



Henry Seymour Esq^r

VOLUME SECOND DES
CHRONIQUES
D'ENGVERRAN
DE MONSTRELET

GENTIL-HOMME IADIS DEMEVANT

A CAMBRAY EN CAMBRESIS.

Guillelmus



A PARIS,

Chez Guillaume Chaudiere, rue saint Iaques, à l'enseigne du Temps
& de l'Homme Sauvage.

1 5 7 2.

Auëc Priuilege du Roy.


Acc. 2006-196 Vols. 2+3
McGovern (517) Fd.

DC37
.M66
1572x
Folio

vols. 2+3

VOLUME SECOND DES
CHRONIQUES
D'ENGVERRA
DE MONSTRELET
GENTIL-HOMME JADIS DEMEURANT

A CAMBRAY EN CAMBRESIS



A PARIS

Chez Guillaume Chaudier, rue Saint-Jacques à l'enseigne du Temps
et de l'Homme Savant.

1572

Avec Privilege du Roy.



N trefrenommé Philosophe nommé Vegece recite en vn sien liure qu'il feist de la vaillance & prudence de cheualerie, que l'exercite des armes & la continuation de batailler que eurent iadis les Rommains furent cause qu'ils subiuguerent & dominerent la plus grand partie du monde. Laquelle recitation & qu'il ayt ainsi esté il semble estre veritable, par ce que engin subtil industrié & exercité d'armes fait plus souuent obtenir victoire que grande assemblée ne multitude de combatans. Et à dire la verité peu de chose eust esté le petit nombre d'iceux Romains en leur temps au regard de toutes autres nations, s'ils n'eussent eu en autre maniere subtilité & instruction de combatre que n'auoient leurs aduersaires: mais ils estoient à ce du tout ordonnez & de iour en iour continuoient en icelle exercite par laquelle ils acquirent durant leur regne grand renommée & inestimable louenge qui au iourd'huy demoure par escript en plusieurs liures: lesquels clerks, sages & eloquens philosophes & poëtes ont fait & composé tant en metres comme en prose, & qui souuent deuant les Princes & grans seigneurs sont alleguez & voulentiers veuz & ouyz pour les vertueuses entreprinſes & hardieſſes d'armes qui y sont escriptes & trouuées. Si peult on considerer en ceste partie que le trespuissant Dieu createur du ciel & de la terre de sa grace donne à vn chacun entendement par soy separer de tous autres, par lequel aucunesfois se ferment en aucunes personnes diuerses imaginations d'une mesme chose, car nous voyons que les liures de plusieurs sciences composées par les sages anciens ont esté & sont adioustées aucunes choses, qui est à supposer icelles auoir esté precedentes à l'entendement d'iceux: lesquels n'en voulurent pour lors mettre n'escire sinon ce qu'il leur sembloit que la matiere requeroit. Et ceux qui ce ont quis & trouué soit par entendement naturel, escripture ou experience entant que l'intentiō soit vtile & raisonnable, le doiuent benignemēt & agreablement retenir sans pour ce reprouuer l'acteur. Et aussi nul ne se doit pas trop esmerueiller si les hommes ayans leurs engins appliquez à la guerre trouuent ou imaginent selon la qualité du temps aucunes nouuelles manieres qui leur semblent estre necessaires & conuenables à la conduicte d'icelle. Et qu'onquesmais ils ne veirent ne sceurent les parolles qui leur viennēt de leur propre entédement & imagination par l'ardant desir qu'ils ont aux besongnes, comprenans & considerās en eux mesmes les manieres qu'ils parçoiuent estre pour eux aduantager d'enuahir leurs ennemis, & eux deffendre d'eux tant par art & maniere louable comme par proëſſe & vaillance de corps: dont tous hommes de noble courage qui se mettent à hanter & poursuiuir icelle guerre par ordonnance, contraincte ou necessité conuenable, se doiuent de leur pouoir instruire & employer vaillamment & honnorablement au bien de la chose publicque & aussi en particulier pour leur honneur & corps garder & deffendre, & en ce faisant peuuent acquerir grande recommandation. Et sans aucunement vouloir defroguer à la vaillance & proëſſe des anciens preux en armes, ne diminuer leurs excellēs & nobles faits: Selon mon opinion on trouue aussi haultes & excellentes vaillances de plusieurs manieres auoir esté faictes au temps dont ceste presente hystoire ou chronique fera mention qu'en icelles, que par auant on peult auoir veu & ouï recorder: car par vsage & continuation

P R O L O G U E.

ont esté mis en cours moult de cruels & diuers habillemens de guerre desquels par auant n'estoit aucune memoire : pourquoy à l'occasion & ayde d'iceux avec autres subtilitez ont esté commises & sont aduenues diuerses manieres de foy conduyre entre la dessusdicte guerre. Pour lesquelles r'amener à memoire, recordation veritable, ie Enguerran de Monstrelet faisant ma residence en la cité de Cambray qui autresfois ay prins laborieux plaisir à faire mettre par escript par maniere de chronique les merueilleuses aduentures & vaillances d'armes dignes de louège & recordation aduenues au treschrestien Royaume de France, és païs voisins & és marches loingtaines tant de la chrestienté comme d'autre loy, au mien petit entendemēt sans polir les choses, ne issir hors de la matiere, mais mettant le fait directement, en ensuiuant les recitations qui faictes en ont esté à moy par plusieurs hommes nobles & autres notables personnes, & aussi par Roys d'Armes, Heraulx & poursuiuans dignes de foy & de credence, qui ont esté presens aux besongnes: me suis remis à continuer & poursuiuir ce que de long temps auoye & ay encommencée & à entendre les besongnes, pour compiller ces presentes hystoires, qui se comprennent comme on pourra veoir à elles lire & ouyr en batailles mortelles, desolations de plusieurs Eglises, citez, villes & forteresses, depopulation de moult de païs & autres merueilles piteuses à recorder, dont les vaillans & prudens hommes tant nobles comme autres qui longuement y ont exposé corps & biēs & souffert & enduré peine & trauail en perils de leurs corps, & que grād partie d'iceux y ont par vaillance ou par pitoyable aduenture miserablement finé leurs iours, doiuent estre bienheurez & guerdonnez, en racomptāt leurs vaillances, bonnes renommées & nobles faits, tant pour eux que leurs successeurs, & doit estre denoncé par les viuans à durable memoire. A laquelle ouyr reciter toutes nobles personnes de vaillance & hardy courage se peuuent & doiuent reueiller à vouloir loyaument seruir leur Prince & seigneur droicturier, en gardant sa querelle & bon droit. Et pour ces raisons ay voulu mettre & par exposer mon temps, comme dit est, en perseuerant en icelle occupation: car avec ce ay assez apperceu & veu par experience ce que aucuns Princes & seigneurs de grandes auctoritez & de diuers estats ont prins plaisir à en veoir & ouyr aucune chose, jaçoit ce que ce ne soit pas sans peine d'enquerir, veiller & trauailler que tels faits se puissent aussi par ordre assembler. Toutesfois de tant peu griefue le trauail comme l'acteur y prend plaisir quand il le fait liberallement. Si commencera iceluy mon second liure au mois d'Octobre mille cccc. xxij. qui est la fin du premier volume par moy autresfois composé des hystoires precedentes. Et aussi le commencement du regne de tresnoble memoire Charles le bien instruit par la grace de Dieu Roy de France septiesme de ce nom, & finira ou mois de May l'an mille cccc. xliiij. Auquel mois & an se prindrent & fermerent les trefues d'entre les Royaumes de France & d'Angleterre en la ville de Tours en Touraine.

S'ensuit la table de ce present deuxiesme volume d'Enguerran de Monstrelet.

Et premierement



COMMENT les nouvelles de la mort du Roy Charles le bië aymé furēt apportees au Duc de Touraine Daulphin son seul fils & plusieurs autres matieres. Fueillet 1

Comment Charles Duc de Touraine Daulphin fut couronné apres la mort du Roy Charles son pere. 1

Comment les Parisiens enuoyerent leur ambassade en Angleterre deuers le Roy Hërry & son conseil & autres matieres. 1.

Commēt les capitaines du Roy Charles s'assemblerent en grand nombre pour leuer le siege de Meulan. Et commēt le Duc de Bethfort traicta à ceux dudit pont. 2.

Comment les Francois eschellerent & prindrent la forteresse de Dommart en Ponthieu & plusieurs autres matieres. 3.

Comment les Ducs de Bethfort, de Bourgongne & de Bretagne vindrent à Amiens & feirent alliance entre eux. 4.

Commēt Pothon de sainte Treille & Lyonnel de Vandonne feirent armes en la presence du Duc de Bourgongne. 5.

Comment le Comte de Salsebery assiegea la forteresse de Montaguillon, laquelle se rendit à luy & autres matieres. 6.

Commēt le Roy Charles de France feit assieger la ville de Creuant par le Connestable d'Escoce & le Comte de Vantadour Auvergnois. 7.

Comment messire Iacques de Harcourt tint parlemēt avec messire Raoul le Bouteillier pour la reddition du Crotoy. 8.

Comment la ville de Compiengne fut remise en la main des Anglois. Et comment la ville & chastel du Crotoy furent rendus au Duc de Bethfort. 11.

Comment deux maistres en ars furent enuoyez en la cité de Tournay pour admonester & entretenir le peuple en l'amour du Roy Charles & autres matieres. 11.

Comment messire Iean de Luxembourg assiegea le chastel de Viege. Et comment

il feit une embusche où Pothon de sainte Treille & ses compagnons furent desconfits. 12.

Comment en cest an grand quantité d'Anglois arriuerent à Calais, & autres matieres en brief. Et comment messire Iean de Luxembourg assiegea la ville de Guise & plusieurs autres matieres. 12.

Comment le seigneur de Longuenal & plusieurs autres seigneurs se tournerent de la partie du Roy Charles. 13.

Comment le Duc de Bethfort alla à grand puissance tenir la iournee deuant Tury: laquelle ville & forteresse luy furent rendues. 13.

Comment le Duc de Bethfort poursuivit les Francois & les combatit deuant Vernueil. 14.

Comment ceux de la ville de Tournay s'esmeurent l'un contre l'autre. 15.

Comment ceux de Guyse traicterent avec messire Iean de Luxembourg & messire Thomas de Rampston. 15.

Commēt les Ducs de Bethfort & de Bourgongne prindrent peine à appaiser les Ducs de Cloestre & de Brabant. 17.

Comment les Ducs de Cloestre & la Duchesse sa femme allerēt de Calais en Hainault prédre l'obeissance des bonnes villes. Et comment le Duc de Bourgongne se prepara pour aller en l'ayde du Duc de Brabant son cousin. 18.

Comment le Duc de Cloestre enuoya vnes lettres au Duc de Bourgongne. Et la copie d'icelles. 19.

Copie des premieres lettres du Duc de Bourgogne enuoyees au Duc de Cloestre. 19.

Copie des secōdes lettres enuoyees par le Duc de Cloestre au Duc de Bourgogne. 20.

Comment le Duc de Bourgongne retourna en Flandres. Et commēt il renuoya vnes secondes lettres au Duc de Cloestre & la copie d'icelles. 21.

Commēt la ville de Braine en Hainault fut destruiete & desolee par les commis de

TABLE DES CHAPITRES

- | | |
|---|--|
| <p>Brabant & autres matieres. 21.</p> <p>Commēt le Pape Martin enuoya vnes bulles au Duc Iean de Brabāt & la teneur d'icelles. 23.</p> <p>Comment apres le departement du Duc de cloestre la guerre s'esmeut en Hainault, & comment la Duchesse Iaqueline de Bauiere escriuit au Duc de cloestre pour auoir secours & le contenu d'icelles lettres. 23.</p> <p>Comment le Duc de Bethfort & le Duc de Bourgongne se trouuerent ensemble en la ville de Dourlens & autres matieres ensuiuans. 25.</p> <p>Comment le Souldan & les Sarrazins delibererent d'aller conquerre tout le royaume de Chippre. 25.</p> <p>Comment le Duc de Bourgongne fait grandes preparations pour combattre le Duc de cloestre & autres matieres. 26.</p> <p>Comment la Duchesse Iaqueline de Bauiere se partit & embla de la ville de Gand & s'en alla au pais de Hollande. 26.</p> <p>Comment le Duc de Bethfort meit ius le champ des Ducs de Bourgongne & de cloestre & autres matieres. 27.</p> <p>Comment le seigneur de Siluatier vint au pais de Hollāde en l'ayde de la Duchesse Iaqueline de Bauiere. 27.</p> <p>Comment le Duc de Bourgongne retourna en Hollande & assiegea la ville de Ze-neuberche, laquelle se rendit à luy, & autres matieres. 28.</p> <p>Comment les Sarrazins retournerent en Chippre & eurent bataille aux Chip-priens. En laquelle bataille le Roy fut prins & mené au Souldan. 29.</p> <p>Commēt la forteresse de Moynes en Cham-paigne fut reprinse des Frācois, & com-ment sentence fut rendue pour le Duc Iean de Brabant & la forteresse d'Ori-pette en Prouence. 31.</p> <p>Comment le Duc ne Bethfort fait assieger Montargis: Et comment le siege fut leué par les Francois & autres matieres. 31.</p> | <p>Commēt la forteresse de la Malle-maison qui estoit à l'Euesque de Cambray fut prinse par messire Iean Blondel, & autres ma-tieres. 33.</p> <p>Comment messire Iean Blondel rendit la forteresse de la Malle-maison qu'il auoit prinse à l'Euesque de Cambray. 33.</p> <p>Comment le Duc de Bourgongne retourna au pais de Hollande où il fait assaillir la ville de Hermonfort & autres matie-res. 34.</p> <p>Comment en ce temps le Souldan de Babi-loine escriuit lettres aux Princes Chre-stiens, & la teneur d'icelles. 34.</p> <p>Comment les Anglois vindrent en la Duché de Bretagne où ils feirēt moult de mauix & de grans dommages, & autres ma-tieres. 34.</p> <p>Comment messire Iean de Luxembourg as-siegea Beaumont en Argonne. 36.</p> <p>Comment le traicté se fait entre le Duc de Bourgongne & la Duchesse Iaqueline de Bauiere pour la guerre de Hollande, & le contenu d'iceluy. 36.</p> <p>Comment le Comte de Salsebery vint en France à tout grās gens en l'ayde du Duc de Bethfort. Et comment le Duc de Bour-gongne ramena la Duchesse Iaqueline de Bauiere en hainault. 36.</p> <p>Comment ceux de Tournay s'esmeurent de rechief l'un contre l'autre. 37.</p> <p>Comment le Côte de Salsebery conquist Iar-gueaux & plusieurs villes deuers Or-leans. Et cōment le Duc de Bethfort vou-lut auoir les rentes des Eglises. 37.</p> <p>Comme le Comte de Salsebery assiegea la cité d'Orleans où il fut occis. 37.</p> <p>Comment un prescheur nommé frere Tho-mas conuertit plusieurs personnes & a-batit les boubans & atours des femmes en plusieurs parties. 38.</p> <p>Comment grans tournoyemens se feirent en la ville de Bruxelles. 39.</p> <p>Comment le Comte de Namur trespassa & fut le Duc de Bourgōgne son heritier. 40.</p> <p style="text-align: right;">Comment</p> |
|---|--|

DU SECOND VOLUME.

Comment les Anglois allans au secours du
siegé d'Orleans rencontrèrent les Fran-
cois qui les assaillirent. 40.

Comment une pucelle nommée Ieanne vint
deuers le Roy Charles à Chinon où il se
tenoit. Et comment ledit Roy Charles la
retint avec luy. 41.

Comment de par le Roy Charles & ceux de
la ville d'Orleans vindrent ambassa-
deurs en la cité de Paris pour faire trai-
té au Duc de Bethfort, affin que ladicte
ville d'Orleans demourast paisible. 42.

Comment la pucelle Ieâne & plusieurs no-
bles capitaines Francois & de grand re-
nom raffreschirent la noble ville & cité
d'Orleans de viures & de gens d'armes:
& depuis leuerent le siege. 42.

Comment le Roy de France à la requeste de
la Pucelle Ieanne & d'autres nobles ca-
pitaines estans en la ville d'Orleans leur
enuoya grās gens d'armes pour aller sur
ses aduersaires. 43.

Comment la Pucelle Ieanne, le Connestable
de France & le Duc d'Alencon & leurs
routtes cōquirent la ville de Iargueaux.
Et la bataille de Patay où les nobles
Francois desconfirent les Anglois. 44.

Comment le Duc de Bourgongne à la reque-
ste du Duc de Bethfort s'en vint à Paris
où de nouuel ils reconfermerent leurs al-
liances. 45.

Comment le Roy Charles de France se meit
sur les champs à tout grand foison de
gens d'armes & de cheualiers, auquel
voyage meit en son obeïssance plusieurs
villes & chasteaux. 46.

Comment le Roy Charles de France à tout
grande & noble cheualerie, & à tout
grand nombre de gens d'armes s'en vint
en la cité de Reims où il fut sacré par
l'Archeuesque de Reims. 46.

Commēt le Duc de Bethfort feit moult grād
assemblée de gēs d'armes pour aller com-
battre le Roy Charles. Et comment il luy
enuoya vnes lettres. 47.

Comment le Roy Charles de France & le
Duc de Bethfort & leurs puissance ren-
contrerent l'un l'autre vers le Mont Es-
piloy. 48.

Comment le Roy Charles de France enuoya
ses ambassadeurs à Arras vers le Duc de
Bourgongne. 49.

Comment le seigneur de Longueual print le
chasteau d'Ammarle sur les Anglois. 49.

Comment la ville de Compiengne se rendit
au Roy Charles. Et du retour des ambas-
sadeurs de France qui estoient allez vers
le Duc de Bourgongne. 50.

Comment le Duc de Bourgongne enuoya ses
ambassadeurs à Amiens pour entretenir
les habitās d'icelle ville de sa partie. 51.

Comment le Roy Charles de France s'en re-
tourna en Touraine & en Berry. 51.

Comment le Duc Philippe de Bourgongne
en grand appareil ramena sa sœur en la
cité de Paris au Duc de Bethfort son
mary. 51.

Commēt les Francois & les Bourgongnons
courroient l'un sur l'autre, nonobstāt les
trefues qui y estoient. 52.

Comment le seigneur de Sauueses & le ba-
stard de saint Pol furent prins deuant
Paris par les Francois. Et comment par
d'autres Francois la ville de S. Denys
fut prinse & eschellée. 53.

De plusieurs conquestes que feirent les An-
glois. 53.

Comment le Duc de Bourgongne se maria
la tierce fois à ma damoyelle Ysabel fil-
le au Roy de Portugal. 54.

Comment Estienne de Vignolles dit la Hire
eschella & print la ville de Louuiers
en Normandie. 54.

Comment en cest an le Duc de Bourgongne
mist sus une ordre qui fut nommée l'or-
dre de la Thoison. 54.

Comment le seigneur de Creuecueur & Ro-
bert de Sauueses furent rencontrez des
Francois en allant à Clermont en Beau-
uoisis. 55.

TABLE DES CHAPITRES

- Comment cinq Francois feirēt armes à Arras contre cinq Bourgongnons & autres menues matieres. 55.
- Comment le Duc de Bourgongne à tout sa puissance alla loger deuant Gournay sur Aronde. 56.
- Comment le Duc de Bourgongne alla mettre le siege deuant le chastel & forteresse de Choisy. Leql il cōquist en brief iours. 56.
- Comment Ieanne la Pucelle rua ius Franquet d'Arras & luy feit trencher la teste. 57.
- Comment René Duc de Bar mist le siege deuant Chappes empres Troyes en Champagne. 57.
- Comment Ieanne la Pucelle fut prinse des Bourgongnons deuant Compiengne. 57.
- Comment le ieune Roy Henry d'Angleterre vint en Frāce & descendit à Calais. 58.
- Commēt apres la prinse de la Pucelle le Duc de Bourgongne & ses gens se logerēt deuant la ville de Compiengne. 58.
- Comment les Liegeois se meirēt sus à puissance de communes & vindrent en la Comté de Namur. 58.
- Comment le Duc de Bourgongne enuoya le seigneur de Croi en la Comté de Namur contre les Liegeois. 59.
- Comment le Comté de Hontidon vint deuant Compiengne en l'ayde du Duc de Bourgongne. 59.
- Comment un homme nommé Thomelaire & ceux de Reims meirent le siege deuāt Champigneux. 60.
- Comment le Duc Philippe de Brabant trespassa. Et comment le Duc de Bourgongne print la possession de ladiēte Duchē. 60.
- Comment messire Iean de Luxembourg entreprint le gouuernement du siege de Cōpiengne, & des ordonnances qu'il y feit & autres matieres. 61.
- Commēt le Prince d'Orenges fut rué ius par les Francois. 62.
- Comment les Francois vindrent deuant la ville de Compiengne où ils leuerent le siege des Bourgongnons. 62.
- Comment le Marechal de Bouffac alla assieger le chastel de Cleremont en Beauuoisis. 65.
- Comment plusieurs Anglois & Bourgongnons vueilans au commandement du Duc de Bourgongne aller assieger Garmigny furent rencontrez & vaincus des Francois. 65.
- Comment les Francois demāderent à auoir bataille cōtre le Duc de Bourgongne & à sa puissance, laquelle ledit Duc par son cōseil ne voulut accorder & autres matieres. 66.
- Comment le gens messire Iean de Luxembourg prindrent le fort de S. Martin auquel ils furent tous morts & prins. 68.
- Commēt Pothon de sainte Treille & messire Lois de Vaucourt furent prins des Anglois. 68.
- Comment Maillotin de Bours & messire Hector de Flauy se combattirent l'un contre l'autre en la ville d'Arras. 68.
- Comment les gens du Roy Charles voulurent prendre la ville de Corbie. 69.
- Comment le seigneur de Barbazan mist siege deuāt le chastel d'Anglure que tenoiēt les gens du Duc de Bourgongne. 69.
- Comment Ieanne la Pucelle fut condānee à estre arse & mise à mort dedans la ville de Roüen. 70.
- Comment le Concile fut remis & ordonné à Basle par la menée & induction de l'Empereur. 71.
- Comment le Duc de Bar vint en la Comté de Vaudemont pour la conquerre à force. 72.
- Comment le Duc de Bar qui auoit assiegé la ville de Vaudemont fut cōbatu du Comte de Vaudemōt & desconfit par luy & ses aydans. 73.
- Comment le ieune Roy Henry d'Angleterre vint à Paris à grand compaignie pour estre consacré à Roy de France. 75.
- Comment ceux que le Duc de Bar auoit laissez

sez deuant Vaudemont se departirent apres la bataille dessusdicte. 76.
 Comment messire Iean de Luxembourg assembla gens & s'en alla en Champaigne contre les Francois où il cōquist plusieurs forteresses & autres matieres. 76.
 Comment le Duc d'Alencon print prisonnier le Chancelier de Bretagne. 77.
 Comment les Francois cuiderent prendre le chastel de Roüen. 77.
 Comment les Francois prindrent le chastel de Dommart en Ponthieu, & emmenerent le seigneur prisonnier. 78.
 Comment messire Thomas Kiriel Anglois fut commis capitaine du chastel de Clermont en Beauuoisis. 78.
 Comment les habitans de Channy sur Oise destruirent & desolerēt le chastel de leur ville. 79.
 Comment la ville de Chartres fut prinse par les gens du Roy Charles. 79.
 Comment le Cardinal de sainte Croix vint en France de par le S. pere pour appaiser la guerre des parties dessusdictes. 80.
 Comment le Bouleuert de Laigny sur Marne fut prins des Anglois. 81.
 Comment Philebert de Vaudray gouuerneur de Tonnoirre & le seigneur Damone alerent seruir le Duc de Bethfort. 81.
 Comment le Duc de Bethfort vint à grand puissance deuant la ville de Laigny sur Marne pour ayder & conforter les Anglois & Bourgongnons qui l'auoient assiegée, lesquels en fin s'en partirent sans nul conquest. 82.
 Comment les Gantois s'esmeurent contre aucuns des gouuerneurs de leur ville. 83.
 Comment messire Iean bastart de saint Pol & le seigneur de Humieres furent prins des Francois. 83.
 Comment plusieurs malefices furent fais & perpetrez es pais d'Amiennois, Santhois & Vimeu. 83.
 Comment le Damoisel de Commercis print la ville de Ligney en Barrois appartenāt

à messire Iean de Luxembourg. 83.
 Comment la forteresses de la Bove vers Laon fut prinse des Bourgongnons lesquels se contrefirent Anglois & autres matieres. 84.
 Comment frere Thomas alla à Romme où il fut ars. 84.
 Comment la Duchesse de Bethfort mourut. 84.
 Comment aucuns capitaines Francois passerent la riuere de Somme pour courir en Arthois. 85.
 Comment un Moyne d'l'ordre S. Benoist voulut prendre le chasteau S. Ange à Romme. 85.
 Comment la paix fut traictée entre le Duc de Bar d'une part & le Comte de Vaudemont. 85.
 Comment la Duchesse de Bourgongne accoucha d'un fils en la ville de Gand. 85.
 Comment la paix fut traictée entre le Duc de Bar d'une part & les Côtes de saint Pol & de Ligney d'autre part. 86.
 Comment la guerre s'esmeut entre messire Iean & messire Anthoine de Vergy d'une part & le seigneur de Chasteau-Villain d'autre part. 86.
 Comment la paix fut traictée entre le Duc de Bourgongne & les Liegeois. 86.
 Comment le Duc de Bethfort qui se disoit Regent de France espousa la fille du Cōte de saint Pol. 87.
 Comment la ville de S. Valery en Ponthieu fut prinse des Francois. 87.
 Comment les Ducs de Bethfort & de Bourgongne vindrent à S. Omer. 87.
 Comment en la cité de Tournay eut grand trouble & dissentiō pour l'Euesché d'icelle à cause de la mort de l'Euesque dudit lieu messire Iean de Torfy. 87.
 Comment les Francois feirent plusieurs conquestes sur les marches de Bourgongne. 88.
 Comment le Duc de Bourgongne reconquist plusieurs forteresses que les Francois

TABLE DES CHAPITRES

- auoient conquises en son pais de Bourgongne. 82.
- Comment Gilles de Postelles fut accusé de trahison dont il fut decapité. 89.
- Comment les Francois eschellerent la ville de Crespy en Vallois & plusieurs autres matieres. 90.
- Comment le Duc de Bourgogne tint la iournée de Passy. Et comment il fist assieger la ville & forteresse d'Aualon. 90.
- Comment Pierre de Luxembourg Comte de S. Pol assiegea la ville de saint Valery, auquel voyage il mourut. 90.
- Comment le seigneur de la Trimouille fut prins en l'hostel du Roy Charles & rendit la Vicomté de Thoiars. 91.
- Comment Guillaume de Coroam rua ius Iean de Beaurrain. Et comment la forteresse de Haplaincourt fut reconquise par messire Iean de Luxembourg. 91.
- Comment les Comtes de saint Pol & de Ligny tindrēt la iournée de Villiers le Carbonnel. Et depuis ruerent ius les Francois de la garnison de Laon. 91.
- Comment la Hire & plusieurs autres Francois coururent en Arthois & en Cambresis, mais ce fut deuant l'aduanture dessusdicte. 92.
- Comment le Duc de Bourgongne tint la feste de la Thoisson d'Or en la ville de Dijon. Et comment il alla aux nopces du fils du Duc de Sauoye. 93.
- Comment les Concile de Basle fut in cest an en grand estat tenu. 93.
- Comment la ville & le chastel de Prouins en Brie que tenoiet les Francois furēt prins des Anglois & Bourgongnons. Et aussi comment la ville & forteresse de saint Valery fut reprinsē des Francois. 93.
- Comment le Duc de Bourgongne retourna en ses pais de Bourgongne en Flādres & en Arthois & emmena avec luy Iean fils du Comte de Neuers & autres matieres. 94.
- Comment ledit Iean de Neuers fut ordonné à mettre le siege deuant Moreul & luy fut donnée la Comté d'Estampes. 94.
- Comment le Pape Eugene fut en discord contre les Rommains qui le voulurent tenir à Romme outre son gré. 94.
- Comment le fort de saint Vincent empres Laon fut demoly. Et comment plusieurs forteresse furent conquises par les Bourgongnons. 94.
- Comment le seigneur de Thalebott vint en France où il conquist plusieurs villes & forteresses. 95.
- Comment le Comte d'Estampes reconquist la ville de saint Valery. 95.
- Comment les Francois prindrent la ville de Han sur Somme en Vermandois. 95.
- Comment la ville & forteresse de Chasteau-Villain furent mis en l'obeissance du Duc de Bourgongne. 96.
- Comment à l'occasion de la guerre grans tailles furent faictes & cueillies sur le pais d'Arthois & autres à l'enuiron. 96.
- Comment les capitaines du Duc de Bourgongne vindrent deuant Ville-Franche où estoit le Duc de Bourbon. Et comment apres ils assiegerent Belle-Ville, laquelle se rendit. 96.
- Comment le seigneur de Villeby & Mathago Anglois meirent le siege deuant saint Sellerin. Et comment ils conquirent premiers les Francois, & depuis iceux Anglois furent ruez ius & desconfits. 97.
- Comment la Hire print malicieusement le seigneur d'Offemont. 97.
- Comment les communes de Normandie se eleuerent contre les Anglois & leurs garnisons. 98.
- Comment la Hire print le fort de Bretueil en Beauuoisis par force d'assault. 98.
- Comment les Ducs de Bourgongne & de Bourbon conuindrent ensemble en la cité de Neuers sur traitté & conuention de paix. 98.
- Comment aymé Duc de Sauoye se rendit hermite en vn manoir nommé Ripaille. 99.

Comment

DU SECOND VOLUME.

Comment les communes de Normandie se
r'assemblerent en grand nombre & al-
lerent deuant la ville de Caen. 100.

Comment le Duc Philippe de Bourgongne
avec la Duchesse sa femme retourna du
païs de Bourgongne en Flandres & en
Arthois. 100.

Comment les Francois prindrent la ville de
Rue sur les Anglois. 100.

Comment la Hire, Pothon, Philippe de la
Tour & le seigneur de Fontaines descō-
firēt le Comte d'Arondel Anglois deuant
le chastel de Gerberoy. 101.

Comment le Duc de Bourgongne fut mal
content & indigné sur ceux de la ville
d'Anuers. 102.

Comment les Francois prindrent sur les
Anglois la ville de saint Denys en Frā-
ce. 102.

Comment les Francois apres qu'ils eurent
fait vnes lettres de trefues aux Bourgon-
gnons sur les marches de Beauuoisis alle-
rent courre le païs de Boulenois & au-
tres. 103.

Comment les Cardinaulx de S. Croix & de
Chippre vindrent à Arras pour estre au
grand Parlement. 103.

Comment Loïs de Luxembourg Comte de
S. Pol espousa Ieanne de Bar Comtesse de
Marle & de Soissons. 104.

Comment les Francois furent ruez ius vers
Rethels du bastard de Humieres. 104.

Comment les ambassadeurs du Roy Henry
d'Angleterre vindrēt à Arras pour estre
au grand parlemēt avec le Duc de Bour-
gongne. 104.

Comment les ambassadeurs de France vin-
drent en grand nombre en la ville d'Ar-
ras pour estre au parlement dessus-
dit. 104.

Comment messire Iean de Marle cheualier
d'Espaigne & le seigneur de Chargny
furent armez l'un contre l'autre. 105.

Comment les Francois & Bourgongnons e-
stans en la ville d'Arras estoient cordial-

lement ensemble l'un avec l'autre. 107.

Comment le Cardinal de Vincerstre vint à
Arras pour estre en la conuention qui là
estoit assemblée. 107.

Comment durant le temps du parlement
d'Arras la Hire & Pothon vindrent
courrir & fourrager le païs du Duc de
Bourgongne. 107.

Comment les Roys d'Arragon & de Na-
uarre furent prins & desconfits de-
uant Gayette par l'armée du Duc de
Millan. 108.

Comment le Cardinal de Vincerstre à tou-
te l'ambassade de Anglois se partit de la
ville d'Arras. Et comment autres am-
bassadeurs de plusieurs lieux vindrēt en
ladicte ville. 108.

Comment la paix fut faicte & confermée
entre le Roy Charles de Frāce & le Duc
de Bourgongne en la ville d'Arras. 108.

Comment les Anglois asiegerent la ville de
S. Denys en France, laquelle en fin leur
fut rendue par traicté. 116.

Comment Ysabel Roine de France trespas-
sa en la ville de Paris. 117.

Comment les Cardinaulx & plusieurs au-
tres ambassadeurs se departirent de la
ville d'Arras. Et comment le Duc de
Bourgongne constitua ses officiers es bon-
nes villes & forteresses à luy données &
accordées par le traicté dessusdit. 117.

Comment apres la paix d'Arras le Duc de
Bourgongne enuoya aucuns de ses offi-
ciers d'armes deuers le Roy d'Angleterre
& son conseil pour monstrier les causes
de la paix qu'il auoit faicte au Roy de
France. 117.

Comment le commun peuple de la cité d'A-
miens s'esment pour les impositions qu'on
vouloit mettre sus. 118.

Comment les Francois coururent & pille-
rēt les païs du Duc de Bourgongne apres
la paix d'Arras. Et aussi comment le
Mareschal de Rieux print villes & for-
teresses en Normädie sur les Anglois. 119.

TABLE DES CHAPITRES

- Comment les Anglois se commencerent à doubter des Bourgongnons qui menoient guerre avec eux contre le Roy de France. Et ne voulurent plus conuerfer en leur compaignie & plusieurs autres matieres en brief. 121.
- Comment le Roy Henry d'Angleterre enuoya ses lettres à ceux du pais de Hollande pour les attraire de sa partie & la copie desdictes lettres. 121.
- Comment apres la paix d'Arras le Duc de Bourgongne conclud de faire & mener guerre aux Anglois. 122. 123.
- Comment le Duc de Bourgongne avec aucuns de ses priuez conseilliers se conclud d'aller assieger & conquerre la ville de Calais. 123.
- Comment la ville de Paris fut reduicte en l'obeissance du Roy Charles de France. 125.
- Comment Artus Comte de Richemont Connestable de France feit guerre au Damoiseau de Commercis. 125.
- Comment l'Euesque du Liege & ses Liegeois destrousserent Bouseuure & plusieurs autres forteresses qui les guerroyoient. 126.
- Comment les villes & forteresses d'Ochimont furent destruietes & demolies par le Damoiseau Euerard de la Marche. 126.
- Comment les Anglois de Calais coururent vers Boulongne & Grauelines & desconfirent les Flamens, & de la Hire qui gaigna Gisors & tantost le perdit. 127.
- Comment les Ganthois & ceux du pais de Flandres feirēt grand appareil de guerre pour aller deuant la ville de Calais. 127.
- Comment messire Iean de Croi Baillif de Hainault à tout plusieurs autres capitaines assaillit les Anglois dont il fut vaincu. 128.
- Comment les Flamens allerent assieger la ville de Calais, & comment ils s'en partirent. 129.
- Comment messire Florimont de Brimeu Senechal de Ponthieu conquist la ville du Crotoy. 134.
- Comment Humfroy Duc de Glocestre arriva à Calais à tout grand nombre de gēs d'armes & entra en Flandres & en Arthois & es autres pais du Duc de Bourgongne où il feit moult de domages. 134.
- Comment les Flamens se remeiret en armes depuis qu'ils furent retournez de Calais en leurs villes. 135.
- Comment la Hire print la ville & forteresse de Soissons & autres matieres. 136.
- Comment la Duchesse de Bethfort sœur au Comte de saint Pol se remaria de sa franche volenté. Et comment Charles de Secille traicta avec le Duc de Bourgongne à cause de sa deliurancie. Et comment les Anglois reprindrent la ville de Ponthoise. 136.
- Comment le Roy d'Escoce fut meurdry par nuit en sa chambre par le Comte d'Athelles son oncle & autres matieres. 137.
- Comment la Hire, Pothon & plusieurs autres capitaines du Roy de France cuiderent auoir la ville de Roüen. Et comment ils furent assaillis & desconfits des Anglois qui les surprindrent en leurs logis. 138.
- Comment ceux de Bruges s'esmeurent contre leur Prince & ses officiers, & y eut grand debat & grand occision. 139.
- Comment le Bourg de la Hire courut & feit moult de maulx es marches de Peronne, Roye & Montdidier. 140.
- Comment plusieurs capitaines Francois au commandement du Roy Charles de France allerent reconquester plusieurs villes & forteresses que tenoient les Anglois. Et comment ledit Roy en sa propre personne alla deuant la ville de Mostreau-ou-faut-Tonne laquelle il conquist. 141.
- Comment ceux de Bruges isirent par plusieurs fois hors de la ville & allerent fourrager le plat pais. 142.

Comment

Comment les Anglois reconquirent la ville de Fescamp en Normandie. 142.
 Comment le seigneur d'Offemont print la Hire prisonnier où il ioüoit à la paulme en la cité de Beauuais. 142.
 Comment le Roy Charles de France feit sa premiere entrée en la ville de Paris depuis qu'elle fut reduicte en son obeissance & les preparatiōs qu'on y feit. 143.
 Comment les Brugelins se commencerent à amoderer & enuoyerent leurs ambassadeurs deuers le Duc de Bourgongne pour auoir paix. 144.
 Comment le seigneur d'Auxi, messire Florimont de Brimeu Seneschal de Ponthieu & d'Abbeuille allerent assieger le Crotoy. 144.
 Comment plusieurs capitaines Francois à tout grand nōbre de gens de guerre qu'on appella escorcheurs vindrent au païs de Hainault. 146.
 Comment grans pestilences & famines furent en cest an. 147.
 Comment les Ganthois feirent nouuelle mutation & se meirent en armes dont les Feures furent les principaux. 147.
 Comment le traicté se feit entre le Duc de Bourgongne & ceux de la ville de Bruges. 150.
 Comment la guerre se resmeut entre la Duché de Bar & la Comté de Vaudemont. 151.
 Comment la famine, la guerre & la pestilence fut grande & merueilleuse en plusieurs païs. 151.
 Comment le seigneur Thalebott, messire Thomas Kiriel & aucuns autres capitaines Anglois conquerēt Longueuille & plusieurs autres forteresses sur les Francois. 152.
 Comment le traicté du mariage fut faict entre l'aisné fils du Roy de Nauarre & la damoiselle de Cleues niepce au Duc de Bourgongne. 152.
 Comment les villes & chasteaux de Montargis & Cheureuses furent mis en l'o-

beissance du Roy Charles de France. 152.
 Comment il y auoit grand discord entre le Pape Eugene, entre le cōseil de Basle & autres matieres. 152.
 Comment le Comte d'Eu qui estoit prisonnier en Angleterre retourna en France, & des armes qu'il feit. 153.
 Comment la Hire, Blanchefort & plusieurs autres capitaines du Roy Charles coururent es Allemaignes. 153.
 Comment le Comte d'Estampes reprint la forteresse de Raoullet sur les gens du seigneur de Moi & autres matieres. 154.
 Comment une assemblée se feit entre Calais & Granelines du Cardinal d'Angleterre & de la Duchesse de Bourgongne pour trouuer maniere d'auoir paix finale entre les parties de France & d'Angleterre. 154.
 Comment le Roy de France contraignit Rodrigue de Villādras lequel gastoit & traualloit son païs d'aller guerroyer sur les Anglois. 155.
 Comment le Pape Eugene enuoya ses lettres en plusieurs lieux de la Chrestienté & la teneur d'icelles. 155.
 Comment messire Iean de Luxembourg enuoya ses lettres aux cheualiers de la thoisson de ce qu'il se sentoit en l'indignation du Duc de Bourgongne. 159.
 Comment le Comte de Richemont Connestable de France print la ville de Meaulx en Brie sur les Anglois. 162.
 Comment messire Iean de Luxembourg enuoya lettres deuers le grand conseil du Duc de Bourgongne & la teneur d'icelles. 163.
 Comment le Roy Charles de France enuoya Dame Katherine sa fille deuers le Duc de Bourgongne pour l'accomplissement de la promesse du mariage d'icelle dame & du Cōte de Charrolois fils audit Duc. 165.
 Comment le bastart de Bourbon print la ville de la Motthe en Lorraine. 165.
 Comment plusieurs notables ambassadeurs

TABLE DES CHAPITRES

- s'assemblerent entre Grauelines & Calais sur le fait du parlement qui se deuoit tenir & faire entre les Roys de France & d'Angleterre.* 166.
- Comment les Anglois vindrent au pais de Santhois où ils prindrēt le chastel de Folleuille & y feirēt moult d'autres maulx & cruantez.* 166.
- Comment le Daulphin, le Duc de Bourbon & plusieurs autres seigneurs se departirent du Roy Charles de France.* 167.
- Comment les Francois coururent en la terre de Néelle appartenant à messire Iean de Luxembourg.* 169.
- Comment le Comte de Sombresset à tout grād puissance d'Anglois assiegea la ville de Harfleur.* 169.
- Comment un grand seigneur du pais de Bretagne nommé le seigneur de Raix fut accusé d'heresie.* 171.
- Comment Pierre Regnault frere bastard de la Hire alla fourrager les pais d'entour Abbeuille.* 171.
- Comment les ambassadeurs de Frāce, d'Angleterre & de Bourgongne vindrēt à Calais pour traicter la paix finale.* 172.
- Comment les Barrois & Lorrains coururent en la Comté de Vaudemont où ils feirent moult de maulx & de grans desrois.* 172.
- Comment le Duc d'Orleans fut deliuré de la prison d'Angleterre par le moyen du Duc de Bourgongne & espousa la damoiselle de Cleues niepce au Duc de Bourgongne.* 173.
- Comment le Roy de France alla à Troyes en Champaigne, & comment plusieurs villes & forteresses se meirent en son obeissance & autres matieres.* 178.
- Comment les Anglois qui se tenoient au chasteau de Folleuille faisoient moult de maulx en Amiennois & es pais d'environ & desconfirent aucuns seigneurs Picards & leurs gens qui les assaillirent.* 178.
- Comment les gens du Comte de S. Pol destroussèrent aucuns des seruiteurs du Roy de France qui ramenoient des habillemēs de guerre tant de la cité de Tournay comme d'ailleurs, & l'amende que ledit Cōte de S. Pol en feit.* 179.
- Comment la Duchesse de Bourgongne vint à Laon deuers le Roy pour faire aucunes requestes & autres matieres.* 180.
- Comment la Duchesse de Bourgongne se partit du Roy Charles estant à Laon, & retourna au Quesnoy où alors estoit le Duc de Bourgongne son mary.* 181.
- Comment la forteresse de Montagu appartenant au Damoiseau de Commercis fut abbatue & desolée par le commandement du Duc de Bourgongne.* 182.
- Comment le Roy de France alla mettre le siege deuant la ville de Creil, laquelle il conquist.* 182.
- Comment le Roy de France alla assieger la ville & forteresse de Ponthoise laquelle en fin il conquist d'assault.* 182.
- Comment le Duc d'Iorch souuerain gouuerneur de Normandie pour le Roy d'Angleterre vint vers la ville de Ponthoise pour cuider leuer le siege du Roy de Frāce.* 184.
- Comment le Duc d'Orleans retourna de France deuers le Duc de Bourgongne.* 186.
- S'ensuit la copie des instructions enuoyées au Roy Charles de France par les seigneurs qui s'estoiēt assemblez à Neuers. Et les responcez faictes par ceux de son grand conseil, & les requestes faictes par les dessusdits.* 186.
- Responce faicte par le Roy ausdictes articles.* 187.
- Comment le Roy Charles de France feit grand assemblée de gēs d'armes avec lesquels alla tenir la iournée de Tartas, à laquelle iournée les Anglois ne comparurent point.* 191.
- Comment le Roy de France apres la iournée de Tartas s'en alla loger deuant saint Seuer*

DV SECOND VOLUME.

- Seuer chief du païs de Gascongne, & cõ-
quist ladicte ville & chastel & autres
plusieurs places audit païs.* 192.
- Comment Pierre Regnault fut par force de-
bouté de la forteresse de Milly.* 193.
- Comment le Roy de France feit grãd assen-
blée de gens d'armes pour aller en Nor-
mandie. Et d'aucunes courses & con-
questes que le Comte de Sombresset feit
au païs d'Aniou & ailleurs sur les Frã-
cois.* 193.
- Comment aucũs cheualiers & gentils-hom-
mes de la court du Duc de Bourgongne
entreprindrent un fait d'armes par la
maniere cy apres declairée.* 194.
- Comment du mandement dessusdit les ar-
mes furent faictes & les noms de ceux
qui deuoient faire lesdictes armes.* 194.
- S'ensuit les articles sur le fait des armes de
pied.* 194.
- Comment le Duc de Bourgongne enuoya le
Comte d'Estampes à tout grand puissan-
ce de gens d'armes en la Duché de Lu-
xembourg.* 195.
- Comment le Duc de Bourgongne meit la
Duché de Luxembourg en son obeis-
sance.* 196.
- Comment aucuns des gens du Daulphin se
tirerent vers le païs de Bourgongne, les-
quels furent ruez ius par le Mareschal
de Bourgongne & les siens.* 198.
- Comment vnes trefues furent faictes &
données entre les Roys de France &
d'Angleterre & tous leurs parens & a-
mis, alliez & subiects.* 199.

*Cy finist la table des Chapitres du second Volume
d'Enguerran de Monstrelet.*



LE SECOND

VOLUME DES CHRONIQUES

D'ENGVERRA N DE

MONSTRELET.

*Comment les nouvelles de la mort du Roy Charles le bien-aymé furent
apportées au Duc de Touraine Daulphin son seul fils, & autres
plusieurs matieres.*




N l'an mille quatre cens xxij. au mois d'Octobre des- 1422.
fusdit, furēt portées les nouvelles du trespas du Roy
Charles le bien-aymé au Duc de Touraine Daul-
phin son seul fils, lequel estoit empres le Puy en Au-
uergne en vn petit chastel nommé Espally, qui estoit
à l'Euesque du Puy. Lequel Daulphin oyant les
nouuelles dessusdictes, en eut au cueur grand tristesse,
& plora treshabondamment. Et prestement par
l'ordonnance de son conseil fut vestu de noir pour la
premiere iournée: & le lendemain à sa messe fut ve-

stu d'une robe de vermeil, & y auoit plusieurs officiers d'armes vestus de leurs
blasons: si fut lors leuée vne banniere de France de la chappelle: & adonc lesdits
officiers commencerent à crier haut & cler, *viue le Roy*. Apres lequel cry fut fai-
cte l'office de l'Eglise, & n'y fut fait pour lors autre solennité. Et de ce iour en a-
uant tous ceux tenans son party le nommerent Roy de France.

Item apres ce que le Duc Philippe de Bourgogne fut retourné en Ar-
thois depuis la mort du Roy d'Angleterre, il assembla plusieurs de ses capitai-
nes dedans Arras: & fut conclud que messire Iean de Luxembourg assemble-
roit gens pour subiuguer les Daulphinois de la Comté de Guise, & du païs en-
uiron: lesquels trauailloient grandement les marches de Cambresis & de Ver-
mādois, & sur ce les assembla autour de Peronne. Et en ces iours fut le seigneur
de l'Isle Adam mis à plaine deliurance à la requeste du Duc Philippe de Bour-
gogne, lequel par long temps auoit esté detenu prisonnier dedans la bastille
S. Anthoine par l'ordonnance du Roy Henry d'Angleterre deffunct, & fut re-
mis & restitué en ses biens & avec ce en partie de ses offices. Item en ce mesme
temps furent enuoyez plusieurs cheualiers & escuyers de Picardie à la iournée

de S. Vvalery, pour sommer messire Jaques de Harcourt de le rendre comme promis l'auoit : Lequel apres ladicte sommation leur fait faire ouuerture de ladicte ville de S. Vvalery, & en demoura capitaine messire Iean Blódel. La nuit de S. Martin d'hiver de cest an par certain moyen fait par auant, la ville de Rue fut rendue en la main de messire Jaques de Harcourt: auquel ceux de la ville feirent ferment & feauté pour & au nom du Daulphin, en violant la paix finale qu'autresfois auoient iurée, & y comiteit ledit messire Jaques pour capitaine le seigneur de Verduisant. Et pource qu'il auoit pou de gens pour fournir ses forteresses, manda aucuns de ceux de la Comté de Guise: lesquels gens venus par deuers luy trauaillerent moult le païs par leurs courses. Item en ce mesme tēps fut prins dedās le chastel de Thoyssi sur Oyse le seigneur Bosqueaux, lequel par grand tēps auoit eu tresgrand regne en tenant le party du Daulphin & d'Orleās. Si fut mené à Paris, où il fut decapité & escartellé: pource que long temps par auāt il auoit occis & mis à mort par haine qu'il auoit à luy, messire Guy de Harcourt Baillif de Vermandois.

Comment Charles Duc de Touraine Daulphin fut couronné apres la mort du Roy Charles son pere.



P R E s la mort du Roy Charles de France dessusdit, son seul fils Charles Duc de Touraine Daulphin, par le conseil de ses Princes se fait couronner & esleuer à Roy de France, en la ville de Poictiers. Et de ce iour en auant par tous ceux tenans son party fut nommé Roy de France, comme estoit son pere en son viuant. Et vn pou par auant auoit il esté en grand peril de sa vie en la ville de la Rochelle: car en tenant son conseil avec ses Barons, cheut vne partie de la chambre où il estoit, & y fut mort Iean de Bourbon seigneur de Preaux & aucuns autres. Et mesmement ledit Daulphin y fut vn pou blessé: mais ses gens le tirerent hastiement hors du peril, & le menerent en autre lieu plus seur, où en brief temps il fut réparé & mis en bonne santé. En cest an fut prins messire Manshart d'Esue dedans le chastel de Vitry, dont il fut capitaine & gouuerneur, & fut prins par la Hyre tenant le party du Daulphin cōme faisoit ledit Manshart: & nonobstant que par long temps ils eussent esté bien amis ensemble par semblant, si fut ledit messire Manshart desseuré de tous ses biens, de sa forteresse: & avec ce fut mis à rançon à tresgrand somme de deniers, & si fut par long tēps detenu prisonnier bien destroitement. Et comme il fut commune renommée, Iean Raoulet avec la Hyre fut consentant de luy bailler ceste gabe de Puille. Item messire Iean de Luxébourg & tous ses gens d'armes qu'il auoit assemblez autour de Peronne (comme dit est) en la Comté de Guise & és marches d'entour, où il conquist en assez brief temps les forteresses de Buissy sur fontaines, Proisy & aucunes autres, & apres s'en retourna à tout ses capitaines, ausquels il donna congé, & s'en retournerent chacun en leurs propres lieux.

Comment les Parisiens enuoyerent leur ambassade en Angleterredeuers le ieune Roy Hēry, & son conseil & autres matieres.

En c'est

EN cest an & en ce temps enuoyerent les Parisiens & ceux du grand cōseil du ieune Roy Henry d'Angleterre au cōseil dudit Roy, & de la Royne, vne ambassade solēnel pour faire requeste que brief ensuiuāt fut enuoyé en France vn certain nombre de combattans, pour resister aux entreprinſes que chacun iour faisoient les gens du nouuel Roy Charles nagueres Daulphin de Viennois. En laquelle ambassade allerent l'Euesque de Terrovvane, maistre Iean de Mailly, messire Bourdin de Salignies, Michault Lailier & aucunes autres notables personnes : & allerent par l'Isle où ils parlerent au Duc de Bourgongne, & de là par Calais nagerent en Angleterre où ils furent ioyeuſement receuz : & leur fut du conseil du Roy & de ladicte Royne promis bon & brief secours. Et apres qu'ils eurent accomplie leurdicte ambassade ils retournerent en France. Le quatorziesme iour de Ianuier audit an, fut prinſe par subtilité la forteresse du pont de Meulan par les François : desquels estoit chief messire Iean de Graſuille. Et avec luy auoit plusieurs notables hommes de guerre, iusques au nombre de cinq cens combattās, lesquels meirent à mort ce qu'ils y trouuerent d'Anglois : & apres se preparerent en toute diligēce pour tenir ladicte ville & forteresse du pont, en les pouruoyāt de viures & habillemens de guerre, & en reparam la fortification d'icelle. En ce temps la Comtesse de Hainault douigere fut deſſiée d'vn pauvre ſaquemain, lequel estoit nommé l'Eſcremot Caſtel, natif de Ligny en Cambresis pour lors capitaine de la tour de Beaumont, ſoubs messire Iean de Luxembourg. Apres lesquelles deſſiances luy courut aucunes de ſes villes & feit guerre à ſes hommes & ſubiects par longue eſpace de temps. En ce temps ou enuiron le Noël y eut plusieurs bourgeois de Paris, qui feirent conſpiration enſemble contre le Roy Henry en intention de liurer ladicte ville en la main de Charles Roy de France : desquels bourgeois y eut vne partie prins dont les aucuns furent decapitez, & vne femme à ce conſentant fut arſe. & les autres ſe rendirent ſubiects : entre lesquels ſe partit Michault Lailier & tous leurs biens furent prins de par le Roy Henry & conſisquez. Item en ces iours meſmes fut prinſe la ville de Lafferté Milon des François par le conſentement des habitans d'icelle : mais le chaſtel fut deſſendu par ceux qui le gardoient, lesquels manderent haſtif ſecours au ſeigneur de l'Isle Adam, au ſeigneur de Caſtillon & au baſtard de Tyan : lequel de l'Isle Adam aſſembla de cinq à ſix cens combattans, & les mena par derriere audit chaſtel : & tantost à certaine heure qu'ils auoient conclud enſemble, aſſaillirent vigoureuſement ceux de la ville, qui en brief temps ſans grand deſſence furent deſconfits & plusieurs prins & occis cruellement, & tous leurs biens ravis & emportez ſans auoir nulle pitié. Item aſſez brief ensuiuant la prinſe de Meulan deſſusdicte, le Duc de Bethfort qui ſe diſoit regent en France, aſſembla grand nombre de combattans tant Anglois, Normans comme Picards, à tout lesquels il alla mettre le ſiege deuant ledit pont de Meulan à vn lez à l'autre coſté de la riuere, & là feit dreſſer contre les portes & murailles grans engins pour icelle confondre & abbatre. Et en ce continua par grand diligence, & fut là aſſiegé depuis l'entrée de Ianuier iusques au mois de Mars ensuiuant que leſdits aſſiegez commencerent à traicter. Ce ſiege durant au mois de Feurier, furent conquis par messire Iean de Luxembourg les

forts de Franquemez Neufuille, Endorās, Viroufonce & Canaple. Avec lequel de Luxembourg estoient le seigneur de Saueuse, messire Dauiod de Poix & plusieurs hommes d'armes experts & esprouuez en armes : apres laquelle conquēste retournerent deuant la ville de Guise & la liurerent à ceux de dedans vne tresgrande escarmouche. Et ce fait par deuāt Oyfi en Terace retourna ledit de Luxembourg en son chastel de Beaurevoir, & donna congé à tous ses capitaines & autres gens d'armes.

Comment les capitaines du Roy Charles s'assemblerent en grād nombre pour leuer le siege de Meulan, & comment le Duc de Bethfort traicta à ceux dudit lieu.

EN la fin du mois de Feurier s'assemblerent en tresgrand nombre les gens du Roy Charles vers le païs de Berry, sous la conduicte du Comte de d'Aumarle, du Comte de Bouquen Escoçois, du Vicomte de Narbonne, de d'Anechy le Chastel Breton & plusieurs autres capitaines à tout six mille combattans ou enuiron: lesquels ils menerent & conduirent iusques à six lieues pres dudit Meulan, & eux venus audit lieu ils ordonnerent leurs batailles: mais il se meut dissention entre eux, parquoy ils retournerent en trespetite ordonnance & sans riens faire, & à leur retour perdirent de leurs gens treslargemēt des garnisons qui estoient à Chartres, & es païs d'enuiron de par les Anglois, qui se ferirent entre eux quand ils apperceurent qu'ils s'en alloient ainsi à desroy: laquelle chose venue à la cognoissance des assiegez de Meulan leur fut moult desplaisant, quand ils veirent qu'on leur faillloit d'enuoyer secours au iour qu'on leur auoit promis, dont par courroux & desespoir iecterent la bāniere du Roy Charles qu'ils auoient mise sur leur porte du haut en bas. Et puis monterent plusieurs gentils hommes à la veüe des assiegeans & là despecerent, deschirerent leurs croix & enseignes, qu'ils portoiēt du Roy Charles dessusdit, en despitant à haute voix ceux de delà qui leur auoient enuoyées comme faulx pariures. Et brief apres commencerent à parler avec les gens dudit Comte de Bethfort, & sur ce furēt gens esleuz des deux parties pour traicter: C'est à sçauoir du costé de Bethfort qui se disoit Regent, le Côte de Salsebery, messire Ieā Fascot, messire Pierre de Fōtenay, messire Iean de Poulligny seigneur de la Motte, Richard de Vvydeuille, Nicolas Bourdec grād bouteiller de Normandie, & Pierre le Verrad. Et de la partie des assiegez furent commis messire Iean de Grasuille, sire Loÿs Martel, messire Adam de Croisines cheualiers, Iean d'Estainbourg, Iean de Mirot, Roger de Boissie, Oudin de Boissie & Iean Marle escuyers: lesquels commis & traicteurs des deux parties dessusdictes conuindrent ensemble par plusieurs fois, & en fin furent d'accord par la forme & maniere cy apres declairé.

S'ensuit la coppie du dessusdit traicté de Meulan.

PRemierement tous les assiegez deuant-dits rendront & deliureront ledit pont & la forteresse en la main de monseigneur le Regent, ou de ses commis & deputez ainsi reparée, fortifiée & garnie de canons, pouldres & arbalestres & autres habillemens de guerre comme elle est en present, sans à icelle faire fraude, mal engin ne deception, & sans faire

faire ausdits habillemens de guerre & autres choses deffensables pour ladicte forteresse aucun gast, fraction ou aucune empirance de viures ou autres choses pour corps humain : laquelle forteresse & pont ils rendront dedans demain tierce qui sera le second iour de ce present mois de Mars. Item est traicté & appointé que tous ceux qui à present sont audit pont de Meulan & forteresse de quelque estat qu'ils soient, se rendrôt & mettront du tout à la volenté de monseigneur le Regent en la plus grand humilité & obeïssance qu'ils pourrôt : pour cause de laquelle humilité & obeïssance lesdits commis & deputez dudit monseigneur le Regent de sa haute grace, en vſant de misericorde & en l'honneur & reuerēce de Dieu & du sainct temps de Karesme qui est de present, les receuera & leur laissera les vies sauues, excepté ceux qui autresfois ont esté en l'obeïssance de feu le Roy d'Angleterre heritier & Regent de France, auquel Dieu pardoint, & ceux qui ont fait le serment de la paix finable des Royaumes de Frāce & d'Angleterre, & ceux qui ont esté consentans & coupables de la mort de feu Iean le Duc de Bourgongne dernièrement trespasſé, & Gallois, Irois & Escoçois ſaucuns en y a, & excepté avec ce Iean Dourdaz, vn nommé Sauary ſervant & Bernabant, Oliuier de Lannoy, & les canonniers & ceux qui furēt en la premiere embusche qui entrerent premierement audit pont, lesquels demourront à la volenté de monseigneur le Regent. Item est appointé que ſaucuns gentils hommes & autres dessusdits non exceptez, comme dit est, se veulent rendre & mettre en l'obeïssance du Roy nostre ſouuerain ſeigneur Roy de Frāce & d'Angleterre, & de monseigneur le Regent comme ſes vrais hommes liges & faire guerre à l'encontre de ſes aduerſaires, cōme nagueres ils faisoient contre le Roy nostredit ſeigneur & mondit ſeigneur le Regent, iceluy monseigneur le Regēt de sa grace les receura ſans ce qu'ils payent finance ne rançon, pourueu toutefois que de ce faire & accomplir ils bailleront plaige & caution. Item que tous ceux qui à present sont en ladicte forteresse & pont de Meulan, qui ont ou tiennent ou autres pour eux aucunes villes, places ou forteresses au Roy nostredit ſeigneur, & à monseigneur le Regent les rendront & deliureront à mondit ſeigneur le Regent, ou à ſesdits commis & deputez : & avec ce feront toute leur puissance & deuoir par deuers leurs parens & amis qui aucunement en tiennēt, qu'ils les rendront à monseigneur le Regent ou à ſes commis. Et iusques à ce qu'ils auront fait & accompli les choses dessusdictes, ils demourrôt en la volenté de mondit ſeigneur le Regent, lequel les choses dessusdictes accomplies deüement les receura comme dessus est dit. Item que ſaucuns estans audit pont & forteresse de Meulan, ont ou tiennent en quelque lieu que ce soit aucuns prisonniers Anglois, François, Bourguignons ou autres marchans de l'obeïssance & serment de mondit ſeigneur le Regent, ils les rendrôt & deliureront franchement & quictēmēt ſans prendre desdits prisonniers ou de leurs plaiges rançons. Item est appointé que ceux qui sont en la forteresse du pont de Meulan dedās le iour de lendemain, mettront ou ferōt mettre en vn ou deux lieux certains de ladicte forteresse tous leurs harnois de guerre ſans aucune chose rompre, froïſſer ne despecer : & auſſi feront mettre en vn autre lieu certain tout l'or & l'argēt, vaïſſelle, ioyaux & autres biens de valüe estans en ladicte forteresse ſans en retenir, receler ne deſtourner aucune chose en quelque lieu ne par quelque ma-

niere que ce soit, & les deliureront & denonceront aux commis de monseigneur le Regent sur peine de perdre le benefice de ce present traicté, & la grace de mondit seigneur le Regent. Item mettront en vn ou deux lieux de ladicte forteresse les cheuaux estans en icelle & leurs harnois, pour icelle estre deliurez en l'estat qu'ils sont de present, avec les autres choses aux commis de mondit seigneur le Regent sur la peine dessusdicte. Item sur ladicte peine est traicté & accordé, que ledit temps durant ils ne laisseront ne souffriront partir de ladicte forteresse & pont de Meulan, n'entrer en iceux quelque personne que ce soit sans le congé & licence de mondit seigneur le Regent. Et sur icelle mesme peine denonceront, bailleront & deliureront à luy ou à sesdits commis tous les devantdits, excepté ceux dont ils n'auront cognoissance. Et affin que toutes les choses dessusdictes & chacunes d'icelles soient interinées & accomplies fermement & vaillablement, les dessusdits commis & deputez d'une partie & d'autre, ont mis leurs seaux à ce present appoinctement le premier iour de Mars l'an mil le quatre cens & vingtdeux.

APRES que tout le contenu de ce present traicté fut accompli en la maniere dessusdicte, à cause de ce furent rendues en la main dudit Regent les forteresses de Marcouffy, de Montlehery & plusieurs autres, estans lors en l'obeissance des desdits assiegez : lesquels furent trouvez au iour de ladicte reddition en nombre de cent gentils hommes & deux cens autres combattans, dont les plusieurs feirent le serment cy dessus deuisé, & iurerent d'estre bons & loyaux enuers ledit Regent, & mesmement leur promet & iura ledit seigneur de Grauille : & furent menez à Roüen prisonniers iusques au plain accomplissement de tout le traicté. Et fut certifiée par ledit de Grauille aux commis du Regent, que le Roy Charles estoit en vie quand il se partit de luy dernièrement pour venir à Meulan : mais il auoit esté blessé en la ville de la Rochelle d'une maison qui estoit cheuste où il tenoit son conseil, dont cy dessus est fait mention.

Comment les Francois eschellerent & prindrent la forteresse de Dommart en Ponthieu, & plusieurs autres matieres.

LE vingtiesme iour de Mars de ce present an, les Francois eschellerent & prindrent la forteresse de Dommart en Ponthieu : dedans laquelle estoit le Borgne de Fosseux Cheualier, & Iagues de Craon son beau fils : lesquels se sauuerent à petite compagnie secrettement par vne poterne quand ils ouyrent l'effroy : & messire Symon de Boulenuiller, Jean de Douceure & plusieurs autres estans audit chastel, furent detenus prisonniers avec la femme dudit de Fosseux : & generallyment tous les biens d'iceluy furent prins, rauiz & butinez : desquels biens y auoit grand habondance tant de ladicte ville de Dommart comme du pays. Et brief ensuiuant le seigneur de Crotoy à tout trois ou quatre cens combattans, s'en alla loger en vne forteresse appartenant à l'Euesque d'Amiens nommée Pernois seant à vne lieuë aupres dudit Dommart, pour là tenir frontiere & garder ledit pays contre lesdits Francois. Et apres aucuns iours ensuiuans fut vn traicté fait avec iceux Francois, par condition qu'ils rendroient ladicte forteresse & s'en retourneroient au Crotoy à tout leur gaignage, & estoit le chef d'iceux vn nommé Dandonnet. En ceste
faison

saïson le Duc de Clocestre eut en mariage la Duchesse Iacqueline de Bauiere, Comtesse de Hainault & de Hollande : laquelle long temps par auant (comme dit est dessus) estoit allée en Angleterre : nonobstant que ladicte Iacqueline auoit espousé le Duc Iean de Brabant, qui pour lors estoit encores viuant : pour lequel mariage moult de gens furent grandement esmerueillez. En l'an dessusdit alla le Roy d'Arragon en Italie à la requeste de la Roïne Ieanne femme à Iaques de Bourbon : laquelle auoit esleu pour son hoir & heritier ledit Roy d'Arragon, & luy venu audit païs dechassa le Duc d'Anjou, qui se nommoit Roy de Cecille & tous ses gens. Et apres atrahit vers luy & à son accord tous les capitaines de ladicte Roïne : c'est à sçauoir Fortebrace, Tartaille & aucuns autres anciens & des plus principaux de toute Italie. Lesquels brief ensuiuant tous d'un commun accord, iceux & ledit Roy d'Arragon feirent tenir prisonniere ladicte Roïne Ieanne. Et par ainsi fut punie de telle punition qu'elle auoit puny son seigneur & mary Iaques de Bourbon. Et demoura ledit Roy d'Arragon seigneur & maistre de la plus grãd partie d'Italie, certaine espace de temps. Et le Pape mesmes s'accorda à luy & y enuoya le Cardinal de Saint Ange pour faire ledit accord : lequel Cardinal en faisant son voyage, sicomme il entroit par vne planchette en vne forteresse, cheut du hault en bas és fossez, & se bleffa tellement que brief ensuiuant il en mourut.

A v temps dessusdit vindrent les nouvelles és marches de France des hereses & rebelles contre la foy chrestienne, estant à Pragues & és marches de là enuiron, lesquels se mettoient en peine de acquerir & mettre en subiection chasteaux & forteresses sur les Chrestiens : & estoient iceux hereses en plus grand erreur & plus puissans que parauant n'auoient esté. Et tant que l'Empereur ne pouoit resister contre eux, & s'en retourna en son païs de Hongrie sans eux riens meffaire. En l'an dessusdit les gens de messire Iaques de Harcourt feirent secrettement plusieurs courses és païs de Vimeu, de Ponthieu, d'Arthois & des marches à l'enuiron. Et mesmement prindrent & emmenerent plusieurs charries aux censiers du Mont saint Eloy empres Arras. Si les menerent vendre & butiner dedans la ville du Crotoy, pour lesquelles courses les riches laboureurs du païs n'osoient coucher en leurs lieux & hostels ne faire labours. Et d'autre part les François qui se tenoient en la Comté de Guise alloient & venoient souuent audit Crotoy & à Rue, parquoy le païs estoit alors moult trauaillé tant d'une partie comme d'autre, & n'estoit iustice en riens obeïe. En cest an furent les bourgeois & communaulté de Tournay en grand dissention l'un cõtre l'autre, & s'assemblerent en armes à tout les bannieres de leurs mestiers par maniere de commotion : c'est à sçauoir les grans contre les petis, & receurent le seigneur de Moÿ qui tenoit le party du Roy Charles, & leur bourgeoisie, & plusieurs hommes de petit estat feirent leurs capitaines en doubtant les preuosts, iurez & autres gouuerneurs : & tousiours la plus grand partie d'iceux soubstenoient la partie dudit Roy Charles : toutesfois ils se appaiserent pour icelle fois sans coups ferir, & depuis par plusieurs fois se meirent en armes en faisant pareilles mutations à celle dessusdicte. Auquel an aussi s'assemblerent en Normandie deux mille & cinq cens Anglois sous la conduicte du seigneur de la Poule, de Thomas Bourry & aucuns autres chefs de guerre : lesquels se meirent à

chemin, & passerent le païs du Maine. Et de là en degastant païs allerent iufques deuant Angiers, où ils feirent de grans dommages, & prindrent audit païs grand nombre de prisonniers, bestail & autres biens, à tout lesquels ils s'en retournerent loger par plusieurs iournées à vne grosse ville nommée Busignes de la Grauelle. Durant lequel temps, Iean Comte d'Aumarle qui par ceux du païs sçauoit ceste cheuauchée, & avec luy le Baron de Colilouure, le seigneur de Fontaines du païs d'Anjou & messire Pierre le Porc, feirent grand amasts de gens d'armes & de communes, & les attendirent assez pres d'illec audit lieu de Grauelle en tresbonne ordonnance. Et lors que les Anglois les apperceurent descendirent tous à pied & meirent tout leur bagage arriere d'eux. Si les assaillirent les François tres vigoureusement & de grand courage, & en estoit la plus grand partie à cheual. Et les Anglois se deffendirent assez vaillamment, & y eut vn tresdur estour. Mais finablement iceux Anglois furent tous desconfits, & en demoura lors sur la place douze cens largement. Et y fut prins le seigneur de la Poule, & avec luy bien trente gentils-hommes. Et des communes de la partie Françoisse moururent six vingts personnes sur tout.

De l'an mille cccc. & xxij.

Comment les Ducs de Bethfort, de Bourgongne & de Bretagne vindrent à Amiens & feirent alliance entre eux.

1423.



V commencement de cest an mille quatre cens vingt & trois, fasssemblerent à Amiens les Ducs de Bethfort, de Bourgongne & Bretagne avec eux de chacune partie grand nombre de cheualiers & escuyers. Et avec ledit Bethfort qui se nommoit Regent de France, estoit le grand conseil du ieune Roy Henry d'Angleterre. Et avec le Duc de Bretagne estoit Artus Comte de Richemont son frere: lesquels Princes venus audit lieu d'Amiens feirent l'un à l'autre grande reuerence & semblant de toute amour. Et donna le Duc de Bethfort royalement à disner aux autres princes en l'hostel episcopal de l'Euesque d'Amiens, où il estoit logé. Et apres ces choses traicterent l'un avec l'autre, & feirent alliances par la forme & maniere contenue en vnes lettres, seellées de leurs seaux & signées de leurs signes manuels, desquels la copie mot apres autre s'ensuit.

JEAN gouverneur & Regent du Royaume de France Duc de Bethfort, Philippe Duc de Bourgongne, & Iean Duc de Bretagne. A tous ceux qui ces presentes lettres verront & orront salut. Sçauoir faisons que pour la consideration des amitez & prochaineté de lignage, qui ja sont entre nous moyennant les mariages concluds, accordez & confermez entre nous Iean Duc de Bethfort Regent de France, & nostre treschere & tresaimée compagne & cousine Anne de Bourgogne d'une part, & nostre treschier & tresaimé frere Artus Duc de Touraine Comte de Montfort & d'Yury, & de nostre treschere & tresaimée seur & cousine Marguerite de Bourgogne d'autre part, & pour le bien du Roy nostre sire & de ses Royaumes de France & d'Angleterre, de nous & de noz dominations & seigneuries: de noz terres païs & subiects nous & chacun de nous, iurons & promettons estre & demourer tant que nous viurons en vraye fraternité, bonne amour & vnion: & nous entreaimerons & entretiendrons
comme

comme freres, parens & bons amis: garderons & deffendrons l'honneur l'un de l'autre tant en couuert comme en publicque, sans fraction ne quelconque dissimulation: aduertirons l'un l'autre de tout ce que nous sçaurons & entendrons estre au profit, dommage, honneur ou blasme l'un de l'autre & de noz seigneuries, terres, païs & subiects. Et se aucun ou aucuns nous faisoient mauuais rapport l'un de l'autre, nous n'y adiousterons point de foy: mais retiendrons seurement chacun deuers nous ceux qui feront lesdits rapports: & par vraye amour & charité ferons sçauoir incontinent à celuy de qui telle relation aura esté faite, pour en faire ainsi comme raison sera. Et se nous ou l'un de nous auons affaire pour nostre honneur, ou noz païs, terres & seigneuries garder & deffendre contre aucuns autres, qui nous voudroient greuer ou endommager: nous & chacun de nous serons tenus d'aider & seruir celuy de nous qui aura à besongner si de ce sommes requis, & à cinq cens hommes d'armes ou de traict valant ledit nombre, en la maniere que cil qui aura à besongner voudra. Et sera tenu celuy qui sera requis payer ses gens à ses despens pour le premier mois. Et celuy qui les requerra, sera tenu de les payer du sien au temps qu'ils serviront outre. Et se aucun de nous veult auoir plus grand puissance pour ayde, celuy qui sur ce & de ce sera requis, sera tenu d'ayder le requerant le plus habondamment qu'il pourra ses païs demourez garnis. Item que de toute nostre puissance & par les meilleures voyes & manieres que nous sçaurons aduiser, nous nous employerons pour le relieuement du poure peuple de ce Royaume, qui tant a à souffrir & tant seuffre de poureté, à debouter les guerres hors de ce Royaume & le mettre en paix & tranquillité: affin qu'en iceluy Royaume Dieu soit seruy & honnoré, & que marchandise & labour y puissent auoir cours. Nous & chacun de nous promettons loyaument & en parolle de Prince, faire, tenir & accomplir toutes les choses dessusdictes par la maniere dessusdicté, autant que nous viuerons, sans dorefnauant faire ne aller à l'encontre par quelque maniere que ce soit, sous l'obligation de noz biens tant meubles que immeubles presens & aduenir. En tesmoin de ce, nous auons fait mettre noz seaux à sesdictes presentes: lesquelles nous auons scellées & signées de noz propres mains: & auons escript au dessous noz propres noms, en la ville d'Amiës le xvij. iour d'Auril. L'an mille quatre cens vingt & trois.

A V E C iceluy traicté & accord dessusdict, furent parconfermez les deux mariages dessus declarez: c'est à sçauoir du Duc de Bethfort Regent & de Anne seur au Duc de Bourgongne. Et avec ce de Artus de ^{Bretagne} ~~Bourgongne~~, & de Marguerite seur au Duc dessusdit: laquelle par auant auoit eu espousé le fils aîné du Roy Charles Daulphin de Vienne & Duc d'Acquitaine. Et fut verité que le Duc de Bourgongne donna à sa seur Anne avec le Duc de Bethfort sa Comté d'Artois, avec toutes les appendances heritablement, en cas toutesfois qu'il n'y eust nul hoir de sa chair nez en loyal mariage. Apres tous lesquels traictez se departirent de la ville d'Amiens les Ducs de Bethfort & de Bourgogne: lesquels retournerent ensemble à Paris, & le Comte de Richemont s'en alla à Arras. Et le Duc de Bretagne receut premier six mille escus pour les despés de son voyage, que luy fait deliurer ledit Regent, & puis retourna en son païs avec ses Bretons. Durant le tēps que les Ducs de Bethfort, de Bourgongne, & de Bretagne

furent ensemble à Amiens, requist iceluy Duc de Bourgongne audit Bethfort, qu'au cas que les chastellenies de Peronne, de Roye & de Mondidier seroient remises au dommage du Roy, qu'en ce lieu luy fussent deliurées les villes d'Amiens & d'Abbeville, Monstreil, Dourlens, Beauquesne & toutes les appartenances. Surquoy luy fut respondu qu'on en parleroit au grand conseil du Roy. En apres le Duc de Bethfort Regent à tout grande puissance de ses Anglois, s'en alla à Troyes en Champagne: auquel lieu luy fut amenée honnorablement du païs de Bourgongne Anne seur au Duc Philippe, & luy amena en gracieux appareil la dame de Rochefort & la dame de Salins, accompagnées du seigneur de Saint George & aucuns autres Barons & seigneurs de Bourgongne. Avec lesquels estoit vn nommé Iean de Quielong, qui de par le Duc de Bourgongne auoit esté enuoyé deuers la Duchesse Douagiere pour faire apprestier les besongnes. Lesquels venus audit lieu de Troyes, le Duc de Bethfort espousa ladicte damoiselle de Bourgongne. Et furent les nopces faictes tant solennellement comme royellement. Apres lesquelles aucuns iours ensuiuans passez, se departirent lesdictes dames l'une d'auec l'autre non mie sans pleurs retournans en Bourgongne. Et le Duc de Bethfort à tout sa femme la Duchesse, print son chemin vers Paris: auquel chemin il assiegea puissamment la ville de Pons sur Seine, laquelle en brief fut par force d'assaux prinse des Anglois, & la plus grande partie des François qui dedans estoient furent mis à mort cruelle. Et de là passa oultre & alla seiourner vne espace de temps à Paris en l'hostel des Tournelles, lequel pour sa demeure il fait grandement reparer.

Comment Pothon de Sainte Treille & Lyonnel de Vvandonne feirent armes à Arras en la presence du Duc de Bourgongne.

EN ces propres iours furent faictes armes à Arras en la presence du Duc de Bourgongne, iuge en ceste partie de Pothon de Sainte Treille d'une part, & de Lyonnel de Vvandonne d'autre part. C'est à sçauoir que ledit Pothon auoit requis Lyonnel, qu'ils peussent courir l'un contre l'autre tant qu'ils eussent assis l'un sur l'autre six coups de lance, ou icelles rompues. Et à l'opposite ledit Lyonnel auoit requis à Pothon de combattre apres de haches, tant qu'elles pourroient durer. En apres quand le iour fut venu & qu'ils se furent preparez, Pothon entra premier au champ comme appellant accompagné de ses gens bien gentement, & alla faire la reuerence au Duc de Bourgongne qui estoit en son eschauffault, & puis se retrahit. Et assez tost apres entra ledit Lyonnel de Vvandonne accompagné de messire Iean de Luxébourg, qui le seruit tout le iour de lances, & aucuns autres de ses seigneurs & amis: & comme auoit fait ledit Pothon alla faire la reuerence au Duc, & puis se mit à son lez au bout des lices: & assez tost apres ils se preparerent à courre l'un contre l'autre. Si coururent plusieurs coups moult roidement, entre lesquels y eut de chacune partie aucunes lances rompues & froissées l'un sur l'autre. Toutesuoyes sur la fin le heaulme Lyonnel fut vn petit cassé du fer de son aduersaire, & de ce eut la teste blecée non mie grandement. Et pourtant le Duc de Bourgongne de ce aduerty, les fait cesser de plus courre l'un contre l'autre ce iour, touchant les armes à cheual. Le lendemain le Duc de Bourgongne

gne reuint en son eschauffault enuiron dix heures, accompagné du Comte de Richemont & des seigneurs de son conseil pour attendre les champions, qui deuoient faire leurs armes à pied. Et assez tost apres entra Lyonnell de Vvandonne tousiours accompagné de messire Iean de Luxembourg, & alla comme il auoit fait le iour de deuant faire la reuerence au Duc Philippe: & puis retourna dedans son pauillon, & là attendit son aduersaire, lequel vint tantost apres. Et apres qu'il eut faicte la reuerence audit Duc se retrahit dedans son pauillon. Et tantost comme il est de coustume en tel cas, fut crié par vn herault que tout homme vuidast les lices, & que nul ne donnast empeschement aux champions sur peine capital. Et adonc Lyonnell de Vvandonne qui estoit appellant issit de son pauillon sa hache en son poing, & marcha le grand pas sur son ennemy: lequel quand il le veit approcher issit hors de son pauillon, & alla à l'encontre dudit Lyonnell: lequel Lyonnell le assaillit vigoureusement, en iettant plusieurs coups de sa hache à bras tourné contre iceluy Pothon. Et aucunesfois frapport d'estoc sans cesser ne refréner son alaine. Et en ce faisant Pothon receuoit froidement ses coups sur sa hache, en les destournant à son pouoir arriere de luy. Et quand il veit son point il approcha ledit Lyonnell & le ferit plusieurs coups de la poincte de sa hache par dessoubs sa visiere de son bacinet, & tant fait qu'il luy leua ladicte visiere, tant qu'on veoit plainement le visage dudit Lyonnell: lequel se voyant en ce danger, fait tant qu'il print la hache de Pothon d'une main dessoubs son bras. Et Pothon print Lyonnell d'une main par le bort de son bacinet & le esgratigna de son gantelet au visage. Et en ce faisant & hardiant l'un l'autre Lyonnell referma sa visiere à pou pres. Et tantost le Duc de Bourgogne les fait prendre en ce point par ceux qu'il auoit commis à garder le champ, desquels ils furent menez deuant le Duc: lequel presentement leur ordonna à demourer bons amis ensemble, tant comme il touchoit leurs armes cy dessus declairées, & sur ce retournerent chacun en leurs hostels. Et fait là ledit Pothon de grans boubans avecques ses gens. Et le lendemain coururent de fer de lance l'un contre l'autre Risslard de Champremy, tenant le party du Roy Charles contre le bastart de Rosbecque, & rompirent l'un sur l'autre aucunes lances: mais en conclusion ledit Risslard fut enfermé tout parmy son harnois qu'on vit vers le costé, & neantmoins ne fut point percé au vif. Pour lequel coup le Duc de Bourgogne les fait cesser & retournerent en leurs hostels chacun accompagné de ses gens. Et dedans briefs iours s'en retourna ledit Pothon avec les siens en la Comté de Guise.

Comment le Comte de Salsebery assiegea la forteresse de Mont-Aguilon: laquelle se rendit à luy. Et autres.

EN ce temps alla le Comte de Salsebery à tout grand puissance assieger la forteresse de Mont-Aguilon en Champaigne par l'ordonnance & commandement du Duc de Bethfort, qui se disoit Regent de France: lequel Salsebery estoit pour lors Gouverneur du pays de Champaigne, & de Brie: lequel siege il continua par moult longue espace de temps en faisant plusieurs assaux par diuers engins & autres instrumens de guerre, & y fut bien six mois ou enuiron. Toutesfois ce temps durant, furent liurez

plusieurs assaux à la forteresse & par diuerses manieres de les assieger furent moult oppressez. Et pouoient estre dedans iusques à six vingts combattans, desquels estoient capitaines le seigneur de la Bourbe, le seigneur de Cotigny & vn homme d'armes, nommé Bourghenon: desquels six vingts combattans se departirent grand partie & en la fin n'y demourerent que trente ou enuiron, lesquels en conclusion furent contrains de manger leurs cheuaux: & en la fin se renderent audit Comte de Salsebery par cōdition, qu'ils payeroient pour sauuer leurs vies vingt & deux mille saluts d'or, dont pour ladicte somme fournir demourerent en hostage quatre des principaux iusques à l'accomplissement d'icelle. Et se partirent les compagnons en pur leurs pourpointeaux soubz bon saufconduit, reserué ceux qui autresfois auoient fait serment de la paix finable, qui auoit esté iurée entre les Roys de France & d'Angleterre. Et quand tous s'en furent partis (comme dit est) la forteresse fut abbatue & du tout demolie. En ces mesmes iours fut prins dedans Arras par le commandement du Duc de Bourgogne messire Mauroid de Saint Leger, pour plusieurs plaintes qui de luy estoient venues audit Duc, tant pour auoir pillé sa ville d'Auchin, comme pour plusieurs autres faits. Si fut mené prisonnier au chastel de Chauetignes, où il fut par l'espace d'un an entier. Et puis fut deliuré par le pourchats de ses amis. En ce mesme temps le Duc de Bethfort feit par ses Anglois assieger puissamment & de force la forteresse d'Orsay, entre Paris & Montlehery. Laquelle tenoient les François: lequel siege lesdits assiegeans continuerent enuiron six sepmaines. Et en la fin se renderent les assiegez à la voulenté du Duc: desquels les vns furent amenez à Paris les testes nues, en purs leurs pourpointeaux, vne corde liée entour leur col, & les aucuns tenans leurs espées nues les pointes appuyées à leurs poitrines. Et en tel point furent menez à l'hostel des Tournelles en la presence dudit Duc de Bethfort & de sa femme: lequel Duc commanda tantost qu'on les menast au chastellet: mais la Duchesse meüe de pitié pria tant pour eux à son seigneur & mary, qu'ils furent deliurez sans auoir autre peine, & s'en allerent où bon leur sembla. Les vns au party dont ils estoient venus, & les autres demourerent du party des Anglois. Item au mois de May furent enuoyez de Roüen & du territoire de Caux de six à sept cens Anglois: lesquels menoit le Baillif de Caux, & passerent parmy Abbeuille, & assiegerent le chastel de Noëlle sur la mer appartenant à messire Iaques de Harcourt. Et dedans briefs iours apres ceux qui estoient dedans doubans non auoir secours, renderent ausdits Anglois leur forteresse en eux departant sauf leurs vies & leurs biens. Et adonc ledit messire Iaques de Harcourt remanda hastiuement ses gens qui estoient à Rue, & laissa la ville habandonnée à ses ennemis sans y mettre quelque prouision. En laquelle sans faillir les Anglois entrerent tantost apres, où par moult de manieres trauaillerent les simples gens qui y estoient demourez. Et lors fut mise frontière à l'encontre du Crotoy de la gent Anglesche, ainsi que vous pourrez ouïr. Audit mois de May fut faicte vne grosse bataille empres Naples, entre Alphons Roy d'Arragon d'une part, & le pere au Comte François, & autres capitaines du païs d'Italie d'autre part: lesquels de rechef s'estoient trouuez contre le Roy d'Arragon, & pour verité la desconfiture fut lors faicte si grande sur les Arragonnois, qu'il faillut par force que le Roy Alphons d'Arragon se sauuaast

uast à bien petite compagnie en luy departant de la bataille, autrement eust il esté mort ou prins de ses aduersaires. Enuiron la sainct Iean Baptiste ensuiuant, fut assiegée par mer & par terre la ville & forteresse du Crotoy par les Anglois. Desquels estoit principal capitaine messire Raoul Bouteillier, qui trespuiissamment & en grād diligence feit son ost fermer & loger ses gens trespauantageusement. Et messire Iaques de Harcourt se prepara trespigoureuusement pour luy deffendre, & feit asseoir plusieurs canons & autres engins pour ietter contre ses ennemis, affin de les garder qu'ils ne peussent approcher de ladicte ville. Pour lequel siege les habitans du païs furent moult ioyeux.

Comment le Roy Charles de France feit assieger la ville de Creuant par le Connestable d'Escoffe & le Comte de Ventadour Auuerghnois.

AL'entrée du mois de Iuillet le Roy Charles feit passer ses gens la riuere de Loire, & assieger à grand puissance la ville de Creuant, laquelle tenoit le party du Duc de Bourgongne. Et estoit chef dudit siege le Connestable d'Escoffe, lequel auoit avec luy plusieurs grās seigneurs, qui vaillamment se combattirent contre lesdits assiegez par diuers engins & habillemens de guerre qu'ils auoient: pour lequel siege ne furent mie tant seulement troublez les bourgongnons, mais avec ce les Anglois: & pourtant la Duchesse Douagiere de Bourgongne manda hastiuement les plus grans seigneurs de Bourgongne, & leur requist instamment pource & au nom de son fils le Duc, qu'ils assemblassent diligemment leurs gens pour donner secours aux dessusdits assiegez de Creuant: lesquels seigneurs avec le seigneur de Toulongon Marechal de Bourgongne, se meirent ensemble à toute puissance, & cheuaucherent iusques à Auxerre: auquel lieu vint de par le Duc de Bethfort Regent le Comte de Salsebery, le Comte de Suffort, le seigneur de Vvilleby & aucuns autres seigneurs Anglois, tant qu'ils furent iusques au nombre de quatre mille combattans ou enuiron gens d'esslite & esprouuez en armes, à l'encontre desquels Anglois: allerent pour les honorer le Comte de Ioigny Bourgongnon, le Borgne de Toulongon, le seigneur de Vergy, messire Iean & messire Guillaume de Vienne, messire Regnier Pot, le seigneur de Rochefort & plusieurs autres notables seigneurs. Et eux venus & assemblez ensemble, feirent grand reuerence l'un à l'autre & puis cheuaucherent l'un avec l'autre en belle ordonnance iusques en la ville: & fut logé ledit Comte de Salsebery en l'hostel de l'Euesque. Et quand ils furent vn peu refectionnez de boire & de manger, se assemblerent lesdits seigneurs tant Anglois que Bourgongnons en l'Eglise cathedrale de la ville: & là prindrent leurs conclusions telles que cy apres seront declairées. Apres les Anglois & Bourgongnons se meirent à chemin pour aller vers Creuant combattre leurs aduersaires, & descendirent à pied à enuiron vn grand quart de lieuë d'iceux. Alors il faisoit moult grand chault: & pource furent grandement trauaillez tant d'aller à pied pour la pesanteur de leurs armes comme de l'ardeur du soleil. Et ce propre iour furent faits cheualiers de ceste partie Guillaume de Vienne, fils au seigneur de sainct George, Iean seigneur d'Auxi, Philippe seigneur de Trenont & Copin de la Viefuille.

PREMIEREMENT fut ordonné par lesdits seigneurs, que lendemain qu'il

estoit vendredy se partiroient avec tous leurs gens à dix heures du matin pour aller loger vers Creuant. Item ordonnerent deux Mareschaux pour auoir regard sur leurs gens : c'est à sçauoir pour les Bourgongnons le seigneur de Vergy, & pour les Anglois messire Gillebert de Halleval. Item fut crié que les Anglois & Bourgongnons fussent d'accord & amis ensemble en bonne vnion, sans faire debat ne remors sur peine d'estre punis à la volenté des capitaines. Item fut ordonné qu'ils cheuaucheroient tous ensemble en vn ost. Et y auroit six vingts hommes d'armes : c'est à sçauoir soixante Anglois & soixante Bourgongnons, avec autant d'archiers qu'il y appartenoit pour descourir deuant. Item fut ordonné que quand on viendrait au lieu, où on se deuroit combattre qu'incontinent qu'il sera dit & publié, que chacun descende à pied, & ceux qui en feront refus soient mis à mort, & tantost les cheuaux soient menez arriere l'espace de demie lieuë. Et ceux qui seront trouuez plus pres soient prins comme confisque. Item fut ordonné que chacun archier fait vn penchon aguisé à deux bouts pour ficher deuant luy quand besoing en seroit. Item fut ordonné que nul de quelque estat qu'il fut, ne fut si hardy que de prendre prisonniers au iour de la bataille iusques à ce qu'on voye plainement que le champ soit gagné : & que si on en prend aucun, tantost soit occis, avecques luy celuy qui l'aura prins s'il en fait aucun refus. Item fut ordonné que chacun se pourueust de viande pour deux iours : & avecques ce que ceux de la ville d'Auxerre enuoyassent viures apres l'ost, entant qu'ils en pourroient finer, & ils seroient bien payez. Item fut ordonné que nuls ne cheuauchassent deuant ne derriere sans l'ordonnance des capitaines sur peine cappital, mais se tienne chacun en l'ordonnance où il sera mis : lesquelles choses dessusdictes furent en ce iour proclamées & publiées au son de trompe en la ville d'Auxerre. Et le lendemain (comme dit est) quand ils eurent ouy la Messe en grande deuotion & beu vn coup, ils se departirent de la ville en grand fraternité & allerent loger tous ensemble en la vinchelles à vne petite lieuë de leurs ennemis. Et le samedi ensuiuant environ dix heures du matin, se deslogerent & allerent à belle ordonnance deuant leurs ennemis : lesquels sans faillir ils trouuerent ordonnez en grande & noble compaignie : & auoient prins place sur vne montaigne deuant ladicte ville de Creuant, laquelle ils auoient tenue nuit & iour en attendant leurs gens. Mais lesdits Anglois & Bourgongnons allerent passer par l'autre lez de la riuere d'Yonne, du costé vers Coulongne lez Vimeus ou Vigneuses. Et adoncques descendirent les François de leur montaigne, & vindrent contre leurs ennemis en montrant grand semblance de hardiesse, & se meirent en bataille l'un contre l'autre, où ils furent bien trois heures sans autre chose faire : & estoit la riuere d'Yonne entre deux. Et apres se aduancerent les Anglois & Bourgongnons, & gagnerent vn pont sur leurs ennemis, par lequel ils les commencerent fort à greuer & enuahir. Et d'autre part ceux qui estoient en la ville, les assaillirent par derriere moult roidement. Et adonc commencerent de toutes parts à combattre les vns contre les autres tresasprement. Mais en conclusion les dessusdits Anglois & Bourgongnons obtindrent la victoire contre leurs ennemis & gagnerent le champ, auquel furent morts & prins la plus grand partie des Escoçois, qui estoient au front deuant la bataille, desquels y auoit enuiron

trois

trois mille. Toutesfois le Conneſtable d'Eſcoce ſe rendit priſonnier au ſeigneur de Chaſtelluz : mais il eut vn œil creué. Et pareillement fut priſonnier le Comte de Ventadour au ſeigneur de Gamaches, & eut auſſi vn œil creué. Eſtienne & Iean de Farimeres Cheualiers Eſcoçois, avecques pluſieurs autres notables hommes iuſques au nombre de quatre cens : & furent morts ſur la place tandis le nepueu du Comte de Bouquinon, meſſire Thomas Secron, meſſire Guillaume Hambon & ſon fils tous cheualiers d'Eſcoce, Iean Pillot capitaine Eſcoçois & le Baſtard du Roy, avecques pluſieurs autres iuſques au nombre de douze cens ou enuiron. Apres laquelle victoire r'assemblerent les capitaines Anglois & Bourgongnons en grande vnion, & entrerent dedans la ville de Creuant, en remerciant & reſpaciſant le createur de leur victoire, où ils furent moult ioyeuſement & honnorablement receuz, & leurs gens ſe logerent au plus pres. Toutesfois Perrinet & aucuns autres chafferent les fuians aſſez longuement, ſi en prindrent & occirent pluſieurs en faiſant celle poursuite. Et le lundy enſuiuant que leſdits capitaines eurent assemblez leurs gens, ils ſe partirent l'un d'avecques l'autre. Et puis ſ'en allerent les Bourgongnons en leurs propres lieux. Et les Comtes de Salſebery & Suffort retournerent au ſiege de deuant Mont-Aguillon du lieu meſmes dont ils feſtoient partis, & y auoient laiſſé aucune partie de leurs gens pour garder ledit ſiege. Et fut verité qu'au iour de la bataille deſſusdicte, ledit Comte de Salſebery feit bien quatre vingts cheualiers ou plus. Et puis apres la deſſusdicte bataille de Creuant, ledit Comte de Suffort alla aſſieger la ville de Couſſy : laquelle ſe rendit à luy dedans certains briefs iours enſuiuans. Et de là alla au païs de Maſconnois, où ſe meirent en obeïſſance pluſieurs forterefſes que les François tenoient. Si feit par vn de ſes capitaines nommé Claidas le fort chaſtel de la Roche, qui en fin ſe meit en ſon obeïſſance.

Cy parle de pluſieurs matieres en brief.

ENviron le temps deſſusdit, le Duc de Bourgogne ſe partit de ſon païs d'Arthois & ſ'en alla à Paris, & de là en ſon païs de Bourgogne, où il ſeiourna iuſques au mois de Feurier enſuiuant : & mena avecques luy le Comte de Richemont, qui eſpouſa lors ſa ſeur, dont le mariage eſtoit fort long temps deuant, comme deſſus eſt dit. A l'iſſue du mois de Iuillet ſ'assemblerent pluſieurs François des marches de Mauſſon, de la Comté de Guiſe & d'ailleurs : leſquels encloÿrent ſoubdainement dedans Bethleem le Bailly de Vermandois & le Baſtard de S. Pol : mais meſſire Iean de Luxébourg & le Comte Mareſchal Anglois, ſe meirent tantost enſemble avec grand nōbre de leurs gens & cheuaucherent haſtiuemēt pour leuer le ſiege que tenoient leſdits François : leſquels François quand ils en furent informez, ſe partirent & tirent en grand haſte vers leurs marches : & les deſſusdits Comte Mareſchal & meſſire Iean de Luxébourg les pourſuiuirent roidement bien xx. lieuës, pour les cōbattre. En ceſt an arriuerent les Arragonnois & les Caſtellans en grand puiſſance au pont de Naples : & illec prindrēt de force icelle ville de Naples, laquelle fut pillée & courue : & prindrent la plus grand partie des puiſſans hommes, iuſques au nōbre de huiēt cens, leſquels ils enuoyerent priſonniers en Arragon, &

en y eut grand partie de morts : & fut bien le tiers de la ville arse & destruite, dont le Roy Loys fut moult troublé. Mais brief ensuiuant par l'ayde que luy enuoya le Duc de Milan, il reconquist icelle ville de Naples & plusieurs. Au mois d'Aoust ensuiuant, messire Jean de Luxembourg conquist par force d'assault la forteresse d'Archie: dedans laquelle estoient environ trente Sacquemains tenans le party du Roy Charles, dont les aucuns furent mis à mort & penduz, & ladicte forteresse fut arse & du tout demolie. Et de là ledit de Luxembourg alla assieger Landoussies, où il fut iusques au mois d'Octobre, en combattant iceux de ses engins tresfort. Mais en conclusion ceux de dedās rendirent la forteresse par tel si, qu'ils s'en allerent sauf leurs corps & grād partie de leurs biēs : laquelle forteresse comme celle de dessus, fut demolie & abbatue. En ce tēps mesmes le Comte Mareschal Anglois estoit à tout six cens combattans ou environ sur les marches de Laonnois : pour lequel ruer ius & destrousser l'assemblerent les gens du Roy Charles, mais ledit Côte de ce aduerty alla contre eux, & les fait fuir & departir l'un de l'autre. Et en les poursuiuant tout chaudemēt, se boutterent vne partie dedans la forteresse. Auquel lieu ils furent dudit Comte assiegez sans arrest, & tant approchez qu'en la fin ils se rendirent à sa volenté. Si en y eut grand partie de pendus & fut ladicte forteresse desolée. Au mois d'Aoust dessusdit le capitaine de Lebuissier entre Tornus & Mascon tenant le party du Roy Charles, meit iournée pour deliurer la forteresse au seigneur de Thoulougon Mareschal de Bourgongne pour vne somme d'argent, dont ils estoient ensemble d'accord : mais à icelle iournée leur capitaine auoit fait deux embusches pres de la forteresse : lesquelles apres ce q̄ ledit Mareschal fut entré en icelles luy douziesme, ses gens saillirēt auāt sur ledit Mareschal & ses gens: si les desconfirent si que pou en eschappa, & par ainsi ledit de Thoulougon fut detenu prisonnier luy & ses gens dedans le chastel. Et depuis certaine espace de temps fut deliuré pour le Comte de Vantadour, qui auoit esté prins en la bataille à Creuant, dont dessus est faicte mention. En c'est an messire Jean de Luxembourg meit en son obeissance les forteresses de Cambresis en Terace, Proisy & autres, lesquelles les gens du Roy Charles tenoient. En l'an dessusdit furent mises en la main du Comte de Hainault toutes les terres du Comte de Pōtieuvre, qu'il auoit en la dessusdicte Comté par le seigneur de Harech gouverneur de celuy païs, pource qu'on auoit souspeçon, qu'iceluy Comte de Pontieuvre ne voulsist mettre garnison en ses forteresses qu'il auoit audit païs: telles comme Landrecy, Auesnes & autres.

Comment messire Iaques de Harcourt tint parlement avec messire Raoul le Bouteiller pour la reddition du Crotoy.

U Tem apres ce que messire Raoul le Bouteiller eut tenu son siege par mer & par terre, iusques au my mois d'Octobre. Il eut parlement avecques messire Iaques de Harcourt. Et ordonnerent de chacune partie leurs commis, pour traicter & donnerent trefues les vns aux autres. Et en fin furent d'accord par la maniere declairée cy apres. Duquel traité la copie s'ensuit.

C'EST le traité fait entre Raoul le Bouteiller cheualier, & Guillaume Miners

ners escuyers commis & deputez de par le tres excellent Prince le Duc de Bethfort Regent de Frâce d'une part, & messire Jaques de Harcourt cheualier lieutenant general en Picardie pour le Roy Charles: ledit de Harcourt soy faisant fort du clergié, des nobles & des manans & habitans en la ville & chastel du Crotoy d'autre part. Premièrement le premier iour de Mars prochain venant: Le second & le tiers soleil leué depuis l'heure de prime, monseigneur le Regent ou ses commis, seront iusques à trois heures apres midy chacun desdits trois iours armez dessus les champs entre la ville de Rue & le Crotoy. Et s'ils ne sont combattus par ledit messire Jaques, ou par autres tenans son party durant les trois iours dessusdits si puissamment, que le champ luy demoure: ledit messire Jaques ou ses commis bailleront & deliureront reaument & de fait à mondit seigneur le Regent, ou à celuy qu'il y commettra ladicte ville & forteresse du Crotoy. Et s'accompliront presentement à trois heures apres midy au tiers iour dudit mois de Mars. Item ledit messire Jaques & generallyment tous ceux de sa compagnie de quelque estat ou condition qu'ils soient, se pourront partir avecques tous leurs biens dudit Crotoy au iour de la reddition: excepté les consentans de la mort de feu Iean Duc de Bourgogne, qui demourrôt en la volonté de mondit seigneur le Regent s'aucuns en y a. Item ledit messire Jaques sera tenu de laisser audit chastel toutes les pouldres, arbalestres & traict sans riés gaster ne despecer, reserué neuf veuglares, deux cacques de pouldres, vingt & trois arbalestres, & neuf coffres de traict. Et toutes les gens emporteront harnois, habillemens & autres biens. Item au cas qu'aucuns de ladicte ville & chastel de quelque estat qu'ils soient, voudroient demourer en faisant le serment à mondit seigneur le gouverneur & Regent, ou à ses commis leurs biens meubles & heritages leur demourront, & de ce on leur baillera lettres suffisantes. Item ledit messire Jaques aura du nauire pour le port estant au Crotoy: c'est à sçauoir la grande Hulque & la Barge, Colin l'Anglois, Plumeterre, Balenier, Jaques, & Martinet, & il sera tenu de laisser l'autre nauire, & les vaisseaux des pescheurs demourront à ceux à qui ils sont, moyennant qu'ils feront le serment comme dit est. Item messire Jaques sera tenu de rendre tous les prisonniers, qu'il a de present en ladicte ville & chastel de Crotoy, & on luy rendra pareillement vn de ses gens que tient messire Raoul le Bouteiller. Item durant le temps dessusdit tous ceux de ladicte ville & chastel, cesseront de faire guerre en appert & en couuert, par quelque maniere que ce soit, sauf que ledit messire Jaques durant ledit iour pourra faire guerre se bon luy semble outre l'aire de Seine. Item ne pourront lesdits monseigneur le Regent ne nuls de ses gens ce temps pendant, faire enuahie n'entreprinse sur ladicte ville & chastel du Crotoy par quelque maniere que ce soit, ne pareillement ses alliez. Item durant ledit tēps iusques au premier iour de Mars, pourrôt ceux du Crotoy aller en marchandise es villes de Rue, & d'Abbeville, & de S. Vallery moyennant qu'ils en ayent congé des capitaines d'icelles villes & non autrement. Et aussi pourront aller par mer en marchandise: & aussi pourront amener vins & toutes autres denrées pour vendre, sauf qu'ils n'en mettront riens dedans ladicte ville & chastel pour le raitailler, sinon pour la quotidienne du temps qu'ils y doiuent estre. Item toutes les gens de mondit seigneur le Regent, & aussi ceux tenans son party pourront aller en

la ville du Crotoy pour besongner, ce qu'ils auront à faire par le congé du capitaine. Item s'il aduenoit durant ledit temps dessusdit, qu'aucuns vaisseaux ou gens d'armes arriuaissent au Crotoy ils n'y seront receuz: & n'auront aucune ayde ou secours par les vaisseaux d'icelle ville, & ne pourra ledit messire Iaques durant ledit temps, fortifier, ne demollir ladicte ville & chastel. Item mondit seigneur le Regent ou ses commis bailleront saufconduit à ceux qui serot dedans la ville & chastel au temps de la reddition, où bon leur semblera pour aller tenir leur party, & à tous leurs biens, & auront quinze iours de vuidenge: & apres auront saufconduit autres quinze iours. Item aura ledit messire Iaques saufconduit pour luy, ses enfans & toutes ses gens durant ledit temps, soit par mer ou par terre pour aller où bon luy semblera. Item pour accomplir toutes les choses dessusdictes & entretenir, ledit messire Iaques baillera en pleges messire Pierre de Hergicourt cheualier, Boort de Fiefiez, Iean Sarpe & Perceual Cambiet escuyers, Iean d'Estampes, Gilles le Roy & Iean de Gonne bourgeois de ladicte ville du Crotoy. Lesquels pleges seront quittez apres la reddition de ladicte ville & chastel du Crotoy: en cas que celuy qui se dit leur Roy les secourroit ou ses commis en demourant victorieux sur la place, seroient aussi quittes les pleges dessusdits. Lequel traitté fait & lesdits pleges baillez se departit le siege. Et ledit messire Iaques fait vendre toutes ses prouisions en Abbeuille & ailleurs, & remanda ses enfans qui estoient en Hainault au chastel de Hamesche. Et quand ils furent à luy venus il les enuoya à Monstreul Bellay. En apres messire Iaques de Harcourt, comme dit est, vendit toutes ses prouisions & à tout infiniz biens se meit en mer avec partie de ses gens, en laissant au Crotoy son lieutenant general messire Choquart de Combionne. Et puis s'en alla nageant au mont S. Michel, où il fut receu moult honnorablement: & de là alla à Monstreul Bellay veoir ses enfans, & là meit la plus grand partie de ses biens. Et aucuns iours apres ensuiuans alla deuers le Roy Charles qui le receut tresbenignement, & luy donna aucuns dons comme Roy: & puis se departit pour aller deuers le seigneur de Partenay, qui estoit oncle à la femme que ledit messire Iaques auoit espousée. Lequel de Partenay tenoit & auoit tousiours tenu le party du Duc de Bourgogne. Et apres qu'iceluy messire Iaques eut esté receu dudit seigneur de Partenay liberallement & à grand honneur, iceluy messire Iaques luy requist d'auoir sa forteresse en garde, & aussi qu'il voulüst laisser la querelle du Duc de Bourgogne qu'il auoit tousiours maintenue, & il se faisoit fort de faire sa paix au Roy Charles, & si auroit son estat ainsi qu'il auoit accoustumé. Dequoy ledit seigneur de Partenay luy respondit, que son intétion estoit de demourer seigneur de sa forteresse & de ses seigneuries: & que ceux à qui elles appartenoient apres sa mort les prinssent fil leur plaisoit. Adoncques ledit messire Iaques assez pourueu de son fait, comme il cuidoit, meit la main audit seigneur de Partenay, & le fait prisonnier du Roy Charles. Et ses gens leuerent le pont du chastel: & en ce faisant fut la noise ouïe de la ville, dont les gens tous esmeuz en grand nombre vindrent au chastel, & tirerent le pont qui n'estoit cliqué ne verouillé: & lors tout soubdainement monterent amont & occirent cruellement ledit messire Iaques, Iean de Herfelames, Iean de Fronssieres, Philippe de Neufuille & plusieurs autres de ses gens. Ainsi trouua ledit messire Iaques

ques sa mort aspre, cruelle & hastiue par vn petit de couuoitise:iaçoit-ce qu'on le compte en plusieurs autres manieres .

Cy parle de plusieurs autres matieres en brief.

EN ce temps ceux de la Côté de Hainault furent en moult grād effroy & tribulation, pour doubte de la guerre des Ducs de Cloestre & de Brabant, dont ils veoyent l'apparence, par ce que tous deux auoient espousé leur dame & heritiere. Et se disoit chacū d'eux estre seigneur du païs ayant la meilleure querelle. Et aussi que les seigneurs du païs estoient diuisez & tenoient les vns le party du Duc de Brabant, & les autres le party de la dame & du Duc de Cloestre. Nonobstant que par auāt tous eussent fait serment de loyauté à iceluy Duc de Brabant, & l'auoient tenu long temps pour seigneur. En ce temps s'assemblerēt à Amiens les Ducs de Bethfort & de Bourgogne avecques leur grand conseil de chacune partie, pour traicter de la paix entre les deux Ducs dessusdits de Cloestre & de Brabant. Mais en conclusion au dernier ils se departirent l'vn de l'autre sans riens pouoir concorder: & prindrent iour pour estre à Paris sur la besongne dessusdicte. En ce temps le Duc de Bethfort fait assieger trespuissammēt par les Anglois, & avecques eux le seigneur de l'Isle Adam, & le bastard de Thyan le chastel d'Iury. Pour lequel siege leuer s'assemblerent en grand nombre, le Comte d'Aumarle, le bastard d'Alençon & plusieurs autres capitaines. Lesquels cheuauchant par deuers ledit siege, trouuerent le capitaine d'Auranches frere au Comte de Suffort qui venoit de courre, & auoit donné congé à vne partie de ses gens: lequel fut assailliy desdits François & desconfit, & fut de sa personne prisonnier. Pourquoi iceux François esperans trouuer ladicte ville desgarnie, se meirent à chemin pour la conquerre. Et ce fait eux venus deuant, y liurerent vn grand assault: mais les habitans se deffendirent vigoureuusement, tellement qu'ils occirent & naurerent plusieurs de leurs ennemis, lesquels demourerent en leurs fossez. Et apres iceux François saichans que le Duc de Bethfort venoit pour les combattre, se departirent de là en cheuauchant hastiument vers la Duché de Touraine, toutesfois furent ils poursuiuis de leurs gens. Item le troiesme iour d'Octobre audit an, fut prinse la ville de Han sur Somme par les gens du Roy Charles, que menoit Pothon de .S. Treille par eschelles par faute de guet. Pour laquelle prinse messire Jean de Luxembourg fut fort troublé, par ce que c'estoit à luy. Et pourtant en grand diligence assembla ce qu'il peust assembler de gēs d'armes: à tous lesquels au tiers iour de la prinse il cheuaucha iusques à ladicte ville. Et en grand hardiesse tout soubdainement fait icelle assaillir & passer ses gens d'armes parmy la riuere avec son estandart. Lequel porta ce iour tresvaillamment vn homme d'armes nommé Iacotin de Cambray. Finablement le dessusdit Jean de Luxembourg reconquist en brief la ville sur ses ennemis & en print & meit à mort cruelle grand partie. Et ledit Pothon au plustost qu'il peut avecques aucuns de ses gēs s'en refuit en Terrace. Toutesfois ils furēt poursuiuis par ledit de Luxembourg & ses gens, & y en eut en icelle poursuite de prins grand foison. Auquel iour fut prins dedans ladicte ville & nauré terriblement, comme en peril de mort vn homme d'armes nommé messire Jean de Fōtenelle & Valerien de S. Germain:

auquel ledit messire Iean de Luxembourg brief ensuiuant fait trencher la teste, c'est à sçauoir audit Valerien.

Item en ce temps la Royne femme du Roy Charles accoucha d'un fils, lequel fut nommé sur les fons Loys premier Daulphin de Viennois. Pour la natiuité duquel fut fait grand liesse & grand ioye par toute son obeissance, & par especial en sa bonne cité de Tournay: & furent fais grans feux par toute la ville, & crioit le commun Noël à haute voix en menant grand ioye & liesse. Item en l'an dessusdit les François prindrent le chastel de Beaumôt sur Oyse, lequel brief ensuiuant fut assiegé par le cōmandement du Duc de Bethfort, & en fin recōquis & tout demoly & abbatu. Itē en ce tēps se resmeurēt ceux de la ville de Tournay, & se meirēt en armes l'un cōtre l'autre à bāniere desployée: & fut la cause de ceste esmeute, pource que la cōmunauté doubtoit que les seigneurs de Moÿ & de Conflās qui estoient en leur ville & auoient grād audiēce, ne leur baillassent garnison plus puissant d'eux. Neātmoins soubdainement ils se rappaiserent sans coup ferir: & assez tost apres se departirēt les seigneurs dessusdits de ladicte ville de Tournay doubtās la fureur d'iceluy cōmun, & alla ledit seigneur de Moÿ demourer en Liege. Item en ce temps la ville de Champagne fut eschellée par faute de guet des gēs du Roy Charles. Lesquels estoiet enuiron ccc. cōbattās, desquels estoient conducteurs Yuon du Puis, Angerot de Laux & Brouffart: lesquels sans delay prindrēt & emprisonnerent tous ceux de la ville qui tenoiet le party des Anglois & des Bourgongnons, avecques tous leurs biens. Et brief ensuiuant vindrent deuant ladicte ville de Champagne pour icelle reconquerre le seigneur de l'Isle Adam, Lyonnel de Bernonuille, le seigneur de Thyan & aucūs autres, qui pou ou neant y feirent: & pourtant tout le paÿs d'environ fut de rechief pour icelle prinse en grād soucy & tribulation. Item en ces mesmes iours fut reprinse sur les gens du Roy Charles la ville de la Charité sur Loire, par vn aduanturier tenant le party du Duc de Bourgogne nommé Perrinet Crasset: lequel par auant & long temps apres fait forte guerre au Roy Charles sur les marches de Berry, & au paÿs d'environ. Pour laquelle prinse les François furent moult fort dolens & courroucez, pourtant qu'ils perdirent le passage de l'eäue qui leur estoit fort duisable. Item en cest an Arthus Côte de Richemont, apres ce qu'il eut espousé Marguerite sœur au Duc de Bourgogne: Nonobstāt le serment & les alliāces, qu'il auoit faictes par auant avec le Roy Henry deffunct & ses successeurs, s'en alla par deuers le Roy Charles pour aucun discord, qui fut entre le Duc de Bethfort & luy: duquel Roy Charles il fut moult fort ioyeusement receu, & brief ensuiuant il fut fait Cōestable de Frāce par ledit Roy Charles. Pour le departement duquel Côte moult de gēs furent esmerueillez attēdu l'alliance si nouuelle qu'il auoit eüe avec ledit Duc de Bourgogne. Au mois de Ianuier en cest an s'assemblerēt en la ville d'Amiēs les Ducs de Bethfort, & de Bourgogne, le Comte de Conuersan, l'Euesque de Tournay son frere, messire Iean de Luxebourg, avecques grand nōbre de notables personnes & conseilliers de chacune partie, & les ambassadeurs des Ducs de Cloestre & de Brabāt. Et toutesfois iaçoit ce que plusieurs fois sur ces propos furent en conseil, ils ne peurēt riēs concorder. Et pourtant assignerēt à iceux ambassadeurs vn iour à estre environ la Trinité ensuiuant. Et apres se departirent les notables Princes dessusdits.

Comment

Comment la ville de Compiengne fut remise en la main des Anglois. Et comment la ville & le chastel du Crotoy furent rendus au Duc de Bethfort.

LTem en ce temps alla le Duc de Bethfort en la ville de Montdidier, où il fut cinq ou six iours : & là ordonna capitaines tant Bourgon- gnôs comme Anglois pour assieger la ville de Compiengne, desquels fut le chief le seigneur de Saueuse. Et si y furent commis le Baillif de Rouen, le capitaine de Gisors nommé Malbery, le seigneur de l'Isle Adam, mes- sire Lyônel de Bournouille, le Bastard Thyan, le seigneur de Creuecueur, Ro- bert de Saueuse & plusieurs autres. Lesquels apres icelle ordonnance mande- rent tout soubdain leurs gens en grand diligence, & s'assemblerent au pont S. Maxence. Et de là cheuaucherent en ordonnance iusques à Compiengne : c'est à sçauoir le seigneur de Saueuse & les Anglois du costé vers Montdidier : & se lo- gerent tous ensemble au bout de la prée en vne ville nommée Venuette, & de l'autre costé de l'eau à l'abbaye de Royal-lieu, le seigneur de l'Isle Adam, Lyô- nel de Bernouille & aucûs autres capitaines : lesquels tant d'un costé que d'au- tre continuerent leur siege environ trois sepmaines. Lequel temps durant y eut de grandes escarmouches entre les parties : Mais neantmoins en conclusion les François non ayans esperâce de secours, feirent traicté aux Anglois par condi- tion, qu'ils s'en iroient sauf leurs corps & leurs biens : & auroiét trois sepmaines de iour d'eux partir, en cas qu'audit iour le Roy ne leur liurast bataille, & sur ce baillerent leurs hostages. Et aussi rendroient le seigneur de Soral, qui auoit esté prins par iceux assiegez deuât ladicte ville. Apres lesquels traictéz, se departirét & retournerent chacun en leurs propres lieux. Et le iour venu auquel ils auoiét promis de rendre ladicte ville, se departirent tous ensemble pource qu'ils n'eurent point de secours : & meirent icelle ville de Compiengne en la main des An- glois par le Duc de Bethfort, qui se disoit Regent. C'est à sçauoir en la main de monseigneur de Montferrant, lequel y commist capitaine le seigneur de l'Isle Adam.

ITEM environ l'issue du mois de Feurier alla ledit Duc de Bethfort à tout moult grand nombre de gens d'armes en la ville d'Abbeuille, en intention de tenir la iournée qui pieça auoit esté prinse pour la reddition du Crotoy. Mais pource que ledit Bethfort fut aduerty seûrement, que les François ne se com- paroistroiét point à puissance, il enuoya querir ladicte iournée à messire Raoul le Bouteiller & demoura à Abbeuille : lequel messire Raoul se tint entour le Crotoy, le premier, secôd & tiers iour de Mars. Quand ce vint audit iour à heu- re de midy ou environ, fut rendue ladicte ville & forteresse du Crotoy par mes- sire Cloquart de Cambronne en la main dudit messire Raoul : lequel luy rendit ses hostages, & luy bailla saufconduit pour luy & pour ses gens aller deuers le Roy Charles, & outre l'eau de Seine par tout où bon luy sembleroit. Et apres iceluy messire Raoul le Bouteiller, quand il fut entré dedans le Crotoy, print les sermens des bourgeois & habitans, qui estoient demourez en ladicte ville & chastel. Et auecques ce fut constitué ledit messire Raoul Bouteiller de par le Regent, general capitaine de ladicte ville : pour la redditiô de laquelle plusieurs seigneurs du pays d'environ : & aussi le pauvre commun furent petitement ref-

ioüis, doubtans qu'au temps aduenir les alliances qui estoient entre les Anglois & le Duc de Bourgongne se rompissent, & que par le moyen d'icelle forteresse, fussent en voye de totale destruction : iacoit ce que ceux qui y estoient de present leur eussent fait de grans martyres. En cest an mourut le Pape Pierre de la Lune, qui se nommoit Benedic : lequel tout son temps auoit desobey à l'Eglise Rommaine depuis le concille tenu à Constance, & voulut mourir Pape. Et encores en sa mort aux Cardinaux qui estoient avecques luy, fait faire election entre eux. Mais assez tost apres sa mort se meirent à l'obeissance de nostre saint Pere le Pape Martin. Et par ainsi fut l'Eglise en bone vnion par toute Chrestieté.

Comment deux maistres en Ars furent enuoyez en la cité de Tournay, pour admonnester & entretenir le peuple en l'amour du Roy Charles & autres matieres.

EN l'an dessusdit vindrent en la ville de Tournay deux maistres en ars illecques enuoyez par le Roy Charles, pour admonnester les bourgeois & le commun, qu'ils se voulsissent entretenir tousiours en leur bon propos vers ledit Roy, sicomme ils auoient fait long tēps par auant : promettant par la bouche des dessusdits qu'ils en seroient moult bien guerdonnez au plaisir de Dieu si le Roy retournoit en sa seigneurie. Lesquels ambassadeurs furent treshonorablement receuz des nobles & du commun : & leur furent faits beaux dons, & leurs despens administrez & payez aux despens de la ville treslargement. Et apres qu'ils eurent esté en icelle ville & cité de Tournay certaine espace de temps, l'un retourna en Berry & l'autre demoura encores à Tournay, en faisant plusieurs predications, en attrayant tousiours iceux que bien ils s'entretenissent au party du Roy : mais en fin son estat fut amoindry, & se refroidirent ceux de Tournay de luy faire si grans biens, qu'ils luy auoient fait de premiere venue. Au mois d'Auril ensuiuant messire Iean de Luxembourg assembla ses gens d'armes, & avecques luy sire Thomas de Rauiston cheualier Anglois : lesquels allerent mettre le siege deuant Oysi en Terace. Et dedans briefs iours ensuiuans traicta le Cadet, qui en estoit capitaine avecques ledit de Luxembourg, par telle condition qu'il luy rendroit la forteresse au cinquiesme iour de May ensuiuant. Et par ainsi se departit le siege, & luy fut rendu au iour dessusdit. Auquel an ledit de Luxembourg assiegea l'Eglise de Broissi, laquelle auoient fortiffiée aucuns Saquemens tenans le party du Roy Charles, qui moult faisoient de dommages au païs. Et pareillement assiegea la tour le Borgne, & furent prins en ces deux places bien quatre vingts d'iceux : entre lesquels estoit vn nommé le gros Bretō, vn de leurs capitaines. Et furent tous pendus aux arbres assez pres de Sery lez Mazieres. Item en cest an furent arses de feu de meschief six cens maisons ou enuiron, en la ville de saint Amand, avecques la porte de la basse court de l'abbaye & deux chambres de deux moines dudit lieu : & ne demoura que deux pauures maisons entre les deux portes de la ville : dont le menu peuple de ladicte ville fut tout desolé, & eut grand tristesse & troublement. Item en cest an se rompirent les trefues qui auoient duré enuiron l'espace de treize iours, entre le Souldan de Babiloine & le Roy de Chippre par le rapport d'aucuns faulx Chrestiens, qui rapporterent au Souldan que les Chippriens occioient ses gens quand ils les pouoient

pouoient atteinre. Sur lequel rapport sans autre deffiance faire au Roy de Chippre, ledit Souldan enuoya six gallées plaines de Sarrazins descendre en Chippre, & faire guerre par feu & par espée. Et premierement ardirent & destruirēt du tout la ville de Lymecō, avecques grād foison d'autre paÿs. Et lors le Roy de Chippre de ce aduertÿ, affin de resister enuoya vn sien cheualier messire Philippe Preuost à tout grans gens: lequel venu aux dessusdits Sarrazins en escarmouchant à eux, fut feru d'vne fiesche au visage, duquel coup il cheut. Et tãtost lesdits Sarrazins luy trencherent incontinent le chief, & prindrent ses espérons dorez avecques ladicte teste, & se retrahirent en leurs gallées & puis retournerent en Surie.

Comment messire Jean de Luxembourg assiegea le chastel de Vvieve: & comment il feit vne embusche, où Pothon de sainte Treille & ses compaignons furent desconfits.

EN ce temps messire Jean de Luxembourg assiegea la forteresse de Vvieve trespuissamment: lequel siege dura enuiron trois sepmaines, continuant tousiours ledit de Luxembourg de faire abbatre & desrompre par ses engins icelle forteresse. Et en fin lesdits assiegez non esperans auoir secours, feirent traicté avec ledit de Luxembourg par tel si, qu'ils s'en iroient sauf leurs vies en delaissant tous leurs biens, promettans d'eux non plus armer deça la riuere de Loire, sinon en la compagnie du Roy Charles. Apres lequel traicté se departirent en allant à Guise, & la forteresse fut demolie & abbatue. Et apres le premier ou second iour ensuiuant, ledit messire Jean de Luxembourg se deslogea avec aucuns de ses plus feables. En ce temps fut Pothon de Sainte Treille prins sicomme vous orrez. Je vous dy que messire Jean de Luxembourg, durant ledit siege, se meit en embusche derriere vne petite Eglise enuers les marches de Guise, pour veoir & pour attendre se aucuns de ses ennemis feroient aucune enuahie apres ses gens, laquelle chose aduint comme il l'auoit proposée: car ledit Pothon de sainte Treille, l'Estandart de Mailly, le seigneur de Verduisant & aucuns autres experts & esprouuez en armes, faillirent hors la ville de Guise en venāt vers ladicte embusche. Et adōcques ledit de Luxembourg voyant sur eux son aduantage à tout les siens, alla vigoureusement contre eux. Et tantost par grand vigueur les meit en grād desroy. Et y fut prins ledit Pothon, le seigneur de Verduisant & aucuns autres en petit nombre. Mais ledit Estandart de Mailly de plaine venue, assist sa lance dessus Lyonnell de Vandonne, si le porta ius de son cheual, & le blessa tresdurement vers l'espaulle: tant que ledit Lyonnell tout son viuant en fut affolé de bras & de iambe. Apres lequel coup iceluy Estandart voyant que proesse n'y pouoit riens valoir, & que ses ennemis estoient trop forts se retrahit vistement dedans la ville de Guise. Et messire Jean de Luxembourg avec ses gens chassa longuement les autres qui s'en fuioient en plusieurs parties. Et apres retourna & assembla ses gens en menant grand liesse de la bonne aduature qui luy estoit aduenue: & ainsi à tout ses prisonniers retourna en son chastel de Beaurevoir, donnant congé à ses capitaines iusques à son rappel.

De l'an mille cccc. & xxij.

Comment en cest an grand quantité d'Anglois arriuerent à Calais . Et autres matieres en brief. Et commēt messire Iean de Luxembourg assiegea la ville de Guise & plusieurs autres matieres.



Au commencement de cest an, vindrent d'Angleterre nageāt par mer en la ville de Calais seize cens combattans Anglois ou enuiron: dont la plus grand partie allerent à Paris deuers le Duc de Bethfort, & les autres deuers messire Iean de Luxembourg sur les marches de la Comté de Guise . En apres messire Iean de Luxembourg traicta auec Pothon de Sainte Treille & autres ses prisonniers , par condition qu'eux & leurs gens se departiroient de la ville de Guise & s'en iroient outre l'eaüe de Loire sans faire guerre ne dommage : promettans de non retourner , sinon en la compagnie du Roy Charles . Par le moyen duquel traicté , & aucunes autres finances que ledit Pothon paya, fut mis en plaine deliurance luy & ses gens : & s'en alla outre la riuiera de Loire, comme dit est. En cest an s'assemblerent sur les marches de Champaigne , la Hyre , Iean Raoulet & aucuns autres capitaines tenant le party du Roy Charles, auec grand nombre d'autres gens : lesquels ils menerent & conduirent sur les marches d'Arданne & de Retelois, & assiegerēt en sa forteresse Oliuier d'Estaneuelle.

En ces propres iours par l'ordonnance du Duc de Bethfort & du Duc de Bourgongne, messire Iean de Luxembourg fait grandes preparations de gens & d'habillemēs de guerre, pour assieger la ville de Guise en Terrace. Apres lesquelles preparations en sa compagnie, le seigneur de Piquigny Vidame d'Amiens , les seigneurs d'Anthoing, de Sauueses, messire Colard de Mailly , Ferry son frere, messire Dauiod de Poix, Maufroy de saint Legier , messire Lyonnel de Barnouille, le Bastard de saint Pol & plusieurs autres en grand nombre vindrent deuant ladicte ville de Guise. Et auec luy estoit messire Thomas de Rampston Anglois à tout certain nombre de combattans: lesquels venus deuant icelle ville, trouuerent grand resistance, de la garnison qui estoit dedans : laquelle garnison affin que leurs ennemis ne les peussent approcher, ardirent leurs faulxbourgs, où il y auoit moult belles habitations, excepté deux maisons qui ne furent point arses . Mais ce ne leur valut riens . Car tantost ledit messire Iean de Luxembourg fait loger ses gens en plusieurs lieux à l'enuiron de la ville : & fait dresser ses engins contre la porte & muraille vers les faulxbourgs. Duquel siege ainsi mis (comme dit est) furent en brief enuoyées les nouuellēs au Duc Regnier de Bar & Comte de Guise, & aussi au Duc de Lorraine son beau pere, par Iean seigneur de Proisy gouuerneur & capitaine d'icelle ville de Guise . Lequel par ses lettres & messages supplioit humblement, en notiffiant la necessité où il estoit au dessusdit Duc de Bar son seigneur, qui luy voulsist donner secours, lesquelles nouuelles despleurent moult à iceux Ducs . Et pourtant assembla plusieurs conseils & grand nombre de gens, pour à ce mettre pourueāce: mais pour doubte qu'ils ne meissent leur païs en guerre contre le ieune Roy d'Angleterre & du Duc de Bourgōgne, ils se deporterent d'y proceder par voye de fait: Et par ainsi se continua ledit siege assez paisiblement par certaine espace de temps , si
non

non des assiegez qui souuentesfois feirent plusieurs faillies en greuât à leur pouoir leurs ennemis. Lesquelles faillies chacune à par soy seroient trop longues à racompter. En cest an enuiron la S. Iean Baptiste, le Comte de Salsebery gouverneur de Champaigne & de Brie, homme tresrenommé en armes, expert & subtil, assiegea en la Comté de Vertus vne bonne petite ville nommée Sodune, laquelle en conclusion fut prinse par force d'assault par vne mine. Et ceux qui estoient dedans pour la plus grand partie furent cruellemēt occis, & en y eut de morts enuiron deux cens tout du moins, & les autres furēt prins prisonniers. Et avecques ce tous leurs biens furent ravis & piliez : leurs femmes violées, & ladicte forteresse demolie. Et si auoit ledit Comte de Salsebery deuât icelle le seigneur de Chastillon, qui fut fait cheualier dedās la mine par la main dudit Cōte. Et estoit le capitaine d'icelle ville vn tresvaillant homme d'armes nommé Guillaume Marin, lequel fut occis avec les autres de ladicte prinse d'icelle. En ce temps le Duc de Bethfort fit assieger le chastel de Gaillon, qui estoit à l'Archeuesque de Roüen moult forte place, laquelle tenoiēt les gēs du Roy Charles. Et finalement fut tant battu par les engins des assiegeans, qu'en la fin les assiegez se rendirent & se departirent sauues leurs vies, & fut icelle forteresse demolie. Enuiron ledit mois de Iuing ledit Duc de Bethfort, fit assieger la ville du chasteau d'Iury. En brief apres le siege, fut la ville gagnée par puissance : Et le chastel qui estoit fort & bien garny de gens d'armes tint enuiron vn mois : au bout duquel les assiegez feirent traicté avec les Anglois, promettant à liurer ladicte forteresse la nuict de l'Assumption nostre Dame, en cas qu'ils n'auroiēt secours du Roy Charles puissant assez pour les combattre & demourer victorieux sur la place. Apres lequel traicté & les seuretez prinse de chacune partie, se deffait ledit siege. En ce tēps les Anglois & les Bourgongnons, tenoient plusieurs sieges sur les marches de Normandie. Et estoient pour ce temps les François fort au dessoubz. Et pour lors fut mise en l'obeissance du Roy Henry Neelle en Tardenois. Et fait Alardin de Monsay traicté avec le Duc de Bethfort, pour la forteresse de la Fere, par condition qu'il ne feroit point de guerre si elle demouroit en sa main : Sinon que le Roy Charles retournaist à puissance outre l'eäie de Seine en venant vers la Champaigne.

Comment le seigneur de Longueual, & plusieurs autres seigneurs tournerent de la partie du Roy Charles.

EN cest an le seigneur de Longueual, Regnault son frere, Iean Blondel le seigneur de saint Symon, Iean de Mailly, le seigneur de Maucourt & plusieurs autres cheualiers de Vermandois, & d'enuiron, qui tousiours auoient tenu le party de Bourgongne, s'assemblerent en la ville de Roye en Vermandois pour auoir aduis & deliberation ensemble, comme ils pourroient resister aux gens d'armes qui souuent degastoient aucunes de leurs villes, de leurs amis & de leurs gardes. Et viuoient indeüement sur le païs, dont moult leur desplaisoit apres qu'ils estoient retournez des courses, sieges & assemblées que par auant auoit faictes messire Iean de Luxembourg pour la conqueste de la Comté de Guise : lesquels venus audit lieu de Roye en y eut aucuns qui s'allierent ensemble, & feirent alliances pour resister contre

lesdits gens d'armes. Les autres doubtans ledit de Luxembourg, s'excuserent en conseillant qu'une autre journée fut prise: dedans laquelle fut enuoyé message propice deuers messire Jean de Luxembourg, sçavoir son opinion, & se c'estoit de son gré que tels destroits feussent faits à ceux qui sur ce se départiroient. Neantmoins les aucuns n'entendirent point à la besongne si avant que depuis elle s'apparut: & pourtant se retrahirent tout coyement d'estre à telles assemblées. Toutesfois ledit seigneur de Longueval, Regnault son frere, messire Jean Blondel, le seigneur de Maucourt, Pierre de Recourt & plusieurs autres leurs alliez continuerent en celle besongne. Et si conclurent ensemble de eux tourner du tout du party du Roy Charles, & meirent dedans plusieurs villes & forteresses, dont les vns estoient seigneurs & les autres capitaines gens de par eux les plus forts: mais brief ensuiuant leur intention vint à cognoissance, pourquoy assez briefuement ils furent en grand cache. Et toutes leurs villes terres & seigneuries furent mises en la main du Roy d'Angleterre: & avec ce la plus grand partie appelée à Ban. Si se rendirent tous subiects, & tindrent tout plainement le party du Roy Charles menant guerre de nuit & de iour au païs du Roy Henry & du Duc de Bourgogne: dont moult de gens furent esmerueillez, pource que ledit seigneur de Longueval & aucuns des autres dessusdits, auoient tout le temps seruy le Duc de Bourgogne & tenu son party: mais ils s'excuserent en disant que c'estoit par les desplaisirs que leur auoient faits & faisoient encores chacun iour les gens du dessusdit sire Jean de Luxembourg: puis disoient que mieux aimoient mettre en aduenture de perdre tous leurs biens, que de viure en telle subiection: iacoit-ce que depuis eurent moult à souffrir. Et y eut pour les causes dessusdictes d'executez à mort, comme cy apres vous fera declairé.

Comment le Duc de Bethfort alla à grand puissance tenir sa journée deuant Iury: laquelle ville & forteresse luy furent rendus.



Y dit l'histoire qu'environ huiet iours en Aoust de cest an, le Duc de Bethfort assembla plusieurs hommes d'armes, archiers & capitaines Anglois: c'est à sçavoir les Comtes de Salsebery & de Suffort, le seigneur de Villeby & plusieurs autres capitaines tant de Normandie comme d'ailleurs, iusques au nombre de dixhuiet cens ou environ homes d'armes, & huiet mille archiers: lesquels il conduisit & mena iusques à Iury pour estre à la reddition d'icelle, dont par avant est faicte mention: & tant cheuaucha à tout son arroy qu'il vint deuant Iury la nuit de l'Assumption nostre Dame. Et tout ce iour se tint en bataille attendant ses ennemis, lesquels estoient tresgrand nombre, & bien dixhuiet mille combattans sous la conduite du Duc d'Alençon, les Comtes d'Aumale, de Ventadour, de Tonnoire, de Donglas & de Bosquen & de Moiry, du Vicomte de Mardonne, du seigneur de la Fayette & plusieurs autres seigneurs & Princes de grand renommée, & estoient à trois lieues pres dudit lieu d'Iury ou environ: lesquels enuoyerēt quarante des mieux courās & plus experts de leur ost, & les mieux montez pour aduiser le cōtennement de leurs aduersaires. Lesquels courās voyans de loing le Duc de Bethfort &

& ses gens en moult belle ordonnance, retournerēt en leur ost: & furent chassez & poursuuius des Anglois. Et eux venus dirent ce qu'ils auoient trouué & veu. Et adoncques les seigneurs dessus nommez du party du Roy Charles, non voyans pour lors leur aduantage, retournerent trestous ensemble iusques à la ville de Vernueil au Perche, qui pour lors tenoit le party du Roy Henry: ausquels ils feirent entendant qu'ils auoient desconfits tous les Anglois, & que leur Regent s'estoit sauué à petite compagnie. Et sur ce propos ceux de ladicte ville de Vernueil leur feirent ouuerture & grand obeïssance, pour ceux & au nom du Roy Charles. Apres laquelle reddition, comme le traicté le contenoit baillèrent saufconduit à aucuns Anglois estans leans, & les renuoyerent à tout leurs haches enuers le Duc de Bethfort. Gerard de la Pailliere qui estoit capitaine d'Iury, voyant que l'heure estoit venue & passée que son secours deuoit venir, alla deuers le Duc de Bethfort qui estoit en bataille deuant pour attendre ses ennemis: & luy presenta les clefs de la forteresse, en luy requerant saufconduit pour luy en aller selon le contenu du traicté tant pour luy comme pour ses gens, lequel luy fut accordé. Et lors ledit Gerard present ledit Duc tira vne lettres, lesquelles il luy monstra en disant: Or voy-ie qu'au iourd'huy m'ont failly dixhuiet grans seigneurs du party du Roy nostre sire, lesquels m'auoient promis de moy donner secours: ausquelles lettres estoient attachez leurs seaux. Et incontinent furent seurement au dessusdit Duc quatre gentils-hommes des gens dudit Gerard. Item apres ledit Duc de Bethfort print conclusion de poursuuiuir les François, qui à ceux d'Iury auoiēt promis de donner secours, & qui pres de là estoient venus, comme dit est. Si enuoya le Comte de Suffort deuant à tout seize cens combattans, pour les cheuaucher & aduiser. Lequel Comte alla à Dampuille & à Vasseux, & de là à Bretueil au Perche à deux lieuës pres de Vernueil, où estoient lesdits François à toute leur puissance. Et ledit Duc de Bethfort alla à Eureux à tout son ost: auquel lieu le Comte de Suffort luy enuoya certain message pour luy faire scauoir, que lesdits François estoient aupres dudit Vernueil tous ensemble. Et pource iceluy de Bethfort se meit à chemin pour y aller, & tant fait qu'il y paruint à tout ses gens pour combattre leurs ennemis: Lesquels par auant leur venue auoient eüe obeïssance de ladicte ville de Vernueil, que souloient tenir les Anglois, par ce qu'ils leur auoient donné à entendre que le dessusdit Duc de Bethfort & tous les siens auoient esté desconfits deuant Iury. Et fut ladicte bataille par vn ieudy dixseptiesme iour d'Aoust en la maniere comme vous orrez de present.

Comment le Duc de Bethfort poursuuiuit les Francois. Et comment il les combattit deuant Vernueil.



R est verité comme ie vous ay ja dit, que le Duc de Bethfort avec ses Barons & cheualiers & gēs d'armes estoit (cōme dit est) deuant Iury. Et là luy furent apportées les nouvelles veritables, que ses ennemis se retrayoient vers Vernueil au Perche. Et adoncques pource que le iour de la reddition d'Iury estoit venu, fait sommer ceux de dedans qu'ils acquitassent leur promesse. Lesquels non ayans esperance de secours, feirēt obeïf-

sance audit de Bethfort, & luy deliurerent ladicte fortresse, en prenant de luy faufconduit pour eux en aller avecques tous leurs biens, sans emmener nuls des prisonniers qu'ils auoient. Et lors commeit ledit Duc, capitaine de ladicte ville vn cheualier de Galles, renomé en armes, accompagné de plusieurs soudoyers. Et apres les dessusdictes choses accomplies le propre iour de l'Assumption, se partit ledit Duc de Bethfort à tout sa puissance de deuant Yury & se meit à chemin pour poursuiuir ses ennemis, & alla logger en vne grosse ville en tirant vers le Perche nomme Dainuille en Vaisseux: & le lendemain tresmatin se deslogea en belle & tresgrande ordonnance, & cheuaucha iusques assez pres de Vernueil. Auquel lieu & à l'environ estoient logez les François ses ennemis: lesquels scachans sa venue se preparerent bien diligemment, & meirent leurs gens en bataille pour assembler à l'encontre d'iceluy Duc. Et feirent seulement vne grosse bataille sans faire avantgarde. Et avecques ce ordonnerent les Lombards, & aucuns autres à demourer à cheual sous la conduicte du Borgne Cameran, du Roussin, Pothon & là Hire, pour rompre & enuahir leurs ennemis par derriere ou au trauers. Et en ce faisant la grosse bataille de François dessusdicté estoit à pied. Pareillement le dessusdit Duc de Bethfort avecques les siens, descendit à pied: & fait mettre ses gens en bataille en vn ost tant seulement, sans aussi faire avantgarde ne laisser homme à cheual. Et furent mis les archiers, au front deuant, ayant chacun vn penchon deuant eux aguisé & fiché en terre. Et estoient les plus grans fols desdits archiers des deux bouts de la bataille par maniere d'aelles. Et derriere les hommes d'armes estoient tous les pages, les cheuaux & les meschans gens non puissans de combattre. Lesquels cheuaux furent par lesdits archiers liez tous ensemble par les hastereaux, & par les queuës en plusieurs lieux les vns aux autres: affin que leurs ennemis de pied & de cheual ne les peussent surprendre. Et pour lesdits cheuaux & bagages garder, furent commis de par le Duc de Bethfort deux mille archiers. Affin que ladicte bataille ne peust par derriere estre enuahie. Et adonc de chacune partie furent faits cheualiers nouveaux en tresgrand nombre. Et apres lesquels, & toutes les ordonnances dessusdictes faictes en iceluy ieudy sixiesme iour d'Aoust, environ trois heures apres nonne, s'assemblerent ces puissantes batailles l'une contre l'autre. Et à l'approcher esleuerent les Anglois tous ensemble vn grand cry, comme ils ont accoustumé faire, duquel s'esmerueillerent moult les François. Laquelle bataille ainsi assemblée dura enuiron trois pars d'une heure moult terrible, cruelle & sanglante. Et n'est point memoire qu'onques fut veu deux parties à si grand puissance, par si grand espace sans veoir lequel auroit victoire. Et en ce faisant les François qui auoient esté ordōnez à cheual pour ferir sur les Anglois par derriere, vindrent iusques aux cheuaux liez ensemble dont dessus est faicte mention: lesquels ils ne peurent trespercer ne passer outre. Et aussi pour la resistance que y meirent les deux mille archiers dessusdits: pourtant iceux François à cheual à tout aucunes bagues & cheuaux qu'ils emmenerent, se meirent à fuir & laisserent tous les autres gens combattans de pied en ce danger. Et adonc ces deux mille archiers Anglois, eux voyans descombres de leurs ennemis, se trouuerent frais & nouveaux avecques leurs gens au front deuant en la bataille, & en esleuant de rechef vn grand cry. Et lors assez brief ensuiuant se commence-

rent

rent les François à desconforter. Et les Anglois en grand hardiesse se bouterent en eux, si les separerent & ouurirent leur bataille en plusieurs lieux. Et tant continuerent lesdits Anglois, qu'en ce faisant, ils obtindrent la victoire & gaignerent la bataille non pas sans grand peine & effusion de sang de chacune partie. Car comme il fut sceu par Roy d'armes, heraux & poursuiuans, & autres gens dignes de foy des François dessusdits, y eut de morts sur la place de quatre à cinq mille combattans : desquels y eut grand partie d'Escoçois & environ deux cens prisonniers. De la partie des Anglois furent morts environ seize cens, tant de la nation d'Angleterre comme de Normandie : desquels furent les principaux deux capitaines, l'un nommé Dodelay & l'autre Charleton. Et de la partie des François y furent morts des gens de nom ceux qui s'ensuiuent : c'est à sçauoir Iean le Comte d'Aumale, le fils au Comte de Harcourt, le Comte de Tonnoirre, le Comte de Ventadour, le Comte de Donglas & messire Iagues son fils, le Comte de Boufquen qui alors estoit Conestable du Roy Charles, & le Comte de Moiry, le seigneur de Grauille ancien, le seigneur de Montenay, messire Anthoine Beaufault & Hugues de Beaufault son frere, le seigneur de Belloy & son frere, le seigneur de Manny, le seigneur de Combrest, le seigneur de Fontenay, le seigneur de Bruneil, le seigneur de Tumblet, & le seigneur de Poisy : en la Daulphiné, le seigneur de Mathe, le seigneur de Rambelle : en Languedoch messire Gaultier de Lindesay, messire Gilles de Gamaches, Godefroy de Malestroit, Iames Donglas, messire Charles de Boin, messire Iean de Vretasse, messire Gilles Martel, le fils de Harpedame, messire Brunet d'Auuergne, messire Raoul de la Treille, Guy de Fourchoniuerre, messire Pochart de Vienne, messire Iean de Murat, le seigneur de Vertois, messire Charles de Gerammes, Dragon de la Salle, le seigneur de Rambouillet, le bastard de Langlan, le Vicomte de Narbonne, lequel apres ce qu'il fut trouué mort en la bataille fut escartellé, & son corps pendu au gibet, pource qu'il auoit esté consentant de la mort du Duc de Bourgogne deffunct, le seigneur de Guictry, messire François de Gangeaux, sire Robert de Laire, messire Loys de Teyr, le seigneur de Foregny, Morant de la Mothe, messire Charles d'Anebal & Robinet son frere, Pierre de Courceilles, sire Aimery de Gresille, Andrieu de Clermont, sire Tristan Coignon, Colinet de Vicomte, Guillaume Remon, Messire Loys de Champagne, Peron de Lippes, sire Loys de Braquemont, le seigneur de Tionuille, le seigneur de Rochebaron, messire Philippes de la Tour, & messire Anselin de la Tour. Et y furent prins prisonniers le Duc d'Alençon, le bastard d'Alençon, le seigneur de Faiette, le sire de Hormit, messire Pierre Herisson, messire Loys de Vvaucourt & Rogier Brouffet, Huchet de saint Mare & Yuon du Puys. Ceux furent les principaux, mais moult en y eut d'autres que ie ne puis pas tous nommer.

ITEM apres que ledit Duc de Bethfort eut obtenu la victoire de la bataille de Vernueil (comme dessus est dit) si r'assembla ses princes autour, & en grande humilité remercia son createur ses mains ioinctes, & les yeux leuez vers les cieux de la bonne aduenture qu'il luy auoit enuoyée. Apres furent desnuez & deuestus grand partie des morts, & fut prins ce qu'il y auoit de bon. Ledit Duc de Bethfort se logea celle nuit autour de Vernueil & fit tresbien guecter son ost, que ses ennemis ne feussent aucunement assemblez. Et le lendemain ceux

qui festoient retraicts dedans la ville & chastel : c'est à sçauoir lesdits François furent sommez de par ledit Duc, qu'ils rendissent la ville & forteresse. Lesquels attains de paour sçachans la grand mortalité & desconfiture de leurs princes, feirent traicté, & rendirent ladicte ville & forteresse en la main dudit Duc par condition, qu'ils s'en iroient sauf leurs corps & leurs biens. Si y estoit le seigneur de Rambures. Et apres que ledit Duc eut regarny ladicte ville & chastel de Vernueil de ses gens, il retourna à tout son ost en Normandie. Item le propre iour de la bataille dessusdicte, se departirent de la compagnie dudit Duc de Bethfort certain nombre de Cheualiers & escuyers de Normandie, & des marches conquises à l'enuiron, qui autresfois luy auoient fait serment de loyauté, & se rendirent fugitifs. Pour laquelle offence les aucuns furent depuis grandement punis par ledit Duc, tant par punition corporelle : tant de leurs terres comme autres biens, qui furent prins comme confisquez & mis en la main du Roy Henry. Si y fut entre eux le seigneur de Choisy, & messire Charles de Longueual. En ce temps fut prins le seigneur de Maucour, qui estoit complice du seigneur de Longueual, & des autres dessus declairez par maistre Robert le ieune Baillif d'Amiens. Et fut par le conseil du Roy Henry decapité en ladicte ville d'Amiës, & son corps mis au gibet. Ses biens & heritages confisquez au Roy : & pareillement vne autresfois fut prins Pierre de Recomp, qui estoit des complices, par vn nommé Raoul de Gaucourt, lequel l'enuoya à messire Jean de Luxembourg : & ledit de Luxembourg l'enuoya à Paris où il fut escartellé comme trahistre, & ses membres furent pendus en plusieurs lieux. Item brief ensuiuant furent portées les nouvelles d'icelle douloureuse iournée deuers le Roy Charles : lequel pour la destruction de ses Princes & de sa cheualerie, eut au cueur tresgrand tristesse & telle que plus n'en pouoit. Et fut par long temps en tresgrand ennuy, voyant que de toutes parts ses besongnes luy venoient au contraire.

Comment ceux de la ville de Tournay se resmeurent l'un contre l'autre.



L'entrée du mois de Septembre se rebellerent, & armerent l'un contre l'autre les bourgeois & commune de la ville de Tournay. C'est à sçauoir ceux du marché & de la vieille Fermete, contre ceux d'entre deux murs. Et fut icelle esmeute faicte pour vne chaine descendue par nuict enuers la boucherie, par vn feure qui demouroit entre deux murs : & pour celle cause fut banny de la cité de Tournay. Apres lequel bannissement, ceux d'entre deux murs se croiserent de droictes croix en tresgrand nombre. Et les autres du marché leuerent ponts, & feirent barriere contre eux & grans bouleuers. Et apres commencerent à ietter & traire l'un contre l'autre : mais en la fin prindrent trefues ensemble pour l'amour de leur procession. Et en conclusion se rappaiserent pour ceste fois, sans porter grand dommage les vns aux autres.

Comment ceux de Guise traicterent avecques messire Jean de Luxembourg, & messire Thomas de Rampston.

Item



Item apres ce que messire Iean de Luxembourg, & messire Thomas eurent par bonne diligence & grand labeur continué leur siege deuant la ville & chastel de Guise, iusques au my mois de Septembre ou enuiron : les assiegez voyans les viures faillir & non ayans esperance de secours, commencerent à traicter avec les deux seigneurs dessusdits. Et en fin furent d'accord par les conditions cy apres declairées. A tous ceux qui ces presentes lettres verront ou orront, Iean de Luxembourg seigneur de Beurevoir, & Thomas de Rampston cheualier Chambellan de monseigneur le Regent, capitaine commis & député en ces marches de par le Roy de France & de Angleterre nostre souuerain seigneur : par monseigneur le Regent & par monseigneur le Duc de Bourgongne salut. Sçauoir faisons qu'aujourd'huy auons traicté, appoincté & accordé és noms que dit est, avec Iean de Proisy gouuerneur & capitaine des ville & chastel de Guise, les gens d'Eglise, gentils hommes, compagnons de guerre manans & habitans d'iceux ville & chastel. Et par ces presentes traictons, appoinctons & accordons sous les conditions, moyés, conuenances & promesses cy apres declairées. Premièrement lesdits gouuerneurs, gens d'Eglise, gentils-hommes, compagnons de guerre, bourgeois manans & habitans de ladicte ville & chastel de Guise, se sont mis & par nous ont esté receuz à aucune composition : moyennant qu'ils ont promis, iuré & enconuenancé, rendre, bailler & deliurer franchement & absolument lesdits ville & chastel à nous, ou à l'un de nous aux deputez de l'un de nous ou à autre que le Roy de France & d'Angleterre y aura commis & ordonné, au premier iour de Mars prochain venant. En cas qu'à ce iour prins pour ce faire, ne soient secourus : & que les seigneurs ou princes de party que ceux de Guise tiennent ou aucuns autres par eux commis ou deputez à ce, ne combattroient l'un de nous ou autres commis de par le Roy & toute nostre puissance : c'est à sçauoir entre la ville de Sains & la maison de Fouquaufains, où nous auons à ceux de Guise esleu & aduisé ensemble, plait pour tenir ladicte iournée. Item se les Princes & seigneurs du party que lesdits de Guise tiennent ou leurs commis & deputez, venoient pour combattre ainsi que dit est, & ils estoient desconfits ou se tournoient en fuitte : lesdits de Guise seroient tenus de nous rendre & deliurer iceux ville & chastel. Item au cas que l'un de nous ou autres commis de par le Roy de France & d'Angleterre, seront desconfits en bataille, ou que comparer n'y oserions sur ledit lieu & place pour cōbattre au premier iour de Mars : nous serons tenuz de rendre, bailler & deliurer ausdits de Guise sans aucune difficulté les hostages & seuretez que pour la reddition desdits ville & chastel nous auront par eux esté baillez. Item mondit seigneur le Regent & mondit seigneur de Bourgongne, ou l'un d'eux & les commis d'eux ou l'un d'eux : nous ou l'un de nous seront tenuz d'estre & comparoir en la place en telle puissance que bon luy semblera, & tenir iournée tout le premier iour de Mars. C'est à sçauoir depuis l'heure de Prime, iusques à soleil couchant cedit iour. Et si combattus ou vaincus n'estoient lesdits de Guise, seront tenus incontinent apres soleil couché sans aucune difficulté, fraude ou mal engin nous bailler & deliurer lesdits ville & chastel de Guise, en receuant de nous lesdits hostages. Item ce pendant ladicte composition, ou vn mois apres, que ledit gouuerneur & tous autres estās

esdits ville & chastel, gens de quelque estat qu'ils soient, s'en veuillent partir pour aller ensemble ou à part outre la riuere de Seine deuers leurs Princes, ou ailleurs en places tenans leur party, ils pourroient faire & emporter & faire emmener avecques eux tous leurs cheuaux & armeures, bagues & autres biens meubles. Et pour tout ce faire seurement, leur baillerons & ferons bailler par mondit seigneur le Regent (si requis en sommes) bons saufs-conduits, suffisans & vallables avecques conduit, fils se partoient ensemble outre la somme de vingt personnes. Et se aucuns vouloiēt aller hors du Royaume fut en Hainault ou autre part, faire le pourroient à leurs perils. Item & si apres icelle composition, aucuns des dessusdits de Guise veuillent demourer sur leurs lieux, & ailleurs es lieux & pays obeïssans au Roy & à mesdits seigneurs le Regent & le Duc de Bourgogne, ils y seront receuz en faisant le serment de la paix finale entretenir, faicte entre les royaumes de France & d'Angleterre. Et iouyront franchement de tous leurs heritaiges & possessions non donnez. Et fils se veulent partir (comme dit est) ils emporteront avec eux leurs biens meubles tant seulement. Item lesdits de Guise & chacun d'eux en ayant bulette, ou saufconduit des conseruateurs ordonnez sur l'entretenement de ce present traicté, qui seront tenus de leur bailler, pourront aller en aucunes villes que nous leur auons ordonnées & ordonnons : & en icelles entrer par le congé des capitaines où gardes desdictes places, ou de leurs lieutenans. C'est à sçauoir saint Quentin, Riblemont, Laon, Bruyeres, Crespy, Marle, Aubenthon, Vertus, & es villages d'environ pour recouurer & auoir pour leur argent tous viures raisonnablement & autres denrées, qui seroient leur besoing, pour leur vie & sustentation le temps durant d'icelle composition tant seulement. Item lesdits de Guise pourront poursuiuir leurs debtes licites & raisonnables par deuant les conseruateurs, qui en auront la cognoissance, & seront tenus de faire raison aux parties icelles ouyes. Item si pendant icelle composition, aucuns tenans le party du Roy, prenoient par eschelles ou autrement lesdits ville & chastel de Guise, nous ferons faire à nostre loyal pouoir de les en faire vider, & mettre iceux ville & chastel, ensemble lesdits de Guise à leur premier estat & deu : lesquels aussi ne les prendront ne feront prendre ledit temps durant. Item pendant icelles compositions, lesdits de Guise, pourtant qu'ils soient residens esdits ville & chastel ne prendront ou feront prendre couuertement n'en appert aucunes places de l'obeïssance du Roy & de ses seigneurs, & ne feront guerre à leurs subiets en nulle maniere. Item abolition generale est faicte ausdits de Guise & toutes gens de quelque estat qu'ils soient & de tous cas : excepté à ceux qui sont coupables de la mort monseigneur de Bourgogne que Dieu absolve, ceux qui ont iuré la paix finale des coupables de la trahison commise sur la personne du Duc de Bretaigne, tous Anglois & Irois se aucuns en ya esdits ville & chastel, lesquels demourront en iustice. Et pour en auoir plainement cognoissance, lesdits de Guise nous bailleront par escript les noms & furnoms de ceux qui de present sont demourans esdictes villes & chastel gens de guerre & autres. Item ce pendant icelle composition aucuns de nostre part ou de la part desdits de Guise, se commettront aucune chose ou contraire ou preiudice de ce present traicté, ou des dependences iceluy ne sera ja rompu, enfraint ne viollé : mais
pourront

pourront & seront tenus les conseruateurs dudit traicté faire prendre & punir les malfaiçteurs, & aussi de faire faire la restitution là où il appartiendra. Item lesdits de Guise pendant icelle composition, ne feront guerre pourtant qu'ils soient demourans en icelle ville & chastel, n'en ceux ne receuront ne soustien-dront aucuns de leur party qui vueillent faire guerre. Et sil aduenoit que au-cûs faisans guerre feussent par ceux du party du Roy, & desdits seigneurs pour-suiuis à veuë d'œil & mis en chace iusques dedans ladicte ville & chastel: iceux de Guise seront tenus les bailler & deliurer à ceux qui ainsi les auront pour sui-uis & chassiez, pour en faire comme de leurs prisonniers. Item pendant icelle composition lesdits de Guise ne pourront, ou devront demolir iceux ville & chastel ne fortifier autrement qu'ils sont de present: & avecques ce ne demo-liront point les approches de dehors. Item incontinent que nous aurons fait retraire en seureté tous les canons, artillerie, engins, habillemens de guerre & autres biens estans en nostredit ost, nous leuerons nostre siege & partirons de deuant lesdits ville & chastel pour aller où bon nous semblera. Item ledit gou-uerneur & autres gentils-hommes & bourgeois desdits ville & chastel iusques au nombre de xxiiij. personnes, iurerent solennellement tenir & faire entrete-nir ce present traicté sans enfreindre en aucune maniere. Et ceux qui aurôt seel, le scelleront de leurs seaux. Item avecques ce pour plus grand seureté, lesdits de Guise nous bailleront huit personnes en hostage: c'est à sçauoir Iean de Re-gnault de Hamel, Iean de Cadeuille, Iean de Beauuoir, Iean de saint Germain, l'ancien Vvautier, messire Valerant du Mont, & Iean de Flangin de Voulbes. Et en cas que aucuns iroient de vie à trespas ou s'en fuiront pendant icelle compo-sition, lesdits de Guise nous bailleront & fourniront tousiours de huit person-nes hostaigiers aussi suffisans ou plus. Item que nous & lesdits de Guise auons esleu & ordonné ensemble d'un commun accord & consentement: & par ces presentes eslisons & ordonnons conseruateurs de ce present traicté: c'est à sça-uoir de nostre costé messire Dauiod de Poix chevalier. Et du costé de ceux de Guise Collard de Proisy escuyer ou son commis. Auquel messire Dauiod ou à son commis, auons donné & donnons plain pouoir & auctorité de bailler aus-dits de Guise saufconduicts ou bulletes necessaires, de cognoistre & determi-ner de tous cas qui estoient approchez: qui tant d'une part comme d'autre, se pourront mouuoir pendant ladicte composition sur les promesses & conuenā-ces cy dessus declairées & chacunes d'icelles. Item auons promis & iuré, iurons & promettons loyaument sur nostre honneur accomplir toutes les choses cy dessus declairées, au regard de celles que tenus sommes d'accomplir de tout no-stre royal pouoir, & chacune d'icelles garder & entretenir par tous les subiects & obeissans au Roy & à mesdits seigneurs le Regent & de Bourgogne sans en-freindre en aucune maniere. Item pour la plus grande seureté de ce, ferons le plus diligemment que faire se pourra louer, ratifier & approuer ce present trai-cté par mondit seigneur le Regent en la forme & maniere cy dessus declairée. En tesmoing de ce nous auons fait mettre noz seaux à ces presentes: donné en nostre siege deuant lesdits ville & chastel de Guise le dixhuitiesme iour de Septembre, l'an mille quatre cens xxiiij. Apres lequel traicté fait & accompli comme dessus est contenu, les hostages baillées, se departit le siege de deuant

Guise, & retourna messire Jean de Luxembourg en son chastel de Beaurevoir, en donnant congé à ses capitaines. Et messire Thomas de Rampston à tout ses Anglois alla deuers Paris, où estoit le Duc de Bethfort où il fut receu moult ioyeusement.

EN ce temps fut traicté fait entre le seigneur de Montagu tenant party du Duc de Bourgogne d'une part, & Estienne de Vignolles dit la Hire d'autre part. C'est à sçavoir que ledit de Montagu deust auoir l'obeissance de Vitry en Parthois, & autres forteresses en Champagne que tenoit ledit la Hire, dedans le premier dimanche de Karesme ensuiuant en cas qu'il n'auroit secours du Roy Charles audit iour : lequel secours ne luy fut point enuoyé. Et pource ainsi que promis l'auoit, bailla audit seigneur de Montagu l'obeissance des dessusdictes villes & forteresses qu'il tenoit en Champagne. En ces iours messire Manfroy de saint Leger & le bastart de saint Pol, assemblerent de quatre à cinq cens combattans, lesquels ils conduirent au pays de Barrois : & là feirent maux inestimables, & acueillirent grans proyes, à tout lesquels ils retournerent hors d'iceluy pays sans auoir empeschement. En cest an au mois d'Octobre le Duc de Clocestre & Jacqueline de Bauiere, Comtesse de Hainault, de Hollande & de Zelande : laquelle ledit Clocestre auoit espousée par auant en Angleterre, comme dessus est dit : nonobstant que le Duc Jean Duc de Brabant son premier mary fut encores en vie, à tout cinq mille combattans Anglois ou enuiron vindrēt nageant par mer du pays d'Angleterre à Calais, en intention d'aller en puissance d'armes au pays de Hainault : lequel, comme dit est, appartenoit à ladicte Jacqueline pour d'iceluy auoir l'obeissance & gouuernement. Et estoit lors avecques eux principal gouuerneur de leurs gensdarmes le Comte Mareschal Anglois.

Comment les Ducs de Bethfort & de Bourgogne prindrent peine à appaiser les Ducs de Clocestre & de Brabant.



L'issue du mois d'Octobre conuindrent ensemble en la cité de Paris les Ducs de Bethfort & de Bourgogne, chacun à tout son conseil ainsi que promis l'auoient à la dernière conuention par eux tenue à Amiens, pour traicter de la paix & diffence qui estoit meüe entre le Duc Jean de Brabant & le Duc de Clocestre. Et là en ladicte ville de Paris practiquerent, & debattirent la matiere en grand deliberation de conseil par plusieurs iournées selon les propositions, allegations & probations d'une partie & d'autre : jaçoit ce qu'icelles parties eussent proces en court de Rome deuant le Pape. Et en fin traicterent tant lesdits Ducs de Bethfort & de Bourgogne, que ils feirent appoinctement selon leur aduis & de leurs conseils entre icelles parties. Lequel traicté ils enuoyerent par leurs ambassadeurs deuers les Ducs de Brabant & de Clocestre. Et alla en ceste ambassade deuers ledit Duc de Clocestre à Calais, où il estoit luy & sa femme, messire Raoul le Bouteiller & l'Abbé Fouquans. Lesquels là venus, monstrerent audit Duc les articles dudit appoinctement & de leur ambassade. Lesquels eurent dudit de Clocestre & de la Dame responce negative, disans ainsi que point ne tiendroient celle ordonnance. Mais dirent qu'ils iroient en Hainault à puissance prendre l'obeissance de leur pays. Et sur ceste responce se departirent lesdits ambassadeurs. Et ceux qui furēt enuoyez

enuoyez deuers ledit Duc de Brabant, eurent de luy responce auecques son conseil, que l'appoinctement que auoient fait les Ducs de Bourgongne & de Bethfort, il auoit bien pour agreable & en estoit content:lesquelles responce des deux Ducs dessusdits, furent portees à Paris deuers les Ducs de Bethfort & de Bourgongne qui de ce furent fort troublez, pource que ledit Duc de Clocestre n'auoit voulu tenir ledit appoinctement qu'ils auoient fait. Et par especial le Duc de Bourgongne en fut tresmal content, & tant qu'il dit tout plainement à son beau frere le Duc de Bethfort: puis qu'il veoit que son frere le Duc de Clocestre ne vouloit condescendre à nul traicté de raison, qu'il ayderoit de toute sa puissance à son cousin le Duc de Brabant à garder son honneur, & sa seigneurie contre ledit Duc de Clocestre: par lesquelles tribulations, ledit Duc de Bethfort fut trescourroucé en cuer contre son frere, doubtant que par telles diuisions & dissensions, les alliâces qu'ils auoient en France auecques ledit Duc de Bourgongne, ne fussent du tout corrompues & adnichillées. Item lesdits Ducs de Bethfort & de Bourgongne, feirent la feste de Toussaincts & le iour des ames dedans Paris solemnellement, chacun en leurs hostels. Et lors aucuns iours ensuiuans ledit Duc de Bourgongne fait en son hostel d'Artois à ses propres despens, les nopces de messire Iean de la Trimouille seigneur de Ionuelles & de la damoiselle de Rochebaron seur au seigneur d'Amboise, qui pour ce temps se tenoit auecques la Royne de France, femme au Roy Charles deffunct en la cōpaignie de la dame de Lafferté. Ausquelles nopces furent ladicte Royne, ledit Duc de Bethfort, sa femme la Duchesse seur au Duc de Bourgongne: auecques eux le Comte de Salsebery & la Comtesse sa femme, le Comte de Suffort, l'Euesque de Theroüane, le seigneur d'Estable, auecques tresgrand nombre de notables cheualiers, escuyers, dames & damoiselles, & autres gens de grand & noble estat, qui tresgrandement furent festoyez & receuz par ledit Duc de Bourgongne & les siens. Et furent adonc grans resolutions & esbatemens, tant en boire comme en mangiers riches & precieux, comme en dances, ioustes & autres esbatemens. Et mesmes iousterent les Ducs de Bethfort & de Bourgongne, & aucuns autres Princes auecques grans nombre de leurs cheualiers. En apres ledit Duc retourna de Paris en son hostel de Bourgongne, & là print en mariage par dispensation apostolicque, la vefue de son oncle Comte de Neuers iadis mort à la bataille d'Azincourt. Laquelle dame estoit moult renommée de viure sainctement, & auoit du dessusdit Comte de Neuers deux enfans. Et si estoit seur germaine au Comte d'Eu, qui pour lors estoit prisonnier en Angleterre & demie seur à Charles de Bourbon Comte de Clermont. En ce mesme temps rendit son esprit Iean de Bauiere iadis Euesque de Liege, oncle au Duc de Bourgongne & à la Duchesse Iaqueline de Bauiere. Et pourtât qu'il n'y auoit nul enfant de la Duchesse de Bourgongne sa femme, il declaira en son derrain ledit Duc de Bourgongne son hoir & successeur. Et meit du tout en oubly la dessusdicte Iaqueline de Bauiere sa niepce.

Comment le Duc de Clocestre & la Duchesse sa femme allerent de Calais en Hainault, prendre l'obeissance des bonnes villes: & comment le Duc de Bourgongne se prepara pour aller en l'ayde du Duc de Brabant son cousin.



En la fin du mois de Novembre, le Duc de Cloestre avecques son grand ost qu'il auoit amené à Calais, comme dit est dessus, & la Duchesse Iaqueline sa femme en sa compagnie se meit à chemin. Et par Houdain & au dehors de Lens en Arthois alla en Hainault. Et en passant parmy le païs du Duc de Bourgogne, ne souffrit faire nul desroy, sinon prendre viures courtoisement. Et alla premier à Bouchain & à Mons, où il fut obeï assez liberallement. Auquel lieu vindrent deuers luy plusieurs des seigneurs & gentils-hommes du païs pour à luy & à sa femme faire seruire & obeïssance. Et brief ensuiuant feirent serment audit Duc de Cloestre toutes les bonnes villes de la Comté de Hainault appartenans à la Duchesse Iaqueline, qu'il disoit estre sa femme: & aussi tous les seigneurs & gentils-hommes du païs, sinon seulement la ville de Halx, qui tint le party du Duc de Brabant. Et pareillement le tindrent le Comte de Conuersan seigneur d'Anghien, & messire Angilbert d'Anghien, & Iean de Iumont avecques toutes leurs villes & forteresses. Et les autres, comme dit est, tant nobles comme bonnes villes en rōpant & adnichillant le serment que autresfois auoient fait au Duc de Brabant, teindrent plainement le party d'iceluy Duc de Cloestre & de la Duchesse Iaqueline. Item aucuns iours apres que ledit Duc de Bourgogne eut espousé sa femme, comme dit est dessus, il se partit d'icelle, & alla à Mascon, où il tint parlemēt avecques le Duc de Sauoye & les ambassadeurs du Duc de Bretaigne: Desquels estoit le principal Artus Comte de Richemont: lequel parlement durant, vindrent audit lieu de Mascon enuoyez de par le Roy Charles de Bourbon Côte de Clermont, l'Archeuesque de Reims, l'Euesque du Puys & aucuns autres notables ambassadeurs. Lesquels entre autres choses traicterent le mariage dudit Comte de Clermont, & d'Agnes seur germaine du Duc de Bourgogne. Et là promet ledit Duc de Bourbon en parolle de Prince en la main dudit Archeuesque, de l'espouser dedans certain temps qui par les parties fut conclud. Et apres sans planté d'autres grandes besongnes accomplir, se departirent l'un de l'autre & retourna chacun en son propre lieu.

ITEM Philippes Duc de Bourgogne sçachant la venue de Honfroy Duc de Cloestre en Hainault, de ce moult indigné, enuoya ses mandemens patens en ses païs de Flandres, d'Arthois & à l'enuiron par toutes ses dominations. Lesquels sans delay furent publiez és lieux accoustumez. Contenans que tous nobles & autres de quelque estat qu'ils fussent, qui se auoiēt accoustumé d'armer, se meissent sus en armes pour aller en l'ayde du Duc de Brabant, contre le Duc de Cloestre en la compagnie de messire Iean de Luxembourg, des seigneurs de Croÿ, de l'Isle-Adam & autres capitaines, qui à ce seroient commis pour les conduire & mener. Apres laquelle publication s'essemblerent tresgrand nombre de gens d'armes sous la conduicte desdits seigneurs, qui tous ensemble se tirerent deuers Philippe Comte de saint Pol, frere au Duc Iean de Brabant. Auquel de par ledit Duc fut baillé la charge de faire guerre, & resistance contre ledit Duc de Cloestre. Avec lequel Comte de saint Pol estoit principal gouuerneur Pierre de Luxembourg, Comte de Conuersan & Braine, seigneur d'Anghien. Et si y estoit messire Angilbert d'Anghien Damoiseau de Vissemalle, de Rosbarre & aucuns autres grands seigneurs Bannerets du païs de Brabant,

bant, avec grand multitude de commun du païs de Brabant & infinis habillemens de guerre. Et adonc commença de toutes parts la guerre de Hainault moult dommageuse par feu & par espée : parquoy le pource peuple fut moult oppressé, car le dessusdit Duc de Cloestre meit grand garnison de ses Anglois audit païs de Hainault en plusieurs villes & forteresses à luy obeissans. Et pareillement le fait le Comte de S. Pol sur toutes les frontieres de son obeissance. Lesquelles garnisons souventesfois couroient sur les marches de l'un l'autre, en faisant (comme dit est) grans & innumerables dommages.

Comment le Duc de Cloestre enuoya vnes lettres au Duc de Bourgogne & la coppie d'icelles.



Tem apres ce qu'il fut venu à la cognoissance du Duc de Cloestre, que le Duc de Bourgogne par ces mandemens auoit fait assembler gens d'armes par ses païs, pour aller contre luy à l'ayde du Duc de Brabant, il fut de ce grandement malcontent. Et pourtant escriuit vnes lettres : lesquelles lettres il enuoya en Bourgogne deuers ledit Duc, & contenoient mot apres autre ce qui s'ensuit. Hault & puissant Prince, trescher & trefaymé cousin : nouuelles me sont venues qu'en voz terres & seigneuries par deça on a publié, & fait cry de par vous, que toutes gens disposez aux armes soient prests pour aller en la compagnie de messire Iean de Luxembourg & autres au seruice de mon Cousin de Brabant, à l'encontre de moy, mes amis, bienvueillans & subiects en donnant à entendre contre verité plusieurs choses : au tant ou plus en ay apperceu par vne coppie de certaines lettres, qui se dient de vostre part escriptes en vostre ville de Dijon le vingtiesme iour de Decembre : lesquelles publications & lettres, comme ie croy, viennent de vostre sceu & ordonnance : pourtant que assez sçauiez ce que le temps passé ay fait à vostre priere, contemplation & requeste. Et par quantes fois soubz mon beau frere le Regent, & à vous me suis soubmis pour cuider appaiser le differend & discord, dont en icelles lettres est fait mention, ce qui est entre mondit cousin de Brabant & moy : quantes iournées en ay acceptées, & que les offres en mon prejudice en fait faire : ausquelles, comme vous sçauiez, ceux de la partie du Duc de Brabant ne voulurent oncques condescendre ne prendre aucun traicté, supposé qu'icelles lettres soient coulourées au contraire, ainsi que par la coppie d'icelles (si vous la voulez visiter) apparoir vous pourra. Et ie sçay aussi que ce que fait en ay, n'est eslongné de vostre bonne memoire. Et si sçauiez que si proximité de lignage vouloit vous mouuoir d'aucune chose faire, plustost deuriez estre enclin de ayder à ma partie que l'autre, veu que ma compaignie & espouse est deux fois vostre cousine germaine, & que mondit cousin de Brabant de tant ne vous appartient. Et encores oultre y estes obligé par le traicté de la paix par vous & moy solemnellement iuré, ce que oncques ne iura ledit Duc de Brabant : mais (comme vous sçauiez) a fait alliances contraires qui contre luy vous deuroient mouuoir. Lequel traicté n'a esté par moy enfrain ne ja ne fera : ains de l'auoir pensé ce me seroit moult grief, & me sembleroit, si fait l'auoye, que depuis ne me pourroit bien venir ainsi qu'il ne feroit. Et aussi me tiens- ie certain qu'en vostre vie ne ferez le contraire. Et d'autre part, n'avez en-

cores peu appercevoir que auant ne depuis que ie suis par deça, n'aye tousiours esté desirant de à vous & aux vostres complaire : ne que i'aye fait, procuré ou porté, ne souffert procurer à vous ne à voz subiects aucuns griefs ou dommages: mais lesdits subiects ay traicté & eu aussi pour recommandez comme les miens propres, cōme de ce vofdits subiects vous peuuent donner cognoissance. Auecques ce sçauiez, comment pieça vous ay escript que vray est, que par deça ne me suis entremis de demander autre chose : ains suis content d'auoir ce qui me appartient à cause de madiète compaignie vostre cousine : & qu'à l'ayde de Dieu garderay tant qu'elle viura, qui bien est assez suffisant. Et se aucune chose me a conueni & conuient faire contre mondit cousin, comme vous sçauiez, n'en suis en coulpe: mais par contraincte par ses emprinses pour mon honneur garder & mon païs deffendre, le m'a conueni faire selon que sçauoir le pouez. Quand à la verité (comme ie tiens) vous la sçauiez desia, qui sont assez notiffiantes choses par lesquelles ie ne puis croire, que oncques lesdictes publicatiōs & lettres precedētes de vostre sceu ou certaine cognoissance ayent esté faictes. Pour ce hault & puissant Prince, mon trescher & tresaimé cousin: ie vous prie tres à certes que ce que dessus est dit, vous vueillez bien considerer. C'est à sçauoir, ce que i'ay fait à vostre contemplation & requeste, le refus de l'autre partie, la prochaineté de lignage, le traicté de paix que n'ay fait à l'encontre d'aucune chose du vostre, & lesdictes entreprinſes de mes aduersaires. Et ie croy que supposé ores quād ainsi seroit, qu'on m'a donné à cognoistre que ne puis encores croire, se bien y pēsez prendrez autre conseil, & serez d'opinion contraire. Quand autrement faire le voudrez, Dieu à qui on ne peut riens celer gardera mon bon droit, & le sermēt qu'auiez ie y appelle. Hault & puissant Prince, trescher & tresaimé cousin, par ce porteur me faictes sçauoir de vostre intention, avec fil est aucune chose q̄ pour vous faire puisse, ie m'y emploiray de bon cueur, nostre seigneur le scet qui soit garde de vous. Escrip̄t en ma ville de Mons, sous mon signet le douziēme iour de Ianuier. Hault & puissant Prince mon trescher & tresaimé cousin, ie vous enuoye en ces presentes lettres encloses la semblable coppie d'icelles lettres, ainsi signées de Croÿ : desquelles lettres la superscription estoit : A hault & puissant Prince mon trescher & tresaimé cousin le Duc de Bourgongne. Et l'infraſcription: vostre cousin le Duc de Cloestre Comte de Hainault, de Hollande, de Zelande, de Pennebourg & seigneur de Frise : lesquelles dessus declairées & receuēs du Duc de Bourgongne, les visita en grand declaration de cōseil. Et apres rescriuit par la maniere cy apres declairée audit Duc de Cloestre.

Coppie des premieres lettres du Duc de Bourgongne enuoyées au Duc de Cloestre.

Hault & puissant Prince Honfroy Duc de Cloestre: ie Philippe Duc de Bourgongne, Comte de Flādr̄es & d'Arthois, ay receu voz lettres à moy adressans, escriptes à Mons en Hainault sous vostre signe le xij. iour de Ianuier dernier passé, contenans plusieurs choses: & entre les autres, qu'auiez ouÿ nouuelles qu'en mes terres & seigneuries par delà on a fait publier & crier de par moy, que toutes gens disposez aux armes, fussent prests pour aller en la compaignie de nostre trescher & tresaimé cousin messire Jean de Luxembourg & autres, pour aller au seruice de mon trescher & tresaimé

aimé cousin le Duc de Brabant à l'encontre de vous & de voz bienvueillans
 & subiects, en donnant à entendre plusieurs choses contre verité, comme por-
 tent vosdictes lettres. Et que autant ou plus que auez apperceu par la coppie
 qu'enuoyée m'auez de certaines lettres, qui se dient de ma part escriptes en ma
 ville de Dijon le vingtynielme iour de Decembre. Sur ce hault & puissant
 Prince, de la plus grand partie d'icelles voz lettres ie me passe de faire recita-
 tion & responce: car guerres ou riens ne m'en est, forts de ce qui touche à mon
 honneur que ie ne vueil ou dois souffrir blasmer ne charger contre droit & rai-
 son. Et pourtant vous escripts & signifie, que les lettres & publications d'icel-
 les sont semblables en substance en ladicte coppie que m'auez enuoyée, proce-
 dant de mon sceu & les ay ordonnées, mandées & commandées estre faictes.
 A quoy ay esté meu du reffus par vous fait, de obtemperer aux articles & points
 dernièrement par beau frere le Regent, & moy à grand deliberation du conseil
 à Paris aduifées, & depuis à vous présentées, pour l'appaisement du contends &
 discord d'entre mō trescher & tresaimé cousin le Duc de Brabant d'une part, &
 vous d'autre. Lesquels articles iceluy mondit cousin le Duc de Brabant (pour
 Dieu mettre de son costé, & cōplaire audit beau frere & à moy) auoit octroyées
 & accordées: mais ce nonobstant vous apres vostredit reffus & sans vouloir at-
 tendre la fin du proces pendant en la Court de Rome sur ledit contends, estes à
 puissance d'armes & de guerre entré au pays de Hainault, vous efforçant d'en
 debouter mondit cousin de Brabant & de luy en oster sa possession. Et desdictes
 choses sont mesdictes lettres causées, qui sont certaines & veritables, si comme
 vous pouez sçauoir & ignorer, ne nier ne le pouez. Si n'ay en ce riens donné à
 entendre contre verité, comme mensongierement & à tort me mettez sus, &
 voulez charger, comme il me semble, par voz lettres dessusdictes. Lesquelles ie
 garde par deuers moy, pour enseigner quand temps sera. Assez voy & trop m'est
 deshonneur, que fait auez & efforcez faire à mondit Cousin de Brabant sans
 vouloir charger mon honneur & renommée, que endurer ne voudroye ne vueil
 de vous ne de nuls autres. Aussi croy-ie que ceux à qui ie attiens & qui me at-
 tiennent de sang, lignage & affinité: & mes loyaux, feaux, vassaux & subiects, qui
 si grandement & si loyaument ont seruy messeigneurs, mes predecesseurs &
 moy ne le voudroient pas ainsi passer ne souffrir. Pource est il, que ie vous
 somme & requiers par ces lettres, que vous rappelez & desdictes ce que m'a-
 uez escript, que j'ay donné chose à entendre contre verité, comme dit est: &
 selon ce que contiennent vosdictes lettres és escripts patens. Et se faire ne le vou-
 lez, & que vueillez maintenir la deuantdicte parolle qui peut charger mon hō-
 neur & renommée: ie suis & seray prest de m'en deffendre de mon corps contre
 le vostre, & de vous cōbattre à l'ayde de Dieu & de nostre Dame, & prenāt iour
 raisonnable & cōpetant par deuant treshault, tresexcellent & trespuissant Prince
 l'Empereur mon trescher seigneur & cousin. Et affin que vous & tout le monde
 voye, que ie vueil abbreger ceste chose & garder mon honneur estroictement.
 Si mieux vous plaist ie suis content que nous prenons à iuge mon trescher &
 aimé cousin: & aussi vostre beau frere le Regent Duc de Bethfort, leq̃l par raison
 ne deurez refuser: car il est tel Prince que ie sçay, qu'à vous & à moy & à tous au-
 tres il voudroit estre droicturier iuge. Et pour l'honneur & reuerence de Dieu,

& pour euitier effusion de sang Chrestien, & de la destruction du peuple dont en mon cuer ay compassion : il doit à vous & à moy qui sommes cheualiers adolefcens, estre plus conuenable (au cas que les parolles dessusdictes voudriez parmaintenir) par mō corps sans plus ceste querelle mener à fin sans y aller par voye de guerre, dont il conuiendroit maints gentils-hommes & autres tant de vostre ost comme du mien finer leurs iours piteusement: laquelle chose me desplaeroit s'ainsi le failloit faire. Et aussi deuroit il faire à vous veu que la guerre des Chrestiens doit desplaire à tous Princes Catholiques. Et à moy & elle desplaust & desplaist s'autrement se pouoit faire. Hault & puissant Prince, sur le contenu de cestes me vueillez faire responce par voz lettres patentes, & par le porteur de cestes, ou par autres le plus brief que faire se pourra sans proroguer ceste chose par escritures ou autrement: car i'ay desir besongne, preigne briefue conclusion pour mon honneur. Et ne doy laisser ne laisseray qu'elle demeure en ce poinct. Et sur ceste matiere apres la reception de voz lettres dessusdictes, vous eusse plustost fait responce & rescrit, n'eussent esté plusieurs grandes occupations qui depuis me sont suruenues & m'ont retardé. Et affin qu'il vous appaire que ce vient de mon sceu & propre mouuement, i'ay escrit mon nom en ces presentes, & à icelles fait mettre mon signet. Escrit le troisieme iour de Mars, l'an mille quatre cens & vingt & quatre. Lesquelles lettres furent de par ledit Duc de Cloestre leües, & assez les visita tout au long avec son conseil. Et sur icelles pour faire respōce escriuit de rechief au Duc de Bourgongne en telle forme que cy apres s'ensuit.

Coppie des secondes lettres enuoyées par le Duc de Cloestre au Duc de Bourgongne.

HAult & puissant Prince Philippe Duc de Bourgongne, Côte de Flandres, Comte d'Arthois & de Bourgongne: Je Honfroy, fils, frere & oncle des Roys d'Angleterre, Duc de Cloestre, Comte de Hainault, de Hollande & Zelande & de Penneburg, seigneur de Frize & grand Chambellan du Roy d'Angleterre: ay receu voz lettres en forme de plaquart à moy adressans, escrites le troisieme iour de ce mois: lesquelles affin qu'il m'appaire, que le contenu vient de vostre sceu & propre mouuement: auez signé & escrit vostre nom, & à icelles fait mettre vostre seel. Desquelles pour la greigneur partie reciter, m'est aussi pou ou moins, qu'il est à vous des miēnes à vous adressées escrites en ma bonne ville de Mons, en ma Comté de Hainault sous mon signet le douzieme iour de Ianuier dernier passé. Si n'est entant qu'elles font mention du reffus, que vous dictes par moy estre fait pour nō vouloir appaiser le discord, qui est entre mon cousin le Duc de Brabant d'une part, & moy d'autre part, qui est moins que verité: car mon treschier & tresaymé frere le Regent Duc de Bethfort, & tout le conseil de France, sçauēt que i'en ay fait & aussi faictes vous. S'ignorer le voulez ne puez: & que dictes, que mensongierement & à tort vous ay mis sus aucune chose par mesdictes lettres: & vous semble qu'assez trop du deshonneur & outrage vous estoit, que m'imposez auoir fait à mondit cousin de Brabant sans vouloir changer vostre honneur & renommée: pourquoy me sonmez & requerez par vosdictes lettres, de rappeler & desdire ce par les miennes escrit vous ay, ou sinon vous estes prest de deffendre
vostre

vostre corps contre le mien & de moy combattre. Vous laissez sçavoir que le contenu de mesdictes lettres: ie dis & tiens estre vray & d'encosté iceluy vueil demourer, & desia est approuvé par ce que voz gens & à vostre mandement ont fait & perpetré en madiete Comté. Ne pour vous ne pour autre ne sera par moy rappellé: ains à l'ayde de Dieu & de nostre Dame & de mōseigneur saint George le contenu en mesdictes lettres vous feray de mon corps contre le vostre cognoistre & iehir, estre verité par deuant quelques des iuges qu'avez esleuz, car tous deux me sont indifferens. Et pource que desirez la chose estre briefue comme ie fais pareillement: par ce que mōdit beau frere est plus prest, ie suis content de parfaire la chose par deuant luy & l'accepte pour iuge. Et le iour que meistes en mon election, ie vous assigne le iour monseigneur S. George prochain venant, ou autre à la discretion de mondit frere. Auquel au plaisir de Dieu ie seray prest & ne faudray. Et en cas que mondit frere ne voudra emprendre la chose, ie suis content que ce soit deuant treshault & puissant Prince l'Empereur. Et pareillement se l'Empereur ne le veult, beau frere Oldeberth ou autre iuge indifferent: mais pource que ie ne sçay si vous voudrez demourer d'encontre vostre signet: ie vous somme & requier que par le porteur de cestes m'enuoyez autres lettres, qui soient seellées de vostre seel, pareillement que du mien sont ces presentes. Et quand audit de Brabant se voulez ou osez dire qu'il ait meilleur droit que moy en ceste presente querelle, ie suis prest de le vous faire iehir mon corps contre le vostre au iour & deuant ceux que dessus est dit, que i'ay meilleur droit & auray à la grace de Dieu, nostre Dame & S. George, Et affin qu'il vous appaire ce que dessus est dit, & vueil entretenir, faire & accomplir, i'ay escrit mon nom en ces presentes & à icelles fait mettre mon seel. Escrit en ma ville de Songnies le seiziesme iour de Mars l'an mille quatre cens vingt & quatre.

Comment le Duc de Bourgongne retourna en Flandres. Et comment il enuoya vnes secondes lettres au Duc de Cloestre. Et la coppie d'icelles.

LTem entre-temps qu'aucunes des lettres dessusdictes s'enuoyerent par iceux Princes l'un à l'autre, retourna le Duc de Bourgongne en son pays de Flandres: & fait grand partie de ses gens aller en l'ayde du Duc de Brabant, comme dit est dessus. Et aussi rescriuit au Duc de Cloestre vnes lettres seellees de son seel, en acceptât le iour apres ledit Cloestre, desquelles la teneur s'ensuit. Hault & puissant Prince Honfroy Duc de Cloestre: ie Philippe Duc de Bourgongne, Comte de Flandres & d'Arthois, ay aujourd'huy receu voz lettres patentes escrites & signées de vostre main, respondant aux miennes que dernièrement vous enuoyay, escrites le treiziesme iour de ce present mois: lesquelles faisoient mention que vous avez reffusé le traicté par grande deliberation, aduisé par le beau frere Regent & moy, sur le discord estant entre beau cousin de Brabant & moy. Et vous y respondes que c'est moins que verité: mondit beau frere le Regent & tout le conseil de France sçauent bien que fait en auez: & aussi fais-ie, ie ne le vueil ignorer: & signorer le vouloye, si ne puis-ie, si comme vosdictes lettres le contiennent. Sur ce vous fais assauoir que sur ce seray trouué veritable, & vous non: comme apparoir pour-

ra par le rapport des ambassadeurs enuoyez deuers vous, à tout la cedulle de l'accord aduisé par le dessusdit beau frere, moy & ledit conseil, lequel auez refusé. & contre la teneur d'icelle de fait entré au païs de Hainault, combien que beau cousin de Brabant l'eut plainement accordée. Et à ce qu'auoye escrit, que mensongierement & à tort m'auez mis sus aucunes choses. Et qu'assez m'estoit deshonneur & outrage qu'auiez fait audit beau cousin de Brabant & moy, sans vouloir charger mon honneur & renommée: parquoy vous sommoye, & reuoye de rappeler & desdire ce que par voz lettres auez escrit, que i'auoye contre verité plusieurs choses donné à entendre, ou si ce non, i'estoye prest de m'en deffendre: & le mien corps contre le vostre deuant l'Empereur ou beau frere le Regent, me laissez sçauoir que le cōtenu en vosdictes lettres tenez estre vray: & d'encosté icelles voulez demourer, & que desia est approuué, par ce que mes gens ont perpetré audit païs de Hainault, que pour moy & autre ne rappellerez: ainçois le contenu en icelles voz lettres me ferez de vostre corps contre le mien recognoistre & reiehir estre verité par deuant quelque des deux iuges deuant nommez. Et que pource que desirez la chose estre briefue, pareillement comme ie fais: & que ledit beau frere le Regent est plus pres, vous estes content de faire la chose deuant luy & l'acceptez à iuge, & assignant la iournée le iour S. George, ou autre à la discretion dudit beau frere. Je vous respons que du iour & du iuge ie suis tresbien à l'ayde de Dieu & de nostre Dame me deffendray, & maintiendray le contraire par mon corps contre le vostre, en faisant à tous apparoir que mensongierement & à tort m'auez mis sus les choses dessusdictes: & y garderay ma loyauté & mon honneur. Et quant à ce que mes gens ont fait au païs de Hainault, s'ils auoient aucune chose, qui fut au bien & à l'honneur du beau cousin de Brabant, i'en seroye bien ioyeux & bié lié. Et pource que vous faictes doubte se ledit beau frere acceptera ceste besongne, i'enuoyeray premierement deuers luy mes ambassadeurs notables le prier chierement: & l'accepter ne le veut, ie suis content de l'Empereur: ainsi que par mesdictes lettres vous ay escrit. Et à ce que m'escruez que se ie vueil n'ose dire que mondit beau cousin de Brabant, ait meilleur droit que vous, vous me ferez ie-hir de vostre corps contre le mien au iour, & deuant ceux que dessus le contraire. Je vous respons que par la sentence de nostre S. Pere le Pape (deuāt qui ceste cause est pendant) pourra ce clerement apparoir qui aura droit ou tort. A la puissance & auctorité duquel, ne voudroye pour riens desroguer ne desobeir. Aussi n'est il point en nous deux d'ordonner ne determiner à qui le droit en appartient. Et si ay esperāce en nostre seigneur Iesus-Christ, & en sa glorieuse Vierge mere, qu'auant que nous departons de la iournée, par vous ainsi entreprinse de tellement deffendre ma bonne querelle, qu'il ne vous sera ja besoing d'autre nouuelleté mettre en auant. Et quand à ce que me requerez, que sous mon seel ie vueille enuoyer la coppie de mes lettres, qu'enuoyées vous ay sous mon signet. Je vous les enuoye ainsi que requis le m'auez. Et ce que i'ay escrit vueil franchement tenir & accomplir.

Comment la ville de Braine en Hainault fut destruite & desolée par les cōmis de Brabant & autres.

Item



Tem durant les tribulations & haines dessus declarées, les Ducs de Bourgongne & de Clocestre se meirent sus à tresgrand puissance, Philippe Comte de Ligney & de saint Pol, frere au Duc de Brabant en sa compagnie, le Comte Conuersan seigneur d'Anghien, les seigneurs de Croÿ & l'Isle Adam, messire Andrieu de Malignes & le Bastard de S. Pol, & plusieurs autres capitaines de guerre avec autres bannieres, & gentils hommes, & environ de trente à quarante mille communes, comme dit est dessus. Lesquels dessusdits Comte de saint Pol mena deuant Braine-le-Comte au pays de Hainault. En laquelle ville estoient environ deux cens Anglois des gés du Duc de Clocestre, avecques la communauté d'icelle. Si furent leans assiegez de tous costez, & fort combattus par les engins qu'ils auoient là amenez sans nombre. Pourquoy apres que les dessusdits assiegez eurent veu la puissance de leurs ennemis par l'espace de huit iours, commencerent à traicter. Et en fin furent d'accord par tel si, que les Anglois qui dedans estoient iroient sauues leurs vies & aucunes parties de leurs biens, Et la ville avec les habitans demoureroiēt en l'obeissance du Duc de Brabant, en faisant serment à luy ou à ses commis, moyennant qu'ils payeroient certaine somme d'argent, en racheptant leur ville & leurs biens. Apres lequel traicté ainsi fait, & que les dessusdits Anglois furent prests à tenir leur saufconduit pour eux en aller, entrerent les communes dessus en tresgrand nombre dedans icelle ville par plusieurs lieux: & occirent grand partie d'iceux Anglois avec aucuns bourgeois de la ville: & prindrent, rauirent & frustrerent tous les biens & puis bouterent le feu en plusieurs lieux & maisons, tant finablement que la ville fut toute arse & desolée. Ainsi & par ceste maniere rompirent & enfraindirent lesdictes communes l'edict, qu'auoient fait leurs capitaines. Et ne fut pour prieres ne pour messages que de ce on leur peust faire retarder, dont les dessusdits seigneurs & nobles furent tresmal contents. Neantmoins aucuns d'iceux Anglois furent sauuez & renuoyez sauues leurs vies, ainsi que promis leur auoit esté par le moyen des seigneurs & nobles dessusdits. Et alors estoient en la compagnie du Comte de S. Pol audit siege de Braine Pothon de S. Treille, Regnault de Lōgueual & aucuns autres à tout leurs gens tenans le party du Roy Charles.

ITEM apres que ladicte ville de Braine fut du tout desolée, comme dit est, se tint l'ost des Brabançons au lieu où ils estoient. Et adōc par le moyen des lettres enuoyées par le Duc de Bourgongne l'un à l'autre: & le iour accepté, comme dit est, de combattre de leurs personnes par deuant le Duc de Bethfort, qui estoit la guerre mise comme en suspens entre le Duc de Clocestre & le Duc de Brabant: & ne deuoient plus ne leurs gens porter aucun dommage l'un à l'autre, ains attēdoient à celuy qui auroit victoire de ladicte iournée. Et sur ce propos se deslogerent ledit Comte de S. Pol & ses gens deuant Braine, pour retourner en Brabant. Et pourtant que ledit Duc de Clocestre avec sa femme & toute sa puissance, comme haineurs estoit à Songnies, eurent les Brabançons grand doubte d'estre aucunement enuahis d'iceux. Et pource tous les nobles se meirent avec leurs Princes en ordonnance, cheuaucherent par ordre tous armez prests, comme fils d'eussent entrer en bataille. Et aussi feirent aller lesdictes communes en belle & grande ordonnance, & ainsi se departirent de deuant Braine:

& quand ils eurent cheuauché vne partie de leur chemin, ils eurent nouuelles par leurs arriere-coureurs, qu'ils auoient laissé derriere que les Anglois estoient sur les champs : laquelle chose estoit veritable: car aucuns des capitaines du Duc de Cloestre à tout huit cens Anglois, se meirent sus par le congé dudit Duc pour veoir iceux Brabançons desloger. Et tant s'approcherent les parties l'un l'autre, qu'ils se pouoient plainement veoir: mais il y auoit bonne espace & fosse entre icelles parties. Toutesfois ledit Cote de S. Pol, fait mettre ses gens en ordonnance sur vne montaigne: c'est à sçauoir ses gentils-hommes & archiers, & pareillement s'y meirent iceux Anglois. Et entre-temps y eut plusieurs coureurs tant d'un costé come d'autre, qui s'escarmoucherent tresfort les uns cote les autres. Et tant qu'en ce faisant de chacune partie y en eut aucuns morts ou naurez, & portez ius de leurs cheuaux non mie en grand nombre. Et demourerent en l'estat que dit est, chacune partie en bataille par treslongue espace, & iusques à ce que chacune desdictes parties contendans, que ses compagnons ennemis s'en deussent partir premiers. Et entre-temps qu'ils estoient ainsi en bataille, comme dit est, vindrent certaines nouuelles au Comte de S. Pol de par le Duc de Bourgogne, de sa iournée acceptée entre luy & le Duc de Cloestre, & ainsi que la guerre deuoit cesser entre icelles parties. Apres lesquelles nouuelles venues, comme dit est, & qu'il estoit desia bien tard vers la nuict, se commencerent à retraire les Anglois dessusdits vers leur seigneur Duc de Cloestre, qui estoit à Songnies. Et d'autre part le Comte de S. Pol & les siens se departirent, & allerent loger à Halx, & à l'environ, auquel lieu ils feirent faire tresbon guet. Or est verité que la plus grand partie des communes de Brabant dessusdit, avec aucuns autres doubtans l'enuahie & bataille desdits Anglois, s'estoient departis d'avec ledit Comte de saint Pol, en fuyant par grand desroy en leur pays, laissant par les champs leurs armures cheoir sans nombre, avec leurs chars & charrettes & autres habillemens de guerre: iacoit-ce qu'ils fussent de trente à quarante mille hommes desdictes communes, si en demoura il assez pou avecques leurs chiefs: & n'en tint pas à eux que ce iour ledit Comte de S. Pol & les autres seigneurs & capitaines, qui estoient avecques ne receussent grand deshonneur & grand dommage.

I T E M le xxvj. iour de Feurier de cest an, auquel le premier iour de Mars se deuoit rendre la ville & chastel de Guise, auoit tant traicté messire Jean de Luxembourg avecques leã de Proisy gouverneur d'icelle, que ladicte ville & chastel luy furent renduz audit vingt & sixiesme iour de Feurier, auant que ledit iour fut venu. Et pareillemēt luy fut baillé & deliuré la forteresse d'Irechon. Et fut par ces moyens du tout obeï par toute la Comté de Guise, dont il despleut grandement à René d'Anjou Duc de Bar, qui d'icelle Comté estoit seigneur & vray heritier. Et par ainsi ceux qui s'estoient assemblez pour estre à la reddition d'icelle au premier iour de Mars, tant Anglois comme Picards, quand ils sceurent les nouuelles d'icelle reddition retournerent en leurs propres lieux. Et le dessusdit de Luxembourg rendit les hostages des François, qui estoient dedans: lesquels à tout bon saufconduit s'en allerent où bon leur sembla : & lors fut commis à Guise nouuel gouverneur messire Dauiod de Poix.

I T E M apres que Philippe Comte de S. Pol, avecques les nobles de Brabant se furent

se furēt retraits à Brucelles depuis le siege de Braine:& que les Picards se furent mis en plusieurs forts sur les marches de Hainault, le Duc de Clocestre, sa femme en sa cōpagnie à tout son armée, alla de Sōgnie à Mons, où il trouua la Cōtesse de Hainault douïagiere: avec laquelle & plusieurs nobles cōclud de retourner en Angleterre à tous ses Anglois, affin de luy preparer de sa personne pour cōbattre le Duc de Bourgongne, cōme par leurs lettres cy dessus escrites estoit conclud & accordé par eux deux. Et lors sur le poinct de son departement, fut requeste faicte au Duc de Clocestre tant par sa belle mere Comtesse de Hainault, comme par les nobles & bōnes villes du paÿs, qu'il voulsist laisser la Duchesse Iaqueline, qu'il disoit sa femme leur dame & heritiere: lequel leur accorda moyennant qu'ils promeirent & iurerent solennellement audit Duc de Clocestre, qu'ils la garderoient & deffendroient contre tous ceux, qui nuire ou greuer luy voudroient. Et par especial le iurerent & promeirent les bourgeois & habitans de la ville de Mons, dedans laquelle elle demoura. Et adonc ledit Duc de Clocestre & sa femme departans l'un de l'autre en grand gemissemens, se departit à tout quatre ou cinq mille combattans Anglois de S. Gillant, & alla gesir celle premiere nuit à Yuins empres Bohaing: & apres par Vy en Arthois, & au dehors delez alla en plusieurs iours iusques à Calais en passant luy & ses gēs paisiblement, en prenāt viures sans faire nul desroy. Et remena avec luy au paÿs d'Angleterre Alienor de Combattre, laquelle il eut depuis espousée: & l'auoit amenée d'Angleterre avec sa femme au paÿs de Hainault, c'est à sçauoir avec la Duchesse Iaqueline de Bauiere. A l'issue de cest an, allerent à Romme deuers nostre sainct Pere les ambassadeurs du Roy Charles: desquels le principal estoit l'Euesque de Leon en Bretaigne: lesquels ambassadeurs feirent de par ledit Roy toute obeissance audit Pape Martin. Et les receut liement: car par auāt ledit Pape s'estoit absenty & Benedic avec les Espaignols & Arragonnois.

Comment le Pape Martin enuoya vnes bulles au Duc Iean de Brabant, & la teneur d'icelle.

AV commencement de cest an furent enuoyées vnes lettres, & publiées de la partie du Duc Iean de Brabant, par maniere de vidimus des lettres du Pape à luy enuoyées sur la bulle, dont la teneur s'ensuit. Martin Euesque le seruiteur des seruiteurs de Diēu. A chier fils noble homme Iean Duc de Brabant, salut & benediction apostolicque: n'agueres par relation par aucuns dignes de foy, est venu à nostre cognoissance (dont nous desplaist grandement) qu'aucunes cedulles ont esté diuulguées, & leües publicquement en certaines lettres sur nostre nom & bulles, demonstrees au peuple es paÿs de Hainault & es Eueschez d'Vctret, de Liege & de Cambray: esquelles (sicomme on nous afferme entre les autres choses) estoit contenu, que nous auions confermé le mariage contraiēt par chier fils noble homme Honfroy Duc de Clocestre, avecques chiere fille en Iesus-Christ Iaqueline noble femme Duchesse de Bauiere: & que le mariage ainsi cōtraiēt par foy avecques ladicte Duchesse, nous auions reprouué & iugé de nulle valeur. Et combien que telles choses qui n'issent point de nous aucunement, sont publiées esdictes parties en nostre escandale, & contre tout hōneur, qui voulons la cause dudit ma-

riage estre terminée selon la dispositiō & forme du droit commun. Et à toy notiffiōs par ces presentes pour les choses dessusdictes, que tu ne preignes aucune rancune ou tristesse en ta pensée : mais tiens fermement que lesdictes lettres & autres choses, qui ont esté dictes & publiées esdictes parties par les hommes plains de scandalle, ne viennent point de nous : mais d'autres, qui n'ont point Dieu deuant le yeux & quierent nouuelletez, mouuemens & scandalles, dissences & faulsetez. Si voulons que les trouueurs de telles escandalles & faulsetez, pour l'honneur de nous & du siege Apostolique, soient deüement puniz selon l'agresse & grandeur du peché commis. Et pource escriuons à noz venerables freres les Euesques d'Vêtret, de Liege & de Cambray, & à chacun d'eux : & mādons par escrits Apostoliques pour oster cest scandale & faulseté, que noz lettres & le contenu d'icelles facent publier en leurs Eglise & sermōs publicques au peuple : & ayent pour excommunié celuy qui telles lettres fait publier ou lire en leur puissance : & le saichant tenir en nostre prison, iusques à tant qu'ils auront receu autre mandement de nous. Donné à Romme aux saincts Apostres es ides de Feurier, l'an huictiesme de nostre Papalité.

Comment apres le departement du Duc de Clocestre, la guerre s'esmeut en Hainault. Et comment la Duchesse Iacqueline de Bauiere escriuit au Duc de Clocestre pour auoir secours, & le contenu des lettres.



Tem apres le departemēt du Duc de Clocestre de la Comté de Hainault, commencerent les gens du Duc Iean de Brabant, & les Picards à mener forte guerre audit païs à toutes les villes qui obeissoient au Duc de Clocestre : & aussi à icelles qui avec leurs seigneurs auoient tenu & tenoient son party : pourquoy le païs fut fort molesté & mis à destruction. Et pour y resister & y auoir pourueance, la Comtesse de Hainault douägiere, eut plusieurs parlemens avec le Duc Philippe de Bourgōgne son nepueu, & avec les ambassadeurs du Duc de Brabant, tant à Douäy & l'Isle, comme en Audenarde : en la fin desquels estoit conclud que ledit païs de Hainault seroit remis en l'obeissance du Duc de Brabant. Lequel Duc feroit aux bons & habitants du païs abolition generale. Et la Duchesse Iaqueline seroit baillée en garde au Duc de Bourgongne, par tel si qu'il auroit pour tenir l'estat d'elle certaine pecune : & elle demoureroit en son gouuernement iusques à ce que le proces durant touchant ceste besongne, & pendant en court de Romme, seroit finé. Durant lequel traicté, se tournerent en l'obeissance des Ducs de Bourgongne & de Brabant contre leur dame les villes : c'est à sçauoir de Vallenciennes, Condé, Bouchain & aucunes autres. Et demoura à pou pres la ville de Mons exilée du party de leur dame : pourquoy de toutes parts furent approchez de leurs ennemis, & leur furent les viures ostez & deffenduz, qu'ils n'en pouoient auoir sinon assez petit. Et adonc eux voyans en ce dangier, furent fort troublez & esmeuz contre leur Dame : & tant qu'ils dirent plainement que s'elle ne faisoit paix, ils la mettroient entre les mains du Duc de Brabant, & avec ce emprisonnerent aucuns de ses gens, & feirent mourir par iustice les aucuns, comme cy apres sera declairé : dont ladicte Duceffe fut en grand doubte & desespoir, tant pour les mutations dessusdictes, comme pour les nouvelles que luy rapporta
sa dame

la dame sa mere : c'est à sçauoir qu'elle seroit mise en la main du Duc de Bourgogne & menée en Flandres, comme cy apres peut apparoir par ses lettres closes, qu'elle enuoya au Duc de Cloestre: lesquelles furent trouuées en chemin & portées au Duc de Bourgogne, desquelles lettres la teneur s'enfuit. Mon tresredoubté seigneur & pere, tant humblement comme ie puis & sçay en ce monde me recõmande à vostre benigne grace. Et vous plaise sçauoir mon tresredoubté seigneur & pere, que i'escris maintenant à vostre glorieuse domination, comme la plus dolente femme, la plus perdue, la plus faulsemēt trahie qui viue: car mon tresredoubté seigneur le dimenche treiziesme iour de ce present mois de Iuing, les deputez de vostre ville de Mons retournerent & apporterent vn traicté fait & accordé par beau cousin de Bourgogne & beau cousin de Brabant: lequel traicté fut fait en l'absence de ma dame ma mere, & sans sa cognoissance, comme elle mesmes m'a signifié & certifié par maistre Gerard le Grand son chappellain. Pourquoy mon tresredoubté seigneur, ma dame de mere m'a escrit ses lettres, faisant mention dudit traicté: sur lequel elle ne scet n'ose moy conseiller, car elle mesmes ne sçauoit que faire: mais me prioit que ie voulusse prier mes bonnes gens de ceste ville, pour sçauoir quelle consolation & ayde ils me voudroient faire. Sur laquelle chose, mon tresdoux seigneur & pere, il vous plaise sçauoir que le lendemain i'allay à la maison de la ville: & leur feiz remonstrer comment à leur requeste & priere vous auoit pleu à moy laisser en leur protection & sauuegarde, comme à ceux qui vous auoient fait serment d'estre voz vrayz & loyaux subiects, & qu'ils feissent de moy bonne garde pour vous en rendre bon compte: lequel serment ils feirent deuant le sacrement de l'Autel, & sur les sainctes Euangiles. Surquoy mon treshonnoré seigneur & pere, ils respondirent tout à plain, qu'ils n'estoient point assez forts dedás la ville pour moy garder: & en ce faisant de fait à pensée s'esmeurent en disant, que mes gens les vouloient meurdrir. Et tant, mon tresredoubté seigneur, qu'en mon despit ils prindrent vn de voz subiects sergent nommé Maquart, & presentement luy feirent prestement couper la teste: & feirent prendre tous ceux qui vous aiment & tiennent vostre party, comme Bardoul de la Porte, Collart son frere, Gillet de la Porte, Iean du Bois, Guillaume de Leur, Sanson vostre sergent, Pierre, Baron, Sandart, Dandre, & plusieurs autres iusques au nombre de deux cens cinquante de vostre party. Et de rechief vouloient prendre sire Baudouin tresorier, sire Loys de Montfort, Haulnere, Iean Fresne, & Estienne d'Estre: lesquels ils n'ont point encores prins, ne ie ne sçay qu'ils feront. Aussi mon tresredoubté seigneur, ils me dirent tout à plain, que se ie ne faisoie traicté, ils me liureroient es mains de beau cousin de Brabant: & n'ay plus de dilation à demourer en ceste ville que huiet iours que ne soye contraincte d'aller en Flādres, qui m'est douloureuse chose & dure: car ie doute que tant que ie viuray plus ne vous verray, s'il ne vous plaist moult en haste moy ayder. Helas mon tresredoubté seigneur pere, toute ma vraye esperance & toute ma conclusion est en vostre domination: veu mon tresredoubté seigneur & ma seulle & souveraine lieffe, que tout ce que ie seuffre est pour l'amour de vous. Dont treshūblement ie vous supplie tant & si trescherement que ie puis en ce monde: pour l'amour de Dieu, qu'il vous plaise auoir compassion de moy, & mes besongnes,

& à moy vostre dolente creature venir tout en haste en ayde si ne me voulez perdre perdurablement. J'ay espoir qu'aussi ferez: car mō tresredoubté seigneur & pere, ie ne desferuis oncques par deuers vous ne ia ne feray tant que ie viuray aucune chose qui vous deust desplaire, ainçois suis toute preste à receuoir mort pour l'amour de vous & de vostre noble personne: car vostre noble domination me plaist tresgrandement: par ma foy mō tresredoubté seigneur & Prince, toute ma vraye consolation & esperance, il vous plaise pour l'amour de Dieu & de monseigneur S. George considerer tant en haste comme faire pourrez mō tresdouloureux affaire qu'encores n'avez vous point fait: car il me semble qu'entièrement m'avez mis en oubly. Autre chose ne vous sçay pour le present que rescrire, forts mon tresredoubté seigneur & pere, que j'ay moult tost enuoyé par deuers vous messire Loys de Montfort: car il ne peut plus estre avecques moy, nonobstant qu'il m'a accompagnée quād tous les autres m'ont failly, qui vous dira tout plus à plain que ie ne vous sçauroye escrire. Pource vous supplie mon treschier seigneur & pere, qu'il vous plaise luy estre bon seigneur & à moy mander & commander voz bons plaisirs, lesquels ie feray de tout mō cuer. Ce scet le benoist fils de Dieu qui vous doit bonne vie & longue, & grace que ie vous voye à tresgrād ioye. Escrit en la faulse & traistre ville de Mons de tresdouloureux cuer le sixiesme iour de Iuing. L'inscription estoit vostre dolente & trefaymée fille, souffrant tresgrand douleur pour vostre commandemēt, vostre fille, de Quienebourg. A icelles les dessusdictes en furent trouuées vnes autres dont la teneur s'ensuit.

TRESCHIER & bien-aymé cousin ie me recommande à vous: & vous plaise sçauoir qu'à l'heure que ces presentes furent escrites, j'estoye tresdolente en cuer comme faulusement & loyaument trahie, & se vous voulez sçauoir aucune chose de nouuel: mon treschier & aymé cousin sçachez qu'encores pour le present ne vous sçauroye que rescrire: Mais veuillez demander à nostre treschier & redoubté seigneur qui vous en dira plus que n'en voudrez oïr. Autre chose ne vous en sçauroye que rescrire, excepté que vous tenez la main à ce que vous sçaez, affin que mon redoubté seigneur vueille venir, ou autrement ne luy ne vous iamaïs ne me verrez. Et quant à ce q̄ vous m'avez escrit de venir deça la mer c'est trop tard. Mais hastez vous à tout si grād puissance q̄ vous me puissiez deliurer des mains des Flamens, où ie seray dedās huiēt iours: Treschier & bien-aymé cousin, ie prie à Dieu qu'il vous doit bonne vie & longue. Escrites à la faulse & traistre ville de Mons, le sixiesme iour de Iuing, Jacqueline de Quienebourg. Par la teneur de cestes appert que moult cremoit ladicte Duchesse à aller en Flandres.

ITEM apres que les deputez de la ville de Mons en Hainault, furent retournez deuers les Ducs de Bourgogne & de Brabant en leur ville: & que plusieurs choses eurent sur ce esté traictées à grand desplaissance de leur dame la Comtesse de Hainault douägiere, & la Duchesse Jacqueline sa fille: neantmoins le trefiesme iour de Iuing de cest an, ladicte Jacqueline non pouant à ce cōtract, se departit de la ville de Mons en la cōpaignie du Prince d'Orège & autres seigneurs à ce commis de par le Duc de Bourgogne, qui la conduirent & menerent à la ville de Gand: & se logea en l'hostel dudit Duc, où elle fut administrée honnorablement

ralement selon son estat. Et le Duc Jean de Brabant son mary eut le gouuernement, comme dit est, de tout le dessusdit pays de Hainault. Et lors fait on departir dudit pays toutes gens de guerre. Et fut faite abolitiō de toutes besongnes par auant passées. Ainsi & par celle maniere que dessus est declairée, liurerent & cōtraignirent ceux de la ville de Mons en Hainault leur dame & vraye heritiere, outre son gré en la main du Duc de Bourgogne: nonobstant que par auant auoient iuré & promis au Duc de Cloestre de la garder, & deffendre contre tous ceux qui nuire ou greuer la vouldroient.

Comment le Duc de Bethfort & le Duc de Bourgogne, se trouuerēt ensemble en la ville de Dourlens & autres matieres suiuanes.

LA vigille de saint Pierre & de saint Paul, arriua le Duc de Bethfort Regent avecques sa femme en la ville de Corbie, accompagné de huit cens cheuaucheurs ou enuiron. Et estoient avecques luy l'Euesque de Theroüenne Chancelier de France, pour le Roy Henry le president en Parlement & moult d'autres nobles hommes, comme gens de conseil, qui tous estoient ensemble avecques ledit Duc de Bethfort qui se disoit Regent, & de là vindrent à Dourlens le second iour ensuiuant: auquel lieu, alla pour veoir iceluy Regent & sa sœur, le Duc de Bourgogne. Et feirēt iceux Princes grād reuerence & ioyeuse chiere l'un à l'autre: & par especial ledit Duc de Bourgogne à sa sœur la Duchesse. Et brief apres s'en alla ledit Duc de Bourgogne loger à Luchan, où estoit le Comte de saint Pol son cousin germain. Et lendemain enuiron quatre heures apres midy, retourna avecques luy ledit Comte de S. Pol en la ville de Dourlens: & mena ladicte Duchesse sa sœur, & toutes leurs gens loger en son chastel à Hesdin: auquel lieu ils furent de par ledit Duc receuz & festoyez moult noblemēt. Et la demourerent par l'espace de six iours faisant grand ioye & grand liesse les vns avecques les autres, en boire, en mangiers, chasserries, dances & autres esbattemens de plusieurs & diuerses manieres. Apres lesquels six iours se departit ledit Regēt, sa femme la Duchesse & toutes leurs gens. Et allerent dudit lieu de Hesdin à Abbeuille, où ils sejournerent aucune espace: & de là par le Crotoy où estoit lors le Duc d'Alençon prisonnier, lequel fut dudit Regent araisonné en luy enhortant, qu'il vouldist faire serment & fidelité au Roy Henry de l'Enclastre: & par ainsi il seroit mis hors de prison & de seruage, & luy seroient rendues toutes ses terres & seigneuries: disant ledit Regent en outre, que si ce ne vouloit faire il demourroit en tresgrād dangier tous les iours de sa vie. A quoy ledit Duc d'Alençon fait response qu'il estoit ferme en son propos, de non en toute sa vie faire serment cōtre son souuerain & droicturier seigneur Charles Roy de France. Laquelle response ouïe par ledit Duc de Bethfort, le fait tātost apres oster de deuant luy & remener en prison, & apres par le pays de Caux s'en alla à Paris. Et audit lieu de Hesdin estoient Jean Bastard de S. Pol & Andrieu de Humiers: lesquels portoient chacun sur son bras dextre vne rodelle d'argent, où il y auoit painct vne raye de soleil. Et l'auoient entrepris, pource qu'ils vouloient soustenir contre tous Anglois & autres leurs alliez, que le Duc Jean de Brabant auoit meilleure querelle de demander & auoir les pays & seigneuries de la Duchesse Iaqueline

de Bauiere sa femme, que n'auoit le Duc de Clocestre. Lesquelles rondelles le Duc de Bethfort leur voulut faire oster par aucuns de ses gēs: pource qu'on luy auoit donné à entendre, qu'ils les portoient sur autre querelle pour vouloir combattre contre sesdits Anglois: mais à la fin fut assez cōtent d'eux, & ne fut sur ce procedé plus auant. Item apres que le Duc de Clocestre fut retourné du païs de Hainault en Angleterre, vn iour en la ville de Londres en la presence du ieune Roy Henry & de son conseil, luy fut remonstré par ledit conseil l'impeditiō qu'il auoit faicte en la Cōté de Hainault, en maniere qu'il auoit tenu le contend contre le Duc de Bourgongne, le plus puissant Prince du sang Royal de France, en le blasmant de ce tresfort: & disant que par telle maniere tenir pourroiet refroidir & adnuller les alliances, qu'auoit fait ledit Duc avecques eux: & par consequēt se pourroit perdre la cōqueste que sur ce auoient en France. Et mesmement fut dit audit Duc de Clocestre, que pour ceste besongne n'auoit point ayde de gens ne d'argent du Roy son nepueu, dont il fut grandement mal content: mais pour le present il n'en pouoit auoir autre chose.

Comment le Souldam & les Sarrazins delibererent d'aller conquerre tout le Royaume de Chippre.

LTem apres que les Sarrazins (dont dessus est faict mention) furent retournez du Royaume de Chippre en Surie, ils allerēt deuers le Souldam. Et en signe de victoire porterent la teste & les esperons du cheualier, qu'ils auoient occis sur vne lance. Et crioient en hault par toute la ville du Kaire, que c'estoit la teste du frere du Roy de Chippre nommé Henry, Prince de Gallilée, dont ils mentoient. Neantmoins pour ceste victoire tous les complices du Souldam & luy monterent en tel orgueil, qu'il se delibererent du tout de faire si grande armée, qu'ils destruiroient tout le Royaume de Chippre. Or est verité qu'en la ville de Damas, estoit vn Sarrazin grand, riche & puissant, lequel par toute la Surie estoit tenu & réputé estre saint homme. Et l'auoit le Souldam en reuerence: & d'autre part estoit bon & cordial amy du Roy de Chippre. Et quand il vint à sa cognoissance de la destruction qu'auoient fait en Chippre les six gallées dessusdictes, il alla au Kaire deuant le Souldam, & le reprint & blasma de ce qu'il auoit commencé la guerre: & tant fait que le Souldam fut moult repentant de ce qu'il auoit fait, & accorda qu'un bon accord y fut traicté. Pour lequel faire & attirer, se chargea ce saint hōme Sarrazin d'enuoyer son fils deuers le Roy de Chippre, pour traicter ladicte paix: & de fait luy enuoya: mais quād il fut venu au païs, le Roy de Chippre n'eut point cōseil de parler à luy de sa personne. Ains pour ouir ce qu'il demandoit y enuoya ses ambassadeurs: ausquels en cōclusion l'ambassadeur dessusdit, ne vouloit dire nulle chose de son ambassade: & fit respōce absolue q'il pouoit parler au Roy la paix se feroit à l'hōneur de luy & de son Royaume. Les cōmis de par le Roy de Chippre luy remontrerēt, comment le Souldam auoit fait vne folle entreprinse de commencer la guerre: pource qu'il auroit à faire à toute Chrestienté: & adonc respōdit iceluy ambassadeur, que le Souldam estoit bien informé du gouuernemēt des Chrestiens: & que le Roy de Frāce qui pour
le

le temps passé auoit tousiours esté le plus mortel ennemy dormoit pour le present, & que pour neant les doubtoit le Souldam. Apres lesquelles parolles s'en retourna ledit ambassadeur à Damas deuers son pere, & luy recita la maniere comment le Roy de Chippre ne l'auoit voulu ouïr. Pourquoy ledit saint homme fut tresmal-content & demoura ennemy mortel du Roy de Chippre. Et depuis ce iour continuellement conforta le Souldam, en luy enhortant de faire cruelle & forte guerre au Roy de Chippre. Disant en outre qu'il n'eust nulle doute & qu'il demoureroit victorieux contre tous ses ennemis.

Comment le Duc de Bourgongne fait grandes preparations pour combattre le Duc de Clocestre & autres matieres.

EN ce mesmes tēps le Duc de Bourgongne fait grandes preparations, tant en armeures pour son corps cōme en paremēs & harnois de cheuaux, pour bien estre fourny à la iournée prinse par luy contre ledit Duc de Clocestre. Et fait forger la plus grand partie desdictes armeures au chastel de Hesdin. Et avec ce s'exercita en toute diligence de sa personne tant en abstinence de sa bouche, cōme en prenant peine pour luy mettre en alaine. Et pour vray il estoit moult desirāt que le iour veint, qu'il peust venir cōtre son ennemy & fournir ledit champ: iāçoit-ce que son beau frere le Duc de Bethfort & son conseil fussent moult desirās, que bon traicté s'y trouuast. Et pareillement se prepara en Angleterre ledit Duc de Clocestre. En ce temps par le cōmandement du Duc de Bethfort, assiegea le Comte de Salsebery le chastel de Ramboüillet, que tenoient les gens du Roy Charles: lesquels couroient souuēt iusques bien pres de Paris, en faisant moult de trauail au peuple: toutesfois en conclusion ils rendirent à iceluy Comte de Salsebery ladicte forteresse en emportant tous leurs biens. Enuiron la S. Iean Baptiste se resmeurent l'un contre l'autre ceux de Tournay, & leuerent les cōmunes gens plusieurs bannieres en leurs frāchises: & si rendirent la ville, pour regner & gouuerner avec eux comme autresfois auoient fait à vn nommé Passcarte, & à vn autre nommé Blarie avec aucunes gens de petit estat, qui pour leurs demerites estoient bannis de ladicte ville, & furent remis dedans à banniere desployée & en armes, en tresgrād nombre outre le gré & consentement des gros bourgeois & gouuerneurs d'icelle cité: & mesmement par lesdictes communes en furent aucuns emprisonnez, & en tresgrand dangier de leurs vies: mais neantmoins apres ils se rappaiserent. En cest an requist le Souldam de Babylonne ayde au Roy de Thunes en Barbarie, pour mener guerre au Roy de Chippre, lequel luy fut accordé. Et lors manda par toutes ses seigneuries tous les nauires & vaisseaux d'armes, qui y estoient: lesquels il assemblea tresgrand nombre, & les fait tresbien garnir de viures & de gens. Et apres sous la conduicte de ses Admiraulx & autres capitaines, les enuoya descendre au Royaume de Chippre par deuers Famagose: & lors commencerent à entrer au païs & tenir les champs à grand puissance, en faisant maulx irreparables. Et pour ce temps le Roy de Chippre estoit tresdurement aggraué de maladie: Pourquoy il ordonna son frere qui estoit Prince de Galilée chief, & capitaine general de son armée: lequel Prince assemblea toute la puissance d'iceluy Royaume de Chippre: & se retrahit par deuers le lieu,

où estoient iceux Sarrazins pour les combattre & rebouter : lesquels sçachans sa venue se retrahirent deuers leurs nauires : mais il les pourfuiuit . Et quand il fut d'eux approché pour les combattre, trouua que les deux parts de ses nauires l'auoient laissé : & par ainsi fut contrainct de retourner à Nicosie, & lesdits Sarrazins r'entrèrent audit pays en perseuerant de mal en pis , & trestout le desolerent. Et apres qu'ils furent plains & rassasiez de tous biens à tout grans rappines & grand foison de prisonniers Chrestiens, s'en retournerent en Surie, & emmenèrent avecques eux en leurs pays de Sarrazinesme vn moult notable & grand gentil-homme & de grand renom, nommé Ragonnet de Pieul : lequel auoit esté prins en la grosse tour de Lymeson, & le presenterent au Souldam, pource qu'il estoit vaillant homme, & f'estoit moult vigoureušemēt deffendu. Lequel Souldam l'admonnesta grandement de regnier la loy de Iesus Christ, & luy promet de le faire grand seigneur : mais oncques il n'y voulut entendre, ainçois à la presence d'iceluy Souldam blasmoit moult fort la loy des Sarrazins : pourquoy ledit Souldam de ce moult indigné, le fait fier par le meillieu du corps, & mettre à mort cruelle. Et depuis fut certiffié par plusieurs personnes dignes de foy, que sur le lieu où il auoit esté enterré, auoit on veu vne couronne de feu descendant du ciel en terre, & reposer sur le lieu dessusdit.

ITEM apres que le Comte de Salsebery eut conquis la forteresse de Rambouillet, comme dit est dessus, il alla mettre le siege entour la ville du Mans S. Iulian, où il fut certaine espace de temps combattans ceux qui dedans estoient de toutes parts à force de ses engins : & tant que les habitans d'icelle ville & cité non esperans auoir secours, commencerent à traicter avec ledit Comte de Salsebery. Et mesmement pour ledit traicté auoir, allerent par deuers luy l'Euesque de la ville & avec luy aucunes gens d'Eglise : & en grande humilité supplierent audit Comte, qu'il les voulsist prendre à mercy pour escheuer l'effusion du sang Chrestien. Et lors iceluy Comte s'enclina à leurs prieres & requestes, & conclud avec eux par tel si qu'aubout de huit iours ensuiuans, ils rendroient leur ville en son obeissance avec tous les habillemens de guerre que dedans auoient, ou cas qu'à ce iour n'auroient secours du Roy Charles ou de ses commis : & ceux qui voudroient faire serment & demourer en l'obeissance du Roy Henry, auroient franchement tous leurs biens : & sur ce baillerent bons hostages d'entretenir ledit traicté : mais pourtant qu'au iour dessusdit ne furent secourus, rendirent ladicte ville en la main du Comte de Salsebery, lequel la garnit tresfort de ses gens : & puis retourna à Roüen par deuers le Duc de Bethfort.

Comment la Duchesse Iaqueline de Bauiere se partit, & embla de la ville de Gand, & s'en alla au pais de Hollande.



Pres que la Duchesse Iaqueline de Bauiere estant en la ville de Gand, comme dit est, eut esté certaine espace de temps non contente de ce que ainsi estoit detenue outre sa volenté, vn iour regarda, & aduisa enuiron l'entrée du mois de Septembre comment elle se pourroit de là partir : Et en la fin tandis que ses gens souppoient, elle vestue en habit de homme, & vne femme pareillement habillée & deux hommes avec elles, se departit de ladicte ville de Gand à cheual, & cheuaucha bien en haste iusques à Anuers,

Anuers, où elle reprint habit de femme, & sur vn char s'en alla à Breda: & depuis à la Garide où elle fut obeÿe & receuë honnorablement comme Dame. Et adonc ordonna le seigneur de Montfort son principal gouuerneur, & manda plusieurs nobles barons du paÿs de Hollande pour auoir conseil avec eux sur ses affaires. Ce lors assez brief ensuiuant vint à la cognoissance du Duc de Bourgongne, dont il fut grandement troublé: & pourtant hastiuement manda gens de toutes parts, & assembla & fait assembler nauires pour icelle poursuiuir en Hollande, & mesmement y alla en personne. Et luy venu audit paÿs fut receu de plusieurs bonnes villes d'iceluy paÿs, comme Herlan Dourdrech, Roëtre-dame & aucunes autres. Et adonc commença la guerre entre ledit Duc de Bourgongne d'une part, & la Duchesse Iaqueline de Bauiere sa cousine germaine d'autre.

Comment le Duc de Bethfort meit ius le champ des Ducs de Bourgongne & de Clocestre, & autres matieres.

EN ce mesme temps le Duc de Bethfort qui se disoit Regent de France, fait assembler en la ville de Paris plusieurs nobles hommes dudit Royaume de France, avec aucuns sages des trois estats. Et les ambassadeurs d'Angleterre, pour ensemble auoir secours & deliberation, sur la iournée & champ de bataille entrepris entre le Duc de Bourgongne & de Clocestre. Toutesfois apres ce que la querelle eut par plusieurs iournées esté visitée & debattue en conseil, fut conclud toutes choses veuës & considérées, qu'il n'y auoit point de iuste cause entre eux d'appeller l'un l'autre en champ. Et pourtant fut ordonné que celle iournée seroit mise de tout à neant, & qu'ils ne feroient d'amendise l'un à l'autre. Et estoient lors à Paris, au conseil dessusdit de par le Duc de Bourgongne, l'Euesque de Tournay, & de par le Duc de Clocestre l'Euesque de Londres, & avec eux de chacune partie aucun de leur conseil. Le dixseptiesme iour du mois de Septembre en cest an, furent en la cité d'Autun faictes les nopces solemnellement de Charles de Bourbon Comte de Clermont, fils & heritier du Duc de Bourbon prisonnier en Angleterre, & d'Agnes seur au Duc de Bourgongne: ausquelles nopces fut la Duchesse de Bourgongne seur au Duc de Bourbon: apres laquelle feste passée, & que icelle Duchesse de Bourgongne fut retournée en Dijon trespasla de ce siecle, & fut enterrée en l'Eglise des Chartreux au dehors de ladicte ville de Dijon en grand tristesse & gemissemens des Bourgongnons, qui moult l'aimoient: car elle estoit dame prudente tant enuers Dieu, comme enuers le monde. En l'an dessusdit furent enuoyez de Paris à Rome, deuers nostre saint Pere le Pape de la partie des deux Royaumes de France & d'Angleterre certains ambassadeurs: c'est à sçauoir pour le Royaume de France l'Abbé d'Orcamp Docteur en Theologie, & deux Cheualiers. Et pour le Royaume d'Angleterre l'Abbé de Beaulieu, avecques deux cheualiers pour sommer audit Pape, comment on auoit sommé au dernier Concile general fait à Constances, affin qu'il conuocast & assemblast Concile pour parfaire & accomplir les choses qui n'auoient esté parfaites audit dernier Concile, en luy notifiant qu'il estoit trop prolongué, que c'estoit contre l'vtilité de la sainte Eglise vniuerselle. En cest an y eut grand

discord en Angleterre entre le Duc de Clocestre d'une part, & le Cardinal de Vincerstre son oncle d'autre part. Et fut la cause du discord, pource que iceluy Duc de Clocestre vouloit auoir le gouuernement du ieune Roy Henry son nepueu: lequel auoit esté baillé en garde par Henry Roy d'Angleterre son pere audit Cardinal: neantmoins par la force & puissance dudit Duc de Clocestre, conuint que ledit Cardinal son oncle se retrahist dedans la grosse tour de Londres: & y fut par six iours qu'il n'osoit issir, & si furent occis huict ou dix de ses gens: mais en la fin la paix se feit, & furent les trois estats du païs assemblez pour sur ce auoir pourueance. En la presence desquels fut par plusieurs fois porté le ieune Roy Henry, & feit en siege Royal. Et entre les autres choses, feit vn Duc du Comte Marechal, & dura cestuy parlement par treslongue espace de temps: esquels furent deliberées plusieurs grandes besongnes sur les affaires dudit ieune Roy, & des Royaumes: c'est à sçauoir de France & d'Angleterre. Enuiron le mois de Decembre se departit le Duc de Bethfort & la Duchesse sa femme avec luy, à tout cinq cens combattans ou enuiron de Paris & vint à Amiens, où il fut par aucuns iours. Durant lesquels estoient sur les champs aucuns faquemens iusques à mille cheuaux: desquels estoit le chief & conducteur vn nommé Sauuage de Fermanuille, lequel n'estoit point aimé du dessusdit Duc. Et pourtant ledit Sauuage qui estoit logé à Esclusiers vers Peronne, sçachant le departement d'iceluy Duc allant d'Amiens à Dourlens petitement accompagné, esperant iceluy soudainement enuahir & ruer ius, se departit à tout ses gens de ladicte ville d'esclusiers: & de là bien en haste cheuaucha à Beauquesne, & là se logea: mais ledit Duc par auant estoit passé & logé à Dourlens, & de là à saint Pol, & par Theroüanne s'en alla à Calais, & de là en Angleterre pour blasmer & corriger son frere Honfroy Duc de Clocestre, des entreprises qu'il auoit faictes contre le Duc de Bourgongne. Pour laquelle poursuite & enuahie dessusdicte, ledit Sauuages de Fermanuille fut en la tresgrande indignation dudit Duc de Bethfort, quand il vint à sa cognoissance ce qu'il auoit fait contre luy: & tant qu'en fin tant pour ce comme pour autres demerites, il en fut vaillamment puny comme cy apres orrez plus plainement declairer.

Comment le seigneur de Siluatier vint au pais de Hollande en l'ayde de la Duchesse Iaqueline de Bauiere.

EN ces iours le Duc de Bourgongne estant au païs de Hollande, menant forte guerre à la Duchesse Iaqueline de Bauiere sa cousine: & à ceux tenant son party, arriuerent assez pres de Serixée au païs de Zelande enuiron cinq cens Anglois gens d'esslite: desquels estoit capitaine le seigneur de Siluatier, soy disant lieutenant du Duc de Clocestre es païs de Hollande & de Zelande: lesquels Anglois allerent deuers la Duchesse Iaqueline pour luy ayder à maintenir sa guerre. Et lors le Duc de Bourgongne qui estoit à le Leyde en Hollande oyant les nouuelles d'iceux Anglois, se partit de là à tout quatre mille combattans qu'il auoit de plusieurs de ses païs: & alla à Rotredame, où il se meit en l'eau en intention de trouuer iceux Anglois pour les combattre. Et iceux attendans y eut aucuns des gens du Duc de Bourgongne, qui rencontrerent partie des dessusdits Anglois, si les desconfirent, prindrēt & occirent.

& occirent. Apres ledit Duc de Bourgongne ſçachant que ſes ennemis Hollandois & Zelandois & Anglois, eſtoient de deux à trois mille combattans armez au port de Branuers en vne aduene, où eſtoient leſdits ennemis & ſ'en vint illec. Si furent toſt & victorieuſement par ledit Duc de Bourgongne & les ſiens aſſaillis, combattus & en brief deſconfits. Et demourerent morts ſur la place tant Hollandois, Zelandois comme Anglois enuiron de ſept à huit cens combattans. Et les autres ſe meirent à fuir en grand deſfroy, & furent chaffeſſez iuſques à la mer où il ſ'en ſauua grand partie dedans leurs vaiſſeaux. Entre leſquels ſe ſauuerent ledit ſeigneur de Siluatier capitaine deſdits Anglois & le ſeigneur de Hantredée. Et de la partie du Duc de Bourgongne, furent morts ſur la place des gēs de nom, meſſire Andrieu de Valines tant ſeulement, & Robert de Brimeu fut rapporté de la place bleſſé, & en fin mourut de ladicte bleſſeure. Apres laquelle victoire ledit Duc de Bourgongne r'asſembla ſes gens, & regracia humblemēt ſon Createur de ſa bonne aduerture. Et brief enſuiuant laiffa en pluſieurs villes au païs, leſquelles eſtoient à luy obeiffans garniſon de ſes gens : & puis ſ'en retourna à ſon païs de Flandres pour de rechief faire aſſemblée de gens, pour mener guerre audit païs de Hollande : c'eſt à ſçauoir à ceux tenans le party de la Duchefſe Iaqueline. Item apres que ledit Duc de Bourgongne fut retourné des païs de Hollande & de Zelande, & qu'il eut laiffé ſes garniſons audit païs : ladicte Duchefſe Iaqueline de Bauiere aſſembla trefgrand nombre de gens d'armes, & les mena deuant Herlam : laquelle ville elle aſſiegea trefpuiffamment tout à l'enuiron : & eſtoit dedans de par le Duc de Bourgongne le Damoifeau Yſambergue, & meſſire Rolland ce Hultquerre cheualier avec certain nombre de combattans. Durant lequel ſiege meſſire Iean de Hultquerre fils dudit meſſire Rolland, aſſembla de ſept à huit cens combattans tant nobles comme communaulté du païs de Flandres : leſquels il emmena haſtiuemēt au païs de Hollande, en intention de ſecourir ſon pere, mais ſa venue fut ſceüe par la deſſusdicte Duchefſe : laquelle enuoya de ſes gens au deuant d'eux & les trouuerent en vn deſfroy vers la mer : ſi les combattirent & deſconfirent ou la plus grand partie ſinon aucuns, qui ſe ſauuerent avecques ledit meſſire Iean de Hultquerre : de laquelle beſongne fut moult ioyeuſe la Duchefſe Iaqueline. Et feit mettre à mort cruelle ceux qui auoient eſté prins priſonniers. Et apres pour doubte de la venuë du Duc de Bourgongne qui faiſoit vne grande aſſemblée de gens en ſes païs de Flandres & d'Arthois, leua ſon ſiege deuant Herlam. En ceſt an le Comte de Salſebery aſſiegea la fortereſſe de Moyennes en Champaigne : laquelle eſtoit forte outre meſure & ſi bien garnie de gens & habillemens de guerre, que c'eſtoit merueilles. Lequel ſiege durant y eut pluſieurs grandes & fortes eſcarmouches entre les parties, tant d'un coſté comme d'autre. Entre leſquelles en y eut vne, où fut mis à mort Valerien de Bernonuille frere de meſſire Lyonnel de Bernonuille d'une lance, qui luy trauerſa outre le corps. Toutesfois nonobſtant la grande reſiſtence que feirent les aſſiegez par longue continuation, furent contrains d'eux rendre & en fin ſe departirent à tout leurs biens, & ladicte fortereſſe fut demolie & abbatue. Item le Duc de Bourgongne eſtant en ſon païs de Flandres, eut pluſieurs parlemens avecques le Duc de Brabant ſon couſin & ceux de ſon conſeil ſur les affaires de Hollande. Et entretemps aſſembla

gens de plusieurs lieux, & vint deuers luy grande cheualerie de Bourgongne : desquels estoit chief le Prince d'Orenge, à tout lesquels & foison de Picards & Flamens vers la my Karesme, retourna en Hollande. Et commença de rechief à mener forte guerre à la Duchesse Iaqueline de Bauiere & ses bienvueillans. Et briefuement se rendirent à luy plusieurs bonnes villes d'iceluy païs de Hollande. En ce mesme temps s'assemblerent les gens de la Duchesse Iaqueline de trois à quatre mille cōbattans, & allerent deuant la ville de Hornes sur les marches de Frise, pour icelle enuahir & prendre : dedans laquelle estoit en garnison le seigneur de l'Isle Adam, le bastard de saint Pol à tout cinq cens combattans ou enuiron, qui en moult grand hardiesse issirent contre leurs aduersaires & ennemis, & se ferirent en eux de moult fort & grand courage : & en fin & conclusion les vainquirent & meirent en fuite, & en demoura sur la place de morts enuiron quatre cens sans les naurez, dont il y en eut grand nombre : & de la partie du Duc de Bourgongne furent morts le bastard de Viefuille, & enuiron dix archiers pour laquelle desconfiture grād partie du païs de Hollande se rendit au Duc de Bourgongne. Durant toutes ces tribulations au païs de Hollande, y eut plusieurs rencontres & grandes escarmouches par plusieurs fois entre les parties, qui trop longues seroient à racompter chacune à par soy. Neantmoins la plus grande partie d'iceux rencontrez, estoient à la cōfusion des gens de ladicte Duchesse Iaqueline de Bauiere. Et estoit la cause, pource que les gens du Duc de Bourgongne estoient tous exercitez & excitez en armes, & faits de guerre. Et avec ce auoient grand foison de traict, duquel les Hollandois n'estoient point accoustumez.

De l'an mille cccc. & xxvj.

Comment le Duc de Bourgongne retourna en Hollande & assiegea la ville de Zeneuberche : laquelle se rendit à luy & autres matieres.



AV commencement de cest an le Duc de Bourgongne assembla tresgrand nombre de gens d'armes de ses païs de Flandres, d'Arthois & de Bourgongne : lesquels apres qu'il eut preparé son armée, il la mena en Hollande deuant vne forte ville nommée Zeneuberche, qui avecques le seigneur d'icelle tenoient le party de la Duchesse Iaqueline de Bauiere, & faisoit forte guerre par terre & par mer à tous ceux qui auoient fait obeissance audit Duc de Bourgongne : mais en brief ladicte ville fut tresfort enuironnée, assiegée & combattue par iceluy Duc de Bourgongne & ses gens. Et d'autre part les assiegez qui avecques ledit seigneur estoient en tresgrand nombre, se tindrent & deffendirent tres vaillamment : mais apres que ledit Duc de Bourgongne eut par long temps continué son siege, ledit seigneur de Zeneuberche feit traicté avecques luy par tel si, qu'il luy deliureroit la ville & forteresse avec la seigneurie & subiects d'icelle. Et avec ce rendit sa personne & tous les gentils-hommes qui estoient avecques luy en la volenté dudit Duc, sauues leurs vies, promettans de tenir prison honneste par tout où il leur seroit ordonné. Item furent deliurez és mains dudit Duc de Bourgongne tous les habillemens de guerre estans dedans lesdictes ville & chasteau, avec toutes les nauires, & quand aux souldoyers estranges qui estoient dedans, eurent congé en
faisant

faisant serment que iamaïs ne feroient guerre, en nuls des paÿs du Duc de Bourgogne. Item furent deliurez franchement tous les prisonniers, qui estoient du party du Duc. Entre lesquels estoit le seigneur de Moyencourt, le Damoyfel Dercle & autres. Item tous les bourgeois & habitans de la ville feirent serment audit Duc ou ses commis, & par ainsi demourerent paisibles en payant certaine somme de deniers. Et fut ledit seigneur de Zeneuberche desueu de sa ville, & de ses biens : & avec ce fut amené à l'Isle en Flandres, & ledit Duc garnit lesdictes ville & forteresse de ses gens. Et apres ce leua son siege & retourna avec les siens en Flandres & en Arthois : mais en faisant lesdits voyages moururent d'epidemie le seigneur de Hymbercourt & messire Manfroy de saint Legier, avec aucuns autres. En iceluy an apres que le Duc de Bethfort eut seiourné en Angleterre par l'espace de sept à huit mois avec sa femme & trois mille combattans, s'en alla à Calais & de là à Paris, où il fut certaine espace de temps pour ordonner des affaires de France. Et apres alla à l'Isle, auquel lieu vint deuers luy le Duc de Bourgogne qu'il receut ioyeusement luy & sa femme. Et là eurent plusieurs conseils ensemble pour appaiser le discord, qui estoit entre le Duc de Clocestre & ledit Duc de Bourgogne : mais pour neant y besongnerent. Et pourtant ledit Duc de Bethfort s'en retourna à Paris. En ce temps le Duc de Clocestre fait grand mandement en Angleterre apres le departement du Duc de Bethfort son frere, en intention de venir en Hollande pour secourir la Duchesse Iaqueline qu'il disoit sa femme. Et s'estoit allié avec le Duc de Clocestre contre le Duc de Bourgogne, le Comte de Salsebery & plusieurs autres seigneurs d'Angleterre. Ledit Duc de Bethfort sçachant ceste entreprinse, enuoya hastiuement ses ambassadeurs en Angleterre deuers son frere le Duc de Clocestre : lesquels ambassadeurs traicterent tant avec luy qu'il se deporta de la dicté emprinse, en impetrant trefues entre les parties iusques à certaine espace de temps, esperant de les mettre d'accord : & feirent ceste ambassade l'Abbé d'Orcamp & maistre Iean le Duc.

Comment les Sarrazins retournerent en Chippre, & eurent bataille aux Chippriens : en laquelle bataille le Roy fut prins & mené au Souldan.

EN ce temps arriuerent deuers le Roy de Chippre plusieurs Cheualiers, & escuyers de diuers paÿs : lesquels par auant auoient mandé pour resister à l'armée des Sarrazins que chacun iour il attendoit. Et avec ce il assembla de son royaume ce qu'il peut auoir de gens : auquel il pourueut de viures, logis & argent au mieux qu'il peut chacun selon son estat, & faculté. Et entre temps qu'il attendoit, comme dit est, la venue des Sarrazins : ses gens qui estoient de diuerses nations, s'esmeurent par la maniere que le Roy auoit assez affaire de mettre paix entre eux : & ne sçauoit comment il peust ordonner capitaine qui à eux fut agreable. Durant lesquelles dissentiōs ou diuisions les Sarrazins arriuerent audit royaume de Chippre en tresgrand multitude, & prindrent port à Lymeson & assiegerent la tour, qui estoit tresbien réparée & garnie de gens d'armes : mais nonobstant elle fut prinse par force & le capitaine nommé Estienne de Buysense mort, avecques tous ses gens. Et adoncques le Roy de Chippre sçachant les nouuelles de ses ennemis, assem-

bla ceux de son conseil, & leur demanda qu'il en auoit à faire. Et la plus grand partie de ceux de son pays luy feirent responce, qu'il se tint en sa ville de Nicosie disant que mieux valoit pays gasté que perdu. Mais tous les estrangers furent de contraire opinion, & luy conseillerent qu'il se meit aux champs, & qu'il combattit tresbien & hardiement ses ennemis : lesquels destruisoient ainsi son pays & mettoient à mort cruelle son poure peuple. Le Roy ce voyant delibera soy mettre aux champs le second iour ensuiuant, & quand le iour vint & qu'il monta à cheual, le premier pas que son destrier feit, il s'agenouilla iusques à terre. Et le Prince de Gallilée son frere en montant à cheual laissa cheoir son espée hors de son fourrel à terre, dont plusieurs eurent petite esperance qu'ils deussent auoir victoire. Et alla celuy iour le Roy loger à trois lieües pres de la cité en vne place moult delectable, nommée beau lieu. Et le samedi ensuiuant dont c'estoit le ieudy cheuaucha en belle ordonnance iusques à vne ville nommée Citotye. Et le dimenche ensuiuant sixiesme iour de Iuillet apres que le Roy eut ouï ses Messes, il se assist à table. Et à celle heure que luy & tous ceux de son ost disnoient, fut veu en plusieurs lieux grand fumée des feux que les Sarrazins boutoient, & lors furent au Roy apportées certaines nouuelles qu'ils venoient contre luy. Et adonc le grand Commandeur de Chippre avecques plusieurs freres de Rhodes de sa religion, & aussi le seigneur de Varemboalais Almant & aucuns autres gentils-hommes de la nation de France, demanderent congé d'aller descouurir & veoir leurs ennemis. Lequel leur accorda moult enuis. Si allerent si auant qu'ils trouuerent les Sarrazins, ausquels ils escarmoucherent & en occirent aucuns : mais en fin pour la tresgrande habondance d'iceux, ils ne peurent porter la charge : & en y eut de morts trente ou enuiron, & les autres se retrahirent enuers le Roy au mieux que faire le peurent, lequel Roy cheuauchoit grand erre pour trouuer ses ennemis. Et aussi sans faire grand ordonnance, cheuaucha grand espace & tant qu'il trouua les Sarrazins assez pres d'une ville qui s'appelle Domy. Et estoient au plus pres de luy son frere Prince de Gallilée, le Connestable de Hierusalem, deux Comtes d'Allemagne & toute la fleur de sa cheualerie. Et adoncques le dessusdit Roy de Chippre assaillit moult cheualereusement & soubdainement les Sarrazins ses aduersaires, & tant que de plaine venue leur feit grand dommage. Mais ainsi que fortune le voulut aduerser le coursier du Roy cheut des quatre pieds à terre, & se desclauerent les sangles de la selle, & apres qu'il fut remonté, & qu'il voulut faire faits d'armes, la selle retourna & le Roy cheut par terre, & le cheual s'enfuit, & fut de necessité qu'il monta sur vn petit cheual d'un sien escuyer, nommé Anthoine Kaire : car tous les petis s'en estoient fouiz de frayeur à tout les grans coursiers. Pour laquelle aduenture grand partie des Chippriens cuiderent certainement que leur Roy fut mort, & demourerent tous esbahis. Et pource les Sarrazins qui ja tournoient en Surie, reprindrent couraige. Si vint leur grosse bataille qui chargea sur la gent chrestienne si puissamment, qu'il fut de necessité au Roy qu'il se retrahist en la Chireotie, dont il estoit party. Et quand il vint assez pres dudit lieu iceluy lieu estoit ja environné des Sarrazins, tellement qu'il n'y peut entrer. Et adoncques se meirent les Chrestiens en desroy & commencerent à fouir chacun, où ils peurent pour le mieux. Le Roy se retrahit

retrahit sur vne montaigne assez aduantageuse : & tousiours estoit au plus pres de luy son frere Prince de Gallilée, lequel luy dit ainsi . Monseigneur vous voyez clerement que toutes voz gens vous abandonnent, & que vous ne puez resister contre voz ennemis, veuillez sauuer vostre personne, & ayez compassion de vostre Royaume. Se vous estes prins, nous sommes tous perdus . Prenez aucuns de voz plus feables seruiteurs, si vous retrayez en aucune seure place, & ie demourray cy avecques les bannieres, iusques à ce que ie sentiray que vous serez en lieu seur, & puis feray pour le salut de ma personne ce que à Dieu plaira moy administrer . Le Roy oyant ce le regarda moult doucement & luy respondit : Beau frere ja Dieu ne plaise que ie me parte, allez reconforter & r'assembler mes gens en eux admonnestant, qu'à ce befoing se veuillent acquitter au seruice de leur souuerain & naturel seigneur . Le Prince de Gallilée y alla à telle heure, qu'il fut si tresdurement rencontré de la gent Sarrazine, que apres qu'il eut fait tant de faits d'armes que vaillant Prince pouoit faire, il fut occis & là demoura en la place . D'autre part le Roy fut si tresfort empressé de ses ennemis, qu'il se partit tout abandonné de ses gens, & descendit de la montaigne, où il estoit en vne petite vallée. Et là fut tellement assailly qu'il fut enfermé en quatre lieux, si qu'il fut abbatu de son cheual à terre . Et la gent Sarrazine non cognoissant que ce fut le Roy, de toutes parts commencerent à ferir sur luy pour le mettre à mort, quand vn cheualier de Castelongne du party d'iceluy Roy nommé messire Gasserant Sauary, se coucha sur le Roy en criant à haulte voix en langage de Surien : c'est le Roy, c'est le Roy. Adoncques vn capitaine Sarrazin feit vn signe de sa main, auquel tous les autres laisserent cheoir leurs espées à terre, & ledit capitaine rebouta la sienne au fourrel : & prestement s'en alla deuers le Roy : si le print par la main en luy disant en langage Grec, qu'il auoit pleu à Dieu le deliurer en la main & puissance du Souldam, & luy dit : Vous viendrez par deuers luy, reconfortez vous : car pour certain i'ay bonne esperance qu'il vous fera bonne compagnie, le dessusdit cheualier Chastelan fut prins avecques le Roy, & luy respiterent la vie pource qu'il estoit si vaillamment maintenu . Ainsi & par ceste maniere fut le Roy de Chippre prins de la gent Sarrazine, qui luy meirent vne chaine au col . Et tantost apres arriuerent les gens de pied, qui à toutes fins vouloient occire le Roy : mais Dieu par sa douce misericorde l'en deliura : car il estoit hōme charitable & de bōne vie enuers Dieu. Et brief ensuiuant tous ceux de la partie du Roy de Chippre furent mis à desconfiture, & se sauuerent ceux qui sauuer se peurent : & la plus grand partie s'en fouyrent par les montaignes, où ils peurent le mieux . Et n'en demoura de morts en la place que enuiron de seize à dixsept cens . Et assez brief ensuiuant la gent Sarrazine menerent le Roy de Chippre à Salines, où estoit leur nauire : & là le meirent en bonne garde . Si furent en celle bataille deuant-dicte deux Comtes d'Alemaigne : c'est à sçauoir le Comte de Humbrecht, & le Comte de Noorch aduoué de Coulongne à tout certain nombre de gens . Et si y estoient de Sauoye le seigneur de Varembon, & messire Iean de champains seigneur de Gruffy : lesquels dessusdits ne furent ne morts ne prins .

I T E M apres qu'il fut venu à la cognoissance par le pays de Chippre & à

Nicosie, de la desconfiture de leurs gens & de la prinse de leur Roy, messire Gilles de Lusignan frere du Roy, esleu Archeuesque de Nicosie, avecques messire Jaques de Caffran Mareschal de Chippre, demourez pour la garde de ses enfans, furent moult troublez & desconfortez pour ces piteuses nouvelles: & pourtant iceluy dimenche à heure de minuiet, se departirent de la cité & emmenerent avec eux la seur du Roy & ses enfans: si les conduirent en la fortresse de Chermes, qui est située sur la mer à cinq lieües pres de Nicosie, & là demourerent iusques au retour du Roy. Et le lendemain qui fut le lundy la communaulté de la ville courut au Palais, pour sçauoir aucunes nouvelles du Roy. Et quand ils ne trouuerent à qui parler, ils s'en retournerent en leurs maisons: & prindrent leurs femmes & leurs enfans & aucuns de leurs biens, & se departirent de la ville, laissant icelle du tout abandonnée, sinon de pources gens impotens & aueugles. Et s'en fuyrent les aucuns deuers Famagoce, & les autres à Chermes & en autres villes & par les montaignes, tant que c'estoit trespiteuse chose à les veoir. Et le second iour ensuiuant le capitaine des Sarrazins alla à toute sa gent deuers la cité de Nicosie: laquelle, comme dit est, il trouua du tout abandonnée. Si se logea au Palais Royal, & puis fait crier prestement par la cité que tout homme retournaist en son propre lieu: c'est à sçauoir de ceux de la ville, & on les tiendroit paisibles. Pour lequel cry retournerent dedans ladicte cité enuiron de dix à douze mille personnes. Or est verité que le Roy de Chippre & le grand maistre de Rhodes auoient vne trespresse armée sur la mer: dedans laquelle estoit le bastard de Bourgongne frere au Duc Philippe, le seigneur de Rombaix & moult d'autres notables seigneurs de diuerses marches: lesquels estoient moult desirans de combattre les Sarrazins: mais oncques ne peurent auoir vent propice pour eux monstrier contre lesdits Sarrazins. Et estoit ledit bastard de Bourgongne arriué à Vasse, esperant d'estre à ladicte journée: & entre temps le Roy fut prins, comme dit est. Et pourtant iceluy bastard & les siens, retournerent sur la mer pour de rechief aller contre iceux Sarrazins. Et adoncques le vent leua que les Chrestiens desiroient, & tant qu'en pou d'espace arriuerent vers l'armée des Sarrazins, & tellement que les parties se veirent l'un l'autre. Et adonc le capitaine des Sarrazins qui aussi estoient en mer, voyant les Chrestiens en grand nombre, enuoya hastiement ses messagiers à l'autre capitaine Sarrazin qui estoit à Nicosie: si luy manda destroitement sur peine d'estre reputé trahistre, qu'il retournaist à tout son ost & ses gens en son nauire: laquelle chose ledit capitaine accomplit. Et apres qu'il eut robbé toute la cité de Nicosie & reduy le peuple en chetueté, il fait bouter le feu au Palais Royal, & en plusieurs autres lieux, & s'en alla à tout les siens à Salines où estoit leur nauire. Et durant le chemin prindrent plusieurs enfans allaictans leurs meres, & les iectoient sur les espines & sur les hayes, en les lapidant tres-horriblement: & d'autre part le capitaine Sarrazin qui tenoit le Roy de Chippre prisonnier luy fait escrire vnes lettres à son capitaine general, qui estoit sur la mer, contenant ou en substance qu'il ne portaist nul dommage aux Sarrazins si chier qu'il auoit la vie du Roy. Et les porta sur vne petite galliotte messire Galleran Sauary: ausquelles lettres le capitaine des Chrestiens obeist, ce que faire ne deuoit selon l'opinion de plusieurs: mais parauant auoient les deux parties
fort

fort approché l'un l'autre, & y auoit grand besongne. A laquelle besongne qui fut par mer y eut trespasse escarmouche, par especial de traict: duquel furent tant d'un party comme d'autres plusieurs hommes morts & nauez. Et à celle besongne furent faits cheualiers Guy bastard de Bourgogne frere au Duc Philippe, Simon de Lan, Robert seigneur de Rebecque & aucuns autres de diuerses marches, sans conquerre nauire l'un sur l'autre, sinon la nef des Pellerins dont cy apres est faicte mention. Durant lequel temps se auança vne naüe chargée de Pellerins, voulans acquerre honneur: esperans pour certain que l'armée des Chrestiens qui estoit sur mer d'eust combattre les Sarrazins, allerent si auant qu'ils ne peurent retourner: & nonobstant secours furent prins, & en la presence du Roy de Chippre coupez en pieces comme on coupe la chair au marché sinon aucuns en trespetit nombre, qui furent retenuz prisonniers. Et apres aucuns iours se meirent à voye & retournerent à tout le Roy de Chippre en Surie.

ITEM quand lesdits Sarrazins furent arriuez en Surie à tout leurs prisonniers, ils menerent ledit Roy de Chippre au Kaire deuers le Souldam de Babilonne: & les autres chrestiens estoient deux à deux liez comme bestes. Et traïnoient les Sarrazins apres eux la Banniere de nostre Dame le chief en terre: & puis apres le Roy de Chippre cheuauchoit sur vn petit mulet sans selle lié & en chaîné de chaines de fer. Et en iceluy estat fut mené en la presence du Souldam & contrainct à ce faire, s'agenouïlla par neuf fois en inclinant le chief tout bas, baïsant la terre à chacune fois. Et quand il fut paruenü par deuant le Souldam, qui estoit assis pompeusement en vne haulte gallerie, le fait estre vne grosse heure en bas ou enuiron sa presence: & depuis le fait mener en vne tour où il tint prison tant qu'il fut en la ville du Kaire, où il se fait seruir tresabondamment comme Roy de tous viures fors de vin. Mais les marchans Chrestiens luy en faisoient deliurer secrettement à grand planté. Et les autres prisonniers Chrestiens furent menez en diuers lieux.

ITEM entre temps que ledit Roy de Chippre estoit ainsi en prison au Kaire par deuers le Souldam de Babilonne, l'Archeuesque de Nicosie qui estoit frere au Roy, manda messire Pierre de Lusignan Connestable de Hierusalem: & luy bailla le gouuernement du Royaume de Chippre: lequel fait faire de grans iustices en punissant ceux qui s'estoient voulu rebeller depuis les tribulations dessusdictes. Et pou de temps apres retourna ledit esleu en la cité de Nicosie, laquelle pou apres se repeupla: & brief ensuiuant vn marchand Geneuois nommé Benedic Peruessin, meü de pitié requist au conseil du Roy, qu'il enuoyast au Kaire, disant qu'il auoit esperance d'estre occasion de la redemption du Roy. Lequel y fut enuoyé, & tant exploicta que le Souldam meit ledit Roy de Chippre à finance de deux cens mille ducats, par telle condition que perpetuellement il payeroit par chacun an tribut de son Royaume de la somme de cinq mille ducats. Et par ainsi fut la paix faicte du Souldam avec le Roy de Chippre, & fut mis hors des fers le iour de l'Assumptiō nostre Dame. Et depuis ce le demandoit souuent le Souldam pour deuïser avecques luy: & luy faisoit de merueilleuses questions en le temptant de abandonner la foy Chrestienne. Ausquelles questions le Roy respondit à toutesfois si sagement, que ledit Soul-

dam non ſçachant plus que dire, le faisoit prendre avec plusieurs reſectiions de boire & de manger, & puis le r'enuoyoit en priſon. Et dedans brieſs iours enſuiuans qu'il fut mis en finance, le feit ledit Souldam mettre hors de priſon & loger en la ville. Et le faisoit ſouuent aller en eſtat en eſbatement ſur beaux cheuaux noblement accompaigné de la gent Sarrazine: & depuis fut payé grand partie de la finance, & baillé ſeureté du ſurplus. Et apres le iour de Paſques Flories fut mis à plaine deliurance, & fut mis en vne gallée au port d'Alexandrie ſur la mer verte. A tout laquelle compaignie de l'Admiral de Rhodes, il alla deſcendre à Chermès: & là trouua ſes enfans & ſa ſeur & tous les ſeigneurs & dames de ſon royaume, avecques toute la Baronnie & toute la nobleſſe de ſon païs, qui tous enſemble le receurent moult reueremment en reſraciant noſtre ſeigneur Ieſus Chriſt treſhūblement de ſa reuenue. Et aucuns iours enſuiuans ſe partit de Chermès & retourna accompaigné, comme dit eſt, en la cité de Nicolie, où il fut de tout ſon peuple receu ioyeuſement: & ſe logea en l'hoſtel du Conneſtable de Hieruſalem. Auquel hoſtel il demoura ſa vie durant, pource que ſon palais, cōme dit eſt deſſus, auoit eſté deſtruit de la gent Sarrazine. Et depuis le trespas de la Royne Charlotte ne fut remarié, n'eut cōpaignie à nulle fēme, cōme ſes propres ſeruiteurs le tenoient veritablement. Et depuis veſquit grand eſpace de temps.

Comment la fortereſſe de Moyenes en Champaigne fut prinſe des Francois. Et comment ſentence fut rendue pour le Duc Iean de Brabant. Et de la fortereſſe d'Oripeſte en Prouence.

EN ce temps fut reprinſe la fortereſſe de Moyenes en Champaigne par les gens du Roy Charles, par trahiſon d'un Anglois qui eſtoit dedans: & depuis fut r'assiégée des Anglois: c'eſt à ſçauoir du Comte de Salſebery: & avec luy pluſieurs Picards, qui audit ſiege continuerent tant que les aſſiegez furent contraincts d'eux rendre. Et ſe departirent les aucuns eſtrangers ſauuement, & ceux qui autresfois auoient tenu le party des Anglois & Bourgonngnons furent executez & mis à mort. Eſquels entre les autres fut l'un d'iceux vn gentil-homme nommé Gilles de Clary, & fut à la reddition meſſire Iean de Luxembourg: lequel apres qu'icelle fortereſſe fut du tout deſolée, retourna en ſon chaſtel de Beaurevoir.

EN ceſt an fut enuoyé par noſtre ſainct Pere le Pape la ſentence diffinitive, touchant le proces du Duc Iean de Brabant: par lequel fut ordonné & declairé, le mariage qui eſtoit fait du Duc de Cloceſtre & de la Duchefſe Iaqueline de Bauiere de nulle valeur, & que ſ'il aduenoit que le Duc de Brabant mourut, ſi ne pourroient auoir leſdits Duc de Cloceſtre & la Duchefſe Iaqueline l'un l'autre par mariage. Et pourtant ledit Duc de Cloceſtre ſçachant ceſte partie faite par noſtre ſainct Pere le Pape, eſpouſa & print en mariage vne femme de bas eſtat au regard de luy, nommée Alienor de Combattre, dont deſſus eſt faite mention: laquelle ledit Duc par auant auoit tenue en ſa compaignie certain temps, auoit comme ſa dame par amours: & avec ce auoit eſté diffamée de aucuns autres hommes que d'iceluy Duc. Laquelle choſe feit moult eſmerueiller pluſieurs perſonnes de France & d'Angleterre, conſiderans que ledit Duc enſuiuoit mal en iceluy cas la ſeigneurie dont il eſtoit extraict.

En

En ces iours messire Jean Blondel accompagné de Jean Blondel son cousin Germain, & huit autres compagnons de guerre, par le moyen d'un Chapellain qui estoit à maistre Jean Cadart, prindrent la forteresse d'Oripecte en Prouence, & ledit maistre Jean dedans qui en estoit gardien: & le feirent prendre prisonnier tendant auoir de luy grand finance. Lesquelle chose vint en brief à la cognoissance de ceux du païs, qui sans delay les assiegerent: & en fin les contraignirent si fort, que bel leur fut d'eux départir de ladicte forteresse sans riens emporter, ayans saufconduit pour eux en aller seurement. Nonobstant lequel à l'issir hors de ladicte forteresse, fut ledit Jean Blondel occis des païsans. Et le chapellain qui auoit fait la trahison fut decapité.

Comment le Duc de Bethfort fait assieger Montargis. Et comment le siege fut leué par les Francois: & autres matieres en brief.

Lors en cest an le Duc de Bethfort qui se nommoit Regent de France de par le Roy Henry, fait assieger la ville & forteresse de Montargis par les Comtes de Vvaruich & Suffort: avec lesquels estoit le seigneur de la Poulle frere dudit Comte de Suffort, messire Henry Biset & autres capitaines, qui pouoient auoir avecques eux trois mille combattans: lesquels venus audit lieu de Montargis l'environnerent. Ladicte ville fut en assez beau lieu, pource qu'il luy conuenoit faire trois sieges: lesquels assez dangereusement pouoient bailler secours l'un à l'autre: neantmoins ils se logerent tout entour & fortifierent leurdit logis en aucuns lieux: & estoit ledit Comte de Vvaruich logé en vne abbaye de Nonnains à vn des costez de la ville. Et brief apres leur venue feirent aucuns ponts & passaiges sur la riuere, pour par iceux secourir les vns aux autres se besoing leur estoit. Et ce fait commencerent vigoureusement à approcher icelle ville de Montargis, & la forteresse & tresfort combattre & adommager de plusieurs engins: mais nonobstant ce les assiegez se deffendirent trespuissamment, & continuerent les assiegeans en ceste besongne l'espace de deux mois ou environ. Lequel temps durant les nouvelles furent portées au Roy Charles de France, & luy feirent scauoir lesdits assiegez que s'il ne leur enuoyoit secours assez brief, il les conuenoit rendre es mains de leurs aduersaires. Ces nouvelles venues à la cognoissance du Roy Charles, comme dit est, ledit Roy assemblea son conseil: auquel fut conclud & deliberé d'y enuoyer secours ou au moins eux rafreschir de viures & de gens: lequel fut mis sus, & fut faicte pour ceste cause aucune assemblée, qui point ne porta d'effect & se derompit: mais depuis fut ordonné de par le Roy Charles, de faire vne autre assemblée à Orleans pour ceste mesme cause: de laquelle fut baillé charge de par le Roy au Comte de Dunois Bastard d'Orleans. Avec lequel se meirent messire Guillaume d'Albret seigneur d'Orual, le seigneur de Grauille, de Villax & de Gaucourt, Estienne Vignolles qu'on dit la Hire, messire Gilles de saint Simon, Gaultier de Brouffart & plusieurs autres capitaines, qui pouoient bien auoir seize cens combattans droits gens de guerre & d'élite: lesquels se meirent à chemin à tout grand foison de viures, en intention de rautailer icelle ville de Montargis & de non leuer le siege. Et quand ils furent venus à vne demie lieüe pres le plus se-

crettement qu'ils peurent, ils prindrent conseil ensemble & conclurent de ferir sur aucuns des logis des Anglois par deux costez, & auoient avec eux gens de la garnison dudit lieu de Montargis, qui les menoïët: entre lesquels estoit vn nommé le petit Breton. Si fut la Hire ordonné à conduire l'vne des compagnies: & comme ils auoient conclud le feirent, si ferirent vaillamment & de grand voulenté sur les logis des Anglois, qui de ce ne se donnoient garde criant Montioye saint Denys: & commencerent à bouter les feux asprement en maint logis & à tuer, prendre & mettre à meschief plusieurs Anglois, & tellement & si vaillamment s'y porterent, que le logis du seigneur de la Poulle fut en assez briefue espace du tout tourné à desconfiture: mais ledit seigneur de la Poulle se sauua en vn petit bastel enuiron luy huiëtiesme. Et adonc auoient ceux de la ville tenues les eaües si grandes & grosses, que les ponts que lesdits Anglois auoient faits estoient couuerts d'eaüe: parquoy quand ils se cuidoient sauuer, ils cheoiët à costé des ponts & se noyoient. Et entant que ce se faisoit, le Bastard d'Orleans se combattoit vigoureusement de l'autre costé sur les logis de messire Henry Besset: & là estoit descendu à pied, & y auoit fort à faire quand les autres qui auoient rué ius & desconfit le premier logis, luy allerent puissamment bailler secours: & auoit esté blessé le seigneur de Grauille. Et lors lesdits Anglois aperceuans que la force n'estoit point à eux, se commencerent à retraire pour aller au logis du Comte de Vvaruich: & passoient par vn pont à si grand haste & en si grand presse, que du grand faix le pont rōpit sous eux, & là furent morts & desconfits laidement & en tresgrand nombre: car avec ce ceux de la ville de Montargis, faillirent fierement en l'ayde de leurs gens, & sans espargner en occirent & prindrent plusieurs. Et entre-temps le Comte de Vvaruich assembla ses gens le plus hastiuement qu'il peut: mais quand il sceut la grand perte & damageable destruction de son ost, dont il auoit ja perdu de mille à quinze cens hommes qui furent que morts que prins, se meit en bataille en soy retournant sur vne petite montaigne és vignes au dessous de son ost. Et lors les François qui furent fort trauallez de ceste besongne, entrerent dedans Montargis. Et entre-temps la nuit vint, & se departirent & meirent à chemin lesdits Anglois à tout le remenant de leurs gens, desquels la plus grād partie estoient de pied eux retrayant au chasteau Landon, en Nemours & és autres lieux de leur obeïssance. Et les dessusdits François demourerent à Montargis faisans bone & ioyeuse chiere, de ce qu'ainsi par l'ayde de Dieu auoient acheué ce pourquoy ils estoient là venuz. Et apres s'en retournerēt deuers le Roy Charles de France qui les receut tresamiablement.

En cest an le Duc Iean de Brabant, qui estoit malade de moult griefue maladie, trespassa en son chastel de Leneure en disant moult deuotement. *Miserere mei Deus, &c.* Et fut enterré en la chappelle de sondit chastel de Leneure empres son pere. Apres le trespas duquel releua toutes ses seigneuries Philippe Comte de Ligny & de S. Pol son frere. Et par ainsi la Duchesse Iaqueline demoura abseulée de ses deux maris: car, comme dit est dessus, le Duc de Cloestre auoit prins autre femme: & ledit Duc de Brabant estoit trespasé, comme dit est. Et durant la vie dudit Duc de Brabant y eut vn nommé Iean Cheualier, qui voulut mettre à iceluy Duc vn carquant au col à la requeste, comme on disoit,

soit, de la Comtesse douïagiere de Hainault : lequel cheualier pour ceste cause fut prins à Bruxelles & decapité. En ce mesme temps la forteresse d'Escandeu-
 ure empres Cambray, fut mise en la main de mōseigneur Iean de Luxembourg
 par le consentement du Duc de Bourgongne: & fut la cause, pource que messie-
 re Loÿs frere bastard de la Duchesse Iaqueline de Bauiere, à qui estoit icelle for-
 teresse fait guerre & tribulation au paÿs d'enuiron, comme celuy qui tenoit le
 party de ladicte Duchesse Iaqueline sa sœur, & ainsi perdit il son heritage. En
 ces iours eut vne terrible & grand rencontre aupres du mont S. Michel, entre
 les Anglois qui tenoient le mont de Hellem d'vne part, & les François & les Bre-
 tons d'autre part: Mais en conclusion lesdits Anglois y furent morts & descon-
 fits. Si obtindrent victoire les François, & par consequent gaagnerent la dessus-
 dicte forteresse.

De l'an mille cccc.xxvij.

Comment la forteresse de la Malle-maison, qui estoit à l'Euesque de Cambray fut prinse ^{1427.}
par messire Iean Blondel: & autres matieres.



AV commencement de cest an, fut prinse la forteresse de la Malle-
 maison seant à deux lieües pres du chastel en Cambresis: laquelle
 estoit à Iean de Lens seigneur de Liekaerque & Euesque de Cam-
 bray, à cause de son Euesché: & là print messire Iean Blondel tenāt
 le party du Roy Charles accompagné de ses gens, qui estoient en petit nombre.
 Dedans icelle estoit comme capitaine par ledit Euesque vn bel escuyer, nom-
 mé Vvatier de Baillon, lequel fut trouué en son liēt. Et entre-temps les dessus-
 dits en trauersant les fossez parmy l'eaüe, & montant par eschelles dedans la
 basse court, audit lieu prindrent le guet, & apres ils s'embuscherent deuant le
 pont du Donjon. Et au matin quand le portier aualla ledit pont, ils saillirent sus
 les espées traictes, & occirent & tuerent ledit portier: puis entrerent tout paissi-
 blement dedans sans y trouuer quelque deffence n'empeschemēt, iacoit-ce que
 ce fut la plus forte place & mieux gardable qui fut en toutes les marches es paÿs
 d'enuiron: pour laquelle prinse tout le paÿs ce sachant fut mis en grand effroy,
 & mesmement ceux du chastel en Cambresis, & ledit Euesque qui leans estoit
 à celle heure furent moult grandement esmerueillez que ce pouoit estre: car
 pour lors n'estoit audit paÿs nouuelle de nulle guerre: toutesfois l'Euesque de
 Cambray enuoya aucuns de ses gens avec grand partie de la communauté du-
 dit chastel iusques audit lieu de la Malle-maison, pour sçauoir & cognoistre qui
 c'estoit. Et eux là venuz & arriuez, parlerent aucuns de ceux qui l'auoient prin-
 se: lesquels par malice feirent leur cry de Bourgongne & de Luxembourg: &
 pourtant les dessusdits enuoyez s'en retournerent en ladicte ville du chastel en
 Cambresis. Et brief ensuiuant ledit messire Iean Blondel se pourueust de viures
 & de gens en grand abondance: & apres commencerent à courir & à fouller le
 paÿs de Cambresis & plusieurs autres, en faisant maux inestimables: avec les-
 quels s'assemblerent par plusieurs fois à faire lesdictes courses aucuns des gens
 du Duc de Bourgongne, & de messire Iean de Luxembourg. Et entre-temps
 iceluy Euesque enuoya par deuers le Duc de Bourgongne, sçauoir si c'estoit de
 son consentement que la forteresse auoit esté prinse. Auquel fut respondu que

non, ains seroit conforté & aydé par ledit Duc tant qu'il r'auroit sa forteresse.

ITEM apres la mort & trespas du Duc Iean de Brabant, fut faicte vne grande assemblée de seigneurs en la ville de Valenciennes : à laquelle furent le Duc de Bourgongne, les Comtes de Namur, de Ponthieuvre & de Conuersam, le Prince d'Orenge, messire Iean de Luxembourg, les Euesques de Tournay & de Arras, & plusieurs autres nobles gens d'Eglise : & fut pour la cause de sçauoir qui auroit le gouuernement du païs de Hainault. A quoy par meure deliberation de conseil, fut ordonné & estably que ledit païs demourroit en la main & gouuernement du Duc de Bourgongne, lequel sur ce y pourueut de gouuerneurs & officiers. En cest an le Comte de Vvaruich & plusieurs autres Anglois, tindrent siege deuant la ville de Pont Orson : & tât contraignirent les assiegez qu'ils se meirent en composition : & promeirent de à certain iour rendre le fort en la main dudit Comte de Vvaruich, en cas qu'ils n'auroiét secours des François & Bretons, si fort & si puissant que pour combattre iceluy Comte : lequel secours ne fut point enuoyé, & pourtant, comme promis l'auoient, rendirent la place aux Anglois.

Comment messire Iean Blondel rendit la forteresse de la Malle-maison qu'il auoit prise : laquelle appartenoit à l'Euesque de Cambrai.

EN apres le Duc de Bourgongne alla à Mons en Hainault avec luy grand nombre de ceux de son conseil : & là, comme dit est, constitua plusieurs officiers natifs du païs pour gouuerner la seigneurie d'iceluy : auquel lieu par saufconduit alla ledit messire Iean Blondel, qui par ledit Duc fut plusieurs fois sommé & requis de rendre & restituer à l'Euesque de Cambrai sa forteresse : ausquelles requestes il ne voulut en riens obeïr : mais en dissimulant s'excusoit aucunement : Toutesfois ledit Duc de Bourgongne & son conseil conclurent, & delibérerēt de bailler gens & ayde audit Euesque pour assieger & reconquister ladicte forteresse. Et pour ce faire ledit Euesque manda ses amis & se meit en armes à tout ce qu'il peut auoir de gens. Pour lequel ayder & reconforter, y furent commis & establis de par le Duc de Bourgongne messire Guillaume de Lalain Baillif de Hainault, le Begue de Launoy cheualier gouuerneur de l'Isle, & aucuns autres nobles hommes & certain nombre de gens d'armes : durant lequel temps ledit messire Iean Blondel oyant ces nouuelles, & sachant que ledit Duc de Bourgongne auoit son fait mal agreable, condescendit à traicté : conclud & delibera de rendre la forteresse, moyennant que sa paix seroit faicte deuers le Duc de Bethfort & le Duc de Bourgongne : & si luy seroient rendues ses forteresses & seigneuries, lesquelles estoient en la main du Roy Henry de l'Enclastre comme confisquez, & avec ce emporteroient luy & ses gens tous leurs biens, & si auroit pour les despēs quatre mille escus : lesquelles choses en conclusion luy furent accordées & promises, & de ce baillé seurté. Et par ainsi deliura la Mal-maison en la main de Baltazar bastard du Questroy, qui de par le Duc de Bourgongne y fut commis & institué à le garder à certaine espace de temps. Et pour payer ladicte somme & autres fraiz, fut mise sus vne grande taille par tout le païs de Cambresis, tant sur gens d'Eglise comme autres, lesquels à ce payer furent contraincts tresfrigueusement.

ment. Apres lesquelles besongnes par le consentement dudit Euesque & d'aucuns autres du païs, fut ladicte forteresse de la Malle-maison abbatus & du tout demolie, dont ce fut moult grand dommage: car c'estoit la nompareille & la mieux ediffiée qui fut en tous les païs à l'enuirón, & ou plus fort lieu. Ainsi messire Jean Blondel par force de mal faire, vint à son intention. Et fut, comme dit est, restitué & remis en la possession de tous ses heritages & edifices.

Comment le Duc de Bourgongne retourna ou païs de Hollande, où il feit assaillir la ville de Hermontfort, & autres matieres.

U Tem apres que le Duc de Bourgongne eut, comme dit est, ordonné de ses besongnes en Hainault, il retourna à tout grand puissance de gens d'armes en Hollande, pour corriger aucuns qui autresfois luy auoient fait serment, lesquels faisoient rebellion audit païs. Et en ce voyage feit assaillir vne ville fermée de fortes hayes & fossez plains d'eau, nommée Hermontfort: lequel assaut dura assez longuement, & fut moult aspre, cruel & terrible. Et mesmement ledit Duc de sa personne passa l'eau desdits fossez, & alla combattre ses ennemis & aduersaires tresvaillamment, & pour vray il se meit adonc en tresgrand peril & dangier: car les deffendans en grand hardiesse s'abandonnoient sans eux espargner pour eux deffendre, & sauuer leurs vies: durant lequel assaut fut mis à mort vn tresvaillant & puissant cheualier: c'est à sçauoir le seigneur de Vozdanquin. Et avecques luy estoient aucuns autres experts hommes de guerre. Et si y fut nauré le bon seigneur de Sauueses, tant qu'il le conuint porter hors des fossez comme en peril & dangier de mort, & plusieurs autres. Et adonc ledit Duc & ceux de son party voyant & considerant la perte & dommage de leurs gens, eurent conseil de faire sonner la retraicte arriere, comme ils feirent: & se logerent assez pres de ladicte ville, où ils furent celle nuit assez pauurement pourueuz de ce que mestier & besoing leur estoit. Et le lendemain ledit Duc print autre marche. Et lors s'estoient aliez avec la Duchesse Iaqueline, ceux de la ville de Vetrech: & aussi les Ducs de Gueldres & de Cleues y estoient de la partie dudit Duc, parquoy la guerre & tribulation croissoit & multiplioit oudit païs de iour en iour.

E N ce temps s'assemblerent és marches de Picardie environ cinq cens combattans, tant hommes d'armes comme archiers de plusieurs terres: lesquels sous la conduicte de messire Charles de Moyencourt, Matthieu de Humiers, Jean de Longueual & aucuns autres gentils-hommes, furent menez par l'ordonnance & commandement du Duc de Bourgongne, à la requeste d'un cheualier nommé messire Phillebert Andrinet, à l'ayde & secours d'Amé Duc de Sauoye bel oncle d'iceluy Duc de Bourgongne, qui auoit lors guerre & dissention au Duc de Millan: Lesquels cinq cens combattans dessusdits cheuaucherent par plusieurs iournées, tant qu'ils vindrēt oudit païs de Sauoye, où ils furent ioyeusement receuz dudit Duc. Et de là furent enuoyez sur les marchés en tirant vers Lombardie, où ils feirent maux inestimables: & tant que par la renommée d'iceux & par la cremeur que les deux Princes dessusdits eurent pour le pauvre peuple, ayans d'iceux compassion se concorderent & feirent bonne paix, & ladicte paix conclute le Duc Amé de Sauoye, donna cōgé à iceux Picards en eux

grandement remerciant de leur trauail, en donnant à aucuns des plus notables draps de Damas & autres ioyaux. Et par ainsi les dessusdits Picards retournerēt en leurs propres lieux. La cause de la guerre si estoit, pource que le Duc de Milā auoit prins Novare, & cité de Verseil sur le Duc de Sauoye, lesquelles luy furēt rendues. Item apres que le Duc de Bourgongne eut par plusieurs iournées visité le païs de Hollande, & mis ses garnisons sur les frontieres de la Gande, où lors se tenoit la Duchesse Iaqueline, delaisant aucuns de ses capitaines pour la garde & seurté d'iceluy, tels comme le seigneur de l'Isle Adam, messire Lyonnel de Bournouille & aucuns autres hommes d'armes experts & renommez de guerre, s'en retourna en son païs de Flandres. En l'an dessusdit furent es païs d'Espaigne de Castellongne & en Languedoc grās mouuemēs de terre, dont en aucuns diuers lieux plusieurs villes & notables edifices cheurent, dont le peuple d'iceux païs fut par long temps moult troublé & en trefgrand effroy.

Comment en ce temps le Souldam de Babiloine escriuit lettres aux Princes Chrestiens, & la teneur d'icelles.

EN ce temps le Souldam de Babiloine enuoya lettres à tous Roys & Princes Chrestiens, desquelles la teneur s'ensuit. Baldadoch fils d'Aire, Connestable de Ierico, Preuost de Paradis terrestre, nepueu des Dieux: Roy des Roys: Prince des Princes, Souldam de Babiloine, de Perse, de Ierusalem, de Chaldée, de Barbarie: Prince d'Affrique & animal d'Arcadie, seigneur de Siche, des Ainces, des Payens, & des Maritans: maistre Anchipotel, aduoüé d'Amazone, gardien des Isles, Doyen des Abbayes, Commādeur des Temples, froisseur des heaumes, fendeur des escus, perseur des haubers, rôpeur de harnois & de places: lانسeur de glaiues, effondreur de destriers, trefperceur de presses, destruisieur de chasteaux, fleur de cheualerie, sanglier de hardiesse, aigle de largesse, cremeur des ennemis, esperance d'amis, recoureur des desconfits, estandart de Machōmet, seigneur de tout le monde: Aux Roys d'Allemagne, de France & d'Angleterre: & à tous autres Roys, Ducs & Comtes. Et generallyment à tous ceux, esquels nostre debonnaireté est à aduenir. Salut & dilection en nostre grace. Comme ainsi soit qu'il est bien loisible de relenquir erreur par sagesse qui veult: vous mande que vous ne laissez nullement ne tardez à venir par deuers moy, & releuez voz fiefs & terres de ma seigneurie, en reniant vostre Dieu & la foy Chrestienne, delaisant voz erreurs: esquelles vous & voz deuanciers auez esté enuoloppez trop longuement. Ou autrement mō indignation & la puissance de ma forte espée tournera sur vous assez briefuement: dont i'auray voz testes en rançon sans riens espargner. Ces lettres furent données la vigille des Ambassadiens, l'an dixiesme de nostre couronnement: La seconde année apres nostre noble victoire & destruction du malheureux païs de Chippre.

Comment les Anglois vindrent en la Duché de Bretaigne, où ils feirent moult de maulx & de grans dommages: & autres matieres.

En cest



N cest an le Comte de Suffort & messire Thomas de Rameſcon, à cause de certaine guerre qu'ils auoient au Duc de Bretagne, enuiron douze cens combattans allerent courre ou païs de Bretagne iusques aupres de la ville de Renes, où estoit le Duc : & y feirēt de tresgrans dommages, & leuerent de tresgrand proyes tant prisonniers comme autres biens, à tout lesquels retournerent en vn gros village du païs nommé Tintenarch. Et le lendemain se meirent à chemin, & rentrerēt es marches de la basse Normandie à tout ce qu'ils auoient gaigné, sans auoir quelque empeschement ne destourbier. Et tantost apres ledit messire Thomas se logea en vne petite ville, nommée S. Iames de Buueron : laquelle autresfois auoit esté desolée, & la fait reparer & fortifier pour y demourer & tenir garnison : affin de faire aux Bretons guerre, car elle estoit à demie lieüe du païs. Et là demoura iceluy messire Thomas lieutenant dudit Comte de Suffort : lequel Comte estoit capitaine de la basse Normandie. Et commencerent les Anglois à mener forte guerre, & faire plusieurs courses & tournoyemens ou païs de Bretagne. Pour ausquelles obuier & resister, le Duc fait moult grād assemblée des nobles hommes de son païs : lesquels il bailla en charge à son frere le Comte de Richemont, qui nouuellement auoit esté fait Connestable de France : Lequel avecques autres gens qu'il auoit les mena dedans ladicte ville de S. Iames de Buueron : & defait l'assiegea trespuissamment, & y eut de la premiere moult grād escarmouche. Neantmoins ledit Connestable se logea, & fait icelle environner tout autour. Si comença à faire iecter & traire plusieurs de ses engins cōtre la muraille, qui moult fort l'endommagerent. Et vne fois entre les autres eut conseil de la faire assaillir, ce qu'il fait. Et dura l'assault par longne espace tresdur & merueilleux. Si estoient les Bretons Bretonnans ja en vn costé bas, où il y auoit vn petit viuier. Et conuenoit qu'il passassent par vne estroicte voye pour aller iusques au mur à grand dangier. Si y auoit à ce costé vn petit bouleuert dont vn cheualier Anglois, nommé messire Nicole Bourdet auoit la charge à tout soixante ou quatre vingts combattans, & d'autre part y auoit vne porte assez bien fournie d'Anglois. Et lors iceux Bretons qui deualloient es fossez en tresgrand nombre pour aller assaillir, ouïrent de deux costez lesdits Anglois iecter vn tresgrand cry, criant Salsebery & Suffort. Pour lequel cry les Bretons se commencerent à retraire en tresgrand desroy. Et adonc ledit messire Nicole l'assaillit apres eux moult vigoureusement, & sans y trouuer gueres grād deffence en furēt mis à mort & noyez oudit estang de sept à huiēt cens : & de ce en demourerēt prisonniers environ cinquāte. Et si furent gaignez par les dessusdits Anglois dixhuiēt estandarts & vne banniere. Et tost apres furent portées les nouuelles audit Connestable de la perte de ses gens, lequel faisoit fort assaillir de l'autre costé. Si fut de ces nouuelles moult grandement esmerueillé, & fait sonner la retraicte : car tout le siege deuers ledit estang estoit ja leué. Apres ces choses se meirent les Bretons ensemble, & prindrent hastif conseil sur ce qu'ils auoient à faire. Auquel conseil fut deliberé qu'attendu la grand perte qu'iceluy Connestable auoit eüe de ses gens, il estoit bon qu'il se departit, & ainsi le fait il : mais il attendit iusques environ minuiēt, & s'en retourna en la ville de Fougieres en trespetite ordonnance, delaisant audit siege grand foison de bombardes, viures & autres ar-

tilleries. Et ledit messire Thomas à tout six cens combattans qu'il auoit: dont la plus grande partie estoient blesez demoura en icelle ville bien ioyeux de sa bonne fortune. Et feit bouter dedans tous les biens qui estoient demourez de ses aduersaires.

DE PUIS les choses dessusdictes le second iour ensuiuant, vint là le Comte de Suffort à tout quinze cens combattans: lequel mena le lendemain messire Thomas avecques aucuns de ses gens deuant vn fort Monstier, qui tantost se rendit à luy. Et de là se tira plus auant ou pays deuers la cité de Dol, & auoit intention de sejourner là: Mais entre-temps le Duc de Bretagne enuoya deuers le Comte de Suffort vn sien poursuiuant à tout ses lettres: Par lesquelles luy prioit d'auoir trefues sur vne forme, que ledit Comte luy accorda. Et sur ce remanda ledit messire Thomas & ses gens, lequel retourna audit S. James de Bueron à tout grans proyes. Si fut tant parlementé entre lesdictes parties, que les trefues furent données, qui durerent trois mois ou enuiron, moyennant que pour les accords le Comte de Suffort eut quatre mille & cinq cens frâcs. Si s'en tretindrent tresbien icelles trefues iusques en la fin de Iuing qu'elles deuoient faillir: durant lequel temps ne se peurent lesdictes parties accorder. Et pourtant de rechief retournerent à la guerre, & furent faictes plusieurs choses dommageables par feu & par espée par les Anglois oudit pays de Bretagne: Pour lesquelles obuier le Duc & le Connestable son frere, feirent reparer la ville de Pont-Orson, qui depart Normandie & Bretagne à deux lieues du Mont S. Michel. Et y fut mise grosse garnison pour faire frontiere contre lesdits Anglois. Et certain iour ensuiuant ledit Comte de Suffort fut deporté du gouuernemēt de la basse Normandie, & y fut commis & institué le Comte de Vvaruich: lequel assembla moult grand quātité de gens & assiegea ladicte ville de Pont-Orson. Et pource que durant le siege, les Anglois assiegeans, auoient viures à grād danger tant pour la garnison du Mont S. Michel comme pour autre. Et fut enuoyé le seigneur de Scalles à tout cinq cens combattans en la basse Normādie, pour conduire & mener les viures dessusdits. Et ainsi qu'il s'en retournoit à tout iceux les Bretons qui sçauoient son retour, s'estoiēt mis en embusche bien quinze cens combattans aupres du Mont saint Michel. Et lors quād ils veirent leur point, ils saillirent sur les Anglois, lesquels ils trouuerent en bonne ordonnance: si se deffendirent tresvaillamment, & tant que finablement les Bretons fūrēt mis & tournez à desconfiture. Et y en eut de morts en la place bien huiēt cens: entre lesquels y fut mort & occis le seigneur de Chasteau Geron, le seigneur de Cresquan, le seigneur de Chambourg, le Baron de Chambouches, le seigneur du Hunaudue, messire Pierre le Porc, le capitaine des Escocois: Et plusieurs autres nobles hommes, & si fut prins le Vicomte de Rohen, & plusieurs autres grans seigneurs. Apres laquelle besongne les assiegez du Pont-Orson non ayās esperance de secours ne d'ayde, se rendirent sauf leurs vies au Comte de Vvaruich, & s'en allerent le baston blanc au poing, & delaisant tous leurs biens: & y fut commis cappitaine ledit seigneur de Scalles. Apres ceste besongne lesdits Anglois feirent emmener le Baron de Soulenges, messire Pierre le Porc, & vn autre tous morts à leur siege: & liurerent les corps à ceux de dedans pour mettre en terre, affin qu'ils fussent plus certains de ladicte destrouffe & desconfiture: &

re: & qu'ils se rendissent plus hastiement, comme ils feirent. Enuiron la fin de cest an conuocqua messire Iean de Luxembourg és païs de Picardie & à l'enuiron, enuiron mille combattans hommes d'armes, comme archiers en intention d'aller assieger & mettre en son obeïssance la ville de Beaumont en Argonne, que lors tenoit Guillaume de Flauy tenant le party du Roy Charles: lequel de Flauy & ceux à luy obeïssans continuellement faisoient moult d'oppressions & griefs dommages au païs à l'enuiron. En ces iours le Duc Philippe de Bourgongne, comme il auoit plusieurs fois, assembla tresgrand nombre de gens d'armes en ses païs de Flandres & d'Arthois & à l'enuiron, pour de rechief aller en Hollande & assieger la Duchesse Iaqueline dedans la ville de Gand. Et pour ceste fois escriuoit aux nobles de ses païs, que son intention estoit d'acheuer à ceste fois la guerre dudit païs de Hollande deuât son retour. Pour laquelle ils auoient esté desia fort trauaillez & lassez, & par plusieurs fois. Lesquelles assemblées, cōme dit est, il mena à l'Escluse & là monterent en mer pour passer au dessusdit païs de Hollande. Durant toutes ses tribulations mennoient les Anglois tresforte guerre sur les marches de Bretagne: & eurent lors iceux Anglois & les Bretons que conduisoit le Comte de Richemont vne tresgrand rencontre: à laquelle moururent grand quantité de combattans tant d'un costé comme de l'autre, mais en fin lesdits Anglois obtindrent la iournée, & les conduisoit le Comte de Vvaruich.

De l'an mille cccc.xxviij.

Comment messire Iean de Luxembourg assiegea Beaumont en Argonne.

1428.



V commencement de cest an eut esté mis le siege à l'enuiron de Beaumont en Argonne par messire Iean de Luxembourg, accompagné de plusieurs hommes nobles des marches de Picardie, auquel siege mettre y eut plusieurs escarmouches entre les assiegeans & les assiegez. Esquelles entre les autres, fut prins & mené dedans la ville vn nommé Enguerrant de Brigoual vigoureux & subtil homme d'armes, pour la prinse duquel ledit de Luxembourg fut moult fort troublé, doubtant que le dessusdit ne fut nauré ou mort: car par grand malice Guillaume de Flauy fait mettre vn linseul en terre, vueillant par ce fait donner à entendre que ce fut ledit Enguerrant qui estoit trespaslé. Et luy fait faire vn seruice solennel, tendât comme on pourroit supposé à iceluy fortraire secrettement hors de la ville & mener en lieu secret & seur: pource qu'il sçauoit ledit prisonnier estre riche homme pour payer bonne finance: toutesfois, nonobstant, qu'iceux assiegez se meissent tresvigoureusement à deffence: si furent ils en brief de toutes parts enuironnez, & tellement approchez que bonnement ne pouoiēt saillir hors de leurdicte ville, sinon en grand peril de leur vie. Et pourtant le dessusdit Guillaume de Flauy, voyant qu'au long aller le conuiendroit estre mis en subiection non esperant auoir secours, fait traicté avec ledit messire Iean de Luxembourg enuiron l'issue du mois de May: par tel si, que luy & les siens s'en iroient sauement en emportant tous leurs biens. Et par ainsi ledit messire Iean de Luxembourg eut l'obeïssance dudit Beaumont: dedans laquelle il meit garnison de ses gens, & y constitua capitaine Valerien de Bournouille, & avec luy rendit sain

& sauf en vie ledit Enguerrant de Brigonval : durant lequel temps furent trefues données tant d'un costé comme d'autre entre messire Jean de Luxembourg, & ceux de la ville de Mouson iusques au iour de la S. Remy ensuiuant : dedans lequel iour dessusdit, ceux de ladicte ville deuoient aller deuers le Roy Charles sçauoir se de luy auroient secours, où ils se rendroient audit messire Jean de Luxembourg. Apres lesquels traictez acheuez par ledit messire Jean donna congé à ses gens, & s'en retourna en son chastel de Beaurevoir : & Guillaume de Flauy pareillement donna congé à ceux qui l'auoient seruy & s'en alla à priuée mesnie sous bon saufconduit à Liencourt en l'hostel de mōseigneur son pere: car entre-temps qu'il estoit assiegé à Beaumont, le Duc de Bar fait demollir & abbatre vne forteresse nommée Neufuille sur Meuse, laquelle tenoient les gens dudit Guillaume de Flauy. Et là auoit sa cheuance de sa retraicte.

Comment le traicté se feit entre le Duc de Bourgongne & la Duchesse Iaqueline de Baviere pour la guerre de Hollander & le contenu d'iceluy.

LTem après que le Duc de Bourgongne fut retourné, comme dit est dessus, au païs de Hollande, & qu'il eut fait de grandes preparations tant de gens comme d'habillemens de guerre pour combattre & subiuguer la ville de la Gande, où estoit la Duchesse Iaqueline & ses aydans. Ladicte Duchesse & ceux de son païs considerans la puissance dudit Duc de Bourgongne : & que desia la plus grand partie de nobles & communautéz de son païs, s'estoient tournez contre elle avecques sa partie aduerse, doubtant non pouoir resister audit Duc, print conseil avecques ses plus priuez & feaux seruiteurs, & se conclud de traicter paix avecques son beau cousin & aduersaire le Duc Philippe de Bourgongne : lequel traicté par le moyen d'aucuns ambassadeurs enuoyez entre les deux parties, fut tel qui s'ensuit. C'est à sçauoir que ladicte Duchesse cognoistra & tiendra son beau cousin le Duc de Bourgongne estre son droit hoir & heritier de tous ses païs : & dès lors le fait gouuerneur & mainbrueg des dessusdits païs, promettant icelle mettre en ses mains toutes les villes & forteresses qu'elle tenoit: dedans lesquelles iceluy Duc mettroit capitaines tels qu'il luy plairoit. Promeist aussi icelle dame de non soy iamaïs marier sinon du cōsentement dudit Duc : & avec ce demouroit à iceluy Duc la ville & forteresse de Zeneuberche. Et par ainsi ledit traicté de paix conclud & finé entre les deux parties cōuinrent ensemble certaines iournées ensuiuas en la ville de Delfe: ouquel lieu apres qu'ils eurent conioy l'un l'autre reuerement, prindrent d'un consentement eux deux ensemble ou leurs commis, les fermens de plusieurs villes. Et par ainsi ledit païs de Hollande qui par longue espace auoit esté trauaillé d'icelle guerre, demoura en paix, & retourna ledit Duc de Bourgongne donnant congé à ses Picards en son païs de Flandres & d'Arthois.

Comment le Comte de Salsebery vint en France à tout grand gent en l'ayde du Duc de Bethfort: & comment le Duc de Bourgongne ramena la Duchesse Iaqueline de Baviere en Hainault.

AV mois de May ensuiuant le Comte de Salsebery homme expert & tresrenommé en armes, par l'ordonnance du Roy Henry & de son grand conseil en Angleterre, conuoca iusques à six mille combattans ou environ gens d'esslite & esprouuez en armes, par l'ordonnance du Roy Henry pour la plus grand partie amener en France en l'ayde du Duc de Bethfort, qui se disoit Regent : desquels il enuoya premierement trois mille à Calais, & de là allerent à Paris pour tousiours maintenir guerre contre les François. Et environ la saint Iean ensuiuant, ledit Comte de Salsebery à tout le surplus de ses gens passa la mer & vint à Calais, & par saint Pol, Dourlens, & Amiens s'en alla à Paris, où il fut ioyeusement receu dudit Comte de Bethfort & de tout le conseil de France là estant, tenant le party du Roy Henry. Apres la venue duquel Comte, furent par plusieurs iours de grans conseils tenus pour le fait de la guerre : entre lesquels fut conclud, qu'iceluy Comte apres qu'il auroit mis en l'obeissance du Roy Henry aucunes meschantes places, que tenoient ses aduersaires, il iroit mettre le siege deuant la ville d'Orleans: laquelle, comme ils disoient, leur estoit moult nuisable. Lequel conseil finé furent de toutes parts euoquez & mandez les Normians, & autres tenans leur party : & fut lors faicte si grand diligence que ledit de Salsebery eut brief ensuiuant iusques à dix mille combattans : entre lesquels estoient le Comte de Suffort, le seigneur d'Escalles, le seigneur de Caloboch, le seigneur de l'Isle Anglois, Classedach & plusieurs autres vaillans & tresexperts hommes d'armes, qui tous ensemble apres qu'ils eurent esté (comme dit est) grandement festoyez & honnorez audit lieu de Paris, se departirent de là & des marches environ avecques le Comte dessusdit, & allerent mettre le siege à Nogen le Roy, que tenoient les François : laquelle fut assez tost conquise : & en y eut grand partie d'eux qui la tenoient executez à mort, & les autres eschapperent en payant bonnes finances : & de là ledit Comte s'en alla vers Iargueaux. En ce temps le Duc de Bourgongne retourna en Hollande accompagné de ses plus feables hommes, pour de rechief conuenir avecques la Duchesse Iaqueline sa cousine & prendre les sermens de fidelité d'aucuns nobles du païs & bonnes villes, qui point encores ne l'auoient fait. Apres lesquels receuz grand espace de temps vindrent ledit Duc & la Duchesse Iaqueline au païs de Hainault, où ils allerent par les bonnes villes receuoir les sermens, pareillement comme ils auoient fait en Hollande & Zelande tant des nobles, du clergé comme des bourgeois & communautéz : desquels en plusieurs lieux furent reueremment & honorablement receuz, iacoit-ce qu'aucuns des dessusdits païs fussent de ce petitement contens, toutesfois ils ne voyoient mie qu'à ce ils peussent bonnement remedier.

Comment ceux de Tournay s'esmeurent de rechief l'un contre l'autre.

AV mois de Iuillet de cest an ceux de Tournay se resmeurent les vns contre les autres. Et furent en armes par plusieurs fois ainsi qu'ils auoient autresfois esté. La cause si fut pource que les gouuerneurs d'icelle cité auoient mis aucun subside sur les ceruoises pour ayder à payer la composition qu'ils deuoient au Duc de Bourgongne: neantmoins par

la diligence d'aucuns des plus saiges, ils se rappaiserent: & brief ensuiuant fut prins vn de leurs capitaines nommé Iean Isaach orfeure pour plusieurs crimes par luy commis:& auoit esté celuy par qui Arnoul le Musi & Loctart de Villeries auoient esté decapitez: lequel Iean Isaach fut pendu publicquement au gibet de Tournay. En ce temps René le Duc de Bar fait assieger le chasteau de Passauant, dedans lequel estoit vn nommé de Varnencourt, qui par long téps auoit tresinhumainement & sans misericorde trauaillé le païs d'enuiron.

Comment le Comte de Salsebery conquist Iargueaux & plusieurs villes deuers Orleans & comment le Duc de Bethfort voulut auoir les rentes des Eglises.



Tem le Comte de Salsebery allant, comme dit est, deuant Iargueaux à tout sa puissance, le feit de toutes parts enuironner & tresfort combattre & approcher de ses gens & habillemens de guerre: & pourtāt ceux qui dedans estoient de par le Roy Charles, doubans la puissance d'iceluy Comte, feirent avecques luy traicté en luy rendant la place par tel si, qu'ils s'en pourroient sauement partir. Lequel Comte apres qu'il eut icelle garnie de ses gens, s'en alla deuāt lanuille, & la feit assieger de toutes parts trespuissamment:& les François estans dedans à tout leur puissance, commencerēt à eux deffendre: mais en aucuns pou de iours apres trouuerent maniere d'auoir parlement avecques iceluy Comte, lequel ne se peult à eux concorder. Et pour ce apres que les François se furent retraits dedans leur ville, s'esmeut vne escarmouche entre les assiegeans & les assiegez. Pour laquelle la plus grand partie des Anglois s'armerent tout soubdainement, & sans le commandement dudit Comte leur souuerain allerent en grand hardiesse assaillir la ville: & tant continuerent en iceluy assault, qu'assez brief ensuiuant ils prindrent & conquirent ladicte ville: dedans laquelle plusieurs François furent prins & morts. Et y furent faits d'autres maux inestimables, lesquels seroient trop longs à declairer. Item durant le temps dessusdit le Duc de Bethfort Regent, & ceux du conseil du Roy Henry estoit à Paris: requierent tresinstamment à auoir pour le prouffit dudit Roy, toutes les rentes & heritages qui auoient esté données depuis quarante ans par auant aux Eglises. Et pour ce mettre à execution, furent en ladicte ville de Paris tenus plusieurs parlemens en grans conseils, entre ledit Duc de Bethfort & le conseil du Roy d'une part, & ceux de l'vniuersité de l'Eglise d'autre part: toutesfois icelle requeste fut tresfort debattue:& tāt qu'en fin la besongne fut mise au net & demourerent ceux de l'Eglise paisibles quāt à ce. Auquel an aussi le Roy de Portugal meit sus vne grosse armée, & avec luy le Duc de Cambray qui faisoit son avantgarde: & pouoit auoir sur tout dix mille cōbatans, à tout lesquels il alla en vne isle sur les mescreans, où estoit le Roy d'Albastre à tout bien vingt mille Sarrazins Turquois, Tartares & Barbarins: desquels la plus grand partie furent morts sur la place, & le dessusdit Roy d'Albastre fut detenu prisonnier. Apres laquelle victoire iceluy Roy de Portugal à peu de perte retourna en son païs.

Comment le Comte de Salsebery assiegea la cité d'Orleans, où il fut occis.

Item

Tem apres ce que le Côte de Salsebery eut conquis & mis en obeissance du Roy Henry de l'Enclastre, lanuile, Meung, & plusieurs autres villes & forteresses au païs d'enuiron, il se disposa tresdiligement pour aller assieger la cité d'Orleans. Et de fait enuiron le mois d'Octobre à tout sa puissance, arriua deuant ladicte cité: en laquelle ceux de dedans long temps par auant attendans sa venue, auoient préparé leurs besongnes tant de fortifications, habillemens de guerre comme de viures & gens esleuz exercitez en armes, pour resister contre ledit Comte & sa puissance & eux defendre. Et mesmement affin qu'il ne se peut loger autour d'icelle luy ne ses gens à leur aise ne eux fortifier, iceux d'Orleans auoient fait abbatre & demollir de tous costez en leurs faulxbourgs plusieurs bons & notables edifices: entre lesquelles furent destruits & abbatus iusques à douze Eglises & au dessus: esquelles estoient les quatre ordres des Mendians, & auec moult d'autres belles & solennelles maisons de plaissance qu'y auoient les bourgeois d'icelle ville. Et tant en icelle euure cōtinuerent, qu'esdits faulxbourgs & tout à l'enuiron on pouoit plainement veoir & iecter de canons & autres instrumēs de guerre tout à plain. Toutesfois ne demoura mie que ledit Comte de Salsebery à tout ses Anglois, ne se logeast assez pres de ladicte ville: iacoit-ce que ceux de dedās de tout leur pouoir se meirent vigoureusement en deffence, en faisant plusieurs faillies en tirant de canons, couleurines, & autres artilleries, occiant & mettant à meschief plusieurs Anglois. Neantmoins lesdits Anglois tresvaillamment & rudement les rebouterent, & approcherent plusieurs fois, tant qu'iceux deffendans auoient merueilles de leurs hardies & courageuses entreprinſes. Durant lesquelles ledit Comte de Salsebery fait assaillir la tour du bout du pont, qui passe par dessus l'eaüe de Loire: laquelle en assez brief temps fut prinſe des Anglois, & conquise auec vn petit Bouleuert qui estoit assez pres nonobstant la deffence des François: & fait iceluy Comte dedans la vieille tour loger plusieurs de ses gens, affin que ceux de la ville ne peussent par là saillir sur son ost: & d'autre part se logea luy & ses capitaines & les siens assez pres de la ville en aucunes vieilles masures là estans: esquelles comme ont accoustumé iceux Anglois, feirent plusieurs logis de terre, tauldis, & habillemens de guerre pour escheuer le traict de ceux de la ville, dont ils estoient treslargement seruis. Ledit Comte de Salsebery le troisieme iour qu'il estoit venu deuant icelle cité, entra en la dessusdicte tour du pont, où estoient logez ses gens: & là dedans icelle monta hault au second estage, & se meit en vne fenestre vers la ville regardant tout ententiement les marches d'entour icelle, pour veoir & imaginer comment & par quelle maniere il pourroit prendre & subiuguer icelle cité: & lors luy estant à ladicte fenestre, vint soudainement de la cité auollant la pierre d'vn veuglaire, qui ferit à la fenestre où estoit ledit Comte: lequel desia pour le bruit du coup se retiroit dedans: neantmoins il fut à consuiuy tresgriefuement & mortellement de ladicte fenestre, & eut grand partie du visage emporté tout ius, & vn gentil-homme qui estoit derriere luy, fut d'iceluy coup tué tout mort, pour laquelle blessure dudit Comte, toutes ses gens generalmente eurent au cueur grand tristesse: car d'eux il estoit moult cremeu & aymé: & le tenoiēt pour le plus subtil & expert, & heureux en armes

de tous les autres Princes & capitaines du Royaume d'Angleterre : toutesfois ainsi blessé il vesquit l'espace de huit iours . Et apres ce qu'il eut mädé tous ses capitaines, & iceux admonnestez de par le Roy d'Angleterre, qu'ils continuaissent à mettre en l'obeïssance icelle ville d'Orleans sans quelque dissimulation, il se fait porter à Meung & là mourut au bout de huit iours de sadicte blessure: au lieu duquel demoura general capitaine des Anglois assigeans le Comte de Suffort:& au dessoubz de luy le seigneur de Scalles & de Thalebot, messire Lancelot de l'Isle, Clacedas, & aucuns autres : lesquels nonobstant la perte qu'ils auoient fait au dessusdit Comte de Salsebery, qui (comme dit est) estoit leur chef & souuerain Connestable, respondirent en eux vigueur:& d'un commun accord en toute diligence, se disposerent par toutes voyes & manieres à eux possibles de continuer leur siege, & ce qu'ils auoient commencé:& de fait feirent en plusieurs lieux bastilles & fortifications: dedans lesquelles ils se logerent, affin que de leurs ennemis ne peussent estre surprins ne enuahis. Item le Roy Charles de France scachant que les Anglois ses anciens ennemis & aduersaires, vouloient subiuguer & mettre en leur obeïssance la tresnoble cité d'Orleans, festoit conclud avecques ceux de son conseil par auant la venue d'iceux, que de tout son pouoir il deffendroic icelle ville: croyant que si elle estoit mise entre les mains de ses ennemis, ce seroit la destruction totale de ses marches & pays & de luy aussi. Et pourtant il enuoya grand partie de ses meilleurs & plus seables capitaines. C'est à sçauoir Bouffac, & le seigneur d'Eu: & avec eux le bastart d'Orleans cheualier, le seigneur de Gaucourt & de Grauille, le seigneur de Vilan, Pothon de sainte Treille, la Hire, messire Theolde de Vvalergne, messire Loys de Vvacourt, & plusieurs autres tresuaillans hommes renommez en armes, & de grand auctorité: avecques lesquels estoient iournellement de douze à quatorze cens combattans, gens d'esslite bien esprouuez en armes: si aduenoit souuent qu'il en auoit l'une fois plus & l'autre moins, car le siege ne fut oncques ferme: parquoy iceux assiegez se pouoient rafreschir de gens & de viures, & aller en leurs besongnes quand bon leur sembloit, & ils auoient volenté de ce faire. Durant lequel siege furent faictes plusieurs escarmouches, & faillies d'iceux assiegez sur les assiegeans: desquelles racompter chacun à part, luy qui y fait perte ou gaigne, seroient trop longues & ennuiables à escrire: mais pour les rappors qui m'en ont esté fais d'aucuns notables des deux parties, n'ay point sceu que lesdits assiegez en toutes icelles faillies feissent à leurs ennemis grand dommage, sinon que par les canons & autres engins iettans de leur ville: desquels engins à une d'icelles escarmouches, il fut occis un tresvaillant cheualier Anglois & renommé en armes, nommé messire Lancelot de l'Isle.

Comment vn prescheur nommé frere Thomas conuertit plusieurs personnes, & abbatit les bobans & atours de femmes en plusieurs parties.

EN cest an és parties de Flandres, Tournesis, Artois, Cambresis, Ternois, Amiennois, Ponthieu, & és marches enuiron, regna vn prescheur de l'ordre des Carmes natif de Bretagne, nommé frere Thomas Conecte: auquel par toutes les bonnes villes & autres lieux où il vouloit faire ses predications, les nobles bourgeois, & autres notables personages

sonnages des bonnes villes où il estoit, luy faisoient faire és plus beaux lieux & plantureux d'icelles pour faire assemblée, vn grand eschaffault bien planchon-
né, tendu & aorné des plus riches draps de tapisseries & autres qu'on pouoit fi-
ner. Sur lequel eschaffault estoit préparé vn autel, où il disoit sa Messe accom-
pagné d'aucuns de son ordre, & plusieurs autres ses disciples : dont la plus grād
partie le suiuoient de pied, par tout où il alloit, & il cheuauchoit vn petit mu-
let : & là sur celuy eschaffault apres qu'il auoit dit sa Messe, faisoit ses predica-
tions moult longues, en blasmant les vices & pechez d'vn chacun, & par espe-
cial le clergé : c'est à sçauoir ceux qui publicquement tenoient femmes en leur
compagnie, en enfreignant le veu de chasteté. Et pareillement blasmoit & dif-
famoit tresexcelllement les femmes de noble lignée, & autres de quelque e-
stat qu'elles fussent, portans sur leurs testes haults atours & autres habillemens
de parage, ainsi qu'ont accoustumé de porter les nobles femmes és marches &
païs dessusdit : desquelles nobles femmes, nulle de quelque estat qu'elle fut à
tout iceux atours ne s'osoit trouuer en sa presence : car il auoit accoustumé quād
il en veoit aucune, s'esmouuoit apres icelle tous les petis enfans : & les admon-
nestoit en donnant certains iours de pardon à ceux qui ce faisoient : desquels
donner, comme il disoit, auoit la puissance. Et les faisoit crier hault, au hennin,
au hennin. Et mesmement quand les dessusdictes femmes de noble lignée se de-
partoient de deuant luy : iceux enfans en continuant leur cry, couroient apres,
& de fait vouloient tirer ius lesdits hennins tant qu'il conuenoit qu'icelles fem-
mes se sauassent & missent à sauueté en aucun lieu. Pour lesquels cris & pour-
suite, s'esmeurent en plusieurs lieux, où ils se faisoient de grans rumeurs & mal-
talens entre lesdits crians au hennin & les seruiteurs d'icelles dames & damoi-
selles. Neantmoins ledit frere Thomas continua tant, & fait continuer les cris
& blasphemes dessusdits, que toutes les dames & damoiselles & autres femmes
portans haults atours, n'alloient plus à ses predications sinon en simple estat &
descogneu : ainsi & pareillement que les portent femmes de labour de petit &
poure estat. Et pour lors la plus grand partie d'icelles nobles femmes retournées
en leurs propres lieux, ayant grand vergongne des honteuses & iniurieuses pa-
roles, qu'elle auoient ouïes audit preschement, se disposerent à mettre ius leurs
atours, & prindrent autres tels ou semblables que portoient femmes de Begui-
nages : & leur dura ce petit estat aucune petite espace de temps : mais à l'exem-
ple du limaçon : lequel, quand on passe pres de luy, retraict ses cornes par de-
dans, & quand il n'oyt plus riens les reboute : ainsi feirent icelles, & en assez
brief apres que ledit prescheur se fut departy du païs, elles recommencerent
comme deuant, & oublierent sa doctrine & reprindrent petit à petit leur viel e-
stat, tel ou plus grand qu'elles n'auoient accoustumé de porter. Pour lesquels
estats ainsi mis ius à l'instance & exhortation d'iceluy frere Thomas, & aussi
pour ledit blaspheme qu'il disoit communement en special contre tous les gens
d'Eglise, il acquist grande amour & renommée de tout le peuple par tous les
païs où il alloit : & estoit d'iceux moult honoré & exaucé. Et aussi d'autre part
par tous les lieux, où il alloit tant des bōnes villes comme d'ailleurs : les nobles,
le clergé, les bourgeois, & generally toutes gens luy faisoient honneur &
reuerence, comme on eut peu faire à vn des apostres de nostre seigneur Iesus

Christ, fil fut du ciel descendu sur terre. Iceluy ainsi accompagné de grand multitude de peuple, allant loing aux plains champs au deuant de luy, & de la part les plus notables, tant cheualiers comme autres fils y estoient menez, eux estans à pied & tenans la bride de son mulet iusques à son hostel, qui estoit communement sur le plus riche bourgeois de la ville: & ses disciples dont il en auoit plusieurs, se logeoient en plusieurs lieux des plus honnestes maisons des villes. Si se tenoient pour bien eureux ceux qui luy ou les siens pouoient auoir à hostes. Et quand ledit frere Thomas estoit (comme dit est) à son logis, il se tenoit en vne chambre moult solitairement, sans vouloir souffrir que nulle personne eust repaire auecques luy sinon assez pou, fors tant seulement de sa famille. Et apres qu'il auoit fait ses predications vers la fin, il admonnestoit moult instamment tant sur damnation d'ame, comme sur peine de excommuniement, que toutes gens qui auoient en leurs maisons tabliers, eschiquiers, quartes, quilles, dez & autres instrumens, dont on pouoit iouer à quelque ieu de plaissance les apportassent à luy. Et pareillement contraignoit lesdictes femmes qu'elles y apportassent leurs hennins: & là deuant son eschaffault il faisoit allumer grans feux & bouter tout dedans les choses dessusdictes. Si regna en iceluy pays par l'espace de cinq ou six mois: & fut en plusieurs notables citez cōme Cambray, Tournay, Arras, Amiens, & Theroüenne, où il feit (comme dit est) plusieurs predications, à la louenge du menu peuple, ausquelles s'assembloient aucunes fois seize ou vingt mille personnes. Et faisoit mettre les hommes d'un costé & les femmes de l'autre, & tendre vne corde entre deux: pource qu'il disoit auoir veu entre eux aucune faulseté, en faisant lesdictes predications. Pour lesquelles faire, il ne prenoit point d'argent, & ne souffroit qu'on le pourchassast ainsi que on souloit faire aucuns autres prescheurs: mais il estoit assez content qu'on luy donnast aucuns riches aornemens d'Eglise, & qu'on reuestist ses disciples & payast ses despens: de laquelle chose faire on en estoit tout ioyeux. Et pour parfaite perfection & esperance, que plusieurs notables personnes pensoient en luy, cuidant qu'il fut homme prudent & de sainte vie, se meirent à le seruir par tout où il alloit. Et en laisserent plusieurs pource faire pere & mere, femmes enfans, & tous leurs prochains amis. Entre lesquels le poursuiuit & accompagna par longue espace le seigneur d'Antony & aucuns autres nobles. Apres lequel temps sans auoir esté en nul d'iceux pays redargué ne corrigé par aucuns clercs, se departit à la grande louenge du peuple, & au contraire l'indignation de plusieurs gens d'Eglise. Et s'en alla monter sur mer au port saint Vvalery pour s'en aller en Bretagne dont il estoit né.

Comment grans tournoyemens se feirent en la ville de Bruxelles.

EN ces mesmes iours le Duc de Bourgogne alla tresgrâdement accompagné des seigneurs de ses pays en la ville de Bruxelles, pour estre à vn tournoyement, qui là deuoit estre fait le iour des Karesmeaux: duquel tournoyement estoit le chief le fils du Damoisel de Gazebeque: c'est à sçauoir de donner le pris. Auquel lieu le Duc de Bourgogne fut honnorablement receu & festoyé du Duc Philippe de Brabant son cousin germain, & des autres seigneurs du pays, & aussi de ceux de la ville de Bruxelles.

xelles. Et quand ce vint au iour que le tournoyement se deuoit faire, les deux Ducs dessusdits furent partis l'un contre l'autre: & pareillement grand partie de leurs gens par l'aduis & deliberation d'aucuns sages de leurs conseils & de leurs officiers d'armes, affin d'escheuer toutes rigueurs qui en pourroient aduenir. Et furent ce iour tant d'un costé comme d'autre, de sept à huit vingt heaumes sur la place. C'est à sçauoir sur le marché de Bruxelles. Et estoit grand noblesse de les veoir, car ils estoient tous moult richement habillez & parez de leurs armes. Et quand ce vint que lesdits officiers d'armes eurent faits les cris en ces cas accoustumez, ils se ferirent de grande volenté l'un parmy l'autre, & y eut maint riche coup feru entre icelles parties: & en fin fut le pris donné à un gentil-homme de Brabant nommé Iean Linqart. Et le lendemain & second iour furent faictes grans ioustes: entre lesquels pour le premier iour emporta le pris le Duc de Brabant, & pour le second le seigneur de Mamines. Et quand aux dances & banquets il en y eut fait en tresgrand abondance, & y auoit largement dames & damoiselles moult richement parées selon l'estat du païs. Et au regard des mōmeries tant d'hommes comme de femmes, il en y auoit largement, durant laquelle feste, fut baillée l'espée au seigneur de Croÿ cheualier du Duc de Bourgongne: lequel par le conseil fait de rechief crier un autre tournoyement à un certain iour ensuiuant, pour estre assemblée & fourny en la ville de Mons en Hainault lequel pour certaines occupations qui suruindrent dedans ledit iour, ne se fait point. Et apres que le dessusdit Duc de Bourgongne eut seiourné dedans icelle ville de Bruxelles quatre ou cinq iours, il s'en retourna en son païs de Flandres: nonobstant que durant le temps dessusdit il faisoit tresdiuers tēps tant de neiges comme gelées, & les autres seigneurs se retrahirent és lieux, dont ils estoient venuz.

Comment le Comte de Namur trespassa, & fut le Duc de Bourgongne son heritier.

LTem en l'an dessusdit rendit son esprit à Dieu le Comte de Namur, qui auoit grand aage: lequel des auant sa mort auoit vendu au Duc de Bourgongne sa Comté de Namur, & ses appertenances. Apres la mort duquel ledit Duc se trahist en iceluy païs, pour auoir la possession des bonnes villes & forteresses d'icelle Comté: lesquelles sans contredit luy feirent plaine deliuration: & fut lors par ledit Duc par tout commis gouverneurs & capitaines, tels que bon luy sembla. Pour lequel voisinage les Liegeois marchissans à icelle seigneurie de Namur, n'en furent gueres ioyeux: ains leur vint à desplaisir, doubans la puissance d'iceluy Duc: duquel long temps par auant de luy ne de ses deuanciers n'aimoient point la seigneurie: pour ce que le Duc Iean son pere & le Duc Guillaume son oncle les auoiēt autresfois vaincuz & subiuguez, comme en autre lieu par auant plus aplain dessus est declairé. Si tenoiēt lors en leurs mains iceux Liegeois, vne forte tour située assez pres de Bouuines: laquelle, comme on disoit, estoit de la seigneurie de Namur: & la desiroit ledit Duc de Bourgongne à l'auoir en ses mains, mais lesdits Liegeois estoient à ce opposans & contraires, pourquoy des lors se commencèrent entre icelles parties aucunes rumeurs & haynes: dont à l'occasion d'icelles, ledit Duc de Bourgongne retourna en son païs, & fit secrettement assembler certain

nombre de gens d'armes : lesquels il enuoya sous la conduite de messire Jean Blondel & Gerard bastard de Brimeu vers le dessusdit pays de Liege, pour prendre d'emblée ladicte tour de Mont-Orgueil. Et eux venus assez pres d'icelle, en eux preparans pour dresser leurs eschelles, furent apperceuz & desconfits de ceux qui estoient dedans: pourquoy sans autre chose faire, s'en retournerent en leurs pays: & lesdits Liegeois firent leurs gardes plus que par auant n'auoient fait, & conceurent de plus en plus grand haine contre ledit Duc de Bourgogne. Item durant le temps que les Anglois tenoient leur siege deuant la noble cité d'Orleans (comme dit est) estoit le Roy Charles tresfort au dessous: & l'auoient au peuples laisse comme abandonné la plus grand partie de ses Princes, & autres des plus nobles seigneurs, voyant que de toutes pars ses besongnes luy venoient au contraire. Neantmoins il auoit tousiours bonne affection & esperance en Dieu, desirant de tout son cuer à auoir traicté de paix avecques le Duc de Bourgogne: lequel par ses ambassadeurs il auoit requis par plusieurs fois, mais encores ne s'y estoit peu moyen trouuer, qui fut au gré des parties.

Comment les Anglois allans au secours du siege d'Orleans rencontrerent les Francois qui les assaillirent.



En ces iours le Duc de Bethfort Regent estant à Paris fait assembler tant des marches de Normandie comme de l'Isle de France, & à l'environ, de quatre à cinq cēs que chars que charrettes: lesquelles avecques la diligence de plusieurs marchās furent chargées de viures, artilleries & autres marchandises, pour mener deuers les dessusdits Anglois, qui estoient au siege d'Orleans. Et apres que ledit charroy & autres besongnes furent prestes, tout fut baillé à conduire à messire Jean Fascot grand maistre d'hôtel dudit Duc de Bethfort: avecques lequel furent commis le Preuost de Paris nommé Simon Mathieu, le bastard de Thian cheualier Baillif de Senlis, le Preuost de Melun & plusieurs autres officiers des marches de l'Isle de France & d'environ, accompagnez de seize cens combattans & biē mille commūs: à tout lesquels se departit ledit Fascot de Paris le iour des cendres, & conduit par plusieurs iournées ledit Charroy & ses gens en bonne ordonnance, iusques environ à vn village nommé Rouuroy en Beauſſe, seant entre Genuille & Orleans. Auquel lieu estoient assemblez pour les combattre plusieurs capitaines Francois, qui long temps par auant sçauoient assez bien leur venue: c'est à sçauoir Charles Duc de Bourbon, les deux Mareschaux de France: le Connestable d'Escoſſe & son fils, le seigneur de la Tour, le seigneur de Chauigny, le seigneur de Grauille, messire Guillaume d'Albreth, le Vicomte de Thouas, le bastard d'Orleans, messire Iacques de Chabannes, le seigneur de la Fayette, Pothon de sainte Treille, Estienne de Vignolles autrement appelé la Hire, messire Theolde de Valeperghe, & plusieurs autres nobles hommes, qui tous ensemble auoient de trois à quatre mille combattans: desquels lesdits Anglois sçauoient bien l'assemblée par aucuns de leurs gens des garnisons, qu'ils auoient bien audit pays. Et pourtant en bien grand diligence firent de leur charroy vn grand parc en plain champ, auxquels ils laisserent deux issues ouuertes: & se meirēt tous ensemble dedans iceluy: c'est à sçauoir les archiers gardans icelles entrées, & les hommes

hommes d'armes assez pres és lieux necessaires . Et à l'un des costez au plusfort lez, estoient les marchans, charretons, paiges & autres gens de petite deffence, avecques tous les cheuaux: lesquels Anglois en cest estat attendirent bien deux heures leurs ennemis : lesquels en grand bruit se vindrent mettre en bataille deuant ledit parc hors du trait . Et leur sembloit, attendu le moleste & le grand nombre qu'ils estoient, & qu'ils n'auoient à faire qu'à gens de plusieurs terres: & n'y auoit que de cinq à six cens Anglois de la nation d'Angleterre, qui ne pouoient eschapper de leurs mains & seroient tantost vaincus : Neantmoins les aucuns faisoient grand doubte que le contraire ne leur aduint, pource que les capitaines d'iceux François ne se concordoient point bien ensemble : car les vns & par especial les Escoçois vouloient combattre & batailler à pied, & les autres vouloient demourer à cheual. Et adonc Charles de Bourbon fut fait cheualier du seigneur de la Fayette, & aucuns autres . Et entre tant ledit Connestable d'Escoce & son fils se meirent à pied, & avecques eux toutes leurs gens. Si allerent en assez brief terme les vns à pied, les autres à cheual enuahir & combattre leurs aduersaires & ennemis, desquels ils furent receuz trescourageusement . Et commencerent les archiers Anglois, qui estoient tresbien targez de leurdit charroy à tirer trefroidement, duquel trait de pleine venue & rencontre, feirent rebouter arriere d'eux ceux de cheual, avecques les hommes d'armes. Et lors à l'une de leurs entrées se combattirent ledit Connestable d'Escoce, & ses gens, qui en brief comprendre, furent desconfits & morts en la place . Et fut mort messire Jean Estouart, avecques lequel furent morts son fils Messire Guillaume d'Albreth seigneur d'Orual, le seigneur de Chasteau Brun, le seigneur de Mont-Pipel, messire Jean Larigot, le seigneur de Verduisant, le seigneur Diuray, le seigneur de la Greue, messire Anthoine de Puilly & bien six vingts gentils-hommes & autres iusques au nombre de cinq ou six cens combattans : desquels la plus grand partie estoient Escoçois : & les autres capitaines dessusdits à tout leurs gens se departirent, & s'en r'allerent és parties dont ils estoient venus . Et les dessusdits Anglois qui pour lors estoient aduersaires & ennemis des François (comme ils auoient accoustumé) se rafreschirent & se retrahirent ceste nuict le plustost & le plus diligemment comme faire le peurent en leurdicte ville de Rouuray. Et le lendemain ensuiuant s'en partirent & s'en retournerent les dessusdits Anglois en moult bonne ordonnance à tout leur charroy & leur artillerie, comme brigandines, heaulmes, arbalestres, bastons à feu & plusieurs autres armeures, qu'il fault à gens de guerre par aucuns pou de iours deuant ladicte ville & noble cité d'Orleans moult ioyeusement, tant pour la bonne fortune qu'ils auoient eüe, comme pour les viures qu'ils leurs menoient. Si fut la iournée dessusdicte, depuis ce iour en auant en langage commun appellée la bataille des harencs : & la cause de ce nom, si fut, pource que grand partie du charroy desdits Anglois estoient chargez de harencs, & autres viures de Karesme . Pour laquelle male aduenture ainsi aduenue, Charles eut au cuer grand tristesse, voyant de toutes parts ses besongnes venir au contraire & perseuerer de mal en pis : la dessusdicte bataille de Rouuray fut faicte la nuict des brandons environ trois heures apres minuict. Et ny eut mort de la partie des Anglois de gens de nom, qu'un seul homme nom-

mé Bresanteau, nepueu de messire Simon Morbier Preuost de Paris. Et y furent faits cheualiers de la partie des Anglois Galloy d'Aunoy seigneur d'Oruille, le grand Raoulin, & Loÿs de Luxu Sauoyen. Et pouoient estre les dessusdits Anglois enuiron dix sept cens combattans, de bonne estoffe sans les communes. Et, comme dit est dessus, les François estoient bien de trois à quatre mille. Et furent faits cheualiers avecques ledit Charles de Bourbon le seigneur de chasteau Brun, & plusieurs autres : & n'y eut pour ce iour prins qu'un prisonnier qui estoit Escoçois.

Comment vne pucelle nommée Ieanne vint deuers le Roy Charles à Chinon, où il se tenoit : & comment ledit Roy Charles la retint avecques luy.

EN l'an dessusdit vint deuers le Roy Charles de France à Chinon, où il se tenoit, vne pucelle ieune fille aagée de vingt ans ou enuiron, nommée Ieanne, laquelle estoit vestue & habillé en guise d'homme, & estoit née des parties entre Bourgongne & Lorraine, d'une ville nommée Droimy, assez pres de Vaucoulour : laquelle pucelle Ieanne fut grand espace de temps chambriere en vne hostellerie, & estoit hardie de cheuaucher cheuaux & les mener boire, & aussi de faire appertises & autres habilités, que ieunes filles n'ont point accoustumé de faire. Et fut mise à voye & enuoyée deuers le Roy par un cheualier nommé messire Robert de Baudrencourt, capitaine de par le Roy de Vaucoulour, lequel luy bailla cheuaux & quatre ou six compagnons. Si se disoit estre pucelle inspirée de la grace diuine, & qu'elle estoit enuoyée deuers iceluy Roy pour le remettre en la possession de son Royaume, dont il estoit enchassé & debouté à tort, si estoit en assez pouure estat. Si fut enuiron deux mois en l'hostel du Roy dessusdit : lequel par plusieurs fois elle admonnestoit par ses parolles, qu'il luy baillast gens & ayde, & elle rebouteroit ses ennemis & exaulceroit sa seigneurie. Durant lequel temps le Roy & son conseil ne adioustoient point grand foy à elle, ne à chose qu'elle sceust dire : & la tenoit on cōme vne folle desuoyée de sa santé : car à si grans Princes & autres nobles hōmes telles ou pareilles parolles sont moult doubtantes & perilleuses à croire, tant pour l'ire de nostre seigneur, principalement comme pour le blasphemisme qu'on pourroit auoir des parlers du monde : neantmoins apres qu'elle eut esté en l'estat que dit est, un espace elle fut aydée : & luy furent baillez gens & habillemens de guerre, & esleua un estandart où elle fait paindre la representation de nostre createur. Si estoient toutes ses parolles du nom de Dieu : pourquoy grand partie de ceux qui la veoient & oyoient parler, auoient grand credence & variation qu'elle fut inspirée de Dieu, comme elle se disoit estre. Et fut par plusieurs fois examinée de notables clerks & autres sages hommes de grand auctorité, affin de sçauoir plus à plain son intention : mais tousiours elle se tenoit en son propos, disant que se le Roy la vouloit croire, elle le remettroit en sa seigneurie : & depuis ce temps fait aucunes besongnes dont elle acquist grande renommée desquelles sera cy apres declairé. Et lors qu'elle vint deuers le Roy y estoit le Duc d'Alençon, le Marechal du Roy & autres plusieurs capitaines : car le Roy auoit tenu grād conseil pour le fait du siege d'Orleans, & de là alla à Poictiers & icelle pucelle avecques luy. Et brief ensuiuant fut ordonné, que

que ledit Mareschal meneroit viures & autres besongnes necessaires audit lieu d'Orleans à puissance. Si voulut Ieanne la pucelle aller avec, & fait requeste qu'on luy baillast harnois pour soy armer & habiller, lequel luy fut baillé. Et tost apres leua son estandart & alla à Bloys, où l'assemblée se faisoit: & de là à Orleans avecques les autres, si estoit tousiours armée de plain harnois. Et en ce mesme voyage se meirent plusieurs gens de guerre sous elle. Et quand elle fut venue en icelle cité d'Orleans, on luy fait tresgrand chere, & furent moult de gens resiouys de sa venue, si comme vous orrez plus à plain bien brièvement.

De l'an mille cccc. xxix.

Comment de par le Roy Charles & ceux de la ville d'Orleans, vindrent ambassadeurs 1429. en la cité de Paris, pour faire traicté au Duc de Bethfort: affin que ladicte ville d'Orleans demourast paisible.

AV commencement de cest an le Duc de Bourgongne accompagné de six cens cheuaucheurs ou environ, alla à Paris deuers le Duc de Bethfort: duquel il fut assez ioyeusement receu, & aussi de sa seur femme dudit Duc: auquel lieu en assez brief temps vindrent Pothon de sainte Treille, Pierre Dorgin, & aucuns autres nobles ambassadeurs enuoyez de par Charles Roy de France, & ceux de la ville & cité d'Orleans, qui moult fort estoient molestez & contrains par le siege, que les Anglois leurs aduersaires & ennemis y tenoient duquel est faicte mention: affin de traicter avecques le Duc de Bethfort & le conseil du Roy Henry d'Angleterre, que icelle ville d'Orleans, ainsi oppressée, demourast paisible, & qu'elle fut mise & baillée és mains du Duc de Bourgongne pour y mettre gouverneur à son plaisir, & la tenir comme neutre. Consideré aussi que le Duc d'Orleans & son frere le Comte d'Angoulesme, qui estoient droicturiers seigneurs de long temps parauant, estoient prisonniers en Angleterre, si n'estoient point de ladicte guerre. Sur laquelle requeste le dessusdit Duc de Bethfort assembla par plusieurs fois son conseil, pour sur ce auoir aduis & deliberation: lequel conseil quand à ce ne peust cōcorder. Et fut la cause pource que plusieurs remonstrentent audit Duc de Bethfort les grans fraiz & despens, que le Roy Henry auoit soustenus à l'occasion dudit siege, & avecques ce auoit perdu de ses meilleurs hommes de guerre. Disans en outre, qu'elle ne pouoit longuement durer sans estre subiuguée: & qu'ils estoient moult & en grand danger, & que c'estoit vne des villes du Royaume qui leur estoit plus prouffitabile à auoir pour plusieurs raisons, qu'ils y mettoient. D'autre part les autres n'estoient point contents, que elle fut mise és mains du Duc de Bourgongne: & disoient qu'il n'estoit point raison, que le Roy Henry & ses vassaux en eussent eu les peines & soustenu les mises, & iceluy Duc de Bourgongne en auroit les honneurs & les prouffits sans coup ferir. Et mesmement fut dit d'un nommé maistre Raoul le Saige, qu'il ne feroit ja en lieu où on le machast audit Duc de Bourgongne & il l'aualleroit. Et finalement apres que ladicte besongne eut esté de plusieurs debattue & examinée, il fut conclud que iceux Orleannois ne feroient pas receuz, s'ils ne traictoient & rendoient leur ville aux Anglois: & pourtant les dessusdits am-

ambassadeurs ceste presente responce ouye, dirent que de ce ils n'estoient point chargez, & qu'ils sçauoient bien que lesdits Orleannois souffriroient moult de griefs auant qu'ils se meissent en l'obeissance & subiection desdits Anglois. Apres lesquelles conclusions, les dessusdits ambassadeurs se departirent & retournerent dedans ladicte cité & noble ville d'Orleans: auquel lieu ils rendirent la responce de leurdicte ambassade: toutesfois le Duc de Bourgongne se tint assez content d'eux, touchant l'estat de ses besongnes dessusdictes: & estoit bien content au cas qu'il pleust au Roy Henry & à son conseil de prendre le gouuernement de la dessusdicte cité & ville d'Orleans, tant de pour l'amour de son beau cousin ledit Duc d'Orleans, comme pour escheuer les aduentures qui en pourroient aduenir: mais alors iceux Anglois en grande prosperité, qui n'auoient point consideration que la rouë de fortune eust eu puissance de tourner contre eux. Et jaçoit ce qu'en iceluy voyage ledit Duc de Bourgongne fait à son beaufrere le Duc de Bethfort plusieurs requestes, tant pour luy cōme pour ses gens: neantmoins luy en furent assez peu accordées: & apres qu'il eut seiourné en la noble & royalle ville de Paris environ trois sepmaines, il s'en retourna en son pays de Flandres, où il fut moult oppressé de maladie. Mais par la diligence de bons medecins il recouura santé.

Comment la pucelle Ieanne & plusieurs nobles capitaines Francois & de grand renom r'afreschirent la noble ville & cité d'Orleans de viures & de gens d'armes: & depuis leuerent le siege.

LTem apres que les capitaines des Anglois dessusdits avec leurs gens, eurent par l'espace de sept mois ou environ continué leur siege entour ladicte ville & noble cité d'Orleans: & icelle moult oppressée & trauaillée, tant par leurs engins comme par les fortifications, bastilles & forteresses qu'ils y auoient faictes en plusieurs lieux, iusques au nombre de soixante: les assiegez voyans que par icelle continuation estoient en peril & danger d'estre mis en seruitude, & obeissance de leurs ennemis. Si conclurēt & disposerent tous ensemble de à resister de tout leur pouoir, & aussi de y remedier par toutes les voyes & manieres que faire se pourroient. Si enuoyerent deuers le Roy Charles, affin d'auoir ayde de gens & de viures: si leur fut enuoyé de quatre à cinq cens combattans ou environ, & depuis en vindrent bien environ sept mille avecques aucuns viures, qui estoient en vaisseaux conduits par iceux gens d'armes parmy l'eaüe de la riuere de Loire: & avecques eux vint Ieanne la pucelle, dont dessus est faicte mention, & iusques à ce iour auoit fait encores peu de chose, dont il fut grand renommée. Et lors ceux de l'ost sefforcerent de conquerre les dessusdits viures: mais ils furent bien deffendus par ladicte pucelle, & ceux qui estoient avecques elle, & furent mis à sauueté: dont ceux de ladicte ville feirent bonne chiere, & furent moult fort ioyeux tant pour la venue d'icelle pucelle, comme pour les viures dessusdits. Et le lendemain qui fut le ieudy, Ieanne la pucelle se leua assez matin, & en parlant à plusieurs capitaines de la ville & autres gens de guerre, les induist & admonesta moult fort par ses parolles, qu'ils s'armassent & la suiussent: car elle vouloit aller (se disoit elle) sur les ennemis: disant en outre, que bien sçauoit sans faulte

faulte qu'ils seroient vaincus. Lesquels capitaines & autres gens de guerre estoient tous esmerueillez de ses parolles, dont la plus grand partie se meit en armes, & s'en allerent avecques elle assaillir la bastille de saint Loup, qui estoit moult forte, & auoit dedans de trois à quatre cens Anglois ou environ: lesquels assez tost furent conquis & morts, & prins & mis à grand meschef, & ladicte fortification fut toute demolie & mise en feu & en flambe. Si s'en retourna ladicte pucelle Ieanne à tout ses gens d'armes & nobles cheualiers, que elle auoit menez avecques elle dedans la noble ville & cité d'Orleans, où elle fut moult grandement & de toutes gens honorée & festoyée. Et le lendemain ensuiuant qui fut le vendredy issit ladicte pucelle Ieanne de rechef hors de la ville à tout certain nombre de combattans: & alla assaillir la seconde bastille plaine d'Anglois, laquelle pareillement (comme la premiere) fut gagnée & vaincue, & ceux de dedans morts & mis à l'espée. Et apres ce que la dessusdicte pucelle Ieanne eut fait ardoir & embrazer icelle seconde bastille, elle s'en retourna dedans ladicte ville d'Orleans, où elle fut plus que deuant exaulcée & honorée de tous les habitans d'icelle. Et le samedi ensuiuant assaillirent par grande vaillance & de grand volenté la tresforte bastille & forteresse du bout du pont, qui estoit tresforte merueilleusement & puissamment ediffiée, & si estoit dedans la fleur des meilleurs gens de guerre d'Angleterre & droictes gens d'armes: lesquels moult longuement & prudemment se deffendirent, mais ce ne leur valut gueres: car par viue force & proesse de combattre, furent prins & conquis & la greigneur partie mis à l'espée: desquels y fut occis vn tresrenomme & vaillant capitaine Anglois, appelé Clasendas: & avecques luy le seigneur de Moulins, le Bailly d'Eureux, & plusieurs autres nobles hommes de guerre de grand & de moult riche estat. Apres laquelle conqueste retournerent dedans ladicte ville Ieanne la pucelle, & les nobles & renommez François à petite perte de leurs gens. Et nonobstant qu'à ces trois assaulx, la dessusdicte pucelle Ieanne la commune renommée dit, en auoir esté la conducteresse: neantmoins si y estoient tous les nobles cheualiers & capitaines, ou aumoins la plusgrand partie, qui durant ledit siege auoient esté dedans ladicte ville & cité d'Orleans: desquels par dessus est faicte mention aux deuantdits assaux. Et sy gouernerent chacun endroit soy si vaillamment, comme gens de guerre deuoient faire en tel cas: tellement qu'en ces trois bastilles furent que morts que prins de six à huit mille combattans: & les François ne perdirent qu'environ cent hommes de tous estats. Le dimenche ensuiuant les capitaines des Anglois: c'est à sçauoir le Comte de Suffort, Thalebot, le seigneur d'Escalles: & aucuns autres voyant la prinse de leurs bastilles, & aussi la destruction & desconfiture de leurs gens, prindrent ensemble conclusion & delibererent, qu'ils s'assembleroient & mettroient tous en vne bataille seule, en delaisant leur logis & fortification, & en cas qu'ils les vouldroient combattre & batailler, ils les attendroient: où sinon ils se departiroient, & s'en retourneroient en bonne ordonnance és bonnes villes & forteresses de leur party. Laquelle conclusion ainsi qu'ils auoient aduisée ils entretindrent: car ce dimenche des le matin ils abandonnerent toutes leurs autres bastilles, & en boutant le feu en aucuns pays, se remeirent en bataille, comme dit est: ils se tindrent as-

sez bonne espace attendans, que les François les allassent combattre & assaillir, lesquels François n'eurent talent de ce faire par l'exhortation de ladicte pucelle Jeanne. Et adoncques les Anglois qui veoient leur puissance mallement affoiblie, & trop diminuée : & aussi qu'il estoit impossible de là plus demourer, se pis n'y vouloient faire. Si se meirent à chemin & s'en retournerent en ordonnance és villes, places, & forteresses tenans leur party. Si feirent lors par toute la noble ville d'Orleans grand ioye & moult grans esbaudissemens, quand ils se veirent & cogneurent ainsi estre deliurez de leurs faux aduersaires & ennemis, & le remanant en aller à leur confusion, lesquels par longue espace de temps les auoient longuement tenuz en danger. Si furent enuoyez plusieurs nobles gens de guerre dedans icelles bastilles & forteresses, où ils trouuerent aucuns viures & treslargement d'autres biens, qui tantost par eux furent portez à sauueté si en feirent bonne chere : car ils ne leur auoient riens cousté : & lesdictes bastilles & forteresses furent prestement arses & demolies iusques en terre, afin que nulles gens de guerre, de quelconque païs qu'ils fussent ne s'y peussent plus loger.

Comment le Roy de France à la requeste de la Pucelle Jeanne & des autres nobles capitaines estans en la ville d'Orleans, leur enuoya grand quantité de gensdarmes pour aller sur ses aduersaires & ennemis.

EN ce temps les François estans en ladicte ville d'Orleans : c'est à sçauoir les capitaines avecques Jeanne la Pucelle tous d'un commun accord, enuoyerent leurs messaiges deuers le Roy de France par plusieurs, luy racompter les vigoureuses besongnes qu'ils auoient faictes : & comment les Anglois ses ennemis s'estoient departis & retournez en leurs garnisons. Iceluy Roy admonnestans que sans delay leur enuoyast le plus de gens de guerre qu'il pourroit finer avecques aucuns grans seigneurs, affin qu'ils peussent poursuiuir leurs ennemis : lesquels estoient tous effroyez pour la perte qu'ils auoient faicte, & aussi que luy mesmes en sa propre personne, se tirast auant en la marche : lesquelles nouvelles furent exaulcées, ce fut bien raison, & furent au Roy & à son conseil moult fort plaisantes. Si furent incontinent mandez à venir deuers luy le Connestable, le Duc d'Alençon, Charles seigneur d'Albreth & plusieurs autres moult nobles & grans seigneurs, & de grand renom : desquels la plus grand partie fut enuoyée à ladicte ville de Orleans. Et d'autre part certaine espace de temps apres, le Roy se retrahit à Gien : & avecques luy, tresgrand nombre de combattans. Et iceux capitaines qui par auant estoient à ladicte ville d'Orleans, & les nobles Princes & grans seigneurs qui nouuellement y estoient venuz, tindrent grans conseils tous ensemble l'un avecques l'autre, pour auoir aduis & deliberation s'ils poursuiueroient les Anglois leurs aduersaires & ennemis, esquels conseils estoit premiere appelée Jeanne la Pucelle, qui pour ce temps estoit en grand regne. Finalement les François enuiron le quatriesme iour du mois de May, dont le siege auoit esté leué à l'entrée d'iceluy mois, se meirent sur les champs iusques au nombre de cinq ou six mille combattans, à tout charroy & habillemens de guerre, & prindrent leurs chemins droit vers Iargueaux, où estoit le

Comte

Comte de Suffort & ses freres, qui ja par auant auoient enuoyez plusieurs messaiges à Paris deuers le Duc de Bethfort, luy noncer la perte de la malle aduanture qui leur estoit aduenue deuant Orleans, en luy requerant que brief leur vouldist enuoyer secours, ou autrement ils estoient en peril d'estre reboutez & de perdre plusieurs villes & forteresses, qu'ils tenoient au païs de Beaufse & sur la riuere de Loire: lequel Duc de Bethfort oyant ses nouuelles, fut moult ennuyant & desplaisant: neantmoins luy considerant qu'il conuenoit pourueoir aux choses plus necessaires, manda hastiuement gens de tous païs, estans en son obeissance, & en fait assembler de quatre à cinq mille: lesquels il fait mettre à chemin & tirer droit vers le païs d'Orleans sous la conduicte de messire Thomas de Rampston, du bastard de Thian, & plusieurs autres: auxquels il promet que brief ensuiuant il iroit apres eux à tout plus grand puissance qu'il auoit mandée en Angleterre.

Comment la Pucelle Ieanne & le Connestable de France, & le Duc d'Alençon & leurs routes conquirent la ville de Iargueaux: & la bataille de Patay, où les nobles Francois desconfirent les Anglois.

OR est verité que le Connestable de France, le Duc d'Alençon, Ieanne la Pucelle & les autres capitaines Francois estans tous ensemble sur les champs, comme il est dit dessus, cheuaucherent tant par aucunes iournées qu'ils vindrent deuant Iargueaux, où estoit le desfusdit Comte de Suffort, & de trois à quatre cens de ses gens avecques les habitants de la ville, qui tantost en toute diligence se meirent en ordonnance de deffence: mais en brief ils furent assez tost énuironnez de toutes parts desdits Francois: & de fait les commencerent en plusieurs lieux à assaillir moult roidement: lequel assault dura assez bonne espace terrible & moult merueilleux, toutesfois iceux Francois continuerent si asprement audit assault, que malgré leurs aduersaires par force d'armes entrèrent dedans ladicte ville, & par prouesses les conquirent: à laquelle entrée furent occis enuiron trois cens combattans Anglois, desquels fut l'un d'iceux des freres du Comte de Suffort: lequel Comte avecques luy son autre frere, le seigneur de la Pouille furent faits prisonniers, & de leurs autres gens iusques à soixante hommes ou au dessus. Ainsi doncques ceste ville & chasteau de Iargueaux conquise & subiuguée, comme dit est, lesdits Francois se rafreschirent dedans icelle tout à leur aise. Et apres eux partans de là allerent à Meung, qui tantost leur fait obeissance: & d'autre part fuirent les Anglois qui tenoient la Ferté Hubert, & se bouterent tous ensemble à Boisjency, iusques auquel lieu ils furent chassés & poursuiuis des Francois, lesquels se logerent deuant eux en plusieurs lieux, & tousiours Ieanne la Pucelle au front deuant à tout son estandart, & lors par toutes les marches de là enuiron, n'estoit plus grand bruit ne renommée comme il estoit d'elle & de nul autre homme de guerre. Et adoncques les plus principaux capitaines Anglois, qui estoient dedans ladicte ville de Boisjency voyant par la renommée d'icelle Pucelle fortune estre du tout ainsi tournée contre eux, & que plusieurs villes & forteresses estoient desia mises en l'obeissance de leurs

ennemis, les vns par vaillance d'armes & forces d'assault, & les autres par traité: & aussi que leurs gens pour la plus grand partie en estoient moult esbahis & espouventez, & ne les trouuoient pas de tel propos de prudence qu'ils auoient accoustumé: ains estoient tresdesirans d'eux retraire sur les marches de Normandie. Si ne sçauoient que faire ne quel conseil eslire: car ils ne sçauoient estre acertenez n'asseurez d'auoir en bref secours. Et pourtant tout considéré les besongnes dessusdictes ils traicterent avec les François, qu'ils s'en iroient à tout leurs biens, saufs leurs corps & leurs vies: par condition qu'ils rendroient la place en l'obeissance du Roy Charles de France, où de ses commis: lequel traité ainsi fait, lesdits Anglois se departirent prenant leur chemin parmy la Beauſſe, & tirant vers Paris. Et les François entrerēt ioyeuſement dedans Boiſ-jency ou Boſcengy: & prindrent conſuſion par l'exhortation de Ieanne la Pucelle, qu'ils iroient au deuât des Anglois, qui des parties vers Paris venoient, pour les combattre comme on leur auoit donné à entendre: laquelle chose estoit veritable. Si se meirent de rechef à plains chāps, & venoient à eux chacun iour gens nouveaux de plusieurs marches. Et furent adoncques ordonnez le Conneſtable, le Mareſchal de Bouſſach, la Hire, Pothon & plusieurs autres capitaines de faire l'auantgarde: & le ſurplus comme le Duc d'Alençon, le Baſtard d'Orleans, le Mareſchal de Roye estoient conduſteurs de la bataille, qui ſuiuoient aſſez pres ladicte auantgarde: & pouoient eſtre de huiſt à neuf mille combattans. Et fut demandé à Ieanne la Pucelle par aucuns des Princes là eſtans, quelle chose il eſtoit de faire, & que bon luy ſembloit à ordonner: laquelle Pucelle reſpondit, qu'elle ſçauoit bien pour vray que leurs anciens ennemis les Anglois venoient pour eux combattre: diſoit outre qu'au nom de Dieu on allaſt hardiement cōtre eux, & que ſans faillir ils ſeroient vaincus, & aucuns luy demanderent, où on les trouueroit, & elle leur dit, cheuauché hardiement on aura bon conduiſt. Et adoncques tous les gens d'armes ſe meirent en bataille, & en bonne ordonnance tirerent leur chemin ayans des plus experts hommes de guerre, montez ſur fleur de courſiers allant deuât pour deſcouvrir leurs ennemis iuſques au nombre de ſoixante ou quatre vingts hommes d'armes. Et ainſi par certaine longue eſpace cheuaucherent & vindrent par vn iour de ſamedy, à vne grande demie lieüe d'un gros village, nōmé Patay, en laquelle marche les deſſusdits coureurs François veirent de deuât eux partir vn cerf, lequel addreſſoit ſon chemin droit pour aller à la bataille des Anglois, qui ja ſ'eſtoient mis tous enſemble: c'eſt à ſçauoir iceux venans de Paris, dont deſſus eſt faiſte mention: & les autres qui estoient partis de Boiſ-jency, & des marches d'Orleans: pour la venue duquel cerf qui ſ'e ferit, comme dit eſt, parmy icelle bataille fut deſdits Anglois eſleué vn tresgrand cry: & ne ſçauoient pas encores que leurs ennemis ſeuſſent ſi pres d'eux. Pour lequel cry les deſſusdits coureurs François furēt acertainez que c'eſtoient les Anglois: car ils les veirent adonc tout à plain. Et pource renuoyerēt aucūſ d'eux vers leurs capitaines pour les aduertir de ce qu'ils auoiēt trouué: & leur feirent ſçauoir que par bonne ordōnance ils cheuauchaſſent auant, & qu'il eſtoit heure de beſongner. Leſquels preſtement ſe reparerent de tous points, & cheuaucherent bien & hardiement ſi auant qu'ils apperceurēt l'oſt de leurs anciens ennemis: leſquels ſachant pareillement la venue des François, ſe prepare-

rent

rent diligemment pour les combattre, & voulurent descēdre à pied empres vne haye qui estoit assez pres d'eux, affin que par derriere ne peussent estre surprins des François: mais aucuns des capitaines ne furent point de ce bien contens, & dirent qu'ils trouueroient place plus aduantageuse: pourquoy ils se meirent au chemin en tournant le dos à leurs ennemis: & cheuaucherent iusques à vn autre lieu enuiron bien vn demy quart de lieüe ou enuiron, du premier qui estoit assez fort de hayes & de buissons: ouquel pource que les François qui couuoioient iceux moult des pres, meirent pied à terre & destendirent la plus grand partie de leurs cheuaux. Et alors l'auantgarde des François qui estoient desirās & ardans en courage pour assembler aux Anglois, par ce que depuis peu de temps en ça les auoient assayez & trouuez d'assez meschante deffence, se ferirēt de plains eslais dedans iceux Anglois & d'vn hardy courage & grand volenté, les enuahirent si vigoureusement & tant soudainement auant qu'ils peussent estre en ordōnance, que mesmement messire Iean Fascot & le bastard de Thian cheualiers, avecques grand nombre de leurs gens ne se meirent point à pied avecques les autres, ains se departirent enfuyant à plain cours pour sauuer leurs vies. Et entre-temps les autres qui estoient descendus à pied furent tantost de toutes parts enuironnez & combattus par iceux François: car ils n'eurent point loisir d'eux fortifier de poinçons aguisez, par la maniere qu'ils auoient accoustumé de faire. Et pourtant sans ce qu'ils feissent grand dommage aux François, ils furent en assez brief terme & legierement ruez ius, descōfīts & du tout vaincuz. Et y eut morts dessus la place d'iceux Anglois enuiron dixhuiēt cens, & en y eut de prisonniers de cent à six vingts: desquels estoient les principaux les seigneurs d'Escalles, de Thallebot, de Hōgreffort, messire Thomas de Tampleton, & plusieurs autres des plus notables, iusques au nombre dessusdit. Et de ceux qui y furent morts furent les principaux, est à sçauoir & les autres estoient toutes gens de petit estat & moyen, tels & si faits qu'ils ont accoustumé à amener de leur païs mourir en France: apres laquelle besongne qui fut enuiron deux heures apres midy, tous les capitaines François se rassemblèrent ensemble en regrant de deuotement & humblement leur createur: & menerent grand lieffe les vns avecques les autres pour leur victoire & bonne fortune: & se logerent celle nuit en icelle ville de Patay qui est à deux lieües pres d'Anuille en Beaufse, de laquelle ville ceste iournée porte le nom perdurablement: & le lendemain lesdits François retournerent à tout leurs prisonniers, & les riches des Anglois qui morts estoient despoüillez: & ainsi entrerent en la ville d'Orleans, & les autres de leurs gens & marches d'entour & à l'enuiron, où ils furent grandement receuz de tout le peuple François, & par especial Ieanne la Pucelle acquist en icelles besongnes si grand louēge, & renommée, qu'il sembloit à toutes gens que les ennemis du Roy n'eussent plus puissance de resister contre elle: & que brief par son moyen le Roy deust estre remis & restably du tout en son Royaume: si s'en alla avec les autres Princes & capitaines deuers le Roy qui de leur retour fut moult resioüy, & fait à tous treshonorable reception. Apres laquelle brief ensuiuant fut prinse par iceluy Roy avecques ceux de son conseil conclusion de mander par tout le païs de son obeïssance, le plus de gens de guerre qu'il pourroit finer, affin qu'il se peust bouter auant és marches & poursuivre

ses ennemis. Item à la iournée de la bataille de Patay, avant que les Anglois sceussent la venue de leurs ennemis : messire Jean Fascot qui estoit vn des principaux capitaines, & qui s'en estoit foüy sans coup ferir, s'assembla en conseil avecques les autres, & fit plusieurs remonstrances : c'est à sçauoir comment ils sçauoient la perte de leurs gens, que les François auoient fait deuant Orleans & Iargeaux, & en aucuns autres lieux. Pour lesquelles ils auoient du pire, & estoient leurs gens moult esbahis & effroyez. Et leurs ennemis au contraire estoient moult en orgueilliz & resingniez : pourquoy il conseilla qu'ils se retrahissent aux chasteaux & lieux tenans son party à l'enuiron, & qu'ils ne combattissent point leurs ennemis si en haste iusques à ce qu'ils fussent mieux rassurez : & aussi que leurs gens fussent venus d'Angleterre, que le Regent deuoit enuoyer briefuement : lesquelles remonstrances ne furent point bien agreables à aucuns des capitaines, & par especial à messire Jean de Thallebot : & dit que si ses ennemis venoient qu'il les combattroit. Et par especial comme ledit Fascot s'en foüit de la bataille sans coup ferir, pour ceste cause grandement luy fut reproché quand il vint deuers le Duc de Bethfort son seigneur. Et en conclusion luy fut ostée l'ordre du blanc iarretier, qu'il portoit entour la iambe : mais depuis tât en partie comme pour les dessusdictes remonstrances qu'il auoit faictes, qui sembloient assez raisonnables, comme pour plusieurs autres excusances qu'il meit auât, luy fut depuis par sentence de proces rebaillee ladicte ordre de la iarretiere : iacoit-ce qu'il en sourdit grand debat depuis entre iceluy Fascot & sire Jean de Thallebot, quand il fut retourné d'estre prisonnier de la bataille dessusdictes : à ceste besongne furent faits cheualiers de la partie des François Jaques de Milly, Gilles de S. Symon, Loÿs de Marconnay, Jean de la Haye, & plusieurs vaillans hommes.

Comment le Duc de Bourgongne à la requeste du Duc de Bethfort s'en vint à Paris, où de nouuel ils reconfermerent leurs alliances.

ET de rechief en ces iours furent apportée nouuelles au Duc de Bethfort, & au grand conseil du Roy Henry d'Angleterre estant à Paris, de la perte & miserable aduenture & destruction de leurs gens : laquelle leur fut tant ennuyeuse & dure à ouïr dire & raconter, que les aucuns en plain conseil commencerent moult fort à plourer : Et d'autre part furent aduertis comment le Roy Charles à tout sa puissance se cōparoit, & aprestoït pour venir conquerir paÿs sur eux : pourquoy par le Duc de Bethfort & les Parisiens fut ordonné d'enuoyer vne solennelle ambassade deuers le Duc Phillippe de Bourgongne, affin de luy remontrer les dessusdictes estranges besongnes : & luy aussi requerre que briefuement il vouldist venir à Paris, pour avec le Regent & le conseil du Roy auoir aduis sur les affaires dessusdits, qui leur estoient suruenus : lesquels ambassadeurs, c'est à sçauoir l'Euesque de Noyon, deux notables Docteurs en Theologie de l'vniuersité, & aucuns des plus puissans bourgeois de Paris vindrent à Hesdin où ils trouuerēt ledit Duc de Bourgongne, auquel ils raconterent leur ambassade, en luy requerant tresinstamment de par son beau frere le Regent, & les Parisiens qu'il luy pleust aller à Paris au plustost que faire se pourroit : pour avec eux auoir deliberation & cōseil, pour

pour resister contre leurs aduersaires. Laquelle requeste iceluy Duc accorda & leur promet qu'en dedans briefs iours, il seroit en ladicte ville de Paris. Et adonc fait assembler de sept à huit cens cōbattans en ses païs d'Arthois & à l'environ: à tout l'esquels il alla en ladicte ville de Paris, pour la venue duquel fut faicte grād ioye tant des Parisiens cōme du Duc de Bethfort: & par plusieurs iournées tindrent ensemble de grans conseils sur les affaires dessusdits, en la fin desquels promeirent l'un à l'autre. C'est à sçauoir les Ducs dessusdits que chacun d'eux de toute sa puissance s'emploiroient à resister contre l'intention de Charles de Valois leur aduersaire: & reconfermerent de rechief les alliances & promesses que long temps par auant ils auoient faictes l'un à l'autre. Et apres ces choses faictes & accomplies, le Duc de Bourgogne retourna en son païs d'Arthois, & mena sa sœur la Duchesse de Bethfort avec luy, & la meit demourer & fait tenir en son estat à Lens en Arthois: & ledit Duc de Bethfort manda sans delay en Angleterre, qu'on luy enuoyast gēs de guerre les plus experts que l'on pourroit finer: & pareillement fait euoquer toutes les garnisons de Normandie, & d'autres lieux de son obeissance: & avec tous les nobles, & autres qui auoient accoustumé d'eux armer: duquel païs d'Angleterre ja pieça mandez, furent enuoyez à l'ayde du dessusdit Duc quatre mille combattans ou environ, desquels estoit chief & cōducteur le Cardinal de Vicestre: lequel passa la mer, & s'en vint à Calais, & de là à Amiens: duquel lieu le Cardinal alla à Corbie deuers le Duc de Bourgogne & sa belle niepce la Duchesse de Bethfort: lesquels, comme dit est, venoient de Paris, ouquel lieu de Corbie ils eurent l'un avec l'autre aucunes briefues conclusions: depuis lesquelles s'en retourna ledit Cardinal à Amiens, & de là mena aucuns de ses gens deuers le Duc de Bethfort son nepueu: lequel eut grand ioye de sa venue. En ces iours fut enuoyé Iean Bastard de sainct Pol, à tout certain nombre de gens d'armes des marches de Picardie, de par le Duc de Bourgogne vers le Duc de Bethfort. Lequel luy bailla en gouuernement la ville & forteresse de Meaux en Brie, & l'en fait souuerain capitaine pour la garder contre la puissance du Roy Charles, qu'on attendoit chacun iour en iceluy païs.

Comment le Roy Charles de France se meit sur les champs à tout grand foison de gens d'armes & de cheualiers: ouquel voyage meit en son obeissance plusieurs villes & chasteaux.



Tem durant le temps dessusdit, Charles Roy de France assembla à Bourges en Berry tresgrand multitude de gens d'armes & de trait: entre lesquels estoiet le Duc d'Alençon, Charles de Bourbon Comte de Cleremont, & Artus Connestable de France Comte de Richemont, Charles d'Anjou son beau frere & fils au Roy René de Cecile, le bastard d'Orleans, & le Cadeth d'Armignac, Charles seigneur d'Albreth: & plusieurs autres nobles hommes & puissans Barons des Duchez & Comtez d'Acquitaine, de Gascongne, de Poictou, de Berry, & plusieurs autres bons païs: avec tous lesquels se meirent sur les champs, & de là vint à Gien sur Loire tousiours Ieanne la Pucelle avec luy & en sa compagnie vn prescheur nommé frere Richard de l'ordre sainct Augustin, qui n'aguere auoit esté debouté de la ville de Paris

& d'autres lieux, où il auoit fait plusieurs predications en l'obeïssance desdits Anglois: pource qu'en icelles se monstroït trop plainement estre fauorable, & estre de la partie des François: duquel lieu de Gien print son chemin, en venant vers Auxerre: toutesfois le Cornestable à tout certain nombre de gens d'armes s'en alla en Normandie deuers Eureux, pour empescher les garnisons du païs, qu'ils ne se peussent assembler avecques le Duc de Bethfort. Et d'autre part le Cadeth d'Armignac fut renuoyé à garder la Duché d'Acquitaine, & de Bourdelois: auquel chemin iceluy Roy meit en son obeïssance deux petites bonnes villes, qui tenoient le party du Roy Henry: c'est à sçauoir S. Florentin & Iargueaux: icelles promettant de faire dorenavant au dessusdit Roy, & à ses commis tout ce que bons loyaux subiects doiuent faire à leur souuerain seigneur: & prenoiēt aussi du Roy seurté & promesse, qu'il les feroit gouuerner & maintenir en bonne iustice & selon leurs anciēnes coustumes, & de là vint audit lieu d'Auxerre: si enuoya sommer ceux de la ville, qu'ils le voulsissent receuoir cōme leur naturel & droicturier seigneur, lesquels de ce faire ne furent point contents de plaine venue: neantmoins plusieurs ambassadeurs furent enuoyez d'un costé & d'autre, si fut en la fin traicté fait entre les parties & promeirent iceux de ladicte ville d'Auxerre, qu'ils feroient telle obeïssance au Roy que feroient ceux des villes de Troyes, Chaalons, & Reims: & par ainsi administrerent aux gens du Roy viures & autres denrées pour leur argent, & ils demoureroient paisibles, & les tint le Roy pour excusez pour ceste fois: & de là vint le Roy à Troyes en Champagne, & se logea tout à l'enuiron: & y fut trois iours auant que ceux de la ville le voulsissent receuoir à seigneur: en la fin desquels parmy certaines promesses qui leur furent faictes, ils luy feirent plaine ouuerture, & meirent luy & ses gens dedans leur ville, où il ouït messe: & apres les sermens accoustumez faits d'une partie aux autres, le dessusdit Roy retourna en son logis aux champs: & feit publier par plusieurs fois tant en son ost comme en la ville sur la hart, que homme de quelque estat qu'il fut ne meffoit riens à ceux de la ville de Troyes, ne aux autres qui s'estoient mis en son obeïssance. Et en ce mesme voyage faisoient l'auantgarde les deux Mareschaux de France: c'est à sçauoir Bouffac, & le seigneur de Rais: avecques lesquels estoient la Hire, Pothon de Sainte Treille & aucuns capitaines, durant lequel voyage se rendirent en l'obeïssance d'iceluy Roy Charles tresgrand nombre de bones villes & chasteaux à l'enuiron des marches, où il passoit: desquelles redditions de les declairer chacune à part soy ie m'en passe pour cause de briefueté.

Comment le Roy Charles de France à tout grande & noble cheualerie, & à tout grand nombre de gens d'armes s'en vint en la cité de Reims, où il fut sacré par l'Archeuesque de Reims.

Lors Charles Roy de France, luy estant à Troyes en Champagne (comme dit est dessus) vindrent deuers luy aucuns deputez de Chaalons en Champagne, qui luy apportèrent les clefs de leur ville & cité, en luy promettāt de par icelle faire toute obeïssance: Apres la venue desquels, ledit Roy vint audit lieu de Chaalons, où il fut benignement & en grand humilité receu: & là pareillement luy furent apportées les clefs de la ville

ville de Reims, en luy promettant, comme dessus, faire toute obeïssance & le receuoir comme leur souuerain seigneur: en laquelle cité de Reims nagueres auoit esté le seigneur de Sauueses de par le Duc de Bourgongne, avec certain nombre de gens d'armes, pour icelle ville tenir en l'obeïssance du Roy Henry & du dessusdit Duc de Bourgongne: lequel seigneur de Sauueses venu à Reims par le gouuerneur & grand nombre des habitans, luy fut promis d'eux entretenir du party & en la querelle du Roy Henry, & aussi d'iceluy Duc iusques à la mort: mais nonobstant ce pour la cremeur qu'ils auoient de la Pucelle, qui faisoit de grans merueilles (comme on leur donnoit à entendre) se rēdirent en l'obeïssance du Roy Charles: iāçoit-ce que le seigneur de Chastillō, & le seigneur de Sauueses qui estoient leurs capitaines, leur remonstrassent & vouloient donner à entendre le contraire: lesquels deux seigneurs voyāns leur volenté & affection se departirent de ladicte ville de Reims: car en leurs remonstrāces ceux de ladicte ville de Reims n'auoient en riens voulu entendre, & ains leur auoient fait responce dures & assez estrāges. Lesquelles parolles ouïes, iceux seigneurs de Sauueses & de Chastillon retournerent au chasteau Thierry: si auoient des lors iceux de Reims print conclusion l'un avec l'autre de receuoir le dessusdit Roy Charles: laquelle chose ils feirent (comme dit est dessus) tant par le moyen de l'Archeuesque de Reims, lequel estoit Chancelier du Roy Charles, comme par aucuns autres: si entra le Roy dedans la ville & cité de Reims le vēdredy sixiesme iour de Iuillet avecques tresgrād nombre de cheualerie. Et puis le dimenche ensuiuant par ledit Archeuesque consacré & couronné à Roy dedans ladicte ville & cité de Reims presens ses Princes, & Prelats & toute la Baronnie & cheualerie qui là estoit. Là estoient le Duc d'Alençon, le Comte de Cleremont, le seigneur de la Trimouille qui estoit son principal gouuerneur, le seigneur de Beaumanoir Breton, le seigneur de Mailly en Touraine: lesquels estoient en habits royaux representans les nobles Pairs de France, qui point n'estoient au fait & noble sacre du Roy, & aussi au noble couronnement dessusdit: si auoient les dessusdits Pairs absens euocquez & appelez deuant le grand autel par le Roy d'armes de France ainsi, & par la maniere qu'il est accoustumé de faire. Apres lequel sacre fait & accomply, le Roy alla disner en l'hostel episcopal de l'Archeuesque, les seigneurs & prelates en sa compagnie: & se feist à sa table ledit Archeuesque de Reims, & seruirēt le Roy à son disner le Duc d'Alençon & le Comte de Cleremont, avecques plusieurs autres grans seigneurs: & fait le Roy le iour de son sacre trois cheualliers dedans l'Eglise, desquels le Damoiseau de Cōmercis en fut l'un: & à son departement laissa en la cité de Reims pour capitaine Anthoine de Hollande nepueu dudit Archeuesque. Et le lendemain se departit de ladicte ville, & s'en alla en pellerinage à Corbeny, visiter S. Marcou: auquel lieu luy vindrent faire obeïssance ceux de la ville de Laon, si comme auoient fait les autres bonnes villes, & citez dessusdictes: duquel lieu de Corbeny ledit Roy alla à Soissons & à Prouuins, qui sans contredit luy feirent plaine ouuerture: & constitua lors la Hire nouuel Baillif de Vermandois ou lieu de messire Collart de Mailly, qui par auant y estoit commis & institué de par Henry Roy d'Angleterre. Et apres s'en vint le Roy & ses gens deuant chasteau Thierry, où estoient dedans le seigneur de Chastillon, Iean de Croÿ,

Iean de Brimeu, & aucuns autres nobles grans seigneurs de la partie du Duc de Bourgon que à tout quatre cens combattans ou enuiron: Lesquels tant pource qu'ils sentoient la communauté encliner à faire obeïssance au Roy Charles, cōme pource qu'ils n'attendoient mie brief secours: & n'estoient mie pourueuz à leur plaisir, rendirent & restituerent icelle forte ville & chastel en l'obeïssance & subiection du Roy Charles, & s'en partirent sauuemēt & sans aucun destourbier, où empeschement à tout leurs biens. Si s'en allerent à Paris deuers le Duc de Bethfort, qui lors faisoit moult grand assemblée de gens d'armes, pour aller combattre le Roy Charles & sa puissance.

Comment le Duc de Bethfort fait moult grand assemblée de gens d'armes, pour aller combattre le Roy Charles. Et comment il luy enuoya vne lettres.

EN ce mesmes temps le Duc de Bethfort Regent vint à tout dix mille combattans ou enuiron, qu'il auoit assemblez d'Angleterre, de Normandie, & d'aucunes autres marches de Frāce se tira de Rouen, Paris: & de là par plusieurs iournées tédant récontrer le Roy Charles pour à iceluy liurer bataille. Si s'en alla par le païs de Brie à Monstriaufaut-Yonne: duquel lieu il enuoya ses messagiers & ambassadeurs deuers le dessusdit Roy, portāt ses lettres seellees de son seel, desquelles la teneur s'ensuit. Nous Iean de l'Enclastre Regent & gouuerneur de France & Duc de Bethfort: sçauoir faisons à vous Charles de Vallois, qui vous souliez nommer Daulphin de Viēnois: & maintenant sans cause vous vous dictes Roy, pource que torsionneremēt auez de nouuel entrepris cōtre la Couronne & la seigneurie de treshaut & excellent Prince, & trefrenommé mon souuerain seigneur Henry, par la grace de Dieu vray naturel & droicturier Roy des Royaumes de France & d'Angleterre: par donnant à entendre au simple peuple que venez pour donner paix & seurté, ce qui n'est pas, ne peut estre par les moyēs qu'auez tenus & tenez, qui faictes seduire & abuser le peuple ignorant, & vous aydez plus de gens superstitieux & reprouuez, cōme d'vne femme desordonnée & diffamée estant en habit d'homme & gouuernement dissolu: & aussi d'un frere Mendiant apostat & seditieux, cōme nous sommes informez: tous deux selon la saincte escriture abominables à Dieu, qui par force & puissance d'armes auez occupez au païs de Champaigne & autre part, aucunes citez, villes & chasteaux appartenans à mōdit seigneur le Roy, & les subiects demouroient en icelles constraints & induits à desloyauté & pariuremens, en leur faisant rompre & violer la paix finale des Royaumes de France & d'Angleterre, solennellement iurée par les Roys de France & d'Angleterre, qui lors viuoient: & les grans seigneurs Pairs, Prelats, Barons, & les trois estats de ce Royaume. Nous pour garder & deffendre le vray droit de mondit seigneur le Roy, & vous & vostre puissance rebouter hors de ses païs & seigneuries à l'ayde du tout puissant: nous sommes mis sus & tenons les champs en nostre personne, & en la puissance que Dieu nous a donné: & comme bien auez sceu & sçauiez vous auons poursuits & poursuiuons de lieu en lieu pour vous cuider trouuer ou rencontrer, ce que n'auōs encores peu faire, pour les aduertissemēs qu'auez faits & faictes pour nous, qui de tout nostre cueur, desirons l'abregement de la guerre: vous sommons, & requerons
que

que si vous estes tel Prince qui querez hōneur, ayez pitié & cōpassion du pauvre peuple chrestien, qui tāt longuemēt à vostre cause a esté inhumainemēt traicté & foulé & opprimé, que briefuement soit hors de ses afflictions & douleurs, sans plus continuer la guerre : prenez ou païs de Brie, où nous & vous sommes bien prochains de vous & de nous aucune place aux chāps, cōuenable & raisonnable & iour brief & cōpetant : & tel q̄ la prochaineté des lieux où nous & vous sommes pour le present, le peut souffrir & demander : auquel iour & place sy comparoir y voulez en personne, avec le conduict de la difformée femme, & apostat dessusdit, & tous les pariures & autre puissance telle que vous voudrez & pourrez auoir : nous au plaisir de nostre seigneur y comparerons, ou monseigneur le Roy en nostre personne : & lors si vous voulez aucune chose offrir ou mettre auant, regardant le bien de la paix : nous laisserons & ferons tout ce que bon Prince Catholique peut & doit faire, & tousiours sommes enclins & volontaires à toute bonne paix non fainte, corrompue, dissimulée, violée ne pariurée, comme fut à Monstriaufaut-Yonne celle dont par vostre coulpe & consentement s'ensuit le terrible, detestable & cruel meurdre commis contre loy & honneur de cheualerie, en la personne de feu mon treschier & tresamé pere le Duc Iean de Bourgōgne, à qui Dieu pardoint : par le moyē de laquelle paix par vous enfrainte, violée & pariurée sont demourez & demourent cent nobles, & autres subiects de ce Royaume & d'ailleurs quictes & exempts de vous & de vostre seigneurie, à quelque estat que vous ayez peu & pouez venir : & tous sermens de loyauté, feauté & subiection les auez absoluz & acquitez, comme par voz lettres patentes signées de vostre main & de vostre seel peut clerement apparoir. Toutesfois se pour l'iniquité & malice des hommes n'y pouoit prouffiter au bien de la paix, chacun de nous pourra bien garder & deffendre à l'espée sa cause, & sa querelle : ainsi que Dieu, qui est seul iuge, & auquel & non autre mondit seigneur à respondre, luy en donnera la grace : & auquel nous supplions humblement, comme à celuy qui sçait & qui cognoist le vray droit & legitime querelle de mondit seigneur, que disposer en vueille à son plaisir, & par ainsi le peuple de ce Royaume sans tel foullement, oppressions pourra demourer en longue paix & seur repos, que tous Roys & Princes Chrestiens qui ont gouvernement, doiuent requérir & demander : si nous faictes sçauoir hastiuement & sans plus delayer ne passer temps par escritures n'argumens, ce que faire ne voudrez : car si par vostre deffaut plus grans maux, inconueniens, continuatiōs de guerre, pillerie, & ranssonnement de gens & occisions & depopulations de païs aduiennent : nous prenons Dieu en tesmoing & protestons deuant luy, & les hommes qui n'en feront point en cause, & que nous auons fait & faisons nostre deuoir, & nous mettons & voulons mettre en tous termes de raison & hōneur, soit preallablement par moyen de paix & iournée de bataille de droit de Prince, quand autrement entre puissans & grans parties ne se peuuent faire : en tesmoing de ce nous auons fait seeller ces presentes de nostre seel. Donné audit lieu de Monstriaufaut-Yonne, le septiesme iour d'Aoust. L'an de grace mille quatre cens xxix. Ainsi signé par mon seigneur le Regent du Royaume de France, & Duc de Bethfort.

Comment le Roy Charles de France, & le Duc de Bethfort & leurs puissances rencontrèrent l'un l'autre vers le Mont-Espilloy.



Tem apres les besongnes dessusdictes, le Duc de Bethfort voyāt qu'il ne pouoit rencontrer le Roy Charles & sa puissance à son aduantage, & que plusieurs villes & forteresses se rendirent à luy sans coup ferir ne faire quelque resistance: il se retira à toute sa puissance sur les marches de l'Isle de France, affin d'obuier que les principales villes ne se tournassent contre luy, comme auoient fait les autres. Et d'autre part le Roy Charles qui ja estoit venu à Crespy, où il auoit esté receu & obeÿ comme souverain seigneur, se retrahit à tout sa puissance parmy le paÿs de Brie en approchant Senlis: auquel lieu les deux puissances dessusdictes: c'est à sçauoir du Roy Charles & du Duc de Bethfort, trouuerent l'un l'autre assez pres du Mont-Dallés, vne ville nommée le Bar. Si feirent de chacune partie grandes preparations, affin de trouuer aduantage pour combattre l'un l'autre, & print le Duc de Bethfort sa place en assez fort lieu, & adosserent aucuns lieux par derriere, & de costé de fortes hayes d'espines: & au front deuant estoient mis les archiers en ordonnance tous à pied, ayans chacun deuant luy poinçons aguisez fichez deuant eux. Et ledit Regent à tout sa compagnie & autres nobles assez pres desdits archiers en vne seule bataille, où il y auoit entre autres seigneurs, deux bannieres, l'une de France & l'autre d'Angleterre: & si estoit avecques icelle l'estandard de saint George: laquelle banniere portoit pour ce iour Iean de Villiers cheualier, seigneur de l'Isle Adam. Et estoient lors avecques ledit Duc de six à huit cens combattans des gens du Duc de Bourgogne: desquels les principaux estoient le seigneur de l'Isle Adam, Iean de Croÿ, Iean de Crequy, Anthoine de Bethune, Iean de Fosseux, le seigneur de Saueuses, messire Hue de Launoy, Iean de Brimeu, Iean de Launoy, messire Symon de Lalain, Ieā bastard de saint Pol, & plusieurs autres hommes de guerre, desquels les aucuns furent faits nouueaux cheualiers, & le fut fait ledit Bastard de la main du Duc de Bethfort. Et les autres comme Iean de Crequy, Iean de Croÿ, Anthoine de Bethune, Iean de Fosseux, le Liegeois de Humiers par les mains d'aucuns autres cheualiers. Apres lesquelles besongnes ainsi mises & conduictes: les Anglois & ceux de leur nation tous ensemble d'un costé de ladicte bataille de la main fenestre, & les Picards & autres de la nation de France estoient de l'autre costé. Et se tindrent en bataille, comme dit est, par treslongue espace, & estoient mis si aduantageusement, que leursdits ennemis aduersaires ne les pouoient enuahir & assaillir par derriere, sinon à tresgrand dommage & danger, & avecques ce estoient pourueuz & rafraischiz de viures, & autres necessitez de la bone ville de Senlis: dont ils estoient assez pres. Et puis d'autre part le Roy Charles avecques ses Princes & capitaines, fait ordonner en son auantgarde la plus grand partie des plus vaillans & plus experts hommes de guerre de sa compagnie: & les autres demourerent, excepté aucuns qui furent commis sur le derriere au lez deuers Paris par maniere d'arrieregarde, & si auoit avecques ce le Roy tresgrand multitude de gens d'armes, trop plus sans comparaison qu'il n'y auoit en la compagnie des dessusdits Anglois. Et puis si y estoit Ieane la Pucelle

Pucelle tousiours ayant de diuerſes opinions, vne fois voulant combattre ſes ennemis, & autres fois non: mais neantmoins toutes les deux parties (comme dit eſt deſſus) eſtans ainſi ſans deſordonner par l'eſpace de l'un deuant l'autre tous pres de combattre, furent deux iours & deux nuitſ ou enuiron: durant lequel temps y eut pluſieurs grans eſcarmouches & aſſaulx: leſquelles racompter chacune à part ſoy, ſeroit trop longue choſe: mais entre les autres y en eut vne qui fut moult dure & aſpre & enſanglantée, au coſté vers les Picards: laquelle dura bien l'eſpace d'heure & demie. Si eſtoient au coſté du Roy Charles grand party de François & autres gens en treſgrand nombre, qui treſfort & aſprement ſe combattoient. Et par eſpecial les archiers d'icelle partie tirerent de leur traiçt moult courageuſement, & en treſgrand nombre l'un contre l'autre. Si cuidoient aucuns des plus ſachans deſdictes parties, voyans la beſongne ainſi multiplier & croiſtre, que point ne ſe deuſſent partir l'un de l'autre que l'une des parties ne fut deſconfite, & vaincue & miſe à neant. Toutefois ils ſe trahirent derriere les vns des autres, mais ce ne fut mie qu'il n'y eut de chacune partie des morts & bleſſez largement. Pour laquelle eſcarmouche & bataille deſſuſdicte, ledit Duc de Bethfort fut moult grandement content des Picards, pource qu'à celle fois ſ'eſtoient portez moult vaillamment. Et apres qu'ils ſe furent retraits, vint ledit Duc de Bethfort au long de leur bataille les remercier en pluſieurs lieux treſhumblement, diſant: mes amis vous eſtes treſbonnes gens & auez ſouſtenus grans faits pour nous, dont nous vous mercions treſgrandement, & vous prions ſil vous vient aucuns affaires, que vous perſeuererez en voſtre vaillantife & hardement: eſquels iours en icelles parties eſtoiēt en moult grand haine les vns contre les autres, & n'eſtoit homme de quelque eſtat qu'il fut prins à finances: ains mettoient tout à mort ſans pitié ne miſericorde, ce qu'ils pouoient attendre l'un de l'autre, & comme il fut informé à toutes ſes eſcarmouches, eut de morts enuiron trois cens hommes des deux parties, mais ne ſçay de quel coſté en a le plus. En la fin deſquels deux iours deſſuſdits ou enuiron, les deux parties ſe deſlogerent les vns deuant les autres ſans pluſ riens faire.

Comment le Roy Charles de France enuoya ſes ambaffadeurs à Arras vers le Duc de Bourgongne.

EN ce temps les ambaffadeurs du Roy Charles de France vindrent à Arras vers le Duc de Bourgongne, pour traicter de paix entre icelles parties: deſquels ambaffadeurs eſtoient les principaux l'Archeueſque de Reims, Chriſtofle de Harcourt, les ſeigneurs de Dampierre, de Gaucourt, & de Fontaines cheualiers, avecques autres gens d'eſtat: qui trouuerent audit lieu d'Arras ledit Duc avecques ſon conſeil: apres la venue deſquels, & qu'il eurent requis auoir audience vers ledit Duc, allerent iceux ambaffadeurs aucuns iours apres leur venue en ſon hoſtel, & par la bouche d'iceluy Archeueſque de Reims, fut audit Duc de Bourgongne expoſé moult ſagement & attentiquement l'eſtat de leur ambaffade, preſens la cheualerie & ceux de ſon conſeil, avec pluſieurs autres là eſtant: en luy remonſtrant entre les autres choſes la parfaicte affection & vray deſir, que le Roy

auoit de pacifier avecques luy & auoir traicté, disant outre que pour y venir, iceluy Roy estoit content de luy commettre & condescendre, en faisant offres de reparations plus qu'à sa majesté royale n'appartenoit. Excusant aucunemēt par sa ieunesse le dessusdit Roy, de l'homicide iadis perpetré en la personne de feu le Duc Iean de Bourgongne son pere, allegant avec ce que lors avec sadiete ieunesse, il estoit au gouuernement des gens qui point n'auoient de regard & consideration au bien du Royaume, ne de la chose publique, & ne les eut pour ce temps oser desdire ne courroucer: lesquelles remonstrāces & plusieurs autres assez notables declairées par le dessusdit Archeuesque, furent dudit Duc & des siens benignement oüyes: en la fin desquelles fut dit à iceux ambassadeurs: Monseigneur & son conseil ont bien oüy ce que vous auez dit, il aura sur ce aduis, & vous fera responce dedans briebs iours: & adoncques ledit Archeuesque retourna en son hostel avecques luy ses compagnons, qui de toutes gens estoient honnorez: & pour lors la plus grand partie de tous les estats du païs estoient tresdesirans, que la paix se fait & concordast entre le Roy & le Duc de Bourgongne: & mesmement ceux du moyen & bas estat y estoient si affectez, que deslors où il n'y auoit encores paix ne trefues, alloient en ladicte ville d'Arras deuers le dessusdit Chancelier de France, impetrer en tresgrand nombre remission, lettres de graces, offices & autres plusieurs mandemens Royaux, cōme si le Roy fait plainement en sa seigneurie, & de ce fussent acertainez: lesquels mandemens dessusdits ou en la plus grand partie ils obtenoient dudit Chancelier. En apres le Duc de Bourgongne avec ceux de son priué conseil, fut par plusieurs iournées en grande deliberatiō, & furent les besongnes entre icelles parties moult approchées.

Comment le seigneur de Longueual print le chasteau Dammarle sur les Anglois.



E temps le seigneur de Longueual, qui long temps auoit esté deboutté de sa seigneurie & estoit retourné deuers le Roy Charles, par le moyen qu'il eut d'un prestre demourant à Aumarle, print la forteresse d'icelle ville chief du lieu de toute la Comté, qu'adonc tenoient les Anglois, & furent trouuez dedans quatre ou cinq desdits Anglois, avecques plusieurs des habitans de la ville, lesquels Anglois furent tantost mis à mort. Et lesdits habitans en faisant serment d'estre bons François, furent receuz à mercy en payant aucune somme d'argent: laquelle forteresse fut en assez brief temps apres largement pourueüe, & garnie de viures, & aussi de gens de guerre: qui en brief commencerent à courre à la marche d'enuiron, à mener forte guerre aux Anglois & à ceux du païs tenant leur party, dont grandement en despleut au Duc de Bethfort: mais nonobstant pour autres plus grans affaires qu'il auoit, n'y pouoit pour lors aller. Et pareillement en ces propres iours fut prinse d'emblée la forteresse d'Estrepagny du seigneur de Rambures & de ses gens. Et d'autre costé aussi fut reduict en l'obeissance du Roy Charles la forteresse de chasteau Gaillard, qui est excellentement située en forte place: dedans lequel estoit prisonnier de long temps parauant, ce vaillant & notable cheualier le seigneur de Barbazan: lequel, cōme dit est, auoit esté prins à Melung par la vertu & puissance du Roy Henry d'Angleterre: par le moyen duquel Barbazan, icelle forteresse

resse fut mise en l'obeissance du Roy Charles, & luy de prisonné, si y commeit en brief aucuns de son party, & s'en alla au plus tost qu'il peut deuers le Roy Charles: & aussi fut moult ioyeusement receu & honoré. En outre fut prinse & mise en la main de François la forteresse de Torcy, par le moyen d'aucuns du païs, qui auoient repaire dedans avecques les Anglois: lesquels ils trahirent & meirent és mains de leurs ennemis & aduersaires. Ainsi dōcques en assez brief temps furent Françoises les quatre forteresses tenās le party des Anglois: & qui estoient les plus fortes à l'eslite de dedans le païs, où elles estoient assises: pour la prinse desquelles le païs fut moult trauaillé, tant par les garnisons des François, comme de celles des Anglois.

Comment la ville de Compiengne se rendit au Roy Charles. Et du retour des ambassadeurs de France qui estoient allez vers le Duc de Bourgongne.



Pres que le Roy Charles de France fut retourné de la iournée de Senlis: où luy & le Duc de Bethfort auoient esté à puissance l'un contre l'autre, comme dit est dessus, & il fut reuenu de Crespy en Valois, illecques luy furent apportées nouuelles que ceux de la ville de Compiengne luy vouloient faire obeissance. Et pourtant sans nul delay alla audit lieu de Compiengne, où il fut des habitans d'icelle ville moult honorablement receu en grand liesse, & se logea en son hostel royal: auquel lieu retournerent deuers luy son Chancelier & ses autres ambassadeurs, que par auāt il auoit enuoyez deuers le Duc de Bourgongne: avec lequel & ceux de son conseil, ils auoient tenus plusieurs destroits parlemens, neantmoins ils n'auoiēt riens concordé: mais en conclusion auoient esté d'accord, que ledit Duc enuoyeroit sa legation deuers le Roy Charles, pour au surplus auoir aduis & entretenement: si furent alors informez que la plus grand partie des principaux conseillers du Duc de Bourgongne, auoient grand desir & affection qu'icelles deux parties fussent reconseillées l'une avec l'autre: toutesfois maistre Jean de Tourcy Euesque de Tournay, & messire Hue de Launoy, qui presentement vindrent deuers ledit Duc de Bethfort: & auoyent de par luy charge de faire aucunes remonstrances audit Duc de Bourgongne, & en luy admōnestant de ce faire entretenir le serment, qu'il auoit fait au Roy Henry, n'estoient pas bien contents que ledit traicté fut fait: sur laquelle parole desquels, fut la besongne atargée, & prinse autre iournée d'enuoyer deuers le Roy Charles legation, comme dit est, pour laquelle faire fut commis messire Jean de Luxembourg, l'Euesque d'Arras, messire Dauid de Brimeu & aucunes autres notables & discrettes personnes. Et ce mesme temps messire Lyonnell de Bournouille, qui auoit perdu la ville & forteresse de Creil, requist au Duc de Bethfort qu'il luy baillast des gens d'armes, pour conquerre vn sien chastel nommé Breteiche, que les François auoient prins: laquelle chose luy fut accordée & octroyée, à tous lesquels il s'en alla à ladicte forteresse, & la print d'assault, & meit à mort ceux qui dedans estoient: mais en ce faisant, il fut nauré dont il mourut.

Comment le Roy de France feit assaillir la cité de Paris,



Tem le Roy Charles de France luy estant acompaigné, luy furent
 apportées nouvelles, que le Duc de Bethfort Regent à tout sa puis-
 sance s'en alloit en Normandie, pour combattre le Connestable : le-
 quel estoit vers Eureux & trauailloit fort le païs : & pourtant iceluy
 Roy Charles apres qu'il eust esté dedans la ville de Compiagne douze iours ou
 enuiron, il se partit de là & laissa Guillaume de Flauy capitaine d'icelle, & à tout
 son ost s'en alla à Senlis : laquelle cité se rendit au Roy par traicté : si se logea de-
 dans auecques grand partie de ses gens, & autres se logerent és villages enuiron :
 esquels iours aussi feirent obeissance au Roy dessusdit plusieurs villes & forte-
 resses : c'est à sçauoir Creil, Beauuais, le Pont Sainte Maxence, choisy, Gour-
 nay sur Aronde, Remy, la Neuville en Hets, & en l'autre costé Mognay,
 Chantely, Saintines, & plusieurs autres : & aussi luy feirent serment les sei-
 gneurs de Mont-Morency & de Moÿ : & pour verité fil à tout sa puissance fut
 venu à saint Quentin, Corbie, Amiens, Abbeuille & plusieurs autres fortes
 villes & fors chasteaux : la plus grand partie des habitans d'icelles, estoient tous
 prests & appareillez de le receuoir à seigneur : & ne desiroient autres choses au
 mode que de luy faire obeissance & plaine ouuerture : toutesfois il ne fut point
 conseillé d'aller si auant sur les marches du Duc de Bourgongne : tant pource
 qu'il le sentoit fort de gens d'armes, comme pour l'esperance & attente qu'il a-
 uoit que aucun bon traicté & appoinctement se fait entre eux. Et apres que le
 Roy Charles eut seiourné aucuns iours dedans la ville de Senlis, il se partit &
 deslogea de là, & s'en alla à tout son ost logger à saint Denys qu'il trouua com-
 me abandonné, & s'en estoient allez les gens dudit lieu à Paris : c'est à sçauoir
 tous les plus grans bourgeois & habitans d'icelle ville : & ses gens se logerent &
 hebergerent à Aubervilliers & Mont-Martre, & villages de là autour assez pres
 de Paris. Si estoit lors auecques ledit Roy Ieanne la Pucelle, qui auoit moult
 grande renommée : laquelle chacun iour induisoit le Roy auec ses Princes &
 seigneurs, à ce qu'il fait assaillir la ville & cité de Paris : si fut conclud & delibe-
 ré que le lundy douziesme iour dudit mois, on liureroit ledit assault. Apres la-
 quelle conclusion prinse, on fait apprester toutes gens de guerre. Et à ce propre
 lundy dessusdit, se meit le Roy en bataille entre Paris & Mont-Martre, ses Prin-
 ces & seigneurs auecques luy : & aussi estoit ladicte Pucelle auec luy, ceux de
 l'auantgarde y estoient en tresgrand nombre : s'en alla à tout son estandart à la
 porte saint Honoré, faisant apporter auecques luy plusieurs eschelles, fagots
 & autres habillemens d'assault : auquel lieu, elle fait entrer dedans les fossez plu-
 sieurs de ses gens tout à pied : & commença l'assault à dix heures ou enuiron
 moult dur, aspre & cruel, lequel dura en continuant de quatre à cinq heures ou
 plus : mais les Parisiens qui estoient dedans leur ville, accompaignez de Loÿs
 de Luxembourg, l'Euesque de Theroüanne & Chancelier de France de par le
 Roy Henry, & d'aucuns autres notables cheualiers, que le Duc de Bourgon-
 gne leur auoit enuoyez : comme le seigneur de Cresquy, le seigneur de l'Isle-
 Adam, messire Simon de Lalaing, messire Valerien de Bonneual, & aucuns au-
 tres notables hommes accompaignez de quatre cens combattans, se deffendi-
 rent moult vigoureusement & de grand courage : & auoient par auant ordon-
 né par capitaineries à chacun sa garde és lieux propices & conuenables. Durant
 lequel

lequel assault furent reuersez plusieurs desdits François : & en y eut tresgrand nombre de morts & de naurez par les canons, couleurines & autre traict, que leur icettoient lesdits Parisiens : entre lesquels Ieanne la Pucelle fut tresfort naurée & blecée, & demoura tout le iour és fossez derriere vn doïdasne iusques au vespre, que Guychard de Thiembronne & autres l'allerent querir : & d'autre part y eut nauré plusieurs des deffendans. Finablement les capitaines François voyans leurs gens en tel peril, considerans qu'il leur estoit impossible de conquerre & gaigner la ville par force, attendu que iceux auoient vne volenté de eux deffendre sans y auoir diuision, feirent incontinent sonner la retraicte. Et en reportant les dessusdits morts & naurez, retournerent à leurs logis. Et le lendemain le Roy Charles triste & dolent de la perte de ses gens, s'en alla à Senlis pour guerir & medeciner les naurez. Et lesdits Parisiens plus que parauant, se reconfermerent les vns avecques les autres, promettans que de toute leur puissance & pouoir, ils resisteroient iusques à la mort contre iceluy Roy Charles, qui les vouloit comme du tout destruire. Et peut bien estre qui le craignoient, comme ceux qui grandement se sentoient forfaits par deuers luy, en le ayant debouté de ladicte ville : & auoient mis à mort plusieurs de ses feables seruiteurs, comme en autres lieux plus à plain est declairé.

Comment le Duc de Bourgongne enuoya ses ambassadeurs à Amiens pour entretenir les habitans d'icelle ville de sa partie.

EN ces iours le Duc de Bourgongne enuoya ses ambassadeurs à Amiens, c'est à sçauoir l'Euesque de Noyon, & d'Arras, le Vidasme d'Amiens, & aucuns autres : affin de remonstrer au maieur & aux habitans d'icelle, la bonne amour & affection que luy & ses predecesseurs auoient tousiours avecques eux : disant que s'ils auoient affaire de chose que luy & ses pays peussent, il estoit à leur commandement : requerāt en outre qui leur pleust perseuerer tousiours & eux entretenir de son party, comme ses bons amis & voisins. Lesquels citoyens d'Amiens eux voyant ainsi honorer par les messagers de s'y hault & s'y puissant Prince, ils en eurent grand ioye : & dirent entre eux qui seroit bon de mettre la ville en sa garde, & qu'il meit aneant toutes aydes & impositions. Et feirent responce ausdits ambassadeurs, qu'ils enuoyeroient briefuement deuers ledit Duc aucuns de leurs gens : laquelle chose ils feirent, & avecques ce y enuoyerēt ceux d'Abbeuille, de Monstreul, saint Ribier, Dourlens : & aucunes autres pour obtenir la mise ius desdictes gabelles & impositions. Laquelle chose ne leur fut point par iceluy Duc accordée : mais il leur fut dit qu'au plus brief que faire se pourroit, ils auroient de luy ayde, assistance de ce impetrer deuers le Roy Henry. Item en ce mesme temps ledit Duc de Bourgongne feit euocquer par toutes les marches de Picardie, tous ceux qui auoient accoustumé d'eux armer : & aussi és pays à l'environ pour estre prests chacun iour pour aller avecques luy, où il les vouldroit conduire. Si furent en peu de temps en tresgrand nombre, & passerent à Monstre à Branquesne, en faisant serment à messire laques de Brimeu à ce commis comme Mareschal. Si se trahirent & tirerent vers Abbeuille. Et saint Ribier, où ils furent moult grande espace de temps attendant que ledit Duc fut prest & appa-

reillé, dont le païs fut moult grandement oppressé.

Comment le Roy Charles de France s'en retourna en Touraine & en Berry.

Lors Charles Roy de France voyant que la ville de Paris qui estoit chief de son royaume, ne se voulut pas mettre en son obeïssance: se disposa & conclud avec ceux de son conseil delaisser gouverneurs & capitaines de luy par toutes les bonnes villes, citez & chasteaux qui estoient en son obeïssance & gouvernement, & qu'il s'en retourneroit és païs de Touraine & de Berry: laquelle chose conclute (comme dit est) il constitua principal chief sur les parties de l'Isle de France & de Beauuoisis Charles de Bourbon Comte de Clermont, & le Chancelier dessusdit se tenoient le plus en la ville de Beauuois: & ledit Comte de Vendosme à Senlis, & Guillaume de Flauy à Compiègne: messire Jaques de Chabannes à Creil, & le Roy dessusdit avecques luy les grans seigneurs qu'il auoit accompaigné au venir, s'en alla de Senlis à Crespy: & delà par deuers Sens en Bourgongne, retourna és païs dessusdits: toutesfois les trefues estoient entre les Bourgongnons & les François iusques au iour de Pasques ensuiuans: & avec ce fut remis le passage du Pont sainte Maxence, que tenoient les François en la main de Regnault de Longueval pour le tenir, si demoura la marche de France & de Beauuoisis en grande tribulation: pource que ceux qui estoient és forteresses, & garnisons tant du païs de France que d'Angleterre couroient chacun iour l'un sur l'autre: à l'occasion desquelles courses les villages de là entour se commencerent à despeupler, & eux retraire és bonnes villes.

Comment le Duc Philippe de Bourgongne en grand appareil remena sa seur en la cité de Paris, au Duc de Bethfort son mary.

Le vingtiesme iour de Septembre de cest an, se partit le Duc de Bourgongne de Heïdin avec sa seur femme du Duc de Bethfort, grandement accompagnez de leurs gens & s'en allerent au giste à Dourlès, & le lendemain à Corbie: où ils furent aucuns peu de iours en attendant les gens d'armes qui là venoient de toutes parts, duquel lieu de Corbie ils allerent à Montdidier: & puis delà à Chastenay, & tous les gens d'armes se logerent à l'enuiron: desquels il pouoit auoir de trois à quatre mille cōbattans: & eux partans de Chastenay s'en allerēt passer la riuere d'Oize, & au Pont S. Maxèce, & delà par empres Senlis allerent au giste au Loure en Paris: si faisoit ledit Duc cheuaucher ses gens en bōne ordonnance, & menoit messire Jean de Luxembourg l'auantgarde, & ledit Duc menoit & cōduisoit la bataille, aupres duquel estoit tousiours sa dessusdicte seur sur vn bō cheual trotier, & avecq's elle estoïēt huiēt ou dix de ses femmes montées sur haquenées, le seigneur de Sauueses & aucuns autres avecques certain nōbre d'hōmes d'armes, cheuachoit tout derriere par maniere d'arrieregarde: si fut ledit Duc moult grandement regardé des François, qui estoient en grād nombre de pied & de cheual au dehors de la ville de Senlis: & y venoit seurement armez comme bon leur sembloit, par le moyen des trefues qui estoient entre les parties: car celuy Duc armé de plain harnois sinon sur la teste, seoit sur les champs sur vn tresbon excellent cheual,

&

& estoit moult gentement habillé & orné de sept ou huiet de ses paiges apres luy, chacun monté sur bons courriers. Deuers lequel Duc vint & arriua premier l'Archeuesque de Reims, Chancelier de France à plains champs au dessus de la dessusdicte ville & cité de Senlis faire reuerce & hommage. Et assez brief ensuiuant yvint Charles de Bourbon Comte de Clermont accompagné de soixante cheualiers, ou environ: lequel venu iusques assez pres dudit Duc, osterent leurs chapperons, & enclinerent leurs chefs l'un à l'autre en disant aucunes parolles de salutations, non mie en embrassant l'un l'autre par maniere de grand amour & ioyeuseté, ainsi que l'ont accoustumé de faire si prochains de sang qu'ils estoient l'un à l'autre. Apres laquelle salutation & reuerence faicte, ledit de Bourbon alla baiser & embrasser sa belle seur de Bethfort, qui estoit assez pres au dextre lez de son beau frere le Duc de Bourgongne: si feirent aucune briefue recognoissance. Et tantost retourna deuers son beau frere le Duc de Bourgongne: duquel quand alors on ne veit point d'apparence ne de cognoissance, qu'il eust grand amour ne desir d'auoir grand parlement avecques iceluy Comte de Clermont son beau frere: ains sans cheuaucher l'un avecques l'autre ne faire long conuoy, se departirent en prenant congé l'un de l'autre au propre lieu où ils estoient abordez & arriuez. Et retournerent lesdits Charles de Bourbon & Chancelier de Senlis à tout leurs gens. Et ledit Duc de Bourgongne (comme dit est dessus) & sa seur s'en allerent au giste à Louures: duquel lieu le lendemain ils se patirent en allant & tirant vers Paris, où desia estoit retourné du pays de Normandie le Duc de Bethfort. A la venue duquel furent faictes grandes acollées & ioyeuses receptions de l'un à l'autre. Si furent assez pres de Paris toutes les gens du Duc de Bourgongne mis en bataille par bonne ordonnance, où ils furent grand espace de temps avant que les fourriers eussent esté dedans ladicte ville pour ordōner les logis. Et apres iceux Princes & la Duchesse entrerent dedans la ville, & generalement tous les gens d'armes. A la venue duquel Duc de Bourgongne fut faicte moult grād ioye des Parisiens, si y crioit on Noël par tous les carrefours où il passoit, & conuoya ledit Regent, & sa femme iusques à l'hostel des Tournelles. Et puis s'en alla loger en son hostel d'Arthois. Et aucuns iours ensuiuans furent entre iceux Princes & ceux de leur conseil tenus plusieurs grans conseils sur les affaires de la guerre, qui estoient moult pesans. Et entre les autres choses furent par Parisiens requis au Duc de Bourgongne, qu'il luy pleust à entreprendre le gouuernement de la ville de Paris, qui moult auoit à luy grande affection: & estoient de present tous prests, & appareillez de maintenir sa querelle, & de son feu pere. Disant outre qu'il estoit necessité & besoing qu'il accordast leur requeste & demande, considéré les affaires que auoit le Regent tant en Normandie comme ailleurs: laquelle chose ledit Duc de Bourgongne feit, & leur ottroya iusques apres Pasques ensuiuant, mais ce fut trefenuis. Si conclurent & delibererent les dessusdits Ducs de Bethfort & de Bourgongne, que vers Pasques à la saison nouuelle se monstreroient sus chacun à tout grand puissance, pour reconquerre & gagner les villes qui estoient retournées contre elles en la marche de France, & sur la riuiera d'Oize. Apres lesquelles conclusions ledit Duc de Bethfort avec sa femme & ses Anglois, se departit de ladicte ville de Paris. Et ledit Duc de Bourgongne commist

capitaine de Paris le seigneur de l'Isle-Adam à tout petit nombre de gens, & à sainct Denys, au Bois-de-Vinssennes, au pont de Charenton & és autres lieux necessaires. Apres de ladicte ville de Paris ordōna capitaine de ses gens:& apres qu'il eut seiourné dedans icelle ville de Paris l'espace de trois sepmaines, prenant congé premier à la Royne de France mere du Roy Charles, s'en retourna par les chemins dont il estoit venu en son païs d'Arthois, & de là en Flandres. Avec lequel se departirent plusieurs bourgeois de Paris de leurdicte ville. Et autres gens marchans.

Comment les Francois & Bourguongnons couroient l'un sur l'autre, nonobstant les trefues qui y estoient.



Tem durant le temps dessusdit que les trefues estoient accordées entre le Roy Charles & le Duc de Bourgogne iusques aux Pasques ensuiuans:neantmoins icelles parties couroient tressouuent l'une sur l'autre. Et mesmement pour embellir leur querelle aucuns tenans le party dudit Duc de Bourgogne, se bautoient avecques les Anglois qui point n'auoient trefues aux François,& menaient avec eux plaine guerre ausdits François. Et les François pareillemēt couroient & faisoient plaine guerre aux Bourguongnons, & en faignant les dessusdits Bourguongnons d'estre Anglois: & y auoit pour lesdictes trefues peu ou neant de seureté. Si en fut entre les autres faite vne entreprise d'un vaillant homme d'armes d'Angleterre nommé Foulques, avec lequel festoient mis aucuns hommes d'armes de ladicte partie de Bourgogne, qui se tenoient à la Neufuille le Roy en vn bel chastel qu'ils auoient reparé:& tous ensemble allerent acueillir la proye de la ville de Creil,& auoient laissé vne embusche: affin que si leurs ennemis failloient contre eux, qui les peussent surprendre, laquelle chose aduint ainsi que l'auoient imaginé: car messire Jacques de Chambannes qui estoit principal capitaine de la ville de Creil tantost qu'il oyt l'effroy, s'arma incontinent sans delay & monta à cheual. Et de grand volenté alla ferir de plains eslais en ses ennemis, desquels de premiere venue fut prins prisonnier vn nommé Georges de Croix, & aucuns autres ruez par terre. Et eut entre icelles parties tresgrande escarmouche, mais en conclusion par la vaillantise & secours dudit Foulques, fut le dessusdit Jacques de Chambannes detenu prisonnier: & avecques luy deux autres cheualiers, & aucuns autres des meilleurs gens: toutesfois en ce faisant iceluy Foulques fut feru à descouuert en la gorge de la poincte d'une espée vn bien petit coup duquel mourut tout prestement: pour la mort duquel tous ceux de son party là estans qui de luy auoient cognoissance, eurent au cueur moult grand tristesse: car ils le tenoient pour le plus vaillant & expert en armes de tout le païs d'Angleterre. Si se rassemblerent tous les Anglois, desquels pour lors estoient les principaux, Bohort de Bozentin, & Robinet Eguetin:si emmenerent leurs prisonniers en leur forteresse. Et en dedans assez brief iours feirent traicté avec messire Jacques de Chambannes, par cy qu'en payant certaine somme, il fut deliuré moyennant ainsi qu'il rendit le dessusdit Georges de Croix. Item en ces iours le Duc de Bethfort considerant, que la forteresse du Chasteau Gaillard estoit située en moult fort lieu & auantageux, pour grandement greuer & guerroyer

royer le païs de Normandie : si conclud que auant que ses ennemis qui dedans estoient, fussent pourueuz de viures & fortifiez de gens, de les faire assieger par les Anglois : laquelle chose il feit, & y fut le siege de six à sept mois. En la fin desquels les assiegez rendirent ladicte forteresse par faulte de viures : & s'en allerent à tout partie de leurs biens.

Comment le seigneur de Sauueses & le bastard de saint Pol furent prins deuant Paris par les Francois. Et comment par d'autres Francois la ville de saint Denys fut prinse & eschellée.

EN ce mesme temps le Duc de Bourgogne enuoya le seigneur de Sauueses, & Iean de Brimeu à tout cinq cens combattans ou enuiron en la ville de Paris pour conforter & ayder les Parisiens contre les Francois, qui chacun iour couroient deuant ladicte ville à tous lez, & leur faisoient moult d'oppressions, lesquels se logerent dedans saint Denys : & feirent par plusieurs fois des enuahies contre leurs ennemis : neantmoins vn certain iour iceux Francois de plusieurs garnisons du costé vers Mont-lehery, vindrent courre aupres dudit lieu de Paris, & auoient laissé vne grosse embuche en vn village là enuiron. Si estoient alors dedans ladicte ville le seigneur de Sauueses & messire Iean le bastard de saint Pol : lesquels oyans l'effroy monterent à cheual hastiuement à petite compagnie : & sans attendre leurs gens, allerent incontinent aux champs & poursuiurent vigoureusement lesdits Francois : lesquels en fuiant les attrahirent iusques bien pres de leurdicte embusche. Et là tantost non pouans à ce resister, furent en assez brief terme tous deux prins prisonniers, & emmenez des dessusdits Francois en leur forteresse, avec aucuns de leurs gens non point en grand nombre. Si fut ledit bastard de saint Pol tresfort blecé au prendre d'vne lance au col, dont il fut en grand peril de perdre la vie : neantmoins les deux cheualiers dessusdits retournerent en assez briefs iours en ladicte ville de Paris, parmy grand finance qu'ils payerent à ceux, qui prins les auoient, dont les gens furent moult resiouys quand il les veirent. D'autre costé en ce temps les Francois qui estoient sous Allain Geron, Gaucher de Bruissart, & aucuns autres capitaines, vindrent à vn point du iour en la ville saint Denys : dedans laquelle estoit venu nouuellement Iean de Brimeu à tout certain nombre de compagnons, qu'il auoit amenez du païs d'Arthois, & avec luy estoient les gens du seigneur de Sauueses. Si entrerent dedans par eschelles vne partie d'iceux Francois, & ouurirent vne des portes, par où les autres en tresgrand nombre se bouterent dedans : & commencerent en plusieurs lieux à crier ville gaignée, en abbatant huis & fenestres, & enuahisoient plusieurs maisons où estoient leurs ennemis : lesquels oyans ainsi soudainement si grans cris parmy la ville, furent tous effrayez. Si se trahirent tantost en aucuns fors lieux d'icelle : c'est à sçauoir Iean de Brimeu & plusieurs autres avecques luy en l'abbaye : le bastard de Sauueses en la porte de Paris, & les autres se meirent en aucunes portes & tous à sauueté. Et d'autre part en y eut grand partie qui en issant de leurs logis, contendans à aller deuers leurs capitaines eux assembler, furent prins prisonniers, les aucuns occis : entre lesquels furent prins Anthoine de Vvistre, Thierry de Manlinghem & de douze à seize

autres : desquels il y en auoit vne partie de gentils-hommes : & y furent morts Theuenin de Thenequestes , Iean de Haultecloque & aucuns autres en petit nombre. Durant lesquelles besongnes les gens des dessusdits seigneurs & Iean de Brimeu, reprindrent vigueur en eux , & commencerent à eux assembler en d'aucuns lieux au cry : & par l'introduction d'un vaillant homme d'armes nommé Guillaume de Beauual, lequel en grand hardiesse rassemblera aucuns de ceux de leur party, & enuahiront ses ennemis , qui en plusieurs parties sans tenir grand ordonnance entendoient au pillier : finalement ils furent reboutez dehors , & mesmement aucuns de leurs gens iusques au nombre de huit ou dix . Et alors le seigneur de Saueuses qui estoit dedans Paris oyans ces nouvelles , assemble hastiuement ce qu'il peut auoir de gens . Et sans delay cheuaucherent vigoureusement deuers ladicte ville de saint Denys , en intention de bailler secours à ses gens : mais auant qu'il y peust venir , iceux François s'estoient retraits deuers Senlis , & les autres garnisons, & auoient emmené grand nombre de chevaux de ceux de la ville . Item en ce temps furent assiegez des Anglois le seigneur de Rambays dedans la forteresse d'Estrepaigny , appartenant heritablement au Comte de Tanquarville : deuant laquelle iceux Anglois tant continuerent de combattre par leurs engins & autrement, qu'en conclusion ledit seigneur de Rambures non ayant esperance d'auoir secours , fit traicté avecques iceux Anglois en leur rendant ladicte forteresse par condition, que luy & ses gens à tout leurs biens se departirent sauement.

De plusieurs conquestes que firent les Anglois.

Etem en l'an dessusdit le Duc de Bethfort fit assieger par ses Anglois le chastel de Torfy, qui estoit le plus excellent & le mieux edifié de la marche environ . Si fut constitué chief desdits Anglois le bastard de Clarence : lequel fit dresser autour d'icelle forteresse plusieurs engins continuellement iettans , lesquels dommagerent moult fort la muraille. Et finalement au bout de six mois ou environ, les assiegez voyans que point n'estoient secourus, & que leurs viures commençoient à deffailir, traicterent avecques le dessusdit bastard de Clarence par condition, que aucuns des plus notables s'en iroient où bon leur sembleroit en portant partie de leurs biens : & les autres iusques au nombre de douze ou environ, qui autresfois auoient tenu le party d'iceux Anglois, & mesmement aydé aux François à prendre ladicte forteresse demouroient à volenté , lesquels furent cruellement iusticiez . Et apres fut ladicte forteresse du tout demolie & rasée.

Item au mois de Ianuier audit an messire Thomas Kiriel Anglois à tout quatre cens combattans ou environ, dont la plus grand partie estoient Anglois, se departit de Gournay en Normandie, où lors se tenoient en garnison, & par deuers Beauuais s'en alla en Beauuoisis vers la Comté de Clermont : auquel pays il fit de tresgrand dommages en prenant prisonniers, bestes & autres bagages , & par especial chevaux . Si cheuaucha iusques aux faulxbourgs de Clermont : & lendemain print son chemin à retourner vers sa garnison . Et adonques le Comte de Clermont qui estoit à Beauuais, sachant l'entreprise dudit messire Thomas, assemble promptement de toutes les garnisons de la

Marche

Marche enuiron tenant le party du Roy Charles, iusques à huict cens combattans & plus : auecques lesquels se meirent grand nombre des payfans, tant de la ville de Beauuais comme des villages d'entour : & tous ensemble allerent pour rencontrer & combattre ledit messire Thomas & ses gens, lesquels ils trouuerent à vne grand lieuë ou enuiron dudit lieu de Beauuais, où ils s'estoient mis en bataille pour receuoir leurs ennemis, dont ils sçauoient assez la venue par leurs coureurs, qui leur en auoient fait rapport : & estoient les dessusdits Anglois tous à pied, adossez d'un Boys, & par deuant eux auoient fiché des poinçons, parquoy on ne les pouuoit rompre de cheual, sinon en grand danger : neantmoins ils furent par lesdits François tresfort enuahis & approchez, & eut entre icelles parties tresdure & trespaspre escarmouche : & assez brief les François qui estoient à cheual, furent reboutez par le traict des Archiers Anglois, à cause duquel traict lesdits François se commencerent à desroyer, & iceux Anglois ce voyant, faillirent vistemment apres eux, & s'efforcerent de plus en plus les enuahir & combattre, tant qu'en conclusion ils demourerent victorieux sur la place, & occirent vne quantité de leurs ennemis, & en prindrent enuiron vn cent ou plus : c'est à sçauoir des dessusdits payfans. Et ceux de cheual s'en retournerent tous desconfits & ennuyez à Beauuais, & iceluy messire Thomas ayant grand ioye de sa victoire à tout son gaignage, s'en retourna sauement à Gournay en Normandie. En ce temps fut le siege mis par le Comte de Suffort Anglois, deuant le chastel de Dammarle : duquel estoit capitaine le seigneur de Rambures, auecques luy de cent à six vingts combattans. Si fut ledit Chastel de toutes parts enuironné : & tellement furent contrainsts que apres que ledit siege y eust esté vingt & quatre iours, ledit seigneur de Rambures & toutes ses gens se rendirent sauf leurs vies, reserué trente ou enuiron qui furent pendus, pource que autresfois auoient fait serment ausdits Anglois & tenu leur party. Et brief ensuiuant iceluy seigneur de Rambures fut mené prisonnier en Angleterre, où il demoura prisonnier de cinq à six ans, auant qu'il peust trouuer sa deliurance. Si fut ladicte forteresse regarnie de viures & de gens. Et par ainsi iceux Anglois reconquirent en cest an plusieurs fortes places, que les François auoient gaignées sur eux à peu de perte de leurs gens.

Comment le Duc de Bourgogne se remaria la tierce fois à mademoiselle Isabel fille au Roy de Portugal.



LE neufiesme iour de Ianuier de cest an fut tenue la feste de Philippe Duc de Bourgogne, & de Dame Isabel fille au Roy de Portugal en la ville de Bruges, en vne maison faicte toute propice nouuellement pour lesdictes nopces. Si fut icelle feste moult riche & solennelle, & estoient les rues de ladicte ville encourtinées en plusieurs lieux de tapiz, & riches draps de haulte lice : ausquelles nopces furent deux des seurs dudit Duc : c'est à sçauoir Anne Duchesse de Bethfort, & la Duchesse de Cleues, la Comtesse de Namur, la Comtesse de Lorraine & de Conuersan, messire Jean de Luxembourg son frere, & la dame de Beurevoir, & l'Euesque de Liege & moult d'autres grans seigneurs dames & damoiselles. Entre lesquel-

les y furent de grand estat de paremens & d'exquis & diuers vestemens, de gens & de cheuaux chacun iour en diuerses parures: ledit Euesque de Liege, messire Jean bastard de saint Pol, messire Jean d'Hornes & aucuns autres. Et quand ladicte Duchesse (laquelle auoient amenée par mer vn de ses freres, & les ambassadeurs que y auoit enuoyé le Duc de Bourgongne: desquels estoient les principaux le seigneur de Rombais, & maistre Gilles d'Escornay Preuost de Harlebecque) vint aupres de la ville de Bruges, les bourgeois en tresgrand nombre, & en grand estat issirent à l'encontre d'elle. Et auoit avecques eux cent soixante quatre trompettes, lesquelles sonnoient moult melodieusement. Quand est à parler des grans estats, qui y furent faits sans nombre, en diuers mets de boires & de mangiers tresplantureusement par l'espace de huit iours ou enuiron, ils seroient trop long à declairer: & y auoient figures de Licornes & autres bestes sauuaiges, qui par engin iettoient clere eaüe rose, vin & autres liqueurs en l'abandon de ceux qui estoient de ladicte feste. Si n'auoit le dit Duc à nulle de ses autres femmes espouser tenu si riche feste, comme il feit à icelle qui estoit la tierce. Si y furent faictes par plusieurs iours grans ioustes, & plusieurs esbatemens de plusieurs notables cheualiers & escuyers. Et cousta icelle feste audit Duc tresgrand finance.

Comment Estienne de Vignoles dit la Hire, eschella & print la ville de Louuiers en Normandie.

EN ces propres iours Estienne de Vignoles, qu'on appelloit la Hire, print d'emblée par eschelle la ville de Louuiers en Normandie: & auoit avecques luy de cinq à six cens combattans, lesquels trouuerent en icelle ville tresgrand abondance de tous biens, dont ils furent moult enrichis. Et y furent morts à entrer dedans tant d'Anglois comme de ceux de ladicte ville trente. Apres laquelle prinse plusieurs des habitans pour la plus grand partie, feirent serment audit la Hire. Ausquels habitans fut rendu aucune partie de leurs biens avecques leurs maisons, & les autres se departirent eux mettans à sauueté, où ils pouoient le mieux delaissans tous leurs biens. Si commencerent dedans briefs iours la Hire, & ses compagnons à endommager le pays enuiron en plusieurs lieux: & couroient souuent iusques bien pres de Roüen, & en estoit le poure peuple mallement greué & oppressé, dont moult grandement desplaisoit aux Anglois: mais pour le present ne le pouoiēt amender, confiderez leurs autres grans affaires.

Comment en cest an le Duc de Bourgongne meit sus vne ordre, qui fut nommée l'ordre de la toison.

EN cest an le Duc Philippe de Bourgongne meit sus en l'honneur de Dieu & de monseigneur saint Andrieu: duquel en armes il portoit l'enseigne, vne ordre & fraternité de vingt quatre cheualiers sans reproche, gentils-hommes de quatre costez: ausquels il donna à chacun d'eux vn colier d'or moult gentement ouuré de sa deuise, c'est à sçauoir du fuzil: auquel colliers pendoit à chacun sur le deuant, en maniere que portent les grans dames & damoiselles images, fermeilletz & autres ioyaux vne
toison

toison, que iadis conquist anciennement Iason en l'Isle de Colchos, comme on le trouue par escript en l'histoire de Troye de laquelle n'est point trouuée en nulles histoires qu'once nul Prince Chrestien on luy eust reuellée ne mise sus. Si fut la dessusdicte ordre à l'imagination de celle que dit est nommée par ledit Duc, l'ordre de la Toison d'or. Et furent par luy & aucuns de son conseil esleuz & nommez pour porter ladicte ordre vingt quatre cheualiers, desquels les noms s'ensuiuent. Premier y estoit ledit Duc chef & fondateur d'icelle: en apres y estoit Guillaume de Vienne seigneur de saint George, messire Regné Pot seigneur de la Roche, le seigneur de Rembaix, le seigneur de Montagu, messire Rollant de Huquerque, messire Anthoine du Vergy Comte de Dampmartin, messire Daud de Brimeu seigneur de Ligny, messire Hue de Launoy seigneur de Santes, messire Iean seigneur de Communes, messire Anthoine de Thoulongon Mareschal de Bourgongne, messire Pierre de Luxembourg Comte de Conuersan, messire Iean de la Trimouille seigneur de Ionuelles, messire Iean de Luxembourg seigneur de Beaurevoir, messire Gillebert de Launoy seigneur de Villerual, messire Iean de Villiers seigneur de l'Isle-Adam, messire Anthoine seigneur de Croÿ & de Renty, messire Florimont de Brimeu seigneur de Massincourt, messire Robert seigneur de Mamines, messire Jaques de Brimeu seigneur de Grigny, messire Baudouin de Launoy seigneur de Moulambais, messire Pierre de Boufremont seigneur de Chargny, messire Philippe seigneur de Ternant, messire Iean de Crequy, messire Iean de Croÿ seigneur de Tours sur Marne: Lesquels cheualiers (comme dit est) au receuoir ladicte ordre, feirent & deuoient faire leurs successeurs plusieurs solennelles promesses & notables ordonnances pour l'entretienement d'icelles: desquelles cy apres en ce present liure sera faicte mention plus à plain, apres que ladicte ordre sera du tout parfournie en son droit nombre: car depuis que les dessus nommez y furent mis certaine espace de temps apres en eust adiousté aucuns autres. Si doiuent les hoirs d'iceux cheualiers renvoyer apres leur trespas audit Duc de Bourgongne ledit collier, pour le bailler à autre cheualier.

Comment le seigneur de Creuecueur & Robert de Sauueses, furent rencontrez des François en allant à Clermont en Beauuoisis.



V mois de Feurier en l'an dessusdit, le seigneur de Creuecueur capitaine & gouuerneur de Clermont en Beauuoisis, se partit d'Amiens pour aller audit lieu de Clermont accompagné de Robert de Sauueses & huit vingts combattans ou environ, avecques aucuns chars & charrettes menans viures de Karesme & autres leurs besongnes. Lesquels passans empres saint Iust vers saint Remy en l'Aire, furent guettez des François qui bien sçauoient leur venue, & incontinent enuahis: desquels François estoient les capitaines, messire Theolde Valeperge, messire Regnault de Fontaines, messire Loÿs de Vvaucourt & autres qui bien auoient plus grand nombre de gens que leur aduerse partie: neantmoins les dessusdits seigneurs de Creuecueur & de Sauuese se meirent à pied avecques leurs gens, dont la plus grand partie estoient archiers: & se deffendirent bien & roidement par l'espace de quatre heures ou environ: durant lequel temps y eut tant d'une part com-

me d'autre plusieurs hommes & cheuaux blecez : mais en conclusion iceux François se departirent voyant que sans grand perte des leurs, ne leur pourroient riens faire ne conquerre sur leurs ennemis, & retournerent en leurs garnisons : & lesdits seigneurs de Creuecueur & Robert & Saueuse s'en allerent à Clermont, où ils furent iusques à la saison nouuelle, attendans la venue du Duc de Bourgongne.

Comment cinq Francois feirent armes à Arras contre cinq Bourgongnons, & autres menues matieres.

LE xx. iour de Feurier audit an feirent armes dedans la ville d'Arras sur le grand marché en la presence du Duc de Bourgongne, iuge en ceste partie cinq des gens du Roy Charles de France, à l'encontre de cinq des gens du Duc de Bourgongne : lesquelles armes estoient de rompre l'un sur l'autre certain nombre de lances. Et y estoient ceux de la partie du Roy, messire Theolde de Valeperge, Pothon de sainte Treille, messire Philebert d'Abrecy, messire Guillaume de Bes & l'Estandart de Nully. Et de par ledit Duc, messire Simon de Lalaing, le seigneur de Chagny, messire Jean de Vulde, messire Nicolle de Menton & Philebert de Menton. Si furent icelles armes faictes par cinq iour : & estoit préparé vn grand parc couuert de sablon, au millieu duquel auoit vne lice garnie daisselles, afin que les cheuaux ne se peussent rencontrer l'un l'autre. Et coururent pour le premier iour, messire Simon de Lalain & messire Theolde plusieurs beaux coups l'un contre l'autre : mais vers la fin messire Theolde fut porté ius luy & son cheual. Et pareillement pour les autres ensuiuans pour les seconds, tiers, quart & cinquiesmes iours furent faits de beaux coups d'armes & de lances, desquelles de chacune partie en y eut plusieurs rompues. Toutesfois le seigneur de Chagny au treiziesme coup qu'il courut contre ledit messire Philebert, luy leua la visiere de son armet du fer de sa lance, & luy meit tout dedans son visage. Pourquoy sans delay il conuint qu'on le remenast en son hostel, comme en peril de mort. Et au dernier iour & par telle maniere fut ainsi feru l'Estandart de Nully, du dessusdit Philebert de Menton. Si fut comme l'autre remené en son hostel, & fut si griefuement blecé qu'à tresgrand peine se pouoit tenir sur son cheual : jaçoit ce que par auant qu'il eust ce coup, il s'estoit porté ce iour moult deuement, en rompant sur son aduersaire aucunes lances : desquelles lances seruit iceux François vn viste & appert homme d'armes nommé Alardin de Moufay, & les autres du costé du Duc de Bourgongne & la plus grand partie furent seruis de messire Jean de Luxembourg. Si venoit chacun iour ledit Duc à son eschauffault moult grandement accompagné de sa cheualerie & en noble appareil. Apres lesquels iours iceux passez, les dessusdits François qui auoient esté moult honnorez par ledit Duc & de luy receuz aucuns dons, se departirent de ladicte ville d'Arras tristes & ennuyez des dures aduentures qui estoient tournées contre leurs gens. Et laisserent les deux blecez dessusdits dedans Arras, pour eux faire medeciner par l'alliance dudit Duc de Bourgongne lesquels finablement tournerent à guarison. Et les deuantdits François s'en retournerent à Compiengne. En ce temps les François tenans les frontieres

res de la riuere d'Oize & du paÿs de Beauuoÿsis, couroient chacun iour sur ceux tenant le party du Duc de Bourgongne : & pareillement ceux de la partie du Duc de Bourgongne couroient sur les mettes d'iceux François, non obstant les trefues par auant seellées entre icelles parties iusques aux Pasques ensuiuans : à l'occasion desquelles courses, tous les villaiges ou la plus grand partie d'iceux paÿs se commencerent à depeupler. En apres le Duc Philippe de Bourgongne conuocqua de plusieurs ses paÿs tresgrand multitude de gens d'armes, lesquels estoient & assembla vers Peronne, & luy mesme & sa femme la Duchesse solenniserent la feste de Pasques dedans ladicte ville de Peronne. Apres laquelle passée, il se tira à tout ses gens d'armes à Montdidier, où il fut aucuns iours. Durant ces tribulations se rendirent en l'obeissance du Roy Charles la ville & chasteau de Melun : laquelle parauant auoit esté baillée en garde au seigneur de Humieres, qui pour l'entretienement d'icelle y auoit constitué aucuns de ses freres à certain nombre de gens d'armes, lesquels par les habitans de ladicte ville en furent deboutez & mis dehors : dont le Roy Charles & ceux de son party furent moult ioyeux, pourtant que par le moyen d'icelle ils pouuoient par là passer à leur plaisir, par la riuere de Seine. Et auecques ce estoit située & assise au plus fort lieu de tout le paÿs enuiron.

De l'an mille cccc. xxx.

Comment le Duc de Bourgongne à tout sa puissance alla loger deuant Gournay sur Aronde.

AV commencement de cest an, le Duc de Bourgongne luy partant de Montdidier, s'en alla loger à Gournay sur Aronde : & deuant la forteresse d'icelle appartenât à Charles de Bourbon Comte de Clermont son beau frere. Auquel lieu il feit sommer Tristan de Magueliers, qui en estoit capitaine qu'il luy rendit ladicte forteresse, ou sinon il le feroit assaillir : lequel Tristan voyant que bonnement ne pourroit resister contre la grand puissance d'iceluy Duc de Bourgongne, feit traicté auecques ses commis par condition, qu'il luy rendroit ladicte forteresse le premier iour d'Aoust prochainement venant, si audit iour il n'estoit combattu du Roy Charles ou ceux de son party, & auecques ce promet que durant le temps dessusdit, que luy & les siens ne feroient quelque guerre à ceux tenans le party dudit Duc, & par ainsi il demoura paisible iusques audit iour. Si fut telle composition faicte ainsi hastiuement, pource que audit Duc de Bourgongne, & à messire Iean de Luxembourg vindrēt certaines nouuelles que le Damoiseau de Cōmercy, Yuon du Puys & autres capitaines à tout grand nombre de combattans, auoient assiegé la forteresse de Montagu, laquelle chose estoit veritable. Car le dessusdit de Commercy à qui icelle forteresse de Montagu appartenoit, y auoit secretement amené grand nombre de combattans à tout bombardes, vuglaïres & autres habillemens de guerre, tendant icelle par soubdain assault ou autrement par force reduire en son obeissance : neantmoins elle fut vigoureusement deffendue par ceux que messire Iean de Luxembourg y auoit commis, au gouuernement duquel elle estoit. Entre lesquels y estoient commis de par luy à la garde d'icelle

comme principaux capitaines deux hōmes d'armes, dont l'un estoit d'Angleterre & vn autre nōmé George de la Croix. Si furent par plusieurs fois sommez & requis de rendre la forteresse, dont point n'eurent volenté de ce faire: car ils n'estoient en nulle doubte que dedans briefs iours ne fussent secouruz. Finablement lesdits assiegeans doubtans la venue dudit Duc de Bourgongne, dont ils estoient ja aduertis, & qu'ils seroient cōbattus, se departirēt dudit lieu de Montagu comme espouentéz, en delaisant bombardes, canons & autres habillemens de guerre. Et se departirent à minuiēt ou enuiron, & se retrahirēt en leurs garnisons: laquelle departie ainsi faicte, les dessusdits assiegez feirent asçauoir hastiuement au dessusdit Duc de Bourgongne & à messire Jean de Luxēbourg, qui en grand diligence se preparerent pour aller combattre les assiegeans dessusdits. Apres lequel departement venu à leur cognoissance, ledit Duc de Bourgongne s'en alla à Noyon à tout son exercite. En ces propres iours messire Jean de Luxembourg alla courre deuers Beauuais sur les marches de ses aduersaires & ennemis: à l'instance & duquel departement fut franc messire Loys de Vvau-court & ses gens, qui par longue espace auoient esté durant l'hiuer & bouterent le feu en vn bel chasteau qu'auoient reparé: si se retrahirent à ladicte ville de Beauuais, & ledit messire Jean de Luxembourg se logea deuant le chastel de Prouueulieu, qu'aucuns Anglois auoient reedifié. Et par leurs courses trauaillerent moult souuent la ville de Montdidier & autres marches à l'enuiron, appartenant au Duc de Bourgongne. Si furent en brief contraints d'eux rendre à la volenté du dessusdit messire Jean de Luxembourg, desquels en fait grād partie executer, & les autres furēt mis en diuers lieux prisonniers: & de là il s'en retourna à Noyon deuers le Duc de Bourgongne.

Comment le Duc de Bourgongne alla mettre le siege deuant le chastel & forteresse de Choisy, lequel il conquist en briefs iours.



Après que le Duc de Bourgongne eut seiourné en ladicte ville & cité de Noyon huit iours ou enuiron, il s'en alla mettre le siege deuant le chastel de Choisy sur Oise: dedans laquelle forteresse estoit Loys de Flauy, qui la tenoit par messire Guillaume de Flauy. Et y fait ledit Duc dresser plusieurs de ses engins pour iceluy chastel confondre & abbatre. Si fut moult trauaillée par lesdits engins, tant qu'en conclusion lesdits assiegez feirent traicté avec les commis du dessusdit Duc de Bourgongne tel, qu'ils departirent sauf leurs corps & leurs biens en rendant ladicte forteresse: laquelle sans delay, apres qu'ils en furent partis, fut tantost demolie & rasée. Si fait iceluy Duc faire vn pont par dessus l'eaüe d'Oise, pour luy & ses gens passer vers Compiengne au lez deuers Montdidier: durant lequel temps auoient esté commis le seigneur de Saueuses & Jean Brimeu, à garder les faulxbourgs de Noyon à tout leurs gens avec le seigneur de Mongonniry & autres capitaines Anglois, qui estoient logez au pont l'Euesque, affin que ceux de Compiengne n'empechassent les viures qui alloient à l'ost dudit Duc. Si aduint vn certain iour que les dessusdits de Compiengne: c'est à sçauoir Ieanne la Pucelle, messire Jaques de Chabannes, messire Theolde de Valeperge, messire Regnault de Fontaines, Pothon de sainte Treille & aucuns autres capitaines François accompagnez de deux

de deux mille combattans ou environ, vindrent audit lieu de Pont l'Euesque entre le point du iour & le soleil levant, où estoient logez les dessusdits Anglois: lesquels ils enuahirent de grand courage. Et y eut tresdure & aspre escarmouche, à laquelle vindrent hastiement au secours d'iceux Anglois les dessusdits seigneurs de Saueuses, Jean de Brimeu & tous leurs gens: duquel secours les dessusdits Anglois prindrent en eux grand courage tous ensemble. Si rebouterent par force leurs ennemis, qui desia estoient bien auant entrez audit logis. Finablement d'iceux Anglois furent que morts que naurez environ trénte, & pareillement des François: lesquels apres ceste besongne se retrahirent à Compiengne, dont ils estoient venus. Et les Anglois dessusdits depuis ce iour en auant, fortifierent en grād diligence leurs logis tout à l'environ. Et aucuns briebs iours ensuiuans, Jean de Brimeu allant à tout cent combattans ou environ deuers le Duc de Bourgongne, en passant parmy le bois au lez vers Crespy en Valois, fut soubdainement enuahy d'aucuns François qui à ceste cause estoient venus deuers Athery en celle marche, pour trouuer aduenture: & en brief sans grand deffence fut prins & emmené prisonnier. Si fut la cause de ladicte prinse, pource que luy & ses gens cheuauchant en train, ne se peurent assembler tant qu'ils ouyrent l'effroy: de laquelle prinse ledit Jean de Brimeu fut depuis mis és mains de Pothon de sainte Treille, lequel en fin le deliura en payant grand finance. Ité apres que le Duc de Bourgogne eut fait du tout demolir ladicte forteresse de Choisy (comme dit est) s'en alla logger en la forteresse de Condin à vne lieue de Compiengne, & messire Jean de Luxembourg se logea à Claroy. Si fut ordonné messire Baudouin de Noielle à tout certain nombre de gēs à logger à Margigny sur la chauce, & le seigneur de Mongonniry Anglois & ses gens estoient logez à Venete au long de la prée. Si venoient lors audit Duc gens de plusieurs partie de ses païs, & auoit intention d'assieger ladicte ville de Compiengne & icelle reduire en l'obeissance du Roy Henry d'Angleterre.

Comment Ieanne la Pucelle rua ius Franquet d'Arras & luy feit trancher la teste.

AL'entrée du mois de May fut rué ius & prins vn vaillāt homme d'armes nommé Franquet d'Arras, tenant le party du Duc de Bourgogne: lequel estoit allé courre sur les marches de ses ennemis vers Laigny sur Marne, à tout trois cens combattans ou environ: mais à son retour fut rencontré de Ieanne la Pucelle qui avec elle auoit quatre cens François. Si assaillit moult courageusement & vigoureusement ledit Franquet, & ses gens par plusieurs fois: car par le moyen de ses archiers, c'est à sçauoir dudit Franquet qu'il auoit: lesquels par tresbonne ordonnance s'estoient mis à pied, se deffendirent si vaillamment que pour le premier & second assault icelle Pucelle & ses gens ne gagnerent riens sur eux, mais en conclusion elle manda toutes les garnisons de Laigny & autres forteresses de l'obeissance du Roy Charles, lesquels y vindrent en grand nombre à tout couleurines, arbalestres & autres habillemens de guerre. Et finablement les dessusdits tenās le party de Bourgongne apres qu'ils eurent moult adommagé leurs ennemis de gens de cheual ils furent tous vaincus. Et desconfits & la plus grand partie mis à l'espée, & mesmement ladicte Pucelle feit trancher la teste à iceluy Franquet, qui grande-

ment fut plaint de ceux de son party, pourtant qu'en arme il estoit homme de vaillant econduiete.

Comment René Duc de Bar meit le siege deuant Chappes empres Troyes en Champagne.

EN ce mesme temps le Duc de Bar nommé René de Cecile conuoqua de ses Duchez de Bar & de Lorraine, & des marches d'Allemagne & à l'environ tresgrand nombre de gens d'armes: avec lesquels aussi se meit ce prudent & vaillant cheualier le seigneur de Barbarin, lequel (comme dit est dessus) a esté tres long temps prisonnier aux Anglois. Et pouoit auoir iceluy Duc de deux à trois mille combattans, à tout lesquels il alla assieger Chappes à trois lieües de Troyes, dedans laquelle estoient le seigneur d'Aumone & son frere, & avec eux plusieurs gens de guerre qui tres vaillamment se meirent en deffence. Et avec ce enuoyerent deuers le seigneurs de Bourgongne eux prier, qu'ils les voulsissent secourir à ce besoing: lesquels seigneurs, c'est à sçauoir messire Anthoine de Toulongon Mareschal de Bourgongne, le Comte de Ioingny, messire Anthoine & messire Iean de Vergy, le seigneur de Ionuelle, le seigneur de Chastelluz, le Beau de Bar, & generallemēt la greigneur partie de la gentillesse de Bourgongne, iusques au nombre de quatre mille cōbattans: s'assemblerent & vindrent assez pres du logis du Duc de Bar pour le combattre. Lequel Duc sachant leur venue se meit en bōne ordōnance de bataille: mais en brief iceux Bourgongnons se meirent en desfroy, & retournerent en leur paÿs. Si fut enuiron que morts que prins bien soixante: entre lesquels le seigneur de Planfi, Charles de Rochefort & pareillement le seigneur d'Aumone en saillāt hors de sa place pour ayder à combattre ses ennemis, avecques aucuns de ses gens fut prins prisonnier. Si conuint qu'il liurast sa forteresse au Duc de Bar, laquelle fut du tout demolie, & son frere fut prins comme luy.

Comment Ieanne la Pucelle fut prinse des Bourgongnons deuant Compiengne.

ETem durant le temps que ledit Duc de Bourgongne estoit logé à Condin, comme dit est, & ses gens d'armes és autres villages aupres de Condin & de Compiengne: aduint la nuit de l'Ascension à cinq heures apres midy, que Ieanne la Pucelle, Pothon & avecques plusieurs autres nobles & vaillans capitaines François, avec eux de cinq à six cens combattans, saillirent hors tous armez de pied & de cheual de ladicte ville de Compiengne par la porte du pont vers Montdidier, & auoient intention de combattre & ruer ius le logis de messire Baudo de Noielle, qui estoit à Marigny au bout de la chaussée, comme dit est, en autre lieu. Si estoit à ceste heure messire Iean de Luxembourg, avec luy le seigneur de Cresquy & huit ou dix gentils-hommes, tous venus à cheual, non ayans, sinon assez petit, de son logis deuers le logis messire Baudo, & regardoit par quelle maniere on pourroit assieger icelle ville de Compiengne. Et adōc iceux François, comme dit est, commencerent tresfort à approcher iceluy logis de Marigny, auquel estoient ou la plus grand partie tous desarmez. Toutesfois en assez brief terme s'assemblerent &

& commença l'escarmouche tresgrande, durât laquelle fut crié à l'arme en plusieurs lieux, tant de la partie de Bourgongne comme des Anglois, & se meirēt en bataille les dessusdits Anglois contre les François sur la prée au dehors de Venete, où ils estoient logez, & estoient environ cinq cens combattās. Et d'autre costé les gens de messire Jean de Luxembourg, qui estoient logez à Claroy, sachans cest effroy vindrent les aucuns hastiement pour secourir leur seigneur & capitaine, qui entretenoit ladicte escarmouche: & auquel pour la plus grand partie les autres se r'allierent: en laquelle fut tresdurement nauré au visage ledit seigneur de Cresquy. Finablement apres ce que ladicte escarmouche eut duré assez longue espace, iceux François voyans leur ennemis multiplier en grand nombre, se retrahirent deuers leur ville tousiours la Pucelle Ieanne avec eux sus le derriere, faisant grand maniere d'entretenir ses gens & les ramener sans perte: mais ceux de la partie de Bourgongne considerant que de toutes parts auroient brief secours, les approcherent vigoureuſemēt, & se ferirent en eux de plain eslaiz. Si fut en conclusion, comme ie fuz informé, la dessusdicte Pucelle tirée ius de son cheual par vn archier: apres duquel estoit le Bastard de Vendōne, à qui elle se rēdit & donna sa foy: & il sans delay l'emmena prisonniere à Marigny, où elle fut mise en bonne garde: Avec laquelle fut prins Pothon le Bourguignon, & aucuns autres non mie en grand nombre. Et les dessusdits François rentrent en Compiengne dolens & courroucez de leur perte: Et par especial eurent moult grand desplaisance pour la prinſe d'icelle Pucelle, & à l'opposite ceux de la partie de Bourgongne, & les Anglois en furent moult ioyeux, plus que d'auoir cinq cens combattans: car ils ne craignoient ne redoubtoient nul capitaine ne autre chief de guerre tant, cōme ils auoiēt tousiours fait iusques à ce present iour icelle pucelle. Si vint assez tost apres le Duc de Bourgongne à toute sa puissance de son logis de Condin, où il estoit logé en la prée deuāt Compiengne. Et là s'assemblerent les Anglois, ledit Duc & ceux des autres logis en tresgrād nōbre, faisant l'vn avec l'autre grans cris & resbaudissemens pour la prinſe de ladicte Pucelle: laquelle iceluy Duc alla veoir au logis où elle estoit & parla à elle aucunes parolles dont ie ne suis mie bien recors, iacoit-ce que ie y estoie present: apres lesquelles se trahit ledit Duc & toutes gens chacū en leurs logis pour ceste nuit: & la Pucelle demoura en la garde & gouuernement de messire Jean de Luxembourg. Lequel apres dedans briefs iours ensuiuans l'enuoya sous bō conduict au chasteau de Beau-Lieu, & de là à Beurevoir: où elle fut par long temps prisonniere, comme cy apres sera declairé plus à plain.

Comment le ieune Roy Henry d'Angleterre vint en France & descendit à Calais.

EN cest an le ieune Roy Henry aagé de huiēt ans vint d'Angleterre à Calais, & descendit de sa nef environ dix heures au matin le iour de monseigneur S. George. Si fut monté sur vn cheual, & alla ouyr messe en l'Eglise saint Nicolas. Si estoiet avec luy Cardinal de Vinchestre, le Duc d'Iorth, le Comte de Hotidon, le Comte de Vvaruich, le Comte de Stanfort, le Comte d'Arondel, le Comte de Suffort, le Comte de Bonne-terre, le Comte de Hem, les seigneurs de Roye, de Beaumont, d'Escaillon, de Grez & plusieurs autres. Si y estoit maistre Pierre Cauchon Euesque de Beauuais, qui

auoit esté enuoyé pour le querir, & depuis vindrent les gens. Si fut mené à tout sa puissance en la ville de Roüen où il fut long temps.

Comment apres la prinse de la Pucelle, le Duc de Bourgongne & ses gens se logerent deuant la ville de Compiengne.

LE lendemain du iour de l'Ascension le Duc de Bourgongne s'en alla loger de Condin à Venete dedans l'Abbaye, & ses gens se logerent en la ville d'autre part, & messire Iean de Luxembourg se logea à Marigny. Si fut assez brief ensuiuant commencé vne bastille de terre à vn traict d'arc ou enuiron pres du bouleuert de la ville: & depuis furent faits aucuns taudiz de chesnes plains de terre & autre bois fiché en terre au plus pres du dessusdit bouleuert. Ausquels taudiz se faisoit guet nuit & iour continuellement de certain nombre de gens d'armes: avec lesquels furent faits depuis ladicte bastille iusques aux dessusdits taudiz grans fossez, par où les gens de guerre alloient seurement à leurdit guet, pour la doubte des engins de ladicte ville, dont on estoit seruy treslargement. Si feit iceluy Duc asseoir aucuns grans engins deuant la porte: laquelle par la continuation des grosses pierres qu'ils y iettoient, derompirent & crauanterent en plusieurs lieux les portes, ponts, moulins & bouleuers de ladicte ville. En fin y eut aucune partie des moulins mis en tel point, que plus ne peurent mouldre, laquelle chose despleut grâdement aux habitans d'icelle. Et avec ce entre les autres maux que feirent les dessusdits engins, occirent vn gentil-homme roide & habille, aagé de xxij. ans ou enuiron nommé Loÿs de Flauy, lequel estoit frere de Guillaume de Flauy general capitaine d'icelle ville de Compiengne, & de tous ceux là estans, pour la mort duquel ledit Guillaume fut troublé & ennuyeux: mais nonobstant il n'en monstra nul semblant, ains pour resbaudir ses gens, brief ensuiuant feit deuant luy sonner ses menestriers ainsi qu'il auoit accoustumé de faire: & avec ce fait diligement garder le bouleuert dessusdit, nonobstant q par lesdits engins il fut moult empiré & trauaillé. Et auoit fait faire au fons des fossez d'iceluy bouleuert de petites maisonnettes de bois, où les gens se tenoient pour faire leur guet, moult subtillement faictes & composées. Si furent par l'introduction de messire Iean de Luxembourg commencées aucunes mines: lesquelles furent cachées bien auant & profond & à grâd coust sans porter effect, ne valeur: duquel temps aussi en faisant lesdictes mines & approches, en y eut plusieurs des assiegeans qui y furent morts, & beaucoup de naurez. Desquels morts furent les principaux: c'est à sçauoir, messire Iean de Belles chevalier, Alain d'Escassines, Thibault de Caitigines, & plusieurs autres, tant de la partie de Bourgongne comme des Anglois.

Comment les Liegeois se meirent sus à grand puissance de communes & vindrent en la Comté de Namur.

EN ce temps les Liegeois tant par l'introduction d'aucuns haussaires, tenants le party du Roy Charles: c'est à sçauoir Iean de Beaurain, Iean de Saumain, Euerard de la Marche & aucuns autres, comme par la haine & malueillance que long temps ils auoient eüe au Duc de Bourgongne, pour les discords

discords que ses predecesseurs & luy auoient eu parauant: dont plus à plain est faicte mention en ce present liure, se disposerent & conclurent de venir à grand puissance sur le paÿs dudit Duc, & par especial en sa Comté de Namur tout destruire: nonobstant que de ce faire les desenhorta par plusieurs fois Iean de Hemberche leur Euesque, en leur remonstrant par plusieurs raisons les grans maulx & inconueniens qui pouoient venir au paÿs de Liege, s'ils mettoient leur entreprise à execution. Lesquelles remonstrances iceux Liegeois prenoient tresmal en gré, & ne vouloient nullement attarger de mener à fin ladicte entreprise. Et pourtant ledit Euesque considerant, que bonnement il ne se pouoit esconduire n'excuser, qu'il ne fait assistance & ayde à ceux de son paÿs, qu'il ne se meit en peril d'estre enchassé de sa seigneurie, print conclusion avec aucuns de son conseil, que pour son honneur garder auant qu'il ne fait guerre ouuerte au Duc de Bourgongne ne à ses paÿs, il luy enuoyeroit premier ses lettres de deffiance, desquelles la coppie s'ensuit.

TRESHAUT, tresnoble & trespuissant Prince Philippe Duc de Bourgongne, Comte de Flandres, d'Arthois & de Bourgongne, Palatin de Namur, &c. Iacoit-ce que Iean de Hemberche Euesque de Liege & Comte de Loz, sur par vertu de certain sur estat par vous & moy pour vous, & les nostres pieça donné l'un à l'autre dont lettres apparent, vous aye plusieurs fois par lettres de bouche, ou autrement, fait supplication, priere & requeste, & sommation d'auoir restitution & reparation selon le contenu dudit sur estat, qui a esté assez petitement tenu de plusieurs grans & horribles dommages commis & perpetrez de voz gens & capitaines & seruiteurs, sur mes paÿs & subiects: ainsi que vostre tresnoble & pourueüe discretion peut bien auoir memoire que mes complaints & requestes le contenoient plus plainement. Neantmoins tresnoble, treshaut & trespuissant Prince iusques à ores, obstant voz gracieuses responce sur ce contenans, que vostre intention & plaisir dudit sur estat estre entretenu & qui encores n'ont sorty nul effect, se sont si auant entremeslées icelles choses d'un costé & d'autre, que griefue chose m'est à porter, dont il me desplaist tant que plus ne peut. Et toutesfois tresnoble & trespuissant Prince vostre tresnoble & pourueüe discretion peut assez sentir & cognoistre, que par raison & serment suis tenu de demourer lez mon Eglise & paÿs, que sans les eslongner cōsiderées les choses ainsi aduenues, les me conuient assister & deffendre en tous droits & contre tous de toute ma force & puissance. Pourquoy treshaut, tresnoble & puissant Prince moy premierement excusant à vostre tresexcellente personne & haute domination, de rechef vous aduertis d'icelles choses en signifiant, que si plus auant aduenoit, ou estoit par moy & les miens fait par necessité ou autrement, qui de tant vouldroye auoir mon honneur pour bien gardé. Donné sous mon seel pendu à ces lettres le dixiesme iour de Iuillet, l'an mille cccc. & trente. Ainsi signé du commandement monseigneur propre I. Berrard. Et pareillement le deffendirēt plusieurs autres seigneurs allies d'iceluy Euesque, c'est à sçauoir le Comte de Beaurienne, Picard de la Grace seigneur de Quinquempoit, Rasse de Rabel, Gerard d'Edeuant, Iean de Valle, Henry le Gayel, Iean de Boilleur, Iean de la Barre, Iean de Gemblais, Corbeau de Belle Goulle, Thierry Ponthey & plusieurs autres.

Comment le Duc de Bourgongne enuoya le seigneur de Croÿ en la Comté de Namur contre les Liegeois .

E Tem apres ce qu'il fut venu à la cognoissance du Duc de Bourgongne, que l'Euesque du Liege & ses Liegeois se preparoient pour entrer en sa Comté de Namur: si conclud auecques ceux de son conseil d'y enuoyer le seigneur de Croÿ à tout six cens combattans, pour garder & deffendre ladicte ville de Namur & forteresse dudit paÿs. Lequel seigneur de Croÿ apres ladicte conclusion se departit de deuant Compiengne, & auoit auecques luy huiet cens combattans qu'il auoit en sa charge, & s'en vint à Namur, où les Liegeois auoient ja commencée la guerre & prins Beau-fort, & bouté le feu: & ledit Croÿ venu audit lieu de Namur, fut dix iours sans faire guerre & depuis print Fosse d'assault: laquelle fut arse reserué le Monstier. Et le lendemain furent mis à fin & morts à Florine bien quarante ou quatre vingts Liegeois, & y eut prins quarante prisonniers: auecques lequel seigneur de Croÿ estoit son frere messire Iean de Croÿ. Si y estoient les seigneurs de Mainfnée, de Rembure, de Fauquemberge & de d'Iuselle, le Galois de Reuly, le seigneur de Frammesant, Robert de Neufuille & plusieurs autres nobles. Ledit seigneur de Rembure fut enuoyé à Polnache, où il fut à vne saillie nauré à mort & prins prisonnier. Et depuis y fut mis le seigneur de Senlis, lequel rendit la place aux Liegeois: & puis y bouterent le feu & l'ardirent, lesquels Liegeois auecques leur Euesque estoient bien cinquante mille hommes. Et depuis qu'ils eurent prins Polnache, meirent le siege deuant Bouuines, & si prindrent Golefme & l'ardirent: durant lequel temps les gens dudit seigneur de Croÿ feirēt plusieurs enuahies sur eux, ausquelles par plusieurs fois en prindrent & occirent sept ou huiet cens.

Comment le Comte de Hontidon vint deuant Compiengne en l'ayde du Duc de Bourgongne .

E N ces iours vint en l'ayde du Duc de Bourgongne le Côte de Hontidon, de Roberfac Anglois à tout mille archiers d'Angleterre ou enuiron: lesquels se logerent en la ville de Venete, où par auāt estoit logé le Duc de Bourgongne, lequel de sa personne s'en alla loger en la Bastille deuant-dicte, entre Marigny & Compiengne. Et ses gens se logerent audit lieu de Marigny, dōt s'estoit deslogé le capitaine, messire Iean de Luxembourg & ses gens: & s'en estoit allé en la ville de Soissons, laquelle par certains moyens qu'il auoit dedans, luy fut rendue auec aucunes autres places ou paÿs à l'environ. Si se departirent de deuant ladicte ville de Compiengne le seigneur de Mongoumery & ses Anglois, & s'en retournerent en Normãdie apres la venue dudit Comte de Hontidon. Et apres iceluy Duc de Bourgongne feit faire iour & nuict grand diligence, d'abbatre & demollir par ses engins le bouleuert de deuant le pont de la ville: lequel comme en autre lieu est declairé, greuoit moult ses gens: neantmoins il dura bien l'espace de deux mois enuiron: & par soudain assault qui y fut fait par nuict de la partie dudit Duc, fut prins de huiet à dix hōmes dedans, auec aucuns habillemens de guerre là estans, qui se deffendirent

dirent assez petit. Apres laquelle prinse furent les fossez remplis & fut iceluy bouleuert fortifié contre ceux de la ville, & gardé songneusement chacun iour à force de gens d'armes: à laquelle prinse furent aussi noyez aucuns de dedans, par ce qu'en eux retrayant en haste, ils cheurēt en la riuere d'Oise. Et d'autre part le dessusdit Duc de Bourgongne fait faire vn pont par dessus l'eau, à l'encontre de Venete, lequel estoit gardé nuit & iour. Et passoient les Anglois & Bourgongnons tressouuent de pied & de cheual, pour aller escarmoucher les François au lieu vers Pierrefons. Si passa vn certain iour le dessusdit Comte Hontidon à tout ses Anglois, & s'en alla courre deuers Crespy en Valois, & delà vint à Sainctines qui se rendit à son obeissance. Et apres il l'en alla loger à Verbrie, où il fait tresfort assaillir l'Eglise de la ville que tenoient les païsans: lesquels en conclusion furent contraints d'eux rendre en sa volenté & eux mettre du tout en sa mercy. Et fait pendre vn homme nommé Iean de d'Ours, qui estoit comme leur capitaine, pource qu'à sa premiere requeste n'auoit voulu obeir. Si furent tous lesdits païsans prins & rançonnez, & tous leurs biens ravis. Et apres s'en retourna ledit Comte à tout aucunes proyes en son logis deuant Compiengne: durant lequel temps se tenoient à Cleremont en Beauuoisis le seigneur de Creuecueur, & Robert de Saueuses à tout leurs gens, pour garder la frontiere contre les François qui se tenoient à Creil & à Beauuais, & avecques ce pour faire acconduire en l'ost des vins & tous viures necessaires. Si se tenoient adonc la Duchesse de Bourgongne à Noyon à tout son estat: laquelle de fois à autre alloit visiter le dessusdit Duc de Bourgogne son seigneur. Esquels iours aussi alla ledit Duc de Bourgongne à toute sa puissance tenir la journée deuant Gournay sur Aronde: laquelle on luy auoit promis de rendre & remettre en son obeissance: & fut avecques luy & pour luy assister & faire compagnie le Duc de Nortfk Anglois à tout mille combattans ou environ, & le Comte de Hontidon. A laquelle journée ne vint homme de par le Roy Charles: & pourtant Tristan de Maiguelers voyant que point ne seroit secouru, rendit la forteresse en la main dudit Duc de Bourgongne, lequel la bailla en garde au seigneur de Creuecueur. Et apres s'en retourna avecques luy le Comte de Hontidon à son siege de Compiengne. Auquel lieu à son departement il auoit laissé certain nombre de gēs d'armes, pour garder son logis. Et le dessusdit Duc de Nortfk s'en alla deuers Paris.

Comment vn homme nommé Toumelaire & ceux de Reims meirent le siege deuant Champigneux.

EN ces iours vn Saquement nommé Toumelaire, qui estoit Preuost de Laon de par le Roy Charles, conduisit de cinq à six cens communes de la ville de Reims & des marches à l'environ, & les mena assieger la forteresse de Champigneux: dedans laquelle estoient aucuns Anglois & Bourgongnons, qui moult oppressoient le païs de Champagne. Si commencerent iceux assiegeans à approcher la forteresse de toutes parts, esperant iceux subiuguer & mettre en leur obeissance, ce que point n'aduint: car dedans briebs iours ensuiuans Guillaume Corain Anglois & Georges de Croix, qui se tenoient à Montagu assemblerent ce qu'ils peurent auoir de gens, & sans

faire long delay allerent combattre les dessusdictes communes : lesquelles sans faire bien grand deffence, furent tantost vaincues & la plus grand partie furent morts & prins . Toutesfois ledit Toumelaire avecques aucuns autres se sauua, si en demoura sur la place de six à sept vingts morts parmy vne partie qui furent ars en vne maison, où ils s'estoient retraits : & delaisserent plusieurs canons , arbalestres & aucuns autres habillemens de guerre qu'ils y auoient apportez : apres laquelle besongne, & qu'ils eurent la forteresse reformée, les dessusdits Guillaume Corain & George de Croix s'en retournerent à Montagu tresioyeux de leur victoire .

Comment le Duc Philippe de Brabant trespassa : & comment le Duc de Bourgogne print la possession de ladicte Duché.

EN ce temps mourut en la ville de Louvain le Duc Philippe de Brabant, qui par long temps deuant à mort auoit esté moult greué de maladie langoureuse. Si furent aucuns de ses priuez seruiteurs soupçonnez d'estre coupables de sa mort : & mesmement en y eut aucuns prins & tresdurement questionnez par diuerses manieres de iehainnes, neantmoins la besongne ne vint plus auant à clarté. Et fut dit par aucuns maistres en medecine, dont il fut visité, qu'il estoit mort de sa mort naturelle par les exces qu'il auoit faits en sa ieunesse tant en ioustes comme en autres choses, si fut enterré avec ses predecesseurs. Et fut la mort dudit Duc tantost mandée au Duc de Bourgogne, qui estoit à son siege deuant Compiengne : pource que la plus grand partie de la Duché de Brabant & des appartenans, & par especial les nobles en disoient iceluy Duc de Bourgogne estre vray heritier, pourtant que le deuantdit Duc de Brabant n'auoit nul enfant, car il n'auoit point esté marié. Et les autres disoient que la Comtesse de Hainault douïagiere & tante d'iceux deux Ducs estoit plus prochaine, & qu'à elle appartenoit ladicte succession . Toutesfois iceluy Duc de Bourgogne sçachant la mort dessusdicté, constitua à son siege de Compiengne aucuns de ses plus feables capitaines & cheualiers : c'est à sçauoir messire Jaques de Brimeu Mareschal de son ost, messire Hue de Launoy, le seigneur de Saucuses & aucuns autres pour d'iceluy auoir le gouuernement, & l'entretenir avec le Côte de Hontidon & ses Anglois. Et avec ce remanda hastiuement & sans aucun delay messire Ieā de Luxebourg, qui estoit au pays de Soissonnois en luy requerant instamment par ses lettres & messages, que sans delay à tout ses gens soubdain il retournaist deuant Compiengne pour du tout auoir la charge de son ost, en luy signifiant les affaires qui luy estoient suruenuz. Et comment il estoit de necessité qu'il s'en allast audit pays de Brabant. Apres lesquelles besongnes ainsi faictes, & que le Duc de Bourgogne eut mis prouision, comme dit est, en son ost par la maniere cy deuant declairée, & aussi qu'il eut deuant la porte du pont fait fortifier & garnir de gens d'armes & habillemens de guerre vne grande & forte bastille, de laquelle fut capitaine messire Baude de Noyelle, prenant premier congé au Comte de Hontidon, il se departit & alla à Noyon : & de là par aucuns iours s'en alla à l'Isle, où il eut conseil avecques ses principaux conseilliers : avec lesquels il s'accorda d'aller audit pays de Brabant prendre la possession & saisine d'iceluy & de toutes les appartenances. Au partement duquel

quel ſ'en retourna la Duchefſe ſa femme au paÿs d'Arthois . Et brief enſuiuant fut ledit Duc receu cōme ſeigneur & Duc de toutes les villes & appartenāces de la Duché & autres paÿs, que n'aguères tenoit le deſſusdit Duc de Brabāt deſfunct. Toutesfois la deſſusdicte Comteſſe de Hainault doüagiere ſa tante y entendoit auoir aucun droit, comme dit eſt , par deſſus : nonobſtant ce elle conſiderant la grand puiffance de ſon beau nepueu, contre lequel ne pouoit reſiſter : voyant auſſi la plus grand partie des nobles & bonnes villes eſtre deſia contre elle, ſe deporta de plus auant en faire pourſuite. Et pourtāt iceluy Duc de Bourgongne en fut par tous les paÿs plus liberallement obeÿ . En ce meſmes temps la damoiſelle de Luxembourg ſœur au Côte Vvaleran moult ancienne: laquelle eſtoit au chaſteau de Beurevoir au gouuernement de meſſire Iean de Luxembourg ſon nepueu, apprehenda & feit releuer pour luy & en ſon nom toutes les ſeigneuries iadis appartenantes au deſſusdit Comte de Vvaleran ſon frere: lesquelles de nouuel luy eſtoient eſcheües comme la plus prochaine heritiere de coſté de pere de ſon beau nepueu le Duc de Brabant naguères treſpaſſé. Si fut par elle que tous les ſermens des officiers furent renouuellez: & ſe nomma depuis ce iour en auant Comteſſe de Ligny & de S. Pol ſa vie durant, & pourtāt qu'elle aimoit moult cordialement ſondit nepueu meſſire Iean de Luxembourg, luy donna prendre & auoir grand partie d'icelles ſeigneuries apres ſon treſpas , dont point ne fut bien cōtent le Comte de Conuerſan ſeigneur d'Anghien frere ainſné de meſſire Iean de Luxembourg, & depuis eurent aucune redarguation enſemble, mais en fin ſe concorderent l'un avec l'autre .

Comment meſſire Iean de Luxembourg entreprint le gouuernement du ſiege de Compiengne: & des ordonnances qu'il y feit, & autres matieres.

E Tem apres ce que le Duc de Bourgongne fut party , comme dit eſt , de deuant la ville de Compiengne qu'aſſez brief enſuiuant vint meſſire Iean de Luxembourg à tout ſes gens deuāt icelle ville, & en print la charge & gouuernement de tout le ſiege , ainſi que par ledit Duc luy auoit eſté requis & ordonné. Si feit ſans delay pourueoir & beſongner neceſſairement à la Baſtille de deuant le pont: & en commēcer deux autres moindres ſur la riuere au lez vers Noyon, dont Guy de Roye eut la charge de l'une , accompagné d'Aubellet de Folleuille & autres de ſa compagnie & de ſes gens: & la ſeconde fut baillée à vn routier de Boullenois nommé Branart : avecques lequel furēt commis aucuns arbaleſtriers Genneuois, Portugalois & autres d'eſtrange paÿs. Et apres ledit de Luxembourg ſe prepara pour paſſer l'eauē, & par deſſus le neuf pont cōtre Venete, alla loger en l'abbaye de Royaulieu avecques luy meſſire Iaques de Brimeu Mareſchal de l'oſt, meſſire Huet de Launoy, le ſeigneur de Creſquy, le ſeigneur de Saueuſes, le ſeigneur de Humieres, meſſire Dauiod de Poix, Ferry de Mailly, meſſire Florimont de Brimeu & pluſieurs autres nobles hommes ſe logerent tant en l'abbaye comme au village, qui eſtoit moult deſolé & és vignes & iardins à l'environ: & demoura le Comte de Hontidon à ſon logis à Venete avecques ſes gens. Durāt lequel temps feirent iceux aſſiegez pluſieurs ſaillies de pied & de cheual : ausquelles tant d'une part comme d'autre furent aucuns prins & naurez non mie en grand nombre . Si fut par

lesdits assiegeans encommencé vne grand bastille à vn trait & demy d'arc pres ladicte ville, en tirant vers la porte de Pierrefons : dedans laquelle pour la garder, furent commis le dessusdit Mareschal de l'hostel, le seigneur de Cresquy, messire Florimont de Brimeu avecques eux trois cens combattans ou environ, qui tous ensemble se logerent dedans ladicte bastille avant qu'elle fut du tout parfaicte ne fortifiée, & y furent par longue espace de temps logez : auquel tēps les assiegez souffrirent moult grand destresse de famine, & ne pouoient pour nulle finance recouurer des viures dedans leur ville : car en l'espace de quatre mois entiers n'en fut dedans icelle ville vendu en public. Si furent adonques enuoyez plusieurs messagiers au Mareschal de Boufach, au Côte de Vendosme & aux autres capitaines du Roy Charles, pour eux requerir instāment qu'ils voulussent secourir icelle ville de Compiengne : laquelle estoit moult oppressée par lesdits assiegeans. Item entre-temps que les tribulations dessusdictes duroient fassemblerent le Mareschal de Boufach, Pothon de Sainte-Treille, Theolde de Valleperge & plusieurs autres capitaines François. Si allerent assieger la ville de Proissy sur Oise : dedās laquelle estoit le Bastard de Cheureux à tout quarante combattans ou environ, qui assez brief furent contraints d'eux rendre à volenté : & en y eut la plus grand partie mis à mort par les gisarmes dudit Mareschal de Boufach. Et depuis qu'ils se furent ainsi rendus, la forteresse fut demolie. Et pareillement furent prinſes par les dessusdits Cathu le fort moustier, le Chastel & aucunes autres places, esquelles furent executez à mort la greigneur partie des compagnons, qui dedans estoient. Toutesfois ledit Mareschal, ne les autres de la partie du Roy Charles ne feirent sur les assiegeans de Compiengne aucune entreprinſe, comme il est accoustumé de faire en tel cas, iusques au derrain que le siege fut leué comme cy apres sera plus à plain declairé. En ce temps le Duc de Nortfolk Anglois se tenoit à tresgrand puissance sur les marches de l'Isle de France, où il meit plusieurs forteresses en l'obeissance du Roy Henry : c'est à sçauoir Dampmartin en la Gohelle, la Chasse Mongay & aucunes autres. Et pareillement d'autre costé le Comte d'Estantfort print d'assault la ville de Bray comte-Robert, par le moyen de laquelle se rendit la forteresse du lieu, laquelle estoit moult forte. Et de là ledit Comte s'en alla passer l'eauie de Seine avecques toute sa compagnie, & fourrager tout le pays iusques assez pres de Sens en Bourgongne : & apres s'en retourna à tout grād proye au lieu dont il s'estoit party, sans ce qu'il trouuaſt nul de ses ennemis qui luy feissent aucun destourbier : & brief ensuiuant print le Quesne en Brie, grand Puys, Rappellon : & en fin feit bien pendre quatre vingts de ceux qui estoient dedans ledit Quesne. Et pareillemēt print la forte tour de Bus : laquelle avec les autres places dessusdictes fut toute desolée. Et estoient dedās Bray-Comte-Robert, quand elle fut prinſe, messire Iaques de Milly & messire Iean de la Haye, lesquels furent prisonniers aux Anglois. Et depuis eschapperent de leurs mains parmy payant grand finance.

Comment le Prince d'Orenge fut rué ius par les Francois.

En l'an

EN l'an dessusdit le iour de la Trinité, se meit sus le Prince d'Orenge à tout douze cens combattans ou environ: lesquels il mena au païs de Languedoch, où il meit en son obeïssance plusieurs chasteaux tenans le party du Roy Charles. Et pareillement fait en Daulphiné, dont grandement despleut audit Roy & à ceux de sa partie. Si fut par luy conclud avecques ceux de son conseil pour y resister, que le seigneur de Gaucourt gouverneur de Daulphiné, messire Ymbert de Gauler Seneschal de Lyon sur Roine, & Rodigue de Villâdras feroient leur assemblée des nobles hōmes du païs, & ce qu'ils pourroient recouurer de gens de guerre & fleur de droictes gēs d'armes d'élite, pour iceluy païs deffendre & recouurer: lesquels quād ils furēt mis tous ensemble, se trouuerent de quinze à seize cens combattans. Si s'en allerent mettre le siege deuant vne forteresse nommée Coulembier, laquelle en assez brief terme se rendit aux dessusdits capitaines. Et entretēps entra le Prince d'Orenge dessusdit qui festoit retraict en sa marche, sçachant ses ennemis à puissance estre sur les champs, & que desia auoient assiegé icelle forteresse que ses gens tenoient, enuoya hastiuement & sans delay ses lettres & messagiers deuers les seigneurs, nobles & gens de guerre du païs de Bourgongne, & aussi d'autres lieux où il auoit ses amis, alliez & bien-vueillans. Si feit si bonne diligence qu'en assez briefs iours ensuiuans il assembla tresgrand nombre de nobles hommes. Lesquels il conduisit & mena vers le païs où estoient ses ennemis, esperant secourir ladicte forteresse, qui par auant, comme dit est, festoit rendue en la main des François: lesquels François par leurs espies sçauoient la venue des Bourgongnons: & pource festoient preparez en grand diligence pour les receuoir & combattre. Et de fait tous ensemble par tresbonne ordonnance se meirent à chemin pour aller au deuant d'eux, & les rencontrerent entre Coulembier & Hauton: mais les dessusdits Bourgongnons venoient parmy vn bois, & ne se peurent pas du tout bonnement rassembler ne mettre en plaine ordonnance de bataille, par ce qu'iceux François les enuahirent soubdainement & vigoureusement. Toutesfois de premier venue y eut tresp dure & merueilleuse rencontre. Entre lesquels de ceux de la partie de Bourgongne se meit à pied vn moult vaillant chevalier nommé messire Loÿs de la Chappelle, & avecques luy aucuns de ses gens: mais il fut tantost mis à mort: & finalement & pour briefue conclusion les François obtindrent & gaignerent le champ, & demourerent maistres. Si y furent morts sur la place environ de deux à trois cēs Bourgongnons largement, & si en y eut de prins six vingts ou plus: desquels prisonniers furent les principaux le seigneur de Bussy fils au seigneur de saint George, le seigneur de Varembon, lequel eut le nez abbattu d'une taillade, messire Jean Loÿs fils au seigneur de Conches seigneur de la Freté, Thibault de Rougemont, le seigneur de Ruppes, le seigneur d'Escabonne, messire Jean de Vienne, le seigneur de Raix, Ieā de Baude, messire Duc de Sicon, Girard de Beauvoir & plusieurs autres iusques au nombre dessusdit. En laquelle iournée se departirent plusieurs Bourgongnons en grand desroy: lesquels pouoient estre environ de seize à dixhuiēt cens combattans, desquels furent les principaux le dessusdit Prince d'Orenge. Et fut iceluy Prince chassé iusques à Authun, où il se sauua à grand peine, le Côte de Fribourg, le seigneur de Montagu, c'est à sçauoir

messire Ieā de neufchastel qui portoit l'ordre de la toison d'or, qui luy fut ostée, le seigneur de Pasmes & moult d'autres notables gentils-hommes, s'en allerent en fuyant par plusieurs parties & en diuers lieux. Et fut ceste besongne enuiron l'heure de tierce: en laquelle se porta tres vaillamment le dessusdit Rodigue de Villandras, qui menoit l'auantgarde des François: lesquels François apres ceste besongne se r'assemblerent & eurent moult grand ioye de leur bonne victoire, en remerciant & louant Dieu leur createur. Et depuis par le moyen de ceste destrouffe, conquerent sur la partie de Bourgongne plusieurs villes & forteresses: dont l'une d'icelle fut Aubrune qui estoit audit Prince d'Orenge, laquelle apres qu'elle fut prinse, fut par iceux François demolie.

Comment les Francois vindrent deuant la ville de Compiègne, où ils leuerent le siege des Bourgongnons.

LTem apres que le Comte de Hontidon, & messire Iean de Luxembourg eurent par grand espace de temps, & à grand labeur continué leur siege deuant la ville de Compiègne, & moult abstraint de famine les assiegez par le moyen des bastilles & approches qu'ils auoient faictes entour d'icelle ville: & qu'ils esperoient en assez brief terme auoir la fin & conclusion de leur entreprinse, & ladicte ville reduire en leur obeissance. Le mardy deuant le iour de Toussaincts les François en nombre de quatre mille combattans ou enuiron: desquels principaux estoient les Mareschaux de Boufach, le Comte de Vendosme, messire Iaques de Chabannes, Pothon de sainte Treille, messire Regnault de Fontaines, le seigneur de Longueual, messire Loys de Vaucourt, Allain Giron & plusieurs autres vaillans capitaines: qui par plusieurs fois auoient esté moult instamment requis de Guillaume de Flauy & des autres assiegez en ladicte ville de Compiègne de bailler secours, vindrent logger tous ensemble au moins la plus grand partie en la ville de Verbrie, à tout foison de viures & grand nombre de payfans qui auoient plusieurs instrumens, coignées, syes, louchez, serpes, hoyaux & autres pareils ostils pour refaire & reparer les chemins parmy forests & autres lieux, que les assiegeans auoient empeschez en plusieurs parties: tant de gros bois qu'ils auoient fait abbatre & trauerser esdits chemins: comme de fossez qu'ils auoient fait faire, & autres empeschemens. Laquelle assemblée & logis sceurent assez brief iceux assiegeans: & pourtant quand partie des chiefs de guerre & des plus notables sceurent ce, se meirent ensemble à conseil pour auoir aduis l'un avec l'autre: sçauoir s'il seroit bon qu'ils allassent au deuant de leurs ennemis pour les combattre, ou s'ils les attendroient à leur siege: laquelle besongne mise en conseil fut de plusieurs debattue: & vouloient les aucuns qu'on les allast combattre deuant qu'il venissent plus auant: & les autres pour plusieurs raisons disoient, qu'il valloit mieux les attendre & eux fortifier & apprestier pour les receuoir. Disant oultre, que s'ils laissoient leur siege pour aller vers les François & leurs bastilles malgarnies: & lors les assiegez qui estoient en grand destresse, desirant estre deliurez du grand dangier où ils estoient, pourroient moult greuer lesdictes bastilles, ou à tout le moins s'en pourroient aller & eux mettre à sauueté là où ils pourroient le mieux: & pour tant retourna ce conseil de la plus grand partie. Si conclurent tous ensemble

semble d'un commun accord, d'attendre toutes aduentsures & de y resister de tout leur pouoir. Si furent les ordonnances telles qu'il s'en suit. Il est à sçauoir que le lendemain tresmatin qui estoit le mercredy, le Comte de Hontidon à tout ses Anglois passeroit l'eau par le neuf pont : & viendrait vers Royaulieu pour luy mettre en bataille avec messire Jean de Luxembourg, & laisseroit en l'abbaye de Venete qui estoit forte la plus grand partie de leurs gens, cheuaux & bagages avec un pou de ses gens, qui seroient commis pour les garder. Et aussi pour garder le Pont. Item fut ordonné que tous les chars, charettes, cheuaux, marchans, viures & autres telles besongnes fussent mis & retraits en la dessusdicté abbaye de Royaulieu. A laquelle garde fut commis messire Philippe de Fosseux, & le seigneur de Cochen. Item fut ordonné que messire Jaques de Brimeu à tout trois cens combattans ou environ demouroient en leur bastille. Et leur fut promis par les seigneurs, que si on les alloit assaillir : & ils auoient affaire on leur iroit secourir sans point de faulte à certain signe qui fut denommé, lequel ils deuoient faire fil leur souloit necessité. Item fut ordonné que la grand bastille qui estoit delez le pont vers Marigny, s'entretenroit : pareillement feroient les deux autres, qui estoient sur l'eau au lez vers Cleroy. Apres lesquelles ordonnances tous les seigneurs se retrahirent chacun en son logis, & admonesterent & induirent iceux chacun en droit soy, leurs gens de eux preparer pour le lendemain attendre leurs ennemis. Et avec ce fut ordonné à faire bon guet en plusieurs lieux, où il appartenoit tant de pied comme de cheual. Et le lendemain selon leurs ordonnances dessusdictes, le dessusdit Comte de Hontidon & six cens combattans s'alla mettre en bataille, avec messire Jean de Luxembourg entre Royaulieu & la Forest au lez, où ils pensoient que leurs ennemis deussent venir. Et les autres tant des dessusdictes bastilles comme de ceux, lesquels deuoient garder les dessusdits logis se meirent chacun en bonne ordonnance, pour deffendre ce à quoy ils estoient commis. En apres à ce mesme mercredy les François qui estoient logez à Verberie (comme dit est) se meirent des le point du iour en plains champs : & fut ordonné par le Marechal de Boufach & les autres capitaines, qu'ils iroient environ cent combattans vers le lez de Choisy à tout aucuns viures deuant eux, pour mettre dedans Compiegne, & pour resiouyr lesdits assiegez : & eux faire hastiement faillir à l'encontre d'eux, & assaillir la grand bastille. Et d'autre part fut commis Pothon de sainte Treille à tout de deux à trois cens combattans ou environ, à aller par le grand chemin de Pierrefons deuers ladicte bastille. Et ledit Marechal, le Comte de Vendosme & les autres capitaines à tout leurs gens s'en allerent passer entre la riuere d'Oise & la forest, & se meirent en bataille deuers ladicte forest à l'encontre de leurs ennemis environ à un traict & demy d'arc pres l'un de l'autre : & se tenoient les dessusdits François à cheual pour la plus grand partie, reserué aucuns gisarmiers & menues gens. Et les Anglois & Bourgongnons estoient tous à pied sinon aucuns en petit nombre, qui auoient esté ordonnez à estre à cheual. Et alors de la partie de Messire Pierre de Luxembourg furent faits aucuns nouveaux cheualiers. C'est à sçauoir Andrieu seigneur de Humieres, Ferry de Mailly, l'Aigle saint Gilles, de Saucourt & aucuns autres. Avec lequel de Luxembourg estoit messire Hue de Launoy seigneur de Xaintes, le sei-

gneur de Saueuses, messire Dauiod de Poix, messire Jean de Fosseux & plusieurs autres nobles hommes: dont la plus grand partie auoient grand desir d'assembler à bataille contre leurs ennemis, ce que bonnement ne pouoient faire: pource que (comme dit est) ils estoient de pied & leurs ennemis de cheual, & si leur conuenoit auoir regard de secourir leur logis & la grand bastille se besoing en estoit. Neantmoins il y eut plusieurs escarmouches le iour, à l'une desquelles fut rebouté le Comte de Vendosme: toutesfois d'un costé ne d'autre n'y eut point fait grand dommage: mais entre les autres vn vaillant homme d'armes, qui estoit au Mareschal de Boufach, falla ferir dedans les archiers Picards, pensant que ses compagnons le deussent secourir & suiui ce que point ne feirent, & pource fut tantost d'iceux archiers tiré ius de son cheual & mis à mort cruelle. Et entretant les dessusdits François qui auoient esté ordonnez à aller deuers Choisy, noncerent aux assiegez tout l'estat & ordonnance dessusdicté: lesquels sans delay en ferueur de hardiesse & de grand ioye, desirans sur toutes riens eux venger de leurs ennemis, qui tant de peine & de mesaise leur auoient fait souffrir, faillirent en tresgrand nombre hors de leur ville à tout eschelles & habillemens de guerre: & de grand courage allerent assaillir la grande bastille, où estoit messire Iaques de Brimeu Mareschal, le seigneur de Cresquy & les autres qui tresvigoureuement se deffendirent, & de fait les rebouterent bien arriere de leurdicté bastille: mais assez brief reuindrent nouuelles gens d'icelle ville de Compiengne, qui de rechief allerent avecques les autres recommencer nouuel assault, lequel dura assez longuement: mais comme ils auoient esté deuant furent pour la seconde fois reboutez hors des fosses, qui estoient moult petites & pou auantageuses, & avecques ce estoit ladicte bastille trespetitement emparée & mise en deffence. Et adonc Pothon de sainte Treille à tout les gens qu'il conduisoit vint issir de la forest, & par empres le grand chemin de pierrefons, s'en alla ioinde avec les François de la ville, & là tantost ensemble allerent assaillir asprement icelle bastille: auquel assault estoient Guillaume de Flauy en grand diligence & fier hardement, induisoit ses gens à faire tout deuoir: avec lesquels estoient hommes & femmes, qui sans eux espargner grandement & villainement en tous perils s'auanturoient à greuer leurs aduersaires: lesquels (comme dit est dessus) se deffendoient tresvaillamment, & par longue espace: mais finablement les dessusdits François feirent si bon deuoir que ladicte grand bastille fut prinse par viue force d'armes malgré les deffendeurs, & sans remede furent mis à mort dedans icelle huit vingts homes de guerre, desquels estoient les principaux le seigneur de Lignieres cheualier, Archabault de Brimeu, Guillaume de Poilly, Druot du Sonis, Lyonnell de Toteuille & plusieurs autres gentils-hommes. Et les autres furent tous prins & prestement menez deuant Compiengne, c'est à sçauoir ledit messire Iaques de Brimeu Mareschal de l'hostel, le seigneur de Cresquy, messire Florentin de Brimeu, messire Vallerien de Beauual, Arnoul de Cresquy, Collart de Bertancourt seigneur de Relepot, Regnault de Saints, Thierry de Mazingien de Reteslay, le bastard de Remy & aucuns autres nobles hommes: lesquels depuis parmy payant grans finances furent deliurez. Durant lequel assault messire Jean de Luxembourg qui aux dessusdits auoit promis de les secourir, oyant & voyant celuy assault multiplier

cut

eut volenté d'y aller à tout sa puissance: mais pour les grans empeschemens que luy bailloient & pouoient faire ses ennemis, il eut conseil d'entretenir en ordonnance de bataille, pour escheuer toutes mauuaises aduentures qui y pouoient suruenir: si se commença entretant le iour à passer. Et adoncques ledit Mareschal de Boufach Comte de Vendosme & les autres capitaines François, se bouterent dedās la ville de Compiengne à tout leurs gens, où ils furēt receuz à moult grand ioye, jaçoit ce qu'en icelle ville fussent moult contrains de famine, & que pour ceste nuit conuint à la plus grand partie souffrir grand disette de viures. Neantmoins pour la bonne aduenture qu'ils auoient eue contre lesdits assiegeans, prindrent tout en gré, & eux esiouissant menerent moult grand ließe les vns avecques les autres: au surplus esperans de totalement debouter leurs ennemis arriere d'icelle ville. Et mesmement feirent hastiuement vn pont de basteaux & d'autres habillemens, par lequel ils passerent: & de fait allerent assaillir vne petite bastille sur la riuere: dedans laquelle pouoit auoir de quarante à cinquante combattans tant d'arbalestriers Geneuois, Portugalois & d'autres brigans d'estranges marches, comme Boulonnois & d'autres lieux: laquelle bastille fut assez briefuement subiuguée & conquise, & tous ceux de dedans mis à mort: reserué vn routier Boulonnois appert homme d'armes nommé Carnart, qui estoit capitaine: si fut prins & mené prisonnier dedans Compiengne avecques les autres. Durant lequel temps Aubele de Folleuille & ses gens, qui tenoient la forte bastille sur la riuere doubtans estre prins d'assault comme les autres, bouterent le feu dedans & se retrahirent és logis Anglois. Si fut par lesdits François liurée grande escarmouche à la quarte bastille du bout du pont, laquelle estoit grande & puissante durement. Si la tenoit messire Baudo de Noyelle: mais pour la force d'icelle & pour la grande deffence de ceux de dedans, qui estoient en vne grosse compaignie de combattans & bien pourueuz d'artillerie, ils ne peurent riens faire & se retrahirent pour ceste nuit dedans leur ville. Apres que les François furent entrez en ladicte ville de Compiengne (comme dit est) & qu'il estoit desia bien tard sur le vespre, le Comte de Hontidon Anglois & messire Jean de Luxembourg voyant clerement que pour ce iour ne seroient point combattus de leurs aduersaires, se meirent ensemble avecques eux grand partie de leurs capitaines, pour auoir aduis sur ce qui estoit à faire, pour sçauoir comment ils se pourroient conduire. Si fut conclud entre eux que pour icelle nuit ils se retrairoient en leurs logis & coucheroient tous armez: & le lendemain se mettroient sur en bataille deuant ladicte ville pour sçauoir se leurs dessusdits aduersaires se vouldroient combattre à eux, esperans que bonnement ne se pourroient tenir si grand nombre dedans la dessusdicte ville sans iſsir, attendu que tous viures, comme dit est, y estoient exillez. Apres laquelle question s'en retourna ledit Comte de Hontidon & ses Anglois en son logis de Venete: & promet de bien faire garder le pont, affin que nuls de leurs gens ne s'en peussent aller sans congé. Et messire Jean de Luxembourg se retrahit aussi à tout ses gens en son logis de Royaulieu, & combeit gens à faire bon guet: mais en celle propre nuit y eut grand partie de ses gens qui s'assemblerent de sa compaignie secrettement, & se prindrent à eux desloger sans trompette & eux en aller où ils peurent le mieux. Et par especial en repassa grand partie au

pont dessusdit, pour eux en aller en leur pays, lequel pont, comme il auoit esté promis, ne fut point gardé : & pareillement s'assemblerent aucuns des gens du Comte de Hontidon. Et pourtāt ce venu à la cognoissance des capitaines muèrent ce qu'ils auoient conclud, c'est à sçauoir eux mettre en bataille deuant la ville : & se disposa ledit messire Jean de Luxembourg de luy & toutes ses gens repasser l'eauie, & aller avec ledit Comte de Hontidon : laquelle chose il feit le iedy bien matin, lequel iour les François issirent à grand puissance hors de la ville, & enuoyerent leurs coureurs en plusieurs lieux, pour sçauoir nouvelles de leurs ennemis : lesquels apperceurent tantost qu'ils s'en estoient partis & repassez l'eauie : si le firent à sçauoir à leurs gens qui de ceste chose eurent moult grand ioye. Si s'en allerent prestement en grand nombre à l'abbaye de Royaulieu, où ils trouuerent foison de bons viures & vins, dont ils furent remplis à largesse : si en firent tresbonne chere, car ils ne leur auoient riens cousté. Et apres s'assemblerent la plus grand partie des plus nobles & mieux habillez, & s'en allerent deuers le pont contre Venete : & sans ce qu'ils trouuassent grand deffence, rompirent ledit pont bien auant & le ruerent en la riuere en plaine veüe des Anglois & des Bourgongnons, en leur disant plusieurs iniures & villaines parolles. Si ne furent plus iceux François en doute que Bourgongnons & Anglois les peussent greuer pour celle fois, que ledit pont estoit rompu. Et d'autre part ce propre iour assirent tous les gros engins de ladicte ville contre la bataille de messire Baudo de Noyelle, desquels ils le trauaillerent moult fort en plusieurs manieres. Et finalement pour briefue conclusion le dessusdit Comte de Hontidon, & messire Jean de Luxembourg avecques les plus notables de leur compagnie, voyans que par nulle maniere ne pouoient surmonter ne vaincre leurs aduersaires quand à present : considerant qu'il estoit chose impossible de longuement entretenir leurs gens, & delibererent tout d'un commun accord de eux en aller à Noyon, de là en leurs propres lieux, laquelle chose ils firent. Et manderent à messire Baudo de Noyelle qu'il boutast le feu en sa bastille, & qu'il s'en partit. Et ainsi le feit comme ils luy auoient mandé. Si se deslogerent au vespre, & s'en allerent par nuict en assez meschant arroy & petite ordonnance iusques au Pont-l'Euesque, delaisans honteusement en leurs logis & en la grosse bastille tresgrand nombre de grosses bombardes, canons, veuglaires, serpétines, couleurines & autres artilleries avecques plusieurs engins & habillemens de guerre, qui demourerent en la main des François leurs aduersaires & ennemis, lesquelles artilleries estoient au Duc de Bourgongne : pour lequel departement messire Jean de Luxembourg eut au cueur tresgrand desplaisance : toutesfois il n'en peut auoir autre chose. Si se departirent le samedi ensuiuant luy & le Comte de Hontidon Anglois du logis du Pont-l'Euesque, & s'en allerent à Roye. Et de là sans entretenement se retrahirent eux & leurs gens chacun en leurs propres lieux & garnisons, dont ils s'estoient partiz. Et pourtant ceux qui estoient en la ville de Compiengne sçachans icelle departie, firent incontinent rediffier le pont dessus l'eauie d'Oize : & issirent à grand puissance de ladicte ville, cheuau chans à estandard desployé par plusieurs compagnies courans en diuers lieux sur les marches que auoient tenues leurs ennemis : & le remanant des fuyans qu'ils trouuerent, meirent à l'espée. Si ardirent & embrazerent en icelle plu-

sieurs

seurs villages, maisons & edifices, faisans en peu d'espace tresgrandes cruau-
tez: pour lesquelles leurs ennemis eurent grand paour, si qu'à peine les osoient
attendre sinon moult doubtablement en quelque forteresse, qu'ils se teins-
& mesmement pour la creueur des dessusdits, se rendirent à eux sans coup ferir
ne attendre nul assault, les forteresses cy apres denommées: c'est à sçauoir Res-
sons sur le Mas, Gournay sur Aronde, le pont de Remy, le pont sainte Maxen-
ce, Longueil sainte Marie, la ville & le fort chastel de Berthueil, le chastel de
Guermegil, la Boissiere, le chastel d'Ireligny les Chastigniers, la tour de Ver-
dueil & aucunes autres places: dedans lesquelles ils trouuerent tresgrand abon-
dance de biens & meirent par tout garnison de leurs gens, dont le pays fut en
brief terme moult oppressé & trauaillé. Et par especial ceux qui tenoient le par-
ty des Anglois & des Bourgongnons.

Comment le Mareschal Boufach alla assieger le chastel de Clermont en Beauuoisis.

DVrant les tribulations dessusdictes, le Mareschal de Boufach rassem-
bla la plus grand partie des François, qui auoient esté à leuer le siege
de Compiengne. Si fait charger plusieurs engins & habillemens de
guerre, si s'en alla mettre le siege autour du chastel de Clermont en
Beauuoisis, par l'introduction & pourchats d'aucuns bourgeois de la ville, de-
dans laquelle luy & ses gens se logerent: auquel chastel estoient le seigneur de
Creuecueur, son frere Iean de Barentin, le bastard Lamon avec enuiron cin-
quante combattans, qui tresvigoureuement se deffendirent contre iceux assie-
geans, qui par plusieurs fois les assaillirent: mais ce fut sans riens gagner. Et y
eut plusieurs de leurs gens occis & blessez, neantmoins ils continuerent leur sie-
ge enuiron douze iours: au bout duquel terme entra par nuit dedans le chastel
par la poterne vers les vignes Boort de Bazentin, avec luy dix combattans & v-
ne trompette: lequel acertiffia audit seigneur de Creuecueur, qu'il auroit brief
secours comme c'estoit verité: car le Comte de Hontidon qui puis n'agueres
festoit retraict à Gournay en Normandie, festoit de nouuel remis sur les chāps,
avec luy messire Iean bastard de saint Pol & mille combattans ou enuiron, en
intention d'aller leuer ledit siege & secourir les assiegez, duquel secours iceux
assiegeans furent aduertis, & pourtant se partirent à vn matin moult hastiue-
ment, & y laisserent plusieurs de gros engins, qu'ils auoient amenez de deuant
Compiēgne. Si retournerent en leurs garnisons & avecques eux plusieurs Bour-
gongnons de Clermont, qui festoient tournez de leur party. Pour lequel depar-
tement ledit seigneur de Creuecueur fut moult ioyeux.

*Comment plusieurs Anglois & Bourgongnons ueillans au commandement du Duc
de Bourgongne aller assieger Garmigny, furent rencontrez & vaincuz des Fran-
cois.*

ED v c Philippe de Bourgongne qui estoit encore en la Du-
ché de Brabant, ouyt les certaines nouuelles comment ses gens a-
uoient esté leuez par les François de deuant la ville de Compiengne,
dont il fut moult esmerueillé & troublé tant pour la perte de ses gēs
qui y auoient esté morts & prins, comme pour les grans fraiz & dommages

que auoit soustenus à l'occasion dudit siege . Et pourtant se prepara à tout ce qu'il peut auoir de gens pour retourner en son païs d'Arthois, où il conuoqua tous les nobles du païs & de la marche enuiron, qu'ils veinssent sans delay deuers luy à tout ce qu'ils pourroient auoir de gens de guerre . Et se trahit ledit Duc à Peronne , & fait partir aucuns de ses capitaines pour aller loger à maniere d'auantgarde deuers Lyhon en Santers : c'est à sçauoir messire Thomas Kirieli Anglois, Iaques de Helly , messire Dauiod de Poix, Anthoine de Vienne, & autres accompaignez de cinq à six cens combattans. Et entretant le dessusdit Duc de Bourgongne en attendant ses gens, se preparoit pour les suiui en intention d'aller loger à Garmigny, où estoient dedans la forteresse les François (comme dit est dessus) qui moult trauaillerent le païs à l'enuiron . Si aduint que les dessusdits capitaines enuoyez , comme dit est, par le Duc de Bourgongne se deslogerent au matin apres qu'ils eurent couché és dessusdits villages vers Lyhon en Santers, & prindrent leur chemin à aller à Garmigny en plusieurs troupeaux, sans eux mettre en ordonnance de bataille ne enuoyer leurs coureurs deuant eux, ainsi que le font & ont accoustumé de le faire droictes gens d'armes experts en fait de guerre, & mesmement quand ils furent pres de leurs ennemis . Et adonc vint deuers eux de la ville de Roye, dont il estoit capitaine Gerard Bastard de Brimeu, à tout enuiron quarante combattans, & cheuaucherent les dessusdits l'un assez pres de l'autre iusques à vne ville nommée Bouchoire. Si trouuerent en leur chemin plusieurs lieues : apres lesquels fut fait grand desroy de courre & de huer : & n'auoient adonc point lesdits capitaines de regard d'entretenir ne rassembler leurs gens ainsi qu'ils deuoient : & aussi la plus grand partie d'iceux n'auoient point tout leur harnois sur eux. Pour laquelle negligence il leur mesaduint villainement : car ce propre iour Pothon de sainte Treille estoit venu du matin audit lieu de Garmigny. Et là à tant de ses gens qu'il trouua audit Chastel comme à tous ceux qu'ils auoient amenez tira aux champs : & pouoit auoir enuiron douze cens combattans, dont la plus grand partie estoient droictes gens de guerre, experts & esprouuez en armes : à tout lesquels il print son chemin droit deuers Lyhon en Santers, & si fait sagement cheuaucher aucuns de ses coureurs deuant, pour descourir & enquerir nouuelles de ses ennemis : lesquels venuz empres ladicte ville de Bouchoire, oyrent crier & apperceurent l'estat & ordonnance de leursdits aduersaires . Et pourtant sans delay & en grand diligence retournerent deuers leurs capitaines, ausquels ils noncerent ce qu'ils auoient ouï & veu . Sur lequel rapport Pothon dessusdit fait incontinent habiller ses gens de tous points, & moult soubdainement les mena & conduit deuers ses ennemis dessusdits en leur admonnestant que chacun s'acquitaist en droit soy & fait bon deuoir de combattre leurs ennemis : lesquels ses ennemis estoient trespetitement preparez pour batailler. Et pourtant Pothon & ses gens venans sur eux d'un vouloir soubdain en grand bruit & roideur auant qu'ils se peussent mettre en ordonnance, les eut tantost esparpillez & mis en grand desroy : & furent la plus grand partie portez ius de fers de lances de leurs cheuaux . Toutesfois les capitaines avec aucuns de leurs gens se rassemblerent à l'estandart de messire Thomas Kirieli, & commencerent à eux mettre à deffence vigoureusement : mais ce riens ne leur vallut :

vallut : car, comme dit est, greigneur partie de leurs gens estoient desia tournez à grand meschief & à grand desroy, fuyant en plusieurs & diuers lieux pour eux sauuer. Pourquoy en assez brief terme ceux qui estoient demourez sur les champs, furent tournez à desconfiture morts & prins & sans nul remede : desquels morts furent les principaux Iagues de Helly, Anthoine de Vienne & avec eux de cinquante à soixante tant Bourgongnons comme Anglois. Et avec ce en furent prins de quatrevingts à cent : desquels estoient les principaux messire Thomas Kiriell dessusdit, & avecques luy de ceux de sa famille deux vail-lans hommes d'armes, c'est à sçauoir vn nommé Robin & l'autre Guillaume Couroüan. Et de la mesme partie des Bourgongnons furent aussi prins messire Dauiod de Poix, l'Aigle de Saints cheualier, l'Hermite de Boual & aucuns autres avec eux, iusques au nombre dessusdit. A laquelle destrouffe se cuida retraire à Roye, dont il s'estoit party Gerard le Bastard de Brimeu : mais pource qu'il auoit vestu vne housse dorfauerie & de grand monstre, il fut roidement pourfuiuy de ses ennemis, & en fin prins des François & ramené avecques les autres. Apres laquelle desconfiture ledit Pothon remeit ses gens ensemble, & delà à tout ses prisonniers à Garmigny premier despouillez, ceux qui morts gisoient sur les champs : entre lesquels furent trouuez occiz tant seulement quatre ou cinq des gens dudit Pothon. Auquel lieu de Garmigny luy & les siens se rafreschirent le iour & la nuict ensuiuant. Et le lendemain emmena toutes ses gens, & laissa la forteresse en la main des habitans de la ville : & pareillement fait desgarnir la Boissiere, que ses gens tenoient & icelle mettre au feu & en flambe. Si s'en alla à Ressons sur le Mas : & delà à Compiègne à tout ses prisonniers, où il fut receu ioyeusement pour la victoire qu'il auoit eüe sur ses ennemis. Ouquel temps ledit Iagues de Helly fut là enterré en l'Eglise. Et les autres pour la plus grand partie furent enterrez en l'Eglise & cymetiere de Bouchoire assez pres de la place, où ils auoient esté occiz.

Comment les Francois demanderent à auoir bataille contre le Duc de Bourgogne, & à sa puissance : laquelle ledit Duc par son conseil ne voulut accorder & autres matieres.

EN ce mesme iour que la bataille eut esté des François & des Bourgongnons empres Bouchoire, furent portées les nouvelles au Duc de Bourgogne de la perte & desconfiture de ses gens dessusdits, lequel Duc estoit demouré à Peronne : pour lesquelles nouvelles il fut grandement trouble, & par especial pour la mort de Iagues de Helly & Anthoine de Vienne. Si furent mandez à venir deuers luy les capitaines là estans : c'est à sçauoir messire Jean de Luxembourg, le Vidame d'Amiens, le seigneur d'Antoing, le seigneur de Saucuses & plusieurs autres avec ceux de son hostel : avec lesquels il conclud d'aller loger à Lyhon en Santers, laquelle chose il fit ce propre iour. Et le lendemain il se tira à Roye en Vermandois, & là seiourna environ huict iours, attendant le Comte d'Estaffort, le Comte d'Arondel & aucuns autres Anglois, que parauant il auoit mandez à venir vers luy : durant lequel temps s'assemblerent plusieurs capitaines, tenans le party du Roy Charles : & avec eux seize cens combattans ou environ, c'est à sçauoir le Marechal

de Bouffach, & le Comte de Vendosme, messire Jaques de Chabannes, Guillaume de Flauy, Pothon de sainte Treille, le seigneur de Longueval, messire Regnault de Fontaine, messire Loys de Vaucourt, Allain Guyon, Bouffart Blanchefort & plusieurs autres, qui tous ensemble passerent en belle ordonnance aupres de Montdidier : & de là s'en allerent loger à deux lieues pres de Roye en deux villaiges. Et le lendemain tresmatin se meirent tous ensemble & conclurent tous d'un commun accord & affermerent à combattre le Duc de Bourgongne, & sa puissance fil se vouloit contre eux mettre aux plains champs. Et affin que ledit Duc fut de ce aduerty, ils enuoyerent vers luy un Herault luy signifier ladicte conclusion. Lequel Duc scachant les nouvelles dessusdictes, fait responce qu'ils seroient combattus : toutesfois la besongne fut atargée par ceux de son conseil, lesquels luy demonstrent plusieurs raisons : disans qu'il n'estoit mie à luy propice de mettre son corps & son honneur en aduventure contre telles manieres de gens & compaignies, sans y auoir nul Prince ne seigneur de grande auctorité, & aussi qu'il auoit peu de gens, & que ils estoient esbahis & effrayez tant pour la perte qu'ils auoient faicte au siege de Compiègne, comme pour la destrouffe de Jaques de Helly. Et pourtant ledit Duc tresgriefuement au cuer courroucé de ce qu'il ne pouoit faire sa volenté, creut son conseil : lequel fait faire responce absolue ausdits François : que s'ils vouloient attendre iusques au lendemain, on les laisseroit loger paisiblement : & si on leur liureroit certaine quantité de viures, & avec ce les combatroit messire Jean de Luxembourg, & de ce on feroit bonne seurété : lesquels François ceste responce ouye, dirent qu'ils n'en feroient rien : mais si ledit Duc (comme dit est) se vouloit mettre aux champs ils estoient prests de le combattre : durant lequel temps issit ledit Duc de Bourgongne à tout sa puissance, & se mit en bataille au dehors de la ville de Roye, & les François estoient pareillement en bataille : mais à grand peine pouoient ils passer de l'un à l'autre, pour aucunes caües de marests qui estoient entre les deux batailles. Neantmoins si furent icelles choses faictes entre iceux deux parties plusieurs escarmouches, durant lesquelles la nuit approcha tresfort. Et pource iceux François se retrahirent vers Compiègne moult indignez, faisans grans mocqueries dudit Duc de Bourgongne & ses capitaines, disant qu'ils ne les auoient osé combattre. Et ainsi s'en retournerent chacun en leurs garnisons. Et ledit Duc avec les siens retourna dedans la ville de Roye. Auquel lieu brief enuiuant vint deuers luy le Comte d'Estaffort à tout six cens combattans ou enuiron. Et adonc ledit Duc luy partant de Roye alla loger à Leigny les Chastiniers, où auoit une petite forteresse, dedans laquelle estoit l'Abbé de saint Pharon de meaulx frere au seigneur de Gamaches : & avec luy enuiron quarante combattans François, lesquels furent signifiez d'eux rendre en la volenté dudit Duc, ce que faire ne voulurent : pourquoy on les assaillist prestement, si fut en brief leur basse court prinse de force. Si s'apperceurent tantost qu'ils ne pourroient tenir leur fort ne le deffendre, & pource se rendirent en la volenté dudit Duc, lequel les liura à messire Jean de Luxembourg pour en faire à sa volenté, & ladicte forteresse fut arse & demolie. Si feirent ceux de Noyon audit Duc priere & requeste qu'il les vouldist deliurer de la forteresse d'Ine, qui moult les oppressoit :

mais

mais pource qu'il estoit huer & que ledit Duc n'auoit point gens à son plaisir, s'en retourna à Montdidier & y meit garnison : & par Corbie vint à Arras, & par Arras, en son païs de Flandres : & le Comte d'Estanffort à tout ses Anglois retourna en Normandie. En cest an fut prinse la ville de Coulombiers en Brie par eschelles au point du iour, par ceux de la garnison de Meaux en Brie, qui tenoient le party du Roy Henry d'Angleterre: dedans laquelle ville de Coulombiers estoit de par le Roy Charles cōme capitaine messire Denys de Chally : lequel oyant cest effroy, se sauua par dessus les murs & avecques luy plusieurs autres, en habandonnant tous leurs biens. Si estoit ladicte ville remplie de tous biens, & de toute ceste guerre n'auoit esté prinse de nulle des parties : toutesfois elle fut pillée & les habitans mis à rançon, sinon ceux qui se sauuerent par fuitte. En cest an Pierre de Luxembourg Comte de Conuersan & Brayne, successeur de la Comté de saint Pol & des appartenances, feit certain traicté avec ses deux freres : c'est à sçauoir Loys Euesque de Theroüenne & messire Jean de Luxembourg, des terres dessusdictes, par condition que ledit Euesque deust auoir le chastel de Hucles en Boulonnois, la chastellenie de Tingry avec toutes les appartenances. Et ledit messire Jean de Luxembourg eut pour sa part à luy & a ses hoirs la Comté de Leigny en Barrois, & les terres de Cambresis iadis appartenans à Vallerian Comte de saint Pol : c'est à sçauoir, Bohain, Serin, Helincourt, Marçoin, Cautaig, & aucunes autres notables seigneuries. Et pourtant de ce iour en auant on nomma ledit messire Jean de Luxembourg en tous ces tiltres Comte de Leigny, seigneur de Beaurevoir & de Bohain. Et tout le surplus desdictes seigneuries demourerent au dessusdit Pierre de Luxembourg, lequel se nomma en cas pareil Comte de saint Pol, de Conuersan, de Brayne & seigneur d'Anghien. Item le trentiesme & dernier iour de Septembre de cest an, fut n'ay en la ville de Bruxelles le premier fils du Duc Philippe de Bourgongne, & la Duchesse Ysabel fille du Roy de Portugal son espouse : lequel fils en son baptesme fut nommé Anthoine, & à sa venue par toute la ville de Bruxelles fut faicte grand ioye & grand liesse. Et estoit lors en icelle ville le Comte de Nuche nepueu de l'Empereur d'Allemagne : lequel tenoit grand & noble estat, & alloient luy & aucuns de ses gens les testes nues chacun vn chappel verd sur son chief, en signifiant qu'il estoit chaste, jaçoit-ce qu'il faisoit moult fort & dur temps. Et tindrent iceluy enfant sur les fons ledit Comte & l'Euesque de Cambray. Et les marrines furent la Duchesse de Cleues, & la Comtesse de Namur. Et y auoit bien trois cens torches tant de l'hostel dudit Duc, comme de ceux de la ville : lequel enfant alla de vie a trespas l'an ensuiuant. Et quand les nouuelles en furent portées audit Duc de Bourgongne, il en fut moult desplaisant & dit: Pleust à Dieu que ie feusse mort aussi ieune, ie m'en tiendroye pour bien heureux. En l'an dessusdit fut prins dedans son chastel à Auchel messire Anthoine de Bethune seigneur de Mareul, qui auoit enuiron trente combattans : & l'auoit assiegé le Comte de Vendosme, de Thomelaire, Preuost de Laon, dont i'ay parlé cy dessus avec grand nombre de communes. Lequel messire Anthoine voyant que bonnement ne pouoit tenir la forteresse, se rendit audit Comte par condition, qu'il s'en iroit luy & ses gens sauvement : mais nonobstant lesdictes promesses à luy faictes

quand ce vint au partir, il fut mis à mort par icelles communes, & avec luy vn gentil-homme nommé Franquet de Beguynes. Pour la mort desquels iceluy Comte de Vendosme fut tresdolent: mais il n'en peut auoir autre chose. Et avec ce fut ladicte forteresse toute arse & demolie, dont messire Jean de Luxembourg fut fort troublé, quand il vint à sa cognoissance, à cause de ce que ledit Anthoine estoit cousin germain de madame Ieanne de Bethune sa femme, fille du Vicomte de Meaulx: & print grande indignation contre ceux de Laon.

De l'an mille cccc. xxxj.

Comment les gens de messire Jean de Luxembourg prindrent le fort de saint Martin, auquel ils furent tous morts & prins.



N l'an dessusdit: c'est à sçauoir au commencement de cest an mille cccc. xxxj. s'assemblerent aucuns capitaines de messire Jean de Luxembourg Comte de Leigny: c'est à sçauoir messire de Lalaing, Bertrand de Manicain, Enguerrant de Cresquy, Enguerrannet de Gribanual & aucuns autres accompagnez de cccc. combattans ou enuiron des frontieres de la marche de Laonnois. Si s'en allerent tous ensemble iusques au fort de l'abbaye de saint Vincent lez Laon, où alors se tenoient aucuns François: & entrerent dedans par subtilité auant qu'ils fussent apperceux & là commencerent à faire vn tresgrand cry: auquel cry s'esueillerent ceux qui leans estoient en vne forte porte, & vigoureusement se meirent à deffence: durant lequel temps iceluy effroy fut sceu dedans la cité de Laon par le seigneur de Pennesac, qui estoit dedans. Lequel s'aualla pour aller querir secours dedans Laon, lequel secours il amena: pourquoy sans delay les gens d'armes avec le tout iré de sçauoir tels voisins pres de luy, se habillerent en grand nombre, & issirent incontinent hors de leur cité pour ayder & secourir leurs gens qui (comme dit est) estoient dedans la forte porte, où ils se deffendoient contre leurs ennemis: desquels vne partie attendoient à piller les biens de ladicte abbaye, & aucuns lieux, & n'auoient point regard à poursuiuir premier, ne mettre à fin leur emprise, ne aussi aux perils qui leur en pouoient aduenir. Si furent tout soudainement enuahis des dessusdits gens d'armes d'un cōmun accord, & tresapremement cōbattuz. Et en conclusion furent mis à grand meschief & à desconfiture, & y en mourut sur la place soixante des plus notables: entre lesquels y furent morts Bertrand de Manicain, & Enguerrannet de Gribanual: lequel Enguerrannet offrant grand finance pour sa rançon ne fut à ce receu, pource que lesdictes communes auoient sur luy grand haine, pour la diuerse & desordonnée guerre qu'il leur auoit long temps parauant faicte. Et messire Jean de Lalaing fut prins prisonnier, & eut la vie sauue par le moyen d'un gentil-galland de la garnison nommé Archanciel, qui estoit bien aymé desdictes communes: avec lequel messire Symon fut prins Enguerrant de Cresquy, & aucuns autres en petit nombre: & le surplus sçachant ceste male aduanture, se retrahirent es lieux dont ils estoient venus: pour laquelle besongne ainsi aduenue, le dessusdit messire Jean de Luxembourg eut au cuer tresgrand tristesse non pas sans cause: car il perdit en ceste destrouffe grand partie de ses plus vaillans hommes de guerre: & y fut aussi mort le frere dudit seigneur de Pennesac nommé Iamet.

En

En ce temps fut conquis le fort chastel de Rambure par les François: & le print par eschelles d'emblée vn nommé Charles des Marests, qui estoit au seigneur de Rambures prisonnier en Angleterre: auquel ledit chastel appartenoit. Lequel auoit en sa garde pour la partie du Roy Henry messire Ferry de Mailly. Et fut par le moyen de ceste prinse grand entrée pour les François au pays de Viemeu en la Marche à l'environ, comme cy apres sera declairé.

Comment Pothon de sainte Treille & messire Loys de Vaucourt furent prins des Anglois,

En l'an dessusdit le Mareschal de Boufach, Pothon de sainte Treille, messire Loys de Vaucourt & aucuns autres capitaines tenans le party du Roy Charles, accompagnez de huit cens combattans ou environ, se partirent de la ville de Beauuais pour aller querir leurs aduentures & fourrer le pays enuers Gournay en Normandie. Avec lesquels y estoit vn que les François nommoient Pasturel: & le vouloient exaucer en renommée, comme & par telle maniere comme par auant auoit esté Ieanne la Pucelle. Si fut sceu leur entreprise & rapportée au Comte de Varuich, lequel en grand diligence assembla iusques à six cens combattans: & cheuaucha en tirant de Gournay à Beauuais, & rencontra ses ennemis qui point ne se doubtoient de sa venue aupres d'une ville nommée Gournay: lesquels de luy & de ses Anglois furent asprement assaillis, & en fin sans ce que par eux fut faite grand deffence, furent desconfits & mis en desroy. Et furent prins de premiere venue Pothon de sainte Treille, messire Loys de Vaucourt, & avec eux soixante combattans ou environ, & les autres reserué huit ou dix, qui furent morts se sauuerent avec ledit Mareschal en retournant à Beauuais. Aupres duquel lieu furent par iceux Anglois poursuiuis & rechassez moult viuement: & apres ledit Comte de Varuich r'assembla ses gens, & retourna à Gournay moult ioyeux de sa bonne aduenture, & depuis à Rouen deuers le Duc de Bethfort: duquel ils furent ioyeusement receuz.

Comment Maillotin de Bours, & messire Hector de Flauy se combattirent l'un contre l'autre en la ville d'Arras,

LE xx. iour du mois de Iuing en cest an, fut fait à Arras en la presence du Duc de Bourgogne vn champ d'armes, entrepris par auant de Maillotin de Bours appellant contre messire Hector de Flauy deffendant. Et estoit la querelle, pource que ledit Maillotin auoit accusé ledit messire Hector deuers ledit Duc de Bourgogne, en disant qu'il auoit volenté de soy rendre son ennemy, & se tourner du party du Roy Charles: & luy auoit requis qu'il s'en vouldist aller avecques luy, & que d'un commun accord preinsent Guy Guillebault, lequel estoit gouuerneur des finances d'iceluy Duc, ou quelque autre bon prisonnier pour payer leurs despens. Sur lequel rapport auoit esté chargé de par le dessusdit Duc audit Maillotin, que luy mesmes print ledit Hector, & l'amenast prisonnier en la ville d'Arras, ce qu'il feit: car luy receu le mandement dessusdit, fut accompagné de gens en nombre competent, & s'en alla en vn village empres Corbie nommé Bauray, si

le manda. Et ledit messire Hector vint deuers luy comme non sçachant que ledit rapport eut esté fait de luy. Si y vint à privée mesgnie: car ledit Maillotin faignoit qu'il vouloit parler audit messire Hector. Et quand ledit Hector fut venu deuers luy, tantost le print & fait prisonnier: & le mena audit lieu d'Arras, où il fut longue espace: Neantmoins par le pourchats de ses amis fut mené à Hesdin en la presence du Duc. Et aussi ledit Hector s'excusa moult fort de ce qu'on luy mettoit sus: disant entre les autres choses que ledit Maillotin mesmes l'auoit requis de pareil cas, dont il l'accusoit: toutesuoyes la besongne fut tant pourparlée entre les parties, que le Maillotin iecta son gage & messire Hector le leua par le congé du Prince. Si leur fut iour assigné au vingtiesme iour de Iuing (comme dit est) & y pouoit auoir enuiron quarante iours de iour. Si baillerent chacun bon & seur respondant de comparoir en personne audit iour: laquelle chose ils feirent, & pourtant en ce mesme iour enuiron deux heures vint ledit Duc de Bourgongne de son hostel d'Arras, grandement accompagné de sa cheualerie & autres nobles à son eschaffault, qui estoit fait pour luy tout propice sur le grand marché, contre le meillieu des lices qui par auant auoient esté faites au lieu accoustumé: dedans lequel eschauffault entrerent avec ledit Duc, le Comte de S. Pol, de Ligny & plusieurs autres notables cheualiers & escuyers. Si auoit dedans ledit parc deux pauillons tendus: & au dehors d'iceux deux grâdes chaires de bois pour les champions. Et estoit celuy de Maillotin au dextre lez du Duc, pource qu'il estoit appellant, & ledit messire Hector au fenestre. Lequel pauillon du dessusdit messire Hector estoit armoyé mout richement de seize manieres de blasons: c'est à sçauoir des costez, dont luy & ses ancestres estoient issus. Et dedans iceluy estoit figuré vn sepulchre, pource qu'iceluy messire Hector auoit esté fait cheualier au saint Sepulchre de Hierusalem. Si fut assez brief ensuiuant le dessusdit Maillotin appelé par le Roy d'armes, à venir comparoir en personne au iour qui luy estoit assigné: Lequel Maillotin enuiron vnze heures issit de son chastel accompagné du seigneur de Chargny, du seigneur de Humieres, & de messire Pierre Quieret seigneur de Ramencourt, avecques plusieurs autres gentils-hommes ses parens & amis: & feoir sur vn cheual couuert de ses armes, & si estoit armé de plain harnois le bacinet au chief, la visiere abbatue, tenant en l'vne de ses mains la lance, & en l'autre tenoit l'vne de ses espées, desquelles il en auoit deux: & si auoit vne grosse dague pendue à son costé au harnois, & menoiert deux des cheualiers dessusdits estans à pied leur cheual par le frain: & ainsi vint iusques à la barriere des lices: au dehors desquelles il fit le serment accoustumé en tel cas en la main de messire Jaques de Brimeu, qui à ce estoit commis & ordonné. Apres lequel serment luy fut la barriere ouuerte: si entra dedans luy & ses gens qui estoient tous à pied: A tout lesquels il falla presenter au Duc de Bourgongne deuant son eschauffault, & puis retourna à sa chaire où il descendit ius de son cheual: & entra en son pauillon pour luy reposer & attendre son aduersaire. Et avec luy entra aussi le seigneur de Chargny, qui l'introduisoit de ce qu'il auoit à faire & aucuns autres de ses plus priuez. Et assez brief ensuiuant le Roy d'Armes d'Arthois dessusdit appella messire Hector de Flauy, ainsi qu'il auoit fait l'autre: lequel messire Hector enuiron le quart d'vne heure apres issit hors de son

son hostel, & vint tout à cheual armé & embaïstonné comme auoit fait son aduersaire, iusques à la barriere des lices grandement accompagné de plusieurs gentils-hommes, entre lesquels estoient les deux enfans du Comte de saint Pol: C'est à sçauoir Loys & Thibault, & menoient tout à pied leurs cheuaux par le frain. Et les autres seigneurs suiuiuent derriere tous à pied: c'est à sçauoir le seigneur d'Antoing, le Vidafme d'Amiens, Iean de Flauy frere dudit messire Hector, Hue de Launoy, le seigneur de Chamy, le seigneur de Saueuses, messire Iean de Fossus, le seigneur de Creuecueur & tresgrand nombre d'autres notables cheualiers & escuyers: lesquels venus à icelle barriere, fut par ledit messire Hector fait le serment: & puis entra dedans, & s'alla presenter au dessusdit Duc de Bourgogne. Et apres retourna en sa chaire où il descendit de son cheual, & puis entra en son pauillon: si allerent assez tost apres tous deux deuant l'eschafault d'iceluy Duc & tout à pied, où ils feirent le serment sur le liure chacun de combattre sur bonne querelle, & apres retournerent en leurs lieux. Et adonques fut crié par le Roy d'Armes dessusdit que sur la hart tout homme vuidast les lices, sinon ceux qui estoient commis à les garder. Et lors on osta les chaires & pauillons, & fut crié de rechief qu'on laissast aller les champiōs, & qu'ils feissent leur deuoir. Si auoit esté ordonné de par le Prince que de chacune partie demourassent dedans les lices huit hommes de leurs plus prochains non armez, avecques les huit qui estoient commis pour les prendre ou leuer, quand ils auoient le commandement du iuge, & leurs cheuaux qui estoient couuers de leurs armes furent laissez aller. Apres lequel cry le dessusdit Maillotin de Bours qui estoit appellant, commença à marcher tout premier, & apres messire Hector vint contre luy chacun d'eux deux paumoyant leurs lances gentement, lesquels à l'approcher les iecterent l'un contre l'autre & point ne s'entre-atteignirent. Et incontinent monstrant signe de grand hardiesse approcherent l'un l'autre, & commencerent à combattre & pousser tresfort de leurs espées l'un sur l'autre: toutesfois en ce faisant messire Hector leua audit Maillotin la visiere de son basinet de coups d'espée par plusieurs fois, tant qu'on veoit son visage plainement: pourquoy le plus d'iceux là estans tenoient messire Hector estre au dessus de la querelle: neantmoins ledit Maillotin sans luy pour ce esbahir à toutes les fois le referma vistement, en frappant de son espée par dessus & en desmarchant vn pas. Durant lequel temps que les deux champions dessusdits monstrerent signe de grand hardiesse & vaillance l'un contre l'autre, fut dit de par le Duc de Bourgogne qu'on les print en ce point, laquelle chose fut faite sans delay par ceux qui estoient commis à ce faire, & n'auoient point tiré de sang l'un de l'autre. Si fut tantost ordonné que chacun d'eux retourna en son hostel: laquelle chose ils feirent & isirent hors des lices aussi tost l'un comme l'autre chacun par son lez. Et le lendemain chacun d'eux dînerent à la table du Duc, & estoit messire Hector au dextre lez: apres lequel dîner leur fut ordonné de par iceluy Duc & sur peine capitale, que iamais ne portassent dommage ne deshonneur l'un à l'autre ne à leurs amis, alliez & biens vueillans: & avec ce leur fait pardonner la malvueillance qu'ils auoient l'un à l'autre, & les fait toucher ensemble.

Comment le gens du Roy Charles voulurent prendre la ville de Corbie.


EN ce mesme temps s'assemblerent plusieurs des capitaines du Roy Charles: c'est à sçauoir le seigneur de Longueual, Anthoine de Chabannes, Blanchefort, Allain Geron & plusieurs autres. Si cheuaucherent tous ensemble avecques leurs gens vers la ville de Corbie, laquelle ils cuiderent prendre par soubdain assault: mais par la diligēce de l'Abbé dudit lieu, ladicte ville fut moult bien deffendue & ceux qui estoient dedans: & aussi ils furent confortez de Jean de Humieres, Auieux de Gribanual & aucuns autres gentils-hommes, qui estoient avec eux, & tant qu'en conclusion ils furent reboutez & perdirent de leurs gens. Et mesmement ledit Allain Geron fut nauré moult durement, & mis comme en peril de mort. Si furent ars à l'occasion d'eux vn tresbeaux faulxbourgs au lez vers Feulloy. Et apres se departirent & allerent fourrer le païs sur l'eaüe de Somme, & prindrent le chastel de Morcourt, & le Lyon qui estoit au seigneur de Longueual, & feirent de grans dommage au païs: mais en assez brief terme ils laisserent ladicte forteresse, & s'en retournerent és lieux dont ils estoient issus, pour doubte qu'ils ne fussent assiegez dedans. Lesquelles forteresses furent demolies & abbatues par l'ordonnance du Duc de Bourgongne.

Comment le seigneur de Barbazan meit siege deuant le chastel d'Anglure, que tenoient les gens du Duc de Bourgongne.

EN cest an le seigneur de Barbazan, qui le plus du tēps se tenoit avec le Duc de Bar és marches de Champaigne, meit le siege deuāt le chastel d'Anglure que tenoient les gens du Duc de Bourgongne: mais par continuation furent fort approchez & combattus, tant de canōs comme d'autre artillerie. Et entre-temps que ce se faisoit en furent les nouuelles portées au Duc de Bethfort, lequel par leurdit siege y enuoya le Côte d'Arondel, l'enfant de Varuich, le seigneur de l'Isle Adam, le seigneur de Chastillon, le seigneur de Bonneul & autres capitaines à tout seize cens combattans ou environ: lesquels par aucuns iours cheuaucherent tant qu'ils vindrent assez pres dudit lieu d'Anglure, où ils trouuerent le seigneur de Barbazan, lequel sçachant leur venue s'estoit desia retraits en vn lieu qu'il auoit fortifié assez à son aduantage. Si y eut entre les parties aucunes escarmouches, esquelles furent morts de seize à vingt hommes d'entre eux, & ledit seigneur de l'Isle Adam y fut blessé. Et pource que les Anglois & Bourgongnons veirent que bonnement & sans trop grand dangier ne pouoient combattre leurs ennemis, ils tirerent leurs gēs hors de la forteresse avec la dame du lieu, & meirent le feu dedans: & apres ce se retrahirent vers Paris, & és lieux dont ils s'estoient partis. Ledit seigneur de Barbazan auoit esté commis de par le Roy Charles de France gouuerneur & capitaine des païs, de Brie, de Laonnois & de Champaigne. Et auant qu'il assiegeast Anglure auoit conquis Norniuile en Laonnois, Voisines, & autres plusieurs places: & fut audit siege d'Anglure environ vn mois. Si estoient avec luy le seigneur de Conflans, messire Jean Bastard de Dampierre & grand nombre de communes. Et quād ce vint que les Anglois & Bourgongnons dessus nommez,

mez, vindrent pour leuer ledit siege à vne escarmouche que feirent les assiegez, gaignerent les François icelle bastille & forteresse, mais prestement fut conquise par les dessusdits Anglois : & pource fut elle mise en feu & en flambe & du tout demolie, comme dit est dessus.

Comment Ieanne la Pucelle fut condamnée à estre arse & mise à mort dedans la cité de Roüen.



Ensuit la condemnation qui fut faicte en la cité de Roüen contre Ieanne la Pucelle, comme il peut apparoir par lettres enuoyées de par le Roy d'Angleterre au Duc de Bourgogne, desquelles la coppie s'en-suit. Treschier & tresaimé oncle la feruente dilection que sçauons vous auoir (comme vray Catholique) à nostre mere sainte Eglise & l'exaltatiō de nostre sainte foy, raisonnement nous exhorte & admōnest de vous signifier & escrire ce qu'à l'honneur de nostredicte mere sainte Eglise, fortification de nostre foy & extirpations d'erreurs pestilencieuses, a esté en ceste nostre ville de Roüen fait nagueres solennellement. Il est assez commune renommée ja comme par tout diuulgée, comment celle femme qui se faisoit nommer Ieanne la Pucelle erronnée, s'estoit deux ans & plus contre la loy diuine & l'estat de son sexe femenin vestue en habit d'homme, chose à Dieu abhominable. Et en tel estat transportée deuers nostre ennemy capital & le vostre: auquel & à ceux de son party, gens d'Eglise, nobles & populaires, donna souuent à entendre que elle estoit enuoyée de par Dieu: en soy presumptueusement vantant, qu'elle auoit communication personnelle & visible avecques S. Michel & grande multitude d'anges & de saints de Paradis, comme S. Katherine & sainte Marguerite. Par lesquels faulx donné à entendre & l'esperance qu'elle promettoit de victoires futures, diuertit plusieurs cueurs d'hommes & de femmes de la verité, & les conuertit à fables & mensonges. Se vestit aussi d'armes appliquées pour chevaliers & escuyers, leua l'estandard. Et en trop grād outrage, orgueil & presumption demanda auoir & porter les tresnobles & excellentes armes de France qu'en partie obtint. Et les porta en plusieurs courses & assaulx, & ses freres, comme on dit, c'est à sçauoir vn escu à deux fleurs de lys d'or à champ d'azur, & vne espée la poincte en haut ferüe en vne couronne: en cest estat s'est mise aux champs, a conduit gens d'armes & de traict en exercite & grans compagnies pour faire & exercer cruautéz inhumaines en espendant le sang humain, en faisant seditions & commotions de peuple: l'induisant à pariuremens, rebellions superstitions & faulces creances: en perturbant toute vraye paix, & renouuellāt guerre mortelle en se souffrant honorer & reuerer de plusieurs, comme femme saintifiée: & autrement dānablement ouurant en diuers cas longs à exprimer, qui toutesfois ont esté en plusieurs lieux assez cogneuz, dont presque toute la Chrestienté a esté toute scādalisée: mais la diuine puissance ayant pitié de son peuple loyal, qui ne l'a lōguement voulu laisser en peril ne souffert demourer es vaines, perilleuses & nouvelles crudelitez, où ja legierement se mettoit: a voulu permettre sa grand misericorde & clemence, que ladicte femme ait esté prinse en vostre ost & siege que teniez lors de par nous deuant Compiengne, & mise par vostre bon moyen en nostre obeissance & domination: & pource que

dés lors feusmes requis par l'Euesque, au diocese duquel elle auoit esté prinse qu'icelle Ieāne notée & diffamée de crimes de leze majesté diuine, luy feissions deliurer, comme à son iuge ordinaire ecclesiastique. Nous tāt pour la reuerence de nostre mere sainte Eglise, de laquelle voulons les ordonnances preferer à noz propres faits & voulez comme raison est: comme aussi pour l'hōneur & exaltation de nostredicte sainte foy: luy feismes bailler ladicte Ieāne, afin de luy faire son procez: sans en vouloir estre prinse par les gens & officiers de nostre iustice seculiere aucune vengeance, ou punition ainsi que faire nous estoit raisonnablement licite: attendu les grans dommages & inconueniens, les horribles homicides & detestables cruautéz & autres maulx innumerables, qu'elle auoit commis à l'encontre de nostre seigneurie & loyal peuple obeissant. Lequel Euesque adioinct avecques luy le Vicaire de l'inquisiteur des erreurs & heresies: & appelé avecques eux grand & notable nōbre de solennels maistres & Docteurs en Theologie & droit Canon, commença par grande solennité & deüe grauité le procez d'icelle Ieāne. Et apres ce que luy & ledit Inquisiteur iuges en ceste partie eurent par plusieurs & diuerses iournées interrogué ladicte Ieāne, feirent les confessions & assercions d'icelle meuremēt examiner par lesdits maistres Docteurs. Et generallyment par toutes les facultez de nostre treschier & tresaymée fille l'Vniuersité de Paris: deuers laquelle lesdictes confessions, assercions, ont esté enuoyez: par l'opinion & deliberatiō desquels trouuerent lesdits iuges, icelle Ieāne superstitieuse, deuineresse de diables, blasphemeresse en Dieu: Et en ses saints & saintes schismastique & errant par moult de fors en la foy de Iesus-Christ. Et pour la reduire & ramener à l'vnité & cōmun de nostredicte mere sainte Eglise, la purger de ses horribles & pernicieux crimes & pechez, & guerir & preseruer son ame de perpetuelle peine & damnation, fut souuent & par bien long temps trescharitablement & doucement admonestée, à ce que tous erreurs fussent par elle reiectée & mises arriere: voulsist humblement retourner à la voye & droit sentier de verité, où autrement elle se mettoit en grand peril d'ame & de corps. Mais le tresperilleux & diuisé esprit d'orgueil & d'outrageuse presumption, qui tousiours s'efforce de vouloir empescher l'vnité & feurté des Chrestiens: occupa & detint tellement en ses liens le courage d'icelle Ieāne, que pour quelconque sainte doctrine ou conseil ne autre douce exhortation qu'on luy eut administrée, son cueur endurcy & obstiné ne se voulut humilier n'amolir: mais se vanloit souuent que toutes les choses qu'elle auoit faictes, estoient bien faictes: & les auoit faictes du commandement de Dieu & desdictes saintes vierges, qui visiblement festoient à elle apparues. Et qui pis est, ne recognoissoit ne ne vouloit recognoistre en terre fors Dieu seullement & les saints de Paradis, en refusant & debouttant le iugement de nostre saint Pere le Pape, du concile general & vniuerselle Eglise militante. Et voyans les iuges ecclesiastiques lesdits courage & propos, par tant & si longue espace de temps endurcy & obstiné, l'a feirēt mener deuant le clergié & le peuple illec assemblé en tresgrand multitude: en la presence desquels furent preschez, exposez & declarez solennellement & publiquement par vn notable maistre en Theologie à l'exaltaion de nostre foy, extirpation des erreurs & edification & amendement du peuple Chrestien. Et de

rechief

rechief fut charitablement admonestée de retourner à l'union de sainte Eglise, & de corriger ses fautes & erreurs en quoy elle estoit obstinée. Et en ce considéré, les iuges dessusdits procederent à prononcer la sentence contre elle en tel cas de droict introduicte & ordonnée. Mais avant que la sentence fut parlute, elle commença par semblant à muer son courage, disant qu'elle vouloit retourner à sainte Eglise: ce que volentiers & ioyeusement ouïrent les iuges & le clergie dessusdits qui à ce la receurent benignement, esperât par ce moyen son ame & son corps estre racheptez de perdition & tourmēt. Adōcques se submit à l'ordonnance de sainte Eglise, & ses erreurs & detestables crimes reuocqua de la bouche, & abiura publicquement signant de sa propre main la cedula de ladicte reuocuation & abiuratiō. Et par ainsi nostre piteuse mere sainte Eglise soy esiouissant sur la pecheresse faisant penitence, vueillant la brebis retrouver & recouurer par le desert festoit esgarée & foruoyée ramener avecques les autres, icelle Jeanne pour faire penitence condamna en chartre. Mais gueres ne fut illecques, que le feu de son orgueil qui sembloit estre estainct en icelle rembrasa en flambes pestillencieuses par les soufflemens de l'ennemy. Et tantost ladicte femme malheuree rencheut és erreurs & és rageries que par auāt auoit proferées, & depuis reuocquées & abiurées, comme dit est. Pour lesquelles causes selon ce que les iugemens & institutions de sainte Eglise l'ordonnerent, affin que doresnauant elle ne contaminast les autres membres de Iesus-Christ, elle fut de rechief preschée publicquement. Et comme elle fut rencheüe és crimes & fautes villaines par elle accoustumées, fut delaissee à la iustice seculiere, laquelle incontinent la condamna à estre bruslée. Et voyant son finement approcher, elle cogneut plainement & confessa que les esprits qu'elle disoit estre apparus à elle, souuentefois estoient mauuais & mensongiers, & que les promesses qu'iceux esprits luy auoient plusieursfois faictes de la deliurer estoient faulces: & ainsi se confessa par lesdits esprits auoir esté deceüe & demoquée. Si fut menée par ladicte iustice liée au vieil marché dedans Roüen, & là publicquement fut arse à la veüe de tout le peuple. Laquelle chose ainsi faicte le dessusdit Roy d'Angleterre signifia par les lettres, cōme dit est, au dessusdit Duc de Bourgongne, affin qu'icelle execution de iustice tāt par luy comme les autres Princes, fut publiée en plusieurs lieux: & que leurs gēs & subiects doresnauant fussent plus seurs & mieux aduertis de non auoir creance en telles ou semblables erreurs, qui auoient regné pour l'occasion de ladicte Pucelle.

Comment le Concile fut remis & ordonné à Basle, par la mort & induction de l'Empereur d'Allemagne.

EN cest an fut par nostre saint Pere le Pape & par l'Eglise vniuerselle constitué à tenir vn concille general en la ville de Basle: lequel auoit esté promeu à estre assemblé durant le Pape Martin. Laquelle ville de Basle est vne cité assez puissante & plantureuse de biens, située & assise sur la riuere du Rhin. Auquel lieu se commencerent à assembler les deputes de plusieurs estudes & nations: entre lesquels y vindrent en notable compagnie ceux de l'Vniuersité de Paris, les ambassadeurs de l'Empereur d'Allemagne & plusieurs Roys, Princes, Prelats & collieges en grand nombre. Si aduint

que le Pape Eugene voulut delayer de mettre iceluy concille iusques à an & demy ensuiuant, & le translater à Boulongne la Grasse, affin que les Gregois y peussent venir: mais pource que l'Empereur luy escriuist quelles lettres où en substance la teneur s'ensuit. Premièrement contenoient les lettres de l'Empereur, qu'il desiroit moult que le Concile de Basle ne fut dissipé ne retardé pour l'esperance des Grecs: car on auoit moult de fois labouré sans effect pour les attirer à l'vniõ de nostre mere sainte Eglise: mais conseilloit mieux d'arracher & extirper les heresies regnans. Item, car ceux du Concile auoient escript à ceux de Pragues appelez Houffes, qu'ils veinssent au present Concile: & l'Empereur leur en auoit escript pareillement, & pour y venir donné saufconduit. Et sembloit qu'ils auoient intention d'y venir: car ils auoient eu grand perte contre les Hongres, & si auoient esté repulsez par deux fois du Duc d'Autriche. Item pource que les Pragois sçauoient, que le saint Concile estoit principalement tenu pour destruire & abolir leurs heresies, pouoit on esperer que par information sans disputation on les conuertiroit à bonne creance. Item si aduenoit qu'ils ne se voulsissent consentir de condescendre à raison, ceux du Concile estãs de tous païs admõnesteroient ceux de leurs contrées, à ce qu'ils voulsissent destruire ces Pragois. Item pource qu'ils veullent approuuer leur secte par sainte escripture se on delaissoit le Concile, ils diroient qu'on ne sçauoit que respondre à leurs raisons, & que riens n'estoit du Concile. Et par ainsi s'enhardiroient en leurs faulses creances & peruerfes erreurs. Item par ce que renommée couroit, que le saint Concile estoit assemblé presentement pour reformer les meurs du peuple Chrestien: & aussi l'estat de l'Eglise. Si estoit à doubter que les gens lays qui moult parloient sur leur estat, diroient que si on assembloit, & puis que departist le Concile ainsi qu'on auoit ja fait à Pise & à Constances, que c'estoit sans vtilité & proffit: Et que ce n'estoit qu'une mocquerie & confusion. Item estoit le Concile commencé pour appaiser les dissensions qui par especial estoient en la foy entre clercs & lays: pourquoy ceux du Concile l'auoient ja escript, & mandé à aucune ville de venir au Concile. Et par especial aucunes villes en Saxongne, dont l'une ville: c'est à sçauoir Mag-debourg auoit bouté hors son Euesque avec le clergie, & autres festoiēt rebellez à leurs Euesque. Et pource qu'ils estoient enclins aux Pragois, estoit à doubter aucuns, que si le Concile se departist, que ceux cy & autres se mettroiēt avec iceux Pragois tant qu'à grãd peine on y pourroit remedier. Item iaçoit-ce que plusieurs Princes & villes situées & assises entour les Pragois, auoient fait trefues avecques iceux: toutesfois la greigneur partie se tenoit encore fermement à eux esperans sur la prouision du Concile: mais s'ils sçauoient le departement d'iceluy si feroient aussi trefues comme les autres, dont il s'ensuiueroit qu'ils se hardiroient avec les Pragois. Item auoit eu aduis sur le Concile de pacifier plusieurs Roys, Princes & autres, & en ce commencé à trouuer moyen de paix: mais si le Concile estoit separé, ceux Princes estoient taillez d'eux employer à guerroyer & continuer en guerre, & ne remainderoit nulle esperance d'assembler le Concile pour les seditions & cruautez qui aduiendroient: & ainsi seroient attargées plusieurs prouisions & moyens, seruans au proffit commun de la Chrestienté. Si aduiendroient grans esclandres & destructions, qui plus euidemment apper-

roient

roient qu'on ne les pourroit escrire. Lesquelles considerations declairées en l'epistre de l'Empereur, si estoit la cōclusion en icelle comme il s'enfuit. Pourquoy nous requérons à vostre saincteté, qu'incontinent escriuez au President & à ceux du sainct Concile qu'en nulle maniere ne se departent: mais bienheuremēt ils accomplissent ce qu'ils ont encommencé & ce pourquoy ils sont au nom de nostre seigneur assemblez, en rappelant & adnichillant s'aucunes choses auez escriptes au contraire. Et vueillez considerer que les heretiques armées accoissent, & que si vous ne les faictes descharger à l'Eglise, & remettre au premier estat, on n'y pourra remedier par nulle puissance, par nul conseil ne par nul engin. Et certainement ceux qui vous ont conseillé le departement du Concile, n'entendoient mie ses griefs maulx qui en pourroient naistre. Pleust à Dieu qu'ils assauourassent & entendissent la fin comme l'attente, & retargement en ce cas soit moult perilleux & nullement à souffrir. Et se on doubtoit, que par aduantage par les lays peut estre vsurpée aucune chose contre l'estat de l'Eglise, on fabuseroit, pource qu'ils ne doubtent iecter leur faulx en autrui lieu, champ ou fructs: Mais pour vray ses subtilitez de retarder le sainct Concile, feront forcer les lays contre l'Eglise & clergie: laquelle chose on pourroit par bonne maniere destourner: c'est à sçauoir par entretenir le Concile, en quoy les lays seroient refrenez, quand ils verroient que les clergiez n'entendroient seulement au singulier profit. Item deuez considerer qu'il est à supposer, que sainct Concile à se departement ne se voudra nullement consentir, & les suiuroit la plus grād partie des Roys, Princes, Prelats & communes. Et vostre saincteté qui iusques à maintenant a esté de bonne reputation en sainte Eglise & sans tache, cherra par cestes euures en suspicion, ou rouil. Et par ce departemēt sans realle cause, corromperez vostre innocēce: car on pourra dire que vous nourrissez les heresies & occasions en terre entre les Chrestiens, de perseuerance de mauuaises meurs & de pechez au peuple. Pourquoy est à doubter grandement inobedience, esclandre & discretion en l'Eglise de Dieu: car aucuns vous imposeront que vous auez dōné matiere & occasion de ces choses. Et est à presumer qu'on trouuera assez de ceux qui s'accorderont à ce. Item se vostre saincteté vouloit en propre personne estre present, au sainct Concile, ce seroit bon & vtile: mais s'il ne pouoit estre, si commandez hastiuement qu'il soit entretenu ainsi qu'il est commencé: car ces choses qui touchent sang, & ne peuuent estre sans blessure de Chrestienté, ne quierent & ne demandent nul retardement. Item se vostre saincteté desire au temps aduenir à entendre au fait des Gregeois ou autre choses, lesquelles ne quierent mie si grand haste. Et pourra bien estre celebré vn autre Concile, qui sera chose aduenāt & plus acceptable que ne seroit pour le present le ralongement de cestuy Concile: car il est bien à doubter que se ce Concile se depart, qu'on ne pourra faire nulle assemblée dedans vn an & demy pour les inconueniens qui aduiendroient. Item toutes lesquelles choses vueillez vostre saincteté diligemment considerer, si que ledit Concile soit tātost restauré. Et vueillez nostre admonition retenir paternellement & debonnairement: car à ce nous contrainct nostre conscience & noz dernieres necessitez, en quoy nous voyōs estre mise l'Eglise de Dieu, & aussi nostre magnificēce ne voudroit point volentiers que de ce nasquist suspicion contre vostre saincteté: sic comme plus

clerement vous donnerons à cognoistre, quand nous serons par deuers vous, ce que nous esperons que serons briefuement. Lesquelles considerations dessus touchées par nostredit saint Pere, il restaura & restablit le saint Concile dessusdit, où se rassemblerent plusieurs seigneurs ecclesiastiques & seculiers ambassadeurs d'Estudes, Prelats & Princes en grand nōbre & en grand multitude.

Comment le Duc de Bar vint en la Comté de Vaudemont pour la conquerre à force.



Rest verité qu'au temps & à l'occasion de la guerre ja pieça esmeüe, & dont en autre lieu est faicte mention entre René Duc de Bar, & Anthoine de Lorraine Comte de Vaudemont son ennemy fait tresgrande assemblée de gens d'armes, tāt des Duchez de Bar & de Lorraine comme des païs d'Allemaigne & de plusieurs autres lieux, iusques au nōbre de six mille combattans ou enuiron: desquels estoient les principaux les Comtes de Salines, de Saliuines & de l'Image, l'Euesque de Mets, messire Thibault de Barbey & aucuns autres nobles hommes & de grand estat. Et si estoit avecques eux ce gentil & renommé cheualier le seigneur de Barbazan, au plaisir & induction duquel ou aumoins en la plus grand partie, le dessusdit Duc de Bar cōduisoit son armée & exercite, pource qu'il estoit expert, subtil & renommé en fait de guerre: lesquels grandement aornez & pourueuz de grand nombre de charroy, viures, artilleries & autres habillemens de guerre furent par ledit Duc capitaine conduits & menez deuant la ville de Vaudemont, chief lieu & chief de ladicte Comté, laquelle fut en assez fort lieu: avecques ce estoit biē réparée & pourueüe pour attendre guerre tant de viures & d'artilleries comme de gens & autres choses necessaires, pource que par auant ledit Comte estoit assez aduerty pour la venue de ses ennemis. Et y auoit en son lieu constitué capitaine de ladicte ville vn nommé Gerard de Passenchault Baillif d'icelle Comté, & Henry de Fouquencourt: lesquels deux feirent bonne diligence de defendre, & resister contre leurs aduersaires. Neantmoins ils furent en assez brief terme assiegez & enuironnez de toutes parts, par ce que leursdits aduersaires estoient en tresgrand nombre au regard d'eux, & ne les pouoiēt de ce destourber. Et d'autre part lesdits assiegeans coururent, rauirent & degasterent par feu & par espée la plus grand partie de la Comté de Vaudemont, dont grandement despleut audit Comte: mais à present luy conuenoit souffrir & endurer, pource qu'il n'estoit mie assez puissant pour y remedier. Si garnist les fortresses qui estoient en son obeissance de ce qu'il auoit de gens, & si conclud qu'il se retrairait deuers le Duc Philippe de Bourgogne, duquel il auoit tousiours tenu le party, pour luy requerre humblement qu'il luy vouldist blailler ayde de ses gēs, affin qu'il peut deliurer ladicte ville de ses ennemis: laquelle estoit assiegée, cōme dit est: lequel Duc il trouua en son païs de Flādrès. Et apres quil luy eut racompté ses affaires & la grande necessité en laquelle estoit la dessusdicte ville de Vaudemont, ledit Duc de Bourgogne luy fait responce que de sa requeste il parleroit volentiers à son conseil, & luy feroit briefuement responce & la meilleur ayde que bonnemēt pourroit. Et alors estoit venu des parties de Bourgogne par deuers ledit Duc, n'auoit point encores gramment, messire Anthoine

Arthois de Toulougon Mareschal de Bourgongne, & aucuns autres notables personnes enuoyez d'iceluy païs, pour remonstrier audit Duc les grans affaires qui estoient en sondit païs de Bourgongne par le moyen des François & Bourbonnois ses ennemis, qui chacun iour incessamment faisoient esdictes parties tresgrandes occisions & dommages par feu & par espée, & auoient desia conquis plusieurs bonnes villes & forteresses au grand dommage & preiudice desdits païs: & estoient bien en volenté de plus auant conquerre, se par luy n'y estoit pourueu: requerant à iceluy treshumblement qu'il luy pleust pour la saluation de ses païs, à eux faire ayde de ses capitaines de Picardie accompagnez de certain nombre de gens d'armes, & par especial des gens de trait: lesquels (comme ils disoient) leur estoient moult necessaires. Sur lesquelles deux requestes dessusdictes, ledit Duc assemblea plusieurs fois avecques luy ceux de son conseil pour auoir aduis, comment il pourroit besongner sur les affaires dessusdictes. Si furent lesdictes besongnes moult debattues: & luy remonstroient on comment les François ses ennemis estoient d'autre partie tout à l'enuiron des marches de Picardie, prests & desirans d'entrer en son païs d'Arthois: disant que s'il se deffournissoit de ses Picards & seldits ennemis le scauoient, ils luy pourroient porter vn tresgrand preiudice. Nonobstant toutesfois tous les perils qui s'ensuiuoient ou pourroient ensuiuir, fut en fin conclud pour le mieux faire qu'on bailleroit audit Mareschal certain nombre de combattans iusques à mille ou à douze cens: lesquels seroient conduits & menez par aucuns chiefs de la marche de Picardie au dessoubz dudit Mareschal à tout les dessusdits: & ceux qu'ils pourroient auoir en Bourgongne, feroit au Comte de Vaudemont le plus grand ayde & secours qu'il pourroit. Apres laquelle conclusion fut aduisé quelles gens on pourroit prendre pour conduire ceste entreprinse: mais il y eut peu de gens d'estat qui en voulsissent entreprendre la charge, pource que c'estoit loing & en païs, où leurs ennemis estoient forts: & s'attendoient estre petitement payez de leurs gaiges, ainsi que passé long temps on auoit accoustumé de faire. Neantmoins le dessusdit Mareschal de Bourgongne, le Cōte de Vaudemont, & aucuns autres de leurs marches qui auoient lesdictes besongnes de Picardie, conclurent ensemble qu'ils prendroient tels gens qu'ils pourroient auoir. Et adonc feirent parler à Matthieu de Humiers, à vn nommé Robinet de Huchechien, le Bastard de Fosseux, le Bastard de Neufuille, Garin Bastard de Brimeu & aucuns autres gentils-hommes & hommes d'armes de moyen estat: lesquels en leur païs n'auoient pas grans reuenues ne tels estats qu'ils desiroient à auoir, scauoir s'ils voudroient assembler gens de guerre pour aller avec eux, là où ils les meneroient pour querir leurs aduentures. Lesquels tantost tant pour les dons & promesses qui leur furent faictes par lesdits seigneurs comme par les moyens, d'autres nobles du païs feirent responce qu'ils iroient tresvolentiers. Si assemblerent à l'entrée de May en plusieurs lieux ce qu'ils peurent auoir de gens, iusques au nombre de mille à douze cens combattans: & eurent congé & mandement patent de par le Duc de Bourgongne d'assembler & entretenir par certaine espace de temps les dessusdits, desquels la plus grand partie estoient pauvres cōpaignons, qui de long temps auoient accoustumé à viure d'auantage & à tenir les champs tant en leur marche qu'ailleurs. Et pource on ne faisoit point grand force s'ils

ſ'en alloient dehors, & auſſi ſils ne retournoient en long temps: toutesfois il en y auoit la plus grand partie de roides, vigoureux & bien vſitez en fait de guerre. Et apres qu'ils furent assemblez en pluſieurs compagnies, ils ſe tirerent vers le paÿs de Cambreſis, & paſſerent à monſtre à vn grand village nommé Solames, appartenant à l'Abbé de ſainct Denys en France. Et de là cheuaucherent ledit Mareſchal & aucuns autres ſeigneur de Bourgongne iuſques à Rethel, où ils receurent aucun payement pour leurs gaiges, & par ſainct Menehault ſ'en retournerent en Bourgongne, où ils furent aucun petit de temps, en attendant que l'armée des Bourgongnons fut preſte. Et entre-temps que toutes ces assemblees ſe faiſoient, le deſſusdit Duc de Bar à tout treſgrande puiſſance de gens eſtoit (comme deſſus eſt dit) au ſiege deuant la ville de Vaudemont: & icelle par l'eſpace de trois mois continuels par pluſieurs & diuerſes manieres, auoit treſfort combattue & adommagée de ſes engins: & tant que les aſſiegez auoient treſgrand neceſſité de grieſs affaires. Mais par ce qu'ils eſperoient auoir aucun brief ſecours par le moyen du Comte leur ſeigneur: duquel ils oyoient ſouuent nouuelles par meſſages ſecrets, ils en portoient plus patientement leurs aduerſitez. Et par le moyen & conduicte des deux chiefs deſſus nommez, feirent ſi treſbonne diligence d'eux deſſendre, que durant ledit ſiege ne peurent ne deurent de leurdit ſeigneur eſtre reprochez d'aucune negligence.

Comment le Duc de Bar qui auoit aſſiegé la ville de Vaudemont, fut combattu du Comte de Vaudemont & deſconfit par luy & ſes aydans.



Tem apres que le Mareſchal de Bourgongne eut fait ſon amas & assemblee és paÿs de Bourgongne & à l'enuiron, il ſe tira à tout iceux vers Langres. Et de là à tout les Bourgongnons & Picards print ſon chemin deuers le paÿs de Barrois, où ſ'assembla avecques luy le Cōte de Vaudemont avecques tout ce qu'il peut auoir de gens: & quand ils furent tous mis en vn ſeul oſt, où ils pouoient eſtre enuiron quatre mille combattans: & deſquels eſtoient les principaux le deſſusdit Anthoine de Thoulongon Mareſchal de Bourgongne, le Comte de Vaudemōt, le ſeigneur d'Auter, Gerard de Marigny, le Comte de Fribourg, le ſeigneur de Merebeau, le ſeigneur de Sez, le ſeigneur de Roland, meſſire Ymber Mareſchal Sauoyen, le Baſtard de Vergy, Matthieu de Humieres nepueu du deuantdit ſeignr d'Antoing, meſſire Iean de Cardonne ſeigneur de Bichācourt, Boort de Bazentin & vn gentil cheualier Anglois nommé meſſire Iean Ladan, & meſſire Thomas Gergerā. Et eſtoit ledit ſire Iean capitaine de Montigny le Roy, & auoit avecques luy ſix vingts combattans ou enuiron, avecques pluſieurs notables gentils-hommes d'armes experts & renommez en faits de guerre: & par bonne ordonnance cōmencerent à cheuaucher parmy le paÿs de Barrois, & auoient avecques eux de ſeize à vingt chars & charrettes chargez de viures, canons, artilleries & autres beſongnes neceſſaires à guerre. Auquel paÿs de Barrois ils feirent bouter les feux en pluſieurs lieux: & ainſi en degaſtant paÿs vindrent loger à vn gros village nommé Sandacourt ſept lieües pres de leurs ennemis, & y arriuerent vn ſamedy au ſoir. Et le lendemain qui fut le dimenche pourtant qu'ils attendoient

doient à estre combattus de leurs ennemis, se meirent en ordonnance de bataille & y furent la plus grand partie du iour: & auoiēt leurs archiers chacun vn pieu aguisé, fiché deuant eux. Et pource que leursdits ennemis ne vindrēt point ce iour, ils se retrahirent vers les vespres au village dessusdit pour eux rafreschir. Et là tous les capitaines se meirent ensemble pour auoir aduis quelle chose leur estoit bonne à faire: si fut conclud pource que bonnement ne pouoint aller iusques à leurs ennemis pour le dangier des chemins, qui estoient trop estroits & hayez en plusieurs lieux. Et avec ce qu'ils n'estoient point en nombre comptant au regard de leursdits aduersaires. Si n'auoiēt point prouisiō de viures pour illec seiourner, s'en retournerent en degastant ledit païs de Barrois en Bourgogne: & là de rechief feroient plus grand assemblée de gens & d'autres choses à ce conuenables, pour en brief combattre leurs ennemis: laquelle conclusion desplaueut moult à iceluy Comte de Vaudemont, mais il luy conuint souffrir, car il n'en pouoit auoir autre chose. Si fut de par les capitaines ordōné à tout trousser le lundy au matin, qui estoit le iour S. Martin d'Esté. Et ainsi qu'ils festoient mis à chemin pour eux retourner, comme dit est, le Duc de Bar & toute sa puissance qui bien sçauoit leur venue, se departit de son siege pour venir trouuer & combattre ses ennemis deuant qu'ils veinssent iusques à luy: & laissa à son dit siege aucuns de ses gens pour garder que les assiegez ne se departissent, si cheuaucherēt en tresbonne ordonnance grande espace: & pouoit biē auoir six mille cōbattās gens de grand parage des mettes de Barrois & de Lorraine, & des Allemaignes: auquel chemin faisant les coureurs q̄ ledit Mareschal & sesdits capitaines auoiēt mis vers leurs ennemis, ruerēt ius & prindrēt aucuns de la partie dudit Duc, parquoy ils furent aduertis de la poursuite d'iceluy. Si le noncerent en brief à iceux capitaines, lesquels en grād diligence se preparerent & meirent en grand ordonnance de bataille, la plus grand partie par le conseil du dessusdit cheualier Anglois. Si furent mis les archiers & front en vne partie sur les æsles, & fischerent leurs pieux deuant eux. Si vouloient estre les hommes d'armes de Bourgongne à cheual: mais les Picards & Anglois ne le vouloient pas souffrir. Et en fin d'un commun accord fut ordonné que tout hōme de quelque estat qu'il fut, descenderoient à pied: & qui autrement le feroit, il seroit mis à mort. Et furent les cheuaux avecques les chars & charrettes mis par tresbon arroy derriere la bastille, affin que leursdits ennemis ne peussent estre rompuz ou enuahis par derriere. Et entre-temps que ce se faisoit, le Duc de Bar & les siens approcherent tresfort, tant qu'ils furent à vn petit demy quart de lieüe pres des dessusdits. Si leur enuoya par aucuns de ses heraulx & trompettes noncer, qu'ils l'attēdissent & qu'il les combattroit. Ausquels fut faicte responce par les capitaines deuant-dits, qu'il estoiet prest & qu'ils ne desiroient que sa venue. Si s'en retournerent deuers ledit Duc dire leur responce: lequel s'approcha de ses ennemis à vn trait d'arbalestre pres ou enuiron, iaçoit que le seigneur de Barbazan luy cōseillast par plusieurs fois qu'il ne combattit mie sesdits ennemis à iour nommé: mais les affamast & contraignist de partir de ses païs par autres manieres. Et luy mettoit au deuant plusieurs besongnes & raisons, lesquelles il ne voulut point croire: mais se fioit au grad nobre de gens qu'il auoit avec luy: desquels la plus grand partie n'estoient point accoustumez ne vsitez en fait de guerre, ainsi qu'estoient

les Bourgongnons, Picards & Anglois leurs aduersaires & ennemis. Neantmoins iceluy Duc feit moult noblement ordonner ses batailles en partie par le conseil dudit seigneur de Barbazan : & auoit moult grand desir d'assembler avec les ennemis : si estoient en sa compagnie trespou de gens de traict. Apres lesquelles ordonnances furent faits plusieurs nouveaux cheualiers d'icelle partie. Et d'autre part le mareschal de Bourgongne, le Comte de Vaudemont & ceux qui estoient avecques eux, feirent par deuant leur bataille dresser sur le fons deux queües de vin qu'ils auoient amené, & meirent auant pain & autres viures, qui furent deliurez & abandonnez à leurs gens. Si beurent & mangerent chacun en droit soy de ce qu'ils peurent auoir : & feirent paix & vnion entre aucuns qui auoient hayne l'un à l'autre. Et apres feirent asseoir aucuns canons & couleurines sur les deux bouts, & au meillieu de leurs batailles, & en ceste maniere furent l'un deuant l'autre deux heures. Auquel temps comme ie fuz informé vint deuant leurdictes batailles & assez pres de leurdicté bataille vn cerf, lequel en soy arrestant tout quoy frappa par trois fois du pied de deuant contre la terre : aduifa tout au long icelle bataille, & puis retourna & s'en alla ferir tout au trauers de la bataille des Barrois. Si fut lors apres ledit cerf faite vne tresgrand huée. Et adonques de la partie des Bourgongnons & des Picards furent faits nouveaux cheualiers, Mathieu de Humieres, Gerard de Marnigny & son fils avecques aucuns autres. Durant lequel temps ledit Comte de Vaudemont cheuaucha sur vn petit cheual tout au long de la bataille, en remonstrant amiablement à tous ceux là estans qu'ils se combattissent seurement & de bon courage : disant qu'il prenoit sur sa damnation que sa querelle estoit bonne & iuste, & que le Duc de Bar le vouloit sans cause desheriter : & si auoit toujours tenu le party des Ducs Iean & Philippe de Bourgongne. Pour laquelle remonstrance generallyment tous les Bourgongnons & Picards eurent au cuer tresgrand liesse. Si fut conclud de ceste partie qu'ils attendroient leurs aduersaires & ennemis au lieu, où ils estoient, & ne iroient point assaillir : & d'autre part le dessusdit Duc de Bar & ses capitaines qui desia auoient ordonné leurs batailles la plus grand partie à pied, voyans que leurs ennemis ne se bougeoient de leur place, conclurent qu'ils les iroient assaillir & commencerent à marcher auant : & leurs aduersaires & ennemis se tenoient tous cois sans mot dire. Et quand ce vint que les Barrois furent bien pres d'eux, comme à douze ou seize diestres, ils bouterent le feu tout à vne fois dedans leurs canons & couleurines dessusdictes : & avec ce esleuerent vn tresgrad cry : pour la doubte desquels canons grad partie d'iceux Barrois se plongerent contre terre & furent fort effroyez. Et adonc en assez brief terme comencerent à assembler en bataille de toutes parts, & pouoit desia bien estre vnze heures de iour. Si tiroient les archiers picards par moult fiere & tresmerueilleuse vigueur contre leurs aduersaires & ennemis : duquel traict ils en occirent & naurerent moult grand nombre. Si dura cestedicte meslée trescruelle enuiron le temps & espace d'un quart d'heure, & les deux parties combattirent l'un contre l'autre en plusieurs & diuers lieux : mais tantost apres ceux de la partie du Duc de Bar se commencerent à eux desroyer & en fuir en plusieurs & diuers lieux vers leurs marches : & leurs ennemis ce voyant se ferirent en eux de grand courage, & par especial les archiers Picards si les separerent,

rent, occirent & naurerent terriblement: & en briefue conclusion les tournerent à grand desconfiture, & les meirent à grand meschief. Auquel desroy fut prins iceluy Duc de Bar, par vn nommé Martin Fouiers, qui estoit au Comte de Conuersan seigneur d'Anghien, & en eut l'honneur & profit: jaçoit que aucuns dirent qu'il ne le print pas de sa main. Auecques lequel Duc furent prins l'Euesque de Mets, Iean de Rodemaque, messire Eurard de Salebery, le Vicomte de Arcy, le seigneur de Rodemaque, messire Collard de Saussy, messire Villin de la Tour, & plusieurs autres iusques au nombre de deux cens ou enuiron. Et si en demoura morts sur la place, & en la chasse qui dura biē deux lieues de vingt-cinq cens à trois mille. Desquels furent les principaux les Comtes de Saumes & de Salmene, de Limage: Allemans, le seigneur de Barbazan, messire Thibault de Barbey, les deux freres de l'Euesque de Mets, George de Banastre & ses deux freres, Iean de Heraumont & autres iusques au nombre dessusdit, dont la plus grand partie estoient gentils-hommes. Apres laquelle desconfiture qui dura bien de deux à trois heures, deuant qu'ils retournassent de ladicte chasse: les seigneurs de la partie de Bourgogne auecques le dessusdit Comte de Vaudemont & ses gens, se r'assemblerent ensemble & regracierent humblement leur createur de leur bonne victoire. Et n'auoient perdu morts sur la place qu'environ quarante hommes, dont messire Gerard de Marigny fut le principal. Et demourerent celle nuit sur le champ. Et fut ledit Mareschal de Bourgongne vn pou nauré au visage. Et aussi estoit le Duc de Bar dessus le nez. Et le lendemain se departirent & prindrent leur chemin pour aller en Bourgongne menans auecques eux leurs prisonniers.

Comment le ieune Roy Henry d'Angleterre vint à Paris à grand compaignie, pour estre consacré à Roy de France.

ENuiron l'issue du mois de Nouembre vint le ieune Roy Henry de Ponthoise à saint Denys en France, sur intention d'aller à Paris pour luy faire enoindre, sacrer & couronner Roy du Royaume de France. Si estoit auecques luy de la nation d'Angleterre, son oncle le Cardinal de Vinestre & le Cardinal d'Iorth son oncle, le Duc de Bethfort & le riche Duc d'Iorth, les Comtes de Varuich, de Salsebery, de Suffort: & aucuns autres notables cheualiers & escuyers de la nation de France, y estoient les Euesques de Theroüenne nommé messire Loys de Luxembourg, de Beauuais, maistre Pierre Cochon, de Noyon maistre Ieā de Mailly, de Paris & d'Eureux messire Iean bastard de saint Pol, messire Guy le Bouteillier, le seigneur de Courcelles, messire Gilles de Clamecy, messire Iaques Painel, messire Iean de Pressi, le seigneur de Passy, le bastard de Thian & aucuns autres. Si pouoit auoir ledit Roy Henry tant en sa cōpaignie comme au païs assez pres à l'environ, de deux à trois mille combattans pour la seureté de sa personne: & se partit de S. Denys pour aller à Paris enuiron neuf heures de matin. Et vindrent à l'encontre de luy iusques à la chappelle d'entre Paris & saint Denys, messire Simon Morier Preuost de Paris pour luy faire reuerence & honneur, & plusieurs autres tous vestuz de satin vermeil & chapperons de bleu. Auecques lesquels estoient grand nombre des plus notables Bourgeois de la ville de Paris vestus & affublez de

vermeil. Et apres qu'ils eurent faicte la reuerence, vindrent au deuant dudit Roy les neuf Preux à cheual, chacun armé des armes à luy appartenans. En apres vindrent le cheualier du Guet, le Preuost des marchans, avecques eux les officiers de la court tous vestus de pers & chapperons vermeils. Et vn petit apres ensuiuant vint maistre Philippe de Moruillier premier President en habit Royal, & tous les seigneurs de Parlement vestus de longs habits de vermeils. Et apres suiuoient les seigneurs de la chambre des comptes, les gens des finances, les maistres des requestes & les secretaires & auoient robbes vermeilles. Et ainsi comme ils venoient l'un apres l'autre chacun selon son estat, ils faisoient au Roy la reuerence & aux seigneurs estans avecques luy: & quand est du commun, il y en auoit sans nombre. Et quand le Roy vint à l'entrée de la porte S. Denys, les armes de la ville y estoient si grandes qu'en la nef d'icelles armes y auoit six hommes: l'un en guise d'un Euesque, le second l'université, le tiers les Bourgeois: & les trois autres estoient comme sergens: lesquels à l'entrée de ladicte porte presenterent au Roy trois cueurs vermeils, dont au premier auoit deux couloms, & au second de petis oiselets, qu'ils laisserent voller par dessus le chief du Roy: & le tiers cueur estoit plain de violettes & autres fleurs qu'ils ietterent sur les seigneurs. Et là tantost le Preuost des marchans & lesdits Escheuins apporterent vn ciel d'azur semé de fleurs de lys d'or, & le meirent & porterent tout parmy la ville par dessus le Roy. Si auoit au poncelet S. Denys vn eschaffault, sur lequel estoit comme vne maniere de bois, où estoient trois hommes sauages & vne femme, qui ne cesserent de combattre l'un contre l'autre tant que le Roy & les seigneurs fussent passez. Et auoit dessous ledit eschaffault vne fontaine iettant ypocras, & trois seraines dedans: & estoit ledit ypocras abandonné à chacun. Et depuis le Poncelet en tirant vers la seconde porte de la rue S. Denys, auoit personnaiges sans parler de la natiuité nostre Dame, de son mariage, & de l'adoration des trois Roys, des innocens & du bon homme qui semoit son blé: & furent ces personnages tresbien iouëz. Et sur la porte S. Denys fut iouëe la legende S. Denys, qui fut volentiers veüe des Anglois. En oultre deuant les Innocens auoit vne maniere de forest en la rue, dedans laquelle auoit vn cerf vif. Et quand le Roy passa deuant on feit courre ledit cerf, & des chiens & veneurs: apres fut grand piece chassé à force, & se vint rendre empres les pieds du cheual du Roy, lequel Roy luy feit sauuer la vie. Et à l'entrée de la porte du Chastelet, auoit encores vn eschaffault: sur lequel auoit en personnaige vn petit enfant en semblance du Roy vestu de fleurs de lys, deux couronnes sur son chief. Et à costé dextre estoit en son personnage le Duc de Bourgogne, & le Comte de Neuers qui luy presentoient l'escu de France: & au costé fenestre le Duc de Bethfort son oncle, & les Comtes de Varuich & de Salsebery, qui luy presentoient l'escu d'Angleterre. Et estoient tous vestus par personnages des cottes d'armes des dessusdits seigneurs: & de là s'en alla au Palais où luy furent monstrées les saintes Reliques, & à ceux qui estoient avecques luy: & puis fut mené en l'hostel des Tournelles pour prendre son repas. Et quand il eut disné, il alla veoir la Roynie sa grand mere à l'hostel de S. Pol. Et le lendemain fut mené au bois de Vincennes, où il fut iusques au quinzième iour du mois de Decembre qu'il retourna au Palais. Et le xvij. iour d'iceluy mois se partit de là a

tout

tout grand seigneurie tant de gens d'Eglise comme seculiers, & s'en vint en l'Eglise nostre Dame de Paris pour estre sacré : auquel lieu de nostre Dame de Paris auoit en la nef vn grand eschauffault de bois de quatre vingts pieds de long, & hault iusques au crucifix. Si montoit on dedans iceluy par la nef, & descendoit on par autre lieu dedans le cueur. Et fut ledit Roy sacré par le Cardinal de Vinestre qui chanta la Messe, dont l'Euesque de Paris ne fut point bien content : & dist qu'à luy appartenoit à faire iceluy office. Et quand ce vint à l'offertoire, ledit Roy offrit vin & pain ainsi qu'il est accoustumé de faire en tel cas : lequel vin estoit en vn grand pot d'argent doré : lequel pot fut reprins & osté de ladicte Eglise des officiers du Roy : dont grandement despleut aux chanoines d'icelle Eglise, pourtant qu'ils disoient ce à eux appartenir de droit. Si en feirent grand poursuite enuers iceluy Roy & son conseil, & en conclusion apres ce qu'il leur eut beaucoup cousté à faire ladicte poursuite, leur fut rendu & furent faictes en celuy iour toutes les besongnes appartenans audit sacre, & plus ensuiuant les coustumes d'Angleterre que de France : & tousiours les seigneurs cy dessus nommez, estoient au plus pres du Roy en ladicte Eglise chacun seruant de son office. Et apres que la Messe fut finée, le Roy retourna au Palais, & se seit & disna à la table de marbre enuiron le meillieu d'icelle. Et au costé de la chambre de Parlement à celle table, ledit Cardinal de Vinestre & maistre Pierre Chauchon Euesque de Beauuais, & maistre Iean de Mailly Euesque de Noyon comme Pers de France estoient ensuiuans. Et à l'autre costé les Côtes de Stanford, de Mortains & de Salsebery. Si estoit grand maistre d'hostel messire Iean bastard de saint Pol. Et avecques luy estoient deuant la viande messire Guy le Bouteillier, messire Gilles de Clamegy, & messire Iean de Pressy. Le seigneur de Courcelles fut pour ce iour grand Eschançon, & messire Iaques Painel fut pour ce iour grand Panetier, & vn cheualier Anglois nommé messire Vvatier de Hongrefort trecha deuant le Roy. Auquel disner furent presentez quatre entremets deuant la table : c'est à sçauoir, le premier d'vn image de nostre Dame & vn petit Roy couronné empres : le second fut vne fleur de lys couronnée d'or tenue de deux Anges : le tiers vne dame & vn paon, & le quart vne dame & vn cigne. Et quant est à parler des diuers mets de vins & de viandes dont on y fut seruy, ils seroient trop longs à racompter, car il en y eut sans nombre. Et pareillement y fut ioué de plusieurs instrumens de musique. Et le lendemain ensuiuant furent faictes de moult belles ioustes en l'hostel de saint Pol : desquelles ioustes emporterent le cry & eurent la voix des dames le Comte d'Arondel, & messire Iean bastard de saint Pol comme les mieux ioustans : & apres le dessudit Roy seiourna en ladicte ville de Paris aucuns iours, & puis peu de temps apres s'en retourna en la ville de Roüen.

Comment ceux que le Duc de Bar auoit laissez deuant Vaudemont se departirent apres la bataille dessusdicte.

Tem apres ce que la bataille du Duc de Bar fut du tout tournée à desconfiture, ainsi & par la maniere que plus à plain a esté declairée : les François qui estoient demourez deuant la ville de Vaudemont, furent assaz brief aduertiz par les suiuanz qui estoient eschappez d'icelle iournée de la

perte & maile aduenture que leurs gens auoient eüe : & pour ce tout soubdainement eurent si grand doubte & paour de leurs ennemis , que briefuement se departirent sans ordonnance en fuyant la plus grand partie vers leurs pays , ou là où ils peurent le mieux pour sauuer leurs vies : & laisserent audit siege tous leurs viures & habillemens de guerre qu'ils y auoient en garde , dont il y en auoit sans nombre . Pour laquelle esmeute & departement lesdits assiegez ce voyans , furent assez aduertis que la iournée auoit esté contre iceux Barrois : & pourtant treshastiument faillirent de pied & de cheual apres eux , si en prirent & occirent tresgrand nombre . Et avecques ce gaignerent infiniz biens , desquels ils furent tresgrandement enrichiz . Si fut tost apres publié parmy le pays de Barrois & de Lorraine la perte que auoit faicte leur seigneur le Duc de Bar , dont ils furent en grand doubte & eurent au cueur tresgrand tristesse . Et fut de ce iour en auant icelle bataille nommée la bataille de Villeman . Si estoit le lieu où elle fut faicte entre Barrois & Lorraine . Et le Comte de Vaudemont remercia le Mareschal de Bourgongne , & les seigneurs & gentils-hommes qui estoient avecques luy du seruice qu'ils luy auoient fait : & puis retourna en sadicte Comté . Et ledit Mareschal avecques tous les Bourgongnons & Picards dessusdits , s'en alla en Bourgongne & mena le dessusdit Duc de Bar à Dijon , où il fut mis en bonne seure garde .

Comment messire Jean de Luxembourg assemble gens, & s'en alla en Champaigne contre les Francois, où il conquist plusieurs forteresses & autres matieres.



V mois de Iuillet en l'an dessusdit messire Jean de Luxembourg Comte de Leigny , assemble iusques à mille combattans ou enuiron par l'ordonnance du Roy Henry & du Duc de Bourgongne : lesquels il conduisoit & mena au pays de Champaigne , & vers les Retelois pour combattre & subiuguer aucunes forteresses que tenoiēt les gens du Roy Charles en iceux pays & à l'enuiron , & que moult oppressoient ledit pays . Avec lequel de Luxembourg se meit le seigneur de Ternât , qui lors estoit accompagné de Rethelois . Et de premiere venue fait loger ses gens autour d'une forteresse nommée Guetron , en laquelle estoient de soixante à quatre-vingts combattans tenans le party du Roy Charles : lesquels assez brief terme quand ils apperceurent la force de leurs ennemis , furent moult esbahis & effraiez , & sans grand deffence laisserent prendre leur basse-court : & assez brief ensuiuant commencerent à parlementer , offrans de rendre ladicte forteresse & eux en aller sauf leurs corps & leurs biens . A laquelle offre ils ne peurent estre receuz , & leur fut dit qu'ils se rendissent à volenté . Et conclusion le capitaine fait traicter avec les commis dudit de Luxembourg par telle condition , que le quatriesme ou sixiesme demouroient à volenté . Apres lequel traicté conclud , & que les promesses d'iceluy entretenir furent faictes , le capitaine retourna dedans son fort : mais il ne dit pas à ses compagnons la verité dudit traicté : ains leur donna à entendre qu'ils s'en iroient tous saufs leurs vies . Et quand ce vint à liurer ladicte forteresse tous ceux là estans furent mis prisonniers . Et le lendemain par la sentence & commandement de messire Jean de Luxembourg , furent tous pendus & estranglez à plusieurs arbres reserué les quatre ou six dessusdits .

Et

Et fut le bourrel pour eux executer l'un de leurs compagnons. Si aduint à l'un d'iceux vne aduanture, qui bien fait à ramenteuoir : car depuis qu'il fut bouté ius de l'eschelle, la corde qui estoit attachée à l'arbre se ferit cōtre le menton d'iceluy, parquoy il ne se pouoit en haste estrangler : & entretant le bourrel en pendoit aucuns autres : durant lequel temps iceluy dessusdit fut aduisé d'aucuns gentils-hommes là estans, ausquels il en print grand pitié : & en y eut vn qui couppa là corde d'une gisarme & cheut à terre, & fut assez brief reuenue en sa bonne santé & memoire. Et depuis par iceux gentils-hommes fut faicte requeste audit de Luxembourg, que pour-Dieu & pour pitié il peust auoir la vie sauuee : lequel en fin l'accorda, & par ainsi il s'en alla franchement. Et en oultre apres que ledit messire Jean de Luxembourg eust faicte l'execution dessusdicte, il se partit de là à tout son armée : mais premier fait demolir ladicte forteresse de Guetron, & s'en alla deuant le fort de Tours en Parciens, où il fut par aucuns iours : durant lesquels ceux de dedans traicterent par condition, qu'ils rendroient ledit fort & s'en iroient sauf leurs vies sans emporter nuls de leurs biens reserué les canonnières, & ceux qui autresfois auoient fait serment pour la partie du Roy Henry : & en y eut d'aucuns penduz, & ladicte forteresse fut demolie de fons en comble. Et de là ledit messire Jean de Luxembourg s'en alla deuant Bahin, où estoit vn Capitaine nommé Barete, lequel en assez brief terme traicta avec ledit messire Jean de Luxembourg par tel si qu'en luy rendant ladicte ville luy & les siens s'en iroient sauf leurs vies, corps & biens : & par ainsi se partirent. Si vint en ce temps deuers messire Jean de Luxembourg pour luy faire ayde s'il en auoit besoing l'enfant de Varuich Anglois, & messire Gilles de Clamegy à tout quatre cens combattans : mais pourtant que les François n'estoient point ou pays de Champaigne ne à l'enuiron à puissance pour resister contre ledit de Luxembourg, les deux dessusdits s'en retournerent en assez brief terme à Meaulx en Brie, & es garnisons dont ils estoient venus. Et adonques de ce mesme voyage furent mises en obeissance de par le dessusdit messire Jean de Luxembourg plusieurs villes & forteresses, qui tenoient le party du Roy Charles avec celles dessus nommées, les vnes par traicté & les autres par force.

En ce temps le seigneur de l'Isle-Adam qui portoit l'ordre du Duc de Bourgogne, fut reconstitué Mareschal de France de par le Roy Henry d'Angleterre, & ceux de son conseil. Si assembla iusques au nombre de six cens combattans, dont il y auoit vne partie Anglois, & avec luy estoit messire Jean bastart de saint Pol, & vn sien frere, lesquels il conduisoit : & les mena iusques aupres de Laigny sur Marne, que tenoient les gens du Roy Charles : laquelle ville il cuida prendre par soudain assault, mais elle luy fut bien deffendue par ceux qui estoient dedans.

Comment le Duc d'Alençon print prisonnier le Chancelier de Bretagne.

EN cest an le Duc d'Alençon print le Chancelier du Duc de Bretagne son oncle, par ce qu'il ne luy voulut ayder de finace à son plaisir pour sa prinse de la bataille de Vernueil ou Perche : laquelle finance il vouloit auoir & recouurer dudit Chancelier. Si le mena en sa ville de Ponssay, mais assez brief ensuiuant ledit Duc de Bretagne de ce non con-


tent, assembla aucuns de ses Barons & grand puissance de gens d'armes, & avecques luy aucuns capitaines Anglois. Si alla assieger ladicte ville de Ponssay tout à l'environ : de laquelle ville le Duc d'Alençon s'estoit party pour la doubte de ses ennemis. Et y auoit laissé la Duchesse sa femme fille au Duc d'Orleans prisonnier en Angleterre. Lequel temps durant ladicte Duchesse gisoit d'enfant moult ennuyée en cuer de veoir telles tribulations. Si y fut ledit siege par certaine espace de temps, au bout duquel iceluy Duc d'Alençon tant pour ladicte femme comme sa ville & subiects, oster des dangiers dessusdits s'appaisa avecques sondit oncle : & luy rendit son Chancelier & autres prisonniers qu'il auoit. Et par ainsi se departit ledit siege. Ledit Chancelier de Bretagne fut prins en vne maison de plaisance, qu'il auoit empres Nantes. Et la cause de la prise fut pource que le Duc d'Alençon entendoit par ce moyen estre payé de certaine somme d'argent, que luy deuoit le dessusdit Duc de Bretagne son oncle.

Comment les Francois cuiderent prendre le Chastel de Roüen.

LE troisieme iour de Feurier en cest an par l'entreprinse du Marechal de Boufach, s'assemblerent le seigneur de Fontaines, messire Iean Foulquet, le seigneur de Mouy & plusieurs autres iusques au nombre de six cens combattans ou environ en la cité de Beauuais. Et s'en allerent iusques à vne lieüe pres de Roüen, & là se meirent en embusche dedas le bois. Et enuoya ledit Marechal secrettement vn gentil-homme nommé Richaruille, avec luy de cent à six vingts combattans tous de pied, excepté quatre ou cinq qui estoient sur petis cheuaux iusques au chastel de Roüen : dedans lequel iceluy Marechal par auant auoit fait moyens certains d'un Saquement nommé Pierre Audebeuf Biernois, qui tenoit le party des Anglois : mais par moyens auoit fait traicté, & accord avec luy de liurer ledit Chastel : laquelle chose il feit & entretint sa promesse quant à ce, car le dessusdit Richaruille & ceux qui estoient avecques luy, le trouuerent tout prest. Et de fait entrerēt tous dedans reserué deux ou trois qui garderent les cheuaux. Si conquirent & gaignerent tantost la plus grand partie dudit Chastel, & par especial la grosse tour qui estoit moult bien garnie. Dedans lequel chastel estoit couché le Comte d'Arondel & plusieurs Anglois : lesquels ou la plus grand partie se sauuerent au mieux qu'ils peurent par dessus la muraille, sinon aucuns qui se retrahirent vers la ville, & là se tindrent, & si y en eut aucuns morts & naurez par lesdits François. Et apres que les besongnes furent ainsi aduacées, le dessusdit Richaruille remonta assez tost à cheual, & retourna moult hastiuement où il auoit laissé ledit Marechal & ses gens : auquel il racompta tout l'estat & gouuernement de l'entreprinse dessusdicte, en leur disant qu'ils cheuauchassent songneusement & bien en haste pour secourir leurs gens : & que sans doubte en brief temps seroit le chastel tantost parconquis. Mais à brief dire pour chose qu'il sceust remonstrer, oncques ne peut tant faire qu'ils se voulsissent conclure ne mettre en voye pour y aller, jaçoit chose que le dessusdit Marechal & grand partie des plus notables de ceux qui estoient avecques luy, leur eussent promis de leur foy à leur departement, qu'ils les secourroient sans point de doubte, s'il aduenoit que ladicte entreprinse vint bien. Neantmoins ils n'en vouloient riens faire

faire : car quand ils furēt ainsi qu'à vne lieüe pres de Rouën, à toutes gens ils se commencerent à débattre l'un contre l'autre, pour auoir la plus grand part du butin lequel point n'estoit encores gaigné. Et à cause de ce retournerent sans aller plus auant, & laisserent leurs gens en ce dangier. Pourquoy quand le dessusdit Richaruille qui vaillamment auoit acheué son entreprinse, fut retourné, leur dist plusieurs grans iniures & reproches : lesquelles ils souffrirent assez patiemment. Et se departirent de là hastiuement. Si s'en retournerent à Beauuais & és autres lieux, dont ils estoient venus : lequel retour despleust moult grandement à iceluy de Richaruille, pourtant qu'il auoit esté meneur des dessusdits entrepreneurs. Et aussi feit il à aucuns autres qui y auoient de leurs prochains amis, pourtant ne demourerent ils mie qu'ils ne s'en retournassent audit lieu de Beauuais comme les autres. Et entretant les dessusdits qui estoient en iceluy chastel, contendoient de tout leur pouoir à debouter les Anglois leurs ennemis hors de la porte dudit chasteau, qu'ils tenoient vers les champs. Et quand ce vint vers le iour qu'ils n'oioient point de nouuelles de leurs gens, ils apperceurent bien qu'ils ne auroiēt point de secours, & qu'ils estoient frauldez de la promesse qui leur auoit esté faicte, si en furent moult esmerueillez & esbahis. Et d'autre part les Anglois s'assemblerent de tous costez en grand diligence, qui les assaillirent moult asprement & durement. Si vindrent avecques grand nombre de combattans de Rouën pour doubte qu'ils ne fussent suspicionnez d'iceux Anglois, qu'ils fussent fauorifables à iceux François : lesquels François voyant que bonnement n'estoiēt point assez puissans pour garder tout ce qu'ils auoient conquis : tout d'un commun accord vers ladicte tour à tout ce qu'ils pouoient auoir de viures, eux vueillans mettre là dedans & le tenir iusques à la mort, laquelle chose ils feirent : mais assez brief ensuiuant ils furent de toutes parts environnez, & tresfort combattus de plusieurs gros engins que lesdits Anglois feirent asseoir contre la grosse tour. Et tant en ce continuerēt, qu'elle fut moult endommagée en plusieurs lieux. Et avec ce ceux de dedans auoient assez petitement viures & autres choses à eux necessaires : pour lesquels affaires & aussi qu'ils n'auoient nulle esperance d'auoir secours, furent contraincts d'eux rendre en la vouldenté du Roy Henry, & de son conseil en la fin de douze iours apres la prise dessusdicte. Toutesfois auant qu'ils fussent conquis, ils feirent de grās dommages aux Anglois, par les engins & artilleries qu'ils auoient attraiēt en ladicte tour. Si furent tous prins prisonniers & mis en bonne garde. Et depuis brief ensuiuant en y eut cent cinquante qui eurent les testes couppees dedans la ville de Rouën, & le dessusdit Pierre Audebeuf Biernois fut escartellé & mis en lieux accoustumez. En ces iours le Duc de Bourgogne se partit de son païs d'Arthois à tout mille combattans ou environ, qui mena en son païs de Bourgogne : & là seiourna l'espace de trois iours ou environ pour visiter le païs qui moult estoit oppressé de ses ennemis. Si vindrent là deuers luy l'Archeuefque de Reims & autres notables ambassadeurs enuoyez de par le Roy Charles, pour traicter de paix entre icelles parties : mais en fin ne peurent en riens concorder, & s'en retournerent deuers ledit Roy Charles. Et apres que ledit Duc eut ordonné gouuernement en la marche de Bourgogne, il s'en retourna en Arthois, Flandres & Brabant.

Comment les Francois prindrent le chastel de Dommart en Ponthieu, & menerent le seigneur prisonnier.



V mois de Feurier les gens du Roy Charles en nombre de quatre vingts combattans ou enuiron : lesquels conduisoit vn noble cheualier nommé messire Regnault de Verseilles, & les auoit prins à Beauuais, à Bretueil, & autres lieux à l'enuiron, allerent passer l'eaüe de Some en vn petit bastel assez pres de Piquigny. Et de là furent conduits & menez iusques au chastel de Dommart en Ponthieu : lequel sans ce qu'ils fussent du guet apperceuz, ils prindrent eschelles & entrerent dedans. Si commencerent tantost à crier forteresse gaignée, & abbatre huis & fenestres en plusieurs lieux. Auquel cry & noise s'esueillerent ceux de leans, & par especial Iaques de Craon seigneur d'iceluy lieu, qui estoit couché en sa chambre empres sa femme, se leua soubdainement cuidant mettre aucun remede à son fait, mais ce riens ne luy valut : car ses ennemis estoient trop fors. Et les gens dont il n'auoit mie grandement, ne se pouoient mettre ensemble. Si fut tantost prins prisonnier, & aucuns des siens avec luy : & les autres au mieux qu'ils peurent, se sauuerent par dessus la muraille. Apres laquelle prinse les dessusdits François assemblerēt tous les biens portatifs, qu'ils peurent trouuer dedans iceluy chastel, comme vaisselle, or & argent, pennes, draps, linges & autres besongnes : lesquels quād ils furent en haste vn peu repeuz, trousserēt & chargerent tout & se meirent à voye à tout leurs prisonniers, pour retourner au passaige par où ils estoient venuz, delaisant ledit chastel tout entier ainsi qu'ils l'auoient trouué. Et entre-temps ceux de la ville de Dōmart oyans cest effroy & ceste noise, s'assemblerent & enuoyerēt hastiuemēt à Piquigny & en aucūns autres lieux, signifier ceste besongne. Si ne demoura point gramment que les dessusdits ne se trouuassent en nombre de deux cens ou enuiron de toutes manieres de gens : lesquels suiuirent bien roidement & en grand haste iceux François, & les acconsuiurent au passaige de l'eaüe, où desia estoient passez ledit messire Regnault & aucuns autres de ses gens, avecques luy & le dessusdit Iaques de Craon prisonnier : si les assaillirēt & desconfirent presentement & y en eut vne partie prins prisonniers & les autres morts & aucuns qui se noyerent à faillir la riuiera de Somme. Et iceluy messire Regnault à tout son prisonnier s'en alla franchement à Beauuais, sans trouuer aucun destourbier n'empeschement. Et depuis ledit prisonnier retourna en payant tresgrand somme de pecune.

Comment messire Thomas Kiriell Anglois fut commis capitaine du chastel de Clermont en Beauuoisis.



N cest an par la subtilité & pourchats de messire Iean de Luxembourg, le fort chastel de Clermont en Beauuoisis fut mis & transporté en la main & gouuernement de messire Thomas Kiriell Anglois : lequel chastel auoit long temps tenu, & encores tenoit de par le Duc de Bourgongne, le seigneur de Creuecueur. Et consentit ledit Duc iceluy transport, par tel si que ledit messire Thomas luy promet & audit Iean de Luxembourg : & de ce luy bailla son seel à rendre à certain temps, quand il en seroit

feroit requis. Si assembla ledit messire Thomas brief ensuiuant grand compaignie d'Anglois, lesquels bouta dedans iceluy chastel. Et commença à faire treforte guerre aux François qui estoient sur les frontieres aupres de luy : comme Creil, Beauuais, Compiengne, & autres lieux. Et pareillemēt feirent grans damages és chastellenies de Montdidier, & aux autres marches de l'obeissance d'iceluy Duc de Bourgongne. Et pour verité durant les tribulations dessusdictes, prindrent plusieurs prisonniers, & emmenerent plusieurs femmes tant de noble lignée cōme d'autres. Lesquelles ils tenoient destroitement enfermées en prenant d'elles grand finance, comme on a accoustumé de faire aux hommes : desquelles les plus qui estoient enceintes d'enfans, trespiteusement & tresinhumanement s'en accouchoient, dont le dessusdit Duc de Bourgongne de tant que toucher luy pouoit pour ceux de ladicte obeissance, en fut tresmal content : mais il ne pouoit auoir autre chose : car quand ce vint qu'il feist requerre ledit messire Thomas qu'il remeit ledit Chastel en sa main, ainsi que promis luy auoit : il fut de ce delayant & reffusant par treslong temps, en alleguant aucunes raisons de sa partie, telles que bien le sçauent faire gens de guerre, qui souuent en aucuns lieux vsent de volenté plus que de raison. Finablement apres plusieurs delais le Duc de Bethfort pour & en faueur de son beau frere le Duc de Bourgongne, feist rendre par ledit messire Thomas iceluy chastel de Clermont en la main du seigneur d'Auffremont.

Comment les habitans de Chauny-sur-Oyse destruirent & desolerent le chastel de leur ville.



E mesme temps messire Collard de Mailly, qui lors estoit Baillif de Vermandois de par le Roy Henry d'Angleterre : & avecques luy messire Ferry de Mailly tous deux demourans ou chastel de Chauny sur Oyse, appartenant heritablement à Charles Duc d'Orleans, qui alors estoit prisonnier en Angleterre pour aucunes parolles non amiables, qui auoient esté dictes par ledit messire Ferry à l'encontre des habitans de la ville : iceux habitans doubtant que par la porte derriere ledit chastel, les deux dessusdits ne meissent garnison d'Anglois ou d'autres gēs de guerre dedans leur ville plus fort qui ne leur plairoit, parquoy ils feussent contraincts & mis en subiection, conclurent tout secrettement ensemble aucuns desdits habitans : desquels furent les principaux Iean de Longueual, Mathieu son frere, Pierre Piat : lesquels feirent serment l'un à l'autre, de à certain iour, quand les dessusdits messire Collard & messire Ferry de Mailly seroient en la ville de prendre icelle forteresse & la demolir. Apres lesquelles conclusions & sermens par eux faits, vn certain iour meirent secrettement aucuns compaignons aduenturiers en petit nombre empres la porte dudit chastel, tous instruits & aduisez de ce qu'ils auoient à faire : lesquels quand ils veirent les deux cheualiers & aucuns de leurs gens issus dudit chastel ainsi qu'ils auoient accoustumé, pour aller iouer en la ville : saillirent hors du lieu où ils estoient, & entrerent dedans le chastel par ce qu'on ne se gardoit point d'eux. Si leuerent tantost le pont contre la ville & se meirent dedans. Laquelle prinse venue à la cognoissance desdits freres, leur fut tresdesplaisant : mais ils n'en peurent auoir autre chose : car tout

incontinent ceux qui estoient du serment dessusdit feirent sonner la cloche du commun, & s'assemblerent en tresgrand nombre armez & embastonnez, & s'en allerent deuant iceluy fort qui tantost leur fut ouuert. Et adonc aucuns des plus notables de la ville allerent deuant les dessusdits cheualiers : ausquels ils dirent qu'ils ne fussent en aucune doubte de leurs personnes . Et aussi de leur cheuance, & qu'on ne leur mefferoit riens : disant que ce qui se faisoit estoit pour le bien & santé de ladicte ville : lesquels non puissans de à ce remedier, responderent que puis que autrement ne pouoit estre qu'ils feissent ce que bon leur sembleroit . Et adonc tous troublez de veoir les manieres dessusdictes, se retrahirent en vn hostel en la ville, & avecques eux tous leurs familiers . Si leur furent deliurez tous leurs biens : & brief ensuiuant tous les habitans d'un commun accord commencerent à desoler & abbatre ladicte forteresse : & tant en ce continuerent & par plusieurs iours, qu'elle fut du tout rasée & demolie de fons en comble. Et aucuns briebs iours ensuiuans le dessusdit Baillif de Vermandois & son frere à tout leurs gens, se departirent de ladicte ville de Chauny : auquel lieu desquels leur fut enuoyé pour eux gouverner de par messire Jean de Luxembourg messire Hector de Flauy, & depuis Vvalleran de Moreul : lesquels, pour l'entreprise dessusdicte, les trouuerēt plus rigoureux & desobeissans qu'ils n'auoient accoustumé deuant la desolation dudit chastel.

Comment la cité de Chartres fut prinse par les gens du Roy Charles.



E vingtiesme iour d'Auril de cest an, fut prinse la noble cité de Chartres par la force des gens du Roy Charles : laquelle cité auoit tenu le party des Ducs Jean & Philippe de Bourgongne depuis l'an mille quatre cens & dixsept, qu'elle auoit fait obeissance au dessusdit Duc Jean, & pareillement auoit tenu la querelle des Anglois . Si furent cause d'icelle prinse deux habitans d'icelle ville : dont l'un estoit nommé Jean Conseil, & l'autre le Petit Guillemain : lesquels autresfois auoient esté prisonniers aux François, lesquels les auoient euz en gouvernement par longue espace : & par saufconduit auoient esté à Blois, & Orleans & autres lieux de l'obeissance d'iceux François, mener plusieurs marchandises & ramener autres audit lieu de Chartres . Si les auoient lesdits François tellement instruits, qu'ils festoient tournez à leur volenté . Et auoient avec eux dedans ladicte ville de Chartres de leur accord & alliance vn Iacobin Docteur en Theologie, nommé frere Jean Sarrazin : lequel estoit principal conducteur de tout la machination dessusdicte, & auoient les autres du tout leur retour à luy. Et quand ce vint au iour qu'ils auoient conclud de acheuer leur emprise, les François festoient assemblez de plusieurs parties iusques au nombre de quatre mille combattans : desquels estoient les principaux le bastart d'Orleans, le seigneur de Gaucourt, Blanchet d'Estouteuille, messire Florent de Lers, la Hire, Girard de Felins, & aucuns autres chiefs de moyen estat. Si se meirent en chemin pour venir deuers la ville de Chartres, & se embuscherent la plus grand partie en vn quart de lieüe pres . Et aucuns autres iusques à quarante ou cinquante furent mis plus pres : & les deux dessusdits nommez qui conduisoient la besongne, amenoient chars & charrettes de vins & autres choses, & avec ce y auoit vne quantité d'alozes.

Si

Si estoient pour conduire les chars, charrettes & autres en guise de charrettons, aucuns experts saquement armez à la couuerte: lesquels assez tost apres que la porte vers Blois fut ouuerte, vindrēt à tout leur charroy pour entrer dedans: & alloient deuant Iean Conseil & le Petit Guillemain dessusdit. Aufquels les portiers qui bien les cognoissoient, demanderent des nouuelles, & ils respondirent qu'ils ne sçauoient que bien: & alors les portiers leur dirent qu'ils fussent les bien venuz. Et adonc pour les mieux abuser, l'un des deux dessusdit print vne paire desdictes alozes, & les bailla à iceux portiers en leur disants: Voyla pour vostre disner, prenez en gré. Nous vous faisons souuent des peines beaucoup de attarger à la porte pour nous attendre, & autres pour ouurir les barrieres. Entre lesquelles parolles & abusemens que iceux faisoient, les dessusdits charretons toutesfois s'assemblerent à coup, & commencerent à ferir sur lesdits portiers: si en occirent vne partie & gaignerent prestement la porte & l'entrée d'icelle. Auquel lieu vindrent soudainement à certain signe, que les dessusdits leur feirent la premiere embusche, & de rechief la seconde: si se meirent à entrer en icelle ville par bonne & ordonnée ordonnance tous à pied armez de plaines armes leurs bannieres & estandars desployez avec eux. Et adonc par aucuns des dessusdits portiers qui estoient eschappez & entrez en la ville, & aussi par aucuns autres habitans qui apperceurent ceste besongne, fut tantost en plusieurs & diuers lieux crié à l'arme. Auquel cry prestement toute la bourgeoisie & communaulté s'esmeut: mais que pis estoit pour eux le Iacobin dessusdit à aucuns preschemens qu'il auoit faits parauant en lieu public, les auoit tresamiablement instruits & admonnestez, qu'il leur pleust à estre ce propre iour au matin à vn sien preschement qu'il deuoit faire moult solemnel & auctenticque, & qui moult prouffiteroit (comme il disoit) pour le sauement de leurs ames, fils le vouloient ouyr & retenir: mais le dessusdit Iacobin auoit à certain propos esleu lieu pour assembler ledit commun à son preschement, tout à l'autre bout de ladicte cité le plus loing qu'il auoit peu de la deuant-dicte porte, par où elle fut prinse. Et à celle mesme heure que le douloureux cry fut ouy parmy la ville, estoient à l'environ d'iceluy Iacobin la plus grand partie de la communaulté & bourgeoisie dessusdicte: lesquels sans delay tous effrayez se prindrent à fuir vers leurs habitations. Si en y eut tresgrand nombre qui se armerent & embastonnerent, & se trahirēt deuers leur Euesque & leurs gouuerneurs de ladicte ville, qui les menerent au plus tost qu'ils peurent deuers où ils sçauoient lesdits François tendans iceux rebouter hors de ladicte ville: mais à brief comprendre ils ne peurent ce faire, pource que lesdits François estoient en tresgrand nombre bien armez, & vsitez en fait de guerre: & desia estoient bien auant en ladicte ville, quand ceux de dedans vindrent vers eux: & de rechief pour les mieux abuser, commencerent iceux François à crier à haulte-voix la paix, la paix: & marcherent par bonne ordonnance & en tirant vers eux: & y eut traict tant d'un costé comme d'autre, mais ce dura assez petit: car avecques toutes ces malles aduentures vn nommé Guillaume de Ville-neufue, qui estoit capitaine de la garnison: lequel les deuoit conduire & mener, quand il apperceut la besongne estre si aduancée, il monta à cheual, & avec luy environ cent combattans de ses gens: si se partit sans delay par vne

autre porte & avec luy grand multitude de peuple : & par ainsi tout le surplus fut tantost mis en desroy, sans ce qu'ils feissent quelque résistance. Pourquoy les François ce voyant s'aduancerent de plus en plus, & allerēt iusques au marché. Et quand ils veirent que nul n'arrestoit deuant eux pour eux greuer, vne partie des chiefs se tindrent ensemble, & enuoyerent vne partie de leurs gens par les rues veoir s'ils trouueroient qui leur contredisist : mais tout fuyoit deuant eux, & se sauuoient où ils pouoient le mieux. Durant laquelle tribulation furēt morts de ceux de la ville enuiron soixāte ou quatre vingts : desquels fut le principal maistre Iean de Festigny natif de Bourgongne leur Euesque, & si en furēt prins prisonniers de cinq à six cens, dont maistre Gilles de l'Aube-espine qui gouuernoit pour les Anglois fut le principal. Et à brief comprendre tant de gēs d'Eglise, comme bourgeois & autres habitans qui peurent estre prins & attains furent mis à finance. Et avec ce generalmente tous les biens qu'ils peurent trouuer à qui qu'ils fussent, puis qu'on en pouoit faire argent tout fut prins & rauy. Quant est à parler de ravissemens, violations & autres besongnes extraordinaires il en fut fait selon les coustumes de la guerre, comme en ville conquise. Et le lendemain furent couppées les testes à aucuns de ceux qui parauant auoient gouuerné pour les Anglois : & furent de par le Roy de France dedans icelle cité reconstituez tous nouveaux capitaines de gens d'armes & gouuerneurs. Si y demoura trespuissante garnison pour les frontieres des Anglois : desquels fut le principal chief sur tous les autres le dessusdit bastart d'Orleans.

Comment le Cardinal de sainte Croix vint en France de par le saint pere, pour appaiser la guerre des parties dessusdictes.

EN ce temps fut enuoyé par nostre saint Pere le Pape es parties de France le Cardinal de sainte Croix : pour appaiser le discord qui estoit entre le Roy de France d'une part, & le Roy Henry d'Angleterre, & le Duc de Bourgongne ensemble d'autre part. Pour lequel traité ledit Cardinal feit de grans diligences entres les parties : mais en fin ne pouoit riens accorder à paix. Par son trauail & moyen furent accordées vne trefues à durer l'espace de six ans, entre le dessusdit Roy Charles & le Duc de Bourgongne, & baillerent chacun d'eux pour la seurté & entretenement desdictes trefues, lettres seellees de leurs seaux deuifées par la meilleur forme & maniere que faire le pouoit. Par le moyen desquelles en aucuns lieux sur les frontieres, le peuple eut grand consolation esperans que ce se deust entretenir. Et à l'occasion d'icelle se commencerent aucuns des païs sur lesdictes frontieres à remplir de laboureurs, bestail & autres choses : mais ceste lieffe ne leur dura point grandement : car en dedans le premier demy an les parties furent si obstinees & entreouillees, qu'ils commēcerent comme deuant à demener tresforte guerre l'un contre l'autre. Si fut la principale cause de celle resmeutte, pource que les François prenoient aucuns tenans le party de Bourgongne, comme Anglois : & pareillement lesdits Bourgongnons : c'est à sçauoir les pauvres Saquemens voulās viure de la guerre se bouttoient avec lesdits Anglois : & en portāt la croix rouge prenoient les François & leur faisoient guerre : par lequel moyen icelles trefues deuant-dictes, furent en brief du tout mises à neant. Si n'estoit lors en nulles
des

des trois parties iustice ne raison entretenue: ains regnoit contre le peuple & gens d'Eglise tresinnumerables & tirannicques pilleries. Et combien que pour viure en paix au dessoubs de ceux qui faisoient la guerre ils donnassent & promeissent du leur tresslargement, en prenant d'iceux ou de leurs capitaines saufs-conduits, lettres de gardes ou seellees d'apactiz: neantmoins peu ou neant leur estoit entretenu, & par ainsi n'auoient ils autre recours sinon de crier miserablement vengeance à Dieu.

Comment le Boulleuert de Laigny sur Marne fut prins des Anglois.

ENuiron le mois de Mars de cest an, furent ordonnez par le Duc de Bethfort & le conseil du Roy Henry estant à Paris, certain nombre de gens d'armes pour aller mettre en l'obeissance dudit Roy aucune forteresses, que tenoient les François ses ennemis sur les marches de l'Isle de France, comme Mongay, Gournay & autres. Et avec ce rompre & demolir le pont de Laigny, qui vient de la ville par dessus l'eau vers l'Isle de France: de laquelle armée furent chief & cōducteurs le Comte d'Arondel, l'enfant de Varuich, le seigneur de l'Isle Adam Mareschal de France pour le Roy Henry, messire Jean Bastard de S. Pol, le Galois d'Aunay cheualier seigneur de Oruille & aucuns autres: lesquels tous ensemble partans de Paris à tout douze cens combattans ou enuiron & foison de chars & charrettes, canons, artilleries & autres instrumens de guerre, vindrent par aucuns iours dedans lesdictes forteresses: lesquelles en assez briebs iours par contraincte d'iceux Anglois, furent mises en l'obeissance d'eux. Et se departirent aucuns desdits François sauue leurs vies & partie de leurs biens, & les autres demourerent à volenté. Si en y eut aussi aucuns executez par iustice, & les autres mis à finance. Apres lesquelles redditions les dessusdits Anglois prindrent leur chemin vers Laigny sur Marne, & se logerent deuant. Si feit le Comte d'Arondel asseoir vne grosse bombarde contre l'arche du pont leuis de la ville, laquelle du premier coup qu'elle iecta rompit ladicte arche par telle maniere, que ceux de dedans ne pouoient bonnement venir à leur boulleuert, qui estoit à l'autre bout du pont qui passe par dessus l'eau. Et adonc ledit Comte d'Arondel & les autres capitaines, avecques leurs gens assaillirent hastiuement iceluy boulleuert & le prindrent sans delay: nonobstant que ceux de dedans qui estoient en bien petit nombre, le deffendoient puissamment & vaillamment. Auquel assaut fut mort Jean de Luxembourg vn des bastards de saint Pol, & aucuns autres avec plusieurs naurez. Et en fin les dessusdits Anglois rompirent le pont en plusieurs lieux: & apres ardirent ledit boulleuert, puis se retrahirēt en leurs logis. Si cōclurent dedans briebs iours ensuiuans d'assaillir la ville en plusieurs lieux, laquelle chose ils feirent. Si demoura ledit Comte d'Arondel à tout certain nombre de gens sans aller audit assaut. Et quand ce vint que le Mareschal & les capitaines se departirent pour aller audit assaut ledit messire Jean de Luxembourg bastard de saint Pol, qui portoit en sa deuise, & en son estandard vn soleil, dit tout hault oyant plusieurs, qu'il faisoit vœu à Dieu que si le soleil entroit en la ville qu'il y entreroit aussi. Laquelle parolle fut de plusieurs entendue par diuers propos. Neantmoins ils allerent à l'assaut & s'y porterent assez vaillamment: mais par la diligence de

Huçon Queüe Escossois, messire Iean Foucault & autres capitaines de la ville, ils furent bien & vaillamment receuz: & en y eut plusieurs des dessusdits assail-lans morts & griefuement naurez. Et avec ce perdirent quatre ou cinq de leurs estandars & panons, qui furent tirez à force de bras dedans la ville par les deux bouts, desquelles furent la banniere de l'Isle Adam Maréchal, & l'estandard & enseigne du soleil appartenant audit messire Iean Bastard de S. Pol, qui auoit voué d'entrer en icelle ville. Si conuint qu'ils se retrahissent à grand honte & confusion en leur logis. Et au bout de trois iours ensuiuans s'assemblerent, & s'en allerent secretement grand partie d'iceux compagnons de guerre sans le congé de leurs capitaines, voyans qu'ils perdoient leur temps de là plus seiourner: car ils y pouoient plus perdre que gagner. Si retournerent à Paris deuers le Duc de Bethfort auant qu'iceux Anglois & Bourgongnons feissent iceluy assaut, auoient bien esté huiet iours logez deuant la ville & y assis grosses bombardes, dont ils auoient fait battre & trauailler la muraille d'icelle.

Comment Philebert de Vaudray gouverneur de Tonnerre, & le seigneur d'Amont allerent seruir le Duc de Bethfort.



Le est verité qu'en ces iours Philebert de Vaudray & le seigneur d'Amont, se departirent du païs de Bourgongne à tout cinq cens combattās ou environ, par l'ordonnāce de leur seigneur le Duc de Bourgongne seruir son beau frere le Duc de Bethfort. Si prindrent leur chemin parmy le païs de Champagne, pour aller en Picardie: auquel païs s'assemblerent les François de sept à huiet cens combattās pour combattre & ruer ius les dessusdits: desquels estoient les principaux Yuon du païs, le Bastard de Dāpierre, le Borgne de Remon & aucuns autres qui se meirent en bataille contre leurs ennemis, qui s'estoient tous mis à pied pour eux deffendre: mais à brief dire quand ce vint qu'ils deurent commencer à ferir l'un dedans l'autre, les dessusdits François qui estoient la plus grand partie à cheual se departirent hastiement en grand confusion, si en y eut aucuns morts & prins en petit nombre. Et apres iceux Bourgongnons par plusieurs iournées cheuaucherēt à tout leurs gens en Picardie, où ils seiournerent certaine espace de temps, en pillant & māgeant le païs, & de là s'en allerent à Paris deuers le Duc de Bethfort. En ce temps le Roy de Chippre par longue maladie qu'il auoit eüe depuis son retour de la prison des Sarrazins, apres qu'il eut receu moult deuotement tous les Sacremens de sainte Eglise, il trespassa de ce siecle. Au lieu duquel fut couronné & sacré en la maistresse Eglise de Nicosie Iean de Lusignen, seul fils du dessusdit Roy & de la Royne Charlote de Bourbon, par le consentemēt de tous les trois estats d'iceluy Royaume.

De l'an mille cccc. xxxij.

Comment le Duc de Bethfort vint à grand puissance deuant la ville de Laigny sur Marne pour ayder & conforter les Anglois & Bourgongnons, qui l'auoient assiegé. Lesquels en fin s'en partirent sans nul conquest.

Au



V commencement de cest an le Duc de Bethfort qui se disoit Regēt de France, conuoqua de plusieurs parties de son obeissance iusques au nombre de six mille combattans ou enuiron : lesquels il conduit & mena deuant la ville de Laigny sur Marne, que tenoient les gens du Roy Charles. Et pouoient estre dedans ladicte ville de huiēt cens à mille cōbattans droit gens d'armes d'esslite accoustumez de guerre:desquels estoient les principaux capitaines, le capitaine Escoçois, messire Ambroise de Loreil & messire Iean Foucault, qui vaillamment se maintindrent & gouvernerent ceux qui estoient soubs leurs bannieres. Auecques le Duc de Bethfort estoient de la langue François le seigneur de l'Isle Adam Mareschal, messire Iean Bastard de S. Pol, le Bastard d'Aunay cheualier seigneur d'Oruille, Philebert de Vaudray, le seigneur d'Amont & plusieurs autres de bon & notable estat, qui tresslōgue espace de temps continuerent le siege deuant ladicte ville de Laigny, pour icelle reduire en l'obeissance du Roy Henry. Si furent assis plusieurs engins grans & petis contre les portes & murailles d'icelle ville, qui en diuers lieux les crauantirent & abbatirent, dont les dessusdits assiegez tant pour lesdits engins comme pource qu'ils auoient viures à grand dangier, furent moult contrains & eurent de grans tribulations & meschiefs:neātmoins que par le dessusdit Duc de Bethfort fussent par plusieurs fois sonmez d'eux rendre, ne se voulurent ils à ce consentir pource que tousiours auoient esperance d'estre secouruz & aydez par ceux de leur party, comme ils furent depuis. Et auoient lesdits assiegez fait vn pont sur la riuere de Marne de basteaux, pour passer à leur ayse de l'vn des costez à l'autre. Et à chacun des bouts dudit pont auoient fait boulleuert pour la garde d'iceluy : dedans lesquels estoient commis gens d'armes en certain nombre pour le garder. Durant lequel temps le Roy Charles de France fait assembler de six à huiēt cens combattans : lesquels soubs la conduicte du Mareschal de Boufach, du Bastard d'Orleans, du seigneur de Gaucourt, de Roudigue de Villandras, du seigneur de sainte Treille & plusieurs autres capitaines gens de grand façon, & vaillās hommes de guerre, il enuoya deuers Orleans pour bailer secours aux assiegez de la ville de Laigny : & tous ensemble par plusieurs iournées se tirerent à Meleun, où ils passerent la riuere de Seine. Et de là parmy le païs de Brie approcherent ladicte ville de Laigny, & leur venoient de iour des garnisons gens de leur party. Et entre tēps ledit Duc de Bethfort & ses gens auoient si fort destraincts lesdits assiegez, qu'iceux sur la venue des François cōmençoient eā traicter:neantmoins ledit Duc se prepara diligēment pour cōbatre les François, qui venoient sur luy: & pource faire manda encores gens de plusieurs lieux de son obeissance:puis enuoya aucūs de ses officiers d'armes deuers iceux François, pour eux signifier qu'il estoit prest d'eux cōbatre avec tous leurs aydans s'ils vouloient prendre iour & lieu de ce faire, à quoy ils ne feirent nulle responce, sinon à leur bel aduantage:& quand bon leur sembleroit au plaisir de Dieu nostre benoist sauueur, ils meneroiēt à fin leur entreprinse. Et sur ce approcherent & vindrent les dessusdits François en tresbonne ordonnance de trois cōpagnies iusques à vne petite riuere, qui est enuiron à vn quart de lieüe de la ville. Et d'autre part ledit Duc de Bethfort auoit ordōné faire trois batailles, pour garder le passage d'icelle petite riuere. Et quand ce vint qu'ils furent approchez

assez pres l'un de l'autre, en plusieurs lieux se commencerent de grandes & dures escarmouches : & par especial au costé où estoit l'enfant de Vvaruich & le seigneur de l'Isle Adam, vindrent à grand puissance Rodigue de Villandras, le seigneur de Sainte Treille & aucuns autres chiefs de guerre, qui conduisoient les viures pour rautailier icelle ville. Et de fait par force & malgré tous leurs aduersaires se bouterent avant, & y en passa certain nombre qui allerēt iusques à la porte, & bouterent dedans de vingt à trente bœufs & aucune quantité de sacs de farine, & si entrerent dedans enuiron quatre vingts combattās : mais ceste besongne ne fut pas faicte sans grande effusion de sang, car de tous costez en y eut plusieurs morts & naurez. Entre lesquels de la partie desdits François fut mort le dessusdit de sainte Treille frere aîné à Pothon. Et pareillemēt à l'autre costé où estoit messire Ieā Bastard de S. Pol, messire Thomas Kyriel, le seigneur d'Amont & Philebert de Vaudray furent fort approchez, & y eut fait maints haulx faits d'armes & vaillantise. Si y furent morts & naurez plusieurs des deux costez : desquels de la partie des Anglois y fut mort vn gentil-hōme Odart de Remy : & durerent ces escarmouches iusques assez pres de vespres, & fut par vn iour S. Laurens en Aoust, qu'il faisoit moult grād chaleur de soleil, dōt les deux parties furēt moult trauaillées & oppressées. Et lors les François voyās que bōnement ne pouoient autre chose faire, par ce que principalement que les Anglois & Bourgongnons estoient en tresfort lieu, se retrahirent tous ensemble, & s'en allerēt loger à Cressy en Brie : & de là se tirerent vers Chasteau Thierry, & puis à Vitry en France, où ils furent l'espace de quatre iours. Et adonc ledit Duc de Bethfort saichant qu'iceux François se trayoient vers l'Isle de France, doubtant qu'ils ne preinssent aucunes bonnes villes, se deslogea de deuant ladicte ville de Laigny en assez petite ordonnance : car ses gens y laisserent plusieurs biēs, si se tira vers Paris. Et depuis rassembla gens & alla vers où estoient lesdits François, pour de rechief eux offrir la bataille : mais comme deuant ils feirent responce qu'ils auoient ce pourquoy ils estoient venus. Et estoit avecques eux le seigneur de Gaucourt qui bien seruoit à la besongne, car moult estoit saige & prudent. Et tost apres se deslogerēt dudit lieu de Vitry iceux François, & s'en retournerent deuers ladicte ville de Laigny, où demoura ledit seigneur de Gaucourt : & les autres capitaines à tout leurs gens s'en retournerent és pays dont ils estoient venus. Et quād aux assiegez ils furent moult resioüis, & non point sans cause quand en ceste maniere se veirent deliurez de leurs ennemis : car moult auoient esté oppressez tant de famine comme d'autres mesaises, car le siege y auoit bien esté par l'espace de quatre mois ou enuiron, qu'ils n'auoient peu auoir aucuns viures pour eux rafreschir. En ce mesme temps fut prins le chastel de Monchaz en Normandie, appartenant au Comte d'Eu prisonnier en Angleterre, lequel long temps par auant tenoient les Anglois, & en estoit capitaine vn nommé Brunelay, lequel pour ce tēps se tenoit avec le Duc de Bethfort au siege de Laigny sur Marne, & là prindrent les prisonniers qui estoient leans de la party du Roy Charles. Si manderent tantost pour estre leur capitaine messire Regnault de Fontaines, qui se tenoit à Beauuais : lequel sans delay y alla à tout quatre vingts combattans ou enuiron. Et par le moyen d'icelle fut faicte forte guerre és marches de Vimeu & enuiron à ceux qui tenoient le party du Roy

Henry,

Henry, & du Duc de Bourgogne.

Comment les Gantois s'esmeurent contre aucuns des gouuerneurs de leur ville.

EN ce temps se r'esmeurent en armes les communes gens de la ville de Gand iusques à cinquante mille ou environ, contre les gouuerneurs d'icelle. Et tous ensemble environ dix heures deuant midy, s'en allerent sur le grand marché deuant l'hostel des Remonstrances où ceux de la loy estoient assemblez. Si conuint qu'ils venissent parler à eux incōtinent, ou ils eussent en brief abbattus huis & fenestres pour y entrer. Et quād ils furent venus à eux de prime face, occirent cruellement le grand Doyen des menuz mestiers nommé Iean Boëlle, & vn escheuin nommé Iean Daniel van Zenere, avec vn homme de conseil qui se nommoit Iason Habit. Pour la mort desquels tous les autres gouuerneurs là estans, furent en grand doubte de leurs vies pour la cruauté qu'ils veoiet desdictes communes: mais pour lors ils se tindrent à tant. Et tous ensemble se partirent de là, & allerent à l'Abbaye S. Pierre abbattre vn petit bois qui estoient empres. Et puis se meirent à chemin & s'en allerent à S. Banon, pour les aucuns estre recōpensez de plusieurs rentes hereditables qu'ils deuoient à l'Eglise, lesquelles ils auoiet par auant payées: mais par le sens & doulces parolles de l'Abbé dudit lieu, ils furent contentez & refrenez, & leur deliura prestement tout ce qu'ils demanderent: & avec ce leur fait donner des viures de l'Eglise treshabondamment. Si se partirent de là assez contents d'iceluy Abbé, & allerent rompre trois ou quatre maisons de la ville tresnotables: & dedans icelles prendre des biens largement, & les autres despecer & ruer es rues. En apres allerent aux prisons du Prince, si les rompirent & laisserent aller tous les prisonniers, & entre les autres deliurerent vn nommé George Goscath, qui moult estoit de leur party cōtre les dessusdits gouuerneurs. Apres lesquelles besongnes icelles communes deuant-dictes au bout de deux iours enfuyuans par le moyen d'aucuns notables hommes, se retrahirent en leurs lieux & furent rappaisez. Neantmoins durāt icelle cruauté tous les officiers du Prince se departirent de ladicte ville de Gand, doubtans que par icelles communes ne fussent mis à mort comme les autres: toutesfois le Duc de Bourgōgne pour les grans affaires que pour lors auoit, ne fut point conseillé de les corriger ne contraindre d'en faire amendises par sa puissance: mais traicté fut avec eux par ceux de son conseil, qu'en luy requerant mercy & payant aucune finance il leur pardonna: & par ainsi ils demourerent paisibles.

Comment messire Iean Bastard de S. Pol, & le seigneur de Humieres furent prins des Francois.

DVRANT le temps dessusdit se departirēt du païs d'Arthois messire Iean Bastard de S. Pol, & le seigneur de Humieres avec eux soixante combattans ou environ, pour aller à Paris avec le Duc de Bethfort. Si allerent par Montdidier à l'Isle Adam. Et de là cuidans aller seurement audit lieu de Paris, furent rencontrez de ceux de la garnison de Creil, qui de leur allée estoient tous aduertis. Et de fait, nonobstāt leur deffence, furent tous deux prins prisonniers, & menez audit lieu de Creil avec grand partie de leurs gens.

Et les aucuns se sauuerent par force de bien fuir. Et depuis les deux cheualiers dessusdits parmy payant grand finance à ceux qui les auoient prins furent deliurez de la prison desdits François.

Comment plusieurs malefices furent faits & perpetrez és païs d'Amiennois, Santhois & Vimeu.

D V R A N T les tribulations dessusdictes, Blanchefort qui se tenoit au chastel de Bertueil tenant le party du Roy Charles de France, feit moult de dommages és païs de Santhois, Amiennois, Vimeu, & autres lieux par feu, pillages & par espée: parquoy iceux pays furent ou la plus grand partie tous perdus & inhabitez, sinon aupres des bonnes villes & forteresses. Et n'en pouoient plus souffrir & payer les grans tributs, qu'ils auoient accoustumez de liurer pour leurs appactis. Et d'autre part furent réparées par ceux de ce mesme party aucunes forteresses au païs de Vimeu: c'est à sçauoir à Raines, Hornoy & autres, esquelles se boutterent plusieurs gens de guerre dont le païs fut moult oppressé, & pareillement de ceux qui tenoient le party du Roy Henry & du Duc de Bourgogne. Si ne sçauoient les pauvres laboureurs où eux bouter, ne où aller à sauueté: & n'estoient aydez ne secouruz d'aucun seigneur de quelque party qu'il fut. Et qui pis fut pour eux, en la marche dessusdicté Philebert de Vaudray & le seigneur d'Amont qui estoient retournez des marches de France de seruir le Duc de Bethfort, se boutterent à tout leurs gens dedans l'Isle du pont saint Remy, & en debouterent les gens du seigneur de Saueuses qui l'auoient en garde. Pour laquelle iceluy seigneur de Saueuses fut tresmal content: & pour iceux debouter hors de la dessusdicté Isle assembla grand partie de ses parens & feables amis: mais en fin pource que les dessusdits estoient trop forts dedans l'Isle dessusdicté, il n'eust point conseil de les aller enuahir. Et pourtant demourerent là certaine espace de temps au grand dommage & preiudice de tout le païs.

Comment le Damoisel de Commercy print la ville de Ligny en Barrois, appartenant à messire Iean de Luxembourg.

A V mois de Septembre audit an le Damoisel de Commercy, qui long temps parauant auoit grand haine enuers messire Iean de Luxembourg, tant pour la forteresse de Montagu qu'il luy detenoit, comme pour plusieurs autres dissentions qu'ils auoient eu l'un avec l'autre, assembla de plusieurs lieux de quatre à cinq cens combattans ou environ: lesquels il mena secrettemēt aupres de Ligny en Barrois: & icelle par faute de guet print, & entra dedās & tous ceux qu'il auoit amenez par les eschelles. A laquelle prinse ceux de ladicte ville furent tous esmeuz soubdainement, & y en y eut vne grād partie qui se retrahirent hastiuemēt dedans le chastel, qui ne fut point conquis: mais se deffendirent hardiemēt contre leurs ennemis, qui par plusieurs fois les sommerent & admonnesterent d'eux rendre, à quoy ils ne voulurent nullement entendre: ains sans delay enuoyerent deuers messire Iean de Luxembourg, luy raconter la besongne dessusdicté en luy requerant humblement qu'à ce besoing les vouldist secourir. Lequel de Luxembourg sachant ces nou-
uelles

uelles meit incontinent clerks en euure: & en grand diligence fait escrire à tous ses amis alliez & bien vueillans eux requerant tresamoureusement, qu'ils luy venissent ayder à deliurer sa ville & ses gens du dangier, où ils estoient sur tous les plaisirs que iamais luy desiroient à faire. Au mandement duquel pour luy accompagner, se commencerent à preparer diligemment plusieurs nobles hommes & autres gens de guerre en grand nombre: mais entre-temps le dessusdit Damoisel voyant que bonnement ne pouoit conquerre icelle forteresse de Ligny, doubtant aussi le secours qui leur pouoit venir de par messire Jean de Luxembourg, duquel il cognoissoit assez la puissance & la volenté: si conclud avecques aucuns de ses plus feables qu'ils s'en retourneroient és lieux dont ils estoient venus. Apres laquelle conclusion fait prendre & trousser tous les biens d'icelle ville, c'est à sçauoir qui se pouoient porter: puis fait bouter les feux & embraser toutes les maisons d'icelle ville, dont les habitās eurent au cueur grād tristesse. Et ledit Damoisel de Salebrusse s'en retourna à Commercis en emmenant avecques luy plusieurs prisonniers. Si furent de rechief mandées ces nouvelles au dessusdit messire Jean de Luxembourg: lequel estant de la destruction d'icelle moult dolent & marry, fait contremander ceux qui de par luy auoient esté mandez, & delaisa son entreprinse.

Comment la forteresse de la Boue vers Laon fut prinse des Bourgongnons, lesquels se contrefeirent Anglois. Et autres matieres.



En ce mesme temps les gens du seigneur de Ternant qui se tenoient à Rethers, prindrent la rouge Croix des Anglois faignans du tout retenir leur party, & vn certain iour en larrecin prindrent la forteresse de la Boue à deux lieües pres de Laon: & estoit chief & conducteur desdits preneurs vn homme d'armes nommé Nicolas Cheualier. Par le moyen de laquelle prinse ceux de la ville de Laon & autres lieux tenans le party du Roy Charles, eurent moult à souffrir. Si fut la cause de prendre la rouge Croix dessusdicte, pource que les trefues, dont par auant est faicte mention, n'estoient point encores du tout rompues entre les dessusdits Roy Charles & le Duc de Bourgongne: car iceux auoient tousiours tenu le party du Duc de Bourgongne: & se faisoient lors entre les trois parties plusieurs telles besongnes, qui n'estoient point sans mal engin. En ces propres iours le Comte de Vaudemont fait assembler de trois à quatre cens combattās ou enuiron és paÿs & marches de Picardie: Lesquels dessusdits combattans il fait mener & conduire en sa ville de Bezelize. Et estoit l'vn des chiefs & capitaine qui les conduisoient le Bastard de Humieres. Lesquels gens d'armes arriuez, commencerent à mener forte guerre au paÿs & contrée de Barrois & de Lorraine: & y feirent moult grand dommage par feu, pillage & par espée, dont le pauvre peuple d'iceux paÿs fut moult trauaillé.

A v mois d'Octobre alla le Duc de Bourgongne au paÿs de Hollande, & avec luy la Duchesse sa femme. Si auoit en sa compagnie six cēs combattans Picards ou enuiron. Et demoura pour visiter iceluy paÿs enuiron vn mois: auquel voyage fut traicté par les conseilliers dudit Duc & de la Duchesse de Bauiere, qu'iceluy Duc de Bourgongne auroit de present le nom, ioüissance & prouffits

des paÿs de Hainault, Hollāde & Zelāde & de Frise, avec les appartenāces pour en vser comme de son propre heritage à tousiours heritablement : moyennant lequel accord fut deuisé que se ledit Duc alloit de vie à trespas deuant ladicte Duchesse, les paÿs dessusdits retourneroient à elle comme vraye heritiere. Et avec ce luy furent ordonnées plusieurs nobles seigneuries & proffitables, dont elle deuoit iouir avec la Comté d'Ostreuant, de laquelle Comté tant seullemēt elle se deuoit escrire Comtesse, en delaisant les tiltres des paÿs dessus nommez. Apres lesquels traictez passez & promis de l'une partie à l'autre, ledit Duc consentit à parconclurre le mariage d'icelle Duchesse sa cousine & de messire Franque de Voselle: lequel par auant auoit esté pourparlé secrettement entre icelles parties. Et de ce iour en auant s'escriuit le Duc de Bourgongne avec ses autres tiltres, qu'il auoit par auant Comte de Hainault, de Hollande, de Zelande & seigneur de Frise. Apres lequel traicté il retourna en son paÿs de Flandres.

Comment frere Thomas alla à Romme où il fut ars.

EN cest an iceluy le prescheur dessusdit de l'ordre des Carmes, nommé frere Thomas Connecte, dont pieça cy deuant ay parlé en cest liure (comme plus à plain est declairé) auoit fait plusieurs predications en la Prouince de Reims : par lesquelles predications plusieurs nobles femmes de haultes lignées auoient osté leurs atours. Apres vint en la ville de Romme, où lors se tenoit nostre saint Pere le Pape Eugene, & y arriua avec les ambassadeurs Veniciens. Si se logea à saint Pol: auquel lieu le dessusdit Pape le manda à venir deuers luy non mie pour mal qui luy voulsist: mais pour le veoir & ouir parler, pource que les nouuelles auoient autresfois esté rapportées iusques à luy. Si refusa par deux fois à y aller, faignant qu'il fut mal disposé. Et à la tierce fois le Pape y enuoya son tresorier pour l'amener. Et quand iceluy tresorier vint à l'huys de sa chambre, ledit frere Thomas le voyant saillit hors par vne fenestre pour soy sauuer : mais il fut isnellement poursuivy & prins, & de là fut mené deuers nostre saint Pere le Pape en son Palais: Lequel chargea pour l'examiner les Cardinaux de Roüen & de Nauarre: lesquels en fin le trouuerent herese & coupable de mort. Et apres que son proces fut fait, fut condamné à mort & fut ars deuant le peuple en la ville de Romme.

Comment la Duchesse de Bethfort mourut.

ETem en ce temps Anne femme au Duc de Bethfort & sœur au Duc de Bourgongne, accoucha malade en l'hostel des Tournelles à Paris, & fut par treslongue espace trauaillée d'icelle maladie & tant qu'en fin (nonobstant qu'elle eut esté tres diligemment visitée de plusieurs Mediciens) rendit son esprit, & fut enterrée aux Celestins en la chapelle, où iadis fut mis Loÿs Duc d'Orleans dernier trespasé. Pour la mort de laquelle le Duc de Bethfort son mary eut au cueur tresgrand ennuy & tristesse, & pareillement plusieurs autres de son party: doubans que pour la mort dessusdicte, l'amour & l'alliance qui s'estoit entretenue grande espace par le moyen d'icelle Duchesse entre sondit mary & son frere le Duc de Bourgongne, ne se refroidit aucune-mēt. Et pour lors les ambassadeurs des trois parties: c'est à sçauoir du Roy Charles

les, du Roy Henry & du Duc de Bourgongne furent ensemble en la cité d'Auxerre & à Meleun on pr traicter de paix, mais en fin ne peurent riens conclurre. Et par ainsi se departirent retournans chacun deuers leurs seigneurs.

Comment aucuns capitaines Francois passerent la riuere de Somme pour courir en Arthois.

DTem enuiron l'entrée du mois de Decembre Blanchefort le capitaine, messire Anthoine de Chabannes, le seigneur de Longueual, messire Karados des Chesnes & aucuns autres du party du Roy Charles s'assemblerent, & avec eux de huit cens à mille combattās d'entour Bretueil, & de là allerēt passer la riuere de Somme à Cappy. Et puis cheuauchèrent toute nuit iusques empres la ville de Dourlens, qu'ils auoient pourguetée par leurs espies pour la prendre & escheller: mais le seigneur de Humieres fut aduertie de ceste cheuauchée. Si enuoya hastiement certains messages au Maire & aux iurez de Dourlens eux signifier, que les Francois estoient sur les champs, & auoient intention d'eux porter dommage, & qu'ils fussent sur leur garde: lesquels oyans ces nouuells se preparerent diligemment pour eux deffendre. Et avec ce meirent dehors leur ville vn messagier pour aller au chastel de Beauual, dire à ceux qui le gardoient les nouuelles dessusdictes. Lequel messagier rencōtra à vn quart de lieüe d'icelle ville enuiron le poinct du iour les coureurs d'iceux François: desquels il fut prins & examiné, si leur recogneut ce pourquoy il alloit. Et adonc se retrahirent vers leurs gens qui les suiuoient d'assez pres: lesquels saichans par les moyens dessusdits leur entreprinse estre rompue, retournerent tous ensemble en la ville de Beauquesne. Et apres qu'ils se furent repeuz & refreschiz longuement, courans aucune partie de leurs gens parmy le pays, s'en r'allerent audit passage de la riuere de Somme. Et de là à tout foison de leurs prisonniers, cheuaux & autres bagages retournerent en leurs garnisons.

Comment vn Moyne de l'ordre S. Benoist voulut prendre le Chastel-S. Ange à Romme.

DVrant ce temps vn nommé le petit Moyne, qui auoit esté moult aimé du Pape Martin & eut grand gouuernement durant sa seigneurie. Apres le trespas d'iceluy se retrahit deuers le Pape Eugene & trouua maniere d'estre tresbien de luy, tant qu'il fut en sa grace comme pour en partie auoir gouuernement, comme il auoit eu au temps de son deuancier. Durant lequel temps par tentation diabolique comme on peut supposer, il eut voulenté de faire trahison contre iceluy Pape Eugene. Et pour icelle mener à effect & de tous poincts accomplir, auoit parlé au Prince de Salerne ou à ses commis pour le mettre à puissance de gens dedans le chastel de saint Ange, & de là dedans Romme: si estoit venu vn certain iour deuers ledit Pape pour prendre congé de luy, disant qu'il s'en vouloit aller demourer en Auignon aucune espace de temps. Et entre-temps requist au chastellain de saint Ange qu'il luy voulsist garder ses coffres, où estoient ses biens iusques à son retour: lequel luy accorda, non doubant que ce fut pour quelque mauuaistié faire: si fit ledit petit Moyne faire douze coffres, dedans lesquels deuoit auoir douze hom-

mes, & à chacun coffre encores deux hommes pour les porter. Et quand ce vint que toutes ses besongnes furent toutes prestes, pour mieux fournir son entreprise, il enuoya vn petit page qui estoit son nepueu porter vnes lettres à vn prisonnier dedans ledit chastel: lesquelles furent d'auenture trouuées au dessusdit chastellain, lequel par le moyen d'icelles sceut & apperceut ladicte trahison. Si les porta sans delay deuers le Pape, lequel feit incontinent par la iustice seculiere prédre iceluy petit Moyne, lequel fut gehainé & cogueut tout son fait. Apres laq̃lle cognoissance il fut pēdu au gibet & fut mis à mort dedās la cité de Rome: leq̃l gibet y fut pour ce fait tout propice & puis fut escartelé au marché. Et par ainsi le dessusdit Prince de Salerne faillit à son intētion: mais pource ne demoura mie qu'il ne feit forte guerre au dessusdit Pape. En ces iours vn Saquement nommé Thomelaire qui estoit Preuost de Laon de par le Roy Charles, print le chastel de Passauant par certains moyens qu'il auoit dedans la forteresse: laquelle prinse despleut moult au Duc, doubtant que par ce moyen son païs ne fut en guerre. Si les feit tantost assieger par ses gens. Et en fin furent les dessusdits preneurs contraints par telle maniere, qu'il leur conuint rendre ladicte forteresse. Et avec ce fut ledit Thomelaire executé & mis à mort & aucuns autres avec luy. Et fut icelle forteresse demolie.

Comment la paix fut traictée entre le Duc de Bar d'une part, & le Comte de Vaudemont.

E Tem en cest an par le moyen du Duc de Bourgongne, fut faicte la paix & traictée entre le Duc de Bar d'une part & le Comte de Vaudemont d'autre. Par ainsi que les deux parties promeirent de bonne foy rendre & restituer toutes les villes & forteresses qu'ils tenoient l'un de l'autre. Et avec ce fut accordé que l'aîné fils dudit Comte, prendroit en mariage l'aînée fille au Duc de Bar. Et luy feroit avec elle chacun an six mille francs de rente, & certaine somme pour vne fois. Lesquels traictez conclus & scelez d'eux & d'aucuns de leurs plus feables conseilliers, pardonnerent l'un à l'autre ce qu'ils se pouoient estre entre-meffaits. Et depuis fut ladicte fille deliurée à iceluy Comte entretenant les promesses dessusdictes, dont les subiets de chacune partie eurent au cueur tresgrand ioye: esperans que par le traicté dessusdit demoureroient paisibles, & seroient hors de la grande tribulation où ils auoient long temps esté par la guerre & discord des deux Princes dessusdits.

Comment la Duchesse de Bourgongne accoucha d'un fils en la ville de Gand.

E N cest an le quatorziesme iour d'Auril, la Duchesse de Bourgongne accoucha d'un fils en la ville de Gand: lequel fut tenu sur les fons de Baptisme par le Cardinal de Vincestre Anglois & les Comtes de S. Pol & de Ligney freres: & la Comtesse de Meaux fut marraine: & fut iceluy fils sur lesdits fons nommé Iosse, iacoit-ce que nul desdits parrains ne marraines eussent ainsi nom, mais ainsi l'auoient ordonné lesdits Duc & Duchesse. Si donnerent chacun en droit foy moult riches dons à iceluy enfant. En celle mesme iournée fut la monnoye renouvellee par ledit Duc de Bourgongne en ses païs, par le consentement d'iceux. Si fut faicte nouvelle monnoye d'or nommée

nommée riddes, lesquels valloient xxiiij. sols en blâche monnoye nommée vi-relans. Et furent toutes monnoyées ayans cours en iceux païs condamnées, & ramenuisées de la quarte ou cinquiesme partie moins qu'elles ne valloient. Durant lequel temps fut grande dissention entre la ville de Bruxelle d'une part, & la ville de Malignes d'autre, & menerent tresgrand guerre les vns aux autres. Et pareillement furent ceux de Gand en grand dissention l'un contre l'autre, & en furent plusieurs officiers bannis de ladicte ville.

Comment la paix fut traictée entre le Duc de Bar d'une part, & les Comtes de S. Pol & de Ligney d'autre part.

Durant le temps dessusdit, fut fait le traicté de paix entre le Duc de Bar d'une part, & les Comtes de saint Pol & de Ligney freres d'autre part, à cause de la guerre & haine qui par un temps auoit esté entre eux. Par la fin de laquelle, toute la Comté de Guise ja pieça conquise par messire Jean de Luxembembourg Comte de Ligney deffendeur: laquelle appartenoit hereditablement au dessusdit Duc de Bar, demoura par ledit traicté à iceluy messire Jean de Luxembourg pour en iouir luy & ses hoirs à perpetuité. Et pour en auoir plus grand seurté, se dessaisit le dessusdit Duc de Bar dedans le chastel de Bohaing sans cōtraincte: present plusieurs de ses hommes qui auoient esté mandez avec aucuns officiers d'icelle Comté, & autres notaires imperiaux & apostolicques qui pour ce y estoient: & avec ce fut protesté un autre appoinctement touchant à Jeanne de Bar, fille à messire Robert de Bar Comte de Marle. C'est à sçauoir pour sa part & portion, qu'elle tendoit à auoir à cause de son dit feu pere sur la Duché de Bar. Et pareillemēt fut pourparlé entre icelles parties du mariage d'une des filles maisnée dudit Duc, & du second fils dudit Comte de S. Pol. Si demourerent les deux articles dessusdits, à parconclure du tout iusques à une autre fois qu'ils se deuoient rassembler l'un avec l'autre. Apres lesquels traictes qui durerēt plusieurs iours, & que ledit Duc eut par les deux freres dessusdits esté grandement & honnorablement receu & festoyé dedans iceluy chastel de Bohaing, il se departit de là tresbien content d'eux cōme il monstroient semblant, & s'en retourna en sa Duché de Bar.

Comment la guerre s'esmeut entre messire Jean & messire Anthoine de Vergy d'une part, & le seigneur de Chasteau-Villain d'autre part.

En ce temps an s'esmeut grand discord entre messire Jean & messire Anthoine de Vergy cheualiers de Bourgongne d'une part, le seigneur de Chasteau-Villain d'autre part. Par le moyen duquel ils cōmencerent à faire guerre ouuerte l'un contre l'autre. Et adonc le seigneur de Chasteau-Villain affin qu'il peust estre plus fort pour greuer les dessusdits, il se tourna du party du Roy Charles, avec luy messire Legier de Tousteuille, Jean de Verpelleurs & aucuns autres gentils-hommes qui long tēps par auant estoient ses allies & bien vueillās, en enfreingnāt le serment qu'ils auoient au Duc de Bourgongne leur naturel seigneur: duquel par auant iceluy seigneur de Chasteau Villain, auoit esté moult familier. Et avec ce réuoya au Duc de Bethfort son ordre qu'il auoit porté lōgue espace. Pour leq̃l renuoy iceluy

Duc fut moult indigné vers luy, & le blasma grandement en la presence de ce-luy, qui ledit ordre rapporta, pource que ainsi auoit faulsé son serment vers luy. Et pareillement en fut ledit Duc de Bourgongne tresmal content quand ce vint à sa cognoissance. Si rescriuit aux gouuerneurs de ses païs de Bourgongne, que par tous les moyens que faire se pourroit, ils meissent peine de le greuer & subiuguer, lesquels en obeissant audit Duc meirent son mandement à execution. Toutesfois à l'occasion de celle guerre les païs de Bourgongne eurent grans affaires : par ce que ledit seigneur de chasteau Villain auoit plusieurs fortresses, lesquelles il garnist de ses alliez qui moult le greuerent : neantmoins par la puissance dudit Duc de Bourgongne & l'ayde des dessusdits seigneurs de Vergy & autres nobles du païs, fut contrainct par telle maniere que la plus grand partie de ses fortresses furent conquises & demolies : c'est à sçauoir Graussy, Flongy, Challancy, Villiers le Magnet, Nully, le Chastel saint Vrbain, Blaise, saint Vorge, Esclaron, Varuille, Cussay, Romain, Vaudemont & de Lafoncourt. Deuant lequel chasteau de Graussy le siege y fut trois mois ou environ, lequel tenoit messire Iean de Vergy chief principal de ceste querelle & avec luy messire Guillaume Baufremont, Guillaume de Vienne & messire Charles de Vergy, avec eux douze cens combattans : auquel siege vint pour le leuer ledit seigneur de Chasteau Villain, le Damoyse de Commercy, & Robert de Vaudricourt à tout seize cens combattans : & y eut tresgrande escarmouche, en laquelle fut mort vn seul homme tant seullement : neantmoins le dessusdit seigneur de Chasteau Villain, voyant que bonnement ne pouoit leuer ledit siege sans grand peril pour la bonne ordonnance & assistance que y mettoient ses ennemis, s'en retourna avec les siens là dont il estoit venu, & brief ensuiuant messire Denys saint Flour qui tenoit iceluy fort, fait traicté avec les commis dudit seigneur de Vergy, par condition que en luy rendant ledit chasteau luy & ses gens s'en iroient sauement à tout leurs bagages : & ce conclud retourna vers le Roy qui luy fait couper la teste pour aucunes raisons, dont il fut accusé vers luy, & aussi pource qu'il auoit fait mourir sa femme. Item en ce mesme temps aucuns capitaines tenans le party dudit Duc de Bourgongne, prindrent d'emblée par eschelles la ville desparnay, appartenant hereditablement à Charles Duc d'Orleans prisonnier en Angleterre : dedans laquelle furent faictes tresgrandes derisions, comme en ville conquise.

Comment la paix fut traictée entre le Duc de Bourgongne & les Liegeois.



L' I S S V E de cest an, fut faicte & confermée la paix entre le Duc de Bourgongne & les Liegeois. Pour laquelle plusieurs iournées auoient esté tenues entre les parties sans eux pouoir cōcorder. Neantmoins pour les dommages & interests que ledit Duc auoit euz en sa Comté de Namur par iceux Liegeois, s'accorderent de payer audit Duc de ses fortresses qu'ils auoient abbatues en son païs desolé, cent cinquante mille nobles avec amendes. Et avec ce parmy le traicté promeirent lesdits Liegeois de abbatre & demolir de fons en comble la tour de Mont-orgueil empres Bouvines, laquelle ils tenoient. Par laquelle en partie le discord estoit meu entre icelles parties : laquelle promesse ils entreteindrent brief ensuiuant & la demoli-

rent

rent du tout. Et furent respondans pour iceux Liegeois, affin que mieux entreteinsent ledit traicté Iean de Hinsberche leur Euesque, Iagues de Fosseux & aucuns autres nobles du païs de Liege. Apres lequel traicté pour plus grand seureté, furent faictes lettres & baillées à chacune partie: & par ainsi les dessusdits Liegeois qui par auant estoient en tresgrand doubte & cremeur, eurent grand ioye & furent rappaisez, & en grand seureté demourerent en leur païs.

De l'an mille cccc. xxxiiij.

Comment le Duc de Bethfort qui se disoit Regent de France, espousa la fille du Comte de saint Pol.

AV commencement de cest an Iean de Lenclastre Duc de Bethfort, espousa en la ville de Theroüanne Iacqueline fille aînée de Pierre de Luxembourg Comte de saint Pol, & niepce de Loÿs de Luxembourg Euesque de Theroüanne Chancelier de France pour le Roy Henry, & aussi de messire Iean de Luxembourg. Si auoit cestuy mariage esté traicté certaine espace de temps parauant par le moyen & sollicitude du dessusdit Euesque, qui pour ce temps estoit vn des principaux gouuerneur & conseiller dudit Duc de Bethfort: duquel mariage le Duc de Bourgogne quand il fut retourné de ses païs de Bourgogne, où il estoit pour lors n'en fut point bien content dudit Comte de saint Pol: pource que sans son sceu & conseil il auoit ainsi allié ladicte fille. Et toutesfois la feste & les nopces furent faictes solennellement en l'hostel Episcopal de ladicte ville de Theroüanne. Et pour la ioye & plaisir qu'iceluy Duc de Bethfort eut & print d'iceluy mariage: car ladicte fille estoit frisque, belle & gracieuse aagée de dixsept ans ou enuiron: & afin que de luy il fut perpetuellement memoire, il donna à l'Eglise de Theroüanne deux cloches moult riches, notables & de grand valeur: lesquelles il fait amener à ses propres cousts & despens du païs d'Angleterre: & aucuns iours apres ladicte feste finée il s'en partit.

Comment la ville de saint Vallery en Ponthieu fut prinse des Francois.

EN ce temps messire Loÿs de Vaucourt, & messire Regnault de Versailles tenans le party du Roy Charles accompagnez de trois cens combattans ou enuiron, prindrent à vn point du iour la ville de saint Vallery en Ponthieu par eschelles. Laquelle ville de par le Duc de Bourgogne, estoit au gouuernement de Iean de Brimeu: & si y furent faits de grans maux par iceux Francois selon les coustumes de la guerre comme en ville conquise. Par le moyen de laquelle prinse furent les païs de là enuiron en tresgrand doubte & non point sans cause: car briefs iours ensuiuans iceux Francois se fortifierent de gens puissamment, & commencerent à courir & faire forte guerre aux païs qui se tenoient du party des Anglois & des Bourgongnons: lesquels païs ou la greigneur partie s'allierent à eux, dont ils receurent grandes finances. En ce mesme temps par la diligence de Perrinet Crasset capitaine de la Charité, sur la riuere de Loire, lequel tenoit le party du Roy Henry, fut prinse la ville & forteresse dessusdicte, qui estoit assise en fort lieu: & n'auoit esté prinse ne conquestée en toute la guerre.

Comment les Ducs de Bethfort & de Bourgongne vindrent à saint Omer.

AL'issue du mois de May vindrent à saint Omer les Ducs de Bethfort & Bourgongne, par certains moyens qui auoient esté pourparlez entre icelles parties : affin d'eux reconseiller l'un avec l'autre, d'aucunes parolles haineuses qui auoient esté rapportées tant d'un costé comme d'autre. Avec lequel Duc de Bethfort estoit son oncle le Cardinal d'Angleterre, qui estoit moult desirant d'iceux deux Ducs mettre en bonne concorde. Neantmoins jaoit ce que pour ce faire fussent les dessusdits deux Ducs venus audit lieu de saint Omer : & qu'il eust esté ordonné qu'ils s'assembleroient l'un avec l'autre dedans vn certain lieu, sans ce que l'un fut tenu d'aller deuers l'autre, toutesfois quand ils furent à leur logis, ledit Duc de Bethfort attendoit que le Duc de Bourgongne allast deuers luy ce que point faire ne voulut. Si furent sur ce plusieurs seigneurs enuoyez d'un & d'autre, tendant y remettre moyen : mais rien n'y valut. Et en fin le dessusdit Cardinal vint deuers le Duc de Bourgongne, & parla à luy à part en sa chambre en luy remonstrant amiablement en disant : comment beau nepueu laisserez vous ainsi retourner vn tel prince, qui est fils & frere de Roy, qui pour vous veoir s'est trauaillé de venir en vostre ville sans parler à luy, ne aussi l'aller veoir ? auquel Cardinal le dessusdit Duc de Bourgongne respōdit qu'il estoit prest d'aller au lieu, où il estoit ordonné pour eux conuenir ensemble. Et finablement apres ces parolles & plusieurs autres, le Cardinal dessusdit se departit & s'en retourna par deuers sondit nepueu de Bethfort. Et brief ensuiuant se departirent dudit lieu de saint Omer sans autre chose sur ce besongner iceux deux Ducs, moins contens l'un de l'autre qu'ils n'estoient par auant.

Comment en la cité de Tournay eut grand trouble & dissention pour l'Euesché d'icelle, à cause de la mort de l'Euesque dudit lieu messire Iean de Torfy.

EN cest an mourut en la ville de l'Isle maistre Iean de Torfy moult ancien, Euesque de Tournay & chief du conseil du Duc de Bourgongne : au lieu duquel fut constitué Euesque de ladicte cité par nostre saint Pere le Pape Iean de Harcourt, qui estoit Euesque d'Amiens. Pour laquelle constitution le Duc de Bourgogne ne fut point bien content : pource que de celle Euesché vouloit pourueoir vn sien conseiller, nommé maistre Iean Cheurot Archediacre du Vvelxin en l'Eglise de Roüen. Et mesme-ment auoit autresfois parlé audit Harcourt, affin que se celuy Euesché estoit vacquant, qu'il ne le voulüst impetrer. Lequel (comme on disoit) ledit Duc luy auoit accordé de le non prendre : toutesfois apres que le dessusdit de Harcourt en fut en possession, le dessusdit fait deffendre par tous ses païs tant en Flandres comme ailleurs, qu'on ne fait nulle obeïssance au dessusdit Duc de Harcourt. Et avec tout ce, luy furent arrestées toutes les rentes & reuenues d'iceluy Euesché : qui, où la plus grand partie, estoient és païs dessusdits. Et furent données au dessusdit Duc : dont iceluy de Harcourt eust grād dueil en son cuer : neantmoins esperant trouuer ses moyens, demoura longue espace dedans la ville de Tournay, où il vesquit à simple estat : & y estoit obeï & tresbien aymé des bourgeois

bourgeois & habitans d'icelle cité. Durant lequel temps vacqua l'Archeuesché de Narbonne, laquelle (pour l'amour & faueur d'iceluy Duc de Bourgongne) fut donnée par nostre saint Pere le Pape à Iean de Harcourt, & ledit Euesché de Tournay fut octroyé audit maistre Iean Cheurot. Et feit le Pape ceste translation pour contenter les deux parties, & par especial ledit Duc: dont ledit de Harcourt ne fut bien content: & y meit plusieurs oppositions, disant que le Pape luy faisoit tout ce pour le destituer dudit Euesché de Tournay: & par ainsi iceluy Duc de Bourgongne voyant qu'il ne vouloit obeir au mandement du saint Pere, fut de luy & de ceux de Tournay plus mal content que deuant. Si feit de rechief deffendre par tous ses païs, que nul ne portast viures en icelle ville de Tournay sur peine de confiscation de corps & de biens. Et avec ce que tout homme qui pourroit sçauoir les bien d'aucuns des habitans, les nonçassent aux officiers dudit Duc, & ils seroient prins comme confisquees. Et furent à l'occasion de ceste tribulation faits plusieurs maux bien par l'espace de quatre ou cinq ans. Durant lesquels fut de par le Duc le Comte d'Estampes accompagné de plusieurs cheualiers & escuyers enuoyé en ladicte ville de Tournay, où estoit le dessusdit de Harcourt pour prendre possession pour ledit maistre Iean Cheurot. Si aduint que quand le dessusdit Comte d'Estampes fut en la ville de Tournay, & qu'il eut ordonné à prendre possession à vn nommé maistre Estienne Viuien: vne grande partie de ceux de la ville ne furent point de ce contens, & fasssemblerent en grand nombre par maniere de commotion. Si allerent en l'Eglise où estoit ledit Viuien assis en la chaire de l'Euesque faisant les ceremonies & apprehensions, qui luy auoient esté commises à faire au nom d'iceluy Cheurot, en prenant la possession de l'Euesché, & le tirerent ius de ladicte chaire tresdurement en luy desrompant son surplis & autres habillemens. Et en y eut plusieurs qui en icelle fureur le vouloient mettre à mort: mais pour les appaiser la iustice de la ville le feit prendre & mettre prisonnier, en donnant à entendre à ces communes qu'il seroit puny par ladicte iustice, & qu'ils fussent contens. Et aussi ledit Iean de Harcourt pour qui ladicte commotion se faisoit, les refrena par doulces parolles & amoderées: en eux remonstrant amiablement qu'ils se retrahissent en leurs maisons, disant que tout se feroit bien, & qu'il garderoit son droit par iustice. Apres lesquelles besongnes, & plusieurs autres icelles communes se retrahirent, & se excuserent les officiers: c'est à sçauoir ceux de la loy & autres plus notables enuers le Comte d'Estampes de ladicte commotion: car ils en doubtoient grandement pis valoir au temps aduenir. Et apres toutes ces besongnes ledit Comte d'Estampes & ceux de son conseil voyant que autre chose n'en pourroient faire, se departirent de là, & s'en retournerent à Arras deuers le Duc de Bourgongne. Auquel il racompta l'estat & la maniere de ce qui auoit esté fait en ladicte ville de Tournay: dont ledit Duc en perseuerant de mal en pis, fut tresmal content de ceux d'icelle cité. Et finalement pour & à la cause de la diuision d'iceux deux Eueschez, aduindrent à plusieurs gens de diuers estats de grandes tribulations & miseres. Et mesmement apres la paix faicte à Arras entre le Roy Charles & le Duc de Bourgongne, fut le dessusdit Roy tresmal content des manieres que tenoit iceluy Duc contre ceux de Tournay, voulant soubstenir iceluy de Harcourt. Lequel de Harcourt sçachant que ledit

Duc de Bourgongne estoit du tout conclud & obstiné, de soubstenir maistre Jean Cheurot : & aussi voyant que par nul moyen il ne pouoit iouir paisiblement des biens & fruiets d'iceluy Euesché. Et avec ce que ses terres de Hainault estoient arrestées & mises en la main du dessusdit Duc, il se departit de ladicte ville de Tournay : & s'en alla à priuée mesgnie deuers le Roy, qui luy fait grande reception, & de là s'en retrahit en son Archeuesché de Narbonne. Et par ainsi iceluy maistre Jean Cheurot demoura paisible en son Euesché de Tournay, & fait prendre la possession par vn chanoine de Cambray nommé maistre Robert d'Auclair, qui pour le dessusdit fut assez courtoisement receu & obeï comme son procureur.

Comment les Francois feirent plusieurs conquestes sur les marches de Bourgongne.

EN ce temps vindrent deuers le Duc de Bourgongne certains ambassadeurs, enuoyez par les trois estats de la Duché & Comté de Bourgongne : lesquels luy dirent & exposerent les grans desroys & exactions, que les gens du Roy Charles faisoient par feu & par espée en seldits païs. Et par especial ceux de son beau frere le Duc de Bourbon : disant que desia auoient prins par force plusieurs bonnes villes & forteresses, & chacun iour s'efforçoient de conquerre plus auant : pourquoy le païs estoit en danger d'estre destruit, se briefue prouision n'y estoit mise : luy requerant treshumblement que de sa grace il y voulüst remedier de sa puissance magnifique, & y aller personnellement à tout ses gens d'armes : lequel Duc ceste requeste ouïe fait assembler son conseil, & avecques iceluy conclud que brief ensuiuant il feroit assembler toutes les gens de guerre de ses païs de Brabant, de Flandres, d'Arthois, de Hainault & autres marches à luy obeïssans. Et lors furent mis clerks en œuvre à escrire lettres adressans à tous les capitaines : & aussi aux cheualiers & escuyers & autres gens de guerre, qui auoient accoustumé d'eux armer, contenant que sans delay se meissent sus pour estre prests & appareillez à l'entrée du mois de May, à tout ce que chacun pourroit finer de gens d'armes, tant hommes d'armes comme archiers à aller en sa compagnie, là où il les vouloit conduire & mener : lesquels capitaines ouï le mandement de leur Prince & seigneur, feirent leur assemblée & se preparerent diligemment. Et en y eut grand partie lesquels meirent leurs gens sur les champs : dont le païs de Picardie, d'Arthois, Ponthieu, Tournesis, Ostreuant, Cambresis, Vermandois & les marches à l'enuiron furent grandement trauaillées : pourtant que le dessusdit Duc de Bourgongne n'eut pas si en haste & viftement appresté ses besongnes pour partir, & faire son voyage, & demourerent iceux gens d'armes par l'espace d'un mois & plus, en mangeant tousiours le païs dessusdit. En la fin duquel mois ledit Duc de Bourgongne, qui de plusieurs parties de ses païs auoit fait grandes apprestes & preparations de chariots, artilleries & de toutes autres manieres d'habillement de guerre, se partit de la ville d'Arras le vingtiesme iour de Iuing avecques luy plusieurs capitaines. Et y fut sa femme la Duchesse qui auoit avecques elle tant de dames & damoiselles que autres femmes seruans, tât qu'elles estoient bien iusques au nombre de quarante ou au dessus, & vint au giste iusques à Cambray : en laquelle cité se retrahit vers luy messire Jean de Luxembourg,

xembourg, qui luy requist d'aller en son chastel de Bohaing lequel luy accorda. Et apres le lendemain incontinent qu'ils eurent ouye Messe dedans l'Eglise nostre Dame de Cambray, luy & sa femme la Duchesse, & qu'ils eurent prins leur refection : ils s'en allerent audit chasteau de Bohaing, où ils furent moult ioyeusement & honorablement receuz du dessusdit messire Jean de Luxembourg, Comte de Leigny & de la Comtesse sa femme. Si furēt eux & leurs gens seruis trefabondamment de plusieurs viures à eux necessaires & conuenables selon le temps, & demourerent en cestuy lieu par deux iours en prenant leurs esbatemens en chasses & autres deduits. Et entre-temps les capitaines & cheualiers à tout leurs gens d'armes se retrahirent vers le paÿs de Rethelois. En apres le Duc de Bourgongne & la Duchesse sa femme partans dudit lieu de Bohaing, s'en allerent à Prouins. Et de là parmy la Champaigne passerent assez tost pres de la ville de Reims. Si auoit en la compagnie iusques à six mille combattans, tant hommes d'armes comme d'archiers : desquels estoient les principaux conducteurs le seigneur de Croÿ, messire Jeā de Croÿ son frere, messire Jean d'Hornes Seneſchal de Brabant, le seigneur de Cresquy son frere, messire Jean bastart de S. Pol & Loÿs son frere : le seigneur de Humieres, messire Baudo de Noyelle, le seigneur de Créuecueur, Robert de Neufuille, Lancelot de Dours, Harpin de Richammes & plusieurs autres moult nobles hommes tant cheualiers comme escuyers : & alors ledit Duc de Bourgongne cheuaucha parmy le paÿs de Champaigne, lequel auoit auantgarde, bataille & arrieregarde. Laquelle auantgarde conduisoit messire Jean de Croÿ au dessous de son frere. Et auecques luy estoit le dessusdit Harpin de Richammes. Si estoit chacun iour mis le charroy entre l'auantgarde & la bataille. Et la Duchesse qui lors estoit bien enceinte d'enfant, alloit auecques ses femmes pres de ladicte bataille où estoit le Duc : & cheminerent tenant telle ordonnance iusques deuant Troyes, qui tenoit le party du Roy Charles : deuant laquelle ville passa ledit Duc : & de là print son chemin vers Cappelles tirant vers Bourgongne à tout grand nombre de combattans. Et adonc vindrent deuers luy les seigneurs de Bourgongne à tout grand nombre de combattans : ausquels il feit ioyeuse reception : & brief ensuiuant print conclusion auecques ceux de son conseil de ce qu'ils auoit à faire. Si fut ordonné que la Duchesse & sa compagnie s'en iroient à Chastillon sur Seine seiourner : & ledit Duc mena ses gens deuant Mussi l'Euesque, que tenoient les François ses aduersaires, & meit le siege tout à l'enuiron. Si furent des assiegeans faictes grādes preparations pour greuer leurs aduersaires & ennemis : c'est à sçauoir, feirent asseoir deuant les portes & murailles plusieurs engins, pour iceux confondre & abbatre. Et d'autre part les assiegez feirent tresgrande diligence d'eux deffendre : neantmoins eux voyans la puissance dudit Duc de Bourgongne estre si grande, & aussi qu'ils n'auoient mie esperāce d'auoir aucun secours feirent traicté auecques lesdits commis d'iceluy Duc dedans les huit iours : & apres le siege mis par tel si, qu'ils s'en iroient sauf leurs vies, corps & biēs en rendant ladicte forteresse : lequel traicté conclud se departirent sous bon sauf-conduit, & s'en allerēt à S. Florentin. Et apres qu'iceluy Duc eut de par luy cōmis capitaine en icelle ville, il s'en alla à Chastillon où estoit ladicte Duchesse sa fēme, & ses gēs d'armes se departirent sous bon saufconduit, & s'en allerent vers la Côté de Tonnerre.

Comment le Duc de Bourgongne reconquist plusieurs forteresses que les Francois auoient conquises en son païs de Bourgongne.

Durant ce temps apres que le dessusdit Duc de Bourgongne eut seiourné aucun pou de iours à Chastillon, il ordonna sa femme la Duchesse à aller à Dijon, où elle fut ioyeusement receüe de la ville & du païs, & il s'en alla apres ses gens. Si feit assieger Lussignes & Passy que tenoient ses aduersaires: laquelle forteresse de Lussignes fut si rigoureusement contraincte, que ceux qui la tenoient la rendirent audit Duc par telle condition, qu'ils s'en iroient sauf leurs vies en delaissant leurs biens. Et les dessusdits de Passy baillerent hostaiges de rendre leur fort le premier iour de Septembre ensuiuant, en cas que iceluy Duc ou ses commis ne seroient combattus par ceux de leur party au iour dessusdit. Et adonc plusieurs autres forteresses que tenoient lesdits Francois, doubans la grand puissance que auoit ledit Duc de Bourgongne au païs, se rendirent à luy avecques celles dessusdictes: c'est à sçauoir Danlermoinne, Herny, Courfain, Secalofloug, Malegny, S. Phalle, Sicry, Sabelly & autres forteresses iusques à vingt & quatre & au dessus. Apres lesquelles redditions ledit Duc s'en alla à Dijon, & ses capitaines à tout leurs gens d'armes se retrahirent vers leurs marches: desquels durant ce voyage fut le chief, messire Iean de Croÿ à tous les sieges qui se meirent en l'obeïssance du dessusdit Duc de Bourgongne.

Comment Gilles de Postelles fut accusé de trahison, dont il fut decapité.

En cest an fut accusé de trahison enuers le Duc de Bourgongne vn gentil-homme du païs de Hainault, nommé Gilles de Postelles, lequel auoit long temps esté nourry & seruiteur en la maison de la Comtesse de Hainault doüagiere tante audit Duc de Bourgongne. Et fut la cause de ladicte accusation, pource qu'il auoit pourparlé avecques aucuns autres nobles du païs, de mettre à mort le dessusdit Duc par trait ou aucune autre maniere, en allant avec luy au bois à la chasse. Si fut pour ceste cause prins en l'hostel de celle Dame au Quesnoy par messire Guillaume de Lalaing, Baillif dudit païs de Hainault. Et puis apres qu'il eut esté diligemment questionné & examiné, il fut decapité & escartelé au marché de Mons en Hainault, & les quartiers mis au dehors de quatre bonnes villes du païs. Avecques lequel fut ainsi decapité vn sien seruiteur, & Iean de Vendeges, à qui iceluy Gilles de Postelle s'en estoit descouuert se rendit fugitif du païs: & depuis par diuers moyens quist plusieurs fois ses excusations deuers ledit Duc. Si fut pour ceste cause mise aucune suspicion contre ladicte Comtesse de Hainault doüagiere, mais en conclusion rien n'en vint à clarté.

Comment les Francois eschellerent la ville de Crespy en Valois, & plusieurs autres manieres.

Durant

DVrant ces tribulations les gens du Roy prindrent par eschelles à vn point du iour la ville de Crespy en Valois, tenant le party des Anglois: & en estoit capitaine le bastard de Thian, lequel avecques grand partie de la garnison & de ses habitans fut prins, & tous les biens pillez & rauiz avec plusieurs autres maulx grans & innumerables qui y furent faits, & par la maniere qu'il est accoustumé de faire en ville conquise. La nuit de l'Ascension de cest an se resineurent les Gantois contre les officiers du Prince & les gouuerneurs de la ville: mais le souuerain Escheuin de la ville se meit sur le grand marché à tout la banniere du Comte de Flandres bien accompagné, auant que les mouuemens fussent assemblez: lesquels voyans qu'ils ne pouoient mener leur intention à fin, se rendirent fugitifs: & les aucuns furent depuis prins & punis par les souuerains gouuerneurs de la ville de Gand. En ces iours fut prinse la ville de Bruyeres en Laonnois sur les gens du Roy Charles, par aucuns des gens de messire Iean de Luxembourg Comte de Ligny: desquels estoit l'vn des meneurs Villemet de Hainau capitaine de Montagu: pour laquelle prinse ceux de la ville furent en grand effroy, doubtans qu'en icelle ne fut en brief temps mise puissante garnison contre eux. Et pourtant se garnirent & fournirent de gens de guerre au mieulx que bonnement faire le peuuent pour y resister.

Comment le Duc de Bourgogne tint la iournée de Passy. Et comment il fait assieger la ville & forteresse d'Aualon.

LE premier iour de Septembre venu le Duc de Bourgogne qui par auant auoit mādé és parties de Bourgogne tous ceux qui l'auoient accoustumé de seruir tint la iournée pour la reddition de Passy dont dessus est faicte mention. A laquelle iournée vindrent en son ayde le seigneur de l'Isle-Adam Mareschal de France de par le Roy Henry & messire Iean de Talbot Anglois à tout seize cens combattans ou enuiron: lesquels furent dudit Duc receuz moult ioyeusement, & fait tresbeaulx dons à iceux seigneurs & leurs gens: toutesfois lesdits François ne comparurent pas à ladicte iournée, parquoy ceux de ladicte forteresse de Passy sicomme promis l'auoient la rendirent en la main du dessusdit Duc de Bourgogne: & se departirent sur bon saufconduit. Et apres ledit Duc enuoya aucuns de ses capitaines mettre le siege entour Aualon: dedans laquelle estoit capitaine vn nommé fort espice à tout deux cens combattans fleurs de gens d'armes roides & instruits de la guerre qui moult vaillamment se deffendirent. Et estoient les principaulx assiegeâs, cest à sçauoir de Bourgogne le seigneur de Charny, Philebert de Vaudray & aucuns autres: & de Picardie y estoient messire Iean Bastard de saint Pol, le seigneur de Humieres & plusieurs autres nobles hommes, lesquels en grand hardiesse approcherent leurs ennemis & se logerent grand partie au plus pres des fossez: Si feirent dresser plusieurs engins dont la muraille d'icelle ville fut fort trauaillée & en moult de lieux abbatue. Et tant que iceux assiegeans esperâs icel le prendre de force luy liurerent vn grand assault duquel ils furent par force rebourez & recullez, mais finablement lesdits assiegez doubtans qu'en fin ne fussent prins de force & non ayans esperance de secours s'effrayerent si fort que

par nuyt se departirent d'illecques en desroy par vne poterne qui point n'estoit bien gardée. Mais ains qu'ils fussent tous hors furent apperceuz de leurs ennemis lesquels s'armerent & vigoureusement se ferirent en eux, si en prindrent & occirent plusieurs. Et le dessusdit Forte-espice & aucuns des principaulx se sauuerent par fuite. Et adonc fut ladicte ville soudainement assaillie & prinse sans trouuer quelconque deffence: dedans laquelle fut prinse la femme d'iceluy Forte-espice & plusieurs de ses gens avecques aucuns payfans & tous les biens d'icelle prins & ravis.

Comment Pierre de Luxembourg Comte de saint Pol assiegea la ville de saint Vvalery, auquel voyage il mourut.



V mois de Iuillet Pierre de Luxembourg Comte de saint Pol accompagné du seigneur de Villeby Anglois & douze cens combattans de deux nations, il meit le siege tout à l'enuiron de la ville de saint Vualery, dedans laquelle estoient de par le Roy Charles messire Loys de Vaucourt, Philippe de la Tour, & messire Regnault de Verfeilles à tout trois cens combattans. Si feirent de rechief dresser contre les portes & murailles aucuns engins pour les greuer. Et apres que ledit siege eut duré par l'espace de trois sepmaines les dessusdits cheualiers assiegez feirent traicté avecques Robert de Saueuses à ce commis de par ledit Comte de saint Pol, par tel si qu'ils deuoient auoir certaine somme de monnoye & emporter tous leurs biens & aussi emmener tous leurs prisonniers, & avecques ce eurent iour de partir de ladicte ville en cas que lesdits assiegeans ne seroient combattus de ceux de leur party. Auquel iour ne comparut homme tenant leur party, & par ainsi se departirent de là & s'en allerent à Beauuais sous bon saufconduit. Et de là brief ensuiuant les dessusdits messire Loys, & messire Regnault furent rencontrez d'un nommé le petit Rolant tenant leur party, lequel pour aucune haine particuliere sur le chemin de Senlis leur courut sus avecques ses gens qu'il auoit amenez à Chantilly, & en conclusion les conquist & destroussa, & mesmement y fut prins ledit messire Regnault de Verfeilles. Et apres le dessusdit Comte de saint Pol refournist de ses gens ladicte ville de saint Vualery & la bailla en garde à messire Robert de Saueuse. Et de là partant de sondit siege s'en alla loger en vn grand village nommé Blangy en la Comté d'Eu en l'intention d'aller assieger le chastel de Mouchas que tenoit pour party du Roy Charles messire Regnault de Fontaines. Lequel messire Regnault non voulant attendre ledit siege, feit traicté avecques les gens & commis dudit Comte par tel si qu'il luy rendroit ladicte forteresse le xv. iour du mois d'Octobre ensuiuant, en cas qu'à ce iour les gens du Roy Charles ne seroient puissans pour combattre ledit Comte audit iour deuant le chastel de Mouchas, ou es pays de Santhois empres Villiers le Carbónel à vne lieüe de Haplaincourt. Et pour la seurte de ce traicté fait & confirmé par les parties le xxvj. iour du mois d'Aoust furent baillez hostaiges. Et le dernier iour d'iceluy mesme mois d'Aoust iceluy Comte estant en ses tentes empres ladicte ville de Blangy, faisant les ordonnances pour aller assieger le chastel de Rambures, luy print la maladie de lespidemie, de laquelle il mourut assez soubdainement. Pour la mort duquel toutes ses gens

gens & aussi les capitaines Anglois là estans furent fort troublez & courroucez en cuer. Si s'en retournerēt assez brief chacun en leurs places & propres lieux, dont ils estoient venus. Et ceux de sa famille emporterent son corps en la ville de saint Pol. Et depuis il fut enterré deuant le grand autel du Monstier de Cler Champ l'Abbaye, de laquelle ses predecesseurs estoient fondateurs. Et assez brief ensuiuant Loys de Luxembourg fils aîné dudit Comte aagé de quinze ans ou environ, print & apprehenda toutes les seigneuries qu'auoit tenu son dit feu pere. Et de là en auant se feît nommer Comte de saint Pol.

Comment le seigneur de la Trimouille fut prins en l'hostel du Roy Charles, & rendit la Vicomté de Touars.

Durant le temps dessusdit le Roy Charles de France se tenoit moult souuent au chastel de Chinon : avecques lequel estoient le seigneur de la Trimouille, par qui toutes besongnes se conduisoient quant à l'estat du Roy, dont n'estoient pas bien contens Charles d'Anjou & aucuns autres grans seigneurs qui l'auoient en haine pour l'amour du seigneur d'Amboise Vicomte de Touars : lequel il faisoit tenir prisonnier dès le temps que le seigneur de Lessay & Anthoine de Viuonne auoient esté decapitez en la cité de Poictiers par son pourchats. Et aussi pource que par luy le Connestable ne pouoit retourner en la grace du Roy, comme iceux entendoient estre vray. Si aduint vn certain iour qu'en comptant des choses dessusdictes entrèrent dedans iceluy chastel de Chinon le seigneur de Bueil, messire Pierre de Verseil, Fregent de Cothiguy, & aucuns autres grans Barons iusques au nombre de seize : lesquels allerent iusques à la chambre d'iceluy seigneur de la Trimouille qui encore estoit en son liât. Si le prindrent prisonnier & l'emmenèrent, & luy fut lors osté tout le gouuernement du Roy. Et puis par traicté qu'il feît avec les dessusdits & autres leurs alliez, rendit ledit seigneur d'Amboise. Et avecques ce promet de non plus retourner deuers le Roy, & si rendit plusieurs forteresses qu'il tenoit. Et assez brief ensuiuant retourna ledit Connestable deuers le Roy : lequel Roy fut assez content de luy, jaçoit ce qu'il luy despleust grandement du desapoinctement dessusdit du seigneur de la Trimouille : neantmoins luy furent baillez nouveaulx gouuerneurs. Au temps dessusdit Philippe le seigneur de Saueuses se tenoit en la ville de Montdidier à tout certain nombre de combattans, pour deffendre le pays & resister contre les François de Compiengne, Reffons sur la mer, Morte Mer, Bretueil & autres places : lesquels estoient allez courre vers le pays de Santhois environ eux cinquante combattans : lesquels furent tantost enuahis & la plus grand partie prins prisonniers, & les autres se sauuerent par fuite. En cest an mourut le Comte de Ponthieure en sa ville d'Auesnes en Hainault, lequel par long temps auoit esté dechassé de Bretagne comme en autres lieux est assez declairé. Et alors regnoit sur la plus grand partie des marches de France grand mortalité, tant en bonnes villes comme en plain pays. Et d'autre part estoient les seigneurs & nobles hommes fort diuisez les vns contre les autres, & n'estoient Dieu, l'Eglise ne iustice obeyz ne crains. Et par ainsi le pource & simple peuple estoit en plusieurs manieres offensé.

Q

Comment Guillaume de Coroan rua ius Iean de Beaurain. Et comment la forteresse de Haplaincourt fut reconquise par messire Iean de Luxembourg.

LTem en celuy temps Guillaume de Coroam Anglois, & avecques luy Villemer de Hainault, & aucuns autres des gens de messire Iean de Luxembourg accompaigné de trois à quatre cens combattans ou environ, ruerent ius & destrousserent entre Ardenne & Champaigne assez pres de Yvvis de cinq à six cens combattans: lesquels auoit assemblez Iean de Beaurain & autres capitaines pour combattre & ruer ius les dessusdits qui là estoient allez courir, toutesfois ledit Iean de Beaurain se sauua & grand partie de ses gens. Et apres au mois de Septembre fut prins le chastel de Haplaincourt, seant sur la riuere de Somme à deux lieües de Peronne par vn tenant le party du Roy Charles nommé Martin le Lombart & ses complices: dedans lequel estoient messire Pierre de Beaufault noble chevalier moult ancien & sa femme, mere de messire Karados de Quesnes. Pour laquelle prinse le pays de Vermandois & autres à l'environ furent en grand effroy & soucy: doubtons que par le moyen d'icelle prinse leurs aduersaires & ennemis n'eussent grãd entrée en iceux pays. Et pourtant sans delay furent incontinent mandées ces nouvelles audit messire Iean de Luxembourg: lequel dedans briebs iours ensuiuant assemblea bien huiet cens combattans Picards, & avecques luy le ieune Comte de saint Pol son nepueu, le seigneur de Saueuses, messire Symon de Lalaing & aucuns autres nobles capitaines & s'en alla debant ledit chastel: deuant lequel il feit dresser aucuns engins pour traire à l'encontre. Et tant feirent par lesdits engins avecques les assaulx que y feirent ses gens, qu'ils contraingnirent tellement ceux de dedans ledit chastel, qu'ils se rendirent du tout en la voulenté dudit messire Iean de Luxembourg, dont les aucuns furent penduz & estranglez. Et ledit Martin, Iacotin, Clamas furent depuis deliurez par finance: & iceluy chastel fut depuis remis en la main de Iean de Haplaincourt, & en furent du tout deboutez les dessusdits chevalier & dame. Apres lequel exploict s'en retournerent les dessusdits Comtes de Ligney & de S. Pol avecques leurs gens es lieux & pays dont ils estoient venuz.

Comment les Comtes de saint Pol & Ligney tindrent la iournée de Villiers le Carbonnel: & depuis ruerent ius les Francois de la garnison de Laon.

LE quinziesme iour du mois d'Octobre le ieune Comte de saint Pol, & messire Iean de Luxembourg Comte de Ligney son oncle, avec de quatre à cinq mille combattans que par auant ils auoient euocquez des pays de Picardie & de Hainault: entre lesquels estoient messire Guillaume de Lalaing, messire Symon son frere, le seigneur de Mailly, messire Allard de Mailly, le seigneur de Saueuses, Valleran de Moreul, Guy de Roye & plusieurs autres hommes de guerre experts & renommez en armes. Avecques ce aussi douze cens Anglois ou environ, que conduisoient le seigneur de Villeby & messire Thomas Kiriell, tindrent la iournée au pays de Santhois empres Villiers le Carbonnel, pour la cõposition du chastel de Mouchas en Normandie faicte par messire Regnault de Fontaines avec le feu Comte Pierre de Luxembourg,

xembourg, comme en autre lieu est à plain declairé. A laquelle iournée messire Regnault ne autres de la partie du Roy Charles ne vindrent ne comparurent, ains laisserent leurs hostages en ce dangier. Neantmoins les deux Comtes dessusdits se tindrent en la bataille au lieu, qui auoit esté diuisé entre icelles parties grand partie du iour. En apres eux voyans qu'ils ne veoient nulle apparence de leurs aduersaires, se logerent à tout leurs gens ceste nuict en aucuns villages pres de ladicte place. Et le lendemain s'en retournerent és lieux dont ils estoient venus par plusieurs iournées. En oultre dedans briefs iours ensuiuans les dessusdits Comtes estans à Guise, leur furent apportées nouvelles que le seigneur de Pennesach alors capitaine de Laon avec luy quatre cens combattans ou environ des garnisons de la marche de Laonnois, estoient venus courre vers Marle, & venoient de cuider prendre Veruins appartenant heritablement à Ieanne de Bar sa belle fille : & desia auoient bouté les feux és faulxbourgs d'icelle ville de Marle. Pour lesquelles nouvelles messire Iean de Luxembourg tout troublé monta à cheual, ledit Comte de S. Pol en sa compaignie, messire Symon de Lalaing & les gens de son hostel. Si manda hastiement à toutes ses gens qui estoient en ses forteresses assez pres d'illec qu'ils le suiussent sans delay : & avec ce messire Symon manda ses gens qui estoient logez en vn village assez pres de là. Finablement ledit Comte de Ligny meit ensemble trois cens combattans de plusieurs terres, & cheuaucha vigoureusement vers ses ennemis, si les trouuerent qu'ils se retrayoient vers Laon assez pres de Daissy. Et jaçoit ce qu'ils fussent en plus grand nombre que luy, toutesfois tantost qu'il les apperceut se ferit des premiers dedans eux sans plus attendre apres ses gens : & pour vray il y fait de grans merueilles, & faits d'armes de sa personne : & finablement les François se meirent en fuite en la veüe de leur capitaine dessusdit : & les autres furent desconfits & mis à mort iusques au nombre de huietvingts, dont estoient les principaulx Gaillart de l'Isle, Anthoine de Belle-Garde, de Mouÿ, le Borgne de Vy, Henry Quenof du paÿs de Brabant & aucuns autres iusques au nombre dessusdit : & en y eut de prins de soixante à quatrevingts, desquels la plus grand partie furent le lendemain pendus : desquels en fut vn nommé Roussellet Preuost de Laon : & si fut prins en la bataille vn gentil-homme d'armes nommé l'Archenciel qui s'estoit rendu à messire Simon de Lalaing dessus nommé : lequel l'Archenciel luy auoit autresfois sauué la vie à saint Vincent comme dit est ailleurs. Et pareillement luy vouloit ledit messire Simon sauuer la vie, ce que faire ne peut : car messire Iean de Luxembourg le fait occire, dont ledit messire Simon fut moult courroucé : mais autre chose n'en peut auoir. En apres les François furent chassés iusques assez pres de la ville de Laon, si en y eut en ladicte chasse plusieurs morts & prins. Si fut ce iour le ieune Côte de S. Pol mis en voye de guerre : car le Comte de Ligny son oncle luy en fait occire aucuns, lequel y prenoit grand plaisir. Apres laquelle destrouffe s'en retournerent tres ioyeux en ladicte ville de Guise pour la victoire qu'ils auoient obtenue.

Comment la Hire & plusieurs autres Francois coururent en Artois & en Cambresis : mais ce fut deuant l'aduenture dessusdicte.



V mois de Septembre la Hire accompagné de plusieurs capitaines du Roy Charles : c'est à sçauoir Anthoine de Chabannes, Blanchefort, Charles de Flauy, Regnault de Longueual & aucuns autres, avecques bien quinze cens combattans ou enuiron qu'ils auoient assemblez és marches de Beauuais, passerent l'eau de Somme à Cappy au pays d'Arthois, si prindrent iceluy à fourrer : & de premiere venue prindrent grand nombre de payfans, qui de ce ne se donnoient garde : lesquels ils emmenerent en la ville de Beauuais en Cambresis, où ils se logerent tous ensemble. Et de rechief comme ils auoient fait ailleurs, prindrent la plus grand partie des homes d'icelle, lesquels ils cōposerent à grand finance. Et le lendemain se meirent aux champs tous ensemble en vne champaigne : & apres qu'ils eurent cheuauché vn petit encest estat, ils se departirent pour aller en deux lieux : c'est à sçauoir Anthoine de Chabannes & Blanchefort à tout leurs gens s'en allerent passer deuant Cambray, & prindrent leur chemin droit à Haspre, où la franche feste auoit esté le iour deuant la tour d'Yvvis : & pource que ceux de dedans ne se voulurent composer à leur plaisir, ardirent la plus grand partie de la ville & du monstier. Et apres s'en allerent deuers ladicte ville de Haspre, où il y auoit tresgrand nombre de peuple & de biens abondamment. Si se ferirent dedans sans ce que ceux de Haspre en fussent de riens aduertis, si en prindrent plusieurs : mais les autres se retrahirent en vne forte tour avecques les moynes, où ils furent par iceux François longuement assaillis. Et pource qu'ils ne les peurent auoir, apres ce qu'ils eurent prins & raui des biens d'icelle ville tout à leur plaisir, bouterent le feu en plusieurs maisons, & aussi en l'Eglise saint Akaire & en l'abbaye, & y feirent dommage incomparable. Et apres ce se remeirent aux chāps à tout leurs bagages, & trauserent le pays de Cambresis : si prindrent plusieurs hommes prisonniers & ardirent plusieurs maisons, & puis s'en allerent loger au mont S. Martin avecques la Hire qui là les attendit. Et en ce mesme iour ledit la Hire auoit fait ardoir & embraser la ville de Beurevoir, le moulin & aussi vne tresbelle maison de plaissance nommée la Mothe, seant assez pres d'icelle ville : laquelle estoit à la Comtesse de Ligney : si coururent lors en plusieurs parties par petites compaignies en faisant maulx & innumerables dommages sur le pays, sans estre occupez de leurs ennemis : car messire Iean de Luxembourg estoit encores avec le ieune Comte de S. Pol son nepueu, pour les affaires qui luy estoient suruenuz à cause de la mort du Comte Pierre son frere. Et pour ceste cause les dessusdits François ne trouuerent quelque destoubier ne resistēce par tout où ils allerent durant ceste entreprinse : & en apres du mont S. Martin prindrent leur chemin vers Laon : & en accueillant grans proyes de bestail & menant grand multitude de prisonniers, s'en allerent loger à Cressy sur Serre, & de là sans perte de leurs gens s'en retournerent à Laon où ils partirent leur butin : & puis s'en allerent en leurs garnisons chacun dont ils estoient venus. Enuiron le temps dessusdit retournerent des pays de Bourgogne les seigneurs de Croÿ & de Humieres, à tout deux mille cheuaux : lesquels par longue espace auoient esté avec le Duc Philippe de Bourgogne, pour faire plusieurs conquestes audit pays sur les François : auquel temps la Duchesse de Bourgogne se deliura d'un fils en la ville de Dijon, lequel fut fait cheualier sur les fons. Et furent les parrains

Charles

Charles Comte de Neuers, qui luy donna son nom. Et ledit seigneur de Croÿ avec luy. Et auant son departement fut deslors constitué de l'ordre de la confraternité de la toison d'or: & avec ce par le dessusdit Duc de Bourgogne son pere, luy fut donnée la Comté de Charrolois.

Comment le Duc de Bourgogne tint la feste de la Toison d'Or en la ville de Dijon. Et comment il alla aux nopces du fils du Duc de Sauoye.


EN ce temps le Duc de Bourgogne tint la feste de la toison d'or en la ville de Dijon en Bourgogne: & brief ensuiuant vindrent deuers luy les gens du Duc de Sauoye, luy requester qu'il voulsist aller aux nopces de son nepeueu le Comte de Geneue: lequel prenoit à femme la fille au Roy de Chippe, & se deuoit tenir la feste d'icelles nopces à Chambery en Sauoye: lequel Duc de Bourgogne accorda d'y aller: & apres qu'il eut ordonné ses besongnes enuiron la Chandeleur, laissa sa femme la Duchesse à Chaalons en Bourgogne & son armée enuiron, & se partit à tout deux cens cheualiers & escuyers. Et cheuaucha par plusieurs iournées, tant qu'il vint en ladicte ville de Chambery en Sauoye, & là vindrent au deuant de luy le Duc de Sauoye & son cousin germain le Côte de Geneue, lesquels les receurent moult liement. Et le lendemain furent faictes les nopces moult solennelles & plantureuses: & se firent à la grād table le Cardinal de Chippe oncle de l'espousée, la Royne de Cecille femme du Roy Loÿs fille dudit Duc de Sauoye. Et puis ledit Duc de Bourgogne tous trois au droit lez, & au milieu fut assise l'espousée: & apres le Duc de Bar, le Comte de Neuers & le Damoisel de Cleues. Et à la secōde table se firent le Duc de Sauoye, le Comte de Fribourg, le Marquis de Fribourg, le Prince d'Orenge, le Chancelier de Sauoye & autres seigneurs & dames. Aux autres tables furēt assis plusieurs cheualiers & escuyers, dames & damoiselles de diuerses contrées moult richement habillees. Lesquels chacun selon son estat furent moult hautement & richement seruis. Et dura ladicte feste par trois iours moult plantureuse. Durant laquelle furent faictes moult de ioyeusetez en dances, & autres esbattemens. Et apres ledit Duc de Bourgogne donna à l'espousé vn moult riche fermail de la valeur de trois mille francs. Et puis les trois iours dessusdits passez print congé à toute la seigneurie qui là estoit, & s'en retourna en Bourgogne. Si fut à son departement grādement remercié du Duc de Sauoye & de son fils.

Comment le Concile de Basle fut en cest an en grand estat tenu.

DVRANT ce temps dessusdit estoit le Concile de Basle en grand estat tenu: & y estoit venu l'Empereur signifiant Roy des Romains, & plusieurs autres seigneurs de diuerses nations tāt ecclesiastiques que seculiers: lesquels entendoient diligemment à mettre ambassadeurs sus, pour appaiser les discords d'entre le Roy de France d'vne part, & le Roy d'Angleterre & le Duc de Bourgogne d'autre part. Et entre-temps vindrent nouuelles audit Concile qui leur furent moult plaisans, c'est à sçauoir que les Pragois auoient esté desconfits & morts de huiet à dix mille personnes par les nobles du pays de Behaine, & par avec eux six cēs hommes de guerre, que ceux

dudit Concile auoient enuoyez en leur ayde. Et brief ensuiuans furent occis deux prestres qui estoient capitaines des errans: dont l'un estoit nommé Proteustus du Tabouret, & l'autre Lupus, & avec eux six mille de leur secte. Si fut lors conquise la grand cité de Pragues & nettoyée des mescreans & grand partie du pays: si enuoyerēt ceux de Behaigne leur ambassade au Concile, pour auoir absolution & confirmation de la foy Catholique. Et adonc fut par ledit Concile leué vn demy dixiesme sur le clergié. Et de rechief vindrent les ambassadeurs du Roy de Castille, & des Espaignols en tresgrand estat audit lieu de Basse. Et estoient bien quatre cens personnes, & deux cens mullets sans les cheuaux. Et furent enuoyez de par iceluy Concile les Cardinaux de sainte Croix & de saint Pierre, deuers Philippe Maria Duc de Millan pour r'auoir la terre de l'Eglise qu'il tenoit, mais ce fut à peine perdue.

Comment la ville & le chastel de Prouins en Brie que tenoient les Francois furent prins des Anglois & Bourgongnons. Et aussi comment la ville & forteresse de S. Valery fut reprise des Francois.



En ce temps furent prins d'eschelles la ville & chastel de Prouins en Brie, que tenoient les Francois par les Anglois & Bourgongnons: desquels estoient les chefs messire Iean Raillart, Mando de Lussach, Thomas Girard capitaine de Mōstreau-faut-Yonne, Richard Huçō & aucuns autres: lesquels pouoient auoir enuiron quatre cens combattans: & fut des eschelleurs vn nommé Grosse-teste. Et fut prins par le chastel enuiron cinq heures apres minuiet. Et estoient dedans enuiron cinq cens hommes de guerre, dont le principal estoit le Commandeur de Gueraines, qui avec ses gens tresvaillamment se gouerna & deffendit l'espace de huit heures ou enuiron: & tant que lesdits entrepreneurs en moururent largement, iusques au nombre de six vingts ou mieux: entre lesquels en fut l'un vn nommé Henry de Hōgrefort Anglois tresvaillant homme d'armes: neantmoins ladicte ville & forteresse furent conquises & du tout mises à saquemen: & furēt morts & prins grād partie des dessusdits Francois deffendeurs. Mais ledit Cōmandeur voyant que nul remede ne s'y pouoit mettre, se sauua avec aucuns autres, & depuis en demoura capitaine le seigneur de la Grange. Item à l'entrée du mois de Ianuier reprindrent les gens du Roy Charles: c'est à sçauoir Charlot du Marests capitaine de Rambures la ville & forteresse de S. Valery par faute de guet: laquelle Robert de Saueuses auoit en sa garde, mais pour lors n'y estoit pas: & y auoit eu si grād mortalité, que pou de gens s'y osoient tenir: neantmoins le Bastard de Siennes son lieutenant fut prins & aucuns autres avec luy: pour laquelle prinse ceux de Ponthieu & autres à l'enuiron furent en moult grand doubte. Philippe de la Tour fut principal chief à prendre ceste ville de S. Valery, avec le dessusdit Charlot du Marests.

De l'an mille cccc. xxxiiij.

Comment le Duc de Bourgongne retourna en ses pais de Bourgongne en Flandres & en Arthois & amena avec luy Iean fils du Comte de Neuers & autres matieres.

Au



V commencement de cest an Philippe Duc de Bourgongne retourna en ses païs de Bourgongne, en Arthois, en Flandres & en ses autres païs six cens combattās avec luy ou enuiron: & laissa audit païs de Bourgongne la Duchesse sa femme & son petit fils. Et avec les forteresses garnies de ses gens d'armes: auquel retour amena avec luy Iean fils au Comte de Neuers son cousin germain & fils à sa femme precedente. Si visita ses païs & bonnes villes, & prepara pour auoir gens & argent pour retourner audit païs de Bourgongne, & entre-temps les gens de messire Iean de Luxembourg tenans les frontieres de Laonnois, prindrent le fort de l'abbaye S. Vincent lez Laon, que tenoient les gens du Roy Charles: dedās lequel fort fut prins vn notable gentil-homme nommé Anthoine de Cramailles: auquel le dessusdit Duc de Luxembourg fait couper le chief, & son corps escarteller à Ripelmonde: & demourerent morts à la prise dudit fort de saint Vincent, Iamet de Pennesach & Eustache Vaude. Et apres ledit messire Iean de Luxembourg garnit iceluy fort de ses gens d'armes, pourquoy ceux de la ville de Laon furent en tresgrand doubte. Et pour mieux y resister garnirent leur ville de droictes gens d'armes. Et par ainsi les parties chacun iour liuroient l'vn contre l'autre de grandes escarmouches: ausquelles souuent aduenoit qu'il en y auoit de chacune partie des morts & de naurez. Et entre les autres de la partie dudit messire Iean de Luxembourg y fut mort vn vaillāt cheualier, nommé Colart de Forges par vn traict dont il fut feru ausdictes escarmouches au trauers de la iambe.

Comment ledit Iean de Neuers fut ordonné à mettre le siege deuant Moreul. Et luy fut donné la Comté d'Estampes.



Tem apres ce que le Duc de Luxembourg eut ramené es païs de Picardie Iean fils du Comte de Neuers (comme dit est dessus) luy fut par ledit Duc de Bourgongne donnée la Comté d'Estampes: & en porta le nom de ce iour en auant grand espace de temps: & avec ce fut ordonné capitaine de Picardie pour auoir la charge des frontieres. Si assembla gēs d'armes pour aller assieger le chasteau de Moreul, que tenoient les François. Avec lequel se meit le seigneur d'Antoing, messire Iean de Croÿ, le Vidame d'Amiens, Valleran de Moreul, le seigneur de Humieres, le seigneur de Salueuses & le seigneur de Neufuille, messire Baudo de Noyelle gouuerneur de Peronne, Montdidier, Roye & plusieurs autres nobles hōmes & gens de guerre iusques à mille cōbattans, qui par ledit Comte d'Estampes & capitaines dessusdits furent menez & conduits iusques audit lieu de Moreul. Et là se logerēt deuant la forteresse, où estoient enuiron cent combattans, qui dedans le terme de huit iours furent par les assiegeans contraincts d'eux rendre sauf leurs vies tant seulement, en delaisant tous leurs biens en la volenté dudit Comte d'Estāpes & de ses commis. Apres lequel traicté finy & qu'iceux François se furent departiz soubs bon saufconduit, ladicte forteresse fut remise en la main du dessusdit Vvalleran de Moreul. Et le dessusdit Comte d'Estampes mena ses gens deuāt le chastel de Mortemer empres Reffons sur Mers: lequel chastel dedans briebs iours ensuiuās luy fut rendu & fut du tout demoly. Et briebs iours apres s'en retourna ledit Comte à tout ses gens es païs dessusdits.

Comment le Pape Eugene fut en discord contre les Rommains, qui le voulurent tenir à Romme outre son gré.

EN ce temps nostre saint Pere le Pape Eugene qui se tenoit à Rôme, eut volenté d'aller demourer à Florence: & quand ce vint à la cognoissance des Rommains, ils en furent moult troublez. Et allerent en grand multitude deuers ledit Pape, & luy feirent dire que point ne se partiroit de là, & que mieux ne pouoit estre qu'en icelle ville de Romme, qui estit la fontaine de Chrestienté. Et lors ledit Pape & ses Cardinaulx voyans la rudesse & folie d'iceux Rommains, monstrerent semblât de non vouloir partir: neantmoins iceux Rommains feirent diligemment garder leurs portes, affin qu'ils ne sceussent partir sans leur sceu. Toutesfois par le moyē de la belle Royne de Cecille qui enuoya au saint Pere aucunes nauires garnies de gens d'armes, se departit ledit Pape de Romme secrettemēt, & s'en alla demourer à Florence: pour lequel partement les Rommains dessusdits furent fort troublez: & incontinent tout ce que le Pape auoit laissé en leurs villes avec aucuns de ses gens, ils arresterent, desquels en estoit l'un le Cardinal de Venise son nepueu. Et fait son departement en guise de moyne, & ainsi habitué s'en alla.

Comment le fort de S. Vincent empres Laon fut demoly: & comment plusieurs forteresses furent conquises par les Bourgongnons.

EN iceluy mesme temps le Duc de Bourgongne se partit de ses païs de Picardie à tout deux mille combattās, pour retourner en ses païs de Bourgongne, avec lequel s'assemblerent messire Symon de Laing, & Robert de Sauueses. Si print son chemin vers Cambresis: & de là à Cressy sur Serre & à Prouins. Et lors les François estoient en grād nombre à Laon venus en intention d'assieger le fort de S. Vincent, où estoient les gens de messire Jean de Luxembourg, comme dit est dessus: lequel Comte de ce aduertie enuoya ses messagers à Veruins deuers ledit Duc, requerant qu'il voulsist retourner à tout ses gens d'armes iusques audit lieu de Cressy: & illec seiourner deux ou trois iours, affin que les dessusdits François estans à Laon se partissent. Laquelle requeste luy accorda & reuint loger audit lieu de Cressy: & entre-temps traictez se commencerent à faire entre ledit de Ligney & ceux de la ville de Laon: lesquels en fin furent concluds par condition, que ceux qui estoient dedās ledit fort de S. Vincent departiroient sauf leurs vies & leurs biēs, & le dessusdit fort seroit demoly: lesquelles besongnes faictes & accordées, ledit Duc s'en alla parmy la Champaigne en son païs de Bourgongne. Et rassembla de rechief avec ceux qu'il auoit amenez grand nōbre de ses Bourgongnons & Picards là estans. Si les enuoya assieger la ville & forteresse de Chaumont en Charrolois, que tenoient les François: lesquels en assez brief temps ensuiuans furent par lesdits assiegeans si fort trauaillez & contraincts, qu'ils se rendirent en la volenté d'iceluy Duc de Bourgongne, lequel en fait pendre cent ou au dessus: & estoit lors le chief pour les Picards en l'absence dudit Duc messire Ieā Bastard de S. Pol. Et est à sçauoir que de ceux qui furent pēduz, estoit l'un le fils de Rodigue de Vilandras. Et apres se rendirent au capitaine d'iceluy Duc ceux dudit


dudit fort, & furent penduz comme les autres. . Apres assiegerent Benam, si se rendirent ceux de dedans sauues leurs vies eux departans le baston ou poing, & de là tant par sieges comme par assaulx meirēt en leur obeissance plusieurs villes & forteresses que tenoient les François.

Comment le seigneur de Thallebot vint en France, où il conquist plusieurs villes & forteresses.



V mesme an messire Jean de Thallebot retourna du païs d'Angleterre en France, & amena avec luy huit cens combattans Anglois, lesquels il mena à Rouen : & de là prenant son chemin vers Paris, print & meit en son obeissance le fort de Ioing seant entre Beauuais & Gisors, & furent penduz les François qui estoient dedans. En apres ice-luy messire Jean de Thallebot s'en alla à tout ses gens audit lieu de Paris, où il fut conclud par le conseil du Roy Henry là estant, que luy, le seigneur de l'Isle Adam Marechal de France, & le Galois d'Aunay cheualier seigneur d'Aruille, avec eux l'Euesque de Theroüanne Chancelier de France pour le Roy Henry à tout leurs gens iroient assieger le chastel de Beaumont sur Oise : lequel auoit reparé Amadour de Vignolles frere de la Hyre. Si se meirent sus à tout bien seize cens combattans gens de bonne estoffe les trois cheualiers dessusdits, & allerent deuant le chastel dessusdit lequel ils trouuerent tout vuide: car desia par auant leur venue ledit Amadour de Vignolles & ses gens l'auoient abandonné, & s'estoient tous retraicts à Creil à tout leurs biens. Auquel lieu tantost le suivirent les dessusdits apres que du tout ils eurent desolé ledit chastel de Beaumont: si se logerent autour de la ville tant d'un costé comme d'autre, & y liuerent plusieurs grandes escarmouches: ausquelles lesdits assiegez se deffendirent vigoureusement: mais à l'une d'icelles ledit Amadour fut frappé d'un trait d'ort il mourut, si en furent ceux de dedans moult marris, car ils le tenoient de grand conduicte & vaillant homme de guerre: durāt lequel siege vint avec lesdits assiegeans le dessusdit Euesque de Theroüanne Chancelier de France: apres laquelle venue au bout de six sepmaines que ledit siege auoit esté mis, se rendirēt lesdits assiegez par condition, qu'ils s'en iroient sauf leurs corps & leurs biens. Et apres que lesdits Anglois eurent regarny ladicte ville & chastel de Creil de leurs gens, ils s'en allerent assieger le pont sainte Maxence, que tenoit Guillon de Ferrieres nepueu de sainte Treille: lequel en assez briefs iours leur rendit & s'en alla luy & les siens sauf leurs corps & leurs bagues. En apres se rendirent à iceux Anglois à Neufuille en Esmoy & la Rouge-maison. Et puis s'en allerent à Crespy en Valois qui fut prinse d'assault, & y auoit bien trente François, desquels Pothon le Bourgongnon estoit le chief. Et de là retournerent à Clermōt en Beauuoisis qui se rēdit à eux, & le tenoit le Bourg de Vignolles: puis s'en allerent deuant Beauuais: mais ils ne veirent point qu'ils y peussent proffiter aucune chose. Et pource s'en retournerent à Paris, & les autres en leurs garnisons dont ils estoient venuz.

Comment le Comte d'Estampes reconquist la ville de S. Vallery.



N ce mesme temps le Comte d'Estampes accompaigné du seigneur d'Antoing, du Vidafme d'Amiens, de messire Jean de Croÿ & plusieurs autres seigneurs, qui par auant auoient esté avecques luy deuant Moreul, alla assieger la ville & forteresse de S. Vallery, deuant lesquelles ils furent enuiron vn mois: au bout duquel Charles de Marests & Philippe de la Tour capitaine, lequel auoit esté principal chief à prendre icelle ville de S. Vallery. Et auoit iceluy Philippe dessous luy la plus grand partie des gens d'armes, estans en ladicte ville tenans le party du Roy Charles: si feirent traicté avec les commis dudit Comte, par tel si qu'eux & les leurs s'en iroient sauement avec leurs biens: & avec ce auroient vne certaine somme d'argent, au iour qu'ils se partiroient de ladicte ville. Et prindrent terme d'eux partir au bout de huit iours, en cas que François ne seroient là puissans assez pour combattre ledit Comte d'Estampes. Auquel iour ne vindrent ne comparurent lesdits François: Ains au iour qui leur estoit ordonné de partir, vint pour secourir iceluy Comte d'Estampes, le besoing luy en eut esté, le dessusdit Loÿs de Luxembourg Euesque de Theroüanne Chancelier de France pour le Roy Henry d'Angleterre à tout cinq cens Anglois, que conduisoient le seigneur de Villeby, messire Guy le Bouteillier & Brunelay capitaine d'Eu. Lequel Chancelier & les dessusdits furent ioyeusement receuz dudit Comte d'Estampes, & les seigneurs estans avec luy. Si se partirent ce mesme iour lesdits François avecques Charles de Marests leur capitaine, qui les mena à Rambures: durant lequel parlement arriua au Haure dudit lieu de S. Vallery vne barge, qui estoit chargée de vins: laquelle venoit de saint Malo pour la prouision desdits François, laquelle fut prestement prinse par les mariniers desdits assiegeans. Et en apres ledit Chancelier & ses Anglois retournerent au giste à Eu, & le Comte d'Estampes se logea celle nuit en ladicte ville de saint Vallery: & le lendemain apres qu'il eut commis Jean de Brimeu capitaine d'iceux ville & chastel, il se departit & retourna en Arthois à tout ses gens, lesquels il congea. En outre de la ville d'Eu le Chancelier dessusdit à tout iceux Anglois, alla mettre le siege deuant le chastel de Monchas: lequel dedans briefs iours luy fut rendu moyennant certaine somme d'argent, qu'en receut messire Regnault de Fontaines, qui en estoit capitaine. Et fut iceluy chastel du tout desolé & abbatu, iacoit-ce que ce fut la plus belle forteresse de toute la Comté d'Eu: durât lequel temps le Comte d'Arondel se tenoit souuent à Mante & au paÿs deuers Chartres. Si print & gaigna pour cest an plusieurs forteresses sur les François tant au paÿs de Chartrain cōme au paÿs de Perche. Et lors ledit Duc de Bethfort retourna d'Angleterre à Rouen: & de là à Paris, où il se tint longue espace de temps.

Comment les Francois prindrent la ville de Han sur Somme en Vermandois.



Nuiron le mois d'Aoust prindrent les gens du Roy Charles la ville de Han sur Somme, que tenoient les gés de messire Jean de Luxembourg Comte de Ligney. Et la rendirent les habitās, pource que leur garnison sçachans la venue d'iceux François, festoient partis d'eux & les laisserent en danger. En laquelle ville vindrent le Comte de Richemont Connestable de France, le Bastard d'Orleans, la Hire & plusieurs autres capitaines

taines & aucques eux grand nombre de combattans. Pour laquelle prinse le païs de Vermandois, Arthois, Cambresis & plusieurs autres marches d'environ furent en tresgrand doubte, voyans iceux leurs ennemis estre logez en fort lieu sur le passage de l'eauë: & aussi sçachât leur Prince estre hors du païs. Neantmoins les Comtes de S. Pol, d'Estampes, de Ligney feirent grans diligence d'assembler gens, pour resister aux entreprinſes desdits François: mais entre-temps qu'icelles assemblées se faisoient, se commencerent aucuns traictez entre les parties: lesquels en conclusion vindrent à bonne fin & moyennât certaine somme d'argent, montant à quarante mille escus qu'eurent les François, rendirent icelle ville de Han en la main de messire Jean de Luxembourg à qui elle estoit. Et la cause pourquoy lesdits traictez furent conduits en douceur, si fut sur l'esperance de venir à paix finale entre le Roy Charles de France & le Duc de Bourgongne: car desia en auoit plusieurs moyens encommencez entre les parties. Auec laquelle ville de Han rendirent le fort de Breteil en la main dudit Comte d'Estampes, que Blanchefort auoit tenu long temps. Et en ce mesme temps le Duc de Bourgongne feit mettre siege deuant Coulongne lez Vigneufes par messire Guillaume de Rochefort & Phillebert de Vaudray, à tout huit cens combattans ou environ: lesquels se logerent en vne bastille. Et au bout de trois mois se rendirent ceux de dedās par condition, qu'ils s'en iroient sauf leurs corps & leurs biens.

Comment la ville & forteresse de Chasteau-villain furent mises en l'obeissance du Duc de Bourgongne.

E Tem apres ce que le Duc de Bourgongne fut retourné en son païs de Bourgongne, comme dit est, il alla deuant Grantsy: lequel long temps par auant auoit esté assiegé par messire Jean de Vergy & ses alliez. Et lors ceux qui dedans estoient non ayans nulle esperâce d'auoir aucun secours, feirent traicté de rendre & mettre iceluy fort en l'obeissance d'iceluy Duc: lequel fort sans estre desolé, fut mis en la main du seigneur de Thy frere au seigneur de Chasteau-Villain. Apres laquelle reddition furent par ledit Duc enuoyez messire Jean de Vergy, & plusieurs autres capitaines tant du païs de Bourgongne comme de Picardie courre deuant la cité de Langres, & iceux sommer qu'ils se rendissent en son obeissance: laquelle chose ils ne voulurent point faire. Ains retindrent le herault qui de par iceux capitaines leur auoit fait ce message, lequel estoit nommé Germole. Et pourtant les dessusdits capitaines voyans que riens ne pouoient exploicter, s'en retournerent deuers ledit Duc en degastant le païs.

Comment à l'occasion de la guerre grās tailles furent faictes & cueillies sur le pais d'Arthois & autres à l'environ.

EN ces propres iours par tous les païs d'Arthois, Vermandois, Ponthieu, Amiennois & autres à l'environ furent leuées grans tailles, pour payer la composition dernièrement faicte pour la ville de Han au Connestable de France: dont le pauvre peuple fut grâdement esmerueillé. Si commencerent à murmurer & estre mal contents des gouuerneurs

& conseilliers, que le Duc de Bourgongne auoit laissez en iceux païs, mais ce riens ne leur valut: car ceux qui furent reffusans de payer on les contraignit par voye de fait, sans tenir nuls termes de iustice en prenant leurs corps & leurs biens, iusques à l'accomplissement du payement dessusdit: durant lequel temps le seigneur de Saueuses qui à ce auoit esté commis par le Comte d'Estampes, fait demolir & abbatre la ville & forteresse de Breteil en Beauuoisis: laquelle luy auoit esté deliurée par Blanchefort qui en estoit capitaine, ainsi que promis l'auoit au dessusdit de Han. Et auoit pour ce faire grād nombre de manouuriers d'Amiens, de Corbie & d'autres lieux: lesquels en icelle euure tant continuerent que du tout fut mis au bas reserué vne forte porte qui estoit audit chastel, laquelle estoit fortiffiée. Et en apres que le dessusdit de Saueuses l'eut garnie de viures & d'artillerie, il y laissa vingt ou trente de ses gens pour la garder. Et pareillement fait demolir la tour de vendueil, & aucunes autres meschantes places és païs à l'enuiron.

Comment les capitaines du Duc de Bourgongne vindrent deuant Ville-Franche, où estoit le Duc de Bourbon. Et cōment apres ils assiegerent Belle-Ville, laquelle se rendit.

ENuiron le temps dessusdit, le Duc de Bourgongne enuoya grād partie de ses capitaines Bourgōgnons à tout foison de gēs d'armes courre deuant Ville-Franche, où lors se tenoit Charles Duc de Bourbon: entre lesquels coureurs estoit le seigneur de Charny, messire Symon de Lalaing, messire Baudo de Noyelle, le seigneur d'Auxi, Robert de Saueuses, Lancelot de Dours, Harpin de Richammes & aucuns autres accompagnez de seize cēs cōbattans, gens d'esslite, qui tous ensemble en bonne ordonnance cheuacherent en train de tirer vers les parties, où ils tēdoient à aller. Et sur la Brune rencontrèrent en leur chemin de cinq à six cens combattans de leurs ennemis, qui tantost se meirent à fuite en retournant vers leur seigneur le Duc de Bourbon. Et en y eut de prins aucuns des pis montez par lesdits Bourgongnons & Picards. Lesquels comme dessus cheuacherent tant qu'ils vindrent, & arriuerent deuant Ville-Franche: & là se meirent en bataille & puis par vn poursuivant enuoyerent signifier leur venue au dessusdit Duc de Bourbon, & qu'il les viensist combattre: lequel non scachant quelle puissance ils pouoient auoir, n'eut point conseil de ce faire: mais il fait dire à celui qui luy auoit apporté le message & les nouvelles, que puis que le Duc de Bourgongne n'y estoit en sa personne qu'il ne les combattroit point: si fait saillir hors de sa ville plusieurs de ses gens à pied & à cheual. Et mesmement le Duc de Bourbon saillit hors monté sur vn bon & excellent coursier sans armeures, vestu d'vne longue robe, vn baston en son poing, pour faire traire ses gens & tenir ordōnance aupres des barrieres: durant lequel temps y eut moult grand escarmouche non mie à grand perte & dommage de nulle des parties. Et apres que les Bourgongnons & Picards eurent là esté en bataille par l'espace de quatre heures ou enuiron, voyans que riens ne pouoient proffiter, se meirent à chemin par bonne ordonnance, laissant de leurs meilleurs gens derriere eux par maniere d'arriere-garde: & s'en retournerent par où ils estoient venus deuers leur seigneur le Duc de Bourgongne: lequel Duc brief ensuiuant fait par iceux & autres de ses gēs assie-
ger

ger Belle-Ville, dedans laquelle estoient de par iceluy Duc de Bourbon messire Jaques de Chabannes, & le Baillif de Beauuais à tout trois cens combattās, lesquels en grand diligence se meirent à deffence. Neantmoins par les engins que auoient lesdits assiegeans, & aussi par les approches qui faictes y furent, furent tellement contraincts & pressez qu'au bout d'un mois ou environ, ils se rendirēt sauues leurs vies, tant seullement en delaissant tous leurs biens, & se departirent tous de pied le baston au poing, & retournerent deuers le dessusdit Duc leur seigneur: lequel en eut au cueur grand desplaisance, mais pour lors iis n'en peurent auoir autre chose. Apres lequel departement le Duc de Bourgongne feit demourer en garnison plusieurs de ses capitaines Picards en ladicte ville: lesquels en continuant & perseuerant la guerre, feirent maulx & dommages inestimables ou païs de Bourbonnois & autres à l'environ. Et d'autre costé ledit Duc de Bourgongne enuoya vne autre armée de ses païs en Dombes en tirant vers Lyon sur le Rosne, lesquels prindrent au païs moult de forteresses: & degasterēt iceluy païs par feu & par espée, & apres en ramenerent tresgrād proye & tresgrand butin. Et furent cōducteurs & meneurs d'icelle armée le Comte de Fribourg, le Bastard de S. Pol, le seigneur de Vaurin & aucuns autres.

Comment le seigneur de Villeby & Mathagou Anglois meirent siege deuant saint Selerin. Et comment premiers les Francois, & depuis iceux Anglois furent ruez ius & desconfits.

AV mesme an mille quatre cens trente quatre le seigneur de Villeby accompagné de Mathagou & aucuns autres capitaines, qui tous ensemble pouoient auoir de huiet cens à mille combattans, meirent le siege deuāt vne forte place nommée S. Sellerin ou païs du Maine, à deux lieües pres d'Alençon: dedans laquelle place estoient les Francois. Et auoient à capitaine vn gentil cheualier nommé messire Anthoine de Loreil, lequel de prime-venue à l'ayde de ses gens, se deffendit moult vigoureusement contre les ennemis & aduersaires: mais nonobstant ce les Anglois dessusdits les environnerent puissamment tout autour, & furēt là environ six sepmaines: durant lequel temps le seigneur de Bueil, messire Guillaume Bleffet, le seigneur de la Varenne & aucuns autres capitaines Francois s'assemblerent, & vindrent environ quatorze cens combattās sur esperance de bailler secours & ayde à leurs gens. Et se tindrent par plusieurs iours à Beaumont le Vicomte, & là se logerēt vne partie, & l'autre partie se logea en vne autre ville nommée Viuien à quatre lieües de leurs ennemis. Et quand ils furent logez audit Beaumôt, si s'assemblerent tous les capitaines & autres des plus experts de leur compagnie, pour auoir conseil & aduis sur ce qu'ils auoient à faire. Si fut conclud & deliberé apres plusieurs debats & noises, qu'ils n'estoient point forts & puissans assez pour combattre iceux Anglois, attendu le lieu & la place où ils estoient: mais conclurent & delibererent d'aller par derriere tirer hors leurs gens, qui estoient assiegez. Apres laquelle conclusion lesdits capitaines s'en retournerent à leurs logis: & ordonnerent & establirent leur guet pour la nuit tant de cheual comme de pied. Et estoit ledit seigneur de Bueil en ceste besongne lieutenant de messire Charles d'Anjou, & auoit la charge de son estandard. Et en ceste mesme nuit

les Anglois qui bien sçauoient la venue de leurs ennemis & aduersaires, se meirent aux champs grand partie, & se tirerent tout coyement de nuict iusques assez pres dudit logis de Viuien. Et pour espier & guetter lesdits François, enuoyerent aucuns de leurs gens par deux fois iusques dedans leurs logis, pour veoir & cognoistre leur maniere, lesquels ils trouuerent assez bien en point. Et ce fait se retrahirēt arriere vers leurs gens, lesquels de rechief tous ensemble les allerent assaillir au poinct du iour: & à petite perte les ruerent ius, & desconfirent, & en prindrent plusieurs, & si en y eut aucuns morts & occis: entre lesquels le fut vn tres vaillant homme d'Amiens nommé Iean de Belley, qui estoit d'Auuergne. Apres laquelle destrouffe se meirent aux champs iceux Anglois à tout lesdits prisonniers. Et lors lesdits seigneurs de Bueil & de la Varenne, qui estoient audit lieu de Beaumont, comme dit est, scachās les nouuelles dessusdictes par aucuns de leurs gens qui estoient eschappez & fuiz au logis, se meirent aux chāps. Et incontinent tous ensemble tirerent vers où estoient leurs ennemis & aduersaires: lesquels quand ils les veirent & apperceurent venir, furent moult grandement ioyeux esperans de les ruer ius, comme ils auoient fait les autres: & se ferirent ces deux compagnies de grand volenté l'vn dedans l'autre: & y eut fait de moult belles & excellentes proësses entre les deux parties, mais finablement les Anglois furent tournez à desconfiture, en partie par l'ayde des prisonniers qu'ils auoient, & y furent morts de leur partie vn vaillāt cheualier nommé Artus, & Mathagou fut prins, mais le bastard de Salsebery s'en fuit. Et y furēt que morts que prins quatre cens Anglois ou plus: & demourerent les dessusdits François maistres & victorieux, lesquels furent tresgrandement ioyeux de leur victoire. Et quand ceux qui estoient demourez au siege deuant S. Sellerin, sceurent la perte de leurs compagnons, se leuerent du siege & se retrahirent en leurs garnisons.

Comment la Hire print malicieusement le seigneur d'Auffemont.

DVrant ces tribulations la Hire accompagné d'Anthoine de Chabannes, du Bourg de Vignolles son frere, & autres iusques à deux cens combattans ou enuiron, passa par deuant le chastel de Cleremont en Beauuoisis, où estoit le seigneur d'Auffemont qui en estoit capitaine: lequel ne s'effrayoit en riens ou bien peu des dessusdits: Et pource sçachant leur venue pour eux complaire & faire le bien-viengnant, fait tirer du vin & le porter dehors la poterne de la tour, & vindrent iceux boire. Et là contre eux isist le seigneur d'Auffemont avecques luy trois ou quatre de ses gens tant seulement. Et commencerent à parler à la Hire & aux autres en eux faisant courtoisie & reception, pensant qu'ils ne luy voulsissent que bien: mais il estoit de ce vehementement abusé, car leur malicieuse volenté estoit bien autre comment ils monstrent prestement: car en parlant audit seigneur d'Auffemont la Hire le print prestement, & de fait le contraignit incontinent de luy rendre ledit chastel, & avec ce le fait mettre en fers & aualler en la fosse. Si le tint vn mois en prison moult durement & en grand trauail, tant qu'il eut le corps & les membres moult trauaillez, & fut plain de poux & de vermine: & en fin paya pour sa rançon quatorze mille saluts d'or, vn cheual de vingt queües de vin ou autre tel

tel pris & estimation. Et nonobstant que le Roy Charles escriuit par plusieurs fois à la Hire dessusdicté qu'il le deliurast sans en prendre finance, & qu'il estoit bien content de son seruice, il n'en voulut riens faire pour luy.

Comment les communes de Normandie se fleuerent contre les Anglois & leurs garnisons.

EN cest an les communes gens du païs de Normandie, & par especial ceux du païs de Caulx s'assemblerent : & estoient bien enuiron deux mille en vne compagnie pour combattre & eux deffendre contre les Anglois estans au païs : lesquels en allât contre les deffences & edits Royaux, auoient esté pillier & fourrager les biens d'iceux communes : iacoit-ce que par auant les dessusdits auoient esté contraincts, & pressez par les baillif & officiers du païs d'estre armez & embastonnez chacun selon son estat, pour resister contre les pillars & autres qui leursdits biens vouloient prendre de force. A l'occasion duquel commandement ils s'assemblerent, comme dit est, & de fait rebourterent les dessusdictes garnisons hors de leurs villes, & en prindrent & occirent aucuns, dont les capitaines d'iceux ne furent point bien contents. Neantmoins ils monstrent semblant de les vouloir rappaiser, & par certains moyes furent les traictez fais entre icelles parties. Et se commencerent lesdictes communes à retraire assez follement sans ordonnance, non doubans la malice d'iceux Anglois : lesquels secrettemēt les poursuiuirēt iusques assez pres de saint Pierre sur Diue empres Tancarville & leur coururent sus : & sans y trouuer grand deffence en occirent bien de mille à douze cens, & les autres se sauuerent par les bois où ils peurent le mieux : pour laquelle offence fut faicte grād plainte à Roüen qui pour ceste cause feirent bannir plusieurs de ceux qui auoient faicte ceste emprise : mais assez brief ensuiuant fut la besongne appaisée pour les grans affaires qui estoient au païs.

Comment la Hire print le fort de Bretueil en Beauuoisis par force d'assault.

Tem apres ce que la Hire eut reprins le chastel de Cleremont, comme dit est, il assembla cinq cens combattans des garnisons de Beauuoisis : lesquels il mena deuant la porte du chastel de Bretueil que tenoient les gens de Saueuses : lesquels il fait assaillir tresaprement par ses gens, & ceux de dedans se deffendirent moult vigoureusement. Si occirent & naurerent plusieurs des assaillans, toutesfois fut tant continué que ceux de dedans voyans partie de leurs gens estre morts & naurés & leur fortification toute derompue, se rendirent en la volenté de la Hire : lequel en fait aucuns pendre, & les autres fait prisonniers au chastel de Cleremont : & puis regarnit ledit fort de ses gens : lesquels de rechief feirent de grās maux & innombrables es païs de Santhers & vers Amiens, Corbie, Montdidier & ailleurs à l'enuiron.

Comment les Ducs de Bourgongne & de Bourbon conuindrent ensemble en la cité de Neuers sur traicté & conuention de paix.



Après ce que la guerre eut long temps duré moult cruelle & merueilleuse, entre le Duc de Bourgongne d'une part, & son beau frere le Duc de Bourbon d'autre part, y eut aucuns moyens ouuers secretement entre icelles deux parties sur esperance de les appaiser. Et pour le premier commencement, furent enuoyez aucuns ambassadeurs d'un costé & d'autre sous bon saufconduit en la ville de Mascon: & là furent par plusieurs journées. Si y eut entre eux de premiere venue aucuns differens, pour sçauoir lequel d'iceux deux Ducs auroit la prerogative & honneur d'estre nommé devant. Et en fin considérées plusieurs raisons, qui furent alleguées d'icelles parties: fut conclud que ledit Duc de Bourgongne seroit premier nommé, & auroit la prevention de toutes honneurs devant le Duc de Bourbon. Et ce finé pour parlerent par diuerses manieres de les appaiser: & de fait feirent aucuns approches & aduis sur ce: & avec ce prindrent autre iour pour eux assembler au lieu, où deuoient conuenir ensemble les deux Ducs dessusdits en leurs personnes. C'est à sçauoir en la ville Douzi, ou en la cité de Neuers: & prindrent iour d'eux assembler au mois de Ianuier. Si se departirent de là, & s'en retournerent chacun desdits ambassadeurs deuers leur Prince & seigneur. Et lors ledit Duc de Bourgongne solemnisa la feste de Noël & des Roys en sa ville de Dijon, & tint moult puissant & noble estat. Et apres ces iours passez luy tresgrandement accompaigné du Comte de Neuers, du Marquis de Routelin, de son nepueu de Cleues & de plusieurs autres notables cheualiers & escuyers avec grand nombre de gens de guerre, se tira à Douzi & de là à Neuers: & se logea en l'hostel de l'Euesque attendant aucuns iours le dessusdit Duc de Bourbon & sa seur la Duchesse, laquelle & deux de ses fils treshonorablement accompaignez de cheualiers & d'escuyers, de dames & de damoiselles vint trouuer audit lieu de Neuers son frere le Duc de Bourgongne: lequel alla au deuant d'elle hors de son hostel & la receut & conjouyt tresioyeusement & amoureuxment: car pieça ne l'auoit veüe: & pareillement feit il ses deux nepueux, jaçoit ce qu'ils fussent de bien ieune aage. Si descendit ladicte Duchesse de dedans son chariot, & le Duc son frere la mena par la main iusques à son hostel, où il print congé d'elle & là laissa reposer pour celle nuict: & le lendemain ladicte Duchesse vint à l'hostel du Duc son frere, où elle fut moult honnorablement receüe à tresgrand ioye, & y eut de beaux esbatemens. Si y feit on les dances par longue espace & y eut moult grand foison de mommeurs de la partie du Duc de Bourgongne. Et ce fait apres qu'on eut prins vin & espices chacun se retrahit à son hostel iusques au lendemain qu'on tint conseil, où il fut ordonné & institué qu'on manderait Artus de Bretagne Connestable de France, & l'Archeuesque de Reims. Et assez briebs iours ensuiuans vint le Duc de Bourbon accompaigné de messire Christofle de Harcourt, du seigneur de la Fayette Mareschal de France & de plusieurs autres notables & vaillans cheualiers & escuyers. Au deuant & à l'encontre duquel le dessusdit Duc de Bourgongne enuoya aux champs les seigneurs de son hostel: & quand il approcha ledit Duc de Bourgongne, alla moult hastiement à l'encontre de luy au dehors de la ville, & là s'entrerencontrerent les deux Ducs & feirent l'un à l'autre tresgrand honneur & reuerence, en monstrant semblant d'auoir l'un enuers l'autre tresfraternelle & tresgrande amour ensemble.

ble. Et lors vn cheualier de Bourgongne qui estoit là dit hault & cler. Entre nous autres sommes bien mal conseillez, de nous aduenturer & mettre en peril & danger de corps & d'ame pour les singulieres volentez des Princes & grans seigneurs : lesquels quand il leur plaist, se reconseillent l'un avecques l'autre. Et souuentefois aduient que nous en demourons pources & destruits. Si fut ceste parolle bien notée & entendue de plusieurs là estans de toutes les deux parties, & bien y auoit raison : car tressouuent en aduient ainsi : neantmoins apres ceste recognoissance ledit Duc de Bourgongne cōuoya son beau frere iusques à son hostel, & de là se trahit au sien. Et apres ledit Duc de Bourbon luy & sa femme vindrent veoir le Duc de Bourgongne en son hostel, & là de rechef furent faictes plusieurs grandes ioyeusetez les vns avecques les autres. Et le lendemain les deux Ducs, & la Duchesse tous trois ouyrent Messe en vn oratoire. Et apres disner se tint vn grand conseil en l'hostel du Comte de Neuers, ouquel la paix fut du tout conclue entre iceux deux seigneurs : c'est à sçauoir le Duc de Bourgongne & le Duc de Bourbon : lequel traicté fut si bien conclud, qu'à tous les deux fut tresagreable, & pourtant incontinent de mieux en mieux fut par eux & toutes leurs gens generalmente faicte plus grand ioye & semblant de grand amour les vns avec les autres, que par auant n'auoit esté fait. Et en faisant toutes ces festes & esbatemens ou la plus grand partie furent aux despens du Duc de Bourgongne, car bien le vouloit ainsi estre fait. Et oultre durant les besongnes dessusdictes, vindrent audit lieu de Neuers le Comte de Richemont Connestable de France qui aussi auoit espousée la seur au Duc de Bourgongne. Et avecques luy vint Regnault de Chartres Archeuesque & Duc de Reims grād Chancellor de France, accompagné de plusieurs notables gens de conseil & de plusieurs cheualiers & escuyers, au deuant desquels allerent les deux Ducs & grād compagnie de leurs gens. Et quand ils s'entreassemblerent ils feirent l'un à l'autre tresgrand reuerence & honneur, & tous ensemble allerent moult cordialement iusques en la ville, où ils furent logez chacun à son estat au mieux que faire se peut. Et briefs iours ensuiuans furent tenus plusieurs estroits conseils sur la paix & reconciliation d'entre le Roy de France & le Duc de Bourgongne : & mesmement par ses ambassadeurs dessusdits furent faictes plusieurs offres au Duc de Bourgongne pour l'interest de la mort Iean son pere : lesquelles offres luy furent assez agreables. Et tellement fut traicté en ce mesme lieu de Neuers, qu'il fut content de prendre & accepter la iournée de conuention, qui depuis se tint à Arras sur intention de paraccomplir le surplus. Et ces besongnes ainsi acheuées, les parties se departirent tresamoureusement : & le fait on sçauoir en plusieurs lieux & diuers Royaumes & contrées : & mesmement à nostre saint Pere le Pape & au concille de Basle : affin qu'un chacun d'eux enuoyast ses ambassadeurs pour le bien & entretenement de la besongne. Et depuis ceste iournée de Neuers & que ledit Duc de Bourgongne fut retourné à Dijon, se prepara de tous poincts de retourner en son païs d'Arthois, affin de apprestier ses besongnes pour estre à la dessusdicte conuention d'Arras : & ainsi de ce iour en auant les frontieres des marches de Bourgongne commencerēt à estre assez paisiblement l'un contre l'autre plus que parauant n'auoient esté.

EN ce temps le Damoisel de Richemont à tout sept ou huiet cens Anglois

& Picards, que messire Jean de Luxembourg luy auoit enuoyez: alla au païs d'Ardène raur, auoir & courre plusieurs villes du Damoyse Eurard de la Marche, & icelle du tout mettre à saquement. Et apres que oudit païs eurent fait moult de dōmages par feu & par espée, ils s'en retournerent sans perte à tout grans proyes. Item en cest an René Duc de Bar feit assieger la ville & forteresse de Commercy ou païs de Barrois, sur intention de subiuguer icelle pour aucune obeissance, que ledit Duc disoit luy deuoir estre faicte par ledit seigneur de Commercy: mais en la fin par le moyen du Connestable de France, qui pour lors estoit en la Marche d'enuiron, fut l'accord fait entre les parties, par tel si que ledit de Commercy promet faire toute obeissance à iceluy Duc de Bar. Et par ainsi fait departir ses gens dudit siege: durant lequel temps le dessusdit Connestable meit en son obeissance au païs de Champagne plusieurs forteresses, tant par siege & composition comme par soubdain assaut.

Comment Amé Duc de Sauoye se rendit Hermite en vn manoir nommé Ripaille.

EN cest an Amé Duc de Sauoye qui estoit aagé de cinquante six ans ou enuiron, s'en alla rendre Hermite en vn sien manoir nommé Ripaille, seant à demie lieüe pres de Thonnon où par coustume parauant son departement il tenoit son estat: lequel manoir de Ripaille ledit Duc auoit fait edifier grandement. Et y auoit vne abbaye & prioré de l'ordre S. Morice, fondée de treslong temps par les predecesseurs d'iceluy Duc. Si auoit bien dix ans par auant en volenté, de là se rendre & deuenir Hermite par la maniere qu'il feit. Et pour y estre accompaigné auoit demādé à deux nobles hommes de ses plus feables & principaux gouuerneurs, fils luy vouloient tenir compaignie à y estre avec luy quant à son plaisir seroit d'y entrer: lesquels ayans consideration que ceste volenté luy pourroit muer, luy accorderent d'y entrer. Et estoit l'un messire Claude de Sexte, & l'autre vn vaillant escuyer nommé Henry de Coulombieres. Et lors iceluy Duc qui desia auoit fait edifier, cōme dit est, sa maison & encommencer celles de ceux qui vouloient estre en sa compaignie, se partit par nuict de son hostel de Thonnon à priuée mesgnie: & alla à icelle place de Ripaille, où il print habit de Hermite selon l'ordre de saint Morice: c'est à sçauoir grise robbe, long mantel & chapperon gris & courte cornette d'un pied ou enuiron, & vn bonnet vermeil par dessus son chapperon: & par dessus ladicte robbe ceinture dorée, & par dessus le mâtél vne croix d'or, assez pareille ainsi que les portent les Empereurs d'Alemaigne. Et briefs iours ensuiuans vindrent deuers luy les deux nobles hommes dessusdits. Lesquels luy remonstrerent aucunement la maniere de son parlement, qui n'estoit point bielicite ne conuenable comme il leur sembloit: en luy disant qu'il pourroit estre desagreable aux trois estats de son païs, pource que par auant ne les auoit mandez & eux signifier son intention. Et il leur respondit, qu'il n'estoit point loing ne amoindry de son sens, ne de sa puissance: & que bien pouruoyeroit à tout, & qu'ils aduifassent & regardassent eux mesmes de luy entretenir, ce que promis luy auoient, c'est à sçauoir de demourer avecques luy. Lesquels voyans que bonnement autrement ne se pouoit faire, en furent contens. Si les feit prestement vestir de tous pareils habillemens que luy. Et apres manda les trois estats de

de son païs avecques son fils qui estoit Comte de Geneue, lequel il feit Prince de Piémont, & luy bailla presens les dessusdits le gouvernement & administration de ses païs, en retenant plaine puissance de luy oster & de le remettre à son plaisir se mal se gouvernoit. Et son second fils feit Comte de Geneue: nonobstât que ledit Duc de Sauoye eust prins l'habit dessusdit, & baillé le gouvernement de ses païs à ses enfans, comme dit est: toutesfois ne se passoit riens en ses païs de grosses besongnes, que ce ne fust de son sceu & licence. Et quand au gouvernement de sa personne, il retint environ vingt de ses seruiteurs pour luy servir: & les autres qui se meirent prestement avecques luy, en feirent depuis pareillement chacun selon son estat. Et se faisoient luy & ses gens servir en lieu de racines & d'eau de fontaine du meilleur vin, & des meilleures viandes qu'on pouoit rencontrer.

Comment les communes de Normandie se r'assemblerent en grand nombre, & allerent deuant la ville de Caen.

A Pres les communes de Normandie qui n'estoient point bien encores r'apaisées du tort, & mal engin, que les Anglois leur auoient fait, se meirent ensemble de rechef par l'exhortation du seigneur de Mermille, & d'aucuns autres gentils-hommes qui les entreprindrent à combattre. Et de fait se trouuerent bien douze mille ou païs de Bessin vers Bayeux: si les menerent deuant la ville de Caen, laquelle ils cuiderent prendre d'assault, mais elle leur fut bien deffendue par les garnisons & communes de ladicte ville. Et pourtant iceux voyans qu'ils ne pouoient riens besongner, se departirent de là en faisant plusieurs desrisions sur le païs, & s'en allerent deuant Auranches, où ils furent huit iours, esperans que le Duc d'Alençon veint à eux à tout grand puissance de gens de guerre ce que point ne feit. Et entretemps les Anglois s'assemblerent en grand nombre pour iceux combattre: laquelle assemblée venue à la cognoissance des capitaines des dessusdictes communes, se departirent & s'en allerent vers Bretagne & à Fougieres. Et brief ensuiuant se departirent l'un de l'autre par plusieurs parties sans riens faire. Pour laquelle assemblée les dessusdits capitaines, toutes leurs terres & seigneuries, & avecques ce furent bannis du païs avecques tous leurs complices: mais depuis y eut abolition pour aucuns des dessusdictes communes. Ouquel temps Guillaume Coraon Anglois capitaine de Meure, alla courre deuant Yvvis en la Comté de Leigny, & n'auoit avec luy que trois cens combattans ou environ. Si vint pour le combattre Iean de Beaurain à tout vne grosse compaignie, c'est à sçauoir à tout six cens combattans: mais il fut rué ius, & là plus grand partie de ses gens morts & prins, desconfits & mis à grand meschef. Et en ce mesme temps la Hire print d'emblée la vieille fermeté d'Amiens, & y fut environ de huit à dix iours. Et apres qu'il eut pillé les biens qui estoient dedans, s'en retourna à Breteuil dont il estoit party.

De l'an mille cccc. xxxv.

Comment le Duc Philippe de Bourgongne avec la Duchesse sa femme retourna des païs de Bourgongne en Flandres, & en Arthois.



Tem au commencement de cest an, apres que le Duc de Bourgogne eut deliuré ses païs de ses ennemis à grand labeur. Et aussi que le Duc de Bourbon son beau frere fut pacifié avec luy : & que la iournée du grand Parlement d'Arras fut entreprinse & assignée avec les ambassadeurs du Roy Charles, il feit preparer son estat & celui de la Duchesse sa femme & de leur petit fils, pour s'en retourner en ses païs de Flandres & de Arthois: lequel parlement fut assigné à estre tenu en la ville d'Arras le deuxiesme iour du mois de Iuillet ensuiuant. Si se departit à tout son armée de sa ville de Dijon, laissant pour gouverner iceluy païs de Bourgongne messire Jean de Vergy, & s'en vint iusques vers Euchoire. Ouquel lieu ou assez pres il trouua mille combattans ou enuiron Picards, lesquels parauant il auoit mandez pour luy compaigner à son retour : & les conduisoient messire Jean de Croÿ Baillif de Hainault, le seigneur de Saueuses, messire Iaques de Brimeu, Jean de Brimeu & aucuns autres seigneurs : & de là ledit Duc print son chemin vers Paris, passa la riuere de Seine à Monstreau-fault-Yonne : & puis vint à ladicte ville de Paris, où il fut des Parisiens tresioyeusement receu. Et furent à luy & à la Duchesse sa femme fais de moult beaux presens. Et quand il eut seiourné en ladicte ville aucuns peu de iours, cheuaucha par plusieurs iournées iusques à la ville d'Arras dessus nommée : & lors donna congé à toutes ses gens d'armes tantost qu'il eust passé l'eaüe de Somme. Si alla assez brief ensuiuant visiter ses païs de Flandres & de Brabant, où il delibera avecques son conseil de conuocquer par tous ses païs les nobles & gens d'estat pour estre & venir à ladicte iournée d'Arras: & avecques ce enuoya vne ambassade en Angleterre deuers le Roy & son grand conseil, eux signifier la dessusdicte iournée : & laquelle estoit entreprinse en intention de traicter paix generale entre les deux Royaumes, de Frâce & d'Angleterre. Et furent les principaux à faire ladicte ambassade messire Hue de Launay, le seigneur de Creuecueur & maistre Quentin Mainart Preuost de S.Omer. Ausquels par le Roy d'Angleterre & ceux de son conseil, fut faicte grande reception. Et en conclusion leur fut dit que par le Roy à ladicte iournée solennellement seroit enuoyée ambassade, apres laquelle responce s'en retournerent vers ledit Duc de Bourgongne.

Comment les Francois prindrent la ville de Rue sur les Anglois.



L'entrée du mois de May assemblerent messire Jean de Bressay Lieutenant du Mareschal de Rieu, Bertrand Martel, Guillaume Braquemont, le seigneur de Longueual, Charles de Marests & aucuns autres tenans le party du Roy Charles de France, iusques au nombre de trois cens combattans droictes gens d'armes & vaillans gens deslites: lesquels alerent passer l'eaüe de Somme par nuict à la blanche tache. Et de là vindrent à la ville de Rue, & entrerent dedans secrettement par eschelles : & de fait auant qu'ils s'en apperceussent, prindrent ladicte ville sans y trouuer quelque deffence. Et adonc quand l'effroy se commença se retrahirent sept ou huiet Anglois en vn bouleuert, auquel ils se deffendirent aucune espace: mais en conclusion ils furent contraints d'eux rendre en la vouldenté des François par force d'assault. Si en y eut partie prestement mis à mort, & les autres depuis furent enuoyez parmy

parmy ce qu'ils payerent grand finance. Si furent aussi prins grand nombre de ceux de la ville, & les autres se sauuerent par dessus la muraille. Apres laquelle prinse la greigneur partie des habitans furent prins, pillez & robbez: & pour la prinse d'icelle ville, furent les païs de Ponthieu, Marquinerre, Arthois, Boulinois & aucunes autres terres à l'enuiron en grand doubte, sçachans leurs ennemis estre logez si pres d'eux & bien garniz de viures. Et point n'estoit sans cause, se iceux païsans auoient doubte & paour: car brief ensuiuant ils commencerent à courre en plusieurs & diuers lieux, & à faire forte guerre en portant grans dommages par feu & par espée aux païs dessusdits: & multiplierent de gens en grand nombre, & (comme dit est) feirent moult de maulx: & mesmement vn certain iour allerent à grand puissance en tirant vers Boulongne iusques assez pres de Saumer au boys, où ils prindrent plusieurs prisonniers & foison de cheuaux & autre bestial. Et à leur retour ardirent la ville & le port d'Estaples, où il y auoit grand nombre de belles maisons & edifices. Et depuis que ils furent retournez audit lieu de Rue à tout grans proyes, r'allerent par plusieurs fois courre le païs où ils feirent innumerables maulx & dommages par feu & par espée: mais en aucunes d'icelles courses assez pres de Monstreul fut prins messire Iean de Bressay, de Harpin, de Richammes: & en vn autre lieu fut pareillement prins le petit Blanchefort d'vn des bastards de Reuly. Si estoit à ceste cause ledit Païs mallement trauaillé.

Comment la Hire, Pothon, Philippes de la Tour & le seigneur de Fontaines desconfirent le Comte d'Arrondel Anglois deuant le chastel de Gerberoy.

DVrant le temps dessusdit le Duc de Bethfort estant à Roüen, sçachant la prinse de ladicte ville de Rue: laquelle cōme il luy fut remonstré, pouoit porter trop grand preiudice au païs de là enuiron tenans leur party, & par especial à la ville & forteresse du Crotoy: affin d'y pourueoir, escriuit deuers le Comte d'Arrondel qui lors se tenoit à Mante, & en la Marche de là autour: & luy manda destroictement qu'à tout ses gens il se tirast à Gournay en Normandie, & de là au Neuf-Chastel d'Azincourt, & puis à Abbeuille, en Ponthieu pour brief ensuiuant assieger la dessusdicte ville de Rue. Lequel Comte d'Arrondel obeissant au mandement du dessusdit Duc, se partit de là, où il estoit à tout huiët cens combattans de ses gens: & vint audit lieu de Gournay, en intention de faire le voyage dessusdit: mais il mua propos, pource que nouuelles luy vindrent que les François reparoient vne grande vieille forteresse nommée Gerberoy entre Beauuais & Gournay: laquelle, comme on luy dit, seroit moult dommageable pour le party des Anglois se ainsi estoit que on leur laissast fortifier, & n'y pourroit on mieux pourueoir que d'y aller chaudement. Et pourtant iceluy Comte d'Arrondel par l'enhortement de ceux de Gournay, de Gisors, & d'autres lieux de leur obeissance pres desdits lieux, se cōclud d'aller audit lieu de Gerberoy & assaillir & prendre tous ceux qu'il y pourroit trouuer se prendre les pouoit de force. Si feit audit lieu de Gournay charger viures & viandes, artilleries & autres plusieurs instrumens de guerre à tout lesquels il se meit à chemin, & aucuns autres de la garnison: & se partit de là tantost apres minuiët, & vint enuiron huiët heures du matin deuant ledit cha-

stel de Gerberoy à tout partie de ses gens, & les autres le suiuoient à tout leur charroy: & pour vray il ne cuidoit pas que dedans y eust tant de gens comme il y auoit, ne tels capitaines. Si se logea en vn cloz de hayes, & fait mettre cent ou six vingt de ses gens assez pres de la barriere dudit chastel pour garder qu'ils ne faillissent sur eux. Et entre-temps qu'ils se logerent Pothon, la Hire, messire Regnault de Fontaines, Philippes de la Tour & aucuns autres vaillans hommes de guerre, qui estoient là venuz la nuit deuant: & auoient avec eux de cinq à six cens combattans, sçachans la venue de leurs aduersaires prindrent conseil ensemble pour sçauoir qu'ils auoient à faire sur ce, & s'ils les attendroient ou non: si fut la chose moult durement debattue d'aucuns, lesquels mettoient auant, qu'ils estoient mal pourueuz de viures & habillemens de guerre: pourquoy s'ils se laissoient enfermer, ils se bouteroient en tresgrand danger: les autres disoient qu'ils n'attendroient point le siege, mais conseilloyent qu'à leur venue on les combattit à leur auantage. Et finalement ils se conclurent tous à vne mesme voulenté, & promeirent l'un à l'autre de les combattre. Et adoncques ordonnerent que les trois capitaines dessusdits seroient à cheual: c'est à sçauoir Pothon, la Hire & Regnault de Fontaines à tout soixante fusts de lance, tous les mieux montez & les plus experts: & les autres hommes d'armes, archiers & guisarmiers seroient de pied & aucuns en petit nombre des moindres demouroient dedans le fort pour le garder. Ordonnerent pareillement qu'à la venue de leurs ennemis, se mostreroient peu affin qu'ils n'apperceussent que leans y eust foison ne planté de gens. Lesquelles ordonnances furent par eux sagement entretenues: s'armerent & meirent leurs besongnes en point. Et lors apres que le dessusdit Comte d'Arrondel fut (comme dit est dessus) venu deuant eux à tout seize vingt combattans ou enuiron, & qu'il eut assis son guet contre la faillie de ses aduersaires, ses gens commencerent à faire leurs logis en attendant leurs gēs qui venoient derriere.

D V R A N T ce temps le guet que les François auoient en leur chastel, veit venir vne grand compaignie d'Anglois plus grande & plus epeisse que la premiere venue, & encores plus loing suiuoient les autres gēs avecques le charroy, si en aduertirent lesdits François: lesquels voyans qu'il estoit droit heure de besongner auant que leursdits aduersaires fussent assemblez, firent faillir hors leurs gens de pied le plus coyement que faire se peut: desquels leurs aduersaires furent vigoureusement assaillis, quand ils les veirent deuant eux. Et furent iceux Anglois ainsi comme demy surprins, & en brief desconfits: & la plus grād partie mis à mort & tournez à grand meschief. Et adonc ceux de cheual (qui estoient faillis pour garder que iceluy Comte d'Arrondel ne secourust ses gens) veirent venir & approcher moult fort la seconde compaignie, dont dessus est faicte mention, qui desia estoient assez pres & ne se donnoient garde de leurs ennemis, pource que leur chef estoit deuant: si furent par les dessusdits incontinent enuahiz & par force trespercez & derompus par plusieurs fois, parquoy ils ne se peurent r'assembler: mais en y eut grand partie qui se prindrent à retourner & à fuir vers Gournay, & les autres si furent assez tost morts, prins & tournez à grand meschief. Et adonc la Hire à tout vne grand partie de ses gens chassa les fuians bien deux lieues: en laquelle chasse plusieurs des Anglois furent
morts

morts & prins. Et d'autre part les gens de pied auoient fort approché le Comte d'Arrondel, lequel à tout ses gens festoit retiré au coing d'un clos, où il festoit logé: si estoit adossé de hayes, & par deuant fortifié de poinçons, parquoy iceux gens de pied ne pouoient bonnement entrer pour ladicte fortification. Si feirēt apporter vne couleurine qu'ils auoiēt en leur fort, laquelle au secōd coup qu'ils la feirent ietter, ferit ledit Comte parmy la iambe vers la cheuille du pied, dont il fut durement blessé & à grand peine se pouoit soustenir. Et apres la Hire retourna de ladicte chasse, où il estoit allé, amenant avecques luy plusieurs prisonniers: mais quand il apperceut la compaignie du Comte d'Arrondel estre encores entiere, il r'assembla sa force & ses gens, & alla de rechef combattre les dessusdits Comte & ses gens qui en assez brief terme comme les autres furēt tournez à desconfiture, & furent tous morts & prins sans nul remede: entre lesquels furent prins des gens de Renom: premier ledit Comte d'Arrondel, messire Richard de Dondeuille, Mondo Domonferrant, Restandif & autres iusques à six vingts hommes ou mieùx, qui tous furent prisonniers és mains des François: & en si eut de morts largement iusques à douze vingts, & le remanant se sauua par bien fuir là où ils peurent le mieùx. Apres laquelle destrousse & desconfiture les capitaines de France r'assemblerent leurs gens, & trouuerent qu'ils n'auoient point perdu vingt hommes de leur compaignie. Si furent moult ioyeux de ceste victoire & noble aduenture, & en regracierent deuotement leur createur & puis s'en retournerēt en leur place. Et de là le Comte d'Arrondel fut mené à Beauuais, où il mourut de sa blessure, si fut enterré aux Cordeliers, & les autres prisonniers Anglois furent depuis deliurez par finance. Et par ainsi les François qui estoient à Rue, demourerent seurement & paisiblement quant à lors, & se commencerent de plus en plus à eux garnir & fortifier.

Comment le Duc de Bourgongne fut malcōtent & indigné sur ceux de la ville d'Anuers.

EN ce temps Philippe Duc de Bourgongne estant en sa Duché de Brabant, fait assembler tresgrand nombre de gens d'armes du païs de Picardie & autres contrées de son obeissance: lesquels il auoit en propos de bouter en la ville d'Anuers par certains moyens qu'il auoit en icelle: affin de punir aucuns des gouuerneurs & habitās d'icelle ville, qui estoient en son indignation, pourtant que long temps parauāt ils auoient prins ou souffert prendre de force par leurs subiects vn grand nauire, qui estoit au Duc de Bourgongne garny de ses gens: lequel il auoit fait mettre à l'embouschure de l'entrée du haure, par où les marchans de plusieurs païs venoient par mer audit lieu d'Anuers: & là les gens dudit Duc estans dedans iceluy nauire, cueilloient sur les marchans passans plusieurs tributs, qui grandement estoit au preiudice de ladicte ville comme ils disoient: & aussi contre le serment que leur auoient fait passé a long temps les Ducs de Brabant deffuncts à l'entrée de leurs seigneuries, & mesmement iceluy Duc de present. Parquoy, comme dit est dessus, sans faire sommation à leur Prince n'officiers, furent tous contens de ce prédre: c'est à sçauoir iceluy nauire & amener dedans leur ville & mettre prisonniers ceux de dedans. A l'occasion de laquelle besongne le Duc dessusdit de ce non cōtent, auoit fait l'assemblée dessus declairées pour entrer dedans icelle ville secrette-

ment, & les punir: mais entre-temps son intention fut sceüe & descouuerte par aucuns sçachans sa vouldé: & furent ceux d'Anuers aduertis de ce qu'on leur vouloit faire, dont grandemét furent esmerueillez. Et lors sans delay ils se meirent en armes en grand nombre pour eux deffendre s'aucunement on les vouloit assaillir, & de fait allerent à l'abbaye de S. Michel seant dedans leur ville, où se logeoit ledit Duc de Bourgongne quand il venoit en leurdicte ville. Et pour ce qu'ils auoient l'Abbé dudit lieu en suspection, chercherent par tous les lieux de leans hault & bas, pour sçauoir s'ils y trouueroient nuls de leurs aduersaires: & apres qu'ils veirent qu'il n'y auoit homme qui mal leur vouldist, rompirent les murs de ladicte Abbaye en plusieurs lieux: affin que de la ville on peust garder & passer pour faire leurs deffences aux murs, qui estoient à l'encontre de ladicte Abbaye: apres laquelle besongne se retrahirent de là & feirent grandes preparations pour eux bien garder. Si fut ledit Duc brief ensuiuant bien acerténé qu'ils sçauoient son entreprinse. Et pource voyant qu'icelle ne pouoit mettre à execution, licencia ses gens d'armes, & feit deffendre sur peine capitale aux bonnes villes de Flandres, Brabant & autres ses païs enuiron, que nul ne portast ne menast viures ou autres biens quelcōques en ladicte ville d'Anuers, ne que on ne leur donnast conseil, confort ne ayde. Et adoncques ceux de celle ville sçachans icelle publication estre faicte contre eux, furent en grande tristesse & garderent leur ville diligemment, & demourerent vne bonne espace en ce danger. Puis se feirent traictez entre icelles parties parmy ce que ledit Duc en eut grand somme de deniers, & retournerent les gouuerneurs de ladicte ville d'Anuers en sa grace.

Comment les Francois prindrent sur les Anglois la ville de S. Denys en France.

DVrant le temps dessusdit prindrent les Francois la ville de S. Denys tant de force comme d'emblée. Et estoient en nombre douze cens combattās ou enuiron: desquels estoient les principaux messire Jean Foulcault, messire Loÿs de Vaucourt, messire Regnault de S. Iean & aucuns autres capitaines: lesquels meirent à mort aucuns Anglois là estās: pour laquelle prinse les Parisiens se commencerent fort à esbahir & à doubter, pource qu'iceux Francois couroient souuent deuant leur ville, parquoy viures n'y pouoient venir. Et affin qu'iceux viures en fin ne leur fussent ostez par la riuere de Seine en venant de Normandie, enuoyerent à Roüen par deuers le Duc de Bethfort: & pareillement à Loÿs de Luxembourg Euesque de Theroüenne & Chancelier de France par le Roy Henry, requerir qu'il leur vouldist enuoyer certain nombre de gens d'armes, pour les secourir & ayder à resister contre les Francois dessusdits: desquels par le pourchats & sollicitude dudit Chancelier leur fut enuoyé messire Iean Bastard de S. Pol, Loÿs son frere Valeran de Moreul, messire Ferry de Mailly, Robert de Neuf-Ville & aucuns autres gentils-hommes avec cinq cens combattans des marches de Picardie: lesquels en prenant leur chemin par Roüen, allerent sauuément à Paris où ils furent ioyeusement receuz desdits Parisiēs: & par l'ayde & conseil du seigneur de l'Isle-Adam Mareschal de France de par le Roy Henry & capitaine d'icelle ville de Paris, commencerent à faire forte guerre à iceux Francois de S. Denys. Toutesfois

iceux

iceux François nonbstant la resistance des dessusdits, couroient tressouuent à puissance deuant icelle ville de Paris. Auquel lieu durant ce temps furent faictes dures escarmouches par les parties entre Paris & S. Denys. Et aussi prindrent les François le fort d'Escoüan aupres de Montmorency, que tenoient les Anglois: si prindrent & occirent ceux de dedans, qui estoient enuiron trente Anglois sur tout. Et puis allerent deuers le chastel d'Oruille empres Louures appartenant à Anglois d'Aunay cheualier tenant le party du Roy Henry de l'Enclastre: lequel au bout de deux iours qu'ils y furent venuz, fait traicté avecques eux par condition, qu'il leur deliureroit ladicte forteresse, en cas qu'à vn iour qui fut prins ceux de son party ne feroient puissans audit lieu pour les combattre. Et entretemps que ce faisoit les seigneurs de Thalebot, d'Escalles & de Varuich & avec eux Georges de Richammes, le Bastard de Thian, messire François l'Arragonnois & aucuns autres iusques au nombre de trois mille combattans ou enuiron, se meirent ensemble & vindrent à Paris & en icelle marche eux ioindre avec le seigneur de l'Isle-Adam, & les autres dessusdits: lesquels tous ensemble allerent tenir la iournée que ledit chastel se deuoit rendre ausdits François, lesquels n'y allerent ne enuoyerent. Et par ainsi icelle forteresse demoura paisible au seigneur dessusdit. Et de là en auant les Anglois tindrent les champs à puissance & meirent en leur obeïssance en la marche de l'Isle de France aucunes forteresses que tenoient les François.

Comment les Francois apres qu'ils eurent fait vnes lettres de trefues aux Bourgongnons sur les marches de Beauuoisis, allerent courre le pais de Boulenois & autres.

EN ce temps furent faictes vnes trefues de par les gens du Duc de Bourgongne sur les marches de Santhois, & de Montdidier avecques la Hire & les siens: par tel si qu'il feroit du tout abbatre & demolir le fort de Bretueil en Beauuoisis: & pour ce faire en eut grand somme de monnoye, qu'il print volentiers. Apres lesquelles trefues se partirent de la marche vers Beauuais le grand Blanchefort & le petit & Pothon le Bourgongnon, avecques eux six cens combattans ou enuiron, & s'en allerent en la ville de Rue: lesquels là venuz avecques eux iceux là pieça auoiēt esté, s'en allerent tous ensemble courre le païs de Boulenois: & en passant tout coyemēt sans faire effroy deuant Estaples, allerent iusques à Desnerue & de là à Saumer le Boys. Esquels lieux ne par tout le païs on ne se doubtoit en riens de leur venue: & y trouuerent les hommes & habitans, avecques leurs biens & maisons: lesquels (ou au moins la plus grād partie) furent prins & liez par iceux François & emmenez prisonniers, & aussi emporterent la plus grand partie de leurs meilleurs meubles. Et mesmement rançonnerent à grand somme d'argent la ville & abbaye de Saumer. Et de là en retournant, s'espandirent en plusieurs & diuers lieux du païs, iceluy degastant par feu & par espée, sans auoir quelque empeschement & destourbier de leurs aduersaires & ennemis. Et apres qu'ils eurent ars & brulé plusieurs maisons en la ville de Francq: & fais innumerables maux & dommages audit païs de Boulenois, ils retournerent tous ensemble à tout grand nombre & quantité de prisonniers, & autres biens en ladicte ville d'Esteples, & là se reposerent & rafraeschirent petite espace de temps. Et pourtant que

les Bourgeois & habitans de la ville qui estoient retraits au chastel, ne voulurent payer rançon de leurdicte ville à leur departemēt, embraserent les maisons d'icelle, & y feirent tresgrand dommage: car ce estoit vne ville bien peuplée & bien edifiée. Et de là s'en retournerent seurement iusques à ladicte ville de Rue, jaçoit ce que messire Ieā de Croÿ, le seigneur de Cresqui, le seigneur de Humieres & aucuns autres du paÿs, assemblerent bien trois cens combattans ou environ esperans iceux aucunement enuahir & assaillir. Mais ce fut pour neant: car les dessusdits François cheuaucherent en si bonne ordonnance, qu'ils n'y veirēt point leur aduantage sur eux: parquoy ils se retrahirent és lieux, dont ils estoient venus. En apres lesdits François retournez en la ville de Rue (comme dit est) ils partirent leur butin: & quand ils furent reposez & refreschis vn peu de iours, ils se remeirent sus & coururēt le paÿs vers Dourlens & Hesdin. Si ardirent en plusieurs lieux & prindrent foison de bons prisonniers, & autres proyes & biens meubles portatifs. Et puis apres s'en retournerent par la Bouë, où ils assaillirent durement là forteresse: mais elle fut si bien deffendue par ceux que y auoit mis le Vidame d'Amiens à qui elle estoit, qu'ils eurent plusieurs de leurs gens blecez. Parquoy voyant qu'ils y perdroient leur temps, se retrahirent à tout leur pillage à Rue. Et depuis par plusieurs fois feirent de telles courses sur les paÿs du Duc de Bourgōgne, dont à l'vne d'icelles courses fut prins vn de leurs gens: c'est à sçauoir messire Iean de Bressay lieutenant du Mareschal de Rieux: & le print Harpin de Richammes vers Monstreul. Et vne autrefois fut aussi prins le petit Blāchefort par l'vn des Bastards de Ranty. Ainsi dōc les François dessusdits dōma gerēt moult le paÿs à l'environ de ladicte ville de Rue. Et mesmemēt ardirēt & embraserēt là ville de Cressi sur Anthieu, laq̃lle estoit du p̃pre demaine du Roy.

Comment les Cardinaux de sainte Croix & de Chipre vindrent à Arras, pour estre au grand parlement.



V mois de Iuillet vindrēt en la ville d'Arras deux Cardinaux enuoyez de par nostre sainct Pere le Pape, & par le Concile de Basle avec eux plusieurs notables ambassadeurs de diuerses nations, pour estre au grand parlement qui se deuoit faire & tenir audit lieu d'Arras pour la paix de France: c'est à sçauoir de par nostre S. Pere le Pape le Cardinal de sainte Croix, l'Archediacre de Mets & aucūns autres Docteurs en Theologie. Et de par le Concile le Cardinal de Chipre, & avec luy l'Euesque d'Ache, & vn docteur nommé maistre Nicolas ambassadeur du Roy de Poulaine. Et de par le Duc de Millan l'Euesque d'Albigue. Avec lesquels ambassadeurs vindrēt l'Euesque de Vzes & l'abbé de Vezelay, enuoyez par les deux parties, & plusieurs autres notables ambassadeurs de plusieurs seigneurs de loingtains paÿs & marches. Et pouiēt tous ensemble estre iusques au nombre de huiēt vingts cheuaucheurs ou environ. Ausquels fut faicte grande & honorable reception, tant de l'Euesque d'Arras, de son clergé & bourgeois de la ville, cōme des gens du Duc qui estoient à ce commis. Et tous ensemble allerent au deuant d'eux aux champs avec grand compaignie de peuple: & les amenerent & conduirent en faisant ioye de ce iusques à leurs hostels: & là leur furent fais plusieurs beaux presens, dont ils se tindrent bien contents.

Comment

Comment Loïs de Luxembourg Comte de saint Pol, espousa Ieanne de Bar Comtesse de Marle & de Soissons.

LE dimenche xvj. iour de Iuillet Loïs de Luxembourg Comte de S. Pol, de Conuersan, de Brayne & seigneur d'Anghien espousa Ieanne de Bar, qui estoit seule fille de messire Robert de Bar, Côtessse de Marle & de Soissons Dame d'Vneberque, de Varneston & de moult d'autres grandes & notables seigneuries, belle niepce de messire Iean de Luxembourg Comte de Leigny, oncle dudit Comte de S. Pol. Et furent les nopces faictes dedans le chastel de Bohain. Auquel lieu furent environ cent cheualiers & escuyers de la famille & amitié des deux parties, sans y auoir nuls Princes des fleurs de lys, dont icelle Comtesse estoit issue moult prochaine. A laquelle feste furent la Comtesse de S. Pol douïagiere, mere d'iceluy Comte Loïs & plusieurs de ses enfans. Le dessusdit Comte de Leigny cōme il fut commune renommée, soubstint les fraiz & despens d'icelle feste. Si y fut on seruy tres abondamment: & avec ce y fut faicte tres ioyeuse chere de tous ceux là estans, en boires, mangiers, dances, ioustes, & autres esbatemens.

Comment les Francois furent ruez ius vers Rethers du Bastard de Humieres.

EN ces propres iours les gens du Roy Charles, tenans la frontiere vers Reims, s'assemblerent avec quatre cens combattans, pour aller courre deuant Rethers, & autres lieux tenans le party de Bourgogne: & de fait acueillerent grand nōbre de payfans, vaches cheuaux, & autre bestial: à tout lesquels s'en cuiderent retourner sauuément en leurs garnisons: si estoit leur chief Yuon du puy. Et entre-temps qu'ils faisoient leurs courses, en vindrent les nouuelles au Bastard de Humieres capitaine de Herquery: si assembla gens d'armes, à tout lesquels il poursuiuit vigoureusement iceux Francois. Et en conclusion les assaillit par si bon arroy, qu'il les tourna à desconfiture: & en y eut environ que morts que prins quarante, & les autres se sauuerent par fuite avec leur capitaine chacun où ils peurent le mieux. Et de la partie dudit Bastard y furent morts environ dix hommes.

Comment les ambassadeurs du Roy d'Angleterre vindrent à Arras, pour estre au grand parlement avec le Duc de Bourgogne.

EN ce temps vindrent en la ville d'Arras les ambassadeurs du Roy Henry d'Angleterre, pour estre au grand parlement avec le conseil du Duc de Bourgogne. Si pouoient estre environ deux cens cheualiers: desquels estoient les principaux l'Archeuesque d'Yorth, le Comte de Suffort, l'Euesque de S. Daud, messire Iean Rodeclif garde du seel priué d'iceluy Roy, le seigneur de Hongrefort, maistre Raoul le saige, l'official de Cantorbie & aucuns autres docteurs en Theologie. Si se logerent dedans la dicte cité lez Arras. Si furent ioyeusement receuz & administrez de ce q̄ besoing leur estoit par les gens du Duc de Bourgogne. Et pareillement vindrent en ces iours plusieurs notables ambassadeurs de diuerses natiōs pour les trois parties: entre lesquels y vindrent pour iceluy Duc de Bourgōgne le Duc de Gueldres, le

Comte de Nassau, l'Euesque de Cambray, le Comte de Vernambourg, l'Euesque de Liege, le Comte de Vaudemont, le Comte de Neuers, le Comte de Salines, le Duc de Bar, & generally la plus grand partie de tous les nobles du païs dudit Duc, y furent en noble appareil & en grand estat: & depuis y vindrent les Comtes de S. Pol & de Ligney à belle compagnie. En apres le xxviij. iour de Iuillet vint audit lieu d'Arras le Duc de Bourgongne, lequel auoit couché en sa ville de Lens en Arthois. Et allerent au deuant de luy bien vne lieüe loing: generally tous les seigneurs qui par auant estoient là venus pour les dessusdictes ambassades, tant de France comme d'Angleterre & autres païs. Et mesmement y allerent les gens des Cardinaux dessus nommez: lesquels venans deuers iceluy Duc, furent de luy moult honnorablement receuz chacun à son tour. Si entra le dessusdit Duc en la ville d'Arras en moult belle ordonnance. Et auoit deuant luy archiers pour la garde de son corps, tous vestus d'une parure, & mesme sorte & habit. A l'entrée duquel fut faicte moult grand ioye de son peuple, en criant haultement Noël de quarrefourg à autre pour sa venue. Et en cest estat alla faire la reuerence au Cardinal de S. Croix, & puis au Cardinal de Cypre, & de là alla loger à son hostel à la Court-le-Comte.

Comment les ambassadeurs de France vindrent en grand nombre en la ville d'Arras, pour estre au Parlement dessusdit.



Le dimanche ensuiuant dernier iour du mois de Iuillet, vindrent audit lieu d'Arras l'ambassade du Roy Charles de France: lesquels ambassadeurs estans venus de Reims, par Laon à S. Quentin en Vermandois. Auquel lieu leur auoit esté faicte ioyeuse reception par les gouuerneurs & habitans d'icelle ville. Et là auoit esté enuoyé de par le Duc de Bourgongne le Comte d'Estampes, accompagné de plusieurs cheualiers & escuyers, pour iceux conduire iusques audit lieu d'Arras. De laquelle ville de S. Quentin par aucuns briefs iours, cheuaucherent tous ensemble à Cambray: & de là assez pres du bois de Mouf-laine, qui est à demie lieüe pres de la ville d'Arras. Entre lesquels estoient de par le dessusdit Roy Charles, le Duc de Bourbon, le Comte de Richemont Connestable de France. Lesquels auoient espousé deux des sœurs au Duc de Bourgongne, le Comte de Vendosme, l'Archeuesque & Duc de Reims Chancelier de France, messire Christofle de Harcourt, messire Theolde de Valleperge, le seigneur de la Faicte Mareschal de France, le seigneur de saint Pierre, le seigneur du Chastel, messire Iaques du Bois, messire Ieā de Chastillon bastard de Dampierre, messire Paillard du Flé, le seigneur de Raillicq, le seigneur de Rommet, le seigneur de Courselles, maistre Adam de Cambray premier President, le Doyen de Paris nommé maistre Iean Tudart, le Tresorier d'Anjou, le Borgne Blesset, maistre Ieā Charretier, le seigneur de Cletel, le seigneur de la Mothe, maistre Adam le Queux, maistre Ieā de Taisé & plusieurs autres notables hommes tant nobles comme autres, accompagnez en tout de quatre à cinq cens cheuaucheurs, à compter ceux qui estoient allez deuant pour prendre les logis. A l'encontre desquels issit le dessusdit Duc de Bourgongne accompagné du Duc de Gueldres & de tous les autres Princes, qui par auant estoient venus & aussi des gentils-hommes cheualiers & escuyers

cuyers de son hostel & de ses paÿs, reserué les Anglois qui n'y furent pas. Si rencontra les dessusdits à vn quart de lieüe pres de ladicte ville d'Arras. Et là à l'assemblée d'iceux nobles Princes fut monstré moult grand signe d'amour & d'amitié les vns aux autres. Et par especial le Duc de Bourgogne au Duc de Bourbon & au Comte de Richemôt Connestable de France dessusdit ses beaux freres: & eux à luy en montrant signe d'estre tresioyeux: & par grād humilité embrasserent l'vn Prince l'autre. Et d'autre part les autres des plus notables de toutes les deux parties faisant tresgrand reuerence les vns aux autres, en montrant semblant de toutes ioyeusetez. Et apres tout ce par belle ordonnance cheuaucherent tout le petit pas iusques à la ville d'Arras. Et là cheuaucherent de front l'vn de costé l'autre les trois Ducs: c'est à sçauoir de Bourgongne, de Bourbon & de Gueldres. Et deuant eux auoient six trompettes & clerons, sonnant tresmelodieusement & grand nombre de Roy d'Armes, heraulx & poursuiuās vestus des armes des Princes là estans. Auecques lesquels estoit comme chief, Montioye Roy d'Armes du Roy Charles de France. Et vn petit deuant cheuaucherent les Connestable dessusdit, Comtes de Vendosme & d'Estampes, le Damoisel de Cleues & aucuns autres grans & notables seigneurs, & derriere les trois Ducs dessus nommez estoient la plus grand partie de leurs cheualiers. Si allerent tenant ceste ordonnance deuant la maison de la ville au petit marché: Et y auoit par toutes les rues & sur les maisons tresgrand multitude de gēs, qui crioient souuent Noël à haute voix. Et là se departit le Duc de Bourgongne & ceux qu'il auoit amenez avec luy, pour retourner à son logis & hostel. Si le vouloient conuoyer ses deux beaux freres, mais il les feit retourner & s'en allerent vers les Cardinaulx. Et de là allerent à leurs logis où leur furent faicts plusieurs grans & tres notables presens, tant par les gens de l'Eglise comme par les gens seculiers. En apres le tiers iour ensuiuant vint la Duchesse de Bourgongne audit lieu d'Arras. A l'encontre de laquelle allerent pour luy honorer les ambassadeurs du Roy de France, & ceux du Roy d'Angleterre. Et generallemēt avec ce tous les nobles, barons & seigneurs là estās en icelle ville, & les gens des Cardinaulx, si estoit en moult riche & noble estat: Et la portoit on dedans vne belle littiere vestue & aornée moult precieusement de riches draps & ioyaulx. Et derriere elle cheuachoient sur hacquenées, six de ses dames & damoiselles moult richement & noblement habillées d'vne parure, leurs robes & chapperons chargez & couuers d'orfauerie. Et apres suiuoient trois chars de parement où estoient la Comtesse de Namur & aucunes autres moult nobles dames & damoiselles de la dessusdicte Duchesse: vestue aussi de pareilles & semblables robes & chapperons qu'estoient celles qui estoient sur lesdictes hacquenées. Si estoient aupres de ladicte littiere les Ducs de Bourbon, de Gueldres, le Connestable de France, le Comte de Vendosme. Et generalmente toute la seigneurie & gentillesse de ces deux parties cheuaucherent deuant & derriere: car les Anglois prindrent congé d'elle aux champs, & se retrahirent & retournerent en la cité lez la dessusdicte ville d'Arras, où ils estoient logez. Et la dessusdicte Duchesse accompagnée, comme dit est, alla faire reuerence aux Cardinaulx. Et de là s'en retourna en l'hostel du dessusdit Duc de Bourgogne son mary: lequel Duc la receut moult ioyeusement & honorablement, & feit aux deux Ducs

dessusdits & aux autres nobles seigneurs là estans tresioyeuse chere en son hostel. Et d'autre part venoient en ces mesmes iours au dessusdit lieu d'Arras aucuns ambassadeurs de plusieurs & diuerses places & cōtrées, tant pour les Princes, Eglises, vniuersitez comme pour bonnes ville. Et entre les autres y vindrent de par la ville de Paris l'Abbé du mont de sainte Katherine de Rouën, maistre Guillaume Breton, maistre Iean le Monstardier, maistre Thomas de Courcelles, maistre Robert Poiteuin & plusieurs autres notables gens. Aussi y vindrent les ambassadeurs des Roys de Cecille d'Espaigne, de Nauarre, de Poulaine, & d'Asie & Rommanie. Et pareillement y vindrent les communes des bonnes villes de Hollande, & de Zelande, de Flandres, de Brabant, de Hainault, de Namur, de Bourgongne & d'autres plusieurs parties qui trop longue seroient à escrire: lesquels assez pres chacun selon son estat furent logez assez suffisamment par les fourriers dudit de Bourgongne, & autres à ce cōmis de par luy. Et avecques ce furent durant la conuention seruis abondamment de tous viures, tels que pour lors pouoit recouurer, laquelle dura enuiron trois mois en payant leurs deniers. Et si ne fut quelque nouuelle durant icelle qu'il y eut grand effroy en ladicte ville d'Arras, tant par feu de meschief comme par débats mouuans entre les parties. Et y auoit certains commis de par la ville à visiter de iour & de nuict les besongnes necessaires à garder que nulles extortions ne se feissent. En apres fut ordonné de par le dessusdit Duc de Bourgongne, qu'il y auroit enuiron cent gentils-hommes & deux cens archiers pour la seurte de sa personne armez & embastonnez avecques aucuns seigneurs de son hostel, tels comme le seigneur de Croÿ, messire Iean de Horne le Cheualier, le seigneur de Creuecueur, le seigneur de Chargny, Iean de Brimeu & aucuns autres: lesquels fussent prests faucun besoing aduenist à resister avecques aucuns des gentils-hommes. Et cinquante archiers qui estoient commis pour la seurte de la personne dudit Duc.

Comment messire Iean de Mer cheualier d'Espaigne, & le seigneur de Chargny furent armez l'un contre l'autre.



Le lundy vnziesme iour d'Aoust de cest an furēt faictes armes en icelle ville d'Arras, en la presence du Duc de Bourgongne iuge en ceste partie: avecques lequel estoit dedans son eschaffault sur le grand marché les Ducs de Bourbon & de Gueldres, le Comte de Richemont Connestable, le Côte de Vendosme, d'Estampes & plusieurs autres grans seigneurs. Si furent lesdictes armes entreprinſes de messire Iean de Merle cheualier Banneret tresrenomme natif du Royaume d'Espaigne, appellāt sans querelle diffamatoire, pour acquerir honneur contre Pierre de Bauffremont cheualier seigneur de Chargny aussi Banneret & natif de Bourgongne portāt l'ordre dudit Duc: & estoit tant seullement pour rompre trois lances l'un sur l'autre. Et apres ceste requeste accordée par ledit seigneur de Chargny: lequel seigneur de Chargny auoit requis audit cheualier d'Espaigne à combattre à pied de haches, d'espées & de dagues si longuement que l'un des deux perdist ses bastons, ou meit mains aux genoulx ou à terre sauf en toute la vouldenté du iuge: lesquelles requestes des deux cheualiers dessusdits long temps par auant estoiet accordées

accordées l'un à l'autre, comme dit est. Et pourtant à ce mesme iedy entre neuf & dix heures du matin, vint ledit cheualier Espagnol au champ accompagné de quatre cheualiers que le Duc de Bourgongne luy auoit baillez pour luy honorer: c'est à sçauoir le seigneur de l'Or gouuerneur de Rethelois, le seigneur de Ligney, le seigneur de Saueuses & le seigneur de Sainzelles avec quatre ou cinq de ses gēs: desquels l'un portoit au bout d'une lance vne petite bāniere armoyée de ses armes. Et les cheualiers dessusdits portoient les lances. Et ainsi sans faire grans bombans, alla faire la reuerence audit Duc de Bourgongne. Et puis se retrahit de ces lices par où il estoit entré au fenestre costé dudit Duc de Bourgongne. Et assez longue espace de temps attendit son aduersaire, lequel vint grandement accompagné des Comtes d'Estampes, de S. Pol & de Ligney, avec eux le Comte de Suffort Anglois qui portoient les lances. Et derriere luy estoient quatre coursiers moult richement couuers de ses deuises: Et les paiges chargez d'orfauerie, & avec eux estoient grand partie de cheualiers & escuyers de l'hostel du Duc de Bourgongne. Et ainsi comme auoit fait ledit cheualier Espagnol, alla faire la reuerence au dessusdit Duc de Bourgongne, & puis il se retrahit à son costé au droit lez. Finablement apres ce qu'ils furent tous deux prests coururent plusieurs coups de fer de lance l'un contre l'autre sans eux atteindre. Et adoncques ledit Espagnol monta sur vn coursier que luy presta le Duc de Bourbon, pource que le sien fuyoit la lance. Et assez brief apres rompirent leurs lances l'un sur l'autre trespuissamment. Et depuis continuerent tant que les trois coups de lances qu'ils auoient entrepris à faire, fussent feruz sans ce que nuls des deux fussent blessez: toutesfois l'armet dudit Espagnol fut vn petit cassé. Si se partirent par la licence dudit Duc de Bourgongne, & s'en retournerent en leurs hostels chacun par où il estoit entré accompagné comme dit est. Et auoit iceluy cheualier Espagnol sur son harnois vne hucque de drap vermeil, laquelle auoit vne croix blanche telle ou pareille que portoient les François. De laquelle aucuns seigneurs de la partie de Bourgongne n'estoient point bien contents, pource qu'il leur sembloit qu'il se monstroient partial d'icelle partie des François: mais depuis quand il en fut aduerty s'en excusa, disant que pour la confederation qu'auoient de long temps l'un avec l'autre les Royaumes de France & d'Espagne, ils ne pouoient porter en iceluy autre enseigne que celle du Roy de France. Le lendemain ensuiuant qui fut le vendredy entre huiet & neuf heures du matin, vint le Duc de Bourgongne en son eschaffault grandement accompagné de sa cheualerie. Avec lequel Duc entrerent dedans les Princes qui le iour de deuant y auoient esté. Et brief ensuiuant vint le seigneur de Chargny, appellant accompagné des seigneurs qui le iour de deuant auoient seruy: lesquels portoient les bastons, dequoy ils deuoient combattre & iouster. Et seoit sur vn cheual couuert de ses armes & derriere luy estoient les quatre pages dessusdits sur quatre coursiers houssez de sa deuise avec la plus grand partie des cheualiers & escuyers de l'hostel dudit Duc de Bourgongne, & aucuns autres nobles hommes: à tout lesquels il entra dedans les lices, si s'en alla descendre droit à son pauillon. Et tantost s'en alla tout à pied faire la reuerence au dessusdit Duc de Bourgongne, & puis se retrahit en sa chaire où il fut bien l'espace d'une heure auant que son aduersaire & ennemy veinist. Lequel vint accompa-

gné comme il auoit esté le iour de deuant tout depuis son hostel iusques à l'entrée des lices. Et portoient les cheualiers & escuyers que ledit Duc luy auoit baillez ses bastons, dequoy il deuoit batailler & combattre. Et derriere luy estoient ses gens, dont l'un d'iceux portoit la petite banniere au bout d'une lance ferrée. Et quand il fut venu aux lices, il alla faire la reuerence au Duc de Bourgogne dessusdit, & de là se retrahit en son pauillon. Et jaçoit-ce que par les dessusdits cheualiers & escuyers qui l'accompaignoient fut par plusieurs fois admonesté, en luy donnant conseil à leur pouoir: Toutesfois oncques ne leur voulut descouurer son secret n'vser de leur conseil, ains leur disoit qu'ils ne fussent point en soing de luy, & qu'au plaisir de Dieu il feroit son deuoir. Et apres le Roy d'Armes nommé Toison d'Or cria en trois lieux sur les lices, que tout homme qui n'estoit commis à la garde d'icelle vuidast sans delay: & que nul ne baillast empeschemens aux champions sur la hart, & de par le Duc de Bourgogne. Si estoient dedans huit gentils-hommes armez pour prendre & leuer les deux champions dessusdits, quand ils en auroient le commandement. Apres lequel cry issit hors de son pauillon ledit seigneur de Charny à tout ses quatre bastons, & tenoit la hache par le meillieu de la dextre main le fer vers son aduersaire, & ainsi marcha un petit auant. Et adoncques issit l'Espagnol embastonné, comme dit est, & auoit sur son bacinet iecté un couurechief qui couuroit sa visiere, laquelle estoit comme demie leuée. Et quand il fut issu & failly hors de son pauillon, un de ses gens osta ledit couurechief. Si commencerent vigoureuusement & de grand courage à marcher l'un contre l'autre leurs lances palmoyant. Et tousiours auoit ledit Espagnol, & eut durant ceste besongne la visiere leuée. Et lors à l'approcher ledit seigneur de Charny iecta premier sa lance & n'en attendoit point son homme: mais iceluy Espagnol l'approcha en luy iectant la sienne, si le ferit & blessa vers le costé, duquel coup il fut nauré & percé au bras tant que la lance se tint dedans son bracelet: mais ledit seigneur de Charny la secout tantost sur le sablon: Et lors les deux champions approcherent de grand courage l'un pres de l'autre. Si commencerent à batailler & à combattre de leurs lances gentement. Si auoit iceluy seigneur de Charny grand desplaissance de ce, que son ennemy & aduersaire ne fermoit point sa visiere. Durant lequel temps le Duc de Bourgogne ordonna qu'on les fait cesser, & commanda à ceux qui gardoient le champ qu'ils les prissent: laquelle chose ils firent & furent amenez deuant ledit Duc de Bourgogne. Si estoient tous deux moult troublez au semblant qu'ils monstroient de ce qu'on leur auoit si tost prins sus. Et par especial l'Espagnol venant deuant ledit Duc repeta par deux fois qu'il n'estoit pas content pour si peu de chose faire, attendu qu'à grand despens & à grand travail de son corps il est venu de moult loingtain pays par mer & par terre pour acquerir honneur & reuerence. A quoy luy fut respondu, que bien & moult honorablement auoit fait son deuoir, & accomply ses armes. Apres lesquelles parolles furent remenez & conduits à leurs logis & hostels, & issirent des lices chacun par son costé aussi tost l'un comme l'autre. Toutesfois ledit cheualier d'Espagne fut la noté de plusieurs nobles là estans, d'auoir entrepris une grand hardiesse & habilité de combattre par ceste maniere la visiere leuée, pource que pareil cas n'auoit point esté veu. Et apres ceste besongne
le

le dimenche & autres iours ensuiuans, iceluy Duc de Bourgongne fait grand honneur & reuerence en son hostel au dessusdit cheualier d'Espaigne, & luy donna de grans dons pour payer plainement ses despens. Et briefs iours ensuiuans print congé dudit Duc & des siens, & se partit d'Arras pour s'en retourner en son païs.

Comment les Francois & Bourgongnons estans en la ville d'Arras estoient cordialemēt ensemble l'un avecques l'autre.

LE lundy qui fut le iour nostre Dame de la my-Aoust les Ducs de Bourgongne, de Bourbon & de Gueldre, les Comtes d'Estampes, de Richemont & de Vendosme, de S. Pol & de Ligney, de Meurs & de Nassau avecques la plus grand partie des cheualiers & escuyers des deux parties, allerent tous à cheual en grand concorde à l'hostel d'iceluy Duc de Bourgogne oïr la messe nostre Dame en la cité, vestuz & aornez de moult riches vestemens: dont le pauvre peuple là estant en grand multitude auoient grand liesse esperans brief auoir consolation de paix, que tant & si longuement auoient attendu. Apres laquelle messe retournerent en l'hostel dudit Duc de Bourgogne, & là disnerent la plus grand partie: Si y furent moult richement seruiz de plusieurs & diuers mets. Pour lesquels conuis & assemblées ainsi faites par icelles parties, les ambassadeurs d'Angleterre n'estoient point bien contents: pource que desia le Duc de Bourgogne & ceux de son party auoient grand communication avecques iceux François leurs aduersaires & ennemis. Et auoient suspicion & doubte qu'entre icelles parties de France & de Bourgogne, ne se machinast aucun traicté qui fut aucunement à leur preiudice.

Comment le Cardinal de Vincestre vint à Arras pour estre à la conuention, qui là estoit assemblée.

LEm le dixneufiesme iour d'Aoust ensuiuant vint le Cardinal de Vincestre en la ville d'Arras pour estre au Parlement là estant: & estoient en sa compagnie le Comte de Hontidon & autres notables cheualiers & escuyers d'Angleterre, iusques au nombre de trois cēs cheuaucheurs. A l'encōtre duquel allerēt les Ducs de Bourgogne & de Gueldres, les Comtes de saint Pol, de Ligney, de Meurs & la plus grād partie des nobles avecques ledit Duc de Bourgogne. Si fut fait par le Cardinal & Duc dessusdit grand honneur & reception l'un à l'autre, & pareillement des autres seigneurs. Si retournerent tous ensemble avec iceluy Cardinal iusques aupres de la porte d'Arras, où ils prindrent congé l'un à l'autre. Si s'en alia le dessusdit Cardinal loger en l'hostel de l'Euesque & ses gens. Si venoient chacun iour ambassadeurs enuoyez de diuerses nations. Et auoit ordonné le lieu ou la conuention se deuoit tenir entre les parties en l'abbaye de S. Vast d'Arras, où il y auoit en la dicte abbaye, salles, chambres, & de notables edifices moult propices pour toutes les parties. Si assemblerent au lieu dessusdit les trois parties en la presence des deux Cardinaulx premiers venus. Lesquels & par especial le Cardinal de S. Croix, & remonstrerent moult auctentiquement à icelles trois parties les grans maulx & inconueniens qui estoient aduenuz par toute Chrestienté à l'occasion

des guerres, qu'ils auoient si longuement maintenues, eux admōnestant moult doucement & sagement, que pour l'amour de Dieu principalement ils voulsissent entendre au bien de paix entant qu'ils estoient ensemble: & qu'un chacun d'eux fait requestes si courtoises & si raisonnables qu'ils se peussent accorder les vns avecques les autres. Apres lesquelles remonstrances s'assemblerent au lieu de ladicte conuention par plusieurs iournées. Et furent par lesdictes parties mis auant plusieurs traictez, lesquels estoient moult contraires & difficiles les vns aux autres. Entre lesquels requirēt ceux de la partie du Roy Charles, que le Roy Henry d'Angleterre se voulsist deporter & desister de luy nommer Roy de France, moyennant que par certaines conditions luy seroient accordées les seigneuries de Guienne, & Normandie: laquelle chose les Anglois ne voulurent point accorder.

Comment durant le temps du parlement d'Arras, la Hire & Pothon vindrent courir & fourrager le pais du Duc de Bourgogne.

LTem le vingtcinquesme iour du mois d'Aoust le Parlement estant à Arras, comme dit est, la Hire & Pothon de sainte Treille à tout six cens combattans, dont il y auoit bien six vingts lances ou enuiron qu'iceux auoient assemblées des frontieres vers Beauuais, cheuaucherent toute la nuict iusques à la riuierie de Somme: laquelle ils passerent à Cappy, & de là se retirerent & s'en allerent vers Dourlens & Beauquesne pour fourrager le pays. Si se partirent & s'en allerent en plusieurs lieux & assemblerent grand nombre de payfans, cheuaux, vaches, brebis & plusieurs autres besongnes, à tout lesquelles se commencerent à retraire vers le passage de l'eauie par où ils estoient venus. Durant lequel temps les nouvelles furēt portées à Arras deuers le Duc de Bourgogne par le seigneur de Saueuses. Lequel Duc de Bourgogne en fut grandement troublé, voyant que par telles manieres tenir les besongnes qu'on traictoit au dit lieu d'Arras, se pourroient attarder. Et afin d'y pourueoir fait sans delay monter à cheual ledit Comte d'Estampes, de saint Pol, de Ligney avecques la plus grand partie de cheualiers & escuyers qui là estoient, & ceux de son hostel pour combattre & rebouter iceux François: avecques lesquels allerent aucuns seigneurs d'Angleterre à tout trois cens combattans ou enuiron. Et pouoient estre en tout de douze à feize cens, mais la plus grand partie estoient sans harnois. Si cheuaucherent hastiuement tous ensemble iusques vers Mailly & à Theu. Et auoient par auant enuoyé ledit seigneur de Saueuses & plusieurs autres coueurs pour enquerre nouvelles de leurs aduersaires & ennemis. Lesquels coueurs sceurēt pour vray qu'ils retourneroient à tout grans proyes vers le passage de l'eauie, si le feirēt scauoir aux seigneurs dessusdits. Lesquels se hasterent pour les attendre, & feirent si bonne diligence qu'ils les trouuerēt à la ville de Corbie à vne ville nommée Bonnay sur l'eauie de Helly. Et lors les dessusdits François d'icelle poursuite aduertiz, ordonnerent aucuns de leurs gens d'armes à garder le passage de ladicte riuierie. Si s'en allerent mettre en bataille sur vne haute montaigne entre Corbie & Helly. Et entre-temps messire Iean de Croÿ fut enuoyé deuant avecques luy certain nombre de gens d'armes pour gaigner ledit passage, lequel fut assez briefue-
ment

ment prins & conquis. Et y en eut de morts de dix à douze d'iceux François & les autres se retrahirent avecques leurs gens sur ladicte montaigne. Et adonques ceux de la partie de Bourgongne & les Anglois passerent l'eau & se mirent en bataille au dessoubz de la montaigne dessusdicte contre leurs aduersaires & ennemis, & y furent bien demie heure. Toutesfois ils n'eurent point conseil de les aller combattre, car ils estoient trop petitement atournez de harnois. Et d'autre part ledit Duc de Bourbon & le Comte de Richemont Connestable qui estoient audit lieu d'Arras, auoient enuoyé aucuns de leurs gens deuers les dessusdits François pour les faire retraire & rendre ce qu'ils auoient prins. Finalement apres ce que les deux parties eurent esté grande espace en bataille l'un contre l'autre, ils s'en retournerent chacun dont ils estoient venuz. Et rendirent lesdits François grand partie des prisonniers, qu'ils auoient prins par le moyen & pourchas de ceux que les ambassadeurs dessusdits auoient enuoyez, & aussi le bestail qu'ils auoient accueilliz, mais ce fut bien enuiz. Si perdirent de leurs gens enuiron vingt hommes tant morts comme de prins.

Comment les Roys d'Arragon & de Nauarre furent prins & desconfits deuant Gayeete par l'armée du Duc de Millan.

LE sixiesme iour d'Aoust de cest an furent prins deuant Gayeete au Royaume de Napples le Roy d'Arragon & de Nauarre, le grād maistre de saint Iaques leur frere, le Duc de Sesse & son fils, le Comte de Fondes, le Prince de Tarente, le fils messire Christofle Garganeymé renommé de l'Aigle, le Vice-roy de Cecille & bien quatre cens cheualiers & escuyers, qui auoient avecques eux bien quatre mille souldoyers qui tous furent desconfits: Et tenoient le siege deuant la dessusdicte ville de Gayeete par mer & par terre, pour icelle conquerre à la desplaisance de Philippe Maria Duc de Milan. Pourtant iceluy Duc feit preparer son armée en la ville de Gennes, pour secourir & mener viures à ladicte ville de Gayeete. Si fut principal conducteur d'icelle armée audit Duc de Milan l'Amiral de la cité de Gennes, lequel ayant intention d'entrer en icelle ville ainsi assiegée par mer, si s'approcha d'icelle tant que les assiegeans allerent pour le combattre & subiuguer: toutesfois nonobstant que l'Amiral dessusdit ne fut point en si grand nombre comme les Napolitains & les Arragonnois ses ennemis estoient, la fortune fut pour luy: & desconfit pour ce iour tous ceux qui estoient audit lieu, tenans le siege par mer & par terre: mais nonobstant que les dessusdits Roys d'Arragon & de Nauarre avecques les autres seigneurs dessus nommez eussent esté prins deuant le port de Gayeete, comme dit est dessus, si furent ils menez prisonniers à Gennes, qui lors se tenoit en l'obeissance du Duc de Millan: mais brief ensuiuant par certains moyens & promesses qu'il feit aux Genneuois, luy furent iceux seigneurs deliurez & mis en sa main, moyennant qu'il promeist de non les deliurer sinon du sceu & consentement desdits Genneuois: laquelle promesse il n'entretint point, car tantost apres qu'ils furent amenez deuant luy, & qu'il les eut grādement festoyez & conioys en sa ville de Millan, il les mit à plaine deliurance sans payer finance ne retenir d'eux aucune chose ne promesse, & mesmement leur donna de grās & precieux dons: dont quād ce fut venu à la cognoissance des Gēneuois ils

en furēt tresmal cōtens & non sans cause: car ils estoiet leurs ennemis capitaux, pourquoy ils se departirēt du tout de l'alliāce & obeissance dudit Duc de Millā.

Comment le Cardinal de Vincestre à toute l'Ambassade des Anglois se departit de la ville d'Arras: & comment autres ambassadeurs de plusieurs lieux vindrēt en ladiete ville.

LE vij. iour de Septembre le Cardinal de Vincestre se partit de la conuētion d'Arras, & avec luy toute l'ambassade de la partie d'Angleterre, sans ce qu'ils eussent aucune concorde avec les François. Nonobstant qu'ils eussent par plusieurs iours esté ensemble, & qu'à icelles journées plusieurs traictez eussent esté mis auāt, cōme dit est, qui point n'auoiet esté mis à effect: jaçoit-ce que le Duc de Bourgogne & ceux de son cōseil eussent faictes plusieurs diligences, pour appaiser icelles deux parties de France & d'Angleterre. Neantmoins iceux Anglois s'en retournerent à Calais, & de là en Angleterre, & se doubtoient biē de ce qui aduint assez tost ensuiuant: c'est à sçauoir que le Roy Charles & le Duc de Bourgogne ne se cōcordassent l'un avec l'autre: car ils apperceurēt biē des deuāt leur departemēt qu'icelles deux parties auoient l'un avec l'autre grand amour & repairoient ensemble, cōme se deslors eussent esté en cordialle vnion dōt ils n'estoient point bien contens. Itē encores vindrēt audit Parlemēt d'Arras plusieurs ambassadeurs de plusieurs Royaumes & nations tāt ecclesiastiques cōme seculiers. C'est à sçauoir de par les Roys de Nauarre & de Dache, d'Espaigne, de Chippre, de Portugal, le Connestable Duc de Poulaine, de par le Duc de Millan, de par le Roy de Cecille, de par le Roy de Norueghe, de par le Duc de Bretagne. Si y vindrēt aussi l'Archeuesque d'Aulx, l'Euesque d'Albigue, l'Euesque d'Vzes, l'Euesque d'Auxerre, l'Euesque d'Albanie, l'Euesque de Viscēne, l'Abbé de Vezelay, l'Archediacre de Mets en Lorraine procureur du S. Concile de Basle, l'Archediacre de Poulaine & moult d'autres gens de grand auctorité.

Comment la paix fut faicte & confermée entrē le Roy Charles de France, & le Duc de Bourgogne en la ville d'Arras.

LTem apres que les ambassadeurs du Roy Henry d'Angleterre se furent partis de la ville d'Arras, comme dessus est dit: & qu'ils furēt retournez en Angleterre sans prendre conclusion de paix avec les François, les deux autres parties qui estoient demourées au dessusdit lieu d'Arras: c'est à sçauoir de France & de Bourgogne, s'assemblerēt l'un avec l'autre au parlement au lieu accoustumé par aucun peu de iours. Et là eurent ensemble grand deliberation & aduis sur plusieurs besongnes. Et aussi par l'exhortation des deux Cardinaulx de S. Croix & de Chippre, de plusieurs Prelats & autres notables gens de conseil là estans de chacune partie, conclurent à faire paix finale entre le Roy Charles d'une part & Philippe Duc de Bourgogne d'autre: de laquelle la teneur s'ensuit.

PHILIPPE par la grace de Dieu Duc de Bourgogne, d'Autriche, de Brabant & de Lambourg, Comte de Flandres, d'Arthois & de Bourgogne, Palatin de Hainault, de Hollande, de Zelande & de Namur, Marquis du S. Empire. Seigneur de Frize, de Saline & de Malines. Sçauoir faisons à tous presens & aduenir, que comme pour paruenir à paix generale en ce Royaume ayent esté te-

nues

nues plusieurs conuentions & assemblées. Et mesmement en nostre ville & cité d'Auxerre, en la ville de Corbeil. Et dernièrement ayt esté accordée de tenir en ceste nostre ville d'Arras certaine iournée & conuention, sur le fait de ladicte paix generale. A laquelle mon trefredoubté seigneur le Roy Charles ayt enuoyez, & y sont venus noz treschiers & trefaymez freres & cousins Duc de Bourbon & d'Auuergne, le Comte de Richemont Connestable de France, le Comte de Vandomme grand maistre d'hostel, & trefreuerend pere en Dieu l'Archeuesque & Duc de Reims grand Chancelier de France, Christofle de Harcourt, Gillebert seigneur de la Fayecte Marechal de France, maistre Adam de Cambray premier President en Parlemēt, maistre Iean Tudart Doyen de Paris Conseillier & maistre des Requestes de l'hostel du Roy, Guillaume Charretier, Estienne Moreau, aussi les conseillers, Iean Chastignier, & Robert Marliere, secretares de mondit seigneur le Roy & tous ses ambassadeurs. Et de la part mō treschier seigneur & cousin le Roy d'Angleterre, y sont venus trefreuerend pere en Dieu le Cardinal de Vincerstre, l'Archeuesque d'Iorth, noz aymez cousins les Comtes de Hontidon & de Suffort. Noz reuerends peres en Dieu les Euesques de Norrovich, de S. David & de Lisieux, & plusieurs autres gens d'Eglise & ambassadeurs de mon treschier frere & cousin le Roy d'Angleterre. Et aussi y sommes venus & comparus en nostre personne accompagnez de plusieurs de nostre sang & autres noz feaux & subiects en grand nōbre. A laquelle iournée & conuention de par nostre saint Pere, ayt esté enuoyé trefreuerend pere en Dieu nostre treschier & especial amy le Cardinal de sainte Croix à tout bō & suffisant pouoir de nostre saint Pere: & de par le saint Cōcile de Basle semblablement aient esté enuoyez & soient venus trefreuerend pere en Dieu nostre treschier & trefaymé cousin le Cardinal de Chippre, trefreuereds peres en Dieu les Euesques de Veronne, d'Albigue, Nicolas Preuost, & Calconie Huche Archediacre de Mets en Lorraine, ambassadeurs d'iceluy Concile, & ayans pouoir suffisant sur ce dudit Concile: par deuant lesquels Cardinaulx, Legats & ambassadeurs de nostre S. Pere & du S. Cōcile sont venus & comparus lesdits ambassadeurs de France d'une part, & ceux d'Angleterre d'autre: & nous aussi en nostre personne toutes les fois qu'il a esté besoing: & par iceux ambassadeurs ayēt esté faictes plusieurs ouuertes, & oblations d'un costé & d'autre. Et combien que finalement de la part de monseigneur le Roy, par lesdits ambassadeurs ayent esté faictes aux gens & ambassadeurs d'Angleterre grandes & notables offres, à fin de paruenir à ladicte paix generale: lesquels comme il semble ausdits Cardinaulx autres Legats & ambassadeurs de nostredit S. Pere & du Concile, estre iustes & raisonnables: & ne les pouoient ou deuoient raisonnablemēt reffuser lesdits ambassadeurs d'Angleterre. Et que lesdits Cardinaulx de S. Croix, de Chippre & autres ambassadeurs du S. Concile eussent prié & requis à iceux ambassadeurs d'Angleterre, de les accepter en leur disant & remonstrant qu'autrement, & ou cas qu'ils ne voudroient entendre à l'effect de ladicte paix generale, ils auoient charge & cōmandement de nostre S. Pere le Pape & du Concile de nous exhorter, requerir & sommer d'entendre avec mondit seignr le Roy à paix particuliere, & reunion avec luy en tant que toucher nous pouoit. Toutesfois lesdits ambassadeurs d'Angleterre n'ont voulu accepter lesdictes offres à eux fai-

etes: mais se sont departiz de nostre ville d'Arras sans aucune cōclusion, & sans vouloir prendre n'accepter iour certain ne competent de retourner. Pourquoy apres leur partement par lesdits Cardinaulx, Legats & ambassadeurs de nostredit S. Pere & du Coneile ayons esté exhortez, requis & sommez de vouloir entendre par effect à ladicte paix particuliere & reunion avec mondit seigneur le Roy: moyēnant que par le cas de la mort de feu nostre treschier seigneur & pere que Dieu pardoint, & pour nostre interest en ceste partie: nous seroient par mōdit seigneur le Roy, & par ses ambassadeurs dessus nommez à ce souffisamment fondez pour luy, & en son nom faictes offres raisonnables affin de satisfaction, recōpensation & autrement qu'en deuerions estre contens: lesquelles offres faictes par lesdits ambassadeurs de mondit seigneur le Roy, ayent esté baillees par escrit en vn rolle de papier ausdits Cardinaulx & ambassadeurs de nostredit sainct Pere & du Cōcile, & par eux à nous présenté: duquel rolle la teneur s'ensuit.

C E sont les offres que nous Charles Duc de Bourbon & d'Auuergne, Artus Comte de Richemont Connestable de France, Loys de Bourbon Côte de Vendosme, Regnault de Chartres Archeuesque & Duc de Reims grād Chancelier de France, Guillebert seigneur de la Fayecte mareschal de France, Adam de Cābray president en Parlement, Iean Tudart Doyen de Paris cōseillier & maistre des Requestes de l'hostel du Roy, Guillaume Charretier, & Estienne Moreau cōseilliers, Iean Chastignier & Robert Maliere secretaire, & tous ambassadeurs de Charles Roy de France nostre souuerain seigneur estans presentement en la ville d'Arras: faisons pour & ou nom dudit Roy à mōseigneur le Duc de Bourgogne & de Brabant pour son interest & querelle qu'il a & peult auoir à l'encontre du Roy, tant à la cause de la mort de feu monseigneur le Duc Iean de Bourgogne son pere comme autrement, affin de paruenir à traicté de paix & concorde. Premièrement que le Roy dira, ou par ses gēs notables suffisamment fondez fera dire à mondit seigneur le Duc de Bourgogne, que la mort de feu monseigneur le Duc Iean son pere (que Dieu absolve) fut iniquemēt & mauuaise-mēt faicte par ceux, qui perpetrerent ledit cas & par mauuais conseil, & luy en a tousiours despleu & à present desplaist de tout son cueur. Et que s'il eut sceu ledit cas & eut tel aage & entendement qu'il a de present, il y eut obuié à son pouoir: mais il y estoit bien ieune & auoit pour lors petite cognoissance, & ne fut point si aduisé que d'y pourueoir. Et priera à mondit seigneur de Bourgogne, que toute haine & rancune qu'il peut auoir à l'encontre de luy à cause de ce, il oste de son cueur & qu'entre eux ayt bonne paix & amour. Et se fera de ce expresse mention és lettres qui seront faictes de l'accord & traicté d'eux. Item que tous ceux qui perpetrerent ledit mauuais cas ou furent consentans, le Roy les abandonnera & fera toutes les diligences à luy possibles de les faire prendre & apprehender quelque part qu'ils pourroient estre trouuez, pour estre puniz en corps & en biens. Et si apprehender ne peuvent estre, il les bannira à tousiours & sans rappel hors du Royaume & du Dauphiné, avecques confiscation de tous leurs biens, & seront hors de tous traictéz. Item ne souffrira le Roy aucuns d'eux estre receuz ou fauorisez en aucun lieu de son obeissance & puissance. Et fera crier & publier par tous les

les lieux des Royaumes & Daulphiné accoustumez à faire cris & proclamations, qu'aucun ne les reçoive ou favorise sur peines de confiscations de corps & de biens. Item & que mondit seigneur de Bourgongne le plus tost qu'il pourra bonnement apres ledit accord passé, nommera ceux dont il est ou sera lors informé qui perpetrerent ledit mauuais cas ou en furent consentans, affin qu'incontinent & diligemment soit procedé contre eux de la part du Roy, comme dit est. Et en outre pource que mondit seigneur le Duc de Bourgongne n'a encores peu avoir cognoissance vraye de ceux qui perpetrerent ledit mauuais cas ou en furent consentans, toutes les fois que cy apres en sera informé deüiement d'aucuns autres, il les pourra nommer & signifier par ses lettres patentes ou autrement suffisamment au Roy. Lequel en ce cas sera tenu de faire proceder tantost & diligemment à l'encontre d'eux par la maniere dessusdicte. Item que pour l'ame de feu monseigneur le Duc Jean de Bourgongne, de feu messire Archambault de Foix Comte de Noailles qui fut mort avecques luy & de tous les autres trespassez, à cause des diuisions & guerres de ce Royaume, seront faictes les fondations & edifices qui s'ensuiuent. C'est à sçauoir en l'Eglise de Monstreau en laquelle fut premiere-ment enterré le corps de mondit feu seigneur le Duc Jean, sera fondée vne chappelle & chappellainie d'une messe basse de requiem chacun iour perpetuellement: laquelle sera rentée & douée conuenablement de rentes admorties iusques à soixante liures parisis par chacun an: & aussi garnie de calice & d'ornemens d'Eglise bien & suffisamment & tout aux despens du Roy. Et laquelle chappelle sera à la collation de mondit seigneur de Bourgongne & de ses successeurs Ducs de Bourgongne à tousiours. Item qu'en ladicte ville de Monstreau ou au plus pres d'icelle que faire se pourra bonnement: sera fait, construit & institué par ledit Roy & à ses fraits & despens vne Eglise, conuent & monastere de Chartreux: c'est à sçauoir pour vn prieur & douze religieux avecques les cloistres, salles & reffectoüiers, grange & autres edifices qui luy seront necessaires & conuenables. Et lesquels Chartreux, c'est à sçauoir le prieur & douze religieux seront fondez par le Roy & de bonnes rentes & reuenues annuelles & perpetuelles, & bien admorties suffisamment & conuenablement, tant pour le viure desdits religieux & entretenement du diuin seruice, comme pour les soustenemens des edifices dudit monastere: & autrement iusques à la somme de huit cens liures parisis par an de reuenue, à l'ordonnance & par l'aduis de tresreuerend pere en Dieu monseigneur le Cardinal de sainte Croix, ou de celui ou ceux qu'il voudra à ce commettre. Item que le Pont de Monstreau au lieu où fut fait ledit mauuais cas, sera faicte & ediffiée & bien entaillée & entretenue à tousiours aux despens du Roy vne belle croix de belle façon. Et ainsi qu'il sera diuisé par ledit monseigneur de sainte Croix ou ses commis. Item qu'en l'Eglise des Chartreux lez Dijon en laquelle gist & repose à present le corps dudit feu monseigneur le Duc Jean: sera fondée par le Roy & à ses despens vne haute messe de requiem, qui se dira chacun iour perpetuellement au grand autel de ladicte Eglise, à telle heure qui sera deuisée. Et laquelle fondation sera donnée & assignée de bonnes rentes admorties iusques à la somme de cent liures pari-

sis de reuenue par an, & aussi garnie de calices & aornemens comme dessus.

Item que leſdictes fondations & edifices ſeront commencées à faire le plus toſt que bonnement faire ſe pourra. En eſpecial commencera on à dire & celebrer leſdictes Meſſes, incontinent apres ledit accord paſſé. Et au regard des edifices qui ſe doiuent en ladicte ville de Monſtreau ou au plus pres d'icelle faire, on y commencera à ouurer dedans trois mois apres que ladicte ville ſera reduicte en l'obeiſſance du Roy. Et continuera on diligemment ſans intercupation, que iceux edifices ſeront tous parfaits & acheuez dedans cinq ans apres enſuiuans. Et quant aux deſſuſdictes fondations on y beſongnera ſans delay le plus toſt que faire ſe pourra. Et pour ces cauſes tantotſt apres ledit accord paſſé, ſera faicte & assignée la haulte Meſſe aux Chartreux de Dijon, dont deſſus eſt faicte mention, avec ce qui en deſpend. C'eſt à ſçauoir de liures, calices & autres choſes à ce neceſſaires. Et auſſi y ſera dicte & celebrée aux deſpens du Roy la baſſe Meſſe quotidienne, qui doit eſtre fondée en l'Egliſe de Mōſtreau ſi toſt qu'elle ſera reduicte en l'obeiſſance du Roy : & au ſurplus touchant les edifices & fondations, qui ſe doiuent faire en la ville de Monſtreau. Et apres d'icelle de la part du Roy ſera miſe dedans leſdits trois iours apres qu'icelle ville ſera reduicte en l'obeiſſance du Roy és mains d'iceluy ou ceux que y voudra commettre monſeigneur le Cardinal de ſaincte Croix, certaine ſomme d'argent ſouffisant pour commencer à faire leſdictes ouurages & edifices : & achepter les calices, liures, aornemens & autres choſes à ce neceſſaires & conuenables. Et d'autre part ſerōt lors auſſi aduiſées, aſſiſes & deliurées les rentes deſſus declairées montans pour ledit lieu de Monſtreau huit cens ſoixante liures pariſis par an bien reuenans ſeulement amorties, & aſſiſes au plus pres que bonnement faire ſe pourra dudit lieu de Monſtreau: ſans y comprendre les cent liures pariſis de réte qui doiuent eſtre aſſiſes pour la fondation de ladicte haulte Meſſe des Chartreux de Dijon. Item que pour & en recompensation des ioyaux & autres biens meubles que auoit feu mondit ſeigneur le Duc Iean au temps de ſon decez, qui furent prins & perdus, & pour en auoir & achepter des autres. Et en lieu d'iceux le Roy payera & fera reaulment payer & de fait à mondit ſeigneur le Duc de Bourgogne, la ſomme de cinquante mille eſcus d'or vieux de poix de ſoixante quatre au marc de Troyes huit onces pour le marc, & à vingt & quatre karas d'aloy ou autre monnoye d'or courſable de la valeur aux termes qui ſ'enſuiuent. C'eſt à ſçauoir quinze mille au terme de Paſques prochain venant en vn an, qui commencera l'an mille quatre cens trenteſept. Et quinze mille aux Paſques enſuiuans qui ſera l'an mille quatre cens trente huit. Et les vingt mille qui reſteront aux Paſques enſuiuans, qui ſera l'an mille quatre cens trente-neuf. Et avecques ce ſera ſauué & reſerué à mondit ſeigneur de Bourgōgne ſon action & poursuite au regard du beau collier de feu mondit ſeigneur ſon pere, contre ceux qui l'ont eu & l'ont pour l'auoir & recouurer : & pareillement autres ioyaux à ſon prouffit en outre & par deſſus leſdits cinquante mille eſcus.

Item & que de la part du Roy à mondit ſeigneur de Bourgogne pour partie de ſon intereſt, ſeront delaiſſées & avecques ce baillées & transportées de nouuel pour luy & ſes hoirs procreez de ſon corps, & les hoirs de ſes hoirs & deſcendants touſiours de droicte ligne ſoient maſles ou femelles les terres & ſeigneuries

ries qui s'ensuiuent. C'est à sçauoir la cité & Comté de Mascon & S. Iangon, & les mettes d'iceux: & auecques ce ensemble toutes les villes, villages, terres, cens, rentes & reuenues quelsconques qui sont & appartiennent & doiuent competer & appartenir en domaine au Roy & à la Couronne de France, & par tous les villages royaux de Mascon & de saint Iangon & mettes d'iceux, auecques toutes les appartenances d'icelle Comté de Mascon & autres seigneuries, que tient & doit tenir le Roy en domaine ancien, en & par tout lesdits villages de Mascon & de saint Iangon tant en fief, arrierefief, confiscations, patronnages d'Eglises, collations de benefices comme en autres droits & prouffits quelsconques, sans y riens retenir de la part du Roy de ce que touche & peult toucher le domaine, la seigneurie, la iurisdiction ordinaire des Comtez & lieux dessusdits. Et est sauué & reserué au Roy semblablement les fiefs & hommages des choses dessusdictes: & le ressort & souueraineté des Eglises & subiects d'icelles de fondations royaux, estans ausdits bailliages & es mettes enclauées en iceux & le droit de Regalle, là où il a lieu & autres droits royaux appartenans d'ancienneté à la couronne de France & bailliages dessusdits: pour à ladicte Comté de Mascō: ensemble des villes, villages, terres & domaines dessusdictes iouir & vser par mondit seigneur de Bourgogne & sesdits hoirs & successeurs à tousiours & les tenir en foy & hommage du Roy & de la couronne de France, & en pairrie sous le ressort du Roy & de sa court de Parlement sans moyen, Pareillement & en telles franchises, droits & prerogatiues comme les autres Pairs de France. Itē auecques ce de la part du Roy seront transportées & baillées à mondit seigneur de Bourgogne, & celuy de sesdits hoirs & successeurs legitimez procreez de son corps: ausquels il delaissera apres son decez & trespas ladicte Comté de Mascon, tous les prouffits & emolumens quelconques qui escherront esdits villages royaux de Mascon & saint Iangon, à cause des droits royaux & de souueraineté appartenans au Roy & en iceux bailliages, soient par le moyen de la garde & souueraineté des Eglises, qui sont de fondation royalle & des subiects d'icelles droits de royalle ou autrement, tant en confiscations pour quelque cas que ce soit amendes, droits, exploits, iustices & les prouffits & emolumens de la monnoye comme autres prouffits quelsconques, pour en iouir par mondit seigneur de Bourgogne & sondit hoir durant leurs vies & du suiuant d'eux tant seulemēt en & par la maniere qui s'ensuit. C'est à sçauoir qu'à la nomination de mondit seigneur le Duc de Bourgogne & de sondit hoir apres luy, le Roy commettra & ordonnera celuy qui fera Baillif de Mascon pour mondit seigneur de Bourgogne, iuge royal & commis de par luy & cognoistre de tous cas royaux & autres choses procedans des bailliages: des pays & lieux & enclauures dessusdictes: aussi auant & tout en la maniere & forme, que l'ont fait & accoustumé de faire les Baillifs royaux de Mascon & de saint Iangon qui ont esté le temps passé: lequel bailliage de saint Iangon est & sera aboly par ce moyen: & semblablement seront commis de par le Roy à la nomination de par mondit seigneur de Bourgogne & de sondit hoir, tous autres officiers necessaires pour ladicte iurisdiction & droits royaux tant capitaines, chasteillains, preuosts, seigneurs comme receueurs & autres qui exerceront leurs offices ou nom du Roy au prouffit de mondit seigneur de Bourgogne & de son

hoir apres luy, comme dit est dessus. Item semblablement de la part du Roy seront transportées & baillées à mondit seigneur & à son hoir dessusdit apres luy, tous les prouffits des aydes. C'est à sçauoir des greniers à sel, quatriesmes de vins venduz à destail, impositions de toutes denrées, tailles, fouages, aydes & subuentions quelscōques, qui ont ou auront cours, & qui sont ou seront imposées és élections de Mascon, Chalon, Austun & Langres si auant qu'icelles élections s'estendent en & par le païs & Duché de Bourgongne, & la Comté de Charrolois, & ladicte Comté de Mascon, tout le païs de Masconnois & és villes & terres quelconques enclauées en icelle Duché, Comté & païs pour iouir de la part de mondit seigneur le Duc de Bourgongne & de son hoir apres luy de toutes lesdictes aydes, tailles & autres subuentions en auoir le prouffit durant le cours de leurs vies & du suruiuant d'eux. Auquel mondit seigneur le Duc de Bourgongne & à sondit hoir appartiendra la nomination de tous les officiers à ce necessaires, soient esleuz, clerks, receueurs, sergens ou autres & au Roy la commission & institution comme dessus est dit. Item & aussi sera par le Roy à mondit seigneur le Duc de Bourgōgne transporté & baillé à tousiours pour luy ses hoirs legitimes procrées de son corps, & les hoirs de ses hoirs soiēt males ou femelles descendans de droicte ligne en heritage perpetuelle, la cité & Comte d'Auxerre avecques toutes les appartenances, & appendances quelconques tant en iustice, domaine, fiefs, patronnages d'Eglises, collations de benefices comme autrement à les tenir du Roy de la couronne de France, & de sa court de Parlement, sans moyen & en telles franchises & droits de prerogatiues comme les autres Pairs de France. Item & avecques ce seront transportées & baillées par le Roy à mondit seigneur de Bourgongne & à iceluy de ses hoirs, à qui il delaissera apres son decez ladicte Comté d'Auxerre tous les prouffits & emolumens quelconques, qui escherront en ladicte Comté & cité d'Auxerre, & en toutes les villes & terres enclauées en icelles, qui ne sont point en ladicte Comté: soient Eglises ou autres à cause de droits royaux en quelque maniere que ce soit tant en regalles, cōfiscations, amendes & exploits de iustice le prouffit & emolument de la monnoye, comme autrement durant leurs vies & du suruiuant d'eux tant seulement en & par la maniere dessus declarée. C'est à sçauoir qu'à la nomination de mondit seigneur de Bourgōgne & de son hoir apres luy, le Roy commettra & ordonnera celuy qui sera Baillif d'Auxerre pour mondit seigneur de Bourgongne iuge royal & commis de par luy à cognoistre tous cas royaux & autres choses és mettes de la Comté d'Auxerre & és enclauemēs d'icelle, aussi auant & tout en la forme & maniere que l'ont fait & accoustumé faire par cy deuant les Baillifs de Sens audit lieu d'Auxerre. Et lequel Baillif de Sens ne s'entremettra aucunement durant les vies de mondit seigneur le Duc de Bourgongne & de son hoir. Mais on en laissera conuenir ledit Baillif d'Auxerre, qui sera commis de par le Roy à la nomination de mondit seigneur de Bourgongne & de sondit hoir. Et semblablement seront commis par le Roy à la nomination de mondit seigneur de Bourgongne & de sondit hoir, tous autres officiers necessaires pour l'exercice de ladicte iurisdiction & droits royaux en ladicte Comté d'Auxerre tous Chastellains, capitaines, preuosts & autres: comme sergens & receueurs, qui exerceront leur office au nom du Roy au prouffit de mondit

mondit seigneur de Bourgongne & de son hoir apres luy. Item d'autre part de la part du Roy, seront transportées & baillées à mondit seigneur de Bourgongne & à sondit hoir apres luy tous les prouffits des aydes. C'est à sçauoir de grenier à sel, quatriesmes de vins vendus en destail, impositions de routes denrées: tailles, fouages, & autres aydes & subuentions quelsconques, qui ont ou auront cours & qui sont & seront en ladicte cité, Comté & election d'Auxerre si auant qu'icelle election s'estend en la dessusdicte Comté, & au pays d'Auxerrois & és villes enclauées en iceux, pour en iouir par mondit seigneur de Bourgongne & sondit hoir apres luy: & en auoir les prouffits le cours de leurs vies durans, & du suruiuant d'eux tant seulement. Ausquels mondit seigneur le Duc de Bourgongne & à sondit hoir, luy appartiendra la nomination de tous les officiers à ce necessaires, soient elleuz, clerics, sergens ou autres, & au Roy la commission & institution comme dessus est dit. Item & aussi seront par le Roy baillées & transportées à mondit seigneur le Duc de Bourgongne pour luy & ses hoirs legitimes, procréez de son corps & ses hoirs de ses hoirs: soient masles & femelles descendans en directe ligne à tousiours & en heritaige à perpetuité, les chastel, ville & chastellenie de Bar sur Seine, ensemble toutes les appartenances & appendences d'icelle chastellenie tant en domaine, iustice, iurisdiction, fiefs, patronnages d'Eglise, collations de benefices comme autres prouffits & emolumens quelsconques à les tenir en foy & en hommage du Roy & en pairrie de France, sous le ressort de la souueraineté du Roy & de la court de Parlement sans moyen. Item & avec ce appartiendra à mondit seigneur le Duc de Bourgongne, & de la partie du Roy luy seront baillées & trāsportées par luy & ceux de ses hoirs à qui il delaissera apres son decez ladicte seigneurie de Bar, tous les prouffits des aydes tant du grenier au sel si grenier ya accoustumé auoir, & quatriesmes des vins vendus à destail, impositions de routes denrées, tailles, fouages & autres aydes & subuentions quelsconques, qui ont & auront cours ou sont & seront imposées en la ville & chastellenie de Bar sur Seine, & és villes & villages subiects & ressortissans à icelle chastellenie, pour iouir de la part de mondit seigneur le Duc de Bourgongne & de sondit hoir apres luy d'icelles tailles & subuentions: & auoir les prouffits de la main des grenetiers & receueurs royaux, qui seront à ce commis par le Roy à la nomination de mondit seigneur le Duc de Bourgongne, durant les vies de luy & de sondit hoir apres luy & les suruiuans d'eux deux. Item & aussi de la partie du Roy sera transporté & baillé à mondit seigneur de Bourgongne pour luy & ses hoirs, la Comté de Bourgongne pour tousiours en heritaige perpetuel: la garde de l'Eglise & Abbaye de Luxeul, ensemble tous les droits, prouffits & emolumens quelsconques appartenans à la dessusdicte garde: laquelle comme Comte à cause de sa Comté de Champagne dit & maintient à luy appartenir: combien que les Comtes de Bourgongne predecesseurs à mondit seigneur, ayent par cy deuant pretendu en querelle au contraire: disans & maintenant icelle Abbaye qui est hors du Royaume & mettes de la Côté de Bourgongne, deuoit estre de leur garde. Et pour ce pour le bien, vtilité & prouffit du pays & pour obuier à tous debats & noises, sera delassé par le Roy à mondit seigneur de Bourgongne, & luy en demourera ladicte garde tout entierement. Item aussi seront par le Roy transportées à

mondit seigneur de Bourgogne pour luy & ses hoirs masles legitimez, procréez de son corps, & les hoirs de ses hoirs masles tant seulement procréez de leurs corps, & descendans d'eux en ligne directe à tousiours & heritaige perpetuelles chasteaux, villes & chastellenies & preuostez foraines de Peronne, Montdidier & Roye: avecques toutes leurs appartenances & appendences quelsconques tant en demaine, iustice & iurisdiccions, fiefs & arrierefiefs, patronnages d'Eglises, collations de benefices, comme autres droits prouffits & emolumens quelsconques à les tenir du Roy & de la couronne de France en foy & en homage, & en pairrie de France sous le ressort & souueraineté de sa court de Parlement sans moyen. Ité & avecques ce baillera & transportera le Roy à mondit seigneur le Duc de Bourgogne, & à celuy de ses hoirs dessusdits masles: auquel il delaissera apres son decez lesdictes villes & chastellenies de Peronne, Montdidier & Roye, tous les prouffits & emolumens quelsconques qui escher rôt en icelles villes, chastellenies & preuostez foraines à cause des droits royaux en quelque maniere que ce soit: tant en regalles, confiscations, amendes, exploicts de iustice, comme autrement: pour en iouir par mondit seigneur le Duc de Bourgogne & sondit hoir apres leurs vies & du suruiuant d'eux tant seulement, & par la maniere dessus declairée. C'est à sçauoir qu'à la nomination de mondit seigneur de Bourgogne & de son hoir masle, apres luy le Roy commettra & ordonnera celuy qui sera gouuerneur & Baillif desdictes villes & chastellenies, pour mondit seigneur le Duc de Bourgogne iuge royal & commis de par luy à cognoistre de tous cas & autres choses procedans desdictes villes, chastellenies & Preuostez foraines & és villes subiectes & ressortissans à icelles aussi auant, & par la maniere que l'ont fait & accoustumé de faire par cy deuant les Baillifs royaux de Vermendois & d'Amiens. Et en outre seront commis, le mestier est, par le Roy à la nomination de mondit seigneur de Bourgogne & de sondit hoir masle, tous autres officiers necessaires pour l'exercice de ladicte iurisdiction & droits royaux: comme chastellains, capitaines, preuosts, sergens, receueurs & autres qui exerceront leurs offices ou nom du Roy & au prouffit de mondit seigneur le Duc de Bourgogne, & de sondit hoir masle apres luy comme dit est dessus. Item & semblablement par le Roy seront transportées & baillées à mondit seigneur le Duc de Bourgogne & sondit hoir masle apres luy, tous les prouffits des aydes: c'est à sçauoir du grenier à sel, quatriesmes de vins vendus en destail, impositions de toutes denrées, tailles, fouages & autres aydes & subuentions quelsconques, qui ont ou auront cours: & qui sont ou seront composées esdictes villes, chastellenies & preuostez foraines de Peronne, Montdidier & Roye: & és villages & terres subiectes & ressortissans à icelles villes, chastellenies & preuostez foraines, pour en iouir par mondit seigneur de Bourgogne & sondit hoir masle durant le cours de leurs vies & du suruiuant d'eux. Auquel mondit seigneur de Bourgogne & sondit hoir masle apres luy appartiendra la nomination de tous les officiers à ce necessaires soient esleuz, clercs, receueurs, sergens ou autres: & au Roy leur commission & institution comme dessus. Item en outre de la part du Roy sera delaisé à mondit seigneur le Duc de Bourgogne à celuy de ses heritiers: auquel apres son decez il laissera le Comté d'Arthois, la compensation des aydes en ladicte Comté d'Arthois

thois reffors & enclauemens d'icelle, montans à present icelles compositions à quatorze mille francs par an ou enuiron sans ce que mondit seigneur le Duc ou sondit hoir apres luy durât leurs vies soient abstraincts d'en auoir autre don n'octroy du Roy, ne de ses successeurs. Et nommeront mondit seigneur & sondit hoir apres luy tels officiers que bon leur semblera, pour le fait de ladicte composition tant esleuz, receueurs, sergens que autres : lesquels ainsi nommez le Roy sera tenu d'instituer & commettre lesdits officiers & leur en faire bailler les lettres. Item que le Roy baillera & transportera à mondit seigneur le Duc de Bourgongne pour luy ses hoirs & ayans cause à tousiours : toutes les citez, villes, forteresses, terres & seigneuries appartenans à la couronne de France dessus la riuere de somme de l'un costé & de l'autre comme S. Quentin, Corbie, Amiens, Abbeuille & autres ensemble: toute la Comté de Ponthieu deçà & de là la dessusdicte riuere de Somme, Dourlens, saint Riquier, Creuecueur, Arleux, Mortaigne avecques les appartenances & appendances quelsconques. Et toutes autres terres qui peuuent appartenir à ladicte couronne de France depuis ladicte riuere de Somme inclusiuement : comprenant aussi au regard des villes entrans du costé d'Arthois, de Flandres & de Hainault tant du Royaume comme de l'Empire. En y comprenant aussi au regard des villes seans sur ladicte riuere de Somme du costé de France, les banlieux & eschaumaiges d'icelles villes, pour en iouir par mondit seigneur le Duc de Bourgongne seldits hoirs & ayans cause à tousiours, desdictes citez, villes & forteresses, terres & seigneuries en tous prouffits & reuenues tant en domaines comme des aydes ordonnées par la guerre & aussi tailles & emolumens quelsconques. Et sans y retenir de la part du Roy fors les foy & hommages de souueraineté. Et lequel transport & bail se fera (comme dit est) par le Roy au rachapt de la somme de quatre cens mille escus d'or vieux de soixante quatre au marc de Troyes, huit onces pour le marc, & d'aloy à vingt quatre karas, & vn quart de karat de remede ou autre monnoye d'or courant : à la valeur duquel rachapt de mondit seigneur le Duc de Bourgongne seront baillées lettres bonnes & suffisantes, pour lesquelles il promettra pour luy & les siens, que toutes & quantes fois qu'il plaira au Roy & aux siens faire ledit rachapt : mondit seigneur de Bourgongne & les siens serot tenuz en receuant ladicte somme d'or, de rendre & laisser au Roy & aux siens toutes lesdictes citez villes forteresses, & seigneuries comprinses en ce present traicté tant seulement. Et sera content en outre mōdit seigneur le Duc de Bourgongne de receuoir le payement des quatre cens mille escuz d'or à deux fois. C'est à sçauoir à chacune fois la moitié: pourueu qu'il ne sera tenu rendre lesdictes villes, citez, forteresses, terres & seigneuries n'aucunes d'icelles, iusques à ce que ledit payement soit accomply & qu'il ayt receu le dernier des quatre cens mille escuz d'or. Et ce pendant seront à mondit seigneur le Duc de Bourgongne les fraiz siens de toutes lesdictes citez, villes forteresses & seigneuries tant des domaines comme des aydes & autrement sans en riens deduire ne rabattre du principal. Et est à entendre que audit transport & bail que fera le Roy (comme dit est) ne seront point comprins les citez de Tournay, Tournesis & S. Amand: mais demourront és mains du Roy reserué Mortaigne, qui est comprins & demeure és mains & gouuernement de mondit seigneur le Duc de Bourgon-

gne ainsi que dessus est dit . Et combien que ladicte cité de Tournay ne doive point estre baillée à mondit seigneur le Duc de Bourgogne : ce nonobstant est reserué à mondit seigneur de Bourgogne l'argent à luy accordé par ceux de Tournay, par certain traicté & accord qu'il a avecques eux durant iusques à certain temps & années aduenir . Et lequel argent lesdits de Tournay payeront plainement à mondit seigneur le Duc de Bourgogne. Item & pource que mondit seigneur le Duc de Bourgogne pretend à auoir droit en la Comté de Boulongne sur la mer, laquelle il tient & possede . Et pour bien de paix icelle Comté de Boulongne sera & demourra à mondit seigneur de Bourgogne, & en iouira & possedera en tous prouffits & emolumens quelsconques, pour luy ses enfans & hoirs males procréés de son corps seulement. Et en apres demourra icelle Comté à eux qui droit y ont ou auront. Et sera tenu le Roy de appaiser & contenter lesdictes parties pretendans auoir droit en icelles Comté: tellemēt qu'en ce pendant ils ne demandent ne quierent riens ne fassent aucune poursuite à l'encontre de mondit seigneur de Bourgogne & sesdits enfans. Item que les chastel ville Comté & seigneurie de Gien sur Loyre, qu'on dit auoir esté donnée & transportée avec la Comté d'Estampes & la seigneurie de Dourdan par feu monseigneur le Duc de Berry, & feu mōseigneur le Duc Iean pere de mondit seigneur de Bourgogne : seront de la part du Roy mises & baillées reauement & de fait es mains de nous Duc de Bourbonnois & d'Auuergne. Et tantost apres ledit accord passé pour tenir & gouuerner l'espace d'un an ensuiuant, & iusques à ce que durant ledit an Iean de Bourgogne Comte d'Estampes ou mondit seigneur pour luy, auront monstré ou fait monstrer au Roy ou à son conseil les lettres dudit don fait à mondit seigneur de Bourgogne par feu mōdit seigneur de Berry : lesquelles veuës si elles sont trouuées suffisans & valla- bles, sommierement & de plain & sans quelconque procez nous Duc de Bourbonnois & d'Auuergne, serons tenus de les bailler & deliurer audit Comte d'Estampes ou à mondit seigneur de Bourgogne : pour luy lesdits ville & chastel de Gien sur Loyre comme à luy appartenans par le moyen & transport que luy à fait mondit seigneur de Bourgogne : sans ce que la part du Roy l'on puisse ne doive alleguer au contraire aucune prescription ou laps depuis le decez de feu mondit seigneur de Berry. Et aussi nonobstant quelsconques conditions ou oppositions d'autres qui voudront prendre droit en ladicte Comté de Gien : ausquels si aucuns en ya sera reserué leur droit pour le poursuiure par droit de iustice quand bon leur semblera contre ledit Comte d'Estampes. Item que par le Roy sera restitué & payé à mondit seigneur le Comte d'Estampes & mondit seigneur le Comte de Nevers son frere, la somme de trente deux mille deux cēs escuz d'or, que feu le Roy Charles dernièrement trespasé fait, comme on dit, prendre en l'Eglise de Roüen, où icelle somme estoit en deppost : cōme deniers de mariage appartenās à feüe Madame Bonne d'Arthois mere desdits seigneurs, ou cas qu'on en fera directemēt apparoir que telle somme soit & ayt esté alloüée ou compte & au prouffit dudit Roy Charles : à payer icelle somme de xxxij. mille deux cens escuz à tels termes comme raisonnables, qui seront aduisez apres le payement fait & accomply à mondit seigneur de cinquante mille escuz dont dessus est faicte mention. Et au regard des debtes que mondit seigneur le Duc

de

de Bourgongne dit & maintient à luy estre tenues & deües, par feu ledit Roy Charles, tant à cause des dons, pensions comme autrement montant à moult grand somme de deniers, son droit tel qu'il a & doit auoir pour la recourance d'icelles debtes luy demoura sauf & entier. Item que mōdit seigneur de Bourgongne, ne sera tenu faire foy ne hommage ne seruice au Roy des terres & seigneuries, qu'il tient à present où royaume de France : ne de celles qui luy pourroient escheoir cy apres par succession oudit royaume. Mais sera & demoura exempt de sa personne en tous cas de subiections, hommages, ressors, souuerainetez & autres du royaume durant la vie de luy. Mais apres le decez du Roy, mondit seigneur de Bourgongne, fera à son fils & successeurs en la courōne de France les hommages, fidelitez & seruices qui à ce sont appartenans. Et aussi le mondit seigneur de Bourgongne alloit de vie à trespas deuant le Roy, ses heritiers & ayans cause, ferōt au Roy lesdits hommages & fidelitez & seruices ainsi qu'il appartiendra. Item & pource que cy apres mondit seigneur de Bourgongne tant és lettres, qui se feront de la paix comme és autres lettres & escriptures : & aussi de bouche recognoistra & nommera & pourra nōmer & recognoistre le Roy son souuerain : offrant & presentant lesdits ambassadeurs du Roy, que lesdictes nominations & recognoissances tant par escript comme de bouche, ne portent aucun preiudice à ladicte exemption personnelle de mondit seigneur le Duc de Bourgōgne sa vie durant. Et que ladicte exemption demeure en sa vertu selon le contenu en l'article precedent : & aussi qu'icelle nomination, recognoissance ne s'estende que aux terres & seigneuries qu'iceluy monseigneur de Bourgongne tient & tiendra en ce royaume. Item & au regard des feaux & subiects de mondit seigneur de Bourgongne des seigneuries qu'il tient & doit auoir par ce present traicté, & qui luy pourroit escheoir par succession ou royaume de France durant les vies du Roy & de luy, ils ne seront point contraincts d'eux armer au commandement du Roy ne de ses officiers : supposé ores qu'ils tiennent avec ce du Roy aucunes seigneuries & terres. Mais est content le Roy que toutes les fois qu'il plaira à mondit seigneur de Bourgongne mander ses feaux & subiects pour ses guerres, soit ou royaume ou dehors, ils serōt cōtraints d'y aller sans pouoir ne vouloir venir au mandement du Roy, se lors il les y mādait. Et pareillement sera fait au regard des seruiteurs de mondit seigneur de Bourgongne, qui sont ses familliers & seruiteurs de son hostel supposé qu'ils ne soient point ses subiects. Item & toutesfois si aduenoit que les Anglois, ou autres leurs alliez facent guerre cy apres à mondit seigneur de Bourgongne, ou à ses pays & subiects à l'occasion de ce present traicté, ou autrement : le Roy sera tenu de secourir & ayder mōdit seigneur de Bourgōgne & ses pays & subiects : ausquels on feroit guerre soit par mer ou par terre à toute puissance, ou autrement selon que le cas requerra & tout ainsi comme pour son propre fait. Item & que de la part du Roy & de ses successeurs Roys de France, ne sera faicte ne promise ne souffert faire par les Princes & seigneurs dessusdits aucune paix, traicté ou accord avecques son aduersaire & ceux de la part d'Angleterre, sans le signifier & faire à sçauoir à mondit seigneur le Duc de Bourgongne & à son heritier principal apres luy : & sans leur expres consentement & les y appeller & cōprendre, si comprins y veulent estre : pourueu que pareillemēt soit fait du costé

de mondit seigneur de Bourgongne & de son heritier principal au regard & en tant que luy touche la guerre d'Angleterre. Item & que mondit seigneur de Bourgongne & tous ses feaux & subiects & autres, qui par cy deuant ont porté en armes l'enseigne de mondit seigneur: c'est à sçauoir la croix S. Andrieu, ne seront point contrainsts de prendre autre enseigne en quelconque mandement ou armée qu'ils soient en ce royaume ou dehors, soit en la presence du Roy ou de ses Connestables, & soient à ses gaiges ou souldoyers ou autrement. Item que le Roy fera restituer & desdommager de leurs pertes raisonnables, & aussi de leurs rançons ceux qui furent prins le iour de la mort dudit feu monseigneur le Duc Iean qui Dieu pardoint, & qui y perdirent leurs biens & furent grandemēt rançonnez. Item qu'au surplus abolition generale soit faicte de tous cas aduenuz, & de toutes choses dictes, passées & faictes à l'occasion des diuisions de ce royaume, excepté ceux qui perpetrerent ledit mauuais cas ou qui furent consentans de la mort dudit feu monseigneur le Duc Iean de Bourgongne: lesquels seront & demourront hors de tout traicté. Et qu'au surplus chacun de costé & d'autre retourne au sien: c'est à sçauoir les gens d'Eglises à leurs Eglises & benefices, & les seculiers à leurs terres, rentes, heritages, possessions & biens immeubles en l'estat qu'ils sont: reserué des terres & seigneuries estans en la Comté de Bourgongne: lesquelles mondit seigneur de Bourgongne ou feu monseigneur son pere ont eües & retenues, & ont données à autrui: comme confiscations & confisquées à eux à cause desdictes guerres & diuisions: lesquelles seront & demourrōt, nonobstant ladicte abolition & accord à ceux qui les tiennent & possèdent. Mais par tout ailleurs chacun reuiendra à ses terres & heritages, comme dit est, sans ce que pour demolition & empiremens gardes de places ou reparations quelsconques on puist riens demander l'un à l'autre: & sera chacun tout quitte de rentes de charges escheües du tēps, qu'il n'aura ioÿ de ses terres & heritages: mais au regard des meubles prins ou euz d'un costé & d'autre, iamaïs n'en pourra estre aucune chose, poursuite, querelle ne question faicte d'un costé ne d'autre. Item & qu'en ce present traicté soient estainctes & abolies toutes iniures, malueillances & rancunes tant de parolles & de fait, comme autrement aduenuz cy deuant à l'occasion des diuisions, partialitez & guerres tant d'une part comme d'autre, sans ce que aucun en puisse aucune chose demander ne faire question ne poursuite par prochaineté ne autrement: ne le reprocher ne donner blasme pour auoir tenu aucun party. Et que ceux qui feront ou diront le contraire soient puniz comme transgresseurs de fait selon la qualité du fait.

Item & en ce present traicté seront comprins de la part mondit seigneur de Bourgongne, toutes les gens d'Eglises nobles, bonnes villes & autres de quelque estat qu'ils soient: qui ont tenu son party & de feu monseigneur son pere, & iouÿront du benefice de ce present traicté, tant au regard de l'abolition, comme de recouurer & auoir tous leurs heritages & biens immeubles à eux empeschez, tant au royaume qu'au Daulphiné à l'occasion desdictes diuisions: pourueu qu'ils accepteront ce present traicté, & en voudront iouir. Item & renoncera le Roy à l'alliance qu'il a faicte avecques l'Empereur contre mondit seigneur le Duc de Bourgongne, & à toutes autres alliances par luy faictes: avecques quelsconques autres Princes ou seigneurs quels qu'ils soient à l'encontre
de

de mondit seigneur le Duc de Bourgongne, pourueu que mondit seigneur de Bourgongne l'efface pareillement: & sera tenu en outre & le promettra à mondit seigneur de Bourgongne de le soustenir & ayder à l'encontre de tous ceux, qui le voudroient guerroyer ou faire dommage par voye de guerre ou autrement. Et pareillement le fera & promettra mondit seigneur le Duc de Bourgongne, sauué toutesfois l'exemption de sa personne à sa vie comme dessus est déclaré. Item & consentira le Roy & baillera ses lettres, que fil aduenoit cy apres que de sa part fut enfraint ce present traicté, les vassaux feaux & subiects presens & aduenir ne soient plus tenus de l'obeyr & seruir: mais soient tenus deslors de seruir mondit seigneur de Bourgongne & ses successeurs à l'encontre de luy. Et que audit cas tous lesdits feaux vassaux subiects & seruiteurs soient absous & quittes de tous sermens de fidelitez & autres: & de toutes promesses & obligations de seruices, en quoy ils pourroient estre tenuz par auant enuers le Roy Charles, sans ce que pour le temps apres à venir il leur peust estre imputé à charge, & qu'on leur puist riés demander. Et que desmaintenant pour lors le Roy Charles leur commande de ainsi faire: & les quitte & descharge de toutes obligations & sermens ou cas dessusdits: & que pareillement soit fait & consenty au costé de mondit seigneur le Duc de Bourgongne, au regard de ses vassaux & feaux subiects & seruiteurs. Item & seront de la part du Roy Charles faictes les promesses, obligations & submissions touchant l'entretènement de ce present traicté és mains de monseigneur le Cardinal de Sainte Croix Legat de nostre saint Pere le Pape, & de monseigneur le Cardinal de Chippre & autres ambassadeurs du saint Concille de Basle le plus ample que l'on pourra aduiser. Et sur les peines d'excommuniemens, aggrauation, reaggrauation, interdit en ses terres & seigneuries, & autrement le plus auant que la censure de l'Eglise pourra estendre en ceste partie, selon la puissance & pouoir que ont mesdits seigneurs les Cardinaux de nostre saint Pere le Pape & du saint Concille: pourueu que pareillement soit fait du costé de mondit seigneur le Duc de Bourgongne. Item auecques ce fera le Roy auec son seellé, bailler à mondit seigneur de Bourgongne les scelez des Princes & seigneurs de son sang de son obeissance, comme monseigneur le Duc d'Anjou, Charles son frere, monseigneur le Duc de Bourbon, monseigneur le Comte de Richemont, monseigneur le Comte de Vandomme, le Comte de Foix, le Comte d'Auuergne, le Comte de Perdiac & autres qu'on aduifera: esquels scelez desdits Princes & seigneurs sera incorporé le seellé du Roy. Et prometterot d'entretenir & maintenir de leur part le contenu dudit seellé: & fil estoit enfraint de la part du Roy d'en ce cas estre aydās & confortans mondit seigneur de Bourgongne & les siens à l'encontre du Roy. Et pareillement sera fait du costé de mondit seigneur de Bourgongne. Item & que pareillement le Roy fera bailler semblables scelez de gens d'Eglise, & autres nobles & bonnes villes de ce royaume de son obeissance & appartenante. C'est à sçauoir ceux desdictes gens d'Eglise & bonnes villes que mondit seigneur voudra nommer, auecques seureté de peines corporelles & pecunielles, & autres seuretez que messeigneurs les Cardinaux & autres Prelats cy enuoyez de par nostredit saint Pere le Pape & le Concille y aduiferont appartenir. Item & fil aduenoit cy apres qu'il y eust aucune faute ou obmission, ou aucune in-

fraction, ou attemptaz faits sur le contenu desdits articles d'une part & d'autre: ce nonobstant à ceste presente paix, traicté & accord:seront & demourrôt vertuables & en leurs plaine force vertuz & vigueur,& ne sera pourtant icelle paix reputée, cassée ne adnullée: mais les attemptaz seront reparez & amendez, & aussi les deffaultes & obmissions accomplies & executées deüement selon ce que dessus est escript. Et à ce contraincts ceux qu'il appartiendra par la forme & maniere que dit est. Item comme ayons de rechef esté tresinstamment exhortez, requis & sommes par lesdits Cardinaux ambassadeurs & messagiers du S. Concille, ne vouloir entendre & de nous incliner & condescendre moyennant les sommes dessusdictes, qui leur semblent estre raisonnables & souffisantes: & ne les pouoient ne deuoient par raison refuser, ainsi qu'il nous ont dit à paix & reunion avecques mondit seigneur le Roy Charles, en nous disant & remonstrant en outre que ainsi le deuions faire selon Dieu, raison & tout honneur: nonobstant les sermens, alliances & promesses pieça faictes entre feu mon trescher & trelaymé seigneur le Roy d'Angleterre dernier trespasé, & nous pour plusieurs causes & raisons à nous remōstrées & alleguées par lesdits Cardinaux & autres ambassadeurs dessusdits de par nostre saint Pere, & du Concile. Nous pour reuerence de Dieu principalement pour la pitié & grande compassiō que nous auōs du poure peuple de cedit royaume, qui tant a souffert en tous estats, & aux prieres, requestes & sommations à nous faictes par lesdits Cardinaux, & ambassadeurs de nostredit saint Pere le Pape & le saint Concile de Basle, que nous tenons & reputons pour commandement & comme Prince catholique & obeissant fils de l'Eglise, eu sur ce grand aduis & deliberation de conseil avec plusieurs grans seigneurs de nostre sang & lignage, & autres noz feaux vassaux, subiects, & autres gens de conseil en grand nombre: auons pour nous & noz successeurs feaux, vassaux, subiects & autres gens de conseil adherens en ceste partie, fait & faits bonne & loyalle, ferme, seure & tresentiere paix & reunion avecques mondit seigneur le Roy & ses successeurs, moyennant les offres & autres choses dessus escriptes: qui de la part mondit seigneur le Roy & ses successeurs, nous doiuent estre faictes & accomplies. Et lesquelles offres de nostre part & en tant qu'il nous touche, tenons agreables & les acceptōs. Et desmaintenant consentons & faisons les renonciations, promesses, submissions & autres promesses & choses dessus declairées, qui sont à faire de nostre part. Et recognoissons mondit seigneur le Roy Charles de France nostre souuerain seigneur au regard des terres & seigneuries que auons en ce royaume: promettons pour nous & noz hoirs par la foy & serment de nostre corps en parolle de Prince, sur nostre honneur & l'obligation de tous noz biens presens & aduenir quelconques, ladicte paix & reunion en toutes & singulieres choses cy dessus transcrittes tenir de nostre part: & en tant que toucher nous peult inuiolablement & à tousiours de point en point tout & par la forme & maniere dessus escripte, sans faire ou venir ou souffrir faire au contraire couuertement ou en appert, ou autrement en quelque maniere ou façon que ce soit. Et pour les choses dessusdictes & à chacune d'icelles tenir, entretenir & accomplir: nous submettons à la cohertion, conclusion & contraincte de nostredit S. Pere le Pape, dudit saint Concile & des dessusdits Cardinaux: lesquels & autres ambassadeurs du Concile

cile & à toutes cours tant d'Eglise comme seculiers, vueillans & octroyans icelles & chacune d'icelles estre contrainct & compellé par la censure de l'Eglise, tant & auant qu'il semblera expedient ausdits Cardinaux & ambassadeurs de nostredit saint Pere le Pape & du saint Concile : au cas que faute y auroit de nostre part és choses dessusdictes ou aucuns d'icelles, renonçans à toutes allegations & exemptions tant de droit comme de fait, que pourrions dire ou alleguer au contraire. Et par especial au droit, disant que generale renonciation ne vault si l'especialle & tout sans fraude, barat ou mal engin. Et affin que ce soit chose ferme & estable à tousiours : nous auons fait mettre nostre seel à ces presentes. Donné en nostre ville d'Arras le xxj. iour du mois de Septembre l'an mille quatre cent trente cinq. Ainsi signées par monseigneur le Duc de Bourgogne en son conseil.

ITEM apres que les deux parties dessusdictes furent venues à fin & conclusions de paix l'un avec l'autre : & que toutes les besongnes furent escriptes & seellées tant d'un costé comme d'autre, brief ensuiuant fut icelle paix publiée en ladicte ville d'Arras. Pour laquelle ne fault point demander n'enquerir se le peuple eut grand liesse & ioyeuseté. Mais generalmente la plus grand partie des gens d'Eglise, des nobles & des Bourgeois avecques grande multitude & abondance de populaire, qui là estoit venu & arriué, entendirent non mie un iour seulement : mais plusieurs à faire ioye l'un avecques l'autre, chacun selon son estat en criant à haulte voix Noël en plusieurs & diuers lieux de la ville. Et par especial fut faicte en l'hostel dudit Duc de Bourgogne moult grand feste & liesse de plusieurs cheualiers, escuyers, dames & damoiselles des deux parties tant en boires, mangiers & dances comme autres plusieurs esbatemens. Et mesmement au propre lieu où icelle paix se traictoit fut mis par le Cardinal de sainte Croix le saint Sacrement de l'autel, & vne Croix d'or sur un couëssin : sur lesquels ledit Cardinal feit iurer & promettre audit Duc de Bourgogne que iamais ne ramenteueroit la mort de son feu pere, & qu'il entretiendrait bonne paix & vnion avecques le Roy Charles son souuerain seigneur & les siens. Et apres le Duc de Bourbon & le Conestable tenans la main sur ladicte Croix, prierent mercy audit Duc de Bourgogne de par le Roy pour la mort de sondit feu pere : lequel leur pardonna pour l'amour de Dieu. Et lors les deux Cardinaux meirent les mains sur iceluy Duc, & le absolurent du serment qu'il auoit fait aux Anglois. Et pareillemēt furent absous plusieurs autres grans seigneurs de son party. Et adoncques feirent serment de leur party d'entretenir icelle paix les seigneurs de la partie du Roy Charles, & plusieurs autres de la partie du Duc de Bourgogne. Entre lesquels le feit le seigneur de Launoy : lequel dit tout hault & cler, voicy le propre qui autresfois a faits les sermens pour cinq paix faictes durant ceste guerre : desquelles nulles n'ont esté entretenues. Mais ie promets à Dieu que ceste sera entretenue de ma partie & que iamais ne l'enfraindray.

Comment les Anglois assiegerent la ville saint Denys en France, laquelle en fin leur fut rendue par traicté.



Vrant le temps dessusdit, les Anglois & leurs alliez qui estoient en l'Isle de France, assiegerent trespuissamment la ville de S. Denys tout à l'environ. Et y estoient comme chiefs & conducteurs desdits assiegeās, le Mareschal de l'Isle Adam, le seigneur de Thalebot, le seigneur de Villeby, le seigneur d'Escalles, Georges de Richammes, Vvalleran de Moreul, messire Jean Bastard de saint Pol, Loys de Luxembourg son frere, messire Ferry de Mailly, Robert de Neufuille, le Bastard de Thian cheualier François, l'Arragonnois & autres notables & experts hommes de guerre de la nation de France & d'Angleterre, accompagnez de six cens combattans ou environ, qui en grand diligence approcherent leurs ennemis : & dresserent contre les portes & murailles d'icelle ville de S. Denys plusieurs engins, pour iceux confondre & abbatre. Si estoient souuent visitez & administrez de ce que besoing leur estoit par Loys de Luxembourg Euesque de Theroüanne, Chancelier du Roy Henry : lequel estoit principal gouverneur dedans Paris & és metes de l'Isle de France, pour le dessusdit Roy Henry. Dedans laquelle ville de S. Denys estoient de la partie du Roy Charles le Mareschal de Rieux, messire Jean Foucalt, messire Loys de Vaucourt, messire Regnault de S. Jean, Artus de la Tour & plusieurs autres vaillans hommes de guerre, avecques eux iusques au nombre de seize cens combattans. Lesquels en tresgrand hardiesse eux voyans ainsi estre approchez de leurs ennemis, se preparerent à resister de toute leur force contre eux. Et de fait grand partie d'eux se logerent sur la muraille, & là se tenoient de iour & de nuict pour estre plus pres de leur deffence. Toutesfois les dessusdictes portes & murailles furent fort empirées en plusieurs lieux par les engins d'iceux assiegeans : & tant qu'à l'occasion desdits empiremens, les capitaines prindrent conclusion l'un avecques l'autre d'assaillir la ville en plusieurs parties, esperans prendre & gagner icelle ville de force. Si feirent vn certain iour armer leurs gens & diuiserent, auquel costé chacun desdits capitaines devoit assaillir : & par vne ordonnance à tout eschelles & plusieurs autres instrumens de guerre, allèrent iceux iusques aux fossez qui estoient garnis d'eau. Si eussiez peu là veoir les gēs d'armes eux employer à passer parmy ladicte eau iusques au col, & porter lesdictes eschelles & monter amont en plusieurs & diuers lieux iusques aux murs sans monstrier semblant de paour. Et lors les assiegez considerās que s'ils estoient prins de force, ne seroient point quittes pour seulement perdre la ville : mais entant que touchoit à leurs vies se meirent à deffence tresvaillamment. Et auoient ordonné à chacune de leurs gardes aucuns de leurs capitaines à tout certain nombre de gēs : lesquels pour chose qu'ils ouyssent & veissent, ne se deuoient partir d'icelle : & le dessusdit Mareschal de Rieux auoit certain nombre de gens d'armes allāt d'un lez à l'autre, pour ayder à secourir ceux qui en auroient besoing. Si commēça l'assault dur, merueilleux & cruel par l'espace de deux heures ou environ : Auquel tant des assaillans comme des deffendans furent faictes de grans vaillances. Et furent à iceluy assault faits nouueaux cheualiers Loys de Luxembourg, Bastard de S. Pol : lequel sy gouerna moult vaillamment, Jean de Humieres, Robert de Neufuille & aucuns autres : toutesfois apres qu'iceux assaillans eurent audit assault bien perdu quatre vingts hommes ou mieux de leurs gens, qui furent morts aux fossez & aupres des murs,

voyans

voyans que bonnement ne pourroient venir à chief de telle besongne, sans recevoir trop grand exil & perte de leurs gens. Les capitaines feirent sonner la retraite, & emmenerent & emporterēt plusieurs de leurs gens qui estoient morts & naurez. Et pareillement les deffendeurs feirent grand perte de leurs gens, & furent en grand doubte que leurs ennemis ne contraignissent de rechief par continuation de nouveaux assaulx. Neantmoins esperans auoir secours par le Connestable, qui estoit à la conuention d'Arras & autres François de leurs gens, ils renforcerent leurs portes & murailles qui estoient rompues en plusieurs lieux; & s'apprestèrent de nouuel, pour eux deffendre au mieux que faire le peurent. Lequel Connestable apres que la paix fut conclue à Arras (comme dit est dessus) se departit de là à tout grand partie de nobles hommes, qui estoient à ladicte conuention, & alla à Senlis. Et demanda à venir deuers luy les François de plusieurs parties en intention de leuer ledit siege: mais à brief dire, il ne trouua point en son conseil qu'il eut puissance de ce faire. Et pourtant ledit Mareschal & les siens qui assez furent aduertiz de non auoir secours, ils traicterent avec les capitaines des Anglois par tel si, qu'ils leur redroient la ville de S. Denys, & s'en iroient sauf leurs corps & leurs biens, en rendant aussi les prisonniers qu'ils auoient prins durāt le siege: desquels en estoit vn messire Jean de Humieres dessusdit: Lequel traicté conclud & accomply se partirent iceux deuant-dits François sous bon saufconduit, qui estoient bien seize cens cheuaux ou enuiron. Et pareillement aussi y auoit de tresexpers & tresvaillans hommes de guerre & de grand renom: si s'en partirent & allerent es places de leur obeissance & laisserēt en icelle-dicte ville de S. Denys aucuns de leurs capitaines & cheualiers morts: c'est à sçauoir messire Loys de Vaucourt, messire Regnault de S. Jean, Artus de la Tour, vn nommé Iosselin & aucuns autres, dont ils estoient moult dolens. Apres lequel departement ladicte ville de S. Denys fut regardée de par le Roy Henry. Et brief ensuiuant les Picards qui desia estoient aduertiz de la paix faicte à Arras entre le Roy Charles & le Duc de Bourgogne, prindrēt congé au plus tost qu'ils peurent aux dessusdits capitaines Anglois, & s'en retournerent sans perte en leurs païs. Et entre-temps les François prindrent d'emblée le pont de Meulan, & meirent à mort enuiron vingt Anglois qui le gardoiēt: pour laquelle prinse les Parisiens furent fort troublez pource que le passage par où ils venoient à tout leurs viures de Normandie estoit cloz.

Comment Ysabel la Royne de France trespassa en la ville de Paris.

EN cest an au mois de Septembre Ysabel Royne de France, mere au Roy Charles pour lors regnant: Laquelle estoit logée à l'hostel du Roy à S. Pol dedans la cité de Paris, où par auant elle auoit vescu en grand pauureté pour les tribulations des guerres de ce Royaume, accoucha malade & brief ensuiuant trespassa de cest siecle. Si fut enterrée en l'Eglise de S. Denys en France: non pas en telle solennité & grand estat, que l'on a accoustumé de faire aux autres Roynes de France: laquelle mort venue à la cognoissance du Duc de Bourgogne, luy fait faire vn seruice tresreuerend & notable en l'Eglise de S. Vvast d'Arras, auquel il fut present vestu de noir: & faisoient dueil avec le Duc de Bourgogne le Comtes d'Estampes, le Comte de

Vandosme & le Damoiseau de Cleues, avec plusieurs autres seigneurs ecclesiastiques & seculiers, & l'Euesque d'Arras fait l'office cedit iour.

Comment les Cardinaulx & plusieurs autres ambassadeurs se departirent de la ville d'Arras. Et comment le Duc de Bourgongne constitua ses officiers es bonnes villes & forteresses à luy données & accordées par le traicté dessusdit.

Etem assez brief ensuiuant que la dessusdicte paix d'Arras fut publiée, comme dit est dessus, se partirent d'icelle ville lesdits Cardinaulx & ceux qui avecques eux estoient venuz : lesquels par le Duc Philippe de Bourgongne auoient esté honnorablement receuz & festoyez. Et pareillement se departirent lesdits ambassadeurs du Roy Charles & tous autres, qui là estoient venuz de plusieurs païs. Et adoncques ledit Duc de Bourgongne estant en icelle ville d'Arras, constitua plusieurs nouveaux officiers es bonnes villes & forteresses du Roy, tant sur la riuere de Somme cōme ailleurs sur les mettes de Picardie : lesquels de long temps estoient du domaine du Royaume. Et estoient par auant icelle paix d'Arras en la main du Roy Henry : & y meit gens à son plaisir, en destituāt ceux qui estoient commis de par le Roy Henry, Commettans aussi receueurs à son plaisir. Et prenant tous les deniers & prouision & les sermens des habitans d'icelles villes & forteresses : pour lesquelles besongnes dessusdictes iceux officiers tenās le party des Anglois, furent fort esmerueillez des manieres que ledit Duc tenoit enuers eux : attendu que par ses moyens en auoit eu iceluy Roy Henry la possession & saisine : & avecques ce nagueres le tenoit & auoit tenu pour son naturel & souuerain seigneur : Neantmoins eux voyans qu'ils n'y pouoient mettre prouision, le souffrirent patiemment. Et entre les autres, maistre Robert le Jeune, qui lōg temps auoit esté Bailif d'Amiens & gourné hautemēt pour iceux Anglois sur les marches de Picardie : & mesmement à iceluy dernier Parlement d'Arras auoit esté de leur cōseil, & à toutes leurs conclusions : quand il apperceut les besongnes ainsi estre retournées contre eux par aucuns moyens qu'il trouua pour son argent (comme on dit) fait tant qu'il demoura en la grace dudit Duc de Bourgongne, & fut retenu & mis à estre gournateur d'Arras au lieu de messire Daud de Brimeu, qui par auant l'estoit. Et par ainsi en assez briefs iours les besongnes furent retournées au contraire que par auant n'auoient esté.

Comment apres la paix d'Arras le Duc de Bourgongne enuoya aucuns de ses officiers d'armes deuers le Roy d'Angleterre & son conseil, pour remonstrer les causes de la paix qu'il auoit fait au Roy de France.

Apres le departement de la paix d'Arras, le Duc de Bourgongne enuoya son Roy d'Armes de la Toison, & vn sien herault avecques luy nommé Franche Comté en Angleterre deuers le Roy Henry à tout lettres de par ledit Duc : esquelles estoient contenues plusieurs remonstrances pour iceluy Roy & son conseil attraire au bien de paix finale avec le Roy Charles : signifiant aussi comment par l'exhortation des Legats de nostre sainct pere le Pape & du Concile de Basle, & avecques ce des trois estats de tous les païs, il auoit fait paix & reunion avec le dessusdit Roy Charles son souuerain

souuerain seigneur, en delaisant celle de iadis qu'il auoit faicte avec ledit Roy Henry son pere. Avec lesquels alla vn frere mendien Docteur en Theologie, qui auoit charge de par les deux Cardinaulx qui auoient esté à ladicte paix d'Arras, de proposer en la presence dudit Roy d'Angleterre & de son conseil: en eux remonstrant les grans cruautéz & innumerables tyrannies, qui se faisoient par la Chrestienté à l'occasion de la guerre, & les biens qui pouoient aduenir si la paix finale se faisoit entre les deux Roys d'Angleterre. Si s'en allerent les trois dessusdits à Calais & là passerent la mer, & arriuerent à Douures où on leur feit defence de par le Roy Henry qu'ils ne se departissent de leurs hostels. Si leur furent demandées leurs lettres, lesquelles ils baillerent & furent portées à Londres deuers le Roy Henry. Et depuis furent conduit par diuers lieux iusques à Lōdres. Si rencontrerēt en leur chemin vn officier d'armes & le clerck du tresorier d'Angleterre, qui les menerent loger dedans icelle ville, en l'hostel d'un cordonnier où ils furent par aucuns iours: & n'alloient ouïr messe sinon sous la conduite d'aucuns heraulx & poursuiuans qui là les visitoient souuent. Car on leur feit deffence qu'ils ne partissent de leurs hostels sans congé & licence. Si estoient en tresgrand doubte, qu'on ne leur feit aucune mauuaise compaignie de leurs personnes pour les nouvelles qu'ils auoient apportées. Et jaçoit-ce que le docteur dessusdit enuoyé de par les deux Cardinaulx qui auoient esté en ladicte paix, & iceux deux officiers d'armes feissent plusieurs requestes à ceux qui leur administroient, qu'ils les feissent parler au Roy & à son conseil, pour dire & remonstrer la charge qu'ils auoient de leurs seigneurs & maistres: neantmoins oncques ne pouoient auoir audience de parler à eux. Toutesfois le tresorier d'Angleterre à qui les lettres dessusdictes auoient esté baillées, assembla deuant le Roy le Cardinal de Vincestre, le Duc de Clocestre & plusieurs autres Princes & Prelats & le conseil Royal là estant en grand nombre de nobles hommes. Et là monstra les lettres que le Duc de Bourgongne escriuoit au Roy & à son cōseil: desquelles l'intitulure & superscription n'estoit pas pareille aux autres, que par auant de long temps par plusieurs fois luy auoit enuoyé: pource que par icelle nommoit le Roy d'Angleterre, hault & puissant Prince son treschier seigneur & cousin, en delaisant à le recognoistre son souuerain seigneur ainsi & par la maniere que tousiours l'auoit fait par auant en ses autres lettres, que par moult de fois luy auoit escrites: de la lecture desquelles sans y faire quelque responce tous ceux qui estoient au conseil generallyment, furent moult esmerueillez quand ils les ouïrent. Et mesmement le ieune Roy Henry print en ce si grand desplaissance que les l'armes luy saillirent hors des yeux. Et dit à aucuns de ses priuez conseilliers, qu'il veoit bien puis que le Duc de Bourgongne s'estoit ainsi desloyauté deuers luy & reconsilié avec le Roy Charles son ennemy, ses seigneuries des parties de France en vaudroient beaucoup pis. En outre le dessusdit Cardinal & le Duc de Clocestre se partirent du conseil tous confus & troublez, & aussi feirent plusieurs autres sans en prendre aucune conclusion, sinon d'eux assembler par plusieurs troupes & dire l'un à l'autre plusieurs iniures & reproches du dessusdit Duc de Bourgongne, & de ceux de son conseil. Et assez brief ensuiuant furent les nouvelles toutes communes auant la ville de Londres. Si n'estoit pas fils de bonne mere, qui ne disoit de grans maulx & villannies

d'iceluy Duc & de ses païs . Si se meirent ensemble plusieurs du commun , & allerent en diuers lieux parmy ladicte ville pour querir aucuns Flamans , Hollandois , Brabançons , Picards , Hannuyers & autres des païs dudit Duc qui là estoient , pour faire leurs marchandises non eux doubans de ceste aduventure . Et en ceste fureur en prindrent & occirent aucuns soubdainement : mais brief ensuiuant on les feit cesser de par le Roy Henry , & mettre les dessusdits en iustice . Et aucuns iours apres le Roy & son conseil se meirent pour auoir aduis sur la responce qu'ils deuoient faire aux lettres dessusdictes , & y en eut de diuerses opinions . Car les vns vouloient qu'on feit guerre soubdaine au Duc de Bourgongne : & les autres conseillèrent pour mieux qu'on le sommaist par lettres ou autrement . Et entre-temps que lesdits conseillers s'entretenoient , vint deuers le Roy nouuelles comment le Duc de Bourgongne en luy pacifiât avec le Roy Charles:deuoit auoir les villes, forteresses, seigneuries & appartenances de S. Quentin, Corbie, Amiens, S. Riquier, Abbeuille, Dourlens & Monstreul : lesquels estoient par auant du domaine & possession d'iceluy Roy Henry d'Angleterre:& que desia en auoit prins les sermens d'icelles , & y auoit commis tous nouueaux officiers . Et pourtant en allant de mal en pis , furent de ce plus mal contens que deuant : & en fin conclurent qu'ils ne rescriroient point . Et adonc le dessusdit tresorier alla deuers les trois dessus nommez à leur hostellerie , & dit à Toison d'or & à Franche Comté son compaignon : comment le Roy acompagné de son sang & seigneurs de son conseil, auoient veües & visitées les lettres qu'ils auoient apportées: desquelles & du contenu en icelles ils auoient grosses merueilles:& auecques ce des manieres que tenoient ledit Duc de Bourgongne enuers le Roy, à quoy il auoit intention d'y pourueoir sur tout quand à Dieu plairoit. Et nonobstant que les officiers d'armes de par ledit Duc de Bourgogne, feissent plusieurs fois requestes d'auoir responce par escript, oncques ne la peurēt obtenir:mais leur fut dit qu'ils s'en retournassent en leur païs: lesquels voyans qu'autre chose n'en pouoient auoir , rapasserent la mer & rapporterent de bouche au Duc de Bourgongne leur seigneur ce qu'ils auoient trouué. Et le docteur s'en retourna aussi deuers eux, qui luy auoiēt enuoyé sans riens besongner. Si eurent durant ce voyage de grans doubtes qu'on ne leur feit desplaisir , pource qu'en plusieurs lieux d'Angleterre ouÿrent de grans murmures & blasphemés faire contre ledit Duc de Bourgongne , & ne leur fut point fait telle ne si amiable reception , comme ils auoient accoustumé qu'on leur feit.


Comment le commun peuple de la cité d'Amiens s'esmeut, pour les impositions qu'on vouloit remettre sus .

EN ces propres iours fut enuoyé deuers le Duc de Bourgongne vn aduocat de par ceux de la ville d'Amiens : lequel aduocat estoit appelé maistre Tristan de Fontaines , pour impetrer grace pour icelle ville d'aucune somme d'argent en quoy ils estoient redeuables enuers ledit Duc ou aucuns de sa partie : laquelle grace ledit aduocat ne pouoit obtenir, ains luy fut baillé nouuel mandement de par le Roy Charles & autres de par le dessusdit Duc : contenans que les impositions & autres subsides anciennement

nement accoustumez de payer, fussent mis sus comme autresfois auoient esté : lesquels mandemens le dessusdit maistre Tristan fait publier quād il fut retourné à Amiens au lieu accoustumé : à l'occasion de laquelle publication grād partie des bouchiers & autres de là ville & autre grand nombre du commun de ce non contens, s'esmeurent soudainement & se meirent ensemble armez & embastōnez selon leur estat. Et allerent deuers leur majeur nommé Iean de Comty, ausquels ils dirent plainement que desdictes subsides ne payeroient nulles. Et qu'il sçauoit bien que le bon Roy Charles leur seigneur ne vouloit point qu'ils payassent, non plus que les autres villes à luy appartenans & obeïssans. Lequel majeur voyant leur rude & sotte maniere, leur accorda tout ce qu'ils vouloient dire en les rappaisant par doulces parolles. Et comme contraint conuint qu'il allast avec eux par tout en la ville où bon leur sembloit. Et feirent leur capitaine d'un nommé Honoré Cokin. Si allerent à l'hostel dudit Tristan pour le mettre à mort, comme ils en monstrent le semblant : mais il fut de ce aduertty par aucuns qui estoient ses amys, si festoit mis à sauueté. Et là rompirent plusieurs huis & fenestres pour le querir. Et depuis s'en allerent à la maison d'un nommé Pierre le Clerc Preuost de Beauuoisis, lequel auoit eu grans gouuernemens en la ville durant le temps que maistre Robert le Jeune auoit esté baillif d'Amiens, & auoit fait plusieurs extortions & rudesses à aucuns des habitans d'icelle cité d'Amiens, & au pays d'enuiron, parquoy il auoit acquis de grans haines : & là le queroient par tout, mais il ne fut point trouué : car luy sçachant ladicte mutation se meit hors de leur voye. Si frustrerent & rauirent tous ses biens, & beurent en vne seule nuict bien dixhuiet queües de vin qu'il auoit en sa maison : & prindrent un sien nepueu qu'ils meirent prisonnier au beffroy. Et de là en auant feirent plusieurs desroys, & allerent par grans compagnies aual la ville & hostels des plus puissans : lesquels comme par cōtraincte falloït qu'ils leur donnassent de leurs biens & largement & par especial vins & viandes : mais entre-temps ledit Pierre le Clerc qui estoit mussé en la maison d'un pauvre hōme au poulrier aux gelines, fut accusé aux dessusdits : Si l'allerent querir à grand solennité & le meirent au beffroy de la ville, & brief ensuiuāt leur feirent couper le halsterel en plain marché, & pareillement feirent ils à son nepueu. Si n'estoit alors homme de iustice ne autre en icelle ville d'Amiēs, qui osast dire mot contre leur plaisir. Si furent ces nouuelles mandées au Duc de Bourgongne, lequel enuoya Iean de Brimeu qui estoit nouuel baillif d'Amiens. Et depuis le seigneur de Saueuses qui aussi en auoit esté capitaine nouuellement, affin qu'ils enquerissent diligemment par quelle maniere on les pourroit chastier, & corriger. Et apres y fut enuoyé le Comte d'Estampes avecques luy plusieurs cheualiers & escuyers, & aussi gens de traict. Et de rechief y alla le seigneur de Croÿ bien accompagné, & mena les archiers de l'hostel du Prince. Si vindrent là plusieurs parties & à diuerses fois grād nombre de notables seigneurs des marches de Picardie. Et faisoit on semblant d'aller assieger le chastel de Bonnes, où il y auoit des pillars. Toutesfois Honnoré Cokin n'estoient point bien afeur qu'on ne leur iouïast à la faulce cōpagnie : Nonobstant qu'ils auoient esté deuers le Cōte & ledit capitaine & Baillif pour luy excuser, & ses gens des malefices passez où il auoit seruy de parolles assez courtoises en luy remonstans, qu'il cessast de

poursuiure telles emprinses, & on luy feroit son traicté. Finablement les seignrs dessusdits après qu'ils eurent eues plusieurs deliberations ensemble sur ceste matiere: Et apres qu'ils eurent garny le beffroy pour sonner la grand cloche de la ville sil y aduenoit aucun effroy: au son de laquelle se deuoient tous ensemble lesdictes communes accompagner. Si se meirent ensemble iceux seigneurs & s'en allerent grand partie sur le marché. Et d'autre part se meirent en d'aucuns lieux de leurs gens armez & embastonnez pour garder les rues contre lesdits esmouuemens, s'ils s'assembloient. Et si furent commis le seigneur de Sauueses capitaine de la ville & le Baillif d'Amiens à tout certain nombre de gés, à aller par ladicte ville pour prendre & faire retraire ceux qui se voudroient armer & assembler. Apres lesquelles ordonnances le dessusdit Comte d'Estampes & plusieurs autres grans & nobles seigneurs & cheualiers, avecques luy estans presens sur le dessusdit marché où il y auoit tresgrand multitude de gens, fut publié vn nouuel mandement de par le Roy Charles, & aussi de par le dessusdit Duc de Bourgongne contenant que les subsides & impositions deuantdictes seroient mises sus. Et avecques ce toutes les offences par auant passées seroient pardonnées, reserué à aucuns en petit nombre des Princes & cheualiers lesquels seroient denoméz & punis cy apres. A laquelle publication estoit present vn nommé Perrinet de Chaalon, qui estoit vn des chiefs. Lequel oyant icelle se departit de là en fuyant pour luy sauuer, & tantost on cria qu'on le print. Si fut poursuiuy iusques dedans l'Eglise saint Germain empres vn prestre qui chantoit messe, où il s'estoit agenouillé & fut mené iusques au Beffroy. Et d'autre part le dessusdit Honnoré Cokin qui bien scauoit ceste assemblée, s'estoit armé & aucuns de ses gens avecques luy pour aller à ladicte assemblée: Mais il fut rencontré dudit seigneur de Sauueses & dudit Baillif d'Amiens avec ses gens, & fut prins incontinent & mené au Beffroy. Avec lequel en fut prins en plusieurs lieux iusques de vingt à trente ou enuiron: desquels en ce mesme iour le dessusdit Honnoré & sept de ses cōpagnons, eurent le hastereaux coupepez d'une doloüere: & pareillement Perrinet de Chaalon avec luy deux de ses cōpagnons furent penduz & estranglez au gibet: & si y en eut vn noyé, & aussi en y eut bien iusques à cinquante bannis ou enuiron. Et puis apres pour ce mesme cas en y eut plusieurs executez à diuerses fois. Entre lesquels le fut vn gros Sacquement qui estoit excellent maistre en iceluy instrument. Pour laquelle execution tous les autres bourgeois & habitans furent mis en grand obeïssance.

Comment les Francois coururent & pillerent le pais du Duc de Bourgongne apres la paix d'Arras. Et comment le Marechal de Rieux print villes & forteresses en Normandie sur les Anglois.



Pres que les ambassdeurs du Roy Charles dessus nommé furent retournez vers luy: & qu'ils eurent monstré les lettres du traicté, qu'ils auoient fait de par luy en la ville d'Arras avecques le Duc de Bourgongne: lesquelles entre les autres articles contenoient, comment iceluy Duc recognoissoit le Roy dessusdit à son naturel & souuerain seigneur: il fut de ce moult ioyeux, & commanda que la paix fut publiée par tout où

où il appartiendroit. Et apres brief ensuiuant se departirent les François qui estoient à Rue, si fut la ville deliurée aux commis du Duc de Bourgogne. Lesquels François s'assemblerent avecques plusieurs de leurs gens sur les marches de Santhers & d'Amiennois, & pillerent en plusieurs lieux le païs audit Duc, & de ceux qui auoient tenu son party. Et mesmement distrousserent tout au net ceux qu'ils pouoient atteindre de ceste partie tant nobles comme autres. Pourquoy ledit Duc feit assembler gens d'armes pour resister aux dessusdits, lesquels sçachans ceste assemblée se tirerent arriere. Et adoncques les Anglois remeirent le siege deuant le pont de Meulan que nagueres les François auoient mis en leur obeissance, mais pour aucun empeschement qui leur suruint se departirent dudit siege. Et d'autre part le Marechal de Rieux & Charles des Marests prindrent la ville de Dieppe, & plusieurs autres en Normandie: si vous diray comment. Il est verité qu'apres le partement de la conuention d'Arras aucuns vaillans capitaines François: c'est à sçauoir le Marechal de Rieux, Gaucher de Bouffach, le seigneur de Longueual & autres capitaines, qui pouoient sur tout auoir de trois à quatre cens combattans droictes gens de guerre: par le moyen de Charles des Marests ou à son entreprinse, allerent le vendredy deuant la Toussaincts pour escheller la forte ville de Dieppe, seant sur la mer en moult fort lieu au païs de Caulx. Et de fait ledit Charles à tout six cens combattans alla secrettement monter dedans la ville du costé deuers le Haure. Et de là allerent rompre la porte deuers Roüen, par où entra ledit Marechal de Rieux à tout ses gens d'armes & à tout estandart desployé, la plus grand partie de ses gens tout à pied. Si allerent iusques au marché & estoit enuiron le poinct du iour, & adoncques commencerent à crier ville gagnée. Si furent ceux de dedans moult fort esmerueillez quand ils ouïrent ce cry. Et commencerent les autres à iecter pierres & à traire de leurs maisons. Et pource qu'il y auoit grand nombre de gens tant de ville comme de nauire, attendirent iusques à neuf ou dix heures auant qu'ils assaillissent lesdictes maisons: mais en fin fut du tout conquis à peu de dommage pour lesdits François. Si y estoit commis lieutenant du capitaine vn nommé Mortemer qui s'en fuit avecques plusieurs autres Anglois, & y fut prins le seigneur de Bloseuille: & à la premiere venue n'y furent morts que trois où quatre Anglois de la garnison, mais plusieurs y furent prins, c'est à sçauoir de ceux qui plus fort auoient tenu la partie des dessusdits Anglois: & au regard de leurs biens en y eut largement prins comme confisque, sinon de ceux qui vouloient faire serment de demourer bons François. Et y auoit au Haure tresgrand nombre de nauires, dont la plus grand partie demourerent avecques les dessusdits François. Et ce mesme iour ou lendemain on feit crier que tous estrangers s'en allassent où bon leur sembleroit, reserué ceux qui vouloient faire serment. Si en demoura ledit Charles des Marests capitaine du consentement de tous les autres pour le Roy de France. Pour laquelle prinse tous les Anglois generalmente du païs de Normandie furent tres fort troublez & marris, & non point sans cause: car icelle ville de Dieppe estoit merueilleusement forte & bien garnie sur vn des bons païs de Normandie. Et outre assez brief ensuiuant vindrent les François audit lieu de Dieppe, au païs à l'environ de trois à quatre mille cheuaux sous la conduicte de

Anthoine de Chabannes, Blanchefort, Pothon le Bourgongnon, Pierre Regnault & autres capitaines. Et depuis se bouta Pothon de sainte Treille, Jean d'Estouteuille, Robinet son frere, le seigneur de Monstreul-Bellay & plusieurs autres nobles seigneurs & chiefs de guerre. Et aussi pareillement y vint vn capitaine de communes, lequel se nommoit le Kirennier à tout bien quatre mille payfans du pays de Normandie, qui fallia avecques les dessusdits François : & fait serment au Mareschal dessus nommé de guerroyer hardiement & faire forte guerre aux devant-dits Anglois. Et quand toutes ces compaignies furent assemblées ensemble, ils se meirent par bonne ordonnance sur les champs, & la veille de Noël allerent tous ensemble deuant la ville de Fescan : laquelle par le moyen du seigneur de Malleuille fut rendue audit Mareschal, moyennant qu'ils demourroient paisibles. Et y fut commis capitaine ledit Jean d'Estouteuille, & le lendemain de Noël allerent deuant Monstier Villiers, qui se rendit pareillement, & en fut cause vn Gascon qui se nommoit Jean du Puys, lequel y estoit de par les Anglois. Si commist ledit Mareschal de Rieux vn nommé Courbenton. Et alors venoient & approchoient les François de tous costez. Et avecques ce feirent serment audit Mareschal plusieurs nobles hommes du pays de Normandie. Si allerent tous ensemble deuant Harfleur & l'assaillirent moult vaillamment, mais par force furent reboutez arriere de ceux de dedans : & y perdirent quarante hommes de leurs gens, qui y furent morts. Desquels furent les principaulx ledit seigneur de Monstreuil-Bellay & le bastard de Langle. Si conclurent de rechief les assaillir : mais ceux de la ville feirēt traicté d'eux rendre par tel si, que bien quatre cens Anglois qui estoient dedans s'en iroient sauement à tout leurs biens. Si en estoit leur capitaine vn nommé Guillaume Minors, qui se departirent à tout leurs biens, & ceux de ladicte ville feirent le serment. Et en ce mesme temps se rendirent de la partie du Roy les villes ensui-uans : c'est à sçauoir le Bec Crespin, Tancarville, Gomusseulle, les Loges, Valemont, Grasuille, Longueuille, Neufuille, Lambreuille & plusieurs autres forteresses au tres petit dommage d'iceux François. Et depuis vint avec eux Artus Comte de Richemont Connestable de France. Auquel depuis sa venue se rendirent Charles-Maisnil, Aumarle, S. Germain sur Cailly, Fontaines le Bourg, Preaux, Blainuille & aucunes autres places, esquelles par tout on mettoit garnison. Si fut ceste saison la plus grand partie du pays de Caulx conquis. Mais par faute de viures il conuint que les François se separassent l'un de l'autre. Et pource, comme dit est, meirent leurs garnisons sur les frontieres, & se retrahirent les principaux capitaines hors du pays. Et furent à ces conquestes dessusdictes ledit Charles des Marets & Richaruille, qui se partirent de Dieppe & se meirent aux champs : si trouuerent le dessusdit Mareschal, le seigneur de Torfy, Pothon Bourgongnon, Brouffart, Blanchefort, Jean d'Estouteuille & plusieurs autres capitaines hommes de grand façon, & droictes gens de guerre. Avecques lesquels & en icelles conquestes faisans, fallia le dessusdit Kirennier à tout six mille combattans gens de communes, pour acheuer les dessusdictes besongnes.

Comment les Anglois se commencerent à doubter des Bourgongnons, qui menoient guerre avec eux contre le Roy de France, & ne voulurent plus conuerſer en leur compagnie. Et autres matieres en brief.

A Pres ce que les Anglois furent du tout acertenez & asseurez du traité fait entre le Roy Charles de France, & le Duc Philippe de Bourgogne, comme dessus est dit, ils se commencerent à garder & garnir, & aussi eux fortifier contre les gens du Duc de Bourgogne, & pareillement comme par auant ils faisoient des François. Et nonobstant que avecques eux eussent eu plusieurs communications, amitez & compagnies d'armes, si n'eurent ils de là en auant plus fiance ne repaire l'un avecques l'autre: jaçoit-ce que presentement ne s'entreſeissent point de guerre ouuerte: toutefois iceux deux parties d'Angleterre, & de Bourgogne commencerent secrettement à aduiser voyes & manieres de prendre aduantage l'un sur l'autre. Et mesmement iceux Anglois tenans les frontieres de Calais, se meirent en peine de prendre la ville d'Ardre d'emblée. Et d'autre part ceux de la partie de Bourgogne vers Ponthieu, feirent le cas pareil sur la forteresse du Crotoy que tenoient les dessusdits Anglois: mais chacun se gardoit de pres l'un de l'autre. Pour lesquelles entreprinſes ainsi faictes couuertement, les dessusdictes parties furent tresmal contentes l'une de l'autre: & feirent chacun d'eux leurs apprestes pour greuer & faire guerre l'un à l'autre. Et pourtant la Hire qui se tenoit à Gerberoy, assembla avecques Pothon de sainte Treille & messire Regnault de Fontaines iusques à six cens combattans ou enuiron: lesquels ils menerent iusques assez pres de Roüen, en intention d'entrer en icelle ville par certains moyens qu'ils y auoient, lesquels ne peurent venir à chief de leur entreprinſe. Et pourtant iceux capitaines & leurs gens qui estoient moult trauaillez, s'en retournerent pour eux rafreschir en vn grand village nommé Roys. Auquel lieu messire Thomas Kiriel & autres plusieurs capitaines Anglois accompagnez de mille combattans, sçachans que les dessusdits François se rafreschissoient audit village de Roys, s'en vindrent frapper sur eux auant que de ce fait ils peussent du tout estre aduertiz ne monter à cheual pour eux deffendre & garantir, parquoy ils furent prestement mis en desfroy. Si contendirent à eux sauuer vers les parties, dont ils estoient venus, sinon aucuns des capitaines en petit nombre, qui cuidoient rallier leurs gens pour cuider resister à l'encontre de leurs ennemis: mais en ce faisant ils furent vaincus par les dessusdits Anglois. Et y furent prins les seigneurs de Fontaines, Alain Geron, Alardin de Moussay, Iean de Bordes, Gamarde & plusieurs autres iusques au nombre de soixante ou plus. Si en furent morts sur la place tant seulement huit ou dix, & les autres se sauuerent. Toutesfois la Hire fut nauré & si perdit toute sa monture. Et aussi gaagnerent lesdits Anglois la plus grand partie des cheuaux d'iceux François, pource que les bois estoient pres, & se sauuerent plusieurs à pied dedans iceux bois. Item en ce temps furent enuoyez de la partie du Roy Henry d'Angleterre certains ambassadeurs deuers l'Empereur d'Allemagne: lesquels en passant parmy le pays de Brabant, furent prins & arrestez par les gens du Duc de Bourgogne. Mais depuis comme ie fuz informé & aduertty,

furent mis à deliurance, pource qu'iceluy Roy d'Angleterre & ledit Duc de Bourgogne n'auoient point encores enuoyé l'un à l'autre leurs deffiances. Item en ces mesmes tēps par la diligence & entreprinse de messire Iean de Ver-gy, & auecques luy aucuns capitaines François furent deboutez les Anglois hors de deux fortes villes, qu'ils tenoient au païs de Champaigne sur les marches de Barrois, c'est à sçauoir Nogent le Roy & Montigny. Et pareillement ceux de Ponthoïse rendirent leur ville és mains de mōseigneur de l'Isle Adam, laquelle part auant tenoient les Anglois. Et nonobstant que ledit seigneur de l'Isle Adam nagueres eut fait guerre pour les dessusdits Anglois, & eut esté Mare-schal de France pour le Roy Henry: neantmoins dedās brief temps apres leur fait forte guerre. Et d'autre part furent les Anglois deboutez du Bois de Vincennes & d'aucunes autres places, qu'ils tenoient vers l'Isle de France. Et adonc se commencerent à apparcevoir les Anglois, qui moult auoiēt perdu en ce que le Duc de Bourgogne estoit d'eux desioinct & rallié auecques les François. Si l'en commencerent à auoir en grand haine luy & les siens, & en plus grande indignation que leurs anciens ennemis.

Comment le Roy Henry d'Angleterre enuoya ses lettres à ceux du païs de Hollande pour les attraire de sa partie: & la coppie desdictes lettres.

EN cest an Henry de l'Enclastre Roy d'Angleterre enuoya des lettres seellées de son seal aux bourgeois, maistres & escheuins, conseilliers & communautē de la ville de Cerisée, affin d'iceux attraire & entretenir de sa partie contre le Duc de Bourgogne: desquelles la teneur s'ensuit. Henry par la grace de Dieu Roy d'Angleterre seigneur d'Irlande: A noz treschiers & grans amis les Bourg maistres & escheuins, conseilliers & communautē de la ville de Cerizée: Salut & continuation de vraye amour & affection. Treschiers & grans amis quantes (comme dictes) & quel repos apporte le fruit de naturel amour aux Royaumes, seigneuries & personnes qui par longue continuation sont cōfederées & alliées ensemble, leurs faits & leurs besongnes le demonstrent assez, comme bien enauez eu l'experience. Et nous rememorans en nostre pensée les doulces amitez, & confederations qui de grand ancienneté ont esté continuées entre noz nobles progeniteurs, ses Royaumes & païs, & les Princes qui au temps passé ont eu seigneurie en Hollande, Zellande & Frize. Moyennant laquelle amitié, bonne paix & vnion, tranquillité, seurté, de marchandise, amoureuse continuation, prouffitable conseruation de loyauté & de foy ont esté gardées d'un costé & d'autre au reboutement de toutes diuisions, haines, debats & enuies, qui sont tousiours occasion de perturber & peruertir toute bonne police & seurté humaine, desirant pour ce de tout nostre cueur icelles estre continuées. Et ensuiuant les traces de noz predecesseurs, qui tant par lignaigne & affinité de sang comme par loyale confederation & alliance qu'ils ont eu auecques les dessusdits Princes du païs de Zelande, ont esté continuées en si grand amour les vns auecques les autres: comme de prendre & porter par les dessusdits Princes nostre honorable ordre de la Jarreteries auecques Empereurs, Roys & autres Princes & seigneurs iceluy portans ordre pour nostre amour. Auons prins iuste occasion de
vous

vous escrire presentement l'affection que nous auons d'entretenir, & continuer lesdictes confederations & amitez qui pieça ont eu commencement, comme dit est. A quoy de nostre part auons & sommes bien enclins & disposez, estimans que quelconque nouuelle confederation n'est à preferer à ancienneté, cōme chose plus honorable & profitable à entretenir. Mais toutesfois pour ce que franchement soubs vmbre de couleur de terme de paix, aucunes nouuelletez & mutations ont esté faictes en nostre Royaume de France au grand preiudice de nous & de nostre estat, honneur & seigneurie: en enfreignant la paix generale de noz deux Royaumes tant fidellement faicte, promise & iurée par feuz de tresnoble memoire noz treschiers seigneurs pere & ayeul les Roys Henry & Charles dernièrement trespassez, ausquels Dieu pardoint: & les plus grans de leur sang & lignaige & estats desdits Royaumes, comme tenons vous auoir en memoire. En laquelle cause plusieurs rumeurs & nouuelles courent en diuers lieux, comme on dit qu'aucuns païs se disposent en romptures de confederations & alliances que nous auons eues avec eux: desquelles n'entendons que cause n'auons d'entendre n'imaginer que soient. Neantmoins pour vostre consolation & aduertissement, nous voudriōs bien sçauoir en ceste matiere vostre bonne volenté, pareillement que vous faisons sçauoir la nostre. Et pource nous vous prions tres affectueusement & de cuer, vous faisons sçauoir nostre inclination & desir pour l'entretenement de bonne amitié d'entre noz subiects & vous: semblablement nous vueillez de vostre intention sur ces choses plainement & entierement rendre certaines responce par le porteur de cestes, qu'enuoyons par deuers vous pour ceste cause: ou par autres de voz messagiers si les voulez enuoyer par deuers nous, en nous certifiāt au surplus de toutes choses honorables & agreables à vous, & nous y ferons entendre tresvolentiers & de bon cuer. Treschiers & grans amis le S. Esprit vous ait en sa sainte garde. Donné soubs nostre seel priué en nostre Palais de Vvestmonstier le quatorziesme iour de Decembre, l'an de grace mille quatre cens trente cinq. Et de nostre regne le quatorziesme: & la subscription estoit. A noz treschiers & grans amis les Bourg-maistres, escheuins, conseilliers & communautiez de la ville de Cerisee. Lesquelles lettres receües par les dessusdits, sans faire responce au messagier qui les apporta, sinon qu'ils se conseileroient sur le contenu d'icelles, les enuoyerent deuers le Duc de Bourgongne & son conseil. Lequel fut tresmal content des manieres qu'iceux Anglois tenoient vers luy & ses païs, tāt en ce comme en autres besongnes.

Comment apres la paix d'Arras le Duc de Bourgongne conclud de faire & mener guerre aux Anglois.

DVrant le temps que les besongnes dessusdictes se commēcerent fort à enfelōner & animer entre les deux parties d'Angleterre & de Bourgongne, comme dit est: fut aduisé par ledit Duc & aucuns de ses feables conseilliers, qu'il seroit bon de trouuer maniere secrette qu'icelles deux parties ne feissent point de guerre l'un contre l'autre: & que leurs gens, païs, amis & alliez demourassent paisibles & comme neutres. Et afin de à ce pourueoir, fut mandé deuers le Duc dessusdit messire Iean de

Luxembourg Comte de Leigny, qui point encores n'auoit fait de serment au Roy Charles de France. Lequel à la requeste d'iceluy Duc se chargea d'en escrire à l'Archeuesque de Rouen son frere: lequel estoit vn des principaux conseillers du Roy Henry d'Angleterre, & son Chancelier sur la marche de France: & adoncques fut icelle besongne mise en conseil. Et qui plus est, iceluy Archeuesque enuoya en Angleterre deuers le Roy Henry & les siens. Si fut aduisé pour mieux faire que laisser, qu'il seroit bon qu'icelles deux parties demourassent en bonne vnion l'vn avec l'autre quant au fait de la guerre. Et pourtant la responce ouïe fut escript audit messire Iean de Luxembourg par son frere, que sa requeste seroit mise à effect: & que bonne seureté se bailleroit de la partie des Anglois de non faire quelque entreprinse sur le dessusdit Duc de Bourgogne, ses pays & subiects, moyennant qu'il seroit pareillement à la partie dudit Roy Henry d'Angleterre. Et lors brief ensuiuant que ledit Comte de Leigny eut receu par escript icelle responce, il l'enuoya deuers iceluy Duc de Bourgogne, en faisant sçauoir à luy par iceux s'il seroit content de proceder outre: lequel feit faire responce par la bouche de l'Euesque de Tournay, que non: car n'agueres & de nouuel les dessusdits Anglois auoient fait contre luy & ses subiects de trop grandes derisions, en diffamant en plusieurs lieux sa personne & son honneur: auoient aussi rué ius de quatre à cinq cens combattans de ses gens sur les marches de Flandres. Et aussi d'autre part, comme dit est ailleurs, auoient voulu prendre d'emblée la ville d'Ardre. Et ceste chose auoient cogneu & confessé quatre de leur party, qui pour celle cause en icelle ville d'Ardre auoient eu les hastereaux coupez. Et si auoient fait plusieurs autres entreprinSES, lesquelles ils ne peurent bonnement passer sous dissimulation. Apres laquelle responce en ceste maniere faicte par ledit Euesque de Tournay aux gens dudit messire Iean de Luxembourg Comte de Leigny, requirent audit Duc de Bourgogne qu'il luy pleust sur ce escrire ses lettres à leur seigneur & maistre, lequel leur accorda & signa de sa main: depuis lesquelles lettres enuoyées par la maniere deuantdicte, ledit Duc de Bourgogne fut fort & par plusieurs fois instruit & enhorté par aucuns de son cōseil à luy preparer & faire ses apprestes à mener guerre contre lesdits Anglois pour garder son honneur. Et tant que assez brief ensuiuant il feit escrire & enuoya ses lettres au Royaume d'Angleterre deuers le Roy Henry: en luy signifiant & recitant les entreprinSES, qui auoient esté faictes de sa partie depuis la paix d'Arras à l'encontre de luy, de ses gens & subiects: lesquelles sembloient estre à luy & aux siens tant estranges, griefues & preiudiciables que pour son honneur & luy mettre en deuoir, ne deuoient plus estre teues ne dissimulées. Disant en outre que s'il en estoit fait aucune chose de sa part, nul n'en deuroit auoir merueilles ne donner charge à luy ne aux siens: car assez & trop luy en estoit donnée occasion & cause raisonnable, dont moult luy desplaisoit.

ADONCQUES les dessusdictes lettres du Duc de Bourgogne receües & leües par le dessusdit Roy d'Angleterre & son conseil, ils furent tous acertenez d'attendre & auoir la guerre au dessusdit Duc de Bourgogne. Et sur ce furent garnies & fournies toutes les forteresses de Boulonnois, du Crotoy & autres lieux à l'environ à l'encontre de ses pays prestes pour attendre toutes auantures qui

qui pourroient aduenir . Et pareillement fait le dessusdit Duc de Bourgongne garnie les siennes. Et adoncques le Roy d'Angleterre enuoya ses lettres és marches de France & en aucunes bonnes villes, affin qu'on sceust la verité de la quelle que le Duc de Bourgongne prenoit contre luy: lesquelles en substāce contenoient excusations des charges qu'iceluy Duc & les siens vouloient donner sur luy: & sur ses gens des entreprinſes dessusdictes. Entre lesquelles remonstrāces recitoit les lettres qu'il auoit escriptes en Hollande, non point pour induire les habitans à nul mal. Et aussi des alliances qu'il auoit voulu & vouloit faire avecques l'Empereur d'Allemagne, estoit en sa franchise de ce faire, & du mandement secret qu'il faisoit en Angleterre pour greuer ledit Duc: comment il auoit escript, estoit si secret que par toute Angleterre estoit commune voix. Et ne le vouloit point celer, pource qu'il pourroit faire assembler gens pour employer où bon luy sembleroit. Disant outre par icelles, que lesdictes charges qu'on luy auoit voulu bailler, estoit sans cause: comme ils pouoient plainement apparoir, par les œuures qu'auoient fait contre luy & ses subiects le dessusdit Duc de Bourgongne & ceux de sa partie. Laquelle charge au plaisir de Dieu retourneroit, dont elle estoit venue.

Comment le Duc de Bourgongne avec aucuns de ses priuez conseilliers se conclud d'aller assieger & conquerre la ville de Calais .

LTem assez brief ensuiuant, apres que le Duc de Bourgongne eut escript ses lettres (comme dit est dessus) au Roy d'Angleterre contenant les entreprinſes faictes contre luy & ses subiects par ledit Roy & les siens: voyant les besongnes en ce point, que pour venir luy & ses païs en guerre contre les Anglois, tint par plusieurs fois de grans conseils afin de sçauoir comment & par quelle maniere il pourroit conduire son fait: esquels furent plusieurs diuerses opinions mises en auant. Et vouloient les aucuns que ledit Duc de Bourgongne commençast la guerre: & qu'il assemblast sa puissance de tous ses païs pour resister contre lesdits Anglois & conquerre la ville de Calais, qui estoit de son propre heritage. Les autres estoient d'autre opinion: car en iceluy cas pensoient & contrepoſoient moult le commencement, entretenement & fin d'icelle guerre: disant que les Anglois estoient moult pres de plusieurs des païs du dessusdit Duc, & y pourroient bien entrer à leur auantage quand bon leur sembleroit. Et ne sçauoit quelle ayde il pourroit trouuer au Roy Charles son seigneur, & en ses Princes à qui il s'estoit rallié aucune mauuaise fortune luy aduenoit. Toutesfois quand tout eut esté debattu par plusieurs iournées, la conclusion fut prinſe que le dessusdit Duc feroit guerre & requerroit en ayde ceux de ses païs de Flandres, de Hollande & d'autres lieux pour luy ayder à conquerre la dessusdicté ville de Calais, & la Comté de Guynes. Si estoient les principaux de ladicte conclusion de faire guerre, maistre Iean Cheurot Euesque de Tournay, le seigneur de Croÿ, maistre Iean de Croÿ, son frere, messire Iean de Hornes qui estoit Seneschal de Brabant, le seigneur de Chargny, le seigneur de Creuecueur, Iean de Brimeu Baillif d'Amiens & autres plusieurs. Ausquels conseils ne furent point appelez plusieurs autres grans seigneurs, qui continuellement auoient seruy & soubstenu grand partie de la guer-

re avecques ledit Duc de durant son regne contre tous ses aduersaires . C'est à sçauoir messire Jean de Luxembourg, le seigneur d'Antoing, le Vidame d'Amiens, le Bastard de saint Pol, le seigneur de Saueuses, Hues de Launoy, le seigneur de Mailly & moult d'autres nobles & puissans hommes tant des pays de Picardie comme d'autres estans en la puissance dudit Duc : pourquoy il leur sembloit qu'ils n'estoient point tant tenus d'eux & leur puissance employer au fait de ladicte guerre, comme fils eussent esté appelez . Neantmoins apres la conclusion dessusdicte ledit Duc alla en sa ville de Gand . Auquel lieu il feit assembler en la chambre des collations les Escheuins & les Doyens des mestiers d'icelle ville. Ausquels luy estant present il feit remonstrer par maistre Goussenin le sauage vn de ses conseilliers de son chastel de Gand, comment la ville de Calais appartenoit jadis à ses predecesseurs: & qu'elle estoit de son droit domaine & heritage à cause de sa Comté d'Arthois, jacoit ce que les Anglois l'auoiēt de long temps occupée par force & contre son droit: comme de ce ils pouoient assez veritablement estre informez, tant par ce qu'autresfois leur auoit fait remonstrer par messire Collart de Communes souuerain Baillif de Flādres, comme par autres ses conseilliers & seruiteurs . Et aussi auoient lesdits Anglois depuis la paix Arras fait plusieurs entreprinſes contre luy, & ses pays & subiects, dont il estoit moult desplaisant : & mesmement auoient en diuers lieux escript & proclamé de tresgrans iniures & diffames contre sa personne: pourquoy il auoit cause bonnement sauué son honneur, de non plus souffrir ne dissimuler contre iceux Anglois. Et pource leur faisoit requeste & priere tresinstamment, qu'ils luy voulussent ayder à reconquerre icelle ville de Calais: laquelle (comme disoit ledit maistre Goussenin) estoit moult preiudiciable à toute la Comté de Flandres: pource que les laines, estaing, plomb, formaiges & autres marchandises que ceux de Flandres y acheptoient, on ne pouoit payer de quelque monnoye tant fut de bon aloy à leur plaisir : & leur conuenoit bailler or ou argent fondu & affiné, ce que point ne faisoient les autres pays, & ce relaterent estre vray lesdits doyens des mestiers. Apres lesquelles remonstrances faictes bien au long, grand partie desdits escheuins & doyes de ladicte ville de Gand sans prendre deliberation de conseil ne iour d'aduis pour parler aux autres membres de Flandres, se consentirent à la guerre: & ne pouoient estre ouys aucuns seigneurs & gens sages & anciens qui estoient de contraire opinion. Et qui plus est quand les nouvelles en furent espondues par les autres villes & pays de Flandres, furent tous voluntarieux à celle besongne: & tardoit moult à la plusgrand partie que on y procedoit si lentement : & estoient trop mallement desirans de monſtrer comment ils estoient bien armez & pourueuz d'engins, & autres habillemens de guerre. Si procederent en ce arrogamment & pompeusement, & pour vray il leur sembloit que ladicte ville de Calais n'auroit point de durée contre eux. Et depuis ce iour en auant commēcerent à eux pourueoir de toutes besongnes seruans à la guerre . Et pareillement feit ledit Duc de Bourgogne faire requeste aux autres membres & chastellenies de sa Comté de Flandres, d'auoir ayde & secours: lesquels luy accorderent liberallement . Et d'autre part iceluy Duc s'en alla en Hollande & feit requeste à ceux du pays que aussi ils luy feissent ayde de gens & de nauires, pour aller audit lieu de Calais . Lesquels luy accorde-

rent

rent grand partie desdictes requestes. Et apres s'en retourna & fait par tous les païs faire grandes preparations de guerre contre lesdits Anglois, en intention de reconquerre ladicte ville de Calais. Item apres ce que les besongnes dessusdictes eurent esté longuement demenées, comme dit est, entre les Anglois & Bourgongnons: & que chacun d'icelles parties se gardoit l'un de l'autre, & desia auoient fait de chacune partie aucunes entreprinſes: lors le Duc de Bourgogne enuoya de ses païs de Picardie le seigneur de Ternant, messire Simon de Lalaing & autres de ses capitaines à tout six cens combattans à Ponthoise à l'ayde du seigneur de l'Isle-Adam, pour luy ayder à garder la frontiere contre lesdits Anglois: lesquels menoient forte guerre à icelle ville de Ponthoise, pourtant que le seigneur de l'Isle-Adam l'auoit n'aguères prinſe sur eux. Avec lesquels se assembloient tressouuent les François & contendoient tresfort à reconquerre la ville de Paris pour la partie desdits François. Durant lequel temps la femme du Roy Charles accoucha d'un fils, lequel le dessusdit Roy fit leuer au nom du Duc de Bourgogne & fut nommé Philippe. Si le tint sur les fons pour ledit Duc Charles de Bourbon, & avecques luy Charles d'Anjou frere de la Roïne. Et apres qu'il fut baptizé enuoya le Roy ses lettres par un poursuiuant deuers ledit Duc, par lesquelles il luy signifioit ce que dessus est declairé: en luy requerrant que ce qu'il en auoit fait il le voulsist auoir pour agreable: lequel Duc fut d'icelles nouvelles tresioyeux & donna audit poursuiuant de tresriches dons comme Prince. Et entre-temps ledit Duc faisoit par tous les païs de grans requestes à ses subiects pour auoir ayde de gens & de finance contre les Anglois.

De l'an mille cccc.xxxvj.

Comment la ville de Paris fut reduicte en l'obeissance du Roy Charles de France.

AV commencement de cest an s'assemblerent le Comte de Richemont Connestable de France, le Bastard d'Orleans, les seigneurs de la Roche, de l'Isle-Adam, de Ternant & avec eux messire Simo de Lalaing & Sauffe son frere, & plusieurs autres capitaines François & Bourgongnons accompagnez de cinq à six mille combattans ou enuiron: lesquels eux partans de Ponthoise vindrent deuers Paris, esperans d'y entrer par subtils moyens, que y auoit le seigneur de l'Isle-Adam & autres fauorisans la partie de Bourgogne. Si furent illec de quatre à cinq heures. Et apres voyans qu'ils ne pouoient venir à leur intention, se logerent à Hauberuilliers, Montmartre & autres lieux à l'enuiron. Et le lendemain assaillirent la ville de S. Denys, où il y auoit de quatre à cinq cens Anglois qui furent prins de force: & en y eut de morts enuiron deux cens, & les autres se retrahirent en l'Abbaye à l'entour du Velin: lesquels Anglois furent assiegez, mais ils se rendirent sauue leurs vies, reseruez aucuns du païs qui demourerent à volenté. Et le lendemain qu'il estoit ieudy messire Thomas de Beaumont, lequel nouuellement estoit venu à Paris à tout six cens Anglois qu'il auoit amenez de Normandie, alla dudit lieu de Paris à iceux vers ladicte ville de S. Denys pour scauoir & enquerre de l'estat des François desquels il fut apperceu: & saillirent hors à grand puissance contre luy. Si furent assez tost mis à grand meschef & tournez à desconfiture. Et en demourra de morts en la place bien trois cens & quatre vingts prisonniers: des-

quels fut l'un ledit messire Thomas, & les autres se sauuerent en fuyant à Paris, & furent chassés iusques aux portes de la ville. Et adonc les Parisiens qui estoient moult fauorables au Duc de Bourgongne: c'est à sçauoir le quartier des Halles, aucuns de l'Vniuersité, Michault Laillier & plusieurs autres notables bourgeois de Paris, eux voyans la perte qu'auoient faicte les Anglois & la puissance qu'auoient les François & Bourgongnons aupres d'eux, se meirent ensemble par diuerses compagnies, & conclurent l'un avec l'autre de bouter les Anglois hors de leur ville & y mettre les François & Bourgongnons dessusdits. Si le feirent sçauoir au seigneur de l'Isle-Adam, affin qu'il y menast les autres. Lequel nonça ces nouuelles au Connestable de France, & aux autres seigneurs: lesquels tous ensemble se conclurent d'y aller, & se partirent de S. Denys en belle ordonnance le vendredy tresmatin. Et entre-temps Loys de Luxembourg Euesque de Theroüenne, les Euesques de Lisieux & de Meaux, le seigneur de Villeby & plusieurs autres tenans le party des Anglois, doubans ce qui leur aduint: c'est à sçauoir que le commun ne se tournast contre eux, feirent loger leurs gens en la rue S. Anthoine aupres de la Bastille. Et feirent ladicte Bastille bien garnir de viures & de plusieurs habillemens de guerre. Et avec ce se tindrent leurs gens armez & sur leur garde pour eux y retraire se besoing leur en estoit. Et les dessusdits François & Bourgongnons venus deuant ladicte ville de Paris vers la porte saint Iaques outre l'eau vers Montlehery, enuoyerent le seigneur de l'Isle-Adam parlementer à ceux des murs: lequel leur monstra vne abolition generale de par le Roy Charles de France, seellée de son grand seal, en les admonestant tresinstamment qu'ils se voulsissent reduire en l'obeissance du dessusdit Roy Charles à l'instance & faueur du Duc de Bourgongne, qui s'estoit reconcilié avec luy: duquel ils auoient si bien tenu le party, & encores demourroient sous son gouuernement: lesquels Parisiens oyans les douces parolles & offres que leur faisoit ledit seigneur de l'Isle-Adam & autres de sa partie, s'enclinerent & conclurent assez brief ensuiuant l'un avecques l'autre de mettre les dessusdits seigneurs en leur ville.

ALORS sans delay furent dressées eschelles contre la muraille: par lesquelles iceluy seigneur de l'Isle-Adam monta & entra en ladicte ville, & avec luy le bastard d'Orleans & grand foison de leurs gens. Avecques lesquels s'assemblerent tantost grand foison de Bourgongnons & grand foison du commun d'icelle cité: qui tantost commencerent à crier parmy ladicte ville: *la paix: vive le Roy & le Duc de Bourgongne*. Et tantost apres feirent ouurir les portes, par lesquelles entrerent dedans ledit Connestable & autres seigneurs à tout leurs gés d'armes, qui se retrahirent vers la Bastille saint Anthoine, où estoient les Anglois: c'est à sçauoir les dessusdits Euesques & seigneurs, qui desia se retrayoient dedans ladicte Bastille: & cuidoient aucunement resister, mais ce fut peine perdue: car leurs aduersaires estoient trop puissans au regard d'eux: parquoy ils furent assez tost reboutez en icelle, & en y eut de morts & prins en petit nombre. Et apres furent faictes barrieres au deuant de la porte de la Bastille de cartiers de bois. Et se logerent gens d'armes aux Tournelles & autres logis au plus pres, affin qu'iceux Anglois ne peussent saillir dehors. Et lors tous leurs biens qu'ils auoient laissez, furent prins & partis, & aussi plusieurs des principaux qui auoient tenu leur

leur party, furent mis prisonniers & leurs biens confisquez. Et avecques ce de par le Roy Charles y furent fais nouveaux officiers. En apres l'Euesque de The-roüenne, le seigneur de Villeby & leurs complices estans en ladicte Bastille, eurent parlement avec les François: lequel parlement par le moyen du seigneur de Ternant & de messire Simon de Lalaing, vint à conclusion par tel si qu'en rendant ladicte Bastille, ils s'en iroient sauf leurs corps & leurs biens. Si eurent sauf-conduit du Connestable de France, sous lequel ils s'en allerent à Roüen par eaüe & par terre. Et à leur departement feirent lesdits Parisiens grand huée en criant, *à la queue*. Et par ainsi demoura ladicte ville de Paris en l'obeissance du Roy Charles. Et issirent iceux Anglois par la porte des champs, & allerent par autour monter sur l'eaüe derriere le Loure. Si perdit ledit Euesque de The-roüenne sa chappelle qui estoit moult riche, & grand partie de ses ioyaux, & autres bonnes bagues qui demourerent audit Connestable. Toutesfois il fut aucunement fauorisé dudit seigneur de Ternant & de messire Simon de Lalaing: & luy fut secrettement rendue aucune partie de ses biens, qui estoient aual la ville, à l'entrée de laquelle fut desployée la banniere du Duc de Bourgongne & son estandart, pour à vouler lesdits Parisiens à eux tourner de ce party. Et si y furent faits cheualiers nouveaux de par le Connestable dessus nommé des marches de Picardie, Saussé de Lalaing, & Robert de Neufuille avecques aucuns autres de la partie des François. Apres laquelle entrée demourerent dedans icelle ville grand espace de temps ledit Connestable, & avec luy ledit seigneur de Ternant qui lors fut fait Preuost de Paris. Et le dessusdit messire Saussé de Lalaing & les autres cōme le Bastard d'Orleans, & les autres Picards retournerent és lieux dont ils estoient venus.

Comment Artus Comte de Richemont Connestable de France feit guerre au Damoiseau de Commercy.

EN cest an le Comte de Richemont Connestable de France à tout grand compagnie de gens d'armes, vint au païs de Champaigne & és marches d'enuiron pour guerroyer le Damoiseau de Commercy, & les autres qui estoient desobeissans au Roy Charles de France & moult trauailloient ses païs. Et à sa premiere venue print Laonnois à quatre lieües pres de Reims, & de là alla deuant Braine appartenant au seigneur de Commercy: mais pource qu'elle estoit trop forte & bien garnie & qu'ils ne vouloient point obeïr, il passa outre & s'en alla à saint Menchoult que tenoit Henry de la Tour, lequel il en debouta par certains traictez faits entre les parties: auquel lieu vint deuers le Cōnestable le Damoiseau Euerard de la Marche, qui avec luy feit appointement pour auoir ses gens & mettre le siege deuant Chauensy: si bailla ledit Connestable plusieurs de ses capitaines avec leurs gens audit Damoiseau Euerard, qui allerent assieger ladicte ville de Chauensy environ huit iours apres Pasques. Et là feirent vne grande & forte Bastille, où se logerent environ quatre cens combattans avec grand nombre de cōmunes de bonnes villes & du plat païs, qui alloient & venoient. Entre lesquels y estoit le lieutenant du Connestable qu'on nommoit Iean de Malatrait, & messire Iean Geofroy de Conurant, & le Preuost des Mareschaux Tristan l'Hermite. Et si y estoit

Pierre d'Orgy, Yuon du Puys, l'Arragon, Estienne, le grand Pierre & plusieurs autres notables hommes, qui là furent bien quatre mois ou plus, faisant moult forte guerre aux assiegez : lesquels aussi se deffendirent tresprudemment. Durant lequel temps vne partie des assiegeans se tindrent aux champs, sur intention de faire dommage en autre maniere au dessusdit Damoiseau de Commercy, lequel se tenoit tousiours sur sa garde & bien garny de gens d'armes. Et sceut par ses espies, que ses aduersaires estoient logez au païs de Champagne en vne ville nommée Rommaigne. Et auant qu'ils s'en apperceussent aucunement, les assaillit environ huiet heures au matin, & ains qu'ils s'en donnassent garde les rua ius & destroussa du tout. Si y furent morts environ soixante hommes: entre lesquels le furent Alain Geron Baillif de Senlis, Geoffroy de Morillon, Pierre d'Orgy, Alain de la Roche, Oliuier de la Iouste, le Bastard de ville Blanche & plusieurs autres Gentils-hômes. Et si en furent prins prisonniers bien six vingts, dont en estoit vn Blanchelaine : apres laquelle destrouffe ledit Damoiseau de Commercy se retrahit. Et apres quand les nouuelles en furent portées au siege de Chauensy, ils en furent fort esmerueillez. Neantmoins ledit Euerard de la Marche se rallia de rechef avec le Comte de Vernembourg, qui en personne & deux de ses fils avecques luy & de quatre à cinq cens combattans alla audit siege. Et y mena messire Hugues Tauxte, messire Herault de Gourgines gouverneurs Dainuiller, les enfans de Brouffet & plusieurs autres grans seigneurs, qui au siege se tindrent iusques à la nuict de saint Iean Baptiste, que les assiegez liurerent vne moult forte escarmouche & bouterent le feu aux logis des assiegeans : parquoy les meirent en desfroy, & en occirent de deux à trois cens: entre lesquels y furent morts Estienne Diest & l'Arragon : & à l'autre des escarmouches y fut mort l'un des fils du Comte de Vernembourg : & pareillement le feu fut bouté par fusées dedans la grand Bastille. Parquoy lesdits assiegeans à grand perte & dommage se deslogerent du tout apres que leurs logis furent du tout ars & bruy, comme dessus est dit. Et estoient dedans Chauensy durant le siege deuantdit de par ledit seigneur de Commercy, Angillebert de Dolle & Girard de Marescoup à tout environ deux cens combattans. Si auoit ce temps pendant le dessusdit Connestable de France mis en l'obeissance du Roy Charles Nantueil en la montaigne de Reims, Han en Champagne, Bourg & aucunes autres forteresses de sa venue.

Comment l'Euesque du Liege & ses Liegeois destrousserent Bouffeuure & plusieurs autres forteresses, qui leur faisoient guerre.



L'issue du mois d'Auril se meit sus à moult grand puissance l'Euesque de Liege, pour aller combattre & mettre en son obeissance plusieurs forteresses sur la Marche d'Ardaine : lesquelles estoient garnies d'aucuns sacquemens, qui tressouuent alloient courre au païs de Liege & y faisoient moult de dommage : desquels estoient les principaux conducteurs & qui les soustenoient Iean de Beaurain, Philippot de Sergins, le seigneur d'Orchemont & aucuns autres qui se retrayoient communemēt au chastel de Bouffenocho au hault chastellet, à Villers deuant Mousson, à Aubigny, à Orchemont, à Beaurain & en plusieurs autres forteresses à l'environ : & se renommoient tressouuent

souuent les aucuns du Roy, & les autres du Duc de Bourgongne, & la plus grand partie de messire Iean de Luxembourg Comte de Leigny. Et les dessusdits: c'est à sçauoir Iean de Beaurain, & Philippot de Sanguin faisoient guerre en leur nom pour aucuns interests, qu'ils disoient auoir au seruice desdits Liegeois. Si assembla ledit Euesque de deux à trois mille cheuaux par l'ayde des nobles de ses païs, & bien douze ou seize mille hommes de ses communes tresbien habillez & embastonnez chacun selon son estat, avecques de trois à quatre mille que chariots que charrettes chargées d'engins, artilleries, viures & autres habillemens de guerre: lesquels partans de la cité de Liege les conduisit à Dignant, & de là les mena passer la riuere de meuze. Et puis parmy les bois qui duroient bien cinq lieües, allerent à Rigniues, où ils seiournerent par l'espace de deux iours, pource que ledit Charroy cheminoit à grand peine & pesamment pour les chemins qui estoient effondrez. Auquel lieu de Rigniues à son partement deuisa son ost, & fit mettre en quatre batailles. C'est à sçauoir deux batailles à pied & deux à cheual: & alla ledit Euesque tout au long desdictes batailles les admonnestant de chacun bien faire son deuoir. Si fit partir vne partie de ses gens à cheual, qui allerent loger deuât ledit chastel de Boussenoich: & il les suiuit à tout ceux de pied, & les fit assieger tout entour & afuster ses bôbardes, & dresser ses engins contre la porte & muraille du dessusdit fort: dedans lequel furent enuiron vingt saquemens qui moult furent esbahis de veoir si grâd puissance deuant leurs yeux. Et adoncques les dessusdits Liegeois meirent la main à l'œuure & vuiderent grand partie de l'eau des fosses par tranchiz qu'ils feirent. Et les autres apporterent vne grand môtioye de fagots, pour icelles fosses remplir: puis commencerent à assaillir terriblement & par grand vigueur, & tant feirent qu'ils prindrent le boulleuert de ladicte forteresse d'assault. Et les deffendâs se retrahirent en vne grosse tour qui estoit là, & se deffendirent vne grâd espace de temps: mais ce rien ne valut: car ils furent tâtost oppressez de feu & de traict, tant qu'ils se rendirent à la voulété dudit Euesque: lequel les fit tous pèdre par les hastereaux aux arbres estâs pres ladicte forteresse par vn prestre, qui estoit avecques eux comme leur capitaine: lequel prestre apres qu'il eut pendu ses cōpagnons fut lié à vn arbre & brulé, & ladicte forteresse fut demolie & rasée. Et se partit de là iceluy Euesque. Et mena ses gens vers le hault chastellet, desquels il y auoit grand partie de ses gens, qui vouloient aller deuant Hyreçon & autres forteresses de messire Iean de Luxembourg: pourtant qu'ils disoient qu'il soustenoit en sesdictes forteresses leurs ennemis qui leur faisoient guerre. Mais ce propre iour vint deuers ledit Euesque sur les champs le Bastard de Coucy, qui leur dit & rapporta que ledit messire Iean de Luxembourg l'auoit là enuoyé pour luy certifier, qu'il ne vouloit à luy ne à ses païs fors bon voisinage, requerrant qu'il ne leur souffrist faire quelque dommage: & si aucun tort auoit esté fait à luy & à ses païs par gens qui se fussent renommez de luy: luy ouï en ses deffences, s'en vouloit rapporter au dict des amis d'un costé & d'autre. Et d'autre part vindrent lettres de par le Duc de Bourgongne au dessusdit Euesque, par lesquelles luy requeroit qu'il ne fait nul dommage audit messire Iean de Luxembourg, ne aussi au seigneur d'Orchimont, & par ainsi fut ce propos rompu & mis en delay. Et s'en allerent l'Euesque dessus nommé & vne partie de ses gens

loger à Aubigny, où il trouua que ceux de la garnison s'en estoient fuiz de paour qu'ils auoient eüe : & pourtant fait ardoir la forteresse. Et puis s'en alla au hault Chastellet, où il y auoit vne partie de ses gens qui estoient dedans, & l'auoient abandonné ceux qui le tenoient, & fut abbatu comme les autres. Et lors auoit l'Euesque intention d'aller à Villiers. Et quand ce fut venu à la cognoissance de iceluy & de ceux de Mousson & d'Iuoy, doutans le dommage qu'ils pouoient auoir au païs pour le grand nombre desdits Liegeois, eux mesmes abbattirent ledit fort de Villiers. Et quand ce fut venu à la cognoissance dudit Euesque, il print son chemin pour aller au Beaurain : laquelle forteresse Iean de Beaurain qui en estoit seigneur auoit fait fort reparer, & y edifier quatre tours: dont l'une estoit nommée Hainault, la seconde Namur, la tierce Brabant & la quarte Reters: qui estoient les quatre païs, où il auoit prins la finance dont il les auoit fait fonder : toutesfois quand il sceut la venue des dessusdits Liegeois, il ne les osa attendre. Si s'en alla avecques ses gens & y fait bouter le feu dedans : mais pourtant ne demoura mie, que ledit Euesque de Liege ne fait abbatre de fons en comble & du tout demolir. Et de là sans plus auant besongner ramena ses Liegeois en leur païs, & s'en retourna en sa cité de Liege.

EN ce temps se rendit au seigneur d'Aussi & à messire Florimont de Brimeu Seneschal de Ponthieu la ville de Gamaches en Vimeu, qui moult long temps auoit tenu le party des Anglois par certains moyens qu'ils auoient dedans : en laquelle ville furent mis par ledit Seneschal gens d'armes de la partie du Duc de Bourgogne. Et pareillement furent lesdits Anglois deboutez d'Aumarle, & fut mise en la main d'un gentil-homme nommé Daud de Reume, qui tenoit le party du Roy Charles. Durant lequel temps le Comte de Richemont Connestable de France fait assieger le Creil, que tenoient les Anglois. Et fut fait vne bastille au bout du pont d'icelle ville vers Beauuoisis, où ils furent longue espace: mais en fin ils s'en departirent assez honteusement, dont ils eurent grand dueil au cuer: & perdirent de leurs gens, & aussi de leurs habillemens de guerre bien largement.

Comment les villes & forteresses d'Orchimont furent destruietes & demollies par le Damoisel Euerard de la Marche.



Tem durant ce temps Bernard de Boursset qui tenoit la forteresse d'Orchimont sur la marche d'Ardenne, enuoya enuiron cinquante saquemens qu'il auoit pour courre sur les païs de Liege, ainsi que plusieurs fois par auant auoient fait : lesquels furent apperceuz du dessusdit païs de Liege, & mis à chasse par l'ayde & entreprinse du Preuost de Rebongne. Et de fait leur fut rompu le passage par où ils s'en cuidoient retourner: & s'en firent par empres Dinan, & se bouterent en Bouuines pour eux cuider sauuer: mais ils y furent detenuz prisonniers. Et depuis nonobstant que lesdits officiers du païs de Liege feissent plusieurs requestes à ceux de Bouuines qu'ils feissent iustice des dessusdits coureurs, si les deliurerent ils: car icelles deux seigneuries ne s'aymoient point bien l'un l'autre. Et entre-temps qu'iceux furent ainsi empeschez, Euerard de la Marche qui estoit allié avecques l'Euesque de Liege, & avecques iceux dessusdits coureurs auoient plusieurs dommages & desplai-

& desplaisances, assembla hastiuement ce qu'il peut auoir de gens: & se meirent avecques luy iceux de Dinan & ceux du païs, à tout lesquels il s'en alla deuant Orchimont & gaigna la ville d'assault. Et lors le dessusdit Bernard qui adonc auoit tres peu de gens de guerre avec luy, se retrahit en la forteresse où il fut approché desdits Liegeois tresfierement: tant que par viue force au bout de quatre iours il fut contraint par telle maniere qu'il se rendit, & feit traicté avecques le dessusdit Euerard de la Marche. Apres lequel traicté icelle ville d'Orchimont, & le chastel ensemble furent demoliz & rasez iusques à terre: dont tout le peuple de toute la marche & des païs à l'enuiron furent tresioyeux, pourtant que de treslong temps parauant s'estoient tenus dedans icelles aucunes gens de tresmauuaise raison, & qui moult auoient greué & oppressé leurs païs voisins.

Comment les Anglois de Calais coururent vers Boulogne & Grauelines, & desconfirent les Flamans. Et de là Hire qui gaigna Gisors & tantost le perdit.

EN ce temps apres que les besongnes dessusdictes furent ainsi approchées de guerre, comme dit est cy dessus, entre les Anglois & Bourgonnons, & que chacune des parties estoit sur sa garde: iceux Anglois vindrent courre deuant Boulogne, & cuiderent prendre la Basse Boulogne: mais elle leur fut fort deffendue. Si ardirent partie du nauire qui estoit au haure, & apres se retrahirent à tout ce qu'ils peurent auoir en leur forteresse sans perte. Et assez brief ensuiuant se remeirent ensemble de cinq à six cens combattans, & allerent fourrager les païs vers les Grauelines: mais les Flamens de la marche à l'enuiron du païs s'assemblerent, & coururent sus aux dessusdits Anglois outre la volenté des gentils-hommes qui les conduisoient, c'est à sçauoir Georges de Vbes & Chery Hazebrouch. Si furent tost vaincus & mis à desroy: & en y eut de trois à quatre cés morts, & bien six vingts prisonniers: lesquels par lesdits Anglois avecques grand proyes furent menez dedans la ville de Calais, & és autres forteresses de leur obeissance, & les autres se sauuerent par les hayes & buissons, où ils peurent pour le mieux. Auquel temps aussi la Hire qui se tenoit à Beauuais & à Gerberoy, pour certains moyens qu'il auoit en la ville de Gisors entra dedans à puissance, & gaigna ladicte ville. Mais aucuns de la garnison estans leans se retrahirent en la forteresse, & enuoyerent querir secours de leurs gens à Roüen & ailleurs de leur obeissance. Lequel secours dedans le tiers iour fut enuoyé si fort qu'ils reconquirent la ville, & s'en partirent la Hire & les siens plustost que le pas, reserué de vingt à trente qui demourerent en icelle ville que morts que prins avecques grand quantité des habitans, desquels par iceux Anglois fut faicte grand destruction, pourtant qu'ils estoient demourez avecques leurs ennemis.

Comment les Gantois & ceux du pais de Flandres feirent grand appareil de guerre, pour aller deuant la ville de Calais.

Y



Vrant le temps dessusdit, les Gantois pour sçauoir leur puissance, mandement par tout leurs chastellenies & és pays à eux subiects que tous ceux qui estoient leurs bourgeois de quelque estat qu'ils fussent (reserué ceux qui estoient à leur Prince) veinssent dedans trois iours eux monstrier deuant les Escheuins de Gand, & faire escrire leurs noms & leurs surnoms sur peine de perdre la franchise de leur bourgeoisie. Et avec ce qu'ils se pourueussent d'armes & de habillemens necessaires à guerre. Aussi feirent publier que ceux qui estoient condamnez pour leurs malefices par lesdits Escheuins, ou autres arbitres à faire pelerinages, fussent tenuz pour excusés iusques au retour d'iceluy voyage & quatorze iours apres. Et que ceux qui auoient guerre ou dissention l'un à l'autre, demourroient en la sauuegarde de la loy ledit voyage durant, & qui l'enfraindroit il seroit puny selon la coustume de ladicte ville. Item en outre fut deffendu que nul du pays de quelque estat qu'il fut, ne menast ou fait mener hors d'iceluy pays aucunes armes ou habillemens de guerre, sur peine d'estre banny de dix ans. Apres lequel mandement dessusdit feirent en icelle ville de Gand & en leur chastellenie moult grand appareil de guerre. Et sçauoient toutes les villes fermées & les villages combien ils deuoient deliurer de gens pour accomplir le nombre de dixsept mille hommes, que ceux de ladicte ville de Gand auoient promis à deliurer à leur Prince en ceste presente année. Et pareillement sçauoient bien combien chacun mesnage deuoit payer de taille des assiettes, qui se faisoient pour la despence d'icelle guerre. Et apres manderent par toute leur obeissance, qu'on leur fait finance pour leurs deniers de chars & de charrettes le tiers plus qu'on n'en auoit liuré jadis pour le voyage de Ham sur Somme. Et furent leurs mandemens publiez par toutes leurs chastellenies par les officiers des lieux. Et pourtant que bonne expedition ne fut mie de ce faicte du tout à leur plaisir, ils enuoyerent de rechef autre nouuel mandement ausdits officiers. Par lequel ils leurs signifioient si de trois iours ensuiuans n'auoient enuoyé monstrier en ladicte ville de Gand deuant leurs commis, leurs chars & charrettes dessusdits en nombre qu'ils les demandoient & requeroient: ils enuoyeroient le Doyen des Blancs Chapperons & ses gens esdictes villes, pour prendre iceux chars & les charrettes sur les plus apparans sans riens espargner aux despens de ceux qui auront esté refusans de les bailler. Lequel second mandement veu pour là doubte des dessusdits Blancs-Chapperons, les deuantdits paysans feirent si bonne diligence que ceux de Gand furent bien contents d'eux. Si ordonnerent & conclurent affin que chacun d'eux fussent embastonnez, que chacun se pourueust de cours maillets de plomb ou de fer à poinctes & de lances, & que deux maillets vauldroient vne lance, & qu'autrement ne seroient point passez à monstre, & si en seroient punis ceux qui en seroient defaillans. Et d'autre part ceux de Bruges & les autres membres feirent chacun selon leur estat, & puissance tresgrans appareils & ordonnance, pour aller en icelle armée. Et fut bien par l'espace de deux mois ou enuiron, que la plus grand partie de tous ceux qui estoient ordonnez pour aller en iceluy voyage ne faisoient aucunement leurs mestiers ne leur labour. Ainçois la plus grand partie du temps s'occuperent d'aller despendre le leur par grandes compagnies és tauernes & cabarets.

rets. Et souuent fesmouuoient de grans debats & rumeurs les vns contre les autres : par le moyen desquels en y auoit souuent de morts & de naurez. Et entre-temps le Duc de Bourgongne preparoit ses besongnes à toute diligence pour fournir iceluy voyage de Calais. Durant lequel temps en y auoit vn nommé Hannequin Lyon natif de Dunequelque, lequel pour ses desmerites auoit esté banny de la ville de Gand & festoit rendu fugitif du païs. Si deuint escumeur de mer, & par son engin & diligence multiplia tellement en cheuance, qu'il auoit à la fois huiet ou dix nefz bien armées & aduitaillées toutes à son commandement. Et faisoit guerre mortelle à toutes gens de quelque estat qu'ils fussent. Si estoit moult craint & cremu sur la mer des marches de Flandres & de Hollande : & se disoit amy de Dieu & ennemy de tout le monde : mais à la fin il en eut pour son salaire tel ou pareil, qu'ont souuent gens de tel estat qu'il estoit : car quand il fut au plus hault de la roüe de fortune, elle le meit tout au plus bas & fut noyé en mer par tempeste & orage de temps.

Comment messire Iean de Croÿ Baillif de Hainault à tout plusieurs autres capitaines assaillit les Anglois, dont il fut vaincu.

EN ce mesme temps messire Iean de Croÿ Baillif de la Comté de Hainault, assembla des marches de Picardie & de Boulenois iusques au nombre de quinze cens combattans ou enuiron : desquels estoient les principaux le seigneur de Vvaurin, messire Baudo de Noyelle, messire Loÿs de Thieubronne, Robert de Saueuses, Richard de Thieubronne, le seigneur Deulez, le Bastard de Roucy & moult d'autres experts & notables homes de guerre en intention de les mener courre deuant Calais, & autres fortresses tenans le party des Anglois. Et se fait ceste assemblée en vn village nommé le Vvast à deux lieües pres de saint Omer : au loing duquel lieu cheuauchèrent de nuiet vers le païs de leurs aduersaires : lesquels aduersaires & ennemis en icelle propre nuiet estoient issus de leurs garnisons bien deux mille ou enuiron, pour aller fourrager le païs de Boulenois & és marches de là enuiron. Et ne sçauoient point icelles deux compagnies la venue l'un de l'autre. Et ne venoient point tout vn chemin pour eux entrerencontrer. Mais le dessusdit messire Iean de Croÿ & ceux de sa partie approchans les marches des dessusdits Anglois, enuoya aucuns experts hommes d'armes cognoissans le païs deuant pour enquerre & sçauoir des nouuelles : lesquels trouuerent le train des Anglois leurs aduersaires & ennemis vers le pont de Milay enuiron le point du iour. Et cogneurent & apperceurent bien qu'ils estoient moult grand nombre. Si le feirent sçauoir à leurs capitaines & qu'ils tiroient vers la Fosse de Boulenois. Lesquels s'assemblerent l'un auecques l'autre pour auoir aduis que sur ce leur estoit à faire. Si conclurent de les poursuiuir & assaillir en tant qu'ils fourrageroient les villages, se ainsi on les pouoit surtrouuer : & sinon, ils les combattroient en quelque estat qu'ils feussent r'attains. Et fut lors ordonné que messire Iean de Croÿ dessus nommé accompagné d'aucuns hommes d'armes experts, meneroit la plus grand partie des archiers deuant, & tous les autres de la compagnie suiuroient d'assez pres sous l'estandart de messire Loÿs de Thieubronne. Si furent de rechef mis coureurs deuant, qui cheuau-

cherent tresgrand espace de chemin tant qu'ils veirent les feux, qu'auoient bou-
tez en icelles villes & citez les dessusdits Anglois. Lesquels estoient desia ad-
uertiz que leurs aduersaires & ennemis estoient sur les champs par aucuns
hommes du païs, qu'ils auoient prins. Si rassemblerent leurs gens ensemble
sur vne petite montaigne entre Graueligne & Champagne. Si pouoit estre
enuiron dix heures du iour: mais la plus grand compaignie des Anglois e-
stoient plus bas, & ne les pouoit on bonnement veoir. Et adoncques ceux
de la partie de Bourgongne voyans leurs aduersaires & ennemis deuant leurs
yeux, furent moult fort desirans d'assembler à eux, pource en y eut fort grand
nombre de ceux de deuant, qui allerent frapper dedans: & en y eut grande-
ment de tuez, à leur nombre de soixante ou quatre vingts: & grand partie des
autres se meirent à la fuite, mais les assaillans n'estoient point ensemble, &
cheuauchioient à loing train: puis voyans au dessous de ladicte montaigne
vne si grosse compaignie de leurs aduersaires & ennemis, qui se r'allioient l'un
auecques l'autre qu'ils doubterent d'entrer entre eux, & attendirent leurs au-
tres compaignons enhardiant l'un contre l'autre. Et entre-temps lesdits An-
glois reprindrent cueur voyans, qu'iceux les assailloient doutablement: si vin-
drent par bonne ordonnance eux courre sus & ferir en iceux vigoureusement.
Et lors les dessusdits de la partie de Bourgongne sans faire grand resistance, se
meirent en desroy, retournerent hastiuement en fuyant vers les forteresses
de leur obeïssance. Et les dessusdits Anglois qui auoient esté comme demy
vaincuz de premiere venue, coururent apres à resne laschée & les chasse-
rent iusques aux bailles d'Ardre, & dedans les barrieres. Si en prindrent & oc-
cirent bien cent ou plus: desquels en fut l'un Robert de Bournouille surnom-
mé le Roux: Et des prisonniers furent Iean d'Estreues, Bournouille, Galiot
du Champ, Maide, Houllefort, Barnamont & plusieurs autres notables hom-
mes. Et mesmement iceux Anglois chasserent si auant, qu'ils tuerent & occi-
rent enuiron cinq ou six Bourgongnons au plus pres des fossez de ladicte vil-
le d'Ardre, desquels en y auoit vn de grand parage. En laquelle ville se retra-
hirēt le seigneur de Vvarin, messire Baudo de Noyelle, messire Loÿs de Thieu-
bronne, Robert de Saueuses, qui auoit esté fait cheualier nouuel à ceste be-
songne & aucuns autres. Et mesmement le dessusdits messire Iean de Croÿ,
qui auoit esté blessé de traict à l'assemblée & y fut son cheual mort: & retour-
na auecques luy le seigneur d'Eule en l'abbaye de l'Isle moult troublé & en-
nuyé de ceste malle aduventure. Et les autres s'en retournerent en plusieurs au-
tres villes & forteresses du païs. En outre apres que les Anglois eurent ainsi
reboutez leurs aduersaires & ennemis, ils se rassemblerent & se bouterent en
Calais & autres lieux de leur obeïssance à tout leurs prisonniers: au deuant des-
quels vint hors d'icelle ville de Calais le Côte de Mortaigne qui leur fait moult
ioyeuse reception, & blasma moult fort ceux qui s'en estoient fouïs & les auoiēt
laissez en ce dangier.

*Comment les Flamens allerent assieger la ville de Calais. Et comment ils s'en par-
tirent.*

A l'entrée

AL'entrée du mois de Iuingle Duc Philippe de Bourgongne, qui par auant auoit fait toutes les preparacions tant de gens comme d'habillemens de guerre pour aller deuers Calais, s'en alla à tout simple estat en la ville de Gand, affin de faire partir les Gantois & autres d'iceluy païs de Flandres: lesquels en la presence dudit Duc de Bourgogne, firent leurs monstres le samedi apres le iour du Sacrement dedans icelle ville de Gand au marché des vendredis: & estoient là venus pour aller avecques eux ceux de leur chastellenie: C'est à sçauoir des villes de Grandmont, d'Alloz, de Terremonde & de Mene (avecques ceux des cinq membres de la Comté d'Alloz, qui contiennent soixante & douze villes champestres & seigneuries) de Boulers, Sotengien, Tournay, Gaures & de Rides, avecques ceux de Regnaits & des Regalles de Flandres, situez entre Grandmont & Tournay. Auquel marché dessusdit ils furent en estat depuis huit heures de matin, iusques apres nonne qu'ils issirent de leur ville allans le chemin vers Calais. Et les cōuoya iceluy Duc de Bourgongne iusques aux champs, où il print congé d'eux, & s'en alla pour mettre à chemin ceux de la ville de Bruges. Si faisoit ce iour moult grand chault & ferueur de soleil, dequoy il en mourut d'icelle ville de Gand deux capitaines. Dont l'un estoit nommé Iean des Degrez, & fut Doyen des Nauieus: & l'autre Gautier de Vvase-Reman capitaine de Vvesmonstre, avecques aucuns autres de petit estat. Si estoient capitaines generaulx d'icelle armée des Flamens: c'est à sçauoir desdits Gantois, le seigneur de Communes: de Bruges, le seigneur de Fienhuse: de Courtray, messire Girard de Chastelles: de ceux du Franc, le seigneur de Merqueüe: & de ceux d'Ippre Iean de Cōmunes. Et se logea l'ost pour celle premiere nuit à Deuise & à Petangien, qui sont assis à lieüe & demie pres de la susdicte ville de Gand ou enuiron. Et le lendemain seiournerent là pour attendre leurs habillemens. Et apres le lundy ensuiuant se partirent de ce lieu, & s'en allerent par plusieurs iournées loger dehors de la ville d'Armentieres sur les praeries: & se meirēt avecques en chemin ceux de Courtray, & d'Audenarde qui sont de leur chastellenie. Et les conduisoit tousiours comme chief & capitaine le seigneur d'Antoing, à cause de ce qu'il estoit Vicomte heritablement de la terre de Flandres. Auquel lieu d'Armentieres furent prins vingt & un homme & liez aux arbres deuant la tente de Gand, pource qu'ils auoient desrobbé aucuns du païs. Et de là s'en allerēt lesdits Gantois parmy le païs de Laleu à Hazebrouch, où ils abbatirent le moulin Chery de Hazebrouch: lequel comme ils disoient, auoit mal conduict les Flamens deuant Grauelignes, qui nagueres auoient esté desconfits par les Anglois: mais il s'en excusoit, disant que ils ne l'auoient point voulu croire n'vser de son conseil. Et de là s'en allerent deuers Drincam: auquel lieu vint deuers eux ledit Duc de Bourgogne leur Prince & seigneur, & le Comte de Richemont Connestable de France, qui estoit venu en ces parties deuers ledit Duc de Bourgongne: & allerent visiter les Gantois de lieu à autre, & prindrent la collation de vin en la tente de Gand, & de là passerent parmy Bourbourg, & allerent loger empres Grauelignes, & abbatirēt le moulin Georges de Vvez, pour le pareil cas qu'ils auoient fait celuy dudit Chery de Hazebrouch. Auquel lieu vindrent ceux de Bruges, d'Ippre & du Franc, & d'autres lieux de celuy païs de Flandres: & s'assemblerent tous aupres

l'un de l'autre, & meirent leurs tentes par belle ordonnance selon les villes & estats dont ils estoient: si estoit vne moult grand beauté à les veoir, car à les veoir de loing se sembloient bones grans villes. Et quant est aux chariots & aux charrettes, il y en auoit par milliers, qui portoient lesdictes tentes & plusieurs autres habillemens de guerre: & sur chacun chariot auoit vn coq pour chater les heures de la nuit & du iour: & si auoit grand nombre de ribauldekins portans canons, couleurines, arbalestres & plusieurs autres gros engins: & si estoient iceux Flamens ou la plus grand partie armez de plain harnois, selon la guise du pays. Et à leur departement de là se meirent tous ensemble en armes, & feirent monstres en la presence dudit Duc de Bourgogne & du dessusdit Conestable de France, qui les regarda moult volentiers. Et ce mesme iour se ferit en l'ost de Bruges vn loup, pour lequel il y eut tresgrad effroy & fut crié à l'arme par tour. Parquoy tous les osts se meirent aux champs, & pouoient bien estre trente mille ou au dessus de testes armées. Et adoncques passerent la riuere de Grauelignes, & se logerent deuers Tournehem. Si feit en celuy iour vn terrible temps de pluye & de vens: pourquoy ils ne peurent tendre leurs tentes, & les conuint gesir sur les prez. Et la furent prins trois Picards que les Gantois feirent pendre, pour ce qu'ils auoient desrobbé les marchans de viures en l'hostel. Durant lequel temps le Comte d'Estampes & tous les gens d'armes du dessusdit Duc de Bourgogne qui estoient ordonnez pour ce mesme voyage, se tirerent vers les parties où estoient les dessusdits Flamens: si allerent par vn vendredy tous les osts de Flādres, & aussi les gens d'armes loger aupres du dessusdit chastel d'Oye que tenoient les Anglois: lequel chastel & forteresse d'Oye fut rendu & deliuré en assez brief terme, & se meirent en la volenté du dessusdit Duc de Bourgogne & de ceux de la ville de Gand: laquelle volenté fut telle qu'on en pendit deuant ledit chastel le mesme iour vingt & neuf, & depuis en furent penduz encores vingt & cinq: & si en y eut trois ou quatre qui furent repitez à la requeste dudit Duc Philippe de Bourgogne. Apres laquelle redditiō iceluy chastel fut ars & brulé, & du tout demolly. Et quand est au regard des Picards & Bourgonnons là estans, nonobstant qu'ils soient assez aspres au pillage: neantmoins ils n'y pouoient auoir lieu pour riens conquerre n'auoir, car Hannequin, Vvinequin, Pietre, Liéuin & autres ne l'eussent iamais souffert ne laissé passer. Et qui pis est, quād ils s'entrebouttoient avec eux, & prenoiēt aucune chose sur leurs aduersaires & ennemis, il aduenoit souuent qu'avec ce leur propre leur estoit osté: & s'ils en parloient aucunemēt, ils auoient souuent des durs horions. Si les conuenoit taire & souffrir pour la grand puissance qu'auoiēt les dessusdits Flamens, mais ce n'estoit point patiemment. Et sembloit à iceux des communes de Flandres, que toutes besongnes on ne pourroit venir à bon chief, se par eux n'estoit. Et mesmement estoient si presumptueux la plus grand partie, qu'ils auoient grand doubte que ceux de la ville de Calais abandonnassent leur ville, & qu'ils s'en fouyssen en Angleterre: & disoient aucuns de leurs gens aux Picards, ausquels ils deuisoient souuentesfois. Nous sçauons bien puis que les Anglois sçauront que messeigneurs de Gand sont armez & à puissance pour venir contre eux, qu'ils ne les attendront mie: & a esté tresgrande negligence, que le nauire qui doit venir par mer n'a esté assis auant qu'on les approchast, afin qu'ils ne

ne s'en peussent fouÿr. Toutesfois ils ne deuoïent point de ce estre en soucy. Car les dessusdits Anglois auoient bonne volenté d'eux deffendre contre eux: & pour verité le Roy Henry d'Angleterre, ceux de son conseil & tous les trois estat^s d'iceluy Royaume d'Angleterre, eussent auant laissé perdre toute la conqueste qu'ils auoient faicte au Royaume de France depuis trente ans par auant, que ladicte ville de Calais, comme on fut depuis veritablement acertené & informé: & aussi ils en monstrent assez bien les manieres & le semblant brief apres ensuiuant. En apres ledit chastel d'Oye ainsi demolly (comme dit est) tout l'ost & les gens d'armes se deslogerēt, & allerent loger entre le chastel de Marcq & icelle dicte ville de Calais. Auquel iour le dessusdit Duc Philippe de Bourgongne avecques ses gens d'armes, s'en allerent courre deuant la ville de Calais, & issirent & saillirent les Anglois hors contre eux de pied & de cheual, & y eut fort grande escarmouche: mais en fin lesdits Anglois furent reboutez, & gagnèrent sur eux les Picards & Flamens, vaches, cheuaux, brebis, moutons, & plusieurs autres choses de la ville. Si se tint ledit Duc de Bourgongne avec ses gens grand espace de temps deuant ladicte ville, tant que les osts fussent logez, & puis retourna ledit Duc en son logis vers le chastel de Marcq: deuant laquelle forteresse allerent les Picards dessusdits liurer vne moult grande escarmouche. Et fut depuis le bouleuert conquis, dont ceux de dedans se commencerent moult fort à esbahir de ce: & bouterent & meirent la banniere de monseigneur S. George dehors vers la dessusdicte ville de Calais, & si commencerent à faire sonner leurs campanes & cloches, & feirent leans moult grans & horribles cris. Et pource doubtons qu'ils ne s'en fouÿssent par nuict, on meit grand guet tout à l'enuiron: & le lendemain furent assis plusieurs gros engins contre la muraille, desquels ils furent fort rompus. Si furent vn iour assailliz des Picards & Flamens: mais ils se deffendirent moult vaillamment de pierres en iectant à val & de trait, tant qu'ils blefferent & naurerent plusieurs de ceux de dehors, & les feirent retraire. Puis requirent ceux de dedans d'auoir trefues pour parlementer, lesquelles leur furent accordées. Et lors s'offrirent d'eux mettre en la volenté du Duc de Bourgongne moyennant qu'ils ne fussent point penduz: mais on feroit son plaisir en autre maniere, à quoy il furent receuz: & fut deffendu sur peine de la hart, que nul n'entraist au chastel s'il n'y estoit commis. Et adoncques furent ceux de dedans amenez par les quatre membres de Flandres en la tente de Gand: & fut ordonné qu'ils feroient changes pour rauoir aucuns Flamens, qui estoient prisonniers dedans ladicte ville de Calais. Si furent amenez hors de ladicte forteresse cent & quatre Anglois: lesquels furent menez en prison en la ville de Gand par le Baillif dudit lieu. Et lors grand partie du commun allerent dedans ledit chastel, & prindrent ce qu'ils peurent trouuer. Mais aucuns de ceux de la bourgeoisie de Gand se meirent à l'entrée d'iceluy chastel, & tollurent & osterent aux dessusdits quād ils en issirent tout ce qu'ils auoient prins, & le meirent tout en vn mont, & disoient que ce faisoient ils par l'ordonnance des Escheuins de la ville de Gand: mais quand la nuict fut venue, ils le chargerent tout sur les chars & charrettes, & le menerent où bon leur sembla. Si en furent de ce accusez deuers les dessusdits Escheuins, dont ils furent bannis cinquāte ans hors du paÿs & la Comté de Flandres. Pour lequel bannissement s'esmeut grād mur-

mure entre eux, & furent en grand peril d'auoir l'un contre l'autre grand dissention. Et le lendemain ensuiuant furent decapitez sept hommes qui auoient esté prins avecques les dessusdits Anglois, dont les six estoient Flamens & le septiesme Hollandois: & apres ce fut la forteresse demollie & du tout abbattue. Si se partirent de là, & s'en allerent loger les Flamens au propre lieu où on dit que Iaques d'Arteuelles auoit iadis mis ses tentes, quand Calais fut conquis de par le Roy Henry d'Angleterre apres la grand bataille de Cressly: & le Duc Philippe de Bourgongne à tout sa cheualerie & ses gés d'armes, se logerent assez pres en tirant vers Calais. Et y eut ce iour tresgrand assaut contre ceux de dedans, & en y eut de morts & de naurez de chacune partie, entre lesquels la Hire fut nauré à la iambe d'un traict, lequel estoit venu veoir ledit Duc de Bourgongne. Si furent assis plusieurs engins pour iecter dedans icelle ville de Calais. Et pareillement ceux de dedans en affusterent plusieurs contre ceux de l'ost, dont leurs aduersaires furent moult fort trauallez, & conuint qu'ils se trahissent plus arriere. Si se logea ledit Duc de Bourgongne plus pres des Dunes contre les montaignes de Sablon. Et ainsi qu'iceluy Duc cheuauchoit à petite cōpaignie pour aduiser la ville, vint vne grosse pierre de canon au plus pres de luy: laquelle occist vne trompette & trois chevaux, dont celuy du seigneur de Saueuses estoit l'un. En outre lesdits Anglois sailloient tressouuent dehors de pied & de cheval: & en y eut moult de fois de tres dures escarmouches entre les deux parties: lesquelles ne se pourroient raconter chacunes à par-elles, ne nommer ceux qui y besongnerent le pis ou le mieux: mais entre les autres j'ay cūy relater à aucuns notables & dignes de foy, que les seigneurs de Habourdin, de Cresquy & de Vvaurin furent bien veuz & louiez en aucunes d'icelles escarmouches, & moult d'autres notables & vaillans hommes des païs de Picardie. Toutesfois les dessusdits Anglois emportoient aucunesfois la renommée pour la iournée. Et d'autre part les Picards les rebouttoient trop souuent iusques dedans leurs barrieres assez confusiblement. Et quant est aux Flamens, ils estoient assez peu cremeuz d'iceux Anglois, & leur sembloit que s'ils n'eussent eu que trois Flamens contre l'un d'eux, qu'ils en fussent venuz bien à chief. Si estoient avecques le Duc Philippe de Bourgongne en ceste exercite son nepueu de Cleues, le Comte d'Estampes, le seigneur d'Antoing qui gouernoit lors les Flamens, le seigneur de Croÿ, les seigneurs de Crequy, de Fosseux, de Vvaurin, de Saueuses, de Habourdin, de Humieres, d'Inchy, de Brimeu, de Launoy, de Huchin & les freres de Hastines & de Fremessen, avecques plusieurs autres seigneurs gentils hommes tant de son hostel & famille comme de ses païs de Bourgongne, de Flandres, de Brabant, de Hainault, d'Arthois & des autres lieux: toutesfois le dessusdit Duc de Bourgongne n'auoit point assemblé la moitié de sa puissance, quant au regard de ses gens d'armes des païs de Picardie. Et en auoit esté renuoyez grand partie des les monstres: dont moult de gens qui bien aymoient son honneur, estoient moult fort esmerueillez, & leur sembloit qu'à tous besoins il se fut mieux aydé d'eux que du double de ses communes. En outre messire Iean de Croÿ qui conduisoit la plus grand partie des gens de guerre de Boulenois, avecques aucuns autres qu'il auoit amenez, fut enuoyé loger à l'autre costé plus pres de Calais en tirant deuers le pont d'Amillan: deuant lequel logis y eut grād
parlement

parlement entre les gens & ceux de la ville. Mais assez brief ensuiuant fut remã-
 dé par ledit Duc de Bourgongne & enuoyé deuant Guisnes, où il se logea luy
 & les gens assez pres des portes & murailles:deuant lesquelles furent dressez &
 assis plusieurs gros engins qui fort les adommagerent. Auecques luy estoient
 le Galois de Rancy cheualier, Robert de Saueuses & plusieurs autres notables
 hommes, qui en grand diligẽce approcherent de leurs aduersaires & ennemis:
 & les meirent en moult grand doubte & necessité d'estre prins de force, & tant
 qu'ils abandonnerent leur ville & se retrahirent dedans le chastel où ils furent
 de rechief tresfort approchez, assailliz & combattus desdits assiegeans. Et par
 auant leur venue audit lieu de Guisnes, s'estoit rédu audit messire Iean de Croÿ
 la forteresse de Vauclingnen: & luy auoient deliurée les Anglois moyennant
 qu'ils s'en iroient sauf leurs vies, & aucunes petite partie de leurs biens. Et pa-
 reillement rendirent lesdits Anglois le chastel de Sangathe à messire Robert de
 Saueuses: lequel y alla deuant entre-temps qu'il estoit au siege de Guisnes, le-
 quel chastel il garnit de ses gens. Durant lequel temps le dessusdit Duc de Bour-
 gongne estant logé deuant la forte ville de Calais (comme dit est) auoit grand
 merueille de son nauire, qui deuoit venir par mer & demourroit tant:& d'autre
 part les Flamens en estoient tresmal contens & murmuroient tresfort à l'encõ-
 tre du conseil d'iceluy Duc de Bourgongne, & de ceux qui auoient la charge
 de les conduire & mener, c'est à sçauoir messire Iean de Hornes Seneschal de
 Brabant,& le Commandeur de la Morée: mais iceluy Duc les rappaisoit & cõ-
 tentoit par doulces parolles,disant qu'ils viendroient bien brief comme ils luy
 auoient fait sçauoir par leurs lettres,& n'auoient point eu vent propice iusques
 à present: parquoy ils eussent peu venir plus tost. Si venoient chacun iour des
 nauires d'Angleterre dedãs Calais à la plaine veüe de leurs aduersaires, vne fois
 plus,l'autre fois moins qui leur amenoient & apportoit des viures,nouvelles
 gës, habillemens de guerre & autres choses necessaires. Aussi n'estoit il pas si
 pres approchez de leurs ennemis, q̃ chacun iour ne meissent grãd partie de leur
 bestail dehors leur ville en pasture, qui faisoit moult grand mal à veoir à ceux
 de dehors, & en y auoit souuent de grandes escarmouches à cause & à l'occa-
 sion d'iceluy bestail,pour cuider en gagner. Et mesmement vn certain iour les
 seigneurs & bourgeois de Gand, qui plusieurs fois en auoient veu & veoient
 souuent ramemer par les Picards, s'apperceurent en eux mesmes qu'ils estoient
 grans & forts & bien armez,& qu'il pouoient aussi bien cõquerre & auoir leur
 part dudit bestail.Si se meirent à chemin bien deux cens,& allerent le plus cou-
 uertement qu'ils peurent és marests aupres d'icelle ville pour prendre & ame-
 ner la proye: mais ils furent tantost apperceuz des Anglois: qui ne furent mie
 patiens quand ils veirent les dessusdits venir si pres d'eux, pour leur oster ce dõt
 ils deuoient viure, & les recogneurent bien à leurs habillemens.Si se ferirent en
 eux vigoureusement & en occirent bien vingt & deux, & en prindrent trente
 trois qu'ils emmenerent prisonniers: & les autres retournerent à grand cours
 en leur logis:disant qu'ils y auoient grand perte & faisant grand effroy, & leur
 sembloit qu'ils estoient bien eschappez. Et y auoit souuent en l'ost d'iceux Fla-
 mens de grans alarmes:car pour peu de chose ils s'esmouuoient tous, & se met-
 toient en armes,dont ledit Duc de Bourgongne leur seigneur estoit desplaisant:

mais il n'en pouoit auoir autre chose. Et conuenoit que toutes besongnes se cōduisissent en la plus grand partie à leur plaisir. Auquel temps vint deuers ledit Duc vn herault d'Angleterre nommé Kemibruch: Lequel le salua moult reuerremment: & luy dit, que Humfroy Duc de Clocestre son seigneur & maistre luy faisoit sçauoir par luy qu'au plaisir de Dieu le combatteroit avec toute sa puissance bien brief, s'il le vouloit attendre. Et s'il se partoit de ce lieu, il le querroit en aucuns de ses païs: mais il ne luy faisoit point sçauoir le iour, pourtant que la mer & le vent ne sont point stables, & ne sçauoit s'il pourroit passer à son plaisir. A quoy fut respondu par ledit Duc de Bourgongne qu'il ne seroit point besoing qu'il lequist en nul de ses païs, & qu'il le trouueroit là se Dieu ne luy enuoyoit aucune fortune: apres lesquelles parolles ledit herault fut grandemēt festoyé: & luy fut donné aucuns dons, à tout lesquels il s'en retourna en la ville de Calais: & le lendemain ledit Duc de Bourgōgne s'en alla en la tente de Gād, où il feit assembler tous capitaines & nobles cheualiers des Flamens: & là feit remonstrer par maistre Gilles de la Voustine son conseilier en la chambre de ladicte ville de Gand, comment le Duc de Clocestre luy auoit mandé par vn sien herault qu'il le combatteroit, & les responce qu'il luy auoit données. Parquoy il requeroit tresinstamment comme à ses humbles amis, qu'ils voulsissent demourer avec luy & luy ayder à garder son honneur. Laquelle requeste ils luy accorderent & promeirent parfournir liberallement: & pareillement feirent les Brugelins & autres membres de Flandres. Adonc fut aduisé par ledit Duc de Bourgongne & ceux de son conseil, qu'on feroit vne bastille sur vne montaigne, qui estoit assez pres de la ville de Calais: par laquelle on verroit le gouuernement de leurs ennemis. Laquelle bastille fut commencée de chesnes & autres bois: & y furent assis aucuns canons pour iecter dedans la ville, & y furent mis & ordonnez hōmes de bonne garde pour faire le guet: de laquelle bastille lesdits Anglois eurent desplaisance, doubtons que par icelle leurs faillies ne feussent rompues & empescheées, dont pour obuier prestement, vindrent en grand nombre & l'assaillirent moult asprement: mais elle leur fut bien gardée & puissamment deffendue des Flamens, qui la gardoient par le moyen & cōseil d'aucūs nobles hommes de guerre, qui s'estoient retraicts: desquels estoit l'vn le bon de Saueuses. Et pourtāt qu'en faisant ledit assaut ceux de l'ost de ce aduertiz, allerent au secours en grand nombre: se retrahirent les Anglois en leur ville sans riens gagner, & en y eut plusieurs de naurez. Et le lendemain y eut grand paletis & plusieurs iournées ensuiuans: dont à l'vne desquelles fut prins vn sot saige nommé le seigneur de Plateaux: lequel, nonobstāt sa folie, estoit assez roide & vigoureux hōmes d'armes. En apres le ieudy ensuiuant qui fut le xxv. iour de Iuillet on cōmença à veoir venir le nauire de deuers Orient, lequel on auoit tant desiré & de long temps attendu. Si monta le Duc de Bourgongne à cheual accompagné d'aucūs seigneurs & autres gens de guerre, & alla sur la riuē de la mer. Et lors s'aduança vne barge le plus pres qu'elle peut: de laquelle saillit hors vn homme, qui en mōtant vint deuers ledit Duc, & luy compta que c'estoit son nauire qui venoit: pour lesquelles nouuelles en feit grand ioye par tout l'ost, & coururēt plusieurs sur les d'Vnes de la mer pour le veoir: mais les capitaines en feirent retraire ce qu'ils peurent. Et le soir ensuiuant à la venue de la mer, vindrent

drent aucuns dudit nauire qui estoient à ce commis, & effondrerent au haure de Calais quatre nefes qui estoient plaines de pierres bien massonnées & ancrées de plomb: afin de rompre, demollir & desoler le passage que ceux d'Angleterre n'y peussent plus venir n'aller à tout leur nauire. Et alors ceux de dedās iectoient continuellement de leurs engins vers le port, pour adommager les vaisseaux & en effondrerent vn. Et encores le lendemain par les dessusdits furent effondrez deux vaisseaux en iceluy Haure, qui estoient massonnez comme les autres. Mais à brief dire tous les dessusdits vaisseaux qui y furent mis par ledit Duc de Bourgogne furent tellement assis, que quand la mer fut retraicte, ils demourerent en la plus grand partie sur le sablon à petite profondeur d'eau. Et pourtant les Anglois de ladicte ville tant femmes comme hommes y coururent à grand effort, si les despiecerent & ardirent à grand exploit par telle maniere qu'il en demoura assez petit: & feirent charier & emmener grand partie du bois en ladicte ville. Nonobstant qu'on tiroit asprement de canons apres eux, dont le dessusdit Duc & les siens eurent grand merueille, & ceux qui les auoient amenez: c'est à sçauoir messire Iean de Hornes, le commandeur de la Morée & plusieurs autres seigneurs de Hollande se departirent le lendemain si loing, qu'on perdit la veüe d'eux, & se retrahirent vers la marche, dont ils estoient venus: car bonnement ne pouoient demourer sur les marches d'entre Calais & Angleterre, pour ce qu'il souuent la mer y est tresperilleuse, & plus qu'en autres lieux comme dient les marinieres. Et avec ce ils estoient assez aduertiz, que l'armée d'Angleterre estoit preste pour passer: contre laquelle ils n'auoient point puissance de resister: pour lequel departement des dessusdits, les Flamens furent fort troublez. Si commencerent de là en auāt à murmurer l'un contre l'autre en disant, qu'ils estoient trahis par les gouuerneurs de leur Prince, & qu'on leur auoit promis à leur departement de Flandres que la ville de Calais seroit aussi tost assiegée par mer que par terre. Si auoient leurs gouuerneurs & capitaines assez à faire à les rappaiser & entretenir. Et entre temps le Duc de Bourgogne qui par tous ses pays auoit mandez ses nobles gens de guerre, pour en estre accompagné à la descende des Anglois. Laquelle il attendoit chacun iour, il feit aduiser par aucuns de ses cheualiers feables & en ce cognoissans vn champ & place la plus aduantageuse que faire se pouoit, pour luy & les siens mettre en bataille contre ses aduersaires quand ils viendroient: & afin d'auoir aduis sur toutes ses besongnes & affaires, le xxvij. iour de Iuillet assembla grand partie de ceux de son conseil, avecques eux plusieurs de ses capitaines & gouuerneurs des communes: ausquels il remonstra & feit remontrer l'intention & volenté qu'il auoit contre ses aduersaires: de laquelle les dessusdits estoient assez contens: mais le propos desdictes cōmunautéz fut assez tost mué: par ce en partie, qu'en ce mesme iour ceux de la ville de Calais faillirent hors de leur ville en moult grand nombre tant de pied comme de cheual, & vindrent soudainement: c'est à sçauoir ceux de pied à la bastille, dont dessus est faicte mention: & ceux de cheual allerent courre entre l'ost & ladicte bastille, pour empescher qu'icelle ne peut si hastiuement auoir secours ne ayde. En laquelle bastille estoient de trois à quatre cens Flamens. Et adoncques fut crié à l'arme par tout l'ost, & y eut moult grand effroy. Si faillirent gens de toutes parts en moult grand multitude & abondance, pour

aller au secours des dessusdits : & mesmement ledit Duc de Bourgogne y alla en sa propre personne tout de pied . Mais les dessusdits Anglois assaillirent si tresfierement & asprement iceux Flamens de la bastille : & pourtant qu'ils les trouuerent de meschante & pauvre deffence, icelle bastille ne leur dura gueres: mais fut briefuement conquise & gagnée auant qu'on y peust venir. Si y furent tuez enuiron huiet vingts Flamens , & vne grand partie des autres prins & menez prisonniers: desquels quād ils furent aupres des portes de Calais, ils en meirent à mort la moitié largement : pource que lesdits Anglois sceurent que les Flamens auoient mis à mort vn de leurs cheualier , qui auoit esté prins par les Picards, qui estoient de cheual à ceste escarmouche, pour laquelle prinse & occision, le Duc eut moult grand desplaissance. Et d'autre part les Flamens qui festoient mis en la bastille, se retrahirent moult troublez & ennuieux pour leurs gens qu'ils veirent ainsi estre occis & tuez . Et s'assemblerent en ce propre iour diuers trouppeaux disant l'un à l'autre, qu'ils estoient trahis, & que riens ne leur estoit entretenu de chose qu'on leur eut promis: & aussi qu'ils perdoient chacū iour leurs gens, & n'y mettoient les nobles nulle prouision : & finalement ils langagerent tant ensemble qu'en fin (nonobstant les remonstrances qui leur furent faictes) ils cōclurent d'eux desloger & retourner en leur païs. Et avecques ce en y auoit aucuns qui estoient en grand voulété d'occire aucuns des gouuerneurs de leurdit Duc: lequel quand il fut aduertý qu'ils auoient pourparlées les choses dessusdictes, fut moult troublé & desplaissant, considerant la charge & deshonneur qu'il pouoit auoir s'il luy conuenoit partir de là, attendu le mandement de Humfroy Duc de Cloestre son aduersaire, qui luy auoit esté noncé par le herault Anglois, & la responce que ledit Duc luy auoit baillée . Si alla en la tente de Gand, où il fait assembler grād nombre des dessusdits, ausquels il requist le plus qu'il peut qu'ils voulsissent demourer avecques luy & attendre la venue des Anglois: de laquelle ils estoient assez acertenez, qu'ils arriueroiēt dedans brieufs iours ensuiuans : disans outre que s'ils se partoient sans attendre ses ennemis & les combattre, ils feroient à luy & à eux le plus grand deshonneur qui oncques fut fait à Prince: ainsi alors & plusieurs autres fois furent par ledit Duc & son conseil faictes plusieurs remonstrances raisonnables à icelles communes, mais finalement ce fut peine perdue: car ils estoient du tout affermez & obstinez l'un avec l'autre d'eux partir . Et pource à tout celles remonstrances faisoient comme la sourde oreille, sinon aucuns des principaux qui respondoient courtoisement en eux excusant. Pour lesquels ceux qui estoient dessous eux au besoing eussent fait assez petit : & adoncques le dessusdit Duc de Bourgogne voyant le dangier où il festoit bouté sous l'ombre & instance des dessusdictes communes : considerant aussi le blasme qu'il luy conuenoit receuoir à cause de son partement, il ne fait point à demāder s'il auoit au cueur grand desplaissance : car iusques à ce toutes ses entreprinſes luy estoient venues assez à son plaisir, & icelle qui estoit là plus grande de toutes les autres de son regne luy venoit au contraire . Toutesfois luy conuint souffrir la rudesse & grand sotie de ses Flamens : car il n'y pouoit pourueoir, jaçoit-ce que par plusieurs fois se meit en peine d'eux retenir aucuns peu de iours . Neantmoins voyant qu'il perdoit son temps de les plus auant requerre, il se conclud avecques

ques les seigneurs de son conseil de desloger avecques eux: & leur fait dire que puis qu'ils ne vouloient plus demourer, ils l'attendissent iusques au lendemain: & qu'ils se partissent par bonne ordonnance à tout leurs habillemens, qu'ils chargeroient: & que leurs aduersaires ne leur portassent nul dommage, & il les reconduiroit à tout ses gens iusques outre l'eaüe de Grauelignes. A quoy les aucuns respondirent qu'ainsi le feroient ils: & la plus grand partie disoient que ils estoient assez puissans pour eux en retourner sans auoir conduicte. Et en y auoit grand partie qui à toutes fins vouloient aller au logis du Duc de Bourgogne tuer le seigneur de Croÿ, messire Baudo de Noyelle, Iean de Brimeu pour lors baillif d'Amiens, & aucuns autres de son conseil, disans que par leurs exhortations auoit ce voyage esté entrepris: lequel n'estoit point bien possible de l'acheuer comme ils disoient, veu le gouuernement & les manieres qu'on y tenoit. Lesquels trois seigneurs dessus nommez scachans la mutation d'iceux Flamens ainsi estre faicte contre eux, se departirent de l'ost à priuée mesgnie, & se retrahirent au logis de messire Iean de Croÿ deuant Guisnes. Et iceux Flamens entre le samedi & le dimenche commencerent à d'estendre par leur ost tentes & pauillons, & charger leur bagues pour eux en aller. Et estoient les Gãtois les principaux faisans ceste mutation. A l'exemple desquels tous les gens de guerre & marchans là estans, troussèrent tout ce qu'ils pouoient auoir de leursdictes bagues: mais pour le soudain partement y demoura des vins, viures & autres biens treslargemēt: & conuint effondrer plusieurs queües de vins & autres bruuages à la perte & dommaige desdits marchans. Et aussi furent laissez plusieurs gros engins & autres habillemens de guerre, qui estoient audit Duc de Bourgogne: pource qu'on ne pouoit trouuer de chars ne de cheuaux pour les emmener. Et pareillement y demoura grand quantité des biens & habillemēs, que y auoient amenez les Flamens. Si se commencerent à desloger en faisant tresgrand bruit, crians tous à vne voix en trèsgrand multitude gaubbe gaubbe nous sommes tous trahis. Qui vault autant à dire, allons, allons en noz pays. Auquel partement bouterent les feux en leurs logis. Et commencerent à tirer vers Grauelignes sans tenir ordonnance. Et lors ledit Duc de Bourgogne qui auoit au cueur tresgrand tristesse à tout ses nobles hommes & gens de guerre, se meit en bataille par bonne ordonnance vers ladicte ville iusques à tāt qu'iceux Flamens fussent esloñez pour les garder, affin que les Anglois de Calais ne faillissent dehors pour ferir sur eux. Et apres par bonne ordonnance mettant ses meilleurs gens d'armes derriere par maniere d'arriegarde, suiuit son ost qui estoient desia vers le chastel de Mare. Si se meirent lesdits Flamens illec vn petit en ordonnance, & s'en allerent loger empres ladicte ville de Grauelignes au mesme lieu, où ils auoient logé au passer: toutesfois les Brugelins estoient tresmal contens de leur honteux departement. Et pourtant qu'à ce iour n'auoient point leurs cheuaux pour ramener leurs gros engins qu'ils auoient là amenez, en chargerent aucuns sur leurs chars & à force & puissance de gens les ramenerent iusques audit lieu de Grauelignes au mesme lieu, où ils auoient logé au passer. Auquel iour ledit Duc de Bourgogne manda à messire Iean de Croÿ qui estoit deuant ladicte ville de Guisnes, qu'il se deslogeast à tout ses gens d'armes & s'en vint deuers luy sans delay. Lequel oyant le mandement

de son seigneur, & sçachant que l'ost estoit deslogé, fait apprester ses gens & se tira en bonne ordonnance enuers sondit seigneur le Duc: mais aucuns gros engins demourerent là, par ce qu'on ne les pouoit charger sur les chars avec grand quantité d'autres biens: pour lequel departement ceux dudit chastel de Guisnes eurent moult grand ioye & liesse: car ils estoient fort contrainsts & en grand necessité, comme pour eux rendre: & dedans brieves iours ensuyuans failirent dehors, en faisant tresgrand huée apres leurs ennemis. Et pareillement quād ceux de Calais veirent & sceurēt le partement de l'ost, ils en furent moult ioyeux: si issirent hors en grand nombre pour recueillir les biens qui estoient demourez, desquels y auoit treslargement. Et lors enuoyerent plusieurs messages en Angleterre nonçer ceste aduenture. Et ledit Duc de Bourgongne qui estoit logé à Grauelignes tant desplaisant & ennuyeux (comme dit est) print cōseil avec les seigneurs & nobles hommes qui là festoient retraits avec luy sur ses affaires, en luy complaignant de la honte que luy faisoient ses communes de Flandres: lesquels les aucuns luy remonstrerent amiablement qu'il print en gré & patiemment ceste aduenture, & que c'estoit des fortunes du monde: & puis luy dirent & cōseillerent qu'il se pourueut au surplus par la meilleure forme & maniere que faire se pourroit: c'est à sçauoir qu'il fournist ses villes & fortresses sur les frontieres de gens d'armes, de viures & habillemens de guerre pour resister contre ses aduersaires, qu'on attendoit chacū iour, lesquels comme on pouoit supposer s'efforçoient de greuer luy & les siens par diuerses manieres, attendu les entreprinse qui auoient esté faictes contre eux. Et luy de sa personne se retrahit plus auant en l'une de ses villes. Et manda par tous ses païs gens de guerre pour ayder & secourir ceux qui en auroient besoing. Apres laquelle conclusion iceluy Duc requist à plusieurs seigneurs & nobles hommes là estant moult instamment, qu'ils voulsissent demourer en icelle ville de Grauelignes: laquelle pouoit estre moult preiudiciable à tout le païs, si elle n'estoit bien gardée: & leur promettant sur son hōneur, que s'ils auoient aucun besoing, & ils feussent assiegez, il les secourroit sans point de faute quelque peril ou dommage qu'il y deust auoir: lesquels luy accorderent & demourerent là le seigneur de Cresquy, le seigneur de Saueuses, sire Symon de Lalain, Sausse son frere, Philebert de Vauldray, & plusieurs autres notables vaillans & experts hommes de guerre. Et d'autre part furent enuoyez à Ardre messire Loys de Thieubronne & Guichart son frere, & aucuns autres de deuers la marche de Boulenois: & es autres lieux furent mis gens d'armes selon les estats des villes & fortesses pour la garde d'icelles. Si estoient là presens plusieurs seigneurs de son conseil, par le moyen desquels icelle entreprinse auoit esté mise sus, qui de ceste malle aduenture estoient desplaisans. Si ne le pouoient auoir autre, & leur conuenoit souffrir & ouyr les parolles du monde. En outre apres ce que ledit Duc eut (comme dit est) tenu son conseil avec ses gens & conclud les choses dessusdictes, il fait requerre aux Flamens qu'ils demourassent encores avec luy vn peu de iours pour attendre la venue de leurs ennemis. Laquelle requeste ne voulurent accorder, pour les perils dont ils se doubtoient: & allerent deuers luy plusieurs des capitaines le mardy dernier iour de Iuillet, requerrir audit Duc qu'il leur donnast congé de retourner en leurs propres lieux. Lequel voyant

voyant qu'il ne les pouoit retenir en nulle maniere du monde leur accorda & leur dōna congé d'eux en aller: car il apperceuoit bien qu'ils n'y feroient ja beau faict, puis qu'ils n'auoient à ce courage. Si se partirent & s'en allerent par plusieurs iournées iusques en leurs villes: mais ceux de Gand ne vouloient point rentrer dedans leur ville s'ils n'auoient chacun vne robbe aux despens de leurdictē ville, ainsi qu'anciennement estoit accoustumē de leur bailler quand ils reuenoient d'aucune armée: laquelle chose on leur refusa, pource qu'il sembloit aux gouuerneurs d'icelle ville de Gand qu'ils s'estoient tresmal portez. Et quād ils eurent responce, ils rentrerent dedans tout murmurant & mal contents des dessusdits seigneurs & gouuerneurs. Si auoient esté au departir de deuant Calais & au desloger, mises en feu & desolées les forteresses de Balinghem & de Sangathe. En apres le Duc de Bourgongne partāt de Grauelignes, s'en alla à l'Isle, & feit publier par tous ses païs que toutes gens de guerre qui estoient accoustumez d'eux armer, feussent prests pour aller deuers luy pour aller où il les enuoyeroit, pour resister à l'encontre de l'armée des Anglois ses aduersaires: laquelle, comme dit est, on sçauoit assez qu'elle estoit preste pour venir descendre au Haure de Calais: & mesmement apres ce que ledit Duc de Bourgongne & son ost furent deslogez de deuant Calais, arriua ledit Duc de Clocestre avecques son armée d'Anglois.

Comment meßire Florimōt de Brimeu Seneschal de Ponthieu, cōquist la ville du Crotoy.

DVrant le temps que le Duc de Bourgongne estoit au voyage de Calais, messire Florimont de Brimeu Seneschal de Ponthieu, Richard de Richaumes capitaine de Rue, Robert du Quesnoy capitaine de S. Vallery & autres des frontieres vers Crotoy, s'assemblerent vn certain iour à tout le nombre de quatre cens combattans ou enuiron: & allerent de nuict eux mettre en embusche sur les greues vers la ville & forteresse du Crotoy, & enuoyerent le dessusdit Robert du Quesnoy à tout trente combattans ou enuiron au matin, passer par vn bastel deuant ladicte ville & forteresse pour faire saillir les Anglois de leans apres eux ce qu'ils feirent: & quand ils apperceurent que lesdits Anglois les pouoient bien veoir, ils feirent semblant que ledit bastel fut feru en terre, & qu'ils ne peussent passer de là ne eux de là partir: & mesmement dix ou douze de leurs gens sortirent en l'eauē, qui faisoient semblāt de vouloir bouter iceluy bastel par force du lieu où il estoit assis. Si faisoiet moult fort les embesongnez: & lors Henry, Jean, Richard & Thomas voyans de leurs murailles l'esbatemēt d'iceux galans & la maniere qu'ils tenoient, desirans de les aller ayder & secourir: mais nō pas au plaisir d'iceux trauaillās, mais pour vouloir conquerre proye, saillirent hors sans delay: & coururent vers iceluy bastel pour le prendre: mais ils furent tantost forcloz par ceux de ladicte embusche. Lesquels les assaillirent fierement, & en occirent sur la place mieus de soixante quatre, & si en y eut de prins de trente à quarante: & par ainsi demoura icelle ville & forteresse du Crotoy fort desgarnie de gens, & en y eut plusieurs naurez de la partie dudit Seneschal. Lequel Seneschal & ceux qui estoient avec luy, sçachās par lesdits prisonniers que dedans la ville & forteresse dudit Crotoy auoit demouré peu de gens de deffence, rassemblerent de

rechef, plusieurs hommes de guerre sur la marche à l'enuiron, & les mena loger deuant ladicte ville : & au bout de quatre ou cinq iours ensuiuans, les feit assaillir, laquelle fut prinse d'assault à petit dommage de ses gens, & ceux qui estoient dedans la ville, se retrahirent dedans le chastel, deuant lequel se logerent les dessusdits. Et feirent dresser aucuns engins contre iceluy qui petit ou neant le dommagerent, car il estoit excellentement fort. Et apres qu'iceluy Seneschal eut là esté certaine espace de temps, voyant qu'il estoit mal possible d'icelle forteresse conquerre se deslogea, & feit abbatre & demolir la fortification de ladicte ville. Si se retrahit avec les siens és lieux dont ils estoient venus, & emporterent les biens qu'ils auoient conquis en ladicte ville. En apres iceux Anglois du Crotoy auoient deux basteaux nommez Gabannes : par le moyen desquels ils traualloient souuent ceux d'Abbeuille, & par especial les pescheurs : si enuoyerent les dessusdits d'Abbeuille de nuit aucuns de leurs gens à tout vn batel assez pres du Crotoy. Et en y eut aucuns qui en nageant, allerent attacher agrappes de fer par dedans l'eaüe aux basteaux dessusdits : ausquelles agrappes y auoit de bien longues cordelles, par lesquelles cordelles iceux nauires furent tirez dehors & amenez audit lieu d'Abbeuille, dont les Anglois furent mallement troublez.

Comment Humfroy Duc de Clocestre arriua à Calais à tout grand nombre de gens d'armes, & entra en Flandres & en Artois & és autres pais du Duc de Bourgongne où il feit moult de dommages.



Après que le Duc de Bourgongne & les Flamens se furent deslogez de deuant Calais, sicomme dit est ailleurs, arriua dedans briefs iours apres ensuiuans le Duc de Clocestre au haure de la dessusdicte ville de Calais à tout dix mille combattans Anglois ou enuiron : & venoient en intention de combattre ledit Duc de Bourgongne & toute sa puissance, s'ils l'eussent trouué : & pourtant qu'il estoit party, se mit à chemin pour aller vers Grauelines. Et de là se tira en Flandres, & passa par plusieurs gros villages comme Poperniche, Bailleul & plusieurs autres : lesquels il desola par feu & plusieurs faulxbourgs de villes, dont par tout ne trouuoit gueres de deffence : mais tout le monde s'en fuyoit deuant luy, & nuls Flamens ou peu ne l'osoient attendre, & enuoya grand proye de bestail & d'autres biens : si y feirent de moult grans dommages, sans perdre de leurs gens ou bien peu : mais ils endurerent grand faim par faute de pain. Si passerent le Neuf-chastel & ardirent Rimesture & Valon-chappelle. Et puis entrerent en Artois, & allerent à Arques & Blandesques, là où ils feirent des escarmouches : mais ils bouterent les feux par tous les lieux où ils peurent aduenir. Et passerent par empres la iustice de S. Omer, & par tout en ses villages à l'enuiron ils feirent moult de dommages, & descendirent autour de Tournehin, Esprelecques & Bredenarde, là où ils feirent escarmouches des capitaines des chasteaux à l'enuiron. Et Cavvart & autres compagnons de l'Angle y furent blecez, qui par force en rebouterent hors de leurs villages & d'autres de leurs chasteaux : dont ils furent en icelles marches & autour d'Ardre plus reboutez : & y eut plus de gens blecez que par tout Flandres, où ils auoient esté. Et se retrahirent vers Guisnes & Calais, pource que plusieurs de
leurs

leurs gens prindrent maladies par necessité de pain : dont ils n'auoient point à leur plaisir : dont aucunes bonnes femmes qui leur en donnoient sauuerēt leurs maisons : & aussi gaignerent en d'aucuns lieux de bon bestail en grand nombre, qu'ils amenoient de Flandres dont les conducteurs n'en pouoient point bien venir à chief de les conduire, pource qu'en aucuns lieux ne trouuoient point d'eau pour les abruuer, dont elles fespertoient : & ceux qui pensoient à les retourner, estoient surprins souuentefois de leurs aduersaires quand ils fessongnoient trop de l'auantgarde & de la bataille. Et en ce temps messire Thomas Kiriel & le seigneur de Faulquemberge assemblerēt au Neuf-chastel d'Incourt enuiron mille combattans, lesquels ils menerent passer la riuere de Somme à la Blanche-tache, & allerent loger à Forest-Monstier : & de là alla à Broye sur la riuere d'Authie, où ils furent quatre iours : & prindrent le chastel d'assault, qui n'estoit point gramment fort ne de grand valleur, & appartenoit au Vidame de Amiens. Si y furent morts vne partie des deffendeurs & cinq ou six des assailans : pour la prinse duquel le païs fut en grand effroy, doubtant que les Anglois ne se voulsissent là loger : car pour ce temps y auoit bien petite prouision quant à la garde du païs, mais les Anglois auoient trouué en icelle ville & en plusieurs autres qu'ils auoient courues & prins des biens tresslargement & grand foison de prisonniers, à tout lesquels ils s'en retournerent audit passage de là Blanche-tache par où ils estoient venuz. Et de là en leurs garnisons sans faire perte de leurs gens qui face à escrire. Et feirent pour iceluy voyage de grans dommages ou païs de leurs ennemis & aduersaires.

Comment les Flamens se remeirent en armes depuis qu'ils furent retournez de Calais en leurs villes :



Pres que les communes de Flandres furent rentrées dedans leurs villes, comme dit est dessus, leur vindrent dedans briefs iours ensuiuans nouvelles, qu'une grand foison de nauires d'Angleterre estoient arriüées deuers Septentrion sur la marche de Flandres entour Bielinghe, ayans intention d'entrer ou païs : & pource de rechef les bonnes villes remanderent toutes leurs gens de plat païs, & se remeirent en armes à toute puissance, & allerent hastiuement sans grand charroy deuers Breuelier, & se logerent sur la mer à l'encontre dudit nauire d'Angleterre qui estoit là enuiron. Et estoit ce nauire là pour occuper & donner empeschement à ceux du païs, affin qu'ils ne se retrahissent deuers l'ost du Duc de Cloestre, qui estoit en la marche de Poperinche, & Bailleul : lequel nauire l'auoit là mené & n'y estoit pour lors dedans que les mariniers, & aucun peu de gens pour le garder : pourquoy ils n'auoient mie volenté de prendre port pour entrer oudit païs. Si se departirent en assez briefs iours ensuiuans, & retournerent à Calais. Apres laquelle retraicte & departement lesdits Flamens se retrahirent chacune compagnie en leurs places. Mais les Gantois qui bien scauoient, qu'on leur bailloit là plus grand charge du departement de Calais qu'à tous les autres, dont ils estoient tres malcontents, ne vouloient mettre ius leurs armes. Si contendoient à faire de grans nouuelletez, & estoient en moult grand discord l'un contre l'autre : parquoy il conuint que leur Prince y allast : lequel là venu luy feirent bailler plu-

seurs articles de remonstrances : desquelles en y auoit aucunes qui vouloient sçauoir pourquoy le siege n'auoit esté mis par mer deuât Calais cōme par terre, sicomme il auoit esté conclud. Et aussi pour qu'elle raison le nauire d'Angleterre n'auoit esté ars comme on auoit ordonné. A quoy on leur fait responce de par le Duc de Bourgogne, qu'au siege par mer il leur estoit impossible, comme bien sçauoient les mariniers à ce cognoissans que nauire y sceust arrester par fortune de mer, sans peril d'estre bouté forciblement par deuers la terre en diuers lieux en la subiection de ses ennemis. Et avecques ce les Hollandois qui luy auoient promis vne ayde & accordée pour fournir ledit nauire, luy auoient faillly de promesse. Et au regard du nauire d'Angleterre qui n'auoit point esté bruslé, les gens & vaisseaux qui auoient à ce esté ordonnez à l'Escluse : & pource faire n'auoient nullement eu vent propice pour y aller, mais leur auoit tousiours esté contraire. Et quant à plusieurs autres points qu'ils requeroient : c'est à sçauoir d'auoir trois capitaines pour gouverner la ville de Gand, pour faire procession par le païs à main armée de garnir les forteresses des gens natifs du païs de Flā-dres, d'appaiser le discord d'entre ceux de Bruges & de l'Escluse, & de plusieurs autres besongnes requises par eux : leur fut par iceluy Duc faicte si bonne & raisonnable responce, qu'ils furent assez contens de luy & se retrahirent ceux qui estoient armez ou marché des vendredis en grand multitude en leurs maisons : & laisserent leurs armes, jaçoit ce qu'ils eussent esté fort esmeuz de premiere venue. Et auoient aux archiers de leur Prince fait mettre ius leurs bastons, qu'ils portoient apres luy, disans qu'ils estoient fors assez pour le garder. En apres furent banniz de Gand messire Rollant de Haultekaerque, messire Colard de Cō-munes, messire Gilles de la Voustine, Enguerran Auvviel & Jean Daudain, pour ce qu'ils ne s'estoient remonstrez comme bourgeois ainsi comme les autres, quand il auoit esté publié : & escriuirent lesdits Gantois à ceux de leur chastellenie, que qui pourroit prendre l'un des dessusdits banniz & le mettre en leurs mains, il auroit pour son salaire trois cens liures tournois, avecques raisonnables despens. Et depuis furent faictes plusieurs ordonnances pour la garde & deffence du païs. Si furent commis plusieurs capitaines : desquels le seigneur d'Estrenhuse fut estably capitaine, le seigneur de Communes à Gand, messire Girard de Tournay à Audenarde, messire Girard de Gystelles à Courtray : & pareillement furent commis par toutes les autres villes aucuns nobles & gens de guerre selon l'estat d'icelles, tant selon les frontieres vers Calais comme sur la mer & ailleurs. En outre fut publié que nul ne se partit du païs pour cause de la guerre, & sur grande amende : & que chacun se pourueust & garnist d'armes selon son estat & puissance. Et aussi que toutes bonnes villes & forteresses fussent réparées & fournies de viures & habillemens de guerre. Et avecques ce que tous fossez & barrieres fussent visitées & reedifiées és lieux & és places accoustumez, & tout aux despens du païs, & ceux dessous qui les reedifications se deuoit faire. En apres pour mieux faire que laisser, conuint que le Duc dessusdit dist de sa propre bouche aux Gantois qu'il estoit bien content d'eux pour la departie de deuant Calais, & qu'ils s'en estoient retournez par sa licence & ordonnance : car c'estoit tout leur desir & affection que d'en estre excusé, pource qu'ils sçauoient & cognoissoient bien qu'ils s'en estoient partiz trop honteusement.

fement. Et quand toutes ces besongnes dessusdictes furent ainsi remises en reigle, comme dit est, ledit Duc s'en retourna à l'Isle : & lors vindrent deuers luy le seigneur de Chagny & aucuns autres nobles & vaillans hommes, qui amenèrent des parties de Bourgongne enuiron quatre cens combattās qui furent mis en garnison sur les frontieres de Boulenois. Et puis apres brief ensuiuant vindrent & arriuerent les seigneurs d'Ansy & de Vvarembon à tout encores quatre cens combattans Sauoisien : lesquels adommagerent moult les paÿs d'Artois, Cambresis vers Tournay. Et puis apres les mena le seigneur de Vvarembon en garnison à Ponthois, là où ils furent grande espace de temps. Si estoient lors par toutes les parties du Royaume de France les Eglises & le poure peuple oppressé & trauaillé, à l'occasion de la guerre & n'auoient comme nuls deffendeurs. Et nonobstant la paix d'Arras faicte, les François & Bourgongnons vers les paÿs & marches de Beauuoisis, Vermendois, Santhois, Laonnois, Champaigne & Rethelois faisoient moult souuent de grandes entreprinſes les vns sur les autres, & prenoient querelles non raisonnables l'un contre l'autre. Pourquoy il aduenoit moult de fois que les paÿs dessusdits tant d'un costé comme d'autre estoient couruz & pillez, & auoient autant ou plus à souffrir comme parauant là dessusdictē paix d'Arras. Si n'y pouoient les pources laboureurs mettre autre prouision, sinon de crier miserablement à Dieu leur createur vengeance. Et qui pis estoit quand ils obtenoient aucun faufconduit d'aucuns capitaines peu en estoit entretenu, mesmement tout d'un party. Et entre-temps que ces besongnes se faisoient messire Iean de Hornes Seneschal de Brabant, qui auoit eu la charge avecques le commandeur de la Morée de conduire le nauire par mer & aller deuant Calais quand le Duc de Bourgongne y estoit, fut rencontré par aucuns Flamens sur les dunes de la mer, ainsi qu'il alloit à ses affaires à petite compaignie : lesquels le meirent à mort dont ledit Duc de Bourgongne eut au cueur tresgrand desplaissance. Et d'autre part apres que ledit Duc eut rappaisez les Gantois, comme dit est cy dessus : & qu'il eut entendu que toutes les communes de sa Comté fussent bien vnies : si s'esmeurent les Brugelins en tresgrand nombre pour aller assieger l'Escluse, & se tindrent en armes sur le marché par moult long temps. Et entre-temps meirent à mort l'Escontecte de la ville, qui estoit vn des officiers du Prince nommé Vauſtre d'Estembourg : & fut pource qu'il ne vouloit point aller en armes sur le marché avecques le commun, où ils furent bien six sepmaines, & estoient les capitaines Pietre de Bourgrane & Cristofle Mynere. Et y eut vn nommé Georges Vaudeberques qui feit leuer la Duchesse & son fils de son chariot, pour querir ceux de dedans : laquelle Duchesse pour lors y estoit & l'arrestèrent. Et puis apres quand elle se departit luy ostèrent de son chariot la femme de messire Iean de Hornes, dont icelle Duchesse fut moult troublée : mais elle n'en peut auoir autre chose. Si estoient avecques elles messire Guillaume & messire Simon de Lalaing : toutesfois par certains moyens qui depuis se feirent entre leur Prince & eux se retrahirent en leurs hostels, & leur pardonna pour celle fois leurs offences & malefices, pource qu'il auoit plusieurs grans affaires vers eux.

Comment la Hire print la ville & forteresse de Soissons & autres matieres.

EN ce mesme temps fut prinse d'emblée là ville & forteresse de Soissons : de laquelle estoit capitaine Guy de Roye pour messire Jean de Luxembourg, qui point n'auoit fait de serment au Roy Charles de France à la paix d'Arras, ainsi comme auoient fait les autres seigneurs & capitaines tenans le party du Duc de Bourgogne, comme dit est cy dessus. Et pourtant les François le tenoient pour leur ennemy, jaçoit ce qu'il eust obtenu du Roy mandement durant iusques à certain iour, pour auoir aduis de faire iceluy serment : lequel Roy deffendit à ses gens que dedans iceluy iour on ne leur fait point de guerre, moyennant aussi que luy & les siens n'en feroient à luy ne aux siens. Neantmoins quand il vint à la cognoissance dudit de Luxembourg qu'on auoit prins sur luy icelle ville & forteresse de Soissons, qui en la plus grand partie appartenoit heritablement à sa belle fille Ieanne de Bar Comtesse de saint Pol, il le print tresmal en gré. Et pourueut & garnit aucunes de ses forteresses de gens de guerre pour resister à telles & pareilles entreprinse. Et d'autre part le dessusdit Guy de Roye qui tenoit le chastel de Maicampre entre Chargny & Noyon, y meit grand garnison, & commença à mener forte guerre à la Hire & aux pays de Soissonnois, Laonnois & autres villes tenans le party du Roy Charles : & pareillement fait le Roy Charles par la Hire & ses alliez aux bien vueillans du dessus nommé messire Jean de Luxembourg. Et par ainsi tous les pays autour d'eux furent moult trauaillez & oppressez tant d'un costé comme d'autre. Apres que le Duc d'Iorth eut conquis la ville de Feschau, comme dit est, & que Jean d'Estouteuille l'eut rendue fut depuis reprise des François sur lesdits Anglois. Et en ce mesmes temps le Duc d'Iorth dessusdit conquist par continuation de siege saint Germain sur Cailly. Si furent penduz les François leans estans iusques au nombre de douze ou enuiron. Et pareillement reconquist Fontaines, le Bourg, Blainuille, Preaux, l'Islebonne, Tancarville & autres plusieurs fortes places & villes : dont la plus grand partie furent desolées & ruées ius par lesdits Anglois : durant lequel temps iceux Anglois continuoient à degaster les viures autour de Harfleur, sur intention de l'assieger au plus tost qu'ils pourroient par aucune bonne maniere,

Comment la Duchesse de Bethfort seur au Comte de saint Pol se remaria de sa Franche voulenté. Et comment le Roy Charles de Cecille traicta avec le Duc de Bourgogne à cause de sa deliurance. Et comment les Anglois reprindrent la ville de Ponthoise.

EN l'an dessusdit la Duchesse de Bethfort seur au Comte de S. Pol, se remaria de sa franche voulenté à un cheualier d'Angleterre nommé messire Richard d'Ondeuille, lequel estoit ieune homme moult bel & bien formé de sa personne : mais au regard de lignage, il n'estoit point pareil à son premier mary le Regent n'à elle. Si en fut Loys de Luxembourg Archeuesque de Rouen & autres ses prochains amis aucunement mal contens : mais ils n'en peurent oncques auoir autre chose. Et apres enuiron le mois de Nouembre laqueline de Bauiere qui estoit espouse Franche de Borselle : apres que par long temps elle eut jeu en son liect de maladie langoureuse alla de vie à trespas. Si succeda le Duc de Bourgogne en toutes ses seigneuries.

En

En ce mesme temps vers la saint Andrieu vindrent deuers ledit Duc de Bourgongne à l'Isle en Flandres, où il tenoit son estat le Roy de Cecille Duc d'Anjou, le Duc de Bourbon, le Connestable de France, le grand Châcellier de France & plusieurs autres grans seigneurs & notables Princes : lesquels il receut & festoya treshonorablement. Et apres furent les traictez ouuers d'entre le Roy Charles de Cecille dessus nommé, & le Duc de Bourgongne touchant la deliurance de sa prison dont en autre lieu est faicte mention: car encores n'estoit sa foy acquitée pour sa prinse: mais estoient aucuns de ses enfans demourez hostagiers pour luy au pays de Bourgongne, lesquels traictez vindrent en fin à conclusion: moyennant que presentement le dessusdit Duc de Bourgongne eut la possession de la terre & chastel appartenant à celuy Roy, laquelle estoit moult bone & profitable. Et auecques ce promet à payer certaine somme de deniers: pour la seureté de laquelle il bailla en hostage en ses Duchez de Bar & de Lorraine quatre bonnes villes & forteresses: c'est à sçauoir Neuf-chastel en Lorraine, & Clermont en Argonne, & Princhy & Louy, que ledit Roy deuoit baillez quand requis en seroit. Esquelles villes & forteresses le dessusdit Duc de Bourgongne meit garnison & capitaines de par luy. Et par ainsi le Roy dessusdit fut acquitté de sa foy & r'eut ses enfans: car à present ne furent baillez en la main dudit Duc que les deux enfans premiers, & eut seureté par promesse d'auoir les deux autres se fauté de payement y auoit. Et à ce faire pour les baillez s'obligerent auec ledit Roy messire Collard de Saussy & Jean de Chambly. Et apres toutes ces besongnes accomplies (comme dit est) ledit Connestable de France traicta auec messire Jean de Luxembourg qui estoit audit lieu de l'Isle, que la guerre d'entre luy & la Hire pour la prinse de Soyssons cesseroit sur forme d'appointement: & si fut audit messire Jean de Luxembourg ralongé son iour de faire serment au Roy de France iusques au iour S. Jean Baptiste ensuyuant, ou de luy declairer parcial, par tel si qu'il promet non faire guerre durant le terme dessusdit: ce pendant Guillaume de Flauy qui par le Connestable de France auoit esté debouté de la ville de Compiengne, trouua maniere de r'entrer dedans à tout grand foison de gens de guerre. Si le reprint sur ceux que ledit Connestable de France y auoit commis. Et ce fait le tint long temps depuis & du consentement du Roy Charles. Nonobstant que iceluy Connestable feit depuis de grans diligences de le r'auoir. Item en ce mesme temps reprindrent les Anglois la ville de Ponthoyse d'emblée à vn point du iour: dedans laquelle estoient en garnison les seigneurs de l'Isle-Adam & de Varenbon, auecques eux enuiron quatre cens combattans: lesquels en la plus grand partie se sauuerent par fuite en delaisant leurs biens. Pour laquelle prinse l'Isle de France & le pays à l'enuiron furent de rechef fort troublez, car iceux Anglois y meirent vne très grande & forte garnison de leurs gens, lesquels coururent tressouuent iusques aux portes de Paris.

Comment le Roy d'Escoce fut meurdry par nuict en sa chambre par le Comte d'Atelles son oncle & autres matieres.



V mois dessusdit aduint vne tresgrande & merueilleuse cruauté ou royaume d'Escocce: car le Roy d'iceluy pays, lequel estoit à S. Iean seant sur la riuere de Thay au milieu de son royaume: & là seiournoit & tenoit son estat en vne abbaye de Iacobins au dehors d'icelle ville, & fut là espié par aucuns de ses hayneurs. Et estoit le chef & capitaine vn sien oncle nommé le Comte d'Athelles: si vint le second mercredy de Karefme qu'il estoit ieusne des quatre temps, accompagné de trente hommes ou environ iusques à la chambre du Roy, qui de riens ne se doubtoit vne heure apres minuiet. Si rompirent & despecerent l'huis de ladicte chambre, & entrerent dedans: & là meirent ledit Roy à mort cruellement, en luy faisant plusieurs playes iusques au nombre de trente ou au dessus, dont il en y auoit aucunes adressées droit à son cuer. Durant laquelle cruauté la Royne sa femme seur au Comte de Sommerfet d'Angleterre, pour le cuider rescourre & le preseruer de cest inconuenient, fut naurée en deux lieux moult villainement par aucuns d'iceux faiseurs: & ce fait se partirent de là hastiuement pour eux mettre à garant & à sauueté. Et lors par le cry de la dessusdicte Royne comme par autres de ses gés, fut icelle besongne tantost diuulguée & prononcée, tant en l'hostel comme en ladicte ville. Si s'assemblerent en tresgrand nombre ceux de sondit hostel & de la ville: & vindrent en la chambre du Roy, où ils trouuerent ledit Roy meurdry trespiteusement, comme dit est dessus, & la Royne naurée: dont ils eurent au cuer tresgrand tristesse, & en feirent moult grans douleurs & lamentatiōs: & le lendemain fut mis en terre tressolemnellement aux Chartreux. Et tantost apres ensuiuant furent mandez les nobles & grans seigneurs du royaume d'Escocce: lesquels conclurent tous ensemble avecques ladicte Royne, qu'iceux homicides fussent poursuiuis en tresgrand diligence: laquelle conclusion fut mise à execution & en fin furent tous prins & mis à mort par diuers & merueilleux tourmens: c'est à sçauoir ledit Comte d'Athelles oncle du Roy d'Escocce qui estoit le principal, eut le ventre ouuert, & luy osta on les boyaux hors: & puis furent ars en vn feu en sa presence, & puis fut escartellé: & furent mis les quartiers au dehors des quatre plus puissantes villes d'iceluy royaume d'Escocce: vn nommé Robert Stecinuart qui estoit vn des principaux faiseurs, fut pendu à vn gibet & apres escartellé: Robert de Gresine fut mis sur vne charrette, où il y auoit vn gibet fait au dessus tout propice, auquel on auoit attaché l'vne de ses mains: c'est à sçauoir celle dont il auoit feru ledit Roy d'Escocce, & en cest estat fut mené par la ville en plusieurs ruës. Et environ luy auoit trois executeurs de Iustice, qui luy lanceoient les fers tous chaulx parmy les cuisses & autres parties de son corps, & apres fut escartellé. Et les autres chacun endroit soy furēt tourmentez treshorriblement. Et fut ceste iustice toute accomplie en dedans les quarante iours apres la mort du dessusdit Roy d'Escocce. Et la cause pourquoy ledit Comte feit ceste cruauté à sondit nepueu le Roy d'Escocce, fut pource que apres qu'iceluy Roy fut retourné d'Angleterre où il auoit esté long temps prisonnier, comme il est declairé en mon premier liure: & il fut retourné en son royaume d'Escocce, il feit de tresgrandes iustices de plusieurs grans seigneurs tant de son sang comme d'autres, qui auoient eu le gouuernement de son royaume durant ladicte prison: & n'auoient point fait leur deuoir selon son vouloir

loir de le deliurer de la dessusdicte prison . Entre lesquels en auoit fait executer d'aucuns qui estoient moult prochains audit Comte d'Athelles: & pourtant jacoit ce que deuant le iour dudit homicide, il fut vn des plus prochains & plus feables dudit Roy: neantmoins luy auoit de long temps gardée ceste mauuaise pensée & voulenté. Laquelle en fin il meit à execution comme vous auez ouy cy dessus. Lequel Roy d'Escocce auoit vn sien fils aagé de douze ans ou enuiron, lequel par l'auctorité & du consentement des trois estats du paÿs fut prestement esleu & esleué à Roy d'Escocce . Et fut mis à gouvernement d'un moult notable cheualier nommé messire Guillaume Criston, lequel le gouuernoit des le vivant du Roy son pere . Et auoit iceluy Roy nouuel la moitié du visaige droit à ligne vermeil, & l'autre blanc . Et puis apres certain temps ensuiuant ladicte Royne embla audit cheualier le Roy son fils au chastel de Haudebourg, & le meit en autre gouvernement: c'est à sçauoir de grans seigneurs du paÿs: lesquels depuis feirent mourir le Comte de Donglas & vn sien frere appellé David de Combrebant, pource qu'on disoit qu'il auoit fait conspiration contre le ieune Roy pour le deposer de sa seigneurie. Si auoit iceluy ieune Roy six seurs, dont l'aînée estoit mariée au Daulphin fils au Roy de France: & depuis en eut vne le Duc de Bretaigne, & la tierce fut mariée au fils du Duc de Sauoye: la quarte au fils du seigneur de Verre en Hollande. Et apres la Royne d'Escocce mere aux enfans dessusdits se remaria à vn ieune cheualier nommé Iaques Stouart & en eut plusieurs enfans.

OR est ainsi que depuis cest article escript, ie sceuz par approbatiō que ledit Comte d'Athelles principal faeteur de la mort du Roy d'Escocce, fut desuestu tout nud en pur ses brayes en la ville de Edimbourg, & fut tiré par plusieurs fois à vne polie encontremont tout hault, & puis on le laissoit cheoir embas à deux pieds de terre . Et apres fut mis sur vn pillier & couronné d'une couronne de ferardant, en signifiant qu'il estoit le Roy des trahistres . Et le lendemain fut mis sur vne claye tout nud & trainé de rue en rue, & apres fut mis sur vne table, & luy ouurit on le ventre . Et puis furent tous ses boyaux & entrailles tirez hors & iettez en vn feu & ars en sa presence durant sa vie. Et depuis fut son cueur ietté au feu, & apres fut decappité & escartelé: & les quartiers mis aux quatre meilleures & bonnes villes d'iceluy royaume d'Escocce, comme dit est cy dessus. Et auecques ce que lesdits faeteurs moururent par diuers martyres & tormens, furent aussi executez plusieurs de leurs plus prochains amis, qui point n'en estoient coupables . Et n'est point memoire qu'oncques on veit faire aux Chrestiens plus aspre iustice. Item en ce propre tēps le Duc de Bourgongne tint plusieurs estroits conseils, auecques les trois estats de son paÿs pour auoir aduis pour resister contre la descendue & puissance des Anglois ses ennemis, lesquels il attendoit chacun iour. Et fut sur ce conclud de mettre garnisons par toutes les frontieres, tant sur là mer comme ailleurs . Et aussi fut ordonné à tous les nobles de ses paÿs & autres qui sauoient accoustumé armer, qu'ils fussent prests toutes les fois qu'on les manderoit pour aller auecques les capitaines, qui estoient commis pour la garde & deffence des paÿs: c'est à sçauoir en chef Jean de Bourgongne Comte d'Estampes . Et d'autre part durant le temps dessusdit plusieurs citoyens de la ville de Lyon sur le Rosne, se rebellerent

contre les officiers du Roy de France pour & à cause de ce qu'ils estoient trop trauaillez de gabelles & subſides qu'on leuoit ſur eux : mais pour ceſte cauſe en furent pluſieurs executez & les autres emprisonnez par leſdits officiers royaux . Et pareillement aucuns Pariſiens furent accuſez de vouloir reliurer la ville de Paris aux Anglois : entre leſquels en furent decapitez maistre Iaques Iouſſel & maistre Mille des Faulx aduocats en Parlement , & avecques eux vn pourſuiuant , deſquels les biens furent conſiſquez au Roy. En l'an deſſuſdit ſe meirent les Gantois en armes & en tresgrand nombre , & occirent vn nommé Gillebert Paſtetent ſouuerain Doyen des meſtiers , & luy impoſerent qu'il auoit empesché qu'on n'assaillist pas la ville de Calais , quand on fut deuant , & que les engins ietterent peu durant le ſiege , & diſoient que trahison y auoit couru . Si requeroient entre les autres choſes , qu'on ordonnast & publiast que doresnauant on ne brassast plus nulles ſeruoises , & qu'on ne feist nuls autres meſtiers à trois lieües pres de Gand : mais pource que les Eſcheuins & autres officiers de la ville ſe meirent à tout la banniere de France amiablement avecques eux ſur le marché des vendredis , & leur dirent courtoisement qu'ils en auroient aduis & conſeil , & feroient tant qu'ils y pouruoyeroient en telle maniere , qu'ils ſ'en deuroient bien tenir pour contens , par raiſon ils furent tantost r'appaizez : & tantost ſe departirent d'illec & meirent ius leurs armeures paiſiblement . Et apres pluſieurs conſeils tenuz par les Eſcheuins & les Doyens des meſtiers d'icelle ville ſur le fait de ladicte requête , icelle fut declarée eſtre inutile & deſraiſonnable . Et finalement fut conclud & déterminé , qu'on laiſſeroit le païs en l'eſtat où il auoit eſté moult longuement , ſans faire aucune irraiſonnable nouuelleté.

Comment la Hire , Pothon & pluſieurs autres capitaines du Roy de France cuiderent auoir la cité de Roüen . Et comment ils furent assailliz & deſconfits des Anglois , leſquels les ſurprindrent en leurs logis .

EN ceſt an ſ'assemblerent pluſieurs des capitaines du Roy Charles ſur les frontieres de Normandie : c'eſt à ſçauoir la Hire , Pothon de ſaincte Treille , le ſeigneur de Fontaines , Lauagan , Philippe de la Tour & aucuns autres , qui tous enſemble pouoient eſtre de huit cens à mille combattans . Et ſe tirerent tous vers la cité de Roüen , ſur intention d'entrer dedans icelle par le moyen d'aucuns des habitans , qui ſecrettement leur auoient promis d'eux faire ouuerture : mais ceſte entreprinſe fut rompue , par ce que nouuellemēt les Anglois y estoient venus en grand nōbre . Et pource que les deſſuſdits capitaines François à tout leurs gens , qui deſia estoient aſſez pres dudit lieu de Roüen , ſçachans qu'ils ne pouoient acheuer ce pourquoy ils estoient partis pour eux rafreſchir ſe logerent en vn gros village nommé Ris à quatre lieües dudit Roüen . Et ainſi qu'ils estoient là , les ſeigneurs d'Eſcalles , de Thalebot , meſſire Thomas Kiriell & aucuns autres capitaines Anglois à tout mille combattans ou enuiron , qui deſia estoient aduertis de leur venue , les pourſuiurent roidement . Et de fait auant qu'ils ſ'en donnaſſent garde ſinon aſſez peu , vindrent ferir par diuers lieux és logis deſdits François : leſquels furent ſi treſſurpris , qu'ils ne ſe peurent oncques deffendre ne mettre enſemble.

ensemble. Et furent en assez brief terme du tout tournez à desconfiture & mis à desroy. Toutesfois la Hire monta sur vn cheual qui appartenoit à l'un de ses hommes d'armes, & cuida rassembler ses gens: mais ce fut peine perdue. Si se meit à chemin, & fut chassé & poursuiuy assez longue espace de temps, & fut moult grandement nauré & blessé en plusieurs lieux: neantmoins il eschappa par la bonne ayde d'aucuns de ses gens: si y furent prins par ledit seigneur de Fontaines, Allain Geron, Loys de Basle, Allardin de Mensay, Jean de Lon & plusieurs autres nobles hommes & le surplus se sauuerent, & la plus grand partie dedans les bois. Et perdirent la plus grand partie de leurs cheuaux & autres bagues: & quand est au regard des morts, n'en y eut que huict ou dix.

De l'an mille cccc.xxxviij.

Comment ceux de Bruges se mesmeurent contre leur Prince & ses officiers. Et y eut grand debat & grand occision.



AV commencement de cest an se mesmeurent ceux de Bruges contre les officiers du Prince, & occirent assez soubdainement Maurice de Versenaire. Et estoient bourgeois, maistres & Escheuins luy & Jaques son frere: lequel aussi ils occirent, pource qu'ils estoient allez à Arras deuers le Duc de Bourgongne leur Prince. Et furent allez querre par le Conuerseur des maisons, où ils festoient allez mussier, quand ils sceurent qu'on les queroit pour eux occire: desquels les plus notables furent tous en grand doubte. Et ainsi le Duc de Bourgongne quand ce fut venu à sa cognoissance, en fut tresmal content. Et pour plusieurs fois fait grand deliberation avecques ceux de son conseil, pour sçauoir comment on les pourroit punir. Si fut aduisé qu'on enuoyeroit secrettement aucunes personnes feables dedans ladicte ville parler à ceux, qu'on pensoit estre de la partie dudit Duc, pour sçauoir comment on pourroit punir & corriger ceux qui faisoient les lamentations dessusdictes: & ce fait grand partie des plus notables escriuirent secrettement deuers ledit Duc de Bourgongne, en eux excusans des rigueurs dessusdictes: & luy feirent sçauoir que volentiers ayderoient à punir les dessusdits meutemacres. Et adonc sur intention de faire icelle publier, le dessusdit Duc de Bourgongne qui auoit volenté d'aller en Hollande pour aucunes besongnes & affaires, comme on disoit, & passer par Bruges & veoir comment & en quelle maniere on pourroit le mieux besongner sur ceste matiere. Si fait assembler grand nombre de gens d'armes de ses Picards de Picardie sous plusieurs capitaines, au nombre de quatorze cens combattans ou enuiron. Et apres partant de l'Isle à tout iceux & plusieurs notables seigneurs, s'en alla au giste en la ville de Roulers, & le lendemain enuoya ses fourriers deuant en la ville de Bruges: avec lesquels allerent plusieurs des gens d'armes dessusdits, pour prendre les logis, comme il est de coustume. Si entrerent dedans, & se logerent dedans chacun en droit soy où ils pouoient le mieux. Et ledit Duc les suiuit tantost apres à tout ses gens, & auoit d'heure en heure nouvelles de ceux de la ville. Et pour vray la plus grand partie des plus puissans eussent esté bien ioyeux si ceux qui auoient fait les offences (dont dessus est faicte mention) eussent esté

punis car c'estoient gens de petit estat, qui ne desiroient autre chose que de fort entroubler les besongnes pour eux augmenter, & auoir majesté sur les plus riches : & pource quand ils sceurent la venue dudit Duc de Bourgogne, furent en grand doute, & pensoient que ceste assemblée se faisoit pour eux, ce qui estoit verité. Et pourtant se commencerent à assembler par compagnies & en diuers lieux, & en y eut aucuns qui donnerent à entendre que ledit Duc & les Picards venoient là pour les destruire & pour piller la ville. Et adoncques les autres entendans & oyans ces parolles, furent plus que deuant en grand effroy, & farmerent communement & en tresgrand multitude. Et de fait à tout beaux Ribauldekins de guerre se meirent sur le marché, & enuoyerent grand partie de leurs gens à la porte vers Roulers, par où leur Prince deuoit entrer. Et estoit le mercredy des festes de la Penthecouste : & quand ledit Duc fut venu qu'il cuida entrer dedans, il trouua les barrieres fermées & les Brugelins armez & embastonnez : lesquels ne furent point contens de luy laisser entrer sinon à petite compagnie & à simple estat, ce que point ne leur vouloit accorder : ains luy feirent responce que point n'y entreroit si toutes ses gens n'estoient avecques luy. Durant lequel temps y eut plusieurs parlemens par maniere de moyés entre icelles parties. Et estoient lors avecques ledit Duc messire Roland de Hutquerque, & messire Colard de Commynes, que les dessusdits Brugelins auoient tresmal en grace. Et aussi estoient avecques ledit Duc plusieurs autres seigneurs & notables hommes de guerre & de grand auctorité c'est à sçauoir le Comte d'Estampes, le seigneur de l'Isle-Adam, le seigneur de Teruane, le seigneur de Humieres, le seigneur de Haubourdin, le seigneur de Saueuses, le seigneur de Creuecueur, Jaques Kiriell, le seigneur de Linternelle, Pierre de Roubaix & plusieurs autres, qui auoient grand merueilles de veoir les manieres que tenoient iceux Brugelins contre leur Prince. Et y eut d'aucuns qui furent d'opinion qu'on print vne partie de ceux qui estoient venus pour traicter & parler au dehors d'icelles barrieres, & qu'on couppast les hastereaux à ceux qui seroient trouuez coupables des commotions deuantdictes : mais ce propos fut delaisné pour doute qu'ils ne feissent le pareil à ceux qui estoient dedans entrez pour prendre leurs logis : neantmoins apres que lesdictes parties eurent parlementé assez longuement, les vns avec les autres de deux à trois heures fut conclud que ledit Duc y entreroit. Deuant laquelle entrée il garnit la porte & y meit de ses gens. C'est à sçauoir Charles de Rochefort, messire Jean Bastard de Dampierre, Meliades Breton accompagné d'aucuns gentils-hommes, & partie de ses archiers.

A I N S I entra dedans ledit Duc en moult belle ordonnance accompagné de plusieurs seigneurs & autres gens de guerre. Et se commença à mettre bien auant en la ville pour aller descendre à son hostel. Et quand ce vint qu'il y eut dedans de quatre à cinq cens de ses gens, ceux de la ville, qui, comme dit est, estoient à la porte en tresgrand nombre armez & embastonnez, refermerent icelle barriere, & puis la porte & enfermerent les autres dehors. Laquelle chose fut noncée audit Duc qui en fut tresdesplaisant, & feit dire à d'aucuns desdits gouuerneurs que puis qu'on ne luy vouloit laisser ses gens entrer avecques luy, qu'on le remit dehors, à quoy ils s'excuserent aucunement. Et entre-temps le
Duc.

Duc feit mettre en ordonnance vne partie de fes gens ou vieil marché : durant lequel temps s'esmeut debat entre les parties, & commēcerent à tirer & à combattre l'un contre l'autre en plusieurs lieux . Et adonc fut confeillé iceluy Duc qu'il se retrahist vers icelle porte pour la reconquerre affin qu'il peut auoir fes gens avecques luy, & retourner dehors si befoing luy en estoit . Laquelle chose il feit , & enuoya par vne rue vne partie de fes gens sur les fossez , pour enuoyer ceux qui estoient deuant ladicte porte au trauers , & luy en sa personne alla par la grand rue . Si escrierent leurs ennemis tous à vne voix , & les enuahirent en moult grand bruit : mais sans delay ces Brugelins si se departirent & laisserent celle porte , si furent aucunement poursuiuis & les aucuns mis à mort . Et adoncques le seigneur de l'Isle-Adam qui s'estoit mis à pied avecques aucuns archiers qui point ne faisoient bien leur deuoir à son plaisir , se bouta si auant pour rebouter les dessusdits , pensant que les autres le suiussent de pres , qui riens n'en faisoient si non assez doubtablement . Si fut incontinent enuahy de plusieurs Brugelins : lequel auant qu'il peust auoir aucun secours fut mis à mort , & luy arracherent l'ordre de la toison qu'il portoit . Pour la mort duquel ledit Duc & generalmente tous ceux qui estoient avecques luy , auoient au cuer tresgrand tristesse : mais ils n'en peurent auoir autre chose . Et n'y auoit celuy qui ne fut en tresgrande doubte de sa vie , pource qu'ils sentoient icelles communes estre en tresgrand multitude tous en armes , prests pour les enuahir de toutes parts, & n'estoient qu'un petit de gens au regard d'iceux . Neantmoins ledit Duc de sa personne fut tousiours assez reconforté . Et auoit grand regret qu'il ne pouoit auoir ses gens qui estoient dehors pour combattre lesdits Brugelins , lesquels il veoit ainsi esmeuz : & d'autre part ses gens de dedans estoient en grand doubte , & ceux qui estoient dehors auoient tresgrand desplaisance : car ils sçauoient par leurs gens , qui estoient sur ladicte porte le meschef & tribulation où estoit leur Prince & leurs compagnons . Et avecques ce veirent iusques à huit ou dix d'iceux leurs compagnons , lesquels furent achassez sur les fossez par les Brugelins , qui eux cuider sauuer saillirent és fossez & furent noyez .

Si dura ceste mortelle tempeste moult cruelle dedans icelle ville de Bruges , par l'espace d'heure & demie ou enuiron : & apres pource que ledit Duc fut aduerty qu'ils s'apprestoient tous aual la ville à grand puissance pour là venir à eux combattre à tout grand nombre de ribaudekins , artilleries & autres habillemens de guerre , à quoy nullement n'eust sceu resister : luy fut confeillé de rechef qu'il se meit en tous perils & en peine de reconquerre la porte deuantdicte , où ses ennemis estoient assemblez . Et lors vint vers eux pour les combattre à tout ce que pour lors pouoit auoir de gens , mais ils se departirent hastiement comme ils auoient fait . Si furent prins les marteaux qui estoient dedans la maison d'un mareschal assez pres de ladicte porte : si leur bailla iceluy mareschal , & en furent tantost rompus les verroux d'icelle porte & les ferrures . Et quand elle fut ouuerte avecques les barrieres , lors issirent ses gens de grand volenté : mais ledit Duc qui estoit monté sur vn moult bon coursier durant toutes ces tribulations dessusdictes , & auoit moult fort esté approché de ses ennemis , demoura sur le derriere en guise de bon pasteur , & se meit à chemin pour retourner en la ville de Roullers , dont il s'estoit party ce propre iour tresennuyeux de

cueur, de ce qu'il veoit les besongnes ainsi tourner sur luy : & par especial de la mort du seigneur de l'Isle Adam dessus nommé & de ses autres gens. Si estoient la plus grand partie de ses autres gens d'armes là estans si effroyez, qu'à grand peine leur pouoit on faire tenir ordonnance au retour dessusdit. Et n'estoient point entrez en icelle ville avec ledit Duc messire Roland de Haultekerque, ne messire Colart de Communes: si furent morts en icelle iournée des gēs du Duc iusques à cēt ou plus, qui tous furēt enterrez en vne fosse au cymetiere de l'hospital, reserué le seigneur de l'Isle Adam qui fut enterré à par luy: & depuis à grād solennité fut remis en l'Eglise de S. Donnast de Bruges. Et si en demoura deux cens prisonniers des gens dudit Prince: desquels le vendredy ensuiuant en y eut trente & deux decapitez, & le surplus eurent leurs vies sauues par les prieres des bonnes gens d'Eglise & des marchans d'estrange païs, qui en feirent treshumble requestes. Et au bout de huit iours ensuiuans, deliurerent à tout leurs bagues tous les familiers dudit Duc de Bourgongne: mais ils feirent escarteller le dessusdit Mareschal dont dessus est faicte mention, qui auoit liuré les marteaux pour ouurir la porte, & se nommoit Iacob Van Ardoyen. Et quant aux Brugelins combattans au Prince, n'en y eut de morts que douze ou enuiron. Et entre lesdits Picards qui furent morts y eut peu de gens de renom, sinon le deuantdit seigneur de l'Isle Adam & vn huissier de salle du Duc de Bourgongne nommé Herman. Et quant est au gouuernement d'iceux Brugelins, ils estoient nuit & iour en armes en tresgrand nombre, tant sur les marches qu'ailleurs. Et brief apres ensuiuant allerent abbatre la maison d'un bourgeois nommé Gerard Reubs. Et quant au regard du Duc de Bourgongne, il s'en alla à Roulers: & de là en la ville de l'Isle où il tint plusieurs cōseils, pour sçauoir par quelle maniere il pourroit mettre en obeïssance iceux Brugelins. Et fut aduisé pour les mieux cōtraindre, qu'on feroit crier par toutes les villes & païs entour d'eux, que nuls ne leur portassent viures sur quanques on doit estre ennemis du Prince. Et ainsi en fut fait dont ils furent fort esmerueillez & en grand doubte: mais pourtant ne laisserent ils point de continuer en ce qu'ils auoient commencé.

Comment le Bourg de la Hire courut, & feit moult de maulx és marches de Peronne, Roye & Montdidier.

EN ce mesme temps le Bourg de la Hire qui se tenoit au chastel de Clermont en Beauuoisis, à tout enuiron de soixante à quatre vingts combattans, dont il trauailloit mallement le païs enuiron, & par especial les chastellenies de Peronne, Roye & Montdidier appartenās au Duc de Bourgongne: & y couroit tressouuent, & en ramenoient à leurs garnisons de grans proyes, tant prisonniers, bestail comme autres biens: nonobstāt la paix d'Arras faicte entre le Roy de France & le Duc de Bourgongne, comme dit est dessus. Et entre les autres vint vn certain iour courre deuant la ville de Roye. Si print & leua le bestail & aucuns biens qu'il peut ataindre, à tout lesquels s'en retourna pour s'en aller deuers le dessusdit lieu de Clermont. Si auoit avec luy gens de plusieurs garnisons, tant de Mortemer appartenans à Guillaume de Flauy, comme d'autres forteresses: de laquelle ville de Roye estoit capitaine de par ledit Duc vn tresvaillant homme d'armes & noble homme nommé

mé Aubert de Folleville: lequel sçachant l'entreprinse dessusdicté, assembla incontinent tout ce qu'il peut auoir de gens de guerre. Et sans delay poursuivit les dessusdits sur intention de rescourre la proye qu'ils emmenoié: si les attaignit vers vn village nommé Boulongne la Grasse, & leur courut sus de grand voulété: mais par auant sa venue auoient mis de leurs gēs en embusche, qui tantost saillirent sur ledit Aubert & les siens. Et finablement pource qu'ils estoient en tresgrand nombre au regard de luy, il fut tantost tourné à desconfiture, & de faict luy coupperent prestement la gorge: & avecques luy furent morts plusieurs tant gentils-hommes comme autres: c'est à sçauoir son nepueu Souldan de la Bretonnerie, Hue de Bazincourt, le Bastard d'Esue, Collard de Picellen, Iagues de la Bruyere, Iean Bazin, Symon le Maire & aucuns autres: & les autres se sauuerent par les bons cheuaux qu'ils auoient. Pour laquelle destrousse, & aussi pour plusieurs autres & assez pareilles entreprinse, le Duc de Bourgogne en estoit tresmal content: & affin d'y resister furent mises esdictes villes de Roie, Peronne & Montdidier plusieurs gens de guerre par le Comte d'Estampes.

Comment plusieurs capitaines Francois au commandement du Roy Charles de France, allerent reconquester plusieurs villes & forteresses que les Anglois tenoient. Et comment ledit Roy propre en sa personne alla deuant la ville de Monstreau fant-Yonne, laquelle il reconquist.

EN ces iours Charles Roy de France conuocqua de plusieurs parties de son Royaume tresgrand nombre de nobles hommes, & des gens de guerre à venir deuers luy à Gien sur Loyre, en intention de recouurer aucunes villes & forteresses que tenoient les Anglois ses aduersaires vers Montargis & sur les marches de Gastinois. Lesquels venus audit lieu de Gien deuers le Roy, avec lequel estoient le Connestable de France, messire Iagues d'Anjou, le Comte de Perdiac, le Comte de Vendosme, le Bastard d'Orleans & autres plusieurs. Si fut conclud par le conseil Royal, que ledit Connestable & le Comte de Perdiac iroient à tout leurs gens d'armes mettre le siege deuant chasteau Landon, que lors tenoient lesdits Anglois. Et comme il fut deliberé, en fut faict: & en brief vindrent deuant & l'environnerent de toutes parts, dont les Anglois furent moult esbahis: car ils estoient bien auant au païs, & auoient petite esperance d'auoir secours & si n'estoient mie fort pourueuz de viures: neantmoins ils monstrerent semblant d'auoir bonne esperance d'eux tenir & deffendre: & jaoit-ce que par ledit Connestable furent sommez d'eux rendre sauf leurs vies, ils feirent responce qu'à ce n'estoient point conseillez de ce faire, & dirent qu'il cousteroit chèrement auant que ce feissent. Toutesfois au troisieme iour furent si fierement & asprement assaillis par lesdits Francois, qu'ils furent prins de force: si y eut la plus grand partie d'eux pendus, & par especial ceux qui furent natifs du Royaume de France, & les autres furent deliurez en payant finance. Et apres les seigneurs dessusdits partās dudit lieu de chasteau Landon, allerent mettre le siege deuant Nemours, lequel se tint environ douze iours: au bout duquel temps ceux de dedans se rendirent sauf leurs vies & leurs biens, & s'en allerent à Monstreau. Et entre-temps messire Gascon de Logus Baillif de Bourges en Berry, & autres capitaines allerent assieger la ville & cha-

steau de Terny que tenoient les dessusdits Anglois : lesquels dedans briebs iours ensuiuans se rendirent moyennant qu'ils sen iroient sauement à tout leurs biens. Et quand ils se partirent de là à tout leur saufconduit, le dessusdit messire Gascon qui estoit monté sur vn bon coursier les conuoya vn petit: mais en le ferant de l'esperon & tournant iceluy coursier cheut dangereusement & se tua le dit cheualier tout mort. Au lieu duquel Poton de S. Treille fut de par le Roy constitué Baillif de Bourges.

TANTOST apres le Roy à tout sa compaignie vint à Gien, à Sens en Bourgogne, & de là à Bray sur Seine: duquel lieu il enuoya deuant Monstreau fault-Yonne, le seigneur de Gaucourt, messire Denys de Saily, Pothon de S. Treille & Bouffac, le Bastard de Beau-manoir & aucuns autres capitaines à tout enuiron seize cens combattans, lesquels se logerent sur vne montaigne vers le chastel sur la Brie. Et deuât iceluy chastel feirent faire vne grosse bastille & puissante, où ils se logerent & fortifierent en grand diligence. Et de l'autre costé vers Gastinois vindrent ledit Connestable, le Comte de Perdiac, le Bastard d'Orleãs, messire Iaques de Chabānes & leurs gens dont dessus est faiete mētion, lesquels se logerēt assez pres de la ville. En apres vindrent le seignr de Valoignes, messire Anselin de la Tour Baillif de Vitry, Regnault Guillaume Baillif de Montargis, lesquels se logerēt dedās l'Isle entre les deux riuieres: & par ainsi ladicte ville & le chastel de Mōstreau fault Yonne furent enuironnez de tous costez par les gens du Roy de Frāce, lesquels feirēt asseoir en plusieurs lieux plusieurs gros engins, dont la muraille fut en assez brief terme tresfort endōmagée. Dedans laquelle ville & chasteau estoit de par le Roy d'Angleterre capitaine general vn nommé Thomas Gerard, & auecques luy Mondo de Monferrant, Mondo de Laufay & plusieurs autres compaignōs de guerre iusques au nōbre de trois ou quatre cēs combattans, lesquels feirent tresgrand resistance contre leurs aduersaires & ennemis selon qu'il leur estoit possible: & auoient grand esperāce d'auoir secours par les capitaines qui gouuernoiet de par le Roy d'Angleterre au paÿs de Normandie, car ainsi leur auoit esté promis: en apres vint le Roy de France dessusdit tresgrandement accompagné de Bray sur Seine audit lieu de Monstreau, & se logea dedans la forte bastille dessusdicte. Si auoit bien auecques luy de six à sept mille combattans, gens de bonne estoffe & tresbien habillez. Et depuis sa venue feit faire de moult grans diligences tant d'approcher ladicte ville comme de faire iecter ses gros engins, & luy mesmes de sa personne y print moult grand trauail. Et en fin au bout de six sepmaines ou enuiron apres iceluy siege mis, fut finablement par le Roy & ses gens ladicte ville prinse d'assault à petite perte des assaillans. Et au regard des assiegez en furent morts de vingt à trente ou enuiron, & autant de prins, desquels la plus grand partie furent penduz. Si entra iceluy Roy assez tost apres dedās. Et pour vray il deffendit qu'on ne mesfeist riens aux bonnes gens de la ville tāt aux hommes comme aux femmes, qui festoient retraits en l'Eglise quand à leurs personnes. Mais quand au regard de leurs biens tout fut prins & pillé comme ville conquise: auquel assault furent faits plusieurs cheualiers: c'est à sçauoir le ieune Comte de Tancarville fils de messire Iaques de Harecourt, Robert de Bethune seigneur de Moreul en brief & aucuns autres. En outre le Roy & grand partie de ses Princes se logerent dedans

dans ladicte ville. Et enuiron quinze iours ensuiuans ceux dudit chastel se rendirent au Roy, par tel si qu'ils s'en iroient sauf leurs vies & leurs biens. Apres laquelle reddition fut constitué capitaine le Bastard d'Orleans, qui le regarnit de ses gens. Et toutes ses besongnes escheuées le dessusdit Roy Charles avecques luy son fils & autres grans & nobles Princes, s'en alla à Meleun, & les gens d'armes par compaignies se tirerent en diuers lieux: mais la plus grand partie allerent vers Paris.

Comment ceux de Bruges isirent par plusieurs fois hors de leur ville & allerent fourrager le plat païs.

QR conuient retourner à parler de ceux de Bruges, lesquels continuerent tousiours en leur mauuaise & folle opinion à l'encontre de leur Prince: & allerent tressouuent par grandes compaignies hors de leur ville fourrager le plat païs, & abbatre les maisons de ceux qu'ils hayoient & tenoient pour leurs ennemis: & entre les autres prindrent le chastel de Coquelaire, que tenoit le Bastard de Bailleul, & y feirent de grans desrois. Et d'autre part quand ils estoient retournez dedans leur ville, ils faisoient souuent de cruelles iustices sur ceux qu'ils sçauoient non estre du tout de leur alliance: & entre les autres feirent decoller de Doyen des Feures, & luy meirent sus qu'il vouloit liurer la ville aux Gantois. Et quand aux puissans & plus notables de la ville, grand partie s'en estoient partis, & allerent en diuers lieux pour doubte des dessusdits. Et apres se meirent sus de trois à quatre mille à tout charroy, engins & habillemens de guerre, & allerent assieger la ville de l'Escluse qu'ils auoient en moult grand hayne: dedans laquelle estoit de par ledit Duc de Bourgogne messire Symon de Lalain avecques certain nombre de combattans. Si y furent par l'espace de vingt & trois iours. Durant lequel temps liurerent plusieurs assaulx à aucunes des portes & barrieres d'icelle ville de l'Escluse: & y furent entre les parties faictes plusieurs escarmouches, ausquelles en y eut grand nombre de morts & de nauré, & par especial desdits Brugelins. Et entre-temps le dessusdit Duc de Bourgogne feit grand assemblée de nobles, & gens de guerre du païs de Picardie & autres lieux de ses seigneuries autour de saint Omer, sur intention d'y aller pour eux combattre. Mais durant le temps dessusdit tant par le moyen des Gantois, qui s'en entremeirent comme pour la doubte de l'assemblée que faisoit ledit Duc, les dessusdits Brugelins se retrahirent en leur ville.

Comment les Anglois reconquirent la ville de Fescamp en Normandie.

UTem en ces iours les Anglois meirent le siege deuant la ville de Fescamp en Normandie, & y furēt enuiron trois mois: en la fin desquels ceux de dedās se rendirent, moyennāt que de là se departiroient sauf leurs corps & leurs biens. Mais tost en assez briefs iours ensuiuans fut reconquise par les François. Si y auoit pour lors tresgrand guerre par toute la Normandie, & se faisoient tressouuent de diuerses rencontres entre les parties: & entre les autres en y eut vne dont il faut faire mention: C'est à sçauoir que la Hire, Pothon de sainte Treille, le seigneur de Fontaines, l'Auagan & autres capitaines se meirent ensemble vn certain iour, & allerent enuiron à tout

six cens combattans courre deuers Roüen, sur intention de faire aucune bonne besongne sur iceux Anglois de Normandie leurs aduersaires: Mais ils faillirent, de ce qu'ils auoient entrepris. Et pourtant se prindrent à retourner vers Beauuais. Et pource qu'eux & leurs cheuaux estoient fort trauaillez, se logerent à vn village nommé Ris pour eux repaistre & rafreschir: auquel logis vint assez tost apres messire Thomas Kiriell & aucuns autres capitaines Anglois: lesquels vigoureulement leur coururent sus, deuant qu'ils peussent estre assemblez, & en fin les desconfirent en peu de dommage de leurs gens. Et y fut prins ledit seigneur de Fontaines, Alardin de Moussay & plusieurs autres. Et la Hire par le bon cheual qu'il auoit se sauua à grand peine, & fut nauré en plusieurs & diuers lieux. Et pareillement se sauua Pothon de sainte Treille & aucuns autres avecques eux: & par especial perdirent la plus grand partie de leurs cheuaux & harnois. Apres laquelle destrouffe les Anglois s'en retournerēt à Roüen tresioyeux de leur bonne fortune: Mais ce nonobstant ils reperdirent tantost ladicte ville de Fescamp, comme cy deuant est declairé.

Comment le seigneur d'Offemont print la Hire prisonnier, où il ioüoit à la paulme en la cité de Beauuais.

DVrant les besongnes dessusdictes le seigneur d'Offemont, qui point encores n'auoit oublié la mauuaise compagnie que la Hire luy auoit fait: lequel l'auoit prins & rançonné à Clermôt en Beauuoisis, comme en autre lieu est plus à plain declairé, assemblea enuiron six vingts combattans: desquels estoit le seigneur de Moÿ son beau frere, le Bastard de Chauny & plusieurs autres capitaines: lesquels il mena par moyen dudit seigneur de Moÿ dedans la cité de Beauuais, dont la Hire estoit capitaine, & à ceste heure ioüoit à la paulme en la court d'une hostellerie, où estoit l'enseigne S. Martin. Ledit seigneur d'Offemont à tout ses gens y alla tout droit, car bien le sçauoit par ses espies estre à iceluy ieu. Mais la Hire qui en fut aduert y aucunement s'en alla mussier sous vne mangeoire de cheuaux, où en fin fut trouué & prins par les gens dudit seigneur d'Offemont, avecques luy vn nommé Perret de Salle-noire. Si furent prestement mōtez à cheual derriere deux hommes, & leur fut dit que s'ils faisoient semblant de crier ne d'esmouuoir quelque noise pour les rescourre, on les mettroit incontinent à mort. Et lors sans arrester furent amenez à trauers de la ville hors de la porte. Mais aucuns de ses gens & de la communauté s'assemblerent & poursuuiurent pour eux cuider deliurer, & y eut fait aucunes escarmouches de traict entre icelles parties. Neantmoins ils furent emmenez iusques au chastel de Moÿ, & de là à Meulan, où ils furent aucune espace de temps: & depuis furent amenez au chastel d'Ancre qui estoit au dessusdit seigneur d'Offemont, & là furent certaine espace de temps prisonniers. Pour laquelle assemblée & entreprinse le Roy de France & plusieurs de ses capitaines n'estoient mie bien contens, pourtant qu'on l'estoit ainsi allé querir es païs du Roy: mais la plus grand partie de ses nobles hommes & seigneurs dessusdits, disoient auoir fait à iceluy seigneur ce seruice à cause de lignaige & appartenance. Et depuis le Roy en rescriuit bien destroictement au Duc de Bourgogne en faueur de la Hire, affin qu'il meit moyen à sa deliurance, & aussi qu'on

qu'on ne luy feit aucune griefueté de sa personne. Et en fin y fut tant besongné que ledit Duc de Bourgongne en partie par contraincte, trouua moyens qu'iceluy & sa partie se soubsmeirent de leur discord sur luy & son conseil chacun d'eux ouÿ en ses raisons. Et se tindrent plusieurs iournées en icelle ville de Douay present ledit Duc: lequel Duc en conclusion tant pour complaire au Roy, qui moult acertes luy en auoit escrit (comme dit est) comme pource qu'il fut trouué que la prinse n'estoit belle ne bonne ne honneste: mais du tout desraisonnable, les meit d'accord & eut ledit seigneur d'Offemont aucunes recompensations pour ses interests, non mie à comparer à la finance qu'il auoit payée, & si luy rendit le chastel de Cleremont, & ledit Perret paya mille escus pour sa rançon. Et par ainsi furent icelles parties rappaisées & accordées de toutes les questions qu'ils auoient eu ensemble. Esquels iours furent accordez la Hire avecques messire Iean de Luxembourg, lequel le hayoit mortellemēt, tant pour la prinse de Soissons comme pour autres griefs & dommages qu'il luy auoit faits en ses seigneuries. Et demourerent bons amis l'un avec l'autre, comme ils monstrent les semblans: & tantost apres ladicte Hire retourna deuers le Roy de France, auquel il se loüa grandement de l'honneur & de l'amour que le dessusdit Duc de Bourgongne luy auoit fait en faueur de luy, dont le Roy fut trescontent & luy fait tresbonne chere. Et luy assigna incontinent la plus grād partie de ses fraits & interests, qu'il auoit eu es besongnes dessusdictes. Et pource que ses gens furent aduertis qu'il les conuenoit departir du chastel de Clermōt, allerent reparer vne vieille forteresse nommée Thoys appartenant au seigneur de Creuecueur. Si s'y bouterent en garnison, & cōmencerent de rechief à moult fort trauailler le paÿs deuers Amiens & Picqueigny, & par especial les terres & seigneuries qui auoient aydé à aller querir la Hire leur capitaine, dont dessus est faicte mention. Si estoit l'un des chiefs de ceux qui ledit chastel auoient reparé, & faisant toutes les besongnes dessusdictes un qui s'appelloit Philippe de la Tour.

Comment Charles Roy de France feit sa premiere entrée en la ville de Paris depuis qu'elle fut reduicte en son obeïssance, & des preparations qu'on y feit.

LE mardy douziesme iour de Novembre de cest an, le Roy Charles de France se logea en sa ville de S. Denys. Si estoient en sa compaignie son fils le Daulphin de Viennois, le Cōestable de France, messire Charles d'Anjou, les Comtes de Perdiac & de Vendosme, & le ieune Comte de Tancarville, messire Christofle de Harecourt, le Bastard d'Orleans & autres en tresgrand nombre nobles & grans seigneurs cheualiers & escuyers: & si y estoit la Hire en tresbel & noble appareil. Et de là s'en alla ledit Roy en la cité de Paris, où il n'auoit esté depuis le temps qu'il en auoit esté debouté, quād elle fut prinse du seigneur de l'Isle Adam qui fut en l'an mille quatre cens dixhuiet. Et vindrent au deuāt de luy iusques à la Chappelle le Preuost des Marchans, Escheuins & bourgeois en tresgrand nombre, accompagnez des arbalestriers & archiers de la ville tous vestus de robes pareilles de pers & de vermeil. Et quand ils furent venuz deuant le Roy, ledit Preuost des Marchans luy presenta les clefs de la ville de Paris: & le Roy les bailla en garde au Conne-

stable de France. Si meirent iceux Preuosts & escheuins vn ciel bleu couuert de fleurs de lis d'or, & le porterēt tousiours apres par dessus le chief du Roy. Apres vint le Preuost de Paris accompagné de ses sergens de pied, qui auoient chacū vn chapperon party de vert & de vermeil. Et ensuiuans iceux sergens vindrent les notaires, procureurs, aduocats & commissaires du chastellet. En apres vindrent les personnages des sept pechez mortels, & des sept vertus montez à cheual. Et estoient tous habillez selon leurs proprietiez. Lesquels personnages suiuiēt les seigneurs de Parlement & des requestes. Apres suiuiōient les presidens, & y auoit tresgrand multitude de peuple. Et ainsi alla le Roy tresauctentiquement & tresnoblement accompagné entrer par la porte saint Denys en la ville & cité de Paris. Sur laquelle porte estoit vn escu de France que trois Anglois tenoient esleué: & au dessus dudit escu estoient Anglois chātans. Et au dessous y auoit escrit.

*Tresexcellent Roy & seigneur
Les manans de vostre cité
Vous recoyuent en tout honneur
Et en tresgrande humilité.*

Item au Poncelet auoit vne fontaine, en laquelle y auoit vn pot où estoit vne fleur de lys, qui iectoit bon ypocras, vin & eaüe. Et dedans ladicte fontaine estoient deux Daulphins, & au dessous auoit vne terrasse voultee de fleurs de lys, & dessus ladicte terrasse estoit vn personnage de saint Iean Baptiste, qui monstroït l'*Agnus Dei*, & y auoit anges chantans moult melodieusement. Item deuant la Trinité estoit la passion. C'est à sçauoir comment nostre seigneur fut prins, battu, mis en croix & Iudas qui s'estoit pendu. Et ne parloient riens ceux qui ce faisoient, mais le monstrerent par ieu de mystere. Et furent les manieres bonnes & biens ioüées, & viuement compassionnées & moult piteuses. Item à la seconde porte estoient S. Thomas, S. Denys & S. Maurice, S. Loys de France & S. Geneuiefue au meillieu. Item au Sepulchre estoit cōment nostre seigneur ressuscita, & comment il s'apparut à Marie Magdaleine. Item à S. Katherine en la rue S. Denys estoit le S. Esprit, qui descendoit sur les Apostres. Item deuant le chastellet estoit l'Annonciation, faicte par l'ange aux pastoureux chantans, *Gloria in excelsis Deo*. Et au dessous de la porte estoit le liēt de iustice, la loy diuine, la loy de nature, & la loy humaine. Et à l'autre costé contre la boucherie estoient le iugement, paradis & enfer: & au meillieu estoit saint Michel l'Ange, qui pesoit les ames. Item au pied du grand pont derriere ledit chastellet, estoit le baptesme de nostre Seigneur. Et y estoit sainte Marguerite contrefaicte issant d'un dragon.

Item s'en vint le Roy au portail de nostre Dame de Paris, où il descendit & veit deuant luy l'Vniuersité qui proposa en brief, & audit portail estoient les Prelats: c'est à sçauoir les Archeuesques de Thoulouze & de Sens, & les Euesques de Paris, de Clermont & de saint Mangon lez Montpellier, les Abbez & ministres de saint Denys, de saint Mor, de S. Germain lez Paris, & aussi pareillement de saint Magloire, & de sainte Geneuiefue. Et là feit le Roy le sermēt à l'Euesque de Paris, & puis entra en l'Eglise de nostre Dame: en laquelle estoïēt trois arches comme à Amiens la nuit de l'an, bien plaines de chandelles & de
cire.

cire. Et de là s'en alla le Roy apres qu'il eut faicte son oraison au palais, où il coucha pour celle nuit. Et à son entrée estoient environ huit cens archiers bien habillez, & en moult belle ordonnance: lesquels le Comte d'Angoulesme conduisoit. Et estoient le Roy & le Daulphin armez de plain harnois, reserué leurs chief. Et sur le harnois du Roy estoit vne tourmole couuerte d'orfauerie. Et sur son cheual estoit vn pers veloux tout tissus de grand fleurs de lys d'or moult riche, & battoit iusques à terre. Et auoit vn chanffrain d'acier, sur lequel auoit vn tresbel plumail. Et deuant luy alloit tout au plus pres de sa personne Pothon de sainte Treille, lequel portoit le heaume du Roy sur vn baston appuyé contre la cuisse: lequel heaume estoit couronné d'une moult riche couronne: & sur le meillieu de ladicte couronne auoit vne double fleur de lys. Et menoit son cheual tout à pied vn gentil-homme nommé Jean d'Olon. Et tousiours portoit on le ciel dessusdit par dessus luy. Et apres luy suiuoient les pages qui estoient tresrichement & noblemēt habillez & ouurez d'orfauerie, & leurs cheuaux pareillement. Et vn petit deuant ledit Pothon alloient le Connestable, les Comtes de Vendosme, & de Tancarville & plusieurs autres grans & notables seigneurs moult noblement montez & habillez. Et vn petit ensuiuant le Roy cheuauchoit & ledit Daulphin tout couuert d'orfauerie, luy & son coursier moult noblement, & semblablement ses pages & leurs coursiers. Et estoit accompagné de messire Charles d'Anjou son oncle, & des Comtes de Perdiac & de la Marche. Et tout derriere suiuoit le Bastard d'Orleans armé de plain harnois tout couuert d'orfauerie luy & son cheual. Et auoit vne moult riche escharpe d'or, qui alloit par derriere iusques sur le dos de son cheual: & menoit la bataille du Roy où il y pouoit auoir environ mille lances fleur de gens d'armes, & habillez eux & leurs cheuaux. Et quant aux autres cheualiers & escuyers & gentils-hommes, en y auoit en grand nombre qui estoient eux & leurs cheuaux tous chargez d'orfauerie. Desquels entre les autres apres les Princes messire Iaques de Chabannes, & le seigneur de Restelant en eurent le bruit pour iceluy iour d'auoir esté eux & leurs gens & leurs cheuaux les plus richemēt parez & aornez. Et quant est au peuple d'icelle ville de Paris, il en y auoit si grande multitude qu'à grand peine pouoit on aller parmy les rues. Lesquels en diuers lieux crioient à haute voix tant comme ils pouoient crier Noël, pour la ioyeuse venue de leur Roy & naturel seigneur, & de son fils le Daulphin. Si en y auoit plusieurs qui ploroient de la ioye & de la pitié qu'ils auoient, de ce qu'ils le reuenoient dedās leur ville. Et apres toutes ces choses faictes & accomplies & le Roy venu au Palais en la maniere, comme dit est, se logea là: & avecques luy le Daulphin son fils. Et tous les autres seigneurs tant cheualiers & eschuyers cōme gens de guerre, s'en allerēt loger parmy la ville en plusieurs & diuers lieux. Et fut crié de par le Roy à son de trompe sur la hart, que homme nul de quelque estat qu'il fut ne meffait riens aux Parisiens ne en corps ne en biens. Et le lendemain le Roy monstra au peuple à la sainte Chappelle la vraye Croix nostre seigneur, le fer de lance dont nostre seigneur Iesus Christ fut feru au costé en la croix. Et tātost apres monterent à cheual, & alla le Roy loger à l'hostel neuf pres de la bastille, & le Daulphin se logea aux Tournelles. Si demourerent certaine espace de temps audit lieu de Paris. Et furent faictes plusieurs nouuelles ordonnances sur le re-

gime du Royaume. Et par especial dedans icelle ville de Paris furent adóc faits aucuns nouveaux officiers, tant en la court de Parlement comme ailleurs. En outre apres ce que le Roy eut fait son entrée à Paris, comme dit est, les Comtes de la Marche & de Perdiac enfans de Bernard Comte d'Armignac iadis Conestable de France, mis à mort par la communauté de Paris tresgrandement accompagnez de plusieurs seigneurs tant d'eglise comme seculiers, feirent desterrer leur feu pere & mettre en vn sercueil de plomb. Et apres le feirent porter en l'Eglise saint Martin des Champs, où luy fut fait vn seruice tressolennel. Auquel furent toute la plus grand partie des colleges de Paris: & le lendemain fut mis sur vn chariot couuert de noir & conuoyé à grand solennité hors de la ville, & apres mené à grand compaignie des gens de ses deux fils dessusdits, en la Comté d'Armignac.

Comment les Brugelins se commencerent à moderer, & enuoyerent leurs ambassadeurs deuers le Duc de Bourgongne pour auoir paix.

EN ce temps les Brugelins qui se sentoient grandement auoir offensé vers le Duc de Bourgongne leur seigneur: & aussi considerans que les autres bonnes villes de Flandres ne les vouloient aucunement conforter ne ayder par quelque maniere que ce fut, se commencerent à esmayer & auoir doubte, qu'à long aller ne peussent resister ne eux deffendre contre le dessusdit Duc de Bourgongne: car avecques ce ils scauoient assez qu'ils n'estoient point bien en la grace des Gantois, & leur venoient chacun iour des nouuelles que le deuantdit Duc de Bourgongne venoit à tresgrand puissance de gens d'armes pour les subiuguer: & iceux Gantois seroient en son ayde pour à eux faire guerre. Et pour à toutes ces choses dessusdictes obuier, trouuerent aucune maniere d'enuoyer leurs ambassadeurs deuers iceluy Duc, qui se tenoit à Arras: & fut la besongne assez longuement demenée entre icelles parties. Et entre-temps iceux Brugelins se commencerent à abstenir de faire leurs courses & rudesses en iceluy païs, comme par auant auoient fait.

Comment le seigneur d'Ossy & messire Florimont de Brimeu Seneschal de Ponthieu & d'Abbeuille allerent assieger le Crottoy.

AV temps dessusdit qui fut enuiron le mois d'Octobre audit an, le seigneur d'Auxy capitaine general des frontieres de Ponthieu & d'Abbeuille, avecques luy messire Florimont de Brimeu Seneschal dudit Ponthieu, & vn cheualier de Rhodes preux & hardy aux armes qui estoit nommé messire Iean de Foy, assemblerent certain nombre de combattans: lesquels conducteurs conduisirent & menerent deuant le chastel du Crottoy que pour lors tenoient les Anglois, esperans iceluy reconquerre & mettre en l'obeissance du Duc de Bourgongne dedās brief terme ensuiuant, par ce qu'un païsant qui n'agueres auoit esté audit chastel: & comme il disoit, auoit espouluré tous les bleds de leans, leur donna à entendre qu'il estoit impossible qu'ils peussent viure ne eux entretenir plus hault d'un mois. Sur lequel rapport qui point n'estoit veritable, comme depuis fut apparent, s'en allerēt logger avec leurs gens deuant ledit chastel en la vieille fermeté de la ville. Et manderent ayde de
gens

gens à plusieurs seigneurs, qui leur enuoyerent aucuns hommes de guerre. Et avec ce furent fort aydez & soubstenuz de viures & d'argent par ceux d'Abbeuille, qui auoient moult grād desir qu'iceluy Crotoy fut subiugué, pource qu'il leur faisoit souuent de grans dommages. Si enuoyerent les chevaliers dessusdits noncer ces nouuelles au Duc de Bourgongne, en luy requerāt son ayde : lequel leur enuoya aucuns de son hostel pour sçauoir que de ce pouoit estre. Lesquels luy feirent responce & rapport que son pouoit garder qu'ils ne feussent regarnis de viures par la mer, il estoit possible de les affamer & de les contraindre de eux rendre par famine. Et sur ce fut escrit par le dessusdit Duc de Bourgongne à ceux de Dieppe, de saint Vallery & de la marine à l'environ, qu'ils s'apprestassent à tout ce qu'ils pourroient finer de nauires, pour garder le dessusdit passage de la mer. Si se tira ledit Duc au chastel de Hesdin & manda à venir deuers luy messire Iean de Croÿ Baillif de Hainault : auquel il auoit autresfois dōné la capitainerie d'iceluy chastel du Crotoy, s'il pouoit estre conquis. Et luy ordonna d'aller en iceluy logis deuantdit à tout certain nombre de cōbattans & de gens de guerre, pour en estre le principal chief & gouuerneur. Et depuis y alla ledit Duc en sa personne à priuée mesgnie, pour veoir & sçauoir plus au vray l'estat d'iceluy logis & n'y seiourna mie grand temps. Et affin que ses gens y feussent plus seurement pour la doubte du secours qui pourroit venir d'Angleterre par mer & par terre à ceux dudit Crotoy: il ordonna à faire & ordonner vne grand bastille, pour eux loger plus seurement. Et fut faicte moult forte & bien enuironnée de grans fossez : & en estoit l'ediffieur & deuiseur aux ouuriers vn chevalier nommé messire Baudo de Noyelle. Apres l'accomplissement de laquelle bastille, furent faits plusieurs logis. Et avecques ce fut pourueüe de toute artillerie & de toutes besongnes necessaires à guerre: durāt lequel temps furent faictes plusieurs escarmouches entre les parties. Entre lesquelles fut prins le lieutenant du capitaine de la forteresse dessusdicte par le seigneur d'Auxi. Desquelles preparatiōs ainsi faictes par la partie dudit Duc de Bourgongne, fut aduertie le Roy Henry d'Angleterre & son conseil, dont ils ne furent point bien ioyeux: pource qu'il leur sembloit qu'icelle forteresse leur estoit moult cōuenable, pour auoir entrée es paÿs & marches de Picardie. Si fut conclud entre luy & les seigneurs de son conseil qu'on y pouruoyeroit de remede. Et pour iceluy mettre à execution, fut escrit de par le dessusdit Roy Henry d'Angleterre à ceux de son conseil, qui se tenoient à Roÿen, qu'incontinent & sans delay ils assemblassent le plus de gens de guerre qu'ils pourroient finer sur les marches de Normandie, pour le secours dessusdit: laquelle chose ils feirent diligemment publier en leur obeissance. Si se meirent ensemble iusques au nombre de quatre mille combatans ou environ tant de cheval comme de pied: desquels furent les cōducteurs le seigneur de Thallebot, le seigneur de Fauquemberge, messire Thomas Kiriel & aucuns autres qui adresserent à venir vers le chastel d'Incourt par plusieurs iournées. Et de là par aucuns peu de iours vindrent loger à l'abbaye de S. Vallery tous ensemble, portans avec eux leurs viures & pouruoyances. Et entre-temps que ceste assemblée se faisoit, le Duc de Bourgongne qui estoit assez acertené de leur venue, auoit par auant assemblé de toutes les marches de Picardie & de ses autres paÿs la plus grād partie de tous les nobles hommes avec luy, & autres

gens de guerre. Et tant qu'ils pouoient dedans estre de huiët cens à mille combattans, lesquels estoient partis de Hesdin & venus à Abbeuille le iour deuant, que les dessusdits Anglois veinssent à la dessusdicte abbaye de S. Vallery. Si estoient en la compaignie d'iceluy Duc le Comte d'Estampes, son nepueu de Cleues, le Comte de saint Pol & plusieurs autres nobles & grâs seigneurs. Si estoit venu audit lieu de Hesdin vers luy & à son mädement messire Jean de Luxembourg Comte de Ligney: mais il s'excusa deuers ledit Duc de luy armer: disant qu'il auoit encores à renuoyer le serment qu'il auoit fait aux Anglois, & que bonnement ne se pouoit armer contre eux: de laquelle excusation (sicomme ie fuz informé) ledit Duc de Bourgongne ne fut point bien content. Et luy remonstra comment il auoit serment à luy, & estoit son homme lige portant son ordre, & auoit tousiours tenu son party. Pourquoy bonnement à son honneur ne se pouoit ou deuoit excuser de luy seruir, attendu qu'il alloit pour rebouter ses ennemis, qui luy venoient courre sus en son païs. Neantmoins ledit de Luxembourg s'en retourna par le congé dudit Duc, & obtint de luy mandement de ladicte excusation. Et apres que le dessusdit Duc fut venu audit lieu de Abbeuille, & qu'il eut certaine nouuelle de la venue de ses ennemis, il feit de rechief hastiuement pourueoir ladicte ville de viures, artillerie, habillemens & gens de guerre. Et tant qu'ils pouoient dedans estre de huiët cens à mille combattans gens experts & renommez en armes. Et quand il leur fut demandé par ledit Duc de Bourgongne, sil leur sembloit qu'ils peussent bien tenir ceste bastille contre leurs aduersaires, ils feirent responce que ouÿ, & qu'il n'en fut en nulle doubte. Toutesfois ledit Duc auoit conclud qu'il ne combatteroit point iceux Anglois à iour nommé ne assigné: mais feroit garder les passages de la riuere contre eux, & les feroit affamer & harrer en leur logis: ou il les feroit prédre en aucuns autres destroits aduantageusement sil pouoit: lequel propos ne fut point bien mis à execution. Et les dessusdits Anglois tantost qu'ils furent logez en l'abbaye deuantdicte, passerent la riuere à gué deux ou trois cens au dessus de ceux dudit Crotoy, & allerent courre au païs par deuant la bastille iusques empres Rue. Et prindrent aucuns hommes d'armes avec leurs cheuaux, & autres bagues: à tout lesquels sans aucun empeschement retournerët tres matin & se meirent à chemin tous ensemble, & vindrent en bonne ordonnance passer la riuere Et pouoient estre enuiron deux mille de pied, qui entroient en l'eaüe iusques aux reins. Si fallerent mettre en bataille aux plains champs sur le hault au dessus de la ville, en la veüe de ceux de ladicte bastille: lesquels cuidoiët qu'ils les deussent venir assaillir. Si se preparerent diligemment pour eux deffendre. Et adonc dedäs icelle bastille furent faits plusieurs nouueaux cheualiers: c'est à sçauoir Iaques de Craon seigneur de Dõmart en Ponthieu, Aymõd de Moucy seigneur de Massy, Eustache d'Inchy, le gräd Bastard de Renty, Anthoine d'Ardentin seigneur de Bouchanes, Harpin de Richames, Gilles de Fay & aucüs autres. Les Anglois qui en riens n'auoient esté empeschez audit passage, s'en allerët logger tous ensemble au monastere de Forest-Monstier à deux lieües de là. Et le second iour se meirent aux champs, & s'en allerent logger à vn gros village sur l'eaüe d'Authie nommé la Broye: lequel estoit fourny de viures tres abondamment, & y furent quatre ou cinq iours, & alloient tressouuent battre, vanner & recueillir

recueillir des viures cent ou six vingts au coup en aucuns villages à demie lieüe de leurs logis. Et mesmement en ce temps qu'ils furent en iceluy logis, allerent quatre ou cinq ardoir vn gros village nommé Angien aupres de Hesdin, jacoit ce que le Duc eut renuoyé pour la garde de Hesdin & du païs à grand nombre de gens d'armes, qui à brief comprendre leur feirent vne mole guerre: car ils ne les adommagerent sinon assez petit. Et apres que les Anglois eurent esté audit lieu de la Broye quatre ou cinq iours, ils l'embrazerēt en feu & en flambe, & s'en allerent loger à Auxi où ils furent par l'espace de trois iours. Et coururent par petites compagnies en plusieurs & diuers lieux, pour fourrager le païs. Et ne furent de leurs ennemis aucunement empeschez, dont il soit besoing faire mention. Et quant est au gouuernemēt dudit Duc de Bourgongne, il se tenoit tousiours à Abbeuille. Et festoient departis de luy grand partie de ses gens par son congé, pour aller garder les bonnes villes & forteresses du païs. Si enuoya vn certain iour le seigneur de Croÿ & Iean de Brimeu Baillif d'Amiens, pour visiter la bastille dessusdictē: & sçauoir se ceux de dedans estoient encores en ferme propos d'eux là tenir, lesquels venus illec apperceurent assez bien à leur façon, qu'il en y auoit vne grand partie qui bien eussent voulu estre dehors à leur honneur. Si auoit esté conclud tant du dessusdit Duc comme de ceux de son conseil que pour pis escheuer, on rechargeroit toutes les artilleries & puis se retrahiroient les gens d'armes à Rue apres ce qu'ils auroient bouté le feu dedans icelle bastille: mais ils n'attendirent point à eux retraire si hōnorablement qu'il auoit esté ordonné. Car sans ce qu'ils feussent aduertis de cause raisonnable, ne aussi pareillement qu'ils veissent venir leurs ennemis sur eux, grād partie d'iceux s'esmeurent soudainement par maniere de commotion, & saillirent à qui mieux hors d'icelle bastille en grand desfroy sans tenir aucune ordonnance: delaisant dedans icelle toute leur artillerie & grand partie de leurs harnois, & plusieurs autres bagues. Si commencerent à cheminer ensemble pour aller deuers Rue en la maniere, comme dit est dessus. Mais aucuns des principaux chiefs d'iceux se meirent en peine de les retenir & ramener en icelle, ce que faire ne peurent. Et aussi le feu auoit esté bouté és logis secrettement, parquoy ladicte bastille fut assez tost esprinse. Si saillirent auant aucuns Anglois de la forteresse qui crierent & huerent fort apres eux, comme on fait apres merdaille. Et brief ensuiuant les capitaines qui estoient (comme on peult supposer) la plus grand partie des plus vaillans gens & plus experts hommes de guerre de la compagnie du Duc de Bourgongne, se departirent ainsi honteusement comme vous auez ouÿ: & retournerent à Rue, & de là en plusieurs autres lieux de leurdictē obeissance: desquels estoient les principaux messire Iean de Croÿ Baillif de Hainault, messire Florimont de Brimeu, messire Iaques de Brimeu & messire Baudo de Noyelle, tous quatre portans la Toison & l'ordre du Duc de Bourgongne. Et avecques eux estoient Valeran de Moreul, le seigneur d'Aussy, le Galois de Renty cheualiers, le seigneur de Fremesfen, Robert de Saueuses, messire Iaques de Craon, Iean d'Arly & tous les nouueaux cheualiers dessusdits avecques grand nombre de cheualiers & escuyers de Picardie, qui grandement furent blasmez pour celle departie. Si s'excuserent les grans en donnant la charge aux petits archiers, disant

qu'ils ne les auoient peu retenir. Et en ce propre iour les Anglois qui, comme dit est, estoient logez sceurent le departement des dessusdits, dont ils se resiouyrent grandement. Si conclurent tous ensemble de r'appasser la riuere pour retourner vers leur païs & és lieux & places, dont ils estoient venus: & à leur departement bouterent les feux en la ville d'Aussy, qui estoit vn moult bel & grand village. Et reprindrent leur chemin deuers le Crotoy, & allerent loger au Nonnion. Et le lendemain r'appasserent la riuere de Somme par le lieu où ils estoient venus, & s'en allerent loger à l'abbaye de saint Vvalery comme ils auoient fait deuant: & delà se retrahirent à Roüen, & és autres lieux de leur obeissance: & emmenerent plusieurs hommes prisonniers cheuaux & autres bestes, qu'ils auoient prins & rapiné au païs. Et avec ce auoient fait grans dommages des feux qu'ils auoient boutez en sept ou en huit villes: & si n'auoient eu nul empeschement de leurs aduersaires, sinon de trente ou quarante fourragiers qu'ils auoient penduz. Et apres toutes ces besongnes, se retrahit ledit Duc de Bourgogne à Hesdin, & donna congé à tous ses gens d'armes reserué ceux qui demourerent sur les frontieres.

Comment plusieurs capitaines Francois à tout grand nombre de gens de guerre qu'on appella escorcheurs, vindrent au païs de Hainault.



Après ce que le Roy Charles de France eut, comme dit est ailleurs, seiourné par aucun temps dedans la cité de Paris, il s'en departit & retourna à Tours en Touraine. Et lors apres sondit departement plusieurs de ses capitaines se departirent des frontieres de Normandie, pourtant qu'ils n'auoient viures fors à grand peine pour eux y entretenir: c'est à sçauoir Anthoine de Chabannes, Blanchefort, Gaultier de Bron, Floquet, Pierre, Regnault-Chapelle, Mathelin d'Escouët & aucuns autres. Si se meirent à chemin tous ensemble & estoient enuiron deux mille cheuaux: & parmy le païs de Vimeu s'en allerent passer la riuere de Somme à la Blanche-tache, & se logerent au païs de Ponthieu: & de ce lieu là s'en allerent deuers Dourlens & logerent à Oruille, & és villages d'entour appartenans au Comte de saint Pol. Et puis apres se tirerent vers Bray, & repasserent l'eaüe à Cappy, & s'en allerent loger à Lihons en Senthois. Et tousiours faisoient de tresgrans maux par tout le païs, où ils passoient. Et ne se tenoient point contens de prendre viures, mais rançonnerent tous ceux qu'ils pouoient attaindre tant de païsans comme de bestial & autres biens. Et mesmemēt assaillirent le chastel dudit lieu de Lihons: mais il leur fut bien deffendu par Valeran de Moreul & ses gens qui estoient dedans. Et apres ce qu'ils eurent là esté par plusieurs iournées, & y fait de tresgrans & sumptueux dommages, se tirerent au païs de Cambresis aupres des terres de messire Iean de Luxembourg Comte de Ligny, qui encores n'auoit point fait serment au Roy Charles: neantmoins ils ne luy mессeirent riens sur ses terres, pource qu'il estoit tousiours bien pourueu de gens de guerre: mais luy baillerent leurs scelez, & luy à eux de riens entreprendre l'un sur l'autre. Si feirent iceux Francois plusieurs maux audit païs de Cambresis, & apres s'en allerent loger à Solames vers le païs de Hainault. Et adoncques messire Iean de Croÿ Baillif de Hainault assembla les nobles du païs de Hainault, & manda aussi aucunes

cunes des bonnes villes pour deffendre ledit paÿs contre les dessusdits, lesquels on nommoit en commun langage les escorcheurs. Et la cause pourquoy ils auoient ce nom, si estoit pourtant que toutes gens qui estoient rencontrez d'eux tant de leur party comme d'autre, estoient deuestuz de leurs habillemens tout au net iusques à la chemise: & pource quand iceux retournoient ainsi nuds & deuestuz en leurs lieux, on leur disoit qu'ils auoient esté entre les mains des escorcheurs en les gabant de leur male aduventure. Si dura ledit nom par aucune espace de tēps: & par ainsi ne fut plus nouvelle des Armignacs ne de leur nom, qui longuement auoit duré. Toutesfois quand iceux capitaines furent logez à Solames, comme dit est dessus, & és villages à l'enuiron, il en y eut vne partie qui vn iour certain se tirerent au paÿs de Hainault outre le Quesnoy, pour trouuer aucun gaignage. Si rencontrerent d'aduventure le Baillif de Leschines nommé Collard de Sennieres à tout de trois à quatre hommes, qu'il auoit assemblez en son village: à tout lesquels il venoit au Quesnoy le Comte au mandement de la Comtesse de Hainault douairiere, & du dessusdit Baillif de Hainault qui là faisoit son amast de gens d'armes, & estoit tres matin. Et incontinent qu'iceux François les apperceurent, ils leur coururent sus vigoureusement & de hardy courage. Si furent icelles communes toutes esmerueillées, & nonobstant que les aucuns se meissent tresuaillamment en deffence: neantmoins ils furent en brief mis à grand meschef & rournez à desconfiture, & là plus grād partie prins & mis à mort trespiteusement. Et mesmement ledit Collard y demoura mort sur la place, & auecques luy enuiron huiet vingts de ses gens. Et les autres ils emmenerent prisonniers, & les rançonnerent comme leurs ennemis. Sinon aucuns en trespetit nombre, qui eschapperent par bien fouyr. Pour laquelle destrouffe les nobles hommes des bonnes villes d'iceluy paÿs de Hainault furent durement troublez. Si enuoya ledit Baillif de Hainault vers le Duc de Bourgogne luy noncer ceste mauuaise besongne, en luy requerant qu'il luy voulüst enuoyer ayde de gens de guerre: lequel Duc luy en enuoya largement. Si feit de rechef iceluy Baillif vne tresgrande assemblée audit lieu du Quesnoy, tant de gens de guerre comme de ceux de Vallenciennes & autres bonnes villes pour combattre les dessusdits. Mais entre-temps ils se departirent dudit paÿs, & se retirerent vers la terre de Guyse, & delà au paÿs de Champagne en faisant tousiours de grans dommages. Mais auant leur departement dudit paÿs de Hainault, rendirent aucuns des prisonniers dessusdits sans payer aucune finance à la requeste dudit de Bourgogne, qui leur en escriuit. Et pour ceste cause y enuoya vn gentil-homme de son hostel nommé Meliades, lequel estoit Breton & bien aymé d'iceux capitaines de France.

Comment grandes pestilences & famines furent en cest an.



Tem en cest an mille quatre cens trente sept furent les bleds & autres grains si chers par toutes les parties du royaume de France, & en autres & diuers lieux & paÿs de Chrestienté, que ce qu'on auoit aucunesfois donné pour quatre soubz monnoye de France, on le vendoit quarante ou au dessus. A laquelle cherté fut si grand famine vniuerselle, que grand multitude de pources gens moururent par indigence. Et estoit moult

douloureuse & piteuse chose à les veoir és bonnes villes mourir de faim, gésir sur les fumiers par grandes compagnies. Si y eut aucunes villes qui les debouterent de leur seigneurie. Et si en y eut aussi des autres qui les receurent & administrerent assez longuement selon leur puissance en accomplissant les œuvres de misericorde: entre lesquelles de celles qui les receurent & administrerent, en fut l'une la cité de Cambray. Si dura ceste pestilence iusques en l'an trenteneuf. Et furent faits à ceste cause plusieurs edits par les seigneurs tant Princes comme autres: & aussi par ceux des bonnes villes, en deffendant que nuls bleds & autres grains ne fussent portez hors sur grosses peines. Et mesmement en la ville de Gand fut crié qu'on s'abstint de brasser ceruoises ne autres pareils bruuages, & que toutes autres pources gens feissent tuer leurs chiens. Et que nul ne gouvernast chienne s'elle n'estoit chastrée. Telles & pareilles ordonnances furent faictes en moult de païs, affin de pourueoir à la commune de pourceur du menu peuple & des mandians.

Comment les Gantois feirent nouvelle mutation, & se remeirent en armes, dont les Feures furent les principaux.

EN ce temps dessusdit les Gantois se meirent en armes de nouvel en tresgrand nombre par le moyen des Feures d'icelle ville. Et fut la cause de ceste assemblée: pource qu'ils disoient que ceux de la garnison de l'escluse auoient pillé sur ceux du plat païs, dont les plaintes en estoient venues en ladicte ville de Gand, si requeroiēt iceux Feures qu'on punist iceux pillars. Item & qu'on allast en armes sur ceux de Bruges, sçauoir s'ils voudroient se departir de ceux du Franc, & les laisser estre vn des quatre membres. Item & que pareillement on allast sur ceux de l'escluse, pour oster lesdits pilliers fischez en l'eau de la Lieue, affin que la marchandise peust venir & entrer au païs. Item qu'on iroit par toute la Comté de Flandres visiter & aduiser ceux qui estoient leurs amis ou non: & qui leur voudroient ayder à faire & entretenir paix au païs, & que les gens y peussent auoir à ouurer & gagner par les villes. Et si en ce les Escheuins & habitans de Gand ne vouloient faire assistance, qu'entre eux Feures le feroient d'eux mesmes, moyennāt l'ayde de ceux de leur alliance. Et autrement ne se vouloient departir de leurs armes: si estoit Feure le Doyen des mestiers pour le temps de lors, lequel estoit appellé Pierre Hemubloc: lesquelles choses les Escheuins remonstrerent aux bourgeois & aux Doyens des Tifferrans, & des autres mestiers de Gand en la place à ce ordonnée en l'hostel de la ville, affin que sur ce ils eussent aduis chacun avec ceux de son mestier: & ce qu'ils trouueroient en conseil, ils l'apportassent le lendemain à la loy: & adonc chacun mestier fut sur ce en congregation és lieux accoustumez en tel cas. Si reuindrent les dessusdits Doyens faire leurs rapports à la loy le neuuiesme iour d'Octobre. Et apres plusieurs interrogations con-
corderent aux Feures leursdictes requestes, pource qu'il leur conuenoit ainsi faire par l'importunité d'eux & de leurs alliez: dont toutesfois grand murmure fut des plus notables, pource qu'en ce tēps ceux de la ville de Bruges traictoient de paix en la ville de l'Isle aux deputez du Duc de Bourgongne leur seigneur, là où ceux de Gand mesmes auoient enuoyez certains ambassadeurs. Si doub-
toient

toient plusieurs que les menues gens ne voulsissent appliquer à eux les biés des riches. Tantost les Feures à tout leur banniere allerent sur le marché au blé : & tantost & incontinent vindrent avec eux les Parmentiers, les vendeurs de vieilles robbes, & bien tost apres tous les autres mestiers. Apres y vindrent les vingt & sept bannieres des Tifferrans, & puis le Baillif avec la loy & la banniere de Flandres & de la ville, & avec eux la bourgeoisie. Et tant qu'il y eut en nombre quatre vingts deux bannieres. Tantost apres se departirent ceux de la loy, & apres eux toutes les autres bannieres par la maniere accoustumée & l'ordonnance coustumiere. Si s'en allerent au marché des vendredis deuant l'hostel des remonstrances, où ils demourerent tout icelle nuit iusques au lendemain, que les dessusdits Feures & les autres de leur opinion vouloient aller aux champs. Mais la bourgeoisie & la plus saine partie des Tifferrans desirant de laisser icelle armée, pource qu'ils n'auoient point volenté de guerroyer : mais estoient d'opinion contraire. Si estoient en chance d'eux discorder & entrebattre. Lors les Feures se retrahirent de l'autre costé du marché & se separerent des autres disant, que ceux venissent qui suiuir les voudroient. Dont plusieurs se meirent avec eux de leur costé. Et apres tous les autres se departirent par bonne ordonnance, & allerent à Merenquerque qui est le chemin de Bruges loger en tentes & en paillons. Si estoient en ce temps plusieurs esmeuz & rioteux, tant pour la perte de la monnoye nouuelle de l'an trente trois & de l'abaissement des vieilles monnoyes, comme pource qu'ils auoient moult frayé en tailles au voyage de Calais, & aussi ils n'auoient point de laines d'Angleterre. Parquoy plusieurs ne sçauoient à quoy employer leur temps pour gagner leur poure vie. Et en especial ceux d'Ippre, qui estoient accoustumez de drapper de ces laines d'Angleterre & plusieurs autres. Et d'autre part le froment & tous autres blez estoient moult chers. Et si n'y vsoit on, ne ne trouuoit marchandises en Flandres pour la cause de la guerre de ceux de Bruges. Parquoy les biens cessoient à venir audit pays de Flandres : car ceux de l'Escluse auoient fisché pilliers au fleue de la Lieue, si que les marchandises ne pouoient entrer au pays. Et les riches gardoient le mieux qu'ils pouoient ce qu'ils auoient de cheuance, pource qu'ils veoient que ces gens de labeur se vouloient maintenir d'eux armer & apprendre à viure de rappine : & que aucuns ne se pouoient remettre à leurs labeurs. Et les riches ne vouloiēt riens mettre dehors, pource qu'ils se doubtoient de guerre auoir tous les iours tant d'un costé que d'autre. Apres ce les dessusdits Gantois manderent ceux des villes & villages de leur chastellenie, qu'ils venissent incontinent deuers eux en armes en tel nombre qu'ils estoient, quand ils furent au voyage de Calais. Lequel mandement les Escheuins monstrerent au cōmun & habitans pour eux sur ce conseiller ensemble. Et pource qu'ils ne le faisoient mie volentiers, allerent aucuns deuers les Escheuins de Gand pour auoir delay, & qu'ils peussent passer à moins de nombre : mais adonc leur commanderent les Escheuins de Gand qu'ils obeissent. Ce temps pendant lesdits Gantois esleurent vn capitaine aagé d'environ trente ans nommé Rasse Rouen bourgeois de Gand : Auquel ordonnerent douze Conseilliers qui oncques n'auoiēt esté en la Loy de ladicte ville. Et de ces douze en y eut quatre de la bourgeoisie, quatre des Tifferrans, & quatre des mestiers : lequel capitaine ainsi esleu ne vou-

loit point entreprendre ledit office. Item le neufiesme iour d'Octobre auoit esté publié en l'hostel des Escheuins, que tous les bourgeois forains veinssent en ladicte ville de Gand sur peine de corps & de biens dedans trois iours, tellemēt habillez en armes comme ils voudroient garder leurs corps, dont en cedit terme plusieurs y comparurent. Et aucuns autres s'enuoyerent excuser, disant que ils auoient loyalle enssoine parquoy ils ne pouoient venir. Et feirent traicté que ils payeroient aucune pecune pour estre excusé. Et pource qu'on ne donnaist charge n'a besongner à ceux qui y estoient venuz, quād ils eurent seiourné trois iours ou enuiron en la ville, ils s'en partirent allans en leurs besongnes. Parquoy le xxvij. iour dudit mois d'Octobre furent mandez sur peine de perdre leur bourgeoisie, & de payer issüe: cedit iour furent prins huit hommes souldoyers de l'Escluse, lesquels sous vmbre de guerroyer ceux de Bruges desoboiē le pays. Et les prindrent ceux de saint Laurens au Bloc, car il auoit esté crié & publié que chacun print & menast deuers la iustice tous desrobeurs, qu'on pourroit trouuer si on les prenoit vifs, & si on ne les pouoit prendre, qu'on les tuast & meit à mort. Lesquels les desarmerent & retindrent icelles armeures avec leurs vestemens: si les emmenerēt en leurs pourpoints à Merenquerque en l'ost de Gand, où le lendemain par le iugement des Escheuins eurent les hastereaux coupez. Et à là priere du souuerain Doyen furent leurs corps donnez aux Augustins, qui les enseuelirent. Depuis furent quatre hommes boutez hors de l'ost de Gand pour cause de pillage par eux fait sur ceux des villages. Ledit Rasse qui fut esleu capitaine alla deuers le Duc de Bourgongne à Arras, pour querir sa commission si son plaisir estoit qu'il fut capitaine. Et laissa trois lieutenans à Gand de trois membres de la ville. Vn de la bourgeoisie nommé Iean l'Estauble, des mestiers vn nommé Iean Cacielle, & vn des Tifferrans nommé Iean de Sterque. Le lundy quatriesme iour du mois de Nouembre reuint Rasse dessusdit à tout la commission d'iceluy Duc de Bourgongne d'estre capitaine desdits Gantois. Et comme il en eut fait le serment en la ville de l'Isle deuant les seigneurs du conseil. Semblablement iura en l'ost deuant le Baillif & Escheuins de Gand d'estre bon & loyal au Prince à garder ses droits & seigneuries, & les priuileges de la ville: mettre paix en droit & iustice, & tenir le peuple en paix & vnion, & pareillement iurerent les douze Conseilliers. Le cinquiesme iour dudit mois de Nouembre Rasse le capitaine à tout deux personnes de chacune bāniere avecques ceux de la Loy, vint de Merenquerque à Gand à la requeste de ceux qui auoient pource prins armes. Si print plusieurs personnes qui auoient esté des principaux gouuerneurs de ladicte ville de Gand. C'est à sçauoir Loys de Holle qui auoit esté premier Escheuin, Lieuin le Iagre qui plusieurs fois auoit esté Escheuin & tresorier, Gilles le Clerc aduocat, Iean l'Appoticaire qui auoit esté tresorier & Escheuin de Gand, qui auoit esté Escheuin, & Iagues la Iaschere qui auoit esté souuerain Doyen des mestiers. Et furent ensemble prisonniers en la maison du Prince, & encores en eussent ils prins des autres: mais ils s'estoient absentez. Et les appelloit on mangeurs de foye. Si feit ledit capitaine publier, que tous ceux qui auoient esté en Loy en la ville de Gand depuis dix ans, qu'ils venissent en l'ost: lors estoit grandement acreu l'ost de Gand lez Merenquerque: car ceux de leur chastellenie estoient venuz estofément, excepté ceux

ceux du Courtray: & sembloit vne grande bonne ville de leurs tentes & pavillons qu'on y veoit. Si prindrent leurs armes de rechef le sixiesme iour de Novembre: & vouloient aller à Gand querir les prisonniers de la ville, pour iceux estre en leur compagnie: mais le capitaine les refraignist, & dit qu'il auoit esté ordonné qu'on les laisseroit en prison iusques à ce que l'ost seroit retourné en la ville, & que lors on feroit droit & loy selon ce qu'on trouueroit par vne generale inquisition par toute la Comté de Flandres. Si eust volentiers veu iceluy capitaine, que ledit ost se fut appetissé: disant qu'il mettroit bien la paix en droit & en iustice à tout la quarte partie d'iceluy ost. Mais ceux de l'ost ne se vouloient nullement departir l'un de l'autre, ains vouloient demourer ensemble en fraternelle amour. Et vouloiēt aller loger entre les villes de Bruges, & de l'Escluse, & se partiroient du Franc selon la sentence du Prince. Et si se soubmettoient de leurs meffaits & outrages en l'ordonnance du Prince & des autres trois membres d'iceluy païs de Flandres, sauué leurs vies & leurs preuileges: & si ceux de Bruges le vouloiēt ainsi faire, ou qu'ils suppliasent au Prince qu'il luy pleust sur ce eux auoir en grace: & en outre determiner du debat d'entre ces deux villes de Bruges & de l'Escluse, affin que les marchans peussent paisiblement frequēter le païs. Que si ceux de Bruges le refusoient, on feroit tant qu'on les mettroit en obeïssance en la volenté du Prince. Or auoient ceux de Bruges enuoyé de chacun mestier de leurs deputez: lesquels traicterent tant à Merenquerque en l'ost, qu'après plusieurs parolles furent d'accord. Si estoient iceux deputez en nombre de quarante deux personnes: lesquels apres ledit accord ensemble, presenterent & accorderent à bailler lettres selon vne minute faicte par eux le xij. iour de Novembre, dont la teneur s'ensuit.

Nous Bourg, maistres, Escheuins, conseil, Cheuetins de la bourgeoisie, Doyens, iurez des maistres & toute communauté de la ville de Bruges: faisons sçauoir à tous ceux qui ces presentes lettres verront, que nous à l'honneur de nostre tresredoubté seigneur & Prince le Duc de Bourgongne Comte de Flandres &c. A la priere des trois membres de la bonne ville de Gand, & de toutes les Franches villes de la chastellenie de Gand: auons consenty & cōsentons par ces presentes par nous & noz successeurs, à tenir ferme & estable tel dit & sentence donnée, & ordonnée de nostredit seigneur & son conseil en ladicte bonne ville de Gand le xj. iour de Feurier, l'an mille cccc. xxxvj. de ceux du Franc comme le quart membre du païs comme par auant eut esté sans fraude, & selon le contenu d'icelle sentence. En tesmoing de verité auons ces lettres seellées du seal des promesses de ladicte ville: lequel accord ainsi par les deputez de Bruges rapporté en la ville apres grand conseil, ceux de la Loy feirent demande aux habitans de Bruges assemblez deuant l'hostel des Escheuins, s'ils vouloient accorder cedit traicté: lesquels là estans iusques au nombre de vingt mille ou plus, apres vn pou de silence respondirēt comme tous ouy. Lors s'auança vn nommé Coppin de Mesinacre pièça banny de Gand pour ses demerites qui dit, Tout va mal: comment estes vous si couars que vous craignez les Gantois? certes vous estes dignes d'auoir à souffrir à cause de vostre folie & inconstance. Et apres ce le Doyen des Feures, vn cousturier & plusieurs autres commencerent fort à murmurer, & à contrarier ledit accord: & especiallemēt contredisoient moult d'en

faire lettre : & tant feirent que tout ledit accord & traicté fut aneanty par le tumulte d'iceux. Parquoy depuis par le iugement de la Loy de Bruges, eurent les hastereaux coupez ledit Coppin, le Doyen des Feures, le cousturier & vn autre : & en furent bannis de leurs complices iusques à dixsept d'iceux. Toutesfois icelle vnté & paix entre ceux de Bruges & ceux de Gand, fut toute despecée quoy q̄ lesdits deputez & ceux de Bruges en eussent baillé xvij. hostages à ceux de Gand : lesquels ceux de Gand deliurerent depuis & les renuoyerent sous vmbre qu'iceux deputez leur disoient, qu'ils auoient fait leur deuoir & leur pouoir à faire enteriner ledit traicté & accord : avecques lequel traicté auoit aussi esté ordonné & accordé, que ceux du Franc pourroient prendre la franchise de Bourgeoisie à Gand où à Bruges, ou mieux plairoit à chacun. Et sur ce deuoient lesdits Gantois & ceux d'Ippre enuoyer deuers le Duc de Bourgongne leurs ambassadeurs, prier qu'il luy pleust oster les souldoyers estrangers de l'Escluse, & les pilliers de la riuere de la Lieue, affin que les marchandises peussent venir au païs, ou sinon qu'eux mesmes le peussent oster. Apres ce s'en alla l'ost de Gand loger à Ardembourg : & pource que ceux de Bruges apres contredisans cedit accord, & qu'ils ne vouloient partir du Franc : fut publié à Gand & en la chastellenie le mandement du Prince fait en l'esté dernier passé, qu'on ne menast ne souffrist mener aucuns viures à Bruges. Item que leurs biens & debtes fussent prins & deliurez en iustice. Et apres fut publié que se ceux de Bruges vouloient faire aucunes courses ou enuahyes sur ceux de la chastellenie, qu'on sonnast les cloches aux Eglises & les bassins pour soy assembler & resister à l'encontre d'eux. Apres ce eut le hastereau couppé Clarus Boye natif d'Axelle : & aussi furent decollez Guillaume le Boquelaire Patinier natif du païs de Vuaft, & vn homme de Courtray pource qu'ils auoient esté à Courtray pour l'instigation des Feures & cousturiers de Gand. Et auoient dit illec, que ceux de Gand desiroient moult que ceux de Bruges veinssent aux champs en armes avecques eux, pour le bien du commun païs de Flandres & l'union d'iceluy, & pour corriger ceux de l'Escluse. Le xvj. iour de Nouembre ceux de l'ost eurent conseil, qu'ils enuoyeroient certains deputez à Gand & es villes de la chastellenie, pour scauoir qu'on feroit & en quelle maniere on procederoit. En outre que s'ils estoient de l'opinion, qu'on allast sur ceux de Bruges, qu'on leur enuoyast encores autant de gens qu'ils estoient. Mais ceux de Gand, eurent autre aduis, pource que les viures estoient chiers & que l'hyuer estoit prest : avecques ce aussi qu'il leur enuioyt bailler l'argent des souldées, parquoy on retourna & delaisa on l'armée : car aussi la greigneur partie estoient adoncques contraires contre icelle, & queroient occasion de le despescher. Et adoncques l'ost des Gantois se departit de Ardembourg retournans iusques à Hecqueloc. Et illec vn de la chastellenie portant vne partie d'une souche de bois, & closture d'un champ pour faire feu & eschauffer viandes : pource qu'aucuns de Gand luy vouloient oster par force se deffendit & cria à la chastellenie. Et les Gantois erierent Gand, si que tous s'esmeurent : à ceste cause les Gantois d'une part, & la chastellenie d'autre part. Et y eust eu grand bataille se n'eust esté vn nommé Pierre Simon Escheuin de Gand, qui par belles parolles departit l'Escarmie par grand vaillance. Et y fut villainement blecé des coups qu'il receut de se bouter entre eux : mais il ne pouoit estre
fort

fort nauré pour ses bonnes armeures. Et en y eut plusieurs naurez, dont les aucuns en moururent depuis : & par especial les Gantois, dont il en mourut en la place vn nauieur de Gand vigoureux homme. Et depuis furent bannis de Gand deux hommes, qui auoient feru sur le premier Escheuin dessusdit. Et la vigille saint Andrieu retournerent chacun en son lieu lesdits Gantois, qui festoient mis en armes à petite deliberation, & repairerent en leur ville à pou de consolation. Et ceux de leur chastellenie qui y estoient allez bien enuis, retournerent bien volentiers chacun en son hostel. Peu de temps apres ensuiuant fut depose de sa capitainerie ledit Rase Ouuren. Et les dessusdits six prisonniers furent deliurez, pource qu'ils promeirent de ester à droit & à Loy de ce qu'on leur imposeroit ou demanderoit dedans trois iours, apres qu'ils en feroient semons. En Decembre le mois ensuiuant furent publiées lettres du Prince par villes & chastellenies de Gand, contenant qu'on n'obeyst plus au capitaine Rase Ouuren, car ledit Prince l'auoit demis. La vigille de Noël fut ordonné par ceux de Gand en plaine colation, que messire Roland de Hutequerque, messire Colard de Communes, Iean de la Damme, Gilles de la Voustine, Girard de Maldigen, Iean de Papegen, Pierre Gougebur, Pierre Bris, Iosse de Beys, Martin de Sinimes & Iean de Crique : lesquels auoient esté bannis de Gand, qu'ils pourroient reuenir en ladicte ville de Gand & au pays de Flandres. En outre vn nommé Coppin Coppon, qui à passé cinq ans festoit absenté de ladicte ville, & auoit defrobé plusieurs personnes en la Comté de Flandres, tant que plusieurs allans par le chemin se doubtoient moult fort de luy. Si fut pour lors retourné à Gand cuidant que tout ce fut oublié : mais il fut prins & condamné, parquoy il eut le hasterel couppé avec deux autres, qui auoient defrobé deux hommes empres la ville de Tendre-monde.

Comment le traicté se feit entre le Duc de Bourgogne & ceux de la Ville de Bruges.

U Tem entre-temps que toutes les besongnes dessusdictes se faisoient, les deuantdits Brugelins qui bien veoient (comme dit est ailleurs cy deuant) que à demourer longuement en l'indignation de leur Prince, estoit totalement la destruction d'eux & de leur ville. Si commencerent fort à continuer de querir les moyens à auoir traicté avec luy : lequel traicté en fin ils trouuerent, & se soubsmirent du tout à leur Prince dessusdit avec ceux de son conseil, par certaines conditions declairées entre icelles parties : duquel traicté aumoins aucuns des principaux points prononcez à Arras le quatriesme iour de Mars, present le dessusdit Duc & son conseil & tresgrand nombre d'autres gens, dont la teneur s'ensuit.

P R E M I E R fut ordonné qu'à la premiere fois que le Duc iroit à Bruges, viendroient au deuant de luy vingt personnes avecques ceux de la Loy, sans chapperons, nuds pieds & deschaussez vne lieüe hors ladicte ville. Et eux venuz en sa presence se mettroient à genoux, en luy requerāt pardon, & luy prier qu'il luy pleust venir en icelle ville. Item que la porte de la bouuerie seroit conuertie en vne chappelle, où on celebreroit chacun iour les sept heures canoniaux. Item que dorefnauant à tousiours quand mondit seigneur & ses successeurs Comtes & Comtesses de Flandres viendroient à Bruges, iceux de Bruges vien-

droient hors de ladicte ville portant les clefs de toutes les portes en perpetuelle memoire d'obeïssance. Item que chacun an le iour de leurs mesdis, ils feront en l'Eglise de saint Donast chanter vne messe solemnelle à Diacre & à sous-diacre, où ils feront estre vingt & quatre personnes chacun tenant vne torche ardent, tant que la messe durera d'une liure de cire chacune torche & à chacun quatre gros. Item qu'au bout de la Lieüe on fera vne belle croix. Item que les biens des bastards ne seront plus affranchiz à la mort: mais seront confisquez au Prince. Itē que ceux de Bruges quitteront & rachepteront à mondit seigneur les rentes viageres, en quoy ces demaines sont tenuz obligez. Item que ceux de Bruges n'auront plus de cognoissance sur ceux de l'Escluse. C'est à sçauoir que ceux de Bruges ne seront leur chef lieu, & ne les suiuront plus ceux de l'Escluse en l'ost ne autrement: & n'auront à faire avec eux, fors seullement en ce que touche la marchandise. Item que aux mestiers qu'on fait à l'Escluse dont longuement a esté question entre les deux villes, iceux de Bruges n'en auront plus nulle cognoissance. Item que ceux de Bruges ne pourront faire nulle armée sur la forfaiture de corps & de biens. Item quiconques feroit cesser les mestiers, & quand armes & dissensions se naistroient, encourroit moult griefues peines contenues en la principale sentence. Item sont reseruées à mondit seigneur aucunes personnes à estre en sa volenté de ceux de Bruges, & de ceux qui y sont deuenuz bourgeois durant la dissention. Item donneront & payeront ceux de Bruges à mondit seigneur deux cens mille Riddes d'or. Item ceux de la Loy & autres denommez de Bruges iront dedans huit iours hors de la ville à l'encontre d'aucuns deputez qui y seront enuoyez de par ledit Duc, & les receueront en grand obediencia. Item que nul ne sera plus bourgeois forain d'icelle ville s'il n'y demeure par trois fois quarante iours. Item fut ordonné que le fils du seigneur de l'Isle-Adam auroit pour la mort de son pere dix mille escus, avec aucunes amendes honorables. Et pareillement amenderoient la mort du Feure, à sa femme & à ses amis: lequel Feure auoit esté escartellé, pource qu'il auoit baillé les marteaux pour ouurir la porte. Avec lesquelles amendises en y auoit de plusieurs autres mises par escript au principal traicté. Desquelles pour cause de briefueté ie me tais d'en faire recitation ne mention: à laquelle sentence prononcer & ouyr, estoient presens à genoux deuant leur Prince en son hostel dedans Arras plusieurs notables personnes, & iusques au nombre de vingt & quatre à ce commis & deputez de par la ville de Bruges: lesquels furent moult troublez, pour la lecture & longueur d'icelle sentence. Et tant qu'en fin le Duc ce voyant par pitié ordōna qu'on les fait seoir pour estre plus à leur ayse. Et toutes ces besongnes parfaictes & accomplies, & que les dessusdits deputez furent retournez en la ville de Bruges, assemblerent le peuple en tresgrand nombre & multitude, & monstrent la coppie de la sentence: laquelle pour le grand desir qu'ils auoient pour retourner à la grace du Prince leur naturel seigneur, fut à la plus grand partie assez agreable. Et aucuns autres gens de petit estat qui auoient eu gouuernement durant les tribulations, ne fut point plaissant. Et eussent volentiers de rechef par leurs paroles seditieuses esmeu le peuple contre les puissans, ce que faire ne pouoient: car ils doubtoient grandement apres icelle paix, estre punis de leurs outrages & deme-

& demerites, & comme ils doubtoient leur aduint. Et dedans brief temps ensuiuant furent prins iusques au nombre de douze ou enuiron des principaux, qui auoient soubstenu & entretenu toutes les rigueurs dont dessus est faicte mention, lesquels eurent les hastereaux coupez. Et si en y eut plusieurs banis, qui se rendirent fugitifs. Et fut faicte ceste iustice à la venue du Damoyseau de Cleues nepueu du Duc de Bourgogne, qui de par luy avec aucuns de son conseil fut commis d'aller receuoir lesdictes amendises, selon le contenu du traicté fait & passé à Arras. Et par auant auoient esté enuoyez deuers ledit Duc en la ville d'Arras soixante trois hommes : lesquels auoient esté prins en la ville de Bruges, quand ledit Duc en fut debouté, & à leur departement de Bruges leur fut deliuré à chacun vne robbe de vert aux despens de la dessusdicte ville.


Comment la guerre se resmeut entre la Duché de Bar & la Comté de Vaudemont.

EN l'an dessusdit se r'esmeut la guerre d'entre la Duché de Bar & la Comté de Vaudemont, pource principalement que messire Iean de Hossouille Seneschal heritable de la Duché de Lorraine voulut prendre la ville de Vaudemont, sur aucune querelle qu'il se disoit y auoir. Et depuis qu'il eut failly de son entreprinse, feit guerre ouuerte en bouquant les feux en plusieurs lieux par ladicte Comté : laquelle besongne venue à la cognoissance du Comte de Vaudemont qui estoit agenouïllé, monta à cheual hastiuement, & avec luy Forte Espice à tout enuiron cent combattans : & poursuiuit ses ennemis tellement, qu'il les attingnit à l'issue de son pays. Si les assaillit tresuaillamment & vigoureuement : & en conclusion les meit en desroy, jacoit ce qu'ils feussent bien trois cens. Si en furent morts enuiron quarante & autant de prisonniers, & les autres se sauuerent en fuyant : & fut leur estandart gaigné sur eux porté en l'Eglise de Vezelise. Et tantost apres fut la guerre plainement ouuerte entre icelles parties : & allerent les gens dudit Comte courre sur leurs ennemis, lesquels furent rencontrez de messire Girard du Chastellier & ruez ius, & menez prisonniers à Mirencourt qui est vne bonne ville appartenant au Duc de Lorraine. Et depuis le dessusdit Comte de Vaudemont print ladicte ville de Mirencourt par l'ayde de Floquet & de Forte-Espice, si en rescouist de ses gens : & en laissa ledit Floquet capitaine, lequel brief ensuiuant la rendit aux Lorrains, & se retourna contre ledit Comte à la requeste de la Hire. En outre Blanchefort, Anthoine de Chabannes, Chappelle, Gautier le Breton, Mathelin & aucuns autres capitaines à tout leurs gens menoient guerre aux Lorrains & aux Barrois pour ledit Comte de Vaudemont : lequel leur auoit baillé en garde Vezelise & aucunes autres de ses places. Mais apres qu'ils eurent tout degasté le pays, ils s'en retournerent & trouuerent maniere d'auoir mandement contenant qu'ils se partissent de là, & seruissent lesdits Lorrains & Barrois contre iceluy Comte : lequel mandement ils monstrent à messire Hector de Flauay, qui estoit gouverneur de la dessusdicte Comté de Vaudemont. Et tantost apres les capitaines dessusdits deliurerent la dessusdicte ville de Vezelise à iceux Lorrains, lesquels la desolerent. Et tantost apres quand ils eurent gasté grand partie des pays tant d'un costé comme d'autre, se departirent iceux François qu'on nommoit escorcheurs en commun langage, & se tirerent vers

les Allemaignes. Auquel departement ils eurent tresgrand finances desdictes Duchez de Bar & de Lorraine. Et avec ce emmenerent hostages avec eux pour estre payez du surplus : desquels hostages en estoit l'un le fils de messire Girard du Chastellier : durant lequel temps le Roy de Cecile enuoya son fils le Marquis du-Pont aagé de neuf ans, pour entretenir le païs. Et gouvernoient pour luy l'Euesque de Thoul & ledit messire Girard. Et un petit par avant un nommé Vatin Tieulier menoit guerre au Comte de Vaudemont, & auoit sa retraicte en un moult fort chastel, qui estoit à son beau pere : c'est à sçauoir le seigneur de Hartuel, lequel le soustenoit : & auoit fait plusieurs dommages par feu & par espée en ladicte Comté de Vaudemont. Pour lesquels contre-venger, ledit Comte de Vaudemont accompagné de son nepueu le Comte de Blamont, le seigneur de Commeris & Forte-Espice, avecques le nombre de quatre cens combattans ou environ, alla deuant ladicte forteresse : & la print par force d'affault, & ledit chevalier dedans : mais incontinent lesdits Lorrains vindrent à grand puissance, pour bailler secours & ayde à iceluy chevalier : lesquels voyans que la place estoit prinse & leurs aduersaires dedans, se retrahirent, & feirent de rechef moult grand assemblée de gens pour mettre le siege deuant Monstier sur Saux. Et pource que messire Hector de Flauay auoit fait ardoir la ville, où ils se cuidoient bouter & loger s'en retournerent en leurs marches. Ainsi & par ceste maniere se destruisoient icelles deux parties.

De l'an mille cccc.xxxviij.

Comment la famine, la guerre & la pestillence fut grande & merueilleuse en plusieurs païs.



Au commencement de cest an en continuant de mal en pis, la famine vniuerselle dont en autre lieu est faicte mention, commença de rechef estre si tresgrande & si destroicte, que c'estoit piteuse chose a veoir les pources gens mourir en grand multitude par le moyen d'icelle famine. Et avec ce fut tresgrande mortalité en diuerses parties du royaume de France. Et par especial en la Comté de Flandres, & plus en la ville de Bruges que ailleurs, & pareillement dedans la cité de Paris : & d'autre part la guerre estoit trespaspre & dure merueilleusement en plusieurs diuers lieux & païs. Pour lesquels trois inconueniens plusieurs nobles hommes, & generallement tout le peuple dudit royaume & des païs à l'environ furent en moult grande & douloureuse perplexité & moult amatis. Et entre-temps les François qu'on nommoit en commun langage les escorcheurs, se tenoient en grād nombre sur les marches de Bourgongne, où ils faisoient de tresgrans & innumerales dommages : tant de prendre forteresses, prisonniers comme de tuer & raver hommes & femmes tant nobles comme autres, en toute & pareille maniere comme eussent peu faire les ennemis & aduersaires du païs : lesquelles entreprises venues à la cognoissance du Duc Philippe de Bourgongne, en eut au cueur grād desplaisance : tant pour l'amour du temps de la famine, comme pour les mortallitez qui estoient en plusieurs lieux de ses païs.

Comment le seigneur de Thalebot, messire Thomas Kiriell & aucuns autres capitaines Anglois conquirent Longueville, & plusieurs autres forteresses sur les François.

L Tem en cest an le seigneur de Thalebot, messire Thomas Kiriell & aucuns autres capitaines Anglois, se meirent sur les champs enuiron le mois de May, avec eux le nombre de huit cens combattans ou enuiron, & allerent loger deuant le chastel de Longueville que tenoient les gens de la Hire: duquel chastel & de la seigneurie iceluy la Hire se disoit seigneur par le don du Roy Charles, ainsi & par la maniere que l'auoit eu jadis ce tresuaillant & excellent combattant Bertran de Clesquin Breton Connestable de France: lesquels assiegez voyans leurs aduersaires en assez brief terme, rendirent la forteresse aux Anglois, par tel si qu'ils s'en departiroient sauf leurs corps & leurs biens. Si s'en retournerent à Beauuais: lesquels Anglois apres qu'ils eurent mis bonne & suffisante garnison s'en allerent deuant Charles-Mesnil, qui estoit vn moult bel chastel seant au plus pres de Dieppe, appartenant au seigneur de Torfi, lequel fut rendu. Et pareillement conquirent Guellemecourt & aucunes autres places, que tenoient les François ou païs de Caux. Et la cause pourquoy ils furent si tost mis en obeïssance, si fut pource qu'ils estoient mal-pourueuz de viures & d'artilleries.

Comment le traicté du mariage fut fait entre l'aisné fils du Roy de Nauarre, & la damoiselle de Cleues niepce au Duc de Bourgogne.

A V temps dessusdit vindrent deuers le Duc de Bourgogne en la ville de Douay enuiron vingt & quatre hommes de cheual ambassadeurs, enuoyez de par le Roy de Nauarre pour traicter le mariage de la damoiselle de Cleues niepce dudit Duc de Bourgogne, avecques le fils heritier du Roy de Nauarre. Entre lesquels estoit le Prieur de Rainchevaux, & vn certain chevalier & aucuns autres gentils-hommes & le Roy d'armes dudit royaume de Nauarre: lesquels traictez furent conduits & demenez assez longuement, mais en la fin vint la besongne à conclusion, & fut octroyée par ledit Duc. Et depuis fut ladicte Dame enuoyée treshonorablement accompagnée en la conduicte de son frere aisné audit Roy de Nauarre.

Comment les villes & chasteaux de Montargis & Cheureuse furent mis en l'obeïssance du Roy Charles de France.

D Vrant le temps dessusdit furent remises en l'obeïssance du Roy Charles de France les villes & forteresses de Montargis & Cheureuses, que tenoient les Anglois. Et d'autre part les garnisons de Meaux en Brye, de Creil, Ponthoise & Gisors trauailloient moult fort le païs d'iceluy Roy Charles. Et par especial és païs de Senthois, Vermandois, Amiennois, Beauuoisis & autres seigneuries. Et pareillement les garnisons qui estoient assises contre les Anglois, faisoient moult grand dōmages aux païs dessus nommez: dont le poure peuple en plusieurs manieres estoit moult trauaillé & lassé. Et quant au regard de messire Iean de Luxembourg, il se tenoit comme neutre:

& pour iceluy temps auoit peu de hantise avecques nulles de ses parties. Si faisoit tres fort fournir & garnir ses villes & chasteaux de viures & d'artilleries sur esperance de luy deffendre contre ceux, qui nuire ou greuer le voudroient. Et jaçoit-ce que par plusieurs fois il eut esté requis & admonesté de faire sermēt au Roy Charles de France, neantmoins oncques ne s'y voulut cōsenter. Et estoit tout resconforté d'attendre les aduentures, qui aduenir luy pourroient: car il auoit les scelez du Roy d'Angleterre, du Duc d'Iorth & de plusieurs autres seigneurs Anglois: par lesquels ils luy promettoient sur leur foy & honneur, que s'il aduenoit que les François approchassent en aucune maniere pour luy faire guerre, ils le viendroient secourir à si grand puissance, qu'ils le deliureroient de tous ses ennemis quelque autre besongne qu'ils eussent à faire: & sur ce ledit de Luxembourg se fioit tresgrandement.

Comment il y auoit grand discord entre le Pape Eugene, & le concile de Basle, & autres matieres.

EN cest an furent enuoyez deuers le Roy de France le Duc de Bourgogne, & autres nobles Princes du sang Royal les ambassadeurs de nostre saint pere le Pape Eugene. Et pareillement ceux du Concile de Basle, lesquels estoient en grand discord l'un contre l'autre: car en proposant deuant les dessusdits Princes ils diffamoient assez vituperablement chacun son aduerse partie: Et dura ceste dissention assez longuement. Toutefois pour ce temps le Roy estoit plus enclin à la partie du Concile, qu'à la partie d'iceluy Pape. Et le Duc de Bourgogne se tenoit plainement pour le Pape Eugene. Et pareillemēt faisoit le Roy d'Angleterre: esquels iours le Duc de Bourgogne enuoya deuers nostredit saint Pere le Pape vne solennelle ambassade: C'est à sçauoir maistre Quentin Mayart Preuost de S. Omer, le Prieur de Lihōs en Santhois, messire Symon de Lalaing, Guillaume le Jeune frere du Cardinal de Theroüanne & plusieurs autres notables personnes: lesquels du dessusdit saint Pere furent receuz tres agreablement: & obtindrent en la plus grād partie tout ce pourquoy ils estoient venus. Esquels iours le seigneur de Creuecueur qui estoit moult saige & prudent, fut enuoyé de par le Duc de Bourgogne deuers le Roy de France pour plusieurs besongnes. Et entre les autres pour traiter le mariage de la seconde fille du Roy & du Comte de Charrolois seul fils dudit Duc de Bourgogne. Auquel seigneur fut faicte tresioyeuse reception tant de par le Roy comme de par la Royne: & pourtant que la fille pourquoy il alloit, estoit nouuellement trespassee, luy fut remandé par ledit Duc qu'il demandast la main sñee ce qu'il feist & luy fut accordée & promise, & se nommoit dame Katherine. Et apres deuāt ledit retour du seigneur de Creuecueur, fut accordé enuers le Roy le discord des Euesques de Tournay: c'est à sçauoir de maistre Iean de Harcourt & maistre Iean Cheurot: Lequel cheurot demoura à Tournay, & ledit de Harcourt demoura Archeuesque de Narbonne. Et toutes ces besongnes & aucunes autres accomplies par les manieres dessusdictes, s'en retourna ledit seigneur de Creuecueur deuers son seigneur le Duc de Bourgogne, qui le receut moult ioyeusement & moult honnorablement. Item en ce mesme temps vn gentil-hōme cheualier, qui estoit de l'hostel du Duc de Bourgogne

gongne, prenant son chemin pour retourner en Sauoye dont il estoit natif par la licence dudit Duc: en son chemin alla en la ville de Guyse veoir messire Jean de Luxembourg, duquel il estoit tres bien en grace & le festoya moult grandement en son hostel: mais apres qu'il fut departy de là & qu'il eut prins son chemin pour aller en son païs, comme dit est, il fut rencontré d'aucuns saquemans, lesquels se disoient estre audit de Luxembourg, entre lesquels y estoit vn nommé Garmonset. Si le prindrent & le menerent à Meaux en Brie deuers les Anglois: & depuis fut mené à Roüen, où il fut detenu prisonnier par certaine espace de temps: & en fin il mourut de maladie, qui le print comme aucuns dirent par desplaisance & par courroux. A cause de la prinse duquel le Duc de Bourgogne fut tresmal content, & en rescriuit aucunement audit de Luxembourg avec autres besongnes: de laquelle prinse ledit de Luxembourg s'excusa grandement, car il est à supposer que d'icelle prinse n'estoit en riens coupable: car depuis fait executer aucuns d'iceux qui l'auoient prins & detenu. Et aussi fait moult grand diligence de faire deliurer ledit cheualier nommé messire Philebert de la main desdits Anglois, par le moyen du Cardinal de Roüen son frere.

Comment le Comte d'Eu qui estoit prisonnier en Angleterre retourna en France & des armées qu'il fit.

EN l'an dessusdit retourna de la prison du Roy d'Angleterre le Comte d'Eu, où il auoit esté detenu depuis l'an mille quatre cens & quinze. Si retourna en France & auoit esté prins en la bataille de Hazincourt, & fut deliuré par le Côte de Sombresset, que le Duc de Bourbon frere audit Comte d'Eu tenoit prisonnier: & l'auoit acheté, où aumoins la Duchesse de Bourbon sa mere de ceux qui iadis l'auoient prins à la bataille de Blangy, où le Duc de Clarence mourut comme en autre lieu est plus à plain declairé: pour le retour duquel ledit Comte d'Eu, plusieurs Princes de France, & autres nobles hommes furent bien ioyeux, & par especial le Roy Charles & le Duc de Bourbon son frere. Et tantost apres sa venue fut par ledit Roy de France constitué capitaine de Normandie depuis la riuere de Seine iusques à Abbeuille, & à la riuere de Somme. Si assembla certain nombre de gens d'armes, & alla prendre la possession de la ville de Harfleu. Si fut receu d'aucuns qui en auoient le gouuernement par le seigneur de Rieux Mareschal de France, mais aucuns autres ne luy voulurent point obeïr. Ains se retrahirent en vne porte & en aucunes tours, & là se tindrent par certaine espace de temps, dont ledit Comte d'Eu fut tresmal content. Si les fait assaillir tres roidement & asprement, & tellement qu'une partie d'iceux se rendirent à luy. Et les autres qui estoient es tours du Haure, enuoyerent à Roüen deuers les Anglois pour auoir ayde & secours: mais depuis s'accorderent secrettement deuers ledit Comte d'Eu. Et tellement s'appoincterent ensemble, que quand iceux Anglois vindrent aux tours dessusdictes, pour bailler ayde & secours à ceux qui les auoient mandez, ils furent vehementement trompez: car il en y eut de prins & retenus environ trente, & les autres qui s'apperceurent d'iceluy mal engin, s'en retournerent tous courroucez audit lieu de Roüen. Et apres que ledit Comte eut du tout l'obeïssance d'icelle ville de Harfleu & d'aucunes autres ou païs de Caulx, il y meit gēs

de par luy . Et apres luy partant de ce païs , s'en alla à Bruxelles en Brabant deuers le Duc de Bourgongne son beau frere , qui le festoya grandement , & luy donna aucuns dons moult riches . Et apres luy partant de là , s'en reuint par plusieurs iournées à Noyon , où il fut moult conjoÿ des habitâs d'icelle ville . Si luy feirent grand plaincte des pillards , qui se tenoient en aucunes forteresses assez pres de là : lesquels de iour en iour leur portoient de grans dommages , & couroient souuent iusques à leurs portes , en rauissant & en emportant tout ce qu'ils pouoient attaindre : mesmement ceux qui se disoient estre au Roy de France , & autres qui se disoient estre à messire Jean de Luxembourg . Et entre les autres en y auoit vn qui se nommoit Jean de l'Isle , avecques luy vn sien frere : lesquels auoient avecques eux ensemble iusques à trente compaignons ou enuiron , qui s'estoient boutez dedans vne vieille forteresse nommée Bretigny , laquelle ils auoient aucunement réparée & reediffiée sur intention de faire guerre & grand bataille à ceux du païs , & en y auoit vne partie qui portoient la rouge croix , & contrefaisoient les Anglois . Si en fut iceluy Comte d'Eu aduerty & admonesté , & pour y pourueoir assembla aucune quantité de gens de guerre par tout où il les peut auoir , & luy enuoya son nepueu le Comte d'Estampes vne partie de ses gens . Et tantost apres alla deuant ledit chastel de Bretigny , qui estoit moult foible & aussi estoit pauurement pourueu & garny de viures & d'artilleries . Et pourtant ceux qui estoient dedans furent moult tost contraints d'eux rendre à la volenté dudit Comte d'Eu : laquelle volenté fut telle qu'il feit prestement couper le hasterel audit Jean de l'Isle & à son frere en la cité de Noyon , & en feit pendre iusques au nombre de vingt . Pour laquelle prinse & mort d'iceux , Jean de Luxembourg conceut grand haine & mal-vueillance cōtre ledit Comte d'Eu , & ceux qui auoient esté à celle entreprinse : & tant qu'un peu de iours apres ledit Comte estant à Chargny sur Oyse , fut ordōné par ledit messire Jean de Luxembourg , à mettre vne embusche de ses gens aupres du chemin par où il deuoit retourner à Noyon pour luy & ses gens ruer ius : mais ledit Comte en fut aucunement aduerty . Si print autre chemin , & ne sortit point la besongne à son effect : toutesfois à ceste cause demourerent en grand haine & dissentiō l'un contre l'autre .

*Comment la Hire, Blanchefort & plusieurs autres capitaines du Roy Charles coururent
és Allemagnes.*



Tem en ces mesmes iours & au propre temps plusieurs capitaines du Roy Charles , entre lesquels estoient la Hire , Blanchefort , Bouffac , Anthoine de Chabannes , Chappelle , Pierre Regnault & autres . Si se tirerent bien six mille cheuaux par les marches de Barrois & de Lorraine au païs d'Allemagne , & coururent iusques deuant la ville de Basle , où se tenoit encores le Concile : & donnoient à entendre à aucuns que c'estoit par l'enuoy & cōsentement du Pape Eugene pour deffendre sa guerre , & domagerent fort le païs par feu & par espée . Et apres se tirerent ou païs d'Aussois enuers Francquefort . Si prindrent & rançonnerent plusieurs meschantes forteresses & forts monstiers , mais entre-temps qu'ils gastoient ledit païs d'Allemagne , & qu'ils y faisoient tant de maulx , les Allemans s'assemblerent en tresgrand nombre

nombre pour les rebouter. Si feirent retraire les viures & les païsans dedans les forteresses & es bonnes villes. Et apres leur cōmencerent à faire forte guerre, & les prenoient à leur aduantage quād ils alloient fourrager à petite compagnie. Si en occirent & meirēt à mort cruelle plusieurs par ceste maniere: & nē se vouloient point assembler en bataille contre eux à iour nommé, jaçoit-ce que plusieurs fois par eux en fussent requis: lesquels voyans la perte de leurs gēs & ainsi croistre la force des Allemans, se tirerent hors du païs apres ce qu'ils y eurent fait de grans cruautēz & dommages, & s'en allerent en Bourgongne, où ils feirent tout pareillement: & de là se tirerent vers le Niuernois. Et apres tousiours continuant en degastant païs & en faisant maulx innumerables, s'en allerent au païs d'Auuergne. Si multiplioient chacun iour la compagnie des mauuais: car tous meschans gens se boutoient avec eux qui n'auoient point de conscience, & tant qu'ils se trouuerent bien telle fois en nombre de dix mille. Si ne deportoiēt personne de quelque estat qu'il fut seigneur ou autre, mesmemēt les propres villes & païs du Roy & de ses Prince degastoiēt comme les autres. Et n'y sçauoit on comment y pourueoir ne remedier, pource qu'ils estoient en si tresgrand nombre. Et par tous païs où ils alloient (sicomme autresfois vous ay dit) on les nommoit les escorcheurs. Et apres ceste pestillence eurent les gens du païs moult à souffrir es places & es lieux où ils alloient.

Comment le Comte d'Estampes reprint la forteresse du Raoullet sur les gens du seigneur de Moüy & autres matieres.

LTem & aussi deuant ceste dure pestillence, les gens du seigneur de Moüy en Beauuoisis auoient prins la forteresse du Raoullet à deux lieües pres de Montdidier sur les gens de Guy de Roye, qui l'auoiēt en garde, & faisoïēt guerre à la ville de Montdidier & au païs à l'enuirō. Et pource qu'icelle ville & le païs estoient en la garde du Comte d'Estampes & en son gouuernement, il enuoya deuant ladicte forteresse certain nombre de gens de guerre sous la conduicte d'aucuns de ses capitaines: c'est à sçauoir Valeran de Moreul, & Guy de Roye & aucuns autres. Lesquels les assaillirent & meirent à tel meschief, qu'ils se rendirent en la voulenté dudit Comte d'Estampes: desquels il fait pendre de vingt à trente, & ladicte forteresse fut remise en la main du dessusdit Guy de Roye. Pour laquelle execution ledit seigneur de Moy qui estoit capitaine de Cleremont, fait dedans brief temps ensuiuant plus forte guerre que par auant à la ville de Montdidier: pourquoy il conuint mettre en plusieurs lieux gens d'armes en garnison, tant en villes comme en forteresses contre ledit seigneur de Moüy. Et par ainsi toutes les marches à l'environ d'un costé & d'autre furēt exillées & gastées, & eurent plus à souffrir que deuant & durant plaine guerre. Et d'autre part les Anglois prindrent en ces propres iours les forteresses de S. Germain en Laye, & de Gerberoy non mie de force, mais d'emblée: si y meirent tresgrans garnisons dont les Parisiens eurent moult à souffrir. En ce mesme temps aduint vne tresgrande cruelle & merueilleuse chose en vn village pres d'Abbeuille: car vne femme y fut prinse & accusée d'auoir meurdry plusieurs petits enfans, lesquels elle auoit desmembrez & salez secrettement en sa maison. Si fut celle grande cruauté accusée par le moyen

d'aucuns Brigans, qui par nuit vindrent en sa maison & en trouuerent des pieces: & pour ceste cause fut prinse. Et apres qu'elle eut cogneu sa malice, fut arse & executée par la iustice dudit lieu d'Abbeuille en Ponthieu. Ou temps desusdit ceux de Bruxelles eurent grand discord & dissensions cōtre ceux de Louuains, Malignes & autres bonnes villes de Brabant, pource qu'ils contraignirent par tout le territoire d'Amiens porter les bleds en leur ville au grand preiudice des bourgeois d'icelles bonnes villes, ausquels les bleds estoient. Et pour ceste cause s'elmeut tresgrand guerre & dissention entre ceux de Malignes & eux, car lesdits de Malignes tendirent leurs chaines sur la riuere: parquoy riens ne pouoit aller à Bruxelles, & assez tost apres coururent en armes l'un contre l'autre, & en y eut plusieurs mis à mort entre icelles parties. Neantmoins depuis le Duc de Bourgongne & son conseil y meirent moyen & les appaiserent de leur dissention.

Comment vne assemblée se feit entre Calais & Grauelignes du Cardinal d'Angleterre & de la Duchesse de Bourgongne, pour trouuer maniere d'auoir paix finale entre les parties de France & d'Angleterre.

ENuiron le mois de Ianuier de cest an s'assemblerent entre Calais & Grauelignes en vn lieu deuisé par les parties, où furent tendues aucunes tentes pour tenir cōvention: c'est à sçauoir le Cardinal de Vincestre d'une part & la Duchesse de Bourgongne d'autre part, chacun d'eux grandement accompaignez de nobles personnes tāt ecclesiastiques que seculiers: avec lesquels y estoient de par le Roy de Frāce comme ambassadeurs vn sien maistre d'hostel, nommé messire Regnault Girard cheualier seigneur de Bazoches, & maistre Robert Mallien conseillicr & maistre des comptes: afin d'auoir tous ensemble aduis, conseil & deliberation sur la paix finale entre les deux Royaumes: Et aussi par la deliurance & rançon de Charles Duc d'Orleans. Si furent plusieurs ouuertures mises auant & par plusieurs iournées: & en la fin ne peurent autrement conclure sinon de prendre iour par l'aduis & conclusion des deux Roys & de leurs conseils, chacun pourtant que toucher luy pouoit à l'an ensuiuant pour tenir nouvelle conuention: lequel iour & lieu on deuoit faire sçauoir à la dessusdicte Duchesse de Bourgongne, pour en aduertir & faire sçauoir à chacune desdictes parties: laquelle iournée nouvellement reprise, deuoit estre amené en personne ledit Duc d'Orleans: c'est à sçauoir à Chierbourg ou à Calais, auquel des deux il seroit aduisé en dedans ledit iour: & apres que les besongnes dessusdictes furent ainsi conclues entre icelles parties, se departirent de là, & retournerent és lieux dont ils estoient venus. Item en cest an le Duc de Bourgongne assembla enuiron seize cens combattans, lesquels furent menez & conduits vers Calais, pour garder contre les Anglois tresgrand nombre de pionniers, de charpentiers & autres manourriers, qui y furent menez & conduits pour rompre & demolir vne dicque de mer, afin de noyer & destruire ceux de la ville de Calais & le païs enuiron. Et auoit on donné à entendre audit Duc de Bourgongne, qu'il estoit trespossible de le faire, & que par ces moyens icelle ville seroit du tout mise à destruction: mais quād ce vint que les pionniers dessusdits eurent ouuré certaine espace de temps, on apperceut assez

sez bien que ce n'estoit point vne chose qui se peust bonnement acheuer. Si fut l'entreprinse delaissee, & fait on rompre le pont de Millay & aucunes autres petites dicques, qui peu feirent de dommages ausdits Anglois.

Comment le Roy de France contrainit Rodigue de Villandras, lequel gastoit & travailloit son pais d'aller guerroyer sur les Anglois.

EN cest an vint à la cognoissance de Charles Roy de France, commēt ses païs en diuers lieux estoient degastez & oppressez par aucuns capitaines tenans son party: lesquels auoient grand nombre de gens d'armes sur les champs: entre lesquels estoit vn des principaux Rodigue de Villandras, lequel auoit en sa compaignie mieux de six cens cheuaux. Si luy furent enuoyez de par le Roy certains messages, lesquels luy dirent & commanderent de par luy qu'il vuidast ses païs ou allast en frontiere contre les Anglois, à quoy il ne voulut obeïr. Et pourtāt le Roy qui estoit à Bourges en Berry, assembla gens & alla en personne pour le ruer ius, mais ledit Rodigue en fut aduerty. Si se tira vers Thoulouze, & alla au païs de Guyenne: auquel lieu avec aucuns du païs il assembla de rechief tresgrand nombre de gens d'armes. Si cōmença à faire tresforte guerre aux Anglois, & tant en ce continua, qu'il leur feit tresgrand dommage & print plusieurs villes & forteresses, où il meit de ses gēs. Si entra en l'Isle de Medoch iusques à Soulach: lequel païs ils destruirent & y trouuerent des biens tressagement, & en tresgrand abondance: & pareillemēt conquirent le païs de Banquefort. Et outre allerent deuant vn fort nōmé Chastel-Neuf, lequel ils prindrēt d'assault & estoit au capitaine de Beusd. Et tantost apres vint le seigneur d'Albreth à tout tresgrand puissance de gens d'armes, & les mena deuers Bordeaux où ils prindrent l'eglise de S. Seuerin, qui est à vn traict d'arbalestre pres de la cité. Si se logerent illec tresgrand nombre de gens de guerre. Et depuis par nuict en meirent és vignes aupres de la ville vne tresgrosse embusche de leurs gens: lesquelles vignes estoient hautes comme treilles, & le lendemain feirent semblant d'eux desloger. Et adonc ceux de Bordeaux cōmencerent à saillir dehors sur eux, & en issit bien deux mille largement. Contre lesquels se meirent ceux de ladicte embusche, & y eut entre eux vne tresgrād besongne & merueilleuse escarmouche: car ils se cōbattirent felonement par moult grand espace de temps, & se tindrent tresvaillamment l'vn contre l'autre. Si en demoura de morts sur la place bien enuiron huit cens, dont la plus grand partie furent Anglois: lesquels Anglois il cōuint retraire dedans la ville de Bordeaux, pour la force & grand puissance des François. Et adōc furent mises grosses & puissantes garnisons de gens d'armes autour de ladicte ville de Bordeaux en plusieurs lieux, lesquels contrainirent & destruisirent moult le païs, qui estoit moult grand & plātueux, & auoit esté long temps sans estre si fort approché de gens de guerre qu'il fut pour lors. Pour lesquelles entreprinſes, vaillances & diligences que feit iceluy Rodigue de Villandras au païs de Bordeaux, le Roy de France luy pardonna toutes les offences & malfaits qu'il auoit faits cōtre luy. Toutesfois dedans vn an apres ensuiuant lesdits Anglois reconquirent la plus grand partie de ce, qu'iceux François auoient gaigné sur eux.

*De l'an mille cccc.xxxix.**Comment le Pape Eugene enuoya ses lettres en plusieurs lieux de la Chrestienté, & la teneur d'icelles.*

Au commencement de cest an furent enuoyées vnes bulles par nostre saint Pere le Pape Eugene, contre ceux tenans le Concile de Basle, dont la teneur s'ensuit.

EUGENE Euesque serf des serfs de Dieu. Tous exemples tant du nouuel comme du vieil testament nous admonnestent les crimes & deffauts, especiallement griefs qui sont & attendent à l'esclandre & diuision de la chose publicque & du peuple à nous commis & baillé: que nous ne les laissons passer sous silence, ne que nullement ne les laissons impunis. Et si les fautes par lesquelles Dieu est grandement offensé, nous differons à poursuiuir & véger, certainement nous prouoquerions la diuine sapience à se courroucer: car il est plusieurs deffauts, esquelles grandement pechent ceux qui relaschent & different de vengeance quand ils les doiuent punir: iuste chose est & à raison consonantes selon la raison des Saints Peres, que ceux qui contemnent les diuins mandemens & desobeïssans aux paternelles ordonnances selon saintes institutions: soient corrigez de plus cruelles vengeance, affin que les autres ayent honte de mettre les crimes & toutes concorde fraternelle se resiouisse, & que tous prennent exéple de cremeur & de honnesteté: car fil estoit ainsi que ja ne soit, que la vigueur & sollicitude de l'Eglise fut par nous delaissee negligemmēt, la discipline de l'Eglise periroit par nostre paresse: ce seroit chose moult nuisant aux ames des bons & loyaux Chrestiens: dont à retrencher la mauuaise chair de la bone, & la brebis rōgneuse du troupeau à ce que toute la maison & les bestes ne perissent ne soient corrompuz n'infectez: car comme dit le glorieux Docteur S. Hierosme, Arien fut à Alexandrie vne estincelle de feu, mais pource qu'elle ne fut pas assez tost estaincte & oppressée, la flābe s'y depopula & alluma tout le monde: & pour ceste cause à l'Euesque de Romme furent de nostre sauueur dōnées les clefs de lier & deslier, affin que ceux qui se desuoient & vont insensiblement hors du chemin de verité & de iustice, soient abstraincts & contraincts des liēs de correction & obligation. Disons donc de l'auctorité Apostolicque, ceux qui curent & qui mettent & menent les autres en erreur, par les sensures de l'Eglise estre baillez à Sathan à ce que leurs esprits soient sauuez: & à ce que tant eux cōme les autres desaprennent de blasphemer. Et comme dit le benoist Pape Sixte: Nous ayons memoire de presider sous le nom d'icelle Eglise, de laquelle la confession est de nostre tresdoux sauueur Iesus glorifier. De laquelle la foy ne nourrist iamais heresie: mais toutes les destruit. Et pource nous entendons à nous non estre autrement licite, que de mettre toute nostre force & puissance à ce à quoy le fait de l'vniuerselle Eglise soit arresté. Verité est que es iours prochains nous presidens à la congregation du Concile general de ceste sainte sacrée Eglise, nostre bien aymé fils maistre Hutin de la Plante Docteur en Loix, & nostre bien aymé fils maistre Iean de Plato Docteur en Loix Promoteur d'iceluy sacré Concile, & maistre Venture du Chastel ordonné Procureur de la chābre Apostolicque & licencié es Loix, nous ont exposé vne lamentable querelle

relle sous ces parolles en disant. Treffainct & reueréd Pere en ce sacré & œcu-
 menique Concile general legitiment assemblé, jaoit-ce qu'une soit la sain-
 cte catholique & apostolique Eglise Rommaine, que le benoist saint Esprit en
 la personne de nostre seigneur au liure des Cantiques le demonstre, en disant :
 Ma coulombe est vne parfaicte, vne est aussi sa mere, qui la porte enfante. Et le
 vaissel d'election monseigneur saint Pol demonstre l'unité d'icelle Eglise &
 le sacrement de ceste unité en disant, vn corps & vn esprit, vne esperance de
 nostre vocation, vn seigneur & vne foy en baptisme vn Dieu. Et (comme dit
 le benoist Cyprien:) elle est vn chief, vne naissance & vne mere plantureuse
 de toute fecondité, & ne peult adulterer l'espouse incorrompue de Iesus Christ
 nette & pure, elle cognoist vne maison, elle garde par chasteté, netteté, &
 sainteté vne seule couche. Et en vn autre lieu iceluy mesme Cyprien dit, il
 n'a point l'ecclesiasticque ordonnance, qui ne tient l'unité de l'Eglise. Et com-
 me Pelage Pape afferme des parolles du benoist saint Augustin tres noble
 Docteur d'icelle Eglise: pource qu'il ne peult estre qu'il ne soit Eglise & faut
 qu'icelle le soit: laquelle est vn siege Apostolicque radiallement constitué
 par la succession des Euesques. Neantmoins dès le commencement d'icelle
 Eglise, la libidinosité & outrage effrené d'aucuns hommes à tousiours atten-
 du de descirer & de destrencher l'unité d'icelle. A l'encontre desquels la di-
 uine vengeance premierement, & apres l'auctorité des saints Peres se sont
 esleuez. Quiconques doncques par hardiesse, sacrilege, & diabolique per-
 suasion, presumera d'entamer ceste sainteté & sans nulle macule unité de l'E-
 glise: cestuy sacré Canon le demonstre & enseigne ennemy de l'Eglise: & ne
 peut auoir Dieu à pere fil ne tient l'unité de l'Eglise vniuerselle. Et ne peut ce-
 luy ne nul en riens conuenir qui ne conuient avecques le corps de l'Eglise &
 l'vniuerselle fraternité: car comme Iesus Christ soit mort pour l'Eglise, & l'E-
 glise soit le corps Iesus Christ, il n'est point de doute que qui diuise l'Eglise,
 qu'il est conuaincu de diuiser & deschirer le corps de Iesus Christ. Et à ceste
 cause par la volenté de Dieu en ses schismaticques Dathan & Abiron, qui
 contre l'honneur de Dieu faisoient schisme & diuision, telle vengeance vint
 que la terre s'ouurit & les engloutit tous vifs: & les autres qui leur adheroient
 furent consommez par feu qui descendit du ciel. En apres combien soit inse-
 parable le sacrement de l'unité de l'Eglise, & combien s'acquierent grand per-
 dition par l'indignation de Dieu: ceux font schisme en l'Eglise, & qui delaif-
 sent le vray espoux de l'Eglise, & vn autre faulx Euesque se constituent on le
 veoit es liures des Roys où l'escriture diuine declare: que quand de la ligne de
 Iuda & de Benjamin les dix autres lignes se furent separées: & qu'ils eurent laif-
 sé leur droit Roy, & en eurent constitué vn autre, nostre seigneur fut indigné
 contre toute la semence d'Israël, & les donna en derision & diuision: & aussi
 qu'il deiecta de sa face. Et dit ceste escriture, nostre seigneur auoir esté indigné
 & iceux auoit donné en perdition qui festoient separez & dissipez d'unité & se
 auoient autre Roy constitué. Et à tousiours est si grande de Dieu l'indignation
 contre ceux qui ont fait schisme & diuision, qu'aussi quād l'homme de Dieu fut
 enuoyé à Hieroboam qui luy reprochoit & blasmoit ses pechez, & luy predi-
 soit la vengeance que Dieu en vouloit prendre. Dieu luy auoit deffendu qu'il

ne mangeast de pain ne beust eaüe avecques iceluy Hieroboam. Laquelle chose il trespassa contre le commandement de Dieu : & tantost apres par la diuine sentence il fut tellement persecuté, qu'ainsi qu'il venoit dudit Hieroboam, il luy vint vn lion tresimpetueusement qui l'occist. Desquelles choses comme S. Hierosme afferme, nul ne doit auoir doubte que le crime de schisme ne soit & ayt esté de Dieu griefuement puny. Comme doncques ja pieça en vn sainct sacré Concile general de Constance, ce pernicious schisme à trauaillé & donné affliction à l'Eglise de Dieu, & à la religion Chrestienne (à tresgrand perdition d'ames & non mie tant seulement d'hommes, mais aussi de citez & prouinces) par persecution cruelle & lōgue. Et depuis par l'ineffable misericorde de Dieu tout puissant : & aussi par les grans labeurs, angoisses & despēs des Roys & des Princes tāt ecclesiastiques comme seculiers : & aussi de moult d'vniuersitez & d'autres loyaux Chrestiens, eut esté appaisé. Et croyoit on l'Eglise parfaictement (comme chacun le desiroit) en ioye de parfaicte paix, tant par l'election de bien aymée memoire le Pape Martin : comme aussi apres son trespas par l'indubitable vnique & canonicque assumption de vous à la haultesse de l'Appostolat. Mais maintenant voicy de nous sommes contraincts de dire comme Hieremie le Prophete. Nous auons attendu paix, mais voicy tribulation. Et de rechief avecques Isaye. Nous auons attēdu lumiere, & voicy tenebres : car plusieurs enfans de perdition & iniquité, peu en nombre & legiers d'auctorité à Basle, apres la translation du Concile (lequel auoit là eu vigueur par vne espace par vostre autorité : laquelle translation a esté faicte par iustes, euidentes, contrainans & necessaires causes, canonicquemēt pour la tressaincte & à tout le peuple Chrestien tres desirée vnion des Grecs & de toute l'Eglise Orientalle) de toutes leurs forces, de toutes leurs douleurs, cautelles se sont efforcez de l'empescher. Car quand les deuantdits appelez estandards qui estoient demourez à Basle eurent failly aux Grecs de leur promesse, & qu'ils apperceurent par les Orateurs des Grecs & de l'Eglise Orientalle, que tres noble Prince messire Iean Paleologue Empereur des Rommains : & aussi Ioseph de bonne memoire Patriarche de Constantinoble, avecques plusieurs autres Prelats & autres hommes de l'Eglise Orientalle, deuoient venir au lieu esleu pour celebrer le Concile œcumenique : & que vostre sainteté estoit là venue avecques plusieurs Prelats, Orateurs, & autres innombrables à tresgrand despens & fraiz. Pour destourber la venue du dessusdit Empereur, ont esté discerner vn monitoire detestable contre vostre sainteté & contre mes tresreuerends seigneurs mes seigneurs les Cardinaulx de l'Eglise de Romme. Et quand ils apperceurent les deuantdits Empereur & Patriarches de l'Eglise Orientalle venir, ils allerent de faict proposer cōtre nostre sainteté vne sacrilege sentence de suspension & administration de Papalité, nonobstans lesquels enforcements iniques & sacrileges, par vostre diligence, cure & sollicitude, avecques le conseil & par moult de labeurs & de diuerses disputations : en fin la diuine misericorde à concedé que le schisme des deuantdits Grecs & Orientalle Eglise : lequel à la grande destruction du peuple de Chrestienté, auoit duré pres de cinq cens ans, si fut osté du meillieu de l'Eglise : & que la tresdesirée vniō de l'Orientalle Eglise & Occidentalle, laquelle on croyoit à grand peine pouoir faire, par tressouueraine cōcorde s'en ensuiuit.

uit. Et eux qui de veoir tant de saintes œuvres & sacré Concile, se deuoient treshaultement esmerueiller : & par souveraines louenges & exaltations (comme toute la religion Chrestienne auoit faict) deuoient venerer & rendre grace au treshautain de tant merueilleux dons, sont faits plus cruels & plus obstinez, en voulant à la tresmauuaise cruauté ministrer enflamment, à la destruction de la chose publique & ruine chrestienne, & sont faits persecuteurs de leur propre honneur par presumption prestifere, festans efforcez tant qu'ils ont peu de trencher l'vnité de la sainte Rommaine & vniuerselle Eglise & incon-
sulte, créée de nostre seigneur, & diuertir d'icelle piteuse & sainte mere Eglise, par leurs morceaux maufades & serpentineux ce tresdeloyal Sathan Amadeus iadis Duc de Sauoye, lequel ja pieça a ces choses premeditées en son courage : & a esté acertené de plusieurs faulces pronostications & sorceries par plusieurs execrables & maudits hommes & femmes : lesquels ont delaisé leur sauueur derriere, & se sont conuertis apres Sathan, seduits par illusion de diables : lesquels en commun lāgaige sont nommées Sorcieres, Frangules, Straganes ou Vaudoyes desquels on dit en auoir grand foison en son païs. Et par telles gens ja passé aucuns ans a esté seduit tellement, qu'affin qu'il peust estre esleué pour chief mōstrueux & difforme en l'Eglise de Dieu, il print habit d'hermite aux Auichoix d'vn tresfaulx hipocrite : affin q̄ sous la peau de brebis ou aignel il couurit sa cruauté lupine : à ce qu'en la fin en procez de temps, luy qui estoit confident à ceux de Basle, en fraude par dons, par promesses & par menaces vne grand partie de ceux de Basle : laquelle estoit subiecté à son commandement ou tyrannie (idollle de Belzebuth d'iceux nouveaux diables ses Princes) ils le constituassent à l'encontre de vostre sainteté, laquelle est tres vray vicaire de Dieu & successeur de saint Pierre indubitablement, & prophanaissent & pollussent l'Eglise de Dieu. Et a induit ce tresiniuste reueux Amadee homme d'execrable & ignominieuse conuoitise, & lequel tousiours fanathematise ceste diuision, laquelle selon l'Apostole est seruitude des diables autrement appelée blasphemouse synagogue d'hommes perdus & de toute Chrestienté la honteuse & confusable sentine puante : à laquelle a deputé pour electeurs Auichoix & proclamateurs certains hommes ou diables sous figures & especes d'hommes mussez, qui en la fin en Idoles (comme iadis la statue de Nabuchodonosor) au temple & en l'Eglise de Dieu s'esleuassent. Et aussi luy mesme esleue par ses furieux vices, descendant à l'exemple de Lucifer, qui dist : ie mettray mon siege en Aquilon & seray semblable au treshautain pour de la deuantdicte election : mais plus vray prophanation faicte de luy (laquelle luy propre à grans fraiz & anxieté de courage auoit pourchassée par tresgrande & detestable auidité & desir) il embrassa, & n'a point eu d'horreur de vestir les vestemens Papaulx & les signes, de soy tenir porter & exercer pour le souverain & Rommain Euesque, & de plusieurs comme tel se faire honorer & reuerer. Et outre plus il n'a point eu de honte ne cremeur d'enuoyer en plusieurs & diuerses parties du mōde ses lettres plombées & bullées, en la forme des Euesques Rommains, esquelles il se nomme & appelle Fœlix : comme il soit ainsi, que de tous les hommes du mōde il soit le plus mal-heureux, & par lesquelles il s'efforce de mettre & espandre les diuers venins de ses pestillences.

O tressainct pere & tressainct sacré conseil, que quiers-ie premierement cy ou que demande-ie, ou par quelle force de voix ou par quelle grauité de pesanteur de parolles, par quelle douleur de courage, par quel gemissement de courage ou par quelle abondance de larmes puis-ie plorer tant horrible forfaiture. Quelle occasion sera-ce qui pourra deplorer, exprimer par nulle effluencieuse largesse ou abondance de larmes dignement ce terrible & enorme péché & crime? Certainement ceste chose ne se peult veritablement exprimer ne racompter, pour l'indicible grandeur de sa crudelité: car la grandeur de si grande offence si vaine la force de la langue. Mais tressainct & trefreuerend Pere, comme ie cognois maintenant est le temps de remede plus que de querelle & de plainte: car voicy nostre mere sainte Eglise, laquelle en la personne de la sainteté qui en son vray & seur espoux par bone & vraye paix se resiouïssoit par cy deuant, maintenant est contraincte de crier en grans souspirs sangloutissemens, & defferrer toutes les fontainées des larmes à toy qui es son vray espoux à vous mes trefreuereds peres, qui estes maintenant en partie de sollicitude & à ce sacré & œcumenicque euocqué, en disant: ayez mercy de moy singulierement vous qui estes mes amis: car mes entrailles sont toutes remplies d'amertume, & les lions destruisent la vigne de Dieu Sabaoth, & la robe de Iesus Christ inconsutile & entiere, qui est l'Eglise, les tresmauuais si deschirerent. Maintenant donc se lieue Dieu, & tous ses ennemis soient dissipés & destruits. Et toy tressainct Pere, comme il soit ainsi que toutes les choses dessusdictes soient manifestes, publiques, & si notoires, que par nulle couuerture elles ne se peuent celer, deffendre n'excuser: en la vertu du treshautain auecques ce sacré Concile lieue toy, & resmeuz & iuge la cause de ton espouse, & aye la memoire de l'opprobre de tes enfans. O trespuissant ceins t'espée & la mets sur la cuisse, entens prospere & regne. Et dits avec le Psalmiste: ie persecuteray mes ennemis, & ne m'en retourneray iusques à ce que ie les consume & desrompe, à ce que plus ne s'eslieuent ne cheent, ne trespuchent sous mes pieds: ne il n'appartiét point si desraisonnable offence ne si abominable sans passer sous dissimulation, afin que par aduenture, presumption de malice impunie ne treuve vn successeur: mais par le contraire la transgression & deffaute punie, soit aux autres exēplaires d'eux retraire d'offencer. Et à l'exemple de Moÿse, l'amy & seruiteur de Dieu doit estre dicté par vraye sainteté à tout le peuple Chrestien: departez trestous des tabernacles & villes des mauuais. Et aussi à l'exemple du benoist saint ton predecesseur, lequel selon le conseil general de l'Eglise, à Ephese, osta & renuoya Dioscorus & ses faulx & ensuiuans en la Calcedoine il condamna. Aussi à l'exemple des souuerains Euesques tes predecesseurs, lesquels ont tousiours exterminés & expulsés de l'Eglise de Dieu, de la communauté des loyaux Chrestiens & du sacré corps de Dieu & affligez & punis d'autres condignes & iustes peines, selon que iustice le requiert tous ceux qui se sont esleuez contre l'Eglise de Dieu par heresies, diuisions & schismes: venge donc ceste nouuelle rage qui en l'iniure de toy & de l'Eglise de Romme ton espouse, & aussi en l'esclādre de tout le peuple Chrestien vengne, deslie à l'ayde & approbation de ce saint sacré & œcumenicque Concile, excommunie, oste, & separe perpetuellemēt des portes de l'Eglise, par l'auctorité

l'autorité de Dieu tout puissant, de saint Pierre & de saint Pol & de la trinité, tous les mauuais deuantdits monstres & difformes acteurs de telle offence, avec leur heresiarque pere de heresie le trespestilétieux Amadée & nouuel Antechrist en l'Eglise de Dieu: avec aussi tous les seruiteurs adherans & ensuiuans, & singulierement de ces peruers Electeurs ou plus vrayement prophanateurs. Soient donc deiectez luy & tous les deuantdits comme Antechrist destructeur & inuadeur de toute la Chrestienté, ne iamais à luy ne aux deuantdits sur ceste matiere, ne soit donné nulle audience. Soient eux & leurs successeurs priuez de tous degrez & dignitez ecclesiastiques & mondaines, sans nulle reuocation: & que tous soient de perpetuelle anathematization & excommunication cōdamnez. Et qu'au iugement ils soient avecques les mauuais, & qu'ils sentent la fureur des benoists saints apostoles S. Pierre & S. Pol, desquels ils presument l'Eglise confondre. Soit leur habitation faicte deserte, & ne soient nuls qui habitent en leurs tabernacles: leurs enfans soient orphelins, & leurs femmes vefues. Tout le monde se combatte contre eux, & tous les elemens leur soient contraires. Et qu'en telle maniere ils soient deiectez, exterminiez & abhominiez de tous, à ce qu'eux pourrissans en perpetuelle necessité & misere, iustement la mort leur soit soulas & vie leur soit tourment. Et les merites de tous les saints si les cōfondent, & que sur eux demonstrent publique vengeance. Et avecques Choré Dathan & Abiron qui furent tous vifs engloutis de la terre, ils reçoivent leur portion. Et finablement fils ne se retournent & de cueur se conuertissent & facent dignes fructs de penitence, & satisfont à ta sainteté & l'vniuerselle Eglise pour la cruauté de tant de crimes & d'offences, avecques les mauuais es tenebres infernales soient mussez en perpetuel tourment, & là condamnez par le digne iugement de Dieu. Et nous & tous bons Chrestiens qui auons en abomination les heresiarches Princes d'heresie, & leur tresabhominable idole Antechrist & blasphemés execrables reprouuons: & toy vicaire & lieutenant de Iesus Christ & tresdigne espoux de l'Eglise (comme nous confessons & par deuote reuerence & obedience reuerons) la grace de Dieu tout puissant garde & deffende par l'intercession des benoists apostoles saint Pierre & saint Pol, & en la fin par sa pitié inenarrable aux eternelles ioyes nous meine. Amē. Nous donc & par la relation des gens dignes de foy, ayans apperceu si tresgrand impieté auoir esté commise: auons esté & sommes afflictionnez de grand douleur & tristesses, comme il appartenoit tant pour le si grand esclandre maintenant venu, comme pour la mort & perdition des ames de ceux qui commettoient & ont perpetré telles choses. Et par especial de celuy Amadée Antipape, lequel nous auons embrassé es entrailles de charité, duquel nous auons eu tousiours cure d'exaucer ses prieres & requestes tant que nous auons peu avec Dieu. Et comme ja pieça à l'encontre de ceste abomination nous ayons eu desir en nostre courage d'y pourueoir de salutaires remedes, selon le droit de nostre office de pasteur. Et maintenant si publicquement en la face de l'Eglise soyons requis de resister, obuier contre le cruel crime, pour la deffence de l'Eglise le plus instamment & hastiuement que nous pourrons, de peur que ceste chose tant enorme & execrable soit vn sougeō & naissance. Moyenant l'ayde de Dieu, de qui en la besongne radicallemēt extirper avec nous ensemble ce saint sacré cō-

seil present, nous auons intention d'y mettre remede sans quelque dilation selon les sainctes ordonnances & canonicques de l'Eglise. Voyans donc & entendans la requeste du Procureur & du Promoteur de ce sacré Concile, & de nostre chambre Apostolicque estre iuste & consonante en droit diuin & humain. Nonobstant que les deuantdictes deffaultes soient si publicques & si notoires, qu'elles ne se peussent par nulle maniere couvrir ne celer, & qu'il ne seroit nulle necessité de faire autre information: toutesfois pour plus grande certification, & cautelle des choses premises par l'approbation de ce sacré Concile: nous auons commis à plusieurs hommes vaillans & nobles d'un chacun estat du Concile diligemment examiner, & ce qu'ils trouueroient par information iustement & sans faueur ils rapportassent à nous & à iceluy sacré Concile. Et par les commissaires eüe tresdiligente inquisition en tant qu'il appartient de ce schisme & diuision & à nous, & audit Concile assemblez en congregation Sinodale, les choses qu'ils auroient trouuées par l'examen de gens dignes de foy, ont loyaument rapportées & combien que par ces tant publicques, manifestes, & notoires deffaultes nous eussions peu sans quelque dilatiō les dessusdits scandaliseurs & flagicieux hommes anathematiser, & condamner selon les sainctes ordonnances: neātmoins nous à ce sacré sinode en ensuiuant la clemēce de Dieu tout puissant, qui ne veult point la mort du pecheur: mais veult qu'il se conuertisse & viue: auons decreté & ordonné de faire toute la douleur que nous pourrons, affin que par le proposer de la voye de douceur, ils se retournassent, & reculent des deuantdits outrages & excez: affin qu'eux retournant à la congregation de l'Eglise comme le fils prodigue benignement nous le receuons, & par paternelle charité nous l'embrassons. Iceluy donc Amadée & Antipape, ses adherans & le receuans, ou par quelque maniere fauorisans, par les entrailles de la misericorde de nostre Dieu: & par l'effusion & aspersiō du precieux sang de nostre seigneur Iesus christ: auquel & par lequel la redemption de l'humain lignage & l'edification de l'Eglise est faicte, de tout nostre cueur nous enhortons, priōs & obsecrons que l'vnité d'icelle Eglise (pour laquelle iceluy sauueur tant instamment pria son pere) dorefnauant ils delaissent & desistent à violer, & que la fraternelle dilection, amour & paix (laquelle tant de fois & si curieusement quand il deust aller de ce monde à son pere par mort, il recommanda à ses disciples: & sans laquelle n'oraisons, ieusnes n'aumosmes ne sont acceptées à Dieu) ils ne detrenchent & deschirent, ains se repentent & hayent honte. Et que des deuantdits & excès tant scandaleux & tant pernicioeux, le plus tost qu'ils pourront ils se desistent. Et ils se trouueront veritablement enuers nous & enuers ce sacré Concile (si affectueusement ils y vueillent comparoir comme ils doiuent & sont tenus) receuz par paternelle charité. Et affin que si d'auenture l'amour de iustice & de vertu ne les retrayoit de peché, la rigueur de discipline, & les peines contraignent les deuantdits Amadée Antipape, electeurs & prophanateurs croyās, adherans, & receuans, & par quelque maniere, approuuans par approbation de ce conseil: nous les requerons & admonestons sur la reuerence & obeissance qu'il doiuent à sainte Eglise, & sur la peine d'anathematisation crimes d'heresie & schisme & de quelconques autres peines: & leur mandons en commandant tresdestroictement que dedans cinquante iours depuis ensuiuans immediatement

diatement apres ceste admonition & sentence, iceluy Amadée Antipape, pour le Pape de Romme doresnauant il desiste & delaisse à soy tenir & nommer, & que par autres tant qu'il le pourra il ne se laisse nommer: & que doresnauant il ne presume à vser des signes & autres choses appartenans au Pape de Romme en quelque maniere que ce soit. Et les deuantdits electeurs & prophanateurs, adherans & receuans faulseurs desormais au crime de ce schisme, ne facent assistance, ne croyent ne adherent ou fauorisent en quelque maniere que ce soit par eux ou par autres directement ou indirectement ne par quelque maniere, question ou couleur: mais tant iceluy Amadée Antipape comme les deuantdits electeurs, crediters, adherans, recepteurs & faulseurs nous ayent, recognoissent & reuerent comme Euesque de Romme vicaire de Dieu & de saint Pierre & de saint Pol legitime successeur. Et qu'à nous comme pere & pasteur de leurs armes ils entendent, comparent & estudient dedas le terme prefix nous & ce conseil certifier & acertener des choses deuantdictes. Et autrement siceluy Amadée, electeurs, croyans, adherans, receptateurs & faulseurs deuantdits font le contraire, que ja ne soit, & que toutes les choses & singulieres deuantdictes ils n'accomplissent par effect dedans le terme assigné, dont maintenant & pour adonc nous voulons qu'ils encourent toutes les peines deuantdictes. Et neantmoins voulons que les deuantdits, fils font le contraire, precisement le quinzieme iour prochain ensuiuant apres ledit terme, mais qu'il ne soit feste, & si est feste au prochain iour ensuiuant sans feste, comparent personnellement deuant nous & le deuantdit Concile où nous serons, pour veoir & ouyr eux & chacun d'eux, lesquels nous citons par telle maniere, pour les declairer audit iour dignes d'estre punis comme hereticques & coupables de crime de leze majesté, & auoir encouru & defferuy les censures & peines deuantdictes. Et outre ordonner selon ce que iustice requerra & sera veu bon & proffitable, en certifiant iceux ensemble & chacun à part quel qu'il soit comparent ou non, ou qu'il se demonstre auoir comparu nous procederons à la declaration des peines moyennant & selon iustice. Nonobstant que leur contumace ou presence n'y soit mie requise, procederons en outre à leur aggrauement & reaggrauement selon que la rigueur de iustice le requerra & leurs merites l'auront defferuy. Et affin que nostre monition & citation faicte en ceste maniere, soit, demeure & vienne à la cognoissance de ceux qui sont citez & à qu'il appartient, nous ferons attacher les chartres & lettres ceste citation contenans aux portes de l'Eglise de nostre Dame la nouvelle de Florence: lesquelles lettres & chartres ainsi comme par leur son & publique monstrence, annoncerent publicquement & demonstrent comme messages, à celle fin que les admonnestez n'ignorent & ne puissent monstrent ne pretendre nulle ignorance ne excusation: comme il ne peut estre vray semblable que telle chose leur peust demourer incogneüe ou celée, laquelle sera cy patemment declairée. Nous voulons aussi & ordonnons par l'auctorité apostolicque, que nostredicte monition mise ausdictes portes, vaille & obtienne plaine vertu & fermeté de contraindre lesdits admonnestez: nonobstant quelconque constitution au contraire comme se ladicte monition auoit esté à chacun des admonnestez personnellement, & presentialement insinuée & intimée. A celle fin toutesfois que les admonnestez & citez à ladicte

excusation n'alleguent iceluy Concile & court Rommaine commune à chacun & le pays & le lieu estre moins seur pour eux, & que pour ces causes & autres deussent estre en peril tant en allant comme en venant & seiournant nous les asseurons par la teneur de ces presentes tous & singuliers Patriarches, Archeuesques, Euesques & autres Prelats & Clercs d'Eglises & de monasteres & personnes ecclesiastiques : & aussi Ducs, Comtes, Princes & cheualiers & escuyers & autres officiers de quelque estat ou condition qu'ils soient, avecques leurs lieutenans : & apres toutes communautéz comme villes, chasteaux & autres lieux nous, requerons par ces presentes & exhortons : & à iceux Patriarches, Archeuesques, Euesques & autres Prelats estroictement nous mandons, qu'à tous les deuantdits admonnestez ou chacun d'eux en venant à ce conseil ou à cestedicte Court Rommaine, en demourant & seiournant en icelle pour l'occasion deuantdicte & en retournant à leurs personnes biens & autres choses, ne fassent ne seussent faire tant qu'ils le puissent amender, nul ennuy & offence à nuls hommes. Et ne soit licite comment qu'il soit ceste page de nostre citation, monition, volenté, requeste, exhortation, proces & commandement enfreindre ou par presumptueuse hardiesse aller à l'encontre. Et si il est aucun qui presume attemper, l'indignation de Dieu tout puissant & des benoists apostres saint Pierre & saint Pol se cognoissent auoir encouru. Donné à Florence en nostre publicque session sinodale solemnellement en l'Eglise la neufue : en laquelle ville de present nous sommes residens, l'an de l'incarnation dominicale mille cccc.xxxix. le dixiesme iour d'Auril & de nostre pontificat le dixiesme.

Comment messire Jean de Luxembourg enuoya ses lettres aux cheualiers de la toison, à cause de ce qu'il se sentoît en l'indignation du Duc de Bourgogne.

DVrant les besongnes dessusdictes, furent portées plusieurs nouvelles deuers le Duc de Bourgogne contraires & preiudiciables à messire Jean de Luxembourg Comte de Ligny, & pour lesquelles ledit Duc ne fut point trop bien content de luy. Et pource principalement qu'il soubstenoit en ses villes & forteresses plusieurs gens de guerre, qui faisoient moult de rigueurs & de rudesses contre les gens & pays d'iceluy Duc. Si en fut ledit de Luxembourg aucunement aduerty. Et pource affin de luy excuser, escriuit certaines lettres aux cheualiers de l'ordre de la toyson d'or de l'hostel du dessusdit Duc, desquelles lettres mot apres autre la teneur s'ensuit.

TRESCHIERS freres & compagnons, depuis peu de temps en ça aucuns mes bons amis m'ont aduerty, que mon tresredoubté seigneur le Duc de Bourgogne estoit indigné pour aucuns rapports lesquels luy ont esté fais à l'encontre de moy. Pour laquelle raison iay enuoyé deuers luy Jean Taillemonde & Huet mon clerc, par lesquels luy ay escript luy suppliant humblement, que de sa grace il ne luy plaise soy enfelonner contre moy, ne me tenir en son indignation sans moy ouyr en mes excusations raisonnables : lequel m'a par les dessus nommez escript vnes lettres de credence, & à iceux en sa presence fait faire response de bouche, en declairant les points dont il estoit informé & malcontent de moy. Lesquels pource qu'ils leur sembloient de grand poix, les ont requis d'auoir par escript : mais ils n'en ont peu finer, dõt ie suis bien esmerueillé. Toutesfois

tesfois ils les m'ont declairez au mieux qu'ils ont peu, & sur iceux ie rescripts à mondit seigneur pour mes excusations. Et combien que i'esperoye les aucuns de vous auoir esté presens à leur declairer lesdits points, neantmoins affin de les vous raffreschir & vous informer de mes responce, sur ce ie vous escripts pareillement. Et premierement pour respondre au point de ladicte credence que i'ay plus au cueur, & qui plus touche mon honneur: par lequel leur à esté declairé, que mondit seigneur à sceu de la part des Anglois que certain temps apres le traicté d'Arras ils escriuirent à monseigneur de Roüen mon frere, que fil plaisoit à mondit seigneur tenir paisible eux leurs seigneurs, paÿs, amis & aliez, ils feroient enuers mondit seigneur & les siens les semblables, & que mondit seigneur & frere m'en aduertist pour en toucher à mondit seigneur a trouuer moyen pour a ce paruenir, dont combien qu'il m'en aye escript ie l'ay celé: parquoy s'en sont ensuis de grans maux & inconueniens, qui ne fussent pas se ie n'en fusse acquitté. Pour moy excuser de ce, sauue la reuerence de mondit seigneur le Duc desdits maux & inconueniens, ne sont point aduenus par moy n'à ma deffaulte ou negligence ne la guerre commencée ne conseillée. Et sçay de vray se mondit seigneur eust esté memoratif des deuoirs & diligences que i'ay sur ce faictes, on ne m'en eust point donné charge. Car veritablement le lendemain que i'euz les lettres que mondit seigneur & frere m'enuoya touchant ceste matiere, qui furent escriptes à Roüen le xxix. iour de Ianuier l'an mille quatre cens trente & cinq: & lesquelles il receut le huictiesme iour de Feurier ensuiuant, i'enuoyay pour ceste cause à mondit seigneur en la ville de Bruxelles aucuns de mes gens, qui y arriuerent le dixiesme iour de Feurier ensuiuant à tout mes lettres de credence: par lesquelles ie leur chargeay là declarer le contenu des lettres de mondit seigneur & frere, ainsi que par eux le rapport en fut fait. Surquoy leur fut faicte responce de par mondit seigneur par la bouche de l'Euesque de Tournay, que pour certaines causes qui leur declaira lors, que mondit seigneur n'auoit encores lors deliberé d'entendre au contenu desdictes lettres de mondit seigneur & frere, qu'ils luy auoient esté exposées en substance. Et me donnay grand merueille de ce que ledit Euesque a dignité & honneur en l'Eglise, mesmement qu'il est réputé de si tresgrand prudence & l'un des chiefs du conseil de mondit Seigneur, qui de par luy fait la responce à mesdictes gens, ne l'en aduertit pour s'en acquitter enuers luy, & aussi pour ma descharge: car si ainsi l'eut fait ie sçay certainement qu'on ne m'en eust point imposé ladicte charge. Toutesfois si ce ne souffisoit pour ladicte descharge, ie feray bien apparoir par lettres signées de la main de mondit seigneur, que ie l'en ay fait aduertir deuëment selon que mondit seigneur & frere le m'auoit escript: & que par les lettres de mondit seigneur & aussi pour les causes cy declairées, il m'escriuit qu'il n'estoit point deliberé d'y entendre. Et par ce pouez entendre se ie me suis acquité & se telle charge m'en doit estre donnée. Et de cy en auant ay intention, au plaisir de Dieu le createur, de m'en excuser par tout où il appartiendra, tellement que chacun pourra cognoistre que la faute n'est point venue de moy. A l'autre point pour lequel m'est imposé, que i'ay enuoyé de mes gens deuers les Anglois à Calais depuis la conuenance & assemblée d'Arras sans le sceu de mondit seigneur & de ma tresredoubtée dame madame la Duchesse, & de ceux

du conseil : il est verité que lors que ie sceuz que madiete dame la Duchesse estoit à Grauelines, i'y enuoyay pour aucuns affaires cuidant que mondit seigneur le Cardinal y fut, comme on disoit qu'il y estoit : & baillay charge de parler à luy de certaine matiere dont autresfois ay parlé à mondit seigneur, & pour laquelle il m'a accordé enuoyer en Angleterre. Non point que ie voulusse estre fait recelement & estre incogneu à nulle personne quelconques : mais en appert, & generalmente au veu & sceu de tout le monde : & mesmement deuant madiete Dame & le conseil se le cas aduenoit. Et pource que mon tressouuerain seigneur le Cardinal dessus nommé n'y estoit point, & ne deuoit venir grand temps apres comme on disoit : celuy que i'y auoye enuoyé voyant que plusieurs alloient audit lieu de Calais, s'enhardit d'y aller pour aucuns de ses affaires. Mais il print congé de ce faire au lieutenant du capitaine de Grauelines qui ce luy accorda. Et pource s'auança d'y aller comme les autres, non cuidant riens mesprendre comme il m'a dit. Et vous certiffie que ie n'ay chargé, signifié ne fait dire ausdits Anglois chose qui puisse preiudicier le royaume, mondit seigneur ne ses païs, ne retarde les choses encommencées de par delà : & me semble qu'en ce on ne doit imaginer sur moy quelque suspicion de mal. Car se ie vouloye pretendre à telles fins dont Dieu me vueille garder, pouez assez considerer que ie l'eusse peu ou pourroye faire par autre maniere ou par gens incogneuz, marchans ou autres gens qui iournellement y repairent : mais ja à Dieu ne plaise que i'aye courage ne volenté de ce faire, car oncques enuers mondit seigneur ne feis ne vueil, n'ay intention de faire chose que chevalier d'honneur ne puisse & doieue faire. Touchant les lettres de garde qu'on dit que i'ay baillées & qu'auoye esté acertené estre à l'assemblée des trois estats pieça faicte en la ville d'Arras. A laquelle auoit esté remonstré que mondit seigneur estoit puissant & plus, la mercy Dieu, que oncques ses predecesseurs Comtes d'Arthois n'auoient esté : parquoy il sembloit que audit païs ne deuoit auoir autre que luy. Et pource que autres choses auoient esté conclutes, que plus nulles desdictes gardes ne feroient baillées sinon à mondit seigneur, ie n'ay point de souuenance que i'aye esté à quelque assemblée avecques iceux trois estats en ladicte ville d'Arras, où il y ayt ainsi esté conclud sur le fait desdictes gardes. Mais i'ay bien memoire qu'à l'Isle en la maison du seigneur de Rombaix, où pour lors mondit seigneur tenoit son hostel en la presence de plusieurs de son conseil, fut conclud que nul ne bailleroit plus lesdictes gardes, & en fuz d'opinion comme les autres, & dis que ie n'en bailleroye nulles se les autres ne les bailloient. Et à ceste cause me departis, mais aucuns temps apres plusieurs recommencerent à en bailler. Et grand espace depuis quand ie veis ce, i'en baillay pareillement : mais ie n'entendoye point que mondit seigneur en deust estre mal content, ne qu'on me voulust tenir en plus grand seruitude que les autres. Mesmement que pour aucunes desdictes gardes par moy baillées, mondit seigneur m'en escriuit plusieurs lettres closes signées de sa main : si à fait madiete dame la Duchesse moy mandant que ie les voulusse bailler. Et par ce me semble que mondit seigneur n'en doit point estre mal content. Au regard de Rislart de Neufuille qu'on dit auoir esté tué à cause desdictes gardes, & le seigneur des Bosquets qui en sa maison fut chassé pour le Villenner. Combien que pour aucuns desplaisirs qui par eux

eux m'ont esté faits, ie n'ay pas esté bien content d'eux : neantmoins mondit seigneur bien informé de la verité, i'ay esperance que les rapports qui luy ont esté fais ne seroient pas trouuez veritables : mais tout à l'opposite ils seroient trouuez menteurs & fausaires . Quant à la desobeissance qu'on veult dire, que font mes officiers & commis au Baillif d'Amyens, aux officiers du Roy & à ceux de mondit seigneur le dessusdit Duc de Bourgogne, qu'ils ne veulent souffrir y exploicter . Et dient & veuillent soubstenir par leurs raisons que ie n'ay nul serment fors tant seulement au Roy d'Angleterre. Je n'en ouys oncques faire mention iusques à present, & sans sçauoir les tors particuliers. Pourquoy n'à quelles gens ce ayt esté ne sçauroye bonnement que respondre. Et me semble que le Baillif d'Amyens que ie tenoye pour mon especial amy, m'en deust auoir aduerty : car s'il l'eust fait, ie luy eusse rendu peine d'y auoir pourueu à mon pouoir, tellement que i'esperoye que mondit seigneur en eust esté bien content du Preuost de Peronne qu'on dit auoir aguetté & chassé en la ville de Cambray pour le villenner, battre & tuer, i'en ay fait parler à mesdits archiers . Lesquels dient que eux estans allez esbatre au vingtiesme lieue de Cambray, il leur fut dit que ledit Preuost s'estoit vanté que s'il pouoit estre maistre d'eux il les prendroit & feroit pendre par les hatereaux : pourquoy soubdainement s'esmeurent & chaudement le poursuiuirent pour sçauoir s'il leur vouloit mal . Et assez tost apres sceurent qu'il n'auoit point ainsi parlé d'eux, & pource se departirent. Et quant aux menaces qu'on dit par eux auoir esté faictes à l'abbé dudit saint Aubert de Cambray, ils s'en excusent. Quant au receueur de Peronne qui se plaint, disant qu'il ne peult exercer son office ne les peageurs de Bapammes à Peronne, pour les empeschemens que y mettent mes officiers, mondit seigneur s'informera & m'en fera escrire plus au long : Et quand il plaira à mondit seigneur m'en faire aduertir, i'ay esperance d'y faire telle & si bonne responce que par raison il n'en deura point estre mal content . Et au regard de maistre Ador Caperel qui a informé mondit seigneur, que ie l'ay fait aguetter pour le villenner : ie vous certifie qu'il ne sera point ainsi trouué pour verité, & requiers que sur ce soit faicte bonne & vraye information. Et s'il appert deuëment que ie l'aye fait aguetter moy-ouy, ie suis content d'en receuoir telle punition que de raison il appartiendra : mais s'il est trouué le contraire, ie vous prie que vous vueillez tenir la main vers mondit seigneur à ce que ledit Caperel & autres qui ont fait tels faux mauuais & mensongiers rapports, soient punis tellement que tous autres y en prennent exemple. Et que apperçoieue que mondit seigneurs ne nuls de ceux de son conseil ne veuillent souffrir de tels rapports estre faits contre moy, ne autres ses seruiteurs . Et pource treschiers freres & compaignons que ie vous sens de grand prudence & discretion aymans loyauté, honneur & grand noblesse, & que vous ne voudrez vn de voz freres estre chargé sans cause. Et en ce moy confiant, & pour plainement vous informer & aduertir desdictes charges & de mesdictes excusations : ie vous escripts par la maniere dessus declairée, vous priant fraternellement & tant à certe comme ie puis, que vous vueillez tenir la main enuers mondit seigneur à ce que de sa grace il luy plaise oster de moy son indignation, & estre content de mes excusations & responce cy dessus contenues : & aussi qu'il ne luy plaise de croire rapports qui luy ont

esté ou pourroient estre faits à l'encōtre de personne, sans le moy signifier pour y respondre & estre ouy en mes excusations raisonnables, ainsi que vous sçavez que de raison à vn chacun faire se doit. Et veritablement se par vous ne suis en ceste matiere assisté, & qu'on vueille proceder enuers moy en telle maniere & sinistres rapports sans estre ouy comme dessus est dit, ie ne m'en sçauroye enuers qui me retraire, & n'auroye plus d'esperance d'estre entretenu en termes de raison: pourquoy i'auroye cause de m'en douloir comme ces choses pouez assez cōsiderer, lesquelles ledit Thallemonde & Huet ou l'un d'eux vous en pourroient dire plus à plain. Treschiers freres & compagnons se chose vous plaise: que faire ie puisse signifiez le moy, & ie le feray de tresbon cueur, comme sçait nostre seigneur qui vous ayt en sa benoïste grace. Escript en mon hostel de Bohain le iour de la Chandeleur.

Ainsi escript messire Iean de Luxembourg aux cheualiers de l'ordre de la toison: desquels grand partie auoient grand affection d'eux employer deuers ledit Duc de Bourgongne, à ce que messire Iean de Luxembourg demourast tousiours en sa grace. Et luy remonstroient tressouuent plusieurs causes raisonnables, parquoy il estoit tenu de souffrir de luy: mais de iour en iour sourdoient nouvelles besongnes entre eux, & faisoit on diuers rapports au dessusdit Duc de Bourgongne de luy. Et encores de rechef aduint en ce mesmes temps, qu'en la preuosté de Peronne on meit sus vne grand ayde de certaine somme de pecune à leuer & recueillir sur iceluy. Et entre les autres furent taxez pour le payer aucuns villages des seigneuries, de Ham & Neelle, lequel pour ce temps possedoit ledit messire Iean de Luxembourg: lequel ne fut point bien content que lesdictes aydes se leuassent sur nuls de ses subiects: mais de fait fait & entreiecta vne appellation contre les officiers dudit Duc de Bourgongne, qui l'auoyent assise & le vouloient cueillir. Lequel Duc non content de ce enuoya aucuns de ses archiers avecques les sergens, qui auoient charge de faire ladicte execution de l'ayde dessusdicte. Et quand ils furent venus en icelles seigneuries, ils commencerent à prendre & leuer des biens desdits subiects assez rigoureusement. Et tant que iceux subiects s'en allerent plaindre en ladicte ville de Ham à Iacotin de Bethune, qui là estoit en garnison. Si fait tantost ses gens monter à cheual en tresgrand nombre pour aller veoir que ce vouloit estre. Et luy mesmes en personne y monta pour aller apres. Si s'en allerent où estoient les archiers & officiers dudit Duc de Bourgongne dessus nommez: lesquels de premiere venue sans enquerir à qui ils estoient, furent tresbien battus. Et y feut vn sergent de Mondidier fort nauré en plusieurs lieux: mais quand ledit Iacotin qui venoit apperceut que c'estoit les archiers du Duc de Bourgongne, il fait cesser ses gens & s'excusa aucunement à eux, en disant qu'il entendoit que ce fussent les escorcheurs, c'est à sçauoir les gens du Roy Charles. Neantmoins ils furent tresdurement villannez & retournerent brief ensuiuant deuers leur seigneur & maistre ledit Duc de Bourgongne, auquel ils feirent grand plainte de la besongne dessusdicte, dont ledit Duc fut tresmalcontent & moult fort indigné contre ledit messire Iean de Luxembourg & ses gens: tant qu'il luy en vouloit faire faire amende quoy qu'il en fut ne deust aduenir. Si escriuit brief ensuiuant audit de Luxembourg qu'il luy enuoyast ledit Iacotin de Bethune

thune & ses autres gens, qui auoient fait ceste offence: ce que ledit de Luxembourg luy refusa en luy excusant, comme dit est cy dessus, disant qu'ils ne cuident point adresser sur les gens: & par ainsi multiplia la hayne entre eux. Et d'autre part assez brief ensuiuant iceluy Iacotin rua ius des postes qu'il auoit en sa garde, aucunes gens qui estoient aux Comtes de Neuers & d'Estampes: & de fait y fut occis vn gentil-homme nommé Iean de la Perriere, qui estoit capitaine des autres & encores aucuns autres, dont les seigneurs dessusdits furent malement troublez & le prindrent tresmal en gré. Toutesfois ledit de Luxembourg estoit fort doubté, pourtant qu'il auoit de moult puissantes places: c'est à sçauoir Couffy, Beaulieu, Han sur Somme, Neelle, la Ferté, saint Goubain, Marle, Arsy, Montagu, Guise, Herison, Bouchain, Beaurevoir, Honnecourt, Oisy & autres forteresses qui estoient garnies de gens puissamment. Et si n'estoit point encores deslié des Anglois, comme dit est ailleurs: mais sy fioit moult grandement, pourquoy tous ceux qui auoient grand voulenté d'entreprendre contre luy, auoient doubte qu'au cas qu'on luy courust sus & feroit on guerre de quelque costé que ce feust, qu'il ne boutast lesdits Anglois en ses forteresses & en ses villes, qui-eust esté la destruction de plusieurs villes & pays. Et pour icelle doubte principalement se dissimuloient tous ceux qui l'auoient en hayne: lequel temps durant il entretenoit en ses places plusieurs gens de guerre en intention de resister & luy deffendre contre ceux qui nuyre ou greuer le voudroient, tant François, Bourgonngons comme autres: desquelles gens de guerre plusieurs pays estoient fort trauaillez, & par especial le pays de Cambresis. Et mesmement sous vmbre de ses gens venoient tressouuent les Anglois de Creil & autres garnisons, qui prenoient plusieurs hommes prisonniers & autres bagues pilloient, & emmenaient és autres forteresses de leur party & de leur obeissance. Et aussi plusieurs gés dudit messire Iean de Luxembourg auoient grãd hantise & communication avec lesdits Anglois. Auquel temps y auoit vn nommé Perrinet Quatre-yeux, qui estoit de deuers Beauuais en Cambresis: lequel estoit guidé d'iceux, & les auoit amenez plusieurs fois en iceluy pays où ils auoient prins & rançonné aucuns riches hommes: mais il aduint que pour continuer en son mauuais propos, il estoit venu en vne censse assez pres d'Oisy nommée Gourgouche. Auquel lieu le sceut ledit de Luxembourg, qui estoit en sa forteresse d'Oisy. Et incontinct y enuoya ses archiers qui sans delay les meirent à mort, & furent enterrez en vne fosse: pour laquelle besongne & execution, il acquist grand louenge de tous ceux du pays.

Comment le Comte de Richemont Connestable de France print la ville de Meaux en Brie sur les Anglois.

EN apres durant toutes ces tribulations Artus de Bretagne Comte de Richemont Connestable de France, assembla iusques au nombre de quatre mille combattans de gens de guerre: avec lequel estoit la Hire, Floquet, le seigneur de Torfy, messire Gilles de S. Symon & plusieurs autres capitaines François, tant de gens de Champaigne François comme autres, à tout lesquels il se tira à l'entrée du mois de Iuillet deuant la ville de Meaux en Brie, que pour lors tenoient les Anglois. Et tout de premie-

re venue se logea à Champ-Commun, qui est vn bien gros village . Et brief apres ensuiuant fait assieger vne bastille deuant icelle ville de Meaux deuant la porte de saint Remy : & apres fait loger ses gens en l'abbaye de saint Pharon, aux Cordeliers , & en autres diuers lieux de ladicte ville . Et tantost apres fut mise vne bastille en l'Isle vers la tour de Constances, & si en fut faicte vne encores par messire Denys de Chailly à la porte de Cormillon vers la Brie. Et depuis en furent faictes cinq en deux isles vers la court de Supletes contre le marché, qui toutes furent fournies de gens de guerre . En outre furent dressez plusieurs gros engins contre les portes & murailles de la dessusdicte ville, qui tresfort la dommagerent. Et tant en ce fait continuerent qu'en la fin de trois sepmaines, le dessusdit Conestable de France & ses capitaines conclurent l'vn avec l'autre de faire assaillir icelle ville par leurs gens d'armes, qui en estoient en moult grand voulenté: duquel assaut elle fut prinse & conquise à peu de perte de leurs gens. Et fut prins dedans icelle le bastard de Thian, lequel tantost apres eut le haterel couppé, & avecques luy vn gentil-homme nommé Carbonnel de Haule, avec aucuns autres. Et si furent morts des dessusdits assiegez tant en deffendant leurs gardes comme eux retrayant au marché enuiron le nombre de soixante hommes, & de quarante à cinquante prisonniers parmy les deux dessusdits . Apres laquelle prinse le dessusdit Conestable & la plus grand partie de sesdictes gens, se logea dedans ladicte ville : toutesfois demourerent gramment de gens en aucunes desdictes bastilles. Si estoient dedans le marché de Meaux pour chief: de la part des Anglois messire Guillaume Chambellan, messire Iean Rippelay & aucuns autres enuiron cinq cens combattans . Et par auant deuant la venue d'iceluy siege, auoient enuoyé certains messages de leurs gens à Roüen, pour signifier la venue desdits François leurs aduersaires, en requerant aux commis du Roy Henry d'Angleterre qu'ils fussent secouruz au plus brief que bonnement faire se pourroit . Pour lequel secours bailler, le Comte de Cambresch qui lors auoit la charge de par icelluy Roy d'Angleterre de la garde & gouvernement de la Duché de Normandie : & avec luy messire Iean de Talebot, le seigneur de Fauquemberge, messire Richart d'Andeuille, & aucuns autres capitaines Anglois accompagnez de quatre mille combattans ou enuiron, se meirent à chemin sur intention de leuer ledit siege. Et cheuaucherent tant qu'ils vindrent dedans la ville de Meaux : dedans laquelle le dessusdit Conestable sçachant icelle venue, auoit fait retirer ses gens & ses habillemens de guerre qui tresbien leur vint à point : car pour vray ils eussent esté trouuez aux champs, il y eust eu grand meschief d'vn costé & d'autre. Et vous dy que les Anglois ne desiroient autre chose que de trouuer lesdits François pour les combattre . Et de ce feirent plusieurs requestes par leurs officiers d'armes audit Conestable, qui ne leur vouloit accorder. Et entre-temps furent faictes aucunes escarmouches entre les parties : à l'vne desquelles lesdits Anglois gagnerent sur les François bien vingt bateaux de viures & d'autres biens. Et d'autre part fut abandonné vne bastille que tenoit le seigneur de Moÿ . En apres assaillirent iceux Anglois & prindrent de fait vne autre bastille qui estoit en l'Isle aupres du marché: dedans laquelle furent morts de cent à six vingts hommes du party des François, & les autres furent prisonniers . Durant lequel temps les dessusdits Anglois

glois voyans que les François n'auoient point volenté de les combattre, & aussi qu'il leur estoit impossible de les greuer dedans leur fort, se disposerent de retourner en Normandie, apres qu'ils eurent rafreschy leurs gens qui estoient audit marché de Meaux. Si se departirent de Meaux & par la mesme marche dont ils estoient venus, s'en retournerent audit pays de Normãdie. Apres lequel departement ledit Connestable & ses gens s'efforcerent de rechef moult fort de guerroyer & combattre ceux du dessusdit marché par diuers engins : & tant en ce continuerent que enuiron trois sepmaines apres ensuiuant ledit sire Guillaume fait traicté avec ledit Connestable pour luy & pour ses gens : par telle condition qu'ils s'en iroient sauues leurs vies & leurs biens : lequel traicté conclud & finy, leur fut donné bon & seur saufconduit, & s'en r'allerent à Roüen : où ledit capitaine fut fort reproché de ceux qui auoient le gouuernement : & de fait fut mis prisonnier au chastel de Roüen, pourtant qu'il auoit si tost rendu iceluy marché de Meaux, qui estoit bien garny de viures & aussi d'abillemens de guerre, & si estoit aussi vne des fortes places du royaume de France. Neantmoins depuis il trouua maniere de luy excuser vers les seigneurs de son party, par lesquels il fut mis à plaine deliurance. Ou temps dessusdit fut decapité & escartellé vn gentil-homme nommé Iean de la Fange, qui estoit au Connestable de France, pource qu'il fut trouué coupable d'auoir pourparlé avecques les Anglois sur aucunes besongnes, qui estoient preiudiciables au Roy de France & à sa seigneurie. Si fut pour lors aussi escartellé avecques ledit Iean de la Fange vn sergent du Chastellet de Paris.

Comment messire Iean de Luxembourg enuoya lettres d'excusations deuers le grand conseil du Duc de Bourgogne & la teneur d'icelles.

EN apres messire Iean de Luxembourg Comte de Ligny & de Guise, lequel de iour en iour sçauoit par les rapports qui faits luy estoient, comment le Duc de Bourgogne estoit mal content de luy. Et ce principalement pour l'offence qui auoit esté faicte encontre ses archiers par Iacotin de Bethune & ses gens, cōme en autre lieu cy dessus est plus à plain declairé. Et affin que surce se peust excuser. Et aussi ledit Iacotin escriuit lettres à ceux du grand conseil dudit Duc de Bourgogne, duquel la teneur s'ensuit.

TRES REVERENDS Peres en Dieu treschiers & tresamez cousins, & tresespeciaux amis : ie croy qu'il soit assez venu à vostre cognoissance certain debat, & soubdainement & par meschef aduenue, entre aucuns archiers de mon tresredoubté seigneur le Duc de Bourgogne & les gens de Iacotin de Bethune en ma ville de Ham. Par lequel mon tresredoubté seigneur a conceu indignation contre moy, dont i'ay esté & suis tant desplaisant que plus ne puis. Et pour vous donner à cognoistre le cas, & les deuoirs où me suis mis enuers mondit seigneur le Duc : en vous faisant assauoir que se i'auoye fait aucune chose vers luy, pourquoy il ait cause de ce faire : pour ma descharge ie vous en escripts ledit cas, qui est tel. C'est à sçauoir que parauant ledit debat les officiers de mondit tresredoubté seigneur imposèrent sur les champs vne taille, sans à ce euocquer les trois estats d'iceluy, au moins au nombre competent : laquelle taille ils vouloient esleuer sur mes terres. Dont aucuns officiers appellerent, & demou-

Ee

ra la chose en ce point. Et pendant ce aucuns, qu'on nommoit escorcheurs, ceux de Valois & autres gens d'armes se demōstroient moy vouloir faire guerre. Pourquoy me conuint mettre gens en mes places & forteresses. Entre lesquels ie adiournay en madiete ville de Ham ledit Iacotin & cetera. Certain tēps apres vindrent aucuns compagnons de cheual en plusieurs de mes villaiges d'enuiron ladiete ville de Ham, courans par les champs & prenans cheuaux, vaches & autres biens. Parquoy vindrent audit lieu de Ham plusieurs femmes, criant qu'on emmenoit ainsi leurs biens. Lors ledit Iacotin, cuidant certainement que ce fussent lesdits escorcheurs, enuoya ses gens sur eux, & y eut aucune voye de fait d'un costé & d'autre. Mais tout incontinent que ledit Iacotin, qui suiuoit les autres gens, sceut que les dessusdits compagnons se disoient archiers de mondit trefredoubté seigneur, il feit cesser ses gens : & estoit tant desplaisant dudit cas, que plus ne pouoit. Car il n'eust iamais cuidé de prime face, qu'ils eussent esté à mon trefredoubté seigneur, attendu ledit appel. Et aussi les grans derisions qu'ils faisoient enuiron la ville de Ham. Et mesmement que ils auoient dit par auant, qu'ils n'auoient point de charge de exploicter sur mes terres. Pourquoy appert ledit debat estre aduenu par meschief soudainement. Ce nonobstant mon trefredoubté seigneur m'a à ceste cause fait sommer de luy deliurer le dessusdit Iacotin de Bethune, & ses gens. Pour laquelle cause, i'ay de iceluy cas fait faire information par gens de iustice present tabellion royal : & fait remonstrer à mon trefredoubté Seigneur, l'effect d'icelle : par laquelle appert ledit Iacotin & ses gens non estre coupables en la maniere que mondit trefredoubté seigneur, monseigneur le Duc en estoit informé. Mais que ledit cas estoit aduenu par la coulpe desdits archiers, & exploits par eux faits contre les termes de iustice. En luy priant que ce considéré, il luy plaise estre content de moy, & que la chose fut traictée par voye de iustice : & qu'il luy en pleust faire faire information par ses gens, tels qu'il luy plairoit, pour en estre fait ainsi que de par raison appartiendrait : en offrant que s'il estoit trouué que luy eusse aucune chose meffait, moy ouy en mes excusations, de luy amender, & de luy en requerir pardon. Et encores pour plus moy humilier, & affin d'oster de luy toutes imaginations qu'il pourroit auoir conceües à l'encontre de moy, de ce que oncques ne luy mессiez, par franchise ie luy ay voulu crier mercy : desquelles offres il n'a voulu estre content, mais a fait saisir & mettre en ses mains les terres que moy & ma femme auons en ce païs de Brabant & Flandres : laquelle chose m'a esté & est bien dure : considéré que en riens ie n'y suis coupable dudit cas : & que ie me suis offert en toute iustice & raison, selon ce que dit est, & posé qu'on me voulüst dire estre coupable, ce qui ne sera point trouué, il n'y-a lieu de confiscation ne cause raisonnable d'empescher le mien : mesmement selon les droits, loix, & coustumes desdits païs toutes lesquelles choses, pour plus auant me mettre en mes deuoirs, i'ay bien au long declairé au seigneur de Santhois : qui de sa courtoisie est venu deuers moy, & que i'ay prié tresinstamment qu'icelle voulüst remonstrer à mon trefredoubté seigneur, & luy supplier que de sa bonne grace, il luy pleust moy ouurir la voye de iustice. Et i'estoye prest moy ouy en mes excusations, d'estre en droit par deuant mondit seigneur le Duc de Bourgongne, mes seigneurs de son ordre, & au-

tres

tres personnes de son conseil. Ou par deuant les trois estats de sesdits pays de Brabant & de Flandres ou par deuant les iuges, & loix dont sont mouuans mesdits tenemens. Suppliant en outre qu'il pleust à mon tresredoubté seigneur à ce moy receuoir, & faire leuer la main de mesdictes terres. En quoy n'est point que ie vueille fuir mondit seigneur, ne sa iustice, ne querir à iuges nuls autres princes que luy & ses gens, comme dessus est dit. Et semble que selon Dieu, noblesse & bonne iustice on ne me deuroit ce reffuser : car ie ne croy point que ie me puisse plus mettre & faire mon deuoir, que de requerir estre traicté par iustice par mondit seigneur, qui est Prince tant renommé, par messeigneurs de son ordre, qui sont ses parens, ses freres, & ses amis, & gens d'esslite & bonne preud'homme: par son conseil, & par les trois estats & iuges desdits pays subiects à luy, où il ya tant de notables & saiges personnages. Et en outre de presenter, d'amender, de crier mercy à mondit seigneur monseigneur le Duc : mesmement de ce qu'onques ne luy meffiz, ainsi comme dessus est dit & declairé. Et neantmoins i'ay sceu depuis par aucuns qui pour ceste cause sont venus deuers moy, que mondit tresredoubté seigneur ne veult point estre content, se ie ne luy liure ledit Iacotin de Bethune : laquelle chose m'est & seroit impossible de faire, car il n'est point en ma puissance. Et si n'est pas vray, ce semble, que nul qui se sentit en l'indignation d'un tel Prince, si hault & si puissant comme mon tresredoubté seigneur, se voulsist laisser apprehender, pour estre liuré à martyre. Et pour ce treschiers & especiaux amis que les choses dessusdictes serot trouuées veritables: ie les desire donner à cognoistre pour ma descharge à vous qui estes notables, cognoissans que c'est de raison : & les vous signifie, vous priant tant humblement que ie puis, que icelles vueillez remonstrer à mondit tresredoubté seigneur, & tenir la main à ce qu'il luy plaise estre content de moy, & faire leuer la main de mesdictes terres. Et au surplus ouurir la voye de iustice en moy y employant par toutes voyes & manieres que pourrez, ayans consideration comment des le temps de ma ieunesse i'ay loyaument seruy feu monseigneur le Duc Iean, à qui Dieu pardoint. Et mondit tresredoubté seigneur qui est à present, comme chacun sçait : & à mon loyal pouoir ay aydé à garder leurs pays. Et se ainsi estoit qu'à tort on detint mesdictes terres sans moy vouloir demonstrier iustice : laquelle on ne doit reffuser à nul qui la requiert, pourtant qu'il vueille estre à droit, ie vous prie que ayez memoire & souuenance des offres & deuoirs en quoy ie me suis mis : lesquels sont cy dessus plus amplement declairez. Reuerends Peres en Dieu, treschiers & trefaymez cousins, & trefespeciaux amis : se chose voulez que ie puisse faire, signifiez le moy, & ie le feray de tresbon cueur, comme sçait le benoist fils de Dieu, qui vous ayt en sa sainte garde. Escript en mon chastel de Vendoul le treiziesme iour d'Auril. La superscription estoit : A mes treschiers & trefamez cousins & especiaux amis, les gens du grand conseil de mon tresredoubté seigneur, mon seigneur le Duc de Bourgogne.

QUAND les dessusdits seigneurs eurent receuës & veuës les lettres, ils se meirent ensemble pour auoir aduis, qu'il en estoit bon de faire sur ceste matiere : & par especial ceux de l'ordre de la toison d'or : duquel orare ledit mesire Iean de Luxembourg estoit, feirent plusieurs diligences pour trouuer

maniere qu'il fut reconcilié avecques ledit Duc : car moult doubtoient que s'il aduenoit qu'il conuint qu'on procedast par voye de fait à l'encōtre de luy, qu'il en aduiendroit grans inconueniens aux païs d'iceluy Duc : pource principalement, comment en autre lieu est declairé, qu'ils le sentoient estre homme de haute entreprinse de sa personne, bien pourueu de puissantes villes & fortresses pour faire forte guerre se besoing luy en estoit. Si estoit avecques ce encores allié aux Anglois, qui luy auoient promis de bailler assistance & secours, & aussi luy liurer gens toutes & quantes fois que besoing en auroit. Auoient regard aussi aux grans seruices qu'il auoit faits au dessusdit Duc de Bourgogne & à ses païs par plusieurs fois & de moult long temps. Et d'autre part veoient que les François de iour en iour entreprenoient en diuers lieux sur les terres & païs du deuantdit Duc : & selon leur aduis entretenoient tres mal les poincts & les articles du traicté d'Arras dernièrement fait. Pourquoy tout considéré il leur sembla par plusieurs raisons, qu'il valloit mieux que ledit de Luxembourg fut receu en faisant les satisfactions qu'il offroit à faire qu'autrement. Et pourtant apres que ladicte matiere eut entre eux esté par plusieurs fois debattue, conclurēt tous ensemble d'eux essayer enuers ledit Duc de Bourgogne leur seigneur, pour sçauoir s'ils y pourroient mettre aucuns bons moyens. Et de fait, luy en toucherent bien au long, en luy remontrant toutes les besongnes dessusdictes par diuerses fois. Et entre les autres y continua tressouuent messire Hue de Launay seigneur de Santhois, qui auoit la chose moult fort à cueur, & aussi auoient aucuns des autres. Neantmoins de prime face trouuerent ledit Duc en assez froide maniere & responce : car entre autres choses estoit tresfort indigné pour l'offence qui auoit esté faicte & commise contre ses archiers, plus que de toutes les autres. Et aussi les Comtes de Neuers & d'Estampes qui auoient euz leurs gens morts & destrouffez par ledit Iacotin de Bethune, comme dessus est dit : dont plus auoient la besongne à cueur & leur en desplaist moult grandement, & non point sans cause. Toutesfois les dessusdits seigneurs par longue continuation en ce pourparlerent tant pour les besongnes dessusdictes, qu'il se commença à condescendre d'ouyr iceux, & les offres qu'ils faisoient pour le dessusdit messire Iean de Luxembourg. Et finalement tant feirent les dessusdits, & tant furent pourmenées lesdictes besongnes & tant approchées, qu'on print journée pour estre les deux parties ensemble en la cité de Cambray. Duquel lieu y furent de par ledit Duc l'Euesque de Tournay, maistre Nicole Raoulin seigneur d'Authun son Chancelier, messire Hue de Launay, le seigneur de Saueuses & plusieurs autres notables personnages. Et pareillement fut messire Iean de Luxembourg accompagné aussi de plusieurs notables personnages tāt cheualiers & escuyers comme gens de conseil, & mesmement y estoit le dessusdit Iacotin de Bethune : & eux venus ensemble, certains iours ensuiuans furent les matieres ouuertes & mises auant sur tous les troubles qu'on disoit auoir esté faits contre le Duc de Bourgogne & ceux de ses païs, par iceluy messire Iean de Luxembourg & ceux de sa partie. Ausquelles ouuertes ledit messire Iean de Luxembourg fait respondre sur tout en luy excusant de la plus grand partie, offrant du surplus, tant par luy comme par ses gens, faire si auant qu'il appar tiendroit. Et apres que tout eut esté pourparlé bien & au long en la maniere dicte,

ete, on meit par escrit les traictez tels qu'il sembloit qu'ils feussent raisonnables pour vne partie & pour l'autre pour venir à paix. Si furent monstrez audit messire Jean de Luxembourg, qui aucunement y fait corriger aucuns poincts lesquels n'estoient point à son plaisir. Et depuis furent rapportez deuers le Chancelier & autres du conseil, qui de rechief y feirent aucunes correctiōs. Et pourtant quand autresfois on les apporta audit de Luxembourg, quand il les eut veuës & ouyës ils ne luy furent aggreables. Si se troubla assez soudainement & les descira par despit. Et dit tout hault que l'Euesque de Tournay & le Chancelier ne l'auroient point à leur plaisir. Et brief ensuiuant par le moyen des seigneurs & gens du conseil tant d'un costé comme d'autre, tout se rappaisa. Et en fin de conclusion furent assez bien d'accord, en retenant tant seullemēt sur ce l'aduis & bon plaisir dudit Duc, auquel ils le deuoient apporter par escrit. Et entre autres choses ledit Iacotin de Bethune se deuoit aller rendre aux prisons dudit Duc pour estre en sa mercy: mais les seigneurs luy promeirent, c'est à sçauoir ceux de la partie dudit Duc estans audit lieu de Cambray, qu'ils s'emploiroient de tout leur bon pouoir enuers luy, affin qu'il le receut en sa bōne grace & misericorde. Et ainsi toutes ces besongnes traictées, fournies & accomplies par la maniere dessusdicte, feirent les dessusdits seigneurs du conseil tous ensemble tresioyeuse chiere l'un avec l'autre en l'hostel dudit messire Jean de Luxembourg. Pour lequel traicté & pacifiement, plusieurs païs & contrées, & avec les habitans d'iceux tant nobles comme gens d'Eglise & autres en eurent tresgrand lieffe, quand ils sceurent iceux traictez estre acheuez. Et brief ensuiuant se departirent les deux parties de la dessusdicte cité de Cambray, & retournerent les gens du Duc de Bourgongne deuers luy, & monstrent ce qu'ils auoient besongné, dont il fut assez bien content: & certain temps apres ledit Iacotin de Bethune alla deuers luy en sa ville de Hesdin, & se rendit en sa mercy en luy requerant que s'il auoit aucune indignation à l'encontre de luy, il luy pleust le receuoir en sa grace, lequel Duc l'enuoya prisonnier. Et peu de temps apres par les treshumbles requestes & prieres d'aucuns seigneurs notables & de grand auctorité & ceux de son conseil, il le fait deliurer sur aucunes conditions qui lors prestement luy furent declairées.

Comment le Roy Charles de France enuoya dame Katherine sa fille deuers le Duc de Bourgongne, pour l'accomplissement de la promesse du mariage d'icelle Dame, & du Comte de Charrolois fils audit Duc.

EN cest an environ le mois de Iuing le Roy Charles de France fait departir dame Katherine sa fille hors de son hostel, icelle moult haultement & honorablement accompagnée des Archeuesques de Reims & de Narbonne, des Comtes de Vendosme, de Tonnerre & de Dunois, du ieune fils du Duc de Bourbon nommé le seigneur de Beau-jeu, du seigneur de Dampierre & autres plusieurs grans & notables seigneurs cheualiers & escuyers accompagnez de trois cens cheuaucheurs ou environ, pour la mener & conduire deuers le Duc de Bourgongne. Auquel, comme dit est ailleurs par cy deuant, il auoit accordé pour son fils le Comte de Charrolois auoir en mariage. Avec laquelle dame estoient pour le conduire la dame de Roche-

fort & plusieurs autres nobles dames, & damoifelles en tresnoble & bel estat. Et tant cheminerent par plusieurs iournées, qu'ils vindrent en la cité de Cambray où ils seiournerent par l'espace de trois iours. Et y furent grandement receuz & festoyez de ceux de ladicte ville, tant de gens d'Eglise comme des gouuerneurs & habitans d'icelle. Auquel lieu de Cambray par le dessusdit Duc de Bourgongne pour receuoir ladicte dame, les Comtes de Neuers & d'Estampes, le Chancelier de Bourgongne & autres en moult grād nombre de gens & notables seigneurs, cheualiers & escuyers: avec lesquels estoient la Comtesse de Namur, la dame de Creuecueur, la dame de Hautbourdin & plusieurs autres femmes d'estat. Si feirent ces seigneurs en icelle ville de Cambray de moult grans honneurs & chieres ioyeuses, avec grans receptions l'un avec l'autre: & portoit on la dessusdicte dame aagée de dix ans ou enuiron sur vne litiere moult richement parée & appoinctée. Et à toutes bonnes villes où elle passoit, tant es bonnes villes du Royaume comme dudit Duc de Bourgongne, on luy faisoit tres grand honneur & reuerence. Et à l'entrée d'icelles bonnes villes descendoient communément dix ou douze gentils-hommes à l'entrée de la porte, qui tenoient la main à ladicte lictiere tant qu'elle fut descendue à son hostel. Et partant de Cambray allerent par aucuns iours en la ville de S. Omer, où ledit Duc de Bourgongne estoit & tenoit son estat: lequel grandement accompagné de cheualiers & escuyers issit hors d'icelle ville, & vint aux champs: & luy venu au deuant de ladicte dame Katherine de France la conioüit & festoya moult reueramment, & luy fait moult grand honneur & ioyeuse reception, & tous ceux qui estoient avec luy: & les mena dedans ladicte ville de S. Omer, où le mariage fut parconfirmé. Si y furent faictes grandes & melodieuses festes & esbattemens par plusieurs iournées tant en ioustes comme autrement, tout aux despens dudit Duc de Bourgongne. Et estoit lors l'entrepreneur d'icelles ioustes pour la partie d'iceluy Duc, le seigneur de Crequy contre les autres defendans. Si demourerent les dessusdits seigneurs assez longuement au dessusdit lieu de S. Omer, pour estre à vn parlement qui se deuoit faire d'entre les deux Roys de France & d'Angleterre entre Grauelignes & Calais, duquel assez tost ie feray mention.

Comment le Bastard de Bourbon print la ville de la Mothe en Lorraine.

EN cest an le Bastard de Bourbon se partit de Iargueaux à tout quatre cens combattans ou enuiron: lesquels il conduisit & mena par plusieurs iournées iusques à la Mothe en Lorraine, laquelle il print assez soubdainement d'emblée. Et tous les biens qui estoient dedans: c'est à sçauoir les biens portatifs furent par ses gens prins & rauiz. Et fut dedans icelle enuiron vn mois: durant lequel temps il courut & pilla le païs en plusieurs & diuers lieux. Et mesmement courut sur la ville de saint Nicolas de Varengeuille, qui de treslong temps par auant n'auoit esté adommagée ne courüe par nulles gens de guerre quels qu'il feussent. Et adonc les seigneurs & gouuerneurs dudit païs de Lorraine voyans la destruction totale d'iceluy par le moyen d'icelle garnison, traicterent avec iceluy Bastard de Bourbon, par condition qu'il auroit certaine grand somme d'argent, & il leur rendroit icelle ville de la Mothe.

the. Lesquels traictez concluds & du tout confermez, ledit Bastard s'en departit d'illec à tout ses gens pour retourner dont il estoit venu: mais ainsi qu'il passoit assez pres de Langres fut poursuiuy, & atteint par messire Jean de Vergy, Anthoine de Gelet, Philippot de Sainginis & aucuns autres: lesquels le ruerent ius & le destrousserent. Et si en demoura morts sur la place biē six vingts ou mieux, & les autres en la plus grand partie furent prisonniers. Et par ainsi ceux qui furent desrobbez, furent d'iceux pillarts aucunement vengez: mais pourtant ne rauoient point leurs biens. Et au regard dudit Bastard il n'y fut mort ne print.

Comment plusieurs notables ambassadeurs s'assemblerent entre Grauelignes & Calais sur le fait du parlement, qui se deuoit tenir & faire entre les Roys de France & d'Angleterre.

LTem en ce temps furent assemblez plusieurs notables ambassadeurs entre Grauelignes & Calais au lieu, où l'an precedent auoient esté ordonnez tant de par les Roys de France & d'Angleterre, comme par le Duc de Bourgogne. Entre lesquels y estoient de par le Roy de France l'Archeuesque de Reims grand Chancelier, l'Archeuesque de Narbonne & l'Euesque de Chaallons, les Comtes de Vandome & de Dunois, le seigneur de Dampierre, messire Regnault Girard capitaine de la Rochelle, maistre Robert Mailliere & Andry le Beuf. Et de la partie dudit Duc de Bourgogne, la Duchesse sa femme, l'Euesque de Tournay, maistre Nicolas Raoulin Chancelier dudit Duc, le seigneur de Creuecueur, le seigneur de Santhois, maistre Pierre Bourdin, messire Philippe de Nanterre & plusieurs autres. Et du costé du Roy d'Angleterre le Cardinal de Vincerstre, l'Euesque d'Iorth, l'Euesque de Noruich, l'Euesque de saint David, l'Euesque de Lisieux, le Doyen de Salsbery, le Duc de Nortfort, le Comte de Scafort & son frere, le seigneur de Bresure, le Comte d'Onthonfort, messire Thomas Kiriell & plusieurs autres notables hommes: lesquels tous ensemble eurent conseil par plusieurs iournées, pour sçauoir s'ils pourroient aucune chose besongner sur la paix generale d'entre les deux Royaumes, & aussi pour la deliurance du Duc d'Orleans. Mais finalement ne peurent venir à aucune conclusion qui fut de valeur, car les Anglois pour nulle riens ne vouloient condescendre à faire nul traicté avecques le Roy de France, sinon que la Duché de Normandie avec leurs autres conquestes leur demourassent franchement, sans les tenir dudit Roy France. Si fut reprins autre iournée au prochain an ensuiuant, & se departirent d'illec sans autre chose besongner. Et quant est aux Anglois ils y estoient venuz en grand pōpe & bombant, & moult richement habillez. Et par le dessusdit Cardinal de Vincerstre y auoit fait venir de moult riches tentes & pauillons bien parez & aornez de tout ce qui y failloit, tant de vaisselle d'or & d'argent comme d'autres besongnes necessaires & duisables. Et feit à ladicte Duchesse sa belle niepce moult ioyeuse chiere & reception, & la festoya treshonorablement. Et apres s'en retournerent chacun d'eux es lieux & places dont ils estoient venus, sans pouoir autre chose besongner.

Comment les Anglois vindrent au païs de Santhois où ils prindrent le chastel de Folleuille, & y feirent moult d'autres maulx & cruantez.



Tem en cest an enuiron l'entrée de Karesme le Comte de Sombrefset, avec luy le seigneur de Thallebot & aucuns autres capitaines, assemblerent iusques au nombre de deux mille combattans ou enuiron tant de pied comme de cheual sur les marches de Normandie vers Rouën : à tout lesquels & à tout charroy portans leurs habillemens de guerre, viures & autres besongnes necessaires, pour venir au païs de Santhois : & passa l'eau de Somme parmy la ville de Monterueil, & s'en alla loger deuant la forteresse de Folleuille, qui pour lors estoit au gouuernement du bon de Saueufes à cause de la dame douïagiere qu'il auoit espousée. Et pour ce que ceux qui estoient dedans ledit chastel, saillirent dehors & occirent l'un des gens dudit Comte de Sombrefset, lequel il aymoît moult bien, si iura grâd serment que de là ne se partiroit iusques à ce qu'il auroit conquis iceluy chastel, & ceux de dedans à sa volenté. Si feît prestement apprestier vne petite bombarde qu'il auoit amenée avecques luy, laquelle estoit excellentement bonne & roide avec autres engins : lesquels engins bombardes & canons à l'une des fois occirent le capitaine de leans, quand elles furent iectées. Et depuis continuerent tant que tout le surplus desdits assiegez furent contens d'eux rendre, en delaisant ladicte forteresse & tous leurs biens avec ce, payant vne grand somme d'argent, en rachepant leurs vies enuers les dessusdits Anglois. Si feît ledit Comte reparer ledit chastel, & y laissa garnisons de ses gens, qui depuis feirent moult de maulx & de dômage à tous les païs à l'enuiron. Et le lendemain de ladicte reddition, se departirent d'iceluy lieu ledit Comte & ses gens, & suiurēt ledit seigneur de Thallebot, qui desia s'estoit boutté bien auant audit païs de Santhois : & tous ensemble s'en allerent loger à Lyhons en Santhois, où ils trouuerent des biens largement & abondamment, & aussi par tout le païs : car on ne se doubait de leur venue, parquoy ceux dudit lieu n'auoient point retraicts leurs biens. Auquel lieu de Lyhons auoit vne petite forteresse & la grande eglise, où le peuple & les habitans d'icelle ville s'estoient retraicts hastiuement, quand ils sceurent que c'estoient Anglois. Si feît ledit Comte signifier à ceux qui estoient en ladicte Eglise, qu'ils se rendissent à sa volenté ou il les feroit assaillir, ce que point ne voulurent faire. Et pource le lendemain feît faire ledit assaut trescruel & merueilleux : lequel fut tant continué, que pource que les Anglois ne les pouoient autrement auoir, bouterent le feu dedans : & fut l'eglise toute arse & demolie avec tous les biens d'icelle, & ceux qui s'estoient retraicts si y furēt morts & bruslez trespiteusement bien trois cens personages ou plus tant hommes, femmes comme enfans : & peu en eschappa de ceux qui estoient en ladicte Eglise. Pour lesquelles cruantez de la forteresse dessusdicte voyans la male-adventure de leurs pauures voisins & amis, se composerēt audit Comte de Sombrefset ou à ses commis pour rachepier leurs vies & parties de leurs biens, avec le feu par les maisons d'icelle ville, & en donnerent vn grand somme d'argēt. Pour laquelle bailler & payer baillerent plusieurs hostages tant hommes comme femmes, qui depuis furent long temps prisonniers à Rouën & ailleurs pour la finance

finance dessusdicte. Desquels hostages en fut l'un un gentil homme nommé Noifeux de Saily, lequel mourut en ladicte prison. Et iceux Anglois qui estoient audit lieu de Lyhons feirent plusieurs courses sur les païs à l'environ, desquels ramenerent des biens largemēt à leurs logis. Et si prindrēt la forteresse de Herbonneres & le seigneur dedans: lequel pour rachepter luy & ses subiects & ladicte forteresse de non estre desolée comme les autres auoient esté, l'accorda & composa à mille salus d'or. Et entre-temps que toutes ces besongnes se faisoient, le Comte d'Estampes qui estoit lors venu à Peronne, manda tous les seigneurs de Picardie, de Hainault & des marches de l'environ qu'ils venissent hastiue-ment deuers luy à tout le plus de gens de guerre qu'ils pourroient finer, lesquels vindrent en grand nombre, c'est à sçauoir le seigneur de Croÿ, le seigneur de Humieres, le seigneur de Saueuses & ses freres, Valerian de Moreul, Iean de Brimeu lors Baillif d'Amiens, messire Iean de Croÿ Baillif de Hainault, le seigneur de Hautbourdin, le seigneur de Barbençon, messire Simon de Lalain & plusieurs autres des païs dessusdits en grand nombre: lesquels venus audit lieu de Peronne & es villes au plus pres pouuoient bien estre en nombre de trois mille combattans de tresbonne estoife. Si tindrent iceux seigneurs conseil sur ce qu'il estoit de faire. Et vouloient les aucuns qu'on combattit les Anglois, & autres en y auoit de contraire opinion: & disoient plusieurs raisons pourquoy on ne les deuoit combattre. Et en fin conclurent d'eux mettre aux champs de nuict, & d'eux mettre en embusche aupres de Santhois: & il y auoit aucuns capitaines ordonnez pour enuahir leurs logis, & bouter le feu en aucunes maisons pour veoir leur gouuernement & conduicte, & sur ce faire selon ce qu'on verroit estre plus expedient. Apres laquelle conclusion fut ordonné que toutes gens feussent prests pour monter à cheual incontinent apres minuiet, & ainsi fut fait comme ils le deuiserent. Et issit ledit Comte d'Estampes & tous les autres hors de Peronne, pour faire ladicte entreprinse: mais quand ils eurent cheminé vne demie lieue ou environ hors de ladicte ville de Peronne, il feit si tresnoir qu'à moult grand peine pouuoient tenir chemin. Et adonc se commencerent à pourmener iusques à ce qu'il feit un peu plus cler iour, que toutes gens se retournoient en leur ville: & par ainsi fut ladicte entreprinse rompue: & en ce mesme iour vers l'heure de midy vindrent certaines nouuelles au dessusdit Cōte d'Estampes, & aux autres seigneurs qu'iceux Anglois s'estoient deslogez de ladicte ville de Lyhons, & s'en retournoient le chemin dont ils estoient venus ou assez pres pour retourner en Normandie, ce qui estoit veritable: car apres qu'ils eurent esté en ladicte ville de Lyhons bien l'espace de dix iours ou environ, & fait de bien grans dommages ou païs, comme dit est dessus: ils se partirent de là, & s'en allerent en Normandie sans ce qu'ils eussent aucuns empeschemens ne destourbier qui face à escrire: & emmenerent plusieurs prisonniers & grand foison de biens avec les hostages dessusdits: & au rappasser audit lieu de Folleuille le renforcèrent, & y laisserent forte garnison de leurs gens. Et en tant qu'ils furent en iceluy païs & audit logis de Lyhons les gens de messire Iean de Luxembourg alloient & venoient de iour en iour paisiblement avec iceux Anglois, & auoient grand communication ensemble: dont ledit Comte d'Estampes & plusieurs autres grans seigneurs qui estoient avec luy, n'estoient point

bien contens, mais pour lors on ne le pouoit auoir autre. Apres lequel departement & deslogement desdits Anglois qui ainsi s'en retournoient, toutes les gens de guerre qui estoient venus au mandement du dessusdit Comte d'Estampes, se commencerent à retraire és lieux dont ils estoient venus.

De l'an mille cccc. & xl.

Comment le Daulphin, le Duc de Bourbon & plusieurs autres seigneurs se departirent du Roy Charles de France.



AV commencement de cest an Charles Roy de France fait grand assemblée de nobles hommes & autres gens de guerre, pour aller ou pays de Bourbonnois destruire & subiuguer monseigneur le Duc de Bourbon & ses pays: lequel à sa grād desplaisance auoit seduiēt & emmené son fils le Daulphin, qui par auant estoit logé à Loches en Touraine au chastel. Et estoit pour ce temps au gouuernement du Comte de la Marche, qui estoit à ceste heure en la ville, & point ne se doubtoit que ledit Daulphin se voulsist partir sans parler à luy. Neātmoins le Bastard de Bourbon, Anthoine de Chabannes & autres capitaines à tout foison de gens d'armes vindrēt deuers luy audit chastel de Loches, & de son consentement le menerēt ou pays de Bourbonnois en la ville de Moulins. Ouquel lieu s'en allerent avec ledit Duc de Bourbon, le Duc d'Allençon & le Comte de Vendosme, les seigneurs de la Trimouille, de Chaumont & de Prie avecques plusieurs autres nobles hommes & grans seigneurs: si estoit-leur intention, que le dessusdit Daulphin auroit seul le gouuernement & pouoir du Royaume de France, & que le Roy Charles son pere seroit mis comme en tutelle & gouuerné par eux. Et affin d'auoir ayde & faueur pour accomplir leur intention, manderent en diuers lieux les Barons, grans seigneurs & gentils-hommes de plusieurs pays: ausquels ils declairerent leur intention, en requerant qu'ils voulsissent faire serment audit Daulphin, & le seruir contre tous ceux qui greuer ou nuire luy voudroient. Entre lesquels y vindrent les seigneurs d'Auuergne: lesquels ceste requeste ouye feirent responce par la bouche du seigneur de Dampierre, que tres volentiers le seruiroient en tous ses affaires reseruē contre le Roy son pere: disoient outre que ou cas que le Roy viendroit à puissance ou pays, & il les requist d'auoir leur ayde & aussi d'entrer en leurs villes & forteresses, ils ne luy oseroient ne voudroient nullement refuser, & qu'iceux requerans point à ce ne s'attendissent autrement. Laquelle responce ne fut pas bien agreable audit Daulphin ne aux autres seigneurs, & se commencerent tresfort à doubter que de leurdicte entreprinse ne leur vint grand mal. Et avec ce estoient desia aduertis qu'iceluy Roy venoit contre eux à moult grand puissance, comme dessus est dit, laquelle chose estoit veritable: car le Roy entra oudit pays de Bourbonnois, & commença à faire tresforte guerre aux villes & forteresses du deuantdit Duc de Bourbon, & de ceux tenans son party: si en meit plusieurs en son obeissance. Et entre-temps ledit Daulphin & ceux de son conseil enuoyerēt deuers le Duc de Bourgogne, pour sçauoir s'il vouldroit en ses pays receuoir luy & les siens & luy bailler ayde en tous ses affaires: lequel Duc apres qu'il eut eu deliberation de conseil, sur ce fait responce, que tous ses pays avec ses biens estoient bien au cōmandement
du

du Daulphin quand il luy plairoit y venir : mais pour nulle riens ne luy donneroit faueur ne ayde, pour faire guerre au Roy son pere : mais estoit prest pour toutes les manieres qu'il pourroit de luy ayder à rentrer & estre en sa grace. Disoit outre qu'il luy conseilleroit qu'ainsi le feit, & que trop grand deshonneur & dommage en pourroit aduenir ou Royaume, si ceste guerre se continuoit. Et pour y obuier & trouuer maniere & moyens, enuoya le Duc de Bourbon ses ambassadeurs deuers iceluy Roy, qui s'entremesurèrent entre icelles parties. Si fut fait le traicté par cōdition qu'iceluy Daulphin, le dessusdit Duc de Bourbon & autres qui auoient offencé, iroient par deuers le Roy en grand humilité requérir pardon desdictes offences : toutesfois auant que ceste chose peut estre acheuée, grand partie des pays du Duc de Bourbon & de ses fauorisans furent tresfort destruits par les gens de guerre dudit Roy de France, qui sur eux estoient venus en tresgrand nombre. En apres le dixneufiesme iour de Iuliet le Roy estant à Cusset, vindrent deuers luy le Daulphin & le Duc de Bourbon accompagnez desdits seigneurs de la Trimouille, & de Chaumont, & de Prie : mais quand ils furent à demie lieue pres dudit lieu de Cusset, vn messagier vint deuers eux : lequel dit ausdits trois seigneurs que le Roy ne les asseuroit point, & qu'il ne vouloit point qu'ils venissent deuers luy. Et lors quand ledit Daulphin ouyt & entendit ce, il dit au Duc de Bourbon. Beau compere vous n'auiez talent de dire comment la chose estoit faicte, & que le Roy n'eust point pardonné à ceux de mon hostel. Et adoncques iura vn grand serment, qu'il s'en retourneroit & n'iroit point deuers le Roy son pere. Et lors ledit Duc de Bourbon luy dit : Monsieur tout ce fera bien, n'en soyez en quelque doute, vous ne pouez retourner : car l'auantgarde du Roy est en vostre chemin. Toutesfois s'en eust esté le Comte d'Eu & aucuns autres seigneurs qui estoient venus au deuant de luy : lesquels luy remonstrerent qu'il feroit grand mal de retourner s'il s'en fut r'allé. Si s'en r'allerent lesdits trois seigneurs audit lieu de Moulins, & lesdits Daulphin & Duc de Bourbon entrerent en la ville de Cusset, & allerent descendre à l'hostel du Roy. Et eux venus en la chambre où il estoit, s'agenouillèrent par trois fois deuant qu'ils venissent à luy. Et à la tierce fois luy prierent en grand humilité, qu'il luy pleust à eux pardonner son indignation. A quoy le Roy respondit en adressant ses parolles à son fils, disant : Loys vous soyez le bien venu, vous auez moult longuement demouré : allez vous en reposer en vostre hostel pour au iourd'huy, & demain nous parlerons à vous. En apres parla au dessusdit Duc de Bourbon assez longuement, sagement & prudemment, & luy dist : Beau cousin il nous desplaist de la faute que maintenant & autresfois auez faicte contre nostre majesté par cinq fois : & luy declaira les propres lieux, où ce auoit esté, disant. Se ne fut pour l'honneur & amour d'aucuns, lesquels nous ne voulons point nommer, nous vous eussions montré le desplaistr que vous nous auez fait : Si vous gardez dorefnauant de plus y rencheoir. Apres lesquelles parolles & plusieurs autres les dessusdits Daulphin & Duc de Bourbon se departirent de là, & s'en allerent à leurs hostels iusques au lendemain apres la messe du Roy qu'ils retournerent vers luy. Et de rechief presens tous ceux de son conseil requierent treshumblement, qu'il luy pleust leur pardonner leur maltalent : & aux dessusdits trois seigneurs, de la Trimouille, & de Chaumont, & de Prie. Et le Roy ref-

pondit qu'il n'en feroit riens, mais il estoit assez bien content qu'ils s'en retournassent chascun en leurs maisons & domiciles. Et adoncques dit le Daulphin au Roy: Monseigneur dont faut il que ie m'en reuoise, car ainsi leur ay promis: & lors le Roy non content de ceste parolle respondit à ce, & luy dit: Loys les portes sont ouuertes, & si elles ne vous sont assez grandes, ie vous en feray abatre seize ou vingt toises du mur pour passer ou mieux vous semblera. Vous estes mon fils, & ne vous pouez obliger à quelque personne sans mon congé & consentement. Mais sil vous plaist en aller si vous en allez, car au plaisir de Dieu nous trouuerons aucuns de nostre sang qui nous ayderont mieux à maintenir & entretenir nostre hōneur & seigneurie qu'encores n'auiez fait iusques à cy. Après lesquelles parolles le Roy le laissa & alla parler audit Duc de Bourbon, qui prestement luy feit serment de le seruir & obeir à tousioursmais. Et d'autre part osta & destitua tous les officiers & gouuerneurs dudit Daulphin, reserué son confesseur & son cuisinier. Et au regard du traicté dudit Duc de Bourbon, il promeit de rendre & restituer dedans la main du Roy en briefs iours apres ensuiuans Corbeil, le Bois de Vincennes, Sanxerre & le chastel de Loches, lesquelles places il tenoit en sa main. Et ne voulut point le Roy nullement consentir que ses gens d'armes se departissent du païs de Bourbonnois & d'Auuergne, iusques à ce qu'il fut asseur d'auoir & posseder en sa main toutes les places dessusdictes. Et pareillement pardonna le Roy audit Duc d'Alençon ou Comte de Vendosme, & plusieurs autres grans seigneurs & nobles Princes qui auoient accompaigné le Daulphin és besongnes dessusdictes. Et quand tout ce fut fait & accompli en la maniere dessusdicté, & que le Daulphin fut content de demourer avecques le Roy son pere, on cria la paix dont la teneur s'ensuit.

ON vous fait à sçauoir de par le Roy, que monseigneur le Daulphin & monseigneur le Duc de Bourbon sont venus deuers luy en tresgrand humilité & obeissance: & les a le Roy receuz tresamiablement en sa bonne grace & tout pardonné. Et par ce veut & ordōne, q̄ toutes guerres & voyes de fait cessent: & que on ne prēne nuls prisonniers, laboureurs & autres gens quelscōques ne bestail ne autres biens, & que nuls ne fassent nulles extortions l'un contre l'autre, soit en prenant places ou autrement: & que toutes gens puissent aller & venir seurement faisant leurs besongnes, sans ce qu'on leur mefface aucunement: & aussi que nulles places ne soient abbatues ne demolies és païs de mondit seigneur de Bourbon ne ailleurs. Donné à Cusset le vingt quatriesme iour de Iuillet l'an mille quatre cens & quarante. Et estoit escrit dessus: de par le Roy & son grand conseil, ainsi signé d'Iugon. En outre dedans assez briefs iours apres ensuiuans, le Roy bailla à son dit fils le Daulphin le gouuernemēt du Daulphiné. Si feit assez tost apres departir les gens d'armes des païs du Duc de Bourbon, & leur donna congé de tirer vers Orleans & deuers Paris.

Comment les Francois coururent en la terre de Neelle appartenant à messire Iean de Luxembourg.

ENiceluy mesme temps enuiron le mois de Iuillet, messire Iean de Luxembourg Comte de Ligney estant à Neelle en Vermādois, vindrent les garnisons de Crespy en Valois, de Ver & d'autres lieux passer l'eau de la riuere d'Oyle au pont sainte Maxence iusques au nombre de cent combattans ou enuiron, sous la conduite d'un nommé Gilbert de la Roche son compaignon d'armes. Si se tirerent en ladicte terre de Neelle appartenant audit Comte de Ligney. Et en icelle prindrent & leuerent tresgrand nombre de païsans, cheuaux, bestial & autres biens: à tout lesquels quand ils eurent fait leursdictes courses, ils s'en retournerent pour eux en aller es lieux dont ils estoient venus. Si vindrent à la cognoissance dudit Comte ces nouuelles, dont il fut moult indigné contre eux, pource que plusieurs fois luy auoient fait de telles enuahies. Si feit incontinent assembler de ses villes & forteresses iusques au nombre de cent combattans ou enuiron, lesquels il enuoya sans delay apres les dessusdits. Et estoient les principaux messire Dauid de Poix gouuerneur de Guyse, Guyot de Bethune, Anthoine de la Banierre gouuerneur de Ham, Anthoine de Belloy & aucuns autres gentils-hommes: lesquels cheuaucherent vigoureusement apres iceux, & tant qu'ils les r'acensuiurent & rataignirent au dessous de Compiengne contre Royaulieu, où desia auoient fait passer leurs proyes & partie de leurs cheuaux outre la riuere par un bastel qu'ils auoient trouué, & desia en y auoit bien vingt entrez dedans le bastel pour passer outre, quand ils apperceurent venir leurs aduersaires contre eux, qui enuahirent & assaillirent baudement & vigoureusement ceux qu'ils trouuerent audit passage. Et adonc ceux dudit bastel voyans leurs compaignons assaillir (comme dit est) cuiderent retourner pour les ayder & secourir, mais ce fut pour neant: car tantost qu'ils approcherēt pres de la terre, les autres eux voyans estre ainsi surprins & enuahis, saillirent audit bastel & en y entra tant & si largement, qu'ils l'effrondrerent & noyerent plusieurs de leurs biens. Et les autres sans delay furent tournez à descōfiture, & vne partie mis à mort. Entre lesquels y furent morts ledit Gilbert de la Roche & iceluy Raffillé se sauua à grand peine avec huit ou dix de ses gens tant seullement. Apres laquelle besongne ceux qui les auoient ruez ius, passerent l'eau & r'allèrent querre les proyes dessusdictes. Et apres par autres chemin passerent l'eau, & retournerent franchement audit lieu de Neelle deuers le dessusdit de Luxembourg leur seigneur, qui fut tresioyeux de leur bonne fortune. Et si auoient amené aussi cinq prisonniers, desquels il feit pendre la plus grand partie.

Comment le Comte de Sombresset à tout grand puissance d'Anglois, assiegea la ville de Harfleur.

ENen uiron l'issue d'Auril de cest an, se meirent sus en la ville de Rouen & au païs à l'entour iusques à six mille combattans Anglois. Avec lesquels sous la conduite & gouuernement des Comtes de Sombresset, Doursec & de Fauquemberge estoient les seigneurs de Thallebot, messire François Arragonnois, Matago, Iacquemin vacquier, Thomas Heniton, le Baillif de Rouen, & aucuns autres capitaines qui tous ensemble allerent mettre le siege tout à l'entour de Harfleur tant par terre comme par

mer. Dedans laquelle ville estoit capitaine pour le Roy de France Jean d'Estouteuille, & avecques luy Robert son frere & autres iusques au nombre de quatre cens combattans ou environ, avec ceux de la ville & de la marine qui grandement & vaillammēt se meirent à deffence contre leurs aduersaires. Et fortifierent nuit & iour en grand diligence les gardes de ladicte ville, & feirent aucunes saillies contre les assiegeans : ausquelles ils prindrent & occirent aucuns de leurs ennemis. Lesquels assiegeans d'autre partie se fortifierēt en leur dit siege de grans fossez tout autour de leur ost. Et laisserent en aucuns lieux conuenables issues & entrées. Et avecques ce feirent sur lesdits fossez fortes hayes, afin que de leurs ennemis ne peussent estre par nul costé enuahiz & prins. Et outre asseirent contre la porte & muraille d'icelle ville plusieurs bombardes & autres habillemens de guerre, desquels ils trauaillerent moult les assiegez. Si continuerent par treslongue espace en cest euure, & tant que ceux de dedans furent moult oppressez & trauaillez. Et par especial auoient moult grand disette & necessité de viures & autres choses. Si enuoyerent plusieurs messages deuers le Roy Charles, luy requerant qu'il leur vouldist enuoyer secours ce qu'il promet de faire : mais pour les grans affaires & occupations qu'il auoit, ne le peut enuoyer si brief qu'ils auoient requis. Neantmoins au bout de quatre mois ou environ que ledit siege eut duré, & que la Comtesse de Sombresset & autres dames & damoiselles du Royaume d'Angleterre y furent venues : lesquelles y demourerent iusques en la fin dudit siege, fut baillé la charge pour faire ledit secours aux assiegez, au Comte d'Eu : & avecques luy le Comte de Dunois Bastard d'Orleans, le Bastard de Bourbon, le seigneur de Gaucourt, la Hyre, messire Gilles de saint Symon, le seigneur de Pennesach, Pierre de Broussac, & aucuns autres chiefs de guerre & capitaines, qui auoient avecques eux quatre mille combattans ou environ. Et dedans ladicte ville de Harfieu avecques ledit Jean d'Estouteuille chevalier & capitaine auoit environ quatre cens combattans : dont les chiefs estoient messire Jean de Bressay, messire Iaques de Hincourt, Hector de Fol, Guillot de Las, & Jean Gentil. Si estoient iceux secourans toutes gens d'armes à l'esslite : lesquels passans les marches de Paris se tirerent assez soubdainement iusques à Amiens & Corbie, où ils passerent la riuere de Somme : & de là parmy Ponthieu allerent à Abbeuille, où ils feirent leur assemblée & tindrent conseil pour prendre conclusion pour poursuiuir leur entreprinse. Si se meirent avec eux, des marches de Picardie à tout leurs gens les seigneurs d'Auxi & de Humieres, Jean d'Ailly seigneur d'Araines, Guillaume le Jeune seigneur de Cousay & plusieurs autres gentils hommes. Et apres que tous ensemble eurent deliberé ce qu'ils auoient à faire, ils feirent charger pour mener avec eux trente chariots d'artillerie ou environ, & des viures & autres engins & habillemens de guerre. Et puis, eux partans d'Abbeuille en tresbelle & bonne ordonnance allerent à Eu. Et faisoient l'auantgarde le Bastard de Bourbon & la Hyre : de laquelle ville d'Eu allerent loger en vn village nommé le Bourg de Dun, la plus grand partie : & ledit Comte se logea à saint Aubin en Caux. Mais en ce mesme iour sur les vespres le seigneur de Gaucourt qui estoit demouré derriere, fut prins d'environ dixhuiet Anglois qui suiuoient leur trace : lesquels l'emmenerent prisonnier au Neuf-chastel de Hincourt

court: & depuis fut deliuré en payant grand somme d'argent. Auquel lieu de S. Aubin ledit Comte d'Eu ouýt nouvelles qu'un nômé maistre Jean de la Mothe auoit esté prins des Anglois, par lequel il enuoyoit noncer à ceux de Harfleur le secours qui leur venoit: & là mesmement renuoyerent les Anglois par un de leurs poursuiuans nouvelles & lettres, qu'ils viendroient combattre les François deuant ce qu'ils venissent à eux, ce que point ne firent. Pourquoi les François se tirèrent tous ensemble à Fauculle en Caulx à deux lieues pres de leurs aduersaires. Et le lendemain se departirent des le poinct du iour, & allerent à Monstier-Villier qui estoit de leur obeïssance, & là eurent certaines nouvelles que lesdits Anglois ne festoient point partis de leur siege. Et en ce iour ledit Comte d'Eu les alla aduiser à tout cent cōbattans gens d'esslite montez sur fleur de cheuaux, & y eut entre icelles parties tresgrandes escarmouches. Et luy retourné print conclusion avecques ceux de sa compagnie: c'est à sçauoir les plus experts & cognoissans de ce qu'il estoit de faire: toutesfois tous generallement estoient tresdeplaisans de la prinse dudit seigneur de Gaucourt, pource qu'il estoit moult saige & bien vstité en telles ou pareilles besongnes. Auquel conseil fut ordonné, que ledit Comte d'Eu monteroit sur mer avecques certain nōbre & quātité de combattans au chief de Caulx. Et le Bastard d'Orleans à tout vne autre partie de gens d'armes d'un autre costé, & les Picards d'autre qui iroient de pied & porteroient des ponts à mettre par dessus les fossez, qu'auoient faits les dessusdits Anglois autour de leur logis. Et d'un cōmun accord assauldroient leursdits aduersaires par diuers lieux. Et la Hire & autres capitaines & leurs gēs demoureroient à cheual pour donner secours & ayde à ceux qui en auroient besoing, & aussi necessité. Apres lesquelles ordonnances en telle maniere faites, le lendemain se preparerent pour faire chacun d'eux ce qui auoit esté ordonné & commandé. Et fut commencé ledit assault par ceux qui estoient de pied, & du costé vers le logis de Thallebot: lequel assault fut tresdur & aspre, & dura par l'espace de demie heure ou plus: mais lesdits assaillans jaçoit-ce qu'ils se portassent tresvaillamment: toutesfois pour la tresgrande resistance d'iceux Anglois leurs aduersaires, & aussi pource que leurs ponts estoient trop cours ne pouuoient venir à chief de leurdictē entreprinse: & d'autre part iceux Anglois estoient hault & aduantageusement assis: pourquoi leurs archiers, dont ils auoient moult grand nombre, titerent moult merueilleusement & par grand vigueur sur iceux assaillans, & tant qu'ils en naurerent & blefferent tresgrand nombre: entre lesquels y furent morts deux vaillans cheualiers qui là estoient, c'est à sçauoir messire Jean de Chailly seigneur de Chambois, & messire Harpin de Richannes capitaine de Rue avecques aucuns autres. Auquel assault furent faits nouveaux cheualiers des François Jean d'Arly, & Guillaume le Jeune & autres. Durant lequel temps saillirent hors de leurs logis environ cinq cens Anglois pour courir sur iceux François de pied: mais ils furent tantost reboutez par ceux de cheual & en y eut de quarante à cinquante de morts. Et pareillement ceux de la ville saillirent sur le guet, qui estoit contre eux & en prindrent & occirent environ trente. Et de l'autre costé sur la mer se bouterent auāt ledit Côte d'Eu & ceux de sa compagnie, qui estoient cōmis avec luy pour assaillir ledit siege de la marine, mais ce fut peine perdue: car iceux An-

glois s'estoient garnis & fortifiez par telle manière, qu'on ne leur pouoit mal faire. Et pourtāt apres qu'ils eurent perduz aucuns de leurs vaisseaux qui estoient demourez par le grauier, ils se retrahirent à Monstieruillier. Et aussi feirēt ceux de pied, voyant que riens ne pouoient besongner qui leur fut prouffitable. Auquel lieu de Monstieruillier ils furent bien huit iours entiers en tresgrand poureté de viures pour eux & pour leurs cheuaux, attendans s'ils ne pourroient riens faire de secours ausdits assiegez: durant lequel temps il y eut aucunes escarmouches entre eux. Et aussi le dessusdit Comte d'Eu feit sçauoir audit Comte de Sombresset, que s'il vouloit combattre puissance contre autre il les fourniroit, ou cent contre autre cent, ou de sa personne contre luy: mais riens ne luy fut accordé. Et la cause si fut, que ledit Comte de Sombresset & ceux de sa partie sçauoient, que ceux de la ville estoient si fort abstrains que bonnement ne pouoient longuement durer qu'ils ne les eussent à leur plaisir. Et auoient regard au grand trauail & aux miseres qu'ils auoient eu moult longuemēt, & que chèrement auoit cousté à leur Roy qu'ils ne vouloient point mettre à l'aduanture sur la requeste de leurs aduersaires. Et finablement les François dessusdits considerans la grand poureté, où ils estoient & que lesdits Anglois estoient en plus grand nombre qu'ils n'estoient, parquoy bonnement ne pouoient secourir ne subuenir à leurs gens. Si conclurent tous ensemble d'un commun accord & opinion, qu'ils s'en retourneroient dont ils estoient venus sans plus là arrester: car force leur estoit pour les necessitez des viures, dont ils ne pouoient finer ne recouurer: mais avant leur departement feirent requerre vn saufconduit ausdits Anglois pour le seigneur de Rambures, lequel saufconduit si luy fut accordé. Puis apres s'en alla ledit de Rambures deuers eux traicter pour la reddition de la ville. Et entre-temps tous les François & Picards s'en retournerent par aucuns briefs iours ensuiuans à Abbeuille. Si trouuerent en leur chemin certains messages de par le Duc de Bourgogne: lesquels leur signifient de par luy, qu'ils ne rentrassent point en son païs pour les grans dommages qu'ils y auoient faits au passer: disant que s'ils y entroient, il les feroit rebouter dehors à puissance de gens. Si promeirent de non y entrer: neantmoins les aucuns faillirent de leur promesse. Si entrerent au païs de Ponthieu en tirant vers Amyens, faisant de moult grans dommages: mais les Comtes d'Estampes & de saint Pol qui s'estoient mis sus avec tresgrand nombre de gens d'armes, allerent au deuant d'eux pour les rebouter & combattre. Si y furent faictes aucunes entreprinſes d'un costé & d'autre. Et en fin par certains moyens promeirent d'eux en r'aller, & se tirerent au païs de Santhois, & de là vers les terres de messire Iean de Luxembourg, qui moult fort le menassoient de luy faire grand guerre & dommage: mais il s'estoit tresbien pourueu de gens de guerre, pour resister contre eux: parquoy ils furent tous ioyeux de passer paisiblement aupres de ses seigneuries, car avec ce ledit Comte de saint Pol les poursuiuoit trefroidement & à grand puissance de gēs d'armes, pour estre en l'ayde & secours de son oncle si besoing luy en eust esté. Si se tirerent es champaignes, faisans tousiours de grans villenies & dommages au poure peuple, par tout où ils pouoient auoir sur eux puissance. Et au regard du seigneur de Rambures il traicta avec ledit Comte de Sombresset, & avec les autres capitaines Anglois par tel si, que la ville de Har-

fleu

fleu leur fut rendue : & se departoient ceux de dedans chacun vn baston au poing : Et pareillement leur fut rendu Monstieruillier , qui par necessité de viures ne se pouoit plus tenir.

Comment vn tresgrand seigneur du pais de Bretagne nommé le seigneur de Raix fut accusé d'heresie.

EN l'an dessusdit aduint en la Duché de Bretagne vne grand diuerse & merueilleuse aduventure . Car le seigneur de Raix qui pour lors estoit grand Mareschal de France , & estoit moult noble homme & tresgrand terrien & yssu de tresgrand & trefnoble generation, fut accusé & conuaincu d'heresie, laquelle il auoit par long temps maintenuz : c'est à sçauoir par la sedition & enhortement principalement du dyable d'enfer , & aussi d'aucuns ses complices & seruiteurs , comme il confessa auoir fait mourir plusieurs enfans soubs aage, & femmes enceintes sur intention de paruenir à aucunes haultesses & cheuances & aussi honneurs desordonnez : desquels enfans & autres creatures après ce qu'il les auoit fait mourir, violement faisoit prendre aucune partie de leur sang: duquel on escriuoit liures où il y auoit coniurations diabolicques & autres termes contre nostre foy catholicque: pour lequel cas dessusdit apres qu'il eut esté prins & diligemment examiné, & aussi qu'il eut cogneu tout son fait, d'en auoir fait mourir par ceste mauuaise maniere iusques au nombre de huit vingt, ou plus: il fut en sa presence par saiges & notables iuges condamné à estre pendu & estranglé, tant qu'il fut mort : & apres son corps ars en vn feu. Si y estoient presens avec ledit Duc grand nombre de grans seigneurs & autres notables hommes tant seculiers comme clerics. Si fut faicte ceste condamnation, & aussi l'execution en la ville de Nantes en Bretagne: toutesfois apres ladicte execution premiere accomplie, & qu'il fut mis au feu & en partie brulé, il y eut aucunes dames & damoiselles de son lignaige, qui requierent au dessusdit Duc de Bretagne de auoir le corps pour le mettre en terre sainte: lequel Duc leur accorda & y fut mis . Et jaçoit ce qu'il eust eu ceste faulse & inhumaine voulenté: neantmoins si eut il a la fin trefbelle & deuote cognoissance & repentance, en requerant moult humblement à son createur mercy & misericorde de ses grans pechez & offences: pour la mort duquel seigneur de Raix grand partie des nobles dudit pays de Bretagne & especiallemēt ceux de son lignage en eurent au cuer tresgrand douleur & tristesse. Et aussi auant que ceste aduventure luy aduint, il estoit moult renommé d'estre trefuailant cheualier en armes.

Comment Pierre Regnault frere Bastard de la Hire alla fourrager es pais d'entour Abbeuille.

APres en ce mesme temps Pierre Regnault frere Bastard de la Hire, qui lors se tenoit au chastel de Milly assez pres de Beauuais: lequel parauant il auoit réparé, se partit vn certain iour de là a tout huit vingts combattans ou enuiron tant de cheual comme de pied, & vint pour fourrager & courre le pays d'entour Abbeuille . Si print le chastel d'Yancourt & le seigneur dedans : lequel chastel il pilla tout nettement, c'est à sçauoir de

tous les biens qui estoient portatifs. Si furent tantost les nouvelles espendues iusques en la ville d'Abbeville, où lors estoient les seigneurs d'Auxi Guillaume de Thiemberonne, Philippe de Vaucourt, Guy Gourle & plusieurs autres gentils-hommes : lesquels tantost apres qu'ils eurent ouy les nouvelles, s'armerent & meirent sus tant de cheual comme de pied, & saillirent dehors de leur ville bien trois cens ou plus, sur intention de rebouter les dessusdits & rescourre les biens qu'ils auoient prins audit chastel: laquelle assemblée vint à la cognoissance du dessusdit Pierre Regnault & de ses gens : lesquels enuoyerent deuers le dessusdit seigneur d'Auxi & ceux de sa partie pour eux excuser aucunement, disant qu'ils ne vouloient que viures : mais pourtant ne furent mie iceux contents. Si s'esmeurent encontre icelles parties tresgrans discords, tellement que ledit Pierre Regnault voyant que la plus grand partie d'iceux qui estoient sailliz hors d'Abbeville contre luy n'estoient que communes, se ferit avec ses gens tout au trauers & sans y trouuer grand deffence, les tourna assez briefuement à grand meschef, & en fin à desconfiture. Si furent morts en la place bien vingt ou trente, & si en y eut bien neuf noyez qui se cuiderent sauuer & passer la riuere de Somme, entre lesquels fut l'un d'iceux ledit Guy de Gourle. Et avec ce en y eut de prisonniers bien soixante ou enuiron. Desquels furent les principaux messire Jean de Fay cheualier de Rhodes, & le dessusdit cheualier de Vaucourt, & Guillaume de Thiemberonne. Apres laquelle destrouffe ledit Pierre Regnault & ses gens s'en retournerent franchement à tout leurs prisonniers, & autres proyes & biens prins audit chastel de Milly: lesquels prisonniers dessusdits ledit Pierre Regnault rançonna & meit à finance, comme s'ils eussent esté Anglois. Et feit en outre pour cest an plusieurs assemblées assez semblables en diuers lieux & pays de l'obeissance du Duc de Bourgogne: pour lesquelles iceluy Duc n'estoit point bien content dudit Pierre Regnault, ne des autres. Et pour ceste cause enuoya deuers le Roy Charles luy noncer & faire sçauoir comment de iour en iour ceux qui tenoient son party, roboient & pilloient son pays, prenoient ses gens & subiects & mettoient à grosse finance & rançons: faisoient en outre plusieurs autres grans maux & excez qui moult luy estoient desplaisans & durs à porter, attendu la paix qu'ils auoient l'un avec l'autre. Desquelles entreprises le Roy s'excusa par moult de fois en disant qu'il luy en desplaisoit moult grandement, & qu'il y pouruoyeroit en tout ce qu'il luy seroit possible. Et mesmement estoit content au cas, que ledit Duc de Bourgogne pourroit atteindre par luy ou par ses gens ceux qui en ses pays faisoient telles assemblées, besongnes & entreprises, qu'on les ruast ius ou destrouffast. Neantmoins au grand preiudice desdits pays & grans dommages du poure peuple, lesdictes courses & pilleries se continuerent par long temps. Auquel temps d'autre part, les gens de la Hire qui se tenoient au chastel de la Bonne empres Laon, commencerent à courir en plusieurs pays: c'est à sçauoir au pays de Hainault, Cambresis & autres lieux és terres du seigneur de saint Pol: lequel non content de ce & pour y resister, meit grosse garnison en la ville de Marle: laquelle garnison alla un iour semblablement courre vers Reims: & pour auoir le passage de l'eauie, prindrent le fort du Bac-à-Bery, qui n'estoit point de trop grand valeur, lequel tenoient les gens de la Hire. Si laisserent dedans enuiron trente combat-

tans

tans pour le garder, & y demoura vn capitaine d'iceux:mais dedans briefs iours ensuiuans vindrent deuant les gens de la Hire dessusdit, & avec eux aucuns des garnisons de Valois, qui n'agueres par auant auoient esté ruez ius des gens messire Iean de Luxembourg au plus pres de la ville de Compiengne, comme en autre lieu est à plain declairé: & pouoient estre en tout enuiron le nombre de trois cens combattans: lesquels incontinent & de grand vouldenté assaillirent le fort dessusdit, desquels assez tost ensuiuant fut prins, & generalmente tous ceux de dedans mis a l'espée & ruez en la riuere. Apres laquelle besongne iceux François de rechef laisserent de leurs gens dedans iceluy fort en garnison. Et enuiron seize iours apres se meirent ensemble les gens d'iceluy Comte de saint Pol & de son oncle messire Iean de Luxembourg Comte de Ligney, pour aller r'assaillir illec la garnison dudit Bac-à-Bery: mais ceux de dedans sçachans celle assemblée s'en departirent, & abandonnerent celle place deuant la venue d'iceux. Si fut icelle place du tout demolie & abbatue: & ainsi & par ceste maniere estoient les pays vers Reims, Laonnois & plusieurs autres marches és pays à l'enuiron fort trauaillez & oppressez par les dessusdictes courses & assemblées d'icelles deux parties: & se faisoit tout ce comme lors en estoit commune renommée & voix à l'occasion, de ce que messire Iean de Luxebourg ne vouloit point faire serment au Roy Charles, & entretenoit tousiours garnisons de gens de guerre en ses places pour l'entretienement d'icelles.

Comment les ambassadeurs de France, d'Angleterre & de Bourgongne vindrent à Calais pour traicter la paix finale.

EN ces iours furent enuoyez de par le Roy Charles plusieurs notables ambassadeurs à saint Omer, pour traicter la paix avec les Anglois qui lors deuoient venir en icelle ville, comme promis l'auoient l'an precedent. Desquels estoient les principaux les Archeuesques de Reims & de Nerbonne, le Comte de Dunois bastard d'Orleans: lesquels là venuz furent notablement receuz & festoyez par le Duc de Bourgongne, & brief ensuiuant oyrent les nouuelles comme le Duc d'Orleans estoit arriué à Calais, & que lesdits Anglois le y auoient amené. Si enuoyerent deuers eux pour sçauoir en quel lieu ils se vouldroient assembler, pour tenir leur conuention. Lesquels Anglois leur feirent sçauoir qu'ils ne se partiroient point de Calais à tout le Duc d'Orleans: mais estoient prests de l'embesongner s'il y vouloit venir. Apres laquelle responce ouye y allerent par saufconduit ledit Archeuesque de Reims, le Comte de Dunois & aucuns autres avec les ambassadeurs dudit Duc de Bourgongne: c'est à sçauoir le seigneur de Creuecueur, & aucuns autres: lesquels là venuz ledit Comte de Dunois fut mené deuers ledit Duc d'Orleans son frere, qui grandement fut ioyeux de le veoir & le receut trescourtoisement & honnorablement, en luy remerciant de la bonne diligence qu'il auoit faicte d'entretenir ses pays durant sa prison. Apres laquelle reception icelles parties conuindrent ensemble par plusieurs fois, & de rechef furent faictes aucunes ouuertes sur la deliurance dudit Duc d'Orleans, & aussi sur les traictez autresfois commencez entre les deux royaumes: toutesfois encores ne pouoient estre d'accord: mais reprindrent autre iournée pour r'assembler: en dedans la-

quelle chacun deuoit r'apporter à sa partie les moyens, qu'ils auoient commencez. Et ce fait s'en retournerent les dessusdit audit lieu de saint Omer. Et ledit Duc d'Orleans fut tantost apres remené en Angleterre.

Comment les Barrois & Lorrains coururent en la Comté de Vaudemont, où ils feirent moult de maux & de grans desrois.



Pres durant le temps dessusdit se meirent sus à grand puissance les Barrois & les Lorrains : avec lesquels estoient aucuns François, qui trestous ensemble se tirerent en la Comté de Vaudemont, & icelle par feu & par espée meirent à grand destruction, viollerent plusieurs Eglises, & y feirent maux inestimables. Pour lesquels contreuenger le Comte de Vaudemont, pource qu'il n'auoit point assez puissance pour resister contre eux, enuoya hastiuement deuers le Duc de Bourgongne, & aussi à son beau fils le seigneur de Croÿ eux requerir instamment qu'ils luy voulussent enuoyer secours & ayde de gens de guerre. Laquelle requeste luy fut accordée: & y furent enuoyez en chef messire Iean de Croÿ & avec luy messire Symon de Lalaing, les seigneurs de Launay & de Maingoual nepueux dudit seigneur de Croÿ, messire Iean bastard de Reuly, messire Anthoine de Vvisloch & aucuns autres nobles de mille combattans ou enuiron bien empoints : & feirent leur assemblée autour d'Aubenton. Et de là se tirerent vers la Duché de Bar. Car desja les dessusdits Barrois s'estoient retraits hors de ladicte Comté de Vaudemont. Et tant cheuaucherent, que tous ensemble vindrent deuant ladicte ville de Bar-le-Duc, où estoit le Marquis du Pont fils au Roy de Cecille Duc de Bar & autres plusieurs seigneurs du paÿs. Si se meirent en ordonnance de bataille deuant la ville de Bar. Et enuoyerent sommer ledit Marquis, s'il vouloit venir dehors à tout sa puissance ou prendre iour de les combattre, ils estoient tous prests de les receuoir & fournir. A laquelle requeste leur fut faicte responce par le conseil du dessusdit Duc de Bar, que point ne les combatteroit à leur requeste n'à leur plaisir: mais auoit intention de le faire en temps & en lieu, quand bon luy sembleroit : laquelle responce ouye lesdits Bourgongnons se departirent de là, & allerēt tous ensemble loger à vn gros village nommé Longueuille. Et de là vint contre eux ledit Comte de Vaudemont à tout ce qu'il auoit peu assembler de gens de guerre : & le lendemain se tirerent plus auant en la marche, & commencerent à bouter feux au trauers de la Duché de Bar. Et de là se tirerent en la Duché de Lorraine en destruyant tout ce qu'ils pouoiēt attaindre, & trouuer hors des forteresses: & qui plus est prindrent par force plusieurs Eglises, esquelles ils feirent moult de violences : & pour vray le Comte de Vaudemont estoit si enclin & obstiné de tout destruire, que nonobstant que les dessusdits seigneurs qui estoient avec luy, n'estoient point bien contens de faire si tres cruel desroy & indicibles derrisions : neantmoins ne le pouoient garder ne pareillement ses gens : & apres qu'ils eurent continué en icelles besongnes par l'espace de xxvj. iours ou enuiron sans trouuer aucunes gens de guerre qui s'apparussent contre eux pour eux combattre, s'en retournerent par autre chemin qu'ils n'estoient allez: toutesfois en faisant iceluy voyage, ils souffrirēt & eurent eux & leurs gens de moult grans peines & trauaux, & moult grand deffault de viures. Ainsi & par ceste

ceste maniere se faisoit la guerre entre icelles parties : c'est à sçauoir iceux deux seigneurs & leurs seigneuries au preiudice, dommage & grand destruction du poure & menu peuple.

Comment le Duc d'Orleans fut deliuré de la prison d'Angleterre par le moyen du Duc de Bourgogne, & espousa la damoiselle de Cleues niepce au Duc de Bourgogne.

Vous auez cy dessus bien entendu & ouy racompter, comment par plusieurs fois en diuerses ambassades tant de par le Roy comme du Duc de Bourgogne auoient esté enuoyées par deuers les gens du Roy d'Angleterre, sur intention de traicter paix entre les deux royaumes. Et aussi pour la deliurance de Charles Duc d'Orleans, lesquelles ambassades y auoient assez peu besongné: car lesdits Anglois ne bailloient responce n'esperance de venir à aucun traicté, se n'estoit que ce fut au grand preiudice & dommage du Roy de France & de sa seigneurie. Et ne vouloient les dessusdits Anglois venir ne condescendre à nul appoinctement, si toutes les conquestes qu'ils auoient faictes en France, & en especial les Duchez de Guyenne, & de Normãdie ne leur demouroient franchement, sans les tenir du Roy de France en quelque souueraineté ou ressort. Et à ce s'estoient du tout fermez. Laquelle chose iceluy Roy de France ne ceux de son conseil n'eussent iamais accordée. Et au regard du Duc d'Orleans, lesdits Anglois n'estoient point trop desirans de le deliurer, pource que chacun an auoient trespasse grosse somme de pecune pour bien largement payer ses despens. Et cela fut vne des choses en partie, pourquoy ils le tindrent si longuement prisonnier selon la relation qu'en faisoient aucuns Anglois, qui bien sçauoient des secrets du Roy d'Angleterre. Et pour vray si le Roy de France & ceux qui auoient le gouuernement des besongnes touchant les seigneuries du dessusdit Duc, eussent long temps par auant conclud de ne luy point enuoyer lesdictes finances, il est à supposer que sa deliurance eust plus tost esté trouuée qu'elle ne fut. Neantmoins ie croy que tout ce qui s'en faisoit estoit en bonne intention & pour entretenir honneur. Lesquels traictez durans & depuis ledit Duc de Bourgogne, qui auoit assez grand desir & volenté à ayder à deliurer ledit Duc d'Orleans, tant pour la prochaineté de sang dont ils attenoient l'un à l'autre, comme aussi affin que fil reuenoit en France qu'ils peussent demourer bons & loyaux amis l'un avecques l'autre. Et que toutes guerres & rigueurs qui auoient esté au temps passé, à cause & par le moyen de leurs peres deffuncts, fussent mises en oubly & du tout adnullées sans iamais riens en releuer, fait par plusieurs & diuerses fois parler & ouurir ceste matiere par aucuns de ses gens audit Duc d'Orleans, & à ceux qui auoient puissance de luy ayder à auoir sadicte deliurance enuers le Roy d'Angleterre, & ceux qui le gouuernoient pour sentir comment ne par quelle maniere ceste besongne pourroit prendre fin. Et en outre fait parler audit Duc d'Orleans, pour sçauoir fil voudroit prendre à mariage vne sienne niepce fille de sa seur Duchesse de Cleues, laquelle estoit en son hostel. Et avecques ce au cas qu'on pourroit traicter de sa deliurance, fil seroit content du tout luy allier & accorder avec ledit Duc de Bourgogne, sans iamais faire aucune poursuite cõtre luy ne les siens par quelque maniere que ce fut pour les querelles du temps passé dessusdit, sauf en tout

le Roy de France & son fils le Daulphin : lequel Duc d'Orleans considerant la grand seruitude où il auoit esté long temps, & le grand dangier qu'il auoit eu & pouoit encores auoir s'enclina à y entendre. Et de fait promet en parolle de Prince que si ainsi estoit, que ledit Duc de Bourgogne le peust & vouldist ayder à deliurer d'icelle seruitude, il seroit content de prendre ladicte niepce à espouse : & avec ce du surplus tant faire à luy sur toutes ses requestes, que de raison il deueroit estre content. Apres lesquelles promesses on commença de rechef à traicter diligemment avec ledit Roy d'Angleterre & ceux de son conseil. Si fut tant en ce temps continué entre les deux parties que finablement furent d'accord: moyennant & par tel si, que le Duc de Bourgogne bailla son seel au Roy d'Angleterre pour la somme qui entre eux fut dictée & deuisée.

A P R E S ces traictez faits & accordez par la maniere cy dessus declairée, le dessusdit Duc d'Orleans fut du tout mis à plaine deliurance. Et apres qu'il eut promis solemnellement de luy employer en tout ce qui luy seroit possible à la paix finale d'entre les deux Roys & leurs royaumes. Et avec ce quand il eut prins congé au Roy d'Angleterre & aux autres seigneurs, se partit de Londres en Angleterre, & par aucuns peu de iours vint en la ville de Calais garny de bon faufconduit, & delà fut amené à Grauelines. Et estoient avec luy pour le conduire le seigneur de Cornoaille, messire Robert de Roix & autres gentils-hommes d'Angleterre. Auquel lieu de Grauelines alla deuers luy la Duchesse de Bourgogne, accompagnée de plusieurs grans seigneurs & autres gentils-hommes. Si s'entreferirent grand ioye, & monstrent semblant d'auoir toute liesse, quand ils s'entreueirent ensemble : c'est à sçauoir ledit Duc d'Orleans pour sa deliurance, & ladicte Duchesse pour sa venue. Et peu de iours ensuiuans y alla ledit Duc de Bourgogne pour le veoir. Et y fut fait comme deuant tresgrand plaisir & ioye à tous ceux qui là estoient pour icelle assemblée. Et pour la grand amour qu'ils veoient ces deux Princes auoir l'un avecques l'autre. Et est à sçauoir qu'ils s'entreacollerent & embrasserent par plusieurs fois. Et pour la grand ioye qu'ils auoient de veoir l'un l'autre, ils furent moult longue espace qu'ils ne disoient riens l'un à l'autre. Et premierement parla le Duc d'Orleans & dit : par ma foy beau frere & beau cousin, ie vous doys aymer par dessus tous les autres Princes de ce royaume, & ma belle cousine vostre femme : car si vous & elle ne fussiez, ie feusse demouré à tousiours au dangier de mes aduersaires & n'ay trouué meilleur amy que vous. A quoy ledit Duc de Bourgogne respondit que moult luy pesoit, que plus tost n'y auoit peu pourueoir : & que long temps par auant auoit eu grand desir de soy employer pour sa redemption. Telles & semblables parolles furent dictes par moult de fois entre iceux deux Princes. Pour lesquelles plusieurs nobles hommes & autres gens d'auctorité qui là estoient des deux parties, estoient bien ioyeux, & par especial pour la reueneue dudit Duc d'Orleans: lequel par si long temps auoit esté prisonnier és mains de ses aduersaires les Anglois : c'est à sçauoir depuis le vendredy prochain deuant la Toussaincts de l'an de grace mille quatre cens & quinze, iusques au mois de Nouembre mille quatre cens quarante. Si estoient là presens les ambassadeurs du Roy de France, desquels estoient les principaux l'Archeuesque de Reims grand Chancelier de France, & l'Archeuesque de Narbonne, le Comte de Du-

nois bastard d'Orleans & aucuns autres : ausquels chacun à son tour ledit Duc d'Orleans feit ioyeuse reception, & par especial à son frere. Et delà s'en vindrent à saint Omer par eaüe, & se logerent en l'Abbaye de saint Bertin, où les appareils auoient esté faits moult solempnels pour receuoir ledit Duc d'Orleans, & avec luy y vindrent les Anglois. Si fut là receu moult honnorablement dudit Duc de Bourgongne, & des seigneurs de son hostel : & luy furent faits de par la ville grans presens, & chacun iour venoient gens des marches de France comme des païs de Picardie pour le veoir. Et entre les autres plus ceux de ses païs que d'autres lieux, & estoient moult ioyeux de son retour. Et apres aucuns iours ensuiuans fut iceluy Duc d'Orleans requis de la partie du Duc de Bourgongne, qui luy pleust iurer la paix d'Arras & prendre en mariage la damoiselle de Cleues niepce audit Duc de Bourgongne, ainsi comme il auoit esté traicté : lequel Duc d'Orleans feit responce que tout ce qu'il auoit dit & accordé luy estant prisonnier, il vouloit entretenir. Et adonc ces besongnes ainsi conclutes se meirent les Ducs & leurs gens dedans le cueur de l'Eglise dudit saint Bertin : auquel lieu fut apporté ledit traicté par escript en Latin & en François : & là fut leu hault & entendiblement, premier en Latin, & puis en François par maistre Jacques Trançon Archediacre de Bruxelles en Brabant, present les deux Ducs dessusdits, les Archeuesques & Euesques là assistens avec grand nombre de cheualiers & escuyers gens d'Eglise, Bourgeois & autres officiers des deux parties. En là fin duquel le Duc d'Orleans promet & iura sur le liure & representation de nostre createur, que tenoit en ses mains ledit Archediacre de Reims de bien entretenir iceluy traicté en tous ses points, generalmente sauf que l'article qui parloit de la mort du Duc Iean de Bourgongne, & dit qu'il n'estoit point tenu de luy excuser d'icelle mort : & que par son ame il n'en auoit esté consentant, & si n'en auoit riens sceu : mais en auoit esté tresdesplaisant quand icelle fut venue à sa cognoissance : voyant & considerant que par le moyen de ladicte mort, le royaume de France estoit en plus grand dangier que deuant. Et ce fait fut appelé le Comte de Dunois Bastard d'Orleans, pour faire le serment dessusdit : lequel delaya vn petit : mais incontinent par le commandement dudit Duc d'Orleans, son frere il le feit. Et ce fait & accomply le Duc dessusdit promet à espouser la dessusdicte damoiselle de Cleues, & de fait fiancerent l'un l'autre en la main de l'Archeuesque de Narbonne. Si commencerent leans de toutes parts à mener grand ioye, & faire moult grans festes & esbatemens : & fut enuoyé par les gens dudit Duc en plusieurs & diuers lieux de ses païs, pour auoir provisions à fournir les festes d'icelles nopces. Et avec ce aussi la feste de saint Andrieu qu'il n'auoit de pieça tenue. Et soubstenoit ledit Duc de Bourgongne tous les despens dudit Duc d'Orleans & de ses gens. Et en apres le samedi deuant la saint Andrieu, espousa le dessusdit Duc d'Orleans ladicte damoiselle de Cleues : & le lendemain qui estoit dimenche fut faicte la feste treshonnorable, & estoit grand noblesse à veoir les seigneurs & les dames mener à l'Eglise. Et menoit ledit Duc de Bourgongne sa niepce en la tenant par le senestre bras. Et au droit costé estoit sur le derriere messire Iean bastard de saint Pol, le seigneur de Haultbourdin, qui portoit la manche de ladicte Duchesse d'Orleans. Et vne dame portoit la robe par derriere qui moult estoit riche : & apres vn

petit plus derriere suiuiot le Duc d'Orleans, qui menoit la Duchesse de Bourgongne accompagnée des plus grans seigneurs : comme des Comtes d'Eu, de Neuers, d'Estampes, de saint Pol, de Dunois : & si y auoit tresgrand nombre de grans seigneurs cheualiers & escuyers, dames & damoiselles, qui tous suiuiot ledit Archeuesque de Narbonne, lequel chanta messe pour iceluy iour. Et avec luy estoient tresgrand quantité de gens d'Eglise, qui feirent la procession autour du cueur : & quand aux Roys d'armes, heraulx & poursuiuans, trompettes, menestriers & autres iouans de diuers instrumens de musique, il y en auoit largement. Et estoient lesdits officiers d'armes vestuz de leurs cottes d'armes, où estoient les blasons des seigneurs à qui ils estoient : entre lesquels y estoit le Roy d'armes de la Iartiere d'Angleterre. A tous lesquels hōneurs estoient aussi ledit seigneur de Cornouaille, messire Robert de Roix avec eux plusieurs de leurs gens. Aufquels on faisoit & fait on durant ces besongnes tresgrans honneurs & ioyeuse reception : & par especial ledit Duc de Bourgongne à iceluy seigneur de Cornouaille. Et alloiēt à leur plaisir par toute la ville sans ce qu'on leur baillast empeschement. Et la Messe finée on alla disner : & fut la Duchesse d'Orleans assise en la grand salle ou meillieu de la table, & au droit lez estoit ledit Archeuesque qui auoit celebré la messe, & de l'autre costé au lez fenestre estoit la Duchesse de Bourgongne, si estoient aussi les Comtesses d'Estampes & de Namur. Et aux autres tables estoient assises les autres dames & damoiselles chacune selon son degré & noblesse. Et quand aux deux Ducs les deux seigneurs Anglois, & les Comtes dessus nommez & autre grande cheualerie disnerent l'un avec l'autre, comme en brigade, & furent tant les vns comme les autres seruiz tresabondamment de plusieurs riches & diuers mets. Apres lequel disner ils allerent veoir les ioustes, qui se faisoient sur le marché & là estoient les dames aux fenestres en tresgrand nombre : desquelles ioustes pour iceluy iour emporta le bruit le seigneur de Vaurin. Et de rechef furent faictes autres ioustes apres soupper en la grand salle de saint Bertin tout hault, sur petis cheuaux de six heaulmes seullement. Et y eust moult grand foison de lances rompues & les faisoit moult bel veoir. Et le lendemain qui fut le lundy fut faicte moult belle & ioyeuse feste, tant en ioustes comme en autres esbatemens : desquelles ioustes le Comte de saint Pol emporta le pris des dames. Esquels iours furent donnez moult grans dons à tous les officiers d'armes par les Princes dessusdits. Pour lesquels ils crierent à haulte voix & par plusieurs fois largesse, en denommant ceux qui ces biens leur auoient faits. Et le mardy ensuiuant qui fut la nuit de saint Andrieu, le Duc de Bourgongne commença sa feste de la toison d'or : & alla ouyr vespres au cueur de l'Eglise de saint Bertin, accompagné de ses freres de l'ordre vestus & habitez de leurs manteaux, chapperons & habillemens autresfois accoustumez de porter. Auquel cueur estoient mis & attachez par dessus lesdits cheualiers contre leur siege, vn tableau auquel estoient painctes les armes, & en y auoit vne grand partie qui point n'estoient presens. Et en failloit cinq qui estoient morts depuis le temps qu'on auoit octroyé ladicte feste : & le lendemain qui fut le iour saint Andrieu vindrent en l'Eglise en moult noble appareil, où fut fait le seruice tressolemnellement. Et faisoit moult bel-veoir les riches paremens tant de l'autel comme du cueur. Et pour vray les François & Anglois

Anglois là estans, estoient tous esmerueillez de veoir le grand estat & les richesses dudit Duc de Bourgogne. Apres lequel seruice ledit Duc s'assist à table en la grand salle, au milieu desdits cheualiers de l'ordre : lesquels se seioient tous d'un lez & par belle ordonnance en la maniere autresfois accoustumée, & furent seruis tresrichement : & en allant & retournant alloient deux à deux, & les plus anciens derriere : c'est à sçauoir en cheualerie. Le ieudy entrèrent en leur chapitre, où ils furent treslonguement pour eslire les cheualiers qui tiendroient les lieux & les colliers de ceux qui estoient trespassez. Auquel chapitre se consentirent tout d'un commun accord d'en presenter vn au Duc d'Orléans. Et pour sçauoir si ce seroit son plaisir de le receuoir, on enuoya deuers luy l'Euesque de Tournay & maistre Nicolas Roullin Chancelier de Bourgogne : lesquels luy declairerent la voulenté du Duc de Bourgogne & des cheualiers de l'ordre. A quoy il feit responce que volontiers les receueroit pour l'honneur de son beau frere & cousin & le Duc de Bourgogne dessusdit, & briefuement apres vint en la grand salle : auquel lieu vindrent le dessusdit Duc de Bourgogne, & tous les cheualiers dudit ordre qui estoient leans venans de leur chapitre, & les officiers d'armes deuant eux. Et portoit le Roy d'armes de la toison vn mantel & chapperon de ladicte ordre sur son bras, & eux approchans ledit Duc d'Orléans messire Hue de Launay qui de ce estoit chargé, porta la parole, & en adressant à luy dit : mon tresexcellent, trespuissant & tresredoubté seigneur monseigneur le Duc d'Orléans, veez cy en vostre presence mon tresredoubté seigneur monseigneur le Duc de Bourgogne & messeigneurs ses freres de l'ordre de la toison d'or, qui ont aduisé & conclud tous ensemble en leur chapitre que pour la treshaute renommée, vaillance & preud'homme, qui est en vostre tresnoble personne, ils vous presentent vn collier de ladicte ordre : en vous priant tres humblement qu'il vous plaise à receuoir & porter, affin que la tresfraternelle amour qui est entre vous & mon tresredoubté seigneur, se puisse mieux entretenir & perseuerer, lequel Duc respondit qu'il le feroit volontiers. Et adonques ledit Duc de Bourgogne auoit vn desdits colliers tout prest, luy presenta & le meit au col dudit Duc d'Orléans au nom du pere & du fils & du saint esprit & puis le baïsa. Et là presentement le Duc d'Orléans requist aussi au Duc de Bourgogne, qui luy pleust porter son ordre ce qui luy accorda. Et tantost ledit Duc d'Orléans tira de sa manche vn des colliers de son ordre, & le meit autour du col dudit Duc de Bourgogne. Et apres ledit Duc d'Orléans fut là afflubé d'un mantel & chapperon de l'ordre : & puis fut mené au chapitre pour faire les sermens accoustumez en ce cas, & pour ayder à eslire quatre cheualiers qui failloient encor, lesquels ne furent point denommez si hastiuement. Et ne sceut nul adonques fors eux mesmes, à qui ils seroient donnez. Pour lesquelles ordres dessusdictes ainsi baillées & receuës par iceux deux Princes, la plus grand partie des nobles & d'autres gens d'auctorité là estans, furent tres ioyeux de les veoir en si tres grand amour & concorde l'un avecques l'autre. Et certain temps apres ensuiuant retournerent en leurdit chapitre tous ensemble, & là se concorderent de l'enuoyer & presenter au Duc de Bretagne & d'Alençon à chacun d'eux vn des colliers dessusdit : pour lequel messaige faire y fut commis ledit Roy de la Toison, & porta lettres desdits Duc d'Orléans & de Bour-

gongne & des cheualiers de l'ordre. Si feit son messaige bien & à point, & tant qu'iceux seigneurs receurent bien agreablement les deux colliers dessusdits : & luy donnerent pour sa peine aucuns riches dons, desquels il fut content. En outre les besongnes dessusdictes accomplies, & que la feste de saint Andrieu fut passée : le seigneur de Cornoaille se partit de S. Omer, & par Calais s'en retourna en Angleterre à tout ses gens, excepté la compagnie dudit messire Robert de Roix, qui demoura avec le Duc d'Orleans sur intention d'aller avec luy deuers le Roy de France, où il estoit enuoyé en ambassade de par le Roy d'Angleterre : durant lequel temps aucuns notables hommes de la ville de Bruges vindrent au lieu de S. Omer, pource qu'ils desiroient moult que le Duc de Bourgogne leur seigneur, duquel ils n'estoient point encores bié en grace, retournast en leur ville : car nonobstant qu'ils fussent reconciliez avec luy, si auoit il dit que iamaïs n'y entreroit si plus grand seigneur que luy ne luy menoit. Si requirent lesdits Brugelins treshumblemēt audit Duc d'Orleans, que de sa grace il luy pleust faire ceste requeste au Duc de Bourgogne, & qu'il luy pleust le y mener : laquelle requeste il feit & luy fut par ledit Duc accordée. Si se preparerent, & tous ensemble se partirent de S. Omer : & par aucuns iours s'en allerent à Bruges ainsi qu'il auoit esté ordonné, où ils furent receuz tresioyeusement. Et feirent ceux de Bruges de grans appareils pour honnorer & receuoir iceux deux Ducs & les Duchesses leurs femmes, avec toutes leurs gens plus sans comparaison qu'ils n'auoient fait passé long temps par auant : desquels appareils & preparations aucunes choses seront cy declairées en brief.

P R E M I E R E M E N T quand les Brugelins sceurent que lesdits deux Ducs approchoient leur ville, tous ceux de la Loy avecques tous les officiers & seruiteurs issirent dehors. Et pareillement les Doyens & Connestables en nombre competent, selon ce qui leur auoit esté ordonné. Et pouoient bien estre sur tout quatorze cens, qui allerent au dehors de ladicte ville de Bruges & hors les mettes d'icelle, & iusques à vn hostel nommé les trois Roys. Et là se meirent en vne grand place attendant la venue de leur seigneur : lesquels le voyant venir & approcher d'eux au costé du Duc d'Orleans, se meirent trestous en ordonnance à nuds pieds sans chapperons & tous desceints. Et en eux approchans se meirent tous à genoux les mains ioinctes : & present toute la seigneurie, qui y estoit en tresgrand nombre & les Duchesses d'Orleans & de Bourgogne, luy supplierēt treshumblement qu'il leur vouldist pardonner leurs offences du temps passé, selon la teneur de la paix. Lequel Duc delaya vn petit : mais incontinct par la priere dudit Duc d'Orleans, leur oëtroya leur requeste. Et ce fait ceux de ladicte loy baillerent audit Duc de Bourgogne toutes les clefs des portes de la ville. Et adonc tous les dessusdits Brugelins se leuerēt, & s'en allerēt chauffer & habiller. Et puis partans de là, vindrent tantost toutes les processions des Eglises de ladicte ville tant des quatre ordres des mendiens, des religieux, des religieuses & beguines, & les parroisses à tout leurs relicques & meilleures chappes. Si estoient en tresgrand nombre, & commencerent tous à chanter. *Te Deum laudamus* à haulte voix & clere, quand ils ouyrent que leur naturel seigneur estoit content d'eux. Si le conuoyerent là plus grand partie iusques à son hostel. Et quand au regard des marchans de toutes nations qui lors se tenoient en ladicte ville de Bruges,

Bruges, ils s'en allerent chacun d'eux en droit soy en moult belle ordonnance, & trefrichement habillez de diuers habillemens tous à cheual au deuant dudit Duc de Bourgogne: d'autre part estoient fais en plusieurs lieux, par où ledit Duc deuoit passer grans eschauffaux: sur lesquels y auoit personages, qui iouoient de moult de manieres de ieux. Aussi estoient les rues à vn costé & à l'autre tendues de riches draps. Et quant aux trompettes d'argent, clérons & autres instrumens de musique, il y en auoit par si grand nombre que tout en retentissoit par ladicte ville. Si y auoit en outre en plusieurs & diuers lieux manieres d'instrumens tant en semblance de personages que autres, qui iettoient vin & autres bruuages & en prenoient tous ceux qui en vouloient & aduenir y pouoient. Finablement il n'est point de memoire, que lesdits Brugelins feissent oncques pour nuls de leurs seigneurs predecesseurs dudit Duc tant de ioyeusetez ne de riches paremens, qu'ils feirent ceste fois, comme dessus est dit. Et quand il fut descendu à son hostel, ceux de là Loy allerent deuers luy pour le bien viengnier. Et apres ce qu'il les eu receuz assez ioyeusement, il leur feit par le souuerain de Flandres rendre les clefs des portes qu'ils luy auoient présentées & baillées au dehors de ladicte ville, disant qu'il auoit bonne fiance en eux, dont ils furent moult ioyeux, & là commencerent tous à crier Noël. Et aussi l'auoient desia crié en plusieurs lieux par la ville à sa venue. Et quand ce vint à la nuit par route la dessusdicte ville, furent fais moult de beaux feux sur haultx eschauffaulx, & tant que tout resplendissoit. Et quand ce vint le lendemain, furent faictes vnes ioustes sur le marché, ausquelles iousterent plusieurs nobles hommes & bourgeois. Si emporta le pris de ceux de dehors le seigneur de Vvaurin, & ceux de dedans la Damoiseau de Cleues: lequel fut seruy de lances par son oncle le Duc de Bourgogne. Apres lesquelles ioustes, & que le souper fut fait: on commença à dancer en grand triumphe, & y furent mandées les damoiselles de ladicte ville de Bruges. Et le mardy ensuiuant furent faictes encores vnes ioustes sur ledit marché. Et soupperent tous lesdits seigneurs, dames & damoiselles en la maison des Escheuins, où ils furent seruiz trefabondamment aux despens de ladicte ville. Et le samedi vindrent de Charrolois le Comte dudit lieu & fils dudit Duc de Bourgogne, & la Comtesse sa femme fille du Roy de France: à l'encontre desquels allerent le Duc d'Orleans & plusieurs nobles hommes, & ceux de la Loy de ladicte ville accompagnez de grand nombre de notables bourgeois. Et furent conuoyez iusques à la court d'iceluy Duc: & le dimanche en perseuerant furent faictes ioustes, dances & plusieurs autres esbatemens, qui trop long seroient à racompter chacun par luy: mais pour vray les Brugelins, feirent es iours dessusdits toutes les ioyeusetez qu'ils pouoient imaginer, tant pour l'amour de leurdit seigneur & Prince comme pour complaire audit Duc d'Orleans, & à ceux qui estoient avec luy: & aussi luy feirēt aucuns presens, desquels il se tint assez content. Et le lundy ensuiuant se departit d'icelle ville de Bruges sa femme la Duchesse & sa compagnie. Auquel departemēt y eut maintes larmes plorées des dames & damoiselles de l'hostel dudit Duc de Bourgogne, au prendre congé à iceluy Duc. Et par especial pour la cause du departemēt d'iceluy Duc d'Orleans, & s'en allerent à Gand: iusques auquel lieu les cōuoya le deuādit Duc de Bourgogne, où ils furēt semblablement receuz honorablemēt:

duquel lieu de Gand peu de iours ensuiuans se departit le dessusdit Duc d'Orleans, la Duchesse sa femme avec luy. Et les conuoya le Duc de Bourgogne iusques au dehors de la ville. Si prindrent congé l'un à l'autre, & s'entre-offrirent de faire dorefnauant ce que possible leur seroit l'un pour l'autre. Et de là s'en alla par aucuns iours en la cité de Tournay, où on luy fait treshonorable & solennelle reception. En outre depuis qu'iceluy Duc fut retourné des païs d'Angleterre à Grauelines, & de là venu à S. Omer & és autres lieux dessus nommez iusques au partemēt de luy & dudit Duc de Bourgogne, vindrent deuers luy des marches de France tāt de seigneurs cōme d'ailleurs plusieurs gens pour le veoir & biē viengner, & luy offrir leur seruice, desquels il en retint partie. Et d'autre part des païs mesmes du dessusdit Duc de Bourgogne, en y eut tresgrād nōbre, qui par diuers moyens feirent tāt qu'ils furēt retenuz à luy & de son hostel, tant gentils hōmes comme damoiselles & autres de diuers estats. Aussi luy furent presentez par plusieurs cheualiers & escuyers bien huict ou dix de leurs enfans pour estre ses pages. Et avec ce luy furent baillez enuiron vingt & quatre compaignons des marches de Boulenois bien empoinctz, montez & habillez pour estre ses archiers & gardes de son corps, lesquels furēt tous retenus de son hostel. Et tant se multiplierent les seruiteurs dessusdits, q̄ quād il vint audit lieu de Tournay, il auoit enuiron bien trois cens cheuaux de sa retenue. Et quand à son ordre elle fut par luy octroyée à porter à grand nombre de cheualiers & escuyers & autres de moyens estats, qui luy en faisoient requerir pour l'auoir: ils en faisoient peu ou neant de reffuz, & fut pour ce temps assez commun és païs de Picardie. Si estoient moult de gens desirans de le seruir & estre à luy, sur intention & esperāce qu'ils auoient principalement que luy venu enuers le Roy, il auroit vn tresgrand gouuernement au Royaume de France: pourquoy par ses moyens ils pourroiet estre moult auancez en diuerses manieres, & luy mesmes l'entendoit ainsi. Toutesfois y auoit aucuns saiges qui doubtoient le contraire & qu'il n'en aduint ainsi qu'il fait. Et bien disoient en leur secret, que plus tost eussent conseillé audit Duc d'aller deuers le Roy plus hastiuemēt, & à plus priuée mesgnie qu'il ne fait. Et d'autre part leur sembloit que ceux qui gouernoient le Roy & auoient gouuerné long temps par auant durant le temps de ses aduersitez, ne souffriroient point tant qu'ils peussent qu'autre qu'eux eust le gouuernement: jaçoit que celuy Duc luy fut plus prochain que tous les autres, & qu'il eut moult fort à souffrir pour la couronne de France. Neantmoins il a esté veu de treslong temps qu'entre si grans seigneuries, a tousiours eu de grans enuies & dissentions, & que les grans seigneurs ont souuent baillé l'un à l'autre des trauers. Et apres ledit Duc d'Orleans partant de Tournay, alla à Vallenciennes & de Vallenciennes au Quesnoy le Comte veoir sa belle cousine la Comtesse Marguerite doüagiere de Hainault, qui le festoya tresioyeusement. Et apres qu'elle luy eut donné aucuns dons s'en vint en la cité de Cambray, où on luy fait plusieurs presens: & entre les autres luy donnerent ceux de la ville cinq cens escus d'or de France: duquel lieu de Cambray il auoit intention d'aller à S. Quentin, mais aucuns de ses gens luy donnerent à entendre qu'il y auoit grād peril pour luy & sa compaignie d'aller ce chemin, pource qu'il failloit passer par aucuns destroits pres des forteresses messire Iean de Luxembourg, qui
encor

encor n'auoit point fait le serment de la paix d'Arras. Et pour ceste cause & afin d'aller plus seurement, manda aucuns gentils-hômes de la marche de Cambresis, & leurs gens pour ayder à conuoyer leurs bagues. Duquel messire Jean de Luxembourg si ledit Duc d'Orleans eut sceu les affaires, il n'en deust point estre en doubte pour deux raisons. La premiere si est qu'il estoit du tout reconseillié auecques ledit Duc de Bourgogne: & mesmement auoit esté à Bruges au temps que ledit Duc d'Orleans y estoit, & auoit eu auecques luy assez grande communication & plusieurs parlemens sur aucuns de leurs affaires, tant de la seigneurie de Coucy comme d'autres besongnes qui leur touchoient. Et auecques ce ledit messire Jean de Luxembourg estoit par bonne amour party de luy de la ville de Bruges, & luy auoit offert de le seruir & luy faire plaisir en tout ce qui luy seroit possible. Parquoy estoit à supposer que iamais n'eust consenty luy porter aucun dommage ou contrarieté. La seconde raison si estoit qu'en tant qu'iceluy Duc d'Orleans estoit à Cambray, le dessusdit messire Jean de Luxembourg gisoit en son hostel de Guise moult aggraué de maladie, de laquelle il alla de vie à trespas. Et furēt apportées les nouuelles de sa mort au dessusdit Duc d'Orleans en la ville de Cambray. Pour lesquelles il demoura deux iours plus qu'il n'auoit intention. Et fait requeste aux gouuerneurs de ladicte ville de Cambray, qu'ils le voulsissent eslire à gardien de leurdicte ville ou lieu dudit de Luxembourg qui par auant l'estoit, & il se feroit confermer de par le Roy de France comme il estoit accoustumé. De laquelle requeste ils s'excuserēt au mieux qu'ils peurent, disans qu'ils ne l'oseroient faire sans le consentement de leur Euesque. En apres ledit Duc s'en alla de Cambray à S. Quentin, & de là à Noyon, à Compiengne, à Senlis & puis à Paris, où il seiourna aucuns iours. Et par tout où il passoit & seiournoit, on luy faisoit aussi grand honneur & reuerence cōme on eut fait à la personne du Roy de France, où à son fils le Dauphin: Et auoient les gens moult grand confidence & esperance que par son retour & desprisonnement, viendroient grand consolation au Royaume de France. Et par especial la plus grand partie du peuple y estoient moult fort affectez, & desiroient long temps par auant à le veoir en sa franchise comme lors le veoient. Si estoit l'intention dudit Duc d'aller deuers le Roy au plus tost que faire se pourroit. Mais il ouyt nouuelles, pour lesquelles il se delaya grande espace de temps, c'est à sçauoir bien vn an ou plus. Et la cause si fut pource que le Roy fut aduertý de toutes les manieres qu'iceluy Duc auoit tenues depuis qu'il estoit retourné du paýs d'Angleterre, & des alliâces & sermens qu'il auoit fait auec le dessusdit Duc de Bourgogne, & aussi de son ordre qu'il auoit prise: & mesmement que desia estoit acompaigné & auoit de son hostel grand nombre de gens des paýs dudit Duc de Bourgogne, qui auoiēt autresfois mené guerre au Roy de France & à ses paýs. Et luy fut dit en outre que ses alliances se faisoient contre luy & ceux qui le gouernoient. Et qu'auecques iceux deux Ducs estoient alliez plusieurs grans seigneurs, comme les Ducs de Bretaigne, d'Allençon & autres: lesquels auoient ja proposé de luy bailler nouuel gouuernement, & que dorefnauant son Royaume seroit gouuerné par eux & autres tels qu'ils y voudroient commettre: & auroit tant seullement honnestement son estat, sans pouoir faire aucune chose qu'il ne fut par le consentement

& cōgé d'iceux seigneurs. Lequel Roy qui tousiours estoit assez enclin de croire conseil, pource que durant son regne on luy auoit fait & machiné par plusieurs fois de grās trauerfes & assez semblables, creut legierement tout ce qu'on luy dit des besongnes dessusdictes estre veritables. Et par especial quand il sceut que lesdits deux Ducs de Bretaigne & d'Alençon auoient receu l'ordre dudit Duc de Bourgongne, il en fut en plus grand doubte que par auant. Et avec ce de iour en iour ceux qui estoient avecques luy, luy disoient & rapportoient que ainsi estoit qu'on le disoit: pour lesquelles nouvelles il estoit tresmal content. Et pource nonobstant qu'il eut ordonné dudit Duc d'Orleans venir deuers luy, en disant à ses gens qu'ils luy auoient apporté les nouvelles de son retour, que moult le desiroit à veoir: neantmoins pour les choses dessusdictes ne fut point content qu'il y allast s'il n'estoit à priuée mesgnie sans y mener aucuns des dessusdits de son seruice: c'est à sçauoir ceux du dessusdit païs du Duc de Bourgogne. Et pourtant ledit Duc d'Orleans sçachant les choses estre en l'estat dessusdit, se tira de Paris à Orleans, & puis à Blois, & sur ses autres seigneuries où il fut encores plus qu'ailleurs tresnotablement receu de tous ses vassaulx & subiects: & luy furent faits plusieurs & notables dons & riches presens en l'esdictes seigneuries.

O R conuient retourner à parler vn peu de messire Jean de Luxembourg Comte de Ligny: lequel (comme dit est) par auant trespassa dedans le chastel de Guyse. Si fut son corps emporté sur vn chariot accompagné de ses gens treshonorablement en l'Eglise nostre Dame de Câbray, où il fut mis sur deux estaulx dedans le cueur. Et la premiere nuit on dit vigilles & commandasses, & fut veillé iusques au lendemain, qu'on dit la messe des morts moult solennellement. Et y auoit tresgrand nōbre de torches allumées autour dudit corps, que tenoient ses gens. Et icelle messe finée fut mis en terre au dehors dudit Cueur, assez pres d'vn de ses predecesseurs nommé messire Vvalleran de Luxembourg seigneur de Ligny & de Beaurevoir: & comme en autre lieu est plus à plain declairé. Ledit messire Jean de Luxembourg alla de vie à trespas sans auoir fait deuers le Roy de France ne autres ses deputez le serment de la paix d'Arras, jaçoit-ce qu'à ce faire eust esté plusieurs fois incité. Et depuis l'an trente cinq qu'icelle paix auoit esté confermée, iusques enuiron la nuit des Roys mille quatre cens & quarante qu'il trespassa (comme dit est) auoit entre tenu ses villes, fortresses & païs sans ce que nulles des trois parties: c'est à sçauoir de France, d'Angleterre & de Bourgongne y eussent fait aucunes entreprises, sinon assez peu. Car quant ausdits Anglois ils estoient tous desirans de luy complaire & faire plaisir, pource qu'il n'estoit point encores deslié d'eux & n'auoit rendu son serment: & auoient moult grand fiance d'auoir son ayde & assistance, si besoing leur en eut esté, & pareillement il se tenoit tout seur d'auoir ayde cōtre tous ceux qui l'eussent voulu nuire ou greuer. Et au regard des Bourgongnōs peu en y auoit qui ne feussent enclins de luy faire plaisir en tous ses affaires. Et nonobstant que le Duc de Bourgongne fut par vn temps aucunement indigné contre luy, par les rapports qu'on luy faisoit souuent: neantmoins la besongne ne sortit point à effect si auant, que pour venir à l'eure de fait: ains estoit du tout retourné en la bonne grace & bien vueillance dudit Duc
Philippe

Philippe de Bourgongne . Et d'autre part les dessusdits François & par especial les capitaines qui menoient & entretenoient les gens de guerre le doubtoient fort, pource qu'ils le sentoient moult vaillant de sa personne & que tousiours il estoit pourueu de gens de guerre pour resister contre eux, fils luy faisoient aucun dōmage . Et sçauoient bien que sil les trouuoit sur aucunes de ses seigneuries à son aduantage, il les feroit destruire sans en auoir aucune misericorde . Et pour ces raisons quand ils approchoient desdictes seigneuries, ils estoient tous ioyeux de bailler leurs sceelz, promettant de non luy faire aucun domage ne quelque grief ou desplaisir à luy ne aux siens. Et ainsi le feirent plusieurs fois, & aussi il estoit content de les laisser paisibles sur icelles conditions . Toutesfois peu de temps deuant sa mort le Roy Charles de France auoit cōclud avecques son conseil, de non luy plus bailler aucuns iours de respit : & avec ce estoit du tout deliberé de venir à grand puissance contre luy, pour le subiuguer & mettre en son obeissance, ou au moins le contraindre de luy faire le serment d'Arras dessusdit . Mais Dieu le createur de toutes choses y pourueut auant qu'on peut sçauoir à quelle fin icelles besongnes pourroient venir . Ainsi & par ceste maniere fina sa vie le dessusdit messire Jean de Luxembourg, qui de sa mesme personne auoit esté trescheualeureux & moult doubté en tous lieux, où on auoit de luy cognoissance . Et pouoit bien auoir enuiron cinquante ans d'aage . Et assez brief temps apres son trespas, vn nōmé Leurin de Moucy à qui il auoit baillé le chastel de Coucy en garde le rendit és mains du dessusdit Duc d'Orleans, moyennāt certaine grand somme d'argent qu'il en receut. Et ne fut point content de mettre és mains du Comte de saint Pol nepueu & successeur dudit messire Jean de Luxembourg . Et aussi ceux de Neelle & de Beaulieu en Vermandois debouterent Lionnel de Vandonne, qui estoit leur gouuerneur, & tous les autres qui estoient en icelles places de par le dessusdit messire Jean de Luxembourg, & meirent dedans les gens de monseigneur de Mongaignier . Et toutes les autres villes, citez, chasteaux & forteresses furent mises & deliurées en l'obeissance dudit Comte de S. Pol, par ceux qui les tenoient & en auoient eu le gouuernement.

Comment le Roy de France alla à Troyes en Champaigne . Et comment plusieurs villes & forteresses se meirent en son obeissance, & autres matieres.

DVrant le temps dessusdit Charles Roy de France feit moult grand assemblée de gens de guerre de plusieurs de ses païs . Et avecques ce remanda les capitaines des compagnies, dont dessus est faicte mention, qu'ils veinssent deuers luy à tout leurs gens . Et quand tout fut assemblé deuers la riuere de Loire, il se partit de Bourges en Berry son fils le Daulphin en sa compagnie, le Cōestable de France, messire Charles d'Anjou, & autres grans seigneurs en tresgrand nōbre. A tout lesquels il se tira à Troyes en Champaigne, & là seiourna enuiron trois sepmaines: & estoient ses gens logez par les villes sur le plat païs, dont cestuy païs estoit moult fort trauaillé: & si en y auoit grand partie és parties d'Auxerre & de Tōnerre, & sur les marches de Bourgongne. Auquel temps plusieurs villes & fortesses se meirent en son obeissance, lesquelles par auāt luy auoient fait forte guerre à ses païs, & aussi ap-

païsa la guerre des Barrois & Lorrains, & du Côte de Vaudemôt. Et si se pacifia avec luy, le Damoiseau de Cōmercis & plusieurs autres seigneurs des marches de Bourgongne, qui par auāt estoïēt en son indignatiō. Et ces besongnes faïctes & accōplies s'en vint ledit Roy en la ville de Bar sur-Aube, auquel lieu vint deuers luy le Bastard de Bourbon, qui auoit soubs luy à son cōmandemēt vne tref grosse cōpaignie de gens d'armes, qu'il auoit long tēps entretenu sur les chāps : mais quand il fut venu audit lieu de Bar, il fut accusé d'aucuns crimes deuers le Roy. Et apres que sur iceux eut esté diligēment examiné, & son proces fait, fut condāpné à estre rué & iecté dedās vn sac à la riuiera tāt qu'il fut noyé, & tant q̄ mort fut accōplie : & ainsi fut fait. Et depuis qu'il fut mort fut tiré dehors de ladicte riuiera & mis en terre saincte. Si fut lors assez commun qu'on luy auoit ce fait, pource q̄ durant la guerre d'entre le Roy & son fils le Daulphin, y estoit à grand puïssances avecques sondit frere le dessusdit Duc de Bourbon : & auoit esté cause principalement de desloger iceluy Daulphin du Roy son pere. Et d'autre part au retour du voyage de Harfleur où il auoit esté avecques le Comte d'Eu (comme dit est ailleurs) il s'estoit tiré à sainct Omer deuers le Duc de Bourgongne : auquel il auoit promis de le servir si aucuns affaires luy suruenoient, en la faueur du dessusdit Duc de Bourbon beau frere au Duc de Bourgongne dessusdit. Pour laquelle execution ainsi faïcte sur iceluy Bastard de Bourbon aucuns des autres capitaines, qui par long temps auoient tenu les champs soubs vmbre des armées du Roy, furent en tresgrand doubte, & cremeur que pareillement ils ne feussent punis de leurs anciennes mauuaises euures.

Comment les Anglois qui se tenoient au chastel de Folleuille, faisoient moult de maulx en Amiennois & és païs d'environ : & desconfirent aucuns seigneurs Picards, & leurs gens qui les assaillirent.



Tem en iceluy temps les Anglois qui se tenoient au chastel de Folleuille feirent moult de maulx au païs d'Amiennois, de Corbie, & de Santhois : & aussi à la ville de Montdidier & és autres lieux à l'environ : & estoient environ cent compaignons de guerre, qui feirent moult de grans maulx : & tellement contraignirent iceux païs, que la plus grād partie des villes estoient toutes appactizées à eux & rançonnées à certaine somme d'argent, & de fromens pour chacun mois, dont le pauvre peuple estoit moult fort oppressé & trauaillé. Et mesmement allerent vn iour courre la ville de Dours sur la riuiera de Somme. Si estoit dedans la forteresse d'icelle ville le seigneur d'icelle, lequel pource qu'il n'estoit point assez puïssant pour resister à l'encontre desdits Anglois, monta hastiuement à cheual, & s'en alla en la ville d'Amiens pour auoir ayde & secours. Si trouua le seigneur de Saueuses capitaine de ladicte ville d'Amiens & plusieurs autres gentils-hommes & autres gens de guerre : lesquels avec aucuns du commun se meirent à voye tant de cheual comme de pied, & poursuiuirent iceux Anglois, lesquels ils trouuerent assez pres dudit lieu de Folleuille, où ils se retrahirent en moult belle ordonnance, menans avec eux grand foison de bagaiges qu'ils auoient conquis. Si fut ordonné que le seigneur de Saueuses conduiroit ceux de pied. Et le seigneur de Dours dessus

dessus nommé, le seigneur de Contay, le seigneur de Tilloye, Guichart de Siennes, & aucuns autres gentils-hommes meneroient ceux de cheual: lesquels approcherent & escrierent iceux Anglois pour les combattre tous ensemble de cheual & de pied, laquelle ordonnance ne fut point bien tenue: car les dessusdits de cheual qui estoient moult desirans d'assembler avecques leurs aduersaires, ferirent dedans sans attendre iceux de pied, dont il leur mesaduint tresgrandement: car les dessusdits Anglois qui veirent leurs aduersaires eux approcher, & qui estoient en plus grand nombre, les deux parts se meirent en bonne ordonnance, leurs cheuaux derriere eux, affin qu'on ne les peut enuahir par derriere: & se deffendoient tresvaillamment, & tant que grand partie de leurs aduersaires & ennemis y furent morts: entre lesquels le furēt le seigneur de Dours, Guichart de Siennes, Jean de Beaulieu & aucuns autres nobles gentils-hommes. Et des prisonniers fut le principal messire Martel d'Antoch seigneur de Tilloye, & les autres passerent outre par force de bons cheuaux qu'ils auoient: desquels les aucuns furent moult fort naurez & blessez, & les autres eurent leurs cheuaux effondrez. Et ledit seigneur de Saueuses voyāt la besongne estre ainsi mal tournée, entretint au mieux qu'il peut ceux de pied: lesquels il auoit en son gouuernement: & avecques ceux de cheual qui estoient eschappez de la besongne dessusdicte, les reconduit audit lieu d'Amiens moult triste & desplaisant de ceste malle aduventure: & depuis par traicté fait avec iceux Anglois, furent les morts apportez tous desnuez pour enterrer chacun en leurs lieux. Si furent aucuns des amis & prochains de ceux qui y auoient esté morts, qui en voulurent donner aucune charge audit seigneur de Saueuses, disans qu'il ne s'estoit point aduancé comme il deust pour ayder & secourir les gens quand besoing leur en estoit. A quoy selon son pouoir s'en excusoit, disant que bonnement ne se pouoit plus fort hastier. Pource qu'il auoit en son gouuernement (comme dit est cy dessus) les gens de pied: lesquels luy auoient esté baillez à conduire par le consentemēt de tous les nobles là estans presens.

Comment les gens du Comte de S. Pol destrousserent aucuns des seruiteurs du Roy de France, qui ramenoient des habillemens de guerre tant de la cité de Tournay comme d'ailleurs: & l'amende que ledit Comte de S. Pol en feit.



Tem entre-temps que le Roy de France estoit à tout son armée au pays de Champaigne, comme vous auez ouy dessus, il auoit ordonné aucuns de ses plus feaulx seruiteurs pour aller en sa ville de Tournay, & és marches de Flandres pour achepter certain nombre d'artillerie & autres habillemens de guerre, pour mener en sa ville de Paris, affin de luy ayder quand il en auroit besoing. Lesquels, c'est à sçauoir ceux qui y estoient commis, en feirent tresbonne diligence, & tant que des besongnes dessusdictes chargerent plusieurs chars & chariots, & les conduirent seurement parmy les pays du Duc de Bourgogne depuis la cité de Tournay sans trouuer aucun qui leur baillast ou feit empeschement, iusques à tant qu'ils vindrēt en vne ville nommée Ripemont, où ils furent récontrez des gens du Comte de saint Pol, qui estoient en garnison en icelle ville. Entre lesquels estoient Jean seigneur de Thorante, Guyot de Bethune, Hoste de Neufuille & plusieurs autres tant hommes

d'armes comme archiers : lesquels destrousserent du tout lesdictes gens & seruiteurs du Roy. Et prindrent & emmenerent lesdits harnois & artilleries à tout les chariots & autres habillemens, & les bouterent en ladicte ville de Rippemont: auquel lieu ils en butinerent & dissipèrent grand partie : toutesfois ce ne fut point du sceu & consentement ne ordonnance dudit Comte de saint Pol : ains en fut trescourroucé & desplaisant: laquelle destrousse venue à la cognoissance du Roy, en fut tresindigné & mal content: & iura qu'il seroit amendé, & qu'il feroit guerre à iceluy Comte de saint Pol, fil n'en faisoit du tout restitution & deliurance, & fil ne luy faisoit hommage & feauté des terres & seigneuries qu'il tenoit de luy en son Royaume. Et lors luy estant en la ville de Bar-sur-Aube (comme dit est dessus) venoiét de iour en iour gens de guerre deuers luy pour le seruir: & quand il eut illec seiourné vne espace, il s'en vint par Chaalons & Reims en la cité de Laon. Et par tout où il venoit estoit receu par les bonnes villes à luy obeïssantes treshonorablement, ainsi & par la maniere qu'il est accoustumé de faire à son Roy & souuerain seigneur. Duquel lieu de Laon & de la marche à l'enuiron se departirent grand partie de ses capitaines à tout leurs gens d'armes: c'est à sçauoir la Hire, Anthoine de Chabannes, Ioachin Rohault & aucuns autres pour venir & approcher les villes & forteresses que tenoient les gens dudit Comte de saint Pol, & pour eux faire guerre: lequel Comte de S. Pol, qui estoit assez aduerty d'icelle venue, les auoit fait garnir de ses gens du mieux qu'il auoit peu: & se tenoit de sa personne à Guyse en Tierace pour ayder & subuenir à ceux qui en auoient besoing & necessité. Mais il aduint que ceux de ladicte garnison & les dessus nōmez qui se tenoient à Rippemont de par ledit Comte de S. Pol, comme dit est, quand ils ouyrent & sceurent que le Roy & sa puissance les approchoit de si pres, eurent si grand doubte & si grand paour qu'auant que les François veinssent, se departirent soudainemēt : & en grand desroy sans attendre l'un l'autre, & abandonnerent la ville & chasteau dudit Rippemont, en les laissant ou gouuernemēt du cōmun peuple. Lesquels demourerent moult desolez pour la departie des dessusdits, & se retrahirent vers leur maistre & seigneur ledit Comte de S. Pol audit lieu de Guyse, & en autres villes & forteresses appartenans audit Comte, qui d'eux fut tresmal content: & par especial de ceux qui en auoient eu le gouuernement, & ausquels il en auoit baillé la charge. Et ce mesme iour ou le lendemain vindrent deuant ladicte ville de Rippemont les François, ausquels au nom du Roy Charles fut baillé plaine obeïssance, & les meit on dedans ladicte ville: dedans laquelle ils trouuerent des biens treslargement, & en partie en prindrent à leur plaisir. Et entre les autres y entra comme chief ledit Ioachin Rohault. Et brief iours ensuiuans la plus grand partie de l'armée du Roy se tirerent deuant la ville de Marle, & l'enuironnerent & l'assiègerent à grand puissance. Dedans laquelle ville estoit de par le Comte de saint Pol vn gentil-homme assez expert & diligent en fait de guerre, nommé Georges de Croix, qui auoit avecques luy enuiron soixante combattans avecques ceux de la ville. Si fut suffisamment sommé de par le Roy de rendre la ville. Mais il feit responces toutes les fois qu'il en fut requis, que sans le sceu & consentement de son seigneur & maistre le Comte de S. Pol point ne la rendroit. Pour lequel reffus, les dessusdits assiegeans mande-

rent

rent en grand diligence les gros engins & artilleries du Roy : & de fait les feirent assieoir & affuster en tresgrand nombre deuant les portes & murailles de la dessusdicte ville. Si commencerent à iecter & adommager ladicte muraille en aucuns lieux : & estoit leur intention & volenté de l'assaillir brief ensuiuant. Mais entre-temps que les besongnes dessusdictes se faisoient, ledit Comte de S. Pol considerant qu'au long aller ce luy estoit chose impossible, de tenir sedittes places contre le Roy & sa puissance : attendu que desia estoit assez aduertty, que point n'auroit secours dudit Duc de Bourgogne, se commença auement à dissimuler : car avec ce les principaux qui estoient avec luy, luy conseillerent qu'il trouuast ses moyens d'auoir traicté & de demourer paisible luy & ses seigneuries. Lesquels moyens tant par la Comtesse sa mere doüagiere, qui par auant auoit esté deuers le Roy & encores estoit à Laon comme par autres ses bons amis, se commencerent à traicter & ouurir. Et finablement ledit Comte de saint Pol alla à Laon deuers le Roy, duquel & du Daulphin il fut receu assez courtoisement, & aussi des autres seigneurs qui là estoient. Et certains brieftours ensuiuant impetra & obtint enuers ledit Roy, que ceux qui estoient deuant ladicte ville de Marle & ses gens, qui estoient dedans ne feissent point de guerre l'un à l'autre, iusques à certain iour : pendant lequel temps on traicteroit du surplus. Lesquels traictes finalement apres que sur ce le Roy & son grand conseil eut tenu plusieurs iournées, & que le dessusdit Comte de S. Pol eut esté ouÿ sur ce qu'il vouloit dire & requerre : fut ordonné qu'iceluy Comte de S. Pol demourroit en la bonne grace du Roy, moyennant qu'il luy feroit hōmaige & serment de fidelité des terres & seigneuries qu'il tenoit en son Royaume, tant de par luy comme de par la Comtesse de Marle & de Soissons sa femme : ainsi & par la maniere que luy auoient fait & faisoient iournellement ses autres vassaulx. Et avec ce qu'il feroit mettre ladicte ville de Marle en l'obeissance du Roy & ses commis, & en vuyder ceux qui dedans estoient. Et outre-plus luy bailleroit certaines lettres signées & seellées de son seel, cōtenās certains points declairez en icelle, dont la coppie sera cy apres mise & escrite. Apres lesquels traictes faits & accordez par icelles parties, on enuoya tantost de par le Roy audit lieu de Marle certains commis pour prendre l'obeissance de la ville comme dit est. Lesquels cōmis porterent vn saufconduit du Roy au dessusdit Georges de Croix, pour luy & pour ses gens, à tout lequel il se partit & alla à la Ferté sur Oyse par l'ordonnance dudit Comte de S. Pol. Et tost apres entrèrent iceux commis dedans la dessusdicte ville de Marle, & feirent ce qui leur estoit commandé & ordonné de par le Roy, en prenant ladicte obeissance selon le dessusdit traicté : mais brief ensuiuant ladicte ville fut remise & rendue par le consentement du Roy & par son octroy en la main dudit Comte comme deuant auoit esté. Et adonc se deslogerent de là toutes gens de guerre, & se tirerent plus auant es marches de Vermandois, de Hainault & de Cambresis : & par tout où ils alloient faisoient de grans oppressions au pauvre peuple. Le Comte de S. Pol depuis qu'il eut sondit traicté, commença à estre tresbien en la grace du Roy & de tous les autres grans seigneurs, & par especial du Daulphin. Et luy promirent de le seruir dorenavant en toutes ses besongnes & affaires contre les Anglois si luy plaisoit le mander, & fut en ladicte ville de Laon bone espace de temps.

Et auant son departement bailla ses lettres, dont dessus est faicte mention contenant la forme maniere qui cy apres s'ensuit.

L O Y s de Luxembourg Comte de S. Pol & de Ligney, de Conuersan, de Braine & de Guise, seigneur d'Angien, & de Beaurevoir, & Chastellain de l'Isle. A tous ceux qui ces presentes lettres verrôt & orront salut: Sçauoir faisons que i'ay promis & par ces presentes promets par foy & serment de mon corps & sous l'obligation de tous mes biens faire, & faire faire plaine & entiere obeissance au Roy nostre sire & à ses officiers tant en iustice comme aux faits & cōseruations des droits royaux de ses finances, aydes, greniers, tailles, haults, passaiages: & autres touchans son domaine, & autrement de faire cesser gardes & apactis mises sus, en ce qui est de ma puissance depuis vingt ans en ça. Et avec ce promets restituer au Roy & par tant où il appartiendra ce qu'il reste, & restituer de l'artillerie du Roy & marchandises prinſes par ceux de Rippemont, & ce qui reste de cheuaux & chariots du Roy prins par ceux de Marle. Et avec ce ay promis & promets de respondre en la Court de Parlement à tout ce que le Roy ou son procureur voudra maintenir, requerre ou demander touchant la succession de feu monseigneur le Comte de Ligney mon oncle à qui Dieu pardoint, tant au regard des heritages comme des biens meubles que tenoit & possedoit mōdit feu oncle au iour de son trespas, pourtant que toucher m'en peut & pour les Comtez de Ligney, & de Guyse, cōme pour autres terres & seigneuries venues à mondit feu oncle. Et de tenir, obeir & accomplir en tant qu'à moy est tout ce que par ladicte Court me sera sur ce dit iugé & pronōcé. Pourquoy i'ay prins & accepté iour, & me suis tenu & tiens pour adiourné en ladicte Court de Parlement, pour respōdre au procureur du Roy au quinzième iour de Iuliet prochain venant, pour y proceder ainsi qu'il appartiendra. Et generallyment promets faire enuers le Roy mon souverain seigneur, tout ce que bon & loyal subiect doit, & est tenu de faire enuers son Roy naturel & souverain seigneur. Ne ne souffriray ne tiendray en nulles de mes places gēs pour faire guerre, mal, ne dommage sur le païs, & subiects du Roy. Et avec ce promets rendre & deliurer toutes les terres d'autrui que i'ay en ma main à cause de la guerre, & au regard de Montagu faire mon plain pouoir d'icelle rēdre. Toutes lesquelles choses ie promets de tenir de point en point, ainsi que dessus est dit sans enfreindre. En tesmoing de ce i'ay signé ces presentes de ma main, & seellées du seel de mes armes le xx. iour d'Auril l'an mille quatre cens xlj.

Comment la Duchesse de Bourgogne vint à Laon deuers le Roy, pour faire aucunes requestes & autres matieres.

AV mois dessusdit la Duchesse de Bourgogne femme au Duc Philippe & fille au Roy de Portugal, alla deuers le Roy Charles en la cité de Laon treshonorablement accompagnée de chevaliers & escuyers comme de gens de cōseil, & aussi de dames & de damoiselles. Et pource qu'elle n'estoit point bien haitée, se faisoit porter sur vne liçtiere. Si vint au deuant d'elle bien vne lieüe le Cōnestable, qui auoit espousé la sœur dudit Duc de Bourgogne, comme dit est ailleurs: lequel Connestable la mena & cōduict iusques en ladicte ville, & aussi deuers le Roy qui la receut assez courtoisement

toisement, & aussi fait son fils le Dauphin & autres plusieurs nobles & grâs seigneurs. Apres laquelle reception elle se retrahit en l'abbaye de S. Martin, où elle fut logée. Et depuis fut par plusieurs fois deuers le Roy pour luy faire aucunes requestes, dont elle estoit chargée de par ledit Duc de Bourgogne son seigneur & mary, tât sur la paix generale d'entre les Royaumes de Frâce & d'Angleterre, comme pour le fait du Duc d'Orleans. Et avec ce pour la fortesse de Montagu appartenant au seigneur de Commercý, que tenoit encores Villemet de Hainault, & autres des gés de feu messire Jean de Luxébourg. Et se vantoient ceux qui la tenoient de la non rendre à ceux qui desia les auoient requis de par le Roy, sans le congé & licence du Duc de Bourgogne. Pour lequel reffuz y estoient allez grand cōpaignie des gés du Roy, sur intention d'y mettre le siege. Si fut aucunement atargé de luy mettre, sur esperance qu'on trouueroit aucun bon traicté deuât le partement d'icelle Duchesse: laquelle fait en outre plusieurs requestes au Roy: mais peu luy furent accordées: neantmoins elle fit ses Pasques audit lieu de Laon & y tint tresnoble & bel estat. Si fut assez visitée des grâs seigneurs & plusieurs autres notables gens de l'hostel d'iceluy Roy. Et pareillement alla deuers le Roy à Laon Jean de Bethune, Cōtesse de Ligney & Vicomtesse de Meaulx: lequel Roy fut cōtent de sa venue, & la receut tresaggreablement & ioyeusement: & releua icelle Comtesse du Roy toutes les seigneuries qu'elle tenoit de luy. Et auécques ce fit certain traicté avec ses commis pour & en tant que toucher luy peut des biens meubles, que son dit feu mary luy auoit laissez: lesquels on disoit estre confisquez, pource qu'il estoit allé de vie à trespas estant aduersaire du Roy, & en paya certaine somme d'argēt. Et par ainsi au regard de ce demoura paisible, & en obtint lettres royaux. Et icelle seiournant alors en ladicte ville de Laon, fut instamment requise de prendre à mary le Comte d'Eu, mais elle s'en excusa aucunement. Et brief iours apres ensuiuans quand elle eut fait & accomply ce qu'elle peut, elle s'en retourna au chasteau de Beurevoir, & de là à Cambray: durant lequel temps venoient de iour en iour plusieurs gens deuers le Roy pour luy faire hommage & le seruir: lesquels il retenoit & leur promettoit à eux faire du bien largement, car il auoit volenté de faire l'Esté ensuiuant vne tresgrosse armée à l'encontre des Anglois ses anciens aduersaires. Item en cest an fut accusé deuers le Duc d'Orleans vn sien escuyer de l'escuyerie nommé Dunot, de l'auoir voulu empoisonner à la requeste & instance (comme on disoit) d'aucuns grans seigneurs de l'hostel du Roy de France: si fut pour ceste cause tresdurement gehainé, questionné & examiné, & apres noyé par nuiët en l'eaüe de Loyre: mais du surplus fut peu de nouuelle que la besongne vint à clarté contre ceux qui estoient suspicionnez. Durant aussi le tēps dessusdit, se s'aduancerent environ huit vingts saquemens de l'hostel du Roy Charles, & allerent au païs de Hainault en vne ville nōmée Haussy: en laquelle auoit bel chastel. Et se logerent là, & s'y tindrent deux ou trois iours. Si composerent plusieurs villes & villages tant de Hainault comme de Cambresis à grand finance: durāt lequel temps messire Jean de Croÿ Baillif de Hainault assembla aucune puissance de gens d'armes au Quesnoy le Côte, & s'en vint pour les destrousser: mais vne partie se retrahirent audit chastel, lesquels furent tantost assailliz: auquel assaut fut mort vn moult notable gentil-homme assez an-

cien nommé Lordenois d'Osterne. Et depuis fut fait traicté dudit Baillif avec iceux par tel si, qu'ils se departiroient en delaisant ce qu'ils auoient prins: & avec ce luy donnerent vne somme d'argent, afin qu'il les laissast partir. Et en y auoit eu plusieurs morts & destrouffez, qui auoient esté trouuez en ladicte ville de Haussy. Si se partirent tous ensemble pour eux tirer vers la ville de Laon: mais ils furent rencontrez des gens du Comte de S. Pol vers le pont au Nouuion, & du tout destrouffez: & la plus grand partie y demourerent morts en la place.

De l'an mille cccc. xli.

Comment la Duchesse de Bourgongne se partit du Roy Charles estât à Laon, & retourna au Quesnoy, où alors estoit ledit Duc de Bourgongne son mary.



V cōmencement de cest an Charles Roy de Frāce estant à Laon, où il auoit solennisé le iour de la resurrectiō nostre Seigneur en l'hostel episcopal de l'Euesque d'icelle cité de Laon, tenans plusieurs grans cōseils sur les requestes que luy auoit faictes la Duchesses de Bourgongne & ceux de son conseil. En la fin desquels conseils finalement, comme i'ay declairé, luy en furent pou accordées dont elle ne fut point bien cōtente. Et aperceut assez clerement, & aussi feirent ceux qui y estoient avecques elle que les gouuerneurs d'iceluy Roy n'auoient mie agreable le Duc de Bourgongne ne ses besongnes. Et pourtant elle voyant que sa demeure illecques ne luy estoit mie grādement proffitabile, print congé au dessusdit Roy, & le remercia de l'honneur & bonne reception qui luy auoit esté faicte: & apres luy dit. Monseigneur de toutes les requestes que ie vous ay faictes ne m'en auez nulles octroyées ne accordées, jacoit-ce selon mō aduis qu'elles feussent assez raisonnables. A quoy le Roy luy respondit assez courtoisement, en disant: Belle sœur ce poise nous qu'autrement ne se peut faire: car selon ce que nous trouuons en nostre conseil, à qui en auons parlé bien au long, icelles requestes nous seroient moult preiudiciables à accorder. Apres lesquelles parolles elle print congé (comme dit est) au Roy & à son fils le Daulpin. Puis se partit de là, & s'en vint au giste à S. Quentin avec elle toutes ses gens. Et là reconduit le Connestable & aucuns autres grand espace: duquel lieu de saint Quentin elle s'en vint le lendemain disner au chastel de Cambresis, & à ceste heure estoient allez aucunes gens dudit Roy fourrager ou païs de Hainault & és marches à l'environ, & emmenoiēt moult grosses proyes: c'est à sçauoir cheuaux, vaches & autres biens & bestail. Si y furent tost & roidement plusieurs des gens de ladicte Duchesse: Lesquels en occirent trois ou quatre en la place, & les autres se sauuerent par force de bien fuir, reserué deux qui furent ratains & prins, & menez au Quesnoy le Comte, où ils eurent les hastereaux coupez. Auquel lieu du Quesnoy alla au giste icelle Duchesse de Bourgongne où estoit le Duc son mary, à qui elle racōpta tout ce qu'elle auoit trouué enuers le Roy de France & ceux qui le gouuernoient: & pour vray la plus grand partie des nobles qui auoient esté avec elle en iceluy voyage, n'estoient point si François à leur retour qu'ils estoient quand ils allerent deuers le Roy, pour aucunes parolles qu'ils auoient ouïes & veües en iceux de ce party: pour lesquels rapports le dessusdit Duc de Bourgongne se pensa de luy

luy mesmes, & s'en deuïsa avecques aucuns de son plus priué conseil, que grand besoing luy estoit de luy ses païs tenir seurs & bien garnis de gens: considerans qu'à peu d'occasion on seroit tost enclin de luy faire grief ou dommage. Neâtmoins si auoit il tousiours de vaillans, discrets, prudens & saiges hommes, qui moult desiroient & contendoient de les tenir en paix & bonne vnion. Et par especial de la partie du Roy si employèrent l'Archeuesque de Reims grand Chancelier de Frâce. Et jaçoit-ce que la dessusdicte Duchesse de Bourgongne se fut departie de deuers le Roy, comme vous auez ouï cy deuât: Si y auoit il de iour en iour aucuns hommes de bien allans & venans de partie à autre, pour entretenir & concorder ce qui seroit à faire entre eux.

Comment la forteresse de Montagu appartenant au Damoiseau de Commercy, fut abbatue & desolée par le commandement du Duc de Bourgongne.

EN outre messire Robert de Salebrusse seigneur de Commercy poursuioit tresfort le Roy & ceux de son cōseil, pour r'auoir sa forteresse de Montaigu: lequel seigneur de Commercy n'estoit point en la grace du Duc de Bourgongne, mais l'auoit en tresgrand indignation & haine pour plusieurs iniures qu'il auoit faictes en ses païs, & aussi ses gens & subiects. Et pourtant ne voulut cōsentir pour nulle riens qu'icelle forteresse luy fut rendue, ains vouloit qu'elle fut demolie & abbatue. Et pareillement le desiroient plusieurs bonnes villes comme Reims, Laon, saint Quentin, & autres, pource que de tres long temps, gens s'estoient accoustumez d'eux y tenir: lesquels moult fort auoiēt trauaillé & oppressé par leurs courses & pillages ceux desdictes villes, & du plat païs à l'enuiron. Et finablement la conclusion fut telle que ceux qui estoient dedans, baillerent seurté de le rendre au Roy à l'entrée du mois de Iuing prochain ensuiuant en tel estat qu'il plairoit audit Duc de Bourgongne: c'est à sçauoir entiere ou desolée, & de ce fut le Roy content. Pendant lequel iour ledit Duc de Bourgongne fait mettre ouuriers en euure en grand nombre pour icelle forteresse abbatre & demolir, & ainsi en fut fait: mais durât le temps dessusdit iceluy Damoiseau de Cōmercy cuida trouuer aucuns moyēs secrettement de la r'auoir en sa main pour argent d'aucuns de cez qui l'auoiēt en garde. Lesquels furēt de ce accusez, & pour ceste cause prins: & en y eut quatre qui eurent les hastereaux coupez, desquels en estoit l'un le Preuost de la ville dudit Montagu. Ainsi & par icelle iniure fut desolée icelle forteresse. Laquelle estoit située & assise hault sur vne montaigne en moult fort lieu, à l'occasion de laquelle le païs auoit eu à souffrir comme dit est cy dessus.

Comment le Roy de France alla mettre le siege deuant la ville de Creil laquelle il conquist.

Tem apres que le Roy de France eut seiourné par l'espace d'un mois ou enuiron dedans la cité de Laon, il se partit de là & par Soissons & Noyon s'en alla à Compiengne, où il seiourna par aucuns iours en attendant son armée, qui se preparoit pour aller deuât la ville de Creil. Et nonobstāt que Guillaume de Flauy capitaine d'icelle ville de Cōpiengne eut son pardō & remissiō du Roy pour la mort du seigneur de Rieux Mareschal de

France, qui estoit mort en ses prisons : toutesfois n'alla il point deuers le Roy, mais par auant sa venue pour la doubte des amis dudit Mareschal s'en alla avecques ledit seigneur d'Offemont, pour estre plus seur de sa personne. Et lors venoient gens de plusieurs parties du royaume de France deuers le Roy, qui par auant auoient esté mandez. Et peu de iours ensuiuans le Roy se partit de ladicte ville de Compiengne, & s'en alla à Senlis où il seiourna vn petit de temps : & puis se mit à chemin avec son exercite pour aller vers la ville de Creil, que tenoient les Anglois. Si se logea assez pres d'icelle ville au costé deuers Paris, & le Connestable & autres capitaines se logerent à l'autre costé deuant le pont : deuant laquelle ville de premiere venue furent faictes escarmouches. Et tost apres furent assis les gros engins du Roy contre les portes & murailles, dont tresfort les adommagerent : & tant que les assiegez commencerent à auoir doubte d'estre prins d'assault : parquoy au bout de douze iours ou enuiron apres ledit siege mis, requierent de traicter avecques iceluy Roy ou ses commis : si leur fut octroyé. Et en la fin d'iceluy traicté furent contens de rendre ladicte ville & le chastel, avec tous les biens par tel si qu'ils pouoient tant seulement emporter leurs robbes & ce qu'ils auoient d'argent. Et ce fait s'en allerent soubs bon saufconduit tout à pied par la porte du Pont, en tirant vers la ville de Beauuais : & y estoit en chef d'iceux Anglois messire Guillaume Chamberlan. Apres lequel departement des dessusdits Anglois le Roy entra dedans le Chastel. Et les autres seigneurs & capitaines se logerent en plusieurs lieux deuant la ville, à laquelle garnison il commeit Yuon du Puys.

Comment le Roy de France alla assieger la ville & forteresse de Ponthoise : laquelle en fin il conquist d'assault.



Après que le Roy de France eut seiourné aucun peu de iours en la ville de Creil, il tira vers la ville de Ponthoise à tout son armée, & y vint enuiron la my May : si se logea à l'abbaye de Maubuisson, où il ya vne notable Eglise de Dames & de moult beaux edifices. Et avec luy se logerent tous ceux de son hostel avec aucuns autres, & le Connestable & les Mareschaux de France : c'est à sçauoir les seigneurs de Soloingnes & de Lohiac, & plusieurs autres capitaines se logerent en aucuns autres diuers lieux. Et brief ensuiuant furent assis & affustez les grans engins deuant vn boulleuert, qui estoit au bout du pont au costé de deuers ledit lieu de Maubuisson : lequel fut tantost si adommagé qu'il se rendit, & fut prins d'assault. Si y furent morts quatorze ou seize des gens du Roy, & plusieurs blecez, & pareillement furent aucuns Anglois : lequel Boulleuert le Roy feit fortifier, & ordonna pour la garde d'iceluy messire Denys de Chailly & Michault Durât à tout leurs gens. Et d'autre part l'en feit faire vn pont par dessus la riuere d'Oise contre l'abbaye de saint Martin, lequel fut clos de petite muraille & fut fortifié tout à l'environ tant de fossez comme de petits boulleuers, ainsi qu'il est accoustumé de fortifier bastilles. Et là se logea messire Charles d'Anjou, le seigneur de Cotuiy Admiral de France, avecques luy trois ou quatre mille combattans. Et si fut fait à l'entrée du pont au dehors de ladicte riuere d'Oise vne assez forte bastille, pour la garde d'iceluy Pont. Par le moyen desquelles fortifications pouoient
passer

passer seurement à leur aise, sans le danger des Anglois leurs aduersaires, auquel costé qu'il leur plaisoit de ladicte riuere. Et entre-temps que les approches dessusdictes se faisoient, vindrent deuers le Roy grand nōbre de gens tant seigneurs & nobles hommes, comme ceux des bonnēs villes qui par auant auoient esté mandez. Entre lesquels y vindrent de ceux de la cité de Tournay iusques au nombre de six vingts combattans, ou au dessus en tresbon conuenant, gens d'escoute & tresbien habillez, dont en la plus grand partie estoient arbalestriers. Et les conduisoient trois notables hommes d'icelle cité: dont le premier estoit nommé Symon de saint Genois, l'autre Robert le Boucher, & le tiers Iean de Courcelle: si furent receuz du Roy tresioyeusement. Et aussi y vindrent ceux de la cité de Paris en moult grand quantité & en tresbel estat, & avec ce d'autres bonnes villes. Et sicomme ils venoient, ils estoient receuz & logez par les gens du Roy comme il appartenoit. En oultre Loys de Luxembourg Comte de saint Pol & de Ligney, qui par auant auoit fait son amas de gens d'armes en ses seigneuries, y arriua enuiron huiet iours apres la saint Iean à tout six cens combattans ou enuiron tresbien en point, & faisoit moult chault. Si meit ses gens en bataille assez pres du logis du Roy: lequel avecques aucuns de ses Princes & capitaines les alla veoir bien à loisir, & toutes ses gens. Et fut moult ioyeux de sa venue. Si le festoya & mercia moult grandement de ce qu'il estoit venu seruir à si belle compagnie. Avec lequel Comte de saint Pol estoient le seigneur de Veruins, messire Collard de Mailly, Loys d'Angien, messire Ferry de Mailly, Iean d'Angiers, messire Dauiod de Poix, Iacotin de Bethune & ses freres, Georges de Croix & plusieurs autres gentils-hommes: si furent ce iour vne grand partie moult trauaillez de la chaleur dessusdictes: & tant qu'à cause d'icelle mourut vn gentil-homme nommé Robert de Frisomen. Et quand le Roy les eut veuz (comme dit est) s'en allerent loger en vn village au plus pres de là, & brief ensuiuant se logerent avec les autres audit siege. Et aussi vint le Comte de Vaudemont, accompagné de cent ou six vingts combattans: de laquelle venue le Roy fut trescontent & ioyeux. Et pour vray à ceste assemblée furent moult de grans seigneurs au seruice du dessusdit Roy de France: c'est à sçauoir son fils le Daulphin, le Comte de Richemont Connestable de France, & les deux Marechaux dessus nommez & l'Admiral, messire Charles d'Anjou, les Comtes d'Eu, de la Marche, de saint Pol, de Vaudemont, d'Albreth, de Tancarville, de Ioyn-gny, le Vidame de Chartres, le seigneur de Chastillon, le seigneur de Moreul en Brie, le seigneur de Bueil, la Hire, Pothō de sainte Treille, le seigneur de Hem, messire Heincelin de la Tour, le seigneur de Mouy, Claude d'Angest, Regnault de Lōgueual, le seigneur de Moyencourt, le seigneur de la Suze, messire Theolde de Valperche, Anthoine de Chabannes, Charles de Flauy, messire Gilles de saint Symon, Hue de Mailly, Oliuier de Cotiuy, le seigneur de Pennesach, Blanchefort, Floquet, Broufach, Ioachin Rohault, Pierre Regnault, le seigneur de Grauille, messire Iean de Gaponde, Geoffroy la Hire, le bastart de Harecourt & moult d'autres nobles gens de grand auctorité: & tant que selon l'estimation de ceux en ce cognoissans, le Roy pouoit bien auoir en tout de dix à douze mille combattans & fleur de gens de guerre: lesquels chacun en droit soy estoient moult desirans de conquerre la ville de Ponthoise: durant lequel temps

le Duc d'Yorth, le seigneur de Thalebot & aucuns autres chefs de la partie des Anglois, qui se tenoient à Roüen, commencerent à aduiser & à imaginer comment ils pourroient mieux secourir leurs gens, qui estoient dedans icelle ville de Ponthoise. Et en fin cōclurent que pour la premiere fois le seigneur de Thalebot la iroit raitailler, pour aduiser la maniere & conduicte des François. Si se meit sus ledit Thalebot à tout quatre mille combatans ou enuiron, tant de pied comme de cheval à tout chars, charettes & bestial. Et alla par aucuns iours tant qu'il vint loger iusques à vne ville nommée Cheurin, assez pres dudit lieu de Ponthoise, & là geut deux nuitcs. Et entre-temps bouta des viures dedans ladicte ville sans auoir aucun empeschement: car le Roy & ceux de son conseil estoient deliberez de non combattre iceux Anglois, sinon qu'ils les trouuassent grandement à leur auantage. Apres lequel raitaillement, messire Iean de Thalebot s'en retourna à Mante, & se logerent ses gens en vn village au dehors de la ville: & de là s'en retournerent en Normandie. Et entretemps les engins du Roy de France, qui estoient assis contre ladicte ville de Ponthoise, tant en la grande bastille de saint Martin, comme ailleurs iettoient continuellement cōtre les tours & murailles d'icelle, & les derompoient en plusieurs lieux: mais les dessusdits assiegez les refaisoient de nuit & de iour de queuhes & de bois au mieux qu'ils pouoient. Et avecques ce faisoient aucunes fois des saillies contre lesdits François: ausquelles tant d'une part comme d'autre en y auoit tressouuēt de morts ou de naurez. Durant lequel temps le Roy & ceux de sa partie encloyrent icelle ville par siege tout à l'enuiron: mais bonnement ne pouoyent encores veoir, que ce se peust faire sans trop grand peril, par ce que lesdits sieges ne pouoyent aller ou secours l'un à l'autre, se besoing en eust esté. Et se sentoient, que les Anglois dessusdits estoient bien puissans, & assez prests pour venir brief ensuiuant eux combattre pour leuer le siege. Et pour ces causes delayerent lesdits François de enuironner icelle ville. Et fut ordonné qu'on feroit encore vne grande bastille en la forest de Compiengne pour amener par eaüe, & icelle assieoir sur aucun des costez, où on verroit qu'il seroit plus expedient. A laquelle pour la faire expedier fut commis Guillaume de Flauy. Et certain temps apres ledit messire Iean de Thalebot retourna pour la seconde fois, & raitailla de rechef ladicte ville & lesdits assiegez de foison de viures & d'aucuns engins & habillemens de guerre. Et à chacune fois y laissoit vne partie de ses gens, & ramenoit avecques ceux qui estoient naurez ou malades: & comme par auant apres le dessusdit raitaillement, s'en retourna sans auoir aucun empeschement ou destourbier. Toutesfois le Roy voyant les manieres que tenoient lesdits aduersaires, ayant consideration que celuy siege pourroit estre long par le moyen des viures qu'on amenoit en ladicte ville de Ponthoise de iour en iour, en estoit moult melencolieux & desplaisant. Neantmoins il de sa personne faisoit trefgrand diligence tant de faire fortifier ses bastilles, comme de les pourueoir de viures & autres besongnes necessaires pour eux deffendre, se ainsi aduenoit que on les assaillist.

Comment le Duc d'Yorth souuerain gouuerneur de Normandie pour le Roy d'Angleterre, vint vers la ville de Ponthoise pour cuider leuer le siege du Roy de France.

Ou



V temps dessusdit le Duc d'Yorch qui estoit chef pour la guerre, & Lieutenant general pour le Roy Henry d'Angleterre quant es marches de France, & de Normandie : auoit assemblez de six à sept mille combattans, entre lesquels estoient les seigneurs d'Escalles, & de Thalebot, messire Richard Dondeuille, qui auoit espousé la Duchesse de Bethfort seur à Loys de Luxembourg Comte de saint Pol, & aucuns autres capitaines de Rouën, dont plus auant ne me suis informé des noms. Et auoient avecques eux tresgrand nombre de chars, charrettes & cheuaux chargez de viures & artilleries, & si y auoit tresgrand nombre de bestail. Si se meirent en chemin en moult belle ordonnance entour la my Juillet. Et de Rouën par aucunes iournées vindrent deuers Ponthoise ledit Duc d'Yorch & ses gens: & faisoit l'auantgarde à tout trois mille combattans messire Iean de Thalebot. Si se logea ledit Duc à Ceury à demie lieüe pres de ladicte ville de Ponthoise: & l'auantgarde se logea en vne ville nommée Hetonuille: auquel logis y furent par trois iours, & rautailerent ladicte ville tresabondamment de plusieurs manieres de viures. Et adoncques feirent sçauoir au Roy qu'ils estoient venus pour le combattre & toute sa puissance, si se vouloit mettre aux champs contre eux. Mais le Roy n'eust point conseil de ce faire, ains luy fut dit & remonstré comme autresfois par ceux de son grand conseil, qu'il seroit trop mal conseillé d'aduãturer sa personne, & toute son armée contre gens de si petit estat. Au regard de luy disant oultre que autresfois luy auoit trop cher cousté en aucunes batailles, qui auoient esté faictes contre eux par ses gens durant son regne: & que mieux valloit de leur laisser faire leur enuahie pour ceste fois, & garder les passages de la riuere: car bonnement ne pourroient lesdits Anglois faire long seiour à si grand gent, pource qu'ils n'auoient viures sinon à grand danger, & fut ceste conclusion tenue. Si furent plusieurs capitaines enuoyez par ordonnance avecques leurs gens au bout de la riuere d'Oize, depuis Ponthoise iusques à Beaumont & encores oultre. Et le Roy & ceux des bastilles demourerent en leurs logis. Et adoncques les Anglois voyans que point ne seroient combattus, prindrent conseil & conclurent l'un avecques l'autre de passer la riuere d'Oyze s'ils pouoient, pour aller en l'Isle de France, & mesmement au logis du Roy. Si se deslogerent dont ils estoient logez au quatriesme iour, & tous ensemble s'en allerent loger à Chanville-hault-Vengier. Et pource qu'ils estoient assez aduertiz & informez qu'on gardoit les passages contre eux, veirent bien qu'ils ne pouoient mieux faire ne acheuer leur entreprinse que par nuict. Et auoient de petis basteaux de cuir & de bois, cordes & autres habillemens tous propices à faire pons, qu'ils auoient chargez sur chariots. Si ordonnerent que la greigneur partie de leurs gens feroient semblant de vouloir passer par force d'assault au port de Beaumont, en y faisant vn tresgrand cry & haulte noyse, affin que toutes gens de leurs aduerses parties l'aissent leurs gardes pour y venir: & les autres à tout leurs habillemens iroient tout coyement espier sur la riuere, quand ils verroient qu'il seroit heure de besongner. Laquelle chose ils trouuerent selon leur intention, c'est à sçauoir adresserent contre l'abbaye de Beaumont où lors n'y auoit point de gueet: car desia toutes gens de guerre estoient allez deuers ledit lieu de Beaumont, où le dessusdit bruit & cry estoit encommencé, sicomme entre eux An-

glois auoient proposé & diuisé. Et faisoient grand semblant de vouloir illec passer la riuere ce qui estoit mal possible, pourtant qu'on leur voulsist deffendre. Et adoncques les dessusdits Anglois bouterent vn bastel en l'eau, & passerent bien doubtablement oultre trois ou quatre pour la premiere fois: lesquels attacherent vne forte corde d'un bort à l'autre à tout petits poinçons, qu'ils auoient lyé par le meillieu: par le moyen de laquelle ils passerent tantost de quarante à cinquante, lesquels se fortifierent de pieux aguisez aux deux bouts, ainsi qu'ils ont accoustumé & estably de faire. Or considerez le grand peril où les premiers passans se mettoient, pour vray fil y eust eu tant seulement dix combattans de la partie des François, ils eussent bien gardé ledit passage contre ledit Duc d'Yorth. Si est moult bel exemple pour ceux, qui ont telle besongne à conduire d'y commettre gens qui soient seurs, & doubtent à perdre leur hōneur, pour ce que par mauuaise diligence aduient souuent de grandes mes-aduentures. Et tost apres aucuns des gens de Floquet qui auoiēt la charge de ce costé en retournant deuers Beaumont, où ils estoient allez au cry dessusdit apperceurent lesdits Anglois qui passoient. Si y allerent tantost, & crierent à l'arme tout du long de ladicte riuere iusques audit lieu de Beaumont où estoient grand partie des capitaines, qui monterent tantost à cheual. Et allerent les aucuns audit passage sur intention de les rebouter, mais ce fut peine perdue: car ils estoient en tres-grand nombre pour y resister: jaçoit ce qu'il y eust escarmouche entre icelles deux parties. A laquelle escarmouche fut mort vn tresuaillant homme, nommé Guillaume du Chastel nepueu de messire Taneguy: & avec luy furent morts deux ou trois autres. Et auoient fait lesdits Anglois vn pont de cordes, par lequel ils passerent tout leur charroy & autres bagues & habillemens de guerre. Et lors les François voyans qu'ils ne pouoient mettre remede, se tirerent hastiement grand partie vers Ponthoise, & noncerent au Roy de France ces nouvelles: lequel en fut moult grandement desplaisant. Et apperceut bien aucunement qu'il estoit en grand peril de receuoir grand honte, dommage & destourbier. Si feit sans delay porter grand nombre de son artillerie dedans la grand bastille de saint Martin, & se prepara diligemment de desloger de là & toute son armée se besoing luy en eust esté. Et lors iceux Anglois quand ils furent passez tout à leur ayse, coucherent la premiere nuit au pont dudit passage, & feirent ce iour aucuns nouveaux cheualiers. Entre lesquels le furent faits les deux freres du Comte d'Estaffort, dont l'un se disoit Comte d'Eu. Et le lendemain se deslogerent assez matin & cheuaucherent en moult belle ordonnance en tirant vers Ponthoise, & se logerent en deux villages. Et adoncques eut le Roy conseil de laisser son logis de Maubuisson: & s'en alla à Poissy, & avecques luy tous ceux de son ost reserué ceux de la bastille saint Martin. En laquelle demourerent de deux à trois mille combattans ou enuiron: desquels estoit souuerain capitaine le seigneur de Cotiuy Admiral de France. Et avecques luy la Hire, Ioachin Rohault, Iean d'Estouteuille & Robinet son frere, messire Robert de Bethune seigneur de Moreul en Brie, le Seigneur de Chastillon, le seigneur de Moyencourt, Regnault de Longueual, le seigneur de la Roche-Guyon, le seigneur de Moÿ en Beauuoisis & moult d'autres nobles & grans seigneurs & vailans hommes de guerre: & aussi y demourerent ceux de la cité de Tournay dont

dont dessus est faicte mention . Et y auoit on retraict des viures de l'ost en tres-grand abondance, & au partement d'iceluy Roy leur fut promis de les secourir & ayder en tout ce qui leur seroit possible . Et quand au boulleuert du bout du pont que tenoient lesdits François, ils le delaisserent & abandonnerent. Et en apres le dessusdit Duc d'Yorth se tira vers Maubuisson dont le Roy de France s'estoit party. Et y trouua. encores des viures & moult d'autres biens, que les marchans n'auoient peu emmener, & là se logea. Et thallebot s'en alla logger vne lieüe plus auant en vne ville sur la riuere entre Ponthoise & Conflans, lesquels logis ils tindrent trois iours. Et alloient en la ville par leur pont que ceux de dedans auoient reedifié, avecques leur boulleuert tout à leur bon plaisir . Et pareillement ceux de dedans issoient quand bon leur sembloit, sans auoir empeschement ou destourbier de leursdits aduersaires . Si esperoient ceux de ladicte Bastille estre assailliz chacun iour, & estoient en volenté d'eux tresbien deffendre: de laquelle chose au regard d'assault, ils n'auoient garde: car iceux Anglois n'eussent iamais bouté leurs gens en ce danger, attendu les affaires qui leur suruenoient dont ils ne pouoient encores veoir la fin . Mais nonobstant ce leur disoient qu'ils les assauldroient, & qu'ils se departissent à tout vne partie de leurs bagues, & qu'ils feroient en gens de grand sens: attendu & veu que le Roy les auoit abandonnez & laissez en ce danger: mais ils n'en auoient volenté . Ains respondirent qu'ils n'en feroient riens, & que point ne les doubtoient. Entre lesquelles parolles furent faictes aucunes escarmouches entre eux & plus de traict que par aucune maniere . Et au quatriesme iour ledit Duc d'Yorth se deslogea dudit lieu de Maubuisson, & alla au logis de Thallebot qui auoit fait faire vn boulleuert de cordes, clayes & autres besongnes, par lequel ils r'appasserent l'eau d'Oize, & pouoient bien auoir cinquante chars que charrettes. Et ce propre iour Pothon de sainte Treille s'estoit party de Poissy à tout grand quantité de gens de guerre, pour mener viures à la deuantdicte bastille . Et allerent apres luy le Connestable de France, le Comte de saint Pol, & aucuns autres capitaines pour le secourir, s'il en eust eu besoing: mais ils furent aduertiz du rapassage desdits Anglois, parquoy ils enuoyerent deuers ledit Pothon dire qu'il se hastast de retourner. Et il leur remanda qu'ils s'en allassent passer par Meulan, par où ils s'en retourneroient audit lieu de Poissy par l'autre costé de la riuere: laquelle chose ils feirēt, & apres que le Duc d'Yorth & ses Anglois furent r'appassez, comme dit est, s'en allerent mettre en bataille deuant Poissy, où estoient le Roy & le Daulphin avec grand partie des seigneurs & des capitaines. Et y eut vne moult grande escarmouche: à laquelle furent prins deux des archiers du Connestable de France, & vn archier du Comte de saint Pol. Et de là s'en allerent logger en vne ville nommée Tourtie sur Seine . Et le lendemain retournerent à Mante: & le Roy s'en alla à Poissy & à Conflans à tout vne partie de ses gens. Et ledit Connestable, le Comte de saint Pol & plusieurs autres allerent passer à saint Clou & de là à Paris, où ils furent deux iours & puis retournerent toutes gens de guerre en l'Isle de France, où leur furent deliurées villes pour eux logger chacun selon son estat . Et depuis le Roy à tout les seigneurs qui estoient entour luy, allerent à saint Denys en France, où ils furent iusques à la my Aoust. Et delà retourna le Roy encores à Conflans, où il feit faire vn pont pour

passer vne isle sur la riuere de Seine . Avec ce fait faire vn autre pont pour passer la dessusdicte riuere tout oultre : au bout duquel il fait vn boulleuert & grans fossez entour, dedans lequel se logerent grand nombre de gens de guerre: durant lequel temps Thalebote vint piller la ville & l'abbaye de Poissy, & les biens des Dames, & puis s'en retourna à Mante. Et brief ensuiuant fut la ville de Ponthoise r'aitaillée pour la quatriesme fois : & y demourerent les gens du Duc d'Yorth au lieu de ceux qui y estoient de par ledit Thalebote, dont le Roy fut moult trauaillé, voyant qu'il estoit petit apparant que son entreprinse veinist à bonne fin. Et conclusion il pensa en luy mesmes, que s'il se departoit de là sans auoir l'obedience d'icelle ville de Ponthoise, qui tant luy auoit cousté, & deuant laquelle il auoit ja esté si longue espace de temps, celuy seroit vn tresgrand debourement & deshonneur de s'en partir sans la subiuguer & crieroit le peuple contre luy & ses gouuerneurs, & par especial les Parisiens qui tant auoient mis du leur. Et avec ce estoit du tout aduerty comment les Princes de son royaume, & mesmement de son sang n'estoient point bien contens de son gouuernement: & luy auoit esté dit qu'ils se deuoient assembler ensemble, & que ce n'estoit point pour son bien, & par ainsi n'estoit point merueille s'il auoit bien à penser. Neantmoins il se disposa & conclud avec les plus feables de son conseil, de retourner & loger audit lieu de Maubuisson & de poursuyuir sadicte entreprinse, & y reuint au bout de douze iours apres qu'il en fut party. Si fait reloger ses gēs en plusieurs lieux ainsi comme ils estoient parauant son partement. Et vn autre iour se leua vne moult grande escarmouche au Connestable entre Maubuisson & ladicte ville, à laquelle fut mort Claude de Hangest seigneur d'Ardillieres du traict d'un canon . Et d'autre part durant le temps dessusdit, furent faictes plusieurs cheuauchées & escarmouches entre les François & les Anglois : lesquelles à racompter chacun à par luy seroient trop longues & ennuyeuses, dont à l'une fut blecé Charles d'Anjou d'une fiesche . Et au regard des grosses besognes & rencontres, s'en feirent peu qui facent à escrire . En apres le Comte de saint Pol qui auoit ses gens, lesquels estoient moult trauaillés & auoient despendu largement du leur, & moult desiroient de retourner en leur païs : luy prierent qu'il les voulsist ramener, print congé du Roy & de monseigneur le Daulphin, & s'en retourna deuers son païs : lesquels luy donnerent de beaux dons en le remerciant des bons seruices qu'il leur auoit faits. Si se partit de là, & puis emmena ses gens pour passer la riuere d'Oize au Pont-sainte-Maxence. A l'entrée duquel Pont le capitaine d'icelle issit hors pour parler au Comte de saint Pol. Si s'esmeurent entre eux parolles rigoureuses: & tant, qu'iceluy Comte de saint Pol cuida faire prendre ledit capitaine : mais il faillit vistement dedans son fort. Et incontinent fait tirer de canons & d'arbalestres sur ledit Comte de saint Pol & ses gens : desquels coups de canon fut tué le cheual messire Ferry de Mailly, & vn autre homme d'armes eut le bras rompu. Pour lequel debat ledit Comte & ses gens se retrahirent arriere de là, & s'en allerent passer à Compiengne, & delà se tira ledit Comte en son païs . Et ceux dudit Pont allerent apres aucuns de ses gens, qui estoient passez & allerent vers Montdidier. Si les battirent & destroufferent. Et en ces mesmes iours se partit pareillement le Comte de Vaudemont à tout ses gens, & aussi feirent autres grans seigneurs:

&

& laisserent le Roy en l'estat que vous auez ouy, dont il n'estoit gueres ioyeux quelque semblant qu'il monstrest: mais il ne pouuoit adonc auoir autre, & luy conuenoit attendre toutes les aduentures qui plaisoit à Dieu luy enuoyer. Si faisoit de iour en iour tresdiligemment continuer de faire ietter ses gros engins contre les tours & murailles de la ville, & avec ce contre l'Eglise de nostre Dame estant au dehors d'icelle ville: laquelle les Anglois tenoient & auoient tenu tousiours passé long temps. Lesquels murs de ladicte Eglise furent moult demoliz & abatus, & tant que le seiziesme iour de Septembre ensuiuant le Roy eut conseil de faire assaillir icelle Eglise, & fut par vn samedi. Si fut assez tost prinse d'assault & ceux de dedans morts & prins: laquelle Eglise estoit moult haulte & assez pres de ladicte ville. Parquoy on pouoit de là veoir grand partie du gouuernement desdits Anglois & avec ce les en pouoient moult traualier de petits canons & couleurines, & aussi d'arbalestres & autres habillemens de guerre. Par le moyen de laquelle prinse de ladicte Eglise, fut de rechef conclud le mardy ensuiuant qu'on liureroit plusieurs assaulx à icelle ville, pour veoir & essayer se on la pourroit bien conquerre. Et comme il auoit esté conclud fut fait: car le mardy dessusdit le Roy & tous les autres seigneurs & capitaines firent armer & habiller leurs gens, & les enhorterent tous eux criàs à haulte voix saint Denys, ville gagnée. Si se trouuerent tantost dedans en tresgrand nombre, qui tresuaillement enuahirent les deffendans, lesquels commencerent à tourner le doz & fuyr pour eux retraire par les Eglises & autres fors lieux. Toutesfoi y eut tantost & plus prestement plus de cinq cens Anglois mis à l'espée, & le surplus furent prisonniers qui pouoient estre selon iuste estimation le nombre de quatre cens ou environ. Et entre les autres de ceux qui y furent morts, le fut vn cheualier Anglois nommé messire Nicolle Bourdet, & si fut prins le capitaine de ladicte ville. Et de la partie du Roy y furent morts tant à assaillir la ville & au prendre comme ceux qui moururent apres par bleceures, quarante ou environ. Si furent aussi faits plusieurs nouueaulx cheualiers, entre lesquels le furent Iean & Robinet d'Estouteuille freres, Regnault de Longueual, le Bon Reuly & plusieurs autres. Et quant au regard de celuy qui monta premier sur la tour du Frice, il fut moult auctorisé de tous les seigneurs pour sa grand vaillance. Si le ennoblit le Roy & ses successeurs, & avec ce luy donna aucuns riches dons pour soy entretenir luy & son estat. Si entra ledit Roy en ladicte ville avec ceux de son assault. Et assez tost apres que ses gens l'eurent gagnée, fait deffendre incontinent qu'on ne fait nulle force aux habitans d'icelle ville qui festoient retraits esdictes Eglises, sinon à ceux qui estoient armez. Et luy venu, sa baniere au plus pres de luy deuant la grand Eglise vn Anglois saillit hors d'icelle, qui se rendit à luy. Si le receut à mercy depuis & le deliura sans payer aucune finance, & luy donna aucuns beaulx dons. Et tantost entra dedans icelle Eglise, & fait son oraison moult deuotement & humblement deuant le grand autel, en regrant Dieu son createur de la belle & bonne fortune qu'il luy auoit enuoyée. En apres tout le iour & la nuict ensuiuant iceux François cherchoient les Anglois, lesquels festoient muez en plusieurs lieux & diuers. Et ainsi qu'ils les trouuoient les mettoient à l'espée, ou les prenoient prisonniers. Ainsi & par ceste maniere reconquist Charles Roy de France septiesme de ce

nom : la dessusdicte ville de Ponthoise par force d'assault à son tres grand honneur:deuant laquelle ville il auoit eu plusieurs grans affaires , comme dessus est declairé. Et au regard des nobles tant cheualiers comme escuyers & autres gens de guerre qui furent à iceluy assault , il en y eut tresgrand nombre , qui s'y portoient preud'homméement moult vaillamment . Entre lesquels me fut dit que messire Charles de Bosqueaulx y auoit esté bien veu.

Comment le Duc d'Orleans retourna de France deuers le Duc de Bourgogne.

EN l'an dessusdit Charles Duc d'Orleans retourna du païs de France deuers le Duc de Bourgogne , qui se tenoit pour lors en la ville de Hesdin : lequel Duc de Bourgogne quand il sceut sa venue, alla au deuant de luy & s'entrefeirent grand chere, & tous ensemble s'en alerent audit lieu de Hesdin , où le dessusdit Duc d'Orleans fut par l'espace de huit iours, & y solemnisa la feste de Toussaincts. Pendant lequel temps tindrent l'un avec l'autre plusieurs grans & estroits conseils sur leurs affaires & besongnes : & conclurent d'eux assembler assez brief ensuiuant en ladicte ville de Neuers , avecques plusieurs autres grans Princes & seigneurs du royaume de France. Lesquels iours passez ledit Duc d'Orleãs se departit d'illec, & par saint Pol s'en alla en la ville d'Arras, où il fut moult haultement & honnorablement receu & festoyé de tous les estats de ladicte ville , & luy furent donnez aucuns beaulx & riches dons. Et puis partant de là , s'en alla à Paris, & de Paris à Blois. Apres lequel temps le Duc de Bourgogne fait assembler certain nombre de gens de guerre, lesquels il conduysit & mena au païs de Bourgogne. Au deuât duquel Duc vindrent de deuers Troyes en Champagne grãd partie des nobles dudit païs de Bourgogne pour le accompagner. Si r'enuoya les Picards qu'il auoit là amenez & leur fait deffendre moult destroictemēt qu'ils ne seiournassent ne messeissent riens au païs ne aux subiects du Roy de France . Si fut en ce voyage pour la secōde fois abatue la forteresse du seigneur de Commercy, c'est à sçauoir la forteresse de Montagu, laquelle ledit seigneur auoit fait reedifier.

S'ensuit la coppie des instrumens enuoyée au Roy Charles de France par les seigneurs, qui s'estoient assemblez à Neuers: & les responcez faictes à icelles par ceux de son grand conseil & les requestes faictes par les dessusdits.

PRemierement reciterent quatre articles autresfois proposez par les ambassadeurs du Roy, par luy enuoyez à Neuers deuers lesdits seigneurs, avec les responcez seruans à vn chacun article.

ITEM remonstrerent au Roy la necessité de la paix generale du royaume de France, & en ensuiuant ce que par luy auoit esté accordé : il deuoit (pour euitier charge) faire entretenir la journée de la paix au lieu accoustumé sans soy arrester à la difficulté du lieu , où on ne veoit point d'interest suffisant pour empescher ladicte journée de paix: & aussi que la journée de Tartas & celle de ladicte paix se peussent bien estre entretenues.

Responce faicte par le Roy ausdits articles.

Quant



Vant est au premier point il ne s'y fault point arrester : car il n'a point esté recité de responcez faictes à Neuers par les seigneurs à monseigneur le Chancelier de France, à messire Loys de Beaumont, & aucuns autres enuoyez audit lieu de Neuers de par le Roy.

Audit second article touchant les remonstrances de la paix : le Roy a eu & a tousiours bon vouloir d'y entendre & proceder par effect par tous moyens licites & raisonnables, comme il sçait bien, & peut sçauoir que lesdits seigneurs ainsi l'entendent. Et veuz les grans deuoirs qu'il a faits en ceste matiere, il s'en tient estre bien acquitté enuers Dieu & le monde. Car comme il est notoire quand le traicté fut fait d'entre le Roy & monseigneur le Duc de Bourgogne en la ville d'Arras, le Roy feit par l'aduis de monseigneur de Bourgogne, qui desiroit le bien & vnion desdits royaumes, offres bien grandes & plus qu'il ne deuoit aux Anglois, qui pour lors estoient enuoyez par le Roy d'Angleterre, pour traicter la paix desdits deux royaumes: lesquelles offres furent par eux refusées. Et pource & autres choses sembla aux Cardinaux, & autres illec enuoyez pour ladicte matiere par nostre saint Pere le Pape & le saint Concille de Basle. Aussi aux parens & seigneurs de mondit seigneur de Bourgogne qu'auoit assemblez de tous ses païs en bien grand nombre, que veüe la defraison qui estoit en la partie d'Angleterre reffusant telles offres ledit seigneur de Bourgogne, ne se deuoit plus tenir a eux par loyauté : mais tant que pour autres causes s'en pouoit escōduire & faire paix avec le Roy son naturel & souuerain seigneur.

ITEM & depuis, le Roy à la requeste de monseigneur le Duc d'Orleans & le Duc de Bretagne, & du consentement de mondit seigneur de Bourgogne, sans lequel iamais à ladicte paix d'Arras n'a voulu entendre ne proceder à nuls moyens de paix avec lesdits Anglois: jaçoit ce que de leur part aucunes ouuerures leur en ayent esté faictes : mais pour tousiours soy mettre en son deuoir, enuoya deuers mondit seigneur de Bretagne ses ambassadeurs solempnels à tout pouoir suffisant, pour prendre lieu de conuention où les ambassadeurs solempnels de la part du Roy de France & d'Angleterre, peussent aller & mondit seigneur le Duc d'Orleans, qui deuoit estre amené à Chierbourg y peust estre : laquelle chose pour lors ne print aucun effect.

ITEM depuis la requeste de monseigneur d'Orleans & de madame la Duchesse de Bourgogne, le Roy consentit tenir iournée entre Grauelines & Calais, pour le fait de ladicte paix à certain iour. Auquel lieu & temps il enuoya ses ambassadeurs à pouoir suffisant : nonobstant que ledit lieu de Grauelines & Calais estoit bien loingtain, & en l'obeïssance de ses ennemis : mais ce luy feit accorder & consentir la faueur de mondit seigneur le Duc d'Orleans, qui pour celle cause deuoit estre amené au dessusdit lieu de Calais : car le Roy vouloit & desiroit qu'il fut présent ou aupres du lieu, où ladicte cause seroit demenée, pour y auoir son aduis ainsi que bien raison estoit veu la proximité de lignage, à quoy iceluy Duc d'Orleans actient au Roy : & aussi pour paruenir à aucuns moyens de sa deliurance. Et si ne feut pour les causes dessusdictes, le Roy n'eust point accepté le lieu de Grauelines dessusdit. A laquelle conuention fut faicte vne cedula par mondit seigneur d'Orleans & ladicte dame la Duchesse de Bourgogne, contenant plusieurs poincts touchant ladicte paix. Laquelle ce-

dulle fut enuoyée deuers le Roy Charles, où il auoit lors ses trois estats pour la diuersité des opinions : aussi pour la faulte de mondit seigneur le Daulphin, auquel (comme chacun scet) touche plus qu'à nul autre apres le Roy. Et aussi que point n'y estoient les seigneurs & gens des païs de Languedoch, de Vienne & d'autre païs, fut prinse vne autre iournée à Bourges en Berry au mois de Feurier ensuiuant. Auquel iour & lieu le Roy auoit intétion d'estre: mais nōobstāt certaines diuisions qui lors suruindrent ne peurent venir à ladicte iournée.

ITEM & neantmoins en entretenant l'appoinctement de la iournée prinse par mondit seigneur d'Orleans & madiete dame la Duchesse de Bourgongne, enuoya à la iournée entreprinse au premier iour de May solemnelle ambassade avec pouoir suffisant; pour besongner au fait de ladicte paix. Et y furent & demourerent lesdits ambassadeurs par l'espace de sept ou de huit mois sans riens besongner. Et tant seullement fut emprinse vne autre iournée au premier iour de May ensuiuant, l'an mille quatre cens quarante deux. Auquel iour de rechef le Roy enuoya de moult notables ambassadeurs, ayans pouoir suffisant comme dessus. Et n'y fut riens besongné pour la deffaulte des Anglois, qui n'y auoient enuoyé qu'un simple clerc, qui n'estoit point personne suffisante pour traicter de telle & si haulte matiere.

ITEM & lors de rechef fut fort pourparlé par mondit seigneur le Chancelier avec madiete dame la Duchesse de Bourgongne, d'entreprendre vne autre iournée au premier iour de ce present mois de May és marches de Beauuais, de Senlis ou de Chartres : laquelle iournée madiete dame de Bourgongne fait sçauoir au Roy d'Angleterre. Et luy fut fait responce par vnes lettres, lesquelles elles enuoya au Roy de France : & en effect contenoit qu'en autre lieu ne tiendroient ne feroient tenir ladicte conuention, que audit lieu de Grauelines: auquel lieu le Roy n'a deliberé de tenir ladicte iournée. Et mesmement veu que par trois fois le Roy auoit enuoyé en l'obeissance desdits Anglois, ne deuoient iceux Anglois reffuser lieu en l'obeissance du Roy de France, où ils pouoient seurement & conuenablement assembler. Et ce que le Roy consentit tant de fois assembler audit lieu de Grauelines, a esté en faueur de la deliurance de mondit seigneur le Duc d'Orleans.

ITEM & neantmoins le Roy pour tousiours de plus en plus monstrier & donner à cognoistre son bon propos & volenté, en continuant ce que par monseigneur le Chancelier auoit fait sçauoir à madiete dame la Duchesse de Bourgongne, est content de tenir iournée avec lesdits aduersaires les Anglois pour le bien de paix au xxv. iour du mois d'Octobre prochain ensuiuant, és marches cy dessus declairées : c'est à sçauoir entre Ponthoise & Mante, entre Chartres & Vernueil, entre Sablé & le Mans iusques à la place moyēne deuisée & prinse par les ambassadeurs, cōmis d'une part & d'autre. Et ne peut le Roy plustost prendre iournée que audit xxv. iour pour deux causes tresraisonnables. La premiere si est qu'il vouloit estre retourné de la iournée de Tartas au tēps dessusdit, & estre pres du lieu où ladicte conuention se tiendrait accōpagné de messeigneurs de son sang, qui estre y voudroient ou de leurs gēs: aussi de prelates, Barōs & grans seigneurs & autres notables hōmes de son royaume: mesmement ceux de la nation de Normādie, sans lesquels avec les autres dessusdits il n'a intention de

de proceder ne besongner en ladicte cause & matiere de paix, ainsi q̄ raison est, veu qu'ils ont bien acquitté leur loyauté enuers le Roy son pere & luy. Et tant y ont souffert qu'ils ont biē defferuy d'y estre appelez, & d'en auoir l'opiniō d'eux & leur conseil. Et aussi pource que la chose leur touche plus qu'à nuls autres. L'autre cause si est pour les anciēnes alliances qui sont entre les nations d'Espaigne & de Frāce, & de celles d'Escocce: lesquelles iusques à l'heure presente se sont bien entretenues: le Roy enuoyera iceluy temps pendant deuers lesdits Roys d'Espaigne & d'Escocce & les autres alliez, pour eux signifier la cause de ladicte conuention, affin d'auoir leur aduis, conseil & consentement: car par les anciennes alliances qu'ils ont ensemble, ils ne peuuent ne doiuent faire paix finale ou prendre longues trefues ausdits Anglois, sans le consentemēt les vns des autres: car tousiours depuis lesdictes alliāces faictes entre les dessusdits Roys de Frāce, d'Espaigne & d'Escocce & autres, elles ont esté bien gardées & entretenues & de par le Roy, qui à l'heure presente les a cōfirmées ne pour riens ne les voudroit enfreindre n'aller au cōtraire: & bien à cause de ce faire: car il à trouué lesdictes alliances entre eux bōnes & seures & les gens de leur païs. Et ont fait leurs subiects de grans seruices à la maison de Frāce. Et pource que le Roy doit desirer & desire, que les deuoirs en quoy il s'est mis & veult mettre (lesquels cōme luy semble deuoiēt estre tenus de toutes gens tres licites & raisonnables) soient cognuz par tout, maintenant & pour le tēps aduenir, & q̄ ce soit son acquit & descharge enuers Dieu & le mōde, il a intention de signifier les deuoirs dessusdits, en quoy il s'est mis & l'offre, que de present il fait de tenir cōuētion avec lesdits aduersaires pour le bien de paix és lieux dessusdits: qui auant où plus sont à seureté de partie aduerse, cōme du Roy, à nostre S. Pere le Pape, ausdit Roys d'Espaigne & d'Escocce, & autres seignrs ses alliez. En outre le Roy fera sçauoir à la partie d'Angleterre affin qu'ils y enuoyēt. Et requiert le Roy à mōseigneur le Duc d'Orleās, à messeigneurs les Ducs de Bourgōgne & de Bretagne, & madame la Duchesse de Bourgōgne, qui en ceste matiere se sont employez, que deuers ladicte partie d'Angleterre ils veulēt enuoyer aucuns de leurs gēs pour exploicter, induyre & mouuoir à réuoyer leurs ambassades solēnels avec bō & suffisāt pouoir au iour, & l'un des dessusdits pour illec besongner au biē de la matiere de paix. Auq̄l tēps n'y aura point de faute q̄ le Roy n'y enuoye gens notables ayās pouoir suffisant.

ITEM le Roy veult des maintenant ouurir & descouurir sa volenté à messeigneurs: cōme à ceux de qui il doit estre seur & certain, qu'ils veulent l'hōneur de luy & de sa couronne, ainsi cōme raison est: cōme ceux qui en sont descēdus & prochains touchās certaines parolles, qui furēt dictes dōt le Roy est informé, qui seruēt beaucoup à la maniere de paix. Lesquelles sont qu'à la premiere assēblée qui fut tenue entre Grauelines & Calais, present madame la Duchesse de Bourgongne & le Cardinal d'Angleterre, fut pronōcé par la bouche de l'Archeuesque d'Yorth q̄ *vsque in ultimo flatu*, toute la natiō d'Angleterre ne souffriroit pas ne cōsentiroit, que leur Roy tint riens en hōmage, ressort ne souueraineté de nul autre Roy ou Prince q̄ de luy mesmes, qui estoit chose mal cōcordable pour paruenir à q̄lcōqs traicté de paix, & n'est point chose qui se puisse, & doieue faire. Et pource le Roy est deliberé & arresté, que pour riēs il ne baillera ne delaissera aucūe chose ausdits Anglois, q̄ ce ne soit en son hōmage, souueraineté & ressort

comme les autres vassaulx de son Royaume & ses subiects : car il ne veut pas que ce que ces predecesseurs ont augmenté & accru par vaillance & bon gouvernement d'eux & l'ayde de ses subiects, soit ainsi perdue : & ne pourroit croire le Roy que pour riens nuls de messeigneurs de son sang ne les vaillans & notables hommes de ce Royaume, sy peussent consentir, ne encores se faire le vouloit le souffrir, considéré la hauteſſe & excellence de la couronne de ladicte maison de France.

ITEM qu'affin que chacun cognoisse les deuoirs que le Roy à faits iusques à present, pour entēdre à auoir ladicte paix, & que pour le temps aduenir, charge ne luy en peust estre imputée, il fera pour estre en memoire enregistrer en sa chambre des comptes ceste presente responce.

ITEM au regard de ce qu'ils ont requis prouision conuenable deuant l'allée du Roy à Tartas, aux nouuelles entreprinſes des Anglois au païs Chartrain & de Beauſſe. Le Roy y donne remede & y enuoye le Bastard d'Orleans, que lesdits Princes ont & auront bien aggreable avec puissance de gens de guerre, pour resister ausdictes entreprinſes.

ITEM que pource que lesdits seigneurs se doiuent prochainement assembler à Neuers, ont lesdits ambassadeurs requis au Roy : qu'en entretenant tousiours ce que par ses ambassadeurs auoit fait ſçauoir aux deſſusdits seigneurs, qu'il estoit content que monseigneur le Duc de Bretagne ſ'assemblast avec eux audit lieu de Neuers: il plaife au Roy escrire de rechief & mander qu'il ſ'assemble audit lieu de Neuers avec lesdits seigneurs, en luy enuoyant son ſaufcōduit & ſeurté ſi beſoing en eſt.

LE ROY fait ſçauoir par monseigneur le Chancelier & messire Loys de Beaumont, qu'il estoit content de leur assemblée esperans les veoir en sa ville de Bourges: ou quelque lieu qu'ils feussent venus, & leur eut fait bonne chiere & veu volentiers comme ses plus prochains parés, & communiqué avecques eux sur les affaires de son Royaume. Et quant à la venue de monseigneur de Bretagne à Neuers, le Roy ſ'eſmerueille de ce qu'ils n'en font mention ne plaincte: car le Roy estoit en bonne intention, que ſ'il fut venu par terre, que son plaisir estoit qu'il passaſt par Tours, pour l'accompagner audit lieu de Bourges à la venue desdits seigneurs ſe bonnement & à l'ayſe de sa personne ſe pouoit faire. Autrement eust peu ſembler audit Duc de Bretagne, que le Roy ſe fut voulu eſtranger de luy: & neantmoins le Roy enuoya le sire de Gaucourt avec lettres patētes: lesquelles il a deuers luy pour ſçauoir ſ'il vouloit aller par eaüe par Blois & Orleāſ, pour luy compaigner & luy faire ouuerture comme à sa propre personne. Et de rechief rescrire au deſſusdit Duc de Bretagne de rassembler à Neuers, ne ſemble point au Roy que ce ſoit choſe raisonnable ou conuenable, que lesdits seigneurs facēt assemblée, pour traicter des faits de ce Royaume en l'absence du Roy ou ſans son commandement: mais le Roy à son retour de Tartas a bien intention de les requerir de leur ayde, conſeil & ſecours: & mettre armée ſus la plus grande qu'il pourra pour entrer en Normandie, à ce qu'il ait meilleur traicté de paix ou qu'il puiſſe à l'ayde de Dieu & d'eux, recourir ſa ſeigneurie.

ITEM au regard de iuſtice, ont requis au Roy que tant en Parlement que
autres

autres offices de iustice de ce Royaume, il luy plaise commettre personnes sages & experimentez au fait de iustice: & pourueoir aux offices & nō point aux personnes.

LE Roy à son pouoir a tousiours mis, esleu & constitué en son Parlement, les meilleurs & les plus sages & plus idoines clerks qu'il a peu trouuer ne finer. Et encores y sont des plus sages & des plus notables pour le present commis clerks juristes & experimentez de ce Royaume. Et en faueur & requeste de mōseigneur le Duc de Bourgongne, le Roy a mis douze tels que mondit seigneur de Bourgongne luy à voulu nommer, d'autres seigneurs quand ils ont requis pour personnes qui le vaillent és autres offices de la iustice du Royaume, le Roy y a mis gens notables & suffisans pour excercer bien & deüement lesdictes offices, tant par eux comme par leurs lieutenans: qui sont gens de iustices & clerks & notables hommes en tel cas eux cognoissans, pour faire & administrer iustice.

ITEM qu'il plaise au Roy faire abreger les proces & administrer iustice aux parties, & tant aux subiects desdits seigneurs comme aux subiects du Roy sans moyen en faisant constitution: & par effect l'entretenant à ce, que sans auoir regard aux partialitez du temps passé bonne iustice y soit mise & administrée.

LE Roy n'a iamais eu planté de doleance desdictes choses, & desire de tout son pouoir l'administration de iustice & l'abreuiation des proces, sans auoir regard ausdictes partialitez: ains voudroit punir tous ceux qui feroient le contraire. Et l'intention du Roy est escrire à sa Court de Parlement, & à ses autres officiers de iustice: que dorefnauāt ils abregent encores plus qu'ils n'ont accoustumé lesdits proces, & facent bon & brief droit ausdictes parties, sans auoir regard ausdictes partialitez.

ITEM ont remonstré au Roy l'horreur des roberies, outrages & derisions que font plusieurs gens de guerre, qui se dient au Roy tant sur les subiects desdits seigneurs que sur les siens:requerant sur ce prouision non par lettres ou parolles,mais par effect. Et aussi ont remonstré qu'il seroit conuenable, que seulement aucuns capitaines notables qui bien & loyaumēt ont seruy le Roy, eussent la charge des gens d'armes & de guerre.

ITEM que les gens de guerre fussent payez & souldoyez & logez és frontières, & sans punition on ne leur souffrist tenir les champs ou viure sur le peuple. Et avec ce que le Roy retienne seulement pour luy seruir gens experimentez de la guerre, & non soy arrester à la multitude: Mais contraigne les gens de bas estat, oiseux, noiseux & non saichans de la guerre d'eux retourner à leurs labours & leurs mestiers.

LESDICTES pilleries ont tousiours despleu au Roy, & desplaisent de tout son cueur. Et s'est essayé plusieurs fois de vuidier toutes gens faisans pilleries. Et quant aux logis sur frontieres: luy estant dernièrement à Angiers l'auoit fait & ordonné, & les auoit establis & souldoyez: mais lors & depuis on luy a leuez lesdits gens d'armes, qui a esté cause de remettre les pilleries sur les pays. Et ont esté faictes plusieurs trauerses, parquoy on n'a point peu executer ne donner prouision ausdictes pilleries, ainsi qu'il auoit proposé & intention de faire. Et

est le Roy du tout deliberé en ensuiuant le conseil desdits seigneurs d'y pourueoir si conuenablement, que lesdictes pilleries cesseront & de casser toutes gés inutiles pour la guerre. Si requiert ausdits seigneurs qu'ils ne vueillent accueillir aucuns, qui feroient contre ladicte ordonnance.

I T E M ont remonstré au Roy la pauureté du commun peuple & excessiues tailles, aydes, impositions, gabelles : dont les dessusdits subiects sont insupportablement foulez, requerans qu'il plaise au Roy d'y pourueoir conuenablement & moderément.

LE Roy est tresdeplaisant de la pauureté de son peuple, en quoy il a tresgrād interests & dommages. Et a intention selon son pouoir de les releuer & supporter le plus fort qu'on pourra. Et pour eux oster de la pillerie luy a conuenu aller l'an passé és pays de Champagne, où il a esté & fait cesser ladicte pillerie. Semblablement le fera és autres lieux de son Royaume, & ne cessera iusques à ce qu'il ait fait. Et mesmement comme dessus est dit touchant les gens d'armes qui demeurerent esdictes frontieres, en leur faisant payement & ordonnance de viures: en quoy il est deliberé d'entendre & vacquer, autrement cognoist la depopulation & destruction de tout son Royaume & de ses subiects. Et au regard des tailles, aydes & gabelles excessiues dont les subiects desdits seigneurs sont insupportablement greuez & foulez. Le Roy a plus supporté les subiects desdits seigneurs que les siens propres. Et sera trouué que quand en l'année sur lesdits subiects du Roy auront esté leuées deux tailles, sur les pays & subiects desdits seigneurs n'en aura esté leuée qu'une, que lesdits seigneurs mesmes ont prinse, leuée & empeschée ou la plus grand partie. Pourquoy appert que besoing a esté au Roy auoir autre ayde que des pays desdits seigneurs, pour conduire le fait de sa guerre & de ses autres grans affaires.

I T E M ont remonstré au Roy, comment telles tailles & impositions se doiuent mettre sus & imposer & appeler les seigneuries & les estats du Royaume.

LES aydes ont esté mises sur les seigneurs & de leur consentement. Et quāt aux tailles le Roy quand il a esté en lieu, les a appellez ou fait sçauoir combien que de son auctorité royal veu les grans affaires de son Royaume si vrgens, cōme chacun scet: & mesmement ses ennemis en occupant vne grand partie & destruisant le surplus le peut mettre sus, ce qu'autre que luy ne peut faire sans son congé. Et n'est ja nul besoing d'assembler les trois estats pour mettre sus lesdictes tailles, car ce n'est que charge & despence au pauvre peuple, qui a à payer les fraits de ceux qui y viennent: & ont requis plusieurs notables seigneurs dudit pays, qu'on cessast de telle conuocation faire. Et pour ceste cause sont contens qu'on enuoye la commission aux esleuz selon le bon plaisir du Roy.

I T E M qu'aux grans affaires de ce Royaume, le Roy deuroit appeler les Princes de son sang plus que nuls autres: & qu'ainsi se doit faire raisonnablement veu leur grand interest. Et ainsi est accoustumé de faire par les treschrestiens Roys de France les progeniteurs.

I T E M ont requis au Roy qu'il luy plaise entretenir lesdits seigneurs en leurs prerogatiues & auctoritez, lesquelles ils ont tāt à cause des parries & autres seigneuries qu'ils ont au Royaume.

LE Roy n'a traicté d'aucune matiere haute sans le sceu desdits seigneurs, ou de la

de la plus grand partie d'iceux : & encore son intention n'est point d'autrement faire. Et son plaisir & sa volenté de les entretenir en leurs prerogatiues & autoritez, & n'a riens fait au contraire. Ainsi luy facent les seigneurs & facét faire à leurs subiects en leurs terres & seigneuries, ainsi qu'ils sont tenus de faire.

I T E M qu'il luy plaise eslire en son grand conseil gens notables cremans Dieu, & non extremes ou passionnez és diuisions passées.

I T E M qu'il plaise au Roy eslire lesdits Conseillers en nombre competent, & non plus commettre la somme ou conduict des grans affaires de ce Royaume à deux ou trois, comme il a esté fait par cy deuant.

L E Roy de son pouoir à tousiours quis & esleu en son conseil des plus notables de son Royaume. Ne le Roy n'a eu regard aux diuisions passées, il les a & tient pour oubliées. Et a tousiours le Roy eu bõ nombre de conseilliers: par lesquels il a conduict & deliberé les matieres ainsi que le cas & le temps l'ont requis.

I T E M qu'il plaise au Roy prendre en bien ces remonstrances veües les quatre causes remonstrées au Roy, qui ont meu lesdits seigneurs de ce faire.

I T E M ont remonstré au Roy le fait de monseigneur le Duc d'Alençon, en luy requerant qu'il luy pleust restituer la place de Nyort, ou luy faire promptement deliurer son argent ou payement: & aussi le restablir à sa lieutenance & pension, & luy faire restituer la place de sainte Susane, & vn sien prisonnier Anglois ou luy administrer bonne & briefue iustice.

Q V A N D le Roy a esté en son pays de Poictou pour y donner prouision, & faire cesser les pilleries qui s'y faisoient & mettre en sa main plusieurs places: par lesquelles se faisoient lesdictes pilleries, doubtant le Roy que durant le tēps de son voyage de Tartas & en son absence, que par les villes & chasteaux de Nyort fut porté dommage au Roy & à son pays de Poictou, ainsi qu'aucunes fois & autres fois a esté, le Roy le reprint en sa main en intention de payer & cōtēter ce en quoy il estoit tenu: jaçoit-ce que toute la debte ne fut point de prest, & desia à fait bailler à mondit seigneur d'Alençon six mille escus. Et le surplus à son payement fera faire & bailler aux termes, & ainsi que le Roy l'a escrit à mondit seigneur d'Alençon & n'y aura point de faute. Sans ce que le Roy ait regard aux rentes & reuenues dudit lieu de Nyort, que mondit seigneur d'Alençon a leuées le temps qu'il l'a tenue. Touchant le restablissement de sa lieutenance & pension, quand mondit seigneur d'Alençon se conduira & gouvernera enuers le Roy ainsi qu'il doit: le Roy traittera comme son parēt & subiect: en ayant memoire de la prochaineté de lignage & aux seruices, que luy & les siens ont fait au Roy & au Royaume. Et tousiours l'a fait iusques à ce que la faute soit venue par luy. Touchant la place de sainte Susane le Roy ne l'a point baillée au seigneur de Bueil, ne de par luy il ne la detient. Et toutesfois que mōdit seigneur d'Alençon requerra au Roy iustice, il luy administrera & fera administrer tres volentiers. Et ledit seigneur de Bueil a bien de quoy respondre s'il tient de tort à mondit sieur le Duc d'Alençon. Semblablement du prisonnier qu'il demande luy sera administrée raison & iustice.

I T E M ont parlé du fait de monseigneur de Bourbon, demandant que sa pension luy fut entretenue, laquelle n'est point excessiue.

LE Roy a tellement fait continuer, que rien ne luy en est deu: & sur quatorze mille & quatre cens francs que monte ladicte pension sur ceste presente année, le Roy auoit ordonné luy estre baillé neuf mille francs, que ses gens ne vouloient accepter à Bressure en Ianuier dernier passé. Et s'esmerueille le Roy comment à present il en fait mention.

ITEM ont parlé du fait de monseigneur de Vendosme, en suppliant au Roy qui luy pleust luy faire auoir les pensions & biens qu'il a euz par cy deuant, dõt il est bien mestier audit seigneur & n'a point besoing qu'elles luy soient cassées. Et aussi qu'il plaise au Roy qu'il peust venir exercer son office de grand maistre d'hostel, comme il auoit de coustume de faire.

LE Roy ne l'a point mis hors de son hostel, luy mesmes s'en est mis hors. Et quand mondit seigneur de Vendosme se gouuernerá enuers le Roy ainsi qu'il doit, le Roy fera ce qu'il appartiendra.

ITEM & au regard de monseigneur de Neuers considéré la prochaineté de lignage dont il attient au Roy. Et que monseigneur son pere mourut en son seruice. Et les seruices que mōseigneur de Neuers peut faire au Roy, il luy plaise faire à faire oster & cesser les empeschemens à luy mis au garnier à sel d'Arcy sur Aube, & luy faire auoir les descharges en la maniere accoustumée pour le payement de sa pension dessusdicte.

LE Roy en contemplation de mondit seigneur de Neuers, & en faueur de luy (nonobstant les grans charges & affaires que le Roy a à supporter pour le fait de sa guerre) est tresbien content que mondit seigneur de Neuers ait sa dessusdicte pension: dont il prendra en payement sa composition des Rethelois, pour autant qu'elle vaut. Et au surplus le Roy luy bailla de ses tailles & aydes, en faisant & donnant obeissance au Roy: ses lettres, mandemens & officiers es terres de mondit seigneur de Neuers, autres que iusques à maintenant n'a esté fait: & n'est point le Roy content que mondit seigneur de Neuers seuffre par toute ladicte Comté de Rethelois, ses païs de Champagne & autres païs voisins estre foulez, couruz, mangez ne destruits tant par ses gens comme par autres qui y passent, & se retrayēt en ladicte Comté de Rethelois, & pour y pourueoir tellement que le Roy ait cause d'en estre content. Et au regard dudit grenier d'Arcy sur Aube, le Roy veut qu'on enuoye en sa chambre des cōptes, sçauoir si mondit seigneur de Neuers doit prendre & auoir ledit garnier d'Arcy. Et ce qui luy en sera certiffié par ladicte chambre, le Roy y donnera prouision.

ITEM ont parlé du faict de monseigneur le Duc de Bourgongne, sans vouloir faire de present aucune poursuite ainsi & par la maniere qu'il l'a proposé. C'est à sçauoir pour donner à cognoistre au Roy, que le traicté de la paix entre le Roy & luy n'est point encore accōply en plusieurs articles de la part du Roy. Et aussi qu'il y a tresgrād nombre d'articles, où on a actempé directemēt & encore fait on de iour en iour contre ledit traicté de paix au grand preiudice de mondit seigneur de Bourgongne.

LE Roy a tousiours desiré & voulu auoir paix, amour & bon accord avec mondit seigneur de Bourgongne & pour l'auoir n'y a riēs esparagné. Et iusques à present a tousiours entretenu ladicte paix & accord: & a voulēté de l'ainsi faire sans riens interrompre. Et pour le mieux fermer & entretenir, a le Roy bien voulu

voulu le mariage de sa fille aller avec son fils monseigneur de Charrolois. Et quant à ce qui reste à accomplir du traicté de la paix d'Arras fait entre le Roy & mondit seigneur de Bourgongne: Mondit seigneur à veu les grans affaires que le Roy iusques à present a eu & souffers: pourquoy ne les a peu accomplir ainsi qu'il eut voulu, mais il a intention & bon vouloir de les accôplir au mieux & le plus brief qu'il pourra. Et tant que mondit seigneur le Duc de Bourgongne en deura estre content. Et quant à ce qu'audit article est faicte mention, que en plusieurs points & articles de ladicte paix a esté actempté directement de la part du Roy, & fait on de iour en iour: le Roy ne scet, ne croit & ne voudroit, que riens de sa part eut esté actempté, ne fait au contraire. Mais bien auroit le Roy sur ce dequoy soy douloir, dont il se passe de present.

I T E M apres que les ambassadeurs dont dessus est faicte mention, eurent esté & vacqué par plusieurs iournées en l'hostel du Roy, où ils furēt receuz assez honorablement: & qu'ils eurent bien au long remonstré l'estat & les articles, pourquoy ils estoient là enuoyez de par les seigneurs dessusdits. Et ainsi que les responces sur iceux articles tant de bouche comme par eserit, leur eurent esté baillez de par le Roy, prindrent congé & s'en retournerent deuers les dessusdits seigneurs. Toutesfois le Roy n'estoit pas bien cōtent ne ioyeux des assemblées, que les dessusdits seigneurs faisoient en son absence: car de iour en iour y auoit des plus grans de tout son hostel & de ceux de son priué conseil: qui luy disoiēt & rapportoient, que lesdictes assemblées n'estoient point pour son bien, & que iceux seigneurs s'efforçoient d'attirer de leur party les nobles hommes de son Royaume avec les gens d'Eglise & le commun peuple, pour faire tous ensemble nouvelles ordonnances, & bailler gouuernement en iceluy Royaume de par les trois estats, ce qui feroit & pourroit estre à son grand preiudice: par ce que si ainsi estoit (comme ils disoient) il n'auoit nulle auctorité sinon par les mains de ceux qui auoient ledit gouuernement. A quoy le Roy dessusdit respondit, qu'il ne pourroit nullement croire qu'iceux dessusdits seigneurs voulussent ce faire contre luy ne sa majesté Royale. Et par especial que le Duc de Bourgongne se voulüst entremettre ne consentir d'aucune chose estre faicte à son preiudice, considéré la paix & reunion que n'aguères ils auoient faicte l'un contre l'autre. Et disoit outre que s'il pouoit estre certainement aduertty, qu'ils voulussent traicter ou faire aucune chose contre luy ne ladicte majesté, il laisseroit toutes autres besongnes pour leur courre sus.

De l'an mille cccc.xliij.

Comment le Roy Charles de France feit grand assemblée des gens d'armes, avecques lesquels alla tenir la iournée de Tartas, à laquelle iournée les Anglois ne comparurent point.



V commencement de cest an le Roy de France feit vn tresgrand mandement par toutes les parties & par tous les païs où il estoit obeï, pour continuer son entreprinse qu'il auoit encommencée & assembler gens de guerre, sur intention d'aller tenir la iournée de Tartas: de laquelle en autre lieu est faicte mention: car il auoit entrepris & voulété d'y auoir la plus grosse armée qu'oncques il eut eu, pour nuls de ses au-

tres affaires durant son regne. Et aussi la besongne luy touchoit moult grandement: car fil eut delaisé icelle journée sans y bailler secours, il estoit en peril & en aduventure de perdre les païs de Guyenne & de Gascongne & tresgrand partie des seigneurs à luy obeissans, & avec ce les nobles d'iceux païs. Lesquelles gens de guerre avec plusieurs autres grans seigneurs se commencerent fort à mettre sus tresdiligemment, & en tresgrande multitude. Et s'assemblerent en plusieurs & diuers païs de grosses compagnies, lesquelles par la deliberation de son conseil il feit tirer deuers la cité de Thoulouze par diuers chemins. Et entre-temps la journée qu'il auoit prinse au premier iour de May, fut ralongée à la requeste des capitaines Anglois qui auoient faicte ladicte composition de Tartas, iusques au iour de S. Iean Baptiste prochain ensuiuant: lequel temps durant, le Roy feit ses preparations. Et en fin se partit en tresnoble & puissant appareil, pour aller audit lieu de Thoulouze où toute sa dessusdicte assemblée se faisoit, comme dit est cy dessus. Et pour vray quand le Roy de France fut illec venu, & que les grans seigneurs & capitaines qu'il auoit mandez furent assemblez ensemble, fut trouué qu'il pouoit bien auoir le nombre de quatre vingt mille cheuaux avec tresgrand nombre de chariots & charrettes, menans artilleries, viures & autres engins & habillemens de guerre. Et quant aux seigneurs & capitaines il en y auoit moult largement: entre lesquels y estoient le Dauphin premier fils du Roy, le Comte de Richemont Cōestable de France, messire Charles d'Anjou, le Comte d'Eu, le Comte de Foix, le Vicomte de Helman fils du Comte d'Armignac, le sire d'Allebret, le Comte de Comminges, les deux Mareschaux de France qui avec le dessusdit Connestable faisoient l'auantgarde: c'est à sçauoir le seigneur de Loheac & de Valoignes, le seigneur de Cotiuy Admiral de France, le seigneur de Vilars, le seigneur de Mongascon, le seigneur de saint Priath, le seigneur de Chalenton, le seigneur de S. Valier, le seigneur de Videmont & plusieurs autres grans seigneurs & capitaines & routiers de guerre, fleur de droictes gens d'armes, qui par treslong temps auoient suiuy la guerre, comme la Hire, Pothon de sainte Treille, Anthoine de Chabānes, Oliuier de Cotiuy, le seigneur de Blainuille & son frere messire Robert Blanchefort, Pennesach, Flocquet, Ioachin Rohault, Pierre Rohault, Mathelin de l'Escouain, Dimenche de Court & moult d'autres nobles hommes de grād renom. Et lors le Roy venu audit lieu de Thoulouze, fut aduerty par plusieurs seigneurs du païs & des marches de Gascongne, que les Anglois n'estoient point puissans assez pour cōparoir à ladicte journée contre luy. Et pource apres qu'il eut eu conseil avec les plus saiges de sa compagnie, se disposa d'aller audit lieu de Tartas à tout vne partie de ses gens, affin qu'il peust estre pourueu &ourny de viures plus abondamment. Si se partit dudit lieu de Thoulouze à tout environ seize mille cheuaux, desquels estoient la plus grand partie des seigneurs & capitaines dessus nōmez. Et alla logger à deux lieües pres de Tartas, en vne petite ville nommée Mylien qui estoit au seigneur d'Allebret, laquelle tenoit le Comte de Foix: & ses gens se logerent assez pres tout à l'environ d'icelle ville. Et le lendemain qui estoit le iour prins entre les deux parties, alla le Roy luy mettre en bataille deuāt ladicte ville de Tartas, & y fut depuis le matin iusques entre dix & vnze heures deuāt nonne. A laquelle heure vindrent deuers luy, les
dessusdits

dessusdits seigneurs de Coignac & Enguerrot de saint Per, lesquels auoient icelle ville en garde, comme dessus est declairé. Et emmenerent avec eux le Cadet Charles d'Allebret, qui estoit demouré en hostage. Si apportoint les clefs de la ville, lesquelles ils rendirent & meirent és mains du Roy. Et avec ce fait ledit seigneur de Coignac serment au Roy. Et le dessusdit Enguerrot s'en alla en la cité d'Acques. Et adonc le dessusdit seigneur d'Allebret entra dedans la ville de Tartas. Et le Roy s'en alla au giste à Coignac, qui est vne petite bonne ville assise assez pres environ deux lieues dudit lieu de Tartas. Et là seiourna le iour de la S. Jean & le lendemain.

Comment le Roy de France apres la iournée de Tartas s'en alla loger deuant sainte Seuerie chief du pais de Gascongne. Et conquist ladicte ville & chastel & autres plusieurs places audit pais.

EN apres le mercredy ensuiuant de la iournée de Tartas (dont cy dessus est faicte mention) le Roy & son armée s'en allerent deuant sainte Seuerie, où tout le pays s'estoit retraict & y auoit cinq fermetez, car c'estoit vne ville forte à merueilles. Desquelles fermetez les gens de monseigneur le Daulphin prindrent deux de premiere venue sans faire long proces, & se logerent dedans. Et peu de iour ensuiuans les gens du Roy prindrent la tierce fermeté. Et depuis fut comandé de par le Roy qu'on assaillist la quarte, à laquelle les Anglois feirent grand resistance: mais petit durerent, & furent reboutez & poursuiuiz tresvigoureuement iusques à la porte du maistre chastel. Lequel sans commandement ne ordonnance du Roy ne de ses capitaines, fut assailly tresvaillamment par les François. Et dura ledit dernier assault environ quatre heures moult merueilleux: mais en fin les Anglois qui estoient dedans, furent prins & conquis par force & mis à l'espée: & en y eut prestement sans remede mis à mort bien de huiet cens à mille Anglois. Et n'y moururent à iceluy assault qu'environ de vingt à trente des gens du Roy, entre lesquels en fut l'un le petit Blanchefort. Si fut prinse la ville par le costé que faisoit assaillir le Connestable de France. Et là fut prins du costé desdits Anglois messire Thomas de Rampston, & aucuns autres en petit nombre. Apres laquelle prinse & que le Roy y eut seiourné environ l'espace de douze iours, il s'en alla mettre le siege deuant la cité d'Acques en Gascongne, où fut bien cinq sepmaines: & y auoit moult fort bouleuers deuant l'une des portes. Et apres que les gros engins du Roy eurent traict & iecté par plusieurs iours & demoly la muraille de ladicte ville & le dessusdit bouleuert, on assaillit iceluy bouleuert. Et dura ledit assault bien l'espace de cinq grosses heures trescruel & merueilleux. Et en fin fut conquesté & prins de force environ le iour faillant. Si y furent morts dix ou douze Anglois, & des François en y eut plusieurs naurez. Apres laquelle prinse on feit traire toutes gens de par le Roy, reserué ceux qui furent commis à garder ledit bouleuert. Et le lendemain ceux de ladicte ville d'Acques, doubans qu'on y fait nouuel assault & qu'on recommenceast de plus fort se rendirent tous à la volenté du Roy, excepté le seigneur de Montferrant, qui estoit capitaine pour le Roy d'Angleterre & le dessusdit Enguerrot de saint Per: lesquels se rendirent sauf leurs corps seulement, & s'en allerent le baston au poing. Et

avec ce permet ledit seigneur de Montferrant de rendre en la main du Roy deux forteresses, qu'il auoit empres la cité de Bordeaux : & pour la seurte de ce bailla son fils en hostage, lequel demoura prisonnier par long temps, par ce que ledit seigneur de Montferrant ne voulut point rendre les forteresses dessusdictes, ainsi que promis l'auoit. Et gouuernoient lors en iceluy pays le Captal de Busch, ledit seigneur de Montferrant & messire Thomas de Rampston Seneschal de Bordeaux. Durant lequel temps les Anglois reprindrent la ville & chastel, avecques tous les forts de sainte Seure : mais brief ensuiuant le Roy de France y retourna à tout son armée. Si fut reconquise de force, & y eut moult grand nombre d'Anglois mis à mort. Auquel temps se rendit François, & fait fermēt au Roy en luy baillāt obeïssance en ses villes & forteresses le seigneur de Rochetaillade. En apres alla le Roy deuers Mermāde, laquelle se rendit à luy : & de là se tira deuers la Reolle, qui fut assiegée trespuissamment par lesdits François : & depuis fut prinse icelle ville d'assault, mais le chastel se tint environ l'espace de six sepmaines : au bout duquel terme se rendirent ceux de dedans sauf leurs vies. Et y comēit le Roy Oliuier de Cotiuy pour en auoir le gouuernement avecques aucunes autres places, qui auoient esté conquises durant ledit voyage : de laquelle ville de la Reolle estoit capitaine pour le Roy d'Angleterre le Baron d'Acques, lequel depuis se rendit François. Et entre-temps que les conquestes dessusdictes se faisoient, y eut aucune destrousse par lesdits Anglois sur les François, & par especial les paysans du pays leur faisoient forte guerre. Pourquoy tant pour la grande multitude de gens qu'y auoit le Roy, comme pour les rebouttemens que leur faisoient les dessusdits, furent par plusieurs fois moult oppressez de famine. Et moururent la plus grande partie de leurs cheuaux, dont les routiers & autres qui ont accoustumé de tenir les champs long temps, furent moult troublez : & en y eut tresgrand nombre qui se tirerent plus auant es pays pour eux raffreschir : & mesmement allerent iusques assez pres du pays de Nauarre, en faisant de tresgrans dommages au pauvre commun peuple. Et d'autre part pendant le temps dessusdit, les Anglois s'assemblerent vn certain iour & par moyens qu'ils auoient, reprindrent la cité d'Acques en Gascongne sur les François : de laquelle estoit capitaine Regnault Guillaume le Bourgongnon, lequel fut prins prisonnier & tresgrand partie de ses gens mis à mort : duquel le Roy de France fut tresmal content, pource qu'il auoit perdu si en haste & par mauvais soing icelle cité, qui assez largement auoit cousté à conquerre. Apres lesquelles besongnes, & que le Roy eut esté au pays de Gascongne environ de sept à huit mois : & fait en iceluy plusieurs belles conquestes (comme dit est cy dessus) considerant le grand trauail que de iour en iour auoient eu ses gens pour la deffaute des viures, dont ils auoient à tresgrand dangier. Si conclud & delibera de tourner à Montauban, où il fut environ deux mois : & là fit ses ordonnances pour la garde du pays, & par diuerses iournées s'en retourna à Poictiers. Et peu de tēps apres la Hire qui moult auoit esté trauaillé en iceluy voyage : & qui desia estoit homme assez aagé, alla de vie à trespas au chastel de Montauban. Pour la mort duquel le Roy fut tresdeplaisant, quand ce fut venu à sa cognoissance. Et ordōna que sa femme possedast d'aucunes terres & seigneuries, qu'il auoit données audit la Hire durant sa vie.

Comment Pierre Regnault fut par force debouté de la forteresse de Milly.

VOus auez ouï bien racompter au long comment Pierre Regnault estoit logé au chastel de Milly, estant à deux lieües ou enuiron pres de Beauuais: lequel lieu de Milly il auoit fait reparer & fortifier. Et auoit bien avec luy le nombre de deux cens combattans, tous fors sacquemens toides & vigoureux: à tout lesquels il couroit souuent en diuers lieux, & tout ce qu'il pouoit attaindre & attraper au dehors des chasteaux & fermetez, tant sur les païs du Roy comme ailleurs estoit prins, rauy & emmené en leur forteresse & garnison. Et par especial auoit couru & couroit continuellement de iour en iour sur les villes & païs de l'obeïssance & seigneurie du Duc de Bourgongne, du Comte d'Estampes & de plusieurs autres grans seigneurs de ce party: & mesmement tressouuent passoient l'eaüe & la riuere de Somme en tirât vers les marches d'Arthois, où il y auoit de douze à seize lieües de leurdicté garnison. Et pareillement faisoient és chastellenies de Peronne, Montdidier & Roye, où ils prenoient de bons prisonniers: lesquels ils mettoient à grosses finances, ainsi & par la maniere qu'eussent peu faire leurs aduersaires du temps de la guerre, avec tous autres biens quelsconques dont lesdits païs estoient moult oppressez & trauaillez: si en furent par plusieurs fois faictes grandes plainctes de doleances aux seigneurs dessusdits, dont ils estoient tresmal cōtens. Et pour ceste cause enuoya ledit Duc de Bourgongne deuers le Roy luy remonstrant la destruction d'eux, ses païs en luy requerant d'y auoir prouision. A quoy le Roy fait responce comme autresfois auoit fait pour pareil cas: C'estoit qu'il luy en desplaisoit moult & qu'il estoit trescontent que ledit Duc de Bourgongne le fait ruer ius & destrousser s'il le pouoit trouuer en ses païs, ou qu'il le fait assieger & debouter par ses gens d'icelle forteresse de Milly: & il manderoit & feroit faire deffence à tous ses capitaines des marches à l'enuiron, qu'ils ne luy baillassent ayde, secours ne faueur nulle contre les gens du Duc de Bourgongne, sur autant qu'ils doubtoient à encourir son indignation. De laquelle responce iceluy fut assez content, & se pourpensa qu'il pouruoiroit au plus brief que bonnement faire se pourroit: si trouua maniere de faire traicté avec aucuns capitaines Anglois sur la marche de Normandie, & qu'ils baille- roient seurté de non faire guerre à ses gens. Et quand le Duc de Bourgongne fut assez acertené des deux parties, qu'ils ne luy porteroient nul grief ne dom- mage à ses gens à la cause dessusdicté: luy qui pour lors estoit en son païs de Bourgongne, fait assauior au Comte d'Estampes qui auoit le gouuernement de ses païs de Picardie, qu'il assemblast le plus de gens de guerre qu'il pourroit fi- ner, & les menast deuant ledit chastel de Milly: surquoy ledit Comte fait grand diligence: & meit ensemble en brief terme bien le nombre de douze cens com- battans, tant cheualiers comme escuyers & autres gēs de guerre des plus experts d'iceluy païs de Picardie & de la marche à l'enuiron. Entre lesquels estoient Valleran de Moreul, Guy de Roye, Iean d'Ange, le seigneur de Saueuses, Symō de Lalain, Iean de Haplaincourt, Charles de Rochefort, messire Colart de Mel- ly & moult d'autres grans seigneurs & gentils-hommes. Et fut faicte icelle as- semblée en la ville d'Amiens: duquel lieu à tout charrois fort chargez de vi-

ures & habillemens de guerre, s'en allerent en moult belle ordonnance par aucuns iours iusques à Beauuais, où ils furent receuz honnorablement: & ses gens se logerent és villages enuiron: & de là ledit Comte se tira deuant le chastel de Milly. Si feit loger ses gens au plus pres de la porte, qui derompirent fort les deffences de ladicte forteresse: & par especial de la basse court, qu'ils auoiēt fort réparée de queües & d'autre gros bois. Si commencerent ceux de dedans à deffendre tresvigoureuement tant de canons, que d'autres artilleries & engins de guerre: desquels ils occirent & naurerent aucuns des gens du Comte d'Estampes. Entre lesquels y fut mort messire Matthieu de Humieres: & auoient les gēs du petit Comte laissé leurs cheuaux ou la plus grand partie en la ville de Beauuais: de laquelle & aussi de la cité d'Orleans venoient viures de iour en iour audit siege. Durant lequel siege apres que les engins dessusdits eurent fort adomagé les fortifications de la basse court dessusdicte, il fut liuré par les assiegeās vn tresdur & fort assault, auquel tant d'un costé comme d'autre furent faictes plusieurs vaillances & proësses: desquelles entre les autres le seigneur de Sauueses avec ses gens emporta le bruit. Neantmoins ceux de dedans se deffendirent trespuissamment, & tant que lesdits assaillans voyant que bonnement ne pouoient conquerre sans auoir trop grand perte & dommage de leurs gens, se retrahirent & furent morts des assaillās enuiron de huiēt à dix, & des deffendeurs y eut aucuns naurez. Et apres iceux deffendans considerans qu'ils ne se pouoiēt longuement tenir, & aussi qu'ils n'auoient point grand esperance d'auoir aucun secours, feirent traicté avec les commis dudit Comte d'Estampes, moyennant & par tel si qu'ils se departiroient de là en emportant trestous leurs biens avec eux. Si rendirent ladicte forteresse, dedans laquelle on bouta le feu & la feit on du tout demolir & desoler. Et ce fait ledit Comte & ses gens s'en retournerent enuiron la sepmaine peneuse és lieux dont ils estoient venus. Et auoit iceluy Comte esté deuant ladicte place & tenu siege enuiron trois sepmaines ou plus audit lieu de Milly. Pour lequel voyage & deboutemēt des dessusdits coureurs tous les païs qui auoient accoustumé estre couruz & pillez, furent tresioyeux quand ils furent acertenez, qu'on les auoit ainsi deslogeuz & chassez hors de ladicte place.

De l'an mille cccc.xliij.

Comment le Roy de France feit grand assemblée de gens d'armes pour aller en Normandie: & d'aucunes courses & conquestes que ledit Comte de Sombresset feit au païs d'Aniou, & ailleurs sur les Francois.



AV commencement de cest an le Roy de France feit grād assemblée de gens d'armes, sur intention d'entrer en Normandie l'Esté ensuiuant: & aussi pour bailler secours à ceux de Dieppe, qui estoient fort cōtraints & trauaillez par le moyen de la tresforte bastille, que tenoient les Anglois deuant icelle ville de Dieppe: lequel secours le Roy leur enuoya, c'est à sçauoir pour r'auitailler ladite ville. Et y fut mené grād foison de bestial & autres viures, à tout grād quātité de gens d'armes, qui les bouterēt dedans à grand force: & y eut entre les deux partie de tresgrosses escarmouches, ausquelles

ausquelles en y eut de morts & de naurez tant d'un costé cōme d'autre. Auquel temps le Comte de Sombreffet assembla iusques au nombre de six mille combattans ou enuiron; à tout lesquels il entra au païs d'Anjou, où il feit de très-grans dommages par feu & par espée. Apres se tira vers Bretagne, & print d'assault la Gerche appartenant au Duc d'Alençon: laquelle ville fut du tout pillée & robée. Et puis s'en alla à Ponzay, où il fut bien deux mois. Si couroiēt de iour en iour ses gens par diuerses compagnies le dessusdit païs d'Anjou, de Traonnois & de Chatragonnois, esquels païs furent plusieurs fois destroussiez par les païsans. Et d'autre part le Mareschal de Hoheac eut la charge avec les gens du Duc d'Alençon de par le Roy de France, pour resister aux entreprinſes dessusdictes. Si conclurent d'aller ferir de nuict sur les Anglois & sur leurs logis, c'est à ſcauoir sur ledit Comte de Sombreffet: mais il en fut à tant aduertý, & alla au deuant d'eux, & les vint rencontrer qu'ils ne s'en donnoient de garde. Et pource furent iceux François mis en desroy, & en y eut de vingt à trēte que morts que prins, & les autres se sauuerent au mieux qu'ils peurent par force de fuir. Et de ceux qui furent prins, en furēt le seigneur d'Auſigny, Loys de Bueil & plusieurs autres gētils-hommes. Apres lesquelles besongnes, iceluy Comte de Sombreffet se deslogea de deuant Ponzay, & alla prédre le chasteau de Beaumont le Vicomte. Et puis apres qu'il eut assis ses garnisons par tout les frontieres, il s'en retourna à Roüen.

Comment aucuns cheualiers & gentils-hommes de la court du Duc de Bourgongne, entreprindrent un fait d'armes par la maniere cy apres declairée.

E Tem en ce mesme tēps le Duc de Bourgongne estant en sondit païs de Bourgongne, y eut plusieurs gentils-hommes de son hostel & de ses païs, qui pour son plaisir & sa licence feirent annōcer & publier par plusieurs marches & diuers lieux du païs de Bourgongne, que s'ils estoient aucuns notables hommes qui voulsissent faire armes & acquerir honneur & pris, ils seroient receuz par iceux & parfournis en certaines armes qu'ils auoient entreprinſes: desquels gentils-hommes leurs noms serōt cy apres declairez, & aussi la maniere des chapitres qui pour ceste cause furent enuoyez es païs dessusdits par messire Pierre de Bauffremont seigneur de Chagny, qui estoit chief de ladicte entreprinſe.

Comment du mandement dessusdit les armes furent faictes, & les noms de ceux qui deuoient faire lesdictes armes.

E N l'honneur de nostre seigneur & de sa tresglorieuse mere, de ma Dame sainte Anne & de monseigneur saint George. Le Pierre de Bauffremont seigneur de Chagny, de Monliet & de Montfort, cheualier, Conseiller & Chambellan de treshault, trespuissant & excellēt Prince mon tresredoubté & souuerain seigneur mōseigneur le Duc de Bourgongne: fais ſcauoir à tous Princes, Barons, cheualiers & escuyers sans reproche, cest excepté ceux du royaume de Frāce & des païs alliez & subiects de mōdit souuerain seignr, q̄ pour augmenter & accroistre le tresnoble mestier, &

exercice des armes, ma voullenté & intétion est avec douze cheualiers, escuyers & gentils-hommes de quatre costez, desquels les noms cy apres s'ensuiuent. C'est à sçauoir Thibault seigneur de Rougemont & Mussy, messire Guillaume de Bresremont seigneur de Sees & de Sonnegnon, Guillaume de Brene seigneur de Mombis & Gilly, Iean seigneur de Valengon, Iean seigneur de Rap & de Tirrecourt, Guillaume de Champ-Diuers seigneur de Cheuigny, Iean de Chiron seigneur de Rancheinères, Anthoine de Vauldray seigneur de l'Aille, Guillaume de Vauldray seigneur de Collaon, Iagues de Challant seigneur d'Aineuille, messire Amé seigneur d'Espirey, & Iean de Chauigny garder & deffendre vn pas, seant sur le grand chemin venant de Dijon à Exonne au bout de la chaucée partant de ladicte ville, & vn gros arbre appelé l'arbre des hermites tout par la forme & maniere qui cy apres s'ensuyt.

P R E M I E R y a deux escuz, dont l'vn est noir semé de larmes d'or, & l'autre violet semé de larmes noires: lesquels escus pendront audit arbre des hermites, & seront de telle condition, que tous ceux qui feront toucher par le Roy d'armes Herault ou poursuivant l'escu noir aux larmes d'or, seront tenus à faire armes à cheual avecques moy, ou avecques vn de mesdits cheualiers ou escuyers, iusques au nombre de douze courses de lances à fer esmoulu.

I T E M en faisant lesdictes armes se l'vn est porté à terre de coup de lance & droicte actainte sur les harnois: celui qui sera ainsi porté à terre, donnera au cōpagnon qui ainsi l'aura porté ius vn dyamant tel qu'il luy plaira.

I T E M sera armé de tel harnois que bon luy semblera double ou sengl accoustumé à faire armes, & sans mal engin: c'est à sçauoir que l'arrest n'ait nul aduantage fors ainsi qu'on le porte en la guerre.

I T E M que chacun portera ses garnisons de lances & de fers, excepté que la rondelle qui gist sur les mains, ne sera que de quatre dois de large & non plus.

I T E M les lances seront d'vne mesme mesure depuis la poincte de fer iusques à l'arrest, desquelles lances baillera la longueur.

I T E M pour faire & accomplir lesdictes armes à cheual, fourniray lances à tous & toutes prestes dedans les lices telles & semblables de celles de mes dessusdits compagnons & des myennes.

I T E M & se feront lesdictes armes à cheual à la toille, laquelle sera de six pieds de haulteur.

S'ensuiuent les articles sur le faict des armes de pied.



E N apres iceux Princes, Barons, Cheualiers & escuyers de la condition dessusdicte, qui auroient plus leur plaisir de faire armes de pied: seront tenus comme dessus de faire toucher l'escu violet aux armes noires, & de combattre de lances ou d'espées duquel mieux, leur plairoit iusques à quinze coups.

I T E M qu'en faisant lesdictes armes se l'vn met les mains ou les genoux à terre, celui qui ainsi y aura touché, sera tenu de donner à l'autre vn ruby de telle valeur que bon luy semblera.

I T E M que chacun soit armé de harnois accoustumé de combattre en lices.

Item

ITEM & se l'un estoit deffourny de hache ou d'espée, ie l'en fourniray assez & de semblables à celles de mes compagnons & des myennes. Et en icelles haches ou espées n'y aura chose qui ne doie estre par raison ou sans croces ou outre mal engin.

ITEM celui qui aura son adresse de faire armes & de combattre avec moy de pied, & l'un de nous deux porte à terre de tout le corps, il sera tenu de luy aller rendre prisonnier, où l'hostellant luy ordonnera.

ITEM celui qui ainsi sera prisonnier pour sa droicte rançon & deliurance, sera tenu de donner à celui ou celle que ledit hostellant voudra ordonner à eslire au dessus de cinq cens escus.

ITEM ceux desdits estrangers ne requierent moy ne mesdits cōpagnons: car ils trouueront à toutes les heures ordonnées & limitées en ce present traité qu'il les fournira.

ITEM ne pourront les dessusdits estrangers faire avec moy ne mesdits compagnons qu'une fois armes: c'est à sçauoir l'une à cheual à l'autre de pied. Et plus auant ne pourront requerre mes dessusdits compagnons ne moy durant le temps de ces presentes armes.

ITEM se feront les dessusdictes armes à cheual & de pied par la maniere qui sensuit: c'est à sçauoir icelles de cheual le lundy, le mardy, & le mercredy: & celles de pied le ieudy, le vendredy & le samedy.

ITEM & se commencera ledit pas le premier iour de Iuillet, qui sera l'an mille quatre cens quarante trois, & durera quarante iours entiers sans comprendre les festes ne les dimenches, ne les festes commandées en la ville de Romme.

ITEM aucuns desdits Princes, Barons, Cheualiers ou escuyers ne pourrōt ne ne seront tenus de passer par le païs n'à vn quart de lieüe pres, qu'ils ne facent & accomplissent les armes dessusdictes ou qu'ils ne laissent gages: c'est à sçauoir son espée ou ses esperons, lequel qui mieux luy plaira.

ITEM & pour faire & accomplir lesdictes armes tant de pied comme de cheual par la maniere & ordonnance contenue cy dessus: i'ay humblement supplié & requis à mondit seigneur souuerain, que de sa grace me donnast congé & licence d'icelles parfaire: lequel desirant l'accomplissement d'icelles le m'a begninement octroyé. Et pour ce faire me donne & a donné à iuge treshault & puissant Prince & mon tresredoubté seigneur le Comte de Neuers & de Reteil: & en son absence monseigneur le mareschal Côte de Fribourg & de Neuf-Chastel. Et affin qu'il vous appaire que ces presens chapitres procedent de mon intention & volenté, desirant iceux accomplir par la maniere dessusdicté, les ay fait seeller du seel de mes armes, & signées de ma main le huictiesme iour de Mars l'an mille quatre cens quarante & deux.

ITEM ie prie Princes, Barons, Cheualiers & escuyers qu'ils n'ayent aucune imagination de mal-vueillance: car ie ne le fais que pour accroistre le noble mestier & exercice des armes. Et aussi pour auoir accointance, par armes aux biens renommez & vaillans Princes & nobles dessusdits, qui venir y voudront.

ITEM auront les dessusdits nobles estrangers bon, seur & loyal saufconduit de mondit souuerain seigneur, & en son absence de son Mareschal.

Comment le Duc de Bourgongne enuoya le Comte d'Estampes à tout grand puissance de gens d'armes en la Duché de Luxembourg.

ETem en ceste mesme saison la Duchesse de Luxembourg, qui autrefois auoit eu espousé le Duc Anthoine de Brabant & Jean de Bauiers deffuncts, tous deux oncles, l'un de pere & l'autre de mere du Duc Philippe de Bourgongne, fait grand complaincte à iceluy Duc de Bourgongne de ce que ses hommes & subiects de ladicte Duché ne la vouloient obeyr ne payer de ses rentes & reuenues, & la plus grand partie d'iceluy païs. Et par especial d'iceluy fort de Luxembourg & de Thionuille, & autres lieux à l'environ. Et l'auoient deboutée desdictes villes en eux rendant du tout rebelles & inobediens contre elle. Si luy requeroit & prioit humblement que pour Dieu, & pitié & aussi pour l'honneur de ses deux oncles qu'elle auoit euz par mariage, & avecques lesquels elle festoit portée honorablement, il la voulust secourir à ce grand besoing tant qu'elle peust estre remise en sa seigneurie: ou autrement la conuiendroit viure dorefnauant en moult grand meschef & poureté. A quoy ledit Duc fait responce trescourtoise, disant que de bon cueur luy bailleroit secours & ayde contre les dessusdits de Luxembourg par toutes les voyes & moyens raisonnables, que bonnement faire pourroit, dont elle mercia grandement. Et pour sur ce auoir aduis, que bon luy en seroit à faire, fait assembler son conseil pour veoir & debatre la matiere, affin de scauoir qu'il en seroit bon de faire pour le mieux. Auquel conseil fut deliberé, que ledit Duc de Bourgongne enuoyeroit ses messagers solempnels deuers ceux de Luxembourg eux requerre & sommer, qu'ils feissent deuers icelle dame & ses officiers toute l'obeissance qu'il appartenoit, & comme ils estoient tenuz de faire: & si ainsi ne le faisoient iceluy Duc de Bourgongne l'ayderoit & conforteroit de toute sa puissance pour la remettre en sa seigneurie: ausquelles requestes & sommatiōs ceux de Luxembourg ne voulurent entendre n'obeyr nullement, jasoit ce que plusieurs requestes leur en furent faictes: mais pour eux entretenir se pourueurent dedans leurs villes de gens de guerre: c'est à scauoir des gens du Duc Guillaume de Saxe, qui se disoit heritier de ladicte Duché de Luxembourg. Et enuoya vn sien parent nommé le Comte de Clicque à tout huit cens combattans des marches d'Allemaigne: lesquels se bouterent en garnison en la dessusdicte ville de Luxembourg, de Thionuille & autres villes & forteresses à l'environ qui estoient fauorables. Et eux là venuz commencerent à courre & à faire grand guerre à aucunes villes & forteresses, qui encores estoient demourées en l'obeissance de ladicte dame. Et par ainsi fut iceluy païs fort diuisé en grand tribulation. Et adonc le dessusdit Duc de Bourgongne sachant que les dessusdits perseueroient de iour en iour en leur mauuais propos, se conclud & delibera du tout à eux faire forte guerre. Et pour ses causes escriuit ses lettres au Comte de Vernembourg, au Damoyseau de Saluce, à Henry de la Tour & aux autres nobles du païs & Duché de Luxembourg & de la Marche à l'environ: & dont la plus grand partie tenoit le party de la dessusdicte Duchesse, & qui se vouloient employer en l'ayde, faueur & secours d'elle qu'ils feissent guerre à tous ceux, qui luy estoient cōtraires & desobeissans. Et leur mada oultre que brief y enuoyeroit

enuoyeroit de ses gens, & puis iroit en personne pour conquerre ladicte Duché, & debouteroit ceux qui l'occupoient : à laquelle requeste dudit Duc de Bourgongne, ils furent trescontens d'entendre & obeyr. Et de fait depuis qu'ils eurent deffié les dessusdits leur feirent guerre ouuerte, & coururent sur eux par plusieurs & diuerses fois. Entre-temps le Duc de Bourgongne enuoya ledit Comte d'Estampes en Picardie, & luy fait sçauoir qu'il assemblast certain nombre de gens de guerre pour mener en Bourgongne deuers luy, ce qu'il fit.

Q V A N D son armée fut preste il les fait tirer deuers saint Quentin en Vermandois, & luy mesmes y alla en sa personne. Si estoient avecques luy Valleran de Moreul, Guy de Roye, le seigneur de Humieres, le seigneur de Saucuses, messire Symon de Lalaing, le seigneur de Neufuille, Gauvain Quieret, messire Anthoine de Vvisoch, Iean de Haplaincourt & plusieurs autres notables cheualiers & escuyers : & pouoit auoir en tout le nombre de douze à treize cens combattans. Si se tira audit lieu de saint Quentin deuers Laon, pour aller passer assez pres de la Comté de Rethers : mais quand il fut vers Montagu, sicomme il fut dit & rapporté que Dimenche de Court, le Roucin & aucuns autres capitaines des gens du Roy estoient logez à Montagu & audit lieu de Sisonne : lesquels n'agueres auoient esté au païs de Rethelois, où ils auoient fait de grans & merueilleux dommages. Pour lesquels ledit Comte d'Estampes estoit tresmal content d'eux : car avecques ce vn petit parauant, iceluy Dimenche de Court auoit esté destrouffé en Bourgongne, & auoit promis de non luy plus loger sur les païs de Bourgongne ne sur ceux du party. Si leur manda & fait sçauoir qu'ils se retrahissent hors de son chemin, & qu'il se vouloit aller loger audit lieu de Montagu, ce que point ne vouloient faire : pourquoy entre icelles parties s'esmeurent aucunes rigueurs. Et fut ordonné que ledit Comte d'Estampes & son conseil leur courroit sus, & ainsi en fut fait. Si furent la plus grand partie desdits François du tout destrouffez : & tous leurs biens tant cheuaux comme autres bagues prins & rauiz par les Picards dessusdits : & en y eut bien pou de morts & aussi de naurez : & depuis qu'ils eurent esté faits prisonniers, furent deliurez. Et avecques ce furent à aucuns rendues aucunes de leurs bagues, & par especial à iceluy de Court : si se tirerent arriere le plus brief que faire le peurent. Pour lesquelles destrouffes le Roy ne son fils ne furent point bien contents, de ce que ainsi on les auoit ruez ius en leurs païs : & aussi pourtant qu'ils alloient à vn mandemēt que faisoit ledit Daulphin, pour aller au secours de ceux de Dieppe, duquel cy apres sera faicte plus ample mention : neantmoins la besongne demoura ainsi faicte pour lors, mais depuis en vindrent de tresgrans remors. En apres le Comte d'Estampes & ses gens se tirerent iusques sur les marches de Bourgongne, & tindrent ses gens les champs vers Langres & Monfaucon : durant lequel temps ledit Comte d'Estampes & les seigneurs, & la plus grand partie qui estoient avec luy, allerent à Dijon vers le Duc de Bourgogne, où ils furent ioyeusement receuz & festoyez : & se tindrent là certaine espace de temps, entre-temps que ledit Duc faisoit ses apprestes, pour aller à puissance en la Duché de Luxembourg.

Comment le Duc de Bourgongne meit la Duché de Luxembourg en son obeïssance.



R conuient parler dudit Duc de Bourgogne: lequel en ce temps faisoit grandes preparatiōs, pour aller en la Duché de Luxembourg, & auoit plusieurs moyens qui de iour alloient & venoient deuers luy, pour sçauoir si on pourroit trouuer aucuns bons moyens entre la Duchesse & ceux qui estoient enuers elle desobeissans, lesquels en fin ne se peurent trouuer. Et pour ceste cause le dessusdit Duc se disposa du tout d'eux liurer forte guerre, & les mettre en l'obeissance d'icelle Duchesse. Si enuoya premier audit païs messire Symon de Lalaing & de trois à quatre cens combattans avec luy, qui se ioingnirent & assemblerent avec le Comte de Vernembourg & les autres nobles du païs de la Marche, qui estoient alliez audit Duc de Bourgogne. Et se logerent en Arlon & en aucunes autres villes qui tenoient le party de ladicte Duchesse, comme dit est cy dessus. Et eux venuz en iceluy païs cuiderent par moyens auoir l'obeissance de Thionuille, en quoy ils faillirent, pource que le Comte de Clicq & ceux de son party les auoient attraits de leur costé, & y meirent des gens de guerre pour les ayder à entretenir: & depuis assez brief ensuiuant vint iceluy Comte de Clicq à tout grand puissance, garny de charroy habillemens de guerre loger assez pres de la ville d'Arlon qu'il entendoit assieger: & y eut entre les parties grandes escarmouches, où furent aucuns de ses gens morts & blecez: & depuis doubtant la grand puissance du Duc de Bourgogne, se retrahit à Luxébourg. Durant lequel tēps les dessusdits feirent plusieurs courses, l'un contre l'autre, & alloiēt les Picards aucunes fois courre iufques aux portes de Luxembourg. Et entre-tēps le dessusdit Duc de Bourgogne se partit dudit lieu de Dijon en tresbel arroy, grandemēt accompagné de cheualiers & escuyers, & s'en vint à Yuoy qui est de la Duché de Luxembourg, & là se logea & y fut receu des habitās moult ioyeusement. Auquel lieu d'Yuoy il conclud de faire assieger vn chastel nōmé Villy, qui estoit garny de plusieurs saquemens, qui long temps parauant auoient fait & faisoient de iour en iour de grans oppressions & tyrannies au poure peuple dudit païs, & estoit leur chef vn nommé Iaquemin de Beaumont. Si eurent la charge de les assieger Guy de Roye & le seigneur de Saueuses, Hues de Hasues & aucuns autres chefs: lesquels y allerent à tout six cens combattans ou enuiron, & y feirent dresser plusieurs gros engins, qui les adommagerent: & se disoient les dessusdits estre au Damoisel de Commercy, qui auoit esté en la compagnie du Daulphin à prendre la bastille de Dieppe, comme dessus est dit. Si fut aduertty d'iceluy siege & pour le cuider leuer, assembla enuiron mille combattans: entre lesquels estoient le Roucin, Pierre Robert & plusieurs autres routiers de guerre. Si se tirerent par plusieurs iournées en approchant ceux du siege dessusdit, & tant qu'à vn matin ferirent dedans leurs logis, & de premiere venue se bouterent dedans sans y trouuer resistance sinon assez petit: neantmoins ceux qui auoient la charge dudit siege oyans l'effroy, r'assemblerent leurs gens bien en haste en belle & bonne ordonnance, & commencerent à marcher auant contre leurs ennemis: lesquels assez tost ils rebouterent hors de leursdits logis aux champs, & là de tous costez se commencerent de tresgrandes escarmouches: ausquelles se porta tresvaillamment messire Gauvain Quiéret, messire Hue de Longueual & plusieurs autres, avec les chefs dessus nommez: lequel messire Gauvain y estoit
venu

venu vn iour deuant, & les auoit aduertis de la venue dudit Damoiseau de Commercy.

FINABLEMENT iceluy Damoiseau & ceux de sa compagnie voyans qu'ils pouoient plus perdre que gagner à illec demourer longuement, se partirent assez hastiuement & s'en retournerent audit lieu de Commercy: & y furent morts huiet ou dix de ses gens & plusieurs naurez: & de la partie des assiegeans fut mort vn gentil-homme nommé Gaultier de Pauant, & pou d'autres avec luy: lequel de Commercy s'en alla avec ledit Jaquemin de Beaumont, & issit du Chastel par derriere, entre-temps que ladicte escarmouche se faisoit en abandonnant ses gens: lesquels se rendirent en brief terme ensuiuant par tel si, qu'ils s'en iroient à tout leurs biens: & apres ledit Duc de Bourgongne fait loger ses gens vers Luxembourg, & alla le Comte d'Estampes à tout grand partie des capitaines & gens de guerre à Ez qui est vne grande ville, laquelle autresfois auoit esté fermée, & fut illec grand espace de temps. Si couroient ses gens bien souuent sur leurs aduersaires: desquels quand ils les rencontroient, en faisoient bien peu de compte. Et entre-temps que toutes ces besongnes se faisoient, le Duc de Bourgongne qui auoit avec luy (comme dit est dessus) plusieurs du païs assez subtils, eut plusieurs imaginations & conseils avec ses plus feables, & aucuns des dessusdits, pour sçauoir comment il viendrait à chef de ceste guerre. Si luy fut dit qu'il pourroit bien faire essayer, sçauoir si on trouueroit point maniere d'escheller & prendre de nuiet ladicte ville de Luxembourg. Et quand ledit Duc ouyt ce il y entendit volentiers, & fut content que on y besongnast par tous les moyens qui pourroient estre possibles: & pour faire l'essay & aller aduiser le lieu, furent ordonnez deux gentils-hommes: c'est à sçauoir l'un du païs de Bourgongne nommé Guillaume le Greuant, & le second Robert de Miramont natif de Picardie, & avec eux aucuns autres du païs qui les conduisoient. Si se meirent à chemin & allerent par plusieurs fois veoir, & espier cōment ils pourroient faire: & aussi comment ceux de dedans se gouernoient en fait de guet: & auoient avec eux aucuns excellens eschelleurs: si trouuerent & apperceurent qu'il y faisoit bon, & que ceux de dedans s'acquittoient assez petitement de faire le guet: & adonc en y eut qui par eschelles monterent amont & aduiserent bien à leur ayse tout l'estat de ladicte ville. En apres se departirent & s'en retournerent le plus secrettement qu'ils peurent deuers le Duc de Bourgongne: auquel ils feirent leur rapport de ce qu'ils auoient veu & trouué. Sur lequel rapport ledit Duc se conclud de faire essayer de mener ceste entreprinse à fin, si le fait sçauoir au Comte d'Estampes & aux capitaines qui estoient avecques luy. En eux signifiant que c'estoit son plaisir, qu'ils feissent ladicte entreprinse, & qu'il iroit en personne avecques eux pour les secourir & ayder se besoing leur en estoit: & estoit lors iceluy Duc à Aillon, & le dessusdit Comte d'Estampes à Ez, lequel Comte d'Estampes quand il eut ouy & entendu l'intention dudit Duc, assembla grand partie des plus nobles de sa compagnie, & leur remonstra toutes les besongnes dessusdictes. Et avecques ce leur declaira l'intention dudit Duc, & leur requist que sur ce le voulsissent conseiller. Et adonc fut la besongne aucunement debatue entre eux: & en y auoit aucuns qui doubtoient aucunement à faire & conseiller ladicte

entreprinse, pour plusieurs raisons. Et en fin tout considéré se conclurent ensemble de le faire, puis que c'estoit le plaisir & ordonnance du dessusdit Duc de Bourgongne leur chef & souuerain seigneur. Et apres ceste conclusion fut aduisé à qui on bailleroit la charge de faire le premier eschellement. Si furent commis messire Gauvain Quieret, le seigneur de Bosqueaux, Guillaume de Greuant & Robert de Miramont dessus nommé, avecques les eschelleurs & de soixante à quatre vingts compagnons. Si se meirent à chemin & auoient bonnes guides du païs qui les menoient: & depuis les suyuit & r'attingnit le seigneur de Saueuses, jaçoit ce qu'il fut pour lors moult aggraué de maladie: pour la compagnie duquel ils furent bien ioyeux, & se tirerent le plus coyeement qu'ils peurent iusques à demye lieüe de Luxembourg, où ils se meirent à pied & laisserent leurs cheualx. Et puis s'en allerent tout oultre iusques au lieu, qui estoit ordonné, & eux là venuz auoient commis ceux qui deuoient premier monter, & aussi ceux qui les suiueroyent de main en main par tres bonne maniere & belle ordonnance. Et quand tout fut prest, on commença à dresser les eschelles & à monter ainsi comme il auoit esté aduisé. Et fut requis au seigneur de Saueuses qu'il demourast au pied des eschelles pour faire tenir les ordonnances, & pour faire monter ceux qui à ce estoient commis, lequel le feit & à point: car audit lieu n'y auoit homme qui bien ne se vouldist conduire par son conseil. Et quand messire Gauvain Quieret & les autres furent dedans & la plus grand partie, ils prindrent aucuns de ceux du lieu: ausquels ils firent semblant de les mettre à mort s'ils faisoient aucune noyse, & tost apres iceux allerent rompre vne poterne & ouurir pour ledit seigneur de Saueuses, & autres qui les auoient suiuius iusques à deux cens ou environ, qui y entrerent & commencerēt à crier à haulte voix, ville gaignée: duquel cry la ville fut estourdie & tout en haste crierent à l'arme en plusieurs lieux. Et entre-temps les dessusdits Bourgongnons se tirerent au marché: lequel ils gagnerent, nonobstant que ceux de dedans se fussent assemblez en petit nombre pour le garder. Si firent peu de resistance, à laquelle fut nauré ledit messire Gauvain & des dessusdits deffendeurs, en mourut deux tant seullement, & les autres se meirent de toute & parts à fuyr vers le chastel & aussi vers le bas de la ville. En apres ledit Comte d'Estampes qui les dessusdits suiuiot de pres à puissance, fut aduertie de celle prinse par plusieurs messages qu'iceux enuoyerent deuers luy, si se hasta le plus tost qu'il peut d'y venir. Et quand il fut dedans, il fut ordonné qu'on enuoyeroit certain nombre de gens deuant le chastel, pour garder la saillie de ceux qui estoient dedans: mais desia ils auoient bouté le feu tout au trauers de la rue qui estoit deuant ledit chastel: par lequel furent arses moult de belles maisons, & la plus grand partie des cheualx des gens d'armes, qui là estoient logez: lesquels en grand nombre s'estoient retraits ou chastel dessusdit. Et avec ce quand le peuple, dont il y auoit grand multitude qui s'estoit retraits en la basse ville, veit & apperceut que la ville estoit ainsi prinse, & qu'il n'y auoit point de rescousse, ils s'en issit hors & s'en alla à Thionuille & autres lieux moult desconforté en abandonnant tous ses biens. En ce mesme iour vint audit lieu de Luxembourg ledit Duc de Bourgongne. Apres laquelle venue se commencerent ses gens à loger par ordonnance par ladicte ville: dedans laquelle

quelle furent trouuées de grandes richesses & des biens en grand abondance : lesquels tantost furent tous prins , rauiz & butinez par ceux qui auoient conquis ladicte ville. Et auoit esté ordonné à faire icelle entreprinse, que tous ledits biens seroient partis & butinez egallement, & que chacun selon son estat en auroit sa portion sans y faire aucune fraude . Laquelle ordonnance ne fut point entretenue: mais en furent fraudez la plus grand partie des compagnons, par especial ceux du moyen & moindre estat:& y en eut peu qui y eurent profit, sinon aucuns des chefs de l'armée, & ceux qui auoient conduit la besongne . Et aussi autres qui furent commis à butiner, & qui eurent le gouuernement d'iceux biens . Pour laquelle fraude en y eut plusieurs qui se plainquirent l'un à l'autre, disant qu'on leur monstroït mauuais exemple d'eux vne autrefois aduenturer leur corps, pour gagner ce où ils n'auoient riens: neantmoins quelque plainte qu'ils en feissent n'en peurent auoir autre chose . Ains furent contrains assez rigoureusement tant par serment comme autrement, d'apporter ou deliurer ce qu'ils auoient trouué en la main desdits butineurs . A laquelle assemblée ou besongne estoit le seigneur de Humieres, qui exerçoit l'office de Mareschal . Auquel office il a esté commis de par le seigneur de Beaumont, le Mareschal de Bourgongne . Aussi estoit avecques ledit Duc de Bourgongne des marches de Picardie, le Comte d'Estampes dessus nommé, le seigneur de Croÿ Comte Porcean, Vvaleran de Moreul, messire Symon de Lalaing, Guy de Roye, messire Robert de Saueuses son frere Hue de Hames, Hue de Longueual, le seigneur de Bosqueaulx, messire Anthoine de Vvisoch & moult d'autres nobles hommes . Et des marches de Bourgongne le seigneur de Ternant, messire Pierre de Baufremont seigneur de Chagny, le seigneur de Brassy, Charles de Rochefort, Philebert de Vaudray, Jean de Vaudray, Philebert d'Aincourt & aucuns autres cheualiers & escuyers en grand nombre. Et quand est audit Comte du Clicq il se retrahit avecques ses gens dedans le chastel: mais depuis se desroba de nuict secrettement, & s'en alla tout de pied à Thionuille: lequel chastel de Luxembourg se detint depuis ladicte prinse enuiron trois semaines : durant lequel temps de ceux de dedans fut occis messire Jean bastard de Dampierre d'un traict, dont il fut frappé par la teste. Et ledit seigneur de Saueuse à vne faillie que auoient faicte aucuns dudit chastel, fut nauré tresgriueusement d'un vireton en la poictrine, dont il fut en peril de mort . Mais par la diligence des cirurgiens dudit Duc de Bourgongne, tourna depuis à guarison. En la fin desquelles trois semaines le dessusdit Comte du Clicq feit traicté avec les commis du dessusdit Duc de Bourgongne, moyennant que ses gens qui estoient audit chastel de Luxembourg s'en iroient sauf leurs vies, & si n'emporteroient riens de leurs biens . Et avec ce rendit la ville de Thionuille, & se retourna en son paÿs d'Allemaigne à grand perte, honte & confusion de luy & de ses gens. Et par ainsi iceluy Duc de Bourgongne eut pleine obeissance de ladicte Duché de Luxembourg en peu de temps, & à petite perte de ses gens. Auquel lieu alla la Duchesse sa femme, & avec elle la Duchesse de Luxembourg: laquelle auoit fait ou feit traicté avec ledit Duc par condition, qu'il iouyroit de ladicte Duché toute sa vie durant, & y auroit tout tel droit qu'elle y auoit:& il luy en rendroit par chacun an la somme de dix mille francs mon-

noye de France. Auquel temps ledit Duc de Bourgogne auoit fait publier luy estant en sa ville de Luxembourg, que nul de quelque estat qu'il fut ne print debat, ne ne fait aucune extortion aux seigneurs du païs n'à leurs gens, qui estoient en sa compagnie des marches d'Allemagne & de ladicte Duché. Laquelle publication fut enfreinte par vn sien archier de corps nommé le petit Escoçois, qui print debat à messire Pierre Bernard, & de fait le ferit aucunement: pour lequel fait ledit Duc le fait pendre. Et nonobstant plusieurs prieres d'aucuns grans seigneurs de son hostel, & aussi dudit messire Bernard qui luy pria pour au dessusdit sauuer sa vie, le fait pendre ja fut que moult l'eust aymé par auant, & que bien fut content de son seruice. Mais il le fait principalement affin de bailler exemple à tous autres, qu'ils ne fussent si osez de rompre & enfreindre ses edits & ordonnances. Item en ce temps furent mis plusieurs ambassadeurs sus d'entre les deux Roys de France & d'Angleterre: lesquels tressouuent alloient d'un païs en autre, pour trouuer moyens de paix entre les deux Royaumes, ou du moins r'alonger les trefues. Et pour lors le Roy de France se tenoit à Tours en Touraine. Auquel lieu se tindrent plusieurs grans conseils & moult d'assemblées sur ceste matiere: ausquelles estoient mandez & euocquez tressouuent les trois estats de son Royaume. Toutesfois nonobstant lesdictes assemblées se mouuoient continuellement les deux parties, & menotent grosses & fortes guerres les vns aux autres.

Comment aucuns des gens du Daulphin se tirerent vers le pais de Bourgogne: lesquels furent ruez ius par le Mareschal de Bourgogne & les siens.



V commencement de cest an le Daulphin de Viennois premier fils du Roy retourna deuers son pere, qui estoit à Tours en Touraine. Et auoit ledit Daulphin esté moult grand espace de temps au païs de Languedoc, tant pour le fait du Comte d'Armignac comme pour autres affaires. Auquel retour moult de gens de son armée se tirerent sur les marches de Bourgogne, où ils feirent de grans desroys comme autresfois auoient fait. Si s'en allerent loger à vn gros village nommé Espoise, auquel lieu leur vint courre sus le seigneur de Beaumont Mareschal de Bourgogne accompagné de plusieurs nobles du païs, & y eut dure rencontre entre eux: mais en fin par la diligence & vaillance dudit Mareschal & d'aucuns autres seigneurs de sa compagnie, furent iceux François tournez à desconfiture & y eut grand nombre que morts que prins. Et brief ensuiuant en furent portées les nouuelles audit Daulphin, & luy fut dit comment ses gens auoient esté ruez ius ou païs de Bourgogne: lequel Daulphin iura lors vn grand serment qu'il s'en iroit lors ou païs pour les contreuenger. Et d'autre part le Duc de Bourgogne fut aduertty de ce que ledit Daulphin auoit dit & iuré. Si dit pareillement qu'il iroit ayder à garder son païs. Et par ainsi eut aucun commencement de rigueur entre ces deux Princes: mais assez brief apres par le moyen d'aucuns notables & sages personnes d'un costé & d'autre, furent les choses rappaisées, & ledit Daulphin refraignit son ire & son courroux.

Comment

Comment vnes trefues furent faictes & données entre les Roys de France & d'Angleterre, & tous leurs parens, amis & alliez & subiects.



Tem durant le temps dessusdit se continuerent à Tours en Touraine les assemblées & traictez d'entre les deux Royaumes de France & d'Angleterre : auquel lieu estoient plusieurs Princes & grans seigneurs du Royaume de France en personne, & ceux qui point n'y estoient, auoient enuoyé grans & notables ambassadeurs, ayant pouoir suffisant de par les seigneurs qui les auoient enuoyez. Entre lesquels y estoient de par le Duc de Bourgogne messire Jean de Croÿ Baillif de Hainault, le Prieur de Vergy, maistre Oudart Caperel & autres notables hommes : & aussi y estoient ceux des bonnes villes en tresgrand nombre. Et pareillement de la partie du Roy d'Angleterre y estoient à tout pouoir suffisant messire Guillaume de la Poulle Comte de Suffort, maistre Adam Melaine garde du priué seel du Roy d'Angleterre & Doyen de Salsebery, messire Robert de Roz & autres : lesquels tous ensemble par diuerses iournées s'assemblerent l'un avec l'autre, & furent faictes plusieurs ouuertures entre icelles parties pour venir & conclurre à paix generale : mais finalement pour les grans difficultez qui pour lors estoient entre les parties, ne pouoient venir ne eux accorder à ladicte paix generale : mais sur esperance d'y paruenir, prindrent vnes trefues & abstinence de guerre iusques à certain temps entre les dessusdictes parties : lesquelles s'entretindrent assez seulement dont du contenu la teneur s'ensuyt.

CHARLES Duc d'Orleans & de Valois, Comte de Blois & de Beaumont, seigneur de Coucy & d'Oisy : Loÿs de Bourbon Comte de Vandomme & de Chartres souuerain maistre d'hostel de France, Pierre de Bresé seigneur de la Varenne & de Bresac Seneschal de Poitou & d'Auignon, Berthran de Beauuau seigneur de Precigny cheualier conseiller & chambellan de tresexcellent Prince le Roy de France nostre tresredoubté & souuerain seigneur. A tous ceux qui ces presentes lettres verront salut : comme nostre saint pere le Pape ait tressouuentesfois prié, requis & exhorté par ses lettres & messages, & mesmemēt dernièrement par reuerend pere en Dieu l'Euesque de Viese son ambassadeur & messagier : le Roy nostre tresredoubté & souuerain seigneur de condescendre & vouloir entendre par moyen de longue trefue ou autrement à bonne paix, vnion & concorde avecques treshault & trespuissant Prince son nepueu d'Angleterre : lequel pour ceste cause a depuis nagueres enuoyé & transmis à tout certain pouoir par deuers nostre tresredoubté & souuerain seigneur ses solumelz ambassadeurs & messages : c'est à sçauoir Guillaume de la Poulle Comte de Suffort grand-maistre d'hostel d'iceluy treshault Prince, maistre Adam Melaine garde de son priué seel docteur en loix Doyen de Salsebery, messire Robert de Roz, messire Thomas Hors cheualier, Richard d'Andrene Secretaire dudit treshault Prince, & nepueu d'iceluy souuerain seigneur : de laquelle chose le Roy nostre tresredoubté seigneur pour reuerence de Dieu, pour la pitié qu'il a tousiours eüe & a des grans dommages & afflictions, que le poure peuple d'une partie & d'autre a eu longuement & a encores à souffrir & porter à

l'occasion de ladicte guerre, & pour euitier l'effusion du sang humain, s'est liberallement condescendu pour besongner en ceste matiere avecques lesdits ambassadeurs de sondit nepueu : & sur tout communiquer, traicter & appoincter avecques eux, luy ait pleu nous commettre & deposer de sa part & nous bailler ses lettres des pouoir dont la teneur s'ensuit.

CHARLES Duc d'Orleans. &cæt. Sçauoir faisons qu'apres ce que pour traicter de ladicte paix & trefues, nous sommes assemblé par plusieurs iournées en ceste ville de Tours avec iceux ambassadeurs d'Angleterre : nous à leur requeste, auons par vertu à nous donnée en esperance principale de paruenir par traict de temps à bonne paix & accord final, entre nostre trefredoubté & souuerain seigneur & sondit nepueu & des Royaumes de France & d'Angleterre : octroyé, consenty, promis & accordé : & par ces presentes consentons, octroyons, accordons & promettons, pour & ou nom de nostre trefredoubté & souuerain seigneur avec les dessusdits Comtes de Suffort & autres ambassadeurs d'Angleterre dessus nommez, & eux aussi avec nous par vertu de pouoir à nous donné : duquel la teneur s'ensuit.

HENRICVS. &cæt. trefues generalles pour le Roy nostre souuerain seigneur son Royaume tant par terre, par eaüe douce comme par mer ses vassaulx & subiects. Et mesmement pour trespouissans Princes les Roys de Castille, des Rommains, de Lihons & Cecille Duc d'Anjou, de Bar & de Lorraine, le Roy d'Escoce, monseigneur le Daulphin de Viennois aussi fils de France : Nous Duc d'Orleans dessus nommé, les Ducs de Bourgongne, de Bretagne, de Bourbon, & d'Alençon, le Comte du Maine & generallement pour tous les seigneurs du sang du Roy nostredit souuerain seigneur & ses autres subiects, amis & alliez & adherans, & par tous leurs Royaume Daulphiné, de Viennois, Duchez, Comtez & par tous les autres païs, terres & seigneuries qu'ils ont & tiennent tant en ce Royaume que dehors, & pour tous leurs vassaulx & subiects : c'est à sçauoir au regard desdits amis & alliez & adherans non suspects, se comprins y veulent : lesquels alliez, aydans & adherans qu'ils y voudront comprendre, si comprins y veulent estre, à non suspects d'un costé ne d'autre : seront tenuz de promettre & iurer à garder ladicte trefue & de reparer ce que par eux, où les leurs seroit fait au contraire. A commencer lesdites trefues par tout le Royaume de France, tant par terre comme par eaüe douce & és ports de mer. C'est à sçauoir en la Duché de Guyenne & païs de Gasconne, & és ports de mer & és isles qui y sont, le quinzième iour de May prochainement venant à soleil leuant & en tous les autres païs & contrées d'iceluy Royaume. Et au regard de la mer le premier iour de Iuillet apres ensuiuant ladicte heure de soleil leuant, par tous les Royaumes d'Angleterre & seigneuries d'Irlande & de Galles. Et par toutes les autres seigneuries & isles quelsconques dudit treshault & puissant Prince & nepueu de nostredit seigneur, dudit iour de Iuillet prochainement venant à soleil leuant. Et au regard de ladicte mer le premier iour de Iuillet prochainement venant à soleil leuant. Et au regard desdits alliez d'un costé & d'autre, commenceront icelles trefues apres ce qu'on aura signifié la declaration de leur voulenté d'une
part

part & d'autre. Et suffira pour la descharge & acquit du Roy nostredit & souverain seigneur, qu'il face signifier ladicte declaration & voulenté desdits alliez à celuy qui aura la charge & gouvernement pour ledit treshault & puissant Prince son nepueu d'Angleterre deça la mer és parties de Normandie & de Guyenne. Et au regard d'iceluy trespuissant Prince & nepueu, il suffira qu'il face faire ladicte signification à la Court de Parlement à Paris. Et dureront lesdictes trefues commençans comme dessus iusques au premier iour de Aupil prochainement venant à ladicte heure de soleil leuant, l'an reuolu qu'on comptera selon l'usage de ce Royaume, l'an mille quatre cens quarante cinq auant Pasques.

I T E M durant les trefues dessusdictes cessera & fera le Roy nostredit souverain Seigneur cesser toute guerre & voye de fait, entre luy & ses Royaumes, païs & subiects, & aussi alliez, ainsi que dit est. Et ledit treshault & puissant Prince & nepueu de nostredit souverain Seigneur, n'aydera ne souffrira aucuns de ses subiects du Roy nostredit Seigneur ne autre quelconque personne à l'encontre de luy, n'à son preiudice & dommage. Et pareillement ne fera le Roy nostredit tresredoubté & souverain Seigneur, au regard dudit treshault & puissant Prince son nepueu.

I T E M & pendant icelles trefues ne pourra l'une desdictes parties ne ses gens prendre au party & obeissance de l'autre aucunes citez, villes, places, forteresses ne autres lieux par force, par emblée ne par eschellemens de iour ne de nuit pour vendition, tradition, seduction ne autrement en quelque maniere, ne sous quelque couleur ou moyen que ce soit : & cesseront & fera nostre tresredoubté & souverain Seigneur cesser toutes prinſes de personnes quelsconques de quelque estat ou condition qu'ils soient & rançonnemens (excepté les rançons de ceux qui auoient esté prins par auant lesdictes trefues) pilleries, roberies, & boutemens de feu & tout autre fait & exploit de guerre. Et ne pourront ne deurent les gens de l'une desdictes parties tenir compaignie de gens de guerre au party de l'autre, ne y porter aucun dommage.

I T E M sil aduenoit que les gens de l'une desdictes parties prinſſent aucune ville, cité, place, ou forteresse sur l'autre partie qui auroit fait ladicte prinſe : audit cas sera tenu de rendre & remettre ladicte place és mains & obeissance de l'autre ainsi qu'elle auoit esté par auant icelle prinſe, & tout reparer & restablir. Et au cas que sans force d'armes ceux, qui auroient ainsi fait ne voudroient obeyr ne rendre ladicte place : la partie à qui ils auroient esté par auant ladicte prinſe ou au temps d'icelle, sera tenue de les faire à ses despens : & aussi sera tenue l'autre partie en ce, si elle en est requise. Et supposé que ladicte reparation ne peust estre faicte pendant lesdictes trefues. Neantmoins la partie à laquelle feroient ou auroient esté par auant au temps d'icelle prinſe, ceux qui auroient faicte ladicte prinſe, seront tenuz de la rendre & reparer tout entierement.

I T E M pendant lesdictes trefues tous les subiects d'un costé & d'autre, pourront desormais aller, venir, demourer & marchander de toutes marchan-

dises (reserué habillemens de guerre) seurement & paisiblement : & faire toutes les autres œuures & besongnes licites les vns és paÿs des autres , sans estre empeschés ; arrestez ou molestez en quelque maniere que ce soit pour marque , represaille , entreprinse ne pour quelque debte , obligation ne autres choses faictes ou aduenues par auant lesdictes trefues , en payant tous peages accoustumez és lieux & paÿs par où ils passent : pourueu toutesfois que les subiects , nobles ou gens de guerre de l'une desdictes parties ne pourroient entrer és chasteaulx , villes fermées , & autres forts lieux , en l'obeissance l'un de l'autre , sans demander licence ou congé aux seigneurs ou capitaines desdits lieux ou de leurs lieutenans , & qu'ils soient desarmez & en petit nombre . Et au regard des vrays pellerins ils pourront aller en compagnie grande moyenne ou petite , ainsi que pellerins ont accoustumé de faire en tous lieux , où il y a pellerinages anciennement accoustumez . Et au regard d'eux & des personnes comme marchans & autre menu peuple , il suffira qu'ils demandent & obtiennent congé & licence d'entrer esdictes villes , chasteaulx & forteresses aux portiers d'icelles .

I T E M pource que plusieurs des subiects du Roy nostredit trefredoubté & souuerain Seigneur , ont en l'obeissance de fondit nepueu d'Angleterre plusieurs terres & seigneuries : desquelles ils ont par cy deuant iouÿ en tout & en partie : par mains de fermiers ou autrement , ils en pourront iouyr durant lesdictes trefues , ainsi & par la forme & maniere qu'ils faisoient par auant icelle .

I T E M & au regard des appactiz qui ont accoustumé d'estre leuez d'un costé & d'autre , il en sera fait & ordonné par les conseruateurs desdictes trefues & par autres commissaires , qui y seront commis & deputez de par le Roy nostre souuerain Seigneur de sa part , & par lesdits ambassadeurs ou autres commis de par son deuantdit nepueu d'Angleterre .

I T E M & si aduenoit que aucuns attemptaz feussent faits à l'encontre desdictes trefues , que Dieu ne vueille , elles ne seront pas pource corrompues , ne pour ce ne sera faicte guerre ne d'un costé ne d'autre : mais demourront les dessusdictes trefues en leur force & vertu , tout ainsi & par la forme & maniere que si aucune chose en auoit esté fait au contraire . Mais lesdits attemptaz seront reparez par lesdits malfaicteurs , & iceux punis par les conseruateurs & commissaires , qui à ce seront commis & ordonnez & de par nostredit souuerain Seigneur pour sa part , & de par ledit Prince son nepueu pour la sienne .

I T E M & si durant lesdictes trefues aucune question ou debat s'esmouuoit par l'une des dessusdictes parties à l'encontre d'aucuns des autres subiects ou alliez , de l'autre : icelle partie ne pourra pour ce soubstenir ne soy alier auecques celui , contre lequel ledit debat seroit ainsi esmeu & commencé . Toutes lesquelles choses dessusdictes & chacune d'icelles : nous Duc d'Orleans , Comte de Vendosme & autres dessus nommez commis & deputez de par ledit trefredoubté & souuerain Seigneur le Roy de France : auons promis & iuré , promettons & iurons pour ou nom & en l'ame de nostredit souuerain Seigneur le Roy , par ses presentes faire auoir agreable à mondit trefredoubté

tresredoubté & souuerain Seigneur . Et par ces patentes telle qu'il apparten-
dra, & que le cas le requiert la tenir & approuuer, & ratifier, confermer &
en bailler ses lettres en la ville de Rouën à celuy, qui aura le gouuernement
de sondit nepueu deça la mer dedans le quinzième iour de Iuillet prochain ve-
nant. Pourueu que ainsi le face de la part du dessusdit treshault & puissant Prin-
ce le nepueu de nostredit souuerain Seigneur, estant illec dedans ledit terme.
En tesmoing de ce nous & chacun de nous en droit foy, auons signé de noz
mains & fait seeller de noz seaulx sesdictes presentes lettres . Données audit
lieu de Tours le vingtiesme iour de May l'an de grace mille quatre cens qua-
rante quatre . Et en traictant toutes les besongnes dessusdictes, furent faictes
plusieurs ouuertures . Aussi pour traicter le mariage du dessusdit Roy Henry
d'Angleterre avecques la fille du Roy René de Cecille Duc d'Anjou, de Bar
& de Lorraine, lequel depuis fut parfait & confirmé comme cy apres sera de-
clairé en mon tiers liure .

*Cy finist le second volume d'Enguerran de Monstrelet, Avecques les grandes
Chroniques des Roys de France : des Papes regnans en leurs temps : &
plusieurs autres nouvelles choses aduenues en Lombardie : és Itales
& autres diuers païs, és temps du regne desdits Roys . Le tout
fait & adiousté avecques la Chronique dudit de Monstre-
let, acheué d'imprimer à Paris, par Iean le Blanc,
l'an de grace mille cinq cens
septante & un.*

LA TABLE DES CHOSES PLUS NOTABLES DV SECOND VOLUME.

A



A duenement du Roy Charles vij. à la couronne de France.	1 a.
A dventure au Roy Charles vij. pour la ruine d'une maison en la ville de la Rochelle, dont mourut Iean de Bourbon seigneur de Preaux.	1. b.
A dventure dangereuse au Duc de Bourgongne à Bourges.	140. a.
A lençon prisonnier entre les mains des Anglois sollicité par le Duc de Bedford de prendre leur party le refuse constamment.	25 a.
A lençon & ce qu'il fait contre le Chancelier de Bretagne.	77. a.
A mé Duc de Sauoye se rend hermitte à Rapaille, & sa maniere de viure & de se vestir.	99. b.
A mbassade des Parisiens en Angleterre, pour auoir secours contre le Roy Charles.	2. a. & 45. b.
A miens ville de Picardie affectonnée à la part de Bourgongne.	51. a.
A miens cité mutinée contre les Bourguignons.	118.
A ugure fort Chasteau & ce qui y aduint.	69. b.
A nnellement fait par le priuè conseil du Roy d'Angleterre du chāp de duel entrepris entre les Ducs de Bourgogne & de Cloestre par ce qu'il fut trouué qu'il n'y auoit point de iuste cause de combat.	27. a.
A nthoine prince fils du Duc Philippes meurt le premier, an de sa naissance.	67. a.
A nuers cité en Brabant mutinée contre le Duc Philippes, & l'occasion de ce.	102. a.
A rmée François & Angloise en bataille l'une deuant l'autre au mont Espilloy pres Senlis sans se mesler	48. b.
A rras & la grand assemblée des potentats de chrestienté pour composer les guerres de France.	104. b.
A ssemblée notable de plusieurs Ducs & grands seigneurs à Arriens pour se liguier ensemble.	4. b.
A ssemblée de Bourguignons & François à Mascon pour composer les troubles.	18. b.
A ssemblée des Princes de France à Neuers, pour auiser aux affaires du Royaume de France & aux differents qu'ils auoient contre le Roy.	186. b.
A ithelles Conte puny pour la trahison qu'il auoit cōmise en la personne du Roy d'Escoffe.	157. b.
A uffemont gentilhomme pris prisonnier en trahison par la Hyre.	97. b.
A umarle Comte au seruice du Roy Charles vij.	2. b.
A uergnacs constants du seruice au Roy Charles vij. cōtre son fils,	167. b.

B

B ac à Bery ruiné par les Bourguignons.	172. a.
B arbazan Capitaine Lorrain.	69. b.
B astard de Bourbon accusé deuant le Roy de plusieurs crimes pour punition desquelz il fut ietté dedans un sac en l'eau.	178. b.
B ataille présentée par les François au Duc Philippes de	

B ourgongne, & la responce qu'il fait.	66. b.
B ataille présentée par les Bourguignons au Duc de Bourbon.	96. b.
B audencourt capitaine de Vaucouleur, fut le premier qui adressa la Pucelle Iehanne au Roy Charles vij.	41. b.
B auffremont seigneur de Chargny tenāt les ioustes en Bourgongne au pas de l'arbre des Hermites.	144. a.
B eauprain ruiné par les Liegeois.	126. b.
B lanchefort capitaine François.	83.
B lanchefort ranage le pays d'Artoys.	85. a.
B osqueaux gentilhomme Picard du parti Daufinois pris dans le chasteau de Choisy par les Anglois & depuis escartelé à Paris.	1. b.
B ouqueu Comte Escoffois au seruice du Roy Charles vij.	2. b.
B outeiller capitaine Anglois chef de l'armée Angloise au siege du Crotoy.	7. a.
B ourguignons en guerre contre les Anglois.	123. a.
B ournouille capitaine François, pour la part Angloise nauré à mort à l'assault de Creil.	50. a.
B onsac Mareschal de France fault à surprendre le Chasteau de Rouē sur les Anglois & ce qui en aduint.	77. b.
B onsach mareschal de France, leu le siege de Clermont en Beauuoisis.	65. a.
B rabant Duché par quel moyen il vint en la maison de Bourgongne.	60. b.
B rimen Mareschal du Duc de Bourgongne.	51. a.
B rimen capitaine Bourguignon pris par les François & sa troupe deffaite.	57. a.
B ruiges en sedition contre le Duc Philippes.	136. a.
B ruiges en reuolte contre le Duc de Bourgongne.	159. a.
B rugeois pacifié avec le Duc de Bourgongne.	144. b.
B rugeois en Traicté avec le Duc de Bourgongne.	150. a.
B rugeois font amande honorable au Duc de Bourgongne.	175. b.
B ueil & la Varenne deffont les Anglois assiegeans Beaumont le Viconte.	97. b.
B ulle du Pape Eugene contre Amé Duc de Sauoye.	155. b.

C

C alamitez par la France de peste famine & de guerre tout ensemble.	151. a.
C ambellan capitaine Anglois prisonnier, pour auoir rendu par composition le Marché de Meaux.	163. a.
C hasteauuillain gentilhomme Bour. despesché de ses terres.	71. a.
C hartres cité estoit de la faction Bourguignonne & comme elle fut reprise par les François.	79. b.
C hauny sur Oyse & la pouruoiance des habitans du lieu qui ruinerent le chasteau de leur ville pour demeurer en liberté.	79. a.
C hampaigne reduite en l'obeissance de Charles vij.	47. a.
C hampremy vaincu en duel par Rosebecque.	6. a.
C habanes cheualier François vaillant & renommé.	52. b.
C ipre Royaume & la guerre qu'y fait le Soldan.	11. b.
C hippre royaume en leuant & des affaires dudict pays.	25. b.
C lassandas capitaine Anglois renommé.	43. a.

A

TABLE DV SECOND VOLUME

Cloesttre Duc Anglois sous couleur de l'illegitime mariage de luy & de la Duchesse Iacqueline occupe Hainault.	18.b.
Cloesttre refusé au conseil du Roy d'Angleterre de secours & de gens & d'argent, pour la guerre de Hainault & les rigoureux termes qui luy furent tenuz.	25.b.
Cloesttre Duc Anglois avecq armée Angloise court & ravage Flandres & Artois.	154.b.
Combat en camp cloz, de Poton de sainte Treille contre Lyonnet de Vandonne devant le Duc de Bourgongne.	5.b.
Combat en dueil entre un Espagnol & un Bourguignon.	105.b.
Commercy Damoiseau assiege pour neant la forteresse de Montagu en Champaigne que les Bourguignons avoient occupé sur luy.	56.a.
Commercy ennemy du Comte de Ligny luy surprend sa ville.	85.b.
Concille de Basle & l'origine du schisme qui en aduint.	71.a.
Commercy Damoiseau guerroyé par le connestable de France, par ce qu'il estoit desobeissant au Roy.	125.a.
Concille de Basle.	97.a.
Concile de Basle & ce qui y fut déterminé contre le Pape Eugene.	152.b.
Couuete religieux Breton de l'ordre des Carmes presche contre les haults atours & abillemens pompeux d'hommes & femmes.	39.a.
Couuete predicateur déclaré heretique & condamné à estre ars à Rome.	84.b.
Conspiration des cheualiers de Vermandois contre la part Bourguignonne & Angloise.	13.a.
Corbie assailly pour neant de la part Françoise.	69.b.
Courses des François en Cambresis & Artois.	92.b.
Courses de François sur les Bourguignons.	105.
Courses d'Anglois sur les Bourguignons, deffaite de Flamans.	117.a.
Creuencueur & Sauenses partizans pour Bourgongne.	55.b.
Crotoy seigneur du Crotoy capitaine pour la part Bourguignonne.	3.b.

D

Deffaite du Mareschal de Bourgongne nommé Toulangeon par la Bußiere capitaine Francois.	8.b.
Deffaite de Bourguignons par les Holandoys.	28.a.
Deffaite d'Anglois & de Holandoys, venans au secours de la Duchesse Iacqueline, par le Duc Philippes de Bourgongne.	28.a.
Deffaite de Bretons par les Anglois.	35.b.
Deffaite de Bretons par les Anglois.	35.a.
Deffaite de François pres Beauvais par les Anglois.	54.a.
Deffaite de Bourguignons, voulans leuer le siege de Chappes pres Troyes.	57.b.
Deffaite des communes de Reims par les Anglois, devant Champigneux.	60.b.
Deffaite de Bourguignons.	62.a.
Deffaite d'Anglois & Bourguignons pour Poton de sainte Treille, par Garmigny.	66.a.
Deffaite de Bourguignons voulans prendre le fort saint Vincent.	67.b.
Deffaite de François, par le Comte de saint Pol.	92.b.
Deffaite d'Anglois à Beaumont le Viconte au Maine.	97.b.

Deffaite de François par Caroan Anglois.	100.a.
Deffaite des François par les Bourguignons.	104.a.
Deffaite de François par les Anglois, dont estoit chief Messire Thomas Kiriel.	121.
Deffaite de Bourguignons par les Anglois pres de Ardre.	128.a.
Deffaite de François voulans surprendre Rouen.	158.b.
Deffaite de Bourguignons par le Bourg de la Hire.	141.a.
Deffaite de pillars par Iehan de Luxembourg.	169.a.
Deffaite de Picars par les Anglois.	179.a.
Delivrance du Roy de Cypre moyennant deux cents mil escuz de rançon payez au Souldan d'Egipte.	31.a.
Delivrance du Duc de Lorraine, du Roy de Cecile, hors des mains du Duc de Bourgongne.	137.a.
Dieppe ravitaillée par les François.	193.b.
Dimanche de Court capitaine François, & ses troupes deffaites par les Bourguignons durant la paix, dont le Roy Charles vij. fut fort mary.	196.a.
Dissention entre le Duc de Betfort & le Duc de Bourgongne.	87.b.
Divisions en la court d'Angleterre entre le Cardinal de Vvicesstre & le Duc de Cloesttre, pour le gouvernement du ieune Roy.	27.b.
Dueil en court de Bourgongne, entre Maillotin de Bours & Hector de Flauy.	68.a.

E

Empoisonneur puny, pour avoir voulu empoisonner le Duc Charles d'Orleans.	181.a.
Entrée pompeuse du Roy Henry d'Angleterre en Paris comme Roy de France.	75.b.
Entrée du Roy Charles septiesme en Paris, la apres qu'elle fut reduicte en son obeissance, l'appareil & magnificence de sa reception.	143.a.
Entreueue des Ducs de Bourbon & Bourgongne.	52.a.
Bourgongne & de Bourbon à Neuers, le pourparlé de paix qu'ils eurent pour la paix finalle.	98.b.
Entreueue des Ducs Charles d'Orleans, & Philippes de Bourgongne, leur finalle reconciliation.	173.b.
Escorcheurs bandes Françoises ainsi nommées, & ce qu'ils feirent.	153.b.
Escorcheurs vont à Basle	153.b.
Estampes Comte issu de la maison de Bourgongne, lieutenant pour le Duc Philippes au pais de Picardie & ce qu'il feit sur les François.	94.a.
Evasion de la Contesse de Hainault hors la puissance du Duc de Bourgongne.	27.a.
Eugene Pape retenu par force en Rome par les Romains.	94.b.
Eu Comte de retour de la prison d'Angleterre.	153.a.

F

Famine en l'an 1437.	147.a.
Fange gentilhomme de la maison du Comte de Richemont, Connestable de France, decapité pour trahison avecq luy un sergent du Chastelet de Paris.	163.a.
Fascot capitaine Anglois fuit à la Bataille de Patay, & le reproche qu'il en eut.	45.b.
Fescamp en Normandy, & ce qui y aduint.	45.a.
Flauy capitaine François, lieutenant pour le Roy Charles vij. en Compienne, lors qu'elle estoit assiegée.	58.b.

D'ENGVERRAN DE MONSTRELET.

Fosseux cheualier pour la part Angloise, capitaine de Domart en Pontieu. 3.b.
 Faulques cheualier Anglois, & l'entreprise qu'il feist. 52.b.
 Forte-espice capitaine François dedans Aualon contre les Bourguignons. 90.a.
 Franquet d'Arras capitaine Bourguignon, & sa troupe de trois cents hommes deffaicts par la pucelle Iehanne: le supplice d'iceluy. 57.a.

G

Gantoys en trouble. 73.a.
 Gantoys en armes, avec le Duc Philippes assiege Calais, leur equipage & preparatifs. 127.b.
 Gantoys mutinez. 138.b.
 Gantoys mutinez. 148.a.
 Gaucourt gouverneur du Dauphiné. 62.a.
 Gribanual capitaine Bourguignon occis par les communes estant prisonnier. 67.b.
 Guise Comté cedée & transportée par le Duc de Lorraine au Comte de saint Pol. 86.a.

H

Harcourt capitaine Normant, pour la part Dauphinoise. 1.b.
 Harcourt deffend le Crottoy contre les Anglois. 7.a.
 Harcourt occis cuidant prendre le seigneur de Partenay son beau-pere. 9.b.
 Hainault & la Contesse dudit pais reduict en la puissance du Duc de Bourgongne. 23.b.
 Henry Roy d'Angleterre, fils de la fille de Charles vij. entre à Paris. 58.a.
 Heresies en Boësmé. 4.a.
 Helly capitaine Bourguignon à la deffaite de Garmigny. 66.a.
 Heretiques husites. 3.b.
 Hire autrement dict Estienne de vignolles rend Victry en Partois & autres lieux aux Bourguignons. 17.a.
 Hire autrement nommé Estienne de Vignolles prend d'emblée la ville de Louviers en Normandie. 54.b.
 Hire pris par Offemont, & le moyen de sa deliurace. 192.b.
 Hollande, Zellade, & Frize escheuz en la maison de Bourgongne, & par quel moyen. 84.b.
 Hostidonne Comte Anglois au secours du Duc de Bourgongne deuant Compiengne. 192.b.
 Humieres & le Bastard de saint Pol, prouocquent les Anglois au combat sur la querelle du Duc de Brabant, contre le Duc de Clocestre. 25.a.
 Humieres & le Bastard de saint Pol capitaines Bourguignons deffaicts & pris par les François. 83.b.

I

Iehanne la Pucelle comme elle vint en la court de France. 41.b.
 Iehanne la Pucelle au secours d'Orleans. 42.b.
 Iehanne la Pucelle prise deuant Compiengne par les Bourguignons. 58.a.
 Iehanne la Pucelle condamnée à estre arse, & la teneur de sa sentence. 10.a.
 Ioustes & tournois à Bruxelles. 40.a.

Ioustes en court de Bourgongne, à fer emolu, de cinq François contre cinq Bourguignons. 55.b.
 Ioustes en Bourgongne leuées par Pierre de Bauffremont, loix & conditions d'icelles. 194.a.
 Iort Duc Anglois chassé des forteresses d'autour de Rouen par les François. 136.b.
 Iuisset & Mille de Faulx aduocats en Parlement à Paris, chargez avecq autres d'auoir voulu trahir Paris aux Anglois, & la punition qui en fut faicte. 138.b.
 Isle Adam capitaine renommé de la faction Bourguignonne, deliuré de prison en laquelle il estoit par commandement du Roy Henry d'Angleterre, & restitué en ses estats. 1.a.
 Isle Adam faict Mareschal de France par le Roy Henry d'Angleterre. 77.a.
 Isle Adam occis à Bruges. 14.a.
 Isle cheualier Anglois renommé meurt au siege d'Orleans. 38.b.

K

Kriel Anglois surprend Pothon de sainte Treille. 142.b.

L

La Poulle capitaine Anglois, les courses qu'il feist en Anjou, & sa deconfiture. 4.a.
 Lettres de deffiance des Ducs de Bourgongne, & de Clocestre l'un contre l'autre. 19.a.
 Lettres du Pape, sur le faict du mariage du Duc de Brabant & de la Contesse de Hainault. 25.a.
 Lettres de la Contesse de Hainault au Duc Clocestre. 24.a.
 Lettres de deffiance du Duc de Betfort au Roy Charles vij. 47.b.
 Lettres du Roy Henry d'Angleterre, aux estats de Holande pour les mutiner contre le Duc Philippes leur seigneur. 121.b.
 Lettres de Mesire Iehan de Luxembourg aux cheualiers de la toison. 159.b.
 Lettres secondes de Mesire Iehan de Luxembourg, Comte de Ligny aux gens du grand conseil du Duc de Bourgongne. 173.b.
 Liegeois en guerre contre le Duc Philippes. 40.b.
 Liegeois en guerre contre les Bourguignons. 89.a.
 Liegeois en armes contre les Bourguignons. 126.a.
 Lion Cité mutinée contre le Roy Charles vij. 158.b.
 Longueuille chasteau en Caux, iadis donné à Bertrand Glesquin, & depuis à la Hire. 152.a.
 Luzignan maison illustre regnant en Chipre. 81.b.
 Luxembourg Duché conquise par le Duc de Bourgongne. 196.b.

M

Mansiart d'Esue pris dans le chasteau de Victry par la faction Orleanoise dont il estoit. 1.b.
 Marcouffy & Mont-lhery forteresses pres Paris rédues aux Anglois par la composition de Meulant. 4.a.
 Mariage illegitime du Duc de Clocestre avec la Contesse de Haynault. 4.a.
 Mariage de Anne de Bourgongne seur du Duc Philippes avec le Duc de Betfort, oncle du Roy d'Angleterre. 5.b.

TABLE DV SECOND VOLUME

Mauroid de saint Leger, capitaine Bourguignon prisonnier par le commandement du Duc de Bourgongne. 6.b.
 Mariage de Iehan de la Trimouille, seigneur de Iouuelle avecq la seur du seigneur d'Amboise. 18.a.
 Mariage du Duc de Bourgongne, avecq la vefue du Comte de Neuers son oncle. 18.a.
 Mariage du Comte de Clermont fils du Duc de Bourbon & de Agnes de Bourgongne, seur du Duc Philippes. 27.a.
 Mariage du Duc Philippes avecq la fille du Roy de Portugal. 54.a.
 Mariage du fils de Sauoye à la fille du Roy de Chipre. 93.a.
 Mariage de Iehanne de Bar, Comtesse de Marle & de Soissons avec le Comte de saint Pol. 104.a.
 Mariage de la vefue du Duc de Betfort, seur au Comte de saint Pol, avec Richard de Oudenille beau chevalier Anglois. 136.b.
 Marche Damoyseau nommé Euerard. 125.a.
 Mille des Faux aduocat à Paris voy Ioussel. 138.b.
 Milly en Beauuoisis ruiné par les Bourguignons. 193.b.
 Mommorency & Moi laissent la part Angloise, & font serment au Roy Charles vij. 50.b.
 Mort du Roy Charles vij. aduenue l'an 1422. f.1.p.a.
 Mort du Pape Pierre de la Lune. 11.b.
 Montagu forteresse en Laonnois appartenant au Comte de Salebrusse Damoyseau de Commercy razée & demolie. 18.a.
 Montrenil Bellay Capitaine François occis deuât Harfleur. 120.
 Mort du Duc de Brabât, mary de la Comtesse de Haynault. 32.b.
 Mort du Comte de Salbery au siege d'Orleans par vne Canonade. 38.a.
 Mort du Comte de Namur duquel le Duc Philippes recueillit la succession. 40.a.
 Mort de Pierre de Luxembourg Comte de saint Pol. 90.b.
 Mort du Duc Philippes de Brabant. 60.b.
 Mort du Roy de Chipre nommé de Luzignan. 81.b.
 Morier preuost de Paris, lors que les Anglois le tenoient. 75.a.
 Mort de Anne de Bourgongne femme au Duc de Betfort, oncle du Roy d'Angleterre, & seur du Duc Philippes de Bourgongne. 84.b.
 Monnoye rabaisée en Bourgongne. 86.a.
 Mort de Iacqueline de Bauiere Comtesse de Haynault, & de Hollande. 136.b.
 Mort du Roy d'Escoffe par la trahison du Comte d'Atelles. 137.b.
 Mort du sieur de l'Isle-Adam à Bruges. 140.a.
 Mort de Iehan de Luxembourg, Comte de Ligny. 177.b.
 Mort de la Hire capitaine renommé à Montauban. 192.b.
 Mousay capitaine François rend Neelle, & la Fere en Tardenoy aux Anglois. 13.a.
 Mouchaen en Normandie, Chasteau appartenant au Comte d'Eu repris sur les Anglois. 82.b.

N.

Naissance du Roy Loys xi. 10.b.
 Naples Royaume occupé par le Roy d'Arragon sur la Roynne Iehanne qui auoit espousé Iacques de Bourbon Comte de la Marche. 4.a.
 Narbonne Vicomte au seruice du Roy Charles vij. 2.b.
 Nopces au Duc d'Orleans, & de la Damoysselle de Cle-

ues. 174.a.
 Normans en sedition contre les Anglois. 98.a.
 Normans mutinés contre les Anglois. 100.a.

O.

Obsèques faictes au Comte d'Arminac iadis, Connestable de France tué à Paris pour la faction de Bourgongne. 144.b.
 Offemont prend prisonnier la Hire. 142.b.
 Orchimont destruit & rasé par le Damoyseau Euerard de la Marche. 127.a.
 Ordre de la toison institué par le Duc Philippes, les noms des premiers chevaliers qui en furent. 55.a.
 Orange Prince Bourguignon rompu avec dix huit cents Bourguignons, par le sieur de Gaucourt gouverneur du Dauphiné. 62.a.
 Orleannois assiegez offrent se mettre entre les mains du Duc de Bourgongne ce que les Anglois ne voulurent accepter. 42.a.
 Orleans deliuré du siege par la pucelle Iehanne. 43.d.
 Orleans deliuré de la prison d'Angleterre espouse la niece du Duc de Bourgongne fille du Duc de Cleues. 173.a.
 Orleans en soupçon enuers le Roy Charles, pour l'alliance qu'il auoit faict avecq le Duc de Bourgongne. 177.b.
 Oruille pres Louures en Paris où les Anglois tindrent iournee. 105.a.

P.

Paix entre le Duc de Lorraine & le Comte de Vaudemont. 85.b.
 Paris assailly par l'armée du Roy Charles vij. dont elle fut repoussée. 50.b.
 Parisiens affectez à la part de Bourgongne & Angloise. 51.a.
 Partenay Baron en Poictou pour la part Bourguignonne. 9.b.
 Pencsac capitaine François, & le deuoir qu'il feist au fort saint Vincent. 67.b.
 Pieuil gentilhomme Ciprian, pris par les Sarrazins, & faict cruellement mourir pour sa perseuerance en sa foy Chrestienne. 26.b.
 Philippes Duc de Bourgongne s'exerce & prepare au duel qu'il auoit affaire contre le Duc Clacestre. 26.a.
 Portugois contre les Maures. 37.b.
 Pothon de sainte Treille, deconfeit & pris par Iehan de Luxembourg Comte de Ligny. 12.a.
 Pothon de sainte Treille defaict & pris par les Anglois. 68.a.
 Pothon de sainte Treille obtient victoire à Garmigny sur les Anglois & Bourguignons. 66.a.
 Prageois hereticques en Boheme. 93.b.

Ensuient les prises de villes disposées par ordre d'Alphabet.

Prise d'Arques sur les Anglois. 192.a.
 Prise d'Arise & Landouffe en Picardie sur les François par le Comte de saint Pol. 8.b.
 Prise d'Aumarle sur les Anglois par Longuenal. 49.b.
 Prise d'Aumarle sur les François. 54.a.
 Prise d'Aualon sur les François. 90.b.

DENGVERRAN DE MONSTRELET.

Prise d'Auchel sur les Bourguignons, par le Comte de Vendosme où fut occis Betune cheualier Bourguignon par les communes du pais. 67.b.
 Prise de Beauuaise & autres villes voisines sur les Anglois. 50.b.
 Prise de Beaumont en Argonne, & Mouson sur les François, par les Bourguignons. 36.a.
 Prise de Bray Comte Robert, & autres forteresses par les Anglois. 61.b.
 Prise de Brethueil en Beauuoisis sur les Anglois. 98.a.
 Prise de Braine le Comte en Hainault, sur le Duc Clocestre. 22.a.
 Prise de la Charité sur les François. 10.b.
 Prise de Chartres sur les Anglois. 79.b.
 Prise de Chasteau-landon sur les Anglois. 141.a.
 Prise de Chappes sur les Bourguignons, par le Duc de Lorraine. 37.b.
 Prise de Chaumont en Charollois sur les François, & le supplice de ceux qui y estoient. 94.b.
 Prise de Choisy sur les François, par le Duc de Bourgongne. 86.b.
 Prise de Compiengne sur les Anglois, & la reprise d'icelle par eux. 10.b. 11.a.
 Prise de Compiengne sur les Anglois. 50.a.
 Prise de Creil sur Oyse par le Roy Charles vij. sur les Anglois. 182.b.
 Prise de Cressy en Vallois sur les François. 90.a.
 Prise du Crottoy par les Bourguignons sur les Anglois. 134.a.
 Prise du Crottoy en Picardie sur les François, les articles de la composition d'icelle. 8.b.
 Prise de Dieppe sur les Anglois, & de toutes les villes & Chasteaux du pais de Caux. 120.
 Prise de Dommart en Pontieu sur les Anglois. 3.b.
 Prise de Dommart en Pontieu sur les Anglois. 78.b.
 Prise de Plusieurs Chasteaux sur les Dauphinois au Comté de Guise. 2.b.
 Prise d'Estrepagny sur les Anglois, & de Chasteau-Gailard pres Rouen, & autres places. 49.b.
 Prise de Folleuille en Santois, les courses & ranages de Anglois audict pais. 166.b.
 Prise de Gaillon sur les François. 13.a.
 Prise de Gamaches en Vimeu sur les Anglois. 126.b.
 Prise de Gisors sur les Anglois, la souldaine reprise par eux. 127.a.
 Prise de Gournay sur Aronde par les Bourguignons sur les François. 56.a.
 Prise de Guetrou sur les François, la penderie de cent qui furent trouuez, aduēture de l'un d'eux qui faillit à estre estranglé. 76.b.
 Prise de Guise par composition, avecq la reddition de plusieurs autres villes par la mesme composition. 16.a.
 Prise de Ham sur Somme par les François. 96.a.
 Prise de Haplaincourt pres Peronne, sur les Bourguignons, la reprise dudit lieu. 91.b.
 Prise de Jargeaux pres Orleans sur les François & autres villes pres Orleans. 37.b.
 Prise de Iury en Normandie sur les François. 13.b.
 Prise de la Ferté Milon sur les Anglois, & la souldaine reprise d'icelle avec grand meurtre des François. 2.a.
 Prise de Meulant sur les Anglois, par Messire Iehan de Grauille, la reprise d'icelle par les Anglois. 2.a.
 Prise de la Mothe en Lorraine, par le Bastard de Bourbon, les courses qu'il feit en Lorraine & sa rouverte pres Langres. 165.b.

Prise de Longueuille & autres au pais de Caux sur les François par les Anglois. 152.a.
 Prise de Louuiers sur les Anglois. 54.b.
 Prise du Marché de Meaulx sur les Anglois. 163.a.
 Prise de la Male-maison pres Cambray sur les Bourguignons par Iehan Blou de la part Françoise, & comme elle fut reprise par apres. 33.a.
 Prise du Mans sur les François. 26.b.
 Prise de Meulan sur les Anglois, par Messire Iehan de Grauille. 2.a.
 Prise de Meulant sur les Anglois. 117.a.
 Prise de Melun sur les Anglois. 56.a.
 Prise de Monstreau-Fautioune sur les Anglois. 141.b.
 Prise de Ham sur Somme par les François, sous la conduicte de Pothon de sainte Treille. 10.a.
 Prise de Meaulx par assault sur les Anglois, le Marché demeurât en leur puissance qui fut bien tost secouru. 162.b.
 Prise de Montaignillon en Châpaigne sur les François. 6.b.
 Prise de Moyennes en Champaigne sur les François. 31.b.
 Prise de Musy l'Euesque par les François. 89.a.
 Prise de Naples par les Espagnolz. 8.a.
 Prise de Nemours sur les Anglois. 141.a.
 Prise de Noelle-sur mer sur les François. 6.b.
 Prise d'Oisy en Tierace sur les François. 11.b.
 Prise de Pontorson sur les Bretons par les Anglois. 38.b.
 Prise de Pontoise sur les Anglois par le Roy Charles vij. 186.a.
 Prise de Prouins en Brie sur les François. 93.b.
 Prise de Rambures en Vimeu sur les Anglois. 68.a.
 Prise de Rue sur les Anglois. 100.b.
 Prise de saint Denis en France sur les Anglois. 102.b.
 Prise de saint Denis en France sur les François. 117.a.
 Prise de sainte Iames de Buueron par les Anglois sur les Bretons. 35.a.
 Prise de saint Seuer en Gascongne sur les Anglois. 192.a.
 Prise de saint Valery sur les François. 1.b.
 Prise de saint Valery sur les François. 90.b.
 Prise de saint Valery sur les Anglois. 93.b.
 Prise de saint Valery sur les François. 95.b.
 Prise de Sedane, ville au Comte de Vertuz sur les Anglois. 13.a.
 Prise de Soissons sur Messire Iehan de Luxembourg par la Hire. 136.b.
 Prise de Terny sur les Anglois. 141.b.
 Prise de Torisy sur les Anglois. 53.b.
 Prise de Verneuil en Normandie sur les Anglois. 14.a.
 Prise de Viege par Iehan de Luxembourg sur les François. 12.a.

R.

R Aix l'un des Barons de Bretagne & Mareschal de France conuaincu de Magie, & bruslé à Nantes, par iugement du Parlement de Bretagne. 171.a.
 Rambures rend la place d'Estrepaigny aux Anglois. 53.b.
 Reconiliation du Roy Charles vij. avec ceux qui auoient seduit Loys son fils. 168.b.
 Regnault Bastard de la Hire court le pais de Picardie & deffait ceux d'Abeuille issuz contre luy. 171.b.
 Regnault capitaine de Larrons, chassé de la forteresse de Milly en Beauuoisis. 193.b.
 Retraicte des Anglois de deuant Orleans. 43.a.
 Retraicte des Lorrains de deuant Vaudemont. 76.b.
 Retraicte des Flamans de deuant Calais. 133.

Reuolte premiere du Daulphin Loys, contre le Roy Charles vij. son pere, les foteurs d'icelle & ce qui en aduint. 167.b.
Richemont frere du Duc de Bretagne, fait Connestable de France. 10.b.
Richemont Connestable de France. 162.a.
Rochetaillade Baron de Gascongne se rend au Roy Charles. 192.b.
Rodigue de Villandras capitaine pour la part François, gaste le pais de Bordelois. 155.a.
Roupte des Roys d'Arragon & de Nauarre deuât Gaiette par les gens du Duc de Milan. 10.b.
Roupte des François & Escossois à Creuant. 8.a.
Roupte de François à Vernueil. 14.b.
Roupte des François à Rouuray en Beausse appelée la iournee de Harens. 41.a.
Roupte des Cipriens & de la prise de leur Roy, & de la ville de Nicosie par les Sarrazins. 28.b.
Roupte notable des Lorrains & François par le Comte de Vaudemont, aidé des Bourguignons & Anglois. 74.b.
Sacre ou couronnement du Roy Charles vij. à Poitiers. 1.b.
Sacre du Roy Charles vij. à Reims & le retour de sa fortune. 47.a.
Sacre du Roy Henry d'Angleterre, comme Roy de France en l'Eglise nostre Dame de Paris. 76.a.
Saisie des terres que le Comte de Pontieuure auoit en Hainault. 8.b.
S. Pol Comte guerroyé par le Roy Charles vij. & contrainct de luy faire obeissance. 179.b.
Saincte Croix Cardinal enuoyé par le Pape pour reconcilier le Duc avecq le Roy. 80.b.
Salisbury Comte Anglois descent en France avec nouvelle armée. 37.a.
Sauueses & le Bastard saint Pol cheualier de la part Bourguignonne pris deuant Paris. 53.a.
Sauueses, & Creuecueur vaillans capitaines Bourguignons. 55.b.
Sauueses capitaine Bourguignon, capitaine de Modidier. 91.a.
Secours du Duc Philippes à ses subiects au Duché & Comté de Bourgongne. 89.a.
Secours de Bourguignons au Duc de Saouye centre le Duc de Milan. 34.a.
Secours des François à leurs gens assiege en Compiengne par les Bourguignons & comme le siege fut leué. 63.a.
Secours des François à leurs gens assiege dans Lagny sur Marne. 82.b.
Sedition du peuple de Tournay. 15.b.
Sedition à Tournay. 26.a.
Sedition des habitans de Tournay. 37.a.
Sedition à Tournay pour raison des pretendans l'Euesché dudit lieu. 87.b.
Sedition des Romains contre le Pape. 94.b.
Sentence diffinitive du Pape sur le fait du mariage du Duc de Cloestre & de la Contesse de Haynault. 31.b.
Serment solenel du Duc Philippes de Bourgongne de iamais ne ramentenir la mort du Duc Iehan son pere. 118.a.
Siege du Crottoy par les Anglois. 7.a.
Siege de Creuant sur les Bourguignons. 7.a.
Siege de Betleem en Vermandois sur les Bourguignons, & comme il fut tue par les Anglois. 8.a.
Siege de Guise en Tierrace appartenant au Duc de Bar sur les François. 12.b.

Siege d'Orleans par les Anglois. 38.a.
Siege de Cöpiegne par les Anglois & Bourguignons. 61.a.
Siege des Anglois deuant Montargis. 32.a.
Siege & assault de Hermonford en Hollande par les Bourguignons sans effect. 34.a.
Siege de Calais par le Duc Philippes avec les Flamās. 129.
Siege du Crottoy sur les Anglois par les Bourguignons, fort mal conduit. 144.b.
Siege de Harfleur par les Anglois le secours qu'y voulurent donner les François. 169.a.
Siege memorable de Pontoise par le Roy Charles vij. 183.a.
Sombresset Anglois court Anjou & Bretagne. 194.
Subsides requis p les Anglois sur les eglises de Flādrès. 37.b.
Suffort Comte Anglois, capitaine general du Siege d'Orleāns apres la mort de Salbery. 38.b.

T.

Talebote en France avecq nouvelles forces Angloises, & ce qu'il y fait. 95.a.
Tartas ville de Gascongne, où le Roy Charles vij. tint iournée assiegee contre les Anglois qui n'y comparurent. 191.b.
Toison d'or celebrée par le Duc Philippes, présentée au Duc d'Orleans & par luy acceptée. 175.a.
Tournay cité en sedition & diuision. 4.a.
Tournay en sedition. 10.b.
Trahison pour surprendre le Chasteau sainte Agendeconuerte, le trahistre puny. 85.b.
Trahison deconuerte contre le Duc Philippes, & les trahistres punis. 89.b.
Traicté & articles de la reditiō de Meulā aux Anglois. 2.b.
Traicté d'accord entre le Duc de Brabant, & le Duc de Bourgongne d'une part, & le Duc de Cloestre & Iacqueline de Bauiere sa femme. 17.b.
Treblement de terre en Espagne, & en Languedoc. 34.b.
Traicté final entre le Duc de Bourgongne & la Comtesse de Hainault par lequel les terres & seigneuries d'elle deuioient appartenir apres sa mort au Duc cōme son heritier. 36.b.
Traicté de la paix d'Arras. 108.b.
Traicté de paix entre France, & Angleterre. 166.a.
Trefues entre les Bourguignons & François. 51.b.
Trefues pour six ans entre Bourgongne, & France qui furent sans effect. 80.b.
Trefues entre France, Angleterre, & Bourgongne, & les articles d'icelle. 199.a.
Trimouille nauré & emprisonné par le Seigneur du Bueil & autres ses hayneux, en la maison du Roy au Chasteau de Chinon en Touraine. 91.a.

V.

Vaudemont pour la faction de Bourgongne. 72.b.
Vaudemont Côte assailly par le Duc de Lorraine. 72.b.
Vaudemont ville assiegee par le Duc de Lorraine. 73.b.
Vaudemont en guerre contre le seigneur de Ossouville, & les Lorrains. 151.a.
Vaudemont court le pais de Barrois & de Lorraine. 172.b.
Vergy, & Chasteau-villain gentilshommes Bourguignons en guerre l'un contre l'autre. 86.a.
Victoire des François au Mont de saint Michel, contre les Anglois. 33.a.
Victoire des François à Montargis cōtre les Anglois. 32.b.
Victoire des François sur les Anglois à Gerberoy. 101.a.
Victoire des François sur les Anglois à Patay en Beausse. 48.a.

F I N.

ANNOTATIONS ET CORRECTIONS

DU SECOND VOLUME D'ENGVERRAN

DE MONSTRELET.

Fueillet 2. Ligne 27. Page 1. se rendirent
subiects, lisez fugitifs.

f.4. lig. 10. p. forte Brace & Tartaille, il y
auoit trois excellens & renommez capi-
taines en Italie de ce tēps là, Sforce, Bra-
che Monton, & Tartaille, on voit ceste
histoire autrement d'escrire par les Italiēs
mesmes par Oliuier de la Marche, en co-
ter les diuersites & contrarietes ce seroit
œuvre proluxe & de peu d'estime.

f.4. l.4. p.2. en doubāt, lisez en deboutant.

f.5. l.4. p.2. Artus de Bourgongne, en lieu
de Bretagne.

f.5. l.4. p.2. eust nul hoir, pour, eust hoir.

f.8. l.6. p.1. le Comte de Bouguignon, la
plus part des histoires de celuy tēps l'ap-
pellent Bouquinghenaultes, lisent Buth-
guen où Buthkan, Froissart nomme en-
tre les Princes Anglois un Côte de Bou-
quignan.

f.8. l.25. p.1. Claidas le fort, faut remettre
Claidas assieger le fort Chastel, &c.

f.10. l.17. p.2. ville de Champaigne, il faut
Compiengne & le mesme en la 6. lig. en-
suuante.

f.11. l.44. p.2. l'espace de treize iours, en lieu
de, treze ans.

f.13. l.28. p.1. Neelle en Tardenois peult
estre faut faire veu ce qui suit apres.

f.13. l.39. p.1. Bosquen cest le mesme Bou-
quinghen cy dessus mentionné corrigez le
semblable au quinziēme fueillet.

f.18. l.31. p.1. hostel de Bourgongne, pour,
païs de Bourgongne.

f.32. l.38. p.2. Leneure c'est peult estre Ge-
neppe, où Gueneppe, chasteau de plaisant
sejour en Brabant, où se tint le Daulphin
Loïs durant sa fuitte.

f.35. l.37. p.2. Hunaudue en lieu de Hu-
naudaye.

f.57. l.24. p.1. Montgonirry il faut Mont-

gomery, c'est une race de gentils-hommes
Anglois issus de Normandie.

f.89. l.12. p.1. Prouins, le païs dont il parle
fait penser qu'il faut Peronne.

f.93. l.35. p.1. Bastard de Siennes ie doubte
sil faut Fiennes maison illustre en Flan-
dres.

f.99. l.17. p.2. Tonnon il faut peult estre
Turin & en lieu de Ripaille Rirolle.

f.120. l.39. p.2. Broufart lisez Bousac ce-
stuy fut depuis, l'un des Mareschaux de
France.

f.137. l.11. p.1. la terre & Chastel adiou-
stez y Castel.

f.139. l.24. p.2. l'internelle, le doubte est,
sil faut Leidquerque par ce qu'il se trou-
ue ainsi ailleurs en pareille compai-
gnie.

f.141. l. penult. p.1. Gascon de Loguz, li-
sez Gaston, & ainsi en la page suuante.

f.143. l.11. & 12. p.2. Anglois, mal en lieu
d'Ange.

f.144. l.34. p.1. reuenoient, ostez la pre-
miere, n.

f.144. l.9. p.2. Ossy pour Auxy.

f.151. l.10. p.1. agenouillé, ie doubte sil faut
à Genouillé.

f.152. l.26. p.1. Raincheaux, pour Ron-
seaux.

f.152. l.34. p.1. Montargis, ce mot de Che-
ureuses qui precede, me fait penser qu'on
doibt lire Marcoussis en lieu de Montar-
gis.

f.154. l.6. p.2. Amiens, lisez Anuers: car
ceste faute d'Amiēs pour Anuers se trou-
ue en deux ou trois autres endroits, aussi
que le voisinage des autres villes dont il
parle, fait iuger qu'il faut quelque autre
mot.

f.155. l.22. p.1. capitaine de Beusd, peult e-
stre qu'il failloit Captal de Beusch.

f.177. l.19. p.1. auichoix, ce sont peult estre
aduis & cōseils, toute ceste bulle est plei-
ne de fautes pour n'auoir eu le latin ne
autre exemplaire sur lequel on la peust
corriger.

f.179. l.3. & 34. p.1. Rippemont, c'est Ri-
blemont en Picardie comme on peult iu-
ger par le païs dont il fait mention.

f.181. l.17. p.1. Iean, il faut Ieanne.

f.183. l.37. p.1. Valperche, il se trouue cy
apres Valpergue c'estoit un capitaine

Italien qui fut fait Seneschal de Lyon
par le Roy Charles vij.

f.193. l.41. p.1. Iean d'Ange, peult estre faut
il Iean d'Angeſt, par ce qu'il en est faiçt
mention ſouuent en pareille compaignée.

f.194. l.7. p.1. Traonnois & de Chatra-
gonnois, le quartier, dōt il le me fait esti-
mer qu'il faut Touraine & Chartrain :
car ces mots de Traonnois & Chatra-
gonnois ſont incogneuz meſmes à ceux
du païs que l'autheur y auoiſine.

VOLUME TROISIÈME DES
CHRONIQUES
D'ENGVERAN
DE MONSTRELET
GENTIL-HOMME IADIS DEMEVANT
A CAMBRAY EN CAMBRESIS.



A PARIS,
Chez Guillaume Chaudiere, rue saint Jacques, à l'enseigne du Temps
& de l'Homme Sauvage.

M. D. LXXII.

Avec Priuilege du Roy.

CY COMMENCE LA TABLE DES
CHAPITRES DV TIERS VOLVME
des Chroniques d'Enguerran
de Monstrelet.

ET premierement comment les Anglois prindrēt trefues pour dixhuit mois, & fiancerent la fille du Roy René de Cecile pour estre femme du Roy Hēry d'Angleterre. Et commēt le Roy de Cecile supplia au Roy de France qu'il luy pleust donner secours. Fueille 1.

Comment le Roy de Cecile vint à Chaalons deuers le Roy de France pour traicter au Duc de Bourgongne de sa rancon: Et cōment la Duchesse de Bourgongne y vint. Puis dit du trespassement des Roines de Espaigne & de Portugal & comment le Roy enuoia vne ambassade en Angleterre. 2.

L'an mille quatre cens quarante cinq que le Roy en retournant d'oīr messe trouua sur son liēt ce present dicté, dōt la teneur s'ensuit. 3.

Comment le Duc de Bretagne fait prendre messire Gilles son frere: & cōment ceux de Gennes enuoierēt leur ambassade deuers le Roy de France pour le faire leur seigneur: & comment il en aduint. 3.

Comment le Roy de France apres le trespas du Pape Eugene fait tenir vn grād conseil à Lion sur le Rosne, où vindrent plusieurs ambassades tant d'Allemaigne comme d'Angleterre & d'ailleurs, pour mettre l'Eglise à vniō, & oster les schismes qui lors y estoient. 4.

Comment le Duc d'Orleans receut de par le Duc de Milan son oncle la Comté d'Ast en Pimont: puis dit comment le Roy fait assieger la cité du Mans, laquelle luy fut rendue par traicté. 5.

Comment le Roy de France enuoia ses ambassadeurs deuers le Pape Nicolas: Et

comment ceux d'Esmales assiegez par les Geneuois furent auitaillez par mer. Et comment le Duc d'Orleans se meit en poinct pour leuer le siege par terre. 5.

Cy est contenu comment sur trefues entre les Rois de France & d'Angleterre, messire Francois de Surienne dit l'Arragonnois print la ville & chastel de Fougieres appartenant au Duc de Bretagne: & des grans maulx qu'ils y feirent. 6.

Comment le commun peuple de Londres se esmeut contre les officiers du Roy d'Angleterre, & tuerent inhumainemēt l'Euesque de Clocestre & sy empoisonnerēt le Marquis de Suffort, lequel ledit Roy fait deliurer. 7.

Cy est contenu cōment par la Court de Parlement deux coquins & vne coquine furent condamnez à estre pendus & estranglez pour leurs malefices. 7.

Comment apres la prinse de Fougieres les allies du Duc de Bretagne prindrent le chastel & la ville du Pont-de-l'Arche sur les Anglois: puis parle de la prinse de Gerberoy. 8.

Comment le Roy de France deuēment informé par plusieurs manieres, que les Anglois eurent brisé les trefues, se delibera de leur faire guerre. Puis dit comment Vernueil fut prinse par vn Musnier que vn Anglois eut battu. 9.

Comment le Comte de saint Pol alla deuant Nogent, laquelle luy fut rendue: parle de la prinse de Pont-Audemer. 10.

Cy dit comment les Anglois entrerēt en Escosse par deux fois: & comment la tour de Vernueil fut redue: & d'aucunes autres besongnes. 11.

Cy dit comment le Roy de France fait som-

TABLE DES CHAPITRES

- mer ceux de Mante qu'ils se rendissent à luy ainsi qu'ils feirent: & les receut pour & au nom du Roy le Comte de Dunois son lieutenant general. 12.
- Comment le Roy entra à Vernueil, & la reception qu'on luy feit. Puis dit comment par l'entreprinse du Seneschal de Poitou le chastel de Laigny fut rendu au Roy: & y furent plusieurs Anglois prins: & comment Vernon fut rendue au Roy. 12.
- Comment le Roy de France vint en la ville d'Eureux où il fut notablement receu. Et de là sen alla à Louviers. Puis dit comment le chastel d'Aiou fut mis en l'obeissance du Roy. Et comment Gournay se rendit: Et comment Hoüel rendit la Roche-Guion au seigneur à qui elle estoit: Et comment il se tourna Francois. 14.
- Comment messeigneurs les Comtes d'Eu & de saint Pol prindrent d'assault la ville de Neuf-Chastel de Nicourt: & comment le chastel se rendit par composition. Et comment le Comte de Dunois print le chastel de Harcourt. 15.
- Comment le Duc de Bretagne & le Connestable de France à tout grosse armée de gens de guerre, entrerēt en la basse Normandie: Et allerent mettre le siege deuant saint Lo, qui leur fut redu: Puis se rendirent plusieurs petites places: & comment la ville de Carenten se rendit. 15.
- Comment le Duc d'Alencon print sa ville d'Alencon. Comment le Comte de Foix print la ville & chastel de Maulton. Comment le Comte de Dunois print Argenten, & comment les Anglois se retrairent au Donjon & sen allerent un baston au poing. 16.
- Comment le Roy de Cecile vint à Louviers deuers le Roy de France, & comment ceux de Fresnoy se rendirēt au Duc d'Alencon, puis parle de la composition de Gisors. Et comment on assiegea Chasteau-Gaillard. 17.
- Comment le Roy de France mada les Comtes de Dunois, d'Eu & de saint Pol & leurs gens venir deuers luy pour aller deuant Roüen où ils furent trois iours puis sen retournerent. Comment aucuns de Roüen luy cuiderent liurer la ville, & comment le Duc de Bretagne assiegea Fougieres, & comment Condé fut prins. 17.
- Comment l'Archeuesque de Roüen & aucuns autres traicterent de rendre Roüen au Roy de France, & comment les clefs de ladicte ville furēt presentées au Comte de Dunois lieutenant general lequel avec ses gens entra en icelle. 19.
- Comment le Roy de France feit assieger le Comte de Sombresset, Thalebott & leurs gens dedās le Palais de Roüen, & comme par composition ils sen allerent parmy redant le chasteau d'Arques, & autres places cy apres declairées. 20.
- Comment le Roy de France entra à Roüen noblement acompaigné, & comment il fut somptueusement receu, puis dit comment meirent en la main du Roy le Chasteau d'Arques, Caudebec, Tancarville & Monstieruiller. 21.
- Comment le Chastel de Gaillard fut mis en l'obeissance du Roy. Comment ceux de Fougieres se rendirent au Duc de Bretagne & Belemme au Duc d'Alencon. Puis parle d'une rencontre d'Anglois & Francois où fut fort combattu. 23.
- Comment le Roy se partit de Roüen: Comment il enuoia son lieutenant general mettre le siege deuant Harfleur. comment la ville luy fut rendue par composition, puis parle de la belle Agnes, de sa maladie, de son trespassement & des ordonnances qu'elle feit. 24.
- Comment le Comte de Foix feit une grosse armée & feit mettre le siege deuant le chastel

- chastel de Guisken, & commēt les Anglois se meirent ensemble pour leuer ledit siege, & comment ils furent desconfits par le sire de Lautrec & le bastard de Foix. 25.
- Comment apres ce que mesire Thomas Kiri-
riel eut prins Valongnes sur les Francois
se meit aux champs à grand compaignie
d'Anglois, le Comte de Cleremont aussi se
meit aux champs à tout ses gens & rue-
rent ius lesdits Anglois. 26.
- Comment le Duc de Bretagne à tout son ar-
mée meit le siege deuant Auranches, com-
ment elle luy fut rendue, commēt il print
Tombelaine, comment Bayeux fut prinse
& comment le Conneſtable de France
print Bricquebec, & autres incidens. 28.
- Comment le siege fut mis deuant Caen, &
comment le Roy de France y vint & le
Roy de Cecile, & le Duc de Calabre son
fils à grosse armée. Puis dit comment les
Anglois apres qu'ils eurent esté fort bat-
tus d'engins redirent la ville & chasteau
de Caen. 29.
- Cy dit commēt le Roy de France entra en la
bonne ville de Caen où il fut noblement
receu: puis dit comment les Anglois ren-
dirent Falaise au Roy de France, de la-
quelle place il ordonna capitaine Pothon
de ſaincte Treille. Puis dit cōment Dan-
front fut mis en l'obeissance du Roy. 30.
- Cy parle de la mort du Duc de Bretagne et
de mesire Gilles son frere. Et comment
on le feit mourir moult piteusement.
Puis dit commēt Chierbourg par mer &
par terre fut assiegée, & commēt elle fut
prinse. 31.
- Cy met l'acteur en memoire les vaillances de
plusieurs nobles faictes en la conqueste
de Normandie sur les Anglois pour le
Roy de France. Comment le Roy enuoia
en Guienne le Comte de Ponthieu qu'il
feit son lieutenant. 32.
- Comment le seigneur d'Orual rua ius ceux
de Bordeaux. Et comment le Duc Pierre
de Bretagne vint faire hōmage au Roy.
Puis dit comment le Duc Philippe de
Bourgongne voulut en Flandres mettre
imposition sur le sel. 34.
- Comment le Roy ordonna le Comte de Du-
nois son lieutenant general pour aller en
Guienne, & mist le siege deuant Mont-
Guion, lequel luy fut rendu, & commēt
il assiegea la ville de Blaie, laquelle fut
prinse d'assault & le chastel se rendit par
composition. 34.
- En ce chapitre sont contenues plusieurs no-
tables requestes de plusieurs villes &
chasteaux. Et generallemēt toute la Du-
ché de Guienne reſeruē Bayonne. Puis
parle comment ceux de Bordeaux se ren-
dirent. 35.
- Cy dit comment la cité de Bayonne fut assie-
gée par les Comte de Foix & de Dunois
tous deux lieutenans du Roy Charles de
France. Et cōment ladiſte cité de Bayon-
ne se rendit. Et quelles ordonnāces y fu-
rent faictes par les dessusdits. Puis en a-
pres dit commēt nostre ſainct Pere le Pa-
pe espousa l'Empereur d'Allemagne à la
fille du Roy de Portugal. Puis parle des
aduenues d'Angleterre. 38.
- Comment Iaques Cueur fut prins prisonnier
& les causes pourquoy, comment le Roy
de France deſſia le Duc de Sauoye, &
commēt la paix en fut faicte par le Car-
dinal de Touteuille. Et comment Thal-
lebot reprint Bordeaux sur les Fran-
cois. 40.
- Comment les Gantois assiegerent Audenar-
de. Et comment le Duc de Bourgongne
ordonna son armée contre les Gantois
& en occirent plusieurs. 41.
- Comment le Comte d'Estampes accompa-
gné des Picards ſeulement leua le siege
d'Audenarde & desconfit les Gantois
deuāt que le Duc de Bourgongne en ſceut
riens. 42.

TABLE DES CHAPITRES

- Cy parle des gens de guerre que le Duc mist par garnisons à l'entour de Gand. Et d'aucunes courses que ceux feirēt iusques à Gand & au pais de Vvas. 43.
- Comment les Gantois fortiffierent Neuene en Flandres. Et comment le Comte d'Estampes les rua ius. Et comment iceux Gantois voulurent rompre une Digue pour noyer le pais là où furent de rechief desconfits. 43.
- Cy parle de la bataille de Rippemonde où les Gantois furēt desconfits par leur seigneur le Duc de Bourgongne. 44.
- Comment ceux d'Acre habandonnerent la place, & fut la ville arse par les gens du Duc de Bourgongne. Et comment le Roy de France enuoia ambassadeurs en Flandres deuers le Duc de Bourgongne pour mettre paix au pais. 44.
- Comment le Coutellier de Gand fut prins en bataille & les Gantois desconfits. Et comment ils furent de rechief desconfits à Haulst, & à Monlebecque. 45.
- Cy parle des poincts du traicté que feirent les ambassadeurs de France à l'Isle pour appaiser les Gantois à leur seigneur dont neantmoins ils ne tindrent riens à Gand. 46.
- Comment les Gantois recommencerent la guerre contre leur seigneur & ardirent Haulst. Et comment un herault de France eschappa de la ville de Gand. 47.
- Comment le Duc rassembla gens d'armes pour guerroyer les Gantois. Et comment iceux Gantois ardirēt Harlebec un villaige pres de Courtray. Puis parle des besongnes qui aduindrent de celle guerre à celle fois. 47.
- Cy dit commēt le Mareschal de Bourgongne fait ardoir la ville d'Esle. Et comment les Gantois furent deboutez de deuant Alloz qu'ils vouloient assieger. 48.
- Cy parle d'aucunes entreprinſes faictes entre les Picards & les Gantois. Et dit comment les Gantois allerēt bouter les feux en Hainault. Et comment ils furent rencontréz tantost apres. 48.
- Comment les Gantois enuoyerent deuers le Comte d'Estampes pour trouuer moyen de paix. Et tost apres s'en allerent assieger Courtray où ils ne gaignerent gueres. Puis dit comment ils cuiderent prendre la Duchesse de Bourgongne allant à Bruges. 49.
- Comment Pierre Moreau un capitaine des Gantois emmena une grande compaignie deuant Terremonde. Puis dit d'une grande course qu'ils feirent en Hainault où ils feirent plusieurs maulx. 50.
- Comment les Gantois cuiderēt prendre d'assault la ville d'Alloz, & comment elle fut bien deffendue. Puis dit comment les trois membres de Flandres & les nations de Bruges contēdoient à faire la paix des Gantois. 50.
- Cy parle de l'armée que le Duc de Bourgongne enuoia en Luxembourg contre aucuns Allemans qui dommageoiēt les pais & auoient leur retour à Tionuille. Puis dit comment le Duc entra en Flandres à grosses armée pour guerroyer les Gantois. 50.
- Comment le Duc print le chastel de Pulcres deuant lequel fut occis la fleur de Cheualerie meſſire Iacques de Lalain. Puis alla assieger le chastel de Gavres où fut la desconfiture des Gantois. Et dit comment il feit prendre tous ceux de leans aincois que les Gantois le venissent combattre. 51.
- Cy dit la maniere de la bataille de Gavres. Et comment les Gantois y furent morts & desconfits plus de vingt mille hommes. 52.
- Commēt le noble Duc pitoyable enuoya son herault à Gand apres celle desconfiture pour scauoir s'ils se vouloient mettre en sa volenté & il auroit pitié d'eux. Et comment

comment les Gantois enuoierent deuers luy requerans sa misericorde. 53.

Cy apres s'ensuit la declaration des articles du traicté de ceux de Gand à leur bon Prince le Duc Philippe de Bourgogne. 53.

Cy parle de l'amendise que feirent les Gantois à leur seigneur. Et dit la maniere comment ils luy feirent leur amendise honorable. 54.

Comment tandis que le Duc de Bourgogne demenoit sa guerre en Flandres contre les Gantois, le seigneur de Croÿ besongna contre les Allemans en la Duché de Luxembourg, lesquels y faisoient moult de maux. 54.

Comment le Roy Charles de France septiesme de ce nom conquist la seconde fois la cité de Bordeaux & tout le pais de Bourdelois: & par auant auoit conquis & par tout son Roiaume auoit obeissance, & de la mort du seigneur de Thalebote. 55.

Cy dit comment le Pape Nicolas enuoia signifier au noble Duc Philippe de Bourgogne l'entreprinse du Turc, & le Duc voïa d'aller en Turquie sous certaines conditions. 55.

Comment Charles Comte de Charrolois fils du Duc de Bourgogne fiâcea Dame Ysabel de Bourbon sa cousine germaine. Et comment le Duc tost apres s'en alla es Allemaignes. Et comment apres son retour son dit fils espousa sadicte cousine. 56.

Comment le Roy alla en son chasteau de Lusignan, comment le sire de Thalebote print Fronzac, comment les Francois allerent assieger Chastillon. Et comment le seigneur de Thalebote assembla ce qu'il peut auoir de gens d'armes pour leuer ce siege. Et comment il y mourut. 56.

Comment apres la reddition de Chastillon les conduiseurs de l'ost du Roy prindrent saint Millon & Libourne avec autres. Puis dit comment le Roy & son armée

estans deuant Bordeaux où estoient grand nombre d'Anglois lesquels luy rendirent la ville par composition. 57.

Cy dit comment le Turc assiegea Constantinoble. Et comment il feit icelle cité battre d'engins de la grande artillerie qui y estoit. Puis dit comment ladicte cité fut prinse d'assault. Et parle aucunement des maux qui y furent commis. Puis parle d'un remede pour aller contre le dessusdit Turc. 59.

Cy dit comment le Turc enuoia lettres au Pape, pource que le Pape vouloit ordonner une croisée pour aller contre luy. Puis dit comment le Blanc Cheualier Marechal de Hongrie rua ius les Turcs au port de Sambrine. 61.

Cy dit comment les sentences de Iaques Cueur & de ma Damoiselle de Mortaigne furent prononcées, & comment maistre Guillaume Edelin Docteur en Theologie fut presché. 62.

Comment le Roy de France enuoia une ambassade deuers le Roy d'Espaigne. Et comment le Roy de France feit faire deux chasteaux à Bordeaux pour tenir le peuple en subiection. Et comment le Duc d'Iorch feit emprisonner les Ducs de Sombreffes & de Cloestre, & plusieurs autres incidents. 63.

Cy dit comment le Comte de Charrolois se maria à ma Damoiselle Ysabeau de Bourbon. Puis parle comment le Duc Philippe de Bourgogne retourna des Allemaignes, & comment il vint à l'Isle & à Arras où il fut honnorablement receu. 64.

Cy parle des grans tailles & aides que le Duc leua en ses pais pour aller en son voyage de Turquie. Puis dit comment il feit Euesque du Treth son fils bastard lors Euesque de Theroüenne. Et comment il meit à obeissance aucuns rebellas à l'encontre dudit Euesque. 64.

TABLE DES CHAPITRES

Comment l'Euesque du Treth trespassa & comment le Duc de Bourgongne alla en Hollande pour en faire Euesque David son fils bastard. Et comment le Roy de France mist en sa main le Daulphiné. Puis met les conquestes que feit le dessusdit Blanc Cheualier sur les Turcs & ce qui en ce tēps aduint au roiaume de Naples. 64.

Comment le Comte de Cleremont & le seigneur de Loheac Mareschal de France & plusieurs autres capitaines prindrent & meirent en la main du Roy la Comté d'Armignac & de Rouergue & meirēt l'Archeuesque d'Aulx en possession. 65.

Comment le Roy de France fut mal content de son fils le Daulphin qui s'en estoit allé deuers le Duc de Bourgongne sans son congé. Puis parle d'aucunes ordonnances faictes par le Pape Calixte pour le fait de la Chrestienté. 65.

Comment le Duc de Bourgongne mena son fils en Hollande à grād armée & le meit en possession paisible de l'Euesque du Treth & contrainit par siege ceux de d'Euenter d'obeir au nouuel Euesque ce que faire ils ne vouloient. 67.

Comment le Duc d'Alencon fut prins à Paris & mis en prison, & comment les Turcs furent desconfits en Hongrie miraculeusement, & parle aussi d'aucunes choses estranges qui aduindrent audit an cinquante six. 67.

Comment Lois de Valois ainsné fils du Roy de France s'en vint à refuge au Duc Philippe de Bourgongne, puis parle d'aucunes autres besongnes qui aduindrent en ce temps. 68.

Cy parle du mal-talēt & courroux qui fut entres le Duc Philippe de Bourgongne & le Comte de Charrolois son fils, & comment le Daulphin les appaisa. Puis dit comment la Comtesse de Charrolois accoucha d'une fille. Et parle d'aucunes au-

tres choses qui aduindrent lors en diuers lieux. 69.

Comment l'ambassade du Roy de Hongrie vint à Tours par deuers le Roy de France. Et comment ils y furent receuz honorablement, & commēt nouuelles leur vindrent du trespas dudit Roy de Hongrie, & comment les Francois prindrent d'assault Sanduich. 70.

Comment le Duc Philippe de Bourgongne mena le Daulphin à Bruges où il fut receu à tresgrand ioye & à moult grand honneur. Puis parle de plusieurs autres choses qui lors aduindrent. Puis dit comment les Francois prindrent & pillerent Sanduich en Angleterre. 71.

Cy parle d'un different estant lors entre le Duc Philippe de Bourgongne & le Comte de S. Pol. Puis parle du Roy de qui enuoia demāder à mariage la fille de France. 72.

Cy parle de la mort du Roy Lancelot de Hongrie pour lequel le dueil fut grand en la court du Roy de France. Puis parle du trespas de Iean de Cuimbes Roy de Chippre, & du trespas du Duc de Bretagne. A laquelle Duché succeda Artus Comte de Richemont son frere. 73.

Comment le Roy Charles de France fut moult griesuement malade. Et comment tost apres il enuoia signifier au Duc Philippe de Bourgongne qu'il prenoit en sa garde les terres du Damoiseau de Rodemac & de la responce du Duc. Puis parle d'autres choses, de Gellées, de neiges & de vents qui lors aduindrent. 74.

Comment à la requeste de ceux de Gand le Duc Philippe leur seigneur alla à Gand & de la feste qui luy fut faicte en icelle ville. Puis dit commēt le Roy feit adiourner ledit Duc pour estre avec les autres Pairs de France au iugemēt du Duc d'Alencon. 74.

Cy parle de la mort du Roy d'Arragon & des

des signes qui lors aduindrēt. Et dit commēt son bastard Ferrād fut Roy de Naples apres luy. Puis parle du Pape Pius & de plusieurs autres choses qui aduindrent au temps de lors, comme de la mort du Duc de Bretagne & de l'ambassade de Grece qui vint au Duc Philippe de Bourgongne. 75.

Cy parle de l'entrée que le Duc Philippe de Bourgongne feit en sa ville de Gand. Et comment les Gantois la receurent noblement. Puis dit comment le Roy de France enuoia sommer le Duc Philippe de Bourgongne pour estre au iugement du Duc d'Alencon. 75.

Comment le Roy contremanda au Duc de Bourgongne qu'il ne se trauaillast point d'aller à Montargis, mais y enuoiaست trois ou quatre notables personnes pour conuenir avec les autres. Puis parle en brief de la sentence donnée par le Roy contre le Duc d'Alencon en la ville de Vendosme, & la reseruacion du Roy apres la sentence rendue. 77.

Comment le Roy manda les douze Pairs de France à comparoir en sa ville de Montargis pour ouir le proces du Duc d'Alencon. Puis parle de la mort du Pape Calixte. Et comment le Roy transmua la iournée de Montargis à Vendosme. 79.

Cy dit comment le Duc d'Alencon fut condamné pource qu'il vouloit bailler ses places aux Anglois anciens ennemis de France & les mettre en Normādie. 79.

Comment l'ambassade d'Angleterre ne peut auoir acces au Roy de France à celle fois. Et pareillement comment le Duc de Bourgogne enuoia le Duc de Cleues à la iournée de Mantua. Et comment la Daulphine accoucha d'un fils à Geneue. Et commēt le Roy d'Escocce fut tué d'un esclat de bombarde. 84.

Cy parle en brief des grandes seditions & diuisions qui furent en Angleterre au

temps de lors. 84.

Cy dit commēt Edouard Comte de la Marche fils aîsné du Duc d'Iorch desconfit en bataille la Roynie d'Angleterre & fut Roy d'Angleterre par l'aide de ceux de Londres. Et comment la Roine s'en alla allier aux Escocois pour auoir leur aide. 85.

Cy parle d'aucun langaige semé par gens plains de zizanie qu'on vouloit empoisonner le Roy Charles septiesme de ce nom, dont il n'eut oncques puis ioye au cueur. 86.

Cy parle de douze maisons qui furent arses à Iuchy, et de la feste de la Toison que le Duc Philippe de Bourgogne tint à saint Omer audit an soixante & un, & de la naissance de la fille du Daulphin de Genepe. Puis parle des ambassadeurs d'outre-mer qui lors vindrent à la court du Roy de France & à la court de Bourgongne. 86.

Cy parle encores du trespas du Roy Charles septiesme de ce nom & des grandes & dures aduētures qu'il eut à son commencement. Et puis de ses glorieux & grans faits d'armes. 87.

Comment le Daulphin & le Duc de Bourgogne se disposerent pour aller à Reims au sacre dudit Daulphin. Puis parle de l'enterrement du feu Roy Charles & du sacre Roy Loïs à Reims, et des besongnes qui y furent faictes. 88.

Cy parle de l'entrée du Roy Loïs de France en sa ville de Paris, & des noblesses qui y furent faictes à son entrée. Et par especial du bruit du Duc de Bourgongne & de ses gens. 89.

Cy parle du partement du Roy & du Duc de Bourgongne de la ville de Paris, & du congé qu'ils prindrent l'un à l'autre, puis parle de plusieurs autres choses qui lors aduindrent en diuers lieux. 90.

Comment Charles de Bourgongne Comte de

TABLE DES CHAPITRES

- Charrolois s'en alla veoir le Roy Loïs de France à Tours où il fut tresgrandement festoïé. Et comment il se perdit à une chasse. Et comment il retourna au pais d'Arthois par le pais de Normandie dont le Roy l'auoit ordonné son lieutenant. 91.
- Comment le Duc Philippe Duc de Bourgogne fut en dangier de mort par maladie, dont neantmoins il eschappa. Puis parle de plusieurs choses qui lors aduindrent. 92.
- Comment le Roy Charles de France septiesme de ce nom apres son trespassement fut apporté à Paris, & de Paris à S. Denys là où son seruice fut fait moult noblement. Auquel seruice furent plusieurs Euesques, abbez & autres. 92.
- Cy parle de la mort villaine de Ieã Constain sommillier de corps du Duc Philippe de Bourgogne, & dit la cause pourquoy il mourut & de celuy mesmes qui l'accusa. 94.
- Cy parle de l'executiõ criminelle que fait faire le Duc Philippe de Bourgogne en sa Comté d'Arthois sur plusieurs mauuais garnemēs tresmal renommez. Puis parle du trespas de l'Abbé de S. Vaast d'Arras & d'autres choses. Puis parle d'aucunes parolles poignātes que le seigneur de Chimay dit au Roy. 94.
- Comment la Duchesse de Bourbon vint demourer avec son frere le Duc de Bourgogne. Puis parle du secours que le Roy de France bailla à la Roine d'Angleterre & de plusieurs autres choses qui lors aduindrent en diuers lieux. 95.
- Cy parle de plusieurs & diuerses besongnes qui aduindrent à l'entrée de l'an mille quatre cens soixante & trois. Puis parle de la dure fortune de la Roine d'Angleterre. 96.
- Comment le Roy de France donna au seigneur de Croi la Comté de Guisnes. Et comment le Comte d'Estampes s'eslongna de la maison de Bourgogne. Puis parle d'autres choses qui lors aduindrent. 97.
- Cy parle comment le Roy Loïs de France racheta les terres engaigées sur la riuere de Somme du Duc de Bourgogne. Et comment il alla veoir le Duc à Hesdin. Puis parle d'aucunes autres choses. 97.
- Cy parle du trespas de la Roine de France dame Marie d'Aniou. Puis dit comment le Roy fait adiourner le Comte de S. Pol & le seigneur de Genly à comparoir en personnes deuant luy. Puis parle d'autres choses, & du mariage du fils de Gueldres. Puis parle de l'abolition de la pragmatique Sanction. 98.
- Cy parle d'une diuisiõ qui lors estoit entre le Duc de Bourgogne & le Côte de Charrolois son fils, & des doleances que fait le Comte de Charrolois du seigneur de Croi aux deputez des trois estats des pais du Duc Philippe de Bourgogne son pere. 99.
- Cy parle de la responce que feirent les deputez des pais du Duc de Bourgogne au Comte de Charrolois son fils. Et comment le pere & le fils s'appaiserent ensemble. Puis dit comment le Roy vint en la ville d'Arras & à Tournay. 100.
- Cy parle du voiage du bastard de Bourgogne. Et comment le Roy fait detenir prisonnier Philippe de Sauoie, nonobstant la seurté du Roy. Et comment le Comte de S. Pol fut appaisé au Roy. Puis parle en brief d'une bataille qui fut en Angleterre. Et d'aucunes autres choses qui lors aduindrent. 101.
- Comment le Roy de France vint à Hesdin la seconde fois, puis parle du trespas du Pape Pius, & de la prinse du Bastard de Rubempré en Hollande, puis parle d'aucunes autres choses qui lors aduindrent. 102.
- Cy

Cy parle de la charge que le Bastard de Ru-
bempre eut d'aller en Hollande pour cui-
der prendre le Comte de Charrolois, puis
parle comment ledit Bastard y fut prins.
103.

Cy parle comment le Roy manda venir de-
uers luy aucuns deputez des villes des-
gaigées & d'autres pais, & de ce qu'il
leur fait remonstrer. Et comment il fait le
Comte de Nevers capitaine de Picardie,
& de l'ambassade qu'il enuoia au Duc
de Bourgongne lez Flandres. 104.

Cy parle de la responce que fait le Comte de
Charrolois aux ambassadeurs du Roy.
Et comment le Roy fait prendre Creue-
cueur de lez Cambray. D'une ambas-
sade que le Duc de Bourgongne enuoia
deuers le Roy, et du trespas du Duc d'Or-
leans. 105.

Cy parle du mariage du Roy Edouard d'An-
gleterre, & des alliances que voulut a-
uoir avecques luy le Roy de France. Puis
dit comment les bastards de Bourgongne
retournerent de leur voiage. Et comment
le Duc de Bourgongne fut malade ius-
ques à la mort. Et comment ceux de
Croÿ furent deboutez de la maison de
Bourgongne. 106.

C'est icy la copie des lettres que le Comte de
Charrolois enuoia aux nobles hommes
& aux bonnes villes des pais du Duc de
Bourgongne son pere touchans les causes
le mouuans à eslongner ceux de Croÿ du
seruice de son dit pere. 107.

Cy dit comment le Duc de Berry seul frere
du Roy de France s'absenta de l'hostel du
Roy et s'en alla à refuge au Duc de Bre-
tagne. Et comment le Comte de Damp-
martin eschappa de la prison du Roy, &
des lettres que le Duc de Berry enuoia au
Duc de Bourgongne. 109.

Cy parle des lettres que le Roy enuoia au
Duc de Bourbon & le Duc au Roy. Et
d'unes autres lettres que le Roy fait pu-
blier par tout son royaume, & d'unes

autres que le Comte de Nevers fait pu-
blier es villes dont il estoit lieutenant pour
le Roy de France. 110.

Comment le Duc de Bourgongne pardonna
à son fils. Et de la grand assemblée que
fait de gens d'armes pour aller en l'aide
du Duc de Berry contre son frere le Roy
de France. Puis parle de plusieurs autres
choses qui aduindrent lors. 111.

Comment le Comte de Charrolois print con-
gé du Duc de Bourgongne son pere pour
tirer en France à toute son armée &
grande artillerie. Et comment il passa la
riuere de Somme & mit en son obeis-
sance Neelle, Roie & Montdidier. Puis
alla assieger Beau Lieu & passer la ri-
uiere d'Oise. 113.

Comment le Comte de Charrolois passa la
riuere d'Oise & s'en alla à saint De-
nys, puis s'en alla mettre en bataille de-
uant Paris. Et le Comte de S. Pol s'en al-
la saisir le Pont S. Clou pour passer la ri-
uiere de Seine. Et comment il la passa à
tout son armée. 113.

Comment le Roy se conclud de combattre le
Comte de Charrolois. Et comment ils cō-
uindrēt à bataille au dessoubz de Mont-
leheri, & de la maniere de celle bataille
ou rencontre qui fut moult aduantageu-
se. 115.

Comment le Comte de Charrolois se main-
tint apres la victoire qu'il eut du Roy de
France à Montleheri & de plusieurs be-
songnes & sequelles qui en aduindrent
lors en diuers lieux. 116.

Cōment les Ducs de Berry, & de Bretagne se
trouuerent à Estampes avecques le Com-
te de Charrolois, & tost apres y vin-
drent aussi les Ducs de Bourbon, de Ca-
labre & de Nemours, le Comte d'Ar-
mignac & leurs alliez, & le Roy s'en
alla de Paris à Roÿen. 117.

Cy parle des diuerses nouuelles portées en
diuers lieux de la iournée de Montleheri,
puis d'une guise, puis d'une autre. 118.

TABLE DES CHAPITRES

Comment entre ces besongnes le Roy de France & les Liegeois firent alliâces ensemble pour guerroyer le Duc de Bourgongne & son fils Comte de Charrolois, et d'autres autres choses, & comment iceux Liegeois assiegerent la ville de Luxembourg. 119.

Cy retourne à parler des Liegeois, et dit comment ceux de Dinant iniurieret le Comte de Charrolois lors estans à Conflans. Et le Roy se trouua à Conflans avec le Côte de Charrolois. Et comment le Duc de Bourgogne print la ville de Roüen. 120.

Cy parle du trespas de la Comtesse de Charrolois. Et comment le Comte de Neuers fut prins au chasteau de Peronne. Puis dit comment les Liegeois furent desconfits à Montenac. Et puis il parle du traité fait à Conflans entre le Roy & les Princes de France. 121.

Cest icy l'extraict des lettres roiaux touchant ce que le Roy ceda & trāsporta au Comte de Charrolois pour le traité de Conflans. 122.

Comment le Roy voulut veoir l'armée du Comte de Charrolois en ordonnance. Et comment le Comte print cōgé du Roy et s'en alla à toute son armée pour guerroyer les Liegeois. Puis dit comment le Duc de Berry feit hommage au Roy de la Duché de Normandie. 123.

Cy parle de l'entrée du Duc de Berri à Roüen & comment tost apres le Roy entra en Normadie & reprint en sa main la Duché. Puis dit comment il feit noier & mourir aucuns seigneurs du pais qui auoient fauorisé son frere. 124.

Comment le Comte de Charrolois entra à toute son armée au pais de Liege. Et comment les Liegeois demanderēt & obtindrent trefues pour un temps. Et commēt tost apres la paix y fut trouuée: Mais ne dura gueres de temps. 124.

Comment apres le traité fait, ceux de Sainctron cuidoiēt auoir occis les gens du

Côte de Charrolois. Mais en fin se trouuerent les plus foibles. Et comment ledit Côte retourna à Bruxelles deuers le Duc son pere. Puis dit comment le Roy de France meit sus grosse armée. Et comment le Comte de Charrolois se tint garny & sur sa garde. 125.

Comment ceux de Dinant en Liege rompirēt la paix & recommēcerent la guerre contre le Duc de Bourgongne. Et comment tost apres leur ville fut assiegée & batue d'engins. 126.

Cy dit la maniere comment la ville de Dinant fut conquise de force par les gens du Duc de Bourgongne, si qu'il les conuint rendre à la uolenté du Duc. Puis dit comment le Duc en ordonna pour memoire perpetuelle à toutes villes de pareil condition. 127.

Cy dit comment apres la destruction de Dinant le Duc se disposa d'entrer au pais de Liege à tout son armée. Et des villes qui se rendirent à luy, puis dit comment la paix y fut trouuée pour celle fois. 129.

Cy dit comment messire Anthoine bastard de Bourgongne passa en Angleterre pour faire armée contre le seigneur de Scales frere de la Roine d'Angleterre. 130.

Cy parle du trespas & de l'enterrement du noble Duc Philippe de Bourgongne, & de son notable obseques fait à S. Donnaert de Bruges. 131.

Prologue sur les Chroniques des treschresties magnifiques, victorieux & illustres Rois de France Loïs vnziesme de ce nom, & Charles viij. son fils. 131.

S'ensuiuent aucunes recapitulations cy adioustées & recolligées és entieres Chroniques du feu Roy Loïs neuuiesme de ce nom aucunement obmises & delaissées par Enguerran de Monstrellet en ce qu'il auoit commencé à descrire és Chroniques du Roy Loïs sur le fait de la guerre & des approches de Montleheri. 132.

Cy apres sont aucunes histoires, gestes & merueilles

merueille aduenues & demonstrees es pais de France & autres diuerses provinces & regions additionnees & redigees à la verité en ce present volume, pour-ce qu'elles ont esté du tout obmises & delaissees à escrire par le dessusdit Chroniqueur maistre Enguerran de Monstrelet. Et tant durant le regne du bon Roy Charles septiesme de ce nom que durant le temps & regne du Roy Loïs vnziesme son fils. 133.

Comment le Roy Loïs vint à Paris & puis il sen alla en Picardie & comment le bastard de Rubempré fut prins en Hollande. Et de la mort du Duc d'Orleans, & comment le Duc de Bourbon feit aucune guerre audit Roy. 135.

Comment le Roy Loïs fut au pais de Bourbonnois où il print aucunes villes & chasteaux et d'aucunes nouvelles et merueilles en la cité de Paris & ailleurs. 136.

Du retour du Roy Loïs à Paris apres la iournée de Montleheri. 138.

Comment apres que les Bourgongnons & Bretons furent bien rafreschis ils retournerent eux loger es villages à l'entour de Paris, pourquoy ceux de la ville firent plusieurs bons & prudens conseils eux fortiffians & gardans par bonne defence. 140.

Cy apres est parlé d'aucuns ambassadeurs esleuz du party du Roy & desdits Bourgongnons pour communiquer sur les differens. Et des nobles de Normandie qui vindrent à Paris pour seruir le Roy. 143.

Comment apres le traicté fait à Conflans entre le Roy & lesdits Princes de son sang furent portez viures aux existans deuant Paris. Et comment le Comte de Charrolois en faisant sa monstre se declaira estre vassal & seruiteur du Roy, & aussi luy feit hommage le Duc de Berry & les autres. 146.

Comment le Roy Loïs mercia ceux de Pa-

ris de leurs bonnes proiesses & loiautez. Et conferma les priuileges qu'il leur auoit donnez en leur offrant autres nouveaux, il remeit Preuost de Paris messire Robert d'Estouteuille cheualier. Et comēt ledit Charles frere dudit Roy fut receu moult honorablement à Rouen come vray Duc de Normandie. 147.

Comment le Roy recouura la Duché de Normandie contre sondit frere Charles Duc de Berry. 149.

Comment le Roy se partit de Rouen pour aller à Orleans. Et enuoia plusieurs ambassadeurs en Angleterre. Et comment plusieurs malfaiteurs furent executez à Paris, du diuorse de sire Guillaume Coulonbel & de sa femme. 150.

Comment le Roy enuoia aucuns Commissaires reformateurs à Paris, desquels les pages eurent grande noise & questions aux clerks du palais. Et comment ledit Roy ordonna aucuns seigneurs pour la garde & deffence du roiaume. 151.

Comment le Roy feit le Comte de Dampmartin son grand maistre d'hostel. De la mort du Duc Philippe de Bourgongne. D'un religieux qui fut occis au temple. Et comment la Roine fut honorablement receüe en la ville de Paris. 152.

Comment le Roy ordonna & veit faire les monstres des bannieres de Paris, d'aucunes guerres au Liege. De la pragmatique qu'un Legat & Balue cuiderent abolir. Et comment le Roy feit faire trefues entre le Roy & Charles le Duc de Bourgongne non comprins les Liegeois. 154.

Comment le Roy enuoia Commissaires pour reueoir les monstres de Paris, de l'armée du Roy entre le Mans & à l'encontre des Bretons, d'une armée que feit & assembla le Duc de Bourgongne à S. Quentin. Et des trois estats qui furent tenus en la ville de Tours audit an mille quatre cens lxvij. 157.

TABLE DES CHAPITRES

D'aucunes iouſtes faiçtes à Paris & à Bruges. Et comment le Roy fut à Meaulx, du Prince de Piemonſ qui vint à Paris, du ſeigneur du Lau qui eſchappa des priſons d'Yſſon, dont pluſieurs furent decapitez. Et de ce qui fut fait entre le Roy & les Ducs de Berry & de Breſtagne en l'an mille cccc.lxviij. 158.

Cōment le Roy alla à noſtre Dame de Haux en Allemaigne. Et apres fut deſtruiçte la ville de Liege. 160.

De la trahiſon de maĩſtre Iean Baliue Cardinal d'Angiers, de la paix du Roy & de ſon frere Charles Duc de Guienne, de l'alliance du Roy de France & du Roy d'Eſpaigne, & autres pluſieurs choſes faiçtes en l'an mille cccc.lxix. 162.

Du Comte de Vvaruich & du Duc de Clarence qu'ils avec leurs femmes & familles dechassez du Roy Edouard vindrent és parties de France. De la natiuité du Daulphin Charles, de l'alliãce du Roy de France & du Roy Henry d'Angleterre, de la fuitte du Roy Edouard, de l'entrée de la Royne d'Angleterre à Paris, & pluſieurs autres choſes aduenues en l'an mille cccc.lxx. 164.

Des nouuelles qui vindrent au Roy, de la victoire de Edouart ſur ledit Roy Henry d'Angleterre. Des libelles diffamatoires contre le Conneſtable audit Paris. Et cōment le Duc de Guienne & le Côte d'Armignac furent alliez enſemble & autres choſes faiçtes en l'an mille cccc.lxxi. 167.

Comment le Pape Paule deuxieſme mua le iubilé & puis il mourut. Et apres luy fut eleu à Pape Sixte quatrieſme luy eſtant general de l'ordre des freres mineurs en l'an mille cccc.lxxi. 168.

Des indulgēces que le Roy impetra pour dire trois fois aué Maria, de la mort de Charles frere du Roy, des trefues avecques le Duc de Bourgongne. Du ſiege & des aſſaux à Beauuais, & des viures & biens enuoyez par ceux d'Orleans à Beauuais

en l'an mille cccc.lxxij.

168.

Des monſtres reſaiçtes à Paris, & comment le Duc de Bourgōgne ſe partit honteuſement de ſon ſiege deuant Beauuais, de l'armée du Roy en Breſtagne, de mōſeigneur de Beauieu qui fut trahy, du Comte d'Armignac & ce qui en fut fait, du Roy de Arragon qui ſ'enfuit de Parpignan. 171.

Du ſiege deuant Parpignan. Et comment le Duc d'Alencon fut detenu priſonnier au Louure. De la mort du Duc Calabre, de l'execution d'un nommé Iean Hardy qui voulut empoifonner le Roy, d'un nouuel edict dudit Roy enuers les gens d'armes & ſur les monnoyes, d'une ambassade du Roy d'Arragon & autres pluſieurs choſes faiçtes en l'an mille cccc.lxxiiij. 173.

Des monſtres faiçtes à Paris preſent le Roy & autres pluſieurs, & du Parlemēt fait entre le Roy & le Duc de Bourgongne. Du ſiege deuant Nuz par ledit Duc de Bourgongne audit an. 176.

De la ſommat̄ion du Roy Edouard d'Angleterre au Roy de France, d'un homme ouuert tout viuāt par les medecins du Roy, & de la reduction de la ville de Parpignan l'an que deſſus. 177.

Commēt l'Empereur & le Roy feirēt enſemble alliance, de la prinſe du Tronquoy, Roie, Montdidier & autres places pour le Roy, des trahiſons du Cōneſtable, de la fuitte & depart du Duc de Bourgongne deuant Nuz, du Parlement & traicté du Roy Edouard avec le Roy & pluſieurs autres choſes. En l'ã mille cccc.lxxv. 179.

Commēt le Duc de Bourgongne liura le Conneſtable Loīs de Luxembourg aux gens du Roy, du proces & de l'executiō faiçte dudit Conneſtable à Paris. Du Duc d'Alencon deliuré du Louure. Du Duc de Nemours prins priſonnier à Carlat par le ſeigneur de Beauieu pour le Roy & autres choſes aduenues audit an quatre cens lxxv. 182.

Du ſuppliment & emprunt fait par le Duc de

- de Bourgongne à ses païs pour sa recou-
rance des Suisses, du Seneschal de Nor-
mandie qui occist sa femme. Du Duc de
Lorraine contre les Bourguignons deuant
Morat & en la Comté de Romont. Et du
siege remis par le Duc de Bourgogne de-
uant Nancy, de l'aduenement du Roy de
Portugal en France & autres choses ad-
uenues en l'an mille cccc.lxxvi. 187.
- Comment le Duc de Millan fut occis. De la
destruction & mort du Duc de Bourgon-
gne. Et de la reduction des païs & autres
lieux qu'il usurpoit à la couronne és ans
mille cccc.lxxvi. & lxxvij. 189.
- Comment le Roy manda venir à Noyon des
conseillers de Paris pour faire le proces
du Duc de Nemours, de la mort du Duc
de Gueldres deuant Tournay. Et de la
mort & execution dudit de Nemours à
Paris, & des executez audit Paris pour
auoir occis le Bourreau d'icelle ville en
l'an que dessus lxxvij. 193.
- Comment le Cardinal de S. George fut dete-
nu prisonnier, là où fut adoncques pendu
& estranglé l'Archeuesque de Pise &
autres plusieurs pour auoir occis Iulien
de Medicis, du siege du Turc deuant Rho-
des. Du saint enfant Symon & un autre
crucifiez & martirisez. D'un deuot Her-
mite qui vesquit xv. ans du S. Sacrement.
D'un monstre né en la ville de Veronne.
D'une merueilleuse Comette & autres
plusieurs choses adioustées en icelles pre-
sentes chroniques. 194.
- Comment le Roy venant de Picardie à Paris
deliura les prisonniers de Chastellet, du
Prince d'Orenge & messire Claude de
Vaudray au Comte de Bourgongne. Et
comment Edouart Roy d'Angleterre feit
mourir son frere en l'an cccc.lxxvij. 195
- Comment l'argent pour les gages des Fla-
mens fut prins par les gens du Roy, les-
quels puis prindrent la ville de Condé,
d'un cordelier nommé frere Anthoine Fra-
din qui prescha à Paris, & de plusieurs
villes que Charles d'Amboise recouura
pour le Roy au Duché de Bourgogne. 197
- Des grandes richesses que le Roy donna à plu-
sieurs Eglises. Et comment un conseil fut
tenu à Orleans pour la Pragmatique, de
l'alliance du Roy de Castille avecques le
Roy. Et comment un moyne noir Herma-
frodite deuint gros d'enfant, d'une Bom-
barde nouvellement essayée à Paris de-
quoy furent tuez & naurez plusieurs
personnes & autres choses aduenues au-
dit an lxxvij. 199.
- De l'ordonnance du Roy en ses guerres. De
plusieurs villes prinsees en Bourgongne
pour le Roy, d'une descōfiture sur le Duc
d'Autriche assez pres de Theroüene, d'une
autre grande execution & destrouffe fai-
cte par les gens du Roy qui gaignerent
xvij. places & quatre vingts nauires de
Flandres que Coulon print en Normãdie
pour le Roy en l'an mille cccc.lxxix. 200
- D'une ambassade d'Angleterre vers le Roy,
du Legat Cardinal de S. Pierre ad vin-
cula en France, des Suisses mis sus au lieu
des Francs-archiers, d'un grand Tuer,
& autres avecques les Anglois en l'an
mille quatre cens & iiij. vingts. 202.
- D'un camp fait pour le Roy entre le Pont de
l'arche & le Pont S. Pierre, de l'année
des petis vins. Du Roy qui deuint malade
à Tours. Puis alla à S. Claude. Et d'une
grande famine qui fut en ce temps mille
quatre cens iiij. vingts & un. 203.
- Du trespass ma dame Ieanne de France es-
pouse du Duc de Bourbon, & du trespass
de la Comtesse de Flandres: Du retour de
S. Claude à nostre dame de Clery. De la
mort & occision du seigneur Lois de
Bourbon Euesque du Liege & autres
choses faictes en l'an mille quatre cens
quatre vingts & deux. 204.
- Comment le Roy estant malade vint à Amboi-
se veoir son fils. Et comment le Roy feit cō-
māder sa santé par deuotes personnes en
l'Eglise S. Denis en France. 205.

TABLE DES CHAPITRES

- Du seigneur de Beaujeu & dame Anne de France sa femme, pour la reception de la Dauphine, de la mort du Roy Edouard, du trespas de dame Marguerite de Bourbon Comtesse de Bresse. De l'entrée & reception de ladicte Dauphine à Paris, du clocher sainte Geneniefue bruslé & des nopces du mariage du Dauphin & de ladicte Dauphine. 207.
- De la sainte Ampolle de S. Remy de Reims portée au Roy en son hostel des Môtis lez Tours. Et finalement du deuot trespas dudit Roy Loïs xi. sepulture en l'Eglise nostre dame de Clery, lequel Dieu absolve. 208.
- Chroniques du treschrestien Roy de France Charles viij. de ce nom. 208.
- Cōment ledit Roy fut sacré à Reims. Et comment il feit son entrée à Paris. 209.
- De la mort du Pape Sixte iiij. de ce nom & cōment le Pape Innocent fut eleu & luy succeda, de la guerre de Bretagne, & cōment ledit Roy Charles espousa madame Anne fille du tresnoble Prince Francois Duc de Bretagne. 210.
- Cōment le Roy Charles rendit liberalement la Comté de Roussillon, de la prinse S. Omer. 211.
- Commēt apres que le Roy Charles eut espousé madame Anne elle fut courōnée Roïne de France en l'Eglise S. Denis en France. Et de son entrée de Paris. 213.
- De l'entreprinse du voiage du Roy Charles pour recouurer son royaume de Naples. 214.
- Commēt un nommé frere Hierosme de Ferrare prescha l'aduenture du Roy & des Francois au pais d'Italie. 214.
- Comment le Roy partit de Grenoble pour passer de là les Monts & aller à Naples. 215. 216.
- De l'entrée du Roy en la ville de Thurin au pais de Piemont. Et comment il fut receu en grand honneur. 216.
- Commēt le Roy se partit de Quiers pour venir en la ville d'Ast, où il eut certaines nouvelles des nobles faits de mōseigneur le Duc d'Orleans au pais de Genes. Et cōment Ludouic & sa femme vindrent veoir le Roy Charles audit Ast. 216.
- De l'entrée du Roy Charles en la ville de Cassal. 217.
- De l'entrée du Roy à Paue, & comment il fut receu. 218.
- De plusieurs autres villes & places où le Roy passa: de Plaisance iusques à la ville de Luques. 218.
- De l'entrée & reception du Roy en la ville de Luques. 219.
- Comment le Roy entra en la ville de Pise et en autres iusques à Florence. 219.
- De l'entrée du Roy à Florence. 219.
- De l'entrée du Roy & de ses gens en la ville de Sene la Vieille à Viterbe. 219.
- Comment le Roy entra à Romme avec son armée. 220.
- Comment le Roy partit de Romme pour aller à Naples. 221.
- Comment le Roy entra triomphamment en la ville & cité de Naples, des assaulx et prinse du lieu dit la citadelle, du chasteau Noue & du chasteau l'Oue. 221. 222.
- De l'entrée du Roy Charles à Naples comme Roy & seigneur du pais & le Monarche des Italies. 224.
- Comment le Roy se disposa de retourner en France & print congé de ceux de Naples. 224.
- Du voiage du Roy Charles en son retour de Naples au pais de France. 225.
- De la iournée de Fournoue & excellēce victoire du Roy & des nobles Francois. 225.
- Comment le Roy leua son camp dudit lieu de Fournoue pour retourner au pais de France. 227.
- Du voiage du Roy Charles à saint Denis en France apres son retour de Naples: & comment il retourna à Amboise là où il

- où il mourut d'un catarre. 228.
- Du service fait des funérailles dudit feu Roy es lieux d'Amboise, Paris & saint Denis en France. 228.
- Du Roy Loïs douzième.
- Comment le seigneur Ludouic fut prins prisonnier deuant Nouare & amené en France. 230.
- Comment le Cardinal Ascaigne frere du seigneur Ludouic fut prins & amené en France. 230.
- Comment les habitans de la ville de Millan furent reduis moyennant aucune somme d'argent. 230.
- Comment le Roy enuoya grand nombre de pietons à Naples pour la reconquester, & en petit de temps fut prinse, et Frederic soy disant Roy vint en France. 234.
- Comment monseigneur le Cardinal d'Amboise feit son entrée à Lyon à cause qu'il fut Legat en France. 234.
- Comment après que Naples fut prinse les Francois feirent guerre aux Turcs. 234.
- Comment l'Archeduc feit son entrée à Lyon sur le Rosne & du second heretique. 234.
- Comment le Cardinal de S. Pierre ad vincula fut fait Pape. 236.
- Comment Sophiz feist guerre à Vsson Cassan Turc. 236.
- De la male saison & de la grand mortalité qui fut, de la mort de plusieurs grans personages. 237.
- Comment l'Archeduc & la Royne de Hongrie moururent, de la guerre du Pape contre les Boulenois. 238. 239.
- La prinse de Boulongne la Grasse par le Pape Iulius deuxiesme & les Francois. 239.
- De damoiselle Triulce. 239.
- Du traicté & appoinctement fait à Cambray par monseigneur le Legat George d'Amboise entre le Pape & l'Empereur Maximilian & le Roy de France & le Roy d'Espaigne. Et comment ledit Roy de France desconfit les Venitiens au lieu de Aignadel. 240.
- Comment guerre fut meüe entre le Pape Iulius & le Roy de France à cause du Duc de Ferrare & du Concille fait à l'instance de l'Empereur Maximilian & dudit Roy, dont le Pape ne fut pas content, & comment la ville de Boulongne la Grasse fut prinse par les Francois. 240. 241.
- Comment le Duc de Nemours alla contre ceux de Bresse qui sestoient rebellez contre le Roy & de la grand occision faicte en icelle ville. 241.
- Comment le Duc de Nemours & les Francois desconfirent l'armée du Pape & des Venitiens & Espaignols aupres de Rauienne. Et comment ledit Duc de Nemours apres la victoire obtenue & ses ennemis chassez hors du camp fut occis. 242.
- Comment apres les batailles dessusdictes & le depart des Francois les Suisses prirent la ville de Milan & autres places qui tenoient pour le Roy. 245.
- De la guerre de Guienne & comment le Roy de France enuoya secours au Roy de Navarre & des preparations que feit le Roy d'Angleterre pour venir en France guerroyer. Et comment deux gros nauires l'un Francois & l'autre Anglois se combattirent sur la mer. 245.
- Comment le Roy d'Angleterre descendit à Calais à tout son armée & comment les Francois furent desconfits à Nouarre par les Suisses. 245.
- Comment aucune compagnie de Francois reuenans d'aitailler la ville de Theroüenne qui estoit assiegée des Anglois & Hennuiers furent desconfits & mis en fuite. 246.
- Comment le Roy d'Escoce entra en Angleterre à tout grosse armée, & comment il fut occis, & de la paix faicte & créée entre le Roy de France & les Veniciens. 246.
- Comment les villes de Theroüenne & Tournay furent rendues aux Anglois par cō-

- position. 247.
- Du trespas & sepulture de la treschrestienne Roine de France Anne Duchesse de Bretagne. 247.
- Comment le Roy de France espousa & print à femme ma dame Marie sœur du Roy Henry d'Angleterre & comment monseigneur Francois Duc de Valois & Cōte d'Angoulesme espousa ma dame Claude fille dudit Roy de France. Et de l'entrée d'icelle dame Marie faicte à Paris. 248.
- Des ioustes faictes à Paris. Et du trespas et sepulture du Roy Loïs xij. 249.
- Du Roy Francois premier de ce nom.
- Comment le chrestien Roy de France Francois premier de ce nom fut sacré Roy à Reims & fait son entrée en la ville de Paris & autres lieux. Et comment ledit Roy partit de France pour aller de là les Mons contre les Suisses qui detenoient la Duché de Millan. 249.
- De ce temps enuoya le Roy querir Pietre de Nauarre, lequel estoit en prison & luy fait le Roy de grans dons & luy bailla charge de gens. 250.
- Comment le Roy de France atout son armée suiuit les Suisses. Et comment la ville & chasteau de Nouare furent rendus au Roy. 251.
- Comment le treschrestien Roy Francois de France desconfit pres de Marignan au camp sainte Brigide l'armée des Suisses le iour de l'exaltation sainte Croix. Et de la cruelle bataille & occision qui fut lors entre les Francois & Suisses. 251.
- Comment les Milannois rendirent la ville de Milan au Roy. Et comment le siege fut mis par les Francois deuant le chasteau de ladicte ville. Et comment il fut rendu au Roy par composition. 253.
- Comment le Pape Leon dixiesme & le Roy conuindrent ensemble en la ville de Boulongne où ils traicterēt de leurs affaires, & comme le Roy reuint en France. 253.
- Comment l'Empereur Maximilian assembla grosse armée de gens pour cuider reprendre la ville de Millan & en ietter hors les Francois. Et comment monseigneur de Bourbon lieutenant general du Roy alla contre luy. 254.
- Cōment l'Empereur Maximilian soy voyāt qu'il ne pouuoit venir à chef de son entreprinse se departit de deuant la ville de Millan. 255.
- Comment le Roy partit de Lyon pour aller en pelerinage au saint Suaire de nostre seigneur. Et comment appoinctement & paix fut faicte entre luy & l'Archeduc Roy d'Espaigne. 255.

Fin de la table du tiers volume.



TROISIEME

VOLUME DES CHRONIQUES

D'ENGVERRANDE

MONSTRELET.



N l'an mil quatre cens quarante quatre à la fin du 1444.
mois d'Auril apres Pasques, les Anglois prindrent
trefues pour huit mois, & fiancerent la fille du Roy
René de Cecille pour estre femme du Roy Henry
d'Angleterre en esperance que paix se feroit entre les
deux Roys, & puis s'en retournerent lesdits Anglois
en Angleterre pour parler à leur Roy & aux estats
du Royaume, & pour conclure du fait de la paix. En
ce temps conclud le Roy en son conseil qu'on en-
uoyeroit les gens d'armes de France tant François

comme Anglois en Allemagne pour viure illec pendant que les trefues de-
mourroient en leur vertu, & les conduiroit monseigneur le Daulphin, lequel
se partit de Troyes ou moys de Iuillet, & cheuaucha tant par iournées à tout
son ost qu'il vint deuant Montbelliart, qui est vne ville d'Allemagne ioignant
de la Comté de Bourgongne, laquelle il assiegea, pource que le Baillif de ladi-
cte ville auoit couru iusques à Langres, vne cité qui est au Roy, & auoit em-
mené les gens prisonniers & les bestes, & auoit fait beaucoup de maulx dont
le Roy fut mal content, & pource meit le Daulphin siege deuant ladicte ville
& chastel, & les print par composition. Le Roy tost apres suiuit le Daulphin à
grand puissance de gens d'armes & cheuaucha tant par iournées qu'il vint en
sa ville & cité de Langres, & passa son auantgarde sur les marches de Lorrain-
ne, & vindrent deuant vn chastel nommé d'Arlay que tenoit vn nommé le Ba-
stard de Vergy, qui d'icelle place & d'autres estans ou paÿs de Champagne
faisoit beaucoup de maulx, laquelle place il rédit au Roy & toutes celles qu'il
tenoit ou paÿs de Champagne: toutesfois ledit Bastard tenoit ledit chastel en
gaige pour aucun argent qu'il disoit auoir baillé aux affaires du Roy de Cecil-
le, lequel chastel estoit tresfort & bien aduitaillé & réparé. Puis vint le Roy à
Espinal vne ville sur les marches de Lorraine, & d'Allemagne: laquelle se te-
noit pour l'Euesque de Mets & le chastel se tenoit pour la communauté, si se
rendit au Roy, lequel y alla en personne, & de là s'en alla le Roy en la ville de

A

Nancy, adonc supplia le Roy de Cecille au Roy de France qu'il luy pleust donner secours, ayde & confort à conquerre la ville de Mets en Lorraine, & aucunes autres prochaines d'illec estans oudit païs, lesquelles luy estoient rebelles & desobeissantes, combien qu'elles soient de son propre demaine comme il disoit: pourquoy le Roy en faueur du Roy de Cecille à tout grād armée de Princes, Barons, Cheualiers & escuyers tant de gens de guerre & de traict, comme autrement, & enuoya la plus grand partie de ses gens d'armes deuant ladicte ville & cité de Mets pour sommer les habitans d'icelle ville la luy rendre, ou autrement mettre le siege deuant eux. Et pource qu'ils se feirent & monstre- rent rebelles disans non estre au Roy de Cecille ne à autre quelconque sei- gneur, ils furent assiegez & furent les gens d'armes deuant, & là entour par l'es- pace de cinq mois ou plus, puis feirent ceux de ladicte ville de Mets aucun traicté avec le Roy en telle maniere que lesdits gens d'armes se deslogeroient d'entour la cité. Et pendant ce siege vint illec vn grand seigneur nommé monseigneur Bourgalemoyne, lequel l'Empereur auoit enuoyé deuers le Daulphin pour le conduire és païs de Basle, Montbelliart, Coulombaria, Se- lestat, Strasbourg, Haguenau estans au païs d'Aussays à fin de subiuguer les Suysses & les Allemãs qui se disoient rien tenir dudit Empereur, lequel Daul- phin accompagné de plusieurs seigneurs & capitaines fut iusques à Basle, & trouua à vne lieuë dudit Basle bien huiet cens Suysses, lesquels se bouterent en vne maladerie, & dedans le iardin d'icelle pour cuider resister audit Daul- phin & se deffendirent vaillamment veu le petit nombre qu'ils estoient, & tel- lement qu'ils tuerent le cheualier Allemant qui conduisoit ladicte armée & plusieurs autres: mais certes ils y furent mors & prins la plus grand partie, & puis s'approcha le Daulphin de ladicte cité, & ceux de la ville saillirent sur ses gens les cuidans trouuer en desaroy: mais ils furent desconfits, à celle descon- fiture d'Allemans en y eust bien mille mors & deux ou trois cens prisonniers, & le demourant se meirent en fuite, & de là s'en alla le Daulphin deuant la vil- le de saint Ypolite pour la prendre d'assault: mais ils y feirēt obeissance & aus- si feirent ceux du Vau-du-Lieure: & lors commencerent ceux de l'ost à pillier le païs & à faire grans & enormes maux, pourquoy les Suysses & les Allemãs s'assemblerent par grans troupeaux & tuerent grand quantité de ses gens. Et lors voyans que c'estoit vn merueilleux païs, & que celuy qui deuoit cōdui- re & qui sçauoit les destroits du païs estoit mort, s'en retourna deuers le Roy à Nancy où estoient le Roy de Cecille son oncle & plusieurs autres grans sei- gneurs, cheualiers & escuyers, & si y estoient les Roynes de France & de Ce- cille, la Daulphine & la fille du Roy de Cecille, pour laquelle auoir en maria- ge le Roy d'Angleterre enuoya en ambassade le Comte de Suffort accompa- gné de plusieurs cheualiers, escuyers & gens de conseil, lesquels parlementerēt & feirent tant qu'ils l'emmenerent en Angleterre. Au partement d'icelle furent faictes moult belles ioustes, & iousterent le Roy mesmes & le Roy de Cecille, mōseigneur Charles d'Anjou, les Côtes de Foix & de saint Pol, Ferry monsei- gneur de Lorraine & plusieurs autres grans seigneurs cheualiers & escuyers, & dura ladicte feste huiet iours & là furēt les Roys & les Roynes, Princes, Barōs, dames, damoyelles en grans & riches estats & riches habillemens, & puis se
partit

partit la Roynie d'Angleterre & la conuoyerent le Roy de France & le Roy de Cecille son pere iusques à deux lieues de Nancy que le Roy commāda à Dieu ladicte Roynie d'Angleterre sa niepce en larmoyant & plorāt l'un à l'autre trespiteusement, & tellement qu'ils ne pouoient parler l'un à l'autre, & ainsi se departirent & retourna le Roy en la ville de Nancy & le Roy de Cecille pere de ladicte Roynie d'Angleterre passa outre conuoyant ladicte fille iusques à Bar-le-Duc, la commanda à Dieu, & aussi feit ladicte Roynie sa mere. Tost apres le departement du Daulphin, les Allemans se bouterent dedans la ville de saint Ypolite, & au contemp de l'obeissance qu'ils auoient faicte audit Daulphin bouterent le feu en ladicte ville & l'ardirent toute, & pareillement la ville du Vau-le-Lieure. En ce point vindrent deuers le Roy l'Archeuesque de Treues & Electeur du saint Empire & le Comte Blancquemain enuoyez de par les Allemans deuers luy, & feirent paix ensemble & alliance perpetuelle. Apres ce le siege estant entour ladicte ville de Mets lequel y fut longuement, durant lequel temps furent faictes plusieurs faillies par les gens de ladicte ville de Mets, & aussi vaillamment furent reboutez par les assaillans : durant aussi lequel siege furent prins par les gens du Roy plusieurs petites forteresses : entre lesquelles vn gentil-homme nommé Guillaume Chanu capitaine de Harfleur en tenoit vne: il y auoit aussi deux ou trois chasteaux tenuz & occupez par les gens du Duc de Bourgongne ausquels ne fut riens demandé, pource que le Roy de Cecille les auoit mys en gaigne pour perte de sa rançon, dont il estoit encores tenu enuers ledit Duc de Bourgongne: & à la garde de ladicte ville de Mets y auoit vn moult cruel homme nommé Iean de Vitout Gouverneur d'icelle, lequel cheuauchoit tousiours vn petit coursier, à la queue duquel pendoit vne sonnette qui faisoit grand noyse, & le faisoit affin que chacun le cogneust quand il alloit parmy la ville: cedit Gouverneur estoit si cruel que quand il sçauoit aucunes femmes qui yssioient dehors pour aller rachapter leurs maris qui estoient prins des gens du Roy, au reuenir il les faisoit noyer, pource qu'elles leur auoient porté aucunes finances. Et mesmement les gens du Roy qui estoient prins par ceux de ladicte ville, faisoit il mourir sans mercy & ne vouloit souffrir qu'aucun fust prins à rançon: neantmoins le Roy doux & begnin Prince ne desiroit pas sa mort ne ses complices: car pour espargner le sang humain il leur bailla gracieuse & belle composition, & telle que parmy certain present qu'ils y feirent de vaisselle dorée qu'ils y donnerent avec deux cens mille escus qu'ils payerent pour le deffrayment dudit siege, & cent mille florins d'or qu'ils quitterent au Roy de Cecille, lequel luy & ses predecesseurs auoient emprunté aux dessusdicts: iceux demourerent en leurs franchises & libertez comme ils estoient parauāt sans rien sur eux innouer ne chose nouuelle reclamer. Et ne fut pas le debat dudit Roy de Cecille ne d'eux terminé de tous points ne mené à fin, pour celle heure. Apres cest accord le Roy ordōna en la ville de Nācy que tous les gens d'armes qui auoient esté en Allemagne & deuant Mets feroient leurs monstres & des mieux en point, & des plus gens de bien on prédroit cinq cens lances & quatre mille archiers, & le demourant ordonnoit eux en aller en leurs maisons ou en leurs païs, & cassa tous les capitaines ou la pluspart, & ordonna seulement quinze capitaines, lesquels auroient chacun cent lances & les

archiers, lesquels seroient logez par les villes de son Royaume & nourriz & payez des biens du peuple: & si hardy d'iceux gens d'armes ne archiers de faire desplaisir ne riens prendre de lors en auant sur homme des champs ne des villes. Et celle ordonnance ainsi faicte & deuisee se partit le Roy & toute sa compagnie & s'en alla à Chaalons où il demoura par certain temps. En ce temps le Roy de Polane, le Cardinal de saint Ange, le Legat du Pape conquirent avec les Chrestiens qu'ils auoient en leur ayde tout le pays de la Grece & de la Valaquie, & chasserent les Sarrazins iusques à la mer Maiour: mais tost apres le Souldan & le grand Turc feirent grand armée de Sarrazins pour secourir les Turcs, & passerent la mer & trouuerent les Chrestiens qui estoient à celle heure peu de gens & les desconfirent & y furent mors & escorchez tous vifs lesdits Roy de Polane & Cardinal, lesquels sont Martyrs & en Paradis se Dieu plaist: car ils moururent pour exaucer la foy de nostre sauueur Iesus Christ. En ce tēps apres que les gens d'armes du Daulphin furent retournez d'Allemagne se partirent de luy les Anglois qui estoient venus à son seruice, & estoit conducteur vn capitaine nommé Matago, lesquels gens d'armes ledit Matago ramena au pays de Normandie que tenoit leur Roy pour ce temps pour viure illec.

Comment le Roy de Cecille vint à Chaalons deuers le Roy de France pour traicter au Duc de Bourgongne de sa rancon. Et comment la Duchesse de Bourgongne y vint: puis dudit trespassement des Roynes d'Espaigne & de Portugal, comment le Roy enuoya vne ambassade en Angleterre.

1445.



N l'an mil quatre cens & quarante cinq le Roy de France estant à Chaalons, le Roy de Cecille vint deuers luy pour traicter avec monseigneur de Bourgongne de la finance en quoy il festoit rançonné luy estant son prisonnier, & pource qu'il n'auoit point argent assez, luy auoit baillé en gage les villes & chasteaux de Neufchastel en Lorraine, de Beaumont en Argonne & de Gaudricourt, & là ledit Duc de Bourgongne auoit mis gens d'armes à la garde d'icelle place payez & souldoyez des deniers du Roy de Cecille, & quand ils auoient faute de paiement ils couroient les Duchez de Bar & de Lorraine & faisoient de grans maux & dommaiges, & à celle cause fut fait vn traicté pourquoy vint la Duchesse de Bourgongne deuers le Roy pour traicter comment le Duc de Bourgongne auroit le val de Cassel en Flandres, & luy donneroit le Roy de Cecille par heritage à luy & aux siens, & en ce faisant rendoit au Roy de Cecille les villes & Chasteaux dessusdits: pour la venuë de la dame de Bourgongne furent faictes moult belles ioustes. En ce temps moururent les Roynes d'Espaigne & de Portugal seurs des Roys d'Arragon & de Nauarre, & aussi trespasserent la Roine d'Escocce & la Daulphine fille du Roy d'Escocce & de ladicte feuë Roine sa femme en ladicte cité de Chaalons, & fut enterrée en la grand Eglise d'icelle ville, & fut grand dommage de sa mort, car elle estoit belle & bonne dame. En ce temps enuoya le Roy en ambassade en Angleterre le Comte de Vendosme son cousin Grant-maistre d'hostel du Roy, l'Archeuefque de Reims premier Pair de France & autres, lesquels allerent en Angleterre deuers le Roy d'Angleterre nepueu du Roy, pour trouuer aucun bon traicté ou

appoinctement de paix entre les deux Roys, & pour ce faire, confermer & consentir furent aussi enuoyez autres ambassadeurs du Roy de Castille frere d'armes & allié du Roy, & aussi du Roy de Cecille, des Ducs de Bretagne, de Bourgogne & d'Alençon & de tous leurs alliez pour cōfermer de leur part ce que lesdits ambassadeurs du Roy feroient avec le Roy d'Angleterre: lesdits ambassadeurs furent grandement receuz en Angleterre du Roy & des grās seigneurs dudit Royaume Cardinaux & Prelats, puis traicterent vnes trefues à durer depuis le mois d'Auril oudit an iusques au mois de Nouembre ensuiuant mil quatre cens xlvj. Et ce pendant lesdits deux Roys deuoient conuenir ensemble entre Roüen & Paris ou entre Roüen & Chartres, & pour plus abbreger les choses dessusdictes le Roy d'Angleterre enuoya maistre Adā de Moulins maistre de son priué seel & eleu Euesque d'Exestre par deuers le Roy son oncle, lequel acquist ralongement de trefues depuis ledit mois de Nouembre mil quatre cens xlvj. iusques au mois d'Auril ensuiuant audit an, affin que iceux deux Roys eussent plus long temps de besongner au bien de paix, & pour confermer les choses dessusdictes renuoya le Roy d'Angleterre son nepueu maistre Guillaume Cousinot conseiller & maistre des requestes de son hostel, Jean Hauart son escuyer trenchant, lesquels se confermerent lesdictes trefues iusques audit mois d'Auril. Apres le retour d'iceux renuoya le Roy d'Angleterre Iartiere son Roy d'armes deuers le Roy, lequel apporta lettres patentes du Roy d'Angleterre comment il promettoit en parolle de Roy d'estre & de venir deça la mer deuers le Roy dedans le premier iour de Nouembre, & aussi en emporta ledit Roy d'armes pareilles lettres de promesse du Roy & furent publiez lesdictes trefues par lesdits deux Royaumes. En ce temps fait le Duc François hōmage au Roy ou Chastel de Chinon de la Duché de Bretagne & de la Comté de Mont-fort. En ce temps aussi vindrent en France deux filles du Roy d'Escoce cuydants trouuer viue la Daulphine leur sœur, lesquelles la Daulphine auoit mandées pour la venir veoir ou pour les marier. Et quand elles furent descendues en Flandres, elles ouyrent nouuelles que la Roïne d'Escoce leur mere estoit morte, & aussi comment la Daulphine leur sœur estoit decedée à Chaalōs en Champaigne, dont elles furent moult desolées. Elles doncques venues deuers le Roy il ordonna qu'elles fussent seruies des seruiteurs de la feuë Daulphine, & eurent l'estat qu'auoit ladicte Dame aux despens du Roy iusques à ce qu'elles fussent assignées ou mariées.

L'an mil.cccc.xlvi. aduint que le Roy en retournant d'ouyr Messe trouua sur son liēt ce present dicté dont la teneur s'ensuyt.

E mal payer, faux conseilliers,
Le discord d'aucuns Cheualiers
Impositions & gabelles
Ont esleué guerre nouuelles
Que iamais iour ne fineront
Tant que tels choses dureront:
Car maints seruent le Roy Francois
Qui pourtant sont de cuer Anglois :

Et service fait contre cuer
Ne peut prouffiter à nul feur.
Le sage si dit & recorde,
A qui du tout ie bien m'accorde
Que Prince hai en sa terre
Ne peut viure sans auoir guerre:
Ne il n'en chault à ses haultx hommes,
Qui du Roy ont les grosses sommes

*L'or & l'argent & les grans terres,
Par iceux sont menez les guerres
Qui au payer sont les premiers
Et au besoing les derniers.*

*Mirez vous icy Ducs & Roys
Qu'en la fin n'oyez le sourdois,
Et s'en la guerre allez tel erre
Seurs soyez que vous perdrez terre:
Car bien payer acquiert amis,
Mal payer acquiert ennemis.*

*Laissez boys, laissez riuieres,
Prenez lances, leuez bannieres,
Fuyez les faux, suyuez les sages,
Allez aux champs, yssiez les caiges
Où vous auez honneur perdue
Helas France ton nom se mue
Et si vous dits bien sur ma teste
Qu'on vous tiendra trestous pour beste
Je parle au Duc, je parle au Roy
Et si suis meu de bonne foy.*

Comment le Duc de Bretagne fait prendre messire Gilles son frere : Et comment ceux de Gennes enuoyerent leur ambassade deuers le Roy de France pour le faire leur seigneur & qu'il en aduint.

1446.

EN lan mil cccc. xlvj. fut prins messire Gilles de Bretagne par le commandement de son frere le Duc François de Bretagne, pour ce qu'il doubtoit que ledit messire Gilles ne boutast les Anglois en son païs, & fut prins en vn chastel nommé le Guilledon, & furent à sa prinse quatre cens lances des gens du Roy, dont furent conduyseurs messire Pregent de Coctiuy Admiral de Frâce, messire Regnault du Dresnay Baillif de Sens, & messire Pierre de Brése Seneschal de Poictou : lesquels baillerent ledit messire Gilles au Duc de Bretagne pour le mettre & mener où bon luy sembleroit, lequel son frere le fait meurdrir en la prison. Ou mois de Septembre vint l'Euesque d'Exestre maistre du priué seel du Roy d'Angleterre & le sire Doudelay, lesquels feirent leur legation comme ambassadeurs dudit Roy d'Angleterre par deuant le Roy en vne maison en Touraine nommée Rassilé pres de Chinon, & puis s'en partirent & renuoya le Roy de France par deuers le Roy d'Angleterre son nepueu maistre Guillaume Cousinot & Iean Hauart & ralongerent les trefues pour vn an. Celuy an ceux d'Orie & ceux de Champ-Fregose du langage du païs des Gennenois avec cinq grosses naües armées, arriuées à Marseille enuoyerent deuers le Roy leurs messages en luy faisant sçauoir que le vouloient faire seigneur de Gennes & de tout le païs s'il luy plaisoit, & sur ce le Roy enuoya ses ambassadeurs pour à tout pourueoir, c'est à sçauoir monseigneur l'Archeuesque de Reims & autres, lesquels furent à Marseille pour praticquer la reduction dudit païs de Gennes. A celle heure estoit vn nommé messire Ianus de Cháp-Fregose entré en Gennes, Pise & en aucunes places qu'il auoit princes ou nom du Roy, lequel auoit en ladicte ville de Gennes plusieurs amis tant de gens de son lignage que de ceux d'Orie. Si vint à vn matin deuers le port de ladicte ville en vne seule gallée, à tout quatre cens hommes, & quand ils furent descenduz à terre dedans ladicte ville, il print la banniere du Roy & trouua ses amis qui estoient en icelle ville tous armez, & monta iusques au palais & là fut fait Duc & seigneur de ladicte ville: Et s'en fuyt vn nommé messire Barnabé Adorne, qui peu deuant auoit esté fait Duc par son entreprinse, & si en fait partir ledit Ianus vn escuyer qui estoit au Roy nommé Guillaume Bastard de Poictiers, qui auoit esté avec ledit Champ-Fregose à prendre ladicte ville

ville, pensant qu'il la voulsist mettre en la main du Roy, si fait mettre ledit escuyer hors de ladicte ville, ces nouvelles sceurent les ambassadeurs du Roy, si se meirent en vne gallée au port de ville Franche pres de Nice, & vindrent audit lieu de Gennes pour demonstrier audit Ianus, qui se disoit Duc de Gennes, qu'il meit ladicte ville & le pays en la main du Roy & ainsi comme luy & ses autres parens & amis luy auoient promis & baillé leurs scelez. Si respondit ausdits ambassadeurs qu'il auoit le pays & la ville conquestée à l'espée, & à l'espée les garderoit cōtre tous. Lesquelles parolles ouyēs retournerent à Marseille, & de là s'en allerent deuers le Roy qui estoit à icelle heure à Bourges. Ou mois de Feurier ensuiuant mourut le Pape Eugene & fut fait & créé le Pape Nicolas le xxviij. iour dudit mois.

Comment le Roy de France apres le trespas du Pape Eugene fait tenir un grand conseil à Lyon sur le Rosne où vindrent plusieurs ambassades tant d'Allemagne comme d'Angleterre & d'ailleurs pour mettre l'Eglise à unio & oster les scismes qui lors y estoient.

EN l'an mil.cccc. xlvij. le premier iour d'Auril faillirent les trefues 1447. entre les Roys de France & d'Angleterre, lesquelles furent ralongées sous esperāce de trouuer aucun bō traicté & accord entre lesdictes parties, iusques en Auril l'an mil.cccc. xlix. & dudit premier iour d'Auril iusques au premier iour de Iuing prochain apres ensuiuant. En ce mesme an mil.cccc. xlvij. apres que grās differēs eurent esté entre le Pape Eugene d'une part & le Concile de Basle d'autre part, & qu'on estoit à tāt venu que le Pape disoit qu'audit lieu de Basle n'auoit plus de Concile, & qu'il l'auoit trāsferé à Ferrare, & depuis à Florence, & apres à Romme. Et au contraire disoient ceux qui estoient à Basle qu'il n'auoit peu transferer ny ne pouoit iceluy Concile sans sur ce auoir leur consentement. Et auoient procedé contre luy sicomme ils le tenoient par auctorité de Concile general à le suspendre de l'administration Papale, & depuis à le deposer, & apres à eslire en Pape monseigneur Amé de Sauoye, qui estoit retraict à Ripaille & menoit vie aucunement solitaire, lequel ils appelloient Pape Felix le cinquiesme, & se faisoient sentences, censures & procez tant du costé dudit Eugene comme dudit Felix, qui estoit grand playe & scysme mis en l'Eglise: lesquelles differēces venuz à la cognoissance du Roy de France, luy desirant tousiours bonne vnion & bonne paix estre en saincte Eglise, portoit ceste diuisiō moult desplaisammēt: & pource enuoya plusieurs ambassadeurs par diuerses fois à Basle, à Romme, en Sauoye pour icelles differences appaiser: pareillement aussi monseigneur Loys Duc de Sauoye fils du Duc Amé appelé Pape Felix en son obeissance, enuoya par plusieurs fois deuers le Roy qui pour lors estoit en la cité de Tours affin de trouuer moyen & appoinctement esdictes matieres. Lequel Roy ou mois de Nouembre oudit an mil.cccc. xlvij. voyant qu'on ne venoit point à conclusion de paix, delibera pour y pourueoir d'assembler son conseil & de faire certains aduise mens tendans à effect, à ce que tous les procez, censures & sentences d'un costé & d'autre fussent reputées pour non aduenues, & qu'ils teinsent & recogneussent vn chacun endroit soy le Pape Eugene pour vray Pape, ainsi comme on faisoit deuant le procez encommencé: & que monseigneur Amé de Sauoye, appelé Pa-

pe Felix en son obeïssance demourast & en estat & dignité honorable en sainte Eglise. Et ceux qui auoient esté avec luy & au Concile de Basle fussent recommandez en dignitez, hōneurs & degrez ecclesiastiques: affin que tout appaisé, on peust venir à bon accord à celebrer vn Concile general pour traicter ce qui seroit possible au salut & vtilité de sainte Eglise vniuerselle: car durant lesdictes differēces sembloit au Roy Charles qu'on ne pouoit paruenir à la celebration d'un Concile vniuersel, & que les questions meutes en l'Eglise ne se pouoient terminer par decision & iugement, tant pour les grandes difficultez que l'on n'y trouuoit ame, pource-que on ne pouoit venir à assembler l'Eglise en concorde deuant ladicte pacification. Si enuoya le Roy Charles les aduise-
mens faits tant par luy comme par son conseil au Pape Eugene par l'Archeuesque d'Aix en Prouence, qui lors estoit venu de par luy deuers le Roy Charles pour aucunes matieres: & d'autre costé enuoya en Sauoye & à Basle iceux aduise-
mens par maistre Helye de Pompadour, Archediacre de Carcassonne, qui depuis fut Euesque de Lect en Languedoc. Or aduint que ce pendant & par auant que le Roy Charles eust les responce des parties, le Pape Eugene alla de vie à trespas, c'est à sçauoir ou mois de Feurier ensuiuant & le trouua ledit Archeuesque mort, ainçois qu'il veint à Romme. Et tantost apres fut eleu messire Thomas Sarrafanne Cardinal de Boulongne en Pape, & fut appelé Pape Nicolas le v. à laquelle election furent gardées toutes solennitez en tel cas accoustumées. Pourquoy monseigneur Loys Duc de Sauoye enuoya adonc deuers le Roy qui se tenoit à Bourges, en luy priant tres instamment qu'il vouldist labourer de faire obeïssance au Pape Nicolas, & que premierement & auant tout œuure, Concile general fut assemblé. En ce temps receut le Roy les bulles de l'electiō du Pape Nicolas & eue deliberation en son grand cōseil conclud d'obeir à luy ainsi comme il faisoit par auant au Pape Eugene. Et neantmoins qu'il poursuiuroit pour la pacification de l'Eglise ainsi qu'il auoit encommencé: si cōclud outre d'enuoyer ses ambassadeurs à Lyon, & fait dire par ceux qui estoient venuz de par le Duc de Sauoye qu'ils luy dissent qu'il enuoyast audit lieu de Lyon de ses gens, & aussi qu'il en fait venir de ceux qui estoient à Basle, affin qu'ensemble & en congregation conuenable on peut là traicter de ladicte pacification. Depuis ou mois de Iuillet ensuiuant en poursuiuant ladicte conclusion le Roy enuoya ses ambassadeurs notables audit lieu de Lyon. Aussi y allerent l'Archeuesque de Treues d'Alemaigne, & les ambassadeurs de l'Archeuesque de Coulongne & du Duc de Saxogne electeur de l'Empire, qui en ce temps estoient venuz deuers le Roy pour icelles mesmes matieres de la paix de l'Eglise: vindrent aussi à Lyon le Cardinal d'Arle, le Preuost de Montieu, & plusieurs autres tant de par monseigneur de Sauoye, comme de par ceux qui estoient à Basle, ausquels il sembla apres plusieurs collations que pour auoir cōclusion es matieres il estoit besoing que les ambassadeurs du Roy allassent à Geneue où estoit Pape Felix pour parler à luy personnellement, & qu'il seroit bien content qu'ils y allassent. Si fut conclud qu'ils yroient, & ce pendant suruint le Comte de Dunoyz enuoyé de par le Roy à Lyon qui amena les ambassadeurs du Roy d'Angleterre. Lesquels tous ensemble ou mois de Nouembre ensuiuant s'en allerent en Geneue avec eux l'Archeuesque d'Ambrun & le seigneur

gneur de Malicorne avec luy, l'Euesque de Marseille ambassadeur du Roy de Cecille, qui tous estoient venus à Lyon pour estre avec les ambassadeurs du Roy en la poursuite de ladicte pacification ensemble. Aussi allerent avec eux audit lieu de Geneue les ambassadeurs du Duc de Saxogne: car l'Archeuesque de Treue s'en estoit retourné en son païs, & celui de l'Archeuesque de Coulongne s'en estoit allé à Romme. Quand lesdits ambassadeurs furent tous arriuez à Geneue ils eurent plusieurs colloquutions avec Pape Felix, ses Cardinaux & autres conseillers. Et finalement furent fais certains articles, moyennant lesquels il estoit content de accepter la pacification que poursuiuoient lesdits ambassadeurs, ou cas que le Pape Nicolas se voudroit consentir en iceux articles: & sur ce retournerent deuers le Roy en la cité de Tours lesdits ambassadeurs & luy porterent lesdits articles, & tout ce qu'ils auoient fait: & lors il sembla au Roy qu'il y auoit bon commencement, pour paruenir à la pacification de l'Eglise, & conclud d'enuoyer son ambassade deuers le Pape Nicolas pour poursuiuir qu'il se vouldist condescendre à iceux articles, ou tant faire sur iceux que ladicte pacification s'en peust ensuiuir.

Comment le Duc d'Orleans receut de par le Duc de Millan son oncle la Comté d'Ast en Piémont: puis dit comment le Roy de France feit assieger la cité du Mans, laquelle luy fut rendue par traicté.

EN cest an le Duc de Millan deliura la Comté d'Ast à monseigneur d'Orleans son nepueu & peu apres mourut ledit Duc de Millan, apres ce fait mettre le Roy le siege au Mans pource que le Roy d'Angleterre par le traicté de son mariage fait entre luy & la fille du Roy de Cecille, auoit promis incontinent apres ledit mariage rendre ladicte ville du Mans & les autres places qu'il tenoit en la Comté du Maine, & auoient deceu le Roy les ambassadeurs du Roy d'Angleterre par leurs parolles en ladicte ville du Mans par l'espace de trois mois, & outre auoient bouté dedans ladicte ville enuiron mil cinq cens Anglois. Quand le Roy sceut les nouuelles il y feit mettre le siege & y enuoya grand puissance de gens d'armes, & de traict iusquès au nombre de six à sept mille combattans sous la conduite du Comte de Dunois, & là furent faictes grandes ordonnances & grans approchemens à l'encontre de ladicte ville contre les Anglois, & tellement que ceux qui estoient dedans la ville ne pouoient resister, & ne auoient deça la mer Anglois ne puissance pour les secourir. Si eussent esté prins par force ce n'eust esté l'Euesque de Cloxestre priué seel du Roy d'Angleterre, lequel feit tant audit Roy que les Anglois laisserent la ville au Roy, & s'en allerent leurs corps & leurs biens sauues pour escheuer que les trefues ne se rompissent & que la guerre ne retournast entre les deux Roys de France & d'Angleterre. Le Roy se tenoit à Lauardin pres de Vendosme, accompagné d'aucuns seigneurs de son sang à grand compaignie de gens d'armes pour ayder & secourir ses gens se besoing estoit: lesquels tenoient le siege deuant ladicte ville du Mans. Puis apres la reddition se partit le Roy pour venir faire ses pasques en la cité de Tours, & ceux qui tenoient ledit siege s'en allerent en leurs maisons & en leurs garnisons, & les Anglois qui estoient dedans ledit Mans s'en allerent pareillement en Normandie.

Comment le Roy de France enuoya ses ambassadeurs deuers le Pape Nicolas: & comment ceux d'Esma! assiegez par les Genneuois furent aduitaillez par mer: & comment le Duc d'Orleans se meit en point pour leuer le siege par terre.

1448.

EN l'an mil cccc. xlvij. le Roy feit ses pasques à Tours & incontinent apres se partirēt pour aller deuers le Pape Nicolas ses ambassadeurs, desquels les vns s'en allerent par mer es gallées de Iaques Cueur argentier du Roy, & partirent de Marseille pour aller en ladicte ambassade avec les autres, & arriuerēt vnze fustes tant galiaces, galées que galiottes, & chargerent de vitaille vne partie d'icelles, & vindrent aduitailler la ville & chastel d'Esma! qui est ou païs de Gennes: laquelle ville & chastel tenoit pour le Roy messire Galiot du Garet seigneur de ladicte place, lequel faisoit guerre aux Genneuois, & pour le dommage que ledit Marquis faisoit ausdits Genneuois ils meirent le siege à deux miles pres, & malgré eux aduitaillerent ladicte place & renuoyerent les fustes à Marseille. Et incontinent l'aduitaillement fait se partirent à tout trois galiaces Taneguy & ledit argentier & vindrent arriuer à vn port pres de Romme nommé Finette Vielle. Les Genneuois feirent grand armée en mer pour les poursuiuir, mais ils ne leur peurēt nul mal faire qu'ils n'arriuaissent seurement au port. Le Duc d'Orleans qui estoit pour lors en sa ville d'Ast sceust la venue dessusdicte & dudit aduitaillement. Si vint à grosse armée par terre pour leuer le siege que tenoiēt lesdits Genneuois, mais quand ils sceurent sa venue ils s'en retournerent à Gennes & laisserent ledit siege: apres ces choses dessusdictes s'assemblerent tous ceux de ladicte ambassade en la Cité de Soane: & puis de là tous ensemble s'en allerent à Romme, & y arriuerent le dixiesme iour de Iuillet en moult grand & honorable appareil, & n'y auoit homme qui oncques y eust veu entrer ambassade si honnorablemēt & en si grand magnificence, ne qui eust ouy parler de pareille. Estoiēt aussi avec les ambassadeurs du Roy ceux du Roy de Cecille & du Daulphin, auant que l'ambassade du Roy arriuaist à Romme les ambassadeurs du Roy d'Angleterre y estoient venus long temps deuant, & auoient exhibé au Pape les articles pour parlez à Geneue dont dessus est faicte mention, ausquels le Pape auoit dit que lesdictes articles n'estoient pas dignes de responce & que pour riens ne s'y consentiroit. Puis s'en estoient partiz iceux ambassadeurs d'Angleterre & vindrent en la cité de Viterbe & là trouuerent tous les autres ambassadeurs & leur dirent qu'ils se tiendroient certain espace de temps audit lieu de Viterbe, affin que se on leur signifioit estre expedient qu'ils retournassent à Romme, cōme ils feirent depuis par les nouuelles qu'ils eurent des ambassadeurs du Roy de France. Le douziesme iour de Iuillet oudit an furent les ambassadeurs du Roy de France, du Roy de Cecille & du Daulphin assemblez pour exposer au Pape ce dōt ils estoient chargez, & proposa moult solennellement l'Archeuesque de Reims & apres exhiberent par leur Princes obeissance solennelle au Pape & exposerent en general le fait de la pacification de l'Eglise pour laquelle ils estoient venus, en reseruant d'en parler plus plainement & plus particulièrement: en apres & le Pape leur feit moult grande & solennelle responce, & tant que ce iour là & depuis par tout le temps qu'ils furent à Romme il les traicta moult

moult honorablement, & plus qu'on n'auoit oncques mais veu traicter quel-
 que ambassade, & tellement que depuis eurent lesdits ambassadeurs plusieurs
 colloquutions avec le Pape & les Cardinaux sur les articles de la pacification de
 l'Eglise, & en aucuns le Pape se condescendit, & es autres non. Et quand ils eu-
 rent ce qu'ils peurent obtenir du bon plaisir du Pape, ils se partirent & s'en vin-
 drent en la cité de Lozane où estoit Pape Felix. Auquel ils exposèrent ce qu'ils
 auoient fait à Romme & ce qu'ils auoient peu obtenir du Pape Nicolas en le
 persuadant qu'il voulsist donner paix à l'Eglise en renonçant au droit qu'il pre-
 tendoit auoir au Papat. Aufquels fut respondu par ledit Felix que eue delibe-
 ration avecques monseigneur de Sauoye son fils, qui lors vint à Lozane & a-
 uecques autres notables de son conseil il aduiferoit qu'il auoit à faire. Et sur ce
 conclud d'enuoyer deuers le Roy & requist lesdits ambassadeurs du Roy qu'ils
 voulsissent attendre en la cité de Geneue ceux qu'il enuoyeroit deuers le Roy
 de France. A quoy pour le bien de la paix lesdits ambassadeurs se condescendi-
 rent & là feirent aussi venir à l'instance dudit seigneur & autres seigneurs de son
 obeissance monseigneur de Tollette ambassadeur du Pape Nicolas qui se te-
 noit à Lyon en attendant responce des matieres, & qui portoit les bulles conce-
 dées par le Pape Nicolas pour les exhiber ou cas que ledit seigneur accepteroit
 le traicté de la paix. Ce pendant & en grand diligence allerent deuers le Roy
 pour & ou nom dudit seigneur & de mon seigneur le Duc de Sauoye son fils
 certains ambassadeurs tendans à celle fin que le Roy s'employast à ce que le Pa-
 pe Nicolas se voulsist plus plainemēt condescendre aux articles qui luy auoient
 esté portées qu'il n'auoit fait. Surquoy le Roy assembla son grand conseil, & a-
 pres par meue deliberation enuoya en Sauoye avec lesdits ambassadeurs vne
 autre ambassade de par luy pour labourer encores en ladicte paix avec l'Arche-
 uesque de Reims, qui lors estoit pourueu en Patriarche d'Antioche & Euesque
 de Poictiers, avecques luy l'Euesque de Lect & messire Iean le Boursier yroient
 encores à Romme pour auoir certaines lettres dont la forme fut entr'eux &
 d'un commun accord diuisee, & aussi pour poursuiuir plus plaine prouision &
 plus amples articles autres fois pourparlez. Et apres plusieurs persuasions les-
 dictes lettres dont mention est faicte obtenues du Pape Nicolas, & les ambas-
 sadeurs retournez audit lieu le Lozane, iceluy Pape Felix le quint ceda totale-
 ment au droit qu'il pretendoit auoir au Papat. Et fut ordonné Legat perpetuel
 en tous ses pays de Sauoye. Ceux aussi qui estoient assemblez avec luy audit
 lieu de Lozane soy disans faire Concile general par la translation du Concile de
 Basle, declairerent obeissance estre faicte au Pape Nicolas & luy obeir comme
 saint Pere de Romme, & puis feirent dissolution de leur congregation qu'ils
 tenoient pour Concile: lesquelles choses faictes se departirēt les ambassadeurs
 du Roy & des autres Princes. Et le Patriarche d'Antioche, l'Euesque de Lect &
 messire Iean le Boursier prindrent leur chemin pour aller à Romme avec les
 ambassadeurs du Pape dessus nommé, affin de confirmation de l'appoinctemēt
 fait à Lozane, & les autres s'en retournerent deuers le Roy, & luy porterent les
 lettres & bulles des choses dessusdictes faictes audit Lozane. Et ainsi se departit
 toute la compaignie & s'en alla chacun où il auoit à faire, & ainsi fut sanée la
 grosse playe qui estoit en l'Eglise par celle vnion, par le moyen, pourchats &

excessiue diligence du Roy de France . A laquelle conduire & mener à fin il a grandement trauaillé & pené son corps, aussi despendu largement du sien pour enuoyer deuers les Roys chrestiens, affin qu'ils feussent vnis pour chrestienté garder: car les Roys de France ne voulurent iamais soustenir scisme en l'Eglise, mais treuue l'en es escritures qu'ils ont tousiours aydé à remettre sus les Eglises. En ce temps ordonna le Roy à auoir en chacune parroisse de son Royaume vn archier armé & prest toutesfois que bõ luy sembleroit pour faire guerre à son plaisir quand il luy seroit besoing, & à celle occasion affin qu'ils fussent subiets à ce faire il les affranchit de toutes subides courans en son Royaume. Et fut ordonné aux Baillifs dudit Royaume chacun endroit soy par chacuns Bailliages & parroisses à prendre les plus habiles & ydoines .

Cy est contenu, comment sur trefues entre les Roys de France & d'Angleterre, messire Francois de Surienne dit l'Arragonnoys print la ville & chastel de Fougieres appartenant au Duc de Bretagne. Et des grans maulx qu'ils y feirent.

EN ce mesme an veille de nostre Dame de Mars fut la ville & chasteau de Fougieres, situez en la Duché de Bretagne à l'entrée de Normandie qui estoit trefriche & bien peuplée de notables gens & de moult grand renommée de toute ancienneté, prinse & pillée en en-fraignant les trefues, & durant icelles entre les Roys de France & d'Angleterre: c'est à sçauoir par messire François de Surienne dit l'Arragonnois de l'ordre de la gearetiere dudit Roy d'Angleterre & grand capitaine és marches de France obeïssans ausdits Anglois, accompagné de six à sept cens combattans tant de la langue de France comme dudit Angleterre, & tellement qu'ils tuerēt en icelle ville aucunes gens, les autres prindrent prisonniers, violerēt Eglises & femmes, rauirent tous les biens qui y estoient, & feirēt tous les maulx dont ils se peurent aduiser, & non contens encores de ladicte prinse allerent courir en la Duché de Bretagne, prendre prisonniers, appetisser le païs, tuer gens & generallement feirēt tous exploicts accoustumez au fait de guerre, laquelle prinse & autres choses dessusdictes venues à la cognoissance du Duc de Bretagne comme fort indigné & soy sentant d'icelle prinse fort greué, enuoya deuers le Roy de France à Chinon l'Euesque de Rennes & autres, luy remonstrer comme sous sa trefue en laquelle il auoit esté compris, soy cõfiant & assurant en icelle les Anglois auoient prins les villes & chastel de Fougieres en luy requerant (cõme son treshumble parent, subiect & seruiteur) qu'il luy pleust luy ayder, secourir & cõforter en soy declairant en la guerre cõtre iceux Anglois, car de sa part il estoit prest d'ainsi le faire sans y riens espargner. A quoy par le Roy leur fut respõdu qu'il ne l'abandoneroit point, & qu'il feroit de sa cause la sienne cõme bien raison estoit, mais pour mieux mettre Dieu de sa part & le tort à ses ennemis il enuoyeroit premierement sommer le Roy d'Angleterre de reparrer lesdits excez, & le Duc de Sombresset son lieutenant gouuerneur pour luy deça la mer és païs obeïssans à luy . Et lequel auoit prins pouoir de faire reparrer toutes choses qui se feroient contre & ou preiudice de ladicte trefue, & seroit bien ioyeux que ledit Roy d'Angleterre & icelluy Duc de Sombresset feissent reparation dudit cas aduenü, pour euitier tous incõueniens qui à l'occasion de ce

de ce pourroient aduenir tant par guerre qu'autremēt, & pour ce faire enuoya deuers le Roy d'Angleterre son varlet tréchant nommé Iean Hauart & maistre Ieā Cousinot l'un des Maistres des requestes de son hostel. Et deuers ledit Duc de Sombreffet Pierre de Fontaines son escuyer d'escuyerie. Lesquels rapportèrent responce tant dudit Roy d'Angleterre comme dudit Duc de Sombreffet, qu'ils desaduouierōt ledit messire François de Surienne de ce qu'il auoit fait, iacoit ce que selon cōmune renommée, ladicte prinse auoit esté faicte par le cōmandemēt, exhortation & ordonnance d'iceux Roy & Sombreffet. Le Duc de Bretagne pareillement qui auoit grād interest à la prinse de Fougieres enuoya sommer le Duc par son herault Roy d'armes, de faire rendre & reparer ladicte ville de Fougieres & restituer les deniers, biens meubles, ioyaux, & autres marchandises qui dedans auoient esté prins estimez à la valleur de seize cēs mil escus. Auquel fut respōdu qu'ils n'aduouioient en riēs ladicte prinse. Apres le departemēt desquels ambassadeurs & herault ledit Duc de Sombreffet desirāt reparer la faute qui auoit esté faicte en ceste partie par ledit de Surienne, enuoya ses ambassadeurs deuers le Roy pour plus plainemēt excuser ledit faict de Fougieres, en desaduouiant tousiours ledit messire François, en disant icelle prinse estre à luy moult desplaisante qui estoiet parolles friuolles. Et quād de faire offre aucune de reparer le cas torciónerement adueni ne parlerēt en riens ne ne dōnerent certaineté, mais seullement requeroient au surplus pour leur aduātage que tout demourast en seurté tāt d'un costé cōme d'autre. A quoy leur fut respondu par le Roy q̄ se ledit Duc de Sōbreffet estoit desplaisant de ladicte prinse, qu'il feit son deuoir cōme celuy qui en auoit le pouoir que restitutiō fut faicte de ladicte place avec reparation des biens qui dedans auoient esté prins furtiurement & cōtre raison, & que par ce moyen la trefue leur seroit entretenue : & au contraire s'ainsi ne le faisoient fussent seurs & certains qu'il soustiendrait son beau nepueu de Bretagne. Et quād de leur bailler seurté des places estās es mains d'iceux Anglois il n'en bailleroit point, disant que son beau nepueu de Bretagne auoit de grans seigneurs en son Royaume ses parens, & y auoit plusieurs chefs de guerre & capitaines en iceluy de la nation de Bretagne, qui estoiet fort indignez de ladicte prinse de Fougieres, & estoit à croire qu'ils mettroiet peine de faire reuenge & de recōquester sur iceux Anglois fils pouoiēt. Et pource gardassent bien leurs places se bō leur sembloit. Car de sa part il mettroit peine de bien garder les siennes, laquelle responce ouie supplierēt au Roy lesdits Anglois qu'il luy pleust enuoyer ses ambassadeurs à Louuiers fondez de pouoir souffisant, & que ceux retournez à Roüen ils sçauoiēt biē que le Duc de Sombreffet commettrait de ses gens pour assembler avec eux, affin de pouoir paruenir à quelque bon appoinctement & accord. Laquelle chose par le Roy tousiours desirant la doulce voye & euitier effusion de sang humain, leur fut accordée & furent par luy cōmis aucuns de ses officiers. Et à tant se departirent lesdits Anglois & s'en retournerent deuers ledit Duc de Sombreffet auquel ils narrent ce qu'ils auoient fait avec le Roy de France & l'appoinctement qu'ils auoient prins : parquoy tost apres il enuoya de ses gens audit lieu de Louuiers pour conuenir avec les ambassadeurs dudit Roy de France ainsi comme promis & appoincté auoit esté. En cest an reparerent les Anglois la

ville de sainte lame de Beuron, laquelle chose ne deuoient faire: car par l'appointement fait à causes des trefues ils ne deuoient reparer nulles places ne du costé des Anglois ne du costé des François: celuy an rendirent les Anglois la ville & chastel de Mayense, de Iuhez de la Comté du Maine, laquelle ils auoient promis rendre quand ils partirent du Mans.

Comment le commun peuple de Londres s'esmeurent contre les officiers du Roy d'Angleterre & tuerent inhumainement l'Euesque de Cloxestre & si emprisonnerent le Marquis de Suffort, lequel ledit Roy feit deliurer.

EN ce mesme temps & audit an enuiron la fin de karesme commença grād commotion de peuple en la ville & cité de Londres, duquel peuple estoit ducteur & cōdulseur le Maire de ladicte cité, lesquels par l'instigation de l'ennemy esmeuz de leur volenté defraisonnable, tuerent inhumainemēt l'Euesque de Cloxestre garde du priué seel du Roy d'Angleterre, qui estoit simple & bonne personne & fondé en science. Et avec ce prindrent le Marquis de Suffort qui estoit grand seigneur & le meirent en prison en la grosse tour de Londres. Cedit Maire auoit grand puissance en celle ville & portoit on l'espée deuant luy quand il alloit parmy la ville. En ce temps estoit le Roy d'Angleterre à trois lieues de Londres sur la riuere de Tamise, lequel fut moult esbahy quand il ouit les nouuelles. Et incontinent manda le lieutenant de ladicte grosse tour qu'il vint deuers luy, à quoy il obeit tresdiligemment, comme à son souuerain seigneur. Et apres qu'il eut ouy la maniere & le fait tel qu'il auoit esté au vray, luy feit cōmandement que sans delay il enuoyast querir ledit Marquis de Suffort & amener sauement, ou autrement il le feroit mourir en sa presence, & prource trouua il maniere de l'amener deuers le Roy sans le sceu dudit Maire & peuple. Et apres que le Roy l'eut ouy parler il le feit mōter à cheual, & s'en fuit droit vers le pays de North où il se meit en mer pour venir en France. Et fut rencontré d'aucunes gens qui estoient au Duc de Sombresset, lesquels le prindrent & luy coupperent la teste, laquelle ils enuoyerent avec le corps en ladicte ville de Londres. Et adonc manderēt au Roy lesdits Maire & habitans d'icelle ville, qui estoient tresmal contens de ce qu'il auoit fait deliurer ledit Marquis, en luy requerāt qu'il luy enuoyast aucuns de ceux de son conseil qui auoient pourchassé ladicte deliurance, lequel doubtant la fureur du peuple & l'inconuenient de la mort les leur enuoya, & tantost leur feirent trencher les testes. Et ainsi ceux de Londres certain temps apres furent appaisez deuers le Roy.

Cy est contenu comment par la Court de Parlement deux coquins & vne coquine furent condampnez à estre penduz & estranglez pour leurs malefices.

1449. **L**'An mil cccc. xlix. le samedi xviii. iour d'Auril furent iugez par la Court de Parlement deux coquins & vne coquine à estre pendus & estranglez. Et pource furent leuées deux potences de bois pour plus manifester leurs cas qui estoient mauuais & damnables, comme d'auoir creué les deux yeux à vn enfant pupille estant lors en l'aage de deux ans, & auoient fait le delict d'espines qui estoit grand tyrannie, & aussi estre larrons & attains

& attains de plusieurs autres malefices par eux recogneuz : l'une desquelles potences fut mises hors la porte saint Iaques, en laquelle fut pendu l'un desdits deux hommes : & l'autre potence fut mise hors la porte saint Denys entre la chappelle & le moulin à vent, à laquelle fut pendu l'autre homme qui estoit ioüeur de vielle, & avec luy ladicte femme, & combien qu'ils fussent mariez tous deux, neantmoins il la maintenoit. Or est vray que tous trois furent liurez au bourreau és prisons de la conciergerie, & y estoient à cheual pour les conuoyer la plus grand partie des huissiers de Parlement, pource que la sentence auoit esté donnée sur les malfaiçteurs par ladicte Court. C'est à sçauoir que grand multitude de peuple affuioit de toutes pars à la iustice, & par especial femmes & filles pour la grand nouuelleté que c'estoit à veoir pendre vne femme : car oncques plus ne fut veu au Royaume de France. Et fut ladicte femme pendue toute descheuelée en vne longue robe ceinte d'une corde les deux iambes ensemble au deffoubs des genoulx. Et disoient aucuns qu'elle requist ainsi estre executée disant la coustume de son païs estre telle en tel cas. Et les autres disoient que la sentence fut donnée telle affin qu'il en fut plus longuement memoire aux autres femmes, & aussi que le delict estoit si enorme qu'il y appartenoit bien plus grande punition qu'elle n'eut : & en y eut plusieurs autres pendus par-apres, tous coquins, qui estoient encores és prisons cedit iour en chastelet, qu'on gardoit pour certaines causes : & par especial iusques à ce qu'on eut peu prendre certains autres coquins qui estoient de leur bende & ligue & suiuoient les pardons en plusieurs & diuers lieux de ce Royaume, cōme à la Dedicace de saint Denys, à la saint Mor, à la saint Fiacre & à saint Mathurin & ailleurs, & se tenoient és grans chemins és bois où ils faisoient de grans finesses sous vmbre de demander l'aumosne, desquels en ont esté prins les aucuns par les gens & officiers du Roy tantost apres.

Comment apres la prinse de Fougieres, les alliez du Duc de Bretagne prindrent le chastel & la ville du Pont-de-l'Arche sur les Anglois, puis parle de la prinse de Gerberoy.



Vdit an le xvj. iour du mois de May, les ambassadeurs du Roy & ceux du Duc de Sombresset estans assemblez en la ville de Louuiers pour le fait de la ville de Fougieres cōme appoincté estoit entre lesdictes parties : aucuns des gens & alliez du Duc de Bretagne, trouuerēt facon & maniere de prédre le chasteau & ville du Pont-de-l'Arche sur la riuère de Seine à quatre lieuës de Roüen. Et est vray qu'un voicturier de Louuiers marchāt estoit de iour à autre & souuētesfois rencōtré par lesdits Anglois en passant parmy ledit Pont & veoyoit qu'il y auoit petite garde, & pource se transporta deuers lesdits alliez, ausquels il traicta de luy bailler gens pour venir avec luy, & leur exposa certain moyen qu'il leur declaira pour prendre ladicte place : lequel moyen leur sembla bien possible, & print iour de comparoir en l'hostel du tauernier demourant és faulxbourgs : & à ce iour vindrent plusieurs de leurs gens les vns apres les autres affin qu'on ne s'apperceut de rien : entre lesquels on en auoit deux appoinctez en facon de charpentiers chacun sa coignée sur le col, & aussi arriua illec tantost apres ledit

voicturier chariant aucunes denrées . Et apres que chacun fut logé enuiron la nuit ils prindrent iceluy tauernier & ses gens & les ferrerent en vne chambre affin que leur entreprinse ne fust descouuerte , & adonc se descourirent audit tauernier apres qu'il fut bien tard, lequel en fut moult ioyeux comme il disoit, pource qu'aucuns de la garnison d'icelle ville l'auoient feru de nouuel. En icelle nuit vint le seigneur de Bresé & certaines gens de pied avec luy eux embuscher pres dudit lieu du costé de deuers le Port-sainct-Ouen, & le Baillif d'Eureux quatre ou cinq cens combattans à cheual en sa compagnie au plus pres de ladicte ville dedans le bois au costé dudit Louuiers : & ainsi Jaques de Cleremont & le voicturier vn pou deuant sa voicture chargée vindrent deuant iceluy pont priant au portier ou chastel dudit lieu qu'il luy voulüst ouurir la porte, faignant d'aller à Rouën, affin qu'il peust plus tost retourner audit Louuiers, pource qu'il auoit haste & il luy payeroit tresbon vin : en la compagnie duquel estoient seulement lesdits deux charpentiers , pour le passage desquels respondit iceluy voicturier : & tantost ledit portier pour conuoitise d'auoir argent print vn autre Anglois avec luy & vindrent aualler le pont. Et quand ledit voicturier fut sur le premier pont à tout sa charette il tira de sa bourse deux bretons & vne placque pour payer ledit Anglois, & laissa cheoir tout degré vn breton, pour lequel leuer se baissa ledit portier, & en soy baissant ledit voicturier tira sa dague & le tua, & pareillement les deux charpentiers qui ja estoient sur l'autre pont tuerent ledit Anglois. Adonc saillirent ceux de ladicte embusche tant de pied que de cheual & entrèrent dedans la ville & le pont en criât S. Yues, Bretagne, & estoient tous les Anglois encore couchez qui furent tous prins & iusques au nombre de cent à six vingts Anglois: entre lesquels estoit le seigneur de Foulquemberghe cheualier Anglois, qui y estoit venu le soir, bon prisonnier pour vingt mille escus, lequel fut mené à Louuiers pour plus grand seureté, & demourerent aucuns desdits conqueteurs gardes de ladicte place iusques à ce que autremēt en fust ordonné: laquelle prinse venue à la cognoissance des Anglois furent fort desconfortez & troublez, & prindrent la chose à moult grand desplaisir. Ce aussi venu à la cognoissance du Roy desirāt le bien & prouffit de son beau nepueu le Duc de Bretagne, apres plusieurs iournées là tenues & assemblées audit lieu de Louuiers fut content que tout feust réparé tant d'vn costé comme d'autre. C'est à sçauoir ledit Fougieres audit Duc avec les biens qui estoient dedans estimez à seize cens mille escus comme dit est. Et ladicte ville & Pōt-de-A'rche à iceux Anglois avec ledit seigneur de Foulquemberghe qui leans auoit esté prins, à laquelle chose les Anglois ne voulurent entendre aucunement, qui estoit aller directement contre raison sicomme il sembloit. Et pource de rechef presens certains notaires apostolicques & imperiaux feirent lesdits ambassadeurs du Roy aucunes protestations en requerant lettres & instrumens des offres par eux faictes ausdits Anglois, en remonstrant comment Dieu & le monde pouoient assez cognoistre & apperceuoir que le Roy s'estoit grandement mis en ses devoirs, & que se la guerre aduenoit (que Dieu ne voulüst) la coulpe n'estoit point par luy, & ainsi se departirent les Anglois & s'en retournerent deuers le Duc de Sombresset, luy dire ce qui auoit esté pourparlé entre lesdictes parties. Et ce pendant pour proceder plus seurement & sa-
gement

gement le Roy enuoya deuers sondit nepueu en Bretagne avecques grand & ample pouoir le Comte de Dunois & autres, lesquels feirent appoinctement, apres plusieurs narrations avec le Duc de Bretagne (luy estant en sa ville de Rènes où il auoit assemblé la pluspart de ses parés Prelats, Barōs & cheualiers de ses païs) que ledit Duc promettoit de le seruir à l'encōtre desdits Anglois de sa personne & puiſſance par mer & par terre, ne iamais à eux ne feroit traicté ne paix que ce ne fust du cōsentemēt, congé & bō plaisir du Roy: & de ce en bailla ses lettres patētes signées de sa main, esquelles lettres estoiet les seaux & seings manuels des Barons de sondit païs. Et outre ses parens & Barons le promirent de leurs mains attouchées à celle dudit Comte de Dunois de faire & tenir de point en point sans aller à l'encontre à nul iour le contenu esdictes lettres, & de la part du Roy leur fut par lesdits ambassadeurs promis en baillant leurs lettres qu'ils feroient ratifier par le Roy ledit appoinctement, ce que depuis il a fait & baillé ses lettres audit Duc, promettant de le porter & soubstenir & faire de sa cause la sienne propre, ne ne fera paix ne autre appoinctement aux Anglois sans luy comprendre & ses païs, & qu'il fust premierement restitué de ce que les Anglois tiendroient du sien. Et ou cas que ladicte place de Fougieres ne luy feroit rendue le Roy se declairoit à la guerre ouuertement & à plain contre les Anglois dedans la fin du mois de Iuillet prochain ensuiuant. En ce tēps fut prinſe la place de Gerberoy en Beauuoisis d'eschelle par le seigneur de Mouy gouuerneur du païs. Et là furent tuez tous les Anglois qui dedās estoiet nombrez trente personnes, dont estoit chief & capitaine vn nommé Iean Harpe qui ce iour estoit allé à Gournay, & ainsi fut reduicte ladicte ville en l'obeissance du Roy de France. En ce mesmes temps & biē pou apres fut prinſe la ville de Conches par Robert de Flocques dit Flocquet Baillif d'Eureux. En ce tēps aussi vn gentil-homme nommé Verdun natif du païs de Gascongne à l'aduis & consentement du Duc de Bretagne print d'eschelle & par emblée les places de Conac & de saint Maigrin assises ou païs de Bourdelois, desquelles estoit garde & capitaine pour le Roy d'Angleterre vn escuyer nommé Mondoch de Lansac, lequel fut prins pres dudit Conac en venant de Bordeaux: car il cuidoit que ladicte place fust encores en l'obeissance du Roy d'Angleterre & en sa garde cōme par auāt estoit: esquelles deux places furēt prins plusieurs prisonniers. Et quād les Anglois sceurēt les nouuelles l'Archeuesque de Bordeaux & ceux de la cité enuoyerent vn poursuiuāt à Chinon deuers le Roy de France luy requerrir qu'il feist rendre lesdictes places de Conac & de saint Maigrin, & qu'il leur donnast sauf-conduit faignans venir deuers luy, dont de tout on ne feist rien pour certaines causes mouuans le Roy & son conseil. Et pareillement enuoyerent lesdits Ducs de Sombresset & le sire de Thalebot deuers le Roy audit lieu de Chinon aucuns de leurs gens pour requerrir qu'on leur rendist les places du Pont-de-larche, de Conches, de Conac, de saint Maigrin & de Gerberoy: A quoy le Roy leur respondit que s'ils vouloient rendre Fougieres à son beau nepueu le Duc de Bretagne & restituer les biens qui auoient esté prins dedans, il se faisoit fort de leur faire rendre les places qu'ils demandoient par iceluy Duc de Bretagne, ou par ceux qui à son adueu les auoient prinſes. Si responderent lesdits ambassadeurs qu'ils n'auoiēt aucune puiſſance de toucher au fait de

Fougieres, & pource s'en retournerent à Roüen deuers ledit Duc de Sombrefset sans autre chose faire. Tantost apres se rassemblerent les ambassadeurs des deux parties à vne conuention qui fut faicte en l'abbaye de Bō-port, où les gēs du Roy feirent offres aux Anglois que fils vouloient rendre le chasteau & ville de Fougieres dedans vn iour qui fut nommé, lequel estoit conuenable & raisonnable és mains du Duc de Bretagne soubz l'obeissance du Roy & les biens qui auoient esté prins dedans estimez (comme dit est) à la somme de seize cens mille escus on leur renderoit les places dessus nommées, & mesmement la personne du seigneur de Foulquemberghe cheualier Anglois qui auoit esté prins dedans ledit Pont-de-l'Arche, & que tous attemptas fussent rembarrez d'un costé & d'autre, laquelle chose ils refuserent, & conuint lesdits François retourner deuers le Roy en cest estat comme deuant. Lequel ouïe la relatiō desdits ses ambassadeurs iustificée sagement par beaux instrumens Apostoliques faisans mētion de la cognoissance & deuoir en quoy il s'estoit mis, & de la faute qui procedoit de la part desdits Anglois le dommage qu'ils portoient & que pourroient auoir ses subiets, ausquels il deuoit garder leur action aussi & la rōpure desdictes trefues sans rien vouloir reparer par lesdits Anglois, & mesmement consideroit qu'ils luy vouloient oster vn tel subiect, comme le Duc de Bretagne & le frustrer de son païs par meure & grande deliberation, & en acquitant sa conscience le Roy se delibera & delibere apres les premonitions & offres qu'il auoit fait faire ausdits Anglois, auxquelles premonitions & offres ne vouloient obtemperer. Ainçois les refuserent iacoit ce qu'ils fussent si iustes & raisonnables que faire se pouoit & plus qu'il ne deuoit, comme il appert & apperra se mestier est de leur faire guerre & recouurer sa seigneurie par toutes voyes licites & possibles, laquelle lesdits Anglois auoient occupé indeuēment & vsurpé par long espace de temps. Parquoy luy fut conseillé que selon Dieu & raison & conscience il le deuoit ainsi faire, ou que autrement il ne faisoit point son deuoir. En executant laquelle fut conclud qu'il enuoyeroit deuers le Duc de Bretagne pour sur le tout prendre conclusion & appointement.

Comment le Roy de France deuēment informé par plusieurs manieres que les Anglois eurent brisé les trefues, se delibera de leur faire guerre : puis dit comment Verneuil fut prinse par vn Musnier qu'un Anglois eut battu.

EN ce mesme an le Roy fut deuēmēt informé de la guerre que les Anglois faisoient au Royaume d'Escocce, lequel estoit comprins esdictes trefues, & aussi de la guerre qu'ils faisoient par mer au Roy d'Espaigne son allié & qui estoit esdictes trefues. Et pareillemēt à ses subiets de Dieppe, de la Rochelle & d'ailleurs depuis le commencement des trefues continuellement sans rendre ne reparer chose qu'ils eussent faicte contre lesdictes trefues ne par mer ne par terre, combien que par plusieurs & diuerses fois & mesmement pour ladicte ville de Fougieres il auoit fait sommer & requerir par ses ambassadeurs & ceux dudit Duc de Bretagne le Roy d'Angleterre en son païs, & ceux qui de par luy auoient le gouuernement en Normandie qu'ils reparassent ou feissent reparer les malefices & dommages par eux ou leurs subiets

ets faits & perpetrez durant lesdictes trefues, desquelles choses accomplir ils auoient esté refusans. Et pource delibera en son grand conseil (voyant ce que dit est qu'il festoit mis en son deuoir de son costé d'entretenir lesdictes trefues) leur faire guerre par terre & par mer: car tant que les trefues auoient duré les Anglois de Mante, de Verneuil & de Laigny alloient sur les chemins d'Orleans & de Paris desrober & couper les gorges aux bonnes gens & marchans qui passoient leur chemin, & pareillement le faisoient les Anglois de Neuf-chastel, de Gournay & de Gerberoy sur le chemin d'entre Paris, Abbeuille & Amyens: & auec ce alloient de nuiet par le plat païs prendre & couper les gorges & meurdrir les gentils-hommes en leurs liets qui estoient de l'obeissance du Roy: comme le seigneur de Maillebois, le seigneur de saint Remy, Oliuier de Noirequerque & plusieurs autres. Et de rechef plusieurs marchans, laboureurs & autres gens de mestier du païs de Normandie qui festoient retraits en l'obeissance du Roy pour les griefs qu'ils souffroient deuant les trefues données, & eux confians en icelles estoient retournez en leurs maisons aux villages pour faire leurs labours & marchandises: mais lesdits Anglois les sont venuz tuer en les appellant faux traistres Armignacs. Ce sont & estoient les beaux exploits que ont fait lesdits Anglois durant lesdictes trefues, & se nommoient & faisoient appeller ces malfaieteurs les faux visages, pource qu'en ce faisant ces choses ils se vestoient & desguisoient d'habits dissoluts & espouuentables, affin qu'on ne les cogneust. Et pour ce pour obuier à tous ces malefices & subiuguer lesdits Anglois qui ainsi greuoient le peuple frauduleusement & traistreusement, feit le Roy de France grande assemblée de gens de guerre d'une part, & ledit Duc de Bretaigne pareillement pour tenir frontiere contre iceux Anglois: & est vray qu'iceux de la garnison de Fougieres feirent vne faillie sur les gens d'iceluy Duc, lesquels les rebouterent, & si asprement sur eux ferirent & si vaillamment qu'ils y furent que mors que prins six vingts Anglois. En ce temps mesmes, & audit an vn musnier de la ville de Verneuil fut battu d'un Anglois en faisant le guet pource qu'il dormoit, & en despit de ce alla deuers le Baillif d'Eureux, & promist apres certaines conuenances faictes entr'eux le bouter dedans la ville: pourquoy s'assemblerent messire Pierre de Bresé Seneschal de Poictou, ledit Baillif d'Eureux, Iagues de Cleremont & autres, & cheuaucherent tant & si diligemment que tous ensemble se trouuerent le xxix. iour de Iuillet au point du iour pres des murs de ladicte ville. Ledit musnier qui faisoit le guet celle nuiet feit descendre les autres qui estoient au guet plus matin qu'ils n'auoient accoustumé, pource qu'il estoit Dimenche & se hastoiët d'aller à la Messe pour desjeuner. Adonc les François à l'aide que leur faisoit ledit musnier, dresserent leurs eschelles au droit du moulin & entrerent dedans ladicte ville sans ce que nul s'en apperceust. Et y auoit dedas six vingts Anglois, dont les aucuns furent mors & prins, & les autres se retrahirent au chasteau à grād haste. Le lendemain ledit musnier osta & tollit vne partie de l'eau des fosses dudit chasteau, lequel fut assailly moult vaillamment & deffendu: mais en la fin fut prins d'assault: ouquel eut de moult belles armes faites, en especial par ledit Seneschal qui y acquist grand honneur, & mesmement tous les autres: car il n'y eust point de grosse artillerie du costé des assaillans, & là furent

morts & prins plusieurs Anglois & les autres se retrahirent en la tour Grise à grand haste, laquelle est moult forte & imprenable tant qu'il y ait dedans à viure, car elle est haulte & grosse, separée dudit chasteau, tresbien garnie & environnée de fossez plains d'eauë, & assiegerent de toutes pars ladicte tour par dehors & par dedans. Ce iour y arriua le Comte de Dunois de nouuel institué lieutenant general du Roy de France en ses guerres, accompagné du sire de Culant aussi nouuellement fait grãd Maistre d'hostel & de plusieurs autres cheualiers & escuyers gës d'armes & de traict, lesquels eux estans deuant ladicte tour tãtost apres se departirent pour ce qu'ils ouirët nouvelles que le sire de Thalebot estoit venu iusques à Breteul pour aider & secourir les assiegez qui estoient dedans icelle tour : & se partirent tous reseruë messire Florent Dilliers, qui demoura pour gouuerner ledit siege à tout huiët cës combattans, & cheuauchèrent tant qu'ils acconsuiurent & rattindirët ledit Thalebot pres de Harcourt, lequel quand il les apperceut se fortifia & ferma de hayes & de ses chariots qu'il auoit amenez pour porter ses viures en telle maniere qu'on ne le pouoit greuer : & quand vint sur la nuit il se retrahit hastiuement audit lieu de Harcourt. Lesdits seigneurs furent tout ce iour en bataille deuant ledit Thalebot cuidans le combattre, mais il ne voulut oncques saillir hors de sa fortification. Et là furët faits cheualiers le sire de Herbault, sire Jean de Bar, seigneur de Baugy & Jean Doulon escuyer d'escuyerie du Roy, & ce fait lesdits François voyãs ledit Thalebot retraict audit lieu de Harcourt, s'en vindrent à Eureux ce soir, & le sixiesme iour d'Aoust audit an le Roy de France se tira à Amboise pour passer la riuere de Loire & mettre ses gens de guerre en son païs de Normandie & pour secourir, conforter & aider ceux qui tenoient le siege deuant ladicte tour de Verneuil, le Comte de Dunois & toute sa compagnie s'en alla à Eureux où il fut deux iours.

Comment le Comte de saint Pol alla deuant Nogent, laquelle luy fut rendue: puis parle de la prinse de Ponteau-de-Mer.

LE vendredy viij. iour du mois d'Aoust l'an que dessus, le Comte de saint Pol à tout quatre mil cheuaux ou environ s'en allerent courre deuant le chastel de Nogent, desquels en y eut trente ou environ des plus vaillans de l'auantgarde qui se vindrent fourrer de plaine escouffe dedans la basse court & gaignerent la barriere: mais pource qu'ils doubtoient fort les canons ils se retrahirent pour attendre leurs compagnons & laisserent lesdits Anglois couler la harfe si hastiuement qu'il demoura deux des François dedãs qui furent prins prisonniers: pourquoy la compagnie venue fut icelle place assaillie du costé des prez bien asprement & vaillamment, & y en eut grand foison de naurez d'un costé & d'autre: & en estoit capitaine & garde pour les Anglois vn nommé Jean le Feure natif d'empres Louuiers, lequel auoit avec luy trëte cõpaignons de guerre ou environ. Et le samedi ensuiuant se rendirët entre xj. & xij. heures, par telle cõpositiõ qu'ils s'en yroiët leurs vies & leurs corps sauues, sans toutesfois emporter quelque habillement de guerre, excepté le capitaine qui emporta vne espée: & meirent tous leurs biens pour celle heure dedans le monstier saint Pierre: lesquels depuis ils vindrent querre & emporter

ter où bon leur sembla. Et le Dimenche ensuiuant les dessusdits voyans ladicte place non estre tenable se deslogerent, & au partir bouterent le feu dedans tant qu'elle fut toute arse & desemparée. Ce mesme iour de vendredy viij. iour dudit mois en l'an dessusdit se partit d'Eureux le Côte de Dunois & plusieurs autres cheualiers & escuyers iusques au nombre de deux mil cinq cens combatrans d'un costé, & d'autre part partirent & passerent enuiron deux iours apres au Pont-de-l'Arche les Comtes d'Eu & de saint Pol, les sires de Sauueses, de Roye, de Moÿ, de Rambures & plusieurs autres iusques au nombre de trois cens lances, & de quatorze à quinze cens archiers, qui tous cheuauchoiert d'un costé & d'autre pour eux assembler, & tāt que le douziesme iour dudit mois ils se trouuerent tous deuant la ville du Ponteau de Mer: c'est à sçauoir ledit sire de Dunois Lieutenant general du Roy (comme dit est) du costé de deuers Roüen, & lesdits Comtes d'Eu & de saint Pol & toutes leurs compagnies du costé deuers Honnefleu, de l'autre costé de la riuere de Riulle, qui passerent encontre icelle ville, & là meit chacun seigneur ses gens en ordonnance pour assaillir ladicte ville. Et premierement du costé dudit Comte de saint Pol fut assailly si vigoureusement & longuement & tellement qu'ils emporterent d'assault ladicte ville, iacoit ce que les Anglois qui estoient dedans feirent bien & grandement leur deuoir de la garder & deffendre. Et du costé de mōdit seigneur de Dunois y eut aussi de moult belles armes faictes, & entrerent tous dedans icelle ville autant d'un costé que d'autre: moyenant aussi & par le feu de fusées, qui y furent iettées par dedans les fossez où ils estoient en l'eau iusques au col, qui estoit vne belle proesse Et se retrahirent les Anglois au bout de la ville en vne maison forte, lesquels estoient en nombre cccc. & xx. Anglois, dont estoient chiefs & capitaines Mont-fort Tresorier de Normandie, & Foucques Ebon, lesquels se rendirent tous prisonniers ausdits Comtes de Dunois & de S. Pol. A celle besongne furent faits cheualiers les seigneurs de Moÿ, le fils du Vidame d'Amyens, le fils du sire de Rambures, & plusieurs autres du paÿs de Picardie iusques au nombre de xxij. Ainsi demoura ladicte place en l'obeissance du Roy de France: ce iour arriua le Roy à Vendosme & y fut iusques au Lundy ensuiuant xvij. iour d'Aoust qu'il se partist pour aller à Chartres où il fut le xxij. iour ensuiuant.

Cy dit comment les Anglois entrerent en Escoce par deux fois, & comment par deux fois furent desconfits: cōment la tour de Verneuil fut rendue & d'aucunes autres besongnes.

ET pour monstrier euidamment la vertu diuine estre contre les Anglois, & comment (chose meritoire) est vray que lesdits Anglois ont voulu de tout temps entreprendre sur leurs voisins Chrestiens tant au Royaume de France comme en Escoce & es seigneuries d'Irlande, Galles, & ailleurs: & tellement que par eux ont esté faits maints maux, par voye de fait, violement & sans raison, & n'ont point eu deuant les yeux les parolles de nostre sauueur Iesus Christ où il dit. *Reddite quæ sunt Cesaris Cesari, & quæ sunt Dei Deo.* Qui vault autant à dire: rendez à Cesar ce qui est à Cesar, & aussi ce qui appartient à Dieu rendez le luy. Entre lesquels maux & extorcions par eux faits en plusieurs & diuers lieux ils ont faits vne entreprinse, laquelle

ils ont mise à execution pour aller courre au Royaume d'Escoce, & enuoya le Comte de Salsebery pour mener guerre aux Escoçois deux seigneurs de grand renom natifs dudit païs d'Angleterre: c'est à sçauoir, messire Thomas de Hanton cheualier, & le sire de Perfy fils du Comte de Northomberland accompagnez de xv. mille Anglois & au nōbre du païs, & passerent la riuere appelée Sollonnause pour entrer oudit Royaume d'Escoce, ouquel ils furent par l'espace de trois iours entiers, & iusques à six mille du païs qui valent trois lieüs de France: mais ce venu à la cognoissance du Comte Donglas Escoçois il print sans delay en sa compagnie six mille Escoçois & vindrent assaillir à plaine de iour & en plain champ lesdits Anglois, en laquelle bataille fut fort combattu d'un costé & d'autre & tellement qu'il y en eut plusieurs mors de chacun costé, & plusieurs prisonniers desdits Anglois, & fut la journée contre eux & le chāp demoura aux Escoçois: à laquelle journée furent prins lesdits seigneurs de Hanton & de Perfy & ceux qui peurent eschapper porterent leurs piteuses nouvelles au Comte de Salsebery, lequel en fut moult dolent & courroucé & non pas sans cause, & tantost il fit plusgrand mandemēt que par auant, & assembla bien à celle fois lx. mille Anglois au nombre dessusdit pour cuider aller tout destruire le Royaume d'Escoce: mais tantost qu'ils eurent passé la riuere dessusdicte sa descendue vint à la cognoissance du Comte Donglas & du Comte d'Ormont son frere, eux ayans Dieu deuant les yeux & voyās lesdits Anglois importunément sans quelque droit, venir gaster leur païs en concordant ausdits de Chattonnet, meirent peine de resister: car il est licite à vn chacun de combattre pour son païs. Eux tantost & sans delay feirent leur armée des seigneurs d'Escoce & se trouuerent bien en nombre xxxij. mille Escoçois bōs & subtils en guerre: lesquels vindrent à vn matin frapper sur les lozis d'iceux Anglois & les prindrent en desfroy, & tellement furent assailliz qu'il les conuint fuir & desplacer, & en y eut grand quantité de mors, de naurez & de prins. Et furent chassiez & poursuuiz de si pres iusques à icelle riuere qu'il en y eut encores grand foison de noyez, & en y eut bien que mors que prins à ces deux journées de xx. a xxiiij. mille Anglois au nombre du païs. Et depuis lesdits Escoçois en attribuāt ladicte destrouffe à la grace de Dieu & non pas à la puissance humaine, & à ce que lesdits Anglois ne fussent plus si outrageux de cōquerre ce qui n'estoit pas leur en poursuuiant lesdits Anglois, passerent ladicte riuere pour entrer ou païs de Angleterre & degasterent bien vingt lieüs de long & six lieüs de large des lieüs de France, & iusques à vne forte place nommée le Neuf-chastel & n'y laisserent oncques ville ne maison que tout ne fust ars en leur chemin, ou au moins toute la plus grand partie. A laquelle chasse fust mort vn cheualier Escoçois de grand auctorité nommé messire Iean Vbouailles. Puis retournerent iceux Escoçois sauuément en leurdit païs. Lesdictes batailles furent relatées à S. Denys en Frāce par trois prestres du païs d'Escoce du diocese de Dunblaine dont l'un estoit chanoine & auctentique personne par semblance, & ce affermerent par serment fait deuant les precieux corps monseigneur S. Denis & ses cōpaignons en parolle de prestre estre ainsi, & auoir esté vray par la forme & maniere que dit est iceux examinez par le cronicqueur de France en la presence de plusieurs religieux d'icelle Eglise. Cedit douziesme iour d'Aoust ou enuiron an dessusdit

dessusdit arriua à Vendosme le Roy de France grandement accōpaigné de gens de guerre tant seigneurs, cheualiers, escuyers, archiers cōme autres, & là fut iusques au lundy ensuiuant xvij. iour dudit mois. Et ce pendant le sire de Loheac, le Marechal de Bretagne, messire Geoffroy de Couré & Ioachin Rouhault & plusieurs autres assaillirent la ville de S. Iame-de-Beuron, si durement & si asprement que l'assault dura depuis ix. heures du matin iusques à la nuit, & fut fort tiré contre icelle tant de grosse artillerie que de menuë, fort assailly & aussi fort deffendu, & le lendemain s'en allerent par composition les Anglois qui dedans estoient leurs corps & leurs biens saufs, & ainsi fut reduicte icelle place en l'obeïssance du Roy de France. Le xxij. iour dudit mois oudit an entra le Roy en sa cité de Chartres. Et le lendemain se rēdirent ceux de la Tour-de-Verneuil ses prisonniers qui n'estoiēt que xxx. dont la pluspart estoient tous Frāçois reniez, car pou deuant estoient eschappez plusieurs d'iceux, & auoient emporté tout l'auoir & cheuance qui dedans estoit par la faulte de ceux qui faisoient le guet de nuit. Ledit messire Florent deuant nōmé en fut blasmé: car pou parauant le Roy luy auoit mandé par vn de ses heraulx qu'il les gardast bien: & apres le departement d'iceux le Roy fut content de faire bon appoinctement à ceux qui estoient demourez, & ce pour certaines consideratiōs qu'il auoit, pourquoy feirent traicté d'icelle tour les sires de Presigny & de Baugy: par ainsi veu que ladicte place estoit imprenable sinon par deffaute de viures ils payerent gracieuse rançon. Et ainsi se departirēt en baillant ladicte place au Roy, dōt chacun estoit & fut bien ioyeux. En ce temps ou pou apres print Ioachin Rouhault S. Guillaume de Mortaing avec grād partie des seigueurs qui auoient prins S. Iame de Beuron, & dura l'assault depuis dix heures iusques au soir. En ce mesmes temps ledit Comte de Dunois Lieutenāt general du Roy, comme dit est, le Comte de S. Pol & autres qui auoient esté à la prise du Ponteau-de-mer se partirent & cheuaucherent tous ensemble en grand ordonnance iusques deuant la cité de Lisieux pour y mettre le siege. Mais quand iceux de la ville apperceurent si grād nombre de gens d'armes, considerant que la ville ne pouoit pas longuement tenir ne resister contre ladicte puissance, doutans aussi qu'elle ne fust prise d'assault & par ce perie, pillée & destruicte, apres plusieurs parolles & parlemēs faits entre eux ils la meirent en l'obeïssance du Roy de France és mains de son Lieutenant par l'administrement & conseil de leur Euesque, qui si gouerna grandement, & honnorablement, & n'y eust en icelle aucun dommage fait ou perpetré: mais demourerent tous & vn chacun endroit soy maistres & seigneurs de leurs biens & reuenues, dont ils possedoient au parauant de ladicte reddiciō, & rendirent avec ce plusieurs menuës places estans à l'entour dudit Lisieux.

Cy dit comment le Roy de France feit sommer ceux de Mante qu'ils se rendissent à luy ainsi qu'ils feirēt, & les receut pour & ou nom du Roy le Comte de Dunois son Lieutenant general.

LE vingtsixiesme iour dudit mois d'Aoust oudit an, le lendemain de la saint Loys se partit le Roy de Chartres & alla au giste à moult belle & notable compaignie à Chasteau-neuf en Thimeray. Et ce iour enuoya sommer ceux de Mante par vn de ses heraux de luy rendre ladicte ville, laquelle

ils tenoient & occupoient outre son gré & volenté. Et ce pendant que ledit herault estoit allé faire sa legation ledit Comte de Dunois, les Comtes d'Eu & de saint Pol & ceux de leurs compaignie qui estoient de cinq à six mil combattans arriuerent ce mesmes iour deuant la ville de Mante pour sommer les gens de guerre manans & habitans d'icelle, la rendre & restituer en l'obeissance du Roy de France, auq̃l elle appartenoit de son propre heritage à quoy ils feirent aucunement refus pour l'amour des gens de guerre qui estoient dedans, combien que les François manans & habitans d'icelle auoient bonne volenté d'estre soubs le Roy de France & en sa subietion: adonc ledit lieutenant & ceux de sa compaignie se preparerent pour assaillir la ville, & ce voyans lesdits habitans, doubtons fort les Anglois qui estoient dedans en garnison iusques au nombre de deux cēs & lx. hommes de guerre: desquels estoit capitaine en icelle ville messire Thomas Hos cheualier & chancelier des Anglois en leur party, lequel n'estoit pas en la ville: mais son Lieutenant nommé Thomas de sainte Barbe, lequel estoit Baillif d'icelle y estoit & vouloit à toutes fins tenir & deffendre icelle place contre la compaignie des François: pourquoy iceux manans & habitans voyans en ce la perdition d'icelle ville, apres la sommation à eux faicte feirēt dire au Baillif que s'il n'appointoit ausdits seigneurs & prenoit composition, que certainement eux mesmes la prendroient: ce qu'ils n'eussent iamais dit n'osé entreprendre s'ils ne se fussent sentus les plus forts, & de fait pour mieux subiuguer iceux Anglois, lesdits habitans gaagnerent la tour & le portail appelé la Porte-au-Saint, avec vn quartier d'icelle ville: & allerent deuers ledit Lieutenāt & les seigneurs estans en sa compaignie, & feirent appointement ensemble: depuis lequel ainsi fait se voudroient esmouuoir lesdits Anglois, & de fait se fussent esmeuz se n'eussent esté ladicte tour & les mōtées que lesdits habitans tenoient & occupoient. Et pource furent enuoyez apres la cōposition recitée entre lesdits seigneurs & iceux habitans, environ quatre heures apres Nonne vn herault du Roy, & avec luy cinquāte homme d'armes vindrent en ladicte ville, & furent receuz par iceux habitans & mis en iceluy portail & tour pour iceluy deffendre contre lesdits Anglois se mestier estoit: combien que le Baillif & lieutenant du capitaine auoit ja accepté pour luy & ses compaignons l'appointemēt, & tous les gens dudit Comte furent deuant icelle ville cedit iour depuis le matin iusques au soir, que ledit lieutenant entra avec certains gens d'armes pour garder lesdits habitans de pilleries ou autres oppressions que gens d'armes ont accoustumé de faire en tel cas: & pour confermer & garder l'appointement tel qu'il auoit esté fait avec lesdits habitans & capitaine pour la reddition d'icelle ville en l'obeissance du Roy.

Comment le Roy entra à Verneuil & la reception qu'on luy feit. Puis dit comment par l'entreprinse du Seneschal de Poitou le chastel de Laigny fut rendu au Roy & y furēt plusieurs Anglois prins, & comment Vernon fut rendu au Roy.

LE xxvij. iour dudit mois oudit an, entra le Roy de France en sa ville de Verneuil en moult grand estat & noblement acompaigné: lequel fut honorablement receu & à grand ioye de ceux de la ville, qui vindrent au deuant de luy en processions, les gens d'Eglise & honorablement reuestuz de belles

de belles chappes iusques dehors la ville, & les autres vindrent de pied & à cheual, & feirent faire les feux & tendre & ioncher les rues au mieux qu'ils peurēt en criant Noël de ioye, en laquelle ville il fut par certaine espace de temps. Auquel lieu vindrent les Euesques de Lisieux & d'Auxerre luy faire hommaige. Et ce pendant fut faicte vne entreprinse par le Seneschal de Poictou pour aller prendre le chasteau de Laigny que tenoit & occupoit vn escuyer de Normandie nommé le sire de S. Marie, capitaine dudit chasteau pour messire François de Surienne dit l'Arragonnois seigneur de ladicte place, qui auoit marié sa fille audit escuyer: Et combien que ledit Seneschal n'y fut point en personne, neantmoins il auoit fait ledit appointment avec ledit capitaine, qui auoit en sa compaignie deux cens combattans, logez en la basse court. Et est vray que les François comparans deuant ladicte place furent boutez dedans icelle par le donjon moyennant ledit capitaine sans le sceu des gens de guerre, qui auoient esté enuoyez par ledit messire François pour la garde dudit chasteau & de sa femme qui estoit dedans: lesquels quand ils apperceurent les François se cuiderent mettre en deffence: mais pource qu'ils estoient trop foibles à leur aduis, ils se deporterent à tant, & furent prins en icelle basse court tous leurs cheuaux & autres biens & demourerent tous prisonniers en la volonté du Roy, excepté la femme dudit messire François, laquelle s'en alla à tous ses biens tresmal contente de son dit gendre: & demoura iceluy seigneur de S. Marie pour capitaine & garde dudit chasteau ainsi que parauant. Ledit iour & an fut enuoyé deuant Vernon le capitaine de Robert de Flocques Baillif d'Eureux & capitaine de certain nombre de gens de guerre, sommer les Anglois & les habitans de la ville de Vernon pour icelle rendre & mettre en l'obeissance dudit Roy de France, en luy baillant pour iceluy seigneur les clefs des portes. A quoy fut respondu par Jean d'Ormont escuyer fils du Comte d'Ormont & d'Irlande, capitaine dudit lieu que tresvolontiers le feroit, & pource en signe de derision & de mocquerie alla deuers ses ferruriers & amassa toutes les vieilles clefs qu'il peut trouuer dont & desquelles il feit present audit poursuiuant: lequel respondit qu'elles estoient trop vieilles pour seruir à la fermeture d'une telle ville, & à tant se departit pour aller faire son rapport aux gens du Roy, desquels estoit chef & lieutenant general monseigneur le Comte de Dunois qui n'estoit gueres loing de la ville: & le lendemain xxviij. au matin vindrent ledit Lieutenant & messeigneurs les Comtes d'Eu & de S. Pol, avec eux monseigneur le Seneschal de Poictou & plusieurs autres capitaines avec grand nombre de francs-archiers mis & instituez de nouuel en France, qui gaignerent de prime face vne petite Isle en laquelle ils feirent assortir plusieurs canons: combien qu'ils n'en iecterent point: mais fut escarmouché de traict, & tellement que le pont fut gaigné sur les Anglois, & y fut le lieutenant du capitaine d'icelle percé d'une fiesche tout au parmy des deux ioües de part en part, qui tresfort les esbahit. Pourquoy eux considerant & pensant la grande puissance qui estoit deuant & entour d'eux, & les autres lieux & places conquises, requierent & demanderent iceux habitans & Anglois audit Comte de Dunois seurté pour quatre ou six personnes, affin d'aller parler à luy touchant le fait de ladicte sommation à eux faicte, ce qui leur fut accordé, & pource par ordonnance du capitaine & habitans furent

eleuz & enuoyez : c'est à ſçauoir Iean Abaron Anglois capitaine des gens de
 guerre d'icelle ville, maistre Guillaume d'Aguenet plus extreme en la querelle
 des Anglois que nul autre, Regnault de Bordeaux & certains autres : & fut or-
 donné ledit d'Aguenet pour porter la parolle: Lequel, ſalutation premieſe audit
 Lieutenant, dit & propoſa en audience telles parolles qui ſ'enſuiuēt ou en ſub-
 ſtāce. Monſeigneur vous nous auez enuoyé ſommer de par voſtre Roy de luy
 rendre ceſte ville de Vernon, diſtes nous qui vous meut à ce, ne que vous nous
 demandez : adonc mondit ſeigneur de Dunois comme froid & attrempé ſei-
 gneur en repreſentant la perſonne du Roy leur commença à dire & expoſer en
 moult beaux & haux termes (& comme vn des beaux parleurs en françois qui
 fut de la langue de France) que ladiſte ville & chaſteau tant dedans comme de-
 hors competoient & appartenoient au Roy ſon ſouuerain ſeigneur & le leur,
 pour raiſon de ſon droit demaine & heritage, leſquels auoient eſté ſouſtraits
 à feu de bonne memoire ſon pere, avec autre grand partie de ſondit Royaume
 & plus par violence qu'autrement, & leur recita en beau ſtille & auſſi pruden-
 tement qu'eut peu faire vn maistre en theologie, le fait de guerre qui eſtoit &
 auoit eſté entre le Roy de France & le Roy d'Angleterre, dont eſtoient deſcen-
 dus maints maux, innumerable & grans inconueniens, qui ſeroit longue choſe
 à reciter : pour laquelle choſe pacifier le Roy meu de grand charité auoit con-
 ſentü patiemment, voulu & accordé certaines trefues pour durant icelles, trou-
 uer aucune bonne forme d'appointement, & que ce nonobſtant, les Anglois de
 leur vouldenté deſordonnée auoient prins d'emblée la ville de Fougieres appar-
 tenant au Duc de Bretagne, lequel eſt parent & ſubieſt au Roy & nommé eſ-
 diſtes trefues, & leur fut recité toutes les altercations qui en ceſte matiere a-
 uoiēt eſté ainſi & par la forme & maniere deſſus declairée. Ce conſideré le Roy
 par meure deliberation de ſes prochains parens & autres ſeigneurs, capitaines,
 conſeilliers & bien vueillans, voyans l'infidelité d'iceux Anglois a mis ſon ar-
 mée ſur pour requerir ce qui luy appartient de ſon droit & demaine, & à ce fai-
 re m'a (dit il) commis ſon Lieutenant. Pourquoi ie vous ay enuoyé ſommer,
 & encores de rechef vous ſomme de moy rendre ladiſte ville pour le Roy, af-
 fin que ſ'il vous vient inconuenient par rebellion ou inobedience, que vous ne
 l'attribuez pas au Roy voſtre ſouuerain ſeigneur & le mien, ne à moy, qui de ſa
 benigne grace m'a inſtitué ſon lieutenant en ceſte partie. Apres le propos duſ-
 ſe retrahirēt à part leſdits Anglois & habitās pour parler enſemble de la manie-
 re, & ſçauoir qu'ils auoiēt à faire. En traictāt de laquelle ils cheurēt en grād diſ-
 cord: car les frāçois conſiderās le Roy de Frāce eſtre leur naturel ſeignr & tout
 ce que par ledit Lieutenant leur auoit eſté expoſé eſtre fondé en raiſon, ſe vou-
 loiēt bien rēdre & les Anglois nō. Toutesfois apres pluſieurs parolles, deuiz &
 altercatiōs fut dit, conclud & ordōné par leſdits habitās qu'ils ſe rendroiēt voul-
 ſiſſent les Anglois ou non, en faiſant aucun bon traicté pour iceux habitās, au-
 quel ſeroiēt leſdits Anglois adioints ſe bō leur ſembloit. Et adōc iceux Anglois
 voyans non pouoir reſiſter à l'intention deſdits habitans, ainſi prouulguée, re-
 quirent auoir lettres ſeellées du ſeau d'icelle ville, que ladiſte reddition n'eſtoit
 point faiſte de leur conſentement & accord, ce qui leur fut fait. Et ainſi ſ'en
 retournerent deuers mondit ſeigneur de Dunois, avec lequel feirent traicté &
 appointe-

appointement par le conseil des seigneurs estans en sa compagnie. Adonc rendirent lesdits Anglois lesdictes villes & chastel de Vernon, où ils estoient douze vingts Anglois combattans dedans, dont estoit chef & capitaine le fils du Comte d'Ormont, comme dit est: lesquels s'en allerent leurs corps & leurs biens saufs, & demourerent ceux de ladicte ville paisibles en leurs maisons sans rien perdre. Et depuis a le Roy donné ladicte ville & chasteau avec leurs appartenances audit Comte de Dunois pour les grans seruices qu'il luy auoit fait, & auoit esperance qu'il luy feroit, en sa conqueste de Normandie & ailleurs en ses affaires & necessitez.

Comment le Roy de France vint à la ville d'Eureux où il fut notablement receu: & de là s'en alla à Louuiers, puis dit commēt le chastel d'Anjou fut mis en l'obeïssance du Roy, & comment Gournay se rendit, & comment Houël rendit la Roche Guyon au seigneur à qui elle estoit, & comment il se tourna Francois.

ENuiron la fin d'Aoust se partit le Roy de France de sa ville de Verneuil, & entra grandement & noblement accompagné, & en grand appareil en sa cité d'Eureux, où il fut receu tressumptueusement des habitans de ladicte ville, en allant au deuant de luy, en faisant feux, en criant Noël & les rues tendues, & coucha en icelle ville vne nuit seulement, & le lendemain se partit pour aller en sa ville de Louuiers, où il fut semblablement receu à grand ioye. Et auoit en sa compagnie le Comte du Maine frere du Roy de Cecille & de la Roïne de Frâce, & le Comte de Clermont fils aîné du Duc de Bourbon, le Vicomte de Longmaigne aîné fils du Côte d'Armignac, le Comte de Castres fils du Côte de la Marche, le cadet d'Albreth, Jean monseigneur de Lorraine & plusieurs autres grans seigneurs, Comtes, Barons, cheualiers & escuyers en grand nōbre. Et avec ce y auoit pour la garde de son corps deux cens lances & les archiers dedans ladicte ville de Louuiers, sans en ce comprendre quatre armées qui estoient sur les champs: c'est à sçauoir l'armée du Duc de Bretaigne, l'armée du Comte de Dunois lieutenant general, l'armée du Comte d'Eu & de S. Pol, & celle du Duc d'Allençon. Et faisoit le Roy grād diligēce de pourueoir lesdictes armées, de ce qui leur estoit mestier, tant argēt, bombardes, artilleries, comme autres choses. Et venoient de toutes pars gens nouueaux pour porter nouuelles au Roy & ausdictes armées. Cedit iour de samedy oudit an Guillaume Chanu capitaine de Pontoise avec certain nōbre de gens de guerre alla courir deuant le chasteau d'Anjou, & somma de par le Roy de France, Portugal capitaine dudit lieu de rendre la place & icelle mettre en l'obeïssance du Roy de France. Portugal capitaine oyant nouuelles de iour en iour comment tout le païs se rendoit au Roy de France, & le recognoissoient les habitans d'iceluy païs pour leur souuerain seigneur, vueillās à iceluy obeir, & sachant de vray à luy estre impossible de resister au Roy ny à sa puissance, a fait traicté audit Chanu, moyennant lequel, ladicte place luy a esté rendue, & par ainsi mise en l'obeïssance du Roy, à la garde duquel chasteau, a esté ledit Chanu commis pour le Roy. Le Dimēche apres ensuiuant se partit messire Loys de Luxembourg Comte de S. Pol de Vernon, pour venir mettre le siege deuant Gournay. Et luy arriué deuant ledit lieu vindrent aucuns des bourgeois de la-

dictē ville, dōt estoit garde Guillaume Harpe soubs Guillaume Corouam Anglois, affin de bailler & liurer audit Comte ladicte place. Et pource ledit lieutenant doubtant & craignant fort qu'il ne vint mettre le siege deuant eux. Sachāt aussi le demené de la guerre, & cōment leurs voisins s'estoient portez en tel cas: considerāt aussi les parolles du sage où il dit. Belle doctrine prend en luy qui se chastie par autruy. Pourquoy ledit Comte arriué vint ledit Guillaume Harpe & avec luy vn des habitans d'icelle ville, nommé Raoullet Pailleauoine avec aucuns autres pour entretenir le traicté fait avecques ledit Comte de S. Pol, lequel auoit esté fait à Longueuille. Et fut l'appoinctement tel que ladicte place luy seroit rendue avec le chasteau, combien que mōseigneur de Moÿ & Guillaume Chanu ignorans l'entreprinse d'iceluy Comte de S. Pol, labourerent fort & instamment pour cuider prendre ladicte place d'emblée: mais ce venu à leur cognoissance se deporterent à tant pour l'hōneur d'iceluy Comte, aussi ladicte ville & chasteau estoient battus de deux vergers: laquelle place le Roy auoit donnée audit Comte sa vie durant avecques toutes leurs appartenances: pour la garde desquelles la ville & le chasteau a esté cōmis de par ledit Comte mesfire George de Croix seigneur de Blainfel. Et ce pēdant que ces appoinctemēs se faisoient le Comte d'Eu estoit à Endely sur Seine & d'illec s'en alla logger au Pont S. Pierre, où il fut trois iours: puis allerent mettre le siege deuāt Harcourt & rappasserent Seine pour ce faire. Le lundy ensuiuāt xxix. dudit mois d'Aoust se partirent tous les seigneurs qui auoient esté à la prinse de Vernon & tirerent pour aller deuers le Roy à Louuiers pour cōclurre & proceder ensemble, comment on procederoit en outre au fait de la conqueste: & ce pendant qu'ils furent assemblez monseigneur de Ialongnes Mareschal de France, & mōseigneur de la Roche Guyon aians grand compaignie de gens de guerre, aduiserent maniere de conquerre, & reduire le chasteau de la Roche Guyon en l'obeissance du Roy: Et pour ce faire enuoierent trente compaignons ou enuiron par eauē bien habillez de traict & de canons, lesquels vindrent deuant la place faignans y vouloir mettre le siege, & faisoient vn si grand huÿ, & bruit que s'ils eussent esté deux cens: & seiournerent ledit lundy, mardy & mercredy tousiours escarmouchās. Et combien qu'ils ne fussent dedās ladicte place que seize Anglois ou au dessus, neantmoins ne conquererent rien sur eux les François. Et le ieudy iij. iour de Septembre vindrent illec le seigneur de Ialōgnes & de la Roche deuant ladicte place. Pourquoy Iean Houël Anglois capitaine dudit lieu (voiant telle compaignie estre deuant luy, à laquelle il ne pouoit resister, doubtant fort le siege, considerant aussi aucunement le bon droit qu'auoit le Roy de France à conquerir son Royaume, & mesmement voiant le seigneur de ladicte place, estre en personne) traicta ausdits seigneurs de leur rēdre ledit lieu & place ou cas qu'il n'auroit secours dudit Roy d'Angleterre, ou de son lieutenant en dedans quinze iours prochains ensuiuans: & aussi s'en deuoiet aller luy & ses compaignōs où bon leur sembleroit. Et ce fut notifier au Duc de Sombreffet gouuerneur de Normādie qui estoit à Roüen. Et là trouua facon celuy qui auoit porté lesdictes nouuelles au Duc avecques xxiiij. Anglois d'eux venir bouter dedans ladicte place: & auoient machiné de tuer ledit Houël, & tantost qu'il fut venu audit lieu de la Roche cuida attirer aucuns de la garnison, pour bouter dedans

dedans lesdits xxiiij. Anglois, affin d'executer son damnable propos : mais ce venu à la cognoissance dudit Houël par certaines coniectures il enuoya hastiement querir ledit seigneur de la Roche, lequel s'estoit retraict en attédant ledit xv. iour qui estoit prins enuers eux, auquel il bailla ladicte place. Et apres se partirent iceux Anglois & s'en allerent par saufconduit, seurement : & demoura ledit Houël, qui se fait françois en faisant le sermēt, parmy qu'il deuoit iouir des terres de sa femme estans en l'obeïssance du Roy : car elle estoit natifue de France, & l'ordonna ledit seigneur de la Roche à la garde de son chasteau.

Comment messeigneurs les Comtes d'Eu & de S. Pol prindrent d'assault la ville de Neuf-Chastel de Nicourt, & comment le chastel se rendit par composition, Et comment le Comte de Dunois print le chastel de Harcourt.

ENuiron la my Septēbre fut conclud & deliberé à Louuiers que veu la grand cheualerie qui estoit assemblée, il estoit expedient pour abreuiation d'icelle que l'armée se departit en deux parties: c'est à sçauoir que Charles d'Artois Comte d'Eu, Loÿs de Luxembourg Côte de S. Pol & autres: lesquels auoiēt en leur compaignie de trois à quatre mil cōbattans, yroient mettre le siege deuāt le Neuf-chastel de Nicourt, duquel estoit capitaine Adam Illeton Anglois, & pource se partirent pour aller mettre ledit siege & y arriuerēt le mardy xxj. de Septēbre, & le ieudy ensuiuant la ville fut prinse d'assault, & le chasteau demoura assiegé, lequel se rēdit au bout de quinze iours par composition. Pour l'autre armée fut ordonné par monseigneur le Comte de Dunois Lieutenant general: avec lequel estoient les Comtes de Cleremont & de Neuers, accompagnez à quatre mille de gens de guerre & bons combattans: lesquels apres le departement de Louuiers alla mettre le siege deuant le chastel de Cambresis le xviiij. iour de Septembre, duquel estoit capitaine Guillaume Crinton Anglois, accompagné de deux cens hommes de guerre: deuant lequel chastel ils furent par l'espace de sept iours ou environ, & apres se rendirent par composition comme dessus : & fait ladicte composition le Comte de Cleremont audit capitaine & à deux cens hommes de guerre estans en ladicte place. Ainsi demoura ledit chasteau en l'obeïssance du Roy. Depuis & sans interualle alla monseigneur de Dunois & toute sa compaignie deuant le chasteau de Harcourt, qui est bel & fort: duquel estoit capitaine messire Richard Frongueual cheualier Anglois, lequel auoit avec luy huiēt vingts Anglois ou environ, & furent assiegez par mondit seigneur de Dunois: lequel siege y fut par l'espace de xv. iours escarmouchans lesdits Anglois par chacū iour: & feirent de grās approches, esquelles fut tué d'un canon vn moult vaillant homme d'armes de la garnison de Louuiers, & vn Anglois fut pareillement tué d'une couleuvre sur le portail de la basse court. Et estoit lors ledit Frongueual deshonoré & pendu par les pieds à la porte dudit Louuiers : & adonc les françois qui deuant eux estoient, voians leur rebellion feirent assortir & iecter leurs canons contre ladicte place, & tellement que du premier coup ils percerent tout outre les murs de la basse court, & lors lesdits Anglois doutans fort lesdits canons, composerent à rendre ledit chasteau ou cas qu'ils ne seroient les plus forts en champ à vn iour

dit, qui fut le vendredy, & de ce baillerent hostages : auquel iour ils ne se trouuerent point, & pource rendirent ledit chastel lequel ils auoient tenu par l'espace de quinze iours. Et par-ainſi demoura ledit chasteau en l'obeiſſance du Roy. En ce temps les Anglois de la garniſon de la ville & chasteau d'Asſey allerent peſcher vn eſtang aſſé loing de ladiſte ville, & vint à la cognoiſſance du Duc d'Alençon, lequel incontinent monta à cheual & print gens pour y aller avec luy le plus ſecretement que faire ſe pouoit, & tellement & ſi ſagement y beſongna qu'ils furent prins, & au plus toſt les mena deuant ladiſte ville d'Asſey, laquelle il leur feit rendre ou autrement il leur euſt fait trencher les teſtes. Et ainſi demoura ladiſte ville en l'obeiſſance du Roy de France. Ce pendant ceux de la garniſon de Dieppe pour le Roy de France ſceurent qu'il y auoit pou de Anglois en l'abbaye de Feſcamp, qui eſt vn port de mer, & y allerent ſecretement & la prindrent d'emblée. Et tãtoſt apres y arriua vne nef qui venoit d'Angleterre, en laquelle y auoit quatre vingts & dixſept Anglois gens de guerre, qui venoient pour eſtre en garniſon en ladiſte abbaye, cuidans qu'elle fuſt encores en leur obeiſſance : mais les François tout degré les laiſſerent deſcendre, leſquels furent tous prins & demourerent priſonniers auſdits François.

Comment le Duc de Bretagne & le Conneſtable de France à groſſe armée de gēs de guerre entrèrent en la Normandie & allerent mettre le ſiege deuant S. Lo qui leur fut rendu: puis ſe rendirent pluſieurs petites places. Et comment la ville de Caranten ſe rendit, &c.

EN ce meſme temps, & audit an le Duc de Bretagne & le Comte de Richemont ſon frere Conneſtable de France à grand compaignie de nobles hommes & de pluſieurs autres gens de guerre du païs de Bretagne, eſtans en nombre de mil à douze cens lances, entrèrent en la baſſe Normandie pour ledit païs reduire & mettre en l'obeiſſance du Roy, que les Anglois (anciens ennemis du Royaume) auoient uſurpé & tenu contre raiſon par l'eſpace de trente deux ans ou enuiron. Et vindrent au giſte à la ville du Mont S. Michel: & leſdits Princes, ſeigneurs & leurs gens loger ēs parroiſſes des Pas Ardenon hault & bas, Courtis, S. George, en Gaine, Poſtulbāch & illec enuiron. Et au partir de Bretagne laiſſa ſon frere meſſire Pierre de Bretagne ſur les marches de Fougieres & d'Auranches pour la garde du païs à tout trois cens lances. Et le lendemain leſdits Ducs & Conneſtable feirent leur auantgarde: en laquelle eſtoit meſſire Iaques de Luxembourg lieutenant dudit Conneſtable, les Mareschal & Admiral de France, eſtans enſemble de quatre à cinq cens lances, qu'iceluy iour allerent coucher deuant ladiſte ville de Conſtances, & le Duc & le Conneſtable en leur compaignie, le Comte de Laual & autres pour la bataille eſtoient enſemble de cinq à ſix cens lances, & demourerent celle nuit à Grand-ville & illec enuiron. Et le lendemain le Conneſtable avec ladiſte bataille allerent audit Conſtances & arriuerent deuers l'hoſtel Dieu. Et depuis leur armée arriuée deuant ladiſte ville de Conſtances, ils n'y furent que vn iour, que les Anglois qui eſtoient dedans ladiſte ville ſe departirent, & les bourgeois manans & habitans de ladiſte ville demourerēt en leurs biens, comme ils eſtoient au parauant ladiſte guerre. Tantoſt apres alla ledit Duc de Bretagne

taigne mettre le siege deuant S.Lo, & y enuoya premierement ladicte auantgarde qui se logea d'un costé. Et le lendemain y arriuerent le Duc & Connestable avecques leur bataille d'autre costé, auquel lieu estoient deux cens combattans, dont estoit capitaine messire Guillaume de Poictou: & combien qu'ils fussent belle compaignie, neantmoins ne feirent aucune resistance: mais prindrent composition avec ledit Duc, par laquelle ils s'en deuoient aller en leur party où bon leur sembloit: & par-ainsi demoura ladicte place en l'obeissance du Roy de France. Et le Duc & Connestable estans audit S.Lo, furent gaignez par leurs gens les places & chasteaux qui s'ensuiuent: c'est à sçauoir le Hommet, Neufville, Torigny, Beuseuille, Hambie, la Mote-l'Euesque, la Haye-du-puis, Chantelou, l'Aunay, & plusieurs autres petites places à l'entour dudit S.Lo: & fut mise garde en chacune d'icelles places, & mesmement audit S.Lo. Apres ce, le Duc & Connestable enuoyerent leur auantgarde deuant la ville de Carenten: & le lendemain ils y arriuerent à toute leur bataille, & ne tindrent les gens de guerre qui estoient dedans ladicte place que trois iours qu'ils se rendirent & s'en allerent vn baston en leur main: & ceux de la ville furent restituez en tous leurs biés meubles & heritages. Et adonc se partirent le Mareschal & Admiral de France & s'en allerent deuant le Pont-d'Ouë, lequel ils prindrent d'assault: & incontinent apres toute ladicte auantgarde alla courir au cloz de Constantin, & se redit à eux la place, laquelle fut baillée à garder à Ioachin Rouhault. Et dudit lieu de Carenten les seigneurs dessusdits s'en retournerent à Constances, & de là ou mois d'Octobre ils enuoyerent partie de leurs gens deuant Gaurey. Et le lendemain arriua le Connestable, & demoura le Duc celuy iour audit lieu de Constances: & auant la venue dudit Connestable auoit esté prins ledit Gaurey d'assault & le bouleuert dudit lieu. Et le lendemain messire Geoffroy de Couren qui faisoit le guet, mina & feit approches telles, que cedit iour ledit Gaurey fut assailly bien & vaillamment: & tellement que les Anglois qui estoient dedans bien de six à sept vingts combattans, demanderent à parler audit Connestable pour faire composition: lesquels eux & leurs biens s'en allerent par traicté fait.

Comment le Duc d'Allençon print sa ville d'Allençon. Comment le Comte de Foix print la ville & chastel de Mauleon. Comment le Comte de Dunois print Argenten. Et comment les Anglois se retrahirent au donjon & s'en allerent vn baston au poing.

DVrant ce temps le Duc d'Allençon se transporta au point du iour deuant la ville d'Allençon par le consentement des bourgeois & habitants d'icelle ville, par le moyen desquels ledit Duc print & entra dedans ladicte ville & se retrahirent les Anglois dedans le chasteau, lequel incontinent fut assiegé par ledit Duc qui auoit en sa compaignie huit cés lances avec les archiers, & estoient grand nombre d'Anglois dedans ladicte place, qui eurent tous le cueur failly: car ils feirent petite resistance & se rendirent audit Duc d'Allençon, auquel competoit & appartenoit ladicte ville de son propre heritaige, à l'aide duquel vint messire Loys de Beaumont gouverneur du Mans à tout soixante lances & les archiers, & estoit encores pour lors le Roy à Louuiers. En ce mesme temps, enuiron la fin du mois de Septembre le Comte de Foix accompagné des Comtes de Comminges, d'Estarçt, du Vicomte de

Lautrec son frere, & de plusieurs autres seigneurs, barons, cheualiers & escuyers des paÿs de Foix, de Comminge, d'Estract, de Bigore, & de Bierne, iusques au nombre de cinq à six cens lances & deux mil arbalestriers, se partit de son paÿs de Bierne & cheuaucha à toute sa compaignie parmy le paÿs des basques iusques deuant la ville de Mauleon & de Solle, où il meit le siege, & tantost apres ledit siege mis ceux de ladicte ville doutans qu'ils ne fussent prins d'assault: mesmement veu & considéré la grand compaignie des gens de guerre qui estoient avecques eux pour euer tous inconueniens, qui à l'occasion dudit siege leur pourroient aduenir, se rendirent par composition: c'est à sçauoir qu'ils ne domageroient en corps & en biens iceux habitans de la ville. Et lors se retrahirent les Anglois dedans le chasteau qui est le plus fort de la Duché de Guyenne: car il est merueilleusement hault assis sur vne roche. Adonc ledit Comte sceut qu'il y auoit pou de viures dedans iceluy chasteau: & pource y meit le siege de tous costez: pourquoy ce venu à la cognoissance du Roy de Nauarre pour à ce obuier & bailler secours à iceux assiegez, & pour leuer le siege fait son mandement de toutes pars, & cheuaucha accompagné de six mille Arragonnois, Gascons, Anglois & Nauarrois iusques à deux lieues pres dudit siege, le cuidant leuer: mais quand il sceut la fortification & puissance d'iceux qui tenoient le siege fait reculer ses gés, & retraire: puis enuoya ses messagiers deuers le Comte de Foix, luy dire qu'il desiroit de parler à luy, & luy enuoya seureté de venir à telle compaignie que bon luy sembleroit. Et vint ledit Roy de Nauarre à tout petite compaignie à vn quart de lieuë pres dudit ost, à tout sa seureté où estoit ledit Comte de Foix: auquel il dist apres salutatio faite, que veu qu'il auoit espousé sa fille dont il auoit belle lignée, & aussi attédu l'affinité qui deuoit estre entr'eux deux se donnoit grand merueille commét il auoit voulu assieger ladicte place sous sa sauuegarde: & mesmement, veu que son Conestable en estoit capitaine de par luy pour le Roy d'Angleterre, auquel il auoit promis le faire garder seurement contre tous. Adonc ledit Comte son gendre tresgracieusement & en luy portant tout honneur, luy dit qu'il estoit Lieutenant general du Roy de France es parties d'entre Gironde & les Mons: estoit aussi son parent & subiect, & par son commandement auoit prins ladicte ville, & mis le siege deuant ledit chasteau: & pource, pour son honneur garder & à ce que ou temps aduenir ne luy fust impugné aucun crime ou reproche ne à hōme de son lignaige, iamais pour homme ne s'en leueroit ne ne se desplaceroit luy ne son ost s'il n'estoit combattu & vaincu iusques à ce que ledit chasteau fust rendu en l'obeissance du Roy, mais à toutes choses à luy possibles il aideroit, conforteroit & seruiroit ledit Roy de Nauarre pere de sa femme, reserué toutesfois, contre le Roy de France, ses subiects & alliez en tant qu'il touche le fait de la couronne de France. Et ainsi s'en retourna le Roy de Nauarre & son ost en son paÿs. Et quand ceux dudit chasteau veirent qu'ils ne pouoient en riens estre secourus, attendu la necessité qu'ils auoient de viures, ils luy rendirent ledit chasteau, par composition, & par-ainsi demoura ledit chasteau & ville en l'obeissance du Roy de France. Et tantost le sire de Luce accompagné de six cens combattans portans tous les croix rouges: lequel est homme du Roy de France à cause du chasteau de Mauleon à luy competant & appartenant, alla faire hommage au Roy en la main
du

du Comte son lieutenant és marches & païs que dit est. Et incontinent apres le serment par luy & ses gens fait, s'en retourna à toute sa compagnie en sa maison, portans tous les croix blanches dont le peuple, hommes, femmes & enfans furent moult esbahis : & ce fait s'en alla ledit Comte & ses gens en son païs apres garde souffisante mise auecques capitaine audit lieu de Mauleon. Le vingt & septiesme iour de Septembre alla monseigneur de Blanville à grand compaignie de gens d'armes deuât le chasteau de Toucques, qui estoit vn treffort chasteau assis sur vne roche ioingnant de la mer, ouquel estoient en garnison soixante Anglois pour la garde d'iceluy : lesquels voyans si grand compaignie estre deuant eux, ne feirent gueres de resistance : mais prindrent composition auecques ledit seigneur, par laquelle ils s'en allerent leurs corps & leurs biens saufs, chacun où bon luy sembla. En ce mesme an le dernier iour du mois de Septēbre les Comtes de Dunois, de Clermont, de Neuers & plusieurs autres de leur compaignie meirent le siege deuant le chasteau d'Yemmes, lequel les Anglois rendirent incontinent leurs corps & leurs biens saufs, & ainsi demoura ladicte place en l'obeissance du Roy. Apres le partement d'Yemmes s'en alla ladicte armée auec ledit Comte de Dunois lieutenant general deuant la ville & chasteau d'Argenten, où ils meirent le siege. Et tantost les Anglois qui dedans estoient, feinctement commencerent à parlementer combien qu'ils n'auoient aucune volenté d'eux rendre. Et quand les bourgeois & autres habitans veirent & cogneurent les Anglois ainsi abuser les François à parlementer : cognoissans aussi que leur volenté estoit d'eux tenir contre la puissance desdits François, & qu'ils disoient au plus loing de leur pensée, lesdits bourgeois & habitans appellerent aucuns desdits François du costé où ils ne parlementoient point, & leur dirent la volenté des Anglois ce qu'ils auoient intention de faire : pourquoy leur demanderent estandart, baniere ou autre panonceau pour enseigne & leur dirent que là où ils mettroient ladicte enseigne ils veinssent seurement, & ils les bouteroient dedans ladicte ville, & ainsi le feirent. Et quand les Anglois les apperceurent entrer dedans ladicte ville ils se retrahirent hastiement ou chasteau, & incontinent on tira contre la muraille, vne grosse bombarde qui y feit vn grand trou assés grand pour passer vne charette. Et lors les François voyans iceluy chasteau estre ainsi abbattu, assaillirent iceluy chasteau & entrerent dedans parmy ledit trou : mais lesdits Anglois se rebouterent diligemment ou donjon, lequel ils rendirent incontinent de paour d'estre prins d'assault, & combien qu'ils demandassent composition ils n'emporterent chacun qu'un baston en son poing.

Comment le Roy de Cecille vint à Louuiers deuers le Roy de France. Et comment ceux de Fresnoy se rendirent au Duc d'Allencon, puis parle de la composition de Gisors. Et comment on assiegea chasteau Gaillard.

EN ce mesmes temps & saison vint le Roy de Cecille deuers le Roy de France audit Louuiers, lequel fut receu à moult grand chiere. Et aussi estoient illec le Comte du Maine son frere & plusieurs Comtes, barons, cheualiers & escuyers qui seroit longue chose à reciter & iusques au nombre de deux cens lances & les archiers, sans en ce comprendre

la compagnie du Duc d'Allençon: celle du Duc de Bretagne, celle du Comte de Dunois lieutenant general, & celle du Comte de Cleremont, sans celles des Comtes d'Eu, & de S. Pol, lesquelles armées estoient moult grand compagnies & notables hommes. Et pource le Roy voiant si noble cheualerie se conclud & delibera de proceder à la conqueste & recourance de son païs & duché de Normandie, & enuoya mettre le siege à vn lundy deuât le chastel Gaillard qui est moult fort & imprenable sinon par famine, & n'est pas possible de le prédre par force ne autrement tant qu'il y ait que viure dedans ladicte place: car il est assis pres de la riuere de Seine sur vne Roche, & en tel lieu que nuls engins ne la pourroient greuer: & y fut mis le siege par le Seneschal de Poictou & plusieurs autres: lesquels à le mettre se gouvernerent vaillamment & grandement, & y alla le Roy de France. En ce mesme temps monseigneur le Duc d'Allençon meit le siege deuant la ville & chasteau de Fresnoy, où il y auoit grand quantité d'Anglois, lesquels ne se rebellerent en riens, pource qu'ils veoient les gens du Roy ainsi prosperer. Mais rendirent la place audit Duc d'Allençon par composition. Ce pendant que le siege estoit deuant ledit Gaillard auant la reddition d'iceluy deux ou trois iours, messire Richard de Merbury cheualier Anglois, capitaine de Gyfors fait composition pour la ville & chasteau dudit lieu de Gyfors avec le frere de sa femme, le xvij. iour d'Octobre ensuiuant. Et de fait se rendit François ledit capitaine & fait le serment en tel cas accoustumé, moyennant & par condition qu'on luy deliureroit purement & nettement & sans despens deux de ses enfans, l'un nommé Iean & l'autre Hemond, lesquels auoient esté prins au Ponteau-de-Mer: avec ce luy fut accordé qu'il iouiroit des terres de sa femme que les François tenoient & occupoient, fut par don du Roy ou autrement. Et outre-plus, à la requeste des parens de ladicte femme, & pour les agreables seruices que le Roy esperoit que luy & ses enfans luy feroient au temps aduenir, le fait capitaine de S. Germain en Laye, & luy donna sa vie durant, seulement tous les profits & emolumens à ladicte capitainerie appartenans. Et demoura capitaine par le don du Roy de la ville & chasteau de Gyfors monseigneur de Gaucourt, lequel auoit grandement trauaillé son corps ou seruite du Roy & tellement que veu son aage qui est de quatre vingts ans ou mieux il a acquis vn grand honneur.

Comment le Roy de France manda les Comtes de Dunois, d'Eu, & de S. Pol & leurs gens venir deuers luy pour aller deuant Roüen, où ils furent trois iours, puis s'en retournerent. Comment aucuns de Roüen leur cuiderent liurer la ville, comme le Duc de Bretagne assiegea Fougieres. Et comment Condé fut prins.



V mois d'Octobre ensuiuant oudit an le Roy de France manda au Comte de Dunois & aux autres seigneurs de sa compagnie tenans les champs, qui auoient mis Argenten en son obeissance. Et pareillement au Comte d'Eu & de S. Pol, & à ceux de leur compagnie qu'ils veinsent deuers luy pource qu'il vouloit mettre le siege deuât la cité de Roüen, & la reduire en son obeissance, lesquels tous hastiuement vindrent à son mädement & cheuaucherent tât, que les compagnies dudit Comte de Dunois, d'Eu & de S. Pol se trouuerent en la champaigne du Neufbourg: & s'assemblerent de l'autre

l'autre costé pres de Roüen. Tantost apres se partit le Roy de France de sa ville de Louuiers accompagné du Roy de Cecille & des autres, & cheuaucha iusques deuant le Pont-de-l'Arche où ceux de la ville vindrent au deuant de luy aux champs, faisans grand ioye de son aduenement. Et lors sans quelque delay enuoia sommer ceux de la ville & cité de Roüen par ses heraulx, affin que sans oppressiõ aucune ils luy voulussent rendre & mettre en son obeissance ladicte ville & cité: mais les Anglois qui dedäs estoient cõsiderans assez la cause pourquoy lesdits heraulx venoient, ne voudroient laisser approcher ladicte ville ne bailler leur sommation: ains leur respondirent qu'ils s'en retournassent à grand haste: aussi feirent ils: car ils furent en grand peril & danger de mort. Et incontinent lesdits heraulx retournez deuers le Roy & leur rapport fait de la maniere que les Anglois auoient tenue à sesdits heraulx, fait passer tous ses gens audit Pont-de-l'Arche: desquels estoit conduiseur ledit Comte de Dunois comme son lieutenant general, & les enuoya deuant la cité de Roüen où ils furent trois iours en grand multitude & puissance de gens. Pendans lesquels trois iours iceux gens de guerre autant le grand comme le petit eurent moult à souffrir & endurer par l'oraige de pluïe qu'il feït. Et à pou estoit tout l'ost perdu de l'ord chemin & de la pluïe qu'il faisoit. Et ce nonobstant ceux de dedans icelle ville feirent de grans faillies, où il y eut de moult belle proësses & armes faïctes: & y fut prins vn escuyer françois nõmé le Bastard Forbier par son cheual qui cheut sous luy: lesdits seigneurs & gens d'armes quelque temps qu'il feït se meirent en bataille deuant ladicte cité, & les enuoyerent la seconde fois sommer par lesdits heraulx du Roy: mais lesdits Anglois ne voulurent souffrir qu'ils approchassent de la ville, ne qu'ils parlassent au peuple: ainsi s'en retournerët sans riens faire, ainsi comme ils auoient fait la premiere fois, qui est contre toute ordre de seigneurie & de cheualerie: car heraulx doiuent aller & venir sauement pour faire ce à quoy ils sont enuoyez, pourueu qu'il n'y ait en leur fait aucune trahison. Et lors lesdits heraulx retournez & leur rapport fait audit Côte de Dunois, iceluy voiant que nul de ladicte cité ne faisoit semblant ne maniere de vouloir rendre ladicte ville: cõsiderant le temps & la saison qui estoit sur l'hyuer & la pluye qu'il faisoit s'en retourna au Pont-de-l'Arche: & les gens de guerre se logerent aux villages à l'entour d'iceluy Pont. Et mesmement celuy iour estoit venu le Roy de France, & le Roy de Cecille iusques à vne abbaye de dames à vne lieuë & demie de Roüen, lequel s'en retourna au giste audit Pont-de-l'Arche & demoura ledit Roy de Cecille derriere iusques à ce que toutes les compaignies se fussent retraïctes audit Pont-de-l'Arche, & es marches enuiron. Pou apres vindrent nouuelles audit Roy de France qu'aucunes gens de ladicte ville de Roüen se mettoient sur la muraille d'icelle ville dedans deux tours, & là gardoient vn pan de mur, en maniere que les François pourroient bien entrer par là en icelle ville: & fut enuoyé, de celle part ledit Comte de Dunois avecques l'armée dessusdicte pour entreprendre icelle besongne: lesquels partirent tous ensemble le ieudy seiziesme iour dudit mois d'Octobre, & se meirent en moult belle ordonnance sur les champs: puis cheuaucherent tant qu'ils arriuerent deuant ladicte cité de Roüen, & se meirent en bataille deuers le Neuf-Chastel, de laquelle ils feirent & ordonnerent deux parties: dont

l'une estoit entre la porte des Chartreux & la porte Beauuoisiéne. Et en estoient conduiseurs le Comte de Dunois lieutenant general du Roy, le Comte de Nevers, le Comte d'Eu, le Cōte de S. Pol & plusieurs autres cheualiers & escuyers: & l'autre bataille estoit entre la iustice de Roüen & la cité: En laquelle estoient le Comte de Cleremont, le Comte de Chartres, le Vicomte de Lommaine & plusieurs autres cheualiers & escuyers. Et furent tous en la bataille iusques apres deux heures apres midy. Et à celle heure faillit vn homme de celle cité à cheual, qui vint dire ausdits seigneurs tenans lesdictes batailles qu'il y auoit de gēs de la ville qui tenoient de fait & de force deux tours pour bouter les gens du Roy dedans. Et lors incontinent ledit Comte de Dunois & les autres seigneurs tenans la bataille deuant la porte des Chartreux, feirent marcher apertement leurs gens de traict pour venir ioindre à vn pan de mur entre lesdictes deux tours: & lors descēdit à pied ledit Comte de Dunois & ceux de sa compagnie, & marcherent iusques à la muraille de ladicte ville, où ils dresserent tant pou d'eschesles qu'ils auoient entre lesdictes deux tours, & faisoit vn chacun grand diligence pour monter contremont le mur. Là furent faits cheualiers le Comte de Nevers, le sire Concrefalt, Brunet de Long-champ, le sire de Pleumartin, Pierre de la Fayette, le sire de Grauille, maistre Guillaume Cousinot, Iaques de la Riuere Baillif de Nyuernois, Robert de Herautullier, & plusieurs autres qui tous faisoient grandement leur deuoir de monter sur ladicte muraille, & tellement qu'ils estoient de trente à quarante François tant dessus le mur que dedans la ville. Sur lesquels vint charger moult vaillāment le seigneur de Thallebot à tout trois cens Anglois en sa compagnie, lequel vint planter sa banniere sur le mur, affin de rebouter lesdits François qui ja estoient en partie dedans la ville, comme dit est: & se combattirent moult vaillamment iceux François, & tellement que la plus grand partie se sauua à ressaillir dedans les fossez, & furent contrains à ce par la force du traict que les Anglois tiroient: & ceux qui ne se peurent retraire furent morts ou prins dedans ladicte ville, & chargerent si asprement sur lesdits François qu'ils furent maistres de toute la muraille & desdictes deux tours: & là furent que morts que prins ou dit assaut de cinquante à soixāte hommes tant des François que de ceux de la ville, qui leur aidoint & fauorisoient: & les aucuns en saillant pour eux cuidoer sauuer se tuerent, & les autres s'en eschapperent: & mesmement aucuns de ceux qui estoient dedans lesdictes tours se rompirent les iambes, & les autres furent prins par les Anglois & meurdri moult inhumainement, & estoit grand abhomination de veoir le sang qui estoit entre icelles tours. Ce pendant arriuerēt à Dernatal lesdits Roys de France & de Cecille, lesquels quand ils veirent la chose ainsi faillir & que ceux de la cité & de la ville n'estoient pas bien vnis ensemble, s'en retournerent le xvj. iour d'Octobre audit Pont-de-l'Arche. Et tous les gens de guerre s'en allerent loger par les villages sur la riuere de Seine où ils auoient leurs ordonnances. Le xvij. iour du mois d'Octobre messire Richard Merbury cheualier Anglois dessus nommé en accomplissant ses promesses bailla & deliura le chasteau & ville de Gisors dont est faicte mētion cy dessus & les meit és mains de monseigneur de Gaucourt pour le Roy de France. Et par-ainsi luy furent rendus ses deux enfans qui estoient prisonniers: & avec ce toutes autres promesses
à luy

à luy faictes & entretenues, & par ainsi se departit. Et fait departir vn capitaine Anglois nommé Regnéfort qui soubs luy auoit eu la garde & charge des gens d'armes, & parauant ce contract ordonné à la garde de ceux ville & chastel. En ce temps se partit le Duc de Bretaigne de la basse Normandie où il auoit prins moult de places, comme dit est, s'en retourna mettre le siege à Fougieres que tenoit messire François l'Arragonnois de Surienne. En ce mesme temps fut prins par les François le chasteau de Condé sur Noireau par la porte par defaute de garde. Et là fut prinse la femme de messire François l'Arragonnois qui autresfois auoit esté desnichée & depuis reboutée dedans ledit chasteau de Condé. Et eurent lesdits François tous leurs biës estans en ladicte place avec ce que lesdits Anglois demourerent leurs prisonniers,

Comment l'Archeuesque de Roüen & aucuns autres traicterent de rendre Roüen au Roy de France: & comment les clefs de ladicte ville furent présentées au Comte de Dunois Lieutenant general du Roy, lequel avec ses gens entra en icelle.

LE xviii. iour dudit mois d'Octobre les manans & habitans de la cité de Roüen pour la grand paour & frayeur qu'ils auoient eu dudit assault doubtans que ladicte ville ne fut prinse en pareil cas, & par ce moyen pilliée, desolée & destruiete, & aussi pour euer l'effusion du sang humain qui pourroit aduenir par icelle prinse, s'assemblerent d'un accord avec l'Archeuesque dudit Roüen, lesquels estoient esmeuz & desplaisans de la mort d'aucuns de ladicte ville, qui auoient esté meurdres & tuez audit assault: & fils eussent rencontré à icelle heure en la commotion où ils estoient le sire de Thallebot, selon commun lāgaige, ils l'eussent occis comme il auoit fait aucuns de leurs parens. Si rencontrerent le Duc de Sombreffet & luy dirent qu'il estoit tresexpedient qu'ils eussent traicté avec le Roy de France: car autrement ils estoient perdus & affamez: & qu'il y auoit six sepmaines & plus qu'il n'estoit entré en ladicte ville bleds, bois, chair ne vin: lesquelles parolles ne furent gueres plaisantes audit Duc. Adonc commença à regarder autour de luy & veit qu'il n'auoit en sa compaignie que cinquante ou soixante Anglois: & ceux de Roüen estoient bien de huit cens à mil, sans le demourant de ladicte ville, qui estoient en armes parmy les rues, dont fut moult esbahy le Duc. Et adonc se cōmença à fort humilier & respōdit à l'Archeuesque & au peuple qui là estoit, qu'il estoit prest de faire ce que les gens de la ville voudroient. Et adonc vint pour appaiser le peuple à l'hostel de la ville, où les assemblées ont accoustumé estre faictes, & là pourparlerent ensemble & tant qu'apres plusieurs allegations & collations fut conclud que ledit Archeuesque, avec aucuns cheualiers Anglois & autres bourgeois de ladicte ville yroient au Port-Sainct Ouen pour parler au Roy ou aux gens de son grand conseil pour le bien & utilité de ladicte cité & du bien public: & pource fut enuoyé l'Official de ladicte ville de Roüen au Pont-de-l'Arche deuers le Roy pour auoir vn saufconduit pour aucuns d'icelle tant d'Eglise, gens de guerre, marchans comme autres, affin de trouuer aucun bon traicté & appoinctemēt: si leur fut octroyé & baillé. Et ledit Official retourné deuers l'Archeuesque, le Duc & les citoyens de la ville furent ordonnez, c'est à sçauoir l'Archeuesque avec plusieurs autres no-

tables & aucuns cheualiers & escuyers de la part dudit Duc de Sombresset pour aller au Port-de-Sainct-Ouen à vne lieuë pres dudit Pont-de-l'Arche: où ils trouuerent pour le Roy de France ledit Comte de Dunois son lieutenant general, le Chancelier de France, le Seneschal de Poictou, messire Guillaume Cousinot & plusieurs autres: avec lesquels ils parlementerent longuement, & requeroient tresinstamment qu'abolition generale leur fut baillée: c'est à sçauoir que ceux qui s'en voudroient en aller au partir des Anglois s'en allassent, & ceux qui voudroient demourer demourassent sans quelque perdition ou arrest de leurs biens. Et avec ce que les Anglois s'en yroient en leur party & leur feroit baillé bon & loyal saufconduit pour eux & pour leurs biens. Lesquelles requestes leur furent accordées par ledit Comte de Dunois & autres du grand conseil du Roy, par ainsi que l'Archeuesque & ses consors promettoient de mettre ladicte ville & cité en l'obeissance du Roy de France. Et à tant se departit ledit Archeuesque & ses consors pour aller faire leur rapport tant aux Anglois comme à ceux de ladicte cité: mais pource qu'ils arriuerent tard & de nuict ne peurent faire leur respõce: & lendemain samedi xvij. iour dudit mois au plus matin alla ledit Archeuesque & ceux qui auoient esté avec luy audit port-sainct Ouen, en la maison de la cité pour reciter deuant les Anglois & les citoyens l'appoinctement & les parolles qu'ils auoient eües avecques les gens du Roy de France: lesquelles parolles & appoinctemens furent tresaggreables à ceux de ladicte ville & tresdesplaisans audits Anglois. Lesquels quand ils veirent & apperceurent la volenté & le grand desir que le peuple auoit au Roy de France furent moult esbahis, & par especial lesdits Duc & sire de Thallebot. Pourquoy se partirent mal contens de la maison de la ville, & se meirent tous en armes: puis se retrahirent au palais, sur les ponts & portaux & au chasteau de ladicte ville. Et adoncques quand ceux de la cité cogneurent leur contenance se doubterent fort, & pour ceste cause se meirent pareillement en armes & feirent moult grand guet & grand garde tout ce iour de samedi & la nuict pareillement, & aussi faisoient iceux Anglois de leur party. Celle mesmes nuict les citoiens de ladicte ville desirans expeller les Anglois qui ne vouloient point de traicté, enuoyerent vn homme au Pont-de-l'Arche, lequel y arriua le Dimanche au point du iour pour faire à sçauoir au Roy qu'il veint à leur secours, & ils le mettroient dedans ladicte ville. Et cedit iour de Dimanche fut le dixiesme iour d'Octobre à huit heures du matin ou enuiron s'esmeut le peuple qui se tenoit sur sa garde, & veit lesdits Anglois armez dedans icelle ville: ausquels ils coururent sus & les chasserent si durement & si asprement qu'à grand peine peurent ils gagner lesdits pont, palais & chasteau. Et en y eut à ladicte chasse morts desdits Anglois de sept à huit: Pendant laquelle chasse ceux de ladicte ville gaignerent les murs, portaux & tours. Pour ausquels donner secours promptement & en grand diligence ledit Comte de Dunois Lieutenant du Roy monta à cheual & avecques luy grand compaignie de gens d'armes. Entre lesquels estoit Floquet Baillif d'Eureux, lequel fut frappé d'un cheual de sa compaignie, tellement qu'il luy rompit la iambe pource qu'il n'auoit point eu loisir de prendre son harnois de iambes: & fut porté au Pont-de-l'Arche pour guerir, apres qu'il eut baillé le gouuernement de ses gens

gens au seigneur de Maulny . Et quand ladicte compaignie fut arriüée deuant Roüen ils sommerent les gens de guerre estans dedans S. Katherine de rendre la place au Roy : Lequel pendant ladicte sommation se partit du Pont-de-l'Arche grandement accompagné de gens d'armes & de traict pour aller deuant Roüen , & fait charger son artillerie pour faire assaillir ladicte place de S. Katherine, combien que de ce ne fut aucun besoing . Car le capitaine de ladicte place , lequel auoit en sa compaignie six vingts Anglois voians si grande & si noble compaignie estre deuant eux , sachans aussi la venue du Roy & doubtons iceluy, rendirent ladicte place audit Comte de Dunois , & s'en allerent lesdicts Anglois en leur party ou bon leur sembla . Et furent ordonnez à la garde d'icelle place iusques à la venue du Roy les gens du Baillif d'Eureux . Pour la seurte desquels Anglois leur fut baillé vn hault du Roy pour les conduire & faire passer au Port-sainct-Ouen , avecques bon saufconduit . Et ainsi qu'ils s'en alloient trouuerent & rencontrèrent le Roy , lequel leur dit qu'ils ne prenissent riens sur le paÿs sans le payer, & ils luy respondirent qu'ils n'auoient point d'argent ne dequoy payer . Lors leur donna le Roy pour faire leurs despens la somme de cent francs & ainsi s'en allerent leurs corps & leurs biens saufs, dont ils n'auoient guerres iusques à Honnefleür ou ailleurs où bon leur sembla : & le Roy s'en vint loger celle nuict audit lieu de S. Katherine en poursuiuant tousiours son entreprise. Pour donc auoir Roüen veindrent le Comte de Dunois, le Comte de Neuers, le seigneur d'Orual, le seigneur de Blanville & le seigneur de Maulny, avec toutes les compaignies des seigneurs dessusdits à la porte de Roüen du costé de deuers Paris nommée Martin-ville à tout les Bannieres du Roy desployées, & là se meirent en bataille au plus pres du boulleuert de ladicte porte, où vindrent les bourgeois de ladicte ville eux presenter & apporter les clefs audit Comte de Dunois, en disant qu'il luy pleust dedans ladicte cité bouter tel & si grand nombre de gens d'armes que bon luy sembloit : à quoy leur respōdit, que à leur vouldenté se feroit . Et pour ce apres plusieurs parolles entre-eux dictes & alleguées pour le bien de la ville fut ordōné à entrer messire Pierre de Bresé Seneschal de Poictou à tout cent lances & les archiers, le sire de Maulny à tout cent lances & les archiers dont la plus part estoient des gens de Robert de Flocques : & des gens du Comte de Dunois aussi cent lances & les archiers, & se logerent au plus pres des Anglois qu'ils peurent: c'est à sçauoir les gens dudit Comte de Dunois deuant le palais où estoient dedans le Duc de Sombresset & le sire de Thallebot à tout douze cens Anglois . Le seigneur de Maulny se logea entre ledit palais & le chasteau, & le Seneschal de Poictou deuant ledit chasteau . Et tous les autres capitaines s'en allerent loger aux champs par les villages du costé de Caulx & de Beauuoisis, & estoit moult belle chose à veoir l'armée dudit Roy de France . Et n'est point memoire qu'on veit oncques à Roy aussi belle armée ou compaignie pour vne fois tant de seigneurs, Barons, cheualiers, escuyers comme autres gens . Ce iour mesme au soir rēdirent les Anglois ledit Pont & fut baillé en garde au seigneur de Heranuillier: & le lendemain furent les portes de Roüen ouuertes, & y entroït tout hōme qui y vouloit entrer & yssoit qui vouloit yssir. Adoncques le-

dit Duc de Sombreffet qui estoit moult desplaisant en cuer & marry de veoir si grand puissance que le Roy auoit requist à parler à luy. Et ce venu à la cognoissance du Roy il fut trescontent. Pourquoy se partit dudit Palais iceluy Duc le cinquiesme iour ensuiuant accompagné de ses gens en certain nombre & d'aucuns des heraulx du Roy, lesquels le conuoierent iusques à S. Katherine du môt de Roüen, où le Roy estoit accompagné du Roy de Cecille, du Comte de Dunois & autres de son conseil & seigneurs de son sang. Aussi y estoit le Patriarche d'Antioche, l'Archeuesque de Rouë & plusieurs autres Prelats. Et apres que ledit Duc eut salüé & fait la reuerence au Roy il luy requit qu'il luy pleust que luy, le sire de Thallebot & les autres Anglois s'en peussent aller seurement, en iouissant de l'abolition ainsi que ceux de la cité l'auoient faicte & acceptée à luy où à ceux de son grand conseil. A quoy le Roy meurement & sagemēt luy respondit que sa requeste n'estoit point raisonnable, obstant ce qu'il n'auoit pas voulu tenir le traicté & appoinctement de l'abolition dessusdicte n'adherer à icelle: mais en contemp dudit appoinctement auoit tenu & occupé, & encores tenoit & occupoit luy & ses consors, ledit palais & chasteau d'icelle ville, contre sa volenté: & aussi n'auoit voulu que ceux de Roüen luy rendissent ladicte ville: mais y auoit empesché & résisté tant comme il auoit peu, & pour ces causes estoit frustré d'icelle abolition: & avec ce qu'auant qu'il partit dudit palais il luy rēdroit les places de Honnefleür, Harfleür & toutes autres places de Caulx estans és mains du Roy d'Angleterre. Sur ces parolles print congé du Roy ledit Duc & s'en retourna au palais regardant parmi les rues tout le peuple portant la croix blanche, dont il n'estoit ioyeux, & fut reconuoyé par les Comtes d'Eu & de Clermont.

Comment le Roy de France feit assieger le Duc de Sombreffet, Thallebot & leurs gens dedans le Palais de Roüen: & comment par composition ils s'en allerent parmy rendant le chasteau d'Arques & autres places cy apres declairées.

LE mercredy xxij. dudit mois fait le Roy mettre le siege deuant le palais dudit Roüen par deuers les champs & deuant le chasteau pareillement: laquelle compaignie estoit nombreé, huiet cens lances avec les archiers, & feirent de grandes tranchées aueur du palais tant aux champs qu'en la ville. Et furent mises & assises à toute diligence bombardes & canons au deuant de la porte dudit palais qui ouure sur la ville, & pareillement deuant celle qui ouure sur les champs. Adonc quand le Duc de Sombreffet veit & apperceut lesdictes approches il fut moult esbahy: & considerant qu'il y auoit pou de viures audit palais & beaucoup de gens, veu aussi qu'il ny pouoit aucunement estre secouru, requist ou feit requerir au Roy le ieudy ensuiuant xxviij. dudit mois, qu'il luy pleust qu'il allast parler à luy. Si luy ottroya le Roy tresbenignemēt. Et lors se partit dudit palais accompagné de plusieurs cheualiers & escuyers Anglois, qui estoient les principaux de sa compaignie iusques au nombre de quarante ou environ, & estoit ledit Duc vestu d'une longue robbe de veloux figuré bleu, fourré d'une martres sebelines, & sur sa teste auoit vn chapeau de veloux vermeil fourré de pareil martres, & passa parmy la ville conuoié & conduit des heraulx du Roy, & à la sail-
lie de

lie de la porte de ladicte ville, vint le Comte de Clermont aîné fils du Duc de Bourbon, & plusieurs autres seigneurs cheualiers & escuyers : lesquels le conduisirent iusques à S. Katherine où le Roy estoit logé, lequel le receut tresbenignement en vne chambre tresrichement parée: & estoient avec luy à ladicte reception le Roy de Cecille, les Comtes du Maine, de Dunois, de Neuers, de Clermont, de S. Pol, de Castres, de Tanquarville, & le Vicomte de Loumaigne & plusieurs autres grans seigneurs, cheualiers & escuyers, qui seroit chose trop prolixie à raconter. Et apres salutation faicte au Roy par ledit Duc, il luy supplia treshumblement qui luy pleust donner & aux Anglois pareillement estés dedans le chasteau & palais de ladicte ville, telle composition qu'auoient eu ceux de ladicte cité. A quoy luy fait responce le Roy & luy dit en beaux termes hauts & notables, que par le traicté fait au Port-S. Ouen il luy auoit esté octroié la composition telle qu'à ceux de Roüen, mais luy ne ses adherans & complices Anglois comme mal aduisez ne l'auoient pas voulu tenir. Parquoy sa requeste n'estoit point raisonnable & pource n'en auroit il riens: & par ainsi print congé du Roy & s'en retourna luy & ceux de sa compagnie audit Palais. Pour la seurte desquels ils furent conduits par les Comtes de Clermont, d'Eu & de Castres. Et lors commanda le Roy au Comte de Dunois son lieutenant general qu'il fait faire autour dudit Palais, trenchis, fossez & approchemens plusforts que par-auant; & tant du costé de la ville que des champs. A quoy ledit lieutenant fait de grans diligences & se monstra prudent & vaillant cheualier en guerre, & meit la place en telle disposition que les Anglois ne pouoient faillir ne yssir de nuls costez desdits palais & chasteau. Et ce voians lesdits Anglois ils requierent le xxiiij. iour ensuiuant dudit mois d'Octobre à parlementer avec ledit Comte de Dunois lieutenant du Roy. Et pour ce faire furent trefues données des deux costez. Et ainsi le Baillif d'Eureux, le mareschal de la Fayette & autres du grand conseil du Roy appelez avecques ledit lieutenant general, commencerent lesdictes parties à parlementer. Et furent lesdictes trefues continuées de iour à autre iusques à l'espace de douze iours: & tout pource qu'iceux Anglois ne vouloient point laisser, en faisant le traicté, en hostage le sire de Thallebot. Mais apres plusieurs allegations & parlemens faicts tant d'un costé que d'autre: finablement ils appoincterent ensemble, & furent d'accord que ledit Duc de Sombresset gouernant pour le Roy d'Angleterre, sa femme, ses enfans & les autres Anglois estans audit palais & chasteau, s'en yroiēt où bon leur sembleroit en leur party, leurs corps & leurs biens sauues reserué prisonniers & grosses artillerie, & parmy ce qu'ils payeroient au Roy de dedans vn an la somme de cinquante mille escus, & à ceux qui auoient fait le traicté six mil. Avec ce promeirent payer loyaument tout ce qu'ils deuoient à ceux de ladicte cité tant hostellains, bourgeois, marchans comme autres. Deuoient outre-plus, & promeirent les dessusdicts de Sombresset & ses compagnons mettre à plaine deliurance le chasteau d'Arques, la ville de Caudebec, le chasteau de Tanquarville & l'Isle-Bonne, la ville de Hónesleur & de Mōstie-rvilliers, & icelles bailler au Roy ou à ses cōmis pour luy: l'accomplissement desquelles choses dessusdictes, & pour plus grand seurte d'icelles, bailla ledit Duc de Sombresset ses lettres patentes: &

avec ce demourerēt en hostage lesdits seigneurs de Tallebot, le fils du seigneur de Barquiny, le fils du seigneur de Roz & de la Duchesse de Sombreffet, le fils du Comte d'Ormont d'Hirlande, & deux autres seigneurs Anglois. Et par-ainsi parmy ce traicté faisant se partit dudit palais le Mardy quatriesme iour du mois de Nouembre ledit Duc de Sombreffet, & s'en alla luy & les autres Anglois tāt par eaue que par terre droit à Harfleur. Et demourerent les hostaiges és mains du Roy de France ou de ses commis dedans Roüen. Et depuis ledit Duc voulāt tenir ses promesses commeit & ordōna messire Thomas Hou & Foucques Hou, pour faire rendre au Roy toutes les places dessusdictes & declairées. Ce qu'ils feirent reseruē ledit Honnefleur dont estoit capitaine vn nommé maistre Courson qui ne le voulut rendre, & pour ceste cause demoura ledit sire de Tallebot prisonnier du Roy. Et le Lūdy dixiesme iour dudit mois, veille de S. Martin le Comte de Dunois & le Baillif de Roüen, feirēt mettre la baniere du Roy dessus ledit chasteau, palais & portes de ladicte cité par vn des heraulx du Roy & en la presence des plus notables bourgeois de ladicte ville & cité.

Comment le Roy de France entra à Roüen noblement accompagné: & comment il y fut sumptueusement receu: puis dit comment les Anglois meirent en la main & obeïssance du Roy le chasteau d'Aarques, Caudebecq, Tanquarville, Monstier-ville. &c.

Pendant desdits appoinctemens faits entre les gens du Roy & lesdits Anglois, solemnisa le Roy la feste de Toussaincts audit lieu de S. Katherine en grand ioye & liesse de ce qu'il veoit ainsi ses ennemis succumbez, & tousiours en remerciant Dieu de la bonne fortune qu'il luy enuoyoit de iour en iour: lequel pour venir en sa bōne ville de Roüen apres qu'en icelle fut meis police & gouuernement par ledit Comte de Dunois son lieutenant, se partit cedit Lundy de S. Katherine enuiron vne heure apres midy accompagné du Roy de Cecille & d'autres plusieurs grans seigneurs tant de son sang comme autres, & meit ses gens en moult belle ordonnance. Premièrement estoient tous ses archiers les premiers vestus de iacquettes de couleur rouge, blanche & vert, semées d'orfauerie. Avec lesquels estoient les archiers du Roy de Cecille, du Comte du Maine & plusieurs autres seigneurs iusques au nombre de six cens archiers bien montez, tous ayans brigādines & iacquettes dessus de plusieurs & diuerses façons, harnois de iambes, espées, dagues & salades bien richement garnies d'argent. Pour gouuernement & conduicte desquels furent commis & ordonnez de par le Roy les seigneurs de Preuilly, & de Cleré, messire Theaulde de Vaulperge, & aucuns autres qui tous auoient leurs cheuaux couuers de satin de diuerses manieres & couleurs. Apres lesquels archiers estoient les heraux du Roy de France, du Roy de Cecille & autres Princes & seigneurs, estans en la compagnie du Roy tous vestus de leurs cottes d'armes, & avec eux estoient plusieurs poursuiuans. Puis y estoient les trōpettes & clairōs qui sonnoient si tresfort que c'estoit grād melodie & belle chose à ouïr. Et estoient les trompettes du Roy vestus de vermeil & leurs māches couuertes d'orfauerie. En apres estoit messire Guillaume Iuuenal des Vrsins cheualier seigneur de Trainel, & Chancelier de France vestu en habits Royaux, c'est à sçauoir robe, mâteau & chapperō d'escarlatte fourrez de menu vair, & sur chacune de ses

de ses espaules rubans d'or, & trois pour fils de lettices : deuant lequel estoient deux varlets de pied, qui menoient vne hacquenée blanche par la bride, couuerte de drap de veloux bleu semé de fleurs de lis d'or tissu : sur la couuerture duquel estoit vn petit coffre couuert aussi de veloux bleu, semé de fleurs de lis d'orfauerie, ouquel estoient les grans seaux du Roy. En apres cheuauchoit vn nommé Pierre Fonteulle escuyer d'escuyerie armé tout à blanc monté sur vn grand destrier, couuert & enharnaché de veloux azuré à grans affiches d'argent doré, sur la teste vn chapeau poinctu deuant de veloux vermeil, fourré d'ermine, lequel portoit en escharpe vn mâteau d'escarlatta pourpré aussi fourré d'ermine. Apres ledit de Fonteulle & sans moyen deuant le Roy estoit le sire de S. Treille Grand escuyer d'escuyerie du Roy & Baillif de Berry, lequel estoit armé tout au blanc & monté sur vn grand destrier pareillement couuert & enharnaché de veloux azuré, à grās affiches d'argent doré comme ledit Fonteulle: lequel portoit en escharpe la grande espée de parement du Roy, dont le pommeau, la croix, la blouque, le morgant & la bouterolle de la gaine estoient couuerte de veloux azuré, & par dessus semées de fleurs de lis d'or. En apres estoit le Roy armé de toutes pieces monté sur vn courfier couuert iusques aux pieds de drap de veloux azuré, semé de fleurs de lis d'or de brodure. Sur sa teste vn chapeau de bieure doublé de veloux vermeil, sur lequel estoit au bout vne houppe de fil d'or. Apres luy estoient ses paiges vestus de vermeil, leurs manches toutes couuertes d'orfauerie blanche : & estoient les harnois des testes de leurs cheuaux couuertes de fin or de diuerses façons d'orfauerie, & plumes d'austuche de plusieurs couleurs. A la dextre du Roy cheuauchoit le Roy de Cécille & à fenestre le Comte du Maine son frere armez tout à blanc : leurs cheuaux tresrichement couuers de couuertes de veloux pareilles à croix blanches, & leurs deuises semées parmy les houpettes de fil d'or, & les cheuaux & les paiges enharnachez tout pareil de la couuerture, & estoient les harnois de la teste des cheuaux des dessusdits seigneurs couuers d'orfauerie de fin or à leurs deuises. Et apres estoient les Comtes de Neuers, de S. Pol & de Clermont: celui de Neuers estoit pareillement armé tout à blanc, monté sur vn courfier tout couuert de veloux verd broché de fil d'or, & apres luy trois paiges vestus de violet & de noir: & si auoit en sa compaignie douze gentils hommes armez tout à blanc, montez sur cheuaux couuers de satin violet : & sur chacune couuerture vne croix blanche excepté l'vn d'iceux duquel la couuerture estoit de satin verd. Celui de S. Pol pareillement estoit tout armé au blanc, monté sur vn destrier enharnaché de satin noir & semé d'orfauerie & de brodure, & apres luy cinq paiges vestus de satin noir decopez par bas, icelles decopures couuertes d'orfauerie : & les harnois des cheuaux de mesme la couuerture. L'vn desdits paiges portoit vne lance couuerte de veloux vermeil, l'autre vne couuerte de drap d'or figuré, l'autre portoit vn armet en sa teste tout de fin or richemēt ouré, & derriere les paiges estoit son pallefrenier vestu & habillé & son cheual enharnaché de pareille liurée que dit est, lequel menoit vn grand destrier en main. Et celui de Clermont estoit pareillement armé tout à blanc monté sur vn courfier couuert, & ses paiges vestus de sa liurée. Le sire de Culant grād maistre d'hostel du Roy (aiāt la charge & gouuernement de la bataille où estoient six

cens lances, & en chacune vn pennoncel de satin vermeil à vn soleil d'or) venoit apres les paiges du Roy, armé de toutes pieces vn chapeau sur la teste, monté sur vn courfier richement couuert de veloux bleu & rouge par bendes : & dessus aucunes desdictes bendes estoient attachées grâdes feuilles d'argent dorées, & sur les autres d'argent blanc : & les harnois de ses cheuaux pareils à ladicte couuerture, & auoit à son col vne escharpe de fin or pendant iusques à la croupe de son cheual. Avec ledit sire de Culant derriere le Roy estoit vn escuyer nommé Rogerin Blosset escuyer d'escuyerie du Roy, lequel portoit l'estandart du Roy, qui estoit de satin vermeil cramoisy à vn S. Michel dedans ledit estandart, & estoit semé tout au long de fueillettes d'or. Avec ce, derriere le Roy estoit Iean de Scaeanuille dit Hauart Baillif de Dreux varlet trenchant du Roy, lequel portoit le panon qui estoit de veloux azuré à trois fleurs de lis d'or de brodure. Et estoient lesdictes fleurs de lis bordées de grosses perles. En ladicte compaignie estoient plusieurs seigneurs : c'est à sçauoir le vicomte de Louuaigne, le Comte de Castres, Ferry mōseigneur de Lorraine, Iean monsieur son frere, le seigneur d'Orual, le Comte de Tanquaruille, le seigneur de Montgascon fils du Comte de Boulongne & d'Auuergne, le seigneur de Ialongnes Marechal de France, le seigneur de Beauuau & plusieurs autres grans seigneurs cheualiers & escuyers, lesquels estoient tous armez au blanc & leurs cheuaux couuers de veloux ou de drap de soye, & sur chacun cheual la croix blâche. Et ainsi en l'ordonnance & par la maniere que dit est cheuaucha le Roy iusques à vn traict d'arc pres de la porte Beauuoisine du costé des Chartreux, & là vint au deuant de luy le Comte de Dunois son lieutenant general, mōté sur vn destrier couuert de veloux vermeil, vestu d'une iaquette de veloux vermeil fourrée de martres, & auoit ceinte vne moult belle espée garnie de pierres, de dyamans, rubis & balais, prisée à quinze mil escus. Estoit aussi le Seneschal de Poictou & Iaques Cueur argentier du Roy montez sur destriers vestus & couuers comme ledit Lieutenant. Aussi y estoient le Baillif d'Eureux & maistre Guillaume Cousinot : ledit Baillif d'Eureux estoit monté sur vn courfier couuert de veloux vermeil, vestu d'une iaquette de pareil drap. Et ledit Cousinot de nouuel institué Baillif de Roüen estoit vestu de veloux bleu à grans affiches d'argent doré, & son cheual enharnaché de ce mesmes. Et amena ledit Lieutenant deuers le Roy pour luy faire la reuerence & obeissance les Archeuesque de la ville de Roüen, l'Euesque de Lisieux, de Bayeux, de Constances avec les citoyens de sa bonne ville & cité de Roüen. Et incontinent que lesdits Prelats eurent fait leur deuoir ainsi que tenuz y estoient, ils s'en retournerent dedans ladicte cité & laisserent lesdits citoyens qui estoient en grand nombre, tous vestuz de bleu & chappes rouges avec ledit Lieutenant, lequel les presenta au Roy. Et apres humble reuerence par eux faicte & les clefs de ladicte ville & cité baillées en la main du Roy comme leur souuerain seigneur : aussi apres plusieurs choses par eux proferées en beaux termes & doux langaiges, il les receut tresbenignement & bailla icelles clefs audit Seneschal qui lors fut institué capitaine d'icelle cité : & adonc le Roy & sa compaignie commencerent à cheuaucher, pour entrer dedans ladicte ville en l'ordonnance qu'ils estoient sur les champs & comme cy dessus est declairé. Et là au mouuement du Roy vindrent en procession au deuant

uant de luy les Prelats en habits pontificaux, & toutes autres gens d'Eglise tant reguliers comme seculiers en chappes, portans ioyaux & reliques, & mesme-
ment les quatre ordres mendians tous chantans, *Te Deum laudamus*, pour le
ioueux aduenement du Roy de France leur souuerain seigneur. Et se meirent
deuant le Chancelier de France & ledit seigneur de la Fayette Marechal de
France, le seigneur de Gaucourt premier Chambellan du Roy, le seigneur de
Preseigny, & Iaques Cueur argentier du Roy, qui tous auoient leurs cheuaux
couuers de veloux ou de satin, & iaquettes pareilles à croix blanches: & deuant
le Roy se meit sondit lieutenant Comte de Dunois empres l'escuyer d'escuye-
rie. Et est chose certaine qu'il n'est point en memoire d'hōme qu'oncques hom-
me veit Roy auoir pour vne fois si belle cheualerie ne si richement habillée, ne
si grand nombre de gens de guerre comme le Roy auoit illec à la recouurance
de ladicte cité. A l'entrée de ladicte ville fut fait cheualier par ledit Seneschal de
Poictou vn ieune enfant aagé de douze à treize ans ou enuiron, fils du sire de
Preseigny. Et y auoit à la porte du bouleuert quatre bourgeois des plus nota-
bles de la ville qui tenoient vn ciel tresbel & tresriche, lequel ils porterent sur
la teste du Roy iusques à l'Eglise de nostre dame de Roüen. Cedit bouleuert, la
porte & l'entrée du Roy & ses gens d'armes au milieu, & toutes les rues par où
il passoit couuertes à ciel & garnies de peuple criant Noël pour son ioyeux ad-
uenement. Par les quarrefours estoient personnages, c'est à sçauoir en vne pla-
ce vne fontaine des armes de la ville qui sont *Agnus Dei*, iettant breuuages par
ses cornets. Ailleurs estoit vn Tygre & les petits qui se miroient en miroirs: &
au plus pres de Nostre Dame estoit vn cerf volant moult bien & sumptueuse-
ment fait, à son col vne couronne, lequel s'agenouilla par mystere deuant le Roy
quand il passa par là pour aller en ladicte Eglise. Là endroit estoient à vne fene-
stre ledit Côte de Dunois pour veoir le mystere avec le sire de Thallebot & les
autres Anglois hostages moult pensifs & marris en cueur, & comme ceux aus-
quels la chose ne plaisoit gueres. Le Roy venu deuant Nostre Dame il descen-
dist à pied où fut receu par l'Archeuesque & tous ceux du college richement
reuestuz en chappes, & entra dedans ladicte Eglise où il fut en son oratoire en
prieres & en oraisons par certain espace de temps. Puis s'en alla en l'hostel dudit
Archeuesque où il fut logé. Et ainsi se partit vn chacun & s'en alla à son logis.
Ceux de la ville de grand ioye qu'ils auoient feirent les feux par toute la cité. Et
le lendemain feirent les processions generales & solennelles où fut ledit Arche-
uesque, & garderent la iournée de toutes œures terriennes comme le dimen-
che. Pareillement le mercredy & le ieudy ensuiuant estoient les tables mises
parmy les rues & y auoit vins & viandes en grand abondance pour tous venās,
& tout aux despens des habitans d'icelle ville. Lesquels feirent avec ce plusieurs
grans dons au Roy, ses officiers, ses heraux & poursuiuans qui là estoient: de-
puis, le Roy estant en l'hostel dudit Archeuesque, les gens d'Eglise, bourgeois,
manans & habitans luy requirent estre ouïs en certaines requestes qu'ils luy
vouloient faire, ce qui leur fut accordé: & ils entrerent en la salle où le Roy e-
stait assis en sa chayere richement aornée, parée de drap d'or, ceux de son con-
seil avec luy: & là proposerent plusieurs choses: & entre les autres, luy remon-
strerent en suppliant treshumblement, qu'il les vouldist auoir en sa bonne grace

& qu'il ne laissast point à poursuiuir & à faire guerre à ses anciens ennemis les Anglois: car par le moyen des villes qu'ils tenoient encores en Normandie ils pourroient encores faire plusieurs enormes maux au païs. Et à ce faire comme bons vrais & loyaux subiets luy offrirent ayde de corps & de cheuance: de laquelle proposition, promesse & octroy le Roy fut trescontent & leur fait faire responce par son Chancelier telle que sur tous les points par eux proposez ils eurent icelle responce bien agreable, & ainsi prindrent congé & s'en allerent chacun en son lieu: depuis se tint le Roy audit lieu de Rouën pour mettre police & officiers de par luy à gouverner icelle ville. Et ce pendant aussi, rendirent les Anglois & meirent en la main & obeissance du Roy (comme promis auoient & baillé hostages pour ce faire) le chasteau d'Arques, Tanquarville l'Isle bonne, Monstervillier & Caudebec. Et combien qu'ils eussent promis pareillemēt de la ville de Honnefleur, neantmoins elle ne fut point rendue, pource que le capitaine dudit lieu ne les gens de guerre ne voulurent obeir en ce audit Duc de Sombresset. Pourquoy le sire de Thallebot & autres hostages demourerent prisonniers du Roy de France. Et fut commis & ordonné messire Pierre de Bresé qui estoit Seneschal de Poictou capitaine dudit Rouën.

Comment le chastel de Gaillard fut mis en l'obeissance du Roy: comment ceux de Fougieres se rendirent au Duc de Bretagne, & Belesme au Duc d'Alencon: puis parle d'une rencontre d'Anglois & Francois où fut fort combattu.

LE xxiiij. iour de Nouembre ensuiuant se rendit en l'obeissance du Roy le chasteau de Gaillard qui est place imprenable, comme dit est: deuant lequel fut le siege par l'espace de six septmaines & se redirent les Anglois estans dedans iusques au nombre de cent à six vingts, par telle composition qu'ils s'en deuoient aller leurs corps & leurs biens saufs à Harfleur où ailleurs en leur party où bon leur sembloit. En ce mesmes temps print le Duc de Bretagne la ville & chasteau de Fougieres où il auoit tenu le siege par l'espace d'un mois ou enuiron. Pendant lequel temps il fait faire telles approches & tellement battre la muraille de canons & de bombardes, que ladicte ville estoit prestē d'affaillir. Et lors voyans les Anglois le danger où ils estoient, & qu'ils auoient peu de viures: veu aussi qu'ils estoient de cinq à six cens, desquels estoit capitaine ledit messire Francois de Surienne dit l'Arragonnois, ils se rendirent par composition, par laquelle ils s'en allerent leurs cheuaux & harnois saufs, & chacun portant vn petit fardet deuant soy seulement. Et depuis se conuertit ledit messire Francois & demoura en l'obeissance du Roy de France: nonobstāt qu'il auoit prins ladicte ville de Fougieres sur ledit Duc de Bretagne, & qu'à ceste occasion & par luy furent rompues les trefues d'entre les Roys de France & d'Angleterre comme dit est. Ledit Duc de Bretagne auoit lors en sa compagnie huit mille combattans, seigneurs, cheualiers & escuyers: lesquels apres ladicte prinse s'en retournerent tous en leurs maisons pour la mortalité qui estoit frappée en l'ost dudit Duc, auquel mourut grand nombre de gens, & entre les autres mourut le fils du Comte de Rohan, qui fut vn grand dommage. Et pource s'en retourna ledit Duc en son païs: apres qu'il eut laissé bonne garnison es places par luy conquestées. En ce mesme temps enuiron la fin de Nouembre

bre meit le Duc d'Allençon le siege deuant la ville & chasteau de Belesme à luy appartenant, occupée par les Anglois contre raison & sa volenté, & estoient en sa compaignie cheualiers & escuyers iusques au nombre de trois cens lances & les archiers, sans en ce comprendre plusieurs gens de deffence de ses païs de la Comté du Maine & de Vendosme, qui estoient estimez en somme trois mil combattans : & apres plusieurs escarmouches & faillies faictes les vns sur les autres, lesdits Anglois voyans eux auoir pou de puissance à resister contre iceluy Duc, commencerent à parlementer, & tantost apres se composerent & promeirent d'eux rendre le vingtiesme iour dudit mois de Decembre, ou cas que ledit iour ne seroient secourus des gens de leur party, & qu'ils ne seroient les plus fors en champ de bataille. Pourquoy le Duc & les siens se fortifierent en vn champ pour attendre la puissance des Anglois, lesquels estoient en chemin, cuidans venir leuer ledit siege, & furent deux mille Anglois iusques à Torigny où ils bouterent le feu, & de là vindrent à Thury : ouquel lieu où ils eurent certaines nouuelles de la puissance & ordonnance dudit Duc d'Allençon. Pourquoy ils s'en retournerent en leurs places. Et ainsi cedit iour le xx. dudit mois le siege estant ia à Harfleur, les Anglois estans dedans ledit Belesme iusques au nombre de deux cens combattans, dont estoit capitaine vn nommé Matago, rendirent ladicte place audit Duc, & s'en allerent par compositiō leurs corps & leurs biens saufs en leur party où bon leur sembla : ledit Duc d'Allençon teint la iournée luy & le sire de S. Treille à pou de gens pour attēdre la puissance des Anglois iusques à ce que l'heure ordonnée fust passée. Oudit an enuiron le Noel les Anglois de la garnison de Vire iusques au nombre de douze vingts estoient allez courre à leur aduenture, & furent rencontrez pres de la croix de Vamoux par aucuns des gens du Connestable, qui estoient en garnison à Gourey. C'est à sçauoir par messire Geoffroy de Couvran, par Ioachin Rouhault & autres, & là fut fort combattu : mais en fin furent les Anglois desconfits, les vns mors, les autres prins & pou s'en eschapperent.

Comment le Roy se partit de Roüen. Comment il enuoya son lieutenant general mettre le siege deuant Harfleur : comment la ville luy fut rendue par composition : puis parle de la belle Agnes, de sa maladie, de son trespassement & des ordonnances qu'elle feit.

Entost apres se partit le Roy de sa cité de Roüen armé d'une brigandine, & par dessus d'une iaquette de drap d'or, accompagné dudit Roy de Cecille & des autres de son sang en grans habillemens & riches : & par especial ledit Côte de S. Pol qui auoit vn chanfrain à son cheual prisé trente mille escus : & cheuaucha le Roy ainsi accompagné iusques en la ville de Caudebec où il fut conclud d'aller mettre le siege à Harfleur : si se prepara d'aller à Monstier-villier qui est à demie lieuë pres : & enuoya mettre ledit siege par son Lieutenant general le Comte de Dunois & par les Comtes d'Eu & de Clermont, de Neuers & de Castres & plusieurs autres cheualiers, escuyers, capitaines, gens d'armes & de traict tant de Franks-archiers que d'autres : la compaignie estimée à six mil combattans, & les Franks-archiers à trois mil sans en ce comprendre canonniers, marchans, man-ouuriers, gens de me-

stier & mariniers & sans les gens de guerre qui gardoient la mer en xxv. gros vaisseaux, & sans ceux qui tenoient le siege aucunesfois en l'abbaye de Grauille, estans tant de gens d'armes que archiers iusques au nombre de mil, & y fut mis ledit siege le lundy huictiesme iour de Decembre. Lequel fut moult desagreable à mettre, pource qu'il n'y auoit nulles maisons pres, ne bois, ne arbres: & si faisoit vn tresgrand froid de gellées & de glaces, & plus grans que puis long temps il n'auoit fait aussi grand, especiallement de grandes pluies qui estoient bien contraires à ceux du siege: aussi eurent plusieurs beaucoup à souffrir pour la mer qui fourdoit & venoit souuent en plusieurs logis, pource qu'ils estoient tous en terre couuers seulement de paille & de genestres. Deuant ladicte ville furent assortis seize grosses bombardes, lesquelles le Roy qui estoit logé à Monstier-villier veint faire ietter: & auoit grandes tranchées & profondes pour aller plus seurement, & s'abandonna fort le Roy à venir veoir battre la muraille de ladicte ville, & fut en personne és fossez & és mines armé, sa salade sur sa teste & son pauois en sa main. Et pouoit on bien aller par ces mines faictes iusques aux murs de Harfleur: desquels canons & mines estoit gouuerneur maistre Iean Bureau Tresorier de France, homme moult subtil & ingenieux en telles matieres & en plusieurs autres. Avec luy aussi estoit Iaspert Bureau son frere qui estoit maistre de l'artillerie du Roy. Ce voyant Thomas Aurmagan capitaine de ladicte ville de Harfleur & d'autres Anglois qui avecqs luy iusques au nombre de seize cens prenans gages, & voyans la puissance du Roy le xxiiij. dudit mois de Decembre veille de Noel ils commencerent à parlementer avecques le Comte de Dunois Lieutenant general du Roy, & traicterent la matiere cedit iour pour eux rendre. Et le lendemain iour de Noel furent concluds icelle rendre és mains du Roy: par ainsi qu'ils s'en deuoient aller où bon leur sembleroit en leur party. Et pouoient emporter tous leurs biens par eaue ou par terre: & pour ce faire eurent terme prefix iusques au premier iour de l'an. Et du party des Anglois furent baillez huiet hostages gentils-hommes affin d'entretenir ledit appoinctement, lesquels furent menez en garde à Monstier-villier. Le premier iour de Ianuier furent lesdits Anglois menez audit lieu de Harfleur pour fournir l'appoinctement tel que dit est. Ce iour enuiron heure de vespres ledit Thomas Aurmagan Anglois & capitaine dudit lieu, bailla les clefs de ladicte ville & des tours audit Comte de Dunois lieutenant general du Roy en soy agenouillant & en grand reuerence, en la presence de tous les autres Anglois, & mesmement en la presence d'un nommé maistre Sanice qui auoit amené audit lieu cinq cens Anglois tous nouveaux au parauant dudit siege. Apres les receptions desquelles clefs fut enuoyé par ledit Lieutenant de ses gens dedans les deux tours du Haure, & fait oster la banniere desdits Anglois qui estoit sur l'une d'icelle à champ blanc & vne croix rouge parmy: & apres par deux heraux fut mise sus l'une d'icelles tours la banniere du Roy de France: en laquelle mettant y auoit grand crierie & resiouissement de peuple: & aussi furent garnies des gens dudit lieutenant, les tours de deuers Roüen, & cedit iour se partit la plus grand partie d'iceux Anglois par bateaux. Et pource qu'ils ne peurent tous estre prests pour la mer qui se retrahit: ledit Lieutenant, ouie l'humble supplication d'iceux, les permist demorer

mourer le vendredy & samedy iusques à midy, & leur bailla garde affin qu'il ne leur fust en riens meffait. Et apres le departement d'iceux le Roy donna la capitainerie dudit Harfleur à sondit lieutenant, lequel y commist pour luy le seigneur de Moÿ à tout cent lances & les archiers pour la garde d'icelle ville, pour plusgrand seureté du paÿs: aussi fut ordonné capitaine de Monstier-villier, & garde d'aucunes autres forteresses, Iaques de Clermont escuyer, auquel fut pareillement ordonné cent lances & les archiers. Et ainsi se departit le Roy de Monstier-villier apres ses ordonnances faictes le cinquiesme iour de Ianuier. Et passer fait tantost apres toute sa compaignie: les vns par Roüen, & les autres par Caudebec, & les aucuns aussi par Tanquarville pour aller mettre le siege deuant Honnefleür: & se retrahit en vne abbaye sur la riuere de Seine nommée Iumieges, qui est à cinq lieuës au dessoubs de Roüen: & là se raffreschit vne espace de temps, pendant qu'on faisoit les ordonnances & les preparatoires pour aller mettre le siege audit lieu de Honnefleür. En icelle abbaye, trouua le Roy vne damoyelle nommée la belle Agnes, qui estoit venue (comme elle disoit) pour aduertir le Roy & luy dire que aucuns de ses gens le vouloient trahir & liurer és mains de ses anciens ennemis Anglois, dequoy le Roy ne teint gueres de compte & ne s'en fait que rire. Et pource que ladicte Agnes auoit esté ou seruice de la Royne par l'espace de cinq ans ou enuiron, ouquel elle auoit eu toutes plaissances mondaines, comme de porter grans & excessifs atours, de robes fourrées, de coliers d'or & de pierres precieuses & tous ses autres desirs: & que le Roy la veoit volentiers, il fut commune renommée que le Roy la maintenoit en concubinaige: car le peuple est plus enclin à mal dire que bien. Aussi l'amour que le Roy luy monstroït, estoit pour les folies, esbattemens, ioyeusetez & langaige bien poly qui estoient en elle: & aussi qu'entre les belles elle estoit tenue pour la plus belle du monde, & fut appelée damoyelle de Beaulté, tant pour celle cause, comme pource que le Roy luy auoit donné à sa vie la maison de Beaulté de lez Paris. Et si estoit icelle Agnes de vie moult charitable, & large en aumosnes & distribuoit du sien largement aux pources Eglises & aux mendians. Bien est vray que ladicte Agnes eut vne fille qui ne vesquit gueres, laquelle elle disoit estre au Roy, & la luy donna comme au plus apparent: mais le Roy s'en est tousiours excusé, & n'y clama oncques riens: elle le pouoit bien auoir emprunté ailleurs, plusieurs en parlerent diuersement. Et finablement luy print le flux de ventre, dont elle fut malade par longue espace de temps: durant laquelle maladie elle eut moult belle contrition, & repentance de ses pechez. Et luy souuenoit souuent de marie Magdaleine qui fut grand pechereffe ou peché de la chair, & inuoquoit Dieu deuotement & la vierge Marie à son ayde. Et comme vraye Catholicque apres la reception de ses Sacremens, demanda ses heures pour dire les vers S. Bernard qu'elle auoit escript de sa propre main. Et depuis fait plusieurs veux, lesquels furent mis par escript, affin de les accomplir par ses executeurs avec son testament, qui se pouoit bien monter tant pour aumosnes que pour payer ses seruiteurs la somme de soixante mil escus: & fait ses executeurs de Iaques cueur Conseillier & argentier du Roy, de maistre Robert Poicteuin Physicien & maistre Estienne Cheualier Tresorier du Roy: & ordonna que le Roy seul & pour le tout fust

dessus les trois. Et depuis ladicte Agnes voyant & sçachant sa maladie rengreuer de plus en plus dit au seigneur de Tanquarville, la Seneschalle de Poictou, à l'un des escuyers du Roy nommé Gouffier, & à toutes ses damoiselles que c'estoit pou de chose, orde & puante de nostre fragilité. Et adonc requist son confesseur qu'il la voulsist absouldre de peine & de coulpe par vertu d'une absolution, laquelle estoit à Loches (comme elle disoit) ce que ledit confesseur à sa relation feit. Et apres qu'elle eut fait un hault cry en reclamant Dieu & la benoïste vierge Marie, se separa son ame d'avec le corps le lundy neufiesme iour de Feurier lan mil cccc. xlix. environ six heures apres midy. Et puis fut ouuerte & son cueur mis en terre en ladicte abbaye: à laquelle elle feit de grans dons, & le corps fut mené & ensepulturé à Loches honorablement en l'Eglise collegial de nostre Dame, où elle à fait plusieurs belles fondations & dotations. Dieu luy face mercy à l'ame & la mettre en paradis.

Comment le Comte de Foix feit vne grosse armée, & feit mettre le siege deuant le chastel de Guisquen: & comment les Anglois se meirent ensemble pour leuer ledit siege: & comment ils furent desconfits par le sire de Lautrec & le bastard de Foix.

EN ce mesmes temps le Comte de Foix feit vne grosse armée & assemblée de gens, & feit mettre le siege par le sire de Lautrec son frere, & par le bastard de Foix deuant le chasteau de Guisquen, qui est trefort, assis à quatre lieuës de Bayonne: & quand les Anglois le sceurēt ils se meirent sur les champs iusques à quatre mil combattans, dont estoit chief le Connestable de Nauarre: & avec luy estoient le Maire de Bayonne, George Saltuiton, & plusieurs autres Anglois, lesquels se bouterent & chargerent vaisseaux sur vne riuere qui passe parmy Bayonne, & vindrent descendre pres dudit chasteau. Laquelle descente venue à la cognoissance de ceux qui tenoient ledit siege, ils se partirent le plus secrettement qu'ils peurent, & allerent au deuant desdits Anglois: & les assaillirent si durement & si asprement, qu'ils les descōfirent & meirēt en fuite iusques à leursdits bateaux. Et y furent que morts que prins à icelle chasse douze cens Anglois: & quand ledit Saltuiton veit icelle destrouffe doubtant qu'il ne peust recouurer lesdits nauires, il passa parmy le siege à tout soixante lances & se sauua tref-vaillamment pour icelle heure dedans le boulleuert dudit chasteau: puis regarda que leans il ne pouoit estre bonement secouru: si se partirent deuant luy & sa compagnie cuidans retourner audit lieu de Bayonne, mais ledit Bastard de Foix sçachant aucunement son partement le poursuiuit, & l'atteinnt, & tellement que ledit Saltuiton fut prins & la pluspart de ses gens. Et le lendemain se rendit ledit chasteau, & tous les pays entre Aux & Bayonne, ouquel pays estoient quinze ou seize places fortes qui toutes se rendirent audit Comte de Foix. Et apres garnisons souffisantes mises esdictes places s'en retournerēt les gens dudit Comte de Foix en leurs pays. Le dixseptiesme iour de Ianuier oudit an fut le siege mis à Honnefleu, le Roy estant à Iumieges, par le Comte de Dunois son Lieutenant general & autres seigneurs dessus nommez, qui se gouernerent moult vaillamment & cheualeusement: & mesmement les francs-archiers qui auoient esté logez pres dudit Honnefleu par l'espace de dix ou de douze iours auant que la seigneurie y vint

y vint pour escarmoucher sur iceux Anglois. Et apres que le siege y eut esté fermé, se partit le Roy dudit Iumieges, & alla loger en vne abbaye nommée Gretain à deux lieuës pres dudit Honnefleur. Et lors ceux qui estoient audit siege feirent grans approches, fossez & mines, & assortirent bombardes, canõs & engins vollans qui moult esbahirent ceux de ladicte place, dont estoit capitaine vn nommé maistre Courson qui auoit en sa compaignie de trois à quatre cens Anglois, lesquels faisoient grand deuoir d'eux deffendre & de tirer canons & autres traicts sur les François: desquels François fut tué vn escuyer nommé Regnault Guillaume de Bourgongnon, qui lors estoit Baillif de Montargis dõt ce fut dommage: car il estoit vaillant homme de son corps. Et apres furent tellement oppressez lesdits Anglois que paour, & necessité les contraignit d'eux rendre & prendre appoinctement, pourquoy fut faicte composition qu'ils rendirent ladicte place le dixhuietiesme iour de Feurier ensuiuant ou cas qu'ils ne seroient combattus: & de ce baillerent hostaiges, par ainsi qu'ils s'en yroient leurs corps & leurs biens saufs. Et pour combattre audit iour feirent les François grans diligences de ordonner & clorre le champ où ils estoient: mais lesdits Anglois n'y vindrent point ne comparurent aucunement: car le Duc de Sombreffet n'osoit desemparer la ville de Caen, & aussi n'estoient pas assez fors sans auoir autre secours d'Angleterre. Et ainsi rendirent ladicte place audit iour & s'en allerent en Angleterre où ailleurs en leur party, avec leursdits biens comme promis leur estoit. Tantost apres, que Honnefleur fut reduict, se partit le Roy de ladicte abbaye de Gretain, & s'en alla à Berucy, & de là à Essey, & à Allençon, & enuoya aucuns de sa suite, & mesmement les Franks-archiers pour mettre le siege deuant Fresney: duquel estoient capitaines & gouuerneurs deux Anglois, l'un nommé Andrieu Torfflot, & Ianequin Vaquier: lesquels auoient leur compaignie de quatre à cinq cens Anglois & Normans, appelez François reniez, & cheuanchoient lesdits François en moult belle ordonnance & en grand nombre: parquoy incontinent eux venus deuant ladicte place, lesdits Anglois commencerent à traicter pour la reddition d'icelle, & apres plusieurs parolles finablement fut appoincté qu'en rendant ladicte ville en l'obeissance du Roy de France & en baillant dix mille Salus on leur deliureroit à pur & à plain leur capitaine nommé Montfort, qui auoit esté prins au Pontheau de mer, & s'en yroient leurs corps & leurs biens saufs. Et ainsi fut fait & se partirent le vingt-deuxiesme iour de Mars pour eux en aller à Caen ou à Fallaise, ou ailleurs où bon leur sembleroit. Oudit an en la saison de Karesme descendirent à Chierbourg trois mil Anglois, qui venoient du païs d'Angleterre dont estoit chief & conduiseur vn cheualier de grand renom nommé messire Thomas Kiriell: lequel & sa compaignée cheuaucherent tant qu'ils vindrent loger és faulxbourgs de Valongnes, où ils meirent le siege, & en estoit garde & capitaine pour le Roy vn escuyer de Poictou nommé Abel Rohault, lequel le teint vaillamment & longuement ou nom de son frere Ioachin Rohault, sans estre aucunement secouru: parquoy il luy conuint rendre ladicte place audit Kiriell, apres qu'il l'eut tenuë trois sepmaines: & se partit par composition faicte ledit capitaine & ses gens leurs corps, cheuaux & autres biens saufs. Combien que les gens du Roy s'estoient assemblez pour venir leuer ledit siege, & aussi estoient les

Anglois de leurs garnisons pour tenir les champs: c'est à sçauoir messire Robert Ver de la ville de Caen à tout six cens cōbattans, Matago de la ville de Bayeux, à tout huit cens combattans, Henry Morbery de la ville de Vire à tout quatre cens combattans ou enuiron, & estoient nombrez tous de six à sept mil combattans compris ledit Kiriell & sa compaignie. Et ce voyans lesdits François laisserent rendre ladicte ville: car ils ne peurent point estre prests à temps, pour secourir icelle ville: mesmement veu & considéré que l'armée du Roy n'estoit point ensemble, mais estoit en diuerses parties pour plus diligemment recouurer ladicte Duché de Normandie.

Comment apres ce que messire Thomas Kiriell eut prins Vallongnes sur les François, se meit aux champs à grand compaignie d'Anglois: le Comte de Clermont aussi se meit aux champs à tout ses gens & ruerent ius lesdits Anglois.

1450.

L'An mil quatre cens cinquante le xij. iour du mois d'Auril apres Pasques se deslogerent de deuant la ville de Vallongnes ledit Kiriell & ses gens avec ceux des garnisons de Caen, de Bayeux & de Vire, & passerent tous ensemble les guez saint Clement pour tirer vers Bayeux & vers Caen: laquelle chose venue à la cognoissance des gens du Roy de France, qui s'estoient mis sur les champs pour les trouuer les poursuuiurent combien qu'ils fussent en petit nombre: & cheuaucherent fort tant qu'en la fin les attaignirent, & fut commis de par le Roy à faire ceste poursuite le Comte de Clermont, avecques lequel estoit le Comte de Castres, le Seneschal de Poictou, les seigneurs de Montgascon & de Raiz Admiral de France, & plusieurs autres iusques au nombre de cinq à six cens lances & les archiers: de laquelle compaignie se separerēt messire Geoffroy de Couvran & Ioachin Rouhault pour querir de tous costez leur aduantage sur lesdits Anglois, & tant cheuaucherent qu'ils trouuerent leur trac: & combien qu'ils eussent pou gens avec eux, neantmoins ils allerent baudement & vaillamment ferir sur leur arrieregarde & en tuerent & naurerent plusieurs: puis se retrahirent vn pou, & manderent ledit Comte de Clermont qui n'estoit pas loing: lequel feit grand diligence de tirer apres lesdits Anglois, & les consuiuit en vn champ pres d'un village nommé Fourmigny, entre Carentan & Bayeux le dixhuitiesme iour dudit mois. Et quand lesdits Anglois les apperceurent ils se meirent en bataille, & manderent diligemment querir vn capitaine nommé Matago: lequel cedit iour s'estoit party d'avec eux pour aller à Bayeux, & incontinent retourna en l'aide de ses compaignons: là furent François & Anglois les vns deuant les autres par l'espace de trois heures tousiours en escarmouchant. Et ce pendant feirent iceux Anglois grans trous & fossez en terre de dagues, d'espées deuant eux, affin que ceux qui les assauldroient peussent tomber eux & leurs cheuaux, & s'estoient lesdits Anglois fort mis à l'aduantage: car ils auoient derriere eux enuiron vn traict d'arc vne petite riuere & grand foison de iardinages plains de pommiers, poiriers, pruniers & autres diuers arbres, affin qu'on ne leur peust courir sus par derriere. Et pource que ledit Comte de Clermont auoit pou gens avecques luy, il enuoya hastiuement à saint Lo, deuers le Comte de Richemont Connestable de France

ce affin qu'il veint à son secours ou autrement luy & ses gens estoient bien taillez d'auoir fort à faire, veu que lesdits Anglois excedoient en nombre de gens de guerre par dessus lesdits François. Et tantost venu à sa cognoissance il se partit incontinent ce xviiij. iour d'Auril enuiron trois heures du matin pour secourir la besongne, combien qu'il venoit de Bretaigne tout de tire. Et cheuaucha iusques au lieu de Treuieres, accompagné de monseigneur Iaques de Luxembourg, du Comte de Laual, du sire de Loheac Mareschal au nōbre de deux cens à douze vingts lances, & huiet cens archiers: lesquels cheuaucherent trefdiligemment (car lesdits Anglois auoient ja passé les guetz) & tant qu'ils vindrent iusques à vn moulin à vent au dessus dudit Fourmigny, où ils se meirent en bataille à la veüe desdits Anglois. Et estoient descendus à pied des gens du Comte de Clermont deuant la venue dudit Conestable de mil à cinq cens archiers: lesquels furent reboutez bien asprement par lesdits Anglois & auoient gagné deux couleurines sur les François: & alors le Conestable fait marcher aucuns de ses gens à vn pont de pierre: & lors incontinent que les Anglois aperceurent la venue dudit Conestable, Matago, maistre Ver & bien mille Anglois en leur compagnie s'en firent à Caen & à Bayeux. Et ledit Kiriell & la bataille qui là estoient se retirerent pour gagner vn ruisseau & le village qui assez pres estoient d'eux. Et au bout dudit pont descendirent à pied partie des archiers du Conestable, & combattirent l'esle d'embas de la bataille desdits Anglois, où il en y eut plusieurs de morts & desconfits: & passa ledit Conestable ledit ruisseau, & se ioignit avecques ledit Comte de Clermont. Et incontinent le grand Seneschal de Normandie demanda congé audit Conestable de faire descendre son enseigne à l'esle d'amont, ce que ledit Conestable luy accorda, en laquelle esle ils combattirent fort, & y furēt lesdits Anglois morts & desconfits. Et tantost marcherent les gens du Conestable en belle ordonnance tant qu'ils furent pres dudit village, où ils passerent ladicte riuere sur le grand chemin. Et lors lesdits Anglois doubterent si fort qu'il laisserent le chāp & se reculerent sur ladicte riuere, & là furent assaillis des François & fut vaillamment combattu d'une part & d'autre. Et combien que lesdicts François ne fussent en tout par le rapport des heraulx que trois mil combattans, & lesdits Anglois estoient de six à sept mil: neātmoins par la grace de Dieu les François desconfirent lesdits Anglois: desquels par le rapport des heraulx, des prestres, & des bonnes gens qui là estoient, furent morts & enterrez en la place en quatorze fosses trois mille sept cens lxxiiij. Et y furent prins prisonniers messire Anthoine Kiriell, messire Henry Norbery, messire Thomas Drieut, messire Thomas Kirqueby, Christofle Auberton, Arpel, Helix Alengour, Iennequin Vacquier, Gobert Caleuille & plusieurs autres capitaines & gentils-hommes Anglois, portans cottes d'armes. Et en cōfermant audit vulgaire qui dit, que mieux vaut vne bonne fuitte qu'une mauuaise attente, les vns s'en firent & abandonnant leurs compaignōs, c'est à sçauoir ledit Matago, messire Robert Ver, Henry Lons, maistre Mellian & vn autre capitaine qui auoit charge de trente lances & cinq cens archiers. Et furent estimez les prisonniers Anglois prins en la bataille de douze à quatorze cens. Et s'en alla ledit Matago à Bayeux & ledit messire Robert à Caen. Et ainsi par la vertu diuine furent les Anglois desconf-

fits. Ce iour furēt faits cheualiers le Comte de Castres fils du Comte de la Marche, Godefroy de Boulongne fils du Comte de Boulongne & d'Auuergne, le sire de Vauuert fils du Comte de Villars, le sire de S. Seuer, le sire de Chalenton & plusieurs autres. Et ladicte iournée du party des François ne mourut au plus que huit personnes seulement: & ainsi se departirent l'ost des François, & s'en allerent tous ensemble mettre le siege deuant Vire. Apres lequel departement s'esmeut altercation entre aucunes gens de guerre, disans les vns que la louenge de la iournée deuoit estre attribuée audit Connestable, comme lieutenant du Roy par tout le royaume de France. Les autres disoient l'honneur deuoit estre audit Comte de Clermont, comme commis & lieutenant à faire celle poursuite, & disoient l'especialité deuoit desroguier à la generalité. Ceste matiere discutée pour les deux parties par plusieurs seigneurs & mesmement du consentement du Roy fut relaté & iugé que ledit Comte de Clermont deuoit emporter l'honneur, combien que par le moyen dudit Connestable la chose prospera en bien. Ceste gracieuse iournée fut tantost diuulguée par tout le Royaume de France: & par especial vint à la cognoissance de reuerend pere en dieu maistre Guillaume Chartier Euesque de Paris: lequel pour remercier Dieu, qui de sa grace auoit voulu ladicte victoire estre obtenue pour le treschrestien Roy de France à l'encōtre de ses anciens ennemis (en consonnāt au dit du Psalmiste où il dit. *Ex ore infantium & lactantium perfecisti laudem*) ordōna vne procession en l'Eglise nostre Dame de Paris: & n'y auoit en icelle que tous enfans allans à l'escolle depuis l'aage de sept ans iusques à l'aage de xj. ans, tant enfans masles que femelles: & mesmement enfans mandians des quatre ordres de Paris, avec tous les maistres d'iceux enfans: & estoit estimée ladicte congregation de douze à quatorze mil enfans de l'aage dessusdicte: Lesquels se partirent de l'Eglise S. Innocent où la congregation auoit esté faicte: & portoit chacun vn cierge ou autre luminaire allumé en sa main: & avecques eux estoient les chappellains de S. Innocent, qui portoient vn reliquaire appelé l'Innocent. Et duroit ladicte procession depuis ladicte Eglise de S. Innocent iusques à l'Eglise de nostre Dame, qui estoit moult belle chose à veoir & moult grand honneur pour ledit Euesque. Apres que ladicte compagnie fut arriuée à ladicte Eglise, fut chantée vne messe solēnelle: & icelle chātée s'en retournerent deux & deux cōme ils estoient allez pour reconuoyer ledit reliquaire iusques à ladicte Eglise de S. Innocent: & de là se partirent & s'en allerent chacun en son escolle. En ce tēps se partit le Comte de Suffort d'un fort chastel, où il estoit pour la doubte des Anglois qui le vouloient faire mourir, & se meit en mer pour eiter la mort. Mais luy estant en la mer fut rencontré des gens du Côte de Sombresset: lesquels le prindrent & luy coupperent la teste, puis l'enuoierent à tout le corps à ceux de Londres, qui le pendirent par quartiers à leurs portes. Tantost apres la desconfiture dessusdicte & sans interualle alla toute la compagnie mettre le siege deuant la ville de Vire: En laquelle estoient en garnison de trois à quatre cens Anglois bons combattans, desquels estoit capitaine messire Henry Norbery lors prisonnier de la iournée dudit Fourmigny. Et ne fut ledit siege pas longuement deuant ladicte ville, que ledit capitaine ne la fait rendre par composition, telle que ceux qui estoient dedās s'en allerent à Caen leurs biens saufs, & ainsi

& ainsi rendirent la dessusdicte place. Et adoncques se partit ladicte armée & se separa en deux parties : c'est à sçauoir le Comte de Clermont & sa compaignie tirerent à aller deuers Bayeux, & ledit Connestable & sa compaignie s'en retournerent deuers le Duc de Bretaigne pour aller mettre le siege deuant Auranches.

Comment le Duc de Bretaigne à tout son armee meit le siege deuant Auranches: comme elle luy fut rendue: comme il print Tombelaine: comment Bayeux fut prinse: comment le Connestable de France print Bricquebec & Valongnes & S. Sauueur-le-Vicomte & autres incidens.

L'Armée dudit Duc de Bretaigne retournée deuers luy apres qu'ils furent vn peu raffreschis, il feit faire ses monstres, & puis sans delay il se partit bien garny de canons & de Bombardes & de toute autre artillerie & alla mettre le siege deuant la ville d'Auranches: en laquelle estoient de quatre à cinq cens Anglois, dont estoit capitaine vn nommé Lampet. A assieoir ledit siege se porterēt moult vaillāment & y eut de moult belles escarmouches d'vn costé & d'autre : & y fut le Duc & son ost par l'espace de trois sepmaines. Pendant lequel temps ils feirent de grans approches & battirent la ville de Engins, & tellement que necessité contraignit ledit Capitaine & ses gens de rendre la place au Duc. Et quelque composition que lesdits Anglois demandassent, neantmoins ils ne peurent obtenir que d'eux en aller leurs corps saufs seullement. Et ainsi rendirent la place, & s'en allerent chacun vn Baston en son poing. Apres la reddition dudit Auranches, alla ledit Duc de Bretaigne & son ost deuant la place de Tomblaine, qui est vne tresforte place & imprenable tāt qu'il y ait à viure dedans : car elle est toute assize sur roc en la mer, & pres du mont S. Michel. En laquelle estoient en garnison de quatre vingts à cent Anglois: lesquels voyans si grand puissance deuant eux, se rendirent par composition, telle qu'ils s'en deuoient aller leurs corps & leurs biens saufs: & s'en allerēt à Chierbourg & rendirent icelle place. Oudit an xvj. iour de May feit le Roy mettre le siege deuant Bayeux par les Comtes de Dunois, de Neuers & d'Eu & plusieurs autres capitaines cheualiers & escuyers. Et se logerent entour la ville, & tindrent illec le siege par l'espace de quinze iours: pēdant lequel temps feirent les François de grans approches de mines & de fossez, & tellement furent battus de canons & de traict leans, que toute la muraille fut percée & abbatue, si qu'il ne restoit plus que d'assaillir : & ce que les seigneurs differoient pour euitier l'effusion de sang, & aux grans maux qui s'en fussent ensuiuis se telle cité eut esté prinse d'assault: mais ce nonobstant sans congé & sans ordonnance de la grand ardeur & conuoitise qu'auoient les gens de guerre de gagner, ils assaillirent ladicte cité deux fois en vn mesme iour : & y eut de moult belles armes faictes tant du costé des assaillans, cōme des deffendans: desquelles deux parties en y eut plusieurs de morts de traict, & de couleurines: mais il conuint les François se retraire sans autre chose faire, pource que l'assault n'estoit que d'vn costé. Et se ladicte ville eut esté assaillie par l'ordonnance des seigneurs & des capitaines, sans quelque deffaut elle eut esté prinse d'assault: Matago estoit capitaine dudit lieu, lequel fut fort espouenté de la vaillance qu'il auoit veüe

esdits François oudit assault: car ils y furent tuez de vaillans gens du party des Anglois: & pourtant il commença à parlementer avec le Comte de Dunois & autres seigneurs, & apres plusieurs parolles dictes entre eux, Matago & ses cōpaignons traicterent & appoincterent, & quelque composition qu'ils demandassent, ils ne peurent obtenir pour toutes productions que d'eux en aller chacun vn baston en son poing seullement. Et ainsi s'en allerent & saillirent d'icelle cité par la porte du chasteau tous lesdits Anglois nombrez à neuf cens, renommez les plus vaillans gens de leur party, & s'en allerēt à Chierbourg: mais à aucuns d'iceux Anglois pour l'honneur de noblesse furent deliurez leurs cheuaux pour porter leurs damoyelles, & les gentils femmes: & avecques ce leur furent deliurées plusieurs charrettes pour porter aucunes autres des plus notables femmes d'iceux Anglois: lesquelles s'en alloient avec leurs maris, si que c'estoit pitié à les regarder: car elles partirent d'icelles cité de trois à quatre cens femmes sans les enfans, lesquels aussi estoient en grand nombre: les vnes portoient leurs petis enfans en berceaux sur leurs testes, les aucunes sur leurs cols, & les aucunes en auoient de pendus entour elles à bēdeaux de toille, & en plusieurs autres façons. Et ainsi demoura ladicte cité en l'obeissance du Roy de France. A laquelle gouuerner meit prouision, & ordōna officiers pour le Roy ledit Comte de Dunois son lieutenant general. Et ce fait passa luy & le Comte de Clermont leurs compaignies & tout l'ost la riuere d'Orue, & meirent leurs gens viure sur le païs, en attendant la venue du Comte de Richemont Connestable de France: & laissa audit lieu de Bayeulx canons, couleurines & toute autre artillerie pour aller mettre le siege deuant Caen. En ce mesme temps le Connestable de France & ceux de sa compaignie: c'est à sçauoir les gens de monseigneur de Lual, le Mareschal de Loheac, les gens de l'Admiral de la mer, & monseigneur de Touteuille, prindrēt la ville de Bricquebec, & la meirent en la main du Roy moyennant qu'ils s'en allerent leurs corps & leurs biens saufs. Apres la reddition dudit Bricquebec s'en alla ledit Connestable mettre le siege deuant la ville de Valongnes, qui nagueres auoit esté prinse des Anglois sur les François: deuant laquelle il ne fut gueres, mais se rendirent tost apres, pource que le lieutenant d'icelle place qui en auoit la garde de par le Roy d'Angleterre festoit fait François: & pource trouua il façon enuers ledit Connestable que les Anglois estans dedans ladicte ville iusques au nombre de six vingts, s'en yroiēt à Chierbourg leurs corps & biens saufs: & par ce moyen se partirent iceux Anglois, & laisserent ladicte ville en l'obeissance du Roy de France. Apres le departement du Duc de Bretagne le Connestable se retira à Bayeulx, & enuoya Iaques de Luxembourg son lieutenant & Oudet Dadie en sa compaignie avec trente lances, mettre le siege deuant S. Sauueur le Vicomte, qui est moult belle place & l'une des plus fortes de Normandie: deuant laquelle place demourerēt l'espace de trois iours en attendant la venue des Mareschaux de France & de Bretagne, des seigneurs de Touteuille & de Bouffac & d'autres. De laquelle place estoit capitaine le sire Roberfart vn Baron de Hainault, qui auoit leans en sa compaignie deux cens combattans Anglois: lesquels Mareschaux & autres feirent moult vaillamment leur deuoir à mettre ledit siege & feirent de grans approches & tranchées. En faisant lesquelles fut tué d'un canon vn vaillant

lant escuyer du paÿs de Berry, nōmé Iean de Blanche fort, qui fut moult plaint. Et tantost apres leſdits Anglois eux voyans estre ſi oppreſſez ſans ce qu'ils fuſſent greuez de canons ne d'autres engins, commencerent à parlementer: & toſt apres ils rendirent la place par compoſition, telle qu'ils ſ'en deuoïēt aller leurs corps & leurs biens ſauſs à huiſt iours de vuidage. Ainſi par ce moyen fut rendue ladicte ville de S. Sauueur le Vicomte, & miſe en l'obeïſſance du Roy de France: & ce fait ſe partirent leſdits Mareſchaux & cheuaucherent iuſques à deux lieües pres de Caen en vn village nommé Ceux, où eſtoit logé ledit Conneſtable & ſa compaignie: & menoient avec eux leſdits Mareſchaux les hoſtages que leſdits Anglois auoient baillé, pour fournir l'appoinctement que dit eſt: pource qu'ils ſe partirent, & n'attendirent point leſdits huiſt iours de vuidage, que les Anglois deuoient auoir à vuidier leurs biens de dedans ladicte place.

Comment le ſiege fut mis deuant Caen: comment le Roy de France y vint, & le Roy de Cecille, & le Duc de Calabre ſon fils à groſſe armée: puis dit comment les Anglois apres ce qu'ils eurent eſté fort battus d'engins rendirent la ville & chasteau de Caen.

LE v. iour de Iuin audit an ſe deſlogea ledit Conneſtable & ſa compaignie dudit lieu de Ceux, & ſ'en allerent loger és faulxbourgs de ladicte ville de Caen, du coſté de deuers Bayeulx dedās l'abbaye S. Eſtienne pres de la muraille d'icelle ville. Et ce iour meſmes ſe partit de la bataille le Comte de Clermont, le Comte de Caſtres & pluſieurs autres ſeigneurs cheualiers & escuyers, qui vindrent tous loger avec ledit Conneſtable oudit lieu de S. Eſtienne: & eſtoient en nombre avec leſdits deux ſeigneurs, douze cens lances, & quatre mil & cinq cens archiers, Guifarmiers & Couſtilliers, & deux cēs francs archiers à pied. Et le Comte de Dunois lieutenant general du Roy, & ſe deſlogea de demie lieüe pres de ladicte ville de Caen: & ſe vint loger és faulxbourgs de Vaucelles du coſté de deuers Paris à grand compaignie de nobles hommes, gens d'armes & archiers, iuſques au nombre de huiſt cens lances, & de deux mille cinq cens archiers, Guifarmiers & Couſtilliers à cheual, & deux mil francs archiers à pied, ainſi fut aſſiegée ladicte ville des deux coſtez. Puis feirent faire diligemment vn pont au deſſus de ladicte ville pour paſſer la riuere d'un coſté & d'autre. Par deſſus lequel pont paſſerēt au quatrieſme iour apres les Comtes de Neuers & d'Eu à grand cōpaignies de gens d'armes, & de traict: leſquels ſ'en allerent loger és faulxbourgs de ladicte ville, du coſté de deuers la mer en vne abbaye de dames, nommée la Trinité: & ſi toſt que leſdits François furent illec arriuez, fut aſſailly le boulleuert eſtant illec: lequel fut moult vaillamment deffendu & y eut de moult belles armes faiſtes tant d'une part que d'autre, & neantmoins en fin fut prins d'aſſault par les François: leſquels le laiſſerent depuis, pource qu'il eſtoit ouuert du coſté de deuers la muraille d'icelle ville: & ſemblablement demoura deſemparé pour la muraille, & fut habandonné par les Anglois, pource qu'ils feirent murer leur porte. Pour venir audit ſiege ſe partit le Roy de France de la ville d'Argenten, en ſa compaignie le Roy de Cecille, le Duc de Calabre ſon fils, le Duc d'Allençon, les Comtes du Maine, de S. Pol, & de Tarquaruille & pluſieurs autres cheualiers, escuyers gens d'armes & de traict, iuſques au nombre de ſix cens lances & les archiers: & alla coucher

à S. Pierre-sur-Dive: le lendemain à Argenten, & le tiers iour vint dîner ausdits faulxbourgs de Vaucelles. Puis se partit incontinent & passa la riuere par dessus ledit pont, & s'en alla logger en vne abbaye nommée Dardenne, où il fut durant ledit siege, fors vne nuict qu'il fut logé en ladicte abbaye de la Trinité: où demourerēt le Roy de Cecille, le Duc de Calabre son fils & les autres seigneurs qui y estoient venus à tout mil lances: avec le Roy douze mil archiers à cheual, mille Guisarmiers & Coustilliers à cheual, & deux cens François archiers à pied, dont la plus-part estoient logez és villages d'environ. Tātost apres la venue du Roy furent faictes grandes diligences de fossoyer autour de la ville, & faisoit vn chacun grand deuoir endroit soy: & commença le Comte de Dunois premierement à faire assaillir les boulleuers de Vaucelles, qui estoient sur la dessusdicte riuere de Dive: lesquels se tindrent longuement, & y fut combattu & deffendu tresvaillammēt d'un costé & d'autre: mais en fin apres plusieurs beaux faits d'armes, furent lesdits boulleuers prins par les François, & y furent morts, prins & naurez grand foison des Anglois, qui moult esbahirent leurs compaignons. En chacun logis dudit siege estoient mines iusques dedans les fossez de la ville, & par especial du costé de deuers le Connestable: ses gēs d'armes minerent du costé de deuers S. Estienne, tellement que tout cheut & trespucha à terre, & pouoient combattre les François & Anglois main à main par ce lieu: quand lesdits Anglois se veirent ainsi agressez & approchez de toutes parts, doubans qu'ils fussent prins d'assault, demanderent & requierent à auoir traictié: à quoy le Roy de France meu de pitié & compassion à l'exemple de nostre seigneur, qui ne demande pas la mort des pecheurs: mais luy souffrit qu'ils se conuertissent en mettant Dieu deuant luy: considerant aussi la grand pitié & dommage que c'eust esté de destruire vne telle ville, de violer & piller les Eglises, femmes & filles despueller: cōsiderant aussi l'effusion du sang humain, qui eut peu estre fait dedans la ville, se consentit & octroya que ladicte ville fut prinse par composition. Et en verité elle estoit prenable d'assault, veu les ouuertes & rompures qui ja estoient faictes en ladicte ville & murailles d'icelle: & quand au regard du chasteau & donjon, lesdits Anglois le pouoient bien tenir par longue espace de temps, s'ils eussent eu courage de ce faire: combien qu'en la fin veu la cheualerie & grand compaignie qui deuant eux estoit, il leur eut fallu rendre: & pour monstrier qu'il estoit tenable à ceux qui n'y ont point esté. Vray est que ledit chasteau est vn des plus fors chasteaux de Normandie, garny de haux & grans boulleuers de moult dure pierre, & assis sur vn roc, lequel contient par estimation autant que la ville de Corbueil: & y a dedans vn tresfort donjon d'une l'arge & haute tour quarrée, entretenue tout autour de quatre grosses tours massiues, depuis le pied du fossé iusques en haut à l'egal de la terre: lesquelles sont moult hautes, & est fermé de haute muraille & forte tout autour selon l'equalité desdictes tours: & de grās & parons fossez, & tout assiz sur roc: dedans ledit chasteau se tenoient le Duc de Sombreffet, sa femme & ses enfans: & en ladicte ville estoit logé messire Robert Ver frere du Comte de Suffort, messire Henry Radefort & plusieurs autres: lesquels estoient conduiseurs pour le Duc de Sombreffet de quatre mil Anglois, estans dedans ladicte ville pour la garde d'icelle. Pour entrer doncques en la matiere

tiere de la composition, fasssemblerent & conuerferent plusieurs fois lesdits Anglois & François: c'est à sçauoir pour le Roy de France ledit Comte de Dunois, le Seneschal de Poictou, sire Jean Bureau tresorier de France. Pour les Anglois messire Richard Herisson Baillif de Caen, Robert Parges & aucuns autres: & pour ladicte ville Eustace Gaingnet Lieutenant dudit Baillif, & l'Abbé dudit S. Estienne: lesquels parlementerent & alleguerent plusieurs choses en fortifiant chacun son fait. Et apres plusieurs parolles dictes entre eux, composerent le lendemain de la feste S. Iean Baptiste: & promirent lesdits Anglois mettre ladicte ville, chasteau & donjon és mains & obeïssance du Roy de France, dedans le premier iour de Iuillet ensuiuant, ou cas qu'ils ne combattroient le Roy & sa puissance dedans ledit iour, parmy ce que ledit Duc de Sombreffet, & sa femme, & ses enfans, & les autres Anglois, qui s'en voudroient en aller s'en yroient eux & leurs biens, femmes & enfans, & emporteroient tous leurs biens meubles. Et aussi s'en yroient leurs corps, cheuaux & harnois saufs: & pour emporter leursdits biens, on leur bailleroit vaisseaux & charroy, & ce qui seroit de necessité pour passer en Angleterre & non ailleurs, à leurs despens & non autrement. Pourueu toutesfois qu'iceux Anglois rendroient tous prisonniers, & tous séelez, & quitteroient tous ceux de ladicte ville tant gens d'Eglise, bourgeois ou autres qui leur deuoient, ou pouoient deuoir aucune chose, & sans que pour ce au departir ils prenissent rien du leur. Et avecques ce qu'ils laisseroient toute artillerie grosse & menue, reserué, arcs, arbalestes & couleurines à main. Pour lequel appoinctement entretenir ils bailleront pour hostages douze Anglois d'Angleterre, deux cheualiers de Normandie & quatre bourgeois de ladicte ville: & pource qu'ils ne furent secouruz en aucune maniere ledit premier iour de Iuillet, ils rendirent ladicte ville, chasteau & donjon: & porta les clefs aux champs par iceluy donjon le Baillif dessus nommé, & les meit en la main du Connestable de France, en la presence dudit Comte de Dunois Lieutenant general: auquel il les liura incōtinent comme au capitaine & gouuerneur d'icelle ville & chasteau pour le Roy de France. Et demoura ledit capitaine aux chāps pour faire tenir le chemin desdits Anglois droit à Estrahan: & tātost apres leur departemēt ledit Comte de Dunois, accompagné du Mareschal de Ialongnes deuant luy deux cens archiers de pied, & les trompettes & heraulx du Roy: & derriere luy trois escuyers d'escuyerie portans les bannieres du Roy: & derriere icelles cent hommes d'armes à pied, entra par ledit donjon dedans icelle ville & chasteau, & fait mettre lesdictes bannieres sur lesdits donjon & portes.

Cy dit comment le Roy de France entra à Caen, où il fut noblement receu. Puis dit comment les Anglois rendirent Falaise au Roy de France, de laquelle place il ordōna capitaine Pothon de S. Treille: puis dit cōment Daufrōt fut mis en l'obeïssance du Roy.

LE vj. iour de Iuillet se partit le Roy de France de l'abbaye de Dardēne, pour entrer en sa ville de Caen: & estoient en sa compagnie tous les seigneurs qui auoient esté au siege, excepté son lieutenant & le seigneur de Ialongnes, qui ja estoient dedans la ville: lesquels estoient tous grandement & richemēt habillez. Et ainsi vint iusques pres de ladicte vil-

le deux cens archiers deuant luy, avec ses heraulx & trompettes, & derriere luy auoit cent lances. Là vindrent au deuât de luy hors de la ville le Comte de Dunois, qui amena les bourgeois de ladicte ville en grand multitude de gens: lesquels apres qu'ils eurent faicte la reuerence au Roy, luy presenterent les clefs & il les receut tresbenignement. Apres ce vindrent les gens d'Eglise reueſtus à proceſſions, ainſi qu'il eſt de couſtume en tel cas de faire. Puis entra en ladicte ville & y auoit quatre gentils-hommes, portans vn ciel ſur luy: & eſtoient routes les rues par où il paſſoit tendues & couuertes à ciel grandement: eſquelles rues auoit grand foïſon de peuple criant Noël: & ainſi cheuaucha le Roy iuſques deuant la grand Eglise S. Pierre, & deſcendit à la porte pour aller faire ſon oraiſon: laquelle faicte il ſ'en alla loger en la maiſon d'un bourgeois de la ville, en laquelle il demoura certaine eſpace de temps, ſon lieutenant & cōſeil avecques luy pour mettre officiers, police & gouuernement en ladicte ville. Et vindrent à la prinſe dudit Caen deuers le Roy le ſeigneur de Croÿ, meſſire Iean de Croÿ ſon frere & le ſeigneur d'Arſy: lesquels eſtoiēt enuoyez de par le Duc de Bourgongne pour traicter du mariage de la fille du Roy & de monſeigneur Charles fils dudit Duc: & pour pluſieurs autres groſſes choſes, dont ils eſtoient chargez de par le Duc. Ledit ſixieſme iour fut mis le ſiege deuant Fallaiſe, & ſ'y trouua premier Pothon de S. Treille Baillif de Berry, & le lundy apres maiſtre Iean Bureau treſorier de France, avec lequel eſtoiēt les François archiers pour conduire l'artillerie, dont il eſtoit gouuerneur. Tantoſt apres que les Anglois de la place les apperceurent ils allerent deuant, & les aſſaillirent tresaprement: & à iceluy aſſault ſe gouerna ledit Treſorier tres vaillamment en ſoy deffendant contre leſdits Anglois. Et pendant vint ledit ſeigneur de S. Treille à ſon ſecours, & tellement fut deffendue ladicte artillerie, que leſdits Anglois furent reboutez iuſques aux portes de leur fortereſſe. Puis ſe partit le Roy de ſa ville de Caen pour aller audit ſiege, & vint à vne lieüe pres dudit Fallaiſe en vne abbaye nommée S. Andrieu. Avec luy eſtoit le Roy de Cecille, le Duc de Calabre ſon fils, les Comtes du Maine, de S. Pol & de Tanquaruille, le Vicomte de Loumaigne & pluſieurs. Et fut mis le ſiege tout autour de ladicte ville de Falaiſe. Et pource que le Roy auoit grand ſeigneurie avec luy, & plus qui ne luy failloit pour tenir ledit ſiege, furent les Comtes de Richemont & de Clermont ordonnez de par le Roy pour aller mettre le ſiege deuant Chierbourg. Dedās Falaiſe eſtoient en garniſon mil cinq cens combattans Anglois, les mieux en point qui fuſſent en Normandie des gēs de leur natiō, dont eſtoiēt cōduiſeurs & capitaines ſoubs le ſire de Thallebot, deux gentils-hommes Anglois: l'un nommé Andrieu Troſlet, & l'autre Thomas Cathon: lesquels voyās telle & ſi grande ſeigneurie & telle multitude de gens d'armes, archiers & arcbaſtiers deuant eux, requirent à parleméter avec le Comte de Dunois: lequel par le commandement & ordonnance du Roy leur bailla ſeurté pour aucuns d'entre eux, venir expoſer ce qu'ils vouloient dire. Et adonc requirent à auoir compoſition avecques le Roy, laquelle leur fut accordée par le Roy. Et depuis appoinctèrent enſemble le dixieſme iour de Iuillet par condition qu'ils mettroient en l'obeïſſance du Roy la ville & chaſteau de Falaiſe le xxij. iour dudit Iuillet, ou cas qu'ils ne ſeroient ſecouruz en dedās ledit iour, pourueu auſſi que
le ſire

le sire de Thallebot qui estoit seigneur de ladicte place du don du Roy d'Angleterre sous qui ils estoient, lequel estoit prisonnier du Roy au chasteau de Dreux, seroit deliuré & mis en sa franche liberté, moyénant certaines promesses que ledit Thallebot deuoit avecques ce faire au Roy. Et furent baillées trefues entre lesdictes parties, durās depuis ce dixiesme iour iusques au vingtiesme dessusdit. Et pour entretenir ce que dit est, baillerēt douze hostages. Et s'en deuoient aller lesdits Anglois en Angleterre leurs corps & biēs saufs, ou cas qu'ils ne seroient secourus dedans le iour dessusdit. Auquel ne cōparut aucun en leur secours. Pourquoi ils s'en allerent franchement ainsi que promis estoit. Et laisserent ladicte ville & chasteau en la main & obeissance du Roy: à laquelle garder de par luy il ordonna capitaine Pothon de S. Treille son grand escuyer d'escuyerie & Baillif de Berry. Le xxiiij. iour dudit Iuillet apres la reddition de Falaise se partirent de la cōpaignie du Roy messire Charles de Culant grand maître d'Hostel, le sire de Blanville, sire Jean Bureau Tresorier de France ayant tousiours le gouuernement de l'artillerie, & de mille & cinq cens François archiers: Lesquels estans tous ensemble, s'en allerent mettre le siege deuant la ville & chasteau de Dampfront. En laquelle estoient en garnison de sept à huit cens Anglois, lesquels sachans le grand nombre de gens d'armes, & la grād seigneurie estans lors en la Duché de Normandie, rendirent ladicte ville & chasteau le second iour d'Aoust ensuiuant dudit an, par telle composition qu'ils s'en allerent en Angleterre leurs corps & leurs biens saufs: ainsi qu'auoient fait plusieurs fauldoyers de leur partie, estans dedans les villes & chasteaux cy dessus escrites.

Cy parle de la mort du Duc de Bretagne & de messire Gilles son frere: & comment on le feit mourir moult piteusement. Puis dit comment Chierbourg par mer & par terre fut assiegée, & comment elle fut prinse.



Vdit an enuiron la fin du mois de Iuillet mourut de mort naturelle messire François Duc de Bretagne nepueu & homme du Roy de France, qui fut vn tresgrād dommage pour le Royaume: car il estoit vn notable Prince, prudēt & vaillant homme de son corps: & s'estoit grandement trauaillé de sa personne & employé ses gens & grand finance ou seruice du Roy à la conqueste du païs de Normandie, comme cy deuāt est dit & declairé. Ce Prince cy en son viuant aimoit naturellement le Roy de France, comme il est assez apparu: car il auoit porté guerre à tous ceux qu'il sçauoit estre contre sa maiesté royale: & mesmement contre vn de ses propres freres, nommé messire Gilles de Bretagne: lequel ou preiudice du Roy de France & sans quelque adueu de luy, auoit receu l'ordre du Roy d'Angleterre qu'on appelle la Iaretiere, & auoit accepté l'office du Cōestable dudit Royaume d'Angleterre. Pourquoi tantost apres que cecy fut venu à sa cognoissance, il le feit prendre & le feit mettre à vn de ses chasteaux, où il fut par longue espace de temps diligemment gardé. Et souuentesfois estoit exorté & admonesté par ledit Duc & ses parens, subiets & autres bien-vueillans du Royaume de France, de delaisser la querelle des Anglois qu'il soubstenoit contre raison, iustice & tout ordre de droit. Et apres qu'il eut esté traicté par doulces parolles, fut

traicté par parolles rigoureuses:mais oncques pour chose qu'on luy sceut dire, il ne se voulut retraire de son propos. Parquoy ledit Duc de Bretaigne son frere conceut haine mortelle contre luy, & tellement qu'il ordonna qu'on le feit mourir. Et fut ledit Duc plusieurs & diuerses fois sommé du Roy d'Angleterre par ses heraulx de luy r'enuoyer son Connestable, lequel il tenoit prisonnier, duquel auoit la garde Artus de Montauban. Et de fait pour le reffus qu'en feit ledit Duc de le rendre, les Anglois luy enuoyerent lettres de deffiance, qui enfelonnerent son fait pis que parauant. Et print ledit Duc vne telle desplaisance en soy que selon commune renommée il fut vne nuit par l'ordonnance du Duc son frere estranglé de deux toüailles torfes. Ainsi fina ses iours messire Gilles, miserablement & piteusement, qui est grand exemple à tous autres: de ceste mort ainsi piteuse on parle autremēt en Bretaigne, & dient plusieurs qu'il y eut du poil de leu enuers lesdits de Montauban & ses complices, qui le gardoient avec luy, pourtant qu'ils le feirent mourir ainsi que dit est, par faulx donner à entendre à son frere, cuidant paruenir à aucunes choses: car il estoit content de renoncer à toutes promesses par luy faictes aux Anglois, & de faire tout ce que le Roy & son frere eussent voulu:mais on leur rescriuoit tout au cōtraire comme l'on a assez sceu par aucun d'iceux, qui l'auoient fait mourir, lesquels en ont dit la verité:& furent trescruellement executez par iustice, & les autres qui ont peu eschapper ne s'oseroient trouuer au paÿs & pour cause. Le siege estant deuant Chierbourg, lequel y auoit esté mis par le Comte de Richemont Connestable de France, & par autre grosse puissance de seigneurs, cheualiers & escuyers, estans en sa compagnie, cōme il est declairé cy deuant, fut grandement gouuerné & vaillamment par les François estans audit siege. Et estoient ceux de dedans fort oppressez de trenchées, de mines & d'autres approchemens:cōbien qu'il y eut vn cheualier & vn escuyer de Bretaigne qui y furent tuez:c'est à sçauoir messire Pregent de Cotiuy seigneur de Raiz, lequel fut tué d'un canon qui fut vn grand dommage pour le Roy: car il estoit vn des vaillā cheualiers & bien renommé qui fut au Royaume de France, prudent aussi & de bon aage:L'autre fut tué d'une couleurine & fut Tuddual le Bourgeois escuyer de bien, & Baillif de Troye:lequel estoit vaillant homme de son corps & pied & à cheual, de grand conduicte & bien cognoissant la subtilité de guerre.Ladicte ville fut fort battue de canons & de bombardes, & le plus subtilement qu'oncques homme veit & mesmement du costé de la mer. Car il y auoit bombardes assises en la mer sur la greue, où elle alloit & venoit par chacun iour & estoient lesdictes bombardes chargées de pierres:& combien qu'elles fussent toutes chargées d'eauë quand le flot venoit: Neantmoins par le moyen de certaines peaux grasses, dequoy elles estoient vestues, oncques la mer ne porta dommage à la pouldre estant dedans lesdits engins:mais au plustost que la mer estoit retraicte les canonniers leuoient le manteau & iettoient contre ladicte place,dont les Anglois estoient moult esbahis:car oncques n'auoient eu cognoissance de tel mystere. Toutesfois il y eut quatre bombardes & vn canon rompues deuant ladicte ville,& y furent faictes de grandes & belles armes tant sur terre que sur mer,& plus au preiudice des Anglois qu'à leur proffit. Pourquoy Thomas Gouuel escuyer Anglois,capitaine dudit lieu:lequel auoit en sa compagnie

paignie en ladicte place mille combattans sous luy, requit à auoir compositiō avec le Cōestable, laquelle il obtint. C'est à sçauoir que ledit Gouuel laisseroit ladicte ville & chasteau en l'obeissance du Roy de France, parmy ce qu'on luy deliureroit vn sien fils qui estoit en hostage pour sa part & portion de l'argent deu au Roy de France, & à ceux de Roüen. Et ainsi que sondit fils luy fut rendu franc, & il rendit ladicte ville & chasteau de Chierbourg au Roy ou ses commis le xij. iour dudit mois d'Aoust audit an. Et s'en allerent luy & sondit fils & tous les souldoyer en Angleterre leurs corps & biens saufs : Puis en fut fait capitaine pour le Roy le sire de Bueil à tout quatre vingts lances & les archiers. Ainsi fut conquestée toute la Duché de Normandie & toutes les autres citez, villes & chasteaux d'icelle mises en l'obeissance du Roy de France, en vn an & six iours, qui fut vne grand merueille : car iamais si grand païs ne fut conquis en si peu de temps & à moins d'occision de peuple & de gens, ne à moins de dommage qui fut vn grand honneur au Roy de France, aux Princes & aux autres seigneurs, & à tous autres qui l'ont accompagné: dont ils deuoient rendre graces à Dieu auquel est deu gloire & louenge. Le temps le deuoit aussi en partie : car c'estoit l'année du grād pardon general de Romme que l'en appelle l'an de Iubilé. Ce païs de Normandie contient six iournées de long, de quarre & de large. Et dedans y a six Eueschez & vn archeuesché, & cent villes que chasteaux, sans ceux qui ont esté abbattus & demolis par la fortune de la guerre. Apres ce fait, ordōna le Roy six cens lāces & les archiers, lesquels il laissa en ladicte Duché pour la garde d'icelle. Et enuoya les autres gens de guerre en Guyēne: Puis se partit pour y aller & arriua en la cité de Tours ou mois de Septembre oudit an, là où par deliberation de son grand conseil, pour rendre graces à Dieu & le remercier d'icelle conqueste, il commanda celebrer processions generalles, par toutes les Eglises de son Royaume au quatorziesme iour d'Octobre ensuiuant: & de là en auant par chacun an le douziesme iour d'Aoust.

Cy met l'auteur en memoire les vaillances de plusieurs nobles hommes faictes en la conqueste de Normandie sur les Anglois pour le Roy de France. Comment le Roy enuoya en Guyenne le Comte de Ponthieure qu'il feit son Lieutenant.



Vi voudroit faire mention de tous les vaillans hommes & des vaillances, qui ont esté faictes durant le recouurement de la Duché de Normandie, ce seroit trop longue chose à escrire. Mais neantmoins en fault il aucunement faire memoire pour ceux, qui au tēps aduenir pourroient lire & veoir la maniere & façon du recouurement d'icelle Duché. Premièrement le Roy de France a mis en son armée & en sa guerre si bon ordre au fait de ses gens d'armes, que c'est belle chose à sçauoir: car il a fait mettre tous lesdits gens d'armes & de traict en bons & seurs habillemens, c'est à sçauoir les hommes d'armes tous armez de cuirasses, harnois de iambes, salades & espées toutes garnies d'argent, & lances que portoient les paiges de chacun homme d'arme: lequel estoit mōté chacun de trois cheuaux, pour luy, son paige & son varlet : lequel varlet est armé de salade, de brigandine, iaquette ou haubergeō, hache ou guisarme. Et auoit chacun desdits hommes d'armes pour lance deux archiers à cheual, armez le plus de brigandines, harnois de iam-

bes & salades, dont le plus estoient garnies d'argent, & à tout le moins auoient bons iaques & bons haultbergeons. Iceux gens de guerre estoient tous payez pour chacun mois, sans ce qu'ils ayent esté si osez ne si hardis de prendre durant ladicte guerre de Normandie aucunes gens prisonniers, ne rançonner cheual ne beste quelconque. (posé que pour lors elle eust esté en l'obeissance des Anglois, & à ceux de leur party,) ne les viures en quelque lieu que ce feust, sans payer, fors seulement sur iceux Anglois, & gens tenans leur party, qui estoient trouuez faisans guerre & en armes: lesquels ils pouoient prendre licitement & leur estoit permis & non autrement. Ladicte guerre, durant si gouerna grandement & honnorablement le Comte de Dunois, Lieutenant general du Roy: & aussi feirent pareillement les Comtes de Neuers, de Castres, d'Eu, de S. Pol, le Sire de Culant Grant-maistre-d'hostel, les seigneurs d'Orual, de Touteuille, de Blanville, de Beauuau, de Bueil, de Beauuois, de Moÿ en Beauuoisiz, son Marechal de Ialongnes, le Seneschal de Poictou, Jean Monsieur de Lorraine, Pothon de sainte Treille, le Baillif d'Eureux, Robert Commugan, & plusieurs autres grans seigneurs, cheualiers & escuyers qui tous notablement, & grandement si font gouvernez à grans trauaux, dangiers, mesaises, peines & perils de leurs corps. Pareillement de la prouision que le Roy auoit mis au fait de son artillerie pour le fait de sa garde, où il a eu le plus grand nombre de grosses bombardes, gros canons, veuglaires, serpentines, crapaudines, couleurines & ribauldequins, qu'il n'est memoire de homme qui iamais veist à Roy si grande artillerie ne si bien garnie de pouldres, de manteaux & de toutes autres choses pour approcher à prendre chasteaux & villes, ne qui eust plus grand foison de charroy à les mener, ne meneurs pour les gouverner qu'il auoit: lesquels estoient payez & souldoyez de iour en iour. Et furent gouverneurs & conduiseurs de ladicte artillerie, maistre Jean Bureau Tresorier de Frâce & Iaspert Bureau son frere maistre de ladicte artillerie: lesquels durant ladicte guerre en ont eu de grans peines & perils: car ils en ont fait de grand diligence. C'estoit chose merueilleuse à veoir les boulleuers & approchemens, fossez, trenchis & mines que les dessusdits trouuoient & faisoient faire deuant toutes villes & chasteaux, qui furent assiegez durant icelle guerre. Car à la verité il n'ya eu quelque place rendue, soit par composition ou autrement, qui n'eust esté prinse d'assault & par force d'armes par la vaillance & subtilité des gens de guerre, qui là estoient. Mais tousiours quand lesdictes places estoient approchées & prestes à prendre & à assaillir, le Roy de sa benignité vouloit qu'on les prenist par composition, pour obuier à l'effusion de sang & à la destruction de son pays & du peuple, qui estoit enclos esdictes forteresses. A la conqueste de la basse Normandie dont estoit chief en son viuant le Duc de Bretagne, le Comte de Richemont Connestable de France son oncle, le feu Pregent de Coctiuy, lequel en son viuant estoit seigneur de Raix & de Coctiuy, & Admiral de France trauaillerent moult leurs corps à la conqueste du pays: aussi le Comte de Laual, le seigneur de Loheac Marechal de France, son frere, le seigneur de Montauban Marechal de Bretagne, Geoffroy de Couvran, James de Tilly Baillif de Vermandois, & aussi fait ledit Tuddual le Bourgeois tant qu'il vesquit. Pour entretenir le fait & la charge de ladicte guerre, tant sur le fait de la iustice que des finances, & pour
conseiller

conseiller bien & loyalement le fait, & entretenement des gens d'armes, & le recouurement de ladicte Duché, se gouvernerent bien & labourerent grandement le seigneur de Trainel Chancelier de France, le seigneur de Gaucourt, messire Theaulde de Vaulpergue Baillif de Lyon, sire Jaques Cueur Conseillier & Argentier du Roy : lequel fait & trouua les manieres & toutes subtilitez à luy possibles d'auoir finance & argent de toutes pars, pour entretenir ladicte armée : & pour souldoyer les gens de guerre, dont il fournist sans nombre. Et aussi firent messire Jean du Bar seigneur de Baugy, & sire Jean Hardouyn Tresorier de France, qui leur fut grand honneur & à tous les autres qui ont trauaillé leurs corps en ceste partie ou seruice du Roy. Apres ce que le Roy Charles septiesme de ce nom au moyen & conduicte de la grace diuine principalement, & de trefnoble & puissante cheualerie ses conseillers & autres souldoyers de diuers estats, a eu conquesté sa Duché de Normandie, qui auoit esté occupée par les Anglois ses anciens ennemis par l'espace de trente ans ou enuiron, & subiugué tout le païs, & en iceluy mis prouision, regime & police nouuelle, & mesmement garde de gens de guerre à la deffence tant des citez, villes, forteresses, chasteaux & autres forteresses : luy tousiours confiant en la grace & misericorde du Roy des Roys, lequel veult à vn chacun garder son droit, comment il est escript en vne omelie de S. Mathieu, où il dit en parlant aux Pharisiens. *Reddite quæ sunt Cesaris Cesari, & quæ sunt Dei Deo* : qui est à entendre qu'on doit rendre à vn chacun ce qui est sien : fect à ceste cause disposé & a deliberé en sa volenté d'aller és païs de Guyenne & de Bordeaux occupez par lesdits Anglois de si long temps, qu'il n'est memoire du contraire, en allant directement contre raison & contre l'omelie dessus alleguée. Et ont tousiours les nobles & populaires d'iceluy païs esté faux & rebelles à la couronne de France, ou aumoins puis deux cens ans, qui est grand laps de temps : combien que ledit païs est & a tousiours esté du domaine d'iceluy Royaume de France. Pourquoy luy voulant vser de conseil & faire meurement ses entreprinsees comme sage, subtil & vaillant Roy, vint en sa ville de Tours au mois de Septembre oudit an cinquante, où il conuocqua & fait assembler grande & noble cheualerie : & là fut deliberé par son conseil d'aucuns de son sang, Prelats & autres ses conseillers & capitaines d'enuoyer audit païs de Guyenne, apres prouision & garde mise audit païs de Normandie. Pour laquelle garde fut ordonné le Comte de Richemont Connestable de France, oncle de Pierre Duc de Bretagne : & avecques luy seigneurs, cheualiers & escuyers dudit païs de Normandie avecques six cens lances, & les archiers payez chacun mois, & grand nombre de Francs-archiers ordonnez de par le Roy : & aussi fut baillé la charge de la cité de Roüen & du païs de Caux à messire Pierre de Bresé Grand Seneschal de Normandie. Puis ordonna le Roy en ce mesme conseil d'entrer audit païs de Guyenne, & aller mettre le siege deuant la ville de Bergerac assise oudit païs en la Comté de Perigord, sur la riuere de Dourdonne. Et pour ce faire fait son lieutenât le Comte de Pontieuvre, & de Perigord Vicomte de Lymoges, lequel accepta la charge dudit siege. Et partirent en sa compagnie messire Charles de Culant seigneur de Ialongnes & Marechal de France, Pothon de sainte Treille Baillif de Berry & grâd escuyer d'escuyerie du Roy, & plusieurs autres seigneurs cheualiers & escuyers, & au-

tres gens de guerre nombrez à cinq cens lances & les archiers : lesquels y meirent le siege tres-vaillamment & tellement, que par leur puissance & bon gouvernement apres l'artillerie venue & conduicte par maistre Iean Bureau tresorier de France, fut rendue ladicte ville de Bergerac en l'obeissance du Roy de France. Et ainsi les Anglois s'en allerent leurs cheuaux & biens saufs comme la composition auoit esté faicte: & aussi deuoient demourer les habitans s'ils vouloient en faisant le serment & faire leurs labeurs & mestiers comme parauant. Puis s'en retournerent lesdits seigneurs & leurs gens, eux Hyuerner és logis à eux ordonnez : & demoura pour capitaine & maistre dudit Bergerac messire Philippe de Culant: & en sa compagnie cent lances & les archiers. En ce mesme an lesdits seigneurs & la compagnie allerent deuers vn chasteau nommé Iansac (esperans y mettre le siege) situé sur ladicte riuere de Dourdonne, lequel fut prins d'assault, & en y eut des assaillans sept ou huit de naurez, & des Anglois xxxv. morts ou enuiron, & le demourant furent prins prisonniers, & demoura ladicte place en l'obeissance du Roy de France. Puis apres se diuisa l'armée du Roy, dont il alla partie à Montferrant où ils teindrent le siege par certaine espace de temps, ouquel fut fort assailly & pou deffendu: car le seigneur dudit lieu voyant la grosse assemblée de gens deuant luy eut paour & demoura prisonnier en ladicte place en l'obeissance du Roy de France. Depuis & sans interualle s'en alla ladicte armée deuant la ville de sainte Foy, assise sur la riuere qui se rendit pareillement sans contredit. Et apres ladicte armée en poursuivant tousiours sa bonne fortune s'en alla deuant vne place appelée Challais, & là fut tenu le siege par certaine espace de temps. Apres lequel les Anglois estans dedans iusques au nombre de cinquante lances, ayans le cuer failly par ce qu'ils veoient telle compagnie deuant eux se rendirent par telle composition qu'ils s'en allerent leurs corps & biens saufs, & meirent ladicte place en l'obeissance du Roy, à laquelle garder fut commis Pierre de Louvain. Le xxvj. iour d'Octobre ou enuiron fut arresté prisonnier maistre Iean de Xancoins receueur general des finances du Roy, & fut mis ou chasteau de Tours, pource selon commune renommée qu'il auoit mauuaiselement distribué & employé les deniers de sa recepte: & tellement que le Roy à son grand besoing ne pouoit finer d'argent pour payer les souldoyers & gens de guerre estans en son seruice ou fait de sa guerre de Guyenne: mais luy conuint trouuer autres moyes merueilleux, pour auoir finances: car autrement son fait eust esté mal pour paruenir à son intention. Et est vray que depuis que ledit receueur fut oudit chasteau en prison enfermé, il fut questionné par aucuns du grand conseil & autres clerks voyans & bien cognoissans és matieres de finances : & fut trouué par sa confession auoir encouru le crime de leze maiesté. C'est à sçauoir tant pour les deniers du Roy qu'il auoit desrobez en grand & excessiue somme, comme pour certaines ratures. Parquoy il fut reputé faulsaire, qui sont causes & peines capitalles, qui luy eust voulu garder iustice. Mais le Roy doulx & misericors luy feit du criminel ciuil, en consonnant à ce qui est escript de nostre sauueur Iesus Christ, où il dit. *Nolo mortem peccatoris : sed magis ut conuertatur & uiuat.* Qui est à dire : Je ne vueil pas la mort du pecheur, mais qu'il se conuertisse & viue. Et pource ces cas grans & enormes par luy confessez, il fut condamné par la bouche du Chancelier

cellier de France à tenir prison fermée certain espace de temps, avec cōfiscation de tous ses biens: desquels le Roy donna vn hostel qu'il auoit fait faire à Tours au Comte de Dunois : & outre plus fut ledit Xancoins condamné de payer & restituer au Roy de France la somme de soixante mil escus d'or, qu'il semble estre bien pou de chose au regard de ce qu'il luy auoit pillé, comme sa cōfession le porte : & pour faire sa plaissance mondaine. Avec luy fut mis prisonnier vn nommé Iaques Carrier Clerc dudit receueur en prison separé : lequel par le commandement de son maistre & comme complice dudit crime, auoit razé & regasté par l'instigation de l'ennemy de nature humaine, plusieurs sommes de deniers, pour icelles conuertir au dommage du Roy & à leur prouffit : pourquoy il auoit encouru sentence capitale se la grace & misericorde du Roy ne se fust pareillement estendue sur luy.

Comment le seigneur d'Orual rua ius ceux de Bordeaux : & comment le Duc Pierre de Bretagne vint faire hommage au Roy. Puis dit comment le Duc de Bourgongne voulut en Flandres mettre imposition sur le sel.



Vdit an dernier iour d'Octobre, le seigneur d'Orual tiers fils du sire d'Albreth & sa compaignie, se partirent de Basas de quatre à cinq cens combattans pour aller courre en l'isle de Medoc : ouquel chemin ils repeurent és bois en vn lieu estant à deux lieues pres de Bordeaux. Et le lendemain iour de Toussaincts au plus matin qu'ils furent montez à cheual cuidans entrer en ladicte isle, leur suruint nouuelles que ceux de Bordeaux tant gens de guerre comme populaires estoient sur les champs ou nombre de huiet ou neuf mille tant de pied comme de cheual, pour combattre ledit seigneur d'Orual. Et neantmoins il ne laissa point son entreprinse : mais meit ses gens en belle ordonnāce attendant la bataille, combien qu'ils fussent en moindre nombre sans comparaison que les Anglois, desquels estoit conduiseur le Maire dudit lieu. Et commencerent les coureurs dudit d'Orual à leur aller mōstrer bon visage, marchans en bataille par belle ordonnance : lesquels coureurs prindrent vn gentil-homme dudit Bordeaux pres d'un boscage : & là fut si vaillamment combattu par les gens du Roy qu'il mourut dixhuiet cens hommes tant d'Anglois comme de Bourdelois, tant sur le champ que à la poursuite de ceux qui s'en fuyoient : dont fut le principal en fuite ledit Maire de Bordeaux qui estoit de Cheual, & habandonna tous ses gens de pied, lesquels auoit mis deuant pour faire frontiere de leur bataille. Et outre & par dessus les morts furent prins & demourerent prisonniers ausdits François douze cens hommes, qui fut grand honneur & prouffit ausdits conquerans, attendu le petit nombre de gens qu'ils estoient au regard de leurs ennemis. Apres la besongne faicte par lesdits François, ledit seigneur d'Orual s'en retourna luy & les siens tresioyusement avec les prisonniers qu'ils auoient en la cité de Basas. Là fut fort abbatu l'orgueil de ceux de Bordeaux & de tout le pays enuiron. Oudit an le lendemain du iour des ames Pierre Duc de Bretagne vint deuers le Roy son souverain seigneur, pour faire hommaige de sa Duché de Bretagne : & luy fait faire le serment en tel cas accoustumé le Comte de Dunois & de Longueuille. Et comme grand chambellan du Roy print sa ceinture, l'espée & le bouclier com-

me à luy appartenoit. Et apres ledit serment fait le Chancelier de France luy dit qu'il estoit lige homme du Roy de France à cause de ladicte Duché. A quoy fut respōdu par le Chancelier d'iceluy Duc, que sauf la reuerēce du Roy & de luy il n'estoit pas lige à cause d'icelle Duché. Et sur ce furēt en altercatiō par vn espace de temps. Et finalement le receut le Roy en foy aux vz & aux coustumes, ainsi comme ses predecesseurs les Ducs de Bretagne auoient fait. Et tost apres, il feit au Roy vn autre Hommage pour sa Comté de Montfort. A cause de laquelle il confessa estre son lige, homme & vassal. Et à ce fut receu, à grand chiere du Roy & de sa noble cheualerie. Ce fut fait à vne petite ville & chasteau appelée Montbason, où le Roy se tenoit pour lors : auquel lieu fut ledit Duc grandement festoié des dames & des damoyelles, & aussi il s'acquitta grandement enuers elles. Il y eut grosses luites & autres esbatemens durant quinze iours ou enuiron que le Duc fut deuers le Roy, lequel estoit bien en point & en belle compaignie: & auoit avecques luy le Comte de Richemont Connestable de France, & plusieurs autres seigneurs, cheualiers & escuyers estimez iusques au nombre de quatre à cinq cēs cheuaux. Oudit an selon le chroniqueur d'Arras le Duc Philippe de Bourgongne aagé de cinquante quatre ans ou enuiron lors Duc de Bourgongne, de Lotrich, de Brabant, de Lembourg & de Luxembourg, Comte de Flandres, d'Artois, de Bourgongne, de Haynault, de Hollande, de Zelande & de Namur, Marquis du S. Empire, seigneur de Frise, de Salins & de Malines, requit aux quatre Membres de son païs de Flandres (qu'il eut fait assembler pour celle cause) que pour tout le païs de Flandres, ils luy voulsissent accorder courre à son prouffit en ladicte Comté imposition sur le sel qui se despendoit illec. C'est à sçauoir sur chacun sac de sel xxiiij. gros de la monnoye de Flandres, promettant que iamais plus en son temps ne leur demãderoit tailles ne aïdes: laquelle requeste ouïe & ruminée par les Gantois principalement, considerans que la nourriture du peuple pour la pluspart est de chairs ou de poissons salez, & pour autres causes à ce les mouuans, refuserent entierement ladicte requeste, disans que pour mourir ils ne souffriroient icelle imposition auoir cours en leur païs. Et consequamment ceux de Bruges, & d'Yppre, & du Franc, ensuiuans ceux de Gand feirent responce qu'ils feroient en ceste matiere ainsi comme ceux de Gand & non autrement.

Comment le Roy ordonna le Comte de Dunois son lieutenant general pour aller en Guyenne, & meit le siege deuant Montguyon, lequel luy fut rendu. Comment il assiegea la ville de Blaye, laquelle fut prinse d'assault & le chasteil se rendit par composition.

1451.



N l'an mil quatre cens cinquāte & vn au mois de May selon le chroniqueur de S. Denys, le Roy estant en sa cité de Tours, ordonna le Comte de Dunois & de Longueuille son lieutenant general pour aller en Guyenne pour la reduire en son obeissance. Et pource vint audit lieu de Tours au commencement de May. Puis manda le Roy à plusieurs tant cheualiers & escuyers qu'un chacun se preparast pour aller à la conqueste de la Duché de Guyenne. Et lors se partist ledit Lieutenant à tout moult grande & notable compaignie, & alla mettre le siege deuant vn chasteau nommé Mont-

Montguyon: auquel lieu vint au seruice du Roy le Comte d'Angoulesme frere legitime du Duc d'Orleans, maistre Iean Bureau Tresorier de France, Pierre de Louuain & plusieurs autres iusques au nombre de quatre cens lances, & les archiers & guisarmiers avec quatre mil Francs-archiers, qui teindrēt le siege vaillamment en attendant tousiours plusgrande seigneurie, laquelle deuoit venir: lequel siege y fut par l'espace de huiēt iours. Et estoit capitaine dudit chasteau pour les Anglois Regnault de S. Iean escuyer, Gascon & seruiteur du Captal de Beusch, avec certain nombre de gens d'armes: lequel voyant non pouoir resister à la puissance qui estoit deuant luy, feit certain appoinctement & composition avecques les dessusdits, moyennant lequel, ladicte place fut rendue en l'obeissance du Roy. Oudit an le seiziesme iour dudit mois de May apres la reddition de Montguyon, alla ledit Comte de Dunois mettre le siege deuant l'une des portes de la ville de Blaye: & se ioingnit avec luy messire Pierre de Beauuau seigneur de la Bessiere & lieutenant du Comte du Maine, gouuerneur de ses gens d'armes, & Geoffroy de S. Belin: lesquels auoient en leur compaignie environ huiēt vingts lances, & les archiers & guisarmiers: & là trouuerent messire Iaqués de Chabannes Grand-maistre d'hostel du Roy, & Ioachin Rouhault: lesquels avecques leur compaignie se meirent du costé de deuers le chasteau, & se logerent à la maladerie: & auoient deux cens lances & les archiers, & deux mil francs-archiers: & là arriua par mer grand foison de nauires, dont estoit chief & gouuerneur messire Iean le Boucher General de France: esquels nauires estoit grand multitude de gens d'armes & de traict, & grād foison de viures pour aitailler l'ost qui estoit deuant ladicte ville de Blaye: lesquels nauires en approchant dudit siege trouuerent deuant le port d'icelle ville cinq gros vaisseaux bien armez: lesquels estoient venus de Bordeaux pour aitailler & ayder ceux de Blaye: & fut illec combattu tres-vaillamment & tellement, que les nauires des François meirent en fuite les Anglois: desquels il y en eut plusieurs morts & nauez & leur cōuint desancrer leurs vaisseaux pour eux en fuir droit à Bordeaux, & les chasserent lesdits François iusques au port. Puis s'en retournerent à tout leurs nauires deuant le Port de Blaye, affin que secours ne viures ne peussent entrer par mer dedans ladicte ville. Et ainsi fut assiegée par mer & par terre de toutes parts: & apres ce fait deux ou trois iours arriua deuant ladicte ville le Comte de Ponthieure à tout cent lances & ccc. arbalestriers, & se logea au siege du Comte de Dunois. Et lors deuant ladicte ville furent faictes de grans vaillances, approchemens de mines, de fossez & de trenchées: & fut terriblement battue de grosses bombardes & de canons, tellement que la muraille fut abbatue en plusieurs lieux: & estoient dedans ladicte ville pour la deffence d'icelle la pluspart des plus vaillans hommes de guerre de la Duché de Guyenne, tenans le party du Roy d'Angleterre. Et environ le xxviij. iour dudit mois de May vn pou deuant soleil couchant à l'heure qu'on sonne le guet, aucuns frācs-archiers de la compaignie de Iean de Meanse, nōmé le seigneur de Mau-gouuerne, capitaine des francs-archiers de Touraine, & les gens de Pierre de Louuain, monterent sur la muraille de ladicte ville: & adonc commença l'assault de toutes parts, tellement que ladicte ville fut prinse: à la prinse de laquelle y eut des Anglois que morts que prins deux cens. Et se retrahirent à grand

haste le Maire & soubz Maire de Bordeaux dedans le chasteau de ladicte ville, le soubdsdit seigneur de l'Esparre, le seigneur de Montferrant & plusieurs autres gens de guerre iusques au nombre de deux cens hommes. Et quand ceux dudit chasteau veirent les approches contre eux & qu'ils ne pouoient euader par faute de secours ne par mer ne par terre, traicterent d'eux rendre & mettre le chasteau en la main & obeissance du Roy. Oudit an & sans interualle apres la reddition de la ville & chasteau de Blaye, se partit ledit Comte de Dunois avec toute sa compaignie : & alla mettre le siege deuant la ville & chasteau de Bourg, tant par mer que par terre, & n'y fut ledit siege que cinq ou six iours : car quand ceux qui estoient dedans veirent si grand puissance & en si belle ordonnance, aussi bombardes & canons assortir deuant eux, avec ce mines, approchemens & trenchis, ils requirent eux rendre leurs corps & biens saufs : & estoient dedans icelle place de quatre à cinq cens combattans, dont estoit capitaine messire Beraud de Montferrand, lequel luy & ses gens s'en allerent leurs corps & biens saufs à Bordeaux : & demoura ladicte place en garde de par le Roy à messire Iaques de Chabannes Grand-maistre d'hostel du Roy.

En ce mesme an & mois de May, le Comte d'Albreth avec les seigneurs de Tartas & d'Orual ses fils, lequel auoit en sa compaignie trois cens lances & deux mil arbalestiers vint mettre le siege deuant la cité de Dax du costé de deuers Bordeaux, au bout du pont de la riuere de la Guarande. Et enuiron de dix ou douze heures apres que ledit siege fut mis, vint le Comte de Foix avec le Vicomte de Lautrec son frere legitime, messire Bernard de Biarn son frere naturel illegitime, les Barons de Nouailles, de Latirdun, de Roz & de Taraxe, messire Martin Gratian capitaine des Espaignols, Robin-Petit-lot capitaine des Escocois & plusieurs autres seigneurs, cheualiers, escuyers & gens de guerre iusques au nombre de cinq cens lances & les archiers, & deux mille arbalestriers, & meirent le siege du costé deuers Nauarre & de Biarn : lequel siege fut vaillamment tenu, & y eut plusieurs beaux faits d'armes, & aussi vaillamment tenu par ceux de la cité. Et iusques à tant qu'il vint à leur cognoissance, que ceux de Bordeaux faisoient ou auoient intention de faire aucun traicté avec ledit lieutenant ou ses commis : parquoy les assiegez à la requeste dudit Comte de Foix furent compris en l'appoinctement que feroient ceux de Bordeaux. Et ainsi fut mise en la main & obeissance du Roy de France : & fut commis à la garde d'icelle cité & chasteau par les Comtes de Foix & d'Albreth à quatre Barons du païs de Biarn. En ce mesme temps & mois fut mis le siege deuant le Chastillon en Perigord par monseigneur le Comte de Ponthieure, monseigneur de Ialongnes Marechal de France, & maistre Iean Bureau tresorier de France. En ce temps se rendirent au Roy ceux de la ville saint Milion : car ils veoient bien qu'ils ne pouoient resister contre sa puissance. Et fut baillée ladicte ville en garde audit Comte de Ponthieure.

En ce chapitre sont contenues plusieurs notables requestes de plusieurs villes & chasteaux. Et generallyment toute la Duché de Guyenne reserué Bayonne. Puis parle comme ceux de Bordeaux se rendirent.

LE second iour de Iuing ensuiuant le Comte de Dunois enuoya mettre le siege par mer & par terre deuant vne place appelée Fronfac, & il demoura en la ville de Bourg par aucune espace de temps pour faire certaines ordonnances, & mettre illec regime & police au bien & prouffit du Roy : & ce fait vint personnellement audit siege de Fronfac, & enuoya vn herault pour sommer ceux de Liborne d'eux rendre au Roy. Apres lesquelles nouvelles ouies ils ordonnerent aucuns des principaux de la ville pour aller avec le herault deuers iceluy seigneur, pour trouuer le traicté & appointement. Et l'appointement fait & accordé, ladicte ville fut baillée au Comte d'Angoulesme. Et quand au fait du chasteau de Fronfac le plus fort chasteau des marches de Guyenne, & lequel a tousiours esté gardé d'Anglois natifs du païs d'Angleterre, pource que c'est chambre Royale & la clef de Guyenne & de Bourdelois. Pourquoy estoit de necessité ausdits Anglois d'y tenir fort la main, ce qu'ils feirent au mieux qu'ils peurent. Et fut ledit chasteau fort assailly par aucun temps : & aussi par les aduersaires fort deffendu : mais apres que le siege y eut esté environ quinze iours, les Anglois qui y estoient, voyans la noblesse & la grand multitude de gens de guerre deuant eux, qui n'estoit pas la moitié de la puissance du Roy non pas le quart : voyans aussi les bombardes, canons & autre artillerie autour d'eux : & les approchemens, comme de fossez & de mines, & la grande cheualerie que le Roy auoit par toute Guyenne, & que les Franks-archiers tenoient le siege en quatre lieux pour icelle heure : lesquels sieges ne pouoient secourir les vns aux autres pour les grosses riuieres de Gyronde & de Dourdonne, qui lors estoient tresgrosses pour les neiges qui fondirent és montaignes en celle saison : & aussi consideroient bien les Anglois qu'il ny auoit siege tenu par les François, combien qu'ils fussent en diuers lieux qu'ils ne fussent assez fors pour attendre & combattre toute la puissance du Roy d'Angleterre, qu'il auoit pour lors en Guyenne. Pourquoy ces choses considerées ceux de la place requirent à parlementer avec ledit Comte de Dunois, & traicterent en ceste maniere, que se dedans la veille de saint Iean Baptiste prochainement venant, les François n'estoient combattus deuant ladicte place par les Anglois, qu'ils se rendroient & mettroient la place en la main du Roy : & pareillement le feroient ceux de Bordeaux & les Barons du païs, eux confians fors de faire rendre toutes les places de la Duché de Guyenne, estans en l'obeissance du Roy d'Angleterre : pourquoy & à greigneur seureté ils baillerent certains hostages, affin d'entretenir ce que dit estoit. Et pour estre à icelle iournée de la S. Iean vindrent les Comtes de Neuers, de Clermont, de Castres, de Vendosme & de Ponthieure grandement accompagnez, & plusieurs autres seigneurs cheualiers & escuyers, & furent en bataille ce iour pour attendre leurs ennemis : laquelle iournée fut haultement & honnorablement tenue en riches & grans habillemens. Et là furent fais cheualiers le Comte de Vendosme, le Vicomte de Turene, le sire de la Roche Fouquault, le fils du seigneur de Commercy, messire Iean de Rochecouard, le sire de Grimaux, messire Pierre des Barres, messire Pierre de Montingrin, messire Ferry de Granfy, messire Iean de Bordeiles, le sire de Fontenelles, le Bastard de Vendosme, sire Iean de la Haye, sire Tristan l'Harmite, sire Iean

de l'Estrange, sire Pierre de Louvain & plusieurs autres iusques au nombre de quarante cheualiers. Et le lendemain au matin qui fut la veille S. Iean Baptiste, rendirent les Anglois ladicte place de Fronfac : car aucun secours d'Angleterre ne leur fut baillé : & le baillerent és mains du Comte de Dunois, lequel le bailla en garde à Ioachin Rouhault : & enuoya ledit Lieutenant vn herault du Roy par deuers le Côte d'Armaignac, qui tenoit le siege deuant la ville de Reom : lequel luy presenta lettres dudit seigneur avec le double du traicté de Bordeaux : & se rendit icelle ville en l'obeissance du Roy de France, & fut baillée en garde au sire d'Albreth : & de là s'en alla ledit herault deuers le Comte de Foix : & adonc se meirent ceux de la cité de Dax en l'obeissance du Roy de France. Tantost que les commis à faire le traicté de Bordeaux eurent besongné avecques ceux dudit lieu, ils retournerent par deuers ledit Lieutenant general du Roy, le chancelier de France & autres du conseil, & leur monstrerent par escript les appoinctemens, accords & conuenances signez & seellez tant d'un costé que d'autre : dont il fut moult ioyeux, & aussi furent tous les autres seigneurs. Ainsi fut la chose delaiée l'espace de huit iours, comme dit est, apres le iour du Dimanche à eux octroyé par ledit Lieutenant, auquel iour ne leur vint ne comparust aucun secours. Et neantmoins contre les promesses faictes lesdits de Bordeaux, eux confians tousiours de secours auoir, requirent iour de bataille, lequel leur fut octroyé par le seigneur de Dunois au vintgdeuxiesme iour de Iuing ensuiuant, pour illec eux deffendre se secours leur venoit de par le Roy d'Angleterre, ou se ce non ils se deuoient rendre ledit iour : auquel iour comparurent les dessus nommez de France pour cuider combattre leurs ennemis ou rendre ladicte ville en son obeissance. Auquel lieu ils furent attendans la bataille iusques à soleil couchant. Et à celle heure ceux de Bordeaux voyans auoir faulte de secours, feirent faire vn hault cry par vn herault : lequel crioyt secours de ceux d'Angleterre pour ceux de Bordeaux. Auquel cry ne fut aucunement respondu ne donné secours. Pourquoi se departirent icelles parties, & s'en allerent loger sans autre chose faire pour icelle heure. Et le lendemain retournerent le Chancelier & le Tresorier de France avec plusieurs autres par deuers iceux de Bordeaux, lesquels appoincterent qu'au mercredy ensuiuant ils seroient tous prests de rendre & bailler les clefs des Tours, chasteaux, haures, portes & des barrieres de ladicte ville, & faire les sermens d'estre bons & loyaux subiects de lors en auant, & estre hommes naturels du Roy de France, selon l'appoinctement & promesses par eux faictes : & fut ordonné ledit Tresorier pour les grans diligences qu'il auoit fait à la poursuite de ladicte Duché de Guyenne Maire de la cité de Bordeaux. Et pareillement fut aussi ordonné Ioachin Rohault Contable dudit lieu, & en fait le serment en la main dudit Chancelier, & ledit Maire és mains d'iceux Chancelier & Contable au mercredy ensuiuant, qui estoit prins pour rendre ladicte ville, furent preparez les seigneurs de Bordeaux & ceux du pays pour plus honorablement receuoir ledit Lieutenant du Roy, & la seigneurie estant avec luy : lesquels feirent l'entrée cedit iour. Et pour prendre la possession & saisine d'icelle cité, entrerent premiers par l'ordonnance dudit Lieutenant messire Thibault de Valpargue Baillif de Lyon, & ledit sire Iean Bureau conseiller du
Roy

Roy & Maire de ladicte cité, leur furent baillées les clefs de tous les lieux fors estans en icelle cité. A l'entrée ne furent point les francs-archiers. Et comme l'en disoit ce fut fait à la requeste de ceux de Bordeaux. Mais furent enuoyez loger autour de Libourne à vn port estant sur la mer. Ladicte entrée commença à soleil leuant, & fut faicte par le port dudit lieu, où estoient les seigneurs de Lesparre, de Montferrant & plusieurs autres nobles & notables personnes de ladicte ville & du pays. A ceste ioyeuse entrée furent tous les gens d'Eglise reuestuz en chappes tant religieux, chanoines, curez & autres, & receurent grandement & honnorablement à ladicte procession le Lieutenant du Roy & sa tresnoble compagnie. Et premierement commencerent à entrer les archiers de l'auantgarde. C'est à sçauoir des Mareschaux & autres estimez de mille à douze cens : dont estoient gouuerneurs ledit Ioachin Contable dudit Bordeaux, & le seigneur de Pauansac Seneschal de Thoulouse : & apres les hommes d'armes de ladicte auantgarde tous à pied, que gouuernoient lesdits Mareschaux de Loheac & de Ialongnes estimez ccc. hommes d'armes, & estoient lesdits Mareschaux tresbien montez. Et apres eux venoient les Comtes de Neuers & d'Armignac, & le Vicomte de Lautrec frere du Comte de Foix, qui auoient trois cens hommes de pied. Apres entrerent les archiers du seigneur de la Bessiere lieutenant du Comte du Maine, nombrez de trois à quatre cens. Apres entra la bataille des archiers nombrez à trois mil, & les gouuernoit ledit seigneur de la Bessiere & le Seigneur de la Roche-Foucault. Apres entrerent trois des seigneurs du grand conseil du Roy : c'est à sçauoir l'Euesque d'Alleth, maistre Guy, Bernard Archediacre de Tours, & apres l'Euesque & Duc de Langres. Le Chancelier de la Marche, & aucuns autres des secretares du Roy : puis entra messire Tristan l'Hermitte Preuost des Mareschaux tout à cheual avec ses sergens. Apres entrerent quatre trompettes du Roy poursuuant & heraux portans les cottes d'armes du Roy, & des seigneurs à qui ils estoient. En apres entra vne haquenée blanche couuerte de veloux cramoisy, & auoit sur la croupe vn drap de veloux azuré, semé de fleurs de liz d'or de broderie : & sur la selle estoit vn petit coffret couuert de veloux azuré, semé de fleurs de liz d'or d'orfauerie : dedans lequel estoient les grans seaux du Roy : laquelle haquenée menoit vn varlet à pied. Et à chacun costé d'icelle estoient deux archiers vestuz de liurée. Puis venoit le Chancelier de France à cheual qui estoit armé d'vn corset d'acier, & par dessus auoit vne iaquette de veloux cramoisy. Apres entra le sire de S. Treille Baillif de Berry & grand escuyer d'escuyerie du Roy, monté sur vn grand coursier couuert de drap de soye : & estoit ledit Baillif armé à blanc tenant vne des banieres du Roy, & le seigneur de Montagu tenant l'autre à fenestre, monté sur vn autre coursier, & cheuauchoiēt sans moyen deuant le Lieutenant du Roy : puis entra ledit Lieutenant, lequel estoit seul monté sur vn coursier blanc couuert de veloux bleu, charge d'orfauerie d'or, & estoit tout armé de harnois blanc. Et apres luy venoient les Comtes d'Angoulesme & de Clermont, armez de blanc, & leurs cheuaux couuers, & leurs paiges apres eux habillez moult richement. Puis entrerent les Comtes de Vendosme & de Castres, avecques eux plusieurs nobles Barons & grans seigneurs tous & chacun d'eux moult richement parez & habillez. Et apres entra la bataille des

hommes d'armes au nombre de mille cinq cēs lances:lesquels gouuernoit messire Jaques de Chabannes grād maistre d'hostel du Roy:& estoit à cheual armé à blanc,son cheual couuert moult richement . En apres entrerent les hommes d'armes du Comte du Maine,nombrez à cl.lances : lesquels gouuernoit Geofroy de S.Belin Baillif de Chaumont en Bassigny. Puis entra l'arrieregarde que faisoient les gens de IoachinRouhault:avec lequel estoient les gens d'armes du seigneur de S.Treilles.Et ainsi allerēt toutes les compagnies iusques deuant la grand Eglise, & là descendit ledit Lieutenant & les Comtes d'Angoulesme, de Vendosme,d'Armignac,de Castres,le chancelier & plusieurs autres dessusdits. Et adonc vint l'Archeuesque de Bordeaux à la porte d'icelle Eglise reuestu en pontificat, accompagné des chanoines de ladicte Eglise, encensa ledit Lieutenant & luy fait bailler aucun Reliquaire avec la Croix.Puis le print par la main, & le mena dedans le choeur faire sa priere & son oraison deuant le grand autel. Avecques ledit lieutenant entrerent deux heraux du Roy vestuz de leurs cottes d'armes . En apres entra la seigneurie dessus nommée & laisserent lesdictes bannieres du Roy dedans l'Eglise.Et tantost apres la deuotion dudit lieutenant faite & des autres seigneurs,ledit Archeuesque print vn messel& fait iurer& promettre audit Lieutenant du Roy,& aux autres seigneurs là presens , que le Roy les maintiendrait & garderoit à tousiours en leurs franchises& preuileges& libertez anciennes (ce qu'ils feirent) & que bien & loyaument en feroient leurs pouoirs deuers le Roy. Et pareillement ledit Lieutenant fait iurer ledit Archeuesque,que le seigneur de Lesparre & autres seigneurs assistans de ladicte ville & gens d'autorité,seroient à tousiours bons , vrayz & loyaux subiects du Roy de France,à luy obeissans & à sa couronne:& mesmement toute la communauté,ce qu'ils feirent& accorderent tous d'vnevoix,les mains tendues aux Saints, comme l'en a accoustumé de faire en tel cas.De cedit serment fut excepté le Capital de Busch , qui pour lors estoit cheualier de la Jarretiere qui est l'ordre du Roy d'Angleterre. Apres ouit ledit Lieutenant & toute la compagnie la Messe bien & deuotement,que chanta ledit Archeuesque: deuant laquelle fut chanté *Veni creator. &c. & Te Deum laudamus. &c.* & sonnerēt toutes les cloches solēnellement tant en ladicte Eglise cathedrale comme es autres Eglises de la cité.Et apres le seruice diuin fait se retrahirēt ledit Lieutenāt & tous les autres seigneurs d'Eglise,pour aller prendre leurs refections , & se retrahit chacun en son logis , reserué le chancelier de France,le grand maistre d'hostel du Roy & le Chancelier de la Marche:lesquels demourerent pour receuoir le serment de messire Oliuier de Coctiuy Seneschal de Guyenne, lequel vint moult grandement accompagné de plusieurs des gens du Roy,de Barons & des cheualiers dudit païs de Guyenne,& aussi des bourgeois dudit Bordeaux.Et là presenta ses lettres oudit chancelier de France. Apres la lecture desquelles ledit chancelier luy fait faire le serment, que bien & loyaument il tiendrait les iurisdicions, & feroit iustice egale au grād comme au petit,au poure comme au riche,& tant en ladicte ville & cité de Bordeaux,cōme en tout le païs de la Duché de Guyenne. Et cōmanda ledit chancelier apres le serment tel que dit est receu dudit Seneschal, que chacun obeit à luy,comme à la propre personne du Roy es choses touchās & conseruans sondit office:& apres que ledit Lieutenant eut enuoyé gens dedans ledit

dit chasteau de Fronſac chambre de Roy, y fut miſe vne baniere du Roy. Puis allerent certains deputez de par ledit Lieutenant és tours & haures de ladiſte ville, où l'autre baniere fut miſe. Et apres fut fait vn cry ſolennel à ſon de trôpe, en deffendant à tous & toutes de par le Roy & de par le lieutenant que nul ne preniſt ſur ſon hoſte ne ailleurs aucune choſe ſans payer: & ce fait ſ'en alla chacun loger ainſi que par les fourriers eſtoit appoincté: mais ne demoura gueres apres diſner que grãd murmure fut en la ville, ſur vn qui eſtoit des gës du Roy, qui auoit tranſgreſſé le cry fait de par le Roy. Et tantost fut prins & amené deuant iuſtice, où il fut diligemment examiné. Et ce venu à la cognoiſſance dudit Lieutenant apres le cas par luy confeſſé, ordonna ledit Lieutenant qu'il fut pendu & eſtrâglé. Et ainſi fut iuſtice accôplie qui moult fut plaifant & bon exêple à ceux de ladiſte ville de Bordeaux & tout le paÿs. Outre plus feit ledit lieutenant faire vn gibet tout neuf pour pendre cinq compaignons de l'oſt dudit lieutenant, qui en faueur de Guillaume de Flaÿ auoient nauré meſſire Pierre de Louuain cheualier luy eſtant ou ſeruice du Roy: & l'auoient eſpié par pluſieurs iournées le cuidant trouuer pour tuer, pour certain debat qui eſtoit de pieça entre ledit Louuain & Flaÿ: & ainſi fut par ledit lieutenant bonne iuſtice faiſte & accomplie deſdits malſaiſteurs, dont tous ceux deſdictes villes & citez furent moult ioyeux d'auoir veu tel exploict: car du temps qu'ils eſtoient és mains des Anglois ils eſtoient tous maiſtres, & ne couroit que voye de fait. A laquelle le plus ſaige du monde ne ſçauroit pas bien que reſpondre. En laquelle ville & cité de Bordeaux ſeiourna ledit Lieutenant par l'eſpace de quinze iours ou enuiron, pour en icelle mettre police & gouuernement: & tellement fut par luy pourueu que les gens de guerre ſe gouuernerent par raiſon ſi gratieufemēt, que pendāt le temps oncques extorcion, dommaige ne aucun grief ne fut fait à aucuns de ladiſte ville & cité. Ainſi fut conquiſe toute ladiſte Duché de Guyēne excepté la cité de Bayonne. A laquelle conquiſte faire en toutes les places fortes eſtans en icelle Duché, ſe gouuernerent haultement & vaillamment ledit Comte de Dunois Lieutenant general du Roy, & tous autres ſeigneurs, cōſeillers & capitaines, & chacun ſelon ſa puissance: & demoura capitaine dudit Bordeaux le Comte de Clermont & ſon lieutenant meſſire Oliuier de Coctiuy, qui auoit la charge des gens de guerre de ſon frere Pregent de Coctiuy en ſon viuāt Amiral de France. Apres la reddition dudit Bordeaux, fut ordonné que les Comtes de Neuers, de Clermont & de Caſtres iroient deuers le Roy eſtant au chasteau de Taillebourg, & leurs armées iroient en leurs paÿs assignez pour viure. Et les Comtes d'Armignac, d'Angoulefme & de Ponthieure eux & leurs gens iroient en leurs maiſons. Et ſemblablement que tous les francs-archiers qui auoient eſté en celle armée ſ'en iroient en leurs maiſons. Et eſtoit l'armée deſſusdicte qui fut à la conquiſte dudit Bordeaux, eſtimée à vingt mille combattans: & ainſi ſe repofa vn petit la compaignie qui eſtoit ou ſeruice du Roy.

Cy dit comment la cité de Bayonne fut aſſiegée par les Comtes de Foix, & de Dunois tous deux lieutenans du Roy de France: comment ladiſte cité ſe rendit, & quels ordonnances y furent faiſtes: puis dit comment le Pape Nicolas eſpouſa l'Empereur à la fille du Roy de Portugal: puis parle des aduenues d'Angleterre.



En ce mesme temps & oudit an se delibera le Roy, par le moyen de son conseil, d'aller mettre le siege deuant la cité de Bayonne, tenant le party des Anglois. Et pour ce faire ordonna au chasteau de Taillebourg ses lieutenans generaux, les Comtes de Foix & de Dunois, iusques à sept cens lances avec les archiers & guisarmiers : dont il en y auoit quatre cens l'ace des gens du Roy, & quatre cēs lances des Barons, cheualiers & escuyers subiets dudit Côte de Foix : desquels il faisoit beau veoir les mōtures & harnois de testes : ledit Comte de Foix auoit avec luy deux mille arbalestriers & les pauaiseux, extraits de son paÿs : quand ledit Comte fut arriué & qu'il eut posé son siege, il feit plusieurs cheualiers : c'est à sçauoir le fils du maistre d'hôtel du Roy, le seigneur de Tessac frere du seigneur de Nouailles, Bertrand d'Espaigne Seneschal de Foix, Rogier d'Espaigne, le seigneur de Benac & plusieurs autres iusques au nombre de quinze cheualiers : & enuiron midy celuy iour arriua le Comte de Dunois & de Longueuille, lequel meit son siege deuant la cité du costé de deuers Biarn, entre les riuieres de la Dour & de la Noë, qui sont deux grosses riuieres & larges : & tellement que l'un desdits sieges ne pouoit secourir l'autre : & estoient en la compagnie dudit lieutenant iusques au nombre de six cens lances, les archiers & les guisarmiers : & à mettre le siege se gouvernerent lesdits seigneurs & capitaines grandement & hōnorablement. Et le lendemain qui fut le vj. iour dudit mois, ceux de dedans Bayonne, desemparèrent les faulxbourgs de S. Leon, du costé dont estoit ledit Comte de Foix : lesquels estoient tresfort fermez de fossez & de gros pels. Mais la grande multitude des grosses couleurines, serpentes & ribaudequins, qui rompirent les paliz & tuoient les gens de guerre qui yssioient à la deffence, leur feirent habandonner & delaisser lesdits faulxbourgs : & adonc boutterent les feux és Eglises qui dedans estoient, & és maisons : & par especial quand ils apperceurent ceux qui tenoient le siege, qui se mettoient à point pour les assaillir. Et adonc entrerent iceux assaillans dedans iceux faulxbourgs, & les poursuiuirent si asprement que s'ils eussent esté cent hommes ensemble, ils eussent gaignée la ville, & y fussent entrez par la porte avec ceux de dedans : mais ils ne pouoient si à coup monter lesdits fossez, pour venir à coup & hastiuement, tant estoient parfonds : car ils n'auoient nulles eschielles. Et adonc se logerent lesdits assaillās en iceux faulxbourgs, estaindirent le feu estant és Eglises & és maisons, & se logea le Comte de Foix aux Augustins, pource qu'ils estoient pou bruslez : & le vj. iour ensuiuant, vint du costé de Bordeaux le sire d'Albreth & le Vicōte de Tartas son fils, & se logerent à S. Esprit du bout du pont de bois : lequel pont fut rompu la nuict ensuiuant par les gens dudit seigneur d'Albreth, lequel auoit en sa compagnie deux cens lances, & les archiers trois mille arbalestriers. Et le lendemain faillirent hors ceux de Bayonne par vn bouleuers du costé de deuers la mer, pour prendre & dommager ceux estans audit siege à l'esquart. Et lors messire Bernard de Biarn & ses gens vindrent à l'escarmouche, & iusques dedans leur ville. Et ainsi que ledit messire Bernard s'en retournoit de ladicte escarmouche, il fut frappé d'une couleurine, qui perça son pauois & entra la plommée dedās sa iambe entre les deux os, qui depuis fut tirée : & fut si bien gouverné par les Chirurgiens, que le peril de feu en fut hors. Puis au lendemain matin fut prinse

vne

vne Eglise forte qui estoit fermée de fossez & de pieux, que prindrent les gens dudit messire Bernad, moitié d'assault moitié d'emblée. Quand ceux de dedans veirent qu'ils n'auoient pas le meilleur, ils se retrahirent dedans la ville, & en y eut de morts & de prins cinq ou six: & ainsi fut assiegée ladicte ville de routes parts, & furent aucuns enuoyez dedans ladicte Eglise. Et lors du costé dudit Comte de Dunois furent faits de grans approchemens, & de tirer cōtre la muraille sans attendre la venue des grosses bombardes: & qui les eut voulu attendre, sans remede ladicte ville eut esté prinse d'assault, veu les courages des assailans. Toutesfois quand les assiegez sceurent que les bombardes approchoient, commencerent à parlementer, & estoit le xxvj. iour d'Aoust. Pourquoy lesdits Comtes de Foix & de Dunois conioints en ceste partie conuindrent à parlementer avec ceux de la cité, appelez avec lesdits Comtes aucuns du conseil du Roy: lesquels apres plusieurs choses pourparlées traicterent en la maniere qui s'ensuit: c'est à sçauoir qu'ils bailleroient & mettroient en la main du Roy Dāp-Jean de Beaumont leur capitaine, frere du Connestable de Nauarre de l'ordre de S. Ieā de Hierusalem: lequel demourroit prisonnier & en la voulété du Roy: & tous les gens de guerre estans dedans icelle ville, demourroient pareillemēt tous prisonniers à la voulenté du Roy, & ceux de ladicte ville se soubsmettoiēt au bon plaisir du Roy. Et pour l'offence de desobeissance qu'ils auoient fait, entant qu'ils n'auoient pas obey à son commandement, ils payeront quarante mille escus d'or: & ce iour rendirent ledit Jean leur capitaine: lequel en la presence de tous les assistans tant de la ville comme autres, bailla la foy au grand maistre d'hostel du Roy. Ainsi fut fait & conclud le traicté de ladicte ville & cité de Bayonne: & tant que ledit siege dura, ceux du paÿs de Biscaye feirent grosses diligences de fournir le siege de viures, car le Roy leur en auoit rescript: & fut ledit siege fort aduitaillé tant pour gens d'armes, cheuaux qu'autrement. Il venoit aussi viures de Biarn & de Nauarre: mais c'estoit à grand peine pour la multitude des brigans, qui estoient ou paÿs: toutesuoyes ledit ost n'eut aucune faute de viures. Ledit Biscayens vindrent à tout douze vaisseaux d'armes nōmez espinaces, & vne grande naüe: lesquels arriuerent à demie lieüe pres de Bayonne. Affin que ceux qui estoient dedans ladicte ville ne s'en peussent fouÿr par eaüe, & estoient lesdits Biscayens nombrez six cens combattans. Et le vendredy xx. iour dudit mois vn pou apres soleil leuāt, le iour fut bel & cler, & fait moult beau temps. Si fut veu ou ciel par ceux qui estoient en l'ost du Roy, & mesmement par les Anglois estans dedans Bayonne, vne croix blanche: laquelle fut veüe publiquement l'espace de demie heure. Et lors ceux de ladicte ville qui s'estoient le iour deuant rendus, & leurs compositions faictes, osterēt leurs bannieres & pēons aux croix rouges, disans qu'il plaisoit à Dieu qu'ils fussent François & qu'ils portassent tous la croix blanche. Celle croix fut veüe le iour de vendredy, qui est le iour que nostre seigneur Iesus-Christ fut crucifié. Et ce dit iour à heure de dix heures entra dedans la ville avec l'Euesque d'icelle le seigneur de la Bessiere, pour prendre la possession d'icelle ville & du chastel. Et là furent portées les bannieres du Roy au haut de la tour du chasteau d'icelle ville par les heraulx du Roy, dont chacun eut grand ioye. Et à celle heure arriua la nauire de Biscayens dedans le port de Bayonne, laquelle chose il faisoit beau

veoir. Et le samedi xxj. iour dudit mois entrerēt les Comtes de Foix & de Dunois dedans ladicte cité de Bayonne : & entrerent avec ledit Comte de Foix le grand maistre d'hostel du Roy, le seigneur de Lautrec frere dudit Comte, le seigneur de Nouailles & le seigneur de la Bessiere & plusieurs autres : & y en auoit deuant eux mille archiers, que gouuernoit l'espinace. Et apres venoient deux heraux du Roy, & autres portans leurs cottes d'armes : & apres messire Bertrand d'Espaigne Seneschal de Foix armé tout au blanc, qui portoit la banniere du Roy, & cheuauchoit vn courfier couuert de veloux cramois. Apres venoit le Comte de Foix armé au blanc, monté sur vn courfier moult richement habillé : & estoit empres luy son Seneschal de Biarn, aussi bien monté & richement habillé, & auoit à son cheual vn chauffrain d'acier, garny d'or & de pierres precieuses prisé à quinze mille escus, & grand nombre de gens apres luy : & sans interualle venoient six cens lances à pied : & de l'autre part entra le Comte de Dunois, & auoit deuant luy douze cens archiers : apres deux des heraux du Roy & autres, portans diuerses armes. Apres venoit messire Iamet de Saueuses monté sur vn courfier, portant l'une des bannieres du Roy. A icelle entrée ledit Comte de Dunois feit cheualier ledit Iamet, le seigneur de Montguyon, Iean de Montmorin & le seigneur de Bouffey. Apres ladicte banniere entra ledit Comte de Dunois tout armé au blanc, & son cheual couuert de veloux cramois. Apres le seigneur Loheac Marechal de France, le seigneur d'Orual & plusieurs autres grans seigneurs, & derriere eux six cens lances. Ainsi tantost se rencontrerent pres de la grand Eglise, & à la porte d'icelle estoient l'Euesque reuestu en pontificat, les chanoynes & autres gens d'Eglise reuestuz en chappes, qui les attendoient à tout les reliques : & là descendirent à pied lesdits seigneurs, & baisèrent lesdictes reliques : & allerent faire leur deuotion dedans ladicte Eglise. Puis s'en allerent en leurs logis : & enuoya ledit Comte de Foix la couuerture de son courfier qui estoit de drap d'or, prisée à quatre cens escus d'or deuant nostre Dame de Bayonne, pour faire des chappes : & le lendemain qui fut Dimanche lesdits seigneurs vindrent ouir messe en ladicte Eglise : & y estoit avec eux le seigneur d'Albreth qui y estoit entré le samedi au soir, & apres la messe prindrent le serment de ceux de la ville. Et y fut commis Maire en icelle messire Iean le Boursier general de France, & messire Martin Gracien capitaine, lesquels demourerēt pour gouuerner & garder ladicte ville. Et le lundy prochain lesdits seigneurs avec leurs gens s'en allerent au païs, à eux assigné pour viure. Et tantost apres les Barons & cheualiers, nobles bourgeois & les trois estats tāt de Bordeaux, Bourdelois, Bayonne, Bazadois, & ceux des païs enuiron allerēt à Taillebourg deuers le Roy, pour confermer & ratifier les articles & appointemens passez par eux. Et pour faire les nobles hommages au Roy de leurs seigneuries : & là le Roy donna vingt mille escus aux Bayonnois, des quarante mille qu'ils deuoient payer par leur composition dessus escripte à leur requeste & priere. Et apres s'en retournerent chacun en leur ville trescontés du Roy, & des seigneurs de son grand conseil. Ou seruice du Roy à Taillebourg estoient les Côtes du Maine, de Neuers, de Clermont, de Vendosme, de Castres & de Tanquarville & plusieurs autres grās seigneurs. Et là vindrent deuers luy les Comtes de Foix & de Dunois, le seigneur d'Albreth, le sire de Loheac & plusieurs autres

autres grans seigneurs : lesquels tantost s'en retournerent en leurs païs eux hyuerner, & le Roy s'en alla passer son hyuer en son païs de Tourraine . Ainsi par la grace de Dieu fut reduicte en la main & obeïssance du Roy de France toute la Duché de Guyenne & de Normandie, & generallemēt tout le Royaume de France, excepté seulement la ville de Calais qui est encores demourée es mains des Anglois: Dieu doit que bien brief puisse estre mise & reduicte en ladicte obeïssance du Roy, si sera ce que dit est accomply. *Melior est obedientia quàm sacrificium.* Qui est à dire en substance: Sacrifice ne vaut pas obeïssance. Oudit an fut l'Empereur Frederic Duc d'Austriche couronné & espousé à Romme par le Pape Nicolas à la fille du Roy de Portugal, & y eut grand feste & solennité comme aux parties appartenoit bien . Et apres pou de temps se partit de Romme & s'en retourna en Allemagne & y mena sa femme, & là furent grandemēt & honnorablement receuz selon l'vsaige & stile du païs. En icelle mesme année eut grand debat & discord en Angleterre entre le Duc d'Iorth & le Duc de Sombresset pour le gouuernement du Royaume : & estoit lors le Roy pour le Duc de Sombresset, & tenoit les champs à toute sa puissance en belle bataille bien ordonnée: & ledit Duc d'Iorth en bataille pareillement, & les vns deuant les autres cuidans combattre. Mais les Prelats & autres avec les seigneurs dudit Royaume, considerans les grans maux qui s'en pourroïent ensuiuir, les desmeurent, & trouuerēt maniere de traicter, & promit ledit Duc d'Iorth non faire iamais assemblée ne armée contre son Roy. Et ainsi s'en retourna chacun en son lieu . Et celuy an vint le Cardinal de Touteuille deuers le Roy comme Legat cōmis de par le Pape Nicolas, luy requerir qu'il voulsist faire paix avec le Roy d'Angleterre, & que la guerre qui estoit entre eux portoit grand preiudice à la foy Catholique, & plus pourroit faire se brief ne se faisoit l'accord entre les deux Royaumes: car on veoit de iour en iour les mescreans marcher, entreprendre & gagner païs sur les chrestiens. Et apres que ledit Cardinal eut exposé ce dōt le Pape l'auoit chargé luy fut respōdu pour le Roy, que le Roy auoit tousiours voulu & encores vouloit paix pour obuier à l'effusion de sang, & aussi pour le bien de la chose publique : & qu'il estoit prest d'y entendre en toutes bonnes voyes, & que par plusieurs fois s'estoit mis en son deuoir pour icelle paix trouuer, & encores estoit prest d'obtemperer à toutes raisons, & de soy employer sur lesdits mescreans en ce qu'il luy seroit possible, & d'y employer grans finances pour repulser iceux Sarrazins. Et ce pendant que ledit Cardinal estoit encores deuers le Roy, Le Pape ayant la chose au cueur, enuoya l'Archeuesque de Rauenne qui est des Vrsins de Romme, par deuers le Roy d'Angleterre, pour luy remontrer semblablement qu'il voulsist faire paix avecques le Roy de France, pour les causes & raisons deuant touchées : & que la diuision pourroit engendrer contempt contre la chrestienté, attendu que desia ils conqueroient sur les marches du Royaume de Hongrie & des Allemagnes trefort. Si feirent responce pour le Roy d'Angleterre ceux à ce commis audit Archeuesque, que quand ils auroient autant conquesté du païs du Roy de France que le Roy de France auoit conquesté sur eux, il seroit temps de parler de ceste matiere, qui fut responce de mauuais exemple : & ainsi s'en retourna ledit Archeuesque d'une part & ledit Cardinal d'autre, pour porter leur responce au

Pape Nicolas: & autre chose par eux ne fut faicte en ceste matiere. En ce pas icy dit le Chroniqueur d'Arras, que la conclusion ainsi prinse que dit est par ceux de Gand pour le fel, voyans que leur seigneur estoit indigné contre eux pour le refus de celle imposition, ou autrement ils se prindrent à murmurer contre iceluy leur seigneur, & esleuez en orgueil & despits, se meirent sus en grand nombre & prindrent plusieurs des officiers du Prince demourās en leur ville, & les feirent decapiter sans mercy. Puis feirent trois nouueaux officiers nommez en leur langaige Hogueuens, qui vault à dire souuerains hommes, & les feirent capitaines d'eux, dont le principal estoit nommé Lieuin Seue, qui estoit vn pauvre maçon: les autres deux estoient aussi gens de bien pauvre estat. Ces choses venues à la cognoissance du Duc, il feit tout incontinent son mandement pour assembler gens d'armes en Picardie & en Haynault principalement: & enuoya à Audenarde pour capitaine de la ville vn gentil-homme & vaillant cheualier natif de Haynault, nommé messire Simon de Lalaing, & avec luy vn autre cheualier nommé le seigneur des Cornets. Oudit an en la sepmaine peneuse trois des membres de Flandres: c'est à sçauoir ceux de Bruges, d'Ippre & du Franc, enuoyerent leurs deputez à Bruxelles deuers le Duc leur Prince, & avecques eux vn Chartreux du Conuent de Gand: Lesquels au iour du benoist vendredy se trouuerent deuers le Duc, & luy prierent par la bouche dudit Chartreux estans à genoux deuant luy en grand humilité, que pour l'honneur & en reuerence de Dieu & de sa sainte passion il voulsist aux Gantois pordonner son maltalent, & auoir pitié de son païs de Flandres, offrāt pour iceux Gantois amender leurs meffais audit iugement de ceux de son conseil, se croire les vouloient: ausquels le bon Prince respondit que pour l'honneur & reuerence de Dieu & du bon iour qui estoit, moyennant qu'ils feissent reparation de leur meffait au loz de son conseil, il leur pardonneroit tous leurs meffais. Or aduint entre-tant qu'aucuns païsans, qui eurent aucuns de leurs biens retraits à Audenarde pour doubte de la guerre, iusques au nombre de douze cens environ, vindrent comme tous ensemble iusques aux portes d'Audenarde, pour repeter & rauoir leurs biens, dont quand messire Simon de Lalaing capitaine de leans en fut aduerty, & qu'ils estoient en si grand nombre, il leur reffusa l'entrée de la ville, & à rendre leurs biens iusques il l'auroit signifié à son Prince. Lesquels païsans non contens de celle responce s'en allerent à Gand incontinent, & feirent aux Gantois leur doleance, supplians qu'ils leur feissent rauoir leurs biens, qu'ils auoient ainsi retraits à Audenarde: & lors sans tarder les Hogueuens vsans de brief conseil, feirent mettre leurs bannieres dehors, & se meirent sus iusques au nōbre de quinze mille hōmes de toutes tirs.

Comment Iaques Cueur fut prins prisonnier & les causes pourquoy, comment le Roy de France deffia le Duc de Sauoye, comment la paix en fut faicte par le moyen du Cardinal de Touteuille, & comment Thallebot reprint Bordeaux sur les Francois.

1452.

EN l'an mil quatre cens liij. fut prins & arresté prisonnier par le commandement & ordonnance du Roy Iaques Cueur son Argentier & Conseiller pour certain cas touchant la foy Catholique, & aussi crime de leze Majesté, comme autrement. Et est vray que ledit Iaques estoit accusé d'auoir

uoir baillé & deliuré aux Sarrazins ennemis de la foy Chrestienne, armeures de toutes sortes à vsaige de guerre : & mesmement enuoyé plusieurs armeuriers & ouuriers pour icelles faire, & instruire les Sarrazins pour icelles sçauoir faire, qui est ou grand preiudice & dommage de toute la Chrestienté : a esté aussi arresté pource que luy plus meü de sa vouldenté que de raison, par l'instigation de l'ennemy de nature humaine, par conuoitise ou autrement comme infidele, à rendu par sa puissance desordonnée ou autrement à vn Chrestien, qui estoit eschappé des mains des Sarrazins, où il auoit esté prisonnier par longue espace de temps, & souffert maint grãd martyre pour la foy de Iesus-Christ : & l'auoit renuoyé de fait & de force où pays de Sarrazinefme, contemnant la foy de Iesus nostre redẽpteur. A esté aussi fait prisonnier pour ce qu'il a extorqué, prins & rapiné indeüement plusieurs grãs finances sur les pays du Roy, tant en Languedoc, Languedouy comme ailleurs. Pourquoy les habitans desdits lieux se font absentez qui est le grand dommage du Roy & de son Royaume. A esté aussi arresté pource que mesmement il a pillé & desrobé les finances du Roy, desquelles il auoit le gouuernement : & lesquelles passoient par ses mains de iour en iour, parquoy fut tenu prisonnier. En ce mesme temps fut aussi arrestée prisonniere ma damoysselle de Mortaigne, pour certaines offēces qu'elle auoit faictes enuers le Roy : & pource qu'elle auoit occupé ledit Iaques Cueur & aucuns autres d'aucunes choses, dont ils estoient innocēs par haine ou autrement. Et pource qu'on trouua ce qu'elle auoit donné à entendre estre menterie, fut mise prisonniere pour receuoir autelle punition que les dessusdits eussent eu, fils eussent esté trouuez coupables & chargez du cas, la grace & misericorde du Roy en ce reseruez. Oudit an cinquāte & deux se partit le Roy de sa cité de Tours ou mois de May, & alla ou chasteau de Tuché faire la feste & solennité de la Penthecouste, & fut là iusques au mois de Iuillet : & lors se partit & alla à Meun sur Yeure pres de Bourges : & enuoya deffier le Duc de Sauoye, pour certaines & grandes extortions qu'il auoit fait au Roy & à la Couronne de France. Et au mois d'Aoust se partit avec tout son ost où il auoit belle & noble cōpaignie de seigneurs & autres gens de guerre, & tant qu'il vint ou pays de Forest pour passer & entrer ou dit pays de Sauoye. Si sceut le Cardinal de Touteuille ces nouuelles en s'en allant à Romme, lequel meü de charité s'en retourna & alla deuers le Duc de Sauoye : & puis apres deuers le Roy apres qu'il eut sceu la cause de leur debat, & traicta tant d'un costé & d'autre, que le Duc vint deuers le Roy, en promettant reparer au bon plaisir du Roy tout ce qu'il demandoit. Et ainsi s'en retourna & fut la paix faicte à Feurs en Forest. Et puis le Cardinal s'en alla son chemin deuers le Pape. Oudit an au commencement de Septembre le sire de Lesparre & aucuns des bourgeois & habitans de la ville de Bordeaux par le conseil du seigneur de Montferrant, du sire de Rosan, du sire de Lane & du sire d'Anglades sous certaine faulce couleur, trouuerent facon & moyen d'aller en Angleterre. Et eux arriuez audit pays traictèrent d'eux remettre en l'obeissance desdits Anglois fils se vouloient retourner, & eürēt plusieurs parolles ausdits Anglois. Et là fut par eux machinée grand trahison : pour laquelle mettre à effect feit le Roy d'Angleterre assembler son conseil, & y furent euocquez tous les seigneurs & capitaines du pays. Et là fut conclud d'en-

uoyer le seigneur de Thallebot le mois d'Octobre ensuiuant ou païs de Bordelois. Et ce fait s'en reuint ledit sire de Lesparre & ses complices, qui pouoient bien estre accõparagez à Iudas: car ils auoient fait serment sur les sainctes Euāgiles de Dieu d'estre bons & loyaux au Roy de France & à la Couronne. Et ils auoient conspiré faulse & mauuaise trahison, qui estoit allé directement contre les sermens qu'ils auoient faits. Et ainsi en adherans à ladicte conspiration se partit ledit Thallebot dudit païs d'Angleterre le xvij. iour du mois d'Octobre, accompagné de quatre à cinq mille Anglois & arriua en l'Isle de Medoc, où ils prindrent deux petites places pour loger partie de leurs gens. Et adonc ledit Thallebot commença à faire courre le païs pour le mettre en sa subiection, qui n'estoit pas fort à faire: car il ny auoit aucune resistance, veu que l'armée du Roy estoit retraicte, & n'y estoit demouré que pou de gës es garnisons des forteresses: la venue duquel sceüe par ceux de ladicte ville de Bordeaux, ils commencerent à parlementer les vns aux autres de la maniere d'eux remettre en la subiection des Anglois & en leur obeissance. Et vouloient les aucuns que les François estans dedans ladicte ville, dont estoit capitaine pour le Roy le sire de Coctiuy Seneschal de Guyenne, & messire Dupin, & feu cheualier & soubz-Maire de ladicte ville, s'en allassent leurs corps & biës saufs: mais ce pendant aucuns d'icelle ville allerent ouurir vne porte aux Anglois & les boutterent dedans le xxij. iour d'octobre, parquoy furent tous prins les François qui estoient dedans la ville, ou au moins la plus grand partie tant gens de guerre comme autres, & demourerent prisonniers ausdits Anglois. Ces nouuelles venues au Roy de France il fut moult dolent: & pource il y enuoya hastiuement les Mareschaux de France, le seigneur d'Orual, Ioachin Rouhault & plusieurs autres capitaines iusques au nombre de six cens lances, & les archiers pour renforcer & garder les places d'entour Bordeaux, ainsi que monseigneur de Clermont Lieutenant general du Roy esdictes marches verroit estre expedient iusques à la saison que le Roy y mettroit plus grand prouision. Neantmoins qu'auant que lesdictes gens du Roy fussent arriuez, ledit Thallebot ses gens & ses Barons du païs de Bordelois, meirent la pluspart des places du païs en l'obeissance du Roy d'Angleterre: & par especial la ville & chasteau de Chastillon en Perigord, laquelle estoit tenue par les gens du Roy de France, leur fut rendue par deffaulte de secours & s'en allerent les François leurs corps & biens saufs. Combien que ledit seigneur de Clermont si gouerna tresgrandement & vaillamment à resister aux Anglois auant la venue desdits François. Puis vindrent d'Angleterre pour renforcer l'armée dudit Thallebot le sire de Camus, le Bastard de Sombresset, le fils dudit Thallebot seigneur de l'Isle, & le seigneur des Moulins: & estoient quatre mil combattans en leur compagnie & amenerent lxxx. batteaux que grans que petits chargez de farines & de lars pour aitailler la ville de Bordeaux.


Comment les Gantois assiegerent Audenarde: & comment le Duc de Bourgongne ordonna son armée contre les Gantois: & comment les Picars conquerent le Pont-d'Espiere sur iceux Gantois & en occirent plusieurs.

Oudit



Vdit an le xiiij. iour d'Auril apres Pasques, se meirent les Gantois aux champs à grand nombre de chariots chargez d'artilleries & de viures, & s'en allerent mettre le siege à Audenarde, qui sied à cinq lieües de Gand. Et à leur venue yffit contre eux ledit messire Simon de Lalaing, & leur liura vne escarmouche: mais besoing luy fut de retourner en la ville pour la grand planté de Gantois, qui chargerent sur luy & sur les siens: mais à son retour il feit boutter le feu és faulxbourgs de la ville de ce costé là. Et les Gantois fermerent leur siege deuant ladicte ville à tous costez, tellement que viure ne personne ne pouoit plus entrer en icelle ville ne par terre ne par la riuere. Le noble Duc de Bourgogne acertené du siege d'Audenarde, que les Gantois tenoient, fut forment troublé, attendu qu'ils luy auoient puis pou de temps requis pardon de leurs meffaits. Et pourtant il feit son mandement le plus efforceemēt qu'il peut par tout le paÿs de Picardie & de Haynault: & vindrent à son mandement Iean-comte d'Estampes son consin germain, lors capitaine general de Picardie, & avec luy tous les gentils-hommes du paÿs, & leurs gens en grand nombre: lesquels tirerent vers Audenarde le chemin du Pont d'Espieres. Aupres duquel Pont estoit vn petit chastel nommé Helchin, que tenoient aucuns Gantois, & en estoit capitaine vn payfant nommé Beutremā, qui vaut autant à dire comme homme de beurre. Ceux cy ainsi auoient fortifié ledit Pont affin que les Picards ny peussent passer, & le gardoient à grand effort: mais vne compaignie de Picards trouuerēt moyen de passer en vn lieu nommé Vvatrebos, & vindrent pour enclorre iceux Gantois, qui gardoient ledit Pont d'Espieres: & l'autre cōpaignie se prindrent à traire & à lancer pour gagner le Pont. Quand les Gantois se veirēt ainsi assaillis de toutes parts ils se retrahirent en vn monstier qui estoit là pres: & les Picards passerēt le Pont, & poursuiuirent les Gantois iusques à ce monstier: & Gantois à eux deffendre tellement qu'ils tuerent trois archiers & plusieurs en naurerent, dont le Comte d'Estampes fut si desplaisant qu'il feit le feu boutter en celle Eglise, & Gantois à faillir dehors: mais tous y demourerent morts, si que nul n'en eschappa fors leur capitaine Beureman, qui s'en estoit fuy autre part à Gand: il en y eut de morts à celle fois quatre vingts & dix, lesquels furent trois iours sur le champ ainçois qu'ils fussent mis en terre. Entre ces choses le Duc de Bourgogne en approchant de Gand s'en alla loger à Grandmont bonne petite ville, seant à cinq lieües de Gand: & vindrent illec deuers luy gramment accompaignez d'hommes d'armes & d'archiers, le Comte de S. Pol & ses deux freres Thibault & Iaques, Adolph de Cleues nepueu du Duc Cornille, le Bastard de Bourgogne, messire Iean de Croÿ & grand nombre d'hommes d'armes & archiers.

Comment le Comte d'Estampes accompaigné des Picards seullement leua le siege d'Audenarde, & desconfit les Gantois ainçois que le Duc en sceut riens.



LE Comte d'Estampes accōpaigné des seigneurs de Picardie & de leurs gens, seiournant à Vvatrebos & à Launoy apres la conqueste du Pont d'Espieres, se conclud de vouloir leuer le siege que tenoient les Gantois deuant Audenarde, ainçois que le Duc en sceut riens: & pour ce faire se partirent d'illec belle ordonnance le vingtcinquiesme iour d'Auril ou dit

an cinquantedeux, & desirans de faire sçauoir leur entreprinse à messire Simon de Lalaing capitaine dedans Audenarde, trois compagnons aduenteux s'offrirent d'aller en la ville, moyennant chacun cinquante escus, que le Comte leur donna pour porter lettres audit messire Simon de Lalaing. Par lesquelles luy estoit signifié l'heure de celle entreprinse: lesquels compagnons approchez du siege voyans que de nul costé ne pourroient entrer en la ville par terre, se deuestirent tous nuds & se meirent en la riuere de l'Escault qui est illec grosse & profonde: & au nau de leurs bras feirent tant qu'ils entrerent en la ville & aduertirent messire Simon de celle entreprinse des Picards dont il fut tresfort refioüy, entre-tant marchoient auant ledit Comte & les Picards & feirent de leurs gens trois batailles. En l'auantgarde furent ordonnez Anthoine le bastard du Duc, le seigneur de Saueuses & autres. En la moyenne fut le Comte grandement accompagné. Et en l'arriergarde furent autres vaillans hommes d'armes & archiers. Quand tous furent approchez de leurs ennemis le seigneur de Saueuses fait cheualier de sa main ledit Comte d'Estampes qui ne l'estoit pas encore, lequel Comte en fit incontinent autres cinquante deux, dont entre les autres & le premier fut ledit Anthoine bastard de Bourgongne, & autres iusques audit nombre de cinquante deux. Quand ils vindrent à vn quart de lieüe d'Audenarde ils trouuerent illec de quatre à cinq cens Gantois gardant illec vn passage. Et lors aucuns Picards s'aduancerent pour les ruer ius: mais ils trouuerent vn cauain de chemin malaisé à descendre, & les conuint planer du long du chemin. Entre ceux cy estoient les principaux messire Iaques de Lalaing, les seigneurs de Bauf-segnies, de Creuecueur, de Bosqueaux & du Boz, & avec eux vn nommé le Bourgongnon: lesquels passez outre ce cauain se fourrerent entre lesdits Gantois qui tenoient ordonnance, & passerent neantmoins parmy eux. Puis rechargea sur eux ledit messire Iaques l'espée nue en sa main: mais il fut illec si enuironné de picques, qu'il y fut demouré sans doubte, n'eust esté ledit Bourgongnon qui luy donna si bon ayde & secours, qu'il eschappa du dangier. Et lors que les Gantois veirent la bataille des Picards auoir passé le cauain ils se meirent en fuite iusques à vne Eglise prochaine de leur siege, là où ils furēt presque tous morts. Ce fait les seignrs feirent tous leurs archiers mettre à pied. Or estoit le siege des Gātois autour de la ville tellemēt clos, q̄ de nuls costez nul ne fut yssu de la ville. Mais aussi ceux du costé de la riuere, qui estoit entre deux osts, ne pouoiēt secourir ceux de l'autre costé qui estoit vn grand peril pour les Gantois, comme l'adventure le monstra depuis. Quand doncques les Gantois, qui estoient du costé de Courtray, veirent & cogneurent que les Picards les venoient assaillir de ce costé là, ils yssirent de leur siege & vindrent contre eux en belle ordonnance moult bien garnis de picques & d'artillerie à pouldre: mais si tost qu'ils sentirent le traict des Picards qui leur perçoit le dos & ventre, pource que mal estoient armez, ils ne tindrent comme neant: ains se meirent en fuite, & picards à les chasser: & en occirent tant en celle fuite, que pou en eschappa que tous ny fussent morts: & fut commune renommée qu'il en y eut plus de trois mille morts. Et ne perdit le Comte qu'un nommé Iean d'Athies homme d'armes natif d'Arras, qui fut tué par son outrage. Entre-temps que ces besongnes

songnes se demenoient ainsi que dit est, & fut party & issu de Grádmont le noble Duc de Bourgongne ainsi accompagné que dit est, pour leuer les Gantois de leur siege, ja aduerty comment les Gantois estoient leuez de l'autre costé de la riuere, & que ceux de son costé tous effrayez s'en retournoient à Gand, & de tant plus s'aduança il de les trouuer & ruer ius, & il les trouua voirement & les meit en chasse, qui dura iusques aux portes de Gand, tuans & affollans tous ceux qu'ils pouoient attaindre iusques à la nuict, qui en fait la departie, & geut le Duc aux champs celle nuict. Et le lendemain au matin s'en alla à Audenarde, là où ils s'entre-feirent grand feste de l'une compaignie & de l'autre, le Duc & le Comte & toutes leurs gens. L'artillerie des Gantois qu'ils eurent laissée & habandonnée fut prinse & mise dedans ladicte ville d'Audenarde: & leurs autres bagues furent butinées des Gantois qui eschapperent de celle desconfiture, furent leurs trois hoguemans. Mais si tost qu'ils furent rentrez à Gand ils furēt prins par le commun & furent decapitez sans nulle mercy, & en leur lieu en fait le commun cinq nouueaux.

Cy parle des gens de guerre que le Duc meit par garnisons à l'entour de Gand, & d'aucunes courses que ceux feirent iusques à Gand, & ou país de Vvas.

LE siege d'Audenarde ainsi leué que dit est, le Duc grandement accompagné s'en alla à Tendremode. Et le Comte d'Estampes demoura à Audenarde, le Comte de S. Pol fut enuoyé à Allost, & le Marechal de Bourgongne avec aucuns gentils-hommes de Picardie fut enuoyé à Courtray. Et aduint tost apres que le Comte d'Estampes issit d'Audenarde pour aller courre deuant Gand, & qu'en passant deuant le chastel de Gauere il fait assaillir le chastel, mais partir conuint: car trop estoit fort & bien garny. Puis s'en alla iusques deuant Gand, & issirent de Gand aucuns vaillans hommes de cheval & de pied, qui feirent vne escarmouche sur les Picards: puis rentrerent en leur ville à pou de dommage de l'une partie & de l'autre, sinon que messire Jean de Miramont fut illec atteint d'un vireton si durement qu'il en mourut tantost apres: puis s'en retournerent les Picards d'Audenarde. Vn autre iour issit d'Allost le Comte de S. Pol & alla courre deuant Gand, & reboutta vaillamment les Gantois, qui issirent contre luy: plusieurs fois le fait ainsi. Le Comte d'Estampes y ralla aussi vne autresfois avec ses gens qui occirent plus de quarante Gantois, & les autres reboutta dedans la ville: puis s'en retourna en Audenarde, mais ils demourerēt morts sept de ses archiers. Entre Gand & Anuers est vn bon país gras & fertile, que l'en nomme le país de Vvas fort país à merueilles d'eau & de bourbes, garny de plusieurs grans & riches villaiges tous obeissans à ceux de Gand, & n'entendoient auoir autre seigneur que ceux de Gand, lesquels au temps passé pour guerres des Roys & Princes, n'eurēt oncques esté pillez n'entamez tant estoit le país fort & bien garny. Encores à celle fois les Gantois auoient ce país icy moult bien fortifié de boulleuers & de trenchiz, si qu'il estoit tresdifficile à y entrer, attendu encores que les Gantois le faisoient garder à grand cure & diligence.

LE DUC desirant d'entrer en ce país de Vvas fait faire vn bon pont de bois deuant Tendremonde, pour passer la riuere: & le pont fait & acheué vn

tres vaillant cheualier nommé messire Iaques de Lalaing fut le premier qui par l'octroy du Duc passa le pont, accōpaigné des archiers de corps du Duc & d'aucuns autres pou de gēs de guerre, le xviiij. iour de May l'an dessusdit: mais n'eut guere allé auant quand il trouua vne tresgrosse compaignie de Gantois, qui l'assaillirent & l'encloïrent tout incontinent. Et il sy porta si bien & si cheualeusement qu'onques cheualier ne le fait mieux: mais messire Iean bastard de Rēty capitaine desdits archiers de corps ne le fait pas ainsi, ains laissa cheoir la baniere du Duc qu'il portoit: & se mit à garand tout le plus tost qu'il peut. En celle tempeste furent occis sept ou huit archiers, dont les trois estoient du corps du Duc. Et le cheual de messire Phelippe de Lalaing ieune cheualier & vaillant, fut occis dessous luy en vne bourbe, là où le bon cheualier, se deffendoit comme vn sanglier aux abaiz: & n'eust esté son frere messire Iaques qui se fourra en la greigneur pressé de ceux qui tenoient son frere en mortel peril, il n'en fut iamais eschappé vif: mais messire Iaques par sa tresgrand vaillance remeit son frere à cheual maulgré tous ses ennemis: & recueillit si pou de gens qu'il auoit par si bonne façon, en soy tenant derriere soubstenāt tousiours l'effort des ennemis: les archiers mesmement qui furent demourez avec luy se deuestirent de leurs iaques & se prindrent à tirer sur les Gantois par si fiere maniere, qu'ils feirent les Gantois retraire & recreantir de leur effort, si que ledit messire Iaques & lesdits archiers s'en retournerent à Tendremonde sauuemēt. D'autre part le Comte de S. Pol accompaigné de ses deux freres & d'Aldof de Cleues, de Cornille le Bastard & de plusieurs hommes d'armes & archiers, & de ceux de Tendremonde que menoit le seigneur de Croÿ, se partirent & s'en entrerent oudit paÿs de Vvas, pour prendre deux boulleuers que les Gantois tenoient à Ouuremare, vn gros village seant oudit paÿs de Vvas. Eux venus illec ils assaillirent les Gantois si asprement qu'ils habandonnerent les boulleuers, & s'en fuirent à Gand ceux qui se peurent sauuer: puis se meirent les gens du Duc en ordonnance pour aller à Locres vn autre gros village, que les Gantois tenoient, & y estoient pres de trois mille combattans: lesquels auoiēt promis secours à ceux d'Ouuremare, & venoiēt en ce point pour les secourir: mais ils vindrent trop tard: comme doncques ils venoient en bonne ordonnance de bataille, & les gens du Duc les veirent venir: le Comte de S. Pol qui conduisoit l'auantgarde fit illec cheualiers nouveaux: c'est à sçauoir Aldof de Cleues, Thibault seigneur de Siennes frere dudit Comte, Cornille bastard de Bourgōgne lors gouuerneur de Luxembourg saige damoisel, prudent & vaillant & bien-aymé de chacun, & aucuns autres. Ceux cy vindrent d'vn costé sur les Gantois qui marchoient tousiours auant cōtre la bataille du seigneur de Croÿ, qui marchoit contre eux aussi: & partant se trouuerent iceux Gantois assailliz des deux costez si roidement, que tous y demourerent que morts que prins: en celle seconde besongne feirent merueilles d'armes quatre ou cinq des archiers de corps du Duc. Dont les principaux furent Hoste le Sur, & le Martre, puis se retrahirent tous à leurs places.


Comment les Gantois fortifierent Nieuue en Flandres: & comment le Comte d'Estampes les rua ius: & comment iceux Gantois voulurent rompre vne digue pour noyer le païs, là où furent de rechief desconfits.

Entre



Ntre Gand & Audenarde estoit lors vn gros village nommé Nieneue que les Gantois auoient malement fortifié de trenchiz & boulleuers, & s'estoient là retraits vne grosse compaignie pour catillier les Picards d'Audenarde. Mais le Comte d'Estampes qui se tenoit à Audenarde manda vn iour ceux de la garnison de Courtray, & s'en allerēt ensemble pour conquerre ce village & en bouter hors leurs ennemis (ce fut le vingt-cinquiēme iour de May l'an cinquante & deux dessusdit) ils prindrent de venue & par force lesdits boulleuers & le village, & meirēt les Gantois à desconfiture sans tarder. Or aduint que le Comte se remeit aux champs, & aucuns de ses gens passerent le pont chassans apres les Gantois : aucuns autres se tindrent dedans le village, & descendirent illec pour eux rafreschir: mais n'y eurent guerre seiourné quand vne grosse compaignie de Gantois qui se furent recueillis ensemble, vindrent rentrer en ce village, trouuerent ceux la qui ne se doubtoiēt plus de riens & en meirent à mort ceux qui peurent attaindre. Entre lesquels furent illec occis le seigneur de Herin cheualier, Ciboy Boucly, Iennequin le Preucst, Iean Dinde & aucuns autres iusques à treize bien vaillans hommes d'armes de l'hostel du Comte d'Estampes, & bien cinquante archiers. Et tous y fussent demourez n'eust esté le secours & ayde du seigneur de Saueuses qui y vint premier & si porta moult vaillamment : & tost apres y retourna le Comte à toutes ses gens & fut illec fait vn tresdur hutin & mortel. Mais neantmoins les Gantois y furent desconfits la seconde fois, & y moururent plus de douze cens Gantois: les autres se sauuerent és bois & és haies. Apres laquelle desconfiture le Comte feit mettre les morts de son costé en vne maison: puis feit le feu bouter dedans & par tout le village, puis s'en retournerent à Audenarde. Tost apres le Duc estant à Tendremonde desirant d'entrer à puissance au païs de Vvas, auoit mandé en Picardie archiers & arbalestriers que les bōnes villes luy eurent enuoyez en grand nombre, & feit venir vers luy toutes ses gens des garnisons de Courtray, d'Audenarde, d'Alloz & de toutes parts pour entrer audit païs: esquelles bonnes villes il enuoya demourer les archiers & arbalestriers des bōnes villes de Picardie, pour les garder tandis qu'il seroit au païs du Vvas. Quand les Gantois furent aduertis de celle grande assemblée ils enuoyerēt vne grosse compaignie de leurs gens pour rompre vne digue de mer, laquelle rōpue pourroit noyer tous ceux qui seroiēt oudit païs du Vvas: mais le Duc qui de ce fut aduerty, enuoya sur ceux vne grosse compaignie de ses gens sous le Côte de S. Pol, lequel exploicta si diligemment qu'il vint trouuer iceux Gantois, & les rua ius incontinent: si qu'il en y eut de morts plus de cinq cens & les autres s'en fuirent & fut la digue refaictē & rassurée. Puis s'en retourna le Comte deuers le Duc, & trouua que Iean Duc de Cleues nepueu du Duc, luy auoit tout nouuellement amené pour le seruir en celle guerre vne belle compaignie d'Allemands, gens de guerre, hommes d'armes & crennequiniers: dont le Duc son oncle luy sceut bon gré. Et si y estoit venu aussi Charles fils legitime du Duc Comte de Charrolois.

Cy parle de la bataille de Rippemonde où les Gantois furent desconfits par leur seigneur le Duc de Bourgongne.



Le sixiesme iour de Iuin oudit an cinquante deux, se partit de Tendremonde à toute son armée le noble Duc de Bourgongne, pour entrer ou pays de Vvas. Et ordonna ses gens en trois batailles: c'est à sçauoir le Comte de S. Pol en l'auantgarde, ses deux freres avec luy, messire Cornille le bastard, le seigneur de Sauueses, messire Iaques de Lalaing & autres: le Duc se teint ou moyen de la bataille son fils avec luy, les Cheualiers & escuyers de son hostel & vne partie des Picards, le Comte d'Estampes & le Duc de Cleues son beau fils feirent l'arrieregarde. Ceste ordonnance ainsi faicte ils tirerent à Vvasselé vn gros village où les Gantois festoient mallemét fortifiez, & l'attendoient à bataille, garnis d'engins & d'artillerie à grand planté pour defendre vn boulleuert qu'ils auoient fait moult fort. Quand le Duc approcha de Vvasselé doutant se les Gantois veoient toute sa puissance ensemble qu'ils ne voulsissent point issir de leur fort, enuoya vne bonne compagnie deuant pour regarder le maintien des ennemis, & pour les catillier affin de les tirer au chāps. Et entretemps marchoient tousiours auant les trois batailles assez pres l'vne de l'autre pour plusgrād seureté, tellemét toutesuoyes que les Gantois ne pouoiēt veoir que la premiere bataille du Duc de Bourgongne. Si tost que les Gantois choisirent ces coueurs & veirent ceux de l'auantgarde qui les suiuiroient, estimans qu'il n'en y eust plus derriere, comme fiers & orgueilleux issirent incontinent de leurs boulleuers, & vindrent pour charger sur ces coueurs qui se meirent en fuitte sans tarder, ainsi comme le Duc leur auoit ordonné: & Gantois à les chasser iusques là où le Duc les attendoit à bataille rengée, toutes ses gens de traict à pied. Là cōmença fiere bataille & mortelle, Gantois à tirer de couleuvres, & Picards à traire fiesches, tant & si roidement que leurs ennemis ne les peurent plus souffrir: ains tournerent le dos, & hommes d'armes à les suiuir & abbatre, tuer & affoler, si que c'estoit horreur de regarder. Mais aduint en celle chasse que messire Cornille le bastard fut atteint d'un Flament, d'une picque en sa gorge qu'il n'auoit point de gorgerin, & fut occis illec, qui fut vn grād dommage pour le grand bien que l'en veoit florir en luy. Neantmoins Gantois furent desconfits & en moururent illec plus de deux mille cinq cens. Les autres se retrahirent à Acre, vn gros village qu'ils auoient tresbien fortifié de trenchiz & de boulleuers, & le Duc recueillit toutes ses gens & se meit au retour, louant Dieu de la belle victoire qu'il luy eust ce iour donnée: mais ainçois feit il leuer le corps de son fils Bastard & l'enuoya bien honnorablement à Bruxelles, là où il fut enterré en l'Eglise de saint Goule.

Comment ceux d'Acre habandonnerent la place & fut la ville arse par les gens du Duc: & comment le Roy de France enuoya ambassadeurs en Flandres deuers le Duc pour mettre paix ou pais.



Le lendemain de celle bataille de Rippemonde, veindrent ou seruice du Duc le seigneur de la Vere Hollandois portant l'ordre du Duc, & le seigneur de Launoy lors gouuerneur de Hollande, & en leur compagnie trois mille combattans: dont la pluspart estoient crennequiniers, dont le Duc fut resiouy. Mais souuenant de la mort de son bastard qu'il ne pouoit oublier, il commanda à ardoir & brusler tous les villages du pays du Vvas, & tost apres

apres furent bruslez plusieurs gros villaiges : & plus en y eust eu ce ne fust que les pources gens des villaiges vindrent en grand nombre crier mercy à leur seigneur à nuds pieds en grande humilité : & le bon Duc & piteable eut pitié d'eux & fait les feux cesser. Puis se tira vers Acre où Gantois se tenoient en grand nombre : mais ne l'oserent attendre, ains s'en firent habandonnans la place, & le Duc fait tout brusler & fut la ville arse. Entre ces choses le Roy de France Charles vij. de ce nom enuoya deuers le Duc vne notable ambassade : de laquelle il nomma chief le Comte de S. Pol lors estans avec le Duc : lequel Comte alla au deuant d'eux iusques à Tournay, là où ils furent grandement festoyez. Puis retourna sçauoir au Duc où il voudroit parler à eux, & il les fait venir à Tendremonde là où il estoit venu pour les ouïr, & auoit laissé son armée au pays du Vvas. Lesdits ambassadeurs remonstrerent au Duc que le Roy se donnoit grand merueille pourquoy il destruisoit ainsi le pays de Flandres, qui estoit tenu de la couronne, & que les Gantois qui estoient felons & orgueilleux se pourroient allier aux Anglois & les pourroient mettre en leur ville, qui pourroit tourner à grand preiudice pour tout le Royaume : en enhortant le Duc de Bourgongne de faire paix aux Gantois se faire se pouoit, en luy commandant de par le Roy qu'il fait celle guerre cesser. A laquelle proposition le Duc fait responce de soy mesmes, disant qu'il ne craignoit en riens que les Anglois se boutassent dedans Gand : & que pour nul homme viuant il ne feroit paix aux Gantois qui deuoient estre ses subiects, que premierement ils ne se rendissent à sa volenté, & que à l'ayde de Dieu & de ses bons amis il les y mettroit bien par force, se par amour ne le vouloient faire. Laquelle responce ouïe par les ambassadeurs, ils n'en parlerent plus pour celle fois. Mais ils firent tant que le Duc à leur requeste & pour l'honneur du Roy leur octroya trefues de trois iours, & si leur bailla saufconduit pour certain nombre de Gantois venir deuers luy se bon leur sembloit, pour traicter de la paix. Ces choses ainsi faictes iceux ambassadeurs (sinon le Comte de S. Pol) s'en allerent à Gand où ils furent treshaultement receuz. Et en la maison de la ville aduertirent les Gantois assemblez illec en tresgrand nombre, de la charge qu'ils auoient eue du Roy des remonstrances qu'ils auoient faictes au Duc, & de la responce qu'il leur auoit faicte. Lesquelles choses ouïes iceux Gantois leur dirent que voiremēt leur seigneur leur estoit trop dur & trop merueilleux, & qu'il leur vouloit oster de leurs preuileges : ce que pour riens ils ne voudroient souffrir, disans aux ambassadeurs s'ils ne vouloient autre chose dire qu'ils vuidassent de la ville tout incontinent. Si s'en partirēt sans plus y arrester & s'en retournerent deuers le Duc.

Comment le Coutellier de Gand fut prins en bataille & Gantois desconfits : & comment ils furent de rechief desconfits à Huiſt & à Moulebecque.

LEs ambassadeurs du Roy de France ne furent oncques plustost yssus de Gand, qu'ils yssirent de Gand plus de cinq mil hommes armez pour cōbattre les gens du Duc, où qu'ils les trouuassent. De laquelle compagnie estoit chief & capitaine vn coutellier de Gand gros homme & pesant, lequel s'estoit vanté de ruer ius le Duc : & les Gantois luy auoient iuré & promis se ainsi le faisoit qu'ils le feroient leur seigneur du pays de Vvas,

voire Comte de Flandres: ceux cy tirerent vers Huiste vn gros villaige où se tenoit monseigneur le Bastard de Bourgogne Anthoine, à grand compaignie de bonnes gens de guerre, & là les cuidoient surprendre: mais ils sçauoient leur venue, & yssirent aux champs contre lesdits Gantois: lesquels ils assaillirent si fierement qu'ils les meirent à desconfiture, & en tuerent bien trois mille: le coustellier fut prins & plusieurs autres Gantois, que le Bastard enuoya à son pere le Duc: lequel les feit tous pendre & estrangler, pource que oncques ne voulurēt crier mercy au Duc leur seigneur, tant le hayoient ils obstineement, & si leur promettoit on sauuer leurs vies, fils eussent voulu crier mercy, qui estoit voirement vn grand signe de haine obstinée & chose de bien grand merueille. Ceux qui eschapperent de celle bataille qui estoient bien encores deux mille hommes, se retrahirent vers Moulebecque vn gros villaige où se tenoient vne grād compaignie de leurs gens, que les Hollandois auoient assiegez droit à celle heure, & ne sçauoient riens d'icelle desconfiture de Huiste: & pourtant quand ils veirent ceux la venir ils se meirent en belle ordonnance de bataille, & en les approchant se prindrent à traire sur eux de leurs Crennequins si dru & si durement que plusieurs en occirent. Et d'autre part ledit Bastard qui chassoit apres eux, les rattaing illec: si que de rechief iceux Gantois furent oultreement desconfits, si que pou en eschappa que tous n'y feussent morts ou prins bien deux mille qu'ils estoient.

Q V A N D ceux de Moulebecque sceurent que leurs compaignōs estoient ainsi morts & desconfits, ils habandonnerent leurs boulleuers & leurs fors & s'enfuirent à Gand. Si que quand messire Anthoine le Bastard & les Hollandois vindrent illec en intention d'assaillir les fors, ils n'y trouuerent personne: si entrerent dedans sans contredit, prindrent & pillerent tout ce qu'ils y trouuerent de bon. Puis bouterent le feu par tout & fut la ville toute arse: le Duc estoit lors à Hoiguemustre vn gros villaige au paÿs du Vvas, & là le trouuerent les ambassadeurs du Roy à leur retour de Gand, & luy dirent tout ce qu'ils auoient veu & ouÿ des Gantois: dont iura le Duc que iamais paix à luy n'auroient s'ils ne se mettoient du tout à sa volenté: & s'ils ne se y vouloient mettre qu'il les y mettroit par force, ou il mourroit en la peine. Et lors sans tarder il se partit de son logis & s'en alla à Axelle pour aller loger deuant Gand, & en approchant la ville conquist Axelle & tout le paÿs du Vvas. Puis s'en alla loger & arrester deuant Gand en vn lieu nommé Long-pont assez pres de la ville. Quand ceux de Gand veirent ce ils enuoyerent deuers les ambassadeurs du Roy, & leur feirent prier qu'ils feissent tant enuers le Duc qu'il leur enuoyast saufconduit, & ils enuoyerent deuers luy pour y trouuer moyen de paix. Le bon Duc à la requeste desdits ambassadeurs & pour l'honneur du Roy, leur enuoya le saufconduit, disant toutesuoyes à ceux qui le porterent à Gand que ja traicté il ne feroit à eux s'ils ne mettoient leurs corps & la ville à sa volenté. Entretemps que ces choses se faisoient (comme dit est) les gens du Duc courroient tous les iours iusques aux portes de Gand bruslans moulins & maisons entour la ville, & au paÿs enuiron sans nul mercy. Et qui empiroit encores les Gantois trop mallement, ils auoient l'epidimie en la ville si terriblement que c'estoit horreur & pitié: eux ainsi enuoloppez en tant de miseres doutans que pis ne leur aduenist,

nist, renuoyèrent prier aux ambassadeurs de France qu'ils voulsissent encores celle fois venir à Gand, & ils y allerent: eux venus illec feirent assembler le peuple sur le marché & leur monstrent le saufconduit de leur seigneur. Puis conclurent illec que ceux qui vouloient la paix se meissent à vne part, & les autres d'autre part. Et lors sans tarder se meirent à vne part de ceux qui demandoient la paix bien sept mille hommes. Mais de l'autre part de ceux qui demandoient la guerre, se meirent ensemble plus de douze mille hommes: dont leur dirent les ambassadeurs qu'ils reueinssent tous le lédemain en celle mesme place, pour veoir se l'en les pourroit accorder ensemble, & s'en rallerent chacun en sa maison iusques au lendemain que reuindrent sur le marché ceux qui demandoient la paix, & n'en y vint nul des autres. Ceux qui furent là venus requirent aux ambassadeurs qu'ils s'en retournassent deuers le Duc & emmenassent avec eux aucuns leurs deputez, pour trouuer leur paix, se faire se pouoit par quelque bonne maniere: eux venus deuers le Duc, ceux ambassadeurs procederent tellemēt avec le bon Duc qu'ils obtindrent vnes trefues à six sepmaines, par si que les Gantois bailleroient au Duc bons & souffisans hostaiges, & promettoient (si pendant ce terme la paix ne pouoit estre trouuée) de rendre audit Duc tous dommages & interēsts qu'il pourroit auoir pour rompre son armée. Et ceux qui luy conuiendroient mettre à la remettre sus, avec les gaiges de ses gens d'armes pour lesdictes six sepmaines: c'est à sçauoir de ceux qu'il laisseroit par garnisons entour Gand, à Courtray, à Audenarde, à Alost & à Tendremonde: & si ne pourroient iceux Gantois mettre en leur ville autres viures durans les trefues que ceux qu'ils auoient. Lors ne pourroient aussi entrer en quelque bonne ville de Flandres sans congé prendre à la porte. Fut aussi ordonné que le parlement pour celle paix se tiendroient à l'Isle, & qu'ils n'y pourroient venir de Gand que cinquante deputez seulement. Ces choses ainsi pourparlées & conclutes, les trefues furent criées en l'ost du Duc, & donna congé à ses gens d'armes de retourner chacun en sa place, sinon à ceux qui laissa es villes dessus nommées pour la garde d'icelles: & s'en alla le Duc à Bruxelles, & ceux de son conseil s'en allerent à l'Isle. Ceux de l'ambassade du Roy enuoyerent vn herault à Gand pour publier les trefues: & auoit son varlet vne iournade vestue, où estoit l'en-seigne du Duc, c'est à sçauoir la croix de S. Andrieu: mais ce varlet fut prins en la ville en menant ses cheuaux boire & pendu & estranglé en despit du Duc, & en vengeance de la mort de leur Coutellier. Et le herault s'en retourna sain & sauf tout effrayé.

Cy parle des poincts du traicté que feirent les Ambassadeurs de France à l'Isle pour appaiser les Gantois à leur Seigneur, dont neantmoins ils n'en tindrent riens à Gand.



Le vingt & deuxiesme iour de Iuillet l'an cinquāte deux, enuoyerent ceux de Gand cinquante de leurs deputez à l'Isle, pour cōuenir avec ceux du conseil du Duc leur seigneur, & ceux de l'Ambassade de France pour paruenir à traicté de paix: & avec eux vn nommé maistre Iean de Poupincourt aduocat de Parlement, & fut ausdits ambassadeurs baillé par escript tout ce que chacune des parties vouloit dire & proposer: le

Duc n'y vouloit point assister. Mais à l'instance de ceux de son conseil & à la priere des ambassadeurs du Roy, il se partit de Bruxelles & arriua à l'Isle le vingtseptiesme iour d'Aoust oudit an. Quand les deputez veirent que leur ap-
pointement se deuoit rendre, & que les trefues de l'ost deuoient faillir, ils ne
oserent là plus demourer. Ains s'en retournerent à Gand, & ne laisserent à l'Isle
que deux heraulx & vn truchement. Neantmoins apres leur departement tost
apres les ambassadeurs de France rendirent sentence sur les dissentions, estans
entre le Duc & les Gantois, qui fut telle que les Gantois feroient ce qui s'ensuit.
C'est à sçauoir que la porte par laquelle ils vuiderent pour aller assieger Auden-
arde, seroit close à tel iour de la sepmaine qu'ils yssirent de leur ville chacune
sepmaine. Item que la porte par laquelle ils allerent à la bataille de Tendre-
monde seroit condamnée & close à tousiours. Item mettroient ius & à neant
les Blancs-chaperons qui estoit leur enseigne pour la guerre. Item que les
bourgeois forains de Gand ne feroient plus submis de respondre à la Loy de
Gand, mais seulement ceux de la ville & Banlieuë. Item qu'ils ne baniront
plus personne sans nommer les causes pourquoy, qu'ils ne faisoient iamais.

Item que au renoueller la Loy de la ville, seroient par les officiers du Com-
te de Flandres esleuz quatre nobles personnes, & quatre de par le commun de
la ville: lesquels renouelleroient la Loy, pource que parauant ils mettoient en
leur Loy vingt & quatre hommes, dont les douze estoient tousiours de la ba-
niere des tisserrans: laquelle maniere de faire seroit du tout abolie. Item pour-
ce que tantost qu'il y auoit trouble en la ville, ils mettroient leurs banieres de-
hors & s'assembloient sur le marché: fut ordonné qu'ils ne le feroient plus, &
que les banieres seroient mises en vn coffre qui se clorroit à cinq clefs, dont le
Baillif de Gand en garderoit l'vne, le premier escheuin vne, le grand doyen des
mestiers vne, & les autres deux garderoient deux preud'hommes esleuz de par
la ville, & si ne se assembleroient plus sur le marché. Item que les Escheuins
de la ville ne se escriroient plus en leurs lettres missibles ne autres seigneurs de
Gand. Item que tous ceux de la Loy, les Doyens & les Hoiquemans de la vil-
le & autres iusques deux mille personnes d'icelle ville, ystroient de la ville ve-
stus de leurs chemises seulement, & viendroient demy lieuë hors de la ville
crier mercy à leur seigneur à genoux humblement, disans que mauuaisement
à leur tresgrand tort ils auoient commencée la guerre cōtre luy, qui estoit leur
seigneur en demandant pardon de leur meffait. Item se aucuns des officiers du
seigneur delinquoient aucunement de lors en auant, ceux de la Loy n'en pour-
roient cognoistre. Ains les renuoyeroient au iugement de leur seigneur ou de
son conseil. Item sur ce que ceux de la Loy auoient accoustumé de cognoistre
de ceux du païs de Vvas, de ceux d'Alloz, de Tendremonde & d'Audenarde
fut appointé que les ambassadeurs en ordonneroient dedans la fin de l'an: c'est
à sçauoir de leur laisser celle auctorité ou de leur tollir. Itē que pour les fraits
& despens que leur seigneur auoit mis en celle guerre, ils seroient tenus de luy
payer deux cens cinquante mille riddes. Telle fut la sentence des ambassadeurs
de France à l'encontre de ceux de Gand: lesquels neantmoins n'en voulurent
riens tenir quelque promesse qu'ils en eussent faicte.

Comment les Gantois recommencerent la guerre contre leur seigneur & ardirent Huiste. & comment vn Herault de France eschappa de la ville de Gand.



Vand les deux Heraulx & les Truchemens de Gand furent retournez à Gand, & que les ordonnances de la paix furent leutes deuant le commun, ils se prindrent comme tous à murmurer & à dire, que les ordonnances estoient trop dures à porter, & se partirent d'illec sans les accorder ne contredire, & en ce point se teindrent bien quinze iours. Pendant lequel temps aucuns mauuais garnemens se meirent sus en grand nombre: & feirent capitaine d'un mauuais garson qui se nommoit le bastard de Blanc-Estain, & se nommerent les compagnons de la Verde tente. Ceux cy doncques bien armez & embastonnez, s'en issirent vne nuit de Gand & se tirerent vers Huiste vn gros village qui se fust rendu à leur seigneur. Eux là venus feirent allumer torsins & fallots à vn costé de la ville pour abuser ceux de dedans, & qu'ils cuidassent qu'ils voulsissent par là entrer en la ville. Car voiremēt ceux de la ville s'en allerent tous celle part pour eux deffendre. Mais les fins gueux tendoient à entrer ens par l'autre costé: & de fait y entrerent sans contredit, & se prindrent à tuer tous ceux qu'ils peurent attaindre. Puis prindrent tous les biens de la ville & bouterent le feu au demourant, & puis s'en retournerent à Gand. Entre ces choses les Ambassadeurs du Roy attendans à l'Isle la respōce des Gantois, s'ils tiendroient le traicté ou non: estans tous esmerueillez qu'ils n'en oyoient nouuelles enuoyerent à Gand vn herault portant leurs lettres à ceux de la ville, pour sçauoir leur volenté: le herault venu à son logis pria à son hoste qu'il le voulsist adresser à bailler ses lettres. Son hoste qui eut pitié de luy, luy dit qu'il se gardast de parler de riens si cher qu'il aymoist sa vie: & s'il estoit cogneu qu'il estoit mort sans remede, & le fait tenir tout le iour en sa chambre sans issir: & le lendemain luy bailla son varlet à le conuoyer hors de la ville, disant se on luy demādoit riens à la porte, qu'il dit qu'il estoit vn marchand de France qui venoit d'Anuers, & si luy fait sa robbe vestir à l'enuers. Le Herault mal asseuré creut son hoste, vint au matin à la porte qui estoit close: ceux qui gardoient la porte luy demanderent dont il estoit, & il leur respondit qu'il estoit marchand de France & venoit d'Anuers: ils luy demanderent le vin, & il alla à sa bourse: entretant ceux ouurirent la porte & il picque son cheual des esperons, & s'en fouit sans riens payer: & ne fust seur iusques à ce qu'il vint à l'Isle, & compta son aduenture aux ambassadeurs de France, les maistres: lesquels cognoissans que les Gantois ne tenoient chose qu'ils eussent promise, prindrent congé du Duc & s'en retournerent en France deuers le Roy Charles, & emporterent du noble Duc Philippe qu'il leur donna pour leur peine six mille riddes d'or.

Encores ne sçauoit le Duc la prinse de Huiste iusques à ce que les Gantois eurent prins & arse la ville d'Axelle: & si cuiderent auoir prins la ville d'Allost: mais messire Anthoine de Vvissoc qui la gardoit pour le Duc, la deffendist si bien qu'ils n'y gaignerēt riens. Mais en retournant à Gand ils bouterent les feux en tous les villages qu'ils trouuoient obeïssans à leur seigneur, mettans à mort hommes, femmes & enfans sans nul mercy.

Comment le Duc r'assembla gens d'armes pour guerroyer les Gantois: & comment iceux Gantois ardirent Harlebecque vn gros villaige pres de Courtray: puis parle des besongnes qui aduindrent de celle guerre à celle fois.



LE Duc de Bourgongne Comte de Flandres attendant à l'Isle la response des Gantois, fut aduerty comment ils auoient prins & ars Huiste & Axele: & pourtant il remeit sus son armée tout incontinct, & manda celle fois venir à son aÿde le mareschal de Bourgongne seigneur de Beaumont à noble compagnie de Bourgongnons, lesquels y vindrent en bel arroy: mais entretemps que ceste armée se mettoit sus, les Gantois en vne tresgrosse compagnie issirent de Gand le xxij. iour de Septembre oudit an lij. & s'en allerent ardoir Harlebecque vn gros villaige seant à demie lieuë de Courtray, & y tuerent plusieurs gens, hommes, femmes & enfans: pourquoy le Duc tout incontinct enuoya à Courtray son nepueu messire Aldof de Cleues, bien accompaigné de gens d'armes & de traict: lesquels venus à Courtray trouuerent ceux de la ville moult effrayez, mais les Gantois s'en estoient retournez à Gand. Quand le Duc eut toute son armée assemblée, il enuoya à Courtray le Mareschal de Bourgongne & le constitua chief de toute l'armée: messire Anthoine le bastard s'en alla à Tendremonde, messire Symon & messire Iaques de Lalaing furent ordonnez à Audenarde, messire Anthoine de Vvissoc à Alloz, messire Aldof de Cleues reuint avec le Duc à l'Isle: le Mareschal de Bourgongne venu à Courtray fait sçauoir par tout le plat paÿs que quiconques vouloit tenir le party du Duc, meissent leurs biens és forts lieux à sauueté, par especial ceux qui estoient à cinq lieuës de Gand. Dont aduint que la pluspart des villaiges se retrahirent à Gand, & y porterēt leurs biens. Et lors iceluy Mareschal fait pendre tous les prisonniers qu'ils auoient de Gand. Et d'autre part les Gantois ne prenoient homme nul à rançon ne à mercy quelque grand qu'il fust, ne quelque finance qu'ils peussent payer tant estoit la guerre mortelle: mais trop plus du costé des Gantois que de ceux du Duc: le Mareschal voyant que ceux du plat paÿs de cinq lieuës de Gand se furent retraits, & eurent porté leurs biens à Gand, il enuoya courre le paÿs & fait ardoir presque tous les villaiges estans à cinq lieuës de Gand & iusques à Gand, especiallement sur les passaiges. Et se les Picards ou Bourgongnons en laissoient aucuns sans les ardoir, les Gantois les alloient brusler: & pourtant tout y estoit bruslé ou de l'une partie ou de l'autre, qui estoit vn moult grand meschief pour tout le paÿs de Flandres. Entre ces choses messire Iaques de Lalaing s'en alla vn iour courre iusques aux portes de Gand & ardist deux de leurs moulins, & si print quinze chariots chargez de blé que l'en menoit à Gand, & les fait mener à Audenarde: car nul issit de Gand sur luy à celle fois. D'autre part le Mareschal de Bourgongne alla vn iour courre iusques à Gand en intention de combattre les Gantois s'ils fussent issus, mais ils n'issirent point à celle fois: & il s'en retourna par deuant Poulcres vn bon chastel, & print la basse court d'assault, puis y fait bouter le feu, pource que ceux de dedans se furent retraits dedans le chastel qui estoit bon & fort, puis s'en retourna à Courtray. Le xxv. iour d'Octobre oudit an lij. par vn vendredy se partit de Tendremonde messire Anthoine le Bastard de Bourgongne, &

avec

avec luy ceux de la garnison d'Allost qu'il eut mādéz pour aller courre deuant Gand, & enuoya deuant iusques à trente coureurs bien montez pour esmouuoir les Gantois à issir aux champs. Lesquels Gantois aduertiz de leur venue estoient tous prests armez & embastonnez pour issir, & issirent si roidement sur lesdits coureurs, qu'ils en furent tous esbahis. Car avec les Gantois estoient lors aucuns Anglois aduantureux qui furent là venus pour gaigner, & estoient de cheual, & les Gantois estoient de pied en tresgrand nombre: qui se hastèrent tant d'aller auant, que ledit Bastard fut tout esbahy quand il les veist si pres de luy: & lors il pria tout homme mettre pied à terre, mais ne descendirent que deux hommes & trois archiers pour priere ne requeste que fait ledit Bastard, & ne sçay dont ce vint: car tous se meirent en fuitte, si que à grand peine furent les deux hommes d'armes remontez sur leurs cheuaux, mais les trois archiers y demourerent morts. Et le Bastard luy vingtiesme d'hommes d'armes tant desplaisant que plus ne pouoit, demourerent derriere & conduirent leurs gens tellement qu'ils n'en perdirent plus pour le iour, & fait à croire que celle fuitte leur sauua à tous les vies: car les Gantois aduertis de leur entreprinse (comme dit est) auoient mis sus vne autre compaignie de leurs gens qui deuoient issir par vne autre porte & aller rompre les ponts & les passaiges par où les Picards estoient passez, en intention d'enclorre iceux Picards entre leurs deux batailles, par telle maniere que iamais homme n'en fut eschappé. Ainsi doncques par celle malle-adventure furent sauuez de mort messire Anthoine le Bastard & toutes ses gens, fors seulement lesdits trois archiers.

Cy dit comment le Marechal de Bourgogne fait ardoir la ville d'Esclo: & comment les Gantois furent deboutez de deuant Allost, qu'ils vouloient assieger.

DE l'autre part ceux des garnisons de Courtray & d'Audenarde sçachans que à Esclo (qui est vn gros village à trois lieuës de Gand) se tenoient vne grand compaignie de Gantois, se assemblerent vn iour: & furent leurs principaux conduiseurs le Marechal de Bourgogne & messire Iaques de Lalaing, lesquels s'en allerent en belle ordonnance iusques à Esclo. Et lors si tost que les Gantois les veirent entrer dedans, ils se meirent en fuitte & gaignerent le bois qui estoit là pres: mais tous n'y allerent pas, ains en demoura de morts ou villaige plus de quarante: Puis feirent bouter le feu en la ville, pource que ceux de celle ville ne se vouloient deporter de mener viures à Gand, ne de sonner leurs cloches si tost qu'ils veoient courre les Picards pour celle cause, principalement, fut tout arts & bruslé entour Gand iusques à cinq lieuës, & se les Picards laissoient aucuns villages sans brusler les Gantois mesmes les brusloient. Le xiiij. iour de Nouembre ou dit an lij. sçachans les Gantois que messire Anthoine de Vvissoc capitaine d'Allost s'en estoit allé vn tour en Artois, s'assemblerent bien vingt mille tout de pied, & en la conduicte d'aucun pou d'Anglois qui se tenoient de cheual, s'en allerent pour assieger Allost, de laquelle esmeute furent aduertis de bonne heure messire Anthoine le Bastard & messire François l'Arragonnois, qui se tenoient à Tendremonde. Et lors par bon aduis & par le gré dudit Bastard messire Fran-

çois accompagné de ccc. bons cōbattans s'en alla bouter dedans Alloft. Et tost apres se approcherent les Gantois pour assaillir la ville : mais messire François vaillant & hardy cheualier issit de la ville à tout ce qu'il auoit de gens laissant la ville garnie, & se vint fourrer esdits Gantois par telle façon qu'il les meit en desroy tout incontinent, & se prindrent à retourner à Gand non pas tous : car ils y demourerent morts dixhuiet Anglois & dixsept Gantois, & se la nuit n'y fut si tost venue il en y eust demouré plus largement. Le samedi ensuiuant le Marechal de Bourgogne s'en alla courre iusques à Gand, mais nul n'issit de la ville contre luy : si se meit au retour, & aduint que douze Picards archiers se eslongnerent des autres bien demie lieuë, pour gaingner fils trouuoient quelque chose. Ils passerent vn petit pont & n'y veirent personne : mais ne furent gueres eslongnez du pont quand ils choisirent deuant eux vne grosse compaignie de Gantois & aucuns Anglois avec eux. Si se meirent au retour, mais ils veirent le Pont tout chargé de payfans qui là les attendoient : Quand ils veirent ce, ils cueillirent cuer aimans plus à mourir honnorablement que estre prins & penduz, & se meirent à pied & lierent leurs cheuaux ensemble : puis se prindrent à traire de toute leur force, si qu'il n'y auoit si hardy Gantois qui les osast approcher, dont s'aduança vn Anglois de cheual lequel coucha sa lance sur eux pour les rompre & mettre en desroy : mais ils se ouurirent & le laisserent passer sans eux desroyer, & se prindrent à tirer sur luy si fierement qu'ils luy naurerent son cheual en plusieurs lieux, & fut tout ioyeux quād il se peut mettre arriere d'eux. Et lors se prindrent à corner comme fils appellassent aucun secours qui fut là pres, dont iceux Gantois furent si effrayez que tout incontinent ils se meirent au retour, & les douze compaignons regarderent deuers le pont & n'y veirent plus personne : car tous les payfans s'en estoient fuiz au bois : si monterent sur leurs cheuaux & s'en retournerent sauement avec leurs compaignons qui leur deuoit tourner à grand honneur & hardement. Entre ces choses vne autre compaignie de Picards feirent vne course deuant Gand & prindrent aucuns compaignons de la Verte tente & vn de leurs capitaines, lequel fut esquartellé & tous les autres furent penduz.

Cy parle d'aucunes entreprinſes faictes entre les Picards & les Gantois : & dit comment les Gantois allerent bouter les feux en Hainault : & comment ils furent rencontrez tantost apres.

LE second iour de Decembre oudit an lij. messire Philippe de Lalaing ieune cheualier hardy & entreprenant, s'en alla courre iusques à Gand accompagné de la garnison d'Audenarde : & lors issirent sur luy de Gand bien deux cens hommes de cheual, contre lesquels Picards se combattirent : & en leur venue tuerent vn Gantois bien en point, lequel puis pou de temps par auant auoit prins vn ieune fils du party du Duc en auoit fait son paige. Lequel paige voyant son maistre mort s'en courut rendre audit messire Philippe, & luy dit pour verité qu'ils estoient issus de Gād plus de quatre mille hommes par diuerses portes pour les surprendre & enclorre, & qu'ils pensassent du retour. En ce point saillirent de Gand bien trois cens hommes de cheual, dont se meit messire Philippe au retour en bonne ordonnance, retournant

retournant souuent & escarmouchant ses ennemis. Messire Iaques de Lalaing son frere aduerty de ceste besongne issit incōtinent d'Audenarde à tout ce qu'il peut auoir de gens de guerre, & s'en courut secourir son frere qui ja estoit à vne lieuë d'Audenarde, escarmouchant tousiours les Gantois, lesquels aussi le sui-uoient tressaigement, pour leurs gens qu'ils veoient venir de costé à grand effort pour enclorre les Picards: les Picards aussi voyans ceux la venir s'en retournerent à Audenarde sauement. Et les Gantois se logerent pour la nuit en vne abbaye à demie lieuë d'Audenarde, & le lendemain s'en retournerent à Gand.

Tost apres se trouuerent ceux de la Verde tente iusques à dix mille hommes & s'en allerent iusques en Hainault, là où ils tuerent aucuns payfans & y ardirent seize ou dixsept villages. Puis s'en retournerent à Gand sans encombrer. Et pou de iours deuant se partirent de Gand enuiron cinquante Anglois faignans d'aller courir sur les Picards: mais ils s'en allerent rendre à Tendremonde à messire Anthoine le Bastard, lequel les receut bien & volentiers, & les ordonna avec ses gens. L'un des Princes auoit nom Iean Hout: & sçachant comment les Anglois retournoient de Hainault, il s'en alla courre vers Gand pour les rencontrer à leur retour, & en trouua vne grosse compaignie: & se fourerent dedans eux Picards & Anglois tellement qu'ils en occirent plus de deux cens, & les autres s'en fuirent à Gand, fors aucuns prisonniers que prindrent les Picards & les emmenerent à Tendremonde.

Comment les Gantois enuoyerent deuers le Comte d'Estampes pour trouuer moyen de paix, & tost apres s'en allerent assieger Courtray où ils ne gaignerent guerres: puis dit comment ils cuiderent prendre la Duchesse de Bourgongne en allant à Bruges.



E temps pendant & que ceux de la Verde tente tenoient les champs le plus du temps, ceux de Gand enuoyerent prier au Comte d'Estampes qu'il leur fait auoir vn saufconduit du Duc leur seigneur, pour enuoyer à luy aucuns de leurs deputez pour trouuer quelque bon moyen de paix. Et le Comte y proceda tellement qu'ils eurent le saufconduit. Et fut le lieu pour conuenir ensemble ordonné à Bruges, là où le Duc enuoya ceux de son conseil, & en son lieu le Comte d'Estampes: auquel lieu ceux de Gand enuoyerent vn Chartreux, & vn ancien cheualier nommé messire Baudouin de Boz, que les Gantois auoient long temps tenu prisonnier, pource qu'ils l'auoient suspect & qu'il ne leur fut contraire à leurs capitales opinions: mesmement fut il iusques sur le Hourt, & les yeux bendez pour trencher sa teste: & n'eust esté qu'il y auoit des bons amis, il eust passé le pas. Ces Gantois icy venus à Bruges se demonstrerent si hautains & si orgueilleux, & comme fils n'eussent oncques riens meffait à leur Prince, & partant n'eurent point de response. Si s'en retournerent sans riens faire, sinō que le cheualier & le chartreux n'y voulurent oncques puis retourner, ains demourerent à Bruges: & les autres qui s'en r'alloient à Gand, seiournerent tant sur le chemin que leur saufconduit fut expiré: & furent rencōtrez d'aucuns Picards qui les prindrent & les menerēt prisonniers à Bruges, dont entre les autres estoient deux des plus durs ennemis que le Duc eust à Gand.

LE xvij. iour de Feurier audit an lij. ceux de Gand sçachans que leurs de-

putez estoient prisonniers, issirent de Gand en grand nombre, & en trois batailles bien ordonnées s'en allerent renger deuant la ville de Courtray: & n'y estoit point à celle heure le Mareschal de Bourgongne principal capitaine de la ville, ains estoit à l'Isle avec le Duc. En icelle ville estoit vn moult vaillant cheualier & aduenteux Picard, nommé messire Gauvain Quieret: lequel à si pou de gens qu'il auoit contre si grand peuple, issit sur eux, & les escarmoucha tresrudement: mais besoing luy fut de r'entrer en la ville, pource que les Gantois estoient en trop grand nombre. Et si tost n'y sceut r'entrer qu'il n'y perdift deux hommes d'armes & vn archier. Et lors se prindrent les Gantois à assaillir les faulxbourgs: mais ils furent si bien deffendus qu'ils n'y gaignerent riens, sinon qu'ils tuerent d'un trait vn homme d'armes, puis s'en retournerent à Gand sauvement. Le second iour de Mars ensuiuant, messire Anthoine Bastard de Bourgongne s'en alla courre vers Gand, & trouua sur les champs vne compaignie de Gantois: esquels ils se fourrerent de telle poulse luy & ses gens, qu'ils en occirent plus de cinquante, & plusieurs en prindrent prisonniers, qu'ils emmenerent à Tendremonde. Le einquiesme iour dudit mois de Mars se partit de l'Isle la Duchesse de Bourgongne par l'ordonnance du Duc son mary, pour aller à Bruges, dont les Gantois furent tost aduertis: & estimans que elle iroit à Bruges le droit chemin, se meirent sus en grand nombre, & s'en allerent mettre sur ledit chemin en bonne ordonnance pour la ruer ius, & pour mettre à mort toute la compaignie: mais la Duchesse qui en fut aduertie se destourna du droit chemin & par autre chemin s'en alla à Bruges sauvement.

MESSIRE Symon de Lalaing capitaine de l'Escluse, aduerty que la Duchesse venoit de l'Isle à Bruges, se partit de l'Escluse à tout deux cens combattans pour la conduire iusques à Bruges, & s'en vint sur le grand chemin de Bruges, non sçachant que les Gantois fussent illec: en sa compaignie estoit vn cheualier de Flandres seigneur de Maldeghen qui sçauoit les chemins & les passages: lequel en cheuauchant sur le costé du grand chemin, veit d'adventure les Gantois en leur embusche, qui guettoient sur la Duchesse & sur ledit messire Symon qu'ils veoient venir. Et lors incontinent le seigneur de Maldeghen fait ses trompettes sonner à grand force, affin que messire Symon quand il les orroit si retrahist: mais il estoit ja si aduancé qu'il estoit droit au milieu de l'embusche de ses ennemis, ainçois qu'il s'en apperceust, & se trouua tout incontinent assailly si viuement que son estandard fut abbattu, & conuint bien que luy & les siens montraissent illec leur vaillance, se mourir ne vouloient: & si bien le firent à l'aide dudit seigneur de Maldeghen qui vint illec à sa rescousse, qu'ils firent les Gantois ressortir: & puis en bonne ordonnance tous ensemble ferrez & vnis s'en allerent à Bruges sauvement: sinon qu'ils y perdirent trois ou quatre hommes d'armes & douze ou seize archiers, qui ne fut pas trop grand perte en si pesante besongne.


TROIS ou quatre iours deuant ceste besongne les Gantois qui se tenoient à Poulcres, ardirent Englemonstier, vn bon & gros villaige appartenant au Comte d'Estampes à cause de sa femme: mais au chastel ne firent ils nul mal, pource qu'il estoit fort & si estoit bien garny. Pou de temps apres les Gantois

tois requierent d'auoir faufconduit du Duc pour enuoyer deuers luy ou son conseil, là où il luy plairoit iusques à vingt de leurs deputez, pour regarder se l'on pourroit mettre fin en celle guerre si dommageuse. Le bon Duc le leur enuoya & assigna le lieu de la conuention à Sclin vn gros village à deux lieues de l'Isle, là où le Duc enuoya pour luy le Comte d'Estampes & ceux de son conseil: mais finablement ils ne feirent riens pour ce que les Gantois se tenoient tousiours en leur orgueil & Felonnie. Tantost que ceux qui furent enuoyez à Sclin furent retournez à Gand, vn François souldoyer, homme d'armes qui se tenoit à Gand pour gaigner, & se nommoit Pierre Moreau, & estoit vn de leurs capitaines. Cestuy cy assembla vn iour vne compaignie de Gantois, & s'en alla courre iusques à Tendremonde, là où se tenoit messire Anthoine le Bastard: lequel aduertie de leur venue issit cōtre eux & les escarmoucha tellement qu'ils s'en refuirent à Gand & plusieurs en tua.

Comment Pierre Moreau vn capitaine des Gantois emmena vne grande compaignie deuant Tendremonde. Puis dit d'vne grande course qu'ils feirent en Hainault, où ils feirent plusieurs maulx.

EN l'an mil quatre cens liij. le troisieme iour d'Auril apres pasques retourna le dessusdit Pierre Moreau à plusgrand compaignie que deuant deuant Tendremonde, & y liura vn grand assault: mais n'y gaigna riens, ains y perdit neuf ou dix de ses gens, puis s'en retournerent à Gand. Le quatorzieme iour du mois d'Auril ils issirent de rechief en tresgrand nombre, & s'en allerent bouter les feux en Hainault iusques vers Enghien, & vers Tournay. En laquelle course ils tuerent plusieurs gens & ardirent plusieurs gros villages, sans ce qu'ils trouuassent qui leur contredit. Pour ce selon commune renommée que les gens de guerre se tennoient de seruir le Duc, pource qu'ils n'estoient point payez de leurs souldées, & si s'en estoient pour celle cause plusieurs retournez en leurs places. Quand ce vint à la cognoissance du Duc il feit son mandemēt de gens d'armes le plusgrand qu'il eust oncques fait pour celle guerre: & furent adonc mandez Fiefes & arriere Fiefes & tous ceux qui eurent accoustumé de porter armes, delibérant en soy mesmes qu'il vouldroit mettre fin en celle guerre, & ordonna que chacun fut prest au quinzieme iour de May oudit an liij. Entre ces choses & que en l'hostel de la salle à l'Isle estoit l'artillerie que le Duc vouloit mener en Flandres. Aduint ne fut oncques sceu comment, que par vne rayere d'vne tour seruant à vn cellier, où estoient les pouldres des engins, le feu y fut bouté: & fil eust espris lesdictes pouldres celle maison, toute l'artillerie, & par aduenture toute la ville eussent esté arses & bruslée: mais par cas d'aduenture droit au point que le feu y fut iecté, & qu'il commençoit à ardoir les cercles d'un tonnel à pouldre, aucun de leans alla au celier qui estaignit le feu si appoint qu'il ne brussa riens.

Comment les Gantois cuiderent prendre d'assault la ville d'Alloft: & comment elle fut bien deffendue. Puis dit comment les trois membres de Flandres & les nations de Bruges contendirent à faire la paix des Gantois.



Le huitiesme iour de May ou dit an cinquante trois, issirent de Gand plus de quatorze mil hommes de pied & deux cens cheuaux pour assieger ou prendre d'assault la ville d'Allost, où estoient environ trois cens hommes de guerre: entre lesquels estoit messire Loys de la Vief-ville comme leur chef ou lieu de messire Anthoine de Vvissoc, qui en estoit capitaine: mais n'estoit il point en la ville ce iour. Ceux cy issirent aux champs, & vindrent trouuer les Gantois qui venoient deuât les autres qui venoient de pied, & les cōbattirent tellement qu'ils en occirent aucuns, & couuint les autres retraire & fuir iusques à leurs gens de pied: puis retournerent les Picards en la ville, & les Gantois se logerent pour la nuit deuant la ville. Mais si tost comme le iour fut venu, les Gantois se prindrēt à assaillir la ville en quatre lieux, & liurerent à vn boulleuert si dur assault qu'ils y occirent six hommes d'armes: mais messire Loys suruint illec, & s'y porta si vaillamment que les Gantois ne peurēt gagner le boulleuert, & si y perdirent environ vingt de leurs hommes. Cest assault dura biē trois heures, & y furēt assez d'hommes morts & naurez d'un costé & d'autre: mais ceux de dedans se deffendirent si bien, qu'il cōuint les Gantois reculer & retraire de l'assault, & se logerēt deuât la ville pour la nuit.

Q V A N D messire Anthoine de Vvissoc qui ce iour estoit allé à Tendremonde, fut aduerty de cest assault, ils se cueillirent bien six cens combattans de Picardie & s'en allerent pour combattre les Gantois: mais quand ils les virent en si grand nombre & en ordonnance de bataille, ils dissimulerent de leur entreprinse & se logerent deuant eux pour la nuit, & conclurent de les combattre le lendemain s'ils y veoient leur aduantage: mais à celle mesme nuit les Gantois se deslogerent de là, & s'en retournerent de là à tout leur charroy & toutes leurs bagues. Entre ces choses les trois Membres de Flandres avec ceux des nations de Bruges se trouuerent à l'Isle deuers le Duc, & luy requirent vn saufconduit pour aucuns Gantois venir deuers luy, pour trouuer moyen de paix en celle guerre: le noble Duc leur octroya pour l'amour de ceux des nations: & tost apres vindrent à l'Isle vingt ambassadeurs de Gand, & lors fut tellement besongné, que l'en cuida que la paix se trouuast à celle fois: & sur celle esperāce s'en retournerent à Gand lesdits ambassadeurs: mais quand ils eurent rapporté leur besongne, le commun de la ville n'en voulut riēs tenir & fut tout rompu. Entre-temps que ces traictez se queroient à faire, les gens d'armes que le Duc eut fait mettre sur les champs, faisoient tous les maux du monde es pays du Duc, & n'estoit homme qui allast par les chāps qui ne fut desrobbé iusques aux portes des bonnes villes, & dura ceste pestilence esdits pays par l'espace de six semaines ou plus.

Cy parle de l'armée que le Duc de Bourgongne enuoya en Luxembourg contre aucuns Allemans qui dommageoient le pais, & auoient leur retour à Tyonuille. Puis dit comment le Duc entra en Flandres à grosse armée pour guerroyer les Gantois.



Environ Pasques l'an liij. aucuns Allemans se prindrent à dommager & à courre le pays de Luxembourg appartenant au Duc de Bourgongne, & se tenoient en vne bone petite ville du pays nommée Tyonuille bonne place de guerre, & forte à merueilles: & plus n'y auoit de villes closes en la

en la Duché de Luxébourg que toutes ne fussent obeissantes au Duc de Bourgongne, sinon celle de Tyonuille. Ces Allemans icy ne cessoient de courre & de dōmager le paÿs. Pourquoy le Duc fut contraint d'y enuoyer le seigneur de Reubenpré Picard, accompagné de cent hōmes d'armes & quatre cens archiers: mais ceux cy trouuerent les Allemans si forts qu'ils ne souffisoient point pour resister contre eux, & ja fut il que le Duc eut bien à faire de gens d'armes pour demener celle guerre de Gand: neantmoins luy fut il besoing d'enuoyer à Luxembourg plus de gens, & y enuoya le seigneur de Croÿ son premier chamberlan & gouuerneur dudit Luxembourg. Et luy bailla à mener avec luy encores cent lances & huiet cens archiers, entre lesquels estoient les plus principaux le seigneur de Hames, le seigneur de Moreul, le seigneur de Dommarcq & plusieurs autres. D'autre part le xv. iour de Iuing l'an liij. les Gantois de la Verdetente ne cessoient entre-temps de courre & de boutter feux en Flandres & en Haynault, & y faisoient tous les maulx du monde. Et entre les autres coururēt vers Ath le iour dessusdit pour ardoir le paÿs, dont messire Iean de Croÿ seigneur de Chimay fut aduertie de bonne heure: & tellemēt si gouerna qu'il les rua ius, trois cēs en occit & si en print assez prisonniers, puis s'en retourna à Ath sans encombrer. Et le xx. iour dudit mois le Duc de Bourgongne se partit de l'Isle, & à tout son armée moult grande s'en alla à Courtray à grand Charroy d'artillerie, & à grand planté de pionniers pour abbatre bois & pour applanier les chemins, & grand foison de charpentiers pour faire engins: lesquels charpentiers & pionniers furent enuoyez illec aux despens des paÿs du Duc. En celle armée avec le Duc estoient pour les plus principaux le Comte d'Estampes, messire Iagues de S. Pol, frere du Comte de S. Pol: lequel Comte pour lors estoit au paÿs de Bourdelois ou seruire du Roy de Frāce contre les Anglois: il y estoit aussi le Mareschal de Bourgongne à tout trois cens hommes d'armes, qu'il auoit amenez de Bourgongne & autres plusieurs grans seigneurs cheualiers & escuyers des autres paÿs du Duc.

LE xxv. iour dudit mois de Iuing oudit an liij. se partit le Duc d'Audenarde, & à toute son armée s'en alla assieger le chastel de Helsebecque, & vn fort monstier qui là estoit: lequel monstier fut prins d'assault incontinent, & y furēt prins enuiron xxxij. Gantois que le Duc fait pendre: au second iour apres se rendirent ceux du chastel, qui estoient enuiron cent & cinq: tous lesquels furēt pendus par commandement du Duc.

Comment le Duc print le chastel de Poulcres, deuant lequel fut occis la fleur de cheualerie messire Iagues Lalaing: puis alla assieger le chastel de Gaures où fut la desconfiture des Gantois. Et dit comment il print & fait pendre tous ceux de leans aincois que les Gantois les venissent combattre.

A Pres la prinse du chastel de Helsebecque, le Duc s'en alla assieger le chastel de Poulcres que les Gantois tenoiēt obstineement. Et aduint en affustant vne bombarde deuant ce chastel que messire Iagues de Lalaing qui là estoit avec autres seigneurs, fut atteint au chief d'vne pierre de veuglere venant du chastel, & fut son hanepier emporté du coup si qu'il cheut mort illec, qui fut vn moult grand dommage: car il estoit renom-

mé qu'il n'auoit son pareil cheualier ou Royaume de France: sicomme il auoit sa vaillâce monstree en maints lieux en Escoce, en Espagne & en plusieurs autres lieux, où il auoit acheué maint grand fait d'armes: & si estoit le plus humble, le plus sage, le plus courtois & le plus large de tous autres, & craignant & seruant Dieu sur toutes riens, & n'auoit encores que xxxij. ans d'aage quand la mort malostreue le print ainsi malheureusement. Avec ledit messire Iaques furent occis dudit Veuglere de ce mesme coup vn homme d'armes & quatre archiers. Pour la mort dudit messire Iaques fut le Duc le plus desplaisant du monde: car il l'aymoit autant ou plus que nul autre de son hostel pour ses belles vertus: & pourtant il fait incontinent ses engins affuster contre la place, & ruer par si grande force qu'il n'y demoura tour entiere nonobstant la force du chastel, & se rendirent à sa voulenté tous ceux de leans. Et les fait tous pendre sans tarder, sinon cinq ou six dont l'un estoit ladre, & les autres estoient ieunes enfans. Puis fait la place abbatre iusques à terre: & le corps dudit messire Iaques enuoya il à Lalaing bien & honorablement.

A P R E S la prinse de Poulcres le Duc retourna à Courtray & laissa son armée viure sur le païs d'illec enuiron, où les gens d'armes feirēt maint domma-ge, pource qu'on ne les payoit point: car le Duc n'auoit point encores ses finances prestes, & fait lors faire des emprunts aux riches Bourgeois & marchans de ses païs, pource que celle guerre l'auoit, comme tout espuisé d'argent. Entre-temps que le Duc seiourna enuiron douze iours à Courtray ses fināces luy vindrent, & lors il fait payer ses gens d'armes pour vn mois aduenir: si que le xvj. iour de Iuillet oudit an, il se partit de Courtray & s'en alla assieger le chastel de Gauere fort chastel & bien garny, seāt entre Gand & Audenarde que les Gantois tenoient. Et en allant illec il ordonna ses gens en trois batailles: le Marechal de Bourgogne en chief, messire Anthoine le Bastard, le seigneur de Chimay Baillif de Haynault à grande compagnie d'hommes d'armes & d'archiers, menerent l'auantgarde. En la moyenne bataille estoit le noble Duc homme sans paour & le plus asseuré de tous autres, le plus hardy & le plus vaillāt. Avec luy estoient son fils le Comte de Charrolois, le Comte d'Estampes, messire Aldof de Cleues & presque tous les cheualiers & escuyers de Picardie. En l'arrieregarde estoient messire Iaques de S. Pol, le sire de l'Isle-Adam & toute la puissance de Boulenois. A la verité l'armée estoit moult à redoubter & besoing en estoit: car les Gantois se furent vantez qu'ils combattroient leur seigneur à celle fois. Quand ils sceurent que le Duc assiegeroit Gauere, ils y enuoyerent vn Anglois nommé Iean de Voz, homme d'armes bien subtil luy xvj. de gens de guerre, & luy iurerēt & promeirent au partir que le Duc n'y seroit ja vingt quatre heures qu'il n'y fut combattu: Neantmoins les gens du Duc se logerent tout à l'enuiron de la place, & furent les engins asis & affustez bien & deüement. A celle heure estoit dedans la place vne trompette qui eut autresfois seruy aucun seigneur de l'ost du Duc, & se fut rendu Gantois: lequel se print à tromper le plus hault qu'il peut, & du plus hault lieu de la place: puis se print à dire plusieurs parolles iniurieuses du Duc en l'appellant Tirant, & en le menaçant que bien brief les Gantois luy rabaisseroient son orgueil. Dont quand le Duc en fut aduertie le bon Prince n'en fait que rire, & tourna tout à la folle de celle

celle trompette. Engins se prindrent à iecter contre la place, & ja fut il qu'elle fut assise en bas lieu, & mal batable d'engins: toutesuoyes ils espouenterent tellement tous ceux de dedans, qu'ils s'offrirent rendre à la volenté du Duc, sauuez leurs vies seulement: Voyans aussi que ceux de Gand ne leur tenoiēt point ce qu'ils leur auoient promis. A quoy ils ne furent point receuz.

Q V A N D l'Anglois veit la maniere & que les Gantois luy auoient ainsi menty & failly au besoing, l'en dit qu'il parla à aucuns Anglois estans en l'ost du Duc, & qu'il promit de leur liurer vne des tours dudit chastel & de les mettre dedans: mais il ne peut tenir celle promesse, pource que les Gantois ne se fioiēt point en luy ne es autres Anglois. Et lors ils veirent vne nef sur la riuere: & de nuit issirent ledit Anglois luy quatorziesme de celle place, & s'en coururent à celle nef, entrerent dedans & s'en allerent à Gand: dont quād vint au matin que ceux de Gauere veirent que leur capitaine les auoit ainsi abandonnez, & si n'esperoient plus auoir de secours, ils se rendirent à la volenté du Duc, ainçois qu'il fut midy. Et la volenté du Duc fut telle qu'il les fait tous pendre & estrangler, mesmement deux cordeliers qui estoient illec avec eux, & celle trompette qui auoit le Duc iniurié. Iean de Voz Anglois venu à Gand & ses compagnons avec luy, leur remonstra qu'ils failloient trop grandement à ceux de Gauere, & leur dit qu'ils n'auroient iamais plus belles pour combattre leur seigneur: car il n'auoit point avec luy plus de quatre mille combattans, & s'en estoient tous les autres allez au païs par faute de payement, en les enhortant moult aigrement d'issir toute leur puissance & d'aller combattre le Duc. Entre ces choses messire Iean de Hout Anglois qui se fut allé rēdre à Tendremode au bastard de Bourgogne (comme dit est cy dessus) eut aucunes parolles secretes avec le Duc tendans à fin de trouuer façon de faire vn iour issir ceux de Gand au plus grand effort qu'il pourroit pour combattre leur seigneur, qui ne desiroit riēs plus que de les auoir aux champs à toute leur puissance. Et tost apres Iean de Hout s'en retourna à Gand, faignant soy repentir de les auoir laissez, & disant que le Duc perdoit ses gens tous les iours, pource qu'il ne les payoit point. Neantmoins les Gantois doubans qu'il ne les voulsist trahir le meirēt en prison, & là le tindrēt iusques au point que Iean de Voz les eut enhortez d'issir à toute leur puissance pour combattre le Duc deuant Gauere: car lors ils le meirent hors de prison & en feirent vn de leurs principaux capitaine. Et puis tout incontinent, ils feirent clorre leurs portes affin que nul n'allast deuers le Duc noncer leur secret: & feirent commandement à tout homme puissant de porter armes depuis vingt ans, qu'ils s'armassent & embastonnassent incōtinent sur peine de la hart. Auquel commandement conuenoit que tout homme de la ville obeit ou estre mort, & pourtant en y allerent plusieurs outre leur gré. Et tost apres ils se trouuerent plus de vingt quatre mille hommes armez & embastonnez: & feirent leurs chiefs & conducteurs desdits Anglois & de leurs compagnons, lesquels se trouuerent bien deux cens de cheual. Et lors si tost qu'ils se veirent ensemble en si grand nombre ils vuidèrent de Gand & se meirent à chemin pour aller combattre leur seigneur. Enuiron trois iours deuāt celle besongne le bon Duc attendant d'heure en heure que les Gantois le venissent combattre, & voulant escheuer, que son fils Comte de Charrolois que plus n'en auoit ne fut à celle

bataille pour les grands perils qui sont en tels affaires, luy fait entendre que la Duchesse sa mere qui lors estoit à l'Isle estoit griefuement malade, & luy dit que bon seroit qu'il allast veoir comment elle le faisoit: lequel bon fils s'en courut à l'Isle hastiuement, mais il trouua la dame haïée & en bõne santé. Et lors, il cogneut que son pere luy auoit ce dit pour le destourner d'estre à celle bataille: & dit puis que monseigneur mon Pere sera à celle bataille, c'est bien raison que ie y soye avecques luy pour luy ayder: car il se combat pour moy garder & sauuer mon heritage: & pourtant ie promets à Dieu que ie y seray se ie puis: Ceste promesse venue à la cognoissance de la Duchesse sa mere elle s'enforça de le retenir, mais elle n'en peut finer: car il s'en retourna en l'ost incontinent avec son pere.

Cy dit la maniere de la bataille de Gauere. Et comment les Gantois y furent morts & desconfits plus de vingt mille hommes.



V mesmes iour que le chastel de Gauere fut rendu au Duc, encore n'estoient pas tous pendus ceux de leans, quand nouuelles vindrent au Duc seant à table pour disner que les Gantois le venoient combattre, & qu'ils venoient à grand haste: dont fait le Duc crier à l'arme & se meit chacun en ordonnance en trois batailles, ainsi comme dit est cy dessus: & le Duc alla de bataille en bataille soy monstrier pour ses gens encourager, disant qu'au plaisir de Dieu ils seroient tous riches pour le iour. Puis se prindrent à marcher les batailles assez pres l'une de l'autre en bonne ordonnance: ce iour furent faits nouveaux cheualiers messire Iagues de S. Pol & autres plusieurs en grand nombre tant de Bourgongne comme de Picardie, & des autres païs du Duc, & aucuns en y eut qui ce iour leuerent baniere. Celle mortelle bataille fut faicte le vingtdeuxiesme iour de Iuillet l'an liij. Le Duc doncques n'eut oncques plustost mis ses gens en ordonnance, que ceux de l'auantgarde ne veissent les Gantois aussi rengez deuant eux en bataille, leurs couleurs & autres engins à pouldre mis deuant eux par bonne maniere: ceste maniere veüe par le Mareschal de Bourgongne chief de l'auantgarde, doubtant que par lesdits engins à pouldre les Gantois ne tuassent beaucoup de ses gens, fait ses gens vn pou reculer, dont cuiderent les Gantois qu'ils s'en voulsissent fuir: & laissans leurs engins derriere eux se prindrent à haster & approcher les Bourgongnons: & estoient tous deuant les autres lesdits Iean de Voz & Iean de Hout Anglois & leurs compagnons, lesquels tout incontinent picquerent cheuaux des esperons, & s'en allerent rendre au Duc, & luy dirent: Monseigneur voyez cy les Gantois que nous vous amenons, & nous mettons en vostre mercy. En ce point commencerent archiers à tirer sur les Gantois tres impetueusement: & Gantois à eux deffendre tres vaillamment: mais si tost que les trois batailles du Duc chargerent tous ensemble sur les Gantois, ils habandonnerent tout & se prindrent à foüir vers Gand. Et les gens du Duc à les chasser si desmesureement, qu'ils en tuerent tant que ce fut vne grand merueille. Or aduint qu'une compagnie des Gantois iusques à quatorze ou quinze cens hommes, se retrahirent en vn pré, où là pres estoit vn petit bosquet, & là reprindrēt courage & se meirent à deffence, pourtant que le pré estoit tout cloz de fossez: & n'y

& n'y pouoiēt le Duc ne ses hommes d'armes entrer, sinon à grand dāger pour vn fossé qui là estoit. Entre les autres estoit illec avec le Duc de Bourgongne vn homme d'armes de Bruges, lequel par trois fois fait son cheual faillir le fossé, & escarmouchoit les Gantois en ce pré. Mais à la troiefme qu'il fait son cheual reffaillir, son cheual cheut mort deffoubs luy des grans horions qu'il auoit receuz des piques des Gantois. Or n'auoit le Duc nuls archiers avecques luy, pource que tous furent descendus à pied & ne pouoient si tost suiuir ceux de cheual, & si s'attardoient assez à tuer Gantois qui fuioient deuant eux. Et le Duc qui hayoit lesdits Gantois mortellement estoit tant desplaisant que plus ne pouoit, de ce qu'il veoit aucuns des siens faillir le fossé & combattre les Gantois: mais retournoient tantost pour l'effort desdits Gantois. Adonc le vaillant Prince hardy comme vn lyon, faist sa lance que portoit son page apres luy, & fait son cheual faillir le fossé, & se fourra dedans les Gantois, & deux ou trois hommes d'armes avec luy: entre lesquels estoit Bertrandon de la Broquiere, qui portoit son pēon. Et fut le cheual du Duc nauré en plusieurs lieux, si qu'il les conuint reffaillir le fossé celle fois, iusques à ce que les archiers furent venuz. Et lors de rechief il fait son cheual faillir outre le fossé, & son fils apres luy: & plusieurs autres se prindrent à combattre lesdits Gantois de toute leur puissance: lesquels Gantois furent incontinent desconfits, & furent tous morts ceux qui furent trouuez en ce pré: car ils n'en pouoient issir pour les fossez qui là estoient à vn costé, & la riuere de l'Escault estoit à l'autre costé. En laquelle riuere faillirent plusieurs Gantois qui y furent noyez. Aucuns en y eut des plus legerement armez & des plus vades qui fouïrent si bien qu'ils gaignerēt la ville de Gād. Et pour certain se le Duc fut à celle heure allé à Gand, il y fut entré sans contredit, tant estoient leans espouentez & desconfits: mais ses guides ne le y sceurent mener ne conduire. Ainsi doncques la bataille finée & aucuns pou de Gantois rentrez en la ville, le Duc fait ses gens retraire, & geut celle nuit aux champs en sa tête: en laquelle tente, il se iecta à genoux & rendit à Dieu graces & louenges pour la belle victoire qu'il luy eust donnée ce iour de ses mortels ennemis. En celle bataille moururent de Gantois plus de vingt mille que tuez que noyez: mais toutesuoyes le Bastard de Blanc Estain en eschappa par bien nager outre celle riuere de l'Escault: de la partie du Duc n'y moururent que xvj. hommes qui furent occis des le commencement de la bataille.

Comment le noble Duc & pitoyable enuoya son herault à Gand apres celle desconfiture pour scauoir s'ils se vouldroient mettre en sa vouldenté & il auroit pitié d'eux. Et comment les Gantois enuoyèrent deuers luy requerans sa misericorde.

A Pres celle desconfiture des Gantois, le lendemain le noble Duc & pitoyable de son propre mouuement & vertueux courage, ayant pitié de ses pures subiets qui par orgueil & outrage se furent ainsi esleuez contre luy, enuoya vn sien herault vestu de sa cotte d'armes en la ville de Gand, portant ses lettres patentes: Par lesquelles il signifioit aux habitans de la ville, que nonobstant la victoire que Dieu luy auoit enuoyée le iour de deuant il auroit encores pitié d'eux, s'ils se vouloient mettre en sa vouldenté: & si leur enuoya vn saufconduit pour enuoyer deuers luy aucuns de leurs

deputez se venir y vouloient, pour trouuer leur traicté. Quand les Gantois cogneurent la grāde benignité de leur seigneur, & qu'il les appelloit si doulcemēt retourner à son amour, & à sa bonne grace par lesdictes lettres, ils festoierent le Herault hautement: & lesdictes lettres leutes deuant tout le commun de la ville, tous se conclurent incontinent de crier mercy à leur seigneur. Et sans plus tarder, en ce mesme iour enuoyerent de leurs gens avec le Herault deuers leur Prince. Lesquels en grande humilité luy requirent pardon de leurs meffaits: & qu'il les voulsist receuoir en sa bonne grace, promettans qu'ils mettroient eux & la ville en sa voulenté, & luy requirent qu'il se voulsist retraire à Gauere, & faire retraire ses gens d'armes, & ils iroient là deuers luy pour ouir & pour faire sa voulenté. Le bon Duc leur octroya leur requeste, & en retournant à Gauere par le lieu où la bataille eut esté, eut si grand pitié de ceux qui là gisoient morts, les vns sur le champ & les autres noyez en la riuere, qu'il en ploura comme aucuns le dirent depuis. Et pource qu'il y veit des femmes qui queroient illec leurs amis pour les enterrer: il feit crier & deffendre sur la hart que nul ne meffait à ces femmes cōment qu'il fut. Le xxv. iour de Iuillet oudit an vindrent deuers le Duc à Gauere pour les Gantois l'Abbé de S. Bauon de Gand, le Prieur des Chartreux & autres notables personnes, lesquels se ieçterent à genoux deuant luy, & luy prierent mercy pour ceux de Gand, & offrans mettre en sa voulenté eux & leurs biens, sauues leurs vies seullement: & il leur respondit qu'il leur pardonnoit tous leurs meffaits pour l'hōneur de Dieu: par si, toutesuoyes, qu'ils entretiendroient le traicté qui eut esté pourpalé à Sclin, & conclud à l'Isle par les trois membres de Flandres & par ceux des nations de Bruges. Et ils luy promeirent ou nom de tous les habitās de la ville, qu'ils tiendroient ledit traicté entierement, en remerciant le Duc humblement de sa grande benignité & douceur.

Cy apres s'ensuit la declaration des articles du traicté de ceux de Gand à leur bon Prince le Duc Philippe de Bourgongne.

LE traicté de Gand fut tel que cy apres s'ensuit. Premièrement ceux de Gand seront tenus d'issir de leur ville vne lieüe loing, en tel lieu qu'il plaira à leur Prince, iusques à deux mille hōmes nuds pieds & nuds testes, & de luy crier mercy. Et deuant ceux cy seront tous les Conseilliers, Escheuins & Hogueuans de la ville tous nuds, sinon de leurs chemises & de leurs petits draps. Et là se mettront à genoux deuant luy, ou deuant son fils, ou quelqu'un autre seigneur que le Duc y voudra commettre, & diront, que mauuaisement & faulusement comme rebelles & desobeissans ils ont esté en armes contre luy, & ont trop mesprins enuers luy, requerans pardon de tous leurs meffaits. Item seront tenus de clorre vn iour en la sepmaine à tousiours la porte par où ils issirent pour aller assieger Audenarde: c'est à sçauoir tous les ieudiz, pource qu'à tel iour ils issirent. Item feront clorre à perpetuité la porte par laquelle ils issirent pour aller combattre leur seigneur à Rippemonde. Item payeront au Duc pour ses dommages & interests deux cens mille riddes d'or de lxviij. au marc. Item pour la reparatiō du païs qu'ils ont brullé, ils payeront ce qu'il en sera ordonné par les trois membres de Flandres.

dres. Et se les trois membres n'en veulent ordonner, ils payeront pour ce cent mille riddes. Item pour la reparation des Eglises bruslées, payeront cinquante mille riddes. Item pour recompense du demaine que ledit Prince peut auoir perdu en Flandres à l'occasion de la guerre, ils mettront sus aucun tribut ou subside qu'ils feront accorder par les autres trois membres de Flandres. Item seront tenus de faire nouuelle Loy par la forme & maniere que leur ordonna pieça le Roy Phelippe de France: c'est à sçauoir que ceux du commun esliront quatre notables personnes, le seigneur ou ses officiers autres quatre: lesquels ensemble feront xxvj. Escheuins, ainçois qu'ils se partent iamais d'une chambre où ils s'assembleront pour ce faire. Item touchant leurs bourgeois, ils en vseront selō leurs priuileges sans plus auoir regard à vsage, ne coustumes passees. Item ne feront aucuns banir de Gand sans appeller le Baillif de Gand, ne sans declarer les causes pourquoy il les baniront. Item ne pourrōt plus faire Edits, ne status sans le sceu & octroy de leur seigneur: Et ceux qui ont esté faits autrement, seront mis ius & aboliz. Item ne cognoistront plus ceux de la Loy de Gand des officiers de leur seigneur touchant leurs offices. Item qu'en leurs lettres ou escrits ne se nommeront plus seigneurs de Gand: ains se nommeront ainsi comme ceux des autres villes se nomment. Item ne cognoistront plus des delits de leurs bourgeois forains: ains seront lesdits bourgeois soumis de respondre aux Iuges des lieux où ils seront demourans. Item seront tenus de porter toutes leurs banieres à leur seigneur pour en faire sa vouldenté, & n'en pourront faire nulles autres doresnauant. Item ne porteront plus les Blancs-chapperons, & si y a homme qui le porte, il en sera puny à la vouldenté de leur seigneur. Item ne cognoistront plus de causes meües au païs du Vvas, ne és villes de Bresueliet, Tendremonde, Audenarde, Courtray, n'Allost: ains demourront les causes és lieux, où elles seront commencées. Item seront tenus d'entretenir les articles d'un autre traicté qui fut fait autresfois present l'Euesque de Tournay & autres du grand conseil du Duc. Ces choses ainsi declarées en la presence du Duc & de son fils & de plusieurs grans seigneurs & autres en grand nombre, furent iurées & promises entretenir par le commun, & les habitans de Gand, presens aucuns notaires à ce appelez pour tesmoigner ledit traicté. Puis s'en retournerent à Gand & reporterent leur traicté par escrit. Lequel fut leu deuant tout le cōmun de la ville, & fut par eux tous accepté par si grand ioye que ce fut vne grand merueille: car ils feirent allumer les feux & permeirent que les gens du Duc qui aller y vouloient, entraissent en la ville, si que plusieurs cōpagnons y entrerent, & y furent recueillis & festoyez grandement.

Cy parle de l'amende que feirent les Gantois à leur seigneur: & dit la maniere comment ils feirent ladicte amende honorable.

LE dernier iour de Iuillet oudit an liij. le noble Duc de Bourgongne se partit de Gauere à toute son armée en moult noble arroy, & comme si allast en bataille, & en ce point s'en alla iusques à vne lieüe pres de Gand, & meit ses archiers en deux ailles en ranc, leurs arcs tendus & bendez, & tenoient bien demie lieüe de long: & puis tous les hom-

mes d'armes tous armez estoient au bout des archiers serrez & rengez, qui estoit pour vray vne noble chose à regarder. Au meillieu des hommes d'armes estoit le Duc monté sur le mesme cheual qu'il auoit cheuauché le iour de la bataille. Auquel cheual paroissoient encores les playés estouppées, dont il auoit esté blessé ou pré dessusdit: & estoit lors le Duc accompagné de son fils, & des plus grans seigneurs de son ost. Et lors incontinent issirent de Gand tous ceux & en tel nombre & ainsi habitez, que leur traicté le portoit, que conduisoient & alloient deuant l'Abbé de S. Bauon & le Prieur des Chartreux: puis estoient xxv. Escheuins, Conseilliers & Hoiguemens, en pur leurs chemises & petits draps à nuds chiefs: & apres ceux cy suiuiroient deux mille hommes vestus de noir nuds pieds, sans ceinture & sans chapperons tous à pied: en ce point passerent tous entre les deux ailes des archiers du Duc: & lors d'aussi loing qu'ils choisirent leur seigneur ils se iecterent tous à genoux crians tous ensemble, comme par vne voix, misericorde à ceux de Gand. Ce cry ainsi fait le Chancelier de Bourgogne, s'aduança & en les approchant leur dit & remonstra que mauuaiseement & faulxement, & comme mauuaises gens orgueilleux & rebelles ils se furent esleuez contre leur seigneur là present, dont ils auoient mal fait, & pourtant ne sçauoit encores s'il leur vouldroit leurs meffaits pardonner: lesquelles parolles ouies iceux Gantois se meirent à genoux comme deuant & à crier, misericorde à ceux de Gand: puis se leuerent & s'en allerent iusques deuant leur seigneur estant illec sur ledit coursier moult richement habillé, & là moult humblement se meirent tous à genoux, & en plorant piteusement se prindrent tous de rechief à crier, misericorde à ceux de Gand. Puis s'aduança de parler au Prince le conseiller de la ville pour tous les autres, luy suppliant que de sa pitié & benigne grace il vouldist pardonner à son peuple de Gand là present. Lesquels mauuaiseement & faulxement, & qui (cōme rebelles & desobeissans) s'estoient esleuez contre luy: auoient créé Hoiguemens, & fait plusieurs grans & enormes crimes, & tant que sans nombre il leur vouldist pardonner tous leurs meffaits, en quelque maniere qu'ils les eussent faits, promettans en bonne foy que iamais plus ne leur aduiendroit: mais de lors en auant luy seroient vrais, obeissans & loyaux subiects. Apres lesquelles parolles le noble Duc & bening leur pardōna son maltalent, & aussi feit son fils qui là estoit present. Ces choses ainsi faictes iceux Gantois s'en retournerēt à Gand tant ioyeux que plus ne pouoient: & aussi feirent tous ceux de la ville à leur retour la plus grād ioye que l'en pouoit faire en ville: & le Duc retourna à l'Isle & deffit son armée & s'en retourna chacun en sa place.

Comment tandis que le Duc de Bourgogne demenoit sa guerre en Flandres contre les Gantois, le seigneur de Croÿ besongna contre les Allemans en la Duché de Luxembourg: lesquels y faisoient moult de maux.

ENtre-temps que le noble Duc de Bourgogne demenoit sa guerre en Flandres contre les Gantois (comme dit est) & qu'il eut enuoyé le seigneur de Croÿ en la Duché de Luxembourg, pour reprimer les enuahies que les Allemans faisoient en ladicte Duché: lesquels Allemans auoient prins & tenoient aucunes places au paÿs, qui deuoient appartenir au Duc

au Duc. Ces Allemans icy se trouuoient bien quand ils vouloient courre de huiet ou neuf cens ou plus, & auoient leur droit refuge à Tyonuille bonne ville fermée, petite, mais tresforte: iceluy seigneur de Croÿ à l'ayde de ceux qu'il auoit menez avec luy, & de ceux du paÿs qui obeïssent au Duc, s'y gouerna tellement qu'il reconquit toutes les places que les Allemans eurent conquises ou paÿs, & eut à eux plusieurs enuahies & rencontres, où moururent plusieurs gens d'un costé & d'autre, mais finablement il les tint si court qu'ils luy requirerent trefues à dix mois: par si qu'ils se submeirent de rendre Tyonuille au Duc, & de luy laisser tout le paÿs quitte, au cas que dedans lesdits dix mois ils ne combattoient le Duc. Lesquelles trefues par le sceu & octroy du Duc leur furent octroyées iusques au iour de l'Ascension qui deuoit estre l'an mil cccc.liiiij. Et ce fait la guerre cessa ou paÿs, & s'en retourna chacun en sa place.

Comment le Roy Charles vij. de ce nom, conquist la seconde fois la cité de Bordeaux & tout le païs de Bordelois: & par auant auoit conquis Normandie, & par tant son Royaume tout à son obeïssance. Et de la mort du seigneur de Thallebot.

L Andis que celle guerre de Gand duroit, le Roy Charles de France septiesme de ce nom estoit à grosse armée au paÿs de Bordelois, que les Anglois auoient reprins sur luy: desquels Anglois estoit chief vn moult vaillant cheualier Anglois nommé messire Jean de Thallebot, trefrenommé en armes: & lequel auoit guerroyé en France plus de xxiiij. ans par auant: mais enuiron trois ou quatre ans deuant, quand le Roy reconquit la Duché de Normandie sur les Anglois, il fut prins à Rouen & fut prisonnier au Roy: & le Roy par sa franchise & courtoisie luy eut quitté sa finance, pource qu'il estoit tant vaillant & renommé. Encores luy donna le Roy de riches dons d'or, d'argent & de cheuaux, quand il sceut que ledit seigneur de Thallebot vouloit aller aux pardons de Romme qui seoiēt lors: c'est à sçauoir l'an mil cccc.cinquante. Neātmoins iceluy Thallebot retourné de Romme en Angleterre se remeit à la guerre, & trouua moyen de reprendre sur le Roy qui tant l'eut honoré la cité de Bordeaux & le paÿs d'environ. Et disoit on lors cōmunement, que ceux du paÿs de Bordelois s'estoient volentiers rendus aux Anglois, pour le grād desplaisir qu'ils prenoiēt en ce q̄ le Roy depuis sa cōqueste, auoit assis ou paÿs grād tailles & grans subsides: & si les traictoient les gens du Roy trop pl⁹ durement, qu'ils n'auoiēt accoustumé estre traicté des Anglois.

Cy dit comment le Pape Nicolas enuoya signifier au noble Duc Philippe de Bourgogne l'entreprinse du Turc: & comment le Duc voïa d'aller en Turquie sous certaines conditions.

L A veille de S. Martin d'hyuer vint à l'Isle vn cheualier enuoyé du Pape Nicolas, portāt ses lettres adressans au Duc Philippe de Bourgogne, contenans en effect, comment le grand Turc estoit à tres grosse armée de Sarrazins entré la terre des Chrestiens: & que desia il auoit conquis la noble cité de Constantinople & presque toute la Grece: & qu'en icelle cité il auoit prins l'Empereur de Grece, & l'auoit fait decapiter inhumainemēt, & l'emperiere violée: auoit fait trainer parmy la ville le precieux

corps de nostre seigneur: auoit fait ardoir la noble Eglise de sainte Sophie: auoit occis chrestiens sans nombre, hōmes, femmes & enfans: & s'enforçoit tous les iours de conquerre sur les Chrestiens: pourquoy nostredit S. Pere prioit & requeroit à iceluy noble Duc, qu'il cognoissoit estre Prince bon & Catholique & le plus puissant des Chrestiens, qu'il se voulsist disposer à faire secours & ayde à la chrestienté contre lesdits ennemis de la foy chrestienne. Si tost comme le noble Duc eut fait lire lesdictes lettres deuāt luy, le cheualier luy en bail-la vnes autres que le Turc auoit escrites & enuoyées à nostredit saint Pere. Toutes ces lettres veües par le noble Duc Philippe de Bourgogne, il festoya grandement le cheualier qui les auoit apportées, & luy donna grans dons & riches: & luy dit qu'au plaisir de Dieu il donneroit secours aux Chrestiens contre le Turc. Et de fait tost apres il enuoya au paÿs quatre galées bien fournies de bonnes gens d'armes & d'artillerie, pour commencement de secours, en rescriuant au Pape sa vouldenté & son intention: assez tost apres vint à l'Isle deuers le Duc Philippe son nepueu le Duc de Cleues: ce fut audit an cinquāte trois vn pou deuant le Karesme, là où il fut festoyé moult grandement: & feirent les seigneurs grans festes de conuiues & de banquets. Puis l'vn puis l'autre moult ioyeusement. Entre les autres en feit vn moult noble le Comte d'Estampes & moult plantureux de tous biens, si que ce fut vne moult grand merueille. En fin duquel banquet, vint illec vne tresbelle ieune fille portant vn chapeau de fleurs, moult bien accompagnée: laquelle monta sur la table & meit bien gracieusemēt ledit chapeau sur le chief du noble Duc Philippe, qui le receut aussi moult ioyeusement: & signifioit le chappel que c'estoit son tour de faire le premier banquet qui se feroit: lequel il feit voirement moult noble & moult riche, environ douze iours apres par la maniere qui s'ensuit. Premièrement le iour dudit banquet environ vne heure apres midy, issit de l'hostel du Duc vn cheualier issu du lignage du cheualier au cigne, armé moult noblemēt, c'estoit messire Aldof de Cleues nepueu du Duc: lequel deuoit ce iour iouster sur le marché de l'Isle contre tous venans à chacun vn cours de lance: deuant ce cheualier estoit vne semblance de cigne de la grandeur d'un cheual, tenant à son col vne moult riche chaine de fin or, par laquelle il cōduisoit & menoit le cheualier: & à chacun costé du cigne estoit vn homme sauage, & le cheualier estoit tout environné d'hommes en semblance d'angelets. Le premier qui suiuoit ce cheualier c'estoit le Duc tant richement paré & vestu, que c'estoit noble chose à veoir & regarder. Tous ceux cy cōduirent le cheualier au cigne iusques au marché, là où il fournist à la iouste à tous ceux qui vouloient iouster cōtre luy. C'est à sçauoir Charles Comte de Charrolois, Loÿs Comte de S. Pol, son frere seigneur de Siennes, messire Anthoine le Bastard de Bourgogne & plusieurs autres. Apres lesquelles ioustes chacun s'en retourna en son hostel, & le Duc emmena avec luy les dames & damoyelles qui eurent esté aux ioustes. Entre lesquelles estoit des plus principales dame Ysabel de Portugal, la Duchesse & damoyelle Ysabel de Bourbon niepce du Duc, la dame de Rauastain, & tant d'autres d'ames & damoyelles tāt richemēt parées, que belle chose estoit à regarder. En l'hostel du Duc estoit le banquet tout prest: & lors qu'ils furēt tous assis descēdirent d'enhault chariots moult riches tous plains de toutes

tes manieres de viures, & faisoit chacun chariot vn meûs: deuant la haute table estoit vne fontaine qui donnoit eaüe. Ou moyen de la salle estoit vn lyon vif, deuât lequel l'en battoit vn chiennet: & assez pres du lyon en vne fueillie estoit vn homme sauuage. En vn autre lieu de la salle estoit vne pucelle, qui de sa māmelle donnoit ypocras en grand largesse. Et de costé la pucelle estoit vn ieune enfant, qui par sa broquette rendoit eaüe rose. Tant d'autres noblesses estoient illec, que trop long en seroit le compte. Deuât la table du Duc estoit vne Eglise, de laquelle issit vn clerc seant sur vn dromadaire, que menoit vn geant tout vif: lequel clerc adressant sa parolle au Duc, luy dit & remonstra en moult beau langage, comment de iour en iour l'Eglise perdoit son heritage, & estoit la Chrestienté foulée par les ennemis de la foy, en ramenāt à memoire les nobles Princes trespassez: lesquels en leur temps eurent la foy soustenue & deffendue moult vaillamment. Comme doncques ce clerc icy se complaignoit ou nom de sainte Eglise, vn nommé Thoison d'or Herault de l'ordre du Duc, portant vn faisant rosty moult noblemēt paré, le presenta au Duc pour entremets, disant que à tel present appartenoit de voüer: le Duc luy respondit que voirement c'estoit bien raison, & en presence de tous voüa & promit à Dieu le pere, à Dieu le fils, & à Dieu le benoist S. Esprit vn seul en trois personnes, à la glorieuse Vierge Marie mere de Dieu, & à toute la court de Paradis, que se le Roy de Frāce vouloit tenir ses païs en paix, il iroit à toute sa puissance où le grand Turc seroit, & le combattroit de son corps contre le sien se au Turc ne tenoit, ou puissance cōtre puissance: lequel vœu ainsi fait, toute la compagnie qui tout le iour eut esté en ioye & en liesse se tourna à gemir & à plorer. Neantmoins le faisant fut présenté à tous les seigneurs qui là estoient l'un apres l'autre: & tous feirent vœux en diuerfes manieres, qui trop me semblent longs à racompter, & pourtant ie m'en passe icy à tant. Apres le banquet furent les dances & les mommeries, & puis chacun s'en ralla en son hostel.

Comment Charles Comte de Charrolois fils du Duc de Bourgongne, fiança dame Ysabel de Bourbon sa cousine germaine. Et comment le Duc tost apres s'en alla és Allemaignes: & comment apres son retour sondict fils espousa sadicte cousine.

ENuiron huiët iours apres le banquet dessusdit, la premiere sepmaine de Mars ou dit an cinquāte trois, fiança le Comte Charrolois damoiselle Ysabeau de Bourbon, par l'ordonnance du Duc Philippe de Bourgongne son pere: laquelle damoiselle estoit sa cousine germaine, fille du Duc de Bourbon de la sœur de son pere: & enuoya le Duc à Rome pour les dispenser & parfaire leur mariage. Et ce fait il donna congé à tous ses officiers domestiques iusques à xij. mois, qu'il esperoit demourer és Allemaignes où il vouloit aller. Et le quinzième iour dudit mois de Mars il se partit de l'Isle à simple compagnie, & par son païs de Bourgongne s'en alla és Allemaignes, pour trouuer l'Empereur Federic & autres Princes d'Allemagne, pour sçauoir s'ils voudroient eux mettre en chemin pour aller sur le Turc: & s'ils voudroient souffrir son armée passer par leurs païs sans encombrer. Il trouua plusieurs grans seigneurs au païs, qui le festoyerent tresgrandement: mais l'Empereur qui plus aimoit repos que trauail, & paix que guer-

re enuoya vers luy faignant d'estre malade, & luy fait dire qu'il n'estoit besoing qu'il trauaillast d'aller deuers luy, & il n'y alla point aussi : mais l'Empereur luy fait donner en esperance qu'ils se trouueroient ensemble au chief de six mois pour y conclurre en leurs besongnes. Et par tant conuint le Duc retourner à pou d'exploit : & s'en retourna en son pays de Bourgongne, là où il se teint vne espace de temps.

Comment le Roy alla en son chasteau de Lusignan : comment le sire de Thallebot print Fronzac : comment Francois allerent assieger Chastillon : & comment le seigneur de Thallebot assembla ce qu'il peust auoir de gēs d'armes pour leuer ce siege : & comment il y mourut.



Vdit an mil cccc.liij. se partit le Roy de France de la cité de Tours, & vint loger en son chasteau de Lusignan : & cependant ledit Thallebot meit le siege deuant le chasteau de Fronzac : duquel estoit capitaine Ioachin Rohault pour le Roy de France, & conuint rendre ladicte place aux Anglois auant que l'armée du Roy fut preste : & s'en allerent les François leurs corps & biens saufs. Le second iour de Iuin ensuiuant se partit le Roy dudit chasteau de Lusignan, & alla à S. Iean d'Angely : & le septiesme iour ensuiuant fut mis le siege deuant Challais : c'est à sçauoir par messire Iean de Chabannes Grand-maistre-d'hostel du Roy, & par le Comte de Ponthieure les seigneurs de sainte Seuer & de Boucat. Et le xvij. iour ensuiuant fut ledit Challais prins d'assault par les seigneurs dessusdits & autres de leur compaignie, nombrée de quatre à cinq cēs lances & les archiers & certains francs-archiers, combien que dedans ladicte ville estoient en garnison huit vingt combattans. Desquels à la prinse d'icelle furent tuez de soixante à quatre vingts : & les autres se retrahirent en vne tour où ils furent certaine espace de temps, cuidans auoir aucun secours de leurs gens : & pource qu'ils n'en eurent point, les conuint rendre à la volenté du Roy. Et estoient dedans ladicte tour iusques au nombre de quatre vingts hommes, qui tous furent decapitez pour leurs sermens qu'ils auoient faulsez, & les trahisons dont ils estoient complices. Et estoit party de Bordeaux le seigneur d'Anglades, pour les cuider venir secourir : lequel quand il sceut les nouuelles de la prinse desdits Anglois & de ladicte ville, il s'en retourna hastiuement. Audit an & le treiziesme iour du mois de Iuillet fut mis le siege par les François deuant Chastillon en Perigord, assis sur la riuere de Dourdōne occupé par les Anglois : & y furent enuoyez pour mettre ledit siege, le sire de Loheac & le sire de Ialongne Mareschaulx de Frâce, & plusieurs autres grans seigneurs, Barons, cheualiers, escuyers, capitaines & gens de guerre, iusques au nombre de seize à dixhuit cens hommes d'armes & les archiers : entre lesquels estoient les gens du Comte du Maine que conduisoit le seigneur de la Bessiere, nommé messire Pierre de Beauuau : & si y estoient les gens du Comte de Neuers que conduisoit messire Ferry de Francy. Aussi y estoient les gens du Comte de Castres, fils de monseigneur de la Marche, que conduisoient messeigneurs Loys du Puy Seneschal de la Marche, Guillaume de Lusac & Iean de Messignac. Et les gens du Duc de Bretaigne, dont estoit chief le Comte d'Estampes son nepueu, & pour luy les conduisoit le seigneur de la Hunodaie

Hunodaie & le sire de Mōtauban, pource que ledit Comte estoit demouré deuers le Roy. Et là estoit la grosse & menue artillerie du Roy, dōt auoit la charge maistre Iean Bureau, & Iaspert Bureau son frere maistre de ladicte artillerie. Et auoient en leur cōpaignie sept cens manouuriers : lesquels par l'ordonnance dudit Tresorier & son frere, feirent hastiuemēt clorre & fermer vn chāp de fossez où estoit toute ladicte artillerie : & adonc meirent le siege deuāt Chastillon. Ce venu à la cognoissance dudit Thallebot, il se partit incōtinēt & en haste de Bordeaux accompagné de huiēt cens à mille Anglois de cheual. Entre lesquels y estoit son fils seigneur de l'Isle, le seigneur de Moulins & plusieurs autres des plus vaillans du Royaume d'Angleterre tāt seigneurs, cheualiers que escuyers : & aussi du païs de Bourdelois, & apres venoient de quatre à six mille Anglois de pied : & arriua ledit Thallebot & sa compaignie deuāt ledit siege le Mercredy dixseptiesme iour de Iuillet, enuiron le point du iour. Et quand les François sceurent la venue dudit Thallebot, ils se bouterent au champ qui estoit fermé de fossez, & trouua ledit Thallebot aucuns Francs-archiers en son chemin, qui n'estoient pas encores retraits audit champ, car ils estoient de pied : si frapperent lesdits Anglois sur eux & en tuerent de cent à six vingts de ceux qui ne se peurent retraire à temps audit champ. Et lors commencerent lesdits François à fort ferir pour gagner ledit champ : pource que lesdits Anglois commencerent à marcher pour approcher, cuidans que les François s'en fussent & leuassent leur siege : & feit ledit Thallebot en attendant partie de ses gens à pied, mettre vne queuē de vin sur le bout pour leur donner à boire & à les rafraichir. Et ce pendant les François arriuerent au parc de toutes parts, & se meirent en bonne ordonnance. Et aussi les canonniers assortirent leurs couleurnes & ribaudequins sur les fossez, deuant la venue d'iceux Anglois. Et trouuerent facon ceux de dedans Chastillon de mander audit Thallebot qu'il s'aduançast legerement, & que les François s'en fuioient. Mais quand il fut venu il fut tout esbahy de veoir la fortification que auoient faicte lesdits François, tant de fossez, artillerie comme autrement. Et là estoient pour resister encontre lesdits Anglois messeigneurs les Mareschaux, le Grand-maistre-d'hostel, le Comte de Ponthieure, le Seneschal de Poictou, le sire de la Bessiere, sire Iean Bureau & plusieurs autres, lesquels estoient commissaires pour la conduction d'icelle armée : combien qu'il y auoit plusieurs autres grans seigneurs en la compaignie, qui teindrent le champ vaillamment & honnorablement à l'encontre des aduersaires du Roy. Or vint ledit Thallebot & sa compaignie & arriuerent droit à la barriere cuidans entrer ou champ : mais ils trouuerent frontiere de vaillans gens, bien experts au fait de guerre, qui leur feirent bon visaige & hardy, dont lesdits Anglois furent moult esbahis veu ce qui leur auoit esté mandé. Ledit Thallebot estoit monté sur vne petite haquenée & ne descendit point à pied, pource qu'il estoit ancien homme : mais il feit mettre pied à terre à tous ceux de sa compaignie, qui estoient venus à cheual. Et à l'arriuer auoient lesdits Anglois huiēt bannieres desployées tant du Roy d'Angleterre comme de saint George, de la Trinité & dudit Thallebot, avecques plusieurs estandarts sciemment pourpensez. Et adoncques commença l'affault & y eut de grans vaillances, & fut fort combattu de l'vne partie contre l'autre : &

dura le chappliz par l'espace de vne forte heure. Et apres pour rafreschir les François qui moult auoient trauaillé à la garde d'icelle barriere, furent enuoyez querir le sire de Montauban & de la Hunodaie, qui gouuernoient les gens du Duc de Bretaigne qu'il auoit enuoyez au Roy, & desquels estoit chief le Comte d'Estampes. Et pour r'enforcer ceux qui toute iour auoient gardé celle barriere: lesquels de grand couraige à leur venue incontinent qu'ils furent arriuez firent tant à l'aide de Dieu & par leur proesse, que lesdits Anglois tournerent le dos, & furent abbatues & ruées par terre toutes leurs bannieres par lesdits Bretons. Et auoit lors dedans ledit champ tel cliquetiz de couleurines & de ribaudquins, que iceux Anglois furent contraints d'eux en fuir. Toutesuoyes plusieurs furent morts en la place, & par especial fut ferüe d'une couleurine la haquenée dudit Thalbot, deffoubs laquelle fut illec tué des François. Pareillemēt aussi furent morts son fils le seigneur de l'Isle, messire Hedouël Haul, Thomas Aurigan, le seigneur de Puiguillam Gascon, & trente cheualiers du Royaume d'Angleterre, & des plus vaillans comme l'en disoit, & y fut prins le sire de Moulins. Et pource que lesdits François estoient de pied & fort allenez & trauaillez, & qu'ils ne pouoient pourueoir par tout, eschapperent plusieurs Anglois & Gascons, & se bouterent dedans la ville & chasteau dudit Chastillon de huit cens à mille. Entre lesquels estoient le fils du Captal de Busch Comte de Candalle, le seigneur de Montferrant, le sire de Rosam & le seigneur d'Anglades. Et eschappa le sire de Lesparre qui auoit esté le principal de toute la trahison. Et les autres qui ne se peurent sauuer, prindrent la clef des champs à l'adventure, les vns par eaue, les autres par terre. Et quant au regard de ceux qui alloient par eaue, ils furent noyez pour la pluspart. Et pour aduancer ceux qui s'en fuioient par terre, monterent à cheual le Comte de Ponthieure, le Baillif de Touraine & plusieurs de tous estats estans de la compagnie des François: lesquels ne cesserent oncques de tuer Anglois en les poursuivant iusques aupres de S. Milion. Et à la besongne du champ furent enterrez de quatre à cinq cens Anglois. Et le lendemain ordonnerent les seigneurs à approcher canons, veugleres & bombardes deuant ladicte ville, pour festoyer ceux de dedans: lesquels voyans l'appareil qu'on leur faisoit, se commencerent à humilier & à abbeffer l'orgueil dont ils estoient plains, & se rendirent tous prisonniers à la volonté du Roy, estimez mil & cinq cens en nombre: desquels les seigneurs dessusdits furent prisonniers du Roy.

Comment apres la reddition de Chastillon les conduiseurs de l'ost du Roy prindrent saint Milion, & Libourne avec autres. Puis dit comment le Roy & son armée estoient deuant Bordeaux où estoient grand nombre d'Anglois, lesquels luy rendirent la ville par composition.

DEpuis la reddition dudit Chastillon, partirent lesdits seigneurs conduiseurs de l'ost du Roy & commissaires en ceste partie, avec leur puissance, canons & artillerie: lesquels vindrent deuant S. Milion, laquelle tantost se meit en l'obeissance du Roy, considerans qu'il ne leur estoit pas possible de resister contre la puissance: Le Roy les receut en sa mercy. De là se tira toute l'armée deuant la ville de Libourne, laquelle n'auoit pas

pas esté baillée du gré des gens de ladicte ville és mains des Anglois, quand le seigneur de Thalbot arriua à Bordeaux : car on leur auoit baillé François pour les garder. Et quand ils sceurent la venue dudit Thalbot, lesdits François desempererent ladicte ville. Et lors conuint aux habitans d'icelle obeir audit Thalbot, pourquoy par la derniere reddition n'ont esté en riens molestez & les a le Roy receuz en sa bonne grace. En ce mesme temps & saison estoit le Comte de Clermont lieutenant general du Roy oudit païs de Guyenne & de Bourdelois, lequel tenoit son armée de là la riuere de Gironde és païs d'amont: estoiet en sa compagnie le Comte de Foix, le Comte d'Albreth, le seigneur d'Orual son fils, messire Theaulde de Vaulpergue Baillif de Lyon, le sire de Santreille grand escuyer d'escuyerie, messire Bernard de Biarn, le Vicomte de Turene, le sire de Lauedan & plusieurs autres capitaines nombrez à huit cens lances & les archiers, lesquels se gouernerent en telle maniere, que pour course qu'ils feissent sur les païs en prenant prisonniers, en dissipant & gastant prouisions des Anglois, tant vins, foins, auoynes, bleds que autrement: oncques Anglois de Bordeaux qui estoient bien huit mille combattans, ne se embattirent sur eux ne ne leur contredirent en riens. Le xiiij. iour dudit mois de Iuillet les Comtes de Clermont, de Foix, & d'Albreth, allerent mettre le siege deuant Chastelneuf de Medoc, & furent deuant par l'espace de quinze iours: & tenoit la place pour le Roy d'Angleterre le sire de l'Isle cheualier Gascoin, lequel voyant luy estre impossible de la tenir, la rendit ausdits seigneurs. Puis se partirent lesdits Comtes de Clermont & d'Albreth & plusieurs de leur compagnie, lesquels allerent mettre le siege deuant Blanquefort, & se departit l'armée: le Comte de Foix, le Vicomte de Lautrec son frere allerent mettre le siege deuant le chasteau de Cadillac, & le sire de Santreille alla deuant S. Makaire & le mit en l'obeissance du Roy. Et ledit seigneur d'Albreth se partit de deuant Blanquefort, & alla deuant Langon & Villendras, lesquels il mit pareillement de l'obeissance du Roy, estans encores les autres deuant ledit Blanquefort, & tenoient deux ou trois sieges à la fois. Pour lesquelles conquestes maintenir ils auoient en leur compagnie mille lances & les archiers, en ce compris les gēs du Comte d'Armignac que conduisoit vn escuyer nommé l'Aisné de Lange, Seneschal de Rouargue. Et en la compagnie d'au-delà la riuere de Gironde, estoient la pluspart cheualiers & escuyers. Et ce pendant que le siege estoit deuant Cadillac, le Comte de Clermont tenoit tousiours le siege deuant Blanquefort, & iusques à ce qu'il se rendit à luy.

Le xvij. iour de Iuillet en ce mesmes an se partit le Roy de la cité d'Angoulesme pour aller ou païs de Bourdelois, pour conforter & ayder son ost: Estoiet en sa compagnie les Comtes d'Angoulesme & du Maine, de Neuers, d'Estampes, de Castres, de Vendosme & plusieurs autres barons, cheualiers & escuyers, & vint en la ville de Libourne, & fut son ost deuant Fronzac que tenoient les Anglois: lesquels se rendirent & s'en allerent par composition en Angleterre, chacun vn baston en son poing. Puis passa son ost la riuere de Dourdōne pour mettre en l'obeissance du Roy le païs d'entre deux mers, & y prindrēt plusieurs petites villes & chasteaux que tenoient lesdits Anglois. Et le Roy vint à Montferrant & feit mettre vne bastille deuant Lormont de lez Bordeaux par vne par-

tie de son ost. Et l'autre partie meirent le siege deuant la ville & chasteau de Cadillac. Et d'autre costé estoit le Comte de Clermont lors Lieutenant general es pays de Guyenne & de Bordelois, comme dit est. Les Comtes de Foix & d'Albreth, le seigneur d'Orual, le seigneur de Santreille Baillif de Lyon & plusieurs autres iusques à mille lances, & les archiers qui estoient deuant Bordeaux, du costé de deuers les landes pour faire le gäst & manger foin, bleds & autres provisions qui estoient sur les pays, affin que ceux de Bordeaux ne s'en peussent ayder.

LE dixhuietiefme iour dudit mois de Iuillet, le Roy en personne & son ost assaillirent la place de Cadillac, & fut prinse & emportée d'assault : & entra le premier dedans vn escuyer nommé Gonffroy de S. Hellin, Baillif de Chaumont en Basigny. Et lors les Anglois se retrahirent audit chasteau qui estoit moult fort. Et combien qu'ils fussent retraiz & bien enfermez : neantmoins la grand puissance du Roy & le bon gouuernement & police qu'il auoit mis en son ost, qui estoit mille lances & des archiers, il conuint ausdits Anglois dire le mot. Et pource se rendirent au mois d'Octobre ensuiuant tous prisonniers du Roy, & le capitaine dudit lieu nommé Gaillard & fut decapité. Dedans la bastille de Lormont estoient le seigneur de Loheac Mareschal de France & plusieurs autres seigneurs, cheualiers & capitaines, iusques au nombre de quinze à seize cens lances avec les gens de traict bien garnis d'artillerie. Et aupres d'icelle bastille estoient les vaisseaux de l'armée du Roy par mer. C'est à sçauoir de Bretagne, de Poictou, d'Espaigne, de Hollande, de Zellande & de Flandres armez & auitaillez. Et là furent dedans la riuere de Gironde iusques à ce que la ville de Bordeaux fut mise en l'obeissance du Roy. Du party des Anglois pareillemēt estoient les bastiaux & nauires venus du party d'Angleterre : & incontinent eux arriuez fait le sire de Camus mettre les cordages dedans ladicte ville de Bordeaux, affin qu'ils ne s'en peussent aller *Hospite insalutato* : c'est à dire sans prendre congé à l'hoste : firent aussi lesdits Anglois faire vne bastille contraire à celle des François & au dessus d'icelle : combien que ce leur prouffita bien pou, neantmoins qu'ils fussent dedans ladicte ville pour le Roy d'Angleterre grans gēs. C'est à sçauoir le sire de Camus, le sire de Cliton, le Bastard de Sombreffet, le sire de Lesparre Gascon, le sire de Rossem comme de trois à quatre mille Anglois d'Angleterre, & autant ou plus de gens du pays de Gascongne, dont l'une des parties estoit dedans icelle ville, & l'autre dedans leur bastille pour garder leurs nauires. Et là furent les deux puissances les vns deuant les autres, & chacun à sa bastille pour garder les nauires depuis le premier iour d'Aoust iusques au xvij. iour d'Octobre, domageant & greuāt chacun iour l'un l'autre en toutes les manieres qu'ils pouoient. Et quand lesdits Anglois se veirent oppressez de auoir faulte de viures, ils furent bien esbahis, & aussi le cas le requeroit, veu qu'ils perdoient toutes les places & forteresses d'iceluy pays, mises par force d'armes en planiere obeissance du Roy de France, & requirent qu'on leur fait amiable cōposition. A quoy le Roy eut regard à deux choses. La premiere qu'il estoit prest de faire & rendre le bien cōtre le mal. Et secondement considera la mortalité qui estoit fort à douter, affin de changer air : pourquoy il fut content de composer ausdits Anglois en la maniere qui s'ensuit. C'est à sçauoir que ladicte

dicté ville & cité de Bordeaux luy seroit rendue & demoureroient tous les habitans ses vrais, obeissans & subiects, & feroient le serment de non iamais eux rebeller contre la couronne de France, recognoissans & affermans le Roy estre leur souuerain seigneur. Et les Anglois eurent congé d'eux en aller en leurs nauires ou païs d'Angleterre, ou à Calais se bon leur sembloit. Et pource que aucuns des seigneurs du païs & de ladicte cité, auoient esté frauduleusement, traystreusement & malicieusement querir en Angleterre lesdits Anglois, en rompant leur foy & serment qu'ils auoient fait l'année precedente au Roy, qui de force & à grand peine, fraiz & mises les auoit conquis, furent bannis du païs de Bourdelois vingt personnes, telles qu'il plairoit au Roy de ceux qui auoient esté querir iceux Anglois en Angleterre: du nombre desquels estoit le sire de Duras, le sire de Lesparre. &c. Et fut faicte ladicte compositiō le xvij. iour d'Octobre audit an liij. Et en verité le Roy s'y trauailla grandement de corps & de biens & de son sens: car apres l'ayde & grace de Dieu, la bonne conduite qui a esté en luy, le doulx acueil de ses gens, & le reconfortement en allant de place en autre l'a fait estre seigneur dudit païs paisiblement. Tous ses vassaulx pareillement & alliez dessus nommez, ont seruy le Roy de leur puissance, & comme se ce eust esté leur propre fait, & en ce sont grandement à louer, & pour l'amour d'eux leurs successeurs. Messire Pierre de Beauuau seigneur de la Bessiere mourut trois iours apres la bataille de Chastillon, dont fut grand dommage: aussi mourut messire Iaques de Chabannes grand-maistre-d'hostel qui fut moult plaint, car il estoit vaillant cheualier. Ledit païs ainsi mis à deliure, se delibera le Roy s'en retourner en sa cité de Tours. Et pource laissa pour la prouision & garde d'iceluy païs le Comte de Clermont son Lieutenant general, avec messire Theaulde dit Vulperge, & sire Iean Bureau tresorier de France & Maire de ladicte cité, & plusieurs autres gens d'armes, archiers & arbalestriers avec eux à la deffence dudit païs. Car de ce estoit grand besoing & vrgente necessité, veu la grand trahison qui par eux auoit esté commise & perpetrée. Et ainsi que dit la Loy, *Semel malus semper præsумitur malus*. Pourquoy est expedient de leur tenir le fer au doz, affin qu'ils soient en greigneur subiection, & telle qu'ils ne se puissent plus rebeller.

Cy dit comment le Turc assiegea Constantinople: comment il fait celle cité battre d'engins de grande artillerie qui y estoit: puis dit comment ladicte cité fut prinse d'assault, & parle aucunement des maulx qui y furent commis. Puis parle d'un remede pour aller contre ledit Turc.



Vdit an mil cccc.liij. le quatriesme iour d'Auril apres pasques, Morbesan fils de Oreste, seigneurs és parties d'Achaïe courut aupres de Constantinople: & le cinquiesme iour dudit mois posa son siege deuant ladicte cité. Item oudit siege estoient entour deux cens mille hommes, desquels ils en pouoit bien auoir lx. mille de fait, & de trente à xl. mille cheuaux: & estoient armez le quart en haubergeons ou de Iaques, & aucuns en y auoit armez à la guise de France, aucuns à la guise Burgaire, aucuns en autres façons, aucuns auoient chappeaux de fer, & auoient aucuns arcs & crennequins. Les autres gens de fait pour la pluspart estoient sans armes, sauf qu'ils

auoient targes & semitarges, qui sont espées de Turquie. Et le surplus des autres desdits lx. mille estoient robeurs, gasteurs de païs, marchans, artisans & autres fuiuans le siege pour gaigner. Item oudit siege estoient plusieurs bombardes & tresgrand nombre de couleurines & autres engins pour assaulx. Et entre les autres y estoit vne grosse bombarde de metal toute d'une piece, tirant Pierre de douze espans & quatre doigts de tour, & pesans mille huit cens liures. Lesquelles bombardes tiroient chacun iour de cent à six vingts coups. Et dura celle tempeste lv. iours, pourquoy conuient dire qu'ils employerent chacun iour mille liures de pouldre, & par ainsi fault dire qu'il y auoit dix mille couleurines. Item l'armée du Turcq en mer estoit tant au port comme dehors de seize à dixhuit gallées, soixante ou quatre vingts galiotes de xvij. à xx. vauchieres, & de xvj. à xx. barques petites, comme pour porter cheuaux, qu'ils appelloient palendrins, & assez d'autres fustes. Item le siege posé & mis par terre, Sangombassa conseiller du Turc & celuy qui auoit plus de credit & d'auctorité enuers luy, fait porter delà la mer par dessus terre l'espace de deux à trois milles de soixante à quatre vingts galées, tant galées que autres fustes, armez iusques dedans la pulse Mondagarin, qui est empres Pere, les deux citez. Auquel port ne pouoient autrement les nauires du Turc entrer pour l'armée des chrestiens, estans à terre du Pac pour aller de Constantinople à Pere pour soy entre-secourir : & de ceste armée de Turq fut capitaine vn nommé Albitangoth, lequel rompit quatre nefes Geneuoises. Et lors le Turc fait vn autre capitaine, & ainsi fut son siege fermé par mer & par terre. Item Constantinople est tresforte cité en figure triangulaire, & a vingt milles de tour deuers terre, & cinq deuers la mer, cinq deuers le port & goufle cinq. Et les murs de deuers la terre sont tresgros & haults : & dessus y a barbaquennes & macicoliz, & dehors faulxmurs & fossez. Et sont haults lesdits murs principaux de quinze à xxij. brasses, & larges estimez en aucuns lieux six, & es autres lieux huit brasses : les faulxmurs de dehors ont le terran hault xxij. brasses & gros de trois brasses, & parsons de dix brasses. Item en icelle cité estoient en tout de xxv. à trente mille hommes & six mille combattans. Item au port pour deffendre la chainne, estoient de Chrestiens trente nefes & neuf galées. C'est à scauoir deux subtiles & trois marchandes Venitiennes, trois de l'Empereur & vne de messire Iean Iustienien long Geneuois aux gaiges de l'Empereur. Constantinople donc ainsi assiege par mer & par terre, & ainsi fort combattue de bombardes & de traict, se deffendit cinquante iours : durant lequel temps le capitaine de la galée Trapefonde monta sur vne galée subtile, pour brusler la nauire du Turc, avecques certains autres à ce ordonnez : mais la galée fut effondrée d'une bombarde de Turcs, & furent par le fondement affichées aux peux agus deuant ceux qui faisoient la garde sur la mer. Item du costé de la terre estoit Sangombassa Roy Albanois, qui en son siege auoit plusieurs hommes accoustumez de miner l'or & l'argent, qu'il fait miner en quatorze lieux sous les murs de la ville pour les trebuscher. Commenceant ses mines bien loing des murs. Les Chrestiens contreminerent, & par souuentesfois estoufferent les Turcs en leurs mines par fumée, & aucunesfois par puantises, & en aucuns lieux les noyerent par force d'eaues, & aucunesfois à combattre main à main.

Item

Item ledit Sangombassa fait vn chasteau de bois si hault, si grand & si fort qu'il seigneurioit le mur. Item fait faire sur basteaux vn pont long de mille brasses, & large de sept pour passer la mer au trauers. Item fait plusieurs autres instrumens de bois treshaulx & grandes estables & legieres. Item aussi faisoient chacun iour grandes escarmouches, où il mourut moult de gens deça & delà. Mais pour vn qui mourut de ceux de dedans il en mourut cent de dehors. Item au siege du Turc estoient plusieurs Chrestiens de Grece & de plusieurs autres nations : lesquels combien qu'ils soient du Turc subiects, toutesuoyes si ne sont ils pas par luy contrains à renier la foy Chrestienne. Ains aorent Dieu & prient à leur plaisir. En outre y estoient autres capitaines & autres puissans Turcs, qui par despit de Sangombassa qui trop les oppressoit, aduiserent ceux de dedans par lettres qu'ils tiroient dedans la ville, & en toutes autres manieres possibles de tout ce qui se faisoit au siege : & entre les autres furēt les Chrestiens aduisez comment le Turc avec tous ses Barons, Princes, seigneurs & conseillers auoient tenu conseil quatre iours. Et entre lesquels estoit vn capitaine nommé Colombassa qui conseilloit à leuer le siege en alleguant au Turc. Tu as fait ton deuoir, tu leur as ja donné plusieurs grans batailles, & à tant de iours en ont esté morts grand quantité de tes gens. Tu vois la cité deffenable & inexpugnable, & en maniere que tant plus va de gens à l'assault plus en demeure. Ceux qui ont esté sur le mur ont esté reboutez & tuez, & tes antecessors iamais ne vindrent ne iamais ne voulurent venir si auant, ce t'est grand gloire d'y auoir esté, & te doit souffrir sans vouloir destruire toutes tes gens. Et tant fut dit que le Turc deliberoit soy leuer & s'en retourner, & de ficher là aucunes colonnes pour notifier à iamais, qu'il auoit fait ce que nul de ses antecessors n'auoit oncques fait ne entrepris : & qui plus est nul Turc ne se osa onc si pres approcher de Cōstantinople. Sangombassa estoit de opinion contraire & disoit au Turc. Tu as fait le plusfort. Tu as rué ius vne grand partie des murs. Nous en ruerons encores de l'autre, donnons encores vn aspre assault, & se nous faillons nous prendrons tel party que bon te semblera. Tant sceut dire que le Turc sy consentit, & de tout ce furent aduisez ceux de dedans & confortez, & qu'ils se feissent vaillans deux ou trois iours : car lors seroient ils seurs que le siege s'en iroit sans nul seiour. Le Turc delibera d'ainsi assaillir. Trois iours deuant l'assault commanda solemnelle ieusne pour l'honneur du Dieu du ciel, lequel seul il adore : ieusnerent luy & ses gens trois iours continuels, par ainsi que tout le iour ne mangerent riens, mais seulement de nuict pour leur vie : de nuict feirent infiny lumiere de chandelles de bois, qui brusloit de soy mesmes en mer & en terre, tant qu'il sembloit que mer & terre brusloient, avecques tresgrans sons de tabours & autres instrumens : car de trompettes n'ont ils que bien pou. Les choses estans en ces termes, & le Turc delibéré d'assaillir quelque opinion ou intention qu'il eut de vaincre. Et ceux de dedans deliberez d'eux bien deffendre. Le Turc commença son assault le may bien lentement au soir. Et auoit ordonné le Turc ses gens en la maniere qui s'ensuit. C'est à sçauoir Siglardy capitaine general de Turquie vingt mille hommes, à la porte de Puchi où estoit la grand bataille. Et Sangombassa aussi conseiller du Turc & amis aux Chrestiens, avec Proces : la tierce partie des gens

du siege à la porte S. Romain loing du Puchy enuiron vn mille, Ebbigabeth capitaine general de Grece fut mis au costé de Galigaria à l'endroit du Palais de l'Empereur. Et estoient la plusgrand part des mines loings de S. Romain deux milles. Sangombassa Albanois renié estoit outre l'eaüe deuers Pere avecques plusieurs Chrestiens reniez. Car de ce païs là s'en renient moult tous les iours. L'assault commencé ceux de dedans se deffendirent par tout vaillamment. A S. Romain est le lieu le plus legier à prendre, & la muraille plus foible : de laquelle auoit ja esté abbatue, par les iours passez vne partie. Là estoient les bombardes qui bouterēt ius vne barbaquenne, & la moitié du mur du meillieu : duquel en cheut bien deux cens brasses : aussi auoit de couleures & de traict tant que à peine veoit on le ciel. Toutesfois ceux de dedans releuoient les brasses de mur de grosses tonnes & de bois en terre & d'autres choses, & se deffendoient au mieux qu'ils pouoient. Item en ce lieu deffendoit messire Iean Iustinien long Geneuois, qui estoit aux gaiges de l'Empereur & s'y porta moult vaillamment, aussi toute la cité auoit grand espoir en luy & en sa vaillance. Item en ce lieu pour faire son dernier effort s'approcha le Turc à deux bannieres, avec dix mille homes esleuz pour la garde de sa personne, & autre infiny nombre de Turcs, avec ceux de chasteau du bois par eschelles & autres instrumēs : & commencerent à emplir les fossez & monter sur le mur. Lors fut messire Iean Iustinien blecé d'une couleure, & s'en partit pour soy faire medeciner, & bailla sa garde à deux gentils-hommes Geneuois : les Turcs neantmoins monterent sur le mur. Et adonc les Chrestiens eux voyans si oppressez, & aussi que ledit Iustinien s'en estoit allé cuidans qu'il s'en fuit, habandonnerent leur garde & s'en fuirent. Ainsi les Turcs entrerent en Constantinople le xxviij. iour de May audit an, mettans tout à l'espée ceux qui luy faisoient resistance.

A PERE n'auoient encores eu nul assault, & estoient la plusgrand part des Periciens à Constantinople pour le deffendre. Ceux qui estoient demourez à Pere qui n'auoient riens osté de leurs biens, delibererent d'enuoyer les clefs au Turc & se recommander à luy, & luy offrir la cité, en laquelle estoient six mille hommes attendans la misericorde de Dieu. Toutesfois vne grand partie des hommes & des femmes monterent sur vne nef de Geneuois pour eux en aller. Mais vne nef chargée des femmes de Pere fut prinse des Turcs. L'Empereur de Constantinople mourut illec, & dient aucuns qu'il eut la teste trachée. Autres diēt qu'il mourut à la porte & en la presse s'en voulant issir, l'un & l'autre peult estre vray. C'est qu'il fut mort en la presse, & que depuis les Turcs luy eussent trachée la teste. Celle entrée fut moult piteuse & douloureuse pour les Chrestiens : car apres que les Turcs eurent possession paisible de la cité, ils se transporterent es Eglises d'icelle, & par especial en la maistresse qui est appelée de sainte Sophie qui est moult grande, large & espacieuse : & là trouuerent ils plusieurs dames, damoiselles & femmes de grande auctorité avecques plusieurs autres filles pucelles : Lesquelles cogneurent & eurent leur compaignie charnelle de force & outre leurs grez & volentez, & ou contempt de Dieu nostre createur & de la Foy catholicque : & mesmement le Turc viola en icelle Eglise la femme de l'Empereur, & la teint pour sa concubine & l'emmena avec luy quand il partit de la cité : plusieurs aussi de ses gens commencerent illec
le

le peché de luxure en plusieurs & diuerses manieres. Item les gallées grosses Venissiennes du païs de Rommenie & de Capezande demourerent là iusques à midy, attendans y sauuer aucuns Chrestiens, dont il en issit bien quatre cens. Entre lesquels fut ledit Iaques Tetaldi qui estoit sur le mur à sa garde bien loing de la part où entrerent les Turcs : & sentit leur entrée bien deux heures apres. Et ainsi gaigna la mer & se despouilla & nagea iusques aux gallées qui le receurent. Item se l'armée de Venise que menoit messire Iean la Rendour fut arriuée vn iour auant, certes il n'y auoit nulle doubte qu'elle eust mont secouru. En laquelle estoient neuf gallées Venissienes, & vingt naües: à tout le moins il ne vint pas à temps: mais seulement arriua à Nigrepont vn iour apres celle prinse. Item ont estimé que les biens de Constantinople ont valu aux Turcs quatre mille millions de ducats: la perte de Venise s'estime cinquante mille ducats: car en ceste gallée s'est sauué enuiron pour vingt mille ducats des Geneuois: il ya perte grande & infinie des Florentins vingt mille ducats: de ceux de la Marche d'Anconne plus de quinze mille ducats. Anconne est la meilleure cité de la Marche d'Anconne. Item on trouue par ceux qui ont conuersé avec le Turc, qui ont cogneu ses faits, ses conditions & sa puissance, qu'il estoit lors de vingttrois à vingtquatre ans cruel plus que Neron & delectant à respendre sang, courageux & ardent de seigneurier & triompher tout le monde, voire plus que Alexandre ne Cesar ne autres quelque vaillans qu'ils ayent esté: & allegue qu'il a plus grand seigneurie & puissance que nuls d'eux n'auoit: & tousiours fait lire histoires deuant luy & demanda où & comment: & tient que legiere & bien aysée chose seroit, à auoir fait vn pont de Meguara durant iusques à Venise pour passer là ses gens d'armes. Et pareillement demanda de Romme où elle est assise, & aussi du Duc de Millan & de ses vaillances & d'autres choses. Il ne parle fors de guerre. Dit aussi qu'il veult faire son siege à Constantinople: car là il peult & veult faire merueilleuses nauires. Il estime ne qu'il sera nul ne en mer ne en terre qui ne luy apporte les clefs auant qu'on l'attende. Considerant qu'il à prins par force Constantinople la plusforte cité d'Europe, & si puissant qu'on ne cuidoit iamais que armée quelque grande qu'elle fut le deust surmonter: & considerant que luy & les siens sont hardis & genieux en armes, & ne font estime de leur vie. Item ont estimé que par ceste esté le Turc ne fera autre grand fait d'armes, mais entendra ses faits pour là venir à Constantinople, sinon que aucun lieu de vouldenté sans guerre se vouldist rendre. Ses gens vouldroient chacun retourner en sa maison pour recueillir leurs biens & se reposer, mais on peult tenir pour certain qu'il s'apreste merueilleusement par mer & par terre, pour soy mettre sus au temps nouuel: mais se Chrestiens y œuurent prestement, on tient fermement qu'on les chassera du païs, & acquestera l'en sur eux du païs pour iamais. Et les manieres d'y pourueoir seront cestes. Premier il fauldroit faire paix entre les Chrestiens. Item fauldroit que les Venissiens, le Duc de Millan, les Florentins & autres seigneurs d'Italie feissent vne armée de vingt mille cheuaux, bien en point & bons capitaines: laquelle fut conduicte deuers Pere par Albanie, iusques aux censues des Chrestiens: & là se posast en lieu habondant de viures, car là ils sont & seroient seurs, & incontinent augmentez d'Albanois, Sclauons

& autres nations Chrestiennes, qui volontiers iroient pour deffendre la foy Catholicque. Item par mer outre l'armée ja faicte à icelle, il faudroit adioindre vne autre armée du Roy d'Aragon, des Veniciens, des Genneuois, des Florentins, de courfaires & autres gens qui sont en la marine, qui souffiroit à vaincre celle du Turc s'elle n'estoit plus grosse qu'elle n'est de present : laquelle armée s'en allast au port de Nigrepont pour prendre Sagripoch, & les autres lieux du Turc, & pour obuier au passage de l'estroit que le Turc veult faire de Turquie en Grece. Item faudroit que l'Empereur, les Hongres, les Boësmes, les Poulains, les Valaques & autres nations d'iceluy païs, avec Iean Vvaiuoda en ceste partie trefredouté des Turcs, feissent vne autre armée qui entrast en Grece par Andrinopoch, & les autres lieux occupez des Turcs : & faudroit tenir maniere que toutes ces armées fussent tout en vn temps esdits lieux, & eussent moult belle intelligence l'une de l'autre de se faire sçauoir c'est effect. Item le Turc qui a fait tout son effort & toute sa puissance n'a que cc. mille hommes que bons que meschans, entre lesquels il ya grand quantité de Chrestiens, & autres ses subiects qui le suiuent mal volontiers : lesquels sentans l'armée des Chrestiens habandonneroient le Turc, & se adioindroiēt aux autres Chrestiens. Item le Turc par nature & vsage ne attend point la guerre n'en cité, n'en chasteau : mais se tient continuellement aux champs, luy & toute sa puissance, parquoy il se diminuera luy & les siens. En outre les Chrestiens de Roussie & de autres païs viendroient tous à l'armée des Chrestiens. Item outre le Caraman qui est grand seigneur en Turquie est ennemy capital du Turc, si aduise que les Chrestiens guerroyent ledit Turc, il l'oppresseroit grandement en Turquie & luy feroit guerre, & à pou de chose se feroit Chrestien. Item en Grece n'y aura païsant ne laboureur, qui ne porte viures aux Chrestiens. Les viures fauldroyent aux Turcs en Grece, le païs de Turquie luy sera rompu par mer, les Chrestiens de Grece voudront recouurer à l'espée leurs terres du Turc ainsi : mais que les armées s'approchent pou à pou l'une de l'autre, il n'est nulle doubte que brief le Turc & toute son exercite ne soit affamée & deffaicte. Mais se on n'y pouruoit diligemment & qu'on donne temps & loisir au Turc de soy mettre à point par mer & par terre, il n'est nulle doubte qu'il ne face grand esclandre aux Chrestiens, dont Dieu nous gard. Item en ceste Galée sont reuenus huiet citadins Veniciens de Constantinople & là sont demourez xxxviij. gentils-hommes & d'autres gens de bien plus de quarante, Dieu leur vueille ayder quoy qu'il leur couste pour depescher.

Cy dit comment le Turc enuoya lettres au Pape, pourquoy que le Pape vouloit ordonner vne croisée pour aller contre luy. Puis dit comment le Blanc Cheualier Mareschal de Hongrie rua ius les Turcs au port de Sambrine.



Vdit an & tantost apres ledit Turc voyant sa prosperité indeuë re-
luire sur luy, meu de presumption & grand orgueil, enuoya au Pape
Nicolas deux lettres toutes d'une mesme matiere : l'une en Latin &
l'autre en François, duquel François la teneur s'ensuit. Morbesan sei-
gneur es parties d'Achaïe fils de Horrestes avec les freres, dont l'un est Callabu-
labre collateraux vellateurs de Urbaneus imperateur : au grand Prestre Rom-
main

main nostre iouxtes ses merites salut. Il est n'aguères paruenü à noz oreilles que aux prieres & requestes du peuple des Veniciens, vous faictes publicquement diuulguer en voz Eglises, que quiconques prendra armes contre nous aura en cest siecle remission de ses pechez, & leur promettez benoïste vie au temps aduenir: de laquelle chose nous auons cogneu la certaine verité par la venue d'aucuns piétons portans croix, lesquels ont n'aguères transfreté & passé la mer és nauires des Veniciens. Pour laquelle chose nous sommes vehementement esmerueilléz: Car iaçoit ce que du grand Dieu tonnant vous fut donné la puissance de absouldre & de deslier les pources ames, tant deuriez vous plus meurement à ce proceder, ne ne deuriez induire les Chrestiens encontre nous, & especiallement les Italiens: car nous sçauons depuis n'aguères, que noz peres dirent que nostre peuple de Turcs auoient esté innocens, & quittes de la mort de vostre Christ crucifié: & comment qu'il soit ainsi que les lieux & les terres où sont voz choses sainctes, ne possessions ne nous ne noz gens n'en ayons la cognoissance, mais tousiours ayons eu & ayons en haine le peuple des Iuifs: car selon que nous lisons en noz histoires & chroniques, ils baillerent proditoirement & par enuie iceluy Christ au iuge des Rommains en Hierusalem, & le feirent mourir au gibet de la croix. Nous esmerueillons aussi & doulons que les Italiens se sont mis contre nous, comme il soit ainsi que nous auons inclination naturelle à les aimer: car ils sont ains issus du sang de Troye, & en ont leur primitiue noblesse & seigneurie. Duquel sang & seigneurie nous sommes anciens hoirs, & les nostres auoir esté augmentateurs & accroisseurs: lesquels estoient issus du grand Roy Priamus & de sa ligne. En laquelle nous sommes nez & auons intention de mener nostre seigneurie & Empire és parties d'Europe, selon les promesses que noz peres ont ouïes de noz Dieux. Nous auons aussi intétion de reparer Troye la grand & de venger le sang de Hector, de la Royne Yxion, en subiugant à nous l'Empire de Grece, & en l'vnissant à l'estat de nostre Dieu Palas, & punirons les hoirs des transgresseurs. Nous auons aussi intention de soubmettre totalement à nostre Empire & seigneurie Crete & autres isles de la mer: lesquelles le peuple des Veniciens deuantdits, nous ont violement ostées, & nous sont promises: & pource nous requerons vostre prudence & priors que vous imposez silence à voz messaigiers par la terre d'Italie à la requeste desdits Venitiens, en non prouocant plus le peuple Chrestien soubz espoir de puissance, comme nous n'ayons nulle guerre vers luy pour la creance & difference qui est entre nous. Comme il ne nous appartient en riens se nous ne croyons point en vostre Christ: lequel nous reputons auoir esté tresgrand Prophete. Et aussi selon que nous auons entendu selon la loy d'iceluy, vous ne nous deueriez point compeller à sa creance. Et se aucune controuersie est meüe entre nous & le peuple des Venitiens, cela procede que indeuément & sans nulle couleur de iustice: sans l'auctorité de Cesar ne d'autre Prince: mais par leur orgueil & temerité ils ont subiugué & occupé aucunes isles de la mer, & autres lieux, lesquels sont commis à nostre Empire: lesquelles desormais nous ne pouons ne deuous souffrir: car le tēps de nostre repromission approche. Par lesquelles choses vous pouez & deuez par raison desister de voz entreprinſes & de ce vous taire. Especiallemēt cōme nous cognoissons iceluy peuple des Venitiens estre estrāge

de la vie & meurs des Rommains: car ils ne vivent pas selon les meurs & selon les loix des autres, mais se cuident estre meilleurs de tous les autres peuples adiacens: desquels à l'ayde de nostre grand Dieu Iupiter nous mettrons l'orgueil & forcenerie en fin. Ou autrement se vostre prudence ne se desiste de ces entreprises, nous nous efforcerons contre vous à l'ayde des organeurs Imperateurs & autres Roys d'Orient: lesquels faignent au iourd'huy se dormir, & de noz contrées ferons venir aydes d'armes & nefz copieuses & artificieuses, par lesquelles nous auons intention de resister belliqueusement: non pas seulement contre voz pietons portans la croix, mais aussi contre Germanie, Rommanie & France se contre nous les incitez. Et avec l'ayde de Neptunus Dieu de la mer, nous auons intétion de passer Hellespont & Dalmacie, avec innumerables nauires menées par voilles & par auirons. Et auons aussi intention de passer par la region septentrionale, & visiter especiallement Dalmacie & Tracie. Donné en l'an de Mahomet viij. cens xl. en Iuing, en nostre palais triomphal scellée & enregistrée. Memoire qu'un nommé le cheualier Blanc Marechal de Hongrie: lequel n'estoit pas noble: car il estoit Marechal au parauant qu'il se meit à la guerre capitaine sous le Roy de Hongrie, se meit sur les champs pour combattre les Turcs, & auoit en sa compagnie de xx. à xxiiij. mille combattans: lesquels auoient ja gagné le port de Sambrine, où estoient bien quatre vingts mille Turcs. Auquel port furent quinze iours pour attendre toutes puissances qui pourroient venir sur luy & ses gens. Et ce venu à la cognoissance dudit cheualier Blanc, se partit de Mortune, & vint ioindre aux Turcs environ deux heures deuant le iour: & tellement fut cōbattu sur ceux qui estoient sur terre, que tout fut mort iusques au nombre de xxiiij. mille: & ceux de la mer voyans le deluge & fortune estre tournée sur leurs gens, s'en fuirent & ne peurent estre poursuiz, pource que ledit cheualier Blanc n'auoit aucunes nauires. Toutesfois lesdits Turcs se combattirent vaillamment, & tant que ledit cheualier Blanc fut fort nauré & plusieurs de ses gens: & ainsi s'en retourna, & y furent prins cinquante Turcs ou environ: desquels ledit cheualier Blanc en enuoya six au Pape Nicolas, six au Roy de France, & six à monseigneur de Bourgogne: le propre cousin du Turc y fut prins.

Cy dit comment les sentences de Iaques Cueur & de ma damoiselle de Mortaigne furent prononcées. Et comment maistre Guillaume Edelin Docteur en Theologie fut presché.



Vdit an mil cccc.liij. le xix. iour de May, fut prononcée certaine sentence present le Roy par monseigneur le chancelier de France, contre Iaques Cueur dessus nommé, conuaincu des cas pour lesquels il estoit emprisonnée en maniere qui s'ensuit. Combien que ledit Iaques Cueur pour les crimes par luy commis & perpetrez eut confisqué corps & biens: Toutesfois le Roy qui tousiours veut vser d'equité, en preferant aussi l'amendement & conuertissement d'un chacun pecheur, nō pas la mort: luy remet de grace especialle la mort & luy sauue la vie, & le condamne racheter des mains des Sarrazins le Chrestien qu'il a rendu, s'il est en lieu qu'il se puisse faire quelque somme d'argent qu'il doie couster: ou si non racheter des mains des

Sarrazins

Sarrazins vn autre chrestien. Item pour les sommes de deniers par luy indeüement prinſes & extorquées ſur les ſubieçts du Roy montans à ſommes ineſtimables, il eſt condamné en la ſomme de cent mille eſcus. Item pour les offences par luy commiſes à pluſieurs & diuerſes fois, le Roy le condamna en la ſomme de quatre cens mille eſcus. Item le ſurplus de tous chacun ſes biens quelque part qu'ils ſoient, ſont & demourront conſiſquez audit ſeigneur. Item il eſt priué de tous offices royaux, ſecrets & publiques, & déclaré eſtre inhabile à iamais les tenir. Item & avecques ce eſt banny à touſiours du Royaume de France. Item ſera tenu de faire amende honorable au Roy, à la perſonne de ſon procureur ſans chapperō & deſceint, vne torche de dix liures peſant en ſes mains, en diſant que faulcement & deſloyaument il auoit rendu ledit chrestien aux Sarrazins, & auſſi leſdits harnois & armeures, en requerant à Dieu mercy, au Roy & à iuſtice. Item eſt déclaré les ſéellez des ſeigneurs de la Fayette & de Cadillac eſtre nuls & de nulle valeur, & que ledit Iaques Cueur ne ſes heritiers ne ſ'en pourroient ayder à l'encontre d'eux, & comme nuls & de nulle valeur, caſſez & adnullez leur furent renduz. Apres lequel arreſt prononcé le Roy feit dire par ſondit Chancellier ces parolles, reſerué au Roy touchant ledit bannifſement & autres choſes la bonne grace & plaſir du Roy. Et au regard de la damoiſelle de Mortaigne combien qu'elle ayt conſiſqué corps & biens. Toutesfois en conſideration des grans ſeruices que les predeceſſeurs d'elle & ſon mary ont fait audit ſeigneur, iceluy ſeigneur luy remet la mort & luy reſtitue ſes biens comme non conſiſquez: & luy eſt deſſendu en peine de conſiſcations de corps & de biens de non approcher la perſonne du Roy ne de la Royne à deux lieües pres, & auſſi à eſtre condamnée de faire amende hōnorable au Roy & à la perſonne de ſon Procureur. En diſant que faulcement & deſloyaument elle a accusé & occupé ledit Iaques Cueur, Iaques Colompne & Martin Prandoux, en requerant de ce à Dieu, au Roy & à iuſtice pardon & mercy, & enuers les deſſuſdits: c'eſt à ſçauoir enuers ledit Martin a eſté condamnée en la ſomme de quatre cens liures courās. Et enuers la femme & les deux filles dudit Iaques de Coulompne, enuers chacune de cent liures tournois, qui montoient trois cens liures tournois. Oudit an le dimenche ſurueille de Noël fut eſchauffaudé & preſchié publiquement en la cité d'Eureux, & condamné à demourer perpetuellement és priſons de l'Eueſque d'icelle cité, maiſtre Guillaume Edelin Docteur en Theologie Prieur de S. Germain en Laye, & au deuant Auguſtin & de certaines autres ordres: lequel par temptation & exhortatiō de l'ennemy d'enfer, auquel il ſ'eſtoit donné pour accomplir ſes delices mondaines: & par eſpecial pour faire ſon plaſir d'une dame cheualereſſe comme on diſoit, & ſe meit en telle ſeruitude de l'ennemy, qu'il luy conuenoit eſtre en certain lieu toutesfois qu'il eſtoit inuité par ledit ennemy. Ouquel lieu ils auoient accouſtumé de faire leur conſiſtoire, & ne luy failloit que monter ſur vn balait qu'il eſtoit preſtement transporté, là où ledit conſiſtoire ſe faiſoit. Et confeſſa ledit maiſtre Guillaume de ſa bonne voulété auoir fait hommage à l'ennemy eſtant en eſpece & ſemblance d'un mouton, en le baiſant par le fondement, & perſeuera le deſſuſdit maiſtre Guillaume par pluſieurs & diuerſes années en ſon damnable propos: & auoit touſiours ayde de l'ennemy en tout ce qu'il luy vouloit reque-

rir:& iusques à ce qu'il fut accusé & atteint dudit malefice, parquoy il fut arresté & detenu prisonnier, depuis lequel emprisonnement fait par iustice la puissance de l'ennemy fut de nul effect:& demoura ledit maistre Guillaume en prison, en la fosse au pain & à l'eau par la cōdamnation que dit est. Et luy remonstra l'inquisiteur de la foy moult hautement & solemnellement, les belles predications & enseignemens qu'il auoit fais au peuple au temps passé, quand il alloit par les païs prescher la foy de Iesus: & plusieurs autres remonstrances luy furent faictes par ledit inquisiteur, & fut mittré en la presence de grand multitude de peuple durant la predication dudit inquisiteur. Apres laquelle remonstrance, ledit maistre Guillaume sachant qu'il auoit voirement delinqué moult grandement enuers nostre redempteur & createur, commença à gemir & douloir de son meffait en criant mercy à Dieu, à l'Euesque & à la iustice, & en soy recōmandant aux prieres des assistens: Puis fut enfermé & mené en la fosse pour faire penitence du treshorrible cas qu'il luy estoit aduenue.

Comment le Roy de France enuoya vne ambassade deuers le Roy d'Espagne: comment le Roy de France fait faire deux chasteaux à Bordeaux pour tenir le peuple en subiection: comment le Duc d'Iorth fait emprisonner les Ducs de Sombresset & de Clocestre & plusieurs autres incidens.

1454.

EN l'an mil cccc.liiiij. se partit reuerend pere en Dieu maistre Iean Bernard Archeuesque de Tours & messire Guillot Destan, cheualier Seneschal en Rouergne, pour aller en ambassade de par le Roy de France deuers le Roy de Castille, pour confermer les alliances des Roys de Frâce & d'Espagne. Oudit an enuoya le Roy de Frâce grand nōbre de gens d'armes & de Franks-archiers dedans la ville & cité de Bordeaux. Et ordōna faire deux chasteaux en icelle cité pour tenir le peuple en subiection: dont l'un estoit situé sur le bort de la riuere, & l'autre à l'autre bout de la ville, du costé de deuers Biarn:& estoient pour la fortification d'iceux chasteaux faire faire ordōnez & commis le Comte de Clermont, le seigneur de Santrailles Bailif de Lyon, le gouuerneur de la Rochelle, sire Iean Bureau Maistre de ladicte ville, & messire Guichart le Boursier: lesquels feirent grosses diligences de faire besongner de iour en iour esdits chasteaux, qui seront fort merueilleusemēt à resister contre tous hommes: & mesmement à tenir les habitans & demourans en icelle ville & cité en subiection plus qu'oncques-mais n'auoient esté. En ce mesme temps & an print le Duc d'Iorth le gouuernement du Roy d'Angleterre, & fait mettre en prison le Duc de Sombresset & de Clocestre: c'est à sçauoir le Duc de Sombresset en la grosse tour de Londres, & celui de Clocestre ou chateau de Proufrois. En ce mesme temps & an le Comte de Charrolois fils de monseigneur le Duc de Bourgogne, espousa la fille du Duc Charles de Bourbon, & mourut le Roy d'Espagne en l'aage de cinquante ans qui fut grand dommage: car il estoit bon, sage & beau Prince. Et celui an mourut le Pape Nicolas qui estoit encores en sa force. Mais il fut empoisonné comme il fut trouué quand il fut ouuert par les Physiciens, & fut esleu Pape Calixte. En cest an mesmes au mois de Feurier le Roy d'Angleterre manda aucuns des seigneurs de son païs, & leur remonstra commēt le Duc de Sombresset & le Duc de Clocestre

de Clocestre ses propres parens & de son sang estoient prisonniers, si vouloit bien que fils n'estoient bien grâdement trouuez chargez de cas criminels touchans contre sa maiesté royale qu'ils fussent deliurez, dont ils furent d'accord, & mesmement le maistre & gouuerneur de Londres dit qu'il les deliureroit en baillant bonne & seure caution d'estre à droit: & tantost apres la deliurâce desdits seigneurs vint le Duc de Sombreffet en pouoir & auctorité, & tellemēt qu'il eut le regime & gouuernement du Roy: & ce voyant le Duc d'Iorth il se departit de la court & s'en alla le plus secrettement qu'il peut en son paÿs, doutant que le Duc de Sombreffet ne luy fait desplaisir. En ce mesmes temps fut prins le seigneur de Lesparre, lequel autresfois en allant contre son serment auoit esté querir les Anglois, pour remettre en leurs mains le paÿs de Bourdelois, ainsi fut traistre à son souuerain & naturel seigneur le Roy de France: & combien que ladicte trahison eut esté toute manifeste: neantmoins le Roy à la derniere prinse de Bordeaux soy mōstrant tousiours bening & misericors, luy remeit la vie, & fut tant seulement banny du paÿs de Guyenne & de Bourdelois: & puis par l'instigation de l'ennemy d'enfer sous ombre d'un sauscōduit, il cuidoit encores mettre de rechief ledit paÿs de Bourdelois és mains d'iceux Anglois, comme plus faulx & desloyal traistré que par auant. Et pource que l'escriture dit. *Quia nullum absconditum quod non sciatur, nec occultum quod non reueletur.* Qui est à dire, que nulle chose tant soit secrettement ne mussément faicte, ne peut estre celée qu'elle ne soit sceüe, ne demourer lōguemēt chose mal-faicte impunie. Ce venu à la cognoissance du Roy, il fut prins & mené en la ville de Poictiers & sur ce questionné. Et apres par luy la chose confessée fut iudiciairement condamné à mort, & fut baillé au bourreau lequel luy osta le moule de son chapperon: c'est à sçauoir la teste, & puis fut escartellé & mis en six pieces & pendu en diuers lieux, comme l'en a accoustumé de faire en tel cas qui peut estre exemple à tous autres.

Cy dit comment le Comte de Charrolois se maria à ma damoiselle Ysabeau de Bourbon: puis parle comment le Duc Philippe de Bourgogne retourna des Allemaignes: Et comment il vint à l'Isle & Arras où il fut honnorablement receu.

LE penultime iour d'Octobre audit an liiij. que le Duc Philippe de Bourgogne estoit retourné des Allemagnes, mōseigneur Charles son fils Comte de Charrolois, espousa en la ville de l'Isle ma dame Ysabeau de Bourbon sa cousine germaine par dispense de sainte Eglise, le Duc estāt en Bourgogne & par tant ne fut point aux nopces: mais la Duchesse y fut, & fut le mariage si soudain que plusieurs dirent lors que le Comte n'en sceut riens, qu'il ne fut à vn iour pres: mais son pere le voulut ainsi & luy manda & commanda bien estroictement qu'il s'en deliurast, ce qu'il fit comme bon fils & obeissant à son pere. Aucuns aussi disoient qu'il faisoit conscience de prendre à mariage sa cousine germaine. Aucuns autres disoient qu'il se fut plus volentiers allié par mariage en Angleterre à la fille du Duc d'Iorth qui tendoit à la couronne d'Angleterre. Et quoy qu'il en fut il se maria lors au gré de son pere à ladicte cousine: & se maintint si bien & si honnorablement avec elle que gens mariez ne le pourroient mieux faire, si qu'il fut renommée que

onques puis qu'il fiança il ne cogneut autre femme. Encores à sa recōmandatiō en l'absence de son pere, estās és Allemagnes qu'il eut le gouuernemēt des païs de son pere. Il eut grace de bien aimer iustice & d'estre tresbien conditionné, si non de trop tost soy informer & de croire trop legierement les premiers rapports qu'on luy faisoit, qui est vne perilleuse condition en grand seigneur. Environ la my Feurier dudit an cinquantequatriesme, vint à l'Isle le noble Duc Philippe de Bourgongne où il fut receu de ses subiects moult honorablement. Et tost apres c'est à sçauoir le xxiiij. iour dudit mois il alla à Arras, où il fut encores receu plus honorablement & à moult grand ioye, pource que longuement auoit demouré, & que Dieu l'auoit ramené des Allemagnes sain & sauf & sans encombrer.

Cy parle des grans tailles & aydes que le Duc leua en ses païs pour aller à son voyage de Turquie: puis dit comment il feit Euesque du Treth son fils Bastard, lors Euesque de Theroüenne: & comment il meit à obeïssance aucuns rebellans audit Euesque.

Enq iours apres que le noble Duc Philippe de Bourgongne eut esté receu & festoyé en sa ville d'Arras, il feit illec conuenir & assembler les trois estats de son païs d'Arthois, & leur feit remonstrer commēt il auoit voüé d'aller en arme contre le Turc: & auoit voulenté determinée d'y aller à toute sa puissance au cas que le Roy son seigneur luy voudroit garder ses païs & les tenir en seurté, & que pour faire le voyage luy estoit necessité d'auoir l'ayde de ses bons vassaux & subiects: & pourtant leur demāda & requist qu'ils luy voulussent ayder de quatre aydes mōtans à lvj. mille francs monnoye royale. Surquoy iceux trois estats parlerent ensemble. Et finalement luy accorderent trois aydes montans à xliij. mille francs, par condition que sil n'alloit audit voyage ils n'en payeroient riens: & le bon Duc leur respōdit que voirement il n'en vouloit nuls fils n'y alloit. Puis s'en alla en ses autres païs de Flandres, de Hainault & de Brabant, là où il leur feit pareille requeste: & ils luy accorderent grans aydes à leuer esdits païs pour luy ayder à faire ledit voyage.

Comment l'Euesque du Treth trespassa: Et commēt le Duc de Bourgongne alla en Hollande pour en faire Euesque Daud son fils Bastard: comment le Roy de France meit en sa main le Daulphiné: puis met les conquestes que feit le Blanc chevalier sur les Turcs: & ce qui en ce temps aduint au Royaume de Naples.


1455.

DE l'an de grace mil cccc. lv. trespassa l'Euesque du Treth qui est en Allemagne tenant au païs de Hollande: & comme le Duc Philippe de Bourgongne eut de longue main pensé d'y vouloir mettre vn sien fils Bastard nommé Daud, lors estant Euesque de Theroüenne, il auoit prié du viuant de leur Euesque aux chanoines du Treth, se le cas aduenoit que leur Euesque allast de vie par mort, qu'en faueur de luy ils voulussent eslire pour estre leur Euesque sondit fils Daud: mais neantmoins ils n'en feirent riens, ains esleurent le Preuost de leur Eglise frere germain du seigneur de Brederode, vn grand Baron de Hollande parent dudit Duc Philippe: de laquelle election le Duc non content enuoya à Romme, & besongna tellement avec le

Pape

Pape qu'il donna son Euesché du Treth à sondit fils, mesmement le luy auoit le Pape donné des le viuant l'Euesque du Treth: & pourtant tost apres la mort dudit Euesque, le Duc s'en alla à la Haye de Hollande, & contendit par doux moyens & par prieres enuers ceux du Treth, affin qu'ils voulsissent son fils recevoir à Euesque, ce qu'ils ne voulurent faire: & à ce faire fut en Hollande depuis la S. Remy, l'an lv. iusques à la S. Iean Baptiste, l'an cinquante six.

Comment le Comte de Clermont & le seigneur de Loheac Mareschal de France & plusieurs autres capitaines, prindrent & meirent en la main du Roy la Comté d'Armignac & de Rouergne. Et meirent l'Archeuesque d'Aux en possession.

 Vdit an lv. ou mois de May le Roy de France enuoya le Côte de Clermont, le seigneur de Loheac Mareschal de France & plusieurs autres capitaines en la Côté d'Armignac. Et pareillement enuoya le Côte de Dápmartin, le Baillif d'Eureux & plusieurs autres au pays de Rouergne à l'encôte dudit Comte d'Armignac, pource qu'il n'auoit point voulu obeir à mettre l'Archeuesque d'Aux en possession & faisine de l'Archeuesché: lequel estoit esleu à bõ droit, & de ce auoit ses bulles du Pape. Et vouloit ledit Comte qu'un nommé de l'Estin contre tout ordre de droit le fut, & l'auoit bouté en ladicte cité, & fait prendre possession contre le gré & vouloir du Roy. Et pource que ledit Comte auoit posé ledit de l'Estin de fait & de force, le Roy moult indigné sur ce, enuoya gens d'armes deuant sa cité de Lestore, pour y mettre le siege: laquelle se rendit aux gens du Roy & pareillement toutes les places de ladicte Comté, celles de Rouergne & celle du Valdore. Et ainsi perdit ledit Comte toutes ses terres pour la rebellion qu'il auoit fait au Roy, car forte chose est de regiber contre l'aguillon. Et ce fait s'en retournerent lesdits seigneurs & capitaines où le Roy ordonna. Oudit an Henry Roy d'Angleterre par le conseil du Duc de Sombresset, manda tous les grans seigneurs de son Royaume pour venir deuers luy en leur simple estat, pour ordonner (comme il disoit) des haux affaires de son Royaume, dont il vint vne grand partie à Londres, & se pensa le Duc d'Iorth qu'il se trouueroit, & de fait se meit en chemin & partit de son pays à tout mille combattans. Et luy venoient de quatre à cinq mille combattans: desquels mille combattans fut le Roy & ceux de Londres bien aduertis, & non pas des autres qui venoient apres. Si se delibera le Roy & le Duc de Sombresset accompagnez du Comte de Northombeland & de plusieurs autres seigneurs, & de ce qu'ils peurent finer hastiuement des gens de dedans Londres de le ruer ius, tous esbahis de ce qu'il venoit en armes sur les champs, & ne scauoit riens de la compagnie qui suiuoit ledit Duc d'Iorth de loing. Pourquoi le Roy se meit sur les champs & cheuaucha luy & son ost, tellement qu'il rencontra iceluy Duc. Et tantost sans quelque proces cōmencerent les parties à frapper les vns sur les autres. Et là fut si fort combattu qu'il en y eut grand foison de morts d'un costé & d'autre: toutesuoyes la victoire de la iournée demoura audit Duc d'Iorth. Et furent tuez lesdits Ducs de Sōbresset & Comte de Northombeland, & plusieurs autres tant seigneurs qu'autres, iusques au nombre de iiij. à cinq cens hommes. Et mesmement fut le Roy nauré & percé d'une fleche parmy le col, & fut en grand aduenture de son corps. Et print le Duc d'Iorth

plusieurs prisonniers tant seigneurs, nobles qu'autres. Lesquels il mena à Londres avec le Roy, & là furent les vns deliurez, & les autres punis selon leurs demerites. Et de ceste heure fut tout le gouuernement du Roy renuersé, & demoura ledit Duc d'Iorth gouuerneur du Roy d'Angleterre & du Royaume feul & pour le tout. En ce temps se retrahit ledit Comte d'Armignac quand il eut tout perdu és royaumes de Nauarre & d'Arragon.

Comment le Roy de France fut mal content de son fils le Daulphin s'en estre allé deuers le Duc de Bourgongne sans son congé. puis parle d'aucunes ordonnances faictes par le Pape Calixte pour le faict de la Chrestienté.

1456.



N l'an mil quatre cens lvj. le Roy sachant son aîné fils estre party de son païs du Daulphiné, & s'en estre allé és païs du Duc de Bourgongne desirant de parler audit Duc, fut mal content de ce qu'il ne luy en auoit riens fait sçauoir. Et pource qu'il doubtoit qu'il ne creut mauuais conseil, & qu'il ne se gouuernast autrement que par raison, pour eui-ter à tous inconueniens qui par faute de gouuerneurs se pourroient ensuiuir, affin qu'il fut plus enclin à se reduire & venir en obeïssance deuers luy, comme vray fils doit faire à son pere, il se transporta au païs de Daulphiné à tout noble & puissante compagnie de gens d'armes: & la print & meit en sa main toutes les rentes & reuenües. Ensemble toutes les villes, forteresses & chasteaux d'iceluy païs, affin que son dit fils ne peut de riens iouïr esperant de le retraire par ce moyen: & enuoya gens d'armes en plusieurs & diuers lieux pour garder les passages, comme à Pontoise, à Compienne, en la Brie & ailleurs, en rescriuât aux bonnes villes, qu'on ne baillast aucun passage audit Daulphin n'entrée en bonne ville ne à ses gens, aussi sans estre les plus forts, & mesmement pource qu'il luy sembloit trop volage & plain de sa voulété, comme le Roy l'auoit aperceu clerement, en tant que quand il se partit d'avec le Roy son pere il ne demanda congé que pour quatre mois, & il en demoura à sa grand desplaisance bien pres de dix ans. En ce mesme temps furent faictes certaines ordonnances par le Pape Calixte pour le fait de la Chrestienté, & indulgences données à tous ceux qui mettroient à execution le contenu d'vnes bulles données par ledit Pape, lesquelles ont esté publiées par predicateurs en plusieurs lieux d'icelle Chrestienté. En ce mesme an furent enuoyez certains articles au Roy par les ambassadeurs du Duc de Bourgongne, touchans le fait du Daulphin son fils. En ce mesme temps feirent les Hongres ou païs de Hongrie vne grand destruction sur les ennemis de la foy de Iesus-Christ, par le conseil de sire Iean Capestrain disciple iadis de S. Bernardin: & par le cōseil d'un sage & puissant cheualier appelé messire Guillaume Blanc, furent boutez hors & expellez de la cité de Belgrade, en laquelle y auoit grād planté de Turcs, lesquels furent tous morts iusques au nombre de quinze mille, & n'en eschappa oncques homme que tous ne fussent occis & mis à mort. Et vindrent grans osts accompagnez d'autres Turcs: lesquels furent le lendemain vaillamment combattus par les Chrestiens, & tellement qu'il mourut de rechief cent mille Turcs entre soleil leuant & soleil couchant. Et là estoit en personne le Souldam de Perse, principal capitaine de tous lesdits Turcs. Lequel voyant telle desconfiture estre sur ses gens, s'en fuit

fuit avec vn pou de ses gens en vne cité nommée Boibe, & de là en la Grece. Apres se transporterent ledit cheualier nommé le cheualier Blanc, & toute sa cōpagnie deuant ladicte cité de Boibe, laquelle fut par eux gaignée & y meirent à mort deux mille Turcs. En apres en ensuiuant leur bonne fortune par l'ayde de Dieu, gaignerent plusieurs citez & chasteaux. C'est à sçauoir la cité Bastiliance Vlgaria, Fastigia, Emere & vne autre cité nōmée Angasta, qui estoit moult belle cité. En laquelle moururēt & furent destruits xv. mille Turcs. Et à celle iournée mourut cinq mille Chrestiens, desquels Dieu mette leurs ames en Paradis. *Quia dignus operarius mercede sua.* Depuis prindrent lesdits Chrestiens S. Vincēt, & la ville de Valence avec le chasteau, & tellement procederent que tout fut conuerty à la foy Catholique. Ce fait s'en allerent lesdits Chrestiens pour gaigner de plus en plus, & prindrent la ville & chastel de Flagis: puis prindrēt Gaudalolo: apres prindrent Porrus: apres prindrent Stauengier & Chastouen: & là furent destruits iiij. mille Turcs & la cité gaignée: mais il y mourut cent Chrestiens que Dieu absolue. Et tantost apres entra toute la cōpagnie d'iceux Chrestiens en la terre de Grece: & là gaignerent vne grande cité nommée Glotuase, où ils tuerent x. mille Turs: & de là s'en firent & delaisserēt tous les chasteaux, villages, villes closes & murées & autres forteresses estant esdictes marches, & s'en allerent en la Prouince de Caldée qui est empres Constantinople: & ainsi leur demoura la terre & le peuple & grād partie du païs d'Occident & de Grece. Apres furent prins sur lesdits Turcs la cité de Latheris, celle de Glamus & le chasteau avecques plusieurs autres places, forteresses & villages. Apres lesquels allerent à toute puissance tous les Chrestiens estās assemblez en icelles parties. Et là furent nombrez tous les Turcs qui auoient esté destruits, deux cens mille en huiēt vingts citez, & villes murées, & quatre cens chasteaux & autres forteresses. Ceste-dicte conquiste fut relatée pour mettre és chroniques, & affermée sur les sainctes Euāgiles de Dieu, & sur le vœu de prestrise par venerables ecclesiastiques personnes messire Ieā Valate prestre, messire Patrice Tournaille aussi prestre, & Andrieu Valate homme lay tous trois estans du Dyocese d'Vmbrianum en Dacie: & fut nauré ledit cheualier Blanc d'vne lance en la derniere bataille trefgriefuement, & tant que necessité le contraignit soy retraire en la cité d'Auguste: en laquelle il alla de vie à trespas: Dieu face mercy à l'ame de luy cōme chose bien defferuie. Et pareillement fut fort nauré le Turc & se retrahit en Constantinople, où il fut malade par certaine espace de temps. Interrogez par le Chroniqueur de France les dessusnommez par le serment que dit est: Comment ils sçauoient les choses deuant dictes estre vrayes, ils deposerent qu'ils auoient esté & assisté personnellement en toutes les batailles en armes, à cōbattre: & pour les grans perils de mort où ils auoient esté s'estoient voüez à mōseigneur S. Denys, & en plusieurs autres pelerinages, qu'ils auoient intétion d'accomplir auant que iamais ils retournassent en leurs païs. Et se monstroient (cōme il sembloit) bien affectez au fait de la Chrestienté. Et depuis se partit ledit Turc de Constantinople pour retourner en son païs. Oudit an le samedy iiij. iour de Decembre enuiron trois heures deuant le iour, se meut vn terremoto és contrées de Naples, de Puille & de Calabre, & tel qu'il n'est homme qui le peut penser fil ne l'auoit veu, dont se sont ensuiuis grans maulx & innumerables, tels

& en la maniere qui s'ensuit. Tout premieremēt est fondue & perie vne cité ou-
dit Royaume nommé Arriano, en laquelle sont morts huit mille personnes.
Item vne autre cité nommée Padule où demouroiēt trois mille personnes, qui
ont esté tous morts sans en eschapper vn. Item vne autre terre nommée Bou-
chery, & en telle maniere qu'il n'est hōme qui sceut dire qu'onques eut veu aus-
dits lieux, citez, villes, chasteaux ne fortereffes, excepté ceux qui les ont veües
par auāt qu'elles fussent fondues ou peries. Item est allé en ruine par ledit Ter-
remote la moitié d'une cité nommée Troye, en laquelle est mort grand peuple.
Item est allé par terre la plusgrand partie du chastel & ville de Canosse par le-
dit Terremote. Item les citez d'Ascoly, de S. Agathe, le chasteau d'Arpy & plu-
sieurs autres. Item en la Côté de Moleffe sont fondus en abisme la cité de Cam-
pobasso, la cité de Laurentino, le cheasteu de S. Iulian, la cité de Macona, le cha-
steau de S. Lou, les chasteaux de Castine & de la Rippe, & aussi plusieurs terres
de la Comté d'Alteuille fondues comme dessus, & esquelles sont morts xxviij.
mille personnes. Item en la cité de Naples a eu par ledit Terremote aucun dô-
mage, & par especial plus aux Eglises qu'aux edifices de ladicte cité, & dura le-
dit Terremote par l'espace de trois iours, & en aucunes parties plus lōguemēt.
Et est à sçauoir que depuis le iiij. iour dudit mois iusques au vij. includes, sont
morts cēt mille personnes, cōme il a esté relaté par gēs de diuerses contrées, qui
sçauent la chose estre vraye. Itē a esté mis en ruine par ledit Terremote en vne
nuiēt le chasteau de Sāguine, le chastel de Presole, & la Roche de Capoa, & n'y
est demouré muraille ne maison. Item a mis en ruine ledit Terremote la moi-
tié de la cité de Sermone & le chasteau d'Oliueto, esquels sont morts cinq cens
personnes, & ou chasteau de Pesolo six cens. Et pareillement ou chasteau de
Thoquo est mort le seigneur, & toutes les personnes qui estoient dedans. Item
en vne nuict meit en ruine ledit Terremote la prinse du mur d'Anconne deuers
la porte d'Elmote. Itē a eu aussi tresgrād dômage és edifices de Capoa, d'Auer-
sa, & de Beneuento & le chasteau de Lusano, qui est chose bien forte & difficil-
le à croire, qui ne l'auroit veu. Ceste grande & merueilleuse perte fut enuoyée
au Marquis de Ferrare en escrit par messire Hercules son frere, qui estoit ou
Royaume de Naples avec le Roy d'Arragon, & escrit à Rougia le vij. iour de
Decembre mille cccc. lvj. Oudit an lvj. le premier iour de l'an le Roy estant à
S. Prier ou Daulphiné pres de Lyon, Otho Castelan Florétin argétier du Roy
fut prins sur le pōt de Lyon par Ieā de la Gardette Preuost de l'Hostel du Roy,
pource q̄ le Roy auoit esté informé & aduertty q̄ ledit Otho auoit fait certai-
nes carecteres à l'encōtre & au preiudice de sa persōne: car il auoit fait certaines
images, par lesquels par art diabolique il deuoit auoir le gournemēt du Roy,
tellemēt que le Roy feroit tout ce qu'il plairoit audit Otho: & aussi estoit son
complice Guillaume Gouffier, lequel longuement fut tenu en prison pour sça-
uoir la verité du fait: & fut ledit Otho mené prisonnier à Toulouse au Parle-
ment, là où il auoit demouré longuement tresorier pour le Roy, & ledit Gouf-
fier fut mené à Tours, & en l'an lvij. fut condamné par le Chancellier ou grand
cōseil du Roy à perdre tout ce qu'il auoit, & estre banny: mais le Roy luy feit
grace qu'il ne perdit fors les offices qu'il tenoit de luy, & fut remis à ses biens
autres, & banny à vingt lieües du Roy: & fut condamné à mille escus pour les
frais

frais & despens qui auoient esté fais pour luy . Item auoit ledit Otho commis le peché de Sodomie , pourquoy il fut reimené à Tours l'an lvij. pour estre sentencié, &c. Combien qu'il fut depuis amené à Paris és prisons du Palais, pource que plusieurs disoient qu'il auoit appelé à Parlement. Et au regard de la cōclusion, ie m'en rapporte à ce que fait en a esté : car il a esté transporté de prison en autre, parquoy m'est incogneüe la diffinition . Oudit an fut en ce Royaume grand année de pluye . Pou apres le Duc de Sauoye & sa femme vindrent deuers le Roy & eut la fille du Roy vn fils du Prince de Piemont, aîné fils du Duc de Sauoye, lequel l'auoit espousée . En ce tēps vint l'ambassade du Roy d'Espagne pour confermer l'alliance des deux Royaumes : en ce temps vint le Prince de Nauarre deuers le Roy demander la Duché de Nemours : en ce temps vint le Cardinal d'Auignon , de Bretagne venant de canoniser S. Vincent de l'ordre des Iacobins en la cité de Vennes . Pou apres vint le Cardinal deuers le Roy pour auoir vn dixiesme sur les gens d'Eglise de ce Royaume pour aller sur les Turcs, comme il disoit .

Comment le Duc de Bourgongne mena son fils en Hollande à grande armée & le meit en possession paisible de l'Euesché du Treth, & contraignit par siege ceux de Deuenter d'obeir au nouuel Euesque ce que faire ne vouloient .



Vand le Duc Philippe veit que par amour ne par priere il ne pourroit son fils mettre en l'Euesché du Treth , il manda gens d'armes en Picardie & Hainault, & ils y allerent bien xiiij. mille combattans. Et lors changerent ceux du Treth leur propos, & receurent son fils à Euesque sous certaines conditions . C'est à sçauoir que le frere du seigneur de Brederode qui eut esté esleu , auroit de pension sa vie durant sur l'Euesché du Treth quatre mille Francs tous les ans , & sur l'Euesché de Theroüenne deux mille francs: Et pour les fraiz & despens auroit cinquante mille lyons pour vne fois. Et outre seroit ledit esleu premier Conseillier du Duc au païs de Hollande à mille Florins de Rin de gages chacun an: & moyēnant ces choses se deporta de son Euesché, duquel l'en dit communemēt qu'il vaut bien tous les ans cinquāte mille mailles de Rin. Ces choses ainsi faiçtes & traictées, le Duc Philippe entra dedans la cité du Treth à toute sa compagnie le v. iour d'Aoust l'an lvj. là où il fut receu honorablement, & le lendemain sondit fils y entra en armes grandement accompagné, & dit la messe en la grande Eglise le Dimenche ensuiuant. Et tantost apres s'en alla le Duc à toute son armée vne bōne ville assieger de l'Euesché du Treth, nommée Deuenter, pource qu'ils ne vouloiēt obeir à leur nouuel Euesque. Et issirent ceux de la ville sur luy , & l'escarmoucherent si durement qu'il en y eut de morts de l'vne partie & de l'autre : Mais en fin furent ceux de la ville rebouttez dedans leur ville. Et au iiij. iour apres fut vn bouleuert qu'ils auoient fait moult fort deuant leur porte, si fort battu d'engins à pouldre, que ceux de dedans mesmes voyans que ne leur pourroient tenir, y boutterent le feu & l'ardirent de nuict: & y fut depuis le siege tenāt iusques enuiron la fin de Septembre, que ceux de dedans enuoyerēt deuers le Duc & promeirent d'obeir à toutes les autres villes dudit Euesché. Entre-temps que ces traictez se faisoient, le Duc de Gueldres qui auoit espousée la niepce du Duc

Philippe, de laquelle il auoit vn beau fils, aagé de xvj. ans ou enuiron : & lequel Duc de Gueldres auoit promis audit Duc Philippe luy faire seruice, & luy auoit habandonné son païs, & ses places. Neantmoins il feit vne hastiue alliance avec ceux de Frise, & s'assemblerent en tresgrand nombre pour ruer ius le Duc Philippe, qui iamais ne s'en fut doubté: mais sa niepce aduertie de la mauuaistié & trahison que son mary vouloit faire à son oncle, sembla vne nuit de la place où elle estoit: print son fils avec elle & vne compagnie de ses gens, & s'en alla deuers son oncle, qui tenoit encore le siege deuât Deuenter, & l'aduertit de celle grande mauuaistié que son mary luy vouloit faire: ceste cy fut la cause pourquoy le Duc Philippe se hastia plus de prédre traicté à ceux de Deuenter: si que le traicté fait & passé & les seurtez sur ce faictes, le Duc leua son siege le xxvij. iour de Septembre, oudit an lvj. s'en retourna au Treth, & du Treth à la haye de Hollande, laissant Dauid son fils paisible Euesque du Treth, puis deffait son armée: bon gré deuoit sçauoir à sa niepce du bon aduertissemēt qu'elle luy feit: car s'il fut demouré deux iours plus à son siege, le Duc de Gueldres & les Frisons luy eussent couru sus, ainçois qu'il eut riēs sceu de leur entreprinse, qui luy eut peu tourner à grād meschief, & au Duc de Gueldres à grād reproche, attēdu qu'il auoit espousée la niepce du Duc Philippe (cōme dit est) & q̄ le bō Duc Philippe auoit leur fille mariée & enuoyée au Roy d'Escocce à ses propres despens, & autres plusieurs biens & hōneurs qu'il auoit fais au Duc de Gueldres.

Comment le Duc d'Alençon fut prins & mis en prison: & comment les Turcs furēt desconfits en Hongrie miraculeusement: & parle ainsi d'aucunes choses estranges qui aduindrent oudit an lvj.



Vdit an lvj. és festes de Penthecouste ou tost apres, fut prins en la ville de Paris le Duc d'Alençon: & le print par le commandement du Roy le Comte de Dunois bastart d'Orleans, & fut enuoyé à Melun, & de Melun fut mené deuers le Roy, & fut trouué (si que disoit cōmune renommée) qu'il auoit machiné avec les Anglois de prendre à mariage pour son fils aîné la fille du Duc d'Iorth au desceu du Roy, & qu'il deuoit mettre les Anglois en ses places au grand peril & nuisance du Roy, & par especial de sa Duché de Normandie: lequel cas il confessa, & partāt fut mis en estroicte prisō, là où il fut tenu & enfermé estroictemēt iusques apres le trespas du Roy, & tost apres sa prinse courut vne voix, que le Duc de Bourgogne estoit consentant de ce que machinoit le Duc d'Alençon avec les Anglois: dont le Roy fut si mal cōtēt, qu'il feit crier par son Royaume & deffendre sur la hart, qu'il ne fust hōme ne femme qui plus en dōnast charge à son beau frere de Bourgōgne, ne parlast en quelq̄ maniere q̄ ce fust cōtre l'hōneur dudit Duc de Bourgōgne.

O V D I T an lvj. ou mois de Iuing apparut en l'air vne comette à longue queüe en la partie de soleil couchant, & tiroit sa queüe vers Angleterre, & apparut illec plus de trois sepmaines: en cest an aussi furent les vins nouveaux si vers que les vieils vins furent plus requis que les nouveaux, pource qu'ils valoient trop mieux, & qu'ils estoient plus vineux. En celle année aussi le grād Empereur des Turcs nommé Morbesan, assiegea vne bōne ville & chasteau nommée Belgrado, seāt sur la fin de Hongrie, & y tint le siege plus de iiij. mois & demy, dōt
il eut

il eut si grand despit qu'il iura vn iour deuant ses gens qu'il feroit celle ville assaillir, & qu'il la prédroit par force, ou il y mourroit & toutes ses gēs. Or estoient en l'ost du Turc qui en aduertirent ceux de la ville, affin qu'ils feussent sur leur garde: & ils le feirēt sçauoir à Ouidianus vn des plus nobles & des plus puissans Princes de Hongrie, lequel tout incontinent assembla bien ix. cens hommes de cheual & xl. mille pietōs de toutes sortes, & par la Dunoe entra de nuit en celle ville à toute son armée, que le Turc n'en sceut riens: car il ne tenoit son siege que par terre, & ne faisoit point garder celle grande riuere de la Dunoe: il y entra la nuit de la Magdaleine que le Turc la deuoit assaillir, sicomme il dit: car pour son serment accomplir, il ordonna que la tierce partie de ses gens assauldroient celle ville des minuit, & l'assaillirent aussi tresaigrement. Et elle fut si biē deffendue qu'ils en furent reboutez. Et dura leur assaut iusques à huit heures du matin, dont s'aduança l'autre tierce partie des Turcs & assaillirent la ville plus asprement que deuant: mais aussi fut la ville si bien deffendue qu'ils furent retreans, & les conuint retraire. Et lors incontinent s'aduança le Turc mesmes en personne accompagné de ses gentils-hommes & des plus vaillās de son ost, & recōmença l'assault par si grande à hatine, qu'il dura celle tierce fois depuis quatre heures apres midy que le second assault fut rebouté, iusques au midy du lendemain qui fut xx heures, qui fut vne terrible chose & merueilleuse peine à ceux de dedans de porter lesdits trois assaulx cōtinuels, sans auoir repos: & tellement qu'ils furent si las & si trauaillez, qu'ils ne se pouoient plus ayder, & cōmencerent les Turcs à entrer dedans la ville à puissance. Entre les Chrestiens estoit leās vn moult deuot Cordelier nōmé Cappristanus, lequel en ce point que les Turcs entroient en la ville print l'image d'un Crucifix, & le porta en sa main iusques au plus hault lieu du chastel. Et en soy escriāt tout hault dit les parolles qui ensuiuent. *O Deus meus, Deus meus: O altissime pater veni in adiutorium, veni & libera populum quē redemisti pretioso sanguine tuo: Veni noli tardare. Deus meus ubi sunt misericordiae tuae antiquae, veni ne Turci & increduli dicant ubi est Deus eorum.* En disant lesquelles parolles le Cordellier ploroit moult fort, & lors que les Chrestiens l'eurent ouï & entendu, ils se trouuerent cōme tous fraiz & tous nouueaux & cōme se parauant ils n'eussent senty mal ne douleur: & assaillirent les Turcs qui entroient en la ville si durement qu'ils les occirent presque tous: & les autres meirent en fuitte & les chasserent bien huit lieües tousiours tuans & assollans ceux qu'ils pouoient atteinre, & tellement qu'en la ville qu'aux champs ils en tuerēt plus de cent mille, & si cōquirent toute l'artillerie du Turc, & tant d'autres biēs & de richesses que ce fut vne grand merueille. Entre autres choses ils gaignerent xj. grosses bōbardes, dont les six auoient xxxij. quartiers de long, & vij. quartiers de hault, & plus de cc. autres petites bombardes & canōs. Ceste miraculeuse victoire venue à la cognoissance du Pape, qui lors estoit, il la signifia par ses lettres Apostoliques par toute la Chrestienté: & ordōna d'en faire es Eglises processions & oraisons, & que graces & louēges en feussent à Dieu rédues. Et entre autres choses ordonna de sonner l'*Aue Maria* apres disner entre deux & trois heures que le miracle aduint, ainsi comme on le sonne par coustume au soir en toutes Eglises, & entretiēent ceste maniere de sonner apres disner en plusieurs Eglises ou Royaume de France.

Comment Loïs de Valois aîné fils du Roy de France s'en vint à refuge au Duc Philippe de Bourgogne. Puis parle d'aucunes autres besongnes qui aduindrent en ce temps.




Vdit an mil cccc. lvj. Loÿs de Vallois aîné fils du Roy de France Daulphin de Vienne, se tenoit lors & demouroit en son Daulphiné, & se y estoit tenu dix ou douze ans, pource que son pere estoit mal content de luy : & disoient aucuns que c'estoit pource qu'il traictoit trop durement ses subiects ou Daulphiné, & especiallement les Euefques, Prelats & gens d'Eglise en prenant leurs biens contre leur gré, pour conduire & entretenir son estat : dont aucuns le excusoient aucunement, pource que le Roy son pere ne luy donnoit plus riens : aucuns autres disoient que celle haine du pere au fils venoit pour cause de la mort de la belle Agnes, qui mourut par poisons : dont aucuns le souspeçonnerent, pource que iceluy Daulphin auoit plusieurs fois blasmé & murmuré cōtre son pere pour la dessusdicte belle Agnes : laquelle pour veoir auoit esté la plus belle femme, ieune & embō point, que l'en pouoit regarder, & qui estoit en la grace du Roy plus beaucoup que n'estoit la Roïne : & à laquelle faisoient plus d'honneur & de seruice les plusgrans seigneurs du Roy, qu'ils ne faisoient à la Roïne qui estoit moult bonne dame & hōnorable, dont le Daulphin auoit tresgrād despit, & que par despit il luy feit la mort aduançer : & toutesfois depuis que la belle Agnes fut morte, la damoiselle de Villequier sa niepce teint son lieu deuers le Roy, lequel en ses derniers iours vouloit ades, auoir en son seruice les plusbelles damoiselles que l'en pouoit recouurer en tout son Royaume. Quelle que la cause fut de celle haine du pere au fils, le Roy ordonna au Comte de Dampmartin messire Anthoine de Chabannes d'aller en Daulphiné à vne bonne compaignie de gens d'armes, pour prendre son fils le Daulphin, & le luy amener ou par force comment qu'il fut : & couroit lors cōmune renommée que fil y fut venu, le Roy luy eust fait tresdure compaignie : & qu'il eust fait Roy Charles son autre fils aîné : mais il ne fut prins ne trouué. Car quand il fut de ce aduerty il feit semblant vn soir de vouloir aller chasser le lendemain, & commanda que le disner fut tout prest au bois où la chasse se feroit. Laquelle chose venue à la cognoissance du Comte de Dampmartin, il se meit en aguet & en ordonnance pour prendre le Daulphin à celle chasse : Mais le Daulphin qui se doubtoit de tout ce que l'on machinoit contre luy : le lendemain au matin que l'on cuidoit qu'il allast à la chasse, print six ou sept de ses plus familiers & montez sur bons cheuaux : d'auantage se prindrent à cheminer vers le paÿs de Bourgogne, autant comme leurs cheuaux en pouoient souffrir : & ne cesserent de cheminer iusques à ce qu'ils furent venus à S. Claude, vne ville de Bourgogne : & leur fut bien besoing de cheminer ainsi roidement : car s'ils eussent tardé quelque pou le Comte de Dampmartin les eust r'ataint, qui le suiuoit à trac au grand exploit.

QVAND doncques le Daulphin fut venu à saint Claude, il trouua tost apres le Prince d'Orenge à Nasere, qui le receut honnorablement. Et lors qu'il luy eut ouÿ dire qu'il se doubtoit d'estre poursuiuy, & qu'il vouloit aller tout le plus tost qu'il pourroit deuers le Duc de Bourgogne : le Prince manda hasti-
uement

uement le Marechal de Bourgongne, lequel vint incontinent bien accompaigné de gens de guerre : & se partirent sans tarder pour tirer au païs de Brabant. A la verité ceste cy fut vne merueilleuse besongne : car le Prince d'Orenge & le Marechal de Bourgongne estoient deux des hommes du monde que le Daulphin auoit les plus haïs, pource que par plusieurs fois ils luy auoient ses hommes destrouffez & ceux de son pere, quand ils entreprenoient sur les marches de Bourgongne, que le Duc vouloit garder non estre violez ne desrobez. Mais necessité qui n'a loy, amena celle fois le Daulphin à refuge à ses plus grans haineux pour soy en ayder à son besoing. Car le Marechal de Bourgongne le conduisit & le mena si bien par les païs du Duc de Bourgongne, qu'ils vindrent sauement à Louuain : & de Louuain s'en allerent à Bruxelles. Et lors incontinent il enuoya deuers le Duc en Hollande par l'un de ses gens signifier sa venue. Lequel bon Duc desirant le receuoir & festoyer comme fils aîné de son souverain seigneur, se hastia le plus qu'il peust de receuoir ceux de Deuanter à traité pour retourner en son païs de Brabant. Si tost doncques qu'il fut retourné à Bruxelles, il trouua le Daulphin & le receut tant honnorablement pour l'honneur du Roy, & pour l'honneur de sa personne, que Prince n'en eust sceu plus ne mieux faire : & luy assigna tout incontinent trois mille francs pour chacun mois pour maintenir son estat : & si luy pria qu'il esleust en ses païs telle place qu'il voudroit pour soy retraire, & il luy feroit deliurer. Et le Daulphin demanda Geneppe vn chastel en Brabant bien assis & en belle place, là où il se tint & demoura par longue espace de temps, à quatre lieües pres de Bruxelles. En ceste année courant. lviij. messire Thibault de Luxembourg seigneur de Fiennes, frere du Comte de saint Pol, veuf de la fille du seigneur d'Antoing : de laquelle il auoit plusieurs enfans, se rendit moyne de citeaux, nonobstant ce que en sa ieunesse il eust esté bien mondain. Enuiron la fin du mois d'Octobre tost apres la venue du Daulphin en Brabant, le Duc de Bourgongne enuoya vne notable ambassade dont fut chief le seigneur de Chimay grand Baillif de Hainault deuers le Roy de France, pour le contenter de ce que son fils estoit ainsi venu à luy : & pour luy dire comment pour l'honneur de luy il l'auoit receu, & qu'il luy feroit tout le mieux & le plus d'honneur qu'il pourroit. Lesquels ambassadeurs demourerent longuement, ainçois qu'ils eussent audience ne expedition : mais tandis qu'ils y seiournerent, le Roy enuoya gens d'armes à compiegne & à Soissons qui sont villes prochaines du païs du Duc de Bourgongne. Lequel Duc (doubtant que le Roy ne luy voulüst faire guerre, & aussi en doubterent plusieurs gens) feit son mandement en ses païs de Picardie, de Flandres & de Hainault, pour tout homme mettre en armes pour soy deffendre se le Roy le vouloit assaillir. Enuiron Noël oudit an lviij. trespassa de ce monde Charles Duc de Bourbon, & luy succeda son fils aîné qui estoit de par sa mere nepueu dudit Duc de Bourgongne.

Cy parle du mautalent & courroux qui fut entre le Duc Philippe de Bourgongne, & Charles Comte de Charrolois son fils. Et comment le Daulphin les appaisa : puis dit comment la Comtesse de Charrolois accoucha d'une fille : & parle d'aucunes autres choses qui aduindrent lors en diuers lieux.



LE xvij. iour de Ianuier audit an lvj. le Duc de Bourgongne estant à Bruxelles meut vn debat entré le seigneur de Quieuram & le seigneur d'Aymeries tous chābellans du Comte de Charrolois, pource qu'en l'absence du seigneur d'Auxy son premier chambellan, chacun d'eux se vouloit preferer à son compaignon: & vouloit bien leur maistre que le seigneur d'Aymeries allast deuant l'autre: dont quād ce vint à la cognoissance du Duc, il manda son fils & luy commanda qu'il preferast le seigneur de Quieuram au seigneur d'Aymeries: le fils respondit au pere qu'il n'en feroit riens, & que iamais ceux de Croÿ ne le gouuernoient ainsi qu'ils l'auoient gouuerné. De laquelle responce le Pere fut si trefoutré d'ire & de courroux, qu'il vouloit courre sus à son fils & luy commanda qu'il vuidast tous ses paÿs. Le fils s'en alla aussi forment courroucé & dolent. Et comme la nuit fut venue le Duc ainsi troublé qu'il estoit, demanda vn cheual & monta dessus & s'en alla tout seul aux champs, iāçoit ce qu'il pleust trespas, & tost apres se trouua en vn bois & se perdit illec, si qu'il ne sçauoit où il estoit: mais si bien luy vint qu'il adressa à la maison d'un poure homme qui demouroit là & coucha leans celle nuit: & tout au plus matin se fait mener & conduire par son hoste droit à Geneppe, & au departir donna à sa Guide huit florins de Rin.

EN celle mesme nuit se meirent à suiur le Duc aucuns de ses gens, si que le lendemain il se trouua grandement accompaigné, & s'en retourna à Bruxelles. Et tost apres pardonna à son fils son mautalent à la requeste & priere des plusgrans de son hostel, & especiallement du Daulphin: mais il fait bannir de tous ses paÿs deux des seruiteurs de son fils, pource qu'il les suspeçonna d'auoir conseilé à son fils ce qu'ils auoit fait contre son gré des deux chambellans dessus nommez. Aduint tantost apres cōme le Daulphin & le Comte de Charrolois fussent allez chasser ensemble en vn bois, & vint sur le soir qu'ils courroient par le bois, separez l'un de l'autre, que le Daulphin se perdit en ce bois luy troisieme de ses gens. Et cuidant le Comte de Charrolois qu'il fut retourné à Bruxelles s'en reuint sans luy. Et adonc quand le Duc le veit ainsi reuenu sans le Daulphin, il se courrouça trespas, & fait son fils remonter à cheual & autres en grand nombre à torsins & à lumiere, & leur chargea qu'ils le querissent par tout, & feissent tant qu'ils le trouuassent: & ils feirent si bonne diligence qu'ils le trouuerent qu'il estoit esloigné de Bruxelles bien huit lieues, & le ramenoit à Bruxelles vn paÿsant, auquel il auoit donné vn escu d'or: & par ce moyen le trouuerent plustost ceux qui le requeroient, & eurent moult grād ioye quand ils le trouuerent: & aussi eust le Duc quand il le veist retourné. En celle mesme année le xiiij. iour de Feurier, la Comtesse de Charrolois accoucha d'une fille en ladicte ville de Bruxelles, & la teindrent sur fons le Daulphin & la Duchesse de Bourgongne, & la dame de Rauestain: & la nomma le Daulphin Marie en l'hōneur de la Roïne sa mere que l'on nommoit Marie: de la naissance de celle fille feirent grand feste tous ceux du paÿs du Duc, & en furent faits feux és bonnes villes & graces & louenges rendues à Dieu. Vn pou de temps apres le Duc de Bourgongne r'enuoya deuers le Roy son ambassade: c'est à sçauoir le seigneur de Chimay & messire Symon de Lalaing, pour certifier au Roy comment le Daulphin estoit de sa propre volenté venu deuers luy, & pour
trouuer

trouuer moyen que le Roy fut content. En ce mesme temps mourut le Patriarche d'Antioche frere du Chancelier de France, de l'Archeuesque de Reims, & d'un autre cheualier en armes. Tous lesquels quatre freres estoient tresbien en la grace du Roy de France, & estoit leur surnom de Iouuenel.

Comment l'ambassade du Roy de Hongrie vint à Tours deuers le Roy de France: & comment ils y furent receuz honnorablement. Comment nouvelles leur vindrent du trespas dudit Roy de Hongrie: & cōment les Francoys prindrent d'assault Sanduich.

EN l'an mil cccc. lvij. le Roy de France affectant de insulter ses ennemis, & par especial les terres Sarrazines & autres estans contre la foy Chrestienne, fait alliance avec le Roy de Hongrie trespuissant Prince, & Roy de trois Royaumes: c'est à sçauoir de Hongrie, de Polane & de Boëfme. Par le moyen desquelles il deuoit auoir ma Dame Magdaleine fille du Roy de France en mariage: & pour icelle fiancer furent enuoyez par ledit Roy plusieurs grans seigneurs de chacun d'iceux Royaumes, comme Barons, cheualiers & autres: & mesmement des gens d'Eglise, comme l'Archeuesque de Coulongne & l'Euesque de Patameuse & plusieurs autres tant nobles que autres, iusques au nombre de cinq à six cens cheuaux: lesquels allerent deuers le Roy vestus de diuers habits selon la coustume de leur païs: & arriuerent en la ville de Tours, le Roy estant au Montis & la Roine & sa fille estoient à Tours: & là presenterent à la Roine vne robbe de drap d'or semée de perles & de pierrerie moult riche, & vne autre pareille à la fille: & auoient amené vn chariot branlant moult sumptueux & moult riche. Au deuant desquels ambassadeurs allerent iusques à vne lieuë ou environ plusieurs grans seigneurs de l'hostel du Roy. Et quand ils furent arriuez, ils furent moult haultement receuz du Roy & de toute sa compaignie, en grand chiere de boire & de manger: & par especial le Comte de Foix les festoya moult grandement le ieudy deuant Noël en l'abbaye S. Iulien de Tours, là où estoient tous les seigneurs & les Princes estans à la court. Là eurent lesdits seigneurs tresgrand habondance de viandes, les plus precieuses & delicieuses qui se peurent trouuer. Comme faisans, perdrix, oustardes, grues & oayes sauages, connins sans nombre, chappons de haulte gresse, six vingts quartes d'ypocras tant blanc comme rouge, entremets, morisques d'enfans sauages saillans d'une roche, chantres, trompettes & clarons, & plusieurs autres choses moult nobles: tant que le disner cousta en somme xvij. cens escus, & en grans & riches dons. Et feirent tousiours grande & bonne chiere, esperant tousiours l'un desdits seigneurs, de fiancer par procureur apres Noël pour le Roy de Hongrie ladicte fille de France: & pour ce qu'il est escript, que souuent ce que l'homme propose au contraire Dieu en dispose: ainsi le lendemain de Noël vindrent au Roy de France trespiteuses nouvelles de la mort & trespas de ce treshaut, puissant Prince le Roy de Hongrie: parquoy luy & toute seigneurie fut fort troublée & feirent grand dueil. Et adonc le Roy ordōna son seruice & funerailles estre faits en la ville de Tours, en la metropolitaine Eglise de monseigneur S. Gratien, tant en sonnerie, lumineaire, de torches, & cierges en grand & excessif nombre, comme à vn tel Prince appartenoit. Et adonc le premier iour de l'an reuolu, prindrent congé du Roy

1457.

pour eux retourner en leur païs, & vindrent parmy la ville de Paris, où ils furent grandement receuz : & allerent au deuant d'eux iusques au moulin à vent hors de la porte S. Iaques toute la seigneurie estant lors à Paris. Ils auoient gens establis à coucher dessus leurs chariots enchainnez de grosses chaines quelque froidure qu'il feist, qui estoit bien nouuelle chose : & estoient fermées à serrure & à clef que l'un des gouuerneurs emportoit au soir, quand il s'en alloit coucher. En l'Eglise de nostre Dame fut fait vn notable seruice, & y eust grand luminaire tant en torches, cierges comme autrement. Lesdits Hongres estans à Paris faisoit grans gelées, glaces & verglas parmy Paris pour les eaues qu'on iettoit deuant les huis des maisons. Pourquoy les seigneurs n'osoient aller parmy la ville ne à pied ne à cheual : mais auoient vn traineau tout quarré de bois sans rouës, & se faisoient trainer à vn cheual ou à deux, eux assis dedans par tout où ils auoient à besongner, tant à visiter la ville & la cité comme autrement. Eux estans à Paris allerent visiter la noble & royalle Eglise de monseigneur S. Denys, où ils furent notablement receuz du conuent l'Abbé absent : & estoit le dit conuent en chappes, & furent receuz à la porte de ladicte Eglise : & leur fut porté à baiser vne croix d'or plaine & semée de pierrerie, en laquelle y a vne partie du fut de la vraye croix : fut aussi porté le texte de l'Euangille, aspergez d'eaue benoiste & encensiers. Et fut la reception telle, qu'on eut peu faire au Roy de Hongrie deffunct s'il y feust venu en son viuant. En icelle Eglise leur fut monstté tout le tresor, les vestemens du sacre, & les corps Saincts qui sont en ladicte Eglise en chacune chappelle : & aussi les sepultures des Roys & des Roynes, inhumez en icelle Eglise : dequoy ils furent bien ioyeux : & y auoit vn des poursuiuans du Roy qui estoit leur Trucheman, ordonné de par le Roy, pource qu'il scauoit leur l'agage : puis s'en retournerent audit lieu de Paris, & de là en leur païs. Le vingt & vniésme iour du mois d'Aoust oudit an partit de Honnefleu messire Pierre de Brezé, seigneur de la Varenne & Comte de Mauleurier, accompagné de Robert de Flocques Baillif d'Eureux & de plusieurs autres seigneurs bien accompagnez de gens d'armes, & de traict, iusques au nombre de quatre mille combattans. Et le vingtcinqiésme iour dudit mois dudit an, se partirent lesdits seigneurs de la Fosse & de l'Eure & teindrent la mer, & allerent en plusieurs lieux sans aucune aduenture trouuer ne descendre en terre par la grãd importunité du temps. Le dimanche ensuiuant vingthuitiésme iour dudit mois, ils descendirent à deux lieuës de Sauduich en Angleterre, enuiron heure de six heures du matin de seize a dixhuit cens combattans, & se meirēt en trois batailles bien ordonnées, & marcherent deux grosses lieuës à pied, & trouuerent de tresmauuais chemin : & cheuaucherent iusques à vn boulleuert remparé nouuellement, duquel les fossez estoient plains d'eaue. Auquel boulleuert ils trouuerent deux estandars garnis de traict, & y fut donné vn assault biē aspre, où plusieurs furent blecez des deux costez : il y mourut plusieurs Anglois : & par force d'armes fut gaigné ledit boulleuert, & desemparé par lesdits Anglois, lesquels se retrahirent en la ville. Le Baillif d'Eureux qui estoit en l'arrieregarde, demoura durant ledit assault sans partir : & apres que ledit boulleuert fut prins & gaigné, ne marcha ne auant ne arriere nullement, & ainsi auoit esté ordonné. Les aucuns alloient par mer & menoient avecques eux plusieurs combattans,

battans, & arriuerent en la dessusdicte ville. Et quand ceux de pied le sceurent ils furent moult ioyeux, & leur fut vn tresgrand resconfort veu la belle ordonnance & le bon gouuernemēt en fait de la guerre, qu'ils tenoient. Laquelle chose voyans les Anglois furent moult affoiblis. Et y auoit vn guidon du Comte de Dunois que portoit Guillaud de Ianoilhac. Dedās le Haure de ladicte ville fut trouué vne grande carraque & trois nefes de guerre, où festoient retraits plusieurs Anglois qui portoient & eussent porté pour lors grand dommage à la compaignie: mais le grand Seneschal de Normandie enuoya deuers ceux qui estoient esdictes nauires, & leur manda que s'ils ne cessoient de traire il feroit brusler lesdictes nauires. Et lors fut prins appoinctement qu'ils seroient esdictes nauires, & cesseroient de faire guerre, pourueu que leurs personnes seroient sauues. Lequel appoinctement fut tenu de point en point. Et ce mesme iour fut ordonné par ledit grand Seneschal, & fait commandement à tous que nul si hardy à peine de mort ne touchast aux biens des Eglises, & que l'honneur des femmes fut gardé, & que l'on ne boutast feu, ne ne fut aucun tué de froit sang. Lesquelles choses furent bien honnorablement entretenues sans les enfreindre. Et à celle heure entrerent les gens de pied dedans ladicte ville de Sauduich par la porte, & ceux de la mer par le haure. Ausquels donnerent lesdits Anglois bien à besongner: car tousiours se deffendirent & rallierent en chacun quarrefourg d'icelle ville: & si bien feirent les François qu'ils rebouterent lesdits Anglois hors de ladicte ville à bien grand peine, & meirent leurs enseignes aux portes: ausquelles se renegerent lesdits François comme besoing leur fut, car les Anglois se rallierent à grand puissance. Et vindrent illec plusieurs des parties voisines: lesquels auoient esté aduertis que les François deuoient venir audit Sauduich, & par leur fierté disoient qu'ils n'en croioient riens iusques au veoir. Lesquels Anglois qui tousiours enforçoient, teindrent les escarmouches hors des portes cōtre lesdits François biē dix heures sans rōpre: & en y eut plusieurs blecez des deux costez, & des Anglois morts à chacune saillie. Illec furēt fais cheualiers iusq̄s au nōbre de trente. C'est à sçauoir Robert de Flocques dit Floquet Baillif d'Eureux, Thibault de Tarmes Baillif de Chartres, Iean Charbonnel seigneur de Cheureuses & plusieurs autres: lesquels dessusdits le feirēt grandement & vaillamment. Enuiron cinq heures apres midy, au regard aux escarmouches qui auoient duré fort & longuement sans rompre: & que tousiours lesdits Anglois enforçoient, & que les François auoient esté longuement sur la mer en grand tourment, pour l'importunité du temps, qui leur auoit esté fort contraire: fut aduisé que retraicte se deuoit faire, & que trop griefue chose seroit à leurs gens de porter le faix de la nuit apres les grans trauaulx qu'ils auoient souffert: considéré qu'il en y auoit plusieurs de blecez, & la pluspart qui n'auoient beu ne mangé toute iour se pou non: & aussi que tousiours venoient Anglois fraiz de tous costez. A ladicte traicte n'y eut autre dommage sur lesdits François, fors en vn boquet, où estoient xij. hommes de guerre, lequel esfondra: & pource enuoya les ix. qui fut grand dommage: car ils auoient fait le iour bien leur deuoir. Dieu leur pardoint par sa grace, & leur face vray mercy & à tous les autres. Se n'eust esté la grand foison des vins, qui estoient dedans ladicte ville de Sauduich, dont plusieurs archiers se chargerent plus que besoing ne

leur en estoit: le grand Seneschal & toute sa compagnie y eussent demouré toute la nuit: mais ils s'en partirent avec plusieurs grans biens & richesses, & plusieurs nauires grās & petits gaignez au haure de ladicte ville. Entre lesquels nauires auoit trois grans nefes de guerre, & s'en vindrent poser l'ancre à la rade, à deux lieues dudit Sauduich: duquel lieu ils s'estoient partis au matin, & là furent iusques au mercredy ensuiuant. Les Anglois estoient tousiours en bataille en grand nombre à terre au traict d'un canon, les vns des autres. Et le ieudy ensuiuant se partit ledit Seneschal avec toute sa compagnie, & auoit grand foison prisonniers, & plusieurs autres biens: & vint arriuer à ladicte fosse de l'Eure, & de là à la ville de Honnefleure, où lesdits prisonniers furent mis à finance & le butin party. Celuy an fut chere année par tout le Royaume de France, & en plusieurs autres lieux mortalité.

Comment le Duc Philippe de Bourgongne mena le Daulphin à Bruges, où il fut receu à tresgrande ioye, & à moult grand honneur: puis parle de plusieurs autres choses qui lors aduindrent. Puis dit comment les Francois prindrent & pillerent Sauduich en Angleterre.




Tost apres Pasques oudit an mille cccc. lvij. se partit de Bruxelles le Duc Philippe de Bourgongne, en la compagnie du Daulphin aîné fils du Roy Charles de France: & pour aller à Bruges passerent par Audenarde & par Courtray. Esquelles villes iceluy Daulphin fut honoré & receu moult noblement. Puis allerent à Bruges, là où ceux des nations vindrent au deuant d'eux moult richement habillez, & montez & autres des bourgeois, iusques au nombre de huit cens, & tant de peuple que sans nombre, pour faire feste & honneur audit Daulphin & pour complaire à leur seigneur.

Le premier iour de Iuillet oudit an, se tint vne iournée aux champs entre S. Omer & Grauelines, où furent le Comte d'Estampes & le Bastard de Bourgongne, pour & ou nom du Duc, & le Comte de Vvaruich pour le Roy d'Angleterre, pour reprimer plusieurs courses & entreprinſes, que faisoient les Anglois es païs du Duc: & tellement y fut besongné qu'il y eust trefues octroyées entre les parties pour huit ans. Le x. iour dudit mois de Iuillet oudit an lvij. Madame Charlotte de Sauoye, fille du Duc de Sauoye espouse du Daulphin, fut amenée deuers son dit mary en la ville de Namur par le seigneur de Montagu: par lequel il l'auoit enuoyée querir, & fut illec leur mariage consommé & parfait: lequel auoit esté commencé cinq ans deuant sans coucher ensemble, si comme aucuns disoient. Et n'estoit point adonc le Duc Philippe audit Namur, ains estoit allé en Picardie & sur la riuere de Some, pour cognoistre l'intention de ceux de S. Quentin, de Corbie, d'Amyès & de Abbeuille: pource que rumeur estoit illec entour, que le Roy auoit tout preste vne grosse armée, & ne ſçauoit où il la vouloit employer: & couroit la renommée qu'il estoit tresmal content du Duc, cuidant qu'il teint son fils avec luy contre son gré & pour le contépner: & pourtant estoit allé le Duc esdictes villes à luy appartenās par le traicté d'Arras, pour les aduertir & prier se le Roy leur enuoyoit gens d'armes pour mettre en leurs villes, qu'ils ne les voulsissent recevoir. Mais se le Roy y venoit en sa
personne,

personne, qu'ils luy feissent ouuerture & honneur, comme à son souuerain seigneur. Ce que lesdictes villes luy accorderent bien & volentiers. Enuiron la fin dudit mois de Iuillet, furent arses en la ville de Dourdrech en Hollande par feu de meschief bien deux mille maisons, & plusieurs personnes, qui fut vne chose moult pitoyable.

O V D I T an enuiron la fin d'Aoust, monterent en mer & partirent de Normandie vne grand compaignie de François, faisans courre vne voix qu'ils alloient en l'ayde du Roy d'Escoce, contre les Anglois. Mais ils allerent prendre port & descendre à Sauduich en Angleterre, & la prindrent d'Assault, ainçois que ceux du païs enuiron se peussent assembler pour resister aux François : & pillerent toute la ville, là où ils gaignerent beaucoup. Mais n'y arresterent que vne marée de mer. Car s'ils y eussent plus demouré tous y fussent demourez, par le grand effort des Anglois, qui y affuioient de toutes parts : de celle armée fut le chief le seigneur de la Varenne Seneschal de Normandie, & là furent faits cheualiers nouveaulx Floquet, Charlot des Mares, Porrus de Liques & aucuns autres iusques au nombre de vingt gentils-hommes. A cest assault furent morts ccc. Anglois, & de François enuiron xxx. Puis s'en retournerent en Normandie & departirent leur butin qui fut grand. D'autre part vn pou deuant entrerent en Angleterre vne compaignie de Bretons, & bouterent les feux en aucuns lieux, pillerent aucuns villaiges, & puis s'en retournerent en Bretagne sans faire long seiour, affin d'euitier plusgrand peril pour eux : car Anglois s'assemblerent incontinent pour les trouuer & ruer ius : mais ils ne les trouuerent point. En celle mesme année ou mois de Septembre, vindrent à Bruxelles deuers le Duc Philippe de Bourgongne ambassadeurs du Roy, l'Euesque de Constances & autres en petit nombre, remonstrer au Duc aucunes choses touchant ce que le Daulphin se tenoit avec luy, dont le Roy n'estoit pas content.

Cy parle d'un different estant lors entre le Duc Philippe de Bourgongne & le Comte de saint Pol : puis parle du Roy de Hongrie qui enuoya demander à mariage la fille de France.



Comme des l'an lvj. le Duc Philippe de Bourgongne comme Comte de Hainault, eust fait prendre en sa main la terre d'Enghien, appartenant au Comte de S. Pol, assise oudit païs de Hainault, & n'eust touché nulle autres des terres dudit Comte, assises ou Royaume de France es païs dudit Duc, le Comte de S. Pol de ce desplaisant & desirant s'en appaiser avec le Duc, luy enuoya prier & requerre, que son plaisir fut qu'il se peust trouuer deuant sa personne, pour ouïr ce dont l'en le vouloit charger, & pour y respondre ainsi qu'il appartiendroit : & pour y aller fait requerre saufconduit du Duc : à quoy le Duc respondit qu'il ne deuoit point demander de saufconduit, s'il ne se reputoit son ennemy. Et le Côte fait repliquer & dire au Duc que son ennemy ne se reputoit il point, mais son vray & loyal subiect. Ains le demandoit pour sa seureté, & pour euitier à l'ire ou fureur de son Prince : pource qu'il auoit entour luy de ses plus prochains conseillers, qui ne l'aymoient guerres, & qui mettoient le trouble entre eux deux : & pource n'estoit point cōseillé

de foy trouuer deuant luy fil n'auoit faufconduit. Finablement le faufconduit luy fut enuoyé. Renommée couroit lors que le Comte de S. Pol reputoit pour son hayneux le seigneur de Croÿ premier Chambellan, & principal conseil-
 lier du Duc: pource que long temps par auant le Comte de S. Pol, & le seigneur de Croÿ auoient fait le mariage de l'aisné fils dudit seigneur de Croÿ, & de la fille dudit Comte: & auoit le seigneur de Croÿ icelle fille avec la dame de Croÿ sa femme. Laquelle il nourrissoient comme leur enfant, pource que trop ieusne estoit pour marier: & ne sçay pourquoy le Comte foy repentant de ce mariage, eust bien voulu r'auoir sa fille pour la marier plus haultement: & pour la r'auoir enuoya secrettement l'un de ses fils, où elle estoit: mais le seigneur de Croÿ aduerty de toutes ces choses, y pourueut si sagement, qu'il parfeit le mariage & les fit coucher ensemble, ainçois que le fils du Comte de S. Pol y sceust mettre remede. Ceste cy estoit la cause de leur haine. Le Comte doncques garny de faufconduit du Duc, vint à Bruxelles deuers le Duc à deux cens cheuaux ou plus, grandement accompagné de nobles hommes: & le lendemain qui fut enuiron la my Septembre, eust audiéce: & present le Duc fut accusé d'auoir occis ou fait tuer certaines personnes, qui luy furent nommées, & d'auoir prins ou fait prendre plusieurs biens d'aucunes gens à tort, & contre iustice. Pour lesquelles causes & autres, le Duc auoit fait mettre en sa main ladicte terre d'Enghien: & si luy fut dit qu'il recognoissoit mal les biens qui auoient esté fais à luy, & aux siens par le Duc & par ses predecesseurs. Ausquelles charges le Comte respōdit, qu'il estoit & auoit tousiours esté prest de seruir & obeir le Duc, & qu'il le tenoit pour si bon & si beniuolent, que fil n'auoit qui le greuast enuers luy, qu'il espo-
 roit qu'il seroit content de luy, se son plaisir estoit de le vouloir ouir à part, & de tout en tout il se submettroit en sa bonne grace: & se à part ne le vouloit ouir, estoit content de respondre à toutes les charges à luy imposées illec presentement & publicquement. A quoy il fut receu: mais quelque excusation qu'il dit ou qu'il feist dire, il ne peut obtenir d'auoir la main leuée de sa terre d'Enghien, & s'en retourna sans riens faire celle fois.

O V D I T an lvij. vindrent en la ville de Tours en Touraine ambassadeurs du Roy Lancelot Roy de Hongrie, & de Behaigne en beau nōbre & notable, pour sept cens cheuaux ou plus: entre lesquels estoient vn Archeuesque, douze ou treize Barons & cheualiers, & autres trente gentils-hommes: & si auoient bien xxvj. chariots bien attelez & richement, pour porter leurs bagues. Mais ainçois qu'ils entraissent en la cité, enuoya le Roy Charles de France à leur encōtre tous les plus grans de son hostel en grand nombre, pour les honorer & amener en la ville: & si issirent à leur encontre de l'Eglise, & du peuple moult honorablement: le Roy pour le iour residoit en vne place nommée les Montis, là où il se tenoit volentiers, & auoit esté malade, pourquoy il conuint lesdits ambassadeurs seiourner à Tours dix iours, ainçois qu'ils eussent audience: puis s'en allerent à ladicte place le xvij. iour de Decembre oudit an, là où ils trouuerent le Roy & la Roïne, leur maisné fils Charles, & Dame Magdaleine leur fille, & plusieurs autres nobles gens. Eux venus deuant le Roy & la reuerence faicte, ledit Archeuesque de Bolisdaſtain feist la proposition en Latin telle qu'il l'auoit prise de son seigneur, & remonstra au Roy tout premierement le prochain lignai-
 ge,

ge, l'amour & beniuolence que de tous temps auoient eu l'un enuers l'autre, les Roys de France, & de Hongrie, & de Behaigne : disant oultre que pour l'entretènement de ladicte amour & beniuolence le Roy Lancelot leur souuerain seigneur, les auoit enuoyez deuers luy. Quand, dit il, paix & amour sera entre vous deux, qui seroient ceux ou monde qui vous pourroient nuire? Tes predecesseurs & noz souuerains seigneurs les Roys de Hongrie & de Behaigne ont de tout temps esté alliez ensemble, & presentement sommes à toy venus pour celle mesme cause. Tu es la coulomme de la chrestienté & mon souuerain seigneur est l'escu. Tu es la chrestienne maison, & mon souuerain seigneur est la muraille. Plusieurs autres belles parolles dit il au Roy, & en conclusion luy requist & demanda sa fille Dame Magdaleine en mariage, pour le Roy Lancelot son seigneur, laquelle il auoit fait demander autresfois plus simplement que à ceste cy. Et pource le Roy voulant entendre au parfait dudit mariage, ordonna de ses principaux conseilliers, pour communiquer avec ceux de l'ambassade : mais les premiers iours furent employez à festoyer lesdits ambassadeurs, de disners & de banquets moult riches & plantureux : puis l'un seigneur puis l'autre. A tous lesquels mangiers estoient toute la seigneurie de la court de France, Ducs, Comtes, Barons, cheualiers & escuyers, & les dames & damoisselles en si noble arroy, que c'estoit noble chose à regarder de heraux & de poursuiuans, de trompettes & de menestrelz, tant que sans nombre : mais par dessus tous les autres le disner que leur feit tout premier le Comte de Foix, passa tous les autres en mets & en entremets, merueilleusement beaulx à regarder : dont des entremets le premier fut vn chasteau à quatre petites tours : aux cornets du chasteau, & ou meillieu vne plus grosse tour à quatre fenestres : & à chacune fenestre vn visage de damoiselle, ayans ses beaux cheueux iaunes, comme fin or, espars sur les espaules : & ne veoit on que les visages & cheueux : & au sommet de celle tour estoit vne banniere armoyée des armes du Roy Lancelot : & autour des quatre petites tournelles, estoient les armes des chiefs de l'ambassade : & dedans la grosse tour à couuert, estoient six ieunes fils chantans illec tresmelodieusement, si qu'il sembloit que ce fussent les damoisselles. Le second entremets estoit la semblance d'un Tigre, qui est vne terrible beste, à corps gros, court & amassé, deux courtes cornes & agues au front, & dens de sanglier : dedans laquelle beste estoit vn homme mussé, qui la faisoit remouuoir comme s'elle fut enuie, & iettoit feu par la gueulle moult terriblement : & le portoient quatre gentils-hommes abillez à la mode de Byarn, dansans à la façon du pays. Le tiers entremets fut vne grande roche, où estoit vne fontaine & grand planté de connins Blancs & autres : de laquelle roche issirent cinq petits enfans sauuages, qui se prindrent à dancer la Morisque. Le quart entremets fut vn tresbille escuyer, semblant estre à cheual moult gentement vestu, & bouchié luy & le cheual : auquel bien aduenoit de faire saillir & bondir le cheual, & tenoit en sa main vn pot paint de diuerses couleurs : & de ce pot sailloient roses, marguerites & autres fleurs : & au dessus estoit vn tresbeau liz bien chargé de fleurs de liz, & le mit sur la table. Puis vint auant vn gentil-homme, portant vn paon en vie, qu'il mit sur la table, pour vouer ceux qui vouer vouldroient, se aucuns en y auoit. Et lors vouerent deux des

cheualiers de l'ambassade: l'un de faire armes, & l'autre de iouster: finalement furent portez à la grande table plats plains d'espices confites en maniere de dragée, faictes en semblance de cerfs, de biches, de sangliers, d'ours & de singes, de lyons, de licornes & de tigres, & d'autres diuerfes bestes: & en chacun plat estoient les armes de ceux que l'en seruoit à ce disner, & apres le disner les dances.

Cy parle de la mort du Roy Lancelot de Hongrie, pour lequel le dueil fut grand à la court du Roy de France. Puis parle du trespas de Iean de Cuymbres Roy de Chippre, & du trespas du Duc de Bretagne: à laquelle Duché succeda Artus Comte de Richemont son frere.



A veille de Noël l'an lvij. vindrent nouuelles à la court du Roy de France que le Roy Lancelot estoit allé de vie à trespas, tandis que les seigneurs de France s'enforçoient de festoyer ses ambassadeurs en la cité de Tours, comme dit est. Et paitant leur feste mua en si trefgrand dueil, que ce fut vne grand merueille & pitié à regarder, especiallement des ambassadeurs qui cognoissoient la volenté de leur seigneur, & le grand desir qu'il auoit d'auoir à mariage la fille du Roy de France: non pas par conuoitise d'auoir avec elle terres ne seigneuries, or ne argent: mais seulement par droicte amour & faueur desir, qu'il auoit d'estre allié au Roy de France, luy qui estoit ieune de l'aage de dixhuiet ans. Cognoissans aussi iceux ambassadeurs la grand ioye, estant à la court du Roy pour celle alliance, & la grand feste que l'en leur faisoit par tous les lieux, où ils passoient, pour honorer celle noble fille de France, qu'ils eussent emmenée avec eux. Et pourtant se leur dueil fut grand ne fait à demander. Celle mort fut celée au Roy Charles six iours, tant pour sa maladie affin qu'il n'en empirast, comme pour le supporter d'un grand dueil qu'il auroit. Et fut le seruice fait en l'Eglise de S. Martin de Tours moult solemnel, ainçois que le Roy en sceust riens: mais ou mesme iour luy fut celle mort reuelée, dont il demena moult grand dueil. Et le lendemain se meirent au retour lesdits ambassadeurs tant desplaisans que plus ne pouoient. Celle mort fut rapportée au Duc Philippe de Bourgogne des le iour de Noël, pour laquelle il demonstra signe de grand dueil, pource que le Roy Lancelot & luy estoient prochains de lignaige: nonobstant qu'il cogneust assez que celle alliance d'iceux deux Roys, ne se faisoit que pour le greuer, & par especial pour luy tollir la Duché de Luxembourg, qu'il auoit conquise tant par acqueste comme par armes. Laquelle Duché disoit à luy appartenir le Roy Lancelot: & estoit lors commune renommée qu'il l'auoit donnée par testament à Dame Magdaleine de France, & qu'il auoit ordonné son executeur le Roy Charles, pour en faire iouir sa fille: dont neantmoins le Duc Philippe de tout aduerty ne se soucioit gueres. Et tantost apres Noël fait faire en sa ville de Bruges vn trefnoble obseque, pour le salut de l'ame dudit Lancelot. Commune renommée fut adonc que le Roy Lancelot mourut de venin, que luy donnerent aucuns de ses gouuerneurs, doubans s'il auoit la fille de France qu'ils ne fussent eslongnez de leur gouuernemēt: car depuis qu'il eut prins la poison, il ne vesquit que trois heures.

heures. En celle année aussi trespassa de ce monde Iean de Cuymbres Portugalois, nepueu de la Duchesse de Bourgongne, allié par mariage à la veufue Roynne de Cypre, & à cause d'elle Roy de Cypre qui fut vn grand dommage: car il auoit tresbeau commencement de bon & vertueux Prince. En ce temps aussi trespassa le Duc de Bretaigne sans laisser hoir de sa chair, & escheut la Duché à son frere Artus Comte de Richemont Connestable de France, lequel fut Duc apres son frere.

Comment le Roy Charles de France fut moult grief malade: & comment tost apres il enuoya signifier au Duc Philippe de Bourgongne, qu'il prenoit en sa garde les terres du Damoiseau de Rodemac, & de la responce du Duc. Puis parle d'autres choses, de gelées, de neiges, & de vent qui lors aduindrent.

EN ce temps fut le Roy Charles de France si griefuement malade à Tours en Touraine, que l'en cuida qu'il deust mourir: & furent faictes en plusieurs lieux de son Royaume processions & prieres à Dieu, affin qu'il luy enuoyast santé: & tost apres il reposa & fut guery. Si tost qu'il fut guery il enuoya vn gentil-homme de son hostel, portant ses lettres de credence au Duc Philippe de Bourgongne: lequel gentil-homme exposant sa credence au Duc, luy dist que le Roy luy faisoit signifier, qu'il auoit prins en sa garde toutes les terres du Damoiseau de Rodemac: tant celles estans en son Royaume comme celles estans hors du Royaume. A quoy le Duc respondit promptement que les terres du Damoiseau n'estoient point ou Royaume, ains estoient en la Duché de Luxembourg: & pourtant qu'il estoit son subiect, & que le Roy n'y auoit que veoir: ie voudroye, dit il, bien sçauoir se le Roy veult tenir la paix d'Arras, laquelle de ma part ie ne briseray pas: mais dictes luy que ie luy prie qu'il me face sçauoir sa volenté & me recommander à luy: ie sçay bien qu'il n'en à nuls en son conseil qui me ayment guerres. Ceste responce faicte par le Duc, il enuoya le lendemain au matin vne secrette ambassade deuers le Roy. Ce Damoiseau de Rodemac qui ses terres auoit en la Duché de Luxembourg, auoit tousiours tenu le party du Roy Lancelot, & se tenoit contre le Duc. D'autre part le Comte de S. Pol tendant à estre Connestable de France, se tenoit lors avec le Roy, si que par telles coniectures aucuns esperoient plus la guerre que la paix entre le Roy & le Duc.

EN ceste année fut hyuer si froid & si long, que la gelée dura depuis la saint Martin, iusques au dixhuietieme iour de Feurier, si que les grosses riuieres furent tant engelées, qu'on charioit dessus en plusieurs lieux. Et en fin cheurent tant de neiges & tant de pluyes, que les eaües furent si grandes, que on les veist oncques parauant, & feirent maint dommage en plusieurs lieux. Puis fut le vent si grand & si terrible, que plus grand ne fut oncques veu, & si grand qu'il abbatit en plusieurs lieux, comme bonnes villes, & villages, maisons & edifices, & tant de cheminées que sans nombre: plusieurs vaisseaux furent brisez sur la mer & riuages, si qu'il sembloit que ce fut vn deluge de vent.

ENVIRON la fin de ceste année fut vne si grand allée au mont S. Michel d'Allemands & Brabançons, & des païs environ, tant d'hommes, de femmes & d'enfans, qu'onques la pareille ne fut veüe: & ne sçauoient dire raison pourquoy ils allerent celle fois en si grand nombre, sinon subite deuotion qui à ce les mouuoit.

Comment à la requeste de ceux de Gand le Duc Philippe leur seigneur alla à Gand, & de la feste qui luy fut faicte en celle ville. Puis dit comment le Roy feit adiourner le Duc pour estre avec les autres Pairs de France au iugement du Duc d'Alencon.

1458.

EN l'an mil quatre cens lviii. le xxiiij. iour d'Auril apres Pasques, entra le Duc Philippe de Bourgogne en sa ville de Gand à la priere & requeste de ceux de la ville, non pas à leur premiere requeste: car ils l'en auoient fait prier plusieurs fois tant par le Daulphin comme par autres grans seigneurs: mais n'y auoit voulu aller iusques audit iour, qu'il y entra sans le Daulphin: car il ne voulut point mener pour certaines causes à ce les mouuans, ne son fils Comte de Charrolois, ne le seigneur de Croÿ son premier chamberlan. En laquelle ville il fut receu le plus honnorablement qu'onques fut Prince ne seigneur en sa ville: car toute la ville issit à son encôtre. C'est à sçauoir toutes gens d'Eglise reuestus & parez des ornemens de leurs Eglises, vn quart de lieüe hors de la ville. Et puis tous ceux de la iustice, tant du seigneur comme de la ville. Puis y estoient les Doyens des mestiers iusques à lxx. chacū accompagné de dix hommes de son mestier, tous vestus autrement les vns que les autres. Apres ceux cy estoient les cheualiers, & les escuyers & les bourgeois de la ville bien iiij. cens ou plus. Eux venus iusques au Duc, le Baillif de Gand luy dit, que ceux de Gand illec presens, venoient à son encontre, & luy prioient qu'il voulsist ouïr ce qu'ils luy diroient. Dont s'aduança le conseiller de la ville, & luy dit telles parolles ou en substance: Mon tresredoubté seigneur, veez cy ceux de vostre ville de Gand, qui vous requierent & supplient (& lors se meirēt à genoux & leurs mains ioinctes) qu'il vous plaise oublier les outrages & les malles volentez qu'ils ont eües par cy deuant, & leur tout pardonner: car ils sont prests & appareillez de vous seruir, obeïr & estre voz pources subiects, & se besoing, est de mourir avec vous. Puis luy dit aucunes autres parolles à ce mesmes propos. Avec le Duc estoïēt le Comtes d'Estampes, le seigneur de Rauestain & plusieurs autres iusques à trois cens cheualiers.

CES choses dictes ils se prindrent à approcher la ville. Ceux de la ville deuant, & le Duc apres eux: lequel auoit ses heraulx & ses trompettes deuant luy, vestus de leurs cottes d'armes: & entour le Duc estoient cinquante de ses archiers de corps vestus de leurs heucques, chacun vn vouge en sa main: à l'entreen, trouua le Duc les manteaux des portes mis dehors aux champs. Et de dessus la porte où il entra, descendit vne pucelle par vn engin pour ce fait, laquelle en salüant & reuerant le Duc, luy dit en latin. *Inueni quem diligit anima mea.* Qui est à dire en françois: J'ay trouué celuy que mon ame ayme. Depuis celle porte iusques à l'hostel du Duc, estoient toutes les rues tendues de riche draps: & aux fenestres des maisons estoient torches allumées tant que sans nombre, & le peuple plorant de pitié & de ioye qu'ils auoient à regarder leur seigneur, demonstans


monstrans tous tresgrand signe d'humilité. A chacun quarrefourg des rues où le Duc passa, estoient hours où l'en iouïoit d'histoires sans parler, les plus riches du monde, & grans feux allumez à chacun quarrefourg. Tant d'autres ioyeusetez y furent faictes, que ce sembloit vn songe, si que le Duc meit plus de deux heures à aller de la porte iusques à son hostel, pour l'occupation qu'il prenoit à regarder tant de belles histoires, & de beaux mysteres, lesquelles faisoit beau veoir. Finablement à l'entrer à son hostel, estoit vn homme vestu de la peau, & en la semblance d'un lyon, qui print son cheual par la bride & le mena dedans son hostel. Encores le lendemain ceux de la ville feirent feux de rechief, & meirent tables par les rues, beuuans & mangeans, & faisans signe de ioye excessiue, & de tresgrand humilité.

Cy parle de la mort du Roy d'Arragon & des signes qui aduindrent : & dit comment son bastard Ferrand fut Roy de Naples apres luy. Puis parle du Pape Pius, & de plusieurs autres choses, qui aduindrent ou temps de lors, comme de la mort du Duc de Bretaigne, & de l'ambassade de Grece qui vint au Duc Philippe de Bourgogne.

ENuiron la S. Iean Baptiste l'an lviiij. trespassa de ce monde Alphons Roy d'Arragõ, de Naples & de Cecille en la ville de Naples: lequel en son temps eut esté moult riche, puissant & redoubté cõme il apparut apres son trespas: car selõ commune renommée il laissa à son fils Bastard, nommé Ferrand outre & avec les Royaumes de Naples, & de Cecille six millions de florins d'or monnoyé, & sa chapelle qui estoit merueilleusement riche: ensemble tous ses ioyaux qui valoïent plus d'un million d'or. Il auoit en son temps fait faire la plus grande naüe que l'on veit onques aller sur mer. Laquelle naüe estant lors à la mer, fut ramenée au port de Naples droitement le iour du trespas du Roy: & luy aduint qu'elle hurta au grauier tellemēt que le mat rompit, & cheut si durement qu'il escartella la naüe en plus de mille pieces, & fut perie: car l'arbre estoit si gros, que cinq hommes ne le pouoient embrasser: & au cheoir fait si grand noise que ce fut grand horreur à l'ouïr. Encores huit iours apres son trespas, cheut en la salle de sō hostel vn moult riche tabernacle, painct & doré moult gentement, qui estoit droit dessus le siege où il se seoit par coustume, droit à telle heure que le Roy trespassa. Ce Roy icy eut esté frere & cõpagnõ d'armes au Duc Philippe de Bourgogne: & iaçoit-ce qu'ils fussent loings l'un de l'autre: neantmoins ils s'entreaïmoient tellement qu'ils portoient les ordres l'un de l'autre, & si ne veirent onques l'un l'autre. Le Pape Calixte qui lors estoit en entendant, que le Royaume de Naples luy fut escheu par le trespas de ce Roy, pource qu'il ne laissa onques apres luy nuls enfans legitimes, priua Ferrand le bastard dudit Royaume de Naples: & l'excõmunia, pource qu'il ne s'en voulut desister & tous ses adherēs: mais tost apres que ce Pape Calixte fut trespasé, le Pape Pius qui luy succeda rendit au Roy Ferrand le Royaume de Naples: & fut commune renommée que le Roy Ferrand donna à ce Pape Pius vne tresgrand somme d'or pour son absolution, & pour demourer Roy paisible de Naples. Apres que Pape Calixte eut tenue la Papalite enuirõ quatre ans, il trespassa de ce monde, & fut esleu & fait Pape apres luy vn Cardinal de Sene, nom-

mé Aénée, qui eut esté secretaire de l'Empereur Federich bon Orateur, & fut nommé le second de ce nom. En la saison de l'Esté de ceste année le temps fut tât sec, qu'il ne pleut comme neant depuis le mois d'Auril iusques au my mois d'Octobre: il n'estoit adonques memoire d'auoir veu plus sec Esté, & furent les vins moult bõs celle année, & les bleds à bas pris: mais ce nonobstât & la beauté du temps, la pestilence courut en aucuns lieux moult terrible: c'est à sçauoir à Paris, & à Abbeuille & en plusieurs autres bonnes villes. En ceste année enuiron la S. Martin d'Hyuer, vint vne ambassade d'Angleterre deuers le Duc Philippe, lors estant en la ville de Monts en Hainault. Et fut commune renommée qu'ils estoient venus deuers le Duc pour requerre alliances de mariage, & que le Duc leur respondit qu'il ne le pouoit faire par le traicté d'Arras, sans le sceu & consentement du Roy de France, comme ne faisoit le Roy par ledit traicté avec les Anglois, sans le consentement du Duc. Apres laquelle responce ils s'en allerent deuers le Roy de France.

Cy parle de l'entrée que le Duc Philippe de Bourgongne fait en la ville de Gand: & comment les Gantois le receurent noblement. Puis dit comment le Roy de France enuoya sommer le Duc Philippe de Bourgongne pour estre du iugement au Duc d'Alencon.



Reshault & puissant Prince le Duc de Bourgongne, entra en la ville de Gand le dimenche xxiiij. iour d'Auril apres Pasques, l'an mil quatre cens lviiij. enuiron de quatre à cinq heures apres midy: laquelle entrée fut faicte en tresgrand & puissant estat comme sera declaré cy apres. Premierement se meirent en ordonnance toutes les gens d'Eglise par maniere de procession au dehors de la ville, en faisant reuerence chacun en son endroit la plus humble & deuote qu'il pouoit. Item le Baillif & les escheuins en partie avec les bourgeois dudit lieu, furent au deuât de mondit seigneur à cheual vestus de noir, & le receurent le plus humblement & obeïssamment que faire peurent: l'autre partie desdits escheuins furent à la porte. Et la tierce à la porte de mondit seigneur: & en chacun desdits lieux luy feirent reuerence en mettant chacun d'eux l'un des genoux à terre, en luy presentant corps & biens, &c. Item & les Doyens des mestiers & les iurez, furent aussi au dehors de la porte chacun vne torche en sa main, & en bonne ordonnance: c'est à sçauoir deux cens ou plus vestus de manteaux pers, & autant vestus de manteaux blācs trainans iusques à terre. Item au dehors de ladicte porte outre l'eaüe, furēt personnages de chacun costé de la rue: vns à maniere de prophetes, l'un faisant maniere de regarder mondit seigneur, tenant en sa main vn rollet ouquel auoit escript *Ecce nomen domini venit de longinquo. Ysaye xxx.* Et l'autre personnage fut regardant les trompettes, qui furent sur la porte. Et estoit escript en son rollet. *Cannite tuba pariter omnes, &c.* Item au dehors & au pied de ladicte porte, estoit fait vn iardin ou vergier, ouquel estoit vne ieune fille pucelle enuiron de l'aage de dix ans, les cheueux pendans, vestue tressimplement de drap de damas en forme de manteau: laquelle se mettoit à genoux & à ioinctes mains, & auoit vn escreteau disant. *Inueni quem diligit anima mea. Cantic. iij.* Item l'auant-porte & aussi la porte furent tēdues de draps noir, gris & vermeil. Et ou drap de l'auant-porte ou barriere, fut escript en lettres d'or. *Venit nobis pacificus dominus, utere seruitio*

uitio nostro: sicut placuerit tibi. Iudic. iij. Et sur le drap de la grand porte, estoient les armes de mōdit seigneur à timbre. Item depuis ladicte porte iusques à la court de mondit seigneur, furent les rues tendues d'un costé & d'autre de drap desdictes couleurs. C'est à sçauoir noir, gris & vermeil: & au noir drap estoit en escript en lettres d'argent. *Venit nobis pacificus dominus.* Ou gris. *Vtere seruitio nostro.* Et ou vermeil. *Sicut placuerit tibi.* Et au dessus desdits draps, estoient torches cinq ou six cens sur chacun drap: ainsi somme desdictes torches comprinse celles qui furent deuant les maisons, & sur les bateaux dedās la riuere de quinze à xvj mille torches. Itē dedās la ville assez pres de ladicte porte, estoit vn personnage de l'enfant prodigue, que le pere apres la cognoissance de son meffait, receut en grace: & y estoit en escript. *Pater peccaui in celum & coram te. Luc. xv.* Itē assez pres de là, estoit vn personnage en maniere de Prophete, qui tenoit vn rollet auquel auoit en escript. *Lex clemētia in lingua eius. Prouerb. xxxj.* Item en apres estoit vn eschauffault, sur lequel fut en escript le personnage de l'Empereur Gayus, ou meillieu de douze Senateurs. Et deuant luy estoit le personnage de Marcus Tullius, qui en loūant la clemence dudit Empereur, en la liberation de plusieurs prisonniers qu'il auoit prins, quand il gaigna Romme commençant. *Diuturni silentij.* En laquelle oraison entre autres choses est cōceu. *Nulla de virtutibus tuis maior clementia est.* Lequel mot fut ou rabat des courtines de ladicte figure. Item en ensuiuant, estoit vne figure où estoit vn lyon noir, qui tenoit en sa patte vn estandart des armes de mondit seigneur, & deuant vne lyonne blanche humblement couchée à terre. Et ou meillieu d'eux deux, estoient trois petits lyonceaux à moitié morts: lesquels par le cry du dudit lyon reprindrēt vie, santé & consolation: & estoit illec escript. *Quasi leo rugiens: & formidabunt filij eius. Osee xj.* Item encores de là estoit vn Prophete qui en regardant mondit seigneur, tenoit vn rollet ouquel estoit en escript. *Ecce venit desideratus cunctis gentibus: & replebitur gloria eius domus domini. Aggei ij.* Item pres de là estoit vne figure de Daud, lequel de l'indignation qu'il eut cōtre Nabel, fut rappaisé à l'humble priere de la femme dudit Nabal par sa grande humilité, & estoit en escript. *Benedictus dominus Deus Israël quoniam te misit. Primi Regum xx.c.* Item l'autre porte fut couuerte de drap noir & gris: en laquelle estoient les armes de mondit seigneur à timbre: & aussi les armes de chacun de messeigneurs de l'ordre de la toyson. Item dedans ladicte porte estoit vn eschauffault: & ou meillieu estoit vne fontaine, & à l'environ l'estat de l'Eglise triomphant. Item assez pres de là estoit vn pasteur, qui auoit retrouué ses brebis esgarées: lequel tenoit vn rollet, où auoit en escript. *Congratulamini michi quia inueni ouem quam perdideram. Luc. xv.* Item apres au pont, estoit vne figure de Pompée capitaine de Rōme, qui auoit prins le Roy d'Armenie, pour les rebellions par luy commises contre les Romains. Lequel voyans son obeissance & humilité eut de luy pitié, & le remeit en sa premiere liberté, par si qu'il luy sembloit chose d'aussi grād gloire de pardonner comme de vaincre: & y eut en escript. *Æquē pulchrum est vincere reges, &c. Valerij libro quinto capitulo.* Item & outre estoit vn autre Prophete aupres de l'autre porte, qui mōstroit du doigt vers l'eaüe, & tenoit vn rollet, auquel auoit en escript. *Respice domine in seruos tuos. Psalm. lxxxix.* Item en la riuere estoient cinq ou six Apostres, entre lesquels estoit S. Iean, qui disoit par escript à S. Pierre.

Dominus est. Matth. xiiij. Et puis S. Pierre voulant venir deuers nostre seigneur qui estoit cheminant sur l'eau, & soy voyant en dangier de noyer, dit par escrit. *Domine saluum me fac. Matth. xiiij.* Et nostre seigneur eut vn rollet qui dit. *Modice fidei quare dubitasti? Eodem cap.* Et en icelle mesme riuere estoit vn grãd bateau chargé de torches ardantes. Item encores vn personnage en guise de Prophete, qui tenoit vn rollet en sa main, & monstroït vne autre grande figure deuant luy en disant par escrit. *Exultabunt omnia ligna siluarum à facie domini quoniam venit. Psalmo. xv.* Item deuant ledit Prophete auoit vn grand eschauffaut, sur lequel & au deuant d'iceluy, estoit vne forteresse à deux tournelle: aux Carneaux de laquelle forteresse furēt pendus des escus, armoyez des armes de tous les païs ce mondit seigneur. A la porte d'icelle forteresse, estoit vn personnage à maniere de geant, qui fut nommé Mars: & fut interpreté le victorieux en armes, qui empres luy auoit vn lyon. Et deuant ladicte forteresse estoit vn bois, auquel estoïēt diuerses manieres de bestes, comme dragons, loups, regnards & autres bestes sauuages, qui feirent semblant de vouloir entrer & vouloir enuahir ladicte forteresse, qui toutes furent rebouttées. Et estoit deuant ladicte porte vn homme, representant les trois estats des païs de mon dessusdit seigneur, vestu: c'est à sçauoir sur la teste comme homme d'Eglise, du costé dextre d'une robe longue de drap de foye: Le costé senestre cōme laboureurs des champs. Si auoit en escrit au dessus d'iceluy. *Diligam te domine fortitudo mea. Et nisi custodieris ciuitatem frustra vigilat qui custodit eam. Psalmo. xxv.* Item en auant fut vn personnage du Roy Salomon, & de la Roïne Saba: deuant lequel personnage fut escrit. *Maior est gloria tua quam rumor quem audiui. iij. Regum. cap. x.* Item apres vne figure de Gedeon, auquel puis qu'il eut obtenu victoire, les enfans d'Israël vindrent humblement à luy, en disant. *Dominare nostri tu, hic est filius tuus & filij tui quia liberaisti nos. Iudic. viij.* Item en apres fut vn elephant, portant vn chasteau: sur lequel furent deux hommes & quatre enfans qui chātoient vne ioyeuse & nouuelle chanson, dont les mots s'ensuiuent.

*Viue Bourgongne est nostre cry
Gardons l'en fait & en pensée
Autres n'aurons bien nous agréé
Nous le voulons tousiours ainsi.
Viue Bourgongne est nostre cry
De cuer chantons ie vous en prie
En sa haute ioyeuse entrée:*

*Viue Bourgongne est nostre cry.
Resioüissons nous pour celuy
Qui est venu en sa contrée,
Par qui no tristesse est finée,
En criant de courage vny:
Viue Bourgongne est nostre cry.*

Icelle entrée fut moult haulte & la plus excellēte, que Prince feit long temps au parauant: car à costé de luy estoit à cheual le chapperon sur l'espaule le bastord d'Armignac, Marechal de mōseigneur le Daulphin: & deuant luy estoient les huissiers d'armes, son premier escuyer d'escuyerie portant l'espée deuant luy, & ses Roys d'armes, heraulx & poursuiuans vestus de leurs cottes d'armes & en grand nombre. Item deuant lesdits heraulx estoient les trompettes, & clairons enuiron douze ou quatorze. Item deuant eux le Comtes d'Estampes & messire Thibault de Neuf-chastel, seigneur de Blancmont Marechal de Bourgongne. Item deuant eux les seigneurs & gentils-hommes de

de monseigneur le Daulphin: les deux fils de monseigneur de Croÿ, & les deux fils dudit Marechal de Bourgongne. Item deuant eux estoient monseigneur Aldof de Cleues, monseigneur le bastard de Bourgongne, & mesire Philippe Pot, richement habillez eux & leurs heraulx. Item deuât eux estoient tous les grans seigneurs de la court: & deuant lesdits seigneurs les gentils-hommes deux & deux, sans varlet ne page: & deuant lesdits gentils-hommes, estoient ceux de la ville en grand nombre vestus de noir. Item apres mondit seigneur estoient cinquante archiers de son corps à pied, vestus de leurs heucques, & chacun ayant vn vouge en sa main: & derriere luy estoient quinze pages, & plusieurs gentils-hommes: & furent les cheuaux estimez qui estoient à ladicte entrée sans les varlets & les pages, qui estoient ja dedans ladicte ville deux cens cheuaux ou plus. Item conclusion, ce fut le plus grand triomphe qui fut fait au paÿs passé cinq cens ans, pour la venue du seigneur: car le lendemain au soir toutes les torches furent allumées. C'est à sçauoir nouvelles torches & fallots. Ceux de la ville iouïrent plusieurs personnages, par lesquels en l'hostel de la ville, ils feirent exposer les personnages & figures dessusdictes en louant le Prince, & en confessant leur meffait. Item semblablement feirent le mardy au soir: mais pour iceluy soir ne furent point tant de torches allumées comme les deux iours precedens, car aucuns dient que monseigneur ne le vouloit pas. Item en ladicte ville y auoit vn bourgeois qui auoit fait couvrir sa maison d'argent, & dessus d'or: & deuant icelle vne tresgrand quantité de torches & de lanternes. Item semblablement en plusieurs & diuerses rues, plusieurs des bourgeois auoient fait aorner & parer leurs maisons de draps, & de luminaires tresrichement & à grans fraiz, & dura ceste feste deux iours. Item cedit mardy les bourgeois & officiers de ladicte ville, vindrent deuers mondit seigneur en son hostel, & illec le remercierent humblement, de ce qu'il estoit venu à sa bonne ville en luy offrant corps & biens, dont il les remercia. Et lors les genoux à terre, luy supplierent qu'il luy pleut soupper par maniere de banquet en la maison de ladicte ville, le dimanche ensuiuant dernier iour d'Auril, lequel leur octroya. Et disoit on que ledit banquet seroit fait à tous venans, & comme court ouuerte, & qu'il cousteroit plus de dix mille escus d'or: car le lendemain ceux de Gand enuoyerent querir par toutes contrées à neuf lieues à la ronde toutes les viandes delicieuses qu'ils peurent finer, tellement que l'en vendoit vn petit poussin deux patars. Oudit an lvij. environ la fin d'Auril, enuoya le Roy certains ambassadeurs deuers le Duc Philippe: par lesquels il luy fait signifier qu'il auoit prins iour au xv. iour de Iuing prochain apres, de redre sentence & iugement au Duc d'Alençon en sa ville de Montargis, en luy intimant & sommant qu'il fut present audit iour & audit lieu, avec les autres Pairs de France, luy qui estoit l'un & le Doyen des Pairs. Et pour illec aussi ouïr traicter de plusieurs besongnes touchant le bien du Royaume. Ausquels ambassadeurs le Duc respondit incontinent & leur dit: Iacoit (ce dit il) que monseigneur le Roy par le traicté d'Arras ne me doïue riens commander, & que de ma personne soie exempt de luy: neantmoins ie y seray personnellement au plaisir de Dieu. Apres laquelle responce & que les ambassadeurs se furent partis, le Duc enuoya sans tarder deuers son thoison-d'or Roy d'armes de son ordre, pour di-

re au Roy certaines parolles que le Duc luy chargea . Puis fait crier par toutes les bonnes villes de ses païs, que tout homme ayant accoustumé de porter armes, fiefes & arrierefiefes & les sermentez d'icelles bones villes, archiers & arbalestriers, se meissent en armes, & se trouuassent deuers luy où qu'il fut le premier iour de Iuing, lors prochain, pour l'accompagner deuers le Roy à Montargis, là où le Roy l'auoit fait sommer d'y estre en personne, & où il auoit intention d'estre au plaisir de Dieu en la plusgrand puissance qu'il pourroit assembler, & mener avec luy. D'autre part le Roy de France fait crier l'arriereban par tout son Royaume, pour chacun estre prest en armes audit premier iour de Iuing: parquoy chacun cuida lors qu'ils fussent venus à la guerre: mais la voix couroit en France que c'estoit pour resister aux Anglois, qui se prepa-roient de passer en France. En ce mesme temps ceux du Treth se rebellerent contre leur Euesque: pourquoy le Duc Philippe pere dudit Euesque, enuoya messire Anthoine son bastard en Hollande accompagné de huiet vingts lances, & de sept à huiet cens archiers: mais quand les rebelles en furent aduertis, ils se r'appaierent & obeirent à leur Euesque comme deuant, & l'armée s'en retourna deuers le Duc .

Comment le Roy contremanda au Duc de Bourgongne qu'il ne trauaillast point d'aller à Montargis, mais y enuoyast trois ou quatre nobles personnes pour conuenir avec les autres. Puis parle en brieu de la sentence donnée par le Roy contre le Duc d'Alençon en la ville de Vendosme & la reseruation du Roy apres la sentence rendue.

ENuiron le premier iour de Iuing audit an lviii. retourna de deuers le Roy thoison-d'or, & rapporta au Duc Philippe son seigneur & son maistre, comme le Roy auoit entendu que le Duc s'apprestoit de venir à Montargis à tresgrand armée, ce que faire ne le pourroient sans la tresgrand foulle & dommage du plat païs. Et pourtant luy mandoit, qu'il se tenoit pour excusé de sa personne. Mais luy prioit qu'il enuoyast à ladicte iournée trois ou quatre de son conseil, & il luy souffiroit. Et le Duc incōtinent ordonna messire Iean de Croÿ, messire Symon de Lalaing cheualiers, & aucuns autres clerks de son cōseil, & ledit Thoison-d'or estre à ladicte iournée. En ceste année se tint vne assemblée à Grauelignes, d'entre les gens & conseilliers du Duc Philippe, & des Anglois. Et le Comtes d'Estampes tost apres alla à Calais par saufconduit, là où il fut grandement receu & festoyé par les Anglois. Et fut commune renommée qu'ils traicterent celle fois vnes trefues d'entre les Anglois, & le Duc pour tous leurs païs. Le Roy considerant qu'à Montargis ne pourroient tant de gens qu'il eut mandez pour ouïr la sentence du Duc d'Alençon, remeit la iournée à comparoir à Vendosme. Auquel lieu il fut en personne en si tresnoble estat, que noble chose estoit à regarder: & si y comparurent tous ceux qu'il eut mandez ou procureurs pour eux. Et lors que le iour fut venu, & que tous ceux comparurent deuant luy qui eurent esté mandez, & qu'ils n'estoient illec que deux Pairs tēporels. C'est à sçauoir le Roy & les procureurs dessus nommez, pour le Duc Philippe de Bourgongne: Le Roy de son auctorité constitua Pairs du Duc de Bourbon, du Côte de Foix, du Comte de la Marche, & du Comte d'Eu, pour assister le Roy en iugement. Eux ainsi instituez & assis

assis és lieux pour ce preparez, maistre Iean l'Orfeure President de Luxébourg, l'un des procureurs du Duc de Bourgogne, supplia au Roy qu'il luy pleust ouir ce qu'ils auoient de charge de leur seigneur, de luy dire & de parler pour le Duc d'Alençon, le Roy fut content qu'il parlaſt. Et lors iceluy maistre Iean feit ſa proposition longue aſſez, & moult bien ordonnée & auctorifée par les eſcritures, contenant quatre conſiderations: dont le Duc de Bourgogne ſon ſeigneur faiſoit aduertir le Roy, pour l'encliner à miſericorde enuers le Duc d'Alençon, qu'iceluy Duc de Bourgogne tenoit ſon prochain parent. La premiere conſideration fut, qu'il appartenoit à la maieſté royalle faire tous temps miſericorde & uſer de clemence. La ſeconde, que le Duc d'Alençon eſtoit parent du Roy. La tierce, les ſeruices que les predeceſſeurs du Duc d'Alençon & luy meſmes auoient fait à la couronne de France. Et la quarte, la ſimpleſſe de ſa perſonne: & que ces choſes conſiderées par le Roy, il vouliſt eſtendre ſa miſericorde & clemence au Duc d'Alençon. A quoy fut reſpondu pour le Roy par le Cardinal de Conſtances, que le Roy auoit bien entendu les cauſes, pourquoy le Duc de Bourgogne luy requeroit miſericorde pour le Duc d'Alençon. Et dit quāt au premier point, que voirement miſericorde & clemence appartiennent aux Roys, & aux grans Princes ſouuerainement: mais auſſi leur appartient faire Juſtice, qui eſt vne vertu par laquelle les Roys regnent: car ſe n'eſtoit Juſtice, les Royaumes ne ſeroient que larronneries. Quant au ſecond point, que le Duc d'Alençon eſtoit parent du Roy, fut reſpondu, que de tant eſtoit il plus tenu au bien & à la conſeruacion du Roy & de ſa Couronne. Quant au tiers point touchāt les ſeruices faits à la Couronne par ſes predeceſſeurs, &c. fut dit qu'il ne les auoit pas enſuiuis ne fait comme ils feirent. Et comme les enfans ne doiuent porter le forfait de leurs peres, auſſi ne doiuent ils proffiter de leurs merites & biensfaits. Quant au dernier point, fut dit que voirement monſeigneur d'Alençon auoit bien monſtré qu'il n'eſtoit pas ſage, ne ſi ſimple qu'ils le diſoient: ains auoit en la matiere procedé par grande ſubtilité & malice, comme l'en pouoit veoir bien par ſon proces. Et qu'il n'auoit pas tenu à luy, que ſa mauuaiſe volenté n'eſtoit pas venue à effect: & que par tant il eſtoit digne de punition, comme ſe le cas fut aduenu: puis leur fut dit en concluſion, que le Roy procederoit en celle matiere par l'aduiſ des Princes & ſeigneurs de ſon ſang, & de ceux de ſon cōſeil. Et eut le Roy bien voulu & deſiré que le Duc de Bourgogne y eut eſté pour en auoir ſon bon conſeil, & qu'il en feroit tāt qu'iceluy Duc de Bourgogne, & tout le monde en deueroient eſtre contents.

Ceſte reſponce ainſi faiçte ſ'enſuit le dictum du Roy, qui fut leu illec en preſence, le Roy ſeant en ſon ſiege iudiciaire, par la bouche de ſon Chancellier qui dit ainſi.



Charles par la grace de Dieu Roy de France. Comme nous deuëment informez que Iean Duc d'Alençon Pair de France, auoit conduit & mené, & fait conduire & mener pluſieurs traictiez & appoinctemēs avec noz anciens ennemis, & aduerſaires les Anglois. Sçauoir faiſons que veües & viſitées par nous & par noſtre court garnie de Pairs, & d'autres à ce appelez, les charges & informations de teſmoings faiçtes à l'encontre de Iean d'Alençon, enſemble ſes confeſſions & autres choſes contenues ou proces

bien au long, & à tresgrande & meure deliberation: & considéré ce qu'il faisoit à cōsiderer en ceste partie. Nous par l'aduis & deliberatiō de nostredicte court garnie comme dessus:auons dit & déclaré, disons & declarons par arrest ledit d'Alençon estre crimineux de crime de leze maiesté, & comme tel l'auons priué & deboutté, priuons & debouttons de l'honneur & dignité de Pairrie de France, & autres ses dignitez & prerogatiues. Et l'auons cōdamné & condamnons à receuoir mort, & estre executé par Iustice. Et auons déclaré & declarōs, tous & chacun les biens dudit d'Alençon estre confisquez & à nous competer & appartenir. Sauf toutesuoyes & reserué à nous de faire & ordōner sur le tout ainsi que bon nous semblera. Laquelle sentence ainsi rendue que dit est, le Roy declara son plaisir estre tel. C'est à sçauoir, q̄ premierement l'executiō de iustice à faire de la personne du Duc d'Alençon, seroit differée iusques à son bō plaisir. Itē touchant les biens dudit Duc confisquez, &c. Iacoit-ce que ses enfans selon raison & vsage deussent estre priuez & debouttez de tous biens, hōneurs & prerogatiues, & viure en telle pouureté & médiçité que ce fut exemple à tous autres, attendu l'enormité des crimes de leur pere, neantmoins pour remembrance des seruices faits par leurs predecesseurs au Roy & à sa Couronne, esperant le Roy que lesdits enfans se gouvernerōt & conduiront enuers le Roy comme vrays & loyaux subiects doiuent faire enuers leur souuerain seigneur. En faueur aussi & cōtemplation des requestes sur ce faictes au Roy par le Duc de Bretaigne, oncle dudit d'Alençon, le Roy de sa grace voulut & declara, que lesdits biēs fussent & demourassent à la femme & aux enfans dudit d'Alençon, reserué au Roy l'artillerie, harnois & autres habillemens de guerre. Au regard des terres & seigneuries, le Roy retint à luy les villes, chasteaux & vicomtez d'Alençon, de Dampfront, de Verneul tant deça comme delà la riuere d'Erne, avec toutes les appartenances & dependences desdictes villes, chasteaux & vicomtez: lesquelles des lors le Roy vnit, adioint & incorpora au demaine de sa Couronne. Item aussi retint le Roy la terre, chastellenie & seigneurie de S. Blāsay en Touraine, ensemble le payage que ledit d'Alençon auoit & prenoit sur les ponts de Tours: Et toutes les autres rentes qu'il prenoit & auoit en ladicte ville & chastellenie de Tours, pour en ordonner à son bon plaisir. Item retint le Roy à luy les fois & hommages, droits, deuoirs & recognoissances qui compettoient & appartenoient audit d'Alençon à cause de la Comté du Perche, sur & par raison de Nogent le Retrou & ses appartenances & pendences, & autres terres appartenans au Comte du Maine, à cause de la Cōtesse du Maine sa femme. Item au regard des autres terres, seigneuries & biens immeubles qui appartenoient audit d'Alençon, le Roy voulut qu'ils demourassent à ses enfans. C'est à sçauoir, la Cōté du Perche pour en iouir par Regné seul fils dudit d'Alençon, & par ses hoirs masles descendans de son corps en loyal mariage, sans toutesuoyes, aucune dignité ou prerogatiue de Pairrie. Et quand au surplus des autres qui furent audit d'Alençon, le Roy ordonna qu'elles demourroient ausdits enfans tant masles comme femelles, pour en iouir & vser par la main du Roy iusques à ce que lesdits enfans seroient en aage: & eux aagez en iouiroient comme de leur propre chose: & par leurs hoirs procreez de loyal mariage, selon la coustume des pays où lesdictes terres sont assises.

Ces choses ainsi faictes & acheuées le Roy enuoya le Duc d'Alencon tenir prison à Aiguemorte, un fort chastel seant vers Auignon.

EN ce mesmes temps issirent de Calais bien viij. cens combattans, & s'en allerent à Estaples en Boullenois, là où ils trouuerent plusieurs vaisseaux chargez de vin de Poitou, que les Bretons y auoient amenez, pour gagner lesquels ils rançonnerēt & si y prindrent plusieurs mulles que marchans de Languedoch y auoient amenez, pour charger des foires & les rançonnerent aussi, & rēmenerent plusieurs prisonniers. En ceste année aussi enuiron le Noël, le Duc Philippe de Bourgongne enuoya vne notable ambassade à Rome deuers le Pape Pius, pour luy faire obeissance pour tous ses païs, comme bon fils de l'Eglise. Et tost apres iceluy Duc renuoya deuers le Roy vne autre ambassade, pour tousiours euitier à la guerre que plusieurs gens coniecturoient à venir, pourtant que le Daulphin cōtre le gré du Roy son pere se tenoit avec le Duc, & ne vouloit retourner deuers son pere. Et pource qu'en celle année les Anglois de la frontiere de Calais, ne cessoient de courre & de piller es païs du Duc. Il meit & ordonna gens d'armes par garnisons à Boulongne, à Ardre, à Grauelines, à Fiennes, à S. Omer & en autres places, pour reprimer les courses & roberies desdits Anglois, & pour les prendre & pour en faire iustice. En ceste année enuiron la feste de Noël trespassa de ce monde Artus de Bretagne, sans laisser hoir de sa chair: & pourtant succeda à ladicte Duché Iean de Bretagne Comte d'Estampes, fils du frere du vieil Duc de Bretagne, & de la sœur du Duc d'Orleans. Et iacoit ce qu'il fut Comte d'Estampes, ce nonobstant Iean de Bourgongne frere au Comte de Neuers, se disoit aussi Comtes d'Estāpes: mais sans profit: car le Roy le tenoit en sa main, & en bailloit les profits à qui il vouloit. En ce temps aussi fut faicte la paix & l'accord du Duc Philippe de Bourgongne, & du Comte de S. Pol, tellement que le Côte luy fut depuis aussi amé & aussi familier, qu'il eut onques esté parauant, & se trouua tresbien en grace du Comte de Charrolois fils du Duc. Encores en ce temps vint deuers iceluy Duc Philippe, vne ambassade de Grece de cinquante cheuaux ou enuiron. Lesquels prierent & requierent au Duc, qu'il voulüst estre ou enuoyer à certaine iournée assignée par le Pape Pius, là où se deuoient trouuer tous les Princes Chrestiens ou leurs commis & deputez, pour certaines causes touchans le bien de toute la Chrestienté. Ausquels ambassadeurs le Duc feit bon recueil & honorable, & leur donna de ses biens largement, & si leur dit qu'au plaisir de Dieu il enuoyeroit aucuns de ses deputez à celle iournée.

Comment le Roy manda les douze Pairs de France à comparoir en sa ville de Montargis, pour oïr le proces du Duc d'Alencon: Puis parle de la mort du Pape Calixte, & comment le Roy transmua la iournée de Montargis à Vendosme.

OVdit an cinquante huiet māda le Roy aux douze Pairs de son Royaume, tant d'Eglise que laiz, & à ceux de sa court de Parlement, qu'un chacun se rendit en sa ville de Montargis le huietiefme iour du mois de Iuing: auquel lieu il auoit intention de tenir son liēt de iustice ou conuen-

tion, pour aucuns affaires touchant le fait de son Royaume moult grâdement, ce qu'ils feirent pour la pluspart. Et là furent par l'espace de deux mois, pour traicter l'expedition & absolution, ou condamnation du Duc d'Alençon cousin germain du Roy, & l'un des Pairs de France. Lequel estoit detenu prisonnier pour certains crimes de leze Majesté, qui luy estoient imputez, & dont on disoit qu'il estoit coupable. Et estoient à ceste-dicte conuention les Comtes de Dunois, & de Longueuille, le Chancelier de France, maistre Pierre du Refuge general de France, & plusieurs autres seigneurs & officiers. A ceste-dicte conuention ne comparut aucunement le Duc de Bourgogne, qui est premier Pair de France, combien qu'il fut admonnesté d'y venir, s'il y vouloit assister ou comparoir. Mais ce nonobstant il n'y vint point, pource que par le traicté fait à Arras entre le Roy & luy, il n'estoit ne ne pouoit estre contraint à quelque assemblée ou conuention, sinon de son bon gré & voulenté. Lesdits deux mois dessusdits durans se tenoit le Roy à Baugency, esperans tousiours aller oudit lieu de Montargis. Mais luy doubtant la mortalité & mauuais ayr qui là estoit, se departit & donna congé à un chacun de s'en retourner en son lieu: & fut transmuée ladicte conuention au quinzième iour dudit mois prochain ensuiuant, au lieu de Vendosme. Oudit an le quatrième iour d'Aoust mourut le Pape Calixte, & fut crée Pape un nommé Pius natif d'Italie. En ce mesmes an le xv. iour d'Aoust vindrēt audit lieu de Vendosme par mandemēt, tous les Conseillers pour le Roy en sa court de Parlement, tant laiz que d'Eglise, & mesmement l'Euesque de Paris & l'Abbé de S. Denys, qui n'auoient point esté à Montargis.

Cy dit comment le Duc d'Alençon fut cōdamné pource qu'il vouloit bailler ses places aux Anglois, anciens ennemis de France & les mettre en Normandie.



Charles par la grace de Dieu Roy de France à tous presens & aduenir. Salut & dilection. Comme nous deuement informé que Iean Duc d'Alençon Pair de France, auoit conduit & demené & fait conduire & demener plusieurs traictiez & appointemens avec noz anciens ennemis & aduersaires les Anglois. Et pour ce faire auoit enuoyé en Angleterre & ailleurs ou pays desdits Anglois plusieurs messages, sans nostre congé & licence, & sans aucune chose nous en faire sçauoir, ou grand preiudice de nous & de la chose publique & de nostre Royaume. Et pour ceste cause & pour obuier aux inconueniens qui s'en eussent peu ensuiuir, se par nous n'eust esté donné remede sur ce. Nostre chier & amé cousin le Comte de Dunois, & de Longueuille: & noz amez & feaux conseillers & chambellans, Pierre de Bressey seigneur de la Varenne & grand Seneschal de Normandie, Iean le Boursier General sur le fait de noz finances, Guillaume Cousinot Baillif de Roüen cheualier, & Oudet d'Ardie Baillif de Constantin, eussent par nostre commandement & par vertu de noz lettres patentes, données à Chastelier pres Esbrimbe le xxiiij. iour de May mil quatre cēs cinquāte six prins, & arresté ledit d'Alençon nostre nepueu. Et pour proceder à l'expedition de son proces par l'aduiz & deliberation des gens de nostre conseil, eussions ordonné par noz autres lettres, données de Mont-Richart le xxiiij. iour du mois de May dernier passé, que nostre-dicte court

court de Parlement lors seant à Paris, seroit & se tiendrait en nostre bonne ville de Montargis, en commençant le premier iour du mois de Iuing dernier passé, & iusques à la perfectiō d'iceluy procès. Et pour icelle court tenir, eussions mādē & ordonné à venir audit lieu de Montargis aucuns de noz Presidens & Cōseilliers en nostredicte court, en bon & souffisant nombre, & mādē pour y estre les Pairs & seigneurs de nostre sang & lignage, tenans de nous en parrie & autres: aussi y estre nostre amé & feal Chancelier, & aucuns des Maistres des requestes de nostre hostel, & autres gens de nostre conseil. Ensuivant laquelle ordōnance nostre-dit Chancelier & noz amez & feaux conseillers l'Archeuesque & Duc de Reims, les Euesques & Ducs de Laon & de Langres, & les Euesques & Comtes de Beauuais, de Chaalons & Noyon Pairs de Frāce, & nosdits Presidens, & aucuns de nosdits maistres des requestes, & de nosdits conseillers de nostre-dicte court de Parlement, & aussi de nostredit conseil: se soient trouuez ausdits iours & lieu, & illec ayent besongné aux preparatoires dudit proces, par aucun temps & aux interrogations d'aucuns adherens, faicteurs & cōplices dudit d'Alençon, & iusques enuiron le dixiesme iour de Iuillet dernier passé. Attendants l'allée de nous de par delà & des Seigneurs de nostre sang, & d'autres gens de nostre conseil, estans par deuers nous en l'intention de proceder à la fin & conclusion dudit proces: à laquelle allée nous eussions differé à cause de la mortalité, qui pēdant ledit temps suruint en la ville d'Orleans, à Sully & autres lieux circonuoisins dudit lieu de Montargis, esquels nous conuenoit passer pour y aller. Et tant à cause de la mortalité, & pour euitier aux incōueniens qui à cause de ce s'en eussent peu ensuiuir: & aussi que nouuelles nous suruindrēt à plusieurs païs que noz ennemis auoient fait certaine grosse armée sur la mer, en intētion de faire descēte en nostre Royaume, es marches de Xaintonge & de Poitou, ou de la basse Normandie. Et affin que peussions estre en lieu de marche plus propice & conuenable pour secourir aux lieux de l'entreprinse, & nosdits ennemis eussions par l'aduis & deliberatiō de nostre-dit conseil voulu ordonner, & establir nostre-dicte court de Parlement estre conuenue & entretenue en nostre ville de Vendosme. Et aussi les gēs de nostredicte court garnie de Pairs, & ceux de nostre sang & lignage, & autres par nous mādēz y estre & comparoir au xij. iour du mois d'Aoust dernier passé. Et semblablement eussions mandé & ordonné y estre le surplus de noz Presidens, maistres des requestes de nostredit hostel, & autres noz conseillers de nostredicte court de Parlement: lesquels pour lors encores estoient demourans en nostre bonne ville & cité de Paris, pour proceder outre & besongner oudit proces iusques à la perfection d'iceluy, ainsi qu'il appartiendroit par raison. Et depuis soyons venus audit lieu de Vendosme, & aussi plusieurs des seigneurs de nostre sang & lignage Pairs de France, & tenans en Pairrie. Et les Archeuesque & Euesques dessus nommez aussi Pairs de France, & plusieurs autres Prelats, Comtes, Barons & cheualiers en grand nombre, nostre-dicte court de Parlement & autres de nostre conseil, & pardeuant nous seās en nostre-dicte court garnie de Pairs & autres à ce appellé: ait esté amené ledit d'Alençon: Lequel apres le serment par luy fait de dire verité, interrogué sur les cas & crimes dōt il a esté chargé par information, a dit & confessé de franche & liberalle volenté ce qui s'ensuit.

QUE apres que le seigneur de Thallebot eust prins Bordeaux, vn nommé Iaques Haye Anglois seruiteur d'un nommé Richard d'Ondeuille, cheualier aussi Anglois, vint à faufconduit à Alençon, & parla audit Duc d'Alençon en secret du fait de mariage de la fille dudit d'Alençon avec le fils du Duc d'Iorth. Et que tant pour le fait dudit mariage comme de toutes autres choses, qu'ils vouldroient faire sçauoir les vns aux autres, luy & ledit Iaques Haye, & esleurent enseigne de prendre le poulse de la main d'iceluy : auquel message de l'une desdictes parties se adresseroit. Et enuiron le mois d'Aoust l'an qu'on disoit mil quatre cens cinquante & cinq, ledit d'Alençon enuoya querir vn nommé Thomas Gille, prestre demourant à Dampfront, & luy fait faire le serment d'estre secret : & apres dit qu'il le vouloit enuoyer en Angleterre : & le teint par aucun temps à ceste cause, & le mena avec luy à la Flesche en Anjou, esperant le despescher illec. Et que lors suruint audit lieu de la Flesche vn nommé Hou-tuitō Anglois, Herault d'Angleterre : auquel il se descourrit, & luy bailla charge d'aller en Angleterre, pour admonnester & exhorter de par luy nosdits ennemis, à venir & descēdre en nostre païs de Normandie: en leur mandant qu'ils feussent d'accord de par Dieu ou de par le diable, & qu'ils pensassent en autre chose, & qu'il seroit heure de foy bouter auant : & que oncques ils n'auoient eu si beau faire qu'ils auoient pour lors, & qu'il estoit temps ou iamais : & que nous estions loings & nostre armée en trois parties, l'une en Armignac, l'autre en Guyenne, & l'autre pour aller contre nostre tresaymé fils le Daulphin de Viennois : & que les nobles, les bonnes villes, & le peuple en tous estats estoient si mal contens que plus n'en pouoient, & que ledit d'Alençon mesmement estoit mal content: & que se nosdits ennemis se vouloient ayder il leur ayderoit, de places, d'artillerie & de tout son pouoir : & qu'il auoit assez d'artillerie pour combattre dix mille hommes aux champs pour vn iour : & que nosdits ennemis amenassent le Roy d'Angleterre & trente ou quarante mille hommes, pour combattre du moins, & qu'il n'y auoit en nostredit païs de Normandie que vn de noz chiefs de guerre, & quatre cens lances : & qu'ils auroient conquesté grand partie du païs, auant que y peussions mettre remede. Et qu'il conseilloit à nosdits ennemis, que le Roy d'Angleterre apres sa descente, fait crier à son de trompe, & sur peine de la hart, que nul ne fut si hardy de prendre aucune chose sur les laboureurs & gens du plat païs: & que chacun peust demourer paisiblement en ses biens & heritaiges : & se aucun faisoit le contraire, qu'incontinent punition en fust faicte. Aussi que le Roy d'Angleterre reuocast les dons faits par son pere & par luy, & pardonnast à tout le monde de tout le temps passé, & procedast comme en conqueste nouuelle: aussi que nosdits ennemis feissent leur descente en plusieurs païs. C'est à sçauoir le Roy d'Angleterre & le Duc d'Iorth en la basse Normandie, & le Duc de Bougingan à Calais pour venir par Picardie & le païs de Caulx, & que se nous voulons aller esdictes marches pour deffendre ledit païs: ceux de Guyenne, lesquels (comme disoit le Duc d'Alençon) estoient mal contens : & se nosdits ennemis leur vouloient donner pou d'ayde, se pourroient mettre sus & rebeller contre nous. Et que en brief nous perdriens tout le païs de par delà. En oultre que nosdits ennemis feissent sçauoir audit d'Alençon leur descente trois mois deuant icelle, affin qu'il peust pourueoir

pourueoir à ses places, & que n'en peussions faire à nostre plaisir : & qu'apres leur descente ils enuoyassent ledit Houtuiton deuers luy, pour luy dire quels gens ils auoient, & leur intention: affin qu'il aduisast qu'il auoit à faire pour soy conduire avec eux. Et oultre plus leur madoit par ledit Houtuiton, qu'ils amenassent le plus de finances qu'ils pourroient, & luy feissent deliurer à Bruges ou ailleurs vingt mille escus, ou à tout le moins promptement dix mille escus : & vn mois apres le surplus, pour luy ayder à payer vne partie des gens qu'il mettroit en ses places, & pour parfaire son artillerie. Et aussi donna charge audit Houtuiton de dire à nosdits ennemis, qu'ils trouueroient apres leur descente à Allençon ou à Damfront partie de son artillerie. Et promet ledit d'Allençon & iura és mains dudit Houtuiton herault dessusdit, qu'il tiendrait à nosdits ennemis tout ce qu'il leur promettoit. Et aussi fait iurer & promettre audit Houtuiton de dire les choses dessusdictes audit Duc d'Iorth, Richard d'Ondeuille & Iaques Haye: & qu'il ne le diroit ne reueleroit à autres qu'à eux. Et pour certifier & approuuer tout ce qu'il auoit donné en charge audit Houtuiton, de dire à nosdits ennemis au partement dudit Houtuiton, ledit d'Allençon luy bailla lettres de creance adressantes audit Duc d'Iorth, signées d'une. N. trenchée contenans ceste forme: Seigneurs vueillez croire ce porteur de ce qu'il vous dira de moy, & vous remercie de vostre bon vouloir: car j'ay bonne volenté se à vous ne tient, disant avec ce nostredit nepueu, qu'il estoit bien recors en general, qu'il auoit baillé audit Houtuiton toutes les persuasions & couleurs, tant d'artillerie cōme d'autre chose, qu'il auoit peu pour paruenir à ses fins. Et apres pour executer ce que dit est, auoit enuoyé ledit Houtuiton en pourueance en Angleterre: disant aussi ledit d'Allençon, que certain temps apres il auoit enuoyé ledit Thomas Gillet, prestre en Angleterre: & luy auoit donné charge de dire audit Duc d'Iorth ou Richard d'Ondeuille, de par luy ausdictes enseignes de poulce l'estat du païs, & la charge de nostre peuple: & de amener nosdits ennemis le pluſtoſt qu'ils pourroient, pour descendre en ce Royaume en la plus-grand compaignie qu'ils pourroient: & qu'ils estoient bien meschans, qu'ils ne s'aduisoient de venir: & qu'ils n'auoient oncques eu si beau faire à conquerir le païs, qu'ils auoient perdu: & que s'ils estoient vingt mille hommes de par deça, ils auroient conquesté grand partie du païs auant que y peussions pourueoir: & aussi que nous estions loings, partis de Berry pour aller sur nostredit fils le Daulphin: & que au païs n'auoit aucuns gens d'armes, & estoit tout le peuple mal content, qu'à icelle heure estoit temps qu'ils veinssent ou iamais: & avec ce que quand ils viendroient ils amenassent le plus de gens, qu'ils pourroient: & qu'il leur dit que ledit d'Allençon estoit fort esbahy, qu'il n'auoit eu aucunes nouvelles d'eux ne sondit poursuiuant: & qu'ils le luy renuoyassent & feissent sçauoir de leurs nouvelles: & qu'il leur dit franchement que ce n'estoit riens de leur fait ne de leur entreprinse, s'ils ne monstroient autrement qu'ils voulsissent besongner. Aussi qu'il leur parlaſt desdits vingt mille escus, dont il auoit donné charge audit Houtuiton: & avec ce qu'il chargeast audit Thomas Gillet de dire audit Duc d'Iorth, que de tous les siens de par deça il estoit le mieux aymé en Normandie, & estoit celuy pour qui les gens du païs feroient le plus. Et chargea en oultre audit Gillet qu'il fait aux Anglois, qu'apres leur descente, ils

feissent les ordonnances, cris & obligations, telles qu'il auoit dictes & declairées audit Houtuiton : & que se on parloit audit Gillet du mariage de la fille de nostredit nepueu, avecques le fils aîné dudit Duc d'Iorth, il dit de ladicte fille ce qu'il en sçauoit & auoit veu : & qu'il baillast audit Gillet certaines lettres pour porter audit Duc d'Iorth, contenant la forme qui s'ensuit. Seigneur. &c. Je me recommande à vous, & vous prie que tout en haste me faciez sçauoir de voz nouvelles, & pensez de moy : car il est temps, & pour Dieu mettez diligence en vostre fait, & vous acquitez à ceste fois : car trop ennuie à qui attend. Et en toute haste enuoyez argent, car vostre fait m'a cher cousté. Et à Dieu, qu'il vous doint ce que desirez. Escript *ubi supra*. Et au dessoubz le tout vostre. N. Disant outre, qu'un pou deuant Noël ensuiuant, il enuoya un nommé Pierre Fortin à Calais, & luy donna charge de parler ausdictes enseignes du poulce, ausdits d'Ondeuille & Jaques Haye, & sçauoir à eux s'ils auoient eu aucunes nouvelles desdits poursuiuans, & de Thomas Gillet. Oultre confessa qu'entre ladicte feste de Noël & l'Epiphanie audit an, lesdits poursuiuans & Thomas Gillet reuindrent d'Angleterre deuers luy, & luy fait ledit poursuiuant rapport dudit Gillet, par lequel luy dit. Que ledit Duc d'Iorth & le chancelier d'Angleterre le remercioient de son bon vouloir, & que le Parlement d'Angleterre n'estoit point encores assemblé, ne le Roy d'Angleterre en estat de luy faire responce finale. Mais que brief en tiendroient Parlement, & besongneroit l'en si bien que ledit Duc d'Alençon en seroit bien content : & que nosdits ennemis luy feroient asçauoir de leurs nouvelles par ledit Ondeuille dedans Karesme lors apres ensuiuant. Et que nosdits ennemis ou aucun d'eux, auoient laissé les armes ou enseigne des lettres dudit Duc d'Alençon, lesquelles portoit ledit poursuiuant pour l'honneur dudit Duc d'Alençon. Disoit aussi que ledit Gillet par son rapport luy auoit dit, que ledit Duc d'Iorth se recommandoit à luy & le remercioit de son bon vouloir : & aussi luy prioit, que tousiours le voulsist continuer : & que auant qu'il feust le mois de Septembre ensuiuant, ledit Duc accompagné des plus grans seigneurs d'Angleterre, descendroit en nostre païs de Normandie à si grand & bonne puissance, que ledit Duc d'Alençon en deuroit estre content. Aussi que nostredit nepueu trouuaist maniere de recouurer aucune place ou port de mer, pour là descente de nosdits ennemis : & qu'il leur fait sçauoir se nostredit fils le Daulphin iroit point en Normandie. Et icelle & semblable responce auoit fait Thomas Gillet du chancelier d'Angleterre, pour la dire & faire sçauoir audit Duc d'Alençon. Et oultre plus dit & confessa, qu'incontinent apres le retour desdits messagiers & Thomas Gillet, il enuoya en Angleterre un nommé maistre Emond Gallet, apres ce qu'il eut prins le serment de luy sur le liure, de tenir les choses secretes : & qu'il bailla audit Gillet vnes lettres adressantes audit Duc d'Iorth, signées de son vray seing & de son nom Iean, lequel il auoit trenchée à quatre : & le bailla audit Gillet pour le regarder à part desdictes lettres : desquelles il disoit l'effect estre tel. Seigneurs ie me recommande à vous : j'ay ouï ce que m'avez fait sçauoir. Et vous prie que ie y aye de vous autres nouvelles le plus tost que vous pourrez, se vous voulez entendre aux matieres, dont ce porteur vous parlera : il en est temps, i'y entendray volentiers, & feray tant que vous en serez content, & le croyez de ce qu'il vous dira de ma part.

part. Aussi disoit qu'il auoit dōné charge audit Gillet de sçauoir la respōce dudit mariage, & des autres choses qu'il leur auoit fait sçauoir par ledit Houtuitō, par son messagier, & par Gillet : & de leur dire qu'il estoit temps de besongner, s'ils vouloient riens bien faire : & qu'il voudroit qu'ils fussent descendus aussi espes que mousches ou gresle : & qu'il estoit adcertené, que nous allions sur nostre dit fils le Daulphin : & qu'il se tenoit seur d'auoir du retour des nopces : & q̃ fils venoient & prenoient appoinctement avecques luy, ledit Daulphin leur ayderoit de ses places, de son artillerie & de tout ce que au monde luy seroit possible, & qu'ils ne faillissent point à venir. Et aussi qu'il n'y ayt point de faulte, que ne luy feussent deliurez lesdits vingt mille escus. Disant oultre que enuiron Pasques lors prochain ensuiuant, pource qu'il s'esmerueilloit fort que ledit Gillet n'estoit encores retourné d'Angleterre, il enuoya ledit Fortin audit lieu de Calais, & luy donna charge de parler ausdits Anglois aux enseignes dessus nommez, & leur demanda s'ils vouloient riens ou non. Et oultre plus dit & confessa que enuiron quasimodo prochain ensuiuant, ledit Gillet retourna d'Angleterre par deuers luy & luy apporta lettres du Roy d'Angleterre signées (comme disoit ledit Gillet) de la main d'iceluy : c'est à sçauoir HENRY, & que lesdictes lettres contenoient en effect ce qui s'ensuit. Treschier cousin nous vous meracions du vouloir qu'avez à nous, nous enuoyerons noz facteurs au premier iour d'Aoust à Bruges, pour le fait des trefues d'entre nous & beau cousin de Bourgongne : & que là aussi se trouuent voz facteurs pour appoincter de toutes choses, & ferons tant (se Dieu plaist) que vous serez bien content. Et oultre disoit que ledit Gillet auoit dit, que le Roy d'Angleterre auoit recueilly le gouvernement, & que ledit Duc d'Iorth estoit allé en Galles : & qu'à ceste cause ledit Gillet s'estoit adressé audit Roy d'Angleterre, & luy auoit dit le vouloir & intention dudit Duc d'Alençon, dont il le remercioit : & faisoit sçauoir par luy qu'il enuoyeroit ses ambassadeurs audit lieu de Bruges, selon le contenu desdictes lettres : & que ledit Duc d'Alençon y enuoyast semblablement. Et que lesdits ambassadeurs appoincteroient ensemble desdits vingt mille escus, & aussi de bailler seellez de toutes autres choses. Dit aussi & confessa ledit Duc d'Alençon, que tant pource que le terme dessusdit, auquel nosdits ennemis luy deuoient enuoyer lesdits vingt mille escus, luy estoit long : que aussi pource qu'il desiroit sçauoir l'issue de son appoinctement avec nosdits ennemis : il r'enuoya ledit Gillet de rechief en Angleterre, affin d'auancer ledit argent : & aussi pour recouurer vn saufconduit pour l'un de ses gens, duquel saufconduit le nom deuoit estre en blanc, affin qu'il peust enuoyer aucun homme pour besongner avec lesdits Anglois, là où mestier eust esté & passer ses appoinctemens. Et que en oultre il dit audit Gillet, qu'il ne sçauoit quelles fortunes de la guerre seroient, & qu'il voudroit bien auoir quelque retraicte en Angleterre, se le cas aduenoit, affin qu'il se retrahist par delà, & qu'il luy parlast de la Duché de Bethfort, de la Duché de Clocestre & des terres que les Ducs desdictes Duchez tenoient en leur viuant, affin qu'il en fut parlé au Roy d'Angleterre. Et qu'au parlement dudit Gillet il luy bailla vnes lettres adressantes au Duc d'Iorth contenant ceste forme. Seigneur ie me recommande à vous, & me donne grand merueille, que autrement n'ay eu nouuelles de vous par ce porteur : & vous prie

que m'en faciez sçauoir de brief, & vueillez le croire de ce qu'il vous dira de par moy. Et outre escriuit autres lettres à maistre Loys Galet demourant en Angleterre, & pere dudit maistre Emond, contenans que ledit d'Alençon le mercioit de sa bonne volenté qu'il auoit eüe à luy, ainsi qu'il auoit sceu par son fils, & qu'il adressast tousiours les matieres. Disoit outre, que (ainsi que luy & ledit maistre Emond deuisoient, des matieres) ledit maistre Emond luy dit, que l'intention des Anglois estoit que le Duc de Clocestre & le fils du sire de Thalleboth descendroient en Guyenne à tout dix ou douze mille combattans. Et que le Roy d'Angleterre, le Duc d'Iorth & plusieurs autres descédroient en nostredit pays de Normandie. Et que le Duc de Bouguingan, le Comte de Villechier & d'Vnchestre descendroient à Calais, & viendroient par Picardie dix ou douze mille combattans. Outre plus dit & confessa ledit d'Alençon auoir parlé à Fortin son varlet de chambre, affin que ledit Fortin fut de son alliance touchât le fait desdits Anglois : & en outre luy auoit donné charge pour sçauoir comment nostre place de Granduille estoit emparée, s'elle estoit bien fortifiée, & quelles reparations on y auoit faictes : & en especial du costé, où elle auoit esté autresfois prinse. Et qu'il se fut ioinct avec lesdits Anglois, comme il apparoit qu'il feist : il eust bien voulu trouuer maniere par quelque moyen que ce eust esté, de bailler ladicte place de Granduille & toutes les autres places qu'il luy eust esté possible ausdits Anglois, & y faire tout le pouoir & diligence qu'il eust peu. Disoit outre ledit d'Alençon, qu'il a esté meu de faire exciter & esmouuoir par lesdits messaiges lesdits Anglois à venir descendre en ce Royaume, à la subiection d'un nommé Mathieu Prestre : duquel il ne sçauoit le nom, qui se disoit estre du pays de Lyonnois, & seruiteur au bastart d'Armignac : lequel (comme disoit iceluy d'Alençon) luy auoit apporté lettres de creance sur le porteur de icelles, & par nostredit fils le Daulphin : & aussi de par ledit bastart d'Armignac : esquelles lettres de nostredit fils ledit d'Alençon (ainsi comme il disoit) faisoit doubte pource qu'elles n'estoient pas en la forme, selon laquelle nostredit fils luy auoit accoustumé de rescrire. Et aussi faisoit doubte en la signature desdictes lettres : sur laquelle chose & à sa requeste eussent esté examinez plusieurs tesmoins par aucuns noz commissaires, nommez par ledit d'Alençon seruiteurs de son hostel. Et lesquels affermerent comment ils auoient veu ledit prestre : & aussi eust esté examiné ledit maistre Emond Galet, avecques lequel ledit d'Alençon se disoit bien amplement auoir communiqué touchant le fait dudit prestre. Et ledit Galet eust esté confronté sur ce avec ledit d'Alençon : aussi eussent esté interrogez sur ce lesdits messaiges, & autres complices dudit d'Alençon : lesquels (comme il estoit à croire) deuoient sçauoir de ladicte matiere ou cas que ce feust chose vraye. Pour tous lesquels tesmoins, n'ont esté trouuez aucune chose en ceste partie de ce que dit est par ledit d'Alençon, ainçois ayent depose plusieurs choses qui donnent presumption au contraire. Et en outre disoit ledit d'Alençon, qu'oncques il n'eut lettres de nostredit fils, & ne ouit parler de ladicte matiere de par luy à autre que audit Mathieu, & ne sçauoit encores fil le disoit de luy mesmes, ou par qu'il le disoit : & que ledit d'Alençon n'auoit oncques eu pouoir ne instruction de nostredit fils touchant icelle matiere. Et sur ce & autres choses, eussent esté faictes audit d'Alençon plu-

sieurs

sieurs remonstrances, par lesquelles eust apparu que c'estoit chose controuuée par luy, pour soy cuider couvrir & donner couleur à sa charge. Ausquelles remonstrances ou à la pluspart d'icelles, ledit d'Alençon eust dit qu'il n'y sçauoit que respondre, ou autres de tel effect. Et outre plus ledit d'Alençon en parlant dudit prestre, & en respondant aux dessusdictes remonstrances, & aussi aux interrogations qui sur ce auoient esté faictes, eust esté vacillant & variant en plusieurs points & articles: comme tout ce appert plusaplain par ledit proces. Parquoy ne par quelque chose qui ayt esté dicté par ledit d'Alençon, ne déposée par lesdits tesmoins sur ce examinez à sa requeste, ne autrement par chose contenue oudit proces, n'a esté trouué chose parquoy nous, ne nostredict court doions tenir ne tenons nostredit fils, ne aussi ledit bastart d'Armignac autrement chargez enuiron nous en iustice. Et depuis eust esté conclud & deliberé que ledit proces estoit en estat de iuger. Sçauoir faisons, veuës & visitées par nostredict court garnie de Pairs & d'autres, comme il appartient, les charges, informations & confrontations des tesmoins faictes à l'encontre dudit d'Alençon: ensemble ses confessions & autres choses contenues oudit proces bien au long, & à tresgrande & meure deliberation de nostredict court, garnie comme dessus: auons dit & declairé, disons & declairons par arrest, ledit d'Alençon estre crimineux de leze maiesté. Et comme tel estre priué & debouté d'honneur & dignité de parrie de France, & autres dignitez & prerogatiues: & l'auons cōdamné & condamnons à receuoir mort & estre executé par iustice. Et avec ce auons declairé & declairons tous ses biens quelconques, estre confisquez & à nous competer & appartenir. Toutefois nous auons reserué & reseruons, de faire ordonner sur le tout nostre bon plaisir, lequel nous declairons estre tel. C'est à sçauoir qu'au regard de la personne dudit d'Alençon, nous plaist que l'execution d'icelle soit differée iusques à nostre bon plaisir. Et quand aux biens qui furent & appartindrent audit d'Alençon: iacoit ce que veuë l'enormité des cas & crimes dessus declairez, les enfans dudit d'Alençon selon droit & les vsages gardez en tel cas, deussent estre priuez & deboutez de tous biens, honneurs & prerogatiues & viure en telle poureté & mendicité que ce fut exemple à tous autres. Neantmoins en remembrance des seruices des predecesseurs dudit d'Alençon fais à nosdits predecesseurs, & à la chose publique de nostre Royaume, esperans aussi que lesdits enfans s'y gouverneront enuers nous comme bons, vrais & loyaux seruiteurs doiuent faire enuers leur souuerain seigneur, & en faueur & contemplation des requestes à nous sur ce faictes par nostre treschier & tresaymé cousin le Duc de Bretaigne, oncle dudit d'Alençon. Nous de grace especialle en moderant la confiscation, & forfaiture des biens dessus declairez: voulons, declairons & nous plaist en tant qu'il touche des biens meubles qui furent audit d'Alençon, soient & demeurent à ses femme & enfans, reserué à nous l'artillerie, harnois & autres habillemens de guerre. Et au regard des seigneuries & biens immeubles, nous en moderant (comme dessus) retenons à nous ville, chastellenie & Vicomté de Dampfront, les ville, chasteau, chastellenie & Vicomté de Vernueil tant deça que delà la riuere d'Erne, avecques les appartenances & dependances des dessusdictes villes, chasteaux, chastellenies & Vicomtez: lesquels des à present nous vnissons, incorporons & adioingnons au

patrimoine & demaine de nostredit Royaume . Et avecques ce nous auons retenu & retenons à nous le surplus des chasteaux, chastellenies , terres, Vicomtez, seigneuries, rentes, reuenues, possessions & biens immeubles, qui furent de la Duché adiacence & appartenāce d'icelle Duché, ensemble tous droits, noms & actions qui furent & pourroient escheoir, competer & appartenir au dessusdit Duc d'Alençon à cause de ladicte Duché & seigneurie , tant en propriété, possession que autrement, & tous autres droits & seigneuries , qui sont parties de nostre couronne & appennage de France, où qu'ils soient reserué, la Comté du Perche, dont cy apres en sera faicte mention, pour en faire & ordonner à nostre bon plaisir. Et aussi auons retenu & retenons à nous les chasteau & chastellenie, terre & seigneurie de sainct Blansay en Touraine : ensemble ce que ledit d'Alençon auoit & prenoit sur les ponts de nostre ville de Tours & autres rentes, fiefs & reuenues que ledit d'Alençon auoit & prenoit en nostredict ville & chastellenie de Tours pour en faire & ordonner comme dessus . Et avec ce auons reserué à nous les fois & hommages, droits & recognoissances qui competoient & appartenoient audit d'Alençon, à cause de ladicte Comté du Perche, sur & pour raison des terres & seigneuries de Nogent le Retrou ses appartenances & appendances, & autres terres & seigneuries appartenans à nostre treschier & tresamé cousin le Comte du Maine, à cause de nostre treschiere & tresamée cousine sa femme. Et au regard des autres terres, seigneuries & biens immeubles, qui furent & appartindrent audit d'Alençon . Nous les laissons & voulons qu'ils demeurent aux enfans dudit d'Alençon, ainsi & par la maniere qui s'ensuit: c'est à sçauoir la Comté, terre & seigneurie du Perche, pour en iouir par Pierre seul fils dudit d'Alençon, & par ses heritiers masculles descendans de son corps en loyal mariage: sans toutesuoyes aucune dignité ou prerogatiue de pairie. Et quant au surplus des terres & seigneuries qui furent & appartindrent audit Iean d'Alençon: Nous laissons & voulons qu'elles soient & demeurent aux enfans dudit Iean d'Alençon tant masculles que femelles, pour en iouir par lesdits enfans sous nostre main, iusques à ce qu'ils & chacun d'eux soient aagez. Et apres ce qu'ils seront aagez, par leurs mains comme de leur propre chose, & par leurs heritiers descédans de leur propre corps en loyal mariage, & tout selō les coustumes des païs, où lesdictes terres & seigneuries sont situées & assises. En tesmoing de ce. &c. Donnē à Vendosme le dixiesme iour d'Octobre l'an de grace mille cccc. lvij. & de nostre regne le xxxvij.

A C E L L E sentence esté donnée & prononcée en l'absence dudit Iean d'Alençon, & apres à luy notifiée: & fait à sçauoir en la prison où il estoit par le grand President de Thorette, maistre Iean de Boullengier conseiller du Roy en sa court de Parlement, maistre Iean Bureau Tresorier de France, & aucuns autres du grand conseil du Roy, ledit d'Alençon fut bien esbahy & desconforté & non sans cause. Oudit an mille quatre cens lvij. ou mois de Ianuier termina de vie à trespas treshault & puissant Prince monseigneur Artus Duc de Bretaigne & au parauant & en apres sa vie durant Connestable de France . Apres la mort duquel succeda à ladicte Duché monseigneur François fils de Madame d'estampes seur de monseigneur d'Orleans : laquelle en personne le mena prendre possession de la dessusdicte Duché.

Comment l'ambassade d'Angleterre ne peut auoir accez au Roy de France celle fois : comment le Duc de Cleues alla à la iournée de Mantua : & comment la Daulphine accoucha d'un fils à Geneppe : & comment le Roy d'Escoce fut tué d'un esclat de bombarde.

EN ladicte année lviiij. retournerent de France les ambassadeurs d'Angleterre, lesquels à grand instance queroient pour auoir alliance avec le Roy de France, par mariage ou par trefues. Mais le Roy ne les voulut veoir ne ouïr. Et pourtant s'en retournerent sans riens, & qui plus est ne trouuerent seigneur ne dame qui voulsist prendre de leurs haquenées qu'ils auoient amenées en grand nombre, pour complaire aux seigneurs & aux dames de la court du Roy. En l'an mille cccc. lix. ou mois de Iuing le noble Duc de Bourgongne, desirant Ades le bien commun de la chrestienté, enuoya pour luy & en son nom son nepueu le Duc de Cleues à la iournée de Mantua, là où deuoient conuenir & eux ensemble le Pape & les Cardinaux & tous les Princes chrestiens, pour auoir aduis ensemble comment pour le mieux l'en pourroit resister aux entreprinſes du grand Turc : lequel s'efforçoit tous les iours de conquerre terre sur les chrestiens, especiallement en la Grece : ouquel voyage iceluy Duc de Cleue fut tresnoblement festoyé en plusieurs lieux où il passa, pour l'honneur tant du noble Duc de Bourgongne duquel il estoit ambassadeur, comme aussi pour l'honneur de sa personne & de sa haultesse. En ce mesme temps le Comte d'Estampes par commandement & ordonnance du Duc Philippe de Bourgongne son oncle, print prisonnier en la ville d'Amyens le Vidame d'Amyens, seigneur de Picquegny : lequel il mena ou enuoya tenir prison à Vuillevorde en Brabant, pource qu'il se gouuernoit autrement qu'il appartenoit à tel seigneur, comme il estoit. En ceste année aussi enuiron la fin de Iuliet, dame Charlotte de Sauoye Daulphine de Vienne se deliura d'un beau fils, lequel à son baptisme fut nommé Ioachin. Pour laquelle natiuité duquel fils, fut grand ioye demenée par tous les païs du Duc Philippe de Bourgongne : deuers lequel le Daulphin & sa femme se tenoient tandis qu'il estoit en la malle grace du Roy Charles de France septiesme de ce nom son pere : & se y entretint tant comme son pere vesquit, tenant sa residence ou chastel de Geneppe en Brabant. Toutesuoyes la ioye pour la natiuité de sondit fils, fut tost apres en dueil terminée : car l'enfant trespassa tantost apres. Item en ceste année enuiron le mois d'Aoust, comme le Roy d'Escoce faisoit affuster vne bombarde pour essayer, aduint que l'affust rompit, & que le Roy fut atteint d'un esclat si durement, qu'il en mourut, qui fut vn moult piteux cas : il auoit espousé la niepce du Duc Philippe de Bourgongne, fille du Duc de Gueldres, de laquelle il laissa plusieurs enfans. En ceste année en la ville d'Arras ou païs d'Artois, aduint vn terrible cas & pitoyable, que l'en nommoit Vaudoisie ne sçay pourquoy : mais l'en disoit que ce estoient aucunes gens, hommes & femmes qui de nuict se transportoient par vertu du Diable des places, où ils estoient. Et soubdainement se trouuoient en aucuns lieux arriere de gens, és bois ou és desers, là où ils se trouuoient en trefgrand nombre hommes & femmes : & trouuoient illec vn diable en forme

d'homme, duquel ils ne veoient iamais le visage : & ce diable leur lisoit ou disoit ses commandemens & ordonnances, & comment & par quelle maniere ils le deuoient aorer & seruir. Puis faisoit par chacun d'eux baïser son derriere, & puis il bailloit à chacun vn pou d'argent. Et finalement leur administroit vins & viandes en grand largesse, dont ils se repaissoient : & puis tout accoup chacun prenoit sa chacune : & en ce point s'estaindoit la lumiere, & cognoissoient l'un l'autre charnellement : & ce fait tout soudainement se retrouuoit chacun en sa place, dont ils estoient partis premierement.

P O U R ceste folie furent prins & emprisonnez plusieurs notables gens de ladicte ville d'Arras, & autres moindres gens, femmes folieuses & autres : & furent tellement gehinez & si terriblement tormentez, que les vns confesserent le cas leur estre tout ainsi aduenü, comme dit est. Et outre plus confesserent auoir veu & cogneu en leur assemblée plusieurs gens notables, Prelats, seigneurs & autres gouuerneurs de bailliages & de villes : voire tels selon commune renommée, que les examineurs & les Iuges leur nommoient, & mettoient en bouche : si que par force de peines & de tormens ils les accusoient, & disoient que voirement ils les y auoient veuz. Et les aucuns ainsi nommez, estoient tantost apres prins & emprisonnez & mis à torture, tant & si treslonguement, & par tant de fois que confesser le leur conuenoit : & furent ceux cy qui estoient des moindres gens executez & bruslez inhumainement. Aucuns autres plus riches & plus puissans, se rachapterent par force d'argent, pour euitier les peines & les hontes que l'on leur faisoit. Et de tels y eut des plus grans, qui furent preschez & seduits par les examineurs, qui leur donnoient à entendre : & leur promettoient s'ils confessoient le cas, qu'ils ne perdroyent ne corps ne biens. Tels y eut qui souffrirent en merueilleuse patience & constance les peines & les tormens. Mais ne voulurent riens confesser à leur preiudice. Trop bien donnerent argent largement aux Iuges, & à ceux qui les pouoient releuer de leurs peines. Autres y eut qui se absenterent & viderent du païs, & prouuerent leur innocence, si qu'ils en demourerent paisibles. Et ne fait icy à traire ce que plusieurs gens de bien cogneurent assez, que ceste maniere de accusation fut vne chose controuuée par aucunes mauuaises personnes, pour greuer & destruire ou deshonnorer, ou par ardeur de couuoitise aucunes notables personnes, que ceux hayoient de vieille haine : & que malicieusement ils feirent prendre meschantes gens tout premierement, ausquels ils faisoient par force de peines & de tormens, nommer aucunes notables gens tels que l'en leur mettoit à bouche : lesquels ainsi accusez estoient prins & tormentez, comme dit est. Qui fut pour veoir au iugement de toutes gens de bien, vne chose moult peruerse & inhumaine au grand deshonneur de ceux qui en furent notez, & au tresgrand peril des ames de ceux qui par tels moyens vouloient deshonnorer gens de bien : & à tant fin de ceste matiere.

Cy parle en brief des grandes seditions & diuisions qui furent en Angleterre au temps de lors.

En l'an

EN l'an mille cccc.lx. furent en Angleterre grandes diuisions, grandes batailles, grans meurdres & grandes occisions des plusgrans du pays, les vns contre les autres. Les vns tenoient le party du Roy Henry, comme le Duc de Sombresset & autres: & les autres tenoiēt le party du Duc d'Iorth: sicomme le Comte de Salsebery, le Comte de Vvaruich & autres: & vindrent vn iour à bataille horrible & cruelle, à grande occision de gens de l'un party & de l'autre. Mais le Duc d'Iorth la gaigna: puis feirent paix & traicté par telle maniere que se le Roy Henry alloit de vie à trespas le Duc d'Iorth seroit Roy d'Angleterre, pour luy & pour ses hoirs apres luy: & par tant seroit priué de la couronne le prince de Galles fils d'iceluy Roy Henry, & de la fille du Roy René de Cecille. Lequel traicté fut fait contre le gré de la Roynes d'Angleterre: laquelle feit son amats de gens d'armes, & de tous ceux qui voulurent tenir son party pour son fils: & se meit aux champs pour combattre le Duc d'Iorth. Lequel aussi auoit fait son armée la plusgrande qu'il auoit peu assembler, pour soustenir sa querelle, & pour soy deffendre. Et aduint que le premier iour de Ianuier oudit an ils conuindrent à bataille, & se combattirent par si grande fierté, qu'il y eust vn tresgrand meurdre de gens de l'une partie & de l'autre: mais la desconfiture tourna sur le Duc d'Iorth à celle fois: car il fut prins & avec luy son second fils, & le Comte de Salsebery. Et tost apres les feit la Roynes tous trois decapiter, & leurs testes mettre sur trois lances: & sur la teste du Duc fut mise vne couronne de papier par grand derision, pource qu'il auoit voulu estre Roy, & n'y auoit peu paruenir. Le Comte de Vvaruich eschappa de celle bataille, & trouua son moyen d'issir du Royaume, & de venir à Calais en vn petit batel à pou de gens moult aduventureusement.

Incident.

EN ceste année en vn village pres de Soissons estoit vn curé: lequel voulut auoir dismes en vne cense estant oudit village, appartenant aux croisez d'outre mer: le censier qui lors y estoit reffusa payer icelles dismes, & fut porté & aduoué desdits freres croisez. Le proces en fut fait & parfait & en decheut ledit curé. Pour laquelle cause iceluy curé print en haine mortelle iceluy censier & sa femme. En ce mesme village estoit vne forcierre trop malle femme, & vsant de mauuais art poure femme: laquelle eut noyse à la femme de ce censier pour aucune cause, & se plaignit à plusieurs gens pour le tort que celle censiere luy eut fait: mesmement audit curé en feit elle sa plainte. Lequel curé perseuerant en la hayne dudit censier & de sa femme, dit à celle femme qu'il se vengeroit moult volentiers d'eux fil sçauoit par quelque voye. Et elle luy respondit qu'elle l'en vengeroit bien fil vouloit faire ce qu'elle luy diroit: le curé luy dit qu'il ne seroit riens qu'il ne feit, pour soy venger d'eux: lors luy alla querir celle malle femme vn pot de terre, dedans lequel estoit vn gros crapault, qu'elle auoit long temps nourry & luy dit: prenez sire (dit elle) ceste beste & le baptisez ne plus ne moins, disant, comme se c'estoit vn enfant, & le nommez Iean: puis consacrez vne hostie & la luy donnez à manger & vous attendez à moy du demourant.

LE maudit Prestre aueuglé de sa haine, baptiza la malle beste, & la nomma Iean: luy donna à vser le precieux corps de nostre Seigneur: puis le rendit

à la forcierre : laquelle tout incontinent le tua & le desmembra par pieces, & de ce fait vn forceron avec autres diables qu'elle y meit : puis bailla le forceron à vne ieune fille qu'elle auoit, & luy dit qu'elle le portast à la maison dudit censier à l'heure de son disner : & qu'en parlant à eux d'aucun propos, iettast le forceron deffoubs la table, où ils mangeoient luy, sa femme & leurs enfans : puis s'en reuint. La fille le fait tout ainsi que sa mere luy auoit dit : dont aduint que le censier, sa femme & vn de leurs fils qui disnoient à celle table se sentirent malades ainçois qu'ils eussent pardigné, & moururent tous trois ainçois que trois iours fussent passez. Pour lequel cas venu à cognoissance de iustice la forcierre fut prinse, & sa fille, & le Curé : & la verité sceüe la forcierre fut arse en la ville de Soissons : la fille se fait enceinte, & fut mise en prison, de laquelle elle eschappa : puis fut reprinse, & par appel fut amenée en parlement : & le curé fut mené és prisons de l'Euesque de Paris, dont il issit depuis par force d'amis & d'argent : ne sçay à quelle fin vint la fille.

Cy dit comment Edouard Comte de la Marche fils aîné du Duc d'Iorth desconfit en bataille la Royne d'Angleterre, & fut Roy d'Angleterre par l'ayde de ceux de Londres : & comment la Royne s'en alla allier aux Escocois pour auoir leur ayde.



Vdit an mille quatre cens soixante le xxviij. iour de Mars iour de Pasques flories, Edouard fils aîné du Duc d'Iorth, ainsi decapité que dit est : iceluy Edouard accompagné du Comte de Vvaruich & d'autres barons & seigneurs d'Angleterre, se partit en armes de la cité de Londres : en laquelle il eust esté receu comme Roy, si eust voulu prendre la couronne. Mais il ne voulut, disant qu'il vouloit premierement combattre ses ennemis, & les bouter hors d'Angleterre. Et mena sa grande armée droit à Iorth, où estoient la Royne d'Angleterre, le Duc de Sombresset & tous leurs alliez à vne tresgrosse puissance, qui les attendoient illec à bataille. Eux approchez les vns des autres, ils prindrent iour de combattre en bataille arrestée, & esleurent vne place nommée Faribuge à huit lieuës d'Iorth. Le iour venu que dit est, les Comtes de la Marche & de Vvaruich, enuoyerent leur avantgarde deuant, que menoit l'oncle du Comte de Vvaruich : laquelle avantgarde trouua si dure encontre de leurs ennemis que tous y furent ruez ius, & mors inhumainement. Cuidant donques le Duc de Sombresset auoir tout gaigné, ils se meirent à piller & à despouiller les morts. Ces nouvelles venuës au Comte Edouard & en son ost, qu'il auoit encores grand & entier, ses gens se commencerent moult à effroyer. Quand il les veit ainsi effroyez, il fait crier par tout son ost, que quiconques auoit paour s'en retournast en sa maison : & quiconques voudroit demourer pour viure ou pour mourir avec luy, ils auroient chacun vne certaine somme d'argent. Mais si il estoit qu'aucun s'enfuit depuis qu'il seroit demouré, celui qui le tueroit auroit aussi vne grand somme d'argent.

D'AUTRE part quand le Comte de Vvaruich ouït dire que son oncle estoit mort, & tous ceux de sa compagnie : il s'escria plorant, & dit, ie prie à Dieu qu'il ayt les ames de ceux qui sont morts en celle bataille. Beau sire Dieu, ores n'ay-ie recours au monde sinon à toy, qui és mon createur & mon Dieu, si te requiers vengeance. Et lors en tirant son espée baïsa la croix, & dit à ses gēs.

Qui

Qui veult retourner, si s'en voise: car ie viuray ou mourray aujourd'huy avec ceux qui demourront avec moy. A celle parolle il saillist à pied & tua son cheual de son espée. Quand vint le lendemain que les parties estoient si prochaines les vnes des autres, qu'il n'y auoit q̄ de ioindre, ils s'assemblerent tous à bataille tant horrible & tāt mortelle, que ce fut vn horreur du meurtre qui y fut: car ils se combattirent par trois iours tousiours tuans & affolans l'un l'autre, que l'on ne sçauoit qui en auroit la victoire. Mais finablement la desconfiture tourna sur les gens de la Royne, & du Duc de Sombreffet: & furent presque tous morts que prins. Et entre les autres de ses gens de nom y moururent le Comte de Northombellant, le seigneur de Clisfort, le seigneur de Muelle frere dudit Comte, le seigneur de Villeby, le seigneur de Vvelez, le fils au Duc de Bouguingen, le seigneur de Graÿ, messire Andrieu Trollo terrible homme & vaillant, & qui fait merueilles d'armes en icelles batailles, & plusieurs autres seigneurs & vaillans hommes de guerre, iusques au nombre de xxx. mille: & aucuns y furent prins qui depuis furent decollez à Iorth.

Ces choses ainsi faictes le Comte Edouard entra dedans Iorth, & fait prendre les testes de son pere & des autres ses amis, & les fait enterrer moult honorablement avec leurs corps: & leur fait faire vn moult notable & riche obseque. Puis s'en r'alla à Londres à grand gloire de sa victoire, là où il fut receu moult honorablement: & tost apres fut couronné Roy d'Angleterre. D'autre part la Royne & le Duc de Sombreffet se retrahirent en vn chastel, & là se teindrent iusques à ce qu'ils furent aduertis, que le Roy Edouard les venoit illec assieger: car lors ils abandonnerent le chastel & s'en allerent en Escoce au reffuge de la Royne d'Escoce, fille du Duc de Gueldres: lesquelles Roynes pour parlerent ensemble le mariage du ieune Prince de Galles fils du Roy Henry, & de la fille d'Escoce: affin d'auoir alliance des Escocois & leur aÿde, contre le Roy Edouard: mais le Duc de Bourgogne oncle de celle Royne d'Escoce enuoya hastiuement deuers elle, le seigneur de Gruthuse pour empescher celle alliance, pource que le Roy de Cecille Duc d'Anjou, pere de la Royne d'Angleterre n'aymoit gueres iceluy Duc de Bourgogne, & fut celle besongne interrompue. Mais tost apres le retour dudit seigneur de Gruthuse les Escocois feirent celle alliance avec la Royne d'Angleterre & son fils, par condition que la ville & chastellenie de Vvaruich, & toute l'isle que les Anglois tenoient à l'entrée d'Escoce leur seroit rendue. Aymans mieux les Escocois aduēturer vne fille à r'auoir celle Isle & celle place, qui est forte à merueilles que faire autremēt: & par tant fut le mariage fait du ieune Edouard Prince de Galles, & de la fille d'Escoce seur au ieune Roy d'Escoce: iacoit ce que les marians fussent trop ieunes, pour cōuenir ensemble: car ils n'auoient chacun d'aage que vij. ou viij ans. Durans icelles diuisions en Angleterre, & auant le couronnement du Roy Edouard, il auoit enuoyé deux ieunes freres qu'il auoit en Hollande, pour les sauuer (se fortune luy eust esté aduerse) soy cōfiāt en la noblesse de cueur, & en la beniuolēce du noble Duc de Bourgogne. Ouquel paÿs ils se teindrēt vn espace de tēps secretemēt: mais le noble Duc si tost comme il les y sceust, il les enuoya querir, & les fait venir deuers luy à Bruges, là où il les hōnora moult grādement, & les y fait moult bien festoyer. Et lors qu'iceluy Roy Edouard eut tous ses ennemis

deboutez de son Royaume, il enuoya prier au Duc qu'il les vouldist réuoyer, & le bon Duc le fait moult volentiers : & les fait conduire iusques à Calais bien & honnorablement: ce fut enuiron la fin d'Auril l'an mil cccc.lxj.

Cy parle d'aucun langage semé par gens plains de zizanie, qu'on vouloit empoisonner le Roy Charles vij. dont il n'eut onques puis ioye au cuer.

1461.

EN l'an mil cccc.lxj. enuiron le commencement du mois de Iuillet, fut semé certain langage par gēs plains de zizanie: & disoit on qu'on vouloit empoisonner le Roy Charles vij. de ce nom, luy estant à Meun sur Yeure: de laquelle chose apres qu'il fut de ce informé, il ficha tellement ledit empoisonnement en son cuer, qu'onques puis n'eut ioye ne santé. Et pource qu'il en fut aduerty par vn capitaine qui bien l'aimoit, il y adiouta telle foy & se desconforta tellement, qu'il delaisa le manger par l'espace de huit iours ou enuiron, pour ce qu'il ne fosoit fier en nul de ses gens: ne pour chose que les Physiciens luy deissent ne vouloit manger ne prendre aucune refection: & iusques à ce que les Physiciens luy dirent que s'il ne mangeoit qu'il estoit mort. Et adonc il meit peine de manger: mais il ne peut, car ses conduits estoient ja tous retraits. Et lors il se confessa, & ordonna comme bon Catholique. Et depuis voyant sa maladie aggreffer, & ses iours abreger, il receut bien & deuotement tous ses sacremens, & fait ses dernieres ordonnāces, & ses laiz tels que bon luy sembla: & ordonna à ses executeurs qu'il vouloit estre sepulture à S. Denys en Frāce, en la chappelle où son pere & son grand pere sont enterrez. Puis fina ses derniers iours, le iour de la Magdaleine oudit an & mois, en ladicte ville de Meun sur Yeure.

Cy parle de xij. maisons qui furent arses à Iuchy, & de la feste du Thoison que le Duc Philippe de Bourgongne tint à S. Omer oudit an soixante & vn, & de la naissance de la fille du Daulphin à Genepe: puis parle des ambassadeurs d'outre-mer qui lors vindrent à la court du Roy de France, & de la court de France à la court de Bourgongne.

EN ce mesme temps furent xij. maisons arses à Iuchy, vn village delez Cambray par feu de meschief: & commēça le feu en la maison d'un homme lequel auoit ce iour mesme bouté sa propre mere hors de sa maison par trois fois, & à la tierce fois luy auoit dit par grand felonnie qu'il aymeroit mieux veoir le feu en sa maison & tout ardoir qu'elle y demourast iamais iournée. Et tost apres ce iour mesme le feu print en sa maison, ne sceut nul cōment: & fut toute arse, & celles de ses voisins iusques à douze, qui pouoit sembler punition diuine quād à la maison du mauuais homme. Le premier iour de May oudit an mil cccc. lxj. le noble Duc Philippe de Bourgongne commença la feste, de soy ordonner du Thoison en sa ville de S. Omer moult noble & moult riche. A laquelle feste furent presens la pluspart des cheualiers & seigneurs, portans ledit ordre. Et entre les autres y furent monsieur Charles son fils Côte de Charrolois, le Duc de Cleues & Aldof son frere nepueu du Duc, le Comte d'Estampes, le Mareschal de Bourgongne, le seigneur de Croÿ, le seigneur de Chimay, son frere & le seigneur de Launoy leur nepueu, de

le seigneur de Haubourdin, le bastard de S. Pol, le seigneur de Bieures Bastard de Bourgongne & plusieurs autres, les Ducs d'Orleans, & d'Alençon n'y furent point en leurs personnes, mais y furent leurs procureurs. A celle feste regarder vindrent plusieurs seigneurs tant d'Allemagne comme de France, d'Escoce & d'autres paÿs, & dura celle feste trois iours en la maniere accoustumée. Et combien qu'oudit ordre ne pouoit estre ne demourer cheualier de reproche, neantmoins vn cheualier y assista pour & ou nom du Duc d'Alençon, que le Roy de Frâce auoit déclaré reproché, & le faisoit encores tenir prisonnier pour les causes que dictes sont cy dessus. Mais le Duc de Bourgongne le tenoit pour seigneur d'honneur & sans reproche, & que par mauuaise enuie, &c. le Roy luy auoit fait ce deshonneur à tort, & aussi le fait dire & prescher le Duc durant sa feste. Et comme ils eussent de coustume d'eux assembler en leur chapitre leur feste faicte, & d'eslire nouueaux freres de leur ordre, ou lieu de ceux qui estoient trespassez : ils esleurent à celle fois messire Philippe Pot seigneur de la Roche Bourguignon, le seigneur de Gruthuse Flament, le seigneur de Roye Picard : & si y fut esleu le Roy d'Arragon : auquel le Duc enuoya le colier par le seigneur de Crequy, qui le luy porta noblement accompagné. Apres laquelle feste faicte & leurs besongnes acheuées, le Comte de Charrolois, Aldof de Cleues & Anthoine bastard de Bourgongne, iousterent contre tous venās & y eut de rechief moult noble feste. En ce mesmes temps accoucha d'une fille à Geneppe en Brabant la Daulphine de Vienne, femme & espouse de monsieur Loÿs aîné fils du Roy Charles de France, soy tenāt pour le temps en Brabant pour crainte du Roy son pere : duquel estoit en la mal-grace comme dit est.

O V D I T mois de May vindrent à la court du Roy de France les ambassadeurs des paÿs d'outre-mer. Entre lesquels estoient vn Prelat en habit de cordelier qui se nommoit Patriarche d'Anthioche, vn cheualier ambassadeur de l'Empereur de Trappesonde, vn autre cheualier ambassadeur du Roy de Perse, vn autre cheualier ambassadeur du Roy de Giorgie & de Mesopotamie, cestuy cy estoit le plus estrangement habitué de tous les autres. Il estoit homme gros & robuste, qui portoit sur sa teste deux tonsures, ainsi que les clerks de France en portent vne sur leur chief : & à chacune oreille luy pēdoit vn anel. Il y estoit encores vn autre ambassadeur du petit Turc, lequel disoit se les Chrestiens vouloient faire guerre au grand Turc, que son seigneur se ioindroit avec les Chrestiens, accompagné de cinquante mille combattans. Puis y estoit vn autre ambassadeur du Roy d'Armenie beau cheualier & gent. Et finablement y estoit encores vn cheualier ambassadeur du Prestre-Iean, que l'en disoit estre grād clerc : & disoit on aussi cōmunemēt qu'ils auoient vacqué par l'espace de xvij. mois à venir de leurs paÿs, ainçois qu'ils fussent venus deuers le Roy de Frâce. Eux dōques venus deuant le Roy, le nommerēt le Treschrestien Roy, & luy requierent qu'il voulsist enuoyer vne armée par delà avec son enseigne pour resister cōtre le grand Turc : & il auroit l'ayde & la cōpagnie de tous les Roys Empereurs & seigneurs desdits ambassadeurs, & si ne vouloient point de son argent : car leurs seigneurs en auoient assez, disans outre, que l'enseigne du Roy de France venue par delà, & vn capitaine qu'il y enuoyeroit en son nom, espouuenteroit plus le Turc & toute son armée, que ne feroient autres cent mille personnes : de la res-

ponce du Roy ne sçay comment il alla, mais il les fait festoyer & tenir bien ayses. Et tost apres se departirent de la court du Roy, & vindrent tous ensemble deuers le Duc de Bourgogne à Bruxelles: lequel noble Duc les receut & festoya grandement, & leur donna beaux dons & riches. Et fait à supposer qu'ils luy feirent mesme requeste qu'ils eurent faicte au Roy de France, & que le Duc leur fait dire & respondre, que s'il pouoit trouuer façon deuers le Roy de tenir ses païs en paix & en bonne seurte, qu'il les ayderoit & secourroit à son pouoir.

Cy parle encores du trespas du Roy Charles vij. de ce nom, & des grandes & dures adventures qu'il eust à son commencement. Et depuis de ses glorieux & grans faits d'armes.



Vdit an mille cccc. lxj. le xxij. iour de Iuillet au chasteau de Meun pres de Bourges en Berry, trespassa de ce monde le Roy Charles de France vij. de ce nom, aagé de lviiij. ans & de son regne xxxix. ans: lequel Roy au commencement de son regne trouua fortune si dure & si diuerse, qu'il perdit tout son Royaume depuis la mer de Flandres & d'Angleterre, iusques à la riuere de Loyre par l'effort du Roy Henry d'Angleterre: lequel auoit sa sœur espousée, & contendit à estre Roy de France par l'ayde & faueur qu'il auoit du Duc de Bourgogne: duquel iceluy Roy Charles auoit fait ou consenty meurdrir le pere: c'est à sçauoir le Duc Iean de Bourgogne en la ville de Monstreau sur Yonne, nonobstant qu'ils eussent fait paix & accord ensemble: & que pour seurte de tenir celle paix, ils eussent pou de temps deuant receu le vray corps de Iesus-Christ consacré & party en deux, dont chacun de eux en vsa la moytié, & le tout: & qu'ils eussent celle paix iurée à tenir inuiolablement, qui fut vn cas moult enorme & deshonnorable, & duquel l'en ne peut trop pou parler: mais toutesuoyes le noble Duc Philippe de Bourgogne loyal à la couronne de France, desplaissant de la destruction de si noble Royaume: & affin que la couronne ne veint és mains des Anglois anciens ennemis d'iceluy Royaume: à la requeste, instance & priere d'iceluy Roy Charles, fait paix & accord à luy en la ville d'Arras l'an xxxv. Et depuis lors en auant qu'il se departit des Anglois, le Roy Charles prospera tellement, qu'il reconquit tout son Royaume sur lesdits Anglois, fors seulement Calais, Guisnes & Hamet, qui sieent és fins de la Comté de Boulongne. Et depuis ses conquestes il entretint tousiours xv. cens lances, & de cinq à six mille archiers, lesquels auoient leurs gages determinez: c'est à sçauoir l'homme d'armes à trois cheuaux xv. florins monnoye royale, & l'archier vij. florins pour mois: lesquels florins se cueilloiét par tailles, que payoient les bonnes gens des villages, si ordinairement qu'en leur payement n'auoit iamais faute. Et de la part d'iceux gens d'armes ils se gouernoient & maintenoient si honnorablement parmy le Royaume, qu'il n'y auoit paillard ne brigand, qui ausassent plus desrober sur les chemins pour doubte de estre trouuez & rattains de ces gens de guerre, qui les persecutoient avecques les gens de Iustice, par tous les lieux où ceux se retrayoient. Mesmement ces gés de guerre conduisoient & guidoient les marchans, & ceux qui alloient par les champs si sauement, que chascun en estoit content, qui fut vne merueilleuse mutation & moult honnorable. Car par auant icelle ordonnance, ceux que l'en nommoit

nommoit escorcheurs (pource qu'ils desroboient tout le monde) deuindrent guideurs & gouuerneurs des marchans , & autres gens qui vouloient aller par les champs .

C E S T V Y Roy Charles remeit sus en son Royaume l'exaction , que l'en nomme le quatriesme, qui se prenoit sur tous les vins que l'on vëd à detail parmy le Royaume , sur quoy le quatriesme se lieue au proffit du Roy . Et dit on quand ceste exaction fut mise sus premierement , que l'en n'en prenoit que le centiesme au proffit du Roy. Puis vint de cent à l. de l. à xx. de xx. à viij. de viij. à iiij. là où il est demouré, qui est vne exaction de grand charge (pour ceux qui l'entretiennent en son cours) dure & pesante à ceux qui le payent . Cestuy Roy Charles, ainçois qu'il fut appaisé au Duc Philippe de Bourgogne, fut de moult belle vie & deuote : mais depuis qu'il eut reconquis son Royaume , il mua ses meurs, & enlaidit sa vie de tenir femmes mal famées en son hostel , & de laisser la compagnie de sa bonne & lealle femme : & souffroit à icelles femmes faire par les plus grans de son hostel plus d'honneur & de reuerence, qu'à la Roine : & si estoient ades plus richement parées & aornées que n'estoit la Roine : qui estoit chose de tresmauuais exemple en si noble personne. Neantmoins il gouuernoit son Royaume moult noblement & moult sagement : & auoit en luy de belles vertus : & maintenoit iustice , & la faisoit garder & tenir par tout son Royaume. Si tost comme il fut trespasé, messire Charles d'Anjou, son beau pere, enuoya son trespas signifier à messire Loys fils aisné dudit Roy estant à Geneppe en Brabant (comme dit est cy dessus) & le luy enuoya signifier par trois messages. Lesquels feirent si bone diligence. qu'iceluy Daulphin en eut les nouvelles audit lieu au mesmes iour, que son pere fut trespasé.

COMMENT LE DAULPHIN ET LE DUC DE

Bourgongne se disposerent pour aller à Reims au sacre dudit Daulphin: Puis parle de l'enterrement du feu Roy Charles, & du sacre du Roy Loys à Reims: & des besongnes qui y furent faictes.



Itost comme le Daulphin sceut le trespas de son pere, il enuoya hastiement en la ville de Hesdin son message au Duc Philippe de Bourgongne, qui luy signifia le trespas du Roy, mais le Duc en estoit ja aduerty : & prindrent iour le Daulphin & le Duc de estre à Auesnes en Hainault pour d'illec tirer à Reims , pour sacrer illec iceluy Daulphin Roy de France . Et pour plus grand seurte de ce faire, le Duc feit mettre sus en armes tous les nobles hommes de tous ses pays : & leur ordonna par ses mandemens que tous feussent en point autour de S. Quentin en Vermédois au viij. iour d'Aoust lors prochain. Et lors n'y eust seigneur ne Baron qui ne se meist au plus beau point de monture, & de harnois qui faire le pouoient, & ou plus grand nombre d'hommes d'armes & d'archiers, si que ce fut vne moult noble chose à regarder. Mais quand le Daulphin fut aduerty que le Duc mettoit sus si grande armée, doubtant que les pays où ils passeroient ne fussent tous mangez & gastez, il pria au Duc qu'il vouldist mettre ius celle armée, & qu'il ne menast avec luy que les plus grâs de ses pays

à leur estat quotidian, armez ou desarmez: Ce que le Duc feit volentiers & renuoya la pluspart de son armée chacun en sa place: & n'allèrent avec luy que environ quatre mille combattans le mieux en point qu'onques furent nobles hommes: & se tous y fussent allez, l'en disoit lors qu'ils eussent esté plus de cent mille combattans. D'autre part des païs du Roy venoient tous les iours au Daulphin plusieurs seigneurs eux rendre à son obeïssance, & le cognoistre à Roy, & semblablement ceux des bonnes villes. Tost apres les nouvelles du trespas venues à la cognoissance du Duc Philippe de Bourgogne, il se partit de Hesdin & s'en alla à Auesnes en Hainault deuers le Daulphin qui là l'attendoit, & eux mis ensemble, fut fait vn moult notable seruice pour le feu Roy les ij. & iij. iours d'Aoust. Auquel furēt faïsans le dueil vestus de noir iceluy Daulphin en chief, & apres luy le Duc Philippe de Bourgogne, & puis son fils Comte de Charrolois apres luy. Puis le suiuoit le Comte d'Estampes, Jaques de Bourbon, Aldof de Cleues, & autres plusieurs grans seigneurs. Et le seruice fait, tout incontinent, le Daulphin que ie nommeray desormais le Roy, lors se vestit de pourpre, qui est à la coustume de France: pource que si tost comme le Roy est mort, son fils plus prochain se vest de pourpre & se nomme Roy. Car le Royaume n'est iamais sans Roy. Le quatriesme iour d'Aoust se partit d'Auesnes le Roy Loÿs pour tirer vers Laon, & le Duc de Bourgogne s'en partit le lendemain pour tirer vers S. Quentin, pour recueillir les nobles hommes de ses païs qu'il auoit mādéz venir illec, & pour le compagner au sacre du Roy. Entre ces choses le corps du feu Roy Charles fut embaulmé, & porté sur vn chariot à grād humilité couuert de drap d'or, iusques à Paris en l'Eglise de nostre Dame, là où sur son corps fut faïct vn moult noble seruice: puis fut porté à S. Denys: & sur son corps fut fait de rechief vn moult beau seruice: puis fut mis en terre avecques les autres Roys ses predecesseurs, qui sont enterrez en l'Eglise de celle Abbaye de S. Denys.

Le xiiij. iour d'Aoust l'an mille quatre cens lxj. entra le Roy Loÿs de France en la cité de Reims, accompagné du noble Duc Philippe de Bourgogne, & du Comte de Charrolois son fils, du Duc de Bourbon, du Duc de Cleues, du seigneur de Rauestain son frere, tous trois nepueux dudit Duc Philippe, du Côte de S. Pol, & de tant d'autres Barons, seigneurs & nobles hommes, que noble chose estoit à regarder, car tous estoient richement habillez: puis y estoient le Comte d'Angoulesme, le Comte d'Eu, le Comte de Vendosme, le Comte de Grand-pré, messire Philippe de Sauoye, le Comte de Nasau & plusieurs autres. Et le lendemain iour de l'Assumption de nostre Dame, fut ledit Roy Loÿs sacré & fait Roy de France par l'Archeuesque de Reims, presens les Pairs de France ou leurs procureurs. Et lors comme le Roy fut habillé & prest pour recevoir le sacré il tira son espée & la bailla au Duc Philippe de Bourgogne, en luy priant qu'il le feit cheualier de sa main, qui fut vne nouvelle chose: Car l'on dit communement, que tous les fils des Roys de France sont cheualiers sur les fons à leur Baptisme. Neantmoins le Duc pour luy obeir luy donna l'accollée & le feit cheualier de sa main, & cinq ou six seigneurs qui là estoient: c'est à sçauoir le seigneur de Beauieu, & Jaques son frere freres au Duc de Bourbon: les deux fils du seigneur de Croÿ, & maistre Iean Bureau tresorier de France. Puis

pria

pria au Duc de Bourgongne qu'il feist les autres qui le vouloient estre : & il en feist aucuns, tant qu'il en fut tenné, & commeit cest office aux autres seigneurs qui en feirent, que longue chose seroit de les nommer tous icy. Mais l'en disoit lors qu'il y eut cedit iour fais pres de deux cens cheualiers nouveaux.

PLVSIEURS beaux mysteres & cerimonies furent faictes à sacrer le Roy: à ce noble mystere furent presens outre & avecques les seigneurs temporels, qui y estoient, le Cardinal de Constances, le Patriarche d'Antioche, vn Legat du Pape, quatre Archeuesque, dixsept Euesques & six Abbez. Apres le sacre disnerent à la table du Roy les douze Pairs de France ainsi que faire le deuoient. Quand les tables furent ostées le noble Duc de Bourgongne vlsant de son accoustumée benignité & noblesse de courage, se meit à genoux deuant le Roy, & luy pria en l'honneur de la Passion & de la mort de nostre Seigneur, qu'il voulsist pardonner son mautalent à tous ceux qu'il tenoit suspects d'auoir mis le discord entre son feu pere & luy, & qu'il voulsist tous les officiers de son feu pere entretenir en leurs offices, se n'estoit que par bonne & deüe information, fut trouué qu'ils eussent fait faute en leurs offices. Laquelle requeste luy accorda, reseruées sept personnes, ne sçay quelles: Puis luy dit le Duc. Mō trefredoubté seigneur, ie vous fais hommage presentement de la Duché de Bourgongne, des Comté de Flandres, & d'Arthois & de tous les païs que ie tiens de la noble couronne de France, & vous tiens à seigneur & vous en promets obeïssance & seruice, & non pas seulement de celles que ie tiens de vous : mais de tous mes autres païs que ie ne tiens point de vous, & d'autant de seigneurs & de nobles hommes de gens de guerre & d'autres qui y sont, que i'en pourray traire; ie vous en promets faire seruice avec mō propre corps tant que ie viuray : avec aussi tout quanque ie pourray finer d'or & d'argent. Apres lesquelles parolles tous les autres Princes, Ducs & Comtes, & tous les autres seigneurs feirent hommage au Roy. Puis se partirent de Reims ces choses ainsi faictes & s'en allerent à Meaux en Brie: de là s'en alla le Roy à S. Denys, & au sepulchre de son pere faire sa deuotion : & entre-temps le Duc de Bourgongne à petite compagnie s'en alla de Meaux à Paris, & y arriua le dimêche penultime iour d'Aoust: & trouua à Paris son fils & la pluspart de ses gens qui y estoient arriuez huit iours deuant.

Cy parle de l'entrée du Roy Loïs de France en sa ville de Paris, & des noblesses qui y furent faictes à son entrée. Et par especial du bruit du Duc de Bourgongne & de ses gens.

LE lundy dernier iour d'Aoust oudit an lxj. s'en issit de Paris apres disner le trefnoble Duc Philippe de Bourgongne moult noblement accompagné pour accompagner le Roy, qui ce iour mesmes y deuoit entrer pour la premiere fois apres son sacre, & attédoit apres le Duc aux champs. Quand doncques ils eurent trouué l'vn l'autre, & honoré comme bien faire le sçauoient, ils feirent mettre leurs gens en ordonnance pour entrer en la ville en la maniere qui s'ensuit. Et premieremēt deuant tous les autres alloient le seigneur de Rauestain, le seigneur de Bauffegines, & le seigneur de la Roche, tous trois en reng chacun ayant six pages apres luy, tāt noblement mō-


tez & tant richemēt fringans, que noble chose estoit à regarder. Apres lesquels suiuoient deux & deux en reng les archiers du Comtes d'Estampes, qui estoient vingt & quatre moult bien en point, & deux cheualiers avecques eux comme leurs chiefs. Et apres eux suiuiōt le Comte de Neuers & ledit Comte d'Estampes freres: & apres le Comte d'Estampes, estoient treize pages moult richement habillez. Et apres eux tous les seigneurs & gentils-hommes de l'hostel dudit Comte, tant noblement montez & habillez, que belle chose estoit à regarder, & estoient plus de trente. Apres ceux cy estoient les archiers du Duc de Bourbon iusques à xxiiij. ou plus. Apres ceux cy estoient les archiers du Comte de Charrolois iusques à trente, tresbien en point & deux cheualiers, lesquels estoient leurs chiefs. Puis y estoient deux cheualiers capitaines des archiers du Duc de Bourgongne, qui conduisoient les archiers du Duc qui estoient illec iusques à cent moult bien en point. Apres les archiers du Duc, suiuoient les seigneurs & les nobles hommes de sa compagnie, & de son hostel en grand nombre tant richement montez, parez & houssez que c'estoit noble chose à regarder: & estoient plus de deux cens & quarante houssures pendans iusques à terre, moult nobles & moult riches: puis estoient apres eux l'Amiral de France & le Marechal, & autres plusieurs seigneurs & gentils-hōmes de l'hostel du Roy, iusques à quarante houssures moult bien en point. Et deuant ceux cy estoient les Comtes d'Eu, de la Marche, & de Patriarc sans houssures, tous trois en rang. Puis suiuoient les Heraulx du Roys & des Princes, qui estoient bien soixante & seize. Puis y estoient les archiers du Roy iusques à six vingts tresbien en point, chacun ayant son varlet de pied de costé luy. Puis y estoient les trompettes iusques à liiij. mais ne sonnoient sinon celles du Roy. Apres les trompettes estoient le Marechal de Bourgongne, & le seigneur de Croÿ moult bien en point & richement. Apres eux estoit Ioachin Rouhault premier escuyer d'escuyerie du Roy portant l'espée en escharpe. Apres luy estoit le fils de Floquet, qui portoit le heaume du Roy à vne couronne d'or moult riche. Entre cestuy-cy & le Roy estoit vn cheual, que l'en menoit à dextre, couuert de veloux bleu tout semé de fleurs de lys d'or. Puis y estoit le Roy monté sur vn blanc cheual, vestu d'une robe de soye blanche sans manches, & affublé d'un petit chapperon loqueté. Et entour luy estoient quatre bourgeois de Paris qui portoient sur lances vn drap d'or, dont ils couuroient ledit Roy, ainsi que l'on fait quand l'en porte le saint Sacrement de l'Autel. Et derriere le Roy estoient deux hommes d'armes de pied, tenans chacun vne hache en sa main. Puis suiuoit apres le Roy le noble Duc de Bourgongne tant noblement & tant richemēt habillé luy & son cheual, que les bagues valloient dix cens mille escus, comme disoit commune renommée. Et apres luy estoient neuf pages tant noblement montez & habillez, que c'estoit noble chose à regarder. Chacun page portoit salade moult riche: & entre les autres en y auoit vne, que l'en disoit valoir cent mille escus: le chanffrain du cheual du Duc estoit tout chargé de pierrerie moult riche: delez le Duc à sa fenestre estoit le Duc de Bourbon son nepueu moult richemēt mōté & habillé. Et au costé fenestre du Duc de Bourbon, estoit le Comte de Charrolois fils du Duc de Bourgongne tant bien en point, & tant richemēt que c'estoit merueilles à regarder. Apres ceux cy vn ieēt de pierre, suiuoit le Duc de
Cleues

Cleues moult richement paré de pierrerie & autrement. Puis y estoient tous les autres seigneurs de la cōpagnie du Roy si grād nombre, que iusques à xij. mille cheuaux tant beaux & tant richement parez, que noble chose estoit à regarder: nō pas ainsi, ne ainsi houffez cōme ceux du party de Bourgongne: car plusieurs y estoient qui ne sçauoient comment ils estoient du Roy ou bien ou mal: mais deuant que ceste maniere d'entrée commençast vint vn Cardinal, & avecques luy vindrent ceux de Paris faire la reuerēce au Roy au dehors de la ville: le Duc d'Orleans n'issit point de Paris, tant pour son ancienneté, cōme pource qu'il faisoit dueil pour le Roy Charles: mais il se meit en vne chambre sur la rue pour veoir passer toute la compagnie: & aussi feit la Duchesse d'Alēçon, & son fils le Comte du Perche aagé de quinze ans ou enuiron en noble estat & ioyeux: car son pere fut mis hors de prison si tost comme le Roy Charles fut trespasé. A l'entrée de la porte de Paris estoit vne nef moult bien faicte: de laquelle par engin descendirent deux angelets droit dessus le Roy, & luy posèrent vne courōne sur son chief: puis remonterēt en leur nef. En la rue S. Denys estoit vne fontaine qui donnoit vin & ypocras à ceux qui boire en vouloient. Au coing d'une rue pres du quartier des halles, estoit vn boucher de Paris qui fescria à haute voix quād il veit le Duc de Bourgōgne, & luy dit. Franc & noble Duc de Bourgongne vous soyez le bien venu en ceste ville de Paris, long temps a que vous n'y fustes, combien que vous y ayez esté moult desiré. A l'entrée du chastelet estoit faicte la prinse de la bastille de Dieppe, que le Roy Loys auoit cōquise luy estant Daulphin: & en autre lieu estoit la crucifixion de nostre Seigneur: puis y estoient histoires de diuers mysteres. Et si estoiet les rues si plaines de gens, que à pou pouoiēt passer ceux de cheual: iāçoit ce que l'on eut crié à son de trompe que nul ne se trouuast sur les rues, par où le Roy deuoit passer: mais ce nonobstant chacun desiroit à veoir si grand noblesse: car là estoit toute la seigneurie de France, excepté le Roy René de Sicile & son frere le Comte du Maine, qui se tenoit avec la vefue Royne sa sœur: aussi n'y furent point le Duc de Bretagne, le Duc d'Alençon, ne le Comte d'Armignac, que le Roy deffunct auoit déclaré banny de son Royaume, & déclaré tous ses biens confisquez: mais tost apres, c'est à sçauoir le xvij. iour de Septembre il vint à Paris deuers le nouveau Roy qui luy feit bonne chiere, & l'absout & luy rendit toutes ses terres & seigneuries: puis se trouua deuers le Duc de Bourgongne qui luy feit aussi trefbon recueil.

LE Roy Loys venu à Paris (comme dit est) il s'en alla tout droit à l'Eglise de nostre Dame, où il feit sa deuotiō: & feit illec le sermēt tel que les Roys ont accoustumé de faire à leur premiere entrée dedans la ville, & feit en celle Eglise quatre cheualiers nouveaux. Puis remonta à cheual & s'en alla au palais, qui estoit tendu & paré moult noblement: & là tint il court planiere & y souppa, & avecques luy à sa table soupperent les Pairs de France & ceux de son sang. Et le lendemain s'en alla loger aux tournelles: le Duc de Bourgongne fut tousiours logé en son hostel d'Artois, qui estoit tout tendu & paré moult noblement, & de la plus riche tapisserie, que les Parisiēs eussent oncques veüe: & si y estoit son estat tant riche & tant noble que Prince tenist oncques: si que tout le mōde alloit en sondit hostel, & fesmervelloient de la grand largesse qu'ils veoiēt. Mes-

mement quand il cheuaucoit par les rues pour aller en aucunes Eglises faire sa deuotion, tout le mōde couroit pour le veoir, pource que tous les iours il portoit quelque nouvelle bague de si grād pris, que c'estoit noblesse à regarder : & si l'accompagnoient tousiours parmy la ville sept ou huiēt que Ducs que Cōtes, & trente ou quarante de ses archiers estans à pied, tenans chacun en sa main vn vouge ou hache, ou autre bastō de guerre. En la salle de son hostel où il māgeoit, estoit vn dressoir quarré à degrez : lequel dressoir à l'heure du manger, estoit couuert & chargé de vaisselle d'or & d'argēt moult riche : & à chacun cornet du dressoir, estoit vne vnicorne tant riche & tant bien faicte, que merueilles estoit à regarder . En son iardin estoit vn pauillon tendu moult riche, tout couuert par dehors de fin veloux, tout semé de fusils d'or, estincelle d'or moult richement brodé. Et entre les fusils estoient les armes de tous ses païs & seigneuries moult richement faictes. En cōclusion fut le Duc à l'hostel ou par les rues, chacun desiroit à le veoir tant pour son noble maintien, comme pour ses grans richesses .

Cy parle du partemēt du Roy & du Duc de Bourgōgne de la ville de Paris: & du cōgé q' ils prindrēt l'un à l'autre. Puis parle de plusieurs choses qui lors aduindrēt en diuers lieux.




LE Roy estant à Paris, comme dit est, il desmit aucuns officiers, & en fait de nouveaux. Puis se disposa de partir de Paris pour aller à Amboise visiter la Roïne sa mere, qui y residoit pour lors : & le iour de deuant son partemēt, s'en alla à l'hostel d'Arthois pour prendre congé de son oncle le Duc de Bourgogne : lequel à celle heure seoit à disner. Mais il se leua de la table si tost qu'il ouit dire que le Roy venoit à luy, & s'en alla cōtre luy à pied bien auant en la rue, tant qu'il encontra le Roy, & s'agenouilla deuant luy en le salüant. Et le Roy tout incontinent descendit à pied : & ainsi tous deux à pied s'en allerent en l'hostel dudit Duc . Et lors qu'ils y furent entrez le Roy, oyans tous ceux qui là estoient, remercia le Duc des biens & des honneurs qu'il luy auoit faits, recognoissant que les biens & les honneurs qu'il auoit, luy venoient de luy : & que s'il n'eust esté par aduenture qu'il ne fut pas en vie. Puis print congé du Duc & s'en retourna en son hostel aux tournelles : & le lendemain vingtquatriesme iour de Septembre se partit de paris, & le conuoya le Duc & tous les seigneurs de sa cōpagnie iusques bien loing aux chāps, nonobstant le congé prins le iour deuant . Et là de rechief le remercia le Roy comme deuant, & print congé de luy, & le Duc luy offrit corps & biens à son seruice moult honorablement. Puis s'en alla le Roy son chemin, & le Duc retourna à Paris à tout sa noble compagnie, là où il se tint iusques au dernier iour de Septembre qu'il se partit de Paris, & s'en alla à S. Denys, où il seiourna deux iours, avecques luy la Duchesse d'Orleans sa niepce . Et en l'Eglise de S. Denys fait faire vn moult notable seruice tāt pour l'ame du feu Roy Charles, comme pour les pauures ames de tous les Roys qui estoient leans enterrez : desquels il estoit descendu. Puis fait disners & bācquets aux seigneurs & aux dames & damoiselles, qui l'auoient conuoyé iusques à S. Denys. De S. Denys se partit le noble Duc, & s'en retourna par Compiengne & par les places du Comte de S. Pol, qui le festoya moult grandement iusques en la ville de Cābray : car le Roy & le Duc

Duc estans à Paris, le Roy feit la paix dudit Comte de S. Pol enuers le Duc, qui par auant l'auoit eu en sa malle grace: & si feirent la paix dudit Côte, & du seigneur de Croÿ qui par auant hayoient l'un l'autre. Et finablement paruint le Duc en la ville de Bruxelles en Brabant. Son fils Côte de Charrolois print congé de luy à S. Denys, & du gré de sondit pere s'en alla en Bourgongne, où il fut festoyé moult grâdemment. Car il n'y auoit point esté depuis qu'il y fut né: ains en fut apporté ieune, & fut nourry en la ville de Gand: il alla visiter le corps de monseigneur S. Claude és fins de Bourgogne: puis print le chemin pour aller à Tours deuers le Roy. En ceste année fut l'Esté moult beau, & moult sec: & furent les vins bons, & les bleds aussi, & furent les bleds à bon marché: & apres Aoust regnerent fiebures & chaudes maladies en plusieurs lieux sans mortalité, & tenoient longuement.

ENVIRON la S. Remy oudit an que les gabelles & exactions se baillerēt à ferme parmy le Royaume, à cry & à renchier, aduint en la ville de Reims que le commun de la ville s'esmeut contre ceux qui les auoient mis à pris, & en tuèrent aucuns. Puis prindrent leurs papiers où leurs marchez estoient escripts, & les ardirent en plaine rue: dont quand le Roy en fut aduert, il y enuoya vn grand nombre de gens de guerre, habitez comme marchans ou laboureurs, qui entrèrent en la ville par diuerses portes, cy deux, cy trois par si bonne maniere, qu'ils se trouuerent en tresgrand nombre, & comme les plus forts: & puis incōtinent vindrent autres gens de guerre tout plainement entrer en la ville, desquels estoit chief le seigneur de Moÿ: & prindrent de quatre vingts à cent personnes des plus coupables de celle esmeute, & les feirent decapiter, & par tant les autres se tindrent en paix, & n'oserent plus contredire à la voulété du Roy. En celle année en la cité de Bordeaux mourut Pothō de S. Treille Seneschal de Bourdelois, qui auoit esté en son temps sage, prudent & vaillant en armes: lequel avec vn autre capitaine nommé la Hyre, qui trespassa deuant luy: seruirent le feu Roy Charles si bien & si vaillamment à conquerre son Royaume sur les Anglois, que l'en disoit cōmunement, qu'ils estoient cause de sa recōqueste plus que nuls autres de son Royaume. En cest an aussi le xj. iour d'octobre, fut presque tout arse l'Eglise & la ville d'Encre en moins de demie heure, qui fut vne grād perte pour les pauvres gēs d'icelle ville. Oudit an environ la S. Remy & la Toussaints, furent veuz en l'air aucuns merueilleux signes, cōme des grans brandons de feu de longueur de iiij. toyses, & de grosseur cōme d'un pied durans fixes en l'air, la moitié de demy quart d'heure, & fut veu par ij. fois. Aucuns autres disoient auoir veu en l'air de nuict cōme batailles de gens, & auoir ouy grans noyses & grād bruit.

Comment Charles de Bourgongne Comte de Charrolois s'en alla veoir le Roy Loïs de France à Tours, où il fut grandement festoyé. comment il se perdit à vne chasse: & cōment il retourna ou païs d'Artois par la Normãdie, dōt le Roy l'auoit ordōné son lieutenant.

 Vand le Comte de Charrolois eut fait son pelerinage à S. Claude, il print son chemin pour aller à Tours, où le Roy Loïs seiournoit pour le temps: & auoit le Comte avec luy pour sa compagnie environ trois cens & cinquante cheuaux, & grād nombre de grans seigneurs & de nobles hommes. Quand le Roy sceut qu'il approchoit de Tours,

Q

il enuoya à son encôtre aux champs des plus grans seigneurs de son hostel : lesquels luy feirent la reuerence & tresioyeux recueil : & par l'ordonance du Roy le menerent descendre en l'hostel du Roy , lequel descendit de sa chambre & le vint festoyer moult grandemēt : & si feirent tous les plus grans seigneurs de son hostel. Puis le mena le Roy iouer & esbabatre, cōme tous les iours es plus belles places d'illec entour, & par tout le faisoit festoyer moult grandement . Vn iour vint que le Roy le mena à la chasse, & accueillirēt vn rouge beste: laquelle courut longuemēt, & le Comte de Charrolois tousiours apres: & tellemēt que quand vint sur la nuit , il se trouua esgaré en ce paÿs là , qu'il ne cognoissoit & n'estoit en ce point que luy cinquiesme . Tant allerent qu'ils trouuerent vn village, où estoit vne bōne hostellerie, & estoit toute noire nuit, si se logerēt leās.

Q V A N D le Roy fut retourné en son logis, & il cogneut que son beau frere n'estoit point retourné, & ne trouuoit homme qui luy sceut dire qu'il estoit deuenue: Il fut tant desplaisant qu'onques homme ne l'auoit veu plus troublé: & lors incontinent il enuoya de ses gens par les villages d'illec entour, & fait allumer torches sur les clochiers des villages , affin que par l'adresse du feu le Côte trouuaist son chemin: ceux mesmes qui alloient par les champs & par les bois, portoient torches & fallots. Le Roy iura qu'il ne beuuroit iusques à ce qu'il en auroit nouuelles, tant en estoit desplaisant, & aussi estoiet tous ceux de son hostel: mais entre-temps le Comte doubtant que le Roy pourroit estre en mesaise de luy, sachant par son hoste qu'il estoit à deux lieües pres du lieu où le Roy estoit, luy escriuit vnes lettres, & les luy enuoya par vn de ses gens que conduisoit vn paÿsant: par laquelle lettre il signifioit au Roy où il estoit arresté & logé pour la nuit, & qu'il ne se donnast point de mauuais temps pour luy: lesquelles lettres veües par le Roy, il fut tout resioüy & le renuoya querir au plus matin . Auec le Roy estoit lors le Duc de Sombreffet Anglois banny, & exillé d'Angleterre de par le Roy Edouard: auquel il auoit tousiours esté ennemy, & auoit demené la guerre contre luy pour la querelle de la Royne d'Angleterre . Et estoit venu en France à recours & refuge du Roy Charles: mais il le trouua trespassé. Et pourtant fut prins par les gens du nouveau Roy Loÿs: & fut amené en son hostel: mais à la requeste du Comte de Charrolois, le Roy le deliura & luy donna or & argent assez : car le Comte de Charrolois l'aymoit tresfort comme son parent: & pourtant aussi qu'il aymoit plus le party du Roy Henry que celui du Roy Edouard: nonobstant qu'il sceut assez que le Duc Philippe son pere aymoit plus le party du Roy Edouard que celui du Roy Henry . Et tost apres se voulut retraire en Escoce ledit Duc de Sombreffet: mais quand il fut aduertie que le Roy Edouard le faisoit espier, il s'en alla à Bruges , là où il se tint bien & simplement vne bonne espace de temps .

Q V A N D le Comte de Charrolois eut seiourné pres d'un mois avec le Roy & vint au congé prendre: le Roy luy ordōna xxxvj. mille francs de pēcion pour an, & le constitua son lieutenant general en la Duché de Normandie : puis luy donna congé. Et le Comte s'en retourna par Blois deuers le Duc d'Orleans, qui le festoya moult grandement. Puis s'en retourna par Normandie, & par tout où il passoit par les bōnes villes, ils issioient des villes à croix & à processions, & luy faisoient autant d'honneur qu'ils eussent fait au Roy mesmes: car le Roy l'auoit
ainsi

ainsi ordonné, & l'auoit fait sçauoir és bônes villes, par lesquelles il deuoit passer: entre les autres il fut à Roüen moult grandement honoré & festoyé. Et finalement retourna par Abbeuille & par Hesdin sans seiourner nulle part, iusques il vint à Aire où estoit la Comtesse sa femme. Et d'Aire tost apres s'en allerent droit à Bruxelles, où estoit le noble Duc Philippe son pere.

En ce temps Ican Euesque d'Arras procura tellement par l'ehort du Pape enuers le Roy Loys de France, que la pragmatique sanction qui auoit duré en France apres de trente ans, fut mise sus. Et pour le plaisir que cest Euesque feit à la court de Romme en ceste partie, le Pape luy enuoya le rouge chappel & le feit Cardinal, & fut nommé le Cardinal d'Arras. Durât ladicte Sanction, les benefices par le Royaume de France se donnoient par la nomination des vniuersitez, dont fourdoient proces infinis, & tournoit à trop grand preiudice & dommage à la couronne de Romme. En ce temps mourut Floquet vn des capitaines du Roy, vaillât homme de guerre & subtil, & qui par sa subtilité print le Pont-de-l'Arche en Normandie sur les Anglois, qui fut la premiere cause de perdre Normãdie audits Anglois. En ce tēps aussi mourut à Authun en Bourgongne maistre Nicolas Raulin, lequel premieremēt fut aduocat en Parlemēt: puis fut Chancelier du Duc Philippe de Bourgongne: lequel il gouerna si sagement tout son tēps & en moult grās affaires, que le Duc le proposa tousiours en toutes ses besongnes: mais aussi feit maistre Nicolas ses propres besongnes si biē, qu'il acquist ou seruices du Duc plus de xl. mille frācs de rêtes & de seigneuries: si qu'il feit ses fils riches & grās seigñrs, & ses filles maria moult noblemēt.

Cy dit comment le Duc Philippe de Bourgongne fut en dangier de mort par maladie, dont neantmoins il repassa. Puis parle de plusieurs choses qui lors aduindrent.



Vdit an soixante & vn enuiron la Chandeleur, le noble Duc Philippe de Bourgongne accoucha malade en sa ville de Bruxelles, d'vne si grieve maladie, que tous ses medecins se desesperent de sa vie: & luy estant en ce point manda son fils au Quesnoy en Hainault venir deuers luy, & il y alla sans tarder. Et lors incontinent qu'il veit son pere si fort oppressé de maladie, il enuoya hastiuement par toutes les bonnes villes de ses pays, & par les Abbayes requerre & prier, que tous se meissent en deuotion, & priaissent à Dieu de bon cueur qu'il vouldist par sa digne grace remettre son pere en bonne santé: lesquelles nouvelles venues à cognoissance, l'en commença à faire processions, oraisons & prieres par si grande affection, que Dieu piteux & misericors r'enuoya santé au bon Duc: car il estoit aymé de ses subiets autant comme fut oncques Prince ne seigneur. Son fils mesmes Comte de Charrolois que plus n'auoit d'enfans legitimes, monstra encores par autre maniere comment il ayroit son pere: car il estoit tousiours au plus pres de luy, pour luy administrer ou faire administrer tout ce que pour sa santé luy estoit bon & necessaire: si qu'il y fut trois ou quatre iours & nuicts sans dormir ne reposer: dōt son pere mesmes estoit desplaisant, & luy disoit souuent qu'il allast reposer, & que mieux valoit en perdre vn que deux: finalement on pria tant pour le bon Duc, & fut si bien pensé qu'il reuint en conualescence: mais oncques puis ne fut qu'il ne fut plus foible & plus debilité: & fait à croire se n'eussent esté

les prieres d'aucunes bonnes personnes, qu'il n'en fut iamais repassé. En ce tēps trespassa la dame de Rauastin niepce de la Duchesse de Bourgongne moult bonne dame, deuote & aumosniere, & fut moult plainte de maintes gens qui la cognoissoient. En ce temps aussi enuiron l'entrée de Mars trespassa la dame de Bar, femme & espouse du Comte Loys de S. Pol, laquelle laissa de son mary quatre fils & plusieurs filles : & succeda son fils aîné nommé Loys de Luxembourg à la Comté de Marle, le second à la Comté de Brienne, & le tiers à la seigneurie de Rouffy. Elle fut moult noble dame & de grād lieu venue. En ce mesmes temps mourut aussi à Abbeuille vn cheualier moult renommé en armes messire Gauvain Quieret, le plus aduantureux de tous autres en fait de guerre, & aymé de toutes gens. Encores oudit an en Mars la Duchesse d'Orleans niepce du Duc de Bourgongne accoucha d'un beau fils, que teint sur fons de baptesme le Roy Loys de France, & luy donna son nom de Loys : & si le leua la Royne d'Angleterre femme du Roy Henry, laquelle à celle heure estoit venue deuers le Roy son cousin germain, pour luy requerre secours & ayde pour recouurer le Royaume d'Angleterre sur le Roy Edouard, qui l'auoit tollu à son mary. En ce temps & trois ou quatre ans deuant se faisoient tous les maux du monde ou pays d'Artois, de meurdres, de larrecins & de violer femmes : mesmement dedans les bonnes villes, & souuent à la veuë des gens de iustice : mais ils n'en faisoient semblant, se n'estoit sur poures gens, qui n'auoient port ne adueu d'aucuns seigneurs. Mesmement & plus que ailleurs se commettoient ces cas icy en la ville, & en la cité d'Arras, qui est chief ville d'Artois : qui estoit vne chose moult enorme & de tresmauuais exemple.

Comment le Roy Charles de France septiesme de ce nom, apres son trespassement fut apporté à Paris : & de Paris à S. Denys, là où son seruice fut fait moult noblement : ouquel seruice furent plusieurs Euesques, Abbez & autres.



Le iour donques de la Magdaleine oudit an mille quatre cēs lxj. trespassa le Roy Charles septiesme de ce nom, tres victorieux Prince ou chasteau de Meun sur Yeure, à qui Dieu face mercy & pardon à l'ame. Le Mardy ensuiuant fut fait son seruice à saint Denys en Frâce moult solemnellemēt, tout ainsi qu'on a accoustumé de faire tous les ans, pour le Roy Loys le gros iadis Roy de France. Item le mercredy cinquiesme iour d'Aoust ensuiuant à dix heures de nuict fut apporté le corps dudit Roy Charles à Paris, & laissé hors la ville à l'Eglise nostre Dame des Champs : & y eut quatre seigneurs de la Court de Parlement qui tenoient les quatre cornieres du poille, vestus de manteaux d'escarlatte, & plusieurs autres seigneurs vestus de vermeil tenans ledit poille. Item apres le corps du Roy, lequel estoit couuert d'un poille de drap d'or bien riche en vne littiere, laquelle portoient sixvingts henouars : & y estoient monseigneur d'Orleans, monseigneur d'Angoulesme, monseigneur d'Eu & monseigneur de Dunois, faisans le dueil à cheual tous quatre. Item apres vn chariot, ouquel auoit esté apporté ledit corps depuis Meun iusques à Paris, couuert d'un poille de veloux noir tout à trauers, couuert d'une croix blanche de drap de veloux figuré moult riche. Item audit chariot auoit cinq cheuaux qui le menaient couuers, iusques à terre de veloux noir figuré, & ne

ne veoit on que les yeux desdits cheuaux. Item apres ledit chariot estoient six paiges vestus de veloux noir, enchapperonnez de mesmes sur six cheuaux, dont les harnois estoient de veloux noir. Item deuant le corps estoient monseigneur le Patriarche, lors Euesque d'Auranches : lequel feit le seruice tant à nostre Dame de Paris qu'à S. Denys, comme il sera dit cy apres : & y estoient ceux de nostre Dame de Paris & ceux du Palais avec les parroisses. Item deuant estoit le Recteur & l'Vniuersité de Paris. Item deuant estoient messeigneurs des cōptes vestus de noir. Item messeigneurs des requestes. Itē deuant estoit le Preuoost de Paris, la court de chastelet & le peuple de Paris chacun par ordonnance. Item deuant estoient plusieurs ordres de religion dudit Paris. Item deuant estoient les quatre ordres des mendians de ladicte ville. Item & tout derriere toutes ces gens & ledit corps, estoit innumerable peuple tant de Paris comme d'ailleurs. Item y auoit deux cens torches chacune de quatre liures, que portoient. cc. hommes vestus de noir. Item & l'Eglise nostre Dame de Paris, estoit tendue doublement de toile perse, en son large toute semée de fleurs de liz. Item fut porté le corps dudit Roy ou meillieu du cueur de nostre Dame de Paris : & là furent châtées vigilles des morts. Le lendemain la Messe, laquelle chāta monseigneur le Patriarche, & fut le vendredy vj. iour d'Aoust l'an dessusdit. Cedit vendredy enuiron trois heures apres midy les seigneurs dessus nommez, lesquels auoient esté au seruice du Roy, apporterent son corps de Paris iusques à la Croix ou-Fiens : laquelle est entre la Chappelle-sainct-Denys, & le Lendit comme dessus en ordonnance : & là eust grosse contradiction pour porter ledit corps iusques à l'Eglise. Et demoura en ce lieu par longue espace de temps. Et tellement que les bourgeois de S. Denys prindrent la biere ainsi comme elle estoit, & voulurēt porter ledit corps à S. Denys, pource que les henouars le laisserent sur le chemin pour la somme de dix liures, qu'ils demandoient pour le porter : & de celle somme de dix liures le Grand Escuyer d'Escuyerie du Roy leur en respondit : & lors ils l'apporterent iusques dedans le Cueur de l'Eglise monseigneur S. Denys, & fut bien huiēt heures de nuict, auant que ledit corps arriuaſt audit S. Denys. Item à celle heure furent chantées vespres des morts seulement pour ledit Roy, & le lendemain matines : c'est à sçauoir *Dirige* enuiron six heures du matin : & y estoient monseigneur d'Angoulesme, mōseigneur de Dunois, monseigneur de Broſſes, monseigneur de Chasteau-Brun, monseigneur le Grand Escuyer, l'Euesque de Paris & la court de Parlement, l'Euesque de Bayeux : feirent le seruice, les Euesques de Troyes, & de Chartres : l'office l'Euesque d'Orleans, l'Euesque d'Angiers, l'Euesque de Beſſiers, l'Euesque de Senlis, l'Euesque de Meaux, l'Abbé de S. Germain, l'Abbé de S. Magloire, l'Abbé de S. Estienne de Dijon, l'Abbé de S. Victor, tous les dessus nommez furent à la Messe : & n'y eut qu'une grande Messe pour le Roy : monseigneur & Madame d'Orleans y furent. Item apres la Messe fut le Roy mis en terre, en la chapelle de son grand pere entre ledit grand pere & son pere. Item le cueur de ladicte Eglise fut tendu tout autour de drap de veloux noir & vne chappelle, laquelle estoit moult belle : ou meillieu dudit cueur, sous laquelle estoit ledit Roy, tendue pareillement de veloux, & par dessus tant de cierges qu'on y peut mettre. Item estoit le Roy dedans vn coffre de cyprés, enchassé en vn auge de

plomb de son long, lesquels estoient enfermez dedans vne biere de bois. Item estoit ledit Roy par dessus en figure sur vn matheras, vne paire de draps de lin & le poile dessusdit: & estoit ladicte figure vestue d'une tunique & vn manteau de veloux à fleurs de liz, fourré d'hermines, tenāt en vne de ses mains vne main, comme vn sceptre: & en l'autre main vn grand sceptre, vne couronne sur la teste, & vn oreiller de veloux dessous. Item auoient les gens du Roy apporté vn ciel de drap d'or, auquel auoit viij. lances pour le porter: & à ladicte Croix-au-fiens sur le chemin de Paris, vindrent huit des religieux de S. Denys prendre le ciel, pour le porter sur le corps du Roy iusques audit S. Denys: mais ledit escuyer le reffusa à bailler, en disant, que ce n'estoit pas la coustume: & que ledit ciel ne se deuoit point porter sur ledit corps parmy les champs: mais se deuoit porter parmy les villes seulement: & quand le corps fut à la porte de saint Denys fut faicte station illec: & là furent chantées trois oraisons, lesquelles se chantoient à chacune station: & là fut baillé ledit ciel ausdits religieux, lesquels le porterent iusques à l'Eglise par dessus le corps, en telle maniere qu'on pouoit veoir iceluy corps tout à plain, c'est à sçauoir ladicte figure. Item apres l'enterrement dudit Roy, eust grosse contradiction entre l'Escuyer d'escuyerie, & les religieux dudit S. Denys, pour le poile qui estoit sous ladicte figure: pource que ledit Escuyer disoit que à luy appartenoit: & tellement qu'il conuint que ledit drap fut mis en la main de monseigneur de Dunois, & de monseigneur le chancelier de France. Et finablement fut appoincté que ladicte poile, laquelle estoit de drap d'or vermeil moult bel, demourroit à S. Denys. En disant par le Grand Escuyer que se aucun droit y auoit, il le donoit à ladicte Eglise de saint Denys. Item au regard dudit ciel, il demoura à l'Eglise de S. Denys sans contradiction avec veloux, cendaux, cire & toutes autres choses: mais ils remporterent le drap de veloux noir à la croix blanche, lequel couuroit ledit chariot & toutes autres choses. Item allerent ledit Comte de Dunois & ledit Grand Escuyer par toutes les chappelles, où il y auoit corps Saints, & donnerent à la decoration des autels du drap de veloux & de satin, à couvrir deux tables d'autel hault & bas. Item au meillieu de là grand Messe y eust vne predication, que feit maistre Thomas de Courcelles Docteur en Theologie. A laquelle auoit grand peuple gemissant & priāt pour ledit deffunct, lequel fut illec tiltré, le Roy Charles septiesme de ce nom tres-victorieux. Item apres l'enterrement fut crié, viue Loys de France: & Dieu ayt l'ame de Charles septiesme, cōme dit est. Et adonc ietterent leurs verges sur la fosse les huissiers, & autres sergens. Item apres tout le seruice fait, allerent disner en la grand salle de l'Abbé: & y eust court planiere & ouuerte à tous venans. Et de ceste heure le disner fait & graces dictes, le Cōte de Dunois & de Lōgueuille dit à haulte voix, que luy & les autres seruiteurs auoient perdu leur maistre, & qu'un chacun pensast à soy pourueoir. Si furent moult dolens chacun à son endroit & non sans cause, & par especial cōmencerent les pages tresfort à plorer.


Cy parle de la mort villaine de Iean Constain solemmeillier de corps du Duc Philippe de Bourgongne: & dit la cause pourquoy il mourust, & de celuy mesme qui l'accusa.

En l'an

EN l'an mille cccc.lxij. par vn dimëche iour de S.Iaques & S.Christofle ou mois de Iuillet, fut prins & mené à Rippemonde Iean Cōstain sommeillier de corps du noble Duc Philippe de Bourgongne: pour ce qu'il auoit voulu faire mourir par poisons le Comte de Charrolois, seul fils legitime de son maistre: & vint son peché à cognoissance par vn poure gentil-homme de Bourgongne, nommé Iean d'Iuy. Auquel ledit Constain auoit marchandé pour vne grande somme d'argent, d'aller en Piémont acheter la poison: & s'estoit à luy descouuert, de ce qu'il en vouloit faire: comme donques cestuy Iean d'Iuy eust acheté la poison, & qu'il l'eust apportée audit Constain à Bruxelles: & il luy demanda ce que Constain luy auoit promis, Constain en fut refusant, & ne luy vouloit pas tant donner qu'il luy auoit promis, & si luy dit plusieurs grosses parolles & iniurieuses: car il n'auoit son pareil d'orgueil & de felonnie. Iean d'Iuy malcontent dudit Constain pour les causes dictes, s'en complaignit à vn autre gentil-homme de Bourgongne, nommé Arquembart, & luy descouurit tout leur secret: dont ledit Arquembart fut merueilleusement esbahi, & conseilla audit Iean d'Iuy, qu'il allast hastiuement descouurir toute la verité de celle besongne au Comte de Charrolois, disant que s'il n'y alloit, luy mesme iroit & luy diroit tout. Iean d'Iuy sans tarder s'en alla deuers le Comte, & se ietta à genoux deuant luy, & luy pria humblement qu'il luy vouldist pardonner le meffait de ce qu'il vouloit dire. Puis luy ouurit la matiere & luy dit toute la verité. Le Comte qui fut bien esbahi & fort troublé, s'en alla hastiuement deuers son pere le Duc, & luy dist la maniere de ceste mauuaitié, tout ainsi que Iean d'Iuy le luy auoit compté, en luy requerant iustice de l'homme si desloyal, & luy nomma Iean Constain. Le Duc luy dit qu'il luy en feroit iustice voirement: le Comte retourné en son logis, ordonna Iean d'Iuy d'aller tenir prison à Rippemonde, & qu'il attendit illec & il y alla. Quand vint le lendemain au matin le iour de S. Iaques (comme dit est) & que le Duc auoit ordonné le seigneur d'Auxi & Philippe de Creuecueur de mener Iean Constain à Rippemonde, & que Iean Cōstain chassoit à celle heure, & se iouoit dedans le parc du Duc. Le Duc l'appella & luy dit qu'il vouloit qu'il allast à Rippemonde avec le seigneur d'Auxi, pour respondre à vn gentil-homme, qui le chargeoit grandement de son honneur: Constain luy respondit tresfieremēt selon sa coustume, qu'il ne craignoit homme du monde, & s'en alla houer & monter sur vn tresbon cheual luy cinquiesme: & en ce point s'en alla à l'hostel du seigneur d'Auxi: lequel il trouua monté à cheual, & avec luy ledit Philippe de Creuecueur, & quinze ou seize archiers de corps du Duc. Quand Constain veit tant d'archiers, il se commença à douter de malle mesure. Neātmoins ils s'en allerent tous ensemble parmy la ville de Bruxelles. Mais quand ils vindrent aux champs, le seigneur d'Auxi fait descendre Iean Constain de son gros cheual, & le fait monter sur vne haguette qu'il cheuauchoit: si se douta Constain encores plus que deuant: car le seigneur d'Auxi luy meit adonc la main sur l'espaule, & le fait prisonnier du Duc: puis s'en allerent de tire tant qu'ils vindrent à Rippemonde, & n'y furent oncques plus tost venus que le Comte de Charrolois n'y fut aussi tost que ledit Constain, & print luy mesmes les clefs de la tour où Iean Constain fut mis en prison: tost apres vindrent illec Anthoine

Bastard de Bourgogne, l'Euesque de Tournay, le seigneur de Croÿ & le seigneur de Goux : & ne parloit nuls audit Constain que ceux cy & que le Comte ne fut present, où qu'il ne les ouist. Eux ainsi assemblez ils feirent comparoir Jean d'Iuy deuant Jean Constain, & à luy dit Jean d'Iuy, comment il auoit marchandé à luy d'apporter les poisons, & les luy auoit apportées : mais ne l'auoit voulu payer ainsi qu'il le luy auoit promis : & pour verifier ses dits, luy monstra ses lettres escriptes de la main dudit Constain, & signées de sa main, non pas vne seule, mais plusieurs. Ce nonobstant Constain denioit tout, & dit audit d'Iuy plusieurs grosses & iniurieuses parolles : mais finablement sans torture & sans quelque torment de gehaine il confessa tout son cas : & dit que luy mesme auoit esté depuis Noël l'an lxj. par deux fois en Piémont pour auoir lesdictes poisons, & n'en auoit peu recouurer : & que pour les auoir, il auoit voirement marchandé audit Jean d'Iuy tout ainsi, comme il auoit dit : disant au premier que ce n'estoit pas pour faire mourir ledit Comte de Charrolois : mais affin que le Comte l'eust en sa bonne grace & qu'il le laissast en son estat, & ne luy ostant riens du sien se le Duc alloit de vie à trespas : mais finablement il cogneust que c'estoit pour faire mourir le Comte, & qu'il auoit proposé de luy donner la poison à quelque banquet qui se feroit à la My-Aoust : laquelle poison prinse il n'eust peu viure qu'un an apres seulement. Ces choses ainsi sceuës & cogneuës par ledit Jean Coustain, il fut le prochain vendredy apres mené sur vne des plus haultes tours du chastel, pour estre decapité : & luy illec pria moult qu'il peust encores parler au Comte & luy dire aucunes choses secretes. Le Comte vint & parla à Constain à luy vne bonne espace de temps seul à seul, nul des assistens ne scauoit quelle chose il luy disoit : mais bien veoient que le Comte se seignoit à chacune parolle que Constain luy disoit. Et fait à supposer qu'il accusoit quelcun cuidant par tant amender sa besongne. Puis pria au Comte que son corps ne fut esquarterelé, & qu'il fut mis en terre sainte : & puis incontinent il eut la teste trenchée. Puis fut appelé Jean d'Iuy, & luy demanda le Comte, se Jean Constain luy eust bien tenu sa promesse, s'il eust leur fait accusé, il respondit que non, & pourtant le Comte luy fait aussi la teste trencher. Les biens dudit Constain qui montoient à plus de trois cens mille francs pour vne fois, furent declairez confisquez & appartenir au droit du Duc : mais le noble & bening Duc les redonna à la femme dudit Constain, & à ses enfans. On dit tousiours depuis communement, que ledit Constain auoit fait mourir par venin la bonne Dame de Rauastin, pource que icelle Dame auoit blasmé la femme dudit Constain du grand estat qu'elle portoit, comme pareil à celuy des Princesses.

Cy parle de l'execution criminelle que fait faire le Duc Philippe de Bourgogne en sa Comté d'Artois, sur plusieurs mauuais garnemens tresmal renommez : puis parle du trespas de l'Abbé de S. Vast d'Arras, & d'autres choses : puis parle d'aucunes parolles poingnantes que le seigneur de Chimay dist au Roy.

 Vdit an ou mois de Septembre, que le Duc Philippe de Bourgogne eut esté aduerty des grans malefices, qui se faisoient en sa Comté d'Artois, par les seruiteurs d'aucuns seigneurs, que les Baillifs & officiers du Prince ne osoient prendre ne punir, pour doute d'estre battuz ou morts ou affolez.

affolez. Les Baillifs d'Amyens, de Cambresis, & d'Orchies vindrent & entrèrent dedans la ville d'Arras le plus secrettement qu'ils peurent, cy deux, cy trois & se logerent en diuers hostels, ayans avec eux des archiers de corps du Comte d'Estampes lors capitaine de Picardie, iusques à l.cheuaux ou plus, garniz du mandement du Prince, qui vouloit que tous les mauuais garçons qu'ils pourroient prendre & apprehender : dont de leurs cas apparoiſſoit par informations precedentes, fuſſent prins & executez criminellement à quelque ſeigneur qu'ils fuſſent, meſmes fuſſent les ſeigneurs, voire meſmes ceux de ſon ſang. Et fait à croire ſe le bon Prince euſt ſceu pluſtoſt les malefices, que l'on faiſoit en ſon païs d'Artois, qu'il y euſt plus toſt pourueu : mais il auoit entour luy aucuns qui n'euffent pas voulu qu'il en euſt eſté aduertie. Quand donques ces Baillifs icy furent venuz à Arras (comme dit eſt) ils ſe meirent enſemble par nuit, & ſ'en allerent és lieux où ils penſoient trouuer les mauuais garçons. Aucuns en prindrent, & aucuns ſ'enfuirent & ſe abſenterent : puis allerent ſur le plat païs & en prindrent aucuns de trefmal renommez, & les pendirent aux arbres ſur les chemins, & feirent vn trefbon exploict pour celle fois. En ceſte meſme année le xv.iour de Septembre, trefpaſſa de ce mōde l'Abbé Iean ſurnommé du Clerc Abbé de S. Vvaſt d'Arras, lequel fut moult plaint & ploré de maintes poures gens. Car il fut en ſon temps grand aumosnier, & gouerna l'Abbaye de ſainct Vvaſt par l'eſpace de xxxiiij.ans, le plus notablement que Abbé qui y euſt eſté puis deux cens ans deuant luy, comme il pouoit apparoir en ſon Eglise, és maiſons & edifices qu'il iſtaura en pluſieurs lieux : lesquelles Eglises & maiſons il auoit trouuées en grand ruïne. Il feit entre autres choſes vne choſe & grande recōmendation, & qui eſt digne de memoire perpetuelle: car en l'an xxxviij. que le bled valut dix francs le ſeptier, ou v.francs le mencault d'Arras, & que les poures gens ne pouoiēt recouurer de bled, il feit ouurir ſes greniers qu'il auoit tous plains de bled, & en feit deliurer à toutes poures gens, & non à autres le mēcault pour xxviij.sols, & n'en laiſſoit emporter que deux boiceaux au coup: affin ſe la famine duroit longuement, que ſon bled duraſt auſſi plus longuement. Il feit faire le portail de l'Abbaye & la nef de l'Eglise, & ſi garda ſi bien les rentes & les reuenues appartenant à l'Abbaye, que onques Abbé ne le feit mieux: & ſi en acquiſt des nouuelles aſſez: & trefpaſſa qu'il auoit d'aage quatre vingts & ſix ans, Dieu luy face pardon & mercy. Enuiron ce temps retourna de deuers le Roy de Frāce, le ſeigneur de Chimay, que le Duc de Bourgongne y euſt enuoyé pour aucuns differans eſtans entre eux: & le plus grand ſi eſtoit que l'en diſoit communement que le Roy vouloit faire publier és païs du Duc, qu'il ne fut homme qui baillaſt confort ne ayde à quelconque maniere que ce fut au Roy Edouard d'Angleterre: ce que le Duc ne vouloit ſouffrir publier en ſes païs, attendu qu'il auoit trefues avec ledit Roy Edouard, & ſi luy eſtoit fauorable. Et ſi vouloit le Roy Loÿs faire courre & leuer la gabelle du ſel en la Duché de Bourgongne, ce qui n'y eut eſté fait grand temps deuant. Ce que le Duc ne vouloit auſſi ſouffrir ne permettre. Pour icelles choſes & autres remonſtrer au Roy, & luy prier qu'en faueur & pour l'amour de luy il ſ'en vouliſt deporter. Mais le ſeigneur de Chimay fut bien longuement pourſuiuant deuers le Roy pour auoir audience, & ne la pouoit auoir, iusques à vn iour qu'il fut dili-

gent d'attendre le Roy à l'issue de sa chambre : & tant y attendit que le Roy en issit. Dont quand il veit ledit seigneur de Chimay , il luy dit : quel homme (dit il) est le Duc de Bourgongne : est il autre ou d'autre metal que ne sont les autres Princes & seigneurs de mon Royaume? Ouÿ sire, dit le seigneur de Chimay (qui estoit homme hardy & courageux) le Duc de Bourgongne voirement est autre, & d'autre metal que les autres Princes de vostre Royaume, ne des paÿs enuiron: car il vous à gardé, porté & soustenu contre la voulenté du Roy Charles vostre pere, que Dieu absolve, & de tous autres ausquels il en desplaist, ce que nul autre Prince n'eut voulu ne osé faire. A ces parolles se teust le Roy, & ne luy dit plus riens : ains rentra en sa chambre & ne parla oncques puis à luy pour celle fois. Aucuns disoient lors que le Comte de Dunois auoit demandé au seigneur de Chimay, comment il auoit ozé parler ainsi au Roy, & qu'il luy respondit. Se i'eusse esté cinquante lieuës loing, & i'eusse pensé que le Roy m'eust voulu dire ce qu'il m'a dit de monseigneur mon maistre, ie fusse retourné pour luy dire ce que ie luy ay respondu: puis s'en retourna faire son rapport au Duc.

Comment la Duchesse de Bourbon vint demourer avec son frere le Duc de Bourgongne: puis parle du secours que bailla le Roy de France à la Royne d'Angleterre, & d'autres choses qui aduindrent en diuers lieux.

EN ce mesmes temps vint la Duchesse de Bourbon veufue, visiter son frere le noble Duc de Bourgongne accompagnée de trois ou quatre de ses fils, & de deux de ses filles. Car elle auoit eu du Duc de Bourbon son mary six fils & cinq filles. Le premier fils nommé Loÿs, estoit Duc au lieu de son feu pere: le second fut marié à la fille du Roy de Chypre, mais il mourut de lepre ainçois qu'il y allast: Charles le tiers fils fut Archeuesque de Lyon sur le Rosne, & Abbé de S. Vvast d'Arras: le iiij. nommé Loÿs fut Euesque de Liege: le v. nommé fut seigneur de Beau-Ieu, & eust à femme la fille du Duc d'Orleans: le vj. nommé Jaques mourut en son aage d'adolescence. Des filles l'une eut espousé le Duc de Calabre, duquel elle eut vn beau fils, mais elle trespassa tost apres: la seconde espousa le Comte de Charrolois son cousin germain, fils du Duc Philippe de Bourgongne & en eut vne seule fille, puis trespassa la bonne Dame. La tierce eut espousé le fils du Duc de Gueldres, nepueu dudit Duc de Bourgongne: vne des autres fut mariées depuis au seigneur d'Arguel: & l'autre estoit lors, à marier, & les auoit tous & fils & filles ainsi alliez & aduancez le noble Duc de Bourgongne leur oncle: en ce temps mesmes le Roy de France enuoya en Angleterre pour le secours de sa cousine la Royne, deux mille combattans, sous la conduite du seigneur de Varenne grand Seneschal de Normandie: lequel auoit comme tout gouverné le feu Roy Charles, & disoient aucuns, que pour le mettre à l'aduenture le Roy Loÿs l'eut là enuoyé tout volentiers. Neantmoins il s'y porta si bien, qu'il y conquist plusieurs places: attendant illec apres le Duc de Sombreffet, qui luy auoit promis mener vne grosse armée d'escocce & d'autre part, dont il luy faillit: car il trouua son moyen entretant d'estre appaisé au Roy Edouard, qui luy rendit ses terres & ses seigneuries. Et partant se trouuerét François assiegez par le Comte de Vvaruich és places qu'ils auoient conquises: si qu'ils furent contrains

trains de tout rendre & de retourner en France, sauues leurs vies seulement: non pas tous, car aucuns en y eut qui furent prins & retenuz en aucunes rencontres & escarmouches, qu'ils auoient faits les vns sur les autres. En ce temps aussi enuoya le Duc de Bourgongne cent hommes d'armes, & cccc. archiers en l'ayde de l'Euesque de Maience, lequel auoit guerre mortelle & terrible contre vn autre seigneur d'Allemaigne: si que à l'occasion de celle guerre, furent arses & destruiçtes deux ou trois iournées du plat païs: & fut chief de celle compagnie que le Duc y enuoya. En ceste année le xxj. iour de Nouembre fut eclipse de Soleil, & tost apres en ce mesme mois, se firent à Bruxelles ioustes & grans esbatemens à la bien venue de la Dame de Bourbon & de ses enfans, qu'elle auoit amenez avec elle (comme dit est) ausquelles festes le Duc de Bourgongne estoit en grand bruit moult richement paré & adoubé, pour veoir les ioustes.

En ce mesme temps furent prins à Bruxelles, par l'ordonnance du Comte de Charrolois trois hommes & vn apoticaire d'icelle ville: lesquels trois hommes auoient fait faire par ledit apoticaire six Images de cire: trois en forme d'hommes & trois en forme de femmes, pour faire aucune forcelerie: mesmement sur la personne dudit Comte de Charrolois, comme disoit commune renommée. Et fut ceste chose sceuë, par ce que l'apoticaire s'en deuïsa à aucuns des seruiteurs dudit Comte, & leur dit que ceux qui luy auoient fait faire lesdictes Images, luy auoient dit qu'ils en feroient merueilles: & qu'ils feroient lesdictes Images aller & parler, qui seroit vne chose bien nouuelle. Et tant en fut parlé que le Comte de Charrolois en ouït parler, & commanda prendre lesdits trois hommes, qui estoient au Comte d'Estampes: & si fut prins l'apoticaire: mais il fut tost apres absouls & deliuré, pource qu'il ne sçauoit à quelle fin les Images eurent esté faits. Vn gentil-homme de l'hostel dudit Comte d'Estampes, nommé Charles de Noyers se rendit fuitif: mais il fut r'ataint & prins & mené prisonnier au Quesnoy le Comte en Hainault. Et fut commune renommée que ces quatre personnes, furent tresfort interrogez & examinez & qu'ils cōfesserent de merueilleuses choses que l'en teint si secretes, que pou de gens en sçauoient parler & demourerent longuement en prison.

Cy parle de plusieurs & diuerses besongnes qui aduindrent à l'entrée de l'an mille quatre cens lxij. Puis parle de la dure fortune de la Royne d'Angleterre.

EN l'an mille cccc. lxij. le xix. iour d'Auril apres Pasques, trespassa de 1463. ce monde maistre Robert le Jeune, gouuerneur d'Arras, aagé de iiij. xx. xij. ans: lequel à son premier aduenement fut aduocat à Amyens. Puis fut prins & retenu au conseil du Roy Henry d'Angleterre. Lequel Roy le fait cheualier, & si luy fait grans biens. Apres la mort de ce Roy Henry, le Duc de Bourgongne le fait Baillif d'Amyens: Ouquel office il se gouerna tellement à la faueur du Duc de Bourgongne & des Anglois, que l'en dit de luy communement, qu'il y fait que pendre que noyer ou decapiter plus de xix. cens personnes: & trop plus de ceux du party des François que l'en nommoit Armignacs, que du party contraire: & tellement que le commun d'Amyens le print en si grand haine, qu'il n'y osa plus demourer: & s'en alla demourer à Arras: & le fait le Duc de Bourgongne gouuerneur d'Arras. En quel-

que lieu qu'il demourast, il se gouerna si haultement, qu'il feit deux fils qu'il auoit grans seigneurs & riches : si que l'un fut Euesque d'Amyens & puis Euesque & Cardinal de Therouenne, le plus riche de tous les Cardinaux : mais il mourut en son aage de xl. ans, & dit on que sa mort luy fut aduancée par venin : l'autre fils fut cheualier en armes grand terrien, & qui eut grand gouuernement en l'hostel de la Duchesse de Bourgongne : & depuis en l'hostel de son fils Côte de Charrolois : la fille dudit maistre Robert fut mariée bien richement & noblement. Oudit an vint de Bruges à l'Isle le Duc Philippe de Bourgongne le vj. iour de Iuillet, & n'y auoit esté depuis celle grande maladie qu'il auoit eue l'année deuant. Et pourtant ceux de la ville le receurent si treshonorablement, qu'onques Prince ne fut mieux receu en ville : car ils allerent au deuant de luy hors de la ville plus de cccc. homes, chacun tenant vne longue torche ardent en sa main, sans les autres notables gēs & bourgeois de la ville : & si estoient les ruēs par où il passa si plaines de ieux, de mysteres & d'allumeries tāt riches, & tant bien faites, que l'en veoit aussi cler comme à plain iour : iāçoit ce qu'il fut bien tard, & que la nuit fut obscure : & en ce point fut cōuoyé en son hostel. Le Duc Philippe de Bourgongne desirant tousiours qu'il peust acheuer le veu qu'il feit à l'Isle l'an liij. d'aller à puissance sur le Turc, pour le rebouter en son païs outre la mer, que l'en nōme le bras S. George, & voulētiers y fut allé de sa personne se n'eust esté la crainte qu'il auoit ades, que luy absent de ses païs le Roy de France ne vouldist greuer ou prédre : pour ceste cause donques il enuoya en cest année vne notable ambassade deuers le Pape Pius, de laquelle furent chiefs l'Euesque de Tournay, le seigneur de Montigny & le seigneur de Forestel cheualiers, pour sçauoir la volenté de nostre S. Pere sur le fait de son veu, qu'il ne pouoit accomplir (cōme dit est) en offrāt d'enuoyer cōtre le Turc six mille bons cōbatans à ses propres cousts & despens, par telle maniere qu'il plaisoit au Pape d'en ordōner.

IC Y conuient bien dire l'aduenture que la Royne d'Angleterre eut à celle fois avec le seigneur de la Varēne : car elle toute esgarée passant vn iour par vne forest en Angleterre son fils avec elle, furent prins de pillars qui les desroberent & desbagerent de tous points : & fait à croire qu'ils les eussent meurdri n'eust esté qu'ils prindrent noise les vns aux autres au departir leurs bagues : & tellemēt monta la noise, qu'ils se combatiēt tresbien : dont quand la Royne les veit ainsi mesler & combattre, elle print son fils entre ses bras, & s'en fuit en la forest ou plus profond du bois, là où elle se trouua tant lassée & tant trauaillée, qu'elle ne pouoit plus aller auant. Et en ce point trouua vn brigant auquel elle bailla son fils à porter, & luy dit, tiens mon amy sauue le fils de ton Roy : le brigant le print tout volentiers & s'en allerent tellement que tost apres ils vindrent par mer à l'escluse : & de l'escluse elle s'en alla à Bruges tousiours son fils avec elle, là où elle fut receuē moult honorablement : entretant estoit son mary le Roy Henry ou païs de Galles en vne des plus fortes places qui fut en Angleterre. Elle laissant à Bruges son fils Edouard, s'en alla à l'Isle deuers le Comte de Charrolois, qui moult l'honora & festoya grandement : puis s'en alla de l'Isle à Bethune pour parler au Duc de Bourgongne : lequel aduertiy que grand nombre d'Anglois estoient venus à Calais luy enuoya ses archiers, qui l'amenerent de Bethune à S. Pol : là où le Duc alla deuers elle, nōobstant qu'il cognoissoit assez qu'elle

ne l'auoit onques aymé : mais vſant le noble Duc de la noblesſe de ſon courage, la feſtoya grandement, & luy donna du ſien largement: aucuns diſoient lors qu'il luy dōna deux mille eſcus d'or, & au ſeigneur de la Varenne mille eſcus, & à chacune des femmes d'icelle Royne cent eſcus, & ſi la feit conuoyer iuſques tant qu'elle fut ou paÿs de Barrois, qui eſtoit au Duc de Calabre frere d'icelle Royne : laquelle Royne ſe reputoit mal'heureuſe de ce que plus toſt ne ſ'eſtoit retraite deuers le noble Duc de Bourgongne, eſperant que par ſon bon moyen ces beſongnes en euſſent mieux vallu.

Comment le Roy de France donna au ſeigneur de Croy la Comté de Guiſnes: & comment le Comte d'Eſtampes ſe eſlongna de la maiſon de Bourgongne. Puis parle d'autres choſes qui lors aduindrent.



Vdit an lxiiij. que le Roy Loÿs de France eut eſté par tout ſon Royaume viſiter, & ſçauoir comment tout y alloit, il reuint à Paris & feit crier à ſon de trompe parmy la ville, qu'il auoit donné au ſeigneur de Croÿ la Comté & ſeigneurie de Guiſnes: & par auant l'auoit fait ſon grād maïſtre d'hoſtel. Et des lors auoit ledit ſeigneur de Croÿ tout delaiſſé la maiſon de Bourgongne, & ſe tenoit avec le Roy qui ſembloit à pluſieurs gens choſe moult eſtrange : car ledit ſeigneur de Croÿ auoit eſté des ſa ieuneſſe nourry & eſleué en icelle maiſon de Bourgongne : en laquelle il eſtoit le plus aduācé de tous autres, & eſtoit premier chambellan & tout gouuerneur de la perſonne du Duc: & tellement y auoit prouſité, qu'il auoit acquis ou ſeruiſſe dudit Duc de xl. à l. mille francs de rente: & tant d'ouurages qu'il auoit fais, que c'eſtoit vne grand merueille: & ſi auoit ſes amis ſi aduancez, qu'ils n'auoiēt leurs ſemblables és paÿs du Duc: & ſil auoit eſté bien du Duc, auſſi fut il du Roy: car le Roy ne luy reſuſoit choſe qu'il luy demandaſt pour luy, ou pour les ſiens. Et diſoit commune renommée, ſi que le Roy l'honnoroit ainſi, pource qu'il luy auoit dreſſé le moyen de r'acheter du Duc de Bourgongne les terres & les bonnes villes, eſtans ſur la riuiera de Sōme, pour la ſomme de cccc. cinquante mille eſcus. Auquel remboursement receuoir le ſeigneur de Croÿ auoit encliné le Duc de Bourgongne: car il vſoit plus de ſon conſeil que de nul autre de ſa court. Toutefuoyes quand ledit ſeigneur de Croÿ eut ſeiourné à la court du Roy vn eſpace de temps, il ſ'en retourna en la maiſon de Bourgongne, & exercea ſes offices comme deuant. Ou voyage que le Roy feit en Guyenne & en Bourdelois, il feit la paix du Roy d'Eſpaigne & du Comte de Foix: leſquels eſtoient en grand diſcord, pourtant qu'ils auoient deux ſeurs eſpouſées filles du Roy de Nauarre. En ce temps auſſi Iean de Bourgongne Comte d'Eſtampes ſeſtoit eſlongné de la maiſon de Bourgongne, & ſe tenoit avec le Roy: & diſoit commune renommée qu'il eſtoit en la malle grace du Duc de Bourgongne, & plus encores de ſon ſils, pour cauſe de ſes Images de cire, dont touché eſt cy deſſus: & doutoit le Comte de Charrolois de ſoy trouuer avec luy pour doute de ſorcelerie: & tenoit le Comte de Charrolois delez luy le Comte de S. Pol, lequel auoit le principal gouuernement de ſon hoſtel & de ſa perſonne: parquoy aucuns diſoient que le Comte d'eſtampes, & le ſeigneur de Croÿ eſtoient eſlongnez de celle noble maiſon de Bourgongne: car le Comte de S. Pol ſelon cōmu-

ne renommée ne aymoît ne l'un ne l'autre. Enuiron ce temps vint deuers le Roy en la ville de Senlis la Royne Ysabel de Sauoye sa femme en petit estat: car pour le temps le Roy despendoit le moins qu'il pouoit, & entendoit à assembler trefor tant pour rembourser le Duc de Bourgogne des villes engagées sur la riuere de Sôme, comme pour faire ses plaisirs, cōme celuy qui aymoît merueilleusement à chasser & à volder, & donnoit largement à braconniers & à fauconiers qui luy faisoient son deduit: à autres gens ne dōnoit que pou ou neant, & ne tenoit compte de soy vestir ne parer richement: ains se vestoit le plus du temps de drap de petit pris & de pourpoints de fustaine, plus meschamment que à son estat n'appartenoit: ains aymoît tous ceux qui ayans à besongner à luy venoient deuers luy en simple estat: il ne diminua tailles ne subsides en son Royaume, ains en mettoit sus des nouuelles tous les iours, dont son peuple fut grādemēt foullé & trauaillé. Oudit an lxiiij. le vj. iour de Septembre, fut rendue sentence par arrest de Parlement contre le Comte de Dampmartin messire Anthoine de Chabannes: lequel apres le trespas du Roy Charles se fut rendu fugitif pour crainte du Roy Loys; auquel neantmoins il vint crier mercy vn an apres, & se meit du tout à sa volenté. Et le Roy l'enuoya prisonnier en la conciergerie du Palais, & manda à ceux de Parlement qu'ils luy feissent son proces. Et son proces fait, fut dit par Parlement qu'il auoit cōmis cas de leze maïesté deuers iceluy Roy Loys: & par tant son corps estre digne de mort, & tous ses biens & heritaiges confisquezz au droit du Roy. Neantmoins le Roy luy donna la vie, par si qu'il promettrait d'aller en Rhodes & demourer illec le demourant de sa vie, & que pour ce faire il bailleroit caution. Mais il ne peut trouuer la caution, & pourtant il fut remis en prison en la bastille de S. Anthoine à Paris. Enuiron ce temps le Roy Loys pour sa singuliere volenté feit brusler & ardoir par toute l'Isle de France toutes les rets, filez & engins que l'en y peut trouuer, seruās à prēdre toutes manieres de bestes sauuages & d'oiseaux: & n'en fut nul espargné noble ne villain, reserué en aucunes garennes appartenans, aux Princes: & disoit on communément qu'il feit ce affin que nul ne chassast ne vollaist que luy, & qu'il fut tant plus de bestes & d'oiseaux: car toute son affection estoit à chasser & à voler.

Cy dit comment le Roy Loys de France racheta les terres engagées sur la riuere de Somme du Duc de Bourgogne: & comment il alla veoir le Duc à Hesdin. Puis parle d'aucunes autres choses.



LE Roy de France qui fut deliberé de r'embourser le Duc de Bourgogne, & de r'acheter de luy les villes & terres de dessus la riuere de Somme: feit tellement sa besongne qu'il assembla vne tresgrosse finance venant de diuers lieux: car il ne demoura en France Abbaye, ne chanoinerie, ne marchans renommez d'auoir argent, qui ne luy donnast ou prestast. Et lors qu'il eut tout prest son remboursement, il enuoya au Duc de Bourgogne iusques à Abbeuille: & le Duc l'enuoya querir illec & le feit rapporter deuers luy en sa ville de Hesdin, où il estoit lors à seiour. Et tost apres vint le Roy deuers luy à Hesdin, là où le Duc alla à son encounter, & le receut moult honorablement comme bien faire le sçauoit: & le logea en son hostel illec en son propre logis: & promet adōc le Roy au Duc de paraccomplir tout

ce

ce que du traicté d'Arras n'estoit encores accompli, dont neantmoins il ne fait pas tout. Le Roy & le Duc estans ainsi ensemble au chastel de Hesdin, vint illec vne grosse ambassade d'Angleterre: de laquelle estoit chief vn Euesque frere du Comte de Vvaruich, & estoit de trois cens à quatre cens cheuaux bien en point & richement. Entretant aussi qu'ils seiournerēt à Hesdin, le Duc enuoya plusieurs messagiers deuers le Comte de Charrolois son fils, qui lors estoit en Hollande, affin qu'il veinst faire la reuerence au Roy: mais il n'y voulut venir, disant que tant que le Comte d'Estampes & le seigneur de Croÿ fussent avec le Roy (comme ils estoient) qu'il ne se trouueroit point deuers le Roy, & non fait il, sçachant que voirement le Roy les tenoit avec luy, & qu'ils estoient de son plus estroit conseil: & si couroit lors commune renommée, que par le cōseil & enhort du seigneur de Croÿ le Duc s'estoit condescendu au r'emboursmēt de la riuere de Somme, qui estoit chose faicte à la grand desplaisance du Comte de Charrolois, & pour le greuer au temps aduenir. Aucuns aussi disoient que le Roy quand il eut bien regardé le chastel & la ville de Hesdin, qui est comme la clef de la Comté d'Arthois, qu'il la demanda au Duc & qui luy offrit en ce lieu dōner la ville de Tournay, & Mortaigne, & aucunes autres places: mais le Duc n'y voulut entendre estimant que telles requestes se faisoient plus à sa nuyssance que autremēt. Quand le Roy se partit de Hesdin où le Duc l'eut festoyé moult honorablement, il le conuoya iusques aux champs, ce fut le xix. iour d'Octobre l'an lxiiij. & disoit on lors que le Duc au parlement du Roy luy fit aucunes requestes: & entre les autres luy pria, qu'il voulsist entretenir en leurs offices ceux que le Duc auoit mis & establis és villes & aux paÿs desgaigez. Et que le Roy luy accorda tout ce qu'il luy auoit requis & demandé. Mais neantmoins il n'en fit riens: ains en mua aucuns en commençant à Abbeuille, là où il fait renouveler les sermens de ceux de la ville & des gentils hommes d'illec entour, dont les plusieurs eurent seruy le Duc toute leur vie. Mais le Roy les faisoit iurer qu'ils le seruiroient de lors en auant contre tout homme. Puis osta au seigneur de Saueuses la capitainerie d'Amyens, de cité lez Arras, & de Dourlens, & commeit en son lieu le seigneur de Launoy nepueu du seigneur de Croÿ: lequel de Launoy estoit gouuerneur de l'Isle, Douay & Orchies de par le Duc de Bourgongne: & si luy donna encores le Roy la capitainerie de Mortaigne, & en deposa le seigneur de Haubourdin bastart de S. Pol. Il osta aussi au seigneur de Creuecueur le Bailliage d'Amyens, & le donna audit seigneur de Launoy. Et outre par dessus tous ses offices, luy donna deux mille liures de pension tous les ans: desquels biens & aduancemens plusieurs se donnerent merueille: attendu que ledit seigneur de Launoy auoit prins son commencement d'honneur, de richesses en la maison de Bourgongne, & n'auoit fait onques seruice au Roy Loÿs de France.

Cy parle du trespass de la Royne de France Dame Marie d'Anjou: puis dit comment le Roy fait adiourner le Comte de S. Pol & le seigneur de Genly à comparoir en personne deuant luy: puis parle d'autres choses, & du mariage du fils de Gueldres: puis parle de l'abolition de la Pragmaticquesanction.



En ce mesmes tēps trespassa de ce monde dame Marie d'Anjou Royne de France, mere du Roy Loys lors regnant: laquelle tout son tēps eut bonne renommée d'estre tresbonne & tresdeuote dame, & moult aumosniere & patiente. En ce temps aussi le Roy de France feit adjourner le Comte de S. Pol, & le seigneur de Genly à comparoir deuant luy, où qu'il fut, & en leurs personnes au quinzieme iour du mois de Nouembre. Et disoit on communement que la cause estoit, pour ce que le seigneur de Genly estoit noté d'auoir esté deuers le Duc de Bretaigne, pour faire aucunes alliances entre le Duc & le Comte de Charrolois, affin de resister contre le Roy, qui les auoit tous deux en sa malle grace, comme pouoit apparoir par ce que le Duc de Bretaigne auoit ses places fortifiées, & son armée preste en son païs, pour soy deffendre se le Roy le vouloit enuahir. L'on disoit encore que le Duc de Bourbon, & aucuns autres Princes de France estoient de celle alliance contre le Roy, pour les tors & estrangetez que le Roy leur faisoit en plusieurs & diuerses manieres. En ce temps le quinzieme iour d'Octobre, apparut au ciel vn signe de feu à l'entrée de la nuit, & sembla que le ciel ouurist, & feit trescler autant comme à dire vn *Aue Maria*: puis se recloÿt, & s'amoncela ainsi comme en vn brandon de feu bien long: & puis à long traict il s'esuanoÿst, ainsi comme font les en l'air. En ce temps aussi retourna de Romme l'Euesque de Tournay, que le Duc de Bourgogne eut enuoyé deuers le Pape Pius: & rapporta au Duc que pour aller contre le Turc, iceluy Pape Pius se fut fait fort de trouuer quarante mille combattans, & de les mener soy mesmes, & de soy croiser contre les infidelles, ou cas que le Duc y voudroit aller accompagné de six mille combattans ou capitaine pour luy. Desquelles nouuelles le noble Duc fut tresgrandement resioÿ: si que tout incontinct il enuoya ses lettres aux seigneurs, qui auoient voüé d'aller avec luy en Turquie, & à tous ses autres cheualiers & vassaux pour estre deuers luy à Bruges le xv. iour de Decembre audit an lxiiij. Ausquels venus illec audit iour, il feit dire & remonstrer que son intention estoit d'aller en sa personne cōtre les Turcs & infidelles, & d'estre à Aigiemorte pour monter sur mer au my-May prochain: mais les remanderoit encores vne fois deuant son parlement, pour leur dire commēt & en quel gouuernement il laisseroit les païs tandis qu'il seroit audit voyage. En cest année le xviiij. iour de Decembre en la ville de Bruges furēt faictes les nopces du fils aîné du Duc de Gueldres, & d'une des filles de Bourbon, sœur à la Comtesse de Charrolois, tous deux nepueu & niepce du Duc Philippe de Bourgogne. C'est à sçauoir le fils du Duc de Gueldres & la fille du Duc, & de la Duchesse de Cleues: laquelle Duchesse auoit esté sa sœur, & estoit trespassee enuiron deux mois deuant lesdictes nopces. Ce iour des nopces apres disner iousterent aucuns seigneurs de la court. Entre lesquels iouxta le seigneur de Renty, & le cōpaignoit vn ieune escuyer de Picardie, nommé Iean de Fremessent fils de David qui plus d'enfans n'auoit, auquel Iean aduint vne dure fortune: car d'un esclaz de lance qui luy cheut sur la teste, il fut tellement blessé qu'il en mourut. En ce mesme iour deux autres hommes furent occis en la presse à cause desdictes ioustes, qui doit estre imputez à leur grād follie, & tous leurs semblables. En ce temps vint deuers le Roy de France Gaudeffroy Euesque d'Alby, Cardinal d'Abbeuille: duquel

duquel l'on disoit vn pou deuant que le Roy ne l'aymoit gueres, mais neantmoins le Roy le receut grandement. Ce fut celuy qui pou de temps par auant auoit procuré tellement deuers le Roy que la pragmatique sanction, mise sus au Royaume de France par le consille de Basse, fut mise ius du gré du Roy: & qui pour auoir le consentement du Roy en ceste partie, auoit promis au Roy certaines choses, dont il luy auoit failly, ne sçay comment il en auoit appaisé le Roy: car il auoit promis au Roy que le Pape enuoyeroit vn Legat en France, qui dōneroit les benefices affin que l'argent demourast au Royaume, & ne fut plus porté à Romme: mais quand le Pape se trouua saisy de la Chartre de celle Pragmaticque sanction, il ne fit force d'enuoyer le Legat en France. Ains fit ladicte Chartre trainer parmy les rues de Romme, pour complaire aux Rōmains, en faisant publier qu'elle estoit abolie & mise ius. On disoit lors communement que le Cardinal d'Alby eut le rouge chappel, & fut institué Cardinal pour le merite d'auoir trouué moyen d'abolir celle Pragmaticque sanction: laquelle à la verité fut nuisante aux pauures clerks & aux pauures escolliers. Car tant de questions & de reproches se faisoient lors à cause des benefices, que c'estoit vne tresmerueilleuse chose: les riches auoient les benefices, qui pouoient soustenir la despence des proces, & les pauures clerks les perdoient par faute d'argēt quelque nomination qu'ils eussent.

Cy parle d'une diuision qui lors estoit entre le Duc de Bourgongne & le Comte de Charrolois son fils: & des doleances que fait le Comte de Charrolois du seigneur de Croi aux deputez des trois estats des païs du Duc Philippe de Bourgongne son pere.

EN ce mesme temps le Duc de Bourgongne seiournant en sa ville de Bruges, manda les trois estats de ses païs, estre à Bruges deuers luy au ix. iour de Ianuier: le Comte de Charrolois son fils lors estant en la malle grace de son pere, manda lesdits trois estats estre deuers luy à Anuers le troisieme iour dudit mois de Ianuier, pour les aduertir des causes pourquoy son pere le tenoit en indignation: ainçois qu'ils se trouuassent deuers son pere, affin de trouuer aucun bon moyen entre eux de venir à appaisement: mais le Duc de ce aduerty māda de rechief ausdits estats, que nul n'allast deuers son fils: aucuns neantmoins y estoient ja allez, & aucuns estoient sur le chemin pour aller à Anuers & n'y allerent point.

A v neufiesme iour de Ianuier se trouuerent tous deuers le Duc à Bruges en tresgrand nombre: car ils y furent trois Euesques, soixante Abbez, nobles hommes en tresgrand nombre, & les deputez de toutes les bonnes villes des païs dudit Duc. Eux conuenans ensemble deuant le Duc, il les fit tous remercier de leur bonne diligence & obeissance par la bouche de l'Euesque de Tournay: disant outre qu'il auoit eu de son fils certaines nouuelles pour lesquelles il se trouuoit si troublé, que pour lors il ne leur vouloit autre chose dire. Neantmoins le Duc qui ne peut sa parolle contenir leur dit, qu'il estoit troublé contre son fils, pourtāt qu'il se laissoit gouverner par gens qu'il n'aimoit pas, & que son fils ne vouloit faire sa volenté. Puis bailla vn escrit à vn de ses secretares, & luy dit qu'il le leut en audience: disant que c'estoit ce que son fils luy auoit escrit, & que chacun y entendit. L'escrit contenoit que son fils disoit que la

chose du monde qui plus luy desplaist, estoit ce qu'il sentoist son seigneur & pere trouble contre luy, priant qu'il ne luy despleust qu'il n'estoit venu deuers luy quand il eut mādē, & qu'il l'en voulsist tenir pour excusé: & que deuers luy ne se vouldroit il trouuer, tant que ceux fussent qui estoient entour luy: lesquels l'auoient cuidé faire mourir par poisons, & qui tous les iours pourchassoient sa mort, comme il le sçauoit certainement: pensoit assez que le trouble de son seigneur & pere, luy venoit pour trois causes principalement. La premiere pource qu'il n'aymoit point le seigneur de Croÿ, pour les causes qu'il auoit autres fois declarées en la presence de sondit pere, & dudit seigneur de Croÿ. Et que encores de nouuel n'auoit cause de l'aymer: car luy & ses alliez auoient tāt procuré enuers le Roy, que le Roy r'auoit les paÿs engagez, qui estoit chose faicte à son grand preiudice de ses hoirs & de tous ses paÿs: & qui ne se deuoit faire, attēdu que le Roy n'auoit pas fait n'accomply autres plusieurs points contenu en leur traicté d'Arras. La seconde cause pensoit estre, pourtant qu'il auoit retenu de son hostel l'Archediacre d'Aualon, depuis qu'il se partit du seruice du Comte d'Estampes: dont neantmoins son pere ne se deueroit troubler, s'il sçauoit les causes pourquoy ce dont il l'aduertiroyt, se son plaisir estoit de le vouloir ouïr. La iij. cause pouoit estre (comme pensoit le Comte) pource que par ses archiers le Duc auoit enuoyé querir en Hollāde maistre Anthoine Michel, lequel auoit esté rescoux des mains desdits archiers au desceu dudit Comte. Disant s'il sçauoit ou pouoit trouuer ledit maistre Anthoine, qu'il l'enuoyeroit prisonnier à sondit pere. Ces choses ouïes par lesdits trois estats, le Duc les remercia, & leur donna congé de retourner chacun en sa place iusques à son remand, qui seroit assez brief. Et à lors s'en retournerent la pluspart: & aucuns demourerent pour ayder à trouuer aucun bon moyen, pour mettre en bon accord le pere & le fils. Entre lesquels estoit vn tresnoble clerc Abbé de Cisteaux: Lequel desiroit moult à veoir cest appaisement, & si faisoient tous les autres.

Les trois estats estant à Bruges (comme dit est) le Comte de Charrolois s'en vint à Gand, & tost apres se trouuerēt deuers luy lesdits deputez, avecques l'Euesque de Tournay & autres cōseilliers du Duc: & par la bouche dudit Abbé, luy fut remonstré par tesmoignage de la sainte escriture l'obeissance que fils deuoit à pere, en luy suppliant qu'il se voulsist en humilité submettre à la volenté de son pere, & mettre hors de son seruice aucuns de ses seruiteurs pour luy complaire. Quand cest Abbé cessa de parler, l'Euesque de Tournay se meit à genoux deuant le Comte, & luy feit plusieurs belles remonstrances, seruant à ce mesmes propos, disant qu'il n'estoit point venu deuers luy comme seruiteur de son pere: Mais comme Euesque de Tournay, pour trouuer quelque bon moyen pour mettre en bon accord, & pour eiter grand meschief qui de leur debat pourroient suruenir. A laquelle parolle le Comte luy respondit, que fil n'eut oncques esté seruiteur de monseigneur son pere, il n'y eust gueres gaigné. Puis dit aux deputez des trois estats, qu'ils ne luy auoient touché en leur proposition que de maistre Anthoine Michel, & maintenant luy muoient propos: & pourtāt ne croyoit il point que l'Abbé de Cisteaux eust eu charge d'eux, de luy faire telles requestes. Mais les deputez adouierent le dessusdit Abbé, disant qu'ils luy auoient ainsi chargé de dire, & que pour obeir à son plaisir ils estoient

estoyent tous venus deuers luy en celle ville de Gand: dont leur dit le Comte en deffulant son bōnet, qu'il estoit tresioyeux de leur venue: & les remercia comme ses tresloyaux amis de la peine, trauail & amour qu'ils luy monstroient, & que iamais ne les oublieroit. Ains le recognoistroit à tous les paÿs dont les deputez estoient là presens, & à eux mesmes. Et que pour le grand bien qu'ils luy monstroient, il ne leur celeroit plus son courage. Ains leur vouloit dire & les aduertir de plusieurs delicts & malefices que le seigneur de Croÿ & ses aliez auoient fait & commis. Premiere dit que quand il eut esté deuers le Roy la derniere fois, le seigneur de Croÿ auoit dit depuis (la Comtesse de Charrolois sa femme lors estant malade) que fil n'eut craint à courroucer, que luy il l'eut fait prendre prisonnier, & mettre en tel lieu qu'il n'eut iamais fait mal à luy ne à autre. Item que le sire de Croÿ auoit dit à Pius notable seigneur, que luy qu'il n'accomptoit riēs à luy: & qu'il auoit neuf cēs que cheualiers qu'escuyers qu'il luy auoiēt promis & iuré de le seruir iusques à la mort. Item dit quand il le veit reuenir: Veez cy ce grand diable qui vient, tant qu'il viue nous n'aurons bien à la court. Item que depuis qu'il se fut retrait en Hollande, le sire de Croÿ dit qu'il auoit grand paour de luy: & que quand il luy vouldroit mal faire, il ne seroit point mieux en Hollande qu'autre part, & qu'il y estoit ainsi comme vne gauffre entre deux fers. Item que le sire de Croÿ se fut vanté que quand viendrait au fort, il estoit seur d'estre seruy de ceux d'Arthois, & qu'il auoit tout le paÿs à son cōmandement: disant outre: Que cuide faire monseigneur de Charrolois, de qui se cuide il ayder: se cuide il ayder de ces Flamēgastes & de ses Brabançons, il s'abuse bien. Car ils le habandonneroient à son besoing, comme ils ont fait à leur seigneur autresfois, ce que ie ne croy pas, se dit le Comte: car ie les tiens pour mes bons & loyaux amis: & aussi fais-ie ceux d'Arthois & de Picardie, & ne me doubte gueres d'eux. Item leur dit, que le seigneur de Croÿ auoit enuoyé au Preuost de Vvatenes la figure de sa natiuité, & que le Preuost auoit iugé qu'il seroit durement fortuné, & que les plusgrans meschiefs du monde luy deuoient aduenir. Et tout cecy auoit il recordé au Duc son pere, pour le blâmer enuers luy. Item qu'il auoit requis audit Preuost de Vvatenes qu'il feist tellement, que son pere le tenist tousiours en haine & l'eslongnast de luy. Item dit qu'il luy estoit apparu souffisamment, que l'en auoit pourchassé sa mort par fors & par voyes estrāges. Et que l'en auoit fait six images, trois en forme d'hōme, & trois en forme de femme. Sur lesquels images estoit escrit le nom du diable nommé Belial, & le nom de celuy sur qui ils vouloient adresser, avec aucūns autres noms. Et deuoient lescits images seruir à trois. La premiere pour estre en la grace de celuy, pour qui ils auoient composé l'image. La seconde pour le faire haÿr de ceux qu'ils voudroient. Et la tierce pour le tenir en langueur quand ils voudroient: & auoit vn Euesque Prieur de Morocq en Bourgongne, baptize lescits images: dit outre que les compositeurs d'iceux images, auoient esté deux ou trois des seruiteurs du Comte d'Estampes: dont l'vn estoit son medecin, que le Comte d'Estampes luy auoit enuoyé prisonnier pour soy excuser & iustifier. Puis dit le Comte finablement ausdits deputez. Mes amis, dit il, ne cuidez pas que ie me deffie de vous, se ie ne vous nomme tous les complices de ceux qui ont pourchassé ma mort. Ie ne le choile que pour sauuer leur hōneur,

& pour l'horreur que vous auriez se vous les oyez nommer. Je vous mercie de rechief de vostre bõne diligence, & vous prie que parlez ensemble & que vous me vueillez conseiller que i'ay à faire: car ie croy que vous seriez desplaisans, si me mesuenoit de moy mettre és mains de mes ennemis. Par eux ne vueil-ie point estre gouuerné: mais par mes bons & loyaux seruiteurs: Si ayez bon aduis sur tout ie vous en prie, car ie ne me partiray d'icy iusques à ce que i'auray ouïe vostre responce: Dieu la me doint ouïr aussi bõne comme i'en ay en vous parfaicte fiance.

Cy parle de la responce que feirent les deputez des pais du Duc de Bourgogne au Comte de Charrolois son fils: & comment le pere & le fils s'appaiserent ensemble: puis dit comment le Roy vint à Arras & à Tournay.



Pres que le Comte de Charrolois eut ainsi parlé aux deputez des trois estats des païs du Duc son pere, ils se retrahirent tous ensemble en vne chambre à part, & conclurent illec la responce qu'ils luy feroient: puis allerent vers luy & se iecterent à genoux deuant luy: mais il les feit leuer incontinent, dont parla l'Abbé de Cisteaux pour tous les autres: & luy dit cõment ils auoient parlé ensemble, & qu'ils estoient tous concluds en vne opinion, qui fut telle: qu'ils luy requeroient treshumblement, que pour paruenir à la bonne grace & amour de monseigneur son pere, il voulsist retourner deuers luy, pour escheuer les inconueniens qui pourroient aduenir de leur discord. Et au regard de ceux qu'il tenoit ses ennemis, Dieu l'en auoit gardé iusques à celle heure, & encores l'en garderoit, par les bonnes prieres de tous ceux de ses païs: & quãd son pere le verroit deuers luy, il en auroit si grãd ioye qu'il le garderoit bien: & qu'il voulsist pour celle fois laisser derriere aucuns de ses seruiteurs, sans leur donner congé: & par tant esperoient que brief il se retrouueroit en la bonne grace de son dit pere, eux offrans fils y pouoiẽt aucun bien faire d'eux y employer de tout leur pouoir. A celle parolle le Comte les remercia tous, & leur dit que pour entretenir l'amour de Dieu, de monseigneur son pere & d'eux, il leur accordoit leur requeste, & vseroit de leur conseil, en leur priant qu'ils le voulsissent accompagner iusques deuers monseigneur son pere: & qu'ils le voulsissent requerre pour ses seruiteurs remettre en sa bõne grace: Ce qu'ils luy accorderent liberallement. Le lundy ensuiuant iceluy Comte de Charrolois, accompagné de grand nombre de cheualiers & escuyers avec luy lesdits deputez, se partist de Gand & vint à Bruges, & allerent en son encontre tous les plus grans de l'hostel du Duc, ensemble ceux de la loy de la ville, & s'en alla descendre à l'hostel du Duc son pere, & monta en sa chambre: & si tost comme il le veit, il s'agenouilla par trois fois: & à la tierce fois luy dit. Mon trefredoubté seigneur & pere, i'ay entendu que vous estes mal content de moy pour trois choses, en luy declarãt les mesmes choses qu'il auoit dictes aux deputez: desquelles il s'excusa tout pareillement qu'il auoit fait ausdits deputez. Tutesuoyes se en ce ou en autres choses ie vous ay aucunement troublé ou courroucé, ie vous en crie mercy. Adonc luy respõdit son pere: De toutes voz excusations sçay-ie biẽ qu'il en est, n'en parlez plus. Mais puis que vous estes icy venu à mercy soyez bon fils & ie vous seray bon pere: puis le prinst par la main & luy

& luy pardonna tout: ce fait les deputez prindrēt congé au pere & au fils & s'en retournerent chacun en sa place, forment resioüis de celle recōciliation: & leur fut dit au congé prendre par le Duc qu'ils retournaissent illec deuers luy au viij. iour de Mars prochain. Ce mesmes iour que cest accord fut fait, se partit de Bruges des le matin le seigneur de Croÿ & se retrahit à Tournay deuers le Roy Loÿs qui lors y seiournoit. En ceste annee lxiiij. & en l'an apres fut le blé à tresbō marché ou paÿs d'Arthois, & tous autres grains: si qu'il n'estoit memoire de les auoir oncques veuz à si bas pris.

LE xxiiij. iour de Ianuier oudit an entra le Roy Loÿs de France en la ville de Cité lez Arras, où il fut receu moult honorablement par le Clergié & par les habitans d'icelle cité. Il descendit à la porte, & alla à pied iusques à l'Eglise de nostre Dame, là où il feit sa deuotion. Puis s'en alla logger en l'hostel de l'Official bon logis, mais petit: & ne voulut point logger en l'hostel de l'Euesque, iacoit-ce qu'il soit grand, bel & notable. Mais la coustume du Roy estoit d'aymer les petits logis plus q̃ les grās. Auec le Roy estoit son frere Duc de Berry, le Côte d'Eu, le Prince de Piemont & aucuns autres en petit nombre: & ne voulut le Roy que nuls de ses gens logeassent en la ville d'Arras, pource que ceux d'Arras n'auoient voulu souffrir, qu'ils s'y logeassent par le fourrier, que premiere-ment les hostelleries ne fussent plaines, esquelles hostelleries on pouoit logger de quatre à cinq mille cheuaux: de laquelle maniere le Roy n'eust pas esté content, & se tint en celle Cité depuis le lundy iusques au samedi, sans entrer en celle ville d'Arras, & iusques à ce qu'il eust fait veoir & visiter les priuileges d'icelle ville d'Arras. Et lors qu'il y entra ce samedi, il trouua à la porte grand nōbre de gens bannis de la ville, qui luy requirent qu'il leur voulüst rendre la ville à son ioyeux aduenement, ausquels il respondit: Enfans (dit-il) vous me requerez de grace & ce n'est pas la coustume aux Roys de France de ce faire: & pourtant ne vous fiez point en moy: car ie ne vueil point rompre les priuileges de beaux oncle de Bourgongne, & autre chose ne peurent auoir de luy. Puis alla ouïr messe en l'Eglise de saint Vvast, & la messe ouïe il s'en retourna dîner en la Cité.

LE dimenche ensuiuant le Roy rentra en la ville d'Arras, & visita tout à son loisir l'Abbaye de S. Vvast & les logis de leans. Puis alla sur le marché: & comme en retournant par deuant S. Gery où la blāche cloche estoit, & l'horloge de la ville il fut là venu, vn ferrurier garde de la cloche, laquelle il faisoit tinēter à la venue du Roy, descendit du clocher tout armé à blanc, & vint prédre le Roy par la bride de son cheual comme vn lourdaut, & luy demanda le vin: le Roy voyant soubdainement cest homme armé il s'effraya vn pou. Neātmoins il luy feit donner le vin, & luy pardōna ce qu'il luy auoit meffait. Et n'eut esté ce que le Roy luy pardonna, le folastre eut esté en grand dangier de sa vie. Encores à ceste occasion tandis que le folastre descendoit du clocher, les enfans qui tin-
toient celle blanche cloche luy feirent aucune rudesse, tellement qu'elle fut cassée, qui fut vn grād dommage à la ville. Car c'estoit la meilleure cloche, que on sceut nulle part trouuer & la greigneur. Celle blanche cloche pesoit de xvij. à xviiij. mille liures de metal. Puis s'en alla le Roy aux champs pour veoir où le Roy son grand pere eut esté logé, quand il tint le siege deuant la ville d'Arras

l'an mille quatre cens quatorze . Et puis il s'en retourna en la cité, & le lendemain se partit de la cité bien soudainement selon sa maniere de faire, & ses gens le suiurent tout incontinent & s'en alla à Tournay, là où il fut receu moult honnorablement : car ils allerent à son encontre plus de trois mille hommes vestuz de blāc, à vne fleur de liz d'or de brodure sur leurs robbes. A la porte de la ville estoit vn chastel de papier, fait à la semblance de la closture de la ville: lequel chastel fut présenté au Roy avec les clefs de la ville. De dessus celle porte descendit par engin vne pucelle la plus belle fille de la ville. Par laquelle en salüant le Roy, ouurit sa robe deuant sa poitrine, & auoit vn cueur bien faict : lequel cueur se fendit & en issit vne fleur de liz d'or de grand pris: laquelle elle donna au Roy de par la ville & luy dit, Sire, dit elle, ie suis pucelle & aussi est ceste ville: car onques ne fut prinse ne tourna contre les Rōys de Frāce: & ont tous ceux de ceste ville chacun vne fleur de liz en son cueur. Puis trouua le Roy sur les rues plusieurs histoires & personnages, & s'en alla loger sur vn cha noine. De Tournay s'en alla le Roy à l'Isle & y arriua le xvij. iour de Feurier, qui lors estoit le quatriesme iour de Kareme : la nuict du bouhourt le Duc de Bourgongne y vint aussi & y eut le lendemain grand feste de ioustes & d'esbat temens, qui durerēt depuis le dimenche iusques au vendredy. Eux estans à l'Isle le Roy remōstra tant d'vnes & d'autres au Duc qui vouloit aller en Turquie, que le Duc luy promet qu'il n'yroit deuant vn an passé. Et le Roy luy promet liurer dix mille combattans payez pour quatre mois pour le compagner quād il y voudroit aller. On disoit aussi communement que le Roy d'Angleterre luy ayderoit de grand nombre d'archiers. Par ceste maniere fut le voyage de Turquie rōpu pour le noble Duc Philippe de Bourgongne, qui luy tourna à grand desplaisir: car tout son desir estoit d'y aller vne fois. Ces choses ainsi faictes le Roy se partit de l'Isle, & s'en retourna en France, & trouua à S. Clou le Duc de Sauoye, qui là l'auoit attendu longuement tout debilité de gouttes, & avec luy son fils aîné. Et disoit on lors, qu'ils estoient en la malle grace de ceux de leur paÿs, pource qu'ils ne se gouuernoient point au gré d'eux: & qu'ils auoiēt prins pour eux gouuerner son iij. fils nommé Philippe, qui estoit renommé d'estre sage & subtil & vaillant en armes.

Cy parle du voyage du Bastard de Bourgongne : & comment le Roy feit detenir prisonnier Philippe de Sauoye, nonobstant la seurté du Roy: & commēt le Comte de S. Pol fut appaisé au Roy. Puis parle en brief d'une bataille qui fut en Angleterre & d'aucunes autres choses qui lors aduindrent.




Le xvij. iour de Mars l'an soixante trois, le Duc de Bourgongne desplaisant que le Roy l'auoit retardé de son voyage de Turquie, feit euoquer les trois estats de ses paÿs en la ville de l'Isle. Ausquels il feit dire & remonstrier comment à la grand instance & priere du Roy, il auoit differé son voyage de Turquie iusques à vn an. Mais affin que le Pape & les Princes Chrestiens se contentassent de luy, il auoit intétion d'y enuoyer Anthoine son bastard accompagné de deux mille combattans, & de Baudoin son autre fils bastard aagé de dixhuiet ans ou enuiron : & qu'au plaisir de Dieu fil n'estoit mort ou malade, il seroit en personne ou paÿs de Turquie dedans le
iour

iour S. Iean Baptiste l'an soixante cinq, à tout la plus grand armée qu'il pourroit assembler. D'autre part le Roy feit adiourner à comparoir en personne deuant luy le Comte Loys de S. Pol sur le iij. deffaut, & luy enuoya saufconduit. Lequel Comte doubtant estre banny du Royaume s'il n'alloit deuers le Roy, se cōclud d'y aller: & y alla & trouua tant de bōs amis enuers le Roy, que le Roy le receut à tresgrand ioye, & fut sa paix faicte: & feit feauté & hommage au Roy des terres qu'il tenoit de luy. L'on disoit lors que le Roy le requist qu'il ne seruit iamais le Comte de Charrolois. Mais il luy respondit en foy excusant gracieusement, que ce ne pouoit il faire, & qu'il estoit obligé au Comte par foy & serment qu'il ne pouoit rompre. Tost apres Pasques l'an mille quatre cens lxiiij. vint deuers le Roy à son command Philippe de Sauoye troisiēme fils du Duc de Sauoye: lequel le Roy auoit mandé & prié venir deuers luy, avec & en la cōpagnie de son premier escuyer d'escuyerie, qu'il luy auoit enuoyé portant lettres de credence signées de la main du Roy, laquelle credence exposée par le dit escuyer, il l'asseura ou nom du Roy de venir & de retourner sauuemēt. Mais ce nonobstant si tost comme iceluy Philippe approcha du Roy le Roy le feit prendre, & l'enuoya tenir prison au chastel de Loches en Touraine, qui est vne forte place: en laquelle il fut prisonnier deux ans entiers: ne sçay pourquoy, sinon par enuie que le Roy eut sur luy, pource qu'il auoit greigneur gouuernement en Sauoye, plus que n'auoit le Duc: & luy obeissoient plus volentiers ceux du païs qu'ils ne faisoient au Duc. Neantmoins au chief de deux ans, le Roy de son mouuement le feit deliurer & mettre hors de prison. En ce mesmes temps trespassa de ce monde Charles Comte de Neuers, sans laisser hoirs de sa chair, & pourtant fut Iean son frere Comte de Neuers apres luy & de Rethel, & seigneur de plusieurs autres places & terres. Oudit an le iour de la Penthecouste xx. iour de May Anthoine bastard de Bourgongne, & aucuns autres cheualiers & gentils-hommes de l'hostel du Duc de Bourgongne, prindrent la croix pour faire le voyage d'outre-mer: & le lendemain se partirent enuiron deux mille combattans, & monterent sur mer au port de l'Escluse en Flandres, voyant le Duc de Bourgongne: lequel luy auoit ce iour donné cent mille escus d'or pour faire son voyage, & si luy auoit donné la Comté de la Roche & aucunes autres terres. A l'occasion de ce voyage se croiserent plusieurs ieunes hommes de diuers païs de la Chrestienté, pour aller contre les Turcs, & prindrent le chemin de Romme. Mais pource qu'ils alloient sans ordonnances & sans chief cy x. cy xx. leur fait cheut à neant, & s'en retournerent chacun en sa place, iacoit ce qu'ils fussent en vn tresgrand nombre, s'ils se fussent trouuez ensemble: mais Dieu ne le voulut permettre celle fois.

O V D I T mois de May fut vne bataille de rechief en Angleterre entre les gens du Roy Edouard, que conduisoit le Comte de Vvaruich contre les gens du Roy Henry, que cōduisoit le Duc de Sombreffet cuidant à celle fois recouurer le Royaume pour le Roy Henry, allant neantmoins contre la paix & le traicté qu'il auoit promis & iuré au Roy Edouard: lequel luy auoit rendues ses terres: & luy auoit tout pardonné, dont mal luy print: car il perdit la bataille, & fut prins & tous ses hommes morts ou prins, & fut présenté au Roy Edouard, lequel tout incontinent luy feit la teste trencher. Le second iour de Iuing ou-

dit an vint à l'Isle grandement accompagné de nobles hommes le Comte de Charrolois deuers le Duc Philppe son pere, qui n'estoit pas cōtent de luy à celle heure: mais le sire de Saueuses parla & procura tant enuers le Duc qu'il parla à son fils, & luy pardōna son mautalent. On disoit lors que le Comte parla aussi au seigneur de Croÿ, & qu'il luy dit entre autres choses, que quand il feroit enuers luy ainsi qu'il deuoit faire, qu'il luy feroit bon seigneur. Neantmoins ne peut il encores r'auoir à celle fois sa pension de son pere. Le xv. iour dudit mois de Iuing, fut occis Pierre Louuain l'un des capitaines du Roy, & sur la sauuegarde du Roy, par les mains de messire Raoul de Flauy, seigneur de Rubencourt, encōtre-vengeāt la mort de Guillaume de Flauy son frere que l'on disoit auoir esté occis par sa femme du sceu dudit Pierre Louuain: & ne firent les facteurs mal ne grief à ceux de la compagnie dudit Louuain. Sa femme à la verité qui estoit de bon lieu, feit sondit mary meurdrir & couper la gorge par son barbier en le barbiāt. Et pource que le barbier ne luy couppa pas la gorge tout outre, elle la par-couppa du rasoir mesmes, qui fut vn bien merueilleux cas: Attendu qu'elle auoit vn beau fils de sondit mary: mais il auoit grace de luy estre moult rude & de tenir garces en sa maison, avec lesquelles il couchoit en delaisant sadicte femme ieune & en bon point, & venue de haut lieu, comme dit est: & si auoit sondit mary prins le pere d'elle & detenu en estroicte prison si longuement, qu'il y estoit mort. Pour lesquelles causes & autres aucuns excusent la femme de la mort de son mary. Ledit quinzieme iour de Iuing audit an lxiiij. aduint vne merueilleuse chose au Palais à Paris, en plaidoyāt vne cause d'un procez estant illec entre l'Euesque d'Angiers & vn riche bourgeois de la ville. Auquel l'Euesque imposoit qu'il estoit heretique & vsurier: & qu'il auoit dit presens plusieurs gens de bien qu'il ne creoit point qu'il fut Dieu ne Diable, Paradis n'enfer: dont aduint comme l'Aduocat de l'Euesque en plaidoyant, recita ces mesmes parolles auoir esté dictes par ledit bourgeois, que celle chambre du plait commença à trembler tresfort & cheut vne Pierre de haut en bas sans blesser personne: mais toutesuoyes n'y eut homme en celle chambre, qui n'eut tresgrand paour & grand merueille: & vuiderent tous leans iusques au lendemain, que celle cause fut appellée & plaidoyée: mais en la plaidoyant la chambre se print à trembler comme dessus: & issit vn des sommiers de la chambre de sa mortaise, & aualla bien deux pieds en bas sans cheoir: dont cuiderent tous mourir ceux qui estoient leans, & vuiderent si impetueusement de la chambre qu'aucuns y laisserent leurs bōnets, & aucuns autres leurs chaperons, leurs patins, & autres choses: & ne plaida on plus en celle chambre iusques à ce qu'elle fut bien refaicte & rassurée.

Comment le Roy de France vint à Hesdin seconde fois: puis parle du trespas du Pape Pius, & de la prinse du bastard de Reubempré en Hollande: puis parle d'aucunes autres choses qui lors aduindrent.

 Vdit mois de Iuing l'an soixante quatre, vint de rechief le Roy de France à Amyens, & d'Amyens à S. Pol où il trouua le Duc de Bourgogne, là où le Comte de S. Pol les festoya grandement: puis s'en alerent le Roy & le Duc à Hesdin, & là les festoya le Duc moult noblement.

Eux

Eux estans à Hesdin vint vn ambassade d'Angleterre deuers le Duc de par le Roy Edouart, ausquels le Duc fait tresbonne chere. Commune renommée estoit lors que le Roy requist au Duc qu'il luy voulüst rendre les Chastellenies de l'Isle, Douay & Orchies, par si qu'il luy rendroit cc. mille liures tournois, & dix mille liures de rente. Pour lesquelles sommes elles eurent esté engagées par vn Roy de France, à vn Côte de Flandres. A quoy le Duc respondit que quand son grand pere le Duc Philippe de Bourgongne, fils du Roy Iean print à mariage Dame Marguerite, fille du Comte de Flādres: que lesdictes chastellenies luy furent baillées par le Roy, pour en iouir par luy & ses hoirs masles: & ou cas qu'il n'en y auroit nuls, elles deuoient retourner à la Courōne, moyennant lesdictes sommes d'argent & de rente, que le Roy en deuoit rendre & payer au Comte de Flandres. Aucunes autres requestes fait le Roy au Duc selon cōmune renommée: dont le Duc n'en octroya riens, pource que les requestes ne luy sembloient point raisonnables. Le Duc de sa part fait aussi trois requestes au Roy. La premiere, qu'il voulüst auoir en sa bonne grace son fils le Comte de Charrolois: pource qu'il auoit entendu que le Roy estoit mal content de luy. La seconde qu'il se voulüst deporter de contraindre les nobles hommes qui tenoient du Roy aucunes terres, & fils tenoient de luy à faire autre serment que nobles hōmes n'auoient accoustumé de faire, pource que le Roy en auoit voulu contraindre aucuns de celle condition à le seruir contre tous hōmes. La tierce qu'il voulüst faire & accomplir tout ce qu'il deuoit, & auoit promis & iuré de ce qui restoit à faire du traicté d'Arras: mesmement quand il se remboursa des terres engagées sur la riuere de Somme: ausquelles requestes le Roy euasa sans respondre: & se partit le lendemain de Hesdin, pour tirer vers Abbeuille & Roüen. Et tantost apres, c'est à sçauoir en la fin de Iuillet il retourna à Nouuion vn village delez la forest de Cressy, où il se tint vne espace de tēps, le Duc estant à Hesdin, sans plus visiter l'vn l'autre, sinon que le seigneur de Croÿ alloit souuent parler au Roy puis retournoit à Hesdin. Le Duc estant à Hesdin il fit pēdre & estrangler au gibet de Hesdin vn gentil-homme nōmé Iean de l'Esquerre, pour plusieurs malefices par luy commis & perpetrez. Nonobstant qu'il fut vn des vaillans hommes de la Comté d'Arthois, & que ses amis feissent requeste au Duc pour sa saluation: mais ils obtindrent de reprendre son corps du gibet, & de le faire enterrer en l'Eglise des Cordelier dudit Hesdin. Le xv. iour d'Aoust ou dit an lxiiij. trespassa de ce monde le Pape Pius: & aduint le iour de son trespas que foudre de ciel cheut en plusieurs lieux entour Rōme, & fouldroya les biens de terre: dont les gens parlerent en diuerses guises. Apres Pape Pius fut Pape Paulus second de ce nom.

Cy parle de la charge que le Bastard de Reubempré eut d'aller en Hollande pour cuider prendre le Comte de Charrolois: puis parle comment ledit Bastard y fut prins.

LE Roy doncques estant à Hesdin, aduint que le bastard de Reubempré eut charge de ie ne sçay qui d'entrer au Crotoy en vaisseau de mer moult aduantageux, que l'en nommoit Ballenier, & quarante hommes de guerre avec luy toutes gens de grand façon pour tirer en Hollande, où lors estoit le Comte de Charrolois (comme dit est) & ne sçauoient nuls de la

ne où le Bastard les vouloit mener ne quelle charge il auoit : sinon qu'on leur auoit dit qu'il les conuenoit aller où le Bastard les menroit, & faire outrement tout ce qu'il leur commanderoit. Eux doncques appliquez à vn port en Hollande, le Bastard laissant illec son vaissel à l'ancre, print trois ou quatre de ses compagnons, esquels plus il se fioit : & s'en alla en vn lieu où le Comte de Charrolois se tenoit, & il alla le plus secrettement qu'il peut : mais neantmoins en beuant illec en vn cabaret il fut recogneu & accusé au Comte, qui le fait prendre luy & ses deux ou trois compagnons, & les fait mettre en prison : mais tost apres les compagnons furent mis à deliure, & demoura seul prisonnier ledit Bastard ou luy deuxiesme. Le Comte enuoya pour prendre les autres, mais ils ne furent point trouuez : car ils se meirent en la mer & s'en retournerēt au Crotoy, si tost qu'ils furent aduertiz de la prinse de leur maistre. Commune renommée couroit lors, que le Roy auoit baillé charge par lettre escrite ou signée de sa main au bastard de Reubempré, de prendre vif ou mort le Comte de Charrolois & le luy amener : & ce fait luy estans pres de Hesdin, & qu'il auoit sur la riuere de Somme vne grosse armée, il eut prins ou fait prédre le noble Duc Philippe qui n'y visoit gueres : & l'eut tenu & mené avec luy ainsi comme il y tenoit & menoit le Duc de Sauoye son beau frere, affin qu'il eut marié à son plaisir la seule fille du Comte de Charrolois ieune dame de vij. ou viij. ans, & qu'il eut departis les païs du Duc : c'est à sçauoir la Duché de Brabant au Comte de Neuers, & les autres païs à qui qu'il eut voulu : mais Dieu qui cognoist les courages des gens, ne voulut souffrir ne permettre si grãde ruine aduenir en celle noble maison de Bourgongne : laquelle pour veoir est le plus beau, le plus ferme & le plus seur pillier de la Courōne de France : Dieu par sa grace vueille ces deux nobles maisons de France & de Bourgongne tenir ades en bonne paix, & bōne amour ensemble. Toutesuoyes ie qui ay mis par escrit ce que dit est selon la renommée de lors, ne croy point que le Roy pensast onques à faire à celle noble maison de Bourgongne si grande iniquité. Attendu les biens & les honneurs qu'il en auoit receuz. Neantmoins estoit encores prisonnier à la façon de cest escrit, le bastard de Reubempré en Hollande en fin de Feurier l'an lxviij. deuant Pasques. Si tost doncques que le Bastard fut prins (comme dit est) & qu'il eut cōfessé son cas au Comte de S. Pol, qui lors se tenoit en Hollande avec le Comte de Charrolois : & qu'il fut mis en bonne prison & seure, le Comte le fait sçauoir à son pere estant encores à Hesdin : & y auoit tresgrandement festoyé la Royne de Frãce qui l'estoit venue veoir à Hesdin, à Abbeuille & à Nouuion. Entre ces choses le Duc de Bourbō vint à Abbeuille deuers le Roy, duquel il n'estoit pas bien en grace : pourtant que commune renommée disoit que le Duc de Bourbon, le Duc de Bretaigne & le Comte de Charrolois se furent alliez ensemble, & qu'ils auoient promis & iuré ensemble d'aider l'vn à l'autre, se le Roy vouloit faire contre eux ou l'vn d'eux aucune entrepinse. Tost apres : c'est à sçauoir le x. iour d'Octobre ou dit an lxiiij. le Duc de Bourgōgne receut lettres du Roy, contenans qu'il le viendroit veoir à Hesdin le lendemain. Et en ce mesme iour à son disner auoit receu les lettres de son fils, faisans mētion de la prinse dudit Bastard de Reubempré, & qu'il n'estoit pas seurement à Hesdin : lesquelles nouvelles ouies tout incontinent qu'il eu disné monta à cheual & tout soubdainement

ment, & à petite compagnie se partit de Hesdin, & s'en alla au giste à S. Pol : & chacun le suiuit incontînêt, & laissa à Hesdin messire Aldof de Cleues son neveu, & le seigneur de Crequy pour la garde & seurté de la ville & du chastel. En leur ordonnant neantmoins se le Roy y vouloit venir, qu'ils luy feissent ouuerture de la ville & du chastel. D'autre part si tost que le Roy sceut que le Duc se fut party de Hesdin si soubdainement, il se partit d'Abbeuille & s'en alla à Roüen: & le Duc de Bourbon s'en alla à l'Isle deuers le Duc son oncle passant par Hesdin: & de l'Isle s'en alla à Gand deuers le Comte de Charrolois : & fut tresgrandement festoyé & du pere & du fils à l'Isle & à Gand.

Cy parle comment le Roy manda venir deuers luy aucuns deputez des villes desgagées & d'autres pais, & de ce qu'il leur feit remonstrer: comment il feit le Comte de Neuers capitaine de Picardie: & de l'ambassade qu'il enuoya au Duc de Bourgogne à l'Isle.

LE Roy venu à Roüen, il manda ceux de Tournay & de toutes les villes desgagées de la riuere de Somme aller deuers luy, & toutes y enuoyerent leurs deputez, sinon ceux de Cambray. Ausquels deputez il feit remonstrer par son Chancellier comment il estoit courroucé, de ce que l'on disoit communement par tous les païs du Duc de Bourgogne, qu'il auoit enuoyé en Hollande le Bastard de Reubempré pour prendre le Côte de Charrolois, & l'amener deuers luy, dont il n'estoit riens. Bien estoit vray, que le Duc de Bretaigne ne luy obeïssoit point ainsi qu'il deuoit. Et qu'il auoit enuoyé son vi-Chancellier en Angleterre, pour faire alliances avecques ses anciens ennemis les Anglois, que faire ne deuoit sans son congé: & que pour celle cause il auoit enuoyé ledit Bastard en Hollande pour prendre le vi-Chancellier se prendre le pouoient, entendant qu'il ietourneroit d'Angleterre par Hollande. Dit outre qu'un prescheur auoit presché à Bruges où conuiennent toutes nations de la Chrestienté, que le Roy auoit enuoyé ledit Bastard pour prendre ledit Comte, ce qu'il n'auoit oncques pensé: & pourtant estoit son intentiõ de punir griefuement tous ceux qui contre son hõneur semoient tels langages. Leur dit outre que le Roy auoit mandé pour les aduertir, qu'il auoit ordonné le Comte de Neuers son lieutenant & capitaine general des païs desgagez, & iusques à la riuere de Loire, pour resister à ses anciens ennemis, sil estoit qu'ils voulsissent faire quelque entreprinse en son Royaume: en leur cõmandât qu'ils obeïssent audit Côte de Neuers cõme à sa propre personne. Ces choses ainsi faites & remõstrées de par le Roy, les deputez s'en retournerēt chacū en sa place.

LE quatriesme iour de Nouembre oudit an lxiiij. vint en la ville de l'Isle le Comte de Charrolois, accompagné de quatre vingts à cent que cheualiers que gentils-hommes, & bien six cens cheuaux: & à sa venue crierent Noël les petits enfans de la ville, de la grand ioye qu'il donna en celle ville pour sa venue. Et tost apres qu'il fut descēdu s'en alla deuers le Duc son pere, qui le receut ioyeusement. Le lēdemain vindrent à l'Isle le Côte d'Eu, le Chancellier de France, & l'Archeuesque de Narbone ambassadeurs du Roy de France, à grande cõpagnie & notable, & le iour ensuiuant se trouuerēt deuāt le Duc, en la presence duquel & du Côte de Charrolois son fils le Chācellier exposa la charge qu'ils auoiēt du Roy, pour remõstrer au Duc iij. choses principallemēt. La premiere

fut q̄ le Roy demãdoit à rauoir le bastard de Reubempré prisonnier en Hollande. La seconde, que le Roy fut réparé des parolles qu'on auoit fait courre à son deshōneur, pour la prinse dudit bastard. Et la tierce, q̄ le Duc enuoyast au Roy vn gentil-homme de l'hostel du Comte de Charrolois, nommé Oliuier de la Marche, par lequel lesdictes parolles auoient esté dictes premierement, au deshonneur du Roy, & le prescheur aussi qui en auoit presché à Bruges pour en faire iustice telle comme à tel cas appartenoit: disans pour l'excusance du Roy, qu'il auoit enuoyé le Bastard en Hollande pour prendre le vi-Chancelier de Bretagne à son retour d'Angleterre. Et pourtant auoit le Comte grandement offencé le Roy de faire prendre & empescher ledit Bastard. A ces parolles le Comte se meit à genoux deuant le Duc son pere, & luy supplia qu'il luy voulust donner congé de respondre à ces mots, lesquels touchoient son honneur: disant s'il plaisoit à Dieu le tenir en sa grace qu'il ne craignoit homme sous le ciel sinon luy, qui estoit son seigneur & son pere: & qu'il se donoit grand merueille de ce que le Roy le requeroit si fort: dont dit le Chancelier de France qu'ils n'auoiēt nulle charge du Roy de parler ne de respondre au Côte de Charrolois. Et le Duc dit à son fils qu'il se deportast de parler iusques à vne autrefois. A laquelle parole il obeit comme bon fils doit faire à son pere, bien enuiz toutesuoyes. Puis dit le Chancelier au Duc que le Roy se donnoit grand merueille de ce qu'il se fut party de Hesdin si soudainement. Attendu qu'il auoit dit qu'il ne s'en partiroit point, qu'il n'eust parlé au Roy ou sans son congé, luy qui auoit accoustumé tousiours tenir sa parole. Quand le Duc l'eut bien escouté & laissé dire tout ce qu'il voulut, il luy respondit de soy mesmes de point en point: & premierement à ce qu'il auoit dit que son fils estoit doubtif. S'il est doubtif, dit-il, il ne le tient pas de moy. Car oncques en ma vie ie ne doubtay homme ne Prince quel qu'il soit: & s'il est doubtif ce luy viēt de par sa mere, qui s'est doubtee maintesfois que ie n'allasse à autre femme qu'à elle. Touchant la reddition du Bastard de Reubempré dit qu'il ne le rendroit point: attendu qu'il eut esté prins en Hollande. Duquel paÿs, dit-il, ie suis seigneur en la terre & en la mer sans en recognoistre nul à souuerain que Dieu: & que là n'auoit le Roy riens à veoir, à cognoistre ne à repeter: & que là estoit le Bastard en iustice, laquelle on luy feroit selon qu'il auroit desseruy. Combien qu'il estoit renommé d'estre vn mauuais garnement, & qui riens ne valoit, homicide & mauuais garçon. Touchant ce que le Roy vouloit auoir Oliuier de la Marche, qui r'apporta les premieres nouuelles de la prinse du Bastard, & le prescheur qui en eut presché à Bruges: le Duc respondit au prescheur qui estoit homme d'Eglise, ne voudroit il toucher: & qu'il ne luy appartenoit pas, & qu'ils sont aucūs qui preschent à la fois, qui ne sont ne sages ne prudens: puis s'en vont de lieu en autre, si que l'en ne sçait qu'ils deuiennent: & ne croy point (dit-il) qu'aucuns en ayent presché: tant qu'est d'Oliuier de la Marche, il est de l'hostel de mon fils. Ie ne pense point qu'il ait fait chose qu'il ne d'eust faire ou dire: & s'il a fait autrement ie m'en informeray, & en feray telle iustice qu'il appartiendra. Touchant que ie n'ay point tenu ma parole, ie vueil bien (dit-il) que chacun sache, que ie ne promis oncques chose de ma bouche à homme qui viue, que ie n'aye tenu à mon pouoir. Ce dit il vn pou passionné, puis dit en riant. Ie ne feis oncques faute si-

non

non aux dames, & vueil bien q̃ vous le sachez: & le dictes à mōseigneur le Roy, q̃ quand dernieremēt ie prins cōgé de luy, ie luy dis voiremēt q̃ f'autres nouuelles ne me suruenoiēt, ou f'autres choses ne requeroiēt mō retour, q̃ ie ne me par tiroye de Hesdin sans parler encores à luy sil luy plaisoit, & autre chose ie ne luy promis. Or à l'heure q̃ ie m'en partis me vindrent nouuelles tāt de la prise du Bastard de Reubēpré, cōme d'autres grās affaires, que partir me cōuint, & si ne me hastay gueres. Car ie n'allay que iiii. lieües pour iour tāt que vins à l'Isle. Dont luy dit le Chancelier, qu'attendu l'honneur & l'amour qu'il auoit tousiours porté à la Couronne de France, la notable ambassade que le Roy luy auoit enuoyée presentement: c'est à sçauoir le Comte d'Eu son parent, luy qui estoit son Chancelier, qu'aumoins ils peussent emporter de luy de r'auoir le bastard de Reubempré, & qu'il se voulsist sur ce conseiller. Le Duc luy respōdit promptement que voirement il auoit tousiours au Roy voulu & pourchassé tout le bien & l'honneur qu'il auoit peu: mais de chose, dit-il, que ie requis onques au Roy il ne m'en a riēs accordé ne tenu chose qu'il m'ait promis: mesmes des terres desgagées dont il m'auoit promis que i'en iouyroie ma vie durant: tout incontinent qu'il les eut rachetées il me cloÿt le pas, & m'en osta la iouissance, dont gueres ne me chault. A ces mots s'aduança de parler maistre Pierre de Goux cheualier, & maistre en loix, & dit aux ambassadeurs du Roy: messeigneurs, dit-il, affin que chacun l'entende. Monseigneur qui cy est, ne tiēt pas du Roy tout ce qu'il a de terres & seigneuries: il tient voirement du Roy la Duché de Bourgongne, les Comtez de Flandres & d'Arthois: mais il a hors du Royaume maintes belles seigneuries, comme les Duchez de Brabant, de Luxembourg, de Lembourg & de Lotrich, avec les Comtez de Bourgongne, de Hainault, de Hollande, de Zelande & de Namur, & d'autres paÿs qu'il tiēt de Dieu tant seullement: neantmoins n'est il pas Roy: dont parla le Duc, & dit: Ie vueil bien que chacun sache, que se i'eusse voulu que ie fusse Roy, sans declarer d'où ne comment: ne plus n'en dit sinon qu'ainçois que trois iours fussent passez, il leur feroit rendre plus ample responce: si se departirent pour le iour, mais en ce propre iour le Duc escriuit vne lettre au Roy, & les luy enuoya par vn poursuuant, lequel les porta au Roy, & du Roy rapporta lettres au Duc: & ne meit le poursuuant que dix iours à aller & à retourner: du contenu de leurs lettres n'en sçay plus.

Cy parle de la responce que feit le Comte de Charrolois aux ambassadeurs du Roy. Comment le Roy feit prendre Creuecueur delez Cambray: d'une ambassade que le Duc de Bourgongne enuoya delez le Roy. Et du trespas du Duc d'Orleans.

LE viij. iour de Nouembre oudit an lxiiij. furent appelez deuant le Duc les ambassadeurs du Roy: & là en presence de tous ceux qui y estoient en grand nombre, respondit le Comte de Charrolois aux charges qu'ils luy auoient dōnées de point en point tout froidemēt, sans monstrier signe de Passion ne de troublement de courage, si notablement que tous en eurent grand merueille: mesmement le Duc son pere apres l'assemblée departie, dit à aucuns de ses priuez, qu'il ne cuidoit pas auoir vn fils si sage. Ainsi doncques s'en retournerent iceux ambassadeurs sans riens emporter de

chose qu'ils eussent requis ne remonstré : & en passant par Tournay, par Arras, par Amyens : & en tous les lieux où ils passèrent, ils assemblerent les loix & les communes & leur dirent & remonstrerent, que le Roy estoit bien troublé & courroucé des parolles qu'on disoit de luy, touchant le vouloir de faire prendre le Comte de Charrolois : disans & affirmãs que le Roy ne le pensa onques, & qu'il ne l'eust daigné faire, & qu'ils le luy auoient ouï dire de sa bouche : & pourtant se aucuns en auoient parlé contre l'honneur du Roy, n'en parlassent plus sur peine de griefue punition à l'arbitraige de la personne du Roy. Le xv. iour de Nouembre oudit an lxiiij. vindrent à Creuecueur delez Cambray les seigneurs de Torcy & de Moÿ, enuoyez illec de par le Roy, garnis de ses lettres patentes : par vertu desquelles ils prindrent & remeirent en la main du Roy la ville & chastel dudit Creuecueur : nonobstant que le Roy pou deuant l'eust donnée à messire Anthoine Bastard de Bourgongne heritablement, pour luy & ses hoirs. Et pource que le chastellain du chastel feit vn pou de refus de rendre le chastel, & qu'il eut assemblé xvj. ou vingt compaignons de guerre avecques luy : ils luy dirēt tant d'vnes & d'autres qu'il leur rendit la place. Mais ils le prindrent prisonnier & l'emmenèrent deuers luy, & fut en doute de sa vie. Mais en fin il reuint quitte & deliuré. Enuiron la feste de Noël oudit an, enuoya le Duc de Bourgongne notable ambassade deuers le Roy de France. C'est à sçauoir l'Euesque de Tournay, le seigneur de Crequy & autres notables gēs : lesquels trouuerent le Roy à Tours en Touraine, là où le Roy assembla tous les Princes & seigneurs de son Royaume en grand nombre : & entre les plus grans y furent le Roy de Cecille Duc d'Anjou, le Duc d'Orleans, les Comtes de Neuers & de S. Pol & autres plusieurs. Ausquels ainsi assemblez le Roy dit de sa bouche, qu'il ne les auoit pas mandez pour vouloir nuire ne greuer le Duc de Bourgongne, ainsi que plusieurs gens le cuidoient. Car au Duc estoit il tant tenu que plus ne pouoit, & ne luy vouloit que tout bien & honneur. Ains estoit pour le Duc de Bretagne, lequel auoit dit & escript au Comte de Charrolois, au Duc d'Orleans, au Duc de Bourbon, au Roy de Cecille & aux autres Princes du Royaume : que ce pourquoy le Roy se tenoit tant ou paÿs de Picardie, estoit pour trouuer paix ou aucun traicté avecques les Anglois ses anciēs ennemis : & que pour venir à celle fin il leur promettoit donner la Duché de Normandie & celle de Guienne : affin que par leur aÿde il peust subiuguer & destruire le paÿs de Bourgogne, & de Bretagne, de Bourbon, d'Orleans, & des autres les plus grans Princes de son Royaume issus de son sang : iurant le Roy & affirmant, qu'il n'auoit onques voulu ne pensé ce faire : disant outre fil vouloit telles choses faire, qu'il ne seroit pas digne de tenir iamais la Couronne ne d'estre Roy : mais se fut tenu en Picardie, pource que le Duc de Bourgongne auoit intention d'aller outre mer pour guerroyer le Turc. Et pourtant vouloit il voirement traicter avecques les Anglois : affin que durant le voyage du Turc, ses paÿs feussent en paix & en seureté. Puis demanda à tous les Princes presens, s'ils creioient que ce fut vray ce que le Duc de Bretagne leur auoit escript : lesquels tous par vne voix luy respondirent, qu'ils n'en creioient riens : dont leur requist le Roy que chacun en droit luy, le voulsissent seruir contre le Duc de Bretagne, qui si grande iniure luy auoit faicte. Et tous luy respondirent, qu'ils le seruiroient de toute leur puissance.

ce. Le iiij. iour de Ianuier oudit an lxiiij. trespassa de ce monde Charles Duc d'Orleans, en son aage de lxx. ans ou enuiron, lequel delaiſſa vn fils de l'aage de trois ans, nommé Loys & vne fille aagée de ſept ou huit ans. Ce fut celuy qui commença la guerre en France contre le Duc Iean de Bourgongne, pour vengeance de la mort de ſon pere: laquelle guerre dura plus de trente ans à ſi grand perte, & ſi grande depopulation du Royaume, que pitié ſeroit du recorder, cōme on le peult veoir cy deſſus par Chroniques d'Enguerran de Monſtrelet. Ce Duc Charles d'Orleans fut prins à la bataille d'Azincourt, & fut mené prizonnier en Angleterre, où il fut par l'eſpace de xxv. ans: & fait à croire qu'il n'en fut iamais iſſu ſe n'eut eſté le moyen du Duc Philippe de Bourgongne, qui l'en racheta, & luy donna à femme vne ſiēne niepce ſeur au Duc de Cleues: de laquelle il eut les deux enfans cy deſſus eſcripts. Et depuis ſon retour de prizon fut touſiours de belle vie & honneſte & deuot, ſi que tous les vendredis de l'an il donnoit à diſner à xiiij. poures perſonnes pour l'honneur de Dieu, & les ſeruoit à table luy meſmes ainçois qu'il mangeaſt, puis leur lauoit leurs pieds à l'exemple de noſtre Seigneur, qui laua les pieds à ſes diſciples le iour de la ſaincte Cene.

Cy parle du mariage du Roy Edouard d'Angleterre, & des alliances que voulut auoir avec luy le Roy de France. Puis dit comment les baſtards de Bourgongne retournerent de leur voyage: comment le Duc de Bourgongne fut malade iuſques à la mort: & comment ceux de Croi furent deboutez de la maiſon de Bourgongne.



Vdit an lxiiij. entre le Noël & le Karesme, Edouard Roy d'Angleterre que l'en nommoit Edouard à lōgues iambes, vn des beaux cheualiers d'Angleterre, print à mariage la fille du ſeigneur de Riuieres cheualier Anglois de moyen eſtat, lequel en ſa ieuneſſe auoit eſté enuoyé en France ſeruir la Comteſſe de Bethfort: le mary de laquelle eſtoit frere du Roy Henry, & regent de France ou lieu dudit Roy Henry: laquelle Comteſſe eſtoit ſeur au Comte Loys de S. Pol moult belle Dame. Laquelle apres le trespas de ſondit mary, vſant de ſon propre conſeil contre la volenté de tous ſes amis, eſpeciallement du Cardinal de Rouen ſon oncle, print à mariage & eſpouſa ledit ſeigneur de Riuieres, renommé d'eſtre le plus beau cheualier que l'en ſceuſt nulle part: lequel l'emmena toſt apres en Angleterre, & onques puis ne l'un ne l'autre ne ſ'oſerent trouuer en France, pour crainte des amis de la Dame. Ceſte Dame eut dudit ſeigneur de Riuiere pluſieurs enfans: & entre les autres vne fille la plus belle fille d'Angleterre: de laquelle fille ſe enamoura ledit Roy Edouard, & la print à femme eſpouſée pour ſa grande beauté, dont furent mal contens le Maieur de Londres & pluſieurs autres ſeigneurs d'Angleterre: & euſſent volentiers empesché que le mariage ne ſe fut point parfait. Mais afin qu'il ne ſemblaſt à ceux cy que la Dame ne fut de bon lieu: iceluy Roy Edouard enuoya deuers le Comte de Charrolois, & luy feit prier qu'il luy enuoyaſt quelqu'un ſeigneur du lignage de la Dame pour eſtre à leurs nopces: & le Côte luy enuoya Iagues de S. Pol oncle d'icelle Dame, treſbien accompaigné de cheualiers & de gentils-hommes, iuſques à cent cheuaux: laquelle venue veuë par les Anglois, feit ceſſer le murmure de pluſieurs gens, & ſi le contenta

tresgrandement le Roy Edouard, si qu'apres la feste faicte & qu'ils voulurent retourner en France, le Roy donna audit Iaques de S. Pol trois cens nobles: & à chacun cheualier & gentil-homme de sa compagnie cinquante nobles, & si les auoit fait festoyer moult noblement. On disoit lors communement, que le Comte de Charrolois luy auoit enuoyé compagnie de nobles hommes pour luy complaire, & affin de l'attirer à son amour, sachant que le Roy de France festoit voulu allier audit Roy Edouard à sa nuissance: & que le seigneur de Launoy estoit allé en Angleterre au commandement du Roy de France, pour traiter leur alliance: mais le Roy Edouard n'y voulut oncques entendre: les lettres mesmes que le Roy de France luy auoit enuoyées par le seigneur de Launoy, il les enuoya à veoir au Duc de Bourgongne: & si luy rescriuit tout ce que le seigneur de Launoy luy auoit dit de par le Roy de France, dont le Duc fut bien esbahy: si que des lors il se commença à doubter du Roy & d'autres qui hantoiēt entour luy. On disoit aussi que le Roy Edouard auoit fait dire par Iaques de S. Pol au Comte de Charrolois, que s'il auoit affaire de gens de guerre, qu'il luy en enuoyeroit tant comme il en voudroit auoir. En cest an lxiiij. fut la gelée si forte & si aspre, que pain & vin engeloient: à la table mesmes geloit, és celiers & en aucuns puy: & dura depuis le dixiesme iour de Decembre iusques au xv. iour de Feurier: & pour sept ou huit iour fut la gelée si aspre, qu'aucunes gens moururent de froid par les champs: & disoient les anciens que depuis le grand hyuer qui fut l'an sept, ils n'auoient veu si fort geler: & n'y auoit riuere de Seine ne d'Oyse qui ne fussent engeléés, si qu'on charioit dessus les riuieres, & si furent beaucoup de neiges en cest hyuer.

ENVIRON la fin de Feurier oudit an, retournerent messire Anthoine & Baudoin Bastard de Bourgongne du voyage qu'ils auoiēt voulu faire en Turquie. Et iacoit ce qu'ils se fussent partis de l'Escluse environ deux mille cōbat-tans, neantmoins en demourerent sans retourner quatre ou cinq cēs, par la mortalité qui se print en leur compagnie. Et laisserent leurs nauires & leurs harnois à Marseille, retournans par terre par Auignon & par Bourgongne, tant qu'ils vindrent à Bruxelles. En ce mesmes temps retournerent aussi de deuers le Roy l'Euesque de Tournay, & les autres ambassadeurs du Duc de Bourgongne: & fut lors commune renommée que s'ils n'y feussent allez, que le Roy estoit tout deliberé de faire entreprinse sur les païs du Duc, cuidāt auoir pour luy & pour le seruir le Comte de S. Pol & le Duc de Bretagne, mais il n'en peut finer. En ce temps aussi accoucha malade à Bruxelles le noble Duc Philippe de Bourgongne de si griefué maladie, que chacun despera de sa santé & de sa vie. En laquelle ville estoit lors son fils Comte de Charrolois: lequel doubtant de la mort de son pere, & tout aduertie que le seigneur de Croÿ & ses alliez auoient le gouvernement, comme de tous les païs du Duc, & par especial des meilleures & des plus fortes places qui y fussent: & considerant que ledit seigneur de Croÿ se fut tiré deuers le Roy plus de quinze iours par auant, enuoya tout soubdainement de ses plus feaux & priuez gens en Luxembourg, en Namur, en Boulle-nois, à Beaumont, en Hainault & en autres lieux, & lesdictes places prendre & saisir de fait par nouveaux capitaines, qu'il y enuoya si tost cōme il veit le Duc son pere en si dangereux estat par maladie, & que les medecins desperoient de son

son terour à santé: il enuoya plusieurs & diuers messages en tous les païs du Duc, aux Abbayes & aux monasteres, & en tous lieux où estoient gens de deuotion: & les feit aduertir de la maladie de sondit Pere, en les enhortant de faire prieres & deuotions & processions, tant par les gens d'Eglise comme par le peuple: & le bon prince amé de son peuple plus que nul autre, fut secouru de suffrages & d'oraisons, tellement que Dieu ouït leurs prieres, & reuint en assez bonne santé: & luy reuenu en santé ordonna son fils Gouverneur de tous les païs, lequel fils tout incontinent recula le seigneur de Quieurnain qui estoit son second Chambellan, apres le seigneur d'Auxi, & meit en son lieu le seigneur d'Aymeries, dont le Duc fut tresmal content, & reuoca tout incontinent l'ordonnance qu'il auoit fait à son fils: dont assembla le fils des plus grans de la Court. C'est à sçauoir le Comte de S. Pol, messire Anthoine le bastard son frere, & la pluspart de ceux du cōseil de son pere, & leur dit. Je ne vous vueil pas celer mon courage, ains vous vueil dire presentement ce que volentiers ie vous eusse dit pieça: ie vueil que vous & tous mes amis sçachent, que le seigneur de Croÿ & les siens & tous ses alliez, sont & les repute tous mes mortels ennemis, en leur declarant les causes pourquoy: & lesquelles causes il signifia tātost apres à toutes les bonnes villes des païs de sondit pere par ses lettres missibles, dont la copie est recitée ou prochain chapitre ensuiuant.

ET lors incontinent qu'il eut ainsi parlé à ses amis, il enuoya dire au seigneur de Quieurnain par deux ou trois cheualiers de son hostel: & lequel estoit premier Chambellan du Duc en l'absence du seigneur de Croÿ son oncle, qu'il partit du seruire du Duc son pere: & qu'il s'en allast le plus doucement qu'il pourroit sans ce que son pere en fut aduerty, affin qu'il ne s'en troublast: le seigneur de Quieurnain tout perplex de ces nouuelles partant enuis de celle noble maison, & doutant mesprendre enuers le Côte de Charrolois, vsant de son propre conseil s'en alla le lendemain au matin deuers le Duc: se ietta à genoux deuant luy & en le remerciant des biens & des hōneurs que le Duc luy auoit faits, luy supplia qu'il voulsist auoir prins en gré le petit seruire, qu'il luy auoit fait: disant outre qu'il luy donnast congé de soy partir, car le Comte son fils luy auoit mandé qu'il s'en allast: & pour tant doutoit encore, qu'il ne le voulsist faire tuer. Quand le Duc l'ouït ainsi parler, il se troubla durement, & luy deffendit qu'il ne s'en allast point: puis print vn espieu & s'en issit de sa chambre tant courroucé que plus ne pouoit, disant à ceux qui estoient entour luy, qu'il iroit veoir se son fils voudroit tuer ses gens. Aucuns de ses gens voyās la maniere s'en coururent clorre la porte de son hostel, & feirent mussier le portier à toutes ses clefs, affin que le Duc n'en peust issir: & par tant le conuint illec arrester attendans apres le portier. En ce point vindrent à luy la dame de Bourbon sa seur, & plusieurs autres Dames & Damoiselles de son hostel, & messire Anthoine le bastard de Bourgogne: & luy dirent tant d'vnes & d'autres qu'il amodera son courage & son ire, & retourna en sa chambre: entre ces choses le seigneur de Quieurnain se partit de l'hostel, & s'en alla luy deuxiesme le plus secretement qu'il peut. Le Comte de Charrolois sçachant que le Duc son pere estoit si mal content de luy, teint tous les iours conseil tant de ses gens comme des plus principaux conseilliers de son pere, querans voyes & moyens pour r'appaier

son pere, & n'y auoit celuy qui ne se employast à ce faire de tout son pouoir: & se conclurent ensemble que bon seroit que le Comte escriuit à toutes les bonnes villes des païs de son pere tout ce qu'il auoit sur le cueur: & qui le mouuoit à eslongner ceux de Croÿ du seruice de son pere & de luy: & pareillement aux nobles hommes, & que lesdictes lettres fussent leues publiquement par toutes ls bonnes villes, affin que chacun en fut aduertty: desquelles lettres la teneur s'ensuit ou prochain chapitre.

C'est icy la coppie des lettres que le Comte de Charrolois enuoya aux nobles hommes, & aux bonnes villes des païs du Duc de Bourgogne son pere: touchās les causes, le mouuans à eslongner ceux de Croÿ du seruice de sondit pere.



Reschiers & bien aymez vous sçauiez comment (graces à Dieu) mon tresredouté seigneur & pere à longuement & haultement & grandement, que par le moyen des grandes & notables vertus qui ont esté & sont en sa personne: il a mis & esleué ceste maison de Bourgogne, dont il est le chief tresnoble, en plusgrand degré qu'elle ne fut de la memoire des hommes. Et combien que de present à cause de son ancien aage, il soit foible de sa personne & trauaillé de maladie, Toutesuoyes si a il tousiours, comme nous cognoissons, vouloir & intention aussi de bons & grans moyens de continuer, d'entretenir sa seigneurie, & maintenir ses bons subiects de bien en mieux en iustice, paix & tranquillité: & ne voyons ne apperceuons chose aucune qui à ce donne empeschement, fors la fraude & damnable deception du fire de Croÿ & des siens, qui par ambition & extreme couuoitise, & pour leur singulier proufit veulent embrasser & auoir tout le gouuernement des païs & seigneuries de mondit seigneur & pere tant qu'il viura. Et comme ingrats apres son decez les mener & faire venir à totale ruine & perdition pour hayne de nous, que paruenue à aage de cognoissance, ils ont de tout leur pouoir labouré & rendu toute peine à eux possible, par faux & non veritables rappors de nous mettre en l'indignation & malle grace de mondit seigneur & pere, comme vous & les estats de sondit païs auez par nous esté & estes assez informez & aduertis: eux sentans que par ce moyen ne pourroient encore plainement paruenir à leurs fins & intentions: ont trauaillé de querir autres voyes pour nous greuer, deffaïre & destruire, s'il eust esté en leur puissance. Car monseigneur le Roy estant par deça encores Daulphin, ils se trauaillerent de faire mettre la main à nous, & nous constituer prisonnier. Ainsi que monseigneur le Roy depuis son couronnement nous à de sa grace certifié de sa bouche: dont & de sa singuliere amour qu'il nous demonstra, nous tenons & tiendrons à tousiours obligez à luy. Et depuis ledit couronnement pour le grand desplaisir qu'ils auoient, & prenoient de ce que monseigneur le Roy nous tenoit bons termes & nous tenoit en grace: ils n'ont iamais cessé iusques à ce, qu'ils ont trouué façon & maniere de nous mettre hors de sa grace, & du tout nous eslongner d'icelle. Et à leur moyen ses ambassadeurs en la presence de mondit seigneur & pere, luy estant nagueres en sa ville de l'Isle, nous ont publiquement imposé grandes charges, comme vous auez pou sçauoir: & ont lesdits de Croÿ & les siens offert & présenté à mōseigneur le Roy, de le seruir à l'encontre de nous apres le decez de

de mondit seigneur & pere, ou cas que greuer & guerroyer nous vouldroit : ce que ne pourrions croire que faire vouldist. Car nous n'auons fait ne ferons, se Dieu plaist, chose qui le doie à ce mouuoir. Et se sont vantez de nous faire guerre des places, & fortresses de Boulongne, Namur, Luxembourg & autres que tenoient en leurs mains, & icelles mettre en autre main que dudit seigneur & pere, de nous. D'autre part, lesdits de Croÿ ont par faulx & mauuais rapports à nostre charge, meu & incité mondit seigneur le Roy à racheter les terres royales, que mondit seigneur & pere auoit en gage. Et pource que mondit seigneur & pere y faisoit difficulté, & n'estoit pas enclin d'y entendre, par ce que mondit seigneur le Roy requeroit auoir quictance de certaine & grande somme, qui se deuoit payer en faisant ledit rachapt: ledit de Croÿ luy dit & fait dire, que mondit seigneur le Roy luy laisseroit lesdictes terres, & qu'il en iouïroit sa vie durant, nonobstant iceluy rachapt: dont toutesuoyes ledit seigneur de Croÿ sçauoit bien le contraire, ainsi qu'il est notoire. D'autre part, pour encores par autre voye vouloir & cuider greuer & dōmager les paÿs & seigneuries de mondit seigneur & pere, ledit seigneur de Croÿ & les siens ont de tout leur pouoir fauorisé, soustenu & aydé à l'encōtre de nous le Comte de Neuers nostre cousin: iacoit-ce qu'ils fussent & soiēt biē aduertis de ce que emprins auoit esté cōtre nostre personne, & comment nostredit cousin de Neuers s'estoit vanté, que mondit seigneur le Roy luy auoit promis de bailler quatre cēs lances avec l'ayde des Liegeois, pour entrer au paÿs de Brabant, & s'en faire seigneur apres le trespas de mondit seigneur & pere: & par ce moyen nous en debouter, dechasser & desheriter. Et pour luy bailler plus de puissance de pouoir faire dōmage aux paÿs & seigneuries de mondit seigneur & pere & à nous: iceluy seigneur de Croÿ luy auoit fait auoir le don du capitaine general, & lieutenant de mondit seigneur le Roy esdictes terres racheptées: lequel office en besongnant ou fait dudit desgagement, il s'estoit fait donner: & moyennāt ce nostredit cousin de Neuers luy a transporté vne Baronnie, nōmée Rosay en Rethelois, & dit on publiquement que luy & les siens sont alliez par serment scelez & promesses à l'encontre de nous. Et combien que puis nagueres de temps aucuns des seruiteurs de mondit seigneur & pere, desirans le radressement dudit seigneur de Croÿ enuers nous & nostre appaisement enuers luy & les siens, ayent esté à celle fin par deuers nous. Et pour honneur & reuerence de Dieu nostre createur, aucteur de paix & de mondit seigneur & pere, sans auoir resgard aux grādes iniures, persecutions, desplaisirs & dommage à nous faits par iceluy seigneur de Croÿ, & les siens, nous feussions condescendus à octroyer, & de fait expedier certaine cedulle signée de nostre main, contenant en effect: que quād ledit seigneur de Croÿ nous feroit aucuns seruices nous l'aurions & tiēdrions pour agreable, & ne serions pas ingrats enuers luy: & que se à cause desdits seruices qu'il nous feroit, luy aduenoit aucuns dommages ou inconuenient, luy en ce cas le porterions & soustiēdrions contre & enuers tous si auant, que par raison faire pourrions & deuierions. Toutesfois iceluy de Croÿ ne tint onc compte du contenu de ladicte cedulle: ains a depuis tousiours perseueré de mal en pis à l'encontre de nous: & quād on luy a remonstré, qu'il se deuoit mettre enuers nous en ses deuoirs, autrement qu'il n'auoit fait par cy deuant: & que les places qu'il tenoit de mondit

seigneur & pere, n'estoient pas son heritage, il a plainement respondu que mondit seigneur & pere les luy auoit données à la vie de luy & de ses enfans, & qu'il auoit bien intention que lesdits enfans les tiendroient apres luy : mesmement lesdictes places de Namur, Boulongne & Luxembourg. Et si est vray, que par deuant il s'est parforcé d'auoir le don de mōdit seigneur & pere de la vraye propriété & seigneurie desdictes places : lequel don il eust lors obtenu se mondit seigneur & pere y eust esté enclin, & se aucuns ses conseillers notables n'y eussent obuié par bonnes & louables remonstrances. Et en outre pour mieux cuidoier brouiller & mettre en inconuenient les païs de mondit seigneur & pere, le dit seigneur de Croÿ a esté nagueres de iours en la ville de Namur, en laquelle & ou chastel d'illec il a cuidé bouter & mettre grād nōbre de gens d'armes, faignant & prenant couleur que c'estoit contre les Liegeois. A quoy Dieu mercy il a failly : car les bonnes gens de la dessusdictē ville, sçachans & cognoissans la fin à quoy il tendoit, ne l'ont point voulu souffrir. Et quand il a ce veu, il s'en est party & s'en est allé à la ville de Beaumont en Haynaut : auquel lieu & ou chastel d'illec il a pareillement voulu mettre gens d'armes, mais ceux de la ville ne l'ont voulu souffrir. Et d'autre part, a puis pou de temps en ça fait venir deuant la ville de Luxembourg le Duc Loÿs de Bauiere, Comte de Valence son beau fils, où aucuns de par ledit Duc à tout grand nombre de gens de guerre, pour soy cuidoier faire maistre d'icelle ville & du chastel de Luxembourg : ce qu'il eut fait se prouision n'y eust esté mise auant sa venue. Finablement ledit seigneur de Croÿ & les siens par toutes les voyes & moyens qui leur ont esté, & sont possibles : mescognoissans, comme ingrats, les grans excessifs biens & hōneurs qu'ils ont receuz de mondit seigneur & pere, leur seigneur & prince, ont contenu & contendent iournellement à mettre à totale ruine, ou aumoins en dangier de guerre ou de grans inconueniens les païs & seigneuries de mondit seigneur & pere, & le bon & loyal peuple habitant & resident en iceux. Toutes lesquelles choses par nous considérées ayant pitié du poure peuple, desirans & voulans de tout nostre cueur (sans plus faire de dissimulation) pourueoir & remedier à ce que par le moyen & cause dudit seigneur de Croÿ, & des siens aucun esclandre, inconuenient ou dangier ne aduienne aux païs & subiets de mondit seigneur & pere : faisons garder songneusement, curieusement & seuremēt lesdits chasteaux de Namur, de Luxembourg & de Boulongne, pour en seruir mondit seigneur & pere, & tenir les païs en seureté, seuremēt & non à autre fin. Et aussi puis aucuns iours en ça, auons supplié & requis en toute humilité mōdit seigneur & pere, que son plaisir fut nous donner audience de parler à luy, à fin de luy pouoir remonstrer & declairer les choses dessusdictes, avec nostre bon desir, vouloir & intention sur celles. Et pource que n'auons encore pou paruenir à ladicte audience auoir : nous auons fait depuis deuers nous assembler ceux de son sang avec tous les cheualiers, escuyers & gens de conseil notables de son hostel, & du nostre estās presentemēt en ceste ville : ausquels bien au long auons remonstré & donné à cognoistre les choses auant-dictes : & comment nous estions & sommes concluds, determinez & deliberez de pourueoir à l'ayde de Dieu aux inconueniens apparans aduenir à fin telle, que mondit seigneur & pere demeure entier en sa seigneurie & nous apres luy.

Pour

Pour laquelle garder & entretenir, nous voulons mettre & exposer corps & biens & demourer son treshumble & obeissant, sans entreprendre aucun gouvernement, fors autant & si auant que son plaisir sera nous en bailler. En leur declairant, que pour nous mieux employer à le seruir & obeir comme bon & obeissant fils, est tenu de faire nostre intention est de continuellement nous tenir dorefnauant empres luy, & en son hostel, sans souffrir à nostre pouoir que iceluy seigneur de Croÿ ne les siens (lesquels tenons & reputons pour noz ennemis) ayent plus de gouvernement empres luy, en sondit hostel ne en ses paÿs, comme ils ont eu par cy deuant iusques à present. Leur declairant aussi que au regard des autres bons & loyaux officiers, conseilliers, seruiteurs & subiects de mondit seigneur & pere, nous les tenons & reputons tous noz bons amis, & les aymons & cherissons comme les nostres propres: & que se le temps passé ils ont bien & loyaument seruy, ils veulent continuer & perseverer de bien en mieux au bien de luy & de sesdits paÿs: & de nostre part entendrons liberallement, songneusement & de bon cueur à faire & executer tout ce qu'il luy plaira par bon aduis, & conseil nous commander & ordonner pour le bien, seureté & deffence de sesdits paÿs & seigneuries: en leur requerant que tous voulsissent auoir regard & consideration à nostre bon, loyal & entier vouloir: sans dorefnauant porter, aymer, soustenir ne fauoriser en aucune maniere ledit seigneur de Croÿ ne les siens (lesquels, comme dit est, nous tenons & reputons noz ennemis) Ains nous aydent & confortent en tout ce que pourrions auoir à faire, pour la garde, deffence & preservation desdits paÿs de mondit seigneur & pere: laquelle nostre requeste tous ceux qui estoient à l'assemblée dessusdicte ont liberallement accordée & octroyée.

DE PUIS ces choses le seigneur de Quieurain, nepueu dudit seigneur de Croÿ s'est party de ceste ville: dont mondit seigneur & pere a esté mal content: & s'est à ceste cause aucunement meu & troublé à l'encontre de nous: mais au plaisir de nostre seigneur & à l'ayde & bonne remonstrence de ses bons & loyaux conseilliers, nous esperons tellement faire qu'il se contentera & appaisera. De toutes lesquelles choses treschiers & bien aymez, vous aduertissons par ces presentes comme noz bons & loyaux amis: ausquels nous voulons & desirons plainement ouurir & manifester le secret de nostre pensée. Et affin que vous sçachez & cognoissiez la pure verité des choses, ainsi qu'elles sont aduenues, vous priant & requerant trefacertes, trefaffectueusement & de ce cueur, que vous ne vueillez recevoir ne donner faueur ausdits de Croÿ ne à leurs alliez, tenans ne qui tiendront leur party: ainçois en faiçtes comme des ennemis de nous & de mondit seigneur & pere: & que ne vueillez adiouster foy aux rapports, lettres ne escriptures qu'on vous pourroit faire au contraire des choses dessusdictes: car nous voulons & desirons de tout nostre cueur ades seruir, honnorer & obeir mon deuantdit seigneur & pere: & en toutes façons & manieres à nous possibles, ainsi que tenus en sommes, & auons fait iusques à ores: ne ja ne ferons, se Dieu plaist, chose aucune dont par raison il ayt ne doïue auoir cause d'estre mal content de nous: ainçois sans entreprendre sur sa personne, sur sa seigneurie, ne sur le gouvernement d'icelle, nous employerons de tout nostre pouoir en corps & en biens à la bonne garde, seureté & preser-

uation desdits paÿs & subiects enuers & contre tous : qui parforcer ou aduancer se voudroient de les greuer, fouler, inuader ou adommager en quelque maniere que ce soit: à quoy vous prions & requerons aussi trescordiallemēt nous vouloir seruir, ayder & assister au mieux que possible vous fera se mestier en auons, comme nous y auons parfaicte fiance. Treschiers & bien ayez, le S. Esprit vous ayt en sa bonne garde: escrit à Bruxelles le xxij. iour de Mars l'an mille cccc. lxiiij. Ainsi signé CHARROLOIS: & estoit la superscription desdictes lettres, de par le Côte de Charrolois seigneur de Chasteau-Belin & de Bethune.

Cy dit comment le Duc de Berry seul frere du Roy de France, s'absenta de l'hostel du Roy, & s'en alla à refuge au Duc de Bretagne: & comment le Comte de Dampmartin eschappa de la prison du Roy: & des lettres du Duc de Berry au Duc de Bourgogne.

ENuiron l'entrée de Mars audit an lxiiij. Charles Duc de Berry seul frere du Roy Loÿs de France, aagé de xvij. ans ou enuiron, que le Roy tenoit delez luy plus simplement qu'il ne voulsist, & en moindre estat qu'il n'auoit eu du viuant de leur pere, faignāt vn iour d'aller à la chasse tādīs que son frere estoit allē en pelerinage delez Poictiers: dont il se fut party au matin, & s'en alla luy x. ou enuiron, à la plus grād hastiueté qu'il peut: & faisoit rompre apres luy les ponts où il passoit, à fin s'il estoit suiuy qu'il ne fut r'ataint: & s'en alla à refuge au Duc de Bretagne. Et disoit on lors, qu'iceux deux Ducs de Berry & de Bretagne auoient puis pou de temps fermé alliances avec le Duc de Bourbon & de Calabre, & avec le Comte de Charrolois & autres seigneurs du sang de France à l'encontre du Roy, s'il estoit qu'il voulsist aucuns d'eux greuer ou nuire: car le Roy vsoit forment de ses voluptez, lesquel les sembloient à plusieurs estranges & desraisonnables. Pour lequel si soubdain departement de son frere, le Roy fut tresdolent & desplaisant: & manda hastiuement en toutes les bonnes villes & forteresses de son Royaume, que chacun fut sur sa garde, & qu'ils feissent par tout bon guet. Et entre les autres outre ce mandement, il quicā aux villes desgagées sur la riuere de Somme certains payages, affin de plus attirer leurs courages à son amour & seruice. En icelle sepmaine qui lors estoit la premiere de Mars, le Comte de Dampmartin que le Roy detenoit prisonnier dedans la bastille de S. Anthoine à Paris, trouua moyen de faire vn trou ou mur d'vne des tours de leans: par lequel il issit, & trouua vn bateau prest sur l'eaüe du fossé auquel entra. Puis si trouua cheuaux prests sur le bort du fossé, qui l'attendoient: illec monta sur l'vn & se meit à chemin droit en Bretagne. En celle mesme sepmaine le seigneur de Roubais accompagné de plusieurs gens de guerre au command du Comte de Charrolois, s'en alla prédre & saisir la ville de Launoy & le chasteau, cuidans trouuer le seigneur de Launoy lors gouuerneur de l'Isle, & Baillif d'Amiens nepueu du seigneur de Croÿ: mais ne trouuerent ne luy ne sa femme ne ses enfans: car il auoit esté aduerty de leur venue & auoit tout vuidé: mesmement son or & son argent & ses meilleurs biens, & s'estoit retraits en la cité de Tournay, qui estoit pres de sa maison à deux lieües. Encores en celle mesmes sepmaine furent prins par le commandement dudit Comte de Charrolois

lois l'Abbé de Hauons, & vn nommé Pierrechon seruiteur & sommeillier de corps du seigneur de Croÿ, & qui estoient les plus priuez dudit seigneur : & furent retenuz prisonniers vne espace de temps. Tost apres le Comte de Charrolois donna à Iaques de S. Pol frere du Comte de S. Pol la ville & chastel de Launoy. Dedans lequel chastel furent trouuez pour la garnison de leans de cent à six vingts pourceaux salez, & de farine grand planté, avec blé & auoyne à grād largesse : & si estoit leans vn moulin tout neuf à mouldre blé. En ce mesmes mois de Mars oudit an lxiiij. enuoya le Duc de Berry au Duc Philippe de Bourgongne, vnes lettres escriptes à Nantes le xv. iour de Mars : par lesquelles il luy escriuoit ainsi que apres s'ensuit. Treschier & tresamé oncle ie me recomande à vous tant comme ie puis : & vous plaise sçauoir que depuis aucun tēps en ça, i'ay eu souuentesfois les clameurs de la pluspart des seigneurs du sang mes parens, & autres nobles hommes de ce Royaume en tous estats, du discord & piteux gouuernement qui par tout iceluy a cours, par le conseil des gens estans entour de Monseigneur, plains de toute mauuaistié & iniquité : lesquels pour leur proffit & affection singuliere & desordonnée ont mis monseigneur en suspection & hayne vers vous, moy & tous les seigneurs dudit Royaume : mesmes vers les Roys de Castille & d'Escoce alliez de si long temps à la Couronne que chacun scet : au regard comment l'auctorité de l'Eglise a esté gardee, iustice faicte & administree : les nobles maintenus en leurs droits de noblesse & vsaiges, le poure peuple supporté & gardé d'oppression ne vous en escripts plus auant, car ie sçay que assez en estes informé. Et moy desplaisant des choses susdictes ainsi que doy estre, comme celuy à qui le fait touche de si pres que chacun scet : & desirant y pourueoir par le conseil de vous, desdits seigneurs & parens, & autres nobles hommes, qui tous ont promis moy y ayder, & seruir & sans espargner corps ne biens au bien du Royaume & de la chose publique d'iceluy, aussi pour sauuer m'a personne que ie sentoye en danger : car incessamment & ouuertement mondit seigneur & ceux d'entour luy parloient de moy parolles telles, qui par raison me deuoient donner cause de moy doubter : ie me suis party d'avec mondit seigneur & venu vers le beau cousin de Bretaigne : Lequel ma fait si bon recueil & si louable, que assez ne m'en sçauroye louer : & est deliberé de moy seruir de corps, de biens & de toute sa puissance au bien dudit Royaume & de la chose publique. Et pource treschier & tresamé oncle, que mon intention & desir est de moy employer avec vous & lesdits seigneurs mes parens : par le conseil desquels ie vueil vser & non autremēt à la ressource & adresse dudit Royaume desolé, & que ie sçay que estes des plusgrans de ce Royaume, à qui le bien ou le mal touche bien auant, & Doyen des Pers de France, Prince renommé, d'honneur & de iustice, ainsi qu'il appert par voz grans faits conduite & entretenement de voz grandes seigneuries : sçachāt que le desordre dudit Royaume vous à despleu & desplaist comme raison est, desiroye de tout mon cueur avec vous & les autres seigneurs mes parens pouoir assembler, affin de pourueoir par le conseil de vous & d'eux à tous les faits qui par deffaute d'ordre, iustice & police sont au iourd'huy en tous les estats dudit Royaume : & au soulagement du poure peuple qui tant a porté que plus ne peut, & mettre tel ordre en tous endroits, qu'elle puisse estre à

Dieu plaissante, à l'honneur, felicité & bien dudit Royaume & à retribution d'honneur & loüable memoire perpetuelle de tous ceux qui sy serôt employez. Si vous prie treschier & trefaymé oncle, qu'en ceste matiere qui est si grande & pour si bone fin, vous plaise monstrier & assister & employer: & aussi faire employer mon beau frere de Charrolois vostre fils en mō ayde, comme ie me suis tousiours confié qu'ainsi le feriez: & affin que vous & moy puissions assembler, qui est la chose que plus desiroye (pource que mon intention est de brief & incontinent entrer en paÿs, & tenir les chāps avec les autres Princes & seigneurs, qui m'ont promis moy y accompagner & ayder) ie vous prie qu'il vous plaise mettre sus & tirer de vostre paÿs en paix vers France: & ou cas que faire ne le pourriez, y vueillez faire tirer mōdit beau frere de Charrolois avec bonne puissance de gens. Et avec ce enuoyer & faire venir deuers moy aucun de vostre conseil feable, pour estre & assister pour vous, à ce que lesdits autres seigneurs du sang aduiseront estre à faire pour le bien dudit Royaume: & par lesquels pourrez tousiours estre informé de ma bonne & iuste intention: laquelle par vous & lesdits seigneurs du sang, ie vueil conduire & non autrement: & ce que par mondit beau frere en vostre absence sera fait & dit pour le bien de la chose publique du Royaume & soulagement du pauvre peuple, ie le soustiendray & maintiendray iusques à la mort & de ce pouez estre bien certain. Treschier & trefaymé oncle, faictes moy tousiours sçauoir sil est chose que pour vous puisse: & ie le feray de bō cuer, priāt Dieu qu'il vous doint bonne vie & ce q̄ vous desirez. Escrit à Nantes en Bretagne le xv. iour de Mars. La subscription estoit vostre nepueu Charles, & le dessus, A mon oncle le Duc de Bourgogne. Environ ce temps retourna d'Angleterre Iaques de S. Pol, que le Comte de Charrolois eut enuoyé deuers le Roy Edouard, tant pour luy faire honneur à ses nopces, comme dit est cy dessus, comme pour auoir son ayde contre le Roy de France se besoing luy en estoit, ou au moins qu'il ne le vouldist nuire: car le Roy de France y auoit enuoyé premier le seigneur de Launoy pour les allier ensemble à la nuisance dudit Comte. A quoy le Roy Edouard n'auoit voulu entendre: mais pour complaire au Duc de Bourgogne, luy auoit enuoyé les propres lettres que le Roy de France luy eut enuoyées: dont le Duc fut tout esbahy, pource mesmement que le seigneur de Launoy auoit porté lesdictes lettres au Roy Edouard. En ceste année aussi des le huictiesme iour d'Auril fut vne grāde coniunction ou ciel de Saturne & de Iuppiter: dont les clerks iugerent grans maulx aduenir au monde.

Cy parle des lettres que le Roy enuoya au Duc de Bourbon, & le Duc au Roy. Et d'unes autres lettres que le Roy feit publier par tout son Royaume: & d'unes autres que le Comte de Neuers feit publier es villes, dont il estoit lieutenant pour le Roy de France.



Vdit mois de Mars l'an lxiiij. le Roy de Frāce enuoya lettres signées de sa main au Duc de Bourbon. Par lesquelles il luy signifia comment son frere le Duc de Berry festoit party de delez luy, & estoit allé en Bretagne sans son sceu. Puis luy escriuoit que toutes excusations cessans, il veint deuers luy incontinent ses lettres veües: & qu'il adioustast foy

foy à ce que Ioffelin du Boys luy diroit de par luy celle fois, & qu'il meit cent lances sur les champs pour les auoir toutes prestes. Sur lesquelles lettres le Duc de Bourbon icelles veües & par credence ouïr, rescrit au Roy vnes lettres. Par lesquelles il recitoit tout premierement ce que le Roy luy auoit escrit, en le remerciant de la grande confidence qu'il monstroït auoir en luy. Puis l'aduertit comment par les fautes & iniustices, que les seigneurs de son sang ont veu parmy le Royaume: & dont le Roy auoit eu plusieurs remonstrances & doleances par plusieurs d'iceux seigneurs, ausquels les choses touchoient de pres: & neantmoins n'y auoit encores voulu entendre, par l'empeschement que y mettoient aucuns qui se tenoient entour luy: pourquoy tous lesdits Princes & seigneurs de son sang, voyans que pour doleances ne remonstrances qu'ils eussent fait, ou fait faire prouision n'y auoit esté mise, estoient concluds & alliez ensemble par sermens & par leurs scelez baillez les vns aux autres d'y pourueoir, & y mettre remede & ordre autre q̄ n'y auoit esté depuis que la Couronne estoit venue en ses mains: & tellement que ce seroit à son honneur mesmes, & de sa Couronne, & au bien & vtilité de la chose publique, de tout son Royaume, & à la recommandation & memoire perpetuelle de tous ceux qui y rendroient peine. Puis dit par ses lettres qu'attendu ce que dit est, le cas ne requiert pas qu'il voise ne qu'il se trouue deuers luy, & que s'il estoit bien aduisé il pouruoyeroit à tout, ainçois que les Princes se meissent sus pour ce faire en son default: priant en fin de le tenir pour excusé qu'il ne va deuers luy: & declarant expressement qu'il est de celle alliance avecques les autres Princes pour le bien du Roy & de tout son Royaume: en fin suppliant que pour l'honneur de Dieu il y vueille pourueoir de bonne heure pour euitier l'inconuenient, qui par faute de prouision pourroit aduenir en son Royaume: & finablement luy escrit & luy assure que celle besongne n'est pas entreprinse contre sa personne, ne contre le bien de son Royaume: mais seulement pour remettre les choses en ordre pour son honneur, & pour son bien, & pour le reliefuement du pauvre peuple, qui sont choses de tout droit & bonne raison & dignes de recommandation: & où il eschiet prompte & conuenable prouision: ces lettres furent escrites à Molins le xiiij. iour de Mars. Ces lettres veües par le Roy & la matiere par luy bien entendue, il feit escrire lettres & les enuoya publier par tout son Royaume: contenant en substance comme aucuns meuz de mauuais espoir, & en damnable propos: non ayans regard à Dieu honorer ne conscience ne à loyauté, qu'ils luy doiuent, eussent conspiré & machiné contré luy & contre le bien de la chose publique de son Royaume: vueillans empescher le bon & paisible estat lors estant par tout iceluy: ont induit & suborné son frere de Berry ieune d'aage, & non considerant leur mauuaïse intention de soy separer d'avecques luy, & de son obeïssance: & ont fait dire & semer par tout qu'il vouloit sondit frere faire emprisonner, & attenter à sa personne ce qu'il ne pensa oncques. Ont aussi prins & fermé alliances ensemble sous ombre de bien qu'ils faignent vouloir à la chose publique du Royaume. Iacoit ce qu'ils ne contendent que mettre guerre & trouble au Royaume, comme faux pariures & mauuais seducteurs. Mesmement par leur occasion pourroient les Anglois anciens ennemis du Royaume eux ioindre avec eux, & descendre au Royaume, & recommencer les sem-

blables maux & desertions, qu'on y auoit veu puis pou de temps par la guerre, qui y auoit esté, voire si grans que c'estoit horreur: & neantmoins doubans lesdits seducteurs, traystres & rebelles au Roy & à la Couronne, que pour leurdicte alliance ne soit le Roy si troublé contre eux, qu'il ne leur vueille pardonner leur offence, pourtāt ne l'osent requerre: ains se preparent à la guerre, & à force soubstenir leur damnable propos: ce nonobstāt le Roy signifie que lesdictes lettres à tous Princes, seigneurs, prelatz, & toutes autres gens estans de celle alliance, que fils le veulent laisser & retourner à sa grace qu'ils soient assurez d'y estre receuz benignement: & n'y mettent point de doute ou cas qu'ils y viendront en dedans vn mois, ou au plus tard six sepmaines apres la date desdictes lettres. Et ce fait seront quittes, absous & remis en leur bonne fame & renommée, & en tous leurs biens faucuns à celle cause eussent esté prins & empeschez. Et finalement mande le Roy par icelles lettres & commande à tous capitaines, iuges, officiers & tous autres, qu'ils facent celle grace & pardon du Roy publier par tout en leurs places, & recoiuent les delinquans à ladicte grace qui viendront deuers eux en dedans le terme dessusdit. Lesdictes lettres données à Thouars sous le grand seel du Roy le xvj. iour de Mars audit an lxiiij. Des ce mesmes iour Iean Comte de Neuers lieutenant & capitaine general de par le Roy és parties des païs, estans entre les riuieres d'Oyse & de Somme, enuoya ses lettres par toutes les bonnes villes desdictes marches, contenant en effect comment le Roy luy auoit escrit & mādē, qu'il fait bonne garde de toutes lesdictes places: & qu'il luy en rēdit bon compte. En outre qu'il fait preparer tous les vassaux & subiects desdits païs pour seruir le Roy en armes, quand aduertis en seroient. Et pourtant ordonnoit & vouloit estre publié par tout, que tout homme accoustumé d'armer, fut prest au seruice du Roy si tost comme il les manderoit & non plus tost sur les peines accoustumées. Et furent lesdictes lettres données à Melieres sur Meuze ledit xvj. iour de Mars oudit an lxiiij. D'autre part le Comte de Charrolois escriuit aussi vnes lettres en iceluy mesmes temps au gouuerneur, majeur & escheuins d'Arras, contenant en effect qu'il auoit entendu que le seigneur de Croÿ, & les siens faisoient assemblée de gens d'armes, & de les leuer & tirer hors des païs du Duc son pere. Et pareillement le Comte de Neuers son cousin, qui sont alliez ensemble pour dommager & greuer lesdits païs. A quoy il vouldroit remedier & obuier. Si leur mande que par cry publique ils facēt deffence és mettes de leurs offices, que nul ne se mette sus pour seruir sondit cousin ne ceux de Croÿ ses ennemis, se n'est par son expres commandement & ordonnance, & de sondit pere sur peine de confiscatiō de corps & de biens. Lesdictes lettres données à Bruxelles le xxv. iour de Mars audit an soixante quatre.

Comment le Duc de Bourgogne pardonna à son fils: & de la grande assemblée qu'il fit de gens d'armes pour aller en l'ayde du Duc de Berry contre son frere le Roy de France. Puis parle de plusieurs autres choses qui aduindrent lors.



Le xij. iour d'Auril oudit an lxiiij. deuant Pasques qu'il estoit le iour de la Passion de nostre benoist sauueur Iesus Christ, vn notable clerc prescha en la maison du Duc de Bourgongne en la ville de Bruxelles moult notablement deuant le Duc: & par sa parolle demonstra à propos que c'estoit de clemence & de misericorde, affin d'atraire le Duc à pardonner à son fils son mautalent. Ce qu'il n'auoit voulu faire deuant ce iour. Apres lequel preschement plusieurs cheualiers de l'ordre du Thoison se tirerent deuers le Duc, & luy prierent moult humblement qu'en ensuiuant la parolle du prescheur, il voulsist pardonner à son fils ce qu'il luy auoit meffait: & tellement que le lendemain nuict de Pasques son fils Comte de Charrolois, enuiron douze heures de iour, s'en vint au Duc son pere & se meit à vn genouil, & luy dit telles parolles en substance. Mon tresredoubté seigneur & Pere ie vous supplie en l'honneur de la Passion de nostre seigneur Iesus-Christ, qu'il vous plaise moy pardonner ce que ie vous ay meffaiçt: car ce que i'ay fait, ie l'ay fait pour moy preseruer de mort & vous aussi, & pour la preseruatiõ de tous voz païs & subiects, comme cy apres ie diray plusaplain. Plusieurs autres parolles dit le fils au pere tressagement, & treshautement au gré & plaisir de tous les escoutans. Et le Duc le tenoit par le coulde, en le regardant tousiours au visage, puis luy dit: Charles mon fils, quanques vous me feistes oncques iusques au iourd'huy, ie le vous pardonne, soyez moy bon fils & ie vous seray bon pere. En disant laquelle parolle les larmes apparurent aux yeux du Duc, & si feirent elles à tous ceux de la compagnie, iacoit-ce qu'ils y fussent presens plusieurs cheualiers & seigneurs & autres en grand nōbre. Ces choses faïctes & les festes de Pasques passées qui commencerent l'an mille cccc. lxv. le Duc manda venir deuers luy à Bruxelles les trois estats de ses païs au xxiiij. iour d'Auril: ausquels illec venuz & assemblez deuant luy, il feit par l'Euesque de Tournay lire les lettres que le Duc de Berry luy eut enuoyées: puis leur feit dire que son intention estoit de faire son armée la plus grande qu'il eut oncques faïcte, pour ayder ledit Duc de Berry: de laquelle il feroit chief son fils Comte de Charrolois pour estre preste le viij. iour de May: ce qu'il ne pouoit faire sans grande despence. Et pourtant feit demande au païs d'Arthois de xviiij. mille francs, & aux autres païs pareillement selon leur puissance. Iour fut prins de respondre au xij. iour de May: le païs d'Arthois luy accorderent l'ayde de xiiij. mille frācs & les autres païs chacun à son aduenant. Ce temps pendant se preparerēt & meirent sus le Comte Loys de S. Pol & ses trois fils, Iaques de S. Pol son frere, le seigneur de Rauestain nepueu du Duc, les deux bastards de Bourgongne, messire Anthoine & Baudoin, & presques tous les cheualiers & nobles hommes des païs du Duc, d'Arthois, de Boullenois, de Hainault, de Flandres, de Brabant, de Hollande & de Zelande, en si grand nombre qu'ils furent estimez à plus de xiiij. mille combattans: c'est à sçauoir xiiij. cens lances & viij. mille archiers, & autres crennequiniers, couleuriniers & coustilliers, & gens de guerre, sans compter ceux du Charroy qui y estoient en grand nombre, portās chacun vn maillet de plomb, avec ceste compagnie n'estoient aucuns de Bourgongne, lesquels deuoient faire leur armée à par-eux, pour venir ioindre avec les autres: & estoient bien six cens lances & autres gens de guerre: dont estoient chiefs le Mareschal de Bour-

1465.

gongne, le Prince d'Oranges, le seigneur d'Argueil, les seigneurs de Chargny, de Thoulougon & plusieurs autres grans seigneurs du pays. Entre temps que ceste armée mettoit sus Jean de Longueual, capitaine des archiers de messire Anthoine bastard de Bourgongne, accompagné d'une route de gens d'armes, s'en alla prendre & saisir les villes d'Arleux & de Creuecueur, que le Roy faisoit tenir en sa main: & auoit tollues audit bastard: puis somma le capitaine du chastel dudit Creuecueur de le luy rendre amiablement, ou il feroit tant qu'il le prendroit de force: lequel capitaine le luy rendit sauue son corps & ses biens, & s'en retourna en Normãdie dont il estoit. Et quand Jean de Longueual eut fait cest exploict, il laissa en icelles places les gens de guerre pour les garder: puis s'en retourna avec les autres. Quand le Roy de France fut adcertené de celle grande armée qu'auoit le Comte de Charrolois, il enuoya son Chancelier à Amyens & à Abbeuille. Et tost apres iceluy Chancelier se retourna avec les Comte d'Eu & de Neuers, & feirent publier par tout de par le Roy, que tout homme qui auoit accoustumé de porter armes, fussent prests pour seruir le Roy: & ne s'armassent deffoubs autre quelconque seigneur ou ses commis, sur peine de confisquer corps & biens: mais ce nonobstant plusieurs cheualiers & nobles hommes qui tousiours auoient tenu le party de Bourgongne, se meirent avec le Comte de Charrolois, mettans à l'adventure tout ce qu'ils tenoient du Roy. Aucuns en y eut qui ne s'armerent de l'un costé ne de l'autre: il en y eut des autres aussi qui s'armerent deffoubs le Roy. Entre ces choses le Comte de Neuers cognoissant qu'il estoit en la male grace du Comte de Charrolois, enuoya plusieurs messages deuers luy pour trouuer sa paix: mais ne pouoient finer d'estre ouïs, dont aduint que plusieurs de ceux qui seruoient le Comte de Neuers & des plus principaux de son hostel, laisserent son seruice & se retrahirent deuers le Comte de Charrolois, pour demourer en sa bonne grace. Quand le Comte de Neuers se veit ainsi abandonné, il enuoya prier au seigneur de Saueuses qu'il allast parler à luy, mais il n'y voulut point aller, & si luy manda plusieurs fois. Or aduint que le Comte sceut que le seigneur de Saueuses deuoit un iour passer à Bray sur Somme, & lors luy mesmes s'en alla à Bray, où il le trouua & parla à luy bien longuement, affin tousiours qu'il luy peut trouuer son moyen d'estre appaisé au Comte de Charrolois. Et le bon seigneur luy promet qu'il en parleroit bien & voulétiers au Comte de Charrolois, ou cas qu'il ne s'armeroit point ne pour l'une partie ne pour l'autre: & qu'il ne boutteroit dedans la ville de Peronne nulle garnison de gens d'armes: ce que luy promet à faire. Or aduint entre-temps que le Comte s'en fut allé de Bray à Amyens, qu'il fut aduertty par ceux de Peronne que le Comte de S. Pol: lequel auoit fait ses monstres deuant la ville, les auoit sommez de rédre la ville au Duc de Bourgongne ou à son fils, & qu'ils auoient prins trois iours de delay pour luy respondre. Et pourtant ces nouvelles ouïes par le Comte d'Amyens incontinent, avec luy Ioachin Rouhault Mareschal de France: lequel auoit deffoubs luy cent lances & deux cens archiers de l'ordonnance du Roy, & rentrent en Peronne le xv. iour de May à cinq ou six cens cheuaux de gens de guerre. Commune renommée courroit lors, que le Duc de Bourgongne auoit donné en mariage au Comte de Neuers son nepueu les terres & chastellenies de Peronne, Montdidier, & Roye, pour

pour en iouir sa vie durant, ou iusques à ce qu'elles seroient racheptées de luy pour xxxij. mille courōnes d'or, ou qu'il auroit autre seigneurie d'autre valleur que lesdictes chastellenies. Et le Comte maintenoit le deuoir auoir heritablement à tousiours, par don & octroy du Roy, & du Duc de Bourgongne puis pou de temps. Et le Comte de Charrolois disoit que audit Côte de Neuers estoient escheutes nouuelles & grandes seigneuries. C'est à sçauoir les Comtez de Neuers & de Rethel, & autres grandes seigneuries: pourquoy il pretendoit r'auoir pour le Duc son pere lesdictes chastellenies. Attendu mesmement que son pere les auoit données par la maniere dicte, sans son gré qui estoit son seul fils & heritier. Le duc mesmes maintenoit qu'il n'auoit données lesdictes terres qu'à rachapt, & que se le Comte auoit ses lettres qui cōtenissent plus auant, qu'elles auoient esté faictes sans son sceu & scellées. Entre ces choses le seigneur de Saueuses auoit si bien besongné deuers le Comte de Charrolois pour le Comte de Neuers, qu'on disoit tout cōmunement qu'il auroit sa paix. Mais les nouuelles qui vindrent, qu'il auoit bouté dedans Peronne grand nombre de gēs de guerre contre ce qu'il auoit promis, rompirent tout.

Comment le Comte de Charrolois print congé du Duc de Bourgongne son pere pour tirer en France à tout son armée & grande artillerie. Et comment il passa la riuere de Somme & meit en son obeïssance Neelle, Roye & Montdidier: puis alla assieger Beau-lieu & passer la riuere d'Oyse.

LE xv. iour de May oudit an lxx. ou enuiron, sachant le Comte de Charrolois que son armée estoit toute preste & toute son artillerie: & que son autre armée estoit aussi en Bourgongne toute preste luy estant à Bruxelles: print congé du Duc son pere: auquel le Duc dit selon commune renommée: mon fils faictes bien la besongne & vous y portez bien, & ayez mieux mourir que fouir: se vous estes en danger, vous ny demourrez pas pour employer encores cent mille hommes de guerre. Ainsi donques le congé prins du pere, le fils s'en alla au giste au Quesnoy en Hainault, là où l'attendoient deux ambassades. C'est à sçauoir vne de Bretagne & vne du Roy de France: de laquelle estoit chief l'Euesque du Mans frere du Comte de S. Pol: ceux cy besongnerent bien pou ou neant, & ceux de Bretagne furēt aussi bien tost expediez. Puis s'en alla le Comte le lendemain à Honnecourt entre Creuecueur & S. Quentin, là où l'attendoit toute son artillerie, dont il auoit tāt que c'estoit vne grand merueille. Car par la ville d'Arras en estoient passez deux cens & xxxvj. charretes, venans du chastel de l'Isle, que bombardes, que serpentes, que crapaudeaux, que mortiers & autre artillerie à pouldre, sans les autres venans de Brabant & de Namur qui passerent à Cambray. De Hōnecourt s'en alla le Comte loger à Roseil à deux lieües de Perōne, là où il se tint aucūs iours accompagné de tout son ost & de son artillerie, dont cuiderēt bien ceux de Peronne auoir le siege: mais le Comte de Charrolois pensoit à faire autrement. Le iiij. iour de Iuing oudit an lxx. se partit le Comte de Roseil & fit toute son armée tirer à Bray sur Somme: ceux de Bray vindrent à son encontre, & luy offrirent les clefs de la ville: puis passerent outre la riuere le Comte de S. Pol & le bastart de Bourgongne, avec leurs gens, & s'en allerent deuant Neelle en Ver-

mandois: & feirent semblant de vouloir assaillir la ville, mais ceux de dedans la leur rendirent par tel si, que huit hommes d'armes qui leans estoient en garnison, s'en iroiēt sauues leurs vies, cheuaux & harnois: & les archiers qui y estoient enuiron six vingts, s'en iroient en leurs pourpoints ou paletoz chacun vne vergette en sa main: neantmoins le seigneur de Neelle qui y fut trouué fut detenu prisonnier. En ce mesmes iour le seigneur de Haubourdin, bastard du Comte de S. Pol à grand route de gens d'armes & d'archiers s'en allerent à Roye en Vermandois, & feirent semblant de vouloir la ville assaillir: mais ceux de ladicte ville doubans le peril, se rendirent à luy pour & ou nom du Comte de Charrolois. Et ils y entrerent & trouuerent leans la Comtesse de Neuers: à laquelle ils ne feirent force ne grief, ains luy donnerent faculté de soy retraire, là où elle voudroit. Et elle se retrahit à Compiengne deux ou trois iours apres, & la conuoya le seigneur de Rauastain à cinq ou six cens combattans, deux ou trois iours apres se rendirent au Comte de Charrolois ceux de Montdidier, en laquelle ville estoit Hues de Mailly, seigneur de Bouillencourt cheualier hardy & vaillant. Lequel auoit tousiours tenu le party de Bourgogne. Et aussi en demoura il capitaine du gré de tous ceux de la ville: laquelle ville aussi auoit tousiours tenu ledit party de Bourgogne. Tandis que lesdictes villes se mettoient ainsi en l'obeissance du Comte de Charrolois, le Comte de Neuers doubant qu'il ne fut assiegé dedans Peronne, s'en partist, avec luy Ioachin Rouhault Mareschal de France, le seigneur de Moÿ & autres iusques au nombre de deux mille combattans, & s'en allerent pour entrer dedans la cité de Noyon: en laquelle ils n'entrerent pas si tost, & iusques à ce qu'ils eurent promis qu'ils n'y entreroient pas tous, & qu'ils ny feroient quelque desfroy. Mais nonobstant leur promesse ils entrerent tous & y feirent desfrois assez. Et aduint à leur entrée que ceux de la ville cuiderēt abbatre leur arche, & cheut sur vn homme d'armes & le tua. Enuiron le quinziésme iour de Iuing le Comte de Charrolois se partit de Roye, & s'en alla assieger le chastel de Beaulieu forte place, appartenant au seigneur de Neelle: dedans lequel chastel estoient plusieurs cōpagnons de guerre, lesquels ardirent le plus beau de la ville entour le chastel, qui fut vn grand dommage. Ce nonobstant le chastel fut battu d'engins à pouldre, tellement que ceux de dedans le rendirent au iour S. Iean Baptiste, sauues leurs corps & leurs biés. Tandis que le siege estoit deuât Beaulieu, le seigneur de Haubourdin bastard de S. Pol, trouua maniere de passer par bateaux la riuiera d'Oyse, & s'en entra en la ville de Ponts-sainct-Maxence, ainçois que ceux de la ville en sceussent riens. Ceux cy estoient de l'auantgarde du Comte de Charrolois, dont estoit conduiseur le Comte de S. Pol. Le Comte de Charrolois estoit en la bataille, & le bastard de Bourgogne estoit chief de l'arriere-garde.

Comment le Comte de Charrolois passa la riuiera d'Oyse, & s'en alla à S. Denys: puis s'en alla mettre en bataille deuant Paris: & le Comte de S. Pol s'en alla saisir le Pont S. Clou, pour passer la riuiera de Seine: & comment il la passa à toute son armée.

Quand



Vand le Comte de Charrolois sceut que ses gens estoient à Pont sainte-Maxence, il feit toute son armée tirer celle part, pour passer celle riuere d'Oyse. Ceux de la ville luy feirent toute obeissance cōme au lieutenant du Duc de Berry: & le Comte tout incontinent feit criez de par le Duc de Berry, duquel aussi il se disoit lieutenant general, qu'il mettoit ius toutes impositions & subsides, quatriesmes & autres exactiōs comme il auoit fait à Roye & à Montdidier, où il auoit passé, dont le peuple estoit grandement resiouy: le Comte entra en ladicte ville de Ponts le iour de S. Pierre & S. Pol, & se tint illec par aucuns iours, puis se partirent d'illec & s'en allerent à S. Denys en France, en laquelle ville le Comte fut receu amiablemēt tant ou nom du Duc de Berry comme ou sien: Car par force ne l'eussent ils peu tenir contre luy. Là se tint toute l'armée tout le remenant du mois de Iuing entre Paris & S. Denys, attédans que les Ducs de Berry & de Bretaigne, de Calabre & de Nemours, de Bourbon & tous les autres de leur alliance deussent venir, ainsi que promis l'auoient les vns aux autres. Dont quand le Comte de Charrolois veit que nul ne venoit, & si estoit le terme passé qu'ils auoient promis d'estre là, ne ses Bourgongnons aussi qu'il attédoit de iour en iour: & qu'il eut esté aduertty qu'ils ne pouoient passer par l'armée du Roy qui les costoyoit de pres, & vint le huictiesme iour de Iuillet, il meit toute son armée ensemble & en tresbelle ordonnance: s'en alla mettre deuant Paris, & presque ceux de la ville les voyoient à plain. Et à dire voir pour peu de gens qu'ils estoient, c'estoit la plus fiere armée que l'on pouoit regarder. Ioachin Rouhault vuida de Paris pour regarder icelle armée, laquelle il auoit costoyée par auant tant à Beaulieu comme autre part par plusieurs fois, pour faire quelque destourbier s'il y eut veu son aduantage: mais il les trouuoit tousiours en point & sur leur garde, tellement qu'il ne les osa oncques assaillir, ains le queroient les gens du Comte, & conuenoit bien qu'il se retrahist à point. Ce iour mesmes qu'il issit de Paris eut il esté encloz de gens dudit Comte, s'il ne fut rentré dedans Paris vistement: & lors incontinent qu'il y fut entré le Comte feit iecter deux ou trois serpentines par dessus la ville, dont ceux de dedans furent tous effrayez. Puis se meit le Cōte deuant toutes ses batailles, & s'arresta illec à vn moulin assez pres de la ville, dont cuiderent ceux de Paris auoir l'assault: mais non eurent: ains leur auoit le Comte fait remonstrer & és autres places où il estoit passé, qu'il n'estoit là venu que pour le bien du Royaume, & à la priere & requeste du Duc de Berry, qui luy auoit mandé qu'il seroit bien brief avec luy, soy donnant merueilles de ce que plus tost n'estoit venu. Disant outre que tout ce que le Duc de Berry vouloit faire n'estoit que pour le bien du Royaume: puis les feit sommer & requerre qu'ils obeissent à luy cōme lieutenant general du Duc de Berry, mais ils n'en voulurēt riēs faire. Quand Ioachin fut entré dedās Paris il encōtra sur la rue vn chanoine d'Arras, nōmé messire Iaques de Villiers: lequel apres qu'il eut eu besongé à Paris, desiroit moult de retourner au païs: Ioachin luy demanda dont il estoit & où il vouloit aller: il luy respōdit qu'il estoit d'Amyens, & qu'il y vouloit retourner: dont luy dit Ioachin & le luy feit iurer & promettre, qu'il diroit au Comte de Charrolois qu'il auoit tout freschement receu lettres du Roy de Frâce: par lesquelles il luy signifioit pour tout certain qu'en dedās quatre iours

le Roy se trouueroit à Paris, & iroit là où le Comte seroit: & que l'on verroit lors qui seroit le plus fort. Le chanoine en tenant la promesse, dit au Comte de Charrolois les mesmes parolles à ce moulin, où il estoit encores, & le Comte luy respondit qu'il ne croyoit pas bien Ioachin, & autresfois luy auoit mandé des choses qu'il n'auoit pas trouué vrayes. Celle monstre ainsi faite deuant Paris par le Comte de Charrolois, il remmena toute son armée loger en la place du Lendit, où les maisonnettes estoient encores. Et feit illec son ost enclore de son charroy, dont il auoit tant que c'estoit vne grand merueille, tant de son artillerie cōme de ceux des seigneurs de son ost. Entre-temps qu'ils estoient là, le Comte de S. Pol chief de l'auant-garde, trouua sur la riuere de Seine vn grand batteau qui menoit foin à Paris: il feit prendre ledit batteau & vuidier le foin, puis entrerent dedans & passerent la riuere les vns apres les autres tous ceux de l'auant garde: & s'en allerent prendre & saisir le pont de S. Clou, & se rendirent à eux aucunes gens de guerre qui gardoient le passage, sauues leurs corps & leurs biens & s'en allerent. Quand le Comte de Charrolois en fut aduerty, il feit toute son armée tirer à ce pont & passer la riuere de Seine pour tirer vers Estampes, esperant trouuer illec les Ducs de Berry & de Bretagne: lesquels ne pouoient passer pour l'armée du Roy qui les empeschoit. Ceste armée passa celle riuere de Seine le quinzième iour de Iuillet. Et en ce mesme iour s'en alla loger le Comte de S. Pol à tout son auant-garde à Montlehery: auquel lieu est vn bon chasteau que tenoient les gens du Roy, & ne feirent quelque semblant de faire entreprinse les vns sur les autres. Le Comte de Charrolois demoura celle nuit à vne lieüe pres du Môt à tout sa bataille. Et le bastard de Bourgogne qui menoit l'arriere-garde, se logea à vne lieüe arriere du Comte, & à deux lieües du Mont. Le Comte de S. Pol enuoya ses escoutes outre le Mont iusques à Chastres, trois lieües outre sur le chemin d'Estampes: lesquels trouuerent en leur chemin les messagiers du Roy qu'il enuoyoit à ceux de Paris: ausquels Parisiens le Roy mandoit par ses lettres qu'ils fussent tous prests le lendemain pour luy ayder à combattre le Comte de Charrolois. Ces messagiers icy furent amenez deuers le Comte de S. Pol: ausquels ils certifierent que le Roy de France & à tout sa puissance estoit à Chastres, & là enuiron de ceste heure qui lors estoit l'vnziesme en la nuit. Ces nouuelles ouies le Comte de S. Pol se deslogea de Montlehery, & se logea au dessoubs du mont au costé de Paris en la vallée, en vne champagne qui est illec. Et feit incontinct ces nouuelles sçauoir au Comte de Charrolois, en luy mandant qu'il se hastast de venir auant, ou qu'il luy mandast ce qu'il vouloit faire: & que le Roy luy liureroit bataille le lendemain au point du iour. Le Côte de Charrolois ouies les opinions de ses gens se deslogea incontinent, & s'en alla ioindre sa bataille avec le Comte de S. Pol, & manda au bastard de Bourgogne qui menoit son arriere-garde, qu'il s'aduançast de le suiuii tout le plus tost qu'il pourroit, sicōme il feit: si que le xvj. iour de Iuillet le Comte de Charrolois & son frere le bastard de Bourgogne, se trouuerent avec le Côte de S. Pol en celle vallée dessoubs Môtlehery des soleil leuant. Et là se meirent & ordonnerēt pour attendre le Roy en bataille en celle place. D'autre part le Roy qui eut esté en Bourbōnois, & qui eut gasté le pays: & qui estoit aduerty de toutes ces assemblées, auoit son armée toute preste,

preste, & doubtant que l'armée de Bretagne & celle de Bourgogne ne ioignissent ensemble, par cōsequēt fussent plus forts, & feissent plus à redoubter pour cōbattre, assembla tous les chiefs de guerre pour auoir aduis, s'il cōbattroit son frere & les Bretons premier ou le Côte de Charrolois, & iāçoit ce qu'aucūns fussent de diuerſes opinions: toutesuoyes la plus part furent d'opinion qu'il cōbatist premier le Côte de Charrolois. Car s'il le pouoit ruer ius, il pourroit de legier r'auoir son frere & les Bretons à sa vōlētē, mesmement tous les autres Princes de leur alliance. Encores tandis que les Bourgongnons n'estoient encores venus, ne ioincts avecques le Comte de Charrolois par empeschement que leur bailloient aucūns des capitaines du Roy. Et iāçoit-ce que la pluspart du cōseil fussent de cest aduis, neantmoins le seigneur de Varenne Seneschal de Normandie dit & repliqua, qu'il n'estoit point de celle opinion: & qu'il cognoissoit assez que le Comte de Charrolois n'estoit pas homme pour delmarcher, & que les Picards & ceux qui estoient avec luy des autres païs de son pere, l'aymoient de si grād courage, & si estoient cōme tous accoustumez de guerre, qu'ils ne laisseroient iusques à la mort. Et pourtāt estoit son opiniō de cōbattre premier le Duc de Berry & le Duc de Bretagne: avec lesquels estoient plusieurs gens de guerre, qui auoient esté de l'ordonnāce du Roy Charles son pere: lesquels quād ils veroient la personne du Roy n'auroient espoir ou voudroient combattre contre luy, ains tourneroient de son party. Pourquoy il pourroit de legier mettre le demourant à sa mercy, dont fut dit au Seneschal qu'il auoit paour. Et il respondit que non auoit, & que s'il y auoit bataille ou rencontre il monstreroit qu'il n'auoit pas paour. Et que ce qu'il auoit dit, il l'auoit dit seulement pour loyaument conseiller le Roy.

Comment le Roy se conclud de combattre le Comte de Charrolois. Et comment ils conuindrent à bataille au deſſous de Montlehery: & de la maniere de celle bataille ou rencontre qui fut moult aduantureuse.

Vand le Roy eut ouy toutes les opinions de ses chiefs de guerre, iāçoit ce qu'elles feussent diuerſes: neantmois il conclud tout chaudemēt de combattre le Comte de Charrolois: & commanda tout incontinent que chacun sur peine de mort le suiuit & se meit au chemin par si grād exploit, que le xiiij. iour de Iuillet audit an lxxv. (comme dit est) il cheuaucha à toute son armée que de iour que de nuict. xxiiij. lieües, & vint gesir à Estampes, & le lendemain vint à Chastres à trois lieües de Montlehery: en venant lequel chemin il passa à sept ou à huit lieües pres de l'ost des Ducs de Berry & de Bretagne, ignorant que ses messages fussent prins qu'il eut enuoyé à Paris, ne que le Comte de Charrolois fut si pres de luy. De Chastres se deslogea le Roy le xvj. iour de Iuillet des deuant soleil leuant. Et tost apres se trouuerēt au Montlehery & veirent l'armée du Comte de Charrolois, qui estoit deſſous en la vallée. Et lors incontinent le Roy feit mettre ses gens en bataille & en feit trois. En l'auant-garde fut ordonné le Seneschal de Normandie, le fils du Comte de No-renton, le seigneur de Barbasen, Malortie, Flocquet, Salzart & autres gens de guerre. En la seconde & moyenne se meit le Roy, & avec luy plusieurs grās seigneurs & capitaines. En l'arriere-garde furent commis le seigneur du Maine, &

avec luy de sept à huict cens hommes d'armes: si que selon commune renommée le Roy pouoit auoir en ces trois batailles deux mille, deux cens hommes d'armes ou lances, les mieux empoint & les mieux montez que gens d'armes furēt oncques: car là estoit toute la fleur des gens de guerre de toute la puissance du Roy de France. Avec lesquels estoient outre plusieurs archiers, & autres gens de guerre en tresgrand nombre. Et si en estoient beaucoup demourez derriere de pied & de mal montez, qui suiuiroient tousiours le train du Roy.

D'AUTRE part quand le Comte de Charrolois, veit l'armée du Roy ainsi prestee, il feit de ses gens trois batailles. En la premiere fut mis & ordonné le Comte de S. Pol, il se tint en la seconde. Et son frere le Bastard mena son arrieregarde. Mais il les feit toutes trois ioindre ensemble, & les feit clore par derriere de son charroy: & feit de ses engins à pouldre affuster deuant ses batailles. Et à ses archiers feit il prendre chacun vn pel pointu, pour mettre deuant eux contre la fouldre des cheuaux s'ils les eussent voulu rompre: & ceux tenans celle ordonnance attendoient que le Roy leur vint courre sus & les combattre. Mais non feit: ains furent en ce point les vns deuant les autres pres de quatre heures sans eux mouuoir, sinon d'aucunes petites escarmouches. Et si estoient pres les vns des autres à vn trait d'arbalestre: pource que le Comte de Charrolois & ses gens estoient comme trop eslongnez de leur artillerie, aucuns furent d'aduis que bon seroit qu'ils se tirassent plus pres en reculāt leurs cheuaux, leurs visage tousiours deuers leurs ennemis sans mōstrer de doz: mais le seigneur de Haubourdin blasmat celle opiniō luy dit, s'il reculoit vn pied du lieu où il estoit qu'il luy tourneroit à trop grand peril & deshonneur: & donneroit à ses ennemis courage & hardement. Entre temps aussi d'un costé & de l'autre se iectoient serpentines & engins à pouldre, qui tuerent assez & des vns & des autres. Finalement le Comte de Charrolois doubta que ceux de Paris ne veinssent soudainement en l'ayde du Roy à grosse puissance: & que par ce moyē ils ne fussent encloz ne assailliz deuant & derriere, ou qu'ils fussent illec affamez en delayāt la bataille: ouie sur ce l'opinion de ses plus principaux capitaines, cōclud d'aller assaillir le Roy. Et lors issans de leur fort en belle ordōnāce, se prindrēt à marcher auāt tous ensemble, les vns du costé du bois & les autres du costé du village, la bataille ou millieu ayant le bois au dos. Et lors tout incōtinent qu'ils se prindrēt à marcher auant, aussi feirēt grād partie des François en frōt à l'endroit de la bataille du Côte, & passerēt vne fosse qui là estoit pres du village: mais les archiers du Comte les chargerent de trait si dru & durement, qu'ils les feirent ressortir outre le fossé, & le Comte apres à les chasser iusques dedans le village bien auāt sa banniere de costé luy, que portoit pour le iour le seigneur du Boys.

OR tandis que ceste besongne se portoit en ce point, & que le Côte auoit ordonné vne grosse route d'archiers & certain nombre d'hōmes d'armes pour les garder, & pour deffendre le passage à iij. ou iiij. cens lāces de François, qui se tenoient à l'endroit d'une bresche, & regardoient leur point pour enfondrer sur lesdits archiers, & d'aller à l'artillerie du Comte: aduint qu'iceux hommes d'armes voyās ressortir les François, & que le Côte les auoit chassés iusques dedās le village, laisserēt leur garde & coururēt apres le Côte: & lors tout incōtinent iceux François voyans lesdits archiers ainsi destituez de leurs gardes & de leurs pels qu'ils

qu'ils auoiēt laissez, se prindrent à fourrer dedans comme fouldre: & tellement qu'ils tuerent & mehaignerent la pluspart desdits archiers, qui fut la plus grād perte du Comte pour le iour. Et ces archiers ainsi ruez ius & desbaretez, iceux Frāçois s'en coururent iusques au charroy & à l'artillerie, & y tuerēt & prindrēt vn pou de gens. Mais ceux qui gardoient le charroy, & qui estoient garniz de maillets de plōb se recueillirent au mieux qu'ils peurēt, & tournerent aucūs de leurs chariots, tellemēt q̄ les Frāçois n'en sçauoient issir & en assommerēt illec la plus grand partie: ceux qui en peurent eschapper cuidās retourner au village, rencontrerēt le Côte & sa route qui retournoiēt du village droit en ce point: les quels les assaillirent si durement que tous y furent morts de ceux qui furent au charroy, tant par ceux du charroy cōme par ceste derniere rencōtre: nonobstāt qu'aucūs Frāçois eussent suiuy le Comte, & qu'ils se cōbattissent à ses gēs. Auquel retour fut occis Philippe d'Oingnies aupres du Côte: le Comte mesme fut nauré au visage & en grand dāgier d'auoir la gorge couppée à cause de ceste diuersité de cōbatre: c'est à sçauoir que le Côte de prime face fait ressortir les Frāçois, & qu'il les chassa iusques bien auant dedās le village, s'en fouirēt de l'ost du Roy toute son arrieregarde, q̄ menoiēt le Côte du Maine & l'Admiral de France seigneur de Montauban, & plusieurs autres iusques au nōbre de vij. ou viij. cens lāces: & si durement s'en fuirent qu'ils laissoiēt par les chāps bagues & harnois, & si n'estoit hōme qui les suiuit. Aduint aussi à celle cause, que le seigneur du Boys porta la banniere du Côte si auant, cuidāt qu'on le suiuit qu'il fut prins outre le village & emmené prisonnier: car le Comte estoit retourné du village cōme dit est. D'autre part à l'occasion de ceux de la Bresse, qui ruerent ainsi ius les archiers du Comte, ils s'en fuirent du party du Côte plus du quart de ses gēs: c'est à sçauoir le seigneur de Happlaincourt, le seigneur d'Ameries, le seigneur d'Inchy, le seigneur de Rabodenghes & plusieurs autres. Mais quand le seignr de Rabodenghes eut foüy enuiron deux lieües, il trouua vn herault qui luy dit, que le Côte auoit le plus beau de la bataille: & par tant il retourna, & en fait retourner autres plusieurs en grād nombre qui vindrēt au Comte biē à point. Car il ne cessoit de r'allier ses gens, & de soy porter aussi vaillāmēt que cheualier qui fut en la place, encourageant ses gens & disant, qu'il vouloit illec viure ou mourir avec eux: si que par son bien faire & de ses hommes l'auant-garde du Roy fut ruée ius, & l'arriere-garde s'en estoit foüie. En celle tempeste des le commencement de celle besongne, fut occis du party du Roy le grād Seneschal de Normandie, Flocquet, Geoffroy, la Hyre & plusieurs autres vaillās hōmes de guerre, iusques à trois ou quatre cens lances: & du party du Côte furent occis le seigneur de Hames, messire Philippe de Lalaing & aucuns autres en petit nombre d'hommes d'armes. Mais trop plus d'archiers, & si en y eut de prins d'un party & d'autre. Le Roy de sa part encourageoit ses hōmes à son pouoir, & s'y porta vaillāment de son corps: mais quand il veit ses gēs ainsi reboutez, il se retira dedans le village: & le Comte demoura sur le champ r'alliant ses gens & les tenāt en ordonnance, cuidant d'heure en heure que le Roy leur reueint courre sus: mais non fait, ains se contint au village depuis huiēt heures de soir que la bataille cessa, iusques à soleil couchāt tant desplaisant que plus ne pouoit: enquerant de ceux qui luy estoient demourez, lesquels s'en estoient fuiz, & lesquels

estoyent demourez delez luy: & trouua des fuians vn tresgrand nombre, & que bien pou estoient demourez avec luy. D'autre part grand nombre des gens du Comte qui eurent fourré les bois & les hayes, s'en reuindrent cy vn ça l'autre remettre avec les autres en ordonnance, eux tenans illec tous ensemble & attendans le hutin d'heure en heure, comme dit est: à la verité ceste chose cy fut vne tresauantageuse bataille ou rencontre & perilleuse pour chacune partie: & fait à croire que l'honneur de la victoire d'icelle vint de la grace de Dieu au Cōte de Charrolois, lequel n'auoit pas gens tels, n'en si grand nombre comme auoit le Roy: encore se nul ne s'en fut fuy de l'une partie ne de l'autre, eust esté la besongne plus terrible & plus mortelle: mais Dieu par sa bonté ne le voulut autrement aduenir, dont son nom soit loué. Ainsi donques aduint que le Roy ainsi melancholié & troublé qu'il estoit & à bon droit, se teint dedans le village iusques à soleil couchant. Puis s'en partit & s'en alla à Corbeil à six lieues pres d'illec, où il arriua à dix heures de la nuit à petite compaignie: car tous les autres s'en estoient fuis, & si ne les chassoient nuls: & tels y eut qui fuirent iusques à Amboise, & disoient par tous les lieux où ils passoient, que le Roy estoit mort & tous ses hommes desconfits.

Comment le Comte de Charrolois se maintint apres la victoire qu'il eut du Roy de France à Montlehery: & de plusieurs besongnes & sequelles qui en aduindrent lors en diuers lieux.



LE Comte de Charrolois soy tenant sur le champ de la bataille, cuidant que le Roy fut encore à Montlehery, & qu'il le voulsist encore combattre le lendemain, teint toute celle nuit ses gens en bataille iusques à soleil leuant, que lors il fut aduertý du partement du Roy: & s'en alla dedans le village luy & tous ses hommes, là où ils trouuerent celiers plains de corps morts & tuez, que les François y auoient iettez, affin qu'on ne sceust le nombre des morts de leur party: ainçois que celle bataille se commençast trois heraux auoient esté enuoyez à Paris de par le Roy: lesquels venus illec, ainsi comme à heure de midy, s'en allerent crier à l'arme parmy la ville de toutes parts: & que tantost & sans delay chacun se meit en armes & s'en allassent ayder le Roy qui combattoit le Comte de Charrolois deuant Montlehery. Mais nonobstant le cry, oncques homme du commun ne autre n'en issit de Paris, sinō Ioachin Rouhault Mareschal de France, qui tenoit ades avec luy de cinq à six cens hommes de guerre: lesquels faillirent hors de Paris tous à cheual, & s'en coururent au pont S. Clou, là où ils ne trouuerent personne: car ceux qui le gardoient pour le Comte de Charrolois s'enfuirent incontinent qu'ils veirent les seigneurs de Haplaincourt, d'Aymeries & les autres en tresgrand nombre, qui leur dirent que le Comte auoit tout perdu: si que le Mareschal entra dedans la place sans contredit: & reteindrent prisonniers tous ceux qui y vindrent depuis pour passer illec, & les menerent à Paris. Ces seigneurs icy qui s'enfuirent ainsi, cuiderent passer au pont de S. Maxence la riuiere d'Oyse: mais ils y trouuerent le seigneur de Mouý capitaine de Compiengne accompagné de ceux des garnisons de Creil, de Senlis, de Clermont, de Creppy & d'autres places en tresgrand nombre, qui se furent assemblez illec apres qu'ils eurent ouý

ouï dire que le Roy auoit gaigné la bataille: & auoient assiegé le Pont du costé vers Montdidier. Et pourtant ceux de dedans cuidans que voirement le Roy eut eüe la victoire: mesmement pour la fuite des seigneurs & autres qui se furent bouttez leans avec eux, se rendirent à eux sauues leurs vies seullement au premier assault qui leur fut fait. En celle place furent prins les seigneurs d'Aymeries & d'Inchy & plusieurs autres: le seigneur de Happlaincourt fut prins sur les champs & mené prisonnier à Paris: oncques homme de nom de tous les fuians n'eschappa de mort ou de prison: mais aucuns pources compagnons aduantureux en eschapperent: lesquels neantmoins retournerent tous desrobbez & en trespoure estat: de ceux qui furent menez à Paris en y eut plusieurs morts & noyez en Seine. A l'assault du pont sainte Maxence, fut tué par ceux de dedans d'un traict à pouldre vn gentil-homme du party du Roy, nommé Jeannet de Grouches, lequel auoit son frere avec le Comte de Charrolois. Quand le Comte de Charrolois fut tout certain que le Roy se fut retrait à Corbeil, il feit crier par tout son ost à son de trompe, s'il estoit homme qui le voulsist requerre de bataille, qu'il estoit prest de le receuoir, puis feit les morts enterrer: & entre les autres il feit enterrer en vne chappelle prochaine du mont les corps de messire Philippe de Lalain, du seigneur de Hames, le seigneur de la Varenne, & aucuns autres: mais tost apres vindrent de Paris par saufconduit aucuns, qui requirēt au Comte le corps dudit seigneur de la Varenne: & par son congé le feirent porter à Paris, & le feirent moult noblemēt enterrer en l'Eglise des Freres Prescheurs: il fut plaint de maintes gens pour les vertus qui furent en luy.

Q V A N D le Roy eut seiourné à Corbeil vn iour ou deux, il s'en alla à Paris: & y vint à petite compagnie le ieudy xvij. iour de Iuillet par le costé de la riuere vers S. Denys: & n'estoient avec luy que cent cheuaux ou environ, mais tost apres & tous les iours reuindrent deuers luy le Comte du Maine son Admiral, & tous ses capitaines & gens de guerre en si grand nombre, que la ville de Paris en fut toute plaine, & les chāps entour Paris du costé de la riuere. Le Comte de Neuers alla deuers le Roy à Paris: mais il n'y arresta gueres, ains s'en retourna à Peronne. Quand le Roy eut vn pou seiourné à Paris, il enuoya l'Euesque de Paris sage Prelat & prudent deuers le Comte de Charrolois, pour trouuer aucun bon moyen de paix entre le Roy & les Princes. L'Euesque venu deuant le Comte il luy dit, que le Roy l'auoit enuoyé deuers luy pour sçauoir qui l'auoit meu d'entrer en son Royaume à si grosse armée: & que le Roy luy mandoit que quand il alla és païs de son pere, il n'y alla pas à grande armée: Ains y alla simplement & à petite compagnie. Le Comte de soymesmes respōdit à l'Euesque tout promptement, que deux choses l'auoient meu d'entrer ou Royaume. La premiere estoit pour tenir sa promesse & son scellé, que luy & plusieurs Princes de France auoiēt promis ensemble: c'est à sçauoir d'eux trouuer ensemble entour Paris pour le bien du Royaume dedans le iour S. Iean Baptiste. La seconde cause estoit pour rauoir deux hommes, lesquels estoient soubstenuz au Royaume, & qu'il estoit venu à si grāde armée pour garder son corps: lequel en son propre païs & heritage de son pere on l'auoit cuidé faire mourir, ou par venin, ou par espée, ou le prendre pour le mener en estrāge païs: & que pourtant vouloit il estre bien accompagné pour soy garder: au regard

que le Roy luy mandoit qu'il ne vint pas és païs de son pere à si grande armée, quand il y vint : le Comte luy respondit que pour lors il n'auoit pas la puissance d'y venir fort accompagné, & que és païs de son pere il eut esté receu noblement, richement & paisiblement : & ne luy auoit on pas fait ainsi comme on luy auoit cuidé faire : dit outre qu'il n'estoit pas venu ou Royaume pour y nuire : mais pour le bien d'iceluy : & qu'il auoit commandé à ses gens que chacun payast ce qu'il y prendroit, sans faire grief à personne. Au regard, dit il, de la puissance que j'ay amenée : ie vueil bien que chacun sçache, que ie suis bien homme pour contrestier à mes ennemis, & pour ayder & conforter mes amis : & celle responce ouïe l'Euesque de Paris s'en retourna deuers le Roy.

Comment les Ducs de Berry & de Bretagne se trouuerent à Estampes avec le Comte de Charrolois : & tost apres y vindrent aussi les Ducs de Bourbon, de Calabre & de Nemours : le Côte d'Armignac & leurs alliez : & le Roy s'en alla de Paris à Rouen.



Vand le Comte de Charrolois eut seiourné sur le champ de la bataille, & à Montlehery tant comme il luy pleut : il tira toute son armée vers Estampes, attendant apres les Ducs de Berry & de Bretagne : lesquels y arriuerent le xxj. iour de Iuillet oudit an, accompagnez de dix mille combattans & gens de guerre bien en point. Le Comte de Charrolois alla aux champs à leur rencontre, & feirent grand ioye & grand feste les vns aux autres : puis entrerent en la ville à leur entrée. Entre ces choses le Comte de Charny, qui s'estoit party de Bourgongne à cinquante lances pour estre en l'ayde du Comte de Charrolois, ne se voulut point mettre desslous le Mareschal de Bourgongne chief de l'armée de Bourgongne, ains tint vn chemin à parluy : mais il fut espié des gens du Roy, & fut vn iour prins & retenu prisonnier : mais ses gens eschapperent & se sauuerent le mieux qu'ils peurent. Environ huiet iours apres que les Ducs de Berry & de Bretagne furent venus à Estampes, vindrent aussi audit lieu les Ducs de Bourbon, & de Nemours, & le Comte d'Armignac à belle armée : puis y vint le Duc de Calabre aussi à belle compagnie : & entre les autres estoient avec luy aucuns Suisses hommes non armez, mais hardis & entreprenans. Puis y vint finablement le Mareschal de Bourgongne, & avec luy plus de six cens lances de Bourgongnons, & plusieurs autres coustelliers à pou d'archiers, tous ces seigneurs icy fussent volentiers plustost venus avec le Comte de Charrolois, s'ils eussent peu passer : mais ne se osoient aduancer pour crainte du Roy qui les faisoit costoyer de pres. Aussi fait à croire qu'ils furent plus hardiz de venir quand ils sceurent que le Comte de Charrolois auoit esprouué le passage, & bien asseuré pour tous les autres passer. Eux tous ainsi assemblez tirerent le chemin de Beauffe, & de Gastinois pour leurs gens viure plus aisement, & feirent ouuerture au Duc de Berry les bonnes villes où ils passoient. D'autre part le Roy s'en alla à Roüen, pour reformer son armée : & fait mettre sus en armes tous fiefuez & arrierefiefuez, & toutes autres gens idoines à porter armes pour estre avec luy.

ENTRE ces choses & que les Princes se furent r'affreschiz, & leurs gens és païs de Beauffe & de Gastinois, esperans tous les iours que le Roy les veinst combattre. Et voyans qu'il n'estoit approché d'eux, feirent faire vn pont à Mouret & passerent

& passerent illec la riuere de Seine : & par le païs de Brie s'en allerent arrester & loger aupres de Paris, passans la riuere de Marne au pont de Charenton. Auquel lieu se logerent les Ducs de Berry & de Bretagne à toutes leurs gens : le Comte de Charrolois se logea à Conflans dedans le chasteau: le Comte de S. Pol & ceux de l'auantgarde entre Paris & Conflans, & le Bastard de Bourgogne & ceux de l'arrieregarde entre Conflans & Charenton. Puis s'en allerent loger les Ducs de Berry & de Bretagne à S. Mor, & à Beauté, & entour du Bois de Vinssainnes d'un costé de la riuere: & le Duc de Calabre & les autres, c'est à sçauoir Bourgongnons, Armignacs & de Nemours, demourerent en Brie à l'autre costé de la riuere à toutes leurs gens, qui pouoient mōter de cinq à six mille combattans. Entre ces choses le Comte de Charrolois feit reprendre le pont S. Clou : car les gens du Roy le delaisserent tantost apres la bataille de Montlehery : puis feit prendre Laigny sur Marne, & faire ponts pour passer outre la riuere, quand ils vouldroient : & assieger Paris, là où se tenoient le Comte du Maine & autres gens de guerre en si tresgrand nombre, qu'il en conuint grand partie loger par les villages outre la riuere de Seine, & en autres forts & boulleuers qu'ils feirent illec en aucuns lieux.

D'AUTRE part, quand les ponts furent faits & mis sur la riuere, vne partie de l'ost des Princes passerent la riuere, & s'en allerent loger pres de Paris: & si pres des gens du Roy, qu'il n'y auoit qu'un fossé entre deux : & là se feirent plusieurs escarmouches d'un costé & d'autre, esquelles estoient aucuns morts ou prins bien souuent. Et entre les autres y fut un iour occis un des fils de messire Symon de Lalaing, qui fut moult plaint des gens du Comte de Charrolois. Un iour vint que les Princes feirent sommer à ceux de Paris pour faire ouuerture au Duc de Berry, comme regent de France: ou sinon ils destruiroient leurs vignes, & leurs maisons & tous les villages d'illec entour, & puis ils assaudroient la ville : entre quoy les Parisiens prindrent iour de respondre. Pendant lequel ils enuoyerent à Roüen ceste sommation signifier au Roy, & dire s'il ne les venoit secourir que rendre les conuiédroit: lesquelles nouvelles ouïes par le Roy, il assembla hastiement tout ce qu'il peut recouurer de gens: & s'en alla à Paris où il entra le vingthuietiesme iour d'Aoust oudit an lxxv. Et dedans trois iours apres enuoya deuers les Princes l'Euesque de Paris, & autres conseilliers & notables gens & grans seigneurs : lesquels procurerent tellement enuers les Princes, que trefues furent données d'un costé & d'autre pour aucuns iours : durans lesquels fut un lieu ordonné entre Paris & Conflans, & oudit lieu vne belle tente pour conuenir aucuns deputez d'un party & d'autre: affin de trouuer quelque bon moyen de traicté & d'appaisement entre les parties.

Cy parle des diuerses nouvelles portées en diuers lieux de la iournée de Montlehery : puis d'une guise & puis d'une autre.

DE ceux qui s'enfuirent le iour de la bataille de Montlehery des le commencement de l'assemblée, & qui ne pouoient sçauoir la fin de la besongne : aucuns passerent la riuere d'Oyse, & disoient par tout que le Comte de Charrolois auoit tout perdu. Entre les autres en passa un à Compiengne, qui dit au Comte de Neuers que voirement l'auant-

garde du Roy auoit esté ruée ius au commencement de la bataille : mais en fin le Roy auoit eu victoire, & que le Comte de S. Pol & le seigneur de Haubourdin y estoient morts: ne sçauoit du Côte de Charrolois fil estoit prins où mort, ne son frere le Bastard. Ces nouvelles icy furent signifiées & escrites au Duc de Bourgongne par le capitaine de Montdidier : & passa le messagier porteur desdictes lettres par la ville d'Arras: & desdictes nouvelles emplit toute la ville: tellement que tout incontinent le païs en fut tout plain à l'environ, dont maintes gens demenerent grand dueil & grans plaintes merueilleusement : ignorans ce qu'ils deussent faire: le seigneur de Saueuses qui se tenoit à Corbie ces nouvelles ouïes, laissa Corbie en passant delez Bray sur Somme: manda au seigneur de Roubaiz capitaine d'icelle ville qu'il la gardast bien, & s'il auoit pou de gens il luy en enuoyeroit assez . Puis passa outre accompagné de vingt archiers ou environ, & vint à Bapaulmes. Mais ceux de la ville luy refuserēt l'entrée de prime face, dont il fut si mal content qu'il leur dit, que s'ils ne le mettoient dedās qu'il y entreroit par force. A laquelle parolle ils le meirent dedans. Ce refus icy sembla bien estrange à beaucoup de gens: attendu que Bapaulmes est neuëment au Duc de Bourgongne & de la Comté d'Arthois. D'illec s'en alla à Arras, & fait assembler ceux de la ville : ausquels il remonstra qu'il estoit besoing de biē garder la ville & la cité, & de mettre gens sus pour deffendre le païs, & pour secourir leur seigneur à la plus grande diligence que faire se pourroit : offrant que se l'en luy vouloit prester vingt mille en rente courant hereditablement, ou viagiere sur tous ses biens & reuenues, qu'il les employeroit à souldoyer gens d'armes pour aller au secours du Côte de Charrolois, & pour la deffence du païs . Et nonobstant qu'il ne trouuast personne, ne qui luy vouldist bailler argent en celle maniere ne autrement. Toutesuoyes il assemblea tout ce qu'il peut recouurer de gens de guerre: & tellemēt qu'il en meit sus & en point de quatre à cinq cens que de pied comme de cheual . Pour laquelle diligence ainsi faicte par le seigneur de Saueuse, le Duc de Bourgongne luy enuoya lettres patētes: par lesquelles il le comēit & ordonna capitaine general de la Comté d'Arthois : & manda à toutes les bonnes villes du païs & de la chastellenie de l'Isle, que tout homme qui pouoit porter armes se meit sus, & se tiraist deuers le seigneur de Saueuses : & tellement qu'en moins de quinze iours il en eut avec luy plus de deux mille combattans : mais la pluspart estoient de pied. D'autre part si tost que le seigneur de Roubaiz, le seigneur de Fosseux & les autres qui eurent esté commis à Bray pour garder la ville, ouïrent dire lesdictes nouvelles ils abandonnerēt Bray: & se tirerēt deuers le seigneur de Saueuse, qui les blasma moult d'auoir ainsi leur garde abandonnée, & tellement qu'ils y retournerent aucuns d'eux huiēt ou dix iours apres que couroient lors autres nouvelles . De l'autre part si tost que ceux de Compiengne eurent ouï les premieres nouvelles de la desconfiture du Comte de Charrolois, ils prindrent, comme dit est, le Pont de sainte Maxence, puis s'en allerent assaillir la ville de Roye : mais le seigneur du Faÿ qui en estoit capitaine la deffendit tellement, qu'ils n'y gagnerent riens: ains y perdirent aucuns de leurs gens : & à leur partement dirent à ceux de la ville qu'ils y reuiendroiēt en brief à greigneur cōpagnie. Pourquoy ceux de Roye & ceux de Montdidier enuoyerent hastiuement deuers le Duc de Bourgongne, pour

pour auoir secours & ayde: & le seigneur de Sauueses leur enuoya tout incontinent de ceux qu'il eust assemblez, le plus qu'il peut: & si en enuoya à Bray & ailleurs à grand diligence.

ENTRE ces choses, les passages des riuieres d'Oyse & de Seine estoient tous si pres gardez par les François, que nul n'y pouoit passer ne porter lettres ne bagage, que tout ne leur fut tollu & destrouffé: si que par ce moyen on ne pouoit sçauoir la verité de celle bataille, iusques à ce que vindrent aucuns Carmes, freres mineurs ou prescheurs & aucuns autres, qui passerent à nau les riuieres: lesquels rapportèrent pour tout certain que le Comte de Charrolois auoit eu victoire & l'honneur de la iournée.

Comment entre ces besongnes le Roy de France & les Liegeois feirent alliances ensemble, pour guerroyer le Duc de Bourgogne & son fils Comte de Charrolois: & d'aucunes autres choses: & comment iceux Liegeois assiegerent la ville de Luxembourg.

VN pou de temps deuant celle besongne de Montlehery: c'est à sçauoir ou mois de Iuing dudit an lxxv. le Roy de France auoit enuoyé vne ambassade deuers les Liegeois anciens ennemis de la maison de Bourgogne, pour faire alliances avec eux, affin de guerroyer le Duc de Bourgogne & son fils Comte de Charrolois: lesquelles alliances furent faites entre eux par telle condition, qu'en dedans le iour saint Iaques & saint Christofle les Liegeois deuoient entrer es pays de Brabant & de Namur appartenans au Duc de Bourgogne: & d'y bouter les feux, & y faire tous les maux que l'on sçait faire en temps de guerre. Et pour les ayder à ce faire le Roy leur deuoit enuoyer. cc. hommes d'armes chacun à trois cheuaux du moins, pour entrer ou pays de Haynault: & si leur promettoit par ladicte alliance qu'il ne feroit paix ne accord au Duc ne aux siens sans leur consentement, & qu'ils n'y fussent comprins: & de ce leur bailla le Roy son seellé selon commune renommée, de toutes lesquelles besongnes le Duc de Bourgogne fut tost apres aduertty. Dont aduint que le xxij. iour d'Aoust ou environ comme, le Duc de Bourgogne estant en sa ville de Bruxelles deuoit monter à cheual pour aller à la chasse, qu'un herault luy apporta lettres des Liegeois contenans en effect, qu'ils deffioient son fils le Comte de Charrolois de feu & de sang & que sur ce vouloient auoir responce: le Duc veist les lettres: puis dit au messaige en luy rebailant les lettres qu'il les portast à son fils. Ceste responce ouïe le messagier retourna en Liege. Et lors sans tarder ils enuoyerent de rechief deffier le Duc mesmes, & tous ses alliez: & tost apres vuidèrent de leur cité de Liege, & entrerent ou pays du Duc: bouterent feux & y feirent des maux assez & s'en allerent assieger la ville de Luxembourg appartenant au Duc: le Duc de Bourgogne aduertty de ces choses, mandá tout incontinent ses amis & alliez: sicomme le Duc de Cleues, le Duc de Gueldres ses nepueux, le Comte de Nazo, le Marquis de Rotelin, le Comte de Horne, & plusieurs autres voisins aux Liegeois, & les feit mettre sus à grosse puissance: il mesmes de sa personne voulut aller iusques à Namur pour combattre lesdits Liegeois: mais quand ils veirent que la puissance du Duc estoit si grande, nonobstant celle que son fils auoit en France: & que

le Roy leur auoit failly d'enuoyer deux cens lances courre en Haynault, ils leuerent leur siege & s'en retournerent à Liege. Entre ces choses la Duchesse de Cleues fille du Côte de Neuers vint deuers le Duc à Bruxelles, où elle fut trois ou quatre iours, ainçois que le Duc vouldist parler à elle. Puis fut appelée deuers luy & à genoux moult hūblement & plorant tendrement, luy supplia qu'il vouldist auoir pitié de son pere & d'elle: car se son pere estoit destruit & deshonoré, elle & ses enfans le seroient aussi: mesmement trois beaux fils qu'elle auoit du Duc de Cleues son mary: recognoissant que tout le bien que son pere auoit & elle aussi venoit de luy, qui les auoit nourris & esleuez si haultement que c'estoit chose notoire à chacun: ausquelles parolles le Duc se appitoya si que l'en luy veoit les larmes aux yeux & dit à la dame. Vostre pere recognoist & a mal recogneu le bien qu'il a eu en l'hostel de ceans: ie luy auoye fait dire qu'il se partit de Perōne, & qu'il s'en allast en la Côté de Neuers ou de Rethelois qui sont à luy: & qu'il se tenist là iusques à ce que ie feroye tant que mon fils seroit content de luy, dont il n'a riens fait. Ains s'est armé contre mon seigneur de Berry & contre mō fils, & a fait le pis qu'il a peu, & tient mō heritage de Peronne, Montdidier & Roye, cuidant qu'ils soient siens: mais non sont, ains les tient pour vne somme d'argent que ie luy donnay pieça: laquelle on luy a voulu rendre, mais il ne l'a voulu prendre. Je ne sçay s'il cuide ainsi auoir mesdits heritaiges & autres seigneuries que i'ay. Il ne les aura pas se ie puis, ie l'en garderay bien au plaisir de Dieu. A ce mot il laissa la Dame. Trois ou quatre iours apres vint à Bruxelles le Duc de Cleues, qui eust laissé ses gens d'armes par garnisons entour le païs de Liege, pour parler au Duc son oncle: deuers lequel il n'auoit esté grand temps deuant, obstant lesdictes diuisions. Et le bon Duc le receut tres-honorablement & le festoia grandement comme bien faire le sçauoit. Car là estoient les Duchesses de Bourbon, de Cleues, de Gueldres & autres Dames.

O V D I T mois de Iuing ou dit an lxxv. furent arses de cent à six vingts maisons en la ville d'Ardre: & fut commune renommée que le feu y fut boutté par malefice d'aucuns mauuais garçons, que le Chancelier de France ou autres du party du Roy de France y eurent enuoyez pour ce faire, & pour faire le semblable és païs du Duc de Bourgogne. Desquels compaignons furent aucuns prins en la ville de S. Omer, & partant les autres s'elongnerent du païs. Apres la iournée de Montlehery se passerent pres de quinze iours ainçois que le Duc de Bourgogne en fut aduertie de certain. Car on ne luy osa riens dire iusques à tant que l'on sceut tout certainement comment la besongne estoit allée, pour doubte qu'il ne rencheust és maladies dont il estoit reuenu, & n'en estoit pas encore bien refaict. Quand donques il en fut bien adcertené, il enuoya argent à son fils pour payer ses gens d'armes en la conduicte du seigneur de Saueuses, accompagné de toutes ses gens tant de pied comme de Cheual: lequel les mena iusques à Conflans en la compaignie du seigneur de Haubourdin, que le Comte de Charrolois auoit enuoyé iusques à Montdidier à grand compaignie de gens de guerre, pour greigneur seureté: car les François se meirent en peine de les destrousser, mais ne les oserent onques enuahir. Quand le seigneur de Saueuses approcha de Conflans, il meit tous ses hommes en belle ordonnance de

de bataille : & en ce point s'en vint deuers le Côte qui le receut tresioyeusemēt, & print grand plaisir à veoir le vieillard si bien armé & si bien en point: puis luy dit qu'il eut voulu qu'il luy eut cousté quarante mille escus & qu'il eut esté avec luy à la iournée de Montlehery.

Cy retourne à parler des Liegeois, & dit comment ceux de Dinant iniurierent le Comte de Charrolois lors estant à Conflans : comment le Roy se trouua à Conflans avec le Comte de Charrolois: & comment le Duc de Bourbon print la ville de Rouen.

ENtre ces choses ceux de Dinant Liegeois hayans mortellement le Duc de Bourgogne & son fils le Comte de Charrolois : eux confians en la force de leur ville & en leurs richesses, & ramenans à memoire que deuant leur ville en diuers temps auoient esté xvij. sieges mis par Roys & par Empereurs, & n'auoient oncques esté conquis. N'auoient cessé de long temps de pillier & rober leurs voisins, & par especial les subiects du Duc de Bourgogne, & les biens apportez en leur ville: parquoy ils auoient tant plus accru leurs richesses. Ces folastres gens cuidans par les premieres nouuelles qui leur vindrent, que le Comte de Charrolois eut esté desconfit à Montlehery, conclurent ensemble de faire vne grande folie en demonstrent la grande & enuieillie haine qu'ils auoient au Duc & à son fils: car ils feirent faire vne semblance & pourtraicture du Comte de Charrolois, laquelle ils vestirent de ses armes: Puis s'en allerent à grosse compagnie & en armes iusques deuant Bouuines vne ville leur voisine, appartenant au Duc de Bourgogne à cause de sa Comté de Namur: & là leuerent vn gibet auquel ils pendirent celle pourtraicture. Puis se prindrent à crier disans à ceux de Bouuines. Veez là le fils de vostre Duc le faulx trahistre Comte de Charrolois, que le Roy de France a fait ou fera pendre ainsi comme il est icy pendu: il se disoit fils de vostre Duc, il mentoit: ains estoit villain bastard, changé en son enfance au fils du seigneur de Hainseberghe: nostre Euesque cuidoit ruer ius le noble Roy de Frâce: plusieurs autres villaines parolles dirent ils lors du Duc de Bourgogne & de son fils, menassant de destruire & ardoir ses païs. En ce faisant comme fols outrageux & outrecuidez, ils iniurierent moult la bonne Duchesse de Bourgogne mere du Comte de Charrolois: car selõ commune renommée elle auoit tousiours esté tenue & renommée pour la meilleure femme de son corps, qui fut en la terre de Portugal: donc quand ces iniures icy vindrent à la cognoissance du Duc & de son fils, ils en furent moult troublez: & iura adonc le fils qu'ils le compareroient vne fois, comme il en aduint assez tost apres. Les Princes estans entour Paris (cõme dit est) le Roy se partit vn iour de Paris luy vingtiesme, entra en vne nacelle & s'en alla à Conflans où se tenoit le Comte de Charrolois: lequel Comte aduertie de sa venue, alla à son encontre & se feirent bon semblât embrassans l'vn l'autre comme amis & bien vueillans. Puis se prindrent à parler ensemble, ne sçay de quoy: mais tost apres le Comte escriuit au Duc son pere comment le Roy auoit esté deuers luy, & luy auoit dit assez de belles parolles. Au parlement du Roy il dit au Comte s'il vouloit venir à Paris, qu'il luy feroit bonne chere. Et le Comte luy respondit qu'il auoit iuré & promis, qu'il n'entreroit en bonne ville iusques il seroit sur son retour: puis conuoya le Roy ac-

compagné de ses archiers: ausquels le Roy donna cinquante escus d'or pour aller boire ensemble. Durans lesdictes trefues le seigneur de Croÿ & les siens se tenoient à Paris, & contendoient à toute diligence de r'auoir leur paix & traité au Comte de Charrolois: le Roy mesmes s'y employa grãdement à leur faueur: mais le Comte n'y vouloit entendre & n'en vouloit ouïr parler. Et comme vne fois le Roy fut allé deuers le Comte à Conflans, & le seigneur de Croÿ avec luy: le Comte luy fait dire qu'il n'y allast plus: le Roy y alloit & venoit biẽ souuent, & eurent ensemble le Roy & le Comte plusieurs deuises & parolles secrètes: & monstroït le Roy au Comte aussi bon semblant d'amour & d'honneur que l'en pourroit faire amy à autre: & renuoyoit ses propres gens à Paris demourant avec le Comte à petite compaignie, & disant qu'il se tenoit plus asseur avec luy que s'il eust esté en sa ville de Paris. Entre ces choses aduint à Boulongne sur la mer, que celuy qui estoit commis à la garde du chastel d'illec, & vn sergent vendirent ledit chastel de Boulongne aux Anglois de Calais & de Guisnes: & les y deuoient mettre le vingthuietiẽme iour d'Aoust oudit an, tandis qu'ils auroient bouté le feu en la basse Boulongne, & qu'on entendroit au feu rescourre: de laquelle trahison ils se descourirent à vn autre sergent, lequel les accusa: & furent prins, & leur fait cogneu, furent decapitez le deuxiesme iour de Septembre ensuiuant & leurs corps pendus au gibet. Ce furent ceux mesmes qui trouuerẽt facon de mettre hors dudit chastel le fils du seigneur de Croÿ, & qui y meirent les gens du Comte de Charrolois: & pour celle cause leur auoit le Comte donné tous les biens dudit chastel appartenans audit de Croÿ: & plusgrans biens leur auoit promis à faire, & neantmoins ils le cuiderent ainsi trahir & deceuoir. Oudit mois d'Aoust l'an lxxv. fut prins le Roy Henry d'Angleterre par les gens du Roy Edouard: & fut mis sur vn petit cheual, & mené par les rues de Londres: & auoit le Roy Edouard deffendu sur la hart, que nul ne le saluast ne fait honneur: & en ce point fut mené iusques au chastel, deuant lequel estoit vn arbre en maniere de piloris, entour lequel on le fait tournoyer trois fois. Puis fut boutté dedans le chastel: de laquelle besongne furent bien troublez plusieurs des bourgeois de Londres, mais n'en oserent faire semblant ne dire mot.

O V D I T an lxxv. enuiron la fin de Septẽbre prindrent les Bretons la ville de Ponthoise de nuict par le moyen du Capitaine mesmes de leans, & d'autres ses complices. D'autre part aussi le Duc de Bourbon accompagné de gens de guerre, entra ou chastel de Rouen sous vmbre & ou nom du Duc de Berry, & le y meit la dame vefue du seigneur de la Varenne: en laquelle neantmoins le Roy auoit grande confidence. Mais les plus grans de la ville conseillèrent à la dame de le faire ainsi. Et tost apres s'en alla le Duc à la maison de la ville, là où tout le commun vindrent deuers luy, & se meirent en son obeïssance pour le Duc de Berry, comme leur seigneur & Duc de Normandie. Puis s'en alla le Duc es autres villes de la Duché & iusques à Caen, & toutes se rendirent à luy pour le Duc de Berry. Entre ces choses se bautoient les feux par les gens du Duc de Bourgogne ou paÿs des Liegeois, & pareillement es paÿs du Duc par iceux Liegeois: especiallement par ceux de Dinant, si que c'estoit pitié de veoir les dommaiges que faisoient les vns & les autres. Aduint vne fois entre
les

les autres que ceux de Dinant furent rencontrez des gens du Duc & ruez ius: & en y eut aucuns mors de leur costé, & les autres s'en retournerent hastant plustost que le pas. Et pour eux venger s'en coururent aux prisons de la ville, où estoient trois prisonniers des gens du Duc: lesquels ils allerent pendre au premier arbre qu'ils trouuerent hors de leur ville: mais il en y eut l'un qui se voüa à saint Iaques l'Apostre, que la corde rompit & par tant eschappa sain & haitié: mais au lieu de celuy là ils voulurent pendre vn ieune fils d'Arras, fils de Martin Corneille qu'ils auoient prins ainsi qu'il reuenoit des estudes. Et ne eussent esté aucuns qui leur remonstrent, qu'ils pourroient pour l'enfant auoir du pere vne grosse finance ils l'eussent pendu sans remede.

Cy parle du trespas de la Comtesse de Charrolois: & comment le Comte de Neuers fut prins au chastel de Peronne. Puis dit comment les Liegeois furent desconfits à Montenac: & puis il parle du traicté fait à Conflans entre le Roy & les Princes de France.

LE xxv. iour de Septembre audit an lxxv. trespassa de ce monde la Cōtesse de Charrolois en la ville de Bruxelles, fille de Bourbon bonne dame & deuote: laquelle dame delaiissa de son mariage vne fille seulement nommée Marie. Celle Dame eut tousiours la grace d'estre humble, benigne & plaine des meilleures meurs que Dame pouoit auoir, & iamaïs ne se courrouçoit: à son trespas furent les Duchesses de Bourgongne & de Bourbon, lesquelles pour son trespas demenerent grand dueil.

Le iij. iour d'Octobre audit an vn gentil-homme de Bourgongne, nommé Arkembarc: lequel depuis vn mois par auant auoit esté plusieurs fois à Peronne deuers le Comte de Neuers, par le moyen du seigneur de Saueuses & par faufconduit du Roy. Auoit aussi esté deuers le Comte de Charrolois, & du Comte de Charrolois deuers le Duc son pere: tendant tousiours à fin de trouuer moyen deuers le Comte de Neuers rendre Peronne: & fait à supposer qu'ils eurent entre eux aucunes deuises secretes, & aucunes conclusions: car le iour dessusdit des quatre heures du matin, ledit Arkembarc accompagné des seigneurs de Roubaiz & de Frommeles, & de cinq à six cens combattans, s'approcha de Peronne le plus coyement qu'il peut: & laissant illec toute celle compagnie, s'approcha luy douziesme seulement du boulleuert qui estoit hors du chastel, & entrèrent dedans par eschelles: puis prindrent ceux de dedans, & par leur moyen entrèrent dedans la tour & donjon du chastel. En laquelle ils trouuerēt au liēt le Comte de Neuers, le seigneur de Sally & aucuns autres, & les prindrēt tous prisonniers qu'il estoit sur le point du iour: le Comte & les autres se prindrent à crier, tellement que aucuns les ouïrent de la ville: se meirent en armes & vindrent pour entrer au chastel, dedans lequel estoient ja entrez de lx. à quatre vingts hommes des gens du Duc, de la compagnie dessusdicte: lesquels se meirent sus les murs, & remonstrent à ceux de la ville comment ils estoient au Duc de Bourgongne, & que le Duc les auoit là enuoyez en les sommant qu'ils se rendissent à luy: lesquels de la ville se meirent à part, parlerent ensemble & enuiron le soir dudit iour feirent responce qu'ils vouloient obeÿr au Duc: puis

ouurirent leurs portes & meirēt dedans la ville le seigneur de Roubaiz, & toute sa compagnie : ainsi fut prinse la ville de Peronne & mise en l'obeissance du Duc de Bourgogne. Et fut commune renommée que le Comte de Neuers l'auoit ainsi voulu, affin qu'il ne semblast au Roy à qui il auoit fait sermēt qu'il l'eut rendue de son gré : & disoit on encores que par ce moyen le Comte auroit son traicté au Duc de Bourgogne & à son fils : neantmoins quoy qu'il en fut le Comte tout incontīnēt fut mené tenir prison au chasteau de Bethune. Et Arkembarc demoura à Peronne comme garde de la ville & du chastel.

O V D I T an cinquante & cinq à cinq heures apres minuiēt, le xv. iour dudit mois d'Octobre, fut veu dessus la ville d'Arras le ciel ouurir & fait cler comme d'escler, & soubdainemēt fut veu & qui dura par l'espace d'un quart d'heure ainsi comme vn barreau de fer embrasé de la lōgueur d'une lance : lequel tournoya & tourna de trauers, & que le bout de deuant qui estoit menu deuint plus gros ; & celuy de derriere qui estoit gros, deuint greslé : puis se diminua tellemēt qu'il alla à neant.

O V D I T an le xix. iour d'Octobre entrerent au paÿs de Liege xviij. cens cōbattans ou enuiron des gens du Duc de Bourgogne : dont estoient chiefs le Comte de Nazau, le Seneschal de Hainault, les seigneurs de Grutuse, de Gasebecque, messire Iean de Rubempré grād baillif de Hainault, & plusieurs autres cheualiers & escuyers, & gens de guerre iusques audit nombre de dixhuiēt cēs : & se prindrēt à boutter feux, à ardoir maisons & à faire tous les maux du monde : tant qu'ils vindrent à approcher vn gros village nommé Montenac, seant à cinq lieües de la cité de Liege : lequel les Liegeois auoient fortifié, & le gardoiēt à puissance quatre mille Liegeois qui se tenoiēt leans : Lesquels Liegeois voyās passer les gens du Duc si pres d'eux & ne faisoient semblant de les vouloir assaillir, pour ce qu'ils estoient ainsi fortifiez, saillirent aux champs & se meirent en vn lieu par lequel les gens du Duc deuoient passer en intention de les combattre : ouquel lieu ils s'encloÿrent de leur charroy, & meirent leurs engins à pouldre deuant eux bien & gentement. Quand donques les gens du Duc virent les Liegeois qui attendoient à bataille, ils parlerent ensemble & conclurēt qu'ils contendroient à faire lesdits Liegeois issir de leur fort. Et lors pour venir à celle fin, ils feirent semblāt de retourner & d'auoir paour : Liegeois voyans ceste maniere de faire cuiderent qu'ils s'en voulsissent fuir, & issirent incontīnēt de leur fort pour courre apres. Mais la chose alla tout autrement, qu'ils ne pensoient : car les gens du Duc retournerent & les assaillirent si vistemēt qu'ils les meirent tout incontīnēt à desconfiture & en fuite, si que sur la place & en la fuite y moururent des Liegeois plus de vingt deux cens : & des gens du Duc ne perdirent qu'un archier, qui fut vne belle besongne pour les gens du Duc. D'autre part le Roy estant lors à Paris, & les Princes de France estans logez entour Paris à toute leur armée : les conseilliers de l'une partie & de l'autre conuindrent ensemble par plusieurs fois, pour trouuer entre eux aucun bon moyē de paix. Lequel y trouuerent finablement par la maniere qu'icy apres s'ensuit au plus brief, que ie l'ay sceu recueillir. Premierement fut ordonné que pour pourueoir au desordre du Royaume : & pour releuer le peuple des exactions, pertes & dommages qu'ils auoient portées : le Roy commettrait trente six no-

tables

tables hommes, saiges & prudens de son Royaume : c'est à sçauoir douze Prelats, douze Cheualiers, & douze hommes de conseil cognoissans és fais de iustice : ausquels il donneroit pouoir & auctorité d'eux informer des deffauts, & des tors fais, qui se faisoient en son Royaume, lesquels y mettroient remede conuenable : & promet le Roy en parolle de Roy, tenir ferme & stable à tousiours tout ce qu'ils ordonneroient sur ce : lesquels deuoient commencer à besongner sur ceste matiere le quinzième iour de Decembre oudit an soixante & cinq, & deuoient auoir tout ce fait & acheué en dedans quarante iours apres lesdits deux mois. Item seroient toutes diuisions mises à neant, & ne pourroit nul reprocher à autrui le party qu'il auoit tenu durant lesdictes diuisions, & n'en seroient nuls en griefs n'en danger à ceste cause : & si r'auoit chacun ce qu'il luy competoit & appartenoit par deuant l'armée mise sus, nonobstant empeschemens à celle cause mis à iceux leurs biens ou heritages, ne dons d'iceux.

Item que le Comte de Dunois r'auoit toutes les terres que le Roy luy eut tollues. Item que le Comte de Dampmartin r'auoit sa Comté de Dampmartin & toutes ses terres & biens quelconques, que le Roy luy eut tollues & données à autrui comme confisquez. Item que le Comte d'Armignac r'auoit aussi toutes les terres que le Roy luy eut prinſes & tollues. Item que le Duc de Bourbon r'auoit aussi toutes ses villes & ses places, que le Roy auoit prinſes & conquises sur luy. Et outre auroit pension de trente six mille francs tous les ans sur le Roy, pour cause du mariage de sa femme qui estoit sœur du Roy : & si auroit la charge & seroit capitaine des gens d'armes de l'ordonnance du Roy. Item que pour aucunes fautes faictes de la part du Roy au Duc de Calabre, pour conquerre le Royaume de Naples, il auroit du Roy pour vne fois deux cens mille escus d'or, & la conduicte de trois cens lances des gens d'armes de l'ordonnance du Roy. Item le Duc de Nemours seroit capitaine de deux cens lances desdictes gens du Roy, & capitaine de l'Isle de France.

Item le Comte de sainct Pol fut fait & constitué Connestable de France, & luy bailla le Roy l'espée de sa main publiquement en son Palais à Paris. Item le Duc de Berry seul frere du Roy pour son partage du Royaume de France, auroit la Duché de Normandie par empannage, pour luy & pour ses hoirs males procréés de son sang : pour la tenir en telle franchise & liberté que les Ducs de Normandie l'auoient tenue du Roy anciennement. C'est à sçauoir en feauté & en hommage, & que de lors en auant les Ducs de Bretagne & d'Alençon tiendroient leurs Duchez du Duc de Normandie, comme ils auoient fait au temps passé. Item que le Comte de Charrolois r'auoit toutes les terres racheptées par le Roy du Duc son pere, avec la Comté de Guisnes, pour en iouyr par luy & ses hoirs en la maniere que dit sera cy apres. Item promet le Roy par ledit traicté de non iamais contraindre aucuns desdits Princes de venir deuers luy en leurs personnes quelque mandement qu'il leur en feit, sauf toutesuoyes non estre exemptez des seruices qu'ils doiuent au Roy à cause de leurs fidelitez, & pour la deffense & bien euidant du Royaume. Item que toutes les villes, places & forteresses prinſes de l'un party & de l'autre durant les diuisions, seroient rendues à ceux ausquels elles appartenoint parauant, & tous autres biens. De toutes lesquelles besongnes ainsi traictées & accordées,

vn chacun des Princes leua lettres du Roy, pourtant qu'à vn chacun d'eux pouoit toucher.

C'est icy l'extrait des lettres royaux, touchans ce que le Roy ceda & transporta au Comte de Charrolois par le traicté de Conflans.

LOÿs, &c. Par l'aduis & deliberatiõ de nostredit frere de Normãdie & de noz treschiers & tresamez cousins les Ducs de Bretagne, de Calabre, de Bourbon & de Nemours: les Côtes du Maine, du Perche, & de Armignac, des gens de nostre grãd conseil de nostre Parlemēt, autres & notables hõmes de nostre Royaume: auõs baillé & trãsporté: baillõs & transportons par ces presentes à nostredit frere & cousin le Comte de Charrolois, pour consideration & en recompēsation des choses dessusdictes: & aussi pour ce que nostredit cousin fest liberallement & plainement accordé en tant qu'en luy estoit, & tresgrãdement employé enuers nostredit frere & autres seigneurs du sang, à l'appoinctement desdictes diuisions: & pour bien de paix pour luy & ses hoirs masles & femelles descendans de luy en droicte ligne à tousiours, les citez, villes & forteresses, terres & seigneuries appartenans à nous de & sur la riuere de Somme d'un costé & d'autre: comme Amyens, S. Quentin, Corbie, Abbeuille, ensemble la Comté de Ponthieu deçà & delà la riuere de Somme, Dourleans, S. Requier, Creuecueur, Arleux, Monstreul, le Crotoy, Mortaigne avec leurs appartenances & appendences quelconques, & toutes autres qui nous peuuent appartenir à cause de nostredit Couronne, depuis ladicte riuere de Somme inclusement en tirant du costé d'Arthois, de Flandres & de Hainault tant de nostredit Royaume que de l'Empire: lesquelles nostredit oncle de Bourgongne tenoit & possedoit nagueres au moyen dudit traicté d'Arras, & auant le rachapt & desengagement que nous en auons fait: en y comprenāt aussi au regard des villes seans sur ladicte riuere de Somme du costé de nostredit Royaume: les banlieuës & escheuinages d'icelles villes, & tout ainsi en la forme & maniere que nostredit oncle les tenoit & possedoit: pour en iouir par nostredit frere & cousin & sesdits hoirs, & les hoirs de sesdits hoirs masles ou femelles descendās d'eux en droicte ligne desdictes citez, villes, forteresses, terres & seigneuries en tous profits & reuenues tāt de demaine cōme d'aydes, ordonnées pour la guerre: & aussi tailles & autres emolumens quelsconques ainsi que faisoit nostredit oncle: & sans y retenir aucunes choses forts les foy, hommages, ressort, & souueraineté. Et lequel transport nous auõs fait & faisons au rachapt de deux cens mille escus d'or bons & de poix à present ayant cours: lequel rachapt nous & noz successeurs ne pourrons faire de nostredit frere & cousin durant sa vie: mais seulement nous & noz successeurs le pourrons faire des hoirs de nostredit frere & cousin descendans de luy en droicte ligne, & des hoirs aussi descendans d'eux en droicte ligne qui tiendront icelles terres, parmy leur baillāt & payant à vne fois ladicte somme de deux cēs mille escus: pour la seurté duquel rachapt de nostredit frere & cousin, nous baillera ses lettres patentes en bonne forme, & voulons & entendons que nostredit frere & cousin & sesdits hoirs descendans de luy: & qui tiendront lesdictes terres, pourront comettre & ordonner plainement & à leur volenté tous officiers qui seront
nécessaires

necessaires à mettre & instituer au regard du demaine desdictes citez terres, &c. Et que les autres officiers qui seroient necessaires pour les droits royaux, aydes & tailles, soient instituez de par nous & nosdits successeurs, à la nomination de nostredit frere & cousin, & sesdits hors pour iceux aydes & tailles imposer & leuer, ainsi qu'il se faisoit du temps que nostredit oncle de Bourgongne les tenoit & possedoit. Et en outre comme par ledit traicté d'Arras entre autres choses ait esté accordé, que la Comté de Boulongne seroit & demourroit à nostredit oncle de Boulongne, & à ses enfans males procreez de son propre corps: & que nostredit feu seigneur & pere seroit tenu de recompenser ceux qui pretendent y auoir droit: Nous pour les causes & considerations dessusdictes, & sans desroguer audit traicté d'Arras: Auons accordé, accordons & declaron de nostredit frere & cousin, que luy & ses enfans males ou femelles procreez en mariage de son propre corps, tant seullement durans leurs vies, tiennent & puissent tenir ladicte Comté de Boulongne en la forme & maniere que par ledit traicté d'Arras, nostredit frere & cousin les peut tenir, & en faire les fruits leuer comme de leur heritage. Et à ce nous ferons consentir ceux qui pretendent droit en ladicte Comté. Et seront tenus de faire les recompensations qu'il appartiendra, & en tenir paisible nostredit frere & cousin & sesdits enfans. Et aussi aués promis & accordé, promettons & accordons à nostredit frere & cousin, que nous luy ferons bailler & despescher plainement, purement & franchement, & en tant qu'en nous est: luy baillons & deliurons des maintenant les chasteaux, villes, chastellenies & preuostez de Peronne, Montdidier & Roye, avec toutes leurs appartenances & appédances deschargez de toutes gaigeries & rachapts. En tels & semblables droits que celles furent baillées & transportées à nostredit oncle son pere par ledit traicté d'Arras, pour les tenir & en ioüir ainsi & par la maniere, que contenu & déclaré est oudit traicté: & ferons & procurerons par effect, que nostre treschier & trefaymé cousin le Comte de Neuers, transporte & remette à nostredit frere & cousin tout le droit qu'il y a & pretend à auoir esdits chasteaux, villes, preuostez & chastellenies: & de ce qu'il en tient il vuide & despesche de la possession, és mains de nostredit frere & cousin ou de ses commis: & avec ce auons baillé & transporté, baillons & transportons à nostredit frere & cousin, pour luy & ses hoirs & successeurs quelsconques & en heritage perpetuel, la Comté de Guisnes & ses appartenances & appendances quelsconques, pour en iouir par nostredit frere & cousin, & sesdits hoirs & successeurs en tous droits, profits & emolumens tant de demaines, aydes, tailles comme & pareillement que des autres. Et du droit que le sire de Croÿ & autres pourroient auoir & pretendre en ladicte Comté, nous ferons tenus de recompenser, & d'icelle Comté faire & tenir frere & cousin sesdits hoirs quittes & paisibles enuers ledit de Croÿ & tous autres. Toutes lesquelles choses nous auons promis & promettons en parolle de Roy, &c. Ces lettres icy furent données à Paris, sous son grand scel le cinquiesme iour d'Octobre l'an mille quatre cens soixāte & cinq: & passées en Parlement l'vnziesme iour dudit mois, &c. En fin desquelles lettres, le Roy mādē à tous Iuges & officiers: à toutes les gens de Parlement, & à tous autres de tenir & faire tenir lesdictes promesses & transports. Et au commencement d'icelles lettres, sont les causes contenues mouuās

le Roy faire lesdits dons & transports au Comte de Charrolois. Premièrement pour les grans mises & despens, que le Comte de Charrolois auoit fais à l'occasion d'icelle armée, qu'il auoit mise sus au commandement du Duc de Berry frere du Roy, pour le bien du Royaume. Secondement pour appaiser les discords & diuisions estans lors entre le Roy & les Princes: ausquels appaiser le Comte de Charrolois festoit moult bien employé. Tiercement qu'à l'occasion desdictes diuisions, les Liegeois festoient mis en armes & estoient entrez es pays du Duc de Bourgogne, où ils auoient bouttez les feux & fait grans dommages. Quartement pour le rachapt fait par le Roy des pays engagez au Duc de Bourgogne: desquels pays le Duc entendoit iouir sa vie durant, nonobstant ledit rachapt, & le Roy en auoit prins la iouissance incontinent le rachapt fait. Et finablement pour recompenser le Comte de Charrolois de sa pension de trente six mille francs, que le Roy luy auoit donnée, & depuis la luy auoit tolue. Pour toutes lesquelles considerations le Roy feit lesdits dons & transports au Comte de Charrolois, par lesdictes lettres & par leur traicté fait à Conflans. Et outre à la requeste & remontrance dudit Comte de Charrolois, le Roy luy accreut ausdictes terres & seigneuries, les preuostez de Vimeu, de Beauuoisis, & de Feuloy pour euer questions & discords, qui eussent peu sourdre entre les officiers du Roy & ceux du Comte: pource que lesdictes preuostez sont enclauées ou bailliage d'Amyens, pour en iouir par ledit Comte & ses hoirs tout semblablement comme des autres, par vnes autres lettres données par le Roy à Paris, sous son scel le xiiij. iour dudit mois d'Octobre dudit an lxxv. passées par Parlement comme dessus le xvj. iour dudit mois. Et par tant furent appeisez le Roy & les Princes.

Comment le Roy voulut veoir l'armée du Comte de Charrolois en ordonnance: & comment le Comte print congé du Roy & s'en alla à tout son armée pour guerroyer les Liegeois. Puis dit comment le Duc de Berry feit hommage au Roy de la Duché de Normandie.

LE traicté fait entre le Roy & les Princes de France (comme dit est) ils assemblerent vn iour tous ensemble au Bois-de-Vincennes dedans le chasteau: ouquel estoit logé pour le iour le seigneur de Saueuses de par le Comte de Charrolois: auquel lieu Charles Duc de Normandie nouvellement, feit hommage au Roy son frere de ladicte Duché. Et puis consequemment tous les autres Princes feirent les deuoirs au Roy de tout ce qu'ils luy deuoient faire chacun endroit luy, à cause de leurs terres & seigneuries: puis prindrent tous congé du Roy & les vns aux autres pour se retraire chacun sur le sien. Ces choses faictes le Comte de Charrolois feit faire monstres & reueuës de ses gens: ausquelles faire le Roy voulut estre present, pour veoir les faire: pource mesmement qu'elles se feirent entre Paris & Conflans: dont quand le Roy les veit, il fut tout esbahy: & dit qu'il n'eut point cuidoie que le Comte de Charrolois fut si puissant ne qu'il eut tant ne telles gens de guerre. Ces monstres faictes le Comte print de rechief cōgé au Roy & aux autres Princes, & se partit de Cōflans le dernier iour d'Octobre & avec toute son armée: & le conuoya le Roy iusques à Villiers le Bel quelque priere que le Comte luy

te luy fait pour retourner, & si n'auoit le Roy guerres de ses gens avec luy: mais qui plus est, furent ensemble audit village trois ou quatre iours faisans tresbonne chiere, & deuisans ensemble secrettement de leurs affaires. Et mostroit le Roy si grand amour au Côte & si grande familiarité qu'il n'en pouoit plus faire, car il ne se vouloit de luy partir n'eslongner. Finablement le Roy s'en retourna & le Côte s'en alla à Senlis, où il fut receu moult honorablement, & puis à Cōpiengne: pareillement à Noyon aussi & es autres villes du Roy, où il passa: car le Roy l'auoit ainsi ordonné, & qu'il entraist par toute ses villes à toute telle compagnie qu'il vouloit: & il y entroit si bien accompagné, qu'il se trouuoit par tout le plus fort: mais aussi payoient ses gens tout ce qu'ils y prenoient sans faire quelque desroy, car le Comte l'auoit ainsi ordonné sur la hart. Le Côte de Charrolois estant encores à Conflans, auoit receu plusieurs lettres du Duc de Bourgogne son pere: par lesquelles le Duc mandoit qu'il luy enuoyast cinq ou six mille combattans, pour ioindre avec ceux qu'il auoit ordonnez contre les Liegeois: & que son intention estoit d'y aller en personne pour les combattre: pourquoy le Comte desiroit tāt plus le retour de France pour estre à combattre lesdits Liegeois, & pour soy venger de ceux de Dinant qui l'auoient tant iniurié comme dit est: mais pource que le traicté fait du Roy & des Princes, plusieurs seigneurs & gens de guerre de son armée se furent partis de son ost & retournes en leurs places, il enuoya ses lettres par tous les païs de son pere: & fait faire commandement sur la hart & sur confiscations de biens, & d'estre banny de tous les païs de son pere, que tous ceux qui eurent esté en France avec luy, & tous autres eurent accoustumé de porter armes, fussent deuers luy entour Maisieres sur Meuse le quinzième iour de Nouembre, armez & montez tout le mieux qu'ils pourroient: auquel lieu de Maisieres se tira le Comte à tous ceux qui luy furent demourez: dont aduint qu'audit iour se trouuerent entour Maisieres les gens d'armes des païs du Duc de Bourgogne: mais plusieurs en y eut qui y allerent contre leur gré & bien enuis, pource qu'ils eurent esté petitemēt payez de leurs gages oudit voyage de Frāce: car de vingt deux sepmaines qu'ils y eurent seruy, ils ne furent payez que de dix sepmaines: mais n'eussent osé cōtredire tāt se faisoit le Comte craindre & redoubter. Et tellemēt qu'il se trouua à Maisieres plus puissant & à plus grād armée, qu'il n'eut en Frāce: car les bones villes des païs du Duc enuoyerent en celle armée archiers & arbalestriers: & si y allerent à celle fois plusieurs cheualiers & escuyers de païs engagez, & autres gens de guerre, qui n'eurent point esté ou voyage de France: & de tels mesmes qui eurent esté du party du Roy contre le Comte de Charrolois.

Cy parle de l'entrée du Duc de Berry à Roüen: & comment tost apres le Roy entra en Normandie & reprint en sa main la Duché: puis dit cōment il fit noyer & mourir aucuns seigneurs du païs qui eurent fauorisé son frere.

AV partement de Conflans Charles nepueu du Duc de Normandie, accompagné du Duc de Bretagne, du Comte de Dunois & d'autres seigneurs, s'en tira en sa nouvelle Duché de Normandie: & tout premierement s'en alla au mont S. Katherine dessus Roüen: car tout le païs s'estoit mis en son obeissance, comme dit est. Et fut aduisé qu'il feroit son

entrée à Roüen le iour S. Katherine lors prochain. Et pour le receuoir honnorablement feirent ceux de Roüen grandes preparations. Mais le Duc de Bretagne faisoit differer ladicte entrée, tendans à aucunes fins couuertes: duquel delayemēt ceux de Roüen non contens, & voyans que leur Duc ne faisoit semblant de faire son entrée, se meirent en armes: & en grande puissance s'en allerent deuers leur nouveau Duc luy prier instamment, qu'il voulsist entrer en la ville: dont luy conseilla le Comte de Harcourt qui lors estoit de ses plus priuez & familiers, qu'il y entraist, & qu'il ne differast plus: & il le creut si que voulsist le Duc de Bretagne où non, il s'en alla avec ceux de la ville entrer dedans, là où il fut moult honnorablement festoyé qui tourna à grand desplaisir au Duc de Bretagne: mais ne le pouoit autrement faire par celle fois. Car il n'auoit point adonc ses gens d'armes avec luy, & pourtant le conuint dissimuler: & commēt troublé & courroucé s'en alla, où ses gens estoient pour soy retraire en Bretagne: & en allant prenoient les liets & les linceulx des bonnes gens, leurs autres biens comme s'ils fussent ennemis. Et prindrent aucunes villes audit païs de Normandie, où le Duc laissa de ses gens pour les tenir sous luy: dont entre les autres il se saisit de la ville de Caen, & laissa dedans le chastel vn grand nombre de ses gens. Ces choses venues à la cognoissance du Roy, il assembla hastiue-ment tout ce qu'il peut auoir de gens d'armes: & alla tout premieremēt à Caen, laquelle luy fut rendue de par le Duc de Bretagne. Et tost apres se rendirent au Roy toutes les autres villes de Normandie, reseruées Roüen, Louuiers, le Pôt-de-l'Arche, & aucuns autres chasteaux. Et le Duc se tenoit à Roüen avec ceux de la ville qui l'auoient receu & tenu à seigneur, & luy auoient promis d'eux tenir à luy iusques à la mort: mais le Duc s'apperceut assez bien qu'ils ne luy tiendroient pas longuement leur promesse. Et pourtant il se partit vn iour de la ville de Roüen, & s'en alla à refuge au Duc de Bretagne, qui le receut benigne-ment. Tost apres que le Duc fut issu de Roüen ceux de la ville se rendirent au Roy, & puis le Pont-de-l'Arche, puis Louuiers: si que toute la Duché de Normandie reuint en la main du Roy, nonobstant don ne promesse par luy faicte à son frere par le traicté de Conflans: & rappella le Roy deuers luy le Duc de Bourbon, vsant de son conseil plus que de nul autre Prince. Si tost comme le Roy se veit au dessus de celle Duché de Normadie, il se print à persecuter ceux qui eurent tenu le party de son frere, & qui l'eurent fauorisé: dont entre les autres il fait prendre & noyer le seigneur d'Esternay, qui auoit esté du temps du feu Roy Charles General de Normandie, homme bien aymé ou païs, sage, prudent & tant deuot qu'il n'auoit son pareil ou païs. Plusieurs autres seigneurs & gens de bien fait le Roy prendre & mourir à celle cause, & aucuns autres s'absenterent du païs, abandonnans leurs maisons & leurs terres, pour crainte de la tyrannie du Roy: pour lesquelles besongnes le Roy se fait blasmer & parler sur luy maintes gens, qui en ouïrent parler.

Comment le Comte de Charrolois entra à tout son armée ou païs de Liege. Et comment les Liegeois demanderent & obtindrent trefues pour vn temps. Et comment tost apres la paix y fut trouuée: mais ne dura gueres de temps.

Ceux



Eux de Liege aduerty du traicté fait entre le Roy & le Comte de Charrolois, cuiderent bien estre comprins audit traicté: mais quand ils sceurent que non estoient, & que le Côte les approchoit à si grosse armée ils enuoyerēt deuers le Duc à Bruxelles vne grande ambassade: & luy feirent offrir grans reparations à faire. Et luy supplierent en toute humilité d'auoir paix à luy & au Comte son fils: & tant feirent deuers le bon Duc qu'ils obtindrent vnes trefues à quinze iours. En ce point estoit dedans Saintron le Comte de Charrolois, qui est vne bonne ville des Liegeois: laquelle se rendit à luy quand il vint. Et ces nouvelles ouies desdictes trefues, il feit crier parmy son ost que nul ne pillast ne feit dommage ou païs de Liege sur la hart, nonobstant que ses gens n'eussent encores receu de leurs gages: & par tant les cōuenoit viure sur les païs du Duc les plus prochains: lesquels païs ils foulerent durement, & si s'espandirent iusques en Lorraine, & autre part moult loing les vns des autres: car autrement n'eussent ils peu viure tant de gens ensemble sans argent. Les quinze iours passez desdictes trefues, elles furent encores r'alongées de huiēt iours, & puis encores autres huiēt iours: & finalement iusques au douziesme iour de Ianuier, qui fut occasion d'un grief dommage à iceux païs voisins: car ils furent durement & piteusement foulez & mangez en si longue espace de temps. Quand le Comte de Charrolois veit si longue trainée, & que les Liegeois ne tenoient ce qu'ils auoient promis: il r'assembla toute son armée & entra dedās le païs de Liege, & rescriuit au Duc son pere, qu'il luy enuoyast ce qu'il auoit de gens d'armes pour ioindre avec les siens, & qu'il auoit intention de combattre les Liegeois à celle fois. Le Duc tout incontinent luy renuoya le seigneur de Sauueses à toutes ses gens, & luy manda qu'il le suiueroit brief en sa personne, & qu'il ne les combattit point sans luy. Comme doncques le Duc se voulüst vn iour partir pour aller en icelle guerre, nonobstant sa foiblesse qui luy douloit encores à l'occasion de la grande maladie qu'il auoit eüe. Son fils luy rescriuit en ce point, comment ceux de Liege estoient venus deuers luy, & luy auoient apporté le traicté tout tel qu'il le leur demandoit, scellé du scel de la cité du Liege. Et que les Liegeois luy crioient mercy, supplians humblement qu'il voulüst estre content d'eux: & qu'il auoit le traicté accepté, ou cas que ce seroit son plaisir. Ces nouvelles venues au Duc il demoura en paix, & ne se partit point de Bruxelles. Le vingt & deuxiesme iour de Ianuier audit an lxxv. sachās ceux de Liege que le Comte de Charrolois & toute son armée entroient en leur païs & à puissance, & que desia son auantgarde que menoit le Comte de S. Pol estoit bien aduacée: Ils enuoyerēt deuers le Comte de Charrolois de quatre vingts à cent homme notables, bien montez & bien armez, pour doubte de leurs gens mesmes bannis & mauuais garnemens, qui ne demandoient que la guerre & qui empeschoient les autres à venir à paix. Ceux cy doncques trouuerent le Comte de Charrolois entre Saintron & Tongres deux bonnes villes appartenans aux Liegeois, & luy presenterent le traicté tel que ceux de la cité auoient accordé & promis tenir, scellé du scel de la cité: eux faisans fors sus leurs vies pour les autres villes & tout le païs de Liege. Ouquel traicté estoit contenu tout au long, tout ce que le Duc & son fils leur demandoient, & vouloient qu'ils feissent, & à genoulx moult

humblement requièrent au Comte mercy & pardon & sa bonne grace: promettant pour tout le païs que de lors en auant ils luy seroient seruiteurs & bons voisins.

LE traicté fut veu par le Comte & accepté, moyennant les reparations & les amèdes proffitables, qu'ils promeirent payer & faire, & par tât leur pardonna le Comte son maltalent. L'amende profitable fut de six cens mille florins de Rin, qu'ils payeroient au Duc en six ans lors prochains aduenir: & que luy Duc de Brabant, & les autres Ducs de Brabant apres luy, seroient à tousiours de lors en auant Mainbrugs & capitaines de tout le païs de Liege à deux mille florins de Rin de pension chacun an. Et qu'iceux Liegeois ne pourroient plus aucune chose recommencer de grand ne de pesant, fut guerre ou autre chose, que ce ne fut du gré & congé de leur Mainbrug. Autre plusieurs points furent contenus audit traicté, que ie tais icy pour cause de briefueté: & pourtant aussi tost apres ils rompirent ledit traicté & n'en tindrent riens.

CE traicté doncques ainsi fait & accepté par le Comte de Charrolois, il feit crier la paix par tout son ost, & que toute son armée fut deuers luy le lédemain aupres de Tongres, en intention que lesdits ambassadeurs de Liege les veissent en ordonnâce de bataille, affin de leur inferer crainte & qu'ils doubtaissent à eux rebeller. Celle armée ainsi mise ensemble le lendemain en ordonnance de bataille, donna grande admiration ausdits Liegeois & aux autres qui le voulurent veoir de Saintron, de Tongres & des autres villes: car iamais n'eussent creu ne cuidé que le Comte eut peu leuer si grand puissance de gens d'armes pour vne fois. A la verité dire selon commune renommée, ils estoient en icelle armée plus de xxviij. mille cheuaux, sans ceux de pied qui y estoient en tresgrand nombre: & si en estoient beaucoup retournez en leurs places tant par congé comme sans congé par faute d'argent. Le Comte voyant ainsi son armée ensemble & en ordonnance, alla tout du long d'icelle bataille, remerciant les capitaines & les autres hommes de guerre bien courtoisemēt, en les priant qu'ils le teinsent pour excusé s'il les auoit mal payez, car il ne l'auoit peu faire autrement celle fois: mais il les payeroit mieux vne autre fois, & les recompenseroit tellement que tous seroit bien contens. Dit outre aux pauvres compagnons, s'il en y auoit aucuns bannis entre eux des païs du Duc son pere, qu'ils veinssent deuers luy à Bruxelles & il feroit tant deuers son pere qu'ils r'auroient leurs païs: à laquelle parolle il print congé d'eux & s'en alla à Saintron en Halsebain, & tous les autres s'en retournerent chacun en sa place.

Comment apres le traicté fait ceux de Saintron, cuiderent auoir occis les gens du Comte de Charrolois: mais en fin se trouuerent les plus foibles: & comment le Comte retourna à Bruxelles deuers le Duc son pere: puis dit comment le Roy de France meit sus vne grosse armée: & comment le Comte de Charrolois se tint garny & sur sa garde.



omme par vn dimenche apres le traicté fait des Liegeois, le Comte estoit à Saintron. Et que les gens d'armes passoient par celle ville pour retourner en leurs places. Ceux de la ville cuidans par aduenture que tous fussent passez, prindrent noise à aucuns compagnons de guerre des gens

gens du bastard de Bourgongne, & en tuerent deux: puis feirent clorre la porte, par laquelle les gens d'armes entroient venans de Tongre & garder les autres. Et fait à croire qu'ils vouloient occire tous ceux, qui lors estoient dedans leur ville: mais les gens d'armes gaignerent celle porte sur eux & entrerent dedans la ville, & s'en allerent tout droit au marché, là où ils se recueillirent & meirent en ordonnance de hutin cōtre ceux de la ville, qui se furent assemblez: mais ne tindrent gueres ains se meirent en fuite pour eux sauuer, neantmoins il en y eut de tuez xix. ou xx. Et n'eut esté que le Comte en fut aduerty, & le remede qu'il y meit ses gēs eussent occis tous ceux de la ville, & eussent tout pillié & tout robbé: car des lors commençoient ils à rompre huis & fenestres, & entrer es maisons: toutesuoyes ils se logerent es maisons & y prindrēt pour viure tels biens qu'ils y trouuerent. Aucuns de ceux de la ville qui eurent esmeu celle noise, se retrahirent en vne forte maison: en laquelle neantmoins ils furēt assiegez & prins, & par tant la noise cessa. Ce fut fait le xxvj. iour de Ianuier l'an lxxv. Puis se partit de Saintron le Comte de Charrolois, & s'en alla à Bruxelles deuers le Duc son pere qui le receut à si grand ioye comme pere pouoit receuoir fils: & furent ensemble par aucuns iours. Puis s'en partit le Comte pour aller à Boulongne payer vn pelerinage, qu'il y auoit promis faire à pied: & s'en alla de Bruxelles à Gand, & de Gand à Bruges & à S. Omer. Esquelles villes il fut moult hautement receu & festoyé. En celle ville de S. Omer vint deuers luy le Comte de Neuers, luy requerre mercy & pardon de tout ce qu'il luy pouoit auoir meffait & offencé, & il luy pardonna tout: & furent ensemble vne espace de temps, & si bien en grace l'un de l'autre, que le Comte de Charrolois rescriuit à ceux des villes: par lesquelles le Comte de Neuers deuoit retourner, qu'ils le receussent & festoyassent aussi honnorablement comme sa propre personne. Et en fut ainsi fait là où il passa. De S. Omer s'en alla le Comte de Charrolois à Boulongne, de Boulongne à Rue, à Abbeuille, à Amyens, à Corbie, à Peronne. En tous lesquels lieux il fut honnorablement receu: iacoit ce q̄ plusieurs desdictes villes rengagées fussent bien desplaisans qu'ils n'estoient plus au Roy. Le Comte de Charrolois estant à Peronne, fut aduerty que le Roy de France mettoit sus la plus grande armée qu'il eut oncques mise sus: & qu'il auoit fait faire tant d'artillerie, que c'estoit vne grand merueille: mesmement faisoit prendre en aucunes villes des cloches, & en faisoit faire serpētines & autres engins à poul-dre: & si escriuoit à la fois au Comte de Charrolois moult doucement, & qu'il le tenoit pour le meilleur amy qu'il eut: mais neantmoins le Comte ne s'y fioit pas trop: & doubtant tousiours la mutabilité du courage du Roy, fait crier es pays de son pere que tout homme accoustumé d'armer, fut prest le quinziesme iour de Iuing pour aller en la compagnie du Roy en la Duché de Normandie contre les Anglois, qui se vouloient enforcer d'y descendre (car ainsi faisoit le Roy courre la voix parmy son Royaume, que les Anglois se preparoient pour descendre en Normandie en la prochaine saison: qui estoient parolles fainctes du Roy, qui pensoit faire tout autrement que les gens ne pensoient: car il auoit enuoyé en Angleterre le bastard de Bourbon, lequel auoit obtenu trefues des Anglois pour douze mois, moyennant vne grande somme d'or que le Roy deuoit payer aux Anglois) neantmoins il faisoit tenir Parlement à S. Omer avec

les Anglois: & y auoit enuoyé son frere le bastard de Bourgogne: & pour le Roy d'Angleterre y estoit le Côte de Vvaruich & autres seigneurs d'Angleterre affin d'auoir l'alliance du Roy d'Angleterre & des Anglois, si aduenoit que le Roy de France le voulsist guerroyer comme il estoit apparent d'aduenir.

Comment ceux de Dinant en Liege rompirent la paix, & recommencerent la guerre contre le Duc de Bourgogne. Et comment tost apres leur ville fut assiégée & battue d'engins.

1466.



N l'an mille cccc.lxvj. depuis Pasques iusques à la my-Aoust, se marierent tant de gens en la Comté d'Arthois & ou païs enuiron, qu'il n'estoit memoire d'homme d'auoir veu le semblable ne ouïy parler. En ce temps aussi ceux de Dinant ennuyez de la paix qu'ils auoient obtenue du Duc de Bourgogne à leurs requestes & prieres, ayans leurs courages enfléz & enclins à la guerre plus qu'à la paix, laisserent entrer dedans leur ville plusieurs bannis & mauuais garnemens, qui ne queroient que mal faire. Et tost apres issirent de leur ville & s'en allerent courre & pillier plusieurs villages en Hainault, & en Namur boutter les feux, violer Eglises & faire tous les maux du monde. Ces nouuelles ouïes par le Duc de Bourgogne, il feit le plus grand mandemēt de gens d'armes qu'il eut oncques fait, pour estre tout homme entour Namur le vingthuiētiesme iour de Iuillet audit an lxvj. Mais non obstant ses mandemens les gens d'armes differoient le plus qu'ils pouoient de eux monter & habiller, ne d'ayder les pauvres compagnons eux mettre sus, redoubtans la despence & souuenans de ce qu'en l'année precedente ils eurent esté trop petitement payez: dont quand le Duc fut aduerty de toutes ces choses, luy estant vn iour à table enuiron l'entrée de Iuillet, il en fut si tresfort troublé & si despit qu'il boutta la table ius: Disant qu'il veoit bien qu'il estoit gouuerné & qu'il ne gouuernoit plus: & toutesuoyes auoit il payé pour l'armée de l'année precedente plus de deux cens mille escus de son tresor, & ne sçauoit comment on les auoit employez. Et comme plus parloit, & plus se courrouçoit, & tellement qu'il en cheut en douleur & en apoplexie: si que l'on cuida deux ou trois iours qu'il n'en releuast iamais, mais si feit. Et lors incontinent & subitement il manda gens d'armes en tous ses païs, en cōmandant sur la hart que tout homme fut prest. Entre ces choses & que le Comte de Charrolois se tenoit à Perōne, il feit remettre sus la gabelle du sel: laquelle il auoit fait mettre ius à son allée en France à la tresgrād ioye du peuple: mais celle remise sus leur mua leur ioye en dueil & en grand murmure: pource mesmement que le Comte feit recueillir les arrierages de l'an qu'elle n'auoit point couru.

LE Duc de Bourgogne conclud & dispose d'aller en Liege à toute sa puissance, feit mettre & attacher aux portes des Eglises des bonnes villes de ses païs, la coppie d'une sentence d'excommunication, donnée du Pape contre ceux de Dinant & leurs complices & adherens, pour punition des maux qu'ils faisoient & s'enforçoient de faire tous les iours, en allant contre le traicté de la paix & comme desobeissans au saint siege Apostolique. Par laquelle sentence le Pape dōnoit congé & licence au Duc de Bourgogne & à ses gens de les punir, & de les faire obeir: lesquels en ce faisant acquerroient plains pardons de leurs

leurs pechez comme ministres de l'Eglise. Et par celle mesme sentence deffendoit le Pape le seruice diuin faire en la ville de Dinant. Neantmoins ceux de Dinant obstinez en leurs capitales volentez & opinions, eux demonstans rebelles & desobeissans à nostre mere saincte Eglise, cōtraignirent leurs prestres, & leur feirent faire le seruice diuin & chanter messes comme deuant. Et pour ce qu'ils en trouuerent aucuns qui ne voulurent celebrer n'obeir à l'Eglise ils les noyerent. En ce point que l'armée du Duc de Bourgogne estoit prestee pour aller à Dinant, le bastard de S. Pol seigneur de Haubourdin, qui auoit toutes ses besongnes prestes comme les autres, vne maladie le prinist si griefue qu'il en mourust tantost apres dont ce fut pitié & dommage. Car il eut esté vaillant, sage & prudent: & estoit encores vn des bons chiefs de guerre, que le Duc eut en son armée, beau cheualier entre tous les autres & portant l'ordre du Duc, de Toison d'or.

ENVIRON le commencement d'Aoust oudit an lxxvj. se meit sus l'armée du Duc de Bourgogne pour tirer vers Namur, ainsi comme il l'auoit commandé & que chacun l'aymoit & vouloit seruir & obeir. Et fut à celle fois la plus belle & la plus grosse armée que l'en eut veu pieça: voire plus grande la moitié, que celle qui fut menée en Frâce: car selon commune renommée, ils estoient en celle armée plus de trente mille payez: en laquelle pour les plus grans estoient le Comte de Charrolois, le Comte de S. Pol Connestable de France, le seigneur de Rauestain, les trois fils du Comte de S. Pol, les deux bastards de Bourgogne & Baudoin, le Comte de Nasso & tant d'autres barons, seigneurs, cheualiers & gentils-hommes qui trop seroiēt longs à nommer: & sy estoit le Mareschal de Bourgogne en son estat: car l'armée de Bourgogne n'y estoit pas, le Duc mesmes en sa personne y voulut aller: & s'en alla de Bruxelles à Namur le quatorziesme iour dudit mois d'Aoust. Et tost apres passerent outre & s'en allerent courre iusques és faulxbourgs de Dinant enuiron trois cens combattans, où estoient le Comte de Charrolois, & le Mareschal de Bourgogne & aucuns autres. Sur lesquels saillirent ceux de la ville, & les escarmoucherent par deux où par trois fois: mais tousiours furēt reboutez & fut vne horreur de veoir les engins qu'ils iecterent de la ville: mais n'en tuerent nuls: & de ceux de la ville en y eut de tuez trois ou quatre. D'autre part à l'autre costé de la riuiera de Meuse, tenoient les champs le Comte de S. Pol, messire Iaques son frere & autres en grand nōbre: lesquels faisoient leurs approches de Dinant à toute diligence. Et le seigneur de Saueuses estoit à Bouvines, vne bōne petite ville de la Comté de Namur, seant à demie lieüe de Dinant ou enuiron. Nouuelles vindrent en l'ost des gens du Duc, que ceux de la cité de Liege auoient fait mōstres de leurs gēs, & qu'ils se trouuoient bien xl. mille combattans: dont ils en auoient enuoyé quatre mille à Dinant, & qu'ils se furent vātez en Liege se le siege se mettoit deuant Dinant qu'ils le leueroient où ils mourroient en la peine. Le xvij. iour dudit mois d'Aoust se meit à chemin toute l'armée en deux esles, & le charroy ou meillieu, pour aller à Dinant: & portoit l'estādart du bastard de Bourgogne le seigneur de Cohem pour l'auant-garde, le Comte de Charrolois en la bataille, & le Comte de Marle grandement accompagné menoit l'arriere-garde. Si tost comme ils approcherent de Dinant, ceux de dedans se prindrent à ruer de leurs

engins à pouldre à grand planté: faillirent dehors, & s'en allerent bouter le feu en vne grosse cense estant illec au dessus d'une abbaye: mais ils furent rencôtrez si durement qu'ils rentrerent en leur ville plustost que le pas, & abandonnerent leurs faulxbourgs, si qu'à pou tint que les gens du Comte n'entrèrent avec eux dedans leur ville: en ceste maniere furent gagez les faulxbourgs de Dinant, nonobstant qu'ils fussent encloz d'eau & de bonnes murailles aussi fors comme vne bonne ville. Esquels faulxbourgs estoit vne belle Eglise de freres mineurs, vn monastere de femmes & vne paroisse: & delez les faulxbourgs vne abbaye de blancs Moynes. Et à ce faire ne perdit le Comte de Charrolois que cinq ou six hommes. Quand ces faulxbourgs icy furent ainsi conquis du costé de Bouuines, ceux de la ville allerent bouter le feu & ardoir ceux qui estoient de l'autre costé, ainçois que le Comte de S. Pol y veinist qui estoit de ce costé là: ce feirent ils affin que nul ne logeast. En la nuit ensuiuant se logea le Comte de Charrolois en celle abbaye, & fait vne bombarde affuster droit deuant la porte de la ville. Dedans l'enclos des freres mineurs, se logerent grand planté de gens de guerre qui y feirent bon guet toute celle nuit: celle bombarbe rua contre celle porte si durement qu'en briebs iours elle la cassa & rompit, mais ceux de la ville la remmurèrent incontinent. D'autre part le Connestable de France qui se fut logé sur la riuere au dessous de la montaigne, fait abbatre de engins vne tour Corniere qui forment les castilloit.

Cy dit la maniere comment la ville de Dinant fut conquise de force par les gens du Duc de Bourgogne, si qu'ils les conuint rendre à la voulenté du Duc: puis dit comment le Duc en ordonna pour memoire perpetuelle à toutes villes de pareille condition.



Vand vint le mardy ensuiuant l'en fait rompre & abbatre toutes les portes & les murailles des Cordeliers, & de l'abbaye pour affuster les engins, & pour abbatre & demollir les murs de la ville: & se prirent à ruer engins de toutes parts tant dehors comme dedans, & en y eut quatre morts des gés du Comte de traict de la ville: & entre les autres fut tué le maistre de la bombarde en cueillant vne verge. Durant ce que les gens du Comte approcherent ainsi la ville: les viures furēt si chers en l'ost qu'un pain de deux deniers y valoit douze deniers, & pareillement les autres viures. Et cōuenoit pour viure les cheuaux, aller trois ou quatre lieües loing en fourrage. Ce iour de mardy s'en alla le Côte de Charrolois loger aux Cordeliers à vn iect de pierre pres de la porte. Et le Duc son pere vint de Namur loger à Bouuines.

Les engins ainsi mis & affustez, ceux de la ville furent sommez d'eux rendre à la voulenté du Duc. Et ils respondirent qu'ils n'en auoient talent, continuans tousiours en leurs villains parlers: iniurians le Duc & son fils plus qu'ils n'eurent oncques fait & disans du Duc: Que f'est dementé ce vieil monnart vostre Duc de cy venir mourir? A il tant vescu pour cy mourir villainement? Et vostre Comte Charlotel qu'a il à cy venir mourir? Il s'en voise à Montlehery combattre le noble Roy de France, qui nous venra secourir. Croyez qu'il ne nous fauldra pas, car il le nous a promis. A malle-heure y vint il oncques, il a le becq trop iaune, ceux de Liege le feront brief desloger villainement. Autres
plusieurs

plusieurs villaines parolles disoient les Dinadois du Duc & de son fils, qui trop longues feroient à escrire, & ne cessoient iamais: encore feirent ils piz. Ceux de Bouuines leurs voisins ainçois que le siege leur veint leur enuoyerent vnes lettres, par lesquelles ils leur conseilloyent d'eux rendre au Duc & de non attendre le siege: mais par grand despit & felonnie ils feirent decapiter leur messagier: ce nonobstant ceux de Bouuines desirans leur salut, leur renuoyerent vn enfant innocent portant leurs lettres, adressans à ceux de la Loy de la ville. Par lesquelles ils les admonnestoient de rechief, qu'ils trouuassent leur traicté deuers le Duc, ainçois qu'il les approchast plus près: affin aussi qu'ils ne fussent plus foulez ne mangez des gens d'armes qui tout gastoient: les felons obstinez feirent mourir le pauvre enfant innocent en despit du Duc & de leurs voisins de Bouuines: & dient aucuns qu'ils feirent le pauvre enfant desmembrer. Autre derision & outrage auoient ils fait ainçois que le siege y veinist, sachans toutesuoyes qu'on luy venoit mettre: car eux en grand nombre s'en allerent assez pres de Bouuines. Et par dessus vne fosse plaine d'eauë, profonde, orde & puante, & plaine de bestes venimeuses, trauerferent vn bancq, sur lequel ils assirent la semblance du Duc de Bourgogne, vestu & armoyé de ses armes: crians & disans à ceux de Bouuines: Veez cy le siege du grand crapaut vostre Duc. Mainte autre chose laide & villaine feirent les Dinandois en despit du Duc & de son fils. Desquelles & le pere & le fils furent bien aduertis. Pourquoy le Duc & le Comte desiroient tant plus prendre vengeance de si male gent.

Q V A N D doncques les engins du Comte furent biē mis & affustez, on les fait ruer contre la ville & dedans icelle si terriblement & si continuellement trois ou quatre heures durans, qu'il n'estoit homme ne femme en la ville qui se sceut ou tenir leans. Si estoit la fumée si grande & le feu si terrible, que ce sembloit leans vn droit enfer. En laquelle tempeste furent occis grand nōbre de gēs hommes & femmes. Et entre-temps le Duc faisoit faire à Bouuines deux ponts de bois pour passer la riuere de Meuse, affin de les enclorre & assaillir de tous costez. Vint le vendredy que les tours & les murailles estoient tresfort dommagées, qu'ils issirent de la ville huit hommes des plus resseans: & par sauscōduit vindrent en l'ost cuidans trouuer aucun moyen de paix, mais ils n'y feirent riēs. Le samedy fut commādē par tout l'ost que chacun fut le lendemain tout prest d'assaillir la ville, & que chacun fut garny d'vn fagot pour remplir les fossez de la ville. Et comme le iour fut venu le Duc ne voulut pas qu'elle fut encores assaillie, mais voulut qu'elle fut de rechief battue des engins. Et elle le fut si terriblement que ceux de la garnison se desespererent de leur salut, & s'enfuirent dehors, dont se voulurent les habitans rendre sauues leurs vies. A quoy le Duc ne les voulut receuoir. Entre ces choses aduint vn meschief entre les gens du Comte par vn pou de feu, qui cheut en vn tonneau de pouldre de canon que l'en auoit oublié à couvrir: car ils y furent ars & morts trente ou trente-deux de ses hommes & plusieurs autres bruslez, qui depuis furent gueris. D'autre part l'Euesque du Liege qui se tenoit à Huy fait sçauoir au Duc son oncle, qu'ils estoient issus de la cité de Liege de trente à quarante mille hommes pour leuer le siege de Dinant, & qu'il fut sur sa garde: surquoy le Duc eut aduis

de ses gens & fut conseillé d'assaillir la ville ainçois que les Liegeois y peussent venir à téps: dont se meirent tous en point pour cōmencer l'assault, & pouoient estre cinq heures du soir: mais ceux de la ville doutans qu'ils ne peussent la ville tenir ne deffendre: nō obstant la batture & demolition de leurs tours & de leurs murs: doutās aussi qu'ils ne feussent tous occis s'ils feussent prins d'assault, se rendirent à la voulété du Duc: & porterent les clefs au Bastard de Bourgongne, lequel les porta au Côte de Charrolois: mais ne les voulut receuoir, iusques à ce qu'ils en eut le consentement de son pere. En celle mesme nuit entra ledit Bastard dedans le chastel de Dinant qui luy fut deliuré. Et le Mareschal de Bourgongne & aucuns autres seigneurs à toutes leurs gens entrerent en ladicte ville, & garderēt les portes iusques au lendemain que le Comte y entra ainsi comme à midy: & fit ses gēs loger par fourrier auāt la ville, iusques à tant qu'il sçauoit la voulenté du Duc son pere: lequel y fut allé voulentiers: mais on le luy descōseilla, attendu que sa voulenté estoit determinée à destruire la ville, si n'y alla point. Quand le Côte sceut qu'il ny viēdroit pas, & que ses gens d'armes estoient tous logez leans: & il habādonna tout à piller & à butin chacun en son quartier. Et lors commença leans vn grand desroy & gens d'armes à piller, & à eux entre-tuer tels y auoit: comme chacun voulsist garder & deffendre son quartier, & auoir ce qu'il pouoit trouuer: mais les plus forts y auoient le plus beau du ieu, car ils tolloient aux foibles ce qu'ils auoient trouué: chacun qui pouoit y prenoit son hoste prisonnier: non obstant qu'ils eussent tous leurs biens perdus: lesquels biens estoient moult grans: car Dinant de son grand estoit la plus riche ville & la plus forte, que l'en sceust nulle part qui fut cause de sa ruine: car ils estoient tant surmontez d'orgueil & d'outrecuidance pour leurs richesses, qu'ils ne craignoient Dieu ne l'Eglise, ne Prince qui fut sur terre: & pourtant fait à croire que Dieu les voulut ainsi punir. Ainsi donques le Mardy, le Mercredy & le Ieudy, l'en ne fit leans que raur & butiner, tellement que la riuere estoit toute plaine de bateaux, & les rues plaines de chariots qui menoient les biens hors de la ville, & hommes tous chargez des biens qu'ils en emportoient. Et si y trouuerent les gens d'armes viures si largement, qu'ils estoient leans garnis assez pour deux ou trois ans. Puis fut enqueste faicte, qui eurent esté les mauuais de la ville, & qui eurent, ainsi que dit est, iniurié le Duc & son fils. Aucuns en furent nommez & prins & iettez en la riuere deux à deux liez ensemble. Puis fit le Comte prendre le Bombardier de la ville, & le fit pendre sur la montagne au dessus de l'Eglise: tous ceux qui furent trouuez coupables d'auoir recommencé la guerre furent noyez en la riuere. Des le commencement que la ville fut abandonnée, le Comte fit crier que nuls sur la hart n'enforçast femme: neantmoins il en y eut trois prins qui furent conuaincus de leur peché, lesquels le Comte fit passer par trois fois parmy toutes ses gens, afin que chacun y print exemple: puis les fit tous trois pēdre à vn gibet: & iura lors s'il en sçauoit nulz quels qu'ils fussent nobles ou non nobles, qui enforçast femme qu'il les feroit tous pendre: si n'y eut onques puis si hardy qui osast violer femme contre son gré: le Comte aussi fit vider de la ville les femmes & les petits enfans & les gens d'Eglise, & les fit par ses gens mesmes conduire iusques pres de la cité de Liege: & fut vne piteuse chose d'ouir lesdictes femmes & enfans faire leurs

cris

cris & leurs plains à leur issue de la ville: & n'estoit si dur cuer qui eut veu leur pauvreté & ouï leurs plains à qui n'en eut prins pitié. Le vendredy xxviij. iour d'Aoust audit an lxxvj. que la ville estoit lors vuide de tous ses biens, les Eglises & les maisons toutes descouvertes de leur plomb, environ vne heure apres minuit se print le feu ou logis du seigneur de Rauestain delez nostre dame, en telle maniere que l'en ne peut sçauoir se ce fut par meschief, ou si y fut boutté à escient pour faire vider les gens d'armes dehors, ou pour les ardoir leans ou autrement. Toutesuoyes le Comte commanda à l'estaindre qui pourroit, & y meit on peine pres de deux heures: mais entre-temps se print aussi le feu en la maison de la ville, où estoient grand planté de pouldres de canon: lesquelles pourprindrent de feu la maison par si grand force, qu'il monta iusques au comble de l'Eglise de nostre Dame, & fut ars le comble: mais pource que l'Eglise estoit vaultée de pierre, le feu ne passa point si tost, & pourtant furent sauuées les reliques, & les aornemens d'icelle Eglise: & les fait le Comte prendre & porter à Bouuines, voire celles qui vindrent à sa cognoissance. Car l'on en auoit prins & rauy beaucoup, ainçois qu'il y venist: & si en y eut assez de bruslées, & tant d'autre butin aual la ville que les gens du Comte y perdirent de leur butin treslargement: & si y eut des gens assez bruslez & eschaudez, tant estoient aigres ou pillage: & le feu les suiuiot de si pres que c'estoit vne grand merueille: si qu'il pourroit sembler que Dieu vouloit toute la ville destruire & ardoir pour punir son orgueil. Tandis que celle ville de Dinant estoit ainsi en feu & en flamme, estoit à Bouuines venue deuers le Duc vne grosse ambassade de Liege pour trouuer leur traicté, lesquels veoient celle ville ardoir, qui leur estoit vn dur exemple. D'autre part quand le Comte veit le feu ainsi enforcer en celle ville, il en fait boutter par tous les lieux où il n'en y auoit point tant en la ville comme es faulxbourgs, affin qu'elle fut tout arse. Puis fait venir gens à planté de tout le païs environ, par lesquels il fait demolir & abbatre toutes les tours, & les murailles & tous les forts de la ville: & fait à chacun d'eux dōner trois patars pour iour à ce faire avec tout le butin qu'ils y pourroient trouuer: & ils y besongnerent tellement, que dedans quatre iours apres le feu cessé en la ville, ceux qui le veoient lors pouoient dire, cy fut Dinant: car il n'y auoit plus porte ne tour, muraille, Eglise, ne maison que tout ne fut ars ou abbatu. Encore estoit aduenu, quand le feu print en la grande Eglise, que plusieurs bons prisonniers qui estoient dedans y furent ars & perdus, & autres plusieurs qui se furent retraits en aucunes tours & forts de la ville furent ars & bruslez là dedans. Ainsi fut destruite celle ville de Dinant par continuer en follie & en orgueil.

Cy dit comment apres la destruction de Dinant le Duc se disposa d'entrer ou païs de Liege à toute son armée & des villes qui se rendirent à luy. Puis dit comment la paix y fut trouuée pour celle fois.




Pres que celle orgueilleuse ville de Dinant fut ainsi destruite, que dit est: le Duc de Bourgogne se partit de Bouuines le premier iour de Septembre oudit an lxxvj. & par la riuere s'en retourna à Namur, avec luy celle ambassade de Liege poursuiuant tousiours d'auoir appointment à luy: puis passa toute l'armée par Namur & s'en alla le bastard de

Bourgongne loger ou paÿs de Halsebam à deux lieuës de Saintron, & le Comte de Charrolois se logea entre Tillemont & Saintron. Tost apres se rendit au Comte de S. Pol la ville de Thuyn, qui luy eut esté par le Duc donnée en récompense de ce qu'il n'auoit point esté au butin de Dinât: laquelle ville ne fut point pillée moyennant vne somme d'argent qu'ils payerent audit Comte de S. Pol: & si feirent abbatre leurs portes & leurs murs: le pareil feirent ceux de Saintrô, & par ce moyen ne furent pillées ne Thuyn ne Saintron. Puis s'en alla le Comte de Charrolois pour assieger la ville de Tongres: mais pource qu'on luy dit qu'il n'y auoit personne leans, & que tous s'en furent fuis, il fit tout son ost tirer vers la cité de Liege, & le Duc son pere demoura à Namur: le Comte s'en alla iusques à Montenac à quatre lieuës de Liege tousiours ses gens & son charroy en ordonnance de bataille. Là luy vindrent nouuelles que ceux de la cité estoient issus en grand nombre pour le combattre, & pourtant il se prepara pour les combattre & meit ses gës d'armes en bonne ordonnance, & fit deux esles de ses gens & la bataille ou meillieu. En ce point se teindrent plus de trois heures attédans que les Liegeois les venissent combattre, mais non feirent: ains luy enuoyerent requerre leur estat iusques au lendemain dix heures, promettans de faire tout ce qu'il leur demandoit: & partant le Comte fut content pour le iour qui estoit le vj. iour de Septembre. Ces choses ainsi faictes le Comte de S. Pol Connestable de France & le Bastard de Bourgongne à toutes leurs gës, s'en allerent pour veoir la conduicte des Liegeois qui furent issus de la cité: lesquels se tenoient sur la riuere de Gerre, & tantost leur fut dit & rapporté que les coureurs d'iceux Liegeois qui eurent conduict leur ambassade escarmouchoient les fourriers de l'ost du Comte: si y enuoyerent vne compagnie de leurs gës. Et lors incontinent que les Liegeois les veirent ils se retrahirent avec les autres. Quand vint sur le soir les gens du Comte apparceurent les Liegeois tout clerement & se meirent en bataille deuant ceux au moins d'un quart de lieuë: le Connestable passa celle riuere de Gerre pour les enclore, & fit vne partie de ses gens descendre à pied qu'il estoit enuiron cinq heures du soir. Ceux cy eussent volentiers assailly les Liegeois: mais le Comte ne le voulut permettre pour cause du leur estat qu'il leur auoit octroïé, dont tous ceux de son ost furent bien desplaisans: car ils pouoient là auoir leurs ennemis à bon compte, & que homme n'en fut iamais eschappé: car ils ne pouoient fuir pource qu'ils là estoient encloz, & si estoient bien deux mille à cheual & dix mille à pied ou plus: car plusieurs estoient ou village, que l'en ne pouoit descourir: aussi des gens du Comte se tenoient plusieurs en vn gros village nommé Varennes, & n'en vouloient issir pour eux ioindre avec leurs compagnons: pourquoy le Comte fit ardoir le village, & par tât les cōuint issir dehors & eux mettre en bataille avec les autres, & si perdirēt de leurs bagues assez par le feu. En ce point teint le Côte ses gës en bataille iusques à dix heures en la nuict: puis fit chacun retraire à son logis. Le Dimenche vij. iour de Septembre ou dit an lxxvj. tout au plus matin remeit le Comte toutes ses gens en bataille, & se teindrēt en ce point tous ensemble sans passer celle riuere de Gerre iusques à dix heures du iour, que lors reuint celle ambassade des Liegeois: & dirent au Comte de Charrolois que ceux de Liege estoient prests & conclus de tenir & parfournir de tous poincts tout ce que le Duc

Duc son pere & luy leur demandoient, requerans qu'ils les tenissent en paix: & pour seureté de tenir le traicté ils bailloient en hostages cinquātē hommes tels qu'ils plairoit au Duc les eslire: c'est à sçauoir xxxij. hommes pour la cité de Liege, six pour la ville de Tongres, six pour la ville de Saintron & huit pour la ville de Hessel. En ce mesmes iour en liurerent ils vne partie, lesquels furent menez à Iudenge deuers le Duc, qui y estoit venu de Namur pour combattre les Liegeois avec son fils. Par ce moyen fut faite la paix des Liegeois au Duc de Bourgongne, & à son fils pour celle fois. Par lequel traicté ils promeirent payer six cens mille florins de Rin en six ans, chacun an cent mille. Et liurerent tost apres les cinquante hostagiers qu'ils auoient promis liurer, & tels comme le Duc les voulut auoir: lesquels deuoient retourner en leurs lieux au bout de l'an la premiere année payée, par si que autres cinquante fussent renuoyez au Duc comme deuant. Et par ledit traicté iceluy Duc de Bourgongne comme Duc de Brabant & ses successeurs Ducs de Brabant, apres luy seroient à tousiours perpetuellement Maimbrugs & capitaines des Liegeois, & de tout leur païs: sans le conseil & voulenté desquels Ducs de Brabant iceux Liegeois ne pourroient quelque chose faire de nouuel d'oresnauant. Autres plusieurs choses promeirent faire lesdits Liegeois que ie laisse à escrire, pource que tost apres ils ne teindrent chose qu'ils eussent promise. En ce point estoient viures si trefchiers en l'ost du Comte de Charrolois, que à tresgrand peine ils en pouoient recouurer. Ce mesmes iour qu'il estoit iour de Lundy huitiesme iour du mois de Septēbre que la paix estoit faicte & accordée, vint l'armée des Bourgongnōs enuiron quatre cens lances, que conduisoient le seigneur de Montagu, & le Marquis de Rotelin. Et si y vindrent vne route de Suisses de soixante hommes ou enuiron, & trois cens hommes que ceux d'Anuers enuoyerent au Comte pour luy ayder à combattre les Liegeois. Le mercredy ensuiuant vindrent ceux de la cité, & deliurerent au Comte les lettres de leurs promesses seellées des seaux des villes de Tongres, de Saintron, de Hessel & des autres villes de leur seigneurie. Estoit aussi traicté se aucuns des hostagiers mouroient deuant la fin de l'an, que les Liegeois en renuoyeroiēt des autres en leurs lieux: & pour les intersts du Duc depuis le premier traicté fait, promeirent les Liegeois en payer autant comme le Duc ordōneroit & diroit qu'il en vouldroit auoir. Ce iour mesmes de la paix ainsi faicte, elle fut criée par tout l'ost & fut deffendu que nul ne pillast ne fourrageast des lors en auāt ou païs de Liege. Ces choses ainsi faictes & acheuées le Comte de Charrolois se meit au retour à toute son armée, & se trouua le Dimenche ensuiuant à vn gros village nommé Chasteler, appartenāt au chapitre de Liege: auquel lieu vindrent deuers luy les hommes de la ville de Thuyn faire leur amendise, & crier mercy humblement à genoux: puis furent ordonnez & enuoyez en leur ville cent hommes pour abbattre & demolir les portes, & les tours & tous les murs de la ville aux despens d'icelle ville. En celle place deffit le Comte son armée, & chacun s'en retourna sur le sien, & le Cōte se retrahit deuers le Duc son pere à Bruxelles où il estoit retourné. Et tost apres enuoyerent vne ambassade en Angleterre deuers le Roy Edouard du besongnié, desquels ie ne mets icy riens pource que ie n'en sçay riens.

Cy dit comment messire Anthoine bastard de Bourgongne passa en Angleterre, pour faire armes contre le seigneur d'Escalles frere de la Royne d'Angleterre.

1467.



An ensuiuant apres Pasques mille quatre cens lxvij. s'en alla en Angleterre messire Anthoine bastard de Bourgongne, pour faire certaines armes cōtre le seigneur d'Escalles frere de la Royne d'Angleterre: & y alla tresbien accompagné de gens de guerre, & garny d'artillerie: pource que nouuelles couroient lors (& vray est) qu'aucuns pirates & escumeurs de mer guettoient sur luy pour le ruer ius faignans qu'ils fussent Espagnols, mais ils estoient François. Et aduint que les gens dudit bastard prindrent deux de leurs nauires tresbien garnies de plusieurs biens, & de gens de guerre, lesquels biens furent butinez: puis arriua sauvement en Angleterre & fait ses armes bien & notablement, lesquelles ne durerent gueres: car elles estoient à la vouldenté du Roy d'Angleterre qui ne les laissa gueres combattre, & si ne les faisoient que pour leur plaissance. En ceste année fut assez grand planté de vins & de bleds, & furent bons & les bleds de bonne garde. En ceste année aussi delaisserent les dames & damoiselles les queües à porter à leurs robes: & en ce lieu meirent bordures à leurs robes de gris de lestices, de martres, de veloux & d'autres choses si larges, cōme d'un veloux de hault ou plus: & si meirent sur leurs testes bourrelets à maniere de bonnet rond, qui s'amenuisoit par dessus de la hauteur de demie aulne ou de trois quartiers de long tels y auoit: & aucunes les portoient moindres, & deliez couurechiefs par dessus, pendans par derriere iusques à terre, les aucuns & les autres: & prindrent aussi à porter leurs ceintures de soye plus larges beaucoup, qu'elles n'auoient accoustumé: & les ferrures plus somptueuses assez, & coliers d'or à leurs cols autrement & plus cointement beaucoup qu'elles n'auoient accoustumé & de diuerses façons. En ce temps aussi les hommes se prindrent à vestir plus court, qu'ils n'eurent oncques fait: tellement que l'en veoit la façon de leurs culs & de leurs genitoire, ainsi comme l'en souloit vestir les singes, qui estoit chose tresmal honneste & impudique: & si faisoient les manches fendre de leurs robes & de leurs pourpoints, pour monstrier leurs chemises deliées, larges & blanches: portoient aussi leurs cheveux si longs qu'ils leur empeschoient leurs visages, mesmement leurs yeux: & sur leurs testes portoient bonnets de drap hauts & longs d'un quartier ou plus. Portoient aussi comme tous indifferement chaines d'or moult somptueuses cheualiers, & escuyers: les varlets mesmes pourpoints de soye, de satin & de veloux. Et presque tous especiallement és cours des Princes portoient poulaines à leurs soulliers d'un quartier de lōg, voire plus tels y auoit: portoiēt aussi à leurs pourpoints gros mahoitres à leurs espaules, pour monstrier qu'ils fussent larges par les espaules, qui sont choses moult vaines, & par aduenture fort haineuses à Dieu. Et qui estoit huyt court vestu, il estoit le lendemain long vestu iusques à terre. Et si estoit ceste maniere si commune, n'y auoit si petit compagnon qui ne se vouldist vestir à la mode des grans & des riches fut long, fut court, non regardans ou coust ne à la despée, ne s'il appartenoit à leur estat.

Cyparle

Cy parle du trespas & de l'enterrement du noble Duc Philippe de Bourgongne, & de son notable obsequie & enterrement fait à S. Donnaſt de Bruges.

LE douziesme iour de Iuing oudit an. lxxvij. par vn vendredy au soir en la ville de Bruges, print au noble Duc Philippe de Bourgongne vne moult griefue maladie, laquelle luy dura iusques au lundy ensuiuant quinziesme iour dudit mois, qu'il rendit à Dieu son ame entre neuf & dix heures du soir. Le Dimenche deuant quand l'en vit son mal enforcer, l'on l'enuoya signifier au Comte de Charrolois son fils, qui lors sejournoit à Gand: lequel tout incontinent se partit de Gand & à si tresgrand haste, qu'il ne pouoit plus: s'en alla à Bruges descendre en l'hostel de son pere, qu'il estoit l'heure de midy dudit iour de Lundy: & s'en courut où estoit son pere au liēt, lequel il trouua qu'il auoit la parolle perdue: neātmoins il se ietta à genoux deuant luy, & en plorant tendrement luy requist sa beneisson, & que se aucune chose il luy auoit meffait qu'il le luy vouldist pardonner: le confesseur qui se tenoit delez le Duc le admonesta, que s'il estoit qu'il ne peust parler, que au moins il luy demonstraſt par signe sa bonne volenté: à laquelle admonition le bon Duc & bening ouurit les yeux: print son fils par la main, & la luy estraignit qui fut signe de pardon & de beniuolēce. Et le bon fils se teint adez au plus pres de son pere, & ne le laissa iusques à ce qu'il rendit à Dieu son ame. Dieu par sa grace luy face pardon & mercy, & vueille son ame sauuer & mettre en Paradis. Le corps du noble Duc ainsi mort fut laissé sur son liēt toute celle nuit, vn noir bonnet sur son chief: & le lendemain encores iusques au soir: si qu'à chacun loisoit de le aller veoir, qui veoir le vouloit: & il y en alla tant que ce fut vne grand merueille: & tous prioient pour luy que Dieu le vouldist sauuer. Le Mardy sur le soir fut son corps ouuert & embaumé, & furent mis à part son cuer: son corps & ses entrailles chacun en vn vaisseau de plomb bien cloz & soudé, & fut tout mis & posé celle nuit en la chappelle de son hostel sur vne biere de cinq à six pieds de hault, couuerte de noir veloux iusques au pauemēt: & par dessus estoit vne croix de drap de damas blanc, aux quatre costez de la biere estoient quatre grans cierges ardans: & là furent celebrées Messes & prieres iusques à nonne tous les iours iusques au Dimenche ensuiuant, que lors entre quatre & cinq heures apres midy, le corps fut porté à saint Donnaſt pour enterrer illec dedans l'Eglise iusques à ce que l'en auroit pourueu pour le porter autre part, ainsi comme il l'auoit ordonné des son viuant. Au porter le corps à l'Eglise alloient deuant seize cens hommes tous vestus de noir, armoyez des armes du Duc, portans chacun vne torche ardent en leurs mains: dont les quatre cens estoient de l'hostel & aux despens du nouveau Duc: quatre cens de par la ville de Bruges, & quatre cens de par les mestiers d'icelle ville: & les autres quatre cens de par le païs du Franc à leurs despens, chacun endroit luy desdictes trois membres. Ou moyen desdictes torches alloient bien neuf cens hommes tant nobles hommes, comme officiers & seruiteurs du feu Duc: & y estoient les Loix de Bruges & du Franc, & xxj. Prelats. Entre lesquels estoit vn Euesque d'Ybernie, qui chanta le lendemain la premiere Messe: entre les Prelats & le corps estoient quatre Roys d'armes embronchez, vestus

de leurs cottes d'armes : le corps fut porté par dix ou douze Cheualiers notables & de nom . Et entour eux estoient les archiers de corps du feu Duc . Sur le corps estoit vn drap de veloux noir long iusques à terre, & vne croix de drap de damas blanc . Et par dessus le corps tout hault portoient vn poille de drap d'or sur quatre lances, le Comte de Nasso, le Comte de Boucan, Baudouin bastard de Bourgongne, & le seigneur de Chalon . Deuant le corps estoit le premier escuyer du feu Duc, qui portoit l'espée la pointe deffoubs . Ceux qui firent le dueil apres le corps, furent le nouveau Duc tout premier, & apres luy Iaques de Bourbon & Aldof de Cleues ses deux cousins germains : puis y estoient le Comte de Marle, Iaques de S. Pol, le seigneur de Rouffy & aucuns autres des plus notables de la court . Deuant lesquels alloient ceux des quatre ordres mendians, & ceux des Eglises de toutes les parroisses de Bruges : esquelles parroisses & en chacune d'icelles l'on celebra ledit iour vigiles des morts, & le lendemain seruice solénel pour le salut de l'ame du trespasé . Quand le corps fut mis & posé dedans le cueur de l'Eglise de S. Donnaft, il y auoit sur la biere vn drap d'or bordé de damas à vne croix de blanc veloux avecques quatre grans cierges ardans, & plusieurs autres mendres iusques au nombre de xiiij. cens ou plus tous ardans : si qu'il conuint trouier les voirrieres de l'Eglise, pour euaporer la chaleur qui y estoit : l'autel du cueur & le dessus estoit tout tendu de drap d'or noir : le lietrin tendu de veloux noir dedans & dehors pendant en bas, armoyé des armes du Duc : puis y estoit vn pennon lacheté d'armes, & la grande banniere du Duc : toute la nef de l'Eglise fut tendue de drap noir, le deffoubs & le dessus de camelot noir . Quand vint au mettre le corps en terre, n'est homme qui sceust dire la pitié que ce fut d'ouir les pleurs & les plains des officiers, & des autres presens illec : voirement en deuoient ils bien plorer & douloir & tous ses autres subiets, car ils auoient perdu vn Prince le plus renommé de bonté & de vertus qui fut en toute la terre des Chrestiens, plain de largesse, plain de tout honneur, plain de hardement & de vaillance, & aorné & remply de toutes bonnes vertus : & lequel tout son temps auoit bien gardé & tenu tous ses païs en paix, tant par son sens & de ceux de son conseil, comme à la poincte de l'espée, sans espargner son corps, ne contre qui que ce fut tant fut grand ne redoubté . Il fut tout son temps refuge à tous ceux qui venoient à luy à garand, fussent mesmement ses ennemis, faisant le bien à chacun, & rendant le bien pour le mal : il n'eut onques son pareil en modestie . Ceux mesmement qui ne l'auoiét onques veu & qui le hayoient par aucune occasion, si tost comme ils l'auoient veu & cogneu sa benignité, le prenoient en amour . Le cueur & le corps du bon Duc furent mis chacun par soy en vn plat sercus, couuert d'une biere de bois d'Irlande . Le lendemain fut fait le seruice : duquel l'Euesque de Tournay celebra la Messe, & à sa Messe fait vne briefue collation à la louenge du trespasé : & affin de chacun prier pour le salut de son ame, que Dieu par sa digne grace vueille mettre en son sainct Paradis . Amen.

Prologue sur les croniques des treschrestiens, magnifiques, victorieux & illustres Roys de France, Loïs unziesme de ce nom & Charles huitiesme son fils.

Quand

Q Vand i'ay considéré la sentence du tragedieux Senecque, disant au liure de ses Prouerbes . Qu'il est tresbon d'ensuiure la voye & maniere de viure de ses maieurs & souuerains fils ont droictement precedez . Rememorant aussi le dit du sage en ses Prouerbes : Que trespas est celuy qui suit oisueté : car selon l'Ecclesiastique elle enseigne plusieurs malices. I'ay tout acoup & diligement recueilly aucunes gestes de chroniques dignes de memoire des Chrestiens, illustres & victorieux Roys de France Loys xj. de ce nom, & Charles viij. son fils, avecques plusieurs merueilles aduenues es temps de leurs regnes . Et tant au Royaume dudit France, cōme es Duchez de Bretagne, Bourgongne, Normandie, Sauoye & Lorraine, Comtez de Flandres, d'Arthois & de Bourgongne: ensemble autres païs adiacens & circonuoisins . Et pareillemēt aussi es Royaumes d'Espaigne, Angleterre, & Cecille, En Rōme, Italles, es Duché de Milan & toute Lōbardie: Selon que i'ay leu es auctentiques gestes & chroniques de feu trespas orateur, & excellent historiographe maistre Robert Guaguin , en son viuant Docteur en Decret & general ministre de l'ordre de la sainte Trinité . Et cōme i'ay aussi recueilly en plusieurs autres histoires descrites & recitées à la verité . I'ay pareillement preueu & regardé les chroniques des renommez chroniqueurs historiques maistres Ieā Froissart , & Enguerran de Monstrelet: lequel i'ay ensuiuy apres ce qu'il a recité & descrit de aucuns autres trespas Roys precedens : & mesmement iusques en aucuns gestes & faits dudit xj. Roy Loys inclusiuement. Soubs aussi la reuerēce duquel i'ay recolligé & recapitulé aucunes merueilles par luy obmises & delaisées, sur les gestes & au temps du regne dudit Roy Loys. Pource par aduēture qu'il n'en auoit esté aduerty: car il est biē difficile à sçauoir aucunes fois, cōprendre & descrire toutes les trespas proüesses , valeureux faits & merueilles aduenues es temps & regnes de si treshaulx, excellens, magnifiques & triomphans Princes, que les trespas Roys de France. Sur lesquelles choses i'ay, soubs correctiō, entrepris & deliberé (aydant le vray Dieu qui tout peut) d'escrire & rediger plusieurs matieres qui sont à louer & rememorer, moy estāt en ceste trespas, populeuse & triomphante cité de Paris, non pas toutes fois pour vouloir reprēdre ou corriger ledit Enguerran de Monstrelet ne autres : car aussi ie n'ay ceste charge: mais l'ay fait cōme fidele & loyal François, & tel veux estre & demourer : & aussi pour moy occuper en euitant oisueté, mere & nourrice de tous maux: & affin pareillement de demonstrier les voyes & sentes de noz Princes & souuerains: lesquels sont memoratiuement à ensuiure, fils ont droictemēt precedé: car plusieurs se delectent & prēnent plaisir à ouir nobles proüesses & merueilles es parties du monde, affin que par icelles ils puissent choisir le bienfait & laisser le mal en arriere, comme aduerty des choses precedentes. Pourquoi i'ay compilé & accumulé ce present opusculé , lequel est petit quand à moy , mais grand quand aux euures & triomphes des Princes. Et aussi de ma part ie n'entēs icelle ma petite euure estre appellée, dictē ou nommée chronique, pource qu'il n'appartient à moy: Mais l'ay seullemēt ainsi reduicte pour donner aucun petit passe-temps & recreation aux lisans , ou escoutant toutes les choses dedans escrites & recitées. Leur priant humblement excuser & supplier à mon ignorāce, & adresser ce qui seroit mal mis ou escrit en aucun passage . Car plusieurs des

faits & merueilles qui s'ensuiuent sont aduenus en tant de diuersitez, lieux assez loingtains, & manieres estranges, que difficilement auroit esté à moy, ou autre de bien au vray & au long escrire la verité des choses aduenues durant ledit temps. Toutesfois sans aucune faueur & à mon possible i'ay tout reduit à la verité selon les prenommez aucteurs. Et en suiuant continuellement, où a delaisié le predit de Monstrelet és chroniques dudit Roy Loys, sans auoir aucunes redictes iusques au trespas d'iceux deux Roys, Loys & Charles.

Fin du prologue.

S'ensuiuent aucunes recapitulations cy adioustées & recolligées és entieres chroniques du feu Roy Loys unziesme de ce nom, aucunement obmises & delaisiées par Enguerran de Monstrelet, en ce qu'il auoit cōmencé à descrire és chroniques dudit Roy Loys, sur le fait de la guerre & des approches de Montlehery.



Après que ledit chroniqueur historiographe maistre Enguerran de Monstrellet a descript & recité en son iij. volume des chroniques de aucuns treschrestiens Roys de France, des Roys d'Angleterre, Ducs de Bourgongne & plusieurs autres grans Princes, notables seigneurs & vaillans cheualiers. Et mesmement iusques au temps du treschrestien, craint & redoubté Roy Loys de Valois. xj. de ce nom inclusiuement : & iusques aussi à la mort & au trespasement du feu Philippe de bonne memoire, en son viuant Duc de Bourgongne & pere du Duc Charles dernier decedé au païs de Lorraine deuant la ville de Nancy. Au trespas & triumpant enterrement duquel Duc Philippe, ledit de Monstrelet finit & termine les chroniques par luy extraictes & compillées : dont apres qu'il a en ce mesmes iij. & dernier volume d'icelles chroniques, escript & traicté du trefnoble & magnifique couronnement, & sacrée vnction dudit Roy Loys en sa bone cité de Reims, & de sa premiere triūphante & ioyeuse entrée en la trefnoble cité de Paris ville, monarche & capital de France. Et apres aussi que ledit chroniqueur a assez amplement traicté de la guerre & bataille de Montlehery : de laquelle il a parlé & descript, comme il luy a pleu, mais par aduenture en faueur : car i'ay trouué & ay leu à la verité outre ce qu'il dit : qu'à ceste iournée dudit Montlehery, qui fut le mardy sixiesme iour du mois de Iuillet, l'an mille cccc. lxv. Ledit Roy Loys venāt deça

1465. Orleans à Paris, arriua hastiuement cedit iour matin à Chastres sous ledit Mōtlehery : & de là sans soy rafreschir ou bien peu, & sans attendre toute sa compaignie (qui estoit pour gens à cheual la plus belle & mieux accoustrée que iamais auoit esté veüe par auant, pour autant de gens qu'il pouoit auoir) se vint vaillamment & de courage magnanime frapper dedans l'armée du Comte de Charrolois, & de ses Bourgongnons : en telle maniere qu'il meit en fuite leurs avantgardes. Et à la rencōtre d'iceux Bourgōgnons, plusieurs occis & mis à mort, & vne grande quantité lesquels furent prins prisonniers. Et aussi d'icelle rencontre & desconfiture furent incontinent seures nouuelles dedans la cité de Paris : de laquelle ville issirent aux champs plus de trente mille personnes. Partie desquels s'en allerent bien montez, cheuauchans sur guet à l'escart : & en allant trouuerent partie desdits Bourgongnons, lesquels furent prins & desconfits par eux : & aussi

aussi de ceux des villages voisins d'icelle ville, comme de Vanves, Issi, Seure, S. Clou, Arqueil, Surefnes & autres lieux. Et en ce faisant fut conquis & gagné vn tresgrand butin sur lesdits Bourgongnons, tellement qu'on estimoit leurs pertes à plus de deux cens mille escus d'or. Et apres que ladicte avantgarde des Bourgongnons eut esté ainsi rompue & desconfite, ledit Roy Loys non cōtent de ce : mais desirant tousiours de perseuerer & mettre à fin iceux Bourgongnons, sans soy refreschir ne prendre aucun repos, se remeit & entra vaillamment dedans la bataille auecques sa garde, & enuiron quatre cens lances de sa compagnie. Mais les bourgongnons festoient fort ralliez, & auoient prestes leurs artilleries par le moyen du Comte de S. Pol qui moult grandement seruit & ayda ledit Comte de Charrolois à ceste iournée: parquoy ledit Roy fut fort oppressé ceste fois, & tellement qu'il se trouua plusieurs fois en dangier de sa personne: car il n'auoit qu'vn peu de gens, & sans artillerie, & aussi il estoit tousiours des premiers dedans la bataille meslé: mais posé ores qu'il eust pour lors bien peu de gens, il se maintint toutesfois moult vaillamment & en grande prouësse. Et fut la commune renommée telle: que s'il eust eu d'auantaige cinq cens archiers de pied, il eust mis en telle subiection iceux Bourgongnons, que iamais n'eust esté memoire d'eux en aucuns faits d'armes. Ledit Comte de Charrolois perdit icelle toute sa garde: & aussi fait le Roy beaucoup de la sienne. Et si fut iceluy seigneur de Charrolois prins par deux fois du noble Geoffroy de saint Belin, & Gilbert de Grassy: mais toutesfois il fut rescoux. Et adoncques enuiron la nuict les Escoçois prindrent le Roy pour le soulager: car il estoit moult las & affligé, pource qu'il n'auoit cessé de combattre & faire grans armes toute la iournée, sans boire & sans manger: & ainsi le menerent pacifiquement & sans bruit dedans le chasteau dudit Montlehery. Et pource que plusieurs gens de l'armée du Roy n'auoient point veu qu'il eust esté ainsi mené audit Montlehery, & qu'on ne le sçauoit où trouuer aucuns cuidans qu'il fut mort ou prins. Et à ceste cause la plus part de aucuns se meirent en fuite. Et lors monseigneur le Comte du Maine, monseigneur l'Amiral de Montaulban, le seigneur de la Barde & autres capitaines, lesquels auoient bien de sept à huit cens lances, se retirerent prenant la fuite & abandonnerent le Roy en ceste maniere, & ne frapperent oncques vn seul coup à ladicte iournée. Dont est bien notamment à sçauoir, que se tous ceux du party de France si peu qu'ils pouoient estre à ceste iournée, eussent esté aussi vaillans & magnanimes, comme estoit le dessusdit Roy leur chief, ils eussent euz vne perpetuelle victoire sur lesdits Bourgongnons: car la plus part d'eux en furent prins & desconfits: & aussi furent aucuns occis du party du Roy. Et tellement que apres que tout fut fait on trouua au champ, où auoit esté la bataille tant d'vne part que d'autre trois mille & six cens hommes morts, desquels Dieu vueille auoir les ames. Et ainsi me tairay à tant de la iournée dudit Montlehery. Car la reste peult plus amplement estre veüe en la chronique dudit Enguerran de Monstrelet: lequel toutesfois festoit aucunement teu de la verité en ceste maniere. I'ay semblablement leu à ce propos: Que parauant ceste dicte iournée du Montlehery, les Bourgongnons arriuerent en la ville de saint Denys en France le Vendredy cinquiesme iour dudit mois de Iuillet, & audit an mille quatre cens soixante

& cinq. Et depuis cuiderent passer au pont de S. Clou (Ainsi que dit aucument ledit Enguerran) mais ils ne peurent pour ceste fois, tant trouuerent bonne resistance des nobles & vaillans François. Pourquoy le dimanche prochain ensuiuant septiesme iour dudit Iuillet, lesdits Bourgongnons cuiderent venir faire aucunes voulstes & allarmes deuant la cité de Paris: mais toutesfois il est à sçauoir qu'ils n'y gagnerent aucune chose: car il y eut aucuns d'eux tuez & occis de l'artillerie estant sur les murs de ladicte cité: dont les autres retournerent hastiuement au predict lieu de S. Denys. Et le lendemain qui estoit le lundy viij. iour du dessusdit mois de Iuillet, lesdits Bourgongnons vindrent de rechief deuant la ville de Paris, & aucument avecques eux toutes leurs artilleries. Puis pour cautelle & subtilité auant qu'ils se demonstraissent pleinement, ils enuoyerent quatre heraulx aux portes, & par dessus de la porte de S. Denys en ladicte cité de Paris: de laquelle estoient pour ce iour capitaines & commissaires maistre Pierre l'Orfeure, seigneur d'Ermonneuille, & maistre Iean de Pôpaincourt, seigneur de Cercelles: ausquels les heraulx dessusdits demanderent viures pour leurs ost. Et aussi qu'on leur donnast passage par ladicte ville de Paris. Lesquelles choses ils demanderent par rigueur & avec menaces. Et ainsi comme l'on escoutoit proposer iceux quatre heraulx sur les dessusdictes demandes, auant qu'on peut auoir loisir de leur faire aucune responce: les dessusdits Bourgongnons (cuidans aucument prendre improuez les nobles manans & habitans de ladicte ville & cité de Paris, & mesmement ceux qui gardoient ladicte porte de S. Denys) vindrent à grosse compagnie de gēs d'armes passer iusques à S. Ladre, & encores plus auant: cuidans aussi gagner les barrieres qui nouuellemēt auoient esté faictes és faulxbourgs, & deuant la porte de ladicte ville: en iettant par eux canons, serpentes & autres bastons de pouldre & à feu, avecques trait de bastons inuasibles à main: mais iceux Bourgongnons furent si vaillamment resistez & rebouttez par les notables seigneurs, bourgeois & habitans dudit Paris, & autres illecques de par ladicte ville, & aussi par les gens de Ioachin Rouhault & de luy mesmes: lequel se vint trouuer en l'escarmouche de ce conflict, qu'il y eut plusieurs desdits Bourgongnons occis & mis à mort, & autres beaucoup fort naurez: parquoy lesdits Bourgongnons se retournerent incontinent aux champs sans autre chose faire: & se cuiderent mettre en bataille deuant ladicte ville & cité de Paris: ainsi comme plus amplement peut estre veu de la reste en la chronique dudit Enguerran, où il parle de ceste affaire. Allant lesdits Comtes de Charrolois & de saint Pol au Montlehery.

Cy apres sont aucunes histoires, gestes & merueilles aduenues & demonstrees és pais de France: & autres diuerses prouinces & regions additionnées & redigées à la verité en ce present volume. Pource qu'elles ont esté du tout obmises & delaisées à escrire par le dessusdit chroniqueur maistre Enguerran de Monstrelet. Et tant durant le regne du bon Roy Charles vij. de ce nom, que durant le temps & regne du Roy Loïs xj. son fils.

Pour

POur venir à recolliger aucunes histoires, gestes & merueilles aduenues és païs de France, & autres plusieurs & diuers lieux, & mesmement par ordre de temps. A commencer au precedent en l'an de nostre salut eternal mille quatre cens & soixante ou temps du Roy Charles septiesme: auquel an il est à sçauoir pour commencement que les riuieres de Seine & de Marne furent moult grandes & excessiues, tellement que ladicte riuere de Marne deuint & fut si grande en vne nuit à l'enuiron de saint Mor des fossez, qu'elle creut comme de la haulteur d'un homme, dont elle feit plusieurs grans dommages en diuers lieux de ceste contrée. Et entre les autres ladicte riuere vint par si grande inondacion en vn villaige nommé Claye: & mesmement dedans vn hostel illec estant, qui est à l'Euesque de Meaux, qu'elle demolit & emporta toute la massonnerie du deuant dudit hostel: ouquel estoient adoncques deux belles tours nouuellement basties, dedans lesquelles y auoit certaines belles chambres bien accoustrées de nattes & verrieres, & aussi bien richement garnies de bons lits & tapisserie: avecques paremens de menuiserie & autres plusieurs choses, que ladicte riuere emporta en ceste grande crue & inondation des eaües. En ce mesmes temps aduint au païs de Normandie, que le chief de l'Eglise de l'Abbaye de Fescamp par infortune & feu d'auenture, qui vint de la partie de la mer deuers les marches de Cornouaille, & se bouta au cloché d'icelle Abbaye, lequel fut tout ars & brulé: en telle maniere que les Cloches estant audit cloché, furent toutes fondues & mises en masse, qui fut vne moult grande perte & pitié en ladicte Abbaye de Fescamp. Au temps dessusdit furent grandes nouuelles par tout le Royaume de France & en autres lieux, d'une ieune fille d'enuiron l'age de dixhuiet ans: laquelle estant en la ville & cité du Mans, feit plusieurs folies & grandes merueilles: & disoit que le Diable la tourmentoit, dont elle failloit en l'air: crioit & escumoit par la bouche, avecques plusieurs autres choses: lesquelles merueilleuses elle faisoit & disoit en abusant & deceuant plusieurs personnes, qu'ils l'alloient veoir & regarder ses gestes. Mais on trouua finalement, que ce n'estoit sinon tout abus: & que ceste fille estoit seulement vne meschante folle, laquelle faisoit icelles follies & diableries par l'enhortement, conduicte & moyen de aucuns officiers de l'Euesque dudit lieu du Mans: lesquels la maintenoient & en faisoit tout ce que bon leur sembloit. Pourquoy ils estimoient n'en estre aucuns aduertis au moyen d'icelles follies, esquelles ils l'auoient induicte. J'ay trouué consequemment selon le prenommé maistre Robert Gaguin, lequel dit enuiron la fin de la chronique dudit Roy Charles vij. & en ceste mesme année mille quatre cens soixante: que apres aucun outrage & iniure fait au Roy Henry d'Angleterre, par Richard Duc d'Iorth & le Comte de Vvaruich: ledit Duc d'Iorth fut suiualement apres & de brief occis & mis à mort, où lieu dit és plains de S. Albion, par le Duc de Sombresset cousin & affin dudit Roy Henry, accompagné d'aucuns autres ieunes seigneurs ses parens & consanguins. Aussi comme assez amplement d'escript & recite ledit de Monstrelet en sa precedente chronique: pourquoy le mercredy troisieme iour du mois de Feurier audit an, le tresvictorieux Roy Charles vij. feit lire & publier à Rouë & autres plusieurs lieux du Duché de Normãdie, és lieux publiqs

1461.

& à son de trompe aucunes certaines & patentes lettres de par luy. Par lesquelles il mandoit & declairoit son plaisir estre tel, que par tout ledit païs de Normandie, & les ports de mer d'iceluy fussent laissez paisiblement descendre tous Anglois & Anglesches de quelque estat qu'ils fussent, & en tel habit que bon leur sembleroit, tenans & adherans le party du Roy Henry d'Angleterre & de la Roïne aussi sa femme, sans aucun faufconduit auoir de luy. Et de là en auant les laisser conuerfer & demourer par tout son Royaume. En quoy fut demonstté la grâde courtoisie & benignité du predict Roy Charles septiesme: car il faisoit donner & acquerre liberté en son Royaume de France, & en ses païs à celuy Roy Henry, lequel souuentesfois luy auoit voulu greuer & faire dommage de tout son pouoir, comme son ennemy. Il est pareillement à noter & scauoir que le mardy xxj. iour du mois de Iuillet, & iour precedent de la mort & deuot trespas du predict Roy Charles septiesme, l'an mille quatre cens soixante & vn, vne grande comette fut veüe tresrefulgente & pleine d'une grande & resplendissante clarté, decourante en lair. Laquelle selon aucun designoît & signifioit la mort d'un si tresgrand & notable Prince, & de plusieurs autres choses au temps à venir. Et aussi le lendemain qui estoit mercredy xxij. iour dudit mois de Iuillet, & iour de feste de la glorieuse Marie Magdaleine, mourut & trespassa en nostre seigneur Iesus-Christ iceluy prenommé Roy Charles, environ deux heures apres midy, luy existant en la ville de Meun sur Yeure. Si prie deuotement à Dieu qu'au benoist Royaume des cieux puisse estre son ame en repos: car il auoit tousiours vescu comme vn bien sage & vaillant seigneur: & tellement qu'il laissa son Royaume bien vny & en bonne paix, garny de iustice & tranquillité. De la mort duquel noble Prince, & de son triomphant enterrement en l'abbaye de S. Denys en France, descrit & recite bien amplement ledit Enguerran de Monstrelet en sa precedente chronique. En apres parle & d'escrit ledit de Monstrelet, comment le tresnoble & victorieux Roy Loys vnziesme de ce nom & fils dudit feu Charles, fut couronné & sacré Roy de France en la cité de Reims. Et puis consequemment comment il feit sa premiere entrée & ioyeux aduenement de Roy en la noble cité de Paris: & des triumphes & noblesses qui furent faictes en ceste cité avecques plusieurs autres choses, comme il appert au dernier volume de sadicte chronique. Je trouue en vn autre chronique dudit Roy Loys, sur ce qu'a obmis & delaisié ledit de Monstrelet: qu'iceluy Roy faisant sadicte entrée de triomphe audit Paris le dernier iour d'Aoust, & l'an dessusdit, il passa par dessus le pont aux châges: sur lequel estoient faits & demonstrez plusieurs beaux personages, & si estoit tout couuert & rendu par dessus. Et à l'heure que le Roy passa, on laissa voler parmy ledit pont plus de deux cens douzaines d'oyseaux de diuerses sortes & manieres, que les oyseleurs de Paris laisserent aller à plain vol, comme ils sont tenus de ce faire: Pour ce qu'ils ont sur ledit pont lieu & place ordinaire à iour de feste pour vendre & distribuer leurs oyseaux de chant, & d'autres manieres & façons, ainsi qu'il leur plaist. Et en tous les lieux de ladicte ville, par où ledit nouveau Roy Loys passa ceste journée, estoit tout tendu & paré de tapisserie au long des rues moult bien & hōnorablement: & aussi ledit Roy alla faire son oraison à l'Eglise de nostre Dame de Paris: & puis il retourna à soupper & au giste en son palais

lais royal, ainsi cōme de coustume est & qu'il est amplement dit en ladicte chronique. Et le lendemain de son entrée, qui estoit le premier iour de Septēbre audit an mille cccc. lxj. le prenommé Roy deslogea de sondit palais, & s'en alla loger en son hostel des Tournelles pres la bastille de S. Anthoine, là où il seiourna depuis par aucun peu de temps. Estant doncques le Roy en sondit hostel des Tournelles, il feit & ordonna plusieurs choses touchant les besongnes & affaires de son Royaume de Frāce, & de ses païs: & illec en ce lieu feit plusieurs nouvelles ordonnances, & tellement qu'il desappointa les plus grans & principaux officiers de sondit Royaume: Cōme le Chancelier Iuuenal, le Mareschal, l'Admiral, le premier President de Parlemēt, le Preuost de Paris & plusieurs autres: Et en leurs lieux meit & ordōna autres nouveaux officiers. Il desappointa aussi pareillement aucuns Maistres des Requestes, Secretaires, Conseilliers & clerks des Comptes, de la Court de Parlemēt, des Generaux des aydes, de la chābre du tresor, des Generaux des mōnoyes, & autres. Et en leurs lieux furent aussi mis, establis & instituez autres nouveaux officiers. Le iij. iour dudit mois de Septēbre oudit an mille cccc. lxj. Le prenommé Roy Loys avecques aucuns nobles seigneurs & gentils-hommes de sa maison, souperent en l'hostel & domicile de maistre Guillaume de Corbie, lors cōseiller en sa court de Parlement: lequel iceluy Roy feit & crea premier President de ses païs du Daulphiné: & là en ce lieu furent au conuiue plusieurs notables damoiselles, & hōnestes bourgeois de ladicte ville & cité de Paris. Et en ce mesmes temps le Roy estāt encores audit lieu de Paris feit plusieurs honnestes & bōnes cheres en diuers lieux & hostels de Paris, & se tourna moult pacifique. Et en apres il se departit dudit Paris, & print honneste congé pour aller à Amboise, ainsi comme puis apres recite & descrit biē au long ledit Enguerran de Monstrelet en sadicte chronique: lequel parle bien longuement sur les faits & gestes du Duc Philippe de Bourgongne, & pareillement de son fils ledit Comte de Charrolois. En l'an mille cccc. lxij. 1462. ensuiuant, ne suruindrent pas grandes nouvelles qui fussent gueres de memoire, pour en auoir fait ou descrit aucune mention en chroniques. Et quād au regard de l'année ensuiuāt mille cccc. lxiiij. ie trouue qu'il fut aucune grande quantité de vins en plusieurs païs, & lesquels furēt assez bons. Puis de la reste des autres choses touchant Princes, seigneurs & dames, ledit Enguerran de Monstrelet en a assez amplement traicté & descrit: ainsi qu'il peut estre veu & leu au troisiēme & dernier voulume de sadicte chronique, & en ce mesmes an.

Comment le Roy Loïs vint à Paris, & puis il s'en alla en Picardie: & de là retourna à Roïen: & comment le bastard de Rubempré fut prins és marches de Hollande: puis alla ledit Roy à Tours & autres lieux, & vint à Poitiers, où ceux de Paris luy enuoyerent ambassadeurs pour aucunes franchises: semblablement vint audit Roy une ambassade du Duc de Bretaigne, qu'ils emmenerent le Duc de Berry: & de la mort du Duc d'Orleans: & comment le Duc de Bourbon feit guerre audit Roy Loïs: & autres plusieurs choses faictes & aduenues en l'an mille cccc. lxiiij. Toutes lesquelles choses ont esté obmises & delaissées és Chroniques dudit de Monstrelet: & aussi d'aucuns faits & de la mort du bon Pape Pie deuxiēme, & du Pape Paul deuxiēme, outre ce que dit ledit chroniqueur.

1464.



N l'an mille quatre cens lxiiij. vn iour de mardy xv. de May le Roy Loys vint & arriua en sa ville & cité de Paris, qui venoit de Nogent-le Roy: auquel lieu la Roine auoit esté deliurée d'une belle fille. Et ce iour ledit Roy souppa à Paris en l'hostel de maistre Charles d'Orgemont seigneur de Mery. Et puis quand il eut traicté d'aucunes ses affaires: il se partit audit mois de May de ladicte ville de Paris, pour aller és marches & limites de Picardie, cuidât illec trouuer les ambassadeurs du Roy Edouard d'Angleterre, pource qu'on luy auoit dit qu'ils deuoient venir par deuers luy: mais toutesfois ils n'y vindrent point: & à ceste cause ledit Roy Loys se partit dudit païs de Picardie, pour aller à Roüen & autres lieux de Normandie. Aduint en ce temps qu'un balenier fut prins sur mer és marches de Hollande: dedans lequel Balenier estoit avecques autres vn nommé le Bastard de Rubempré, lesquels furent tous prins prisonniers par aucunes nauires de Flandres. Puis apres ceste-dicte prinse, plusieurs Picards & Flamans dirent & publierent que le Roy Loys auoit ainsi enuoyé ledit Bastard, & les autres pour prendre prisonnier le Comte de Charrolois dont toutesfois il n'estoit riens. En ce mesmes temps se partit le Roy dudit païs de Normandie, pour retourner audit lieu de Nogent-le Roy. Et puis s'en alla à Tours, à Chinon, & iusques à Poictiers: auquel lieu alla & fut par deuers luy vne ambassade de Paris, pour luy requerir & impetrer aucunes franchises pour ladicte ville: dont riens ou que peu ne leur accorda, sinon que l'impositiō foraine n'auroit plus cours en ladicte ville, qui n'estoit pas vne grande chose: mais encores n'en iouïrent ils point, nonobstant la donation: pource que les gens des Comtes auxquels leurs lettres s'adressoiēt ne leur voulurent donner sur icelle expedition. Et pareillement enuiron le commencement du mois de Mars en l'an dessusdict, furent les ambassadeurs du Duc de Bretagne audit lieu de Poictiers par deuers le Roy: lequel les ouit exposer aucuns leurs articles touchant le fait dudit Roy, & d'iceluy Duc: lesquels articles ou la plus part furent par le Roy accordez. Et en accordant iceux articles, lesdits ambassadeurs promeirent de faire venir ledit Duc de Bretagne audit Poictiers ou ailleurs ou bon plaisir du Roy, pour confermer & entretenir iceux articles accordez par iceluy Roy. Et à tant se departirent les ambassadeurs prenant humble congé du Roy. Puis à leur depart faignirent retourner audit païs de Bretagne, mais ils feirent tout le contraire: car ils partirent dudit Poictiers vn iour de samedi, & ne feirent que quatre lieües: & illec demourerent iusques au lundy ensuiuant, que monseigneur Charles le Duc de Berry frere du Roy Loys partit secrettement dudit lieu de Poictiers absent ledit Roy, & vint iusques ausdits ambassadeurs, qui le recueillirēt & le menerent audit païs de Bretagne à bien grand haste & diligemment, doubans que le Roy ne le sceut, affin qu'ils ne fussent suiuis. Comme de la reste parle aucunement ledit chroniqueur Enguerran au chapitre faisant mention du Duc de Berry. Apres ledit departemēt du Duc de Berry, ainsi que dit est: & que plusieurs particuliers allerent apres luy au païs de Bretagne, monseigneur le Duc d'Orleans se departit aussi dudit lieu de Poictiers. Et vn peu apres luy suruint vne maladie à Chasteleraut, laquelle le greua en telle maniere qu'il mourut & trespassa en nostre seigneur Iesus-Christ, & puis il fut sepulturé en l'Eglise de S. Sauueur au chasteau de Blois. Et tantost apres

apres le Duc de Bourbon fait & porta aucune guerre au Roy & à ses païs, en telle maniere qu'il print toutes les finances estant pour lors au païs de Bourbonnois:lesquelles appartenoient au Roy. Ledit Duc de Bourbon fait semblablement prendre & arrester le seigneur de Crussol, lequel estoit bon & loyal familier du Roy: pource qu'il passoit lors par les païs du predict Duc avecques sa femme,& plusieurs de ses biens: Tous lesquels furent arrestez en la ville de Conne en Bourbonnois. Vn peu apres aussi pareillement furent prins, & arrestez prisonniers en la ville de Molins audit Bourbonnois, le seigneur de Trainel par auant Chancelier de France, & maistre Pierre d'Oriolle General des finances du Roy:lesquels furent longuement detenus & arrestez en ladicte ville de Molins. Puis consequemment furent deliurez par iceluy Duc & retournerent audit Roy Loys. Le mercredy xv.iour du mois de Mars, messire Charles de Meleun lieutenant du Roy, maistre Jean Baluë eleu Euesque d'Eureux, & maistre Jean le Preuost notaire & secretaire du Roy, vindrent & arriuerent à Paris en l'hostel de la ville, où illec fut fait lecture d'aucuns articles dont le Roy leur auoit donné charge. Et apres ladicte lecture ainsi faicte (entendu le bon vouloir du Roy) furent faictes en l'hostel de ladicte ville plusieurs belles ordonnances pour la tution, garde & seurté d'icelle ville de Paris: comme de faire tresbon guet,mettre & asseoir gardes en aucunes portes d'icelle, & les autres fermer & murer:& aussi mettre & apprester les chaines de fer des rues de ladicte ville de Paris en tresbon estat, pour seruir quand mestier seroit. Et semblablement furent ordonnées plusieurs autres choses, qui longues seroient à escrire que ie passe pour brefueté. Enuiron ce temps furent prins par inuentoire,& mis en la main du Roy tous & chacun les biens de Pierre Morin trouuez & estans à Paris, pource que ledit Morin qui estoit pour lors tresorier du Duc de Berry,tenoit pour ledit seigneur contre le Roy la ville & la tour de Bourges. Et à ceste cause le Roy dōna encores l'office de huissier du tresor qui estoit au predict Morin,à vn nommé Iaques Teste-clere. Consequemment Anthoine de Chabannes Comte de Dampmartin,lequel s'estoit eschappé de la bastille de S.Anthoine audit Paris, là où il estoit prisonnier (comme a dit ledit Enguerran) trouua façon & moyen de prendre & auoir sur Geoffroy Cueur fils de feu Iaques Cueur,les places de saint Forgeul & S.Maurice,où il print & saisit ledit Geoffroy comme son prisonnier.Et avecques aussi print tous les biens qu'il auoit en chacun desdits lieux. Et apres ces choses le Roy Loys adressa son chemin deuers Angiers & le pont de Sée, pour sçauoir le vouloir de ceux lesquels ainsi à son desceu s'estoient iniquement partis & absentez de luy,pour aller au païs de Bretagne avecques sondit frere le Duc de Berry. Et pour ce faire auoit ledit Roy Loys en sa compagnie le Roy de Cecille, Duc d'Anjou, & le Comte du Maine,& si le suiuoient plusieurs gens de guerre de son Royaume en si grand nombre,qu'on les estimoit estre de vingt à trente mille tous bons combattans. Et apres que ledit Roy Loys eut ainsi esté illec vne espace de temps, voyāt qu'il n'y auoit pas aucuns grans affaires, il s'en alla & tira au païs de Berry deuers Isouldum Viarron,le Bourg-de-Dieux & autres places enuiron. Et mena avecques luy vne grande quantité de ses gens de guerre,& de son artillerie.Et adōcques il laissa lesdits Roys de Cecille & Comte du Maine freres & ses oncles de

par sa mere, avecques vne grosse cōpagnie de gēs d'armes, pour garder & deffendre q̄ lesdits Ducs de Bretaigne & de Berry n'entraissent en Normandie, ne es autres lieux de son Royaume pour le dōmager. Et quād le Roy Loys de Frāce fut ainsi arriué au païs de Berry, il seiourna illec aucū peu de tēps: & puis il se partit pour aller au païs de Bourbōnois, & ne voulut aller en la ville de Bourges, pour ce qu'il y auoit dedās grāde garnison de gens d'armes: desquels estoit cōducteur & capitaine le Bastard de Bourbon pour ledit seignr de Berry. En ceste mesmes année mille cccc. lxiiij. le xiiij. ou xv. iour du mois d'Aoust, mourut & trespassa le bō Pape Pie deuxiesme de ce nom, ainsi cōme a d'escrit ledit chroniqueur de Monstrelet: sur quoy est en outre à sçauoir, qu'iceluy Pape Pie deuxiesme, eleu l'an de nostre seigneur mille cccc. cinquante huiet, fut par auant appellé *Ænée Siluius* de la cité de Siene, homme eloquent, grād Orateur & Poète lauré, ambassadeur & secretaire du grand Empereur Sigismond, lequel auoit escrit vn notable traicté au Concile de Basle pour l'auctorité d'iceluy Concile, avecques plusieurs beaux liures & de bōne doctrine qu'il a composez. Il canoniza S. Katherine dudit Siene de l'ordre des freres Prescheurs: en l'an mille cccc. soixante & vn, il manda & rescrit en autres certaines belles epistres latines à plusieurs Princes chrestiens, pour faire passage & croisée contre les Turcs & infidelles. Ainsi que notamment appert au liure de ses epistoles: & tellement qu'il eut avecques luy plusieurs desdits Princes & seigneurs chrestiens de diuers païs, avecques vn grand ost & exercite de vaillās gens d'armes: & si furent mis grande quantité de galées, naües & nauires sur mer bien equippees de gens de guerre, artillerie & ce qu'il conuenoit: dont plusieurs ainsi assemblez paruindrent avecques ledit Pape Pie iusques en la Marche d'Ancone. Auquel lieu venoit à luy le Roy d'Hongrie, avecques vn tresgrād & puissant exercite terrestre. Mais apres toutes telles bonnes & deuotes dispositions & salutaires entreprinſes, ce bon Pape Pie mourut & trespassa en ladicte Marche d'Ancone l'an & iour cy dessus escrit, Dieu le reçoie en Paradis. Cest an dessusdit mille quatre cens soixāte quatre, fut eleu Pape Paul deuxiesme successeur dudit Pape Pie: lequel Paul fut Venitien. Et approuua incontinent la celebration de la feste de ladicte glorieuse vierge Katherine de Siene. Il ayma iustice & eut desir d'amasser richesses, parquoy il commença de faire construire & edifier vn grand Palais de costé l'Eglise de S. Marc à Romme.

Comment le Roy Loys fut au païs de Bourbonnois, là où il print aucunes villes & chasteaux: & d'aucunes nouvelles & merueilles en la cité de Paris & ailleurs: & comment ledit Roy meit le siege deuant la ville de Rion au païs d'Auuergne: & aussi plusieurs autres choses aduenues en l'an mille quatre cens soixante cinq, obmises & delaisſées par ledit de Monstrelet iusques à la guerre du Montlehery.



Pres dōques toutes icelles choses, le Roy Loys fut au païs de Bourbonnois: Auquel lieu enuiron le iour de l'Ascension de nostre Seigneur, l'an mille quatre cens soixante cinq, fut prinſe d'affault la ville & chasteau de S. Amand Lalier: & peu de temps apres luy fut rendue la ville & chasteau de Molucon par composition: dedans laquelle estoient Jaques de Bourbon & trentecinq lāces, qui s'en allerent eux & leurs biēs saufs.

Et

Et iurerent que iamais ne s'armeroient contre ledit Roy. Enuiron ce temps arriuerent à Paris le Chancelier Trainel, maistre Estienne cheualier, Nicolas de Louuiers, maistre Iean des Moulins. Par lesquels le Roy escriuoit à ses bōs manans & habitans de Paris, en les merciant de leurs bons vouldoirs & loyautez: les priant & exhortant aussi de rechief du bien en mieux cōtinuer. Et par iceux leur madoit qu'il leur enuoyeroit la Royne sa femme, pour accoucher de l'enfant dont elle estoit enceinte audit lieu de Paris, comme en la ville du monde que plus il aymoît. Le ieudy penultime iour du mois de May audit an mille cccc. soixāte cinq, aduint qu'à vn moulin qui est par de la Moret en Gastinois, nommé le Moulin Basset. Et vne hostellerie illec estant, se vindrent loger Iean de la Hure marchant de la ville de Sens, vn sien nepueu & autres en sa compagnie. Et en ladicte hostellerie enuiron minuiet, vindrēt enuiron de trēte à quarante hommes à cheual tous en armes: lesquels estoient venus desdits S. Maurice & S. Forgeul. Et de ceste hostellerie menerent prisonniers esdits lieux ledit Iean de la Hure, & ceux de sadicte compagnie, ensemble tous leurs biens & bagues qu'ils pouoient auoir avec eux. Et le ieudy sixiesme iour de Iuing audit an mille quatre cens soixante cinq, aduint à Paris en la rue S. Denys, deuant la barbe d'or, qu'un ancien homme bonnetier nommé Iean Marceau se pendit & estrangla en sa maison, & fut le corps trouué mort. Si fut despēdu & apporté au chastellet dudit Paris, pour illecques estre visité. Et apres ladicte visitation faicte, fut enuoyé & porté pendre ledit corps au gibet de Paris. Et en ce mesmes iour eut vn laboureur demourāt à Clignencourt, nommé Iean Petit qui couppa la gorge à sa femme. En ce mesme tēps le Bastard & le Mareschal de Bourgogne, prindrent les villes de Roye & Montdidier, ainsi que dit Monstrelet. Le dimenche ensuiuant neufiesme iour dudit mois de Iuing, fut faicte à Paris vne moult belle & notable procession generale: En laquelle furent portées les chasses du benoist S. Marcel & de madame sainte Geneuiefue glorieuse vierge, avecques plusieurs autres saintes reliques de diuerses Eglises: lesquelles processions vindrent deuotement par belle ordonnance en la grande Eglise de nostre Dame audit Paris, où illecques fut dicte & celebrée vne haulte messe de la glorieuse vierge Marie. Et prescha au peuple vn nommé maistre Iean de l'Oliue Docteur en Theologie, lequel declaira ladicte assemblée & processio estre faicte pour la santé & bonne prosperité du Roy, & aussi de la Royne sa femme & du fruit qui estoit en elle. Et semblablement pour la paix & bonne vnion estre mise entre le Roy & les autres Princes, & pour tous les biens dessus terre. Audit an mille quatre cens soixante & cinq, le Roy estant en Bourbonnois se tira à S. Pourfain: Auquel lieu la Duchesse dudit Bourbonnois & d'Auuergne sa sœur, s'en alla pour parler à luy comme marrie & desplaisante du discord qu'elle veoit entre iceluy Roy, son frere & le Duc de Bourbon son mary: & pour y cuider trouuer aucun bon moyen, ce qui ne se peut faire lors. Et ce temps pēdant ledit Duc de Bourbon partit & issit de Molins, & alla iusques à Rion au pays d'Auuergne. En ce temps fut ordonné en l'hostel de la ville de Paris que les portes de S. Martin, Montmartre, le Temple, S. Germain des prez, S. Victor & S. Michel seroient murées & les ponts leuez, & qu'on feroit le guet de nuit dessus les murs d'icelle ville. En ce mesme temps fut enuoyé mettre le siege

deuāt S. Maurice, pour lors tenu & occupé par l'adueu dudit Comte de Dampmartin. Et furent à tenir iceluy siege le Baillif de Sens nommé messire Charles de Meleun, & plusieurs gens de commune avec luy. Et encores y fut de rechief enuoyé Anthoine Baillif de Meleun, lequel mena avec luy aucuns archiers & arbalestriers de ladicte ville de Paris. Il aduint en l'an dessusdit, qu'un nommé maistre Loys de Tillieres notaire & secretaire du Roy, tresorier de Carcassonne & grenetier de Séelles en Berry, qui estoit seruiteur de messire Anthoine de Chasteau-neuf, seigneur du Lau, fut tué par infortune & grand accidēt d'un archier qui esprouvoit vn arc, duquel il tiroit vne fiesche contre vn huis, qui estoit deuant luy, qu'à l'heure ledit maistre Loys ouuroit pour issir dehors la maison dont luy vint passer la fiesche tout au trauers du corps. Et incontinent ledit maistre Loys falla ietter dessus vne couchette estant en la chambre, là où tantost apres il mourut & rendit son ame à Dieu. Et le iour de S. Iean Baptiste vingtquatriesme iour de Iuing: aucuns qui se baignoient à leur plaisir en la riuere de Seine, par infortune se noyerent. Et pour ceste cause de ce il fut crié par les carrefourgs de Paris, que de là en auant ne fut aucū si hardy de soy plus baigner en ladicte riuere, & que chacun tint par iour deuāt son huis, vn seau plain d'eau sur peine de prison & de soixante sols parisis d'amende. Le lendemain vingtcinquiesme iour dudit mois de Iuing, fut ordonné en ladicte ville de Paris, que toutes les chaisnes de fer des rues de ladicte ville seroient abbatues, & laissées gesir sur la terre es lieux où elles sont ordonnées: & regarder où il y auroit faute pour les amender, & y pourueoir à les trouuer toutes prestes quand besoing en seroit: ce qui fut fait. Et en outre fut aussi enioinct & ordonné à vn chacun de ladicte ville qu'ils s'armassent, & eussent prouisiō d'armes chacun selon son estat pour la garde de ladicte ville: & pour estre tous prests, quād mestier en seroit: Laquelle chose fut ainsi faicte par cedulles enuoyées de par ladicte ville à vn chacun en particulier. Audit temps mille quatre cens soixante & cinq tous Bourgongnons, Picards, & autres nations de l'obeissance & sous la conduicte du Comte de Charrolois fils du Duc Philippe de Bourgongne, marcherent tant en France par leur outrage & ambition, qu'ils vindrent & arriuerent iusques à Pont-saincte-Maxence, qu'ils trouuerēt moyen d'auoir: & qu'un nommé Mardré capitaine pour maistre Pierre l'Orfeure, seigneur d'Ermonneuille, leur bailla par cōposition & argēt qu'il print dudit Comte de Charrolois. Parquoy de là en auāt entrerēt en l'Isle de France faignant estre pour le bien public, ce que toutesfois n'estoit pas. Ils vindrent à S. Denys deuant Paris & de là à Montlehery, où fut faicte vne grande bataille: ainsi comme amplement escrit ledit chroniqueur maistre Enguerran de Monstrelet. Et comme j'ay aussi desia additionné & recapitulé à la verité au premier chapitre de ce present mon petit euure: parquoy ie delaisse la reste de toute ceste guerre & bataille rengée, à requierir es chapitres de cest affaire au dernier vouldume des chroniques dudit chroniqueur. Or est notamment à sçauoir qu'au commencement de ces choses, le Roy Loys qui estoit adoncques au païs de Bourbonnois, alla mettre le siege deuant la ville de Rion au païs d'Auuergne: Dedans laquelle estoient le Duc de Bourbon, le Duc de Nemours, le Comte d'Armignac, le seigneur d'Allebret & autres. Et auoit ledit Roy deuant ladicte ville vne moult belle & noble

ble armée, autant qu'onques fut guerres veüe, car il auoit plusieurs vaillans & notables gens de guerre iusques outre le nombre de xxiiij. mille hommes combattans. Et apres que ledit siege eut esté ainsi mis deuant ladicte ville de Rion: Voyant à Paris que lesdits Bourgongnos approchoiēt de ladicte ville: il fut ordonné & estably en icelle ville de Paris vn grand guet de cheual, qui alloit toutes les nuiĉts selō les murs & en ladicte ville, depuis l'heure de minuiĉt iusques au iour apparent. Pour la conduicte duquel guet, y auoit capitaines à ce ordonnez de gens de renom par icelle ville & par chacune nuiĉt. Le lundy deuxiesme iour de Iuillet audit an mille quatre cens soixante & cinq, maistre Iean Baluē Euesque d'Eureux feit le guet de nuiĉt parmy la ville de Paris: Et mena avecques luy la compagnie dudit Ioachin Rouhault avecques clairons & trompettes, & autres instrumens sonnans par les rues, & selon les murs d'icelle ville: ce qui n'estoit accoustumé de faire à gens de guet, & mesmement en iceluy temps. Et le mercredy ensuiuant quatriesme iour dudit mois de Iuillet en l'an dessusdit: le Roy Loys estant deuant ladicte ville de Rion, manda & rescriuit vnes lettres à messire Charles de Meleun son lieutenant audit Paris. Semblablement audit Ioachin, & ausdits habitans de Paris par sire Charles de Charlay son cheualier du guet audit lieu de Paris: Par lesquelles lettres le Roy mercioit tres affectueusement lesdits habitans de Paris de leurs bonnes loyautez enuers luy, en les priant & exhortant de tousiours y continuer & perseuerer, pour le grand bien de son Royaume. Et que dedans quinze iours ensuiuans luy & toute son armée seroient à Paris. Et aussi il leur mandoit de bouche par ledit de Charlay certain accord, qu'il auoit fait avecques lesdits Ducs de Bourbon & Nemours, & les sires d'Armignac & d'Albreth. Et comment en faisant ledit accord chacun d'eux auoit promis au Roy de bien loyaumēt le seruir, & de viure & mourir pour luy. Et par lesdits appoinctemens iceux seigneurs de Bourbon & autres dessus nommez, promettoient de faire tout deuoir: & de faire traicter la paix audit Roy par les autres seigneurs avecques eux alliez contre luy. Et que pour ce faire, seroient enuoyez de par lesdits quatre seigneurs, certains ambassadeurs deuers le Roy à Paris, dedans le iour & feste de l'Assumption nostre Dame en la my-Aoust prochain ensuiuant, pour traicter de ladicte paix. Et ou cas que lesdits autres seigneurs avecques eux alliez contre luy ne vouldroient entendre à icelle paix: Ils promeirent & iurerent à certes, que dorefnauant à iamais ils ne s'armeroient contre ledit Roy: Et qu'ils viuroient & mourroient pour luy & pour deffendre son Royaume. Et fut tout ce que dit est, ainsi promis par les dessusdits quatre seigneurs au lieu de Moyssiat pres dudit Rion. Et pour plus amples & seures promesses, ils s'obligerēt es mains de deux notaires Apostoliques, voulans & accordans estre incōtinent excommuniiez, se par eux ou l'vn d'eux estoit aucunement fait le contraire. Et pour les nouuelles dessusdictes, fut ordonné & deliberé audit Paris, que le vendredy ensuiuant seroient pour ce faictes processions generalles en l'Eglise de S. Katherine du Val des escolliers audit Paris. Laquelle procession y fut faicte deuotemēt moult honneste & tressolennelle. Et y prescha cedit iour maistre Iean Pain-&-Chair Docteur en Theologie. Et le mercredy ensuiuant xj. iour dudit mois de Iuillet audit an mille cccc. soixante cinq, fut publié & fait sçauoir par les quar-

refourgs de ladicte ville de Paris : qu'en chacun hostel d'icelle ville y eut vne lanterne & vne chandelle ardante dedans durant la nuit. Et que chacun menage qui auroit aucun chien quel qu'il fut, l'enfermast dedans sa maison : le tout sur peine de la hart. Le vendredy prochain ensuiuant, la compagnie, ou la plus part desdits Bourgongnons, vindrent & arriuerēt en la ville de saint Denys en France eux loger illec, pour faire leurs dessusdicte emprinse deuant ledit Paris & au Montlehery : ainsi comme il peut estre veu en la chronique dudit Enguerran de Monstielet.

Du retour du Roy à Paris apres la iournée de Montlehery. Et aussi de certains conseils, ordonnances & executions faictes audit Paris d'aucuns personages. Auecques plusieurs autres choses aduenues apres ladicte iournée oudit an mille cccc.lxv. Desquelles s'est teu & n'a riens escript ledit Enguerran chroniqueur.



Pres la iournée du Montlehery que le Roy Loys xj. de ce nom fut retourné en sa bonne ville & cité de Paris le ieudy dixhuitiesme iour dudit mois de Iuillet oudit an mille quatre cens soixante & cinq. Il souppa ce iour en l'hostel de son lieutenāt general nommé messire Charles de Meleun. Et selon maistre Robert Gaguin soupperent auecques luy cedit iour plusieurs grans seigneurs & damoïselles & bourgeois de ladicte ville de Paris : auquel lieu il recita son aduenture aduenue audit Montlehery. En quoy faisant il declaira plusieurs piteux mots, desquels il prouoqua tous & toutes à plorer & gemir eux escoutans son doux parler. Et puis il dit encores plus, qu'au plaisir de Dieu il retourneroit de rechief & bien briefuement à l'encontre de ses ennemis & qu'il mourroit en la poursuite ou qu'il auroit vengeance d'eux en gardant tousiours son bon droit. Mais toutesfois il fait autrement, pource qu'il fut conseillé pour le mieux. Et aussi il est à noter qu'il fut pour lors assez laschement seruy d'aucuns ses gens de guerre : car fils l'eussent tous courageusement seruy comme il se monstra preux & vaillāt à ladicte iournée, il eut eu adoncques entiere victoire de tous ses ennemis. Le lendemain dixneufiesme iour dudit mois de Iuillet vn gentil-homme nommé Laurens de Mory pres de Mittry en France, lequel auoit esté constitué prisonnier en la bastille saint Anthoine audit Paris pour occasion de ce qu'il auoit fauorisé lesdits Bourgongnons & leurs alliez, & les auoit induits & menez en certains lieux & en plusieurs maisons assises en diuers villages d'entour Paris, appartenans à aucuns bourgeois dudit lieu de Paris, pour icelles maisons pillier & prendre les biens desdits bourgeois dudit Paris. Pourquoy ce faisant & auec plusieurs larrecins fut fait son proces sur lesdits cas par aucuns commissaires à ce faire ordonnez, par lesquels fut dit audit de Mory qu'il auoit commis crime de leze Majesté. Et comme tel le condamnerent à estre escartelé es halles de Paris auec ses biens & heritages acquis & confisquez au Roy, dequoy ledit de Mory appella en la court de Parlement. Pour reuerence duquel appel fut differé estre executé pour iceluy iour. Et le lendemain iour de samedi : en corrigeant ladicte sentence fut dit par arrest de Parlement que ledit Laurent de Mory seroit pendu & estranglé au gibet de Paris & fut executé cedit iour. Ce mesmes iour de samedi vingtiesme iour dudit mois de

de Iuillet l'an deffusdit mille cccc.lxv. maistre Guillaume Charretier Euesque de Paris & autres conseilliers & gens d'Eglise de ladiète ville, furent deuers le Roy en son hostel des Tournelles pres de la Bastille S. Anthoine : comme descrit ledit Gaguin. Et là fut proposé deuât luy par ledit Euesque, disant plusieurs prudêtes & honnestes parolles qui toutes tendoiēt à fin, q̄ le Roy eut à cōduire & ordōner de là en auât tous ses affaires par bō cōseil, ce q̄ le Roy luy accorda. Dont fut lors ordonné que des lors iroient au conseil du Roy dixhuiēt sages & prudens hommes. C'est à sçauoir six conseilliers de la court de Parlement, six autres clerks prins & choisis en l'vniuersité. Et pareillement six bourgeois conseilliers de ladiète ville. Et pource aussi que le Roy veit & cōsidera qu'il auoit plusieurs ennemis en son Royaume: Il meit en cōseil & deliberation de trouuer plusieurs gens de guerre, avec ceux lesquels il auoit. Et pareillement il fut dit qu'il seroit sceu & aduisé combien on en trouueroit à Paris. Et à ceste cause fut ordonné que tous ceux de Paris seroiēt prins par escrit & par dixaines pour en prendre de chacune dixaine dix hommes. Ce que toutesfois ne fut fait : car il suruint vn si grand nombre de gens de guerre au Roy qu'il ne fut besoing de ce faire. Si aduint que le Roy estant encores à Paris, se trouua fort chargé d'iceux gens de guerre : pour lesquels payer & souldoyer de leurs gages, luy estoit besoing de trouuer aucunes grandes sommes de deniers : car il ne receuoit riens d'aucunes villes, sur lesquelles lesdits gaiges estoient assignez: pource que lesdictes villes estoient tenues & vsurpées par aucuns Prince pour lors ennemis du Roy, lesquels ne vouloient souffrir estre riens cueilly dudit payement en tous leurs païs. Dont ledit Roy fut adoncques contraint de faire certain emprunt d'argent sur plusieurs officiers & autres de ladiète ville de Paris : ausquels de par luy fut demandé argent à prester, dequoy ils furent refusans, aumoins de si grande somme qu'on leur demandoit. Et pour leur reffus fut dit & declairé à aucuns de par ledit Roy, qu'ils estoient priuez & forclos de toutes leurs offices royaux. Ce qui fut fait à maistre Iean Chanteau greffier en la court de Parlement, maistre Martin Picard conseiller des Comptes & plusieurs autres. Et apres plusieurs autres choses en ces entrefaictes : le vendredy ensuiuant vingtsixiesme iour dudit mois de Iuillet, le Roy ordonna qu'il demourreroit deux cens lances à Paris sous la charge & conduicte du Bastard d'Armignac, de messire Gilles de saint Symon Baillif de Senlis, le sire de la Barde, Charles des Marests, & dudit messire Charles de Meleun, que le Roy constitua lieutenant pour luy en ladiète ville de Paris, à la relation & requeste d'aucuns seigneurs d'Eglise, & des Preuosts des Marchans, & Escheuins en ladiète ville. Le lendemain iour de samedi vingtsieptiesme dudit Iuillet audit an quatre cens soixante cinq, sur le milliaire vn nommé Iean de Bourges, qui auoit esté clerc & seruiteur de maistre Iean Berard conseiller du Roy nostre sire en sa court de Parlement: & lequel clerc auoit esté prins & constitué prisonnier avec Gratian Meriodeau & François Meriodeau son frere, pour occasion de ce qu'eux & autres festoient tirez du lieu de Paris en Bretagne : par deuers ledit seigneur de Berry en conspirant contre le Roy fut iceluy Iean de Bourges tiré & mis hors de la bastille saint Anthoine audit Paris & ledit François Meriodeau avec luy : & par

la sentence du Preuost des Mareschaux, furent noyez en la riuere de Seine par le bourreau de Paris deuant la tour de Billy assez pres de ladicte bastille. Et le mardy ensuiuant trentiesme iour d'iceluy mois de Iuillet, ledit Gratian qui estoit notaire du Roy au chastellet dudit Paris, fut pour ce cas pareillement tiré de ladicte bastille comme les autres dessus nommez & noyez au lieu dessusdit. Et semblablement y fut aussi noyé vn pauvre man-ouurier ayde à maçon, lequel par la femme d'un nommé maistre Odo de Bucy, fut enuoyé de Paris à Estampes pour porter lettres audit de Bucy son mary, qui lors estoit aduocat ou chastellet dudit Paris. Et lequel estoit audit lieu d'Estampes avec le frere du seigneur de saint Pol, duquel il estoit seruiteur: estant audit Estampes avecques les autres Princes & seigneurs estans contre le Roy, ainsi que dit est. Et lequel ayde à maçon sollicita & apporta responce desdictes lettres à ladicte femme dudit maistre Odo. En quoy faisant, il auoit gagné chacun iour de son voyage deux sols parisis. Pour lequel cas ledit ayde à maçon fut aussi condamné à mourir, & fut noyé au lieu dessusdit de ladicte tour de Billy apres les autres dessus nommez. Et le lendemain fut fait cōmandement à icelle femme dudit maistre Odo, de partir & vider hors de la ville dudit Paris. Ce qu'elle fait & s'en alla à saint Anthoine des champs hors ladicte ville, où depuis s'est tousiours tenue iusques à ce que l'appointement fut fait entre le Roy & les dessusdits Princes & seigneurs ses contraires. Lesquels depuis vindrent à saint Mor des Fosse, Conflans & deuant Paris apres qu'ils eurent seiourné aucuns iours en ladicte ville d'Estampes: ainsi comme assez amplement descript & recite ledit Monstrelet au troiesme & dernier volume de ladicte chronique. Le samedi troiesme iour d'Aoust audit an mille quatre cens soixāte cinq, le Roy ayant vn singulier desir de faire & impartir aucuns biens & soulagemens à ladicte ville de Paris & aux habitans d'icelle: remeit le quatriesme du vin vendu à detail en ladicte ville au huictiesme. Et voulut en outre que tous priuilegiez peussent iouir & vser de leurs priuileges, tout ainsi & par la maniere qu'ils auoient fait au temps & durant la vie de son feu pere le bō Roy Charles septiesme, que Dieu absolue. Et outre-plus ordonna encores ledit Roy Loys que toutes les impositions, qui auoient cours en ladicte ville, fussent abbatues & forcloses: Excepté toutesfois les denrées des six fermes vendues en gros en icelle ville: c'est à sçauoir les fermes de la busche, du pied fourché, du drap vendu en gros, du poisson de mer & des autres. Lesquelles choses furent ce mesmes iour publiées à son de trompe par les carrefourgs de Paris: en la presence de sire Denys Hesselin Eleu sur le fait des aydes de ladicte ville de Paris. Et incontinent apres ladicte publication tout le populaire de ladicte ville de Paris crioit de ioye & à bon droit Noël Noël. Et de ce furent faits les feux parmy les rues dudit Paris. Le dimanche ensuiuant quatriesme iour d'Aoust audit an, Reuerend pere en Dieu maistre Jean Baluë fut sacré Euesque d'Eureux, en l'Eglise nostre Dame de Paris. Et ce mesmes iour le Roy souppa en l'hostel de son tresorier des finances maistre Estienne Cheualier. Et le mardy ensuiuant sixiesme iour d'Aoust en l'an dessusdit mille quatre cens soixante cinq, ainsi que recite Gaguin, fut executé és halles de Paris vn ieune compagnon nommé maistre Pierre de Gueroult natif de Lusignan, lequel fut illec decapité & puis

puis mis en quatre quartiers par la sentence du Preuost des Mareschaux, pour occasion de ce qu'il auoit confessé estre venu de Bretaigne, pour dire & aduertir le Roy que plusieurs capitaines & chiefs de guerre de son ordonnance & retenue estoient à luy cōtraires, ce qu'il disoit pour mettre dissentiō entre le Roy & lesdits gens de guerre. Et aussi pour accuser plusieurs notables personnes de Paris de non estre feaux au Roy. Et auecques ce pour espier & regarder quels gens de guerre & puissance le Roy pouoit auoir : affin de le rapporter ausdits Princes & seigneurs contraires au Roy, pour mieux & plus aisement executer contre luy leurs mauuaise & damnée entreprinse : dont pour ledit cas fut ainsi executé que dit est, & tous ses biens & heritages acquis & confisque au Roy. En ce temps que les Bretons & Bourgongnons cuidoient passer les riuieres de Seine & Yonne, deux bons & loyaux capitaines pour le Roy, c'est à sçauoir Salezart & Malortie, leur resisterent plusieurs fois moult vaillamment à tout si peu de gens qu'ils pouoient auoir. Et en ce mois d'Aoust oudit an furent par distribution logez en Paris les francs archiers de Normandie, qui estoient des bailliages de Caen & d'Allençon : c'est à sçauoir ceux de Caen qui auoient iaquettes, où estoit escrit dessus la broderie, Caen, furent tous mis & logez dedans l'hostel & pourpris du Temple. Et les autres dudit bailliage d'Allençon qui auoient iaquettes, où estoit aussi dessus escrit de broderie, *Audi partem*, furent logez au quartier dudit Temple par tout où ils peurent estre logez outre l'ancienne porte dudit Temple. Audit temps le treziesme iour d'Aoust mille quatre cens soixante cinq, fut crié & publié par les quarrefourgs de Paris, que tous ceux de ladicte ville qui auoient marests aux champs d'icelle ville, feissent couper & abbatre tous les faulx & autres arbres estans en iceux, & tout ce dedans deux iours apres ladicte publication : autrement tous iceux faulx & autres arbres estoient abandonnez à tous ceux qui les voudroient abbatre. Et ce mesme iour vint & arriua à Paris le seigneur & Comte d'Eu, comme lieutenant general du Roy : & comme tel fut aussi receu honnestement en ladicte ville. Le mardy ensuiuant quatorziesme iour dudit mois d'Aoust, vn nommé Cassin Cholet sergent à verge du chastellet de Paris, lequel durant aucune escarmouche faicte deuant icelle ville & par auant la iournée dudit Montlehery, auoit crié en courant lors par les rues de Paris, boutez vous dedans voz maisons & fermez voz huis : car les Bourgongnons sont entrez dedans ceste ville de Paris. Au moyen dequoy plusieurs femmes grosses auoient enfanté auant terme, & autres en moururent & perdirent leur entendement. Dont pour ceste cause auoit esté mis en prison ledit Cassin Cholet. Et ce iour adoncques present fut par sentence du Preuost de Paris condamné à estre battu & fustigé par les carrefourgs de ladicte ville : priué de tous offices royaux, & estre encores vn mois en prison au pain & à l'eau. Et fut ainsi mené battre par lesdits carrefourgs au cul d'un ord & vil tombereau, dont on venoit de porter la boüe à la voirie, & puis fut remis en prison. En ce mesmes iour arriuerent à Paris deux cens archiers tous à cheual : dont estoit capitaine vn nommé Mignon, tous lesquels estoient assez bien en point. Et en cedit nombre estoient plusieurs portans crannequins, voulges & couleurines à main. Et tout derriere icelle cōpagnie alloient à cheual huit folles femmes pecheresses & vn moyne noir pour leur confesseur.

En ce temps messire Charles de Meleun qui auoit esté lieutenant pour le Roy audit lieu de Paris, fut desapoincté de sa charge, & fut baillée audit seigneur de Eu. Et au lieu dudit estat de lieutenant, le Roy fait ledit de Meleun son grand maistre d'Hostel. Et avec ce luy donna le bailliage d'Eureux: duquel lieu aussi il le fait & ordonna capitaine, & de Honnefleu.

Comment apres ce que les Bourgongnons & Bretons furent raffreschis, ils retournerent eux loger és villages & enuiron à l'entour de Paris: parquoy ceux de la ville firent plusieurs bons & prudens conseils, eux fortifians & gardans par bonne defence, estant le Roy en Normandie, lequel retourna en brief temps. Et furent faictes aucunes monstres, courses & saillies de ladicte ville: Estant adoncques lieutenant pour le Roy le Comte & seigneur d'Eu, avec plusieurs autres choses obmises & délaissées par ledit chroniqueur de Monstrelet.



Le iour de la feste de l'Assumption nostre Dame en la my-Aoust mil-le cccc. lxxv. les Bourgongnons & Bretons qui festoient r'affreschis en la Brie & au Gastinois, retournerent à Laigny sur Marne. Et le vèdredy ensuiuant vindrent loger à Creil, & autres plusieurs lieux sur la riuere de Seine illec enuiron à l'entour de Paris. Et pource qu'on doubtoit aucunement iceux Bourgongnons & Bretons retourner deuant ladicte ville de Paris, attendu l'absence du Roy. Et qu'il fut aussi rapporté qu'un nommé maistre Girault Canonnier de leur party, festoit vanté d'asseoir & sortir son artillerie dessus les voiries deuant les portes de S. Denys, & S. Anthoine audit Paris, pour dommager aucuns lieux d'icelle ville & au long des murs. Il fut ordonné ce iour en ladicte ville de Paris, que de chacū hostel allast le lendemain vne personne esdictes voiries, chacun en son quartier: & tous garnis de pics & pelles pour ruer & resprendre icelles voiries, ou ce qu'il en pourroit estre fait: mais on en fait bien petite chose, puis fut tout laissé. Et à ceste cause furent faictes & ordonnées plusieurs tauldis, bouleuers & trenchées au long desdits murs, pour la seurté & deffense de ladicte ville & des habitās, & aussi de ceux qui s'emploieroient à la bien garder. Et le samedi ensuiuant audit an plusieurs notables personnage & de diuers estats de ladicte ville, furent par deuers le Comte & seigneur d'Eu lieutenant pour le Roy, auquel ils firent plusieurs belles remonstrances: par lesquelles ils vouloient dire & conclure qu'il luy pleut pour le bié, profit & vtilité du Roy, de ladicte ville de Paris & des subiects d'icelle & de tout le Royaume, d'aduiser façon & moyen par deuers lesdits seigneurs de Berry, Bourgongne & Bretagne & autres deuant nommez, d'auoir avec eux aucune bonne pacification ou accord, à l'honneur du Roy & au soulagement & bien de tout le Royaume: ausquelles choses ledit seigneur d'Eu fait responce telle. Que le Roy l'auoit mis & laissé à Paris pour y estre son lieutenant, & en son absence dōner de tout son pouoir prouision à tout ce qui seroit necessaire, tant au Roy qu'au fait du Royaume, & qu'à ce faire estoit bien tenu & obligé: pourquoy il employeroit tout son possible à pourchasser ledit accord & bonne vnion pacifique avecques les seigneurs dessusdits, & que se mestier y estoit s'offroit d'y aller en personne. Et avecques ce furent encores faictes plusieurs belles offres ausdits de Paris par ledit seigneur d'Eu & maistre Iean de Pôpaincourt

court son conseil. Le lundy apres ensuiuant lesdits Bourgongnons & Bretõs s'approcherēt encores plus pres de Paris. Et le lendemain qui estoit iour de mardy ledit seigneur Côte d'Eu lieutenant du Roy, enuoya deuers lesdits seigneurs contraires vn nommé le seigneur de Rambures pour sçauoir de leur intention & qu'ils vouloient dire. Et le lendemain iceluy seigneur de Rambures retourna à Paris, mais de ce qu'il feist par deuers lesdits seigneurs de Berry & les autres en fut peu de bruit. Et le ieudy ensuiuant vingtdeuxiesme iour dudit mois d'Aoust, lesdits Bretons & Bourgongnons vindrent faire aucune escarmouche, mais de Paris issirent aux champs plusieurs gens de guerre. Et lors vint vn Breton-archier de corps du Duc de Berry accoustré d'une brigandine couuertes de veloux noir à cloux dorez, & vn bicoquet sur son chief garny de boutons d'argent doré: lequel frappa vn cheual par les flans & cuisse, sur quoy estoit monté vn homme d'armes de l'ordonnance du Roy, lequel tournât à Paris cheut son cheual mort dessous luy: mais incontinent que ledit Breton eut ainsi nature le dit cheual il vint à luy vn archier de la cõpagnie dudit seigneur d'Eu, qui d'une demie lance le trauersâ tout outre le corps, dont tantost cheut mort dessus terre. Et adoncques furent prins ses habillemens & son cheual pour amener audit Paris & fut illec laissé le corps mort en seule chemise. En ce temps le Roy feist aller la Roine à Orleans, qui lors estoit à Amboise. Et le ieudy ensuiuant dixhuietiesme iour dudit mois le Roy souppa en l'hostel du seigneur d'Armonneuille où il feist grand chiere. Et y mena avecques luy le Comte de Perche, Guillaume de Bisheguot, Durie, Jaques de Creuecueur, monseigneur de Craõ, messire Yues du Sau, messire Gastonnet du Leon, Vaste de Mompodon, Guillaume le Cointe & maistre Regnault des Dormans. Et pour femmes y estoient ma damoiselle d'Armonneuille, la Longue Ioye & la Duchesse de Longueil. Et pour bourgeois Estienne de Paris, Perrette de Chaallon & Jeanne Baillette. Et le mardy vingtdeuxiesme iour dudit mois, le Roy alla par deuers lesdits Princes à priuée mesnie sans sa garde iusques à la granche aux merciers, sauf que monseigneur de Berry n'y estoit point. Et le ieudy ensuiuant monseigneur le Duc de Bourbon vint parler au Roy en la place deuant Paris par deça la fosse de granche de Ruilly. Et estoit le Roy ce iour le plus honnestement habillé qu'on ne l'auoit point veu deuant: car il estoit vestu d'une robe de pourpre desceinte & toute fourrée d'ermine, qui luy seioit beaucoup mieux que ne faisoient les cours habits qu'il auoit portez par auant. Et le samedi ensuiuant mondit seigneur de Charrolois se departit de son ost, & feist crier par tout iceluy sur peine de la hart, que tous ceux de son armée & compagnie, feussent incontinent prests pour l'aller seruir à l'encontre des Liegeois, qui gastoient & mettoient à feu & à l'espée tout ce qu'ils trouuoient es païs dudit seigneur de Charrolois. Et les dimanches, lundy & mardy ensuiuant monsieur de Berry qui estoit logé à S. Mor-des-Fossez, fut vn peu malade d'une fièvre qui le tint durant lesdits trois iours, & puis fut guery. Et pareillement que deuant le Roy feist ledit iour de lundy les feux & le guet parmy ladicte ville, & tondre les chaînes de toutes les rues foraines. Ce mesmes iour de ieudy l'an mille quatre cens soixante cinq, estant ledit seigneur de Berry logé à Beauté avec plusieurs desdits autres seigneurs du sang: ainsi q̃ décrit & recite ledit de Mõstrelet. Le trou-

ne outre plus en autre autentique chronique, & mesmement selon ledit Gauguin, qu'il enuoya aucuns ses heraux à ladicte ville de Paris, qui apportèrent de par luy quatre lettres: les vnes aux bourgeois manans & habitans d'icelle ville. Autres à l'vniuersité: les autres aussi aux gens d'Eglise, & les autres à la court de Parlement. Toutes lesquelles contenoient en effect, que luy & ceux de son sang assemblez, estoient illec venuz pour tout le bien vniuersel du Royaume de France: & que par ladicte ville luy fussent enuoyez cinq ou six notables hommes, affin d'ouïr les causes pourquoy luy & ceux de sondit sang estoient venus, ainsi comme dit est: & en obtemperant ausdictes lettres, & affin que lesdits habitans & autres peussent ouïr & escouter qu'il seroit dit sur cest affaire, furent esleuz & deleguez pour ladicte ville, maistre Iean Choart pour lors lieutenant ciuil au Chastellet de ladicte ville de Paris, maistre François Hasle Aduocat en Parlement & Arnoult l'Villier changeur de Paris. Pour l'Eglise, maistre Thomas de Courcelles Doyen dudit Paris, maistre Iean de l'Oliue docteur en Theologie & maistre Eustache l'Villier aussi aduocat en ladicte court. Pour ladicte Court de Parlement, maistre Iean le Boulenger, maistre Iean le Sellier Archediacre de Brie & maistre Iaques Fournier. Pour l'vniuersité, maistre Iaques Iuing lisant: pour la faculté des ars, maistre Iean l'Villier: pour Theologie, maistre Iean de Montigny: pour Decret & maistre Enguerran, de Parente pour Medicine. Tous lesquels ensemble furent menez, conduits & presentez par ledit Reuerend pere en Dieu maistre Guillaume Charretier Euesque de Paris. Cedit iour vint nouvelles que maistre Pierre d'Oris le general des finances du Roy l'auoit delaisné, & s'en estoit allé rendre audit seigneur & Duc de Berry. Et ce mesmes iour aussi les dessus nommez ambassadeurs de Paris qui ainsi estoient allez à Beaulté par deuers lesdits seigneurs, retournerent en ladicte ville & vindrent arriuer en l'hostel des Tournelles pres la Bastille, où ils trouuerent ledit seigneur d'Eu: auquel ils declairerent ce qui leur auoit esté dit & proposé de par lesdits seigneurs. Et le samedi xxiiij. iour dudit mois d'Aoust apres disner, furent seurement assemblez pour tenir conseil en l'hostel de ladicte ville de Paris, l'vniuersité, l'Eglise, la court de Parlement & autres officiers avecques le corps de ladicte ville, pour ouïr la deliberation & conclure sur la relation desdits ambassadeurs: & en ceste assemblée fut dit & conclud par les oppinans, qu'au regard des trois estats que requeroient estre tenus lesdits Princes & seigneurs, estoit vne requeste iuste: & en outre que passage leur seroit baillé à Paris, & viures pour eux en payant: & aussi en donnant par eux bonne caution, que nul mal ou esclandre ne seroit fait par eux, ou leurs gens en ladicte ville, ne aux manans & habitans d'icelle, & sauf sur tout le bon plaisir du Roy: & à tant iceux ambassadeurs dessus nommez retournerēt par deuers lesdits Princes, pour leur reporter ladicte deliberation de ceux de Paris. Ledit iour de samedi au mois d'Aoust en l'an que dessus mille. cccc. lxv. les gens d'armes de l'ordonnance du Roy estant pour lors en ladicte ville de Paris, feirent leurs monstres parmy icelle: & pareillement tous les marchans les vns apres les autres, & par ordre qui faisoit bon veoir. Et premierement alloient à pied les archiers dudit Normandie. Apres les archiers à cheual, puis les hommes d'armes des cōpagnies dudit seigneur & Comte d'Eu, du seigneur de Craen, du seigneur de la Barde & du
predit

predict Bastard du Maine : lesquels pouoient bien estre en tout environ de quatre à cinq cens lances bien en point, & sans ceux de pied qui bien estoient de quinze à seize cens hommes, & tous hommes de bonne deffence. Et ce mesme iour le Roy enuoya lettres à ceux de Paris, par lesquelles il leur mandoit qu'il estoit à Chartres avecques son oncle le Comte du Maine, & vn grand nombre de gens de guerre : & que dedans trois ou quatre iours il seroit audit Paris. Et cedit iour vint & arriua l'Amiral de Montauban, & vne grande quantité de gens de guerre avecques luy. Et adonques le Duc de Berry qui estoit allé seul avecques son train à S. Denys, retourna avecques les autres Princes audit lieu de Beauté doubtant fort le retour du Roy. Et aussi le mercredy ensuiuant xxviij. iour dudit mois d'Aoust & en l'an dessusdit, le Roy retourna à Paris ainsi que descrit & recite ledit chroniqueur de Monstrelet : mais il a obmis & delaisié ce que j'ay icy diligemment recueilly en autre certaine chronique : car ledit Roy vint adonc audit lieu de Paris, avec sondit oncle le Comte du Maine, le seigneur de Ponthieure & autres : & si r'amena son artillerie qu'il auoit menée avec luy, & vne grande quantité de Pionniers qu'il auoit prins audit païs de Normandie : lesquels furent tous logez en l'hostel du Roy à S. Pol. Et de ceste venue du Roy en sa ville de Paris, fut le populaire d'icelle fort resiouy en criant à haulte voix par tout, où il passoit en ladicte ville Noël. Et le lendemain qui estoit ieu- dy, vindrent lesdits Bretons & Bourgongnons comme par maniere de voulster, & vouloir faire escarmouche deuant ledit Paris. Mais dessus eux issirent & sortirent grand nombre de gens de guerre de l'ordonnance du Roy. Lesquels tant par port d'armes que des grosses serpentines du Roy qui fort tirerent & feirent deuoir, y eut plusieurs desdits Bretons & Bourgongnons tuez & abbatus. Le vendredy ensuiuant vindrent & arriuerent à Paris plusieurs grandes charges de farines & autres viures dudit païs de Normandie. Et entre les autres choses y fut amené de la ville de Mante, deux cheuaux chargez de pastez d'anguilles de Gort, qui furent vendus deuant le chastellet dudit Paris en la place de la volaille. En ce mesmes iour apres disner, issirent dehors ladicte ville de Paris Pontcet de Riuiera & ceux de sa compagnie, qui bien pouoient estre de trois à quatre cens cheuaux cuidans trouuer lesdits Bretons & Bourgongnons : lesquels ne se trouuerent point, pourquoy ne fut à lors riens fait. Et la nuit de ce iour les Bourgongnons qui estoient logez à la Grange-aux-merciers, se deslogerent de ce lieu, pource que l'artillerie du Roy portoit de Paris iusques à ladicte Grange. Et au desloger ils abbatirent toute la couuerture dudit lieu, & emporterent tout le preparatif : comme huis fenestres & autres bois pour eux tauldir & faire du feu à leur besoing & necessité. En cedit iour selon ledit Robert Gaguin : le Roy fait dire à cinq des deuant nommez, qu'ils auoient esté à Beauté deuers lesdits Princes, apres la deliberation ainsi faicte que dit est deuant en l'hostel de ladicte ville, qu'ils partissent & vuidassent hors ledit Paris : desquels les noms cy sensuiuent. Maistre Iean l'Villier curé de S. Germain l'Auxerrois, maistre Eustache l'Villier & Arnoult l'Villier ses freres, maistre Iean Choart & maistre François Hasle Aduocat en Parlement. Le samedi ensuiuant dernier iour d'Aoust, furent faictes aucunes belles faillies par les portes de S. Anthoine, & de S. Denys : à laquelle porte fut tué vn archier du Roy : & du costé desdits Bretons

& Bourgongnons, furent plusieurs tuez & naurez. Et ce mesme iour le Roy faillit aux champs du costé de son boulleuert de la tour de Billy:& illec fait passer au trauiers de la riuere de Seine de l'autre costé de trois à quatre cens piétons, pionniers: lesquels estoient venus du païs de Normandie, pour aller pionner à l'endroit du port à l'Anglois, & deuant Conflans: aussi à l'endroit de la riuere, où estoit le siege desdits Bourgongnons: car on disoit que lesdits Bourgongnons & ceux du party contraire, auoient intention de faire là endroit vn pont pour passer ladicte riuere: pourquoy le Roy meit & ordonna certain nombre de gens de guerre, pour garder & deffendre de faire ledit pont, & passer la riuere illec en ce lieu. Et aussi le Roy passa ladicte riuere apres les pionniers luy estant en vn bac, & sans descendre de sur son cheual. Et le dimenche ensuiuant premier iour de Septembre l'an mille quatre cens soixante cinq, lesdits Bourgongnons meirent & assirent vn pont pour passer ladicte Riuere au port à l'Anglois: mais à l'heure qu'ils cuidoient passer par sur ledit pont, arriuerent incontinent plusieurs francs archiers & autres gens de guerre pour le Roy, lesquels vindrent asseoir engins & bastons à feu au bout dudit pont: dont ils tirerent à l'encontre desdits Bourgongnons: desquels ils tuerent & naurerent plusieurs, parquoy les conuint reculler. Et de l'autre part de la riuere du costé desdits Bourgongnons, passa l'eau à nage vn Normand: lequel alla couper les chables & cordes ordonnées à porter ledit pont, dont il s'en alla aual l'eau. Et ce iour aussi furent tirez plusieurs coups d'artillerie dedans l'ost desdits Bourgongnons, dont ils furent contraincts d'eux reculer & tirer arriere. Et aussi tirerent les Bourgongnons de leur artillerie audit port à l'Anglois:& y eut vn gentil-homme de Normandie qui eut la teste emportée d'un coup de serpentine. Et adonques en ce temps vindrent & arriuerent à Paris par deuers le Roy deux ambassades pour le Duc de Nemours, & l'autre pour le Comte d'Armignac. Ledit iour aussi fut faicte belle faillie aux champs par messire Charles de Meleun avecques le capitaine Malortie, & ceux de leurs compagnie: lesquels faillirent bien en point pour escarmoucher sur lesdits Bretons & Bourgongnons. Et ledit iour arriuerent en Paris bien enuiron quatre cens hommes, venans du païs & Duché d'Anjou: lesquels portoient voulges & crênequins pour bastons de guerre: & ainsi ils furent menez sur lesdits du party contraire: & à ceste fois furent deux archiers de l'ordonnance du Roy tuez & vn prins, & les gens du Roy tuerent sept Bourgongnons & en prindrent deux. Et encores cedit iour de dimenche fut à Paris à seurté par deuers le Roy le Comte de Sombresset du Royaume d'Angleterre, qui estoit en l'ost desdits Bourgongnons: & parla au Roy estant en la bastille saint Anthoine assez longuement. Et puis luy fut donné à boire, & print congé du Roy: lequel pource qu'il plouuoit luy donna sa cappe qui estoit de veloux noir. Le lundy ensuiuant deuxiesme iour de Septembre oudit an, le Comte du Maine qui estoit logé à Paris deuant l'hostel du Roy, enuoya au Duc de Berry deux muids de vin vermeil, quatre demies queües de vin de beaulne, & vn cheual chargé de pommes, de choux, & de raues.

Cy apres est parlé d'aucuns ambassadeurs esleuz du party du Roy, & desdits Bourgongnons pour communiquer sur leurs differens : & des nobles de Normandie qui vindrent à Paris, pour servir le Roy : & aussi d'aucunes saillies & assaulx donnez, & autres choses aduenues en ce mesmes an mille quatre cens.lxv. obmises & delaisées par ledit chroniqueur de Monstrellet, iusques à l'appointement fait entre le Roy & lesdits Princes.

LE Mardy deuxiesme iour de Septembre audit an mille quatre cens soixante cinq apres aucuns preparlemens, furent nommez & esleuz aucuns ambassadeurs pour le Roy & lesdits Bourgongnons: affin de veoir & communiquer sur leurs differens. C'est à sçauoir que pour le Roy furent esleuz le Comte du Maine, le seigneur de Precigny President du Parlement de Thoulouse. Et du costé desdits princes & seigneurs contraires, furent nommez le Duc de Calabre, le Comte de S. Pol & le Comte de Dunois. Et ce iour par cas fortuit fut mis & bouté le feu dedans la pouldre à canon, qui estoit à la porte du temple : & là estoient huit pieces d'artilleries prestes à tirer, qui au moyen de ce furent deschargées & emporterent le comble du dessus de ladicte porte. Et incontinent que leldits seigneurs ambassadeurs furent ainsi esleuz & nommez, ils preparerent ensemble sur l'accord & pacification d'entre eux : & furent faictes trefues iusques au ieudy ensuiuant, pourquoy ne fut lors faicte aucune chose d'un costé ne d'autre. Mais durant ce temps chacun meit peine de soy fortifier, & conuersoiēt les vns avecques les autres de chacun des deux parties, iusques audit iour de ieudy, que le Comte du Maine en retournant de l'ost desdits Bourgongnons, dit aux portiers de la porte S. Anthoine audit Paris, qu'ils feissent tous bonne chere, & qu'au plaisir de Dieu auant qu'il fut huit iours ils auroient tous cause de ioye & chanter Noël: & cedit iour furent encores continuées lesdits trefues iusques au mercredy suiuant. Et le vendredy apres, furent tous iceux seigneurs cōsulter ensemble en la Grange-aux-merciers, dessoubz vn pauillon pour ceste cause illec ordonné. Et ce pendant environ deux mille des plus honnestes Bretons & Bourgongnons vindrent en grandes pompes eux monstrier iusques aux fossez de derriere S. Anthoine des chāps: & aussi issirent de Paris plusieurs personnes pour les aller veoir & parler à eux, combien que le Roy l'eust deffendu & aussi en fut mal content: pourquoy voyant ces choses, fut meü de leur faire ietter plusieurs canons & serpentines, qui estoient chargées en la tour de billy & pres d'illec. Et le Dimenche ensuiuant viij. iour de Septembre feste de la natiuité nostre Dame, le Roy partit de son hostel des Tournelles pour aller à la grande Eglise : & en y allant passa par l'Eglise de la Magdaleine, où illec se feit frere & compagnon de la grande confrarie des bourgeois de Paris : & avecques luy se meirent l'Euesque d'Eureux & autres. Et le lundy ensuiuant ix. iour dudit mois de Septembre, lesdits Bretons & Bourgongnons furent prendre & vendanger les vignes de Clignencourt, la courtille & autres vignobles d'entour Paris : & ainsi feirent vin pour boire, combien que lès raisins ne feussent encores meurs. Et à ceste cause les citoyens furent contrains de vendanger toutes leurs autres vignes à l'entour, cōbien qu'elles ne feussent meures, dont furent de trespetis vins. En ce temps vin-

drent à Paris plusieurs nobles & gentils-hommes de Normandie pour seruir le Roy en ses guerres : tous lesquels furent logez és faulxbourgs de S. Marcel lez ladicte ville. Et entre iceux furent aucuns particuliers qui feirēt plusieurs griefs & larrecins en iceluy lieu, pourquoy ils furent reprins par aucuns bourgeois de ladicte ville : en laquelle pour ceste cause se voulurent perforcer d'entrer outre leurs volentez. A quoy lesdits bourgeois obicierent & furēt refusans. Et pour ce refus, iceux de Normandie leur dirent plusieurs iniures & mauuaises parolles, en eux rebellant à l'encontre d'eux, & en les appellant trahistres Bourgonngnons, & qu'ils les mettroient bien en point : disans encores de rechief qu'ils n'estoient venus dudit païs de Normandie audit lieu de Paris, que pour les tuer & piller : desquelles choses comme dit maistre Robert Gaguin, furent faictes informations à la plaincte de ceux dudit Paris : lesquels se sentirent fort iniuriez desdictes parolles : dont les informations faictes & veuës deuëment, le principal malfaieteur & prononceur d'icelles parolles, fut condamné à faire amende honorable deuant l'hostel de ladicte ville : c'est à sçauoir à la personne du Procureur d'icelle pour toute la ville : laquelle amende il fit publiquement le chief descouuert, desceint & vne torche au poing, en disant par luy que faulusement & mauuaisement il auoit menty en disant lesdictes parolles, en priant & regrant, icelles luy estre remises & pardonnez : & apres eut la langue percée d'un fer chault, & fut banny pour son demerite. Et le lundy suiuant aucuns Bourgonngnons se vindrent monstrier deuant Paris : entre lesquels estoit le Comte de S. Pol, auquel pour parler issit le Roy dehors Paris & parlerent ensemble environ deux heures : puis pour soy retourner seurement le Roy bailla pour luy en ostage le Comte du Maine, lequel demoura en l'ost desdits Bourgonngnons iusques au retour dudit seigneur de S. Pol. Et ce mesme iour selon ledit Gaguin le Roy retournant des champs dit à plusieurs de Paris estans à ladicte porte saint Anthoine, que lesdits Bourgonngnons ne leur donneroient plus tant de peine comme ils auoient fait : & qu'il les en garderoit bien. Et lors vn procureur de Chastellet nommé Pierre Beron luy respondit, voire Sire : mais ils vendangent noz vignes & mangent noz raisins sans y sçauoir remedier. Et le Roy repliqua qu'il valloit mieux qu'ils vendangeassent leurs vignes & mangeassent leurs raisins, qu'ils veinssent dedans Paris prendre leurs tasses & vaillant, qu'ils auoient mis & mussez dedans leurs caues & celliers. Et le vendredy ensuiuant vindrent & arriuerent és halles de Paris deux cens cheuaux tous chargez de marée & de diuerses sortes, en despit & malgré tous lesdits Bretons & Bourgonngnons & autres : lesquels auoient menassez ceux de ladicte ville de leur faire manger leurs chats & rats par grande famine. Et depuis furent lesdictes trefues continuées par deux ou trois fois iusques au dixhuitiesme iour de Septembre : lequel temps durant lesdits Bretons & Bourgonngnons se aitaillerent fort en leur ost, à la grand charge & foule de tout le païs & du peuple. Et n'est point à douter, que se le Roy eust voulu dire auant, & habādonner pour aller frapper sur lesdits Bourgonngnons (pourueu qu'il eust esté bien seruy de ses gens de guerre avecques les nobles & peuple de Paris, qu'ils auoient bōne volenté d'eux employer) il eust subiugué & mis tous lesdits ennemis en tel estat, que iamais ne fussent retournez dont ils estoient partis, pour venir ainsi deuant ladicte ville de
Paris

Paris par leur fier outrage. Le mercredy xviii. iour dudit mois de Septembre, nonobstant le preparlé desdits ambassadeurs de costé & d'autre, fut tout rompu & perdu tout le bon espoir qu'on eu par auant. Et cedit iour fut totalement desemparé le siege, que le Roy auoit fait audit port de l'Anglois, parquoy tous les gensdarmes estans audit siege, s'en vindrent retraire & loger aux Chartreux, là où furent logez six cens hommes de guerre avec leurs cheuaux: & tellement en fut remply ledit lieu, que les saincts hommes religieux de leans en furent dechassez & boutez hors de leurs celles & lieux de deuotion. Et le lendemain iour de ieudy fut vn grand conseil & assemblée en la chambre des comptes: auquel lieu avec autres furent les seize quarteniers & les cinquanteniers: & de chacun desdits quarteniers six hommes notables avec aucuns conseilliers de la Court de Parlement, officiers & autres. Et illec le Chancelier dit Moruillier, dit & exposa de par le Roy, comment il s'estoit grandement mis en son deuoir, d'auoir offert & présenté aux Princes & seigneurs qui estoient deuant Paris, aux demandes qu'ils luy faisoient pour l'apanage de son frere le Duc de Berry: pour lequel ils demandoient auoir la Duché de Guyenne, Poitou & le païs de Xaintonge ou la Duché de Normandie. A quoy fut dit & respondu par ledit conseil ainsi assemblé, que le Roy ne luy pouoit pas bailler ne desmembrer de la couronne. Et depuis le Roy luy offrit de bailler les païs de Champagne & Brie, reserué à luy Meaux, Mōstrean & Meleun pour ledit apanage. Et ausdits de Charolois & autres seigneurs fait plusieurs grans offres pour leurs deffraiemens, ce qu'ils ne deuoient refuser: mais riens ne voulurent accepter & ainsi demoura le tout iusques au vendredy suiuant. Ce iour de vendredy le ieune Seneschal de Normandie issit hors Paris avec enuiron six cens cheuaux, de bons hommes de guerre pour escarmoucher, & eux monstrier deuant lesdits seigneurs contraires, où ils feirent tresuaillamment. Et dedans les vignes pres S. Anthoine des champs, furent prins enuiron xxiiiij. pillars, larrons Calabriens, & Bourgonnons comme tous nuds & mal en point, que tous furent vendus au butin, & en donnoit on quatre pour vn escu d'or. Qui estoit pour lors audit pris de vingt six soubz six deniers Parisis la piece. Le samedi ensuiuant au point du iour enuiron la fin du mois de Septembre audit an mille cccc. lxxv. les Bretons prindrēt la ville de Ponthoise sur le Roy, ainsi comme dit simplement ledit Enguerran chroniqueur: mais plus outre descript ledit Gaguin en la chronique d'iceluy Roy Loÿs xj. Qu'un nommé Loÿs Forbier pour lors Lieutenāt audit Ponthoise de Ioachin Rouhault Mareschal de France, par fauce & mauuaise trahison qu'il feit & conspira contre le Roy son souuerain seigneur, meit & bouta dedans ladicte ville lesdits Bretons & autres adonc ennemis dudit Roy. Et iceluy Loÿs faisant par luy ladicte trahison, meit & decreta en son appoinctement, que ceux qui estoient audit lieu de Ponthoise de la compagnie dudit Ioachin, qui ne vouldroient demourer s'en iroient sauement eux & leurs biens saufs: & incontinent qu'il eut ainsi baillé & deliuré ladicte ville, & s'en partit luy & aucuns de sa compagnie, & allerent deuant Meulant porter & monstrier la croix blanche enseigne du Roy, affin que ceux estans audit lieu les boutassent tantost dedans sans en faire difficulté: mais auant sa venue ceux dudit Meulant estoient aduertis d'icelle trahison, dont incontinent qu'il fut apperceu par les-


aits de Meulant qui ja estoient en armes dessus les murs, ils luy crièrent à haute voix: allez faux & desloyal traistre: en ce disant luy ietterent aucuns engins de ladicte ville, & par tant fut contrainct de soy retirer audit lieu de Ponthoise tout remply de honte & vergongne. Et le dimanche ensuiuant au point du iour, les dessusdits ennemis vindrent comme par maniere de resueil, & faire escarmouche deuât Paris deuers la porte S. Anthoine, & estoient vn grand nombre. Mais d'icelle ville leur furent incontinent iettez plusieurs traiçts de canons & serpentines, & autres artilleries. Parquoy ils desplacerent adonques, & se retirerent arriere. Et le lundy suiuant apres (comme recite ledit Gaguin) s'apparut de nuict à ceux qui faisoient le guet en ladicte ville, comme vne commette embrasée de feu, qui vint des parties dudit ost: laquelle sembla cheoir dedans les fossez d'icelle ville à l'environ de l'hostel d'Ardoise, dont plusieurs furent espouentez non sçachans que ce pouoit estre. Mais cuidans que ce eust esté vne fusée ardante, illec iettée & enuoyée par lesdits Bourgongnons. Si fut ceste chose incontinent rapportée au Roy estant en son hostel des Tournelles: lequel comme diligent Prince monta tantost à cheual & s'en alla dessus les murs à l'endroit dudit hostel d'Ardoise, & y demoura grande espace de temps. Et si fait adonques tous assembler les quartiers de Paris, pour aller chacun en sa garde dessus lesdits murs: mais il ne fut pour lors veu ne ouy aucun effroy du party desdits Bourgongnons. Et en ce mesme temps lesdits ennemis Bretons & Bourgongnons ainsi logez deuant Paris, feirent plusieurs ballades, rondeaux & libelles diffamatoires, & autres choses pour blasmer & vituperer aucuns bons seruiteurs estans pour lors à l'entour du Roy, affin qu'à ceste cause le Roy les print en sa mal-vueillance, & les dechassast de son seruice pour iceux ennemis mieux & plus facilement paruenir à leur damné vouloir. Vn soir environ deux heures de nuict maistre Iean Baluë Euesque d'Eureux, fut guetté & accueilly par aucuns ses ennemis en la rue de la Barre du-Bec: lesquels vindrent frapper sur luy d'espées & bastons, dont fut blefcé: en telle maniere qu'il luy conuint prendre la fuite estant monté dessus sa mulle: laquelle comme toute esgarée l'emporta iusques au cloistre de nostre Dame en son hostel, dont elle estoit partie. Et de ce fut marry le Roy, pourquoy il ordonna en faire aucune information: mais on ne peut sçauoir qui c'estoit, parquoy tout demoura en ceste maniere sans riens en sçauoir: combien qu'aucuns dirent depuis que ce auoit fait faire le seigneur de Villier-le-boscage, pour l'amour d'une nommée Ieane du bois, de laquelle il estoit amoureux. Et en ce temps vn nommé Alexandre l'Orget natif de Paris, qui estoit homme d'armes sous l'Ordonnance du Roy & à la charge du seigneur de la Barre, s'en alla & absenta dudit Paris luy cinquiesme, pour soy aller rendre au Duc de Berry estant pour lors à S. Denys, où ledit l'Orget emporta sa male & toutes ses bagues. Le ieudy ensuiuant environ la fin dudit mois de Septembre, vindrent en l'hostel de la ville de Paris plusieurs grandes plaintes par aucuns des bourgeois d'icelle ville, eux complaignans & faisant doleances de certaines mauuaises parolles mal sonâtes, que disoient & publioient plusieurs gens de guerre estans en ladicte ville contre lesdits bourgeois manans & habitans d'icelle, pour y donner prouision. Et estoient lesdictes parolles telles proferées & dictes en substance par iceux gens de guerre. Le regnie,
& au-

& autres villains sermens. Les biens qui sont à Paris, ne aussi la ville ne appartient à ceux qui y sont demourans ne residens: mais sont à nous gens de guerre, qui y sommes presentement: & voulons bien que vous sçachez que malgré voz visages nous porterons les clefs de voz maisons, & vous en ietterons dehors vous & les vostres: & se vous en caquetez nous sommes assez en Paris pour estre maistres de vous tous. Et entre les autres dit vn fol Normand à la porte de S. Denys. Que ceux de Paris estoient bien simples de penser que les chaines de fer tendues au trauers de leurs rues, leur peust valoir à l'encontre d'eux. Par lesquelles parolles ainsi mal sonnans (que dit est) fut soudainement ordonné par aucuns en l'hostel de ladicte ville, ausquels lesdictes parolles furent ainsi dictes & rapportées: que ceste nuict chacun quartenier de Paris feroit faire grans feux allumez par toutes les dixaines de son quartier: & que chacū seroit en armes & sur sa garde deuant lesdits feux. Et si furent aussi ordonnez toutes les chaines des rues foraines estre tendues, ce qui fut fait: & ainsi veilla chacun iusques au point du iour. Et ceste nuict fut grand bruit, que la Bastille S. Anthoine fut laissée ouuerte pour donner entrée dedans Paris aux ennemis, qui estoient deuant. Et si furent trouuez ceste nuict aucuns canons pres dudit lieu, dont les huis des chambres estoient fermez & enclouez: affin qu'ils ne peussent seruir quand mestier seroit. Et desdits feux & du grand guet qui y fut fait, & ainsi ordonné que dit est, furent lesdits capitaines qui estoient à Paris moult esbahis: pourquoy aucuns d'eux se retirerent en la chambre du Roy en son hostel des Tournelles audit Paris, sçauoir à luy se c'estoit de son ordonnance & commandement que lesdits feux & guet estoient ainsi faits & ordonnez, ou de par qui c'estoit. Lequel Roy dit & respondit qu'il n'en sçauoit riens. Parquoy le Roy manda incontinent venir à luy sire Jean l'Villier pour lors Clerc de ladicte ville: lequel vint bien diligemment, & luy certiffia que lesdits feux & guet estoient fais à toute bonne fin, & de ce asseura le Roy & lesdits capitaines. Et nonobstant ordonna à messire Charles de Meleun, qu'il allast en l'hostel de la ville & par tous les quartiers d'icelle, dire, qu'on laissast lesdits feux & que chacun s'allast coucher: dont riens n'en voulurent faire lesdits habitans, mais demourerent ainsi armez iusques au iour. Et maintenoient plusieurs depuis que ce fut grace de Dieu, & que s'ils s'en fussent allez & departis, ladicte ville estoit perdue & destruite. Et que lesdits de deuant Paris y feussent entrez par ladicte Bastille, & par ce demourée ladicte ville destruite & du tout desolée.

ET le vendredy ensuiuant vindrent à Paris deux poursuiuans, l'vn de Gisors qui vint dire au Roy qu'il enuoyast secours en ladicte ville, & que deuant y auoit bien cinq ou six cens lances. Et que dedans icelle n'y auoit nulles gens de guerre de par le Roy. Et si n'auoient aussi nulle artillerie, pouldres ne autres deffences. Et l'autre poursuiuant estoit aussi enuoyé au Roy de par Hue des vignes escuyer, homme d'armes de l'ordonnance dudit seigneur sous la charge & compagnie du seigneur de la Barde: Lequel Hue estoit lors à Meulant: par lequel poursuiuant estoit mandé au Roy, que ledit des Vignes auoit sceu par gens de foy, que les Bretons & autres auoient entrepris d'entrer à Roüen tout ainsi qu'ils auoient fait à Ponthoise: & par dedans le chastel ou Palais de ladicte ville, affin qu'il y pourueust. Et cedit iour de vendredy lesdits ambassadeurs

ordonnez de chacun costé disnerent à S. Anthoine des champs dehors Paris. Et là leur fut enuoyé de par le Roy pain, vin, poisson, & tout ce que mestier leur estoit pour ledit disner. Et fut illec aussi porté en vne charrette plusieurs des cōptes rendus en la chābre des cōptes à Paris, des paÿs & villes de Champagne & Brie. Et le samedy ensuiuant leldits ambassadeurs de costé & d'autre, furent de rechief assemblez en deux parties. C'est à sçauoir mōseigneur du Maine, & ceux de sa compagnie pour la partie du Roy avecques les autres Princes & seigneurs estans dehors tous en la Grāche-aux-merciers. Et pour le Roy audit S. Anthoine des champs y estoient ordonnez, maistre Estienne Cheualier tresorier de Frāce, maistre Arnould Bouchier & Christofle Paillart cōseillier des cōptes. Et les cōmissaires de l'autre partie estoient Guillaume de Bische, maistre Pierre Doriolle, maistre Iean Berart, maistre Iean Compaing, vn autre Licencié escumans latin, & maistre Ythier Marchant, & ce iour ne feirent que peu de chose. Cedit iour le Roy receut lettres & de la vefue messire Pierre de Brezé: par lesquelles luy mandoit qu'elle auoit fait prendre le seigneur de Broquemont capitaine du Palais de Roüen, pource qu'elle se suspecōnoit dudit cas: & qu'il n'eust aucune doubte de ladicte ville de Roüen, du bout du pont du Palais, & des habitans d'icelle: & que tous ils se trouueroient bons & loyaux enuers luy. Et le dimenche ensuiuant au point du iour, se vindrent rendre au Bouleuert de la tour de Billy sept hommes, qui estoient eschappez prisonniers de l'ost desdits Bourgongnōs: dont il en y auoit quatre facteurs de marchans d'Orleans, deux autres facteurs de marchans de Paris, & vn Flamant, qui tous auoient esté condamné à estre pendus par leldits Bourgongnons: pource que depuis leur prinse n'auoit eu personne qui les eust pourchassez. Et rapporterent que le mercredy precedent, fut tirée vne serpentine de la tour de Billy dedans l'ost desdits Bourgongnons: laquelle d'vn seul coup tua sept Bourgongnons, & en blessa plusieurs. Ce iour apres disner vindrent nouuelles au Roy que Roüen estoit prins par mōseigneur le Duc de Bourbon, qui y entra par le chastel de Roüen du costé des champs: le vendredy au soir precedent, par le moyen de la vefue messire Pierre de Brezé, à qui le Roy auoit fait moult de biens & où il auoit grand fiance. Et conduisoit le fait d'icelle vefue l'Euesque de Bayeux, & ledit maistre Iean Hebert & autres. Et au moyen de ladicte prinse quād les seigneurs de dehors Paris sceurent icelle, ils donnerent responce au Roy, que monseigneur Charles frere du Roy qui par auant se feust contenté de Champagne & Brie, n'auoit point d'autre ampanage que la Duché de Normandie: laquelle chose feit le Roy par force & contraincte. Et pource qu'il n'y pouoit remedier, bailla à mondit seigneur Charles pour son ampanage ladicte Duché de Normandie, & reprint à luy la Duché de Berry. Et apres que le Roy eust baillé ladicte Duché de Normandie audit monseigneur Charles, il fut apres contrainct de recompenser tous leldits Princes & seigneurs de leurs armes & interests qu'ils auoient fait contre luy, qui tous les butinerent. Ainsi comme assez amplement le descript & recite ledit chroniqueur maistre Enguerran de Monstrelet au tiers liure de sa chronique. Le chapitre deuant les lettres royaux du traicté des Princes à Conflans.

Comment apres le traicté fait à Conflans entre le Roy & lesdits Princes de son sang, furent portez viures aux existans deuant Paris, Bretons, Bourgongnons & autres avec lesdits Princes, en payant deuëment lesdits viures. Et cōment le Comte de Charrolois en faisant sa monstre se declaira estre vassal & seruiteur du Roy, & aussi luy fait hommage le Duc de Berry & les autres. Et la publication du traicté, avec plusieurs autres nouvelles aduenues audit Paris.



Edit iour fut crié à Paris de par le Roy que chacun portast des viures & autres choses pour aitailler & reuestir lesdits Bourgongnons & Bretons, laquelle chose fut faicte. Et incontinent que ledit cry fut fait, plusieurs marchans de Paris y porterent grand foison de viures aux champs deuant sainct Anthoine : lesquels viures y furent incontinent bien recueillis par lesdits de l'ost, qui y vindrent de toutes pars : & acheptoient iceux viures ce qu'on leur faisoit, par especial pain & vin : car lesdits de l'ost estoient tant affamez, les iouës velues & si pendans de malheureté qu'ils auoient longuement enduré, que plus n'en pouoient, & la plus part estoient sans chausses & soulliers, plains de poulx & d'ordure. Et entre autres vindrent & arriuerent ausdits viures plusieurs, Lifrelofres, Calabriens & Suisses, qui auoient telle rage de faim aux dents, qu'ils prenoiēt fromages sans peler & mordoient à mesmes : & puis beuuoient de grās & merueilleux traicts en beaux pots de terre, & Dieu sçet en quels nopces ils estoient : mais ils ne leur estoient pas franchises pource qu'ils payoient bien leur escot. Et plusieurs autres choses y eust faictes ce iour, qui sont cy passées pour cause de briefueté : mais chacun peut sçauoir que c'est chose incomprehensible & inestimable que la puissance de Paris : car lesdits Bourgongnons, Bretons, Calabriens, Bourbonnois, Picards & autres ainsi estant deuant Paris, que dit est, qu'on estimoit à bien cent mille cheuaux apres l'appoinctement fait : & ceux de Paris qui estoient trois fois plus, furent tous fournis & nourris des biës de ladicte ville par moult grand espace de temps, & sans riens encherir. Et apres leur partement y fut encores beaucoup meilleur marché que deuant n'auoit esté. Et le ieudy ensuiuant ne fut riens fait sinon que tousiours on aitailloit lesdits de l'ost. Et aussi ce mesmes iour le Roy avecques peu de gens alla iusques ioingnant de Conflans parler audit seigneur de Charrolois : laquelle chose sembla à toutes personnes voulans son bien, estre simplement fait à luy. Et de ce se farsoient & mocquoient les Picards & autres de leur party, qui en disoient tels mots. Et reuoitiez vo Roy qui parle à no seigneur de Charrolois, & a passé à deux heures qu'ils y sont, & par foy se vouliōs il est à no commandement.

Et le vendredy ensuiuant quart iour dudit mois le Roy ordonna de ladicte porte sainct Anthoine, qu'on laissast entrer lesdits Bourgongnons en icelle ville : dont plusieurs y vindrent à ceste cause & en grand nombre qui y feirent plusieurs excès & maistrises : ce qu'il ne leur eust pas esté souffert, qui bien eüst sceu que le Roy ne s'en fut point courroucé. Et à cause de la permission d'icelle entrée, y eut vn Bourgongnon entre les autres, qui voulut entrer en icelle ville par ladicte porte S. Anthoine cōtre le gré des portiers illec estans : & mesmemēt d'un de la cōpagnie dudit Bastard du Maine, qui gardoit le guichet de ladicte porte

S. Anthoine. Et pour le reffuz que feit ledit archier audit Bourgongnon d'entrer dedans ladicte porte & en icelle ville, ledit Bourgongnon bailla à iceluy archier en entrebaillant ledit guichet, d'une dague dedans le ventre: & incontinent ledit Bourgongnon fut prins & merueilleusemēt battu & nauré, & le voulurent plusieurs tuer, ce qui leur fut deffendu: mais on feit assaouir ces choses au Roy, qui ordonna que on le menast audit seigneur de Charrolois pour en faire iustice, lequel y fut incontinent mené. Et tout aussi tost qu'il fut vers luy arriué, & qu'il fut aduerty des choses dessusdictes, le feit pendre & estrangler à la iustice estant pres du pont de Charenton. Ce iour aussi le Roy ordonna que en chacun quartier de Paris fust fait des feux: & ceux desdits quartiers de ladicte ville estre illec en armes, & qu'en chacun desdits carrefours y eust vn notable homme eleu pour parler aux passans parmy les rues, & sçauoir qu'ils estoient, & où ils alloient: & ce iour fut esclipse de Lune. Et le Dimenche ensuiuant plusieurs des seigneurs de l'ost vindrent soupper à Paris avecques le Roy, en l'hostel de sire Iean l'Villier Clerc de ladicte ville de Paris. Et là sy trouuerent plusieurs dames, damoyelles & autres nobles femmes d'icelle ville. Et cedit iour Sallezart capitaine & vingt hommes d'armes de sa compagnie, furent aux champs dehors Paris & issirent par la Bastille de S. Anthoine: pource que la porte estoit gardée & deffendue de par le Roy, que homme n'issist hors d'icelle ville. Mais à les bouter dedans on n'y en mettoit que dix à vne fois: car on leuoit le pont leuiz deuers ladicte place, & les menoit on aux champs & puis reuenoit on querir les autres dix, pour aussi faire passer aux champs. Tous lesquels vingt hommes d'armes estoient vestus & habillez de hocquetons de camelot violet à grans croix blanches: & auoient belles chesnes d'or autour du col, & en leurs testes cramignolles de veloux noir à grosses houppes de fil d'or de chippre dessus. Et tous leurs cheuaux estoient couuers de campanes d'argent. Et au regard dudit Sallezart, pour deffence de ses gens, il estoit monté dessus vn beau coursier, à vne moult belle houffure toute couuerte de tranchouers d'argent: dessus chacun desquels y auoit vne grosse campane d'argent dorée. Et tout deuant ladicte compagnie alloit la trompette dudit Sallezart, monté dessus vn cheual grison: lequel en courant au long des fossez d'entre ladicte porte S. Anthoine & le bouleuert de la tour de billy: ledit cheual cheut dessous ladicte trompette si tres lourdement, qu'icelle trompette se rompit le col. Et le lundy ensuiuant vint nouuelles à Paris, que le seigneur de hautbourdin & le seigneur de Saueuses auoient prins Peronne, & le Comte de Neuers qui y estoit dedans. Et cedit iour eschapperent trois prisonniers des prisons de Tizon: dont l'un auoit esté cause avec Loys Sorbier, de bouter les Bretons & autres dedans Ponthoise, & estoit de la cōpagnie Ioachin Rouhault. Ce iour aussi se print le feu à Paris en vne maison en Champ-gaillart, dont le Roy en eut vn peu de paour. Et ordonna pour ceste cause qu'on en feit faire des feux par tous les quartiers de Paris, & les habitans armez deuant iceux: & le guet fut renforcé, ce qui fut fait.

CEDIT mois d'Octobre furent aucunes gens de guerre du party dudit de Bourgongne deuant la ville de Beauuais, pour sommer les prelatz & populaire d'icelle, d'eux rendre & mettre és mains dudit seigneur de Bourgongne, & ladicte

cte place aussi:lesquels Prelats & habitans prindrent ladicte sommation par es-
 crit & l'enuoyerent au Roy, qui incontinent l'enuoya au seigneur de Charro-
 lois,auec lequel il auoit fait paix & trefue. Lequel Charrolois rendit responce
 que ce n'estoit point de par luy qu'on faisoit ledictes sommatiōs,en disant que
 le diable peut emporter ceux qu'ils faisoient tels, & qu'ils faisoient plus qu'on
 ne leur commandoit. Et dit le Roy audit seigneur de Charrolois, que puis que
 appoinctemēt auoit esté fait entre eux,qu'il ne failloit plus vser de telles voyes:
 & si luy dit plus le Roy qu'il luy dōneroit ladicte ville de Beauuais s'il vouloit.
 Et le mercredy ensuiuant neufiesme iour dudit mois fut ordōné de par les pre-
 uosts des Marchans & Escheuins de ladicte ville,que chacū quartenier & dize-
 nier d'icelle ville,feissent faire des feux és lieux accoustumez de les faire: & que
 toutes les chaisnes des rues foraines fussent tendues: & que chacune personne
 fut veillant deuant lesdits feux,laquelle chose fut faicte. Et le ieudy ensuiuant
 vint ledit seigneur de Saueuses, & arriua en l'ost desdits Bourgongnons à tout
 grand puissance de gens,qui amenoient certaine grand somme d'or & d'argent
 pour faire le payement des gens de guerre dudit seigneur de Charrolois. Et ce
 iour aussi le Duc de Bretaigne eut son appoinctement auecques le Roy nostre
 sire,de ses vacations,fraiz & mises de luy & son armée,pour estre venu contre
 luy & son Royaume deuant Paris,auecques les autres Princes & seigneurs des-
 sus nommez. Et en faisant ledit appoinctement luy fut rebaillee sa Comté de
 Montfort, & autres auecques grand somme de deniers. Et le vendredy ensui-
 uant vint en l'hostel de ladicte ville maistre Iean Boulengier President en Par-
 lement, dire illec de par le Roy nostre sire, qu'on feist assauior aux quarteniers
 & dizeniers de ladicte ville, & de main en main au populaire d'icelle, qu'on ne
 s'esbahit point se on veoit la puissance des Bourgongnons venir ce iour deuant
 Paris: & que ce seroit pour illecques faire leurs monstres.Et nonobstant ce n'y
 vindrent point ce iour:mais les feirent depuis le pont de Charenton iusques au
 bois de Vincennes, & se monstrerent grand puissance. Et là le Roy se trouua
 pour veoir icelles monstres bien simplement, comme de luy quatriesme seul-
 lement:c'est à sçauoir le Roy, le Duc de Calabre, le seigneur de Charrolois, &
 monsieur de S.Pol, ainsi comme descrit ledit Enguerran de Monstrelet: mais
 non pas en telle maniere,pourquoy ie l'ay ainsi laissé. Et quand ledictes mon-
 stres furent faictes,le Roy s'en retourna par eaüe à Paris: & auant son partemēt
 & en sa presence,ledit seigneur de Charrolois dit à tous ledictes gens de guer-
 re ces mots. Mes seigneurs vous & moy sommes au Roy mon souuerain sei-
 gneur, qui cy est present pour le seruir toutes les fois que mestier en aura. Et le
 samedi ensuiuant douziesme iour dudit mois d'Octobre quatre cens soixante
 cinq, vint nouuelles que la ville d'Eureux auoit esté baillée & liurée aux Bre-
 tons,par vn nommé messire Iean le Beuf cheualier, qui les bouta en ladicte vil-
 le le mercredy precedent iour de S.Denys, ainsi que les bourgeois & habitans
 de ladicte ville alloient en vne procession hors d'icelle ville. Et ainsi qu'ils issi-
 rent par l'une des portes d'icelle en allant à ladicte procession, ledicts Bretons
 entroient en ladicte ville par vne autre porte. Et le seiziesme iour d'iceluy mois
 d'Octobre, aduint qu'on aduertit le Roy qu'il y auoit entreprinse faicte sus sa
 personne par aucuns ses ennemis, de le prendre ou tuer dedans ladicte ville. Et

pour soy engarder & dormir seurement ordonna expressement, qu'on feist grãd guet & garde en ladicte ville, tant sur la muraille que dedans: & que par chacũ quartier & rue feussent faits les feux, ce qui fut fait. Et vint aussi nouuelles que la ville de Caen & autres de Normandie s'estoient remises & reduictes en l'obeissance de mondit seigneur de Berry. Et depuis ce le Roy enuoya en la ville de Mante grand quantité de gens de guerre, & de francs-archiers. Et le mercredi ensuiuant trentiesme & penultime iour du mois d'Octobre audit an, furent leües & publiées les lettres de la paix ou trefue faictes entre le Roy, & lesdits Princes en la court de Parlement, où illecques fut enregistré. Et ce mesme iour le Roy partit de Paris pour aller au Bois-de-Vincennes par deuers lesdits Princes. Et là mōdit seigneur de Berry luy feist hōmage de la Duché de Normādie, qui baillée luy auoit esté pour sondit ampanage. Et cedit iour fut ladicte ville de Paris fort gardée: & feist on armer tous les archiers & arbalestriers d'icelle & autres, pour garder les portes de ladicte ville, iusques à ce que le Roy fut retourné en icelle de deuers lesdits Princes, où il s'en estoit ainsi simplement allé. Et delibera le Roy cedit mesmes iour, de coucher la nuit audit lieu du Bois, & enuoya querir son liēt qui estoit à Paris: mais le Preuost des Marchans & les Escheuins de ladicte ville, luy enuoyerent messages expres luy humblement prier & requerre, qu'il n'y couchast point pour moult de causes. Ce qu'il leur accorda & s'en retourna au giste audit lieu de Paris. Et le ieudy ensuiuant monseigneur de Berry, monseigneur de Charrolois, & autres se departirent de deuers Paris & s'en allerent en diuers lieux: c'est à sçauoir mōdit seigneur Charles s'en alla en Normandie, & le conuoya le Roy bien loing sur le chemin de Ponthoise. Et puis s'en tira luy & ledit Comte de Charrolois vers Villiers le Bel, où ils furēt deux ou trois iours: & puis s'en alla ledit de Charrolois au païs de Picardie: & de là s'en alla faire guerre aux Liegeois. Ainsi comme bien amplement dit Enguerran de Monstrelet.

Comment le Roy Loïs remercia ceux de Paris de leurs bonnes proësses & loyautex: & conferma les priuileges qu'il leur auoit donnez, en leur offrant autres nouueamx. Il remeit Preuost de Paris messire Robert d'Estouteuille cheualier: puis il desappoincta aucuns de leurs offices, & en leurs lieux meit autres officiers, puis alla à Orleans. Et cōment ledit Charles frere dudit Roy, fut recca moult honnorablement à Roüen, comme vray Duc de Normandie avecques plusieurs autres choses. Et comment le Roy retourna audit païs de Normandie.



Le lundy ensuiuant messire Robert d'Estouteuille cheualier, seigneur de Beine, qui auoit esté Preuost de Paris du tēps du feu Roy Charles: & que le Roy luy auoit ostée la Preuosté & baillée à Jacques de Villiers seigneur de l'Isle Adam, fut remis & restitué audit office de Preuost de Paris. Et ce mesme iour fut en l'hostel de ladicte ville pour les affaires du Roy, & là luy fut baillé le nom de la nuit comme à Preuost de Paris. Et le mardy ensuiuant le Roy souppa en l'hostel d'icelle ville, où il y eut moult beau seruice de chair & poisson. Et y soupperent avec plusieurs gens de grand façon, inuitez & mandez avecques leurs femmes. Et auant ledit soupper le Roy proposa à aucuns quarteniers & dizeniers pour ce aussi amenez: Disant qu'il

qu'il les mercioit tous en general & particulier de la grande feauté & loyauté, qu'il auoit trouuée en eux. Et que pour eux il estoit du tout disposé de faire tout ce que possible luy seroit. Et que pource que deuant la guerre & diuision qui auoit esté deuant ladicte ville, il auoit donnez & conferez à icelle aucuns priuileges, & qu'aucuns pourroient auoir imagination qu'il auroit ce fait pour la necessité, où il festoit trouué d'auoir d'eux secours. Et qu'apres ladicte paix ou accord les leur pourroit oster:il leur declaira pour ceste cause des lors & des maintenant pour lors à tousiours, qu'il leur auoit dōnées & laissées sans iamais auoir esperance de les rappeler ne venir contre. Et se mieux vouloient auoir de luy qu'ils le demandassent, & il le leur octroyeroit. Et leur dit encores qu'il laissoit en ladicte ville le seigneur de Beine, comme Preuost de ladicte ville de Paris:auquel il vouloit qu'ils obeissent cōme à luy: & leur dit qu'il auoit moult bien seruy à la iournée de Montlehery, & pour autres causes qu'il declaira audit preuost des Marchans & escheuins de ladicte ville de Paris. En leur priant d'estre tousiours bons & loyaux enuers luy & à la Couronne de France, sans ce qu'aucune partialité fut trouuée en ladicte ville. Et illecques ce iour fut fiancée la fille naturelle du Roy à mōseigneur le Bastard de Bourbon. Et apres soupper y furent faictes plusieurs ioyeusetez, dances & autres plaisances. Et là mondit seigneur le Bastard y dança, & y fait grande & bonne chiere. Et le lundy ensuiuant septiesme iour de Nouembre audit an quatre cens soixāte cinq, ledit messire Robert d'Estouteuille fut amené au chastellet de Paris par messire Charles de Meleun & maistre Iean Dauuet premier President du Parlement de Thoulouze:auquel President le Roy mandoit qu'il auoit receu le serment dudit d'Estouteuille à Preuost de Paris, au lieu de Iaques de Villiers seigneur de l'Isle Adam: auquel il auoit donné ladicte Preuosté à son ioyeux aduenement, & qu'il le meit & instituast en possession & saisine dudit office de Preuost de Paris. Et apres que les lettres de don dudit office furent leües au grād parc du chastellet de Paris, iceluy d'Estouteuille fut mis & institué en possession dudit office, sans preiudice du cas d'appel dudit de Villiers. Et tantost apres ces choses ainsi faictes le Roy manda venir à luy les Presidents de sa court de Parlement, ausquels il dit telles ou semblables parolles. Il est vray qu'apres que ie vins à mō ioyeux aduenement à la Couronne, ie feiz le premier President en ma court de Parlement messire Helie de Thorettes, qui tantost apres alla de vie à trespas. Et à l'heure que ie le feis, i'auoye mō affection singuliere d'y mettre en son lieu maistre Iean Dauuet nostre premier President à Thoulouze, qui cy est present: mais tant par importunité de requerans qu'aussi à la priere & requeste de messire Iean Bureau, nous y meismes le President de Nanterre, qui depuis y a esté iusques à la venue de nostre ville de Paris d'aucuns seigneurs de nostre sang, qui nous feirent dire & remontrer, qu'en nostre Royaume auoient esté faictes plusieurs grandes iniustices, & mesmement en nostre court de Parlement. Pourquoy & autres causes qui nous meuuent, declairons que ledit de Nanterre ne fera plus nostre premier President en nostre court de Parlement. Et que pour & en son lieu y auons mis & creons ledit maistre Iean Dauuet, pour y estre & demourer tant qu'il nous plaira. Et le samedy ensuiuant neufiesme iour dudit mois de Nouēbre messire Pierre de Moruillier cheuallier, qui auoit esté Chan-

cellier de France fut desappointé dudit office : & y fut mis en son lieu messire Jean Iuuenel des Ursins, qui aussi auoit esté Chancelier de France, & qui encores estoit au iour du trespas dudit feu Roy Charles . En ce temps aussi le Roy desappointa messire Pierre Puy de l'office de maistre-des-Requestes ordinaire de son hostel, & donna ledit office à maistre Regnault des Dormans.

A P R E s ces choses le Roy se partit de Paris pour aller à Orleans , & emmena avecques luy Arnoult l'Huillier changeur & bourgeois de ladicte ville : auquel il chargea tresexpressément de le suiure & estre tousiours pres de luy. Et si y mena aussi maistre Jean Longue-ioye le ieune, nouuellemēt marié à damoiselle Geneuiefue fille de maistre Jean Baillet, pour estre de son grand conseil. Et à l'heure dudit partement il crea Tresorier de France maistre Charles d'Orge-mont, seigneur de Mercy. Et feit ledit Arnoult l'Huillier Tresorier de Carcas-sonne, & maistre Pierre Ferteil mary de Terteau, maistre-des-Requestes de son hostel sans gages & interest . Et le lundy ensuiuant dixhuietiēme iour dudit mois, aduint à Paris à six heures du matin, qu'une comette y cheut en resplen-disseur de feu, qui dura longuement : & estoit telle qu'il sembloit que toute la ville fut en feu & en flambe . Et de ceste espouventable & merueilleuse chose, vn hōme en la place de Greue, qui à ladicte heure alloit ouir messe au S. Esprit, fut de ce si tresmerueilleusement espouenté, qu'il en deuint fol & en perdit son sens & entendement.

E T apres toutes ces choses, mondit seigneur Charles qui ainsi estoit party de Paris pour aller en Normandie, s'en alla iusques à S. Katherine du mont de Roüen, où il seiourna illecques par diuerses iournées, en attendant que ceux de Roüen eussent préparé ce qu'ils auoiēt intention de faire pour son entrée: mais ce pendant se meust noise entre mondit seigneur Charles Duc de Bretagne & le Comte de Dampmartin : dont fut dit audit monseigneur Charles, que ledit Duc de Bretagne & le Comte de Dampmartin, auoient entrepris de le prendre & ramener en Bretagne: pour laquelle cause Jean monseigneur de Lorraine qui de ce fut aduerty, alla incontinent dire ces nouuelles en l'hostel de ladicte ville de Roüen, qui incontinent y pourueurent & feirent armer tous ceux de ladicte ville. Et à grand port d'armes ledit monseigneur Jean de Lorraine à l'ayde desdits de Roüen, alla en la place dudit lieu de S. Katherine, où on ne le vouloit laisser entrer: & illec malgré ledit Duc de Bretagne & Comte de Dampmartin sans solemnité garder, feit monter mondit seigneur Charles sur vn cheual garny de selle & de harnois simplement, sans aucune housure: & auoit vestu à ceste heure vne robbe de veloux noir : & en cest estat le menerent en ladicte ville de Roüen tout droit, en l'Eglise nostre Dame, où chanté fut. *Te Deum laudamus*, & de là au chasteau dudit lieu .

E N ce temps le Roy estant à Orleans, feit plusieurs ordonnances & establissemēs, & desappointa plusieurs capitaines de guerre. Et entre les autres, il osta les cent lances dont Poncet de Riuiere auoit la charge, & le feit Baillif de Môt-ferrant, & de autres : osta aussi les charges & meit d'autres en leurs lieux. Et quād ledit Poncet de Riuiere se veit ainsi desappointé de ladicte charge, il s'en alla outre la mer au saint voyage de Hierusalē: & de là à S. Katherine du Mont de Synay. Et si remeit & feit le Roy le seigneur de Loheac Mareschal de France,

ce, comme autresfois l'auoit esté: & fut mis au lieu du Comte de Comminge Bastard d'Armignac. Et apres ces choses ainsi faictes, le Roy partit d'Orleans, & s'en alla en Normandie à toute son armée, francs-archiers & son artillerie grosse & menue: & s'en tira vers Argenten, Eymes, Falaize, Caen & autres places dudit païs pour les prendre, saisir & mettre en ses mains: & là il trouua le Duc de Bretagne qui furent ensemble vne espace de temps. Et d'autre part audit païs de Normandie y estoit par le Roy monseigneur de Bourbon, qui alla deuant Eureux pour l'auoir, qui n'y obeïrent point de premiere venue: mais depuis traicterent avecques luy & le bouterent dedans ladicte ville luy & ses gens. Et apres d'illec se partist & s'en vint deuant Vernon sur Seine, où semblablement luy fut fait reffus de premiere venue, & puis le meirent dedās. Et d'une autre part estoit messire Charles de Meleun grand maistre d'hostel du Roy, qui aussi prenoit & saisissoit villes & places, comme Gisors, Gournay & autres: & si rua ius enuiron six vingts Escoçois qui s'en alloient au seigneur de Bueil pour mondit seigneur Charles. Et fut la r'encontre faicte desdits Escoçois à vn village du bailliage de Caulx nommé Cailly. En ce temps le seigneur d'Esternay qui estoit General de Normandie, qui s'en estoit party hors de la ville de Roüen pour la doubte & fureur du Roy: & affin qu'il ne fut cogneu, s'habilla en Cordelier de l'obseruance, fut rencontré par aucuns gens de guerre de la compagnie dudit grād Maistre au Pont S. Pierre, qui est à quatre lieües de Roüen & auoit avec luy vn Augustin: lesquels apres qu'ils eurent esté saisis furent cherchez par lesdits gens de guerre, & trouuerent sur eux plusieurs bagues & or monnoyé content, qu'iceux prindrent & saisirent. Et apres mōdit seigneur Charles qui s'en estoit allé à Roüen, s'en alla à Louuiers cuidant y trouuer monseigneur de Bourbon, lequel il n'y trouua poinct: & incōtinent s'en retourna audit lieu de Roüen. Et apres son retour audit lieu de Roüen ceux de ladicte ville le receurent & le menerent en l'hostel de ladicte ville, où illec l'espouserent à leur Duc. Et en ce faisant luy baillerent vn anneau qu'ils luy meirent au doigt, qu'à ce faire est ordonné. Lequel depuis mōdit seigneur Charles porta & promet lors ausdits de Roüen, de les entretenir & garder en leurs franchises & libertez. Et leur ordonna à ceste heure la moitié de tous les aydes, que par auant la reception ils auoient payez. Et ces choses faictes luy fut dit & remonstré par les gens d'Eglise, les nobles, bourgeois & populaire d'icelle ville, qu'ils se rendoient & demouroient du tout ses vrays & loyaux subiects: tous biens deliberez de viure & mourir pour luy, iusques au dernier homme. Et puis luy feirent lire vn article contenu en vne chronique, qui estoit en icelle maison de la ville publiquement deuant tous, qui contenoit en effect: que iadis y eut vn Roy de France qui mourut, & apres son trespas demoura deux fils, dont l'un par aisneesse succeda à la Couronne. Et à l'autre fut baillé pour son ampanage la Duché de Normandie, que depuis ledit Roy de Frâce voulut r'auoir & en print grand guerre cōtre son frere pour la r'auoir. Et outre pour leurdit Duc guerroyerēt tellemēt ledit Roy de France, que par leur puissance d'armes ils meirent en exil ledit Roy de France, & feirent leurdit Duc Roy. Et apres ladicte lecture luy dirent, qu'il ne se souciast de riens. Et que de là en auant ceux de ladicte ville le fourniroient dedans icelle & dessus leurs

murs d'engins & autres choses deffensables, & de tout ce que necessité leur seroit d'auoir. Tellement qu'aucun dommage ou esclandre ne viendrait audit seigneur ne à eux, ne à leurdicte ville.

Comment le Roy recouura la Duché de Normandie contre sondit frere Charles le Duc de Berry: & à ce retour fut noyé le seigneur d'Esternay. Et aussi furent exécutés plusieurs officiers de Normandie, & autres bannis dudit Duché. Pourquoi s'en alla de Rouen ledit Duc de Berry. Et apres luy cuida aller Jean monseigneur de Lorraine: mais il fut prins & mené vers le Roy, & autres choses aduenues.

E T le lundy penultime iour de Decembre audit an: Le Roy en retournant dudit bas pays de Normandie, vint au Pontheau-de-mer: & de là en la Champaigne du Neufbourg pres Conches. Et enuoya mondit seigneur de Bourbon deuant la ville de Louuiers. Et le mercredy ensuiuant premier iour de Ianuier ladicte ville de Louuiers, fut rendue à mondit seigneur de Bourbon pour le Roy. Et ce mesmes iour le Roy entra dedans ladicte ville de Louuiers apres disner. Et en ce mesmes iour aussi fut mené par les gens dudit grand maistre d'hostel le seigneur d'Esternay, qui aussi en iceluy iour fut noyé en la riuere d'Vre: & aussi ledit Augustin avec luy par les gés du Preuost des Mareschaux. Et puis fut le corps dudit seigneur d'Esternay retiré hors de ladicte riuere & mis en terre, en l'Eglise de nostre Dame de Louuiers, où illec fut fait son seruice. Ainsi comme mesmes recite ledit chroniqueur de Monstrelet: mais non pas en telle maniere, qui est selon ledit Gaguin, pourquoy ie l'ay ainsi laissé.

A V D I T temps furent plusieurs personnes officiers, & autres dudit pays de Normandie exécutés & noyez par le Preuost des Mareschaux, pour les questions du Roy, & monseigneur Charles son frere. Et apres le Roy se partit dudit Louuiers, & vint mettre le siege deuant la ville du Pont-de-l'Arche qui est à quatre lieues de ladicte ville de Rouen. Et le ieudy sixiesme iour dudit mois de Ianuier, fut crié en la ville de Paris, que tous marchans accoustumez de porter viures en ost, portassent viures en l'ost du Roy qui estoit deuant ladicte ville du Pont des-Arches. Et aussi que tous pionniers fussent tous prests à partir le lendemain, pour aller audit lieu du Pont-des-Arches sous sire Denys Giber, l'un des quatre Escheuins de ladicte ville, à la conduite d'iceux ordonné. Et le mercredy ensuiuant les gens du Roy qui estoient allez à leur aduantage sur les chaps, prindrent quatre hommes d'armes de la compagnie, & estans sous ledit monseigneur Charles. Et qui autresfois auoient esté en l'ordonnance du Roy: & l'un d'iceux estoit nommé le petit Baillif, qui autresfois auoit esté de la compagnie de Ioachin Rouhault Mareschal de France, & qui auoit esté cause de la prise de Ponthoise contre le Roy. Furent menez deuers le Roy, & incōtinent fut ordonné qu'on leur couppast leurs testes. Et lors ils requierent au Roy qu'il leur sauua la vie, & ils luy feroient rēdre ledit Pont-de-l'Arche: ce que le Roy leur accorda à la requeste de mondit seigneur de Bourbon, & de plusieurs autres Princes & seigneurs. Et ce mesmes iour le Roy & sa compagnie entrerent dedans ledit Pont-de-l'Arche: & ceux qui estoient dedans ladicte ville se retirerēt dedans le chasteau. Entre lesquels y estoit maistre Jean Hebert, General des finances

nances du Royaume de France. Et trois iours apres fut rendu au Roy le chasteau dudit Pont-de-l'Arche. Et apres que ladicte ville & chasteau eurent esté ainsi rendues au Roy: ceux de Roüen enuoyerent par deuers luy, pour parler d'appoinctemēt: lequel enchargea hault & bas les Ducs de Bourbon & de Bretagne. Et pour ledit appoinctement auoir, vindrent de ladicte ville de Roüen aucuns commissaires ordonnez de par icelle, pour luy faire plusieurs requestes & remonstrances. Et entre autres que quelque chose qu'ils eussent fait, le Roy voulsist estre content d'eux, & qu'il luy pleust declairer qu'ils n'auoient point failly ne fait chose contre luy, dont il leur voulsist donner pardon, grace ou remission. Et que le Roy de là en auant les affranchit en la maniere qu'il auoit fait ceux de sa ville de Paris: & plusieurs autres requestes feirent au Roy qu'il leur rendit responce, que sur le tout il auroit son aduis. Et durāt ces choses plusieurs des gens du Roy alloient & venoient en ladicte ville, & les vns avecques les autres. Et ce pendant mondit seigneur Charles luy & plusieurs autres de sa compagnie, sortirent dehors de ladicte ville de Roüen & s'en tirerent à Honnefleür & à Caen, où ils furent depuis certaine espace de temps. En ces entrefaictes Iean monseigneur de Lorraine, se cuida eschapper pour aller en Flandres: mais il fut rencontré par les gens du Roy, qui le prindrent & menerent vers le Roy. Et donna le Roy la pluspart des offices de ladicte Duché de Normandie, & y feit de nouveaux officiers & en debouta les autres. Et apres ledit partement dudit mōseigneur Charles de ladicte ville de Roüē, elle fut remise & reduicte au Roy: & ce fait le Roy renuoya tous ses francs-archiers, & leur donna congé iusques au premier iour de Mars ensuiuant, & renuoya aussi son artillerie à Paris: & puis print son chemin pour aller au bas païs de Normandie, & vers le Mont S. Michel. En ce tēps Anthoine de Chabannes Côte de Dāpmartin (dont dessus est fait mētīon) se tint avecques le Roy, & y eut gouuernemēt & charge de gēs d'armes de cent lāces, dont auoit la cōduicte messire Charles de Meleun grād Maître d'hostel du Roy: Et si luy osta l'office de grand Maistre, & la bailla à mōseigneur de Craon: iāçoit que moult de gēs estoīēt assez d'opinion q̄ ledit de Meleun eut biē seruy le Roy, & fait de moult grād seruices: mesmemēt à la grād diligence qu'il print à la garde de la ville de Paris en l'absence du Roy, & luy estāt en Bourbōnois. Où tāt & si bien se gouerna & maintint, que plusieurs estoient d'opinion que se n'eust esté sa grand diligence & bonne conduicte, que ladicte ville eust eu beaucoup à souffrir au grand dommage du Roy & du Royaume. Et en ces choses faisant le Roy feit eschange avec ledit Comte de Dampmartin d'un sien chastel, qu'il auoit en Gascongne nommé Blancaffort: Et à l'encontre le Roy luy bailla tout le demaine & souueraineté qu'il auoit és villes de Gounesse, Gournay sur Marne, & Crecy en Brie. Et de ce luy bailla lettres adressans à sa court de Parlement pour icelles estre par eux expediees, & pour les ioindre avecques ladicte Comté de Dampmartin. Aūdit temps le Roy ordonna que la place de Chaumont sur Loire, qui appartient à messire Pierre d'Amboise seigneur dudit lieu de Chaumont, fut mise en feu & en flambe & arrasée, ce qui fut fait. Et le lundy tiers iour de Feurier vn nommé Gauvain Manniel, qui estoit lieutenant general du Baillif de Roüen, fut prins en ladicte ville & mené prisonnier au Pont-de-l'Arche. Et là par le Preuost

des Mareschaulx dessus le pont dudit lieu, fut dressé vn eschaffault : dessus lequel ledit Gauvain fut decapité pour aucuns cas de crime à luy imposez. Et dessus ledit pont fut sa teste mise au bout d'une lance, & son corps iecté en la riviére de Seine. Et en ce temps le hault Doyen de l'Eglise de Roüen, & autres chanoynes de ladicte Eglise iusques au nombre de six, furēt enuoyez hors icelle, & leur fut ladicte ville interdicte: & furēt enuoyez demourer hors de la Duché de Normandie.

Comment le Roy se partit de Roüen pour aller à Orleans : & enuoya plusieurs ambassadeurs en Angleterre. Et comment plusieurs malfaiçteurs furent executez à Paris, du diuorçe de sire Guillaume Colombel & de sa femme : du seigneur du Lau qui fut prins prisonnier. D'un mandement du Roy publié à Paris contre les Anglois, avec lesquels furent faictes trefues. Et comment plusieurs perdirent leur sens & entendement audit Paris, du temps que les febues florissoient.



1466.

Pres ce le Roy se partit de Roüen & s'en alla à Orleans, où la Roynne estoit: & y demoura par long tēps, & puis s'en alla à Iargeau & illec enuiron: & pēdant qu'il y fut, arriuerēt deuers luy plusieurs ambassades de diuerses contrées & pour diuers cas. Et durāt ce le Roy delibera enuoyer ambassade au Royaume d'Angleterre pour aucunes causes: Et pour ce faire esleut le Comte de Roussillon Bastard de Bourbon & Admiral de France, le sire de la Barde, l'Euesque & Duc de Langres, maistre Iean de Pōpincourt seigneur de Cercelles, maistre Oliuier le Roy Conseiller & maistre des Comptes & autres. Et partirent pour aller audit Royaume d'Angleterre au mois d'Auril mille cccc. soixante six. Et audit temps par la iustice ordinaire de Paris, furēt prins plusieurs pauvres creatures larrons, crocheteurs & autres malfaiçteurs, qui pour lesdits cas furent les aucuns pendus & estranglez au gibet de Paris à Montfaucon, & les autres en furent batus au cul de la charrette par les carrefourgs de ladicte ville. En ce temps damoiselle Ysabeau de Cambray femme de sire Guillaume Coulombel, puissant, & riche homme, fut mise & constituée prisonniere en la Conciergerie du Palais royal à Paris à la requeste & pourchats de sondit mary, qui principallement la chargeoit de trois choses. La premiere qu'elle s'estoit forfaitē & abandonnée à autre qu'à luy. La seconde qu'elle l'auoit desrobbé de ses biens en grans sommes de deniers: & aussi que elle auoit fait & cōpilé plusieurs poisons pour l'empoisonner & faire mourir: & sur ces choses auoit sondit mary fait faire ses informations. Apres lesquelles veües & pour lesdits cas, demoura longuement prisonniere & fut sur ce gehainée. Et finablement veu par la Court de Parlement lesdictes charges & informations sur ce faictes, & sa confession prinse par arrest & iugement diffinitif d'elle, fut dit & prononcé que lesdictes charges par ledit Colombel imposez à ladicte femme estoient souffisamment prouuées. Pourquoy fut declairé par ledit arrest priuée de toute communauté de biens, & douaire avecques sondit mary. Et au regard des poisons furent appoinctez contraires, dequoy elle proposa erreur & consigna six vingts liures parisis. Le dixiesme iour de May audit an soixante six, messire Anthoine de Chasteau-neuf seigneur du Lau, qui auoit eu congé du Roy lon temps par auant, fut trouué par cas d'auenture par

re par le seigneur de Chabefnais & autres és plains de Clery près Orleans . Et pource que luy & ses gens furent apperceuz en habits mescogneuz , fut prins prisonnier & mené au Roy , qui l'enuoya avecques ses gens prisonnier en vn chastel pres Mehun . Et le Mercredy veille de l'Ascension nostre seigneur , par l'ordonnance du Roy maistre Jean le Preuost notaire & secretaire du Roy , entra dedans la Bastille saint Anthoine par moyens subtils : & d'illec en meit & iecta hors vn nommé Marc , qui en estoit Lieutenant pour monseigneur des Bordes nouvellement espousé avec la fille naturelle dudit messire Charles de Meleun , qui estoit fils dudit seigneur des Bordes . Et apres ledit Marc & sadiète femme & mesnaige , s'en retournerent à refuge par deuers ledit messire Charles en la ville de Meleun . Et le samedi veille de Pentecouste vingtquatriesme iour dudit mois audit an mille quatre cens soixante six , furent leües & publiées en ladiète ville de Paris par les carrefourgs d'icelle à son de trompe & à cry public , que le mandement du Connestable de France : dedans lequel estoit inseré le mandement du Roy qui contenoit que le Roy estoit deüiemét informé que les Anglois ses anciens ennemis en grosse & merueilleuse armée , estoient deliberer d'entrer & descédre au Royaume de France pour destruire & gaster iceluy . Et que pour ce faire , auoient desia fait grand amats de nauires . Et pour ce le Roy voulant resister à leur mauuaise & damnée entreprinse , & pour les greuer & nuire en tout ce que possible seroit : mandoit audit Connestable que par toutes villes , paÿs & lieux dudit Royaume és places , où on a accoustumé de faire cry public : Il feist à sçauoir que tous nobles tenans du Roy en fief & arrierefief de quelque estat ou condition qu'ils feussent , feussent en armes & habillements dedans le quinziésme iour de Iuing ensuiuant , sur peine de confiscation de corps & de biés . Et aussi à tous francs-archiers à estre tous prests audit iour . En ce temps le Roy qui ainsi auoit desappoincté ledit seigneur des Bordes de la capitainerie de la Bastille S. Anthoine , donna ladiète capitainerie au seigneur de Blot Seneschal d'Auuergne , qu'on disoit estre homme de grand conduicte . En ce temps ledit seigneur de Montauban , qui auoit esté Admiral , grand maistre administrateur & general reformateur de toute la noise aduenue en Bretaigne , & par cōsequent au Royaume de France : & qui auoit eu des biés du Royaume & argent inestimable mourut à Tours , & ne fut point pleuré . Et apres sa mort le Roy donna ses offices : c'est à sçauoir l'office d'Admiral à monseigneur le Bastard de Bourbon , qui auoit espousée vne sienne fille naturelle . Et l'office de grand Maistre des eaües & forests fut donnée au seigneur de Chastillon , frere du Mareschal de Loheac .

A V D I T temps furent prinſes trefues avec lesdits Anglois durans vingt deux mois tāt par mer que par terre : & furent lesdictes trefues publiées : & aussi audit temps monseigneur du Maine pour aucunes causes qui meurent le Roy , fut desappoincté du gouuernement de Languedoc & fut baillé à monseigneur de Bourbon . Et apres ledit mariage fait dudit monseigneur l'Admiral , le Roy luy donna le chastel & place d'Vsson en Auuergne , qu'on dit estre la plus forte place du Royaume , avecques les capitaineries de Honneſſeur & autres places de Normandie . Audit mois de Iuing que les febues florissent & deuiennent bonnes , aduint que plusieurs hommes & femmes perdirent leur bon entende-

ment & mesmemēt à Paris. Il y eut entre autres vn ieune homme nommé maistre Marcial d'Auuergne, Procureur en la Court de Parlemēt & notaire au chastelet de Paris. Lequel apres qu'il eut esté marié trois sepmaines, avec vne des filles de maistre Iaques Fournier conseiller du Roy en ladicte Court de Parlement, perdit son entendement en telle maniere que le iour de monseigneur S. Iean Baptiste enuiron neuf heures de matin: vne telle frenaisie le print qu'il se iecta par la fenestre de sa chambre en la rue, & se rôpit vne cuisse & froissa tout le corps: & fut en grand dangier de mourir. Et depuis perseuera longuement en ladicte frenaisie & apres ce reuint & fut en son bon sens.

Comment le Roy enuoya aucuns commissaires reformateurs à Paris: desquels les pages eurent grande noise & question aux clerks du Palais. En ce temps y eut grande guerre entre les Liegeois, & le Duc de Bourgogne. Puis fut vne moult grande pestillence & mortalité à Paris des enuirs. Et comment ledit Roy ordonna aucuns seigneurs pour la garde & deffence du Royaume, & autres choses aduenues audit Paris en l'an mille quatre cens lxvi.




V mois de Iuillet ensuiuant vindrent & arriuerent à Paris plusieurs Prelats, seigneurs, cheualiers, gens d'Eglise & autres gens de cōseil, que le Roy ordonna venir: & qu'on disoit qu'ils estoient ordonnez pour mettre ordre & pollice en la iustice, & reformer en toutes choses & leur fut baillé moult grand pouoir. Et par iceluy estoient nommez vingt & vn commissaires: Dont mōseigneur Iean Bastard d'Orleans Comte de Dunois & de Longueuille estoit l'un & premier. Et duquel nombre de vingt & vn, ne pouoit estre riens fait qu'ils ne feussent treize. Ledit Comte de Dunois tousiours deuant & le premier. Et les appelloit on lors les reformateurs du biē public. Et sur la ladicte commission ainsi à eux baillée, commencerent à besongner le mardy xvj. iour dudit mois de Iuillet audit an mille quatre cens lxvj. Et pour y bien commencer & mettre tousiours en leurs faits Dieu deuant, fut fait par eux chanter vne belle messe du S. Esprit en la sainte Chappelle du Palais royal à Paris. Laquelle messe fut chantée & celebrée par l'Archeuesque de Reims Iuuenel, qui estoit eleu & nommé l'un desdits commissaires. Et à cedit iour eut vn an que le Roy rencontra monseigneur de Charrolois à Montlehery. Et le lendemain qui fut le mercredy seiziesme iour de Iuillet, aduint en la court dudit Palais que plusieurs des pages des conseillers de ladicte court illec attendans leurs maistres, prindrēt noise & question aux pages desdits seigneurs, tenans le conseil dudit bien public: & se meut la noise d'entre lesdits pages du Palais, contre lesdits pages du bien public, sur ce qu'ils n'auoient point payé leurs bien venues à iceux du Palais, & de ce auoient esté reffusans. Et demoura à tant ladicte noise iusques au lendemain qui fut ieudy, que tous lesdits pages d'un costé & d'autre retournerent en icelle court, & remeirēt sus leurdicte question. Et en pourparlant d'icelle, lesdits pages du bien public coururent sus aufdits pages du Palais, qui se reuencherent & baillerent les vns aux autres de terribles & merueilleux coups tant poings, de pierres, bastons, cousteaux & dagues, qu'il y en eut plusieurs naurez, battus, & les yeux creuez: & faillut fermer les portes, & que gens de bien s'en messassent pour les desmesler & appoincter.

appoincter. Et de ce fut dit par plusieurs, que ces choses signifioient le bout de l'an de la rencontre de Montlehery. Ladicte année fut fort moiste, & en diuers lieux en France y creust de bons bleds, en autres lieux ne valurent gueres, & estoient nuillez: & eut de grans tempestes en diuers lieux, tant d'esclair que de tonnoire, vents, pluies & autres tempestes: qui feirent moult de maux & de dommages en diuers lieux dudit Royaume, & par especial au païs de Soissonois: où elle gasta les bleds, les vignes & autres fruiçts, & destruisit plusieurs belles maisons, manoirs, couuertures d'Eglises, & fait plusieurs autres maux. En ce temps felsemeut grand guerre entre les Liegeois & le Duc de Bourgogne, qui pour ceste cause se meit en armes, & leur alla faire guerre & se fait porter en vne licthiere, & y mena avecques luy son fils ledit seigneur de Charrolois, avecques tous les nobles hommes gens de guerre, & autres qu'il peut recouurer & tous ses bahuz & artillerie: & fait mettre le siege deuant la ville de Dinant, comme assez amplement descript ledit de Monstrelet enuiron la fin de ladicte chronique.

En ladicte année es mois d'Aoust & Septembre, fut grande & merueilleuse chaleur: au moyen de laquelle s'en ensuiuit grande mortalité de pestillence & autres maladies: dont & dequoy il mourut tât en la ville, villages, voisins, Preuosté & Vicomté de Paris quarante mille creatures & mieux. Entre lesquels y mourut maistre Arnoul Astrologien du Roy, qui estoit fort homme de bien, sage & plaisant: & aussi y mourut plusieurs medecins & officiers du Roy en ladicte ville de Paris: & si grand nombre de creatures furent portez enseuellir & enterrer au cimitiere des sainçts Innocens en ladicte ville de Paris, que tant des morts en ladicte ville que de l'hostel Dieu tout y fut remply. Et fut ordonné que de là en auât on porteroit les morts au cimitiere de la Trinité, qui est & appartient à l'hostel de la ville de Paris. Et continua ladicte mort iusques au mois de Nouembre: Que pour la faire cesser & prier Dieu, il luy pleust de le faire, furēt faiçtes de moult belles processions generalles à Paris par toutes les Parroisses & Eglises d'icelle, où furent portées toutes les Chasses & sainçtes Reliques. Et mesmement les Chasses de nostre Dame, de sainte Geneuiefue & saint Marcel: & lors cessa vn petit ladicte mort. Et en ce temps fut grand bruit à Paris de larrons & crocheteurs allans de nuict crocheter huis, fenestres, caues & celliers. Et pour lesdits cas en furent aucuns battus au cul de la charrette, & les autres pendus & estranglez au gibet de Paris. Audit an fut pendu & estranglé audit gibet de Paris vn gros Normand natif de Constantin en Normandie, pource qu'il auoit longuement maintenue vne sienne fille, & en auoit eu plusieurs enfans: que luy & ladicte fille incontinent qu'elle en estoit deliurée meurdriçoient. Et pour ledit cas fut pendu comme dit est, & ladicte fille fut arse à Maigny pres Ponthoise, où ils estoient venus demourer dudit païs de Normandie. En ce temps furent apportées à Paris les Chasses de saint Crespin & saint Crespinien pour trouuer remede à ladicte maladie de pestillence: Et aussi pour eux quester, affin d'auoir dequoy recourir l'Eglise desdits Sainçts audit lieu de Soissons, que ladicte fouldre & tempeste auoit ainsi destruiçte & abbatue, comme dit est deuant. Et durât ce temps le Roy & son conseil se tindrent à Orleans, Chartres, Bourges, Mehun, Amboise & autres

lieux : & durant qu'il y fut vindrent plusieurs ambassades de diuerses nations , comme d'Angleterre, de Bourgongne & autres. Et delibera à lors le Roy de faire guerre ausdits Duc de Bourgongne & Comte de Charrolois son fils. Et pour ceste cause fait crier és villes de son royaume, ban & arriereban. Et ordonna & crea plusieurs Frans-archiers outre le nombre ordinaire. Apres ce que dit est, le Roy fait plusieurs ordonnances & establissemens pour la tuition & garde de ses païs & villes . Et ordonna monseigneur le Marechal de Loheac son lieutenant en la ville de Paris, & en l'Isle de France . Et à monseigneur de Chastillon fut baillé le païs de Champagne. Et la garde du païs de Normandie fut baillée à monseigneur le Comte de S. Pol Connestable de France , qui au parauant auoit esté ennemy du Roy avecques le Duc de Bourgongne, & mondit seigneur de Charrolois. En apres au mois de Feurier mille quatre cens soixante six, arriua vne ambassade de Bretaigne par deuers le Roy: lesquels apres qu'ils eurent par luy esté ouïs, les receut tresbien. Et puis apres s'en allerent en Flandres deuers ledit Duc de Bourgongne, & monseigneur le Comte de Charrolois son fils. Et lors fut grand bruit partout qu'il y auoit appoinctement fait entre le Roy & monseigneur son frere, dont plusieurs gens de bien furent moult ioyeux. Et auant ce le Roy auoit enuoyé ses ambassadeurs au païs du Liege : entre lesquels y estoit ledit maistre Iean Hesbert, monseigneur l'Euesque de Troyes & autres. Et en iceluy temps aduint en la ville de Paris que trois sergens à verge du Chastellet qui estoient bien mal renommez, furent de nuict prendre vn prestre de l'Eglise monseigneur S. Pol à Paris : lequel prestre estoit paisiblement couché en sa chambre : en laquelle par force & violence entrerent dedans lesdits sergens : & illec le battirent & mutilerent, & puis l'en emmenerent en la rue, & le trainerent au long d'icelle, & le naurerent en plusieurs lieux, & puis le laisserēt : & apres ledit prestre les en poursuiuit par iustice, & tellement qu'ils en furent constituez prisonniers au Chastellet, où leur proces fut fait : & furent illec condamnez à estre bannis du royaume de France. Et leurs biens & heritages confisquez & à faire amende honorable. Dont & dequoy ils appellerent en la court de Parlement : dont aussi en appella le Procureur du Roy, de ce qu'ils auoient esté trop peu iugez . Et depuis par arrest d'icelle court, fut dit que avecques le iugement de sentence du Preuost de Paris, qu'ils seroient battus par les carrefours de Paris ce qui fut fait.

Comment le Roy fait le Comte de Damp-martin son Grand-maistre-d'hostel. Et puis il alla à Roüen où il manda venir à luy le Comte de Vvaruich: & illec fut la Royne audit Roüen : de la mort du Duc Philippe de Bourgongne. Puis le Roy s'en alla à Chartres où il fait venir aucuns de Paris, pour leur ordonner faire bannieres en chacun estat & vocation: d'un religieux qui fut occis au temple: & comment la Royne fut moult honnorablement receüe en la ville dudit Paris.



ET le ieudy xxij. iour d'Auril mille quatre cens lxvij. Anthoine de Chabannes Comte de Damp-martin, qui ainsi estoit eschappé de la Bastille S. Anthoine, & qui depuis fait moult de maux au Roy & à ses subiects en Auvergne & ailleurs, venu deuant Paris avecques les autres Princes, fut fait & crée Grand-maistre-d'hostel du Roy au lieu du seigneur

gneur de Croÿ En doubtant de ce, ledit de Croÿ, meſſire Charles de Meleun, & tous autres: & luy en furēt baillées lettres par le Roy, qui certiffioit que ledit de Chabannes luy auoit fait ſerment de loyaument le ſeruir à l'encontre de tous. Depuis toutes ces choſes au mois de Iuing audit an quatre cens ſoixante ſept: le Roy ſe partit de Paris, & alla en Normandie à Roüen & ailleurs. Et luy eſtant à Roüen, feit venir à luy le Comte de Vvaruich qui eſtoit hors du Royaume de Angleterre pour aucunes cauſes qui le meurent, & deſcendit à Honnefleu & à Harfleu. Et illec ſe meit en bateaux luy & ſa compagnie, & vindrent iuſques à la Bouille village aſſis ſur la riuere de Seine, à cinq lieuës pres de Roüen à vn ſamedy ſeptieſme iour du mois de Iuing à l'heure de diſner: lequel trouua illec ſon diſner tout preſt. Et le Roy y eſtoit illec auſſi arriué pour le receuoir, & y fut moult fort feſtoyé & tous ceux de ſadiſte compagnie: & puis apres diſner entra ledit Vvaruich eſdits bateaux: & ſ'en alla par la riuere de Seine, & le Roy ſ'en alla par terre luy & ſa compagnie iuſques audit Roüen. Et allerent à l'encōtre ceux de ladiſte ville par la porte du Cay S. Eloy, où le Roy luy feit faire moult grand recueil & honorable: car de toutes les parroiſſes & Eglifeſ de ladiſte ville furent portées au deuant de luy les croix, bannieres & eauë benoiſte, & tous les preſtres reueſtus en chappes. Et ainſi fut conduit iuſques à la grand Eglise noſtre Dame de Roüen, où il feit ſon offrande & apres ſ'en alla en ſon logis, qu'on luy auoit ordonné aux Iacobins dudit lieu. Et apres vindrent en ladiſte ville la Royne & ſes filles, & demoura illec le Roy avecques ledit de Vvaruich par l'eſpace de douze iours. Et apres ledit de Vvaruich ſ'en departit & retourna en Angleterre. Et renuoya avecques luy monſeigneur l'Amiral, l'Eueſque de Laon, maïſtre Iean de Pompincourt ſon conſeillier, maïſtre Oliuier le Roux & autres. Et eſt à ſçauoir que durant le temps que ledit de Vvaruich, & ceux de ſadiſte compagnie furent & ſeiournerent à Roüen, que le Roy leur feit de moult grans dons, comme de belles pieces d'or, vne coupe d'or toute garnie de pierrerie. Et monſeigneur de Bourbon auſſi luy donna vn moult beau riche diamant & d'autres choſes. Et ſi fut du tout deffrayé de toute la deſpence, que luy & tous ſes gens auoient faiſte depuis qu'ils deſcendirent de la mer à terre, iuſques à ce qu'ils remontaſſent en mer. Et apres ledit partemēt de Roüen le Roy ſ'en retourna à Chartres, où illec il demoura par aucun temps. Audit mois de Iuing audit an, le Duc Philippe de Bourgogne mourut en la ville de Bruges, & fut ſon corps porté en la ville de Dijon & inhumé aux Chartreux. Ainſi que bien au long deſcript ledit chroniqueur de Monſtrelet au dernier chapitre, & pour la fin & termination de ſadiſte chronique. Et auſſi feit & ordonna le Roy audit lieu de Chartres, que toutes perſonnes eſtans & reſidens à Paris feroient des bannieres: & qu'en chacun deſdictes bannieres auroit des gouuerneurs qui feroient nommez principaux & ſoubs principaux, qui auroient la conduicte & gouuernement deſdictes bannieres. Et que tous les ſubieſts eſtans ſoubs icelle, ſeroient armez de Iaques, de brigandines, ſallades & harnois blāc, voulges, haches & autres choſes qui y appartiennent, pour eſtre bien armez tant de meſtier, officiers, nobles, marchans, gens d'Eglise que autres: laquelle choſe fut faiſte.

Et en ce meſme an au mois de Iuing, le Roy manda aller par deuers luy au

Mellay près de Chartres plusieurs gens notables de Paris : entre lesquels y fut maistre Jean le Boulenger President en Parlement, maistre Henry de Liures Conseillier de ladicte Court, sire Jean Clerbout general maistre des monoyes, Jaques Rebour procureur en ladicte ville de Paris, maistre Eustache Millet aussi conseillicr en ladicte court, Nicolas Laurens, Guillaume Roger, Jean de Hacqueuille & plusieurs autres bons marchans, que le Roy enuoya à Chartres deuers le conseil, qui depuis y furent par aucun temps durans : lequel vn nommé Robert-de-la Mote & Jean Raoul, qui auoient longuement esté tenus prisonniers par l'accusation d'un religieux de S. Lo de Rouën, nommé maistre Pierre le Mareschal, qui les auoit accusez d'estre ennemis du Roy & conspiré contre luy. Et avecques eux en auoit accusé plusieurs autres, ce qui ne peust monstrier ne enseigner : mais fut trouué qu'il auoit menty de tout ce qu'il auoit dit : & cōme faux accusateur fut iugé à mort, & fut noyé le quatorziesme iour du mois de Iuillet audit an. Et apres ce furent despeschez lesdits de la Mote, Jean Raoul & autres renuoyez en leurs maisons. Et apres ce le Roy enuoya en la ville de Paris vn mandement pour y estre seellé, & fut signé Michel de Ville-Chartre : par lequel le Roy vouloit que pour bien repeupler sa ville de Paris, qui disoit auoir esté fort depopulée : tant pour les guerres, mortalitez & autrement, que quelque gens de quelque nation qu'ils feussent, peussent de là en auāt venir demourer en ladicte ville & és faux bourgs & banlieuë, ils peussent iouir de toutes franchises de tous cas par eux commis : comme de meurdre, furt, larrecins, piperies & tous autres cas reserué crime de leze maiesté. Et aussi pour resider illec en armes, pour seruir le Roy contre toutes personnes : lesquelles lettres furent leuës & publiées par les carrefourgs de Paris à son de trompe, & tout selon le priuilege donné à tous bannis residens, & demourans és villes de S. Malo & Valenciennes. Et ce mesme mois aussi le Roy feit crier & publier que tous nobles tenans fiefs & arrierefiefs, fussent tous prests & en armes. Et mesmement ceux de l'Isle de France, tant en la ville de Paris que ailleurs au quinziesme iour d'Aoust, pour le seruir & estre tous prests quand mestier en auroit. Et le lundy tiers iours d'Aoust audit an, aduint à Paris que l'un des religieux du temple nommé frere Thomas Louecte, qui estoit receueur dudit Temple, eust la gorge couppee audit lieu du Temple par vn de ses freres & compagnons nommé frere Henry, pour aucunes noises qu'il auoit conceu contre ledit frere Thomas. Et pour raison dudit cas ledit frere Henry s'absenta, & ne peust estre trouué qu'il ne feust le dixiesme iour dudit mois, que enuiron dix heures de nuict vn examinateur du chastellet de Paris, nommé maistre Jean Potin accompagné de trois sergens en feit telle diligence, qu'il le trouua mucé en l'hostel de S. Pol à Paris, dedans vne armoire en habillement d'un Rocquet blanc de toille, & vn chapeau noir : & en ceste estat fut mené prisonnier en chastellet, & puis rendu en la court de Parlement, pource qu'il estoit appellant de sa prinse : & disoit que le lieu où il auoit esté prins, estoit lieu de franchise & qu'on luy deuoit remettre. Et puis fut requis par les religieux du Temple leur estre rendu, ce qui fut fait : & fut mené és prisons dudit lieu du Temple. Le mercredy douziesme iour d'Aoust audit an mille quatre cens soixante sept : & le ieudy ensuiuant le grand Prieur de France pour ledit cas, accompagné de plusieurs autres seigneurs de leurdit

leurdit ordre pour faire le proces dudit frere Henry, qui depuis fut par eux condamné à demourer prisonnier en lieu tenebreux, & d'auoir illec pour pitance tant qu'il y pourroit viure, le pain de douleur & eaue de tristesse. En ce temps retournerent du Royaume d'Angleterre monsieur l'Amiral & autres dessus nommez, qui ainsi s'en estoient allez avec ledit Vvaruich audit païs d'Angleterre : lesquels y demourerent longuement & n'y feirent riens. Et par eux ledit Roy d'Angleterre enuoya au Roy des trompes de chasse, & des bouteilles de cuir, à l'encontre des belles pieces d'or, coupe d'or, vaisselle, pierreries & autres belles besongnes, que le Roy & autres seigneurs auoient donnez audit de Vvaruich à son partement de Rouën. Et le vendredy dixhuietiemes iour du mois d'Aoust le Roy arriua à Paris enuiron huit heures de soir, & estoit avecques luy monsieur le Duc de Bourbon & plusieurs autres seigneurs. Et le mardy premier iour de Septembre, la Royne aussi arriua à Paris en bateaux par la riuere de Seine, & vint arriuer au terrain de nostre Dame : & illec à l'arriuer qu'elle feit, trouua tous les Presidens & conseillers de ladicte court de Parlement, l'Euesque de Paris & plusieurs autres gens de façon, tous honnestement vestus & habillez. Et à l'entrée dudit terrain y auoit fait de moult beaux personages, illec richement mis & ordonnez de par la ville de Paris. Et si est à sçauoir que auant que ladicte Royne se meit esdicts bateaux pour venir à Paris, furent au deuant d'elle : & pour la receuoir les conseillers & bourgeois de ladicte ville en grand & notable nombre aussi tous en bateaux, qui estoient tous richement couuers de belle tapisserie & draps de soye. Et dedans iceux estoient les petis enfans de cuer de la sainte Chappelle, qui illec disoient de beaux virelais, chançons & autres bergerettes moult melodieusement. Et si y auoit autre grand nombre de Clarons, trompettes chantiaux & bas instrumens de diuerses sortes, qui tous ensemble iouoient chacun endroit soy moult melodieusement, à l'heure que ladicte Royne, ses dames & damoyelles entrerent en leur basteau : dedans lequel par lesdits bourgeois de ladicte ville luy fut présenté vn beau cerf fait de conficteure, qui auoit les armes d'icelle noble Royne pendues au col. Et si y auoit plusieurs autres drageoirs tous plains d'espicerie de chambre, & belles conficteures : grand quantité aussi y auoit de fruiçts nouveaux de moult de sortes, violettes fort odorans, iettées & semées tout parmy le bateau : & vin à tous venans y fut baillé & distribué, tant qu'on en vouloit auoir & prendre. Et apres qu'elle eut faicte son oraison à nostre Dame de Paris, elle se rebouta en son bateau & s'en vint descendre à la porte deuant l'Eglise des Celestins, où aussi elle trouua dessus ladicte porte de moult beaux personages. Et elle descendit à terre, monta & ses dames & damoyelles sus cheuaux, belles hacquenées & palefrois, qui illec les attendoient : & puis s'en alla iusques en l'hostel du Roy aux tournelles. Et deuant la porte dudit hostel, trouua autre moult beau personnage. Et icelle nuit furent faits à Paris les feux par les ruës d'icelle, & illec mises aussi tables rondes & donné à boire à tous venans. Et le ieudy ensuiuant quatriemes iour dudit mois de Septembre ensuiuant, maistre Nicolle Baluë frere de Monsieur l'Euesque d'Eureux, fut marié à la fille de maistre Iean Bureau cheualier, seigneur de Montglat : & fut la feste desdictes nopces faicte en l'hostel de Bourbon, laquelle fut moult belle & honneste. Et luy fut illec fait

grand honneur ce iour : car le Roy & la Royne, monseigneur de Bourbon & Madame sa femme, monsieur de Neuers, Madame de Bueil & toute leur noblesse, qui les suiuiroient y furent : & s'y trouuerent & y fut fait moult grand chiere & si leur fait on de moult grans beaux & riches dons. Et depuis ce le Roy & la Royne feirent de grans chieres en plusieurs des hostels de leurs seruiteurs, & officiers en ladicte ville. Et entre les autres le ieudy dixiesme iour dudit mois de Septembre audit an quatre cens soixante sept, la Royne accompagnée de madicte Dame de Bourbon & Madamoyselle Bonne de Sauoye seur de la Royne, & plusieurs autres dames de sa compaignie, soupperent eu l'hostel de maistre Iean Dauuet premier President en Parlement. Et illec furent receuës & festoïées moult noblement & à grand largesse : & y eut faits quatre moult beaux bains & richement aornez, cuidant que la Royne s'y deust baigner : dont elle ne fait riens, pource qu'elle se sentit vn peu mal disposée, & aussi que le temps estoit dange-reux. Mais en l'un desdits baings s'y baignerent madicte Dame de Bourbon, Madamoyselle Bonne de Sauoye. Et en l'autre baing au ioingnant, se baignerent Madame de Montglat & Perrette de Chaalon bourgeoise de Paris, & là feirent bonne chiere.

Comment le Roy ordonna & veit faire les monstres des bannieres de Paris : de aucune guerre au Liege : de la Pragmaticque qu'un Legat & Baluë cuiderent abolir. Et comment le Roy fait grace au Duc d'Alencon condamné à Vendosme, du seigneur du Lau. Et comment le Comte de S. Pol fait faire trefues entre le Roy & Charles le Duc de Bourgongne non comprins les Liegeois. Et plusieurs autres choses faictes en l'an mille quatre cens soixante sept.



Le ieudy ensuiuant xiiij. iour dudit mois de Septembre, le Roy qui auoit ordonné mettre sus les bannieres de Paris, comme dit est deuant, fait publier que audit iour ils feussent toutes prestes pour estre aux chāps dehors Paris, en faisant sçauoir à tous de quelque estat ou conditiō qu'ils feussent, depuis l'aage de seize ans iusques à soixante ans, ississent hors de ladicte ville en armes & habillemēt de guerre : & si l'en y auoit aucuns qui n'eussent harnois, q̄ neātmoins ils eussent en leurs mains vn bastō deffensable & sur peine de la hart, ce qui fut fait. Et issit hors de ladicte ville la plus part du populaire d'iceluy chacun sous estādart ou bāniere, qui faisoit moult beau veoir. Car chacun y estoit en moult belle ordōnance & sans noise ne bruit. Et estoient bien de lx. à lxxx. vingt mille testes armées, dont il en y auoit biē xxx. mille tous armez de harnois blancs, iaques ou brigandines. Et tous estans en belle bataille, le Roy, la Royne & leur compaignie, qui les suiuiroient les vindrent veoir : laquelle chose leur pleust moult. Car onques n'auoient veu istre de ville du monde à beaucoup pres telle ne si grand armée. Et se trouuerent soixante sept bannieres des mestiers sans les estandars & guidons, de la court de Parlement, de la chambre des comptes, du tresor, des generaux, des aydes, des monnoyes, du Chastellet & hostel de la ville : desquels il se trouua autant & plus de gens de guerre que sous toutes lesdictes bannieres. Et hors Paris en aucuns lieux ordonnez, leur fait porter & conduire plusieurs tonneaux de vin, qui illec furent deffoncez pour faire boire & rafreschir tous ceux de ladicte monstre, qui tenoient moult grand

grand païs: car ils estoient tous en bataille à commencer au bout de la voirie d'entre la porte S. Anthoine, & celle du temple: dedans les fossez de Paris en montant contremont iusques à vn pressouër deuant ladicte voirie: & de là en bataille au long des vignes iusques à S. Anthoine-des-champs. Et puis apres iusques au long des murs dudit S. Anthoine des champs, iusques à la granche de Rully: & d'icelle granche iusques à Cōflans. Et dudit Conflans en reuenant par la Granche-aux-merciers, tout au long de la riuere de Seine iusques au boulleuert du Roy de la tour de Billy. Et d'iceluy boulleuert tout au long des fossez de ladicte ville par dehors, iusques à la Bastille & à la porte S. Anthoine. Et brief c'estoit merueilleuse chose à veoir le monde qui estoit en armes dehors Paris. Et si maintenoient plusieurs qu'il en estoit à peu pres demouré autant dedans Paris, qu'il y en auoit dehors. Et le mardy ensuiuant xxij. iour de Septembre audit an quatre cens soixante sept, le Roy partit de Paris apres disner pour aller à pied iusques à S. Denys en France: & auoit avecques luy aussi mondit seigneur d'Eureux, monseigneur de Crussol, Philippe l'Huillier & autres. Et entre Paris & S. Denys le Roy allant à son pelerinage, trouua trois ribaux qui luy vindrent requerir grace & remission, de ce que tout leur temps ils auoient esté larrons, meurdriers & espieurs de chemins: laquelle chose le Roy leur accorda benignement. Et tout ce iour demoura audit lieu de S. Denys iusques au lendemain vespre, qu'il s'en retourna en son hostel des Tournelles. Et d'illec s'en alla soupper en l'hostel de sire Denys Hesselin son pannetier & eleu de Paris, qui nouuellement estoit deuenu compere du Roy à cause d'une sienne fille dont sa femme estoit accouchée, que le Roy feit tenir pour luy par maistre Iean Baluë Euesque d'Eureux. Et pour commeres y estoient Madame de Bueil & Madame de Montglat. Et audit hostel le Roy y feit grand chere, & y trouua trois beaux baings honnestement & richement attintelez, cuidant que le Roy deust illec prendre son plaisir de se baigner: ce qu'il ne feit point pour aucunes causes qui en raison le meirent: c'est à sçauoir tant pource qu'il estoit enrimé, que aussi pource que le temps estoit dangereux. En ce temps s'esmeut grande guerre entre les Liegeois & monseigneur de Bourgogne, & leur Euesque cousin de mondit seigneur de Bourgogne, & frere de monseigneur le Duc de Bourbon: lequel Euesque lesdits Liegeois allerent assieger dedans vne ville nommée Huÿe. Et apres que iceux Liegeois eurent bien longuement esté deuant icelle ville, ils la prindrent & gaignerent, & en ce faisant eschappa leurdit Euesque estant en icelle. Et durant ce que dit est, le Roy ordonna aller au secours & ayde desdits Liegeois quatre cens lances de son ordonnance: dont auoient la charge le Cōte de Dampmartin, Sallezart, Robert de Conihan & Steuenot de Vignolles, avecques six mille francs archiers prins & esleuz en Champagne, Soissonnois & autres lieux en l'Isle de France. Et apres ce que ledit de Bourgogne eut bien sceuë la gaigne que lesdits Liegeois auoient faicte de ladicte ville de Huÿe, & qu'ils y auoient tué plusieurs Bourgongnons: il assembla tout son ost, en soy deliberant d'aller aux armes sus les champs en intention de tout destruire & mettre à feu & à sang lesdits Liegeois: & ainsi le feit crier & publier par tous ces païs. Et ceux qui faisoient lesdictes publications en icelles publiant, tenoient en vne main vne espée toute nue, & en l'autre vne torche alumée qui signifioit

guerre de feu & de sang. Audit temps au mois de Septembre le Roy bailla ses lettres à vn legat venu de Romme de par le Pape, pour la rompture de la Pramatique Sanction : lesquelles lettres furent leuës & publiées au Chastellet de Paris, sans y faire aucun cōtredit ou oppositiō. Et le premier iour d'Octobre ensuiuant maistre Iean Baluë fut & alla en la salle du Palais royal à Paris, la Court de Parlement vaccant: pour illec aussi faire publier lesdictes lettres, où il trouua maistre Iean de S. Romain Procureur general du Roy nostre sire, qui formellement s'opposa à l'effect & execution desdictes lettres, dont ledit Baluë fut fort desplaisant. Et pour ceste cause feit audit de S. Romain plusieurs menasses, en luy disant que le Roy n'en seroit point content, & qu'il le desappoincteroit de son office: dequoy ledit S. Romain ne tint pas grand compte, mais luy dist & respondit que le Roy luy auoit donné & baillé ledit office: lequel il tiendrait & exerceroit iusques au bon plaisir du Roy: & que quand son plaisir seroit de la luy oster, que faire le pourroit: mais qu'il estoit du tout deliberé & bien resolu de tout perdre auant que de faire chose, qui feust contre son ame ne dommage au Royaume de France & à la chose publique: & dist audit Baluë qu'il deuoit auoir grand honte de poursuiure ladicte expedition. Et en apres le Recteur de l'Vniuersité de Paris & les suppos d'icelle, allerent par deuers ledit Legat, que de luy appellerent & de l'effect desdictes lettres au S. Concile, & par tout ailleurs où ils verroient estre à faire. Et puis vindrent audit Chastellet où pareillement autant en feirent, & feirent illec enregistrer leur oppositiō. Audit temps le Roy enuoya par deuers ledit Charrolois lesdits Legat & Euesque d'Eureux qui nouuellement auoit esté Cardinal à Romme, maistre Iean de l'Adriesche tresorier de France & autres, pour faire de par luy aucunes choses dōt il leur auoit donné charge. Et le ieudy viij. iour d'Octobre audit an mille quatre cens lxvij. vn nommé Seuestre le Moyne natif de la ville d'Auxerre, pour aucuns cas & delicts par luy commis & imposez: & qui par aucun temps auoit esté constitué & tenu prisonnier és prisons de Rhizon, fut ledit iour tiré hors desdictes prisons, & fut mené noier en la riuere de Seine pres de la Grancheaux-merciers, par la sentence & iugement de messire Tristan l'Ermite Preuost des Mareschaux de l'hostel du Roy. Et le dimenche xj. iour dudit mois d'Octobre, fut vn grand & merueilleux escler & tōnoire enuiron huict heures de soir. Et auant & depuis durant ledit mois furent faictes grādes & merueilleuses chaleurs, & les plus extremes qu'hōme eust veu en sa vie, qui sembloit chose estrāge & desnaturée. Et le lundy xij. iour dudit mois d'Octobre audit an. lxvij. le Roy se partit de son hostel des Tournelles à Paris, pour aller en l'Eglise nostre Dame où il ouït les vespres. Et apres icelles dictes, fut faicte procession par l'Euesque & chanoynes dudit lieu: & puis s'en alla reposer en l'hostel de son premier President, maistre Iean Dauuet où il fut certaine espace de temps. Et puis s'en partit pour s'en retourner en sondit hostel des Tournelles. Et à l'heure de son partement qui estoit heure de noire nuict, il veit & apparut au ciel vne estoille au dessus de l'hostel dudit President: laquelle incontinent que le Roy commēça à marcher pour s'en retourner, ladicte estoille le suiuit, & fut tousiours apres luy iusques à ce qu'il fut entré en sondit hostel. Et incōtinēt qu'il y fut entré elle se disparut, & depuis ne fut veüe. Et le ieudy ensuiuant xv. iour dudit mois vint

nouuelles

nouvelles au Roy, que certain grand nōbre de Bretons estoient venus eux bouter dedans le chastel & en la ville de Caen. Et puis s'en allerent d'illec à Bayeux & reindrent lesdictes villes contre le Roy, dont de ce il fut courroucé. Et en renuoya pour ceste cause le Mareschal de Loheac, qui lors estoit avecques le Roy, & qui auoit cent lāces de Bretaigne sous sa charge esdictes villes de par le Roy, pour y pourueoir & mettre prouisiō. Et ausquels Bretōs le Duc d'Alençon qui comme crimineux de leze maiesté du temps du Roy Charles dernier trespassé, auoit esté constitué prisonnier pour aucuns crimes qu'il auoit machinez contre luy, & à la faueur des Anglois anciens ennemis du Royaume, en la ville de Vandoisme le lys de iustice illec seant: auquel lieu apres ses cōfessions prinſes & proces fait, fut condamné à mourir fauf surce le bon plaisir du Roy. Et lequel d'Alençon depuis le tēps des lors iusques au trespas dudit feu Roy Charles, fut tenu prisonnier au chasteau de Loches. Et apres iceluy trespas q̄ le Roy vint à sa couronne, le bouta hors desdictes prisons & luy pardonna tout, en voulant que dudit proces ne fut iamais nouvelles. Et puis aduint qu'un boiteux qui auoit accusé ledit d'Alençon audit deffunct Roy, craignoit fort que ledit d'Alençon ne luy fait quelque grād desplaisir, se tira par deuers le Roy, en luy suppliant qu'il luy fait auoir assurance dudit d'Alençon: laquelle chose il fait & ordonna & commanda le Roy de sa bouche audit Duc d'Alēçon, que sur sa vie il ne luy meffait ne fait meffaire: en luy disant qu'il le mettoit en sa main, protection & sauuegarde, ensemble sa famille & ses biens: laquelle chose ledit d'Alençon luy promet & enconuenança: mais tantost apres ledit d'Alençon en allant contre sondit serment, fait prendre ledit Boiteux & amener deuant luy. Et nonobstant les deffences ainsi à luy faictes de par le Roy, fait incontinent iceluy boiteux meurdrir & mettre à mort: pour laquelle mort la femme dudit boiteux se tira deuers le Roy, luy faire sçauoir ces choses & pour estre son iniure réparée, dont & de quoy le Roy depuis empescha les villes & terres dudit d'Alençon: mais biē tost apres tout luy fut deliuré, & par luy tout pardonné cōme deuant. Et puis apres le Duc d'Alēçon pour bien le remunerer de toutes ses graces & biens faits, bail-la ou offrit bailler toutes ses villes & païs ausdits Bretons & à monsieur Charles cōtre la volenté du Roy & à sa plaissance. En ce temps aussi messire Anthoine de Chasteauneuf cheualier seigneur du Lau, Grand-Bouteiller de France & Seneschal de Guienne, qui estoit Grand-Chambellam du Roy, & de luy plus aymé qu'onques n'auoit esté autre, & qui fut autour de luy & en son seruice: car en moins de cinq ans il amenda des biens du Roy de trois à quatre cens mille escus d'or: qui auoit esté fait prisonnier du Roy, & mis au chasteau de Sully sur Loire: de l'ordonnance du Roy fut enuoyé audit lieu au mois d'Octobre messire Tristan l'Ermite, Preuost des Mareschaux de l'hostel du Roy, & maistre Guillaume Cerisay nouuellement greffier ciuil de Parlement, pour illec tirer hors ledit seigneur du Lau & le mener prisonnier au chasteau de Hufson en Auvergne. Mais lors qu'il fut amené au dehors dudit lieu, il fut grand bruit que ledit seigneur du Lau auoit esté noyé, & fut ce que dit est longuement continué.

Et le mardy xx. iour dudit mois d'Octobre le Roy se partit de sa bonne ville de Paris, pour aller au païs de Normandie: & alla cedit iour au giste à Villepeux, & le lendemain à Mante. Et auant son partemēt en enuoya plusieurs capi-

taines qu'il auoit avecques luy, querir tous les gés de guerre qui estoient sous leurs charges pour venir apres luy audit païs de Normãdie, ou autre part quelque lieu qu'il fut. Et le iour de sondit partement il feit & ordonna certaines lettres & ordonnances, par lesquelles il voulüst & ordonna que de là en auant, son plaisir estoit que tous les officiers de son Royaume demourassent paisibles en leurs offices: & que nulle office ne fut dicté vacant si non par mort, resignation ou confiscation. Et si il donnoit nulles autres au contraire par importunité de requerans ou autrement, vouloit qu'il n'y fut aucunement obtéperé: & que de là en auant toute iustice fut faicte & ordonnée à vn chacun. Et puis s'en partit dudit lieu de Mante & s'en alla à Vernon sur Seine, où il demoura illec depuis par certain temps: durant lequel vint & arriua deuers luy monsieur le Connestable, lequel trouua moyen que le Roy bailla & donna trefue entre luy & monsieur de Charrolois iusques à six mois lors apres ensuiuans, sans en ce y comprendre les villes & païs de Liege, qui desia estoient mis sus & en armes à l'encontre dudit seigneur de Charrolois, en esperance d'auoir l'ayde & secours du Roy, ainsi que promis leur auoit esté, & à ceste cause demourerent du tout abandonnez. Et puis apres ce que dit est, ainsi fait, ledit monsieur le Connestable s'en retourna par deuers ledit monsieur de Bourgongne, luy porter les nouvelles desdictes trefues. Et ce fait maistre Iean Baluë Cardinal d'Eureux, maistre Iean de Ladriesche & maistre Iean Preuost, retournerent deuers le Roy audit lieu de Vernon, qui estoient allez en Flandres de l'ordonnance du Roy, par deuers ledit de Bourgongne. Et tãtost apres ledit retour fait, le Roy se partit dudit lieu de Vernon, & s'en alla à Chartres où il feit illec venir & arriuer la plus grand partie de son artillerie, qui lors estoit à Orleans pour enuoyer à Alençon & autres villes du païs, pour les auoir & mettre en ses mains. Et apres le Roy enuoya ledit maistre Iean Preuost audit lieu de Flandres par deuers ledit de Bourgongne, pour luy porter & bailler les lettres desdictes trefues. Et apres vint & arriua à Paris le xvj. iour du mois de Novembre ledit mōseigneur le Cardinal, ledit tresorier de Ladriesche, maistre Iean Berart & maistre Geoffroy Alnequin, pour faire faire les monstres des Bannieres de Paris par deuant eux, & pour faire autres charges qui leur estoient données de par le Roy. Et apres s'en partit dudit lieu de Chartres pour aller à Orleans, Clery & autres villes d'illec, & puis à Vendosme, & de là iusques au mont S. Michel. Et avecques luy feit mener grande quantité de sadicte artillerie: & si alloient avec luy grand nombre de ses gens de guerre. Et en ces entrefaictes les Bretons issirent tous en armes hors de leur païs, & vindrent en Normandie iusques à la cité d'Arenches & autres villes dudit païs. Et apres iceux Bretons s'espandirent par ledit païs de Normandie, comme iusques à Caën, à Bayeux, Constances & autres lieux. Audit temps ledit seigneur de Bourgongne au moyen desdictes trefues à luy baillées par le Roy: esquelles n'estoient aucunement comprins lesdits Liegeois, entra audit païs du Liege avecques toute son armée, en poursuiuant lesdits Liegeois. Tous lesquels pource que le Roy leur faillit de secours & qu'ils veirent clerement leur destruction aduenue, se renderent audit de Charrolois: ensemble toutes leurs villes, avec lequel ils prindrent composition. Et pour ce faire & auoir luy donnerent & baillerent grand somme d'or, & si eurent vne partie de leurs portes & murailles abbatues.

Comment

Comment le Roy enuoya commissaires pour reueoir les monstres desdictes bannieres dudit Paris, & generallyment de tous officiers & autres. De l'armée du Roy outre le Mans & Alençon contre les Bretons. D'une armée que feit & assembla le Duc de Bourgongne à S. Quentin : & des trois estats qui furent tenus en la ville de Tours audit an mille quatre cens soixante sept.

EN apres ledit Cardinal Baluë, & commissaires deuant nommez procederent à faire les monstres des bannieres desdits mestiers, par deuant iceux commissaires en plusieurs & diuers lieux de ladicte ville, tant dessus les murs d'icelle d'entre les portes du temple, & saint Martin en la closture du Temple sur les murs d'entre la tour du bois, & la porte saint Honoré, deuant le Louure, au marché aux brebis, & sur les murs iusques à ladicte porte saint Honoré. Et le samedi ensuiuant xxij. iour dudit mois de Nouembre, le Roy feit crier par les carrefours de Paris, que toutes gens qui auoient accoustumé de suiure la guerre, & qui auoient esté cassez de gaiges se trahissent par deuers certains commissaires, qu'il auoit ordonnez pour les receuoir & mettre à ses gaiges & souldées pour le seruir en ses guerres. Et le lundy ensuiuant xxiiij. iour de Nouembre maistre Iean Preuost retourna par deuers ledit seigneur de Charrolois, où le Roy l'auoit enuoyé porter les lettres de trefues qu'il auoit faictes auecques luy, & pour rapporter au Roy la responce que ledit seigneur de Charrolois auoit faicte audit Preuost, touchant le fait desdictes trefues. Et le ieudy ensuiuant xxvj. iour dudit mois de Nouëbre partie desdictes monstres furent faictes dehors Paris, deuant l'Eglise & abbaye de saint Germain des prez, iusques sur la riuere de Seine : esquelles monstres y auoit grand nombre de gens à pied & à cheual, tous bien en point & armez : où estoient les tresoriers de France, les cōseilliers & clerks des Comptes, les Generaux des monnoyes & des aydes, le tresor, les esleuz & toute la Court de Parlement tout ensemble. Apres y estoient tous les praticiens & officiers de Chastellet de Paris en bien belle & grosse compagnie. Et auecques les compagnies dessusdictes estoient aussi tous ceux estans sous l'estandart & guidon de la ville de Paris, qui estoient moult grand nombre de gens à pied & à cheual. Et si y vindrent pour l'Euesque, vniuersité, abbez, prieurs & autres gens d'Eglise de ladicte ville certaine quantité de gens en armes, & en icelles monstres y auoit grand nombre de gens bien armez. Et apres lesdictes monstres ainsi faictes, ledit Cardinal & commissaires dessus nommez, maistre Iean de Ladriesche tresorier de France, maistre Pierre l'Orfeure seigneur d'Ermonneuille & autres officiers du Roy, partirent de la ville de Paris pour aller deuers le Roy, qui estoit lors entre le Mans & Alençon à tout moult grand armée : car il auoit qui le sui-uoit plus de cent mille cheuaux, & plus de vingt mille hommes à pied, pour resister à l'armée desdits Bretons : & feit mener le Roy auec luy de son artillerie grand quantité pour mettre le siege à Alençon. Et en ces entrefaictes fut pourparlé de trefues, qui tindrent le Roy & ladicte armée longuement sans riens faire, & en ce faisant mangerent & destruirent tout le plat pays bien à vingt ou trente lieues dudit lieu du Mans, & d'Alençon. Et durant ce que dit est, ledit seigneur de Charrolois qui ainsi auoit destruit lesdits Liegeois & leur pays, s'en re-

tourna deuers S. Quentin: & fait crier par tous les païs que toutes gens de guerre desdits païs s'en tirassent deuers S. Quentin, pour illec faire leurs monstres au quinzième iour du mois de Decembre sur bien grosses peines. Et si fait aussi crier par tout le païs de Bourgogne que tous nobles & autres gens suiuant les armes, feussent tous prests à Montsauion, pour illec prendre les gages & souldees dudit seigneur de Charrolois, par les mains de ses commissaires qu'il auoit ordonnez. Et ce dedans le vingtième iour de Decembre lors prochain ensuiuant: & pour partir dudit Montsauion & aller audit S. Quentin par deuers luy, pour le accompagner & luy ayder à secourir son treschier & amé frere monseigneur Charles de France, & le Duc de Bretagne estant avecques luy à l'encontre de aucuns leurs malueillans: & telle substance portoit ledit cry. Pour occasion duquel cry, les marchans & faiseurs des marchans de Paris, qui estoient allez audit païs de Bourgogne pour faire leurs emploictes, s'en retournerent à Paris bien hastiuement sans riens faire. Et derechief apres toutes ces choses, ledit de Charrolois fait mader à luy venir toutes ses gens de guerre audit saint Quentin au quatrième iour de Ianuier ensuiuant.

ET le lundy feste des Saints Innocens xxviij. iour de Decembre, vint & arriua à Paris monseigneur le Duc de Bourbon de par le Roy, pour mettre garnison en plusieurs villes & garder les Bourgongnons d'entrer es païs du Roy. Et vint & arriua avec luy monseigneur le Marechal de Loheac, qui venoit à Paris comme on disoit pour estre Lieutenant de ladicte ville: lequel de Loheac s'en partit deux iours apres pour aller à Roüen & autres villes de Normandie, pour y mettre garde & ordre de par le Roy, & illec demoura par certain temps. Et mondit seigneur de Bourbon depuis demoura à Paris par certain autre temps: pendant lequel fut festoyé de plusieurs nobles gens de ladicte ville. Et en ce temps la ville d'Alençon qui estoit tenue par les Bretons, comme dit est deuant, fut rendue & mise es mains du Roy par le Comte du Perche fils du Duc d'Alençon, qui tenoit le chasteau dudit Alençon: & lesdits Bretons tenoient la ville: mais durant ce le Roy ne partit point de ladicte ville du Mans: & durant qu'il y fut enuoya deuers mondit seigneur Charles audit païs de Bretagne le Legat du Pape, dont pourparlé est deuant, & Anthoine de Chabannes Comte de Dampmartin, le Tresorier de Ladriesche & autres pour cuider trouuer aucun bon expedient. Et en fin le Roy se condescendit que les trois estats se tiendroient & assembleroient. Et pour ce faire leur fut lieu assigné en la ville de Tours, pour illec eux y trouuer au premier iour d'Auril mille quatre cens lxvij. Et s'en reuint le Roy dudit païs du Mans & s'en alla aux Montils lez Tours, à Amboise & illec environ: & puis furent assemblez lesdits trois estats tenus audit lieu de Tours, qui pour ceste cause y estoient allez. Et illec le Roy present fut pourparlé & conclud sur la question pour laquelle ils estoient assemblez audit lieu de Tours, iusques au iour de Pasques qui fut l'an mille quatre cens lxviij. Que chacun d'eux illec venus s'en retournerent en leurs maisons, apres la conclusion par eux prinse sur le fait de ladicte assemblée. Et pour ceste cause y estoient venus le Roy premierement, le Roy de Cecille, monseigneur le Duc de Bourbon, le Comte du Perche, le Patriarche de Hierusalem, le Cardinal d'Angiers: & plusieurs autres seigneurs Barons, Archeuesques, Euesques, Abbez & autres

autres nobles personnes & gens de grād façon:ensemble aussi les ambassadeurs venus audit lieu pour ceste cause, de la pluspart de tout le Royaume de France. Et par tous iceux ainsi assemblez & à grande & meure deliberation: fut dit & conclud qu'au regard de la question d'entre le Roy & mondit seigneur Charles touchant son ampanage, qu'il auroit & receuroit pour iceluy ampanage: & de ce se tiendroient pour bien content de douze mille liures tournois en assiete de terre par an, & tiltre de Comté ou Duché. Et en outre que le Roy luy fourniroit en pension par chacun an iusques à soixante mille liures tournois par chacun an. Et tout ce sans preiudice aux autres enfans, qui pour le temps aduenir pourroient venir à ladicte couronne, de pouoir demāder tel & semblable estat. Pource que le Roy pour auoir paix & bonne amour avecques sondit frere, se eslargissoit à luy bailler si grand somme que de soixante mille liures tournois par chacun an. Et en tant que touchoit la Duché & païs de Normandie, monseigneur Charles ne l'auroit point: disans qu'il n'estoit pas au Roy de la bailler ne desmembrer sa couronne. Et qu'au regard du Duc de Bretaigne qui detenoit mondit seigneur Charles: & qui auoit prinſes les villes du Roy en Normādie, lequel on disoit auoir intelligence avecques les Anglois anciens ennemis de la couronne de France: Fut dit & deliberé par lesdits trois estats, qu'il seroit sommé de rendre au Roy lesdictes villes. Et ou cas qu'il en feroit reffuz, & que le Roy seroit deuēment aduertý de ladicte alliance ausdits Anglois, que incontinent le Roy recouuraſt ſesdictes villes à main armée & de luy courir sus:& que pource faire lesdits trois estats promeirent de ſecourir & ayder au Roy. C'est à ſçauoir les gens d'Eglise de prieres & oraisons & biens de leur temporel, & les nobles & populaires de corps & de biens & iusques à la mort incluſiue. Et qu'en tant que touchoit la Iuſtice de tout le Royaume, le Roy auoit ſingulier deſir de la faire courir par tout ſondit Royaume: & fut content qu'on eleuſt nobles personnes de tous estats pour y mettre remede & bonne ordre. Et furēt d'opinion lesdits trois estats, qu'à ce faire monseigneur de Charrolois ſe deuoit fort employer: tant à cauſe de proximité de lignage qu'il a au Roy, comme auſſi de Per de France. Et apres ladicte deliberation le Roy ſe partit de Tours & ſ'en alla à Amboiſe. Et puis apres enuoya ſon ambassade par deuers l'assemblée eſtāt à Cambray, afin de ſçauoir leur vouloir & reſponce ſur ladicte deliberation prinſe par lesdits trois estats ainſi assemblez comme dit eſt.

D'aucunes iouſtes faiçtes à Paris & Bruges: & comment le Roy fut à Meaux. Du Prince de Piémont qui vint à Paris: du ſeigneur du Lau qui eſchappa des priſons de Vſſon, dont pluſieurs furent decapitez. Les Bretons ou Bourgongnons prindrent Meruille. Meſſire Charles de Meleun fut decapité: & de ce qui fut fait entre le Roy et les Ducs de Berry & de Bretaigne: & comment apres fut faiçte paix avec le Duc de Bourgongne en l'an mille cccc. lxviij.

A Pres ces choſes le lundy cinquiesme iour de May mille quatre cens ſoixantehuiçt, Dame Ambroiſe de Lore en ſon viuant femme de meſſire Robert d'Eſtouteuille cheualier Preuoſt de Paris, alla de vie à treſpas ce iour enuiron vne heure apres minuit: laquelle fut fort plaincte, pource qu'elle eſtoit noble Dame bonne & honneſte. Et en l'hoſtel

de laquelle toutes nobles & honnestes personnes estoient honnorablement receües . Et ce mesme iour entre neuf & dix heures de nuict se bouta le feu en l'un des moulins aux mufniers de Paris, qui appartenoit au Prieur de saint Ladre : & fut tout le comble d'iceluy bruslé par vn paillard varlet monnier, qui auoit attaché vne chandelle contre le mur de son liect, qui cheut dedans iceluy liect & brussa tout reserué ledit paillard qui se sauua & s'enfuit comme vn regnard .

Le quinziésme iour d'iceluy mois de May, furent faictes ioustes à Paris deuant l'hostel du Roy aux Tournelles par quatre gentils-hommes de guerre, de la compagnie du grand Seneschal de Normandie, qui auoient ordonné les lisses & préparé le champ : En faisant assaüoir à tous qu'ils se trouueroient audit quinziésme iour de May pour attendre les venans, rompans chacun trois lances à l'encontre d'eux . Auquel iour y vindrent & comparurent les enfans de Paris: desquels & tout premier y vint & arriua Iean Raguier Grenetier de Soissons, & Tresorier des guerres au Duché de Normandie, fils de maistre Anthoine Raguier cōseillier & tresorier des guerres du Roy : lequel Iean Raguier vint & arriua à bien grand haste de la ville de Roüen, où il estoit pour estre & comparoir ausdictes ioustes: & arriua le soir de deuât à S. Ladre les Paris, accompagné de plusieurs nobles hommes de la charge & cōpagnie de messire Ioachin Rouhault Mareschal de France, & plusieurs autres gens iusques au nombre de vingt cheuaux. Auquel lieu de S. Ladre ils se tindrent secrettement, & sans faire bruit iusques à lendemain, qu'ils menerent & compaignerent ledit Iean Raguier bien & honnorablement garny de trompettes & clairons, qui faisoient de grans melodies iusques au lieu desdictes lisses : & lequel Iean Raguier accompagné, comme dit est, auoit autour de luy quatre pietons vestus de liurée, & tousiours estans pres de luy & du coursier, surquoy il estoit monté: lesquels estoient prests de le seruir & recueillir son bois : & estoient tous ceux de sa cōpagnie habillez de hocquetons brodez à grans lettres d'or . Et audit champ & dedans les lisses se pourmena plusieurs tours en attendant les quatre champiōs, ou l'un d'eux : contre lesquels il se porta vaillamment: car il rompit cinq lances bien nettement: & eut fait plus s'il eust pleu aux commissaires ordonnez pour lesdictes ioustes . Et apres lesdictes lances ainsi rompues s'en partit moult honnorablement, en soy pourmenant par lesdictes lisses & prenant cōgé des Iuges desdictes ioustes : & merciant les dames, damoiselles & bourgeois qui illec estoient venues, desquelles il acquist moult grand los . Et apres luy y vint & comparut vn eleu de Paris nommé Marc Senamy, & deux des fils messire Iean Sanguin, qui aussi vindrent en ladicte iouste honnorablement: & y feirent tous les maux qu'ils peurēt: mais ils n'en emporterent gueres de bruit. Et en apres y vint aussi & arriua vn nōmé Charles de Louuiers eschāson du Roy, qui moult bien & vaillamment s'y porta, en portant bien & honnestement son bois & sans ayde, & rompit nettement plusieurs lances: & tellement se porta à la iournée qu'en la fin le pris luy fut donné. Et demourerent lesdits quatre gentils hōmes dedans moult foulez . Desquels les deux porterent le bras en escharpe, & le tiers eut la main blessée deffoubs le gantelet . Et par ainsi l'honneur fut & demoura ausdits enfans de Paris. Et le dimenche precedent qui fut huictiésme iour

iour dudit mois de May, se feirent aussi à Bruges en Flandres autres ioustes deuant monseigneur le Duc de Bourgongne, qui aussi furent moult triumpantes: esquelles aussi vn enfant de Paris nommé Hierosme de Cambray, seruiteur dudit monseigneur le Duc iousta & illec se porta vaillamment, & tellement qu'il en emporta l'honneur de ladicte iouste. Apres lesdictes ioustes le Roy qui estoit à Amboise s'en partit par aller à Paris: & emmena avec luy monseigneur de Bourbon, monseigneur de Lyon, monseigneur de Beauieu & autres seigneurs: Et se tint par aucun temps à Laigny sur Marne, à Meaux & autres villes illec enuiron. Et auant son partement dudit Amboise, aduint que le iour veille d'Ascensio nostre seigneur, la terre trembla à Tours, audit lieu d'Amboise & autres lieux en Tourraine. Et quād le Roy se partit de Laigny où il festoit tenu par aucunes iournées pour aller à Meaux, il enuoya à Paris son mandement, pour faire publier par les quarrefourgs d'icelle ville, que tous nobles & gens suiuan la guerre fussent tous prests & en armes le huićtiesme iour de Iuillet, pour aller & eux trouuer où il leur seroit ordonné de par le Roy, & sur peine de confiscation de corps & de biens.

Et puis ces choses ainsi faictes, le Roy s'en alla à Meaux en Brie: & durant le temps qu'il y fut y eut vn homme natif du païs de Bourbōnois, qui pour aucun cas par luy commis: & aussi pour auoir reuelé les faits du Roy aux anciens ennemis les Anglois, fut decapité audit Meaux le lundy vingtseptiesme iour de Iuing audit an soixante huićt. Et au parauant le Roy enuoya à Paris le Prince de Pimont fils du Duc de Sauoye, pour bouter le feu en Greue: Et si meit en ladicte ville de Paris les prisonniers à deliurance, qui estoient en Parlement, en Chastellet & autres prisons. Enuiron ce temps y eut vn nōmé Charles de Meleun homme d'armes de la cōpagnie de monseigneur l'Admiral: lequel de Meleun estoit capitaine d'Vsson en Auuergne, qui auoit sa garde de par le Roy du seigneur du Lau sur sa vie audit lieu d'Vsson: dont il eschappa, dequoy le Roy fut fort desplaisant. Et pour ledit cas fait constituer prisonnier ledit de Meleun au chasteau de Loches: auquel lieu & pour iceluy cas fut decapité. Et apres luy fut aussi decapité pour iceluy cas vn ieune fils nommé Remōnet, qui estoit fils de la femme dudit Charles de Meleun en la ville de Tours. Et si fut aussi pour iceluy cas decapité en la ville de Meaux le procureur du Roy audit lieu d'Vsson. Et puis le Roy s'en alla dudit lieu de Meaux à Senlis & à Creil.

A V D I T temps les Bourgongnons ou Bretons estans en Normandie prindrent le seigneur de Meruille, seant entre S. Sauueur d'Yue & Caen, & luy feirent rendre & mettre en leurs mains ladicte place: dedans laquelle y auoit plusieurs francs-archiers. Et incontinent qu'ils furent dedans, tuerent & meurdriřt tout ce qu'ils y trouuerent: & puis pendirent ledit seignr de Meruille & pillerēt tout ce qu'ils trouuerent, & puis ils bouterēt le feu en ladicte place. Et apres le Roy se deslogea de Creil & s'en alla à Cōpiegne, où il fut depuis par aucun tēps, & puis s'en retourna à Senlis. Et d'illec s'en vint à Paris monseig. de Bourbon le iour dela feste de l'Assumption nostre Dame. Et par auant le Roy auoit enuoyé par deuers le Duc de Bourgongne, monseig. de Lyon, monseig. le Connestable & autres seigneurs, pour tousiours se mettre en deuoir & trouuer par tout bon moyen de paix sans figure de guerre. Et ce nonobstāt le Roy enuoya son armée

au paÿs de Normandie : dont auoit la charge & conduicte monseigneur son Amiral, qui bien y besongna : car en moins d'un mois il chassa les Bretons estés dedans Baieux. Et puis apres le samedi vingtiesme iour du mois d'Aoust audit an mille quatre cent soixante & huit, messire Charles de Meleun seigneur de Normanuile, qui auoit esté grand Maistre d'hostel du Roy : & lequel nouuellement auoit esté constitué prisonnier au chasteau de Gaillard en la garde du Comte de Dampmartin capitaine dudit lieu, fut par le Preuost des Mareschaux fait son proces sur le cas à luy imposé. Et ledit iour fut tiré hors de sa prison & mené au marché d'Andely, où illec publicquement deuant tous fut decapité & mis à mort. Et depuis ce le Roy se tint par certain long temps à Noyon, Compiengne, Chauny & autres places enuiron, iusques au xv. iour du mois de Septembre, que nouuelles luy furent illec apportées, que mōseigneur Charles son frere & le Duc de Bretagne s'estoient remis & deuenus bōs amis & biē vueillans au Roy : & prest mondit seigneur Charles de prendre la pension de lx. mille liures tournois par an, iusques ce que son ampanage luy eust esté assigné selō le dit de plusieurs Princes & seigneurs, q̄ ledit mōseigneur Charles esliroit pour ce faire : & ausquels il se vouloit rapporter. C'est à sçauoir à mōseigneur le Duc de Calabre & monseigneur le Cōestable de France. Et ledit Duc de Bretagne offrit bailler au Roy les villes, que luy & ses gens tenoient en Normandie : en luy rendāt & restituant les autres villes & places, que les gens du Roy tenoient en Bretagne. Laquelle chose le Roy luy accorda. Et puis le Roy feit sçauoir ces choses au Duc de Bourgogne, qui estoit à tout son ost aux champs pres de Perōne entre Esclusiers & Cappy sur la riuere de Somme : desquelles nouuelles il ne vouloit riens croire, iusques à ce qu'il en fut autremēt acertené par lesdits mōseigneurs Charles & Duc de Bretagne. Laquelle chose luy fut depuis dicte & certifié par le herault dudit Duc de Bretagne : mais ce nonobstāt il ne s'en voulut aller ne desemparer son ost. Et s'en alla avec sondit ost tenir & edifier vn parc audit lieu d'entre Esclusiers & Cappy-le-Doz au lōg de la riuere de Somme. Et pendant certain temps qu'ils y furent, furent enuoyez par diuerses fois audit Duc de Bourgogne de par le Roy plusieurs ambassadeurs, comme mōseigneur le Conestable, mōseigneur le Cardinal d'Angiers, maistre Pierre d'Oriolle & autres, pour tousiours trouuer moyen de bonne amour & pacificatiō du costé du Roy, qui tousiours la vouloit auoir : iacoit ce que les capitaines & gens de guerre du Roy n'en estoient point d'oppinion : mais requeroiēt au Roy qu'il les laissast faire, & qu'ils rendroient au Roy ledit Duc de Bourgogne, & ceux de sadicte compagnie tout à son bon plaisir & volenté : laquelle chose il ne voulut souffrir ne toller qu'on leur courut sus, mais leur deffendit de le faire & sur la hart. Et durant ce temps & iusques au douziesme iour d'Octobre ensuiuant mille quatre cens soixante huit, furent grans nouuelles, que le Roy & ledit Duc de Bourgogne auoient fait vne trefue iusques au mois d'Auril prochainemēt ensuiuat. Et sur l'esperance d'icelle trefue le Roy delibera soy en retourner de Compiengne, où il estoit pour s'en venir à Creil & à Ponthoise. Et pour ceste cause enuoya ses fourriers audit lieu de Ponthoise, qui y prindrent son logis : mais depuis il changea propos & retourna hastiement dudit lieu de Compiengne, à Noyon, où peu de temps par auant y auoit esté. Pendant lequel temps

temps Philippe de Sauoye, Poncet de Riuiere seigneur Dullé, le seigneur du Lau & autres qui festoient mis & meslez ensemble, feirent moult de maulx. Et ce pendant le samedi huictiesme iour du mois d'Octobre, fut crié à son de trōpe par les carrefourgs de la ville & cité de Paris, que tous les nobles tenans fiefs ou arrierefiefs de la Preuosté & Vicoté de Paris, fussent tous prests & en armes à Gounesse, pour d'illecques partir le lundy ensuiuant, & aller où mādé leur seroit. Lequel cry esbahist beaucoup plusieurs de Paris, qui cuidoiēt bien que veu ledit cry il n'y auoit point de trefue n'abstinence. Et puis le Roy qui estoit à Noyon s'en partit, & ledit Duc de Bourgongne s'en partit pour aller à Perōne: auquel lieu le Roy s'en alla bien hastiuement par deuers luy audit lieu de Peronne & à bien petite compagnie: car il n'auoit auecques luy que ledit Cardinal d'Angiers & vn peu de gens de son hostel, monseigneur le Duc de Bourbon & autres. Et ainsi priuément, que dit est, s'en alla iusques audit lieu de Peronne par deuers ledit Duc de Bourgongne: lequel luy fait grande reuerence comme bien tenu y estoit. Et puis parlerent ensemble longuement, & furent fort bien contens l'vn de l'autre quelque rumeur qu'il y eust eu au par auant: & tellemēt pacifierent ensemble qu'ils feirent entre eux paix. Et iura ledit monseigneur de Bourgongne que iamais ne feroit riens contre le Roy, & qu'il vouloit estre son subiect & seruiteur & viure & mourir pour luy. En faisant laquelle paix, le Roy luy conferma le traicté d'Arras, & plusieurs autres choses. Ainsi que depuis le Roy le mādā & fait assçauoir aux nobles gens d'Eglise, à sa court de Parlement & autre populaire de ladicte ville de Paris, qui pour cause de ce & par son ordonnance feirent processions generalles chātans aux Eglises, *Te Deum laudamus*, & autres louēges à Dieu. Les feux furēt faits parmy les rues & tables dressées donnans à boire à tous venans. Et plusieurs autres grans ioyes en furent faictes en ladicte ville & cité de Paris. Et en ces entrefaictes vint nouuelles que les Liegeois auoient prins & tué leur Euesque, & tous ses officiers: dont & dequoy le Roy, ledit monseigneur de Bourgongne, monseigneur le Duc de Bourbon & messeigneurs ses freres & autres, furent moult desplaisans & marris: & furent grans nouuelles que le Roy & ledit seigneur de Bourgongne iroiēt en personne pour punir & destruire lesdits Liegeois. Et incontīēt apres vindrent autres nouuelles, que ledit Euesque n'estoit point mort ne prins: mais l'auoient iceux Liegeois contrainct de chanter messe. Et depuis se tindrent iceux Liegeois bien contens de luy, & se rendirent tous à luy comme à leur vray seigneur naturel, en eux offrāt à luy cōme à leur vray seigneur naturel, en eux offrāt à luy à tout son bon plaisir faire: cuidans à ceste cause appaiser tout le mal tallent du par auant.

Comment le Roy alla à nostre Dame de Haulx en Allemaigne. Et apres fut destruite la ville du Liege. Puis le Roy conferma avec ses officiers de Paris ce qu'il auoit traicté au Duc de Bourgongne. Et puis il fait prendre aucuns oiseaux, & tous les cerfs & bisches qui furent trouuez à Paris pour mener à Amboise. Du Comte de Foix qui fut amoureux, des grandes eaües qui furent en Hollande & Zelāde. Et d'un prisonnier au chastellet de Paris, lequel accusa de larrecin plusieurs autres ses compagnons qui furent tous pendus audit an mille quatre cens soixante huict.

EN ce tēps le Roy s'en alla à nostre Dame de Haulx en Allemagne, où il ne seiourna gueres. Aussi Philippe de Sauoye & autres estans avecq's luy, feirent leur paix au Roy par le moyen de mōdit seignr de Bourgogne: & apres q̄ le Roy eut fait son voyage & pelerinage audit lieu de nostre Dame de Haulx, il s'en alla à Namur par deuers ledit seignr de Bourgogne: où on luy fait deliberer d'aller avecq's ledit de Bourgogne deuant la cité du Liege, où ils furēt & demourerent depuis par aucun tēps logez aux faulxbourgs d'iceluy tenāsle siege. Et avecques le Roy y estoiet monseignr de Bourbon, mōseigneur de Lyon, monseigneur de Beauieu & monseigneur l'Euesque dudit Liege, tous freres: lequel mondit seigneur du Liege estoit issu hors d'icelle ville, pour aller deuers mondit seigneur de Bourgogne, pour sçauoir s'il pourroit trouuer aucun bon appoinctement pour les habitans dudit Liege. En luy offrant par eux luy bailler & deliurer ladicte ville & tous les biens de dedans, pourueu que les habitans d'icelle ville, hommes, femmes & enfans eussent leur vie sauue seulement, dont il ne voulut riens faire: mais au contraire fait serment que luy & tous ses fatalites mourroient en la poursuite, ou il auroit ladicte ville & tous les habitans d'icelle, pour en faire du tout à son plaisir & volenté: & retint par deuers luy ledit Euesque du Liege, sans vouloir souffrir qu'il s'en retournast en ladicte ville. Nonobstāt que ledit Euesque auoit promis & iuré ausdits du Liege de retourner par deuers eux, & de viure & mourir avecques eux. Et tantost apres le partement dudit Euesque de ladicte ville & cité du Liege: & ce que lesdits Liegeois furent aduertis, que leurdit Euesque estoit detenu par ledit de Bourgogne, & ne s'en pouoit retourner en ladicte ville. Iceux Liegeois feirent plusieurs saillies sur lesdits Bourgongnons & gens du Roy, & sur leurs compagnies. Lesquels Liegeois quand aucuns en pouoient prendre, les mettoient à mort & gens & cheuaux: mais nonobstant toutes ces choses, le dimenche trentiesme & penultime iour d'Octobre audit an cccc. soixante huiet, entre neuf & dix heures de matin: ledit Duc de Bourgogne fait ordōner de bailler & liurer assaut en icelle ville, ce qui fut fait: & y entrerent iceux Bourgōgnons sans aucune resistēce. Et y entra aussi le Roy & les Ducs de Bourgogne, monseigneur de Bourbon, messeigneurs de Lyon, de Liege & Beauieu freres. Et aussi dudit assaut la plus grand & saine partie des habitans d'icelle cité s'en fuirēt, & retrahirent & laisserent vn peu de populaire: comme femmes, enfans, prestres, religieuses & vieils & anciens hōmes qui tous y furent tuez & meurdri: & moult d'autres merueilleuses cruautēz & inhumanitez y furent faictes, comme ieunes femmes & filles forcées & violées. Et apres le desordonné plaisir prins d'elles, les tuer & meurdrir. Les religieuses aussi forcer, petis enfans tuer, & prestres consacrans *Corpus Domini*: aussi tuer & meurdrir dedās les Eglises. Et apres toutes ces choses faictes, roberent & pillerēt toute lesdicte ville & cité. Et en apres la bruslerent & ardirent & ietterent la muraille dedans les fossez.

E t apres toutes ces choses ainsi faictes que dit est, le Roy s'en retourna à Sélis & Compiengne, où il manda aller par deuers luy toute sa Court de Parlement, sa Chambre des-Comptes, Generaux des finances & autres ses officiers, ce qu'ils feirent. Et eux venus & arriuez par deuers luy fait & ordōna plusieurs choses: & aussi pource qu'il n'auoit pas intention de seiourner audit lieu: il fait proposer

proposer par la bouche dudit Cardinal d'Angiers, à tous les dessusdits officiers tout ce que par luy auoit esté accordé audit seigneur de Bourgongne, qui plus à plain estoit contenu & spécifié en quarante deux articles, qui par ledit Cardinal furent declairez lors ausdits officiers. En leur disant de par le Roy, que son plaisir estoit que par ladicte Court de Parlement & tous autres ses officiers, fut fait & accomply tout ce qu'il auoit cōclud & accordé avecques ledit de Bourgongne: & que tout luy fut du tout enteriné & accomply sans aucun contredit, ou difficulté sur certaines grans peines que lors il exprima de bouche. Et puis le Roy s'en alla en aucuns lieux pres Paris sans vouloir entrer dedans ladicte ville. Mais aucuns grans seigneurs estans autour de luy, y vindrent & y sejournerent: comme messeigneurs de Bourbon, de Lyon & de Beauieu freres, le Marquis du Pont & autres. Et le samedi dixneufiesme iour de Nouembre audit an quatre cens soixante huiet, fut criée & publiée à son de trompe & cry publicque par les quarrefourgs de Paris ledit accord & vnion fait, comme dit est, entre le Roy & mondit seigneur de Bourgongne. Et que pour raison du temps passé, personne viuant ne fut si osé ou hardy de riens dire à l'opprobre dudit seigneur, fut de bouche, par escrit, signes, peintures, rôdeaux, ballades, libelles difamatoires, chansons de geste, n'autrement en quelque maniere que ce peut estre. Et que ceux qui seroient trouuez auoir fait ou esté au contraire, fussent griefuement punis, ainsi que plus à plain ledit cry le contenoit. Et ce mesme iour furent princes pour le Roy, & par vertu de sa commission adressant à vn ieune fils de Paris, nommé Henry Perdriel en ladicte ville de Paris toutes les pies, jais & choüettes estans en cages ou autrement, & estans priuées pour toutes les porter deuers le Roy: & estoit escrit & enregistré le lieu, où auoient esté pris lesdits oiseaux. Et aussi tout ce qu'ils sçauoient dire, cōme larron, paillard, fils de putain, va dehors va, Perrete donne moy à boire. Et plusieurs autres beaux mots qu'iceux oiseaux sçauoient bien dire, & qu'on leur auoit aprins. Et depuis encores par autre commission du Roy adressant à Merlin de Cordebeuf: fut venu querir & prédre audit lieu de Paris tous les cerfs, biches & grues, qu'on y peut trouuer & tout fait mener à Amboise. En apres le Côte de Foix qui nouuellement estoit venu à Paris au mois de Decembre ensuiuant, deuint merueilleusement amoureux d'une moult belle bourgeoise de Paris, nommée Estiennette de Besançon, femme d'un marchand de ladicte ville nommé Henry de Paris, qui estoit bon marchand & puissant hōme. Et si estoit ladicte bourgeoise moult prisée & honorée entre toutes les femmes de bien de ladicte ville, & fort priée & requise d'estre & soy trouuer en tous bancquets, festes & hōnestes assemblées, qui se faisoient en icelle ville: communiqua avecques ledit Comte de Foix de questions ioyeuses & amoureuses: & sur plusieurs requestes offres & autres plaisans bourdes, que luy fait & promet ledit Comte de Foix, conuindrent tellement ensemble, que le dimanche douziesme iour dudit mois de Decembre audit an mille quatre cens soixante huiet: icelle Estiennette se departit de son hostel de Paris qu'elle laissa & abandonna, ensemble son dit mary, ses enfans, pere & mere, freres & sœurs & tous ses parens & amis: & ainsi follement seduicte, s'en alla apres ledit seigneur de Foix avecques aucuns de ses gens & seruiteurs: qui pour ce faire estoient demourez audit lieu de Paris, & l'emme-

nerent à Blois où estoit demouré à sejour ledit seigneur, attédant illec la venue d'icelle Estiennete: avecques lequel seigneur icelle Estiennete demoura par l'espace de trois iours. Et puis s'en partit ledit seigneur de Foix, & s'en alla à Tours par deuers le Roy. Et en fait mener avecques luy icelle Estiennete, qui fut illec bien recueillie par Martin Ponchier, marchât & bourgeois de Tours oncle d'icelle Estiennete. Et peu de temps apres fut ladicte Estiennete enuoyée à Fronteaux par deuers la Prieure dudit lieu tante de ladicte Estiennete: où depuis elle demoura par certain long temps apres. En apres le Roy se tint & sejourna à Tours, à Amboise: & illec enuiron tousiours attendât que la Roïne deust accoucher qu'on disoit estre fort grosse. Mais elle n'eut point d'enfant. Et apres ces choses le Roy ordonna certaine quantité des lances de son ordonnance pour aller seruir le Duc de Calabre, pour recouurer son Royaume d'Arragon. Et avecques lesdictes lances, y ordonna aussi aller huit mille francs-archiers avec grand quantité de son artillerie, où ils ne furent point, nonobstant ladicte ordonnance. Et le mois de Feurier ensuiuant vindrent à Paris les ambassadeurs de mondit seigneur de Bourgongne, pour l'expedition des articles à luy accordez de par le Roy. Et pour lesquels le Roy escriuit & chargea bien expressement au Preuost des marchans & escheuins, & tous autres officiers & gens notables de ladicte ville, que de tout leur pouoir ils festoyassent fort & honorablement lesdits ambassadeurs. Laquelle chose fut faicte, & furent moult honorablement & abondamment festoyez. Et premierement par ledit monseigneur l'Amiral d'Angiers: Secondement par le premier President de la court de Parlemēt. Tiercement par maistre Iean de l'Adriesche President en la chambre des Comptes & Tresorier de France. Quartement par monseigneur de Mery. Et quintement & pour derniere fois par le Preuost des marchans & bourgeois de ladicte ville, lequel festoy fut moult honorable. Et durant lesdictes choses, furent leurs lettres expediees par toutes les cours de Paris: tous lesdits articles ainsi à eux accordez par le Roy comme dit est. Et le ieudy seiziesme iour de Feurier audit mille an quatre cens soixante huit: aduint au chastellet de Paris qu'un nommé Charlot le Tonnellier dit la hotte, varlet chaufsetier demourant à Paris, qui auoit esté constitué prisonnier audit chastellet de Paris pour raison de plusieurs larcins: dont on le chargeoit qu'il denioit, fut ordonné par le Preuost de Paris & les officiers du Roy audit chastellet, que son proces seroit fait sur les charges à luy imposées: & conclud d'ainsi faire, dont il appella. Et par arrest fut renuoyé audit Preuost, pour estre fait sondit proces. En l'amenant de sa prison en la chambre de la questiō dudit chastellet, faisit vn cousteau qu'il apperceut sus son chemin, & d'iceluy se couppa la langue: & puis fut ramené en sa prison sans autre chose faire pour ledit iour. Audit temps aduint qu'au païs de Hollande & Zelande qui sont des païs de monseigneur de Bourgongne, y vindrent & abonderent si grandes eaües, que l'eaüe noya & emporta plusieurs villes & places desdits païs, pour raison de plusieurs escluses qui tenoient la mer, qui se rompirēt. Et à ceste cause y eut de grans dommages faits & plus grand destruction, comme on disoit, que ledit seigneur de Bourgongne n'auoit fait par fureur en la cité & habitans du Liege. Et apres que ledit Charlot tōnellier (dont est parlé deuant) qui ainsi festoit incisée la langue & fut guery: fut de rechief amené en la
question

question pres d'estre estendu en la gehaine, pource qu'il ne vouloit cognoistre les cas à luy imposez: lequel apres qu'il eut esté longuement assis sur la sellette, dit qu'il diroit verité: & lors declaira tout au long sa vie & de moult grands & merueilleux larrecins: & si accusa moult de gens coupables à faire icelles: comme vn sien frere surnomé le gendarme, vn ferrurier, vn orfeure, vn sergent fieffé nommé Pierre Moynel & plusieurs autres, qui pour lesdits cas furēt constituez prisonniers: & sur ce interrogez, qui depuis confesserēt auoir fait plusieurs larrecins. Et apres toutes ces choses, le mardy de la sepmaine peneuse: ledit la Hote & son frere, ledit sergent fieffé, le ferrurier, vn tondeur de grans forces, & vn frippier nommé Martin de Coulongne par la sentence du Preuost de Paris, furent condamnez à estre pendus & estranglez au gibet de Paris, dont ils appellerent en Parlement. Et par arrest de la Court ladicte sentence fut confermée au regard des quatre d'iceux: c'est à sçauoir desdits de la Hote, son frere, dudit tōdeur de grans forces, & dudit ferrurier. Et le lendemain qui fut mercredy furent menez pendre au gibet. Et au regard desdits frippier & sergent fieffé, ils demourerent encores en la prison iusques apres les festes de Pasques. Et le vèdre dy Saint & aouré vint & issit du ciel plusieurs grans esclats de tonnoire, & espartissemens & merueilleuse pluie, qui esbahist beaucoup de gens: pource que les anciēs dient tousiours, que nul ne doit dire helas fil n'a ouï tonner en Mars. Et apres ce que dit est, ledit frippier nommé Martin de Coulongne fut rendu par ladicte Court de Parlement audit Preuost de Paris, & fut enuoyé audit gibet le samedy veille de Quasimodo mille cccc.lxix.

De la trahison de maistre Iean Baluë Cardinal d'Angiers, dont il fut prisonnier: du Roy de Cecille, & sa femme qui vindrent au Roy: de la paix dudit Roy & de son dit frere Charles pour lors Duc de Guienne: lequel vint depuis aux Montiz lez Tours: de l'alliance du Roy & du Roy d'Espagne: & cōment le Duc de Bretagne refusa l'ordre du Roy: & du ban & arriereban ordonné par le Roy pour obuier au Roy Edouard d'Angleterre. Et autres plusieurs choses faictes en l'an mille cccc.lxix.

AV mois d'Auril ensuiuant mille cccc.lxix. maistre Iean Baluë Cardinal d'Angiers, qui en peu de tēps auoit eu moult grans biēs du Roy & du Pape, par le moyen du Roy: qui pour l'auancer & faire si grād comme de Cardinal: & auquel Cardinal le Roy se fioit moult fort, & faisoit plus pour luy que pour Prince de son sang & lignaige. Et iceluy Cardinal non ayant Dieu en memoire, ne l'honneur & profit du Roy ne du Royaume deuāt ses yeux, mena le Roy iusques à Peronne: auquel lieu il le fait ioindre avec iceluy Duc de Bourgongne & leur fait faire ensemble vne telle quelle paix: laquelle fut iurée & promise entre les mains dudit Cardinal. Et puis voulut, conseilla & ordonna que le Roy iroit & accōpaigneroit ledit de Bourgongne iusques en ladicte cité du Liege, qui par auant festoient esleuez & mis sus pour le Roy contre ledit de Bourgongne, & pour luy porter dommage. Et au moyen d'icelle allée du Roy deuant icelle cité desdits Liegeois: & icelle cité furent ainsi meurdri & destruis, tuez & fugitifs, cōme dit est deuant: mais qui pis est, le Roy, messeigneurs de Bourbon, de Lyon, Beauieu & Euesque dudit Liege freres, & toute la seigneurie estant deuant ladicte cité, furēt en moult grād dan-

gier d'estre morts & tous périls : qui eut esté fait la plus grãd esclandre qui oncques fut aduenue au Royaume de France, depuis la creation d'iceluy . Et apres que le Roy s'en fut retourné deuers Paris, pour s'en retourner à Tours & autres lieux enuiron : & le garda d'entrer en sadiète bõne ville & cité de Paris, & le feit passer deux lieües pres d'icelle , en cuidant par luy à ceste cause mettre ladiète bonne ville & cité, ensemble les subiects d'icelle en l'indignation du Roy. Et en faisant ledit voyage audit lieu de Tours & Angiers par le Roy , il feit content monsieur son frere de son ampanage , & luy bailla pour iceluy la Duché de Guienne & autres choses, dont il se tint à bien content du Roy . Et voyant par iceluy Cardinal, la paix & bonne vnion estre entre le Roy & sondit frere, cuida de rechief faire son effort & rebouter trouble & malueillance entre le Roy & autres seigneurs de son Royaume, comme deuant auoit fait . Car il enuoya & meit sus messages especial avecques lettres & instrumens , qu'il enuoyoit audit de Bourgogne en luy faisant assçauoir, que ledit accord ainsi fait estoit du tout fait à sa confusion & destruction : & n'estoit fait à autre fin que pour l'aller destruire incontinent que le Roy & sondit frere seroiēt assemblez. Et que pour se garder contre eux luy estoit besoing & necessité, qu'il se meit en armes comme deuant auoit fait : & qu'il assemblast plus grand armée qu'oncques n'auoit fait , & mouuoir guerre au Roy plus que iamais : & autres grandes & merueilleuses diableries qu'il escriuoit audit de Bourgogne par vn sien seruiteur, qui de cescdictes lettres & instructions qu'il portoit, fut trouué saisy, & promptement furent portées au Roy : lequel incōtinent ces choses par luy sceües, fut iceluy Cardinal prins & saisy & mené prisonnier à Montbason , où il fut laissé en la garde de monsieur de Torcy & autres. Et apres furēt prins & saisis en la main du Roy tous ses biens & seruiteurs : & furent lesdits biens prins par inuētoire, & luy furent baillez commissaires pour l'interroguer sur les cas & charges à luy imposées : c'est à sçauoir messire Tanneguy du Chastel gouverneur de Roussillon, messire Guillaume Cousinot, mondit seigneur de Torcy & maistre Pierre d'Oriolle general des finances : tous lesquels besongnerēt à l'interroguer & examiner sur lesdits cas & charges . Et en apres le Roy donna & distribua des biens dudit Cardinal à son plaisir : c'est à sçauoir sa vaisselle d'argēt fut vendue & l'argēt baillé au tresorier des guerres, pour les affaires du Roy : la tapisserie fut baillée audit gouverneur de Roussillon, & la librairie audit maistre Pierre d'Oriolle : & vn beau drap d'or tout entier contenant vingt quatre aulnes & vn quart qui bien valoit douze cens escus , & certaine quantité de martres sebelines , & vne piece d'escarlade de Fleurance furent baillez & deliurez à mōsieur de Crussol : & ses robbes & vn peu de mesnage fut vendu pour payer les fraits des officiers & commissaires, qui auoient vacqué à faire ledit inuentoire .

E T durant ces choses le Roy de Cecille & la Royne sa femme, vindrent par deuers le Roy à Tours & Amboise , où illec furent moult honnorablement receuz de par le Roy . Et apres tout ce que dit est , le Roy , mondit seigneur de Bourbon & autres seigneurs s'en tirerent deuers Niort , la Rochelle & autres lieux enuiron, où ils trouuerent monsieur le Duc de Guienne frere du Roy : & en iceluy voyage (moyennant la grace de Dieu & de la benoiste vierge Marie) le Roy & mondit seigneur de Guienne furent reünis & mis en bonne paix , &
amour

amour l'un avec l'autre : dont moult grand ioye fut incontinent espendue par tout le Royaume. Et pour ceste paix, fut dit & châté en sainte Eglise. *Te Deum laudamus*, fait les feux par toutes les bonnes villes, tables rondes dressées & de moult grans soulas, esbatemens & ioyes pour ce demenées. Et puis apres le Roy s'en retourna à Amboise par deuers la Royne: qui (comme bonne, honneste & tres noble dame) auoit fort trauaillé à traicter ladicte bonne paix & vnion, que nostre seigneur par sa sainte grace & bonté vueille de bien en mieux tousiours bien entretenir. Et puis fut deliberé par le Roy & son grand conseil, d'aller conquerir, prendre & auoir la Comté d'Armignac: & mettre en la main du Roy & promis d'icelle bailler à mondit seigneur de Guiéne. Et pour ce mettre à execution y enuoya le Roy grand quantité de son artillerie, de ses gens de guerre & frâcs-archiers. Et pour ledit voyage faire & preparer ladicte armée: le Roy s'en partit dudit lieu d'Amboise pour aller iusques à Orleans, où seiourna cinq ou six iours, & puis s'en retourna audit lieu d'Amboise. Et peu de temps apres vint & arriua à Paris monsieur de Chastillon, Grand Maistre enquesteur & general reformateur des eaües & forests, pour prendre, receuoir & veoir les monstres des bannieres, des officiers, gens d'estat & populaire de la ville de Paris.

ET le samedi quatriesme iour de Nouembre mille quatre cens soixante & neuf, fut leüe & publiée par les carrefourgs de Paris, és lieux ordinaires en icelle ville, l'alliance & bone vnion faicte entre le Roy de France & le Roy d'Espaigne: laquelle lecture & publication fut faicte par maistre Iean le Cornu clerc de la Preuosté de Paris, és presences des Lieutenâs criminel & ciuil de ladicte Preuosté, & de la plus part des examinateurs ordinaires & extraordinaires dudit chastellet. Et depuis ce le Roy, monsieur de Bourbon & autres seigneurs d'entour luy, se tindrēt à Amboise: & illec enuiron & iusques au samedi vingtquatriesme iour de Decembre audit an mille quatre cens lxix. que monsieur de Guienne accompagné des nobles de sa Duché, en moult grand, belle & noble compagnée, arriua par deuers le Roy en son chasteau des Môtiz lez Tours: qui de sa venue eut moult grand ioye & aussi eurent la Royne, ma dame de Bourbō & autres dames & damoiselles de leur compagnie: qui incontinent qu'ils sceurent ladicte venue, se partirent dudit lieu d'Amboise pour aller audit lieu des Montiz, pour aller veoir & festoyer ledit monsieur de Guiéne. Et en ces entrefaictes fut tout le païs d'Armignac mis & rendu és mains du Roy & sans effusion de sang: & tout deliuré à monsieur l'Amiral & Comte de Dampmartin, comme gouuerneur de ladicte armée pour le Roy. Et demourerent depuis le Roy, monsieur de Guienne, la Royne, ma dame de Bourbon & autres de ladicte compaignie audit chasteau de Montiz, faisans illec de moult grâs chieres & iusques à Noël. Et apres que mondit seigneur de Guienne s'en partist & print cōgé du Roy & de toute sa compaignie, & s'en alla & retourna à la Rochelle, à S. Ieā d'Angeli & autres ses païs voisins, pour illec tenir ses estats & appoincter des offices & autres affaires de sondit païs & Duché de Guiéne. Et apres le Roy s'en reuint & retourna audit lieu d'Amboise, où il se tint depuis par aucun tēps: durāt lequel il enuoya ses ambassadeurs par deuers le Duc de Bretaigne, par lesquels ses ambassadeurs il enuoya audit Duc de Bretaigne son ordre nouuellement mise & créé sus: affin qu'icelle il portast, & iurast tout ainsi & selon que

l'auoient prinse & iurée plusieurs autres Princes & seigneurs de ce Royaume. Et iaçoit ce que le Roy luy eut fait cest hōneur: neantmoins de prime face il la refusa & ne la voulut prendre n'accepter. Et disoit on que c'estoit au par auāt que ledit Duc de Bretaigne auoit prinse la toison d'or, en soy declairāt amy, frere & allié du Duc de Bourgongne: pourquoy le Roy se tint pour mal content & nō sans cause. Et biē tost apres le Roy ordōna certaine quātité de gens d'armes de son ordonnāce & ses archiers avec partie de son artillerie, pour faire guerre audit Duc de Bretaigne & ses paÿs: mais auant le partemēt desdictes gens de guerre d'aller audit paÿs de Bretaigne, fut dōné delay audit Duc de Bretaigne de dix iours entiers: qui faillirent le xv. iour de Feurier pour donner au Roy sa responce de tout ce qu'il auoit intention de faire, & comment il se vouloit avecques luy gouuerner. Et le mercredy quatorziesme iour d'iceluy mois de Feurier, furent leües & publiées es carrefourgs de Paris le mādement patent du Roy signé Guillaume de Cirisay: par lequel le Roy mandoit au Preuost de Paris, qu'il estoit deüement acertené que le Roy Edouard d'Angleterre & les Princes, seigneurs & populaire dudit Royaume, qui pour long temps auoient esté en grād guerre & diuision entre eux, auoient fait leur paix & pacification entre eux. Et que tous iceux estans assemblez en conseil auoient conclud, promis & iuré de venir descendre en plusieurs & diuers lieux de ce Royaume, en intention d'y prendre, saisir & gaster villes, places, paÿs & fortresses: & destruire ledit Royaume & les habitās d'iceluy, tout ainsi qu'autresfois il auoit fait. Pour lesquelles causes, & voulant par le Roy de tout son pouoir & puissance obuier aux damnées & faulses entreprinſes desdits Anglois: ordonna son ban & arriereban estre fait. Et que par ledit Preuost de Paris (toutes excusations cessant) il contraignit vigoureuſemēt & sans deport aucun, tous les nobles & non nobles tenans en fief & arrierefief, preuilegiez & non preuilegiez, à estre tous en armes & habillemēt souffisant & en personne, sans y prédre ne receuoir aucun au lieu d'eux, dedans le premier iour de Mars ensuiuant: & sur peine de confiscation de corps & de biens: en deffendāt de par le Roy, par lesdictes lettres audit Preuost & tous autres, de bailler ne receuoir aucune excusation ou certification pour iceux tenant en fief ou arrierefief, sur peine de perdicion de leurs offices: & de confiscation de corps & de biens & nonobstant oppositiōs ou appellations. Et aussi en declairant les deffaillans ou reffusans estre ennemis du Roy, & auoir cōfisque enuers luy corps & biens, sans iamais le leur remettre ou pardonner. Et ce mesme iour de mercredy vint nouuelles à Paris, que monsieur de Bourgongne auoit esté veu en la ville de Gand, portāt à l'vne de ses iambes la iarretiere, & sur luy la croix rouge, qui estoit ordre & enseigne dudit Roy Edouard d'Angleterre. Et à ceste cause se demonstroit & declairoit ennemy capital du Roy & du Royaume, & cōme Anglois tenu & réputé. En apres ledit seigneur de Bourgongne enuoya à Tours ses ambassadeurs par deuers le Roy: lesquels depuis y demourerent par certain tēps illec, attendans leur expedition: durans ces choses le Vicomte & seigneur de Villars en Poictou, alla de vie à trespassement: lequel en son viuant auoit donnée & laissée sa succession au Roy pour en iouir par luy incōtinent apres son trespas. Et pour icelle succession auoir & recueillir, le Roy s'en partit pour aller audit paÿs de Poictou, pour prendre, saisir & auoir ladicte succession

ſucceſſiõ d'iceluy ſeignr de Villars:à quoy faire le Roy y demoura tout le mois d'Auril. Audit mois d'Auril vn nômé maistre Pierre Durand, qui eſtoit nepueu dudit Cardinal d'Angiers:leq̃l par long tēps auoit eſté detenu priſonnier au chateau de Mailly,eſchappa des priſons dudit lieu & ſ'en vint iuſques à Paris, où il fut cogneu par vn apotichaire nômé Chambetin:& fut de rechief prins & ſaiſy & mené priſonnier és priſons de la conſiergerie du Palais royal à Paris,où il fut detenu iuſques au xxvj.iour d'Auril mille cccc.lxx.apres Paſques fut tiré & mis hors deſdites priſons de la cõſiergerie, & baillé & deliuré és mains des ſergēs & ſeruiteurs du Preuoſt des Mareſchaux,pour mener où ordonné leur ſeroit.

Du Comte de Vvaruich & du Duc de Clairance, qui avecques leurs femmes & familles dechassez du Roy Edouard d'Angleterre,vindrent és parties de France: & auſſi la Royne dudit Angleterre & ſon fils:dont fut mal cõtent le Duc de Bourgongne. De la natiuité du Daulphin Charles. De la pacification du Duc de Bretagne avecques le Roy. Du retour dudit Comte de Vvaruich. De l'alliance du Roy & du Roy Henry d'Angleterre: De la fuite du Roy Edouard. De l'entrée de la Royne d'Angleterre à Paris. De ceux d'Auxerre tenans pour ledit Duc de Bourgogne. Des victoires par les gens du Roy és Duché dudit Bourgongne. Comté de Charrolois & Picardie. D'aucũs voyages du Roy & autres pluſieurs choſes aduenues en l'an mille quatre cens ſoixante & dix.



V mois de May enſuiuant mille quatre cens lxx. le Comte de Vvaruich & le Duc de Clairāce avec leurs femmes, qui dechassées auoiēt eſté par le Roy Edouard d'Angleterre au moyen de certains grans debats & questions, qui ſ'eſtoient meuz entre eux: ſe meirent eux, leurs ſertiteurs & autres gens qu'ils auoiēt peu recueillir en pluſieurs manieres ſur mer,iuſques au nombre de quatre vingts nauires, & ſ'en vindrent prendre terre en Normandie iuſques à Honnefleu & Harfleu. Et illec ils trouuerent monsieur l'Amiral,qui les recueillit: & bouta leſdits de Vvaruich, de Clairance,le Comte de Vuafonfort, dames & damoiſelles, avec vn peu de leur priuée meſgnée. Et au regard des nauires,ils ſe retrahirent depuis & ceux eſtans dedās és hables de Honnefleu & Harfleu. Et en apres auſſi ſe deſlogerent les dames & damoiſelles & leur train,& ſ'en allerēt à Valongnes où leur logis leur fut ordonné. Et bien toſt apres ces choſes, le Duc de Bourgongne ſachant ce que dit eſt,eſcriuit lettres miſſiues à la Court de Parlemēt: par leſquelles il leur mādait qu'il auoit ſceu, que le Roy auoit recueilly ledit de Vvaruich en acunes villes de ſon Royaume,és marches de Normandie: qui eſtoit allé contre l'appoinctement fait à Perōne entre le Roy & luy. En priant & enhortant auſdits de Parlemēt,qu'ils vouliſſent demonſtrer ces choſes au Roy: affin qu'il ne fauoriſaſt ledit de Vvaruich & ceux de ſadicte cõpagnie,qu'il diſoit eſtre ſon ennemy capital & dudit Royaume:ou autrement il l'iroit querir quelque part qu'il le peut ſçauoir en France:pour en faire à ſon bõ plaisir. Et nonobſtāt ce ledit de Vvaruich ſeiourna & demoura depuis certain temps:c'eſt à ſçauoir durāt le mois de Iuing audit Honnefleu. Et durant ce temps pluſieurs gens de guerre de l'ordōnance du Roy deſlogerent de leurs garniſons,& ſ'en vindrent gaſter tout le plat payſ:loger & mettre en pluſieurs villes & places ſur les marches de Normādie

& Picardie. Audit mois de Iuing aduint que deux hommes de guerre de ladicte ordonnance fous la charge de monsieur le Connestable, tuerent & meurdrirent deux ieunes clers du tresorier des guerres en plaine Beaulse, pour auoir l'argent qu'ils portoient pour le payement des gensdarmes. Et peu de temps apres furent prins & saisis à Honnefleu : & d'illec menez par deuers mondit seigneur le Connestable en la ville de Meaux, où il ya deux arbres & sur deux diuers chemins, furent pendus & estranglez. En ces entrefaictes le Roy se tint & seiourna à Tours, à Amboise, Vendosme & autres lieux pres d'illec, par deuers lequel lesdits Anglois allerent. Et aussi y fut & alla la Royne d'Angleterre & le Prince de Galles son fils. Et illec tous arriuez fut pourparlé entre eux de la maniere, pourquoy ils estoient illec tous venus & arriuez : & depuis s'en retournerent lesdits Anglois à Honnefleu, Valongnes, S. Lo & autres lieux en Normandie : durant ce que dit est, le Duc de Bourgongne fait prendre & mettre en sa main toute la marchandise qu'il auoit en ses païs, appartenant aux marchans de France, iusques à ce que les marchans de ses païs eussent eu restitution d'aucuns biés prins sur mer par lesdits Anglois.

Audit temps le samedy dernier iour de Iuing mille cccc.lxx. environ entre deux & trois heures de matin, la Royne accoucha au chasteau d'Amboise d'un beau fils, qui illec fut baptizé & nommé Charles par monsieur l'Archeuefque de Lyon, avec le Prince de Galles fils de Henry iadis Roy d'Angleterre, & prisonnier detenu par Edouart qui se disoit Roy dudit païs d'Angleterre. Et la commere fut Madame Ieanne de France Duchesse de Bourbon. Et de ladicte natiuité fut grand ioye faicte & esbandue par tout le Royaume de France, & en fut chanté en diuers lieux. *Te Deum laudamus*, & autres belles louenges à Dieu : les feux fais parmy les ruës, tables rondes & autres grans ioyes & esbatemens. Et tantost apres ladicte natiuité, le Roy de Cecille, monsieur de Guienne, monsieur de Bourbon, de Lyon, Beauieu & autres, s'en allerent à Angiers, à Saumur, le Pont de See & autres lieux illec environ, pour trouuer pacification & accord avec le Duc de Bretaigne, sur aucune question qui estoit entre le Roy & le Duc dessusdit. Et illec demourerent par certain temps, & iusques à tant que appoinctement si trouua, & fut fait entre eux : & puis le Roy s'en retourna par deuers la Royne à Amboise. Apres ledit accord ainsi fait, furēt enuoyez ambassadeurs dudit Duc de Bretaigne par deuers ledit Duc de Bourgongne : & luy furēt rendus le seel & alliance, qui estoit entre eux : dequoy ledit de Bourgongne se courrouça fort quand il apperceut l'accord du Roy & dudit Duc de Bretaigne. Durant ce que dit est, le Comte de Vvaruich (dont deuant est parlé) qui estoit audit païs de Normandie, cuidant soy en retourner en son païs d'Angleterre : fut ordonné & estably sur mer de par ledit de Bourgongne plusieurs beaux & grans nauires de guerre : comme hurques, gallées & autres nauires en grand quantité, tous fort auitaillez & garniz d'artillerie & gens de guerre, d'Anglois, Bourgongnons, Picards & autres. Et singlerent en mer tellement, qu'ils s'en vindrent arriuer sur la coste de Normandie, environ la fosse de l'aire, cuidans trouuer & rencontrer ledit de Vvaruich & sa compagnie pour les desconfire. Et illec demourerent à l'ancre par certain long temps : pendant lequel le Roy qui estoit à Amboise s'en partit & alla au Mont-Sainct-Michel en pelerinage. Et apres ice-
luy

luy fait & accomply, s'en reuint & retourna à Auranches, Tombelaine, Constances, Caen, Honnefleu & autres places de Normandie: & illec sur le costé de la mer feit aussi arriuer & auitailler sa nef, la nef monsieur l'Amiral, la nef de Colon & autres plusieurs beaux nauires: dedans lesquels se meirent & bouterent lesdits de Clarence, de Vvaruich & ceux de leur compagnie, avec aucuns Franks-archiers & autres gens de guerre que le Roy leur auoit baillez, pour leur seureté & conduicte: & incontinent qu'ils furent ainsi montez que dit est, pres de partir & singler en mer lesdits Bourgongnons, Anglois & autres voyant qu'ils auoient longuement esté à l'ancre sans auoir riens fait & mágé tous leurs viures: retirerent lesdits ancrs, & s'en retournerent à leur Duc sur traine boyau, & sans auoir riens, dequoy il eust bien tost ris son saoul, pource qu'ils auoient perdu grand temps: & si auoit beaucoup fraié & despendu à l'auitallement desdictes nauires, & au souldoy desdictes gens de guerre. Et ce fait ledit de Vvaruich accompagné comme dessus, entrerent en mer & eurent vent propre & à gré: tellement qu'en peu de temps ils vindrent arriuer audit Royaume d'Angleterre, & descendirent & arriuerent iceux nauires à Peulme & Dertemue à heure de nuict. Et tout incontinent qu'il eut mis pied à terre, il enuoya dix mille dedans ledit païs d'Angleterre par aucuns de ses gens, prendre & saisir vn Baron d'Angleterre qui estoit en son liect couché, & qui ne pensoit point à ladicte descendue: & l'amenerent au matin par deuers ledit de Vvaruich: auquel Baron incontinent luy arriué fut mise la teste hors des espaules. Et apres s'en alla audit lieu Dertemue à Bristo, où il fut bien recueilly: & illec auoit laissé son artillerie & de ses bagues quand il s'en alla en Normandie. Et apres qu'il eut recouré ses choses, & auant qu'il fut trois iours il vint & arriua par deuers luy plus de soixante mille hommes en armes pour le seruir, viure & mourir pour luy: il se meit dessus les champs tousiours cherchant à trouuer ledit Edouart. Et fut plus de xv. iours apres ladicte descendue, auant qu'en France on peust auoir aucunes de ses nouvelles. Apres les choses dessusdictes le seigneur d'Argueil fils du Prince d'Orenge qui estoit domestique, & le plus prochain dudit Bourgongnon: & qui estoit marié à la seur de monseigneur de Bourbon, s'en partit & embla d'autour dudit de Bourgongne: & s'en vint & retrahit par deuers le Roy qui bien le recueillit. Et quand ledit Duc sceust ledit partement il cuida enrager & creuer de dueil. En la presence de ladicte ambassade de Bretagne, ledit Duc de Bourgongne declaira ledit seigneur d'Argueil, auoir confisque enuers luy corps & biens. Et puis feit arraser & abbatre toutes les places & chasteaux qu'il auoit en ses païs. En apres le xiiij. iour d'Octobre audit an mille cccc.lxx. le Roy enuoya ses lettres patentes à Paris, qui furent leuës & publiées par les quarrefourgs d'icelle, presens les Lieutenans criminel de la Prenosté de Paris & plusieurs des examineurs d'iceluy chastellet. Et par lesdictes lettres estoit contenu l'alliance faicte du Roy, & du Roy Henry d'Angleterre, en mandant par lesdictes lettres tous Anglois laisser venir & descendre en ce Royaume, pour leurs affaires & marchandises sans saufsconduits ne autre seureté, cōme les subiects de France: sauf en ce non comprins Edouart de la Marche nagueres Roy dudit Royaume d'Angleterre, ses alliez & complices. Et à ce iour & depuis vindrent certaines nouvelles en France que lesdits de Clarence, Vvar-

uich qui ainsi estoient sur les champs & en armes audit Royaume d'Angleterre, cuidans trouuer ledit Edouart, prospererent illec tellement que tous les Princes, seigneurs, nobles, prelatz, bourgeois & commune dudit païs d'Angleterre: & singulierement tout le populaire de Londres, vindrent au deuant dudit Vvaruich, & tournerent le doz audit Edouart: & vindrent mettre à plaine deliurance ledit Henry, qui par long temps auoit esté detenu en captiuité de prison par ledit Edouart: & luy baillerent de rechef la possession & iouissance dudit Royaume: & fut fait ledit de Vvaruich gouernant dudit Royaume. Et puis vindrent en la cité de Londres faisans grans chieres. Et illec & aussi audit Royaume, furent mis à plaine deliurance tous François qui illec estoient prisonniers, & renuoyez en France quittement. Et si fit ledit de Vvaruich prendre & saisir tous les biens aux subiects dudit de Bourgongne, & mettre en arrest & en ses mains: & puis ledit Edouart voyant qu'il estoit seul demouré & du tout abandonné, s'en fuit & vuida hors ledit Royaume: & s'en vint à recours audit Duc de Bourgongne son beau frere, & audit Royaume d'Angleterre demoura sa femme & mesnaige.

EN apres le Roy qui par long temps n'estoit bougé de Tours & Amboise, meue de bonne deuotion, s'en partit & alla à nostre Dame de Celles qui est en Poictou, où il seiourna vn peu de temps: & puis retourna audit lieu d'Amboise. Audit mois de Novembre le Roy enuoya à Paris ses lettres patentes par lesquelles il mandoit aux nobles clerks & laiz de la ville de Paris, qu'ils feissent processions & louenge à Dieu, & à la vierge Marie: & toutes œuures cessans par l'espace de trois iours en louant & merciant Dieu nostre createur, la benoïste vierge Marie & tous Saincts & Saintes de Paradis, de la bonne victoire que auoit eu Henry de l'Enclastre Roy d'Angleterre de fondit Royaume, à l'encontre de Edouart de la Marche, qui longuement sur luy l'auoit vsurpé à la faueur dudit Duc de Bourgongne: & aussi de la bonne paix & vnion que faicte estoit entre le Roy & ledit Roy Henry d'Angleterre. Laquelle procession fut faicte & accomplye, ainsi que le Roy l'eut mandé: & tout ainsi en fut fait par toutes les bonnes villes de ce Royaume. En apres le Roy escriuit autres lettres, par lesquelles il mandoit à Paris qu'il y enuoyoit la Roine d'Angleterre femme dudit Roy Henry avec son fils, le Prince de Galles & sa femme, fille dudit Comte de Vvaruich: avec la femme dudit de Vvaruich mere de la femme dudit Prince de Galles: la dame Vuilchere & autres dames & damoyelles de la compagnie d'icelle Roine d'Angleterre: laquelle Roine d'Angleterre y vint & arriua audit lieu de Paris accompagnée, comme dit est: & estoient à l'accompagner de par le Roy les Comtes d'Eu, de Vendosme & de Dunois, de monseigneur de Chastillon & autres plusieurs nobles hommes. Et furent & issirent hors de ladicte ville de Paris, pour aller & estre au deuant de ladicte Roine, & du commandement expres du Roy, le Prelat & Euesque de ladicte ville, l'Vniuersité, la Court de Parlement, le Preuost de Paris & suppost de Chastellet: le Preuost des marchans & escheuins, marchans, bourgeois, manans & officiers d'icelle ville, tous moult honnorablement & en habits honnestes, & en moult grād & merueilleux nombre. Et entra en icelle ville par la porte S. Iaques, & par toutes les rues par où elle passa, auoit de moult belles tapisseries & tentes au long desdi-

ètes rues depuis ladicte porte, par où elle passa iusques au Palais, où son logis
 luy fut moult honnorablement appresté. En ce temps fut amenée à Paris toute
 la belle artillerie de Tours, que le Roy auoit : laquelle fut mise & descendue au
 chasteau du Louure. Audit temps aussi le Roy escriuit au preuost & escheuins
 de ladicte ville de Paris, que son plaisir, voulenté & intention estoit de faire &
 tenir la feste de son ordre en ladicte ville. Et que pour ceste cause & pour estre
 à icelle feste, y ameneroit tous les seigneurs de son sang, qui y viendroient & fe-
 roient à grand compagnie de gens. Et que pour ceste cause les manans & habi-
 tans de ladicte ville, feussent contens qu'ils y feussent logez & hebergez par
 fourriers, ce qui leur fut accordé. En ce temps aussi qui estoit le mois de Decē-
 bre, messire Artus de Longueual cheualier & autres gentils-hommes, entrerent
 pour le Roy en la ville de S. Quentin en Vermandois du bon vouloir des habi-
 tans dudit lieu. Et puis le dixiesme iour dudit mois monseigneur le Connesta-
 ble vint & entra pour le Roy en ladicte ville, à tout deux cens lances & les ar-
 chiers. Et d'icelle entrée le quatorziesme iour dudit mois ensuiuāt, maistre Iean
 de Ladriesche tresorier de France, maistre Robert Fessier, maistre Pierre de
 Boieuual & plusieurs autres officiers de mondit seigneur le Connestable, feirēt
 faire vn cry publicque à son de trompe à la table de marbre au Palais Royal à Pa-
 ris. En faisant sçauoir la prinse & entrée ainsi faicte audit S. Quentin, par mon-
 dit seigneur le Connestable: & que de ce on merciaist Dieu en luy priant de don-
 ner bonne prosperité au Roy, & audit Connestable stipulāt pour luy au recou-
 urement de ses autres villes & païs engagez : qu'il auoit bonne intention de re-
 couurer & mettre hors des mains de Charles soy disant Duc en Bourgongne:
 & ainsi le contenoit ledit cry. Au mois de Ianuier ensuiuant le Roy qui s'estoit
 party d'Amboise pour venir à Clery & Orleans, s'en partit pour venir au païs
 de Beauffe, & vint coucher au Puifet : & le lendemain s'en alla au giste à Palai-
 seau pres de Montlehery. Et le lendemain vint à disner à Seaux le grand, en vn
 hostel qui appartenoit à maistre Iean Baillet maistre des requestes ordinaire de
 l'hostel du Roy : & d'illec s'en vint au giste en la ville de Paris en son hostel des
 Tournelles. Et auecques ce, aussi y vindrent la Royne, Madame de Bourbon &
 autres plusieurs dames & damoyelles en leur compagnie : & demoura le Roy
 à sa bonne ville de Paris iusques au samedi vingtsixiesme iour dudit mois, qu'il
 s'en partit pour s'en aller à Senlis, à Cōpiengne & autres lieux voisins, où estoit
 la pluspart de toute son armée pour batailler contre ledit Duc de Bourgongne.
 Et apres luy fut menée par eaüe & par terre grand quantité de son artillerie, &
 menée à Compiengne, Noyon & ailleurs au païs de Picardie & Flandres. Et
 puis fut crié à Paris par les quarrefourgs de ladicte ville à son de trompe, que
 tous les Fracs-archiers de l'isle de France & aussi tous les nobles, fussent tous
 prests & en leurs habillemens pour suiure & aller avec le Roy en ladicte armée.
 Et durant ce temps fut fait à Paris moult grande quantité de pouldre à canon &
 serpentines, pour fournir à ladicte guerre. En ce temps auoient esté enuoyez
 de par le Roy sire Christofle Paillard seigneur des Comptes, & sire Iaques Hef-
 felin conterolleur du grenier à sel à Paris, en la ville d'Auxerre pour sommer
 les habitans d'icelle d'eux & ladicte ville rendre au Roy, & de prendre illec gar-
 nison pour luy. Et par lesdits commissaires leur furent faictes de moult belles

remonstrances:lesquels habitans demanderent ausdits ambassadeurs terme iusques au ieudy ensuiuant pour auoir aduis entre eux,& de ce leur rendre responce. Pour laquelle responce attendre s'en allerent lesdits ambassadeurs à loigny, distant d'illec de six lieuës : & y seiournerent iusques audit ieudy que iceux habitans leur enuoyerent responce par vn homme de ladicte ville, que l'on disoit estre fauetier:lequel leur dit & rendit responce, que lesdits habitans d'Auxerre mandoient ausdits commissaires,qu'ils auoient mis & bouté avecques eux dedans ladicte ville grande garnison de gens de guerre pour ledit Duc. Et qu'au regard d'eux ils estoient fermes & deliberez de viure & mourir pour ledit Duc, & garder ladicte ville pour luy . Et le iour que ladicte garnison y fut boutée, y fut tué & meurdry vn des bourgeois d'icelle ville nommé Guillemain Goutier, qui fut dommage:car il mourut pour la querelle du Roy soustenir . Et apres le partement du Roy de sa ville de Paris pour aller à Compiengne & à Senlis : se rendirent pour le Roy,les villes d'Amyens, de Roye & Montdidier . Et puis le mardy quatriesme iours de Feurier, furent faictes à Paris processions generalles moult honorables. Et y fut la Royne, Madame de Bourbon & toute leur noble compagnie:& allerent en la grand Eglise de nostre Dame,& delà à nostre Dame de recourance aux carmes . Et là fut prié pour le Roy,la Royne & leur bonne prosperité. Et fut dit & declairé comment lesdictes villes estoient rédues au Roy,& entre les autres la ville d'Abbeuille,dont il n'estoit riens. Audit tēps furent prins à Paris & contraints tous manouuriers de bras : comme massons, charpentiers de la grand coignée & autres plusieurs,de aller esdictes villes ainsi nouvellement reduictes au Roy:dont on bailla la charge au regard desdits pionniers à maistre Henry de la Cloche procureur du Roy au Chastellet de Paris, qui estoit bon & loyal François : qui les mena & conduict iusques en ladicte ville de Roye,où illec furent fais de grans boulleuers,fossez,trenchées& autres belles fortifications : & aussi en furent faictes d'autres en autres villes & diuers lieux : & illec demourerent lesdits pionniers certain grand espace de temps , & iusques enuiron le iour de Pasques,que le Roy donna & bailla trefue pour certain temps avecques le Duc de Bourgogne : lequel estoit assiegé par les gens du Roy en son parc qu'il tenoit entre Bapaulmes & la ville d'Amyens . Et là où il fut en telle misere & poureté, qu'il estoit du tout & fondit ost à la disposition & voulenté du Roy,pour en auoir du tout fait à son plaisir se n'eust esté ladicte trefue. Et depuis la guerre encommencée iusques à ladicte trefue, y eut de tresgrandes & merueilleuses desconfitures , faictes par les gens du Roy sur les Flamens & Picards:tant sur ceux qui auitailloient le Parc desdits Bourgongnons, qu'à cause de plusieurs belles faillies que les gens du Roy faisoient sur les tenans le party desdits Bourgongnons. Et mesmement se feit de moult belles destrouffes en la Duché de Bourgogne & Comté de Charrolois & Masconnois , où les gens du Roy y gagnerent de moult beaux butins : & y prindrent de moult beaux prisonniers,&moult grand nombre en y eut de tuez. Et auoient tout gagné messeigneurs les Comte Daulphin d'Auuergne, de Comminge, le sire de Combrode,de Charentes, messire Guillaume Cousinot & moult d'autres nobles hommes, n'eust esté que le Roy leur manda qu'ils cessassent tout pour la-mour desdictes trefues, qui moult en furent desplaisans & moult de gens de façon

façon aymans le Roy en son honneur. Et à ceste cause s'en feirent à Paris des epitaphes qui furent mis & assis à S. Innocent, à l'hostel de la ville & autres lieux, en vituperant & dōnant grand charge à plusieurs seigneurs estans pres du Roy. Et durant ladicte trefue le Roy, monseigneur de Guienne & autres seigneurs & nobles hommes d'autour d'eux, se tindrent à Han avecques monseigneur le Connestable. Auquel lieu durant ledit temps se feirent grandes allées & venues des ambassadeurs du Roy, & de ceux de mondit seigneur de Bourgongne. Et illec demourerent par long temps sans riens conclure: mais en la fin fut fait trefue entre le Roy & ledit Duc de Bourgongne durant vn an. Et pour appoincter les differens du Roy & ledit Duc de Bourgongne, y eut ambassadeurs ordonnez: & pour appoincter des debats & questions des gens de guerre de chacun des deux costez. Et puis se partirent dudit lieu de Han & s'en allerent chacun à sa maison. Et demourerent les gens de guerre du Roy en garnison és villes qui par auant ladicte trefue auoient esté gaignées par le Roy.

Des nouuelles qui vindrent au Roy, de la victoire de Edouart sur ledit Roy Henry d'Angleterre & les siens: & comment le Roy, le Duc de Guienne & autres furent à Paris, & puis à Orleans où mourut le Prince de Piémont. Des libelles difamatoires contre le Connestable audit Paris. De la mort du Comte d'Eu: & comment ledit Duc de Guienne & le Comte d'Armignac furent alliez ensemble, & autres choses faictes en l'an mille cccc.lxxj.

EN ce temps se meurent de grans questions, noises & debats au Roy-1461.
aume d'Angleterre entre le Roy Henry de l'Enclastre Roy dudit
Royaume, le Prince de Galles son fils, le Comte de Vvaruich & au-
tres seigneurs dudit Royaume, tenant le party dudit Henry, contre
ledit Edouard de la Marche, qui vsurpoit ledit Royaume contre ledit Henry.
Et y eut à cause de leur dit debat de moult grand meurdre fait de costé & d'au-
tre. Et dura ladicte guerre iusques au mois de Iuing mille cccc. lxxj. Que nou-
uelles furent apportées au Roy audit lieu de Han: que ledit Edouard accom-
pagné de grand quantité de gens de guerre, tant Anglois, Ostrelins, Flamens, Pi-
cards & autres nations que ledit de Bourgongne luy auoit enuoyez se meit sur
les champs, à l'encontre de l'armée & puissance desdits Roy Henry, Prince de
Galles, la Royne, ledit de Vvaruich & autres Princes & seigneurs tenans ledit
party de Henry. Et y eut les vns contre les autres de grans armes faictes, & grād
nombre de gens morts de chacun costé, ainsi comme par auant à esté descript la
maniere. Mais en la fin ledit Edouard demoura Victorien, tant par trahison qui
estoit du costé d'aucuns estans en l'armée dudit Henry, que autrement. Et y
mourut & fut tué ledit Prince de Galles, qui fut moult grand pitié: car il estoit
moult beau ieune Prince. Et aussi y mourut ledit de Vvaruich, qui aussi fut vn
grand dommage: car il auoit singulier desir de bien seruir le Roy & le Royau-
me. Et pour lequel le Roy auoit frayé & despendu moult grand finance, pour
l'entretienemēt dudit Comte de Vvaruich. Et de ladicte desconfiture fut le Roy
moult desplaisant. Et puis apres ces nouuelles ouïes se partit le Roy de ladicte
ville de Han en Vermandois: & en emmena avecques luy mondit seigneur de
Guienne, le Comte de Dampmartin, le President des Comptes & plusieurs au-

tres:& vint à Paris où il ne seiourna gueres:& durant qu'il y fut, il feit si grande & ioyeuse feste,& feit cest honneur à sadiète bonne ville & cité de Paris, de luy mesmes bouter le feu au feu fait en la place de Greue d'icelle ville, la veille S. Iean Baptiste. Et puis s'en partit & s'en alla à Orleans, où le Prince de Piémont y deuint malade de maladie, dont il alla de vie à trespas audit lieu d'Orleans. En apres s'en alla le Roy à Tours & à Amboise veoir la Royne, & monseigneur le Daulphin.

EN ce temps audit mois de Iuing mille quatre cens lxxj. le Roy fut mal content des epitaphes & libelles diffamatoires, qui ainsi auoiēt esté mis & attachez à l'esclandre dudit monseigneur le Conestable & d'autres. Et pour sçauoir la verité de ceux qui ce auoient fait, feit crier à son de trompe & cry publicque par les carrefourgs d'icelle ville, que quelque personne qui sçauoit aucune chose desdits epitaphes ou de ceux qui les auoiēt faits, qu'ils le venissent incontinent dire & denoncer aux commissaires sur ce ordonnez, & on dōneroit trois cens escus d'or au denonciateur. Et qui le sçauoit & ne le viendrait declairer auroit le col couppe. Et pour suspicion de ce, fut mis & constitué prisonnier vn ieune escollier de Paris nommé maistre Pierre le Mercier, fils d'un lunetier du Palais, qui pou de temps apres fut deliuré non chargé du cas. Aussi y fut mis & constitué prisonnier maistre Henry Mariette, qui auoit esté Lieutenant criminel de la Preuosté de Paris: tant pour raison desdits que aussi pour aucunes iniures ou parolles par luy dictes (comme on disoit) de maistre Iean de Ladriesche tresorier de France. Et puis fut deliuré iceluy Mariette par la court de Parlement, & mis hors des prisons de la consiergerie, où il estoit detenu pour ceste mesme cause.

A v mois de Iuillet audit an lxxj. mourut monseigneur le Comte d'Eu, qui fut moult grand dommage: car c'estoit vn noble, sage & bon seigneur: & qui de tout son pouoir auoit bien & loyaument seruy le Roy, & fort aymé le bien & vtilité du Royaume. Et fut mise ladiète Comté d'Eu en la main du Roy, & mise & baillée és mains de monseigneur le Conestable à la grand desplaisance de monseigneur le Comte de Neuers, frere de mondit seigneur d'Eu. Et qui apres ladiète mort cuidoit bien iouir de ladiète Comté d'Eu & des autres terres dudit deffunct, comme son vray heritier. Depuis ledit mois de Iuillet iusques au iour de Noël, ne fut riens fait audit Royaume de France: sinon que les ambassadeurs du Roy & de mondit seigneur de Bourgongne feirent plusieurs allées & venues les vns avec les autres, pour pacifier & trouuer moyen de paix & accord entre eux. En ladiète année fut mortalité commune & vniuerselle par la pluspart dudit Royaume, de maladie de flux de ventre & autres maladies, à cause dequoy plusieurs gens de façon moururent en ladiète ville de Paris & ailleurs. Audit an monseigneur de Guienne qui s'en estoit retourné dudit païs de Guienne apres le retour d'Amyens, deuint mal content du Roy: & manda venir à luy le Comte d'Armignac, qui auoit esté fugitif hors du Royaume, & duquel le Roy auoit mis sadiète Comté en sa main: lequel Côte vint par deuers mondit seigneur de Guienne:& puis mondit seigneur luy rendit la plus part de sadiète Comté contre le gré & vouldenté du Roy. En apres lesdits de Guienne & Armignac, & aussi le Comte de Foix & autres assemblerent en leur païs gens
de

de guerre, faignans de vouloir faire faire guerre au Roy: lequel pour ce leur empêcher y enuoya sur la marche dudit Guiëne cinq cens lances, & certain nombre de Francs-archiers avecques grand nombre de son artillerie, qui depuis ce y fut & seiourna par long temps: pendant lequel vint & fut nouuelles que mondit seigneur de Guienne estoit mort à Bordeaux, dont il n'estoit riens. Audit temps aussi furent enuoyées par diuerses fois de par le Roy ambassades par deuers le Duc de Bourgongne, pour le fait de la trefue d'entre eux, qui failloit le quatriesme iour de May mille quatre cens lxxij. Et y estoient encores le premier iour de May, le sire de Craon, maistre Pierre Doriolle & autres.

Comment le Pape Paule deuxiesme mua le Iubilé, & puis il mourut: & apres luy fut esleu en Pape Sixte quatriesme luy estant general de l'ordre des freres mineurs en l'an mille quatre cens lxxj. Et d'une ieune fille qui eut les playes & stigmates de nostre seigneur Iesus Christ és pieds, és mains, & en son costé.

EN ce mesme an mille cccc.lxxj. le Pape Paule deuxiesme de ce nom, qui fut Venitien & homme tenable & auaricieux: en faueur des ames l'an Iubilé qui estoit celebré de cinquante en cinquante ans, apres fut par luy mué de vingt cinq ans en vingt cinq ans: afin que sur iniquité qui habondoit au peuple, fut superhabondante la diuine grace de nostre seigneur, pour impetrer remission de noz vices & iniquitez. D'iceluy Pape Paule furent dictes plusieurs parolles non à reciter: car Dieu est le souuerain iuge, & le seul scrutateur des cueurs. Il feit commencer de construire vn grand Palais pres de l'Eglise de saint Marc à Romme: mais il mourut & trespassa faisant c'est edifice le vingt & vniesme iour du mois de Iuillet en l'an dessusdit: & auoit régné en dignité Papale l'espace de sept ans entiers. Apres le trespas dudit Pape Paule, fut eleu & luy succeda le Pape Sixte quatriesme de ce nom, en l'an que dessus. Et est à sçauoir que iceluy Pape Sixte estoit par auant dit & appelé François de Sauonne, de la prouince & region de Genes: il estoit docteur en theologie, homme bien famé & de bonnes meurs. Pourquoi luy estant general de l'ordre des freres mineurs, fut appelé & eleu dudit Pape Paule pour estre Cardinal, sans en faire aucune poursuite & hors son sceu. Et en ce mesme an Bernard Iustinian orateur de Venise, luy recita que le Turc auoit osté & rauy à la Chrestienté deux Empires, quatre Royaumes, vingt prouinces & deux cens citez: dont estoit perdu vn infiny nombre de peuple, hommes, femmes & ieunes enfans. Parquoy le prenommé orateur exhortoit ledit Pape Sixte, qu'il luy pleust soy disposer de resister à tel accident qui touche nostre sainte foy. Ledit Pape Sixte eut la cure & sollicitude de reparer la cité de Romme en plusieurs regions. Et mesmement és principales rues il feit faire & reparer vn pont dessus le Tibre, lequel anciennement estoit appelé pont Iudée: & depuis fut dit pont de Sixte. Il restaura l'hospital du saint Esprit, où sont tous les iours faictes de tresgrandes aumosnes, & misericordes aux malades & pures enfans orphelins. Luy aussi comme bon zelateur du salut des ames, ouurit moult grandement le tresor de l'Eglise sous la misericorde de Dieu, en donnant plusieurs pardons & indulgences au deuot peuple Chretien en diuerses prouinces. Et si feit plusieurs choses qui sont bien dignes de

memoire. Et au temps du regne dudit Pape Sixte, vne ieune fille vierge, adonques nouvellement conuertie, nommée Stine és parties Vvestphalie en vne ville appelée Hame, eut clerement les stigmates & playes de la passion de nostre seigneur I E S V S C H R I S T, és pieds, és mains & au costé. Et apres l'espace de quinze sepmaines de sa conuersion, enuiron la feste du Sainct Sacrement, en l'an millecccc. lxxiiij. elle monstra icelles playes veritablement deuant douze tesmoings : & leur predict que lesdictes playes & stigmates, se retourneroient d'elle deux heures apres : & que adonc ne se verroient plus, ce qui fut fait : car les lieux où estoient les playes furent adonques du tout sanées.

Des indulgences que le Roy impetra pour dire trois fois Aue Maria. Du trespas de l'Euesque de Paris : du Duc de Calabre : du feu à nostre Dame de Clery. De la mort Charles frere du Roy, pourquoy il alla en Guienne. Des trefues avec le Duc de Bourgongne. Et comment la ville de Nesle fut prinse par trahison. Et de la crudelité des Bourgongnons. Du siege & des assaux à Beauuais. De ceux d'Auxerre desconfits. D'aucunes ordonnances & refections à Paris : des charges sur le Connestable. Et des viures & biens enuoyez par ceux d'Orleans à Beauuais. En l'an mille quatre cens soixante & douze.

1472.



T ledit premier iour de May mille quatre cens lxxij. fut fait à Paris vne moult belle & notable procession en l'Eglise de Paris : & fait vn preschement bien solennel par vn docteur en Theologie, nommé maistre Brete natif de Tours : lequel dit & declaira entre autres choses, que le Roy auoit singuliere confidence en la benoiste vierge Marie : prioit & exhortoit son bon populaire manans & habitans de sa cité de Paris, que doresnauant à l'heure de midy que quand on sonneroit à l'Eglise dudit Paris la grosse cloche, chacun fut fleschy vn genouil à terre, en disant trois fois *Aue Maria* pour donner bonne paix au Royaume de France. Et apres ladicte procession faicte, reuerend pere en Dieu mōseigneur l'Euesque de Paris maistre Iean Charetier, cheut malade d'une maladie : de laquelle ce mesme iour alla de vie à trespas, dont fut grand dommage & fut fort ploré : car il estoit sainct, bonne personne & grand clerc. Et ce iour furent en son hostel episcopal grand populaire de la ville de Paris, tant hommes que femmes, pour le veoir mort en sa chappelle haulte, estant au long de la grand salle fille dudit hostel. Et illec par ledit peuple fut moult piteusement ploré, & pour son ame deuotement prié : & au partir luy baisoient les pieds & les mains, & disoient la plus part d'iceux qu'ils croyoient fermemēt, que ledit Euesque fut Sainct & bien aymé de Dieu. Et le xv. iour dudit mois de May le Roy enuoya lettres au Preuost des Marchans & escheuins & bourgeois de Paris : par lesquelles il leur faisoit sçauoir que ledit Euesque en son viuant luy auoit esté mauuais, & n'auoit pas aymé son profit : & qu'il auoit eu intelligence avec le Duc de Bourgongne & autres Princes & seigneurs, qui auoient esté deuant la ville de Paris durant le bien publicque : & que pour leur dōner faueur en icelle ville auoit suborné lesdits habitās. Et q̄ pour ces causes, & affin qu'il en fut memoire : ordōna estre faicte & mise sur son corps vn epitaphe contenāt les choses dessusdictes : lequel epitaphe fut fait faire par les dessusdits iusques à l'asseoir. En ce temps audit mois de May la trefue d'entre le Roy & le Duc

Duc de Bourgongne qui failloit au iiij.iour dudit mois, fut de rechief contenue iusques au xv.iour de Iuing ensuiuant. Audit mois de May le Duc de Calabre nepueu du Roy de Cecille & de Hierusalem, à qui le Roy auoit fait tant d'honneur de luy donner sa fille aînée en femme & épouse, s'en alla hors de sa Duché de Lorraine par deuers ledit Duc de Bourgongne, pour traicter d'auoir & espouser sa fille, en delaissant (en ce faisant) ladicte fille du Roy sa femme, qui fut chose moult estrange à luy de ainsi faulcer sa foy, & soy ainsi abaisser de delaïsser la propre fille aînée du Roy son souuerain seigneur, pour cuider auoir & prendre la fille dudit de Bourgongne subiect & vassal du Roy. Et par auant ces choses, ledit de Bourgogne auoit fait & fait faire moult de guerre au Royaume de Frâce à la faueur de mōdit seigneur de Guienne, faignant à ceste cause de luy donner & bailler ladicte fille: dont il ne fait riens: mais fait tout le contraire en abusant iceux plusieurs autres sous vmbre dudit mariage.

ET le ieudy xiiij. iour dudit mois de May mille cccc.lxxij. aduint par male fortune, que tout le comble & feste de l'Eglise nostre dame de Clery & aupres d'Orleans, que le Roy auoit fait faire & edifier de nouuel, où il y auoit moult noble & belle couuerture, tant de charpenterie de bois que d'ardoise & de plomb, fut toute arse & brouÿe, & tout tombé en bas & par terre: par ce qu'un plombreur besongnant en icelle couuerture, s'en desualala en bas & laissa le feu, où il chauffoit les fers à souder en icelle couuerture sans aucune garde: & lequel feu le vêt acueillit tellemēt, qu'il s'en vola & dispersa au long d'icelle charpenterie & couuerture, en telle façō que sans y pouoir remedier tout fut brulé & ars.

ET ce mesmes iour le Roy eut certaines nouuelles, que luy fait assauoir mōseigneur de Malicorne seruiteur & bien fort aymé de mondit seigneur de Guienne, que sondit seigneur & maistre estoit allé de vie à trespas en la ville de Bordeaux. En iceluy mois monseigneur de Craon, maistre Pierre Doriolle general des finances, maistre Oliuier le Roux conseiller & maistre des comptes, & autres ambassadeurs du Roy, par luy éuoyez par deuers ledit Duc de Bourgogne, retournerent deuers le Roy, luy relater ce que fait auoient avec luy & de la trefue qu'ils auoiēt ainsi faicte qui deuoit durer iusques audit xv.iour de Iuin ensuiuant. Durāt laq̃lle trefue, & nonobstant icelle, ledit de Bourgogne fait mettre ses gens de guerre sus les chāps, & mener & asseoir son parc & artillerie entre Arras & Bapaumes, en vn lieu qu'on nōme Hubuterne en Arthois. Et pēdāt ce temps le Roy apres les nouuelles de la mort de mondit seigneur de Guienne son frere, s'en partit du Plessis du parc lez Tours, & s'en tira au paÿs de Guiene, la Rochelle, S.Iean d'Angely, Bordeaux & autres lieux voisins: & y meit & crea officiers nouveaux de par luy. Et d'icelle Duché de Guienne fait & establit gouuerneur monseigneur de Beaujeu, frere de monseigneur le Duc de Bourbon.

APRES ces choses ledit de Bourgongne en perseuerant tousiours en ses diableries, folles obstinations & mauuaisez, comme deuant auoit fait, le ieudy xj. iour de Iuing audit an lxxij. enuoya deuant la ville de Nesle: dedans laquelle y auoit de par le Roy vn nōmé le petit Picard, qui estoit capitaine de v.cens Frācs archiers de l'Isle de France, qui estoient dedans ladicte ville. Et par grand force & violence, voulurent auoir ladicte ville & chasteau: & pour l'auoir y baillerēt & liurerent de grans & diuers assaux: ausquels Bourgongnons fut vaillamment

resisté par ledit Picard & ceux de ladicte compagnie. Et iusques au vèdredy qui estoit le lendemain xij. iour dudit mois de Iuing, que enuiron cinq heures du matin: ledit Picard en la compagnie de la Comtesse dudit lieu de Nesle, issirent hors de ladicte place pour aller par deuers le Bastard de Bourgongne & autres, ayans illec leur armée pour ledit de Bourgongne, pour cuider trouuer pacification & accord entre les gens du Roy & ledit de Bourgogne: qui traicta avec eux en telle maniere que ledit Picard & ceux de sa compagnie, s'en iroient leurs vies sauues en rendant ladicte place, & en laissant leurs biens & harnois: à quoy faire ils furent contens. Et à tant se departirent & s'en retournerent en ladicte ville de Nesle, & dirent aux dessusdits Franks-archiers leur composition: & comment ils deuoient tous laisser leurs biens, cheuaux & harnois, & eux en aller leurs vies sauues. Pour laquelle chose incontinent apres plusieurs d'iceux par l'ordonnance dudit Picard leur capitaine, se despouillerent & habandonnerent leursdits harnois. Et en ce faisant & auant qu'ils feussent bien asseurez d'auoir lettres de leurs promesses & traictes, furent par aucuns dudit lieu de Nesle mis & boutez en icelle place lesdits Bourgongnons: qui incontinent (non-obstant ladicte promesse) vindrent charger sur lesdits Franks-archiers, ainsi deshabillez sous vmbre d'icelle promesse, & plusieurs en tuerent & meurdrirent: & partie d'iceux cuidans eux sauuer s'en allerent & retrahirent dedans l'Eglise dudit lieu de Nesle, où depuis lesdits Bourgongnons allerent les tuer tous & meurdrir. Et apres qu'ils furent tous ainsi tuez & meurdrys: y suruint & sy trouua ledit de Bourgongne, qui tout à cheual entra dedans ladicte Eglise: en laquelle y auoit bien demy pied de hault de sang des pures creatures illec estans, qui à ceste heure estoient tous nuds gisans illec morts. Et quand ledit Bourgognon les vit, dit qu'il veoit moult belle chose, & qu'il auoit avecq's luy de moult bons bouchiers. Et le lendemain ensuiuant qui fut le samedi treiziesme iour dudit mois, ledit petit Picard qui estoit prisonnier avecques autres de ladicte compagnie, furent pendus & estranglez de l'ordonnance dudit de Bourgongne: & puis fait arraser ladicte place, & mettre le feu dedans. Et le dimanche quatorziesme d'iceluy mois s'en partirent dudit lieu de Nesle, & allerent deuant Roye, où estoient enuiron quatorze cens archiers de la compagnie & charge de Pierre Aubert, baillif de Meleun & de Nugnon. Et aussi y estoient pour gentils-hommes & capitaines Loiset de Balagny, capitaine de Beauuais, monseigneur de Mouÿ, le seigneur de Rubempré & autres, qui bien auoient deux cens lances bien en point. Et iacoit ce qu'ils feussent dedans ladicte ville que le Roy auoit fait réparer, bien auitailler & garnir de moult belles serpentines: ils se rendirent le mardy ensuiuant seiziesme iour d'iceluy mois à l'heure de midy, & laisserent illec ladicte artillerie, leurs cheuaux & harnois: tout habillement de guerre & toutes leurs bagues, où le Roy & eux eurent dommage de cent mille escus d'or & plus. Et s'en reuindrent tous nuds & en pourpoint vn baston en leur poing: & demoura illec ledit Duc de Bourgongne depuis par certain temps. Et d'illec s'en alla deuant la ville de Beauuais, pour y mettre le siege: où il y arriua le samedi xxvij. iour de Iuing audit an mille quatre cens soixante & douze: où de plaine venue y donnerent vn fort assault, à quoy fut fort résisté par les bourgeois manans & habitans d'icelle ville. Et celle mesme

nuict

nuiſt y arriua Guillaume de Vallée Lieutenant du Senefchal de Normandie à tout deux cens lances, qui moult bien ſecoururent ceux dudit lieu: car ils y arriuerent à l'heure du fort de leur affault: & tout incontinent monterent deſſus la muraille, & feirent reculer leſdits Bourgongnons. Et le lendemain enſuiuant y vint monſeigneur de Cruſſol, Ioachin Rouhault, la compagnie de monſeigneur de Bueil, Guerin le Groing, monſeigneur de Torcy & autres, à tout trois cens lances & autres nobles de Normandie, qui trefuaillâment ſe conduirent. Et pendant ce tēps, furent bien ſecourus de ceux de la bonne ville de Paris: tāt de pionniers, pics, pelles, farines, vins, pouldres à canon & autres habillemens & auitaillemens: qui feirent trefgrand bien auſdits gens de guerre, & aux habitās d'icelle ville. Et en ces entrefaictes y eut de belles & grādes eſcarmouches, où pluſieurs Bourgongnons eſtans deuant icelle ville furent morts & tuez.

EN ce temps aduint que aucuns des habitans d'Auxerre, faillirent hors de leur ville, pour aller courir és païs du Roy: pour prendre & mener audit lieu d'Auxerre beufs, vaches & tout ce qu'ils pourroient trouuer pour eux auitailler: & vindrent pres de Joigny, de Seignelay & illec enuiron. Contre leſquels y allerent le Baſtard dudit Seignelay, le ſeigneur de Plancy & autres iuſques au nombre de trois cens, qui vindrent rencontrer leſdits d'Auxerre, qui ſe meirent en bataille contre eux. Et quand les deſſuſdits ſeigneurs les eurent ainſi veuz, ils ſe frapperent dedans moult vigoureuſement, & y en eut huiſt vingts de morts & quatre vingts de prins. Et le demourant ſe meit en fuitte ou fut noyé. Audit temps pour raiſon de l'approchement deſdits Bourgongnons, ainſi venus à Beauuais, furent faictes à Paris de moult belles ordonnāces par ſire Denys Heſſelin Pannetier du Roy noſtre ſire Eſleu de Paris, & Preuoſt des marchans de ladicte ville: comme de faire redifier la muraille & gardes de deſſus les murs, faire faire belles & grandes tranchées, mettre en point les cheſnes, redifier les foſſez, bouleuers & barrieres des portes, en faire murer d'aucunes: faire faire de moult belles ſerpentines toutes neufues, & d'autres belles ordonnances y furent faictes. Et le ieudy ſecond iour de Iuillet vint & arriua à Paris le ſeigneur de Rubempré, qui venoit de ladicte ville de Beauuais: & apporta lettres des capitaines de ladicte ville adreſſans au ſeigneur de Gaucourt Lieutenant du Roy à Paris, aux Preuoſt des marchans & eſcheuins de ladicte ville de Paris: par leſquelles leur eſtoit fait ſçauoir, que le Duc de Bourgongne & ceux de ſon oſt eſtoient en telle neceſſité de viures, qu'un pain de deux deniers à Beauuais valoit audit oſt trois ſols parisis. Et que iceluy Duc de Bourgongne auoit intention de iouer au deſeſpoir, & auoir ladicte ville pour y perdre la plus part de tous ſes gens. Et pource prioient auſdits de Paris qu'on leur enuoyaſt de la menue artillerie, des arbaleſtriers, du traiſt & des viures: laquelle choſe fut faicte & enuoyée à eux par le baſtard de Rochouart ſeigneur de Meru, qui y mena & conduiſt les ſoixante arbaleſtriers de Paris avec traiſt, arbaleſtres, artillerie & viures. Et le ieudy neufieſme iour dudit mois de Iuillet, enuiron l'heure de ſept heures au matin, apres que ledit de Bourgongne eut fait ietter grand nombre & quantité de Bombardes, & autres artilleries contre les murs de ladicte ville, à l'endroit de la porte de l'hoſtel Dieu: vindrent & accoururent dedans les foſſez de ladicte ville grand quantité deſdits Bourgōgnōs,

qui y apportèrent grand nombre de bourrées, clayes & autres mefrain dedans lesdits fossez: & puis y dresserent eschelles, & moult vigoureusement assaillirēt à l'endroit de la muraille, & portail dudit hostel-Dieu: dont auoit la garde & charge messire Robert d'Estouteuille cheualier, seigneur de Beine & Preuost de Paris, qui moult honnorablement & vaillamment si contint & ceux de ladicte compagnie. Et dura ledit assault depuis ladicte heure de sept heures iusques apres vnze heures: durant lequel temps y eut grande quantité de Bourgongnōs ruez & abbatus morts de dessus lesdits murs dedans les fossez d'icelle ville: & de naurez grand nombre, & bien iusques au nombre de quinze à seize cens hōmes. Et plus largemēt y en eut eu de morts, si y eut eu saillie à istre hors d'icelle ville. Mais toutes les portes d'icelle estoient murées du costé de l'ost desdits Bourgongnons: pourquoy ne se peut faire ladicte saillie: dont furēt moult dolans les nobles seigneurs, capitaines, gens d'armes & de traict, qui estoient dedans icelle ville en bien grand nombre: comme de quatorze & quinze mille combattans: dont auoit la charge & conduicte le Comte de Dampmartin, Ioachin Rouhault Marechal de France, Sallezart, Guillaume de Vallée, Mery de Coué, Guerin le Groing, les sire de Beine & de Torcy freres, & plusieurs autres gentils-hommes de conduicte, & grand façon. Et durant ledit assault moyennant la grace de Dieu ne fut point tué des gens du Roy plus de trois ou quatre personnes, & encores disoit on que ce auoit esté par leur outrage. Et au regard de toute l'artillerie, qui fut tirée par lesdits Bourgongnons durant le temps en icelle ville iusques au neufiesme iour de Iuillet, n'en fut tué plus de quatre personnes. Et le lendemain dudit assault enuiron le poinct du iour, fut de rechief enuoyé par ledit sire Denys Hesselin Preuost des Marchans audit lieu de Beauuais grand quātité de traict, & arbalestres & des cordes pour y seruir des poudres à canon & couleurine, & des chirurgiens pour penser & guerir les blesez en iceluy lieu.

Et le samedi xxj. iour dudit mois de Iuillet au matin, fut tiré hors des prisons du chastellet de Paris vn messagier de l'hostel du Roy, qui auoit esté constitué prisonnier esdictes prisons, pour ce qu'il auoit dit & publié au Palais & autres plusieurs lieux de ladicte ville de Paris, que monseigneur le Connestable auoit tiré dudit lieu de Beauuais aux champs les capitaines estans dedans icelle, faignant d'auoir conseil avecques eux: à sçauoir qu'il estoit de faire pour la seurté & deffence d'icelle ville. Et que ce pendant qu'il tenoit ledit conseil, lesdits Bourgongnons furent auitaillez en leur ost de grand quantité de viures: à quoy eut esté fait faire resistance par lesdits capitaines si n'eut esté ledit conseil. Desquelles parolles ainsi dictes par ledit messagier, qui sonnoiet mal à la charge de mondit seigneur le Connestable: & que de ce se tint fort à mal content, fut ledit messagier baillé & deliuré par l'ordonnance du Roy à maistres Milles Huissier d'armes de son hostel, qui le mena & conduict par deuers ledit Connestable: & si luy porta les charges & informations qui faictes auoient esté desdictes parolles. Et le vendredy dixiesme iour dudit mois, qui fut le lendemain dudit assault par vne trenchée qui fut faicte pour istre hors dudit lieu de Beauuais: Sallezart & autres de sa compagnie entrerent dedans le parc d'iceluy de Bourgongne enuiron le poinct du iour: où furent tuez tous les Bourgongnons qu'ils

qu'ils rencontrerent. Et en iceluy parc y furent brulées trois tentes, & tout ce qui estoit dedans: & en vne d'icelles y furent tuez deux hōmes de grand facon, iacoit-ce qu'ils promettoient de payer moult grād finance: & pource qu'en iceluy ost fut fait grād cry & noise, en criant viue Sallezart: lesdits de l'ost s'assemblerent en bien grād nombre, parquoy il conuint audit Sallezart se retraire audit lieu de Beauuais: & en se retrayant & ceux de sa compagnie, en emmenerent avecques eux de bien belle artillerie: comme deux des chambres des bombardes, qui auoient battu & iecté en bas la muraille de ladicte ville: lesquelles chambres pour cause de hastiueté, ils iecterent dedans les fossez. Et si bouterent dedans ladicte ville deux bien belles Serpentes, avecques vn gros canon de cuire nommé l'vn des douze Pers, que le Roy à la iournée au rencōtre de Montlehery y perdit. Et fut ledit Sallezart suiuy de bien pres & fort battu & nauré, & son cheual aussi nauré de plusieurs coups de picques de Flamens & autres: non obstant qu'il le reporta iusques audit lieu de Beauuais, où ledit cheual mourut incontinent qu'il y fut arriué: & depuis ladicte saillie n'aduint audit ost guerres de choses iusques au xxj. iour dudit mois de Iuillet, que les bourgeois manans & habitans de la ville d'Orleans enuoyerent, & feirent passer parmy la ville de Paris la quantité de cent tōneaux de vin du creu dudit lieu d'Orleans, qu'ils enuoyoient & donnoient ausdits seigneurs & gens de guerre estans audit Beauuais, pour les raffreschir & ayder à bien besongner à l'encontre desdits Bourgonnons. Et si leur enuoyerent encores grand quantité de trousses de flesches & arcs, artillerie arbalestres & des pouldres à canon: & pour conduire les choses dessusdictes, y estoient en personne aucuns bourgeois dudit lieu d'Orleans, pour faire le present ausdits seigneurs & gens de guerre, estans audit Beauuais de par icelle ville d'Orleans.

Des monstres refaictes à Paris. Et comment le Duc de Bourgogne se partit honteusement de son siege deuant Beauuais. De l'armée du Roy en Bretagne: Et des honteux faits dudit Bourgonnon en Normandie. Des Francois qui reprindrent Eu: du Comte d'Eu Daulphin contre le Comte de Roussi: comment la Royne accoucha d'un autre fils qui fut Duc de Berry: de monseigneur de Beauieu trahy du Comte d'Armignac, & ce qui en fut fait à Lestore fut reprins & ledit Comte d'Armignac tué: du Roy d'Arragon qui s'enfuit de Parpignan: le Duc d'Alencon fut prins prisonnier: comment le Roy alla à Bordeaux & du fils du Comte d'Albret decapité à Poictiers.

EN ce temps furent faictes les monstres en la ville & cité de Paris, par les manans & habitans d'icelle par chacune dizaine & quartiers de ladicte ville. Tous lesquels y furent en armes, & par moult belle ordonnance. Lesquelles monstres furent veües & receües par le seigneur de Gaucourt lieutenant pour le Roy en ladicte ville de Paris, maistre Ieā de Ladriesche President des Comptes, de sire Denys Hesselin Panetier du Roy Eleu sur le fait des aydes, & Preuost des Marchans de ladicte ville: lesquelles monstres il faisoit moult beau veoir, & plus eut fait se les arbalestriers, couleuriniers, gens prins és bannieres & autres gens de guerre en grand nombre, enuoyez de ladicte ville audit lieu de Beauuais y eussent esté. En ce temps fut mis en termes qu'encores seroit prins parmy ladicte ville, iusques au nombre de

trois mille combattans, qui seroient armez & souldoyez de par ladicte ville, ceux de Parlemēt, de Chastellet, la chābre des Comptes, la chambre des Monnoyes, le Chancellier Maistres des Requestes, les Eleuz & autres qui sembla estre moult grand charge aux habitans d'icelle, veu le grand nombre de gēs que desia on auoit enuoyé audit Beauuais. Et qu'aussi ladicte ville en demourroit moult affoiblie. Et furent ces choses moult honnorablement remonstrées par ledit sire Denys Hesselin aux capitaines, estans audit Beauuais: qui desdictes remonstrances se tindrent à bien contens & se contenterent de ce qu'il leur auoit esté enuoyé, sauf qu'ils prièrent qu'encores on leur menast cent arbalestriers & couleuriniers, ce que fait ladicte ville. Et depuis le mercredy feste de la Magdalaine enuiron l'heure de trois heures de matin, ledit Duc de Bourgongne honteusement se deslogea de son ost, & s'en partit: & s'en alla sans autres chose faire, sinon que durant l'espace de xxvj. iours entiers qui fut deuant ladicte ville, il ne cessa de faire iecter son artillerie contre ladicte ville nuit & iour, qui peu ou neant greuerent icelle ville, ne les habitans d'icelle. Et y donna & fait donner deux grās & merueilleux assaulx, ausquels y furent tuez & meurdri bien grand nombre de ses gens de guerre des plus grās qu'il eut en sa compagnie. Et si perdit durant iceluy temps grand quantité de son artillerie, que ceux de la garnison d'Amyens pour le Roy gaignerent dessus lesdits Bourgongnons. Et depuis ledit partement desdits Bourgongnons, ils s'en allerent boutās les feux és bleds & és villages par tout, où ils passoient: & vindrent deuāt S. Vvalery lez le Crotoy, qui leur fut rendu par ceux de dedans: pource qu'ils n'estoient pas assez gēs, & que la place n'estoit point de tenir contre sa puissance. Et apres s'en alla à Eu, qui pareillement luy fut rendue pour les causes que dessus. Et le mercredy xxix. iour de Iuillet, monseigneur le Connestable, monseigneur le Grand maistre & autres capitaines, qui estoient dedans la ville de Beauuais accompagnez de huit cens lances, se partirent dudit lieu pour eux tirer au païs de Caux vers Arques & Monstieruillier: pour estre au deuant desdits Bourgongnons, qu'ils supposoient qu'ils y deuoient aller, ce que firent lesdits Bourgongnons. Et allerent mettre & asseoir leur parc entre ladicte place d'Eu & Dieppe, en vn village nommé Ferrieres. Et illec depuis il seiourna bien grand piece sans riens conquerir, sinon le neuf Chastel de Nicourt, où ils se boutterent: pource que dedans n'y trouuerent aucun qui leur contredist, & y furent par l'espace de trois iours, puis s'en allerent: & au partir y bouterent le feu & bruslerent la ville & chastel, qui fut vn moult grand & piteux dōmage: car c'estoit vne moult belle ville de guerre & grande. Et en apres fait mettre & bouter ledit Bourgongnō le feu à Lōgueuille, au Fahy & autres plusieurs lieux & villages du bailliage de Caux, que pour tout son vaillant n'eut sceu reparer. Et plus ne autre vaillance ne fait que de bouter lesdits feux, depuis son partemēt de ses païs, iusques au premier iour de Decembre quatre cens lxxij. Durant ces choses le Roy qui estoit en Bretagne à tout plus de cinquante mille combattans, ne fait que peu ou rien: pource qu'il fut mené de belles parolles & par ambassades, au moyen dequoy il cuidoit auoir bonne pacification & accord avecques ledit Duc de Bretagne, sans effusion de sang ne perdition de ses gēs de guerre, que tousiours il a fort craint plus sans comparaison que ledit de Bourgongne: qui estoit trop
cruel

cruel & plain de mauuaise obstination, ainsi qu'en son temps l'a bien monstré & monstroit chacun iour. Et apres que ledit Duc de Bourgongne fut retourné dudit païs de Caux, où ainsi auoit bouté les feux, comme dit est: Et que deuant Arques & Dieppe fut si vigoureulement recueilly & battu luy & ses gens, s'en partit d'iceluy païs & delibera de s'en aller deuant la bonne ville & cité de Roüen, où plus que deuant fut bien receu. Et tellement qu'au moyen des failles & grans vaillances, que feirent sur luy ceux de dedans, luy conuint soy en retourner bien honteusement, & à sa grand perte vers Abbeuille: & feit courir lors le grand bruit de mettre le siege deuant la ville de Noyon, & icelle auoir par force. A quoy luy fut bien resisté par le sire de Crussol, & autres vaillans capitaines pour le Roy: qui se vindrent loger dedans & qui la fortifierét d'engins, de viures & autres choses pour repulser sa damnée fureur: mais vn grand mal fut fait par son moyen, car lesdits capitaines pour estre & demourer plus seurs en ladicte ville, feirét brusler & abbatre les faulxbourgs d'icelle ville, pour garder d'y loger lesdits Bourgongnons qui n'y vindrent point.

A V D I T temps messire Robert d'Estouteuille cheualier Preuost de Paris, qui estoit dedans la ville de Beauuais avecques les nobles de la Preuosté & Vicomté de Paris, & certain nombre de francs archiers s'en partit dudit lieu de Beauuais, & s'en vint loger és faulxbourgs de la ville d'Eu du costé d'Abbeuille. Et ce mesme iour aussi arriua d'autre costé esdits faulxbourgs du costé de Dieppe, monsieur le Mareschal Ioachin: lesquels incontînét enuoyerent sommer les Bourgongnons qui estoient dedans, & tels effrois leur feirent les gens du Roy, qu'ils prindrent composition qui estoit telle qu'ils s'en allerent tous, & si rendirent ladicte ville: c'est à sçauoir les cheualiers chacun sur vn petit courtault: Et tous les autres Bourgongnons qui estoient bien cent & plus, s'en allerent chacun vn baston en leur main: & laisserent tous leurs habillemens, biens & cheuaux & si payerent dix mille escus: & puis ne demoura gueres que lesdits Ioachin & d'Estouteuille, eux & leurs gens s'en allerent deuant la ville de S. Vvalery, qu'ils eurent par semblable condition, & payerent six mille escus. Et puis s'en allerent à Rembures vn bien bel & fort chasteau, où dedans estoient aucuns Bourgongnons, qui vindrent au deuât dudit d'Estouteuille & Ioachin: ausquels ils rendirent ledit chastel, moyennant que lesdits Bourgongnons s'en allerent eux & leurs bagues sauues. En ces entrefaictes aucuns tenans le party dudit de Bourgongne: comme le Comte de Rouffi fils dudit Connestable & autres de leur party, tindrent les champs au païs & marche de Bourgongne: & se vindrent espandre & loger en la Comté de Tōnerre, où ils ne trouuerent aucune resistance. Et en gastant & destruisant païs, vindrent iusques à Ioigny, qui fut fort secouru par les gens du Roy & ne l'eurent point. Et puis s'en allerent vers Troyes boutans feux és granches & villages, & autre vaillance ne feirent. Et pendant qu'ils faisoient tels maulx, semblablement le faisoiet le Comte Daulphin d'Auuergne, & autres nobles hommes de sa compagnie au païs de Bourgongne pour le Roy: où ils meirent & bouterent aussi le feu en plusieurs des villes, villages & lieux dudit de Bourgongne. Et y feirent du dommage irreparable: mais c'estoit pour reuenger de ce que ledit Bourgongnon auoit fait sur les villes, païs & subiects du Roy comme mauuais qu'ils estoient à leur vray &

souuerain seigneur. Au mois de Septembre ensuiuant le Roy qui auoit esté par certain temps au païs de Bretaigne, fait trefue & abstinéce de guerre: en laquelle trefue estoient comprins les amis & alliez de Bretaigne: lesquels il declaira estre ledit Duc de Bourgongne, qui aussi print & accepta la ladicte trefue. Ledit temps durant aussi pour luy, ses amis & alliez qu'il declaira estre l'Empereur d'Allemagne, les Roys d'Angleterre, Escocce, Portugal, Espaigne, Arragon, Cecille & autres Roys iusques au nôbre de sept: & plusieurs autres Ducs & grans seigneurs. En ce temps accoucha d'un fils la bonne Royne de France qu'on appella monsieur de Berry, qui ne vesquit gueres.

V E R S la fin du mois d'Octobre aduint que monseigneur de Beauieu, frere de monseigneur le Duc de Bourbon, qui estoit allé par l'ordonnance du Roy au païs d'Armignac, comme gouuerneur de Guienne: lequel estoit bié accompagné de grans seigneurs & nobles hommes, luy estant dedans la ville & cité de Lestore audit païs, fut par trahison prins & mis és mains dudit Comte d'Armignac, lequel au moyen d'icelle prinse recouura ladicte cité. Et puis apres icelle prinse, ledit d'Armignac deliura plusieurs des seigneurs estans avec ledit seigneur de Beauieu, qui depuis furent prins & de par le Roy: pource qu'il auoit suspicion qu'ils eussent esté cause de la prinse dudit seigneur de Beauieu, & furent menez plusieurs au chasteau de Loches. Et de ladicte prinse dudit de Beauieu fut le Roy moult dolant. Et pour le r'auoir, enuoya deuant icelle cité de ses gens de guerre & artillerie en grand nombre: & luy mesmes alla iusques à Poictiers, à la Rochelle & au païs d'environ: & y estoit le iour S. Andry audit an lxxij. & puis s'en retourna à Angiers. Et à cause de ladicte prinse y eut vn gentil homme seruiteur dudit monsieur de Beauieu, nommé Iean Deymer, qui estoit prisonnier audit lieu de Loches: lequel fut escartellé en la ville de Tours, pource qu'il cōfessa auoir esté trahistre au Roy, & à son dit maistre. Et à l'heure qu'il d'eust mourir, parla moult honnorablement & publiquement deuant tous dudit seigneur de Beauieu: En disant par luy qu'il estoit bon & loyal, & qu'il n'auoit riens sceu de ladicte trahison: mais d'icelle en chargea fort le Cadet d'Albret seigneur de sainte Basille: auquel ledit de Beauieu auoit eu grand confidence: pource qu'il auoit esté nourry, & eu moult de biens en la maison de Bourbon. Apres ces choses le Roy seiourna longuement en Poictou, & vers les marches de Bretaigne: & tant y demoura qu'appoinctement se fit entre le Roy, & le Duc de Bretaigne: dont de ce faire se mella fort Oudet de Rie seigneur de l'Escun, à qui le Roy à ceste cause fit de grans biens: & par auant luy en auoit aussi fait, & en faisant ledit appoinctement, le Roy bailla & deliura audit Duc de Bretaigne la Comté de Monfort, & certaine somme de deniers. Et apres ledit accord ainsi fait, fut enuoyé par ledit Duc de Bretaigne le faire fortifier & sçauoir par ses ambassadeurs au Duc de Bourgongne. Et pour r'auoir de luy les scelez que ledit Duc de Bretaigne luy auoit baillez en faisant l'alliance d'entre eux. Au mois de Feurier audit an cccc.lxxij. le tiers iours dudit mois: aduint sur le poinct de six heures au soir, que le temps estoit fort doux & chault qui descendit du ciel deux grans clartez comme deux chandelles, passant deuant les yeux des regardans, qui sembloit estre fort espouëtable: & en issoit moult grād clarté, mais ce ne dura gueres. Le septiesme iour dudit mois de Feurier monsieur

sieur l'Euesque de Paris fils de mōsieur de la Forest, feit son entrée cōme Euesque de ladicte ville, & y eut grande solennité gardée à son entrée. Et apres le seruice fait en la grand Eglise, donna à disner aux gens d'Eglise, Vniuersité, Parlement, chambre des Comptes, Generaux, Maistres des Requestes, Secretaires, Preuost des Marchans, escheuins & bourgeois de ladicte ville bien & honnorablement. En ce temps fut tirée de la ville de Lestore vne grosse serpentine en l'ost des gens du Roy, estās deuant: laquelle d'un seul coup tua le maistre de l'artillerie du Roy, & quatre autres canonniers. Audit temps fut prins prisonnier le Duc d'Alençon par messire Tristan l'Ermite Preuost des Mareschaux, & mené deuers le Roy pour occasion de ce qu'on disoit, qu'il s'en estoit party de ses païs, cuidant s'en aller par deuers ledit de Bourgongne, pour luy vendre & deliurer toutes ses terres & seigneuries qu'il auoit au païs du Perche & Normandie, avecques ladicte duché d'Alençon.

A v mois de Mars ensuiuant mille quatre cens septante deux le vendredy cinquiesme iour, le Comte d'Armignac estant dedans ladicte ville de Lestore: & qui audit iour auoit composition faicte avecques le Roy par le moyen de messire Yues du Fau, que le Roy auoit enuoyé par deuers ledit d'Armignac pour ceste cause: affin de soy en vider dudit lieu de Lestore, luy, sa femme & seruiteurs leurs vies sauues: fut ledit d'Armignac tué & meurdry par les gens du Roy, qui par assault entrerent en icelle ville: pource que ledit d'Armignac, non obstant son dit appoinctement, en allant à l'encontre voulut tuer & meurdrir aucuns des gens du Roy, qui entrerent en icelle ville, sous & couleur dudit traité: lesquels quand ils veirēt que ledit d'Armignac les voulut ainsi traicter, crièrent aux tenans illec le siege, qu'ils les voulsissent secourir ce qu'ils feirēt: & vindrent assaillir ladicte ville à l'endroit où elle auoit esté battue: & par là entrerēt dedans, le Seneschal de Limosin & autres en grand nombre & tels, qu'ils tuerēt ledit d'Armignac, toutes ses gens & tous les habitans de ladicte ville de Lestore: tellement que de tous n'en demoura que la Comtesse d'Armignac, & trois femmes, & trois ou quatre hommes que tout ne fut tout meurdry & tout pillé. Et partant mōsieur de Beauieu & les autres seigneurs & gentils-hōmes, que ledit d'Armignac tenoit prisonniers au lieu de Lestore, furent deliurez & s'en vindrēt deuers le Roy. Et des choses dessusdites en apporta nouuelles au Roy vn des cheuaucheurs de son escuyrie, nommé Iean d'Auuergne: dōt le Roy fut moult ioyeux. Et pour ceste cause le feit & crea son herault, & si luy donna cēt escus d'or. Et aussi entra dedans ladicte ville le Cardinal d'Arras, qui moult vaillamment s'estoit porté deuāt icelle, en y tenant le siege pour le Roy. Et apres fut toute ladicte ville arse & tout iecté dedans les fossez. Et pour la desconfiture dudit lieu de Lestore & dudit d'Armignac, en alla la nouuelle au Roy d'Arragon, qui estoit à Parpignan, lequel pour la cause dessusdicte, & aussi qu'on luy apporta que Philippe mōsieur de Sauoye s'en alloit à luy pour luy faire guerre & recouurer ladicte ville de Parpignan, qu'il auoit prinse sur le Roy, & venoit illec à tout grand compagnie de gens de guerre: tant des païs de Sauoye, du Daulphiné que d'Armignac, s'en alla & departit dudit Parpignan & se retrahit en autres lieux ses païs. Et puis le samedi matin xiiij. iour du mois de Mars à l'heure de six heures, le Roy qui estoit au Plessis du Parc iadis nommé les Mon-

tiz lez Tours, s'en partit à priuée compagnie & s'en alla à Bordeaux & à Bayonne. Et affin que homme viuant autres que ceux, qu'il auoit ordonnez ne le suivissent n'allassent apres luy: fait tenir toutes les portes de Tours fermées depuis ladicte heure iusques à dix heures sonnées, & fait rompre vn pôt pres dudit lieu de Tours, par où il estoit passé: affin que homme ny passast: & fait illec aussi demourer monseigneur de Gaucourt capitaine des gentils-hommes de sa maison, affin que personne n'allast apres luy.

Et le mercredy septiesme iour d'Auril auāt Pasques audit an septāte deux, le Cadet d'Alebret fils du Comte d'Alebret, qui auoit esté avec mōdit seigneur de Beauieu audit lieu de Lestore: & qui auoit trahy & baillé ledit seigneur au Comte d'Armignac, fut iceluy Cadet prins prisonnier audit lieu de Lestore apres la mort dudit d'Armignac, & amené en prison à Poictiers, où illec fut fait son proces & condamné à estre decapité: lequel y fut ledit iour de mercredy Auril septiesme. Et incontinent qu'il eut le col couppé fut son corps & sa teste mis en vn sercueil, couuert d'un poille armoyé à ses armes. Et fut porté ledit corps enterrer par les quatre mendians dudit Poictiers, & luy fut fait vn moult beau seruice. Audit mois d'Auril fut fait de rechief trefue entre le Roy & le Duc de Bourgongne iusques à vn an prochain ensuiuāt, qui fineroit l'an lxiiij.

Du siege deuant Parpignan: & comment le Duc d'Alencon fut detenu prisonnier au Louure: de la mort du Duc de Calabre: de l'execution d'un nommé Iean Hardy qui voulut empoisonner le Roy: d'un nouuel edict dudit Roy enuers les gensdarmes, & sur les monnoyes. D'une ambassade du Roy d'Arragon & autres plusieurs choses faictes en l'an mille cccc.lxxiiij.

1473.



'An mille quatre cens soixāte & treize enuiron la fin d'Auril, aduint que le Roy d'Arragon fait entreprinse sur la ville de Parpignan. Et la print sur mōseigneur du Lau, qui en auoit la garde & la charge: mais le chasteau demoura au Roy & à ceux qui dedans estoient, & le tindrent depuis ladicte ville prinse bien longuement. Et iusques la conquēte faicte dudit lieu de Lestore, qu'apres icelle le Roy en enuoya son armée deuant ladicte ville de Parpignan: deuant laquelle ils meirent le siege & y assiegerent ledit Roy d'Arragon, & son fils. Et avec les nobles seigneurs, capitaines & Seneschaux de ladicte armée y estoit aussi monsieur le Cardinal d'Alby, qui moult bien & sagement s'y gouerna. Et deuant icelle ville tindrent le siege longuement: & iusques au mois de Iuing que le Roy y enuoya de rechief pour reconforter ladicte armée quatre cens lances, prinse à Amyens & autres villes voisines: & si y enuoya grand quantité d'artillerie & canonniers. Au mois de Iuing audit an mille cccc.lxxiiij. le Duc d'Alençon que ledit Roy auoit fait prendre & mener prisonnier à Loches, fut mené à Paris au chasteau du Louure: & y arriua le mercredy veille du S. Sacrement xvj. iour dudit mois de Iuing à l'heure d'entre neuf & dix heures au soir à l'arche de Bourbon, où il descendit illec des bateaux qui l'auoient amené de Corbeil: & estoient à le conduire monsieur de Gaucourt, le sire de la Choletiere maistre de l'hostel du Roy: & avecques ce en leur compagnie y estoient cinquante archiers de la garde & xxiiij. gentils-hommes de l'hostel du Roy: lesquels apres que leurdit seigneur eut esté mis ou bou-

té

ré audit chasteau du Louure, s'en retournerent deuers le Roy, & le laisserent en la garde dudit seigneur de la Choletiere & des archiers de ladicte ville de Paris: & est assçauoir que le iour qu'il arriua fut mené loger en la rue S. Honnoré à l'enseigne du Lyon d'argent. Et ledit iour dudit Sacrement apres soupper aussi à ladicte heure d'entre neuf. & dix heures au soir, fut mené & conduit ledit seigneur audit chasteau du Louure. Et apres que ledit siege eut esté longuement tenu deuant ladicte ville de Parpignan: aduint que les gens du Roy au moyen de la grande & extreme chaleur, qu'ils auoient & souffroient illec: & aussi que ils auoient grand souffrete de viures, prindrent trefues lesdits de Parpignan, & eux vn peu de temps: pendant lequel chacun s'auitailla & appoincta de ce que besoing leur estoit: & en ces entrefaictes y furent enuoyez grand quantité de gens de guerre: & pour y remettre le siege & fournir de viures ledit ost, le Roy enuoya monsieur de Gaucourt, maistre Iean Bourré, & le changeur du tresor: pour prendre viures & les payer par tout où recouurer en pourroiet, pour mener audit Parpignan. Durant ce temps & au mois de Iuillet quatre cens septante trois, mourut vn des enfans du Roy nommé monsieur François de France Duc de Berry, dõt le Roy porta moult grād dueil: & fut par l'espace de six heures au chasteau d'Amboise que hõme ne parloit à luy. Audit mois de Iuillet le Duc de Calabre mourut de pestillence à Nancy en la Duché de Lorraine. Et incontinent apres son trespas fut nouuelles qu'vn Alemant, qui auant son trespas auoit la conduicte de l'armée dudit de Calabre print prisonnier le Comte de Vaudesmons heritier de ladicte Duché de Lorraine, à l'adueu & faueur du Duc de Bourgongne: pour laquelle cause & affin de r'auoir leur Comte de Vaudesmons, fut prins pour marque en ladicte ville de Paris, vn ieune fils escollier neveu, de l'Empereur d'Allemaigne. Audit mois de Iuillet fut ordonné vn grand conseil estre tenu en la ville de Senlis, entre les gens du Roy & ceux du Duc de Bourgongne pour appoincter sur les differens d'entre eux. Et y enuoya le Roy de son costé le Comte de Dampmartin, qui y feit de grans pompes, monsieur le Chancelier, mōsieur de Craon, mōsieur le premier President de Parlemēt, maistre Guillaume de Serisay greffier ciuil d'icelle court, & maistre Nicolle Bataille aduocat en ladicte court: lesquels y seiournerent par longue espace de temps & iusques au iour de my-Aoust dudit an lxxij. sans aucune chose faire.

En ce mesme temps le Duc de Bourgongne meit sus son armée, & s'en alla à la Duché de Gueldres, pour la subiuguer & mettre en ses mains. Audit mois d'Aoust le dimēche huictiesme d'iceluy, le Roy estant dedans le chasteau d'Alençon qui s'en alloit hors d'iceluy, aduint que par grād defortune ainsi qu'il isoit hors du chasteau d'iceluy lieu, cheut dessus luy dessus l'vne de ses manches vne grosse pierre de faix, dont & dequoy il fut en moult grand dāgier de sa personne: duquel dangier Dieu & la benoiste Vierge Marie & tous les saincts & saintes de Paradis, à la grace de laquelle il estoit moult enclin, en fut garenty & hors iecté. Audit mois d'Aoust le conseil du Roy, qui estoit en la bonne ville de Senlis avec les ambassadeurs de Bourgōgne & Bretagne: & qui auoiet seiourné longuement, s'en departirent & s'en alla & retourna chacun en son lieu sans riens faire de la matiere, pour laquelle ils estoient allez. Et au regard du fait & dispositiō du temps de ladicte année, l'Esté fut moult chault: & par especial de-

puis le mois de Iuing iusques au premier iour de Decembre : & plus chault & ardent qu'onques n'auoit esté veu d'aage d'homme lors viuant : & à ceste cause furent les vins chauds & ardans, & plusieurs d'iceux deuindrent aigres & puans : & en fut grand quãtité de perdus iectez par les rues, & ne fait point de froid ne ne gella point qu'il ne fut la chandeleur passée. En ce temps pource qu'il estoit bruit que les Bourgongnons tiroient vers Lorraine & Barrois : le Roy y enuoya cinq cens lances sous la conduite de mōseigneur de Craon, qu'il fait son lieutenant general : & enuoya les nobles de l'Isle de France, de Normandie & les francs archiers, qui furent logez en diuers lieux au païs de Champaigne, & y demourerent plus de deux mois. Et puis s'en retourna chacun en sa maison sans riens faire. Audit temps ledit Bourgongnon amena l'Empereur d'Allemagne iusques à Luxembourg : Et ledit Empereur dedans la ville de Mets, pour les enhorter de bouter ledit de Bourgongne en ladicte ville, ce qu'ils ne voulurent pas faire. Et s'en retourna ledit Empereur audit de Luxembourg, & d'illec s'en retourna en Allemagne. En ce temps ledit de Bourgongne enuoya à Venize, pour emprunter de l'argent aux Veniciens : & de celuy argent en souldoyer six cens lances du païs pour le tēps de trois mois. Et passerent par la Duché de Milan, & s'en vindrent ioindre au hault païs de Bourgongne avecques les subiects dudit Duc : pource qu'ils n'estoient pas assez forts pour greuer l'armée du Roy, qu'il auoit fait loger sur les marches dudit Duc de Bourgongne. Audit temps le Roy maria son aînée fille que par auant il auoit promise au feu Duc de Calabre, à monseigneur de Beauieu frere de monseigneur le Duc de Bourbon. Audit temps les Bourgongnons par trahison & emblée entrerent au païs de Niuernois, & y prindrent des places de monseigneur de Neuers, comme la Roche, Chastillon & autres. Audit temps se rassemblèrent à Compiengne les ambassadeurs du Roy qui au parauant auoient esté assemblez à Senlis, cuidant y trouuer l'ambassade de Bourgongne, qui auoient promis y venir : lesquels feirent longuement attendre lesdits ambassadeurs du Roy : lesquels s'en retournerent à Paris, pource que lesdits Bourgongnons ny venoient point. Et puis encores y retournerent le mois de Ianuier, & y estoient le quinzième iour dudit mois. En ce temps fut nouuelles que ledit Duc de Bourgongne voyant qu'il n'auoit pas puissance de paruenir à destruire le Royaume de France, ainsi que grand peine y auoit mis : conspira avecques vn nommé maistre Ythier Marchant, qui auoit esté seruiteur de monseigneur de Guienne : & avecques vn nommé Iean Hardy seruiteur dudit maistre Ythier, qui s'en estoient retirez apres ledit trespas dudit de Guienne deuers ledit de Bourgongne, de trouuer moyen de faire mourir & empoisonner le Roy : de laquelle chose faire ledit Hardy print à luy la charge. Et pour ce faire & accomplir, luy furent baillez les poisons en luy promettant faire moult de biens : & de luy donner cinquante mille escus, pour distribuer à celuy ou ceux qui feroient ladicte execution. Et si fut deliuré argent audit Hardy, pour faire ses despens en la poursuite : lequel Hardy fol non ayant Dieu deuant les yeux, & non voulant cognoistre que se ladicte execution eut esté accomplie (où Dieu à bien pourueu) tout le tresnoble Royaume de France estoit du tout perdu & destruit : s'en partit & tira là où le Roy estoit. Et pour mettre sa damnée entreprinse à execution (&

non

non cognoissant que le Roy l'auoit recueilly & donné grand argent) s'adressa à vn des seruiteurs du Roy, ayant la charge en sa cuisine de faire saulces : & auquel ledit Iean Hardy auoit eu cognoissance, durant que ledit Saulcier & Hardy auoient esté en l'hostel & au seruice de mondit seigneur de Guienne. Et declara ledit Hardy de ladicte entreprinse, en luy promettant vingt mille escus, ou cas où il vouldroit faire & accomplir ladicte charge, qui luy presta l'oreille, & dit qu'il n'y pourroit riens faire sans le moyen de Colinet Queux du Roy: & qui aussi auoit esté & demouré auecques ledit Hardy & Saulcier en l'hostel dudit seigneur de Guiene: En disant par ledit Saulcier à iceluy Hardy qu'il parleroit audit Queux, & y feroit ce qu'il pourroit. En disant outre audit Hardy qu'il luy deliurast lesdictes poisons, pour les môstrer audit Queux. Et bien tost apres ledit Saulcier & Colinet, qui de ce auoient parlé ensemble en allerent aduertir le Roy, dont il fut moult esbahy & espouenté. Et dudit aduertissement furent lesdits Queux & Saulcier moult honorablement & prouffitablement guerdonnez du Roy. Et en toute diligence fut ledit Iean Hardy suiuy qui s'en retournoit deuers Paris : & fut prins vers Estampes & remené deuers le Roy, qui l'interroqua ou il feit interroguer sur les choses dessusdictes, & icelles luy confessa estre vrayes. Pourquoy & affin d'y donner le iugement, ordonné estre fait en pareil cas. S'en partit le Roy d'Amboise & s'en vint à Chartres, Meulanc, Creil & autres lieux és marches de Beauuoisin. Et apres luy estoit mené ledit Hardy en vne basse charrette, où il estoit moult bien enfermé de gros fers & enchesné: & le conduisoit Iean Blosset escuyer, capitaine de cent archiers de la garde de monseigneur le Daulphin : & auoit auecques luy cinquante desdits archiers tousiours estans autour de ladicte charrette. Et ainsi accompagné que dit est, fut ledit Hardy enuoyé à Paris, pour estre deliuré au Preuost des Marchans & escheuins de ladicte ville: & y fut mené, & y arriua le ieudy vingtiesme iour de Ianuier quatre cens soixante & treize, enuiron l'heure de trois heures apres disner, que sire Denys Hesselin conseiller & maistre d'hostel du Roy Preuost des Marchans, & Eleu sur le fait des aydes de ladicte bonne ville, l'alla recueillir és faulxbourgs de la porte saint Denys d'icelle ville. Et auecques luy estoient les quatre escheuins, le clerc & sergens de l'hostel de ladicte ville, & autres notables habitans d'icelle: Et accompagnoient lesdits Preuost & escheuins auecques les archiers d'icelle ville & par bel ordre. Et fut ledit Hardy ainsi accompagné que dessus, & assis sus vne haulte chaire mise au dessus: & au meilleur lieu d'une charrette, affin qu'il fut manifesté & apperceu par le populaire d'icelle ville. Aufquels & affin qu'ils ne fussent meuz de mal faire, ou iniurier ledit Hardy pour l'enormité dudit cas, fut deffendu de le mutiler, blasphemer ne iniurier. Et ainsi estant en ladicte charrette que dit est, fut amené tout au long de la grand rue S. Denys & descendu audit hostel de la ville, & deliuré par ledit Blosset és mains & en la garde desdits Preuost des Marchans & escheuins. Aufquels le Roy voulut leur attribuer l'honneur d'en auoir la garde, & faire faire son protes & iceluy mettre à execution. Audit temps le Roy estant à Creil, feit vn edit touchant les gens d'armes de son Royaume: par lequel il declara que chascune lance n'auroit ne ne tiendrait que six cheuaux. C'est à sçauoir la lāce, trois cheuaux pour luy, son page & le coustillier; & les deux archiers deux che-

uaux, & vn cheual pour le varlet, & qu'ils n'auroient plus de panniens à porter leurs harnois. Et avec ce ne seiourneroyent qu'un iour en un village. Et en outre fut crié, que nul marchand ne vendist ausdits gens de guerre ne prestast aucuns draps de soye, ne camelots sur peine de perdre l'argent, que lesdits gens de guerre leur pourroient deuoir à cause de ce. Et aussi qu'on ne leur vèdist aucun drap de laine plus de trente deux sols parisis l'aune. Audit temps le Roy fait ordonnance sur le fait des monnoyes, & ordōna les grans blans courir pour vnze deniers tournois, qui par auant ne valoient que dix. Les targes vnze deniers tournois, qui en valoient douze: l'escu trente sols trois deniers tournois. Et ainsi de toutes les autres especes de monnoyes tout fut changé. Audit tēps enuiron le xx. iour de Ianuier cccc.lxxij. fut fait accord & appoinctement entre le Roy & monseigneur le Cōnestable, qui auoit prins & mis en sa main la ville de S. Quentin: & en meit hors le sire de Creton, qui y auoit cent lāces de par le Roy. Et par ledit accord demoura ledit Connestable audit S. Quentin, ainsi qu'auant auoit fait. Et luy fut rendu Meaux & autres places, dont il auoit esté desappoincté: & si luy bailla on commissaires pour eux informer de ceux qui auoient parlé dudit Connestable: pour raison de ladicte prinse de S. Quentin, affin de les punir. Et luy fut deliuré l'argent du souldoy de ses gens de guerre, qui empesché fut incontinent apres ladicte ville de S. Quentin prinse. Audit temps le Roy vint des parties d'Amboise, où il estoit soy tenir à Senlis & illec enuiron. Et ce pendant les ambassadeurs du Roy & du Duc de Bourgogne, qui cōmuniquerent sur le fait de trouuer entre eux appoinctement de paix ou trefues: & finalement fut ladicte trefue continuée iusques à la my-May, en attendant plus ample appoinctement. En ce temps le Roy qui estoit à Senlis s'en vint loger à Ermonneuille en Santerres, appartenant à maistre Pierre l'Orfeure conseiller des comptes. Et illec y seiourna enuiron vn mois: pendāt lequel tēps monseigneur de Bourbon que le Roy auoit diuerses fois mandé venir par deuers luy y vint, & arriua & n'y demoura q̃ x. ou xij. iours. Puis s'en retourna en son païs faire ses Pasques ainsi que le Roy luy en donna le congé: auquel il promet incōtinent apres quafimodo s'en retourner & reuenir. En ce tēps au mois de Mars ieudy xxx, & penultime iour dudit mois, Iean Hardy emprisonné (dont est parlé deuāt) fut cōdamné par arrest de la Court de Parlement, à estre trainé depuis l'huis de la cōsingerie du Palais iusques à la porte dudit lieu: & d'illec bouter en un tombeau & mené deuant l'hostel de la ville de Paris, dessus l'eschauffaut pour ce illec dressé, pour y estre escartellé, ainsi qu'il fut fait & cōdamné: la teste estre mise & demourer dessus vne lance deuāt l'hostel de ladicte ville: les quatre membres porter en quatre des bōnes villes des extremitez de ce Royaume: & à chacun desdits membres estre mis vne epitaphe, pour faire sçauoir la cause pourquoy lesdits membres y estoient mis & posez. Et outre cōdamné le corps estre bruslé & mis en cendre deuāt l'hostel de ladicte ville. Toutes les maisons dudit Iean Hardy arrasées, & mises par terre: mesmemēt le lieu de sa natiuité iecté par terre sans iamais y estre fait edifice: & d'y mettre epitaphe, pour faire sçauoir l'enormité du cas dudit Hardy, & pourquoy estoit faicte ladicte demolition. Et fut ledit Hardy ainsi executé ledit iour de ieudy és presences du seigneur de Gaucourt Lieutenant du Roy, du premier President Boulenger, du Preuost de Paris

Paris, du Preuost des Marchans & escheuins de ladicte ville, du Procureur & clerc d'icelle, & plusieurs autres notables personnes. Et fut baillé audit Hardy pour la cōduicte de son ame & conscience vn notable Docteur en Theologie, nommé maistre Jean Hue. Et puis le samedi ensuiuant enuiron minuiet: (parquoy ce fut, il n'a point esté sceu) la teste dudit Hardy mise au bout d'une lance, fut ostée de dessus l'eschauffaut, où elle estoit mise & iectée en vne caue pres de illec. Ledit iour vint & arriua à Paris vne moult belle ambassade du Roy d'Arragon, qui fut bien recueillie par monseigneur le Comte de Ponthieure, monseigneur de Gaucourt & autres, qui bien festoyerent ladicte ambassade en plusieurs lieux de Paris: & iusques au iour de Pasques Fleuries, qu'on cessa pour la sepmaine peneuse qui entra de les festoyer. Et puis vint & arriua le Roy à Paris le samedi xvj. iour d'Auril lxxiiij. apres Pasques.

Des monstres faictes à Paris present le Roy & autres plusieurs: d'aucunes ambassades, & du parlement faict entre le Roy & le Connestable: des trefues entre le Roy & le Duc de Bourgongne, avecques autres plusieurs choses. Et commēt le Duc d'Alencon fut condamné estre decapité à Paris. Le Roy meit en ses mains le pais d'Anjou: du siege deuant Nuz par ledit Duc de Bourgongne: lequel print autres villes, nonobstāt lesdictes trefues audit an que dessus.

E T le samedi ensuiuant vingtiesme iour dudit mois d'Auril mille quatre cens soixante & quatorze: le Roy ordonna que les monstres fussent faictes des officiers, bourgeois, manās & habitās de ladicte ville de Paris, ce qui fut fait. Et fut ladicte mōstre faicte & monstrée au dehors de Paris depuis la bastille S. Anthoine en allāt au lōg des fossez, iusques à la tour de Billy: & d'illec en bataille iusques à la grange aux Merciers: & de l'autre costé aussi estoiet en bataille les habitās de ladicte ville, qui estoit moult grande & belle chose à veoir. Et estimoit on le nōbre des armez de cent & quatre mille hommes, tous d'une liurée de hocquetons rouges à belles croix blanches: & fut tiré aux champs grand quantité d'artillerie de ladicte ville de Paris, qu'il faisoit moult beau veoir. Et à veoir ladicte mōstre y estoit le Roy & l'ambassade du Roy d'Arragon, qui tous faisoient grandes admirations de la quantité des gēs de guerre, qu'ils veirēt issir hors de ladicte ville. Et avecques le Roy estoit sa garde, ses gentil-hommes de sa maison, le Comte de Dampmartin qui s'y trouua moult fort pompeux. Aussi y estoient Philippe monseigneur de Saouye Côte de Bresse, mōseigneur du Perche, Sallezart & plusieurs autres capitaines notables hōmes & gēs de nom. Et apres ladicte mōstre faicte, le Roy s'en alla au bois de Vincennes soupper, & mena avecques luy ladicte ambassade de Arragon. Et peu de temps apres le Roy donna aux deux seigneurs chiefs de ladicte ambassade, deux hanaps couuers à personages tout de fin or, qui pesoient quarante mars d'or fin, & cousterent trois mille deux cens escus d'or. Et puis s'en partit le Roy pour s'en retourner à Senlis, où il y seiourna depuis par certain temps. Pendant lequel tēps vint & arriua l'ambassade de Bretagne, qui s'en alla deuers le Roy. Et des Alemagnes aussi arriua à Paris ambassade, dōt estoit chief le Duc de Bauiere. Et avecqs ladicte ambassade de Bretagne, y vint Philippe des Essars seigneur de Thieux maistre d'hostel du Duc de Bretagne:

lequel auoit au par auant esté contre le Roy. Et le recueillit tresbien le Roy, & luy donna dix mille escus, & si le fait maistre enquesteur & general refformateur des eaües & forests,és marches de Brie & de Champagne, que tenoit monseigneur de Chastillõ à qui le Roy l'osta pour bailler audit Philippe des Effars. Audit temps que le Roy estoit à Senlis, à Ermonneuille & illec enuiron, y vint & arriua l'ambassade de Bourgongne, qui y demoura assez longuement sans riens faire: & le Roy s'en alla à Compiengne, à Noyon & autres places enuiron. Et là le Connestable vint par deuers luy pour aucuns differens, qui estoient entre le Roy & luy: & parlerent aux champs ensemble en vn village, où fut fait vn pont entre eux deux: & chacun d'eux estoient garnis de gens de guerre pour la garde de leurs personnes. Et illec ainsi assemblez, que dit est, parlerent de leursdits differens: mesmement pour raison de la prinse & retenue que faisoit ledit Connestable de la ville de S. Quentin, qu'il auoit prinse & mise en sa main: & en dechassé & bouté dehors le sire de Creton, qui auoit la charge d'icelle ville de par le Roy & la retenue de cent lances: qui tous par la force & contraincte dudit Connestable vuiderent dehors de ladicte ville, dont le Roy fut bien malcontent. Et pour ceste cause le Roy fait arrester les deniers & descharges, qui auoient esté leuées pour le payement dudit Connestable, & des quatre cens lances de sa charge, & retenue pour le quartier d'Auril, May & Iuing lors escheu, qu'il print ledit S. Quentin. Et apres ledit pourparlé ensemble, le Roy leua sa main dudit arrest & fait tout le payement deliurer audit monseigneur le Connestable, & puis se departirent d'ensemble bons amis. Et si fait illec la paix dudit seigneur & du Comte de Dampmartin, qui rien ne s'entredemandoient. Et audit partement le Roy pardõna tout audit monseigneur le Connestable, qui luy promet & iura de non luy faire iamais autres fautes, mais que bien le seruiroit de là en auant à l'encontre de tout le monde sans nul en excepter. En iceluy tẽps le Roy s'en retourna à Senlis, Ermonneuille, Pont S. Maxence & autres lieux: & souuēt & presque tous les iours alloit le Roy en l'abbaye de la Victoire prier & aorer la benoïste Vierge Marie illec requise: à l'honneur & louenge de laquelle il fait faire audit Prieur de bien grans dons en or content, qui bien monterent dix mille escus d'or. Audit an le Roy ayant en singuliere recommandation son populaire & gens de guerre: pour escheuer effusion de sang par guerre, fait vne trefue avecques son ennemy & aduersaire le Duc de Bourgongne pour vn an, finissant le premier iour d'Auril mille quatre cens lxxv. Combien que plusieurs ambassades feussent venues par deuers luy de par l'Empereur d'Allemaigne, luy humblement prier & requerir, qu'il ne fait point ladicte trefue avecques ledit de Bourgongne. Et que par port d'armes, ils le rendroient fugitif & en la mercy du Roy. Et que toute la conqueste & prouffit qu'ils pourroient faire & auoir sur ledit de Bourgongne, ils promettoient la bailler & donner au Roy sans riens luy couster du sien: mais nonobstant ce que dit est, fut ladicte trefue faicte & accordée avec ledit de Bourgongne à la grand desplaisance des tresbons & loyaux subiects du Roy. Et nonobstant ladicte trefue & au commencement d'icelle, lesdits Bourgongnons feirent de grans outrages & dommages aux païs & subiects du Roy estans à l'entour desdits Bourgongnõs, dont aucune reparation ne fut faicte par iceux Bourgongnons: laquelle chose demoura

demoura en grand esclandre, de veoir le vassal du Roy ainsi outrager les paÿs & subiects de son souuerain seigneur. Au commencement du mois de Iuillet mille quatre cens lxxiiij. le Roy vint & arriua en sa bonne ville & cité de Paris, où il ne seiourna qu'une nuict: Et le lendemain s'en alla à l'Eglise nostre Dame, & de là en la sainte chappelle du Palais: & disna en la consiergerie dudit Palais au logis & domicile de maistre Iean de Ladriesche President des Comptes. Et illec enuiron quatre heures apres midy, s'en partit & alla en vn bateau par la riuiere, depuis la poincte dudit Palais iusques à la tour de Nesle, où il monta à cheval & s'en alla à Chartres, à Amboise & de là à nostre Dame de Behuart en Poictou.

Audit an le Roy enuoya grand nombre de gens d'armes de son ordonnance, des Franks-archiers & autres, & de son artillerie pour se conquerir le Royaume d'Arragon: dont on disoit que Dieu leur donnaist grace de y bien besongner & de retourner ioyeusement: car on dit communement que c'est le cimetiere aux François. Audit temps le lundy xvij. iour dudit mois de Iuillet lxxiiij. l'arrest fut prononcé en la court de Parlement par monseigneur le Chancelier nommé maistre Pierre d'Oriolle, du proces fait à l'encontre dudit d'Alençon, qui par auant auoit esté detenu prisonnier au Louure & audit Palais. Et par iceluy arrest fut ramené à fait les cas & crimes à luy imposez, & la condamnation iadis contre luy prononcée à Vendosme, du temps du Roy Charles dōt Dieu ait l'ame. Et le pardon & grace que de ce luy auoit depuis fait le Roy, de luy laisser la vie sauue, & que depuis il auoit encores continué de mal en pis cōme ingrat: & tout dit & recité publiquement en icelle court, fut ledit d'Alençon declairé par arrest estre criminel de crime de leze maiesté: & comme tel condanné à estre decapité & souffrir mort: sauf sur ce le bon plaisir du Roy. Et toutes ses terres & seigneuries, & tous ses biens estre acquis & confisquez au Roy. Et luy fut le dictum dudit arrest dit à sa personne par mondit seigneur le Chancelier. Et bien tost apres fut ramené prisonnier en sa premiere prison dudit Louure, en la garde & conduicte de sire Denys Hesselin eleu de Paris, & de ses gens pour luy: de sire Iaques Hesselin son frere escuyer d'escuyrie du Roy & de sire Iean de Harlay cheualier du guet de nuict de ladicte ville, & autres ordonnez de par le Roy à la garde dudit seigneur. Apres ledit arrest le Roy s'en tira à Angiers & au paÿs d'environ: & fait mettre en sa main ladicte ville d'Angiers & autres terres & seigneuries, qui estoient & appartenoient au Roy de Cecille pour aucunes causes qui à ce le meurent. Et au gouuernement & administration desdictes seigneuries & terres, y fut mis & commis maistre Guillaume de Cerisay Greffier Ciuil de la Court de Parlement. Et apres le Roy retourna par deuers le paÿs de Beausse, à Chartres & en Gastinois, au Bois-de-malesherbes & autres lieux voisins, où il seiourna par certaine longue espace de temps, en chassant & prenant bestes sauages: comme cerfs, sangliers & autres bestes, dont il trouua largement. Et pour raison de la grand quantité des bestes qui y furent trouuez ayma fort ledit paÿs. Combien qu'en autres choses il est maigre paÿs, sec, inutile & de petite valeur. Et puis s'en partit le Roy & s'en alla au Pont-de-Chamois, où aussi il demoura par certain temps & iusques au ieudy sixiesme iour d'Octobre audit an lxxiiij. qu'il s'en partit, & alla iusques à Montereau-fault-yonne. Et

audit Pont-de-Chamois demoura mondit seigneur de Beaujeu : par deuers lequel s'en alloient par chacun iour les gens du grand cōseil en l'absence du Roy. En ce temps le Duc de Bourgongne qui s'en estoit party de ses païs, pour aller faire guerre aux Allemans, alla en Allemaigne tenir & mettre le siege deuant la ville de Nuz, qui est vne bōne ville pres de Coulongne sur le Rhin, où il seiourna bien longuement tenant le siege illec deuant avec toute son armée & artillerie. Audit temps furent enuoyez en Bretaigne ambassadeurs de par le Roy: c'est à sçauoir monseigneur le Chancelier, Philippe des Essars & autres. Et au retour de ladicte ambassade reuint & retourna dudit Bretaigne messire Pierre de Moruillier, iadis Chancelier, qui s'en estoit allé avec feu monseigneur de Guienne, & depuis son trespas s'en estoit retrait audit païs de Bretaigne. En ce temps les gens tenans le party dudit de Bourgongne (nonobstant ladicte trefue) prindrent la cité de Verdun en Lorraine, dont le Roy estoit seigneur & gardien. Et pour la r'auoir le Roy enuoya trois cens lances & quatre mille Francs-archiers, qui estoient accompagnez du seigneur de Craon & autres. Audit temps aussi lesdits Bourgongnons prindrent par emblée vne ville au païs de Nyuernois nommée Molins en Gibers, où pareillement le Roy enuoya des gens de guerre & de son artillerie. Et ne diffiera point ledit de Bourgongne que par ses païs & de son party (nonobstant icelle trefue) de tousiours faire maux & persecuter les gens seruiteurs, villes & subiects du Roy.

De la sommation du Roy Edouard d'Angleterre au Roy de France: & des bonnes nouvelles de l'armée des Francois en Arragon avecques aucuns Arragonnois decapitez. D'un homme ouuert tout viuant par les medecins du Roy & preserué de mort: de la feste du Roy saint Charlemagne: de la perte du Duc de Bourgongne deuant Nuz & autres conquestes faictes sur luy en Picardie & Bourgongne: de aucuns Barons executez à Paris: & de la reduction de la ville de Parpignan l'an que dessus.

EN iceluy temps Edouard Roy d'Angleterre enuoya ses heraulx par deuers le Roy, le sommer de luy rendre & bailler les Duchez de Guyenne & de Normandie, qui disoit à luy appartenir, ou qu'en son reffus il luy feroit guerre: ausquels heraux fut faicte & rendue response, & par iceux le Roy enuoya audit Edouard le plus beau courcier qu'il eust en son escuyrie. Et depuis ce le Roy luy enuoya encores par Iean de Laiffier mareschal de ses logis, vn asne, vn loup & vn sanglier: & à tant s'en retournerent lesdits heraux en leurdit païs par deuers leur Roy. Audit mois de Nouëbre le Roy vint par deuers Paris & fut logé à Ablon sur Seine: depuis au bois de Vincennes, à Hauberuillier & autres lieux: & puis d'illec se deslogea & alla en la France soy loger en vn hostel appartenant à maistre Dreux Budé audiencier, nommé le Bois-le-conte. Et messeigneur de Lyon, de Beauieu & autres seignrs suiuan le Roy se logerent à Mictry en France. Et puis se deslogea le Roy & alla avecques les seigneurs deuãtdits à Chasteau Thierry, où il demoura certaine espace de temps. Et iusques enuiron le douzième iour de Decembre qu'il retourna à Paris, & y fit son Noël: & fut le Roy au seruice la veille de Noël en l'Eglise nostre Dame de Paris. Le lendemain de Noël qui estoit le iour S. Estienne, le Roy eut des nouvelles que les Anglois estoient en armes en grand nombre

bre sur mer, & estoient vers les parties du mont S. Michel. Et incontinent feit monter à cheual enuoyer en Normandie les archiers par luy mis fus de sa nouuelle garde, nommée la garde de monseigneur le Daulphin.

EN ce temps le Roy eut des nouuelles de son armée, qu'il auoit enuoyée en Arragon: & comment ses gens auoient prins vne place pres de Parpignan nommée Gonne: dedans laquelle y estoient aucuns gentils-hommes & habitans d'icelle ville de Parpignan, qu'on voulut faire mourir comme trahistres: mais on différa pource qu'ils promeirent dedans vn temps qu'ils nommerent, de faire reduire & mettre en l'obeissance du Roy ladicte ville de Parpignan: laquelle chose ils ne feirent point dedans le temps qu'ils auoient promis, parquoy en furent aucuns d'eux decapitez. Et entre les autres y eut vn nommé Bernard de Douÿs, qui eut le col couppé. Et bien tost apres fut fait appoinctement entre le Roy & lesdits d'Arragon: par lequel la Comté de Roussillon fut de rechief remise en la main du Roy.

A v mois de Ianuier lxxiiij. aduint qu'aucuns larrons Bourgongnons sans maistre ne adueu, se meirent sur les champs & vindrent courir és paÿs du Roy, & iusques pres de compiegne, où ils prindrent & tuerent plusieurs gens: & puis voulurent ediffier vne place pour eux retraire pres de Roÿe nommée Arson, où ils amenerent grand quantité de pionniers. Et quand le Roy en eut ouÿ les nouuelles, il manda aux garnisons d'Amyens, Beauuais & autres lieux avecques la compagnie du grand maistre, & aussi des arbalestriers & archiers de Paris & autres de ladicte ville, que messire Robert d'Estouteuille Preuost de Paris conduisoit, qu'ils allassent destruire lesdits Bourgongnons & place: mais incontinent qu'ils en ouirent la nouuelle ils desemparèrent tout, & s'en fuirent comme paillards qu'ils estoient. Audit mois de Ianuier cccc.lxxiiij. aduint qu'un Franc-archier de Meudon pres Paris, estoit prisonnier és prisons de Chastellet pour occasion de plusieurs larrecins qu'il auoit faictes en diuers lieux: & mesmemēt en l'Eglise dudit Meudon. Et pour lesdits cas & comme sacrilege, fut condamné à estre pendu & estranglé au gibet de Paris nommé Montfaucon: dont il appella en la Court de Parlement, où il fut mené pour discuter de son appel: par laquelle court & son arrest, fut ledit Franc-archier declairé auoir mal appellé & bien iugé par le Preuost de Paris: par deuers lequel fut renuoyé pour executer sa sentence. Et ce mesmes iour fut remonstré au Roy par les medecins & chirurgiens de ladicte ville, que plusieurs & diuerses personnes estoient fort trauaillez & molestez de la pierre, colique passion & maladie du costé: dont pareillement auoit esté fort molesté ledit Franc-archier. Et aussi desdictes maladies, estoit lors fort malade monseigneur du Boscage: & qu'il seroit fort requis de veoir les lieux, où lesdictes maladies sont concrées dedans les corps humains: laquelle chose ne pouoit mieux estre sceue que inciser le corps d'un homme viuant, ce qui pouoit bien estre fait en la personne d'iceluy Franc-archier, qui aussi bien estoit prest de souffrir mort: laquelle ouuerture & incision fut faicte au corps dudit Franc-archier: & dedans iceluy quis & regardé le lieu desdictes maladies: & apres qu'ils eurent esté veues, fut recousu & ses entrailles remises dedans: & fut par l'ordonnance du Roy fait tresbien penser, & tellement que dedans quinze iours apres il fut bien guery, & eut remission de ses cas sans

despens, & si luy fut donné avec ce argent.

EN ce temps le xxviij. iour dudit mois de Ianuier, le Roy ayant singuliere affection aux Saincts faiz, & grans vertus de sainct Charlemagne, voulut & ordonna que ledit xxviij. iour de Ianuier fut faicte la solennité de S. Charlemagne: laquelle chose fut faicte & solemnisée en la ville de Paris, & ladicte feste gardée comme le Dimenche. Et ordonné que doresnauant par chacun an ladicte feste seroit faicte ledit xxviij. iour de Ianuier. Au mois de Feurier ensuiuant, furent les Allemans auitaillez en la ville de Nuz par ceux de la ville de Coulongne sur le Rhin, & autres Allemans de la partie de l'Empereur d'Allemaigne: nonobstant le Duc de Bourgongne, qui passé a long temps estoit demouré tenant le siege deuant ladicte ville de Nuz: & qui auoit fait arriuer plusieurs nauires pour cuider empescher, que ledit auitaillement ne vint en icelle ville: mais nonobstant toute sa puissance & armée, vint & entra tout ledit auitaillement en ladicte ville. Et furent toutes les nauires dudit Duc rompues, & mises en pieces dedans la riuere du Rhin, & morts plus de six à sept mille Bourgongnons, estans dedans iceux nauires. Et au parauant auoient eu & souffert lesdits Bourgongnons de grans pertes, & maux par lesdits de Nuz. Au mois de Mars ensuiuant pource que lesdits Bourgongnons des parties de Flandres, Picardie & aussi de ceux estans par ledit Duc de Bourgongne logez à Roye, Peronne, Môt-didier & autres places tenans son party, estoient venus courir és païs & sur les subiects du Roy: Et en iceux prins plusieurs prisonniers, viures & biens, & menez en leurs places contre la trefue faicte entre le Roy & luy: se meirent aux champs plusieurs des compagnies de l'ordonnance du Roy estans és garnisons d'Amyens, Beauuais, S. Quentin & autres lieux, iusques au nombre de cccc. lances & autres populaires, qui pareillement allerent courir sur lesdits Bourgongnons: & iusques dedans les faulxbourgs d'Arras, où ils coucherent vne nuit entiere. Et illec au moyen de certaine grande quantité de vants, fleaux & autres hostils: dont les gens du Roy auoient mené grand nombre avec eux en charrettes & chariots, fut battu tout le grain estant & trouué és granches dudit païs de Bourgongne & Picardie. Et iceluy bestail, gens prisonniers & vtencilles, fait amener & conduire par Salezart & autres capitaines dedans lesdictes villes d'Amyens & Beauuais. Durant lequel temps le Roy ne bougea de Paris, & y feit son Karesme faisant grand chere & s'y trouua sain & bien disposé comme il disoit. Audit temps de Mars aduint à Paris qu'un ieune fils Brigandinier, qui auoit esté nourry en partie par un poissonnier d'eau douce de ladicte ville, nommé Iean Pensart meu de mauuais courage & trahison, sçachant que ledit Pensart auoit grand argent, qui estoit venu & issu de la vente du poisson qu'il auoit vendu durant le Karesme: & dont il deuoit la plus part à plusieurs seigneurs & autres nobles hommes, qui luy auoit vendu le poisson de la pesche de leurs estangs. Et lequel argent ledit Brigandinier auoit veu & le lieu, où iceluy Pensart le mettoit: vint & entra de nuit en l'hostel dudit Pensart: & apres la minuit passée, vint ouurir l'huys du Pensart à tout trois Escoçois qu'il auoit illec fait venir pour auoir ledit argent, & desrober ledit Pensart: dont l'un desquels Escoçois estoit nommé Mortmer dit l'escuyer, & l'un des autres Thomas le Clerc: desquels Escoçois par le moyen dudit Brigandinier crocheterent, prindrent & emporterent

emporterent ledit argent montant en somme deux mille cinq cens liures tournois. Et pour lequel recouurer fut fait bien grand diligence, tellement que ledit iour dudit desrobement, fut ledit Brigandinier tenant franchise aux Carmes de ladicte ville de Paris: duquel lieu il fut tiré hors & apporté au chastellet de Paris: pource qu'au moyen des fers dōt il estoit enfermé, il ne pouoit aller: & illecques il confessa que lesdits Escoçois auoient eu tout ledit argent. Pourquoy fut fait grand diligence de le recouurer. Et eut esté ledit Mortemer prins, & fait amener audit chastellet par l'ordonnance de maistre Philippe du Four, se n'eussent esté deux Escoçois de la garde du Roy: qui voulurēt tuer ledit maistre Philippes & ses sergens: & feirent eschapper ledit Mortemer. Et depuis ledit Thomas le Clerc trouuerent tenant franchise dedans l'Eglise S. Katherine-du-val-des-escoliers, qui illec fut prins à grand port d'armes, qu'il feist contre les gens dudit monseigneur le Preuost de Paris, dont il blessa plusieurs. Et à la fin apres qu'il eut receu plusieurs playes, fut amené esdictes prisons, où il confessa ledit larrecin: à cause dequoy fut rendue partie de ladicte somme, qu'il auoit mucée pres saint Estienne des Grecz. Et pour ledit cas & autres, par mondit seigneur le preuost de Paris eu sur ce opinion & deliberation de sages, fut condamné à estre pendu & estranglé au gibet de Paris, dont il appella. Et depuis fut ledit appel vuidé par la court de Parlement, & renuoyé audit monseigneur le Preuost pour executer sa sentence: laquelle fut mise à execution le ieudy seiziesme iour dudit mois de Mars l'an lxxiiij. pour veoir laquelle gent, furent iusques audit gibet sire Denys Hesselin, maistre Jean de Ruel comme commis par maistre Pierre de La-dehors à l'exercite de l'office de Lieutenant criminel, pour occasion de la maladie dudit de La-dehors. Audit temps fut la ville de Parpignan mise & reduicte en l'obeissance du Roy, & s'en allerent ceux de dedans qui s'en voulurent aller eux & leurs biens saufs, fors que l'artillerie qui dedans estoit qui demoura au Roy: laquelle estoit belle & de grand valuë.

Comment l'Empereur & le Roy feirent ensemble alliance. Des ambassadeurs de Florence & dudit Empereur: avec autres prudens & nobles faicts du Roy: d'une deuote procesion à Paris: de la prinse du Tronquoy, Roye, Montdidier & autres places pour le Roy, des trahisons du Connestable, d'une grande desconfiture de Bourgonnons & Lombards par le Duc de Bourbon, où furent prins le Comte de Roussy & plusieurs autres grans seigneurs de Bourgongne: d'une autre grande desconfiture de ceux d'Arras par les gens du Roy: de la deliurance du Prince d'Orenge. De la fuitte & depart du Duc de Bourgongne deuant Nuz: du Parlement & traicté du Roy Edouart d'Angleterre avec le Roy, & autres plusieurs choses aduenues à Paris & autres diuers lieux, en l'an mille quatre cens septante & cinq.

LE septiesme iour du mois d'Auril l'an mille quatre cens septante cinq, fut publiée à Paris l'alliance d'entre l'Empereur & le Roy: & de l'ordonnance du Roy fut enuoyé publier deuant le logis de mōsieur du Maine Duc de Calabre, & l'ambassade de Bretagne: qui estoit en ladicte ville, & apres par les carrefourgs d'icelle ville. Audit mois d'Auril vint par deuers le Roy deux ambassades, l'une de Florence, & l'autre de l'Empereur d'Alemaigne: lesquelles furent moult honnorablement receües & festoiées

tant du Roy, que des autres seigneurs de autour de luy. Audit mois de May le Roy se partit de Paris, pour aller à Vernon sur Seine: auquel lieu l'attendoient monsieur l'Amiral & les autres capitaines, pour conclure de la guerre & ce qui estoit à faire, pour la trefue qui failloit le dernier iour dudit mois d'Auril: & puis s'en retourna à Paris, où il arriua le vendredy xiiij. iour dudit mois. Et le lundy xxv. iour dudit mois d'Auril, s'en partit le Roy pour aller à Pont-Saincte-Maxence, pour illec preparer de son armée. Et en emmena pour le conduire & estre autour de luy avec les gentils-hommes, la garde & officiers de son hostel viij. cens lances fournies: & y fut mené & conduicte grand quantité d'artillerie, grosse & menue: entre lesquelles y auoit cinq bombardes, dont les quatre auoient nom: c'est à sçauoir, l'vne Londres, l'autre Brabant, & la tierce Bourg en Bresse, & la quarte S. Omer. Et outre & par dessus la cōpagnie desdits de la garde Escoçoise & Frāçoise, & autres gentils-hommes & officiers de l'hostel, y fut & y alla grande cōpagnie des nobles & Francs-archiers de France & Normandie. Et pour l'aitaillement de l'ost y furent enuoyez viures de toutes parts.

Et le lundy premier iour de May le Roy se partit de l'Abbaye de la Victoire, où il estoit pour aller audit Pont-Saincte-Maxence, pour faire ses approches & ordonner de la guerre, en ce qui estoit affaire sur les Bourgongnons, & fut enuoyé deuant le Tronquoy & Montdidier. Et le mardy x. de May vint & arriua à Paris monsieur de Lyon, qui venoit deuers le Roy: lequel fut estably lieutenant du Roy au conseil de Paris. Et le mercredy troiesme iour dudit mois feste de S. Croix, fut faicte vne moult belle procession generale audit lieu de Paris, de toutes les Eglises: en laquelle faisant furent tous les petits enfans de Paris chacun tenant vn cierge, & fut allé querir le S. Innocent & porté à nostre Dame. Et en ladicte procession estoient monsieur de Lyon, monsieur le Chancelier de costé-luy. Et apres alloient monsieur de Gaucourt lieutenant du Roy à Paris, les preuosts des marchans & escheuins de ladicte ville, les Presidens & conseilliers de Parlement, Chambre-des-comptes & autres officiers d'icelle ville. Et apres le populaire alloient en grand & merueilleux nombre, qu'on estimoit à c. mille personnes ou mieux: & fut porté ledit S. Innocent en ladicte procession par monsieur le premier president, & par Nanterre president en ladicte court de Parlement: & le president des comptes de Ladriesche & le preuost des marchans. Et pour conduire & mettre ordre en ladicte procession, y estoient les archiers de la ville & autres gens ordonnez, pour garder de faire bruit & noise en icelle procession. Et le mardy second iour de May audit an, le Roy qui auoit enuoyé sommer les Bourgongnons tenant ledit Tronquoy, furent par iceux Bourgongnons tuez ceux qui estoient allez faire ladicte sommation. Et pour ceste cause fait tirer son artillerie contre ledit lieu du Tronquoy: tellement que ledit iour à cinq heures apres midy y fut liuré l'assault fort & aspre, & fut emportée ladicte place d'assault. Et furent tuez & pendus tous ceux qui furent trouuez dedans, sauf & reserué vn nommé Motin de Caulers, que le Roy fait sauuer, & si le fait Esleu de Paris extraordinaire. Mais auant qu'ils fussent prins feirent tresgrand resistance iceux Bourgongnons contre les gens du Roy: & tuerent audit assault le capitaine de Ponthoïse, qu'on disoit estre vaillant homme, & autres gens de guerre & Francs-archiers: & puis fut ledit lieu abbatu

& demoly. Et ledit iour de Sainte Croix, s'en alla l'armée du Roy mettre le siege deuant Montdidier, pource qu'ils furent refusans d'eux rendre au Roy. Et le vendredy cinquiesme iour dudit mois d'Auril audit an, fut mise & reduicte en la main du Roy ladicte ville de Montdidier, & s'en allerent ceux de dedans leurs vies sauues, & laisserent tous leurs biens: & puis fut toute ladicte ville abbatue.

LE samedi ensuiuant vj. iour de May, fut pareillement rendue la ville de Roye. Et s'en allerent les Bourgongnons de dedans vies & bagues sauues, & puis fut aussi rendu le chasteau de Moreul pareillement que ceux de Roye. Et en faisant telles executions, que dit est, sur ledit de Bourgongne & son paÿs pour l'armée du Roy, qui estoit si noble telle & si belle compagnie & artillerie, que là où elle eust esté menée, y auoit gens assez pour en brief temps prendre & mettre en la main du Roy toutes les villes & places de Bourgongne, tant Flandres, Picardie que autres lieux: car tout fuioit deuant iceux. Et pour rompre icelle armée fut le Roy aduertty par aucuns, & mesmement de par monseigneur le Connestable, que besoing luy estoit de garder sa Duché de Normandie, pour les Anglois qu'on luy disoit qui y deuoient descendre: & si luy fut dit par monseigneur le Connestable, au moins fut mandé ou escript, qu'il feist hardiment ledit voyage en Normandie, & qu'il ne se souciaist point d'Abbeuille & Peronne, & que ce pendant qu'il iroit les feroit reduire en sa main. Et le Roy croiant ces choses s'en alla audit paÿs de Normãdie: & là mena avec luy mōseignr l'Amiral & cccccc. lāces avec les nobles & Frācs-archiers: & à ceste cause departit l'armée & s'en alla chacū en son logis. Et puis quād le Roy fut en Normãdie trouua qu'il n'estoit nulles nouuelles desdits Anglois, & alla à Harfieu, Dieppe, Caudebec & autres places, & ce pendant ne feist riens à l'auantage du Roy: mais au cōtraire au moyē de ladicte allée en Normandie feirent lesdits Bourgōgnōs de grans maux aux subiects & paÿs du Roy, qui y eurent de grans pertes. Et puis s'en vint le Roy à nostre Dame d'Escouis en vn hostel pres d'illec, nommé Gaillard-bois appartenant à Colon Lieutenant de monseigneur l'Amiral, où il se teint par aucun temps: durant lequel eut nouuelles de monsieur le Connestable, de la venue & descendue que faisoient lesdits Anglois à Calais. Et aussi que mondit seigneur de Bourgongne s'estoit leué de deuant Nuz: dont il disoit qu'il auoit la possession, & fait de son appoinctement avec l'Empereur: lequel Empereur avec ledit de Bourgongne s'en venoit faire faire guerre au Roy: desquelles choses n'estoit riens, & fut trouué tout le contraire estre vray.

DVRAND ces choses fut prins vn herault d'Angleterre nōmé Scalles, qui auoit plusieurs lettres qu'on escriuoit de par le Roy Edouard à diuerses personnes: lesquelles lettres le Roy veit & dit & certifia au Roy ledit Scalles, que les Anglois estoient descendus à Calais, & que le Roy Edouard y deuoit estre le vingt & deuxiesme iour de ce present mois de Iuin à tout douze ou treize mille combattans. Et si luy certifia outre, que ledit de Bourgongne auoit fait son accord avec ledit Empereur: & estoit retourné à Bruxelles, dont de tout n'estoit riens. Audit lieu d'Escouis fut aussi le Roy aduertty que mōdit seigneur le Connestable auoit enuoyé à monsieur de Bourbon son seellé, pour suborner & tant faire que mondit seigneur de Bourbon voulsist deuenir & estre cōtre le Roy, &

de soy allier avec ledit Duc de Bourgongne: de toutes lesquelles choses le Roy fut moult esmerueillé. Et incontinent par plusieurs & diuers messages, fut mädé par le Roy mondit seigneur de Bourbon venir à luy. Et en la fin l'enuoya querir par monseigneur l'Euesque de Mande: par lequel ledit seigneur de Bourbon auoit enuoyé au Roy le seellé dudit monsieur le Connestable des choses deuant dictes.

A V D I T temps le Roy eut nouuelles de mondit seigneur de Bourbon, comment les gentils-hommes de ses païs, Franks-archiers & autres que mondit seigneur auoit enuoyez faire guerre pour le Roy à la Duché de Bourgongne: par laquelle guerre le Roy auoit commis mōdit seigneur à son Lieutenant general, qu'ils auoient trouué lesdits Bourgongnons à Guy pres de chasteau Chinon, & illec chargé sur iceux: lesquels desconfirent & y en eut de prins, de morts, & s'en fuirent grand quantité: entre lesquels Bourgongnons y fut deffait cc. lances de Lōbardie, dont la plus part y moururent, & si y mourut le seigneur de Conches & autres seigneurs. Et y furent prins le Comte de Rouffy, le mareschal de Bourgongne, le sire de Longy, le Baillif d'Auxerre, le sire de l'Isle, l'enseigne du seigneur de Beauchamp, le fils du Comte de S. Martin, messire Loÿs de Mōtmartin, messire Iean de Digoigne, le seigneur de Rugny, le seigneur de Chaligny, les deux fils de monseigneur de Viteaux, dont l'un estoit Comte de Joigny & autres: & fut ladicte destrouffe ainsi faicte le mardy xx. iour de Iuing.

A V D I T mois de Iuing nonobstant les lettres ainsi enuoyées par mondit seigneur le Connestable au Roy, le Roy eut nouuelles de l'Empereur, qu'il auoit fait rafreschir ceux de ladicte ville de Nuz: & d'icelle auoit mis hors tous les naurez & malades, & les auoit auitaillez pour vn an entier, & mis gens tous nouveaux: & par tant meit ledit de Bourgongne à sa croix de par Dieu: & que avec ce auoit gagné grand quantité de son artillerie, sa vaisselle d'argent & autres bagues. Audit temps de Iuing le mardy xxvij. monsieur l'Amiral & ceux de sa compagnie, qui auoient esté ordonnez de par le Roy à faire degast en Picardie & Flandres: & de mettre à feu & à sang tout ce qu'ils trouueroient esdits païs: vint ledit iour mettre ses embusches pres de ladicte ville d'Arras. Et icelles enuoya enuiron xl. lances courir deuant ladicte ville d'Arras: lesquels d'Arras cuidans descōfire lesdictes lances, feirent sur eux grās saillies, qui vindrēt esprement courir sus ausdictes xl. lances: lesquelles se vindrent rēdre esdictes embusches, & apres eux lesdits d'Arras tous: lesquels furent enclos par ceux desdictes embusches, qui sur eux chargerent & les meirent en fuite: & en fuiant y en eut de tuez de xiiij. à xv. cens hōmes, & y fut tué le cheual du sire de Romont fils de Sauoye & frere de la Roïne, mais il se sauua, le gouuerneur d'Arras nōmé Iaqs de S. Pol, & plusieurs autres seigneurs & gens de nom y furent prins, que mondit seigneur l'Amiral mena deuant icelle ville pour les sommer d'eux rendre es mains du Roy leur souuerain seigneur, ou autrement qu'il feroit couper les cols ausdits seigneurs prisonniers. Audit mois de Iuing le Roy qui auoit à son prisonnier le Prince d'Orenge seigneur de Arlay, & qui estoit à trente mille escus de finance, le deliura & donna ladicte finance. Et en ce faisant deuint hōme lige au Roy, & luy fait hommage de ladicte principauté d'Orenge. Et par tant le Roy le renuoya à ses despens en ses païs, & luy donna & octroya telle preminence,

nence, qu'il se peut nommer par la grace de Dieu, puissance de faire monnoye d'or & d'argent de bon aloy, aussi bon que la monnoye du Daulphiné : donne aussi toutes graces & remissions & pardons, reserué d'heresie & de crime de leze maiesté. Et si donna le Roy dix mille escus contens au seigneur, qui auoit prins ledit Prince.

Audit mois de Iuing le Roy enuoya ses lettres patentes à Paris, par lesquelles il feit publier que les Anglois estoient descendus à Calais : & que pour resister il mandoit au Preuost de Paris, de contraindre tous les nobles & non nobles tenans fief & arrierefief, pour estre prest le lundy troisieme iour de Iuliet entre Paris & le bois de Vincennes, pour d'illec partir & aller où ordonné leur seroit, & nonobstant leur priuilege & pour celle fois seulement. Et ensuiuant lequel cry furent enuoyez par ceux de Paris plusieurs gens en armes, montez & habillez par deuers mondit seigneur le preuost de Paris au païs de Soissonois. Au mois de Iuliet ensuiuant le Roy qui seiourna en Normandie par aucun temps, s'en retourna à nostre Dame d'Escouis & à Gaillard-bois pres d'illec, où aussi il seiourna vne piece : & puis s'en partit pour aller à nostre Dame de la Victoire, où il fut aussi vne autre espace de temps, & puis s'en alla à Beauuais. Audit mois ledit Duc de Bourgongne, qui auoit esté deuant la ville de Nuz par l'espace de douze mois, s'en partit : & s'en alla de nuit & honteusement de deuant icelle ville, sans l'auoir peu conquerir, qui luy vint à moult grand blasme & perte de gens & biens. Et puis s'en reuint en ses païs, où il trouua son frere le Roy Edouard d'Angleterre, qu'il y auoit fait descendre, pour en continuant son mal & malice de rechief faire guerre au Roy & à ses païs & subiects. Audit temps se feit de grandes bateries & destructions de païs & terres dudit de Bourgongne : & y eut plusieurs villes, bourgs & villages ars & destruis. Et audit temps fut mandé par le Roy venir à luy monseigneur le Duc de Bourbon, qui auant qu'il y vint eut plusieurs lettres & messages : & puis vint par deuers le Roy luy estant à nostre Dame de la Victoire. Et arriua en la ville de Paris mondit seigneur de Bourbon au mois d'Aoust à moult belle & honneste compagnie de nobles hommes, & bien fort triumphans : & auoit bien auecques luy de sa compagnie cinq cens cheuaux. Et s'en partit ledit Duc de Bourbon de ladicte ville de Paris pour aller par deuers le Roy le lundy quatorzieme iour d'Aoust. Et fut vn peu d'espace de temps auecques le Roy, & puis s'en partit de Senlis pour aller à Clermont. Audit mois d'Aoust le Roy eut ambassade de par le Roy d'Angleterre, qui s'estoit venu loger à Lyhons en Santers, qui communiquerent auec le Roy aucunes matieres, auecques lequel pourparlé le Roy enuoya à Paris monseigneur le Chancelier, messeigneurs les gens des finances & autres, pour auoir prest d'argent de ceux de ladicte ville : ausquels fut fait promesse & obligation, de leur restituer leur prest dedans le iour de Toussaincts. Et fut presté de ladicte ville septante cinq mille escus d'or, qui furent baillez ausdits Anglois au moyen de certain traicté fait auec eux. Et si fut enuoyé au Roy grand quantité de gens en armes de par ladicte ville, montez & habillez aux gages & despens des officiers & autres habitans à ladicte ville. Audit mois d'Aoust le mardy vingtneufiesme iour dudit mois, le Roy se partit d'Amyens & aussi messeigneurs de Bourbon, de Lyon & autres nobles

hommes capitaines, gens d'armes, officiers & autres gens en moult grād & merueilleux nombre, que bien on estimoit estre cent mille cheuaux pour tous aller à Picquigny : auquel lieu le Roy Edouard d'Angleterre vint parler au Roy, & en emmena avecques luy son auātgarde & arrieregarde, & demoura en bataille pres dudit Picquigny . Et dessus le pōt dudit Picquigny le Roy auoit fait dresser deux appentis de bois, l'un deuant l'autre : dont l'un estoit fait pour le Roy, & l'autre pour le Roy d'Angleterre. Et entre les deux appentis y auoit vne cloison de bois: dont la moitié par le hault estoit treillissée tellement, que chacun des deux Roys pouoient mettre leurs bras par dedās ledit treillis: & en l'un desdits appentis vint & arriua le Roy tout le premier, & incontinent qu'il y fut arriué, s'en partit vn Baron d'Angleterre illec attendant la venue du Roy, qui alla dire au Roy d'Angleterre, qui estoit en son parc loing d'une bonne lieüe dudit Picquigny accompagné de vingt mille Anglois bien artillez dedās son dit parc. Si s'en vint incontinent audit lieu de Picquigny audit appentis, qui luy estoit appareillé . Et amena avec luy pour l'attendre au ioignant d'iceluy appentis vingt & deux lances de sadicte compagnie, qui illec furent & demourerent dedans l'eaüe à costé dudit Pont, par tout le tēps que le Roy & ledit Roy d'Angleterre furent & demourerent en iceluy appentis . Durant lequel temps vint vne moult grande & merueilleuse pluie, qui fait moult de mal & perte aux seigneurs & gentils-hōmes du Roy, à causes des belles houffures & nobles habillemens, qu'ils auoient preparez pour la venue dudit Roy Edouard d'Angleterre: & lequel Roy d'Angleterre quand il veit & apperceut le Roy il se iecta à vn genoūil à terre: & depuis par deux fois sy iecta auant qu'arriuer au Roy, lequel le receut bien benignement, & le fait leuer : & parlerent bien vn quart d'heure ensemble és presences de mesdits seigneurs de Bourbon, de Lyon & autres seigneurs & gens des finances, que le Roy auoit fait illec venir iusques au nombre de cent. Et apres ce qu'ils eurent parlé ensemble en general, le Roy fait tout reculer & parlerent à priué ensemble, où aussi ils furent & demourerent vne espace de temps. Et au departement fut publié que l'appoinctement estoit fait entre eux tel qui s'ensuit. C'est à sçauoir, que trefues estoient accordées entre eux pour le temps de sept ans, qui commencerent ledit vingtneufiesme iour d'Aoust l'an septante cinq, & fineroient à pareil & semblables iour, qui seroit l'an mille quatre cens quatre vingts & deux. Laquelle trefue seroit marchande, & pourroient aller & venir lesdits Anglois par tout le Royaume armez & non armez, pourueu qu'ils ne seroient en armes en vne compagnie plus que de cent hommes . Et fut publiée ladicte trefue à Paris, Amyens & autres lieux du Royaume de France. Et puis fut baillé audit Roy d'Angleterre soixāte & quinze mille escus d'or. Et si fait le Roy d'autres dons particuliers à aucuns seigneurs d'autour dudit Edouard: & aux heraulx & trompettes de ladicte compagnie, qui en feirent grand feste & bruit en criant à haute voix *Largeffe au tres noble & puissant Roy de France, largeffe, largeffe.* Et si promist encores audit Roy Edouard luy payer & donner par chacune desdictes années cinquante mille escus . Et si festoya bien fort le Duc de Clairance frere dudit Roy d'Angleterre, & luy donna de beaux dons. Et puis le Roy Edouard retira tous ses Anglois, qu'il auoit tant de son ost qu'autres qu'il auoit enuoyez à Abbeuille, Perōne & ailleurs: & fait trousser & baguer

baguer tout son bagage, & s'en retourna à Calais, pour passer la mer & s'en aller en son Royaume d'Angleterre. Et le conuoya iusques audit lieu de Calais maistre Hesberge Euesque d'Eureux. Et si laissa ledit Edouard au Roy deux Barons d'Angleterre: l'un nommé le seigneur de Hauart, & l'autre le grãd-escuyer d'Angleterre, iusques à ce que le Roy eut eu aucune chose que ledit Edouard luy deuoit enuoyer du Royaume d'Angleterre. Et lesquels de Hauart & Grãd-escuyer estoient fort amis & en la grace dudit Edouard: & qui auoient esté moyen de faire ladicte paix, trefues & autres traictez entre iceux Roys. Et furēt iceux Hauart & Grand-escuyer fort festoiez à Paris. Et puis le Roy, mesdits seigneurs de Bourbon, Lyon & autres seigneurs, qui estoient à Amyens, s'en retournerent à Senlis, où ils furent vne espace de temps. Et ordonna le Roy les gens de sa maison pour mener & conduire lesdits de Hauart & escuyer parmy la ville de Paris & autres lieux: & entre autres y ordonna & bailla la charge à sire Denys Hesselin son maistre d'hostel & Eleu de Paris, qui en fait bien son deuoir à l'honneur & louenge du Roy: & demourerent en ladicte ville par l'espace de huit iours entiers, où ils furent bien fort festoiez & menez iouer au bois de Vincennes & ailleurs. Et entre autres choses furent bien fort festoiez aux Tournelles en l'hostel du Roy, & pour ce faire leur fut enuoyé pour les honnestement entretenir, plusieurs dames, damoiselles & bourgeoises. Et puis s'en retournerent lesdits de Hauart & escuyer par deuers le Roy qui estoit à la Victoire pres Senlis. Et audit mois le Roy qui estoit audit lieu de la Victoire, s'en alla vers le païs de Soissonnois & à nostre Dame de Lience. Et en ce voyage print & reduisit en ses mains la ville de saint Quentin, que monseigneur le Connestable auoit prinse sur luy, & bouté hors ceux à qui le Roy en auoit baillé la charge, ainsi que dit est deuant. Et par auant ledit Connestable s'en estoit allé, & en l'obeissance dudit de Bourgogne. Et apres (qui pis estoit) auoit escript & mandé au Roy Edouard d'Angleterre apres le traicté par luy fait avecques le Roy: & qu'il estoit retourné à Calais pour passer la mer & retourné en Angleterre, qu'il estoit vn lasche, deshonoré & poure Roy, d'auoir fait ledit traicté avecqs le Roy sous vmbre des promesses qu'il luy auoit faictes: dont il ne luy tiendroit riē, & qu'en fin s'en retourneroit deceu. Lesq̃lles lettres ainsi audit Roy Edouard escriptes par ledit Connestable, il enuoya dudit lieu de Calais au Roy, lequel aperceut que ledit Connestable n'estoit point feal comme estre deuoit. Et puis fut donné congé par le Roy audit de Hauart & Grand-escuyer d'eux en retourner audit Royaume d'Angleterre. Et leur fut dōné de beaux dons tant en or, que en vaisselle d'or & d'argēt. Et si fait le Roy publier à Paris qu'on leur laissast prendre des vins au païs de France tant que bon leur sembleroit, pour mener en Angleterre en les payant. Audit mois d'Octobre le Roy qui estoit à Verdun & autres places enuiron la Duché de Lorraine, retourna à Senlis & à la Victoire, & y vindrent les ambassadeurs de Bretagne, qui feirent la paix entre le Roy & ledit Duc de Bretagne, qui renōça à toutes alliances & sceillez qu'il auoit fait & baillez contre le Roy. Et pareillement ledit monseigneur de Bourgogne print & accepta trefues marchades avecques le Roy, pareillemēt q̃ la trefue des Anglois.

ET le lundy seiziesme iour dudit mois d'Octobre audit an mille cccc. lxxv. fut publiée solennellement au son de deux trompettes & par les quarefourgs

de ladicte ville de Paris, ladicte trefue marchande d'entre le Roy & mondit seigneur de Bourgongne, pour le temps & terme de neuf ans, commençans le quatorziesme iour de Septembre audit an : & finissans à semblable iour l'an mille quatre cens quatre vingts & quatre. Par laquelle toute marchandise deuoit auoir cours par tout le Royaume de France. Et ce temps durant, chacun pouoit retourner en ses possessions immeubles. Et puis le Roy s'en retourna à S. Denys, & puis à Sauigny pres Montlehery, & de là au bois de Malesherbes, & en apres à Orleans, à Tours & à Amboise. Et le lundy vingtiesme iour de Nouembre audit an lxxv. fut mené escarteller aux halles à Paris par arrest de la Court de Parlement, vn gentil-homme natif de Poictou nommé Regnault de Veloux, & fort familier de monseigneur du Maine, pour occasion de ce que ledit Regnault auoit fait plusieurs voyages par deuers diuers seigneurs de ce Royaume, & conseillé de faire plusieurs traictez : & porté plusieurs scelez cōtre & au preiudice du Roy, du Royaume & de la chose publique. Et fut ledit Regnault par l'ordonnance de ladicte court fort secouru, pour le fait de son ame & conscience. Car il luy fut baillé le curé de la Magdaleine Penitancier de Paris & moult notable clerc Docteur en Theologie, & deux grans clercs de l'ordre des Cordeliers. Et furent pēdus ses membres aux quatre portes de Paris & le corps au gibet.

Comment le Duc de Bourgongne deliura le Connestable Loïs de Luxembourg aux gens du Roy, par lesquels il fut amené prisonnier dedans la Bastille à Paris. Et comment le Comte de Roussy fut mené prisonnier de Bourges aux Montiz lez Tours : & de ce que le Roy luy dit. Du proces & de l'execution faicte dudit Cōnestable audit Paris. D'aucuns officiers desappoinctez en icelle ville, & autres choses qui y furent faictes. Du Duc d'Alencon deliuré du Louure, d'un Concille ordonné par le Roy : & des nouvelles qu'il eut d'une grande desconfiture du Duc de Bourgongne par les Suisses pres Gransson : du Duc de Nemours prins prisonnier à Carlat par le seigneur de Beauieu pour le Roy, & autres choses faictes audit an mille quatre cens soixante & quinze.

ET pource que par le Roy d'une part, & ses ambassadeurs pour luy, & les ambassadeurs de monseigneur le Duc de Bourgongne : au mois d'Octobre qui estoit passé dernier, en faisant par eux la trefue de ix. ans entre eux deux, dont est faicte mention deuāt : auoit esté promis de par mondit seigneur le Duc de Bourgongne, de mettre & liurer és mains des gens & ambassadeurs du Roy ledit Connestable de France, nōmé monseigneur Loïs de Luxembourg. Fut par ledit Duc de Bourgongne baillé & liuré ledit Connestable és mains de monseigneur l'Amiral bastard de Bourbon, de monseigneur de S. Pierre, de monseigneur du Bouchaige, de maistre Guillaume de Cerisay & autres plusieurs. Et que tous les dessus nommez en fut mené prisonnier en la ville de Paris, & mené par dehors les murs d'icelle du costé des chāps à l'entrée de la bastille S. Anthoine : laquelle entrée ne fut point trouuée ouuerte. Et pource fut ordonné & amené ledit mōseigneur le Connestable passé parmy la porte S. Anthoine au dedans de ladicte ville, & mis en ladicte Bastille. Et estoit ledit monseigneur le Connestable vestu & habillé d'une cappe de camelot,

lot, doublée de veloux noir: dedans laquelle il estoit fort embrunché. Et estoit monté sur vn petit cheual à cours crains fort velues. Et audit estat apres ce qu'il fut descendu audit lieu de la Bastille, trouua illec monseigneur le Chancelier, le premier President & les autres Presidents en la Court de Parlement, & plusieurs conseillers d'icelle Court. Et aussi y estoit sire Denys Hesselin maistre d'hostel du Roy nostre sire, qui tous illec le receurent. Et apres s'en departirent, & le laisserent en la garde de Philippe l'Huillier capitaine dudit lieu de la Bastille. Et auquel lieu de la Bastille ledit monseigneur l'Amiral present mondit seigneur le Connestable, ausdits Chancelier, Presidents & autres dessus nommez, profera & dit telles où semblables parolles en effect & substance. Messieurs qui cy est tous presens, veez cy mōseigneur de S. Pol: lequel le Roy m'auoit chargé d'aller querir par deuers monseigneur le Duc de Bourgongne, qui luy auoit promis le luy faire bailler en faisant avecques le Roy son dernier appointement de la trefue d'entre eux. En fournissant à laquelle promesse, le me fait bailler & deliurer pour & au nom du Roy. Et depuis l'ay biē gardé, iusques que ie le mets & baille en voz mains pour luy faire son proces le plus diligemment que faire le pourrez: Car ainsi m'a chargé le Roy de le vous dire. Et à tant s'en partit ledit monseigneur l'Amiral dudit lieu de la Bastille. Et apres que ledit Connestable eut esté ainsi laissé és mains des dessus nommez monseigneur le Chancelier, premier & second Presidents de Parlement, & autres notables & sages personnes en bien grand nombre, vacquerent & entendirent à bien grand diligence & sollicitude à faire ledit proces. Et en faisant iceluy interroguerent ledit seigneur de saint Pol, sur les charges & crimes à luy mis sus & imposez: ausquels interrogatoires il respondit de bouche sur aucuns poincts: lesquels interrogatoires & confessions furent mis au net & enuoyez deuers le Roy.

Et le lundy quatriesme iour de Decembre audit an lxxv. Aduint qu'un herault du Roy nommé Montioye natif du païs de Picardie, & qui faisoit la plus part de sa residence avecques ledit seigneur de S. Pol luy estant Connestable: vint & arriua luy & vn sien fils en la ville de Paris, par deuers maistre Iean de Ladriesche President des Comptes, & Tresorier de Frâce, natif du païs de Brabant, pour luy apporter lettres de par le Comte de Marle, sa femme & enfans, affin de secourir & ayder par luy en ce que possible luy seroit audit Connestable, pere dudit Comte de Marle. Lesquelles lettres ledit maistre Iean de Ladriesche ne voulut pas receuoir d'iceluy Herault, sinon en la presence de monseigneur le Chancelier, & des gens du conseil du Roy. Et à ceste cause ledit maistre Iean de Ladriesche, mena & conduisit ledit Herault iusques au logis dudit monseigneur le Chancelier, affin que par luy lesdictes lettres feussent veuës, & ce qui dedans y estoit contenu. Mais pour ce que ledit Iean de Ladriesche demoura longuement au conseil, avecques iceluy monseigneur le Chancelier & autres, ledit Montioye & son fils s'en retournerent en leur logis. Et illec monterent incontinent à cheual, & s'en allerent au giste au Bourget. Combien qu'à leur partement ils dirent à leur hoste, que se aucun les demandoit: qu'il dit qu'ils s'en estoient allez au giste au Bourg-la-royne. Et quand ledit de Ladriesche cuida trouuer ledit Herault pour auoir lesdictes lettres, ne le trouua point: pour-

quoy fut hastiuement enuoyé apres ledit Herault iusques au Bourg-la-royne, où il ne fut point trouué. Mais fut trouué par deux archiers de la ville de Paris audit lieu de Bourget: & par eux ramené le dimenche tiers iour de Decembre audit an: lequel fut mené & conduit iusques à l'hostel d'icelle ville: & illec deuant les gens du conseil à ce ordonnez, fut ledit Montioye & sondit fils chacun à part interrogué: & furent leurs depositions redigées & mises par escript par le sire Denys Hesselin. Et apres ce furēt lesdits Montioye & sondit fils mis & laissez en la garde de Denys Baudart archier de ladicte ville, & en son hostel. Auquel il fut & demoura par l'espace de xxv. iours. Et illec bien & diligemment gardé avec sondit fils par trois des archiers de ladicte ville.

A V D I T temps au commencement du mois de Decembre, fut amené le Comte de Rouffy qui prisonnier estoit dedans la grosse tour de Bourges, iusques au Plessis du Parc, autrement dit le Montiz lez Tours, où le Roy estoit. Et illec fut parlé à luy, & luy fait plusieurs grans remonstrances des grâdes folies, esquelles par long temps il festoit entremis. Et comment il auoit au Roy durât ce qu'il auoit esté & soy porté son ennemy, & fait plusieurs grans & enormes maulx à ses villes, païs & subiets comme Mareschal de Bourgongne pour le Duc. Et comment villainement & honteusement il auoit esté prins prisonnier par les gens de guerre du Roy, qui pour luy estoient en armes audit païs de Bourgongne, sous la charge de monseigneur le Duc de Bourbonnois. Et par ledit de Rouffy baillée sa foy au seigneur de Combronde, & comment il auoit achepté de mondit seigneur le Duc vingt & deux mille escus d'or. Et luy fait le Roy de grans paours & effrois, dont ledit seigneur de Rouffy cuida auoir froide ioye de sa peau. Mais en conclusion le Roy le meit à quarante mille escus de rançon. Et luy fut par luy donné terme de les trouuer, & rapporter deuers le Roy dedans deux mois apres ensuiuans, pour tous termes & delais: & qu'autrement, & où il y auroit faute dedans ledit terme, qu'il fut asseuré qu'il mourroit. Et depuis ces choses, fut procedé par toute diligence à faire le proces dudit Connestable par mesdits seigneurs le Chancelier, President, & conseilliers, clerks & lais de la court de Parlement, desdits de S. Pierre & autres à ce faire ordonnez & appelez. Lequel proces veu par eux & conclud, tellement que le mardy dixneufiesme iour de Decembre audit an mille quatre cens septatécinq, fut ordonné que ledit Connestable seroit mis & tiré hors de sa prison, & amené en la court de Parlement, pour luy dire & declairer le dictum donné & conclud à l'encontre de luy par icelle court de Parlement: & fut à luy ledit iour de mardy en la chambre & logis d'iceluy Connestable en ladicte Bastille S. Anthoine où il estoit prisonnier, ledit monseigneur de S. Pierre, qui de luy auoit la garde & charge: lequel en entrant en la chambre luy fut par luy dit. Monseigneur que faictes vous, dormez vous: lequel Connestable luy respondit, Nenny: long temps a que ne dormy: mais suis icy où me voyez pensant & fantasiât. Auquel de S. Pierre dit, qu'il estoit necessité qu'il se leuaist pour venir en ladicte court de Parlement par deuant les seigneurs d'icelle court, pour luy dire par eux aucunes choses, qu'ils luy auoient à dire touchant son fait & expedition: ce que bonnement ne pouoit mieux faire en ladicte court. En luy disant aussi par ledit de S. Pierre, qu'il auoit esté ordonné que avecques luy & pour l'accompagner

gner y seroit & viendroît m^{on}seigneur Robert d'Estouteuille cheualier Preuost de Paris, dont de ce ledit Connestable fut vn pou espouenté, pour deux causes que lors il declaira. La premiere pource qu'il cuidoit qu'on le voulsist mettre hors de la possessi^{on} dudit Philippe l'Villier, capitaine d'icelle Bastille: avecques lequel il festoit bien trouué, & l'auoit fort agreable, pour le mettres és mains dudit seigneur d'Estouteuille, qu'il reputoit estre son ennemy: & que s'il y estoit doubtoit qu'il luy fait desplaisir, & aussi qu'il craignoit le populaire de Paris & de passer parmy eux. A toutes lesquelles doubtes ainsi faictes par ledit Connestable, luy fut solu & dit par ledit seigneur de saint Pierre, que ce n'estoit point pour luy changer son logis: & qu'il le meneroit seurement audit lieu du Palais, sans luy faire aucun mal: & à tant s'en partit dudit lieu de la Bastille, monta à cheual & alla iusques audit Palais tousiours au meillieu desdits d'Estouteuille & de S. Pierre, qui le feirent descendre aux degrez de deuant la porte aux Merciers d'icelle court de Parlement. Et en montant esdits degrez trouua illec le seigneur de Gaucourt & Hesselin, qui le saluerent & luy feirent le bien venant: Et iceluy Connestable leur rendit leur salut. Et puis apres qu'il fut monté, le menerent iusques en la tour criminelle dudit Parlement, où il trouua monseigneur le Chancelier qui à luy s'adressa en luy disant telles parolles: monseigneur de S. Pol vous auez esté par cy deuant, & iusques à present tenu & réputé le plus sage & le plus constant cheualier de ce Royaume. Et puis doncques que tel auez esté iusques à maintenant, il est encores mieux requis que iamais qu'ayez meilleure constance qu'onques vous n'eustes. Et puis luy dit: monseigneur il faut que vous ostiez d'autour de vostre col l'ordre du Roy, que y auez mise. A quoy respondit ledit de S. Pol que volentiers il le feroit. Et de fait meit la main pour la cuider oster, mais elle tenoit par derriere à vne espingle, & pria audit de S. Pierre qu'il luy aydast à l'auoir, ce qu'il fait. Et icelle baïsa & bailla audit monseigneur le Chancelier. Et puis luy demanda ledit monseigneur le Chancelier, où estoit son espée, qui baillée luy auoit esté en le faisant Connestable: lequel respondit qu'il ne l'auoit point, & que quand il fut mis en arrest, que tout luy fut osté, & qu'il n'auoit riens avecques luy autremēt qu'ainsi qu'il estoit, quand il fut amené prisonnier en ladicte Bastille, dont par mondit seigneur le Chancelier fut tenu pour excusé. Et à tant se departit mondit seigneur le Chancelier. Et tout incontinent apres y vint & arriua maistre Iean de Pompincourt President en ladicte Court, qui luy dit autres parolles telles que s'enfuiuent. Monseigneur vous sçauiez que par l'ordonnance du Roy, vous auez esté constitué prisonnier en la Bastille S. Anthoine pour raison de plusieurs cas & crimes à vous mis sus & imposez: ausquelles charges auez respondu & esté oüy en tout ce que vous auez voulu dire, & sur tout auez baillé voz excusati^{ons}. Et tout veu à grand & meure deliberation: Je vous dis & declaire par arrest d'icelle Court, que vous auez esté crimineux de crime de leze Majesté, & comme tel estes condamné par icelle Court à souffrir mort dedās le iourd'huy: c'est à sçauoir, que vous serez decapité deuant l'hostel de ceste ville de Paris: Et toutes voz seigneuries, reuenues & autres heritaiges & biens declairez, acquis & confisquez au Roy nostre sire: duquel dictum & sentence il se trouua fort perplex, & nō sans cause: car il ne cuidoit point que le Roy, ne fa iustice le deussent

faire mourir. Et dit alors & respondit: Haa Dieu soit loué veez cy bié dure sentence. Le luy supplie & requiers qu'il me donne grace de bien le cognoistre au iourd'huy. Et si dit outre à monsieur de saint Pierre: ce n'est pas cy ce que m'auez tousiours dit: Et à tant se retrahit. Et lors ledit monsieur de S. Pol fut mis & baillé és mains de quatre Docteurs en Theologie: dont l'un estoit Cordellier nommé maistre Iean de Sordun, l'autre Augustin, le tiers Penitancier de Paris, & le quart estoit nommé maistre Iean Hue Curé de S. Andry des Ars, Doyen de la faculté de Theologie audit lieu de Paris: ausquels & à mondit seigneur le Chancelier il requist, qu'on luy baillast le corps de nostre Seigneur, ce qui ne luy fut point accordé: mais luy fut fait chanter vne messe deuant luy, dont il se contéta assez. Et icelle dicte, luy fut baillé de l'eau benoiste & du pain benoist, dont il mangea: mais il ne beust point lors depuis. Et ce fait demoura avecques lesdits confesseurs iusques à entre vne & deux heures apres midy dudit iour qu'il descendit dudit Palais: & remonta à cheual pour aller en l'hostel de ladicte ville, où estoient fais plusieurs eschauffaux pour son executiō. Et avecques luy estoient le greffier de ladicte Court, & huissiers d'icelle. Et audit hostel de la ville descendit & fut mené au bureau dudit lieu, contre lequel y auoit vn grand eschauffault dressé: & au ioignant d'iceluy on venoit par vne allée de bois à vn autre petit eschauffault, là où il fut executé. Et en iceluy bureau fut illec avecques lesdits confesseurs faisans de grans & piteux regrets: & y fait vn testament tel, que & sous le bon plaisir du Roy que ledit sire Denys Hesselin escriuit sous luy. En faisant lesquelles choses il demoura audit bureau iusques à trois heures dudit iour, qu'il issit hors d'iceluy bureau, & s'en vint ieeter au bout dudit petit eschauffault, & mettre la face, les deux genoux fleschis deuant l'Eglise nostre Dame de Paris pour y faire son oraison: laquelle il tint assez longue en douloureux pleur & contrition, & tousiours la croix deuant ses yeux que luy tenoit maistre Iean de Sordun: laquelle souuent il baisoit en bien grand reuerence & moult piteusement plorant. Et apres ladicte oraison ainsi faicte, & qu'il se fut leué debout, vint à luy vn nommé petit Iean, fils de Henry Cousin lors maistre executeur de la haute iustice, qui apporta vne moyenne corde dont il lia les mains dudit de S. Pol, ce qu'il souffrit bien benignement. Et en apres le mena ledit petit Iean, & fait monter dessus le petit eschauffault, dessus lequel il s'arresta & tourna le visage par deuers ledit Chancelier, de Gaucourt Preuost de Paris, seigneur de S. Pierre, Greffier Ciuil de ladicte Court, dudit sire Denys Hesselin & autres officiers du Roy nostre sire, estans illecques en bien grand nombre en leur criant mercy pour le Roy, & leur requerant qu'ils eussent son ame pour recommandée. Non pas (comme il leur dit) qu'il n'entendoit pas qu'il leur coustast riens du leur. Et aussi se retourna au peuple estant du costé du S. Esprit, en leur suppliant aussi de prier pour son ame. Et puis s'en alla mettre à deux genoux dessus vn petit carreau de laine aux armes de ladicte ville, qu'il meit à point & le remua de l'un de ses pieds: où il fut illec diligemment bndé par les yeux par ledit petit Iean tousiours parlant à Dieu & à lesdits confesseurs & souuent baisant ladicte croix. Et incontinent ledit petit Iean saisit son espée que son dit pere luy bailla, dōt il fait voller la teste de dessus les espaulles si tost, & si transsiuement que son corps cheut à terre aussi tost que la teste: laquelle

teste

teste incontinent apres fut prinse par les cheueux par iceluy petit Iean, & mise lauer en vn seau d'eauie estans pres d'icelle. Et puis mise sur les appuies dudit petit eschauffault, & monstrée aux regardans ladicte execution, qui estoient bien deux cens mille personnes & mieux. Et apres ladicte execution ainsi faicte, ledit corps mort fut despouillé & mis avecques ladicte teste tout enseuely dedas vn beau drap de lin: & puis bouté dedans vn sercueil de bois que ledit sire Denys Hesselin auoit fait faire. Et le quel corps ainsi enseuely, que dit est, fut venu querir par l'ordre des Cordelliers de Paris, & sur leurs espaulles l'emporterent inhumer en leur Eglise. Et ausquels Cordelliers ledit Hesselin fait bailler quarante torches, pour faire le conuoy dudit corps: apres lequel il fut & le cōuoya iusques audit lieu des Cordeliers: & le lēdemain y fait aussi faire vn beau seruice en ladicte Eglise. Et aussi en fut fait seruice à S. Iean en Greue, là où aussi sa fosse auoit esté faicte, cuidant qu'on luy d'eust enterrer: & y eut esté mis se n'eust esté que ledit Sordun dit à iceluy de S. Pol, qu'en leurdicte Eglisey auoit enterrée vne Comtesse de S. Pol: & qu'il deuoit mieux vouloir y estre enterré qu'en nulle autre part: dont iceluy de saint Pol fut bien cōtent, & pria à ses iuges que sondit corps fut porté ausdits Cordelliers. Et est vray qu'apres ladicte sentence ainsi declairée, appert, audit deffunct de S. Pol que dit est, fut tout son proces bien au long declairé au grand parc de ladicte Court & à huis ouuerts. Auquel proces fut dit & declairé de moult merueilleux & enormes cas & crimes, auoir esté faits & perpetrez par ledit de S. Pol. Et en iceux maulx soy estre entretenu, continué & maintenu par long teımps & par diuerses fois. Et entre les autres choses fut dit & recité comment lesdits de Bourgongne & de S. Pol, auoient enuoyé de la partie d'iceluy Duc de Bourgongne, messire Philippe Bouton & messire Philippe Pot cheualiers: & de la partie dudit Connestable Hector de l'Escluse par deuers monsieur le Duc de Bourbon, affin d'esmouuoir mondit seigneur de Bourbon de soy esleuer & estre contre le Roy, & soy departir de sa bonne loyauté: ausquels fut dit pour ledit seigneur par la bouche du seigneur de Fleurac son Châbellan, qu'ils s'abusoiēt, & que ledit seigneur aimeroit mieux mourir que d'estre contre le Roy: & n'en eurent plus pour ceste fois. Et que depuis ce ledit de l'Escluse y retourna de rechief, qui dit audit monseigneur de Bourbon: que ledit Connestable luy mandoit par luy que les Anglois descendroient en France: & que sans difficulté à l'ayde dudit Connestable, ils auroient & emporteroient tout le Royaume de France. Et que pour escheuer sa perdition & de ses villes & paÿs, ledit seigneur de Bourbon vouldist estre & soy allier avec ledit de Bourgongne: & luy dit en ce q̄ faisant luy en viendroit de grād prouffit. Et où il ne vouldroit faire le bien, luy en conuenist que fil luy en prenoit mal, qu'il ne seroit pas à plaindre. Lequel mondit seigneur de Bourbon dit & respōdit audit de l'Escluse, qu'il n'en feroit riens: & qu'il aymeroit mieux estre mort & auoir perdu son vaillant, & deuenir en aussi grand captiuité & pauüreté que oncques fut Iob, que de consentir, faire, n'estre fait quelque chose que ce fut au dommage & preiudice du Roy: & à tant s'en retourna ledict Hector sans autre chose faire. Et par auant ces choses, mondit seigneur de Bourbon enuoya au Roy lesdictes lettres de scellé dudit Connestable: par lesquelles appairoit la grande trahison dudit Connestable: & plusieurs autres grans cas, trahisons &

mauvaistiez qu'auoit confessées à sondit proces ledit Connestable, bien au lóg declairées en iceluy proces, que ie laisse icy pour cause de briefueté. Et si est verité que ledit Connestable apres ce qu'il eut esté confessé, & qu'il vouloit venir audit eschauffault: dit & declaira à sesdits confesseurs, qu'il auoit dedans son pourpoint soixante & dix demy escus d'or, qu'il tira hors d'iceluy en priant audit Cordellier, qu'il les donnast & distribuast pour Dieu en aumosne pour son ame & en sa conscience: lequel Cordellier luy dit qu'ils seroient bien employez aux pauvres enfans nouices de leur maison, & autant luy en dit ledit confesseur Augustin des enfans de leur maison. Et pour tous les appaiser dit & respondit iceluy deffunct Connestable à sesdits confesseurs, qu'il prioit à tous lesdits quatre confesseurs, que chacun en prinst la quarte partie: & qu'en leurs consciences le distribuassent, là où ils verroient qu'il seroit bien employé. Et en apres tira vn petit anneau d'or, où auoit vn diamant qu'il auoit en son doigt: & pria audit Penitancier, qu'il le donnast & presentast de par luy à l'image nostre Dame de Paris, & le meit dedans son doigt ce que ledit Penitancier promet de faire. Et puis dit encores audit Cordellier Sordun, Beau pere veez cy vne pierre que i'ay longuemét portée en mō col, & que i'ay moult fort aymée pource qu'elle a moult grande vertu: car elle resiste contre tout venin, & preserue aussi de toute pestilence: laquelle pierre ie vous prie que portez de par moy à mō petit fils, auquel direz que ie luy prie qu'il la garde biē pour l'amour de moy: laquelle chose luy promet de le faire. Et apres ladicte mort, mondit seigneur le Chancellier interroqua lesdits quatre confesseurs, si leur auoit aucune chose baillé: qui luy dirēt qu'il leur auoit baillé lesdits demy escus, diamant & pierre dessus declairez. Lequel monseigneur le Chancellier leur respondit, qu'au regard d'iceux demy escus & diamant ils en feissent ainsi qu'ordoné l'auoit: mais qu'au regard de ladicte pierre, qu'elle seroit baillée au Roy pour en faire son bon plaisir. Et de ladicte executiō ainsi faicte, que dit est, en fut fait vn petit epitaphe tel cōme il s'ensuit.

*Mille quatre cens l'année de grace
Soixante quinze, en la grand place
A Paris que l'on nomme Greue
L'an que fut fait aux Anglois trefue
De Decembre le dixneuf,
Sur vn eschauffault fait de neuf*

*Fut amené le Connestable
Accompagné grand & notable
Comme le veut Dieu & raison
Pour sa tresgrande trahison:
Et là il fut decapité
En ceste tresnoble cité.*

Et apres ladicte execution ainsi faicte dudit Cōnestable, fut le samedy xxiiij. iour dudit mois de Decembre fait publier à Paris à son de trompe & cry publicque, le desappoinctement des Generaux, maistre des monnoyes, pour les causes contenues audit mandement. Et au lieu d'eux le Roy meit & establíst quatre personnes seullement: c'est à sçauoir sire Germain de Merle, & Nicolas Potier, Denys le Breton, & Symon Ausoran. Et fut ordonné que les escus d'or du Roy, qui par auant auoiēt eu cours pour xxiiij. sols parisis & trois tournois, auroient cours pour trente cinq vnzains, vallant vingt cinq sols huiēt deniers parisis. Et qu'on feroit des autres escus d'or, qui auroient vn croissant au lieu de la couronne qui estoit és autres escus, qui vaudroient trente six vnzains, du pris de vingt six sols & six deniers tournois. Et des douzains neufs de douze tour-

nois

nois pour piece . Et ledit iour de samedy par la permission du Roy, furent allez querir & assembler le corps qui pendu estoit au gibet de Paris de Regnault Veloux, & la teste qui mise estoit au bout d'une lance és halles de Paris, & fut tout assemblé ensemble. Et puis furent portez inhumer & enterrer au conuent desdits Cordelliers de Paris: auquel lieu luy fut fait son service, & honorablemēt pour le salut & remede de son ame, tout au coust, mises & despens des parés & amis dudit deffunct Regnault de Veloux. Et le mardy ensuiuant iour S. Estienne apres Noël audit an septante cinq, fut & cōparut par deuāt l'hostel de ladicte ville de Paris vn cheualier Lombard, nōmé messire Boufillé, qui auoit esté desfié d'estre cōbattu à outrance en lice de pied, par vn cheualier natif du Royaume d'Arragō : qui audit iour y deuoit comparoir, mais il n'y vint point. Et pour auoir contre luy tel deffaut que de raison par ledit Boufillé, s'en vint par deuers le Comte de Dampmartin illec ordonné iuge de par le Roy, de la questiō d'entre lesdictes deux parties . Et vint en icelle place ledit de Boufillé tout armé de son harnois, & en l'estat qu'il deuoit combattre sa hache au poing. Et deuāt luy faisoit porter son enseigne, & auoit trois trōpettes : & apres luy auoit plusieurs seruiteurs, dont l'un luy portoit encores vne autre hache d'armes. Et apres qu'il eut ainsi parlé audit de Dāpmartin & fait ladicte requeste, il se retrahit & s'en retourna en son hostellerie, où pend l'enseigne du grand godet pres dudit hostel de la ville. Et le ieudy vingthuictiesme iour de Decembre audit an cccc. soixante & quinze, enuiron l'heure de six heures de nuict: monseigneur d'Alençon dont est parlé deuant, & qui auoit esté lōguement detenu prisonnier audit chasteau du Louure, en fut mis dehors par la permission du Roy : qui octroya à ses gardes qu'on le meit en ladicte ville en vn hostel de bourgeois où ils verroient estre bon, & il fut mené loger en l'hostel feu maistre Michel Laillier: Et y estoier à le mener dudit Louure iusques audit hostel, ledit sire Denys Hesselin, Iaques Hesselin son frere, sire Iean de Harlay cheualier du guet, & autres personnes en armes. Et deuant ledit seigneur estoient portées quatre torches. Au mois de Ianuier ensuiuant dudit an lxxv. fut publiée à son de trompe par les quarrefourgs de Paris, les lettres patentes du Roy nostre sire: qui contenoient comme de toute ancienneté il auoit esté permis aux Roys de France par les saincts peres Papes, que de cinq en cinq ans ils pussent faire assemblée de tous les Prelats du Royaume de France, pour la reformation & affaires de l'Eglise, ce qui de long temps n'auoit esté fait: pour laquelle chose & aussi que le Roy voulant les droits de l'Eglise estre gardez & obseruez, voulut & ordonna qu'il tiendrait le cōcille de l'Eglise en la ville de Lyon, ou autre lieu pres d'illec: pourquoy il vouloit, mandoit & ordonnoit, que tous Archeuesques, Euesques & autres constitués en dignité, fussent residens chacun en leurs benefices & s'y en allassent demeurer, pour estre tous prests & appareillez à aller où ordonné leur seroit : & où ils n'auroient ce fait dedans six mois apres ladicte publication, que tout leur tēporel fut saisy & mis en la main du Roy . Et apres ledit cry fut fait de rechief publier, comme des pieça le Roy pour luy subuenir à aucuns ses affaires : & pour la necessité de son Royaume, eut mis & ordonné vn escu à estre leué & payé sur chacune pipe de vin à mener dehors du Royaume : & qu'il en seroit tiré & de toutes autres denrées à la valeur, qui par aucun tēps auoit esté delaisé

à cueillir. Lequel ayde d'un escu sur chacune pipe de vin seulement, & nō point sur autre marchandise: fut de rechief mis sus par toutes les extremitez du Royaume. Et à ce faire & recueillir furent maistre Laurēs Herbelot cōseillier dudit seigneur, & Denys Cheualier iadis notaire au chastellet de Paris: non obstant que de ceste mesme charge le Roy y auoit pieça ordonné maistre Pierre Iouuelin correcteur des Comptes, que de ce en demoura deschargé.

A v mois de Feurier audit an mille cccc. lxxv. le Roy qui estoit à Tours & à Amboise s'en partit pour aller au païs de Bourbonnois & d'Auuergne: & de là s'en alla faire sa neufuaine à nostre Dame du Puy, & de là en Lyonnois & au païs de Dauphiné. Et luy estant audit lieu du Puy eut nouuelles, que les Suisses auoient rencontré le Duc de Bourgogne & son armée, qui vouloient entrer audit païs de Suisse. Et comment ils auoient mis ius ledit Duc de Bourgogne, & des gens de son armée bien de seize à dixhuiēt mille hommes: & si gaignerent toute son artillerie par la maniere qui s'ensuit. Apres que le Duc de Bourgogne eut prins Granſſon où il y a ville, il s'en alla au long du lac de Verdon en tirant deuers Fribourg, & trouua moyen d'auoir deux chasteaux qui sont sur les montaignes à l'entrée de Suisse: mais les Suisses qui bien sçauoient sa venue & la prinſe qu'il auoit desdits deux chasteaux & dudit Granſſon, s'approcherent. Et le vendredy au soir deuāt le iour des Brandons, trouuerēt iceux Suisses moyen d'enclorre lesdits deux chasteaux, en façon telle que ceux qui estoient dedans n'en pouoient faire saillir: & meirent leurs embusches entre & assez pres desdits deux chasteaux en vn petit bois pres de là où les Bourgonnons auoient mises leurs batailles. Et le lendemain ensuiuant veille desdits Brandons au bien matin, ledit Duc de Bourgogne passa avecques ses gens & son artillerie. Et incontinent qu'il fut passé, lesdits Suisses qui n'estoient qu'environ de quatre à six mille couleuriniers & tout à pied, qui se prindrent à tirer & bouter le feu dedās leurs bastōs: dont ils feirent tel & si bon bruit que les chiefs de l'auantgarde dudit de Bourgogne y furent tous tuez, & ainsi tourna en fuite toute ladicte auantgarde. Et tantost apres chargerent lesdits Suisses si estroit, que la bataille tourna en fuite. Et non obstant ce que ledit Duc de Bourgogne feit son pouoir de rallier ses gēs pour resister à la fureur desdits Suisses: finalement luy fut force de tourner en fuite & s'en eschappa à grand peine & dangier de sa personne: & luy cinquiesme en cheuauchant & fuiant sans arrester, & souuent regardoit derriere luy vers le lieu où fut faicte sur luy ladicte destrouſſe iusques à loigné, où il y a huiēt grosses lieües qui en valent bien seize de France la iolie, que Dieu sauue & gard. Et y furent morts à ladicte rencontre la plus grand part des capitaines & gēs de renom de l'armée dudit Duc de Bourgogne. Et fut faicte ladicte destrouſſe le samedi deuxiesme iour de Mars audit an septante cinq, où il y eut grand meurdre fait desdits Bourgonnons. Et apres ce que ledit Duc de Bourgogne s'en fut ainsi honteusement fuy que dit est: & qu'il eut perdu toute son artillerie, sa vaisselle & toutes ses bagues: lesdits Suisses reprindrent lesdits deux chasteaux & feirent pendre tous lesdits Bourgonnons, qui dedans estoient. Et aussi reprindrent la ville & chastel du Granſſon. Et feirent despendre tous les Allemans que ledit de Bourgogne y auoit fait pendre: lesquels estoient en nombre cinq cens & douze, & les feirent mettre
en terre

en terre saincte. Et puis feirent pendre les Bourgongnons qui estoient dedans ledit Grāsson és mesmes lieux & des licols, dont ils auoient pendu les Allemans ou Suisses. Audit mois de Mars & audit an septante cinq, le Roy qui auoit enuoyé monsieur de Beaujeu avec grand quātité de gens de guerre assieger mōdit seigneur le Duc de Nemours, qui lors estoit à Carlat en Auuergne, se meit & rendit mondit seigneur de Nemours és mains de monseigneur de Beaujeu, qui le mena par deuers le Roy estans lors au paÿs du Daulphiné & Lyonnois. Et fut ledit de Nemours de l'ordonnance du Roy mené prisonnier au chasteau de Vienne. Et durant ce qu'il fut ainsi assiegé au chasteau de Carlat, ma dame sa femme fille de Charles d'Anjou Comte du Maine, accoucha d'enfant en iceluy lieu de Carlat. Et tant par la desplaissance de sondit seigneur & mary que du mal d'enfant, alla de vie à trespas: dōt ce fut grand dōmage, car on la tenoit biē bōne & honneste dame. Et apres ces choses fut mené ledit seigneur de Nemours à Pierre-assise lez Lyon. Au mois d'Auril audit an, le Côte de Campobache Lombard ou Milanois, qui auoit la conduicte de deux cens lances de Lombardie, qu'il auoit amenées audit Duc de Bourgongne luy tenant le siege deuāt la ville de Nuz, & qui depuis festoit trouué avec ledit de Bourgongne à la destrouffe sur luy faicte pres de Grāsson: se partit ledit de Campobache dudit de Bourgongne, & alla par deuers le Duc de Bretagne, duquel il se disoit estre parent: & faignant par luy aller en pelerinage à S. Iaques en Galice: lequel Duc de Bretagne le recueillit tresbiē & luy donna de l'argent. Et illec ledit Cāpobache disoit dudit de Bourgongne, qu'il estoit trescruel & inhumain: & qu'en toutes ces entreprinſes n'y auoit point d'effect, & ne faisoit que perdre temps, gens & paÿs par ses folles obstinations.

Du suppliement & emprunt fait par le Duc de Bourgongne à ses païs pour sa recouurāce de Suisses: de la venue du Roy de Cecille au Roy estant à Lyon: & de ce qu'ils feirēt: du Seneschal de Normandie, qui occist sa femme & son veneur pour leur adultere: du Duc de Lorraine cōtre les Bourgōgnons deuāt Morat & en la Cōté de Romont: d'aucuns pelerinages & voyages du Roy: de la ville de Nancy recouurée par ledit Duc de Lorraine, du Roy de Portugal en Frāce, & autres choses aduenues en l'an 1476.

AV mois de May ensuiuant mille quatre cens septante six, & apres la 1476. rencontre sur ledit Bourgongnon faicte par lesdits Allemāns pres dudit Grāsson: ledit de Bourgongne delibera de poursuiure & continuer sa poursuite, & sur & à l'encontre desdits Allemans, & d'aller deuant la ville d'Estrabourg y mettre le siege: laquelle chose bonnement il ne pouoit faire sans auoir ayde & secours de gens, & aussi auoir argent de ses paÿs. Et à ceste cause y enuoya son Chancellier nommé maistre Guillaume Gounet, & autres deleguez avecques luy iusques au nombre de douze en aucuns de ses paÿs & villes: pour leur dire & remonstrer la destrouffe, ainsi sur luy faicte par lesdits Allemans ou Suisses. Et que nonobstant icelle son intention estoit, de tirer auant & estre vengé des dessusdits Suisses: pour lesquelles choses luy failloit auoir argent & gens. Et qu'ils voulsissent ayder du sixiesme de leur vaillant & de six hommes l'un, puissant de porter harnois: ausquels douze ainsi deleguez de luy, que dit est, fut rendue & faicte responce de Gand, Bruges, Bruxelles, l'Isle

les Flâdres & autres, qu'au regard dudit de Bourgogne ils le reputoiēt leur vray & naturel seigneur, & que pour luy feroiēt leur possibilité. Et en disant par eux que fil se sentoit aucunemēt empessé desdits Allemās ou Suisses: & qu'il n'eust avecques luy assez gens pour s'en retourner frâchement en ses paÿs, qu'il le leur fait assçauoir, & qu'ils exposeroient leurs corps & leurs biens pour l'aller querir pour le ramener sauvement en sesdits paÿs: mais que pour faire plus de guerre par luy, n'estoient point deliberez de plus luy ayder de gens ne d'argent.

D V R A N T ces choses le Roy demoura à Lyon faisant grand chere: & vint par deuers luy le Roy de Cecille son oncle: auquel il fait moult bel recueil à l'arriuer par deuers luy audit lieu de Lyō. Et luy mena veoir la foire, qui estoit audit lieu avec les belles bourgeois & dames dudit Lyon. Aussi y vint & arriua vn Cardinal nepueu du Pape, qui auoit fait aucuns excès en Auignon contre le Roy, & mōseigneur l'Archeuesque de Lyon Legat d'Auignō. Lequel Cardinal demoura par long temps autour du Roy, auant que de luy peust auoir son expedition. Et puis tout ledit debat fut appoincté entré le Roy, ledit Legat d'Auignon & ledit Cardinal.

A V D I T temps le Roy de Cecille appoincta, voulut & accorda avecques le Roy, qu'apres sa mort sa Comté de Prouence retourneroit de plain droit au Roy, & seroit vnies à la Courōne. Et en ce faisant la Royne d'Angleterre fille dudit Roy de Cecille vefue du feu Roy Henry d'Angleterre, qui estoit prisonniere au Roy Edouard d'Angleterre, fut par le Roy racheptée: & pour sa rançon en fut payé audit Edouard cinquante mille escus d'or. Et à ceste cause ladicte Royne d'Angleterre ceda & transporta au Roy tout le droit, qu'elle pouoit auoir en ladicte Comté de Prouence: moyennant aussi certaine pēsion à vie que le Roy luy bailla par chacun an durant le cours de la vie d'icelle Royne.

E N ce temps le samedi xiiij. iour du mois de Iuing mille cccc. lxxvj. Le Seneschal de Normandie Comte de Mauleurier, fils de feu messire Pierre de Brezé, qui fut tué à la rencontre de Montlehery. Lequel Seneschal qui s'en estoit allé à la chasse pres d'un village, nommé Romiers lez Dourdan à luy appartenant. Et avecques luy y auoit mené ma dame Charlotte de France sa femme, fille naturelle dudit feu Roy Charles, & damoiselle Agnes Sorel. Aduint par male-fortune apres que ladicte chasse fut faicte, & qu'ils furent retournez au soupper & au giste audit lieu de Romiers: ledit Seneschal se retrahit seul en vne chambre pour illec prendre son repos de la nuit. Et pareillemēt ladicte femme se retrahit en vne autre chambre: laquelle meüe de lescherie desordonnée (comme disoit sondit mary) tira & amena avecques elle vn gentil-homme du paÿs de Poictou, nommé Pierre de la Vergne, lequel estoit veneur de la chasse dudit Seneschal: & lequel elle fait coucher avecques elle. Laquelle chose fut dicte au Seneschal par vn sien seruiteur & maistre d'hostel, nommé Pierre l'Apotichaire. Lequel Seneschal incontinent print son espée & vint faire rōpre l'huis, où estoient lesdits dame & veneur. Lequel veneur il trouua en chemise: auquel il bailla de son espée dessus la teste & au trauers du corps, tellemēt qu'il le tua. Et ce fait s'en alla en vne chambre, où il retrait au ioignant de ladicte chambre, où il trouua ladicte femme mussée dessoubs la couste d'un liēt, où estoient couchez ses enfans: laquelle il print & la tira par le bras à terre. Et en la tirant abas, luy frappa
de

de ladicte espée parmy les espaulles. Et puis elle descēdue à terre & estāt à deux genoux, luy trauer sa ladicte espée parmy les mammelles & estomach, dont incōtinent elle alla de vie à trespas: & puis l'enuoya enterrer en l'abbaye de Coulons, & y fait faire son seruice. Et fait enterrer ledit Veneur en vn iardin au ioignant de l'hostel où il l'auoit occis. En apres le Roy estant à Lyon, qui aupres d'illec auoit grand quātité de son armée, eut certaines nouuelles que le Duc de Lorraine qui estoit au paÿs de Suisse auecques les Suisses, Bernes, Allemans & Lorrains pour desconfire ledit de Bourgongne, qui par sa folle obstination & outrecuidance estoit entré audit paÿs de Suisse: Et auec luy mené grand quātité d'artillerie, gens de guerre & marchās suiuan son ost qu'il auoit parqué, & mis en forme de siege deuant vne petite ville dudit paÿs de Suisse nommée Morat. Et le samedy xxij. iour dudit mois de Iuing audit an quatre cens lxxvj. enuiron l'heure d'entre dix & vnze de matin: ledit Duc de Lorraine accompagné (cōme dit est) s'en vint assaillir ledit de Bourgongne: & de prime venue iceluy de Lorraine desconfit toute l'auantgarde dudit de Bourgongne, qui estoient xij. mille combattans & mieux, dont auoit la charge & conduicte mōseigneur le Comte de Romōt, qui à bien grād haste trouua moyen de foy sauuer & mettre en fuite luy xij. Et puis se bouterent les gens de guerre, estans dedans ledit Morat auecques les autres de ladicte armée de mondit seigneur de Lorraine dedans le parc dudit de Bourgongne, où ils tuerēt tout ce qui y fut trouué & sans misericorde aucune. Et fut ledit Duc de Bourgongne contrainct de se retraire auec vn peu de gens de guerre de son armée qui se sauuerent. Et depuis sondit parc s'enfuit sans arrester, souuēt regardant derriere luy iusques à Ioigné, qui est bien distant dudit lieu, où fut ladicte desconfiture de xv. à xvj. lieües Françoises. Et illec perdit tout son vaillāt qui y estoit: cōme, or, argent, vaisselle, ioyaux, tapisseries, toute son artillerie, tentes, pauillons, & generallemēt tout ce qu'il y auoit mené. Et apres ladicte desconfiture, lesdits Allemans & Suisses cōsiderant le grand seruice à eux fait par ledit de Lorraine, luy dōnerent & deliurerent toute ladicte artillerie & parc dudit de Bourgongne, pour la recompense de son artillerie, qu'il auoit perdue audit lieu de Nancy: qu'iceluy de Bourgongne par violēce de vouloir desordōné sans aucun tiltre, auoit prinse & emportée hors d'icelle ville. Et en ladicte desconfiture moururēt xxij. mille vij. cens hōmes, qui y furent trouuez morts tant dedans ledit parc que dehors, par le rapport fait des heraux & poursuuans, qui pour ladicte estimation faire se transporterent audit lieu. Et apres ladicte desconfiture ainsi faicte, que dit est, ledit de Lorraine & Suisses feirēt leur suite apres ledit de Bourgongne: & tuerēt depuis plusieurs autres Bourgongnons, qui aussi se retiroient audit lieu de Ioigné: & depuis feirent bouter les feux & destruire toute la Comté de Romont en Sauoye, où ils tuerent tout ce qui y fut par eux trouué, & sans misericorde aucune. Apres ces choses ainsi faictes ledit seigneur de Lorraine se retrahit à Strabourg, audit paÿs de Suisse: & d'illec apres s'en partit à tout quatre mille combattans de ladicte armée: & alla mettre le siege deuant sa ville de Nancy, où dedans estoient bien de mille à xij. cens cōbattans pour ledit de Bourgongne: Lequel siege il meit & ordōna deuant ladicte ville de Nācy: & apres qu'il eut ce fait, s'en retourna audit lieu de Suisse. Et depuis retourna audit siege à tout grand quantité d'autres gens de guerre.

EN apres le Roy par long temps festoit tenu à Lyon : & illec enuiron s'en retourna au Plessis du parc lez Tours, où estoient la Royne & monseigneur le Daulphin, où il seiourna vn peu de temps . Et puis s'en alla rendre graces à nostre Dame de Behuart, de ce que ses besongnes festoient bien portées durant sondit voiage dudit lieu de Lyon . Et si y enuoya argent en plusieurs & diuers lieux, où est reuerée la benoïste glorieuse vierge Marie . Et entre autres lieux donna, & enuoya à nostre Dame de Ardenbourg en Flandres deux cens escus d'or. Et en soy retournant dudit Lyon fait venir apres luy deux damoiselles dudit lieu iusques à Orleans: dont l'une estoit nommée la Gigonne, qui autrefois auoit esté mariée à vn marchand dudit Lyon. Et l'autre estoit nommée la Passefillon, femme aussi d'un marchand dudit Lyon, nommé Anthoine Bourcier. Et pour l'honnesteté desdictes deux femmes, leur fait & donna le Roy de grans biens : car il maria la Gigonne à vn ieune fils natif de Paris, nommé Geoffroy de Caulers : & pour ledit mariage donna argent & des offices audit Geoffroy. Et au mary de Passefillon, donna l'office de Conseillier en sa chambre des comptes à Paris, au lieu de maistre Iean de Reilhac: auquel pour ceste cause elle fut ostée. Et puis laissa la conduicte desdictes deux femmes à les mener à Paris dudit lieu d'Orleans, à damoiselle Ysabeau de Caulers femme de maistre Philippe le Begue, correcteur en la chambre des comptes à Paris . En apres le Roy s'en alla dudit lieu d'Orleans à Amboise & à Tours, par deuers la Royne & monseigneur le Daulphin: & depuis en pelerinage à nostre Dame de Behuart & autres saincts lieux. Et apres s'en retourna audit Plessis du Parc, & autres lieux voisins. En apres ladicte desconfiture faicte desdits Bourgongnons audit lieu de Morat: & que le siege eut esté ainsi mis deuant ledit Nancy, que dit est, par ledit Duc de Lorraine, fut icelle ville remise en ses mains: & s'en allerēt lesdits Bourgongnons, estans dedans par composition eux & leurs biens saufs . Et apres ce que ledit seigneur de Lorraine eut ainsi recourée sadicte ville de Nancy, & de nouuel aitaillée : & mis gens pour la garde d'icelle, ne demoura pas vn mois apres que ledit Duc de Bourgogne, qui festoit retrait en vne ville nommée Riuieres, qui est pres de Salins en Bourgogne : & qui auoit assemblé & fait amas de gens le plus qu'il auoit peu, s'en vint de rechief mettre le siege deuant ladicte ville de Nancy. Et d'autre part s'en alla ledit Duc de Lorraine audit pays de Suisse, pareillement faire son amas de gens pour reuenir secourir ses gens dudit Nancy & leuer ledit siege.

APRES ces choses le Roy de Portugal qui pretendoit à luy appartenir les Royaumes de l'une & l'autre castille, ensemble toutes les Espagnes à cause de sa femme: se partit de sondit Royaume de Portugal, & vint descendre es marches de France, & puis vint à Lyon, & de la à Tours par deuers le Roy pour luy aider à recouurer lesdits Royaumes : & fut receu du Roy moult benignement & honnorablement : & apres ce qu'il eut esté audit lieu de Tours par certaine espace de temps, où il fut fort festoyé & entretenu de plusieurs seigneurs & nobles hommes estans avecques le Roy: & tout aux cousts & despens du Roy. Ledit Roy de Portugal print congé du Roy & s'en alla à Orleans, où il luy fut fait honneste recueil . Et apres s'en partit dudit Orleans & vint en la bonne cité de Paris, dedans laquelle il fait son entrée. Et y arriua le samedi xxij. iour de Novembre

uembre cccc.lxxvj. enuiron l'heure d'entre deux & trois apres midy . Et y entra par la porte S. Iaques. Et pour aller au deuant de luy & le recueillir aux champs iusques au moulin à vent , y furent tous les estats de Paris & par ordre & honnestes & riches habits, tout ainsi que ce eut esté pour faire l'entrée du Roy : & premierement issirent hors Paris pour aller à luy les Preuost des marchans & escheuins de ladicte ville, qui pour ladicte venue furent vestus de robbes de draps, de damas blanc & rouge, fourrées de martres . Lesquels estoient accompagnez des bourgeois & officiers de ladicte ville . En apres y fut aussi messire Robert d'Estouteuille Preuost de Paris, qui estoit accōpagné de ses lieutenants ciuil & criminel, & tous les officiers du Roy & praticiens du chastellet, qui sy trouuerent en grand nombre & honnestes habits: en apres y vint monseigneur le Chancelier d'Oriolle, messeigneurs les Presidens & conseilliers de la Court de Parlement, les conseilliers & gens des Comptes, les Generaux sur le fait des aydes & monnoyes & du tresor: avecques grand quantité de Prelats, Euesques & Archeuesques, & autres notables hommes en moult grand & honneste nōbre. Et ainsi accompagné que dit est, fut mené & conduict iusques à la porte S. Iaques, où illec en entrant par icelle dedans ladicte ville, trouua de rechief lesdits Preuost des marchans & escheuins, qui luy presenterent vn moult beau poille ou ciel, qui estoit armoyé par les costez aux armes du Roy, & au meilleur lieu y estoient les armes d'Espagne : & puis se bouta deffoubs iceluy poille . Et luy estant ainsi deffoubs vint & fut conduit iusques à S. Estienne des Grecs, où il trouua là les Recteurs, supposts & bedeaux de l'vniuersité de Paris, qui proposerent deuant luy sa bien venue. Et ce fait s'en vint iusques à l'Eglise de Paris, où il fut receu par le Prelat d'icelle moult honnorablement . Et apres son oraison faicte, s'en vint au long du pont nostre Dame : & trouua à l'entrée de Marchepalu cinquante torches allumées, qui le conduisirent autour dudit poille . Et au bout dudit pōt nostre Dame, à l'endroit de la maison d'vn cousturier nōmé Motin, y fut trouué vn grand eschauffault où estoient diuers personages, qui estoient ordonnez pour ladicte venue : & d'illec s'en alla descendre en son logis, qui luy fut ordonné en la rue des Prouuaires en l'hostel de maistre Laurens Herbelot, marchant & bourgeois de ladicte ville, où il fut bien recueilly . Et là luy furent faits plusieurs beaux presens tant de ladicte ville que d'ailleurs: & fut veoir tous les beaux lieux & estats de Paris. Et premieremēt fut mené en la court de Parlement, qui fort triompha à ce iour de sa venue . Car toutes les chambres y furent tendues & parées. Et en la grand chambre y trouua monseigneur le Chancelier d'Oriolle, messeigneurs les Presidens, Prelats, conseilliers & autres officiers tous honnestement vestus. Et deuāt luy y fut plaidoyé & publié vne matiere en regalle, par maistre François Hasle archediacre de Paris & aduocat du Roy en ladicte Court . Et contre luy estoit pour aduocat maistre Pierre de Braban aduocat en ladicte Court, & curé de S. Eustace: lesquels deux aduocats il faisoit moult bel ouir. Et apres ladicte plaidoyerie luy furent monstrez les chambres & lieux de ladicte Court . Et par autres iournées fut en la grand salle de l'hostel de l'Euesque de Paris, pour illec veoir faire vn Docteur en la faculté de Theologie. Et apres alla veoir le chastellet, les prisons & chambres qui toutes estoient tendues, & tous les officiers chacun en son estat vestus

de beaux & honnestes habits. En apres le dimenche premier iour de Decembre audit an quatre cens lxxvj. allerent passer par deuant son logis toute l'vniuersité de Paris, & toutes les facultez & subiects d'icelle. Et puis s'en vindrent chanter vne grand Messe à saint Germain l'Auxerrois. Et par tout où il alloit par ladicte ville estoit mené & conduict par monseigneur de Gaucourt Lieutenant du Roy audit lieu de Paris, qui luy donna en sa maison vn moult beau & riche soupper, où y furent grand nombre de gens notables d'icelle ville tant hommes que femmes, dames & damoiselles & autres.

Audit mois d'Octobre aduint à Tours qu'un nommé Ieanbon natif du païs de Galles, qui auoit belle pension du Roy, & qui l'auoit marié à vne femme de Mante qui auoit bien du sien: conspira par l'enhortement du Duc de Bourgongne (comme il confessa) d'empoisonner & mettre à mort monseigneur le Daulphin aîné fils du Roy. Et pour ledit cas qu'il confessa estre vray, fut condamné par le preuost de l'hostel du Roy, à estre decapité. Et en le voulant executer luy fut demandé par ledit preuost s'il vouloit plus rien dire. Lequel respondit que non, si non qu'il pleust au Roy d'auoir sa femme & ses enfans pour recommandées. Et à lors luy fut dit par ledit preuost, qu'il choisist de deux choses l'une: c'est à sçauoir de mourir ou d'auoir les yeux creuez. Lequel choisit d'auoir les yeux creuez, ce qu'il luy fut fait faire par ledit preuost, & puis fut deliuré à sa femme. Laquelle le Roy voulut qu'elle eust la pension de son dit mary durant sa vie.

Comment le Duc de Milan fut occis & de ce qui en fut fait: de la totale destruction & mort du Duc de Bourgongne par le victorieux Duc de Lorraine deuant la ville de Nancy: & de la reduction de ses païs & autres lieux qu'il vsurpoit à la couronne: comme les villes d'Arras, & de Hedin où furent decapitez aucuns dudit Arras, Cambray, & aussi plusieurs autres villes, és ans mille quatre cens lxxvj. & lxxvij.



V mois de Decembre audit an lxxvj. feste de saint Iean és festes de Noël: aduint par male fortune que le Duc de Milan fut tué & meurdry par vn gentil-homme du païs, que ledit iour en faignant de vouloir parler à luy dedans la grand Eglise dudit Milan, où il se pourmenoit avecques vne ambassade qui estoit venue par deuers luy, vint secrettement luy bouter vn cousteau parmy la fente de sa robbe dedans le petit ventre, où le meit soubdainement par trois ou par quatre fois & sans dire mot, cheut soubdainement à terre tout mort. Et fut fait ledit fait pour raison de ce que ledit gentil-homme, ses parens & amis, auoient mis & employé tout leur vaillant pour payer le vaccant d'une abbaye, pour vn de leurs parens. Auquel ledit Duc de Millan luy auoit ostée pour la bailler à vn autre. Et pource qu'il ne voulut delaisser & en souffrir iour leur dit parent. Iceluy gentil-homme apres ce qu'il eut de ce fait plusieurs requestes audit Duc de Milan, qui ne luy vouloit accorder, fait & commist ledit homicide à la personne dudit Duc de Milan dedans ladicte Eglise. En laquelle aussi incontinent ce fait fut tué & meurdry, & vn autre de ladicte ville qui accompagnoit ledit gentil-homme, qui aussi auoit deliberé de tuer ledit Duc de Milan, pour ce qu'il luy detenoit & maintenoit sa femme contre

contre son gré & voulenté estant avecques luy. Et par la sentence des nobles dudit païs, des iuges & autres notables personnes dudit Milan : fut dit & delibéré que tous les hommes, femmes & enfans du costé & ligne de iceluy gentilhomme : & celuy de sadicte compaignée quelque part qu'ils seroient trouuez, seroient tuez & meurdriés : & leurs maisons & seigneuries demolies & iettez par terre & arrasez : mesmement les arbres portans fruiçts à eux appartenans desracinez, & mise la racine dessus : ce qui fut fait. Audit mois de Decembre quatre cens septante six. mourut & alla de vie à trespas Madame Agnes de Bourgonne, au chasteau de Moulins en Bourbonnois. Laquelle eut espousé feu Prince de tres noble memoire, monseigneur Charles en son viuant Duc de Bourbonnois & d'Auuergne, dont est issue tres noble & treshonnestre lignie tant masles que femelles : comme treshault & puissant Prince monseigneur Iean Duc de Bourbonnois & d'Auuergne, qui espousa tres excellente princesse Madame Jeanne de France fille aînée du Roy Charles septiesme de ce nom, monseigneur Loys seigneur de Beaujeu, qui mourut ieune, monseigneur Charles Archeuesque & Comte de Lyon primat de France, Cardinal de Bourbon : monseigneur Pierre seigneur de Beaujeu qui espousa l'aînée fille du Roy de France lors fille dudit Roy Charles, monseigneur l'Euesque du Liege, laques monseigneur qui mourut à Bruges, Madame Ieâne qui fut espousée au Prince d'Orenge seigneur d'Arlay, Madame Marguerite femme de Philippe, monseigneur de Sauoye seigneur de Bresse. Et laquelle deffuncte Dame vesquit sainctement & longuement. Et son trespas fut fort plaint & ploré de tous ses enfans, parens, seruiteurs & amis, & de tous autres habitans esdits païs de Bourbonnois & d'Auuergne. En benoist repos gise son ame. Elle gist en l'Eglise de Souigny. Et apres que ces choses eurent esté ainsi faictes, que dit est, le Duc de Bourgongne qui auoit mis le siege deuant la ville de Nancy en Lorraine, pour icelle auoir comme deuant auoit eüe : meit les gens qui estoient dedans icelle ville pour ledit Duc de Lorraine en telle necessité, qu'ils n'auoient plus que menger : & par grand contrainte de famine festoient mis en composition d'eux rendre és mains dudit Duc de Bourgongne. Le dimenche veille des Roys v. iour de Ianuier audit an lxxvj. vint & arriua ledit monseigneur de Lorraine accompagné de xij. à xiiij. mille Suisses, Allemans & autres gens de guerre pour leuer ledit siege, combattre ledit de Bourgongne, & recouurer ledit Nancy : dont en aduint ce qui s'ensuit. C'est à sçauoir que quatre iours auant la iournée & venue dudit de Lorraine deuant Nancy, qui fut le v. de Ianuier veille des Roys cccc. lxxvj. le Comte de Campobasse, le sire Ange & le seigneur de Montfort laisserent le Duc de Bourgongne, & l'abandonerent en sondit parc. Et le mercredy deuant la bataille ou iournée, iceluy Comte de Campobasse, en emmena bien avecques luy neuf vingts hommes d'armes. Et le samedy ensuiuant les deux autres capitaines dessus nommez, en emmenerent bien six vingts hommes d'armes, qui tous vouloient estre François. Mais on dissimula de les receuoir pour la trefue. Et fut ordonné par aucuns à qui ils s'adresserent qu'ils s'en iroient en Lorraine. Laquelle chose ils feirēt, reseruē vne partie qui demoura pour garder Condé, qui est vne place sus la riuere de Mozelle, par où tous les viures dudit Duc de Bourgogne passoiēt, qui venoient du val de Mets & du païs de Luxembourg. Et s'en tira ledit sei-

gneur de Câpobasse deuers môseigneur de Lorraine, & l'aduertit de tout le fait dudit de Bourgongne. Et incontinent s'en retourna luy & ses gens audit lieu de Nancy. Et ledit iour de samedi quatriesme iour dudit mois de Ianuier, ledit monseigneur le Duc de Lorraine arriua à saint Nicolas de Varengeuille, & les Suisses avecques luy, qui bien estoient dix mille cinq cens de vray compte fait: & d'autres Allemans y auoit beaucoup, sans les Lorrains & autres gens de guerre.

LE dimenche ensuiuant cinquiesme iour dudit mois environ huit heures de matin, desemparèrent & partirent lesdits seigneurs de Lorraine & de Suisse: & vindrent à Neufuille, & outre vn estang pres d'illec firent leurs ordonnâces. Et en effect lesdits Suisses se meirent en deux bandes, dont le Comte Dabstain & les gouuerneurs de Fribourg & de Zurich auoient l'une d'icelles bandes. Et les aduoüez de Berne & de Lucerne l'autre: & environ midy marcherent tous à vne fois. C'est à sçauoir vne bande deuers la riuere, & l'autre tout le grand chemin à venir deuers ledit Neufuille audit Nancy. Ledit Duc de Bourgongne estoit ja mis hors de son parc & en bataille. Et au deuant & deuers luy, y auoit vn ruisseau qui passe à vne maladerie nommée la Magonne: & estoit ledit ruisseau entre deux fortes hayes des deux costez, entre luy & lesdits Suisses. Et sur le grand chemin par où venoient l'une des bades d'iceux Suisses, auoit ledit Duc de Bourgogne fait asseoir tout le plus fort de son artillerie. Et ainsi que les deux bandes marchoient, & qu'elles furent à vn grand traict d'arc des Bourgongnons deschargea sur iceux Suisses & y fait quelque dommage. Laquelle bande des Suisses laissa ledit chemin & tira au dessus vers le bois, & fait tant qu'elle fut au costé dudit Duc de Bourgongne au plus hault du lieu.

EN faisant ces choses ledit Duc de Bourgogne fait tourner ses archiers, qui tous estoient à pied deuers iceux Suisses: & ordonna deux esles de ses hommes d'armes pour batailler, dont en l'une estoit Iaques Galiot capitaine Italien. Et à l'autre estoit le souuerain de Flâdres nommé messire Iosse de Lalaing. Et si tost que lesdits Suisses se trouuerēt au dessus, & au costé dudit de Bourgongne: tout à vn coup se tournerent le visage vers luy & son armée: & sans arrester marcherent le plus impetueusement & orgueilleusement que iamais gens firent. Et à l'approcher pour ioindre, deschargerent leurs couleurines à main. Et à ladicte descharge (qui n'estoit pas des Generaux des finances) tous les gens de pied dudit de Bourgogne se meirent en fuite. La bande desdits Suisses qui estoit deuers la riuere, marcherent quant & quant celle dudit Galiot: & de ceux qui estoient avecques luy, & frapperent lesdits Suisses dedans eux, tellement qu'ils furent incontinent deffaits. L'autre esle desdits Bourgongnons, tourna pareillement sur l'autre bande desdits Suisses: mais ils les recueillirent bien & si tost que lesdits gens dudit Duc de Bourgogne, qui estoient à pied se meirent en fuite: tous les gens de cheual picquerent apres, & tirerent pour passer au pont de Bridores à demie lieüe de Nancy, qui estoit le chemin à tirer vers Thionuille & Luxembourg. Et lequel pont de Câpobasse auoit empesché & y estoit luy & ses gens & autres gēs d'armes tous en armes: & auoit fait mettre des chariots au trauers dudit pont. Et ainsi que la foule desdits Bourgongnons y arriuoit trouua illec empeschement: monseigneur de Lorraine & ses gens qui le suiuoient au dos, pource

pource qu'on gardoit ledit pont, & qu'il estoit bataille, lesdits Bourgongnons furent contraints d'eux ietter aux guez de la riuere. Et là fut la grand desconfiture & plus la moitié qu'au champ de la bataille : car ceux qui se iettoient en l'eauë, estoient incontinent tuez par lesdits Suiffes qui y vindrent : & ceux de l'autre partie se noyoient eux mesmes, & tout le demourant fut prins ou mort & bien peu s'en sauua. Et aucuns quand ils veirent l'embusche dudit pont, se tirerent vers les bois, & là les gens du païs si les suiuiroient & les prenoient & tuoient, & à quatre lieuës enuiron on ne trouuoit que gens morts par les chāps & chemins. Et dura la chasse sur lesdits Bourgongnons iusques à plus de deux heures de nuict, que monsieur de Lorraine s'enquist de tous costez qu'estoit deuenue ledit Duc de Bourgongne & s'il s'en estoit fouy ou s'il estoit prins, mais à l'heure n'en furent sceuës aucunes nouuelles. Et tout incontinent fut enuoyé par ledit de Lorraine homme propre en la ville de Mets par deuers vn, qui estoit nommé Jean Dais clerc de ladicte ville de Mets, pour sçauoir se ledit Duc de Bourgongne estoit point passé : & le lendemain ledit Jean Dais manda dudit lieu de Mets audit seigneur de Lorraine, que seurement il n'estoit point passé : & ne sçauoit-on qu'il estoit deuenue & qu'il n'auoit point tiré vers Luxembourg. Et le lendemain qui fut lundy iour des Roys, ledit Comte de Campobasse, mōstra vn paige qui auoit esté prins, qui auoit nom Baptiste natif de Romme, de la lignée de ceux de la Coulonne, qui estoit avec le Comte de Chalon Neapolitain, lequel estoit avec ledit Duc de Bourgongne. Et apres qu'il eut esté interrogué fut iceluy paige mené à grand compagnie de gens de guerre au lieu, où ledit de Bourgongne gisoit mort, lequel estoit tout nud. Et en iceluy lieu le mardy ensuiuant de ladicte bataille au matin, ledit paige monstra clerement ledit Duc de Bourgongne mort & tout nud : & enuiron luy quatorze hommes tous nuds les vns assez loing des autres. Et auoit ledit Duc de Bourgongne vn coup de baston, nommé hallebarde à vn costé du milieu de la teste par dessus l'oreille iusques aux dents, vn coup de picque à trauers des cuisses, & vn autre coup de picque par le fondement. Et fut cogneu manifestement que c'estoit ledit Duc de Bourgongne à six choses. La premiere & la principale fut aux dents de dessus, lesquelles il auoit autresfois perdues par vne cheute. La seconde fut d'vne cicatrice, à cause de la plaie qu'il eut à la journée de Montlehery en la gorge en la partie dextre. La tierce à ses grans ongles, qu'il portoit plus que nul autre homme de sa court ne autre personne. La quarte fut d'vne plaie qu'il auoit en vne espaule, à cause d'vn escarboucle que autresfois y auoit eue. La cinquiesme fut à vne fistule, qu'il auoit au bas du ventre en la pennilliere du costé dextre. Et la sixiesme fut d'vn ongle qu'il auoit retrait en l'orteil. Et ausdictes enseignes donna son iugement pour tout vray vn sien medecin Portugalois, nommé maistre Mathieu que c'estoit ledit Duc de Bourgongne son maistre. Et aussi le dirent pareillement ses varlets de chambre, le Grand-Bastard, messire Oliuier de la Marche, son chappellain, & plusieurs autres de ses gens prisonniers dudit monseigneur de Lorraine.

ET TANTOST apres que ledit Duc de Bourgongne ainsi trouué eut esté porté audit lieu de Nancy, & illec lauë & mundé & nettoyé : il fut mis en vne

chambre bien close, où il n'y auoit point de clarté : laquelle fut tendue de velours noir, & estendu le corps dessus vne table, habillé d'un vestement de toille depuis le col iusques aux pieds. Et dessus sa teste fut mis vn oreillier de velours noir. Et de sus le corps vn poille de velours noir : & aux quatre cornets auoit grans cierges, & aux pieds la croix & l'eau benoïste. Et ainsi habillé qu'il estoit le vint veoir mondit seigneur de Lorraine, vestu de deuil : & auoit vne grand barbe d'or venant iusques à la ceinture, en signification des anciens Preux, & de la victoire qu'il auoit sur luy eue. Et a l'entrée dit ces mots, en luy prenant l'une des mains de de sus ledit poille. Voz ames ait Dieu, vous nous auez fait moult de maux & douleurs. Et à tant vint prendre l'eau benoïste & en ietta dessus le corps : & depuis y entrerent tous ceux, qui le voulurent veoir. Et puis le feit ledit Duc de Lorraine enterrer en sepulture bien & honnorablement & luy fait faire moult beau seruice.

Et incontinent apres ladicte desconfiture & mort dudit de Bourgongne, ledit monseigneur de Lorraine & autres seigneurs & capitaines se meirent à conseil, & ordonnerent que aucuns d'eux iroient en la Duché de Bourgongne, en la Comté & autres lieux qui se tenoient pour ledit de Bourgongne, pour tous les reduire & mettre en la main du Roy : laquelle chose fut incontinent faicte sans resistance. Et pareillement ceux de la Comté d'Auxerre se rendirent & feirent serment au Roy. En ladicte bataille moururent la plus part de tous les gens de bien de ladicte compagnie : & y furent prins le grand bastard de Bourgongne, lequel depuis ledit monseigneur de Lorraine mena au Roy, luy estant en Picardie. Le bastard Baudouin de Bourgongne & plusieurs autres grans seigneurs prisonniers.

APRES ces choses, & que le Roy eut esté deuëment acertené de ladicte mort dudit Duc de Bourgongne & des choses dessusdictes, il se partit de Tours pour aller en pelerinage à sa deuotion. Et apres s'en retourna à Chartres, à villepereur, à Hauberuillier, à nostre Dame de la Victoire, & apres à Noyon & à Compiengne. Et ce pendant se reduisirent à luy plusieurs villes & places, tenues & occupées par ledit de Bourgongne : comme Montdidier, Peronne, Abbeuille, Monstreul sur la mer & autres places estans pres d'Arras. Mais lesdits d'Arras ne voulurent point obeïr de prime face & se fortifierent en ladicte ville de gens de guerre, viures & artillerie. Et furent enuoyez de par eux au Roy plusieurs ambassadeurs, qui teindrent la chose en trefue : pendant laquelle le Roy feit le plus grand amas d'artillerie, pouldres, pionniers, gens de guerre & autres preparatoires, que iamais on auoit veu : tousiours attendans quelle conclusion prendroient lesdits d'Arras, ou de appoinctement ou de guerre. Et pour faire les fraiz des choses dessusdictes, fut fait de grans emprunts à Paris & autres bonnes villes de ce Royaume. Et apres le Roy trouua moyen d'auoir & mettre la cité dudit Arras en sa main : dedans laquelle il entra le mardy quatriesme iour de Mars l'an septante six. Et feit fortifier & redifier ladicte cité contre ladicte ville d'Arras : dedans laquelle y auoit vn tas de gens illec venuz de plusieurs lieux, tenans le party de Bourgongne : & mesmement des villes qui nouuellement s'estoient reduictes au Roy. Et illec sans auoir chief ne hommes de conduicte se fortifierent fort. Et feirent de
grans

grans blasphemés au Roy : comme faire gibets en ladicte ville & sur les murs, & y pendre croix blanches, monstrier leur cul & autres villenies. Et s'entretindrent en leurs folles imaginations iusques à vn peu de temps apres, que vindrent deuers le Roy en ladicte cité aucuns manans dudit lieu d'Arras, pour auoir de luy aucune bonne pacification : avecques lesquels nonobstant qu'ils fussent de faulx & mauuaise obstination, & qu'en icelle eussent trop perseueré: Le Roy fut content avec eux que ladicte ville d'Arras seroit mise en sa main comme souuerain, & par deffaute d'homme, droits & deuoirs non faits. Et que les fruits & reuenues de ladicte ville & appartenances, seroient recueillis par ses commissaires: laquelle reuenue se pourroit prendre par lesdits commissaires, & sous la main du Roy par icelle damoiselle de Bourgongne, iusques à ce qu'elle luy eut baillé homme. Et qu'au regard de ladicte ville d'Arras, le Roy n'y mettroit puissance ne gens d'armes sans le bon gré & vouloir des habitans dudit lieu : apres lequel appoinctement ainsi fait, le Roy enuoya audit lieu monseigneur le Cardinal de Bourbon, monseigneur le Chancelier, messire Guiot Pot Baillif de Vermandois, messire Philippe de Creuecueur seigneur Desquerdes gouuerneur de ladicte ville, & autres tresnobles hommes pour prendre & receuoir les sermens des habitans dudit Arras, laquelle chose fut faicte. Mais en icelle faisant, lesdits habitans d'Arras en aucune partie se rebellerent, & vindrent en l'abbaye de saint Vvast, où estoient assis à disner lesdits seigneurs, Cardinal & autres nommez, en armes : & fort effrayez crians, tuez tuez: dont tous lesdits seigneurs eurent la plus grand paour & fraieur, qu'ils eurent onques en leur vie : mais il n'y eut point de mauuais mal fait pour ceste fois. Et apres ces choses & qu'ils furent retournez en la cité d'Arras, le Roy s'en partit & alla faire ses Pasques à Theroüenne. Et apres s'en alla à Hesdin, où il eut la ville : mais aucun paillards tenans le party du Duc de Bourgongne, s'en allerent mettre & bouter dedans le parc & chastel dudit Hesdin : auquel lieu le Roy feit tirer de son artillerie, & incontinent y feit vne grande bresche, par laquelle les gens du Roy y entrerent. Et en celle mesme heure ceux de dedans eurent composition de rendre ladicte place, & eux en aller eux & toutes leurs bagues sauues.

L'AN mille quatre cens septante & sept, apres ce que ledit lieu de Hesdin eut esté ainsi prins que dit est: aduint qu'aucuns habitans dudit Arras faignans de vouloir aller deuers le Roy, obtindrent vn bon & seur saufconduit de monseigneur l'Amiral qui le leur bailla: mais pource qu'il luy sembloit qu'ils auoient autre imagination que d'aller par deuers le Roy, les feit suiure : & trouua on qu'iceux alloient au pays de Flandres par deuers ladicte damoiselle de Bourgongne: pour laquelle cause ils furent prins & ramenez audit lieu de Hesdin, auquel fut fait leur proces. Et par iceux fut trouué, qu'ils alloient audit voyage en mauuaise intention : pour laquelle cause furent decapitez audit lieu de Hesdin, iusques au nombre de dixhuiet: entre lesquels y estoit vn nommé maistre Oudard de Bucy procureur general de ladicte ville d'Arras & de la Comté d'Artois, auquel fut le col couppé dedans vn chapperon d'escarlare fourré de lettiffes : & ladicte teste avecques ledit chapperon mise & boutée au bout d'un cheuron, auquel fut fort cloué ledit chapperon, affin qu'il ne fut emblé ensem-

ble ladicte teste : & contre ledit cheuron y auoit vn escripteau, où estoit escript : Cy est la teste maistre Oudart de Bucy Conseillier du Roy en sa Court de Parlement à Paris . Et apres ladicte execution faicte, le Roy s'en alla à nostre Dame de Boulongne sur la mer . Et pour raison des dessusdits ainsi decapitez, le Roy eut grande malle-vueillance contre ladicte ville d'Arras, & declaira lors qu'elle seroit toute destruiete . Et pour ce faire y enuoya manouriers, gens de guerre, artillerie, viures & autres habillemens de guerre : & y fut mis le siege fort & aspre . Et tira l'artillerie dedans icelle ville d'Arras, vers la fin du mois d'Auril que le Roy retourna en la dessusdicte cité d'Arras, où incontinent fait tirer ladicte artillerie, tant bombardes que autres : à cause dequoy toute la ville fut moult fort fouldroyée, & fut fort abbatu le Bouleuert que iceux de la ville d'Arras auoient fait contre ladicte cité : tellement qu'on veoit de ladicte cité parmy le bouleuert tout au long de ladicte ville d'Arras . Et tellement que apres ces choses ainsi faictes, lesdits manans & habitans dudit Arras furent fort espouentez & cuidoient bien mourir : mais il trouuerent moyen d'enuoyer deuers le Roy pour de luy obtenir sa bonne grace & misericorde, lequel le leur bailla & octroya : combien qu'il auoit abandonnée aux nobles hommes & Francs-archiers lors estans pour luy deuant ladicte ville, qui se teindrent à mal contents de la composition que leur auoit donnée le Roy, veu & consideré sondit abandonnement . Et que les dessusdits en perseuerant de mal en pis auoient iniurié le Roy, tué de ses gens & fait moult de maux, parquoy leur sembloit bien que le Roy ne les prendroit point à mercy . Et les gens du Roy au moyen dudit appoinctement entrerent dedans ladicte ville d'Arras le dimenche quatriesme iour de May mille quatre cens septante sept.

EN APRES la composition ainsi faicte dudit lieu d'Arras, s'en partit le Roy & vint à la Victoire . Ainsi s'en partit monseigneur l'Amiral, les gentils-hommes & Francs-archiers de Normandie, pour eux en aller chacun en leur maison . Et le Roy estant audit lieu de la Victoire, eut nouuelles que cinquante archiers de son ordonnance estoient allez à Peronne, pour y mettre & loger cinq prisonniers de par le Roy, ausquels il auoit fait refus d'y entrer, pourquoy il s'en partit & alla audit Peronne, cuidant qu'on y vouldist faire aucune rebellion : où il fut depuis par aucun temps que autres nouuelles luy furent apportées, que les Flamens & autres tenans leur party estoient sur les champs pour nuire au Roy & ses païs : pourquoy incontinent le Roy fit publier son arriereban, & que tout homme noble & non noble, priuilegié & non priuilegié : & pour ceste fois fut tout prest & en armes pour le seruir & resister à leur fureur . Et fut ledit cry publié à Paris le dimenche dixhuietiesme iour de May audit an mille quatre cens septante sept . En apres le Roy s'en alla à Cambray, où il fut receu par composition . Et illec fut receu par certain temps, & sy rafreschirent ses gens d'armes iusques au iour de la Trinité.

Comment le Roy manda venir à luy au lieu de Noyon tous ses conseilliers de Paris, pour faire le proces & expedition du Duc de Nemours: d'un Falsificateur executé à Paris: de la victoire du seigneur de Craon contre le Prince d'Orenge: de la mort du Duc de Gueldres deuant la ville de Tournay: & de la mort & capitalle execution dudit Duc de Nemours audit Paris: puis d'aucuns Flamans desconfits estans parquez és blancs fosses. Et des executez audit Paris pour auoir occis le Bourreau d'icelle ville de Paris en l'an que dessus lxxvij.

EN ce temps le Roy enuoya ses lettres patentes, adressans aux gens tenans sa court de Parlement à Paris: par lesquelles leur mandoit tous en general aller & eux transporter en la ville de Noyon, avec aussi les maistres des requestes de l'hostel du Roy: pour avecques le Roy & autres seigneurs de son sang & lignage, qui seroient illec veoir prendre conclusion & fin sur le fait du proces fait à l'encontre dudit de Nemours, qui par long temps auoit esté detenu prisonnier en la Bastille S. Anthoine à Paris: laquelle chose feirent lesdits de Parlement, & partirent de Paris pour aller audit lieu de Noyon le lundy second iour de Iuing, pour estre le lendemain audit Noyon, ainsi que mandé leur estoit par lesdictes lettres.

A V D I T temps & au mois de Iuing, le samedi quatorziesme iour d'iceluy mois, vn qui auoit esté de l'hostel du Roy, & qui auoit falsifié s^{on} signet, & celuy d'un des secretares: & à ceste cause auoit fait & signées plusieurs lettres & baillées en diuerses villes de ce Royaume, où il auoit (au moyen d'icelles) prins plusieurs sommes de deniers au nom du Roy, & icelles à luy appliquées: fut par ledit cas ledit delinquant son proces fait de par le Preuost de l'hostel du Roy ou son lieutenant, & depuis enuoyé audit lieu de Paris: auquel lieu & pour ledit cas fut pillorié & mittré: & puis flastré au fronc, le poing couppé & banny du Royaume de France, & ses biens & heritages declarez & acquis confisque au Roy.

A V D I T mois de Iuing aduint que le seigneur de Craon, à qui le Roy auoit baillé la charge de son armée, pour aller en la Comté de Bourgogne faire guerre à l'encontre du Prince d'Orenge, pour aucunes iniures à luy faictes par ledit de Craon, qui n'estoit pas de pareille maison de luy: & pour soy venger d'icelle iniure. Et aussi le Roy qui auoit baillé le gouuernement du païs audit Prince, & qui auoit esté aussi au moyen de faire mettre ledit païs en la main du Roy. Et l'auoit de ce deschargé pour bailler audit de Craon, s'en courrouça fort & trouua moyen de faire recouurer contre le Roy les païs, villes & places, qui à sa requeste festoiét reduictes à luy. Et avecques & en sa cōpagnie se meit, & bouta vn cheualier dudit païs de Bourgogne nommé messire Claude de Vaudray, qui soustindrēt la guerre contre ledit de Craon iusques à certain tēps, que ledit de Craon sceust que ledit d'Orenge estoit en vne ville nōmée Guy, où il vint mettre le siege, & y demoura par deux iours q̄ ledit seigneur de chasteau Guyon frere dudit d'Orenge & autres, vindrēt pour le secourir: dont fut aduertty ledit de Craon, qui s'en alla mettre en bataille contre ledit seigneur de chasteau Guyon, & y eut grand hurtiz à ladicte rencōtre: & de costé & d'autre y mourut de gens de façon xiiij. ou xv. cens combattans. Et de ladicte desconfiture, y fu-

rent faictes par l'ordonnance du Roy processions generalles à Paris en l'Eglise S. Martin des champs.

A v mois de Juillet ensuiuant audit an lxxvij. le Duc de Gueldres qui estoit venu loger pres de Tournay à tout xiiij. ou xv. cens Allemans, & vint cuidât bouter le feu és faulxbourgs dudit Tournay, & soy loger au pont de Pierre pres de ladicte ville, vindrent dommager icelle: fut fait faillie par deux fois sur ledit de Gueldres, où à la premiere faillie il fut tellemēt qu'il y mourut, & son corps apporté en la ville de Tournay & puis à la seconde faillie issirent sur ceux de son armée de trois à cccc. lances de l'ordonnance du Roy, avec aucuns particuliers de ladicte ville: lesquels meirent en fuite tous lesdits Allemans & Flamens, & bien tuerent deux mille, & de sept à huit cens prisonniers. Et de ladicte descōfiture en fut chanté en l'Eglise de Paris, *Te Deum laudamus*. Et fait faire les feux parmy les rues de ladicte ville.

A V D I T an mille cccc. lxxvij. le lundy iij. iour d'Aoust, messire Jaques d'Armignac Duc de Nemours & Comte de la Marche, qui auoit esté constitué & amené prisonnier de la Bastille S. Anthoine à tel & semblable iij. iour d'Aoust en l'année precedente, pour aucuns cas, delits & crimes par luy commis & perpetrez: durant lequel temps de son emprisonnemēt en iceluy lieu de la Bastille, luy furent faits plusieurs interrogatoires sur lesdictes charges: ausquels il respondit de bouche & par escrit: tant par deuant messeigneurs le Chancelier de France nommé maistre Pierre d'Oriolle, qu'autres des Presidens & conseillers de la Court de Parlement par plusieurs & diuerses iournées: & encores par certains grās clerks du Royaume, demourans en diuerses citez & villes dudit Royaume pour ce mādrez & assemblez de l'ordonnāce du Roy en la ville de Noyō, avec & en la compagnie desdits de Parlemēt. Et en la presence de monseigneur de Beaujeu illec representant la personne du Roy, fut tout veu & visité la procedure par ladicte Court faicte à l'encontre dudit de Nemours: ensemble aussi les excusations par luy faictes & baillées seruans à sa saluation. Et tout par eux veu, cōclurent audit proces: tellement que ledit iour de lundy iij. iour d'Aoust fut audit lieu de la bastille messire Iean le Boulengier premier President audit Parlement, accōpagné du greffier criminel de ladicte Court, de sire Denys Hefselin maistre d'hostel du Roy, & autres qui vindrent dire & declairer audit de Nemours, que veües les charges à luy imposées, ses cōfessions & excusatiōs par luy sur ce faictes: & tout veu & considéré à grande & meure deliberation, luy fut dit par ledit President & par la Court de Parlemēt, qu'il estoit crimineux de crime de leze Majesté. Et cōme tel cōdamné par arrest d'icelle Court, à estre ledit iour decapité és halles de Paris, ses biens, seigneuries & terres acquises & cōfiscuées au Roy: laquelle execution fut ledit iour faicte à l'eschauffaut ordonné esdictes halles à l'heure de trois heures apres midy, qu'il eut illec le col couppé: & puis fut enseuely & mis en biere & deliuré aux Cordelliers de Paris, pour estre inhumé en ladicte Eglise: & vindrent querir ledit corps esdictes halles iusques enuiron de sept à huit vingts Cordelliers, à qui furent deliurées xl. torches pour mener & cōduire ledit corps dudit seignr de Nemours en leur dite Eglise.

A V D I T mois le Roy qui estoit à Theroüenne enuoya partie de son armée, pour combatre & mettre hors de leur parc certaine quantité de Flamens, qui

qui estoient parquez en vn lieu nommé le Blanc-fossé:lesquels Flamens quand ils ouïrent nouuelles de la venue du Roy & son armée, s'enfuirent & desparquerent: & audit desparquement frapperent noz gens sur les dessusdits Flamens, desquels en y eut bien tué deux mille. Et depuis furent suiuis iusques bien loing dedans le paÿs de Flandres:& passerent lesdits gens du Roy au mont de Cassel à Fiesnes, & autres places qui furent prinſes & arrasées, & tuerent encores bien autres deux mille. Et desdictes desconfitures en furent faictes de moult belles processions en la ville de Paris.

A V P I T mois l'an mille cccc.lxxvij. aduint qu'un ieune fils Bourreau à Paris, nommé Petit-Iean fils de maistre Henry Cousin maistre Bourreau en ladicte ville de Paris, qui desia auoit fait plusieurs exploicts de Bourreau. Et entre les autres auoit executé & coppé le col de messire Loÿs de Luxembourg Connestable de France, fut tué & meurdry ledit petit Iean en ladicte ville de Paris, au pourchats d'un menuisier, qui estoit nommé Oudin du Bust, natif du paÿs de Picardie, qui auoit conceu haine mortelle contre ledit Petit-Iean, pour raison & cause de ce que ledit Petit-Iean auoit frappé ou battu long temps par auant ledit du Bust, pour aucune noïse qu'ils eurent ensemble, à cause de ce que ledit menuisier du Bust luy demandoit la grosse & ſéel d'une obligation, en quoy ledit Petit-Iean estoit obligé à iceluy Oudin du Bust. Et de laquelle obligatiō ledit Petit-Iean auoit payé le principal, & ne restoit que ledit grossement & ſéel. Et pour estre ledit du Bust vengé dudit Petit-Iean, s'associa ledit du Bust de trois ieunes compagnons demourans en ladicte ville de Paris:l'un d'iceux nommé l'Empereur du Houlx sergent à verge, l'autre Iean du Foing fontenier & plombeur: & l'autre nommé Regnault Goris orfeure fils de Martin Goris, courtier de geolerie. Tous lesquels quatre de guet à pense & propos deliberé, vindrent assaillir ledit Petit-Iean qu'ils trouuerent au coing de la rue de Garnelles pres de l'hostel du Moulinet: & vint le premier à luy ledit Empereur du Houlx sous fiance amiable, qui le print par dessus le bras en le tenant fermement. En luy disant qu'il n'eust point de paour des dessusdits, & qu'ils ne luy feroient point de mal. Et en luy disant ces choses vint ledit Regnault Goris, qui frappa ledit Petit-Iean d'une pierre par la teste, dont il chancela. Et lors ledit Empereur le lascha: & incontinent vint à luy ledit Iean du Foing, qui luy bailla d'une laueline au trauers du corps, dont il cheut mort en la place: & depuis qu'il fut mort ledit du Bust luy vint couper les iambes. Et à tant se departirent les quatre dessusdits, & s'en allerent bouter en franchise aux Celestins de Paris: auquel lieu la nuit ensuiuant furent prins & tirez dehors, par l'ordonnance & commandement de messire Robert d'Estouteuille Cheualier, preuost de ladicte ville de Paris, & gens de conseil. Pource que par information leur apparut dudit guet appens & propos deliberé, dequoy lesdits Celestins appellerent: & par la court de Parlement fut l'appel voidé, & dit qu'ils ne iouyroient point des priuileges de l'Eglise. Et apres comme clerks furent requis par l'Euesque de la ville de Paris, comme ses clerks. Aussi pareillement fut dit par arrest de parlement qu'ils ne iouyroient point du priuilege de Clerc, & furent renuoyez par deuant ledit preuost: par la sentence duquel, ils furent tous condamnez à estre pendus & estrāglez, dont ils appellerent

en la Court de Parlement:laquelle conferma ladicte sentence,qui fut executée: & furent tous quatre pendus au gibet de Paris, par les mains dudit maistre Héry pere dudit petit Iean, qui pourtant fut vengé de la mort de sondit fils le ieu- dy veille de monseigneur S.Iean de Collace xxviij. iour dudit mois. Et furent pendus en la maniere qui s'ensuit, & tout au ioingnât l'un de l'autre . C'est à sça- uoir ledit Empereur le premier, Iean du Foing le secōd, Regnault Goris le tiers, & ledit Iean du Bust le quatriesme & dernier . Et est assçauoir que lesdits Em- pereur, du Foing, & Goris estoient trois beaux ieunes hommes : Et en outre pour le cas, fut battu de verges & banny du Royaume de France vn ieune fils cordonnier, qui auoit conspiré de la mort dudit petit Iean, mais point ne festoit trouué à icelle.

Comment le Cardinal de saint George fut detenu prisonnier à Florence, là où fut adonc pendu & estranglé l'Archeuesque de Pise : & autres plusieurs pour auoir occis Iu- lian de Medicis: du siege du Turc deuant Rhodes: du Saint Symon & un autre cru- cifiez & martyrizex: d'un deuot Hermite qui vesquit xv. ans du S. Sacremēt: d'un mōstre né en la ville de Veronne: d'une merueilleuse comette, & autres plusieurs cho- ses adioustées en icelles presentes chroniques .

ENuiron ce temps & vn peu apres que le Duc de Milan eut esté tué, ainsi qu'il est dit, vne grande sedition fut esmeüe dedans la cité de Florence: en laquelle vn noble citoyen de ladicte ville dit & ap- pellé Francisque des Paets, aduoué de plusieurs autres grans person- nages Italiques, accompagné de leurs familles, naura & occit d'une dague vn nommé Iulian fils de Cosme de Medicis dedans l'Eglise de Sainte, réparée en ladicte ville:lequel meurtre fut fait & commis celebrāt les solennitez des mes- ses en icelle Eglise . Et aussi fut blessé son frere aisné nommé Laurent de Medi- cis, mais il fut puis apres sané . Et pour ceste cause tresreuerend pere en Dieu le seigneur Nicolas Cardinal du tiltre S. George, nepueu du Comte Hierosme, fut detenu prisonnier en garde secrette. Et ainsi reuerend pere en Dieu le seigneur Francisque de Saluiat Archeuesque de Pise, fut publiquement pendu & estran- glé en habit Episcopal au palais des seigneurs de Florence . Et pareillement fu- rent pendus avec luy plusieurs autres de sa famille, & de ceux dudit Cardinal, & aucuns d'eux executez par autres diuerfes manieres: Pour lesquelles execu- tions faictes, le Pape Sixte iiij. de ce nom du conseil des seigneurs Cardinaux, fait prononcer & manifester vne merueilleuse excommunication & horrible interdit en ladicte ville de Florence . Et aussi fut suscitē vne cruelle guerre en toute Tuscie par l'Eglise, & furent faictes aucunes grandes occisions . Et en ces entrefaictes, par aucun Orateur de la seigneurie de Venise, fut remis & rédu le- dit Cardinal de saint George en sa liberté, & retourna en la cité de Romme: mais toutesfois dura encores la guerre aucun temps entre l'Eglise & les Florē- tins. Puis en apres fut appaisée & vsa de misericorde enuers les preditions Floren- tins, lesquels furent absoulz & pacifiez avec l'Eglise. Les Iuifs enuiron ce temps prindrent & roberent en la cité Tridentine, vn ieune enfant en l'aage de xiiij. ans appellé Symon:lequel ils crucifierent & luy feirent souffrir les mysteres de la passion, à la similitude de nostre seigneur Iesus Christ: & ainsi le feirent mourir en l'es-

en l'effusion de son sang: pourquoy ils furent grandement punis, selon leurs demerites. Et adonc fut porté iceluy martyr en l'Eglise ~~Cardinale~~ d'icelle cité: Là où venoit de toutes parts vne grāde affluence de peuple, car par la deuotion dudit enfant estoient faits plusieurs beaux miracles pour la memoire de la passion de nostre Seigneur. Consequemment apres aduint vn pareil cas en la cité où chasteau d'Opiterge sous la seigneurie de Venise, où les Iuifs martyriserēt & meirent à mort vn ieune enfant en telle maniere que dessus: parquoy ils furent amenez à Venise: & illec apres la confession de leur vilain peché, furent bruslez tous vifs en vn feu au meillieu de deux colonnes, en la place deuant S. Marc. Ce mesme temps fut né en la ville de Veronne, vn monstre en forme de fille: laquelle auoit tant seulement vn chef & deux pieds, mais elle auoit quatre bras: c'est à sçauoir, deux les plus gros: lesquels elle mouuoit à sa volenté, & les deux autres plus tendres & menus, estoient immobiles. Elle auoit aussi deux ventres conioints enuers l'estomach: & si auoit pareillemēt deux portes & pertuis au ventre dessous, par lesquelles elle purgeoit & iectoît hors ses naturelles superfluitez. Et en ceste maniere estoit menée & portée ceste fille de ses parens par toute Italie, lesquels la mandioient & prenoient argent de ceux qui auoient desir de la veoir. Et enuiron ce temps furent tresgrādes inondations des eaües, & aussi treshorribles vents qui subuertirent plusieurs edifices. Le grand Turc enuiron ce temps avecques son grand & puissant exercite de guerre par terre & par mer, vint assieger la cité de Rhodes, en laquelle ils feirent plusieurs grans dommages, destruisant les murailles d'icelle cité de Rhodes de leurs bōbardes & artilleries: & si occirent plusieurs Chrestiens par diuerses & cruelles manieres, dont ils feirent innumerables playes en Chrestienté: car ils enuironnerent la cité de plusieurs parties & vindrēt iusques à la tour de S. Nicolas, lieu moult inexpugnable & de grande deffence pour ladicte ville. Et tellement que plusieurs & la plusgrand partie d'iceux Turcs, furent iusques dessus les murs & cōme prests de crier la ville gaignée: mais le seigneur grand maistre dudit Rhodes desploya adoncques vne grande baniere, en laquelle estoit singulierement depeinct l'image & representation du benoist crucifix: laquelle baniere desployée furent incontinent lesdits Turcs comme tous aueuglez, & par le diuin ayde de nostre Seigneur victorieusement repulsez arriere. Et depuis ne feirent iceux Turcs aucuns efforts ne assaulx à ladicte ville qui fut chose miraculeuse: mais toutesfois furent plusieurs morts & occis d'une part & d'autre. En apres entrerent aucuns Turcs en aucunes parties du Royaume de Cecille, là où ils gasterent plusieurs lieux & aucunes villes: car ils prenoient les hōmes qu'ils estrāgloient & faisoient mourir, & autres prenoient de leurs biens. Et tellement que lesdits Turcs feirent adoncques vne moult cruelle pestilence de glaïue en tout le païs: ils prindrent la cité d'Ottrente, là où ils occirent & meirent à mort quasi tous les habitans d'icelle cité pour la foy. Laquelle chose ils supporterent virillement & le plus constamment, qu'ils peurent pour l'hōneur de Dieu. Et puis ils prindrent finablement l'Archeuesque d'icelle cité, lequel ils sïerent par le meillieu: mais aussi est bien à sçauoir que plusieurs d'eux furent occis au conflict de ladicte ville. Vn deuot hermite fut enuiron ce temps ou vn peu deuant, és parties & limites des Suisses pres Vnder Valde: lequel seulement tous les

mois refect & substanté du S. Sacrement, vesquit l'espace de quinze ans & plus, sans prendre n'estre nourry d'autre viande corporelle. Et en ceste maniere fut trouuée la verité de plusieurs tesmoings, lesquels l'affirmerent ainsi: or n'est pas de merueilles se tant de guerres, meurtres, effusion de sang humain, & aucuns grans Princes & seigneurs, ont esté les vns occis & autres executez ainsi que dit est. Car deuant plusieurs icelles choses aduenues en ceste maniere: il est à noter & recapituler icy en ce lieu, pource qu'il a esté obmis, qu'en l'an mille cccc.lxxij. au commencement de l'année enuiron la feste sainte Agnes au mois de Ianuier, f'apparut & demonstra vne grande comette: laquelle adócques passa dessus Colongne en l'opposite du signe de Libra: & auoit icelle comette vne longue queue comme de trente degrez, qu'elle enuoya deuers Occident: & au iour de la feste S. Blaise, qui est le troisieme iour de Feurier, elle demoura & fut stante au signe d'Aries: & enuoya adoncques ladicte queue cōme aux Pleiades, qui sont estoilles pluuiiales deuers Orient. Ceste comette estoit souuentefois beaucoup vague, aucunes fois blanche, & puis autres fois elle estoit comme toute enflambée, & grandement citrine: dont icelle comette ainsi considérée, & est assçauoir selon la description de tous Astrologiens, qu'elle ne pouoit autre chose signifier, sinon batailles, epidemie & grāde pestilence de glaiue en diuerfes parties: & aussi en l'an prochain ensuiuant fut vn Esté moult chault & ferme: & si fut telle secheresse qu'il n'est memoire de semblables, & en aucunes terres & regions fut le feu allumée sous terre, cōme iusques à l'areine & poul dre pour la vehemente chaleur, Dieu nous vueille tous preseruer. Si retourneray à parler des faits & chroniques de France & autres parties de Gaule, Flandres, Bourgongne & Angleterre: En reprenant où j'ay laissé pour les choses cy dessus escrites.

Comment le Roy venant de Picardie à Paris, deliura les prisonniers de chastellet: du Prince d'Orenge: & messire Claude de Vaudray au Comté de Bourgongne: de S. Loïs & S. Charlemagne qu'il furent descendus de leurs lieux: le Roy fait faire douze grosses bombardes, & comment Edouard le Roy d'Angleterre fait mourir son frere en vne pipe de maluoisie. D'aucunes charges contre Daniel seruiteur de maistre Oliuier: du retour du Roy audit Picardie: & de plusieurs grans seigneurs & dames festoyez à Paris en l'an mille quatre cens lxxviij.



Vdit temps le Roy qui estoit au païs de Picardie, se partit dudit païs, & y laissa pour son lieutenant general monseigneur le bastart de Bourbon Amiral de France, pour la conduicte de la guerre & garde de tout le païs. Et au regard des gens de guerre de l'ordonnance du Roy, & autres estans pour luy esdits païs, on leur bailla & assigna len leur logis, en la cité & ville d'Arras, Tournay, Lens, la Bassée, & autres lieux sur les frontieres de Flandres & autres païs, qui encores se tenoient pour ladicte damoiselle de Flandres fille du Duc de Bourgongne. Et apres toutes ces choses ainsi faictes & ordonnées, le Roy s'en vint à nostre Dame de la Victoire veoir la belle dame illec aornée: & puis apres s'en tira à Paris où il ne seiourna gueres: & y estoit le iour de la feste S. Denys. A la reuerence duquel Sainct, il deliura tous les prisonniers estans en ses prisons de chastellet de Paris. Et puis s'en alla
à Tours,

à Tours, à Amboise & autres lieux voisins, où il se tint par assez longue espace de temps: durant lequel les Bourgongnons & autres ennemis du Roy sous les charges & compagnies du Prince d'Orange, messire Claude de Vauldray, & autres estans en la Comté de Bourgogne feirent & porterent de grans guerres aux gens du Roy, estans pour luy audit pays: & en fut fait de grans desconfitures sur lesdits gens du Roy, tant en la ville du Grey sur Sone & ailleurs, où lesdits gens du Roy festoient logez. Et y tuerent lesdits Bourgongnons aucuns gentils-hommes de l'ordonnance du Roy, sous les charges & compagnies de Sallezart & de Conyngan capitaine des Escoçois en bien grand nombre. En ladicte année, le Roy ayant en singuliere recommandation les saints faits de S. Loys & S. Charlemagne, ordonna que leurs images de pierre pieça mis & assis en deux des pilliers de la grand salle du palais royal à Paris, du reng des autres Roys de France, feussent descendus: & voulut iceux estre mis & posez au bout de ladicte grand salle au dessus, & au long de la chapelle estant au bout de ladicte salle ce qui fut fait. Et en furent payez les deniers que l'ouurage cousta à faire par Robert Cailletel receueur des aydes en ladicte ville de Paris.

A V mois de Decembre audit an, le Roy pour tousiours accroistre son artillerie, voulut & ordonna estre faictes douze grosses bombardes de fonte & metal de moult grãde longueur & grosseur: & voulut icelles estre faictes: c'est à sçauoir trois à Paris, trois à Orleans, trois à Tours, & trois à Amyens. Et durãt ledit temps fait faire bien grand quantité de boules de fer, és forges estans és bois pres de Creil: dont il bailla la charge à maistre Iean de Reilhac son secretaire. Et pareillement fait faire és carrieres de Peronne grand quantité de pierres à bombe. Et aussi faire dedans les bois grãd nombre de cheuretes & taudis de bois, avecques des eschelles à assaillir villes & forteresses, pour auoir & prendre les villes de Flandres & Picardie, qui encores audit temps estoient à reduire.

A V D I T temps aduint au Royaume d'Angleterre, que pource que le Roy Edouard dudit Royaume fut acertené, qu'un sien frere qui estoit Duc de Clairance, auoit intention de passer la mer & aller descendre en Flandres, pour donner ayde & secours à sa sœur Duchesse en Bourgogne veufue dudit deffunct le dernier Duc: fait iceluy Roy Edouard prendre & constituer prisonnier son dit frere & mettre en la tour de Londres, où il fut depuis detenu prisonnier par certaine longue espace de temps: pendant lequel ledit Edouard assembla son conseil, & par la declaration d'iceluy fut condamné à estre mené depuis ladicte tour de Londres, trainant sur les fossez iusques au gibet de ladicte ville de Londres: Et illec estre ouuert & ses entrailles iectez dedans vn feu: & puis luy couper le col & mettre le corps en quatre quartiers, mais depuis par la grand priere & requeste de la mere desdits Edouard & de Clairance, fut sa condamnation changée & muée: tellement qu'au mois de Feurier audit an, iceluy de Clairance estant prisonnier en ladicte tour, fut prins & tiré de ladicte prison, & apres qu'il eut esté confessé fut mis & bouté tout vif dedans vne pipe de maluoisie deffoncée par l'un des bouts la teste en bas: & y demoura iusques a ce qu'il eut rendu l'esprit. Et puis fut tiré dehors, & luy fut le col couppé: & apres enseuely & porté enterrer aux Carmes avecques sa femme, iadis fille du

Comte de Vvaruich, qui mourut à la journée de Conueneray avecques le Prince de Galles fils du saint Roy Henry d'Angleterre de l'Anclastre.

A V D I T temps aduint à Paris, qu'un nommé Daniel de Bar seruiteur de maistre Oliuier le Dain premier barbier & varlet de chambre du Roy, fut mis & constitué prisonnier en la court de Parlemēt, pour raison de plusieurs plainctes qui furent baillées à ladicte Court à l'encontre dudit Daniel: & mesmemēt à la complaincte d'une nommée Marion femme dissolue, qui chargeoient ledit Daniel de les auoir efforcées: & en elles fait & commis l'ord & villain peché desordonné. Et apres que ladicte court & par la iustice du Preuost de Paris, eut esté vacqué par longue espace de temps à besongner audit proces: icelles femmes se desdirent desdictes charges, en confessant par elles qu'icelles charges auoient faictes à la petition & requeste dudit Panier, & d'un nommé Ianuier comme ennemis dudit Daniel: & pour eux venger de luy: Pourquoy lesdictes deux femmes par sentence du Preuost de Paris, furent condamnée à estre battues nues & bannies du Royaume de France, leur biens & heritages confisquez au Roy: sur quoy premierement seroient prins les dommages & interest dudit Daniel, premierement & auant toute euure. Laquelle sentence fut prononcée & apres executée par les carrefourgs de Paris, le mercredy xj. iour de Mars audit an quatre cens lxxvij.

A V D I T an & mois de Mars le Roy qui estoit à Tours, s'en vint vers Paris loger à Ablon sur Seine, en vn hostel appartenant à Marc Senamy eleu de Paris, où il ne seiourna que deux iours, puis vint à Paris & coucher en son hostel des Tournelles: & d'illec le lendemain matin s'en alla en l'Eglise de Paris, faire son oraison à la benoiste Vierge Marie. Et icelle faicte s'en alla coucher à Louures & és lieux voisins, où il seiourna vn peu de temps. Et apres alla à Hefdin, Amiens & autres lieux de Picardie, où le seigneur de Hauart de par le Roy Edouard d'Angleterre y vint, & communiqua de trouuer accord entre le Roy & les Flamans. Et du costé du Roy y fut commis le seigneur de S. Pierre & autres. Et durant ce temps le Roy feit tousiours passer son armée audit pays de Picardie, tant ceux de son ordonnance que nobles archiers de retenue, & autres gens de guerre en bien grand nombre.

1478. A V D I T temps audit mois de Mars quatre cens septante huiet, apres Quasi modo, vint & arriua à Paris madame d'Orleans, monseigneur le Duc d'Orleans, vn ieune enfant fils du Duc de Cleues nepueu d'icelle dame, madame de Nerbonne fille du feu Duc d'Orleans & femme de monseigneur le Vicōte de Nerbonne fils du Comte de Foix, le fils du Comte de Vendosme & autres plusieurs seigneurs, gentils-hommes, dames & damoiselles, qui moult bien furent festoyez par deux fois en ladicte ville de Paris. Pour la premiere fois par monseigneur le Cardinal de Foix en l'hostel d'Estampes pres la Bastille. Et la secōde fois par monseigneur le Cardinal de Bourbon en son hostel à ladicte ville de Paris, qui y donna à soupper à icelle dame, à toute sa compagnie & plusieurs autres, le mercredy dernier iour de Mars audit an quatre cens lxxviij. Et fut ledit soupper moult honorable, plantereux & bien honnestement seruy de tout ce qu'il estoit possible de trouuer, avecques chantres & plusieurs instrumens melodieux, farces, mommeries & autres hōnestes ioyeufetez. Et fut l'assiete dudit

dit soupper en la gallerie dorée, reserué madiète dame de Nerbonne, qui estoit fort grosse: qui pour son aise auoir avecques monseigneur son mary & iusques au nombre de huiet, soupperent en vne chambre basse dudit hostel au logis de Jean Roye, secretaire de monseigneur le Duc de Bourbon & garde dudit hostel de Bourbon.

Comment l'argent pour les gages des Flamans fut prins par les gens du Roy: lesquels depuis prindrent la ville de Condé: d'un Cordellier nommé frere Anthoine Fradin, qui prescha à Paris, & en apres fut mis en exil: d'un Legat enuoyé du Pape au Roy & au Duc d'Autriche: de la deception dudit Duc d'Autriche, enuers le Roy: & de ce qui en fut appoincté, & de plusieurs villes que Charles d'Amboise recouura pour le Roy au Duché de Bourgongne.

AV mois d'Auril audit an mille quatre cens lxxviij. fut sceu par Guerin le Groin baillif de S. Pierre-le-Môstier, & Robinet du Quesnoy: Lesquels & chacun d'eux auoient charge de cent lances de l'ordonnance du Roy: & qui estoient en garnison au païs de Picardie, que les Flamens venoient à Douay, pour apporter argent à ceux dudit lieu pour leurs gages & souldées, & aussi pour les affaires de ladiète ville. Lesquels capitaines se meirent aux champs pour gagner ledit argent, ce qu'ils feirent: & ruerent ius ceux qui le portoiēt, & en tuerent aucuns & plusieurs prisonniers y furent prins. Et pource que ceux de ladiète ville de Douay & de l'Isle lez Flâdres, eurent certaines nouuelles de ladiète destrouffe, se meirent aux champs pour rescourre ledit argent & prisonniers: & nonobstant qu'ils feussent moult grand nombre, nosdits gens se sauuerent par-my eux: en tuerent quatre vingts & mieux, & en emporterent ledit argent par eux gagné, & n'y mourut point des gens du Roy plus de vingt six ou vingt sept hommes.

A v mois de May audit an mille quatre cens lxxviij. le Roy qui estoit audit païs de Picardie ne fait gueres de choses, sinon de gagner & auoir par sa puissance vne petite ville nommée Condé, qui estoit tenue pour les Bourgongnôs: laquelle estoit fort nuisante à aitailler & porter viures à ceux de la cité de Tournay. Dedans laquelle ville y auoit des gens de guerre du party du Duc en Autriche, qui se laisserent battre. Mais en fin quand ils apperceurent le grand ost qui leur estoit apparent, ils prindrent composition avecques le Roy de luy bailler ladiète ville & le chasteau. A quoy le Roy les receut & s'en allerent eux & leurs biens saufs.

EN ladiète année vint à Paris vn Cordellier, natif de Ville-Franche en Beau-iolois pour prescher à Paris & blasmer les vices: & y prescha bien longuement disant & publiant les vices, dont les creatures estoient entachées. Et par ses parolles y eut plusieurs femmes qui s'estoient données aux plaisances des hommes, & autres pechez qui de ce se retrahirent. Et aucunes d'icelles se meirent & rendirent en religion en delaisant leurs plaisances & voluptez, où par auant s'estoient demenez. Et si blasma tous les estats: & si prescha de la iustice, du gouvernement du Roy, des Princes & seigneurs de ce Royaume: & que le Roy estoit mal seruy, & qu'il auoit autour de luy des seruiteurs qui luy estoient traistres: & que s'il ne les mettoit dehors, qu'ils le destruiroiēt & le Royaume aussi.

Desquelles choses en vindrent nouvelles au Roy, parquoy ordonna qu'on luy deffendist le prescher. Et pour ceste cause vint à Paris maistre Oliuier le Dain barbier du Roy pour luy faire deffendre le prescher, ce qui luy fut interdit. Ce qui fut à la grand desplaisance de plusieurs hōmes & femmes, qui fort s'estoient rendus enclins à le suiure & oïr ses parolles & predications. Et pour doubte qu'on ne le print ne qu'on ne luy fait aucun opprobre, le feirent veiller nuit & iour dedans le conuent des Cordelliers dudit lieu de Paris. Et si disoit on que plusieurs femmes y alloient curieusement de nuit & de iour, qui garnissoient en leurs patois de pierres, cendres, cousteaux mucez & autres ferremens & bastons, pour frapper ceux qui luy voudroient nuire ou empescher sadicte predication. Et qu'ils luy disoient qu'il n'eut point de paour & qu'ils mourroient auant qu'esclandre luy aduenist.

D V R A N T ces choses s'en alla en Picardie vn Legat de par le Pape, pour remonstrer au Roy & au Duc d'Autriche le grand mal que faisoient les Turcs infidelles à l'encontre de la Chrestienté, en les exhortant de faire paix entre eux: & d'eux deliberer d'eux exposer à la deffence de ladicte Chrestienté, & destruire lesdits infidelles. Au moyen dequoy fut vn peu cessé ladicte guerre, en esperant de trouuer accord en leursdits débats: mais nonobstāt ce ne cesserent point les Bourgongnons de la Duché & Comté de Bourgogne, de tousiours faire guerre ausdits païs & à l'armée que le Roy y auoit enuoyée. Et de prendre sur les gens du Roy, villes, chasteaux & places par le Roy recourez: & y tuerent des gens du Roy & francs archiers bien grand nombre.

E T le mardy xxvj. iour de May fut crié à son de trompe & cry publicque par les carrefourgs de Paris, comme de toute ancienneté il soit de coustume, & qu'il ne loise à nuls de quelque estat qu'ils soient, de faire assemblées de gens en la ville de Paris sans le congé & licence du Roy ou de sa iustice. Et que ce neâtmoins au moyen de certains sermons & predications puis nagueres faits en ladicte ville par frere Anthoine Fradin de l'ordre des Cordelliers, plusieurs personnes se sont assemblez & venus au conuēt desdits Cordelliers pour illec garder ledit Cordellier: auquel n'auoit esté fait aucun opprobre par le Roy ne sa iustice: mais y auoient esté enuoyez seulement aucuns des conseilliers du Roy, pour l'interroguer sur aucunes choses & matieres secretes: dont le Roy en vouloit sçauoir la verité. Et illec s'estoient tenus nuit & iour pres d'iceluy frere Anthoine, & pour le garder sicomme ils disoient. Laquelle chose estoit en grand esclandre: parquoy & par l'aduis de la court de Parlement & Preuost de Paris, estoit interdit & deffendu à toutes personnes de quelque condition qu'ils feussent, de non plus faire lesdictes assemblées en ladicte Eglise des Cordelliers ne ailleurs sur peine de confiscation de corps & de biens. Et qu'au regard de ceux qui ainsi estoient assemblez audit lieu des Cordelliers, incontinent apres le cry se departissent & allassent chacun en sa maison sur lesdictes peines. Et aux maris qu'ils feissent deffence à leurs femmes de plus aller ne eux tenir ausdictes assemblées. Apres lequel cry ainsi fait que dit est, fut par grand desfrision crié par plusieurs des escoutans, que ce n'estoit que follie, & que le Roy ne sçauoit riens des choses dessusdictes. Et que c'estoit mal fait d'auoir ordonné de faire ledit cry.

ET le lundy premier iour de Iuing audit an, par le premier President de Parlement & autres, qui se disoient auoir charge du Roy : fut dit & declairé audit frere Anthoine Fradin, qu'il estoit à tousiours bāny du Royaume de France: & que pour ce faire il vuidast incontīnēt & sans arrester hors d'iceluy Royaume, ce qu'il feit & vuida le lendemain de ladicte ville de Paris qui fut mardy secōd iour dudit mois de Iuing mille cccc.lxxviij. Et quand ledit frere Anthoine partit dudit lieu des Cordeliers de Paris, y auoit grand quantité de populaire criās & souppirans moult fort son departement, & en estoient tous fort mal contēs. Et du courroux qu'ils en auoient disoient de merueilleuses choses : & y en eut plusieurs tant hommes que femmes qui le suiuiroient hors de la ville de Paris iusques bien loing, & puis apres s'en retournerent.

Audit temps le Roy qui estoit allé au paÿs de Picardie en intētion d'auoir & mettre en ses mains & obeïssance les villes & places & paÿs, que tenoit le defunct Duc de Bourgongne au iour de son trespas, cōme appartenans au Roy & à luy acquises par la rebelliō & desobeïssance du deffunct Duc de Bourgōgne : & qui pour icelles auoir y auoit menée la plus belle & grande quātité d'artillerie & gens d'armes de son ordonnāce, francs archiers & nobles hōmes, qui oncques fut veüe en France. Et demoura longuement audit paÿs cuidant tousiours auoir les Flamens, & le Duc Maximien d'Autriche qu'ils appelloient leur seigneur. Soubs vmbre duquel auoir fut enuoyé deuers le Roy luy estant à Cambray & en la cité d'Arras ambassadeurs dudit Duc d'Autriche, qui pour parlerēt de bailler au Roy paisiblement les Comtez d'Arthois & de Boulongne, l'Isle, Douay & Orchies, S. Omer & autres villes avecques la Duché de Bourgongne entiere. Et soubs vmbre desdictes promesses, le Roy leur bailla la iouïssance de Cambray, Quesnoy, le Comte, Bouchain & autres villes. Et pour estre plus près du Roy pour communiquer des choses dessusdictes, s'en vint loger & parquer ledit Duc d'Autriche luy & son ost, qu'on disoit estre vingt mille combattās & mieux entre Douay & Arras. Et illec tindrent le Roy en belles parolles soubs vmbre desdictes promesses, iusques en la fin dudit mois de Iuing, que le Roy n'eut aucune chose de ce qui luy auoit esté promis. Et si auoit eu liberallement du Roy iceluy Maximien lesdictes villes, cuidāt que de son costé fut entretenu ce q̄ promis luy auoit: dōt il ne feit riēs & n'y eut aucune cōclusiō sur ce prinse.

DV RANT ledit mois de Iuing l'armée que le Roy auoit enuoyée en la haute Bourgongne, pour recouurer ses villes contre luy rebellées: & dōt auoit la charge le gouuerneur de Champagne nōmé d'Amboise, prospera fort & regaignerent & meirent és mains du Roy la ville de Verdun, Monfauion, & Semur en l'Auxois, tant par assault que par cōposition. Et apres allerēt mettre le siege deuant la ville de Beaulne, où ils furent depuis par aucun tēps & iusques au cōmencemēt du mois de Iuillet ensuiuāt: & audit an lxxviij. que ladicte ville de Beaulne se rēdit au Roy par cōposition és mains du gouuerneur Charles d'Amboise: tellement qu'ils eurent leurs vies & biens saufs, & payerent en ce faisant par forme d'amende pour leurs deffauts xl. mille escus: & si furent condānez à rendre & restituer tout le vin & autres debtes qu'ils pouoient deuoir aux marchans de Paris & autres marchans du Royaume, tāt en vin par eux védu & non liuré, que d'argent à eux baillé & presté. Et au regard des gens de guerre ils s'en allerēt par

ladiete composition franchement & quictement eux & leurs biens saufs.

A V D I T mois de Iuillet furent & se transporterent en ladiete ville d'Arras par deuers le Roy illec estât, vne grande ambassade dudit Duc Maximien d'Autriche: & aussi des habitans des villes & païs de Flandres. Lesquels furent ouïs par le Roy & son conseil: & sur ce qu'ils voulurent dire à grande & meure deliberation, fut appoincté entre le Roy & lesdits Maximien & Flamens, que la guerre qui lors estoit audit païs cesseroit iusques à vn an: pendant lequel iroiēt seurement de chacun des deux costez toutes personnes de l'un party en l'autre: & que toute marchandise auroit son plain cours. Et à tant s'en partit le Roy, & s'en vint loger vers Paris: & n'entra point en la ville pour cause de ce qu'on luy dit, qu'on s'y mourroit, & s'en alla pres de Vendosme, où il se tint aucun temps. Et apres alla à Behuart & autres pelerinages à sa deuotion.

Des grandes richesses que le Roy donna à plusieurs Eglises. Et comment vn conseil fut tenu à Orleans pour la pragmatique: de l'alliance du Roy de Castille avec le Roy. Et comment vn Moyne noir hermosfrodit deuint gros d'enfant: d'un Lyon au païs d'Auuergne: d'un procureur general du païs d'Arthois decapité à Tours: d'une bombarde nouuellement essaye de costé Paris, dequoy furent tuez & naurez plusieurs personages: & comment vn capitaine Gascon nommé Oricle, & son lieutenant furent decapitez à Tours, & autres choses auenues en l'an mille quatre cens septante huit.

EN ladiete année & au retour dudit païs, le Roy feit de grans dons à plusieurs Eglises & diuers saints: car il vint veoir la benoïste Vierge Marie de la victoire pres Senlis, où il dōna deux mille francs qu'il voulut estre employez à faire des lampes d'argent, deuant l'autel de ladiete Vierge. Et aussi feit couvrir d'argent la chasse de monseigneur saint Fiacre, où il fut employé de sept à huit vingts mars d'argent. Et en outre pour sa grande & singuliere confidence que de tout il a eu à mōseigneur saint Martin de Tours, voulut & ordonna estre fait vn grand treillis d'argent, tout au tour de la chasse dudit S. Martin: lequel y fut fait & pesoit de seize à dix sept mille mars d'argent, qui cousta auāt qu'estre prest tout assis bien deux cens mille francs. Et est à sçauoir que pour finer de ladiete grande quantité d'argent à faire les ouurages dessusdits, furēt ordonnez commissaires pour prendre & saisir toute la vaisselle, qu'on pouoit trouuer à Paris & autres villes, laquelle vaisselle fut payée raisonnablement: mais nonobstant ce en fut grande quātité musfée, & ne fut plus veüe és lieux où elle auoit accoustumé de courir. Et à ceste cause de là en auant quand on alloit aux nopces franches & autres, où on auoit accoustumé d'y en veoir largement, n'y estoïēt trouuez que beaux verres & esguieres de feugiere.

E N iceluy temps le Roy feit faire grād assemblée de Prelats, gens d'Eglise, de grans clercs, tant des vniuersitez de Paris, Montpellier que d'autres lieux pour eux trouuer & assembler en la ville d'Orleans, pour subtillier & trouuer moyen de r'auoir la Pragmatique: & que l'argent des vaccans & benefices ne fussent plus portez à Romme, ne tirez dehors de ce Royaume. Et pour ceste cause se tint ladiete assemblée ainsi estant à Orleans, où presidoit pour le Roy monseigneur

gneur de Beaujeu, monseigneur le Chancelier & plusieurs autres nobles homes du conseil du Roy. Lequel monseigneur le Chancelier en la presence de monseigneur de Beaujeu & autres, dit & declaira les causes pourquoy ladicte assemblée estoit ainsi faicte audit Orleans, & les causes qui mouuoient le Roy d'auoir fait faire icelle assemblée: laquelle proposition fut respondue par maistre Iean Hue Doyen de la faculté de Theologie pour ladicte vniuersité de Paris, qui en ce faisant feit de grandes remonstrances & parla fort & hardimēt, pource qu'il estoit aduoüé de par lesdits de l'vniuersité de Paris. Et aussi y parla pour ladicte vniuersité de Montpellier vn autre grand clerc, qui aussi parla moult bien. Et apres qu'icelle assemblée eut illec esté certaine espace de temps, le Roy vint à sa deuotion en l'Eglise nostre Dame de Clery: Et apres sa deuotiō faicte alla audit lieu d'Orleans, où il ne seiourna que demie iournée. Et apres qu'il s'en fut retourné, tout ledit conseil ainsi assemblé que dit est, sans conclurre: se departit & alla chacun, dont il estoit party pour y venir: & fut ledit conseil remis à Lyon au premier iour de May apres ensuiuant.

A P R E S le Roy estant audit païs de Touraine, enuoya ses lettres closes à ses bons bourgeois de Paris, leur faisant sçauoir quand il auoit enuoyé ses ambassadeurs par deuers le Roy de Castille & de Leon sur aucuns differens, qui estoient entre le Roy & luy, affin de trouuer aucun bon accord entre eux sur lesdits differens. Lesquels ses ambassadeurs estoient retournez dudit voyage: & auoient rapporté, que ledit Roy de Castille estoit bien content du Roy: & luy auoit promise & iurée bonne amour & vraye alliance: pourquoy le Roy voulāt de ces choses estre loué & regracié Dieu nostre createur & la benoïste glorieuse Vierge Marie, mandoit ausdit de Paris que de ce ils feissent processions generalles à Paris: & que les feux fussent faits parmy les rues de ladicte ville, laquelle chose fut faicte. Et furent icelles processions faictes, qui allerent de nostre Dame à madame sainte Geneuiefue au mont de Paris: & y fut illec presché par le Prieur des Carmes, qui illecques declaira bien au long & honnorablement l'intention & contenu desdictes lettres du Roy.

E N ladicte année au mois d'Octobre aduint au païs d'Auuergne, qu'en vne religion de Moines noirs appartenant à monseigneur le Cardinal de Bourbon, y eut vn des religieux dudit lieu, qui auoit les deux sexes, d'homme & de femme: & de chacun d'iceux fayda, tellement qu'il deuint gros d'enfant: pourquoy fut prins & saisy & mis en iustice, & gardé iusques à ce qu'il fut deliuré de son apostume, pour apres iceluy venu, estre fait dudit religieux ce que iustice verroit estre à faire.

A V D I T païs aduint aussi qu'vn gentil-homme dudit païs d'Auuergne, nourrissoit vn lion qui luy eschappa & le perdit par aucun réps, qu'il ne sçauoit où il estoit, ne qu'il estoit deuenü. Laquelle beste s'en alla à l'escart & sur aucuns chemin, là où māgea & deuora plusieurs creatures tant hommes que femmes: pour cause dequoy grand nombre de gens dudit païs se meirēt sur les champs pour le tuer, & y alla aussi sondit maistre: & tant feirent qu'ils trouuerent ladicte beste. Laquelle entre autres personnes recogneut & vint à sondit maistre, & incontinent fut tué & meurdry. Et pareillement aussi audit païs y sourdit vne fontaine en lieu, où iamaïs n'en auoit point eu: & illec deuint la terre mouuant

& tremblant merueilleusement.

A V D I T an lxxviij. au mois de Novembre, vn nommé Symon Courtois, que le Roy auoit fait son procureur general par toute la Comté d'Arthois : au moyen de la trefue qui estoit entre le Roy & les Flamens, se partit de la ville d'Arras faignāt aller à ses affaires au païs de Flandres. Auquel païs s'en alla par deuers la Comtesse dudit Flandres femme de Maximien d'Autriche: par deuers laquelle & non content de l'honneur à luy fait par le Roy, de l'auoir ainsi créé sondit procureur general en ladicte Comté, dit à icelle Comtesse qu'il estoit bien son seruiteur comme ses autres parens auoient esté. Et qu'elle voulsist prendre de luy le serment & créer sondit procureur, & de raison elle luy reueroit: & aimoit mieux qu'elle fut & demourast en ses mains qu'en celles du Roy: lesquelles choses qui furent sceües par le gouuerneur dudit Arras pour le Roy, fut ledit Symon Courtois prins & saisy & mené deuers le Roy à Tours, où il confessa tout ce que dit est dessus: Et à ceste cause il fut decapité.

A V D I T an lxxviij. le lundy deuant les Roys, aduint que plusieurs officiers du Roy en son artillerie feirent assortir vne grosse bombarde, qui en ladicte année auoit esté faicte à Tours pour illec essayer & esprouuer: & fut acculée la queue d'icelle aux champs deuant la Bastille S. Anthoine. Et la gueulle d'icelle en tirant vers le pont de Charenton: laquelle fut chargée pour la premiere fois, & tira la pierre d'icelle de vollée iusques à la iustice dudit pont de Charēton. Et pource qu'il sembla aux dessusdits, qu'elle ne s'estoit pas bien deschargée de toute la pouldre qui mise & boutée auoit esté dedans la chambre d'icelle bombarde: fut ordōné par les dessusdits qu'encores seroit chargée de nouveau, & q̄ de rechief seroit tirée par seconde fois: & qu'auāt ce elle seroit nettoyée dedans la chambre d'icelle auant que d'y mettre la pouldre, ce qui fut fait: & fut faicte charger & bouté sa boule qui pesoit cccc.liures de fer dedās la gueulle d'icelle bombarde: à laquelle gueulle estoit vn nommé Iean Maugué fondeur, qui icelle bombarde auoit faicte: laquelle boule en roullant au long de la vollée contre le tampon de la chambre d'icelle bombarde, se deschargea incontīēt sans sçauoir dont le feu y vint. A cause dequoy elle tua & meurdrit, & mit en diuerses pieces ledit Maugué & iusques à quatorze autres personnes de Paris: dont les testes, bras, iambes & corps estoient portez & iectez en l'air & en diuers lieux. Et alla aussi ladicte boule tuer & mettre en pieces & loppins vn pauvre garson oiseleur, qui tendoit aux champs aux oiseaux. Et de la pouldre & vent de ladicte bombarde, y en eut quinze ou seize autres personnes qui tous en eurent plusieurs de leurs membres gastez & bruslez, & en mourut plusieurs depuis: & tellement que de ceux qui y moururent ledit iour, que de ceux qui furent happez dudit vent, en mourut en tout de xxij. à xxiiij. personnes. Et apres le trespas dudit Maugué fondeur de ladicte bombarde, son corps fut recueilly, enseucly & mis en biere & porté à S. Medry à Paris son patron pour y faire son seruice. Et fut crié par les carrefourgs de Paris qu'on priaist pour ledit Maugué, qui nouvellement estoit allé de vie trespas entre le ciel & la terre au seruice du Roy nostre sire.

EN ladicte année le mardy second iour de Mars le corps d'un nōmé Laurens Garnier de la ville de Prouins, qui auoit par arrest de la Court de Parlemēt esté
pendu

pendu & estrâglé au gibet de Paris vn an & demy par auant ledit iour, pour occasiõ de ce qu'il auoit tué & meurdry vn collecteur ou receueur de la taille dudit lieu de Prouins: & duquel cas il auoit obtenu remission qui ne luy fut point enterinée par ladicte Court: fut au pourchas d'un sien frere fait despendre dudit gibet par Henry Cousin executeur de la haute iustice audit lieu de Paris. Et illec fut enseuely ledit corps & mis en vne biere, couuerte d'un cercueil: & dudit gibet mené dedans Paris par la porte S. Denys: & deuant icelle biere alloiẽt quatre crieurs de ladicte ville sonnant de leurs clochettes, & en leurs poictrines les armes dudit Garnier. Et autour d'icelle biere y auoit quatre cierges & huiẽt torches, qui estoient portez par hommes vestus de dueil & armoyez, comme dit est. Et en tel estat fut mené passant parmy ladicte ville de Paris iusques à la porte S. Anthoine, où fut mis ledit corps en vn chariot couuert de noir, pour mener inhumer audit Prouins. Et l'un desdits crieurs qui alloit deuãt ledit corps crioit: bonnes gens dictes voz patenostres pour l'ame de feu Laurens Garnier, en son viuant demourant à Prouins qu'on a nouuellement trouué mort sous vn chesne: Dictez en voz patenostres que Dieu bõne mercy luy face. En ladicte année audit mois de Mars le ieudy xvij. iour dudit mois, vn gentil-homme nõmé Oriole natif du paÿs de Gascongne, qui au parauant auoit eüe la charge & conduicte de par le Roy de cent lances de son ordonnance: laquelle charge & ordonnance le Roy auoit nouuellement fait casser avec autres, laquelle chose il print à desplaissance. Et à ceste cause fut rapporté que ledit Oriole parloit mal & vsoit de menasses: & qu'avec ce aussi qu'il meit en deliberation avec le lieutenant de sa compagnie de laisser le Roy & son seruice, & aller seruir en guerre son aduersaire le Duc en Autriche. En quoy faisant commettoit crime de leze Majesté enuers son souuerain seigneur: pour lesquels cas & autres, furent iceux Oriole & sondit lieutenant decapitez en la ville de Tours ledit iour de ieudy. Et apres ladicte execution faicte, furent portez par maistre Denys Cousin executeur de la haute iustice, & qui auoit executé ledit Oriole & sondit lieutenant, leurs testes & partie de leurs membres attacher & mettre aux portes d'Arras, Bethune au paÿs de Picardie. Audit an & mois de Mars fut aussi prins prisonnier à Paris vn nõmé le seignr de Mauues, qui aussi auoit esté cassé de la charge de cent lances, dont aussi auoit eüe la charge pour le Roy: & fut prins en l'hostel du Cornet pres S. Iean en Greve, par Philippe l'Huillier escuyer capitaine de la Bastille S. Anthoine, & par luy ou par autres mené prisonnier audit lieu de Tours par deuers le Roy, qui lors y estoit. Et depuis fut deliuré comme ignorant des cas à luy imposez.

De l'ordonnance du Roy en ses guerres. Et des Flamens mis dedans Cambray: de plusieurs villes prinſes, en Bourgongne pour le Roy: lequel pource fait aucuns voyages en Champaigne: des ambassadeurs d'Esſpaigne: & du Duc d'Albanie qui vint à Paris: d'une desconfiture sur le Duc d'Autriche assez pres de Theroüenne, où fut prins le fils du Roy de Poulaine: d'une autre grãde execution & destrouſſe faicte par les gens du Roy, qui gaignerent xvij. places, & quatre vingts nauires de Flandres que Coulon print en Normandie pour le Roy, en l'an mille cccc.lxxix.



V mois d'Auril mille cccc.lxxix.apres pasques le Roy qui estoit au paÿs de Touraine, delibera du faict de sa guerre, & de ce qu'estoit de faire touchât le fait d'icelle: pource que la trefue qui sur ce auoit esté entre luy d'une part & le Duc en Autriche d'autre part, estoit presques faillie. Et que par ledit d'Autriche n'auoit esté aucune ambassade enuoyé deuers luy, pour accord faire entre eux sur leurs differens. Et pour conclure de ce qu'ils auoient à faire apres la fin d'icelle trefue. Au mois de May ensuiuant, nonobstant que ladicte trefue ne fut expirée ne faillie, les manans & habitans de la ville de Cambray, meirent & bouterent les Picards, Flamens & autres ennemis du Roy, tenans le party dudit Duc d'Autriche dedans ladicte ville de Cambray. Et d'icelle en dechasserēt & meirent dehors les gens de guerre, qui estoient dedans le chasteau de ladicte ville de par le Roy: nonobstant que ladicte ville le Roy auoit laissée & baillée en la garde & confidence du seigneur de Fiennes: & incontinent apres vindrent de trois à quatre cens lances desdits Flamens, & Picards deuant la ville & chastel de Bouchain: dedans laquelle n'y auoit en garnison pour le Roy que xvj. lances qui se retrahirent dedans ledit chastel, pource qu'ils apperceurent que les habitans dudit Bouchain auoient deliberé de mettre lesdits ennemis du Roy dedans leur ville, incontinent qu'ils y seroient arriuez, ce qu'ils feirent. Et incontinent eux arriuez vindrent lesdits habitans assaillir lesdits gens du Roy, que par force ils prindrent & les tuerent tous dedans ledit chasteau: & de tous ceux qui y estoient n'en eschappa qu'un seul, lequel s'enferma dedans vne chambre. Et par vn tuiau des chambres aisées, se laissa cheoir dedans les fossez & se sauua: desquelles entreprinſes & choses ainsi faictes, le Roy en fut fort mal content & non sans cause, veu que ladicte trefue rompue & entreprinſes dessusdictes, ne se faisoient point pour aucune faute ou coulpe que eussent fait les gens de guerre du Roy sur lesdits ennemis. Et à ceste cause le Roy enuoya certain grand nombre d'artillerie en la Duché & franche Comté de Bourgongne, avecques grand nombre de nobles hōmes & Francs archiers du Royaume de France, par deuers le gouuerneur de Champagne qui estoit gouuerneur & lieutenant general du Roy audit paÿs, & mettre de rechef en sa main. Et y besongnerent lesdits gouuerneur & ceux de sa cōpagnie si vaillamment, que par assault & port d'armes ils gaignerent d'assault le chastel de Rochefort, & tuerent ceux qui estoient dedans en pillant tout ce que ils y trouuerēt. Et de là s'en allerent deuant la cité de Dole, laquelle fut fort battue d'artillerie: & apres fut assaillie tellement qu'elle fut prinſe d'assault, à cause dequoy plusieurs gens de façon & bons marchans y moururent, & si fut ladicte ville arrasée & mise par terre.

A v mois de Iuing ensuiuant messire Robert d'Estouteuille cheualier, seigneur de Beyne, qui auoit esté preuost de Paris par l'espace de quarante trois ans, alla de vie à trespas audit lieu de Paris. Et en son lieu le Roy donna ledit office de preuost de Paris à Iaques d'estouteuille fils dudit deffunct preuost: en faueur de ce qu'il disoit, que ledit deffunct l'auoit bien & loyaument seruy à la rencontre de Montlehery & autres diuers lieux. Durant ces choses le Roy estant à Montargis, ouit les nouuelles des choses dessusdictes, dont il fut fort ioyeux: & lors se partit & s'en alla à nostre Dame de la Victoire pres Sélis y faire
ses

ses offrandes: & de là s'en vint au bois de Vincennes, où il ne sejourna qu'une nuit. Et d'illec se partit & print son chemin pour aller à Prouins, & de là au pays de Champagne, à Langres & autres lieux: & ce pendant fut chargé à Paris par la riuere de Seine moult grand nombre de belle & grosse artillerie: entre laquelle y auoit seize grosses bombardes toutes de fonte, & grand quantité de pouldres & salpestre, pour mener à Chaalons en Champagne, à Bar-le-Duc: & d'illec aller cōquester la Duché de Luxembourg, mais ledit voyage fut rompu & n'en fut riens fait. Et le samedi tiers iour de Iuillet audit an lxxix. vint & arriua à Paris vne moult belle & honneste ambassade du pays d'Espaigne, que menoit & conduisoit pour le Roy l'Euesque de Lombais, Abbé de S. Denys en France. Et les receurent aux champs hors de ladicte ville les Preuost des marchans & escheuins de ladicte ville, & autres estats d'icelle ville. Et apres leur entrée faicte en icelle ville, s'en allerent à S. Denys, où ils furent fort festoyez par ledit Abbé dudit lieu. Et aussi audit lieu de Paris par aucuns des gens & officiers du Roy estans en icelle. En icelle année lxxix. arriua en France vn ieune Prince du Royaume d'Ecosse, qui par ledit Roy estoit dechassé hors dudit Royaume: lequel s'en vint au Roy à reffuge, qui luy fait faire grand honneur à l'entrée qu'il fait à Paris: car au deuant de luy furent aux champs par la porte S. Anthoine sur le chemin allant au bois de Vincennes, tous les estats de Paris & en la compagnie de monseigneur de Gaucourt, qui comme lieutenant du Roy, le recueillit bien honorablement: & d'illec fut amené & conduit dedans Paris & mené loger en la rue S. Martin, combien que de sa compagnie & gens de nation n'auoit auecques luy que de dix à douze cheuaux. Et le fait le Roy accompagner par messeigneurs de Monypigny cheualier, le seigneur de Congressault qui estoit aussi Escossois. Au mois d'Aoust ensuiuant les Picards, Flamens & autres ennemis du Roy, estās logez és pays de Flandres & autres villes contraires au Roy, se meirent sur les champs, tendans affin de trouuer & combattre les gens du Roy, & vindrent pource faire pres de la ville de Theroüenne: laquelle ville tenoient les gens du Roy, & lesquels ennemis cuidoient auoir & emporter ladicte ville par force & violence. Et apres leur venue la battirēt fort de leur artillerie, à quoy il fut moult vaillamment resisté, & contredit par mōseigneur de S. Andry, comme lieutenant de cent lances de monseigneur le Duc de Bourbon & autres capitaines & nobles hommes de l'ordonnance du Roy. Et dudit exploit en furent aduertis les autres gens de guerre, estans pour le Roy en garnison esdits pays de Picardie: tous lesquels pour secourir ceux de Theroüenne & ladicte ville, s'assemblerent & meirent sur les champs, & vindrēt trouuer lesdits Picards, Flamens & autres gens de guerre ennemis du Roy à vne lieuë pres dudit Theroüenne: lesquels ennemis & aduersaires estoient en moult grand nombre, comme soixante mille combattans, qui estoient menez & cōduits par ledit Duc en Autriche, le Comte de Romont & plusieurs autres seigneurs tenans ledit party: desquels vindrent frapper les gens du Roy estans en garnison audit Theroüenne, auecques plusieurs des compagnies des lances, que le Roy auoit en Picardie: dont auoit la conduicte le seigneur des Querdes & autres capitaines auecques luy: tous lesquels par grand vigueur & honneste courage frapperent dedans lesdits aduersaires & ennemis, & tellement qu'ils deffirent

toute l'auantgarde dudit Duc au paÿs d'Autriche. A ceste cause dequoy y eût moult grand occision des gens dudit Duc, & y perdirent beaucoup de biens & furent menez chassans. Et pource que aucuns Frâcs-archiers du Roy, qui sui-uoient ladicte chasse se meirent à piller le bagage & autres biens laissez par les dessusdits aduersaires ainsi chassez, cōme dit est: vint & arriua sur lesdits Frâcs-archiers & autres gens de guerre le Comte de Romont, qui bien auoit de xiiij. à xv. mille pietons picquiers, qui tuerent partie desdits Frâcs-archiers & autres gens de guerre. Et tant y en mourut des deux costez, qu'on disoit & estimoit les morts de xiiij. à xv. mille combattans. Dont en y eut desdits Bourgongnons, Picards & Flamans de morts enuiron de vnze à douze mille combattans sans les prisonniers: dont les gens du Roy prindrent grand quātité. C'est à sçauoir comme de neuf cens à mille prisonniers: entre lesquels y fut prins vn des fils du Roy de Poulaine, & vn autre ieune fils qu'on disoit estre le mignon dudit Duc d'Autriche, avecques grand nombre de gens de bonne & grande maison & tous bōs prisonniers. Et au regard des gens de l'armée du Roy, y mourut le capitaine Beauuoisien, & Vvaste de Mompedon Baillif de Roüen: & des gens de guerre de l'ordonnance du Roy, y mourut enuiron trois cens archiers de ladicte ordonnance sans les Frâcs-archiers. Et apres ladicte desconfiture ainsi faicte que dit est, ledit Duc en Autriche, le Comte de Romont & autres de leur compagnie se rallierent & vindrent deuant vne place nommée Malaunoy, dedans laquelle estoit vn capitaine Gascon nommé le Cadet Remonnet, & avec luy de sept à huiet vingts lacquets arbalestriers aussi Gascons: laquelle place par lesdits d'Autriche & Romont fut assaillie. Et par lesdits Gascons fut fort resisté, mais en fin furent emportez d'assault & y moururent la plus part desdits lacquets: & les autres se ietterent dedans les fossez. Et au regard dudit Cadet il fut prins prisonnier, & mené par assurance deuers ledit d'Autriche: lequel nonobstant ladicte assurance & trois iours apres ladicte prinse, & de sang froid & rassis, ledit d'Autriche le fait pendre & estrangler. Et pour vengeance faire de sa mort le Roy tresmal content d'icelle, fait pendre iusques au nombre de l. des meilleurs prisonniers que ses gens d'armes eussent en leurs mains, & par le Preuost des Mareschaux, lequel les fait pendre: c'est à sçauoir sept des plus especiaux prisonniers au propre lieu, où le Cadet Remonnet auoit esté pendu, dix autres prisonniers deuant Doüay, dix autres deuant S. Omer, dix deuant la ville d'Arras & dix deuant Lille. Et estoit ledit Preuost accompagné pour faire faire ladicte execution, de huiet cens lances & six mille Frâcs-archiers: tous lesquels apres icelle execution faicte, s'en allerent costé le Comte de Guynes: & en reuenant iusques en Flandres prindrent xvij. places & maisons fortes, & tuerent & bruslerent tout ce qu'ils trouuerent: & en amenerent beufs, vaches, cheuaux iusques és autres biens: & apres s'en retournerent en leursdictes garnisons. Audit tēps fut prins sur mer par Coulon & autres escumeurs de mer en Normandie pour le Roy, iusques à quatre vingts nauires de Flandres, qui estoient allez querir des seigles en Puce pour aitailler le paÿs: & tout le Harenc de la Peche d'icelle année, où il fut fait la plus grād desconfiture qui passé a cent ans fut faicte sur mer, en la grande confusion & destruction desdits Flamans.

D'une ambassade d'Angleterre vers le Roy : d'aucune commission donnée contre le Duc de Bourbon: de l'Euesque de Constance prisonnier en la conciergerie. Du Legat Cardinal de S. Pierre ad vincula en France, & autres parties. Le Roy feit deliurer de prison le Cardinal Baluë: Des Suisses mis sus au lieu des Franks-archiers. D'un grād hyuer: des trefues qu'eurent les Flamāns, & autres avecques les Anglois, en l'an mille quatre cens quatre vingts.

EN l'année mille quatre cens quatre vingts, passerent la mer d'Angle- 1480.
terre pour venir en France par deuers le Roy, le seigneur de Hauart, vn prothonotaire & autres ambassadeurs Anglois, pour le fait de l'entretènement de la trefue d'entre le Roy & le Roy d'Angleterre. Lesquels ambassadeurs furent bien receuz du Roy, & leur fait on bonne chiere & grande, & s'en retournerent apres leur expedition. Et leur fut donné par le Roy de l'or contant & de belle vaisselle d'argent. Audit an mille quatre cens & quatre vingts, le Roy bailla lettres de commission à maistre Iean Avin cōseillier en sa Court de Parlement, & à Iean Doyac de la ville de Cusset en Auvergne, pour faire sur monseigneur de Bourbon ses villes, païs, officiers & bons subiets plusieurs damnez exploits & nouuelletez, que lesdits cōmissaires prindrent ioyeusement à faire, cuidans destruire & porter dommage audit monseigneur le Duc contre Dieu & raison & sans cause: mais pour complaire à la voulenté du Roy, qui le menoit, affin de destruire ledit seigneur & mettre en exil. Et par lesdits commissaires en ensuiuant leurdictē commission, feirent adiourner à comparoir personnellement en la Court de Parlement à Paris la plus part des officiers d'iceluy monseigneur le Duc: comme son Chancelier, son Procureur general, le capitaine de sa garde & autres plusieurs en grand nombre, qui y comparurēt au iour à eux assigné, où par commissaires d'icelle court furent examinez: & pource furent longuement detenus en arrest en ladicte ville: à l'encontre desquels maistre François Hasle aduocat du Roy en ladicte Court de Parlement plaidoit pour son plaisir faire, contre Dieu & raison, le seruice de corps & d'ame. Et apres par ladicte Court furent eslargis & renuoyez en leurs maisons. Et apres ces choses ainsi faictes, fut aussi adiourné à comparoir en ladicte Court maistre Iean Hebert Euesque de Constances, pour respondre des crimes & cas à luy imposez, où il vint & comparut: & fut sur ce interrogué & puis par arrest de ladicte Court fut fait constituer prisonnier es prisons de la conciergerie, & tous ses biens & temporel mis en la main du Roy. En ladicte année au mois d'Aoust fut faicte trefue avec le Duc en Autriche pour sept mois, dont les trois mois deuoient estre marchans, les trois autres d'abstinence de guerre, & le vij. mois de repentailles. En ladicte année au mois de Septembre le lundy quart iour dudit mois, vn Legat du Pape nommé le Cardinal de S. Pierre *ad vincula*, qui estoit venu en France, & arriua en la ville de Paris, où il fut honorablemēt receu par tous les estats de Paris, qui allerent au deuant de luy par la porte S. Iaqués. Et par tout son chemin où il passa par ladicte ville, estoit tout rendu de tapisserie iusques à l'Eglise nostre Dame de Paris, où il feit illec son oraison. Et apres icelle faicte s'en alla au logis qui luy estoit ordonné au college de S. Denys pres les Augustins. Et l'accompagnoit & estoit tousiours pres de luy tresnoble

tresreuerend pere en Dieu monseigneur le Cardinal de Bourbon. Et le lendemain qui fut mardy vj. iour dudit mois, maistre Oliuier le Diable dit le Dain barbier du Roy, festoya lesdits Legat, Cardinal de Bourbon & moult d'autres gens d'Eglise & nobles hommes, tant plantureusement que possible estoit. Et apres disner les mena au bois de Vincennes esbatre, & chasser aux dains dedans le parc dudit bois, & apres s'en reuint chacun en son hostel. Et le ieudy ensuiuant veille de la natiuite de la benoiste Vierge Marie & vendredy ensuiuant, ledit Legat fut aux vespres & messe en l'Eglise nostre Dame de Paris, où moult de gens de tous estats furent en ladicte Eglise, pour veoir faire ledit seruice audit Legat, qui le fait bien & honorablement. Et le dimenche ensuiuant xij. iour dudit mois, ledit Legat alla disner & soupper en l'hostel de Bourbon à Paris, où mondit seigneur le Cardinal de Bourbon le festoya & y mena ledit Legat plusieurs Archeuesques, Euesques & autres seigneurs & gentils-hômes, où estoient l'Archeuesque de Besançon & celuy de Sens, les Euesques de Chartres, celuy de Neuers, celuy de Theroüenne, celuy d'Amiens, celuy d'Aleth & autres, le seigneur de Curton, Moireau maistre d'hostel du Roy, & plusieurs autres gentils hommes & gens d'eglise: où ils furent moult honorablement festoyez. Et le lundy apres ensuiuant xiiij. iour dudit mois, ledit Legat se partit de Paris & s'en alla à S. Denys en France, où aussi il fut festoyé par l'Abbé de S. Denys: & dudit S. Denys s'en alla au pays de Picardie & Flandres, pour cuider communiquer avecques les Flamens, & Picards: & essayer de faire aucun accord entre le Roy & eux sur leurs differens, où il fut depuis par long temps: la pluspart d'iceluy sejourant à Peronne, cuidant auoir seur accez d'entrer audit pays de Flādres, où le Roy y enuoya aussi maistre François Hasle, le Preuost de Paris & autres, qui sans y riens faire retournerent à Paris. Et aussi retourna ledit Legat audit lieu de Paris, le ieudy deuant Noël xxj. iour de Decembre mille cccc. quatre vingts: lequel Legat alla veoir mōseigneur le Cardinal de Bourbon, avec lequel il souppa & coucha. Et le lendemain s'en partit dudit hostel par la porte dorée, & passa la riuere iusques en l'hostel de Neelle, où il monta à cheual avecques ses gēs qui illec l'attēdoient. Et s'en alla iusques à Orleans, où il sejourna certain temps, pendant lequel le Roy fait deliurer le Cardinal Baluē & s'en alla audit Orleans deuers ledit Legat. Et en ce tēps se tint le Roy au pays de Touraine, où il demoura par la pluspart de l'hiuer, & iusques à enuiron les Roys, qu'il s'en alla à Poitiers, & autres lieux: & puis s'en retourna à Tours, & aux forges vers la fin du mois de Ianuier. En ce temps le Roy fait casser & abbatre tous les francs archiers du Royaume de France, & en leur place y voulut estre & demourer pour seruir en ses guerres, les Suisses & picquiers. Et fait faire par tous coustelliers grand quantité de picques, hallebardes & grans dagues à larges rouelles.

EN ladicte année l'hiuer commença tard, & ne gella point qu'il ne fut le lendemain de Noël iour S. Estienne: & dura iusques au huitiesme de Feurier, qui sont six sepmaines: durant lequel temps fait la plus grāde & aspre froidure, que les anciens eussent iamais veu faire en leurs vies. Et furent les riuieres de Seine, Marne, Yonne & toutes autres riuieres affluās en ladicte riuere de Seine, prises & gellées si tresfort, que tous charrois, gens & bestes passoient par dessus la
glace

glace. Et au desgel desdictes riuieres, en aduiut plusieurs grans maux & dommages à cause desdictes glaces, qui en emporterēt plusieurs ponts estans sur lesdictes riuieres. Et les glaçons feirent de grans dōmages: car ils rompirent & emporterent grand quantité de basteaux, dont partie s'en allerent frapper cōtre les ponts nostre Dame, S. Michel d'icelle ville de Paris: lesquels basteaux sauuerent plusieurs grans heurs, qu'eussent fait lesdits glaçons contre lesdits ponts, qui furent en bien grand dangier d'estre abbatus. Et pour la paour qu'en eurent les demourans sur lesdits ponts, desemparèrent lesdits ponts eux & leurs biens, iusques le dangier en fut passé: & lesquels glaçons rompirent sept des pieux du moulin du Temple. Et à ceste cause ne vint point de bois à Paris par la riuere: & fut bien cher cōme de sept à huit soubz parisis le moule: mais pour secourir le poure peuple, les gens des villages amenerent en ladicte ville à cheuaux & charrois grād quātité de bois verd: & eust esté ledit bois plus chier, se les Astrologiens de Paris eussent dit verité: pource qu'ils disoient que ladicte grande gelée dureroit iusques au viij. iour de Mars: & il desgella trois sepmaines auant: mais depuis ledit desgel, le temps fut fort froid iusques bien auant le mois de May. A cause de quoy plusieurs bourgeons des vignes, qui estoient trop auancez, furent perdus & gelez: & les fleurs des arbres & les souches en diuers lieux perdues & gelées. Durant ledit hiuer & iusques au mois d'Auril, que failloit la trefue entre le Roy & les Flamens ne fut riens fait de costé ne d'autre, pource que lesdits Flamens enuoyerēt leur ambassade deuers le Roy à Tours: ausquels il donna expedition & continua les trefues d'un an, esperant que durant iceluy se trouueroit quelque bon expedient de paix finale. Audit temps les ambassadeurs du Roy Edouart d'Angleterre vindrent par deuers le Roy, pour le fait de la trefue. Et print le Roy la peine d'aller deuers eux iusques à Chasteau-Regnault, où le Roy les ouit sur la matiere, pourquoy ils estoient venus: & illec furent expediez par le Roy, & puis s'en retournerent en Angleterre. Et apres leur partement fut dit & publié, que la trefue d'entre lesdits deux Roys estoit continuée pour bien lōg temps. Audit an mille quatre cens quatre vingts au mois de Mars, le Roy estant en son hostel du Plessis-du-parc lez Tours, fut merueilleusement malade d'une maladie qui soudainement le print: dont fut dit depuis qu'il fut en grand dangier, de mort: mais moyennant l'ayde de Dieu la santé luy fut rendue, & reuint en conualescence.

D'un champ fait pour le Roy entre le Pont-de-larche & le Pont-sainct Pierre: des har-nois de guerre empeschez que le Duc de Bretagne faisoit apporter de Millan: de l'année des petis vins et autres choses aduenues: du Roy qui deuint malade à Tours, parquoy faisant aucuns pelerinages fut veoir le Daulphin son fils à Amboise: puis alla à saint Claude: & d'une grande famine qui fut en ce temps l'an mille quatre cens quatre vingts & un.

EN l'année mille cccc. cens quatre vingts & un le Roy voulut & ordō-
na que certain champ de bois, qu'il auoit fait faire pour tenir les
champs contre ses ennemis, fut dressé & mis en estat en vne grand
plaine pres le Pont-de-l'Arche, pour illec le veoir: & dedans iceluy
certaine quantité de gens de guerre, armez avec halebardes & picques que nou- 1481.

uellement auoit mis sus: dont il auoit donné la conduicte desdits gens de guerre à messire Philippe de Creuecueur cheualier, seigneur des Querdes, & à maître Guillaume Picard Baillif de Roüen: dedās lequel champ il voulut que lesdits gens de guerre fussent par l'espace d'un mois, pour sçauoir cōment ils se cōduiroient dedans: & pour sçauoir quels viures il conuiendroit auoir à ceux, qui feroient dedans ledit champ durant le temps qu'ils y seroiēt. Et pour aller audit champ, que le Roy auoit ordonné estre prest dedans le xv. iour de Iuing: le Roy s'approcha pres de Paris, & feit la feste de Pentecouste à nostre Dame de Chartres. Et d'illec s'en alla audit Pont-de-l'Arche, & de là audit champ, qui fut choisý & assis entre le Pont-de-l'Arche & le Pont-sainct-Pierre: partie duquel chāp tel qu'il pouoit contenir, fut fossoyé au long de ce qui en fut dressé: & dedās fut tendu des tentes & paillons, & aussi y fut mis de l'artillerie, & de tout ce que y estoit requis. Et par ladicte proportion ainsi dressée qui fut agreable au Roy, fut fait iugement quel auitaillement il faudroit auoir, pour fournir tout iceluy champ, quand il seroit du tout emply de ce que le Roy auoit intētion de y mettre & bouter. Et apres ces choses & que le Roy l'eut bien vëu & visité, s'en vint à bien content & s'en partit pour s'en retourner audit lieu de Chartres, Selome, Vendosme & à Tours. Et en r'enuoya toutes les compagnies, qui estoient venus audit chāp par son ordonnance chacun en sa garnison. En ladicte année le Duc de Bretagne enuoya acheter à Milan certaine quantité de harnois: comme cuirasses, sallades & autres harnois, qui furent enfardellez en fardeaux en façon de draps de soye, & autres marchandises fort enueloppez de cotton. Et tellement qu'à remuer les fardeaux, ne faisoient point de noise: lesquels fardeaux qui se porterent sur mulets, arriuerent aux montaignes d'Auuergne: laquelle marchandise de harnois les gens & commis de Doyac prindrent: & incontinent fut mādē au Roy qui donna lesdits harnois audit Doyac & autres ses satellites. En ladicte année toutes les vignes presque vniuersellement par tout le Royaume de France, faillirent & ne rapporterent qu'un peu de chose. Et le vin qui creut en ladicte année, ne valut gueres & si se vendit bien chier. Et à ceste cause le vin de l'année precedente, qui aussi ne valoit gueres, fut vendu moult chier: car le vin qui au commencement d'icelle année, qui ne fut vendu à detail & tauerne que quatre deniers tournois, fut vëdu douze deniers tournois la pinte. Et par aucuns marchans bourgeois de Paris & d'ailleurs, qui auoiēt gardé du vin creu autour de Paris: comme de Champigny sur Marne, & autres lieux voisins, le vendirent bien chierement. Car plusieurs en vendirent à detail deux soulds parisis la pinte, qui estoit audit pris xxxvj. liures tournois le muy. Et aduint qu'au moyen de ce que lesdictes vignes faillirent, comme dit est, & que le vin ne valut gueres, plusieurs marchans s'en allerent chercher les bons en diuerses regions loingtaines: lesquels marchans feirent amener en la ville de Paris, qui fut pareillement chier vendu, comme six & sept blancs la pinte. Et lesquels vins furent allez querir iufques és fins & mettes des dernieres villes d'Espaigne. En ladicte année les garnisons pour le Roy estans au païs de Picardie, tenans frontiere sur lesdits Flamens: nonobstant la trefue, feirent de grans courses les vns contre les autres, en faisant mauuaïse guerre: car tous les prisonniers de guerre prins de chacun desdits costez sans misericorde aucune, estoient pendus quand prins estoient sans
aucun

aucun en mettre à rençon. Audit temps le Roy qui auoit esté malade à Tours, s'en partit dudit lieu de Tours & s'en alla à Touars: où aussi y deuint tresfort malade, & y fut en grand dangier de mort. Parquoy & affin de recouurer sa santé, enuoya faire maintes offrandes & donner de bien grans sommes de deniers en diuerses Eglises de ce Royaume, & fait de grandes fondations. Et entre les autres fondations, fonda en la sainte Chappelle du Palais royal à Paris, vne haute messe pour y estre dicte chacun iour en l'honneur de monseigneur saint Iean, à l'heure de sept heures de matin: laquelle il ordonna estre chantée par huit chantres, qui estoient venus du pays de Prouence: lesquels auoient esté au Roy René de Cecille & de sa chappelle, qui s'en vindrent apres le trespas dudit feu Roy René leur maistre deuers le Roy, qui les recueillit cōme dit est. Et fonda ladicte messe de mille liures parisis, prinſes sur la ferme & coustume du poisson de mer, qui se vend és halles de Paris. Et apres ce que dit est, & que le Roy eut esté ainsi malade, il se voia d'aller en pelerinage à monseigneur S. Claude, ce qu'il entreprint de faire: & s'en vint à nostre Dame de Clery faire ses offrandes, & puis se partit d'illecques pour aller accomplir sondit voyage. Et pour estre seurement de sa personne, y mena avecques luy huit cens lances, & plusieurs autres gens de guerre, qu'on estimoit bien à six mille combattans: & auant son partement du pays de Touraine, alla à Amboise veoir monseigneur le Daulphin son fils, que iamais n'auoit veu, au moins que bien peu. Et au departement luy donna sa benediction, & le laissa en la garde de monseigneur Pierre de Bourbon seigneur de Beaujeu: lequel il feit son lieutenant general par tout son Royaume durant sondit voyage. Et lors declaira le Roy à monseigneur le Daulphin, qu'il vouloit qu'il obeit à mondit seigneur de Beaujeu, & qu'il feit tout ce qu'il luy ordonneroit. Et tout ainsi que luy mesmes luy commandoit. En ladicte année durant le voyage de S. Claude, fut le bled moult chier vniuersellement par tout le Royaume de France: & mesmemēt au pays de Lyonnois, Auvergne, Bourbonnois & autres pays voisins. Et à ceste cause y mourut grād quantité de peuple, tant de maladie que de famine, qui fut merueilleusement grande par toutes contrées. Et se ce n'eussent esté les grandes aumosnes, & secours de ceux qui auoient des bleds, la mort y eut esté moult doloieuse. Non obstant ce partirent desdits pays plusieurs pauvres gens, qui allerent à Paris & en plusieurs autres bonnes villes. Et furent mis en vne grāge ou maison à S. Katherine du Val des escolliers, où illec les bons bourgeois & bonnes bourgeois de Paris les alloient songneusement penser: & depuis furent menez à l'hostel Dieu de Paris, où il moururent tous ou la plus part: car quand ils euidoient manger, ils ne pouoient, pource qu'ils auoient les conduits retraits par auoir trop esté sans manger.

Du trespas ma dame Ieanne de France, espouse du Duc de Bourbon: & du trespas de la Comtesse de Flandres avecques la declaration: du trespas de plusieurs autres personages & autres choses aduenues à Paris. Du retour du Roy de S. Claude à nostre Dame de Clery & autres lieux. Des ambassadeurs de Flandres: de la prinſe de la ville d'Aire: de la mort & occision du seigneur Loïs de Bourbon Euesque du Liege: & autres choses faictes en l'an mille cccc. quatre vingts & deux.

EN l'an mille quatre cens quatre vingts & deux, le ieudy quatriesme iour de May enuiron l'heure de quatre à cinq heures: tresnoble, puissante, saincte & des bonnes viuans l'exemplaire: c'est à sçauoir matresfredoubtée Dame Madame Ieanne de France, femme & espouse de monseigneur Iean Duc de Bourbonnois & d'Auuergne, expira & rendit l'ame à Dieu en son chasteau de Molins en Bourbonnois, par le moyen d'une forte fieure si merueilleuse, que l'art de medecine n'y peut pourueoir. Et fut son corps inhumé en l'Eglise de nostre Dame dudit Molins: laquelle Dame fut fort plorée & lamentée, tant par mondit seigneur son espoux & mary, ses seruiteurs & gens de ses pays, & par tous autres du Royaume de France, qui ladicte dame auoient veüe & eu cognoissance, pour les grandes vertus & biës dont estoit par grace remplie. Et au parauant icelle année, alla aussi de vie à trespas au pays de Flandres, Madame la Comtesse de Flandres & Arthois, fille du feu Duc Charles de Bourgogne, femme du Duc en Autriche, & niepce de messeigneurs de Bourbon: de laquelle issirēt deux enfans: c'est à sçauoir vn fils & vne fille, lesquels demourerent en la garde des Flamés en la ville de Gand. En cestedicte année mille cccc. lxxxij. de ladicte maladie de fieure & rage de teste, moururent en diuers lieux moult de notables & grans personages tant hōmes que femmes. Et entre autres moururent les Archeuesques de Narbonne & Bourges, l'Euesque de Lisieux & maistre Iean le Boulengier premier President en la Court de Parlemēt, & aussi messire Charles de Gaucourt cheualier, qui auoit esté Lieutenant pour le Roy en sa ville de Paris: lequel fut fort plaint: car il estoit vn beau & honneste cheualier, beau personnage, sage homme & grand clerc. Et de ladicte Court de Parlement, moururēt plusieurs des conseilliers & aduocats d'icelle. Et entre autres mourut vn nommé maistre Nicolle Bataille, qu'on disoit estre le plus grād Legiste du Royaume de Frāce, bōne personne & fort plaisant, qui fut fort plaint & nō sans cause. Et disoit on qu'il mourut par le courroux, qu'il print de sa femme qui fut fille de maistre Nicole Erlaut en son viuant Tresorier du Daulphiné, combien qu'elle eust de sondit mary tout le plaisir, que femme en pouoit auoir. Et d'elle auoit eu douze enfans en mariage, & auoit ledit deffunct au iour de sondit trespas xliij. ans d'aage. Laquelle femme se conduisit en la lescherie de sa pute charongne, avecques ribaux particuliers durant sondit mariage. Et entre autres entretint en sadicte lescherie vn ieune garson, fils d'une venderesse de poi rées & poisson de mer des halles de Paris, nommé Regnault la Pie: lequel auoit autresfois euē grand familiarité autour du Roy, comme son varlet de chambre. Et depuis auoit esté mis dehors de son seruice par ses fautes & abus, dont l'accusa Olivier le Diable dit le Dain aussi son compagnon, comme barbier varlet de chambre du Roy. Laquelle femme le print en son amour desordonné. Et pour l'entretenir, en vendit & engagea de ses bagues & vaisselle de sondit mary. Et si print aussi de l'argent de sondit mary larcineusement, pour l'entretenement de sondit paillard: de toutes lesquelles choses sondit mary en fut aduerty, qui en print si tres grand courroux, qu'à cause d'iceluy il alla de vie à trespas, qui fut moult grand dommage. Au Royaume des cieux gise l'ame de luy en bon repos. Et apres que le Roy eut fait & accompli son voyage audit lieu de S. Claude, il s'en retourna fort malade à nostre Dame de Clery, là où il feit sa neufuaine. Et

apres

apres icelle faicte, moyennant la grace & bonté de la benoiste vierge Marie illec requise: & à laquelle il auoit sa singuliere confidence & deuotion, reuint en assez bonne conualescence & fut fort allegé de ses maux. Durant & pendant le temps que le Roy estoit audit lieu de Clery, y mourut beaucoup de gens tant de son hostel que d'autres. Et entre les autres y mourut vn Docteur en Theologie, que nouuellement il auoit fait son conseillicr & aumosnier, qui estoit natif de Tours, fils d'un bouchier de ladicte ville. Et se nommoit ledit docteur maistre Magistri. En apres le Roy qui estoit audit lieu de Clery s'en partit & s'en alla à Mehun sur Loire, à S. Laurens-des-Eauës, & illec enuiron. Et y fut iusques pres la feste nostre Dame de My-Aoust qu'il se partit dudit saint Laurës, & retourna de rechief audit lieu de Clery à la feste & solennité de la nostre Dame de My-Aoust. En ladicte année au commencement de Iuillet, se meirent sus vne belle & honneste ambassade du païs de Flandres, pour venir deuers le Roy audit lieu de Clery, où ils arriuerent. Et illec parlerent au Roy: auquel ils feirent remonstrer & à son conseil les causes, pour lesquelles ils estoient venus deuers luy, de par les nobles hommes gens d'Eglise & populaire dudit païs de Flandres. Lesquelles causes estoient tendans à fin, qu'il pleust au Roy auoir bon appointement avecques luy pour lesdits Flamens, qui ne tēdoient à autre fin que d'auoir paix finale avecques le Roy. Lesquels ambassadeurs furent du Roy tresbien & honnestement receuz & recueillis. Et leur fut de par luy donné expedition, dont iceux ambassadeurs furent tresbien contens. Et ce fait ils s'en retournerent audit païs de Flandres: & furent conduits & menez de par le Roy en la ville de Paris par monseigneur de S. Pierre, qui les feit bien festoyer par le Preuost des marchans & escheuins d'icelle ville de Paris bien & honnestement. Et puis apres s'en retournerent à Gand & autres villes de Flandres, dont ils estoient partis. Et ainsi que ladicte ambassade s'en retournoit, le Roy auoit fait mettre sus les champs grād partie de ses gens de guerre, qu'il auoit en garnison au païs de Picardie: dont auoit la charge & conduicte le seigneur des Querdes: laquelle compagnie il faisoit beau veoir, car elle estoit fort belle. En laquelle compagnie auoit xiiij. cens lances fournies, tresbien accompagnées de six mille Suisses, & aussi de huit mille picquiers: tous lesquels gens de guerre ainsi assemblez, que dit est, s'en allerēt à triumphe & bruit, mettre le siege deuant la ville de Aire, qui est vne tresbelle place & bien assise pres de S. Omer & Therouenne: dedans laquelle ville y auoit plusieurs gens de guerre de par le Duc en Autriche. En laquelle place tout incontinent que les gens du Roy y furent arriuez, la battirent moult fort d'artillerie: dont & de quoy les manans d'icelle ville furent & se trouuerent fort espouentez, mais aucuns des gens de guerre illec estans, qui auoient bonne intelligence avecques ledit seigneur des Querdes pour le Roy, de luy bailler ladicte place & ville, feirent composition pour icelle ville qui estoit telle, qu'elle seroit mise en la main du Roy. Et fut faicte ladicte composition par vn cheualier nommé le seigneur des Contrans, qui estoit du païs de Picardie. Et lequel auoit la garde de ladicte ville de Aire de par ledit Duc en Autriche. Et meit ladicte place en la main du Roy, en luy faisant le serment de le seruir bien & loyaument: dont & pour bien le recompenser, le Roy luy donna la charge de cent lances. Et si luy fut outre baillé & donné trente mille escus en or con-

tent. En ladicte année és mois d'Aoust & Septembre, vn cheualier du paÿs du Liege, nommé messire Guillaume de la Marche dit le Sanglier d'Ardaine, feit & conspira guerre mortelle à l'encontre de tres noble Prince & tresreuerend pere en Dieu monseigneur Loÿs de Bourbon Euesque de ladicte cité de Liege, qui auoit par auant nourry ledit Sanglier d'Ardaine, pour le tuer & meurdrir. Et apres ce fait de mettre & faire Euesque dudit Liege, le frere dudit Sanglier. Et pour faire par iceluy Sâglier sa damnée entreprinse, le Roy luy feit deliurer argent & gens de guerre en grand nombre: au moyen desquels & aussi de certain nombre de mauuais garçons, larrons, pipeurs & pillards, qu'il print & assembla tant en la ville de Paris qu'en aucuns des villages voisins d'icelle ville iusques au nombre de deux à trois mille, lesquels il feit vestir & habiller de robes rouges. Et à chacune desdictes robes dessus la manche fenestre, y feit mettre vne hure de sanglier: Et estoient lesdits mauuais garçons legierement armez. Et ainsi ledit Sanglier les mena iusque audit paÿs du Liege. Et luy illec arriué, trouua façon & moyen d'auoir intelligence avecques aucuns traistres Liegeois de ladicte ville à l'encontre de leur seigneur, de dechasser, tuer & meurdrir leurdit Euesque, & le mettre hors de la cité avecques ce qu'il auoit de gens: ce que feirēt lesdits Liegeois. Et sous vmbre d'une amitié faincte, qu'ils disoient auoir à leurdit Euesque, luy dirēt que force estoit qu'il allast assaillir sondit ennemy. Et que lesdits habitans le suiuroient en armes, & viuroient & mourroient pour luy: & qu'il n'y auroit point de faute, que ledit Sanglier & sa cōpagnie demoureroient desconfits & destruits: lequel monseigneur du Liege inclinant à leur requeste, faillit de ladicte cité du Liege, & alla avecques eux aux champs tout droit, où estoit ledit de la Marche: lequel quād il veit ledit Euesque se descourir de l'embusche, où il estoit & s'en vint tout droit audit monseigneur l'Euesque. Et quād lesdits traistres habitans du Liege veirent leurdit Euesque és mains dudit de la Marche son ennemy, luy tournerent le dos, & sans coup ferir s'en retournerent en ladicte cité du Liege. Et incontinent ledit monseigneur du Liege, qui n'auoit ayde ne secours que de ses seruiteurs & familiers, se trouua tresfort esbahy: car ledit de la Marche qui estoit failly de ladicte embusche, s'en vint à luy: & sans autres chose dire luy bailla d'une taille sur le visage, & luy mesmes le tua de sa propre main. Et apres ce fait, iceluy de la Marche feit mener & iecter ledit Euesque & estendre tout nud en la grand place deuant l'Eglise de monseigneur S. Lambert, maistressè Eglise de ladicte cité de Liege. Où illec fut manifestemēt monsté tout mort aux manans & habitans de ladicte ville, & à vn chacun qui le vouloit veoir. Et tantost apres ladicte mort y arriuerent cuidans le secourir, le Duc d'Autriche, le Prince d'Orenge, le Comte de Romont & autres gens de guerre. Lesquels quand ils sceurent la mort dudit Euesque, s'en retournerēt sans riens faire à l'occasion d'icelle.

Comment le Roy estant malade vint de Tours à Amboise recommander à son fils maistre Olinier le Dain, & autres: du mariage du Daulphin & de Marguerite Comtesse de Flandres. De l'appoinctement fait entre les Roys d'Escoffe & d'Angleterre, comprenant le bon Duc d'Albanie: & comment le Roy feit recommander sa santé par deuotes personnes en l'Eglise S. Denys en France.

EN ladicte année au mois d'Octobre, le Roy se trouua fort malade en son hostel du Pleffis du Parc lez Tours. A cause de laquelle maladie eut grand paour de mourir. Et pour ceste cause se fait porter à Amboise, par deuers monseigneur le Daulphin: Auquel il fait plusieurs belles remonstrances, en luy disant qu'il estoit malade d'une maladie incurable. En l'exhortant que apres son trespas, il voulsist auoir aucuns de ses feaux seruiteurs pour bien recommandez. C'est à sçauoir maistre Oliuier le Diable dit le Dain son barbier, & Iean de Doyac gouuerneur d'Auuergne, en disant qu'il auoit esté bien seruy d'eux: & que ledit Oliuier luy auoit fait plusieurs grans seruices, & qu'il ne fut riens de luy se n'eust esté ledit Oliuier. Et aussi qu'il estoit estrangier & qu'il se seruiist de luy, & qu'il l'entretenist en son seruice & aux offices & biens qu'il luy auoit donnez. Luy recommanda aussi monseigneur du Boscaige, & messire Guyot Pot baillif de Vermandois. Et luy enchargea qu'il creust leur conseil: car il les auoit trouuez saiges & de bon conseil. Et si dit oultre à mondit seigneur le Daulphin, qu'il confermast tous les officiers qu'il auoit faits en leurs offices. Et que principalement il eust son poure peuple pour recommandé, lequel il auoit mis en grande poureté & desolation. Et plusieurs autres choses luy remonstra, que depuis il fait manifester en plusieurs des bonnes villes de son Royaume, & en sa Court de Parlement. Et si luy dit oultre que pour la conduicte de la guerre, il se seruiist du seigneur des Querdes: & lequel il auoit trouué en tous ses affaires bon, loyal & notable cheualier, & de bonne & grande conduicte, & ce fait s'en retourna aux Montils. Audit temps le Roy fait venir grand nombre & grand quantité de ioueurs de bas & doux instrumens, qu'il fait loger à saint Cosme pres Tours, où illec ils s'assemblerent iusques au nombre de six vingts. Entre lesquels y vint plusieurs bergiers du païs de Poictou: lesquels souuent iouerent deuant le logis du Roy, mais ils ne le veoient point, affin que ausdits instrumens le Roy y print plaisir & passetemps, & pour le garder de dormir. Et d'un autre costé y fait aussi venir grand nombre de bigots, bigottes & gens de deuotion: comme Hermites & saintes creatures, pour sans cesser prier à Dieu qu'il permist, qu'il ne mourust point & qu'il le laissast encores viure. En ce temps és mois d'Octobre & Nouembre, se feirent de grans allées & venues par les Flamens de la ville de Gand, & qui vindrent en ambassade deuers le Roy: lequel pour les ouir y commeist maistre Iean de la Vacquerie, qui estoit du païs de Picardie, & lequel il auoit nouuellement fait & créé son premier President en sa court de Parlement à Paris, pour consulter de la matiere: c'est à sçauoir de bonne paix & vnion estre faicte entre le Roy & lesdits Flamens. Et avec ledit President, y commeist le Roy ledit monseigneur des Querdes & autres. Et tellement fut cōmuniqué par lesdictes parties tant d'un costé que d'autre, qu'ils feirent & traicterent ladicte paix. En laquelle faisant se deuoit faire le mariage de monseigneur le Daulphin & de la fille du Duc en Autriche, qui estoit en la possession & garde desdits Flamens de Gand: dont de ce le Roy fut fort ioyeux, & eut ladicte paix & vnion pour bien agreable. Et pour l'honneur d'icelle en fut châté par tout le Royaume *Te Deum laudamus*: & si en furēt fais les feux en la ville de Tours. Et incōtinent ces choses faictes, fut grād bruit q̄ lesdits Flamens

sestoient partis dudit lieu de Gand, pour ramener ladicte fille : laquelle pour la bien & honnestement recueillir, le Roy y auoit ordonné mes dames de Beaujeu sa fille aînée, ma dame de Dunois sœur de la Royne, ma dame de Touars, ma dame l'Amiralle & plusieurs autres dames, damoiselles & gentils-femmes, qu'on cuidoit qu'ils deussent venir & arriuer en la ville de Paris le viij. iour de Decembre: mais ladicte venue seiourna pour aucun menuz differens, qui suruindrent du costé desdits Flamens & iusques à ce que lesdits differens eussent esté vuidez. En ladicte année les Roys d'Angleterre & d'Escoffe, eurent grand guerre l'un cōtre l'autre. Et entrèrent lesdits Escossois bien avant audit Royaume d'Angleterre, lequel ils dommagerent moult fort: & nonobstant que lesdits Escossois estoient cent mille hommes en bataille, plus que n'estoient les Anglois, toutesfois affin qu'ils ne frappassent l'un sur l'autre, se meit & fut fait appointement entre eux par le moyen du Duc d'Albanie, frere du Roy d'Escoffe son frere : laquelle querelle d'entre eux estoit telle que ledit Duc d'Albanie disoit, que son dit frere vsurpoit sur luy ledit Royaume, pource que lesdits Roy d'Escoffe & Duc d'Albanie qui estoient freres, estoient venus & issus sur terre d'une ventrée: Et que ledit Duc d'Albanie qui estoit le premier issu, & que par ainsi il auoit acquis droit d'aînéssé deuant son dit frere audit Royaume. Et à ceste cause ceux qui menoient ladicte guerre pour ledit Roy d'Escoffe, feirent composition avecques lesdits d'Albanie & Anglois qui estoient ensemble, tellement qu'ils ne frapperent point les vn contre les autres, & s'en retourna chacun au lieu dont il estoit party. En ladicte année au mois de Ianuier, vindrent & arriuerēt en la ville de Paris les ambassadeurs de Flādres, qui auoient moyenné la paix d'entre le Roy & les Flamens, au moyen du mariage de monseigneur le Daulphin, & de damoiselle Marguerite d'Autriche. Au deuant lesquels & pour les receuoir en la ville de Paris de par le Roy, y furent monseigneur l'Euesque de Marseille lieutenant pour le Roy en icelle ville de Paris, accompagné du Preuost des marchans & escheuins, bourgeois & habitans d'icelle ville, & d'un Docteur de la ville de Paris nommé Scourable, qui feit vne moult honorable proposition par deuant lesdits Flamens, qui moult s'en tindrent pour bien contens. Et le lendemain qu'ils furent arriuez en ladicte ville, qui fut le dimanche quatriesme iour de Ianuier, furent lesdits ambassadeurs Flamens en l'Eglise nostre Dame de Paris ouïr illec la messe. En laquelle Eglise de nostre Dame y furent faictes processions generalles, & y prescha ledit Scourable qui y feit vne moult belle collation, dont tous ceux qui l'ouïrent furent moult bien contens. Et de ladicte venue & publication de ladicte paix, en fut châté en icelle Eglise, *Te Deum laudamus*: fait les feux, & aussi de grans chieres parmy les rues de ladicte ville. Et furent ledit iour de dimanche iceux ambassadeurs au partir de ladicte Eglise de nostre Dame, menez disner en l'hostel de ladicte ville de Paris, là où ils furent moult bien festoyez. Et le lendemain lesdits ambassadeurs se partirent dudit lieu de Paris, & s'en allerent par deuers le Roy. Et d'icelle venue & bonne paix, en furent resioüis & ioyeux tresnoble & tresreuerend pere en Dieu monseigneur le Cardinal de Bourbon: qui à l'occasion d'icelle bone paix, feit faire en son hostel de Bourbon à Paris vne moult belle moralité, sottie & farce, où moult de gens de la ville allerent pour les veoir iouer, qui moult prise-

rent

rent ce qui y fut fait. Et eussent les choses dessusdictes esté plus triumpantes, se n'eut esté le temps qui moult fut pluuiex & mal aduenant, pour la belle tapisserie & le grand appareil fait en la court dudit hostel: Laquelle court fut toute tendue de la tapisserie de monseigneur le Cardinal, dõt il en auoit grande quantité & de belle. Apres lesdits ieux ainsi faits que dit est, lesdits ambassadeurs s'en partirent de Paris le lundy ensuiuant, comme dit est: & s'en allerent à Amboise, où ils furent moult honnorablement receuz de par le Roy: & y veirent par deux fois monseigneur le Daulphin qui les recueillit moult honnestement. Et à leur departement de Tours, où ils furent depuis: ledit Roy leur fait donner pour leur deffroy trente mille escus au soleil, & de belle vaisselle d'argent largement. Et depuis iceux ambassadeurs s'en retournerent à Paris, où ils feirent publier en la Court de Parlement les articles faits pour ladicte paix: c'est à sçauoir publicquement & en plaine Court à huis ouuers. Et apres ladicte lecture faicte, leur furent iceux articles confermez par ladicte Court. Et au departement d'icelle Court, maistre Guillaume le Picard Baillif de Rouen, mena & conduisit lesdits ambassadeurs & autres officiers du Roy estans illec, en son hostel assis audit lieu de Paris, en la rue de Quinquempoix, où illec il donna à disner à toute la compagnie: & y furent moult plantureusement festoyez à vn iour de mardy quatriesme iour de Feurier, en ladicte année mille quatre cens quatre vingts & deux. Audit mois de Feurier: le Roy escriuit lettres à tous les estats de Paris: par lesquelles il les prioit tresinstamment, qu'ils se voulsissent transporter en l'Eglise monseigneur S. Denys, luy faire priere qu'il vueille estre intercesseur & moyen enuers nostre seigneur Iesus Christ, qu'il voulsist permettre que le vent de bise ne courut point, pource que par le rapport de tous medecins auoient esté d'opinion que ledit vent de bise quand il venteroit, feroit moult de maulx, tant à la santé des corps humains que des biens de terre. Et par l'ordonnance du Roy, furent tous lesdits estats de Paris à diuers iours audit lieu de S. Denys, faire processions & chanter lesdictes messes.

Du seigneur de Beauieu & dame Anne de France sa femme, & autres pour la receptiõ de la Daulphine: de la mort du Roy Edouard d'Angleterre: & du trespas de dame Margnerite de Bourbon Comtesse de Bresse: de l'entrée & reception de ladicte Daulphine à Paris: du cloché de sainte Geneuiefue bruslé: & du mariage & nopces du Daulphin & de ladicte Daulphine.

ET le samedi xix. iour d'Auril mille quatre cens quatre vingts & trois apres Pasques, monseigneur de Beauieu & ma dame sa femme vindrent à Paris pour eux aller en Picardie receuoir ma dame la Daulphine des mains des Flamens, qui par le traicté de la paix la deuoient mettre és mains de mondit seigneur de Beauieu pour le Roy. Et feit ladicte dame de Beauieu son entrée en la ville de Paris, cõme fille du Roy, & y feit des mestiers nouueaux. Et estoient lesdits seigneur & dame bien honnestement accompagnez de grans seigneurs & dames: comme le seigneur d'Albret, le seigneur de S. Valier & autres nobles hommes: Ma dame l'Amiralle & autres dames & damoiselles, lesquels seiournerent à Paris par trois iours: durant lesquels monseigneur le Cardinal de Bourbon les festoya moult hõnorablement. Audit mois

d'Auril le Roy Edouard d'Angleterre, mourut audit Royaume d'une apoplexie qui le print. Autres dient qu'il fut empoisonné en beuvant du bon vin du creu de Chaluau, que le Roy luy auoit donné: duquel il beut en si grande abondance qu'il en mourut: combien qu'on a dit depuis qu'il vesquit iusques à ce, qu'il eut fait Roy en son lieu son fils aîné. Audit mois & an mourut aussi ma dame Marguerite de Bourbon, femme de Philippe monseigneur de Sauoye Comtesse de Bresse, de maladie qui longuement luy dura: & d'icelle maladie on n'y peut mettre remede qu'elle n'en mourut hetique: dont fut grand dommage, car elle estoit en son viuant moult honneste & bonne dame, & pleine de grans biens & vertus. Au mois de May le samedi iij. iour d'iceluy mois par l'ordonnance & commandement du Roy, tous les estats de Paris comme le Preuost Iuge ordinaire, avecques les supposts & praticiens du chastellet dudit Paris: la Court de Parlement, la chambre des Cōptes, les Generaux, des aydes & monoyes, la chambre du Tresor & les esleuz: avecques les Preuosts des marchās & escheuins d'icelle ville, allerēt en belle processio dudit lieu de Paris, iusques au lieu & en l'Abbaye de monseigneur S. Denys en Frāce: pour en icelle Abbaye prier pour la bone prosperite du Roy, de la Roynie, monseigneur le Daulphin & tous les seigneurs du sang royal, & aussi pour tous les biens qui estoient sur terre. Au mois de Iuing ensuiuant le lundy ij. iour dudit mois enuiron cinq heures du soir, fait son entrée en la ville de Paris ma dame la Daulphine, accompagnée de ma dame de Beaujeu, ma dame l'Amiralle & autres dames & gentils-femmes Et entrerent à lad icte heure audit lieu de Paris par la porte S. Denys, où estoient preparez pour sa venue trois beaux eschauffaux: en l'un desquels tout en hault, estoit un personnage representant le Roy comme souuerain: Au second estoient deux beaux enfans, un fils & une fille vestus de damas blanc, faisans & representans mondit seigneur le Daulphin, & madicte damoiselle de Flandres. Et autres estages au dessoubs estoient deux personnages de mondit seigneur de Beaujeu, & de ma dame sa femme. Et à chacun d'iceux personnages à costé, estoient les escussions des armes desdits seigneurs & dames. Et si y auoit aussi quatre personnages: c'est à sçauoir l'un de labour, l'autre de clergé, l'autre marchandise, & l'autre noblesse, qui tous dirent un couplet à icelle entrée. Et est à sçauoir que par tout, où madicte damoiselle de Flandres passa, tout fut tendu par les rues. Et y furent encores faits plusieurs beaux personnages, tous consonnans ausdits monseigneur le Daulphin & ma dame la Daulphine. Et pour l'honneur de sadicte venue, furent mis hors & deliurez tous prisonniers de ladicte ville de Paris, & y fut fait nouveaux mestiers. Et le vendredy vij. iour dudit mois de Iuing enuiron l'heure d'entre huit & neuf heures du soir, se leua grand tonnoirre audit lieu de Paris. Et à un des esclats dudit tonnoirre qui fut à ladicte heure, vint iceluy tonnoirre enflamber & mettre le feu au clocher de ma dame sainte Geneuiefue au mont de Paris: lequel brusta toute la charpenterie dudit clocher, qui estoit demourée par l'espace de neuf cens ans: fondit toutes les cloches dudit clocher & le plomb, dont il estoit couuert, où il y auoit par estimation cent mille liures de plomb & plus, & y eut un grand dommage qui estoit pitié à veoir. Au mois de Iuillet audit an mille quatre cēs quatre vingts & trois, fut fait & solemnisé la feste des nopces de mondit seigneur le Daulphin, & damoiselle Marguerite de Flandres
en la

en la ville d'Amboise. Et y auoit & estoient presens plusieurs nobles & notables personages de ce Royaume, enuoyez des citez & bonnes villes dudit Royaume & par l'ordonnance du Roy.

De la sainte ampolle de S. Remy de Reims, portée au Roy en son hostel des Montils-lez-Tours. Et finalement du deuot trespas dudit Roy Loys xi. sepulture en l'Eglise de nostre Dame de Clery, lequel Dieu absolue.

EN ladicte année mille quatre cens quatre vingts & trois, le Roy delibera d'auoir & luy estre portée la sainte Ampolle, qui estoit en l'Eglise S. Remy de Reims: & qui auoit esté apportée par grace diuine des l'an cinq cens, par vne coulombe blanche au bon S. Remy de Reims, pour en oindre & sacrer à Roy de France le Roy Clovis, qui fut le premier Roy Chrestien: lequel mourut en ladicte année, & gist en l'Eglise S. Geneuiefue au môt de Paris. Et par ainsi estoit demourée ladicte sainte Ampolle audit lieu de S. Remy neuf cës quatre vingts & trois ans, qu'elle en fut tirée & mise hors de son lieu, & apportée à Paris par Claude de Montfaulcon, gouverneur d'Auuergne à ce cõmis de par le Roy. Et arriua à Paris le dernier iour de Iuillet: & fut apportée en tresgrande reuerence & processions reposer en la S. Chappelle du Palais royal à Paris, où elle y demoura iusques au lendemain au soir premier iour du mois d'Aoust, qu'elle fut emportée dudit lieu de Paris au Roy en son hostel des Montils les Tours, avecques les verges de Moysé & Aarõ: & la Croix de la Victoire qui aussi fut enuoyée par grace diuine au bon Roy S. Charlemaigne, pour obtenir victoire à l'encõtre des infidelles: Lesquelles verges & croix auoient tousiours esté audit lieu de la S. Chappelle à Paris, avecques les saintes reliques estans illec au premier iour d'Aoust, qui en furent avecques ladicte sainte Ampolle par l'Euesque de Seez & autres commissaires à ce ordõnez de par le Roy, emportées. Audit an le lundy xxv. iour dudit mois d'Aoust, le Roy deuint fort malade en son hostel des Montils lez Tours, tellement qu'il perdit la parolle & tout entendement: & en vindrent les nouuelles à Paris le mercredy xxvij. iour dudit mois qu'il estoit mort, par vnes lettres qu'en escriuit maistre Iean Briçonnet: ausquelles lettres fut foy adioustée, pource que ledit Briçonnet estoit homme de bien & de credit. Et à ceste cause les Preuost des marchs & escheuins de la ville de Paris, pour pourueoir aux affaires d'icelle ville, feirent mettre garde aux portes de ladicte ville pour garder que homme n'en issit n'y entraist. Et à ceste cause fut bruit tout commun parmy ladicte ville de Paris, que le Roy estoit ainsi mort, dont il n'estoit riës: & s'en reuint, beut, parla & mangea tresbien & vesquit iusques au samedi au soir ensuiuant xxx. & penultime iour dudit mois d'Aoust, environ l'heure d'entre six & sept au soir qu'il rendit l'ame: & incontinent fut le corps habandonné de ceux qui l'auoient seruy en la vie. En apres ledit trespas son corps depuis fut appareillé, comme on a de coustume de faire, fut porté inhumer dudit lieu des Montils en l'Eglise nostre Dame de Clery, pource qu'il voulut & ordonna en son viuant, qu'ainsi fut fait. Et ne voulut estre mis avecques les deffuncts tresnobles Roys de France ses predecesseurs, en l'Eglise & Abbaye de monseigneur S. Denys en France, & ne voulut iamais dire la raison qui l'auoit meu ad ce: mais aucuns

pensoient que ce fut pour la cause de l'Eglise, où il feit moult de biens. Et aussi pour la grande deuotion qu'il auoit à la benoïste Vierge Marie, priée audit lieu de Clery. Lequel deffunct Roy en son viuant à cause d'aucuns personages, qui estoient à l'entour de sa personne, comme Oliuier le Diable dit le Dain son barbier, Iean de Doyac & autres plusieurs: lesquels il croyoit plus que gens de son Royaume: feit durant son regne beaucoup d'iniustices, maux & violences: & tellement qu'il auoit mis son peuple si au bas, qu'au iour de son trespas estoit presque au desespoir. Car les biens qu'il prenoit sur sondit peuple, donnoit & distribuait aux Eglises en grans pensions, en ambassades & gens de bas estat & condition: Ausquels pour les exaucer ne se pouoit tenir de leur donner argent, biens & possessions en telle façon, qu'il auoit donné & aliené la pluspart du domaine de son Royaume. Et nonobstant qu'il eut durant sondit regne plusieurs affaires: toutesfois il meit en telle subiection ses ennemis, qu'ils vindrent tous par deuers luy à mercy: & fut si craint & redoubté qu'il n'y auoit si grand en son Royaume, & mesmement ceux de son sang, qui dormit & reposast seurement en sa maison. Et auant sondit trespas, fut moult fort molesté de plusieurs maladies: Pour le guerir desquelles maladies, furent faictes pour luy par les medecins, qui auoient la cure de sa personne de terribles & merueilleuses medecines. Lesquelles maladies luy puissent valoir au salut de son ame, & luy done son Paradis par sa misericorde, celuy qui vit & regne au siecles des siecles. Amen.

LES GRANDES CHRONIQUES DV TRESCHRESTIEN

Roy de France Charles viij. de ce nom, magnanime & victorieux, recueillies & assemblées par Pierre Desfrey simple Orateur de Troies en Champagne.



Eu & considéré la mutable instabilité de fortune, quant au regard de l'esperance de ceste vie trāsitoire, assez ne me puis esmerueiller: & me viennent les larmes aux yeux: Car i'ay deliberé d'escrire la Chronique du Treschrestien Roy de France Charles huitiesme de ce nom, lequel a esté vn Prince magnanime, plain de prouesse & victorieux: & toutesfois la volubilité d'icelle fortune apres plusieurs louables & triumpantes conquestes, l'a mis & subiugué es ineuitables mains d'Atropos, luy existant au xxviij. an de son aage & florissante ieunesse. Pour le commencement donques de ceste presente Chronique le Roy Loys xj. de ce nom, mourut & trespassa en l'an mille quatre cens quatre vingts & trois, au mois d'Aoust ainsi qu'il est dit: & à luy succeda au Royaume de France son fils unique ledit Charles viij. Il estoit aucunement tendre & maladif en sa ieune enfance: mais quand il vint en aage adolescent, il commençoit en son entendement à donner expectation, par maniere de discerner entre les vices & vertus. Et par le decours d'aucuns ans, il fut encóres tousiours plus dextre, mettant frein à sa volupté. Parquoy l'on pouoit facilement entendre, comment il eut esté preux & saige au temps aduenir, se la mort trop ineuitable ne l'eut saisy en sa ieunesse. Il estoit doux & bening de nature & entendement. Sondit pere le Roy Loys ne luy voulut faire donner introduction en langue Latine, pensant & estimant
foi

foy que lettres Latines peuuent donner empeschement à ceux qui regnent, & ont a regir : & pource aussi qu'iceluy son pere voyoit & cognoissoit l'excellent entendement de son fils, il vouloit dire comme ayant cogneu plusieurs choses, que l'introduction d'icelles lettres luy eut peu faire aucune moleste, ainsi comme desirant prouoir à la tendre fragilité d'iceluy son fils: auquel il cognoissoit l'enfance n'estre assez ferme pour ce faire : car il estoit aussi adoncques bien foible & debile de membres, pourquoy il n'eut peu bonnement porter le labour de trop grande estude : mais toutesfois apres le trespas de son pere, & qu'il eut prins la dignité royale : il commença moult volentiers à lire les liures escripts en langage François, & si voulut encores prouuer & faire experiment pour sçauoir la langue Latine: & de faire comme vn tresbon Prince, il occupa volontaiement sa ieune adolescence à seruir deuotement à Dieu, & ouir le conseil des sages, desirant sçauoir & comprendre pour bien regir & gouuerner. Il aimoit naturellement & de tresbon zele tous ceux de son sang, affin que pareillement ils fussent tous inclinez au bien & vtilité de son peuple, & aussi de tout le Royaume.

Comment le Roy Charles huitiesme de ce nom, fut sacré à Reims. Et puis il visita consequemment plusieurs bonnes villes. Et comment il feit son entrée en sa bonne cité de Paris, là où furent pendus & executez maistre Oliuier le Dain & son seruiteur Daniel, & Iean Doyac: lequel eut les oreilles couppées & la langue percée d'un fer chault. Et d'autres entrefaictes par ledit Roy en aucunes ses bonnes villes.

L'An mille cccc. quatre vingts & quatre, le treschrestien Roy Charles ^{1484.} estât en l'aage de xiiij. ans, fut par les tresnobles seigneurs de son sang le Duc d'Orleans, le Comte d'Angoulesme, le Comte de Foix, le Comte de Vendosme, le seigneur de Beaujeu, le seigneur de Dunois, le Duc de Lorraine & plusieurs autres Princes, capitaines, cheualiers & notables seigneurs, conduit & mené en sa ville & cité de Reims, pour illec estre sacré de l'onction de la sainte Ampolle, là où il fut pareillement accompagné des xij. Pairs de France ou par leurs commis: lesquels tous d'un commun accord comparurent en iceluy lieu, pour assister & le seruir vn chacun endroit soy selon son office, & comme en tel cas est accoustumé. Et apres que l'office de ce saint Sacre fut parfait à la personne du Roy Charles en ladicte cité de Reims, là où il fut moult honorablement receu & en grand triôphe, avecques tous les autres Princes & notables seigneurs: aucuns iours apres euolus il se partit dudit Reims, & se disposa aller veoir plusieurs bonnes villes illec à l'entour, esquelles il fut moult louïablement receu & en grād honneur: c'est à sçauoir que les rues d'icelles estoient tendues & parées de tapisserie, le clergé & autres estats avecques le cōmun populaire chacun endroit soy, s'efforçoient & estoient employez de tout leurs courages, à luy demonstrier bon signe d'amour & obeïssance, comme à leur souuerain seigneur, faisans esbats & feux de ioye à sa venue & reception. Enuiron ce temps vn nommé Daniel natif de Flandres seruiteur de maistre Oliuier le Dain, fut pour plusieurs cas de crimes & pechez par luy commis & perpetrez, condamné à estre pendu & estranglé au gibet de Paris, & ainsi

fut executé. Et vn peu apres ledit maistre Oliuier son maistre, qui auoit esté seruiteur du feu Roy Loÿs, fut semblablement pour plusieurs ses demerites & trop hardies entreprinſes condamné, à estre comme ſondit ſeruiteur pendu & eſtrâglé audit gibet: ce qui fut fait & executé. Et vn temps apres euolu, vn autre nommé Iean Doyac auſſi ſeruiteur dudit Roy, pour aucunes ſes folles entreprinſes & trop grandes hardieſſes faiçtes és biens & à la perſonne d'aucûs Princes, fut par arreſt de la Court battu & fuſtigé par le Bourreau: & puis vne oreille coupée & la langue percée d'vn fer chault au Pillory, eſtant és halles de la ville dudit Paris. Et apres ce fut mené iceluy Doyac dudit lieu de Paris à Montferrât, là où il fut pareillement battu & fuſtigé & eut l'autre oreille coupée. Et conſequemment apres ledit ſacre en ladicte ville de Reims, iceluy Roy Charles fut conduit & amené en la ville de S. Denys en France, pour illec prendre la Couronne & faire les deuoirs accouſtumez ainſi que droit eſt. Et de ce lieu de S. Denys, fut ſemblablement par leſdits ſeigneurs cōduict & amené en ſa bonne ville & cité de Paris, pour illec faire ſon entrée en la maniere qui ſ'enſuit. Le vj. iour de Iuillet l'an que deſſus, mille quatre cens quatre vingts & quatre, pour aller au deuant dudit Roy à ſon entrée & reception iſſirent de ladicte ville de Paris tous les eſtats d'icelle & par bel ordre, vn chacun habitué ſelon ſon eſtat pour venir trouuer le Roy venant de la ville de S. Denys, afin de luy faire l'honneur & reuerēce qu'à luy appartenoit: & en l'aſſemblée de ceſte iſſue eſtoit l'Eueſque de Paris avecques aucuns de ſon Clergé, la Court de Parlement, le Preuoſt de Paris, la chambre des Comptes, les autres chambres & tous officiers, le Preuoſt des marchans & eſcheuins, tous & chacun d'iceux moult honorablement veſtus & habitez ſelon ſa qualité. Et tant marcherent auant leſdits Preuoſt des marchans & eſcheuins, qu'au lieu dit la Chappelle par delà ſainct Ladre, vindrent trouuer le Roy accompagné des treſnobles Princes & ſeigneurs de ſon ſang, monsieur le Duc d'Orleans avecques les deſſus nommez, & encores pluſieurs autres notables ſeigneurs: & apres que leſdits Preuoſt & eſcheuins furent ainſi venuz au deuant du Roy, ils feirent l'honneur & reuerence comme il appartenoit: & là luy fut dit & propoſé pour ladicte ville, en luy preſentant les clefs de la porte de S. Denys, par où il feit ſadicte entrée: & conſequemment luy feirent tous les autres chacun la reuerence, en luy propoſant auſſi de leurs affaires, en eux offrans à ſon ſeruite & commandement chacun ſelon ſa faculté. Et ce fait ils ſe retirerent tous à part, pour marcher & entrer en ladicte ville ſelon le train de leurs degrez. Et en ceſte maniere entra le Roy Charles viij. de ce nom dedans la ville de Paris, moult richement veſtu & accouſtré de drap d'or, avecques autres riches parures, armé d'vn riche blanc harnois excepté ſon helmet d'honneur: lequel eſtoit triumphamment porté deuant luy ſur vn courſier de pris accouſtré de meſme: au lieu d'iceluy helmet auoit vn chappeau ſur ſon chief, & vne moult riche couronne d'or fin & precieufes pierres, comme ſoy monſtrant eſtre Roy: & deſſus luy auſſi eſtoit porté vn treſriche ciel de drap d'or. Et pareillement eſtoient tous les Princes & ſeigneurs de ſon ſang, & autres ſeigneurs & capitaines moult richement & honorablement accouſtrez, bien armez de toutes pieces deſſus leurs cheuaux: deſquels pluſieurs eſtoiēt bardez, & moult notablement parez de diuerſes ſortes & façons, pour luy faire hōneur

en ladicte entrée: & aussi y estoient les gentils hommes & pages d'honneur tresrichement appointez à cheval, & autres en si tresgrand nombre qu'il est impossible de dire, lesquels il faisoit tous bon veoir: plusieurs mysteres, histoires & esbatemens estoient demonstrez par la ville à l'honneur du prenommé Roy, qui feroient longs à reciter: chacun crioit Noël, & viue le Roy. Toutes les rues par où il deuoit passer cedit iour, estoient tendues & parées de riches tapisseries de plusieurs & diuerses manieres. A tous le passans faisans ladicte entrée & autres seiournans, estoit plantureusement donnée à boire de toutes manieres de vins: & si auoit diuers commis, pour en general donner à māger & boire à tous passans & rappassans. Et brief chacun se perforça de faire en tous cas son deuoir par amour de cuer cordial, pour l'honneur du tresnoble Roy: Lequel ainsi fut honnorablement receu avecques tous ceux du clergié de ladicte ville: la plus part desquels luy estoient venus au deuant en procession, reuestus de tresriches chappes & en moult grād nombre, portans plusieurs sainctes reliques & diuers ioyaux: & fut directement conduit & mené en la grande Eglise nostre Dame audit Paris. Et de là assez pres du coing dedās la rue neufue nostre Dame, estoit attendant le Recteur de l'Vniuersité honnestement accompagné de plusieurs docteurs & autres scientifiques personnages, lequel illecques fit la reuerence audit Roy en luy faisant proposer sa harengue: & puis il le conduisit iusques à ladicte Eglise, là où il fit son oraison. Et de cedit lieu il fut cōduit en son Palais royal en ladicte ville, là où fut fait vn tresmagnifique & plantureux soupper en la grande salle dudit Palais, ouquel il estoit en tresexcellent triumphe, accompagné de plusieurs Princes de sondit sang, & autres notables seigneurs: & illec coucha ceste nuict en sondit Palais. Et apres cestedicte entrée, le Roy tint le siege royal au Parlement dudit Palais: & seiourna plusieurs autres iours en icelle ville de Paris, où il demonstra chacun iour auoir bon zele & affection à la chose publique, & à la tresnoble couronne de France, de laquelle il estoit descendu: car il fut si tresbien instruiet & maintenu en sa ieunesse, qu'il a esté tousiours bon Catholique & bien aymé de tout son peuple. Estant doncques ledit Roy Charles ainsi accompagné des Princes de son sang, & garny de gens sages en ladicte ville de Paris: furent plusieurs choses considerées & mises en conseil pour le bien & soulagement du Royaume, & de tout le peuple: & entre plusieurs autres choses fut diligemment regardé, que le feu Roy Loys son pere peu de tēps par auant decedé, auoit fait & concedé aucūs grans dons superflus en plusieurs lieux & diuerses manieres: ausquelles superflues donations toutes raisons cōsiderez en y mettant droit & raison, furent reuoquées & remises à la bourse & au droit du Prince, pour tousiours soulager son peuple. Et ainsi toutes choses bien ordonnées & reduictes au droit, furent faictes iustes & tournoyemens sumptueux, pour le ioyeux aduenement dudit Roy Charles en ladicte ville de Paris. Et ainsi apres plusieurs choses politiques bien decidées, & mises en ordre par droit & iustice, ledit Roy Charles viij. se partit de sa bonne ville de Paris, pour aller visiter plusieurs autres lieux de son Royaume, ainsi comme à Rouen, Troyes, Orleans & autres ses bonnes villes & citez: esquelles il fit son entrée tousiours accompagné de la plus grande partie des tresnobles Princes de son sang, & autres notables seigneurs & vaillans capitaines. Esquelles

bonnes villes, il fut avecques sa compagnie honorablement receu : & luy furent faictes plusieurs bonnes cheres & loyaux seruices : & de la partie d'une chacune d'icelles villes & des habitans, à qui mieux mieux eux employans en tous esbats, triomphes & magnificences pour l'honneur de luy & des siens, car il estoit tant doux & plain de bonté, qu'il estoit craint, aymé & honoré de tout son peuple.

De la mort du Pape Sixte iiij. de ce nom. Et comment le Pape Innocent viij. fut eleu & luy succeda. De la guerre & victoire dudit Roy Charles au pais de Bretagne. Et commēt il espousa ma dame Anne fille de tresnoble Prince Francois Duc dudit Bretagne & autres choses aduenues.

ENuiron ce temps l'an mille quatre cēs quatre vingts & quatre mourut à Romme le Pape Sixte iiij. de ce nom, qui par auant auoit esté General de l'ordre des freres mineurs : & lequel auoit biē & catholiquement regy & gouuerné le Sainct siege de souuerain prestre audit Romme, par enuiron l'espace de treize ans. Son trespas fut fort plainct & ploré de tous les Rommains, car il auoit esté tousiours bening & pacifique enuers vn chacun en son regne. Et auoit eu la cure & sollicitude de la chose publique en la reparation des Eglises, pour l'honneur de Dieu & de la cité de Romme moult affectueusement & de bon courage, sans y espargner ses deniers, comme zelateur de tout bien. En l'an du trespas dudit Pape Sixte és ides du mois d'Aoust, fut fait & créé Pape Innocent huictiesme de ce nom. Lequel estoit du païs de Gennes : son pere fut nommé Aaron, de parens & estat moyen, mais biē loüez & honnorez : ledit Innocent estoit par auant dit & appelé Iean Baptiste, & fut Cardinal prestre du tiltre de sainte Cecille, & vulgairement appelé le Cardinal Malfait : il estoit entre les autres tresreuerends Peres Cardinaux, le plus pauvre & humain de tous : & aussi pour la cause de sa benignité & treshumaine humilité, il merita de paruenir au sainct siege Apostolique, comme souuerain : il estoit aussi tresprudent & magnanime en toutes ses euures, car en l'office de la legation en la cité de Siene & à Romme, fait & laboura si tresprudemment, qu'il donna grande esperance de son regime & de sa prudence aux autres Peres Cardinaux : il ouura & dispença tresliberallement le tresor de l'Eglise à tous fidelles chrestiens, en la remission de tous leurs pechez. Et a tousiours vescu pacifiquement en la bōne amour & dilection des Romains, & de tout le peuple. Et en ce mesmes temps durant le regne dudit Pape Innocent huictiesme, le Roy Charles huictiesme de ce nom, estant encores en aage adolescent, ordonna de ses guerres de Picardie, par les seigneurs de son sang & gens de conseil. Et en fut donnée la charge & gouuernemēt à messire Philippe de Creuecueur cheualier & seigneur des Querdes : Car en ce temps Maximien, qui auoit eu à femme & espouse dame Marie de Bourgongne fille du Duc Charles dudit Bourgongne, lequel auoit esté tué deuant la ville de Nancy au païs de Lorraine, s'esleua belliqueusement avecques vn grand ost & exercite de gens d'armes. Et au moyen de la mort dudit Duc Charles de Bourgongne, soy disant auoir aucun droit en sa succession pour luy & les siens, vouloit de toute sa force & puissance repeter & demander le païs d'Arthois, & autres païs de Bourgongne, nonobstant que
ja eussent

ja eussent esté tenus & occupez par le Roy Loÿs pere dudit Charles huictiesme. Au moyen dequoy fut ordonné ledit seigneur des Querdes audit paÿs de Picardie, pour obuier & resister aux entreprinſes dudit Maximien. Et ſuiuamment apres, comme dit maistre Robert Gaguin dedãs ſa Chronique en l'an mille quatre cens quatre vingts & cinq, fut pour aucune cauſe mûe & ſuſcitée vne grande guerre en Bretagne: laquelle fut ſi bien & prudemmēt conduicte de la partie dudit Roy Charles, qu'il gagna quaſi victorieuſement tout ledit paÿs de Bretagne. Et durant icelle guerre mourut & treſpaſſa le Duc François dudit Bretagne: & à luy ſuccederent deux filles, deſquelles l'vne eſtoit dicte & appellée Anne, laquelle de brief & ſucceſſiuement apres le treſpas de l'autre fille, demoura vraye ſeulle heritiere: & pour ceſte cauſe le Roy Charles print armes luy meſmes pour eſtre & cōparoïr à ceſte guerre en propre perſonne. Et avecques pluſieurs vaillans ſeigneurs & bons capitaines, furent donnez pluſieurs merueilleux affaux à la ville & cité de Nantes contre les Bretons, afin que les deux dictes filles du Duc de Bretagne, adoncques viuans, ne peuſſent prendre party de mariage avecques aucun ſans le conſentement dudit Roy: mais toutesfois cela tourna pour lors finablement à bien petit fait. Car le Roy Henry d'Angleterre vij. de ce nom, enuoya vn grand exercite d'Anglois pour ſecours auſdits Bretons: combien toutesfois qu'il n'y auoit pas gueres de tēps que ledit Roy Henry d'Angleterre, eſtoit venu cōme fugitif dudit paÿs deuers ledit Roy Charles à refuge: avecques lequel il demoura aſſez longuement, & luy ayda liberallement de ſes propres deniers: & avecques ce luy donna & departit encores de rechief pluſieurs de ſes gens d'armes: avecques leſquels il retourna nauigeant la mer iuſques audit paÿs d'Angleterre, là où apres que le Roy Richard fut occis, ledit Henry fut & demoura Roy pacifique dudit Royaume d'Angleterre, moyennant l'ayde du prenommé Charles: en quoy appert bien notamment l'ingratitude des Anglois: pour ceſt affaire ledit maistre Robert Gaguin, fut en pluſieurs ambaffades audit paÿs d'Angleterre, avecques le ſeigneur François de Luxembourg & Charles de Marigny par deuers iceluy Henry. Mais apres toutes choſes premieſes, les François avecques ledit Roy Charles en perſonne, feirent victorieux & vaillans faits d'armes au predict paÿs de Bretagne: entre leſquels dignes de memoire, fut la iournée de ſainct Aulbin eſtant lors le Roy à Laual: à laquelle iournée iceux François, furent ſi victorieuſement belliqueux & plains de proüeſſe, qu'ils gagnerent le champ de la bataille: & en ce lieu fut ſi grande deſconfiture & occiſion de Bretons & Anglois, leſquels eſtoient venus à leurs ſecours, ainſi que dit eſt, qu'on ne trouuoit ſinon gens morts par l'eſpace de plus de deux lieües de chemin: & avecques ce y auoit au champ de ladicte bataille vn moult grand nombre de Bretons occis. Et au pres d'iceluy champ, y auoit vn bois plain de pouldre d'artillerie: dedans lequel, parauant la deſconfiture, cuidans leſdits Bretons que les François y deuſſent faire leur embuche, ce qu'il ne fut pas fait par le diuin ayde de Dieu, vray protecteur du ſang de France: mais nonobſtant iceux Bretons eſtimans ainſi eſtre, ieçterent leur artillerie dedans ledit bois, où ils auoient mis ladicte pouldre, lequel fut incontinent comme tout bruſlé: de laquelle choſe leſdits François furent moult eſbahis: & d'iceluy bois iſſit ſoubdainement vn cerf, lequel

print & adressa sa course iusques au lieu, où estoient les François: & fut dit adoncques, qu'il sembloit que ledit cerf vint vers eux à refuge, comme ayant les larmes aux yeux. Et aussi il est à noter, que deuant ladicte iournée de saint Aulbin au lieu dit à la croix de Malere, assez pres où fut faicte ladicte rencontre, vindrent s'assembler vne grande multitude d'oiseaux: c'est à sçauoir de geais & de pies, lesquels oiseaux se battirent longuement ensemble, en telle maniere que l'une des parties fut surmontée & vaincue de l'autre: dont demourerent morts audit lieu enuiron deux lieües de longueur, qui fut chose moult merueilleuse. Et en ladicte iournée de saint Aulbin, furent prins plusieurs prisonniers, & les autres chassés en fuite, lesquels se retirerent en aucunes fortes places dudit païs, pourquoy ils eurent leurs vies sauues. Et ainsi les François marcherent tousiours vigoreusement, ayant audacieuse force en telle maniere qu'ils gaignerent, & subiuguerent la plus grand part de Bretagne. Et adoncques les seigneurs de Bretagne, & autres plusieurs moult cognoissans ladicte grande puissance des François, & de tout le Royaume, se meirent diligemment en peine pour trouuer moyen de faire aucun bon appointement & traicté de paix auecques ledit Charles en la maniere qui s'en suit. C'est à sçauoir qu'iceluy bon Roy Charles huictiesme, considerant le courage & vouloir dudit Maximilian Roy des Rommains, & qui luy sembloit non auoir pour agreable le traicté de mariage, qui auoit esté faict de luy auec sa fille dame Marguerite de Flandres, au moyen des picques & guerres qu'il auoit tousiours contre luy, ainsi que dit est, il se disposa par bon courage & noble vouloir de faire paix ausdits Bretons: & en ce faisant print à femme & espouse, ma dame Anne de Bretagne, adoncques fille vnique & seule heritiere dudit feu Duc François de Bretagne: & par le moyen d'iceluy traicté de mariage, ladicte Duché & païs de Bretagne, fut adoncques paisiblement vnüe & accordée audit Royaume de France: & fut fait lors vne bonne paix & alliance entre tous les seigneurs d'une part & d'autre, dont plusieurs furent tresioyeux: car l'alliance estoit vtile pour le Royaume & pour le peuple.

Comment le Roy Charles rendit liberallement la Comté de Roussillon au Roy Ferdinand d'Arragon: & de l'institution de l'ordre des filles Repenties à Paris: de la prinse de S.Omer par le seigneur des Querdes. Et comment il traicta la paix auecques le Roy d'Angleterre apres le siege de Boulongne: de la trahison faicte à Carqueleuant en la ville d'Arras: de la bonne garde de la ville d'Amiens: Et du traicté fait entre le Roy de France & le seigneur Archeduc d'Autriche.



Pres l'expedition du païs & Duché de Bretagne, & le traicté fait ainsi que dit est. Le Roy Charles demonstrent tousiours son noble & loyal courage, fait rendre liberallement & par bonne amour la Comté de Roussillon au Roy Ferdinand d'Arragon: & si luy donna franchement & quittement tous les deniers dont il estoit tenu & obligé: & lesquels luy auoient esté presté sur ladicte Comté, pour laquelle chose parfaire, fut enuoyé pour ambassade le seigneur Loys d'Amboise Euesque d'Alby: Com bien toutesfois que plusieurs n'estoient pas d'opinion, de faire la reduction de ceste Comté de Roussillon en ceste maniere: au moyē dequoy & pour tout apaisement

païement du murmure, qui en pouoit estre: ledit Roy Charles fait vulgairement dire & manifester, que son pere le feu Roys Loys luy auoit ainsi ordonné & chargé de faire par son testament auât qu'il fut mort: parquoy il auoit ainsi faite: & pour ceste cause fut adōcques aduis à plusieurs, qu'une perpetuelle amitié auroit esté faite & souldée entre lesdits Roy de France, & le Roy d'Arragō.

L'AN de nostre salut mille quatre cēs nonante quatre, fut institué l'orde des femmes & filles repenties, qui auoient esté publiquement pechereſſes à Paris: lequel ordre en l'honneur de la benoiſte Marie Magdaleine, fut commencé par la deuote predication de religieuſe perſonne frere Iean Tifferant, de l'ordre des freres Mineurs: & pour ce faire leur fut cōtribué la maiſon d'Orleans, en laquelle est à preſent ordonnée leur religion, où ſont pluſieurs deuotes femmes. Et en apres la reddition dudit Comté de Rouſſillon, meſſire Philippe de Creuecueur ſeigneur des Querdes, fait & ſe porta ſi vaillamment au païs de Picardie pour le Roy de France, que par force d'armes & puissance luy & ceux de ſa compagnie, prindrent & gaignerent la ville de S. Omer. Dedans laquelle entra moult hardiment ledit ſeigneur des Querdes malgré ſes ennemis, & paſſa moult vaillamment par deſſus les murs la hache d'armes au poing, avecques vn grand nōbre de vaillans gens d'armes François, apres luy criant à haulte voix en ladicte ville, *viue le Roy*: de laquelle prouēſſe les manans & habitans d'icelle ville & gēs de guerre qu'ils eſtoient dedans, furent bien eſbahis & eſmerueillez, deſquels il fait à ſon plaïſir en recourant ladicte ville. Conſequēment apres aucuns iours, ledit Roy Henry d'Angleterre ingrāt du grand bien & ayde, qu'il auoit liberallement receu du Roy de France, ainſi qu'il eſt dit au precedent chapitre, deſcendit iuſques à Calais & en Picardie, avecques vne grande compagnie de gens d'armes: tellement qu'il meit le ſiege deuant Boulongne ſur mer, où il cuida monſtrer aucuns grans efforts: & pour ceste cause ledit ſeigneur des Querdes gouuerneur du païs d'Arthois, delaiſſant en la ville dudit S. Omer & autres places bonnes garniſons de gens d'armes, avecques le Baſtard Cardon capitaine d'Arras & autres François en grand nombre, allerent diligemmēt iuſques à ladicte ville de Boulōgne, pour reſiſter audit Roy d'Angleterre, & leuer ſon ſiege: & demoura ſeulement adōcques Carqueleuāt vn Breton au chaſteau d'Arras, parquoy aucuns traïſtres liurerent ladicte ville d'Arras entre les mains de l'Archeduc, ainſi qu'il ſera dict apres, & plus amplemēt declairé. Et ainſi cōme ledit ſeigneur des Querdes fut paruenu iuſques audit lieu de Boulongne, avecques luy le Baſtard Cardon, apres aucune reſiſtēce fait audit Roy Henry d'Angleterre: ils trouuerent façon & maniere de traïcter la paix, pour & au nom du Roy de France avecques iceluy d'Angleterre, qui fut vn moult grand bien & proffit pour tout le Royaume: car le traïcté de paix fut ainſi fait, & accordé par telle maniere, q̄ le deſſusdit Henry d'Angleterre & tous ſes gens d'armes, retournerent en leurs païs ſans plus faire aucune querelle. Dont ſur ce paſſage dit maiſtre Robert Gaguin dedās ſa chronique, que ceste paix fut bien agreable audit Roy Henry d'Angleterre: Et ſe retira ſans faire aucune offence ne dōmage aux deſſusdits François: car il les aimoit de courage, mais il auoit eſté contrainct & preſſé des Anglois, pour venir iuſques audit lieu de Boulongne, plus qu'il n'auoit eſté fait par ſon industrie & monitiō. Et ainſi il eſtoit venu pour leur obtē-

perer, affin qu'il fut suspicionné d'iceux Anglois, de monstrier trop grande faueur & signe de beniuolence audit Roy François: car il auoit amour à luy pour le bien & ayde qu'il luy auoit fait, ainsi comme il est dit: dont fut en brief traicté la Paix. Et incontinent deux ou trois iours apres ceste paix ainsi accordée: la ville d'Arras par la negligēce & paresse dudit Breton Carqueleuant, fut prise & saisie de nuict par les gensdarmes de l'exercite dudit Maximilian: lesquels entrerent dedans la cité sans trouuer aucune deffense, ne personne pour resister: car ledit capitaine Carqueleuant à l'appetit de quelques trahistres, auoit donné en garde les clefs des portes de ladicte ville d'Arras à aucū de ses gens: parquoy il fut trahy par sa lascheté & par faulte de bonne garde. Dont la puissance des ennemis le vint tout à coup surprendre, estant couché dedans son liēt. Et adonques estoient pour l'armée & compagnie dudit Maximilian plusieurs Allemās & Germaniens, qui estoient lors entrez en ladicte ville: lesquels auoient estez long temps sans receuoir aucuns gaiges d'iceluy Maximilian. Au moyen de quoy, il ne cesserent pas de faire plusieurs rapines & pilleries en ladicte ville: mais apres qu'ils eurent pillez & despouillez plusieurs bourgeois, marchans & autres manans & habitans de ladicte cité d'Arras: ils commencerent à rober & piller les Eglises. Et brief feirent telles insolences & exactions, comme descript ledit Gaguin, qu'il ne sembloit pas que ledit Maximilian ne ses gens, fussent venus pour recouurer icelle ville: mais plus tost sembloit qu'ils fussent venus pour la mettre totalement à extreme destruction. Et apres aucuns mois passez, iceluy Maximilian feit abbatre & desoler vne grande tour au marché d'Arras, avecques plusieurs autres fortifications & propugnatoires, que le feu Roy Loys xj. auoit fait faire & edifier dedans la cité, & pour deffendre à l'encontre de la ville dudit Arras: mais à l'opposite ledit Maximilian feit adonques rompre les murs de la cité & fortifier ladicte ville contre icelle cité. Au moyen de quoy plusieurs citoyens furent aucunement resiouis, nonobstāt leurs destruction, voyās la perturbation & dommage desdits François: le nom desquels ils ont tousiours euz en haine, combien que de toute antiquité ils ont tousiours esté de droit & loy, sous la maiesté & iurisdiction des Roys de France, ausquels ils sont & appartiennent. Et quelque peu de temps apres icelles choses, fut fait & trouué moyen, ou à tout le moins feinct & simulé, d'estre fait aucune concorde & traicté d'accord entre le Roy & ledit Maximilian, pour paruenir à quelque autre effect. Et semblablement vn peu de temps apres euolu, aucuns gensdarmes de la garnison dudit Arras, vindrent vne fois enuiron la minuiēt deuant la ville de Amiens, pour la cuider prendre d'assault, comme gens venus à l'emblee: mais la garnison desdits François & les manans & habitans d'icelle ville, qui veilloient à faire bon guet, les seruient si bien de traict & d'artillerie en les reboutant vaillamment, qu'ils se partirent soudainement des faulxbourgs de saint Pierre, dudit Amiens, où ils estoient: & s'en retournerent bien diligemment en ladicte ville d'Arras, de laquelle ils estoient venus. Et qui eust adonc laissé faire le seigneur de Rubempré, il fut lors failly avecques aucuns de ses gēs de guerre, & les manans & habitans de ladicte ville: car il auoit vn mout grand desir de deffaire iceux ennemis: mais messire Anthoine Clabault cheualier, & pour lors Maire de ladicte ville avecques le conseil, ne voulut pas qu'il issit dehors: disant

pour

pour bonne opinion, qu'il souffisoit assez de bien garder & deffendre icelle ville d'Amiens, à l'encontre de leurs ennemis. Et adonques les seigneurs de France feirent & traicterent par deuers le Roy, avecques l'aide des nobles seigneurs de Picardie d'autre part, qu'on feit appoinctement & bonne paix entre le Roy de France & l'Archeduc: auquel fut rendue la Comté d'Artois: & à ceste cause fut toute la Picardie en bonne vnion avecques lesdits François, & sont encores de present, qui est vn moult grand bien pour ce Royaume.

Comment apres que le Roy Charles eut espousé Madame Anne de Bretaigne, elle fut couronnée Royne de France en l'Eglise de monseigneur S. Denys. Et feit son entrée à Paris: Puis sera dit de leurs enfans: & comment le Roy alla visiter son pais de Picardie: D'un prestre executé & bruslé à Paris: de la mort du Pape Innocent. viij. de son successeur le Pape Alexandre. vj.

POur retourner à descrire en brief du mariage du Roy Charles apres les choses dessusdictes: il est assçauoir que peu de temps apres, que le dessusdit Roy Charles eut espousé & prins à femme Madame Anne de Bretaigne: pour demonstrier la bonne amour & dilection qu'il auoit avecques icelle dame, il voulut qu'elle fut noblement couronnée comme Royne & dame de France. Pour lequel mystere parfaire, fut dicté & celebrée vne messe solennelle en l'Eglise de monseigneur S. Denys en France, par vn tresreuerend Cardinal accompagné de l'Archeuesque de Sens & autres Euesques: à laquelle fut & assista la dessusdicté tresnoble dame, accompagnée de plusieurs grans Princes, seigneurs & notables personnes, & aussi de plusieurs nobles dames & damoiselles, & autres plusieurs personnages. Apres la celebration de ladicte Messe, fut ladicte Royne par solennel mystere dicté & couronnée Royne de France en moult grand triumphe & honneur. Et puis fut illec fait vn dîner tresplantureux & abandonné à pleine court ouuerte. Et apres qu'elle eut vn peu seiourné en ladicte ville de S. Denys, elle se disposa de venir faire son entrée en la ville de Paris capitale de France: là où icelle fut receuë moult honorablement & en tresgrand honneur. Et vint au deuant d'elle hors ladicte ville de Paris, tout le clergé en moult belle procession, avecques riches chappes de drap d'or & saints reliquaires. Et pareillement luy vindrent au deuant l'Euesque de Paris, Preuost des marchans & les Escheuins, avecques les autres officiers de ladicte ville: lesquels luy feirent tous moult humble reuerence & honneur. Et puis icelle Royne entra dedans ladicte ville moult triumpamment, où toutes les ruës d'icelle estoient moult richement tendues & parées de tapisseries, avecques plusieurs beaux mysteres & feux de joye: lesquels feux estoient faits pour l'honneur d'icelle Royne à sa bien venue, & ioyeuse reception dedans ladicte ville. Et ainsi fut moult honorablement conduite, & menée iusques en l'Eglise catedralle de nostre Dame audit Paris. Et illec en la rue neufue nostre Dame, estoit attendant le Recteur de l'vniuersité accōpagné de plusieurs docteurs & autres, pour luy faire la reuerence ainsi qu'il est accoustumé: puis elle alla faire son oraison en ladicte Eglise. Et apres fut tousiours ainsi conduite iusques en son logis au Palais Royal: lequel estoit tresnoblement & sumptueusement appareillé, pour la receuoir ainsi que bien appartenoit. Et durant le temps

qu'icelle noble Royne de France fut & seiourna adonc à Paris, furent faits plusieurs ioyeux esbatemens par notables & vaillans seigneurs, comme ioustes & tournoyemens, tout à son honneur & louange: le Roy Charles vesquit amoureusement avec elle, & par bonne dilection: ils eurent estans ensemble en mariage selon le cours & par traict de temps trois beaux enfant masles: lesquels vesquirent aucun temps, mais apres successiement deuant & depuis le voyage de Naples, furent morts & trespassez en leurs ieunes enfances, selon diuine disposition, Dieu leurs doint grace de prier pour nous. Toutes ces choses doncques deduictes & considerées: apres le traicté qui fut fait avec l'Archeduc, ainsi que dit est au precedent chapitre: le Roy Charles se disposa d'aller en Picardie, pour veoir son païs: auquel il feit plusieurs pelerinages accompagné d'aucuns Princes de son sang, nobles, seigneurs & vaillans capitaines avecques plusieurs ses subiects. Et consequamment il feit son entrée en plusieurs bonnes villes dudit païs de Picardie, esquelles il fut moult honnorablement receu, & luy fut fait tresgrand honneur & moult bonne chiere: car tout le peuple auoit tresgrand desir, & affection de le veoir. Et entre les autres entrées de villes qui luy furent faictes chacun à qui mieux mieux: fut dit & maintenu que l'entrée laquelle luy auoit esté faicte dedans la ville d'Amiës, estoit la plus belle & la plus sumptueuse. Les seigneurs & le commun peuple dudit païs de Picardie, furent tresioyeux & moult bien contens, de ce que ledit Roy les estoit allé visiter. Et furent des lors beaucoup plus ardans en son amour, qu'ils n'auoient esté parauant: car il estoit vn bening Prince & tresaggreable à chacun. Et enuiron ce temps le lendemain d'une feste Dieu, fut vn grand scandalle à Paris: car vn prebstre nommé maistre Iean l'Anglois, estant cedit iour dedans la grande Eglise cathedrale nostre Dame dudit Paris, en la chapelle de S. Crespin & S. Crespinien, de courage mal meu & tempté du Diable, vint & approcha le prebstre qui disoit la Messe en ceste chappelle: & apres la cōsecration iceluy mauuais prebstre, print furieusement la sacrée Hostie du precieux corps de nostre sauueur & redempteur Iesus Christ: laquelle il osta furieusement de la main dudit Prebstre, lequel auoit consacré: & icelle Hostie ietta en terre par contemnement, cuidant mettre le pied dessus. Et pour ceste cause il fut incontinent prins & mené en prison: là où il fut gardé aucune espace de temps pour l'interroguer. Ce qui fut fait: mais il perseuera tousiours en sa mauuaise iniquité, & ne voulut laisser son erreur: pourquoy il fut publiquement degradé deuant la dessusdicte Eglise de nostre Dame de Paris: Et puis apres, il fut mis & delaislé entre les mains de maistre Pierre de la Porte pour lors Lieutenant criminel du preuost dudit Paris: lequel de la Porte condamna iceluy malfaieteur à estre villainement trainé dessus vne cloye: puis auoir la langue couppée, & finablement estre bruslé en vn feu, & son corps consumé en cendre dedans le Marché aux porceaux: ce qui fut fait & executé. Ces iours enuiron trespassa le saint Pere Innocent viij. de ce nom à Rome: lequel en dignité Papalle auoit bien & pacifiquement regy & gouuerné l'Eglise par assez bonne espace de temps. Il fut plein de misericorde: car il deliura & absolut les Veniciens de interdit ecclesiastique, & de la censure laquelle auoit esté fulminée en iceux Veniciens dessusdits, par son predecesseur ledit Pape Sixte quatriesme de ce nom. Et consequamment apres ledit Pape Innocēt huictiesme

huitiesme de ce nom, fut fait & créé le Pape Alexandre vj. lequel estoit de la nation du païs d'Espaigne, homme robuste & magnanime, qui par auant auoit esté Vischancellier dudit Pape Innocent. viij. Iceluy Alexandre fut de grande entreprinse, & qui appetoit vengeance de ses ennemis. Et au temps du regne de ce present Pape, furent par le bon Roy Charles viij. faictes grandes & victorieuses entreprinsees és Italies & en Lombardie, comme il sera dit cy apres.

De l'entreprinse du voyage du Roy Charles pour aller recouurer son Royaume de Naples : & comment il fut meu à ce.

A Pres que le treschrestien & victorieux Roy Charles viij. de ce nom, eut vaillammēt & par bonne prudence conquis & subiugué ses prochains ennemis és limites, lieux adiacens & circonuoisins de son Royaume de France : auquel il eut peu adonc viure & demourer en tresbon repos pacifique. Toutesfois comme magnanime & homme vertueux, plain de prouesse & toute vaillance : Il entreprint & delibera d'aller recouurer son Royaume de Naples & Cecille, qui droictement & à iuste tiltre luy appartenoit. Et combien qu'il fut petit de corps, toutesfois il auoit vne precellente magnitude de noble courage : car depuis qu'il eut deliberé de faire ceste grande entreprinse, homme ne l'en peut iamais desmouuoir de la sentence qu'il auoit en luy decretée, pour icelle parfaire & mener à chief. Et aussi comme dit maistre Robert Guaguin dedans sa chronique : Il ne voulut onques ouir les orateurs & ambassadeurs qui pour ceste cause luy furent enuoyez des Parisiens, pour le retirer & desmouuoir d'iceluy voyage. Mais en toute diligence feit assembler vn moult grand ost, & exercite de vaillans gens d'armes à pied & à cheual, & aussi par terre & par mer, & ordonna bons capitaines pour les bien conduire & mener. Et de ce faire fut aussi ledit Roy tresgrandement exhorté par le Pape Alexandre de Romme sixiesme de ce nom, & par le seigneur Ludouic Sforzia : lesquels pour lors auoient en haine & maltalent Alphonse Neapolitain : lequel aussi adonques vsurpoit & tenoit à faux tiltre ledit Royaume de Naples : & si faisoit plusieurs grans griefs à tous les nobles du païs. Pourquoy lesdits Pape Alexandre & de Sforzia, appellerent iceluy Roy Charles pour venir ainsi és Italies : lequel Roy pour mieux assembler gensdarmes & faire son emprinse, se retira en sa bonne ville & cité de Lyon, approchant tousiours son voyage.

Comment vn nommé frere Hierosme de Ferrare, prescha l'aduenement du Roy des Francois au païs d'Italie. Et comment le Roy estant à Lyon ordonna prudemment de tous ses païs du Royaume de France. Et puis comment il partit dudit Lyon, & alla à Grenoble, là où au departir il print congé de la noble Royne sa femme.

A V A N T que le Roy Charles huitiesme fait gueres semblant de marcher és parties des Itales. En l'an mille quatre cens quatre vingts & treize, vn deuot religieux dit & appelé frere Hierosme de Ferrare, dit & prescha publiquement l'aduenement dudit Roy Charles & des Francois en plusieurs villes en Italie : & tellement que les Florentins l'estimoient estre vn bon Prophete. Et ainsi donques comme le Roy Charles estoit

à Lyon, delibéré de faire le voyage par luy entrepris esdictes Itales, pour recouurer son Royaume de Naples & Cecille: il enuoya deuant pour passer les monts monseigneur le Duc d'Orleans, avecques plusieurs grans seigneurs de ce Royaume de France, & autres accompagnez de plusieurs gens d'armes tant de ses ordonnances qu'autrement: lesquels furent ainsi enuoyez par terre, pour eux tirer chacun selon sa charge & commission deuers Milan, Gennes, Venise, Florence, Luques, Pise, Viterbe, Romme & autres plusieurs lieux de Lombardie & des Itales, pour les affaires de ceste entreprinse. Et affin qu'en toutes icelles villes & autres places, ils voulsissent tenir la promesse qu'ils auoient faicte au Roy de France, pour recouurer sondit Royaume: pour lequel affaire, ils furent chacun endroit soy moult honnorablement receuz esdictes villes & pays: & leur fut fait vn moult bon recueil. Et puis ledit Duc d'Orleans retourna en sa Comté d'Ast. Et aussi feirent moult bon exploict, & aduantageux tous les autres chacun en sa legation. Et leur fut encores de rechief promis & asseuré ce qu'ils demandoient. Et en ce temps le seigneur des Querdes, qui vulgairement estoit dit monseigneur des Cordes, cheut en vne griefue maladie luy estant à Lyon, disposé de passer les monts avec le Roy: pourquoy luy fut conseillé par les medecins de retourner en Picardie, dont il estoit natif, & que l'air luy pourroit ayder. Et adóc ledit Seigneur print cōgé du Roy & des autres nobles Princes & seigneurs de France: & se partit dudit Lyon & alla iusques à la Bresle, qui est à trois lieües de ladicte ville & illec trespassa en ce lieu: son corps fut mis en vn cercueil de plomb & porté à nostre Dame de Boulongue sur mer, où il est sepulturé comme il auoit dit. Et par le commandement du Roy, fut fait grand honneur & procession audit corps par les villes, où il passa. Estant encores adóc le Roy Charles à Lyon par bon conseil & meure deliberation, furent aussi de par luy commis & ordonnez plusieurs grans seigneurs & prudés personages, pour la garde & tuitiō du noble Royaume de France & y proueoir en tous affaires, ainsi que besoing seroit. Et premierement fut commis seul Regent & principal chief dudit Royaume monseigneur Pierre Duc de Bourbon: lequel auoit espousé la sœur du Roy ma dame Anne de France, le seigneur de Bauldricourt fut mis gouverneur de Bourgongne, les seigneurs d'Auaugourt & de Rohen gouverneurs de Bretagne, le seigneur d'Orual gouverneur en Champagne, le seigneur de Grauille fut ordonné és pays de Caux, Normãdie & toute Picardie, & le seigneur d'Angoulesme gouverneur en Angoulemois & en tout le pays de Guienne. Tous lesquels ainsi ordonnez prindrent humble congé du Roy, & allerent vn chacun d'eux pour fournir à leursdictes charges. Et apres toutes ces choses ainsi disposées par bonne ordre, le Roy Charles demoura encores quelques iours à Lyon pour les delices & plaisirs d'icelle ville, ou aussi pour la bonne grace d'aucunes dames Lyonnoises: mais il suruint vne pestilence, au moyen de laquelle iceluy Roy se partit de ladicte ville de Lyon, accompagné de ma dame la Roïne sa femme, & autres plusieurs avecques eux, & vindrent iusques à Vienne qui est à cinq lieües de Lyon. Consequemment apres se departirent de la bonne ville & cité de Vienne le Roy & la Roïne, avecques leurs gens. Et en passant à Ville Neufue à la coste S. Andrieu & à Rine, où ils furent tousiours bien receuz parvindrent iusques à Grenoble. Le samedy

xxiiij. iour d'Aoust en l'an mille quatre cens quatre vingts & xiiij. le prénommé Roy Charles accompagné de la Royne sa femme & plusieurs autres Princes, seigneurs, avecques dames & damoiselles, fait son entrée dedans la ville & cité de Grenoble : laquelle fut tressumptueuse & magnifique, tant de la partie des gens d'Eglise : lesquels vindrent au devant de luy & de ladicte Royne en notable procession, garnis de plusieurs reliquaires & honnestement reuestus de moult riches chappes : comme de la partie des seigneurs de la Court du Parlement dudit Grenoble, & autres plusieurs officiers, avecques les nobles bourgeois manans & habitans de ladicte ville : lesquels estoient tous honnestement vestus & habitez selon leurs estats. C'est à sçauoir les vns vestus de belles liurées, & les autres de certaines deuises chacun à son plaisir. Et en ceste maniere, vindrent au devant dudit Roy & sa compagnie. Et là par ceux à ce deputez comme bourgeois & escheuins, luy furent présentées les clefs de ladicte ville, en luy proposant & disant louenges par gens qui le sceurent bien faire, en signe d'honneur & obeissance. Puis fut mis & porté vn moult riche ciel dessus luy, & vn autre dessus la Royne. Et ainsi accompagnez de leurs gens & vn moult grand nombre, furent conduits dedans la ville : laquelle estoit treshonnestement tendue & parée de tapisseries & autres riches paremens. Et en icelle ville estoient pareillement faits & demonstrez plusieurs histoires, & beaux mysteres designans l'excellent honneur & louenge du Roy & de la Royne, autant que possible : car il n'y auoit riens obmis. Et ainsi fut conduict en ladicte ville & iusques en la grand Eglise dudit Grenoble, là où il fit son oraison : & puis fut mené en son logis, là où se tient le Parlement du Dauphiné, vn beau logis & spacieux. Le Roy & la Royne demourerent six iours entiers dedans icelle ville, là où par les seigneurs presidens dudit Parlement & de son grand conseil, furent considerer plusieurs choses pour l'appareil & armée dudit Roy, affin de facilement & en grande seureté, passer les haults mons de Sauoye. Et mesmement fut aduisé que pour tenir la voye opportune, seroient renuoyez les chariots & charrettes qui iusques en cedit lieu de Grenoble auoient esté ordonnez, pour apporter le bagage du Roy & autres choses necessaires à ladicte armée. Et en lieu de ce, furent ordonnez grand nombre de mulets pour icelles choses porter à grosses charges, ainsi qu'au païs de Sauoye ont accoustumé : car autrement n'eussent peu promptement passer. Et aussi furent ordonnez gens prudens & sages, pour prendre & limiter les logis du Roy & de son armée, selon qu'à vn chacun pouoit appartenir en vn tel affaire : duquel fut principalement donné la charge à vn nommé Pierre de Valetault : lequel fut bien propre à ce faire, pource qu'il cognoissoit les lieux & les païs de tout ce voyage : Et consequamment par le Roy, lesdits seigneurs & gens de conseil, furent ordonnez saiges personages, pour aller ça & là en plusieurs villes & lieux dudit païs, faire apporter viures & choses necessaires à ladicte armée : lesquels viures & autres choses estoient d'vn chacun payez & soluz à honneste taux, & sans faire aucunes pilleries. Et pour ceste cause & y donner prouision, les ordonnez à ce eurent tiltres de Mareschaux, maistres d'hostels- & -preuosts, qui bien en feirent leurs devoirs. Et pour tousiours entretenir les seigneurs citoyens, manans & habitans des villes & citez de Lombardie & Italie, affin qu'ils fournissent leurs cōpromis au Roy

(pource que leur fidelité est aucunesfois bien petite) furent enuoyez ceux qui s'ensuiuent. Premièrement fut enuoyé vn maistre d'hostel nommé Iean de Cardonne à Florence, le seigneur Charles Brillart à Genes, Gaulcher de Tinteuille à Senes, la Ville Rigault d'Oreilles à Millan, Adrian de l'Isle à Pise, & le seigneur de Louan à Luques & autres iusques à Viterbe. Et auecques vn chacun d'iceux furent transmis gens de longues robes, eloquens & scientifiques orateurs, pour en cest affaire proposer harengues, quand mestier seroit. Item & pour ce mesme affaire, furent enuoyez deuers les Princes & regens desdits pays de Lombardie & Italie, les seigneurs qu'icy s'ensuiuent. Premièrement fut enuoyé le seigneur de la Trimouille au Roy des Romains, Loys Lucas au seigneur Ludouic à Milan, le seigneur du boschage aux Venitiés, le seigneur d'Aulbigny & ses gens à Romme : auecques aussi monseigneur d'Aultun, le President Guesnay & General de Bidant ambassadeurs deuers le Pape. Et autre part fut enuoyé le seigneur d'Argenton accompagné de Monstreau. Et pour conduire l'ost & l'armée du Roy en iceluy voyage delà les mons, furent les Princes du sang Royal & autres seigneurs qui s'ensuiuent : monseigneur le Duc d'Orleans, le seigneur de Montpencier, le seigneur de Foués, le seigneur de Luxembourg, le seigneur de Vendosme, le seigneur Angillebert de Cleues, le seigneur Iean Iaques, le Prince de Salerne, le seigneur de Miolens & le seigneur de Pienne : les Marquis de Saluses, de Vienne & de Rothelin : les mareschaux de Gie & de Rieux, & auecques les Seneschaux de Beaucaire & de Normandie, tous & chacun d'eux accompagné de plusieurs notables capitaines, cheualiers, barons, gentils hommes, escuyers, & autres plusieurs dextres & loyaux gensdarmes. Et pour les mignons de la compagnie du Roy, furent ordonnez les seigneurs Bourdillon, Chastillon, la Palice, George Edouille, auecques aucuns familiers : comme Paris, Gabriel, d'Yjon, & autres plusieurs domestiques. Et en ceste noble compagnie estoient encores pour maistres d'hostels de chez le Roy & autres sans les dessus nommez, qui ja auoient esté enuoyez deuant pour les affaires sollicitier & entretenir Guyot Loufiers, qui eut la charge de conduire l'artillerie : & aussi le seigneur Chaudoyt, lequel eut commission pour aller auecques la descharge de la grande nef de France, le Baillif de Vitry, Jehannot du Tertre, Perot de Baché, le seigneur de Ville Neufue, René Parent, le Baillif S. Pierre du Monstier, Jean Chasteau Dreux, Herné du Chesnoy, Iean de Lasnay, le seigneur du Fau, Adam de l'Isle, Girault & Charles de Sufaine, le seigneur de la Brosse, honoré seigneur du Chef & autres principaux officiers ordinaires : comme panetiers, eschançons, varlets de chambre, huissiers de salle & autres plusieurs, ainsi comme bien appartenoit à l'estat dudit Roy & en cest affaire. Et apres qu'iceluy Roy Charles eut seiourné l'espace de six iours dedās ladicte ville de Grenoble pour ordonner de tous ses affaires, il se partit d'icelle ville moult honorablement auecques sa noblesse, prenant congé de Madame la Roynie & de ses gens, lesquels retournerent en France.

Comment le Roy partit de Grenoble pour passer delà les mons & aller à Naples.

Le vendredy



Le vendredy vingtneufiesme iour du mois d'Aoust en l'an que dessus: le Roy apres auoir oüy la messe se partit de la ville & cité de Grenoble, en prenant congé de la noble Royne sa femme & de ses gens, ainsi q̄ dit est: & alla luy & demie sa cōpagnie disner en vn lieu dit la Meure, qui est vn petit bourg dependant d'aucune baronnie appartenant au seigneur de Dunois. Et de là vint à soupper & au giste à Escoy vne petite ville, & là fut aussi honnorablement receu de tous les nobles bourgeois & habitans de ladicte ville. Et le lendemain samedi penultime d'Aoust il vint disner à saint Bonnet, & puis alla au giste en vne petite cité nommée Gap en Dauphiné. Et le iour ensuiuant ledit Roy alla disner aux Forges, & au soupper à nostre Dame d'Abrun, là où luy & sa cōpagnie furent pareillement honnestement receuz de tous les estats d'icelle cité, & fut logé en la maison de l'Euesque: lequel pour iceluy Roy estoit adoncques allé en ambassade par deuers le Pape. Le lundy matin premier iour de Septembre apres oüir la messe deuant nostre Dame, il s'en alla coucher à saint Crespin: & puis au giste à Briançon, là où il fut treshonorablement receu de l'Eglise, noblesse & labour: & puis il fut par excellence mené loger hors la ville, en vne hostellerie la plus grande qu'on sache veoir. Et en ce lieu à luy & aux siens fut faicte moult plantureuse chere de diuerses sortes de viandes, & excellens vins. Et le deuxiesme iour dudit mois il alla disner à Suzane: & pour le soir à la preuosté d'Ourse, auquel lieu apres le repas du Roy fait, luy fut présenté vn grand homme Robuste, natif de la Poille: lequel interrogué fut accusé estre vn des principaux maistres de la Vau-Pute: & apres que le Roy l'eut oüy parler, il le remeit à la iustice chargé de son cas, l'information deuëment faicte par la iustice, fut ledit Robuste pendu & estranglé publicquement à vn gros arbre. Le lendemain le Roy alla disner à Chaulmoult, & incontinent apres il entra au païs de Sauoye, & alla choucher dedans Suse: & de ce lieu luy vint au deuât la dame de Sauoye moult richemēt accoustrée, & accompagnée de plusieurs notables personnes, grans seigneurs, barons, gentils-hommes, dames & damoiselles, qui tous luy firent grand honneur: & fut triumphamment receu & honnestement festoyé. Le iour suiuant apres, il partit dudit lieu de Suse, & alla disner à saint Iousset. Puis apres entra au païs de Piémont, & alla au giste à Villanne, là où il fut tousiours moult hōnorablemēt receu en vn chacun lieu. Et le lendemain qui estoit vendredy cinquiesme iour de Septēbre, ledit Roy delibera d'entrer moult triūphamment à Turin en la maniere qui s'ensuit.

De l'entrée du Roy en la ville de Turin au païs de Piémont. Et comment il y fut receu en moult grand honneur & solennité.



Le vendredy cinquiesme iour de Septembre, ainsi que le Roy Charles alloit en la ville de Turin, les gens d'Eglise d'icelle ville luy vindrent au deuant en moult notable procession, comme en tel cas est accoustumé: & aussi ne faillirent pas à faire grandement leur deuoir gens de noblesse, & de labour, manans & habitans de ladicte ville, & aussi l'vniuersité. Et pareillement luy vint au deuât la notable dame princesse de Piémont, biē sumptueusement accoustrée d'estat magnifique: car elle estoit habituée d'vn fin drap d'or

frizé, en habits & vesture de mode antique, bordez de gros saphirs, diamans, rubis & autres riches & precieuses pierres: elle auoit sur son chief vn grād tas d'afiquets subrunis de fin or, plains des charboucles, de balais & iacintes avec houpes dorées, gros fanons & bouquets d'orfauerie politement faits: elle portoit aussi en son col colliers à grans rocquets, garnis de grosses perles orientalles: bracclets de mesmes en ses bras & autres bien riches parures: & ainsi richemēt vestue estoit montée sur vne hacquenée, laquelle estoit conduicte par six laquets bien accoustrez de fin drap d'or broché, avec vne bande de damoiselles ordonnées en si bonne sorte, que brief n'y auoit que redire: elle estoit aussi accompagnée de plusieurs nobles cheualiers, seigneurs, barons, escuyers, & pages d'honneur. Et en ceste maniere entra le Roy dedans Turin, là où les rues estoient tendues de fins draps d'or, & de drap de soye & autres riches paremens: & parmy la ville estoient dressez grans eschauffaux remplis de mysteres & tant de la loy de nature que de la loy escripte, gestes poëtiques & histoires des vieil & nouveau testamens: & estoit ainsi continué depuis l'entrée des faulxbourgs de ladicte ville iusques au chasteau, auquel le Roy entra pour son logis en moult grande triumphes, sonnant toute melodieuse armonie de trôpettes & clars: & illec honnorablemēt recueilly de ladicte dame & du Duc aussi son beau fils, accompagné de son oncle le seigneur de Bresse & autres seigneurs & barons: lesquels tous avec ladicte dame se presenterent de faire tout secours & ayde au Roy & tant de leurs gens comme de leurs biens, luy monstrant grand signe d'amour: & n'est pas à obmettre que parmy ladicte ville furent ce iour faictes plusieurs repues franches, donnant plantureusement à manger & boire à tous passans & rapassans. Et le lendemain qui estoit samedi ladicte dame amena encores ledit son beau fils en la chambre du Roy, & illec disnerent ioyeusement avec luy en moult grande largesse de biens: & apres disner le Roy print congé de ladicte dame & de son dit fils & autres seigneurs, pour aller soupper & coucher à Quiers. Le samedi vj. iour de Septembre apres disner, le Roy Charles se partit de la ville de Turin, & marcha tant avec sa compagnie, qu'il approcha la ville de Quiers audit païs de Piémont: auquel lieu icelle dame auoit expressement mandé de bien receuoir ledit Roy, ainsi qu'il fut fait: & aussi furent faits plusieurs ioyeux esbatemens en ladicte ville de Quiers à l'honneur du Roy & des siens, qui furent tous moult bien receuz avecques le Triumphe des dames, & y sejournerent trois iours.

Comment le Roy se partit de Quiers pour venir en la ville d'Ast, où il eut certaines nouvelles des nobles faits de monseigneur le Duc d'Orleans au païs de Genes. Et cōment Ludouic de Milan & sa femme vindrent veoir le Roy audit Ast: & d'une merueille aduenue audit lieu de Genes.

LE mardy ix. iour de Septēbre le Roy partit de la ville de Quiers, remerciant honnorablement les seigneurs & dames d'icelle ville, du bon accueil qu'on luy auoit fait: & ce iour alla disner à Ville-noue, & puis il vint au soir soupper dedans la ville d'Ast, appartenant à monseigneur le Duc de Orleans, là où il fut moult ioyeusement receu de tous les estats, & non pas en moindres qualitez que les autres precedentes villes: mais feirent encores d'auantage

rage selon leur pouvoir, en la reception de luy & des siens. Et ainsi entra le Roy dedans la ville d'Ast, & fut premierement tresbien logé en l'hostel d'un nommé Jean Roger: & les autres seigneurs aussi tous logez en diuers logis. Et pour lors estoit ledit seigneur d'Orleans absent dudit Ast: car il naufrageoit sur la rive de la mer de Genes pour les affaires dudit Roy, & en assurant son voyage. Et le lendemain mercredy matin que le Roy fut arriué en ladicte ville, vint en diligence vn faulx poste, lequel (comme tout esperdu avec quelque escript fait à propos) rapporta nouvelles q̃ les François auoient tout perdu dessus mer: parquoy le Roy assembla diligemment son conseil avec les nobles seigneurs estans avec luy, pour incontinent donner & mettre prouision en tout cest affaire, & ce pendant se absentia ledit faulx poste. Et aussi il ne tarda gueres, que tantost apres vint vn certain poste: lequel dit & rapporta tresbonnes nouvelles, comment mondit seigneur d'Orleans, & les siens en naufrageant sur & enuiron le Rapail deuers le port de Genes, auoit deffait le Prince de Tarente & toute son armée, & si amenoit bien quarante prisonniers: & bref y auoit eu telle desconfiture & occision des ennemis de France, qu'il estoit impossible d'en sçauoir le nombre: car il n'eschappa d'eux sinon vn bien peu, lesquels prindrent diligemmēt la fuite par dessus les monts, l'un des nepueuz du Cardinal de Genes, & l'un des fils de messire Fregore, furent prins prisonniers: dont Frederic qui estoit chef de ceste rencontre, fut mort & expiré de paour. Et aussi y estoit vne partie des principaux de la fleur des Itales: & à ceste victorieuse conqueste estoient avec mondit seigneur d'Orleans, le seigneur de Piennes, Jean de la Grange, Charles de Brillac, lequel illec fut fait cheualier: Le Bailly de Dijon, le seigneur dit Guyot de Loufiers, avec plusieurs hommes d'armes, & autres vaillans gens de guerre. Et apres icelle victoire, ledit seigneur d'Orleans fut aucunemēt surprins d'une fieure ou autre maladie, en telle maniere qu'il luy conuint retourner en ladicte ville d'Ast, où estoit encores le Roy. Auquel lieu estoit venu de Milan Ludouic avec sa femme, laquelle estoit fille du Duc de Ferrare: & icelle auoit amenée en moult grand triumphe de habits & ioyaux d'or, & plusieurs riches pierreries, pour ainsi estre monstrée deuant ledit Roy: avec lequel ils se deuisoient aussi familieremēt comme paire de compagnons: mais iceluy trahistre Ludouic ne declairoit pas adonc l'iniquité de son maling & faux courage, comme il le demonstra depuis: & dont aussi finalement luy est mal prins & aduenue. Et apres que ledit Roy Charles eut seiourné aucuns iours en ladicte ville d'Ast, il fut aucunement mal disposé par deux ou trois iours: pourquoy il changea de logis, & fut logé aux Iacobins d'icelle ville, en aucune chambre propice dessus les iardins. Et là avec ledit seigneur d'Orleans & autres Princes & seigneurs & gens de conseil, ordonna & expedia de plusieurs affaires pour le bien & vtilité de son voyage & de tout le Royaume. Et ce pendant se retira ledit Ludouic par deuers Milan, & puis retourna assez tost apres: mais il faisoit tout fainctement & comme plain de trahison. Et durant ce temps estans encores plusieurs François à Genes, il aduint eux presens & plusieurs autres d'icelle ville, qu'un iour apres dîner pour passer temps, allerent pour eux esbatre trois ou quatre gentils compagnons, lesquels se baignerēt en la mer. Et en apres suruint encores vn autre, lequel se despouilla de ses habits pour soy baigner avec les dessusdits: & tantost sortit

du fons de l'eau vn gros poisson, lequel alla mordre ce dernier homme baigneur iusques au cler sang: dont luy se voyant ainsi blessé eschappa dudit poisson, en soy deffendant: mais quand le poisson eut succé de son sang, il retourna encores courir audit homme, & le mordit en plusieurs lieux: & tant fait sur luy par sa force, qu'il le traina dedans la mer, & iamaïs depuis ne fut veu, dont plusieurs furent esbahis en regardant ceste merueille. Et apres que le Roy eut demouré & seiourné en Ast depuis le neufiesme iour de Septembre iusques au sixiesme d'Octobre, il se departit d'icelle ville pour tousiours exploicter chemin en parfaissant sondit voyage. Le lundy sixiesme iour du mois d'Octobre apres que le Roy Charles eut ouï la messe en la ville d'Ast, ainsi qu'il auoit de coustume, il print aucune petite refection: Et puis se departit de ladicte ville, & alla disner à la Fariniere: & apres disner se partit & alla au giste à Mōçal, qui est la premiere place deuers Lombardie & vne tresbonne bourgade, qui estoit au feu Marquis de Mont-Ferrat, & où le Roy fut treshonorablement & moult bien receu: car là estoit adonc la noble dame de ce lieu veufue dudit Marquis, laquelle avec le seigneur son beau fils & son frere dit monsieur Constantin, le receut tresioyeusement & en grand honneur: & luy monstra toute la maniere & estat d'iceluy bourg & forteresse merueilleusement premuny, & affusté de toutes choses seruant à la guerre & en tresgrande quantité: Et si luy monstra les testes de trois hommes traistres qui vn peu deuant auoiēt suscité guerre & discord entre Ludouic de Milan, & son mary le feu Marquis. Et en ceste honorable reception ladicte dame feit vne bonne chere & plantureuse audit prenommé Roy, en luy offrant tous & chacun ses biens & sa possession à son bō & loyal seruice: en luy rememorant amiablement, comment son feu mary en son trespassement, auoit delaisié elle & ses enfans en sa bōne garde & protection: pourquoy ledit Roy les eut moult affectueusement recommandez enuers sa noble majesté. Et le lendemain matin se partit le Roy dudit Monçal, pour aller disner & soupper à Casal ville capitale dudit Marquis de Montferrat.

De l'entrée & reception du Roy en la ville de Casal: & comment la dame & son fils se meirent en sa sauuegarde & protection.

LE mardy vij. iour d'Octobre, le Roy partit dudit Monçal & alla disner & soupper à Casal, qui est la ville capitale du Marquis de Mōt-Ferrat: là où il fut loüablement receu & cōduit iusques au chasteau, où fut ordonné son logis: & à l'entrée d'iceluy chasteau estoit la noble dame veufue du feu Marquis richement accoustrée avec son fils le ieune Marquis, qui le saluerent humblement & en grande reuerence: & pource qu'ils ne sçauoient bonnement parler la langue Françoisse, le Comte de Foix & Loÿs Monseigneur feirent leur harengue: disant en substance pour tousiours entretenir ses premieres parolles, qu'ils soubsmettoiēt tous & chacū leurs biens terriens entierement à son obeissance, & sans riens excepter: & que pour totale resolution, ils mettoient leurs dicte ville de Casal, le chasteau & generallyment tous leurs autres lieux & places en sa sauuegarde & protection: ce que le Roy benignement print & accepta en sa garde, & puis il entra dedans ledit chasteau à son de cors, trompettes & clairōs: Et là fut festoyé le Roy aux despens de ladicte

cete dame si bien & plantureusement de bons vins diuers, ypocras & diuerses viandes, qu'il estoit impossible de mieux : & aussi le lendemain le Roy donna riches & nouveaux habillemens au ieune Marquis à la mode de France, demonstrent sa liberalité, & comment il le receuoit en sa garde & protection : & ainsi seiourna le Roy trois iours dedans ladicte ville. Et le vendredy au matin enuiron le soleil leuant, le Roy se partit dudit Cazal, & s'en alla disner à Conste : & puis souper & coucher à Morterre, là où il fut honorablement receu : puis fut mené loger au chasteau, qui estoit vn lieu treshonnestre : & en ce lieu fut moult bien festoyé. Le samedi vnziesme iour dudit mois d'Octobre il disna encores en ce lieu, & puis il s'en alla au giste dedans la ville de Vigeue, là où il fut aussi triumphamment receu, & en icelle ville fut en honneur solennel recueilly dudit Ludouic & sa femme, & aussi de plusieurs autres seigneurs du pays & des manans & habitans dudit lieu : & apres qu'on luy eut fait toute la reuerence, & proposé ce qu'on luy voulut dire, il fut conduit pour son logis iusques au chasteau, qui est vn beau lieu de plaissance : & ainsi fut luy & les siens traictablement entretenus. Le lundy treiziesme iour d'Octobre, le noble Roy alla aux Granges à demye lieu dudit Vigeue : ces Granges sont au seigneur de Milan, qui est vn tresplaisant & delectable lieu, & duquel sort vn bien innumerable : car c'est vn lieu pour nourritures, & pour garder bestes de toutes sortes & manieres : pourquoy ledit seigneur de Milan peut y receuoir moult grans droits. Et premier y a vne moult grande & spacieuse court : aupres de laquelle est vne grande estable, là où le lieu est gentement fait & ordonné à haults pilliers & grans soubassemens : là où d'un costé sont grans cheuaux & coursiers de pris, & d'autre part estoit le haras des iumens. Et pour ce temps en aucunes estables, y auoit bien dixhuiet cens grosses bestes à cornes : comme gras beufs, grosses vaches, & bouffles : & és bergeries de chambre en chambre, estoit bien le nombre de enuiron quatorze mille bestes à pied fourché : comme moutons, brebis & cheures : & brief estoit iceluy lieu de moult grande estime & valeur.

De l'entrée du Roy à Pauie: & comment il y fut receu.

A Pres que le Roy se fut departy du lieu dessusdit, & qu'il approchoit de la ville de Pauie : ceux du clergé luy vindrent au deuant en moult honorable procession. Et en ceste maniere fut conduit le Roy iusques en la grande Eglise appelée le Dome, puis de là il fut mené loger au chasteau vn tresbeau lieu & spacieux. Et illec l'attendoient la Duchesse & son petit fils, pour luy faire la reuerence en sa ioyeuse bien venue : il fut tousiours moult notablement & bien entretenu de tresbons vins & diuerses viandes, luy & sa noble compagnie, depuis le mardy quatorziesme iour dudit mois d'Octobre, iusques au vendredy xvij. iour apres ensuiuant : auquel iour de vendredy il se departit dudit lieu apres ouir la Messe, & alla disner à Beriofle, & apres disner vint souper, & au giste à Castel-sainct-Iean. Et le lendemain qui fut le samedi xviii. iour dudit mois, il fut au disner à Roqueste : & de là apres le midy, il se delibera faire son entrée dedans la ville de Plaissance.

LE iour d'un samedi xviii. iour d'Octobre apres disner, le Roy Charles approchant de la bonne ville de Plaisance, les gens d'Eglise luy furent au deuant en moult belle procession, comme auoient fait les autres villes: & semblablement vindrent les seigneurs de renom, manans & habitans de ladicte ville: comme Iuges, Baillifs, Preuosts & Lieutenans avecques plusieurs autres officiers & conseillers d'icelle ville: lesquels luy feirent reuerence & fut honnestement receu, & puis triomphamment mené iusques en son logis moult bien appareillé. Et durant le temps qui fut illec dedans ladicte ville, accompagné de ses nobles seigneurs, il vint un poste en grande diligence luy donner lettres, lesquelles narroient en substance, que ce mesmes iour estoit mort & trespasé le petit Duc de Milan, dequoy le Roy fut moult esmerueillé & marry. Et sans aucune fiction luy en vindrent les larmes aux yeux, & encores pour parfaire son deuoir enuers Dieu & luy, feit le lendemain faire un seruice de funerailles tressolennel: & apres iceluy seruice fut donné grande somme d'argent en aumosnes pour l'amour de Dieu, & tout aux despens dudit Roy: desquelles choses eut principale charge le seigneur Regnault d'Oreilles. Et est à noter qu'à ce seruice du feu petit Duc, furent de par le Roy inuitez tous les principaux & la plus part dudit lieu de Plaisance: lesquels pour recognoissance de sa benigne humanité, luy dōnerent plusieurs grans fromages, aussi grans quasi comme la largeur de meulles à moulin: lesquels il enuoya dudit lieu au païs de France pour faire present à la Roynne. Et apres plusieurs autres choses illec faictes & deliberées, le Roy se partit de Plaisance, où il auoit seiourné six iours.

De plusieurs autres villes & places, où le Roy passa de Plaisance iusques à la ville de Lucques.

A Pres que le Roy eut ouï messe le leudy xxiii. iour du mois d'Octobre, il se partit de la ville de Plaisance. Et alla ce iour disner & soupper à Florensole, qui est vne petite ville: là où il fut tresbien receu selon la possibilité du peuple, qui auoit bonne affection. Le vendredy apres disner il alla soupper & coucher au Bourg S. Denys, vn autre bien petite ville, là où il fut honnestement receu en obeissance. Et le samedi xxv. iour du mois d'Octobre, il alla au giste à Fornove, qui est vne grande bourgade ainsi qu'un village: mais il y a en iceluy lieu vne belle & grande Abbaye, & est quasi le commencement des Alpes & hautes montaignes. Le lendemain qui estoit dimanche apres disner, il alla loger à Terente Borg de Tarro: & le lundy apres ouïr la messe, il alla au soir à Beers: & en iceux lieux estoit assez estroitement logé tout le train du Roy, mais il failloit piller patience selon le païs. Le lendemain mardy suiuant il se partit dudit lieu de Beers, & alla reposer à Pontresme, là où il fut receu en procession à grandes torches & luminaire de cire moult honorablement, & luy fut fait vne belle entrée comme es autres villes. Et en ce lieu vint par deuers le Roy, Pierre de Medicis pour luy apporter aucunes nouvelles de Florence: & à ce moyen il se soubmist en l'obeissance, & sauuegarde dudit Roy, & pour soy aussi exempter d'aucuns mutins, il promist luy soubmettre en sa main vne petite ville appelée Sarzane: laquelle estoit subiecte aux Florentins: & apres ce luy donna encores vne bonne place de ceux Florentins dicte

dicté Sarzanelle pres dudit Sarzane. Le mercredy matin le Roy fut à nostre Dame des Miracles pres ladicte ville de Pontresme, & de là disner à Yole. Et ce iour pour quelque debat, furent aucuns Allemans tuez dedans Pontresme, dõt ils se vengerent au retour. Et le ieudy xxx. iour d'Octobre il feit marcher toute l'armée, & alla coucher à Sarzane: & illec en ce lieu reposa six iours à ordonner de ses affaires, pource que les Florentins estoient mutinez: & adoncques le vint encores veoir en ce lieu Ludouic de Milan, lequel brasloit sa trahison, dõt il retourna bien soudain. Et le vj. iour de Nouembre le Roy alla luy & son ost à Masse, qui est vn bourg, ouquel a vn fort chasteau. enuironné de grans fossez d'eäue: & en ce lieu fut honnorablemēt receu de la dame, laquelle estoit en icelle place pres ce chasteau, à vne montaigne là où se prend le marbre blāc & noir: & d'illec on peut veoir la grand mer qui est enuiron à demie lieu pres. Le vendredy ensuiuāt le Roy se partit dudit lieu de Masse, & alla au giste à Petre-Sainte, qui est vne petite ville, pour lors estant aux Florentins: mais le Roy auoit esté deüiement informé qu'elle estoit du Duché de Genes, & que les habitans s'estoient ainsi retournez par leurs cautelle & subtilité: au moyen dequoy il meit dedans le chasteau bonne garnison de gens d'armes iusques à son retour.

De l'entrée & reception du Roy en la ville de Luques.

VN samedi au mois de Nouembre, le Roy feit son entrée en la ville de Luques, & alla le Clergé au deuant de luy plus d'une lieüe loing: Pareillement y allerent les seigneurs, bourgeois & autres de la ville, lesquels pour chose singuliere estoient pour la plus part vestus & habitez de fins draps d'or, & draps de velours. Et apres qu'eux tous l'eurent reueramment receu en obeissance, ils le menerent dedans la ville qui estoit richement parée auecques ieux & esbatemens: & fut logé en l'Euesché, où luy fut faicte bonne chere, & à toute sa compaignie.

Comment le Roy entra en la ville de Pise, & en autres iusques à Florence.

LE Roy partit le dimenche au matin de ladicte ville de Luques apres ouïr messe, & alla disner à Primat. Et puis ce iour apres disner il feit son entrée dedās Pise, là où les gēs d'Eglise, Potestats & gouuerneurs d'icelle ville luy furent au deuant. Et n'est pas à doubter que sur tous autres, luy feirēt grād honneur & reception eux soubz-mettans du tout à son obeissance, & crioient du plus petit iusques aux plus grans auoir deffous luy liberté: car ils estoient grandement molestez des Florentins, qui les subiuguoïēt. Et brief estoit pitié d'ouïr leurs complainctes de griefs & torts qu'on leur faisoit: dõt le Roy le retint à soy, & leur assura de les tenir en bōne franchise. Parquoy ils furent tāt ioyeux, qu'il n'est possible à reciter. Et ainsi n'est pas de merueilles, s'il fut grandement festoyé & tous les siens pareillement. Le lendemain matin le Roy partit de ladicte ville de Pise, & alla disner à Pont-Codere, & puis au giste à Empoly. Et le mardy vnziesme iour de Nouembre, le Roy apres disner alla coucher au Pont de Signe, qui est vn beau lieu de plaifance. Et là seiourna le Roy par cinq ou six iours: Pource que les Florentins festoient mutinez contre Pierre de Medicis: lequel auoit rendu aucunes places & chasteaux au

Roy : mais si bonne barbe fut lors monstrée aux dessusdits Florentins, & l'artillerie du Roy préparée pour aller contre eux : lesquels enuoyerent ambassades pour faire obeissance au Roy, & eux excuser de leurs fautes, en luy priant qu'il les allast veoir. Pour laquelle chose ainsi faire, il feit assembler son armée.

De l'entrée du Roy à Florence, avecques les autres seigneurs, & aussi toute son armée.



Le lundy xvij. iour de Novembre, le Roy qui auoit fait assembler toute son armée & son train, disna assez pres de Florence en vn grand Palais. Et là luy vindrent au deuant tous les seigneurs & bourgeois, & gens de tous estats de ladicte ville, pour luy faire la reuerence & le receuoir honnorablement. Et apres que les Florentins eurent du tout fait leur deuoir enuers le Roy, luy presentant les clefs de la ville: toutes les bādes de l'armée du Roy commencerent à marcher en icelle ville, ayans chacun leurs capitaines, & sous bānieres desployées l'un apres l'autre par belle ordre: ce qui dura bien longuement, car là auoit plus de gens d'armes qu'onques Florentins n'auoient veuz. Et apres toutes icelles bendes passées, le Roy accompagné de plusieurs grans Princes & seigneurs, & entra dedans ladicte ville moult bien armé d'un riche harnois blanc, avecques sa garde & ses cent gentils-hommes aussi tous armez. Il fut honnorablement conduit & mené sous vn riche ciel desdits Florentins iusques à l'Eglise. Et puis de là fut mené au logis à luy préparé en l'hostel de Pierre de Medicis: là où luy & les siens furent si grandemēt festoyez, qu'on ne le pourroit estimer. Le Roy pour subiuguer & tenir les Florentins en son obeissance, seiourna douze iours à Florence. De laquelle ville il partit le vendredy ensuiuant xxj. iour de Novembre, & alla au giste en vn grand Palais par delà. Le lendemain iour de samedi il fut coucher à S. Cassant, où il demoura le dimenche. Et le lundy premier iour de Decembre il fut au giste à Pondibont, qui est vne petite ville assez peuplée & plaisante à veoir. Le lendemain le Roy alla disner à l'abbaye d'Aye, & puis au giste à Sene la Vieille.

De l'entrée du Roy & de ses gens en la ville de Sene la Vieille à Viterbe, & autres villes puis apres.



Le mardy deuxiesme iour de Decembre issirent de la ville de Sene les gens d'Eglise accompagnez des autres estats : & chacun en son deuoir furent bien vne lieuë au deuant du Roy, & en le salüant & faisant leurs harengue, luy presenterēt les clefs de la ville, comme le cognoissant à leur vray seigneur. Et avec grande solennité fut amené dedans ladicte ville moult bien & ioyeusement préparée à sa bien venue : & fut logé en l'Euesché pres la grande Eglise, & fut bien traicté luy & toute sa compagnie. Le ieudy ensuiuant le Roy se partit dudit Sene & alla disner à Bon-Couuent : puis au giste à S. Clerico, & demoura illec tout le vendredy. Le samedi il disna à Ricoure & alla coucher à la Paille. Et le dimenche apres la messe ouïe il alla à Aiguependant, qui est vne ville en vn haut, & laquelle appartient au Pape: mais toutesfois le Roy y fut receu honnorablement en notable procession, & luy furent presentez les clefs de la ville. Le mercredy ensuiuant dixiesme iour de Decembre, le Roy passa à Mont

Mont Flacon, & alla au giste à Viterbe qui est aussi vne belle ville appartenant au Pape, mais toutesfois les habitans d'icelle ville luy feirent vne entrée d'excel-
lence, eux soubmettant en sa subiection. Et le menerent honnorablement loger
en l'Euesché, vn tresbeau lieu pres la porte Rommaine. Et en ce lieu de Viterbe
le Roy y fait cinq iours residence, & visita plusieurs fois ma dame Sainte Ro-
se : laquelle y est en chair & en os : Il meit le seigneur de Gaiafche en garnison
dedans le chasteau : Et puis il enuoya le seigneur de la Trimouille par deuers le
Pape Alexandre, lequel promet estre loyal au Roy. Et pour asseurance de ce luy
renuoya aucuns Cardinaux & Euesques, & mesmemēt son confesseur. Le lun-
dy xv. iour dudit mois de Decembre partit dudit Viterbe, & fut disner à Rouf-
fillon & au giste en vne petite ville appelée Naples, là où il fut iusques au ven-
dredy. Et le vendredy dixneufiesme iour dudit mois, il alla disner & coucher à
Braciane qui est à messire Vergille, là où le Roy assembla de rechief toute son
armée. Tandis que le Roy demoura parqué audit Braciane bien accompagné
de plusieurs grans Princes & seigneurs, & loyaux gens d'armes : Le Pape par son
ambassade luy accorda mener son ost en la cité de Romme. Et ce pēdant le sei-
gneur de Ligny accompagné d'une bonne bande, mena les Allemans iusques à
Hostie, qui est vne forte place outre le Tibre sur vn port de mer. Et adoncques
estoit à Romme le Duc de Calabre, lequel par son outrecuidance luy sembloit
qu'il feroit merueilles contre les François : mais il luy fut bon besoing de des-
marcher sans longue demeure, & s'en fuit deuers l'Apoüille : & incontinent al-
lerent le seigneur de la Trimouille & le Mareschal de Gyé, prendre les logis de-
dans Romme aussi priuément comme ils eussent fait és villes de France.

*Comment le Roy entra en Romme avecques son armée : & de tout ce qui y fut
faict.*



LE dernier iour du mois de Decembre, Le Roy Charles avecques ses
gens en armes princes & notables seigneurs : & comme tenant la
main forte, entra en la cité de Romme avec toute son armée en bel
ordre, dequoy plusieurs furēt estonnez : mais estoit adonc enuiron
la nuit. Au moyen dequoy furent allumez vne grande quantité de torches &
fallots : Et ainsi entra par la porte Flamine pres l'Eglise de S. Marie de Populo.
Et en trauersant vne partie de Romme, il alla luy & sa seigneurie loger au Pa-
lais de S. Marc, où il fait ordonner son artillerie : Et les autres chacun en leurs lo-
gis, ainsi comme lesdits seigneurs les auoient ordonnez. Le Pape Alexandre
sixiesme adoncques aduertý de l'armée & grande puissance du Roy, s'en ferma
adoncques au chasteau S. Ange, doubtant aucune motion, mais par le bon ad-
uis du Roy & de son conseil, furēt enuoyez par deuers luy les Comtes de Foix,
de Bresse & de Ligny avec le Mareschal de Gyé, & l'Euesque d'Angiers, maistre
Jean de Rely : lequel fait la harengue enuers ledit Pape, par telle maniere qu'il se
contenta, & fut asseuré : dont de là en auant eut pacifique accointance & bonne
amitié entre ledit Pape & le Roy, avec tous les nobles seigneurs. Le Roy s'oc-
cupoit tous les iours à ordonner son affaire par tout bon conseil, il visitoit de-
uotement les Eglises & saincts lieux de Rōme : où luy furent monstrez en plu-
sieurs lieux les saintes Reliques & merueilleux ioyaux : En quoy luy & les siēs

prindrent vn singulier plaisir & deuotion. Et pour brief le Roy se demonstra auoir lors pouoir si vigoureux & magnifique en la cité de Rōme, qu'il y fait dresser trois ou quatre iustices: Et mesmement fait pendre, estrangler & decapiter aucuns larrons meurtriers & malfaiçteurs en Camp de Fleur. Il fait semblablement battre, fustiger, noyer, & efforeiller autres delinquans, pour demonstrier que comme vray fils de l'Eglise & Roy Treschrestien, il auoit haute iustice, moyenne & basse dedans Romme, comme dedans sa ville de Paris ou autre de France. Et durant ce temps vn grand pan de muraille sans violence cheut du chasteau S. Ange dedans les fossez, dont ledit Pape fut aucunement irrité & espouenté. Et les Rommains cuidoient d'autre part, qu'il fut ainsi fait par miracle. Le Roy visita la sumptueuse place de Colisée, & autres merueilles de Romme. Le vendredy xvj. iour dudit mois de Ianuier, le Roy accompagné de toute sa noblesse, fut ouïr la messe à S. Pierre de Romme, & là par bonne paix & dilection le Pape & luy deuisoient familieremēt ensemble, bras sous bras comme compagnons. Et brief fut faicte vne telle amitié entre eux deux, que l'Euesque de S. Malo fut adonc fait Cardinal: & fut le Roy avec le Pape aucuns certains iours. Le mardy ensuiuant xx. iour de Ianuier le Roy ouït messe en vn lieu dit la Chappelle de France, là où il toucha & guerit les maladies des escroüelles: dont ceux des Italies voyans ce mystere, ne furent onc si esmerueillez. Et cedit iour le Pape chanta messe solennelle au grand autel de S. Pierre de Romme, present le Roy & toute sa noblesse, grans seigneurs & gens d'ordonnance: & là estoient en nombre xxv. Cardinaux avec enuiron trente Archeuesques & quarante Euesques, sans les Prothonotaires & autres seigneurs d'Eglise. Et apres la messe chantée le Pape & le Roy ensemble avec leurs gens dessusdits, vindrent en vne place preparée à l'entrée de S. Pierre. Et illec sur vn eschaffault pource ordonné, fut par vn Euesque present tout le peuple demonstrée la sainte face de Iesus Christ trois fois: & là tout le peuple crioit adonc à haute voix, misericorde. Et apres ce fait le Pape fut porté sur vn eschaffault deuant ladicte Eglise: & là decoste luy fut assis le Roy. Et en apres les Cardinaux chacun selon leur ordre, & les seigneurs du sang royal: Puis le S. Pere fait dire à tout le peuple, *Confiteor*, pour dōner pleniere remissiō de peine & de coulpe cōme à l'an Iubilé: laquelle fut publiée par trois Cardinaux en trois langages: c'est à sçauoir en Latin, en François & Italien. Et ainsi q̄ le Pape faisoit la benedictiō pour ce Iubilé, il auoit sa main fenestre sur l'espaule du Roy. Et par ceste maniere fut illec chacū absoulst de peine & coulpe en moult grāde deuotion. Et adonc estoit le Turc au chasteau S. Ange, leq̄l pouoit veoir tout ce peuple dequoy il fut moult esbahy. Et apres ce fait chacun se retira en son logis biē ioyeusement. Le Roy visita les sept Eglises priuilegiées, qui sont dedans Romme & dehors. Et le dimanche apres suiuant le Pape & le Roy pour eux demonstrier bons amis cheuaucherent ensemble par la ville de Romme. Le Roy demonstra au Pape & à ses Cardinaux le trein de son armée, qu'il auoit en Romme par belle ordonnance: qui estoit vne merueilleusement belle chose à veoir pour ceux qui l'aimoient, & vne crainte pour ses ennemis. Et depuis furent encores aucuns iours en la cité de Romme. Le mardy vingtseptiesme iour de Ianuier le Roy commanda de faire preparer tout son train, pour soy departir de ladicte ville de Romme:

& alla

& alla humblement prendre congé dudit Pape Alexandre & plusieurs de ses Cardinaux, qui tous luy auoient fait vn moult bon recueil.

Comment le Roy partit de la ville de Romme avec son armée, pour aller à Naples: & ce qu'il fut fait en chemin.

E Le mercredy xxviij. iour dudit mois, le Roy alla encores desieuner & disner au Palais du Pape. Et apres qu'ils eurent assez longuement deuisé ensemble pour aucuns cas expres, le Pape luy donna sa benediction. Et adoncques se partit de Romme, & pour son plaisir emmena le Turc. Et avec luy estoient le Cardinal de Valence & le fils du Pape: & iceluy iour apres disner le Roy avec sa cōpagnie alla au giste à Marignevne petite ville, qui est à enuiron vij. ou viij. mille de Romme. Et le lendemain il alla au giste à Belistre, qui est vne cité, & fut logé en l'hostel de l'Euesque, là où seiourna aucūns iours: & ce pendant ledit fils du Pape se desroba & comme traistre abandonna le Roy. Le samedi xxxj. & dernier iour du mois de Ianuier, estant encores le Roy audit lieu de Belistre, il eut certaines nouuelles par vn poste, comment le seigneur Angilbert de Cleues grand capitaine des Allemans & d'autres gens d'ordonnance, auoit par assault & vaillamment (nonobstant toute resistance) prins & gaigné les ville & chasteau de Montfortin, appartenant au seigneur Iaques Comte, lequel s'estoit reuoqué du serment qu'il auoit fait au Roy: & pour ceste cause fut iceluy lieu mis au feu & à l'espée. En ce lieu furent prins les deux fils dudit Iaques Comte, & autres plusieurs prisonniers sous ledit seigneur de Cleues. Le dimenche premier iour de Feurier, & le lundy iour de la Purification nostre Dame, le Roy seiourna encores audit lieu de Belistre accompagné de quatre Cardinaux & six Archeuesques. Le mardy & le mercredy ensuiuant il passa à Valemonton, à la Tour & à la Botine. Et le ieudy v. iour dudit mois il arriua à Florétine, là où il s'arresta: pource qu'un Iuif luy vint humblement supplier pour receuoir baptesme, dōt le Roy le print par la main, & incontinent le mena à l'Eglise, & le fit baptizer par son confesseur l'Euesque d'Angiers, & luy donna le Roy à nom Charles, & luy fait du bien largement. Et en icelle ville est vne Abbaye, où l'on dit estre le corps S. Ambroise. Le vendredy le Roy alla disner & coucher à Verlic, là où les seigneurs d'icelle ville luy apporterent reueremment les clefs des portes, eux soubmettans à son obeissance: & dit on là estre le corps de sainte Marie Iacobi, sœur de nostre Dame, que le Roy voulut illec veoir, & y seiourna le dimenche. Et le lundy ix. iour dudit Feurier le Roy alla disner à Bahut: & apres disner cōme Roy vertueux il alla tout armé veoir le siege, que les François auoient mis deuant Mont S. Jean, où il y auoit forte ville & moult fort chasteau, ausquels furent donnez merueilleux assaults, car ils estoient tous enuironnez de gens d'armes François: mais là dedans auoit vn tas de gens assemblez de diuerses nations, lesquels se deffendirent merueilleusement, & blecerent plusieurs François. Et adonc le Roy present fut donné vn terrible assault à ladicte ville & chasteau en si grand effort, qu'on ne veit oncques: & lequel dura enuiron huiet heures: dont par la bresche d'une moult forte tour, où lon apperceut aucune trace de sang, entrerent incontinent les François dedans ledit lieu à toute violence, & tuerent tous les gens d'armes qui

furent trouuez en nombre enuiron neuf cens & cinquante cinq morts : mais il y auoit aussi eu plusieurs François blecez & aucuns tuez . Apres fut le siege leué, & icelles ville & chasteau donnez en garde au seigneur de Taillebourg, lequel en fait à son hōneur. Ceste place de Mont saint Iean estoit estimée vn lieu imprenable. Et qu'il soit vray, il n'y auoit pas long temps qu'Alphonse Neapolitain auoit tenu son siege deuant, l'espace de sept ans : mais pour toute sa force & puissance n'y sceut onc riens conquerir . Et de ce lieu le Roy retourna audit Verbic, & puis alla coucher à Bahut, où il eut nouuelles que le Duc de Calabre, s'en estoit fuy de la place de saint Germain, apres qu'il eut ouy les nouuelles dudit Mont saint Iean. Ce lieu de saint Germain est la clef & entrée du Royaume de Naples : car il y a là ville forte, avec deux ou trois chasteaux de grand deffense : & au dessus de la ville vne grande Abbaye, dedans laquelle repose le corps de saint Benoist. Le iedy douziesme iour de Feurier, le Roy alla coucher à Cyprienne vne petite ville, & le vendredy il alla disner en la ville d'Aquin, de là où estoit natif le Docteur saint Thomas d'Aquin : & puis au giste audit saint Germain, & de ce lieu le lendemain coucher à Mignane. Le lundy seiziesme iour dudit mois le Roy alla disner à nostre Dame de Correges : & alla soupper à Triague, là où il luy fut faicte vne moult belle & ioyeuse entrée : & en ce lieu il eut nouuelle que ledit Duc de Calabre s'estoit encores fuy de la ville de Cappelie : pourquoy les habitans vindrent apporter les clefs d'icelle ville audit Roy. En luy requerant humblement & à ioinctes mains, qu'il les voulsist prendre à mercy. Le lendemain qui estoit mardy, le Roy se tint tout le iour à Couy : & le mercredy dixhuietiesme iour dudit Feurier le Roy fait hōnorablement son entrée en ladicte ville de Cappelie, & fut logé dedans le chasteau qui est vne place moult forte & la ville pareillemēt. Et le lendemain il alla disner & coucher à Averse, là où aussi luy fut faicte vne moult belle entrée, & fut logé en l'hostel de l'Euesque. Le vendredy vingtiesme dudit mois, les bourgeois & marchans de Naples vindrent humblement saluer le Roy en icelle ville, pour luy dire & certifier que le Roy Alphons & son fils s'en estoient fuis par la mer. Et en ce disant, ils luy presenterent les clefs de ladicte ville de Naples, eux soubsmettans du tout à son bon plaisir & obeissance. Et adonc le Roy y enuoya le Marechal de Gyé avec plusieurs autres seigneurs : lesquels ils receurent fort, & foible, ainsi qu'il leur pleut y entrer. Le samedi matin vingt & vniesme iour dudit mois le Roy se partit dudit Averse, & alla disner dedās Poge-Real, qui est vn lieu de moult grande plaissance, & beaucoup plus grand que n'est le bois de Vincennes remply de diuerses sortes d'arbres, & de plusieurs manieres d'oiseaux & bestes grandes & petites, fontaines, praeries & vins de bien grande excellence. Lesquelles toutes choses à dire & la magnificence du lieu, seroient trop longues à reciter.

Comment le Roy entra triumphant en la ville & cité de Naples : des assaulx & prinſes du lieu dit la Citadelle, & du chasteau Nove, & du chasteau de Love : & des choses qui y furent faictes & ordonnées ainsi qu'il sera declairé.

Le



Le dimenche xxij. iour de Feurier . En l'an mille cccc. quatre vingt & quatorze le Roy Charles s'accoustra triumphamment en ses riches habits . Et entra vertueusement en sa ville & cité de Naples , combien qu'il y feit depuis vne autre entrée comme il sera dit : mais toutesfois il se demonstra dès ce iour vray Roy & puissant seigneur de Naples , car il s'en alla droictement loger au chasteau de Cappeloue. Et pource qu'aucuns des gens dudit Alphons tenoient encores vne forte place, dicté la citadelle , le chasteau Nove & le chasteau de l'Ove dedās ledit Naples: le dessus nommé Roy Charles feit soubdainement assieger ladicte citadelle qui a d'un costé la grand mer . Et pareillement feit faire les approches de sa grosse artillerie deuant ledit chasteau Nove, affin de les faire renger . Les capitaines du guet pour le Roy estoient messire Gabriel de Montfaulcon , Iean de la Grange & plusieurs autres gens de bien. Et à brief parler fut vertueusement prins cedit lieu de la citadelle, par vn bien aspre & merueilleux assault, dont incontinent les Allemans, Espaignols & Neapolitains contraires au Roy qui resisterét audit assault, bruslerent les faulxbourgs d'icelle place , & puis se retirerent dedans ledit chasteau Nove avec ceux qui ja y estoient. En ceste citadelle auoit la plus grosse artillerie qu'on veit iamais, & aussi y fut tant trouué de biens de diuerses sortes & estranges manieres , qu'on fut plus de huiet iours entiers à les tirer & vuider dehors par force de gens, & de charretes , & encores n'en pouoit on trouuer la fin tant y en auoit . Et le mercredy xxv. iour dudit mois , le Roy apres ouïr messe à l'Eglise de l'Annonciade, disna au logis du seigneur de Montpencier: & de là accompagné de tous les seigneurs du sang, alla veoir comment ladicte citadelle auoit esté assiegée & batue: & ce fait il fut aduisé comment on auroit ledit chasteau Nove, autrement dit le chasteau Neuf. Le lendemain qui fut le ieudy xxvj. iour de Feurier, ceux qui estoient demourez audit chasteau , demanderent à parlementer : parquoy on laissa de tirer l'artillerie , & vindrent pour parler à eux le seigneur Angilbert de Cleues, le seigneur de Ligny, le Baillif de Dijon, & le grand escuyer de la Royne . Et adoncques iceux dudit chasteau demanderent & requirent ausdits seigneurs , que le bon plaisir du Roy fust de leur donner xxiiij. heures de trefues, ce qui leur fut volentiers accordé. Et pource que le lendemain ils demanderent sortir leurs vies & bagues sauues , il ne leur fut riens octroyé: Dont incontinent plus fort que deuant commença de bastons à feu la batterie, & les approches si merueilleusement, que c'estoit piteuse chose de veoir la ruine & demolitiō dudit chasteau Neuf, lequel estoit fort à merueilles. Pourquoy ceux de dedans voyans estre de si pres chassés, iecterent vne piece d'artillerie, laquelle rompit toute la nef de l'Eglise des freres Mineurs de l'Observance, sans faire mal à homme ne femme qui pour lors fut en ladicte Eglise, & si en y auoit largement. Ladicte batterie dura depuis le ieudy iusques au lundy apres ensuiuant , si fort & si impetueusement qu'il estoit possible : dont ceux de dedans voyans ceste enorme batterie & de toutes pars . Le Roy en propre personne illec present furent encores contrains de rechief parlementer, dont cessa de tirer ladicte artillerie . Et adoncques parla à eux le seigneur Angilbert de Cleues avecques le Baillif de Dijon, qui parlerent en Allemant. Lors feirent les dessusdits leurs demandes, en requerans sortir leurs vies & bagues sauues, &

qu'ils seroient payez pour trois mois en seruāt le Roy fil luy plaisoit, ou qu'on leur donnast saufconduit pour eux aller à l'aduenture. Ce parlement dura iusques au mardy iij. iour de Mars, que trefues furent tousiours continuées à ceux de dedans, eux attendans auoir secours dudit Alphons ou de par luy: mais quād ils veirent qu'il ne venoit point, & qu'on vouloit recommencer la batterie pire que iamais, & par assault hardy & furieux, ils furent contrains de tout abandonner, & se rendirent à la personne du Roy mesmes: lequel les receut, eux & leurs bagues sauues: c'est à sçauoir en laissant l'artillerie qu'ils auoient & les viures en ladicte place, auquel lieu le Roy meit incontinent ses gens & bons capitaines pour le bien garder. Il est à sçauoir qu'en ces iours estant le Roy à Poge-Real lieu sumptueux & magnifique, ainsi que dit est, la fille de la Duchesse de Melfy, en la presence de sa mere vint sur vn beau coursier de Pouille. Et à bride aualée tāt qu'il en pouoit porter, le fait courir & estrader quatre ou cinq lōgues courses. Et brief en soy presentant audit Roy, fait encores iceluy coursier contorner, sauter & pennader aussi bien ou mieux qu'eut sceu faire le mieux cheuauchant du monde: à quoy le Roy print grand plaisir, & luy fait quelque noble don. Le mercredy quatriesme iour du mois de Mars, le Roy fait mettre le siege au chastel de l'Oue vulgairement dit en lāgage François, le chastel de l'Ouef, qui estoit quasi enuers le poinct du iour. Et fut iceluy chasteau merueilleusement battu d'artillerie du costé deuers la terre, pource que l'autre costé estoit deuers la mer. Et cedit iour le Roy ouit la messe aux Chartreux, & disna au logis du seigneur de Clerieux. Et apres disner il alla veoir son siege deuant ledit chasteau de l'Oue, duquel l'artillerie dudit siege auoit ja abbattu vne grande partie: car ceux qui en auoient la charge faisoient leur deuoir à merueilles. Et tellement qu'environ cinq heures apres vespres ceux du chasteau demanderent à parlementer, le Roy estant illec present ce que volentiers leur permet, & enuoya par deuers eux le seigneur de Fouës, & le seigneur de Miolan: lesquels les ouïrent parler & rapporterent la responce au soupper du Roy estāt au chasteau de deça. Le ieudy cinquiesme iour de Mars, le Roy retourna encores apres disner veoir son siege deuant ledit chasteau. Et luy estant es trenchées de son artillerie, le Prince de Tarente vint parler à luy. Et auoient esté deuers lesdits Prince, le seigneur de Guise, le seigneur de Ligny & le maistre d'hostel Brillac: lesquels estoient demourez en ostage, iusques à ce que ledit Prince fut retourné de son parlement: & adonc le Roy & ledit Prince tous deux honnestement vestus, parlerent eux deux seullement assez longuemenr ensemble en vn iardin ioignant l'artillerie: & à les veoir ils se contenoient eux deux bien sagement, en toutes leurs parolles: & apres leur parlemēt tenu, le Roy appella le seigneur de Montpencier, le seigneur de Fouës, le seigneur de la Trimaille, le seigneur de Miolan, & le Mareschal de Gié avec plusieurs autres, & parlerent ensemble assez bonne piece, le guet & les gardes à l'entour. Et quand leur parlement fut finy ledit Prince print congé du Roy & retourna en sa galée qui flotloit sur mer deuant ledit siege: & à son retour le cōuoyerent aucuns desdits seigneurs par le cōmandement du Roy. Et quād il fut sur le bort de la mer, il print congé desdits seigneurs en se recōmandant tousiours à la bonne grace du Roy: puis quand il fut en sa galée les dessus nommez seigneurs de Guise & de Ligny avec

avec les autres, prindrent aussi congé dudit Prince de Tharente & retournerent deuers le Roy: auquel ils feirēt hōnorablement ses recōmandations, & se louērent moult de l'hōneur & festoy q̄ les seigneurs dudit Prince leur auoiēt faits en ladicte galée: & cedit iour ne fut tiré aucū coup d'artillerie d'vne part ne d'autre.

Le vendredy sixiesme iour de Mars le Roy apres ouïr la messe, alla disner en l'hostel du seigneur de Clerieux. Et ce mesmes iour se partirent encores aucūns personages dudit chasteau Nove, entre lesquels y en auoit plusieurs blesez: les Espaignols allerent au Prince de Tharente, & les Allemans se vindrent rendre au Roy tous par saufconduict: & de ce iour entra audit chasteau par commandement du Roy le seigneur de Cresol, messire Gabriel de Montfalcon, avec grande quantité de ses gens & des archiers du Roy qui eurēt la charge d'iceluy chasteau, & des biens qui estoient dedās: lesquels estoient en moult grand nombre. Et le samedi septiesme iour dudit mois de Mars, le Roy alla veoir ledit chasteau Nove: lequel il veit moult volentiers, & puis il se partit & vint veoir son siege deuant l'autre chasteau de l'Ove: & sur le soir le Prince de Tharente vint encores parler au Roy ioignant l'artillerie, & furent pour luy en ostage le seigneur de Guise, & le seigneur de Ligny iusques à son retour, ce parlement fut brief: car il estoit tard, & puis ledit Prince retourna en sa galée, & lesdits seigneurs retournerent aussi par deuers le Roy. Il est à noter que ce iour de samedi le Prince de Salerne, lequel auoit esté fugitif cinq ans, pour la crainte du Roy Alphons, arriua en la ville de Naples, & trouua vn sien petit fils, que ledit Alphons auoit detenu prisonnier: mais le Cardinal S. Pierre *ad vincula* l'auoit aacheté & donné grosse rançon pour luy. Dimenche viij. iours de Mars la messe ouïe & apres disner le Roy alla ioïer en son siege, & enuoya le Preuost de Paris & l'escuyer Galiot pour sommer à ceux du chasteau, qu'ils se voulsissent rendre au Roy, ou autrement qu'en bien brief temps on leur monstreroit de beaux poincts: ce que l'on fit sans nulle faute, pource qu'ils n'y voulurēt entendre: car depuis cedit iour de dimenche iusques au ieudy ensuiuant, ils furent tellement battus & assaillis d'artillerie, qu'ils ne sçauoient comme plus ou eux heberger: en telle maniere que cedit iour de ieudy douziesme de Mars, le capitaine du chasteau fut cōtrainct de sortir dehors por venir parler au Roy estāt en son siege: & illec ledit capitaine se vint prosterner à genoux, mains ioinctes, & la teste nue deuant ledit Roy en ayant trefues iusques au lendemain, priant qu'il les print à mercy, ce que le Roy luy octroya: puis iceluy capitaine, lequel estoit bel homme & auoit ja les cheueux tous blancs, retourna au chasteau de l'Ove: & avecques luy furent enuoyez de par le Roy le Prince de Salerne & l'Mareschal de Gié pour parlementer à ceux dudit chasteau, & allerent par mer avec ledit capitaine: & depuis y furent ordonnez capitaines Claude de Rabaudanges, & le seigneur de la Vernade sans riens oster dudit chasteau. Le dimenche seziemesme de Mars le Roy apres la messe ouïe retourna au chasteau de Cappoïe, où il estoit estoit logé, & là demoura plusieurs iours à receuoir les fidelitez & hommages des Princes & Princesses du Royaume, ensemble plusieurs autres seigneurs & nobles hommes tant de la ville de Naples & Terre-de-Labeur, de Calabre, de Pouille que d'autres païs, qui ne sont cy nommez subiects audit Royaume: il y auoit lieu estably où l'on faisoit la Chancel-

lerie comme en France avec Presidens en estat: comme le President Guennay, le Chancelier & les secretaires du Roy soubs luy, ayans seaux grans & petits, à simple & double queües, donnans graces & remissions, aubaines, forfaitures, ordonner coings à monnoye d'or & d'argent, & autre metal en plusieurs fortes: comme escus, ducats, grans blancs & autres pieces doubles & simples. Et estoient grauez esdits coings les armes de France d'un costé, & les armes de Cecile d'autre part à croisettes de Hierusalem. Et pour ceste ordonnāce le Roy fait & crea plusieurs nouveaux officiers en ladicte cité de Naples, & autre part: comme iuges, maistres des monnoyes & autres en diuers offices. Et dés ce tēps en auant le Roy, fut plusieurs iours à Naples à visiter les sainctes Eglises, & veoir autres plusieurs nouuelletez en ladicte ville & és enuirs. Et en ce faisant luy furent faictes plusieurs bonnes chieres par la seigneurie dudit Naples, & d'aucuns en particuliers qui seroient longues choses à dire. Le mercredy xxv. de Mars vindrent nouuelles que Gayette estoit prinse des gens du Roy, lequel y enuoya le lendemain le Seneschal de Beaucaire pour en prendre possession. Au mois d'Auril le Roy visita son artillerie, & celle qui auoit esté trouuée esdictes places & chasteaux de Naples, dont la plus part fut amenée en France. Et en ces mesmes iours d'Auril le seigneur d'Aulbigny partit de Naples, pour aller en Calabre accompagné de ses gens d'armes & Allemans, qui estoient assez grand nombre. Le mercredy quinziesme d'Auril le Roy ouït messe à l'Annonciade à Naples, où il se confessa & puis toucha & guerit les malades des escrouelles: lesquels malades estoient en moult grand nombre de toutes parties des Itales & autres lieux, dont tous les assistans desdits païs faisoient grand estime de ceste dignité. Et ce iour messire Virgille & le Comte de Petilane, vindrēt au Roy apres leur prinse. Le lendemain qui estoit le ieudy absolu seiziesme d'Auril le Roy ouït le seruice à S. Jean vne belle Eglise, là où il fait sa Cene comme en France: c'est à sçauoir treize pauures, lesquels eurent à disner & xiiij. escus d'or. Et là fait le sermō nostre maistre Pinelle docteur de Paris, & les deux autres iours apres. Le iour de Pasques xix. d'Auril, le Roy fut confessé à S. Pierre ioignant son logis. Et puis il toucha les malades des escrouelles pour la secōde fois: & apres ce fait il alla ouïr la grande messe en ladicte Eglise de S. Jean: & apres disner il ouït le sermon fait par ledit docteur Pinelle. Et le mercredy xxij. d'Auril apres disner, le Roy alla aux lices où se deuoient faire les ioustes, qui estoient pres vne Eglise fondée des Roys de Cecile, c'est à sçauoir de ceux d'Anjou: & là trouua plusieurs seigneurs & dames des païs d'Italie. Et durerent les ioustes depuis ce mercredy iusques au premier iour de May: Les tenans du dedās esdictes ioustes se nommerent Chastillon & Bourdillon. Et au regard des deffendans du dehors, le nombre en estoit incogneu, mais trop bien y fut fait merueilles. Le dimenche troisieme iour de May le Roy audit Naples ouït la messe à saint Genny, qui est la feste de la grande Eglise cathedrale, où furent assemblez plusieurs Cardinaux, Euesques & autres Prelats d'Eglise. Et en ce lieu fut monstřé au Roy le chief dudit saint Genny, qui est vne moult digne chose à veoir. Illec fut apporté de son sang en vne grande ampolle de voirre, lequel estoit dur comme vne pierre: ainsi comme le Roy prouua, en la touchant d'une petite verge d'argent. Et ceste ampolle mise deuant ledit chief sur
le grand

le grand autel, le sang commença incontinent de soy eschauffer & amollir dedans ceste ampolle, dont plusieurs furent esbahis de veoir ce merueilleux miracle: & disoient les seigneurs d'Eglise & autres de la temporalité dudit Naples, que par ce digne chief & sang dudit saint Genny, auoient cognoissance de plusieurs de leurs requestes enuers Dieu. Car quand ils faisoient leurs prieres, s'elle estoit bone il s'amollissoit: & si elle n'estoit de iuste requeste, il demouroit dur. Et par ce aussi ils auoient aucune recognoissance de leur Prince, & fil deuoit estre leur seigneur ou nō, qui est chose bien merueilleuse. Lundy quatriesme de May le Roy enuoya Iean du Bois, Fontaines & le maistre d'hostel de Bresse, pour mettre par inuentoire les biens qui estoient dedans le chasteau Nove: lesquels estoient en si grande quantité de viures, & autres tous biens en diuerses especes & qualitez, de sorte que la valeur sembloit inestimable à priser. En ces iours le Roy visita plusieurs lieux de la ville de Naples & des enuirs. Et mesmement alla par sur le bord de la mer iusques au commencement de la montaigne de la Crotte, que Virgille fait percer bien subtilement: car celle montaigne est moult haute ioignant de la mer, & n'y a autre chemin selon le train de la mer que cestuy là, qui est vne nouuelle chose comme scauent ceux qui l'ont veu. Et vn petit arriere de là est le lieu, où l'on fait le souffre sur vne grande montaigne moult forte, laquelle art & brusle tousiours sans feu, & veit le Roy faire le souffre. Et y a choses merueilleuses aussi dessus ceste montaigne de sources d'eaües chaudes & froides. Et en la vallée d'icelle montaigne à vn trou, dont il s'ourd vn si impetueux vent, qu'il soustient pierres, bois & tout ce qu'on iecte dedans ledit trou, lequel on dit estre moult chault. Le Roy alla consequemment en vn autre lieu de grāde excellence, là où l'on fait l'alun de roche, dequoy il en vit la maniere. Et apres ce, luy fut monstré vn trou tout rond en l'vne des montagnes, qui est vne chose douteuse: car tout ce qui est mis à l'entrée est incontinent mort: ce qui fut experimenté deuant ledit Roy, car on y iecta vn asne tout vif, & vn chat qui furent subitement morts. Et quād le Roy eut tout ce veu il retourna coucher à Naples.

De l'entrée du Roy Charles en Naples comme Roy & seigneur du pais & le monarque des Itales.

MArdy douziesme iour de May le Roy ouit la messe en l'Eglise de l'Annōciade: & puis apres disner il issit de la ville de Naples pour aller audit lieu de Poge-Real, où s'assemblerent tous les Princes tant de France comme dudit Naples & des autres lieux d'Italie, pour honorablement accompagner le Roy à faire son entrée dedās icelle ville de Naples, comme Roy de France, de Cecile & de Hierusalem: laquelle entrée il fit en moult grand triomphe & excellence, en habillement Imperial. Et aussi il fut adonc nommé & appelé Charles Cesar Auguste. il tenoit la pomme ronde en sa main dextre, & à la fenestre son sceptre. Il estoit aussi vestu & habité d'vn grād manteau de fine escarlate, fourré & moucheté d'hermines, à vn grād collet renuersé, fourré de mesmes, & la noble couronne dessus son chief. Il estoit aussi richemēt monté sur vn beau cheual housé & accoustré cōme biē luy appartenoit. Et dessus luy estoit vn moult riche poille à maniere d'vn ciel, porté par les

plus grans de la seigneurie dudit Naples, accompagné à l'entour de luy de ses laquets, tous richement habillez de drap d'or: le Preuost de l'hostel & ses archiers à l'entour de luy tous à pied, le Seneschal de Beaucaire representoit le Connestable de Naples, le seigneur de Montpencier estoit deuant luy honnestement monté & habitué comme vice Roy, & lieutenant general dudit Naples. Et là estoit semblablement le Prince de Salerne avec autres grans seigneurs de France, cheualiers de l'ordre & parens du Roy: comme le seigneur de Bresse, le seigneur de Fouez, le seigneur de Luxembourg, le seigneur de Vendosme, & autres grans seigneurs sans nombre: lesquels seigneurs estoient habitez de manteaux ainsi que le Roy comme senateurs: Et brief fut l'entrée moult honnorablement, & pleine de triumphe: les nobles seigneurs de Naples avec leurs femmes en grand nombre presentoient au Roy leurs enfans de dix, douze, quinze, & seize ans, requerans qu'il leur donnaist cheualerie. Et aussi il les fait cheualiers à son entrée de sa propre main, qui fut moult noble chose à veoir. Et ainsi fut par les reuerens & venerables personages du clergé, honnestement accoustrez, & reuestus de bien riches chappes, avecques reliquaires & precieux ioyaux, conduit & mené en la grande Eglise dudit Naples. Et sur le grand autel d'icelle Eglise estoit le chef du benoist S. Genny, & son digne sang qui autresfois auoit esté monstre au Roy, comme cy deuant a esté amplement déclaré. Et en icelle Eglise deuant ledit autel, le Roy fait le serment à tous ceux de Naples tant de l'Eglise que du temporel. Et leur octroya leurs requestes & principalement franche liberté, dont ils furent tous moult contens & firent grandes solennitez: c'est à sçauoir tant pour sa bien venue que pour le grand bien, qu'il leur faisoit volontairement. Et apres que tout fut bien ordonné en ceste maniere, le Roy se departit de là & fut conduit en son logis. Et plusieurs iours apres ensuiuant le Roy étant encores en ladicte ville de Naples receut plusieurs ambassades des villes d'iceluy Royaume & autres païs: comme de Calabre, de Pouille, de l'Abrusse, & autres lieux touchant le fait de leur gouuernement, & sçauoir que deuoit demourer audit païs pour leur gouuerneur & vice Roy, ainsi que de raison estoit. Le lundy xviii iour dudit mois de May le Roy fait preparer vn grand soupper au chasteau Nove. Et illec fait vn sumptueux banquet aux princes & nobles seigneurs, estans à deux tables en la grand salle dudit chasteau, où l'on monte à plusieurs degrez de pierres. Et là fut seruy par le grand Seneschal de Naples tout à cheual, vestu de blanc en tous ses mets, & force trompettes & clairons. Et apres souper le Roy print & receut le serment de tous lesdits Princes & seigneurs, & puis s'en alla coucher en sondit logis.

Comment le Roy se disposa de retourner en France, & print congé de ceux de Naples.



Le mercredy xxj. iour du mois de May, le Roy en grand triumphe & solennité ouït la Messe à l'Annonciade: & puis alla disner en son logis. Et apres disner tous les princes & seigneurs tant de France, de Naples que des autres païs dessusdits, vindrent au logis dudit seigneur, pour illec prendre congé de luy: & furent tous ensemble en vne grande sale. Et adonc tout conseil tenu & delibéré, & que lesdits seigneurs eurent prins congé: le Roy aussi print vn debonnaire & humain congé d'eux, & de tous ceux du païs

du païs estans en ce lieu . En leur presentant le seigneur de Montpencier pour leur Viceroy,maistre,seigneur & gouverneur en son absence. Et de ceste heure lesdits seigneurs & autres du Royaume de Naples , le receurent & accepterent pour Vice-roy,regent & gouverneur dudit Royaume de Naples. Et ce fait,cōclud & paracheué apres tous congez prins , comme dit est , à belle compagnie triumpamment accoustrée tant de seigneurs, gentils hommes, gens d'armes , Suisses , Allemans comme autres gens longs à reciter . Ce propre iour de mercredy il se partit de ladicte ville de Naples:& en retournant deuers France fut à coucher en la ville d'Averse.

Du voyage du Roy Charles en son retour de Naples au païs de France.

A Pres que le Roy Charles fut party de Naples le mercredy xxj. iour de May,& qu'il vint dudit Naples au giste en la ville d'Averse,ainsi que dit est. Le ieudy xxij. iour dudit mois il se partit dudit Averse, & vint au giste iusques dedans Cappoüe. Et le lendemain vendredy, il disna& coucha en la maison episcopale de l'Euesque de Cesse. Et le samedy ainsi comme il venoit pour repaistre à Gayette, le chasteau se rompit aucunement par derriere , & ne peut on passer adonc, parquoy le Roy retourna audit lieu de Cesse:mais le dimanche apres qu'on eut donné prouision à cest affaire,il vint au giste à S. Germain. Et de ce lieu il passa à Pont-Corue,& à Cyprienne:puis vint iusques à Florentine,qui est vne petite cité:laquelle en ce temps estoit interdicte de nostre saint Pere le Pape Alexandre, pource que les citoyés d'iceluy lieu auoient tué & couppé les bras de leur Euesque qui estoit Espagnol. Et la cause fut, pource qu'il vouloit formellement tenir le party du Roy Alphons Neapolitain contre ledit Roy Charles : lequel n'eut point ouïy messe cedit iour, se n'eut esté qu'il auoit plain pouoir & puissance de faire chanter & celebrer en tous lieux,où que bon luy sembloit. Le vendredy xxix. iour dudit mois de May,le Roy vint au giste à Valmonton,là où estoient plusieurs haineux des François:pource qu'on auoit destruiet & brulé Mont-Fortin:mais nonobstant ils vindrent le samedy au giste à Marine,là où le Roy seiourna le dimanche. Le lundy premier iour du mois de Iuing le Roy entra dedans Romme à son retour de Naples:& fut logé au Palais du Cardinal de S.Clement,assez pres de S.Pierre. Et estoit le Roy moult bien accompagné de tous ses gens d'armes avec ses pensionnaires & gentils-hommes,sa garde, ses arbalestriers,Suisses & Allemans en vn moult grand nombre. Et pource que ledit Pape Alexandre estoit pour lors absent de Rōme,il fait loger aucuns de ses gens en certains lieux, affin qu'aucune insolence ne fut suscitée audit lieu de Romme, là où il alla en l'Eglise de S.Pierre rendre graces & louēges à Dieu:il se partit le mercredy prochain dudit Romme,puis vint disner à Isola, & au coucher à Campanolle. Le vendredy il vint disner à Rosillon : & ce iour mesmes avec toute son armée, il vint entrer dedans Viterbe,là où il fut encores honnorablemēt receu ainsi que deuāt. Et là seiourna le Roy iusques le dimanche iour de Pentecouste, qu'il fit son deuoir à l'Eglise,& visita le corps de S.Rose audit Viterbe. Le lendemain lundy viij.iour de Iuing,le Roy fut à soupper & au giste en la ville de Montflacon, où croissent les bons vins muscadets. Et de là il passa à la Paille & autres

lieux, & vint iusques en la cité de Senes la vieille : & là les habitans d'icelle ville luy vindrent au deuant en triumphe & magnificence, comme ils auoient fait à passer. Le mercredy xvij. iour de Iuing le Roy se partit dudit Senes apres disner, & vint au giste à Pondibont, là où il demoura tout le matin, qui estoit le ieudy iour du Sainct Sacrement, & fut à la procession & à la grand Messe en bien deuote reuerence. Et apres disner il alla au chasteau Florentin : Et le lendemain au matin disner à Campane assez pres de Florence, là où il ne fut point à son retour, pource que faingnans estre François par trahison, fut prinse la ville de Pont-Velle. Le samedi xx. de Iuing le Roy entra dedans Pise, où ils le receurent encores moult honnorablement, & se soubsmeirent du tout à sa maiesté, & y seiourna deux iours. Le mardy ensuiuant le Roy fut disner à Pōmart : & puis il vint au giste à Luques, où il fut tousiours bien receu : & meirent la ville en sa sauuegarde & protection : Il passa consequemment à Petre-saincte, & tant qu'il vint le samedi ensuiuant au lieu de Sarfaigne : là où il eut nouuelles de l'assemblée du Duc de Millan & des Venitiens : & pour ceste cause il ne voulut point coucher à Ville-Franche, mais outre la riuere fait parquer son camp : auquel soubs les tentes & pauillons il souppa avecques ses gens d'armes, en attendant son artillerie & les Allemans de l'auantgarde, avecques les autres gens de guerre. Le ieudy xxx. iour de Iuing le Roy partit de son camp pres ville-Franche, & alla ouir Messe & disner en vne grosse abbaye dessus Pontresme : pource que les Allemans auoient brulé iceluy lieu de Pōtresme, pour le tort que ceux de la ville leur auoient fait, quand ils tuerent aucuns de leurs gens au passer. Et apres disner le Roy alla coucher au pied des Alpes. Et en ce lieu fait parquer son camp iusques à tant que toute son artillerie fut passée : de laquelle chose eurent charge & commission le seigneur de la Trimouille & Iean de la Grange : lesquels avecques tous leurs gens y feirent grande diligence, car il estoit bien difficile pour les fors rochers qui y sont. Et le vendredy iij. de Iuillet & le lendemain, le Roy passa les Alpes, & fut à Verce, à Cassan, & puis il fait parquer son ost aupres de Tharète, là où il coucha soubs la seurte de bon guet & certaines gardes. Le dimanche cinquiesme de Iuillet le Roy ouit la Messe à Tarrence, & puis fut disner à Fournoue, là où il donna tout l'ost de ses gens d'armes en belle bataille avec les auantgarde & arrieregarde, les aelles & guet accoustumé.

S'ensuit la iournée de Fournoue, & excellente victoire du Roy & des nobles Francois.



Le lundy sixiesme iour du mois de Iuillet l'an mille quatre cens quatre vingts & quinze, en vn lieu dit Vergera ioignant le Val de Tarro à enuiron deux mille de Fournoue, & quatre mille de Parme : le preux Roy Charles viij. de ce nom accompagné de plusieurs grans seignrs & vaillans capitaines ja deuant nommez, avec enuiron de huiet à neuf mille bons gens d'armes, vint rencontrer enuiron de cinquante à soixante mille Lombars, Venitiens, Estradiots & autres ses ennemis : desquels auoient la charge & conduicte le Marquis de Mantoue pour les Venitiens, le Comte Galiache pour Ludouice de Milan, & le seigneur Ferrare pour aucuns autres trahistres, avecques plusieurs grans capitaines : le Roy estoit armé de pied en cappe de toutes pieces, d'un moult beau harnois comme Prince de grand nom : il auoit dessus ce harnois

harnois vne bien riche iaquette à courtes manches de couleur blanche & violette, à croisettes de Hierusalem : & son armet magnifiquement accoustré, garny de plumaceaux de mesmes, l'espée, la dague & autres choses appartenans à vn bon gensd'arme: & estoit bien monté sur vn puissant cheual de poil noir appelé Sauoye, bien bardé de mesmes couleurs, & semé desdictes croisettes: puis pour l'accompagner & tenir en bonne & seure garde contre les dessusdits ennemis, auoit à l'entour de luy gens d'entendement, expres & de bonne fiance, avecques bien enuiron deux mille hommes, vaillans & vertueux gens d'armes, comme ils le monstrerent au besoing : & apres que la bataille des François fut bien ordonnée & l'artillerie mise en son train, ils commencerent de marcher contre leurs ennemis en tel ordre & maniere de faire, comme le cas le requeroit, & comme ils sçauoient bien l'usage : & pource que lesdits ennemis ne sçauoient pas en quel endroit pouoit estre le Roy, ils enuoyerent vn herault faignant demander aucune chose au Roy : lequel herault rapporta auoir veu ledit Roy, en declairant la maniere de son accoustrement ainsi que dit est : adonc commencerent aussi de marcher lesdits Lombars, Venitiens & autres trahistres: lesquels venus en place auantageuse, ietterent vne grosse piece d'artillerie vers le costé de l'auantgarde des François, dequoy furent aucuns blesez : mais pour ce ne fut toutesfois desioincte ne separée ladicte auantgarde : & tantost apres quelques coups ruez de l'artillerie desdits ennemis, incontinent que les canonniers du Roy les peurent choisir au descouuert à leur auantage, ils tirerent vn gros canon chargé d'vne boule de fonte avec autres pieces d'artillerie, en telle maniere que les bastons des ennemis dont ils tiroient impetueusement, furēt froissez & mis en pieces : & aussi fut adonc tué vn de leurs principaux canonniers, comme il fut sceu par vne trompette, lequel fut prins tantost apres : & brief les canonniers François continuerent si bien à tirer avec la diligence des bons gens d'armes, que les aduersaires furent contraints d'eux retirer pour ceste premiere fois : & aussi ils veoient les François estre en bon ordre, & conduicte de perfection. C'estoit pareillement vne chose merueilleuse, de veoir adonc le tresvertueux Roy soy mettre en auant si vaillamment, comme il faisoit : mais avec ce il se demonstroit comme vn homme preux, & vaillāt en contenāce, & en geste: bien deliberé en parolles, en bon conseil & demandes courageuses, qu'il faisoit à ses familliers & principaux amis, disant en ceste maniere. Que dictes vous messeigneurs & amis? estes vous pas deliberez de bien me seruir aujourd'hui? voulez vous pas viure & mourir avec moy? & puis il disoit de rechef, la responce euē d'vn chacun. Prenez courage, & ne ayez peur: ie sçay de vray qu'ils sont dix fois autant que nous, mais vous sçauiez que sommes en bōne querelle: parquoy ie me confie en Dieu, lequel m'a ja donné victoire contre mes aduersaires, ainsi comme vous avez apperceu en tout ce voyage : & aussi i'ay bonne esperance qu'il bataillera aujourd'hui pour nous: & que par son digne plaisir nous aurons triumphe & victoire, & retournerons tous en France à sa glorieuse louenge & à nostre honneur : & de ces propres mots ou autres termes en substance semblable, le hardy Roy Charles consoloit, & encourageoit ses gensd'armes merueilleusement : lesquels estoient tousiours en bonne ordonnance, de quoy les ennemis furent esmerueillez: dont pour les cuider desioindre & desemparer de

bon ordre, lesdits ennemis enuoyerent leurs Estradiots & autres plusieurs Albanois passer vne montaigne: lesquels vindrent sur le bagage, sommiers & muletiers portans les coffres & autres besongnes, qui ne l'estoient tenus en ordre pour aucun different entre eux, dont il ne leur print gueres bien: mais tout ce ne fut pas grand chose, comme il sera dit cy apres: car l'armée fut tousiours en ordre sans aucunement descamper. Ce voyant les ennemis Lombards, Veniciens & autres, enuoyerent vn herault par deuers le Roy de France pour demander aucunes trefues: auquel ledit Roy respondit, s'ils veulent auoir trefues qu'ils viennent à moy entre les deux batailles: mais apres ce le Roy leur manda, qu'ils le laissassent passer, luy & ses gens par bonne amour, ou que malgré qu'ils peussent auoir, il passeroit par dessus eux. Et quand ils ouïrent ainsi parler le herault du Roy, ils le detindrent & delibererent de venir frapper sur les François comme gens enragez: & sur tout en vouloient au Roy, lequel ils taschoient à surprendre pour le mettre à mort, mais Dieu estoit son protecteur. Et incontinent que ceux du guet veirent venir iceux aduersaires, ils vindrent de rechief aduertir le Roy, comment ils marchoiēt gagnāt le bois & les buissons. Lors le preux & vertueux Roy sous la bōne confidence qu'il auoit en Dieu, & à l'ayde de ses amis marcha avec sa bande iusques outre la greue, tellement que chacun commēça de veoir sa partie aduersē. Et de fait pour chose certaine les dessus nōmez ennemis venoient hardiemēt bien deliberez, montez, bardez & accoustrez par bonne ordonnance, & comme gens biē asseurez de leur entreprinse & en beaucoup trop plus grand nombre, que les François, ainsi que dit est. Et si auoient mis leurs meilleurs gens d'armes deuant: parquoy de prime face choquerent vertueusement les auantcoureux, & feirent moult grand deuoir à fort combattre d'une part & d'autre, comme gens fiers, & magnanimes, en donnant coups impetueux. Et pource que lesdits ennemis sçauoient l'accoustrement du Roy par le herault qui vint à luy, ils feirent tant qu'ils vindrent iusques à sa personne, & chargeoient sur luy fort & ferme: mais courageusement & cheualeresquement se deffendit comme preux & hardy, en frappant virilement sur ses ennemis sans quelsconques peur ne frayeur. Et tellement que par son moyen & par les vertueux faits de ceux qui estoient à l'entour de luy, les ennemis qui s'estoiēt tant approchez, furent illec deffaits meurtris & accablez comme miserables: & mesmes les plus grans d'entre eux, lesquels pour leur plus grand honneur gaignerent au mieux fuir, car quand ils cogneurent leur deffait & si cruelle resistance, la poincte de leurs esperons estoit adonc la meilleure piece de tous leurs harnois. Et ne fut fait prisonniers des François pour homme de nom que le seigneur Matthieu Bastard de Bourbon: lequel deffendit merueilleusemēt la personne du Roy. Et si fut prins en les suiuant quasi iusques en leurs barrieres. Il n'y eut des François morts, sinon enuiron ix. ou x. gentils-hommes d'estime: combien que leurs ennemis fussent dix contre vn: desquels il en eschappa qui se sauuerent à fuir. Et pource il n'est pas à doubter que Dieu ayda moult aux François, qui leur donna ceste victoire contre iceux leurs desloyaux ennemis: lesquels furent vaincus & subiuguez en si peu d'espace. Le Roy fut tout le iour armé & à cheual, au moins iusques à ce que tout fut retiré au camp: là où apres ceste iournée vindrent deuers luy aucuns enuoyez desdits ennemis, pour demander

mander les prisonniers: mais il leur fut respondu qu'ils n'en auroient nuls, dont ils furent bien esbahis, pensant le grand nombre des morts, & des plus grans qui fussent entre eux. Le Roy & aussi tous les siens en signe de triumphe & victoire, souperent & coucherent audit camp de bataille, où ils mangerent & beurent ce qu'ils pouoient auoir: & ainsi comme il pleut à Dieu, auquel ils rendirent chacun humbles graces & toutes louanges, ainsi que bien y estoient tenus.

Comment le Roy leua son camp dudit lieu de Fournoue, pour retourner au païs de France.

LE lendemain de la iournée dudit lieu de Fournoue, qui estoit le mardy vij. iour de Iuillet l'an mille cccc. quatre vingts & xv. Le Roy au matin apres ouïr Messe feit leuer son camp, & alla loger en vn hault lieu appelé Magdelan, distant à enuiron demie lieuë de France, du lieu où estoit ledit camp: & là demoura tout le iour: auquel iour fut faicte telle diligence par les maistres de l'artillerie, que toute icelle fut tirée & amenée dudit camp pour estre tousiours à l'entour du Roy, ainsi qu'en tel cas appartient. Et le mercredy viij. iour de Iuillet, le Roy partit dudit Magdelan avecques toute son armée bien equipée de l'artillerie. Et en certains iours ensuiuant, ledit Roy passa en ceste maniere par plusieurs villes & places ja dessus nommées, en allant où il rapassa malgré ses ennemis: & tant qu'il vint iusques au lieu de Nôuare, où il deliura monseigneur d'Orleans, lequel estoit avecques plusieurs de ses gens mis & enclos en icelle ville en danger du trahistre Ludouic de Milan: & puis ledit Roy vint en Ast, & iusques à Versel, où ledit seigneur d'Orleans vint par deuers luy, lequel il receut moult honnorablement, & par debonnaire amitié, souperent le soir ensemble. Le vendredy ij. iour du mois d'Octobre audit an mille quatre cens iiij. xx. & xv. mourut & trespassa en ladicte ville de Versel le seigneur de Vendosme: dequoy le Roy fut moult courroucé: & aussi furent tous les seigneurs de France, car il estoit moult notable Prince. Et le mardy ensuiuant le Roy feit faire le seruice des funerailles dudit seigneur moult solennellement en la grãde Eglise dudit Versel, qui est appelée sainte Eusebie: & là fut fait vn moult grand plaint & dueil de plusieurs seigneurs & de tout le peuple: & puis son corps fut apporté sepulcrer en France avecques ses predecesseurs. Le mercredy ensuiuant vij. iour dudit mois d'Octobre, l'Euesque de Syon arriva audit lieu de Versel: & amena plusieurs Suisses & aucuns à pied & à cheual des ligues d'Alemaigne au Roy, lequel les receut volentiers, en merçant ledit Euesque qui feit grandement festoyer. Et le lendemain qui estoit ieudy, les ambassadeurs dudit Ludouic de Milan, & des Veniciens vindrent audit Versel par deuers le Roy, & demandoient en requerant instamment appointement, pour ce qu'ils auoient veu la force dudit Roy, & le franc courage de France: dont leur fut fait aucun traicté, mieux qu'il ne leur appartenoit. Le dimanche dixiesme iour d'Octobre le Roy ouït la Messe en l'Eglise des cordeliers dudit Versel, ioingnant son logis. Et apres disner se partit d'icelle ville, & s'en alla au giste à Atrain, là où pour aucuns affaires il seiourna iusques au quinzième iour dudit mois d'Octobre, qui vint au giste à Crescentin: & de ce lieu en venant à Grenoble passa par plusieurs iournées, es villes ainsi qu'il s'ensuit: à Sillon, Cesse,

Turin, Quiers, Riuole, Suze, Briançon, nostre Dame d'Ambun, Sauvine, & saint Eusebe, la Meure, & à Tault pres dudit Grenoble. Le mardy xxvij. iour du mois d'Octobre, le Roy arriua enuiron vespres dedans la cité de Grenoble, là où les habitans en tous estats le receurent moult honorablement à son retour, & luy feirent nouvelle entrée. Et là le Roy seiourna aucuns iours, pource qu'il fut vn peu malade. Le mercredy iiij. iour de Nouembre le Roy partit dudit lieu de Grenoble pour venir à Lyon: il passa aussi en aucuns iours à S. Rambert morain, Sillon, la coste S. Andry, Chatomay & de ce lieu vint coucher aupres de Lyon. Le samedi vij. iour du mois de Nouëbre l'an que dessus mille cccc. lxxx. & xv. le Roy Charles viij. de ce nom disna à Venissiere pour venir au giste à Lyon. Et pour luy venir au deuant issirent de Lyon en procession les gens d'Eglise reuestus de toutes riches chappes, avecques leurs croix, saintuaires, reliquaires, & autres ioyaux, pour luy faire la reuerence à sa bien venue & ioyeux retour, en luy faisant nouvelle entrée, comme Roy de Hierusalem, de Naples, & Cecile: dont pour ce semblablement luy vindrent au deuant les gens de iustice, ses officiers, seigneurs, bourgeois & marchans de ladicte ville de Lyon, avecques les principaux enfans d'honneur d'icelle ville, honnestement habitez. Et quād eux tous & chacun d'eux eurent fait la reuerence deuë enuers le Roy, ainsi que bien tenus estoient, & cōme il luy appartenoit: ils le conduirent moult honorablement & ladicte ville, avecques ses nobles seigneurs & tous ceux de sa compagnie, lesquels il faisoit moult beau veoir. Et prenoit on moult grand plaisir à les regarder pour la noble triumphe & victoire, qu'ils auoient euë & obtenue sur tous leurs ennemis, en la compagnie de leur Prince. Et en ceste maniere les rues tendues & parées le long de Lyon, avecques feux de ioye & plusieurs mysteres & esbatemens demonstrez par ladicte ville, ledit Roy fut moult honnestement cōduit iusques en l'hostel de l'Archeuesque de Lyon, où son logis estoit appareillé. Et en ce mesmes logis l'attendoient Madame la Royne sa femme & Madame de Bourbon sa seur, avecques plusieurs autres nobles dames & damoilles, desquelles il fut receu à grande ioye & lieffe, moult desiré singulieremēt, & aussi il le valoit bien. Ledit Roy Charles fait faire ioustes & tournois à Lyon les plus sumptueuses que merueilles, & mesmement és trois principaux lieux de ladicte ville: c'est à sçauoir en la Grenette deuant les Cordeliers, en la Iuerie, & au Palais: esquelles ioustes & tournois iceluy Roy Charles estoit tousiours le premier soy presentant en champ de bataille, là où il se porta tousiours vaillamment & de bon courage: & fait plusieurs bons coups d'espée, & aussi furent plusieurs seigneurs de France: lesquels feirent plusieurs beaux faits d'armes à pied & à cheual. Et en memoire d'icelles ioustes furent faits & dressez trois piliers de pierre, ausquels sont encores à present escripts aucuns vers en langue latine, composez pour icelles ioustes en grande singularité: car ledit Roy Charles viij. estoit le principal tenant. Il est pareillement à sçauoir que ledit Roy auant son voyage de Naples, auoit fait magnifiquement esleuer le corps du docteur Seraphique S. Bonauenture, estant sepulturé aux cordeliers de ladicte ville de Lyon: & depuis monseigneur de Bourbon & Madame Anne de France sa femme, feirent couvrir de fin argent la chasse dudit S. Docteur: & aussi le Roy dessusdit fonda le conuent des cordeliers de l'obseruance en ladicte ville de Lyon,

qui

qui est vn lieu deuocieux. Et apres qu'il eut seiourné aucuns iours à Lyon il delibera de marcher plus auāt en France pour faire son voyage à S. Denys, & puis retourner à Amboise comme il sera dit cy apres. En l'an mille cccc. iiij. xx. & xvj. le fils du Roy d'Espaigne mourut. Et en ce mesme an pareillement mourut & trespassa le Duc de Sauoye, lequel comme on disoit auoit esté empoisonné au pays de Piémont.

Du voyage du Roy Charles à S. Denys en France apres son retour de Naples. Et comment il retourna à Amboise, là où il mourut d'un caterre.

A Pres que le Roy Charles eut seiourné plusieurs iours à Lyon : & que aucunes ioustes & tournois eurent depuis esté faictes à Moulins en Bourbonnois: celuy Roy alla à S. Denys en France pour accomplir le vœu & pelerinage, qu'il auoit fait: & pour rēdre graces & louenges à Dieu des bonnes victoires qu'il auoit eu & obtenu, à l'encontre de tous ses ennemis, en faisant son voyage de Naples, comme dessus a esté dit. Et aussi pour remettre les benoists corps des saincts martirs, qui illec reposent: lesquels auoient esté descendus de leurs places au departement d'iceluy Roy en sondit voyage: car vne louable coustume & maniere de faire a esté depuis long temps aux trefcrestiens Roys de France, que quand ils veulent faire aucune loingtaine expedition, & voyager hors du Royaume pour leurs affaires & besoing: ils requierent & supplient humblement l'ayde & intercession des glorieux martirs saint Denys & ses compagnons S. Rustique, & S. Eleuthere. Et pour ceste cause au departement d'iceux Roys les chasses & fiertes des Saincts Martirs dessus nommez, sont descendus des propres lieux & repositoires, là où ils ont accoustumé d'estre gardez & venerez d'un chacun en ladicte Eglise & monastere de S. Denys en France: & en telle maniere sont adonques mis & establis patemment en laire de ladicte Eglise. Et quand lesdits corps saincts sont ainsi descendus: ils ne peuuent apres estre remonter ne mis en leurs propres lieux ordonnez, que premierement le Roy en personne ne soit retourné de son voyage entrepris de faire loingtaine conqueste & cheualerie. Et ainsi apres que le bon Roy Charles eut victorieusement parfait son voyage du Royaume de Naples, en ensuiuant la bonne coustume de ses predecesseurs Roys de France, il vint par deuot pelerinage en l'Eglise dudit S. Denys: & par luy furent remises & colloquées les chasses & fiertes des dessusdits Martirs en leur propre lieu ordonné, à ce presens plusieurs grans seigneurs & autres de sa compagnie: mais en faisant iceluy voyage de S. Denys, il ne voulut aucunement passer ne rapasser par sa bonne ville & cité de Paris, pour aucunes causes qui à ce le peurent mouuoir: lesquelles ie delaisse à dire en euitant prolixité. Et pour ceste cause le Roy au partir dudit S. Denys, adressa son chemin par S. Anthoine des champs: & de là passa au Pont-de-Chalenton, & puis par la Beaulse s'en alla droictement à son chasteau d'Amboise: & illec trouua Madame la Roine sa femme, avecques plusieurs autres seigneurs & dames de son noble sang. Et en iceluy lieu aussi fut moult honnorablement receu de tous les estats, manans & habitans de toute la ville dudit Amboise. Et apres qu'il eut seiourné aucuns iours audit Amboise, il eut nouuelles de la trahison des Neapolitains & de la mort du noble Gilbert sei-

gneur de Montpencier: parquoy les autres capitaines impuissans à porter le fais de pardelà, s'en retournerēt au mieux qu'ils peurent à l'ayde de nostre seigneur: car iceux trahistres Neapolitains, Lombars & autres nations se fortifierent soudainement contre eux: au moyen dequoy iceux capitaines & autres gens d'armes François ne peurent estre si brief secourus en si loingtain païs que Naples: & pour ce ledit Roy Charles viij. se dispoisoit de retourner audit païs de Naples pour soy licitement venger de leur desloyalle infidelité: mais le bon seigneur auoit ja prins tant de trauail en sa premiere adolescence, qu'il estoit foible de son corps & deuenoit maigre & attenué. Dont luy estant vn iour audit lieu d'Amboise en vne gallerie, où il se recreoit avecques la Royne en regardant aucuns ioueurs de paume, il fut surprins d'un catterre, & mourut en bien brief espace, luy estant enuiron le xxviij. an de son aage, en l'an mille cccc. quatre vingts & seize le xij. iour du mois d'Auril Dieu vueille auoir l'ame de luy.

1497.

Du seruice fait és funerailles du Roy Charles viij. és lieux d'Amboise, Paris, & Saint Denys en France.



Pres le trespas du feu Roy Charles viij. que Dieu absolue, le seruice & obsequie de ses funerailles fut moult solennellemēt fait à Amboise, en l'Eglise de S. Florent, par le tresreuerend Cardinal monseigneur Iean Peraule, assistās plusieurs grās seigneurs & autres personages: & là avecques vn merueilleux nombre de luminaire, furent faictes plusieurs grādes aumosnes: & quād le seruice fut parfait en ladicte Eglise, le cuer dudit Roy Charles fut porté pour sepulchurer en l'Eglise de nostre Dame de Clery avecques son pere. Et puis son corps avecques la figure fut soleunellement apporté en grand triūphe de dueil, iusques en l'Eglise de nostre Dame des Chāps és faulxbourgs de Paris: & là fut veillé toute nuit par aucūs de ses bōs amis. Et le lēdemain matin enuirō la fin du mois d'Auril, issirēt de la ville dudit Paris plusieurs gēs d'Eglise en processio avecques leurs croix. Et tāt de l'Eglise cathedralle cōme des autres parroisses, religieux, & mendiās: & pareillement furēt au deuant dudit corps messieurs de la Court de Parlemēt, la chābre des Cōptes, & autres chābres du Palais: les seignrs du Chastelet, & autres officiers, les Preuost & escheuins de ladite ville, avecques plusieurs bourgeois marchās & autres dudit Paris, tous & chacū d'eux vestus de robes de dueil selō qu'à eux appartenoit: & ainsi vindrent iusques audit lieu nostre Dame des Champs lez Paris: auquel lieu estoient attendans plusieurs grans seigneurs, capitaines, officiers & autres seruiteurs domestiques & pages d'honneur, tous vestus de robes de dueil & chapeperons, iusques au nombre de plus de vij. mille: & ainsi chacun par ordre en la maniere qu'il est accoustumé, conduirent ledit corps iusques dedans ladicte ville de Paris, avecques cccc. torches allumées & les escussions des trois fleurs de lys: lesquelles torches estoient portées par cccc. pources tous vestus de robes, & chaperons de dueil. Et ainsi fut conduit & mené iusques en la grandre Eglise de nostre Dame de Paris, là où fut pareillement fait vn seruice tressolennel, pour ledit deffunct, avecques moult grandes aumosnes: & iceluy seruice parfait & accōply, fut ledit corps avecques la figure retiré de ladicte Eglise de nostre Dame, & tousiours conduit en moult grande solennité de dueil parmy la ville de Paris & dehors,

dehors, iusques en l'Eglise de l'Abbaye de S. Denys en France: auquel lieu fut pareillement fait vn moult beau seruice pour ledit trespasé, avecques presens de piece d'argent à tous les assistans pour les offrandes des Messes, & grandes aumosnes aux pources. Et apres ce seruice fait & toutes ceremonies obseruées, comme de coustume est, ledit corps du Roy Charles huiétième, fut inhumé & sepuluré au cercueil & sepulchre à luy préparé: puis le tout parfait & accomply fut fait vn disner & conuiue moult excellent à tous les assistans, pour l'honneur du dessusdit Roy, auquel Dieu face vray pardon. Amen.

DV ROY LOYS XII.



V D I T an, c'est à sçauoir mille quatre cens quatre vingts & dixhuié, & le xxviij. iour de May, Loys Duc d'Orleans fils du Duc Charles, fut sacré à Reims comme ses predecesseurs Roys de Frâce. Et fut nommé treschrestien Roy douxième de ce nom, & lv. Roy de France. Au sacré duquel estoient mes tresredoubtez & honnorez seigneurs, messeigneurs les douze Pers de France ou autres pour eux. Pour le Duc de Bourgongne, monseigneur le Duc d'Alençon. Pour le Duc de Normandie, le Duc de Lorraine: pour le Duc de Guyenne, le Duc de Bourbon: pour le Comte de Flandres, monseigneur de Rauastain: pour le Comte de Champagne, Anguilebert monseigneur de Cleues. Et pour le Comte de Thoulouse, monseigneur de Foix. Et brief audit sacre estoit quasi toute la noblesse de Frâce: lequel sacre fut fait & solennisé à la maniere des autres Roys. Et estoit pour lors mōseigneur de S. Malo Archeuesque de Reims. Et apres le sacre, incontinent le Roy feit cheualier & donna son ordre de S. Michel à monseigneur de Taillebourg, à monseigneur des Pierres, à monseigneur de la Grutur, & à monseigneur de Clerieux. Et en outre feit plusieurs cheualiers iusques au nombre de quatre vingts ou plus, comme le seigneur de Myolans, messire Claude de Mont-lor seigneur de Chasteau-neuf & de Salazuit, & plusieurs autres qui seroient longs à nommer. Apres toutes ces choses faictes, le Roy se delibera de faire son entrée à Paris. Le premier iour de Iuillet le Roy fut couronné à saint Denis en France, comme ses predecesseurs en grand triumphe: & le lendemain il feit son entrée à Paris, laquelle fut tressolennelle: puis s'en alla soupper au Palais. Apres toutes ces solennitez faictes, chacun se retira és lieux ordonnez de par le Roy. Le premier qui luy feit la guerre ce fut monseigneur de Vergy, mais en brief temps la guerre fut cessée & fut en Bourgongne. Le dixhuiétième iour d'Octobre le Comte de Valentinois qu'on disoit estre fils du Pape Alexandre septiesme, feit son entrée à Lyon sur le Rosne, auquel le Roy auoit donné ladicte Comté de Valentinois. Et vint en France pour aucunes causes, dont fut fait le mariage de luy & de la fille de monseigneur d'Albret. Cestuy Comte de Valentinois estoit Cardinal, mais il laissa sa cardinalité pour venir en France, lequel vint en habit seculier en grand pompes & richesses. Le deuxiesme ou troisième de Decembre, feit à Lyon si grand & impetueux vent que merueilles: tellement que aux cordeliers de ladicte ville, la custode où on mettoit les hosties

sacrées estant dessus le grand autel, s'ouurit & sortirent lesdictes hosties volant par l'Eglise, qui fut grand scandale & fut à cause d'une verriere rompue, & fut environ huit heures deuers le matin. En cestuy an le Roy donna à Madame Jehanne de France la Duché de Berry : & pour le prouffit & vtilité de la chose publique, il espousa & print a femme Madame Anne de Bretaigne, relaissée du feu Roy Charles : & de ce eut dispence du Pape Alexandre septiesme qui fut vn grand bien pour tout le païs. En l'an mille quatre cens quatre vingts & xix. fut enchassé aux cordeliers de Lyon le chef de saint Bonauenture, en vn beau & riche chef d'argent : cedit iour fut faicte procession en ladicte Eglise & sermon solennel, fait par vn religieux du conuent. En cestuy an le dixiesme iour de Iuliet, le Roy feit son entrée à Lyon sur le Rosne, laquelle fut tressolennelle, & fut fait plusieurs beaux mysteres & choses ioyeuses, & les ruës richement tendues de fines tapisseries. Le Roy desirant auoir la iouissance de son païs de Milan, y enuoya grosse armée : tellement qu'en moins de quinze iours fut prinse la ville de Milan par les François, & fut le quatriesme iour de Septembre. En ladicte ville estoit le seigneur Ludouic, mais il s'en partit subtillement : nonobstant il cuida estre prins. Et ceux d'Alexandrie de la Paille à cause qu'ils furent rebelles, furent pillés & la plus part de la ville. Et quād le Roy eut nouuelles que la ville de Milan estoit prinse, il partit de Lyon & y alla, & feit son entrée solennellement, puis meit ordre en son cas. Le Roy estant party de Lyon pour aller audit Milan, feit abbatre les bancs & auuens de ladicte ville de Lyon, dont le seigneur de Bersac estoit commissaire de par le Roy. En cestuy an le vendredy deuant la Toussaincts xxv. d'Octobre au matin, tomba à Paris le pont nostre Dame, qui fut vn grand dommage : dont puis apres le Roy y enuoya Iean de Doyac pour donner la conduicte de refaire ledit pont, lequel fut fait en petit de temps. L'an mille cinq cens fut le grand pardon & Iubilé de Romme celebré par Pape Alexandre septiesme, auquel y auoit grand nombre de gens de toutes nations : il y en eust eu encores plus, si n'eust esté que le troiesme iour de Ianuier ou environ, la ville de Milan fut reprinse par le seigneur Ludouic, qui y estoit en personne accompagné de grand quantité d'Allemands. Ladicte ville fut prinse par la trahison des habitans : lesquels rendirent ladicte ville audit seigneur Ludouic, mais les François se porterent si vaillamment qu'ils tindrent tousiours le chasteau, & batirent fort ladicte ville. A cause dequoy és hostelleries sur le chemin de Romme, on feit mourir plusieurs François allans au Iubilé à Rōme : puis apres on le sceut par aucuns, & en feit on telle iustice, qu'on en brusla aucunes maisons, les hostes & famille dedans pour bailler exemple aux autres. Et bailloit le seigneur Ludouic vn ducat de chacune teste des François qu'on luy apportoit. Le Comte Gayache & sa femme vindrent en France, lequel estoit frere de Galiache. En cestuy an le vendredy dixneuuesme iour de Mars, la Royne feit à Lyon sa seconde entrée, laquelle fut auctentique & honneste : les ruës tendues & plusieurs escharfaux, où estoient plusieurs mysteres iouez qui estoit belle chose à veoir. Environ huit iours apres, furent amenez à Lyon vers le Roy aucuns prisonniers, lesquels auoient fait au contraire de leurs sermens, dont chacun murmuroit.

Comment le seigneur Ludouic fut prins prisonnier deuant Nôuare, & amené en France.

LE ieudy deuant Pasques Flories les François feirent tel deuoir, que le seigneur Ludouic s'en fuit avec cent cheuaux, & habandonna toute son armée & artillerie dedans la ville de Nôuare. Et quād les lieutenans & armée des François approcherent, sortit de Nôuare vn capitaine des Bourguignons, appelé le capitaine des Yotiers, lequel se rendit ausdits François luy & ses gens. Le Baillif de Dijon alla audit Nouare pour traicter & practiquer les Suisses du seigneur Ludouic, qui estoient dedans en nombre de quatre mille hommes, qui ne demandoient que payement : & au regard des Lansquenets, ils ne sçauoient encore qu'ils deuoient faire : car les Suisses du Roy ne les vouloient pas prendre à mercy : mais nonobstant les capitaines practiquerent tousiours, que tout se fait sans effusion de sang. Ils estoient à Nouare vingt mille combatans : c'est à sçauoir huit mille Lansquenets, quatre mille Suisses, huit cens Bourgongnons, & le surplus Lombars : & d'auantaigé quinze cens, qui leur venoient à secours qui estoient ja à vn mille de Verseil sans ceux de Vigueue. Peu de tēps apres reuint le seigneur Ludouic & son armée, sortit de Nouare & se mit en camp contre les François : mais Dieu voyant la grād vsurpation que faisoit ledit seigneur Ludouic, donna aux François tel courage, qu'ils estoient deliberez d'eux deffendre : ce nonobstant sans effusion de sang, fut finée la bataille : c'est à sçauoir que ledit seigneur Ludouic estant avec ses gens, delibera de mettre à fin les François. On disoit que les Lansquenets ne voulurent point batailler cōtre leur enseigne : & d'autre part que ledit Ludouic n'auoit pas payé ses gens, comme il deuoit : parquoy n'auoient nulle volenté de le bien seruir. Et d'autre part les François estoient deliberez de frapper dessus l'armée des Millannois. Et quand vint à frapper l'armée dudit Ludouic, se rendit aux François sans coup frapper. Et apres ce le seigneur Ludouic cognoissant ceste chose, finablement cuidant eschapper, il se mit en habit de Cordelier, comme on disoit, & se mettoit parmy ses gens. Monseigneur de Ligny, & monseigneur de la Trimouille feirent si belle & si bonne ordonnance en l'armée, qu'il ne peut eschapper : car lesdits seigneurs feirent passer toute l'armée dudit seigneur Ludouic sous la pique, & finablement il fut cogneu & prins prisonnier, & mis en la garde des François en la ville de Nouare, laquelle fut incontinent rendue és mains des François. Le seigneur Iean Iaques ne faillit pas à la conqueste, car tousiours il auoit esté loyal au Roy : ledit seigneur Ludouic auoit vn astrologue Nigromancien, auquel il creoit fermement : mais son astrologie ne sa nigromancie ne luy valut riens, quand il fut prins. Et fut tel appointement fait entre les capitaines & autres gens de guerre, que les gens d'armes & autres dudit seigneur Ludouic, s'en allerent leurs bagues sauues : & le seigneur Ludouic & l'artillerie demoura au Roy, & par ainsi fut mené ledit Ludouic prisonnier à Nouare. Adonc estoit monseigneur le Cardinal d'Amboise à Verseil, lequel voia le Roy à nostre Dame de bonnes nouuelles. De ceste prinse eut le Roy nouuelles à Lyon la veille de Pasques flories dōt il fut tresioyeux. Et celuy iour fut fait à Lyon feu de ioye, de ce que les François auoient

gagné l'armée dudit Ludouic. Puis apres de rechief vindrent nouuelles que ledit Ludouic estoit prins, parquoy furent encores faits feux de ioye & plusieurs sollennitez audit Lyon: dont petits & grans menoient grand ioye de la victoire, & conqueste. Et furent les enfans dudit seigneur Ludouic menez en Allemagne.

Comment le Cardinal Ascaigne frere du seigneur Ludouic, fut prins & amené en France.

LE Cardinal Ascaigne frere dudit seigneur Ludouic, estoit en la ville de Milan: & quand il sceut la prinse de son frere, il s'en fuit avecques six cens cheuaux & aucune artillerie. Il auoit beaucoup d'Estradiots môtez sur genets, & avecques luy auoit les plus nobles de Milan: & estoit le capitaine principal le Comte Iean frere du Marquis de Mantuë, ils cuidoient aller au païs de Boulongne, mais on disoit qu'il auoit rencôtré vn capitaine Venicien nommé Soucin Bienfon, lequel assaillit ledit Cardinal: parquoy il cria qui viue, on luy respondit S. Marc & Frâce: ceste bataille dura quatre heures, dont ledit capitaine Venicien fut bien blessé & plusieurs de ses gens: mais quand ledit Cardinal qui estoit armé veit que mal alloit pour luy & pour ses gens, il s'en fuit en vn chasteau, qui s'appelle Riuolle: lequel chasteau fut assiegé par ledit capitaine Venicien. Et briefle Cardinal perdit beaucoup de ses gens, & le capitaine frere du Marquis de Mantuë, fut mis à rançon. Avecques ce capitaine Venicien estoit vn nommé Charles des Vrsins. Vn capitaine nommé Badin fut prins avecques l'Abbé de Senselles, & avecques eux quatre Vicomtes & bien cent mille ducats, sans les bagues. Quand le chasteau fut assiegé, le Cardinal fut bien esbahy, à cause qu'il n'y auoit que manger pour luy: & qu'il auoit perdu tout son or & son argent. Ledit Cardinal pria ledit capitaine qu'il le print à rançon, lequel ne voulut: & finalement il se rēdit par tel si: sa vie sauue, & qu'apres sa prinse il fut rendu au Roy de France. Le capitaine le vouloit mener prisonnier à Venise: mais le Seneschal de Beaucaire, monseigneur de Montoison & le Mage-Iuge de Prouence y estoient de par le Roy pour faire raison. Mais les Veniciens cognoissant que ledit Cardinal estoit ennemy du Roy, & qu'il auoit esté prins és païs du Roy és terres de Plaisance: & aussi qu'ils vouloient estre amis du Roy, le meirent & rendirēt és mains des seigneurs François dessusnommez, comme ils auoient promis. Et quād les habitans de Milan sceurent que le seigneur Ludouic auoit esté ainsi prins & son frere le Cardinal, ils trouuerent la maniere d'appoincter vers le Cardinal d'Amboise lieutenant du Roy, dont s'ensuit la teneur.

Comment les habitans de la ville de Milan furent reduits, moyennant aucune somme d'argent.

L'AN mille cinq cens le iour du grand Vendredy aoré xvij. iour d'Avril, les nobles, bourgeois & gens de mestier de la ville de Milan, en recognoissant leur tresgrande faute qu'ils auoiēt commis enuers le Roy Duc de Milan, treshumblement requierent & supplierent tresreuerend Pere en Dieu & tresnoble seigneur George d'Amboise du S. Siege Apostolique, Prestre

stre Cardinal de saint Sixte lieutenant general dudit seigneur, qu'il luy pleust (apres auoir accordé quelque petite somme eu egard à leur faculté pour l'amende prouffitabile, & pour les sauuer de pillerie & feu & sang, que les gens de guerre dudit seigneur estoient prests de faire se l'on ne les faisoit retirer incontinent) soy transporter en la maison du Roy dedans ladicte ville de Milan, pour receuoir l'amède honorable qu'ils auoient deliberé de faire, pour satisfaire en partie à leurdicte faute, en requerant la bonté & clemence du Roy, de prendre pour satisfaction ce qu'eux pourroient bonnement fournir. Lequel tresreuerend Pere en Dieu & tresnoble seigneur leur accorda, & se transporta en ladicte maison que l'on appelle la Court-vieille. Et en laquelle s'assemblerét les nobles bourgeois, & gens de mestier & autres manans & habitans de ladicte ville en grand nombre: & mesmement des petits enfans, fils & filles tous à teste decouuerte, & habillez de toille blanche en procession, avecques l'image de nostre Seigneur en croix & l'enseigne de nostre Dame. Et mondit seigneur le Cardinal assis en son lieu, en la grand court de ladicte maison avecques plusieurs cōseilliers & capitaines du Roy nostre sire, maistre Michel Touse Docteur des premiers practiciens & aduocat de ladicte ville, monta sur vne chaire, laquelle on auoit preparée: & pour tous les nobles, bourgeois, manans & habitans de ladicte ville proposa en la maniere qui s'ensuit.

M O Y indigne suis monté en ceste chaire, tresreuerend & illustre monseigneur le Cardinal, i'ay bien desiré auoir memoire & eloquence pour exprimer le grand vouloir & deuotion que ont tous mes compatriotes & peuple Milanois, & moy avec eux enuers le treschrestien Roy de France nostre seigneur & Duc. Et combien que ie sceusse que mon treshōneste desir ne se pouoit pas accomplir: neantmoins comme bon citoyen de la ville, n'ay voulu refuser la charge: de laquelle ie me despescheray aumoins mal que ie pourray selon ma petite puissance & entendement. Entre toutes les autres citez & villes des Italles, la ville de Milan sans point de doubte, tien la principauté quand elle seroit gouuerné de iustice & droit seigneur, ainsi que tousiours ont desiré les bōs & vrais citoyens: Et puis que Dieu le createur leur auoit octroyé d'estre entre les mains du Roy treschrestien, vray & legitime Duc de Milan qu'ils ne pourroient auoir ne desirer meilleur, plus grand ne plus puissant Prince: leur deuoir estoit de perseuerer en la foy & fidelité, qu'ils auoient iuré entre les mains dudit seigneur: lequel les receut en grand humanité & benignité: & se pouoient bien dire qu'il auoit reintegrez les citoyēs à la patrie, & la patrie à leur fondateur: pource que les François auoient ediffié & fondé la ville de Milan & le paÿs, & iusques à au iourd'huy retient le nom de Gaule deça les Monts. Mais, hélas, ils ont vaincu la plus grand partie de fragilité, en ensuiuant aucuns mauuais & principaux, auōs commis rebellion & crime de leze majesté à tort & sans cause: pource que le Roy nostre sire ne ceux qu'il auoit deputez au gouuernemēt du paÿs, n'ont fait chose, pour laquelle nous d'eussions estre mal contens: car au regard dudit seigneur nous n'auons trouué en luy que toute bonne humanité, amour & clemence. Et au regard de monseigneur de Luson, que ledit seigneur auoit ordonné chief de la iustice par deça, nous ne le pouons charger d'aucune chose: pource qu'il nous a bien & humainement recueilliz, ouïs & despeschez en iustice &

toute sa compagnie, tout ainsi que le bon pere fait à ses enfans. Semblablement du seigneur Iean Iaques, lequel nous a bien & equalement traictez sans difference des personnes: en punissant plustost les siens que les autres, tout ainsi que les bons Romains Brutus & Torquat feirent qui pour le bien de la patrie feirent mourir leurs enfans. Et aussi ledit seigneur Iean Iaques nous donnoit tout ayde & faueur necessaire. Et aussi ont fait monseigneur de Come, & tous les autres de la maison de Triuoulce. Et sur tous sommes bien tenus audit seigneur Iean Iaques, pource q̄ cognoissant la mauuaistié d'aucuns qui ont esté cause de la rebellion, vouldist plustost les gagner par amour en leur faisant honneur & biens que par force: pour non la main mettre au sang de ses compatriotes, & pour garder la ville au Roy & ne la mettre à feu & à sang, ainsi qu'il deuoit faire, & par le deuoir de son office: & ayma mieux soy retirer au chasteau, & de là s'en aller dōt est reuenu à si grand gloire & hōneur de la courōne de France, que de faire quelque exploit de guerre en la patrie, dequoy est ensuiuie la conseruation de la ville, & la victoire digne de memoire sur toutes autres victoires, que ont eües les Roys de France: veu que le seigneur Ludouic Sforce & quasi tous les ennemis du Roy qui estoient à l'opposite de l'armée dudit seigneur, sont prisonniers. Et semblablement monseigneur le Cardinal Ascaigne, & tous ceux qui le suiuoient: parquoy Dieu le createur a mis hors de dangier & peril la ville & Duché de Milan. Et sont les manans & habitans de ladicte ville & Duché bien tenuz à Dieu & au Roy nostre sire, qui n'a pas regardé à leurs fautes & crimes, ne les a voulu punir, ainsi qu'ils auoient gagné. Ains pour obuier à la fureur de son victorieux ost & armée, a pleu audit seigneur d'enuoyer en ladicte ville, vous tresreuerend pere en Dieu & tresnoble seigneur, mōseigneur le Cardinal en vous donnant plain pouoir & puissance, de laquelle auez vŕé si bien & prudemment qu'auez sauué la ville au Roy: dequoy nous trestous & noz enfans & successeurs en sommes tenuz audit seigneur & à vous. Et aussi mercions mondit seigneur l'Euesque de Come des bonnes recommandations qu'il vous à fait: & des bons moyens qu'il a tenus pour la cōseruation de la patrie. Et puis que de vostre clemence & bonté tresreuerend pere en Dieu & tresnoble seigneur, en ensuiuant le vouloir du Roy nostredit seigneur, vous à pleu nous faire dignes de vostre audience: messeigneurs les manans & habitans de ladicte ville & partenances d'icelle, m'ont ordōné de vous faire aucunes humbles requestes. Premièrement que vostre plaisir soit quand serez deuant le Roy nous recommander treshumblement à sa bonne grace: & mettre & asseurer sa royale majesté, que iamais le peuple de Milan ne luy fera faute ne commettra rebelliō contre son honneur ne son estat: & sera semblant à mōseigneur S. Pierre, lequel apres qu'il auoit renié Dieu nostre redempteur eut si grand douleur de son peché qu'il en fut plus ardent & deliberé en son seruice, tousiours requerant mercy de sa faute. Tout ainsi que ie fais à vous, tresreuerend Pere en Dieu & tresnoble seigneur, au nom du Roy nostre sire à deux genoux de par tous nobles, manans & habitans de ceste ville, qu'il vous plaise pardonner la faute & rebellion perpetrée & commise par nous, qui a esté cōtre la coustume dudit peuple, qui tousiours a gardé sa foy. Secondement, tresreuerend pere en Dieu & tresnoble seigneur, combien qu'en partie des frais & mises faictes par le Roy nostre

stre

estre sire par nostre coulpe & faute: & pour r'enuoyer les gēs d'armes qui estoient pour nous piller & tuer: nous ayōs promis & offert, & sommes obligez payer trois cens mille escus: c'est à sçauoir cinquante mille le xij. iour de ce mois, & autres cinquante mille le premier iour de May: & les deux cens mille à vostre voulētē, qu'il vous plaise interceder pour nous enuers le Roy nostre sire, de remettre par grace & misericorde lescits cc. mille escus: pource qu'il seroit impossible leuer tant d'argent & la ville en demoureroit abandonnée. Attendu que tout le bien de la ville gist en fait de marchandise & d'ouurage de drap de foye & de laine: & en ostant ladicte somme d'argent cesseroient, toutes ouurages & marchandises: parquoy la ville en seroit destruite, & consequemment le païs & Duché qui despend d'elle. Et est office de Roy à enrichir ses subiects, plustost que les mettre en pauureté & mendicité. Tiercement nous vous supplions tres-humblement, qu'il vous plaise faire vuidier les gens d'armes du païs le plustost que possible sera, pour sauuer les fruiçts & recueillettes de ceste presente année pour la ville, les subiects dudit seigneur & pour son seruice. Quartement vous supplions qu'il vous plaise reintegrer chacun en son office. Vltimement puis que tressagement & à grande & meure deliberation, vous à pleu separer & exclurre de la grace & misericorde qu'il vous plaist faire aux manans & habitants de ceste ville, les principaux acteurs & participans de ladicte rebellion. Et a pleu à Dieu le createur que monseigneur le Cardinal Ascaigne, & la plus grand partie desdits acteurs participans, soient prisonniers pour la conuersation du païs: lesquels acteurs & participans pour l'auctorité & biens qu'ils auoient, tenoient les autres bēdez & en crainte reuerenciale: qu'il plaise au Roy & à vous, monseigneur, d'y dōner teller prouisiō & remede, qu'ils ne puissent doresnauāt troubler la ville ne le païs, & nous mettre en difficulté & dangier de noz vies, hōneur & biēs: ainsi qu'ils auoient fait dernièrement, si n'eut esté la grace & misericorde du Roy & la vostre. En vous assureāt, tresreuerēd pere en Dieu & tresnoble seigneur, que nous qui sommes demourez, sommes deliberez d'estre tous vn corps & vn ame vnīs au bien & au seruice du Roy nostre sire: ne iamais doresnauant ne se parlera plus de bendes, discordes ne differences entre nous, ainsi que l'experience vous monstrera, en nous accordant noz tresnobles requestes, ainsi que nous auons nostre parfaicte foy & esperāce pour vostre benigne grace, & vostre tresreuerente & noble seigneurie, fera ce qu'il appartient à vn tresnoble seigneur de la maison dont il est, & chose bien agreable à Dieu & digne de memoire, de coucher en impressiō de marbre à la louēge & gloire de la court celestielle, de la royal majesté & de vostre tresreuerende & tresnoble seigneurie: à laquelle ce peuple Milannois qui est icy, & moy de rechief à genoux treshumblement nous recommandons. Laquelle proposition faicte par ledit maistre Michel, mondit tresreuerend pere en Dieu, & tresnoble seigneur monseigneur le Cardinal cōsulta la respōce avec messeigneurs le Marechal de Triuolce, l'Euesque de Luson Chancelier de Milan, monseigneur de Neuf-Chastel & autres chambellans, conseilliers & capitaines dudit seigneur, commanda à maistre Michel Ris docteur en droit civil & Canon, & conseiller dudit seigneur en son grand conseil en la Court de Parlement de Bourgongne, & en son Senat de Milan, de faire ladicte respōce qui fut faicte en la maniere qui s'ensuit.

M I S E R T V S est dominus super Niniuem ciuitatem: eo quòd pœnitentiam egit in cinere & cilicio. A entendu, messeigneurs les Milannois, tresreuerend pere en Dieu & tresnoble seigneur monseigneur le Cardinal icy present, lieutenant general du Roy Duc de Milan, vostre humble requeste & proposition plus humainement que voz demerites ne requeroient. Et à cause que la tresgrande bonté & misericorde dudit seigneur soit plus manifestée, a ordonné de vous faire entendre vostre tresgrande faute & inexcusable rebellion: ce que volentiers sa tresreuerende & tresnoble seigneurie auroit fait par sa bouche, s'il eut bien sceu parler vostre langage. Et pource que ie suis iceluy qui par commandement, du treschrestien Roy nostre sire, le iour qu'il print de vous le sermēt de fidelité par son commandement, portay la parolle, vous exhortant de par luy tenir foy & loyauté, dequoy vous en viendroitz beaucoup d'honneur & de biēs: & en ce faisant autrement beaucoup de maulx & inconueniens: ensemble à pleu à mondit tresreuerend & tresnoble seigneur par moy, & par ma bouche vous faire recognoistre vostre tresgrande desloyauté & infidelité: & pour cognoistre plus appertement la tresgrande pitié & clemence du Roy nostre sire. Voz fautes & demerites, ô Milannois, sont si grandes & enormes qu'on ne sçauroit trouuer punition egale: & ne seroit pas assez se le Roy vous punissoit ainsi que les Romains feirent aux Samiens, desquels est escrit aux histoires. *Ita ruinas urbis diruerunt vt hodie Samus in ipsa Samo requiratur*. Ne la punition que feit Archila Roy des Gots contre les Rommains: de laquelle les enseignes en apparent au iourd'huy aux murailles & edifices de ladicte ville. Ne celle que le Roy Alexandre feit contre les Thebains. Et l'on trouuera bien par les histoires, que pour moindre faute l'Empereur Charles le Grand Roy de France, & l'Empereur Frederich premier de ce nom punirent asprement ceste ville de Milan. Et pour vous faire cognoistre vostre tresgrande ingratitude ainsi quil a esté dit par vous, vous auez erigé, principe & cōmencemēt des Frāçois. Le treschrestien Roy est vostre vray, indubitat & naturel seignr, auquel vous deuez amour, foy & obeissance, ainsi que Dieu l'a ordonné & les loix: car le sage lignage au premier article q̄ les loix qu'il donna au Spartans dit. *Populum in obsequia principū, principes ad iustitiam imperatorum infirmabit*. Et outre que le Roy nostredit seigneur soit vostre vray & naturel seigneur, né & descendu de la legitime, il vous a fait de sa bonté & clemence innumerables benefices. Il est venu en personne pour vous deliurer de seruage, auquel estiez non pas par ambition ne pour appetit desordōné d'acquérir Royaumes & païs: mais pour pitié qu'il auoit de vous vrais subiects du Duc Iean Galeache vostre premier Duc, & de tresexcellente Dame, dame Valentine sa fille grand mere dudit seigneur. Il vous rappelle à vostre païs: la iustice laquelle en estoit bannie, & le tout se conduisoit à l'arbitre d'un homme. Il vous assure de corps, d'honneur & de biens, que parauāt n'estoit personne qui eut peu dire cecy est mien. Il vous a pareillement donné la liberté de mariage, que parauant le pere ne pouoit marier sa fille ne semblablement le frere la sœur à leur volenté: mais tout à l'appetit du seigneur. Les offices qui estoient par temps, il les a fait perpetuelles. Il vous a ostez de toutes pilleries, concutions & exactions. En outre & par dessus les grans & innumerables benefices qu'auetz receuz de luy, vous estes obligez par serment à luy estre feaux & obeissans: &

neantmoins

neantmoins aucuns en faisant le serment pensoient de le tromper. Et trestous vous autres Milannois oubliez le salut de vostre ame & de vostre honneur, non ayans regard au dangier, auquel vous vous mettiez, voz femmes, voz enfans & la ville: auez conspiré cōtre ledit seigneur, laissant le vray & iuste seigneur pour le Tirant: le premier Roy des Chrestiens, pour vn homme priué de petite extraction: vn trespuissant Prince, pour vn homme pauvre de cueur, de biens & d'amis. Et se i'eusse l'entendement & la langue pour accuser vn si tresgrand cas, ie ne le scauroye faire en deux iours, mais vostre conscience vous en dit plus auant que ie ne fais. Et si pouez bien dire de vous ce qui est escrit: *Populus dure cervicis*. Vostre seigneur Ludouic que vous auez rappellé en commettāt si tresgrand faute & desloyauté contre vostre vray & naturel seigneur: Incontinent qu'il est arriué ne luy a pas esté assez de prendre les biens des particuliers, mais a prins les croix, calices & ioyaux des Eglises n'est à merueilles: car comme est escrit de Cambises Roy de Perse: *Difficile enim erat ut parceret suis, qui contempta religione grassatus etiam in Deos fuerat*. Et combien qu'à vn si grand & enorme delict y soient plusieurs desuoyez de coulpe, n'y a personne qui s'en puisse bonnement excuser: car il estoit bien ayse du commencement resister à la malignité des coniurateurs: lesquels ne se fussent pas aduācez, s'ils eussent doubté du peuple de Milan. Ne se peut personne excuser d'auoir receu le seigneur Ludouic à si grande feste & ioye, comme se Dieu fut descendu du ciel en terre. Le peuple de Milan a aydé ledit seigneur Ludouic d'argent & de gens: les ioyes & festes que vniuersellement ont esté tenues pour sa venue, & pour ses courtes victoires d'auoir gaigné la ville de Nouare, sont toutes notoires. Regardez donc Milannois la iustice de Dieu le createur comment elle a esté manifestée. Et la tresgrand puissance qu'il luy a pleu donner au Roy nostre sire, que quād vous cuidiez auoir tout fait pour auoir gaigné Nouare, vous auez tout perdu: & vostre idolle le seigneur Ludouic prisonnier, & l'on dira de luy comme il est escrit de Perse. *Seruit alteri cui nuper mediolanum seruiebat*. Quoy qu'il soit, ô Milannois, la grande fontaine de pitié du Roy nostre sire n'est pas cessée pour vostre grande ingratitude: & la bonté de mōdit seigneur le Cardinal vous est au iourd'huy assez manifestée, & en l'hōneur & reuerence du iour: auquel pleut à Dieu nostre createur endurer mort & passion en l'arbre de la croix, mondit seigneur le Cardinal de par le Roy vous pardonne voz vies, vostre honneur & biens, vous exhortant à vous garder doresnauant de iamais plus encourir, non seulement crime de rebellion: mais seulement suspeçon quelcōque dudit crime: pource qu'en faisant quelque semblāt de desuier de l'affinité dudit seigneur, vous serez punis si asprement que la memoire en demourera à tousiours & à iamais. Et en faisant ce que bons & loyaux subiects doiuent faire enuers leur vray & naturel seigneur, la ville & paÿs en amendera de mieux en mieux, & vous trouuerez tresaises & trescontens: pource que c'est vne grande liberté de viure sous vn vray & naturel seigneur. Et au regard de voz requestes, vous les baillerez par escrit: & mondit seigneur le Cardinal vous en fera responce: de laquelle vous aurez occasion & matiere de vous contenter. En exceptant, toutefois, de la presente grace & remission, les aucteurs & participans de ladicte rebellion: & ce fait tous lesdits petits enfans en procession passerent par deuant

mondit seigneur le Cardinal en criant France, France, France & misericorde. Le iour saint George la Royne partit de Lyon pour aller à saint Claude à moult belle compagnie, mais avant qu'elle reuint, elle fut commere du Prince d'Orenge: car sa femme estoit accouchée en ce temps d'un fils. Audit an le ij. iour de May le seigneur Ludouic fut amené à Lyon, il auoit vne robe de camelot noir à la mode de Lombardie, & estoit monté sur un petit mulet. Le Preuost de l'hostel & le Seneschal de Lyon luy furent au deuant, & le firent prisonnier de par le Roy, puis on le mit au chasteau de Pierre Size: & pour veoir le Ludouic, y auoit grand nombre de gens par les rues, par où il passa: & estoit le Roy à Lyon. En cestuy an & le xij. iour de May, fut fait à Lyon le mariage de monseigneur de la Roche, Baron de Bretagne & de la Princesse de Tharente, fille de Dom Frederich de Naples: pourquoy furent faictes ioustes & esbattemens present la Royne, dames & damoiselles: & avec la Royne estoit la femme du Comte Galliche, & en aucuns lieux de la ville furent faictes ioustes & tournois. Ledit seigneur de la Roche espousa le xvij. iour de May à S. Croix pres S. Jean de Lyon, dont de rechief on fit iouste en la Grenette. Les gentils-hommes qui ioustoient à cheval de bois & lisses de cordes couuertes de drap de soye qui estoit vne chose si mignonnement faicte que merueilles & tresioyeuse à veoir. Le xiiij. iour du mois de May le seigneur Ludouic fut par le vouloir du Roy & du conseil mis hors du chasteau deuant dit, & fut mené en France en un chasteau nommé Loches pres de Bourges. Le dimenche xxiiij. dudit mois monseigneur de Ligny retourna de Lombardie, & arriva à Lyon dont le Roy enuoya au deuant beaucoup de gens de bien. En cestuy an xvij. iour de Iuing veille de la feste Dieu, le Cardinal Ascaigne frere du seigneur Ludouic fut amené à Lyon prisonnier du Roy: & fut mis en prison au chasteau de Pierre Size, où son frere auoit esté mis: mais quand il fut en France, il fit tant qu'il fut en la grace du Roy & eut France pour prison. Monseigneur le Cardinal d'Amboise & monseigneur de la Trimouille venant de Lombardie, arriuerent à Lyon le xxj. iour de Iuing: & avec eux estoit le seigneur Iean Iaques, lequel amena sa femme en France. Environ la fin de Iuillet le Pape Alexandre vij. estant à Romme, fut frappé de la tempeste & fort blessé: mais il se recommanda à Dieu & à nostre Dame, puis il fut guarý, & fit vne solennelle procession, où il fut en personne: bailloit plaine absolutiõ à chacun l'accompagnant comme en l'estat d'innocence: Et disoit on qu'il fut ainsi frappé la veille ou surueille de la S. Pierre. Audit an le xxj. de Iuillet, le Roy & la Royne partirent de Lyon pour aller à Troye en Champaigne à cause que l'ambassade d'Allemagne y deuoit venir. Audit an le iour S. Anne xxvj. iour de Iuillet trespassa à Lyon le Roy d'Iuetot, & fut enterré à S. Croix pres S. Jean de Lyon. Audit an le xxviiij. iour de Iuillet par un dimenche matin, tomba à Lyon la penultime arche du pont de Rosne vers Becheuelain, & demoura l'autre muraille & l'arche entiere: & n'y pouoit on passer fors qu'en dangier, & par dessus la muraille. Audit an les Suisses firent guerre es pays du Roy, à cause de quoy aucuns des Suisses de la garde du Roy s'en allerent en Suisse: mais ceste guerre fut tantost accordée. En cest an environ la saint Symon saint Iude, mourut monseigneur de Bordeaux Archeuesque de Lyon: & apres luy succeda à l'Archeuesché de Lyon François de Rohan fils de monseigneur le Marechal de

Gié.

Gié. En cestuy an le Roy enuoya à la Vaupute vn docteur de Paris pour les cōuertir d'aucunes fantasies qu'ils tiennent, mais il n'y fait riens. En cestuy an deuant Noël la riuere de Sone fut gelée iusques à Mascon dont à cause qu'il ne venoit à Lyon bled n'y autre chose, le pain y fut chier. Et le iour de S. Thomas apres, le Rosne creut si fort iusques enuiron le disner, que c'estoit merueilles: & ne la veit on iamais en demy iour croistre si fort. L'an mille cinq cens & vn mourut l'Euesque d'Amiens natif de Bourgongne d'un lieu nommé Arbois: & luy succeda monseigneur de Nevers. En cestuy an fut vn Iubilé en France pour faire guerre aux Turcs, laquelle chose on fait: Il fut aussi prins en France dixiesme des benefices, aussi pour faire ladicte guerre. En cestuy an l'Archeduc Philippe & sa femme furent à Paris, & se declairerent amis du Roy: Puis alla ledit Archeduc en Espagne, & y mena sa femme, laquelle y accoucha d'un fils. En cestuy an on enuoya à Naples plusieurs pietons & grand nombre de lards & beufs salez: & estoit le Roy & la Royne à Lyon pour veoir partir lesdits pietons Picards & Normans. La femme du Duc Regné de Lorraine avecques son fils, vint à S. Claude: puis vindrēt à Lyon vers le Roy & la Royne: dōt ledit fils demoura en la court du Roy, & eut pēson: & la mere retourna en Lorraine, & la Royne luy donna vne haquenée blanche tresrichemēt accoustrée de bordure. C'est à sçauoir de veloux cramoisy semé de cordelieres, & fut le mois de Iuillet.

Comment le Roy enuoya grand nombre de pietons à Naples pour la reconquester: & en petit de temps fut prinse & Frederich soy disant Roy vint en France.

LE Roy desirant auoir la iouissance de son Royaume de Naples, y enuoya grand nombre de gens d'armes par terre & par mer: & tant exploicta mōseigneur d'Aubigny lieutenant général pour le Roy, qu'en brief temps il arriua audit païs: tellement qu'incontinent il print la ville de Naples. Et estoit adonc Dom Frederich audit Naples, lequel se disoit Roy du païs apres la mort du Duc de Calabre nōmé Ferrand: lequel Frederich se rendit quād il veit qu'il ne pouoit resister: dōt il fut accordé qu'il deuoit venir en France vers le Roy, pour mettre ordre en tout: car il ne vouloit pas estre ennemy du Roy, considerant qu'il n'estoit pas pour resister à sa puissance. Aucuns de ses enfans furent prins secrettemēt & menez au Roy d'Espagne. De la prinse de Frederich & de la ville de Milan, furēt apportées nouuelles au Roy à Lyon le viij. iour d'Aoust, dont fut mené grand ioye & faits feux de ioye & processions, rendāt graces à Dieu de la victoire. En cestuy an le iour de nostre Dame de Septembre au soir, le feu se meit aux Celestins de Lyō, où il y eut grād dommage: car tout le conuēt cūida brusler: mais en brief tēps fut mieux edifié que iamais & se print le feu en la cheminée de la cuisine. En cestuy iour trespassa frere Ieā Tisserant Obseruantin, dont est parlé deuant. En cestuy an le ij. iour de Nouēbre iour des morts arriua à Lyon Dom Frederich de Naples, & fut mené en France.

Comment monseigneur le Cardinal d'Amboise fait son entrée à Lyon à cause qu'il fut Legat en France.



N cestuy an le dimenche vij. iour d'Octobre, monseigneur le Cardinal d'Amboise feit son entrée à Lyon, à cause qu'il fut fait Legat en France. Ladicte entrée fut tresbelle & sumptueuse: les rues tendues de tresriches tapis, & furent ioüez plusieurs beaux mysteres par les rues où il passa. Et estoit le peuple tresioyeux de sa venue, à cause que fut fait le traicté & appoinctement & paix entre les Princes Chrestiens: laquelle paix fut criée à Lyon le samedi deuant Noël, dont furent faits feux de ioye par les habitans de ladicte ville. Enuiron ce temps ma dame Marguerite fut mariée au Duc de Sauoye, & feit son entrée à Genéue le mois de Decembre.

Comment apres que Naples fut prinse les Francois feirent guerre aux Turcs.



'An mille cinq cens & deux fut le Iubilé pour la croisée: & fut en toute la Chrestienté comme on disoit, affin que chacun Prince feit guerre aux Turcs: mais les Princes eurent quelque diuision, parquoy faillit leur entreprinse: mais le Roy de France se monstra treschrestien comme il est appellé. Car apres la conqueste de son Royaume de Naples, luy desirant l'augmentation de la Chrestienté, feit marcher les François tant par mer que par terre pour faire guerre aux Turcs, lesquels estoient descenduz iusques vers Venise: car par auant les Turcs auoient fait guerre aux Veniciens. L'armée des François se porta vaillamment pour venir à la conqueste de Constantinoble, & l'a remettre à la foy Chrestienne. Monseigneur Philippe de Raustain estoit capitaine des François: lesquels meirent le siege deuant la ville de Methelin à la fiance des Veniciens, lesquels auoient promis au Roy d'auitailier l'armée des François: laquelle chose fut faicte au contraire, car les gens d'armes de France furent cinq iours sans auoir nuls viures. Et qui pis est, lesdits Veniciens donnerent passage à l'armée des Turcs, lesquels frapperent sur les François, là où mourut beaucoup de gens de bien: & furent prins trente & deux prisonniers, tellement que le Pape donna pardons pour les mettre hors de prison, & de tout ce, fait mention la bulle. Et moyennant ces choses l'armée fut röpue: mais qui eust tenu promesse aux François ils eussent en peu de tēps conquis la plus grād partie de Turquie. En cestuy an le iour de nostre Dame de Mars, fut le iour du Védredy Sainct, parquoy le pardon fut à nostre Damedu Puys en Auergne: auquel pardon y eut grand nōbre de gēs tuez, car la grād multitude des gens röpirent vne muraille à force d'estre ferrez: parquoy ladicte muraille röpita & tua ceux qui estoient de l'autre costé en tombant dessus eux, plusieurs autres moururent en la presse. En cestuy an enuiron quinze iours deuant la S. George, mourut le Prince d'Orenge: & luy succeda vn sien fils bien ieune. En cestuy an fut fait le mariage du Roy de Hongrie & d'Anne de Candale fille de monseigneur de Candale de la maison de Foix: laquelle peu de temps apres elle feit son entrée à Lyon, où furent faits beaux mysteres: Puis elle partit de ladicte ville & fut menée en Hongrie, où fut le mariage consommé, & apres ont eu de beaux enfans ensemble. Petit de temps apres le Roy s'en alla en Lombardie, & fut à Gennes où il feit son entrée: & luy donnerent les habitans de la ville, grans dons & se donnerent à luy: en laquelle ville le Roy y fut long temps, puis retourna en France le mois de Septembre. Enuiron ce temps René Bastard de

de Sauoye fut dechassé dudit paÿs, lequel eut refuge au Roy de France, dont le Duc de Sauoye Philebert & ma dame Marguerite sa femme furent bien mar-
ris: car ledit René aduertit le Roy de plusieurs choses, lesquelles estoient ma-
chinées & disposées de faire au preiudice de la couronne de France: puis apres
aucuns temps il fut en proces contre ladicte Dame, à cause d'aucunes places
que le Duc auoit données à ladicte dame: lesquelles estoient audit René par
achapt. Le Roy estant au Daulphiné, le Duc de Sauoye & ma dame Margue-
ritte vindrent à Lyon vers la Roïne & ne fut point faicte d'entrée: ils n'y furent
gueres plus de quatre ou six iours, qu'ils retournerent en Sauoye vn petit deuât
que le Roy arriuaſt audit Lyon. Peu de temps apres le General des Cordeliers
vint en France, & feit tenir à tous les Cordeliers l'ordre de l'Obſeruāce: car ainſi
le vouloit le Roy, cognoiſſant qu'ils estoient trop mondains, & qu'il valoit
mieux dix bons religieux que deux mille vicieux. En ce temps la veille de la S.
Martin, la femme de Dom Frederich vint en France, & amena son train & au-
cuns de ſes enfans. L'an mille cinq cens & trois l'image noſtre Dame du Cloi-
ſtre, laquelle estoit au cloiſtre des Cordeliers de Lyon, fut apportée en l'Eglise
en la chappelle de S. François: ceste image estoit paincte en plate paincture, par-
quoy on rompit le mur & fut portée en ladicte Chappelle, où elle eſt à preſent
treſrichement accouſtrée. Enuiron Karesme entrant la grand maison du Roy
de Dijon fut brulée en nettoÿāt la cheminée par vne couleurine, qu'on y iecta,
dont fut toute arſe: mais le Roy en peu de tēps apres la feit refaire toute neufue
auſſi belle que iamais. Audit an enuiron le xxj. iour d'Auril le Roy estant à Lyō
feit vne abolition de payages, treuz, impoſts & autres nouueaux ſubſides mis
ſus depuis cēt ans ſans octroy de Roy, de nō plus les leuer ne receuoir ſur peine
de perdition deſdits payages, & d'amēde arbitraire par le Roy & par ſes lettres
patentes contenant edict perpetuel, octroyé aux marchans frequentans les ri-
uieres du Roſne & de la Saonne, & autres riuieres nauigeables cheans & deſcē-
dans en icelles depuis la ville & lieu de Pontarly au deſſus d'Auxonne iuſques
à la mer: & auſſi par terre, tant France, Maſconnois, Lyonnois, Languedoc que
Daulphiné. Et auſſi d'oſter deſdictes riuieres les eſclufes, peſcheries, naſſiers,
molins, bennes, combres & autres choses empeschans le cours deſdictes riuie-
res & paſſages de barques ou baſteaux, ſinon que premierement ne ſoit fait par
commandement de Roy. Et fut ce paſſé à Lyon ſur le Roſne. L'armée du Roy
eſtant à Naples gaignoit touſiours paÿs marchant & conquerant vaillamment,
iuſques en Cicile, tellement que tout trembloit deuant eux.

Comment l'Archeduc feit ſon entrée à Lyon ſur le Roſne, & du ſecond heretique.



E xxij. iour de Mars l'Archeduc Philippe feit ſon entrée à Lyon, la-
quelle fut treſbelle. Il venoit d'Eſpaigne, mais auant qu'il entraſt és
paÿs & terres du Roy il demanda oſtage: c'eſt à ſçauoir que cinq ou
ſix des plus prochains de la Couronne, fuſſent enuoyez en ſes paÿs
& terres durant le temps qu'il ſeroit en France: laquelle chose fut faicte, car le
Roy n'y entendoit que tout bien: ledit Archeduc ne feit pas cela ſans cauſe, pre-
ſuppoſant qu'il doubtoit aucune chose: de la veüe duquel le peuple, ſe reſioüiſt
à cauſe qu'il auoit charge de faire la paix entre le treſchreſtien Roy de France,

RR

& le Roy d'Espaigne, laquelle il feit: car le Roy estant à Lyon avec la Roynie & toute la noblesse de France, fut criée ladicte paix en ladicte ville de Lyon le iiij. iour d'Auril: c'est à sçauoir entre le Roy de France & le Roy d'Espaigne, comprenant l'Archeduc & le Roy des Rommains & leurs alliez. Puis ledit Archeduc s'en alla à Bourg en Bresse au pays de Sauoye, & là veit le Duc Philebert & sa sœur dame Marguerite femme dudit Duc Philebert de Sauoye. En ce tēps environ le xiiij. iour d'Auril vint à Lyon vers le Roy monseigneur Iean de Horne, Euesque du Liege à cause que monseigneur de la Marche estoit en different avec luy, & disoit on que le Roy en auoit la charge, & qu'ils s'en estoient remis du tout sur luy pour les accorder, laquelle chose fut faicte. Peu de temps apres l'Archeduc estant audit Bourg en Bresse, le Roy d'Espaigne fait descendre à Naples grand armée, lesquels assaillirent les François qui entendoient estre en paix avec le Roy d'Espaigne & les Espaignols. Nonobstant il y eut grand bruit, dont monseigneur de Nemours fut tué par grand trahison. Et nonobstant la paix, les Espaignols prindrēt la ville de Naples qui fut contre le sermēt du Roy d'Espaigne: Et disoit on que le Pape Alexandre vij. auoit auitaillé les Espaignols. Monseigneur d'Aubigny se retira en la Calabre avec peu de gens: & si les François eussent esté secourus, ils eussent bien gardé leurs ennemis de venir à leur entreprinse. Encores disoit on plus, qu'aucuns François s'entendoient bien avec le Roy d'Espaigne, qui par aduenture apres a bien esté sceu. Peu de temps apres fut enuoyé monseigneur de la Trimouille au pays de Naples, lieutenant general pour le Roy: mais si griefue maladie le print en chemin qu'il demoura, & finalement retourna en France. En cestuy an aduint à Paris vne chose merueilleuse: c'est à sçauoir d'un ieune escolier de l'age de xxij. ans, lequel estoit natif d'Abeuille: son pere & sa mere estoient gens de biē & d'auctorité: cestuy escolier alla le iour S. Loys au mois d'Aoust en la S. Chappelle du Palais: On chantoit vne messe en vne chappelle à main dextre, & seruoit à ladicte messe cestuy escolier. Quand vint à l'heure de la cōsecration du corps de Iesus Christ, ledit escolier print l'hostie entre les mains du Prestre & s'en fuit, & l'éporta iusques à la court dudit Palais deuant la chambre des Comptes: & quand il veit qu'on le suiuoit il rompit ladicte hostie en pieces, & l'a iecta sur le paué: parquoy il fut prins & mis en prison en la conciergerie, & ne peut estre conuertie pour admonestement qu'on luy fait. Ce considéré on alla querre son pere & sa mere: & quand ils furent venus à Paris ils furent moult desplaisans du cas, & principalemēt de son obstination & malice: de laquelle chose sa mere mourut de dueil & de desplaisance en la ville de Paris. Et le pere le renōça à fils cōme heretique & le vouloit tuer soy mesmes. La iustice l'interroqua quelle loy il tenoit: Il disoit qu'il tenoit la loy de nature: & disoit on qu'il auoit hanté avec aucuns escoliers d'Espaigne, lesquels s'en fuirēt. Aussi fut faicte processio generale à la S. Chappelle pour prier Dieu qu'il voulust conuertir ledit escolier, en la presence duquel fut faicte la predication par un Docteur. Apres ladicte chose faicte la iustice voyāt qu'il estoit tousiours obstiné, il fut condamné d'estre traîné depuis la prison iusques au lieu, où il auoit iectée ladicte hostie. Puis fut mis en un tombereau au propre lieu, où il eut le poing coupé. Puis fut mené au marché aux pourceaux, où il fut brûlé. Du long du chemin fut tousiours admōnesté de soy repētir par trois Docteurs,

monseigneur

monseigneur maistre Jean Standun, vn Cordelier & vn Iacobin: dōt ledit Standun ne le laissa point iusques à la mort, nonobstāt qu'il mourut en son obstinatio. Depuis l'heure qu'il eut commis le cas y eut tousiours vn drap d'or & deux cierges ardans dessus le lieu, où il iecta ladiēte hostie: puis apres fut depaué & de nouveau repaué, & mis les pierres au tresor de la S. Chappelle avec les pieces de ladiēte hostie, qui furent recueillies & assemblées à grand diligence & est tenu pour reliquaie. Audit an enuiron la fin du mois d'Aoust mourut le Pape Alexandre vij. le Roy de France estant à Macon: parquoy par le cōmandement du Roy monseigneur le Cardinal d'Amboise Legat de France, le Cardinal Afcaigne frere du seigneur Ludouic alors prisonnier en Frāce, le Cardinal S. George & autres Cardinaux & gens de bien, allerent à Romme pour eslire le Pape. Audit an le lundy deuant la S. Michel, enuiron neuf ou dix heures, tōba de tout poinct l'arche du pont du Rosne de Lyon.

LE Cardinal de Sene fut esleu Pape à Romme & nommé Pius tertius, lequel estoit nepueu de Pape Pie second: lequel apres son election ne vesquit qu'environ huiēt ou dix iours, & commençoit ja à faire de grans outrages aux François, & fut cent sixiesme Pape. Audit an le mercredy deuant la saint Luc mourut monseigneur Pierre de Bourbon, & estoit le Roy à Macon: lequel seigneur fut fort plainēt, car il auoit tousiours esté bon & loyal à la couronne de France & de bon conseil. Audit an enuiron le disneufiesme d'Octobre, mourut à Romme le Pape Pie tiers: & comme dit est ne vesquit en sa Papalite que huiēt ou dix iours. Parquoy les Cardinaux feirent nouuelle election. Les François estans à Naples tuerent grand nombre d'Espaignols: & s'ils eussent peu auoir secours ils eussent fait fuir lesdits Espaignols de Naples, car monseigneur d'Aubigny sy monstra vaillant & courageux.

Comment le Cardinal de S. Pierre ad vincula fut fait Pape.

LE Cardinal de saint Pierre *ad vincula* Legat d'Auignon, nommé François de Sauone, fut fait Pape de Romme le cent septiesme & nommé Iulius second, lequel estoit nepueu de feu Pape Sixte quatriesme: lequel auoit aussi nom François de Sauone auant sa Papalite, & estoit pareillement Legat d'Auignon & Cardinal de S. Pierre *ad vincula*. Cestuy Pape Iules à present est cestuy qui fut avec le Roy Charles à la conqueste de Naples. Apres son electio son nepueu fut Cardinal de S. Pierre *ad vincula* & Legat d'Auignon. L'armée du Roy estant deuant Saulse en la Cōté de Roussillon, fut tresmal cōduite par aucūs à qui le Roy auoit parfaicte & tresferme fiāce: car ladiēte armée estoit si tresbelle & biē entreprinse q̄ merueilles: les François ne vouloient nullement prēdre le chasteau ne les gens d'armes & capitaine de dedans leurs vies sauues, nonobstāt que la pluspart le vouloit, mais aucūs nō: Ledit chasteau fut miné sous terre iusques aux fondatiōs. Le siege estoit en vn parc subtillemēt fait, & en telle façō qu'on n'eut peu greuer les Frāçois: mais le Roy d'Espagne à force d'argent cōme il a esté sceu depuis, auengla les yeux à aucūs tellement que les loyaux François furent biē esbahis quād il cogneurent la grād trahison & si euidēte. Mōseigneur le Mareschal de Rieux Bretō, lequel auoit la charge de l'armée, s'en alla à Narbone, dont les Frāçois furēt mal cōtens, à cause

que le cap demoura sans cōduicte: mais nonobstāt chacū sy porta si vaillāmēt, qu'ils leuerēt l'ost & emmenerent l'artillerie sans riēs perdre, & si vaillāment se defendirent q̄ merueilles, parquoy chacū se retira: mais qui eust fait comme on deuoit & tenu promesse au Roy, deuāt peu de tēps on eust gaigné grand païs, veu la belle ordonnance de l'armée des François. Deuant ledit Saulse fut tué d'un coup d'artillerie monseigneur de la Roche-Pot, dont ce fut grand dommage: car il estoit vn bon & vaillant cheualier & en fut le Roy marry à merueilles, & aussi tous ceux de l'armée. L'armée de Naples estoit tousiours en vertu, car les François gaignoient tousiours païs. En cestuy an la veille de Noël, mourut à Lyon Loÿs mōseigneur de Luxembourg seigneur de Ligny enuiron la minuiet: dont le Roy, les gentils-hommes de court, manans & habitans de Lyon, furent bien marris & non sans cause, car c'estoit vn seigneur bien aymé de chacun. En cestuy an le troisieme iour de Iuillet par vn matin, trespassa frere Pierre Cardinal d'Ambusson grand maistre de Rhodes, lequel gouuerna Rhodes vingt & sept ans: dōt és premiers ans fut assailly de guerre par les Turcs iusques en la ville de Rhodes, dont ledit Cardinal & maistre des Rhodiens fut victorieux, & y demourerent plus de xl. mille Turcs morts, & tous les autres Turcs qui là estoient s'en fouyrent: de laquelle chose furent les habitans de Turquie tresdeplaisans, quand ils sceurent la grand desconfiture de leurs gens: dont crierent tous à haulte voix: Mahon donne nous en vengeance. Et le grand Turc voyant son armée ainsi deffaicte, feit vn cry horrible à ouïr, dōt les Turcs furent moult desconfortez. Puis apres le grand Turc iura deuant tous d'en prendre vengeance, & feit marcher son armée vers Rhodes, mais ainsi deliberé il mourut. Ledit grand maistre de Rhodes tint treize ans prisonnier l'heritier du grand Turc outre le gré de plusieurs: puis le rendit au Pape: le Pape Innocent luy enuoya le chapeau de Cardinal à Rhodes. Puis il feit reparer les murs de ladiete ville, lesquels auoient esté par les Turcs gastez & rompus. Apres il conuertit tous les Iuifs de la ville de Rhodes, & a obtenu l'alliâce de tous les Princes Chrestiens, & plusieurs grans biens ont esté par luy faits. Et apres luy est succédé vn des freres de monseigneur le Legat de Frāce, lequel incontīēt alla à Rhodes pour resister aux Turcs, lesquels faisoient bataille & guerre aux Chrestiens.

Comment Sophiz feit guerre à Vsson Cassan Turc.

E septiesme iour de Decembre mille cinq cens & deux, cestuy grand maistre de Rhodes Cardinal d'Ambusson eut nouuelles du païs d'Armenie & de Perse: c'est à sçauoir d'un nommé Sophiz Chrestien ou bonnet rouge d'armenie, comme luy voulant venger la mort de son feu pere, lequel fut tué par Vsson Cassan Turc & ses gens deffaits: lesquels estoient en nombre quarante mille hommes: & aussi luy desirant recouurer tous les Sophines, qui alloient expressement par la Turquie. Et attendu la mauuaise compagnie & iniquité que le grand Turc faisoit ausdits Sophines, fest party de son païs appelé Adanil, loing de Thoris douze iournées: & estoit venu pres de Arzian ville dudit Vsson Cassan, accompagné de cent hommes de guerre tant seulement en bonne paix & amour: lequel impetra dudit Vsson Cassan foy d'amitance, cōme son loyal amy & parent à cause de sa mere: laquelle estoit seur dudit Vsson Cassan,

Cassan, en faignant d'attendre certain nombre de ses gens pour paruenir à son intention, pource qu'il se tenoit fort iniurié du grand Turc: lequel comme dit est, lesdits Sophines ses vassaux en telle maniere qu'en l'espace de quinze iours, recouura de ses gens iusques au nombre de seize mille hommes: avec lesquels entra dedans Arzian violement & par force, & fait tailler en pieces petis & grans. Et entre les autres choses qui sont dignes de memoire, fait que tous les Mosques des Turcs, autrement appelez temples pour plus grand mesprisement, fait lier dedans iceux les cheuaux comme vne estable, puis les fait abbatre & arraser iusques au fondement. Illec aupres auoit vn temple de Chrestiens qui auoit autresfois esté destruit par le Turc, lequel temple incontinct ledit Sophiz fait reparer & refaire solennellement: puis partit tousiours croissant son armée: puis alla en la Prouince de Firnam qui est seigneurie fort diuerse, laquelle appartenoit audit Vison Cassan. Voyant ledit Vison Cassan, que ledit Sophiz subiugoit ainsi son païs & grand nombre de Turcs iusques au nombre de cinquante mille Turcs tous d'icelle Prouince: & incontinct, Collatis signis, fut combattu, tué & mis en pieces avec toutes ses gens par ledit Sophiz: lequel print le seigneur Vison Cassan, & entra victorieusement dedans la cité de Firnam & obtint le païs: & mesmement la ville de Sarda, en laquelle il se tint & demoura l'espace de trois mois: puis s'en vint à Tharabe, laquelle estoit audit Vison Cassan, laquelle se rendit incontinct. Et affin qu'il fut memoire dudit Sophiz, alla iusques au païs de Sultanie, où il trouua les enfans de Vison Cassan qui luy estoient venus au deuant avec xxv. mille de leurs vassaux. Et incontinct que ledit Sophiz les veit il les combatit en telle maniere que l'un desdits enfans fut tué en la bataille, & les autres trois prins prisonniers: lesquels incontinct ledit Sophiz fait mourir de mort vilaine & despecer en pieces, & aussi toutes leurs gens furent mis à l'espée, & n'en demoura pas vn. Parquoy ceux de la cité de Thauriz voyant la grand puissance de Sophiz, & qu'il auoit deffait leur seigneur avec ses enfans, se rendirent avec la cité sans faire bataille: auquel lieu il seiourna plusieurs iours avec ses gens. Et les citoiens de Thauriz voyant la grand sagesse & prudence dudit Sophiz, le meirent en possession de l'estat & païs dudit Vison Cassan. Puis il partit de là & alla en vne grosse ville nommée Lingia, à trois iournées de Thauriz: puis vint avec ses gēs en vne autre ville appelée Passy, qui est la derniere ville de Vison Cassan. Sophiz voyant qu'il auoit subiugué & mis en son obeissance la region & païs dudit Vison Cassan, & mis seurement & stablement chacun en son endroit selon son estat, retourna en ladicte ville de Thauriz, qui est la cité principale du païs dont la mere dudit Sophiz, accompagnée de plusieurs dames & damoiselles & de maintes esclaves siennes, suiuant continuellement son fils bien aymé, voyant & considerant le grand outrage que le grand Turc faisoit aux Sophines ses vassaux, manda ambassadeurs audit grand Turc, luy mandant qu'il eust à donner liberté & franchise à tous ses Sophiz ses subiects: & en outre qu'il eust à se mettre le bonnet rouge à la coustume de ses gens Sophines: ou autrement elle luy feroit cognoistre la grand force de son fils. Pourquoy ledit grand Turc retint ledit ambassadeur Sophine à Constantinople, & se doutoit fort le Turc que ledit Sophine descendiſt avec son armée au païs de Natholie, lequel appartient

au grād Turc. Parquoy ledit grand Turc feit preparer grande armée au paÿs de Angori : & manda à tous ceux de la Pierre qu'ils se preparassent de prendre armes contre Sophiz Chrestien ou bonnet rouge: lesquels furent rebelles & refusans de ce faire : & estoient quasi tous deliberez de leur rendre audit Sophiz. Et comme disoient les Armeniens, ledit Sophiz n'estime ledit grand Turc vn bouton : car il a en son armée le nombre de quatre vingts & dix mille hōmes d'armes bien armez : & sans les gens qui luy suruiennent tous les iours de ses gens de son paÿs d'Armenie . Et furent ces nouuelles apportées au Roy de France estant à Moretel au Daulphiné l'an mille cinq cens & trois.

De la male saison , & de la grand mortalité qui fut, de la mort de plusieurs grans personages.

L'An mille cinq cens & quatre trefues furent faictes entre le Roy de France & le Roy d'Espaigne, touchant la Comté de Rouffillon. Et ce pendant les Espaignols qui estoient à Saulse s'en allerent secrettemēt à Naples. Et aussi disoit on que le Roy d'Espaigne auoit donné aucune somme d'argent à aucuns François , dont apres furent accusez : parquoy les Espaignols prindrent le paÿs de Naples . Et y furent prins prisonniers monseigneur d'Aubigny, & monseigneur d'Alegre principaux capitaines des François: & y mourut plusieurs de l'armée de France, à cause qu'ils n'auoient nuls viures: nonobstant sans grand effusion de sang retournerent les François: & tousiours tenoit bon le lieutenant de monseigneur de Ligny, lequel estoit és terres & places de la feu femme dudit seigneur , nonobstant les François prindrent aucuns prisonniers gens d'apparence : parquoy furent renduz lesdits seigneurs d'Aubigny & d'Alégre. En cestuy an feit vn esté treschault : tellement que les bleds furent de petite monstre, & en petite quantité és paÿs de Lyonnois, Daulphiné, Auuergne, Bourgongne, Sauoye, & autres paÿs . Dés le mois de Mars les villageois cognoissans le temps mal disposé , estoient moult desolez & faisoient ja processions en plusieurs lieux : tellement qu'en la ville de Lyon y venoit grand nombre de processions des villages : & tous les iours & d'heure en heure , dont les bourgeois, marchans & habitans de ladicte ville, leur donnoient pain & vin en abondance , & les religieux pareillement . Esdictes processions estoient les filles ieunes vestues de linge blanc, pieds nuds, & vn couurechef en la teste, & vne chandelle en la main: les enfans masses apres aussi vestus de linge blanc, nuds pieds, teste nue: puis apres les prestres , les hommes , & les femmes en chantant la letanie. Et aucunes fois crioient à haulte-voix. *Sancta Maria : ora pro nobis.* Puis. *Misericorde.* Les parroisses de Lyon faisoient semblables processions , & allerent à nostre Dame de l'Isle à vne lieuë Françoisse pres de Lyon. Le ieudy penultime iour de May , fut apporté à Lyon l'Innocent de S. Iust des faulxbourgs dudit Lyon, qu'homme viuant n'auoit iamais veu apporter en la ville . Et avec ce fut apporté S. Iust en procession, chantant & criant comme les autres & alloient d'Eglise en Eglise. Le iour ensuiuant on porta la marchoire de S. Iean Baptiste en procession aux Augustins: laquelle machoire n'auoit iamais esté portée hors de S. Iean de Lyon, où elle est . Et huit iours apres il pleut , mais la seicheresse fut comme deuant. Les religieux de nostre Dame de l'Isle avec plusieurs villages,

ges, vindrent à Lyon en procession, & apporterēt nostre Dame de l'Isle, & saint Loup qu'on n'auoit iamais apporté à Lyon, & fut le vij. iour de Iuing. Aussi fut apporté audit Lyō saint Hereny Prince des dixneuf mille martirs. Il venoit des processions de quatre & cinq lieües. Et plusieurs villages furent bien cinq ou six iours errans & allans par les champs de lieu en autre, sans retourner en leurs maisons. Et brief c'estoit si grand pitié, qu'il n'y auoit si dur cueur ne si inhumain qui n'eust esté esmeu à plorer & à laisser toute liesse, voyant la grand desolation du peuple. Environ le mois de Septembre y auoit à Lyon en la riuere de Saonne grād nombre de petis anguillons gros comme vn petit doigt, & n'en osoit on manger. En ceste année furent beaucoup de malades. Environ le neufiesme iour de Septembre, mourut au pont Dain le Duc de Sauoye Philebert, & disoit on qu'on l'auoit empoisonné: luy succeda vn sien frere seculier, & en auoit vn autre Euesque de Genefue.

L'AN mille cinq cens & cinq mourut Madame Iehanne Duchesse de Berry, & est enterrée au chasteau de Bourges en vne chapelle, laquelle auoit fait fonder & augmenter de rentes. Ceste année c'est à sçauoir iusques à la S. Iean, & l'année de deuant depuis ladicte saint Iean à l'autre, fait tresmale saison & chere: car le bled valoit à Lyon xxvj. & xxvij. sols le bichet. Et pource que ladicte saison estoit si male, vindrent à Lyon si grand abondance de pources gens des villages, que c'estoit pitié: les vns laissoient leurs maisons vagues: les autres laissoient femmes & enfans, & les femmes, enfans & maris, & tous demandans l'aumosne: dont il en mourut innumerablement: nonobstant que chacun qui auoit dequoy leur donnoit suffisamment: car à Lyon se faisoient autant d'aumosnes que iamais on veist faire en ville, chacun si efforçoit de sa puissance. Et avec ce y regnoit vne maladie, dont il mourut si grand nōbre de gens que merueilles, & principalement à l'hostel Dieu de Lyon, y en mourut des pources villageois quasi innombrables. Beaucoup de riches gens aussi moururent, lesquels estoient de grand auctorité. Et comme on disoit, l'année estoit par tout semblable en mortalité. Es montaignes de Sauoye & és villages à l'entour moururent de faim plusieurs gens: & demourerent ceste année plusieurs possessions à labourer. En cestuy an en Karesme le Roy fait apporter de Blois les os de son feu pere Charles Duc d'Orleans à Paris, lesquels furent mis en sepulture aux Celestins en la chapelle, laquelle est fondée des Ducs d'Orleans. Et quand on apportoit lesdits os y auoit aussi bel honneur qu'il estoit possible, qui fut vne chose sumptueuse & digne de memoire. Environ ce temps le Roy fut malade, tellement qu'on cuidoit qu'il fut trespasé, dont les seigneurs de Court furent si courrouceez que merueilles: à cause dequoy plusieurs des principaux le vouèrent en plusieurs lieux & pelerinages, & furēt faictes processions par tout le Royaume, priant Iesus Christ qu'il luy voulüst donner santé, laquelle luy fut octroyée: car luy estant comme mort, se reuint & racompta vne vision qu'il auoit eüe: laquelle estoit de grand efficace, & digne de memoire: & croy fermement que ce fut plus tost chose miraculeuse qu'autrement. Et peu de temps apres sa maladie, impetra du Pape vn pardon & iubilé en son païs de France, & en ses autres terres & païs, & ne falloit point donner d'argent. Et le xxvj. iour de Iuing, qui fut feste de saint Pierre & saint Paul, fut faicte vne procession: en laquelle on por-

toit le *Corpus Domini* comme le iour de la feste Dieu : & le Roy cognoissant que son peuple auoit prié pour luy en sadiete maladie & luy non voulant estre ingrat , mais les remunerer, fait impetrer cestuy pardon. En cestuy an mourut en France Dom Frederich de Naples, auquel le Roy auoit fait de grans biens & grandes recompenses, touchant le Royaume de Naples.

L'AN mille cinq cens & six mourut Ysabel Royne d'Espaigne : laquelle a fait plusieurs beaux faits de guerre en son viuant deuant Grenade: apres la mort de laquelle, fut baillée audit Roy à femme la seur de monseigneur de Foix & fut fait par le Roy. Et par ainsi fut fait aucun appoinctement entre le Roy de France, & le Roy d'Espaigne touchant Naples & Roussillon. En cestuy an fut guerre entre le Duc de Sauoye & les Valoisiens, laquelle fut tantost accordée. En cestuy an enuiron le mois de Iuillet fut à Romme tenu chapitre general des Cordeliers, lequel n'y auoit esté tenu depuis le temps de S. François. Et fut à cause (comme dit est deuant) que les Cordeliers du Royaume de France auoient esté reformez par auant : mais aucuns n'en estoient pas contens, dont pour faire le cas plus seur en fut determiné audit chapitre : c'est à sçauoir que le Pape vouloit qu'il n'y eust que deux manieres de viure : & principalement que ceux qui estoient reformez le demouroient, & par consequent tous les conuens de France sont demourez de l'obseruance sans riens repliquer. En ce temps estoit aussi à Romme chapitre de ceux de S. Iean de Rhodes, dont plusieurs & grand nombre furent noyez en mer en venant audit chapitre par l'impetuosité de la mer. Le dixhuietiesme iour de Iuillet feste de mōseigneur saint Panthaleon, fut fait & donné vn pardon à tous confez & repentans qui donneroient de leurs biens aux Eglises, fondées des seigneurs de Rhodes : à cause que l'an deuant le Grand maistre de Rhodes nouveau, & frere de monseigneur George d'Amboise Cardinal & pource temps Legat en France, auoit gagné vne iournée contre les Turcs & desconfit toute l'armée, qui fut chose digne de memoire. A cause de quoy fait ledit Grand-maistre fonder deux chapelles en la ville de Rhodes, dōt l'une fut de saint Panthaleon. En cestuy an le iour de l'Ascension de nostre seigneur Iesus Christ, monseigneur d'Angoulesme seconde personne de France, fiança à Tours Madame Claude de France, fille vnique du Roy Loys douziesme, & de la Royne Madame Anne de Bretagne: dont fut faicte en France grande ioye, procession & feste, avecques feux de ioye & grande resiouissance de tout le peuple. Le quatorziesme iour d'Aoust reuerend pere en Dieu monseigneur François de Rohan, fils du Mareschal de Gié Archeuesque de Lyon & d'Angiers, fait son entrée audit Lyon moult triumphamment. A laquelle entrée furent fais plusieurs mysteres par les rues, par où il passa & tendu de tapisserie. Le iour ensuiuant, qui fut le iour de l'Assumption nostre Dame, il chanta la grād Messe en l'Eglise de S. Iean dudit Lyon en grand Pontificat. En cest an le Duc de Gueldres fait guerre audit païs de Gueldres que tenoit l'Archeduc.

Comment l'Archeduc & la Royne de Hongrie moururent. De la guerre du Pape contre les Boulegnois.

L'an

L'Archeduc Philippe estant en Espagne en la ville de Burgues, mourut le xxv. de Septembre oudit an mille cinq cens & six. La Roynne de Hongrie mourut le iour de la nostre Dame d'Aoust, laquelle estoit accouchée quinze iours deuant d'un fils nommé Loys: & le porta baptiser le fils du marquis de Brandebourg, pour & au nom du Roy de France. Elle auoit eu par auant vne fille, laquelle auoit environ trois ans quand ladicte Roynne mourut, & vivent lesdits enfans. Es Lombardies y a vne fille religieuse de l'ordre des Iacobins comme sainte Katherine de Sene, laquelle tous les vendredis a les cicatrices aux pieds, mains & costé, comme nostre seigneur Iesus Christ, & y abonde le sang qui est vne chose merueilleuse.

La prinse de Boulongne la Grasse par le Pape Iulius deuxiesme & les Francois.

EN cestuy an mille cinq cens & six, le Pape Iulius deuxiesme considerant que la terre de Boulongne la Grasse en comprenant citez, villes & chasteaux & places sont des biens de l'Eglise & terre Papale, il se disposa de trouuer les moyens de la reduire à son obeissance. Ceste terre estoit detenue violement à force par vn nommé messire Iean de Bentiuole, lequel l'auoit long temps vsurpée. Toutes ces choses considerées, il se pensa qu'il n'y auoit Prince en toute la terre qui mieux luy peust ayder à la conquerir que le Roy de France treschrestien, & ferme pillier soustenant l'Eglise: car maintenant il florit en victoire entre tous les Princes de la terre: à cause dequoy le Pape l'aduertit de la chose. Et incontinent voulant seruir nostre mere sainte Eglise, enuoya en son païs de Milan grand nombre de gens d'armes, avecques ceux dequoy il se pouoit seruir. Le Pape avec grande armée estoit du costé de Romme & par ainsi la ville de Boulongne fut assiegée de deux costez: par le Pape d'une part, & par les Francois d'autre, & fut ou mois d'Octobre. Les Francois (comme dit est) estans vers Modène se porterent si vaillamment, qu'ils prindrent le chastel Franque & le pillerent, à cause qu'ils ne se vouloient point rendre. Les gens du Pape prindrent aussi vn autre chasteau: & se porterent vaillans les gens d'armes d'un party & d'autre, tant que les Boulegnois furēt moult esbahis & espouentez: parquoy eux considerans qu'ils estoient assiegez de deux costez, & qu'il n'estoit possible de resister à l'encontre du Pape & du Roy de France, ils rendirent au Pape la ville de Boulōgne, & en dechasserent ledit messire Iean de Bentiuole, lequel tenoit ladicte ville par force, comme dit est, non obstant qu'elle fut naturellement au Pape. Et par ainsi pour en rendre graces à Dieu le createur, nostre S. Pere le Pape y chanta Messe le iour de la Toussaincts en l'Eglise de S. Petron tresdeuotement.

De Damoiselle Triulce.

EN ce temps regnoit au païs de Milan vne fille vierge, nommée damoiselle Triulce: laquelle de son ieune aage fut mise à l'estude, depuis l'aage de sept ans iusques à xiiij. Elle apprint son a.b.c. iusques à Grammaire parfaicte: & au xiiij. an estoit treseloquente, & prenoit grand plaisir à l'estude, qui estoit quasi chose miraculeuse. Elle est de noble maison, de la famille de ceux de Triulce. Son pere estoit nommé Iean, lequel estoit

cheualier, bon clerc, aussi estoient tous ceux de sa lignée. Sa mere se nomme Angele noble, de la lignée des Martinengois. Et certes pour bien louer ladicte pucelle, ne scauroye mieux faire que de me accorder avec Prospere, disant. *Natura sequitur semina quisque sua*. Sa mere n'estoit point experte en science, mais plaine de grans vertus. Ceste fille est si deuote & eloquente, qu'elle semble plus angelique qu'humaine en ses oraisons. Et certes s'elle continue toute sa vie aussi sainctement & aussi abondante en vertus qu'elle a fait iusques à present, elle sera digne d'estre reputée saincte. En l'aage de douze ans, elle commença estre oratrice. Elle fut inuoquée en la compagnie de plusieurs grans clercs, tant ecclesiastiques que seculiers: entre lesquels estoit l'Euesque de Losenne grand orateur, l'Euesque de Cumenise son oncle & François Triulce: aussi son oncle de l'ordre des freres mineurs grans clercs, & plusieurs autres gens experts en science: lesquels apres plusieurs argumentations & disputations faictes, tindrent grand cōpte de la pucelle. Avec ce elle est philosophe & entend merueilleusement bien Themistocles, Seneque Philosophes, & aussi Pierre de Rauene. Quelque chose qu'elle veit, qu'elle ouit ou entendit en lieu où elle allast, sans faillir le racomptoit à son pere quand elle retournoit en la maison, cōme s'elle l'eust eu par escript. Elle est aussi experte en l'art poëtique, tellement qu'un iour elle composa grand quantité de vers, & si bien que son maistre en fut tout esmerueillé. En peu de temps elle fut tresexperte es lettres grecques. Elle cōposa plusieurs epistres en toutes sciences, lesquelles elle enuoya à plusieurs grans clercs, lesquels les trouuerent treseloquentes. Elle est trespatiente en aduersitez, & les tourne en lieffes. Et brief en tous ses faits elle est si tresparfaicte, que c'est chose merueilleuse, plustost miraculeuse que humaine. Et quand on luy parle de la marier, elle respond que iamais n'espousera homme, qu'elle ne sçache qu'il soit vierge comme elle.

EN ce mesmes temps mille cinq cens & six, les Geneuois vsans de leurs trahisons accoustumées, non contens des fautes par eux commises peu par auant enuers le Roy leur seigneur, contre luy se reuolterent, & feirent vn Duc à leur plaisir nommé Paule Noyus, qui auoit autresfois exercé le mestier de Taincturier. Le Roy voyant leur rebellion meit sus son armée, & y alla en propre personne en sorte qu'il les subiuga & remeit en son obeissance: ce neantmoins que lesdits Geneuois auoient fait gros preparatifs & munitions de guerre, & eux confians en vn fort rampart & bastillon imprenable ce leur estoit aduis, se tenoient des plus fors: mais sur ces entrefaictes aucuns hardis auaturiers François, mōterent secrettement iusques aupres dudit rampart & bastillon: parquoy les Geneuois bien estonnez & esbahis ayans les cueurs faillis s'en firent & retrahirent dedās la ville, où ils feirent conclusion d'eux en venir rendre deuers le Roy: laquelle chose & pour eiter de respādre sang humain, & aussi le dōmage que c'eust esté d'abandonner vne si belle ville: le Roy les receut benignement à mercy, & entra dedans la ville avec toute son armée, & luy fait on belle & magnifique reception. Ce pendāt le delict leur Duc Paule Noyus fut prins par vne Barque Françoise: lequel s'en estoit fuy, & ramené à Genes, où il fut decapité. Et deslors en auant deffendu publiquement de non plus crier. Adorne Fregose. &c. ce qu'ils auoient de coustume de faire parauant icelle reduction.

Du traité & appointement fait à Cambray par monseigneur le Legat George d'Amboise entre le Pape, l'Empereur Maximilian, le Roy de France, & le Roy d'Espagne. Et comment ledit Roy de France desconfit les Veniciens au lieu d'Aignadel.

ENviron ce temps le Roy enuoya monseigneur le Legat à Cambray, où il eut appointement entre le Pape, l'Empereur Maximilian, le Roy de France, le Roy d'Espagne, Madame Marguerite comme gouvernante de l'Archeduc. Lequel appointement ne dura pas longuement, & fut cause de la mort de deux cens mille hommes, qui depuis au moyen de la racine & frauduleuses pensées des confederez, ont esté occis comme verrez cy apres par plusieurs batailles & rencontres : & encores qui pis est, nous sommes du temps present & serons, se Dieu n'y boute remede, en la captiuité dudit appointement : mais le Roy voulât ou cuidant auoir tousiours bone paix & confederation avecques les Princes circonuoisins a esté deceu, comme il est apparu depuis à la iournée de Pesquiere contre les Veniciens : car luy seul avecques son armée print l'adventure hardiement, passa les monts & vint en Milan : Puis fait marcher son armée, où fut fait vne chose digne de memoire : car où il passa il fit rompre les ponts apres luy, pour mōstrer qu'il ne failloit point fuir : en apres print pour commencement le chasteau de Treuis : Puis fait marcher son camp iusques à Pesquiere, où fut la iournée au lieu dit Aignadel. Et vertueusement cinq iours apres ledit camp dressé, assaillit les Veniciens & leur armée : lesquels Veniciens ayans les cueurs failliz, furent incōtinent vaincuz moyennant le seigneur de Bourbon : lequel si porta vaillamment & y eut grand occision, ce que les confederez en l'appointement n'eussent iamais pensé auoir esté fait par l'armée seule du Roy, mesmes les Veniciens ne le vouloient croire iusques à ce que le Comte Petillane qui s'en estoit fuy, lequel menoit l'arrieregarde leur manifesta la deffaicte. Et de fait ce fut vne chose bienheureuse : car la bataille fut le quatorziesme iour de May, qui estoit le vj. iour apres que le Roy fut arriué au camp. Par ainsi ne dura la guerre entre les deux armées que cinq iours entiers : pourtant que apres celle victoire n'y eut plus de guerre ne de deffence, qui empeschast que le Roy n'eust tout ce qu'il demandoit. Parquoy ie dis que ce fut vn grand heur, veu qu'ils estoient aux lieux auantageux & gardans les forts passages : dont ils auoient moult grand nombre, & aussi leur puissance : car quelque puissance qu'ils eussent qui estoit suffisante, non pas seulement pour resister à tout autre, & garder le païs qu'ils tenoient : mais pour assaillir & combattre : pourtant qu'ils auoient en leur camp plus de mille sept cens hommes d'armes, & d'autres cheuaux legiers que d'autres iusques au nombre de neuf mille cinq cens, & de gens de pied plus de xxij. mille : tous bien armez & accoustrez, & d'artillerie grosse plus de vingt pieces aussi bonnes ou meilleures que le Roy en auoit point : & au surplus les meilleurs conducteurs & capitaines qui furent lors en Italie, comme messire Bartholomy d'Aluiane principal de l'armée, lequel fut cedit iour prins prisonnier, comme il estoit avecques aucunes gens de pied : lesquels il auoit rassemblez : & fut prins en ladicte iournée grand nombre d'autres capitaines, & principalement plus renommez de la seigneurie de Venise, lesquels furent amenez en France & mis en fortes places : les enseignes à S. Denys

en France. Et ne fut occis de l'armée du Roy que deux cens hommes, & des Veniciens bié quinze mille. Apres la iournée faicte le Roy feit enseuelir les morts & ordonner vne chapelle audit lieu, fondée de certaines Messes pour les ames de ceux, qui estoient morts en estat de grace. Et tantost apres furent rendues sous la puissance du Roy de France les villes, que auoient vsurpées lesdits Veniciens: c'est à sçauoir de Bergame, Bresse, Creme & Cremonne appartenant de la Duché de Milan. Le Pape Iulius ij. de ce nom recouura pareillement à l'ayde d'iceluy Roy ses villes de l'Eglise: c'est à sçauoir Seruie, Rauenne, Imole, Fauance, Foreliue & autres terres qu'ils tenoient appartenant à l'Eglise. Maximilian Empereur recouura aussi ses villes que lesdits Veniciës tenoient, Veronne, Vincenne & Padouë: lequel Padouë ne garda pas longuement ledit Empereur, car par sa negligence ou paour qu'il auoit, n'osa venir iusques au camp du Roy, ce nonobstant les promesses qu'il auoit faictes au Roy s'absenta de luy: ce neantmoins le Roy depuis luy bailla quantité de gens d'armes, dont estoit chef monseigneur de la Palisse pour rauoir ladicte cité de Padouë, & y fut le siege lōgement: & en la fin ce ne fut riens. Le Roy d'Espaigne aussi receut pareillement ses villes, que detenoient iceux Veniciens: c'est à sçauoir Brondouse, Tarente & autres lieux semblablement. Et brief apres tout reduit & mis en la subiection du Roy Loys, & auoir donné secours au S. Pere le Pape Iulius cōme vray pillier de l'Eglise, aydant à chacun par charité, & luy auoir fait plusieurs autres bōs serui-ces & courtoisies: comme de luy mettre en ses mains la cité de Boulongne la Grasse & expulsé messire Iean de Bentiuole, ainsi comme il est dit dessus: mais nonobstant icelles gratuitez à luy faictes par le Roy, iceluy Pape moyennant la suscitation des Veniciës & autres, print leur alliance, meit son armée aux chāps avec celle des Veniciens: parquoy il print Mutine & Mirandule, laquelle il restitua à sire Iean Francisque Picus, qui disoit estre vainement seigneur dudit lieu. Apres la iournée faicte contre les Veniciens le Roy print son chemin vers Milan, où luy fut faicte vne triumpante & magnifique entrée en maniere du tēps passé, comme faisoient iadis les Rommains: & y auoit chars triumpans, où estoient des plus belles dames de la ville: & accomparageoient le Roy à Cesar, d'auoir submis vne si superbe seigneurie en sa subiection, eux qui estoient craints & doubtez par tout le mōde. Et de fait lesdits Milannois luy feirent vn tresbeau recueil: Et de là s'en vint le Roy à Sauonne, où il fut receu hōnestement. Durant ce temps Ferdinand Roy d'Arragon vint par mer en ladicte ville de Sauonne, avec plusieurs galeres, qu'il faisoit beau veoir: & fut receu par le Roy Loys luy & sa femme, & feirent tresbonne chiere ensemble, & vserent le corps nostre seigneur le Roy de France & le Roy d'Arragon, pour confermer la paix, laquelle ne dura pas longuemēt comme pourrez veoir cy apres. Il ya plusieurs qui font bon marché de leurs consciēces & promesses: il eut esté de besoing que l'un eust vsé vn charbon ardent des lors, car maintes creatures ont achetez les pariuremens qui n'en auoient que faire, & en estoient Innocens.

Cōment guerre fut meüe entre le Pape Iulius & le Roy de France, à cause du Duc de Ferrare: & du concille fait à l'instāce de l'Empereur Maximiliā & dudit Roy, dōt le Pape ne fut pas cōtent. Et cōmēt la ville de Boulogne la Grasse fut prinse par les Francois.

Enuiron

Enuiron ce temps la ville & place de Myrandole, fut vaillamment reprise par les François: & aussi fut deliurée la ville de Mutine au Roy des Rommains. Durant ce temps fut prins prisonnier le Marquis de Mantouë par les Veniciens, & mené à Venise: mais depuis en est sorti bien aysemēt. En apres s'ourdīt encore vne autre guerre entre le Pape Iulius, & le Duc de Ferrare cōfederé du Roy de Frāce: Parquoy le Roy laissa pour son lieutenant general en la Duché de Milan, le Comte Gaston de Foix: auquel le Roy luy donna la Duché de Nemours, lequel feit merueilles d'armes au païs d'Italie. Depuis la reueneue d'Italie monseigneur le Cardinal d'Amboise cheut malade à Lyon, dont il mourut qui fut grand dommage, comme l'on à veu depuis: ce neantmoins que aucuns en ont murmuré au contraire: mais ils ne consideroient pas ses vertus, n'en quoy il seruoit. Durant sa vie il a tousiours bien gouuerné son maistre, en sorte que le peuple n'estoit pas trop taillé: car quelque guerre que le Roy Loys a fait delà les monts, il n'a point creu les tailles autrement qu'ils estoient par auant: mais quand l'affaire est venue & que les ennemis sont venuz iusques au fumier & vray possessoire de France, ce luy a esté force de les croistre. Et n'estoit point nommé pour neant pere du peuple: jaçoit ce qu'aucuns en ont escript durant sa vie en maniere de flaterie, & desprisoient les autres Roys pour collauder iceluy. L'on ne peult trop bien dire d'un homme vertueux en son absence: mais en sa presence non, cela sent trop sa lucratiue. Ledit Legat ja trespaslé fut mis & embausmé en vn sercueil de plomb, & porté ensepulturer à Roüen. De là le Roy vint à Blois, & emmena la Royne enceinte d'une belle fille: laquelle le Roy auoit vouée à monseigneur saint René Euesque d'Angiers, où il feit son voyage luy & la Royne peu apres qu'elle fut deliurée, & eut nom Renée: & fut le seigneur Jean Iaques compere du Roy. Enuiron ce temps fut prins par les Portugalois en vne terre nouuellement trouuée par eux en l'Isle d'Orane tirant vers Affrique, vne maniere de gens sauages assez de noire couleur: & auoient aucuns stigmates en la face, grosses leures en la bouche, les crins noirs & gros comme vn cheual. Il n'ont iamais barbe n'apparence d'en auoir en tout le corps, sinon les cheueux & sourcils: leurs nauires sont d'escorces de bois legieres, qu'un homme en porteroit bien vne. Ils ont vn arc bendé de nerfs de bestes, les traicts sont de cane, emmanchez de pierres ou os de poisson. Ils n'ont vsaige ne de pain, ne de vin, ne d'argent. Et se trainent à terre comme bestes: ils mangent la chair creüe: & sont vestus de peaux de bestes seulement. Ils vivent vne partie de temps dedans la mer. Et furent amenez par aucuns Normans iusques à Roüen, & en presenterent deux au Roy: lesquels ne vescurent pas longuement, ne les autres qu'on auoit amenez. Pour donques retourner à la matiere precedente, vn peu de temps apres se meut vn concille requis par Maximilian eleu Empereur, & par le Roy Loys douziésme dont le Pape Iulius n'en fut pas content, jaçoit qu'il auoit ja faulcé sa foy, suscitant le Roy d'Arragon & la seigneurie de Venise & autres, delaisant la chaire saint Pierre, pour prendre le tiltre de Mars Dieu des batailles, desployer aux champs les trois couronnes, & dormir en eschauguette: & Dieu scet comment ses mittres, croix & crosses estoient belles à veoir voltiger parmi les champs: le diable n'auoit garde d'y estre, car l'on faisoit trop bon mar-

ché de benedictions . Et pour commencement la guerre fut contre le Duc de Ferrare allié du Roy, où il y eut maintes rencontres & sieges mis & leuez. Et se demenoit la guerre hiuer & esté, comme auez peu veoir du siege de Boulongne, où monseigneur de Nemours estoit comme Visroy : en sorte que ceux de Boulongne fuirent deuant sa presence : & posseda ladicte ville de Boulongne la Grasse comme verrez cy apres. Environ ce temps le Pape Iulius suscita les Suisses pour descendre en la Duché de Milan, ce qu'ils feirent : & vindrent iour & nuict iusques aupres de Milan, où ils feirent beaucoup de maux : & principalement en vne abbaye de nonnains, où ils rauirent & prindrent par force tout ce qu'ils trouuerent . Monseigneur de Conty aduertie comme cheualereux capitaine y alla, où il feit merueilles d'armes : mais à la fin il fut enclos & y demoura qui fut grand dommage. Peu apres monseigneur de Nemours appoincta ausdits Suisses, moyennant l'argent qu'ils eurent comme ils ont de coustume d'auoir: puis s'en retournerent pour reuenir bien tost requerir d'autre pecune.

De ce temps les habitans & citadins de Bresse, se reuolterent par la subornation d'aucuns personages & delaisserent le party des François, & retournerent au party de la seigneurie de Venise, dont mal leur en print peu apres. Et semblablement se reuolterent ceux de Bergame, & consecutiuelement retournerent aux Veniciens : mais nonobstant demourerent les chasteaux de Bresse, Bergame & autres villes en la possession du Roy de France, où estoient bons capitaines qui bien seruirent le Roy : principalement au pays d'Italie, dont aucuns en ont esté mal recompensez. Durant le temps de ce concille premierement allegué : lequel commença à Tours, puis fut décidé à Lyon, & de là fut remis general à Pise, où il y auoit plusieurs Cardinaux, Archeuesques, Euesques, abbez, prieurs & autres grans personages en l'Eglise . Et principalement de tresscientifiques docteurs en theologie, canonistes & autres gens litterez à cest affaire, tant qu'il y eut aucuns bons points decidez & concluds en aucunes cessions d'iceluy concille: mais pour plusieurs causes suruenantes, il fut consequamment translaté en Milan, & puis fut charroyé à Lyon où il demoura. Le siege fut mis deuant Boulongne la Grasse par monseigneur de Nemours, où les gens d'armes François souffroient beaucoup de mal, à cause qu'il faisoit encores hiuer: mais ce nonobstant vindrent au dessus & chasserent le Pape & ses Archeuesques & toute son armée, & repulserent tout deuant eux en sorte qu'ils entrerent dedans la ville comme vainqueurs.

Comment le Duc de Nemours alla contre ceux de Bresse, qui s'estoient reuoltez contre le Roy : & de la grand occision faicte en icelle ville.



Ncontinent ces choses aduenues, nouuelles vindrent au Duc de Nemours, comment ceux de Bresse s'estoient reuoltez : & comment les Veniciens estoit endedans & faisoient grand appareil de guerre contre les François, lors : & sans demeurer ledit Duc de Nemours feit marcher son armée iour & nuict tirant vers Bresse à grand traicte : & ie vous promets que le Roy auoit de gens de bien à celle heure : aussi que la promesse & liberalité dudit Duc de Nemours, qu'il leur auoit promise en estoit bien cause, car ils furent incontinent deuant Bresse . Et ceux du chasteau voyant que les

François

François estoient pres ouvrir la porte du chasteau, où il y en entra vne partie par la ville par force. Helas le grand deluge, les grans criemens & lamentations qu'il y auoit aux pources citadins de la ville, ce fut vne bien grand pitié. Et est vne merueille que pour soubstenir le tiltre & querelle des Princes & seigneurs, que tant de pources gens meurent, ce nonobstant qu'ils auoient bien merité d'estre punis bien griefuement, d'auoir faulcé leur serment. Incontinent que le Duc de Nemours homme tresbelliqueux eut gaigné la citadelle & le Palais, il entra dedans la ville vn bras tout nud, l'espée au poing criant France, & consequamment tous les François. Lors les Veniciens bien esbahis s'en firent vne partie par vne porte de ladicte ville, les autres occis, aucuns prisonniers & des plus grans personages de la seigneurie de Venise, lesquels furent enuoyez au Roy de France. Les pources citadins de la ville mis à l'espée & leurs biens pillez, & tout le demourant fut mis à sacment. Lors les aduenturies de France beau drap d'or & drap de soye dechiquetoient par despit. On y faisoit bon marché à celle heure desdits draps de soye. Le grand pleur faisoient les dames & petis enfans de la ville, de veoir ainsi leurs maris occis & ietter par les fenestres & leurs biens tous pillez. Et à brief parler, ils pensoient que ce fut la fureur & ire de Dieu, qui fut descendue sur eux: car les auenturiers François & autres estoient acharnez sur eux, pour autant que lesdits citadins & leur famille auoient resisté contre eux, en leur iettans grans pieces de bois, pierres des fenestres desdictes maisons, pour eux cuider tousiours deffendre, doubtant que leur ville seroit pillée, pource que ladicte ville estoit moult riche & comblée de biens. Et de fait les plus grans seigneurs François y eurent beaucoup à souffrir. Mais apres toute resistance & que ceux de la ville de Bresse, & les gens d'armes des Veniciens eurent fait tout ce qu'ils peurent pour eux deffendre & resister. Les François submirent & subiuguerent tout deffoubs leur puissance, & occirent tous les hommes qu'ils trouuerent, si que les rues de la ville estoient plaines de morts, sans ceux qui estoient occis aux champs. Et brief y eut beaucoup & grand nombre de milliers de gens morts. Des prisonniers furent messire André Gritti, messire Jean Paulle, Caufre & son fils, & le Comte Ludouic Adanago, lequel auoit fait la trahison de ladicte ville, dont ne s'en trouua pas bien. Apres celle victoire faicte par les François, furent mises les garnisons aux chasteaux & villes de Bresse, & force municions de viures pour pourueoir aux choses futures: & fut commis le seigneur d'Aulbigny pour garder Bresse. La ville & chasteau de Bergame furent pareillement rendus, & remis entre les mains du Roy de France, à cause de sa Duché de Milan, & plusieurs autres places & forteresses estant audit pays: lesquelles aussi s'estoient reuoltées, & souffrirent beaucoup de miseres & de grâs dommaiges. Et vint nouuelles au Duc de Nemours, que les Espaignols auoient laissé leur grosse artillerie & bagaige à Imolle, & estoient venuz en diligence avec quelque quantité d'artillerie legiere loger à Bondoye, & es enuiron en la plaine: lesquels se vantoient d'eux venir ioindre & assembler avecques l'armée des Veniciens pour secourir Bresse: mais ie croy qu'eux aduertis de la destruction de Bresse, changerent bien tost de propos. Enuiron ce temps estoit en la terre d'Auguste Vindelice vne vierge appelée Anne, laquelle estoit ja paruenue en l'aage de xl. ans sans boire, ne sans manger, ne dormir & sans euacuer aucu-

ne chose de son corps. Pourquoy l'on pouoit cognoistre qu'elle estoit la sainte grace de nostre seigneur Iesus-Christ, avec ce qu'elle estoit addonnée tousiours en diuines & deuotes contemplations: c'est vne bien grand merueille vne autre merueille en la ville de Rauenne auoit vn monstre nouveau né: lequel monstre pour le cōmencemēt estoit cornu au chief, ayant esles cōme vne chauue souris, vn pied comme vn oyseau rauissant, & l'autre pied cōme vn homme humain. Il auoit vn œil en vn genoil, & auoit sexe masculin & femenin: Il auoit stigmates & signe d'un Y, en la poitrine & vne semblance de croix: & vn croissant au dessous, signifiant plusieurs choses selon messeigneurs les philosophes & prognosticateurs.

Comment le Duc de Nemours & les Francois desconfirent l'armée du Pape: des Veniciens & Espaignols aupres de Rauēne. Et comment ledit Duc de Nemours apres la victoire obtenue & ses ennemis chassés hors du camp fut occis.



Rest doncques à sçauoir pour retourner à nostre matiere touchant des guerres d'Italie, & autres: que durant le saint temps de quarantaine l'an mille cinq cens & douze, le Duc de Nemours s'en alla deuers Rauēne, où l'armée du Pape & des Espaignols & Veniciens estoit, pour cuider tousiours prendre vengeance des Francois, ou leur cuider iouer quelque mauuais tour, lesquels auoient fait gros preparatifs & mouuemens de guerre. Le Duc de Nemours aduertty de tout, partit accompagné de plusieurs nobles & vaillans capitaines: comme le seigneur de la Palice, le seigneur d'Alegre & son fils, le seigneur Iean Iaques, le seigneur de Chastillon Preuost de Paris, le seigneur de Molarc, Maugeron, la Crotte & autres vaillans & renommez capitaines: & vindrent viftement iusques aupres dudit Rauēne, où estoient leurs ennemis Italiens & Espaignols: où les Francois tindrent vn peu longuement le camp, car il n'y auoit pas trop de munitions de viures, & souffrirent beaucoup l'esdits Francois. Mais eux voyans que les viures leur estoient faillis, comme hardis & belliqueux gens d'armes: aussi avec le grand desir que le Duc de Nemours auoit de rencontrer & chocquer ses ennemis, delibererent en vn soir la veille de Pasques de dōner le lendemain, qui estoit le iour de la resurrection nostre seigneur Iesus-Christ, l'assault & la bataille à leurs ennemis: ce qu'ils feirent, & vindrent hardiement approcher de leurs ennemis: ordonnerent leurs gens tant d'un costé que d'autre, & marcha l'artillerie premiere: laquelle tira l'espace de plus de quatre heures sans cesser de costé & d'autre: & fit l'artillerie des Francois grand dommage aux Espaignols, principalement à leurs hommes d'armes. Apres aucuns Espaignols sortirent de leur fort, & les Francois d'entrer dedās & ioignirent ensemble. Là fut veu deux nations superbes & hardies aux armes, avec aussi grande volenté & desir qu'auoient les Francois d'eux rencontrer. On ne veit iamais mieux chamailler ne frapper: si qu'ils estoient encharnez les vns sur les autres, que c'estoit bien grand pitié à les regarder. Mesmes le gentil Duc de Nemours se bautoit auant, faisant merueilles d'armes, donnant courage à ses gens. Et de fait y eut vne merueilleuse rencontre, & fut vne grand piece que l'on ne sçauoit lequel l'auroit du meilleur de l'un ou l'autre: tellement que les Espaignols crioient aucunesfois victoire Iulle Iulle:

Iulle, l'autresfois les François crioient de leur victoire. Mais à la fin les François les enchaſſerent: ce nonobſtant que durât la bataille le ſeigneur Molarc fut occis d'une piece d'artillerie, qui fut vn tresgrand dommage au Royaume de France d'auoir perdu vn ſi vaillant & hardy capitaine: ledit Molarc menoit les gens de pied de France, qui eſtoit vne hardie bande. Auſſi fut tué la Crotte vaillant homme, le capitaine Iacob qui menoit les Lanſquenets, qui fut auſſi grand dommage: Et furent tuez des premiers. Ce nonobſtant leurs gens tant François que Lanſquenets prindrent bon cueur, & hardiement vengerent la mort de leurs bons capitaines: & gaignerent la place tant qu'ils vindrent iuſques au bagaige & viures des Eſpaignols, où aucuns affamez aduenturiers commēcerent à deffoncer les tonneaux de vin: comme maluoisie, & vins de Romanie & autres & de boire parmy la place: & apres qu'ils eurent beu retournerent à la fuite, & demurant des Eſpaignols qui battailloient encores: car ie vous promets qu'ils moururent en gens de bien & n'eſtoient pas gēs recreus que leſdits Eſpaignols. Et ne treuve point que de long temps vne ſi cruelle bataille ait eſté & en vn ſi digne iour; Dieu vueille pardonner aux treſpaſſez. Le demeurât des Eſpaignols & Italiens qui eſchapperent, ſ'en allerēt par routes çà & là: & y eut plus de vingt grans ſeigneurs d'Italie, qui demourerent occis au cāp: & pluſieurs priſonniers, comme Petre de Nauarre, Dom Iean de Cardonne, le Marquis de Peſquiere, Pomare, Epinoſe, Caſtignago, Iean Anthoine Voſino, le Comte de Montelon, le Marquis de Betonde, le Marquis de l'Eſtelle, le fils du Comte de Conſege & autres, qui eſtoient de renommée, le Duc du Traict qui eſtoit avec eux l'on ne ſceut qu'il deuint. Le Vice-Roy de Naples ſe ſauua à fuir tant qu'il ſe meit ſur la mer pour aller à Naples. Le Marquis de la Padulle, & le Comte de Populle trouuerent maniere d'eſchapper durant ce conſlict, avec vnze ou douze cens cheuaux tant hommes d'armes que cheuaux legiers, & ſeize ou dix ſept cens hōmes de pied qui fut la reſte de leur armée, & ſe ſauuerent où ils peurent: parquoy n'eſt pas à doubter qu'il y demeura beaucoup des François, car les Eſpaignols eurent gros cueur: & meſmement quand les hommes d'armes François retournerēt de la chaſſe de leurs ennemis, & qu'ils paſſerent par le camp où les morts & occis eſtoient: aucūns deſdits bleſſez & naurez à mort amafferent leurs eſpées ou autres, & tous couchez qu'ils eſtoient couppoiet les iambes des cheuaux ſurquoy les hommes d'armes François reuindrent. Le Pape Iulius lors eſtoit à Romme, quand les nouuelles luy furent annoncées: & Dieu ſcait quelle chere il feit, car il auoit beaucoup perdu en icelle iournée. Incontinent qu'il eut les nouuelles, il ſ'en vouloit partir pour ſ'en aller à Naples de peur qu'il auoit, que l'on vint le querre iuſques à Romme.

A P R E S celle deſconfiture le treſilluſtre & preux Duc de Nemours Gaſton de Foix tenant encores les rens, vint & apperceut aucuns hōmes de guerre tenans la partie des Italiens & autres ſes ennemis, leſquels auoient prins fuite comme gens eſgaré, parquoy iceluy magnanime Prince, homme de cueur, peu attrempé, non ayant ſouffifance & regard de la victoire que Dieu luy auoit donnée, pria & requiſt inſtamment à aucuns nobles & vaillans capitaines qu'il leur pleuſt marcher avecques luy pour expedier ceſte reſte de leurs ennemis. Et combien qu'aucuns prudens ſeigneurs & bons capitaines, qui de long temps

auoient veu quelles issues il y a à la guerre, luy peurent remonstrier quelle en pourroit estre la fin, & qu'il fait bon soy contenter de chose raisonnable sans trop hardie & legiere volenté. Ce nonobstant il fut tousiours permanent en sa forte hardiesse, & pria de rechief estre suiuy disant qui m'aymera si me suiue. Donc quand le seigneur Alegre, son fils, Maugeron, le Bastard de Cliete & autre bien petit nombre, veirent qu'il estoit deliberé & ja party le suiurent. En entra ledit Duc de Nemours le premier dedans la route desdits ennemis: lesquels estoient grand quantité pour eux, & vint ferir & frapper sur eux d'un terrible courage: & là eussiez veu grand merueilles d'armes que faisoit ce gentil Prince, tant que du premier il estonna lesdits ennemis & en tuoit beaucoup, & faisoit vne grand place entour luy: si que nul n'osoit approcher de luy ne de son cheual: lequel estoit bon à merueilles. Et brief c'estoit triumphe de veoir vn si ieune homme en telle aduenture. Les ennemis voyant qu'il ne luy venoit nul secours, & qu'ils n'estoient que bien peu de gens avec luy s'eslargirent, & fut enclos le gentil Prince & tuerent premierement son cheual: puis à grans coups sur luy de force picques, haches & autres bastons, frapperent dessus en sorte qu'il mourut glorieusement, & tous ceux qui le suiurent tous occis. Lâs! la grosse perte pour le Royaume de France, d'auoir perdu vn si noble & cheualereux Prince digne d'estre mis au triūphant throsne & temple des nobles & excellens preux: luy qui eust esté suiuy par tout le monde sans croix ne pille pour la grand liberalité & franche volenté qui estoit en luy, lequel en quatre mois auoit esté vainqueur de trois batailles. Apres celle piteuse aduenture, le seigneur de la Palice & autres capitaines vindrent pour venger la mort de si nobles hommes: & tuerent ceux qui auoient occis ledit Duc de Nemours & seigneur d'Alegre & autres: si qu'il fait telle execution, qu'il n'en eschappa pas vn. Et ainsi demeura le camp victorieux aux François. Et de là allerent assieger la ville de Rauenne, laquelle vigoureusement ils prindrent d'assault & submeirent à leur volenté. Et entrerent dedans, pillerent & occirent vne partie de ceux de ladicte ville de Rauenne, où il y eut vne grand pitié & confusion, car elle fut fort destruicte. Et cōsequemment apres toutes choses reduictes & expediées, les François vindrent au camp pour honnestement leuer & donner honorable sepulture en Eglise aux feux Duc de Nemours, & autres seigneurs dessusdits. Lequel tresnoble Prince & Duc Vice-Roy au pays d'Italie, fut moult hōnorablement & en grād triūphe de dueil prins & leué d'iceluy camp, où il auoit esté occis, & plongé son sang en victoire: & fut porté deuers Milan pour y estre magnifiquement sepulture, cōme bien luy appartenoit. Le corps dudit Duc de Nemours fut apporté à Milan le xxvj. iour du mois d'Auril mille cccc.xij. & estoient deuant luy tous les prisonniers qui auoient esté prins & detenus à celle iournée de Rauenne. Et pareillement estoit porté deuant son corps toutes les bānieres, guidōs & estandarts que les François auoient victorieusement cōquis en celle bataille, tant de ceux des Italiens comme semblablement celles des Veniciens, & aussi celles des Espaignols, avecq's celles de Galice, & autres provinces & seigneuries, lesquels auoient esté tuez & occis en icelle bataille. Pourquoy y auoit ioye & dueil à ceste trefmagnifique sepulture: car il y auoit moult belle ordre à ses obseques & funerailles, & si estoit vne moult belle chose à veoir passer vn tel triumphe.

Les

Les seigneurs & capitaines y estoient par ordre en tresgrād dueil, cōme on a accoustumé de faire à vn tel Prince. Et n'y auoit si dur cueur qui ne plorast à celle heure deuant son corps : & estoient ses paiges & gens domestiques de sa maison, qui menoient ses grans cheuaux d'honneur & autres coursiers, dequoy il estoit bien garny: l'on portoit deuant luy son helmet, l'espée de victoire comme lieutenant general du Roy. Et brief ceux de l'armée qui estoient à son conuoy tous en dueil, demenoient merueilleuses plainctes & lamentations : car ils l'auoient trouué liberal & debonnaire, & ne se prisoit riens en la guerre. Les gens & seigneurs de la ville, citadins & autre populaire tous reueremment vestus & habillez de robes noires, & chapperons de dueil, avec grand luminaire allumé, où estoient les armes & blason dudit deffunct : duquel le corps estoit accompagné de deux cens lances bons gens d'armes, & autres gens de pied à grand nōbre. Et ainsi fut en grand triumphe & pompe de dueil honnorablement conduit iusques en l'Eglise principale de Milan, où fut fait vn tressolennel seruice assistans tous les gentils hommes & autres, semblablement les gens domestiques de la maison dudit seigneur. Pensez le grand dueil qu'eut lors le Roy & la Royne, lesquels estoient à Blois à l'heure qu'on apporta les nouuelles, car ils l'aymoient comme leur enfant. Et ie vous promets que ceux qui iamais ne l'auoient veu, se prindrent à pleurer pour la grād renommée de ses vertus & honestetez & proësses, qu'ils auoient oüy dire de luy: Dieu en ait l'ame.

Comment apres les batailles dessusdictes & le depart des Francois, les Suisses prindrent la ville de Milan & autres places qui tenoient pour le Roy.

VN peu apres le temps de ces terribles batailles dessusdictes, esquelles furent faictes plusieurs execrables occisions & grand effusion de sang humain, principalement des Italiens & autres gēs amassez Veniciens & leurs alliez par les François: desquels aussi de leur costé en est demouré aucune quātité. Et qui pis est des plus gens de bien & de grosse renommée, desquels les pauvres dames & damoiselles sont deuenues veufues en France. Iceux François que ie ne mente, ou ceux qui auoient l'administration des deniers pour lors, pensoient auoir tout conquis iusques à Romme & plus auant ce leur sembloit, casserent les gens de pied & autres à l'heure qu'il en failloit auoir d'autres : car il failloit beaucoup de gens d'armes aux garnisons des villes & chasteaux nouvellement conquis. Et apres aucuns insatiables martiaux & bibules de sang humain, ce qui ne leur appartenoit, fesmurent & susciterēt les esprits de la reste de leurs gens d'armes & autres par eux appelez. Parquoy eux voyans ainsi les François dispersez en leurs garnisons, considerant que la vertu dispersée & respendue n'est si forte que la vertu ensemble vnüe, feirent vn nouuel ost & exercite de gens d'armes pour leur desordonnée vindication, & venir dessus les François. Aussi q̄ le Pere Sainct courroucé bien amerement contre les François, pour la perte qu'il auoit eüe desia par trois fois, suscita Cantons & ligues des Suisses, dont les François auoient delaisé leur accointance par auant. Aussi qu'ils ne vivent que des pensions des Roys & Princes : & moyennant aussi vn Cardinal de Syon que fait le Pape au païs des Suisses: lequel Cardinal les suscitoit & preschoit publiquement, pour accomplir le vouloir dudit

Pere Sainct. Et aussi moyenant que l'Eleu Empereur Maximilian auoit retourné sa robbe, qui leur deuoit faire ouuerture & ayde par deuers Veronne & autres lieux. Et d'autre part s'encouragerent les Espaignols, tant qu'ils furent assez espandus par iceluy païs d'Italie & Lombardie. Et vindrent tous lesdits ennemis iusques aupres de Milan, iacoit que la iustice de Milan estoit ja partie pour eux en reuenir en France: ce qui desespera les pauvres Milannoïs & ne sçauoiēt de quel part leur tourner: Eux voyans que tous les François s'en retournoient en si grand diligence, se tindrent des plus forts comme ils ont de coustume, & entrerent lesdits ennemis dedans, ce neantmoins que le chasteau tenoit bon, & y estoit le seigneur de Louvain & plusieurs autres François. Et consequemment aux autres places comme à Bresse, le seigneur d'Aubigny tenoit aussi le chasteau dudit Bresse.

D v commencement du partement des François de la Duché de Milan, vindrent à Pauie où il y eut gros escarmouche: car aucuns aduenturiers de France se battirent contre leurs ennemis pres d'un pont, où ils se retiroiēt & en demoura aucun nombre, lesquels se porterent vaillamment. Et ensuiuant ceux de Pauie mauuais François leur feirent si grand opprobre & inhumanité, que l'on ne scauroit penser. Entre lesquelles execrables vilennies, y eut vn citadin dudit Pauie, lequel dist à vn François lequel n'auoit peu suiure les autres, mon amy i'ayme la generatiō de France: le te prie viens en ma maison, & ie te garderay à celle fin que ne sois occis des ennemis. Le pauvre aduenturier sous la fidelité du citadin s'en va quand & luy: quand il fut en sa maison, le tyranniza & luy couppa les genitoires & pria: puis le meit en chemise & le boutta en la rue disant, voy là encores vn François. Incontinent sortirent les autres citadins & feirent force charbonnées de son corps, & le martyrerent de taillades de leurs espées. D'un autre citadin dudit Pauie mesmes, qui mangea du cuer d'un autre François par villaine vindication. Et n'est pas la premiere fois de leurs tyrannies. Et croy qu'iceux & autres du païs d'Italie que de Lombardie, soit cause que tout le mal & misere qu'ils ont souffert, a esté par leurs iniquitez & infames malfaits qui sentent leur Sodome & Gomorre: l'air en est infect de le reciter, Dieu les vueille amender & tous autres.

Incidence.

D'Autre part les François ont perseueré & accoustumé principalement au païs d'Italie de blasphemer nostre seigneur Iesus-Christ, nostre Dame & autres sortes de iuremens deshonestes, & y prenoient plaisir: peut estre que Dieu soit courroucé, & que moyennant iceux detestables blasphemes, & aussi la grād gloire dont lesdits François sont tousiours plains Dieu a permis leur donner des verges, pour monstrier que c'est celuy qui donne les victoires & bonnes fortunes. Et mesmement suiuant iceluy propos, lesdits François en eux partant d'Italie auoient vne cremeur terrible, & ne sçauoient dont leur venoit: & estoient bien ioyeux d'eux en venir en France, pensant à eux que ce fut permission diuine. Ce sont des fortunes de ce monde. En ce mesme an mille cinq cens & douze, le Pape Iulius second, qui iniustement & sans cause & en retribuant mal pour bien, fut merueilleusement obstiné & animé contre les François.

François. Et apres que son pauvre vouloir fut vne partie accompli, d'auoir esté cause de repulser les François hors d'Italie, mourut & trespassa à Romme en l'an neufiesme de son Pontificat Dieu luy face pardon. Enuiron ce temps toutes choses considérées & faictes, furent accordées trefues pour certaine espace de temps entre le Roy de France & le Roy d'Arragon, comprins les Espaignols : Et fut esleu le Pape Leon, dixiesme de ce nom à present regnant: Fut consacré à Romme & succeda apres le Pape Iulius. Iceluy Leon estoit natif de Florence, c'est à sçauoir de tresriches, honnestes & renommez parens, son pere auoit nom Laurés de Medicis, esquels Medicis le Roy Loys xj. leur permist porter en leurs armes les trois fleurs de Lys.

De la guerre de Guyenne : & comment le Roy de France enuoya secours au Roy de Nauarre. Des preparations que feit le Roy d'Angleterre pour venir en France guerroyer. Et comment deux gros nauires, l'un Francois & l'autre Anglois, se combattirent sur la mer.

VN peu apres ce temps, se meust vne autre guerre en Guyenne, principalement au Royaume de Nauarre : auquel Royaume le Roy d'Arragon estoit ja entré dedans, & auoit prins Pampelune & autres villes appartenant audit Royaume, soy disant heritier à cause de sa femme sœur du feu Duc de Nemours & Comte de Foix, lequel ses gens mesmes auoient occis à la iournée de Rauenne. Parquoy le bon Roy de Nauarre requist & demanda du secours au Roy de France, pour luy ayder à recouurer ses places. Le Roy de France considerant la bonne fidelité qu'iceluy Roy de Nauarre luy auoit tousiours tenue, luy enuoya secours & grand quantité d'hommes d'armes, & autres gens de pied & autres. Et fut le Duc de Longueuille & Dunois conducteur d'icelle armée pour le commencement. Et y eut en icelle guerre de grosses despences pour le Roy de France : car l'on y fut longuement sans coup frapper. Ensuiuant icelle guerre aucuns Anglois venus par mer iusques aupres de Roncevaux, & saint Iean Pie-de-Porc par le suscitement que leur auoit fait ledit bon Roy d'Arragon, & aussi le bon vouloir les Anglois venir audit Guyenne, comme eux disans hereditaires dudit lieu à cause des guerres du tēps iadis. Ce nonobstant lesdits Anglois ne peurent ioindre & s'en retournerent en leur païs.

L'AN mille cinq cens & treize le Roy Henry d'Angleterre fils du Roy Hēry d'Angleterre vij. lequel par l'ayde du Roy Charles viij. fut fait paisible Roy dudit Royaume d'Angleterre apres la mort & occision du noble Richard de l'Enclastre: pourquoy il est tenu ou doit estre à la couronne de France: mais nō obstant toutes ces choses, & que la verité soit telle, & mesmement que feu son pere Roy luy enchargea à sa mort qu'il ne fait riens contre le Roy de France s'il vouloit longuement prosperer. Ce qu'il n'a fait: mais incontinent apres la mort dudit Roy d'Angleterre son pere : & aussi avec la grand deuotion qu'auoient lesdits Anglois venir au Royaume de France, enuoya ledit Roy d'Angleterre au païs de Flandres vers l'Archeduc, à tout le moins ma dame Marguerite comme gouuernante dudit seigneur & païs : pour auoir force harnois, artillerie & autres munitions de guerre: & principallemēt treize grosses pieces d'artillerie que

fait faire ledit Roy d'Angleterre audit païs de Flandres : lesquelles munitions de guerre luy furent incontinent toutes deliurées, moyénant force angelots qui demurerent : car il y auoit trop long temps, qu'ils n'estoient vollez en autre cōtrée qu'en la leur. Et aussi moyennant la bonne confederation & promesse secrette, qu'il y auoit entre le Roy des Rommains & l'Archeduc avec ledit Roy d'Angleterre. Pourquoy ledit Roy d'Angleterre fut assuré par lesdits Flamens, fait faire ses preparatifs forces nauires, viures & autres vtancilles necessaires à la guerre. Entre lesquelles choses enuoya vers Bretagne son Admiral, accompagné de plusieurs nauires : & principalement auoit vn grand nauire, où estoit ledit Admiral d'Angleterre : lesquels vindrent escumāt la mer au long de la coste de Bretagne. Laquelle chose voyant les François qui n'estoient pas assez pour resister encontre tant de nefes & nauires, & mesmement des gens qu'il y auoit dedans, vn vaillant capitaine de mer nommé Primaugay, lequel estoit en vne nauire grande nommée la cordeliere : laquelle nauire la Royne de France auoit fait faire depuis peu de temps, qui auoit cousté gros argent : dont iceluy Primaugay vint chocquer hardiemēt la grand nef d'Angleterre nommée la regente, aussi belle nef & plus grāde que la cordeliere : & quand vint au ioindre eut force artillerie deschargée. Puis vindrent à ancrer l'vn & l'autre & de battre & frapper l'vn sur l'autre d'vne terrible sorte : mais à la fin celui de la cordeliere qui estoit en la husne, iecta le feu dedans la regente, & se meit le feu aux poudres de fallepestres, où ils furent tous bruslez tant de costé que d'autre : & entre les autres demeura ledit Amiral d'Angleterre & ses gēs : ledit Primaugay voyāt le feu si pres de luy, & qu'il n'y auoit plus de remede ne autre secours se lancea dedans la mer tout armé & là fut noyé, qui fut vn grand dommage, car il estoit vaillant & hardy homme. Et furent lesdictes deux nefes toutes bruslées : les autres nefes du Roy d'Angleterre s'en retournerēt dire des nouuelles au Roy d'Angleterre, lequel en fut bien courroucé, & non sans cause.

Comment le Roy d'Angleterre descendit à Calais à tout son armée : & comment les François furent desconfits à Nouare par les Suisses.

DVrant ledit temps apres que ledit Roy d'Angleterre eut fait ses preparations, ordōna son armée & se meit sur mer, pour venir en France, & vint descēdre droit à Calais : puis print son chemin vers le quartier de Flandres, avec aucune quantité de ses gens. Et qui eut donné dedās dès lors on n'eut pas esté en la perplexité, où l'on a esté depuis. De ce mesme temps le Roy de France fit vne armée pour recouurer la Duché de Milan : & fut principal conducteur le seigneur de la Trimouille, ensemble le seigneur Iean Iaques, messire Robert de la Marche, le seigneur d'Albanie & autres capitaines. Laquelle armée passa les monts, vindrent en Piémont attendant encores le demeurant de ladicte armée : ce neantmoins passerent outre & approcherent iusques aupres de Nouare, auquel estoient quelque quantité de Suisses. Les François voyans qu'il n'y auoit pas grand nombre, furent deliberez de donner la bataille, ce qu'ils feirent : mais il estoit descendu le soir de deuant grand nombre d'autres Suisses, dequoy lesdits François n'estoiēt pas aduertis : ce nonobstāt vindrent donner dedans lesdits Suisses, & deffirent la premiere route. Apres
vindrent

vindrent grand multitude de Suisses de costé & d'autre, parquoy lesdits François furent bien estonnez: & brief s'en reculerent iusques à Turin, & demoura aucun nombre de gens de pied François qui moururent vaillamment, & principalement se porterent vaillans les fils du seigneur de la Marche. Et gaignerēt lesdits Suisses vn beau parc d'artillerie, qu'auoit fait amener le seigneur de la Marche & autres bagages. En apres manda le Roy de France le demeurant de l'armée pour eux reuenir en France, & en enuoya vne partie vers Guyenne: auquel Guyenne y fut le tresillustre seigneur de Bourbon, accōpagné de plusieurs gentils-hōmes & autres: & furent iusques au Royaume de Nauarre, où il auoit vn moult beau camp: & furēt faictes maintes courses des vns sur les autres. Depuis enuoya le Roy son successeur, c'est à sçauoir le Duc de Valois, Côte d'Angoulesme, avec force gētils-hommes pour estre chief dudit camp & armée, où ils furent moult longuement: mais à la fin ce ne fut riens, & s'en reuindrent vers France: & de là le Roy les enuoya vers Picardie au deuant des Anglois, lesquels estoient descēdus & tiroiēt chemin vers Theroüenne, & mourut le seigneur de Longueuille incontīnēt la reuenue de Guyenne. En celle mesme année apparurent vers Suze en Piémont trois soleils & trois lunes, & aucūs stigmates & figures de cercles ou arcs de diuerses couleurs, & vne croix blāche au milieu: ce sont terribles augures: & croy que c'estoit l'année des merueilles. Mesmement au paÿs de Suisses aduint plusieurs semblables augures, qui les esmerueilloiēt terriblement. Ensuiaūt ce temps le Roy enuoya le seigneur de la Trimouille par deuers les Cantons des Suisses: lesquels ne voulurent oncques parlemēter s'ils n'auoient quelque somme de deniers, lesquels deniers leur furent deliurez. Puis parlementerent audit seigneur de la Trimouille, où il fut longuement en leur faisant grans dons pour les cuider auoir: mais apres qu'ils eurent force argent ils renuoyerēt ledit seigneur de la Trimouille qui reuint par deuers la Bourgōgne, pour faire réparer lesdictes villes de Bourgōgne, esquelles lesdits Suisses auoiēt deliberé de venir: ce qu'ils feirent. Et vindrēt lesdits Suisses iour & nuit en grād diligence, où à venir feirent de moult griefs maulx & degasts: & brief marcherent iusques deuāt Dijon, où estoit ledit seigneur de la Trimouille avec quelque peu d'hōmes d'armes & de gens de pied, mais il n'y auoit pas alors pour resister encōtre si grād multitude de Suisses: ce nonobstāt ledit seigneur de la Trimouille feit tout retirer ce qui peut dedans la ville de Dijon. Lesdits ennemis estoient deuant, où ils saluerent la ville à force d'artillerie, si que la ville souffrit beaucoup. Ledit seigneur de la Trimouille bien conseillé parlamenta avecques lesdits Suisses, en sorte qu'il appoincta à eux moyennāt cent mille escus d'or, qui leur furēt deliurez deuāt q̄ partir de deuāt ladiete ville, puis s'en retournerēt en leur paÿs.

Comment aucune compagnie de François reuenans d'auitailler la ville de Theroüenne, qui estoit assiegée des Anglois & Henuiers furent desconfits & mis en fuite.

Durant ce temps le Roy de France marcha en personne vers Picardie, & vint iusques à Amyens, où il eut belle reception de ceux du paÿs. De là enuoya le Duc de Valois & Comte d'Angoulesme au camp contre les Anglois, comme lieutenant general du Roy de France, pour ordonner des choses necessaires à cest affaire: & principalement pour

l'auitaillement de la ville de Theroüenne, ouquel estoient le Roy des Romains, & le Roy d'Angleterre, & force seigneurs de Flandres, & principallemēt force Hainuiers & autres gēs de guerre: lesquels estoient emparquez en vn fort pres la ville de Theroüenne, où là estoit battue ladicte ville de grosse & forte artillerie: ce nonobstant que ceux de ladicte ville tenoient contre icelle puissance & honnestement se porterent & vaillāment: mais les pauvres gens n'auoient plus de viures, parquoy fut fait vn preparatif pour y porter des viures: & fut monseigneur de Longueuille le principal chief, & autres grans seigneurs: dont pour abbreger partirent bien equippez portans viures, vindrent iusques deuant Theroüenne, & là deschargerent leurs viures: mais au reuenir trouuerent vne embusche, dequoy lesdits François ne se doubtoiēt mie, en sorte qu'ils s'en vindrent aucuns esbanoyant parmy les champs, non pensant à nulle embusche ne trahison du monde: sortirent les ennemis, vindrent courir sur les François: lesquels François bien estonnez, commencerent à fuir: ce nonobstāt ledit seigneur de Longueuille, le capitaine Bayard, le seigneur de Bussy & plusieurs autres capitaines de nom, furent prins prisonniers & menez aucuns en Angleterre & mis en bien grand rançon. Sur ces entrefaictes enuoya le Roy de France à Paris cōmāder au Preuost des marchans & escheuins de ladicte ville pour faire les mōstres des mestiers & autres gens de ladicte ville lesquelles monstres furent faictes honnestement. Et y en auoit de richemēt accoustrez & bien armez & tous robbes de liurée. Et fut trouué vn tresgrand nombre de citadins & autres sortes de gens en ladicte ville par le rapport des commissaires qui furent deleguez en cest affaire ou furent portez les bannieres desdits mestiers.

Comment le Roy d'Escoffe entra en Angleterre à tout grosse armée: & comment il fut occis: & de la paix faicte & criée entre le Roy & les Veniciens.

DVrant ce conflit & enhaïssement dessusdit, le tresnoble & debonnaire Roy d'Escoffe descendit au Royaume d'Angleterre, cōme pretendānt droit audit Royaume à cause de sa femme: & aussi pour la bonne confederation & amour que ledit Roy d'Escoffe a tousiours eu avec les Roys de France, le voulut bien secourir & aider à son besoing, à tout le moins trouuer occasion & moyen de nuire ou faire retourner lesdits ennemis du Royaume de France, pour euitier plus grans inconueniens. Parquoy ledit bō Roy d'Escoffe entra dedans ledit Royaume d'Angleterre, & y fait de grans dōmages: ce nonobstant qu'ils eurent vne grand bataille ou maints Anglois furēt occis, & quelque grand quantité de ceux d'Escoffe, & principalement le bon Roy d'Escoffe qui y demoura cheualereusement: qui fut vn tresgrād dommage & grand perte au Royaume de France. On ne trouue pas beaucoup de tels hōmes de mettre son corps & ses biens en voye de mort, pour vn sien amy voire encores en son absence. Ce nonobstant les Escossois gaignerent le camp, posé qu'il en fut beaucoup occis: car il y auoit long tēps que les Anglois & Escossois auoient grand desir d'eux rencontrer, pource ne faut pas doubter qu'il y eut maints coups donnez: Dieu vueille pardonner aux trespassez. Celle année mesmes l'an de grace mille ccccc. xiiij. le vendredy iij. iour de Iuing, fut criée & publiée à Paris sur la pierre de marbre au Palais alliance, bonne confederation & paix

paix entre le Roy treschrestien Loys xij. de ce nō, & la tresillustissime seigneurie de Venise. C'est à sçavoir pour eux & leurs successeurs d'une part & d'autre perpetuellemēt, & à iamais. Et par ce traicté fut renuoyé à ladicte seigneurie de Venise, le gentil chevalier messire Berthelemy d'Aluiane, messire André Gritti & autres, auxquels le Roy fait de grans dons & presens pour leur bien allée.

Comment les villes de Theroüenne & Tournay furent rendues aux Anglois par composition.

Ensuiuant nostre premiere matiere touchant la guerre des Anglois, estant en Picardie: lesquels tindrent longuement camp deuant la ville de Theroüenne, en donnant l'assault par plusieurs fois: mais ceux de dedans ladicte ville se monstrent bonnes gens de guerre, & se deffendirent vaillamment: mais en la fin les viures leurs faillirēt, & leur fut force d'eux rendre par composition. Et entrerent lesdits aduersaires dedans Theroüenne, & ne tindrent pas promesse lesdits aduersaires: Car quand ils furent dedans la ville, ils commencerent à faire griefs excez aux pauvres gens manans & habitans de ladicte ville, en sorte qu'ils pillerent vne partie des pauvres citadins: tant qu'ils furent contrains de chercher autre lieu pour habiter, qui fut vne grosse pitié: encores ne leur suffist il point, car à la fin bruslerent partie d'icelle & ruerent les murs par terre. Il ne se faut pas esbahir si les Anglois estoient descendus si hardiement en France, principallemēt vers la Picardie, veu la grosse intelligence euidente qu'ils auoient aux Flamens: lesquels maintenant en lauent leurs mains, & mesmement à ceux de Tournay qui oncques n'auoit tourné ce disent ils: ce nonobstant qu'ils auoient ja fait le chapitre, *De venditionibus* deuant que lesdits Anglois se boutassent sur mer. Ce n'est point trop honnestement fait à eux, veu qu'ils auoient assez receant seigneur, & ont bien desrogué contre leurs premiers tiltres. Et s'ils s'en trouuent mal, ils ne s'en prendront qu'à eux mesmes. Et brief apres que lesdits Anglois eurent prins Theroüenne par composition, tirerent vers Tournay, qui sans aucune resistance leur fut liurée par les mains des principaux de ladicte ville, ainsi qu'il auoit esté cōclud ensemble. Apres cesdictes prises le Roy d'Angleterre s'en retourna en son païs, pareillement le Roy des Rommains, & laisserent garnison à Tournay. Aussi s'en retourna le Roy de France à Blois avecques la Royne. Durant le temps de ceste guerre des Anglois, & peu auant la descente d'iceux au siege de Theroüenne, se fait vn combat sur mer les xxij. & xxv. iours d'Auril entre Pregent capitaine François & Milort Hauart Amiral d'Angleterre: car ledit Pregent le vendredy veille de S. George cuidant venir à Brest se ioindre avec l'armée François qui là estoit, rencontré d'une route de quarante à cinquante nauires, fut assailly & inuadé de deux galeasses & quatre ou cinq nauires d'icelle route Anglesche: & tellement qu'à l'approcher l'un de l'autre par l'espace de deux heures, y eut merueilleux combat d'artillerie, d'arbalestres & d'arcs, ce qui ne fut pas fait sans grand occision d'une part & d'autre: mais finablement les Anglois contrains d'eux leuer & retraire, allerent deux de leurs nauires en fons. Semblablement le lundy ensuiuant (qui fut le iour S. Marc) ledit Pregent & sa suite fut de rechief assailly d'iceux Anglois, lesquels estoient en nombre trente na-

uires, & vingt & cinq ou trente basteaux, duquel nombre la gallée dudit Pregent fut assaillie de deux galleasses & trois nauires, dont ledit Pregent se deliura en telle sorte, que tous ceux qui dedans la premiere galleasse estoient, furent tuez à coups de picques: & les autres iectez en mer, exceptez deux prisonniers seulement, dont l'un fut enuoyé en fons. Et mesmement en ce conflict demoura ledit Milort Hauart Amiral d'Angleterre: lequel fut pesché, & le corps d'iceluy embasme pour mettre en sepulture. Laquelle chose voyant lesdits nauires Anglois: & aussi que ces cinq ne pouoient nuire ne preualoir contre la gallée dudit Pregent que singulierement ils auoient assaillie, parlement eu entre eux, prindrent le chemin aual la mer en façon telle, que deuant ledit Pregent nul d'iceux ne demoura & eut alors chemin deliuré. Item durant ces debats dessusdits, se fit à Honnefleu vne assemblée & grosse congregation de nauires Francoises pour aller empescher le Roy d'Angleterre qui s'en retournoit: mais quand ils furent sur mer suruint si grand tempeste, que l'entreprinse fut rompue, & y eut aucuns nauires periz. En cest an mille cinq cens & treize fut vn si long & merueilleux hyuer, que la riuere de Seine & autres fleuves furent prins & gelez, iusques à passer asseurement par dessus. Et quand vint au desgel il y eut plusieurs maisons & moulins versez & emmenez par lesdictes riuieres. Enuiron ce temps fut quelques nouuelles que les Suisses vouloient reuenir en Bourgogne, parquoy le Roy y enuoya le seigneur de Bourbon, avecques quelque quantité d'hommes d'armes & autres gens de guerre, mais lesdits Suisses ne descendirent point. Celle année mesmes reuindrent les garnisons qui estoient au païs d'Italie pour le Roy de France, moyennant l'appoinctement qui fut fait deuant Dijon avec les Suisses: c'est à sçauoir ceux du chasteau de Milan, & autres de ladicte Duché. Puis reuint aussi le seigneur d'Aubigny la lance sur la cuisse luy & ses gens, lesquels estoient au chasteau de Bresse: & se bouterent dedans ledit chasteau les espaignols, pensans les Veniciens que ce fut en leurs priuez noms, mais quand lesdits Espaignols furent dedans leur chäterent l'Euangile des Vierges, c'est du demené de la guerre.

Du trespas & sepulture de la treschrestienne Royne de France Anne Duchesse de Bretagne.



Pres icelles ennuyeuses nouuelles, la trefillustre & debonaire Royne de France & Duchesse de Bretagne & autres lieux, cheut malade au chasteau de Blois le lundy ij. iour de Ianuier mille cccc. & xiiij. Et tant persista & continua ladicte maladie d'icelle tresbonne dame, qu'elle trespassa tresdeuotement en Iesus-Christ nostre souuerain seigneur: auquel elle rendit humblement son esprit, le lundy apres ensuiuant ix. iour dudit mois de Ianuier: duquel trespasement furent faits & iectez moult grans plains, pleurs, regrets & lamentations de dueil. Puis fut son corps embasme & mis en vn riche cercueil. Apres laquelle chose faicte, le corps de ladicte dame avec grand quantité de luminaire, fut apporté de la ville de Blois en l'Abbaye de S. Denys en France: où honnorablement il fut ensepulturé au grand regret de ses gentils-hommes & officiers domestiques. Et fut audit lieu son seruice fait, ainsi comme à telle dame appartenoit: Dieu luy soit vray ayde à l'ame.

Au

Au mois d'Auril mille cinq cens & treize avant Pasques, furent à Paris criées & publiées trefues entre le Roy de France Loys xij. & le Roy d'Arragon.

Comment le Roy de France espousa & print à femme ma dame Marie sœur du Roy Henry d'Angleterre. Et comment monseigneur Francois Duc de Valois & Comte d'Angoulesme espousa ma dame Claude fille dudit Roy de France. Et de l'entrée d'icelle dame Marie faicte à Paris.

A Pres icelles funerailles pour reuenir à la matiere precedente, vint le Roy à Paris vn peu apres le trespassement de ladicte Royne, & fut logé aux tournelles : & de fait vouloit que nul ne parlast à luy, fil n'estoit vestu de drap noir. Peu de temps apres manda ses filles, lesquelles estoient à Blois: c'est à sçauoir ma dame Claude & ma dame Renée, lesquelles cōduisoit ma dame d'Angoulesme. Puis māda tous les Princes & seigneurs, Prelats & autres gens de conseil pour subuenir aux affaires de la paix du Royaume. Et enuoya le Roy en Angleterre son general de Normandie, le President de Roüen, & autres pour le traicté de la paix: & avec ce le seigneur de Longueuille, lequel estoit prisonnier audit Angleterre, qui fut en affaire pour ledit appointement. Durant ledit temps fut le Roy bien malade au Bois de Vincennes: & pour sa guerison ordonna generally, qu'on chantast. *O salutaris hostia*, à la leuation du saint Sacrement du precieux corps de nostre sauueur Iesus Christ, qui luy auoit fait grand ayde: & manda par tout le Royaume de France estre dit & continué. De là s'en alla ledit Roy Loys à saint Germain en Laye pour passer temps, & aussi pour eiter la melencolie de son dueil: car c'est vn païs bien recreatif pour les bois, buissons, boscages, & principalement pour le gibier. Et aussi fut illec traicté de plusieurs affaires dudit Royaume & païs. Et fut adonc fait le mariage de mōseigneur le Duc de Vallois & Bretagne, Comte d'Angoulesme & autres lieux, avec la fille du Roy ma dame Claude: & espouserent tous en dueil, vestus de drap noir. Et fut fait ledit mariage en la chapelle du chasteau present le Roy accompagné du sang royal, & plusieurs autres nobles Princes & seigneurs, Prelats d'Eglise tous vestus de noir. Et fut le xvij. iour du mois de May mille cinq cens & quatorze. Enuiron ce temps estant encores le Roy à saint Germain en Laye, fut fait appointement par les ambassadeurs enuoyez de par le Roy en Angleterre, entre le Roy de France Loys xij. & Henry Roy d'Angleterre, moyennant que le Roy de France espouseroit ma dame Marie sœur dudit Roy d'Angleterre. Pourquoy de la partie dudit Henry d'Angleterre, furent pareillement enuoyez ambassadeurs d'iceluy païs: c'est à sçauoir aucuns grans seigneurs temporels & spirituels: lesquels vindrēt iusques en ladicte ville & cité de Paris par deuers ledit Roy Loys, pour confermer le mariage entre luy & dame Marie sœur dudit Roy Henry: Et pour aussi entretenir & confermer la paix dessusdicte entre les dessus nommez Roys: ce qu'ils ont iuré & promis entre le Roy Loys de Frāce & lesdits Prelats ambassadeurs, & tāt qu'icelle paix & cōcorde generally fut criée & publiée esdits païs de Frāce & d'Angleterre. Et fut le mercredy xvj. iour d'Aoust mille ccccc. xiiij. à force trōpetes & clairōs sur la pierre de marbre à Paris, & furēt faits feux de ioye: & incōtinēt apres ledit cry vint vn herault d'armes nōmé Mont-ioye, lequel publia &

inuoqua tous Princes, seigneurs & gentils-hommes de venir à iour nommé à vn tournay, lequel seroit fait à Paris par monseigneur le Duc de Valois & Bretaigne, Comte d'Angoulesme, & autres lieux, où il feit faire grandes preparations. Apres peu de temps ladicte dame Marie fut conduicte & menée en France par plusieurs bien nobles seigneurs, & grans personages dudit Royaume d'Angleterre: aussi en la compagnie d'aucuns seigneurs du païs & Royaume de France. Et adonques estoit party de Paris le Roy de France accompagné de plusieurs grans Princes, Barons & seigneurs de sondit Royaume, pour aller au deuant de ladicte dame Marie, iusques au païs de Picardie au lieu d'Abbeuille, où il y fut en brief. Et tant fut bien conduicte par le païs icelle dame, que le dimanche huietiesme iour d'Octobre mille cinq cēs & quatorze, feit son entrée audit lieu d'Abbeuille moult triumphamment, accompagnée de monseigneur le Duc de Valois & autres princes & grans seigneurs, tant du Royaume d'Angleterre que de France: lesquels estoient bien richement accoustrez & force grosses chaines d'or, principalement les Anglois. Ladicte dame estoit tresrichement accoustrée, & consequamment tout son train seigneurs, dames & damoiselles, & chariots bien triumphans. Brief c'estoit vne chose magnifique. Et deuant ladicte dame marchaient cc. archiers dudit païs, qui estoient garnis de force saiettes l'arc au poing. Ledit Roy sçachant sa venue, monta sur vn courcier, feit semblant d'aller soy esbatre aux champs accompagné de force de gens: lequel vint au deuant de ladicte dame & la baïsa tout à cheual, en luy disant trois ou quatre parolles ioyeuses comme moult bien le sçauoit faire. Puis reuint en ladicte ville d'Abbeuille, là où fut receuë honorablement ladicte dame: & sans point de faulte chacun feit son deuoir de luy faire belle reception, & principalement les citadins dudit Abbeuille. Le lendemain qui fut le iour monseigneur sainct Denys, furent espousez ledit Roy de France & ladicte dame Marie d'Angleterre ensemble: laquelle estoit tresmagnifiquement accoustrée de force pierres precieuses, & autres ioyeaux. Puis fut fait vn banquet tressingulier, où il y eut grand ioye. Et furēt aucune espace de temps audit Abbeuille à eux solacier, ce qui ne dura pas longuement. Puis apres se partirent dudit Abbeuille en tirant vers Paris: en passant par les villes de Picardie, leur furent faictes entrées solennelles. Et deliura ladicte dame les prisonniers en tous les lieux, par où elle passoit de par le commandement du Roy. Tant approcherent dudit Paris, qu'ils vindrent iusques à sainct Denys en France, où ladicte dame fut couronnée Roynne de France, & y eut moult grand triumphe de force Archeuesques, Euesques & autres gens dignes de nom.

LE lundy sixiesme iour de Novembre mille cinq cēs & quatorze, la Roynne feit sa triumphatique entrée en la ville & cité de Paris, chef & principale de France, où tout le clergé alla au deuant de ladicte Dame. Puis y fut la Court de Parlement, & generallyment tous ceux qui ont l'administration de la Iustice: Puis la chambre des comptes: Puis allerent les Preuosts & escheuins de ladicte ville de Paris: & consequamment les marchans & officiers de ladicte ville, comme archiers, arbalestriers, & sergens de ladicte ville: Puis le Cheualier du guet & tous ses gens par ordre. Ladicte dame estoit assise en vne riche littiere bien aornée de pierres precieuses. Et la conduisoient monseigneur le Duc de Valois & Bretaigne

& Bretagne & autres lieux, monseigneur d'Alençon, monseigneur de Bourbon, monseigneur de Vendosme, François monseigneur son frere, Loys de Nevers, avec autres grans seigneurs, tant de France que d'Angleterre, & force de Prelats & gens d'Eglise. Puis Madame Claude fille du Roy de France, Madame d'Angoulesme, Madame d'Alençon, Madame de Vendosme, Madame de Nevers, & plusieurs autres princesses & nobles dames, tant de France que d'Angleterre. Et en icelle maniere entra ladicte Royne en nostre dame de Paris, où elle feit le serment accoustumé. Puis vint au Palais Royal, où il fut fait vn grand banquet solennel, qui estoit moult beau à veoir. Puis allerent le Roy & la Royne coucher dedans le Palais mesmes, pour abbreger ses iours bien tost.


Des ioustes faictes à Paris. Et du trespas & sepulture du Roy Loys douziesme.

LE lendemain alla le Roy & la Royne aux tournelles pour veoir le Tournoy, qui auoit esté publié par cy deuant: auquel Tournoy y auoit vne arche triumpante, en laquelle estoient esleuez les escuz du Roy & de la Royne. Puis apres consequamment tous les autres escuz & blasons des seigneurs & princes, tant tenans comme deffendans. Et estoit monseigneur le Duc de Valois & Bretagne, Comte d'Angoulesme seul tenant avec ses aydes. Et y auoit moult belles lices, où furent faictes maintes belles cources & coups de lance: là où aucuns se trouuerent bien, les autres mal. Et brief il faisoit moult beau veoir ledit tournoy. Et tout pour l'amour de la bienvenue de ladicte Royne Marie, laquelle ne dura gueres qui fut vn gros dommage pour les pures gens: ce nonobstant qu'ils fussent fort taillez, car le Roy auoit grand volenté de faire amender les tailles, si eust vescu plus longuement, comme il pensoit. Apres lesdictes ioustes & tournois, mena le Roy la Royne à saint Germain en Laye, où ils furent quelque peu d'espace de temps demeurant ioyeuse vie, au mieux que ledit Roy pouoit. Apres reuint à Paris à son logis des tornelles, où il accoucha malade, disposa de sa conscience comme vn bon chrestien doit faire. Puis rendit l'esprit à Dieu le lundy premier iour de Ianuier l'an dessusdit mille cinq cens & quatorze. Son corps fut aromatiquement embasme, & gardé par aucuns iours ausdictes tournelles, où chacun l'alloit veoir qui vouloit. Puis luy furent faictes les cerimonies en la maniere accoustumée, comme il appartient à vn Roy qui seroit trop long à descrire. Aucuns iours apres fut porté à nostre dame de Paris, & y auoit moult bel ordre audit obseques: & fut mis en vne chapelle, laquelle auoit esté faicte diligemment au cueur de ladicte Eglise de nostre Dame. Et feit le seruice l'Euesque de Paris: le lendemain fut ledit corps du Roy porté iusques à vne croix pres saint Denys où messeigneurs de saint Denys le vindrent querre. Et par eux fut ensepulturé triumpamment & à grand dueil de ses seruiteurs, & officiers domestiques. Et fut ensepulturé pres de la Royne Anne de Bretagne son espouse: Dieu leur vueille faire pardon. Ceux qui faisoient le grand dueil estoit le seigneur d'Alençon, le seigneur de Bourbon, le seigneur de Vendosme & autres bien grans princes & seigneurs.

Incidence.

En'est pas peu de chose quand vn Roy ou grand Prince meurt, qui aucunesfois ont esté cause de la mort de beaucoup d'hommes : lesquels sont creatures humaines comme lesdits Princes ou seigneurs : & croy qu'en l'autre monde ils ont beaucoup d'affaires, & principalement pour vne raison. C'est qu'un pource homme lequel aura six ou sept petis enfans, & n'aura que vingt sols vaillant, & il est taxé à dix ou à vingt sols pour la taille, & le recepueur viendra pour executer ledit pource homme, & il n'aura ne ne pourra nullement finer dudit argent : ce nonobstant sera mis en prison. Je voudroye bien que l'on monstraist la loy par escript d'icelle belle raison : mais il n'y a nul qui l'ose remontrer, pour autant que chacun veult faire ses besongnes : Dieu vueille ayder au pource populaire.

COMMENT LE TRESCHRESTIEN ROY DE France Francois premier de ce nom, fut sacré Roy à Reims, & fait son entrée en la ville de Paris & autres lieux. Et comment ledit Roy partit de France pour aller de-là les monts contre les Suisses qui detenoient la Duché de Milan.



PRES le Roy Loys douziesme, succeda audit Royaume de France François premier de ce nom lviij. Roy dudit Royaume. Partit de Paris pour s'en aller faire sacrer en la ville & cité de Reims, comme estoit de coustume de faire à ses predecesseurs. Là où il fut moult dignemēt sacré & enoinct de la sainctevnction le ieudy xxv. iour de Ianuier mille cinq cens & quatorze. Les douze pers de France, ou les deputez à ce faire illec assistens & appelez faisant vn chacun son office ainsi qu'il est accoustumé, ce qui fut fait moult reueremment & en grand triumphe. Et fut audit sacre Madame sa mere, Madame de Bourbon, Madame de Vendosme & autres dames & damoiselles. Il vint suiualement à sainct Denys en France, & en son reuenir eut plusieurs belles entrées : sicomme à Laon, à Noyon, Compiègne, Senlis & autres villes. Et tellement qu'il vint iusques à Paris tousiours accompagné de grans Princes & seigneurs dudit Royaume. Et brief fait son entrée la plus triumpante & magnifique, que iamais fut veuë des viuans. Car c'estoit toute orfauerie des accoustremens & des bardes des cheuaux, tout drap d'or frisé : Somme que les seigneurs & gentils-hommes estoient ceux & leurs cheuaux, pour le moins, tous couuers de drap d'or : à aucuns desdits accoustremens estoit force orfauerie à l'entour desdictes bardes. Et entra ledit Roy François ainsi triumpamment accompagné : & estoient les accoustremens du Roy tous d'orfauerie d'argent blanc, & ses lacquets & autres gens auoient de drap d'argent blanc. Puis alla au palais royal, comme de coustume estoit à ses predecesseurs : & là fut fait vn solennel banquet, où estoient force instrumens & châtres de plusieurs sortes qu'il faisoit moult beau veoir. Apres furēt faictes ioustes & tournois en la rue sainct Anthoine audit Paris, où le Roy se porta vaillamment. De ce tēps fut fait appointement entre le Roy de France & l'Archeduc, moyenant Madame Renée seur dudit Roy, & fille du feu Roy Loys xij. laquelle fut accordée

accordée audit Archeduc par ambassadeurs deleguez audit affaire, & fut le Comte de Nanfau : lequel Comte de Nanfau aussi fut marié, & depuis espousé avec la fille du Prince d'Orenge. De ce temps fut fait au Palais de Paris monseigneur de Bourbon Connestable de France. De ce temps mesmes que le Roy estoit à Paris, qui estoit le saint temps de la quarantaine, espousa le Duc de Suffort Madame Marie Royne Blanche du Royaume de Frâce, seur du Roy d'Angleterre : lequel Roy d'Angleterre auoit enuoyé en France ledit Duc de Suffort : & emmena ladicte femme en Angleterre, laquelle fut conduite & accompagnée de bien grans Princes & seigneurs. Aussi fut confirmée la paix entre le Roy de France & d'Angleterre. De ce temps enuoya le Roy querir Pierre de Nauarre, lequel estoit en prison : & luy fait le Roy de grans dons, & luy bailla charge de gens.

APRES tous iceux appoinctemens & mariages, le Roy fait ses Pasques à Paris : puis s'en alla par eaue, consequamment la Royne, Madame sa mere & autres : & furent par eaue iusques à Monstereau Fault-Yonne. De là partit le premier iour du mois de May, alla iusques à vn petit chasteau nommé Egreuille, où là fut fait vn petit Tournoy & ioustes. De là vint à Montargis, & de là à Briare, où il se meit sur la riuere de Loire : brief vint à Amboise faisant par tout, où il passoit entrées ausdictes villes : cōme à Meun, Monterau, Montargis, Blais, Amboise & autres petites villes, où luy fut fait belle reception. Sicomme il fut à Amboise, fut à la chasse vn iour, où il se meit vne espine dedans la iambe, qui luy perça sa botte & chausses, tant que ladicte espine luy fait grosse douleur & en fut biē malade. De ce temps mesmes que le Roy estoit à Amboise, fut espousé monseigneur de Lorraine avec Mademoiselle de Bourbon, seur du Connestable de France, seigneur dudit Bourbon. Et fut fait gros triumphe ausdictes nopces, & estoit le donjon du chasteau d'Amboise tout couuert de toilles de peur du soleil. Quand vint vers la nuict, y eut plusieurs mommeries & mourisques bien richement accoustrez, qui faisoit bon veoir. Apres toutes icelles ioyeusetez se partit le Roy vn iour biē matin, pour venir à Remorantin, où aussi fut fait pareillement bonne chere. Et festoya Madame sa mere le Roy son fils pour sa bien allée. Car à l'heure le Roy eut nouuelles que les Suisses estoient venus courir iusques aupres de Briansson, qui est au païs de Daulphiné, & auoiēt brulé vn village pres du chasteau Daulphin. Parquoy le Roy partit soudainement, print congé de Madame ladicte mere, & vint à Bourges, où luy fut fait vne moult belle entrée. Le Roy partit lendemain vint en poste à Moulins, où Madame de Bourbon le receut treshonnestement, & eut belle entrée pour vne si petite ville : car il y auoit chars triumpfans où estoient belles dames, nauires, bestes estranges, où estoient montez dessus moult belles dames tous marchans deuant le Roy. Ensuiuant vint le Roy à Lyon, où pareillement luy feirent les citadins trespelle & magnifique entrée. Et là ordonna des affaires pour les munitions de la guerre, laquelle estoit ja encommencée pour aller à Milan, & passer les mons. Ensuiuant iceluy voyage delaisa le Roy pour gouuerner en France ce pendant qu'il seroit hors du Royaume, Madame sa mere Duchesse d'Anjou & du Maine, Comtesse d'Angoulesme & autres lieux. Vn peu de temps apres le Roy partit de Lyon & vint en la ville de Grenoble, où il eut aussi trespelle en-

trée : où il fut aucun peu de temps ce pendant que les preparatifs se faisoient pour ladicte guerre. Enuiron ce temps mourut le petit fils de Frederich , iadis Roy de Naples : lequel petit enfant commençoit à suiure la guerre, & croy que fil eust vescu il eust fait bon fruit, car il estoit moult gentil & honnesté. Apres se partit le Roy de Grenoble pour passer les mōs, & alla par nostre dame d'Ambrun, nonobstant que tout le train de la guerre au moins la plus grand partie alla par le bourg Duissant , où le Roy auoit fait faire sur ledit chemin grand provision de viures pour ladicte armée. Et brief le Roy vint à Guillestre , de là à S. Paul . Et finablement passa vn chemin impossible, où iamais homme n'estoit passé. Et y eurent beaucoup de miseres les pources piétons & autres. Le Roy feit mener vne partie de l'artillerie par cedit chemin : & de fait fut demontée l'artillerie pour la passer par cedit chemin. Sur ces entrefaictes le Pape auoit enuoyé bien quinze cens cheuaux, bien equipez & accoustrez , dont estoit chef vn nommé Prospere Coulonne natif de la Rommanie : lequel Prospere & ses gens estoient venus en ayde à Maximilian, & ses alliez pour cuider surprendre le Roy de France ou ses gens aux passages : mais ledit Prospere ne scauoit pas que les François fussent si pres, & qu'ils eussent passé les mons: parquoy ledit Prospere se vint rafreschir en vne ville nommée ville Franche de la Morette, qui est au pays de Piémont. Ce pendant estoit vn des gentils-hommes du Roy nommé le seigneur de Morette, auquel vn villain du pays vint dire l'aventure. Et que Prospere Coulonne estoit en ladicte ville de ville Franche à se rafreschir : & qu'il ne se doubtoit de riens, & qu'il y feroit bon aller pour les surprendre vistemment. Parquoy ledit seigneur de Morette vint annoncer au Mareschal & seigneur de la Palisse, au seigneur d'Aubigny, au capitaine Imbercourt, Bayard & autres : lesquels furent tous d'accord moyennant le seigneur d'Imbercourt, qui marcha le premier , & enuoya sonner le guet par vn de ses archiers : lequel luy feit rapport qu'il y feroit bon aller incontinent : & que ledit Prospere Coulonne & ses gens estoient prests de disner, & qu'ils ne se doubtoient de riens : parquoy diligemment enuoya ledit Imbercourt par deuers le Mareschal de la Palisse & autres, à celle fin qu'ils vinssent hastiuement . Ce nonobstant ledit seigneur d'Imbercourt hardiement marcha le premier , & entra incontinent à grans courses de cheual, luy & ses gens dedans la ville, où estoit ledit Prospere & ses gens : & quand vint à la porte de ladicte ville, la trompette bouta son cheual auant & commença à sonner dedans dedans, en sorte que le col de son cheual fut ensermé entre les portes de ladicte ville: mais il eut incontinent des hommes d'armes, qui croiserent leurs lances & entrerent dedans, & tuerent & occirent tous ceux qui auoient resisté contre eux à ladicte porte. Puis coururent parmy la ville & marcherent criant France France, & vindrent iusques où estoit ledit Prospere Coulonne, lequel disnoit alors: où il y eut moult batu & frappé à l'entrée dudit lieu: ce pendant ledit seigneur de la Palisse & autres vindrent diligemment . Et brief fut prins ledit Prospere Coulonne & aucune quantité de ses gens occis: & tout leur bagage prins & pillé, & force de beaux cheuaux qui furent trouuez dedans les estables de ladicte ville. Et fut amené ledit Prospere Coulonne & autres prisonniers deuers le Roy : puis fut amené en France & mis au chasteau de Montagu appartenant audit seigneur de la Palisse.

Comment le Roy de France à tout son armée suiuit les Suisses . Et comment la ville & chasteau de Nouare furent rendus au Roy.

A Pres icelle deffaicte, le Pere Sainct eut nouuelles à Romme comment ledit Prospere & ses gens d'armes estoient deffaits & prins prisonniers, dont il fut moult esbahy & non sans cause: car il n'eust iamaïs creu, que le Roy eust sceu passer par ce chemin terrible, & à grand peine le vouloit il croire. De là aussi vindrent nouuelles aux Suisses, lesquels estoient à Suze, à Villane & Riuolle, & autres lieux pour garder les passages. Les Suisses aduertis au vray, incontinent & à grand diligence commencerent à marcher & eux en aller tirant vers Milan. Lors les François suiuan lesdits Suisses de bien pres, vindrent iusques à Thurin, où le Duc de Sauoye estoit: lequel vint au deuant du Roy de France son parent & confrere, & luy fait bonne reception. Et le Roy le mena quand & luy du depuis, & fait mener le Roy cinq grosses pieces d'artillerie quand & eux: laquelle artillerie estoit audit Duc de Sauoye. En apres marcherent tousiours apres lesdits Suisses, lesquels auoient desia passé la riuere du Pau d'une terrible sorte: car ils n'auoient nuls basteaux ne ponts sinon des cordes, où ils tiroient tout leur artillerie & bagage, & s'en allerent iour & nuict. En eux allant vindrent en vne petite ville nommée Chiuas, où ils bruslerent le chasteau & aucunes maisons dudit Chiuas, ladicte ville appartenant au Duc de Sauoye: & occirent & pillerent vne partie de ladicte ville, qui estoit grand pitié à veoir: & auoient ce fait les Suisses, pource que ceux dudit Chiuas ne leur voulurent donner aucuns viurés & aussi passage dedans ladicte ville: & furent occis aucuns Suisses, lesquels estoient demeurez à piller ladicte ville. Durant ce temps vint le seigneur de Prie accompagné des Geneuois, lequel arriua à Alexandrie & autres villes, laquelle il pilla ce nonobstant que lesdits citadins s'en estoient ja fuis: lesquels auoient bien merité auoir beaucoup de mal, pour les bons tous que souuent & de coustume ont ioué aux François. En ensuiuant icelle guerre & la suite que les François faisoient apres les Suisses, lesquels marchaient se sembloit vers Iurée, ce nonobstant tirent tout court & vindrent à Nouare. Lors le Roy & ses gens tousiours suiuan vint en la ville de Verseil, où il y eut aucun bruit & mention de quelques paroles d'appoinctement entre le Roy & les Suisses: & y estoit commis mōseigneur le Bastard de Sauoye, le seigneur de Lautrec & autres. Ce non pourtant le Roy faisoit tousiours marcher son camp apres lesdits Suisses, lesquels s'en estoient desia partis de Nouare, & teindrent le chemin vers Milan. Ce pendant vint de renfort au Roy vne bande de Lansquenets, qu'on appelloit la bande noire: laquelle bande estoit bien accoustree. Et fait le Roy marcher son camp deuant Nouare, où fut donné incōtinent l'assault par Pietre de Nauarre & autres: mais ceux de dedans furent incontinent rendus, & submis entre les mains du Roy. Durant ce temps accoucha à Ambōise la Royne de France d'une belle fille, laquelle fut nommée Loÿse: dont fut enuoyé apres peu de temps la pourtraicteure au Roy, lequel estoit ja dela les monts. Apres que le Roy eut prins & conquis la ville & chasteau de Nouare, ce nonobstant que ladicte ville ne fut point pillée par le commandement du Roy, le camp marcha & tira vers Milan & al-

lerent à Bufalore. Ce pendant fut nouvelles que l'appoinctement estoit fait entre le Roy de France, & les Suisses : ce qui fut accordé moyennant grand nombre d'or, que leur auoit promis le Roy : & de fait iurerent leur foy lesdits Suisses & passerent appoinctement, ce qu'ils ne teindrent pas & faucerent leur foy & promesse.

Comment le treschrestien Roy Francois de France desconfit pres de Marignan au Camp S. Brigide, l'armée des Suisses le iour de l'exaltation sainte Croix. Et de la cruelle bataille & occision qui fut lors entre les Francois & Suisses.

LE Roy pensant estre asseuré de ladicte promesse des dessusdits Suisses, fait marcher son camp à Marignan approchant pres de Milan : mais il ny fut pas longuement que les Suisses ne retournerent leurs robbes, ce nonobstant que le Roy leur auoit enuoyé par monseigneur de Lautrec & autres, vne somme d'or qui leur auoit esté promise en accordant ledit appoinctement. Ce temps pendant que l'on menoit iceluy argent, iceux Suisses & leurs alliez furent deliberez de venir surprendre le Roy & son armée. Aussi que le Cardinal de Syō les auoit corrompus & preschez, avec aussi la requeste que leur faisoit Maximilian fils de Ludouic, iadis prins prisonnier audit pays d'Italie par le feu Roy Loys douziesme : & aussi la priere que leur faisoient les citadins & autres gens de Milan, en leur liurant & baillant plusieurs alecrets & vtencilles pour le fait de la guerre : & aussi les belles promesses, que ceux iouissans pour lors du pays leur faisoient : lesquels Suisses voyant le pays pour eux & principalement regarderent le grand hazard, où ils se boutoient, pensant que si la fortune leur disoient bien, qu'ils seroient seigneurs de beaucoup de prouinces & crains & redoubtez de tout le monde : & fut la cause pourquoy ils vindrent si hardiement.

LORS le Roy eut des nouvelles vn bien peu deuant que la bataille se donnast, que lesdits Suisses auoient deliberé de combattre, dont il fut bien esbahy, veu que l'argent qu'il leur auoit promis estoit en voye, & cuidoit qu'ils comptassent ledit argent à l'heure. Ce nonobstant comme hardy & vaillant, non ayant cremeur, se delibera de receuoir lesdits ennemis, & fait mettre diligemment ses gens en bon ordre. Si comme il estoit en tels affaires, nouvelles luy vindrent qu'il estoit sorty de la ville de Milan vn grand nombre de gens de pied bien armez, qui venoient donner la bataille avec les Suisses ses aduersaires, ce qu'ils feirent : car incontinent la iournée mesmes entre trois & quatre heures deuers le soir, vindrent vne route & grand compagnie de Suisses hardiement frapper sur l'armée du Roy de France, où ils furent receuz vertueusement, ce nonobstant qu'il y en eut qui n'en voulurent oncques manger, & regardoient par où ils s'en retourneroient.

LE Roy qui menoit la bataille voyant les ennemis venus, incontinent luy mesmes vint en personne avec aucuns de ses gentils-hommes en la bataille, & vaillamment chargerent dessus, en sorte qu'il en deffit vne bande. Puis gentils auenturiers François se vindrent mettre ou lieu des Lansquenets, lesquels vne partie auoient tourné le doz : mais de ce ne les en fault blasmer, car par auant on leur

leur auoit signifié l'appoinctement, dont ils estoient bien courroucez & ne demandoient qu'à combattre: pourquoy lesdits Lansquenets estoient bien estonnez, pour la cause qu'on leur auoit signifié l'appoinctement, & du depuis signifié d'eux venir combattre. Et en auoit aucuns qui cuidoient que le Roy les voulsist faire tuer: ce non pourtant quand ils veirent que les auenturiers François se bautoient si hardiement dedans lesdits Suisses, ils prindrent cueur & se porterent au mieux qui leur fut possible: mais à brief parler les auenturiers François faisoient merueilles, & si n'y auoit pas grand quantité desdits auenturiers François, & deffeirent vne bende desdits Suisses, où ils estoient bien quatre mille, & lesdits François auenturiers n'estoient pas deux mille. Là eussiez veu chamailler, frapper à grans coups de piques fortes & roides, & force espées à deux mains: somme toute, que l'on ne sçauoit lequel auoit du meilleur. Lesdits Suisses vindrent si treshardiement que merueilles, & chargerent sus la bataille & arrieregarde, qui estonna fort les François: & pensoient faire lesdits Suisses comme ils feirent à la iournée de Nouare. Lors l'artillerie qui pas ne dormoit, reueilla bié lesdits Suisses: ce nonobstant que du commencement lesdits Suisses cuiderent venir ruer dessus pour la gaigner: mais ils trouuerent forte resistéce, & ne tiroit coup ladicte artillerie, qu'elle n'occist beaucoup desdits ennemis. Brief la bataille dura iusques à la lune couchant, avec ce qu'il faisoit vne merueilleuse poulciere pour la grand chaleur qu'il auoit fait audit païs d'Italie. Et de fait combattirent tousiours, tant qu'ils se peurent veoir: & y en eut aucuns qui cuidoient estre retirez en leur camp, & ils estoient au camp des François: & mesmement aussi des François en leur camp: & encores vne chose qui abusa lesdictes deux parties, c'est que les Suisses crioient France France, & puis occioient les François: la nuict ne fut pas longue. Et fut tousiours le Roy parmy ses gens en leur donnant courage & bon espoir, sollicitant de lieu en autre ses gens, & principalement à son artillerie: en laquelle auoit grand nōbre de Lansquenets, qui la gardoient bien. Puis le Roy se reposa vn petit sur le limon d'une charette tout armé. Et vous promets & si n'ya nulle faulte, que sans sa presence les François eussent eu bien affaire.

QUAND vint au matin que le iour commença à poindre, lesdits Suisses encharnez sur lesdits François, ce nonobstant que des le soir auoient lesdits Suisses perdu plus de gens qu'ils ne pensoient, vindrent cedit iour sainte Croix le quatorziesme iour du mois de Septembre mille cinq cens & quinze, au lieu dit sainte Brigide hardiement: & eussiez dit qu'ils venoient à vne dance, & donnerent vertueusement sur les François. Et lors eussiez veu battre & chamailler les vns sur les autres, c'estoit à qui en auroit du meilleur: mais l'artillerie où estoit le Roy faisoit beaucoup de meurtre desdits Suisses, & principalement en vne grosse routte & compagnie desdits Suisses, lesquels estoient emparquez ensemble & ne bougeoient: mais à la fin eux voyans qu'on tuoit tant de leurs gens, se retirerent & tournerent le dos vers Milan: eux voyant aussi que le demeurant de leurs gens, lesquels combatoient, ne resisteroit pas longuement contre les François, delibererent d'eux enfuir. Et à brief parler tout le demeurant fut amassé & vaincu. Et n'eust esté la grand poulciere qu'il faisoit lors, il n'en fut pas tant retourné: mais à grand peine veoit on l'un l'autre alors. Et souffrit

beaucoup de soif ledit seigneur ce soir, car il faisoit vne merueilleuse chaleur: & avec ce ne scauoit on trouuer nulle eaüe qui fut bonne à boire, pource que toutes les eaües de là entour estoient toutes ensanglantées: ce neantmoins que ce fut force d'en boire audit seigneur & ses gens, ce nonobstant à la fin aucun luy en apporta de clere. Et estoit moult ioyeux d'auoir rencontré lesdits Suisses, en attendant hardiement le lendemain, comme vne brisée que l'on fait, quand on suit la chasse d'un cerf. Et demoura lendemain desdits Suisses audit camp bien de quinze à seize mille hommes, lesquels ne moururent pas en enfans, mais en gens de grand proësse: & en demoura beaucoup de morts par le chemin en eux fuiant vers Come & Milan, lesquels auoient esté naurez & blecez en bataille. Ce fut vne merueilleuse victoire pour la premiere bataille du commencement du regne du Roy, veu qu'ils le surprindrent par matiere de deception, ensuiuant leur appoinctement par eux promeis des iours precedens de la bataille. C'est bien chose digne de memoire d'auoir combattu si hardie nation & en si grand nombre: car ie ne treuve point par escript, que iamais en fut deffait en vn camp seize mille de leurdicte nation, sinon du temps de Iulius Cesar. Le Roy Loys vnzième luy estant Daulphin, en deffait de trois à quatre mille: & vn Duc de Milan en deffait vne fois de deux à trois mille. Parquoy ie dis que ce fut vne moult bien heureuse bataille pour le Roy, aussi qu'ils estoient grand nombre desdits ennemis & bien deliberez: car ils estoient sortis dudit lieu de Milan. xxxvj. mille hommes.

LORS arriua le secours de la seigneurie de Venise, que le seigneur de Bourbon Connestable de France auoit esté querir: lequel secours venoit à grand diligence tresbien accoustrez & fort bien empoint pour combattre, lesquels trouuerent les Suisses ja deffaits, qui fuioient vers Milan & vers Come. Donc voyant les Veniciens les ennemis fuir, frapperent sur lesdits Suisses & leurs alliez, & se monstrent gens de bien. Principalement messire Barthelomy d'Aluiane, chief & capitaine general de l'armée des Veniciens. Et aussi le fils du Comte de Petillane, lequel fait merueilles d'armes: mais comme il vouloit faillir vn fossé lequel estoit par trop large, son cheual cheut & luy deffous ledit cheual, lequel fut occis par lesdits Suisses & aussi n'auoit pas gens à l'heure avec luy pour le secourir. Et mesmement mourut cheualereusement le seigneur de Imbercourt, lequel entra dedans eux eschauffé comme vn sanglier, qui fut vn tresgrand dommage: car ie vous promets que c'estoit vn homme treisbelliqueux, & hardy comme vn lyon: & qui ne soit ainsi on l'a veu par plusieurs fois en de gros affaires. Aussi y demoura & fut occis François monseigneur de Bourbon: lequel s'y porta vaillamment, & fut enclos desdits Suisses, par ce qu'il ne fut pas suiuy ne secouru à lors. Aussi fut occis le Prince de Tallemont: apres demeura aussi le Comte de Sanxerre, le seigneur de Buffi, le capitaine Mouÿ & autres grans nobles seigneurs & capitaines, porteurs d'enseignes & gens vsitez à la guerre & dignes de nom. Et vous promets que durant la bataille, le bagage n'auoit garde d'estre perdu: car il y auoit moult de gens de guerre, & autres qui le gardoient, & si auoient aussi grand paour que ceux qui batailleoient: mais au fort il y en auoit de bien montez, si le cas fut escheu que la mauuaise fortune eust dit aux pures auenturiers & vaillans hommes d'armes,

mes, qui s'y portèrent furieusement enuers leurs ennemis. Cedit iour fut fait par le Roy beaucoup de chevaliers. Durant ce conflict, s'en fuit le Cardinal de Syon, cause de la mort de tant de gens de bien : & se retira faignant & donnant à entendre audit seigneur Maximilian, qu'il alloit requerir du secours, mais il reuint trop tard.

APRES icelle piteuse occision, se retira aucun grand nombre de Suisses vers vne cassine de l'auantgarde, où estoit le Connestable de France seigneur de Bourbon : lequel suiuant lesdits Suisses, les fait brusler tous dedans ladicte cassine, & n'en eschappa pas vn fil ne volla par dessus ledit feu. Dieu vueille auoit leurs ames, & principalement de tous ceux d'icelle iournée : c'est grand pitié que pour la faueur & suscitement de deux ou trois personages, auoir esté cause de faire mourir tant d'hommes humains. Aucuns n'en font estime non plus que de moutons. Helàs ! ce ne sont pas bestes : car les hommes ont sens & raison ou doiuent auoir, ce neantmoins que aucunesfois leur sens fault par leur mauuaise intention. Aucuns Suisses naurez & blecez s'en retournerent à Milan, les autres vers Come. Ceux qui entrerent dedans Milan, disoient aux citadins qu'ils auoient gagné la iournée : parquoy lesdits citadins les feirent bouter en l'hostel Dieu pour estre pensez : mais quand les Lansquenets furent à Milan, ils les acheuerent de medeciner d'vne estrange & terrible sorte.

Comment les Milannois rendirent la ville de Milan au Roy. Et comment le siege fut mis par les Francois deuant le chasteau de ladicte ville. Et comment il fut rendu au Roy par composition.

VN peu apres icelle funereuse & furieuse bataille, vindrent ceux de Millan par deuers le Roy, luy criant mercy & pardon de la faulte qu'ils auoient faicte enuers luy, & luy liurerent les clefs de ladicte ville de Milan : le Roy misericordieux les receut moyennant quelque appoinctement, qui fut fait presentement d'œuvre pecunielle. Vn peu apres, le Roy enuoya son camp deuant le chasteau de Milan, où estoit le seigneur Maximilian & aucune quantité de Suisses & autres gens amassez : auquel chasteau le Roy fait donner l'assault & battre de force grosse artillerie, tant qu'en peu de iours feirent de grans breches & ouuertes audit chasteau. Aussi pareillement fut fait par Pietre de Nauarre vne mine sous terre, adressant audit chasteau, où ledit capitaine Pietre de Nauarre fait fondre & cheoir quantité dudit chasteau de Milan.

DURANT ledit siege & batterie dudit chasteau, enuoya le seigneur Maximilian par deuers le Roy de France soy voyant par succession de temps en grand dangier, pour traicter d'appoinctement. Parquoy le Roy y enuoya son chancelier, & aucune grand quantité de ses gentils-hommes : lesquels estoient bien accoustrez : & auoit ledit Chancelier vne grand robe de drap d'or frisé : entra dedans le chasteau, auquel estoit ledit seigneur Maximilian, où ils traicterent de matiere de paix. En sorte que le Chancelier de France amena le seigneur Maximilian quand & luy, & vindrent au camp par deuers le Roy : & là

fut ledit appoinctement confirmé, moyennant que les Suiffes qui estoient audit chasteau s'en allerent leurs bagues sauues, & receurent argent de par le Roy qui auoit esté dit par ledit appoinctement. Aussi declaira ledit seigneur Maximilian qu'à perpetuité il ne pretendoit à la Duché de Milan: & luy feit le Roy bon recueil, & l'enuoya au païs de France pour y demeurer & tenir. Incontinent apres entra le Roy à Milan, où luy fut fait assez belle entrée: & y demoura assez longuement en ladicte ville, où ceux & plusieurs des gentils-hommes de la ville, luy feirent force beaux conuiues & banquets. Au regard des citadins de Pauie on n'auoit garde de les prendre ne piller: car il n'y auoit riens que les pures gens du païs, & estoient retirez la plusgrand partie à Milan quand ils furent aduertis que les François auoient gaigné la plaine. Et aussi fut fait appoinctement moyennant qu'ils baillarent quelque somme d'argent.

Comment le Pape Leon dixiesme & le Roy conuindrent ensemble en la ville de Boulongne, où ils traicterent de leurs affaires: & comme le Roy reuint en France.

ENuiron ce temps mourut le capitaine general des Veniciens, messire Barthelemy d'Aluiane: lequel festoit eschauffé en sorte qu'il eut la fieure dont il mourut, qui fut grand dommage, car il estoit vaillant & hardy homme & bon François. Durant ce temps eurent les Lansquenets double paye par deux fois, que le Roy leur feit bailler. Et durant que le Roy estoit audit Milan, fut conclud & pacifié appoinctement entre le Roy de France & aucuns Cantons des Liges des Suiffes, moyennant grosse somme d'or que leur bailloit le Roy, ce nonobstant qu'ils auoient esté vaincus & battus par les François. Apres celuy appoinctement y eut ambassadeurs entre le saint Pere & le Roy de France tant de costé que d'autre, & fut conclud que le Pape se transporterait iusques à Boulongne la Grasse, & aussi que le Roy de France y viendrait en personne pour eux veoir & faire bonne chere & bonne confederation d'amitié ensemble. Parquoy le Roy partit & se mit à chemin menant grand train, & principalement force hommes d'armes & autres, tant qu'il arriua audit Boulongne, où luy fut faicte belle reception. Et feit le Roy la reuerence au Pere Saint, & se feirent bonne chere l'un à l'autre, & parlerent longuement de plusieurs affaires. Vn iour feit le Pere Saint Leon dixiesme le seruice, où assista le Roy, & dura ledit seruice moult longuement. Et brief feirent bonne paix & vnion ensemble: & bailla & deliura le Pape au Roy aucunes villes luy appartenant à cause de la Duché de Milan. Et donna vn chapeau rouge à l'Euesque de Constances, frere du grand maistre de France. Apres iceluy appoinctement le Roy reuint à Milan, & puis se mit à chemin pour reuenir en France delaissant le seigneur de Bourbon Connestable de France, lieutenant general pour luy en la Duché de Milan. Et s'en vint le Roy en grand diligence au trauers des montaignes iusques à la Bausme, où estoient allez la Royne & ma dame sa mere en voyage, où il fut receu à grand ioye & triumphe, & luy fut fait plusieurs entrées au païs de Prouence. De là le Roy & la Royne, ma dame sa mere & tout leur train arriuerent en Auignon, où ils eurent tresbelle entrée. Puis vindrent à Lyon, où la Royne feit son entrée tresbelle & magnifique, & luy feit on tresbelle reception. De ce temps mourut

rut Ferdinand Roy d'Arragon en Espagne: lequel Roy d'Arragon en son vivant a conquis plusieurs Royaumes & paÿs vers le paÿs d'Occident & Midy, & principalement contre les Mores Blancs, lesquels il a subuertis durant sa vie. De ce temps mourut aussi le magnifique Laurens de Medicis frere du Pape, lequel auoit nagueres par auant espousé la sœur du Duc de Sauoye, & sœur de ma dame la Duchesse d'Anjou & du Maine, Comtesse d'Angoulesme & autres lieux, mere du Roy de France, lequel magnifique estoit capitaine de l'Eglise. De ce temps mesmes ensuiuant fut vne grosse iournée entre Sophy dit Ismaël, & le grand Turc de Tartarie: si que le Turc gaigna vne grand iournée contre ledit Sophy, où il fut bien occis cent soixante mille hommes. Et du depuis ledit Sophy Ismaël r'assembla ses gens, & refait vne autre nouuelle armée, si qu'il rassembla grand nombre de gens. Puis de rechief rassembla contre ledit Turc & ses alliez, en sorte qu'il vainquit ledit Turc & ses gens, & les poursuivit iusques en nostre terre derniere de Constantinoble, qui est la premiere Grece: & desherita ledit Turc de ses premiers paÿs, où ledit Sophy est encores possesseur, & ledit Turc demeure captif sur les marches de la terre Chrestienne & de iour en iour guerroyent les vns contre les autres.

Comment l'Empereur Maximilian assemble grosse armée de gens pour cuider reprendre la ville de Milan, & en ieeter hors les Francois. Et comment monseigneur de Bourbon lieutenant general du Roy alla contre luy.

ENuiron ce temps que le Roy de France estoit à Lyon, qui estoit vers la fin de la sainte quarantaine mille cinq cens & quinze, survint & meust vne autre guerre au paÿs d'Italie par le moyen des bōs tours accoustumez de l'Empereur Maximilian, lequel suscita les angelots du Roy Henry d'Angleterre: lesquels auoit long temps qu'ils n'auoiēt vollé en son paÿs, consequemment au paÿs des Cantons de la ligue grise des Suisses: aussi suscita ledit Empereur lesdits Suisses par le moyen d'une partie desdits angelots d'Angleterre qu'ils receurent. Aussi qu'il suscita & inuoqua aucuns citadins de la ville de Milan, & principalement les Galiaches Vicomtes dudit Milan, pensant estre causes de faire reuolter ladicte ville. Parquoy iceux gens amassez & subornez par ledit Empereur, avec ce qu'ils estoient mauuais François, se delibera pour venir à Milan ayant avec luy le frere de Maximilian qui estoit à Milan par auāt: lequel Maximilian auoit fait amener le Roy en France par leur appoinctement, comme i'ay recité par cy deuant en ladicte conqueste faicte par ledit Roy de France. Donc pour ensuiuir la matiere precedente, ledit Empereur rassembla grand nombre de gens. Puis les fait descendre en la plaine de Veronne iusques à Laude. Ensuiuant icelle entreprinse si nouvellement engendrée, le seigneur de Bourbon Connestable de France & lieutenant general pour le Roy au paÿs d'Italie, rassembla le plustost qu'il luy fut possible gens d'armes & autres gens necessaires à la guerre: Puis marcha en personne, quand & son camp, lesquels n'estoient pas grand nombre à cause de l'entreprinse si soudaine: ce nonobstant que bien sept sepmaines deuant il en estoit aucunes nouvelles, mais non pas asseurées. Ledit seigneur de Bourbon

fait marcher tousiours les gens iusques à la riuere d'Ade, où les ennemis estoient ja descendus de leur costé de ladicte riuere d'Ade, & estoient l'un deuant l'autre. Vn peu deuant ce conflict, furent mandez de par le Roy de France aucuns confederez des citadins de Milan: lesquels se meirent à chemin & vindrēt iusques à Suze, lesquels se trouuerent enuiron trente & sept: & parlementerēt ensemble audit Suze, & le lendemain s'en firent trente & trois vers le Roy des Rommains: les autres quatre lesquels se trouuerent bons François vindrēt par deuers le Roy à Lyon qui compterent le cas des autres. Pour retourner à nostre matiere premiere, ledit seigneur de Bourbon estant deuant les ennemis, auoit enuoyé par deuers les Cantons des Suisses: ausquels le Roy de France auoit eu appoinctement par auant, pour & à celle fin d'en auoir aucun nombre pour secourir la Duché de Milan: parquoy en descendit iusques au nombre de neuf à dix mille deuers Ivree. Ledit seigneur de Bourbon luy estant pres la riuere d'Ade prest de combattre contre lesdits ennemis, fut aduerty que ceux de la ville de Milan se vouloient reuolter: aussi qu'ils n'estoient pas assez pour attendre l'armée de l'Empereur, veu qu'ils estoient si grand nombre: fut conseillé le seigneur de Bourbon pour retourner vers Milan: ce nonobstāt que ledit seigneur vouloit bien attendre le choc & le hafart de combattre les ennemis, supposé qu'ils n'auoit pas quantité pour resister, fut soudainement conclud & aduisé qu'ils retourneroient vers la ville de Milan, & attéderoient le secours des Suisses qui estoient à Ivree, lesquels furent longuement à marcher. Ledit seigneur de Bourbon fit marcher son armée à grand diligence tant qu'ils arriuerent audit Milan, où ceux de la ville furent moult esbahis de les veoir ainsi accourir. Incontinent que ledit seigneur fut arriué en la ville, voulut sçauoir ceux qui se vouloient reuolter, & les fait prendre & bouter en prison: aucuns eurent la teste trenchée. Quand les autres citadins veirent que les François auoient gagnée la ville, & qu'ils n'estoient pas les plus forts, delibererent de vouloir mourir quand & les François si la fortune leur disoit mal. Lors le Roy des Rommains voyant que l'armée des François s'en estoit allée si soudainement, pensoit les auoir desia vaincuz: fait marcher son camp apres & passerent la riuere d'Ade, & tirerēt vers la ville de Milan, & se vint loger ledit Empereur pres Margnan. Et ne doubtez pas que ceux de Milan auoient alors grand paour. Ledit seigneur de Bourbon fait incontinent brusler vn faulxbourg de ladicte ville de paour que les ennemis ne se fortifiassent audit faulxbourg. Peu de iour apres enuoya ledit seigneur de Bourbon aux Suisses aucunes pieces de draps d'or, & draps de soye pour les principaux capitaines, pour & à celle fin de venir vistement à secours. Parquoy lesdits Suisses vindrent incontinent, & entrerent par deuers le chasteau. Et les receut ledit seigneur de Bourbon à grand ioye. Incontinent ledit seigneur fait besongner aux fossez & autour de ladicte ville de Milan, pour la fortifier mieux qu'elle n'estoit par auant. Lors ledit Empereur lequel estoit deuant Milan & tout son camp, où estoit moult grand nombre de gens, fait saluer la ville de force pieces d'artillerie, & ceux de dedās la ville mesmement contre lesdits ennemis deschargerent hardiement.

Comment l'Empereur Maximilian soy voyant qu'il ne pouoit venir à chief de son entreprise se departit de deuant la ville de Milan.

Ledit Empereur soy voyant si grand nombre de gens : lesquels n'auoient nuls viures fut bien estonné : car il cuidoit que ceux de la ville se deussent reuolter incontinent qu'il seroit deuant, comme luy auoit promis Galias Viscomte, ce qui fut bien au contraire. Parquoy ledit Empereur cognoissant que les François auoient eu secours de nouveau : & aussi qu'il ne pourroit pas tenir son camp longuement deuant ladicte ville sans auoir viures, aussi qu'il n'auoit plus grand compagnie d'anges d'Angleterre, se retira vers Bergame, où il feit sommer la ville : lesquels citadins d'icelle ville voyant que ceux de Milan estoient en affaires, se tauerent & baillerēt quelque somme d'argent audit Empereur. Puis se retira ledit Empereur quand & son camp vers Laude, où ils pillerent ladicte ville & occirent beaucoup des citadins d'icelle, & bruslerent partie de ladicte ville, qui a esté vn grand dommage. Ledit seigneur de Bourbon estoit tousiours à la queue du camp dudit Empereur, où il en escarmouchoit aucuns nombres desdits ennemis, puis çà puis là, aucunes fois cinq cens, par fois huit cens, trois cens, deux cens, somme qu'il en demoura grand quantité d'occis. Apres que ledit Empereur eut fait les choses dessusdictes, il feit tant qu'il eschappa de ses gens, & feit mention que le Roy de Hongrie estoit trespasé, & qu'il l'y en alloit hastiuement, & laissa ses gens entre deux & ars : lesquels se retirerent du depuis chez eux, ce non pourtant ampoigna durant ce temps ledit Empereur cinquante mille Angelots, que le Roy d'Angleterre auoit enuoyé de renfort, cuidāt que ledit Empereur fut desia possesseur de la Duché de Milan, dont il estoit bien loing. Enuiron ce temps auoit enuoyé le Roy par deuers ledit seigneur de Bourbon aucuns gentils-hommes de sa chambre, pour subuenir & ayder aux affaires precedens.

Comment le Roy partit de Lyon pour aller en pelerinage au saint Suaire de nostre seigneur. Et comment appointement & paix fut faicte entre luy & l'Archeduc Roy d'Espaigne.

Environ ce temps que l'on disoit mille cinq cens & seize enuiron la Pentecouste, le Roy partit de Lyon accompagné de plusieurs gentils 1516. homes, pour aller & faire vn vœu & voyage au saint Suaire de nostre Seigneur, lequel est à Chambery, & estoit la deuotion du Roy d'aller à pied : parquoy le Roy partit de Lyon à pied, consequemment avec luy force gentils-hommes qu'il faisoit moult beau veoir : car ils estoient fort gorgias d'accoustremens faits à plaisir & force plusmars, & tous à pied suiuant le Roy : & fut le Roy en celle sorte à pied iusques audit Chambery : auquel Chambery se trouua le seigneur de Bourbon à grand ioye & consolation, lequel reuenoit du pays d'Italie. Et fut festoyé le Roy par plusieurs iours du Duc de Sauoye. De ce temps fut fait appointement aux Espaignols, & gés amassez au chasteau & ville de Bresse, lesquels s'en allerent leurs bagues sauues. Puis se transporterent dedans la ville & chasteau les Veniciens, auxquels appartenoit ledit Bresse

par appoinctement fait avec le feu Roy Loÿs douziesme & lesdits Veniciens. Vn peu deuant iceluy temps y eut quelque gens amassez, principalement aucuns Comtes d'Allemagne & Lansquenets : lesquels vindrent es parties de Lorraine, où ils feirent quelque tumulte de guerre pour occasion d'aucunes mines dependantes d'iceluy paÿs de Lorraine : lesquels Lansquenets & autres vouloiēt vsurper, mais ce nonobstant les repulsa ledit seigneur de Lorraine, & ne fut pas grand chose. Et depuis sont venus lesdits Comtes d'Allemagne par deuers le Roy de France, lequel estoit à Tours : & les amena le seigneur de Florenge fils du capitaine de la Marche. Peu de tēps apres reuint le Roy du paÿs de Sauoye & Lyonnoys, & s'en vint au paÿs de Tourraine. De ce temps mourut le Roy de Navarre fils du seigneur d'Albret : lequel Roy de Navarre estoit repulsé de sondit Royaume de par le Roy Ferdinand d'Arragon, comme i'ay descrit par cy deuant. Ensuiuant ce temps fut fait appoinctement entre le Roy de France, & l'Archeduc Roy d'Espaigne : & fut créée & publiée la paix à Paris & autres villes du Royaume, moyennant que ledit Roy d'Espaigne prendroit à mariage madame Loÿse, fille vnique du Roy François premier de ce nom. Et y furent en ambassade le grand Maistre, l'Euesque de Paris, le president Oliuier & autres, & fut ledit appoinctement composé en la ville de Noyon, esquels estoient de grans seigneurs de Flandres, d'Espaigne & autres. Et du depuis fut enuoyé de par l'Archeduc Roy d'Espaigne le seigneur de Rauestain, par deuers le Roy de France. Et fut accompagné ledit seigneur de Rauestain de plusieurs grans seigneurs de Picardie & autres. Ensuiuant ce temps mesmes le samedi vj. iour du mois d'Octobre mille cinq cens & seize, arriua le Roy en sa bonne ville & cité de Paris, où il fut receu honnestement en la maniere accoustumée. Et lendemain au matin qui fut le dimenche ensuiuant, partit le Roy de Paris pour aller à S. Denys en France, à celle fin de remettre les corps Saints, qui par luy & à sa requeste, & pour le bien & vtilité de sondit Royaume, auoient esté descenduz en les remerciant humblement de la victoire, que par leur merite il auoit eüe & gagnée. Aussi que c'est la coustume ausdits Roys de France d'estre en personne pour remettre lesdits corps Saints.

Cy finist le tiers & dernier volume d'Enguerran de Monstrelet, Auecques les grandes Chroniques des Roys de France : des Papes regnans en leurs temps : & plusieurs autres nouvelles choses aduenues en Lombardie : es Itales & autres diuers païs, es temps du regne desdits Roys. Le tout fait & adiousté auecques la Chronique dudit de Monstrelet, achené d'imprimer à Paris, par Iean le Blanc, l'an de grace mille cinq cens septante & vn.

TABLE DES CHOSSES QUI SONT DIGNES
D'ESTRE REMARQUEES CONTENUES
en ces Chroniques d'Enguerran de Monstrelet : de
laquelle, A signifie la premiere pa-
ge, B la seconde.

A BOLITION des peages sur les riuieres
de Rosne Saone, & autres fluans en icelles.
235. a.
Adolph de Cleues au seruice du Duc Philip-
pes contre les Gantois. 42. a.
Aduenement de Loïs xi. à la couronne de France. 88. a.
Aduenement du Roy Charles viij. à la Couronne, & la
nourriture de sa ieunesse. 208. b.
Aduenement du Roy Loïs xij. à la Couronne de France, &
le sacre d'iceluy. 229. a.
Aduenement du Roy François à la Couronne. 249. b.
Aduenture de douze archers Picards contre les Gantois.
48. b.
Aduenture perilleuse à la Royne d'Angleterre fille de la
maison d'Anjou. 96. b.
Aduenture d'un Bourgongnon pendu par les Liegeois, dont
la corde se rompit miraculeusement, par ce qu'il s'estoit
voïé à saint Iacques l'Apostre. 121. a.
Aduentures diuerses aduenues à Paris. 137. a. & b.
Aduentures au Roy Loïs xi. à la bataille de Montlehery :
dont il fait le recit au soupper chez Charles de Meleun à
Paris. 138. b.
Aduenture perilleuse au Roy Loïs xi. à Alençon. 174. a.
Aduenture merueilleuse d'un gros canon à Paris. 199. b.
Aduenture estrange de quelques soldats François se bai-
gnans au port de Genes. 217. a.
Adultere comme il fut puny par le Parlement de Paris.
150. b.
Adultere vengé sur le champ par le seigneur de Brezé
contre sa femme Charlotte de France, fille bastarde de
Charles vij. & de la belle Agnes. 188. a.
Agnes la belle quant & par quelle occasion elle entra en
la grace du Roy Charles vij. avec brief discours de la vie
mœurs & trespass d'icelle. 25. a.
Albanie querelle la couronne d'Escoffe. 206. b.
Albret pour le Roy Charles vij. au siege de Dax en Guien-
ne. 35. b.
Albret & Tartas son fils au siege de Bayonne avec deux
cens lances & trois mille arbalestriers leurs subiects. 38. b.
Albreth à la conqueste seconde de Guienne. 58. a.
Alexandre vi. de nation Espagnol créé Pape. 214. a.
Alençon Duc arresté prisonnier par le commandement du
Roy Charles vij. pour cause d'intelligence avec les An-
glois. 67. b.
Alençon condamné de crime de lese maïesté par arrest des
Paris l'an 1458.
Alençon tenu du Duché de Normandie. 122. a.
Alençon de rechef prisonnier. 173. a.
Alençon de rechef condamné à mourir. 177. a.
Alençon eslargy de la prison du Louure. 186. a.
Alengour Capitaine Anglois pris à la bataille de Formi-
gny. 27. a.
Alliance perpetuelle des Allemans & François faicte au
temps du Roy Charles vij. 2. a.

Alliance des Rois de France & Castille. 63. b.
Alliances des Rois de France & de Castille. 67. a.
Alliance du Roy Loïs xi. avec les Liegeois pour guerroyer
le Duc de Bourgongne. 119. a.
Alliance de l'Empereur Sigismot & du Roy Loïs xi. 179. a.
Alliance entre France & Castille publiée à Paris. 199. a.
Alliance du Roy Edouar & du Côte de Charolois. 106. b.
Alost pour neant assailly par les Gantois & avec leur per-
te. 50. b.
Ambassade de France pour reconcilier le Duc Philippes a-
vec ses Gantois. 45. a.
Ambassade de Hongrie au Roy Charles vij. 72. b.
Ambassades des Princes de leuant vers le Roy de France,
pour le mouoir à faire la guerre au Turc. 87. a.
Ambassade du Roy Loïs xi. pardeuers le Duc de Bourgong-
ne pour se plaindre du Comte de Charolois. C'est le com-
mencement de l'histoire de Philippes de Comines. 104. b.
Ambassade d'Arragon en France. 176. a.
Ambassade du Roy Loïs xi. en Angleterre. 150. b.
Ambassade du Roy Loïs xi. vers les Gantois. 152. b.
Ambassadeurs de Bourgongne à Paris, pour faire publier
es cours souveraines dudit lieu le traicté de Peronne. 161. b.
Ambassade d'Allemagne en France de laquelle estoit
chef le Duc de Bavières. 176. a.
Ambassade du Roy de Castille bien venue à Paris. 201. a.
Ambassade des Flamens vers le Roy Loïs xi. pour traicter
du mariage de Charles son fils, & de Marguerite fille
de Maximilian. 205. a.
Amboise Cardinal gouverneur à Milan. 231. a.
Ambusson Grand-maistre de Rhodes, ce qu'il fait en son
viuant. 236. b.
Amé Duc de Sçauoye élu Pape par le Concile de Basle.
4. a.
Amende honorable de Gantois au Duc Philippes ij. leur
seigneur pour la rebellion qu'ils auoient commise contre
luy ordre & ceremonie d'icelle amende. 54. b.
Ampoule sainte de Reims portée au Roy Loïs xi. étant
malade à Tours. 208. a.
Anatomie d'un homme vif, faicte à Paris par permission
du Roy. 178. a.
Angoulesme Comte frere du Duc d'Orleans, à la conqueste
de Guienne. 37. a.
Anjou pais mis en la main du Roy. 177. a.
Anglades ramène les Anglois en Guienne. 41. a.
Anne d'Auguste viuante sans manger. 242. b.
Anthoine Bastard de Bourgongne au seruice du Duc Phi-
lippes contre les Gantois. 42. b.
Anthoine & Baudouyn bastards de Bourgongne au voya-
ge de Turquie. 101. b.
Anthoine & Baudouyn bastards de Bourgongne de re-
tour du voyage de Turquie sans auoir riens exploicté pour
la mortalité qui se met en leur compagnie. 106. b.
Apennage second de Monseigneur Charles frere du Roy
Loïs xi. 158. a. les autres apennages voy Normandie &

TABLE DV III. VOLUME

- Guienne.
- Argued fils du Prince d'Orège qui auoit espouſé vne ſœur du Duc de Bourbon laiſſe le party du Duc de Bourgongne & ſe retire pardeners le Roy. 165.a.
- Arkembarc capitaine de Bourgongnon à la ſurpriſe de Peronne & du Comte de S. Pol. 121.a.
- Armagnac depoffedé des Comtes d'Armagnac Roüargue & du Valdore, pour auoir contre le vouloir du Roy Charles vij. maintenu l'ufurpateur de l'Archeueſché d'Aux. 65.a.
- Armagnac a main leuée de ſes terres qui auoient eſté ſaiſies ſur luy par le commandement de Charles vij. 90.a.
- Armagnac comprins au traité fait par le Roy Loys xi. avec les Princes affociéz pour le bien public. 122.a.
- Armagnac Comté en Gaſcogne ſaiſie par autorité du Roy Loys xi. & deliurée au Duc de Guienne ſon frere. 153.a.
- Armagnac reſtitué en ſon Comté par le Duc de Guienne contre le gré du Roy. 167.b.
- Armagnac ſurprend l'Eſtore & le Seigneur de Beaujeu eſtant dedans pour le Roy. 172.b.
- Armagnac Duc de Nemours decapité aux halles à Paris. 193.b.
- Armée du Daulphin Loys contre les Allemans & Suiffes, vers Montbeliard & Baſle. fueil. I. a.
- Armée Bourgongnonne en France, ſoubs la charge du Comte de Charolois. 113.a.
- Armée Bourgongnonne contre les Liegeois. 127.a.
- Armée du Roy Loys xi. contre les Bretons. 157.a.
- Armée Bourgongnonne en Picardie. 159.b.
- Armée en Guienne contre le Duc frere du Roy. 168.a.
- Armée enuoyée en Arragon par le Roy Loys xi. 177.a.
- Armée ordinaire entretenue par le Roy Loys xi. pres le Pont-de-l'arche. 203.b.
- Armes qu'on portoit en Bretagne ſaiſies par le commandement du Roy. 203.b.
- Arpel capitaine Anglois pris à la bataille de Formigny. 27.a.
- Arragonnois nommé François de Surienne laiſſe le party Anglois, & vient au ſeruiſe du Roy de France Charles vij. 23.b.
- Arragonnois en guerre contre les François pour raiſon de Parpignan. 173.a.
- Arras reduite en la puiſſance du Roy Loys xi. apres la mort du Duc Charles. 191.b.
- Arreſt de condamnation du Duc d'Alençon, & ſon proces bien au long. 79.b.
- Arſon pres Compiègne fortifié par les Bourgongnons dont ils furent bien toſt chafféz. 178.a.
- Aſcagne frere de Ludouic Sforce priſonnier peu apres la priſe de ſon frere. 230.b.
- Aſſemblée des Princes de France à Tours en laquelle le Roy ſ'excusa du bruit qui couroit qu'il vouloit nuyre au Duc de Bourgongne & ſe plaignit griefuement du Duc de Bretagne. 105.b.
- Aſſemblée des armées de Princes cōiurez, apres la bataille de Montlehery. 117.b.
- Aſt Comté en Lombardie deliurée au Duc d'Orleans par le Duc de Milan ſon oncle. 5.a.
- Auberton capitaine Anglois pris à la bataille de Formigny. 27.a.
- Aubert baillif de Melun capitaine dedans Roie contre les Bourgongnons. 169.b.
- Auxerrois battu & deſconfits par le baſtard de Segne-lay & le Seigneur de Plancy. 170.a.
- Auxerre reduite en la puiſſance du Roy Loys xi. apres la mort du Duc Charles. 191.b.
- B.
- Baillet maiſtre de requeſtes & ſeigneur de Seaux re-çoit le Roy Loys xi. en ſa maiſon à Seaux. 166.a.
- Balagny capitaine dedans Roie contre les Bourgongnons. 169.b.
- Baluë Eueſque d'Eureux enuoyé à Paris, pour entretenir les Pariſiens en l'amitié du Roy Loys xi. 136.a.
- Baluë Sacré Eueſque d'Eureux. 139.b.
- Baluë bleſſé de nuit à Paris. 144.b.
- Baluë Cardinal atteint de trahiſon ſa perſonne & biens ſaiſis. 162.a.
- Bannieres c'eſt à dire enſeignes ou compagnies dreſſées à Paris, pour ſeureté de la ville. 153.a.
- Barbaſon l'un des capitaines pour le Roy, à la bataille de Montlehery. 115.a.
- Barde capitaine du Roy Loys xi. fait mauuais denoir à la bataille de Montlehery. 133.a.
- Barde à la garde de Paris, lors de la guerre du bien commun. 139.a.
- Barde ambassadeur pour le Roy en Angleterre. 150.b.
- Bar ſeigneur de Baugy l'un des prouoyeurs & munitionnaires du Roy Charles vij. à la conqueſte de Normandie. 33.a.
- Barres à la conqueſte de Guienne. 36.a.
- Batterie de Chierbourg fort induſtrieuſe. 31.b.
- Bauſſeymes au ſeruiſe du Duc Philippes contre les Gantois. 42.b.
- Baugy capitaine François au ſeruiſe de Charles vij. 12.a.
- Bayonnois reſolu d'eſtre bons François, pour auoir veu vne croix blanche au ciel apres la reduction de leur ville. 39.a.
- Beaumont frere du Conneſtable de Nauarre capitaine en Bayonne, pour la part Angloiſe demeure priſonnier en redant la ville enſemble tous ſes ſoldats. 39.a.
- Beaumont Eueſque de Paris fils de Loys de Beaumont ſeigneur de la foreſt. 173.a.
- Beauuais à la conqueſte de Normandie. 32.b.
- Beauuau à la conqueſte de Normandie. 32.b.
- Beauuau ſeigneur de la Beſiere à la conqueſte de Guienne. 35.a.
- Beauuau à la ſeconde conqueſte de Guienne. 56.b.
- Berart l'un des commis de la part des Princes, pour compoſer leurs differens avec le Roy Loys xi. 145.b.
- Bernard de Biarn baſtard de Foix, pour le Roy Charles vij. au ſiege de Dax en Guienne. 35.b.
- Bernard de Biarn baſtard de Foix bleſſé au ſiege de Bayonne. 38.b.
- Berry frere du Roy Loys xi. ſ'absente de la court & ſ'en fuit en Bretagne. 109.b.
- Beron Procureur au Chaftelet de Paris, parle hardiement au Roy Loys xi. 143.b.
- Beutremen c'eſt à dire homme de beurre eſtoit vn payſan capitaine pour les Gantois contre le Duc Philippe. 42.a.
- Beuf cheualier Normant trahit Eureux aux Bretons. 147.a.
- Bifcheguiot l'un des gentils-hommes qui ſe trouuerent à vn ſoupper avec le Roy cheſ le ſeigneur d'Armenonuille à

DE MONSTRELET.

Paris. 141.a.
Bishe l'un des commis de la part des Princes pour composer leurs differens avec le Roy Loys xi. 145.b.
Biscayens au secours des François devant Bayonne. 39.a.
Blanc capitaine Hongre & ce qu'il fait sur les Turcs. 65.b.
Blanchefort gentil-homme Berruyer occis au service de Charles vij. devant S. Sauveur le Vicomte en Norman. & fort plaint. 29.a.
Blanville lieutenant du Roy Charles vij. au siege de Touques. 17.a.
Blanville à la conquête de Norman. 32.b.
Blot Seneschal d'Auvergne fait capitaine de la bastille de Paris. 151.a.
Bois gentil-homme Bourgongnon porte la banniere du Comte de Charolois à la bataille de Montlehery. 115.b.
Bonaventure au rang des Saints, son corps esleu à Lyon & mis en chassee couverte d'argent aux despens de la Duchesse de Bourbon. 227.b.
Boscage fauorité du Roy Loys xi. 206.a.
Bordelois reuoltez de l'obeissance de Charles vij. & la cause de ce. 55.a.
Bosqueaux au service du Duc Philippes contre les Gantois. 42.b.
Bordeilles à la conquête de Guienne. 36.a.
Bordes destitué de la capitainerie de la bastille de Paris. 151.a.
Poucat au service de Charles vij. à la seconde conquête de Guienne. 56.b.
Boucher general de France à la conquête de Guienne. 35.a.
Boucher tresorier general de France fait maire de Bayonne. 39.b.
Boucher l'un de ceux qui furent commis par le Roy Loys xi. pour pacifier la guerre du bien public. 146.b.
Bouchy tué au service du Duc de Bourgongne contre les Gantois. 44.a.
Boulenger President au Parlement de Paris l'un des deputés pour aller pardeuers les Princes. 141.b.
Boulenger fait premier President du Parlement de Paris. 193.b.
Boufillé Cheualier Lombard se presente en la place de greue à Paris, pour combattre à oultrance contre son aduersaire qui y defaillit. 186.a.
Bourbon en disgrâce du Roy Loys xi. 103.b.
Bourbon Duc comprins au traité fait par le Roy Loys xi. avec les Princes associez pour le bien public. 122.a.
Bourbons de la maison aisnée nepueux du Duc Philippes de Bourgongne de par sa seur & comme il les pourueut & esleua. 195.b.
Bourdillon & Chastillon gentils-hommes François tenans les ioustes à Naples. 223.b.
Borgia Comte de Valentinois en France pardeuers le Roy Loys xij. 229.a.
Bourgongne maison illustre seur apuy & pillier de la couronne de France. 103.b.
Bourgongne reduite en la puissance du Roy Loys xi. apres la mort du Duc Charles. 191.b.
Bourgongne reduite en l'obeissance du Roy par le gouverneur de Champagne nommé Charles d'Amboise. 198.a.
Bourgongnon capitaine au service du Duc Philippes contre les Gantois. 42.b.
Bourgongnon Baillif de Montargis tué au siege de Honnefleu. 26.a.
Boussac capitaine François au service de Char. vij. 28.b.

Boussy à la prise de Bayonne. 39.b.
Boz cheualier enuoyé par les Gantois avec un Chartreux pour moyenner leur pacification avec le Duc Philippes leur Seigneur. 49.a.
Brillac capitaine François à la bataille de Rapallo. 217.a.
Bresse saccagée par le Duc de Nemours. 242.a.
Bréte Theologien de Paris renommé predicateur. 168.b.
Bretaigne tenu du Duché de Normandie. 122.a.
Bretons font quelques rauages sur la coste d'Angleterre. 72.a.
Brezé Seneschal de Poictou capitaine de cent hommes d'armes du Roy Charles vij. 20.a.
Brezé grand Seneschal de Normãdie gouverneur de Roien. 33.a.
Brezé Comte de Mauleurier avec Floques Bailly d'Eureux courent la mer d'Angleterre y font quelque descente pres de Sanduic & prennent d'assault un fort de terre & ladicte ville. 70.b.
Brezé seigneur de la Varenne au secours de la Roine de Angleterre & le deuoir qu'il y fait. 95.b.
Brezé seigneur de Varenne Seneschal de Normandie donne meilleur aduis au Roy Loys xi. que tous les autres capitaines sur le fait de la bataille de Montlehery. 115.a.
Brezé chef de l'auantgarde du Roy à la bataille de Montlehery. 115.a.
Brezé Seneschal de Normãdie occis à la bataille de Montlehery. 116.a.
Brezé autrement Varenne inhumé aux freres prescheurs à Paris. 117.a.
Brocqmont capitaine du Palais de Roien, emprisonné par soubçon d'estre du party des Princes. 145.b.
Bueil capitaine François commis à la garde de Chierbourg par le Roy Charles vij. 32.a.
Bueil à la conquête de Normandie. 32.b.
Buffet du Duc Philippes descript. 90.b.
Bureau tresorier du Roy Charles vij. 30.a.
Bureau tresorier de France maistre de l'artillerie du Roy Charles vij. & capitaine de mil cinq cens archers. 31.a.
Bureau à la conquête de Normandie. 32.b.
Bureau à la conquête de Guienne. 35.a.
Bureau & Iaspard son frere maistres de l'artillerie à la seconde conquête de Guienne. 57.a.
Bureau fait Maire de Bordeaux pour recompense du deuoir qu'il auoit fait à la conquête de Guienne. 36.b.
Bureau tresorier de France fait cheualier au sacre du Roy Loys xi. 88.b.

C.

Adet d'Albret decapité à Poictiers pour la trahison de lestore. 173.b.
Caën ville en Normandie & son chasteau amplement descript. 29.b.
Calabre fils du Roy de Naples abandonne S. Germain qui estoit l'entrée du Royaume de Naples au Roy Char. vij. 221.b.
Calais seul demeurée en l'obeissance des Anglois deça la mer. 40.a.
Calenille capitaine Anglois pris à la bataille de Formigny. 27.a.
Cambray en l'obeissance du Roy Loys xi. 192.b.
Cambray prins sur le Roy par les Flamens. 200.b.
Campobasse Comte Italien trahist le Duc de Bourgog. 190.a.

TABLE DV III. VOLUME

<i>Camus</i> bastard de Sombresset Anglois amene renfort de gens & de viures à Talbot en Guienne.	41.b.	France.	151.a.
<i>Capital</i> de Busc gentil-homme Gascon pour la part Angloise.	37.b.	<i>Cheualier Tresorier</i> de France l'un de ceux qui furent commis par le Roy Loys xi. pour pacifier la guerre du bien public.	145.b.
<i>Capestrin</i> Hongre & de ce qu'il feist sur les Turcs.	65.b.	<i>Chimay</i> Bailly de Hainault ambassadeur du Duc Philippes pour contenter le Roy de ce que le Dauphin s'estoit retiré en Bourgongne.	69.a.
<i>Capistranus</i> Cordelier Hongre dans Belgrade assiegé des Turcs, & les feruantes prieres qu'il feist à Dieu pour la deliurance du siege.	68.a.	<i>Chimay</i> ambassade du Duc Philippes vers le Roy Loys xi. & les termes rigoureux qu'il eut du Roy qui fut cause de leur dissention.	95.a.
<i>Carbonnel</i> seigneur de Cheureuses à la prinse de Sanduich en Angleterre.	71.a.	<i>Choart</i> lieutenant ciuil au Chastellet de Paris.	141.b.
<i>Cardonne</i> l'un des maistres d'hostel du Roy Char. viij. enuoyé ambassadeur à Florence.	215.b.	<i>Choart</i> banny de Paris.	142.a.
<i>Cartier</i> commis de Xaconis conuaincu de faulx & de peculat.	34.a.	<i>Cholet</i> puny du foiet pour auoir sans occasion effroyé le peuple de Paris.	140.a.
<i>Castres</i> l'un des capitaines du Roy Charles vij. à la bataille de Formigny.	26.b.	<i>Clarance</i> Duc Anglois fuitif en France.	164.a.
<i>Castres</i> Comte à la conqueste de Normandie.	32.b.	<i>Clarance</i> Prince Anglois noyé en une pipe de maluoisie par le commandement du Roy Edouart son frere.	195.a.
<i>Castres</i> à la conqueste de Guienne.	37.a.	<i>Claye</i> village pres Meaux & le chasteau de l'Euesque de Meaux y estant ruiné par le desbord de la riuiere de Marne l'an 1460.	134.a.
<i>Caulers</i> & de sa fortune.	179.b.	<i>Clerieux</i> fait cheualier de l'ordre au sacre du Roy Loys xij.	229.a.
<i>Ceremonies</i> que feirent ceux de Roüen à la reception de leur Duc Charles.	149.a.	<i>Cleues</i> Duc nepueu & allié du Duc Philippes à son seruice contre les Liegeois.	119.a.
<i>Cerizay</i> Greffier ciuil au Parlement de Paris.	136.a.	<i>Cimitiere</i> de la Trinité à Paris quant on commença y enterrer les pestiferez.	152.a.
<i>Chabanne</i> Grand-maistre d'hostel du Roy Charles vij. à la conqueste de Guienne.	31.a.	<i>Coctiuy</i> à la conqueste de Normandie.	32.b.
<i>Chabanne</i> au seruice de Charles vij. à la seconde conqueste de Guienne.	56.b.	<i>Coctiuy</i> en son nom Oliuier Seneschal de Guienne à la conqueste d'iceluy pays.	37.b.
<i>Chabanne</i> Comte de Dammartin condamné de lese maiesté.	97.b.	<i>Coctiuy</i> Seneschal de Guienne prins en la ville de Bordeaux par les Anglois.	41.b.
<i>Chabanne</i> Comte de Dammartin euade la prison de la bastille de Paris, par un trou qu'il feist en la muraille.	109.b.	<i>Cohem</i> portoit l'enseigne du bastard de Bourgongne contre les Liegeois.	127.a.
<i>Chabanne</i> Comte de Dammartin remis en la grace du Roy Loys xi.	150.a.	<i>Colombel</i> bourgeois de Paris homme riche accuse Ysabeau de Cambray sa femme d'adultere & venefice & le iugement de la court de Parlement sur ce.	150.b.
<i>Chabanne</i> Comte de Dammartin fait grand-maistre de France par Loys xi.	152.b.	<i>Commercy</i> fils du seigneur de Commercy à la conqueste de Guienne.	36.a.
<i>Chanteau</i> Greffier en la court de Parlement à Paris priué de son estat pour auoir refusé de prester argent au Roy.	139.a.	<i>Comete</i> apparu l'an 1456.	67.b.
<i>Chanu</i> capitaine pour le Roy Charles à Pontoise prend le chastel d'Anjou en Normandie sur les Anglois.	14.a.	<i>Comete</i> apparu l'an 1461.	134.b.
<i>Charlemaigne</i> au rang des Saints iour statue pour solemniser sa memoire le xxviij. iour de Ianuier.	178.b.	<i>Comete</i> espouuentable sur la ville de Paris.	148.b.
<i>Charny</i> Comte Bourgongnon pris apres la bataille de Montlehery.	117.b.	<i>Comete</i> au ciel suiuant le Roy Loys xi.	155.b.
<i>Charolois</i> à la bataille de Montlehery nauré au visaige.	116.a.	<i>Comete</i> apparu à Cologne en Allemagne.	195.b.
<i>Charolois</i> se porte vaillamment à la bataille de Montlehery.	116.a.	<i>Commissaires</i> pour reformer l'estat de France tenans conseil au Palais de Paris.	151.b.
<i>Charolois</i> respond brauement à l'Euesque de Paris.	117.a.	<i>Compang</i> l'un des commis de la part des Princes pour composer leurs differens avec le Roy Loys xi.	145.b.
<i>Chartier</i> Euesque de Paris fait faire une procession de petits enfans pour remercier Dieu de la victoire de Formigny.	27.b.	<i>Composition</i> d'entre le bastard de Bourgongne & Brederode pour l'Euesché de Treth.	67.a.
<i>Chartier</i> Euesque de Paris en ambassade vers le Comte de Charolois & la responce qu'il eut.	117.a.	<i>Comte</i> Baron Romain reuoque le serment qu'il auoit fait de tenir le party du Roy Charles vij. allant à Naples qui fut occasion de ce que son chasteau de Montfortin & ses enfans y furent prins par les François.	221.a.
<i>Chartier</i> Euesque de Paris tint plusieurs honnestes & sages propos au Roy Loys xi. estant à Paris au temps de la guerre du bien public.	139.a.	<i>Comte</i> l'un des gentils-hommes qui se trouuerent à un soupper avec le Roy, chez le seigneur d'Armenonville à Paris.	141.a.
<i>Chasteauneuf</i> seigneur du Lau prisonnier par le commandement de Charles vij.	150.b.	<i>Concile</i> vniuersel tenu à Basle du regne de Charles vij. le scisme qui en aduint & le deuoir en quoy se meit le Roy pour le pacifier.	4.a.
<i>Chasteaux</i> edifiez à Bordeaux l'an 1454. pour assurer la ville en l'obeissance du Roy Charles vij. à la diligence de Bureau & Boursier tresoriers de France.	63.b.	<i>Concile</i> national indiét par le Roy Loys xi.	186.a.
<i>Chastillon</i> frere de Loheac maistre des eäies & forests de		<i>Concile</i> national tenu à Orleans lequel se departit sans rien conclure.	199.a.
		<i>Cöfederatiö</i> des Princes de Fräce cötre le Roy Loys xi.	103.b.

DE MONSTRELET.

Conihan capitaine de gens d'armes du temps de Loys xi.
155.a.
Contrans gentil-homme Picard capitaine de gens d'armes
au service de Loys xi. 205.a.
Conseillers prins du Parlement de l'université & maison
de ville de Paris pour assister au prime conseil du Roy
Loys xi. estant oppresse de la guerre du bien public. 139.a.
Constain attainct d'auoir voulu empoisonner le Duc Phi-
lippines de Bourgongne & son fils. 94.a.
Constain au supplice. 94.b.
Corbie conseiller au Parlement de Paris aymé du Roy Loys
xi. & par luy fait premier President de Dauphiné.
135.a.
Cornets au service du Duc Philippines contre les Gantois.
40.b.
Cornille bastard de Bourgongne au service du Duc Philip-
pes contre les Gantois. 42.a.
Courcelles Docteur en Theologie fait l'oraison funebre de
Charles vij. 93.b.
Courcelles Doyen de Paris l'un des deputez pour aller par-
deuers les Princes. 141.b.
Coüe l'un des capitaines qui deffendirent la ville de Beau-
nais contre les Bourgongnons. 170.b.
Couden capitaine François au service du Roy Charles vij.
12.a.
Courses & bruslemens faits au terroier de Gand par les
Gantois & Bourgongnons en guerre ciuile. 47.b.
Courses de Gantois iusques à Enghien & Tournay. 50.a.
Courses d'Anglois sur le Boulenois. 79.a.
Courson capitaine Anglois assiegé dans Honnefleure. 26.a.
Courroux extremé du Duc Philippines contre le Comte son
fils & les occasions de ce. 107.a.
Courtois procureur du Roy au pays d'Artois decapité à
Tours. 199.b.
Court de France en la court de Bourgongne & l'ordre des
obseques faictes au Roy Charles vij. 88.b.
Cousin bourreau de Paris pend les meurtriers de son fils e-
stant en ce faisant executeur de iustice en sa propre cau-
se. 194.b.
Cousinot commis pour examiner le Cardinal Balluë prison-
nier. 162.b.
Coustilliers du temps de Charles vij. 29.a.
Coutelier capitaine des Gantois homme gros & pesant leur
promet merueilles & eux à luy. 45.a.
Coutelier desconfit & pris par le bastard de Bourgongne.
45.b.
Courran l'un des capitaines du Roy Charles vij. à la ba-
taille de Formigny. 26.b.
Courran à la conqueste de Normandie. 32.b.
Craon l'un des gentils-hommes qui se trouuerent à vn
soupper avec le Roy cheZ le seigneur d'Armenonuille à
Paris. 141.a.
Craon fait grand-maistre de France par Loys xi. 150.a.
Craon lieutenant du Roy Loys xi. au secours de Lorraine.
174.b.
Crequi porte l'ordre du Duc Philippines au Roy d'Arragon.
87.a.
Crespin & Crespinian saints & Martirs desquels les
chasses furent apportées de Soissons à Paris pour faire
cesser la peste par leur intercession. 152.a.
Creuecueur au service du Duc Philippines contre les Gan-
tois. 42.b.
Creuecueur l'un des gentils-hommes qui se trouuerent à

vn soupper avec le Roy cheZ le seigneur d'Armenon-
uille à Paris. 141.a.
Croï au service du Duc de Bourgongne Philippines cōtre les
Gantois. 42.a.
Croï en Luxembourg contre les Allemans & ce qu'il y
exploicta. 54.b.
Croï fait grand maistre de France par Loys xi. 97.a.
Croï & ses freres chasseZ de court de Bourgongne. 106.b.
CruauteZ d'entre les gens du Duc Philippines & les Gan-
tois. 47.b.
Cruisol ou Cursol familier du Roy Loys xi. arresté prison-
nier par le Duc de Bourbon à Cosne. 136.a.
Cruisol pour le Roy dans Beauuais assiegé par les Bourgong-
nons. 170.a.
Cueur argentier & conseiller du Roy l'un des prouoyeurs
& munitionnaires à la conqueste de Normandie. 33.a.
Cueur prins prisonnier & les causes pourquoy. 40.b.
Cueur condamné de peculat faulseté d'auoir porté des ar-
mes aux Turcs & vendu vn chrestien. 62.b.
Culant grand-maistre de France. 10.b.
Culant grand-maistre d'hostel du Roy Charles vij. à la
conqueste de Normandie. 32.b.
Cumagon à la conqueste de Normandie. 32.b.
Cyboy tué au service du Duc de Bourgongne contre les
Gantois. 44.a.

D.

DAdie capitaine François au service de Charles vij.
28.b.
Dain & Doyac fauoriZ du Roy Loys xi. puniZ apres la
mort d'iceluy. 209.b.
Dammartin Comte comprins au traicté fait par le Roy
Loys xi. avec les Princes associez pour le bien public.
122.a.
Dauphiné saisy par le Roy Charles vij. pour la desobeissan-
ce du Dauphin son fils. 65.b.
Dauphin fuitif de France en court de Bourgongne. 68.b.
David bastard de Bourgongne Euesque de Terouenne fait
Euesque du Treth à l'ayde du Duc Philippines son pere.
64.b.
Dauuet premier president à Paris. 148.a.
Deffaicte d'Anglois issuZ de Fougieres par les Bretons.
10.a.
Deffaictes d'Anglois en Escosse. 11.b.
Deffaicte de Saltuton capitaine Anglois par les gens du
Comte de Foix. 25.b.
Deffaicte d'Anglois & Bourdelois en Medoc par Orual fils
du seigneur d'Allebret. 34.a.
Deffaicte de Gantois. 42.a.
Deffaicte de trois mille Gantois deuant Audenarde par
les Picards estans au service du Duc Philippines. 42.b.
Deffaicte de Gantois au pais de Vvas par les gens du Duc
Philippines. 43.b.
Deffaicte de Gantois à Nienene. 44.a.
Deffaicte de Gantois pres Huiſte. 45.b.
Deffaicte de Gantois par Iean de Croï seigneur de Chimay.
51.a.
Deffaicte de Liegeois par les Bourgongnons. 121.b.
Deffaicte de Flamens au val de Cassel. 144.a.
Deffaicte d'Auxerrois tenans le party de Bourgongne.
170.a.
Deffaicte de Bourgongnons en Allemagne. 178.b.

TABLE DV III. VOLUME

Deffaite de Bourgongnons par les gens du Duc de Bourbon & les noms des gentils-hommes qui y furent prins. 180.b.
 Deffaite de Bourgongnons deuant Arras par l'Amiral de France. 180.b.
 Deffaite de Bourgongnons par le seigneur de Craon. 193.a.
 Deffaite du Duc de Gueldres pres de Tournay. 193.b.
 Deffy du Roy d'Angleterre au Roy de France. 177.b.
 Deprecation du Duc Philippes au Roy Charles pour le Duc d'Alençon prisonnier pour crime de lese maieſté. 78.a.
 Deſſeing de Charles vij. sur la conqueſte de Normandie. 33.a.
 Deſtan ſeneſchal de Rouargue ambassadeur du Roy Charles vij. en Caſtille. 63.b.
 Deſtitution des Generaux des monnoyes. 185.b.
 Differend entre le Duc Philippes & le Comte S. Pol. 72.a.
 Differens entre le Roy Loys xi. & le Duc Philippes. 103.a.
 Differens entre le Roy Loys xij. le Duc de Sauoye. 235.a.
 Digue que les Gantois voulurent rompre pour noyer le pais de Vvas. 44.a.
 Dinandois obſtine à leur grand dommage. 128.a.
 Dinde tué au ſervice du Duc de Bourgongne cõtre les Gantois. 44.a.
 Discipline militaire du Roy Charles vij. en ſa conqueſte de Normandie. 32.a.
 Diſſention d'entre le Roy Charles vij. & le Daulphin ſon fils. 65.b.
 Diſſention entre le Duc Philippes & le Comte de Charolois ſon fils à l'occafion de ceux de la maiſon de Croi. 69.b.
 Diſſention du Roy de Caſtille & du Comte de Foix pacifiée par Loys xi. 97.a.
 Diſſention entre le Duc Philippes & le Comte de Charolois ſon fils pour raiſon de ceux Croi cõpoſée par les eſtats pais bas. 99.a.
 Diſſention entre le Roy de France, le Duc Philippes & ſon fils qui fut commencement de la guerre du bien public. 104.b.
 Diſmes ne ſont deües aux cure à ſur les terres des croi à d'outremer. 85.a.
 Dole ſaccagée par les François. 200.b.
 Domarcq au ſervice du Duc Philippes. 51.a.
 Donglas & Ormont comtes Eſcoſſois ſe portent vaillamment à la deffence de leur pais. 11.b.
 Dormans l'un des gentils-hommes qui ſe trouuerent à vn ſoupper avec le Roy chez le ſeigneur d'Armenouuille à Paris. 141.a.
 Doyac & Dain favori du ſeu Roy Loys xi. puni. 209.b.
 Doymer eſcartelé à Lockes pour la trahiſon de Leſtore. 172.b.
 Drkut capitaine Anglois pris à la bataille de Formigny. 27.a.
 Duel pour plaiſir fait en court d'Angleterre entre le baſtard de Bourgongne & le ſeigneur d'Eſcalles Anglois. 130.b.
 Dunois ordonné lieutenant general du Roy Charles vij. es guerres de Normandie & Guienne. 10.b. & 32.b.
 Dunois chef des commiſſaires reformateurs de l'eſtat de France. 151.b.
 Dunois comte compris au traité fait par le Roy Loys xi. avec les Princes aſſocié pour le bien public. 122.a.
 Durie l'un des gentils-hommes qui ſe trouuerent à vn

ſoupper avec le Roy chez le ſeigneur d'Armenouuille à Paris. 141.a.

E.

E Delin Docteur en Theologie condamné de magie & ſortileges. 63.a.
 Edict notable du Roy Loys xi. ſur le fait de la gendarmerie. 175.b.
 Edouard refuſe ſon alliance au Roy Loys xi. 106.b.
 Edouard chaſſé du royaume d'Angleterre. 165.b.
 Edouard recouure le royaume d'Angleterre. 167.a.
 Embraſement d'Eſclo fait par le Duc de Bourgongne ſur les Gantois. 48.a.
 Embraſement aduenü à Dourdrech en Hollande. 72.a.
 Embraſement miraculeux au village de Iuchy pres Cambray. 86.b.
 Embraſement de la ville d'Encre. 91.a.
 Embraſement de la ville d'Ardres par bouteſeux. 119.b.
 Embraſement de l'Egliſe de Feſcamp en Normandie. 134.a.
 Embraſement de la maiſon Ducale de Dijon. 235.a.
 Embraſement d'une maiſon au champ-gaillard à Paris, durant la guerre du bien public, qui eſpouuenta le Roy Loys xi. 146.b.
 Embraſement du Pont aux Meſniers à Paris. 158.b.
 Embraſement de l'Egliſe de noſtre Dame de clery. 169.a.
 Embraſement du cloché de S. Geneuieſue de Paris. 207.b.
 Embuſche vainc des Gantois pour ſurprendre la Duchefſe de Bourgongne allant à Bruges. 49.b.
 Englemonſtier ars par les Gantois. 49.b.
 Enghien en Hainault ſaiſy ſur le comte de S. Pol par autorité du Duc Philippes & les occaſions de ce. 72.b.
 Empoiſonnement machiné contre le Roy Loys xi. 175.a.
 Emprunts faits à Paris par le Roy Loys xi. les refuſans de preſter priuez de leurs offices. 139.a.
 Emprunt d'argent fait par le Duc de Bourgongne aux Veniciens. 174.b.
 Emprunts que voulüt faire le Duc de Bourgongne ſur ſes ſubiects pour continuer la guerre contre les Suiſſes & le refuſ qui luy fut fait. 187.b.
 Entrée du Roy char. vij. à Roüen & les pompes des ſeigneurs qui l'accompagnoient. 21.b.
 Entrée pompeuſe des François en Bordeaux apres la reduction du lieu en l'obeiſſance du Roy char. vij. 37.a.
 Entrée du Duc Philippes en Gand la premiere qu'il y feit apres les guerres qu'il eüt contre les Gantois, pompes & magnificences qui y furent faiçtes. 74.b.
 Entrée pompeuſe du Roy Loys xi. en Paris faiçte le dernier iour d'Aouſt l'an 1461. 89.a.
 Entrée du Roy Loys xi. en Arras la cité & ce qu'il y feit. 101.a.
 Entrée du Duc Charles de Berry frere de Loys xi. à Roüen pour ſ'impatronir du Duché de Normandie ſuiuant le traité de Conſlans. 124.b.
 Entrée de la Royne femme du Roy Loys xi. en la ville de Paris par la riuere de Seine vers le terrain de noſtre Dame les honneurs & magnificences qui y furent faiçtes. 154.a.
 Entrée d'un Prince de Piémont fils du Duc de Sauoye à Paris & les honneurs qui luy furent faits. 159.a.
 Entrée de la Royne d'Angleterre & du Prince de Galles à Paris & les honneurs qui leur furent faits par le com-

DE MONSTRELET.

mandement du Roy Loys xi.	165.b.
Entrée du Roy de Portugal à Paris.	188.b.
Entrée de Marguerite de Flandres à Paris, les honneurs qui luy furent faits.	207.a.
Entrée du Roy Char. viij. à Paris.	209.b.
Entrée de la Royne Anne à Paris.	213.a.
Entrée du Roy Charles viij. à Turin & les honneurs qui luy furent faits.	216.a.
Entrée du Roy Char. viij. à Casal de Montferrat.	217.b.
Entrée du Roy Charles viij. en Pame & autres lieux de Lombardie.	218.a.
Entrée du Roy Char. viij. à Lucques, Pise & Florence, Sene, Viterbe & autres villes.	219.a.
Entrée du Roy Char. viij. en la ville de Romme.	220.a.
Entrée du Roy Char. viij. à Naples.	222.a.
Entrée seconde du Roy Char. à Naples comme Roy paisible du lieu.	224.a.
Entreueüe des Roys de France & d'Angleterre à Picquigny.	181.b.
Escalles Anglois combat en Duel contre le bastard de Bourgongne.	130.b.
Escarrouche bien meslée des Parisiens & Bourgongnons.	133.b.
Escarrouches deuant Paris.	141.a.
Esclo bruslé sur les Gantois.	48.a.
Escossois en guerre contre les Anglois.	206.b.
Escu d'or vallant xxvi. s. vi. den. pari. l'an 1466.	144.a.
Espare capitaine Gascon pour la part Angloise.	36.b.
Essars seigneur de Thieux maistre d'hostel du Duc de Bretagne fait maistre des eaües & forests de France.	176.a.
Esselin ou Hesselin panetier du Roy Esleu de Paris & Preuost des marchans pouruoit sagement à la garde de Paris lors que le Duc de Bourgongne estoit deuant Beauuais.	170.a.
Estampes cousin germain du Duc de Bourgongne capitaine general contre les Gantois.	42.a.
Estampes nepueu du Duc de Bretagne à la seconde conqueste de Guienne.	56.b.
Estampes Comté pretendu par Iean de Bretagne & Iean de Bourgongne s'en nommäs comtes l'un & l'autre.	79.a.
Estampes nommé Iean de Bourgongne cousin du Duc Philippes banny de sa court pour magie.	97.a.
Estats tenuz à Tours sur le differend d'entre le Roy Loys xi. & Charles son frere.	158.a.
Esternay general de Normandie noyé par le commandement du Roy Loys xi. pour auoir suiuy le party du Duc de Berry frere du Roy.	124.b.
Estiennete de Besançon fille d'un marchand de Paris rauie par le Comte de Foix.	161.a.
Estouteuille seigneur de Beine restitué en l'office de Preuost de Paris.	147.b.
Estouteuille seigneur de Beine Preuost de Paris en Beauuais deffend la bresche contre les Bourgongnons.	170.b.
Euasion de Durant nepueu de Balluë & sa reprinse.	164.a.
Eu Comte au seruice de Charles viij.	11.a.
Eu Comte à la conqueste de Normandie.	32.b.
Eu gouverneur de la ville de Paris assiegée par les Princes conuarez pour le bien public.	140.b.
Eu Comté donnée par le Roy Loys xi. au Comte de S. Pol.	167.b.
Excez de sergens contre un prestre puni du fouët.	152.b.

F.

Falsificateurs du seing du Roy puny & de quelle sorte.	193.a.
Fai capitaine Bourgongnon dedans Roie.	118.b.
Ferrand bastard d'Alphonse Roy de Naples apprehende la succession de son pere contre la volonte du Pape Calixte qui luy en fait la guerre.	75.a.
Ferteil bourgeois de Paris maistre des requestes extraordinaire du Roy Loys xi.	148.b.
Festins faits à la court de Bourgongne avec mascarades & tournois.	55.b.
Festins magnifiques faits à Tours aux fiançailles de Magdaleine fille de Charles viij. avec le Roy de Hongrie.	70.a.
Festoyemens faits au Daulphin Loys de Flandres y estant fuitif.	71.b.
Festins entre-mets & autres magnificences faictes aux fiançailles de la fille du Roy Charles & du Roy de Hongrie.	73.a.
Festin aux cheualiers de la roison d'or fait par le Duc Philippes.	86.b.
Festoyemens & esbats que fait le Roy Loys xi. au Comte de Charolois qui le vint veoir à Tours au commencement de son regne.	91.b.
Festoyemens de ceux de Bruges pour la conualescence du Duc Philippes.	96.b.
Fiennes en son nom Thibault de Luxembourg frere du Comte de S. Pol se rend moyne de Citeaulx.	69.a.
Flauy nauré en Assassinat par les gens de Pierre de Louvain.	38.a.
Flauy occis par sa femme.	102.b.
Floques ou Floquet Bailly d'Eureux capitaine François au seruice du Roy Charles.	13.a.
Floques autrement Floquet Bailly d'Eureux à la prise de Sauduich en Angleterre.	71.a.
Floquet l'un des capitaines pour le Roy à la bataille de Montlehery.	115.a.
Floquet occis à la bataille de Montlehery.	116.a.
Florence & des seditions contre la maison de Medicis.	194.b.
Foix Comte pour le Roy Charles viij. au siege de Dax en Guienne.	35.b.
Foix Comte lieutenant du Roy Charles viij. à la prise de Bayonne.	38.b.
Foix à la seconde conqueste de Guienne.	58.a.
Foix Comte amoureux d'une dame de Paris nommée Estiennete de Besançon & ce qu'il en fait.	161.a.
Fonteuille escuyer d'escuyerie au seruice du Roy Char. viij.	22.a.
Fontenelles à la conqueste de Guienne.	36.a.
Fonte d'artillerie ordonnée par le Roy Loys xi. en diuers lieux de son royaume.	196.a.
Forbier bastard pris deuant Roüen par les Anglois.	18.a.
Forbier lieutenant de Ioachim Rouhault trahit Ponthoise aux Princes conuarez pour le bien public.	144.a.
Forestel & Montigny voy Montigny.	
Fosseux capitaine Bourgongnon.	118.b.
Fouldre tumbée sur le Pape Alexandre sans le tuer.	233.b.
Fournier conseilier au Parlement de Paris l'un des deputez pour aller par deuers les Princes.	141.b.
Francs archers & de leur premiere institution.	6.b.
Franc archers du temps de Char. viij.	29.a.
Francy à la seconde conqueste de Guienne.	6.b.

TABLE DV III. VOLUME

Frederic Duc d'Autriche couronné Empereur à Rome & marié à la fille du Roy de Portugal par le Pape Nicolas. 40.a.
 Fromelées capitaine Bourgongnon à la surprinse de Peronne & du Comte de S. Pol. 121.a.
 Fremessent escuyer Picard occis par inesadventure à un tournoyement fait à Bruges. 98.b.
 Fronsac fort chasteau chambre royale la clef de Guienne. 36.a.

G.

Gabelle de sel que le Duc Philippes de Bourgongne voulut imposer sur les Flamens dont vint l'occasion de la reuolte des Gantois. 34.b.
 Gabelle de sel abolie puy remis sus par le Comte de Charolois aux pais degagez. 126.b.
 Gabelles & aydes diminuées à Paris par le Roy Loys xi. se voyant oppresse de la guerre du bien public. 139.b.
 Gantois en guerre contre le Duc Philippe leur Seigneur. 40.b.
 Gaucourt vieil cheualier François. 17.b.
 Gaucourt l'un des prouoyeurs & munitionnaires du Roy Charles vij. à la conqueste de Normandie. 33.a.
 Gazebecque au service du Duc Philippes contre les Liegeois. 121.b.
 Geneppe chasteau de plaisance en Brabant ou seiournoit le Dauphin Loys pendant sa fuite. 69.a.
 Geneuois se donnent au Roy Charles vij. puis le renoncent. 3.b.
 Geneuois chastiez de leur reuolte par le Roy Loys xij. & leur Duc Paule Noyus decapité. 239.b.
 Genly & S. Pol adiournez à comparoir en personnes pour fait de sedition. 98.b.
 Geoffroy de S. Belin à la conqueste de Guienne. 35.a.
 Gilles de Bretagne frere du Duc de Bretagne emprisonné & fait mourir par le commandement du Duc son frere par ce qu'il auoit pris le party des Anglois. 3.b.
 Gyé au voyage de Naples avec le Roy Char. viij. 220.a.
 Gouffier emprisonné pour magie. 66.b.
 Gonnel capitaine Anglois dedans Chierbourg assiéger par les François rend la place par composition. 32.a.
 Gournay en Normandie donné par le Roy au Comte Loys de S. Pol. 14.b.
 Gouvernement de Normandie donné par le Roy Loys xi. au Comte de Charolois avec 36. mille liures de pension. 91.b.
 Gouvernement de Languedoc osté au Comte du Maine par le Roy Loys xi. 151.a.
 Gratien capitaine d'Espaignols pour le Roy Charles vij. au siege de Dax en Guienne. 35.b.
 Gratien demeure à la garde de Bayonne. 39.b.
 Granfy à la conqueste de Guienne. 36.a.
 Grandmont ville en Flandres pres de Gand. 42.a.
 Grassy gentil-homme François à la bataille de Montlehery print vnes fois le Comte de Charolois mais il fut recoux. 133.a.
 Grimaux à la conqueste de Guienne. 36.a.
 Groin capitaine de gens d'armes au service de Loys xi. 197.a.
 Grutire ou Grutuse enuoyé en Escosse par le Duc Philippes pour empescher le mariage du Prince de Galles & de la fille d'Escosse son ariere-niece pour sa hayne qu'il portoit à la maison d'Anjou dont estoit le Prince de Galles de par sa mere. 86.a.

Grutuse fait cheualier de l'ordre de la toison d'or. 87.a.
 Grutuse au service du Duc Philippes contre les Liegeois. 121.b.
 Grutire fait cheualier de l'ordre de France au sacre du Roy Loys xij. 229.a.
 Galles fils du Roy Henry d'Angleterre est en court de France demandant secours au Roy Loys xi. 164.b.
 Gueldres Duc ingrat avec les Frisons machine vne surprinse contre le Duc Philippes de Bourg. laquelle fut decouuerte par sa femme qui se vint retirer avec son fils audit Philippes son oncle. 67.b.
 Gueldres Duc nepueu & allié du Duc Philippes à son secours contre les Liegeois. 119.a.
 Gueldres pais assailly par le Duc de Bourgongne. 174.a.
 Guerin le Groin pour le Roy dans Beaunais assiéger par les Bourgongnons. 170.a.
 Gueroult natif de Lusignan en Poictou pendu pour espion à Paris lors de la guerre du bien public. 139.b.
 Guienne baillée en apennage à Char. frere du Roy Loys xi. 162.b.
 Guillaume de Poictou capitaine Anglois rend S. Lo en Normandie aux François. 16.a.
 Guisarmiers du temps de Char. vij. 29.a.
 Guisnes Comté donnée par le Roy Loys xi. au seigneur de Croi. 97.a.
 Guisnes Comte cedé au Comte de Charolois par Loys xi. 122.a.

H.

Habillemens de pourpre vstiez aux Roys de France incontinent que leur predecesseur est decédé. 88.b.
 Habillemens d'hommes & femmes de quelle façon ils estoient l'an 1467. 130.b.
 Hames au service du Duc Philippes. 51.a.
 Hames Bourgongnon occis à la bataille de Mōtlehery. 116.a.
 Hanton & Parsy Anglois deffaits avec leurs troupes en Escosse. 11.b.
 Haplaincourt capitaine Bourgongnon abandonné le Comte de Charolois à la bataille de Montlehery. 116.a.
 Hardy prisonnier pour empoisonnement qu'il auoit conspiré contre le Roy. 175.a.
 Hardy escartelé par arrest de Parlement. 175.b.
 Hardouin tresorier de France l'un des prouoyeurs & munitionnaires du Roy Charles vij. à la conqueste de Normandie. 33.a.
 Harecourt Comte Normant au conseil de Charles frere du Roy Loys xi. 124.b.
 Harengue du Roy Loys aux estats de Picardie. 104.a.
 Harengue pour le peuple de Milan au Cardinal d'Amboise lieutenant du Roy. 231.a.
 Harengue du Comte de Charolois resposiue à celle des ambassadeurs de France. 105.a.
 Harlay cheualier du guet à Paris. 186.a.
 Hasle aduocat en Parlement l'un des deputez pour aller pardeuers les Princes conuere pour le bien public. 141.b.
 Hasle banny de Paris. 142.a.
 Hasle aduocat du Roy au Parlement de Paris vexe le Duc de Bourbon en la personne de ses officiers à la faueur de Doyac. 202.a.
 Hatie courageux gendarme tué au service du Duc Philippes contre les Gantois. 42.b.
 Hauard grand escuyer d'Angleterre. 182.a.

D E M O N S T R E L E T .

Hautons Abbé pris prisonnier par commandement du Comte de Charolois par ce qu'il estoit de plus priniez seruiteurs du seigneur de Croi. 110.a.
Hault Bourdin bastard de S. Pol priné de la capitainerie de Mortaigne par Loys xi. 98.a.
Hayne de la maison de Bourgongne & d'Anjou. 86.a.
Hebert ambassade pour le Roy Loys xi. vers les Gantois. 152.b.
Hedin sejour du Duc Philippes ou le Roy Loys xi. l'alla visiter. 97.b.
Henry Roy d'Angleterre pris par le Roy Edouard mené à Londres & exposé en derision du peuple. 120.b.
Henry restitué au Royaume d'Angleterre. 65.b.
Henry Roy d'Angleterre ingrat vers le Roy Char. viij. qui l'auoit esleué à la couronne. 211.a.
Herauillier capitaine François au seruice de Charles vij. 20.a.
Herisson Baillif de Caën Anglois. 30.a.
Herin tué au seruice du Duc de Bourgongne contre les Gantois. 44.a.
Hermasrodite en Auvergne & ce qui en aduint. 199.a.
Hermite à la conqueste de Guienne. 36.a.
Hesselin & Paillart bourgeois de Paris enuoyez pour sommer ceux d'Auxerre. 166.a.
Hieronyme de Ferrare predict le voyage du Roy Char. viij. à Naples. 214.a.
Hogmans souuerains magistrats esleuz par les Gantois estans en guerre contre le Duc Philippe leur seigneur. 40.b.
Hogmans decapitez par les Gantois pour auoir mal fait leurs besongnes deuant Audenarde. 43.a.
Homage fait au Roy Charles des Duché de Bretagne & Comté de Montfort par le Duc François. 3.a.
Homage fait au Roy Char. vij. de la Duché de Bretagne & Comté de Montfort par le Duc Pierre. 34.a.
Homages que fait le Duc Philippes de ses terres de Bourgongne & d'Artois au Roy Loys xi. 89.a.
Homage du Duché de Normandie fait au Roy Loys xi. par le Duc Charles son frere. 123.b.
Homages & obeissances que firent les Barons de Naples au Roy Charles viij. 223.a.
Hommes d'armes d'ordonnances de France instituez par le Roy Char. vij. & leur reigle & discipline. 2.a.
Hommes d'armes des ordonnances du Roy Char. vij. leur gages & equipage. 87.b.
Hongres en guerre contre les Turcs l'an 1456. 66.a.
Horne Comte au secours du Duc Philippes contre les Liegeois. 119.a.
Hostie de la Messe rauie entre les mains d'un prestre à Paris & ce qui en aduint du temps de Loys xij. 235.b.
Hoste se porte vaillamment contre les Gantois au seruice du Duc de Bourgongne. 43.b.
Hotte prisonnier se coupe la langue de peur qu'elle feust cause de sa mort. 161.b.
Houel capitaine Anglois deuient François & par quelle occasion. 15.a.
Hout capitaine Anglois à la solde des Gantois les induit par trahison à sortir aux champs avec toute leur puissance pour donner bataille au Duc Philippes leur seigneur en laquelle ils furent desconfits. 52.a.
Hue des vignes home d'armes du seigneur de la Barde aduertit le Roy de l'entreprinse des Princes sur Mante & Rozen. 145.a.

Hunaudaie à la seconde conqueste de Guienne. 57.a.
Hyre occis à la bataille de Montlehery. 116.a.
Hyuer merueilleux l'an 1457. 74.a.
Hyuer merueilleux semēt froid l'an 1464. comme il fut cent apres l'an 1564. 106.b.
Hyuer merueilleux à Paris 1481. 203.a.

I.

Ialongnes Mareschal de France. 14.b.
Ialongnes Mareschal de France regnant Char. vij. 30.a.
Iean de Lorraine à la conqueste de Normandie. 32.b.
Iean de Bourgongne Comte d'Estampes succede au Comte de Neuers son frere. 102.a.
Illiers capitaine François laissé par le comte de Dunois pour gouverner le siege de Verneuil. 10.b.
Impositions sur la traicte des vins à un escu pour pippe. 186.b.
Inceste plus griefuement puny en la femme qu'en l'homme. 152.a.
Indulgences & pardons à ceux qui diroient l'Aue Maria à midy. 168.b.
Innocent viij. créé Pape. 210.b.
Inundations fort pernicieuses en Flandres. 161.b.
Inundation estrange de riuieres de Marne & Seine l'an 1460. 134.a.
Iorth s'empare du gouvernement d'Angleterre & met en prison Sombresset & Glocestre. 63.b.
Iorth hors de court d'Angleterre. 64.a.
Iorth gaigne la bataille contre le Roy d'Angleterre. 65.a.
Iorth desconfit & fait decapiter avec son second fils par la court d'Angleterre. 85.a.
Iorth fils du susdit gaigne la bataille contre le Roy Henry d'Angleterre puis fait paix par laquelle deuot estre Roy apres la mort de Henry. 85.a.
Iorth enuoye ses freres en Hollande & les en retire estant paruenus à la couronne d'Angleterre. 86.a.
Ioustes & tournois à Lyon au retour du Roy Charles viij. de son voyage de Naples. 227.b.
Ioustes & tournois en la court de Bourgongne à la venue de la Duchesse de Bourbon sœur du Duc Philippes. 96.a.
Ioustes à Bruges pour les nopces du Duc de Gueldres. 98.b.
Ioustes à Paris. 158.b.
Isle fils de Talbot amene renfort de gens & de viures à Talbot son pere en Guienne. 41.b.
Isle Adam capitaine au seruice du Duc Philippes. 51.b.
Italiens à la solde du Duc de Bourgongne. 174.b.
Iubilé remis à vingt cinq ans par le Pape Paul ij. 168.a.
Inchy capitaine Bourgongnon abandonne le comte de Charolois à la bataille de Montlehery. 116.a.
Iuifs crucifient des enfans à la semblance de Iesus christ & ce qui en aduint. 195.a.
Iules second créé Pape au parauant nommé François de Saoune cardinal ad vincula Legat d'Auignon. 236.a.
Iules Pape second en guerre contre les François. 241.b.
Iuuenal des Vrsins Chancelier de France regnāt Char. vij. 21.b.
Iuuenal des Vrsins Chancelier de France estoit armé à l'entree de Bordeaux la ville estant reduite en l'obeissance de Charles vij. 37.a.
Iuuenal des Vrsins Chancelier de France destitué de son estat par Loys xi. venant à la couronne. 135.a.
Iuuenal des Vrsins seigneur de Tramel arresté prisonnier

TABLE DV III. VOLUME

à Molins par le Duc de Bourbon. 136.a.
Juuenal des Ursins restitué en l'office de Chancelier de France. 148.b.

K.

K Atherine de Sene & le miracle d'elle. 239.a.
Kiriell capitaine de grand renom Anglois descend à Chierbourg avec trois mille Anglois. 26.a.
Kirqueby capitaine Anglois pris à la bataille de Formigny. 27.a.
Kiriell capitaine Anglois pris à la bataille de Formigny. 27.a.

L.

L A Cloche procureur du Roy au Chastellet enuoyé par le Roy Loys xi. pour pourvoir à la fortification & munition de Roie. 166.b.
Ladehors lieutenant criminel de Paris. 179.a.
Ladriesche tresorier de France. 157.a.
La Haye à la conquête de Guienne. 36.a.
Lalaing au service du Duc Philippes contre les Gantois. 40.b.
Lalaing capitaine de l'Ecluse à peine eschappe l'embusche des Gantois. 49.b.
Lalaing nommé Philippes occis à la bataille de Montlehery. 116.a.
Lampet capitaine Anglois dans Auranches. 28.a.
Lanes & Lespare ramenant les Anglois en Guienne. 41.a.
Launoy au service du Duc Philippes. 44.b.
Launoy cousin de Croi fait Baillif d'Amiens par Loys xi. 98.a.
Lartidun Baron pour le Roy Charles vij. au siege de Dax en Guienne. 35.b.
Lauat à la bataille de Formigny. 27.a.
Lauedan à la conquête seconde de Guienne. 58.a.
Lau grand Bouteiller de France grand Chambellan & Seneschal de Guienne. 156.a.
Lau euadé de la prison d'Yson dont les gardes furent puniz de mort. 159.a.
Lautrec Vicomte frere du Comte de Foix pour le Roy Charles vij. au siege de Dax en Guienne. 35.b.
Legat de Romme en France. 202.a.
Leon l'un des gentils-hommes qui se trouuerent à vn souper avec le Roy chez le seigneur d'Armenouville à Paris. 141.a.
Lespare & autres gentils-hommes Gascons ramenant les Anglois en Guienne. 41.a.
Lespare gentil-homme Gascon decapité à Poitiers pour crime de trahison. 64.a.
L'Estrange à la conquête de Guienne. 36.b.
Lettres patentes du Comte de Charolois aux estats de Bourgongne contre ceux de Croi plaines de charges & reproches. 107.b.
Lettres du Duc de Berry frere du Roy Loys xi. plainctives contre le Roy pour ordir la guerre du bien public. 110.a.
Lettres du Roy Loys xi. au Duc de Bourbon & de luy au Roy sur le commencement de la guerre du bien public. 111.a.
Lettres patentes du Roy contre les coniurez du bien public. 111.a.
Lettres patentes du Roy Loys xi. sur la pacification de la guerre civile du bien public. 122.b.

Lettres & ordonnance du Roy sur le fait de l'impetration des offices. 156.b.
Lettres du Duc de Bourgongne à la court de Parlement de Paris plainctives de ce que le Roy contrenenoit au traité de Peronne. 164.a.
Libelles diffamatoires & plaquars contre le Comte de S. Pol Connestable de France. 167.b.
Libourne baillée au Comte d'Angoulesme. 36.a.
Liegeois en guerre contre le Duc de Bourgongne. 119.a.
Liegeois iniurient de parolles le Duc Philippes & son fils. 120.a.
Liegeois en guerre contre leur Euesque & le Duc de Bourgongne. 155.a.
Liegeois en guerre contre les Bourgongnons. 160.a.
Liege prié & saccagé par les Bourgongnons. 160.b.
Lion eschapé en Auvergne & ce qui en aduint. 199.a.
Liques à la prise de Saudnich en Angleterre. 72.a.
Loheac capitaine François au service du Roy Charles vij. 12.a.
Loheac Marechal de France à la bataille de Formigny. 27.a.
Loheac à la prise de Bayonne. 39.b.
Loheac restitué en l'office de Marechal de France. 148.b.
Longue-joye bourgeois de Paris au conseil priué du Roy Loys xi. 148.b.
Longueual au service du Roy Loys xi. 166.a.
Lorraine assaillie par le Duc Charles de Bourgongne. 174.b.
Lousiers capitaine François à la bataille de Rapallo. 217.a.
Louvain capitaine François commis à la garde de Challais. 33.b.
Louvain à la conquête de Guienne. 36.b.
Louvain occis par Raoul de Flauy. 102.b.
Louviers Eschançon du Roy. 158.b.
Luce gentil-homme Gascon laisse la part Angloise pour recouurer son chasteau de Mauleon en Gascongne que les François auoient pris. 16.b.
Ludouic Sforce Duc de Milan visite le Roy Charles vij. en Ast. 217.a.
Luillier chageur bourgeois de Paris l'un des deputez pour aller pardeners les Princes. 141.b.
Luillier nommé Jean Clerc de la maison de ville de Paris. 145.a.
Luillier & ses freres bannis de Paris. 142.a.
Luillier changeur & bourgeois de Paris à la suite du Roy Loys xi. par son commandement. 148.b.
Luillier tresorier de Carcassonne. 148.b.
Lussac à la seconde conquête de Guienne. 56.b.

M.

M Adré capitaine François trahit le pont S. Maxence aux Bourgongnons. 137.b.
Maillebois, S. Remy & Noirequerque gentils-homes François tue en leur maison par ceux de la part Angloise pendant la trefue. 10.a.
Mailly seigneur de Bouillencourt chevalier hardy du party de Bourgongne. 113.b.
Maine Comte de la maison d'Anjou chef de l'arriere-garde pour le Roy à la bataille de Montlehery. 115.b.
Maine Prince de la maison d'Anjou fait mauuais deuoir à la bataille de Montlehery. 116.a.
Majence Euesque d'Allemagne secouru par le Duc Phi-

DE MONSTRELET.

lippes. 96.a.
 Mayene la Iube^z fortifiée par les Anglois contreenans
 aux articles de la trefue. 7.b.
 Magdelaine fille du Roy Charles vij. accordée en mariage
 au Roy de Hongrie. 70.a.
 Magiciens attains d'auoir voulu charmer le Duc Philippes
 & son fils. 96.a.
 Magnificence du Duc Philippes à l'entrée du Roy Loys xi.
 à Paris. 90.a.
 Maladie fort griesue au Duc Philippes. 92.a.
 Maladie fort griesue du Duc Philippes à Bruxelles. 106.b.
 Maldeghen cheualier Flament au seruice du Duc Philip-
 pes contre les Gantois. 49.b.
 Malicorne gentil-homme de la maison du Duc de Guienne
 & fauory d'iceluy. 169.a.
 Malortie l'un des capitaines pour le Roy à la bataille de
 Montlehery. 115.a.
 Malortie garde les passages des riuieres contre les Bretons.
 140.a.
 Maniel lieutenant du Bailly de Roüen pendu & estranglé.
 150.b.
 Marests à la prinse de Sauduich en Angleterre. 72.a.
 Marests à la garde de Paris lors de la guerre du bien com-
 mun. 139.a.
 Marchant l'un des commis de la part des Princes pour com-
 poser leurs differens avec le Roy Loys xi. 145.b.
 Marche à la seconde conqueste de Guienne. 56.b.
 Marche fils du Duc d'Iorth desconfit la Roïne d'Angleter-
 re & se fait Roy. 85.b.
 Mariage de la fille du Roy de Sicille Duc d'Anjou & de
 Lorraine avec le Roy Henry d'Angleterre en l'an 1444.
 1.a.
 Mariage du Comte de Charolois fils unique du Duc Phi-
 lippes de Bourgongne avec Isabel de Bourbon fille du Duc
 de Bourbon. 64.a.
 Mariage du Daulphin Loys & de Charlotte fille du Duc
 de Sauoye cinq ans apres qu'il fut commencé. 71.b.
 Mariage d'une fille du Roy d'Escoce avec le Prince de Gal-
 les fuitif d'Angleterre. 86.a.
 Mariage du Duc de Guelbres avec vne fille de Bourbon.
 98.b.
 Mariage d'Edouard Roy d'Angleterre & de la fille du
 seigneur de Riuieres excellemment belle. 106.a.
 Mariage de la Bastarde du Roy Loys xi. avec le Bastard de
 Bourbon. 148.a.
 Mariage du seigneur de Beaujeu & de la fille aînée du
 Roy de France. 174.b.
 Mariage du Daulphin Charles avec Marguerite de Flan-
 dres. 208.a.
 Mariage du Roy Charles avec Anne de Bretagne. 211.b.
 Mariage du Roy Loys xij. avec Anne de Bretagne. 229.b.
 Mariage du Roy Ferdinand d'Arragon avec la sœur du
 Comte de Foix. 238.b.
 Mariage du Roy Loys xij. avec la sœur du Roy Henry d'An-
 gleterre les honneurs & receptions qui luy furent fai-
 ctes. 248.a.
 Mariage du Roy François avec la Roïne Claude. 248.a.
 Mariette lieutenant criminel de la Preuosté de Paris.
 167.b.
 Marle Comte fils (à mon aduis) du Comte de S. Pol assiste
 au Comte Charolois à la guerre des Liegeois. 127.a.
 Martre se porte vaillamment contre les Gantois au seruice
 du Duc de Bourgongne. 43.b.

Masse en Touseane où il se trouue plusieurs carrieres de
 marbre blanc & noir. 219.a.
 Matago capitaine Anglois. 26.b.
 Matago fuit à la bataille de Formigny & abandonne ses
 gens. 27.a.
 Matago rend Bayeux aux François. 28.b.
 Mathieu Bastard de Bourbon à la bataille de Fornoue.
 226.b.
 Maulny capitaine de cent hommes d'armes. 20.a.
 Mauuet capitaine de gens d'armes au seruice de Loys xi.
 200.a.
 Maximilian renouuelle la guerre contre les François. 210.b.
 Meanse seigneur de Maugouuerne capitaine de Franc-ar-
 chers à la conqueste de Guienne. 35.a.
 Melun Bailly de Sens. 137.b.
 Melun lieutenant du Roy Loys xi. en Paris avec le Maref-
 chal Ioachin Rouhault au temps de la guerre du bien pu-
 blic & l'ordre qu'il y donna. 138.a.
 Melun fait grand-maistre de France pour recompense du
 gouuernement de Paris. 140.b.
 Melun destitué de l'office de grand-maistre de France.
 150.a.
 Melun decapité à Andely par le commandement du Roy
 Loys xi. 157.b.
 Meßignac à la seconde conqueste de Guienne. 56.b.
 Merueilles & singularité^z des lieux d'autour de Naples
 visite^z par le Roy Char. vij. 224.a.
 Merbury cheualier Anglois au seruice de Charles vij.
 17.b.
 Mern bastard de Rocheconart conduict des Arbalestriers
 au secours de Beauuais. 170.a.
 Mœurs & conditions du Roy Loys xi. 208.b.
 Mœurs & conditions du Roy Loys xi. 97.b.
 Meurtre du Chancelier d'Angleterre & du Marquis de
 Suffolt voy mutinerie.
 Meurtre de Loys de Bourbon Euesque du Liege. 205.b.
 Meurtre du Duc de Milan par tradiment. 189.b.
 Mignon capitaine de deux cens archiers à cheual au secours
 du Roy Loys xi. 140.a.
 Miramont tué au seruice du Duc Philippes deuant Gand.
 43.a.
 Michelllets c'est à dire voyageurs à S. Michel dont il fut grād
 année l'an 1458. 74.b.
 Mompédon l'un des gentils-hommes qui se trouuerēt à un
 soupper avec le Roy chez le seigneur d'Armenouuille à
 Paris. 141.a.
 Monnoye haulsée de pris. 175.b.
 Monnoye haussée. 185.b.
 Monstres en armes des Parisiens. 154.b.
 Monstre en armes du peuple de Paris. 176.a.
 Monstre ou prodige d'une femme à Veronne. 195.a.
 Montagu à la conqueste de Guienne. 37.a.
 Montaulban à la seconde conqueste de Guienne. 57.a.
 Montaulban Admiral de France issu de la maison de
 Bueil fait mauuais denoir à la bataille de Montlehery.
 116.a.
 Montgascon l'un des capitaines du Roy Char. vij. à la ba-
 taille de Formigny. 26.b.
 Montguion à la prise de Bayonne. 39.b.
 Montingrin à la conqueste de Guienne. 36.a.
 Montigny & Forestel ambassadeurs du Duc Philippes sur
 le fait de son vœu d'aller contre les Turcs. 96.b.
 Montguyon en Guienne pris sur les Anglois par compo-

TABLE DV III. VOLUME

sition.	35.a.	Mort de Robert le Jeune gouverneur d'Arras qui auoit esté iadis partial pour la faction Bourgongnonne pour laquelle il auoit autresfois fait mourir du party contraire plus de neuf cens personnes étant Bailly d'Amiens.	96.a.
Montferrant capitaine Gascon pour la part Angloise.	35.b.	Mort de Marie d'Anjou Royne de France uesue de Charles vij. & mere de Loys xi.	98.b.
Montferrant ramene les Anglois en Guienne.	41.a.	Mort de Charles de Bourgongne Comte de Neuers.	102.a.
Montmorin à la prise de Bayonne.	39.b.	Mort de Charles Duc d'Orleans discours de ses mœurs & fortunes.	106.a.
Montpencier ordonné Viceroy à Naples par le Roy Charles vij.	225.a.	Mort de Marie de Bourbon femme du Comte de Charolois.	121.a.
Morbery capitaine Anglois.	26.b.	Mort de Haultbourdin bastard de S. Pol renommé capitaine Bourgongnon.	127.a.
Moreau capitaine François à la solde des Gantois.	50.a.	Mort du Duc Philippes de Bourgongne.	131.a.
Moreul au seruice du Duc Philippes.	51.a.	Mort du Roy Charles vij. aduenue l'an 1461.	134.b.
Morin tresorier du Duc de Berry tenoit la grosse tour de Bourges pour son maistre contre le Roy Loys xi.	136.a.	Mort du Duc Charles d'Orleans aduenue à Chastelleraud.	135.b.
Mortaigne damoiselle condamnée de calumnie.	63.a.	Mort du Pape Pie. II.	136.b.
Mortalité au camp des Bretons deuant Fougieres d'ot mourut le fils du Comte de Rohan.	23.b.	Mort de Montauban Admiral de France son estat donné au bastard de Bourbon.	151.a.
Mort des Roynes d'Espaigne, Portugal, & Escosse, & de la Dauphine aduenues en mesme temps en l'an 1445.	2.b.	Mort du Duc Philippes.	153.a.
Mort de Gilles frere du Duc de Bretagne & l'occasio pourquoy.	31.a.	Mort du Prince de Galles.	167.a.
Mort de Tindual le bourgeois baillif de Troye tué d'une canonnade au siege de Chierbourg.	31.b.	Mort du Comte d'Eu.	167.b.
Mort de Cotin seigneur de Raiz Admiral capitaine de François tué d'une canonnade au siege de Chierbourg.	31.b.	Mort du Comte de Vuaruich.	167.a.
Mort de Chabannes Grand-maistre d'hostel du Roy Charles vij.	39.a.	Mort de Chartier Euesque de Paris fort regretté sinon que du Roy Loys xi. qui l'estimoit auoir tenu party contraire.	168.b.
Mort de Cornille Bastard de Bourgongne en la victoire de Vausselles.	44.b.	Mort du Pape Paul. II.	168.a.
Mort de messire Iacques de Lalaing fort plaincte à la guerre des Gantois au siege de Poulcres.	51.b.	Mort du Comte d'Armagnac en l'Estore.	173.a.
Mort de Thalebot capitaine Anglois fort renommé à la bataille de Chastillon.	57.b.	Mort de François de France Duc de Berry second fils du Roy Loys xi.	174.a.
Mort de Beauuau seigneur de la Besiere.	59.a.	Mort d'Agnes de Bourgongne Duchesse de Bourbon & le nombre de ses enfans.	190.a.
Mort de l'Empereur de Constantinople à la prise de sa cité.	60.b.	Mort de Charles Duc de Bourgongne.	191.a.
Mort du Pape Nicolas.	63.b.	Mort de messire Robert d'Estouteuille qui auoit esté Preuost de Paris l'espace de xliij. ans & l'office donnée à Iacques son fils par le Roy Loys xi.	200.b.
Mort du Roy de Castille.	63.b.	Mort de plusieurs grands personages à Paris en mesme temps.	204.b.
Mort du Roy de Hongrie nommé Lancelot à qui estoit accordée la fille de Charles vij.	73.b.	Mort de la Duchesse de Bourbon fille du Roy Charles vi.	204.b.
Mort du Roy de Cypre.	74.a.	Mort de la Comtesse de Flandres fille du Duc Charles de Bourgongne.	204.b.
Mort du Duc de Bretagne.	74.a.	Mort du Roy Edouard d'Angleterre.	207.b.
Mort d'Alphons d'Arragon Roy de Naples.	75.a.	Mort du Roy Loys xi. aduenue au Plessis lez Tours le penultiesme iour d'Aoust 1483.	208.a.
Mort du Duc Artus de Bretagne qui auoit autrefois esté appellé Comte de Richemont Connestable de France.	79.a.	Mort du Pape Sixte iiij.	210.b.
Mort du Roy d'Escosse qui auoit espousé la fille du Duc de Gueldres mere du Duc Philippes.	84.a.	Mort du Pape Innocent viij.	213.b.
Mort du Roy Charles vij. avec discours notable de la fortune & mœurs d'iceluy.	87.b.	Mort du seigneur des Cardes ou des Querdes Philippes de Creuecueur Marechal de France.	214.b.
Mort du Roy Charles vij. aduenue pour la fantasie qu'il auoit, qu'on le vouloit empoisonner.	86.b.	Mort du Comte de Vendosme au retour du voyage de Naples.	227.a.
Mort du renommé capitaine Pothon de S. Treille Seneschal de Guienne.	91.a.	Mort du Roy Charles vij. à Amboise & ses obseques.	228.b.
Mort de Gauvain Quieret renommé capitaine Bourgongnon.	92.b.	Mort du Roy d'Iætot.	233.b.
Mort de Floquet autrement dit Floques Bailly d'Eureux renommé capitaine.	92.a.	Mort du Pape Alexandre Espagnol Valentinois.	236.a.
Mort de Raulin chancelier de Bourgongne qui auoit esté aduocat en Parlement à Paris & les grands biens qu'il acquist au seruice du Duc Philippes.	92.a.	Mort du Duc Pierre de Bourbon.	236.a.
Mort de Iean du Clerc Abbe de S. Vast fort regretté pour sa charité & sainteté.	95.a.	Mort de Loys de Luxembourg Comte de Ligny.	236.b.
		Mort de Dom Federich de Naples étant en France.	238.b.
		Mort du Duc Philebert de Sauoye.	238.a.
		Mort de l'Archeduc Philippes d'Autriche.	239.a.
		Mort du Cardinal d'Amboise grand amy du Roy Loys xij.	241.a.

Mort

DE MONSTRELET.

Mort de Gaston de Foix Duc de Nemours. 243.b.
 Mort du Roy d'Escoffe en vne bataille qu'il perdit contre les François. 246.b.
 Mort de la Royne Anne femme du Roy Loys xij. 247.b.
 Mort du Roy Loys xij. aduenue le j. iour de Ianuier 1514. 249.a.
 Moruillier destitué de l'office de Chancelier de France. 148.b.
 Moulins Anglois amene renfort de gens & de viures à Tallebot en Guienne. 41.b.
 Mory gentil-homme François pendu pour auoir adheré à ceux du bien public. 138.b.
 Moi capitaine au seruice de Charles vij. 11.a.
 Moi en Beauuoisis à la conqueste de Normandie. 32.b.
 Moi à la prinse de Creuecueur. 105.b.
 Moi fait grand deuoir contre les Bourgongnons. 116.b.
 Moi capitaine dedans Roie contre les Bourgongnons. 169.b.
 Mutinerie du peuple de Londres contre le Roy d'Angleterre appaisée par le meurtre du Chancelier & du Marquis de Suffort & autres conseillers du Roy. 7.b.
 Mutinerie entre ceux de Saintron au Liege & les soldats du Comte de Charolois. 126.a.
 Mutinerie entre les pages de court & les clerks du Palais à Paris. 151.b.

N.

Naissance de Marie fille du Duc Charles de Bourgongne lors Comte de Charolois. 69.b.
 Naissance du Roy Loys xij en l'an 1461. 92.b.
 Naissance d'une fille au Roy Loys xi. laquelle l'auteur ne nomme point. 135.b.
 Naissance d'un second fils au Roy Loys xi. qui fut appelé François Duc de Berry & ne vescu gueres. 172.b.
 Naissance de Loys Roy de Hongrie dont le Roy Loys de France fut parrain par le fils du Marquis de Brandebourg. 239.a.
 Naissance de madame Renée de France depuis Duchesse de Ferrare qui fut en l'an 1512. 241.a.
 Naissance de Charles vij. 164.b.
 Nanterre premier President de Paris destitué de son office. 148.a.
 Nassau Comte au secours du Duc Philippes contre les Liegeois. 119.a. 121.b. 127.a.
 Nauale bataille entre les François & Anglois. 247.a.
 Nauarre Royaume occupé par les Espaignols. 245.a.
 Neuers Comte à la conqueste de Normandie. 32.b.
 Neuers Iean de Bourgongne gouverneur de Picardie. 104.a.
 Noier les delinquans par forme de supplice vité du temps du Roy Loys xi. 139.b. 124.b.
 Noms des capitaines François qui se trouuerent à la conqueste de Normandie avec le Roy Char. vij. 32.b.
 Noms des seigneurs & capitaines qui suyuoient le Roy Charles vij. au voyage de Naples. 215.b.
 Norbery capitaine Anglois pris à la bataille de Formigny. 27.a.
 Norenton l'un des capitaines pour le Roy à la bataille de Montlehery. 115.a.
 Normandie reconuerte ville à ville sur les Anglois par le Roy Charles vij. en un an qui fut l'an 1450. 32.a.
 Normandie contient six iournées de long quatre de large & dedans y a six Eueschez & vne Archeuesché & cent villes. 32.a.

Normandie reconuerte par le Roy Loys xi. sur Charles son frere. 149.a.
 Normandie donnée en apennage à Charles frere du Roy Loys xi. par le traité de Conflans. 145.b.
 Normandie rauagée par les Bretons. 156.b.
 Nouailles Baron pour le Roy Charles vij. au siege de Dax en Guienne. 35.b.
 Noyers emprisonné pour auoir voulu charmer le Duc Philippes. 96.a.
 Nuz enuittailé à la vené du Duc de Bourgongne qui tenoit le siege deuant. 180.b.

O.

Obsèques faits à Paris en l'honneur du Roy de Hongrie trespassé qui auoit fiancé Magdelaine fille du Roy Charles vij. 70.b.
 Obsèques du Roy Charles vij. 88.b.
 Obsèques du Roy Charles vij. faictes à Paris & a S. Denys avec ample description de l'ordre & ceremonie d'icelles. 92.b.
 Obsèques magnifiques faictes au corps du Duc Philippes trespassé à Bruges. 131.a.
 Obstination des prisonniers Gantois qui aymerent mieux estre pendu & que de crier mercy au Duc Philippes. 45.b.
 Officiers desapointez par le Roy Loys xi. à son aduenement à la couronne. 135.a.
 Offrandes tresriches du Roy Loys xi. à diuerses Eglises & mesmement à S. Martin de Tours d'un Treillis d'argent pesant dixsept mille marcs. 198.b.
 Oiseliens du pont au Change à Paris ce qu'ils font tenu & faire aux entrées des Roys. 134.b.
 Oline docteur en Theologie renommé predicateur à Paris. 137.a.
 Oline docteur en Theologie l'un des deputez pour aller parader les Princes. 141.b.
 Olivier le Roy conseiller & maistre des comptes ambassadeur pour le Roy en Angleterre. 150.b.
 Orange prend le party du Roy Loys xi. 180.b.
 Orfeure seigneur d'Ermenonuille capitaine Parisien à la deffence de sa ville contre les Bourgongnons. 133.b.
 Orgemont seigneur de Mery ou Mercy tresorier de France. 148.b.
 Orget homme d'armes de la compagnie du seigneur de la Barde euadé de Paris pour aller au party des Princes. 144.b.
 Oriolle general des finances arresté prisonnier à Molins par le Duc de Bourbon. 136.a.
 Oriolle l'un des commis de la part des Princes pour composer leurs differens avec le Roy Loys xi. 145.b.
 Oriolle l'un des commis pour examiner le Cardinal Balluë prisonnier. 162.b.
 Oris general des finances du Roy Loys xi. laisse son party pour suyure celui des Princes. 141.b.
 Ormont Comte Escoffois se porte vaillamment à la deffence de son pais. 11.b.
 Ornemens de la rue de S. Denys à l'entrée du Roy Loys xi. à Paris. 90.a.
 Orual à la conqueste de Normandie. 32.b.
 Orual fils d'Albret à la conqueste de Guienne. 34.a.
 Orual fils du seigneur d'Albret pour le Roy Charles vij. au siege de Dax en Guienne. 35.b.
 Orual à la prise de Bayonne. 39.b.

TABLE DV III. VOLUME

Orual à la conquête seconde de Guienne. 58.a.
 Oruille gentil-homme Gascon capitaine de cent hommes
 d'armes decapité à Tours avec son lieutenant. 200.a.
 Otho Castellan argentier du Roy Charles vij. emprisonné
 pour magie. 66.b.
 Ottrente saccagé par les Turcs. 195.a.
 Oudard de Bucy conseiller en Parlement decapité à Hedin
 pour crime de leze majesté. 192.b.

P.

Paix fourrée entre le Roy & les Ducs de Bourbon de
 Nemours Comtes d'Armignac & d'Albret lors de
 la guerre du bien public. 138.a.
 Paix d'entre le Roy & le Duc de Bourgongne publiée à
 Paris. 161.a.
 Paillart conseiller des comptes l'un de ceux qui furent
 commis par le Roy Loys xi. pour pacifier la guerre du
 bien public. 145.b.
 Paillart & Hesselin bourgeois de Paris enuoyez pour som-
 mer ceux d'Auxerre. 166.a.
 Parisiens en esmoy pour la garde de leur ville. 145.a.
 Parisiens soignent au salut de leur Roy Loys xi. 147.b.
 Parisiens font leurs monstres en armes deuât le Roy Loys xi.
 154.b.
 Parisiens font monstres en armes deuant le Cardinal Ba-
 lué commis adce par le Roy Loys xi. 157.a.
 Parges capitaine Anglois en Caën. 30.a.
 Parpignan & le Comte de Roussillon reduict en l'obeissan-
 ce du Roy. 178.a.
 Parpignan rendu au Roy d'Arragon. 211.b.
 Partement du Duc de Bourgongne avec le Roy Loys xi. a-
 pres l'entrée de Paris & les gracieux propos qu'ils eu-
 rent ensemble. 90.b.
 Partement du Comte de Charolois de deuant Paris. 124.a.
 Passage dextrement fait des riuieres d'Oise de Seine par
 l'armée Bourgongnonne sous la conduite du Comte de
 Charolois. 114.a.
 Passage de l'Archeduc d'Autriche par France. 234.a.
 Passage de l'Archeduc d'Autriche par Lyon. 235.a.
 Passage premier du Roy François en Italie. 250.b.
 Pauansac Seneschal de Thoulouze à la cōquête de Guie-
 ne. 37.a.
 Paul ij. Pape. 136.b.
 Pelerinage du Roy Loys xi. à S. Claude au Comte de Bour-
 gongne. 204.a.
 Pelerinage d'iceluy à nostre Dame de Hault-bois voy,
 voyage.
 Perdriel enfant de Paris a commission de prendre tous les
 oyseaux priuez apris à parler qui se trouueroient à Paris
 & luy porter à Amboise. 161.a.
 Perte du Royaume de Naples. 228.a.
 Peste à Gand qui les contraingnit d'entendre à paix avec
 le Duc Philippes leur seigneur. 45.b.
 Pestilence à Paris en laquelle moururent plus de quarante
 mille creatures. 152.a.
 Petit-Lot capitaine Escossois pour le Roy Charles vij. au sie-
 ge de Dax en Guienne. 35.b.
 Picard conseiller de la chambre des Comtes priné de son
 estat pour auoir refusé de prester argent au Roy. 139.a.
 Picquigny Vidafme d'Amiens emprisonné par autorité
 du Duc Philippes de Bourgongne. 84.a.
 Piennes à la bataille de Rapallo. 217.a.

Pie ij. auparauant nommé Eneas Silvius créé Pape par
 la mort de Calixte. 75.b.
 Pie tiers Pape & son peu de regne. 236.a.
 Pierres fait cheualier de l'ordre au sacre du Roy Loys xij.
 229.a.
 Philippes ij. Duc de Bourgongne se porte vaillamment en
 la victoire qu'il eut contre les Gantois à Gauere. 53.a.
 Philippes ij. Duc de Bourgongne rapelle les Gantois en sa
 grace apres la bataille de Gauere. 53.a.
 Philippes iij. Duc de Bourgongne se met en denoir d'aller
 à la guerre contre le Turc dont il fut empesché par l'Em-
 pereur Frederic qui aymoit la paix. 56.b.
 Philippes Duc de Bourgongne assiste au Roy Loys xi. à son
 entrée à Paris en fort riche parure. 89.b.
 Philippes de Sauoye emprisonné par commandement du
 Roy Loys xi. pour l'entreprinse qu'il auoit faite sur l'au-
 thorité du Duc de Sauoye son frere. 102.a.
 Philippe monsieur de Sauoye à la solde du Roy Loys xi.
 173.a.
 Poitiers visité par le Roy Loys xi. auquel lieu Charles son
 frere s'enfuit en Bretagne qui fut le commencement de
 la guerre du bien public. 135.b.
 Pontieure au seruice de Charles vij. à la seconde conque-
 ste de Guienne. 56.b.
 Pontieure Comte François à la conquête de Guienne.
 35.a.
 Popaincourt seigneur de Cercelles capitaine Parisien à la
 defence de sa ville contre les Bourgongnons. 133.b.
 Popaincourt & Roux ambassadeurs pour le Roy Loys xi.
 153.a.
 Popaincourt ambassadeur pour le Roy en Angleterre.
 150.b.
 Pothon de S. Treille Baillif de Berry. 30.b.
 Pot Baillif de Vermandois fauorist du Roy Loys xi. 206.a.
 Pragmatique-Sanctionabolie en France au pourchaz du
 Cardinal d'Arras. 92.a.
 Pragmatique-Sanction mise ius. 99.a.
 Pragmatique-Sanction maintenue en France par le moyen
 de l'opposition que forma Iean de S. Romain procureur
 general au Parlement de Paris contre les bulles de l'abo-
 lition d'icelle. 155.b.
 Predications d'un Cordelier à Paris de grand effect. 197.a.
 Pregent frere de feu de Coëtivy Admiral de France. 37.b.
 Preparatifs du Duc de Bourgongne pour la guerre du bien
 public. 112.a.
 Preparatifs de guerre du Roy Loys xi. pour rompre la paix
 de Conflans. 126.a.
 Preparatifs du Roy Loys xi. contre le Duc de Bourgongne.
 152.b.
 Presigny capitaine François au seruice de Charles vij.
 12.a.
 Preuost tué au seruice du Duc de Bourgongne contre les
 Gantois. 44.a.
 Preuost Notaire & Secretaire du Roy surprend la Bastille
 de Paris sur le seigneur des Bordes capitaine d'icelle le-
 quel estoit gendre de Melun qui estoit suspect au Roy
 Loys xi. 151.a.
 Prise d'Acre en Flandres sur les Gantois. 44.b.
 Prise d'Aire sur les Flamens. 205.a.
 Prise d'Anjou Chastel en Normandie, peult estre faule
 Andely. 14.a.
 Prise d'Argentem sur les Anglois. 17.a.
 Prise d'Arras sur les François par Maximilian. 212.b.

DE MONSTRELET.

Prise par composition des villes d'Arques Tanquarville,
 Isle-Bonne, Montieruillier & Caudebec, sur les Anglois.
 23. b.
 Prise d'Assy sur les Anglois par le Duc d'Alençon &
 par quelle occasion. 15. b.
 Prise d'Aulnay sur les Anglois. 16. a.
 Prise d'Auranches sur les Anglois. 28. a.
 Prise de Bayeux sur les Anglois. 28. a.
 Prise de Bayonne sur les Anglois. 39. a.
 Prise de Beaulne & plusieurs autres villes en Bourgogne
 par Charles d'Amboise. 198. a.
 Prise de Beaulieu en Picardie par les Bourgongnons. 113. b.
 Prise de Bergerac sur les Anglois. 33. b.
 Prise de Beuseville sur les Anglois. 16. a.
 Prise de Blaye sur les Anglois. 35. b.
 Prise de Bouchain par les Flamens. 200. b.
 Prise d'Alençon sur les Anglois par le Duc d'icelle ville.
 16. a.
 Prise de Boulongne la grasse sur le Bentinolle. 239. a.
 Prise premiere de Bordeaux, voy entrée pompeuse.
 Prise de Bordeaux sur les François avec la pluspart des
 villes de Guienne par les Anglois sous la conduite de
 Talbot. 41. b.
 Prise seconde de Bordeaux par composition sur les Anglois
 & les conditions d'icelle fait l'an 1454. le 17. iour d'Octo-
 bre. 59. a.
 Prise de Bricbec sur les Anglois. 28. a.
 Prise de Caën sur les Anglois par composition. 30. a.
 Prise de Caën & autres villes de Normandie par la ligue
 des Princes sur le Roy Loys xi. 147. b.
 Prise de Caën & de Bayeux sur le Roy Loys xi. par les Bre-
 tons. 156. a.
 Prise de Caillard Chasteau imprenable en Normandie par
 composition sur les Anglois. 23. b.
 Prise de Cambrai par les Flamens sur le Roy Loys xi.
 200. b.
 Prise de Cambresis chasteau en Normandie sur les Anglois
 par le Comte de Dunois. 15. a.
 Prise de Carenten sur les Anglois. 16. a.
 Prise de Carlat en Auvergne & du Duc de Nemours y
 estant. 187. a.
 Prise de Caudebec sur les Anglois. 21. a.
 Prise de Challais sur les Anglois. 33. b.
 Prise de Challais sur les Anglois pour la seconde fois. 56. b.
 Prise de Chantelou sur les Anglois. 16. a.
 Prise de Chasteauneuf de Medoc s. Makaire, Langon, Ca-
 dillac, Blanquefort sur les Anglois à la seconde conque-
 ste de Guienne. 58. a.
 Prise du Chasteau-Noue à Naples. 223. a.
 Prise de Chastillon sur les Anglois. 35. b.
 Prise de Chastillon en Guienne sur les Anglois. 57. b.
 Prise de Cloz en Constantin sur les Anglois. 16. a.
 Prise de Conches ville en Normandie par Floquet Bailly
 d'Eureux sur les Anglois. 9. a.
 Prise de Condé pres Tournay. 197. a.
 Prise de Conac & s. Maigrin villes en Bourdelois sur les
 Anglois par Verdun capitaine Gascon au nom du Duc
 de Bretagne. 9. a.
 Prise de Constances en Norm. pour le Roy Char. vij. par le
 Duc de Bretagne & son frere Connestable de France.
 15. b.
 Prise de Constantinople par les Turcs. 60. b.
 Prise de Creuecueur sur les Bourgongnons. 105. b.

Prise de Dax sur les Anglois. 35. b.
 Prise de Dax sur les Anglois. 36. b.
 Prise de Daufmont sur les Anglois. 31. a.
 Prise & sac de Dinam au Liege. 128. b.
 Prise & saccagement de Dole par les François. 200. b.
 Prise d'Eu par les Bourgongnons. 171. b.
 Prise d'Eu & de s. Vallery sur les Bourgongnons. 172. a.
 Prise de Fescamp sur les Anglois & un navire venant à
 leur secours. 15. b.
 Prise de Fougieres par les Anglois sur les Bretons dont
 s'ensuiuit ruyne de trefues entre les François & An-
 glois. 6. b.
 Prise de Fougieres ville & chasteau par le Duc de Bretai-
 gne sur les Anglois. 23. b.
 Prise de Fresney sur les Anglois. 26. a.
 Prise de Fresnay en Normandie sur les Anglois par le
 Duc d'Alençon. 17. b.
 Prise de Fronsac sur les Anglois. 36. a.
 Prise de Fronsac sur les François par les Anglois. 56. b.
 Prise de Fronsac sur les Anglois pour la seconde fois y e-
 stant en personne le Roy Char. vij. 58. a.
 Prise de Gauere par le Duc Philippes supplice de ceux qui
 la tenoient contre luy mesmes de deux Cordeliers qui y
 furent trouvez. 52. a.
 Prise de Gaurey sur les Anglois. 16. a.
 Prise de Gayette par les François. 223. b.
 Prise de Gerberoy en Beauvoisis sur les Anglois par le
 seigneur de Moi gouverneur pour le Roy de France au-
 dit pais. 9. a.
 Prise de Gisors pour le Roy. 17. b.
 Prise de Gournay en Normandie par le Comte s. Pol pour le
 Roy Charles vij. 14. b.
 Prise par une seule composition de plusieurs citez que te-
 noient les Anglois en Guienne. 36. a.
 Prise de Guisken & autres places fortes entre Aux &
 Bayonne par le Comte de Foix. 25. b.
 Prise de Hambie sur les Anglois. 16. a.
 Prise de Harcourt en Norman. sur les Anglois. 15. a.
 Prise de Harfleur par les François. 24. b.
 Prise de la Haye-du-Puis sur les Anglois. 16. a.
 Prise de Hedin par le Roy Loys xi. 192. a.
 Prise de Helsebecque ou Harlebecque par assault sur les
 Gantois. 51. a.
 Prise de Honnefleure sur les Anglois. 21. a. 26. a.
 Prise d'Huiste par les Gantois sur le Duc Philippe. 47. a.
 Prise de Iansac sur les Anglois. 33. b.
 Prise de Isle-bonne sur les Anglois. 21. a.
 Prise de Laigny ou comme il pense l'Aigle en Normandie
 sur les Anglois. 13. a.
 Prise de Launoy par les Bourgongnons pour surprendre le
 seigneur du Lieu nepueu de Croi. 109. b.
 Prise de Lestore & du seigneur de Beaujeu frere du Duc
 de Bourbon par le Comte d'Armagnac. 172. b.
 Prise de Lestore sur le Comte d'Armagnac & le meurtre
 d'iceluy. 173. a.
 Prise de Libourne sur les Anglois. 36. a.
 Prise du Liege par les Bourgongnons saccagement & ruyne
 d'iceluy. 173. a.
 Prise de Lisieux en Norm. par les François. 12. a.
 Prise de Ludovic Sforce & de Milan pour la seconde fois
 par le Roy Loys xij. 230. a.
 Prise du Mans sur les Anglois par les François. 5. a.
 Prise de Mante en Normandie sur les Anglois. 12. b.

TABLE DV III. VOLUME

Prise de Mauleon en Gascongne sur les Anglois par le Comte de Foix lieutenant du Roy en iceluy pais. 16.b.

Prise de Meruille en Normandie par les Bretons & la mort du seigneur du Lieu. 159.a.

Prise de Milan par les gens du Roy Loys xij. 229.b.

Prise de Milan sur le Roy Loys xij. 229.b.

Prise de Molins en Gilbers par les Bourgongnons. 177.b.

Prise de Montdidier sur les Bourgongnons. 180.a.

Prise de Montluçon sur le Duc de Bourbon. 136.b.

Prise de Monstieurwilliers sur les Anglois. 21.a.

Prise de Montferrant sur les Anglois. 33.b.

Prise de Mont S.Jean au Royaume de Naples par le Roy Charles viij. 221.a.

Prise de Mote-Leuesque sur les Anglois. 16.a.

Prise de Moulebecque sur les Gantois. 45.b.

Prise de Nancy sur les Bourgongnons par le Duc de Lorraine. 188.b.

Prise de Naples sur les François par les Arragonnois du temps de Loys xij. 235.b.

Prise de Naples sur les François du temps du Roy Loys.xij. 237.b.

Prise de Neelle & du seigneur du Lieu par le Comte de Charolois. 113.b.

Prise & saccagement de Neelle par les Bourgongnons. 169. b.

Prise de Neufchastel de Nicourt sur les Anglois par les Comtes d'Eu & de S.Pol. 15.a.

Prise & saccagement de Neufchastel de Nicourt en Normandie par les Bourgongnons. 171.b.

Prise de Nogent en Normadie par composition sur les Anglois. 10.b.

Prise de Parpignan par les Arragonnois sur les François. 173.b.

Prise de Parpignan sur les Arragonnois. 179.a.

Prise de Peronne & du Comte de Nevers par les Bourgongnons. 121.a.

Prise de Pont-Audemur ville de Normandie sur les Anglois. 11.a.

Prise du Pont-de-l' Arche ville située pres Roüen sur les Anglois à l'aduen du Duc de Bretagne. 8.a.

Prise du Pont-de-l' Arche par le Roy Loys sur le Duc Charles son frere. 149.b.

Prise de Pont-d'Oue sur les Anglois. 16.a.

Prise de Ponthoise sur le Roy Loys xi. par la faction du bien public. 120.b.

Prise du Pont S.Maxence sur les Bourgongnons. 171.a.

Prise de Poulcres sur les Gantois. 51.a.

Prise de Roche-Guyon chasteau en Normadie sur les Anglois lequel fut rendu au seigneur à qui il appartenoit. 14. b.

Prise de Roüen sur les Anglois. 19.a.

Prise de Roüen sur le Roy Loys xi. par la faction du bien public. 120.b.

Prise de Roüen par monsieur le Duc de Bourbon sur le Roy Loys xi. 145.b.

Prise de Roye & Montdidier par les Bourgongnons. 113.b.

Prise de Roye sur les Bourgongnons. 180.a.

Prise de S. Amand Lalier sur le Duc de Bourbon. 136.b.

Prise de Sanduich en Angleterre par le Sieur de Brezé Seneschal de Normandie. 71.a.

Prise de S.Foy sur les Anglois. 33.b.

Prise de S.Guillaume de Mortain ville de Normandie par les François sur les Anglois. 12.a.

Prise de S. Katherine du mont de Roüen sur les Anglois par le Roy Char.vij. assiegeant Roüen. 20.a.

Prise de S.Lo en Normandie sur les Anglois par le Duc de Bretagne & le Comte de Richemont Connestable de France son frere. 16.a.

Prise de S.Milion Libourne & autres places sur les Angl. à la seconde conqueste de Guienne. 57.b.

Prise de S.Milion sur les Anglois. 35.b.

Prise de S.Omer sur les Bourgongnons par le seigneur de Querdes. 213.a.

Prise de S.Quentin sur les Bourgongnons. 166.a.

Prise de S.Sauneur le Vicomte sur les Anglois. 28.a.

Prise de S.Vallery par les Bourgongnons. 171.b.

Prise de Tanquarville sur les Anglois. 21.a.

Prise de Tombelaine en Norm. 28.a.

Prise de Toucques chasteau sur la mer en Normandie sur les Anglois. 17.a.

Prise de Torigny sur les Anglois. 16.a.

Prise de Tronquoy par assault sur les Bourgongnons. 179.b.

Prise de Valongnes en Normandie sur les François par les Anglois. 26.a.

Prise de Valongnes sur les Anglois. 28.a.

Prise de Verdun en Lorraine sur le Roy par les Bourgongnons. 177.b.

Prise d'Emblée de Verneuil ville de Normandie par les François sur les Anglois par le moyen d'un meusnier. 10. a.

Prise de Vernon en Normandie sur les Anglois. 13.a.

Prise de Vire en Normandie. 28.a.

Prise d'Yemmes en Norm. sur les Anglois. 17.a.

Prison du Comte de S.Pol. 182.b.

Privileges de la principaulté d'Orenge. 181.a.

Procession des petitx enfans à Paris. 179.b.

Prodige d'un feu veu au ciel sur Arras. 121.b.

Prospere Colonne pris à Ville-Franche. 250.b.

Protestation notable faicte par les François contre les Anglois sur l'observation de la trefue. 8.b.

Prouence donnée à la couronne de France par le Roy de Cécille. 187.b.

Puy Seneschal à la seconde conqueste de Guienne. 56.b.

Q.

Qvieret capitaine Picard au service du Duc Philippes contre les Gantois. 49.b.

Quesnoy capitaine de gens d'armes au service de Loys xi. 197.a.

R.

Rabodenghes capitaine Bourgongnon abandonne le Comte de Charolois à la bataille de Montlehery. 116. a.

Rachapt des villes de la riuere de Somme par Loys xi. 97.b.

Radefort Anglois dans Caën. 29.b.

Raguiet fils du tresorier de Normandie aux ioustes à Paris. 158.b.

Raix Admiral de France l'un des capitaines du Roy Charles vij. à la bataille de Formigny. 26.b.

Rapt de femmes puni seuerement par le Duc Philippes. 128.b.

Rauastain au service du Duc de Bourgongne contre les Liegeois. 127.a.

DE MONSTRELET.

Reconciliation du Duc Philippes & de son fils le Comte de Charolois. 112.a.
 Reconciliation finale du Roy Loys xi. & de Charles son frere. 162.b.
 Refuz fait par le Duc de Bretagne d'accepter l'ordre du Roy Loys xi. 163.b.
 Regnault de S. Jean capitaine Gascon pour la part Angloise. 35.a.
 Regnault de Veloux gentil-homme de Poictou escartelé à Paris pour s'estre entremis de factions contre le Roy Loys xi. 182.b.
 Rembures enuoyé par le Comte d'Eu gouverneur de Paris vers les Princes coniurez pour sçavoir leur intention. 141.a.
 Remerciement du Roy Loys xi. au peuple de Paris. 148.a.
 Renonciation que feit le Duc de Bretagne à l'alliance du Duc de Bourgongne. 164.b.
 Renuoy fait par la court de Parlement d'un religieux de l'ordre de S. Jean accusé de meurtre à la iustice du temple à Paris. 153.b.
 Repenties ou penitentes religieuses instituées à Paris en l'hostel d'Orleans. 212.a.
 Repeuplement de Paris depeuplé par les guerres civiles. 153.b.
 Responce superbe des Anglois aux ambassadeurs du Pape Nicolas. 40.a.
 Retour du Roy Loys xi. en Paris le camp des Princes estant devant. 142.a.
 Retour du voyage de Naples du Roy Charles viij. 224.b.
 Retraicte honteuse de l'Empereur Maximilian hors de Lombardie. 255.a.
 Reuolte du Prince d'Orenge gouverneur pour le Roy Loys xi. au Comté de Bourgongne. 193.a.
 Reuolte de Neapolitains. 228.a.
 Ribauquins especes de canons d'artillerie. 38.b.
 Richemont Connestable de France & le Duc de Bretagne son frere aydent le Roy Charles viij. en la reduction de Normandie. 15.b.
 Richemont Comte frere du Duc de Bretagne Connestable de France à la bataille de Formigny. 26.a.
 Richemont Connestable de France gouverneur de Normandie. 33.a.
 Rithme François qui fut trouuée sur le liect du Roy Charles viij. luy retournant de la Messe. 3.a.
 Riuere capitaine de gens d'armes destitué de sa charge. 148.b.
 Robersac hannuyer capitaine pour la part Angloise dedans S. Sauueur le Viconte. 28.b.
 Rochecouart à la conqueste de Guienne. 36.a.
 Roche-fouquault à la conqueste de Guienne. 36.a.
 Roche-pot fait cheualier de l'ordre de la toison d'or. 87.a.
 Rodemac Damoiseau a refuge vers le Roy Char. viij. 74.a.
 Romont puisné de Sauoye pour la part Bourgongnonne. 180.b.
 Rohan raméne les Anglois en Guienne. 41.a.
 Rothelin Marquis au secours du Duc Philippes contre les Liegeois. 119.a.
 Roubaiz capitaine Bourgongnon prend Launoy. 109.b.
 Roubaiz capitaine Bourgongnon. 118.b.
 Roubaiz capitaine Bourgongnon à la surprinse de Peronne & du Comte de S. Pol. 121.a.
 Roien assailly par les François mieux deffendu par les Anglois. 18.b.

Rouhault capitaine François au seruice du Roy Char. viij. 12.a.
 Rouhault nommé Abel frere de Ioachin Rouhault capitaine dedans Valongnes en Norman. soustint longuement le siege qui y meirent les Anglois. 26.a.
 Rouhault nommé Ioachin l'un des capitaines du Roy Charles viij. à la bataille de Formigny. 26.b.
 Rouhault à la conqueste de Guienne. 35.a.
 Rouhault fait Contable de Bordeaux. 36.b.
 Rouhault Mareschal de France dedans Paris contre la faction du bien public. 114.a.
 Rouhault à la deffence de Paris contre les Bourgongnons. 133.b.
 Rouhault pour le Roy dans Beaunais assiégué par les Bourgongnons. 170.a.
 Roussillon Bastard de Bourbon Admiral de France. 150.b.
 Roussy fils du Comte S. Pol Connestable de France estant au seruice du Duc de Bourgongne gaste le terroier de Troye & de Tonnerre. 172.a.
 Roussy fils du Comte de S. Pol prisonnier à Tours & ce qui en fut fait. 183.b.
 Rouppe des Bourgongnons à Gransson contre les Suisses. 186.b.
 Rouppe de Bourgongnons à Morat contre les Suisses. 188.a.
 Rouppe de Bourgongnons à Nancy. 190.b.
 Rouppe de Nouare. 246.a.
 Rouppe des Esperons & la perte de Terouienne & Tournay qui s'en ensuyuit. 246.b.
 Rupture de paix entre le Duc Philippes & les Liegeois commencée par ceux de Dinan. 126.b.
 Roux & Popincourt ambassadeurs pour le Roy Loys xi. 153.a.
 Roye capitaine au seruice de Char. viij. 11.a.
 Roz Baron pour le Roy Charles viij. au siege de Dax en Guienne. 35.b.
 Rubempré Bastard en Hollande pour surprendre le Comte de Charolois. 103.a.
 Rubempré grand Baillif de Hainault au seruice du Duc Philippes contre les Liegeois. 121.b.
 Rubempré Bastard prins en Hollande. 135.b.
 Rubempré capitaine dedans Roye contre les Bourgongnons. 169.b.
 Ruine du pont nostre Dame à Paris. 229.b.
 Ruze du Duc Charles de Bourgogne qui vouloit faire d'une fille deux gendres. 169.a.

S.

Sacre du Roy Loys xi. 88.b.
 Sacre du Roy Charles viij. 209.a.
 Saillie furieuse des Anglois assiegez dans Falaise. 30.b.
 Saillie de ceux de Beaunais sous la conduite de Sallehart sur les Bourgongnons. 170.b.
 S. Belin Bailly de Chaumont en Basigny à la conqueste de Guienne. 37.b.
 S. Belin Bailly de Chaumont en Basigny le premier à l'assaut de Cadillac en Guienne donné en presence du Roy Charles viij. 58.b.
 S. Belin gentil-homme François à la bataille de Montlehery print une fois le Comte de Charolois mais il fut recoux. 133.a.
 S. Marie capitaine Normant au seruice du Roy. 13.a.

TABLE DV III. VOLUME

S. Pol. Comte au service de Char. vij.	11. a.	à la guerre contre les Turcs.	55. b.
S. Pol. Comte à la conquête de Normandie.	32. b.	Senamy enfant de Paris aux ioustes à Paris.	158. b.
S. Pol & Genly adiournez à comparoir en personne pour fait de sedition.	98. b.	Serment reciproque des gens du Roy & des estats de Gascongne d'estre loyaux au Roy & de leur entretenir leurs privileges.	37. b.
S. Pol. Comte chef de l'aduantgarde pour le Comte de Charolois à la bataille de Montlehery.	115. b.	Siege d'Audenarde par les Gandois.	42. a.
S. Pol. Comte fait Conestable de France par le Roy Loys xi.	122. a.	Siege des Gandois deuant Audenarde leué par le Duc Philippes & eux rompuz.	43. a.
S. Pol. Conestable de France au service du Duc de Bourgongne contre les Liegeois.	127. a.	Siege de Bayonne par les Comtes de Foix & de Dunois lieutenans du Roy Char. vij.	38. b.
S. Romain Procureur general du Roy au Parlement de Paris deffend la Pragmatique-sanction.	155. b.	Siege de Beauuais par le Duc Charles de Bourgongne.	170. a.
S. Simon. Baillif de Senlis à la garde de Paris lors de la guerre du bien commun.	139. a.	Siege de Belgrade par les Turcs leurs assauts terribles & la miraculeuse deliurance d'iceluy.	68. a.
S. Seueré au service de Charles vij. à la seconde conquête de Guienne.	56. b.	Siege de Boulongne par les Anglois leué peu apres.	212. a.
S. Treille grand Escuyer de France.	22. a.	Siege de Caën par le Roy Char. vij.	29. a.
S. Treille à la conquête de Normandie.	32. b.	Siege de Chastillon en Perigord.	56. b.
S. Treille grand Escuyer d'escuyrie à la conquête seconde de Guienne.	58. a.	Siege deuant Chierbourg par les François sous la charge des Comtes de Clermont & Richemont.	30. b.
S. Vincent de l'ordre des Iacobins canonizé à Vennes par le Legat du Pape.	67. a.	Siege à Dauenter par le Duc Philippes pour faire recognoistre Euesque du Treth son fils Bastard.	67. a.
Salle Art l'un des capitaines pour le Roy à la bataille de Montlehery.	115. a.	Siege de Dinant au Liege par les Bourgongnons.	127. b.
Salle Art garde les passages des riuieres contre les Bretons.	140. a.	Siege d'Esmal par les Geneuois.	5. b.
Salle Art capitaine de gens d'armes sa pompe & braueté.	146. b.	Siege deuant Falaise par les François.	30. b.
Salle Art l'un des capitaines qui deffendirent la ville de Beauuais contre les Bourgongnons.	170. b.	Siege de Harfleur par les François.	24. a.
Sanguin enfant de Paris aux ioustes à Paris.	158. b.	Siege de Honnefleuer par le Comte de Dunois.	25. b.
Sauueses capitaine au service de Charles vij.	11. a.	Siege de Mets en Lorraine par les Rois de France & de Sicille & la composition qu'ils feirent avec les habitans d'icelle ville.	f. 1. b.
Sauueses à la prise de Bayonne.	39. b.	Siege des chasteaux de Naples.	222. b.
Sauueses au service du Duc Philippes contre les Gantois.	42. b.	Siege de Nesle par le Duc de Bourgongne.	169. a.
Sauueses priné de sa capitainerie d'Amiens par le Roy Loys xi.	98. a.	Siege de Nouare leué & le Duc d'Orleans deliuré.	227. a.
Sauueses reconcilie le Comte de Charolois au Duc Philippes son pere.	102. b.	Siege de Nuz par le Duc de Bourgongne.	177. b.
Sauueses capitaine Bourgongnon & ce qu'il fait pour son party.	118. b.	Siege de Paris par les Princes comurez pour le bien public.	118. a.
Sauueses amène secours d'argent & de gens au Comte de Charolois estant deuant Paris.	119. b.	Siege de Parpignan par l'armée du Roy Loys.	173. b.
Sauoye Duc deffié en guerre par Charles vij.	41. a.	Siege de Rhodes par les Turcs.	195. a.
Sauuages hommes descouverts par les Normans & Espagnols.	241. a.	Siege de Roïen par Charles vij.	18. a.
Sau l'un des gentil-hommes qui se trouuerent à vn soupper avec le Roy chez le seigneur d'Armenouuille à Paris.	141. a.	Siege de S. Maurice par Charles de Melun Baillif de Sens.	137. b.
Scandale fait en l'hostie de la Messe à Paris du temps de Charles vij. & la punition qui s'en ensuyuit.	213. b.	Siege de Saulse par les François.	236. b.
Schisme d'entre le Pape Fælix & Nicolas appaisé & pacifié par condition que Fælix renōceroit au Papat & demoureroit Legat en les terres de Sauoye & Piémont.	6. a.	Sixte iij. Pape, ses mœurs & œuures.	168. a.
Sicille rauagée par les Turcs.	196. a.	Sombreffet & Tallebot rendent par composition les Palais & chasteau de Roïen au Roy Char. vij.	20. b.
Secheresse en l'an 1504. dont s'ensuyuit grande famine.	237. b.	Sombreffet banny d'Angleterre est à la court de France.	91. b.
Secours de Iean Duc de Clènes au Duc Philippes contre les Gandois.	44. a.	Sombreffet fait sa paix au Roy Edouart abandonnant la Royne d'Angleterre.	95. b.
Seillier Archediacre de Brye & conseiller au Parlement de Paris vn des deputez pour aller pardeners les Princes.	141. b.	Sombreffet vaincu en bataille & fait decapiter par le Roy Edouart fils du Duc d'Iort.	102. a.
Semonce que fait le Pape Nicolas au Duc Philippes d'aller		Sommation que fait le Roy Charles vij. au Duc Philippes pour assister comme Pair de France au iugement du Duc d'Alençon.	77. a.
		Sorcelement horrible fait par vn curé d'aupres de Soissons.	85. a.
		Stine vierge au pais de Vvestphatre eut visiblement les stigmates des playes de Iesus Christ.	168. b.
		Subsides accordez au Duc Philippes par ceux de son pais bas pour faire le voyage de Furquie.	64. b.
		Suffort Comte Anglois occis par les ges du Comte de Sombreffet.	27. b.
		Suisses occupent la Duché de Milan sur les François.	244. b.
		Supplice de femme nouveau & estrange au peuple Parisien.	

sien par ce qu'on n'auoit au siecle d'alors veu mourir
femmes par iustice. 8.a.
Supplice de plusieurs mauuais garçons au pais d'Artois.
 95.a.
Supplice de plusieurs larrons à Paris. 162.a.
Supplice du Comte de S. Pol. 184.b.
Supplice d'un heretique Vauldois du temps de Char. viij.
Sur ou Surré se porte vaillamment contre les Gantois au
seruice du Duc de Bourgongne. 43.b.

T.

T*Aliebourg fait cheualier de l'ordre au sacre du Roy*
Loys xij. 229.a.
Tallebot Anglois entreprend de leuer le siege de Verneuill
& ce qui en aduint. 10.b.
Tallebot au recouurement de Guienne pour les Anglois.
 41.b.
Tallebot & quelles courtoisies il receut du Roy Charles vij.
estant prisonnier en France. 55.a.
Tanneguy du Chastel gouverneur de Roussillon l'un des
commis pour examiner le Cardinal Balluë prisonnier.
 162.b.
Tanquarville Comte à la conqueste de Guienne. 39.b.
Tarente fils du Roy de Naples vient parlementer au Roy
Charles vij. 222.b.
Tarmes Bailly de Chartres à la prise de Sauduich en An-
gleterre. 71.a.
Tarraxe Baron, pour le Roy Charles vij. au siege de Dax en
Guienne. 35.b.
Tartas fils du seigneur d'Albret pour le Roy Charles vij.
au siege de Dax en Guienne. 35.b.
Tillieres Secretaires du Roy occis par mesaduenture. 137.b.
Tilly Baillif de Vermandois à la conqueste de Normandie.
 32.b.
Tionuille en Luxembourg occupée par les Allemans où le
Duc fut contrainct d'y enuoyer partye de ses gens de
guerre dont il s'aydoit contre les Gantois. 51.a.
Tison prison à Paris dont enaderent plusieurs prisonniers.
 146.b.
Torsy à la prinse de Creuecueur. 105.b.
Torsy l'un des commis pour examiner le Cardinal Balluë
prisonnier. 162.b.
Torsy pour le Roy dans Beauuais assiége par les Bourgon-
gnons. 170.a.
Torsfote & Vaquer capitaines Anglois assiege dans Fres-
nay en Normandie. 26.a.
Thorettes premier president au Parlement de Paris. 148.a.
Toussé docteur harangue au lieutenant du Roy Loys xij. pour
le peuple de Milan. 231.a.
Touteuille ou Estouteuille capitaine François au seruice de
Charles vij. 28.b.
Touteuille Cardinal compose les differens du Roy Char. vij.
& du Duc de Sauoye. 41.a.
Touteuille Cardinal enuoyé par le Pape Nicolas pour recon-
cilier les Rois de France & d'Angleterre. 40.a.
Trainel autrement Iuuenal des Vrsins Châcellier de Fran-
ce l'un des prouoyeurs & munitionnaires du Roy Char-
les vij. à la conqueste de Normandie. 33.a.
ses autres actions, voy Iuuenal.
Trahison de Voë & Hout capitaines Anglois contre les
Gantois. 52.b.
Trahison pour liurer Boulongne aux Anglois descouuerte

& punie. 120.b.
Trahison du Connestable S. Pol descouuerte. 182.a.
Traicté & appointemens entre le Roy de Sicile & le
Duc de Bourgongne par lesquels le val de Cassel en Flan-
dres demeura au Duc. 2.b.
Traicté de paix entre les Gantois & le Duc Philippes par
le moyen des ambassadeurs de France lequel ne sortist
aucun effect. 46.a.
Traicté de paix troiesiesme d'entre le Duc & les Gantois
qui ne sortist effect par l'inconstance du populasse de
Gand. 50.b.
Traicté final d'entre le Duc Philippes & les Gantois le-
quel sortist effect. 53.b.
Traicté de paix entre le Roy le Comte de Charolois & les
Princes coniuerez pour le bien public. 120.b.
Traicté entre le Roy Loys & les Princes coniuerez pour le
bien public. 121.b.
Traicté de paix entre le Duc Philippes & les Liegeois qui
ne sortist effect. 125.b.
Traicté de paix entre les Liegeois & le Duc Philippes qui
n'eut aucun effect. 130.a.
Traicté & pourparle d'appointemens entre le Roy Loys
xi. & les Princes. 144.a.
Traicté second d'accord entre le Roy Loys xi. & Charles
son frere. 157.b.
Traicté d'appointement entre le Roy Charles, son frere &
le Duc de Bretagne. 159.b.
Traicté de paix à Peronne entre le Roy & le Duc de Bour-
gongne. 160.a.
Traicté de paix entre le Roy Loys xi. & le Duc de Bourgon-
gne à Senlis. 174.a.
Traicté de reconciliation entre le Roy & le Connestable de
S. Pol. 175.b.
Traicté de paix premier entre le Roy François & Charles
d'Autriche. 250.a.
Traicté de paix d'entre le Roy & les Flamens publié en
la court de Parlement de Paris. 207.a.
Traicté de Cambray entre le Roy & autres Princes Chre-
stiens contre la seigneurie de Venise. 240.a.
Traicté second du Roy François avec Charles d'Autri-
che. 355.b.
Translation des statues de Charlemaigne & Loys ix. pour
les poser à la chapelle des presidens. 196.a.
Translation de nostre Dame des Cloistres de Lyon. 235.a.
Translation des os du Duc Charles d'Orleans de Blois aux
Celestins de Paris. 238.a.
Trefues entre les Anglois & les Bourgongnons. 71.b.
Trefues entre le Roy & le Duc de Bourgongne. 156.b.
Trefues entre le Roy & le Duc de Bourgongne. 167.a.
Trefues continuée entre le Roy Loys xi. & le Duc Charles
de Bourgongne. 169.a.
Trefues rompues par le Duc de Bourgongne. 169.a.
Trefues entre les François Bretons & leurs allies. 172.b.
Trefues entre France & Angleterre. 181.b.
Trefue marchande entre Bourgongne & Angleterre.
 182. b.
Trefue entre le Roy Loys xi. & Maximilian. 198.b.
Tremblement de terre aduenu en Italie l'an 1456. 66.b.
Tremblement miraculeux de la chambre du plaidoyé au
Palais à Paris. 102.b.
Tremblement de terre à Tours & Amboise. 159.a.
Trimoüille au voyage de Naples avec le Roy Charles vij.
 220.a.

Tristan l'Hermitte preuost de l'hostel du Roy. 155.b.
Triuulce damoiselle Milanoise ses mœurs & conditions.
 239.a.
Turcs deuant Constantinople. 59.a.
Turene Viconte à la conqueste de Guienne. 36.a.
Turene à la conqueste seconde de Guienne. 58.a.

V.

V *Acquier capitaine Anglois pris à la bataille de*
Formigny. 27.a.
Valetault Marechal du camp du Roy Charles viij. au
voyage de Naples. 215.a.
Vallée lieutenant de la compagnie du Seneschal de Nor-
mandie au secours de la ville de Beauuais assiegée par le
Duc de Bourgongne. 170.a.
Valpergue Seneschal de Lyõ l'un des prouoyeurs & muni-
tionnaires du Roy Char. viij. à la conqueste de Normandie.
 33. a.
Valpergue baillif de Lyon à la conqueste secõde de Guien-
ne. 58.a.
Vaudemont heritier de Lorraine prisonnier en Allemai-
gne. 174.a.
Vaudoisie c'est à dire magie ou heresie des Vaudois en grãd
cours au país d'Artois l'an 1458. comment il y fut
pourueu & l'abus des inquisiteurs de ce crime. 84.b.
Vaupute país d'heretiques ausquels le Roy enuoya un do-
cteur en theologie pour les conuertir. 234.a.
Vendosme Comte à la conqueste de Guienne. 36.a.
Vendosme le Bastard à la conqueste de Guienne. 36.a.
Ver capitaine Anglois. 26.b.
Ver fuit à la bataille de Formigny & abandonne ses gens.
 27. a.
Verde tente faction de citoyens Gantois. 49.a.
Vere gentil-homme Halandois au service du Duc Philip-
pes. 44.b.
Vernon donné par le Roy Charles vij. au Comte de Du-
nois. 14.a.
Veu & protestation que fait le Duc de Bourgongne de
guerroyer les Turcs si le Roy de France vouloit tenir son
país en paix. 56.a.
Victoire de Formigny. 26.b.
Victoire du Duc Philippes contre les Gantois à Vausselles.
 44. b.
Victoire de Chastillon en Guienne où Thallebot fut descon-
fit & les Anglois & Gascons. 57.a.
Victoire de Gauure ou Gauere en laquelle le Duc Philippes
deffit vingt mille Gantois. 52.b.
Victoire de Montlehery incertaine sur la part Bourgongnon-
ne ou François. 116.a.
Victoire de Montlehery autremēt descripte par l'addition de
la Chronique d'Enguerran. 132.b.

Victoire nauale des François contre les Flamens. 201.b.
Victoire nauale du Duc Loys d'Orleans sur les Neapolitains
à Rapallo sur la Comté de Genes. 217.a.
Victoire de Fornoue. 225.b.
Victoire de Rauenne. 242.b.
Victoire de Signadel contre les Venitiens. 240.a.
Victoire de S. Aubin contre les Bretons. 211.b.
Victoire de Guinegaste incertaine. 201.a.
Victoire de Marignan sur les Suisses & le recouurement de
Milan. 251.a.
Viefuille lieutenant de Vvissoc deffend vaillamment Al-
lost contre les Gantois. 50.b.
Vignolles capitaine de gens d'armes du temps du Roy Loys
xi. 155.a.
Villier-le-boscage chargé d'auoir blessé de nuit à Paris Bal-
luë Euesque d'Eureux. 144.b.
Villars ou pluïstost Thouars Viconte en Poictou donné au
Roy Loys xi. 163.b.
Villiers seigneur de l'Isle-Adam destitué de l'office de
Preuost de Paris. 148.a.
Vins vers Lan 1456. 67.b.
Vins à foison l'an 1462. 135.a.
Vins vers Lan 1481. 203.b.
Vitout capitaine general des habitans de Metz & ce qu'il
faisoit durant le siege d'icelle ville. 2.a.
Voyage du Roy Loys xi. à nostre Dame des Hauts-bois en
Allemagne. 160.b.
Voyage de Naples du Roy Charles viij. 213.a.
Valerie des deniers du Roy. 164.b.
Voï capitaine Anglois à la solde des Gantois. 51.b.
Vsson en Auvergne donné au bastard de Bourbon par le
Roy Loys xi. 151.a.
Vssum Cassam & l'histoire de la guerre de Thoris. 236.b.
Vvaruich Comte Anglois bien veinu en France & festoyé
par le Roy Loys xi. 153.a.
Vvaruich Comte Anglois fuitif en France. 164.a.
Vvaruich en Angleterre avec armée contre le Roy Edouard.
 165.a.
Vvas país entre Gand & Anuers amplement descript.
 43.a.
Vvasonfort Comte Anglois fuitif en France. 164.a.
Vvissoc capitaine au service du Duc Philippes. 47.b.
Vvissoc au secours d'Allost. 50.b.

X.

X *Ancoins tresorier general de Frãce prisonnier à Tours*
pour peculat. 33.b.

F I N.

ANNOTATIONS ET CORRECTIONS SVR
LE TROISIÈME VOLUME D'ENGVERRAN
de Monstrelet.

- Fueillet 1. page 1. L'auteur ne deduit l'occasion de ceste guerre que mena le Dauphin Loïs cōtre les Suisses, aucūns ont escrit que ce fut au pourchats de l'Archeduc d'Autriche qui auoit perdu deux ou trois batailles contre eux, autres sans propos ont voulu dire que les Dauphins de Viennois auoient quelques droicts au païs d'Oultre-Iure usurpez par les communaultez de Suisse.*
- fueil. 1. p. 2. En lieu de Val-de-Lieure, peut estre faudroit Val-de-Lierre, qui est vne ville au païs dont est mention: toutesfois Nicole Gilles l'appelle aussi Van-du-Lieure, peult estre faudroit Iure en lieu de Liepure.*
- f. 3. p. 1. En la rithme Francoise en un vers qui se commence Et au besoing, par ce qu'il est court fault Et au besoing sont les derniers.*
- En la mesme page. Au Roy d'Angleterre son nepueu, pour oster l'equiuoque soit mise vne virgule apres nepueu.*
- f. 4. p. 2. Euesque de Lect en Languedoc, fault d'Aleth, & ainsi aux lieux ensui-uans où il en est fait mētion, en la mesme page trouuoit ame, est meilleur trouuoyt, cōme sinō q̄ ce feust vne phrase Picarde: encores faudroit il un comma a trouuyt.*
- f. 5. p. 2. Finette vielle, peult estre fault cité vielle, qui est ciuita Vecchia au mesme païs dōt parle l'auteur, aucuns ont estimé que ce fut Centumcellæ.*
- f. 6. p. 2. au tiltre du chapitre, fault sur la fin les grans maulx qui feirent les Anglois.*
- f. 7. p. 2. en lieu de Majence de Iubez Maiene la Iubez.*
- f. 10. p. 1. Mante, Verneuil, Laigny, prenez garde qu'il ne faille Laigle qui est vne ville au mesme païs.*
- eod. en lieu de Pontaudemer, on escrit correctement Pont-Audemer.*
- f. 30. Daufront & Dardenne, on dit Damfront & Daudaine.*
- f. 38. p. 2. le Comte de Foix auoit avec luy deux mille arbalestriers & les pauesieūx, c'estoient porteurs de pauois, grans escuz à couuert dequoy les arbalestriers rebandoient.*
- f. 43. p. 2. Thibault seigneur de Siēnes, fault Fiennes, comme il se trouue ailleurs au mesme volume.*
- f. 44. p. 1. Cy parle de la bataille de Rippe-monde, toutesfois il n'est fait aucune mention de Ripemōde en tout le chapitre ains seulement de Vauselles mais Ripemonde ou Rupelmonde n'est pas loing de là.*
- f. 58. p. 2. Geoffroy de S. Stelin, peult estre fault de S. Belin comme on le trouue en autres lieux subsequens.*
- f. 50. p. Ce Morbesan fils d'Oreste, est Mahomet second fils d'Amurath: Morbesan toutesfois en langue Turque signifie Duc ou Duché: & Morbesalen en langue Suriene sonne ces mots d'Euangile, vade in pace, qui sont surnoms que le peuple de Turquie auroit peu donner à ce Mahōmet, ce que les Chrestiens d'alors auroient prins pour nom propre. Ainsi l'escrit Anthoine Geuffroy cheualier de l'ordre de S. Iean de Hierusalem, en sa description de la court du grand Turc.*
- f. 60. p. 2. Ce Cheualier Blanc Marechal de Hongrie c'est Huniad capitaine Hongre renommé, cōme escrit le susdits Geuffroy disant que les Hongres l'appelloient Iane Ban.*
- f. 61. p. 2. Ceste patente du grand Turc a esté non seulement par faulx aduertissemens mais par moquerie donnée au seigneur Enguerran, & eussions volentiers*

ostée, sinõ qu'on eust peult estre crié que ce seroit violer l'auteur, partant le vous laissons (comme l'on dit en prouerbe) à tout son poil.

fueil. 65. p. 2. Octo Castellan, fault Otho ou Odo.

f. 87. p. 2. Calais, Guines, Hamet, fault Hames.

f. 92. p. 1. Pragmatique-Sanction fust mise sus, lisez ius, idem en un ou deux lieux ensuiuans.

f. 121. p. 1. le Seigneur de Saily, peult estre fault Suyly.

eod. Rubempré Baillif de Hainault, il se trouue en autres lieux Rubencourt.

f. 123. p. 1. oncle de Boulongne, en lieu de Bourgongne,

f. 126. p. 2. Mainbrugs, c'est à dire protecteurs, ce mot se trouue aux précédens volumes & aux memoires de Langey, où il appelle l'Empereur Maximilian Mainbrug de Charl. son petit fils.

f. 138. p. 1. Charles de Charlay son Cheualier du guet, il y a en autres lieux subsequens de Harlay.

f. 146. p. 2. Loïs Sorbier, fault Forbier cõme il se trouue ailleurs.

f. 133. p. 1. en doutant de ce ledit de Croi, lisez en deboutant.

f. 154. de lx. à lxxx. vingt, ostez vingt.

f. 164. p. Durant ces choses, le Vicomte, & seigneur de Villars en Poictou alla de vie à trespas, lequel en son viuant auoit donnée & laissée sa succession au Roy, pour en iouir par luy incõtinẽt apres son decez & c. On dit qu'il fault lire Toüars en lieu de Villars, & que le seigneur de Amboise Vicomte de Toüars, vendit au Roy Loïs xi. par vendition imaginaire tout son vaillant en hayne du seigneur de la Trimouille son heritier: toutesfois que le Roy Loïs xi. meü de conscience, restitua le tout au seigneur de la Trimouille, fors Amboise, qu'il se reserua pour l'amenité du lieu, lequel le Roy Charles viij. orna depuis de somptueux bastimens par ce qu'il y naquit.

f. 164. fosse de Laire, fault de Euure.

f. 232. p. 2. en la harengue des Milanois, en lieu de sage lignage, lisez Licurge, & au latin populum ad obsequia principum, principes ad iustitiam Imperator confirmabit, & un peu au dessus duræ ceruicis, en lieu de dure.

Au tiltre de la table de ce troiesme volume à esté mal mis que ce fut la table de tout l'œuure, il failloit mettre que c'estoit la table des choses plus notables du troiesme volume.

2 vols

ATTR

